


Metĩndjwỳnh Kute  
Memã Kabẽn Ny Jarẽnh



New Testament in Kayapó (BR:txu:Kayapó)

# Metĩndjwỳnh Kute Memã Kabẽn Ny Jarẽnh New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

## Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 11 Nov 2022 from source files dated 29 Jan 2022  
385317df-3c6a-53ac-81db-0815750ed560

## Contents

Matêu . . . . .	1
Makô . . . . .	89
Ruka . . . . .	137
Djuão rax . . . . .	225
Metĩndjwỳnh Karô . . . . .	283
Rôma . . . . .	358
Kôritu kumrêx . . . . .	403
Atãri Kôritu . . . . .	444
Garaxa . . . . .	472
Epexu . . . . .	488
Pĩrpu . . . . .	504
Korxi . . . . .	514
Texarônika kumrêx . . . . .	525
Atãri Texarônika . . . . .	534
Ximoxi kumrêx . . . . .	539
Atãri Ximoxi . . . . .	551
Xĩtu . . . . .	559
Pĩremô . . . . .	564
Mekbê idjaer . . . . .	567
Xijagu . . . . .	598
Pedru kumrêx . . . . .	609
Atãri Pedru . . . . .	621
Djuão kumrêx . . . . .	628
Atãri Djuão . . . . .	639
Djuãoo ino rer . . . . .	641
Djuda . . . . .	643
Mỳjja apôx . . . . .	647

## Matêu memã Jeju'ã ujarênh ne ja.

Matêu ne prîne Jeju'ã ajarê, rwÿk djà kraxrÿm ne 'ã ujarênh tèn àbir djâmã kumê. Matêubê ne Jeju kôt ba djwÿnh'õ. Nãm bēnjadjwÿr bajtemmã pi'ók kaprïo atom djâkam nhÿ nhyam kam Jeju kum kabēn nhyam tu kum iren kam mã Jekukôt ajkamê. Kôt bikamēnh tēm rã'ã nhyam Jeju wabi. Nhyam kam prîne gwaj bamã Jeju'ã pi'ók no'ók ne. Kute Jeju pykabê ar bari noo omÿnh ne amako kute mar kôt ne gwaj bamã 'ã pi'ók no'ók ne.

Matêu nhidji 'õdjwÿbê ne Rewi.

*Jeju nhingêt'ã ujarênh kadjy ne ja.*

### Ruk 3.23

<sup>1</sup> Ba, ibê Matêu ne ba pi'ókkam ar amã ikabēn jarê. Dja ba ar amã Jeju Kritu'ã ajarê. Metëndjwÿnh ne 'ã Bēnjadjwÿrbê kumkati mē. Kute 'ã Bēnjadjwÿrbê kumkati mēnhkôt ne me Jejumã Kritu jarê. Dja ba Jeju Kritu nhingêt kumrêx'ã ar amã ajarê. Aben nHITEPã ar amã ingêt djari arēho tē. O tèn arÿm 'ã ar amã pi'ók no'ók gar arēn ama. Jeju nhingêtê ne Dawi. Ne ingêt 'õdjwÿbê Abraão.

<sup>2</sup> Ingêt Abraão ne Idjak dji.

Idjak dji nhyam arÿm kato. Katon kam arÿm abatānh ne ar ba. Ar ba:n kam arÿm Djako dji.

Djako dji nhyam arÿm kato. Katon kam arÿm abatānh ne ar ba. Ar ba: nhyam kam arÿm aben kukām Djudamē kamy ar adjuw.

Djudamē kamy ar adjuw nhyam ar arÿm apôx. Apôx ne kam arÿm abatānh ne ar ba.

<sup>3</sup> Nhyam kam Djuda arÿm Tamaremã Perēmê Djera ar adjuw.

Perēmê Djera ar adjuw nhyam ar arÿm apôx. Apôx ne arÿm abatānh ne ar ba. Ar ba: nhyam kam Perê arÿm Êrõ dji.

Êrõ dji nhyam arÿm kato. Katon kam arÿm abatānh ne ar ba. Ar ba:n kam arÿm Arão dji.

Arão dji nhyam arÿm kato. Katon kam arÿm abatānh ne ar ba.

<sup>4</sup> Ar ba:n kam arÿm Amñnadabi dji.

Amñnadabi dji nhyam arÿm kato. Katon kam arÿm abatānh ne ar ba. Ar ba:n kam arÿm Naxõ dji.

Naxõ dji nhyam arÿm kato. Katon kam arÿm abatānh ne ar ba. Ar ba:n kam arÿm Xamão dji.

Xamão dji nhyam arÿm kato. Katon kam arÿm abatānh ne ar ba.

<sup>5</sup> Ar ba:n kam arÿm Rabemã Bõadji dji.

Bõadji dji nhyam arÿm kato. Katon kam arÿm abatānh ne ar ba. Ar ba:n kam arÿm Ruximã Ôbet dji.

Ôbet dji nhyam arÿm kato. Katon kam arÿm abatānh ne ar ba. Ar ba:n kam arÿm Djexe dji.

Djexe dji nhyam arÿm kato. Katon kam arÿm abatānh ne ar ba.

<sup>6</sup> Ar ba:n kam arÿm Dawi dji.

Dawi dji nhyam arÿm kato. Katon kam arÿm abatānh ne ar ba. Ar ba:n kam arÿm kubê bēnjadjwÿr rax. Ar ba:n kam arÿm Urij prômã Xaromão dji.

Xaromão dji nhyam arÿm kato. Katon kam arÿm abatānh ne ar ba.

<sup>7</sup> Ar ba:n kam arÿm Robowão dji. Robowão dji nhym arÿm kato. Katon kam arÿm abatànħ ne ar ba. Ar ba:n arÿm Abij dji.

Abij dji nhym arÿm kato. Katon kam arÿm abatànħ ne ar ba. Ar ba:n arÿm Adja dji.

Adja dji nhym arÿm kato. Katon kam arÿm abatànħ ne ar ba.

<sup>8</sup> Ar ba:n arÿm Djoxapa dji. Djoxapa dji nhym arÿm kato. Katon kam arÿm abatànħ ne ar ba. Ar ba:n arÿm Djørão dji.

Djørão dji nhym arÿm kato. Katon arÿm abatànħ ne ar ba. Ar ba:n arÿm Udji dji.

Udji dji nhym arÿm kato. Katon arÿm abatànħ ne ar ba.

<sup>9</sup> Ar ba:n arÿm Djotão dji. Djotão dji nhym arÿm kato. Katon kam arÿm abatànħ ne ar ba. Djotão ar ba:n arÿm Akadji dji.

Akadji dji nhym arÿm kato. Katon kam arÿm abatànħ ne ar ba. Ar ba:n arÿm Edjekij dji.

Edjekij dji nhym arÿm kato. Katon kam arÿm abatànħ ne ar ba.

<sup>10</sup> Ar ba:n arÿm Manaxe dji. Manaxe dji nhym arÿm kato. Katon arÿm abatànħ ne ar ba. Ar ba:n arÿm Amõ dji.

Amõ dji nhym arÿm kato. Katon arÿm abatànħ ne ar ba. Ar ba:n arÿm Djoxij dji.

Djoxij dji nhym arÿm kato. Katon kam arÿm abatànħ ne ar ba.

<sup>11</sup> Ar ba:n arÿm Djekonijmẽ kamy ar adjuw.

Djekonijmẽ kamy ar adjuw nhym ar arÿm apõx. Apõx ne kam arÿm abatànħ ne ar ba. Nhym kam me kurẽ djwÿnh arÿm mebẽ idjaer'ÿr prõt ne kam me

pa 'amÿn meo mõ. Me pardja'ã meo mõ. Krÿraxbê Babirõnij'ÿr meo mõn meo bõx.

<sup>12</sup> Nhym me krÿraxbê Babirõnijkam ar ba: nhym kam Djekonij arÿm Xarati dji.

Xarati dji nhym arÿm kato. Katon kam arÿm abatànħ ne ar ba. Ar ba:n arÿm Djørba dji.

Djørba dji nhym arÿm kato. Katon kam arÿm abatànħ ne ar ba.

<sup>13</sup> Ar ba:n arÿm Abidji dji. Abidji dji nhym arÿm kato. Katon kam arÿm abatànħ ne ar ba. Ar ba:n arÿm Eriki dji.

Eriki dji nhym arÿm kato. Katon kam arÿm abatànħ ne ar ba. Ar ba:n arÿm Adjõ dji.

Adjõ dji nhym arÿm kato. Katon kam arÿm abatànħ ne ar ba.

<sup>14</sup> Ar ba:n arÿm Xadoki dji. Xadoki dji nhym arÿm kato. Katon arÿm abatànħ ne ar ba. Ar ba:n arÿm Akĩ dji.

Akĩ dji nhym arÿm kato. Katon arÿm abatànħ ne ar ba. Ar ba:n arÿm Eriju dji.

Eriju dji nhym arÿm kato. Katon arÿm abatànħ ne ar ba.

<sup>15</sup> Ar ba:n arÿm Erijdõ dji. Erijdõ dji nhym arÿm kato. Katon arÿm abatànħ ne ar ba. Ar ba:n arÿm Matã dji.

Matã dji nhym arÿm kato. Katon arÿm abatànħ ne ar ba. Ar ba:n arÿm Djako dji.

Djako dji nhym arÿm kato. Katon arÿm abatànħ ne ar ba.

<sup>16</sup> Ar ba:n arÿm Jõdje dji. Jõdje dji nhym arÿm kato. Katon arÿm abatànħ ne ar ba. Ne kam arÿm kubê Marij mjên.

Ne kam arÿm Jeju'ÿr o bõx. Marij kurÿm ne arÿm Jeju kato.

Katon kam arým abatànñ ne ar ba.

Be, Jeju nhingêt'ã ujarènñ ne ja. Jejubê ne me ô Bêñjadwýrbê kumkati. Kubê ne Kritu.

<sup>17</sup> Be, Abraão krakam kra mã aben djô'ã apôx. Nhyñ me aben nHITEPã ar'ã akre: nhyñ ar kute 14 pyrãk ne aben djô'ã apôx nhyñ me kam Dawi'ýr o bôx. Nhyñ kam Dawi krakam kra mã aben djô'ã apôx. Nhyñ me aben nHITEPã ar'ã akre: nhyñ ajte ar kute 14 pyrãk ne aben djô'ã apôx. Nhyñ me kam arým me kurê djwýññ kute mebê idjaer pytãr'ýr o bôx. Me me utàn krĩrãxbê Babirônij'ýr meo bôx. Nhyñ kam me krakam kra mã aben djô'ã apôx. Nhyñ me aben nHITEPã ar'ã akre: nhyñ ajte ar kute 14 pyrãk ne aben djô'ã apôx. Nhyñ me kam arým Kritu'ýr o bôx. Metĩndjwýññ kute 'ã Bêñjadwýrbê kumkati mênñkôt ne me kum Kritu jarê.

*Jeju nã kurũm kator kadjy ne ja.  
Ruk 1.26*

<sup>18</sup> Jakam dja ba Jeju Kritu kator'ã ajarê. Nã kurũm kator'ã ajarê. Nãbê ne Marij. Metĩndjwýññ Karô ne Marij'ýr bôx nhyñ arým tujarô. Marij tujarô kêtri ne Jôdje arým amim kum kabên nhyñ me kunĩ kuma. Nãm amim kum kabên kajgobit. Kraxje kute o nõr kêt. Nhyñ kam arým tujarô. Tujarô nhyñ arým omũ. <sup>19</sup> Ne kam bit kute kangamã. Jôdje mexkam bit kute me kãxã kangamãn amim karôo nhýñ amim,

—Ne ba ren me krãptĩ nhipôkri kanga nhyñ ren me arým kam ngryk ne. Ba me krãptĩ kãxã kanga. Nãm ã mexkam amim ane. <sup>20</sup> Nãm ã amim anhýro nhýñ kam nõn arým ngôr. Ngôr nhyñ aêrbê Bêñjadwýr djwýññ kadjy mrãññ djwýññ'ô arým 'ýr bôx nhyñ ôtkam arým omũ. Nhyñ kum,

—Jôdje, Dawi tãmdjwý, arým aprô tujarôkam kwãrik wãññ adjumar punu kêt. Mrãmri dja ga ĩ tu 'ýr amôrũkumrêx. Djãm axwe? Kati. Metĩndjwýññ Karô ne 'ýr bôx nhyñ arým tujarô. <sup>21</sup> Dja kra ruw ga kam kum Jeju jarê. Mýkam dja ga kum ja jarê? Bir, dja ô me wýññ axwebê me utã. Kam dja ga kum Jeju jarê. Nãm ã Metĩndjwýññ kadjy mrãññ djwýññ'ô Jôdjemã ane. Mýj'ã ne idjibê Jeju amijakre? Bir, me utãr djwýññ'ã ne amijakre.

<sup>22-23</sup> Amrêbê: ne Bêñjadwýr djwýññ Jeju nã tujarô'ã ajarê. Kabên jarênñ djwýññmã 'ã ajarê. Nhyñ arým kukwakam me bakukãmãremã kum, “Me kurerer'ô, me'ô kraxje kute o nõr kêtja dja arým tujarô nhyñ ĩ kra ruw.

Nhyñ me arým idji'ã abenmã kum, ‘Emane’, anhýro ba.”

Nãm ã kabên jarênñ djwýññ Bêñjadwýr djwýññ kukwakam me bakukãmãremã ane. Nhyñ kam me aben djô'ã arênho mõ:n arênho mõr tãmtã arým 'ýr o bôx. Tũ:mrãm me bakamingrãnyrekam Jeju nã katon arým abatànñ ne ar ba. Ar ba:n arým tujarôkumrêx. Kraxje me'ô kute o nõr kêt kam arým tujarôkumrêx. Me kute me bakukãmãremã 'ã ujarênñ kôt arým ã tujarôo ane. Kabên jarênñ djwýññ ne me bakukãmãremã kum,

—Nhyñ me arým idji'ã abenmã kum, “Emane”, anhýro ba. Be, ne ren me me bakabênkôt idjibê Emane'ã abenmã kum,

—Kubê ne me banhô Metĩndjwýññ. Me banhô Metĩndjwýññ arým me baro'ã ar ba. Nãm ã kabên jarênñ djwýññ me bakukãmãremã ane.

<sup>24</sup> Metĩndjwýññ kadjy mrãññ djwýññ prô'ã Jôdjemã karôn arým kum karô pa. Nhyñ arým krã kato. Ne kam arým kabên kôt prô'ýr mõ. <sup>25</sup> Nãm 'ýr mõr kajgon ikô'ã ikwã kêt. Kra rwýkkambit ne ikô'ã

ikwã. Nãm 'ÿr mör kajgo nhym kam arÿm kra kutewa ruw nhym kumÿ. Kumÿ nhym arÿm kum Jeju jarê.

## 2

*Ar kute kanhêtire mar'ã ujarênh kadjy ne ja.*

<sup>1</sup> Ar kute kanhêtire mar ne ar myt apôx djã kurüm tẽ. Tẽ: nhym arÿm akati krãpti apêx nhym ar arÿm Djeruxarêkam bôx. Pykabê Djudêjakam krîraxbê Berêkam ne Jeju ruw. Bênjadjwÿr raxbê Erodji memã ÿrri ne ruw. <sup>2</sup> Ar kute kanhêtire mar Djeruxarêkam bôx ne arÿm me kukjêro tẽ. Ar memã kum,

—Nhÿnh ne me'õ prîreja? Dja kubê mebê idjaer nhõ Bênjadjwÿr rax. Kanhêtire kute rwÿk'ã ami-jakre ne bar arÿm omü. Myt apôx djã'ãnh ne bar omün kam amrê 'ÿr tẽn arÿm bôx. Ije kum rax jarênhmã bôx, ane. Nãm ar ã memã anhÿro tẽ: nhym arÿm bênjadjwÿr raxbê Erodji kuma, me kute ar arênhja ma. Kuman arÿm axwe: umar ne. Djeruxarêkam me kunîdjwÿ axwe: umar ne. <sup>4</sup> Nhym kam Erodji arÿm amiwÿr me rünh 'uw. Me kadjy Metîndjwÿnh mar djwÿnh nhõ bênjadjwÿrmẽ Môjdjê kukràdjã mar djwÿnhmẽ amiwÿr me ku'uw ne amijã meo akuprõ. Ne kam arÿm abej me kukjêro nhÿn memã kum,

—Nhÿnh ne Kritu rwÿkmã? Nhÿnh ne Kritu rwÿk djãja? ane. Metîndjwÿnh kute 'ã Bênjadjwÿrbê kumkati mênhkôt ne me kum Kritu jarê. <sup>5</sup> Nãm Erodji memã ane nhym me kum,

—Pykabê Djudêjakam krîbê Berêkam ne rwÿk djã. <sup>6</sup> Amrêbê: ne Metîndjwÿnh kabên jarênh djwÿnhmã arê. Kritu rwÿk djã'ã kum ajarê. Nhym kukwakam me bakukãmãremã 'ã ajarê. Me krîmã arênh kum,

“Pykabê Djudêjakam krîbê Berê, amã ne ba ikabên ne. Djãm Djudêjakam akajgo got?

Abê bênjadjwÿr rax pyrãk. Djudêjakam me bênjadjwÿr kunî dja amã arax jarê. Mÿkam?

Bir, akam dja me'õ prîre ruw ne ï arÿm bênjadjwÿr rax. Ne arÿm inhõ mebê idjaer pumün meo ba.

Dja meo ba kute mrãmri ne mrykî'ãtomtio ba djwÿnh kute õ mryo ba pyrãk”, ane.

Nãm kabên jarênh djwÿnh ã me bakukãmãremã anen arÿm 'ã pi'ók no'ók ne. Ga, Berêkam Kritu rwÿkja pumü. Pi'ók jakôt ne bar arÿm omü. Nãm me rünh ã Erodjimã ane. <sup>7</sup> Nhym kam bênjadjwÿr Erodji amipdjun amiwÿr ar kute kanhêtire mar 'uw nhym ar arÿm 'ÿr bôx. 'ÿr bôx nhym me kãxã arkum,

—Nhÿnhjakam ne kanhêtire amirît djã? Mÿj ne kanhêtire kute amirît'ã amex kute? ane. Nhym ar arÿm prîne kum arê. <sup>8</sup> Nhym kam arÿm Berêmã ar anon arkum,

—Aje. Dja gar tẽn prîne me'õ prîre jabej ne kum akato. Kum akaton on amrê iwÿr tẽn imã 'ã ajarê. Badjwÿ 'ÿr itêm ne ije kum rax jarênh prãmkumrêx. Aj mã, ane.

<sup>9</sup> Nhym ar bênjadjwÿr rax kabên mar pan arÿm 'ÿr tẽ. 'ÿr tẽ: nhym ar aêrbê kanhêtireja mō. Tãm ne ar myt apôx djã'ãnh omü. Arÿm ar kukãm mō. Nãm ar kukãm mō:n arÿm iby arek wajêt. Prîre rwÿkja nhiby arek wajêt nhym ar arÿm omü. <sup>10</sup> Omün arÿm kî:nhkumrêx. <sup>11</sup> Ne kôt tẽ:n arÿm ûrkwã'ÿr bôx. Ne kam arÿm wadjãn prîreja pumü. Nã Marij ne kumÿn o nhÿ nhym ar omü. Ne kam amikajgo man arÿm amijo ngriren parbê tu mÿrbê rôrök ne. Parbê kum rax jarênho ikwã. Ne kam arÿm kãmã krîn

arým nèkrêx 'äpre bôn kum adjuw. Kên karýrmê pí djuw, me kute kuwykam rênh nhym kudjýjamê me kudjý djâbê mirajamê ne ar kum adjuw. <sup>12</sup> Ne kam kâjmâ djan pry 'ôdjwý kôt akubyn ar ô pykamã tê. Me'ô ne ar biptirkam arkum,

—Kwãrîk wãnh akubyn Erodji'ýr atêm kêt, ane nhym kam ar akubyn Erodji jaà'ã tê. Tê:n arým ar ô pykakam bôx.

*Jôdje kute Edjitu'ýr Jejuo kator kadjy ne ja.*

<sup>13</sup> Nãm ar kute kanhêtire marja tê nhym kam Jôdje arým ngôr. Ngôr nhym ê, arým Metündjwýnh kadjy mrãnh djwýnh'ô bôx ne kum,

—Kâjmâ djan amibêx ne prîremê nã aro akaton amû pykabê Edjítumã aro tê. Erodji kute prîre bñnmã kute abej 'ýr. Dja gar Edjítumã tèn bôx ne arek kam ar aba. Ije amã arênhkambit dja gar akubyn tê, ane. <sup>14</sup> Nãm kum ane nhym arým kâjmâ dja. Nhym akamat kô râ'ã nhym arým prîremê nã aro tê. Pykabê Edjitu'ýr ne aro tèn aro bôx. Ne kam ar arek kam ar ba. <sup>15</sup> Amrêbê: ne Bënjadjwýr djwýnh ar Edjitu'ýr tèm'ã ajarê. Kabên jarênh djwýnhmã 'ã ajarê. Nhym arým kukwakam me bakukãmãremã kum,

“Bënjadjwýr djwýnh ne me amã, ‘Ba ne ba ikra 'uw nhym arým Edjitu kurũm kato.’ Nãm ã me amã ane.”

Nãm ã kabên jarênh djwýnh me bakukãmãremã ane. Nhym kam me aben djô'ã arênho mō:n arênho mōr tãmtã arým 'ýr o bôx. Tũ:mrãm me bakamingrãnyrekam Jôdje ar arým Edjitu'ýr tê. Me bakukãmãremã 'ã ujarênh kôt ar arým Edjitu'ýr tê. Arým Erodji tykkambit dja ar akubyn Edjitu kurũm tê.

<sup>16</sup> Jôdje ar Edjitu'ýr tê nhym Erodji arým ar kute kanhêtire marja ma. Ne kam amim,

—Je tô mýkam ne ar imã 'êx ne iwýr bôx kêt? ane. Nãm anen arým ngyr:k ne. Ne amim,

—Amũ akati ja'ã ne ar kute kanhêtire mar imã, “Bënjadjwýr rwýk ny'ã kanhêtire katorja'ã ne arým amex amãnhkrut apêx bar omũ”, ane. Be, kanhêtire kator'ã amex amãnhkrut apêx kôt godja bënjadjwýr rwýk ny'ã arým amex amãnhkrut ne apêx jabej. Nãm ã amim anen arým ô krãkamngônhmã kum,

—Me on Berêkam me prîre nhimex. Bu'ã Berê nhô pyka kunîkôtdjwý dja ga me me prîre nhimex. Mybit dja ga me kunî nhimex. Me prîre rwýk'ã amex amãnhkrut apêx nhijukribit dja ga me me imex kêt, ane. Erodji ô krãkamngônhmã ane nhym me arým me prîre'ýr mōn me imexo mō. Me imexo mōn arým me imex pa. Nhym me arým amak djaje mýro kumex. <sup>17</sup> Amrêbê: ne Metündjwýnh me mýr kumex'ã ajarê. Kabên jarênh djwýnhbê Djermimã 'ã ajarê. Nhym arým kukwakam me bakukãmãremã kum,

<sup>18</sup> “Ota krîbê Ramakam me mu:w ne kãj bê amra:.”

Rakeu krao amak djaje me mu:w. Kra arým kubê kêt kam ne me te kute memã kaprî kwý ngrimã.”

Nãm ã kabên jarênh djwýnh Metündjwýnh kukwakam me bakukãmãremã ane. Nhym kam me aben djô'ã arênho mō:n arênho mōr tãmtã arým 'ýr o bôx. Tũ:mrãm me bakamingrãnyrekam ne me arým mýro kumex. Krãkamngôn arým me prîre nhimex ne nhym me arým amak djaje mýro kumex. Djermi kute me bakukãmãremã 'ã ujarênh kôt me arým ã mýro ane.

*Nadjare'ýr akêx'ã ujarênh.*

<sup>19</sup> Jôdje ar Edjítukam ar ba: nhym kam Erodji arým ty. Ty nhym



kam Jôdje arým biptiro nō. Biptiro nō nhyM Metîndjwýnh kadjy mrânĥ djwýnh'ô arým kum amijo amirî't ne kum,

<sup>20</sup>—Kâjmã djan prîremê nã aro tē. Me abê idjaer nhô pyka'ýr aro tē. Me kute bit prîre bîn prãmja ne me arým ty, ane. <sup>21</sup>NhyM kam Jôdje arým kâjmã djan prîremê nã aro tē. Aro tēn amũ mebê idjaer nhô pyka'ýr aro tē. Ýr aro tē:n arým 'ýr aro bôx. <sup>22</sup>Ýr aro bôx nhyM me arým kum,

—Erodji kra Akireu arým pykabê Djudêjakam bãM pãnh memã bēnjadjwýr, ane. Nãm me Jôdjemã ane nhyM arým kum uman Djudêja'ýr tēm prãm kêt. Ne kam ôtkam me'ô arým nêje kukrà. NhyM kuman arým pykabê Djudêja nhibej tēn kam pykabê Garrêjakam bôx. <sup>23</sup>Ne ajte tē:n arým krîraxbê Nadjarekam bôx ne kam ar ba. Kam ar ba: nhyM kam Jeju arým kam abatãnh ne. Amrêbê: ne Metîndjwýnh ja'ã ajarê. Jeju Nadjarekam abatãnh'ã ajarê. Kabēn jarēnh djwýnhmã 'ã ajarê. NhyM arým kukwakam me bakukãmãremã kum, “Dja me abenmã 'ã, 'Nadjarekam ne abatãnh djã', anĥýro ba.”

Nãm ã ujarēnh djwýnh Metîndjwýnh kukwakam me bakukãmãremã ane. NhyM kam me aben djô'ã arēnh mō:n arēnh mōr tãmtã arým 'ýr o bôx. Tũ:mrãm me bakamingrãnyrekam arým 'ýr o bôx nhyM Jeju arým Nadjarekam abatãnh ne. Me bakukãmãremã 'ã ujarēnh kôt ne arým Nadjarekam abatãnh ne.

### 3

*Djuão kute Jeju kutêp me akre'ã ujarēnh.*

*Mak 1.1; Ruk 3.1; Dju r 1.19*

<sup>1</sup> Jeju Nadjarekam ar ba: nhyM kam ngômã me angjēnh djwýnhbê Djuão arým bôx. Pykabê Djudêjakam kapôt kukritkam ne

Djuão me akreo ba. Me ta ne me 'ýr ban bôxo kumex nhyM ar me akreo ba. <sup>2</sup>Nãm memã kum,

—Me amikam akapriren wãnh ajaxwemã anhiren Metîndjwýnh'ýr amijo akêx. Arým kãjkwakam Bēnjadjwýr djwýnh kute pykakam amim me utãr ne ar meo ba 'ýr. Nãm ã Djuão memã ane. <sup>3</sup>Amrêbê: ne Metîndjwýnh Djuão kukãm 'ã ajarê. 'A ujarēnh djwýnhbê Idjaijmã 'ã ajarê. NhyM arým kukwakam me bakukãmãremã kum,

“Me'ô dja kapôt kukritkam memã kabēn ne. Kãj bê dja me akren memã kum,

'Me apa. Ê, on Bēnjadjwýr djwýnh kutêp wãnh ajaxwemã anhiren katãt amijo aba. Kute mrãmri ne me kute bēnjadjwýr rax kutêp pry mex ne kute kum katãt pry jadjwýrja pyrãk', ane.

Dja ã ujarēnh djwýnh Bēnjadjwýr djwýnh'ã memã ane.”

Nãm ã Idjaij Djuão'ã me bakukãmãremã ane. NhyM kam me aben djô'ã arēnh mō:n arēnh mōr tãmtã arým 'ýr o bôx. Tũmrãm 'ýr o bôx nhyM Djuão arým kato. Me bakamingrãnyrekam katon arým ã me akreo bao ane. Metîndjwýnh kute me bakukãmãremã 'ã ujarēnh kôt Djuão arým katon ã me akreo ane.

<sup>4</sup> Be, Djuão ne mry jabatãnhbê kameru kî nhîpêxo kubêkãn angij ne mry kào amikrax pren krytkanhê kun menĥ kangôo ikô. <sup>5</sup> NhyM kam krîraxbê Djeruxarêkam me ja Djuão'ýr bôxo dja. Bu'ã pykabê Djudêjakam me jadjwý Djuão'ýr bôxo dja. Ngôbê Djodão bu'ã pykakam me jadjwý 'ýr bôxo kume:x ne. Nãm me

Djuão'ýr ban bô:xo dja. <sup>6</sup> Ne kam amijaxwe kôt amijarēn memã kum,

—Be, mrãmri ne ba ijaxwe tũm krãptî. Arým imã kînh kêt ne

wānh kum inhire, ane. Nhyam kam ngô raxbê Djodãokam mã Metĩndjwýnhmã me angij.

<sup>7</sup> Nhyam kam mebê pardjêumê mebê xadjudjêumê krãptĩ arým Djuão'ýr bôxo dja. Nhyam me omũn memã kum,

—Me akamingrãny ne ga me abê iry. Mýj me'õ got ne me amã Metĩndjwýnh ngryk nhõ akati jarê ga me umaje iwýr aprõt kajgo? <sup>8</sup> On katãt amijo aba gê me mrãmri me amex jabej me amã kato. Mrãmri ga me amikam akaprĩren wānh ajaxwemã anhiren aje Metĩndjwýnh'ýr amijo akêx jabej gê me me amã kato. Ne kam me akam kĩnhkumrêx kute mrãmri ne me kute pidjõ djõ mexmã apõx ne kam kĩnhja pyrãk. <sup>9</sup> Kwãrĩk wānh me anhõkre kadjwýnhbê anhingêt kukãmãre Abraão adjãmra kêt ne amim,

—Me ba ne ba me ibê Abraão tãmdjwý. Dja Metĩndjwýnh me ikam ngryk kêt. Dja ba me te ijaxwe nhyam kam me inhingêt kukãmãre Abraãokõt Metĩndjwýnh kum me ijabê ne me ijaxwekam me ijo bikênh kêtumrêx, ane. Kwãrĩk wānh ga me ã anhýr ar aba kêt. Kati. Ê, ba me amã arê. Dja ga me te abê Abraão tãmdjwý nhyam Metĩndjwýnh tu me ajo ajkê, me ajaxwe pãnh tu me ajo ajkê. Ne ren kute ajte Abraão tãmdjwý prãm jabej ren tu kênjao itun o amim Abraão tãmdjwý nhípêx nhyam me ren tu katon kumex. <sup>10</sup> Ê, mrãmri arým 'ýr. Metĩndjwýnh kute memã axwe pãnh jarênh nhõ akati arým 'ýr. Kute mrãmri ne pidjõ apýnh abenkam õ kêt nhyam me kute kãr ne o mrãnh ne kute kuwykam rênhja pyrãk. Arým ne Metĩndjwýnh me ajã pidjõ djõ kêt jakren arým me ajaxwe pãnh kute me ajo bikênh 'ýr. Dja me ajo mõn kuwykam me amê. Arým 'ýr. Kute mrãmri ne me'õ kute pidjõmã 'yr kadjy

kute parbê kãxkrãkõ mýnh ne o ãm pyrãk.

<sup>11</sup> Mrãmri ba ne ba ngômãbit me ajangij. Ga me amikam akaprĩren wānh ajaxwemã anhiren Metĩndjwýnh'ýr amijo akêx ba ngômãbit me ajangij. Nhyam be, itotokbê ne me'õ bõxmã. Me'õ tãm ne raxo kute amũ ijakrenh, kute ijakrenh mexi. Nã bãm te irax ne 'ýr ibikamênh prãmje. Nã bãm te irax ne 'ã inhbõn ije kum parkã 'ã pre bõnh ne o itêm prãmje. Be, ãm irax ba ren arým kum apê. Nhyam be, kati. ãm ingrire. Nãm raxo ijakrenh mex ne. Tãm ne arým bõx 'ýr. Djãm ngômã kute me ajangjênhmã? Kati. Tãm dja bõx ne kam me awýr Metĩndjwýnh Karõ jano. Katãt me aje amijo ababit'ýr dja ano kute me ajo bamã. Ne kam me ajaxweja kute kuwymã me arênhmã. <sup>12</sup> Gêdja bõx ne kam kute mrãmri ne me kute kõtýk byr ne o kute bãygogore ka'uk ne kute kam mũm 'ynhĩ, 'y mexjao atom ne kam kute 'ýkãjao tēm ne kute kuwykam mēnh nhyam xêtja pyrãk. Dja me'õja bõx ne ã me axweo anen kuwykam me kurê. Nhyam kuwyja dja põk rã'ã: rã'ãn apêx kêtumrêx. Nhyam be, me mex, me katãt kute amijo baja'ã gêdja 'y mex jakren mũm meo atom. Meo atom ne kãjkwakam õ pykamã meo mõ gê me kam kam kĩnhkumrêx ne ar ba. Arým kute meo anhýr 'ýr. Nãm ã Djuão mebê pardjêumã ane.

*Djuão kute ngômã Jeju jadjãr.  
Mak 1.9; Ruk 3.21; Dju r 1.32*

<sup>13</sup> Kam Jeju arým pykabê Garrêja kurũm tē. Tē:n arým ngõbê Djodão'ýr bõx. Nãm 'ýr bõx ne arým Djuão'ýr bõx. Kute Metĩndjwýnhmã ngômã adjãrmã ne 'ýr bõx. <sup>14</sup> Nhyam kum,

—Djãm ba ije ngômã ajadjãrmã? Kati. Ba ne ga ren Metĩndjwýnhmã ngômã ijadjã, ane.

<sup>15</sup> Nhyam kum,

—Kati, kwārīk rā'ā. Metīndjwýnh kute gu bamā katāt baje amijo baba'ā karō kōt dja gu prīne katāt amijo baba. Kam dja kīnhkumrēx. Kam dja ga on ngōmā ijadja, ane.

<sup>16</sup>Nhym arým ngōmā adjā. Nhym kam wabin dja nhym aêrbê kàjkwa arým aben bê ajkij. Aben bê ajkij nhym me kute omūnh kadjy Metīndjwýnh Karō kute tut pyrāk arým 'yr ruw ne 'ā tým. 'Ā tým nhym Djuāo arým omū. <sup>17</sup>Nhym ē, arým kàjkwa kurūm Metīndjwýnh memā kabēn ne memā kum,

—Ikra ne wā. Imā abê:kumrēx. Ba kam kam ikīnhkumrēx. Nām ā Metīndjwýnh Kra'ā memā ane.

## 4

*Xatanaj te kute axwe'ā Jejumā àpnēnh.*

*Ruk 4.1; Mak 1.12; Idja 2.18, 4.15*

<sup>1</sup>Nhym kam Metīndjwýnh Karō kapōt kukritmā Jejuo katon o mō. Dja Xatanaj te kute axwe'ā mēnhmā kum apnē. Ja kadjy ne o mō.

<sup>2</sup>Nhym kam Jeju Metīndjwýnhmā amijajbu. Nām amijajburo dja: nhym 'ā akatibê 40 apēx. Nhym kam arým kum prā:m ne. <sup>3</sup>Nhym kam me axwe'ā memā àpnēnh djwýnhbē Xatanaj arým 'yr tēn 'yr bōx. Nām bit kute amikōt o ba nhym kōt axwemā 'yr bōx. Ne kam kum,

—Ē, goja abê Metīndjwýnh Krakumrēx jabej ne goja kēnjamā akabēn gē goja kubē djwý ga krē, ane. Nām Xatanaj ā Jejumā ane. <sup>4</sup>Nhym kam kum,

—Kati. Mýkam? Bir, Metīndjwýnh ne amrēbê: me ikukāmāremā kum, “Djām djwýobit dja me amityx ne tīn ne ar ba?

Kati. Metīndjwýnh kabēnodjwý dja me amityx ne tīn ne ar ba, kabēn kunīo.”

Nām ā Metīndjwýnh me ikukāmāremā ane nhym me arým 'ā pi'ōk no'ōk ne. Ije Metīndjwýnh kabēn ja

markam ije akabēnkōt kēno djwý prām kêt. Nām ā Jeju kum ane.

<sup>5</sup>Nhym kam Xatanaj Djeruxarē'yr o tēn o bōx. Krīrax jamā ne me kum, “Metīndjwýnh nhō krīrax”, ane. Nām o bōx ne o tēn Metīndjwýnh nhō kikreti'yr o bōx. Ne kam o tēn o wabin kikreti nhimōk'yr o bōx ne anhā'ā kudja. <sup>6</sup>Ne kam kum,

—Ē, goja abê Metīndjwýnh Krakumrēx jabej goja rūm tēn ato. Amrēbê: ne me akukāmāre amā arē. Metīndjwýnh kukwakam amā arēn amā,

“Dja ba ajā ikadjy mrānh djwýnhmā karō.

Dja me atēmkōt amā ikra dja gē kēn'ō apar ngānh kêt:kumrēx.”

Nām ā Metīndjwýnh me akukāmāre amā ane nhym me arým 'ā pi'ōk no'ōk ne. Ajrā, rūm tēn ato gē goja me atēmkōt amā ikra dja, ane. <sup>7</sup>Nhym Jeju kum,

—Kati. Mýkam? Bir, ba ajte amā arē ga ama. Amrēbê: ne me ikukāmāre memā arē. Metīndjwýnh kukwakam memā arēn memā kum,

“Kwārīk wānh Bēnjadjwýr djwýnh, Atīndjwýnh kabi kêt, kute ajāno ām jabej kabi kêt”, ane.

Nām ā Metīndjwýnh me ikukāmāremā ane nhym me arým 'ā pi'ōk no'ōk ne. Ije Metīndjwýnh kabēn ja markam ne ba ije akabēnkōt rūm itēm ne idjātor prām kêt, ane.

<sup>8</sup>Nhym Xatanaj ajte o tēn krānh prēkti nhimōk'yr o wabi nhym dja. Nhym kam apýnh pyka djāri nhym Xatanaj arým kum kunī jakreo dja. Ne apýnh bēnjadjwýr kute meo ba djāri kum me kunī jakreo dja. Nhym apýnh me ō mýjja rūnh ne uma djāri nhym kum me kunī jakreo dja nhym arým kunī pumū. <sup>9</sup>Nhym kam kum,

—Ba amā ja kunī kanga. Ba amā me ō mýjja rūnh ne uma kunī kanga. Dja ga amijo angrin ikuka kōnh akōnkrāo nhýn imā irax jarē

ba arÿm amã kungã. Ba amã kunĩ ngã ga arÿm idjô'ã o aminhõn ar o aba, ane.

<sup>10</sup> Nhyim Jeju kum,

—Kati, Xatanaj, on rÿm imã akàx. Djãm ije akuka kõnh ikõnkrão inhÿrmã ne ije amã arax jarënhmã? Arkati. Mÿkam? Bir, amrëbê: me ikukãmãre memã arë. Metĩndjwÿnh kukwakam memã arën memã kum,  
“Bënjadjwÿr djwÿnh, Afĩndjwÿnhmãbit dja ga amijo angrin kum rax jarën ajbitmã apê.

Kwãrĩk wãnh atemã 'õmã rax jarënh kêt.”

Nãm ã Metĩndjwÿnh me ikukãmãremã ane nhyim me 'ã pi'òk no'òk ne. Ije Metĩndjwÿnh kabën ja markam ne ba ije akuka kõnh ikõnkrão inhÿr ne ije amã arax jarënh prãm kêt, ane.

<sup>11</sup> Nhyim kam Xatanaj arÿm kum kàx ne mã tẽ. Nhyim kam kadjy mrãnh djwÿnh ar arÿm 'ÿr bõx ne o djuw mex.

*Jeju kute me akremo krax.*

*Mak 1.14; Ruk 4.14*

<sup>12</sup> Nhyim kam Jeju arÿm tẽ. Tẽ:n pykabê Garrêjakam bõx. Me arÿm kute Djuãoo tÿm ne kubê ijêkam ne Garrêjakam bõx. <sup>13</sup> Nãm Garrêjakam krĩraxbê Nadjarekam bõx. Ne kam kurÿm katon kam amũ krĩraxbê Kapanakam tẽn bõx ne nhÿ. Imõti mÿrri ne Kapana dja. Me kute Kapana bu'ã pykamã Djeburõmê Naptar jarënh. Kam ne krĩraxbê Kapana dja. <sup>14</sup> Amrëbê: ne ujarënh djwÿnhbê Idjaij me bakukãmãremã arë. Jeju Kapanajakam bõx jarë. Metĩndjwÿnh kukwakam ne Idjaij memã arën memã kum,

<sup>15</sup> “Pykabê Djeburõ, pykabê Naptar. Imõti'ÿr pyka. Ngõbê Djodão nhikjêbê pyka.

Me bajtem nhõ pyka jamã ne me kum Garrêja jarë.

<sup>16</sup> Pyka jakam ne me axwe:. Me mrãnh punu:re kute mrãmri ne akamãt kò tykkam me mrãnh punu pyrãk.

Me ja ne me arÿm me'õ me:xkumrëx pumũ kute mrãmri ne me kute memã irã djã rax pumÿnh pyrãk.

Pyka jakam ne me kaprĩre ne ar ba. Kute mrãmri ne me on tyk karõ kaprĩn ar ba pyrãk.

Me ja ne me arÿm me'õ me:xkumrëx pumÿn kĩnhkumrëx ne. Me kĩnhkumrëx kute mrãmri ne aje arngrokam me kĩnh pyrãk”, ane.

Nãm Idjaij ã me bakukãmãremã ane. Nhyim kam me aben djô'ã arënhõ mõ:n arënhõ mõr tãmtã arÿm 'ÿr o bõx. Tũ:mrãm me bakamingrãnyrekam Jeju arÿm Kapanakam bõx. Me:xkumrëx ne arÿm kam bõx. Idjaij kute me bakukãmãremã 'ã ujarënh kõt ne bõx.

<sup>17</sup> Ne kam arÿm kãj bê me akremo krax. Ne amijã memã kum,

—Amikam akaprĩren wãnh ajaxwemã anhiren Metĩndjwÿnh'ÿr amijo akëx. Arÿm kãjkwakam Bënjadjwÿr djwÿnh kute pykakam amim me utãr ne ar meo ba 'ÿr. Nãm ã Jeju me akreo ane.

*Jeju kute amikõt me kamënh.*

*Mak 1.16; Ruk 5.1*

<sup>18</sup> Nhyim kam Garrêjakam Jeju imõti mÿrbê tẽ. Nhyim Ximãomê Ængre ar axikõt katorja ngõkam ar kryre rënho ba nhyim arÿm ar omũ. Ximãomã ne me Pedru jarë. Ar kubê tep pynënh djwÿnh tũm. <sup>19</sup> Nãm ar ar kryre rënho ba nhyim Jeju arkum,

—On ar mã ikõt ajkamê. Jakam dja gar ikõt me kamënhõ aba kute mrãmri ne ar aje tep pynënhõ aba pyrãk, ane. <sup>20</sup> Nhyim ar on amikõt kryre mën arÿm mã Jeju kõt ajkamê.

<sup>21</sup> Nhyim ãm ajbir tẽ nhyim Xijagumê Djuão ar kãkam nhÿ nhyim arÿm ar omũ. Ar axikõt kator: Djebedêu ne ar adjuw.

Djebedêumê ne ar amim kryreo mexo nhÿ. Nãm ar omün arÿm kàj bê amikôt ar ku'uw. <sup>22</sup> Nhyim bãm Djebedêu kàkam nhÿ nhyim ar arÿm wãnh kum iren mã Jeju kôt ajkamê.

*Jeju kute me punuo mex.*

*Mak 3.7; Ruk 6.17*

<sup>23</sup> Nhyim kam Jeju Garrêjakam pyka kunikôt memã kukràdjã jarêno ba. Apÿnh me bê idjaer bikprônê djari memã arêno ba. Ne kàj bê ujarênh ny jarêno ba. Bênjadjwÿr djwÿnh kute pykakam amim me utàr ne ar meo ba'ã memã ujarênh ar ba. Ne kam arÿm apÿnh me kanême me punuo mexo ba. <sup>24</sup> Nhyim me arÿm arênh kumex. Pykabê Xirijkam ne me prÿne me kunimã arêno ipôk ne. Arêno ipôk nhyim me kunÿ arÿm Jeju jarênh ma. Ne kam arÿm 'ÿr me punu kunio bôx. Apÿnh me kanê djari meo bôx. Ajte apÿnh me tokry djari meo bôx. Nhyim me kwÿ me karô punu kute meo baja nhyim me meo bôx. Nhyim me kwÿ me tyk kute meo baja nhyim me meo bôx. Nhyim me kwÿ akry nhyim me meo bôx. Nhyim kam arÿm me kunio mex. <sup>25</sup> Nhyim kam me krãptÿ: arÿm 'ÿr bôx ne kôt ar ba. Pykabê Garrêja kurüm, pyka nhidjibê Krîraxbê 10 kurüm, krîraxbê Djeruxarê kurüm, pykabê Djudêja kurüm, ngôbê Djodão nhijukri pyka kurüm ne me bôx ne kôt ar ba.

## 5

*Me kÿnh'ã ujarênh.*

*Ruk 6.20*

<sup>1</sup> Kam ne me krãptÿ: Jeju kôt ar ba nhyim me omü. Ne kam arÿm krãnh'ã tèn wabi. Wabin arÿm nhÿ. Nhÿ nhyim kôt ba djwÿnh ar arÿm 'ÿr bôx ne nhÿ. <sup>2</sup> Nhyim arÿm arkum amikabên jarênhmo krax ne kum, <sup>3</sup>—Ë, djãm me kute amim, “Ikajgo”, anhÿro baja djãm me kaprÿ got? Kati. Mÿkam? Bir, me wã dja kàjkwakam Bênjadjwÿr

djwÿnh amim me utàn meo ba. Kam dja me kÿ:nhkumrêx.

<sup>4</sup> Djãm me mÿr baja kaprÿ got? Kati. Mÿkam? Bir, me wã dja Metÿndjwÿnh ÿ meo kÿ:nhkumrêx. Kam dja me kÿ:nhkumrêx.

<sup>5</sup> Djãm me kabôt katija kaprÿ got? Kati. Mÿkam? Bir, me wã dja me ÿ pykakam mÿjja kunio ô. Kam dja me kÿ:nhkumrêx.

<sup>6</sup> Me kute memã kum, “Ba on Metÿndjwÿnhmã ijaxwe kêt”, anhÿro ba ne kute katàt amijo ba prã:mja djãm me kaprÿ got? Kati. Mÿkam? Bir, me wã dja me ÿ axwe kêt'ÿr bôxkumrêx ne arÿm prÿne Metÿndjwÿnhmã mexkumrêx. Kam dja me kÿ:nhkumrêx.

<sup>7</sup> Djãm me ukaprÿja kaprÿ got? Kati. Mÿkam? Bir, me wã dja Metÿndjwÿnh kum me kaprÿkumrêx. Kam dja me kÿ:nhkumrêx.

<sup>8</sup> Djãm me kute amikam axwe'ô mar kêtja kaprÿ got? Kati. Mÿkam? Bir, me wã dja me Metÿndjwÿnh pumü. Kam dja me kÿ:nhkumrêx.

<sup>9</sup> Djãm me kute aben nêje me kukrào baja kaprÿ got? Kati. Mÿkam? Bir, me wã'ã dja me abenmã kum, “Metÿndjwÿnh kra ne wã”, ane. Kam dja me kÿ:nhkumrêx.

<sup>10</sup> Me katàt kute amijo baja dja me te katàt nhyim me arÿm meo ajkê. Me katàt kute amijo bakam meo ajkê. Djãm kam me kaprÿ got? Kati. Mÿkam? Bir, me wã dja kàjkwakam Bênjadjwÿr djwÿnh arÿm amim me utàn ar meo ba. Kam dja me kÿ:nhkumrêx.

<sup>11</sup> Ar ga dja gar ikabên markumrêx ne kôt ar amijo aba nhyim me te wãnh ar amã akjÿ ne te ar ajo ajkên te ar ajaxweo ar apytã, apÿnh ar ajaxwe djario

ar apytà. Djâm kam ar akaprî got? Kati, Mÿkam? Bir, kàjkwakam akînh djà raxkam. <sup>12</sup> Dja gar tu akînhkumrêx ne kam akînh kati. Mÿkam? Bir, dja Metîndjwÿnh ar amâ o pân̄h rax ne. Kàjkwakam gêdja amâ o pân̄h mex ne. Kàjkwakam kute ar amâ o pân̄h mex ja dja gar amikukâm aman kam akînh kati. Nâm me tûmre ã axwe anen me kamingrâny kajmã'ã ã Metîndjwÿnh kabên jarênh djwÿnho bikênhho bao ane. Ga, arÿm kam kàjkwakam me kînhkumrêxja pumû, ane.

*Kadjwanhîmê kurwÿ djà'ã ujarênh.*

*Mak 9.50; Ruk 14.34*

<sup>13</sup> Ne kam ajte arkum,

—Ar aje kadjwanhî pyrâk. Kadjwanhî kute ômrôo mex pyrâk ar gadjwÿ dja gar ajmã akute kêt ne akabên mexkumrêx ne ar aba nhym ar abu'ã me ja kwÿ ar akudjwa arÿm mex jabej. Dja kadjwanhîkam akry apêx jabej mÿj dja ajte akry kadjy kam nê? Arkati. Arÿm mÿjja akry kadjy punukumrêx. Godja punukam me kum kînh kêt ne arÿm rûm kapî. Kapî nhym me arÿm 'ã mrân paro kajy. Ar gadjwÿ godja gar memã kum, “Ba ne ba ije Jeju mar”, ane. Ne ate kam ar ajaxwe gar arÿm apunu. Apunu nhym me arÿm kum ar akînh kêt ne ar apunukôt kum Metîndjwÿnhdjwÿ kînh kêt.

<sup>14</sup> Ar aje mrâmri ne pyka kunîkôt me kurwÿ djà pyrâk. Ga, krîraxja pumû. Djâm krân̄hre'ã me kute krîrax nhipêxkam me kute o bipdjurmã? Arkati. Ar gadjwÿ kwârîk wân̄h ikam apijâm kêt ne ikôt adjukaprî. <sup>15</sup> Ngôn̄hpôkdjwÿ. Djâm me kute kum angjênh ne kute mÿjja 'ôkôt o bipdjur got? Kânoipôko 'ã pro got? Kati. Ngôn̄hpôk ne me kum angij ne tu parkam, kên̄hkam umjuw nhym me kunîmã kikre kre kurwÿo ku'ê.

<sup>16</sup> Ar gadjwÿ kwârîk wân̄h ikam

apijâm kêt. Ar abê me kurwÿ djà pyrâk ne ar adjukaprî. Dja me ar adjukaprî pumûn arÿm kàjkwakam ar Abâmmã rax jarê. Nâm ã Jeju arkum ane.

*Môjdjê kukràdjã'ã ujarênh.*

*Ruk 16.16*

<sup>17</sup> Ne kam ajte arkum,

—Kwârîk wân̄h ijã amim, “Be, mÿj kadjy ne Jeju bôx? Bir, kute memã kum, ‘Kwârîk wân̄h jakam Môjdjê kabênja mar kêt. Ne Metîndjwÿnh kukwakam kabên jarênh djwÿnh 'ôdjwÿ kabênja kwârîk wân̄h mar kêt.’ Kute ã memã anhÿro ba kadjy ne bôx”, ane. Kwârîk wân̄h ijã ã amim anhÿr kêt. Djâm ije ja jarênhmã? Kati. Mÿkam? Bir, me amrêbê: me bakukâmãremã ijã ajarê. Nhym me aben djô'ã arênhho mô:. Arênhho môr tâmtã arÿm iwÿr o bôx. Ba kam arÿm me kute amrêbê: ijã ujarênh kôt ar amijo iba. Me kute ikukâm ijã ujarênh kôt ije amijo anhÿr kadjy ne ba bôx. Kam ije ar kabên markumrêx ne ije ar'ã anhÿr prãm kêt. <sup>18</sup> Dja te Metîndjwÿnh kabên kukràdjã kwÿ'ã pi'ôk no'ôk kryre ne te apÿnh mÿrbê kyx djari'ã pi'ôk no'ôk kryre djâm 'ô kajgomã? Kati. Dja 'ô kajgo kêt. Kabên'ã pi'ôk no'ôk kôt dja mÿjja apôxkumrêx. Kôt dja mÿjja kunî apôx tê:n prîne apôx mexkumrêx. Kabên 'ô dja kajgo kêtumrêx. Nhym kam kàjkwamê pyka arÿm apêx. Mrâmri ne ba ar amâ ja jarênhkumrêx.

<sup>19</sup> Godja me'ô Metîndjwÿnh kabên ngrire 'ômã kajgo jarên kam 'ã memã kum, “Kabên ja dja ga me mar rerekre”, anhÿro ba jabej, dja me adjwÿnhdjwÿmã kum, “Akajgo”, ane. Kàjkwakam Bênjadjwÿr djwÿnh kute pykakam amim me utâr ne ar meo bakam dja me kunî kum, “Akajgo”, anhÿro kumex. Nhym be, dja me'ô Metîndjwÿnh kabên man kôt ar amijo ban kam memã kabên jarênhho ba. Me'ô jamã dja me kum,

“Araxkumrêx”, ane. Kàjkwakam Bēnjadjwyr djwýnh kute pykakam amim me utâr ne ar meo bakam dja me kum, “Araxkumrêx”, ane. <sup>20</sup> Kam, ba ar amã arê gar ama. Djãm mrãmri Môjdjê kukràdjà mar djwýnhmê mebê pardjêu mexkumrêx? Kati. Mrãmri ar aje katât amijo abakam ne o aje me akrenhkambit dja kàjkwakam Bēnjadjwyr djwýnh amim ar apytà gar kôt ar amijo aba. Nãm ã Jeju arkum ane.

*Me ngryk'ã ujarēnh.*

*Rô 12.19; Ep 4.26; Xim k 2.8; Xij*

1.19

<sup>21</sup> Ne kam ajte arkum,  
—Amrêbê: me bakukãmãre memã kum,  
“Kwãrik wãnh me par kêt”,  
anen ajte,  
“Dja me me'õnh bĩ nhyim me arým kum axwe pãnh jarê”, ane.

Tãm ne me ar amã arê gar arým ama. <sup>22</sup> Nhyim be, ba dja ba ar amã arê gar ama. Djã ne me me'õnh bĩ nhyim me arým kambit kum axwe pãnh jarê? Kati. Me kute me'õkam ngrykkamdjwý. Dja me axwe jabej kukjêr kêt ne tu kam ngryk. Nhyim kam me arým kum axwe pãnh jarê. Ba ajte ar amã arê gar ama. Me kute ikukwakam abeno kamyja godja me kum kamy kurêkam kum, “Apunure”, anhÿr jabej nhyim kam me arým 'ã meo akuprô. Memã axwe pãnh jarênh djwýnh krãptĩbê 70 jao akuprô nhyim me arým memã amikôt amijarê. Nhyim be, godja me kamymã kum, “No kêt”, anhÿr jabej ne kam arým me biknor tokry djakam kuwykam môr jabej.

<sup>23</sup> Kam godja ga Metĩndjwýnh nhõ ki'ÿr kĩnh djào abõx jabej. O abõxo tẽn kam akamy ma. Aje o akamyja kute ajã, “Nãm ijo ajkê”, anhÿrja ga ama. Akam kaprĩja ga ama. Djãm kam aje on Metĩndjwýnhmã kĩnh djàja nhõrmã? Kati. Dja akamy akam kaprĩ ga Metĩndjwýnhmã kĩnh

djajao bõx nhyim Metĩndjwýnh arým kum kĩnh djàja kĩnh kêt. <sup>24</sup> Kam dja ga wãnh ki kabem kĩnh djàjamã anhiren akamy kumrêx'ÿr tẽn kam kum akabēn mex jarê gê akubyn akam kĩnh. Akubyn akam kĩnhkam dja ga akubyn tẽn kam kĩnh djàja mÿn Metĩndjwýnhmã angã.

<sup>25</sup> Dja me'õ mÿjjakam kum akurēn memã axwe pãnh jarēnh djà'ÿr ajo tēm jabej. 'ÿr ajo tēmri dja ga on o anhõbikwa. O anhõbikwa nhyim arým memã axwe pãnh jarēnh djà'ÿr ajo tēm kêt. Nok ga ren o anhõbikwa kêt nhyim ren memã axwe pãnh jarēnh djwýnhmã akanga nhyim ren mebê ijê djwýnhmã akanga. Nhyim kam ren mebê ijê djakam abê ijê. <sup>26</sup> Ga ren kam akator kêt. Prĩne aje amijo pãnh mex inomã mēnhkambit ren akato. Nãm ã Jeju arkum ane.

*Me kute abenbê prõmê mjênmeõ àkĩnh.*

*Mat 19.3; Mak 10.2*

<sup>27</sup> Ne kam ajte arkum,  
—Nãm me ar amã,  
“Kwãrik wãnh mebê prõ, nàr mjêno adjàkĩnh kêt”, ane.

Ja ne me ar amã arê gar ama. <sup>28</sup> Nhyim be, ba dja ba ar amã arê gar ama. Mrãmri ro'ã anõrkam ajaxwe. Djãm kambit ne ajaxwe? Kati. Dja gar me'õ nire pumün arým amã o anõr prãm ne. Jabit. Kam arým akadjwýnhbê amim o adjàkĩnh'ã karõ. Kamdjwý arým ajaxwe. Nãm ã Jeju arkum ane.

<sup>29</sup> Ne kam Ar kubê axwe pyma. Ga, me kute apÿnh kukràdjào àpēnh jaxwe prãmja pumũ. Me kute àpēnh jaxweo krã'ÿrmã ne Jeju Ar kubê axwe pyman arkum,

—Ne ga ren ano djubõko ajaxwe prãm ga ren on kaban mùm amibê amē. Ren te ano nhikjê kêt ne ren Metĩndjwýnh kôt atũn ne ar aba rã'ã, kam ren akĩnhkumrêx. Ne ren ano amãnhkrut rã'ã nhyim Metĩndjwýnh ren me biknor tokry djakam amē.

Ga ren kam akaprîkumrêx. <sup>30</sup> Ne ga ren anhikra djubôko ajaxwe prâm ga ren on krâtan mûm amibê amê. Ren te anhikra nhikjê kêt ne ren Metîndjwÿnhkôt atîn ne ar aba râ'â kam, ren akînhkumrêx. Ne ren anhikra amânhkrut râ'â nhym Metîndjwÿnh ren me biknor tokry djâkam amê. Ga ren kam akaprîkumrêx, ane. Djâm mrâmri ne me kute amino kadjârmâ ne Jeju arkum karô? Kati. Djâm mrâmri ar kute aminhikra krâ'ymâ arkum karô? Kati. Me kute àpênh jaxweo krâ'ymâ ne Jeju Ar kubê axwe pymâ.

<sup>31</sup> Ne kam ajte arkum,

—Me ar amâ,

“Me kute prô kangamâ gê me 'â pi'ôk no'ôk ne kum kungân kam kanga”, ane.

Nâm me ã ar amâ ane, gar ama. <sup>32</sup> Nhym be, ba dja ba ar amâ arê gar ama. Gêdja me'ô prô djwÿnh kangan kam arÿm axwemâ ngrêk. Gêdja prô djwÿnhja pânih me'ô mymâ kabên nhym arÿm 'ÿr mō. Nhym kam nija arÿm o akîn kam axwe. Nhym kam my jad-jwÿ arÿm o akîn kam adjwÿnhdjwÿ axwekumrêx. Nhym be, prôja krô'â mjênkambit nhym myja kute kangakam axwe kêt. Nâm ã Jeju arkum ane.

<sup>33</sup> Ne kam ajte arkum,

—Kam, amrêbê: me bakukâmâre memâ kum,

“Dja gar memâ akabên jarên amâ me kute amar pydji prâm jabej kum,

‘Metîndjwÿnh ne amybÿm kute imar. Ije amâ ikabên pydjîn arênhkôt kute imar’, anhÿrkam kwârîk wânih 'â adjukanga kêt.

Dja gar aje memâ akabên jarênh kôt ar amijo abakumrêx. Nok ren ga kôt ar amijo aba kêt ne ren arÿm Metîndjwÿnh jarênh kajgon ren o kum amikurêtuw”, ane.

Nâm me bakukâmâre ã memâ ane gar arÿm ama. <sup>34</sup> Nhym be, ba dja ba ar amâ arê gar ama. Djâm ar aje memâ akabên jarênhkam aje ajte kôt Metîndjwÿnh nâr ô myjja'ô jarênhmâ? Kati. Mrâmri dja gar memâ akabên pÿnhbit jarê. Kwârîk wânih aje memâ akabên pydjîn arênhkôt ajte memâ kâjkwa jarênh kêt. Metîndjwÿnh kam ÿrkam memâ arênh kêt. <sup>35</sup> Kwârîk wânih ar aje memâ akabên pydjîn arênhkôt ajte memâ pyka jarênh kêt. Metîndjwÿnh pykakam par djâm djâkam memâ arênh kêt. Nâr, kwârîk wânih ar aje memâ akabên pydjîn arênhkôt ajte memâ Djeruxarê jarênh kêt. Kubê Bênjadjwÿr rax djwÿnh nhô krîraxkam memâ arênh kêt. <sup>36</sup> Nâr, kwârîk wânih ar aje memâ akabên pydjîn arênhkôt ajte akrâ jarênh kêt. Mÿj ne gar aje omâ? Djâm ar ga aje akrâkam akî 'ôo akamâ nâr akî 'ôo kakrâtykmâ? Arkati. Te aje akîo anhÿrmâ. <sup>37</sup> Kam, memâ akabên pÿnhbit jarê. Aje mrâmri myjiao anhÿrmâ. Kambit memâ kum, “Nâ. Dja ba ã o ane”, ane. Nâr, aje myjiao anhÿr kêtâmâ. Kam memâ kum, “Kati. Dja ba o anhÿr kêt”, ane. Jabit memâ arê. Memâ akabên pÿnhbit jarê. Godja gar memâ akabên jarê ne me kute ar amar pydji kadji ajte kôt memâ apÿnh myjja jarên arÿm akabên punu. Kute mrâmri ne me axwe nhô bênjadjwÿr jajkwa kurûm akabên kator pyrâk. Nâm ã Jeju arkum ane.

*Kute ar amipânih nêje ar akre.*

*Ruk 6:29*

<sup>38</sup> Ne kam ajte arkum,

—Me ar amâ,

“Amrêbê: ne me bakukâmâre memâ kum,

‘Dja me me'ô no katôk gê me o aben man kam pânih no katôk. Nâr, dja me me'ô dja kwÿr gê me pânih wa kwÿr’, ane.

Me bakukâmâre ã memâ ane.”



Nãm me ã ar amã ane. <sup>39</sup> Nhy m be, ba dja ba ar amã arê gar ama. Djãm ar aje amipãnh meo abikênhmã? Kati. Kwãrik wãnh. Dja me ar ajo ajkê gar amipãnh meo abikênh kêt. Godja me ikra poo anhine djubôkbê ar akurwanh jabej tu me'yr anhine nhikjêo apa gê kurwa. <sup>40</sup> Nhy m godja me arým pykakam me bënjadwýr'yr ajo tẽn 'yr ajo bôx ne kum, "Me'ôja ne ijo ajkê. Kum arê gê imã o pãnh", ane. Nhy m bënjadwýr arým amã "Pãnh dja ga kum anhô kubêkà'ô pydjín angã", ane. Djãm aje kubê nênmã? Kati. Dja ga tu kam anhôdjãnh ne kum anhô kubêkào amãnhkrut ne angã. <sup>41</sup> Dja me kôt atêmmã amã krã tÿ:x ne amã, "Ga dja ga ikôt tẽn nhy m ajã kirometu pydjí apêx", ane. Ga kam kabênkôt tẽn. Kôt atêmo kirometu pydjí apêx. Ga kam ik-abên kôt amã kĩnh ne ajte ijukri kôt tẽn nhy m ajã kirometu 'ôdjwý apêx. <sup>42</sup> Godja me ar amã, "Imã angã", anhÿr jabej tu kum angã. Godja me ar amã, "Imã angã. Ba kam í amã kungã", anhÿr jabej. Kwãrik wãnh kubê nê kêt. Ba ne ba ã ar amã ane. Nãm ã Jeju arkum ane.

*Arkum kurê djwýnh jabêmã kute arkum arênh.*

*Ruk 6.27, 23.34; Kar 7.60; Rô 12.14*

<sup>43</sup> Ne kam ajte arkum,

—Me ar amã,

"Me bakukãmãre ne memã kum, 'Ar amã amibu'ã me ja jabên kam amã akurê djwýnh kurê', ane.

Me ã memã ane."

Nãm me ã ar amã ane. <sup>44</sup> Nhy m be, ba dja ba ar amã arê gar ama. Djãm ar amã akurê djwýnh kurênmã? Kati. Dja gar amã akurê djwýnh jabê. Me kute ar ajo Metëndjwýnhmã a'wýr ne kum, "Dja ga o ajkê", anhÿro baja dja gar meo Metëndjwýnhmã a'wý ne kum, "Dja ga o djuw mex", ane. Amã akurê djwýnh kaprĩ. Me kute ar amã kabên punuo baja ne kute

ar ajo bikênho baja dja gar meo Metëndjwýnhmã a'uw. <sup>45</sup> Ar amã akurê djwýnh jabên arým Abãm kôt amijo tẽn. Aje amijo kãjkwakam Abãm krakumrêx kadjy dja gar Abãm kôt amijo tẽn. Ga, Abãm kute me axwemê me mex'ã myto apôxja pumũ. Ne kute me katàt kute amijo bamê me ate kute amijo ba'ã nao bixadjwýrja pumũ.

<sup>46</sup> Godja gar amã me kum ajabêjabit jabê djãm kam Metëndjwýnh kute ar amã mex jarênhmã? Kati. Mÿkam? Bir, ar amã me kum ar ajabêjabit jabêkam. Amã akurê djwýnh jabê kêt kam. Djori kam amex? Kati. Nãm ã me bënjadwýr bajtemmã pi'ók kaprĩo atom djwýnh djãkĩnhĩ meo ane. Me kum kurê djwýnh jabê kêt. Djori kam me mex? Kati. Metëndjwýnh ne memã axwe jarê. <sup>47</sup> Godja gar anhôbikwamãbit akabên mex jarê djãm kam ar amexkumrêx? Kati. Mÿkam? Bir, ar aje anhôbikwamãbit akabên mex jarênhkam. Aje akurê djwýnhmã akabên mex jarênh kêt kam. Nãm ã me bënjadwýr bajtemmã pi'ók kaprĩo atom djwýnh meo ane. Me kute kurê djwýnhmã kabên mex jarênh kêt. Djori kam me mex. Kati. Metëndjwýnh ne memã axwe jarê. <sup>48</sup> Kam ar ga dja gar amextire. Kãjkwakam ar Abãm prĩne mextirekumrêx. Kudjwa ã ar amextireo anen amã akurê djwýnh jabê. Nãm ã Jeju arkum ane.

## 6

*Kute ar ukaprĩ'ã arkum karô.*

<sup>1</sup> Ne kam ajte arkum,

—Dja gar mekam adjukaprĩ. Djãm kam ar aje amim, "Ba memã amibên ne mekam idjukaprĩ gê ibu'ã me ja imã idjukaprĩ jarê", anhÿrmã? Kati. Kwãrik wãnh amim anhÿr kêt. Dja gar memã amibên nhy m me ar amã adjukaprĩ jarê. Djãm kam dja Metëndjwýnh ar

amã akĩnh djà ngã? Ar aje memã amibênkam djãm ar amã akĩnh djà ngã? Kati. Kam ar aje memã amibênkam dja ar amã akĩnh djà nhõr kêt.

<sup>2</sup> Kam ar aje me õ mýjja kêt mã ar anhõ mýjja nhõr kadjy. Djãm kam ar aje me kute amijo 'êx ne ta kute amijo Metĩndjwýnh mar mexja kudjwamã? Nãm me kute memã amibên nhym me kute memã ukapri jarênh kadjy amijo õ'i kakõ. Me bikprõnh djãkam nãr pry kõt amijo õ'i kakõro ba. Djãm ar aje me kudjwamã? Kati. Kwãrik wãnh me kudjwa kêt. Mrãmri ar aje amibênkam dja pykakam me ja ar amã ukapri jarê. Djãm Metĩndjwýnh dja ar amã akĩnh djà ngã? Kati. Ar aje memã amibênkam dja ar akam kĩnh kêt kumrêx ne ar amã akĩnh djà nhõr kêt. Mrãmri ije ar amã ja jarênhkumrêx. <sup>3</sup> Nhym be, ar ga ar aje me õ mýjja kêt mã mýjja nhõrmã tu udju gê me ar abu'a ar amar kêt. Gê ar aje memã òrkõt me ar abu'a ar amar kêt. Dja gar memã angãn kwãrik wãnh amim, "Arým ne ba kum kungã. Idjukaprikumrêx", kwãrik wãnh amim anhýro aba kêt. <sup>4</sup> Dja gar mebê udju nhym ar Abãm djwýnh arým ar aman ta arým ar amã akĩnh djà ngã. Nhym kam me kunĩ ar apumũ. Nãm ã Jeju arkum ane.

*Metĩndjwýnh mã ar kabên'a arkum ujarênh.*

*Ruk 11.1*

<sup>5</sup> Ne kam ajte arkum,

—Metĩndjwýnh mã ar akabênkam djãm aje me kute amijo 'êx ne ta kute amijo Metĩndjwýnh mar mexja kudjwamã? Me kute memã amibên nhym me kute memã mex jarênh kadjy ne me me bikprõnh djãkam nãr pry bikjêrkam Metĩndjwýnh mã kabêno ku'ê. Djãm ar aje me kudjwamã? Kati. Kwãrik wãnh me kudjwa kêt. Mrãmri me kute amibênkam dja pykakam me ja memã mex

jarê. Djãm Metĩndjwýnh kute memã mex jarênh mã? Kati. Me kute memã amibênkam ne Metĩndjwýnh mekam kĩnh kêt kumrêx. Kam dja memã mex jarênh kêt kumrêx. <sup>6</sup> Ar aje mrãmri kum akabên mã djãm ar aje memã amibên kadjy me ipõkri adjãmmã? Kati. Kwãrik wãnh. Dja gar me kãxã ar anhõ kumoka'ê djwýnh mã wadjãn amijã ijê. Ar Abãm djwýnh ne bipdjur. Nãm te bipdjurn kute mýjja bipdjur kunĩ pumũnh. Dja gar amijã ijê. Ne kam arým kum akabên jarê nhym arým ar apumũn ar ama. Ar aman arým ar amã akĩnh djà ngã nhym kam me kunĩ ar apumũ. <sup>7</sup> Dja gar Metĩndjwýnh mã amikabên jarê. Kwãrik wãnh me kwý kudjwa kêt. Me kwý kute apýnh mýjjao metĩndjwýnh karõ nhipêx ne marja ne me 'êx ne arík mýjjamã amikabên krãptĩ jarênh kajgoo ba. Ne arík amim, "Dja ba kum amijarênh krãptĩ gê ikabên krãptĩ man arým imarkumrêx", ane. <sup>8</sup> Kwãrik wãnh me kwý ja kudjwa kêt. Djãm we ar aje Metĩndjwýnh kumrêx mã akabên krãptĩ jarênh nhym kõt we kute amarmã? Kati. Ar Abãm djwýnh, kubê Metĩndjwýnh kumrêx, djã ne mýjjao metĩndjwýnh karõ nhipêxja kudjwa amakkre kêt? Kati. Metĩndjwýnh kumrêx ne amak me: xkumrêx ne tu kute ar amar. Ar anhõ mýjja kêtja tu kute mar. Ar aje kum mýjjao adjã'wýr kêttri arým kute ar amar.

<sup>9</sup> Ate gêdja gar ikabên kõt kum akabên jarê ne kum,

"Djũnwã, ga ne ga kãjkwakam nhý ba arým ama.

Gê me amexo apymaja man amim ajarên aben mã ajarê.

<sup>10</sup> On me kadjy abênjadjwýr ne ar meo aba.

Ga, kãjkwakam me kute akabên marn kõt kute ar amijo baja pumũ.

Gê me pykakamdjwý on me kudjwa ã akabên marn kôt ar amijo bao ane.

<sup>11</sup> Akati jakam ar ijawkwa mánhikutã ar imã inhô kwý krên djã ngã.

<sup>12</sup> Ar ijaxwe maro akno. Godja me'ô ar ikam axwe bar o ibiknor jabej ga gadjwý ar ijaxwe maro akno.

<sup>13</sup> Me kute ar imã axwe'ã àpnênh kunĩkôt ga ga ar ijo týx bar mebê idjãm týx ne ijaxwe kêt. Dja ga ajte Xatanajbé mã ar ipytãro aba.

Mýkam ne bar ã amã ane? Bir, abê Bënjadjwýr djwýnh. Ga apydji ajity:x ne ara:x rá'ã: rá'ã ne. Tãm ne ja", ane.

Dja gar ã Metĩndjwýnhmã akabêno ane. <sup>14</sup> Nã bãm ar amã, "Dja me'ô ar akam axwe gar tu wãnh axwe maro aknon kam angryk kêt", ane. Mýkam? Bir, godja gar me axwe maro aknon kam angryk kêt nhy m kãjkwakam Abãmdjwý ar ajaxwe maro aknon akam ngryk kêt. <sup>15</sup> Nhy m be, godja gar me axwe mar rá'ãn me kam angryk rá'ã jabej ar Abãmdjwý dja ar ajaxwe mar rá'ãn ar akam ngryk rá'ã. Kam ne ba ar amã, "Dja me'ô ar akam axwe gar axwe maro aknon kam angryk kêt." Nãm ã Jeju arkum ane.

<sup>16</sup> Ne kam ajte arkum,

—Ne kam ar aje Metĩndjwýnhmã amijajbur jabej djãm ar aje me kute amijo 'êx ne ta kute amijo Metĩndjwýnh mar mexja kudjwamã? Me kute amijajburo amirĩt ne memã amibên kadjy ne me amijo nokre kaprĩn aminokreo àpnu. Djãm ar aje me kudjwamã? Kati. Kwãrĩk wãnh me kudjwa kêt. Mrãmri me kute amibênkam dja pykakam me memã mex jarê. Djãm kam Metĩndjwýnh kute memã mex jarênhmã? Kati. Me kute memã amibênkam Metĩndjwýnh mekam kĩnh kêtumrêx ne memã

me kĩnh djã nhôr kêt. <sup>17</sup> Nhy m be, ar ga ar aje kum amijajburkam on amikrã ngràn aminokre pô. <sup>18</sup> Ar aje amijajbur'ã memã amijo amirĩt kêt kadjy ã memã amijo ane. Ar Abãm djwýnhbê Metĩndjwýnh ne bipdjur. Nãm te apdjur kute mýjja bipdjur kunĩ pumũnh. Dja gar ã anen arým kum amijajbu nhy m ar apumũn ar ama. Ar aman arým ar amã akĩnh djã ngã nhy m kam me kunĩ ar apumũ. Nãm ã Jeju arkum ane.

*Kãjkwakam ar ô nêkrêx'ã arkum ujarênh.*

*Ruk 12.33; A Xim 4.8; Ped k 1.4; Idja 10.34*

<sup>19</sup> Ne kam ajte arkum,

—Kwãrĩk wãnh amim pykakam ar anhô nêkrêx rax jadjwýr kêt. Kam ne kanêremê 'ók arým abê o àpnu nhy m me àkĩnhĩ arým 'ã ôpôk ne o akĩ. <sup>20</sup> Ate dja gar Metĩndjwýnhmã apê nhy m arým pãnh kãjkwakam djwýnhkam ar amã nêkrêx rax jadjuw. Kam ne 'ók kute ar abê o àpnu kêt nhy m kanêre kute o àpnu kêt nhy m me àkĩnhĩ kute 'ã ôpôk ne o àkĩnh kêt. <sup>21</sup> Mýkam dja kãjkwakam anhô nêkrêx? Bir, ar aje anhô nêkrêxkôt ajamak bën prãmkam. Dja kãjkwakam ar anhô nêkrêx rax gar arým kãjkwakam mýjjakôt ar ajamak bẽno aba. Nãm ã Jeju arkum ane.

<sup>22</sup> Nhy m me nodjwý. Me noo ne me kute mýjja pumũnh. Dja gar ano mex ne ajmã ano kute kêt jabej arým mrãmri arĩt týxkumrêx ne mýjja pumũ. Aje mrãmri ne me a'uri mrãnh mex pyrãk. <sup>23</sup> Nhy m be, dja ano rá, ano ajmã kute gar arým arĩt kêt ne aje mýjja pumũnh kêt. Aje mrãmri ne me akamãt kô tykkam mrãnh punuja pyrãk. Gêdja gar Metĩndjwýnh kôt aje amijo aba kêt jabej kute ar amã amikukràdjã jarênhja kôt aje amijo aba kêt jabej arým ar aje me'ô akamãtkam ba

pyràk, aje me'ò akamàt kô tyk týxkam mrân̄h punuja pyràk.

<sup>24</sup> Ë, nhÿnh ne me'ò amê ò bēnjadjwÿr ajkrut ne kum apê? Kati, gēdja o anen kam te o ane. Gēdja kum ja kurēn kam kum ja jabê. Nār kon, gēdja kum ja kÿnh ne kumābit apê ne kam kum ja kurēn kum apēnh kêt ne. Dja gar amā Metīndjwÿnh kÿnh ne ajte amā nēkrēxo atom raxja kÿnh ne kam kute bēnjadjwÿr amānhkrutmā adjapēnh pyràk. Dja gar te o ane, ane.

*Amikam umar punu kêt 'ā kute arkam karō.*

*Ruk 16.13; Pir 4.6; Ped k 5.7*

<sup>25</sup> Ne kam Jeju ajte arkam,

—Kwārĭk wānh amikam adjumar punun amim, “Mÿj dja ba kukrē, mÿj dja ba o ikō, mÿj dja ba adjà?” Kwārĭk wānh ā adjumar punuo anhÿr kêt. Djām Metīndjwÿnh kute ar akudjwa djwÿmē kubēkābit maro ba? Kati. Kute ar gajbit ar amar týx. Kute ar amar týxkam dja ta arÿm ar amā ar anhō kwÿ krēn djāmē ar anhō kubēkāmē kungā. Kam, kwārĭk wānh amikam adjumar punu kêt. <sup>26</sup> Ga, kÿjrūm kwēnhja pumū. Djām kwēnh kute pur kre nār bāygogo djê nār o atom ne kute ò kikrekam adjwÿr? Kati. Kwēnh kute ā o anhÿr kêt nhym kàjkwakam Abām tu o djuw mex. Metīndjwÿnh ne kum kwēnh kÿnh ngrire. Ar gajbit kum ar akĭnhkumrēx. Kam ar gajbit dja ar ajo djuw mexkumrēx. Kam kwārĭk wānh amikam adjumar punun amim, “Mÿj dja ba kukrē”? anhÿr kêt. <sup>27</sup> Djām amikam ar adjumar punun arÿm ar adjumar punuo ar aje amū atyk kētmā aminhō akati kamēnhmā? Kati. Ar aje te o anhÿrmā.

<sup>28</sup> Mÿkam ne gar anhō kubēkà prāmje amikam adjumar punu? Ga, kapōtkam pidjōrāja pumū. Mÿj ne pidjōrā abatan̄h on? Djām pidjōrā àpēnh nār djām

kute ò kubēkà kayr? Kati. <sup>29</sup> Bēnjadjwÿr raxbē Xaromāo nhō kubēkà me:xkumrēx ne kume:x. Djām mexo kute pidjōrā pyràk? Arkati. Pidjōrā ne mexo kute Xaromāo nhō kubēkà jakrenh me:xi. <sup>30</sup> Metīndjwÿnh ne pidjōrā kre nhym abatan̄h ne arÿm mexkumrēx. Akatija tām kam ne mex nhym akati nhym me arÿm kaban kuwykam kurē nhym arÿm xēr. Ga, Metīndjwÿnh kute prĭne pidjōrāo djuw mex nhym mexkumrēxja pumū. Mÿkam ne gar amim Metīndjwÿnh mar rerekre? Kum pidjōrā kÿnh ngrire. Nhym be, ar gajbit Metīndjwÿnh kum ar akĭnhkumrēx. Tām dja gar ama. Djām kute ar ajo djuw mex kētmā got? Dja ar ajo djuw mexkumrēx gar arÿm anhō kubēkà.

<sup>31</sup> Kam kwārĭk wānh ar anhō mÿjja prāmje amikam ar adjumar punu kêt. Kwārĭk wānh amim, “Mÿj dja ba kukrē”? nār, “Mÿj dja ba o ikō”? nār, “Mÿj dja ba angij”? kwārĭk wānh amim anhÿr kêt. <sup>32</sup> Apÿnh pyka djāri me kute Metīndjwÿnh mar kētja kute mÿjja jakōtbit amak bēn ne. Djām ar aje me kudjwamā? Kati. Kwārĭk wānh. Kàjkwakam ar Abām kute ar amar. Ar anhō mÿjja kētja kunĭkōt kute ar amar. <sup>33</sup> Nhym be, ar ga, djām ar amā mÿjja ja kÿnhmā? Kati. Kwārĭk wānh. Bir, mÿj dja gar amā kÿnh? Bir, Metīndjwÿnh kute ar apytār ne kute ar ajo bajabit dja gar kumrēx amikam mar týx. Ne kōt ar ajaxwe kētdjwÿ dja gar mar 'āno dja. Ja dja gar amā kÿnh nhym kam arÿm ar amā mÿjja kÿnhja kunĭ ar amā kungā. <sup>34</sup> Kwārĭk wānh ar amikukām adjumar punu'ò mar kêt ne amim, “Godja akatibē idjumar punu djā'ò iwÿr bōx jabej mā gēdja ba nē”? anhÿr kêt. Djām akati 'ōkam Metīndjwÿnh kute ar ajo djuw mex kētmā? Kati. Akati kunĭkōt kute ar ajo djuw mex. Dja

akati nhyM Metîndjwÿnh ta arÿm ar ajo djuw mex. Ar adjumar punu ar awÿr bôx jabej ajbit dja gar amikam ama. Kwârîk wânĥ amÿ amikukâm adjumar punu'ô maro atêm kêt. Nâm â Jeju arkum ane.

## 7

*Ar kute me'ã axwe rênh nêje kute ar akre.*

*Ruk 6.37; Rô 2.1; Kô k 4.5; Xij 4.11*

<sup>1</sup> Ne kam ajte arkum,

—Ar aje me axwe jabej me kukjêr kêt kam mÿkam ne gar tu me'ã amim, “Axwe”, anhÿro aba? Kwârîk wânĥ. Dja gar me'ã axwe rênh aba nhyM me arÿm amipânĥ ar ajã axwe rê nâr Metîndjwÿnh arÿm ar amã ajaxwe jarê. <sup>2</sup> Godja gar me'ã mÿjja'ô man kôt tu 'ã, “Axwe”, ane. Djâm kam me nâr Metîndjwÿnh akam kînh? Kati. Dja gar me'ã ane nhyM me nâr Metîndjwÿnh arÿm ar gadjwÿ ar ajã mÿjja tâm man kôt ar ajã axwe mê. Dja gar Metîndjwÿnh kudjwa memã ôr rûnh nhyM kam me akubyn ar aje memã ôr 'ânĥ ar amã kungã, ane.

<sup>3</sup> Mÿkam ne gar akamy nokam pyka jaÿmbit pumûn kam ar anokam pîponhtija pumûnh kêt ne? <sup>4</sup> Djâm ar aje akamymã kum, “Akmere, amrê ba amã anokam pyka jaÿmwã kaba”, anhÿrmã? Ne kam ar anokam pîponhtiwã pumûnh kêt kumrêx ne. Ar aje aminokam pîponĥ pumûnh kêt kam we ã kum ane. <sup>5</sup> Kê. Mrâmri ne gar apunu rax ne kam ajajkwakambit amimexo amra. Akumrêx gêdja gar aminokam pîponhtiwã kaban kam arît mex ne arÿm kôt ar akamy nokam pyka jaÿm ngrire wã kaba. Kam dja gar akumrêx wânĥ ajaxwemã anhire. Ne kam arÿm aje aminokam pî ponhti kadjar pyrâk. Ar ga dja gar akumrêx wânĥ ajaxwemã anhire ne kam arÿm amex ne ajaxwe kêt ne ar akamy jaxwe nêje kukrà kadjy arÿm amex.

Amex kute arÿm ar akamy nokam pî jaÿm kadjar kadjy kute arît mex pyrâk.

<sup>6</sup> Me kwÿ ne me kum axwe kînh ne kam axwe'ã maje kum Metîndjwÿnh kînh kêt. Djâm me jamã aje Metîndjwÿnh kabên jarênhmã? Kati. Ga ren me jamã arê ne ren aje mrâmri me kute ropremã Metîndjwÿnh nhô mÿjja rênh pyrâk nâr me kute angrô jamymã kryt karÿr rênh pyrâk. Kwârîk wânĥ o anhÿr kêt. Ga ren o ane nhyM ren me kum Metîndjwÿnh kabên kurên o ajkên akêx ne gadjwÿ ajo ajkê. Kute mrâmri ne ropre kute mÿjja mex nhirênh nhyM angrô jamy ituo kryt karÿr ngânĥja pyrâk. Nâm â Jeju arkum ane.

*Ar kute Metîndjwÿnh 'wÿr'ã arkum ujarênh.*

*Mak 11.24; Dju r 14.13; Ruk 11.9; Tex k 5.17*

<sup>7</sup> Ne kam ajte arkum,

—Dja gar tu mÿjja'a 'uw, mã mÿjja'a 'wÿro tê nhyM Metîndjwÿnh arÿm ar amã kungã. Ga, ar aje mã mÿjja jabej ne kam arÿm kum ajapôxja pumû. Ne kam mã kîkre jajkwa krekremã akabêno aku'ê nhyM arÿm me kute ar amã 'ã rênhja pumû. Dja gar ã Metîndjwÿnh 'wÿro ane. <sup>8</sup> Be, me kute mÿjja'a 'wÿr 'ãno âm gêdja Metîndjwÿnh arÿm memã kungã. Ga, me kute mÿjja jabej ne kum apôxja pumû. Ne kam me kute kîkre jajkwa krekremã kabêno ku'ê nhyM arÿm me kute memã kîkre'ã rênhja pumû. Dja gar gadjwÿ ã mÿjja'ã Metîndjwÿnh 'wÿro ane nhyM arÿm amã o amirît. <sup>9</sup> Nhÿnh ne ar akra'ô tèn djwÿ'ã ar ajuw gar kum kên ngã? <sup>10</sup> Ne tep'ã ar ajuw gar kum kangã ngã. Arkati. <sup>11</sup> Be, gar ajaxwewak aje akramã mÿjja mex nhôrja pumû. NhyM be, kâjkwakam ar Abâm mestire ta gêdja

ar amã amũ mỳjja mex nhõro ar ajakre.

<sup>12</sup> Kam gar aje amibu'ã me'ã amim “Gê me imã mex”, “Gê me imã mex”, anhÿro aba. Kute aje me'ã amim anhÿro aba pyrãk ar gadjwÿ dja gar amikabên kôt ã memã amexo ane. Dja ga ã memã amexo anen arÿm Metĩndjwÿnh kabên kukràdjã kôtdjwÿ aje amijo aba mexkumrêx. Mõjdjê kute kabên jarênh kôt aje amijo aba mexkumrêx. Me kute Metĩndjwÿnh kukwakam memã kabên jarênhdjwÿ aje kôt amijo aba mexkumrêx. Nãm ã Jeju arkum ane.

*Apÿnh pry'ã arkum ujarênh.*

*Ruk 13.24*

<sup>13</sup> Nhyam kam mrãmri me kute mỳjja mar ne kôt ar amijo ba ne kute pry pyrãk. 'Ã ne Jeju arkum,

—Ikôt dja gar amijo aban arÿm abê tÿx kute mrãmri ne pry kre ngrire mebê tÿx pyrãk. Nhyam be, dja gar me kum ikĩnh kêtja kôt ar amijo aban arÿm amã rerekre. Amã tÿx kêt kute mrãmri ne pry kre raxkôt me mrãnh memã tÿx kêt pyrãk. Kwãrik wãnh me kum ikĩnh kêtja kôt ar amijo aba kêt. Aje pry jajkwa krekre ngrirekôt adjãr mãn prãbê dja ga on amim iman ikôt ar amijo aba. Me krãptĩ ne me me kum ikĩnh kêtja kôt ar amijo ba. Memã tÿx kêtê kute mrãmri ne me kute pry jajkwa krekre raxkôt ngjêx nhyam memã tÿx kêt pyrãk. Kute pry kre rax kôt me mõi memã tÿx kêt pyrãk. Dja gar me kum ikĩnh kêt kôt ar amijo aban arÿm akuno. Me biknor tokry djãkam akuno. <sup>14</sup> Nhyam be, me ngrêrebit ne me imã apôx ne amim imaro ba. Me kute mrãmri ne me ngrêre pry jajkwa kre kre ngriremê pry kre ngriremã apôx pyrãk. Ar ga dja gar imã akaton amim imaro aban arÿm atĩn ne, Metĩndjwÿnhkôt atĩn

ne ar aba rã'ã: rã'ã ne. Nãm ã Jeju arkum ane.

*Ar amijã no tÿx'ã arkum ujarênh.*

<sup>15</sup> Ne kam ajte arkum,

—Me kute amijo 'êx ne memã, “Ba ne ba ibê Metĩndjwÿnh kukwakam kabên jarênh djwÿnh”, anhÿro bajabê amijã ano tÿx. Nãm me kute mrãmri ne rop krori kute amijo mrykĩ'ãtomti kã jangjênh ne bôx pyrãk. Me ta ne me kute amijo imar mex ne ar awÿr bôx. Nhyam be, kati. Nãm me ar anoo akno. Me kã kadjwÿnhbê ne me kute mrãmri ne rop jamrex pyrãk. Me axwe. Ne kute ar amã Metĩndjwÿnh'ã 'êx ne kabên kêt jarênhmã ne ar awÿr bôx. Kute o ibê amiwÿr ar ajo akêx ne ar ajo bamã ne ar awÿr bôx. <sup>16</sup> Mÿj dja gar me omũnh ne memã akator on? Bir, mÿj dja gar pidjôjadjwÿ mar on? Bir, ô ne parbê rôrôk ne ikwãn o bario amirĩt nhyam me kôt kum apôx. Ga, rojtikam tyrti apôx kêtja pumũ. Ar gadjwÿ dja me apÿnh kabên punu jarênh ãpênh jaxwe gar me omũn arÿm memã akaton amim, “Be, ga, axweja pumũ. Kabên kajgo. Nãm Metĩndjwÿnh'ã 'êx ne kabên kêt jarênh ba”, ane. Djãm mrÿnhĩkam me kute akrô djôbê uba rênh? Kati. Nãr, djãm prêxkam me kute pidjôbê pigu rênh? Kati. <sup>17</sup> Bãri mexkam ne ô mex arij. Nhyam be, bãri punukam ne ô punu arij. <sup>18</sup> Bãri mexkam ne ô punu arij prãm kêtumrêx. Nãr, bãri punukam ô mex arij prãm kêtumrêx. <sup>19</sup> Bãrikam ô punu jariija kunĩ ne me kute akàr ne kuwykam rênh. Dja me ã kute Metĩndjwÿnh'ã 'êx ne kabên kêt jarênho bajao ane. <sup>20</sup> Be, me ãpênh jaxwe dja gar omũn arÿm kôt kum akato. Me kute Metĩndjwÿnh kabên kêt jarênhja dja gar ama. 'Ã ne ba ar amã, “Ga, rojtikam tyrti apôx kêtja pumũ”, ane.

<sup>21</sup> Me kute arĩk imã, “Ga abê inhõ Bẽnjadjwÿr djwÿnh. Ga ne ga ijo

aba”, anhÿrja. Djãm me ja kunĩ kàjkwakam Bẽnjadjwÿr djwÿnh kute amim me utàr ne ar meo bamã? Kati. Me kute amim kàjkwakam Ibãm kabẽn mar ne kôt kute amijo babit. Me jabit dja Bẽnjadjwÿr djwÿnh amim me utàn ar meo ba. <sup>22</sup> Ije memã axwe pãnh jarènh nhõ akati wãkam dja me krãptĩ aminêje imã, “Bẽnjadjwÿr djwÿnh. Djãm akukwakam ije memã akabẽn jarènh kêt got ga ikanga? Djãm akukwakam ije me karõ punu kujaék kêt got ga ikanga? Djãm akukwakam ije mÿjja pumũnh kêt nhipêx kêt got ga ikanga? Mÿjja rũnh, mÿjja krãptĩ ne ba ipêx ga ikanga”, ane. Ije memã axwe pãnh jarènh djã nhõ akatikam dja me ã imã ane. <sup>23</sup> Kam dja ba irã ipòkri me kunimã kum, “Kati. Djãm ikukwakam ne ga mÿjja nhipêx? Kati. Wãnh amikukwakam ne ga mÿjja nhipêx. Ba ije amar kêt. Rũm imã akàx. Me adjãpènh jaxwe”, ane. Dja ba ã memã ane. Nãm ã Jeju arkum ane.

*Me kute apÿnh kikre nhipêx'ã arkum ujarènh.*

*Ruk 6.47*

<sup>24</sup> Ne kam ajte arkum,

—Me kunĩ kute ikabënja mar ne kôt kute amijo baja ne me kute mrãmri ne me'õ jamak mex pyrãk. Me'õ jamak mexja kènkam amim kikre. <sup>25</sup> Nhyam kam te 'ã na axidjuw ne te 'ã ngò tám ne te kòk djãbêr tÿx kikre karngro nhyam tÿm kêt. Kènkam kute ipêxkam ne tÿm kêt. <sup>26</sup> Nhyam be, me kunĩ kute ikabënja mar kajgon kôt kute amijo ba kêt ne me kute mrãmri ne me'õ bèn kati pyrãk. Me'õ bèn kati pykatikam amim kikre. <sup>27</sup> Nhyam kam 'ã na axidjuw ne 'ã ngò tám ne kòk djãbêr tÿx kikre karngro nhyam arÿm tÿm. Djã nãm kãjbê ban tÿm got? Kati. Nãm tu ban gru: ane.

<sup>28-29</sup> Nãm ã Jeju memã anen arÿm memã amikukràdjã jarènh

pa. Nhyam me kabẽn man kam ari ar aben pumũn kam abenmã kum,

—Tõ mÿj kabẽn ny gotja? Nãm prĩne kute amimarkôt katà:t memã amikukràdjã jarènhkumrêx. Nãm ã me bẽnjadjwÿr rũnh kwÿ kabẽn mex anen ar prĩne kabẽnno meo atomo ba, ane. Djã nãm ã Mòjdjê kukràdjã mar djwÿnh memã arènhno ane? Kati, nãm me ari no prõt ne ari kukràdjã jarènh'ã umju:w ne kute arènh katàt kètkumrêx.

## 8

*Me'õ ã kajêkam tê'ã ujarènh.*

*Mak 1.40; Ruk 5.12*

<sup>1</sup> Nhyam kam krãnh'ã arÿm rwÿk tê. Nãm rwÿk tê:n arÿm ruw. Nhyam me krãptĩ: kôt mō. <sup>2</sup> Nhyam kam me'õ ã kajêkam têja 'ÿr bõx ne parbê kōnkrão nhÿn kum rax jarèn kum,

—Bẽnjadjwÿr djwÿnh, ga aje inhĩ kajêkam itèkôt aje ipumũnh ne aje mar. Aje ijo mex prãm jabej ba ren arÿm imex ne, ane. <sup>3</sup> Nhyam arÿm 'ÿr ikran kupèn kum,

—Ije ajo mex prãm. On amex, ane. Nhyam arÿm 'ã ã kajêkam têja apêx nhyam arÿm mex ne. Kute o ãm támkam tẽmbê kà mex ne. <sup>4</sup> Nhyam kum,

—Kwãrĩk wãnh ga amijarènh kêt. Dja ga tu katàt mã me kadjy Metĩndjwÿnh mar djwÿnh'ÿr tèn kum amibê, kum amikà bẽ. Ne kam kum mry ngã gẽ akadjy Mòjdjê kukràdjã kôt Metĩndjwÿnhmã mry gan kum kungã. Arÿm akà mexkam dja ga kum mrywã ngã gẽ me kunĩ apumũ, arÿm akà mexkôt apumũ. Nãm ã Jeju me'õmã ane.

*Kute amybÿm me'õo mex.*

*Ruk 7.1*

<sup>5</sup> Ne kam arÿm tèn krĩraxbê Kapanamã wadjã. Nhyam krãkamngõnh krãptĩ kubê 100 nhõ bẽnjadjwÿr arÿm 'ÿr bõx ne kum ò àpènhno no katon kum arèn kum,

<sup>6</sup> —Bênjadwÿr djwÿnh, inhô àpênh arÿm akryn tokry rax ne kikrekam arek nô, ane.

<sup>7</sup> Nhyr Jeju kum, “Ba 'ÿrn o mex”, ane.

<sup>8</sup> Nhyr krâkamngôn nhô bênjadwÿr kum,

—Djâm imex got ga inhÿrkwâmã tê? Kwârîk wân. Dja ga akabênbit jarê nhyr arÿm inhô àpênh mex ne. <sup>9</sup> Inhô bênjadwÿr kute raxo ijakrenhja ne imã kabên ba kabên man kôt ar amijo iba. Ne kam ba ibê me krâkamngôn hre nhô bênjadwÿrkam ba memã ikabên nhyr me ikabên kôt ar amijo ba. Ba 'ômã kum, “'ÿr tê”, ane nhyr arÿm 'ÿr tê. Ba kam ajte 'ôdjwÿmã kum, “Amrê tê”, ane nhyr arÿm amrê tê. Ba inhô àpênhmã kum, “On mÿjja kupê”, ane nhyr arÿm kupê. Kam ne ba amã, “Abênjadwÿr djwÿnhkam dja ga akabên nhyr arÿm akabênkôt mex ne”, ane. Krâkamngôn nhô bênjadwÿrbê ne me bajtem.

<sup>10</sup> Nãm Jejumã ane nhyr kuman arÿm kam no tyn djan kôt ba djwÿnh arkum,

—Be, me'ô bajtemja kute tu amim imar mexkumrêx. Mebê idjaerkumrêx ren kudjwa ã amim imaro ane. Nhyr be, kati. Me kute kudjwa ã amim imaro anhÿr kêt. Pydji bajtemkam kute amim imar me:xkumrêx. Mrãmri ne ba ar amã ja jarênhkumrêx. <sup>11</sup> Ê, ba ar amã arê gar ama. Kâjkwakam Bênjadwÿr djwÿnh arÿm kute pykakam amim me utâr ne ar meo bakam dja gwaj me bakukâmãremê ro'ã banhô kwÿ krê. Abraãomê Idjakmê Djakomê ro'ã banhô kwÿ krên mexo nhÿ. Nhyr kam dja me bajtem krâptî: ban bôx, myt apôx djârÿm bôx ne myt ngjêx djârÿm bôx. Bôx ne arÿm gwaj baro'ã ô kwÿ krêno nhÿ.

<sup>12</sup> Nhyr be, mebê idjaerkumrêxja dja Metîndjwÿnh arÿm bôm me kumê. Bênjadwÿr djwÿnh bit kute amim me utâr ne ar meo baja, me

tâm dja arÿm bôm me kumê. Bôm mebê idjaer mē nhyr me wân akamât kô tykkam ar ba. Wân ne me amim ngryk ne tokry djaje amijanên ar àmra ba. Nãm ã Jeju arkum ane.

<sup>13</sup> Ne kam me krâkamngôn nhô bênjadwÿrmã kum,

—Aj mã. Ga ne ga tu amim imarkumrêx. Kôt dja ba arÿm amã ã o ane, ane. Nhyr myt tâmkam arÿm ô àpênh mex ne.

*Kute me punu krâptîo mex.*

*Mak 1.29; Ruk 4.38*

<sup>14</sup> Nhyr kam Jeju arÿm Pedru nhô kikrekam bôx nhyr Pedru djupânhdjwÿ kanên nô. <sup>15</sup> Nhyr 'ÿr bôx ne arÿm ikra kupê. Kupê nhyr kanê arÿm kum ire. Kum ire nhyr arÿm kâjmã djan arÿm mex ne. Ne kam arÿm aro djuw mexo ba.

<sup>16</sup> Nhyr kam ar'ã para nhyr me arÿm 'ÿr me krâptîo bôx. Me karô punu kute meo baja tâm ne me'ÿr meo bôx. Nhyr mã me'ã kabênbit jarê nhyr mã me karô punu umaje mō. Memã iren mã mō. Jeju arÿm mã me kunîkam me karô punu kujate. Ne kam ajte me punudjwÿ kunîo mex. <sup>17</sup> Amrêbê: ne ujarênh djwÿnhbê Idjai Jeju'ã ajarê. Kute meo mex'ã ajarê. Nãm Metîndjwÿnh kukwakam 'ã ajarê. Nãm me bakukâmãremã kum, “Apÿnh me bapunu djâri, apÿnh me bakanê djâri nhyr kute amijã me bamar.

Kute mrãmri ne me kute jênh pytîo bakam kute amijã mar pyràk. Nãm ã amijã me bamaro ane.”

Nãm ã Idjai me bakukâmãremã ane. Jeju kute meo mex'ã ne memã arê. Nhyr kam me aben djô'ã arêno mō. Arêno mōr tâmtã arÿm 'ÿr o bôx. Tÿ:mrâm, me bakamingrãnyrekam Jeju arÿm kato. Katon kam arÿm abatân ne ar ba. Ne kam arÿm me punuo mexo ba. Metîndjwÿnh kukwakam



Idjaij kute me bakukâmâremã 'ã ujarênh kôt Jeju arÿm ã meo mexo bao ane.

*Ar'õ bit kute Jeju kôt amijo bikamênh.*

*Ruk 9.57*

<sup>18</sup> Jeju me punuo mex ne arÿm amibu'ã me krãptĩ: pumũ. Ne kam arÿm arkum,

—Gwaj on akàx nhikjênmã rê, ane.

<sup>19</sup> Nhyim kam Môjdjê kukràdjã mar djwÿnh'õ 'ÿr bõx ne kum,

—Ê, ujarênh djwÿnh, ba arek akôt tẽ. Dja ga nhĩ'ãm amrãnh kunĩkôt ba akôt mrã, ane.

<sup>20</sup> Nhyim kam kum,

—Ê, ga, djoti pykakam kreja pumũ. Ne kwênh kÿjrũm aêja pumũ. Mrymẽ kwênhbit ne õt djã kute amim kre pumũnhkôt kam õt djã. Nhyim be kati. Ba ne ba inhõ kikkre kêt. Inhikwã djã kêt. Ije amijo inhĩ ne me awÿr irwÿk nhÿnh ne ba inhũrkwãja? Kon, gop ga amiman kam ikôt atêm jabej nãr kon, arek dja, ane.

<sup>21</sup> Nhyim kam me'õ ja kute Jejukôt bamã ne kum,

—Bênjadwÿr djwÿnh, ba ibãm kumrêx jadjã. Ne kam arÿm akôt ar iba, ane. Nhyim kum,

<sup>22</sup> —Kati. Amrẽ on ikôt ar aba. Gê me kute Metĩndjwÿnh mar kêt wãnh ne tyk jadjã. Me kute mar kêt ne me kute mrãmri ne me tyk jamakkre kêt pyrãk. Gê me wãnh õbikwa tyk jadjã. Nãm ã Jeju kum ane.

*Jeju kôkmã bẽn tÿx.*

*Mak 4.35; Ruk 8.22*

<sup>23</sup> Ne kam ar kà'ÿr tẽn 'ÿr bõx. Nhyim Jeju arÿm kãkam nhÿ nhyim kôt ba djwÿnh ar arÿm kôt nhÿ. Nhyim kam ar arÿm kã kujaten amũ tẽ. <sup>24</sup> Tẽ: nhyim ar aêrbê na 'itÿx ruw nhyim kôk 'itÿx wabê. Nhyim ngô arÿm aben pumjuw ne kã nhĩby ato. Nhyim be, Jeju wãnh arek õto nõ. <sup>25</sup> Nhyim kam kôt ba djwÿnh ar 'ÿr tẽn arÿm tok ne kum,

—Bênjadwÿr djwÿnh, gop ar ipytã. Arÿm gwaj badjãr 'ÿr, ane.

<sup>26</sup> Nhyim arkum,

—Nã gãm ar amim imar rere:kre. Mÿkam ne gar atĩn prãm? ane. Ne kam kãjmã djan kôkmã bẽn tÿx. Nhyim arÿm tu ngô mên nõ.

<sup>27</sup> Nhyim ar te kute marmã kam no tyn djan abenmã kum,

—Mÿj got on nhyim kôkmẽ ngô raxmẽ tu kabẽn kôt ã amijo ane? ane. Nãm ar ã abenmã ane.

*Me karõ punu krãptĩ: kute ar me'õo ba.*

*Mak 5.1; Ruk 8.26*

<sup>28</sup> Nhyim kam Jeju arÿm ngô nhikjênmã bõx ne wabi. Kam ne pyka nhidjibê Djeradja. Nãm wabi nhyim me'õ amãnhkrut ar arÿm kajpa. Me karõ punu ne ari aro ba. Me tykmã kikkre kurũm ne ar mõ. Ar àkrê: nhyim me te ar umaje ne te ar'ãnh tẽmmã. <sup>29</sup> Nãm ar Jeju kajpan arÿm kãj bê amran aminêje kum,

—Mÿj nã Metĩndjwÿnh Kra? Djãm me inhõ akati kêttri dja ga me imã me itokry jadjã? ane.

<sup>30</sup> Nhyim nĩjar angrõ jamy krãptĩ: àkur mõ. <sup>31</sup> Nhyim kam me karõ punu kum amijo a'uw ne kum,

—Aje me ikujaêk prãm jabej ba me angrõ jamy krãptĩ:wãmã wadjã, ane.

<sup>32</sup> Nhyim kum, “Aj mã”, ane. Nhyim me arÿm kato. Katon arÿm angrõ jamy krãptĩ:mã wadjã. Wadjã nhyim arÿm angrõ jamy kunĩ prõt ne. Pyka krã'ÿr'ã aparmã prõt tÿ:x ne arÿm imôtikam nox ne aminhimex ne. <sup>33</sup> Nhyim angrõ jamy pumũnh djwÿnh ar omũn arÿm krĩraxmã prõt ne. Prõt ne arÿm bõx. Bõx ne arÿm prĩne memã mÿjja kunĩ'ã ajarẽ. Ne ajte me karõ punu kute ar o baja'ã ajarẽ. <sup>34</sup> Nhyim krĩraxkam me krãptĩ kute Jeju pumũnhmã 'ÿr mõ. Ne kam arÿm omũn kam anon kum,

—Gop me inhõ pyka kurũm akato, ane.

## 9

*Kute me'ô jakryo mex.*

*Mak 2.1; Ruk 5.17*

<sup>1</sup> Nhyam kam Jeju ar arým kàkam wadjàn nox ne arým akàx nhikjêrnã rê. Ne kam wabin krîrakkam ar ba tùmjamã tèn bôx. <sup>2</sup> Nhyam ar kwý kum me'ô jakryo bôx. Ikwã djâkam nôr râ'ã nhyam ar kum o bôx. Nhyam amim,

—Be, ar ja ne ar tu amim ikamnhîxkumrêx, ane. Ne me'ô jakryjamã kum,

—Akmere, on akînh. Jakam ne ba arým ajaxwe kunî maro aknon kam ingyryk kêt ne, ane. Djã nãm tẽmbê me'ô jakryo mex got? Kati, nãm amidjêje nèn kum jabit jarê nhyam êje nô. Jeju ta ne axweo akno.

<sup>3</sup> Nhyam wãnh Môjdjê kukràdjã mar djwýnh kwý arým amim,

—E kum be, me'ô ja ne ajmãn Metîndjwýnh japrýo djan amijo Metîndjwýnh dja. Metîndjwýnh pydji ne kute me axweo biknorn mekam ngryk kêt, ane. <sup>4</sup> Nãm me ã ôkre kadjwýnhbê anhÿro kumex nhyam arým tu me kuman memã kum,

—Mýkam ne ga me anhôkre kadjwýnhbê ijo kajgon ijaprýo akumex? <sup>5</sup> Ê, ba me amã mýjja amãnhkrut jarê. Mýj ne amirît, nèn? Ba ren kum, “Ba arým ajaxwe maro aknon akam ingyryk kêt”, ane. Nâr kon, “On kãjmã djan tẽ”, ane. Mýj ne ren amirît, nèn? Nã bãm ren kum, “Ba arým ajaxwe maro aknon akam ingyryk kêt”, ane nhyam amirît kêt kumrêx ne. Tãmbit ne amirît kêt.

Nhyam be, kãjmã me ku'ê, ije ren me'omã kum, “Kãjmã djan tẽ”, ane nhyam ren arým amirît. Tãmbit ne amirîtkumrêx. <sup>6</sup> Dja ba kum, “Kãjmã djan tẽ”, anen arým o mex ga me arým omün arým amim, “Be ga, Jeju kute me'ô jakryo mexja pumũ. Be, djãm kute me axweo biknor kêt got? Mrãmri ne Metîndjwýnh

arým amijo ï ne pyka jakam amik-abênkôt ari me axweo biknoro ba”, ane. Me aje amim ja jarênh kadjy dja ba me'ô jakryjao mex. Nãm ã Môjdjê kukràdjã mar djwýnhmã anen arým tu me'ô jakryja'ÿr akêx ne kum,

—On kãjmã djan anhikwã djã mýn anhûrkwãmã o tẽ, ane. <sup>7</sup> Nhyam kam arým me aêrbê kãjmã djan ikwã djã mýn ûrkwãmã o tẽ. <sup>8</sup> Nhyam me krãptî omün kam no tyn kumex ne amim,

—Ê, arým ne djãm mrãmri o mex nhyam mrãnh mexja pumũ. Mrãmri ne kabênkumrêx. Djãm kute me axweo biknor kêt got? Mrãmri kute Metîndjwýnh kabênkôt me axweo biknorkumrêx. Ga, kute kam me'ôo mex nhyam mrãnh mexkumrêxja pumũ. Metîndjwýnh mexkumrêx, ane. Nãm me krãptî: ã amim ane.

*Kute amikôt Matêu kamênh.*

*Mak 2.13-15; Ruk 5.27-29*

<sup>9</sup> Nhyam kam Jeju arým tẽ. Tẽ: nhyam me'ô bẽnjadjwýr bajtemmã pi'ók kaprîo atom djâkam nhÿ. Îdjibê ne Matêu. Nhÿ nhyam arým omün kum, “Amrê mã ikôt ajkamê”, ane. Nãm kum ane nhyam Matêu arým amim kabên man kãjmã dja. Kãjmã djan arým kôt ajkamê.

<sup>10</sup> Nhyam kam arým Matêu nhûrkwãkam tèn bôx ne arým ô kwý krêno nhÿ. Nhyam bẽnjadjwýr bajtemmã pi'ók kaprîo atom djwýnh krãptî bôx ne Jejumê ro'ã nhÿ. Nhyam we me axwedjwý ikô'ã nhÿ. Me krãptî ne me nhÿ. Jeju kôt ba djwýnh ne ar Matêumê ro'ã nhÿ. <sup>11</sup> Nhyam mebê pardjêu arým me ja pumün arým Jejukôt ba djwýnh arkum,

—Je tô, djãm me wã axwe ngri got? Mýkam ne ar anhô ujarênh djwýnh me ro'ã ô kwý krêno nhÿ? Bẽnjadjwýr bajtemmã pi'ók kaprîo

atom djwýnhmê me axwemê ro'ã õ kwý krêno nhÿ, ane.

<sup>12-13</sup> Nhyim Jeju arÿm ar kabên ma. Ar kute,

—Djãm me wã axwe ngri got? anhÿrja Jeju arÿm kuman arkum,

—Djãm me mex'ÿr ne me kane djwýnh mrã? Kati, me kanê'ÿrbit ne me kane djwýnh mrã. Badjwý ne ba me axwe'ÿr tẽ. Djãm we me amex'ÿr ne ba tẽ? Kati, me axwe'ÿr ne ba tẽ. Me tãm ne ba amiwÿr me ku'uw. Me amikam kaprîren wãnh axwemã irern iwÿr amijo akêxmã ne ba amiwÿr me ku'uw. Nhyim be, amrêbê: ne Metîndjwýnh me bakukãmãremã kum,

“Djãm me aje imã mry bôr djãm imã kÿnh? Kati. Me amã me kaprî. Ja ne imã kÿnh”, ane.

Mÿj'ã ne Metîndjwýnh me bakukãmãremã ja jarê? Ja dja gar tẽn ama. Mÿkam? Bir, me axwe ne ba amikôt me ku'uw. Nãm ã Jeju mebê pardjêumã ane.

*Me kukràdjã tùm'ã ujarênh.*

*Mak 2.18; Ruk 5.33*

<sup>14</sup> Nhyim kam Djuão. Kubê ngômã me angjênh djwýnh. Djuãokôt ba djwýnh ar arÿm Jeju'ÿr bôx ne kum,

—Ar ba ne bar ije Metîndjwýnhmã amijajbur kumex. Mebê pardjêudjwý ne me kute kum amijajbur kumex. Nhyim be, akôt ba djwýnh ne ar kute kum amijajbur kêt. Mÿkam? ane.

<sup>15</sup> Nhyim Jeju tu amijã mjên jarên amikôt ba djwýnh ar'ã mjênmê ro'ã ar ar ba jarên arkum,

—Ga, me kute abenã mjênmê prômê rênha pumû. Djãm ar mjênmê ro'ã ar baja kaprîin mÿr got? Arkati. Ar kÿnhkumrêx ne ar õ kwý krên rax. Adjÿm, dja apÿnh akati amrê mörjakam me Ar kubê mjêno tÿm ne mã o mō. Nhyim kam gêdja ar kaprîren arÿm Metîndjwýnhmã amijajburo ba. Nãm ã Jeju Djuãokôt ba djwýnh

arkum ane. Amijã ne mjên jarê. Ne amikôt ba djwýnh'ã ne mjênmê ro'ã ar ar baja jarên arÿm ã arkum ane. Mÿj'ã ne me kute Ar kubê mjêno tÿmjia jarê? Bir, ta amijã ne arê. Jeju dja meo tÿm ne mã o mō. Kambit dja kôt ba djwýnh amijajburo ba.

<sup>16</sup> Be, ga, me kute jãm amim Jeju kukràdjã ny mar ne ajte kute jãm amim me kukràdjã tùm marja pumû. Me kute amê kukràdjã maro bakam umar mex kêt. Me kute mrãmri ne kubêkã ny kubêkã tùm'ã ir pyrãk ne ajte kute pidjô kangô ny mrykào ngôn tùm kam runh pyrãk. 'A ne Jeju ajte memã kum,

—Ga, me'õ nhõ kubêkã tùm ne arÿm 'yrja pumû. Nhyim kam arÿm kubêkã nyn pôn kêt. Djã ne me tùmja'ã kudji? Kati. Mÿkam? Bir, dja me kupõ nhyim arÿm nykam é abenmã wangij. Abenmã wangij ne arÿm tùmja kadjô. Nhyim kam arÿm 'yr nyja kute 'yr tùmja jakrenh mex ne. <sup>17</sup> Ga, me'õ nhõ mrykào ngônha pumû. Me bakukãmãre ne me õ mrykào ngôn. Ga, mrykào ngôn arÿm tùm ne ngrãja pumû. Djã ne kam uba kangô ny ru? Kati. Mÿkam? Bir, dja nör 'ãtùm nhyim uba kangô arÿm kadjàn ajmrô nhyim ngôn arÿm igot tẽn arÿm ajkatôr. Nhyim arÿm kangô ajkapî nhyim ngôn arÿm punu ne. Be, kam mex rã'ã kadjy ne me kute mry kào ngôn ny, kà rerekrekambit kangô ny runh prãm. Nãm ã Jeju arkum ane. Gêdja me amim Jeju kukràdjã nybit maro ban arÿm mar mexkumrêx. Nhyim be, gêdja me amim me kukràdjã tùm djwý mar prãm ne arÿm umar mex kêt kumrêx. 'A ne Jeju memã ajarê.

*Kute akubyn bënjadjwÿr krao tîn.*

*Mak 5.21; Ruk 8.40*

<sup>18</sup> Kute memã ja jarênho ãmkam ne me'õ bënjadjwÿr 'ÿr bôx ne kute

kum rax jarênh kadjy tu parbê tÿm. Ne arÿm kum rax jarên kum,

—Arÿm godja ikra ni ty. Dja ga ikôt 'ÿr tèn 'ã anhikra dji gê arÿm tÿn ne, ane. <sup>19</sup> Nhyim arÿm kâjmã djan kôt tẽ. Kôt ba djwÿnhdjwÿ ne arkôt tẽ.

<sup>20</sup> Tẽ: nhyim me'õ nire kôt bôx. Kamrô apôx'ã ne arÿm amexbê 12 apêx. Nãm kôt bôx ne tu Jeju nhibûm kôt 'ã kubêkà jabu djâbit kupê. <sup>21</sup> Kute o anhÿr djwÿnhràm ne ta arÿm amim,

—Ba gop 'ã kubêkâbit mãn kupên arÿm imex ne, ane.

<sup>22</sup> Nhyim kam Jeju arÿm akêx ne omûn kum,

—Àpnhîre, on akînh. Ga ne ga tu amim ikamnhîxkumrêx ne arÿm amex ne, ane. Nhyim kam myt tâmkam mex ne.

<sup>23</sup> Nhyim kam Jeju ar tẽ. Tẽ:n kam arÿm bënjadjwÿr nhûrkwã 'ÿr bôx ne arÿm wadjã. Nhyim wãnh me kwÿ pore kakôro dja nhyim me kangao kumex. <sup>24</sup> Nhyim memã kum,

—Me on ajmã. Djã nãm kurerer wã ty got? Kati. Nãm ôto nô, ane. Nhyim me arÿm 'ã keketo kumex. <sup>25</sup> Ne arÿm kato. Nhyim kam arÿm 'ÿr tèn 'ÿr bôx ne kurerer nhikra 'amÿ. Nhyim arÿm tÿn ne kâjmã dja. <sup>26</sup> Nhyim kam me arÿm pyka kunîkôt arênho ipôk ne.

*Kute me punuo mex.*

<sup>27</sup> Nhyim kam Jeju arÿm amû tẽ. Tẽ: nhyim me'õ no rã ar amãnhkrut arÿm kôt tẽ. Nãm ar kâj bê kum amijo àmra tèn mã kum,

—Dawi tâmdjwÿ gop amã ar ikaprî, ane. <sup>28</sup> Nhyim arÿm kikremã wadjã nhyim ar no rã arÿm 'ÿr bôx. Nhyim ar kukij ne arkum,

—Djã ne gãm ar tu amim imarkumrêx? Ije ar ajo mex marja djãm mrãmri ar aje tu amim ja markumrêx? ane.

Nhyim ar kum, “Nà, Bënjadjwÿr djwÿnh”, ane.

<sup>29</sup> Nhyim kam arÿm ar no kupê ne arkum,

—Ar aje tu amim imarkumrêx kôt dja ba ã ar ajo ane, ane.

<sup>30</sup> Nhyim kam ar arÿm rît mex ne. Nhyim Jeju nêje arkum 'ã karôn kâj bê arkum,

—Kwãrîk wãnh me'ômã ijarênh kêt, ane. <sup>31</sup> Nhyim ate ar katon arÿm pyka kunîkôt arênho ipôk ne.

<sup>32</sup> Nhyim kam me Jeju 'ÿr me'õo bôx. Me karô punu ne ar me'õo ba nhyim ô'ã kabên kêt nhyim me 'ÿr o bôx. <sup>33</sup> Nhyim arÿm me karô janon kujate nhyim arÿm me aêrbê kabên mexkumrêx. Nhyim me krãptî: kam no tyn kumex ne abenmã kum,

—Mÿj me'õ ne kute me babê idjaerkam mÿjja pumûnh kêt ja'õ pumûnh? Arkati, ane.

<sup>34</sup> Nhyim be, mebê pardjêu ne me memã kum,

—Me karô punu nhô bënjadjwÿr kabênkôt ne kute me karô kujaêko ba, ane. Nãm mebê pardjêu ã Jeju'ã memã ane.

*Kum me krãptî kaprî.*

*Mak 6.34*

<sup>35</sup> Jeju ne krîrax kunîkôt memã ujarênh ny jarênho tẽ. Krîraxmê krî kryre kunîkôt memã arênho tẽ. Me bikprôn̄h djâkam memã arênho tẽ. Bënjadjwÿr djwÿnh kute amim me utâr ne ar meo ba'ã ujarênh nyja ne kâj bê memã arênho tẽ. Ne ajte me punumê me kanê kunîo mexo tẽ.

<sup>36</sup> Ne kam me krãptî: pumû. Nãm me omûn arÿm kum me kaprî: Mÿkam? Bir, me katyk ne ate ar bakam. Me kute mrãmri ne kute mrykî'âtomtio djuw mex djwÿnh kêt kam katyk ne ate ar ba pyràk. <sup>37</sup> Ne kam kôt ba djwÿnhmã kum,

—Me kute Metîndjwÿnh mar prãmja ne me kumex. Nãm me kute mrãmri ne bãy arÿm abôr tyk ne kumexja pyràk. Nhyim be, Metîndjwÿnh'ã ujarênh djwÿnh ne me ngrêre kute bãykam me âpên̄h djwÿnh ngrêreja pyràk. <sup>38</sup> Kam dja

gar me kadjy Metîndjwýnh 'uw gé me'ýr 'ã ujarênh djwýnh jano gé me memã arê nhym me kuman kam arým tu ahim markumrêx ne. Kute mrãmri ne me mrãnh ne kute me õ purkam bãy pumũnh ne mrãnh ne bõx ne kute kadjy me õ pur djwýnhmã arênh nhym me kute amũ kadjy memã arênh nhym me ban kute memã ê ja pyrãk. Dja gar ã me kadjy Metîndjwýnh 'wýro ane.

## 10

*Kute ar kubê 12 janor.*

*Mak 6.7; Ruk 9.1*

<sup>1</sup> Nhym kam amiwýr kõt ba djwýnh Ar kubê 12 'uw nhym ar bõx. Nhym ar kute kabênkõt me karõ punu janor ne kujaêk kadjy arkum amipyma jadjã. Nhym apýnh me punu djãri. Nhym apýnh me kanê djãri. Nhym ar kute kabênkõt meo mex kadjy arkum týx jadjã. Ne kam arým ar ano.

<sup>2</sup> Apýnh kute ar anorbê 12 nhidji jarênh kadjy ne ja.

Ximão. Idji 'õdjwý ne Pedru.

Ãngre. Kamybê ne Pedru.

Xijagu. Djebedêu ne kudji.

Djuão. Kamybê ne Xijagu.

<sup>3</sup> Piripi.

Batormê.

Tõme.

Matêu. Kubê ne bënjadjwýr bajtemmã pi'ók kaprõo atom djwýnh.

Xijagu 'õdjwý. Aupêu ne kudji.

Tadêu.

<sup>4</sup> Ximão 'õdjwý. Mekõt ne me kukràdjã'ã no týx.

Djuda. Idji nhikjêbê ne Ikadji. Tãmja ne Jeju kurê djwýnhmã kanga.

Apýnh kute ar anorbê 12 nhidji ne ja.

<sup>5</sup> Ar ja ne Jeju ar ano. Nãm ar apênh djã'ã arkum karõn ar ano. Nãm arkum,

—Kwãrik wãnh me bajtemmã ar amõr kêt ne kwãrik wãnh pykabê

Xamarijka krĩ'õmã ar adjãr kêt. <sup>6</sup> Mebê idjaer ne me no akunon ate ar ba kute mrãmri ne mrykĩ'ãtomti no biknor pyrãk. Me ja'ýr dja gar mõ. <sup>7</sup> Ne me'ýr bõx ne kãy bê memã kum, “Arým kãjkwakam Bënjadjwýr djwýnh kute pykabê amim õ me utãr ne ar meo ba 'ýr”, ane. <sup>8</sup> Dja gar me kanêo mex ne ajte me ï kajêkam tẽo mex ne ajte akubyn me tyko tĩn. Ne ajte mekam me karõ punu janon kujate. Ba ne ba tu kajgo ar amã adjãpênh djã'ã karõ gar maro aba. Ikudjwa tu kajgo meo mexo aba. Kwãrik wãnh memã pãnh jarênh kêt. <sup>9</sup> Kwãrik wãnh kên karýr nãr kryt jaka nãr kryt kamrêkbê kobri me kute o õ pi'ók kaprõja kwãrik wãnh byr ne ar anhõ katõk'y djãkam ir kêt. <sup>10</sup> Kwãrik wãnh ar anhõ xakuo amõr kêt. Ar akã krãkã pýnh ne ar aparkã amãnhkrut ne ar anhõ kõ pýnh dja gar o mõ. Jabit dja gar o mõ. Ar anhõ mýjja ja'õ'ã kãtãm kwãrik wãnh o amõr kêt. Ar adjãpênh pãnh dja me ta ar amã ar anhõ mýjja ngã. Nãm ã arkum karõo ane.

<sup>11</sup> Ne kam ajte arkum,

—Dja gar krĩrax 'õmã wadjãn me'õ mexja jabej. Kum ar akĩnh dja gar abej. Dja ar amã aminhũrkwã jarê gar kambit anhwã. Me kurũm ar akatorkambit ajte anhwãrkwã 'õdjwý jabej. <sup>12</sup> Dja gar me ũrkwã 'õmã wadjãn memã umar mex jarê. <sup>13</sup> Dja me mex ne kum ar akĩnh gar memã umar mex jarê nhym me arým ar akabên kõt mrãmri umar mexkumrêx. Nãr godja me kum ar akĩnh kêt jabej dja me umar mex kêt ne. <sup>14</sup> Godja me'õ kum ar akĩnh kêt ne kute akabên mar prãm kêt jabej aparkã'ã me õ pyka ka'u. Me ũrkwã kurũm nãr me õ krĩrax kurũm ar akator kutã ar aparkã'ã me õ pyka ka'u. Aje me kute akabên mar prãm kêtjao amirĩt nhym Metîndjwýnh kute omũnh ne amũ 'õkam kute memã pãnh jarênh kadjy me õ

pyka ka'u. <sup>15</sup> Ba ar amã arê gar ama. Amrêbê: me bakukãmãrekam ne me krîraxbê Xôtômamê Gomorakam axwekumrêx. Dja î Metîndjwýnh kute me axwemã pãnh jarênh kadjy akati bôx nhyim me arým tokry. Dja ajbir krîrax jakamdjwý me axwe pãnh tokry:. Ne tokryo Xôtômakam me jamê Gomorakam me ja jakrenh me:x ne. Mrãmri ne ba ar amã arênhkumrêx, ane. Jeju ã arkum 'ã karôo ane.

<sup>16</sup> Ne kam ajte arkum,

—Dja ba ar ajano gar arým aje mrãmri ne mrykî'ätomti kute rop djâkrê katikôt ar ba pyrâk. Amijã ano tÿx kute mrãmri ne kangã amijã no tÿx pyrâk. Ne ar ajaxwe kêt kute mrãmri ne tut axwe kêt pyrâk. <sup>17</sup> Aminêje rît. Mÿkam. Bir, godja me ar ajo rôrôk ne ar ajo mō. Nhyim kam me krãptî kute ar akukjêr kadjy arým ar ajã akuprō. Ar ajã akuprō nhyim me arým ar akaprêprêk. Mebê idjaer bikprōnh djâkam ar akaprêprêk. Mry kã punuo ar akaprêprêk ne. <sup>18</sup> Imã ar adjâpênhkam dja me ar ajo rôrôk ne ar apa 'amÿn arým me bēnjadjwýr kabem ar apumjuw. Ne me bēnjadjwýr rûnh kabem ar apumjuw gar arým ijã memã amijarê. Nhyim me me bajtem kabem ar apumjuw gar arým ijã memã amijarê. <sup>19</sup> Godja me ar ajo rôrôk ne ar ajo mōn me kabem ar apumjuw kwârîk wãnh ar amikukãm amim, “Mÿj dja ba aminêje memã ikabên on”? anhÿr kêt. Mÿkam? Bir, myt tãmkam dja ar amã akabên jangij. <sup>20</sup> Djãm ar ga dja gar amikabên jarê? Kati. Ar Abãm djwýnh Karō dja ar amã amikabên jarê gar arým amũ memã arê. Nãm Jeju ã arkum 'ã karôo ane.

<sup>21</sup> Ne kam ajte arkum,

—Me kamy dja kurê djwýnhmã kamy kanga nhyim me arým me kupa. Nhyim me bãm djwý dja kurê djwýnhmã kra kanga. Nhyim me

kra dja me kum bãmme nã kurê ne memã ar kanga nhyim me ar kupa. <sup>22</sup> Imã adjâpênhkôt dja me kunî kum ar akurê. Dja gar ikôt ar aba tÿx rã'ã:n ijã adjukanga kêt ne kam 'ã aminhinomã amimê ba arým ar apytã. <sup>23</sup> Godja me krîrax 'ôkam kum ar akurê ar ajo ajkê gar krîrax 'ôdjwýmã aprôt. Dja gar apÿnh mebê idjaer nhō krîraxkam me akreo tē:n o atēm nhinomã mēnh kêt ba arým bôx. Ba ije amijo inhî ba arým ar awÿr bôx. Nãm Jeju ã arkum 'ã karôo ane.

<sup>24</sup> Ne kam ajte arkum,

—Ê, djãm ar kute kabên mar ar o baja kute raxo ar ô ujarênh djwýnh jakrenh? Kati. Nâr, djãm ô âpênh kute raxo ô bēnjadjwýr jakrenh? Kati. <sup>25</sup> Kute kabên mar ar o baja kute ar ô ujarênh djwýnh kôt ar amijo bakambit ne mex. Ô âpênh kute ô bēnjadjwýr kôt ar amijo bakambit ne mex. Ga, me kum ikurê ne imã me karō punubê Bedjêbu jarênhu baja pumũ. Djãm me kum ar akurê kêt mã? Kati. Ar gadjwý dja me ar amã mÿjja punu jarênh kume:x. Ar aje araxo ijakrenh kêt kam ne ikôt ar amijo abakam dja me ar gadjwý ar amã mÿjja punu jarênh kume:x.

<sup>26</sup> Djã nãm me kadjwýnhbê axweja bipdjur rã'ãmã? Kati, dja î amirît ne. Nhÿnh ne mÿjja bipdjur'ô me kute omũnh kêt mã? Ne nhÿnh ne me kute mÿjja pudjur'ô mar kêt mã? Adjÿm, dja î kunî amirît ne. Mÿjja pudjur, mÿjjao bipdjurja dja î kunî amirît ne. <sup>27</sup> Ije akamãtkam ar amã mÿjja jarênh dja gar a'uri kãj bê memã arê. Ije ar ajamakri ijajkwa momokkam mÿjja jarênh dja gar kikre nhimōk po'ã djan kãj bê memã arê. <sup>28</sup> Ne kwârîk wãnh gar amã me kute ar aparja pyma kêt. Me ja gêdja me ar akrãkãbit par kajgon kam ijukri kute ar akadjwýnhbê ajmã ar ajo kêt. Kati, ba ar amã arê. Me'ô pydji dja ga ar amã uma.

Kute me bñn ne ijukri me biknor tokry djâkam me rênh jabit dja ga ar amâ uma. Be, ba ar amâ are. Metîndjwýnhbit dja gar amâ uma. <sup>29</sup> Kwênhne amânhrut ne pânhrigire, pânhrngônhrponh pydji. Nhyr kam kwênhr pydji pykabê tým ne arým ty. Djâm Abâm djwýnh kute mar kêt? Kati. Kute kwênhr mar. <sup>30</sup> Ne ar akîdjwý kute mar. Arým Abâm djwýnh kute ar amâ abenâ ar akî'â akre mar. <sup>31</sup> Kam, djâm ar atîhr prâmmâ? Kati. Kwârîk wânhr. Te kwênhr krâptî: nhyr kum kwênhr kînh ngrire. Nhyr be, ar gajbit. Metîndjwýnh kum ar akînhkumrêx. Tâmr dja gar aman atîhr prâmr kêt. Nâm Jêju â arkum karôo ane.

<sup>32</sup> Ne kam ajte arkum,

—Kam me'ô kute amijo ipytâr ne me ipôkri memâ kum, “Ba ne ba ije amim Jêju mar”, anhyro baja. Badjwý dja ba tâmwâ'â kâjkwakam Ibâmmâ kum, “Nâ, ba inhôbikwa ne wâ”, ane. <sup>33</sup> Nâr, dja me'ô me ipôkri memâ kum, “Kati. Ije Jêju mar kêt”, ane. Badjwý dja ba tâmwâ'â kâjkwakam Ibâmmâ kum, “Kati. Ije tâmwâ mar kêt”, ane.

<sup>34</sup> Djâm ibôx nhyr ikam me umar mexmâ? Kati. Dja ba bôx nhyr me arým imýr jabej abeno kurê djwýnh ne aben pa. <sup>35</sup> Amrêbê: ne me me bakukâmâremâ kum,

“Dja me'ô my kum bâm kurê. Nhyr me'ô nire kum nâ kurê. Nhyr prô kum umrêngêx kurê.

<sup>36</sup> Me'ô nhûrkwâkam dja ta ôbikwa kum aben kurê.”

Nâm me â me bakukâmâremâ ane. Jakam dja me imýr jabej â abeno ane. Me kute me bakukâmâremâ arênhr kôt dja me â abeno ane.

<sup>37</sup> Godja gar ajô imâ, “Ba akôt apê”, anen amâ abâmbit nâr amâ anâbit kînh ne amâ ikînh ngrire ba arým imâ ikôt adjâpênh kînh kêt. Godja amâ akra mybit nâr amâ akra nibit kînh ne amâ ikînh ngrire ba arým imâ ikôt adjâpênh

kînh kêt. <sup>38</sup> Dja gar ajô amâ ikôt atokry pyma ne ikôt aje anhôm pîte'y mýnh prâmr kêt ne ikôt abikamênh prâmr kêt jabej ba kam imâ ikôt adjâpênhja kînh kêt. <sup>39</sup> Dja gar ajô atînmâ aminên arým akuno. Nâr gar ibê aminê kêt nhyr me arým abî. Imâ adjâpênhkam arým abî. Kwârîk wânhr râ'â. Metîndjwýnh dja arým atînkumrêx kadjy apytâ ga arým kôt atîhr ne ar aba râ'â: râ'â ne. Nâm â Jêju arkum 'â karôo ane.

<sup>40</sup> Ne kam ajte arkum,

—Dja gar me'ýr bôx nhyr me kum ar akînh. Me kum ar akînh o arým kum badjwý ikînh. Ne kum ikînh o arým kum kute ijanor djwýnhdjwý kînh.

<sup>41</sup> Dja Metîndjwýnh kukwakam memâ kabên jarênh djwýnh me'ýr bôx nhyr me kum kînh. Kubê Metîndjwýnh kukwakam memâ kabên jarênh djwýnhkam kum kînh. Metîndjwýnh dja kam arým memâ o pânhr ne. Metîndjwýnh kute kukwakam ujarênh djwýnhmâ âpênh o pânhr kôt dja arým memâ o pânhr. Dja me'ô katât kute amijo bakumrêx me'ýr bôx nhyr me kum kînh. Me'ô katât kute amijo bakam me kum kînh. Metîndjwýnh dja arým memâ o pânhr ne. Metîndjwýnh kute me'ô katât kute amijo bajamâ o pânhr kôt dja memâ o pânhr. <sup>42</sup> Dja me'ô ikôt ba djwýnh rax kêt'ô bôx nhyr me kum ngô ngâ. Me'ôja kute ikôt bakam kum ngô ngâ. Ba dja ba mrâmri o pânhr mex. Me kute o djuw mex ngrire jao pânhr mex. Nâm â Jêju arkum 'â karôo ane.

## 11

*Djuã'o'ã ujarênh.*

*Ruk 7.18*

<sup>1</sup> Ne arým kôt ba djwýnh Ar kubê 12mâ 'â karô pa. Arkum 'â karô pan kam arým amû tê. Pykabê Garrêjakam apýnh krî rûnh djâri kute memâ kukradjâ jarênh ne kute kâj bê 'ã me akre kadjy ne amû tê.

<sup>2</sup> Nhyam kam me Djuãomã Jeju jarê. Djuãobê ne ngômã me angjênh djwýnh. Me kute arým Djuãobê ijêkam ne me kum Jeju jarê. Nãm me Djuãomã kum,

—Jeju ne arým apýnh mýjja pumũnh kêt nhípêx, ane nhyam arým kuma. Kuman arým Jeju'ýr amikôt ba djwýnh ar amãnhkrut jano. <sup>3</sup> Ar kute Jeju kukjêrmã ne Djuão ar ano nhyam ar arým 'ýr tẽn 'ýr bõx ne Jejumã kum,

—Metíndjwýnh kute me imã me'õ janor nhyam bõxmã, kute me imã arênhja djãm ga? Nàr kon godja gwaj me'õkam ama? Nãm ar ã Jejumã ane.

<sup>4</sup> Nhyam Jeju arkum,

—Dja gar akubyn Djuão'ýr tẽn kum arê. Aje ajbir mýjja mar ne omũnhja kum arên kum, <sup>5</sup> “Me no rã arým rít mex. Nhyam me mrãnh kêt arým mrãnh mex. Nhyam me ï kajêkam tê arým mex. Nhyam me amakkre kêt arým amak mex. Nhyam me tyk akubyn tïn ne. Nhyam me õ mýjja kêtja nhyam me kàj bê memã ujarênh ny jarênh ba”, ane. Tãm dja gar aman Djuãomã arê gê kuma. <sup>6</sup> Dja me memã ijarê nhyam me ibê amijo akêx kêt, me ja ne me kĩnhkumrêx. Nãm ã Jeju Djuãokôt ba djwýnh arkum ane. Nhyam ar kuman arým katon tê.

<sup>7</sup> Nhyam kam Jeju arým me krãptĩ:mã kum,

—Mýj ne ga me aje kapôt kukritkam omũnhmã mõ? Djãm Djuão kute bõti kòk djàbêrkam ari amijadjwýr pyræk? Djãm ari memã kabên jadjuw? Kati. Nãm katàt memã kabên jadjwýrkumrêx. <sup>8</sup> Bir, mýj ne ga me aje omũnhmã mõ? Djãm Djuão ne kubêkã pãnh rax ne akrita jangij? Kati. Nãm kubêkã pãnh ngrire jangij. Bẽnjadjwýr rũnh nhõ kikretikam ne me kubêkã jakrita jangij. Nhyam be, Djuão ã kã kute anhýr kêt. <sup>9</sup> Nhyam bir, mýj ne ga me aje omũnhmã mõ? Djãm

Metíndjwýnh kukwakam memã ujarênh djwýnh? Nã. Tãm. Nhyam be, Djuão ne raxo kute Metíndjwýnh kukwakam memã ujarênh djwýnh kunĩ jakrenh. <sup>10</sup> Amrêbê: ne Metíndjwýnh imã 'ã ajarê. Djuão'ã imã ajarê. Nãm imã,

“Ota ba akukãm ajã ujarênh djwýnh'õ jano kute akukãm me akre nhyam me kute mar ne akutêp kute axwemã irern katàt amijo bamã.

Kute mrãmri ne me kute me bẽnjadjwýr rũnh kutêp katàt 'ã pry jadjwýrja pyræk.”

Nãm ã Metíndjwýnh Djuão'ã imã ane. Amrêbê: me bakukãmãre bari. Nhyam me arým kabên man 'ã pi'ók no'ók ne. Ne kam me aben djô'ã arênh mõ:n arênh mõr tãmtã arým 'ýr o bõx. Tũ:mrãm me bakam-ingrãnyrekam Djuão arým kato. Katon arým abatãnh ne. Abatãnh ne arým ijã memã ujarênh ar ba. Me kute amrêbê Metíndjwýnh kabên'ã pi'ók no'ók kôt ne Djuão ijã ujarênh ar ba. Ikukãm meo mexo ba.

<sup>11</sup> Ngômã me angjênh djwýnhbê Djuão ne jakam raxo kute pykakam me kunĩ jakrenh. Djãm me'õ pykakam ar ba 'õ raxo kute Djuão jakrenh? Kati. Mrãmri ne ba me amã ja jarênhkumrêx. Nhyam be, dja ï kàjkwakam Bẽnjadjwýr djwýnh amim me utàn meo ba. Nhyam kam dja me kunĩ raxo Djuão jakre. <sup>12</sup> Nhyam be, on jakam Djuão ra:x. Nãm memã arênh ban memã kum, “Kàjkwakam Bẽnjadjwýr djwýnh kute amim me utàn ne ar meo ba 'ýr”, anhýro ba. Nhyam kam me krãptĩ kuman amim Bẽnjadjwýr djwýnh mar prã:m. Me kute mrãmri ne me krãptĩ kute kikre ngriremã ngjêx prãm ne kute 'ã kute aben nhingãnhja pyræk. Me kute ari 'ã ikjêo aben rênh ne 'ã kute aben nhingãnh kumex ja pyræk. Ne jakam me kute o anhýr rã'ã. <sup>13</sup> Amrêbê: me me bakukãmãremã Bẽnjadjwýr djwýnh bõxmã arê.



Metîndjwýnh kukwakam ujarênh djwýnh aben kukâm Bênjadjwýr djwýnh bôxmã arê:. Môj djêdjwý arê: nhyam kam me bakamin-grãnyrekam Djuão arým katon ajte tãm jarê. Bênjadjwýr djwýnh bôx jarê. <sup>14</sup> Amrêbê: ne me me bakukãmãremã kum, “Dja me’ô kute Erij pyrãk bôx”, ane. Ba on ar amã me’ô jarê gar ama. Djuão ne kute Erij pyrãk ne arým bôx. Ar aje imar prãm jabej dja gar arým ima. Nãr ar aje imar prãm kêt jabej arým imar kêt. <sup>15</sup> Gop ar ajamak mex jabej tu amim ikabên ja markumrêx. Nãm ã Jeju me krãptimã ane.

<sup>16</sup> Ne kam ajte memã kum,

—Je tô mýj got ba me akamin-grãny’ã akre? Mýj ne ga me aje urãk? Nã gãm me aje me prîre mýjja kam kînh kêt pyrãk. Ga me, me prîre kikre kabem krîn kute abeno bixaêr baja pumû. <sup>17</sup> Ar ja ne ar ar jamã kabên ne arkum, “Gwaj bakînh katio dja, gwaj babixaêro dja ne ngôtãx à’ãk”, ane.

Nhyam ar kum, “Waj, ar ibixaêr prãm kêtê. Ar itor prãm kêtê. Ar imã wã kînh kêtê”, ane.

Nhyam ajte arkum, “Gwaj bamýr kati mãn o nhý”, ane.

Nhyam ar, “Kê, wajre. Ar imã kînh kêtê. Ar imýr prãm kêtê”, ane.

Be, nã gãm me aje me prîre pyrãk ne amã ja kînh kêt ne ajte amã jadjwý kînh kêt. <sup>18</sup> Djuãobê ngômã me angjênh djwýnh ne me awýr bôx. Nãm amijajbu:n kute uba kangôo kôm kêt ne ar ba ga me amã kînh kêt ne kam we, “Nãm ajbã. Me karô punu ne ar o ba nhyam ajbã”, ane. <sup>19</sup> Nhyam be, ba ne ba nrãmri gêt amijo inhî ne me awýr bôx ne me akam idjakur iban kôt ikôm iba ga me amã ikînh kêt ne we ijã, “Kê, tãmwã ne kute àkur rûnhbit mar, kum uba kangô djãnhiti”, ane. Ne we ajte ijã, “Me kute bênjadjwýr bajtemmã pi’òk kaprîo

atom djwýnhmê me axweo bit ne ôbikwa ne”, anhýr ar o aba. Nhyam be, djãm Metîndjwýnh amak punu got? Amak me:xkumrêx ne prîne kute amikukãm mýjja kunî mar ne Djuão kute amijajbur ne ar bamã ano. Ne ajte amikukãm umarkam badjwý ijano. Ije amijajbur kêt mã ijano. Nhyam kôt me amak mex ne amikukãm umar, ar ipumûn kam ôkre kadjwýnhbê amim, “Mrãmri ne Metîndjwýnh mexkumrêx ne amê ar ano.” Nãm ã Jeju memã ane. Tãm ne ja.

*Kute krîraxmã watîre jarênh.  
Mat 12.38; Ruk 10.13, 11.29*

<sup>20</sup> Nîjar krîraxkam ne Jeju mýjja pumûnh kêt ngrêre nhipêx nhyam me krãptî tu amim markumrêx. Nhyam kam arým me wãmã kabên’ô jarênh kêt. Nhyam be, amiwýr krîraxkam me ja ne Jeju arým memã kabên ne. Krîrax jakam ne arým mýjja pumûnh kêt krãptî nhipêx ne me punu krãptîo mex. Djã ne me amikam kaprîren wãnh axwemã iren ýr amijo akêx? Kati. Me kute ýr amijo akêx kêt. Kam ne arým krîrax jakam memã kabên ne memã kum,

<sup>21</sup> —ÿ, watî:re Koradjikam me wã. Watî:re Bexadakam me wã. Dja ga me atokry rax ne. Ba ren me bajtem nhô pykabê Xirumê Xidôkam ren mýjja rûnhja, mýjja pumûnh kêtja kwý nhipêx nhyam ren me omûn ren arým amrêbê amim katon ren amikam kaprîren wãnh axwemã ire. Ne ren kute kum irero amirît kadjy kubêkã kukrebê exopa jangjên ren amijã mro prã kapî. Ne ren kam iwýr ren amijo akêx. Nhyam be kati, inhô me wýnhkam me ga, Koradjikam me gamê Bexadakam me gamê me akam ne ba te mýjja pumûnh kêt kwý rax ne ipêx ga me omûnh kajgo. Omûnh kajgon amikam akaprîre kêt ne wãnh ajaxwemã anhirer kêt kumrêx ne

aje iwÿr amijo akêx kêt-kumrêx ne.  
<sup>22</sup> Ba me amã arê ga me ama. Dja ï kute me axwemã pãnh jarênh nhô akati bôx nhym Metîndjwÿnh me ajaxwemã pãnh jarê. Ga me kam arÿm pãnh atokryo me rîñã jakrenh mex. Ga me atokryo krîraxbê Xirumê Xidô jakrenh mex ne.

<sup>23</sup> Ne kam krîraxbê Kapanakam me gadjwÿ djãm mrãmri me abênjadjwÿr rûnho kâjkwa'ÿr abôxmã? Kati, aparmãbit dja ga me me biknor tokry djãmã wadjã. Krîraxbê Xôtômakam me axwe: nhym Metîndjwÿnh arÿm meo akno. Ba ren mekam mÿjja pumûnh kêt nhîpêx kute me akam ije mÿjja pumûnh kêt nhîpêx ja pyrâk nhym ren me wãnh axwemã ire nhym ren krîrax arek ãm rã'ã. Krîraxbê Xôtôma ren arek ãm rã'ã. Nhym be, kati. <sup>24</sup> Ba me amã arê ga me ama. Dja ï kute me axwemã pãnh jarênh kadjy ô akati bôx. Dja Metîndjwÿnh memã pãnh jarê ga me kam arÿm atokry raxo Xôtômakam me ja jakrenh mex ne. Nãm ã Jeju krîraxkam me jamã ane.

*Me katykmã 'ã ujarênh.*

<sup>25-26</sup> Nhym kam Jeju Bãmmã kum, —Djünwã, ota ga anhô kâjkwa, anhô pyka djwÿnh. Amã ne ba amikînh jarê. Nã gãm me amikukãm umarmê me kute mÿjja mar rûnhjabê mÿjja ja pudju. Ne kam me kute amijo prîre pràbê amijo rûnh kêtjamã mÿjjao amirît ne. Mrãmri Djünwã, nã gãm ã aje anhÿrkam mrãmri mexkumrêx. Ga adjukaprîkam ne ga amim me'ã karôn arÿm ã meo ane. Ba kam badjwÿ ikînhkumrêx ne wãm amã amikînh jarê, ane.

<sup>27</sup> Ne kam ajte me krãptîmã kum, —Arÿm ne Ibãm imã ô mÿjja kunî kanga. Ba ibê Metîndjwÿnh Kra. Djãm me'ô ne kute prîne imar? Kati. Ibãmbit ne kute imar. Djãm me'ô ne kute prîne Ibãm mar? Kati. Bajbit ne ba ije prîne mar. Ije

me'ômã Ibãmo amirît prãmja ad-jwÿnhdjwÿ kute mar.

<sup>28</sup> Pykakam me akukràdjã punu ne ga me aman kôt ar amijo aba. Ne kam arÿm akaprîre kute mrãmri ne me jênh pytî turn o ban kam kaprîja pyrâk. Kam ne ga me akatyn akaprî:re. Amrê me akunî iwÿr tèn ikam atyk djã kêt ne ikam akôkam kôt. <sup>29-30</sup> Nãm me mry bàri kute jênh bjêro mrãnh kadjy ne umar mex kadjy mutbê pîo kapa. Ikukràdjã mex ne kute mry mutbê pîo kapaja pyrâk. Dja ga me amim ikukràdjã mex man kôt ar amijo aba kute mrãmri ne me kute mry bàri mutbê pîo kapa ja pyrâk. Djãm aje ikukràdjã kôt ar amijo abakam adjumar punumã? Kati. Kam adjumar mexkumrêx. Adjumar mex kute mrãmri ne me kute mry mutbê pî kajkrito kapa ja pyrâk. Djãm ije me amã ino katormã? Djãm ije amijo idjamramã? Kati. Ba ne ba memã iprî mex ne meo iban ije amijo ingrîre kadjy amimar. Kam dja ga me ikukràdjã kôt ar amijo aba nhym me abê tÿx kêt-kumrêx ne. Kute mrãmri ne jênh kajkrit mrybê utî kêt pyrâk. Kam dja ga me ikukràdjã kôt ar amijo aban arÿm akadjwÿnhbê atyk djã kêt. Nãm ã Jeju me krãptîmã ane.

## 12

*Pi'ók ràràr mÿr jabej me kum kurê.*

*Mak 2.23; Ruk 6.1*

<sup>1</sup> Ne kam pi'ók ràràrkam Jeju pur katikôt tẽ. Nhym kôt ba djwÿnh ar kôt môn arÿm kum prãm ne mômã bàygogo 'y nhikên mrãnhkôt ngãnh ne amijajkwamã rênho mô. <sup>2</sup> Nhym kam mebê pardjêu ar omûn kum,

—Je tô mã ne akôt ba djwÿnh ar arÿm nê? Pi'ók ràràrkam ne me tyk djã kêt djã. Me kute pi'ók ràràrjakam mÿjja jao anhÿr kêt. Me tûmre ne me ta kukràdjãkôt mã me babê uma. Me kute pi'ók ràràrkam

mýjja kupênh kêt. Kambit ne me tyk djâ kêt djâ. Mýkam ne akôt ba djwýnh ar ã ar o anhýro ba? ane. <sup>3</sup>Nhym kam Jeju memã kum,

—Kê, djâm me aje Metîndjwýnh kabên'ã pi'ók no'ókjadjwý pumûnh kêt? Djâm me aje me bakukãmãrebê Dawi'ã ujarênhja pumûnh kêt? Ê, Dawi arkum prã:m. <sup>4</sup>Kum prã:m nhym Dawi arým Metîndjwýnh nhürkwãmã wadjàn djwý byn kukrên kam kôt ar têm jamãdjwý kungã nhym ar arým kukrê. Djwý me kute Metîndjwýnhmã örja tãm ne kubyn kukrên arkum kungã. Metîndjwýnh nhö djwý ja ne me kätãm kute kur kêtumrêx. Me kadjy Metîndjwýnh mar djwýnhbit ne kute kur. Nhym be, Dawi ta ne tu kukrê. Nhym kam me kute kum axwe jarênh kêt. Djâm me aje ja mar kêt? Ga, me kute Dawimã axwe jarênh kêtja pumû. Ne kam ikôt ba djwýnhmêbit ar imã ar ijaxwe jarê. Je tô mýkam?

<sup>5</sup>Ba ajte me amã arê ga me ama. Mýj ne me kadjy Metîndjwýnh mar djwýnh pi'ók rãrãrkam nê? Mýj ne me me tyk djâ kêt djâ nhö akatikam nê. Djâm me aje me'ã Môjdjê kukràdjã mar kêt got? Djâm me aje 'ã pi'ók no'ók pumûnh kêt got ga me imã akabên ne? Nãm me pi'ók rãrãrkam Metîndjwýnh nhö kikretikam tu àpênh ba. Ne kadjy kum mry bôro bao tu àpênh ar ba. Djã ne Metîndjwýnh kam memã axwe jarê? Kati. Ga, me kute me kadjy Metîndjwýnh mar djwýnhmã axwe jarênh kêtja pumû. Ne kam ikôt ba djwýnhmêbit ar imã ar ijaxwe jarê. Je tô mýkam?

<sup>6</sup>Ba ajte me amã arê ga me ama. Ba ne ba Metîndjwýnh nhö kikretikam ipydji irax ne ije kam me àpênh'ã memã karö djwýnh. <sup>7</sup>Ga me ren Metîndjwýnh kute me bakukãmãremã kabên jarênhja ma. Nãm memã kum, “Djâm me aje imã mry bôr djâm

imã kïnh?

Kati. Me amã me kaprî. Ja ne imã kïnh.”

Nãm ã Metîndjwýnh me bakukãmãremã ane. Ga me ren Metîndjwýnh kabên ja man ren amã me kaprî. Ne ren amã me kaprîkumrêx ne ren ar axwe kêtjamã axwe jarênh kêt.

<sup>8</sup>Ba me amã arê ga me ama. Ba ije amijo inhî ne me awýr irwýk ne ba inhö pi'ók rãrãr djwýnh. Kam gêdja ba memã, “Kwãrîk wãnh ga me kam mýjja kupênh kêt nãr kon, dja ga me jakam apên nãr kam mýjja kupênh kêt ne arek akrî”, ane. Tãm ne ja. Nãm ã Jeju memã ane. <sup>9</sup>Ne kam arým amũ tãn mebê pardjêu nhö me bikprõnh djãmã wadjã. <sup>10</sup>Nhym me'ö nhikra nhikjê jarõxja me ikô'ã nhý. Nhym me ja kute 'ã axwe nhôr kadjy Jeju kukij ne kum,

—Djâm Môjdjê kukràdjã kôt ne me me tyk djâ kêt djâ nhö akatikam meo mexo ba? Pi'ók rãrãrkam meo mexo ba? ane.

<sup>11</sup>Nhym memã kum,

—Ba me amã arê ga me ama. Godja me ajö anhö mryki'ãtomti nhym pi'ók rãrãrkam arým kre'ökam tým. Djâm ate akrãmã? Kati. Dja ga amã kaprîn 'amýn kaba. <sup>12</sup>Nhym be, Metîndjwýnh kum mryki'ãtomti kïnh ngrire. Nhym be, gu me ba ne kum me bakïnhkumrêx. Kam me kute pi'ók rãrãrkam meo mexkam Metîndjwýnh kute memã axwe jarênh prãm kêt. Mrãmri, me kute pi'ók rãrãrkam meo mexkam ne me kute kukràdjã kôt amijo ba mexkumrêx. Nãm ã Jeju memã ane.

<sup>13</sup>Ne kam arým me'ö nhikra jarõxjamã kum, “Amrê anhikra katãt”, ane. Nhym 'ýr ikra katãto dja nhym arým kum mex ne. Kum ikra mex kute ikra nhikjê mexja pyrãk. <sup>14</sup>Nhym mebê pardjêu ar mã apõx ne o aben man abenmã kum,

—Mÿj godja gwaj baje Jeju bîn kadjy on? ane. Nãm me ã Jeju'ã abenmã ane.

*Memã prÿre'ã ujarênh.*

*Mat 11.29; Ruk 22.25; Dju r 13.1;*

*Pir 2.5*

<sup>15</sup> NhyM Jeju arÿm ar kuman pyka wã kurÿm kato. Kato nhyM me krãpti: arÿm kôt mō nhyM arÿm me kunio mex. <sup>16</sup> Ne kam mã memã kum, “Dja ga me ipudju”, ane. <sup>17</sup> Amrêbê: ne Metÿndjwÿnh Jeju 'ã ajarê. Jeju dja memã prÿ mex ne memã kukràdjã jarê. NhyM kam kabên jarênh djwÿnh Metÿndjwÿnh kukwakam amÿ me bakukãmãremã 'ã ajarên memã kum,

“Metÿndjwÿnh ne memã kum,

<sup>18</sup> ‘Ota, ba arÿm amijo inhō àpênh pytã. Imã abê. Imã kÿnhkumrêx.

Dja ba kum Ikarō jano nhyM arÿm o ba. NhyM arÿm apÿnh me bajtem ba djari memã 'ã ajarê. Ije meo mex nhyM me imã axwe kêtja 'ã memã ajarê.

<sup>19</sup> Ne mekmê kabêno aben japanho ku'ê kêt. Ne memã àkjêro ku'ê kêt. Djãm kãj bê kabên nhyM me kute prykôt òkre marmã? Kati.

<sup>20</sup> Me kaprÿre kute mrãmri ne bōti kajyr kaprÿre pyrãk djãm kute meo bikênhmã? Kati. Dja memã tÿx jadja nhyM me kam arÿm kÿnh ne.

Me kute amim imar rerekre kute mrãmri ne ngônhpòk nhō kadjàtnhÿ kÿm tyk ne akrax rerekreja pyrãk.

Djãm kute memã àkjêr nhyM me 'ã ukangamã? Kati. Dja memã kabên mex jarê nhyM me arÿm amim mar tÿx. Ne memã axweo àpanho tē:n kam arÿm meo mexkumrêx.

<sup>21</sup> NhyM kam apÿnh me ba djãkam me bajtem arÿm tu

amim markumrêx.’ Nãm ã Metÿndjwÿnh memã ane.”

Nãm ã Idjaij me bakukãmãremã ane nhyM me arÿm aben djô'ã arênho mō:n arênho mōr tãmtã arÿm 'ÿr o bōx. Tÿ:mrãm me bakamin-grãnyrekam Jeju arÿm katon kam arÿm abatãnh ne ar ba. Ne kam arÿm memã prÿ mex ne memã kukràdjã jarênho ba. Idjaij kute me bakukãmãremã 'ã ujarênh kôt ne memã prÿ mex ne memã kukràdjã jarênho ban kam memã kum,

—Dja gar ipudju. Nãm ã Jeju memã ane.

*Me kute Jejumã Xatanaj nhō àpênh jarênh.*

*Mak 3.20; Ruk 11.14*

<sup>22</sup> NhyM kam me karō punu kute me'ōo baja me arÿm 'ÿr o bōx. Me karō kute o bakam ne no rãn kabên kêtikumrêx. NhyM kam arÿm o mex nhyM me aêrbê arÿm kabên ne rÿt mex. <sup>23</sup> NhyM me kunÿ kam no tyn abenmã kum,

—Bãrãm mrãmri got we kubê Dawi tãmdjwÿkumrêx, ane.

<sup>24</sup> NhyM be, mebê pardjêu arÿm me kabên man arÿm abenmã kum,

—Djãm Metÿndjwÿnh kukwakam ne Jeju bōm ar me karō punu rênho ba? Kati. Me karō punu nhō bēnjadjwÿrbê Bedjêbu. Bedjêbu kukwakam ne bōm ar me karō punu rênho ba, ane. Xatanaj'ã ne me Bedjêbu jarên ã abenmã ane.

<sup>25</sup> NhyM kam Jeju tu me kadjwÿnhbê me kabên man memã kum,

—Me karō punu ne Xatanajmã àpênh ar ba. Djãm mrãmri ne ba we Xatanaj kukwakam ò àpênh kajaêko iba? Kati. Dja me aben djwÿnh tãm kum aben kurê nhyM kurê djwÿnh arÿm meo apêx. Nãr, me ò krÿrax tãmkam nãr ò kÿkre tãmkam me krÿja godja me ja tãm kum aben kurê jabej mÿj dja me kam nê? Bir, kam dja me arÿm aben ngràn abenbê ajmã. Djãm

mrãmri ne ba we Xatanaj kukwakam ò àpênh kujaeôko iba? Kati. Djâm Xatanaj kum ò àpênh kurê? Kati. <sup>26</sup> Be, Xatanaj ren kum ò àpênh kurên kujate nhym ren ò àpênh arÿm aben ngràn abenbê ajmâ. Ren me abenbê ajmâ nhym ren arÿm kubê me ò bënjadjwÿr kêt. Nhym be, kati. Xatanaj kum ò àpênh kurê prâm kêt. Ba ren we Xatanaj kukwakam ò àpênh kujate nhym ren Xatanajdjwÿ kum ò àpênh kurê. Nhym be, kati. Xatanaj kum ò àpênh kurê prâm kêt. <sup>27</sup> Ba ren Bedjêbu kabênkôt ren bôm ar me karô punu rênho iba nhym ren mÿj kabênkôt ne anhô àpênh bôm ar me karô rênho ba? Me jadjwÿ ne me bôm me karô punu rênho ba. Djâm me adjwÿnhdjwÿ ne me we Xatanaj kabênkôt ar bôm me karô rênho ba? Ga me ren memâ ja jarê nhym ren me amâ. “Je tô djâm Xatanaj ta kute ò àpênho bikênho ba got?” ane. <sup>28</sup> Nhym be kati, Metîndjwÿnh puma puroobit ne ba ar bôm me karô rênho iba. Ga, kôt arÿm Metîndjwÿnh me awÿr bôxja pumû. Metîndjwÿnh kute me apytâr ne me akadjy bënjadjwÿr ne kute me ajo bamâ me awÿr bôxja pumû. Ja dja ga me ama. Nâm â Jeju memâ ane.

<sup>29</sup> Ne kam memâ kum,

—Nâr, mÿj dja me me'ô tÿx nhûrkwâmâ àr on? Kute kubê nèkrêxo prôt kadjy me'ô tÿx nhûrkwâmâ àr on. Bir, dja me me'ô tÿm ne uwpre. Ne kam arÿm ûrkwâmâ wadjàn kubê nèkrêxo prôt ne, ane. Mÿj'â ne me'ô tÿx jarê? Bir, Xatanaj'â. Dja me Xatanaj kumrêx djuwpren kam arÿm amim ò me ja pytà. Ja'â ne Jeju â memâ ane.

<sup>30</sup> Ne kam ajte memâ kum,

—Me'ô kum ikînh kêt ne arÿm mrãmri ijo kurê djwÿnh ne. Ne ar ikôt ba kêt ne arÿm kam amijâ, “Ba dja ba ate ikrân ar mrâ. Amidjwÿnhbit dja ba amiman amijo mrâ”, anen ate ar ba. <sup>31</sup> Kam

ba me amâ arê ga me ama. Me kute mÿjjao bikênh kunîkôt Metîndjwÿnh kute me axweo biknor prâm. Ne me kute Metîndjwÿnh japrÿ kunîkôt kute me axweo biknor prâm. Metîndjwÿnh kute me axweo biknor ne wân h mekam ngrykmâ irer prâm. Nhym be, me kute Metîndjwÿnh Karô japrÿkambit ne Metîndjwÿnh mekam ngryk rã'â ne. <sup>32</sup> Godja me'ô ijâ kabên punu jarên h jabej ije amijo inhî'â kabên punu jarên h jabej Metîndjwÿnh dja axweo akno ne kam ngryk kêt. Nhym be, godja Karô'â kabên punu jarên h jabej Metîndjwÿnh dja axweo biknor kêt ne. Ne kam kam ngryk rã'â ne. Jakam dja ngryk rã'â. Amrê akubyn Kra bôx'â akati môrkamdjwÿ dja kam ngryk rã'â.

<sup>33</sup> Djâm pidjô punukam pidjô djàn h apôx got? Nâr kon, djâm pidjô mex, pidjô djàn h jakam pidjô punu apôx got? Kati, apÿnh pidjô bàri djâri ne kam ô apôx. Ô ne parbê rôrôk ne ikwân kam bàrio amirît nhym me kôt kum apôx. <sup>34</sup> Me akamingrân yre ne ga me abê iry. Me ajaxwekam djâm me aje akabên mex 'ô jarên h prâm? Arkati. Ê, me ôkre kadjwÿnhbê ne me mÿjja kumex ma nhym kam amrê bôm ajkwa krekremê ôto'ÿr apôx nhym me kam arênho ba. Arênho ban kam arÿm memâ amijo amirît. Mex nâr axwe jao memâ amijo amirît. Kute mÿjja ô kute pidjô bàrio amirît ja pyrâk. <sup>35</sup> Nâm me ôkre kadjwÿnhbê kabên punu kumex man arÿm kabên punuo memâ amijo amirît. Nhym me ajte ôkre kadjwÿnhbê kabên mex kumex man arÿm kabên mexo memâ amijo amirît. <sup>36</sup> Ba me amâ arê ga me ama. Amrê memâ axwe pân h jarên h djâ nhô akati môrkam dja ga me amikôt Metîndjwÿnhmâ amijarê. Me aje amrêbê akabên kajgo, akabên punu jarên h kunîkôt kum arê nhym arÿm me ama.

37 Kam amrêbê me akabên mex jabej dja akabên mex kôt me amâ amex jarê. Nâr, amrêbê akabên punu jabej dja akabên punu kôt me amâ ajaxwe jarê ga me arým me biknor tokry djâkam akuno. Nâm â Jeju me krâptimâ ane.

*Me kute kum mÿjja pumũnh kêt nhipêx'ã wÿr.*

*Mak 8.11; Ruk 11.29*

38 Nhyam kam Môjdê kukràdjâ mar djwÿnhmê mebê pardjêu kwÿ Jejumâ kum,

—Ujarênh djwÿnh, dja ga mÿjja pumũnh kêt'õ nhipêx ba me omũn kôt ama, ane. Nhyam memâ kum,

39 —Me akamingrãnyre ne ga me ajaxwen mÿjjakôt ari Metĩndjwÿnhbê amijo akêxo aba. Ga, me kwÿ kum prõ djwÿnh kĩnh ngriren kute ar mebê prõo àkĩnho baja pumũ. Me gadjwÿ ne ga me amâ Metĩndjwÿnh kĩnh ngriren mÿjjakôt ari kubê amijo akêxo aba. Ne ate kam ije me amâ mÿjja pumũnh kêt nhipêx'ã ijwÿro aba. Kati. Ije me amâ ipêx ga me aje omũnh prãm kêt-kumrêx. Dja ba amijo kute Metĩndjwÿnh kukwakam ujarênh djwÿnhbê Djônaj pyrâk. Tãm dja ga me omũn imâ akator jabej. 40 Me bakukãmãre Djônaj ne tep rax tikkrekam nõ nhyam 'ã akatin akatin akati nhyam arým kato. Badjwÿ dja ba ã amijo anen kênkrekam nõ nhyam ijã akatin akatin akati ba arým ikato. Ba ne ba amijo inhĩ ne bõx. Dja ba ã amijo ane. Jabit dja ga me omũ.

41 Djônaj ne krĩrãxbê Niniwekam me akreo tẽ nhyam me arým amikam kaprĩren wãnh axwemã iren Metĩndjwÿnh'ÿr amijo akêx. Nhyam be, ba ije iraxo Djônaj jakrenh mex ne ba jakam me akuri djan te me amâ idjujarênh ar iba. Djã ne ga me me kudjwa amikam akaprĩn wãnh ajaxwemã anhiren Metĩndjwÿnh'ÿr amijo akêx? Kati. Me aje wãnh ajaxwemã anhirer

kêt-kam dja Niniwekam me wã arým pãnh me amâ ajaxwe jarê. Me akamingrãnymã arê ga me me biknor tokry djâkam akuno.

42 Be ga, aparmã onĩj pyka 'õdjwÿkam bẽnjadjwÿr rax nija pumũ. Bẽnjadjwÿr ni Xaromã'o'ÿr tẽ:, 'ÿr tẽm 'iry:n arým 'ÿr bõx. Kute krã mexkôt marmã 'ÿr bõx ne arým kuma. Nhyam be, ba ije iraxo Xaromão jakrenh me:x ne ba jakam me akuri djan te me amâ idjujarênh ar iba. Djã ne ga bẽnjadjwÿr ni kudjwa ajamak mex ne ima? Kati. Ga me aje imar kêt-kumrêx. Me aje imar kêt-kam dja bẽnjadjwÿr ni ã arým pãnh me amâ ajaxwe jarê. Me akamingrãnymã arê ga me me biknor tokry djâkam akuno, ane.

43 Ne kam ajte me karõ punu'ã ajarênh memã kum,

—Me karõ pydjim kute ar me'õo baja ne arým kurũm katon tẽ. Ne kam te ar mrã, ngõ kêt-kam ar mrã, te ajte me'õmã àr ne tyk djã kêt-mã ar mrã. 44 Ne kam amim,

—Ba inhũrkwã kurũm ikatorja'ÿr tẽ, ane. 45 Ne kam amim badjã tũmja'ÿr tẽn 'ÿr bõx ne omũ nhyam arým mexkumrêx. Me karõ'o kute o ba kêt nhyam prĩne kre mex nhyam arým kam mÿjja katãt. Nhyam kam kadjy mã me karõ punu'ÿr tẽ. Ne kam mekam me kwÿ japrõn 'ÿr meo mõn meo bõx. Nãm me karõbê 7 ne o bõx ne me'õjamã meo wangij nhyam kam mekam ar ba. Kute me karõ punubê 7 ne o bõx tãm ne axweo kute õbê pydji kute ar o ba tũmja jakrenh mex ne kam arým o punu rax ne. Kãjbê punuri ne kãjbê punu nhyam be, kute kubê 7 ne o bõxja ne arým o punu rax ne. Dja ã me akamingrãnyre ajaxwekam me karõ punu me ajo ane, ane. Nãm Jeju ã memã ane.

*Nãmê kamyre'ã ujarênh.  
Mak 3.31; Ruk 8.19*

<sup>46</sup> Jeju me krăptî:mă kabêno dja nhyim nămê kamyre ar axikôt apôx ar bôx ne bôm ku'ê. Ne kute kum kabên jarênhmă. <sup>47</sup> Nhyim me'ô 'ÿr tĕn kum,

—Ë, onĭj anămê akamy ar amă kabên, ane.

<sup>48</sup> Nhyim Jeju me'ômă kum,

—Be, ije me'ômă inămê ikamy jarênh kadjy mÿj dja arkam kute? ane. <sup>49</sup> Ne kam kôt ba djwÿnhmă kum,

—Ota, inămê ikamy ne ja. <sup>50</sup> Dja gar Metĭndjwÿnh kĭnh kadjy kabên man kôt ar amijo aba. Ba kam arÿm ar amă ikamyre năr ikanikwÿnh năr ină jarê. Năm ă Jeju arkum ane.

## 13

*Băygogo'ă ujarênh.*

*Mak 4.1; Ruk 8.4*

<sup>1</sup> Ne kam akati tămkam Jeju kikre kurŭm katon tĕn arÿm imôti mÿrri nhÿ. <sup>2</sup> Nhyim kam me krăptî: 'ă akuprô. Nhyim kam arÿm mebê tĕn kăkam nhÿ nhyim me krăptî: arÿm ngô mÿrri kum dja. <sup>3</sup> Nhyim kam arÿm apÿnh kukrădjă djari'ă memă mÿjja jakren memă 'ă ajarê. Ne memă kum,

—Ë, ô pur djwÿnh ne kute ô purkam băygogo kremă 'ÿr o tĕ. 'ÿr o tĕn o bôx ne kam ar 'yo ukabêr mră, ane. Năm me kute mÿjja kre kadjy tu mÿjja 'yo akabê, băygogo 'yja ne me kute purkam kremă o mrăn kam purkam o ukabêr mră. Kute mrămri ne me kute katĕbări 'yo ukabêr mrănhja pyrăk.

<sup>4</sup> Jeju memă kum,

—Be, me'ô ne ar băygogo 'yo ukabêr mră. Nhyim 'y kwÿ prykam rôrôk. Nhyim kwĕnh prĭne kuku. <sup>5</sup> Nhyim kwÿ kĕn po'ă pyka purorrekam rôrôk. Nhyim kam pyka purorrekam ingrôt kukră kĕtkumrĕx. <sup>6</sup> Nhyim kam kÿjrŭm myt nhÿn arÿm 'y nhingrôt ga nhyim kajot ne arÿm ty. Arĕ jabjĕ kĕtkam ne ty. <sup>7</sup> Nhyim 'y kwÿ mrÿnhĭkam

rôrôk ne kam mrÿnhĭmĕ ro'ă ingrôt. Nhyim kam prĭne o akno. <sup>8</sup> Nhyim 'y kwÿ pyka mexkam rôrôk ne ingrôt ne kam abatănh ne. Ne arÿm apÿnh bări ku'ê djari nhyim kwÿ ijy jabjĕ nhyim kam 'y mexti:re. Nhyim kam 'y'ă akre kubê 100. Nhyim kwÿ ijy mexkumrĕx nhyim 'y'ă akre kubê 60. Nhyim kwÿ kăjbĕ ijy mex nhyim 'y'ă akre kubê 30. Năm ă Jeju Metĭndjwÿnh kukrădjă'ă apÿnh mÿjja jakren 'ă ujarênh o ane. <sup>9</sup> Ne ajte memă kum,

—Gop me ajô ar ajamak mex jabej tu amim ikabên markumrĕx, ane.

<sup>10</sup> Nhyim kam kôt ba djwÿnh ar 'ÿr bôx ne kum,

—Mÿkam ne ga apÿnh kukrădjă djari'ă memă mÿjja jakren memă mÿjjabit'ă ajarê? ane.

<sup>11</sup> Nhyim arkum,

—Bir, djăm me kunĭ kute ikukrădjă marmă? Kăjkwakam Bĕnjadjwÿr djwÿnh kute pykakam amim me utăr ne ar meo ba'ă ikabên kukrădjă ja djăm me kunĭ kute marmă? Kati. Ar gajbit ije ar amă arĕnh o amirĭt gar aje marmă. Nhyim be, me wăbĕ ne ba udju ne. <sup>12</sup> Be, me kwÿ kute ikukrădjă markumrĕx ja dja ba mă memă mÿjja krăptĭ jarê nhyim me arÿm mÿjja krăptĭ ma. Nhyim me kwÿ mă kute ikukrădjă mar kajgojabĕ dja ba ikukrădjăo apdju. Kute ikukrădjă mar kajgojao apdju. <sup>13</sup> Me wă kute mar kajgokam ne ba memă mÿjjabit 'ă ajarê. Ba apÿnh kukrădjă djari'ă memă mÿjja jakren memă mÿjjabit'ă ajarê. Me kute ikukrădjă mar kajgo wă ne me amrĕbĕ: me bakukămăremă arĕn memă kum,

“Me te memă mÿjja jakre nhyim me omŭnh kajgon mă amim omŭnhkumrĕx kĕt.

Nhyim me te memă mÿjja jarê nhyim me me kabên maro krĭn mă mar kĕt. Mă mÿjja'ă me

kabên kute amijakreja mar kêt ne.”

Nãm me ã me wã'ã me bakukãmãremã ane. Me kute ikukràdjã mar kajgo'ã ne memã arê. <sup>14</sup> Me bakukãmãre Idjaij ne amrêbê: me kute imar kajgowãmã kabên jarê. Nãm Metĩndjwýnh kukwakam memã kum,

“Dja ga me maro aku'ên mã mar kêt. Mã kukràdjã'ã mýjja kute amijakreja mar kêt. Ne omũnh kajgon mã amim omũnhkumrêx kêt. Mýkam?

<sup>15</sup> Bir, arým ga me adjumar djãkam ajamakke kêt. Me aje ajamako mar kêt mã ne ga me arým ajamakke jadu.

Ne aje anoo omũnh kêt mã tu ano ngôr.

Nã gãm me aje mar kêt mã ã ibê amijo ane. Aje ikukràdjã'ã mýjja kute amijakreja mar kêt mã ã ibê amijo ane.

Ne aje adjumar djãkam mar kêt mã ã ibê amijo ane. Me aje iwýr amijo akêx ba ije me ajo mex kêt mã ã ibê amijo ane.”

Nãm ã me bakukãmãre Idjaij me kute ikabên mar kajgomã ane. Nhym me bakukãmãre aben djô'ã arênho mō:n arênho mōr tãmtã arým me wã'ýr o bōx. Tū:mrãm me bakamingrãnyrekam ne me wã ã ikukràdjã mar kajgoo ane.

<sup>16</sup> Nhym be, djãm ar ga ne gar ã anomê ajamako ane? Kati. Ar ga ne gar ano atemã ne aje omũnhkumrêx. Ajamakke ne atemã ne aje markumrêx. Kam ar akĩnhkumrêx. <sup>17</sup> Ba ar amã arê gar ama. Djãm ar aje mýjja pumũnh ja ne me bakukãmãre kute omũnh? Djã ne Metĩndjwýnh kukwakam ujarênh djwýnhmê me katãt kute amijo bamê kute omũnh? Kati. Djãm ar aje mýjja mar ja ne me kute mar? Kati. Me krãptĩ ne amrêbê te kute omũnh ne mar prãmje. Kam, ar gajbit ne gar aje omũnh

ne aje mar. Mrãmri ne ba ar amã arênhkumrêx.

<sup>18</sup> Kam ba ar amã arê gar ama. Ije ikabên kukràdjã'ã me'õ kute bãygogo 'yo ukabêr jakreja dja gar ama. <sup>19</sup> Kãkwakam Bẽnjadjwýr djwýnh kabên ne me arým me'õmã arê. Metĩndjwýnh kute amim me utãr ne kute ar meo ba'ã kabênja kum arê nhym arým mar kêt ne. Mýj'ã kute kabên jakreja mar kêt ne. Nhym ate Xatanaj jãm meo amijakren mebê Metĩndjwýnh kabêno akno. Me kute tu amim markumrêx nhym Metĩndjwýnh kute kubê me utãr karõ ne jãm meo amijakren mebê Metĩndjwýnh kabêno akno. Bãygogo 'y kwý prykam rôrøk ne ja.

<sup>20</sup> Kênkam 'y rôrøk ja ne me kute amim Metĩndjwýnh kabên mar 'iry kêt ne kangaja'ã amijakre. Nãm me myt tãmkam Metĩndjwýnh kabên man bit kum kĩnhkumrêxo tēm kajgo. <sup>21</sup> Kute tu amim markumrêx kêtê. Ajkwaobit ne kute mar. Kute 'y nhingrõt ne arê jabjê kêt kam tẽmbê tykja pyrãk. Kute amim mar 'iry kêt nhym ate apýnh me kaprĩ djãri 'ýr bōx nhym arým kanga.

<sup>22</sup> Mrýnhĩkam 'y rôrøkja ne me kute Metĩndjwýnh kabên mar ne kam ate ajte kute jãm mýjja marja'ã amijakre. Nãm me arým Metĩndjwýnh kabên man kam 'ãno ãm kêt ne amim, “Mýj dja ba nẽn inhõ kwý krên mex ne inhõ kubêkã mex? Ikanêkam mýj dja ba nê?” ane. Nãm pykakam mýjjabitkam ar no katon axwe umar. Ne kam amim pi'ók kaprĩo atom rax prã:m ne ajte nêkrêxo atom rax prã:m. Djãm kute amim mýjjao atom raxkam mrãmri umar mex? Kati. Bir, me arým õ mýjja rũnhkam mrãmri umar punukumrêx. Ga, mrýnhĩ kute bãygogoo bikênh nhym kam ijj kêtja pumũ.

<sup>23</sup> Ga, me'õ bãygogo 'yo ukabêr tẽ nhym ajte kwý pyka mexkam rôrøkja pumũ. Nhym kam arým



ingrôt ne abatàn ne. Abatàn ne arým iyykam 'y kume:x. Me kwýdjwý ne me memã Bēnjadjwýr djwýnh'ã kabēn jarē nhym me arým tu amim markumrēx. Ne kam maro amũ amikamēn arým mar rax ne. Mar rax ne arým ukaprīkumrēx. Me kwý ne me ukaprīti:re kute mrāmri ne bāri kwýkam iyy mexti:re nhym kam 'y kubê 100 pyrāk. Nhym me kwý kājbe ukaprī kute mrāmri ne bāri kwýkam iyy mexkumrēx nhym kam 'y kubê 60 pyrāk. Nhym me kwý kājbe ukaprī kryre kute mrāmri ne bāri kwýkam iyy mex nhym kam 'y kubê 30 pyrāk. Me ukaprīkumrēx nhym Metīndjwýnh arým mekam kīnhkumrēx. Mekam kaprīre kētkumrēx. Nām ā Jeju arkum ane.

*'É 'y'ã ujarēnh.*

<sup>24</sup> Ne kam Jeju ajte kabēn kukrādja'ã pur 'ōdjwý jakren memã 'ã ajarēn memã kum,

—Kājkwakam Bēnjadjwýr djwýnh dja pykakam amim me kwý pytàn ar meo ba. Kam dja meo ajkij. 'Ā ne pur amijakre. Purkam ne me'ō 'y mex rēnhō tē. Ne o tē:n arým kre pa. <sup>25</sup> Ne kadjy ate krā. Nhym me ōt mýrri kurē djwýnh arým pur'ýr bōx. 'Ýr bōx ne kam 'é 'ymē bō nhi-jymē akrō 'ymē rēnhō tē. Bāygogo 'y mex nhiby 'é 'y rēnhō tē:n arým kre pa. Kre pan arým mǎ tē. <sup>26</sup> Nhym kam bāygogo ingrôt ne abatàn ne iyy ajkapī. Nhym 'édjwý arým kam kume:x ne.

<sup>27</sup> Nhym kam ō àpēnh ar arým ō pur djwýnh'ýr bōx ne kum, "Bēnjadjwýr, 'y mexbit ne ga purkam arēn kre. Mýj ne arým ajmã pur kam nē nhym kam 'é kume:x"? ane.

<sup>28</sup> Nhym arkum, "Gwaj bakurē djwýnh'ō ne kam 'é 'y rē", ane. Nhym ō àpēnh ar kum, "Dja bar 'é kaba", ane.

<sup>29</sup> Nhym arkum, "Kati. Gar ren 'émē ro'ã bāygogo kaba. <sup>30</sup> Kwārīk wānh ro'ã abatàn gē prý ngrã ba 'ýr é djwýnh jano. Kam dja ba é djwýnh arkum, 'Dja gar 'é kumrēx karwàn 'āpren kum adjã gē xēr. Nhym be, bāygogo dja gar o atom ne inhō bāygogo nhō kikremã o wadjàn adjwý', ane. Dja ba ā kum ane." Nām ā ō pur djwýnh arkum ane. Nām ā Jeju memã ujarēnhō ane.

*Metīndjwýnh kute me utār ne meo ba.*

*Ruk 13.18*

<sup>31</sup> Ne kam ajte kabēn kukrādja'ã motadu 'y jakren memã kum,

—Kājkwakam Bēnjadjwýr djwýnh kute pykakam amim me utār ne ar meo ba ne kute mrāmri ne me'ō arým ō purkam motadu 'y kre nhym abatàn pyrāk.

<sup>32</sup> Motadu 'y ne kryreo kute apýnh 'y jakrenh. Nhym be, arým abatànham abatànho kute purkam djwý kunī jakrenh. Arým abatàn kute pī pyrāk. Nhym arým àkmē kwēnh apýnh pa'ã ku'é. Nām ā Jeju arkum ane. Me kute amim Jeju marmã nhym arým ja pydjīn kadjy amima nhym arým ja kadjy amiman 'ã tým nhym ja kôt 'ã tým nhym ja 'ã tým nhym arým 'ã krāptī ne. 'Ā ne 'y kryre ja jakre.

<sup>33</sup> Ne kam ajte kabēn kukrādja'ã djwý nhigot djã jakren memã kum,

—Kājkwakam Bēnjadjwýr djwýnh kute pykakam amim me utār ne ar meo ba ne kute mrāmri ne djwý nhigot djã djwýkam bimàn tēm pyrāk. Me'ō nire ne djwý nhigot djã byn arým djwý djōm raxkam kapī. Djwý'ã akreo amānhkrut ne ikjékēt. Nām djwýkam kapīn o akã nhym arým prīne djwýkam ajmã, ane. Jejudjwý dja amim me utāro tēn kam arým pyka kunīkôt amim me kwý pytàn ar meo ba.

<sup>34</sup> Jeju kute memã mýjja'ã ujarēnhja kunī ne kukrādja'ã akre. Ne kam me krāptī:jamã mýjjabit'ã

ajarê. Djâm kute kukràdjà 'ô'ã mýjja jakre kêt ne tu kukràdjàbit memã arê? Kati. Nãm kukràdjà'ã memã mýjjabit jakren memã 'ã ajarê. <sup>35</sup> Me bakukãmãre ne Metĩndjwýnh kukwakam memã ja'ã ajarê. Jeju memã ujarênh ja'ã ajarê. Amrêbê: ne memã kum, “Kukràdjà'ã dja ba memã mýjjabit jakren memã 'ã ajarê.

Adjâkam mýjja bipdjur ne bipdjur rã'ã dja ba arým 'ã ajarê”, ane.

Nãm ã me bakukãmãre Metĩndjwýnh kukwakam memã ane. Ne kam me aben djô'ã arênhõ mō:n arênhõ mōr tãmtã arým 'yr o bōx. Tū:mrãm me bakamingrãnyrekam ne Jeju katon arým ã memã ujarênhõ ane. Me bakukãmãre kute memã ujarênh kôt ne Jeju arým amikabên kukràdjà'ã mýjjabit jakren memã mýjjabit 'ã ajarê.

<sup>36</sup> Ne kam arým me krãptĩ jano nhym me mã mō nhym arým kikremã wadjã. Nhym kôt ba djwýnh ar arým 'yr bōx ne kukijn kum,

—Ajbir me kute purkam bãygogo 'y mex nhiby 'ê 'y rênho tēm'ã adjujarênhja mýj'ã ne amijakre? Ar imã arê bar kuma, ane. <sup>37</sup> Nhym arkum,

—Bir, ba ne ba amijo inhĩ ne ruw. Ba ijã ne me'õ kute purkam 'y mex rênh ja. Ijã ne me'õja amijakre. <sup>38</sup> Pyka kunĩkôt me kunĩ'ã ne pur amijakre. Me kute Bẽnjadjwýr djwýnh mar'ã ne 'y mex amijakre. Me kute Xatanaj kôt ar amijo baja'ã ne 'ê amijakre. <sup>39</sup> Xatanaj'ã ne kurê djwýnh kute purkam 'ê 'y rênhja amijakre. Mýjja kunĩ kute aminhinomã amimênh djã nhõ akati'ã ne bãygogo atom djã nhõ akati amijakre. Metĩndjwýnh kadjy mrãnh djwýnh'ã ne me kute bãygogo djê djwýnhja amijakre.

<sup>40</sup> Kute ê djwýnh kute 'ê jarênh ne o atom ne kum adjãr nhym xêt pyrãk, dja Metĩndjwýnh kadjy

mrãnh djwýnh ã me axweo ane. Me kute aminhinomã amimênh djã nhõ akatikam me axweo ane. <sup>41</sup> Ba ije amijo inhĩ dja ba amũ ikadjy mrãnh djwýnh jano nhym me arým me axweo kunĩo atom. Bẽnjadjwýr djwýnh kute pykakam meo bajakam me axweo kunĩo atom. Me kute me axwe'ã memã ãpnênhmê me axweo kunĩo atom. <sup>42</sup> Ne kam me arým me biknor tokry djâkam me kumê. Wãnh ne me amim ngyryk ne tokry djãje amijanên ar ãmra ba. <sup>43</sup> Kam dja me Bãm djwýnh amim me katãt kute amijo baja pytãn ar meo ba. Nhym kam me axweja kurãm dja me arým me:xkumrêx nhym me kum me kĩ:nhkumrêx kute mrãmri ne arým myt katorkam me kum kĩnh pyrãk. Gop me ajõ ar ajamak mex jabej tu amim ikabênja markumrêx. Nãm ã Jeju arkum ane.

*Apýnh mýjja'ã ujarênh.*

<sup>44</sup> Ne kam ajte arkum,

—Kãjkwakam Bẽnjadjwýr djwýnh kute pykakam amim me utãr ne ar meo ba ne me kum kĩnh. Kute mrãmri ne kute me kum nêkrêx pãnh rax kĩnh pyrãk. 'A ne nêkrêx pãnh rax amijakre. Pykakam ne me'õ nêkrêx pãnh rax jadjãn o apdju nhym atemã me'õja arým 'yr bōx ne kum katon kaban kam kĩnhkumrêx. Me'õja nêkrêx pãnh raxkam kĩnhkumrêx ne ajte pyka tãm kam nêkrêx pãnh rax jadjãn o apdju. Me'õ kute kubê o ãkĩnh karõ o apdju. Ne amim, “Ba on pykao inhõn kam ije nêkrêx pãnh rax jadjãr djão inhõ pyka”, ane. Ne kam arým õ mýjja kunĩo atom ne memã kungãn pãnh pi'õk kaprĩ by. Ne kam arým pi'õk kaprĩo amim pyka byn o õ. Ne urokam kute kam nêkrêx pãnh rax jadjãrjao õ.

<sup>45</sup> Kam, ajte kãjkwakam Bẽnjadjwýr djwýnh kute pykakam amim me utãr ne ar meo ba ne me kum kĩnh. Kute mrãmri ne kute me kum nêkrêx pãnh rax kĩnh pyrãk.

'Â ne angà pãnh raxdjwÿ amijakre. Kam ne me'õ kute angà byrmã abej ar mrã. <sup>46</sup> Ne kam arÿm angàja pãnh ra:xmã kato. Ne amim, "Ba on angà pãnh raxjao aminhõ", ane. Ne kam amũ tẽn õ mÿjja kunĩo atom ne memã kungãn pãnh pi'òk kaprĩ by. Ne kam angàja pãnh rax pãnh memã pi'òk kaprĩ ngãn arÿm o õ. Nãm ã Jeju arkum ane.

<sup>47</sup> Ne kam ajte arkum,

—Kàjkwakam Bënjadwÿr djwÿnh dja pykakam amim me utàn ar meo ba. Kam, dja me axwemã pãnh jarẽ. 'Â ne kryreti amijakre. Imõtikam ne me kryreti mẽ nhym arÿm apÿnh tep krãptĩ kum wangij nhym me arÿm unẽ. <sup>48</sup> Ne arÿm ipukam bjêro mõn akãx'ã kumẽ. Ne kam arÿm tep kabio nhÿ. Nãm tep mex ne kãrwàn kaxnokaikam o atom. Nhym be, tep punu ne me rũm kurẽn kanga. <sup>49</sup> Mÿjja kunĩ kute aminhinomã amimẽnh djã nhõ akatikam dja me ã meo ane. Dja Metĩndjwÿnh kadjy mrãnh djwÿnh apõx ne me'ÿr bõx ne meo ajkij. Me axweja me katõt kute amijo bajabẽ meo ajkij. <sup>50</sup> Ne kam arÿm kuwy djakam me axwe mẽ. Kam dja me amim ngryk ne tokry djãje amijanên ar àmra ba, ane.

<sup>51</sup> Ne kam arkum,

—Djã ne gar arÿm mÿjja markumrẽx? Mÿjja'ã ije apÿnh mÿjja jakreja djã ne gar arÿm markumrẽx? ane.

Nhym ar kum,

—Nã. Mÿjja'ã apÿnh mÿjja kute amijakreja bar ije markumrẽx, ane.

<sup>52</sup> Nhym kam arkum,

—Aj, tãm ne ja. Arÿm ne ba mÿjja krãptĩ'ã ajarẽ gar ama. Kàjkwakam Bënjadwÿr djwÿnh kute pykakam amim me utàn ar meo ba'ã ne ba mÿjja krãptĩ jakren ar amã 'ã ajarẽ gar arÿm ama. Arÿm ar aje markam ar aje õ kikre djwÿnh pyràk. Õ kikre djwÿnh ne õ nêkrẽx jadjwÿr djakam mÿjja nymẽ mÿjja

tũmo põx. Ar aje uràk. Ar abẽ memã kukràdjã jarẽnh djwÿnh ne gar arÿm memã kukràdjã ny jarẽnh ajte memã kukràdjã tũm jarẽ. Tãm ne ja. Nãm ã Jeju arkum ane.

Õ pyka djwÿnhkam bõx.

Mak 6.1; Ruk 4.16

<sup>53</sup> Jeju apÿnh kukràdjã'ã memã mÿjja ja jakren memã 'ã ajarẽnh kam arÿm o ino re. Ne kam arÿm mã tẽ. <sup>54</sup> Ne kam arÿm õ pyka djwÿnhkam tẽn bõx. Bõx ne arÿm me bikprõnh djakam tẽn wadjã. Ne kam arÿm memã kukràdjã jarẽ. Memã arẽ nhym me arÿm kam no tyn kumex ne abenmã kum,

—Tõ, mÿj me'õ ne kum me kukràdjã ja jarẽ nhym arÿm ã amak mexo ane. Mÿj me'õ ne kum arẽ nhym arÿm ã mÿjja nhipẽxo ane. Mÿjja pumũnh kêtikumrẽx ne arÿm ipẽx nhym kumex. <sup>55</sup> Be, kubẽ ne pĩ kênh djwÿnh kajgo kra. Marij kurũm ne kato. Kõt ar apõxjabẽ Xijagumẽ Jõdjemẽ Ximãomẽ Djudamẽ. <sup>56</sup> Kanikwÿnhdjwÿ ar me baro'ã ar ba. Tõ mÿj me'õ ne kum kukràdjã ja jarẽ nhym maro ba? ane. <sup>57</sup> Me ã abenmã anhÿro ban kam kubẽ kĩnh no kati.

Nhym Jeju amijã memã kum,

—Metĩndjwÿnh kukwakam memã ujarẽnh djwÿnh dja pyka kunĩkõt ba nhym me kum mex jarẽho ba prãm ne. Nhym be, õ pyka djwÿnhkam me jabit ne me ari aprÿo ba. Õbikwa djwÿnhkam ar ajbit dja me ari aprÿo ba, ane.

<sup>58</sup> Ne kam arÿm te kute õ pyka djwÿnhkam me krãptĩ mex prãmje. Me kute amim tu kamnhĩxkumrẽx kêtikam te kute meo mex prãmje.

## 14

Me kute Djuão mut krã'ÿr.

Mak 6.14

<sup>1</sup> Nhym kam me amũ Jeju jarẽho ipòk ne. Nhym kam mebẽ idjaer nhõ bënjadwÿr raxbẽ Erodji arÿm

me kute Jeju jarênhja ma. <sup>2</sup> Ne kam arîk Jejuo Djuão ne ô àpênhmã kum, —Ngômã me angjênh djwýnhbê Djuão arým akubyn tîkam ne ar ba. Be, tyk ne akubyn tîkam ne arým mýjja pumûnh kêt nhîpêxo ba, ane.

<sup>3-4</sup> Be, Erodji kute bîn kêtri ne Djuão Erodjij'ã kum kabên ne. Erodji ne Erodjijo prô. Nãm 'ã kum kabên ne kum,

—Metîndjwýnh kukràdjã kupa'ã ne ga akamyrebê prô'ýr mô, ane. Nhyk kuman arým ngryk ne. Ne arým 'ýr me krâkamngôn jano nhyk me arým o tým ne kubê ijê. <sup>5</sup> Nhyk kam bit kute me anor nhyk me kute bînmã. Nhyk be, kati. Me krãptî: ne me 'ã abenmã kum,

—Djuãobê ne Metîndjwýnh kukwakam memã ujarênh djwýnh, ane. Me krãptî kute ã anhýrkam ne Erodji arým kum me krãptî pyman Djuão bîn kêt.

<sup>6</sup> Nhyk kam Erodji rwýk djã nhô akati arým bôx. Bôx nhyk me arým ro'ã àkuro nhý. Nhyk Erodjij kra arým memã to. Memã to nhyk Erodji kum kînhkumrêx. <sup>7</sup> Kum kînhkam ne kum,

—Mýj ne ga amã kînh? On imã mýjja'ô jarê ba arým amã kungã. Amã ikabên kajgo kêtumrêx. Metîndjwýnh ne arým ima, ane. <sup>8</sup> Kraja kum tor djwýnhram ne nã arým Djuão krã'ã kum karôn kum,

—Dja kum akînh ga Djuão krã'ã kum apnê, ane. Nhyk kam arým kum to nhyk kum kînh. Kum kînh ne kum mýjja jarênh mãmджи nhyk arým kuma. Ne nã kabên man arým Erodjimã kum,

—Dja ga ngômã me angjênh djwýnhbê Djuãoja ngôn purortikam krã djàn o bôx ne imã angã, ane. <sup>9</sup> Nhyk kam bënjadjwýr rax arým kuman kaprîren amim,

—Je, arým ne ba mrãmri kum ikabên jarênh mãmджи nhyk Metîndjwýnh arým ima. Ba arým

kam te ije kum, “Kati”, anhýr prãmje. Ibu'ã me jadjwý ne me arým mrãmri ikabênkumrêx ma, ane. Ne kam arým ô àpênhmã kum, “Me kum angã”, ane. <sup>10</sup> Ne 'ýr me ano nhyk me mebê ijê djã'ýr môn arým 'ýr bôx. Ne kam arým mut krãta. <sup>11</sup> Mut krãtan ngôn purortikam krã djàn o tên arým kureremã kungã. Nhyk kumýn o tên arým nãmã kungã. <sup>12</sup> Nhyk kam Djuãokôt ba djwýnh ar 'ýr tên 'ýr bôx. Ne kam Djuão nhî mýn o tên arým adjã. Ne kam Jeju'ýr tên 'ýr bôx ne kum arê nhyk arým kuma.

*Kute mebê 5.000o djuw mex.*

*Mak 6.30; Ruk 9.10; Djur 6.1*

<sup>13</sup> Nhyk kam ate arwãkam ýr kadjy kãkam nhýn arým nox ne. Nhyk kam me arým arênh ma. Arênh man arým krîrax kurüm kôt mô. Pykakôt ar ibej mô. Ar ibej mô:n arým akãx nhikjêkam Jeju kutêp akuprô. <sup>14</sup> Nhyk Jeju ar ngôkôt môn arým akãx'ýr bôx. 'Ýr bôx ne arým kã dji. Nhyk kam Jeju arým wabin me krãptî: pumû. Me omûn arým kum me kaprî:. Kum me kaprîn arým me kanêo mexo dja.

<sup>15</sup> Meo djan kam arým amykry mex ne. Nhyk Jeju kôt ba djwýnh arým 'ýr bôx ne kum,

—Arwãkam ne gwaj ar baba nhyk arým amykry mex ne. On me krãptîmã arên kum, “Me amû krî kryremã môn djwý jamýn anhô kwý krê”, ane. Dja ga ã memã ane, ane.

<sup>16</sup> Nhyk arkum,

—Kati. Kwãrîk wãnh amû me môr kêt. Ar ga dja gar memã mýjja ngã nhyk me arým kukrê, ane.

<sup>17</sup> Nhyk ar kum,

—Jakam ne djwý kubê 5bit ne tep amãnhkrutbit, ane.

<sup>18</sup> Nhyk arkum, “Amrê imã o tê”, ane. Nhyk kam ar arým 'ýr o bôx. <sup>19</sup> Nhyk kam me bôkam ýrmã memã arê. Ne kam arým djwý

kubê 5mê tep amãnhkrutja jamÿ. Amÿn kãjmã kãjkwa pumÿn djwÿmê tepo Metÿndjwÿnhmã amikÿnh jarê. Kum amikÿnh jarên arÿm djwÿ kokij. Djwÿ kokjêro dja:n mã kôt ba djwÿnh arkum ôro dja. Arkum ôro dja: nhyr ar mã memã ôro mrã. <sup>20</sup> Memã ôro mrã: nhyr kam me kunÿ kukrên arÿm ajne. Nhyr kam ar arÿm aÿm karwãno mrã. O mrãn arÿm kaxnokaikam kungij ne o ipu. O ipun arÿm 'ã akre. Kam kaxnokai ipu kubê 12 ne 'ã kãtãm ne dja. <sup>21</sup> Be, me my kute krên 'ã akre kubê 5.000. Ne ijukri me niremê me prÿre'ã akre kêt. Be, me kunÿ ne me arÿm ô kwÿ krên mex ne arÿm ajne.

*Ngô'ã tēm.*

*Mak 6.45; Djur 6.15*

<sup>22</sup> Nhyr kam Jeju kôt ba djwÿnh arkum,

—Aj mã, kãkam nhÿ. Dja gar ikukãm akãx nhikjê mã rê. Ba 'ÿr me ano gê me mã mō, ane. Nhyr ar arÿm kãkam nox ne mō. <sup>23</sup> Nhyr arÿm me krãptÿ'ÿr tãn memã kum,

—Aje, me on ajmã. Ba on, ane. Ne kam Metÿndjwÿnhmã kabên kadjy krãnh'ã tãn wabi. Nhyr kam arÿm akamãt nhyr ate krãnhkam nhÿ. <sup>24</sup> Nhyr ar kãkam mōrja arÿm imôti nhipôkri mō. Mō: nhyr kôk ar kutã àbêr tÿx. Àbêr tÿx nhyr ngô arÿm ar'ã kã japÿno mō.

<sup>25</sup> Apÿno mō: nhyr arÿm ôkrên'ãnh kã. Ôkrên'ãnh kãr pydji nhyr Jeju arÿm tu ngô rax'ã arkôt tẽ. <sup>26</sup> Ngô'ã arkôt tẽ nhyr kôt ba djwÿnh ar arÿm omÿ. Ngô'ã tẽmkôt omÿn arÿm madjã kretin abenmã kum,

—Ota amrê me karõ'ô gwaj bakôt mō, anen arÿm umaje amra.

<sup>27</sup> Nhyr kam arkum,

—E kum, ba ne ba wãm ar akôt tẽ. On ar akÿnh ne ar atÿn prãm kêt, ane.

<sup>28</sup> Nhyr Pedru kum,

—Djãm mrãmri gakumrêx? Ga atêmkumrêx jabej amiwÿr ijwÿ ba wãm akudjwa ngô'ã awÿr tẽ, ane.

<sup>29</sup> Nhyr kum, “Amrê iwÿr tẽ”, ane.

Nhyr Pedru arÿm Jeju'ÿr tẽmmã ngôkam ruw ne arÿm ngô'ã tẽ. <sup>30</sup> Ngô'ã tãn arÿm ngô pumÿ. Kôk djãbêr tÿx kute ngô djãkã tÿxkôt omÿn arÿm tÿn prãm. Tÿn prãm ne arÿm àr tẽ. Ngômã àr tãn arÿm amran kum, “Bênjadjwÿr djwÿnh, gop ipytã”, ane.

<sup>31</sup> Nhyr Jeju on pa 'amÿn kum,

—Aje amim imar rere:kre. Mÿkam ne ga amim, “Djãm mrãmri ne Jeju kute ngô ja mar”, anen amim imar rerekre?

<sup>32</sup> Nãm ã kum ane nhyr ar arÿm kã'ÿr bôx. Ne kam arÿm wabi. Wabi nhyr kôk djãbêr on amikrãtan anhikrê ne. <sup>33</sup> Amikrãta nhyr kãkam ar 'ÿrja arÿm parbê kônkrão nhÿn rax ma:ro nhÿ. Ne arÿm kum,

—Mrãmri abê Metÿndjwÿnh Krakumrêx, ane.

<sup>34</sup> Ne kam ar arÿm akãx nhikjê mã rên kam arÿm kã dji. Ar pykabê Djene'ã kã dji. <sup>35</sup> Nhyr kam me arÿm Jeju nokre pumÿn amÿ memã arê. Nhyr kam me arÿm bu'ã pyka kunÿkôt me'ÿr me ano nhyr me me'ÿr mō. Me'ÿr mōn memã arê nhyr me arÿm kuman Jeju'ÿr me punu kunÿo bôx.

<sup>36</sup> Nhyr me arÿm kum,

—Ba me akã japkredit kupên arÿm imex ne, ane. Ne me kunÿ kute kupênja arÿm prÿne mex ne.

## 15

*Tu mÿjja krên'ã ujarênh.*

*Mak 7.1*

<sup>1</sup> Nhyr kam mebê pardjêumê Môjdjê kukrãdjã mar djwÿnh krÿrãxbê Djeruxarê kurÿm mōn Jeju'ÿr bôx. Me ô kwÿ krên kadjy ne me aminhikra pônho ba. Me kukãmãkjê kukrãdjã kôt me we Metÿndjwÿnhmã mex kadjy ne me

kum aminhikra pônho ba. 'Á ne me Jejumã kabên ne kum,

<sup>2</sup> —Mýkam ne akôt ba djwýnh ar me kukâmãkjê kukràdjã mar kêt ne kam amikrà ar o ba? Nãm ar kute aminhikra pônho kêt ne tu aku, ane.

<sup>3</sup> Nhyem Jeju memã kum,

—Djãm mrãmri Metíndjwýnh kukràdjã kôt ne ga me me akukâmãkjê kukràdjã jarê? Kati. Atemã. Ga me atemã akukâmãkjê kukràdjã ja'ã ano týt ne Metíndjwýnh kukràdjã mar kêt. Ne kam arým kam amikrà ar o aba. <sup>4</sup> Ba me amã arê gar ama. Metíndjwýnh ne me bakukãmãremã 'ã karôn memã kum, “Me amã abãmmê anã jabên ar kabên ma”, ane.

Ne ajte memã kum,

“Me'õ arým bãm'ã nãr nã'ã, ‘Gê Metíndjwýnh o ajkê’, anhýr jabej gê me tu kubí”, ane.

Me kum bãmmê nã ar abemã ne Metíndjwýnh ã me bakukãmãremã ane. <sup>5</sup> Nhyem be, djãm me ga ne ga me amã abãmmê anã jabê? Kati. Ga me akukràdjã kôt arík memã kum, “Me ajõ godja anã nãr abãm mýjja'ã ajwýr jabej. Ne aje kubê anhõ mýjja nê prãm jabej kum, ‘Be, ba te ije amã òrmã. Aje mýjja 'ã ijwýr ba arým o Metíndjwýnh nhõ mýjja. Kam ba te ije amã òrmã’, ane. Dja ga me ã kum anen arým kubê nê nhyem kam arým pijãm ne”, ane. <sup>6</sup> Ga me aje ã memã 'ã karõo anhýrkam arým me nãmê bãmbê òdjý'ã memã adjãpnêho aba. Me kum ar abê kêt'ã memã adjãpnêho aba. Metíndjwýnh te memã 'ã karôn memã kum,

“Me amã abãmmê anã jabên ar kabên ma”, ane.

Nãm te memã ane ga me arým Metíndjwýnh kabên jao me kukràdjã kajgon kupa'ã memã akukràdjã punu ja jarên arým nãmê bãmbê òdjý'ã memã adjãpnêho aba. <sup>7</sup> Me ga ne ga me amijo ajêx ne ar amijo Metíndjwýnh mar mexo

aba. Mrãmri ne me bakukãmãre Idjaij me ajã kabên ne. Nãm Metíndjwýnh kukwakam me ajã me bakukãmãremã kum,

<sup>8</sup> “Be, me ja ne me arík 'êx ne ajkwa kajgokam imã imex jarênho ban òkre kadjwýnhbê jãm ate ibê krãn ba.

<sup>9</sup> Ne arík imã irax jarênho kajgoo ban 'êx ne me ta kukràdjã'ã memã kum, ‘Metíndjwýnh kukràdjã’, anhýro ba.”

Nãm ã Idjaij me ajã ane ga me akamingrãnyre ajêx ne akukràdjã kajgoo Metíndjwýnh kukràdjã memã arênho aba. Mrãmri ne me ajã arênhkumrêx. Nãm Jeju ã mebê pardjêu arkum ane.

<sup>10</sup> Ne kam amiwýr me krãptí 'uw ne memã kum,

—Ê, dja ga me akuní iman ikabên markumrêx. <sup>11</sup> Me kute apýnh mýjja'ã memã kum, “Ja dja ga ãm omü. Dja ga krên arým ajaxwe”, anhýro ba. Nhyem be, djãm me'õ mýjja 'õ krê nhyem Metíndjwýnh arým kum, “Ja ne ga krê. Arým ajaxwe”, ane? Kati. Me kabên punukam ne memã axwe jarê. Me ãkínhíkam ne memã arê. Me ari prõ, mjên kupa'ã kurê bakam ne memã arê. Me 'êxnhíkam ne memã arê. Apýnh axwe 'òkam ne Metíndjwýnh memã axwe jarê. Nãm ã Jeju memã ane.

<sup>12</sup> Kam kôt ba djwýnh ar 'ýr bõx ne Jejumã kum,

—Ê, mebê pardjêu kute akabên markam arým ngryk ne, ane.

Nhyem me'ã arkum,

<sup>13-14</sup> —Ga, me no rã ne me amikukãm rít kêtja pumü. Kam me kute amipry mar kêt. Kam godja me no rã me no rã japrõ kute meo ba jabej nhyem arým amê kre'òkam tým. Mebê pardjêu ne me kute me urák. Nãm me 'êx ne memã, “Ba ne ba ije Metíndjwýnh mar”, anhýro ba. Nhyem be, kati. Me kute mar kêt. Ne kam te memã Metíndjwýnh'ã ujarênho ar ba nhyem

me adjwýnhdjwý kute Metíndjwýnh mar kêt. Mebé pardjêu 'êx ne kute memã anhÿro bakam dja Ibãm arým memã o pãnh ne me biknor tokry djakam me kumê kute mrãmri ne me kute 'ê kadjár ne rûm mênh pyrãk. Kwãrîk wãnh me rã'ã. Nãm ã Jeju mebé pardjêu'ã ane.

<sup>15</sup> NhyM Pedru kum,

—Nã gãm ar imã, “Djãm me mÿjja 'õ krê nhyM Metíndjwýnh kum, ‘Ja ne ga krên arým ajaxwe’, ane? Kati”, ane. Tãm ne ga arê nhyM ar ibê bipdjur rã'ã ne. Mÿj'ã ne ga akabên jarê? Ar imã arê bar kuma. Nãm ã Pedru Jejumã ane.

<sup>16</sup> NhyM Jeju arkum,

—Djãm ar gadjwý ar aje mÿjja mar kêt rã'ã? <sup>17</sup> Mÿjja me kute krên ne me tikkambit wangij. Ne kam atykmã arým apôx. <sup>18</sup> NhyM be, me ajkwa kurûm me kabên punu apôxja ne me kute amim mÿjja'ã karõ djã kurûm apôx. Kam Metíndjwýnh arým memã axwe jarê. <sup>19</sup> Me kute amim mÿjja'ã karõ djakam amim mÿjja punu'ã karõn arým me kurûm apôx.

Nãm me kute me par'ã amim karõ. Ne kute me prõ puro nãr me mjên puroo àkînh ne ro'ã ikwãja'ã amim karõ.

Ne prõ djwýnh nãr mjên djwýnh kupa'ã kurê'ã amim karõ.

Ne kute mÿjjao àkînh'ã amim karõ.

Ne memã 'êx'ã amim karõ.

Ne kute Metíndjwýnh japry'ã amim karõ.

<sup>20</sup> Me axweja kunĩ ne me kurûm apôx nhyM Metíndjwýnh arým memã axwe jarê. NhyM be, me kute aminhikra põnh kêt ne kute õ kwý krên ja ne Metíndjwýnh kute memã axwe jarênh kêt. Djãm ar aje ja mar kêt? Nãm ã Jeju kôt ba djwýnh arkum ane.

*Me'õ nire bajtem kute tu amim kamnhixkumrêx'ã ujarênh.*

*Mak 7.24*

<sup>21</sup> Ne kam Jeju arým mebé tẽ. Tẽ:n kam krîraxbê Xirumê Xidõ bu'ã pyka'ÿr bõx. <sup>22</sup> NhyM pykabê Kanaãkam me'õ nire pyka wãkam ar ba. Mebé idjaer ne me wão me bajtem. Me'õ nire kam ar ban arým Jeju'ÿr bõx. Ne kam kãj bê kum,

—Bênjadjwýr djwýnh, Dawi tãmdjwý, gop amã ikaprĩ. Me karõ punu ne ari ikrao bikênhõ ba, ane.

<sup>23</sup> NhyM tu kubê anhikrên itõ ne. NhyM kôt ba djwýnh ar 'ÿr bõx ne kum,

—Dja ga amũ ano gê tẽ. Nãm ari gwaj bakôt àmra tẽ, ane.

<sup>24</sup> NhyM arkum,

—Djãm me bajtem'ÿr ne Metíndjwýnh ijano ba tẽ? Kati. Mebé idjaer'ÿr ne ijano ba tẽ. Mebé idjaer ne me kute mrãmri ne mrykĩ'ãtomti no biknor pyrãk ne ate ar ba. Me ate ar ba ja'ÿr ne ijano ba tẽ, ane.

<sup>25</sup> NhyM kam arým ni bajtemja 'ÿr bõx. 'ÿr bõx ne arým parbê kõnkrão nhÿn ra:x man kum,

—Bênjadjwýr djwýnh gop ikôt o kangõn ikrao mex, ane.

<sup>26</sup> NhyM õ mebé idjaer'ã me prĩre jakren kum,

—Nok ba ren rop kraremã me prĩre nhõ djwý rẽ nhyM ren kam punure, ane. Djãm mrãmri ne djwý'ã ajarê? Kati. Kute meo mex djã'ã ne djwý jakren kum 'ã ajarê. Bir, Jeju ne jakam kute me bajtemo mex prãm kêt. Õ mebé idjaer'ÿr ne Metíndjwýnh Jeju jano. Kute õ mebé idjaerbit kumrêxo mexo bamã. Kam ne nimã kum,

—Nok ba ren rop kraremã me prĩre nhõ djwý rẽ nhyM ren kam punure, ane.

<sup>27</sup> NhyM nija arým amim,

—Ijã ne rop krare jarê, anen arým kum,

—Tukwa, mrãmri Bênjadjwýr djwýnh. Kôt ne ga arê. NhyM be, godja wãnh õ wýnh nhõ pĩponh krakri djwý jaũm rôrõk. Aũmbit dja rop krare kukrê. Kam gop badjwý

ibê rop krare pyrâk tu imã ikrao mex, ane.

<sup>28</sup> Nhyam Jeju kum,

—Me'õ nire, ga ne ga tu amim ikamnhĩx me:xkumrêx. Akabên kôt ne ba arým akrao mex, ane. Nhyam myt tãmkam kra arým mex ne.

*Kute mebê 4.000o djuw mex.*

*Mak 8.1*

<sup>29</sup> Nhyam kam Jeju arým pyka ja kurũm tẽn imõtibê Garrêja'yr tẽn 'yr bõx. Ne kam arým krãnh'ã tẽn wabin nhỹ. <sup>30</sup> Nhyam me krãptĩ: arým 'yr bõx. Nãm me 'yr me punuo mõn 'yr meo bõx. Me mrãnh kêtme me no rãmê me kabên kêtme apỹnh me kukràdjã punumê apỹnh me punu djã 'õdjwỹ krãptĩ:ja ne me 'yr meo mõn meo bõx ne Jeju parbê me adju:w nhyam arým meo mex ne. <sup>31</sup> Jeju meo mex nhyam me krãptĩ: arým me omũ. Me kabên kêt arým kabên mex. Me apỹnh kukràdjã punu arým kukràdjã mex ne. Me mrãnh kêt arým mrãnh mex ne. Me no rã arým rĩt mex ne. Nhyam me arým me omũn te kute marmã mekam no tyn kumex. Ne kam arým mebê idjaero ba djwỹnhmã rax jarê. Metũndjwỹnhmã rax jarêho kume:x.

<sup>32</sup> Nhyam kam arým amiwỹr kôt ba djwỹnh ar ku'uw nhyam ar bõx nhyam arkum,

—Imã me krãptĩ:ja kaprĩ. Me iro'ã krĩ'ã arým akati amãnhkrut ne ikjêkêt apêx. Ne kam arým me õ mýjja kêt. Nok ba ren me kum prãmkan ren amũ me ũrkwãmã me ano nhyam ren pry konenh ren me arým rerekre nhyam ren tyk djã me kupa, ane.

<sup>33</sup> Nhyam kôt ba djwỹnh ar kum,

—Kapôt kukrit jakam ne gwaj te me krãptĩ:ja kadjy djwỹ kume:x prãmje. Mýj got gwaj me kadjy nê? ane.

<sup>34</sup> Nhyam Jeju arkum,

—Mýj ne ar anhõ djwỹ kute? ane. Nhyam ar kum,

—Djwỹ kubê 7. Tepprãredjwỹ ngrêre, ane.

<sup>35</sup> Nhyam kam arým me krãptĩmã 'ã karõn kum,

—Pykabê dja ga me nhỹ, ane. Nhyam me kam arým nhỹ. <sup>36</sup> Nhyam kam arým djwỹ kubê 7 jamýn tepprãre jamýn o Metũndjwỹnhmã amikĩnh jarê. Ne kam kokij ne mã kôt ba djwỹnh arkum kungã nhyam ar mã me krãptĩmã adjuw. <sup>37</sup> Nhyam kam me kunĩ kwỹ krẽn arým ajne. Nhyam kam me arým aũm karwãn kaxnokaikam kungij. Kungij nhyam arým kaxnokai ipubê 7 ne 'ã kãtãm. <sup>38</sup> Be, me my kubê 4.000 ne õ kwỹ krê nhyam me niremê me prĩre'ã akre kêt. <sup>39</sup> Nhyam kam arým amũ me anon kam kã'õkam nhỹ. Ne kam nox ne pykabê Madara'yr mõn 'yr bõx.

## 16

*Kute kãjkwa kurũm mýjja'õ nhĩpêx'ã me kum à'wỹr.*

*Mat 12.39; Mak 8.11*

<sup>1</sup> Nhyam mebê pardjêumê mebê xadjudjêumê Jeju'yr bõx ne mrãmri kubê Metũndjwỹnh Krakumrêx jabej kum,

—Goja kãjkwa kurũm mýjja pumũnh kêt'õ nhĩpêx bar omũn kôt ama, ane.

<sup>2</sup> Nhyam memã kum,

—Arým myt djãrmã nhyam myt ngjêx djãkam kãjkwa kamrêk. Ga me kam 'ã abenmã kum, “Dja kryràam kãjkwa mex”, ane. <sup>3</sup> Nãr, arým myt katormã nhyam myt apõx djãkam kãjkwa kamrêk ne kakrã kumex ga me kam 'ã abenmã kum, “Akati jakam dja na kumex”, ane. Me ga ne ga me amijo ajêx ne amijo Metũndjwỹnh mar mex. Aje kãjkwa mex mar nãr aje kãjkwa punu mar. Mýkam ne ba me akam ar ibari mýjja pumũnh kêt kwỹ nhĩpêx ne me amã mýjjao amirĩto iba ga me ja mar kêt ne? Ga me omũnh kajgon amim, “Je tã mýj'ã”? anhỹr kajgon mar kêtukumrêx. <sup>4</sup> Me ga



akamingrãnyre ne ga me ajaxwen mýjjakôt ari Metîndjwýnhbê amijo akêxo aba. Ga, me kwý kute kum prô djwýnh kînh ngriren kute mebê prôo àkînhô baja pumû. Me gadjwý ne ga me amã Metîndjwýnh kînh ngriren ari kubê amijo akêxo aba. Ne kam me aje omûnh kadjy ije me amã mýjja pumûnh kêt nhípêx jabej. Djãm kam ije me amã ipêxmã? Kati. Ije me amã ipêx me aje omûnh prãm kêtumrêx. Dja ba ï amijo Metîndjwýnh kukwakam ujarênh djwýnhbê Djônaj pyræk. Dja ga me jabit pumû, ane. Tyk ne akubyn tîn'ã ne ã Jeju memã ane. Ne kam arým mebê akêx ne mã tẽ.

*Djwý nhigot djã ã ujarênh.*

*Mak 8.14*

<sup>5</sup> Ne kam ar imôti'ã rên akàx nhikjêrnã bôx. Nhyrn kôt ba djwýnh ar djwýo amak kêt katin arým Jejurnã arê. <sup>6</sup> Nhyrn arým me kukràdjã kajgo kôt ar amijo ba kêt kadjy arkum kabên ne arkum,

—Ga, me kute djwý nhigot djã djwý djômkam kapînja pumû. Nhyrn arým djwý tÿx me:x ne. Ar gadjwý dja gar me kukràdjã man kôt ar amijo aban arým ajaxwe mex ne. Mebê pardjêu kukràdjã nâr mebê xadjudjêu kukràdjã dja gar aman kôt ar amijo aban arým ajaxwe me:x ne. Ar amijã ano tÿx ne me kukràdjã mar kêt ne kôt ar amijo aba kêt. Nãm ã Jeju nêje ar kukràno ane.

<sup>7</sup> Nhyrn kam ar ari 'ã aben kukij ne arîk abenmã kum,

—Gwaj baje djwý byr kêtam ne ã gwaj bamã ane, ane.

<sup>8</sup> Nhyrn Jeju arým ar kabên man arkum,

—Ar aje amim imar ngri:re. Mýkam ne gar aben kukij ne abenmã kum, “Gwaj baje djwý byr kêtam ne ã gwaj bamã ane”, ane? <sup>9</sup> Djãm ar aje mýjja mar kêt rã'ã? Mýj'ã ikabên kute amijakreja djãm aje mar kêt rã'ã? Ar akubyn

amijo tèn ije djwý kubê 50 mebê 5.000o djuw mex'ÿr amijo bôx. Mýj ne ar aje djwý janhy karwãnhkam kaxnokai ipu kuten 'ã kâtãm ne? <sup>10</sup> Ar akubyn amijo tèn ije djwý kubê 7o mebê 4.000o djuw mex'ÿr amijo bôx. Mýj ne gar aje djwý janhy karwãnhkam kaxnokai ipu kute? Ga, djwý kume:xo ije meo djuw mexja pumû. Djãm arým ne gar o ajamak kêt kati? <sup>11</sup> Djãm djwý'ã ne ba ar amã arê? Djãm 'ã ne ba ar amã, “Ari amijã ano tÿx. Kwãrîk wãnh mebê pardjêu kukràdjã, nâr mebê xadjudjêu kukràdjã, kute djwý nhigot djã pyræk kwãrîk wãnh kôt ar amijo aba kêt”, ane? Kati. Djwý'ã ije ar amã ja jarênh kêt. Mýkam ne gar aje ja mar kêt? Nãm ã Jeju arkum ane. <sup>12</sup> Nhyrn kam ar arým kuma. Kute Ar kubê me kukràdjã puma. Kute Ar kubê mebê pardjêumê mebê xadjudjêu kukràdjã puma. 'Ã ne djwý nhigot djã amijakre. Tãm ne ar arým jakam kuma.

*Pedru kute Jejurnã Bênjadjwýrbê kumkati jarênh.*

*Mak 8.27; Ruk 9.18*

<sup>13</sup> Be, Piripi nhô krîraxbê Xedjare bu'ã ne apýnh me ô krî djari. 'ÿr ne Jejurnê kôt ba djwýnh ar mō. Ar 'ÿr mōrkôt nhyrn Jeju arkum,

—Ë, ar imã ijã me ujarênh jarê ba kuma, ane.

<sup>14</sup> Nhyrn ar arým kum,

—Nãm me kwý ajã, “Ngômã me angjênh djwýnhbê Djuão. Ta ne akubyn tîn ne ar ba”, ane. Nhyrn me kwý ajã, “Me bakukãmãre Erij. Metîndjwýnh kukwakam ujarênh djwýnh raxbê Erij”, ane. Nhyrn me kwý ajã, “Me bakukãmãre Djermi. Metîndjwýnh kukwakam ujarênh djwýnhbê Djermi”, ane. Nhyrn me kwý ajã, “Me bakukãmãre kam Metîndjwýnh kukwakam ujarênh djwýnh ar 'ô.” Nãm me ã abenmã ajã ane. Nãm ã ar Jejurnã ane.

15 Nhyam ajte arkum,  
—Ne ar gadjwÿ mã ne gar imar on? Mÿj'ã ne gar ijakre? ane.

16 Nhyam Pedru kum,  
—Abê me inhô Bënjadjwÿrbê kumkatibê Kritu. Abê Metïndjwÿnh tïn ne ar baja Kra, ane.

17 Nhyam Jeju Pedrumã kum,  
—Ximão, Djônaj kra. Djãm pykakam me'õ ar ba ne amã ijarê ga ima? Kati. Kàjkwakam Ibãm ne amã ijo amirît ga ima. Kam ne ga akï:nhkumrêx ne. 18 Ga ne ga imã, “Abê me inhô Bënjadjwÿrbê kumkatibê Kritu. Kadjy ne Metïndjwÿnh ajano ga bôx. Ga abê Metïndjwÿnh tïn ne ar baja kra”, ane. Ba amã arê ga ama. Ga abê Pedru. Mrãmri, kën'ã ne anhidji amijakre. Akabên mex jakôt ne ga arÿm atÿx ne aje kën pyrãk. Dja me akudjwa ã amim imaro ane ba arÿm amim me utã nhyam me arÿm akudjwa tÿx kute kën tÿx pyrãk. Me kute amim imar kunÿja dja me tÿ:x nhyam arÿm Xatanaj nhô me àpênh te kute meo àpanhmã ne te kute me biknor tokry djãkam meo biknormã. 19 Dja ga aje mrãmri ne me'õ kute bënjadjwÿr nhô kikrekam o kajkep djão ba pyrãk. Me'õ kikre'ã kuta nhyam me arÿm wadjã nãr kikre'ã ijê tÿx ne arÿm mebê aptã nhyam me ar kêtumrêx. Aje me'õja pyrãk. Dja me amim imar kêt ga arÿm mebê aptã. Nhyam kam kàjkwakam Ibãmdjwÿ arÿm akôt amikabên djïn arÿm mebê aptãn amim me utãr kêt ne ar meo ba kêt. Nãr, dja me amim ima ga memã kum, “Ajrã. Kôt ar aba”, ane nhyam kàjkwakam Ibãmdjwÿ arÿm akôt amikabên djïn memã kum, “Ajrã. Ikôt ar aba”, anen arÿm amim me utãn ar meo ba. Nãm ã Jeju Pedrumã ane. 20 Ne kam amijã kôt ba djwÿnh arkum karô. Metïndjwÿnh ne arÿm mebê idjaer kadjy Jeju'ã Bënjadjwÿrbê kumkati mē. 'Ã ne me kum Kritu

jarê. Nãm amijã arkum karôn arkum,

—Kwãrik wãnh me'õmã kum, “Jejubê ne Kritu. Kubê ne me banhô Bënjadjwÿrbê kumkati”, anhÿr kêt. Nãm ã Jeju arkum ane.

*Amikukãm amityk'ã ujarênh.*

*Mak 8.31; Ruk 9.22*

21 Ne kam ja nhijukri arÿm kôt ba djwÿnh arkum,

—Krïraxbê Djeruxarêkam itokry kumexmã ne Metïndjwÿnh ijano ba arÿm 'ÿr itëmmã. Dja ba kam bôx nhyam mebêngêtmê me kadjy Metïndjwÿnh mar djwÿnh nhô bënjadjwÿrmê Môdjê kukràdjã mar djwÿnhmê ijo bikênh kumex nhyam me arÿm ibi. Nhyam ijã akatin akatin akati ba akubyn itïn ne, ane.

22 Nhyam kam Pedru arÿm Ar kubê Jejuo tën ar kãxã nêje kum bën tÿxmo krax ne kum,

—Bënjadjwÿr djwÿnh, gop gê Metïndjwÿnh kum akaprï. Djãm ga dja me abi? Arkati, ane.

23 Nhyam Jeju akêx ne Pedrumã kum,

—Arÿm akabên kute Xatanaj kabên pyrãk. Amũ imã akre rax ne dja. Aje Metïndjwÿnh bê ijo akêx prãm pyrãk. Metïndjwÿnhkôt adjumar kêt. Me kum ikïnh kêtja kôt ne ga adjumar djã dji, ane.

24 Nhyam kam Jeju kôt ba djwÿnh arkum,

—Gêdja gar ajô mã ikôt abikamênh prãm jabej kwãrik wãnh amidjwÿnhbit mar kêt. Dja ga amim, “Djãm ba ije amijo ikïnhmã? Kati”, ane. Dja ba ityk kadjy inhô pïte'y mÿn itokry:. Dja ga ijã amijakren aje anhô pïte'y mÿnh mãn prãbê amã atokry pyma kêt ne amã ijabê rã'ã ne mã ikôt ajkamê.

25 Me kute amidjwÿnhbit mar ne me kum tokry pyma, me tãm gêdja me tyn kam ijukri me biknor tokry djãkam tē. Nhyam be, me kum ijabêkumrêx ne kute amidjwÿnhbit mar kêt nhyam me kute me bïn jabej

me tãm gêdja me amiptàn ar tîn ne ba rã'ã: rã'ã ne. <sup>26</sup> Ne ren me'õ pykabê mýjja mexja kunî, nèkrêx kunîja ren ari o atom ne o ban kam ren ty. Je, mã dja kam nê? Kati, nãm ren ty nhym ren õ nèkrêxja ren wãnh kumex. Nhym mýj pãnh ne ne ren Metîndjwýnhmã arê nhym ren akubyn o tîn nhym ren kum amijo pãnh? Arkati. Dja te kum pãnh jarê nhym akubyn o tîn prãm kêt kumrêx.

<sup>27</sup> Ba ije amijo inhî ne me'ýr irwýk dja ba Ibãm jadjênhmê umao ipyma:n me'ýr bôx. Kadjy mrãnh djwýnh pyma:mê ro'ã me'ýr bôx. Ne kam me î pýnhkôt me kunîmã o pãnh ne. Me axwe kôt nâr me kute katât amijo ba kôt memã o pãnh ne. <sup>28</sup> Ba ar amã arê. Ije amijo inhî ne ar awýr ibôx. Ibãm dja ijã bënjadjwýr rax mẽ. Dja ba bôx ne ipymao ar apytàn ar ar ajo iba. Dja gar adjãmja akwý atîni iraxkôt ipumû, ar akadjy ibênjadjwýr rax ne ipymakôt ipumû. Mrãmri ne ba ikabênja. Nãm ã Jeju arkum ane.

## 17

*Kute amijo atemã'ã ujarênh.  
Mak 9.2; Ruk 9.28*

<sup>1</sup> Jeju memã ane nhym kam ar'ã akati amãnhkrut ne amãnhkrut ne amãnhkrut apêx. Nhym kam Jeju arým Pedrumê Xijagumê Djuão ar aprôn aro tẽn krãnh prêkti'ã aro wabin ate ar ro'ã me kãxã dja. <sup>2</sup> Ne kam arým ar kabem amijo atemã. Ne nokre jadjênh kute myt jadjênh pyrãk. Nhym õ kubêkã arým aka:n kam adjê:nh. <sup>3</sup> Nhym kam me bakukãmãrebê Mòjdjêmê Erijmê arým arkum amijo amirît ne. Ar Jejumê abenmã ujarênh o dja nhym ar arým ar omû.

<sup>4</sup> Nhym kam Pedru Jejumã kum, —Bênjadjwýr djwýnh, jakam arým gway bakînhkumrêx. Amã kînh jabej dja bar ar amã kikre kryre nhípêx. Dja bar amã 'õ

nhípêx ne Mòjdjêmã 'õ nhípêx ne Erijmã 'õ nhípêx, ane.

<sup>5</sup> Nãm kum kabêno dja nhym kakrã jadjênh arým ar nokrekam kato. Ar nokrekam katon arým ar kuno. Nhym ar aêrbê Metîndjwýnh kakrã kurûm kabên nhym ar kabên ma. Nhym arkum,

—Ikra ne wã. Imã abê:kumrêx. Ba kam kam ikînhkumrêx. Tãm wã dja gar kabên man kôt ar amijo aba, ane.

<sup>6</sup> Ar kabên ja man arým madjã kreti. Madjã kretin tu mýrbê tým ne nõ. <sup>7</sup> Nhym Jeju ar'ýr bôx ne ar kupên arkum,

—Kãjmã ar dja. Kwãrîk wãnh ar atîn prãm kêt, ane. <sup>8</sup> Nhym ar kãjmã rît nhym arým Jeju pydjibit dja nhym ar omû. Arým ne Mòjdjê ar ar aêrbê mã tẽn arým amirît kêt ne.

<sup>9</sup> Nhym kam ar arým krãnh prêkti'ã rwýk tẽ. Rwýk tẽ nhym Jeju arým arkum 'ã karôn arkum,

—Ar aje ipumûnhja kwãrîk wãnh on me'õmã 'ã adjujarênh kêt. Ba ije amijo inhîja ityk ne akubyn itînkambit dja gar 'ã ajarê, ane.

<sup>10</sup> Nhym kôt ba djwýnh ar Erij jabej Jeju kukij ne kum,

—Mýkam ne Mòjdjê kukràdja mar djwýnh memã kum, “Erij kumrêx dja bôx nhym kam Metîndjwýnh ar meo ba”, ane? Mýkam ne me memã ja jarê? ane.

<sup>11</sup> Nhym Jeju arkum,

—Be, mrãmri, gêdja me'õ kute Erij pyrãk kumrêx bôx ne akubyn Metîndjwýnh'ýr me kunîo akêx ne. Meo akêx nhym me arým amim maro ba. <sup>12</sup> Ba ar amã arê gar ama. Me'õ kute mrãmri ne Erij pyrãk arým bôx nhym me kute mar kêt ne arým amikînhje o bikênh o ba. Badjwý ije amijo inhî dja me ijo bikênh o ba ba itokry ne, ane. <sup>13</sup> Nhym kam kôt ba djwýnh ar amim,

—Be, ngômã me angjênh djwýnhbê Djuão'ã ne ar imã ane, ane.

*Me karô punumã àkjêr.*

*Mak 9.14; Ruk 9.37*

<sup>14</sup>Kam Jeju ar arým krãnh'ã rwýk tẽ. 'Ã rwýk tẽ:n arým me krãptija'ýr bôx. Nhyr kam me'õ 'ýr bôx ne parbê kõnkrão nhýn <sup>15</sup>kum,

—Bênjadwýr djwýnh, amã ikra kaprĩ. Ikra ibê tyk ar ban amijo bikênh krãptĩ. Nãm mã tyn kuwykam rôrôk ne ngôkam nox. <sup>16</sup>Nã bãm akôt ba djwýnh ar'ýr o bôx nhyr ar te kute o mexmã o ane, ane.

<sup>17</sup>Nhyr kam Jeju me'ýr akêx ne memã kum,

—Je, me akamingrãny aje amim ikamnhix kêtumrêx ne ajaxwe. Mýj dja ijã akati, akamãt kô kute ba me akam arek ar iba? Nã bãm me awýr bôx ga me ajamakre kêtumrêx ne prĩne akabêno ikaty. Nã bãm te amiwýr me akam ama ga me arĩk ar aba, ane. Ne kam bãmjamã kabên ne kum,

—Amrê akrao tẽ, ane. <sup>18</sup>Nhyr arým 'ýr o tẽn o bôx nhyr Jeju arým kum akij. Me karô punu kute kra bôktio bajamã akij nhyr arým kum iren kurũm katon mã tẽ. Nhyr arým myt tãmkam mex ne.

<sup>19</sup>Nhyr kam Jeju tẽn ate dja nhyr kôt ba djwýnh ar arým 'ýr bôx ne kum,

—Mýkam ne bar te: ije me karô punu kujaêkmã o ane? ane.

<sup>20</sup>Nhyr Jeju arkum,

—Djãm ar aje kujaêk kadjy tu amim Metĩndjwýnh kamnhixkumrêx? Kati. Ar aje kadjy tu amim kamnhixkumrêx kêt. Dja gar tu amim kamnhixkumrêx. Be, me kute tu amim Metĩndjwýnh kamnhixkumrêxkam me kute rerekre pyrãk. Ga, pidjôbê motadu 'ydjwý ngri:ren rere:kreja pumũ. Nhyr be, kati. Motadu 'y arým krekam ingrôt ne abatãnh ne kam arým abatãnh ne. Ar gadjwý

dja gar tu amim Metĩndjwýnh kamnhixkumrêx ne kam kute arerekre pyrãk nhyr arým ar amã mýjja jabatãnh nhípêx. Kute mýjja rũnh kunĩ nhípêx mar. Gar ren kadjy tu amim Metĩndjwýnh kamnhixkumrêx ne ren krãnhjamã kum, “Krãnh, amũ ajkamê”, ane nhyr ren arým amũ ajkamê. Djã ne gar ren te aje mýjja 'õo anhýrmã? Kati. Ne gar ren apýnh mýjja kadjy tu amim Metĩndjwýnh kamnhixkumrêx nhyr ren arým ar amã ipêx ne. Nhyr be, kati. Ar aje tu amim kamnhixkumrêx kêt. Mrãmri ne ba ar amã ja jarênhkumrêx. <sup>21</sup>Nhyr be, me karô punu kute bôktio baja mebê tý:x. Me kute Metĩndjwýnhmã o à'wýr ne kum amijajburkambit arým apôx. Nãm ã Jeju arkum ane.

<sup>22</sup>Nhyr kam ar arým pykabê Garrêjakam ar ba. Nhyr kam Jeju arkum,

—Ba ije amijo inhĩ dja me'õ ibê amijo akêx ne memã ikanga. <sup>23</sup>Nhyr me kam arým ibĩ. Nhyr ijã akatin akatin akati ba akubyn itũn, ane. Nhyr kam kôt ba djwýnh ar arým kaprĩre ne.

*Pi'ók kaprĩo atom djwýnh'ã ujarênh.*

<sup>24</sup>Nhyr kam ar krĩraxbê Kapan'a'ýr tẽn 'ýr bôx. Nhyr kam pi'ók kaprĩo atom djwýnh ar ba. Ar kute Metĩndjwýnh nhõ kikretio mex kadjy pi'ók kaprĩo atomo ba. Ne kam ar Pedru'ýr bôx ne Jeju jabej kukij ne kum,

—Djãm ar anhõ ujarênh djwýnh kute Metĩndjwýnh nhõ kikreti kadjy memã pi'ók kaprĩ nhõrmã? ane.

<sup>25</sup>Nhyr arkum,

—Nã. Dja ar amã kungã, ane. Ne kam kikremã wadjàn Jeju'ýr bôx ne amikabên mar tórãm nhyr Jeju kumrêx kum,

—Ximão, mýj ne ga kam mar on? Mýj xêbê gêdja pykakam me bẽnjadwýr pi'ók kaprĩo atomo ba?

Pi'ók kapribê ìpôxuo atom nàr pi'ók kapribê kributuo atom. Mỳj xêjabê dja o atom? Djâm ta kra Ar kubê dja o atom nàr djâm ò àpênh kajgobê o atom? ane.

<sup>26</sup> Nhyim Pedru kum,

—Ò àpênh kajgobê dja pi'ók kapriõ atom, ane.

Nhyim Jeju kum,

—Mrâmri, ò àpênh kajgobê dja o atom. Kute kra Ar kubê pi'ók kapriõ atom kêt. <sup>27</sup> Bir be, gu babê Metîndjwýnh kra. Kam Metîndjwýnh gu babê pi'ók kapriõ atom kêt. Gê te gu babê pi'ók kapri byr kêt gu ba dja gu tu o atom djwýnh arkum kungã. Metîndjwýnh nhõ kikreti kadjy o atom djwýnhmã kungã. Gwaj ren arkum òr kêt nhyim ren me abenmã gwaj bajã kabê:n ne. Aje, imôti'ýr dja ga tèn 'ýr bõx. Ne kam kum anhõ kadjãt mē. Dja tep'õ kumrêx 'ã wajêt ga o wabin abyn ajkwa pôt. Ajkwakam dja ga ngônthonho pi'ók kapri pumũ. Tãm dja ga aby gu amikadjy arkum kungã, ane. Nhyim kam arým ã anen arým arkum kungã.

## 18

*Ar kute amirax jabej Jeju kukjêr.*

*Mak 9.33; Ruk 9.46; Pir 2.3; Ped k 5.5*

<sup>1</sup> Nhyim kamã kôt ba djwýnh 'õdjwý ar 'ýr bõx ne kukij ne kum,

—Kàjkwakam Bënjadjwýr djwýnh kute pykakam amim me utàr ne ar meo bakam nhýnh ar ijõ dja bar iraxo aben jakre? ane.

<sup>2</sup> Nhyim amiwýr me'õ prîre 'uw nhyim 'ýr bõx nhyim ar ipôkri kudja.

<sup>3</sup> Ne arkum,

—Dja gar on amirax jabejja kangan amijo angriren amijo akâtãm. Amijo angrire kute me prîre pyrãk. Godja gar amirax jabej rã'ã djâm kàjkwakam Bënjadjwýr djwýnh kôt ar abamã? Kati. Kàjkwakam Bënjadjwýr djwýnh kute pykakam amim me utàr ne ar meo bakam kôt ar aba prãm

kêt-kumrêx. Mrâmri ne ba ar amã ja jarênhkumrêx. <sup>4</sup> Kam me kute amijo ngrire kute me prîre ja pyrãk tãm ne raxo kute me kunĩ jakrenh. Kàjkwakam Bënjadjwýr djwýnh kute pykakam amim me utàr ne ar meo bakam ne raxo kute me kunĩ jakrenh. <sup>5</sup> Nhyim kam me kute ikukwakam kum me prîre kute ja pyrãk kînh, kum me'õ kâtãmja kînh ne kam arým badjwý kum ikînh.

<sup>6</sup> Nhyim be, me'õ kute me prîre pyrãk ne ajbir kute amim imar ny nhyim kam ren ate me'õja axwe'ã kum apnê nhyim ren arým kôt axwe nhyim kam ren pãnh me mut'ã kênpoti nhõ, kute kum axwe'ã àpnênh djwýnhja mut'ã ren kên jabatàn nhõ ne ren ngônhmã kumê, ngõ jabatàn nhipôkri kumê nhyim ren ngõ kubĩ. Ja ne kàjbê tokry. Tokry ngrire. Nhyim be kati, dja prîre Metîndjwýnh o ajkê nhyim tokry ra:x ne. <sup>7</sup> Ý, watî:re. Pykakam me kute me axwe'ã memã àpnênhja dja me tokry ra:x ne. Mrâmri dja me axwe'ã memã àpnênh ba. Nhyim be, kute 'ã memã àpnênh djwýnhja watî:re. Dja tokry ra:x ne. Nãm ã Jeju arkum ane.

<sup>8</sup> Ga, me kute apýnh amikukràdjã òpênh jaxwe prãmja pumũ. Ar kute àpênh jaxwe krã'ýrn kangamã ne Jeju Ar kubê axwe pyman arkum,

—Ne ga ren ar ajaxwe kadjy anhikra nhikjêo aje mýjja punu kupênh prãm nàr ar apar nhikjêo mýjja punu 'ýr amrãnh prãm mýj ne gar ren on? Bir, ga ren ar on krãtan rûm amibê amē. Ne ren kam te anhikra nhikjê kêt nàr apar nhikjê kêt ne ren atînkam ren akînhkumrêx. Metîndjwýnhkôt atînh ne ar abakam ren akînhkumrêx. Ne ren aktã anhikra rã'ã nàr aktã apar rã'ã nhyim Metîndjwýnh ren kuwykam ar amē. Kuwy pók rã'ã: rã'ãkam ren ar amē gar ren kam atokry ra:x ne.

<sup>9</sup> Ne gar ren ajaxwe kadjy ano nhikjêo aje mýjja punu pumũnh prãm mýj ne gar ren on? Bir,

ga ren ar on kaban rûm amibê amê. Ne ren kam te ano nhikjê kêt ne ren atînkam ren akînhkumrêx. Metîndjwýnhkôt atîn ne ar abakam ren akî:nhkumrêx. Ne ren aktâ ano râ'ân ren atokry ra:x ne. Ne ga ren ar me biknor tokry djâkam kuwykam tẽn ren kam akaprîkumrêx, ane. Djâm mrâmri ne ar kute aminoo pôx ne amin-hikra krâkâr ne amipar krâkârmâ Jeju arkum 'ã karô? Kati, ar kute âpênh jaxwe krâ'yryn kangamã ne Jeju 'ã arkum ar kute amibê amikukràdjâ krâkârmã arê.

*Mrykî'âtomtî biknor'ã ujarênh.*

*Ruk 15.4*

<sup>10</sup> Ne kam ajte arkum,

—Me'ô kute me prîre pyrâk djâm ar amã kurên aje kum kajgo jarênhmã? Kati. Kwârîk wân. Mýkam? Bir, djâm kajgo? Kati. Mýkam? Bir, kadjy mrân timerênh kute me prîreo djuw mex djwýnhja ne kute kâjkwakam Ibâm pumûnh rá'âkam. Ba ne ba ar amã ja jarê.

<sup>11</sup> Be, ije me axwe pytârmã ne ba tẽ. Kadjy ne ba amijo inhî ne me awýr ruw, ije me axwekam me biknorja pytârmã. <sup>12</sup> Ar gadjwý dja gar adjukaprî. Godja me'ô nhô mrykî'âtomtî krâptî kubê 100 nhym kam pydji kubê màt ne biknorja. Mýj dja me'ôja on? Bir, dja mry krâptîbê 99jamã ire gê wân timerênh kutêp kumex, nhym kam krân timerênh kôt tẽ, pydji biknorjakôt tẽ. <sup>13</sup> Godja kum kator jabej ne kam arým kî:nhkumrêx. Kute pydji biknorjamã katorkam dja kî:nhkumrêx. Ne mry'ã kâtâmbê 99 biknor kêtjakam dja kînh ngrîre. Ba ne ba mrâmri ar amã ja jarênhkumrêx. Be, ije ar amã idjujarênhjakam mýj dja gar kam ama? <sup>14</sup> Bir, kâjkwakam Abâm djwýnhdjwý, djâm me'ô prîre kute âmja pyrâk pydji biknor nhym kam kînh got? Arkati. Kam kînh kêtumrêx. Ukaprîkam kam kînh kêtumrêx. Tãm dja ga amim aman

kudjwa adjukaprî. Nãm ã Jeju arkum ane.

*Kute me'ô jaxwe'ã arkum karô.*

*Ruk 17.3; Gar 6.1; A Tex 3.15*

<sup>15</sup> Ne kam ajte arkum,

—Kam, aje me'ô akamy'ô godja ajo bikênh jabej ne arým axwe jabej. Ga dja ga adjukaprînkumrêx 'yr tẽn me kâxã kukjan kum akabên. Godja kute amar ne axwemã irer jabej ga ne ga arým Metîndjwýnh'yr o akêx nhym ajte kôt ba. <sup>16</sup> Nhym godja kute amar prâm kêt ne mã axwe jabej. Kam dja ga me'ô pydji nâr amân timerênh 'yr aro tẽ. 'Yr aro tẽn 'yr aro bôx. Ne kam kukjan kum akabên gê ar amã amijarê gar ama. Gar ajamân timerênh nâr ar ajamân timerênh ne ikjêkêt dja gar arým ama. Amrêbê: Metîndjwýnh kabên kôt dja gar ã maro ane. Nãm me bakukâmãremã kum,

“Dja me'ô amijarênh jabej. Gê ar amân timerênh nâr ar amân timerênh ne ikjêkêt kabên kôt memã arê.

Ar kute kabên mar kôt arê nhym me arým kuma. Ar axikôt kabên timerênh dja me ar kabên man arým abenmã kum,

‘Mrâmri me'ôja kute amijarênh nhym ar kute kabên kôt arênhkumrêx’, ane. Dja me ã abenmã ane.”

Nãm ã Metîndjwýnh me bakukâmãremã ane. Metîndjwýnh kabên jakôt

dja gar ajamân timerênh ne ikjêkêt ne me'ôja'yr tẽn 'yr bôx ne ama.

<sup>17</sup> Godja gar gadjwý te kukjan kum akabên nhym kute ar amar prâm kêt ne mã axwe prâm jabej gar me kute amim imarjamã arê. Me kute aben pydjikam memã arê. Nhym godja me kute amim imar aben pydjikam te kukjan kum kabên nhym kute me mar prâm kêt ne mã axwe prâm jabej gar abenmã kum, “Kute Metîndjwýnh mar kêt. Ga, axwe prâm rá'ãja pumû”, ane. Dja gar ã abenmã anen arým o kute me

bênjadwÿr bajtemmã pi'ók kaprïo atom djwÿnh jaxwe pyrãk. Nãm ã Jeju arkum ane.

<sup>18</sup> Ne kam ajte arkum,

—Ba ar amã arê gar ama. Dja me amim imar kêt gar mebê aptã nhym kãjkwakam Ibãmdjwÿ dja ar akôt amikabên dji. Nâr, dja me amim ima gar memã kum, “Ajrã”, ane, kãjkwakam Ibãmdjwÿ dja ar akôt amikabên dji. Mrãmri ne ba ar amã ja jarênhkumrêx.

<sup>19</sup> Ba ajte ar amã arê gar ama. Godja gar ajamãnhkrut pykakam kum mÿjjao a'uw nâr kum me'õo a'uw ne axikôt 'ã ar akabên dji, kãjkwakam Ibãm dja arÿm ar aman ar akabên kôt ã anen ar amã mÿjja ngã nâr me'õo kaprïmã kÿnh jadjân nâr me'õo mex. Ar akabên kôt dja ã ane. <sup>20</sup> Mÿkam? Bir, godja me'õo ar amãnhkrut nâr ar amãnhkrut ne ikjêkêt ikabênkôt bikprõnh jabej badjwÿ dja ba ar ro'ã akuprõ. Kam dja Ibãm ar akabên kôt ã ar amã o ane. Nãm ã Jeju arkum ane.

*Me'õ ukapri kêt'ã ujarêh.*

*Mat 6.14; Ruk 17.4; Ep 4.32; Kor*

**3.13**

<sup>21</sup> Kam, Pedru Jeju'ÿr bõx ne kum,

—Ije me'õo ikamy godja ari ikam axweo ba jabej. Mÿj dja ba kam ingyk kêt on? Djãm kam ingyk kêt 'ikrân ne kubê 7? Nâr kon? ane.

<sup>22</sup> Nhym Jeju kum,

—Kati. Dja ga kam angyk kêt ry typdji. Dja ga kam angyk kêt bê 70 ne ajte kubê 70 ne ajte kubê 70 ne ajte kubê 70 ne ajte kubê 70 ne ajte kubê 70. Dja ga ã kam angyk kêt ry typdjio ane.

<sup>23</sup> Kãjkwakam Bënjadwÿr djwÿnh dja pykakam amim me utàn ar meo ba. Kam dja kum me kaprï. Gwaj badjwÿ ne gwaj ren bamã me kaprï. 'Á dja ba idjujarêh jakre gar ama. Pykakam bënjadwÿr rax'õ. Nhym õ àpênh kwÿ. Amrêbê ne bënjadwÿr õ àpênh kwÿmã pi'ók

kaprï ngã nhym ar kum o ba. Nhym jakam arÿm kute akubyn Ar kubê õ pi'ók kaprïo atommã.

<sup>24</sup> Ne kam kute amikraxmã ne arÿm 'ÿr me àpênh'ã me omÿnh djwÿnh jano. Õ àpênh ja'ÿr me àpênh'ã me omÿnh djwÿnh jano. Nhym 'ÿr tèn arÿm 'ÿr bõx. Ne kam bënjadwÿr'ÿr õ àpênhjao tèn o bõx. Be, amrêbê ne bënjadwÿr õ àpênh jamã pi'ók kaprï kumex ngã nhym kum o ba. Pi'ók kaprï kume:x kubê 10.000 ne kum kungã nhym o ba. Kum ar o ba:n arÿm nhÿnh o akno nhym arÿm pi'ók kaprï kêt ne.

<sup>25</sup> Õ me àpênh'ã me omÿnh djwÿnh bënjadwÿr'ÿr õ àpênhjao bõx nhym te kute akubyn õ bënjadwÿrmã pi'ók kaprï nhõrmã. Te o ane nhym arÿm kam ngyk ne. Ngyk ne arÿm õ me àpênh'ã me omÿnh djwÿnhmã kum, “Inhõ àpênh ja ne ibê inhõ pi'ók kaprï kume:x ar o ban nhÿnh o akno. Gu akubyn kubê inhõ pi'ók kaprï byrkumrêx. Dja ga kubê õ mÿjja kunÿ byn me kâtãmmã angã gê me kubyn pãnh amã pi'ók kaprï ngã. Nhym õ mÿjja kêt ga ajte me kâtãmmã ta ï djwÿnh ngã gê memã àpênh ar ba nhym me pãnh arÿm amã pi'ók kaprï ngã. Ga kam ajte memã prõmê kra ar kungã gê ar memã apê nhym me pãnh arÿm amã pi'ók kaprï ngã. Kam dja ga me kute amã pi'ók kaprï nhõr kunÿo atom ne iwÿr o bõx ne imã angã. Ba kam arÿm akubyn inhõ pi'ók kaprï byrkumrêx. Inhõ àpênhja kute ibê pi'ók kaprïo biknor pãnh dja ba arÿm akubyn amim byrkumrêx”, ane nhym me àpênh 'ã me omÿnh djwÿnh kum, “Gê tô, ba 'ÿr”, ane.

<sup>26</sup> Nhym õ àpênhja arÿm õ bënjadwÿr kabên man umaje parbé tÿm ne kõnkrão nhÿn aminêje kum, “Bënjadwÿr, gop adjy amimar tô. Dja ba ï akubyn anhõ pi'ók kaprï pãnh amã pi'ók kaprï kunÿ ngã”, ane. <sup>27</sup> Nhym bënjadwÿrja arÿm

kum ò àpênhja kaprî: ne kum, “Aje, jakam dja ga imã o pãnh kêt. Arÿm ba maro aknon akam ingyk kêt”, anen arÿm kum ire nhym kato.

<sup>28</sup> Kute ò bënjadjwÿrbê pi'òk kaprî ra:xo biknor ja katon arÿm ro'ã àpênh'ò jabej. Amrêbê ro'ã ar baja jabej. Bënjadjwÿr nhõ àpênh ja ne amrêbê ro'ã àpênh jamã pi'òk kaprî ngrire kubê 100bit ngã nhym kum kubyn ar o ba. Nãm ro'ã àpênhja jabe:j ne arÿm kum kato. Kum katon arÿm mut 'amÿn òkreny janên kum, “Aje imã pi'òk kaprîo abaja on akubyn imã angã”, ane.

<sup>29</sup> Nhym ro'ã àpênhja arÿm umaje parbê tÿm ne kônkrão nhÿ. Nhÿn arÿm aminêje amijo a'uw ne kum, “Adjy amimar tô. Dja ba ï amã kunio pãnh”, ane. <sup>30</sup> Nhym kute bënjadjwÿrbê pi'òk kaprî kumexo biknorja arÿm ro'ã àpênhkam ngry:k ne. Ne kum kaprî kêt ne kum, “Kati. On dja ga imã kunio pãnh ne”, ane. Ne kam on krâkamngônhamã arê nhym me arÿm kabênkôt kubê ijê. Kute mebê ijê djâkam ãm ne o pãnhkambit katormã ne me kubê ijê. Nãm ã ro'ã àpênho ane. On kute kum ò pi'òk kaprî ngrirebito pãnh kêt kam ã ro'ã àpênhjao ane.

<sup>31</sup> Nhym kam amü bënjadjwÿr nhõ àpênh kwÿ 'òdjwÿ arÿm 'ã omün kam ar arÿm kam kaprî:re ne. Ukaprî kêt kam arÿm kam kaprî:re ne. Ne kam bënjadjwÿr'ÿr tën arÿm prîne kum 'ã ajarê. Ò àpênhja kute kubê pi'òk kaprî kumexo biknorja'ã kum ajarê. Ukaprî kêt'ã kum ajarê.

<sup>32</sup> Nhym kam bënjadjwÿr amiwÿr ò àpênhja 'uw nhym bõx nhym kum, “Inhõ àpênh, ga ne ga ajaxwe:. Ga inhõ pi'òk kaprî kumexo aban ibê o akno ba amã, 'Imã o pãnh', ane. Ga te aje imã o pãnhmãn arÿm aminêje imã akabên. Ba imã akaprîn arÿm amã, 'Aj. Jakam dja ga imã o pãnh

kêt. Arÿm ba maro aknon akam ingyk kêt', ane. Imã akaprîkam ne ba ã akam ingyk kêt o ane. <sup>33</sup> Ga ren ikudjwa ã amã aro'ã àpênhja kaprîo anen kam ren ã angyk kêt o ane. Nhym be, kati. Aro'ã àpênh ja amã anhõ pi'òk kaprî ngrirebito ba. O ba ga kam anhõ pi'òk kaprî jabej kum akabên. Nhym kam te kute akubyn amã òrmãn aminêje amã kabên. Djã ne ga ikudjwa amã kaprî? Kati. Ga tu kam angyk ne memã kanga nhym me arÿm kubê ijê.” Nãm ã bënjadjwÿr ò àpênhjamã ane. <sup>34</sup> Ne kam arÿm kam ngrykkumrêx ne. Bënjadjwÿr nhõ àpênh kute ro'ã àpênhkam ngryk ne kum kaprî kêtja pãnh ò bënjadjwÿr arÿm kam ngrykkumrêx ne. Ne kam arÿm me kamjêr djwÿnhmã kanga. Kute tokry kumexmã kamjêr nhym on kute o pãnh mex kadjy kum kanga. Nãm ã o ane. <sup>35</sup> Ne kam ar gadjwÿ, apÿnh ar anhÿ djãri, godja ar aje me'òo akamyja ar akam axwe jabej ar ga dja gar amã kaprî. Mrãmri tu amã kaprîkumrêx ne axwe maro aknon tu kam angyk kêt. Godja gar amã kaprî kêt ne kam angyk rã'ã jabej kâjkwakam Ibãmdjwÿ dja kum ar akaprî kêt ar akam ngry:k ne. Ije ar amã pykakam bënjadjwÿr'a idjujarênhja kôt dja ar akam ngry:k ne.

## 19

*Me kute prõ kanga'ã ujarênh.*

*Mat 5.31; Mak 10.1; Ruk 16.18; Kò k 7.10*

<sup>1</sup> Jeju arkum ja jarênh pan arÿm pykabê Garrêja kurüm katon tẽ. Nãm tẽ:n arÿm ngôbê Djodão nhikjêmã rên pykabê Djudêja'ÿr bõx. <sup>2</sup> Nhym me krãptî: ne me kôt mō. Nhym tën bõx ne kam arÿm kam meo mexo dja.

<sup>3</sup> Nhym kam mebê pardjêu 'ÿr bõx ne kute we kabên kajgo jabej kukjêrmã ne kum,



—Djâm Metîndjwýnh kukràdjà kôt me kute mýjja ngrirekôt tu prô kangamã? ane.

<sup>4-5</sup> Nhyam memã kum,

—Adjâkamã ne mýjja kunî nhîpêx djwýnh mymê ni ar ipêx ne memã kum,

“Kam dja me my prô kadjy arým bãmmê nã arkum iren kam arým prôbit'ã ngrã ne.

Nhyam kam ar ï abenã tým ne kam kute ï typdji pyrãk”, ane.

Djâm ar aje anhô pi'ôkkam ja pumũnh kêt? <sup>6</sup> Djâm ar ï amãnhkrut rã'ã? Kati, ar kute ï typdji pyrãk. Be ga, Metîndjwýnh kute abenã ar mênhja pumũ. Kwãrik wãnh me'ô abenbê aro bikjêr kêt. Nãm ã Jeju mebê pardjêumã ane.

<sup>7</sup> Nhyam me kum,

—Mýkam ne me bakukãmãre Môjdjê memã ã karôn memã kum, “Gê me prô'ã pi'ók no'ók ne kam kanga”? ane.

Mýkam ne Môjdjê ã memã ane? ane.

<sup>8</sup> Nhyam memã kum,

—Bir, me amakkre kêt kam ne memã prô kanga jarê. Nhyam djâm adjâkamã ne me ã prôo ane? Kati. <sup>9</sup> Ba dja ba ar amã arê gar ama. Gêdja me'ô prô djwýnh kangan kam atemã akãxhê me'omã kabên ne kam 'yr môn kam arým mrãmri krô'ã o prôn arým axwekumrêx. Nhyam be, prôja krô'ã mjênkambit nhyam myja kute kangakam axwe kêt. Nhyam kam godja atemã me'ô my jadjwý arým prô kangaja'yr mör jabej. 'Yr mörkam arým o akîn ajte adjwýnhdjwý axwekumrêx. Nãm ã Jeju memã ane.

<sup>10</sup> Nhyam kôt ba djwýnh ar kum,

—Djã nãm ã me prôkam ane? Nãm ren me kum amijã man ren kam kuprýn ar ba, ane.

<sup>11</sup> Nhyam arkum,

—Be, me kwý kukràdjà kôt ne aje arênhja. Me kwý týxkam ne me kum amijã ma. Me jabit ne me prô kêt. Nhyam be, me kwý ne me týx

kêt ne kam kum amijã ma kêt ne arým prô'yr mô. <sup>12</sup> Nhyam be, me nã tikkrekam ne me kwý amijo ajkê. Me nire kadjy kukràdjà amijo ajkên kam kurê kêt ne. Nhyam irãri me me kwýo ajkê nhyam kam me kurê kêt ne. Nhyam me kwý kute kãjkwakam Bênjadjwýr djwýnh'ã nopdji kadjy ta kum amijã ma. Kum amijã man arým kum me nire kîn kêt ne. Dja gar amã amijã ma kadjy atýx jabej amã amijã man amã me nire kîn kêt. Nãm ã Jeju arkum ane.

*Kum me prîre kîn'ã ujarênh.*

*Mak 10.13; Ruk 18.15*

<sup>13</sup> Nhyam kam me arým 'yr me prîreo bôx. Kute me'ã ikra jadjwýr ne Metîndjwýnhmã meo à'wýr kadjy ne me Jeju'yr meo bôx nhyam kôt ba djwýnh ar arým nêje memã bën týt.

<sup>14</sup> Nhyam Jeju arkum,

—Kwãrik wãnh arek amrê me prîre iwýr mô, ane. Kwãrik wãnh mebê adjãptãr kêt gê me arek amrê mô. Me kute amijo me prîre pyrãk ne amijo kãtãmjabit gêdja kãjkwakam ibãm me utàn me kadjy bênjadjwýr ne ar meo ba, ane. <sup>15</sup> Ne kam arým me prîre'ã ikra jadjuw. Ne kam arým mã me kurüm tê.

*Me'ô nêkrêx kumex'ã ujarênh.*

*Mak 10.17; Ruk 18.18; Xij 5.2*

<sup>16</sup> Tê: nhyam me'ô 'yr bôx ne kum,

—Ujarênh djwýnh, ga ne ga amexkumrêx. Mýj dja ba Metîndjwýnhmã amijo ne gêt kôt itîn ne ar iba rã'ã: rã'ã ne? ane.

<sup>17</sup> Nhyam kam kum arê. Kute Jejubê Metîndjwýnh Kramã kator kadjy ne Jeju arým kum,

—Mýkam ne ga mýjja mex jabej ikukij? Me'ô pykakam mex kêt kumrêx. Metîndjwýnh pydjibit mex. Metîndjwýnh me katãt kute amijo ba'ã memã karôkôt kukràdjaja dja ga aman kôt ar amijo aban kam arým kôt atîn ne ar aba rã'ã: rã'ã ne, ane.

<sup>18</sup> Nhyam kum,

—Nhÿnh kukràdjàjakôt dja ba amijo iba? ane.

Nhym kum,  
“Kwârîk wânh me par kêt.  
Kwârîk wânh mebê prôo adjâkînh  
kêt.

Kwârîk wânh adjâkînhî kêt.  
Kwârîk wânh ajêx ne me kàmex  
jarênh kêt.

<sup>19</sup> Amã abãmmê anã jabên ar kabên  
ma.

Amã amibu'ã me ja jabê. Kute  
mrãmri ne ga amã amijabêja  
pyràk dja ga ã amibu'ã amã  
me ja jabêo ane”, ane.

Metîndjwÿnh kute me bakukãmãremã  
'ã karôkam kabênja dja ga aman kôt  
katât amijo aba ne kam atîn ne ar  
aba râ'ã: râ'ã ne. Nãm ã Jeju kum  
ane.

<sup>20</sup> Nãm me'ôja ajbir abatânh ne.  
Nhym Jeju kum ane nhym kam  
kum,

—Nà, arÿm ne ba ja kunî man kôt  
katât ar amijo iba. Ibôktikam ne  
ba kôt katât amijo iban kam kôt ije  
katât ar amijo iba râ'ã. Mÿj dja ba  
ajte nênh kam itîn ne ar iba râ'ã: râ'ã  
ne? ane.

<sup>21</sup> Nhym Jeju kum,

—Be, prîne amex kadjy on tên  
memã anhô mÿjja wã ngân pân  
pi'ók kaprî byn me 'uwtî, me ô  
mÿjja kêtjamã angân o meo kînh ne  
kam amrê iwÿr tên mã ikôt ajkamê.  
Dja ga ã anen kam arÿm kâjkwakam  
anhô mÿjja mex kumex, ane.

<sup>22</sup> Nhym arÿm kuman kam akêx  
ne mã tê. Kaprî:re ne tê. Be, ô  
nêkrêx ne kume:x. 'Ã maje ne mã  
kaprî:ren tê.

<sup>23</sup> Nhym Jeju arÿm kôt ba djwÿnh  
arkum,

—Nêkrêx ne kute me kukrà  
prãmã. Me ô nêkrêx kumex gêdja  
me te kâjkwakam Bênjadjwÿr kute  
amim me utâr ne ar meo baja'ÿr  
bôxmã. Mrãmri ne ba ar amã  
arênhkumrêx. <sup>24</sup> Ba ajte ar amã arê  
gar ama. Be, ga mry jabatânhbê  
kameru te: kute aguja tekrax  
kremã ngêxmãja pumû. Me ô

nêkrêx rûnhdjwÿ kute uràk. Nãm  
me te Metîndjwÿnh kute amim me  
utâr ne ar meo baja'ÿr bôxmã nhym  
nêkrêx utâ: ne, ane.

<sup>25</sup> Kôt ba djwÿnh ar kute ja  
markam te kute marmã kam no  
tyn ku'ên arÿm abenmã kum,

—Je nhym mÿj me'ô gêdja  
Metîndjwÿnh amim me utâ? ane.

<sup>26</sup> Nhym Jeju arÿm ar omûnho  
djan arkum,

—Be, me ne me te: kute amipytâr  
prãmje. Nhym be, Metîndjwÿnh  
kute mÿjja kunî mar. Kumãbit ne  
amirît ne. Ta ne kute me utârkôt  
kute mar; ane.

<sup>27</sup> Nhym kam Pedru kum,

—Ë, arÿm ne bar inhô mÿjja  
kunîmã inhiren kam mã akôt  
ajkamê. Mÿj dja bar pân  
kubyn o aminhô? ane.

<sup>28</sup> Nhym Jeju arkum,

—Ba ar amã arê gar ama. Ar  
ga ne gar arÿm mã ikôt ajkamê.  
Amrê mÿjja kunî nÿ mörkam dja  
ba ipyma. Ije amijo inhî dja ba  
imexo ipyma:n ikrî djà raxkam  
memã nhÿ. Ar gadjwÿ, ikôt ar  
abaja dja gar apÿnh anhî djari ar  
abênjadjwÿr rûnh ne akrî djà rûnhbê  
12kam memã akrî. Apÿnh mebê id-  
jaer ba djari kubê 12 dja gar memã  
akrî, memã axwe pân jarênh  
akrî. Mrãmri ne ba ar amã ja  
jarênhkumrêx.

<sup>29</sup> Kam godja me'ô imã àpênh  
kadjy arÿm ô mÿjjamã irer jabej nâr  
ôbikwamã irer jabej. Ô kikre nâr  
kamy nâr kanikwÿnh nâr bâm nâr  
nâ nâr prô nâr kra nâr ô pykamã  
irer jabej. Godja arÿm ô mÿjja  
ja'ômã irer jabej ba dja ba kum o  
pân ra:x ne pân kum ô mÿjjao  
akrenh mex ne kum kungã ne pân  
kum ôbikwao akrenh mex ne kum  
kungã. Kum ô mÿjjamê ôbikwamê  
krãptî: kubê 100 ngã. Nhym kam  
arÿm Metîndjwÿnh kôt tîn ne ar ba  
râ'ã: râ'ã ne. <sup>30</sup> Nhym be, jakam  
me rûnho kutewaja djâm me kute  
memã wa râ'ãmã? Kati. Me ja

kräpti gédja me kajgo mex ne me katê tē. Nhyim be, jakam me kajgo mex ne me katēn tēmja kräpti gédja me pānh rünho kutewa. Nām ā Jeju kôt ba djwýnh arkum ane.

## 20

*Pidjôkôkam me àpēnh'ā ujarēnh.*

<sup>1</sup> Ne kam ajte arkum,

—Kàjkwakam Bēnjadjwýr djwýnh kute pykakam amim me utār ne ar meo bakam dja memā o pānh. 'Ā dja ba ō pidjôkô djwýnh jakren 'ā ajarē gar ama. Ō pidjôkô djwýnh ne kry:rām aminhürkwā kurūm kato. Ne tē:n me abej. Kute ō pidjôkôkam kum àpēnh kadjy me abej. <sup>2</sup> Ne kam ar ja'ýr bôx ne arkum, “Dja ba ar adjapēnh pānh apýnh ar anhī djāri ar amā pi'ôk kaprī pýnh ne kungā”, ane. Nhyim ar kum, “Mrāmri”, ane. Nhyim arým amū ō pidjôkômā ar ano nhyim ar arým 'ýr tē. 'Ýr tēn 'ýr bôx ne kam arým àpēnh 'amý.

<sup>3</sup> Nhyim kam arým kàjmā myt nhýrbé 9 ora nhyim ō pidjôkô djwýnh ajte kato. Katon arým amū me kute mýjja nhör djābé mekadukam tēn bôx. Nhyim ar ja àpēnh kēt ne dja nhyim arým ar omū. <sup>4</sup> Ne ar'ýr bôx ne arkum, “Ē, ar gadjwý inhō pidjôkôkam tēn apē. Dja gar apē ba arým ar amā o pānh katāt”, ane. <sup>5</sup> Nhyim ar arým kabēn kôt amū 'ýr tēn 'ýr bôx. Ne kam àpēnh 'amý.

Nhyim kam mēdjikkam ajte katon tēn ajte tām ne àpēnh'ýr me kwý 'ōdjwý jano. Ne kam myt nhibôbé 3 orakam ajte katon tēn ajte tām ne àpēnh'ýr me kwý 'ōdjwý jano. <sup>6</sup> Nhyim kam arým amykry mexbé 5 ora nhyim ajte katon tē. Nhyim ar ja àpēnh kēt ne dja nhyim arkum, “Mýkam ne gar adjapēnh kēt nhyim arým ar ajā amykry”? ane.

<sup>7</sup> Nhyim ar kum, “Bir, me'ō kute ar imā idjapēnh jarēnh kētkam”, ane.

Nhyim arkum, “Ar gadjwý dja gar tēn inhō pidjôkôkam apē. Dja ba katāt ar amā adjapēnh pānh”, ane. Nhyim ar arým 'ýr tē.

<sup>8</sup> Nhyim kam arým para nhyim ō pidjôkô djwýnh amiwýr me àpēnh'ā me omūnh djwýnh 'uw nhyim arým bôx. Nhyim kum, “Inhō àpēnh kunīmā akabēn gē ar bôx ga arkum àpēnh pānh. Dja ga ar kute àpēnh'ýr ar katē mōrjamā o pānh kumrēx. Ne ar kunīmā o pānh tē: nhyim ar kumrēx àpēnh'ýr bôxja dja ga arkum o pānh ne o pānh ino re”, ane. Nhyim me àpēnh'ā me omūnh djwýnh kum, “Gē tō. Ba akabēnkôt memā o pānh.” Nām ā ō bēnjadjwýrmā ane. Ō pidjôkô djwýnhmā anen arým amiwýr ō àpēnh 'uw. Ar ku'uw nhyim ar arým 'ýr bôxo dja.

<sup>9</sup> Kam ar ja kumrēx 'ýr bôx. Ar amykry mexkam 5 orakam àpēnh'ýr mōrja kumrēx 'ýr bôx. 'Ýr bôx nhyim arým apýnh ar ī djāri pi'ôk kaprī pýnh ne arkum kungā.

<sup>10</sup> Nhyim amū ar jadjwý aben totokmā 'ýr bôx. 'Ýr bôxo dja: nhyim arým arkum o pānh tē. Arkum o pānh tē: nhyim kam ar kumrēx àpēnh djā'ýr bôxja arým 'ýr bôx. Ar ja ne ar amim, “Jakam dja ar imā kàjmā pānh kamē”, ane. Ar 'ýr bôx nhyim kam arým pi'ôk kaprī tām ne arkum kungā. Pi'ôk kaprī pýnhbit ne arkum kungā. Nhyim apýnh ar ī djāri pi'ôk kaprī pýnhbit jamý.

<sup>11</sup> Amýn arým ō pidjôkô djwýnh'ā kabēn kume:x ne arē. <sup>12</sup> Ne kam kum, “Ē, amykrykam ar kute ar ikatē àpēnh'ýr bôxwā àpēnh ngrire ne 'ā ora pydjibit apēx. Ar bajbit ne bar arngro týxkam idjapēnh 'iry ne. Djā ne ga katāt ar imā o pānh ne? Kati. Ga ren ar imā kàjmā pānh kamēn ren ar imā pi'ôk kaprī rax ne ar imā angā. Ne ren ar wāmā ngrire ne angā. Ga arým aro ar ipyrāk ne arým arkum pi'ôk kaprī pýnh ne arkum angā”, ane.

13 Nhyr arým ar 'ômã kum, "Ak-mere, djã ne ba amã ijêx ne anoo akno ga akabên ne? Kati. Kryrãm ne ba amã, 'Pi'ók kaprî pÿnh dja ba adjâpênh pãnh amã kungã', ane. Ga kam imã, 'Mrãmri, dja ga ã imã ôro ane', anen arým adjâpênh'ÿr mō. 14 Kam dja ga on akrãnmã anhō pi'ók kaprî jamÿn o tē. Mrãmri ne pidjôkō'ÿr ar kute akatēn bōxja ije arkum o pãho kute apyrãk. Mrãmri ije amã ôr kôt ije arkum pÿnh ne ôrkumrêx. 15 Inhō ne pi'ók kaprî djwÿnh. Ba dja ba amim me'ã karō kôt memã kungã. Djãm kam ijaxwe? Kati. Imã ar ja kaprîkam ga ren akînh ne. Nhyr be, kati. Angryk. Me'ō nhō mÿjja pro prãmje angryk ne. Kwãrîk wãnh." Nãm ã ô pidjôkō djwÿnh ane. Tãm ne ja. Be, dja ã Bēnjadjwÿr djwÿnh kute pykakam amim me utãrn ar meo bakam memã o pãho ane, ane. Jeju ã kôt ba djwÿnh arkum ane. 16 Ne kam ajte arkum,

—Jakam me kajgo mex ne me katē tēmja djãm me katē tēm rã'ãmã? Kati. Me ja dja me ï rûnho kutewa. Nhyr be, me rûnho kutewaja gēdja me pãnh kajgo mex ne me katē tē. Mÿkam? Bir, Metîndjwÿnh ne amiwÿr me krãptî 'uw. Nhyr be, kute mekam me ngrêrebit amijo me utãr. Nãm ã Jeju arkum ane.

*Ajte amityk'ã ujarênh.*

*Mak 10.32; Ruk 18.31*

17 Ne kam ajte prykôt mō. Kôt ba djwÿnhbê 12 ne aro mō. Krîraxbê Djeruxarê'ÿr ar àbir tē nhyr arým me kãxã aro tēn arkum,

18—Ë, ota gwaj arým Djeruxarê'ÿr badjãbirn babôxmã. Nhyr kam ba ije amijo inhî dja me apÿnh me rûnhmã ikanga. Dja me me kadjy Metîndjwÿnh mar djwÿnh nhō bēnjadjwÿr arkum ikangan Mōdjê kukràdjã mar djwÿnhmãdjwÿ ikanga. Kam dja me ikã mex jarêh ijã abenmã kum, "Axwekumrêx.

Gê me pãnh tu bînkumrêx", ane. 19 Ne kam me bajtemmã ikanga nhyr me arým ijã bēno ajkêh mry kã punuo ikaprêprê:k ne. Ne kam arým pîte'y'ã inhō ba arým ty. Nhyr kam ijã akatin akatin akati ba kam akubyn itîh ne. Nãm ã Jeju arkum ane.

*Ar kute ajte amirax jabej.*

*Mak 10.35; Ruk 22.24*

20 Nhyr kam Djebedêu prō Jeju'ÿr kra aro tē. Ne kam 'ÿr aro bōx ne parbê kônkrão nhÿn kum rax jarê. Kute mÿjja'ã 'wÿrmã ne 'ÿr bōx.

21 Nhyr kum, "Mÿj nã"? ane.

Nhyr kum,

—Me kadjy abēnjadjwÿr ne aje amim me utãr ne aje meo abakam gē ikra amãnhkrutja ar rax ne anhikō'ã memã nhÿ. Gê ja adjubôk'ãnh nhÿ nhyr ja adjuge'ãnh nhÿ, ane.

22 Nhyr Jeju kum,

—Gêt kon. Ë, nã gãm arîk amim 'ã karôn imã arê. Ba ar amã arê gar ama. Dja ba ngônhrã kam kangô jao ikō. Djãm ar aje ipyrãk ne kangô jao akōmmã? Dja me ngômã ijadjã. Djãm ar aje ipyrãk nhyr ngômã me kute ar ajadjãrmã? Nãm ã arkum ane. Bir, mÿj'ã ne kangô jao kôm ne ngômã adjãrja jakre? Bir, amitokry kume:x'ã ne akre. Nhyr ar kute urãk jabej ne ar kukij. Ar tokryo kute Jeju tokry pyrãk jabej ne ar kukij. Nhyr ar Jejumã kum,

—Nã. Kadjy ar ije apyrãk, ane.

23 Nhyr Jeju arkum,

—Mrãmri dja gar aje ipyrãk ne atokry kumex ma. Mrãmri dja gar kangô jao ikō nhyr me ngômã ar ajadjã. Be, djãm ba ne ba ar amã inhikō'ã ar anhÿrmã arê got? Be, Ibãm kute amrêbê: amijo me'ō ar utãr, ar ta dja ar inhikō'ã memã nhÿ. Nãm ã Xijagumê Djuão arkum ane.

24 Nhyr kôt ba djwÿnh Ar kubê 10 arým ar kabên man arým arkum

àkrê. Ar arým kamy amãnhkrutja, Xijagumê Djuão arkum àkrê ne. <sup>25</sup> Nhyr Jeju amiwÿr ar ku'uw ne arkum,

—Me bajtemkam me bënjadwÿr ne me àpênh'ã memã àpnênh ne memã bën tÿx ar o ba. Nãm ã me bajtemkam me rÿnh ar meo bao ane. Gar arým ama. <sup>26</sup> Djãm ar ga gar aje me kudjwamã? Kati. Ar ga dja gar ã anhÿr kêtukumrêx ne. Ar ajõ abenkam arax prãm jabej gêdja amijo kajgon tu ar amã àpênh ar ba. <sup>27</sup> Ga kam ar ajõ aben kadjy abënjadwÿr rax prãm jabej gêdja tu amijo kâtãr ne tu ar amã àpênh kajgo ba. <sup>28</sup> Ba ije amijo inhÿ djãm me imã àpênh kadjy ne ba amrê têt? Kati, ba dja ba memã apê. Me ren ta amijaxwe pãnh tokryn arým ty. Nhyr be kati. Me krãptÿ jaxwe pãnh ba dja ba itokryn arým ty. Memã idjãpênh ja kadjy ne ba amrê têt. Nãm ã Jeju arkum ane.

*Me'õ no rã akubyn rÿt.*

<sup>29</sup> Nhyr kam ar krÿrãxbê Djeriko kurÿm kator têt nhyr me krãptÿ: arým arkôt mõi. <sup>30</sup> Nhyr ar no rã amãnhkrutja pry japkre'ã nhÿ. Nhyr me abenmã kum, “Jeju ne têt”, anhÿro kumex nhyr ar arým kuman kam kum amijo akij,

—Ê, amã ar ikaprÿ, Bënjadwÿr djwÿnh, Dawi tãmdjwÿ 'õ, ane.

<sup>31</sup> Nhyr me krãptÿ mörja arkum bën tÿx ne arkum,

—E kum ar anhikrê, ane. Nhyr kam ar tu kum àkjêro bën kum,

—Ê, gop amã ar ikaprÿ, Bënjadwÿr djwÿnh. Dawi tãmdjwÿ 'õ, ane.

<sup>32</sup> Nhyr Jeju ar kabên man arým arek arkum dja. Arkum djan amiwÿr ar ku'uw nhyr ar 'ÿr bõx. Nhyr arým arkum,

—Mÿj ne ba ije ar ajomã? ane.

<sup>33</sup> Nhyr ar kum,

—Bënjadwÿr djwÿnh, bar on irÿt, ane.

<sup>34</sup> Nhyr Jeju arým kum ar kaprÿn ar no kupê. Nhyr ar no kupênhmê ro'ã ar rÿt ne arým kôt têt.

## 21

*Jeju rax ne Djeruxarêmã àr.*

*Mak 11.1; Ruk 19.28; Dju r 12.12*

<sup>1-2</sup> Nhyr Jejumê ar prykôt mõi:n kam krÿrãxbê Djeruxarê kuri krÿ ngrire ja'ÿr bõx. Krãnhrebê Oriwêre'ã rwÿykbê ne krÿ ngrire jabej Bepadjê. Ar krÿ ngrire ja'ÿr bõx nhyr arým kôt ba djwÿnh amãnhkrutmã kum,

—Pry ja'ã dja gar arek katãt krÿwãmã têt. Nhyr ar akutã pry kator kraxkam dja gar mry'ã krÿwã pumÿ, djumêtuwã pumÿ. Kraremê dja gar omÿ. Nhyr me kute mrywã pÿ maktã krã djê nhyr amê ãmwã dja gar 'ãpre bôn amrê amêo têt. <sup>3</sup> Godja me'õ 'ã ar amã kabên jabej gar kum, “Bënjadwÿr 'ã têt prãm. Dja 'ã têt kam akuby:n amã ano”, ane. Nhyr kam dja on ar amã, “Ajrã, 'ÿr o têt.” Nãm ã Jeju arkum ane.

<sup>4</sup> Mÿkam ne ã arkum ane? Bir, amrêbê: ne ujarênh djwÿnh me bakukãmãremã 'ã ajarê. Jeju djumêt'u'ã têt'm'ã ajarê. Metÿndjwÿnh kukwakam memã 'ã ajarê. <sup>5</sup> Ne memã kum,

“Dja ga Xijãokam me jamã kum”, Krÿrãxbê Djeruxarê'ã ne memã Xijão jarê. Nãm memã kum,

“Dja ga Xijãokam me jamã kum,

'Ota me anhõ Bënjadwÿr rax me awÿr bõxmã. Nãm kabôt katin mry jabatãnh nyre'ã nhÿ. Mry'ã krÿ kra'ã ne nhÿn me awÿr bõx', ane.

Dja ga ã Xijãokam me jamã ane.”

Nãm ã ujarênh djwÿnh me bakukãmãremã ane nhyr me arým aben djô'ã abenmã arênh mõi:. Arênh mör tãmtã arým 'ÿr o bõx. Tÿ:mrãm Jeju arým me bakamingrãnyrekam kato. Ne ar ban kam kute arým mry'ã

krîja'ÿr kôt ba djwÿnh janorja'ÿr o bôx. Ujarênh djwÿnh kute me bakukâmâremâ ujarênh kôt ne mry'ã krîja'ÿr arÿm ar ano.

<sup>6</sup> Nhyam kam ar arÿm 'ÿr tẽn 'ÿr bôx. Jeju kute arkum 'ã karô kôt ar 'ÿr tẽn 'ÿr bôx. Ne kam mrymê krare 'ãpre bô. <sup>7</sup> Ne kam akubyn 'ÿr o bôx. Ne kam arÿm aminhõ kubêkà krâkào pôx ne o amê mry nhibûm'ã kum aty. Nhyam arÿm krare'ã nhÿn arÿm tẽn. <sup>8</sup> Nhyam kam me krâptî: aminhõ kubêkà krâkào pôx ne arÿm kukâm kum pry'ã o atyo mõi. 'Ã tẽn kadjy kum pry'ã kum atyo mõi. Nhyam me kwÿ pi'ô nhikên arÿm kukâm pry'ã kum atyo mõi. Me ta kukràdjà kôt ne me ã Bënjadjwÿr rax kukâm pry'o ane. Me kukâm pry'ã kum atyo mõi. <sup>9</sup> Nhyam me krâptî: kukâm mõi, o àkjêr mõi nhyam ajte me krâptî: kôt o àkjêr mõi. Nãm me o àkjêr mõi kàj bê abenmã kum, Metîndjwÿnhmã kum,

—Jejubê me inhõ Bënjadjwÿr rax. Bënjadjwÿr raxbê Dawi tàmdjwÿ. ãm mexkumrêx. Kam me ikî:nhkumrêx. Gê on me ipytà. Gê Metîndjwÿnh o kînh rax. Metîndjwÿnh kukwakam ne arÿm me bakadjy bôx. Gê me kàjkwakamdjwÿ Metîndjwÿnhmã mextire jarênh kumex. Gê on me ipytà. Nãm me ã Jejuo àkjêro mõi ane.

<sup>10</sup> Nhyam kam arÿm Djeruxarêmã wadjà. Nhyam kam krîraxkam me kunî te no katon 'ã aben kukjêro kumex ne abenmã kum,

—Mÿj me'õ ne bôx? Mÿj me'õ ne bôx? anhÿro kumex.

<sup>11</sup> Nhyam me krâptî: memã kum,

—Jeju ne bôx. Metîndjwÿnh kukwakam ne ar me bamã 'ã ujarênh ba. Pykabê Garrêjakam krîraxbê Nadjarekam ne Jeju abatàn djà. Nãm ã me krâptî memã ane.

*Kute kikreti nêje me anor:  
Mak 11.15; Ruk 19.45*

<sup>12</sup> Nhyam kam Jeju Metîndjwÿnh nhõ kikretimã tẽn wadjà. Nhyam me kute memã mÿjja nhõ djwÿnh kam kumex. Nhyam me kute memã mÿjjao pãnh ne amim byr kadjy ne me me'ã kumex. Nhyam arÿm bõm me rênho tẽn. Nhyam me kute me õ pi'ók kaprî pãnh memã kikreti nhõ pi'ók kaprî nhõr kadjy ne me kumex nhyam mebê pîponho àpanho tẽn. Nhyam me kute tut nhõr djwÿnhdjwÿ kumex nhyam mebê krî djà nhikô rênho tẽn. <sup>13</sup> Ne kam memã kum,

—Amrêbê: ne me bakukâmâre Metîndjwÿnh kabên'ã pi'ók no'ók ne. Kamã ne Metîndjwÿnh ta memã kum,

“Inhõ kikreti ja'ã dja me abenmã kum,

'Me kute Metîndjwÿnhmã kabên kadjy ne õ kikreti wã', ane.

Dja me ã inhõ kikreti'ã abenmã ane.”

Nãm ã Metîndjwÿnh pi'ók kam ane. Nhyam be, me ga ne ga me kam aje me àkînhõ aben pydji djà. Nãm ã Jeju memã ane. <sup>14</sup> Nhyam kam Metîndjwÿnh nhõ kikretikam me no rãmê me mrãnh punu 'ÿr bôxo kumex nhyam arÿm meo mex. <sup>15</sup> Nhyam kam me kadjy Metîndjwÿnh mar djwÿnh nhõ bënjadjwÿrmê Môjdjê kukràdjà mar djwÿnhmê ne me Jeju djâpênh me: xkumrêxja pumûn ajte me prîre pumû. Me prîre ne me kikretikam kàj bê o akij ne kum,

—Jejubê me inhõ bënjadjwÿr rax. Bënjadjwÿr raxbê Dawi tàmdjwÿ. ãm mexkumrêx. Kam me ikînhkumrêx. Gê on me ipytà, ane. Nhyam me me omûn me kuman arÿm ngryk ne.

<sup>16</sup> Ngryk ne arÿm Jejumã kum,

—Djãm aje me prîre kabênja mar kêt? ane.

Nhyam memã kum,

—Nã, arÿm ba kuma. Ba ar amã arê gar ama. Me bakukâmâre ne

amrêbê: Metîndjwýnhmã me prîre ja'ã ajarê. Me kum, “Me prîremê me karàremê ne ga memã me kabên mexmã 'ã karô nhym me arým amã mextire jarênh mexkumrêx.”

Nãm ã me bakukãmãre Metîndjwýnhmã

ane. Nhym me arým kuman amũ aben djô'ã abenmã arênhô mõi. Arênhô mõi tãmtã arým iwýr o bõx. Tũmrãm me bakamingrãnyrekam me prîre arým imã amikînh jarênhô kumex. Me bakukãmãre kute Metîndjwýnhmã me prîre ja'ã ujarênh kôt ne me prîre arým imã amikînh jarê. Nãm ã Jeju memã ane.

<sup>17</sup> Nãm memã anen kam arým memã kãx ne krîrax kurũm katon tẽ. Ne tẽ:n arým krî ngrirebê Betanha'ýr bõx. Ne kam arým kam ngõr.

*Ar kute tu amim Metîndjwýnh kamnhîxkumrêxmã 'ã ujarênh.*

*Mak 11.20; Dju r 14.13; Xij 1.6*

<sup>18</sup> Nhym 'ã akati nhym ajte akubyn krîraxbê Djeruxarêmã tẽ. Nãm 'ýr tẽ:n kam arým kum prãm.

<sup>19</sup> Ne arým prykôt pidjôbê pigêre pumũn 'ýr tẽn 'ýr bõx. Ne te ô jabej. 'Ôbit ne kumex. Ne kam kum,

—Gê ajte adjô'õ jêt kêtumrêx, ane. Nhym arým tẽmbê ngrã.

<sup>20</sup> Nhym kam kôt ba djwýnh ar arým omũn kam no tyn abenmã kum,

—Je, mã ne bàrio nhym myt tãmkam ngrã? ane. <sup>21</sup> Nhym Jeju arkum,

—Ba ar amã arê gar ama. Dja gar kadjy tu amim Metîndjwýnh kamnhîxkumrêx. Kwãrîk wãnh anhõkre kadjwýnhbê amim,

—Kon, birãm dja ipêx, kon, anhýr kêt. Gar ren tu amim kamnhîxkumrêx ne ren arým ã pidjôbê pigêremã ane nhym ren arým ã ngrão ane. Djãm jabit? Kati, gar ren krãnhwãmã kum, “On amikaban ngô jabatãnh mũjakam

mõn tým”, ane. Nhym ren arým akabên kôt mrãmri ã amijo ane. <sup>22</sup> Dja gar mýjjao Metîndjwýnhmã a'uw ne tu kadjy amim kamnhîxkumrêx nhym arým ar akabên kôt ã ar amã mýjjao ane. Mrãmri ne ba ar amã ja jarênhkumrêx. Nãm ã Jeju arkum ane.

*Me kute rax jabej Jeju kukjêr.*

*Mak 11.27; Ruk 20.1*

<sup>23</sup> Ne kam arým Metîndjwýnh nhõ kikreti'ýr bõx ne kum wadjã. Ne kam arým kam memã Metîndjwýnh kukrãdjã'ã ujarênhô dja. Nhym me rũnh arým 'ýr bõx. Me kadjy Metîndjwýnh mar djwýnh nhõ bẽnjadjwýrmê mebêngêtmê 'ýr bõx. 'Ýr bõx ne amũja'ã kute kikreti kurũm me anorja jabej kukij ne kum,

—Mýj me'õ kabênkôt ne ga ar ã meo anhýro aba? Mýj me'õ ne amã me'ã karô ga kam amũ ô'ã bõm ar me rênhô aba? ane.

<sup>24</sup> Nhym Jeju memã kum,

—Badjwý dja ba mýjja jabej me akukja. Me akumrêx dja ga me imã arê. Ba kam arým badjwý ije mýj me'õ kabênkôt ar me anoro ibaja me amã arê. <sup>25</sup> Djuão kute ngõmã me angjênhja djãm me kabên kôt ne arîk ar ngõmã me angjênhô ba? Nãr djãm Metîndjwýnh kabênkôt? Imã arê, ane.

Nhym kam me abenkam kangan abenmã kum,

—Je mýj dja gwaj kum nê? Dja gwaj kum “Metîndjwýnh kabênkôt”, ane nhym kam gwaj bamã kabên 'õ jarênh gwaj bamã, “Bir be, mýkam ne ga me amim Djuão kabênja mar kêt ne”? ane.

<sup>26</sup> Nãr dja gwaj kum, “Me kabênkôt ne tu arîk ar ngõmã me angjênhô ba”, ane nhym kam me krãptî ren o ngyrk ne kum gwaj bakurê gwaj ren kam bamã me uma ne. Me kãtãm ja ne me arým Djuão kabên man kum kînh ne ne o Metîndjwýnh kabên jarênh djwýnh

ne. Dja gwaj kam ane nhym me arÿm o ngryk ne, ane.

<sup>27</sup> Nãm me ã abenmã anen kam Jejumã kum,

—Kon ne. Me ije mar kêt. Mÿj me'õ kabênkôt Djuão kute ngômã me angjênhja me ije mar kêtê, ane.

Nhym kam memã kum,

—Bir be, dja ba badjwÿ me amã arênh kêt ne. Mÿj me'õ kabênkôt ije ar meo iba ja dja ba me amã arênh kêt ne, ane.

*Me'õ kra amãnhkrut'ã ujarênh.*

<sup>28</sup> Ne kam ajte memã kum,

—Be, mÿj ne ga me me'õ krakam ama? Me'õ kra amãnhkrut. Ne kam arÿm kutewa'ÿr tèn kum, “Ak-mere, akati jakam dja ga gu banhõ pidjôkôkam apê”, ane.

<sup>29</sup> Nhym kum, “Kê, kati”, ane. Ne kam tẽ. Arÿm amimaro tẽ:n arÿm amim ngryk ne, ne amim, “Kati. Dja ba pidjôkô'ÿr tẽ”, ane. Ne arÿm 'ÿr tẽ.

<sup>30</sup> Nhym kam bãm kutapu'ÿr tèn àpênh'ÿr ano. Nhym kum, “Djünwã, dja ba arÿm akabên kôt 'ÿr tẽ”, ane. Ne kam atekam arek nhÿn 'ÿr tẽm kêt. Be, tãm ne ja. <sup>31</sup> Ba me amã arê. Nhÿnh ja ne bãm kabên man kôt amijo tẽ? Nãm ã Jeju me rünhmã ane.

Kutewa kute bãmmã, “Kati”, anhÿr ne kam kute amimarja ne Jeju kute me axwe'ã akre. Kute mrãmri ne me axwe pyrãk. Nãm arÿm amima. Amiman kam arÿm Metündjwÿnh'ÿr amijo akêx ne tu amim markumrêx. Nhym be, kutapu kute bãmmã 'êx ne Jeju kute me rünh'ã akre. Kute mrãmri ne me rünh pyrãk. Me kute Metündjwÿnh kôt kabên djir kajgon kam kute kabên mar kêt ne. Nãm Jeju me rünh kukij ne memã kum,

—Nhÿnhja ne bãm kabên man kôt amijo tẽ?

Nhym me kum, “Kutewaja”, ane.

Nhym memã kum,

—Ba me amã arê ga me ama. Djãm me arünhja dja ga me

akumrêx kàjkwakam Bênjadjwÿr djwÿnh kôt dja nhym me ajo ba? Kati. Pykakam me bēnjadjwÿr bajtemmã pi'ók kaprïo atom djwÿnhmê me nire kuprÿmê, me aje memã axwe jarênhja dja me kàjkwakam Bēnjadjwÿr djwÿnh kôt dja nhym arÿm ar meo ba. Ga me kam arÿm wãnh dja. <sup>32</sup> Mÿkam? Bir, Djuão ne me awÿr bôx. Kute katãt me amã pry jakre kadjy me awÿr bôx. Kôt ga me Metündjwÿnhmã amex kadjy me awÿr bôx. Ga me kam amim Djuão mar kêt. Nhym be, pykakam me bēnjadjwÿr bajtemmã pi'ók kaprïo atom djwÿnhmê me nire kuprÿmê ne me tu amim Djuão markumrêx. Ga me kam arÿm me omÿ. Ne te me omÿ. Me ga ne ga me wãnh ajaxwemã anhïrer ne amim mar kêt. Mrãmri ne ba me amã ja jarênhkumrêx. Nãm ã Jeju me rünhmã ane.

<sup>33</sup> Ne kam ajte memã atemã mÿjja'ã ujarênh jakreo tèn memã kum,

—Ê, jadjwÿ dja ga me ama. Me'õ ne pur rax ne kudjin kam kam amim pidjô kumex ne kadjy bu'ã kēno kôkayr kum o ipôk ne. Ne kam pidjô janênh djãmã kren ipêx. Ne pidjô pumÿnh djwÿnh ku'ê djã'ã par prêkti nhïpêx. Ne kam me kwÿmã kum,

—Gora me imã o djuw mex. Gora gê abatãnh ne ô ga amim kwÿo atom ne imã mÿm kwÿo atom. Nãm ã me rünhmã ane. Mebê idjaer'ã ne Jeju pidjô jakren me rünh'ã pidjôo djuw mex djwÿnh jakren Metündjwÿnh'ã õ pidjôkô djwÿnh jakren kam arek memã 'ã ujarênho djan memã kum,

—Õ pidjôkô djwÿnh ã memã anen kam atemã pyka 'õmã tẽ. Ne kam kam wãnh ar ba. <sup>34</sup> Nhym arÿm pidjôja tuk ne kumex. Nhym kam õ pidjôkô djwÿnhja arÿm 'ã mytyrwÿ jakren kam 'ÿr õ àpênh kwÿ jano. Ar kute memã arênh



nhyim me kute kum pidjô kwÿo atom ne kute arkôt anor kadjy ne 'ÿr ar ano. <sup>35</sup> Nhyim kam ar 'ÿr tÿn bôx nhyim kam me kute pidjôo djuw mexja ate ar 'ôja kaprêprê:k ne ar'ônh bÿn ar 'ô këno titik. <sup>36</sup> Nhyim kam ajte memã õ àpênh krãptÿ jano nhyim me ajte ã aro ane. <sup>37</sup> Nhyim kam tekrekam me'ÿr kra jano. Nãm amim, "Godja ikra me'ÿr bôx nhyim me arÿm mar jabej", ane. Ne arÿm me'ÿr kra jano nhyim me'ÿr bôx.

<sup>38</sup> Nhyim o djuw mex djwÿnh arÿm kra pumÿn abenmã kum, "Be, kra ne wã. Gwaj on kubÿ. Tãmja dja bãm kum mÿjja kunÿ ngã, õ nèkrêx kunÿ kanga. Gwaj on tãmja bÿn kam amim õ nèkrêx, õ mÿjja, õ pidjôja kunÿo aminhõ", ane. <sup>39</sup> Ne kam arÿm o tÿm. O tÿm ne pidjôkô kurÿm bôm kumÿn arÿm kubÿ. Tãm ne ja, ane. Me rÿnh'ã ne Jeju pidjô pumÿnh djwÿnh jakre. Me kute mrãmri ne me rÿnh pyrãk. Ne kam ajte memã kum,

<sup>40</sup> —Mÿj gêdja õ pidjôkô djwÿnhja bôx ne ajmã pidjô pumÿnh djwÿnh ano? Nãm Jeju ã me rÿnhmã ane.

<sup>41</sup> Nhyim me kum,

—Bir, dja prÿne me axwejao ajkÿn me imex ne kam õ pidjôkôja atemã me ja'ômã kungã nhyim me arÿm pidjô tukkam arÿm kum pidjô nhôr kumrêx, ane.

<sup>42</sup> Nhyim kam Jeju ajte memã me kukãmãre kabÿn jarÿn memã kum,

—Amrêbê: ne me bakukãmãre Metÿndjwÿnh kabÿn jarÿn memã kum,

"E kum kÿn ja ne me kute kikreo ãm djwÿnhja kute kikremã armã te omÿn kam bôm kumÿ.

Kÿn ja ne arÿm kute kikremã o kajpar, kum o kajpar tÿxi.

Bÿnjadjwÿr djwÿnh ta ne ã këno ane gu me omÿ nhyim kam gu bamã mexkumrêx."

Nãm ã me bakukãmãre memã anen arÿm 'ã pi'ók no'ók ne. Djãm me

aje omÿnh ne mar kêt? Nãm Jeju ã me rÿnhmã ane. Nãm amijã kÿn jakre. Ne me rÿnh'ã kikreo ãm djwÿnh jakre. Me rÿnh kute mrãmri ne kikreo ãm djwÿnh pyrãk ne arÿm Jeju kanga. Me rÿnh kute kanga'ã ne Jeju me rÿnhmã ja jarÿ.

<sup>43</sup> Ne kam ajte memã kum,

—Ba me amã arê ga me ama. Metÿndjwÿnh bit kute amim me apytãr ne ar me ajo bamã. Nhyim be, kati. Dja me akangan me apãnh amim me bajtem pytãn meo ba. Nhyim me kam arÿm kute pidjô djô mex pyrãk ne imã mexkumrêx ne axwe kêt. Nãm Jeju ã me rÿnhmã ane. <sup>44</sup> Ne kam ajte memã kum,

—Ë, kÿn ja gêdja ga me ajô 'ã tÿm ne prÿne 'ã amikrakra ne. Nhyim be, ta gêdja me ajô nhiby tÿm ne prÿne angãn prÿne pyka mÿ ajo amrã, ane.

<sup>45</sup> Jeju memã ja jarÿ. Me kadjy Metÿndjwÿnh mar djwÿnh nhô bÿnjadjwÿrmÿ me bÿ pardjêumã ja jarÿ nhyim me arÿm kuman amim,

—Be, me bajã ne pidjôo djuw mex djwÿnhmÿ kikreo ãm djwÿnh jakren me bamã 'ã ajarÿ, ane. <sup>46</sup> Ne kam me bit kute o tÿmmã te 'ã amijakre. Me krãptÿ ne me Jeju'ã amim,

—Be, Metÿndjwÿnh kukwakam memã 'ã ujarÿn ba, ane. Nhyim kam me me umaje te 'ã amijakre.

## 22

*Bÿnjadjwÿr rax kute abenã ar mÿnh.*

*Ruk 14.16*

<sup>1</sup> Nhyim kam Jeju ajte apÿnh kukrãdjã djãri'ã memã mÿjja jakren memã 'ã ajarÿn memã kum,

<sup>2</sup> —Kãjkwakam Bÿnjadjwÿr djwÿnh kute amim me utãr ne ar meo ba'ã dja ba bÿnjadjwÿr rax'õ jakren 'ã ajarÿ gar ama. Be, bÿnjadjwÿr rax arÿm kute kra'ã prô mÿnhmã. Amrêbê ne kadjy memã arê. <sup>3</sup> Ne kam arÿm kute amrêbê memã arÿnhja'ÿr õ àpênh ar ano. Kute

abenã ar mēnh djà'yr me 'wỳr kadjy ar ano. Nhyr ar me'yr bōx ne memã arē. Nhyr me arỳm arkum,

—Kati, 'yr ar imōr prãm kêt, ane. Nhyr kam ar akubyn bēnjadjwỳr'yr bōx ne arỳm kum arē.

<sup>4</sup> Nhyr kam ò àpēnh 'ōdjwỳ arkum,

—Dja gar amrēbē ije memã arēnhjamã ikabēn jarēn memã kum, “Ē, arỳm ne ba me akadjy inhō jadjuw nhyr kumex. Inhō mrytimē abatānh nyre twỳmtijamē ne me arỳm kupa. Arỳm ne ba mỳjja kunĩ mex. Dja ga me amrē abenã ar mēnh djà'yr mō”, ane. Dja gar ã memã ane. Nãm ã bēnjadjwỳr arkum ane. Nhyr ar arỳm me'yr tēn kôt memã arē.

<sup>5</sup> Nhyr me ate krã. Me kwỳ ja ne me ò purmã mō nhyr me kwỳ ja ò nēkrēx'yr mō. <sup>6</sup> Nhyr me kwỳ ja ne me arỳm aro rōrōk ne aro ajkēn arỳm ar kupa. <sup>7</sup> Nhyr kam bēnjadjwỳr rax arỳm arēnh man arỳm ngyrk ne. Ne kam arỳm ò krākamngōnh krãptĩmã 'ã karōn me'yr me ano. Nhyr me arỳm kabēnkôt me'yr mōn arỳm me'yr bōx. Me'yr bōx ne arỳm me kupan mebē krĩraxmã adjã nhyr arỳm xēr.

<sup>8</sup> Nhyr kam ajte bēnjadjwỳrja ò àpēnh arkum,

—Ije abenã ar mēnh kadjy ne ba arỳm prĩne mỳjjao mex nhyr nō. Nhyr be, ije memã arēnhja ne me kadjy mex kêt. <sup>9</sup> Jakam dja gar apỳnh pry bikjēr djari kôt tēn ar aje me omũnh kunĩ memã akrà gē me amrē mō gwaj baro'ã banhō kwỳ krē gwaj bakĩnh kati, ane. <sup>10</sup> Kam, ò àpēnh ar arỳm apỳnh pry djari kôt tēn arỳm kute me omũnh kunĩo atomo tē. Me mex nār me punu kunĩo atomo tē:n meo bōx. Nhyr me kam prĩne abenã ar mēnh djakam kikre kre jaē.

<sup>11</sup> Nhyr kam arỳm bēnjadjwỳr rax wadjàn me omũnh tē. Nhyr

wānh me'ō dja. Kute abenã me rēnh'yr me ngjēx kadjy me ò kubēkà jadjār kêt ne dja. <sup>12</sup> Nhyr arỳm omũn kum,

—Akmere, nã gãm abenã me rēnh'yr me ngjēx kadjy me ò kubēkà jadjār kêt ne wadjã. Mỳj ne ga nēn wadjã? ane. Nhyr arỳm te kute aminēje kum kabēn'ō jarēnhmã.

<sup>13</sup> Nhyr kam bēnjadjwỳr rax ò àpēnhmã kum,

—Dja gar inỳx 'ãpren te 'ãpren amũ ò tēn bōm amē. Wānh ne me akamãt kō tykkam amim ngyrk ne mỳro kumex ne tokry djaje ami-janēnhō kumex. Me ikō'ã dja gar amē, ane. Nhyr me ã me'ōo ane. Tãm ne ja.

<sup>14</sup> Be, Metĩndjwỳnh ne amiwỳr me krãptĩ 'uw. Nhyr be, kute mekam me ngrērebit amijo me utār. Nãm Jeju ã memã ane.

*Me kute Xedjamã pi'ók kaprĩ nhōr.*

*Mak 12.13; Ruk 20.20; Rô 12.1*

<sup>15</sup> Nhyr kam mebē pardjēu arỳm mã tēn Jejuo aben ma. Nãm me abenmã kum,

—Mỳj gēdja gwaj Jejumã arē nhyr arỳm gwaj bamã bēnjadjwỳr'ã kabēn punu'ō jarē? Dja bēnjadjwỳr'ã kabēn punu jabej nhyr me arỳm kum axwe jarē, ane. <sup>16</sup> Nãm me aben man kam arỳm 'yr ò me ja kwỳ jano. Erodji nhō me ja kwỳ ne me adjwỳnhdjwỳ 'yr me ano. Nhyr me 'yr bōx ne kum,

—Ujarēnh djwỳnh, bar arỳm ama. Ga ne ga akabēn katàtkumrēx ne Metĩndjwỳnh kabēn kôt me kute amijo ba'ã memã adjujarēnh katàtkumrēx. Amã me rũnh pyma kêt. Me rũnhmē me kajgomē ne ga memã akabēno aben pyrāk. <sup>17</sup> Ba me akukja ga me imã arē. Me rũnh kunĩ nhō bēnjadjwỳr raxbē Xedja. Mebē idjaer kute o me bajtemja. Djãm Metĩndjwỳnh kukràdjã kôt ne gu me baje bēnjadjwỳr Xedjamã

pi'ók kaprĩ nhõrmã? Nàr kon? Goja on, e me imã arẽ, ane.

<sup>18</sup> Nhyr Jeju arým me axwe kõt tu me kuman memã kum,

—Me ga ne ga me amijo ajêx ne amijo Metĩndjwýnh mar mexo aba. Nok ba ren me amã, “Metĩndjwýnh kabẽn kupa'ã ne me kum õro ba”, ane ga me ren memã kum, “Be, Jeju axwekumrêx. Ga, kute bẽnjadjwýr raxbê Xedjabê pi'ók kaprĩ nê prãmja pumũ”, ane. Ga me ren memã anen ren arým memã ikurêtuw. Nã gãm me ajêx ne aje Metĩndjwýnh mar. <sup>19</sup> Amrê imã pi'ók kaprĩõ tẽ, me aje kum õrja o tẽ ba me amã omũ, ane. Nhyr me arým 'ýr ngõnhponho pi'ók kaprĩ pydjio tẽn kum kungã. <sup>20</sup> Nhyr memã kum,

—Mýj me'õ ne 'ã karõja? Ne mýj me'õ ne 'ã idji jêtja?

<sup>21</sup> Nhyr me kum,

—E kum be Xedja karõ, ane.

Nhyr memã kum,

—Bir be, õ pi'ók kaprĩ. Dja ga me kum angã. Nhyr be, Metĩndjwýnh nhõ mýjjabit dja ga me Metĩndjwýnhmã angã. Nãm Jeju ã memã ane nhyr me arým kabẽn ma.

<sup>22</sup> Ne arým te kute mýjja'õ jarẽnhmã kam no tyn dja. Ne kam arým kum kãx ne mã tẽ.

*Me tyk akubyn tĩn mýr jabej me Jejumã kabẽn.*

*Mak 12.18; Ruk 20.27; Tex k 4.16; Ap 20.4*

<sup>23</sup> Nhyr kam myt tãm kam mebê xadjudjêu kwý 'ýr bõx. Mebê xadjudjêu ne me arĩk memã kum,

—Be, me tyk akubyn tĩn prãm kêt kumrêx, anhýr ar o ba. Nãm me 'ýr bõx ne kukij ne kum,

<sup>24</sup> —Ujarẽnh djwýnh, me bakukãmãre Mõdjê ne amrêbê: me bamã,

“Godja me'õ prõ'ýr mõn kra kêt rã'ã tyk jabej mýj dja me nê?

Bir, dja kamymê ar aben djãkam ikwãja'õ 'ýr mõ. Ne kum kra

djin kukrij nhyr abatãnh ne.

Me kute 'ã abenmã kum, ‘Be, kamy tyk kra ne wã’, anhýr ne kute kamy tyk mar týx rã'ã kadjy.”

Nãm ã me bakukãmãre Mõdjê me bamã ane, ane. Mebê xadjudjêu ne me ã Jejumã ane. <sup>25</sup> Ne kõt arĩk kum,

—Be, ar my aben djãkam ikwãbê 7. Ne kam kutewa prõ'ýr mõ. Ne kam kra kêt rã'ã ty. Nhyr prõja arým 'uwũ. Nhyr kam atãri kamyreja 'ýr mõ. Ne kam ã ane, kra kêt rã'ã ty. <sup>26</sup> Nhyr aben totokmã Ar kubê 7 kunĩ kudjwa ã anen 'ýr ban kra kêt rã'ã ty. <sup>27</sup> Nhyr kam ar prõjadjwý arým ar o ino ren ty. Ja ne ba me kuman amã arẽ. <sup>28</sup> Ar kubê 7 ne ar aben totokmã kamy prõ'ýr ba. Godja we ar kunĩ akubyn tĩn ne àbir jabej we àbirkam nhýnh kamyja dja ajte 'ýr mõ? ane. Me ta kute we me tyk akubyn tĩn kêt jarẽnh mýr jabej ne me ã Jejumã ane. Me kute o àpanh nhyr binhikrẽnh kadjy nãrãm ne mebê xadjudjêu ã kum ane.

<sup>29</sup> Nhyr Jeju arým memã kum,

—Me aje Metĩndjwýnh kabẽn'ã pi'ók no'ók mar kêt ne me aje Metĩndjwýnh tý:xkumrêx mar kêt. Nã gãm me arĩk Metĩndjwýnh kupa'ã memã 'ã adjujarẽnh aba. <sup>30</sup> Be, me tyk ne akubyn tĩnkam djãm me ajte abenwýr ba? Kati, akubyn me tĩnkam dja me abenwýr ba prãm kêt kumrêx. Kam dja me kute Metĩndjwýnh kadjy mrãnh djwýnh pyrãk. <sup>31</sup> Be, mrãmri me tyk akubyn tĩnkumrêx. Amrêbê: Metĩndjwýnh kute me bakukãmãremã kabẽn jarẽnh. Me tyk akubyn tĩn'ã kute kabẽn jarẽnh nhyr me kute 'ã pi'ók no'ók djãm me aje amim arẽnh kêt? <sup>32</sup> Nãm me bakukãmãremã kum,

“Ibê Abraãomê Idjakmê Djako ar õ Metĩndjwýnh”, ane.

Bir be, ar tyk tùmja Metîndjwÿnhmã tîn ne ar ba nÿj pumÿ. Djãm Metîndjwÿnhbê me tyk nhõ Metîndjwÿnh? Kati. Metîndjwÿnh ne me tîn nhõ Metîndjwÿnh. Me tyk kunÿ ne me kum tîn. Kam ne ba me amã,

—Metîndjwÿnh ne kubê me tîn nhõ Metîndjwÿnh. Nãm Jeju ã mebê xadjudjêumã ane. <sup>33</sup> Nhyim me krãptÿ: kuman te kute mÿjja'õ jarênhmã kam no tyn kumex.

*Me kute kukràdjã jabej Jeju kukjêr.*

*Mak 12.28; Ruk 10.25*

<sup>34</sup> Jeju mebê xadjudjêumã ane nhyim me amijã maje arÿm anhikrê. Amijã maje anhikrê nhyim mebê pardjêu arÿm arênh man arÿm akuprõ. <sup>35</sup> Me'õbê ne Môjdjê kukràdjã mar djwÿnh. Tãm ne Jeju'ÿr bõx ne kute amak mex jabej kabimã. Kute Môjdjê kukràdjã jabej kukjêrmã. Jeju kute kukràdjã kupa'ã arênh kadjy narãm ne kum kabên ne kum,

<sup>36</sup> —Ujarênh djwÿnh, Môjdjê kute Metîndjwÿnh kukwakam kabên kukràdjã jarênh, kute kam me kute katãt amijo ba'ã memã karõja nhÿnh kabênja ne mexo kute kunÿ jakrenh? ane.

<sup>37</sup> Nhyim Jeju kum,

—Be, nãm memã kum,

“Me anhõ Bênjadjwÿr djwÿnh, me Atîndjwÿnh dja ga me amã kÿnh, amã abêo katãt me kunÿ, mÿjja kunÿ jakre.

Djãm ajajkwaobit amã Metîndjwÿnh jabêmã? Kati. Ajamak, akadjwÿnhbê, akukràdjã kunÿo dja ga me amã abê:”, ane.

<sup>38</sup> Be, tãm ne ja. Metîndjwÿnh kabên mexo kute kabên kunÿ jakrenh ne ja. <sup>39</sup> Ne kam atãri Môjdjê ajte 'õ kute urãk memã arênh memã kum, “Me amã amibu'ã me ja jabê. Kute mrãmri ne ga me amã amijabêja pyrãk dja ga me ã amã

amibu'ã me ja jabêo ane”, ane.

<sup>40</sup> Be, ba arÿm amã Môjdjê kabên kukràdjã ja jarênh ajte amã ja jarê. Dja ga amê kabên ja man kõt ar amijo aba jabej ne mrãmri tu arÿm Metîndjwÿnh kabên kukràdjã kunÿkõt ar amijo aba mexkumrêx. Môjdjê kute Metîndjwÿnh kukwakam kabên jarênhjamê kukwakam memã 'ã ujarênh djwÿnh 'õdjwÿ kute kabên jarênhjamê ne ga arÿm kunÿkõt ar amijo aba mexkumrêx. Nãm ã Jeju kum ane.

*Kritubê mÿj me'õ tãmdjwÿ jabej me kute kukjêr.*

*Mak 12.35; Ruk 20.41*

<sup>41</sup> Mebê pardjêu kute abeno bikprõnhri Jeju amijabej me kukij ne memã kum,

<sup>42</sup> —Mÿj ne ga me Kritukam ama? ane. Metîndjwÿnh ne arÿm mebê idjaer kadjy Jeju'ã Bênjadjwÿrbê kumkati mê. Kumã ne me Kritu jarê. Nãm Jeju amijã memã kum,

—Mÿj ne ga me Kritukam ama? Mÿj me'õ tãmdjwÿbê ne Kritu? ane.

Nhyim me kum,

—Me bakukãmãre Dawi tãmdjwÿ. Bênjadjwÿr raxbê Dawi tãmdjwÿ, ane.

<sup>43-44</sup> Nhyim kam Jeju ta kubê Bênjadjwÿr Kritu'ã memã kum,

—Ne kam ajte kubê Dawi nhõ Bênjadjwÿr. Mÿj ne arÿm kubê Dawi tãmdjwÿnh ajte õ Bênjadjwÿr kadjy nê? ane. Ne kam Jeju memã me bakukãmãre Dawi kabên jarênh memã kum,

—Be ga, me bakukãmãre Dawi ta kute memã 'ã ujarênhja pumÿ. Metîndjwÿnh Karõ kukwakam kute memã Kritu'ã ujarênhja pumÿ. Nãm memã kum,

“Inhõ Bênjadjwÿrmã ne Bênjadjwÿr djwÿnh kabên ne kum,

'Amrê idjubõk'ãnh nhÿ, Abênjadjwÿr raxkam idjubõk'ãnh nhÿ.

Ikam ama ba amrê awÿr akurê djwÿnho mō ga me kwÿo apardjan me kwÿ nhimex.’

Nām ā Metÿndjwÿnh inhō Bēnjadjwÿrmā ane”, ane.

Bir be ga, Dawi kute kum “Abēnjadjwÿr rax”, anhÿrja pumū. <sup>45</sup> Mÿkam ne me Dawi tām djwÿ kajgo jarē? Djā nām o tām djwÿ kajgo? Kati, Dawi ta ne kute o ō Bēnjadjwÿr rax. Nām ā Jeju mebē pardjēumā ane. <sup>46</sup> Nhy m me’ō te kute kutā kabēn’ō jarēnhmā te amijo ane. Kabēn mex pymaje me kute ajte mÿjja ’ō jabej kukjēr kêt kumrēx.

## 23

*Watirebê 7’ā ujarēnh.*

*Mak 12.38; Ruk 11.44*

<sup>1</sup> Nhy m kam Jeju me krāpti:mē kôt ba djwÿnhmā kum,

<sup>2</sup> —Be, Mōjdjê kukrādja mar djwÿnhmē mebē pardjēumē ne me Mōjdjê pānh ar amā Metÿndjwÿnh kukrādja jarēnho krī. <sup>3</sup> Kam dja me Metÿndjwÿnh kabēn kôt ar amā kabēn jarē gar prīne me kabēn kunī man kôt ar amijo aba. Nhy m be, me ta ne me arīk ar ba. Nām me ajkwakambit ar amā Metÿndjwÿnh kabēn jarēn kam ta kute amikabēn mar ne kôt kute ar amijo ba kêt ne arīk ar ba. Kwārīk wānh mekôt ar amijo aba kêt. <sup>4</sup> Nām me ajte kabēn kajgoobit ar memā we Metÿndjwÿnh kabēn jarēnho ba. Djām Metÿndjwÿnh kabēn? Kati, me ta kabēno ne me ar me anoro ba. Ne kam kôt kute amijo ba kêt ne. Nhy m me te amijo anen kam, “Je mÿj dja ba me nē”? ane. Me kute ā meo anhÿrkam ne kute mrāmri ne me kute me kadjybit jēnh rÿnho atom ne me mut’ā anhōr ne kam kute memā tur kêt kumrēx ja pyrāk. Nām ā Jeju memā ane.

Ne kam ajte arkum,

<sup>5</sup> —Me kute memā amibēn nhy m me kute memā mex jarēnh kadjy ne me amijo ba. Mōjdjê kukrādja’ā

pi’ôk no’ôk kwÿ ne me ’ā ikôn amikrāmē amipamā aktā ’āpre. Ne ’ā ikô poti:reo ane. Mÿj kadjy? Bir, me kute memā amibēn kadjy. Dja we me me omÿn memā mex jarē. Ja kadjy ne me ’ā ikô poti:reo anen amikrāmē amipamā aktā ’āpre. Ne kam ajte ’ā kubēkà jabu djā ā abjēo ane. Mÿj kadjy? Bir, me kute memā amibēn kadjy. Dja we me me omÿn memā mex jarē. Ja kadjy ne me ’ā kubēkà jabu djā jabjēn ’ā ar ba. <sup>6</sup> Me krāpti nhikō’ā me ō kwÿ krēnkam ne me me rÿnh krī djākam krī prām kumrēx. Kute memā amibēn kadjy me rÿnh krī djākam krī prām kumrēx. Ne mebē idjaer bikprōnh djākam ne me memā wan krī prām kumrēx. <sup>7</sup> Ne ajte me krāpti bikarēr nhipôkri, mekadu nhipôkri kute memā amibēn nhy m me kute memā rÿnh jarēnh ne kute memā kum, “Ujarēnh djwÿnh, djām ga? djām ga”? anhÿrja. Ja ne me kum kÿnh kumrēx.

<sup>8</sup> Nhy m be, ar ga me kute ar amā, “Ujarēnh djwÿnh”, anhÿrmā djām ar amā ja kÿnhmā? Kati. Mÿkam? Bir, atemā ar anhō ujarēnh djwÿnh pydjii. Kam dja gar abeno akamybit. <sup>9</sup> Ne kam djām ar aje pykakam me’ō raxmā, “Djūnwā”, anhÿrmā? Kati. Mÿkam? Bir, ar Abām pydjii. Kājkwakam ar Abām djwÿnh pydjii. <sup>10</sup> Djām me kute ar amā, “Bēnjadjwÿr”, anhÿrmā? Djām ar amā ja kÿnhmā? Kati. Mÿkam? Bir, ar anhō Bēnjadjwÿr pydjii. Metÿndjwÿnh ne arÿm ’ā me ō Bēnjadjwÿrbē kumkati mē. Kubē ne Kritu.

<sup>11</sup> Ar ajō abenkam araxo kutewa prām jabej gēdja amijo kajgon tu ar amā āpēnh ar ba. <sup>12</sup> Mÿkam? Bir, me kute amijo rÿnh prāmja gēdja i kajgo mex ne. Nhy m be, me kute amijo kajgo mex ne akrānmā kute amijo baja gēdja Metÿndjwÿnh arÿm pānh meo rÿnh ne. Nām ā Jeju arkum ane. Ne kam Mōjdjê kukrādja mar djwÿnhmē mebē pardjēumā kum,

13 —Be, me abê Môjdjê kukràdjà mar djwýnhmê me abê pardjêumê ne ga me amijo ajêx ne ar amijo Metîndjwýnh mar mexo aba. Ý, watî:re. Dja ga me í me biknor tokry djàkam tu amòrkumrêx. Mýkam? Bir, me aje mebé adjàptàrkam. Me bit kute kàjkwakam Bênjadjwýr djwýnh kôt âm ne kôt ar amijo ba prâm ga me kupa'ã memã arê. Ne Bênjadjwýr djwýnh nêje aje memã atemã kukràdjà jarênho aban arým o mebé utà. Ga me kam ga Metîndjwýnh mar kêt ne ajte me jadjwýbê aptà.

14 Be, me abê Môjdjê kukràdjà mar djwýnhmê me abê pardjêumê ne ga me amijo ajêx ne ar amijo Metîndjwýnh mar mexo aba. Ý, watî:re, dja ga me í me biknor tokry djàkam tu amòrkumrêx. Mýkam? Nã gãm me me 'uwtí krão apan mebé mýjja kunõ akí ne kam ajajkwao-bit Metîndjwýnhmã akabên rûnh ne, ne kum akabên 'ijabjêo aku'ê. Bir, nã gãm me ajêx ne amijo amex ne kum akabêno aku'ê. Be kati, me ajaxwekumrêx. Kam gêdja Metîndjwýnh me kuràm me amã pãnh rax jarên prîne me kuràm me ajo ajkê.

15 Be, me abê Môjdjê kukràdjà mar djwýnhmê me abê pardjêumê ne ga me amijo ajêx ne ar amijo Metîndjwýnh mar mexo aba. Ý, watî:re. Dja ga me í me biknor tokry djàkam tu amòrkumrêx. Mýkam? Bir ga, me aje arík memã kum, “Ba me Metîndjwýnh'ýr meo akêx gê me amim maro ba”, anhÿrja pumû. Djãm mrãmri ne ga me akabên? Kati, me aje amiwýr me'õ pydjio akêx kadjy ngômê pykakôt aba 'ijabjê:. Nhyim arým me awýr amijo akêx ga me kam arým amikôt axwe 'ã mênh mex ne. Amikôt axwe 'ã mênh mex nhyim arým axweo me ajakrenh mex ne. Nhyim arým me akôt biknor prãmikumrêx. Djãm Metîndjwýnh'ýr

ne ga me meo akêx nhyim me amim kuma got? Kati. Nãm ã Jeju Môjdjê kukràdjà mar djwýnhmê mebé pardjêumã ane.

16 Ne kam ajte memã kum,

—Ý, watî:re. Dja ga me í me biknor tokry djàkam tu amòrkumrêx. Me aje mrãmri ne me no rà kute arík meo ba pyræk. Mýkam? Bir, me aje arík memã Môjdjê kukràdjà jarênho punukam. Nãm ã Jeju memã ane. Bir, Môjdjê kukràdjà kôt ne mebé idjaer memã amikabên jarên ajte memã kum,

—Nã bãm amã ikabên pydjín arê, anen ajte kôt memã Metîndjwýnh nhõ mýjja jarê. Mýj kadjy ne kôt memã Metîndjwýnh nhõ mýjja jarê? Bir, kute kabên maro âmja kute mar pydji kadjy ne me Metîndjwýnh nhõ mýjja jarê. Gêdja amikabên jarênha 'êx ne kam Metîndjwýnh nhõ mýjja jarên kam arým o Metîndjwýnhmã amikurêtuw. Amikurêtuw nhyim Metîndjwýnh arým kute maro âmja ngrykmã. Nãm me ã Môjdjê kukràdjà kôt memã amikabên jarênho ane. Nãm Jeju Môjdjê kukràdjà jarênho djwýnh arkum,

—Me aje mrãmri ne me no rà kute arík meo ba pyræk. Mýkam? Bir, me aje arík memã Môjdjê kukràdjà jarênho punukam. Nã gãm me memã kum, “Dja ga me memã amikabên jarên memã kum, ‘Nã bãm amã ikabên pydjín arê. Ê, Metîndjwýnh nhõ kikretija ma’, ane. Gêdja ga me memã ajêx prãm jabej ne Metîndjwýnh nhõ kikretibit jarê ne kam o amikurê'uk kêt. Dja Metîndjwýnh me'õ kute akabên maro âmja ngryk kêt ne me ajo bikênho kêt.

Nhyim be, dja ga me memã amikabên jarên memã kum, ‘Nã bãm amã ikabên pydjín arê. Ê, Metîndjwýnh nhõ kikretikam kên karÿrja ma’, ane. Aje kên karÿr jarênham dja ga akabênikumrêx.

Aje memã amikabên jarênh kôt dja ga amijo anhÿrkumrêx. Dja ga memã ajêx ne kam kên karÿr jarên arÿm o Metîndjwÿnhmã amikurêtuw” ane. Me abê Môjdjê kukràdjà mar djwÿnh ne ga me arÿk ã memã kukràdjà jarênh punuo ane. <sup>17</sup> Me no rã ne me kute amikukãm rît kêt. Kam me kute amipry mar kêt. Me aje me uràk ne amijo ajêx ne memã, “Ba ne ba ije Metîndjwÿnh mar mex”, anhÿr ar o aba. Nhym be, kati. Me aje mar kêt ne te memã Metîndjwÿnh’ã adjujarênh ar aba nhym me adjwÿnhdjwÿ kute mar kêt. Be, me amãbit ne kên karÿr kute mexo kikreti jakrenh. Djãm mrãmri? Kati. Kikreti ne kute mexo kên karÿr jakrenh. Kikreti kukwakambit ne kên karÿr mex. Metîndjwÿnhmã mex. Nãm Jeju ã Môjdjê kukràdjà mar djwÿnhmã ane.

<sup>18</sup> Ne aje memã kum,

—Ga me arÿk memã kum, “Dja ga me memã amikabên jarên memã kum, ‘Nã bãm amã ikabên pydjìn arê. Ê, Metîndjwÿnh nhõ ngônho kija ma’, ane. Gêdja ga me amã memã ajêx prãm jabej ne Metîndjwÿnh nhõ ngônho kibit jarê ne kam o amikurê’uk kêt. Dja Metîndjwÿnh me’õ kute akabên maro ãnjao ngryk kêt ne me ajo bikênh kêt.

Nhym be, dja ga me memã amikabên jarên memã kum, ‘Nã bãm amã ikabên pydjìn arê. Ê, Metîndjwÿnh nhõ ngônho kikam mry nôrja ma’, ane. Aje mry nôr jarênhkam dja ga akabênkumrêx. Aje memã amikabên jarênh kôt dja ga amijo anhÿrkumrêx. Dja ga memã ajêx ne kam mry nôr jarên arÿm o Metîndjwÿnhmã amikurêtuw”, ane. Me abê Môjdjê kukràdjà mar djwÿnh ne ga me arÿk ã memã kukràdjà jarênh punuo ane. <sup>19</sup> Me aje me no rã pyrãk. Djãm mrãmri mry kute mexo

Metîndjwÿnh nhõ ki jakrenh? Kati. Õ ki ne kute mexo mry jakrenh. Õ kikam me kute mry jadjwÿrkambit ne kum mex, Metîndjwÿnhmã mex. Nãm Jeju ã memã ane.

<sup>20</sup> Ne kam aje memã kum,

—Kam, me kute memã amikabên jarênh ne kôt aje kute Metîndjwÿnh nhõ ki jarênhkam djãm kute ò kibit jarênh? Kati. Nãm me kute ò ki jarênh ne aje kute kam mÿjja kunÿ ikwãdjwÿ jarênh. <sup>21</sup> Ne ajtekam me kute memã amikabên jarênh ne kôt aje kute Metîndjwÿnh nhõ kikreti jarênhkam djãm kute kikretibit jarênh? Kati. Nãm me kute kikreti jarênh ne aje kute Metîndjwÿnh kam ÿr jarênh. <sup>22</sup> Ne ajtekam, me kute memã amikabên jarênh ne kôt aje kute kàjkwa jarênh. Djãm kute kàjkwabit jarênh? Kati. Nãm kute kàjkwa jarênh ne aje kute Metîndjwÿnh nhõ krÿ djà rax jarênh ne aje kute ‘ã krÿ djwÿnhbê Metîndjwÿnh jarênh. Kam, dja me memã kabên pÿnh ne arênh kôt amijo anhÿrkumrêx. Nãm ã Jeju memã ane.

<sup>23</sup> Ne kam aje memã kum,

—Be, me abê Môjdjê kukràdjà mar djwÿnhmê me abê pardjêumê ne ga me amijo ajêx ne ar amijo Metîndjwÿnh mar mexo aba. ÿ, watÿ:re. Dja ga me ï me biknor tokry djãkam tu amõrkumrêx. Mÿkam? Bir, me aje Metîndjwÿnhmã mÿjja kakritbit nhõr ne kam mÿjjabê kumkatija aje kum õr kêtumrêxkam. Nã gãm me mÿjja kakrit, õmrõ djãnh djà, pi’ômê õmrõ djãnh djà ‘õdjwÿmê Metîndjwÿnhmã ikjê rên kum kryre ne angã. Ne kam kukràdjà kôt ar amijo aba kêt ne katãt meo aba kêtumrêx ne amã me kaprÿ kêtumrêx ne amim Metîndjwÿnh mar kêt ne. Aje kum kryre ne õrja ne mrãmri tu mexkumrêx. Mÿkam ne ga me kum mÿjjabê kumkatijadjwÿ kum õr kêt ne? Mÿkam ne ga me amã

Metîndjwýnh jabên katàt meo abaja kêt ne? Ja ne ga me aje marmân ate mýjja kakritbit ma.

<sup>24</sup> Ba me amã arẽ ga me ama. Dja me anhõ òmrõkam pure'õ tým ga me pure ngrire'ã ano tỳ:x ne kaban mũm amẽ. Nhyim be, mry jabatãnhbê kameru ja ne anhõ òmrõkam dja, ga me ate akrãn tu ro'ã krẽ. Be, mýj'ã ne ba amã ikabên ja jarẽ? Bir, mýjja kryre ne ga me'ã ano tỳ:x ne ma:ro aba. Nhyim be, mýjja bê kumkati, mýjja kabênkumrẽx ne ga me aje mar kêt. Metîndjwýnh kabên kute me ajaxwe nêje me akukràja ne ga me aje mar kêt ne ate akrãn ajaxwe rax rã'ã. Æ ne ba me amã, “Ga me pure ngrire'ãbit ano tỳx ne kaban mũm amên tu kameru raxja òmrõmẽ ro'ã krẽ”, ane. Kam ne ga me aje meo ba djwýnh no rã pyrãk. Nãm Jeju ã memã ane.

Ne kam ajte memã kum,

<sup>25</sup> —Be, me abê Môjdjê kukràdjã mar djwýnhmẽ me abê pardjêumẽ ne ga me amijo ajẽx ne ar amijo Metîndjwýnh mar mexo aba. Ý, watĩ:re. Dja ga me ĩ me biknor tokry djãkam tu amõrkumrẽx. Mýkam? Bir, nã gãm me aje mrãmri ne me kute ngõnhkrãmẽ ngõnh puror nhĩbũmbit põnh ne kre põnh kêt nhyim krekam mýjja kakrãtyk pyrãk. Be, nã gãm me ã we katàt amijo abao ane. Nhyim kam me me akrãkãbit pumũ nhyim kam kute me amex pyrãk. Nhyim be kati, me akadjwýnhbê ne ga me apunu rã'ã. Me akadjwýnhbê ne me amã me õ nèkrẽx prãm ne 'ã angyk ne aje mebê mýjjao adjãkĩnh'ã aje amim karõ rã'ã. Kam ne ga me akadjwýnhbê apunu rã'ãja. <sup>26</sup> Me abê pardjêu ne ga me aje me no rã pyrãk. Dja ga me akadjwýnhbê kumrẽx wãnh ajaxwemã anhire. Ne kam arým mrãmri abu'ã memã amexkumrẽx. Ne kam aje mrãmri

ne me kute ngõnh puror, kremẽ ibũm põnh nhyim prĩne mex pyrãk.

<sup>27</sup> Be, me abê Môjdjê kukràdjã mar djwýnhmẽ me abê pardjêumẽ ne ga me amijo ajẽx ne ar amijo Metîndjwýnh mar mexo aba. Ý, watĩ:re. Dja ga me ĩ me biknor tokry djãkam amõrkumrẽx. Mýkam? Bir, ga me aje mrãmri ne me kute me tykmã kikre krãkã jaka pyrãk. Krãkãkambit ne kute memã mexti:re pyrãk. Nhyim be, kadjwýnhbê ne mýjja punu:re. Kadjwýnhbê me tyk 'imẽ mýjja punu kunĩ. <sup>28</sup> Ga me aje urãk. Abu'ã memã ajaxwe kêt pyrãk. Nhyim be, kati. Metîndjwýnh ne me akadjwýnhbê me aje mýjja marja kunĩ kute mar. Me ga ne ga me amijo ajẽx ne ar amijo Metîndjwýnh mar mexo aban aje ajaxwebit mar. Nãm ã Jeju memã ane.

Ne kam ajte memã kum,

<sup>29</sup> —Be, me abê Môjdjê kukràdjã mar djwýnhmẽ me abê pardjêumẽ ne ga me amijo ajẽx ne ar amijo Metîndjwýnh mar mexo aba. Ý, watĩ:re. Dja ga me ĩ me biknor tokry djãkam amõrkumrẽx. Mýkam? Bir, amrẽbê: me bakukãmãrekam ne Metîndjwýnh kabên jarẽnh djwýnh arým ty nhyim me amrẽbê: me angij. Ga me akamingrãnyre ne ga me me tyk tũmjamã kikren me katàt kute amijo ba tũm nhõ pyka krã kunhêro aba. <sup>30</sup> Ne kam arĩk memã kum, “Ne ba me ren amrẽbê: me bakukãmãre, me banhingêt kator nyri ren me ro'ã ikator ne ar iba ne ren me banhingêt kudjwa ã anhÿr kêtumrẽx ne. Ne ren Metîndjwýnh kabên jarẽnh djwýnh par kêtumrẽx ne.” Nã gãm me ã memã ane. <sup>31</sup> Me aje ã memã anhÿrkam arým amikõt amijarẽ. Me abê me par djwýnh tãmdjwý, Metîndjwýnh kabên jarẽnh djwýnh kanẽ tãmdjwý. Arým ne ga me amikõt amijarẽ. <sup>32</sup> Metîndjwýnh ne me anhingêtum ngyk. Aje, me



rã'ã ne me anhingêt kôt ã ajaxweo anen ar badjwý ar ipa. Ar badjwý ar ipa gê Metîndjwýnh on me akam ngryk me:x ne. Nãm ã Jeju memã ane.

Ne kam ajte memã kum,

<sup>33</sup> —Me akamingrãnyre ne ga me abê kangã, me abê iry. Djãm me ga ne ga me aje abiknorbê amipytãrmã? Kati. Me biknor tokry djãbê me aje amipytãr prãm kêtumrêx. <sup>34</sup> Kam arým ije me awýr me anormã. Ije me awýr ikabên jarênh djwýnh janormã. Ije ajte me awýr me no mex janormã. Ije ajte me awýr me kukràdjã mar djwýnhkumrêx janormã. Dja ga me kam arým me kwý pa, píte'y'ã me kwýmo iten me kupa. Ne me abikprõnh djakam mry kã punuo me kwý kaprêprêk. Ne aje meo abikênh kadjy me abej mô, apýnh krîrax djãri kôt me abej mô. <sup>35</sup> Me akukãmãremê nã gãm me me katãt kute amijo ba kunî paro tẽ. Paro tẽn paro tẽn arek me kamrô kapîn o tẽ. NhyM Metîndjwýnh arým meo ngryk ne kam gormã me ajabatãnhmã pãnh jarê. Me akukãmãre ne me Abeu jaxwe kêtja bîno kurêtuw ne kam ijukri me ja paro tẽn tãmtã: arek o tẽn ne kam Djakarij, Berakij kute irja'ýr bõx ne kam Metîndjwýnh nhõ kikretimê õ ngõnho ki kaêxkam\* kubî.

<sup>36</sup> Ë, ba me amã arê. Metîndjwýnh ne arým meo ngryk ne. Ne kam me akamingrãnymã arým pãnh jarê. Me ga dja Metîndjwýnh me akukãmãre kute me imex tũmja pãnh me ajo ajkê. Mrãmri ne ba me amã arênhkumrêx. Nãm ã Jeju memã ane. <sup>37</sup> Ne kam krîraxmã kum,

—Djeruxarê, Djeruxarê, mýkam ne akra kute Metîndjwýnh kabên jarênh djwýnh par prãm ne? Mýkam ne me kêno me titik ne me kupa, Metîndjwýnh kute me awýr

me anorja pa? Je nã bãm te ije me ajo ibikprõnh ne ije me ajo atommã. Kute mrãmri ne ôkrên'ãnh kute arao noreo bikprõnhja pyrãk. Ba ren ã me ajo ane. Nãm bãm te ije me ajo anhýrmã ga me amã ikînh kêt. <sup>38</sup> Ë, jakam me amõr djã ja gêdja kukrit mex ne kaprýn nõ. <sup>39</sup> Ë, ba me amã arê ga me ama. Jakam dja ga me ipumũnh kêtumrêx ne. Ipumũnh kêt rã'ã: nhyM inhõ akati ijo rãm ne jao tẽ ga me abenmã kum, “Ë, ota arým Metîndjwýnh kabênkôt tãmja bõxmã. Me:xkumrêx”, ane. Dja ga me ã abenmã ane ba kam arým me awýr bõx. Nãm ã Jeju memã ane.

## 24

*Akubyn bõx kukãm mýjja apõx'ã ujarênh.*

*Mak 13.1; Ruk 21.5; Xim k 4.1; A Xim 3.1*

<sup>1</sup> Ne kam Metîndjwýnh nhõ kikreti kurũm kato. NhyM kôt ba djwýnh 'ýr bõx. Ar kute kikretikam apýnh kum kikre jakre kadjy 'ýr bõx. <sup>2</sup> Ne kam ar arým kum akre nhyM Jeju arkum,

—Ar mýjja kunî pumũnho dja. Ë, ba ar amã katãt arê. Be, dja ï me kurê djwýnh prîne kikreti ngrã. Dja me kên aben nhiby ikwã kunî nhikô rê. NhyM kam kên'õ aben nhiby nõr kêtumrêx, ane.

<sup>3</sup> Ne kam ar tẽn kam krãnhbê Oriwêre'ã wabi nhyM arým ate nhý. NhyM kam kôt ba djwýnh 'ýr bõx ne me kãxã kum,

—Dja ga ar imã kikreti ngrãnh'ã ajarê. Nhýnh amex 'õkam dja me bakurê djwýnh me bawýr bõx ne kikreti ngrã? Dja ga akubyn bõx nhyM mýjja kunî arým pyka kôt amingrà nhyM me kunî arým pykakam ar ba'ã aminhinomã amimê. Mýj gêdja kukãm apõx? Dja bar omũn kam kôt õ akatimã ikaton õ akati ma.

\* 23:35 ipõokri

<sup>4</sup> Nhyam kam Jeju arkum apÿnh mÿjja kukâm apôxmâ arkum 'ã ajarên arkum,

—Ar amijã ano tÿx gê me'õ ar amã 'êx ne ar anoo biknor ne Metîndjwÿnhbê ar ajo akêx kêt. <sup>5</sup> Be, me krãpti dja i aben totokmã me'ÿr bôx ne arÿm amijo 'êx ne amijã imê. Amijã imên arÿm memã kum, “Me anhô Bênjadjwÿrbê kumkati kadjy ne Metîndjwÿnh ijano ba tên bôx. Ba ibê Kritu”, ane. Ne kam arÿm me krãpti noo aknon Metîndjwÿnhbê meo akêx.

<sup>6</sup> Be, kam dja gar me kute abenwÿr prôt man amybÿm me kute abenwÿr prôt jarên ma. Kwãrik wãnh kam ar atin prãm kêt. Ba ne ba kukâm ar amã 'ã ajarê gar arÿm ama. Ja kumrêx gêdja me ã o anhÿro tẽ. Kraxje kute inomã mênh kêt, kute 'ÿr o tẽm rã'ã, ane. <sup>7</sup> Nã, apÿnh me ba djari gêdja me abenwÿr prôt ne aben nhimexo ba. Nhyam apÿnh bēnjadjwÿr rûnh nhô âpênhja abeno kurê djwÿnh ne aben nhimexo ba. Nhyam prãmdjwÿ me kwÿ nhimex. Apÿnh pyka djari gêdja kam pyka tertet ne. <sup>8</sup> Be, me tokry krax ne ja. Ga me nire kra ãja pumû. Adjÿm. Dja kra à:n kam arÿm à ra:x ne. Me adjwÿnhdjwÿ dja me tokry mô:n kam arÿm tokry ra:x ne. Be, me tokry krax ne ja. Nãm ã Jeju arkum ane.

Ne kam ajte arkum,

<sup>9</sup> —Dja me tokry: nhyam kam me arÿm memã ar akanga. Me kute ar ajo bikênho ba kadjy ar akanga. Nhyam me arÿm ar apa. Apÿnh me bajtem ba djã kunikôt dja me kum ar akurê. Ikôt ar abikamênhkam dja me kum ar akurê. <sup>10</sup> Kam dja me krãpti ibê amijo akêx. Ne kam me kurê djwÿnhmã aben kangan kum aben kurê. <sup>11</sup> Me krãpti dja me ta amijo 'êx ne amijã Metîndjwÿnh kabên jarên djwÿnh rê. Amijã kurên memã kum, “Metîndjwÿnh kukwakam ne ba ar amã arê”, anhÿro ba. Dja me ã amijo 'êxo

anen arÿm me krãpti noo aknon Metîndjwÿnhbê meo akêx. <sup>12</sup> Me krãpti kum Metîndjwÿnh kînhja dja me arÿm kum kînh apêx. Pyka kunikôt me krãpti axweo kume:x. Me axweo kumexkam dja me arÿm kum kînh apêx.

<sup>13</sup> Nhyam be, dja mÿjja kunî kute amingrãnh nhô akati bôx. Me kunî kute aminhinomã amimên nhô akati bôx. Nhyam kam me 'ã ukanga kêt ne kum kînh tÿx rã'ãja dja Metîndjwÿnh arÿm me utã. <sup>14</sup> Mÿjja kute amingrãnh kêttri dja me apÿnh pyka kunikôt memã arê. Bēnjadjwÿr djwÿnh'ã ujarên nyja memã arê. Apÿnh me ba djã kunikôt me kute ujarên mar kadjy memã arê. Nhyam kam akati arÿm bôx. Me kunî kute aminhinomã amimên nhô akati arÿm bôx. Ba ne ba kukâm ar amã 'ã ajarê gar arÿm ama. Nãm ã Jeju arkum ane.

Ne kam ajte arkum,

<sup>15</sup> —Be, ar aje ajbir imã, “Dja ga ar imã kikreti ngrãnh'ã ajarê”, anhÿrja ba ar amã arê gar ama. Dja mÿjja kute amingrãnh 'ÿr nhyam kam arÿm mÿjja punutija dja. Metîndjwÿnh nhô kikretikam dja. Gar arÿm omû. Mÿjja punuti djô'ã dja me mÿjja kunîo ajkê ne kungrà. Me bakukãmãre Danijeu ne amrêbê: 'ã ajarê. Metîndjwÿnh kukwakam memã 'ã ajarê. Danijeu ne arÿm memã mÿjja punuti ja'ã ajarên 'ã pi'ók no'ók. Dja gar pi'ók no'ókwã pumûn kam mÿjja punuti pumûn kam kêt ama. <sup>16</sup> Kam gêdja Djeruxarê bu'ã pyka ja nhidjibê Djudêjakam me ja amijã maje krãnh'ÿr prôt ne. <sup>17</sup> Gêdja me kikre nhimök po'ã ãm jabej kwãrik wãnh akubyn ùrkwãkam nêkrêx'ÿr àr ne byr ne o tẽm kêt. <sup>18</sup> Gê purkam me ar ba jabej tu umaje prôt. Kwãrik wãnh me kute kubêkã jamÿnhmã 'ÿr akêx kêt. Dja tu me ãm kamã amû prôt.

19 Ý, watĩ:re, akati wākam me tu-jarômê me kra karà dja me tokry:. Mýj gêdja me ja mýjja punutija pymaje prõtja on? 20 Dja gar Metĩndjwýnhmã amijo a'uw gê na raxkam umaje ar aprõt kêtãm. Nàr, gê pi'ók ràràrbê me tyk djà kêt nhõ akatikam ar aprõt kêtãm.

21 Be, dja me kam tokry kumex. Dja gar akubyn amijo tèn mýjja kunĩmo krax djà'ýr amijo bõx ne ama. Me akukãmãre aben kukãm tokrykõt dja gar maro tẽ. Me tokry tũm maro tẽn amiwýr me tokry maro bõx. Ga, me tokry kume:xja pumũ. Be, amrẽ mýjja punuti nhõ akati bõxkam dja me tokryo katát me tokry tũmwã kunĩ jakre. Ne amrẽ me'ã akati mõrkam me tokry nydjwý dja me tokryo mýjja punuti'ã me tokryja tẽp kêtumrẽx. 22 Metĩndjwýnh ren tokry'ã akati kwý ngri kêt nhym me'õ ren tĩn kêtumrẽx. Be, Metĩndjwýnh kute amijo me utãrja kadjy dja arým 'ã akati wã kwý ngri.

23 Godja me'õ 'êx ne ar amã, “Ota, jakam arým Kritu bõx ne nhỹ. Arým ne Metĩndjwýnh 'ã me õ Bẽnjadjwýrbê kumkati mẽ nhym jakam arým memã nhỹ”, anhýr jabej nãr me'õ ajte 'êx ne ar amã, “Ota, jakam arým Kritu bõx ne nhỹ. Arým ne Metĩndjwýnh 'ã me õ Bẽnjadjwýrbê kumkati mẽ nhym jakam arým memã nhỹ”, anhýr jabej. Djãm ar aje me ja marmã? Kati. Kwãrik wãnh amim me ja mar kêt. 24 Be, apýnh me 'êx ne ta kute amijo Kritu, ta kute amijo Bẽnjadjwýrbê kumkati dja me apõx. Nhym amũ me jadjwý dja me apõx ne 'êx ne memã kum, “Ba ne ba Metĩndjwýnh kukwakam me amã idjujarẽnh iba”, anhýro ba. Dja me me aèrbê mýjja pumũnh kêt kwý nhipêx, kute me noo biknor nhym me kute me'ã abenmã kum, “Mrãmri ne djãm Metĩndjwýnh kukwakam me kabẽnkumrẽx”, anhýr kadjy. Godja me me noo biknor

ne Metĩndjwýnhbê meo akêx jabej, Metĩndjwýnh kute amrêbê amijo me utãrja kubê meo akêx ne kute meo ba jabej. Me 'êxnhĩ no týxo kute me akrenh jabej godja kubê me kwýo akêx ne meo ba jabej. 25 Ba ne ba mýjja apõx kêttri kukãm ar amã 'ã ajarẽ gar arým ama. Nãm ã Jeju arkum ane.

Ne kam ajte arkum,

26 —Kam godja me'õ ar amã, “Ë, onj kapõt kukritkam arým bõx ne ar ba”, anhýr jabej. Djãm 'ýr ar amõrmã? Kati, dja gar tu ate akrãn 'ýr amõr kêt. Nãr, godja me'õ ar amã, “Ë, kikre jakam ne apdjun nhỹ”, ane. Djãm ar aje amim me marmã? Kati. Kwãrik wãnh amim me mar kêt. 27 Djãm ibõx ne mebê ibipdjur? Kati. Ga, kãjkwakam na krak ne adjẽnhja pumũ. Na jadjẽnh prõt ne arým myt ngjêx djãmã ngjêxja pumũ. Adjẽnh kute kãjkwa kunĩ kurwýja pumũ. Dja ba ã ibõxo ane. Ije amijo inhĩ dja ba ã ibõxo ane nhym me kunĩ arým ipumũ. Nãm ã Jeju arkum ane. 28 Nhym kõt ba djwýnh bõx djà jabej kukij ne kum,

—Bẽnjadjwýr, nhýnh jakam dja ga bõx, ane?

Nhym arkum,

—Ga me, nhõnh ne mry tyk'ã bikprõnh ne kumex ne kute o amirĩtja pumũ, ane. Dja ã Jeju akubyn bõx kutã mýjja apõx ne bõx djào amirĩto ane. Nãm ã Jeju arkum ane.

Ne kam ajte arkum,

29 —Nhym me tokryo ku'ewã'ã akati kwý apêxkam dja on mýjja rũnh apõx.

“Dja myt amijo akamãt kô tyk nhym mytyrwý irã kêt.

Nhym kanhêti kãjkwa kurũm rõrõk nhym kãjkwakam apýnh mýjja tý:x amingrêk ne.”

30 Ba kam ije amijo inhĩ dja ba kãjkwakam amirĩt nhym me arým ipumũ. Nhym kam pyka kunĩkõt me ba djakam me kunĩ arým mu:w.

Ba kam ije amijo inhĩ dja ba arým itý:x ne prĩne imextire ne ipyma:. Ne kam kàjkwakam kakràkòt bõx nhym me kunĩ: arým ibõxkòt ipumũ. <sup>31</sup> Dja ba ikadjy mrãnh djwýnh jano nhym me arým õ'i kakòr tý:x ne. Kakòr tý:x ne arým ije amijo me utàrja kunĩo atom. Dja me kàjkwa krax'ãm mõn meo atomo mõ. Ne kàjkwa 'ènhòt'ãm mõn meo atomo mõ. Ne aktã kàjkwa nhiré'ãm mõn meo atomo mõ. Ne apýnh pyka kunĩkòt inhõ me ja kunĩ: abenwýr meo atomo mõn meo aben pydji. Ba ne ba kukãm ar amã 'ã ajarẽ. Gora abej ajkam ama.

<sup>32</sup> Be, akubyn ibõx djã nhõ akatija'ã ne ba ije pidjòbè pigère jakremã. Gora ije 'ã mýjja jakreja ma. Ba ar amã arẽ gar ama. Be, dja pidjò pakã nokã tukam 'õ nhingrà kadjy arým ingrà apõx gar kam arým amexmã kamnhĩx nhym kam arým amex. <sup>33</sup> Bir be, gèdja ba ije ar amã mýjja jarènhja ã apõx mõr ane gar me kam arým ijabej rĩt ne ijabej ajkam ama. Akubyn ibõx djã arým 'ýr. Ýr dja mýjja apõxja. Amex kutã gèdja pi'õ ingrà. Nhym be, ibõx kutã gèdja mýjja pymatija apõx mõ.

<sup>34</sup> Nã, mrãmri ne ba ar amã kòt arẽ. Ar anhõ pykakam me kam-ingràny ja gèdja me tyk par kètri mýjja ja kunĩ apõx. Mrãmri ne ba ar amã arẽ. <sup>35</sup> Ikabèn kajgo kètkumrèx. Gèdja pykamè kàjkwa ì apèx nhym be, ba ikabèn gèdja 'õ biknor kètkumrèx. Mrãmri gèdja ba ije mýjja jarènh ja kunĩ apõx nhym me omũ.

*Me kute bõx djã nhõ myt mar kèt.*

*Ruk 12.37; Kar 1.6; Tex k 5.2*

<sup>36</sup> Ne kam ajte arkum,

—Be, ba akubyn ibõx djã nhõ akati nãr myt djãm me'õ kute mar? Kati, me'õ kute mar kètkumrèx. Metindjwýnh kadjy mrãnh djwýnhdjwý kute mar kèt. Ibãmbit ne kute mar. <sup>37</sup> Be ga,

amrèbè me bakukãmãre Nõwe pykakam ar bari me ate krãn ar baja pumũ. Dja ba ibõx 'ýr nhym me ã ane. Ije amijo inhĩ dja ba akubyn ibõx 'ýr nhym me ate krãn ar ba. <sup>38</sup> Amrèbè: ngò kute pykao bikamýr kètri ne me bakukãmãre ate krãn ar õ kwý krènbít ba ne ar kõmbít ba. Ne abenwýr babít ar ba. Nãm me me mymã kra jarè ne memã kum,

—Nã, jakam dja ga arým tu ikra'ýr mõ, anhýro ba nhym me arým me'ýr ba. Nãm me mýjja jabít kòt amak bẽno ba: nhym kam Nõwe arým kã raxmã wadjã. <sup>39</sup> Nãm me amikukãm mýjja mar kètkumrèx ne ar ba: nhym me aèrbè ngò tãm mõn me kunĩo mõn prĩne meo akno. Ije amijo inhĩ dja ba akubyn ibõx 'ýr nhym me ã anen ate krã nhym mýjja arým ã meo ane. <sup>40</sup> Nhym me'õ my ar amè kapòtkam tẽ. Ba ikjè pa 'amý nhym ikjè arek wakrekam dja. <sup>41</sup> Nhym me'õ nire ar amè à'uko nhý. Ba ikjèbit pa 'amýn o tẽ nhym ikjèja arek wakrekam nhý.

<sup>42</sup> Kam dja gar arek ijabej ajkam ama. Mýkam? Bir, ar aje akubyn ibõx'ã myt mar kètkam. Ba ibè ar anhõ Bènjadjwýr djwýnh ar aje akubyn ibõx'ã myt mar kètkam. <sup>43</sup> Dja gar ikabèn ma. Ba ajte ar amã 'òdjwý jarè gar ama. Ne ren õ kíkire djwýnhja ren me àkĩnhĩ bõx djã man ren kam ren arek kam amako nhý. Nhym ren bõx ne kíkire'ã 'yr ne kum àr kètkumrèx. Badjwý dja ba ije me àkĩnhĩ pyrãk ne me ajaèrbè bõx. <sup>44</sup> Kam gèdja gar gadjwý mã ikam amako nhý. Ba ije amijo inhĩ ne me awýr ibõx ba gèdja ba ajte akubyn bõx. Ar aje nhýnh myt nhýr 'òkam aje ibõx djã mar kèt. Kam gèdja ba tu ar ajaèrbè bõx. Nãm ã Jeju arkum amibõx djã jarènhõ ane. Ne kam ajte arkum, <sup>45</sup> —Me õ bènjadjwýr ne õ àpènhmã kabèn ne kum, “Ga dja ga

me àpênh'ã me omũ ne prĩne 'ã meo djuw mex. Ne myt kunĩkõt memã õ kwý krên djã ngãn akrãmã memã õro aba.” Nãm ã õ àpênhmã me'ã karõ ane. Kute akrãmã me àpênh'ã me omũnh ne kute 'ã meo djuw mex katãtmã ã kum me'ã karõ ane.

Nhym õ àpênh kum, “Nà, gêdja ba mrãmri ã anen kam me 'ãno dja”, ane. Nhym kam õ bẽnjadwýr mã nhĩ'ãm tẽ. Nhym kam õ àpênhja kabênkumrêx. Nãm katãt ar memã mýjja nhõro ba, me kanga kêtikumrêx ne ar meo ba.

<sup>46</sup> Nhym kam bẽnjadwýr akubyn bõx ne kam õ àpênhjamã kato. Kute amrêbê kum kabên jarênhja kõt ne mrãmri meo djuw mexkumrêx nhym kam arým kum kato. Kam dja õ àpênhjadwý tu amikam kĩnhkumrêx.

<sup>47</sup> Ê, ba ar amã kõt arê. Bẽnjadwýrja dja õ àpênh ja'ã bẽnjadwýr mẽ. Kute nêkrêxmẽ mýjja kunĩ pumũnhmã dja 'ã bẽnjadwýr mẽ. Nhym kam õ àpênhja kĩnhkumrêx ne. <sup>48</sup> Nãm ren õ àpênhja axwen ren õkre kadjwýnhbê õ bẽnjadwýrja'ã ren, “Be, nãm nhĩ'ãm bẽnjadwýr tẽn arým amikrà. Jakam dja ba on tu arĩk ar iba”, ane. <sup>49</sup> Ne kam ren ar õ àpênhja titiko ba, me ro'ã àpênhja ren ar me titiko ba. Ren õ kwý krênbit ban me bibãnhkõt ren kadjwati kangõ\* kõmo ba. <sup>50</sup> Nhym kam õ bẽnjadwýrja aêrbê bõx. Õ àpênhja kute amim õ bẽnjadwýrja bõx djãkõt mar kêt. Nhýnh akati 'õkam bõx djãmã kute mar kêt ne nhýnh myt nhýr 'õkam bõx djãmã kute mar kêt kam ne aêrbê bõx. <sup>51</sup> Nãm bõx ne kam õ àpênh arĩk ar bajakam ngryk ne. Ngryk ne kam o ajkapõn bõm kumê. Me kute amijo 'êx ne ta kute amijo Metĩndwýnh mar mexjamê ro'ã ãm kadjy bõm kumê. Wãnh

ne me amim ngryk ne tokry djãje amijanên ar àmra ba, ane. Nãm Jeju ã kõt ba djwýnhmã ane.

## 25

### *Me prĩtirebê 10'ã ujarênh.*

<sup>1</sup> Ne kam ajte arkum,

—Kãjkwakam Bẽnjadwýr djwýnh dja akubyn bõx ne amim me utãn ar meo ba. 'Ã dja ba me prĩtirebê 10 jakren 'ã ar amã ajarê. Be, mjên kumrêx ne arým prõ nhũrkwã'ýr tẽn 'ýr bõx ne arým aminhũrkwã'ýr kute prõo bõxmã. Me kute abenã ar mênhmã ne aminhũrkwã'ýr kute prõo bõxmã. Nhym nĩjar me prĩtirebê 10 arkam ama. Ar ro'ã kĩnh kadjy arkam ama. Arkam ama:n kam arým kute ar kajpar kadjy arým katon ar'ýr ngõnhpõko mõ. <sup>2</sup> Ar prĩtirebê 5 ne ar no rerekre nhym Ar kubê 5 ne ar no mexkumrêx. <sup>3</sup> Ar no rerekreja ngõnhpõkkambit kangõo mõn ngõnhpõk kangõ 'õdjwýo mõr kêt. <sup>4</sup> Nhym be, ar amak mexja ne ar ngõnhpõko mõn ajte ngõnh 'õdjwýkam ajte kangõ 'õdjwýo mõ. Ar amũ mjênme prõ ar'ýr ngõnhpõko mõ:. <sup>5</sup> Nhym mjên ar amikrà nhym prĩtireja ar arým õtdjwan dja:n arým nõn kam arým ngõr.

<sup>6</sup> Nhym akamãt kõ ipõkri nhym me'õ arým ar aêrbê mjên aro aki:j ne arkum, “Ê, arým ne prõo bõx. Amrê ar aprõt ne ar kajpa”, ane.

<sup>7</sup> Nhym kam ar prĩtire kunĩ krã katon arým ngõnhpõko mex. <sup>8</sup> Nhym no rerekre arja arým amak mex ar jamã kum, “Ar imã ar anhõ kuwy kangõ kwý ru. Arým ar inhõ ngõnhpõk àtyk mõ”, ane.

<sup>9</sup> Nhym ar arkum, “Kati. Ngrire. Ba ren ar ar amã kangõ kwý ru nhym ren kangõ gwaj banhõ ngõnhpõk'ýr ren bõx kêt. Ar

\* **24:49** Mýjja me kute o kõm ne kõt bibãnh kunija, kadjwati kangõomê uba kangõomê, mýjja kangõo kunĩ ne me kum kadjwati kangõo jarê.

ngônhpôk kangô nhôr djwýnh'ýr môn amim kwý kôpra”, ane.

<sup>10</sup> Nhyam kam ar no rerekre arým kôpra djà'ýr mō. 'Ýr mōrram nhyam arým mjênmmē prō ar bōx. Nhyam kam ar prîtire, ar ò ngônhpôk kangôja arým mjênmmē arkôt wadjà. Me kute prō'ã mēnh djakam kikremã wadjà. Mjênmmē prōmē ro'ã ar ò kwý krēn kīnh kadjy ne ar prîtire ar kôt kikremã wadjà. Nhyam kam me arým ar pānh kikre'ã ijē.

<sup>11</sup> Nhyam kam ajmã nhyam ar prîtire no rerekreja bōx. Ar arým kuwy kangô kôpra djakam tēn kangô kôpran arým akubyn bōx. Ne kam mjênmmē prō nhō kikre'ýr bōx ne kum, “Bēnjadjwýr, bēnjadjwýr, gop ar imã kikre'ã ta”, ane.

<sup>12</sup> Nhyam arkum, “Kati. Ije ar amar kêt. Mrāmri ne ba ar amã arēnhkumrēx.” Nām ã bēnjadjwýr arkum ane. Tām ne ja. Nām ã Jeju kôt ba djwýnh arkum ane.

<sup>13</sup> Ne kam 'ã ajte arkum,

—Dja ba ije mjēnwã bōx pyrāk. Kam dja gar ijabej ajkam ama. Ba ije amijo inhīja ar aje ibōx'ã akati nār myt mar kêt. Nām ã Jeju arkum ane.

*Pi'ók kapribē tarētu nhōr'ã ujarēnh.*

*Ruk 19.11*

<sup>14</sup> Ne kam ajte arkum,

—Kàjkwakam Bēnjadjwýr djwýnh dja akubyn bōx ne arým amim me utàn ar meo ba. 'Ã dja ba me'ō jakren 'ã ar amã ajarē. Me'ōja ne anhýr bê pyka 'ōmã tēmmã, ne amiwýr ò àpēnh ar ku'uw. Nhyam kam ar bōx nhyam arým arkum ò mýjja ngã. <sup>15</sup> Apýnh ar kum àpēnh mexkôt ne arkum ò mýjja ngã. Ar kute kutēp kum kãjmã 'ã kamēnhmã ne arkum kungã. Ò àpēnh no mexjamã ne pi'ók kaprī rax ngã. Pi'ók kapribē tarētubē 5 ne kum kungã. Ne kam ajte kãjbē no mexjamã pi'ók kaprīo amānhkrut

ne kungã. Ne kam ajte no rerekre jamã pydjin kungã. Ne kam arým mã pyka 'ōmã tē. <sup>16</sup> Nhyam kam kute pi'ók kapribē 5 byrja arým o nèkrēx kumex by. Ne kam pi'ók kaprī pānh arým memã òro dja. Memã òro dja: nhyam me pānh kum pi'ók kaprī rax nhōro dja. Nhyam amýn arým 'ã akre. 'Ã akre:n arým 'ã akrebē 5 ne kuby ne kam ijukri 'ã akre: ne o 5 ne kuby. <sup>17</sup> Nhyam kam kute pi'ók kaprīo amānhkrut byrja ã o anen o nèkrēx kumex by. Ne kam pi'ók kaprī pānh arým memã òro dja. Memã òro dja: nhyam me pānh ajte kum pi'ók kaprī rax nhōro dja. Nhyam amýn arým 'ã akre. 'Ã akre:n arým 'ã akreo pi'ók kaprīo amānhkrut ne kuby ne kam ijukri 'ã akre: ne kam o amānhkrut ne kuby. <sup>18</sup> Nhyam be, kute pi'ók kaprī pydji byrja ne mã o tēn kam kum kren tu kam adjà. Nām kãjmã kum 'ã akre bikamēnh kêt.

<sup>19</sup> Nhyam kam ajmã:kam ar àpēnh nhō bēnjadjwýrja bōx ne amiwýr ar ku'uw nhyam ar 'ýr bōx. Kute akubyn ò pi'ók kaprī jamýnh ne 'ã akre kadjy amiwýr aro bōx. <sup>20</sup> Nhyam kute pi'ók kapribē 5 byrja ne kum o bōx ne kum ajte ijukri 5 ne o bōx ne kum kungān kam, “Bēnjadjwýr, ije amã omūnh kadjy ne ga imã 5 ne angã. Ota, ba arým kãjmã amã 'ã akre kamē nhyam arým kubē 10. Mī, anhō pi'ók kapribē 10”, ane.

<sup>21</sup> Nhyam ò bēnjadjwýr kum, “Mexkumrēx. Ga ne ga adjapēnh mexkumrēx. Akabēnkumrēx. Nã bām amã mýjja ngrire ngã ga prīne ikutēp imã o djuw mex ne 'ã adjukanga kêt. Pānh gēdja ba amã inhō mýjja rax jarē. Ga kam amū idjō'ã ar o aba. On dja ga ikôt akīnhkumrēx”, ane.

<sup>22</sup> Nhyam kam kute pi'ók kaprī amānhkrut byrja ne ajte 'ýr bōx ne kum, “Bēnjadjwýr, ije amã omūnh kadjy aje imã o amānhkrut ne òrja

ne ba arým kâjmã amã 'ã akre kamê nhyim arým kubê 4. Mĩ, anhõ pi'ók kapribê 4", ane.

<sup>23</sup> Nhyim õ bēnjadjwýr kum, "Mexkumrêx. Ga ne ga adjapênh mexkumrêx. Akabēnkumrêx. Nã bãm amã mýjja ngrire ngã ga prĩne ikutêp imã o djuw mex ne 'ã adjukanga kêt. Pãnh gêdja ba amã inhõ mýjja rax jarê. Ga kam amũ idjõ'ã ar o aba. On dja ga ikôt akĩnhkumrêx", ane.

<sup>24</sup> Nhyim kam kute pi'ók kaprĩ pydji byrja ne 'yr bõx ne kum, "Bēnjadjwýr, nã gãm ajamakre kêt. Nã gãm adjakre kêt kam ar mebê djwýo atomo aba. Ne aje amim mýjja kunĩ jadjwýr kêt kam ar mebê jãm o amijakren o atomo aba. <sup>25</sup> Ba kam ije amã kupênh prãm kêt kam prĩne kum kren kam adjã nhyim nõ. Imã apymakam. Mĩ, anhõ pi'ók kaprĩ", ane.

<sup>26</sup> Nhyim kam õ bēnjadjwýr kum, "Ga ne ga ajaxwekumrêx. Amã djukangakumrêx. Djã nã bãm idjakre kêt kam ar mebê djwýo atomo iba ne ije amim mýjja kunĩ jadjwýr kêt kam ar mebê jãm o amijakren o atomo iba? <sup>27</sup> Bir be, ga kam we ga aje amim ipumũnhkôt ren inhõ pi'ók kaprĩ jao tēn ren me kute pi'ók kaprĩ marmã angã nhyim ren abenã rôrôk tēn rax ba ren arým 'yr bõx ne arým ren kuby." Nãm õ bēnjadjwýr ã kum ane.

<sup>28</sup> Ne kam memã kum, "Aj, amũ me ajõ kubê pi'ók kaprĩwã byn o tēn kute imã pi'ók kaprĩo aptãr nhyim kubê 10wãmã angã", ane. <sup>29</sup> Mýkam? Bir, arým me õ mýjja gêdja Metĩndjwýnh iby memã kungã nhyim kam arým me õ mýjja kumex. Nhyim be, me õ mýjja kêt, kute memã õr nhyim me kute kum o djuw mex kêtjabê gêdja Metĩndjwýnh mýjja ngrireja kunĩ by.

Ë, ba ar amã arê gar ama. Me kute tu amim imarkumrêx jamã dja Ibãm ijo amirĩto tē gē me amim imar rax. Nhyim be, me ajkwaobit kute amim imarjabê dja Ibãm ijo apdju. Dja prĩne inêje me no nhityn mebê ijo apdju.

<sup>30</sup> Be, nhyim kam bēnjadjwýr memã kum, "Aje, me bõm inhõ apênh punuwã mē gē wãnh akamãt kô tykkam ar me ikõ'ã ba. Wãnh ne me tokry djãje amijanên ar àmra ba. Nãm ã bēnjadjwýr memã ane nhyim me arým bõm kumê. Tãm ne ja." Nãm ã Jeju arkum ane.

*Mrykĩ'ãtomtimē mokaak'ã ujarēnh.*

*Mat 13.36, 22.13; Ap 20.11*

<sup>31</sup> Ne kam ajte arkum, —Ba ije amijo inhĩ dja ba prĩne imex ne ipyma:n arým akubyn bõx. Ne amikôt Metĩndjwýnh kadjy mrãnh djwýnh kunĩo bõx. Ne kam kãjkwakam imexo ime:xkumrêx ne ipyma:kumrêx ne arým ikrĩ djã raxkam nhỹ. <sup>32</sup> Nhyim kam apýnh me ba djã kunĩkôt dja me ikabem akuprõ ba arým meo ajkij. Kute mryo ba djwýnh kute õ mryo bikjêr pyrãk. Kute aben bê mrykĩ'ãtomtimē mokaako bikjêr pyrãk. Dja ba arým ã aben bê meo ibikjêro ane. <sup>33</sup> Ne inhõ me mex kute mrykĩ'ãtomti pyrãk ja dja ba amidjubók'ãnh me umjuw. Ne me axwe kute mokaak pyrãk ja dja ba amidjuge'ãnh me umjuw.

<sup>34</sup> Ne kam ba Ibēnjadjwýr rax idjubók'ãnh me mex ku'êjamã kum, "Amrê me iwýr mõn ikôt aku'ê. Ba ibê me anhõ Bēnjadjwýr djwýnh dja ba arým me ajo ibakumrêx. Amrêbê: mýjja kunĩ kator djã kraxkam ne Ibãm arým amijo me apytãn me ajo djuw mex. Ije amim me apytãr ne ije me ajo iba kadjy amijo me apytã. <sup>35</sup> Mýj ne ga me nē ba kam arým amikôt me apumjuw? Bir, arým imã prãm ga me imã mýjja'õ ngã ba kukrê.

Arÿm imã kôr ga me imã mÿjja 'ô ngã ba o ikô. Nãm me ijo me bajtem ga me arÿm imã anhürkwã jarê ba kam inhikwã. <sup>36</sup> Arÿm ikà kêt ga me arÿm imã kubêkà ngã ba adjã. Arÿm ikanê ga me arÿm ikane. Arÿm me ibê ijê ga me arÿm iwÿr bôx ba ikĩnh. Kam ne ba arÿm amikôt me apumjuw”, ane. Akubyn ibôxkam dja ba ã idjubôk'ãnh me katàt kute amijo bajamã ane.

<sup>37</sup> Nhyim kam dja me imã, “Bênjadwÿr djwÿnh, nhÿnh ne ga amã prãm ba me apumÿn amã mÿjja ngã ga krê? Nhÿnh ne ga amã kôr ba me amã mÿjja'ô ngã ga o ikô? <sup>38</sup> Nhÿnh ne me kute ajo me bajtem ba me apumÿn amã inhürkwã jarê ga kam anhikwã? Nhÿnh ne ga akà kêt ba me amã kubêkà ngã ga adjã? <sup>39</sup> Nhÿnh ne akanê ba me apumÿ? Nhyim nhÿnh ne me abê ijê ba me awÿr bôx ga akĩnh”? ane.

<sup>40</sup> Kam, ba Ibênjadwÿr rax dja ba memã kum, “Ije meo ikamy'ô nhyim me kum kurê. Nhyim arÿm ô mÿjja kêt. Ga me kam arÿm o djuw mex. Aje o djuw mex o aje ba ijo djuw mex pyrãk. Mrãmri aje o djuw mexkam aje ba ijo djuw mex mexkumrêx”, ane. Dja ba ã akubyn ibôxkam me mexmã ane.

<sup>41</sup> Kam dja ba idjuge'ãnh me axwe ku'êjamã kum, “Me apunu:re. Me rÿm imã akàx. Kuwy pôk rã'ã: rã'ãjamã me mô. Ije Xatanajmê kadjy mrãnh djwÿnh kadjy kuwy nhipêxjamã me mô. <sup>42</sup> Mÿj ne ga me nê ba me amã, ‘Me rÿm imã akàx’? ane. Bir, imã prãm ga me aje imã mÿjja nhôr kêt. Imã kôr ga me aje imã ngô'ô nhôr kêt. <sup>43</sup> Me kute ijo me bajtem ga me aje imã anhürkwã jarênh kêt. Ikà kêt ga me aje imã kubêkà nhôr kêt. Ikanê ga me iwÿr abôx kêt nhyim me ibê ijê ga me iwÿr abôx kêt. Ga me ã ane ba kam me amã, ‘Me rÿm imã akàx’, ane.” Dja ba ã idjuge'ãnh me

axwe ku'êjamã ane.

<sup>44</sup> Me axwewãdjwÿ dja me imã, “Bênjadwÿr djwÿnh, nhÿnh ne ga amã prãm nãr amã kôr nãr me ajo me bajtem nãr akà kêt nãr akanê nãr me abê ijê ba me ajo djuw mex kêt”? ane.

<sup>45</sup> Kam dja ba memã kum, “Bir, ikamy 'ô me kum kurê nhyim ô mÿjja kêt ga me aje o djuw mex kêt. Aje o djuw mex kêt o ne aje ba ijo djuw mex kêt pyrãk”, ane. Mrãmri, ba me amã ja jarênhkumrêx. Dja ba ã akubyn ibôxkam me axwemã ane.

<sup>46</sup> Kam dja me arÿm mã môn tokry rã'ã: rã'ã ne. Nhyim be, me katàt kute amijo baja dja me Metëndjwÿnhkôt tĩn ne ar ba rã'ã: rã'ã ne. Nãm ã Jeju memã ane.

## 26

*Me kute Jeju bĩn kadjy kute o aben mar.*

*Mak 14.1; Ruk 22.2; Dju r 11.47*

<sup>1</sup> Jeju arkum kabên jarênh pan kam arÿm kôt ba djwÿnh arkum,

<sup>2</sup> —Arÿm ne Metëndjwÿnh me bakukãmãre nhirôbê mrãnh djã nhô akati 'ÿr. Mebê idjaer krãptĩ kute aben kajmã'ã me irôbê mrãnh djã mar kadjy ne me kute aben pydji 'ÿr. Arÿm nêje akati pydji. Tãm ne gar arÿm ama. Kam ba ije amijo inhÿja dja me memã ikanga nhyim me arÿm pĩte'y'ã inhôn ibĩ, ane.

<sup>3</sup> Nãm arkum ane nhyim wãnh me kadjy Metëndjwÿnh mar djwÿnh nhô bênjadwÿr rax nhÿ. Idjibê ne Kajbaj. Ô kikretikam ne nhÿ nhyim me rÿnh arÿm kam akuprô. Me kadjy Metëndjwÿnh mar djwÿnh nhô bênjadwÿrmê Môjdjê kukràdjã mar djwÿnhmê mebêngêtmê akuprô. <sup>4</sup> Nãm me akuprôn abenmã kum,

—Mÿj godja gwaj me krãptĩ kãxã Jejuo tÿm ne bĩn kadjy on? ane. <sup>5</sup> Ne kam abenmã kum,

—Kwãrik wãnh gwaj me kute aben pydji djã nhô akatijakam o



batým kêt. Ne gwaj ren o ane nhym me krăptî ren o ngyrk ne ren kangao kumex, ane.

*Me'ô nire kute Jeju nhimôk'ã kangô kapî.*

*Mak 14.3; Dju r 12.1*

<sup>6</sup> Be, krî ngrirebê Betanhakam ne Jeju nhÿ. Kamã ne me'ô î kajêkam tê arým mex. Idjibê ne Ximão. <sup>7</sup> Ximão nhûrkwâkam ne Jeju ô kwÿ krêno nhÿ. Ô kwÿ krêno nhÿ: nhym me'ô nire arým 'ÿr tèn 'ÿr bôx. Nãm 'ÿr kên jakareo ngôn h byn o tẽ. Be, ngôn h kam ne me kudjÿ djã kangôo ipu. Nãm me prîne ipêx mex nhym pân h raxkumrêx. Nãm ngôn ho tèn kam Jeju nhimôk'ã kangô kapî.

<sup>8</sup> Nhym kôt ba djwÿnh ar arým omû. Ne kam nokã nhàn abenmã kum,

—Je tô mÿkam ne arým me kudjÿ djão ajkê? <sup>9</sup> Gwaj ren pi'ók kaprî kadjÿ ren memã kungã ne ren pân h pi'ók kaprî rax ne ren kubyn ren me ô mÿjja kêt mã kungrà. Mÿkam ne arým o ajkê? ane.

<sup>10</sup> Nhym Jeju arým tu ar kabên man arkum,

—Mÿkam ne gar kum kaprî jadjã? Djãm kute ijã kapînkam punu got? Kati, mexkumrêx. <sup>11</sup> Be, akati kunîkôt ne ar abu'ã me ô mÿjja kêt ar ba rã'ã. Nhym djãm arek gwaj baro'ã ar baba rã'ãmã? Kati. <sup>12</sup> Dja ba ty nhym me arým ijadjã. Me kute ijadjâr kadjÿ ne ijã me kudjÿ djã kapî. <sup>13</sup> Ba ar amã arê gar ama. Dja me kâj bê pyka kunîkôt mã ijã memã ujarên h ny jarên mã nijadjwÿ 'ã ajarê. Kute ijã me kudjÿ djã kapî'n'ã ajarê. Ne kam aben djô'ã nija mar rã'ã ne. Mrãmri ne ba ar amã arên h kumrêx. Nãm ã Jeju arkum ane.

*Djuda kute memã kangamã kute memã arên h.*

*Mak 14.10; Ruk 22.3*

<sup>14</sup> Nhym kam Jejukôt ba djwÿnhbê 12 ja 'ô, idjibê Djuda

Ikadji ne me kadjÿ Metîndjwÿnh mar djwÿnh nhô bënjadjwÿr'ÿr tẽ. <sup>15</sup> Nãm ar'ÿr tèn ar'ÿr bôx ne arkum,

—Arým ne ba ije ar amã Jeju kangamã. Mÿj dja gar pân h imã angã? Ba kam arým ar amã kanga, ane. Nhym kam ar arým kum kryt jakao ngôn hponho pi'ók kaprî jarê. Nãm ar kute 'ã akrebê 30 ne kum kungã nhym kubyn o tẽ. <sup>16</sup> Ne kam amim,

—Mÿj dja ba ije arkum Jeju kanga kadjÿ on? Nãm ã amim anhÿro ba.

*Ar kute ro'ã ar ô kwÿ krêno ino rer.*

*Mak 14.12; Ruk 22.7*

<sup>17</sup> Nhym kam mebê idjaer kukràdjâkôt me kute djwÿponhbit kur nhô akati arým kutewa nhym kôt ba djwÿnh ar Jeju'ÿr bôx ne kum,

—Metîndjwÿnh me irôbê mrân h nhô akatikam gwaj banhô kwÿ krên kadjÿ jãm dja bar tèn akutêp gwaj banhô kwÿ krên djã jadjwÿr mex? ane.

<sup>18</sup> Nhym arkum,

—Dja gar krîraxkam tèn me'ô 'ÿr bôx ne kum, “Ujarên h djwÿnh ne amã, ‘Arým ne inhô akati iwÿr bôx. Dja bar Metîndjwÿnh me irôbê mrân h nhô akatikam me kukràdjã kôt inhô kwÿ krê. Bamê ikôt ba djwÿnhmê dja bar anhûrkwâkam inhô kwÿ krê’, ane. Dja gar ã kum ane.” Nãm Jeju ã kôt ba djwÿnh arkum ane. <sup>19</sup> Nhym kam ar arým Jeju kute arkum 'ã karô kôt 'ÿr tẽ. Ne me'ô ja'ÿr bôx ne kum Jeju kabên jarê nhym arkum, “A”, ane. Nhym kam ar arým ûrkwâkam kutêp ar ô kwÿ krên djã jadjwÿr mex. Metîndjwÿnh me irôbê mrân h nhô akati kadjÿ ne ar ô kwÿ krên djã jadjwÿr mex. Ne kam akubyn Jeju kutã tẽ. <sup>20</sup> Nhym kam ar'ã para nhym ar me'ô kute arkum ûrkwã jarên hja nhûrkwã'ÿr tẽ. Kam ar ô kwÿ krên mã 'ÿr tèn 'ÿr bôx. Ne kam nhÿ. Ar kubê 12ja ne ar Jejumê ro'ã

nhÿ ne arÿm ò kwÿ krêno nhÿ. <sup>21</sup> O nhÿ: nhyem Jeju arkum,

—Be, ar ajò dja ga ikurê djwÿnhmã ikanga. Mrãmri ne ba ar amã arênhkumrêx, ane.

<sup>22</sup> Nhyem kam ar arÿm kaprî:ren apÿnh ar ï djari aben totokmã kum, —Bênjadwÿr djwÿnh, djãm ba? Bënjadwÿr djwÿnh, djãm ba? ane.

<sup>23</sup> Nhyem arkum,

—Be, kute ikòt ngònhkrãtikam djwÿ jadjarja tãm dja memã ikanga.

<sup>24</sup> Be, me bakukãmãre kute ba ije amijo inhÿ ijã pi'òk no'òk, kute Metïndjwÿnh kukwakam ijã pi'òk no'òkkòt ne me arÿm jakam ar ã ijo anhÿro ba. Nhyem be, kute ikurê djwÿnhmã ikanga djwÿnhja dja ï kute memã ikanga pãnh tokry ra:xi. Ý, watî:re. Tãmja ne ren rwÿk kêt ne. Nãm ã Jeju arkum ane.

<sup>25</sup> Nhyem Djuda, kute kurê djwÿnhmã kanga djwÿnhja kum,

—Ujarênh djwÿnh, djãm ba dja ba ajo ane? Arkati, ane.

Nhyem kum,

—Arÿm ga, “Ba”, ane. Amikòt ne ga arÿm amijarênhkumrêx, ane.

<sup>26</sup> Nhyem ar àkuro nhÿ: nhyem Jeju arÿm djwÿ'ò byn kam o Metïndjwÿnhmã mextire jarê. Kum mextire jarêh arÿm kòt ba djwÿnh arkum kokij ne apÿnh arkum kungã. Ne kam aminhÿ'ã djwÿ jakren arkum,

—Inhÿ ne ja. Ar abyn krê, ane.

<sup>27</sup> Ne kam ngònhkrãkam pidjò kangòjadwÿ byn kam o Metïndjwÿnhmã mextire jarê. Amikamrò'ã ne pidjò kangò jakren arkum,

—Ar akunÿ dja gar o ikò.

<sup>28</sup> Ikamrò ne ja. Me krãptÿ jaxwe pãnh dja ikamrò pròt nhyem kam Metïndjwÿnh memã kabêh ny jarênh mãmjin me axwe maro aknon me kam ngyrk kêt.\* <sup>29</sup> Ba ar

amã arê gar ama. Ije pidjò kangò ikòmo krã'yr ne ja. Ibãm kute amim ò me ja kunÿ pytãr ne kute meo bakambit dja ba ajte pidjò kangò nyo ikò. Gwaj baro'ã o ikò. Nãm Jeju ã arkum ane.

<sup>30</sup> Nhyem kam ar ngre. Ngren arÿm o ino re. O ino ren arÿm amũ krãnhbê Oriwêre'ÿr mò.

*Pedru 'êxnhÿ kukãm kute kum arênh.*

*Mak 14.27; Ruk 22.31; Dju r 13.36*

<sup>31</sup> Ar 'ÿr mò: nhyem Jeju arkum,

—Be, akamãtja tãmkam dja me ijo ajkê gar me umaje apròt ne ajmã. Amrêbê: ne me bakukãmãre ar apròt ne abimãnh'ã ajarê. Metïndjwÿnh kukwakam ne me arêh memã kum,

“Be, dja ba mrykÿ'ãtomtio ba djwÿnh titik nhyem mry umaje pròt ne ajmã”, anen arÿm 'ã pi'òk no'òk ne.

Be, akamãtja tãmkam dja gar me umaje apròt ne ajmã. Me bakukãmãre kute ar ajã ujarênh kòt dja gar apròt ne ibê ajmã. <sup>32</sup> Ibê ajmã nhyem me arÿm ibÿ. Ba ityk ne akubyn itïnkam dja ba ar akukãm pykabê Garrêjamã tẽ. Nãm ã Jeju arkum ane.

<sup>33</sup> Nhyem Pedru kum,

—Godja ar kunÿ pròt ne bimãnh jabej ba dja ba arkòt ipròt kêtumrêx, ane.

<sup>34</sup> Nhyem Jeju kum,

—Kati, mrãmri dja ga arkòt apròt. Ba amã arê ga ama. Akamãtja tãmkam òkrêh'ãnh kãr kêtî dja ga amijã maje ajêxo amãnhkrut ne ikjêkêt ne memã kum, “Kati, ije me'òwã pumÿnh kêtumrêx”, ane. Mrãmri ne ba amã ja jarênhkumrêx. Nãm ã Jeju kum ane.

<sup>35</sup> Nhyem Pedru kum,

\* **26:28** Mrãmri ne Jeju kamròo pròt nhyem Metïndjwÿnh arÿm 'ã memã kum, “Arÿm ne ikra tyn kamròo pròt ne. Jakam dja me tu amim ikra markumrêx ba kam arÿm me axwe maro aknon me kam ingryk kòet ne.” Nãm ã Metïndjwÿnh memã ane.

—Kati, gê me gu baro'ã gu babîn jabej ba ije aminêje ajã ijêx prãm kêtumrêx, ane. Nhyam kam kôt ba djwýnh ar kunĩ kabên kôt kum arê.

*Pidjôkôkam Bãmmã amijo à'wýr.*

*Mak 14.32; Ruk 22.40*

<sup>36</sup> Ne kam mō:n kam Jeju kôt pidjôkôbê Djexema'ýr bôx. Nhyam kam kôt ba djwýnhmã kum,

—Jakam dja gar ikutêp nhỹ. Ba mũm tẽn Metĩndjwýnhmã amijo a'wý, ane. <sup>37</sup> Ne kam Pedrumê Djebedêu kra ar amãnhkrut japrôn aro tẽn. Ne kam tokry rax pymaje madjã kreti:n arým kaprĩ rax ne.

<sup>38</sup> Ne kam arkum,

—Arým ne ba ikaprĩ:re. Arým ikaprĩ kute ibĩn 'ýr. Jãnh mãn ar idjêje nhỹ gwaj baro'ã aminêje barĩt o nhỹ, ane.

<sup>39</sup> Ne kam amũ tẽn. Tẽmo rãm ne jan tu myrbê tỹm. Tỹm ne arým Metĩndjwýnhmã amijo a'uw ne kum,

—Djũnwã, aje itokry, ikaprĩjabê ipytãr prãm jabej ipytã. Nãr kon, kwãrĩk wãnh rã'ã ba tu itokry. Djãm ba ne ba amimarkôt ar amijo iba? Kati, akabênkôt ne ba ar amijo iba, ane.

<sup>40</sup> Ne kam kãjmã djan kôt ba djwýnh ar'ýr akêx ne tẽn ar'ýr bôx. Nhyam arek ar ôto ikwã. Nhyam Pedrumã kum,

—Je, kraxje kô 'iry kêt ne gar anhôto anhikwã. Mýkam ne gar iro'ã aminêje arĩto anhỹr kêt ne?

<sup>41</sup> Ar aminêje rĩt ne Metĩndjwýnhmã amijo a'wý. Gêdja me te ar ajaxwe'ã ar amã apnê gar mekôt ajaxwe kêt. Ja kadjy dja gar kum amijo a'wý. Be, ar anhôkre kadjwýnhbê ne gar amã ikabênja kĩnh. Nhyam be, ar aminêje arĩtbê ne gar arerekren anhôtdjwa ne, ane.

<sup>42</sup> Ne kam ajte amũ tẽn Metĩndjwýnhmã amijo a'uw ne kum,

—Djũnwã, aje itokry, ikaprĩjabê ipytãr prãm kêt jabej kwãrĩk wãnh

rã'ã ba tu itokry ne akabên man kôt ar amijo iba, ane.

<sup>43</sup> Ne kam ajte akubyn ar'ýr akêx ne tẽn ar'ýr bôx. Nhyam ar nokã bã mex ne ajte arek ôto ikwã. Rerek mex ne arek ôto ikwã nhyam ar omũ. <sup>44</sup> Ne kam ajte akêx ne amũ tẽn Metĩndjwýnhmã amijo a'uw. Ôbê kute kum kabên jarênh jakôt ajte kum tãm jarê.

<sup>45</sup> Ne kam ajte kôt ba djwýnh ar 'ýr akêx ne ar'ýr tẽn ar'ýr bôx ne arkum,

—Je, djãm arek ar anhôto anhikwã rã'ãã, akôkam kôto anhikwã? Aj, arým itokry djã iwýr bôx 'ýr. Ota, arým kute me axwemã ikangamã, ije amijo inhĩja ne kute memã ikangamã. <sup>46</sup> Kãjmã ar dja. Gwaj on me'ýr. Ota, arým kute memã ikanga djwýnh bôx. Nãm ã Jeju arkum ane.

*Me kute Jejuo tỹm.*

*Mak 14.43; Ruk 22.47; Dju r 18.3*

<sup>47</sup> Ne kute arkum anhỹro ãm rã'ã nhyam Djuda arým 'ýr tẽn 'ýr bôx. Jeju kôt ba djwýnhbê 12 'ô ne kubê Djuda. Nãm 'ýr bôx nhyam me krãptĩ me:x ne kôt mōn 'ýr bôx. Nãm me kãxdjwa kajgomê kô jamýn kôt 'ýr o mōn o bôx. Me rũnh ne me me ano. Me kadjy Metĩndjwýnh mar djwýnh nhô bẽnjadjwýrmê mebêngêtmê ne me me ano nhyam me 'ýr bôx. <sup>48</sup> Me 'ýr mōr kêtne ne kute memã kanga djwýnhbê Djuda memã kum,

—Be, ije me'ô nhine kaôrkôt dja ga me omũn o tỹm ne pa 'amý. Nãm ã memã ane. <sup>49</sup> Nãm Jeju'ýr bôx ne kum,

—Ujarênh djwýnh, djãm amexkumrêx? anen arým ine kaô.

<sup>50</sup> Nhyam Jeju kum,

—Akmere, mýj kadjy ne ga iwýr bôx? ane.

Nhyam kam me arým 'ýr mōn o tỹm ne pa 'amý. <sup>51</sup> Nhyam kam bẽnjadjwýr nhô ãpênh'ô ne mekôt tẽn. Me kadjy Metĩndjwýnh mar djwýnh nhô bẽnjadjwýr rax nhô

àpênh mekôt tē. Nhyr Jejumē ro'ã ar ku'êja 'ô ne arým ô kàxdjwa kajgo kaban o me'ôjamã akabên amak ta, bēnjadjwÿr nhô àpênhja jamak ta.

<sup>52</sup> Nhyr Jeju nêje kukràn kum,

—Kwãrik wãnh. Akubyn àkam adjã. Ga, me kute kàxdjwa kajgoo pôx ne kute o aben parja pumũ. Ja dja ga amikam ama, ane. Mÿj'ã ne kum kabên ja jarê? Bir, djãm me kute me par prãm umar mexmã? Kati. Dja kurê djwÿnh ï arým kubĩ. 'À ne Jeju kum,

—Ga, me kute kàxdjwa kajgoo pôx ne kute o aben parja pumũ, ane.

<sup>53</sup> Ne kam ajte kum,

—Djã nã gãm ijã amim, “Dja te Bãm 'uw nhyr kum ôr kêt”, ane? Kati, ba ren me'ã Ibãm 'uw nhyr ren imã kadjy mrãnh djwÿnh krãptĩ: jano. Ren imã redjiãobê 12 jano nhyr me ren ipytã. Me redjiãobê 12kam me krãkamngôn'h'ã akre nhyr me kubê 72.000. Me krãptĩ: <sup>54</sup> Ne me ren ipytã ba ren kam me bakukãmãre kute Metĩndjwÿnh kabên'ã pi'òk no'òk kôt amijo itẽm kêt. Nhyr be, kati. Mrãmri ne ba kabên kôt amijo itẽmkumrẽx, ane.

<sup>55</sup> Nãm ã Jeju kum anen kam me krãptĩjamã kum,

—Je djãm idjãkĩnhĩ ne ga me aje ijo atým kadjy iwÿr anhô kômẽ anhô kàxdjwa kajgomẽ o mō? Myt kunĩkôt ne ba Metĩndjwÿnh nhô kikretikam ikrĩ, memã idjujarẽnhô ikrĩ ga me kam kam ijo atým kêt ne. <sup>56</sup> Mÿkam ne ga me ijo tÿm? Bir, amrêbê: ne Metĩndjwÿnh kukwakam kabên jarẽnh djwÿnh me bakukãmãremã me ajã ajarê. Me aje ijo atým'ã ajarẽnh arým 'ã pi'òk no'òk ne. Nhyr me arým aben djô'ã arẽnhô mō. Arẽnhô mōr tãmtã arým iwÿr o bôx. Tũ:mrãm me bakamigrãnyrekam arým iwÿr o bôx. Ba ar iba: ga me arým jakam ã ijo ane. Me kute me bakukãmãremã

me ajã ujarẽnh kôt ne ga me arým jakam ã ijo atýmō ane. Nãm ã Jeju me krãptĩmã ane. Nhyr kam kôt ba djwÿnh kunĩ mã amijã maje prôt ne.

*Me kute we axwe jabej kukjêr.*

*Mak 14.55; Ruk 22.66; Dju r 18.12*

<sup>57</sup> Nhyr me kute pa 'amÿnh djwÿnhja o mō:n arým Kajbaj'ÿr o bôx. Me kadjy Metĩndjwÿnh mar djwÿnh nhô bēnjadjwÿr raxbê ne Kajbaj. Nhyr Mōjdjê kukràdjã mar djwÿnhmẽ mebêngêtmẽ ne me arým akuprô nhyr me me'ÿr o bôx. <sup>58</sup> Nhyr be, Pedru ne Jeju kôt tē, nïjar kum kre rax ne tē. Nhyr me kadjy Metĩndjwÿnh mar djwÿnh nhô bēnjadjwÿr rax nhô kikre nhipôkri kênh ngrire nhyr Pedru arým Jejukôt wadjã. Me kute ajmã Jeju o jabej kute omũnhmã arým nhÿ, bēnjadjwÿr nhô krãkamngôn'hmẽ ro'ã nhÿ.

<sup>59</sup> Nãm me me'ÿr Jejuo bôx nhyr kam me rũnh arým me 'êxnhĩ jabej. Me kadjy Metĩndjwÿnh mar djwÿnh nhô bēnjadjwÿrmẽ mebêngêttemẽ me rũnh kunĩ ne me me 'êxnhĩ jabej. Dja me amãnhkrut Jeju'ã 'êx ne memã kum,

—Ba ne ba axwe kôt omũ. Nãm ã ane ba omũ, ane. Dja me ane nhyr me arým me kabên man arým we axwe 'ô pãnh kubĩ. Kadjy ne me me 'êxnhĩ jabej. <sup>60</sup> Ne te abejo dja. Me'ô ar amãnhkrut kute axikôt 'ã kabênja ne me te abejo dja. Nhyr me 'êxnhĩ krãptĩ kãjmã ku'ên arĩk aben kupa'ãbit axwe jarẽnhô kumex. Nhyr me te ar amãnhkrut axikôt 'ã kabênja jabejo dja: nhyr kam ar 'êxnhĩ amãnhkrutja arým kãjmã djan axikôt 'ã kabên jarê. <sup>61</sup> Nãm ar'ã 'êx ne memã kum,

—Tãmwã ne memã kum, “Ba ne ba ije Metĩndjwÿnh nhô kikreti ngrãnh ne ije akubyn ipêx kadjy ijityxo 'ÿr ibôx mexkumrẽx. Akubyn ije ipêx'ã dja akati amãnhkrut ne ikjêkêtbit apêx ba

arým ipêx pa.” Nãm Jeju ã memã ane bar arým kuma. Nãm ar 'êxnhîja ã Jeju'ã memã ane. Ar axikôt ã memã arêngo ane.

<sup>62</sup> Nhyam me kadjy Metîndjwýnh mar djwýnh nhõ bënjadjwýr raxja arým kãjmã djan kum,

—Ga ar kabênjama. Djãm aje aminêje akabên'õ jarênh prãm kêtumrêx. On imã amikôt amijarê, ane. <sup>63</sup> Nhyam Jeju tu anhihrê.

Nhyam me kadjy Metîndjwýnh mar djwýnh nhõ bënjadjwýr rax ajte kum,

—Metîndjwýnh tîn ne ar baja ne arým gu bapumünho nhÿ. Kwãrik wãnh nokrekam ajêxnhî kêt. On me imã amijarê. Djãm abê me babê idjaer nhõ Bënjadjwýrbê kumkati, nêñ? Djãm mrãmri abê Kritu? Djãm abê Metîndjwýnh Kra? On me imã amijarê, ane.

<sup>64</sup> Nhyam Jeju kum,

—Kôt ne ga imã arê. Ba ar amã arê gar ama. Gêdja ba ï Metîndjwýnh pymati djubôk'ãnh nhÿ. Ije amijo inhî ne ibënjadjwýr raxkam ubôk'ãnh nhÿ gar arým ipumũ. Ne kam ajte kakrãkôt amrê kãjkwa kurũm itêmkôt ipumũ, ane.

<sup>65</sup> Nhyam kam me kadjy Metîndjwýnh mar djwýnh nhõ bënjadjwýr rax kute memã amin-gryko amirît kadjy arým amibê kã kadjõ. Amibê kã kadjõn arým memã kum,

—Ë, arým ne Metîndjwýnh japrÿ. E kum kwãrik wãnh gwaj ijukri axwe kôt omũnh djwýnh'õ jabej kêt. Gwaj bakunî ne gwaj arým kute Metîndjwýnh japrÿja ma. Ta ne amijo Metîndjwýnh rax pytãn arým o aprÿ gwaj kôt kuma. Kute gwaj bamã, “Metîndjwýnh djubôk'ãnh inhÿrkôt dja gar ipumũ”, anhÿrkôt ne gwaj arým kuma. <sup>66</sup> Arým ne gar ama. Mÿj dja gwaj nê? ane.

Nhyam me kupãhtã 'ã kum,

—Gê me on kubî. Gê me on kubî, ane.

<sup>67-68</sup> Nhyam kam me kwÿ nokre kutõn ikra krão tak nhyam me kwÿ ikra poo tak ne kum,

—We me inhõ Bënjadjwýrbê kumkati kadjy ne Metîndjwýnh ajano, abê Kritu kadjy ajano ga bõx. Aj, goja abê Kritu jabej goja me'õ kute akurwanhjakôt omũ. Goja tu aman me imã arê. Nãm me ã Jeju'ã bẽno bikêngo ane.

*Pedru aminêje 'êx.*

*Mak 14.66; Ruk 22.55; Dju r 18.15*

<sup>69</sup> Nhyam Pedru arým me kadjy Metîndjwýnh mar djwýnh nhõ bënjadjwýr rax nhõ kikre nhipõkri kênh ngrirekam nhÿ. Nhÿ: nhyam bënjadjwýr nhõ ãpênh ni arým 'ÿr bõx ne omũn kum,

—Tukwa, gadjwÿ ne ga Jeju kôt ar aba. Pykabê Garrêjakam Jejukôt ar aba, ane.

<sup>70</sup> Nhyam me kunî nhipõkri arík aminêje 'êx ne kum,

—Kati, ije akabênwã mar kêtumrêx, ane.

<sup>71</sup> Ne kam kikreti'ÿr ãrmã katon kre tã dja. Nhyam bënjadjwýr nhõ ãpênh ni 'õdjwÿ omũn memã kum,

—Tãmwãdjwÿ ne Jejukôt ar ba, Nadjarekam Jejukôt ar ba, ane.

<sup>72</sup> Nhyam ajte aminêje 'êx ne memã kum,

—Aje mÿj me'õ jarênhwã ije omũnh kêt. Djãm ijêxnhî? Kati. Metîndjwýnh ne arým ijêxnhî kêtikôt ima, ane.

<sup>73</sup> Nhyam kãjbê 'ãtũm nhyam kam me'õ 'ÿr tẽn kum,

—Be, mrãmri ne gadjwÿ kôt ar aba. Abê pykabê Garrêja kra'õ. Garrêjakam me kabên kôt ne ga akabên bar kôt aman arým amã ikato, ane.

<sup>74</sup> Nhyam memã kum,

—Kati, mrãmri ije me'õwã pumũnh kêtumrêx, ane. Ne me'õ kute kum anhÿr kêtãnã arým amikangrõn memã kum,

—Dja ba ijêxnhî jabej gê Metîndjwýnh pãnh ijo akno. Ta ne

arým ijêxnhĩ kêt kôt ima, ane. Nãm anhÿr 'iry kêt nhyam arým ôkrên'ãnh kà. <sup>75</sup> Nhyam kam Pedru ôkrên'ãnh kàr man akubyn amimaro tẽ. Amimaro tẽn arým amũja'ã Jeju kute kum kabẽn jarênhja'ÿr amimaro bõx ne amijã kabẽn ma. Kute kum,

—Ôkrên'ãnh kàr kêtiri dja ga aminêje ajêxo amãnhkrut ne ikjê kêt ne memã kum, “Kati, ije tãmwã pumũnh kêt”, anhÿr ja ne arým kuma. Nãm maro dja nhyam arým rerek 'ÿr bõx. Rerek 'ÿr bõx nhyam arým katon mu:w.

## 27

*Me Piratu'ÿr o môn o bõx.*

*Mak 15.1; Ruk 23.1; Dju r 18.28*

<sup>1</sup> Nhyam kam kryrãm me kadjy Metĩndjwÿnh mar djwÿnh nhõ bẽnjadjwÿr kunĩmẽ mebê idjaer bêngêt arým Jejuo aben ma. O aben man arým abenmã 'ã karõn abenmã kum,

—Mrãmri dja me on tu bĩnkumrêx, ane. <sup>2</sup> Ne kam arým uwpreñ Piratu'ÿr o môn o bõx. O bõx ne kum kanga. Piratubê bẽnjadjwÿr bajtem. <sup>3</sup> Me kute bĩnmã 'ÿr o morkam ne Djuda arým omũ. Djuda kute kurê djwÿnhmã kanga djwÿnhja arým omũ. Ne kam arým amim ngry:k ne. Amim ngryk ne arým amim,

—Je tô mykam ne ba memã Jeju kanga? ane. Amim ngryko tẽn akubyn me rũnh'ÿr kryt jakao ngõnhponho pi'ók kapribê 30o tẽn arým me'ÿr o bõx. Me kadjy Metĩndjwÿnh mar djwÿnh nhõ bẽnjadjwÿrmẽ mebêngêt'ÿr ne o bõx ne arým memã kum,

<sup>4</sup>—Axwe kêtumrêxkam ne ba me amã kanga ga me arým aje bĩnmã. Ba kam arým ijaxwe:, ane. Ne memã kum, “Mĩ”, ane.

Nhyam me kum,

—Djãm me ba ne ba me o amaro iba? Kati, ga ne ga o me ima, ane.

<sup>5</sup> Nhyam kam arým Metĩndjwÿnh nhõ kikreti'ÿr tẽn 'ÿr bõx ne kikreti kadjwÿnhbê ngõnhponh mẽn arým mã tẽ. Mã tẽn kam ta pi'ã amimut djên amibĩn arým ty.

<sup>6</sup> Nhyam kam me kadjy Metĩndjwÿnh mar djwÿnh nhõ bẽnjadjwÿr ar 'ÿr tẽn ngõnhponho atom ne abenmã kum,

—Djãm Metĩndjwÿnh nhõ kikreti nhõ pi'ók kapriõ atom djakam gwaj baje ngõnhponh djirmã? Kati. Djuda kute gwaj bamã Jeju kanga nhyam me kute bĩn nhyam kamrõ prõt pãnh ne ngõnhponho pi'ók kaprija. Gwaj ren Metĩndjwÿnh nhõ kikretikam pi'ók kapri djin ren kam Môjdjê kukràdjã kupa'ã amijo tẽ, ane. <sup>7</sup> Ne kam aben man abenmã kum,

—Gwaj ngõnhponho ngybõr nhõ pyka by. Me kute kam me bajtem tyk jangjênh kadjy pyka by, ane. Ne kam arým ngõnhponho pyka by. <sup>8</sup> Kam ne me arým pykamã pyka kamrõre jarê. Akatija tãmkam ne me kute kum arênh rã'ã. <sup>9-10</sup> Amrêbê: ne me bakukãmãre Djermi memã 'ã ajarê. Me kute ngõnhponho ngybõr nhõ pyka byr'ã ajarê. Djermi Metĩndjwÿnh kukwakam me bakukãmãremã 'ã ajarên memã kum,

“Nãm me kam arým kryt jakao ngõnhponho pi'ók kapribê 30 by. Mebê idjaer kute me'õ'ã kum,

'Dja ba me me'õ pãnh amã ã pi'ók kapriõ ane', anhÿr kôt ne me arým kubê 30 by.

Ne kam arým o ngybõr nhõ pyka by. Bẽnjadjwÿr djwÿnh kute imã arênh kôt ne me kuby.”

Nãm ã Djermi me bakukãmãremã ane. Nhyam me kam arým aben djõ'ã arê:. Arênhõ mõi tãmtã arým 'ÿr o bõx. Tũ:mrãm me bakamingrãnyrekam me rũnh arým ngõnhponho ngybõr nhõ pyka byrkumrêx. Djermi kute amrêbê:

me bakukâmâremã 'ã ujarênh kôt  
ne me arým pyka byrkumrêx.

*Piratu kute we axwe jabej kukjêr.  
Mak 15.2; Ruk 23.3; Dju r 18.28*

<sup>11</sup> Me kute pyka byr djwýnhřãm  
ne me rûnh arým bënjadjwýr Pi-  
ratu'ýr Jejuo môn o bôx. O bôx  
nhym arým kabem dja nhym kum,  
—Djãm abê mebê idjaer nhô  
bënjadjwýr rax? ane.

Nhym Jeju kum,

—Kôt ne ga aje arênhwã, ane.

<sup>12</sup> Nhym kam me kadjy  
Metîndjwýnh mar djwýnh nhô  
bënjadjwýrmê mebêngêtmê arík  
Jeju'ã dja ga me kum, “Abĩ, abĩ.”  
Nãm me ã memã ane.

<sup>13</sup> Nhym Piratu kum,

—Djãm ajaxwe krãre ne me amã  
arê? Djãm aje mar kêt? ane.

<sup>14</sup> Nhym kum kabên'ô jarênh  
kêtkumrêx. Nhym bënjadjwýr Piratu  
te kute marmã kam no tyn omûnho  
nhỹ. <sup>15</sup> Be, akatija tãmkam ne mebê  
idjaer krãptĩ: arým aben pydji. Me  
kute aben kajmã'ã Metîndjwýnh me  
kukâmãre nhirôbê mrãnh djã mar  
kadjy aben pydji. Amex kunĩkôt  
ne bënjadjwýr raxbê Piratu akati  
jakam mebê ijê djã kurûm me  
pýnh ne meo pôx nhym me mã  
mrã, mebê ijêjao pôx nhym me mã  
mrã. Me kute me'ô'ã à'wýrja ne me  
kĩnh kadjy bôm kumê. <sup>16</sup> Mebê ijê  
djãkam ne me arým me'ô axwe:jabê  
ijê. Idjibê ne Baraba. <sup>17</sup> Me krãptĩ  
ne me akati jakam akuprô nhym  
Piratu memã kum,

—Mýj me'ô dja ba me amã kaban  
ano? Dja ba Baraba kaban ano.  
Nãr, dja ba Jejumã inhiren ano, me  
kute kum Kritu jarênhjamã inhiren  
ano, ane. <sup>18</sup> Nãm anhýr djwýnhřãm  
amim,

—Jeju'ã me krãptĩkam ne me rûnh  
'ã ngryk ne imã kanga, ane. Ne  
kam arým kute Jejumã irer ne kute  
anor prãm.

<sup>19</sup> Piratu arek memã axwe pãnh  
jarênh djãkam nhỹ nhym prô amũ  
kum kabên janon kum,

—Kwãrĩk wãnh ajmã me'ôwão  
kêt. Axwe kêtkumrêxkam ajmã o  
kêt. Akatija tãmkam ne ba ibip-  
tirkam omûn arým kam axwe idju-  
mar, ane.

<sup>20</sup> Kam ne Piratu kute kum irer  
ne kute anor prãm ne me krãptĩmã  
kum,

—Mýj me'ô dja ba kum inhiren  
ano? ane. Nhym me kadjy  
Metîndjwýnh mar djwýnh nhô  
bënjadjwýrmê mebêngêtmê me  
krãptĩmã kum,

—Baraba dja ga me amã kĩnh.  
Jeju'ã dja ga me kum, “Abĩ, abĩ.”  
Nãm me ã memã ane.

<sup>21</sup> Nhym kam bënjadjwýr Piratu  
ajte me krãptĩmã kum,

—Ar amãnhkrutja. Nhýnhja dja ba  
kum inhiren ano? ane.

Nhym me kum, “Baraba”, ane.

<sup>22</sup> Nhym memã kum,

—Mýj dja ba Jejudjwý on? Me  
kute kum Kritu jarênhja mýj dja ba  
on? ane.

Nhym me kunĩ kum, “Pĩte'y'ã  
anhô”, ane.

<sup>23</sup> Nhym Piratu memã kum,

—Tô mýkam? Mã ne kute? Djãm  
axwe? ane.

Nhym me kãj bê kum, “Pĩte'y'ã  
anhô”, ane.

<sup>24</sup> Nhym Piratu amim,

—Je, jakam ne ba arým te meo  
ane. Nhym me ngry:k ne kangao  
kumex, ane. Ne kam ta kute we  
memã amijaxwe kêtô amirit kadjy  
arým ngô byn me kunĩ nokrekam  
aminhikra pôn memã kum,

—Djãm ije me'ô axwe kêtja  
kamrô kapĩnkam ba ijaxwe? Kati,  
me ga ne ga me 'ã imã apnê ba arým  
ije bĩnmã. Me ga ne ga me ajaxwe,  
ane.

<sup>25</sup> Nhym me kunĩ kum,

—Nã. Tãm. Me ba dja ba  
me ijaxwe. Me ikramê ikrakam  
itãmdjwýmê dja ba me ijaxwe. Me

ba ne ba me imã bîn prãm ne kam aje bînmã amã 'ã apnê, ane.

<sup>26</sup> Nhyam kam arým Baraba kaban ano nhyam ta arým arek ar mekôt ba. Nãm kum iren anon kam memã Jeju jarê. Nhyam me arým mrykã punuo kaprêprê:k ne. Nhyam kam me kute pîte'y'ã nhôr kadjy memã arê.

*Krâkamngôn kute 'ã bêno bikênh.  
Mak 15.16; Dju r 19.2*

<sup>27</sup> Nhyam kam bënjadwÿr Piratu nhô krâkamngôn kikretimã Jejuo môn o wadjã. Kumoka'ê nhidjibê Pretorimã o môn o wadjã. O wadjàn arým kadjy me krâkamngôn kâtãm kunïo akprô. O akprô nhyam me kunï arým bôx ne Jeju'ã aben pydji. Me kute aprÿn 'ã bêno bikênh kadjy 'ã aben pydji. <sup>28</sup> Ne kam kubê kubêkã kaban inôkã ryti kamrêk kute me bënjadwÿr rûnh nhinôkã pyrãkja kum adjã. <sup>29</sup> Ne kam mrÿnhïo kajkep ne ikãnh ne, ne kum kutu. Nãm me me bënjadwÿr rûnh nhô krãdjê'ã mrÿnhï jakren arým kum kutu. Ne kam ikra djubôkmã po'ê jadjã nhyam kuby. Me bënjadwÿr djãbêr djã'ã ne me po'ê jakren ikramã adjã nhyam kubyn o nhÿ. Nhyam me parbê ari rôrôk ne kônkrão krÿn 'ã bêno ajkên apÿnh kum,

—Ga we abê mebê idjaer nhô bënjadwÿr rax. Gora kribêm atÿn 'iry, anhÿro kumex. <sup>30</sup> Ne kam apÿnh kutôn apÿnh po'ê byn arÿk o krã môre. <sup>31</sup> Ne kam arým 'ã bêno bikênhja inomã kumên kam arým kubê inôkã ryti kamrêk kaban akubyn kum ô kubêkã djwÿnhja jadjã. Ne kam kute pîte'y'ã nhôrmã o katon o mô.

*Me kute pîte'y'kam nhôr.*

*Mak 15.21; Ruk 23.33; Dju r 19.17*

<sup>32</sup> O môn arým me'ôbê Ximão kãjpa. Pykabê Xirenikam me kra ô. Nhyam me krâkamngôn arým

Jeju nhô pîte'y'ã kum àpnênh tÿx nhyam arým kum ikreio kumÿn o mô. <sup>33</sup> Krãnhrebê Gogota'ÿr ne me Jejuo mô. Me bakabênkam ne gu me ren krãnhremã me krã'i jarê. Nãm me 'ÿr o môn arým 'ÿr o bôx. <sup>34</sup> Ne kam pidjô kangô kadjãmê pïdjÿo akàn arým Jejumã kungã. Nhyam te kakin kanga. <sup>35</sup> Nhyam kam me arým pîte'y'ã kunhô nhyam wajêt.

Nhyam kam me apÿnh kute ô kubêkã jamÿnh kadjy kên kryre rê. Me kute kên rênhkôt ne me amijo kubêkã pytã. Amrêbê: ne ujarênh djwÿnh 'ã ajarê. Me kute abenmã ô kubêkã ngrãnh'ã ajarê. Metÿndwÿnh kukwakam ne 'ã ajarê me bakukãmãremã kum, “Metÿndwÿnh Kra ne memã kum, ‘Arým ne me abenmã ikã ngrã.

Nãm me ikã ja'ã kên kryre rên arým amijo utã.’ Nãm ã memã ane.”

Nãm ã me bakukãmãremã ane nhyam me arým aben djô'ã arênhô môn arênhô môr tãmtã arým 'ÿr o bôx. Tÿ:mrãm me bakamin-grãnyrekam 'ÿr o bôx nhyam me arým abenmã Jeju kã ngrãnhkumrêx. Metÿndwÿnh kukwakam ujarênh djwÿnh kute me bakukãmãremã 'ã ujarênh kôt ne me arým abenmã Jeju kã ngrãnhkumrêx.

<sup>36</sup> Ne kam arým nhÿ, nêje rÿto nhÿ. <sup>37</sup> Ne kam 'ã pi'ók no'ók ne. Pi'ókkam ne memã kum,

—Jeju ne ja. Mebê idjaer nhô bënjadwÿr rax ne ja, ane. Me kunï kute omÿnh kadjy ne me Jeju nhimôkri kunhô. Me kute we Jeju jaxwe 'ô pãnh pîte'y'ã jêtja pumÿnh ne kute mar kadjy ne me pi'ók no'ók ne imôkri kunhô. <sup>38</sup> Ne kam ar àkÿnhï amãnhkrutja Jeju nhikjê'ã pîte'y'ã ar kunhô. Nhyam arým ar arij. Jeju ôkredjãkôt wajêt nhyam aktã ar axweja ijên wajêt. <sup>39</sup> Nhyam me 'ãnh môrja nokã nhàn kum kabên punu:re ne kum,

<sup>40</sup> —Be, ga: ne ga we aje Metÿndwÿnh nhô kikreti ngrãnh ne



aje akubyn ipêxmã. Nhyam aje ipêxo adjãm'ã akati amãnhkrut ne ikjêkêt ga we aje ipêx parmã. Goja jakam amiptã. Goja abê Metĩndjwýnh Kra jabej píte'y kurũm rwý, ane.

<sup>41</sup> Nhyam kam me rũnh arĩk 'ã bẽno ajkẽ. Me kadjy Metĩndjwýnh mar djwýnh nhõ bẽnjadjwýrmẽ Mõjdjê kukradjã mar djwýnhmẽ mebẽngêtmẽ ne me arĩk 'ã bẽno ajkẽn abenmã kum,

<sup>42</sup> —Amũbit ne me utã. Ne kam te kute amipytãr prãmje. Goja gẽ mrãmri mebê idjaer nhõ bẽnjadjwýr raxkumrẽx jabej on píte'y kurũm rwý. Gẽ goja rwý gwaj goja rwýkkõt omũn arým tu amim markumrẽx. <sup>43</sup> Tãmwã ne we Metĩndjwýnh kanãrrãm ar ba. Gẽ Metĩndjwýnh mrãmri kum kĩnh jabej on utã. Tãmwã ne 'êx ne memã kum, “Ibê Metĩndjwýnh Kra”, anhýr ar o ba. Nãm me ã abenmã ane. <sup>44</sup> Nhyam ar ãkĩnhĩ aktã píte'y'ã jêtjadjwý kum ãkjẽro wajêt.

*Tyk kadjy ne ja.*

*Mak 15.33; Ruk 23.44; Dju r 19.28*

<sup>45</sup> Nhyam arým kãjkwa nhipõkri myt nhý. Nhyam kam tu akamãt kô tyk ne. Pyka kunĩkõt ne me'ã akamãt kô tyk ne. Nãm me'ã akamãt kô tykkam myt kyn kyn kyn ky: nhyam 3 orakam, amykrykambit arým ajte myt no põt ne. Arým ajte myt kato. <sup>46</sup> Myt kato nhyam Jeju mebê idjaer kabẽnkam kãj bê kabẽn ne Bãmmã kum,

—Eroi: Eroi: rama xabatani, ane. Nãm ren me bakabẽn kam kum,

—Inhõ Metĩndjwý:nh, Inhõ Metĩndjwý:nh, mykam ne ga arým ikanga? ane.

<sup>47</sup> Nhyam parbê me ku'êja kabẽn man arĩk abenmã kum, “Ë, me'õwã ne Erijmã kabẽn”, ane.

<sup>48</sup> Nhyam kam me'õ prõt ne ngõnh puror põnh djã jakrita byn pidjõ kangõ kadjãmã adjã. Nhyam kam

kangõ ipu nhyam pĩ nhidjamã adjãn kãjmã kum kungã, kute kaõr kadjy.

<sup>49</sup> Nhyam me'õ ar kum,

—Adjým, gẽ goja me bakukãmãrebê Erij 'ýr bõx ne goja utã, ane.

<sup>50</sup> Nhyam kam Jeju kãj bê ajte kabẽn ne arým ty.

<sup>51</sup> Be, nhyam arým Metĩndjwýnh nhõ kikreti kadjwýnhbê kubêkãtija ta amikadjõ. Nãm nhõr djã'ãnh amikrax ne e y: ne kraxmã amimẽ. Nhyam pyka arým amingrẽk ne. Nhyam apýnh kẽn amikokij. <sup>52</sup> Nhyam apýnh pyka krã amijã kurê. Nhyam me tyk krãptĩ, Metĩndjwýnh nhõ me ja krãptĩ, arým ĩ tã akubyn tĩn ne kato <sup>53</sup> ne arým Jeju akubyn tĩn nhijukri Djeruxarẽmã mõ, krĩrax tãmmã ne me kute Metĩndjwýnh nhõ krĩrax mextire jarẽnh ja, kumã ne me mõn me krãptĩmã amijo amirĩt.

<sup>54</sup> Pyka amingrẽk nhyam myjja kwý ã amijo ane. Nhyam krãkamngõnh krãptĩ: kubê 100 nhõ bẽnjadjwýrmẽ ro'ã Jeju nêje rĩto ku'êja arým omũ. Myjja pumũn arým tĩn prã:m ne abenmã kum,

—Be, mrãmri ne me'õ jabê Metĩndjwýnh Krakumrẽx, ane.

<sup>55</sup> Nhyam me niredjwý krãptĩ amybým omũnhõ dja. Amrêbê Jeju pykabê Garrêjakam ar bari ne me nire ja mã kõt ban o djuw mexo ba. Ne Jeju ajbir krĩraxbê Djeruxarẽ'ýr tẽmkam kõt ajte mõn bõx. <sup>56</sup> Me nire ja nhikõ'ã ne Marij Madarena dja. Nhyam Marij 'õdjwý dja. Kurũm ne Xijagumẽ Jõdje ar apõx. Nhyam Djebedêu kute kum ar adjwýrja nãdjwý dja.

*Arým adjãr kadjy ne ja.*

*Mak 15.42; Ruk 23.50; Dju r 19.38*

<sup>57</sup> Nãm Jeju ty nhyam kam amykry mex ne. Nhyam Jõdje arým bõx. Krĩraxbê Armatêkam ne Jõdje abatãnh djã. Õ nèkrẽx rax. Adjwýnhdjwý ne arým Jeju kõt ba.

<sup>58</sup> Nãm Piratu'ýr tẽn bõx ne Jeju

nhĩ'ã kuma. Nhyr Piratu memã kum, “Aje, me kum angã”, ane.<sup>59</sup> Nhyr kam Jôdje kadjy kubêkã mexbê rinhu byn 'ÿr o tẽ. 'ÿr o tẽn arÿm pite'y kurũm o ruw. Ne kam arÿm kubêkão kupu.<sup>60-61</sup> Nhyr wãnh ta õ me tyk nhõ kẽnkreja. Ta kabẽn kõt ne me ajbir kẽnkre kakruw. Nhyr arÿm Jeju o mõn kam adjãro dja. Ne adjãr pan kam kẽnpoti jabatãnhja ajkwa krekre'ã kudjan kam arÿm mã tẽ. Nhyr Marij Madarenamẽ Marij 'odjwÿmẽ ar kẽnkre kõnh omũnho nhÿ.

*Kẽnkre nêje ku'ẽ djwÿnh'ã ujarẽnh.*

<sup>62</sup> Pi'ok rãrãr nêje akatikam ne me adjã. Akati jakam ne me me tyk djã kêt djã nhõ akati bõx kêttri aminhõ mÿjja kupẽnho kumex. Nhyr kam arÿm pi'ok rãrãr bõx. Me tyk djã kêt djã nhõ akati bõx. Nãm te pi'ok rãrãr nhyr me rũnh akati mar kêt ne tu Piratu'ÿr tẽ. Me kadjy Metĩndjwÿnh mar djwÿnh nhõ bẽnjadjwÿrmẽ mebẽ pardjẽu Piratu'ÿr tẽn 'ÿr bõx ne Jeju'ã kum,

<sup>63</sup> —Bẽnjadjwÿr, me'õ 'ẽxnhãja tĩn ne ar bari ne memã kum, “Dja ba ty nhyr ijã akatin akatin akati ba kam akubyn itĩn”, ane. Tãm ne bar ma:ro iba.<sup>64</sup> Kam bar amã arẽ. Godja kõt ba djwÿnh ar akamãtkam kẽnkre 'ÿr bõx ne arÿm ïo akĩn mã o mõ. Ne kam arĩk memã 'ẽx ne memã kum, “Arÿm ne akubyn tĩn ne”, anhÿro ba. Jeju ta ne amrẽbẽ me noo biknoro ba. Dja ar ijukri akubyn tĩn jarẽ nhyr me abenmã arẽn arÿm abennoo biknor me:x ne. Me 'ẽx kêt kadjy dja ga anhõ krãkamngõnh janon memã kum, “Me 'ÿr mõn kẽnkre kuri dja”, ane nhyr ar te kute ïo àkĩnhmã. Gẽ 'ã akati amãnhkrut ne ikjêkêt apêxkambit me ajte ate krã ba. Nãm me rũnh ã Piratu'ã ane.

<sup>65</sup> Nhyr memã kum,

—Gêtõ. 'ÿr krãkamngõnh kwÿo mõ gẽ me kẽnkre nêje djan rĩt tÿ:xo dja, ane.<sup>66</sup> Nhyr kam me

arÿm kẽnkre'ÿr meo mõn meo bõx. Ne kam arÿm kẽnkre'ã kẽnpotio yn kam kre nêje krãkamngõnh pumjuw nhyr me arÿm nêje djan rĩt tÿ:xo dja.

## 28

*Akubyn tĩn kadjy ne ja.*

*Mak 16.1; Ruk 24.1; Dju r 20.1*

<sup>1</sup> Nhyr me tyk djã kêt djã nhõ akati arÿm apêx nhyr arÿm pi'ok kamrẽkkam akati tẽ. Nhyr kam Marij Madarenamẽ Marij 'odjwÿ ar arÿm kute kẽnkre pumũnhmã 'ÿr tẽ.

<sup>2</sup> 'ÿr tẽ: nhyr arÿm pyka amingrẽk tÿ:x ne. Bẽnjadjwÿr djwÿnh kadjy mrãnh djwÿnh 'õ ne kãjkwa kurũm ruw nhyr kam pyka amingrẽk tÿ:x ne. Nhyr kadjy mrãnh djwÿnh arÿm kẽnkre'ÿr tẽn 'ÿr bõx. Bõx ne arÿm ajkwa krekre'ã jãm kẽnpoti dja. Jãm kudjan arÿm 'ã nhÿ.<sup>3</sup> Nãm nokre jadjẽ:nh kute mrãmri ne na jadjẽnhkam pøk tÿxja pyrãk. Nhyr õ kubêkãja jaka: kute mrãmri ne kakũm arngrokam akaja pyrãk.<sup>4</sup> Nhyr kre nêje ku'ẽ djwÿnhja arÿm omũ. Omũn arÿm umaje tertẽ:ne arÿm rôrõk ne. Ne kam arÿm wãnh kute me tyk pyrãk ne ikwã.

<sup>5</sup> Nhyr ar nire kẽnkre'ÿr tẽn bõx nhyr kadjy mrãnh djwÿnhja arkum,

—Kwãrĩk wãnh ar atĩn prãm kêt. Jeju ne gar abej. Arÿm ne ba ar ama. Me kute pite'y'ã nhõr ne bĩnja ne gar abej tẽ.<sup>6</sup> Jakam ne arÿm nõr kêt. Nãm akubyn tĩn ne kato, kute ar amã arẽnh kõt. Amrẽ ar tẽn nõr djã kaprÿja pumũ.<sup>7</sup> Dja gar omũn kam amikrà kêt ne tẽn kõt ba djwÿnhmã arẽ. Dja gar arkum, “Arÿm ne akubyn tĩn ne ar akukãm pykabẽ Garrẽja'ÿr tẽmmã. Dja gar kam tẽn arÿm omũ” ane. Dja gar ã arkum ane. Ba ne ba arÿm ar amã arẽ gar arÿm ama. Nãm ã kadjy mrãnh djwÿnh arkum ane.

<sup>8</sup> Nhyr ar nire kabên man arým amikrà kêt ne mã kênkre kurüm prôt ne. Tîn prämmê kînhmê akân prôt ne. <sup>9</sup> Ar kute kôt ba djwýnh arkum arênhmã prôt ne. Prôt nhyr ar aêrbê Jeju ar kajpan arkum, “Àpnhîre ar”, ane. Nhyr ar arým 'ýr bôx ne paro tým ne kum rax jarênho nõ. <sup>10</sup> Nhyr Jeju arkum,

—Kwârîk wãnh ar atîn prãm kêt. Tên ikamy arkum ikabên jarên arkum, “Ar Garrêja'ýr mō. Dja gar kam bôx ne arým omũ”, ane. Dja gar ã arkum ane. Nãm ã Jeju arkum ane. Nhyr ar nire arým ar'ýr mō.

*Kênkre nêje ku'ê djwýnh 'ã ujarênh.*

<sup>11</sup> Ar'ýr mō nhyr wãnh kre nêje ku'ê djwýnh kwýja arým kãjmã djan amũ krîraxmã mōn bôx. Bôx ne arým me kadjy Metîndjwýnh mar djwýnh nhō bënjadjwýrmã prîne amijarên arkum,

—E kum, pyka ne amingrêk nhyr kadjy mrãnh djwýnh arým ruw ne kênkre'ýr tē. 'Ýr tēn arým ajkwa krekre'ã jãm kênpoti djan 'ã nhý. Nokre adjê:nh ne nhý. Bar omũn itîn prãm, ane. <sup>12</sup> Nhyr ar arým kuman mebêngêt'ýr tēn 'ýr bôx ne mekmê akuprō. Ne kam arým o aben ma. O aben mar pan kam arým krākamngōnh'ýr bôx ne arkum,

<sup>13</sup> —Kwârîk wãnh memã wã jarên kêt. Dja gar memã ajêx ne memã kum, “Akamãtkam ar inhôt tykkam arým kôt ba djwýnh ar bôx. Bôx ne arým Jejuo akîn mã nhî'ãm o mō”, ane. Dja gar ã memã ajêxo ane bar pãnh arým ar amã pi'ók kaprî kumex ngã. <sup>14</sup> Nhyr godja mē kãtãm arým ar anhō bënjadjwýr Piratumã ar ajarênh jabej ne kum, “Nãm anhō krākamngōnh kre nêje rît'ã ngōr nhyr kôt ba djwýnh ar arým Jejuo akî”, anhýr jabej. Nhyr ar akam ngryk jabej. Ar ba dja bar arým ar anêje kum ikabên ne ar apytã. Mî, pi'ók kaprî. Dja gar ã

memã ajêxo ane. Nãm ã me rûnh krākamngōnh arkum ane. <sup>15</sup> Nhyr kam ar arým amim pi'ók kaprî jamýn ã memã 'êxo bao ane. Ar kute arkum 'ã karō kôt ã memã 'êxo bao ane. Nhyr kam mebê idjaer arým arênho kumex ne arênho ipók ne. Ne akati jakam kute we ar kute Jejuo àkînhja jarênh rã'ã ne.

*Ar àpênh djã'ã arkum karō.*

*Mak 16.14; Ruk 24.46; Dju r 20.19; Kar 1.6*

<sup>16</sup> Nhyr kam kôt ba djwýnh Ar kubê 11ja amũ pykabê Garrêja'ýr mōn bôx. Jeju kute arkum krãnh jarênhja'ýr ne ar bôx. <sup>17</sup> Ne kam arým Jeju pumün parbê kõnkrão nhýn kum rax jarên kum,

—Mrãmri ne ga arým akubyn atîn ne, ane. Nhyr be, ar kwý ne ar abenmã kum,

—Djãm mrãmri Jejukurêx ne dja? Djãm mrãmri akubyn tîn ne? Kon ne, ane. <sup>18</sup> Nhyr Jeju arým ar'ýr bôx ne arkum,

—Kãjkwamê pykamê kam mýjja kunî ne ba ije o iba kadjy arým ibënjadjwýr rax. <sup>19</sup> Kam dja gar mōn me kunimã arê. Apýnh me ba djã kunîkôt memã arê gê me ikabên man kôt ar amijo ba. Dja me ikabên man kôt ar amijo ba gar Metîndjwýnhmã ngômã me angij. Dja gar memã kum, “Arým ne ga tu amim Bãm markumrêx ne ajte tu amim Kra markumrêx ne ajte tu amim Metîndjwýnh Karō markumrêx. Ba kam arým ar kukwakam ngômã ajadjã”, ane. Dja gar ã memã anen arým ngômã me angij. <sup>20</sup> Ije ar amã katãt ar amijo aba'ã karōkam ikabên kunîja memã arê gê me ikabên kunî man kôt ar amijo ba. Dja ba kam akati kunîkôt ar amê amijo ikajkep rã'ã: rã'ã ne nhyr pykakam me kute aminhinomã amimênh djã nhō akati arým bôx. Nãm ã Jeju arkum ane. Tãm ne ja.

## Makô memã Jeju'ã ujarënh ne ja.

Makôdjwý ne prïne Jeju'ã ajarë. Arým abatành ne kute memã amijo amirít'ã pi'òk ja nhipêxmo krax ne 'ã ujarënh tën tyk ne akubyn tìn ne àbir djãmã kumë. Nãm Paurmë Pedru arkôt mrã. NhyM Pedrudjwý Makôo òbikwa nhyM ô'ã prïne gwaj bamã Jeju'ã pi'òk no'òk ne.

*Djuão kute Jeju kutêp me akre'ã ujarënh kadjy ne ja.*

*Mat 3.1-12; Ruk 3.1-18; Dju r 1.19-28*

<sup>1</sup> Ba ibê Makô ne ba pi'òkkam me amã ikabën jarë. Me ujarënh ny kraxkôt ne ba me amã arë. Jeju. Kubê ne Metëndjwýnh Kra. Metëndjwýnh arým 'ã Bënjadjwýrbê kumkati më. Jejubê Bënjadjwýrbê kumkatikôt ne me kum Kritu jarë.

<sup>2</sup> Idjaij ne amrêbê Metëndjwýnh kukwakam kabën. Kabënkam ne Metëndjwýnh Kramã kum,

“Ota ba akukãm ajã ujarënh djwýnh'ò jano kute akutêp me akre nhyM me kute mar ne adjwýnhràM axwemã irern katàt kute amijo bamã.

Kute mrãmri ne me kute me bënëjadjwýr rünh kutêp katàt pry jadjwýrja pyrãk”, ane.

<sup>3</sup> Ne ajte me bakukãmãremã kum,

“Me'ò dja kapôt kukritkam memã kabën ne. Kàj bê dja me akren memã kum,

‘Me apa. Ê, on Bënëjadjwýr djwýnh kutêp wãnh ajaxwemã anhiren katàt amijo aba.

Kute mrãmri ne me kute bënëjadjwýr rünh kutêp pry mex ne kute kum katàt pry jadjwýrja pyrãk’, ane.

Dja ã me'ò Bënëjadjwýr djwýnh'ã memã ane.”

Nãm ã Idjaij me bakukãmãremã ane nhyM me arým 'ã pi'òk no'òk ne.

NhyM kam me aben djô'ã arënhomô:n arënhomôr tãmtã arým 'ýr o bôx. Tü:mrãm 'ýr o bôx nhyM Djuão arým kato. Me bakamingrãnyrekam katon arým abatành ne. Abatành ne arým ã Kritu kukãm memã ujarënh ar bao ane. Metëndjwýnh kute me bakukãmãremã 'ã ujarënh kôt arým katon ã wýnhràM ar me akreo bao ane.

<sup>4</sup> Nãm kapôt kukritmã kato. Katon arým ngômã me angjën ar o ban ar me akreo ba. Nãm memã kum,

—Me ga ne ga me ajaxweo aba tùm. On me amikam akapriren wãnh ajaxwemã anhiren Metëndjwýnh'ýr amijo akëx. Dja ga me ane nhyM Metëndjwýnh arým me ajaxwe maro aknon arým ngyrk kêt. Ba kam arým Metëndjwýnhmã ngômã me ajangij. Nãm ã memã anhýr ar o ba.

<sup>5</sup> NhyM kam pykabê Djudêjakam me jamê kríraxbê Djeruxarëkam me jamê aben totokmã Djuão'ýr ban bôxo dja. Bôx ne tu me ipôkri amijaxwe kôt amijarën kum,

—Be mrãmri, ba ijaxwe: ar iba. Arým imã kính kêt ne wãnh kum inhire, ane.

NhyM Djuão arým ngô raxbê Djodãokam Metëndjwýnhmã ngômã me kuní jangij.

<sup>6</sup> Be, Djuão ne mry jabatãnhbê kameru kí nhipêxo kubêkã jangij ne mry kão amikrax pren mýjja kute krytkanhê pyrãk kun menh kangôo ikô.

<sup>7</sup> Nãm kàj bê memã Jeju'ã ajarënh memã kum,

—Itotokbê ne me'ò bôxmã. Me'ò tãm ne raxo kute ijakrenh, kute ijakrenh mexi. Nã bãm te irax ne 'ýr ibikamënh prãmje. Nã bãm te irax ne 'ã inihôn ije kum parkã 'ãpre bônhe ne o itëm prãmje. Be, ãm irax ba ren arým kum apê. NhyM be kati. ãm ingrire. Nãm raxo ijakrenh mex ne. Tãmja ne arým bôx 'ýr. <sup>8</sup> Ba ne ba ngômãbit me

ajanggih. Djâm tâmwã kute ngômã me ajangjênhmã? Kati. Tãm dja bôx ne kam me awÿr Metîndjwÿnh Karô jano. Nãm â Djuão memã ane.

*Kute ngômã Jeju jadjàr'ã ujarênh kadjy ne ja.*

*Mat 3.13-17; Ruk 3.21-22*

<sup>9</sup> Nhyam kam pykabê Garrêjakam krîraxbê Nadjare. Kurûm arÿm Jeju tẽ. Tẽ:n kam arÿm Djuão'ÿr bôx. Nhyam kam arÿm ngô raxbê Djodãokam ngômã Jeju jadjà, Metîndjwÿnhmã adjà. <sup>10</sup> Nhyam arÿm ngô kurûm kator tẽ nhyam aêrbê kâjkwa abenbê ajkij nhyam arÿm omû. Nhyam Metîndjwÿnh Karô kute tut pyrâk 'ã ruw. Me kute omûnh kadjy ne amijo tut pyrâk ne 'ã ruw. <sup>11</sup> Nhyam arÿm kâjkwa kurûm Metîndjwÿnh Jejumã kabên ne kum,

—Mrâmri abê ikrakumrêx. Imã ajabê:kumrêx. Ba akam ikînhkumrêx, ane.

*Xatanaj kute axwe'ã kum àpnênh kadjy ne ja.*

*Mat 4.1-11; Ruk 4.1-13*

<sup>12</sup> Ne kam adjynkêt ne Metîndjwÿnh Karô kabêno amû Jeju kujaten kapôt kukritmã o môn o bôx ne ipôkri o ba. <sup>13</sup> Nhyam kapôt kukritkam rop môr djâkam ar ba. Nhyam kam me axwe nhô bënjadjwÿrbê Xatanaj te kute axwe'ã Jeju mênhmã kum àpnênh dja nhyam 'ã akatibê 40 apêx. Nhyam kam kadjy mrânh djwÿnh arÿm Jeju'ÿr bôx ne o djuw mex.

*Jeju kute amikôt ar 'wÿr kadjy ne ja.*

*Mat 4.12-22; Ruk 5.1-11*

<sup>14</sup> Nhyam kam Jeju arÿm tẽ. Tẽ:n pykabê Garrêjakam bôx. Me arÿm kute Djuãoo tÿm ne kubê ijêkam ne Jeju kam bôx. Bôx ne kâj bê memã ujarênh ny jarênh ba. <sup>15</sup> Nãm memã kum,

—Be, Metîndjwÿnh kute amrêbê me bakukâmãremã arênh kôt arÿm ô akati bôx 'ÿr. Kute amim me utâr

ne ar meo ba 'ÿr. Me on amikam akaprîren wãnh ajaxwemã anhiren Metîndjwÿnh'ÿr amijo akêx ne tu amim ujarênh ny markumrêx, ane.

<sup>16</sup> Ne kam Garrêjakam imôti mÿrbê tẽ. Nhyam Ximãomê Ængre ar axikôt katorja ngônkhkam ar kryre rênho ba. Ar kubê tep pynênh djwÿnh tûm. <sup>17</sup> Ar kryre rênho ar o ba nhyam Jeju arkum kabên ne arkum,

—Amrê ar mã ikôt ajkamê ba ar amã ar adjâpênh djâ ny jarê gar ar o aba. Dja gar mã ikôt me kamênh ar o aba. Kute mrâmri ne gar aje tep pynênh abaja pyrâk dja gar mã ikôt me kamênh ar o aba, ane.

<sup>18</sup> Nhyam ar arÿm amikôt kryre mên mã Jeju kôt ajkamê.

<sup>19</sup> Nhyam ajbir tẽ nhyam Xijagumê Djuão ar axikôt apôxja kâkam amim kryreo mexo nhÿ nhyam arÿm ar omû. Djebedêu ne ar adjuw. <sup>20</sup> Nãm ar omû nhyam adjynkêt nhyam amikôt ar ku'uw. Nhyam Bãm Djebedêumê ô àpênhmê ar kâkam nhÿ. Nhyam Xijagu ar arÿm wãnh ar wãmã iren mã Jejukôt ajkamê.

*Jeju kute me krâptïo mex.*

*Ruk 4.31-37*

<sup>21</sup> Jejumê ar mō:n arÿm krîraxbê Kapanakam bôx. Nhyam kam ar'ã pi'ók rârâr. Ar'ã me tyk djâ kêt djâ nhô akati nhyam kam ar mebê idjaer bikprônho djâmã wadjà. Nhyam kam arÿm memã 'ã ujarênh dja. <sup>22</sup> Nhyam me Jejukam no tyn kumex ne kam abenmã kum,

—Tô mÿj kabên ny got ja? Nãm prîne kute amimarkôt katà:t memã amikukràdjâ jarênhkumrêx. Nãm ã me bënjadjwÿr rûnh kwÿ kabên mex anen ar prîne kabêno meo atomo ba, ane. Djâ nãm ã Môjdjê kukràdjâ mar djwÿnh memã arênh ane? Kati. Nãm me ari no prôt ne ari kukràdjâ jarênh'ã umju:w ne kute arênh katât kêtumrêx.

<sup>23</sup> Jeju memã 'ã ujarênh dja nhyam me'ôja me bikprônho djâkam

nhÿ. Me karô punu ne me'ôjao ba tûm. Nâm nhÿ nhyim me karô punu kute o baja kâj bê Jejumã kabên ne kum,

<sup>24</sup> —Krîraxbê Nadjarekam Jeju, mÿj ne ga aje me ijomã? Tô djãm aje me ijo abiknormã? Ba me ije apumûnh tûm. Metîndjwÿnh mexo ne ga amex. Ô kâjkwa kurûm ne ga ruwn ar aba, ane.

<sup>25</sup> Nhyim kam Jeju kum bën tÿx ne kum,

—Anhikrên me'ôja kurûm akato, ane.

<sup>26</sup> Nhyim arÿm me karô punu me'ôja bÿ nhyim tyko nô. Nâm kubÿn amran arÿm kum iren katon mã tê. Nhyim arÿm mex ne. <sup>27</sup> Nhyim arÿm me kunÿ te kute marmã kam no tyn kumex ne te ari aben kukij ne abenmã kum,

—Mÿj ne kute? Djãm me kukràdjã ny 'ô ne wã? Nâm kute amimar kôt tu me karô punumã kabên nhyim arÿm kum uman kabên kôt mã tê, ane.

<sup>28</sup> Nhyim kam me pykabê Garrêja kunÿkôt abenmã Jeju jarênho ipôk ne.

<sup>29</sup> Nhyim kam Jejumê Xijagumê Djuão ar mebê idjaer bikprônñ djã kurûm kato. Ne kam ar Ximãomê Ângre ar ûrkwãmã môn bôx. <sup>30</sup> Nhyim Ximão djupãnhdjwÿ kanên nô. Ar wadjã nhyim ar Jejumã kum,

—Ximão djupãnhdjwÿ kanê kubÿ nhyim nô, ane.

<sup>31</sup> Nhyim arÿm 'ÿr tèn 'ÿr bôx ne ikra 'amÿn kâjmã 'ÿr. Nhyim ar aêrbê kanê kum ire nhyim arÿm kâjmã dja. Kâjmã djan kam arÿm aro djuw mexo ba.

<sup>32</sup> Nhyim arÿm ar'ã myt wadjã. Nhyim me kanêmê me punumê me karô punu kute meo ba tûmja nhyim me aben totokmã Jeju'ÿr me ja kunÿo bôx. <sup>33</sup> Nâm krîraxja tãmkam me kunÿ 'ã akuprô, ûrkwã jajkwa krekre'ã akuprô. <sup>34</sup> Nhyim kam apÿnh me kanê djãri kute me parja

Jeju arÿm me ja krãptiô mex. Ne me karô punu krãpti kute ar meo baja arÿm ano nhyim arÿm memã ire. Nhyim kute anoro âmri mã me karô punumã kum, “Anhikrê”, ane. Mÿkam? Bir, me karô kute Jeju pumûnh tûmkam ã kum anhÿro ba. Nhyim kam ar'ã akamât nhyim ar arÿm ngôr.

*Arwãmã katorn Metîndjwÿnhmã kabên.*

*Ruk 4.42-44*

<sup>35</sup> Ôto nô: nhyim kam, Jeju ôkrên'ânñ kâr pydjikam krã katon amÿ arwãmã kato. Ne tèn arÿm Metîndjwÿnhmã kabêno nhÿ.

<sup>36</sup> Nhyim kam Ximão ar abej mō. <sup>37</sup> Abej mōn kam arÿm kum katon kam kum,

—E kum, me kunÿ ne me ajabej ar ba, ane.

<sup>38</sup> Nhyim arkum,

—Gwaj on amÿ bu'ã krÿ kwÿkamdjwÿ tê ba me kamdjwÿ kâj bê memã arê. Me wãdjwÿ kadjy ne ba ikato, ane.

<sup>39</sup> Ne kam Garrêjakam pyka kunÿkôt kâj bê memã arênho ba. Apÿnh mebê idjaer bikprônñ djãkam memã arênho ba. Ne me karô punu kute ar meo baja janoro ba nhyim arÿm memã iren mã mrã.

*Kute me'ô ï kajêkam têjao mex.*

*Mat 8.1-4; Ruk 5.12-16*

<sup>40</sup> Nhyim kam me'ô ï kajêkam têja 'ÿr bôx ne parbê kônkrão nhÿn kum rax jarên kum,

—Bênjadjwÿr djwÿnh, ga aje inhÿ kajêkam itékôt ipumûnh ne aje mar. Aje ijo mex prãm jabej ba ren arÿm imex ne, ane. <sup>41</sup> Nhyim arÿm kum kaprÿn 'ÿr ikran kupên kum,

—Ije ajo mex prãm. On amex, ane. <sup>42</sup> Nhyim arÿm 'ã ï kajêkam têja apêx ne arÿm mex ne. Kute o âm tãmkam têmbê kà mex ne. <sup>43-44</sup> Nhyim kum,

—Kwãrik wãnh ga memã ami-jarênñ kêt. Dja ga tu katât mã me kadjy Metîndjwÿnh mar djwÿnh'ÿr

tên kum amibê, kum amikà bê. Ne kam kum mry ngã gê akady Môjdjê kukràdjà kôt Metîndjwýnhmã mry gan kum kungã. Arým akã mexkam dja ga kum mrywã ngã gê me kunĩ apumũ, arým akã mexkôt apumũ, ane. <sup>45</sup> Nãm te kum ane nhym arým tu memã amijã ujarênh ar bamo krax ne kam memã amijã ujarênh o ipôk ne. Nhym kam Jeju te irã ipôkri krĩrax'ômã àrn ar ba prãmje ne arým arwãkambit ar ba. Nãm arwãkam ar ba nhym me arým bu'ã pyka kunĩkôt 'yr ban bôxo dja.

## 2

*Jeju kute me'õ jakryo mex.*

*Mat 9.1-8; Ruk 5.17-26*

<sup>1</sup> Nhym kam 'ã akati kwý apêx nhym Jeju krĩraxbê Kapanakam tên bôx. Nhym kam me abenmã kum,

—Arým ne ajte õ kikrekam bôx. Arým ne ajte õ kikrekam bôx, ane.

<sup>2</sup> Nhym kam me itepato 'ã akuprõ. Me krãptĩ: 'ã akuprõ nhym arým kikre kre'ã me kàtãm abenbê krãptĩ. Ne prĩne kikre jajkwa krekre pytãr mex ne. Nhym arým kãj bê memã Metîndjwýnh kabên jarênh o dja. <sup>3</sup> Nhym ar 'õ amãnhkrut ne amãnhkrut me'õ jakryja mýn o tên o bôx. <sup>4</sup> Ne kam me krãptĩkam te: Jeju'yr àrmã. Ne kam kikre nhimõk'yr o wabi. Kikre nhimõk po'yr ne o wabin arým Jeju nhiby kikre nhimõk'ã kuprã ne kôt 'ã jãm ngybôr jadjuw ne kôt 'yr o ruw. Akryja ikwã djãkam nõr rã'ã nhym ar o ruw ne arým kabem kudji. <sup>5</sup> Nhym kam Jeju amim,

—Ar ja ne ar tu amim ikamnhĩxkumrêx, ane.

Ne kam me'õ jakrymã kum,

—Akmere, jakam ne ba arým ajaxwe kunĩ maro aknon akam ingyk kêt ne, ane. Djã nãm tẽmbê me'õ jakryo mex got? Kati, nãm amidjêje nèn kum jabit jarê nhym êje nõ. Jeju ta ne axweo akno.

<sup>6</sup> Nhym wãnh Môjdjê kukràdjà mar djwýnh kwý nhýn arým amim,

<sup>7</sup> —E kum be me'õ ja ne ajmãn Metîndjwýnh japryõ djan amijo Metîndjwýnh o dja. Metîndjwýnh pydji ne kute me axweo biknorn mekam ngyk kêt, ane. <sup>8</sup> Nãm me ã õkre kadjwýnhbê anhýro kumex nhym arým tu kuman memã kum,

—Mýkam ne ga me anhõkre kadjwýnhbê ijo kajgon ijapryõ akumex? ane. <sup>9</sup> Ê, ba me amã mýjja amãnhkrut jarê. Mýj ne amirĩt? Ba ren me'õ jakryjamã kum, “Ba arým ajaxwe maro aknon akam ingyk kêt”, ane. Nãr kon, “On kãjmã djan anhikwã djã mýn o tẽ”, ane. Mýj ne ren amirĩt, nèn? Nã bãm ren kum, “Ba arým ajaxwe maro aknon akam ingyk kêt”, ane nhym amirĩt kêtumrêx ne. Tãmbit ne amirĩt kêt. Nhym be, kãjmã me ku'ê, ije ren me'õmã kum, “Kãjmã djan tẽ”, ane nhym ren amirĩt. Tãmbit ne amirĩtkumrêx. <sup>10</sup> Dja ba kum, “Kãjmã djan anhikwã djã mýn o tẽ”, anen arým o mex gar arým omũn arým amim, “Be ga, Jeju kute me'õ jakryo mexja pumũ. Be, djãm kute me axweo biknor kêt got? Mrãmri ne Metîndjwýnh arým amijo ã ne pyka jakam amikabên kôt ari me axweo biknoro ba”, ane. Me aje amim ja jarênh kadjy dja ba me'õ jakryjao mex. Nãm ã Môjdjê kukràdjà mar djwýnhmã anen arým tu me'õ jakryja'yr akêx ne kum,

<sup>11</sup> —Amã ne ba ikabên ne. On kãjmã djan anhikwã djã mýn anhũrkwãmã o tẽ, ane. <sup>12</sup> Nhym kam me aêrbê me ipôkri kãjmã dja nhym me kunĩ arým omũ. Nãm kãjmã djan ikwã djã mýn mã o katon o tẽ. Nhym me krãptĩ kam no tyn kumex ne abenmã kum,

—Mýj me'õ got mýjja mex ja'õ pumũ. Arkati, anen amim,

—Ê, arým ne djãm mrãmri o mex nhym mrãnh mexja pumũ. Mrãmri

ne kabênkumrêx. Djâm kute me axweo biknor kêt got? Mrâmri kute me axweo biknorkumrêx. Ga, kute kam me'ô mex nhyim mrânih mexkumrêxja pumû. Metîndjwýnh mexkumrêx, ane. Mrâmri ne Jeju kute me axweo biknorkumrêx. Me kute ja mar kadjy ne Jeju arým me'ô jakryo mex. Tãm ne ja.

*Kute amikôt Rewi kamênh.  
Mat 9.9-13; Ruk 5.27-32*

<sup>13</sup> Nhyim kam Jeju arým katon ajte imôti mýrbê tê. Nhyim kam me itepato 'ã akuprô nhyim arým memã 'ã ujarênhô dja. <sup>14</sup> Ne kam amû tê. Tê: nhyim kam Rewi, Aupêu kute irja nhÿ. Kubê ne Matêu. Bênjadjwýr bajtemmã pi'ók kaprîo atom djâkam ne nhÿ nhyim arým omû. Ne kam 'ÿr tèn kum,

—Amrê on mã ikôt ajkamê, ane.

Nãm kum ane nhyim amim kuman arým kâjmã dja. Kâjmã djan arým mã kôt ajkamê. <sup>15</sup> Nhyim kam Jeju Rewi nhô kíkrekam ô kwý krêno nhÿ. Nhyim bênjadjwýr bajtemmã pi'ók kaprîo atom djwýnh krãptî Jejumê ro'ã nhÿ. Nhyim we me axwedjwý ikô'ã nhÿ. Me krãptî ne me nhÿ. Be, me ja krãptî ne me arým amim Jeju man kôt ba. Nhyim kôt ba djwýnh tûmdjwý Jejumê ro'ã nhÿ. <sup>16</sup> Nhyim mebê pardjêukôt Môjdjê kukràdjã mar djwýnh arým me omû. Pi'ók kaprîo atom djwýnhmê me we axwe ar Jejumê ro'ã ô kwý krêno nhÿ nhyim me arým me omû. Ne kam arým kôt ba djwýnhmã kum,

—Be, gar bênjadjwýr bajtemmã pi'ók kaprîo atom djwýnhmê me axwe ar omû. Je tô, djâm me wã axwe ngri got ne Jeju me ro'ã ô kwý krêno nhÿ? ane.

<sup>17</sup> Nhyim Jeju arým me kabên ma. Me kute,

—Djâm me wã axwe ngri got? anhÿrja Jeju kuman memã kum,

—Djâm me mex'ÿr ne me kane djwýnh mrã? Katî, me kanê'ÿrbit

ne me kane djwýnh mrã. Badjwý ne ba me axwe'ÿr tê. Djâm we me amex'ÿr ne ba tê? Katî, me axwe'ÿr ne ba tê. Me tãm ne ba amiwýr me ku'uw. Me amikam kaprîren wãnh axwemã irern kute iwýr amijo akêxmã ne ba amiwýr me ku'uw. Nãm ã Jeju mebê pardjêumã ane.

*Me kukràdjã tûm'ã ujarênh.  
Mat 9.14-17; Ruk 5.33-39*

<sup>18</sup> Nhyim kam Djuãokôt ba djwýnhja ne ar Metîndjwýnhmã amijajburo ba. Djuãobê ngômã me angjênh djwýnhja. Nãm ar amijajburo ba. Mebê pardjêu nhô me jadjwý ne me amijajburo ba. Nhyim kam me Jeju'ÿr môn 'ÿr bôx ne kukij ne kum,

—Be, Djuãokôt me ba djwýnhmê mebê pardjêu nhô me jamê ne me amijajburo ba. Je tô, mýkam ne akôt ba djwýnh ar kute amijajbur kêt mex ne ar ba, ane?

<sup>19</sup> Nhyim Jeju tu amijã me'ô mjên jarên amikôt ba djwýnh ar'ã mjênmmê ro'ã ar ar ba jarên memã kum,

—Ga, me kute abenã prômê mjên rênhja pumû. Djâm mjênmmê ro'ã ar ar baja kute amijajbur got? <sup>20</sup> Arkati. Mjênmmê ro'ã ar ar baja ar kînhkumrêx ne kute amijajbur kêt. Ar ô kwý krên rax. Adjým, akati amrê môrjakam dja me Ar kubê mjêno tým ne mã o mō. Kam gêdja ar kaprîren arým Metîndjwýnhmã amijajburo ba, ane. Mý'ã ne me kute Ar kubê mjêno tým jarê? Bir, ta amijã ne arê. Jeju dja me o tým ne mã o mō. Kambit dja kôt ba djwýnh amijajburo ba.

<sup>21</sup> Be ga, me kute jãm amim Jeju kukràdjã ny mar ne ajte jãm amim kukràdjã tûm marja pumû. Me kute amim amê kukràdjã maro bakam ne me umar mex kêt. Me kute mrâmri ne kuebêkã ny tûm'ã ir pyrãk. Ne me ajte ãm mrâmri ne kute pidjô kangô ny ngônih tûmkam



runh pyrâk. 'Ă ne Jeju ajte memă kum,

—Ga, me'ô nhô kubêkà tũm ne 'yrja pumũ. Nhyam kam arȳm kubêkà ny, põnh kêt. Djă ne tũm'ă kudji? Kati. Mȳkam? Bir, dja me kupõ. Nhyam kam arȳm põnhkam nykam ê abenmă wangij. Abenmă wangij nhyam arȳm tũmja kadjô. Nhyam kam arȳm 'yr nyja kute 'yr tũmja jakrenh mex ne.

<sup>22</sup> Ga, me'ô nhô mrykăo ngõnh. Me bakukămare ne me mrykăo ngõnh. Mrykăo ngõnh arȳm tũm ne ngrăja pumũ. Djă ne kam uba kangô ny ru? Kati. Mȳkam? Bir, âm 'ătũmkam arȳm uba kangô kadjăn ajmrô nhyam ngõnh arȳm igot tẽn arȳm ajkatôr. Nhyam arȳm kangô ajkapĩ nhyam ngõnh arȳm punu ne. Be, kam mex ră'ă kadjy mrykăo ngõnh ny, kà rerekrekambit me kute kangô ny runh prăm. Nhyam kam amê mex ră'ă. Năm ă Jeju memă ane. Gêdja me amim kukrădjă nybit maro ban arȳm umar mexkumrêx. Nhyam be, gêdja me amim me kukrădjă tũmdjwȳ mar prăm ne arȳm umar mex kêtumrêx. 'Ă ne Jeju memă ajarê.

*Pi'ok rărăr mȳr jabej me kum kabên.*

*Mat 12.1-8; Ruk 6.1-5*

<sup>23</sup> Ne kam pi'ok rărărkam pur katikôt tẽ. Nhyam kôt ba djwȳnh arkôt mō. Kôt mōn arȳm kum prăm ne mōrkôt băygogo 'y nhikên mrănhkôt ngănh ne amijajkwamă rênho mō. <sup>24</sup> Nhyam kam mebé pardjêu ar omũn kum,

—Je tô mȳj ne akôt ba djwȳnh ar arȳm nê? Pi'ok rărărkam ne me tyk djă kêt djă. Me kute pi'ok rărăr jakam mȳjja jao anhȳr kêt. Me tũmre ne me ta kukrădjăkôt mă me babê uma. Me kute pi'ok rărărkam mȳjja kupênh kêt. Kam ne me tyk djă kêt djăbit. Mȳkam ne akôt

ba djwȳnh ar ă anhȳro ba? ane. <sup>25</sup> Nhyam kam Jeju memă kum,

—Kê, djăm me aje Metĩndjwȳnh kabên'ă pi'ok no'okjadjwȳ pumũnh kêt? Djăm me aje me bakukămarebé Dawi'ă ujarênhja pumũnh kêt? Ê, Dawi arkum pră:m. <sup>26</sup> Kum prăm ne arȳm Metĩndjwȳnh nhürkwămă wadjă. Amrêbê: me kadjy Metĩndjwȳnh mar djwȳnh nhô bẽnjadjwȳr rax ne kubê Abijta. Metĩndjwȳnh nhürkwăkam ne me bakukămaremă nhȳ. Nhyam Dawi ar Metĩndjwȳnh nhürkwămă wadjăn djwȳ byn kukrên kam kôt ar tẽn jamădjwȳ kungă nhyam ar arȳm kukrê. Djwȳ me kute Metĩndjwȳnhmă ôrja tăm ne kubyn kukrên arkum kungă. Metĩndjwȳnh nhô djwȳ ne me kătăm kute kur kêtumrêx. Me kadjy Metĩndjwȳnh mar djwȳnhbit ne kute kur. Nhyam be, Dawi ta ne tu kubê kukrê. Nhyam kam me kute kum axwe jarênh kêt. Djăm me aje ja mar kêt? Ga, me kute Dawimă axwe jarênh kêtja pumũ. Ne kam ikôt ba djwȳnhmêbit ar imă ar axwe jarê. Je tô mȳkam? Năm ă Jeju mebé pardjêumă ane.

<sup>27</sup> Ne kam ajte memă kum,

—Djăm me kute pi'ok rărăr ajbit maro ba kadjy ne Metĩndjwȳnh me ipêx? Kati. Me tȳx djă kadjy ne Metĩndjwȳnh akati ja jarê nhyam wajêt. <sup>28</sup> Ba me amă arê ga me ama. Ba ije amijo inhĩ ne me awȳr irwȳk ne ba inhô pi'ok rărăr djwȳnh. Kam gêdja ba memă, “Kwărĩk wănh ga me kam mȳjja kupênh kêt năr kon, dja ga me jakam apên năr kam mȳjja kupênh kêt ne arek akrĩ”, ane. Tăm ne ja. Năm ă Jeju memă ane.

### 3

<sup>1</sup> Nhyam kam ajte ar'ă pi'ok rărăr nhyam kam ar me bikprõnh djă'ȳr bõx ne wadjă. Nhyam me'ô nhikra nhikjê jarõxja me ikô'ă nhȳ. <sup>2</sup> Nhyam kam me kam krĩja amim,

—Adjým, dja te me tyk djà kêt djà nhô akati nhym arým me'ôjao mex, ane.

Ne kam Jeju kam no tyn kumex. Kute me'ôjao mex jabej rïto kumex. Adjým. Dja me'ôo mex nhym me arým 'ã axwe nhôn memã kum,

—Tãmwã ne kum me bakukràdjã kurêkumrêx ne pi'ók ràràrkam meo mexo ba, ane. <sup>3</sup> Nãm me kam no tyn kumex nhym Jeju arým me'ôo nhikra jarôxjamã kabên ne kum,

—Amrê tèn me ipôkri dja, ane.

<sup>4</sup> Ne kam me kukij ne memã kum,

—Amrêbê: ne me bakukãmãre Môjdjê pi'ók ràràr'ã memã karô. Mýj godja me kam nê? Godja me kam àpênh mex jabej nàr godja me kam àpênh punu jabej. Nàr godja me kam me utàr jabej nàr godja me kam me par jabej. Mýj godja me pi'ók ràràrkam nê? Be, ba dja ba me'ôjao mex. Djãm kôt me aje imã ijaxwe jarênhmã? ane. Nãm ane nhym me arým bèn kêt mex ne nhý.

<sup>5</sup> Nhym me kute kabên mar prãm kêtgam arým mekam kaprï:re ne. Ne kam arým nokà nhàn me omũ. Ne kam tu me'ôo nhikra jarôxmã kum, “Amrê anhikra katàt”, ane.

Nhym 'ýr ikra katàt tēm puron arým ikra mex ne. Arým prïne kum mex ne. <sup>6</sup> Nhym me bête pardjêu arým ngryk ne mã apôx. Ne kam on Erodjikôt me ba djwýnh'ýr mōn me'ýr bôx. Ne kam arým Jejuo aben man abenmã kum,

—Mýj godja gwaj baje Jeju bñn kadjy on? ane.

*Kute me krãptïo mex.*

<sup>7-8</sup> Nhym kam Jejumê kôt ba djwýnh ar me kurũm kato. Katon arým imôti'ýr mō. 'Ýr mōn arým 'ýr bôx. Nhym me krãptï: apýnh pyka djãri kurũm arkôt mōn bôx. Garrêja kurũm ne me kwý bôx. Nhym Djudêja kurũm me kwý bôx. Nhym me kwý krĩraxbê Djeruxarê kurũm bôx. Nhym me

kwý Idumêja kurũm bôx. Nhym me kwý ngôbê Djodão nhikjêbê apýnh kikre djãri kurũm bôx. Nhym me kwý krĩraxbê Xirumê Xidô kurũm mōn bôx. Jeju kute apýnh mýjja pumũnh kêt nhípêx djãri ne me arým omũn amũ memã 'ã ajarê nhym me arým kuma. Ne kam arým itepato arkôt mōn bôx. Me krãptï: bôx. <sup>9</sup> Nhym kam Jeju arým kôt ba djwýnh arkum,

—Gar ikuri kà'ô dji. Godja me ijo bikamýr jabej ba on me bête kãkam nhý, ane.

<sup>10</sup> Bir, kute me krãptïo mexkam ne apýnh me punu djãri kute kupênh prãm. Me krãptï: te kupênh prãmje ari Jeju kôt bikamênho ku'ên ingãnh kumex. Kam ne ar kute kuri kà'ô djirmã arkum kà jarê.

<sup>11</sup> Nhym me kôt apýnh me karô punu kute ar meo ba. Nhym me Jeju parbê rôrôk. Me karô kute Jeju pumũnhkam ne me mã: parbê rôrôk ne mã: kãj bête kum kabên ne kum,

—Ga abê Metĩndjwýnh Kra, ane.

<sup>12</sup> Nhym kam mã me karô punumã bèn týx ne kum,

—Dja ga me ipudju, ane.

*Kute ar kubê 12 janor.*

*Mat 10.1-4; Ruk 6.12-16*

<sup>13</sup> Ne kam arým krãnh'ã wabi. 'Ã wabin arým amikôt ar ku'uw. Kum ar kĩnh djãri ar ku'uw nhym ar arým 'ýr bôx. <sup>14-15</sup> Nhym kam arým amikôt ar umjuw. Ar kubê 12 pumjuw. Dja mã amimê aro ba nhym ar arým ýtãri omũn kabên maro ba. Nhym kam kute ar anorn kute arkum,

—Dja gar kãj bête memã ijã adjujarênh ar aban kam ikukwakam me punuo mexo aban kam me karô punu janor ne kujaêko aba, anhýrmã. Dja ã Jeju Ar kubê 12 mã ane. Ja kadjy ne amikôt ar umjuw. Nhym kam me aben djô'ã ar'ã abenmã kum,

—Kute ar anorja, anhýro ba.

16-17 Be, kute amikôt Ar kubê 12 pymjÿr nhidji jarênh kadji ne ja. Ximão. Ajbir ne Jeju kum Pedru jarê.

Xijagu. Djebedêu ne Xijagu dji.

Djuão. Xijagumê ne Djuão ar axikôt kator. Ajbir ne ar amêmã Bôanedu jarê. Na krikrit'ã ne ar idji amijakre.

18 Ängre.

Piripi.

Batormê.

Matêu.

Tôme.

Xijagu 'ödjuwÿ. Aupêu ne Xijagu ja dji.

Tadêu

Ximão 'ödjuwÿ. Idji nhikjêbê ne Xerodji.

19 Djuda. Idji nhikjêbê ne Ikadji. Ta dja kurê djwÿnhmã Jeju kanga.

Be, Ar kubê 12 nhidji ne ja. Jeju kute amikôt Ar kubê 12 pymjÿr ne kute ar anor ne ja.

*Me kute kum Xatanaj nhô àpênh jarênh.*

*Mat 12.22-32; Ruk 11.14-23, 12.10*

<sup>20</sup> Nhyam kam Jeju ar mōn arÿm kikre 'omã wadjã. Nhyam kam me krãpti: ajte ar'ã akuprô. Nhyam kam ar te kute ô kwÿ krênh mexmã.

<sup>21</sup> Nhyam Jeju kute meo ôbikwaja arÿm me krãpti: jarênh man abenmã kum, "Bârãm arÿm ajbã", ane. Ne kam kute o tÿm ne pa 'amÿnhmã kôt tê.

<sup>22</sup> Nhyam Môjdê kukràdjã mar djwÿnh kwÿ ne me arÿm krîraxbê Djeruxarê kurüm tēn mekôt bôx. Ne kam arîk Jeju'ã memã kum,

—Be, djãm Metîndjwÿnh kukwakam ne me karô punu kujaêko ba? Kati. Me karô punubê Bedjêbu ne o ba. Me karô punu nhô bēnjadjwÿr kukwakam kute me karô punu janor ne kujaêko ba. Nãm me ã Jeju'ã memã ane.

<sup>23</sup> Nhyam kam amiwÿr me ku'uw ne apÿnh kukràdjã djari'ã memã

mÿjja jakren 'ã memã ajarēn memã kum,

—Djãm mrãmri ne ba we Xatanaj kukwakam ô àpênh kujaêko iba? Kati. <sup>24</sup> Me aben djwÿnh tãm kum aben kurêkam ne kurê djwÿnh arÿm meo apêx. <sup>25</sup> Nâr, ô kikre tãm kam me krî godja me ta kum aben kurê jabej nhyam me arÿm aben bê me kungrà. Djãm mrãmri ne ba we Xatanaj kukwakam ô àpênh kujaêko iba? Kati. Djãm Xatanaj kum ô àpênh kurê? Kati. <sup>26</sup> Be, Xatanaj ren kum ô àpênh kurênh kujate nhyam ren ô me arÿm aben bê ajmã nhyam ren arÿm bēnjadjwÿr'ã aminhinomã amimê. Nhyam be, kati. Xatanaj kum ô àpênh kurê prãm kêt. Ne ba ren Xatanaj kukwakam ô àpênh kujate nhyam ren Xatanajdjwÿ kum ô àpênh kurê. Nhyam be, kati. Xatanaj kum ô àpênh kurê prãm kêt.

<sup>27</sup> Ga, me'ô tÿx nhûrkwãja pumû. Mÿj dja me kute ô nèkrêxo prôt kadji me'ô tÿx nhûrkwãmã àr on? Bir, dja me me'ô tÿx kumrêxo tÿm ne uwpre. Ne kam arÿm ûrkwãmã wadjàn kubê nèkrêxo prôt ne, ane. Mÿj'ã ne Jeju me'ô tÿx jarê? Bir, Xatanaj'ã. Dja me Xatanaj kumrêxo tÿm ne uwpren kam arÿm amim ô me ja pytä. Nãm ã Jeju memã ane. <sup>28</sup> Ne kam ajte memã kum,

—Kam ba me amã arê ga me ama. Me kute mÿjjaô bikênh kunîkôt ne Metîndjwÿnh me axweo aknon mekam ngryk kêt. Me kute Metîndjwÿnh japyrkam dja o aknon me kam ngryk kêt. <sup>29</sup> Nhyam be, dja me Metîndjwÿnh Karô japyrÿ nhyam arÿm mekam ngryk rã'ã ne memã axwe jarênh rã'ã: rã'ã ne. Nãm ã Jeju memã ane. Mÿkam ne ã memã ane?

<sup>30</sup> Bir, Metîndjwÿnh Karô ne mã Jejuo ba nhyam me arîk 'ã memã kum,

—Me karô punu ne ar o ba, ane. Nhyam kam arÿm Metîndjwÿnh

Karô'ã me kabên punu nêje me kukrà.

*Nã ar'ã ujarênh.*

*Mat 12.46-50; Ruk 8.19-21*

<sup>31</sup> Nhyam kam Jeju nhôbikwa ar kute o tÿm ne pa 'amÿnhmã kôt mô. Jeju nãmê kamyre ar axikôt apôx ar Jejukôt tên kam arÿm mekôt bôx. Ne kam ar arek bôm ku'ê. Arek ku'ên arÿm 'ÿr me'ô jano. Kute amiwÿr 'wÿr kadjy 'ÿr ano. <sup>32</sup> Nhyam me krãpti: bu'ã ku'ê nhyam me'ôja 'ÿr bôx ne kum,

—E kum, bôm anãmê atônhre ar amã kabên, ane.

<sup>33</sup> Nhyam kum,

—Be, mÿj dja mekam kute ba kum, “Nhirwa”, ane nâr kum, “Akmere”, ane? ane.

<sup>34</sup> Ne kam ari me bu'ã ku'êkôt krân memã kum,

—Ota, inãmê ikamy ne ja. <sup>35</sup> Dja gar Metîndjwÿnho kÿnh kadjy kabên man kôt ar amijo aba. Ba kam arÿm ar amã, “Akmere” nâr amã, “Àpnhîre”, ane nâr amã, “Nhirwa.” Nãm ã Jeju arkum ane.

#### 4

*Bàygogo'ã ujarênh.*

*Mat 13.1-9; Ruk 8.4-8*

<sup>1</sup> Ne kam akati tãmkam tên arÿm imôti mÿrri nhÿ. <sup>2</sup> Nhyam kam me krãpti: 'ã akuprô. Nhyam kam arÿm mebê tên kâkam nhÿ nhyam me krãpti: arÿm ngô mÿrri kum dja. <sup>3</sup> Nhyam kam arÿm apÿnh kukràdjã djari'ã memã mÿjja jakren memã 'ã ajarê. Ne memã kum,

—Ë, ô pur djwÿnh ne kute ô purkam bàygogo kremã 'ÿr o tê. 'ÿr o tên o bôx ne kam ar 'yo ukabêr mrã, ane. Nãm me kute mÿjja kre kadjy tu mÿjja 'yo ukabê, bàygogo 'yja ne me kute purkam kremã o mrân kam purkam o ukabêr mrã. Kute mrãmri ne me kute katêbàri 'yo ukabêr mrãnhja pyrãk.

<sup>4</sup> Nãm Jeju memã kum,

—Be, me'ô ne ar bàygogo 'yo ukabêr mrã. Nhyam 'y kwÿ

pryam rôrôk. Nhyam kwênh prÿne kuku. <sup>5</sup> Nhyam kwÿ kênpo'ã pyka purorrekam rôrôk. Nhyam kam pyka purorrekam ingrôt kukrà kêtukumrêx. <sup>6</sup> Nhyam kam kÿjrÿm myt nhÿn arÿm 'y nhingrôt ga nhyam kajot ne arÿm ty. Arê jabjê kêtka ne ty. <sup>7</sup> Nhyam 'y kwÿ mrÿnhikam rôrôk ne kam mrÿnhimê ro'ã ingrôt ne. Nhyam kam prÿne o akno nhyam arÿm bàygogo 'y kêt ne. <sup>8</sup> Nhyam 'y kwÿ pyka mekkam rôrôk ne ingrôt ne kam abatãnh ne. Ne arÿm apÿnh bàri ku'ê djari nhyam kwÿ'ã kãjbé iyy mex nhyam 'y'ã akre kubê 30. Nhyam kwÿ iyy mekkumrêx nhyam 'y'ã akre kubê 60. Nhyam kwÿ iyy jabjê nhyam 'y mexti:re ne kam 'y'ã akre kubê 100. Nãm ã Jeju Metîndjwÿnh kukràdjã'ã apÿnh mÿjja jakreo ane. <sup>9</sup> Ne ajte memã kum,

—Gop me ajô ajamak mex jabej tu amim ikabên markumrêx, ane.

<sup>10</sup> Nhyam kam me krãpti mã mô. Mã mô nhyam Jeju ar arÿm ate nhÿ. Nhyam bu'ã ar jamê kôt ba djwÿnhbê 12 ar arÿm kukij ne kum,

—Mÿkam ne ga apÿnh kukràdjã djari'ã mÿjja jakren memã ajbit jarê? ane.

<sup>11</sup> Nhyam arkum,

—Bir, djãm me kunÿ kute ikukràdjã marmã? Kãjkwakam Bênjadjwÿr djwÿnh kute amim me utâr ne ar meo ba'ã ikabên kukràdjã djãm me kunÿ kute marmã? Kati. Ar gajbit ije ar amã arênhô amirÿt gar aje marmã. Nhyam be, me wãbê ne ba udju ne. <sup>12</sup> Me wã kute mar kajgokam ne ba apÿnh kukràdjã djari'ã memã mÿjja jakren memã mÿjjabit'ã ajarê. Me kute ikukràdjã mar kajgo wã ne amrêbê: me bakukãmãre memã arên memã kum,

“Me te memã mÿjja jakre nhyam me omÿnh kajgon mã amim omÿnhkumrêx kêt. Nhyam me te memã mÿjja jarê nhyam me me kabên maro krân mã mar kêt. Mã kukràdjã'ã

mýjja kute amijakreja mar kêt.

Kute Metîndjwýnh'ýr amijo akêx kêt nhym me axwekam ngryk rã'ãmã."

Nãm me bakukãmãre ã me wã'ã memã ane. Kam ne ba apýnh kukràdjã'ã apýnh mýjja jakren memã mýjjabit'ã ajarê. Me wã kute mar kajgokam.

<sup>13</sup> Ne kam ajte arkum,

—Be, ikukràdjã ije ajbir 'ã me'õ kute bàygogo 'yo ukabêr jakreja djãm ar aje mar kêt? Be, dja ba apýnh ikukràdjã'ã mýjja jakre rã'ã. Mýj godja gar amũ ikukràdjã ja mar on. <sup>14</sup> Be, Metîndjwýnh kabên'ã ujarênh djwýnh ne arým memã arê nhym me kuma. <sup>15</sup> Kuma kute mrãmri ne 'y kwý prykam rôrôk pyrãk. Nhym ate Xatanaj totokbê jãm mebê o amijakren mebê Metîndjwýnh kabêno akno.

<sup>16</sup> Kênkam 'y rôrôkja ne me kute amim Metîndjwýnh kabên mar 'iry kêt ne kangaja'ã amijakre. Nãm me myt tãmkam Metîndjwýnh kabên man bit kum kînhkumrêxo tēm kajgo. <sup>17</sup> Kute tu amim markumrêx kêtê. Ajkwaobit ne kute mar. Kute 'y nhingrôt ne arê kêt kam tēmbê tykja pyrãk. Kute amim mar 'iry kêt nhym ate apýnh me kaprî djari me'ýr bõx nhym me arým kanga.

<sup>18</sup> Mrýnhĩkam 'y rôrôkja ne me kute Metîndjwýnh kabên mar ne kam ate ajte kute jãm mýjja marja'ã amijakre. Nãm me arým Metîndjwýnh kabên man <sup>19</sup> kam 'ãno ãm kêt ne amim, "Mýj dja ba nēn inhõ kwý krēn mex ne inhõ kubêkã mex? Ikanêkam mýj dja ba nē"? ane. Nãm pykakam mýjjabít kam ar no katon axwe umar. Ne kam amim pi'ók kaprîo atom rax prã:m ne ajte apýnh mýjjao atom rax prã:m. Djãm kute amim mýjjao atom raxkam mrãmri umar mex? Kati. Bir, me arým õ mýjja rũnhkam mrãmri umar punukumrêx. Ga, mrýnhĩ kute

bàygogoo bikēnh nhym kam iyy kêtja pumũ.

<sup>20</sup> Ga, me'õ bàygogo 'yo ukabêr tē nhym ajte kwý pyka mexkam rôrôkja pumũ. Nhym arým ingrôt ne abatãnh ne. Abatãnh ne arým iyykam 'y kume:x. Me kwýdjwý ne me memã Metîndjwýnh kabên jarê nhym me arým tu amim markumrêx. Ne kam maro amũ amikamēn arým mar rax ne. Mar rax ne arým ukaprîkumrêx. Me kwý ne me kãjbê ukaprî kryre kute mrãmri ne bari kwýkam iyy mex nhym kam 'y kubê 30 pyrãk. Nhym me kwý ukaprîkumrêx kute mrãmri ne bari kwýkam iyy mexkumrêx nhym kam 'y kubê 60 pyrãk. Nhym me kwý ukaprîti:re kute mrãmri ne bari kwýkam iyy mexti:re nhym kam 'y kubê 100 pyrãk. Me ukaprîkumrêx nhym Metîndjwýnh arým mekam kînhkumrêx. Mekam kaprîre kêtumrêx. Nãm ã Jeju arkum ane.

*Kute amikukràdjã'ã ngõnhpõk jakre.*

*Ruk 8.16-18*

<sup>21</sup> Ne kam arkum,

—Be, godja me me'ýr ngõnhpõko bõx jabej djãm me kute mýjja 'õkõt o bipdjur got, kute kãnoipõko 'ã pro got? Nãr djãm me ikwã djã krakri me kute umjýr got? Kati. Ngõnhpõk ne me kum angij ne tu parkam kēnhkam umjuw. <sup>22</sup> Ba ar amã arê gar ama. Ikabên kukràdjã ije 'ã apýnh mýjja jakren mebê udjurja dja í me kunĩmã amirîtkumrêx nhym me kunĩ kuma. <sup>23</sup> Gop ar ajamakkre mex jabej tu amim ikabên markumrêx. Nãm ã Jeju arkum ane. <sup>24</sup> Ne kam ajte arkum,

—Ar ikabên mar 'ãno dja. Ar ajamakkre mex kõt dja ba ar amã ikabên jarê. Dja gar tu amim ikabên markumrêx ba arým ar amã ikabên kumex jarê. <sup>25</sup> Mýkam? Bir, me kute tu amim ikabên markumrêx jamã dja ba mã kwý rax ne arēnhõ tē nhym me arým kwý rax ne

kuma. Nhyim be, me kute ikabên mar kajgoja dja Metîndjwýnh arým mebê o akno, mebê ikabên mar kajgo jao akno. Nâm â Jeju kôt ba djwýnhmã ane.

*Mýjja 'y'ã ujarênh.*

<sup>26</sup> Me kute memã Metîndjwýnh kabên jarênh nhyim ta kute arým memã amak bôn timer nhyim me kute amũ mar kamênh ne kute arým mar rax ne. 'Ă ne Jeju memã kum,

—Be, Metîndjwýnh kute amim me utâr ne ar meo baja'ã ne bãygogo amijakre. Be, me'õ ne bãygogo 'yo ukabêro tẽn arým 'y kre pa. <sup>27</sup> Ne kam akati kunikôt ate kadjy krã. Nhyim kam 'y ingrôt ne abatãnh tẽn arým príti. Nhyim kam kre djwýnh amim, “Je, mýj ne abatãnh kadjy amijon?” ane.

<sup>28</sup> Be, bãygogo ta ne pykakam abatãnh ne arým ô. 'Y kumrêx ne pykakam ikwã. Ne kam arým ingrôt. Ne abatãnh tẽn arým príti. Prítin arým tujarô. Tujarôn arým iijy ajkapĩ. <sup>29</sup> Ajkapĩn kam arým prý ngrã. Nhyim me'õja arým 'ãno djan êo mõi. Be, Metîndjwýnh kute ar meo ba ja ne me bãygogo kôt â amijo ane. Nâm â Jeju memã ane.

<sup>30</sup> Ne kam ajte memã kum,

—Metîndjwýnh kute amim me utâr ne ar meo baja. Mýj ne kute me urak? Ba ar amã arê gar ama.

<sup>31</sup> Me amikraxkam kajgo kute motadu 'y kajgo pyrãk. Pykakam 'y bimãnhkam 'y kryre. Apýnh pidjô 'y djari kam 'y ne kute rũho motadu 'y jakrenh mex ne. <sup>32</sup> Pykakam motadu 'y rôrök ne kam arým ingrôt. Ingrôt ne arým rũnh mõi. Rũnh mõi arým amipãnh pidjô bari kunĩ rê. Ne arým pa koror mex ne. Nhyim kwênh arým amykrãkôt apýnh pakam ku'ê. Nâm â Jeju memã ane. Me kute amim Jeju marmã nhyim arým ja pydjin kadjy

amima nhyim arým ja kadjy amiman 'ã tým nhyim ja kôt 'ã tým nhyim ja 'ã tým nhyim arým 'ã krãptĩ ne. 'Ă ne 'y kryre ja jakre.

<sup>33</sup> Mýjja kute ajbir ja pyrãk krãptĩ ne Jeju memã kukrãdjã'ã akren memã 'ã ajarê. Me amakkre mex kôt ne memã 'ã ajarê. <sup>34</sup> Ne apýnh mýjjabit'ã ajarê. Nâm kute Metîndjwýnh kukrãdjã'ã mýjja jakrebit ne memã 'ã ujarênh ar ba. Ne kam arým kôt ba djwýnh ar ate ýrkam prĩne arkum kukrãdjã jarênh mex. Kukrãdjã'ã mýjja kute amijakreja prĩne arkum arênh mex.

*Kôkmã bẽn tỳx.*

*Mat 8.23-27; Ruk 8.22-25*

<sup>35</sup> Nhyim akati tãm kam arým ar'ã myt wadjã nhyim Jeju arkum,

—Gwaj on ne ikjêmã rê, ane.

<sup>36</sup> Nhyim kam ar me krãptĩmã kum,

—Me on ajmã, ane. Nhyim Jeju

kôknhökakam ýr rã'ã nhyim ar tu amimê o mõi. Nhyim me kwý kã kwýkam arkôt mõi. <sup>37</sup> Nhyim kam

na 'itỳx ar'ã ruw nhyim kôk 'itỳx wabê nhyim kam ngô arým aben

pumjuw ne kã nhiby aton arým kã krekam bikapĩno mõi. Kã krekam

bikapĩno mõi nhyim arým ipu 'ýr. <sup>38</sup> Nhyim wãnh Jeju kã katêkam krã

japar djã'ã krã djin ôto nõ. Ôto nõr mex katikôt nhyim kôt ba djwýnh ar

arým tok ne kum,

—E kum, ujarênh djwýnh, ngô kute gwaj banhimex 'ýr ga ate akrãnh anhõto nõ, ane.

<sup>39</sup> Nhyim arým kãjmã djan kôkmã bẽn tỳx. Kum bẽn tỳx ne ngômã kum,\*

—Anhikrê, on akubyn aminê, ane.

Nhyim arým kôk djãbêr amikrãta nhyim ngô arým tu mê ne nõ.

<sup>40</sup> Nhyim kam arkum,

—Je tô mýkam ne gar ã atĩn prãmo ane? Mýkam ne gar tu amim imarkumrêx kêt? ane.

\* 4:39 Adjãkam kute kabêno mýjja kunĩ nhipêxkôt arým kôkmã bẽn tỳx.

<sup>41</sup>Nhym ar madjà kretin abenmã kum,

—Je tô mỳj me'õ got ja? Nãm tu gêt kôkmã kabên nhym tu kabên kôt anhikrê, ane.

## 5

*Me karõ punu krãptĩ kute ar me'õo ba.*

*Mat 8.28-34; Ruk 8.26-39*

<sup>1</sup> Ne kam imôti nhikjêmã bôx. Kam ne mebê Djeradja nhõ pyka.

<sup>2</sup> Nhym kam Jeju ar akàxkam bôx ne arým wabin dja. Nhym ad-jynkêt ne me'õja pyka krã kurüm katon 'yr tẽ. Me karõ punu ne ar o ba. <sup>3</sup> Pyka krãkam ne ar ba tüm. Nhym me te kàxirãxo ari uwpreo ba. <sup>4</sup> Nãm me te kadjy kàxirãxo te djê djãmẽ kàxirãxo kàkrã djê djã mỳn te o uwpre nhym mã ari kàkrã djê djã rênho ba. Ne mã ari kàxirãxo te djê djã kukênho ba. Nhym me kute unênh mex kadjy te: me tỳxo kute uràk'õ prãmje. <sup>5</sup> Nhym akati kunikôt ne akamãt kunikôt me'õja krãnhre'ã ar ba. Ne me tykmã kikre mẽ amijo kajkepo ba. Nãm ari âmra ban ari kêno amijayro ba. <sup>6</sup> Me'õja katon arým amybým Jeju pumũ. Omũn arým tu 'yr prôt ne. Prôt ne 'yr bôx ne arým ibôn nhỹ. Kute kum amijo à'wỳr kadjy ne parbê ibôn nhỹ. <sup>7-8</sup> Nhym kam kum kabên ne kum,

—Me karõ, apunure. On kum anhire, ane.

Nhym me'õ me karõ punu kuk-wakam arým kum kabên ne. Kãj bê kum âmrakam kum kabên ne kum,

—E kum, mỳj nã Jeju? Abê kãjkwakam Metĩndjwỳnh Kra. Mỳj ne ga aje ijo mã? Dja ga Metĩndjwỳnhmã akabên pydjĩn jarên ijã kum, “Dja ba kamjêr kêt”, ane. Dja ga ã Metĩndjwỳnhmã anen arým ikamjêr kêt ba arým itokry kêt. Nãm ã me'õ kum ane.

<sup>9</sup> Nhym kum, “Mỳj ne anhidji kute”? ane.

Nhym kum,

—Me ikrãptĩ:kam, inhidjibê ne krãptĩtire, ane.

<sup>10</sup> Ne kam amijo a'uw ne kum,

—Kwãrik wãnh me ja môr djã kurüm me ijanor kêt, ane.

<sup>11</sup> Nhym wãnh angrô jamy krãptĩ: krãnhrekam àkur mõ. <sup>12</sup> Nhym me karõ punu krãptĩ amijo a'uw ne kum,

—Gop angrô jamymã me ijano ba me kum wadjã, ane.

<sup>13</sup> Nhym memã kum, “Aj mã”, ane.

Nhym me karõ punu krãptĩ arým me'õmã iren kurüm kato. Katon arým angrô jamymã wadjã. Nhym angrô jamy arým amibêx ne tu pyka krã'yr'ã aparmã prôt. Prôt ne arým imôtikam nox. Nox ne arým ngõo aminhimek ne arým kunĩ ty. Angrô jamy kubê 2.000 ne ty.

<sup>14</sup> Nhym wãnh angrô jamyo djuw mex djwỳnh ar arek omũnhõ dja. Ne kam mã krĩraxmã tẽn arým memã arê. Arwãkam me jamẽ ne memã arê. Nhym me kute mỳjja pumũnhmã amũ 'yr mõ. <sup>15</sup> Jeju'yr mõn 'yr bôx. Nhym me'õ me karõ kute kum irerja arým arek nhỹ. Nãm arým kã jadjãn no mextiren nhỹ. Nhym me kum uma ne. <sup>16</sup> Nhym ar kumrêx kute omũnhja arým me'õja'ã ajarê. Ne ar ajte angrô jamy'ã ajarê. <sup>17</sup> Nhym kam me Jejumã à'wỳrmo krax ne kum,

—Gop on me inhõ pyka kurüm akato, ane.

<sup>18</sup> Nhym Jeju ajte kàkam ÿrmã tẽn nhym me'õ me karõ kute kum irerja kum amijo a'uw ne kum,

—Ba mã akôt ajkamẽ, ane.

<sup>19</sup> Nhym kum,

—Kati, mã. Akubyn anhũrkwã 'yr tẽ. Aje meo anhõbikwa wã'yr tẽ. Memã Bẽnjadjwỳr djwỳnh'ã ajarê. Kum akaprĩn kute ajo mex'ã ajarê, ane.

<sup>20</sup> Nhym kam arým mã tẽn amũ pyka nhidjibê Krĩraxbê 10'yr bôx. Ne kam Jeju kute o mex'ã me kunĩmã ujarênh ar ba. Nhym me

kunĩ te kute mỳjja marmã kam no tyn ku'ê.

*Me'õ kurerer tyk'ã ujarēnh.*

*Mat 9.18-19; Ruk 8.40-42*

<sup>21</sup> Nhyam kam Jeju ajte kãkam nox ne akãx nhikjẽmã mō:n kam bõx. Ne kam wabin dja. Nhyam kam ajte me krãptĩ: 'ã akuprõ.

<sup>22</sup> Nhyam me'õbê Djajru 'yr tẽ. Mebê idjaer bikprõnh djãkam kubê bẽnjadjwyr'õ. Nãm 'yr tẽn arỳm omũ. Omũn kute kum rax jarēnh kadjy tu parbê tỳm ne nõ. <sup>23</sup> Ne krao a'u:w ne kum,

—Wãnh ne ikra prĩtire nõn arỳm tyk 'yr. Gu 'yr ga 'ã anhikra dji gẽ à kêt ne imã tĩn, ane.

<sup>24</sup> Nhyam arỳm kõt tẽ. Tẽ: nhyam me krãptĩ: prĩne aẽr mex ne kõt mō. <sup>25</sup> Nhyam wãnh me'õ nire kõt tẽ. Kamrõ mã: apõx'ã ne arỳm amex kubê 12 apẽx. <sup>26</sup> Nhyam kamã me ta kute amijõ mỳjja marja krãptĩ aben totokmã te kaneo ba. Djãm kam arỳm mex got? Kati. Me õ'ã ãm mã tokryõ tokry. Ne mã memã o pãnh'ã arỳm õ pi'õk kaprĩ kunĩ krẽ. Ne kam mex kêt ne ãm punu mex mō.

<sup>27</sup> Ne kam me kute Jeju'ã ujarēnh man arỳm 'yr tẽ. Me krãptĩ: Jejukõt mō: nhyam nija mekõt amibẽx mex ne arỳm kõt bõx. Kõt bõx ne tu Jeju nhibũmkõt 'ã kubẽkã kupê. <sup>28</sup> Be, kute o anhỹr kêttri ne amim,

—Ba 'ã kubẽkãbit kupẽn arỳm imex ne, ane.

<sup>29</sup> Nãm 'ã kubẽkã kupẽn kupẽnhmẽ ro'ã nhyam arỳm kamrõ ngrã nhyam arỳm amikam amimex ma. <sup>30</sup> Nhyam Jeju on kute o mekõt amikam kuman arỳm me ipõkri akubyn akẽx ne memã kum,

—Nhyam ne ijã kubẽkã kupê? ane.

<sup>31</sup> Nhyam kõt ba djwỹnh kum,

—Djãm me krãre ne me akuno ga, “Nhyam ne ikupê”? ane, ane.

<sup>32</sup> Nhyam kute me'õmã katormã ari mekõt krã. <sup>33</sup> Nhyam nija arỳm kute amimex markam 'yr bõx.

Nãm umaje tertet ne tu parbê tỳm. Parbê tỳm ne arỳm prĩne kum amijarēnh kum,

—Mrãmri, ba ne ba akã kupê ga arỳm ijo mex ne, ane.

<sup>34</sup> Nhyam kam kum,

—Àpnhĩre, ga ne ga tu amim ikamnhĩxkumrẽx ne arỳm amex ne. Adjumar mex ne tẽ. Arỳm amexkumrẽx, ane.

<sup>35</sup> Nãm ã kum anhỹro dja nhyam me kwỹ bẽnjadjwyr Djajru nhũrkwã kurũm tẽn ar kajpan arỳm Djajrumã kum,

—Arỳm ne akadjwỹx akuno. Kwãrĩk wãnh ijukri ujarēnh djwỹnh kunor kêt, ane.

<sup>36</sup> Nhyam Jeju Ar kubê ate krãn arỳm Djajrumã kum,

—Kwãrĩk wãnh amã akra tyk pyma kêt. Djã gãm tu amim ikamnhĩxkumrẽx, ane.

<sup>37</sup> Ne kam Pedrumẽ Xijagumẽ Djuãõ arkum,

—Ar gajbit dja gar ikõt tẽ, ane.

Ne bu'ã me ku'ẽmã kum,

—Me arek jakam dja, ane.

Djuãõmẽ ne Xijagu ar axikõt kato.

<sup>38</sup> Nãm memã anen kam ar Djajru nhũrkwãmã tẽn bõx. Nhyam wãnh me kangao kumex. Me muw ne abej ãmrao kumex nhyam Jeju arỳm me omũ. <sup>39</sup> Ne kam arỳm me'yr wadjàn memã kum,

—Mỳkam ne ga me akangao akumex ne muw? Djã nãm prĩtija ty? Kati. Nãm õto nõ, ane. Kute akubyn o tĩnmã. Kam ne ã memã ane.

<sup>40</sup> Nãm memã ane nhyam me arỳm 'ã bẽno ajkẽn keketo kumex. Nhyam kam arỳm bõm me ano nhyam me kunĩ kato. Ne kam bãmmẽ nãmẽ kõt ba djwỹnh ar ajbito mõn prĩti nhikwã djã 'yr aro wadjã. <sup>41</sup> Ne kam prĩti nhikra 'amỹn kum, “Tarita kumĩ”, ane.

Nãm ren me bakabẽnkam kum,

—Prĩtire, amã ne ba ikabẽn. Kãjmã dja, ane.



<sup>42</sup> Nãm kum ane nhym arÿm ar aêrbê kâjmã djan ar mrã. Nhym ar arÿm kôt madjà kreti. Prĩti'ã ne amex kubê <sup>43</sup> Nhym kam arkum kabên ne amijã arkum karôn arkum, “Djã gãm ar ipudju”, ane.

Ne ajte arkum,  
—Ar kum mÿjja'õ ngã gê kukrê, ane.

## 6

*Õ pyka djwÿnhkam bõx.*

*Mat 13.53-58; Ruk 4.16-30*

<sup>1</sup> Ne kam arÿm memã kàx ne amũ õ pyka djwÿnhmã tẽ. Nhym kôt ba djwÿnh ar kôt mõ. Nhym kam arÿm 'ÿr bõx. <sup>2</sup> Nhym ar'ã arÿm pi'ók rãrãr. Nhym arÿm mebê idjaer bikprõnh djã'ÿr tẽn kam 'ÿr bõx ne arÿm wadjã. Ne kam kute memã amikukràdjã jarênh kadjy arÿm amikrax ne. Nhym me krãptĩ kabên man kam no tyn kumex ne ari abenmã kam,

—Je tô nhym nã kum me kukràdjã ja jarê nhym ã kabên mexo ane. Nhym ne kum àpênh'ã karõ nhym ã mÿjja nhípêxo ane. Mÿjja pumũnh kêtukumrêx ne ipêx nhym kumex. <sup>3</sup> Be, Jejubê ne pĩ kênh djwÿnh kajgo. Marij kurũm ne kato. Kôt ar apõxjabê ne Xijagumê Jõdjemê Djudamê Ximãomê. Be, ar axikôt apõx ne ja. Kanikwÿnhdjwÿ ar me barõ'ã ar ba. Djãm atemã me'õ? Kati. Tãm. Me bajõ tãm. Ne kam ã àpênho ane. Nãm me ã ari abenmã anen kam arÿm kubê Jeju kĩnh no kati. <sup>4</sup> Nhym kam amijã memã kum,

—Pyka kunĩkôt me Metĩndjwÿnh kukwakam ujarênh djwÿnhmã kâjmã rax kamênho ba. Nhym be, õ pyka djwÿnhkam me jabit ne me ar prãro ba. Õbikwa djwÿnhkam ar ja, õ kikre djwÿnhkam ar ja ne me ar prãro ba, ane.

<sup>5</sup> Ne kam te kute õ pyka djwÿnhkam mÿjja pumũnh kêt krãptĩ nhípêx prãmje. Te me krãptĩo

mex prãmje. Me kute aparmã rax kamênh prãmkam. Nãm me punu ngrêrebit'ã ikra jadjuw ne meo mex. <sup>6</sup> Ne mekam no tyn djan amin,

—Je tô mÿkam ne me kute inhõ pyka djwÿnhkambit amin imar kêtukumrêx, ane.

*Kute Ar kubê 12 janor.*

*Mat 10.1-15; Ruk 9.1-6*

Ne kam arÿm tẽ. Apÿnh krĩkôt tẽ. Memã amikukràdjã jarênho tẽ. <sup>7</sup> Ne kam amiwÿr Ar kubê 12 'uw nhym ar arÿm 'ÿr bõx. 'ÿr bõx nhym kute amũ ar anor kadjy arÿm aro aben nhikjê. Ne ar kute kukwakam me karõ punu janor ne kujaêk kadjy arkum amipyama jadjã. <sup>8</sup> Ne kamã arkum 'ã karôn arkum,

—Ar amõr kadjy kwãrĩk wãnh mÿjja krãptĩ byr kêt. Dja gar aka-jpar djãbit by. Kwãrĩk wãnh mokã byr kêt. Kwãrĩk wãnh anhõ katõk'y djãkam pi'ók kaprĩ byr kêt. <sup>9</sup> Ne ar aparkã ponh jangjên ar anhinõkã pÿnhbit jangjê, ane.

<sup>10</sup> Ne kam ajte arkum,

—Dja gar apÿnh krĩ'ÿr mõ. Nhym me'õ arÿm ar amã aminhũrkwã jarê. Kumã dja gar wadjãn kambit anhĩkwã. Ne kam me õ krĩrax kurũm ar amõrkambit dja gar anhũrkwã 'õdjwÿ jabej. <sup>11</sup> Nhym godja me ar abê aminhũrkwã nê jabej ne kute ar amar prãm kêt jabej gar mebê aparkã'ã me õ pyka ka'u. Me kurũm akatorkam pyka ka'u. Aje me kangao amirĩt kadjy. Ba ar amã arê gar ama. Amrêbê: krĩraxbê Xõtõmamê Gomorakam me axwekumrêx. Dja ï Metĩndjwÿnh kute memã axwe pãnh jarênh kadjy akati bõx. Nhym be, ajbir me krĩ jakam dja me axwe pãnhõ amrêbê me tũm wã jakre. Me kute ar abê aminêkam dja me axwe pãnhõ me tũmwã jakre. Nãm ã arkum karõ ane.

<sup>12</sup> Nhyam kam ar amũ mōn kàj bê me akreo ban memã kum,

—On me amikam akaprïren wãnh ajaxwemã anhiren Metïndjwÿnh amijo akẽx, ane.

<sup>13</sup> Ne arÿm me karõ punu krãptĩ kute ar meo ba jano nhyam arÿm memã iren mã mō. Nhyam ar me kanê krãptĩ kungrã. Mÿjja kangô kute rōny kangô pyrãko me kungràn meo mexo ba.

*Djuão'ã ujarẽnh.*

*Mat 14.1-12; Ruk 9.7-9*

<sup>14</sup> Nhyam kam me amũ Jeju jarẽnh ipõk. Nhyam kam mebê idjaer nhõ bẽnjadjwÿr rax nhidjibê ne Erodji. Arÿm ne me kute Jeju jarẽnhja ma. Ne kam arĩk Jejuo Djuão ne memã kum,

—Ngômã me angjẽnh djwÿnhbê Djuão arÿm akubyn tĩn ne ar ba. Be, tyk ne akubyn tĩnkam ne mã mÿjja pumũnh kêt nhipẽxo ba, mã me punuo mexo ba, ane.

<sup>15</sup> Nhyam me ja arĩk Jeju'ã memã kum,

—Be, kubê Metïndjwÿnh kukwakam ujarẽnh djwÿnhbê Erij, ane.

Nhyam amũ me ja 'ã memã kum,

—Be, kubê ne Metïndjwÿnh kukwakam ujarẽnh djwÿnh'õ. Nãr, kute amrêbê: Metïndjwÿnh kukwakam ujarẽnh djwÿnh'õ pyrãk, ane.

<sup>16</sup> Nhyam bẽnjadjwÿr rax Erodji kute Jeju jarẽnh markam 'ã memã kum,

—Be, Djuão ne wã. Ba ije kadjy me anor nhyam me kute mut krã'yr, arÿm akubyn tĩn ne ar ba, ane.

<sup>17-18</sup> Be, me kute Djuão bĩn kêttri ne Erodji kamyre. Idjibê ne Piripi. Piripi prõ nhidjibê ne Erodji. Nhyam kam Erodji arÿm kamyrebê prõ pytàn ar o ba. Nhyam kam Djuão nêje kum kabẽn ne kum,

—Metïndjwÿnh kukràdjã kupa'ã ne ga akamyrebê prõ pytã, ane.

Nhyam Erodji kuman arÿm Erodjimã apnê. Djuão'ã kum apnê

nhyam arÿm 'ÿr me krãkamngõnh jano. Nhyam me arÿm o tÿm ne kubê ijê. <sup>19</sup> Nhyam kam Erodji ari kum

Djuão kurêo ban te kute bĩnmã 'ã amijakreo ba. <sup>20</sup> Erodji kum Djuão pymakam Erodji te 'ã amijakreo ba. Erodji mã 'ã amim,

—Djuão ne katàt ar amijo ban Metïndjwÿnh mexo mex, ane. Nãm mã amim anen ar Erodjibê utar mexo ba.

Djuão kute Erodjimã Metïndjwÿnh jarẽnh o ÿr kunĩkõt Erodji ari amim,

—Je tō mÿj dja ba amijon? anen te kute kabẽn mar ne kõt kute amijo anhÿr prãmje. Nhyam be, kum Djuão kabẽn mar prãmã.

<sup>21</sup> Erodji kum Djuão kurêo ba nhyam kam arÿm mrãmri kute bĩn kadjy õ akati bõx. Erodji rwÿk djãkam õ akati arÿm bõx. Nhyam õ akatikam arÿm bu'ã bẽnjadjwÿrreja ro'ã àkuro nhÿ. Apÿnh õ me rũnh djari, õ krãkamngõnh nhõ bẽnjadjwÿr djari, õ pykabê Garrêjakam me õ nêkrêx rũnh djari, me kunĩ õ akati kadjy Erodji'ã akuprõ. <sup>22</sup> Ne õ kwÿ krêno nhÿ nhyam Erodji kra kurerer arÿm me'ÿr wadjã. Ne kam memã to nhyam me arÿm kum kĩnh. Erodjimê me ro'ã ÿrja kum kĩnh. Nhyam kam Erodji kurerermã kum,

—Mÿj ne ga amã kĩnh? Dja ga amã mÿjja'õ kĩnh ne imã arê ba arÿm amã kungã, ane.

<sup>23</sup> Nãm kum kabẽn jarẽnh mãmdjin kum,

—Be, amã ikabẽn kajgo kêtukumrêx nhyam Metïndjwÿnh arÿm ima. Dja ga amã mÿjja'õ kĩnh ne imã arê ba arÿm amã òrkumrêx. Nãr godja amã inhõ pyka kuto katê kĩnh jabej ba arÿm amã kungã. Mrãmri ne ba tu amã ikabẽn jarẽnhkumrêx, ane.

<sup>24</sup> Nhyam kam arÿm katon nã kukij ne kum, “Õ mÿj dja ba kum arê?” ane.

Nhyam kum,

—Xô, ngômã me angjênh djwýnhbê Djuão krã'ã dja ga 'wý, ane.

<sup>25</sup> Nhyam amibêx ne ajte bēnjadjwýr rax'ýr wadjàn kum,

—Ô kum amikrà kêt ne ngômã me angjênh djwýnhbê Djuão krã dja ga imã angã. Ngônh purortikam adjàn o bôx ne imã angã, ane.

<sup>26</sup> Nhyam kam bēnjadjwýr rax arým kaprîren ôkre kadjwýnhbê amim,

—Je, arým ne ba mrãmri kum ikabēn jarēnh māmđi nhyam Metĩndjwýnh arým ima. Jakam ba te ije kum, “Kati”, anhýr prãmje. Inhõ me rũnh mrãmri ikabēnkumrêx jabej ikam no tyn kumex, ane.

<sup>27</sup> Ne kam on me par djwýnhmã kabēn ne kum,

—Amrê Djuão krão aprôt, ane.

<sup>28</sup> Nhyam arým mebê ijê djà'ýr tēn wadjàn arým Djuão mut krãtan kam arým ngônh purortikam krã djà. Ne kam kurerermã o tēn o bôx ne arým kum kungã. Nhyam arým nãmã kungã.

<sup>29</sup> Nhyam kam Djuãokôt ba djwýnh ar arēnh man arým 'ýr tē. 'Ýr tēn 'ýr bôx ne kam arým Djuão nhĩ mýn o tēn arým kēnkrekam adjà. Be, me kute Djuão bĩn'ã ujarēnh ne ja.

*Kute mebê 5.000o djuw mex.*

*Mat 14.13-21; Ruk 9.10-17; Dju r 6.1-14*

<sup>30</sup> Ne kam Jeju kute ar anorja ne arým apýnh krĩkôt tē:n kam arým akubyn Jeju'ýr tēn 'ýr bôx ne 'ã akuprô. Ne kam kum amijã ajarê. Kute mýjja nhípêx kunĩ'ã kum ajarê. Kute memã kukràdjà jarēnh kunĩja kum 'ã ajarê. <sup>31</sup> Nhyam me krãptĩ: Jeju ar'ã aben japanho dja. Ar 'ã aben japanho dja nhyam ar te ô kwý krēn kadjy amijo ane. Nhyam kam Jeju arkum,

—Gwaj on arwãmã mebê tēn kam bôx ne bakôkam kôto nhỹ, ane.

<sup>32</sup> Nhyam kam ar ate arwākam ýr kadjy kākam nhýn arým nox ne. <sup>33</sup> Nhyam me krãptĩ ar mörkôt amim nokre pumũn arým ar ibej prôt ne. Krĩ kunĩ kurũm ne me pykakôt ar ibej prôt ne. Ibej prôt ne arým akàx nhikjêbê ar kukãm akuprô. <sup>34</sup> Nhyam kam ar kà dji nhyam Jeju wabi. Wabin arým me krãptĩ me:xja pumũ. Ne kam amim,

—E kum, nãm me kute mryo ba djwýnh kêt kam mrykĩ'ãtomti krãptĩ ta kajgo ba pyrãk, ane. Kam ne arým kum me kaprĩn arým memã kukràdjà krãptĩ jarēnhmo krax ne. <sup>35</sup> Nãm memã arēnh dja: nhyam kam arým 'ã myt ibô. Nhyam kam kôt ba djwýnh ar arým 'ýr bôx ne kum,

—Arwã jakam mýjja kêt nhyam arým amykry mex ne. <sup>36</sup> Me ano gê me amũ apýnh kikremã mōn amũ apýnh krĩmã mō. Dja me amim ô kwý krēn djà jamý, ane. <sup>37</sup> Nhyam arkum,

—Ar ga dja gar memã mýjja ngã gê me kukrê, ane.

Nhyam ar kum,

—Djãm gwaj baje pi'ôk kaprĩ kumexjao djwý jamýnhmã? Denarju kubê 200jao djwý jamýnhmã? Djãm gwaj baje memã ôr nhyam me kute krēnmã? ane. <sup>38</sup> Nhyam arkum,

—Mýj ne ar anhõ djwý kute? Tēn omũ, ane.

Nhyam ar arým bu'ã me ku'ê kôt tēn omũ. Ne akubyn 'ýr bôx ne kum,

—Ë, djwý amãnhkrut ne amãnhkrut ne ikjêkêt. Ne tepdjwý amãnhkrut, ane. <sup>39</sup> Nhyam kam arkum,

—Ar memã arê gê me apýnh bõre ngrãngrākam krĩ mō, ane.

Nhyam ar arým apýnh me krĩ kadjy memã karô. <sup>40</sup> Nhyam me apýnh me krĩ kadjy me'ã akre. Nhyam me kwý kubê 100'ã kabēn ne

krí mō. Nhyṁ me kwý kubê 50'ã kabên ne krí mō.

<sup>41</sup> Nhyṁ djwý amãnhkrut ne amãnhkrut ne ikjêkêt jamý. Ne tep amãnhkrutja by. Ne kãjmã o kàjkwa jabên Metĩndjwýnhmã o amikĩnh jarê. Ne kam djwý kokij ne kôt ba djwýnhmã kungã nhyṁ ar memã ôro mō. Ne kôt tepdjwý ã o anen arým me kunĩmã kungã. <sup>42</sup> Nhyṁ kam me kunĩ ô kwý krên arým ajne. <sup>43</sup> Nhyṁ kam me arým tepmê djwý janhy ngij ne 'ã akre. Nhyṁ arým 'ã akrekam kaxnokai ipubê 12 ne 'ã kãtãm. <sup>44</sup> Be, me my kute djwý krên'ã akrekam kubê 5.000. Ne ijukri me niremê me prĩre'ã akre kêt.

*Ngô'ã tēm.*

*Mat 14.22-33; Dju r 6.15-21*

<sup>45</sup> Nhyṁ kam Jeju urokam kôt ba djwýnhmã kum,

—Aje, on ar mōn kãkam nhýn ikukãm akàx nhikjê mã rên krĩbê Bexadamã tē. Ba me ano gê me on mã mō, ane.

<sup>46</sup> Ne kam me krãptĩ'ýr tēn memã kum,

—Aje, on me ajmã. Ba on, ane. Ne kam arým Metĩndjwýnhmã kabên kadjy krãnh'ã tēn wabi.

<sup>47</sup> Nhyṁ kam ar'ã akamãt nhyṁ ar arým kãkam ngô nhipôkri mō nhyṁ Jeju ate atýxã dja. <sup>48</sup> Nhyṁ kam ar kutã arým kôk djãbêr týx. Æbêr týx nhyṁ ar kute kutã ngô rênh kurêje àpênh raxo nhý. Àpênh ra:x nhyṁ arým ar omũ. Ne ôkrên'ãnh kàr pydjikam arým arkôt tē. Ngô'ã arkôt tē. Tēn kam bit ar'ãnh tēmmã. <sup>49</sup> Nhyṁ ar arým ngô'ã tēmkôt omũn abenmã kum,

—Ota, amrê me karô'ô mō. Ar anen amra.

<sup>50</sup> Ar kunĩ omũn arým madja kreti. Nhyṁ adjynkêt nhyṁ arým arkum,

—E kum, ba ne ba wãm tē. On ar akĩnh ne atĩn prãm kêt, ane.

<sup>51</sup> Ne arým arkôt kãkam nhý. Kãkam nhý nhyṁ arým kôk djãbêr

anhikrê. Nhyṁ ar ôkre kadjwýnhbê amikabên kudjan te kute mýjja marmã kam no tyn nhý. <sup>52</sup> Be, amũja'ã ne Jeju te me krãptĩ:mã djwý ngã nhyṁ ar kute kum kator kêt. Kubê Metĩndjwýnh Krajamã kator kêt. Nhyṁ kam ar te kute marmã kam no tyn nhý. Ar amakkre kêt kam.

<sup>53</sup> Ne kãkam ngô'ã mōn kam ar arým pykabê Djenekam akàx nhikjê mã bôx ne kã dji. <sup>54</sup> Nhyṁ kam ar wabi nhyṁ me arým amin Jeju nokre pumũ. <sup>55</sup> Ne kam me bu'ã pykawã kunikôt prôt ne arê. Nhyṁ me arým kute memã Jeju bôx djã jarênhja'ýr meo bôxmo krax ne. Me punu nhikwã djãkam ikwã rã'ãja ne me Jeju'ýr meo prôt ne meo bôx. <sup>56</sup> Ne kam mã kikre kabem me punu jadjuw. Krĩ kryrekam nãr krĩraxkam nãr arwãkam Jeju ku'ê djã kunikôt mã kikre kabem me punu jadjuw. Nhyṁ me mã Jeju tēmkôt kum amijo a'uw ne kum,

—Ba gop akã japkrebit kupê. Ba gop akã japkrebit kupênh, ane. Ne me kute kupênh kunikôt arým mex ne.

## 7

*Tu mýjja krên'ã ujarênh.*

*Mat 15.1-9*

<sup>1</sup> Ne kam mebê pardjêumê Môjdjê kukràdjã mar djwýnh kwý krĩraxbê Djeruxarê kurũm mōn Jeju'ã akuprô. <sup>2</sup> Nhyṁ Jejukôt ba djwýnh kwý tu ikra pôn h kêt kam ô kwý krê nhyṁ me arým ar omũ. Ne ar'ã kabên ne Jejumã kum,

—Mýkam ne akôt ba djwýnh me bakukãmãkjê kukràdjã kupa'ã ikra punu rã'ã tu àkur ba? Dja me o ane nhyṁ Metĩndjwýnh arým memã axwe jarê, ane.

<sup>3</sup> Bir, mebê pardjêumê mebê idjaer kunĩ ne me mã me kukãmãkjê kukràdjã'ã no týx ne kam arĩk abenmã kum,

—Me kute prĩne aminhikra põnhkambit dja me aku. Kambit dja Metĩndjwýnh memã axwe kêt jarẽ, ane. <sup>4</sup> Ne me me õ djwý jamýnh djã kurũm ban bõx. Ne kam kute ngõo amiku'õnhkambit aku. Be, apýnh me kukãmãkjê kukràdjã kajgo kute ja pyrãk ne krãptĩ. Nhym me 'ã no týx ne mã apýnh mýjja ku'õ. Ngõnhkrãmẽ ngyo ngõnhmẽ ngõnh tykmẽ ne me mã ku'õn arĩk amin,

—Dja ba o ane nhym Metĩndjwýnh imã imex jarẽ, ane.

<sup>5</sup> Kamã ne mebê pardjẽumẽ Mõjdjê kukràdjã mar djwýnhmẽ Jejumã kum,

—Mýkam ne akõt ba djwýnh me bakukãmãkjê kukràdjã kupa'ã ikra punu rã'ã àkur ba? ane.

<sup>6</sup> Nhym memã kum,

—Me ga ne ga me amijo ajêx ne ar amijo Metĩndjwýnh mar mexo aba. Mrãmri ne Idjaj Metĩndjwýnh kukwakam me ajã pi'ók no'òkkumrẽx. Nãm me bakukãmãremã kum,

“Metĩndjwýnh ne me amã,

'Be, me ja ne me arĩk 'èx ne ajkwa kajgokam imã imex jarẽnho ban jãm ate ibê krãn ban

<sup>7</sup> imã irax jarẽnh kajgoo ban kam ta kukràdjão ikukràdjãn memã arẽnho ba. Ne kam ta kukràdjã'ã memã kum, Metĩndjwýnh kukràdjã, anhýro ba.'

Nãm ã Metĩndjwýnh me amã ane.”

Nãm ã Idjaj me ajã ane. Ga me akamingrãnyre arým akabẽn kajgoo Metĩndjwýnh kukràdjãn memã arẽnho aba. Mrãmri ne me ajã arẽnhkumrẽx. <sup>8</sup> Be, Metĩndjwýnh ne me kute katãt amijo ba'ã memã karõ ga me kam kubê amijo akẽxo aba. Ne kam mã me akukãmãkjê kukràdjã'ã ano týx ne ar o aba. Ne kam ngyo ngõnhmẽ ngõnhkrã ku'õ. Apýnh me akukràdjã kajgo kute ja pyrãk krãptĩ ga me 'ã ano týx ne ar o aba. Ne kam arĩk 'ã abenmã kum,

“Dja Metĩndjwýnh kõt imã ijaxwe kêt jarẽ.” <sup>9</sup> Nãm ã Jeju memã ane.

Ne kam ajte memã kum,

—Be, Metĩndjwýnh kute katãt amijo aba'ã me amã karõ ga me arým kabẽn ma. Djãm mrãmri Metĩndjwýnh kukràdjã kõt ne ga me akukãmãkjê kukràdjã jarẽ? Kati. Atemã. Atemã ne ga me akukãmãkjê kukràdjã ja'ã ano týx ne Metĩndjwýnh kukràdjã mar kêt ne arým o abikẽnho aba. Djãm kam me ano mex got? <sup>10</sup> Ba me amã arẽ ga me ama. Mõjdjê ne Metĩndjwýnh kukwakam me bakukãmãremã karõn memã kukràdjã jarẽn memã kum,

“Me amã abãmmẽ anã jabẽn ar kabẽn ma”, ane.

Ne ajte memã kum,

“Me'õ arým bãm'ã nãr nã'ã, 'Gê Metĩndjwýnh o ajkê', anhýr jabej gê me tu kubĩ”, ane.

Me kum bãmmẽ nã ar abêmã ne Metĩndjwýnh ã me bakukãmãremã ane.

<sup>11</sup> Nhym be, djãm me ga ne ga me amã abãmmẽ anã jabê? Kati. Ga me akukràdjã kõt arĩk memã kum, “Me ajõ godja anã nãr abãm mýjja'ã ajwýr ga aje kubê anhõ mýjja nê prãm jabej. Ne kum, 'Be, ba te ije amã õrmã. Aje mýjja 'ã ijwýr ba arým o Metĩndjwýnh nhõ mýjja. Kam ba te ije amã õrmã', ane. Dja ga me ã kum anen arým kubê nê nhym kam arým pijãm ne akubyn 'ã ajwýr kêt”, ane. <sup>12</sup> Ga me aje ã memã 'ã karõo anhýrkam arým me nãmẽ bãmbê õdjý'ã memã adjãpnênho aba. <sup>13</sup> Me kum ar abê kêt'ã memã adjãpnênho aba. Metĩndjwýnh te memã kum,

“Me amã abãmmẽ anã jabẽn ar kabẽn ma”, ane

ga me arým Metĩndjwýnh kabẽno me kukràdjã kajgon akukràdjão arým nãmẽ bãmbê õdjý'ã memã adjãpnênho aba. Aje Metĩndjwýnh kukràdjão me kukràdjã kajgo ne

ajte kupa'ã memã akukràdjà punu ja jarë. Nãm ã Jeju memã ane.

<sup>14</sup> Ne kam ajte amiwÿr me kunĩ 'uw ne memã kum,

—Ë, dja ga me akunĩ imaro nhÿn ikabën markumrëx. <sup>15</sup> Me kute apÿnh mÿjja'ã memã kum, “Ja dja ga ãm omũ. Dja ga krën arÿm ajaxwe”, anhÿro ba. Nnym be, Metĩndjwÿnh, djã ne me mÿjja 'õ krë nnym arÿm kum, “Ja ne ga krën arÿm ajaxwe”, ane? Kati. Me kabën punukam ne memã axwe jarë. Me ãkĩnhĩkam ne memã arë. Me ari prõ, mjên kupa'ã kurë bakam ne memã arë. Me 'ëxnhĩkam ne memã arë. Axwe'õkambit ne Metĩndjwÿnh memã axwe jarë. <sup>16</sup> Gop me ajamak mex jabej tu amim ikabën markumrëx. Nãm ã Jeju memã ane.

<sup>17</sup> Ne kam arÿm mebë kikremã wadjã. Nnym kõt ba djwÿnh arÿm kujij ne kum,

—Nã gãm ar imã, “Djã ne me mÿjja 'õ krë nnym Metĩndjwÿnh kum, ‘Ja ne ga krën arÿm ajaxwe’, ane? Kati”, ane. Tãm ne ga arë nnym ar ibë bipdjur rä'ã ne, ane.

<sup>18</sup> Nnym kam arkum,

—Je tõ djãm ar gadjwÿ ajamakre kët? Be, mrãmri ne me kute mÿjja'õ krënkõt Metĩndjwÿnh memã axwe jarënh kët. Djãm ar aje ja mar kët? <sup>19</sup> Be, aparmã ne mÿjja mrãn me tikkremãbit wangij. Mÿjja'õ kurja ne me kute amim mÿjja'ã karõ djãkam ngjëx këtumrëx. Me tikkremãbit ne wangij ne kam atykmã arÿm apõx. Me kute amim mÿjja'ã karõ djãmã ngjëx këtkam Metĩndjwÿnh kute kõt memã axwe jarënh prãm kët, ane. Jeju kute ã arkum anhÿro arÿm me õ mÿjja krënja kunĩ mex jarë.

<sup>20</sup> Ne kam ajte arkum,

—Me kurũm me kabën punu apõx ne me ãpënh punukam ne Metĩndjwÿnh memã axwe jarë. <sup>21</sup> Me kadjwÿnhbë, me amim mÿjja'ã karõ djãkam ne me amim axwe'ã karõ nnym arÿm me kurũm

apõx. Me kute amim axwe'ã karõkam ne

me kute me prõ puro nàr me mjên puroo ãkĩnh ne ro'ã ikwãja'ã amim karõ.

Ne prõ djwÿnh nàr mjên djwÿnh kupa'ã kurë'ã amim karõ.

Ne kute me par'ã amim karõ.

<sup>22</sup> Ne kute mebë mÿjjao ãkĩnh'ã amim karõ.

Ne kute mÿjjao atom rũnh'ã amim karõ.

Ne kute meo bikënh'ã amim karõ.

Ne memã 'ëx ne kute me noo bi-knor'ã amim karõ.

Ne kurë ba'ã amim karõ.

Ne te ta kute me uràk prãmje ngryk.

Ne me'ã kabën punu'ã amim karõ.

Ne amijo àmrati.

Ne bën kati.

Me kute amim axwe'ã karõ ne ja.

<sup>23</sup> Me axweja kunĩ ne me kurũm apõx. Nnym kam kõt Metĩndjwÿnh memã axwe jarë. Nãm ã Jeju kõt ba djwÿnh arkum ane.

*Me'õ nire bajtem kute tu amim kamnhĩxkumrëx.*

*Mat 15.21-28*

<sup>24</sup> Ne kam arÿm mebë tẽ. Tẽ:n kam krĩraxbë Xirumë krĩraxbë Xidõ kuri pykaja'ÿr bõx. Ne kam arÿm kikkre'õmã wadjàn nhÿ. Ne bit kute me'õmã amijo amirĩt kët mã. Ne kam te kute mebë amijo bipdjurmã. <sup>25</sup> Nnym me'õ nire arÿm arënh ma. Kubë ne me bajtembë kregu'õ. Pykabë Xirij Penixijkam ne rwÿk djã. Me karõ punu ne kra prĩtio ba. Nãm arënh man arÿm 'ÿr tẽn parbë ibõn nhÿ. <sup>26</sup> Ne arÿm Jejumã krao a'uw ne kum,

—Amrë tẽn me karõ punu kute ikra prĩtio baja jano gë kum ire, ane.

<sup>27</sup> Bir, Jeju ne jakam me bajtemo mex prãm kët. Nãm kute õ mebë idjaerbit kumrëx o mexo bamã. 'ã kute kum ujarënh nnym kõt kute marmã ne õ mebë idjaer'ã me prĩre jakren kum,

—Gë me prĩre kumrëx djwÿo amityãmã. Nok ba ren me prĩre

nhô djwÿ rop kraremã kurê nhym ren kam punure, ane. Djãm mrãmri ne djwÿ'ã ajarê? Kati. Kute meo mex'ã ne djwÿ jakren kum 'ã ajarê. Nãm,

—Nok ba ren me prĩre nhô djwÿ rop kraremã kurê nhym ren kam arÿm punure, ane.

<sup>28</sup>Nhym nija arÿm amim,

—Ijã ne rop krare jarê, anen arÿm kum,

—Tukwa, mrãmri Bẽnjadwÿr djwÿnh. Kôt ne ga arê. Nhym be, godja wãnh pĩponh krakri djwÿ jaũm rôrôk. Aũmbit dja rop krare arÿm kukrê. Kam gop badjwÿ ibê rop krare pyrãk tu imã ikrao mex, ane.

<sup>29</sup>Nhym kôt kum,

—Be, aje imã akabên wã jarênhkam adjumar mex ne tẽ. Arÿm ne me karô punu akramã ire, ane.

<sup>30</sup>Nhym kam arÿm ũrkwãmã akêx ne 'ÿr bôx. Nhym wÿnhràmm me arÿm me ikwã djãkam kra prĩti dji nhym nõ. Me karô punu arÿm kum ire nhym arek nõ nhym arÿm omũ.

*Kute me'õ jamakkre kêt ne kabên tôo mex.*

<sup>31</sup>Nhym kam krĩraxbê Xirumê Xidökuri pykaja kurũm tẽ. Tẽ:n kam amũ pyka nhidjibê Krĩraxbê 10jakôt tẽ. Ne tẽ:n kam arÿm imôtibê Garrêja'ÿr bôx. <sup>32</sup>Nhym wãnh me'õ jamakkre kêt ne kabên tôja. Nhym me arÿm 'ÿr o bôx ne kum, “Gop 'ã anhikra dji”, ane.

<sup>33</sup>Nhym ate kute o ãm kadjy amũ me krãptĩ bê o tẽ. Ne kam aktã amakkremã aminhikra'i jadjàn aptôn ôtodjwÿ kupê. <sup>34</sup>Ne kãjkwa jabên kum kaprĩkam arÿm amityk djã mẽ. Ne kum, “Epata”, ane. Nãm ren me bakabênkam kum, “On ajamakkre kajrer”, ane. <sup>35</sup>Nãm kum ane nhym arÿm amakkre kajrer ne kabên mex ne. Nhym kam akubyn me'ÿr o bôx.

<sup>36</sup>Ne memã 'ã karôn memã kum, “Gora ipudju”, ane. Be, nãm te mã:

memã anhÿro ba nhym me ate mã: pyka kunĩkôt abenmã arênhô ba. <sup>37</sup>Nãm me'õo mex nhym me te kute marmã kam no tyn ku'ê ne abenmã kum,

—Nãm apÿnh me kanê djãri me kunĩo mexkumrêx. Nãm me umar kêtô mex nhym arÿm akubyn amak mex ne. Nãm me kabên kêt djwÿo mex nhym arÿm akubyn kabên mex ne, ane.

## 8

*Kute mebê 4.000o djuw mex.*

*Mat 15.32-39*

<sup>1</sup>Nhym kam me krãptĩ: ajte Jeju'ã akuprôn 'ã akuprôn me'ã ô kwÿ krên djã kêt. Nhym kam arÿm amiwÿr kôt ba djwÿnh ar ku'uw nhym ar bôx nhym arkum,

<sup>2</sup>—Imã me krãptĩja kaprĩ. Me iro'ã krĩ'ã arÿm akati amãnhkrut ne ikjêkêt apêx. Ne kam arÿm me ô mÿjja kêt. <sup>3</sup>Nok ba ren me kum prãm kam ren amũ me ũrkwãmã me ano nhym me ren pry konen nhym ren me tyk djã me kupa. Djãm jãnh got. Onĩj me ũrkwã. Nãm ã Jeju arkum ane.

<sup>4</sup>Nhym kôt ba djwÿnh ar kum,

—Kapôt kukrit jakam ne gwaj te me krãptĩja kadjy djwÿ kumex prãmje. Mÿj got gwaj me kadjy nê? ane.

<sup>5</sup>Nhym Jeju arkum,

—Mÿj ne ar anhô djwÿ kute? ane.

Nhym ar kum, “Djwÿbê 7”, ane.

<sup>6</sup>Nhym kam me krãptĩmã kum,

—Pykabê dja ga me nhÿ, ane. Nhym kam me arÿm nhÿ. Nhym kam arÿm djwÿbê 7 jamÿn o Metĩndjwÿnhmã amikĩnh jarê. Ne kam kokij ne mã kôt ba djwÿnh arkum kungã nhym ar mã me krãptĩmã adjuw. Nãm ar memã adjwÿro môn kam arÿm adjwÿr pa.

<sup>7</sup>Ne kam ar ô tepprãre ngrêre nhym o Metĩndjwÿnhmã amikĩnh jarê. Ne kam arkum,

—Dja gar memã jadjwý jadjwý, ane.

<sup>8</sup> Nhyam kam ar memã adjwýro mōn adjwýr pa. Nhyam kam me arým kukrēn arým ajne. Nhyam kam me arým aũm ngij ne 'ã akre nhyam kaxnokai ipubê 7 'ã kâtãm. <sup>9</sup> Be, me my kubê 4.000 ne ò kwý krê.

Nhyam kam memã kum, “Aje, on me ajmã”, ane. <sup>10</sup> Ne on kôt ba djwýnhmê ro'ã kãmã wadjàn nhý. Nhyam ar arým nox ne rē:n kam arým pykabê Tamanu'ãnh kã djin wabi.

*Kute kàjkwa kurũm mýjja'ò nhipêxmã ne me kum 'ã à'wýr.*

*Mat 16.1-4*

<sup>11</sup> Nhyam mebê pardjêumê mebê xadjudjêumê Jeju'ýr bōx ne kukij ne mrãmri kubê Metĩndjwýnh Kra ne kute mýjja pumũnh kêt'ò nhipêx jabej 'ã kum apnên kum,

—Goja kàjkwa kurũm mýjja pumũnh kêt'ò nhipêx bar omũn kôt ama, ane.

<sup>12</sup> Nhyam amikadjwýnhbê tyk djã mēn memã kum,

—Je tó mýkam ne ga me akamin-grãnyre mýjja'ã ijuw? Ije me amã mýjja pumũnh kêt'ò nhipêx ga me aje omũnh prãm kêtumrêx. Mrãmri ne ba me amã ikabēnkumrêx, ane. <sup>13</sup> Ne kam arým mebê akêx ne tēn ajte kãmã wadjã. Wadjàn akàx nhikjēmã rēr kadjy arým nox ne.

<sup>14</sup> Nhyam kam djwý ar kumãnhkutã nhyam kôt ba djwýnh kute byrmãn arým o amak kêt kati. Nhyam wãnh kàkam djwý pydjibit nõ. <sup>15</sup> Nhyam kam Jeju me kute me kukràdjã kajgo mar kêt kadjy ne kôt kute ar amijo ba kêt kadjy arkum kabēn ne arkum,

—Ga, me kute djwý nhigot djã djwý djômkam kapĩnja pumũ. Nhyam arým djwý tỳx me:x ne. Ar gadjwý dja gar me kukràdjã man kôt ar amijo aban arým ajaxwe me:x ne. Mebê pardjêu kukràdjã nār Erodji kukràdjã dja gar aman

kôt ar amijo aban arým ajaxwe me:x ne. Ar amijã ano tỳx ne me kukràdjã mar kêt ne kôt ar amijo aba kêt, ane.

<sup>16</sup> Nhyam kam ar ari 'ã aben kukij. Ne kam arĩk abenmã kum,

—Gwaj baje djwý byr kêtumkam ne ã ar imã ane, ane.

<sup>17</sup> Be, Jeju kute me kukràdjã kajgo'ã djwýnhigot djã jakre nhyam ar kute mar kêt. Nhyam kam arým ar kabēn man arkum,

—Mýkam ne gar abenmã, “Gwaj baje djwý byr kêtumkam ne ã ar imã ane”, ane? Djãm kraxje ar aje omũnh kêt rã'ã? Djãm kraxje ar aje mýjja mar kêt rã'ã? Mýj'ã ikabēn kute amijakre ar aje mar kêt rã'ã? Djãm ar ajamakreja kêt? <sup>18</sup> Jãm ne gar anon omũnh kêt ne. Jãm ne gar ajamak ne mar kêt ne. Be, ije djwý ngrireo me krãptĩo djuw mexja djã ne gar arým o ajamak kêt kati? <sup>19</sup> Akubyn amijo tēn ije mebê 5.000mã djwý kubê 5 kokjêr'ýr amijo bōx. Ar aje djwý janhyo atomkam mýj ne kam kaxnokai ipu kute? ane.

Nhyam ar Jejumã kum, “Kaxnokai ipubê 12”, ane.

<sup>20</sup> Nhyam ajte arkum,

—Ajte akubyn amijo tēn ije mebê 4.000 kadjy djwýbê 7djwý kokjêr'ýr amijo bōx. Ar aje kam djwý jaũmo atomkam mýj ne kam kaxnokai ipu kute? ane.

Nhyam ar kum, “Kaxnokai ipu kubê 7”, ane.

<sup>21</sup> Nhyam kam arkum,

—Djãm djwý'ã ne ba ar amã arê? Djãm 'ã ne ba ar amã, “Ari amijã ano tỳx”, ane? Kati. Djwý'ã ne ba ije ar amã ja jarēnh kêt. Mýkam ne gar aje ja mar kêt rã'ã? ane.

Nhyam ar kum, “Kaxnokai ipu kubê 7”, ane.

<sup>22</sup> Nhyam kam arkum,

—Djãm djwý'ã ne ba ar amã arê? Djãm 'ã ne ba ar amã, “Ari amijã ano tỳx”, ane? Kati. Djwý'ã ne ba ije ar amã ja jarēnh kêt. Mýkam ne gar aje ja mar kêt rã'ã? ane.

*Kute me'ò no rão mex.*

<sup>22</sup> Ne kam ar arým krĩraxbê Bexadamã tēn bōx. Nhyam kam me Jeju'ýr me'ò no rão mōn o bōx ne kum, “Gop kupê gē mex”, ane.



<sup>23</sup> Nhyṁ arÿm me'ô no rã nhikra 'amÿn krî kurÿm o katon atykmã o tẽ. Ne kam no kutôn 'ã ikra djin kukij ne kum,

—Djãm arÿm ga mÿjja'ô pumÿ? ane.

<sup>24</sup> Nhyṁ kãjmã krãn kum,

—Arÿm ne me kute pî pyrãk ne mrã ba omÿ, ane.

<sup>25</sup> Nhyṁ ajte no'ã ikra djin kãjmã kum krã nhyṁ arÿm no mex. No mex ne arÿm kute me kunî pumÿnh mexkumrẽx. <sup>26</sup> Nhyṁ kum,

—Aj mã. Dja ga katãt anhÿrkwãmã tẽ. Kwãrîk wãnh krîmã atẽm kêt. Ne kwãrîk wãnh krîkam me'ômã ijarẽnh kêt, ane.

*Pedru kute Jejubê Krituo amirît.*

*Mat 16.13-20; Ruk 9.18-21*

<sup>27</sup> Be, bẽnjadjwÿr raxbê Piripi nhô krîraxbê Xedjare bu'ã ne apÿnh me ô krî djari. 'ÿr ne Jejumẽ kôt ba djwÿnhmẽ ar mō. 'ÿr mō nhyṁ Jeju arÿm arkum,

—Ë, ar imã ijã me ujarẽnh jarẽ ba kuma, ane.

<sup>28</sup> Nhyṁ ar arÿm kum,

—Nãm me kwÿ ajã, “Ngômã me angjẽnh djwÿnhbê Djuão”, ane. Nhyṁ me kwÿ ajã, “Me bakukãmãre Erij. Metîndjwÿnh kukwakam ujarẽnh djwÿnh raxbê Erij”, ane. Nhyṁ me kwÿ ajã, “Me bakukãmãrekam Metîndjwÿnh kukwakam ujarẽnh djwÿnh ar 'ô.” Nãm me ã abenmã ajã ane. Nãm ã ar Jejumã ane.

<sup>29</sup> Nhyṁ ajte arkum,

—Ne ar gadjwÿ mã ne gar imar on? Mÿj'ã ne gar ijakre? ane.

Nhyṁ Pedru kum,

—Abê ne Kritu. Abê me inhô Bẽnjadjwÿrbê kumkati, Metîndjwÿnh tîn ne ar bakumrẽxja Kra. Amrêbê ne me bakukãmãremã ajarẽ. Aje me ipytãr ne aje ar me ijo abamã ajarẽ. Amrêbê me imã ajarẽ ba me akam amako iba nhyṁ arÿm Metîndjwÿnh ajano ga arÿm bôx, ane.

<sup>30</sup> Nhyṁ arkum,

—Kwãrîk wãnh me'ômã ja jarẽnh kêt, ane.

*Kute amikukãm me kute bîn'ã amijarẽnh.*

*Mat 16.21-28; Ruk 9.22-27*

<sup>31</sup> Ne kam amijã arkum ajarẽnh arkum,

—Ba ije amijo inhî ne ar awÿr irwÿkja ije mrãmri itokry kumex mar kadjy ne Metîndjwÿnh ijano ba tẽ. Dja me rÿnh ikanga. Mebẽngêtmẽ me kadjy Metîndjwÿnh mar djwÿnh nhô bẽnjadjwÿrmẽ Môjdê kukràdjã mar djwÿnhmẽ dja me memã ikanga nhyṁ me arÿm ibî. Nhyṁ ijã akatin akatin akati ba akubyn itîn ne, ane. <sup>32</sup> Nãm Jeju arkum ja jarẽnho amirîtkumrẽx. Nhyṁ Pedru arÿm Ar kubê o tẽn ar kãxã nẽje kum bẽn tÿxmo krax.

<sup>33</sup> Nhyṁ kam arÿm kôt ba djwÿnh'ÿr akẽx ne ar omÿn Pedrumã bẽn tÿx ne kum,

—Arÿm akabẽn kute Xatanaj kabẽn pyrãk. Amÿ imã akre rax ne dja. Ga Metîndjwÿnh kôt adjumar kêt. Me kãtãm kôt ari adjumar, ane.

<sup>34</sup> Ne kam me krãptî:mẽ kôt ba djwÿnhmẽ amiwÿr me ku'uw. Nhyṁ me arÿm 'ÿr bôx nhyṁ memã kum,

—Gêdja ga me ajô mã ikôt abikamẽnh prãm jabej kwãrîk wãnh amidjwÿnhbit mar kêt ne mã amim, “Djãm ba ije amijo kînhmã? Kati”, ane. Dja ba ityk kadjy inhô pîte'y mÿn itokry:. Dja ga ijã amijakren aje anhô pîte'y mÿnh mãn prãbê amã atokry pyma kêt ne amã ijabê rã'ã ne mã ikôt ajkamẽ.

<sup>35</sup> Me kute amidjwÿnhbit mar ne me kum tokry pyma. Me tãm gêdja me tyn kam ijukri me biknor tokry djãkam tẽ. Nhyṁ be, me kum ijabêkumrẽx ne kute amidjwÿnhbit mar kêt nhyṁ me kute me bîn jabej me tãm gêdja me amiptãn ar tîn ne ba rã'ã: rã'ã ne. <sup>36</sup> Nhyṁ ren me'ô pykabê mÿjja mexja kunî, nêkrẽx

kunĭja ari o atom ne o ban kam ren ty, je mā dja kam nē? Kati, nām ren ty nhy m ren ō nēkrēxja ren wānh kumex. <sup>37</sup> Nhy m mýj pānh ne ne ren Metĭndjwŷnhmā arē nhy m ren akubyn o tĭn nhy m ren kum amijo pānh ne? Arkati. Dja ga te kum pānh jarē nhy m akubyn ajo tĭn prām kētkumrēx ne.

<sup>38</sup> Be, me kamingrāny ja ne me axwe:kumrēx ne ari mýjjakōt ibē amijo akēxo ba. Ga, me kwŷ kum prō djwŷnh kĭnh kēt ne mebē prō ō ākĭnho baja pumū. Me jadjwŷ ne me kum ikĭnh kēt ne ate ibē jām krā. Kam godja me'ō ikam pijām ne ikukrādĵakam pijām jabej ba badjwŷ gēdja ba amipānh kam ipijām. Ba ije amijo inhĭ ne me awŷr irwŷk dja ba Ibām jadjēnhmē umao ipyma:n ar awŷr bōx. Kadjy nrānh djwŷnh pyma:mē ro'ā ar awŷr bōx. Ibē kumkatio bōx nhy m tāmja ikam pijāmja ba badjwŷ arŷm amipānh kam ipijām ne. Nām ā Jeju me krāptĭmā ane.

## 9

*Jeju jadjēnh'ā ujarēnh.*

*Mat 17.1-13; Ruk 9.28-36*

<sup>1</sup> Ne kam arkum,

—Ba ar amā arē. Ibām dja ijā bēnjadjwŷr rax mē. Dja ba bōx ne ipymao me apytān ar me ajo iba. Dja gar adjāmja akwŷ atĭnri iraxkōt ipumū, me akadjy ibēnjadjwŷr rax ne ipymakōt ipumū. Mrāmri ne ba ikabēnja, ane.

<sup>2</sup> Nhy m kam akati amānhkrut ne amānhkrut ne amānhkrut ar'ā apēx nhy m Jeju arŷm krānh prēkti'ā wabi. Nām Pedrumē Xijagumē Djuāo ar aprōn aro wabin ate ar ro'ā me kākā dja. Ne kam arŷm ar kuka kōnh atemā aminhipēx. <sup>3</sup> Ne ō kubēkā arŷm adjēnh ne aka: kute kakūm arngrokam aka pyrāk. Ren kubēkā pōnh djwŷnh'ō kubēkā'ō pōn ren kubēkā jakao kute Jeju kā jaka tēp kētkumrēx. <sup>4</sup> Nhy m kam me kukāmārebē Erijmē Mōjdĵē arŷm

arkum amijo amirĭt ne. Nām ar Jejumē abenmā kabēno dja nhy m ar ar omū.

<sup>5</sup> Nhy m Pedru kum,

—Be, ujarēnh djwŷnh, jakam ne gwaj arŷm bakĭnhkumrēx. Dja bar ar amā kikre'ā irōx nhipēx. Dja bar amā 'ō nhipēx, Mōjdĵēmā 'ō nhipēx, Erijmā 'ō nhipēx, ane. <sup>6</sup> Ar madĵa kretikam ne Pedru umaje Jejumā kabēn kajgo jarē.

<sup>7</sup> Nhy m kam kakrā'ō arŷm amirĭt ne ar kuno. Ar kuno nhy m Metĭndjwŷnh arŷm kakrā kurūm kabēn nhy m ar arŷm kuma. Nhy m arkum,

—Ikra ne wā. Imā abē:. Tāmwā dja gar kabēn man kōt ar amijo aba, ane.

<sup>8</sup> Nhy m ar te ar abej amibu'ā rĭt. Nhy m Jeju pydjibit dja nhy m ar omū. Arŷm ne Mōjdĵē ar ar aērbē mā tēn arŷm amirĭt kēt ne.

<sup>9</sup> Nhy m kam ar arŷm krānh prēkti'ā rwŷk tē. Rwŷk tē nhy m Jeju arŷm ar kute omūnh'ā arkum karōn arkum,

—Ar aje omūnhja kwārĭk wānh jakam me'ōmā 'ā adjujarēnh kēt. Ba ije amijo inhĭ ne ibōxja ityk ne akubyn itĭnkambit dja ga memā 'ā ajarē, ane.

<sup>10</sup> Nhy m kam ar arŷm 'ā ujarēnh kēt. Ne rwŷk tēn kam aben kukij ne abenmā kum,

—Jeju kute gwaj bamā, “Ityk ne akubyn itĭn”, anhŷrja. Mýj'ā ne amijakre? ane.

<sup>11</sup> Ne kam Jejumā kum,

—Mýkam ne Mōjdĵē kukrādĵa mar djwŷnh memā kum, “Erij kumrēx dja bōx. Nhy m kam totokbē Metĭndjwŷnh bōx ne ar meo ba”? ane. Mýkam ne me mā memā ja jarē? ane.

<sup>12</sup> Nhy m Jeju arkum,

—Be, gēdja me'ō kute Erij pyrāk kumrēx bōx ne akubyn Metĭndjwŷnh'ŷr me kunĭo akēx ne. Meo akēx nhy m me arŷm amim maro ba. Mýkam ne ba ije amijo

inhĩ ne ibôxja badjwý amrêbê: me ijã me bakukãmãremã kum, “Dja arým tokry kumex ma nhym me memã kanga”, ane?

Nãm me ã ijã anen arým 'ã pi'ók no'ók ne. Nãm ã Jeju arkum ane.

<sup>13</sup> Ne kam ngômã me angjênh djwýnhbê Djuão'ã arkum,

—Ba ar amã arê gar ama. Mrãmri, me'õ kute Erij pyrãk ne arým bôx. Nhym kam me arým mar kêt ne amikĩnhje o bikênho ba. Amrêbê: me bakukãmãre kute Metĩndjwýnh kabên'ã pi'ók no'ókkam me kute o anhýrmã kôt ne me arým ã o ane, ane. Nãm krãnh'ã rwýk tẽmkôt ne Jeju ã arkum ane.

*Kute me karõ punumã àkjêr.*

*Mat 17.14; Ruk 9.37*

<sup>14</sup> Ar rwýk tẽn kam arým kôt ba djwýnh kwý aro rãm ne ja. Ar arkôt krãnh'ã àbir kêtjao rãm ne ja. Nhym me krãptĩ ar'ã akuprõ. Nhym Môjdjê kukràdjã mar djwýnhmẽ ar aktã kabêno aben japanho dja nhym Jeju arým me omũ. <sup>15</sup> Ne me aêrbê bôx nhym me kunĩ kam no tyn kumex ne 'yr prõt ne kum,

—Djãm arým ne ga bôx? Djãm arým ne ga bôx? ane.

<sup>16</sup> Nhym kam abej Môjdjê kukràdjã mar djwýnh kukij ne memã kum,

—Mýkam ne ga me akabêno aben japanho dja? ane.

<sup>17</sup> Nhym kam me krãptĩkôt me'õ ãmja kum,

—Ujarênh djwýnh, awýr ne ba bit ikrao itẽmmã. Me karõ punu ne o ba nhym ibê kabên kêtikumrêx.

<sup>18</sup> Nhym apýnh kute par djãri pyka'ã kurê nhym ajmrõ prõt ne àpjãnh ne àpnhirêno nõ. Awýr ne ba bit o itẽmmã ga adjãm kêt. Ba kam tu akôt ba djwýnh'yr o bôx ne arkum,

—Dja gar ano gê kum ire, ane. Nhym ar te kute kujaêkmã o dja. Nãm ã me'õ Jejumã ane.

<sup>19</sup> Nhym kam Jeju me'yr akêx ne memã kum,

—Je, me akamingrãny aje amim ikamnhĩx kêtikumrêx ne ajaxwe. Mýj dja ijã akati, akamãt kô kute ba me akam arek ar iba? Nã bãm me awýr bôx ga me ajamakre kêtikumrêx ne prĩne akabêno ikaty. Nã bãm te amiwýr me akam ama ga me arĩk ar aba, ane. Ne kam bãmjamã kabên ne kum,

—Amrê akrao tẽ, ane.

<sup>20</sup> Nhym me arým 'yr o bôx. 'Yr o bôx nhym me karõ arým Jeju pumũn ajte me'õ kraja bí. Kubĩ nhym arým pykabê tým ne àpnhirêno nõn ajmrõ prõto nõ.

<sup>21</sup> Nhym Jeju arým bãm kukij ne kum,

—Mýj ne kute bĩn kraxkam 'ã amex kute? ane.

Nhym kum,

—Prĩrekam ne kum o krax. <sup>22</sup> Nãm te: kute bĩn mexmã ar o ba. Nãm kute kuwymẽ ngókam rênh krãptĩ. Aje me karõbê utàr mar jabej utà. Amã ar ikaprĩn utà, ane.

<sup>23</sup> Nhym Jeju kum,

—Be, Metĩndjwýnh umaro kute mýjja kunĩ jakrenh mexi. Me tu amim kamnhĩxkumrêx nhym arým meo mex. Dja ga tu amim kamnhĩxkumrêx nhym arým amã akrao mex, ane.

<sup>24</sup> Nhym kam bãm no kangô prõtmẽ ro'ã on kàj bê kum,

—Bẽnjadjwýr djwýnh, arým ba amim kamnhĩx. Gop ga imã 'ityx jadjã ba gop tu amim kamnhĩxkumrêx, ane.

<sup>25</sup> Nhym me arým itepato prõt ne 'ã bikprõnho dja nhym Jeju arým me omũ. Ne arým me karõ punumã bẽn týt ne kum,

—Me karõ, aje me'õ bõktimã kabên kêtme amakre kêt jadjãr. Ba ne ba amã ikabên ne. On kum anhiren kwãrĩk wãnh ajte o aba kêtikumrêx, ane.

<sup>26</sup> Nhym arým amran bĩno bê mex ne arým kurũm kato. Nhym

arým kute tyk pyrâk ne nõ. NhyM me krãptĩ 'ã abenmã kum,  
—Arým ne akuno. Arým ne akuno, ane.

<sup>27</sup> NhyM Jeju arým ikra 'amýn kãjmã aro tẽ nhyM arým kãjmã dja.

<sup>28</sup> NhyM Jeju arým tẽn kikremã wadjã. NhyM me kãxã kôt ba djwýnh ar arým me karõ jabej kukij ne kum,

—Mýkam ne bar te ije me karõ punu kujaekmã o ane? ane.

<sup>29</sup> NhyM arkum,

—Bir, me karõ punu kute wã pyrâk ne 'ity:xi. Dja me Metĩndjwýnhmã amijo a'uw ne kum amijajbu. Kambit dja me me karõ wã jano nhyM arým memã ire, ane.

*Amikukãm tyk'ã ujarẽnh.*

*Mat 17.22; Ruk 9.43*

<sup>30-31</sup> Ne kam ar arým me kurũm tẽn amũ pykabẽ Garrêjakôt tẽ. Nãm mebẽ amijo bipdjuro tẽ. Jeju kute me kãxã kôt ba djwýnh arkum amijã ujarẽnh prãm. Ne kam mebẽ amijo bipdjuro tẽ. Tẽn kam arým arkum,

—Ba ije amijo inhĩ ne ibõxja dja me memã ikanga nhyM me arým ibĩ. NhyM kam dja ityk'ã akati amãnhkrut ne ikjêkêt apêx. Ba kam akubyn itĩn, ane.

*Ar kute amirax jabej Jeju kukjêr.*

*Mat 18.1; Ruk 9.46*

<sup>32</sup> NhyM ar amim,

—Je tô, mýj'ã ne kabẽn ja jarẽ? ane. Ne kam ar kute kukjêr kêt. Jeju kute arkum kabẽn pymaje ar kute kukjêr kêt.

<sup>33</sup> Ne kam mõ:n kam arým krĩraxbẽ Kapana'ýr bõx ne kikremã wadjã. NhyM kam Jeju arkum,

—Pry'ã ar amõrkôt ne gar aktã akabẽno aben japanho mõ. Mýj'ã ne gar abenmã akabẽn ne? ane.

<sup>34</sup> NhyM ar arým anhikrê ne. Be, prykôt ne ar amirax mýr jabej abenmã kabẽn mõ. Kam ne Jeju 'ã ar kukij nhyM ar arým pijãm ne anhikrê ne.

<sup>35</sup> NhyM kam nhýn amiwýr ar ku'uw. Kôt ba djwýnhbẽ 12ja 'uw ne arkum,

—Gar ajõ araxo kutewa prãm jabej gẽdja amijo kajgon me katẽ tẽn kam tu me kunĩmã àpẽn ba, ane.

<sup>36</sup> Ne kam arým me prĩre'õ nhikra 'amýn o tẽn ar ipõkri kudja. Ne kam kute o kĩnh kadjy kumýn arkum,

<sup>37</sup> —Ë, ga, me'õ prĩreja pumũ, kãtãm mexja pumũ. Dja me'õ ikukwakam kum me'õ kute prĩre ja pyrâk kĩnh, kum me'õ kãtãmja kĩnh ne kam arým badjwý kum ikĩnh. Djãm bajbit kum ikĩnhmã? Kati, dja me'õ kum ikĩnh ne kam kum ibãmdjwý kĩnh, ibãm kute ijanorjadjwý kum kĩnh. Nãm ã Jeju arkum ane.

<sup>38</sup> NhyM Djuão arým kum,

—Ujarẽnh djwýnh, ba amã arẽ. Me'õ gwaj bakôt ba kêt'õ tu me karõ punu kute meo ba'ã anhidji jarẽ. 'Ã anhidji jarẽn me karõmã kum, “Ba Jeju kukwakam amã ikabẽn ne. On kum anhire.” Nãm ã anhyro dja bar arým omũ. Ne kam gwaj bakôt ba kêt kam kum, “Kwãrĩk wãnh”, ane.

<sup>39</sup> NhyM Jeju arkum,

—Kwãrĩk wãnh kubẽ adjãptãr kêt. Be, godja me ikukwakam mýjja pumũnh kêt nhipêx, godja me'õ punuo mex, me ja ne me te kute ijã kabẽn punu jarẽnhmã. <sup>40</sup> Be, me kum gwaj bakurẽ kêtja ne gwaj bajo õbikwa. Kam kwãrĩk wãnh kubẽ adjãptãr kêt. <sup>41</sup> Ba ne ba ibẽ Kritu. Gar ikôt abakam godja me'õ ar amã ngõnhkrãkam ngõ nhõr jabej. Ba dja ba mrãmri kum àpẽn mexjao pãnhkumrêx. Mrãmri ne ba ar amã arẽnhkumrêx.

<sup>42</sup> NhyM be, me'õ kute me prĩre pyrâk ne ajbir kute amim imar ny nhyM kam ren ate me'õja axwe'ã kum apnẽ nhyM ren arým kôt axwe nhyM kam ren me õkre'ã kẽnpoti nhõ. Kute memã axwe'ã

àpênh djwýnhja nhökre'ã kên jabatânhmã kumê nhyem ren ngô kubî, ja ne kâjbê tokry. Tokry ngri. Nhyem be kati, Metîndjwýnh dja prîne o ajkê nhyem tokry ra:x ne. Nãm ã Jeju arkum ane.

<sup>43</sup> Ga, me kute apýnh amikukràdjào àpênh jaxwe prãmja pumũ. Me kute àpênh jaxwe kangamã ne Jeju mebê uman memã kum,

—Ne gar ren ajaxwe kadjy anihkra nhikjêo mýjja punu kupênh prãm mýj ne gar ren on? Bir, gar ren on krâta. Ne kam ren te anihkra nhikjê kêt ne ren atînkam ren akînhkumrêx. Metîndjwýnhkôt atîn ne ar abakam ren akî:nhkumrêx. Ne ren aktã anihkra râ'ân ren me biknor tokry djâkam tèn ren atokry ra:x ne. Kam ne kuwy pôk râ'ã: râ'ân àtyk kêtumrêx. <sup>44</sup> Kam kôp kute me kakwýrja tyk kêt nhyem me kute kuwy pôkjadjwý par kêt. <sup>45</sup> Ne gar ren ajaxwe kadjy apar nhikjêo mýjja punu'ýr amrân phrãm mýj ne gar ren on? Bir, gar ren on krâta. Ne kam ren te apar nhikjê kêt ne ren atînkam ren akînhkumrêx. Metîndjwýnhkôt atîn ne ar abakam ren akî:nhkumrêx. Ne ren aktã apar râ'ân ren me biknor tokry djâkam tèn ren atokry ra:x ne. Kam kuwy pôk râ'ã: râ'ân àtyk kêtumrêx.

<sup>46</sup> Kam kôp kute me kakwýrja tyk kêt nhyem me kute kuwy pôkjadjwý par kêt. <sup>47</sup> Ne gar ren ajaxwe kadjy ano nhikjêo aje mýjja punu pumũnh týx prãm mýj ne gar ren on? Bir, gar ren on kaba. Ne ren kam te ano nhikjê kêt ne ren akînhkumrêx. Metîndjwýnh kute me utâr ne ar me kadjy bënjadjwýr ne kute ar meo baja'ýr abôxkam ren akî:nhkumrêx. Ne ren aktã ano râ'ân ren me biknor tokry djâkam kuwykam tèn ren atokry ra:x ne. <sup>48</sup> Me bakukãmãre ne amrêbê: 'ã memã kum,

“Kôp kute me kakwýrja tyk kêt nhyem me kute kuwy pôkjadjwý par kêt.”

Nãm ã Jeju arkum ane. Djãm mrãmri ne ar kute aminhikra, amipar jakãrmã? Djãm mrãmri ne ar kute aminoo pôxmã? Kati, ar kute àpênh jaxwe krã'yr ne kangamã ne Jeju 'ã arkum ar kute amibê amikukràdjà jakãrmã arê.

<sup>49</sup> Ne kam arkum,

—Be, kuwykam gêdja me kunî tokry. Kute mrãmri ne me kute Metîndjwýnhmã mry parkam kadjwanhîo mry kunî kangâr pyrãk, ane. Dja me ã tokryo tuknîo ane.

<sup>50</sup> Ne kam ar'ã kadjwanhî jakre ne arkum,

—Be, kadjwanhî mexkumrêx. Godja kadjwanhî ta amikam akry apêx jabej arým o mýjja jakry kadjy punukumrêx ne. On ar aje kadjwanhî mex pyrãk ne abenmã akabên mex, ane.

## 10

*Me kute prô kanga'ã ujarênh.*

*Mat 5.31, 19.1; Ruk 16.18*

<sup>1</sup> Ne kam arým krîraxbê Kapanakam me jamã kàx. Ne tê:n arým ngôbê Djodão nhikjêmã rên arým pykabê Djudêja'ýr bôx. Bôx nhyem kam me krãptî: ajte 'ã bikprônho dja. Nhyem kam aje memã ujarênho dja.

<sup>2</sup> Nhyem mebê pardjêu arým 'ýr bôx ne kute we kabên kajgo jabej kukjêrmã ne kum,

—Djãm Metîndjwýnh kukràdjà kôt me kute tu prô kangamã? Nãm me Jeju kute kabên kajgo jarênh kadjy nârãm ã kum ane.

<sup>3</sup> Nhyem memã kum,

—Be, Môjdjê ne amrêbê: me bakukãmãremã 'ã karô. Mýj ne memã arê? ane.

<sup>4</sup> Nhyem me kum,

—Môjdjê ne memã kum, “Gê me prô'ã pi'ók no'ók ne kam kanga”, ane.

<sup>5</sup> Nhyem memã kum,

—Bir, me amakkre kêtumrêx ne memã prô kanga jarê. Nhyem djãm adjâkamã ne me ã prôo ane?

Kati. <sup>6-7</sup> Adjàkamã, kute mỳjja kunĩ nhipêxkam ne Metĩndjwỳnh mymẽ ni ar ipêx ne memã kum,

“Kamã dja me my prõ kadjy arỳm bãmmẽ nã arkum iren kam arỳm prõbit'ã ngrã ne.

<sup>8</sup> Nhyam kam ar ì abenã tỳm ne kam kute ì typdji pyrãk.”

Nãm ã Metĩndjwỳnh memã ane. Kam, djãm ar ì amãnhkrut rã'ã? Kati, ar kute ì pydji pyrãk. <sup>9</sup> Be ga, Metĩndjwỳnh kute abenã ar mẽnhja pumũ. Kwãrĩk wãnh me'õ abenbê aro bikjêr kêt. Nãm ã Jeju mebê pardjêumã ane.

<sup>10</sup> Nhyam kam ar akubyn kikrekam tẽn nhỹ. Nhyam kôt ba djwỳnh arỳm Jeju kute memã kabẽn jarênhja jabej kukij. <sup>11</sup> Nhyam arỳm arkum,

—Gêdja me'õ prõ djwỳnh kangan kam atemã akãxbê me'õmã kabẽn ne 'yr mõn kam arỳm mrãmri krõ'ã o prõn arỳm axwekumrêx, prõkam axwekumrêx. <sup>12</sup> Nhyam me niredjwỳ gêdja me mjên kanga nhyam kam atemã me'õ akãxbê 'yr mõ nhyam kam arỳm mrãmri krõ'ã o mjên ne arỳm axwekumrêx. Nãm ã arkum ane.

*Kum me prĩre kĩnh'ã ujarênh.*

*Mat 19.13; Ruk 18.15*

<sup>13</sup> Nhyam kam ar ja arỳm Jeju'yr me prĩreo mõn o bõx. Kute me kupênhmã ne ar 'yr meo mõ. Nhyam kôt ba djwỳnh ar arỳm nêje memã bẽn tỳx. <sup>14</sup> Nhyam Jeju arỳm ar omũn arỳm no kã nhàn arkum,

—Kwãrĩk wãnh arek amrê me prĩre iwỳr mõ, ane. Kwãrĩk wãnh gar mebê adjãptãr kêt gê me arek amrê mõ. ã me kute amijo anhỹrbit gêdja Metĩndjwỳnh me utàn me kadjy bẽnjadjwỳr ne ar meo ba. <sup>15</sup> Ë, me kute me prĩre pyrãk ne amijo kãtãmjabit gêdja Metĩndjwỳnh me utàn me kadjy bẽnjadjwỳr ne ar meo ba. Be, me prĩre kute ta amim imarja pumũ. ã me kute amijo anhỹr gêdja Metĩndjwỳnh me utàn

me kadjy bẽnjadjwỳr ne ar meo ba. Mrãmri ne ba me amã katà arê. Nãm ã Jeju arkum ane. <sup>16</sup> Ne kam aben totokmã me prĩre jamỳn me'ã ikra jadjuw ne memã kum,

—Gê Metĩndjwỳnh ajo djuw mex. Gê Metĩndjwỳnh ajo djuw mex, ane.

*Me'õ nhõ nêkrêx kumex'ã ujarênh.*

*Mat 19.16; Ruk 18.18; Xim k 6.6; Xij 5.1*

<sup>17</sup> Ne kam arỳm memã kàx ne ajte prykôt tẽ. Tẽ: nhyam me'õ arỳm 'yr prõt ne arỳm parbê kõnkrão nhỹn kum,

—Ujarênh djwỳnh, ga ne ga amexkumrêx. Itĩn rã'ã rã'ãmã mỳj gêdja ba Metĩndjwỳnh kadjy nê? ane.

<sup>18</sup> Nhyam Jejubê Metĩndjwỳnh Kra nhyam ta kute kôt kum kator kadjy Jeju kum,

—Mỳkam ne ga imã imex jarê? Me'õ pykakam mex kêtukumrêx. Metĩndjwỳnh pydjibit mex. <sup>19</sup> Metĩndjwỳnh kukràdjã ne ga arỳm ama. Me kute katãt amijo ba'ã kute memã karõkôt kukràdjã ne ga arỳm ama. Nãm memã kum, “Kwãrĩk wãnh me par kêt.

Kwãrĩk wãnh mebê prõo adjãkĩnh kêt.

Kwãrĩk wãnh adjãkĩnhĩ kêt.

Kwãrĩk wãnh ajêx ne me kãmex jarênh kêt.

Kwãrĩk wãnh aje me'õ nhõ mỳjja o aminhõ kadjy kwãrĩk wãnh ajêxnhĩ kêt.

Me amã abãmmẽ anã jabên ar kabẽn ma”, ane.

Ja kunĩ ne ga arỳm ama. Nãm ã Jeju kum ane.

<sup>20</sup> Nhyam kum,

—Nã, ujarênh djwỳnh, arỳm ne ba ibõktikam ja kunĩ ma. Ne kam kôt ije ar amijo iba rã'ã:n arỳm ijabatãnh ne, ane.

<sup>21</sup> Nhyam Jeju arek omũnho djan kam kum kĩnhkumrêx ne kum,

—Be, mỳjja pydji ne kute akukrà rã'ã. On tẽn memã anhõ mỳjja

wã ngràn pãnh pi'ók kaprĩ byn me 'uwĩ, me ò mýjja kêtjamã angãn o me kĩnh. Ne kam amrê iwýr tẽn mã ikôt ajkamê. Dja ga ã anen kam arým kãjkwakam anhõ mýjja mex kumex. Ne kam ijã amijakren aje pĩte'y mýnh mãn prãbê amã atokry pyma kêt ne amã ijabê rã'ã ne mã ikôt ajkamê.

<sup>22</sup> Jeju ã kum ane nhym arým kam kaprĩ:re ne. Ne kam akêx ne mã tẽ. Kaprĩ:re ne tẽ. Be, ò nêkrêx ne kume:x. 'Á maje ne mã kaprĩren tẽ.

<sup>23</sup> Nhym kam Jeju kôt ba djwýnh ar'ýr akêx ne arkum,

—Nêkrêx ne kute me kukrà prãmã. Me ò nêkrêx kumex gêdja me te Metĩndjwýnh kute amim me utàr ne ar meo baja'ýr bõxmã, ane.

<sup>24</sup> Nhym kôt ba djwýnh te kute marmã kam no tyn ku'ê nhym Jeju arým arkum,

—Akmere ar, me ò nêkrêx kanàrrãm ar baja ne me te Metĩndjwýnh kute amim me utàr ne ar meo baja'ýr bõxmã. <sup>25</sup> Ba ar amã arẽ gar ama. Be ga, mry jabatãnhbê kameru te: kute aguja tekrax kremã ngjêxmãja pumũ. Me ò nêkrêx rũnhdjwý kute uràk. Me te Metĩndjwýnh kute amim me utàr ne ar meo baja'ýr bõxmã nhym nêkrêx utà: ne. Nãm Jeju ã arkum ane.

<sup>26</sup> Nhym kôt ba djwýnh ja man kam no tyn djan kam kum,

—Je, nhym mýj me'õ gêdja Metĩndjwýnh amim utà? ane.

<sup>27</sup> Nhym Jeju arým ar omũnho djan arkum,

—Be, me ne me te: kute amipytãr prãmje nhym be, Metĩndjwýnh kute mýjja kunĩ mar. Kumãbit ne amirĩt ne. Ta ne kute me utàrkôt kute mar, ane.

<sup>28</sup> Nhym kam Pedru kum,

—Ë, arým ne bar inhõ mýjja kunĩmã inhiren mã akôt ajkamê, ane.

<sup>29-30</sup> Nhym Jeju arkum,

—Ë, godja me'õ imã àpênh ne memã ijã ujarênh tẽn kadjy arým ò mýjjamã irer jabej, òbikwamã irer jabej. Ó kikre nãr kamy nãr kanikwýnh nãr nã nãr bãm nãr prõ nãr kra nãr ò pykamã irer jabej ba dja ba kum o pãnh ra:x ne. Ne pãnh pyka jakam kum ò mýjjiao akrenh mex ne kum kungã. Ne pãnh òbikwao akrenh mex ne kum kungã. Dja ba kum krãptĩ: kubê 100 ngã nhym pãnh ò kikre, kamy, kanikwýnh, nã, kra, ò pyka krãptĩ mex ne. Kamdjwý dja me kãtãm me'õ jao bikênhõ ba. Dja ã pykakam ane. Nhym ije pykao nykam gêdja Metĩndjwýnhkôt tĩn ne ar ba rã'ã: rã'ã ne. Mrãmri ne ba ar amã arênhkumrêx, ane. <sup>31</sup> Nhym be, jakam me rũnho kutewaja djãm me kute memã wa rã'ãmã? Kati. Me ja krãptĩ gêdja me kajgo mex ne me katên tẽ. Nhym be, me kajgo mex ne me katên tẽmja gêdja me pãnh rũnho kutewa. Nãm ã Jeju kôt ba djwýnh arkum ane.

*Ajte amikukãm amityk'ã ujarênh.  
Mat 20.17; Ruk 18.31*

<sup>32</sup> Ne kam ar ajte Jejumẽ ro'ã prykôt mõ. Krĩraxbê Djeruxarê'ýr àbir mõ nhym Jeju tu kum me uma kêt ne ar kukãm tẽ. Nhym ar te kute marmã kam no tyn mõn arým tĩn prãm. Nhym kam arým me kãxã aro tẽn arkum amijã ujarênh tẽ. Kôt ba djwýnhbê 12jamã ne amijã ujarênh tẽn kum,

<sup>33</sup>—Ë, ota gwaj arým Djeruxarê'ýr badjãbirn babõxmã. Nhym kam ba ije amijo inhĩ dja me apýnh me rũnhmã ikanga, me kadjy Metĩndjwýnh mar djwýnh nhõ bẽnjadjwýr arkum ikangan Mõjdjê kukràdja mar djwýnhmãdjwý ikanga. Nhym kam me ikã mex jarên ijã abenmã kum, “Axwekumrêx. Gê me pãnh tu bĩnkumrêx”, ane. Ne kam me bajtemmã ikanga. <sup>34</sup> Nhym me arým ijã bẽno ajkên ikutõn mry

kà punuo ikaprêprê:k ne. Ne kam arým ibĩ nhyim ijã akatin akatin akati ba akubyn itĩn ne. Nãm ã arkum ane.

*Ar kute ajte amirax jabej.*

*Mat 20.20; Ruk 22.24*

<sup>35</sup> Nhyim kam Xijagumẽ Djuão ar arým 'yr bõx. Djebedeu kute ar irja 'yr bõx ne kum,

—Ujarẽnh djwýnh, bar amã arẽ ga prĩne kõt ã ar ijo ane, ane.

<sup>36</sup> Nhyim arkum,

—Mýj ne ba ije ar ajomã? ane.

<sup>37</sup> Nhyim ar kum,

—Be, dja ga ĩ anhõ me ja kunõo amiptàn prĩne amexkumrẽx ne apyma. Memã anhýrkam bar irax ne anhkõ'ã memã nhỹ, bar ijõ adjubõk'ãnh nhỹ nhyim ar ijõ adjuge'ãnh nhỹ. Dja ga ã ar ijo ane, ane.

<sup>38</sup> Nhyim Jeju arkum,

—Gêt kon. Nã gãm ar arĩk amim 'ã karõn imã arẽ. Ba ar amã arẽ gar ama. Dja ba ngõnhkrã kam kangõ jao ikõ. Djãm ar aje ipyrak ne kangõ jao akõm mã? Dja me ngõmã ijadjã. Djãm ar aje ipyrak nhyim ngõmã me kute ar ajadjarmã? Nãm ã arkum ane. Bir, mýj'ã ne kangõ jao kõm ne ngõmã adjarmã akre? Bir, amitolcry kume:x'ã ne akre. Ar kute urak jabej ne ar kukij. Ar tokryo kute Jeju tokry pyrak jabej ne ar kukij.

<sup>39</sup> Nhyim ar kum,

—Nã. Kadjy ar ije apyrak, ane.

Nhyim Jeju arkum,

—Mrãmri dja gar aje ipyrak ne atokry kumex ma. Mrãmri dja gar kangõ jao ikõ nhyim me ngõmã ar ajadjã. <sup>40</sup> Be, djãm ba ne ba ar amã inhikõ'ã ar anhýrmã arẽ got? Be, Ibãm kute amrêbê: amijo me'õ ar utar ar ta dja ar inhikõ'ã memã nhỹ. Nãm ã Xijagumẽ Djuão arkum ane.

<sup>41</sup> Nhyim kõt ba djwýnhbê 10 arým ar kabẽn ma. Ne kam arým Xijagumẽ Djuão arkum àkrê ne.

<sup>42</sup> Nhyim Jeju amiwýr ar ku'uw ne arkum,

—Me bajtemkam me bẽnjadjwýr ne me ari àpẽnh'ã memã àpẽnh ne memã bẽn týx ba. Nãm ã me bajtemkam me rũnh kute meo bao ane gar arým ama. <sup>43</sup> Djãm ar ga aje me kudjwamã? Kati. Ar ga dja gar ã anhýr kêtukumrẽx ne. Ar ajõ abenkam arax prãm jabej amijo akajgon arkum adjapẽnh ar aba. <sup>44</sup> Ne kam ar ajõ aben kadjy abẽnjadjwýr rax prãm jabej tu amijo akatãm ne me kunĩmã adjapẽnh kajgo aba. <sup>45</sup> Ba ije amijo inhĩ djãm imã me àpẽnh kadjy ne ba amrẽ tẽ? Kati, ba dja ba memã apê. Me ren ta amijaxwe pãnh tokryn arým ty. Nhyim be kati. Me krãptĩ jaxwe pãnh ba dja ba itokryn arým ty. Memã idjapẽnh ja kadjy ne ba amrẽ tẽ. Nãm ã Jeju arkum ane.

*Me'õ no rã akubyn rĩt.*

*Ruk 18.35*

<sup>46</sup> Nhyim kam ar ajte tẽ:n kam krĩraxbê Djerikokam bõx. Bõx ne kam kato. Nhyim kam Jejumẽ kõt ba djwýnhmẽ me krãptĩmẽ ne me Djeriko kurũm kator mõ. Kator mõ nhyim wãnh Baximẽu no rãja pry japkre'ã nhỹ, amijo à'wýro nhỹ. Ximẽu ne kudji. <sup>47</sup> Nhyim me abenmã kum,

—Nadjarekam Jeju ne tẽmja, anhýro kumex. Nhyim arým kuman arým kum amijo akij ne kum,

—Ë, Jeju, Dawi tamdjwý 'õ. Gop amã ikaprĩ, ane.

<sup>48</sup> Nhyim me krãptĩ arým kum bẽn týx ne kum, “E kum anhikrê”, ane. Nhyim kam tu kum àkjẽro bẽn kum,

—Dawi tamdjwý 'õ, gop amã ikaprĩ, ane.

<sup>49</sup> Nhyim Jeju arek kum djan memã kum,

—Me ajõ tẽn kum arẽ gẽ amrẽ iwýr tẽn, ane.

Nhyim me 'yr tẽn kum arẽn kum, —On akĩnh ne on kãmã dja. Onĩj amiwýr ajuw, ane. <sup>50</sup> Nhyim arým



wānh inôkàti mēn ekruX ne kàjmā dja. Kàjmā djan arým Jeju'ÿr tē. 'ÿr tēn arým 'ÿr bôx.

<sup>51</sup> NhyM Jeju kum,  
—Mÿj ne ba ije ajomā? ane.

NhyM no rāja kum,

—Bēnjadjwÿr, aje inoo mex ba irĭtmā, ane.

<sup>52</sup> NhyM Jeju kum,

—Ga ne ga arĭt kadjy tu amim ikamnhĭXkumrēx ne iwÿr bôx. Kam dja ba arým ajo mex. Aj mā, ane.

NhyM kum kabēnmē ro'ā arým rĭt mex ne arým Jejukôt pry'ā tē.

## 11

*Jeju rax ne Djeruxarēmā ār.*

*Mat 21.1; Ruk 19.28; Dju r 12.12*

<sup>1</sup> NhyM Jejumē ar prykôt mō:n kam krĭraxbē Djeruxarē kuri krĭ ngrire ja'ÿr bôx. Krānhrebē Oriwēre'ā rwÿkbē ne krĭ ngrire jabē Bepadjēmē Betanhamē. 'ÿr bôx nhyM kôt ba djwÿnh amānhkrutmā kum,

<sup>2</sup> —Pry ja'ā dja gar arek katāt krĭwāmā tē. NhyM ar akutā pry kator kraxkam dja gar mry'ā krĭ jabatānh nyrewā pumū. NhyM me kute pĭ maktā ôkre djē nhyM āmwā. Kraxje me'ō mry wā'ā krĭ kēt. Dja gar 'āpre bōn amrē o tē. <sup>3</sup> Godja me'ō 'ā ar amā kabēn jabej ne ar amā, “Mÿj kadjy”? ane gar kum, “Bēnjadjwÿr 'ā tēm prām. Dja 'ā tēn kam akuby:n amā ano.” Nām ā Jeju arkum ane.

<sup>4</sup> NhyM kam ar 'ÿr tē. Tē:n kam arým mrymā kato. Kikre'ō jajkwa krekre tāri ne me mry 'āpre nhyM dja. Pry kēnhkam ne mry dja nhyM ar arým 'āpre bō. <sup>5</sup> NhyM ar bu'ā me ku'ēja ar kukij ne arkum,

—Mÿj kadjy ne gar mry 'āpre bō? ane. <sup>6</sup> NhyM Jeju kute arkum 'ā karō kôt ne ar ā memā ane. NhyM me arým arkum, “Ajrā”, ane.

<sup>7</sup> NhyM ar arým Jeju'ÿr mryo tēn o bôx. Ne kam ar aminhō kubēkào kum mry'ā aty. NhyM kam 'ā

nhÿ. <sup>8</sup> NhyM kam me krāptĭdjwÿ kukām kum pry'ā atyo mō. Am-inhō kubēkào kum atyo mō. NhyM me kwÿ bu'ā kapôt'ÿr mōn pi'ō nhikēn o bôx ne kukām kum pry'ā o atyo mō. NhyM arým 'ā tē. <sup>9</sup> NhyM me kwÿ kukām mō, o ākjēr mō nhyM me kwÿ kôt o ākjēr mō. Nām me o ākjēr mōn kàj bē abenmā kum, Metĭndjwÿnhmā kum,

—Jejubē me inhō Bēnjadjwÿr rax. Ām mexkumrēx. Kam me ikĭ:nhkumrēx. Gē on me ipytā. Gē Metĭndjwÿnh o kĭnh rax. Metĭndjwÿnh kukwakam ne arým me bakadjy bôx. <sup>10</sup> Arým me bakukāmāre Dawi kudjwa kute me ijo ba kadjy ne bôx. Gē me kàjkwakamdjwÿ Metĭndjwÿnhmā nextire jarēnh o kumex. Gē on me ipytā, ane.

<sup>11</sup> NhyM arým krĭraxbē Djeruxarēkam bôx. Bôx ne kam Metĭndjwÿnh nhō kikretimā wadjā. Ne kam amibu'ā mÿjja kunĭ pumūnh o tē. NhyM kam arým 'ā amykry mex ne. NhyM kam kôt ba djwÿnhbē 12mē amū krĭ ngrirebē Betanha'ÿr tē. 'ÿr tē:n kam bôx.

*Ar kute tu amim Metĭndjwÿnh kamnhĭXkumrēxmā 'ā ujarēnh.*

*Mat 21.18*

<sup>12</sup> NhyM ar'ā akati nhyM arým Betanha kurūm tē. Ne kam kum prām ne. <sup>13</sup> NhyM wānh pidjōbē pigēre'ō dja nhyM amybÿm 'ō pumū. Ne kute ô jabej kadjy 'ÿr tēn 'ÿr bôx. Ne te ô jabej nhyM ô kēt ne 'ôbit nhyM arým omū. Kraxje ô'ā mytyrwÿ kator kēt rā'ākam ne ô kēt. <sup>14</sup> Nām omūn tu pidjōmā kum,

—Jakam dja ga adjō kētkumrēx nhyM me adjō krēn kēt ne, ane. NhyM kôt ba djwÿnh arým kuma.

*Kute kikreti nēje me anor.*

*Mat 21.12; Ruk 19.45*

<sup>15</sup> NhyM kam ar tē:n kam krĭraxbē Djeruxarēkam bôx. Kam bôx nhyM kam Jeju Metĭndjwÿnh nhō kikretimā tēn wadjā. NhyM me

kute memã mÿjja nhôr djwÿnh kumex. Nhy m me kute memã mÿjjao pãnh ne amim byr kadjy 'ã kumex. Nhy m arÿm bôm me rênho dja. Nhy m me kute me ô pi'ôk kaprÿ pãnh memã kikreti nhô pi'ôk kaprÿ nhôr kadjy me kumex nhy m mebê pÿponho âpanho tẽ. Nhy m me kute tut nhôr djwÿnhdjwÿ kumex nhy m mebê krÿ dja nhikô rênho tẽ. <sup>16</sup> Ne mã mebê âptãro djan memã kum,

—Kwãrik wãnh on Metÿndjwÿnh nhô kikreti katikôt me ajênho aba kêt, ane. <sup>17</sup> Ne kam memã kum,

—Amrêbê: ne me bakukãmãre Metÿndjwÿnh kabên'ã pi'ôk no'ôk ne. Kamã Metÿndjwÿnh ta memã kum, “Inhô kikreti ja'ã dja me abenmã kum,

'Apÿnh me ô pyka kunÿkôt me kute Metÿndjwÿnhmã kabên kadjy ne ô kikreti wã', ane.

Dja me ã inhô kikreti'ã abenmã ane.”

Nãm ã Metÿndjwÿnh pi'ôkkam ane. Nhy m be, me ga ne ga me aje kam me àkÿnhÿo aben pydji dja. Nãm ã Jeju memã ane. <sup>18</sup> Nhy m Môjdjê kukràdjã mar djwÿnhmẽ me kadjy Metÿndjwÿnh mar djwÿnh nhô bënjadjwÿrmẽ arÿm Jeju kabên ma. Ne kam 'ã aben maro nhÿn abenmã kum,

—Je tô mÿj dja gwaj baje Jeju bÿnmã on? ane. Me kum umakam ã abenmã ane. Me kãtãm kunÿ Jejukam no tyn kum kabên kÿnh ne kumex. Nhy m kam me rÿnhja kum uma.

<sup>19</sup> Nhy m kam Jeju ar'ã para nhy m ar arÿm krÿrax kurÿm katon tẽ.

*Ar kute tu amim Metÿndjwÿnh kamnhÿxkumrẽxmã 'ã ujarênh.*

*Dju r 14.13; Xij 1.6; Dju k 5.14*

<sup>20</sup> Nhy m ar'ã akati nhy m ar ajte pidjôbê pigêre 'ãnh tẽn omÿ. Nhy m arÿm arêmẽ kunÿ ngrã ne. <sup>21</sup> Nhy m Pedru akubyn amijo tẽn Jeju kabên man kum,

—Ujarênh djwÿnh ota, aje pidjôbê pigêre kangrônha arÿm ngrãn dja, ane.

<sup>22</sup> Nhy m kam arkum,

—Gora ar tu amim Metÿndjwÿnh kamnhÿxkumrẽx. <sup>23</sup> Ba ar amã arê gar ama. Gorên me'ô krãnhwãmã kum, “On amikaban ngô jabatãnh mÿjakam môn tÿm”, ane. Ne ren ôkre kadjwÿnhbê amim,

“Kon, birãm dja ipêx, kon”, anhÿr kêt ne tu kadjy amim kamnhÿxkumrẽx ne ren amim, “Be, mrãmri dja ikabên kôt ã imã o ane”, ane. Kute ren ã amim anhÿrkam ren krãnh mrãmri ã amijo ane. Mrãmri ne ba ar amã arênhkumrẽx.

<sup>24</sup> Kam aje mÿjja kunÿo Metÿndjwÿnhmã adjã'wÿrja dja gar tu kadjy amim kamnhÿxkumrẽx nhy m arÿm ar akabên kôt ã ar amã o ane. <sup>25</sup> Ga kam ar aje Metÿndjwÿnhmã adjã'wÿro adjãmkam amimaro dja. Me'ôkam angyrk jabej amimaro dja. Godja gar me'ôkam angyrk jabej on kam angyrk wãnh kum anhiren kam angyrk kêt. Dja gar kam angyrk kêt nhy m kãjkwakam ar Abãmdjwÿ arÿm ar gadjwÿ ar ajaxwe maro aknon ar akam ngyrk kêt. <sup>26</sup> Be, godja gar me'ô, axwe'ô mar rã'ã jabej ne kam angyrk rã'ã jabej nhy m ar Abãmdjwÿ ar ajaxwe mar rã'ãn ar akam ngyrk rã'ã ne. Nãm ã Jeju kôt ba djwÿnhmã ane.

*Me kute rax jabej Jeju kukjêr.*

*Mat 21.23; Ruk 20.1*

<sup>27</sup> Nhy m ar tẽn kam Djeruxarêkam bôx. Nhy m kam Jeju ajte Metÿndjwÿnh nhô kikretikam bôx ne kam ar mrã. Nhy m me rÿnh arÿm 'ÿr bôx. Me kadjy Metÿndjwÿnh mar djwÿnh nhô bënjadjwÿrmẽ Môjdjê kukràdjã mar djwÿnhmẽ mebêngêtmẽ ne me 'ÿr bôx. <sup>28</sup> 'ÿr bôx ne amÿja'ã kute kikreti kurÿm me anorja jabej kukij ne kum,

—Mÿj me'ô kabênkôt ne ga ar ã meo anhÿro aba? Mÿj me'ô ne amã me'ã karô ga kam amũ ô'ã bôm ar me rênho aba? ane.

<sup>29</sup> NhyM Jeju memã kum,

—Badjwÿ dja ba mÿjja jabej me akukja. Me akumrêx dja ga me imã arê. Ba kam arÿm badjwÿ ije mÿj me'ô kabênkôt ar me anoro ibaja me amã arê. <sup>30</sup> Djuão kute ngômã me angjênhja djãm me kabên kôt ne arík ar ngômã me angjênho ba? Nãr djãm Metîndjwÿnh kabênkôt? Goja imã arê, ane.

<sup>31</sup> NhyM kam me abenkam kang anbenmã kum,

—Je mÿj dja gwaj kum nê? Dja gwaj kum “Metîndjwÿnh kabênkôt”, ane nhyM kam gwaj bamã kabên 'ô jarên gwaj bamã, “Bir be, mÿkam ne ga me amim Djuão kabênja mar kêt ne?” ane.

<sup>32</sup> Nãr dja gwaj kum, “Me kabên kôt ne tu arík ar ngômã me angjênho ba”, ane nhyM kam me krãptĩ ren o ngyk ne kum gwaj bakurê gwaj ren kam bamã me uma ne. Me kâtãm ja ne me arÿm Djuão kabên man kum kĩnh ne, ne o Metîndjwÿnh kukwakam kabên jarên djwÿnh ne. Dja gwaj kum ane nhyM me arÿm o ngyk ne.

<sup>33</sup> Nãm me ã abenmã anen kam Jejumã kum,

—Kon ne. Ar ije mar kêt. Mÿj me'ô kabênkôt Djuão kute ngômã me angjênhja ar ije kôt mar kêtê, ane.

NhyM kam memã kum,

—Bir be, dja ba badjwÿ me amã arênh kêt ne. Mÿj me'ô kabênkôt ije ar meo iba ja dja ba me amã arênh kêt ne, ane.

## 12

*Pidjôo djuw mex djwÿnh jaxwe'ã ujarênh.*

*Mat 21.33; Ruk 20.9*

<sup>1</sup> Ne kam memã apÿnh kukràdjã djãri'ã memã mÿjja jakren memã 'ã ajarên memã kum,

—Be, me'ô arÿm amim pidjô kwÿ kren kadjy bu'ã keno kôkayro kum o ipôk ne. Ne kam pidjô janênh djãmã kren ipêx. Ne pidjô pumũnh djwÿnh ku'ê djã'ã par prêkti nhípêx. Ne kam me kwÿmã kum, “Gora me imã o djuw mex. Gora gê abatãnh ne ô ga amim kwÿo atom ne imã mũm kwÿo atom.” Nãm ã me kwÿmã ane. Mebê idjaer'ã ne Jeju pidjô jakren me rũnh'ã pidjôo djuw mex djwÿnh jakren Metîndjwÿnh'ã ô pidjôkô djwÿnh jakren kam arek memã 'ã ujarênho djan memã kum,

—Ô pidjôkô djwÿnh ã me kwÿmã anen kam atemã pyka 'ômã tẽ. Ne kam kam wãnh ar ba. <sup>2</sup> NhyM arÿm pidjôja tuk ne kumex. NhyM kam ô pidjôkô djwÿnhja arÿm 'ã mytyrwÿ jakren kam 'ÿr ô àpênh jano. Kute memã arênh nhyM me kute kum pidjô kwÿo atom ne kute kôt anor kadjy ne 'ÿr ano. <sup>3</sup> NhyM kam 'ÿr tẽn bôx nhyM kam me kute pidjôo djuw mexja ate me'ôjao tÿm ne kaprêprê:k ne. NhyM mã akubyn 'ÿr ÿkam tẽn 'ÿr bôx. <sup>4</sup> NhyM ajte ô pidjôkô djwÿnhja pãnh 'ÿr me'ôjadjwÿ jano nhyM 'ÿr tẽn 'ÿr bôx nhyM me bĩn punun kum pijãm jadjãn ano. <sup>5</sup> NhyM kam ô pidjôkô djwÿnh 'ÿr ajte ô àpênh 'ô jano nhyM 'ÿr tẽn 'ÿr bôx. Tãmwãdjwÿ ne me tu kubĩ. NhyM kam aben totokmã me'ÿr ô àpênh krãptĩ jano nhyM me kwÿ titik ne kwÿ pa.

<sup>6</sup> NhyM kra djwÿnh pydji, kum kra jabêja 'ã ne arÿm amim, “Godja ikra me'ÿr bôx nhyM me arÿm mar jabej”, ane. Ne arÿm me'ÿr ano nhyM me'ÿr bôx.

<sup>7</sup> NhyM kam me abenmã kum,

—Be, kra ne wã. Gwaj on kubĩ. Tãmwã dja bãm kum mÿjja kunĩ ngã, ô nèkrêx kunĩ kanga, ane. Gwaj on tãmwã bĩn kam amim ô nèkrêx, ô mÿjja, ô pidjôja kunĩo aminhõ, ane. <sup>8</sup> Ne kam o tÿm ne kubĩn arÿm pidjôkô kurũm bôm kumê.

<sup>9</sup> Be, mỳj gédja ò pidjòkò djwỳnhja me ja on? Bir, dja me'ỳr tèn me'ỳr bòx ne me imex ne kam ò pidjòkòja atemã me ja'òmã kungã. Nãm ã Jeju me rűnhmã ane. Amijã ne ò pidjòkò djwỳnh kra jakren Metűndjwỳnh kukwakam kaběn jarěn djwỳnh'ã ne ò àpěnh jakre. <sup>10</sup> Nhyam kam Jeju ajte memã me kukãmãre kaběn jarěn memã kum,

—Amrěbė: ne me bakukãmãre memã Metűndjwỳnh kaběn jarěn memã kum,

“E kum kěn ja ne me kute kikreo ãm djwỳnhja kute kikremã armã te oműn kam bòm kumė.

Kěn ja ne arỳm kute kikremã o kajpar, kum o kajpar tỳxi.

<sup>11</sup> Běnjadjwỳr djwỳnh ta ne ã kěno ane gu me oműn kam bamã mexkumrěx”.

Nãm ã me bakukãmãre memã anen arỳm 'ã pi'òk no'òk ne. Djãm me ajte oműnh ne mar kět? Nãm Jeju ã me rűnhmã ane. Nãm amijã kěn jakre. Ne me rűnh'ã kikreo ãm djwỳnh jakre. Mrãmri ne me rűnh kute kikreo ãm djwỳnh pyrãk ne arỳm Jeju kanga. Me rűnh kute kanga'ã ne Jeju me rűnhmã ja jarė.

<sup>12</sup> Nhyam me amim,

—Be, gwaj bajã ne pidjòo djuw mex djwỳnhmė kikreo ãm djwỳnh jakre, ane. Ne bit kute o tỳmmã te 'ã amijakre. Me krãpti pymaje ne me te 'ã amijakren arỳm mã tė.

*Xedjamã pi'òk kaprĩ nhør'ã ujarěnh.*

*Mat 22.15; Ruk 20.20; Rò 12.1*

<sup>13</sup> Ne kam Jeju'ỳr mebė pardjėu kwỳmė Erodji nhõ me ja kwỳ jano. Jeju bėnjadjwỳr'ã kaběn punu jabej ne me me ja jano. Godja bėnjadjwỳr'ã kaběn punu'ò jarė nhyam me arỳm bėnjadjwỳrmã arė. Kadjy ne me Jeju'ỳr bõx ne kum,

<sup>14</sup> —Ujarěnh djwỳnh, ba me arỳm ama. Ga ne ga akaběn katãtkumrěx. Amã me rűnh pyma kět. Me rűnhmė me kajgomė ne ga memã

akaběno aben pyrãk ne me imã Metűndjwỳnh kukrãdjã'ã adjujarěnh mexkumrěx. Me bėnjadjwỳr rűnh kunĩ nhõ bėnjadjwỳr raxbė Xedja. Mebė idjaer kute o me bajtemja. Djãm Metűndjwỳnh kukrãdjã kõt ne gu me baje bėnjadjwỳr Xedjamã pi'òk kaprĩ nhõrmã? Nār kon. Goja on ar imã arė. <sup>15</sup> Dja gu me kum kungã nār dja gu me kubė nė? Nãm me ã Jejumã ane.

Nhyam arỳm me 'ėxnhĩkõt tu me kuman memã kum,

—Nok ba ren me amã, “Metűndjwỳnh kaběn kupa'ã ne me kum òro ba”, ane ga me ren memã kum, “Be, Jeju axwekumrěx. Ga, kute bėnjadjwỳr raxbė Xedjabė pi'òk kaprĩ nė prãmja pumű”, ane. Amrě imã ngõnhponho pi'òk kaprĩo tė ba me amã omű, ane. <sup>16</sup> Nhyam me kum o tèn kungã nhyam arỳm memã kum,

—Mỳj me'ò ne 'ã karõja? Ne mỳj me'ò ne 'ã idji jětja? ane.

Nhyam me kum,

—E kum be, Xedja nhõ, ane.

<sup>17</sup> Nhyam Jeju memã kum,

—Bir be, ò pi'òk kaprĩ. Dja ga me kum angã nhyam be, Metűndjwỳnh nhõ mỳjjabit dja ga me Metűndjwỳnhmã angã, ane. Nãm memã ane nhyam me te kute kutã mỳjja'ò jarěnhmã kam no tyn dja. Ne kam arỳm kum kãx ne mã mõ.

*Me tyk akubyn tĩn mỳr jabej me Jejumã kaběn.*

*Mat 22.23; Ruk 20.27; Tex k 4.16; Ap 20.4*

<sup>18</sup> Nhyam kam mebė xadjudjėu kwỳ'ỳr bõx. Mebė xadjudjėu ne me arĩk memã kum,

—Be, me tyk akubyn tĩn prãm kětikumrěx, anhỳr ar o ba. Me ja ne me 'ỳr bõx ne kukij ne kum,

<sup>19</sup> —Ujarěnh djwỳnh, me bakukãmãre Mõjdjė ne amrěbė: me bamã,

“Godja me’ô prô’ÿr môn kra kêt rã’ân tyk jabej mÿj dja me nê?

Bir, dja kamymê ar aben djâkam ikwãja’ô ’ÿr mō. Ne kam kum kra djin kukrij nhym abatàn ne.

Me kute ’ã abenmã kum, ‘Be, kamy tyk kra ne wã’, anhÿr ne kute kamy tyk mar tÿx rã’ã kadjy.”

Nãm ã me bakukãmãre Môjdjê me bamã ane. Nãm mebê xadjudjêu ã Jejumã ane. <sup>20</sup> Ne ajte kum,

—Be, kamybê 7 ne axikôt apôx. Nhym kutewaja prô’ÿr mō. Prô’ÿr môn kra kêt ne ty. <sup>21</sup> Nhym atãrija pãnh ’ÿr môn kam ajte ty. Nhym pãnh atãrija ’ÿr môn kam kra kêt rã’ân ajte ty. <sup>22</sup> Be, nãm ar ã o anhÿro tēm tãmtã: nhym arÿm kutapureja aro ino ren ’ÿr môn adjwÿnhdjwÿ ty, kra kêt ne ty. Nhym arÿm ar prôja arkôt ty, kra kêt rã’ân ty. <sup>23</sup> Ar kubê 7 ne ar aben tokmã kamy prô’ÿr ba. Godja we ar kunÿ akubyn tÿn ne àbir jabej we àbirkam nhÿnh kamyja dja ’ÿr mō? ane. Me ta kute we me tyk akubyn tÿn kêt jarēnh mÿr jabej ne me ã Jejumã ane. Me kute o àpanh nhym binhikrēnh kadjy nàràm ne mebê xadjudjêu ã kum ane.

<sup>24</sup> Nhym Jeju arÿm memã kum,

—Me ajte Metÿndjwÿnh kabēn’ã pi’ôk no’ôk mar kêt ne me ajte Metÿndjwÿnh tÿ:xkumrēx mar kêt. Nã gãm me arÿk Metÿndjwÿnh kupa’ã memã ’ã ajarē. <sup>25</sup> Be, me tyk ne akubyn tÿnkam djã ne me ajte abenwÿr ba? Kati, akubyn me tÿnkam ne me abenwÿr ba prãm kêt kumrēx. Kam dja me kute kàjkwakam kadjy mrãnh djwÿnh pyrãk. <sup>26</sup> Be, mrãmri me tyk akubyn tÿnkumrēx. Amrêbê: ne Metÿndjwÿnh me bakukãmãre Môjdjêmã kabēn jarē. Me tyk akubyn tÿn’ã kabēn jarē nhym ’ã pi’ôk no’ôk. Djãm me ajte pi’ôkkam

omÿnh kêt, akaôk pôk ne tu mex ne ãm’ã ujarēnhkam Metÿndjwÿnh kute kum,

“Tbê Abraãomê Idjakmê Djako ar ô Metÿndjwÿnh”, anhÿrja, djãm me ajte pi’ôkkam amim arēnh kêt?

Arÿm Abraão ar tyk ’ãtÿmkam ne Metÿndjwÿnh ã me bakukãmãremã ane. <sup>27</sup> Bir be, ar tyk tÿmja Metÿndjwÿnhmã tÿn ne ar ba nÿj pumÿ. Djãm Metÿndjwÿnhbê me tyk nhô Metÿndjwÿnh? Kati. Metÿndjwÿnh ne me tÿn nhô Metÿndjwÿnh. Me tyk kunÿ ne me kum tÿn. Kam ne ba me amã, “Metÿndjwÿnh ne kubê me tÿn nhô Metÿndjwÿnh”, ane. Nã gãm me kupa’ã memã ’ã ajarē. Nãm Jeju ã mebê xadjudjêumã ane.

*Me kute kukràdjã jabej Jeju kukjêr.*

*Mat 22.34; Ruk 10.25*

<sup>28</sup> Jejumê mebê xadjudjêumê aktã kabēno aben japanho dja nhym Môjdjê kukràdjã mar djwÿnh’ô arÿm me’ÿr bôx. Ne Jeju katãt kute memã Metÿndjwÿnh kabēn jarēnhkôt arÿm kuman kam kukij ne kum,

—Metÿndjwÿnh kute katãt me kute amijo ba’ã memã karôkam kabēn jarēnhja kute aben nhitepã memã kabēn jarēnhja dja ga amim maro tē. Nhÿnh kabēnja’ô ne mexo kute kunÿ jakrenh? ane. <sup>29</sup> Nhym kum,

—Be, Metÿndjwÿnh kabēn’ô kumrēx mexo kute kunÿ jakrenhja ba amã arē ga ama. Metÿndjwÿnh memã kum,

“Ë, mebê idjaer, gora ikabēn ma. Bēnjadjwÿr djwÿnh, kubê ne Metÿndjwÿnh. Bēnjadjwÿr djwÿnh pydji.

<sup>30</sup> Me anhô Bēnjadjwÿr djwÿnh, me Atÿndjwÿnh dja ga me amã kÿnh, amã abêo katãt me kunÿ, mÿjja kunÿ jakre.

Djām ajajkwaobit amā Metīndjwýnh jabêmā? Kati. Ajamak, akadjwýnhbê, akukràdjà kunīo dja ga me amā abê:.”

Nām ā Metīndjwýnh memā ane. Be, tām ne ja. Metīndjwýnh kabên'ō kumrêx mexo kute kabên kunī jakrenh ne ja. <sup>31</sup> Ne kam atāri Metīndjwýnh ajte memā kum,

“Me amā amibu'ā me ja jabê. Kute mrāmri ne ga me amā amijabêja pyrāk dja ga me ā amā amibu'ā me ja jabêo ane.”

Nām ā Metīndjwýnh memā ane. Atemā kabên'ō mexo kute ja jakrenh kêt. Nām ā Jeju kum ane.

<sup>32</sup> Nhyam Mōjdjê kukràdjà mar djwýnh kum,

—Ujarênh djwýnh, kôt ne ga arê. Mrāmri Metīndjwýnh pydjibit. Atemā'ō kêt kumrêx. <sup>33</sup> Dja me kum kīnh, kum abêo katāt me kunī, mýjja kunī jakre. Djām ajkwaobit kum Metīndjwýnh jabêmā? Kati. Amak, kadjwýnhbê, kukràdjà kunīo dja me kum abê: . Ne kum amibu'ā me ja jabê. Kute mrāmri ne me kum amijabêja pyrāk dja me ā kum amibu'ā me ja jabêo ane. Akabên ja ne mexo Mōjdjê kabên kunī jakre. Dja me Metīndjwýnh kabênja man kôt ar amijo ban arým mexkumrêx nhyam me kute Metīndjwýnhmā mry bôrja mexo me têp kêt kumrêx. Me kute kum apýnh mýjja nhôr kunīja mexo me têp kêt kumrêx. Nām ā Mōjdjê kukràdjà mar djwýnhja Jejumā ane.

<sup>34</sup> Nhyam kam ôkre kadjwýnhbê amim,

—Be, tām wā ne ikabên kôt kabên mexkumrêx, ane. Ne kum,

—Be, Metīndjwýnh kute amim apytār ne ar ajo ba 'yr, ane. Nhyam me ajte ijukri Jeju kukjêr kêt. Kabên mex pymaje ne ajte kukjêr kêt.

*Kritubê mýj me'ō tām djwý jabej kute me kukjêr.*

*Mat 22.41; Ruk 20.41*

<sup>35</sup> Nhyam kam Jeju ajte Metīndjwýnh nhō kikretikam tēn bōx ne memā Metīndjwýnh kukràdjà'ā ujarêho djan kam memā kum,

—Be, Mōjdjê kukràdjà mar djwýnh ne me memā kum, “Kritubê ne Dawi tām djwý”, anhýr ar o ba. Be, djām Kritubê Dawi tām djwý bit? Kati, kubê ne Dawi nhō Bēnjadjwýrdjwý, ane. <sup>36</sup> Ne kam memā me kukāmāre Dawi kabên jarēn memā kum,

—Be ga, me bakukāmāre Dawi ta kute memā 'ā ujarēnhja pumū. Metīndjwýnh Karō kukwakam kute memā Kritu'ā ujarēnhja pumū. Nām memā kum,

“Inhō Bēnjadjwýrmā ne Bēnjadjwýr djwýnh kabên ne kum,

'Amrê idjubōk'ānh nhý, Abēnjadjwýr raxkam idjubōk'ānh nhý.

Ikam ama ba amrê awýr akurê djwýnho mō ga me kwýo apardjan me kwý nhimex.’

Nām ā Metīndjwýnh inhō Bēnjadjwýrmā ane”, ane.

Bir be ga, Dawi kute kum “Abēnjadjwýr rax”, anhýrja pumū.

<sup>37</sup> Mýkam ne me 'ā Dawi tām djwý kajgo jarê? Djā nām o tām djwý kajgo? Kati, Dawi ta ne kute o ō Bēnjadjwýr rax. Nām Jeju ā memā ane nhyam me krāptitija kum kabên kī:nhkumrêx ne.

<sup>38</sup> Nhyam arek memā ujarêho dja:n memā kum,

—Gora me aminêje me omū. Aminêje Mōjdjê kukràdjà mar djwýnhwā pumū. Be, me ja ne me kute amibên kadjy kute kubêkà jabjêtibit jangjênh prām kumrêx. Ne ajte me krāpti nhipōkri kute memā amibên nhyam me kute memā rūnh jarēnh ne kute memā kum, “Bēnjadjwýr, djām ga, djām ga”? anhýrja. Ja ne me kum kīnhkumrêx.

<sup>39</sup> Ne mebê idjaer bikprōnh djākam nār me krāpti ākuro krīkam ne memā wan krī prām kumrêx. Me kute amibên kadjy ne me me rūnh

krî djâkam krî prâmkumrêx. Kwârîk wânh gar me kudjwa kêt. <sup>40</sup> Nâm me me 'uwtî krâo apan mebê mỳjja kunîo akî ne kam ajkwaobit Metîndjwýnhmâ kabên rûnh ne, ne kum kabên 'ijabjêo ku'ê. Nâm me 'êx ne amijo mex ne kum kabên. Be kati, me axwekumrêx. Kam gêdja Metîndjwýnh me kurâm memâ pân̄h rax jarên prîne me kurâm meo ajkê. Nâm â Jeju memâ ane.

*Me'ô 'uwtî kute ô pi'ók kaprî ngrîre nhôr.*

*Ruk 21.1*

<sup>41</sup> Nhyam kam me kwý itepato môn bôx. Me kute amikutâ Metîndjwýnhmâ pi'ók kaprî kwý nhôr kadjy ne me mō. Nhyam Jeju arým tēn pi'ók kaprî nhôr djâ kôn̄h nhýn me omûnho nhý. Me ô nêkrêx rûnh krâptî ne me aben totokmâ kam pi'ók kaprî rûnh ne kurê. <sup>42</sup> Nhyam kam me'ô nija 'uwtî kubê mjên tyk nhyam ô mỳjja kêtja ngôn̄hponhreo pi'ók kaprîo amân̄hkrut ne kubyn o tēn kam kumê. Ngôn̄hponhreja ne abenâ rēnhkam kubê pi'ók kaprî 'ô pydji, ngrî:re.

<sup>43</sup> Nhyam kam Jeju amiwýr kôt ba djwýnh ar ku'uw nhyam ar 'ýr bôx. Nhyam arkum,

—Ba ar amâ arê, me'ô 'uwtî ja ne ô mỳjja kêt ne tu me kurâm ô pi'ók kaprî raxo tēn Metîndjwýnhmâ kungâ. Me kunî kurâm pi'ók kaprî raxo tēn kum kungâ. <sup>44</sup> Me ja ne me ô pi'ók kaprî kumex ne kam 'â kâtâm ne kumex. Ne kam 'â kâtâmja Metîndjwýnhmâ kungâ. Nhyam be, me'ô nija ne ô pi'ók kaprî kêtê, pi'ók kaprî ngrîre ne tu kum kunî ngâ. O kute amikadjy mỳjja byr ne krên ne tîn kadjy Metîndjwýnhmâ kunî ngâ. Kum 'ô nôr kêtê. Kam ne ba me amâ,

—Nâm me kurâm pi'ók kaprî rax ne kum kungâ. Mrâmri ne ba ar amâ arê. Nâm â Jeju kôt ba djwýnh arkum ane.

## 13

*Akubyn bôx kukâm mỳjja apôx'â ujarênh.*

*Mat 24.1; Ruk 21.5*

<sup>1</sup> Ne kam Metîndjwýnh nhô kikreti kurûm kato. Nhyam kôt ba djwýnh'ô kum,

—Ê, Ujarênh djwýnh ga, kēntio me kute kikreti kwý nhîpêxja pumû. Kēnmê kikre â ti:re ane, ane.

<sup>2</sup> Nhyam Jeju arým arkum,

—Be, ar kikretija pumû. Dja î me kurê djwýnh prîne kikreti ngrân kēn aben nhîby ikwâ kunî nhîkô rê. Nhyam kam kēn'ô aben nhîby nôr kêtumrêx, ane. <sup>3</sup> Nhyam kam ar tē:n kam krân̄hbê Oriwêre'â wabi. Nhyam Jeju arým amybým Metîndjwýnh nhô kikreti kôn̄h nhý. Nhyam Pedrumê Xijagamê Djuâomê Ængre ar me kâxâ kukij ne kum,

<sup>4</sup> —Ê, ar imâ kikreti ngrân̄h'â ajarê. Nhýnh amex 'ôkam dja me bakurê djwýnh me bawýr bôx ne kikreti ngrân̄h am djâ kapô? Mýj gêdja kukâm apôx? Dja bar omûn kam kôt ô akatimâ ikaton ô akati ma.

<sup>5</sup> Nhyam kam Jeju arkum apýnh mỳjja kukâm apôxmâ arkum 'â ajarên arkum,

—Gora ar amijâ ano tỳx gê me'ô ar amâ 'êx ne ar anoo biknor ne Metîndjwýnhbê ar ajo akêx kêt.

<sup>6</sup> Be, me krâptî dja î aben totokmâ me'ýr bôx ne arým amijo 'êx. Amijo 'êx ne arým amijâ imê. Amijâ imēn arým memâ kum, “Me anhô Bēnjadjwýrbê kumkati kadjy ne Metîndjwýnh ijano ba tēn bôx. Ba ibê Kritu”, ane. Ne kam arým me krâptî noo aknon Metîndjwýnhbê meo akêx.

<sup>7</sup> Be, kam dja gar me kute abenwýr prôt man amybým me kute abenwýr prôt jarênh ma. Kwârîk wânh kam ar atîn prâm kêt. Ba ne ba kukâm ar amâ 'â ajarê gar arým ama. Ja kumrêx gêdja me â o anhyro tē. Kraxje kute inomâ mēnh kêt, kute 'ýr o tēm rã'â.

<sup>8</sup> Nà, apÿnh me ba djari gédja me abenwÿr prôt ne aben nhimexo ba. Nym apÿnh bënjadjwÿr rÿnh nhô me dja me abeno kurê djwÿnh ne aben nhimexo ba. Apÿnh pyka djari gédja kam pyka terte:t ne. Nym prãmdjwÿ me kwÿ nhimex. Be, me tokry krax ne ja. Ga, me nire kra àja pumû. Adjÿm. Dja kra à:n kam arÿm à ra:x ne. Me adjwÿnhdjwÿ dja me tokry mō:n kam arÿm tokry ra:x ne. Be, me tokry krax ne ja.

<sup>9</sup> Be, ar ga dja gar ajaxwe kêt kadjy amijãno dja. Dja me apÿnh me rÿnhmã ar akangan me bikprônh djãkam ar atitik ne. Ar aje ijã adjujarênh ar abakam dja me apÿnh me bënjadjwÿr rÿnhmê me bënjadjwÿr kry'ÿr ar ajo mō. Ar ajo mō gar me kabem aku'ê. Memã ijã adjujarênh nym me kute mar kadjy me kabem aku'ê. <sup>10</sup> Nym be, me kute amim imar dja me apÿnh me ba djã kunîkôt ijã ujarênh ny jarênh kumrêx.

<sup>11</sup> Dja me ar ajo rôrôk ne kute memã ar akujêr kadjy me rÿnhmã ar akanga. Kwãrik wãnh gar kam amikukãm akabên 'ô'ã karô kêt ne kwãrik wãnh amikukãm anhôkre kadjwÿnhbê amin, "Je tô mÿj gédja ba aminêje memã ikabên ja on"? anhÿr kêt. Be, me kute memã ar akujêr majmã dja Metÿndjwÿnh Karô ta ar amã ar akabên mex jarê gar aman arÿm memã arê. Kute ar amã ar akabên jarênh ja dja gar memã arê. Djãm ar ga dja gar memã akabên jarê got? Katî. Karô ta dja memã kabên jarê.

<sup>12</sup> Nym mÿjja kunî pyka kôt amingrãnh kadjy dja me kute abeno ôbikwa djwÿnh abenmã àkrê. Me rÿnh kute me par kadjy dja me memã kamykanga. Dja bãm memã kra kanga. Dja kra kum nã nãr bãm kurên me rÿnhmã ar kanga. Me rÿnh kute ar par kadjy ar kanga. <sup>13</sup> Ikôt ar abikamênhkam dja me kunî kum ar akurê. Ne te kum

ar akurê gar ijã adjukanga kêt ne amã ikÿnh tÿx rã'ã ba arÿm ar apytã. Dja me kunî kute aminhinomã amimênh nhô akati bôx gar amã ikÿnh tÿx rã'ã ba arÿm ar apytã. Nãm ã Jeju arkum ane.

<sup>14</sup> Ne kam ajte arkum,

—Be, ar aje ajbir imã, "Ar imã kikreti ngrãnh'ã ajarê", anhÿrja ba ar amã arê gar ama. Dja mÿjja amingrãnh 'ÿr nym kam arÿm mÿjja punutija dja. Metÿndjwÿnh nhô kikretikam dja. Djãm mÿjja punuti Metÿndjwÿnh nhô kikretikam ãnkam mex got? Dja kam dja gar arÿm omû. Mÿjja punuti djô'ã dja me mÿjja kunî ajkên kungrà. Me bakukãmãre Danijeu ne amrêbê: 'ã ajarê. Metÿndjwÿnh kukwakam memã 'ã ajarê. Danijeu ne arÿm memã mÿjja punuti ja'ã ajarênh 'ã pi'ók no'ók. Dja gar pi'ók no'ókwã pumûn kam mÿjja punuti pumûn kam kôt ama. Kam gédja Djeruxarê bu'ã pyka ja nhidjibê Djudêjakam me ja amijã maje krãnh'ÿr prôt ne.

<sup>15</sup> Gédja me'ô kikre nhimôk po'ã ãm jabej kwãrik wãnh akubyn ùrkwãmã nèkrêx'ÿr àr ne byr ne o tēm kêt.

<sup>16</sup> Gê purkam ar ba jabej tu umaje prôt. Kwãrik wãnh kute kubêkã jamÿnhmã 'ÿr akêx kêt. Dja tu me ãm kamã amû prôt.

<sup>17</sup> Watî:re, akati wãkam me tujarômê me kra karã dja me tokry:. Me mÿjja punuti pymaje prôt ne kam arÿm tokry:. <sup>18</sup> Dja gar Metÿndjwÿnhmã amijo a'uw gê na raxkam umaje ar aprôt kêtã.

<sup>19</sup> Be, dja me kam tokry kume:xi. Akubyn amijo tēn mÿjja kunîmo krax djã'ÿr amijo bôx ne ama. Me akukãmãre aben kukãm tokrykôt dja gar me maro tē. Dja gar me tokry tūm maro tē:n amiwÿr me tokry maro bôx. Ga, me tokry kume:xja pumû. Be, amrê mÿjja punuti nhô akati bôxkam dja me tokry katãt me tokry tūm wã



kunî jakre. Ne amrê me'ã akati mörkam me tokryo nydjwý dja me tokryo mýjja punuti'ã me tokryja têp kêtumrêx. <sup>20</sup> Metîndjwýnh ren tokry'ã akati kwý ngri kêt nhyim me'õ ren tîn kêtumrêx. Be, Metîndjwýnh kute amim õ me ja'ã karõ ne kute amijo me utàrja kadjy dja arým 'ã akati wã kwý ngri.

<sup>21</sup> Godja me'õ 'êx ne ar amã, “Ota, jakam arým Kritu bõx ne nhý. Arým ne Metîndjwýnh 'ã me õ Bënjadjwýrbê kumkati mē nhyim jakam arým memã nhý”, anhýr jabej. Nàr me'õ ajte 'êx ne ar amã, “Ota, jakam arým Kritu bõx ne nhý. Arým ne Metîndjwýnh 'ã me õ Bënjadjwýrbê kumkati mē nhyim jakam arým memã nhý”, anhýr jabej. Djãm ar aje me ja marmã? Kati, kwãrîk wãnh amim me ja mar kêt.

<sup>22</sup> Be, apýnh me ta kute amijo Kritu pyrãk dja me amijo amirît ne. Nhyim amũ me jadjwý amijo amirît ne 'êx ne memã kum, “Ba ne ba Metîndjwýnh kukwakam me amã idjujarênh iba”, anhýro ba. Dja me me aêrbê mýjja pumũnh kêt kwý nhípêx, kute me noo biknor nhyim me kute me'ã abenmã kum, “Mrãmri ne djãm Metîndjwýnh kukwakam me kabênkumrêx”, anhýr kadjy. Godja me o me noo biknor ne Metîndjwýnhbê meo akêx jabej. Metîndjwýnh kute amrêbê amijo me utàrja kubê meo akêx ne kute meo ba jabej. Me 'êxnhî no týxo kute me akrenh jabej, godja kubê me kwýo akêx ne meo ba jabej. <sup>23</sup> Be, ar ga dja gar amijã ano týx ne. Ba ne ba mýjja apõx kêttri kukãm ar amã arê gar arým ama. Nãm ã Jeju arkum ane.

<sup>24</sup> Ne kam ajte arkum,

—Nhyim me tokryo ku'êwã'ã akati apêxkam dja mýjja rũnh apõx. “Nhyim myt amijo akamãt kô tyk nhyim mytyrwý irã kêt.

<sup>25</sup> Nhyim kanhêti kãjkwa kurũm rôrõk nhyim kãjkwakam apýnh mýjja tý:x amingrêk ne.”

<sup>26</sup> Ba kam ije amijo inhî dja ba arým prîne itý:x ne prîne imextire ne ipyma:. Ne kam kakrãkõt bõx nhyim me kunî: arým ibõxkõt ipumũ. <sup>27</sup> Ba kam ikadjy mrãnh djwýnh jano nhyim me arým inhõ me ja o atom. Ije amijo me utàrja kunõ atom. Dja me kwý kãjkwa krax'ãm mõn meo atomo mõ. Nhyim me kwý kãjkwa 'ênhõt'ãm mõn meo atomo mõ. Nhyim me kwý aktã kãjkwa nhirê'ãm mõn meo atomo mõ. Dja me apýnh pyka kunîkõt inhõ me ja kunî:o atom. Ba ne ba kukãm ar amã 'ã ajarê. Gora abej ajkam ama.

<sup>28</sup> Be, akubyn ibõx djã nhõ akatija'ã ne ba ije pidjõbê pigêre jakremã. Gora ije 'ã mýjja jakreja ma. Ba ar amã arê gar ama. Dja pidjõ pakã nokã tukam 'õ nhingrã kadjy arým ingrã apõx gar kam arým amexmã kamnhîx nhyim kam arým amex. <sup>29</sup> Bir be, gêdja ba ije ar amã mýjja jarênhja ã apõx mör ane gar kam arým ijabej rît ne ijabej ajkam ama. Akubyn ibõx djã arým 'ýr. Ýr dja mýjja apõxja. Amex kutã gêdja pi'õ ingrã. Nhyim be, ibõx kutã gêdja mýjja pymatija apõx mõ.

<sup>30</sup> Nã, mrãmri ne ba ar amã kõt arê. Me akamingrãnyre ja gêdja gar atyk par kêttri mýjja ja kunî apõx. Mrãmri ne ba ar amã arê. <sup>31</sup> Ikabên kajgo kêtumrêx. Gêdja pykamê kãjkwa ï apêx. Nhyim be, ba ikabên gêdja 'õ biknor kêtumrêx. Mrãmri gêdja ba ije mýjja jarênh ja kunî apõx nhyim me omũ, ane.

*Me kute bõx djã nhõ myt mar kêt.*

*Mat 24.36; Ruk 12.37; Tex k 5.2*

<sup>32</sup> Ne kam ajte arkum,

—Be, ba akubyn ibõx djã nhõ akati nàr myt djãm me'õ kute mar? Kati, me'õ kute mar kêtumrêx. Kãjkwakam kadjy mrãnh

djwýnhdjwý kute mar kêt. Ibãmbit ne kute mar. <sup>33</sup> Dja gar ajaxwebê amijãno djan arek ijabej ajkam ama ne Metĩndjwýnhmã amijo a'wý. Mýkam? Bir, ar aje akubyn ibôx djã'ã myt mar kêt kam. <sup>34</sup> Ar aje akubyn ibôx djãkam myt mar kêt kute ò kikre djwýnh nhõ àpênh pyrãk. Ba ar amã arê gar ama. Be, ò kikre djwýnh ne arým kurüm anhýr bê tẽmmã. Ne kam ò àpênhmã kikre'ã karõn arkum apýnh àpênh djã'ã karõ. Ne kre nêje ku'ê djwýnhmã kum, "Gora arek ijabej ajkam ama", ane. Ne kam arým mã tẽ.

<sup>35</sup> Kam dja gar gadjwý arek ijabej ajkam ama. Ba ne ba ije ò kikre djwýnh pyrãk. Ar aje ibôx'ã myt mar kêt. Godja ba parakam ibôx jabej nãr akamãt kô ipôkri ibôx jabej nãr òkrên'ãnh kãrkam ibôx jabej nãr kryrãm ibôx jabej. <sup>36</sup> Ar arek ijabej ajkam ama. Dja gar ate akrã ba ar ajaêrbê bôx gar ajmã nẽ. <sup>37</sup> Ar amã ne ba arým ibôx djã'ã karõ. Jakam ne ba me kunĩmã 'ã karõ. Me arek ijabej ajkam ama. Nãm ã Jeju me kukãm mýjja apôx'ã arkum ane.

## 14

*Me'õ nire kute Jeju nhimõkkam kangõ runh.*

*Mat 26.6; Dju r 12.1*

<sup>1</sup> Be, Metĩndjwýnh me irõbê mrãnh nhõ akati nêje arým akati pydji. Kam ne mebê idjaer kunĩ amex kunĩkõt aben pydji. Amrêbê: Metĩndjwýnh me kukãmãre nhirõbê mrãnh nhym me kute aben kajmã'ã mar kadjy ne me aben pydji. Kamãdjwý ne me kute djwýponhrebít kur. Metĩndjwýnh me irõbê mrãnh nhõ akati nêje akati pydji nhym me kadjy Metĩndjwýnh mar djwýnh nhõ bẽnjadjwýrmẽ Mõjdjê kukradjã mar djwýnhmẽ arým abenmã kum,

—Mýj godja gwaj baje me krãptĩ kãxã Jejuo batým ne bĩnmã on? ane. <sup>2</sup> Ne ajte abenmã kum,

—Kwãrĩk wãnh gwaj me kute aben pydji djã nhõ akatikam o batým kêt. Gwaj ren o ane nhym me krãptĩ ren o ngryk ne ren kangao kumex, ane. Metĩndjwýnh me irõbê mrãnh nhõ akatikam me krãptĩ bõxja ne me kuman ã Jeju'ã abenmã ane.

<sup>3</sup> Be, krĩ ngrirebê Betanhakam ne Jeju nhý. Kamã ne me'õ ã kajêkam tẽ arým mex. Idjibê ne Ximão. Úrkwãkam ne Jeju ò kwý krẽno nhý. Ò kwý krẽno nhý: nhym me'õ ni arým 'ýr tẽn 'ýr bõx. Nãm 'ýr kẽn jakareo ngõnh byno tẽ. Ngõnhkam ne me kudjý djã kangõo ipu. Idjibê ne nadu. Nãm me prĩne ipêx mex nhym pãnh raxkumrêx. Nãm o tẽn o bõx ne 'ã kutan arým Jeju nhimõkkam kapĩ.

<sup>4</sup> Nhym bu'ã me ku'ê kwý kõt nokã nhãn abenmã kum,

—Je tõ mýkam ne arým me kudjý djão ajkê? <sup>5</sup> Gwaj ren pi'òk kaprĩ kadjy ren memã kungã ne ren pãnh pi'òk kaprĩ rax ne ren kuby. Ren 'ã akrekam pãnhõ denarju kubê 300 jakre. Gwaj ren pi'òk kaprĩ rax byn ren me ò mýjja kêt mã kungrà. Mýkam ne arým o ajkê? ane.

<sup>6</sup> Nãm ar anen nijamã akij. Nhym Jeju arým tu ar kabẽn man arkum,

—Kwãrĩk wãnh rã'ã. Mýkam ne gar kum kaprĩ jadjã? Djãm kute ijã kapĩnkam punu got? Kati, mexkumrêx. <sup>7</sup> Be, akati kunĩkõt ne ar abu'ã me ò mýjja kêt ar ba rã'ã. Ar aje memã mýjja nhõr prãm tu memã angã. Nhym djãm arek gwaj baro'ã ar baba rã'ãmã? Ba ar amã arê gar ama. <sup>8</sup> Dja ba ty nhym me arým ijadjã. Me kute ijadjãrmã ne nija kuma. Kuman arým kum ikaprĩn ijã me kudjý djã kapĩ. Nãm te kute mýjja mexo kute imex pyrãk ne kute imã òrmãn arým tu ijã me kudjý djã kapĩ. <sup>9</sup> Ba ar amã arê gar

ama. Dja me kàj bê pyka kunikôt mã memã ijã ujarênh ny jarên mã nijadjwý 'ã ajarê. Kute ijã me kudjý djã kapîn'ã ajarê. Gêdja me kam aben djô'ã nija mar rã'ã ne. Mrãmri ne ba ar amã arênhkumrêx. Nãm ã Jeju arkum ane.

<sup>10</sup> Nhyam kam Djuda Ikadji, Jejukôt ba djwýnhbê 12 'õ ne me kadjý Metíndjwýnh mar djwýnh nhõ bēnjadjwýr ar'ýr tē. Kute arkum Jeju kanga kadjý ne tē. <sup>11</sup> Ar'ýr tēn ar'ýr bõx ne arkum,

—Arým ba ije ar amã Jeju kangamã. Nãm ã arkum ane nhyam ar kuman arým Kínhkumrêx ne. Ne arým kum kabēn jarēnh mãmdjin kum,

—Dja ga ã Jejuo ane bar kam arým amã pãnh pi'òk kaprĩ ngã, ane. Nhyam kam amim,

—Mýj dja ba ije arkum Jeju kanga kadjý on? Nãm ã Djuda amim anhýro ba.

*Ar kute ro'ã õ kwý krēno ino rer.  
Mat 26.17; Ruk 22.7*

<sup>12</sup> Nhyam kam mebê idjaer kukràdjákôt me kute djwýponhbit kur nhõ akati arým kutewa. Kam ne me apýnh úrkwákam Metíndjwýnhmã mrykĩ'átomti pan kuku. Amrêbê: Metíndjwýnh me irôbê mrãnhja ne me kute kôt mar kadjý ã o ane. Nhyam kôt ba djwýnh ar Jejumã kum,

—Metíndjwýnh me irôbê mrãnh nhõ akatikam gwaj banhõ kwý krēn kadjý jãm dja bar tēn ar akutêp gwaj banhõ kwý krēn djã jadjwýr mex? ane. <sup>13</sup> Nhyam arým kôt ba djwýnh amãnhkrutmã 'ã karõn arkum,

—Dja gar krĩraxkam tē. Nhyam arým me'õ ngyo ngõnhkam ngõ mýn o tē gar omũ. <sup>14</sup> Nhyam arým kikremã wadjã gar kôt tēn wadjã. Wadjãn õ kíkire djwýnhmã kum, “Ujarênh djwýnh ne amã kabēn ne amã, ‘Bamê ikôt ba djwýnhmê ne bar inhõ kwý krēnmã. Nãr kadjý

inhõ kumoka'ê? Aje me bõx nymã kumoka'ê jarēnhja, nãr? Dja bar Metíndjwýnh me irôbê mrãnh nhõ akati mar kadjý mrykĩ'átomti krē.’ Nãm ã Bēnjadjwýr amã ane”, ane. Be, dja gar ã õ kíkire djwýnhmã ane. <sup>15</sup> Nhyam kam kôjrũm kumoka'ê jabatãnh'ýr ar ajo tēn ar amã akre. Kam ne gwaj bakutêp mýjja kunĩ nõr pro. Dja gar kam ikutêp gwaj banhõ kwý krēn djã jadjwýr mex. Nãm ã Jeju arkum 'ã karõo ane.

<sup>16</sup> Nhyam kam kôt ba djwýnh 'ýr tē. Ne Jeju kute arkum kabēn kôt arým mýjja kunimã katon arým kam mrykĩ'átomti gan õ kwý krēn djã jadjwýr mex.

<sup>17</sup> Nhyam arým ar'ã para nhyam Jejumê Ar kubê 12 ro'ã kíkire'ýr tēn 'ýr bõx. <sup>18</sup> Ne kam arým nhý. Ákuro nhý nhyam kam Jeju arkum,

—Ar ajõ ikôt adjákuro anhýrja dja ga ikurê djwýnhmã ikanga. Mrãmri ne ba ar amã arênhkumrêx, ane.

<sup>19</sup> Nhyam kam ar arým kaprĩren apýnh ar ì djari aben totokmã kum, —Djãm ba? Djãm ba? ane.

<sup>20</sup> Nhyam arým arkum, —Be, ar abê 12ja 'õ, aje ikôt ngõnhkrãtikam mry kangômã djwý jadjãro anhýrja'õ dja ga memã ikanga. <sup>21</sup> Be, ba ije amijo inhĩ ne amrêbê me bakukãmãre ijã Metíndjwýnh kabēn no'òk nhyam pi'òkkam me kute ijo anhýrmã arēnh kôt ne me arým jakam ar ã ijo anhýro ba. Nhyam be, kute ikurê djwýnhmã ikanga djwýnhja dja ì kute memã ikanga pãnh tokry rax ne. Ý, watĩ:re. Tãmja ne ren rwýk kêt ne. Nãm ã Jeju arkum ane. <sup>22</sup> Nhyam ar ákuro nhý: nhyam Jeju arým djwý'õ byn kam o Metíndjwýnhmã mextire jarē. Kum mextire jarēn arým kokij ne apýnh arkum kungã. Ne kam aminhĩ'ã djwý jakren arkum,

—Inhĩ ne ja. Ar abyn krē, ane.

<sup>23</sup> Ne kam ngõnhkrãkam pidjõ kangôjadjwý byn kam o

Metĩndjwýnhmã mextire jarēn arkum kungã. Nhyam ar kunĩ o ikõ.  
 24 Nhyam kam amikamrõ'ã pidjõ kangõ jakren arkum,

—Ikamrõ ne ja. Me krãptĩ kadjy dja ikamrõ prõt. Metĩndjwýnh ne arým ikamrõ prõt'ã memã kabēn ny jarēnh mãmđji, ane.\* 25 Ba ar amã arē gar ama. Ije pidjõ kangõ ikõmo krã'yr ne ja. Metĩndjwýnh kute amim õ me ja kunĩ pytār ne kute meo bakambit dja ba pidjõ kangõ nyo ikõ. Mrãmri ne ba ar amã arēnhkumrēx. Nãm ã Jeju arkum ane.

26 Nhyam kam ar ngre. Ngren arým o ino re. Ngrero ino ren arým amũ krãnhbē Oriwēre'yr mō.

*Pedru 'êx kukãm kute kum arēnh.  
 Mat 26.31; Ruk 22.31; Djur 13.37*

27 'Yr mō: nhyam Jeju arkum,

—Be, akamãtja tãmkam dja me ijo ajkē gar me umaje aprõt ne ajmã. Amrēbē: ne me bakukãmãre ar aprõt ne ar abimãnh'ã ajarē. Metĩndjwýnh kukwakam ne me ar ajã ajarēn memã kum,

“Be, dja ba mrykĩ'ãtomtio ba djwýnh titik nhyam mry umaje prõt ne ajmã.”

Nãm me ã ar ajã ujarēnho anen arým 'ã pi'ók no'ók ne. Be, akamãtja tãmkam dja gar me umaje aprõt ne ajmã. Me bakukãmãre kute ar ajã ujarēnh kõt dja gar aprõt ne ajmã.  
 28 Nhyam kam me arým ibĩ. Ba ityk ne akubyn itĩnkam dja ba ar akukãm pykabē Garrējamã tē, ane.

29 Nhyam Pedru kum,

—Godja ar kunĩ prõt ne bimãnh jabej ba dja ba arkõt iprõt ne imãt kēt ne, ane.

30 Nhyam Jeju kum,

—Kati, mrãmri dja ga arkõt aprõt. Ba amã arē ga ama. Akamãtja tãmkam õkrēn'ãnh kār kētri dja ga amijã maje ajēx pydji,

nhyam arým kã. Ga kam ajte amijã maje ajēxo amãnhkrut ne ijã memã kum, “Kati, ije me'õwã pumũnh kētkumrēx”, ane. Nhyam ajte kã. Dja ga ã ijã memã ane. Mrãmri ne ba amã arēnhkumrēx. Nãm ã Jeju kum ane. 31 Nhyam Pedru kãj bē ajte kum,

—Gē me gu baro'ã gu babĩn jabej ba ije amijã maje ijēx prãm kētkumrēx, ane. Nhyam kam ar kunĩ ã kum ane.

*Pidjõkõkam Bãmmã amijo à'wýr.*

*Mat 26.36; Ruk 22.40*

32 Ne kam mō:n kam Jeju kõt pidjõkõbē Djexema'yr bõx. Nhyam kam kõt ba djwýnhmã kum,

—Jakam dja gar ikutēp nhỹ. Ba 'yr Metĩndjwýnhmã amijo a'wý, ane. 33 Ne kam Pedrumē Xijagumē Djuão ar aprõn aro mō. Ne kam madjã kreti:n arým kaprĩ rax ne. 34 Ne kam arkum,

—Ikaprĩ:re. Arým ikaprĩ kute ibĩn 'yr. Jãnh mãn ar idjēje nhỹ gwaj baro'ã aminēje barĩto nhỹ, ane.

35 Ne kam amũ tē. Tēmo rãm ne ja ne tu mýrbē tým. Tým ne arým Metĩndjwýnhmã amijo a'uw. Kute tokry, kaprĩbē utār prãm jabej kum amijo a'uw. Tokry 'yr bõx kēt jabej kum amijo a'uw. 36 Ne kum,

—Djũnwã, djãm abē mýjja'õ bipdjur? Kati. Aje mýjja kunĩ nhĩpēx mar. Itokry, ikaprĩjabē ipytã. Nār kon, kwãrik wãnh rã'ã ba tu itokry. Djãm ba ne ba amimarkõt ar amijo iba? Kati, akabēnkõt ne ba ar amijo iba, ane.

37 Ne kam kãjmã djan ar amãnhkrut ne ikjēkētja'yr akēx ne tēn ar'yr bõx. Nhyam arek ar õto ikwã. Nhyam Pedrumã kum,

—Je, Ximão, djã nã gãm arek anhõto nõ? Kraxje kō 'iry kēt ne ga anhõto nõ, ane. 38 Ne ar kunĩmã kum,

\* 14:24 Mrãmri ne Jeju kamrõ prõt nhyam Metĩndjwýnh arým 'ã memã kum, “Arým ne ikra tyn kamrõ prõt. Jakam dja me tu amim ikra markumrēx ba kam arým me axwe maro aknon mekam ingyryk kēt ne.” Nãm ã Metĩndjwýnh memã ane.

—Ar aminêje rîr ne Metîndjwÿnhmã amijo a'wÿ. Gêdja me te axwe'ã ar amã apné gar mekôt ajaxwe kêt. Ja kadjy dja gar kum amijo a'wÿ. Be, ar anhôkre kadjwÿnhbê ne gar amã ikabênja kÿnh. Nhyim be, ar aminêje arîtbê ne gar arerekren anhôtdjwa ne, ane.

<sup>39</sup> Ne kam ajte amũ tên Metîndjwÿnhmã amijo a'uw ne kute ôbê kum kabên jarênha kôt ajte kum tãm jarê. <sup>40</sup> Ne kam ajte akubyn ar'ÿr akêx ne tên ar'ÿr bôx. Nhyim ar nokà bã mex ne. Ajte arek ôto ikwã. Rerek mex ne arek ôto ikwã nhyim ar tok nhyim ar te kute kum kabênmã umaro nhÿ.

<sup>41</sup> Nhyim kam ajte amũ tên Metîndjwÿnhmã amijo a'uw. Kum amijo a'uw ne ajte ar'ÿr akêx ne ar'ÿr tên ar'ÿr bôx. Ne arkum,

—Je, djãm arek ar anhôto anihkwã rã'ãã, akôkam kôto anhîkwã? Aj, arÿm itokry djã iwÿr bôx 'ÿr. Ota, arÿm kute me axwemã ikangamã, ije amijo inhÿja ne kute memã ikangamã. <sup>42</sup> Kãjmã ar dja. Gwaj on me'ÿr. Ota, arÿm kute memã ikanga djwÿnh bôx, ane.

*Me kute Jejuo tÿm.*

*Mat 26.47; Ruk 22.47; Dju r 18.3*

<sup>43</sup> Ne kute arkum anhÿro ãm rã'ã nhyim Djuda arÿm 'ÿr bôx. Jeju kôt ba djwÿnhbê 12 'ô ne kubê Djuda. Nãm 'ÿr bôx nhyim me krãptî me:x ne kôt môn 'ÿr bôx. Nãm me kãxdjwa kajgomê kô jamÿn kadjy o môn o bôx. Me rûnh ñe me me ano. Me kadjy Metîndjwÿnh mar djwÿnh nhô bënjadjwÿrmê mebêngêtmê ne me me ano nhyim me 'ÿr bôx. <sup>44</sup> Me 'ÿr mör kêttri ne kute memã kanga djwÿnhbê Djudaja memã kum,

—Be, ije me'ô nhine kaôrkôt dja ga me omûn arÿm o tÿm ne pa 'amÿ. Nãm Djuda arÿm ã memã ane. <sup>45</sup> Ne kam 'ÿr tên 'ÿr bôx ne kum, “Ujarênh djwÿnh”, anen arÿm ine kaô.

<sup>46</sup> Nhyim kam me arÿm 'ÿr môn 'ÿr bôx ne o tÿm ne arÿm pa 'amÿ.

<sup>47</sup> Nhyim me kadjy Metîndjwÿnh mar djwÿnh nhô bënjadjwÿr raxja nhô àpênh mekôt tē. Nhyim bu'ã me ku'êja 'ô ne arÿm ô kãxdjwa kajgo kaban o me'ôjamã akabên amak ta, bënjadjwÿr nhô àpênha jamak ta.

<sup>48</sup> Nhyim kam Jeju me krãptîjamã kum,

—Je djãm idjãkÿnhÿ ne ga me aje ijo atÿm kadjy iwÿr anhô kômê anhô kãxdjwa kajgomêo mō? Myt kunîkôt ne ba ar Metîndjwÿnh nhô kikretikam ikrî, ar memã idjujarênho ikrî ga me kam kam ijo atÿm kêt ne. <sup>49</sup> Mÿkam ne ga me ijo tÿm? Bir, amrêbê: ne Metîndjwÿnh kukwakam kabên jarênh djwÿnh me bakukãmãremã me ajã ajarê. Me aje ijo atÿm'ã ajarên arÿm 'ã pi'ok no'ok ne. Nhyim me arÿm aben djô'ã arênho mō. Arênho mör tãmtã arÿm iwÿr o bôx. Tû:mram me bakamingrãnyrekam arÿm iwÿr o bôx. Ba ar iba: ga me arÿm jakam ã ijo ane. Me kute me bakukãmãremã me ajã ujarênh kôt ne ga me arÿm jakam ã ijo atÿmo ane. Nãm ã Jeju me krãptîmã ane.

<sup>50</sup> Nhyim kam kôt ba djwÿnh kunî mã amijã maje prôt ne. <sup>51</sup> Me'ô abatàn ny ne kute kubêkà pydjio amikupuja Jeju kôt tē. Rinhuo ne kubêkà. Nhyim me kwÿ adjwÿnhdjwÿo tÿm ne kubê kubêkà 'amÿnh tÿx. <sup>52</sup> Nhyim arÿm amikaban amikôt kubêkãmã iren tu kajgo mã prôt ne.

*Me kute axwe jabej kukjêr.*

*Mat 26.57; Ruk 22.66; Dju r 18.12*

<sup>53</sup> Nhyim me arÿm Jejuo mō. Me kadjy Metîndjwÿnh mar djwÿnh nhô bënjadjwÿr rax'ÿr ne me o mō. Nhyim arÿm me rûnh kunî abeno akuprô. Me kadjy Metîndjwÿnh mar djwÿnh nhô bënjadjwÿrmê mebêngêtmê Môjdjê kukràdjã mar djwÿnhmê ne me arÿm akuprô. Nhyim me Jejuo môn o bôx ne arÿm me rûnh kabem kudja. <sup>54</sup> Nhyim be, Pedru ne Jeju kôt tē, nÿjar kum

kre rax ne të. Nnym me kadjy Metĩndjwýnh mar djwýnh nhõ bēnjadjwýr rax nhõ kikre nhípõkri kēnh ngrire nnym Pedru arým Jejukõt wadjà. Ne arým bēnjadjwýr nhõ krākamngõnhmē ro'ã ànhũho nhỹ.

<sup>55</sup> Nām me me'yr Jejuo bõx nnym kam me rũnh arým me 'ēxnhĩ jabej. Me kadjy Metĩndjwýnh mar djwýnh nhõ bēnjadjwýrmē mebēngētmē me rũnh kunĩ ne me me 'ēxnhĩ jabej. Dja me amānhkrut Jeju'ã 'ēx ne memã kum,

—Ba ne ba axwe kõt omũ. Nām ã ane ba omũ, ane. Dja me ane nnym me arým me kabēn man arým we axwe'õ pānh kubĩ. Kadjy ne me me 'ēxnhĩ jabej. Ne te abejo dja. Me'õ ar amānhkrut kute axikõt 'ã kabēnja ne me te abejo dja:. <sup>56</sup> Nnym me 'ēxnhĩ krāptĩ ne me kājma ku'ēn arĩk aben kupa'ābit axwe jarēnho kumex.

<sup>57</sup> Nnym kam me'õ ar ja arým kājma djan 'ēx ne 'ã kabēn jarēn memã kum,

<sup>58</sup> —Tāmwa ne memã kum, “Be, me kute ikrao Metĩndjwýnh nhõ kikreti nhípēxja dja ba kungrà. Ne kam Metĩndjwýnh nhõ kikreti 'õdjwý nhípēx. Me kute ikrao ipēx kēlja'õ dja ba ipēx. Nnym ije ipēxo idjām'ã akati amānhkrut ne ikjēkētbīt apēx ba ipēx pa.” Nām ã Jeju memã ane bar arým kuma, ane. <sup>59</sup> Ne kam ar jadjwý kute memã arēnhkam axikõt Jeju'ã kabēn jarēnh kēt ne arĩk aben kupa'ābit arē.

<sup>60</sup> Nnym kam me kadjy Metĩndjwýnh mar djwýnh nhõ bēnjadjwýr raxja arým kājma djan me ipõkri djan Jeju kukijn kum,

—Ga, ar kabēnja ma. Djām aje aminēje akabēn'õ jarēnh prām kētkumrēx? On imã amikõt ami-jarē, ane. <sup>61</sup> Nnym tu anhikrē.

Nnym me kadjy Metĩndjwýnh mar djwýnh nhõ bēnjadjwýr rax aje kukijn kum,

—Djām abē me babē idjaer nhõ Bēnjadjwýrbē kumkati, nēn? Djām mrāmri abē Kritu? Djām abē Metĩndjwýnh Kra? ane.

<sup>62</sup> Nnym Jeju kum,

—Kõt ne ga imã arē. Ba ar amã arē gar ama. Gēdja ba ĩ Metĩndjwýnh pymati djubõk'ānh nhỹ. Ba ije amijo inhĩ gēdja ba ubõk'ānh nhỹ. Ibēnjadjwýr raxkam ubõk'ānh nhỹ gar ipumũ. Ne kam aje kakrākõt amrē kājkwā kurũm itēm kõt ipumũ, ane.

<sup>63</sup> Nnym kam me kadjy Metĩndjwýnh mar djwýnh nhõ bēnjadjwýr rax kute memã amin-gryko amirĩt kadjy arým amibē kã kadjõ. Amibē kã kadjõn arým memã kum,

—Ē, arým ne Metĩndjwýnh japrý. E kum kwārĩk wānh gwaj ijukri me'õ kute axwe kõt omũnhja jabej kēt. <sup>64</sup> Gwaj bakunĩ ne gwaj arým kute Metĩndjwýnh japrýja ma. Ta ne amijo Metĩndjwýnh rax pytān arým o aprý gwaj kuma. Kute gwaj bamã, “Metĩndjwýnh djubõk'ānh inhýrkõt dja gar ipumũ”, anhýrkõt ne gwaj arým kuma. Arým ne gar ama. Mýj dja gwaj nē? ane.

Nnym me kupānhã 'ã kum,

—Gē me on kubĩ. Gē me on kubĩ, ane.

<sup>65</sup> Nnym kam me kwý nokre kutõn rĩtbē nokre'ã pron aje nokrebē tak ne. Ne kute takmē ro'ã kum,

—Nnym ne akurwa? Goja me'õ pumũn imã arē, ane. Nnym krākamngõnh arým 'ã akuprõn tako kumex.

*Pedru aminēje 'ēx.*

*Mat 26.69; Ruk 22.55; Djur 18.15*

<sup>66</sup> Nnym wānh Pedru kikreti parbē ànhũho nhỹ. Ànhũho nhỹ: nnym me kadjy Metĩndjwýnh mar djwýnh nhõ bēnjadjwýr rax nhõ àpēnh nija arým 'yr bõx. <sup>67</sup> Ne omũn pñe omũnh mex ne kum,

—Tukwa, gadjwý ne ga Jeju kôt ar aba. Krîraxbê Nadjarekam Jekukôt ar aba, ane.

<sup>68</sup> Nhyam aminêje 'êx ne kum,

—Kati, ije akabênwã mar kêtumrêx, ane. Ne kam tên kre tâ dja nhyam kôt arým ôkrên'ân̄h kà.

<sup>69</sup> Nhyam bēnjadjwýr nhõ àpēnh nija ajte omūn bu'ã me ku'ēmã kum,

—Tãmwãdjwý ne kôt ar ba, ane.

<sup>70</sup> Nhyam ajte aminêje 'êx ne kum, “Kati”, ane. Nhyam kãjbê 'ãtūm nhyam bu'ã me ku'ēja kum,

—Be, mrãmri ne ga kôt ar aba, ane. Abê pykabê Garrêja kra'õ. Garrêjakam me kabên kôt akabēnja ma. Bar kôt aman arým amã ikato, ane. <sup>71</sup> Nhyam memã kum,

—Kati. Mrãmri ije me'õwã pumūnh kêtumrêx. Aje me'õ jarēnhwã ije omūnh kêt, ane. Ne kam me'õ kute kum anhýr kêtãã amikangrôn memã kum,

—Dja ba ijēxnhĩ jabej gē Metīndjwýnh pãnh ijo akno. Ta ne arým ijēxnhĩ kêtãkôt ima, ane.

<sup>72</sup> Nãm ane nhyam totokbê ajte ôkrên'ân̄h kà. Nhyam kam Pedru akubyn amijo tēn amrēbê Jeju kute kum kabên jarēnhja ma. Kute kum,

—Ôkrên'ân̄h kãr kētri dja ga amijã maje ajēx pydji nhyam arým kà. Ga kam amijã maje ajēxo amãnhkrut ne ijã memã kum, “Kati, ije tãmwã pumūnh kêt”, ane nhyam ajte kà, anhýrja ne arým kuma. Nãm maro dja nhyam arým rerekre 'ýr bõx. Rerekre 'ýr bõx nhyam arým mu:w.

## 15

*Piratu kute we axwe jabej kukjêr. Mat 27.1; Ruk 23.1; Dju r 18.28*

<sup>1</sup> Nhyam kam me'ã akati, kryrà̄m nhyam apýnh me rūnh djãri akuprõn arým aben kabên ma. Me kadjy Metīndjwýnh mar djwýnh nhõ bēnjadjwýrmē mebēngētmē Mójdjê kukràdjã mar djwýnhmē me rūnh kunīmē ne me Jejuo aben ma. Ne

kam arým uwpren Piratu'ýr o mõn 'ýr o bõx. 'Ýr o bõx ne kum kanga. <sup>2</sup> Nhyam kam Piratu arým kukij ne kum,

—Djãm abê mebê idjaer nhõ bēnjadjwýr rax? ane.

Nhyam kum,

—Kôt ne ga aje arēnhwã, ane.

<sup>3</sup> Nhyam kam me kadjy Metīndjwýnh mar djwýnh nhõ bēnjadjwýr ar arík Jeju'ã axwe krãptĩ janhõ. <sup>4</sup> Nhyam tu anhikrê. Nhyam Piratu kum,

—Ë ama. Djãm ajaxwe krãre ne me amã arê? Djãm aje aminêje akabên'õ jarēnh kêtumrêx? ane.

<sup>5</sup> Nhyam kum kabên 'õ jarēnh kêtumrêx. Nhyam Piratu te kute marmã kam no tyn nhý.

<sup>6</sup> Be, me irõbê mrãnh nhõ akatija tãmkam ne mebê idjaer krãptĩ: arým aben pydji. Me kute aben kajmã'ã Metīndjwýnh me kukãmãre nhirõbê mrãnh mar kadjy ne me aben pydji. Amex kunĩkôt ne bēnjadjwýr raxbê Piratu akati jakam mebê ijê djã kurūm mebê ijê pýnh ne meo põx nhyam me mã mrã. Me kute me'õ'ã à'wýrja ne me kīnh kadjy bõm kumê. <sup>7</sup> Ajbir me'õbê ijê ne idjibê Baraba. Me kute kubê ijê kētri ne me jakôt me bēnjadjwýr'ýr prõt ne me kwý pa. Nhyam kam me arým kubê ijê. <sup>8</sup> Nãm Piratu Jeju kukjêro dja: nhyam kam me krãptĩ: arým kãj bê Piratumã me'õbê ijê jarê ne kum,

—Aje mekbê ijēwã'õ kaba gē arek ar me ikôt ba, ane.

<sup>9</sup> Nhyam arým Jeju'ã memã kum,

—Me abê idjaer, we me anhõ bēnjadjwýr rax ne ja djãm ije me amã kum inhirermã? ane. <sup>10</sup> Be, Piratu kute memã ja jarēnh kētri ne arým me kadjy Metīndjwýnh mar djwýnh nhõ bēnjadjwýr ma. Nãm ar'ã amim,

—Jeju'ã me krãptĩkam ne me rūnh 'ã ngyrk ne imã kanga, ane. Ne kam bit kute kum irermã ã me

kräptimã ane. <sup>11</sup> Nãm 'ã memã kum,

—Djãm ije me anhõ bënjadwýrmã inhirermã? ane. Nhyem me kadjy Metĩndwýnh mar djwýnh nhõ bënjadwýr ar memã kum,

—Kwãrik wãnh me amã Jeju kĩnh kêt. Dja ga me kum Baraba jarë gê kaba, ane. Nhyem me kätãm kräptĩ Piratumã kum,

—Kwãrik wãnh Jejumã anhirer kêt. Baraba dja ga kaba, ane.

<sup>12</sup> Nhyem kam Piratu memã kum,

—Be, ga me abê idjaer, aje tãmwãmã anhõ bënjadwýr rax jarënhja mýj dja ba kam on? ane.

<sup>13</sup> Nhyem me kãj bê kum, “Pĩte'y'ã anhõ”, ane.

<sup>14</sup> Nhyem Piratu memã kum,

—Mýkam? Mýj ne ajmã o ne ba ije pĩte'y'ã nhõrmã? ane.

Nhyem me kãj bê kum,

—Pĩte'y'ã anhõ. Pĩte'y'ã anhõ, ane.

<sup>15</sup> Nhyem kam me kĩnhmã Piratu Baraba kaba nhyem arým arek ar mekôt ba. Nhyem kam Piratu krãkamngõnhmã Jeju jarë. Me kute kaprêprék kadjy memã arë. Nhyem me arým mrykã punuo kaprêprë:k ne. Kaprêprék nhyem Piratu arým memã kangan memã arë. Me kute pĩte'y'ã nhõr kadjy memã arë.

*Krãkamngõnh kute 'ã bẽno bikẽnh.*

*Mat 27.27; Dju r 19.2*

<sup>16</sup> Nhyem kam me krãkamngõnh amũ bënjadwýr nhõ kikretimã Jejuo mõn o wadjã. Kumoka'ẽ nhidjibê Pretorimã o mõn o wadjã. Ne kam me krãkamngõnh kätãm kunĩ jadjwý o akprõ nhyem me kunĩ arým 'ã aben pydji. <sup>17</sup> Me kute 'ã bẽno bikẽnh kadjy ne me 'ã akuprõ. Ne kam inõkã ryti kamrêkja byn arým Jejumã adjã. Ne mrýnhõ kajkep ne ikãx ne kum kutu. Nãm me arĩk bënjadwýr rax krãdjê'ã mrýnhĩ jakren ikãx ne arým kum kutu. <sup>18</sup> Ne kum kabẽno kute me rũnhmã me kabẽn pyrak ne kum,

—Ga we abê mebê idjaer nhõ bënjadwýr rax, gora kribêm atĩn 'iry, anhýrkôt <sup>19</sup> po'eo krã mõn kutõn parbê kõnkrão krĩ. Nãm me parbê kõnkrão krĩo kute me bënjadwýr rũnh parbê kõnkrão krĩja pyrak. <sup>20</sup> Ne kam arým 'ã bẽno ajkẽn inomã kumẽn arým kubê inõkã ryti kamrêkja kaban akubyn kum õ kubêkã djwýnhja jadjã. Ne kam kute pĩte'y'ã nhõrmã o katon o mõ.

*Me kute pĩte'y'kam nhõr.*

*Mat 27.32; Ruk 23.26; Dju r 19.17*

<sup>21</sup> Nhyem me'õbê Ximão tẽ. Pykabê Xireni kra 'õ. Kute Arexãrimẽ Rupu ar ir. Arwã kurũm ne tẽn bit me'ãnh tẽmmã. Nhyem me krãkamngõnh arým Jeju nhõ pĩte'y'ã kum ãpnẽn týt. Kum 'ã ãpnẽn týt nhyem arým kadjy kumýn o mõ. <sup>22</sup> Nãm me krãnhrebê Gogota'yr Jejuo mõn 'yr o bõx. Me bakabẽnkam ne gu me ren krãnhremã me krã'i jarë. <sup>23</sup> Nhyem kam me pidjõ kangõkam pidjýbê mirao akã Jejumã kungã nhyem arým kanga. <sup>24</sup> Nhyem kam me pĩte'y'ã kunhõ nhyem wajêt. Nhyem kam me apýnh kute õ kubêkã jamýnh kadjy kẽn kryre rë. Me kute ari kẽn rẽnhkõt ne me amijo kubêkã pytã.

<sup>25</sup> Arým kãjmã myt nhýrkam. 9 orakam ne me pĩte'y'ã kunhõ. <sup>26</sup> Ne kam 'ã pi'õk no'õk ne. Pi'õkkam ne me memã kum,

—Mebê idjaer nhõ bënjadwýr rax ne ja, ane. Me kunĩ kute omũnh kadjy ne me Jeju nhimõkri kunhõ. Me kute we Jeju jaxwe 'õ pãnh pĩte'y'ã jëtja pumũnh ne kute mar kadjy ne me pi'õk no'õk ne imõkri kunhõ. <sup>27</sup> Ne kam ar ãkĩnhĩ amãnhkrutja Jeju nhikrebê pĩte'y'ã ar kunhõ. Nhyem arým ar wajêt. Jeju õkredjãkõt wajêt nhyem aktã ar axweja ijên wajêt. <sup>28</sup> Amrêbê: ne me bakukãmãre'õ memã ja jarën 'ã pi'õk no'õk ne. Nãm memã kum,



“Dja me 'ã abenmã kum, 'Nãm me o axwen me axwemê ro'ã kubî, anhÿro dja.”

Nãm ã pi'ôkkam memã ane. Nhyam kam me aben djô'ã arê. Arênho mör tãmtã tũ:mrãm arÿm 'ÿr o bôx. Me bakukãmãre kute memã arênho kôt ne me arÿm ar axwejamê ro'ã ar anhôrkumrêx nhyam me arÿm 'ã arênhkumrêx. <sup>29</sup> Nhyam me 'ãnh mörja nokã nhàn kum kabên punu:re ne kum,

—Be, ga: ne ga we aje Metîndjwÿnh nhõ kikreti ngrànne ne akubyn ipêxmã. Nhyam aje ipêxo adjãm'ã akati amãnhkrut ne ikjêkêt we aje ipêx parmã. <sup>30</sup> Goja amiptàn pîte'y kurÿm rwÿ, ane.

<sup>31</sup> Nhyam kam me rÿnh arîk 'ã bẽno ajkê. Me kadjy Metîndjwÿnh mar djwÿnh nhõ bẽnjadjwÿrmê Môjdjê kukràdjã mar djwÿnhmê ne me arîk 'ã bẽno ajkên abenmã kum,

—Amübit ne me utã. Ne kam te kute amiptâr prãmje. <sup>32</sup> Goja gê mrãmri kubê Kritukumrêx jabej goja mrãmri kubê mebê idjaer nhõ Bẽnjadjwÿrbê kumkatikumrêx jabej on pîte'y kurÿm rwÿ. Gwaj goja kôt omÿn arÿm tu amim markumrêx. Nãm me rÿnh 'ã abenmã ane. Nhyam ar aktã pîte'y'ã jêtdjadjwÿ Jejumã ãkjêro wajêt.

*Tyk kadjy ne ja.*

*Mat 27.45; Ruk 23.44; Djur 19.28*

<sup>33</sup> Nhyam arÿm kãjkwa nhipôkri myt nhÿ. Nhyam kam tu akamãt kô tyk ne. Pyka kunîkôt me'ã akamãt kô tykkam myt kyn kyn kyn ky: nhyam 3 orakam, amykrykambit arÿm ajte myt no pôt ne. Arÿm ajte myt kato. <sup>34</sup> Kato nhyam mebê idjaer kabênkam Jeju kãj bê kabên ne Bãmmã kum,

—Eroi: Eroi: rama xabatani, ane. Nãm ren me bakabên kam kum,

—Inhõ Metîndjwÿ:nh, inhõ Metîndjwÿ:nh, mÿkam ne ga arÿm ikanga? ane.

<sup>35</sup> Nhyam parbê me ku'êja kabên man arîk abenmã kum, “Ë, Erijmã ne kabên”, ane.

<sup>36</sup> Nhyam kam me'õ prôt ne ngônne puror pônne djã jakritaja byn pidjô kangô kadjãmã adjã. Nhyam kam kangô ipu nhyam pî nhidjamã adjàn kãjmã kum kungã, kute kaôr kadjy. Nhyam me'õ ar kum,

—Adjÿm, gê goja me bakukãmãrebê Erij 'ÿr bôx ne goja o rwÿk jabej, ane.

<sup>37</sup> Nhyam kam Jeju kãj bê kabên ne ate ty.

<sup>38</sup> Be, nhyam kam arÿm Metîndjwÿnh nhõ kikreti kadjwÿnhbê kubêkãtija ta amikadjô. Nãm nhôr djã'ãnh amikrax ne e y: ne kraxmã amimê.

<sup>39</sup> Nhyam krãkamngônne krãptî: kubê 100 nhõ bẽnjadjwÿr pîte'y parbê dja. Nhyam Jeju kãj bê kabên ne ty nhyam arÿm omÿ. Omÿn arÿm memã kum,

—Be, mrãmri ne me'õ jabê Metîndjwÿnh Krakumrêx, ane.

<sup>40</sup> Nhyam me niredjwÿ amybÿm omÿnho dja. Nhyam Marij Madarenamê Marij, kurÿm Jôdjemê Xijagu ar apôxjamê Xirôwemê ne ar me ikô'ã dja. <sup>41</sup> Amrêbê, Jeju pykabê Garrêjakam ar bari ne ar nireja mã kôt ajkamên o djuw mexo ba. Nhyam ar ja bu'ã me nire krãptîdjwÿ amybÿm omÿnho dja. Jeju ajbir krîraxbê Djeruxarê'ÿr tẽmkam ne me nireja kôt môn bôx.

*Arÿm adjãr kadjy ne ja.*

*Mat 27.57; Ruk 23.50; Djur 19.38*

<sup>42</sup> Jeju ty. Ty nhyam kam amykry mex ne. Amykry mex nhyam me arÿm no katon ô mÿjja kupênho kumex. Pi'ók rãrãr djwÿnhràmm ô mÿjja kupênho kumex. <sup>43</sup> Nhyam Jôdje arÿm bôx. Krîraxbê Armatêkam ne Jôdje abatãnh djã. Nãm me rÿnh bikprônne djãkam mekôt rax nhyam me kum kînh. Nãm amiwÿr Metîndjwÿnh kamnhÿx ne. Metîndjwÿnh bôx ne me kadjy

bĕnjadjwÿr ne kute ar meo bamã ja ne amiwÿr kamnhÿx ne. Jôdje kum Piratu puma kĕt ne 'ÿr tĕn 'ÿr bôx ne Jeju 'ã kuma. <sup>44</sup> Nhyr arÿm kam no tyn nhÿn kum, "Je, djãm arÿm ne ty"? ane. Ne kam amiwÿr krãkamngônĥ nhô bĕnjadjwÿr 'uw nhyr bôx. Bôx nhyr arÿm kukij ne kum, "Djãm arÿm ne ty"? ane. <sup>45</sup> Nhyr kum, "Nã", ane. Nhyr kam arÿm Jôdjemã Jeju jarĕ. <sup>46</sup> Nhyr kam rinhuo kubĕkã 'ô byn 'ÿr o tĕ. 'ÿr o tĕn 'ÿr o bôx. Ne kam arÿm pĭte'y kurÿm Jejuo ruw. O ruw ne arÿm kubĕkão kupun kam kĕnkre'ÿr o tĕ. Me kute kĕnkre kakrwÿnhja'ÿr o tĕn kam arÿm kam adjã. Ne kam kĕnpoti ajkwa krekre'ã kudja. <sup>47</sup> Nhyr Marij Madarenamĕ Marij kurÿm Jôdje katorja arÿm omÿ.

## 16

*Akubyn tĭn kadjy ne ja.*

*Mat 28.1; Ruk 24.1; Dju r 20.1*

<sup>1</sup> Nhyr kam pi'ôk rãrãr, me tyk djã kĕt djã nhô akati apĕx nhyr ar arÿm pi'ôk kaprĭ pãnh me tyk nhô pĭdjÿ kwÿ by. Marij Madarenamĕ Marij kurÿm Xijagu katorjamĕ Xirôwemĕ ne ar kadjy pĭdjÿ kwÿ by. Kĕnkre'ÿr tĕm ne kute o Jeju djymã ne ar kadjy kwÿ by. <sup>2</sup> Nhyr kry:rãm, pi'ôk kamrĕkkam, kraxje akati mex kĕtkam ar kĕnkre'ÿr tĕ. Tĕ: nhyr arÿm myt kato nhyr ar arÿm o rãm ne ja. <sup>3</sup> O rãm ne jan arÿm abenmã kum,

—Mÿj me'ô dja gwaj bamã jãm ajkwa krekre'ã kĕnpoti dja? ane. Kĕn jabatãnhkam ne ar ã abenmã ane.

<sup>4</sup> Abenmã anen kam rĭt ne omÿ nhyr arÿm amijã kuta. <sup>5</sup> Nhyr kam ar 'ÿr tĕn arÿm kĕnkremã wadjã. Nhyr kadjy mrãnh djwÿnh'ô kute me'ô jabatãnh ny pyrãk ne nhÿ. Nãm inôkã jaka ryti jadjãn nôr djã djubôk'ãnh nhÿ.

Nhyr ar wadjãn arÿm omÿ. Ne te umaje.

<sup>6</sup> Nhyr arkum,

—Kwãrĭk wãnh ikam ar atĭn prãm kĕt. Jeju Nadjarekam abatãnh ja me kute pĭte'y'ã nhôr ne bĭnja ne gar abej tĕ. Jakam arÿm nôr kĕt. Nãm akubyn tĭn ne kato. Gar nôr djã kaprÿja pumÿ. <sup>7</sup> Be, amÿ ar tĕn kôt ba djwÿnhmã arĕ. Ne arkôt Pedrumã arĕ. Ne arkum, "Arÿm ne ar akukãm pykabĕ Garrĕja'ÿr tĕmmã. Dja gar kam tĕn arÿm omÿ", ane. Dja gar ã arkum ane. Amrĕbĕ kute ar amã arĕnh kôt ba arÿm ar amã arĕ. Nãm ã kadjy mrãnh djwÿnh ar niremã ane.

<sup>8</sup> Nhyr ar katon mã kĕnkre kurÿm prôt ne. Te umaje tertetkam prôt ne. Tĭn prãm kam ne me'ômã kabĕn kĕt ne tĕ.

<sup>9</sup> Be, akubyn tĭnkam kryrãm, pi'ôk kamrĕkkam ne Jeju Marij Madarena kumrĕxmã amijo amirĭt ne. Be, me karô punubĕ <sup>7</sup> ne Marijo ba nhyr Jeju amrĕbĕ ano nhyr kum ire. <sup>10</sup> Nãm Marijmã amijo amirĭt nhyr arÿm kôt ba djwÿnh'ÿr tĕn ar'ÿr bôx. Nhyr ar kaprĭ:ren mÿro nhÿ. Nhyr arÿm ar'ÿr bôx ne arkum 'ã ajarĕ. <sup>11</sup> Nãm arkum Jeju tĭn jarĕn kute omÿnh'ã ajarĕ. Nhyr ar kuman arÿm abenmã kum, "Nãm 'ĕx", ane.

<sup>12</sup> Nhyr kam ajte ar jamã kute amijo amirĭtmã tĕ. Nãm kôt ba djwÿnh amãnhkrut arwãmã tĕ. Tĕ nhyr arÿm atemã aminhipĕx. Ne kam kute atemã me'ô pyrãk ne arkum amijo amirĭt ne arkôt tĕ. <sup>13</sup> Nhyr kam ar akubyn Djeruxarĕ'ÿr tĕ. Kôt ba djwÿnh'ã kãtãmja'ÿr tĕn ar'ÿr bôx ne arkum 'ã ajarĕ. Nhyr ar abenmã kum, "Kati, nãm ar 'ĕx", ane. <sup>14</sup> Nhyr kam ajte Ar kubĕ 11mã amijo amirĭt. Ar ô kwÿ krĕno nhÿ nhyr arkum amijo amirĭt ne arkum bĕn tÿx ne arkum,

—Nãm ar akubyn itĭnkôt ipumÿn ar amã ijã ajarĕ gar ar'ã abenmã

kum, “Nām ar 'êx”, ane. Tô mỳkam ne gar tu amim imarkumrêx kêt? Djām ar ajamakkreja kêt? ane.

<sup>15</sup> Ne kam ajte arkum,

—Apỳnh me ba djà kunĩkôt dja gar mōn kàj bê me kunĩmã ijã adjujarēnh ny jarēnho mō.

<sup>16</sup> Dja me tu amim imarkumrêx nhym me Metĩndjwỳnhmã ngômã me angij. Nhym arỳm me utà. Nhym be, me kute amim imar kêt dja Metĩndjwỳnh arỳm pãnh me kanga. <sup>17</sup> Nhym me kute tu amim ikamnhĩxkumrêx dja me mỳjja pumũnh kêt nhipêx. Me kute Metĩndjwỳnh raxmã kator kadjy ipêx. Ne me karō punu kute meo baja jano nhym me karō memã ire. Dja me apỳnh me bajtem kabēnkam kabēn. <sup>18</sup> Godja me kangã djàkrê by. Me kute mar kêt kam kangã djàkrê by nhym arỳm ajmã meo kêt. Nār, te mỳjja kanêo ikō nhym ajmã meo kêt. Dja me me kanê krã'ã ikra jadjuw nhym me arỳm à kêt ne, ane.

<sup>19</sup> Bēnjadjwỳr djwỳnh Jeju memã ane nhym Metĩndjwỳnh arỳm kàjkwamã amiwỳr o wabi. Nhym arỳm ra:x ne Metĩndjwỳnh djubôk'ãnh nhỹ. <sup>20</sup> Nhym kam kôt ba djwỳnh arỳm amũ mōn pyka kunĩkôt kàj bê memã 'ã ujarēnh mō. Nhym Bēnjadjwỳr djwỳnh mã arkum tỳx jangij nhym ar arỳm mỳjja pumũnh kêt nhipêxo mō. Me kute ar'ã abenmã kum,

—Mrāmri ne djām ar Metĩndjwỳnh kôt kabēnkumrêx? anhỳr kadjy ne ar mỳjja pumũnh kêt nhipêxo mō.

## Ruka Teopiremã Jeju'ã ujarẽnh ne ja.

Rukadjwý ne prĩne Jeju'ã ajarẽ. Rwýk krax kurũm ne 'ã ujarẽnh tẽn àbir'ãnh o ìno re. Rukabê ne me kane djwýnh. NhyM Paur Jeju'ã ujarẽnh kadjy apýnh me õ pyka djari'ýr mrã. NhyM Ruka kõt ar mrã. Ne kam me'õbê Teopiremã me bakunĩ kadjy pi'õk no'õk ne. Teopirebê idjaerkam me'õ kêt. Kumã ne Ruka Jeju'ã pi'õk no'õk ne. Nãm prĩne me kute Jeju'ã ujarẽnh kunĩkõt kuman prĩne kabin kam 'ã kum pi'õk no'õk ne. Adjwýnhdjwýmã pi'õkbê *Metĩndjwýnh Karõ Kute Meo Baja'*ã kum pi'õk no'õk ne.

### *Ruka Teopiremã amijarẽ.*

<sup>1-4</sup> Aj, Teopire, ba ne ba wãm amã pi'õk no'õk ne. Ba ibê Ruka ne ba wãm amã pi'õk no'õk ne. Me kunĩ ne me kum akĩnh ne amex jarẽ ba badjwý imã akĩnh ne wãm amã pi'õk no'õk ne.

Me krãptĩ ne me arým 'ã pi'õk no'õk ne, Jeju me ikam ar ba'ã ne me pi'õk no'õk ne. Me kute kraxrũm noo Jeju pumũnh ne memã kabẽn'ã ujarẽnh, me tãm ne me me imã arẽ nhyM me amũ me ijuk'ã 'ã pi'õk no'õk ne.

Ba kam badjwý inhõkre kadjwýnhbê,

—Be, mexkumrẽx. Badjwý dja ba 'ã pi'õk no'õk nhyM kam mexkumrẽx, ane.

Mrãmri ne ba me'ýr tẽ, me kute noo Jeju pumũnhja'ýr tẽ. Me'ýr tẽn prĩne abej me kukij ne kam Jeju kraxrũm prĩne mýjja kunĩ maro tẽn inomã kumẽn mar týt ne. Mar týt ne kam amã 'ã pi'õk no'õk ne. Dja ba prĩne mýjja kraxrũm amã kõt 'ã idjujarẽnh tẽn, aje prĩne marmã. Me kute õbê amã arẽnh ga aje katàt maro atẽmmã ne ba badjwý mekõt

amã 'ã pi'õk no'õk tẽ, aje omũnh ne aje amĩm,

—Mrãmri ne me katàt imã Jeju jarẽ, anhýr kadjy. Kadjy ne ba amã 'ã pi'õk no'õk ne.

### *Djakarij krabê Djuão rwýkmã.*

<sup>5</sup> Be, ã, ije amã katàt Jeju'ã idjujarẽnh kadjy dja ba amã Djakarij kumrẽx jarẽn kam ijukri amã Jeju jarẽ. Mekbê idjaer nhõ pykabê Djudêjakam me kadjy Metĩndjwýnh mar djwýnh 'õ nhidjibê ne Djakarij. NhyM Djakarij nhingêt kukãmã nhidjibê ne Abij. Ne kam prõdjwý idjibê Ixabeu, kubê ne Arão tãmdjwý 'õ. NhyM bep me õ bẽnjadjwýr nhidjibê ne Erodji ne memã nhỹ. <sup>6</sup> NhyM Djakarijmẽ prõ ar amẽ mrãnh katàt nhyM Metĩndjwýnh arkam kĩnhkumrẽx ne. Nãm ar prĩne Metĩndjwýnh kabẽnkõt amijo ba, Metĩndjwýnh kute memã me katàt amijo ba'ã karõjakõt amijo ban kute 'õ kudjar kêtumrẽx. ãm ar mexkumrẽx. <sup>7</sup> NhyM bep Ixabeu kra kêt ne te kra prãme ar ba, mjẽnmẽ ro'ã te ar ari kra prãme ba ne arým kubẽngẽt:te.

<sup>8-9</sup> Be, me kute me kadjy Metĩndjwýnh mar ne me Metĩndjwýnh nhõ kikretikam àpẽn tẽn, apýnh me ingêt me kajmã'ã àpẽn'ýr ngjẽn djari ne me me kudjwa Metĩndjwýnhmã àpẽn tẽn. Nãm me ja kumrẽx mytyrwý 'õkam 'ýr wadjàn kam apê:n kato. NhyM pãnh me ja aje mytyrwý 'õkam 'ýr wadjàn kam kum apê:n kam kato. Nãm ã meo anhýro tẽn. NhyM kam mekbê Abij me ja pãnh 'ýr wadjàn Metĩndjwýnhmã àpẽn ba. NhyM Djakarij, kubê me kadjy Metĩndjwýnh mar djwýnhkam mekõt Metĩndjwýnhmã àpẽnho ku'ê. NhyM me kute Metĩndjwýnhmã kikre kudjý dja bõr kadjy kẽn mẽre à'ak ne kurẽn kõt 'ýr wangij nhyM Djakarij kukràdja jakõt ate Metĩndjwýnh nhõ kikretimã wadjà,

kute kikre kudjy dja bôrmã. Ate ne me kudjwa 'yr wadjã ne kum kubô.

<sup>10</sup> NhyM kute kum bôrkôt me kunĩ kikreti kabem Metĩndjwýnhmã kabêno ku'ê. <sup>11</sup> NhyM Djakarij bôro dja nhyM aêrbê Metĩndjwýnh kadjy mrãnh djwýnh 'ô nokam kato. Nãm tu kikre kudjy dja bôr dja jakýxkôt 'yr kato. <sup>12</sup> NhyM omũn kam umar punuren kum uma ne, kute ajmã o karô ne kum uma. <sup>13</sup> NhyM kam kum,

—Djakarij, kwãrĩk wãnh atĩn prãm kêt. Arým ne Metĩndjwýnh aje amijo adjã'wýr ma. Dja on aprôbê Ixabeu tujarô gar amim akra my mý. Akra my mýn kam kum idji Djuão jarê. <sup>14</sup> Dja gar tu akĩ:nhkumrêx ne. NhyM me krãptĩ ar akôt kĩnhkumrêx, ar akra rwýkkam kĩnhkumrêx. <sup>15</sup> NhyM Metĩndjwýnh kadjy godja akra rax ne kam kabên mexkumrêx ne. Godja uba kangô djãkrêo kôm kêt, nãr atemã kadjwati kangô\* 'ôo kôm kêt. NhyM Metĩndjwýnh Karô raxo akra kadjwýnhbê nhýn ar o ba, nã tikkrekam jêt rã'ã dja Metĩndjwýnh Karô mrãmri o ba.

<sup>16</sup> NhyM mekbê idjaer krãptĩ dja me ô Bẽnjadjwýr Metĩndjwýnh 'yr amijo akêx, akra kabênkôt 'yr amijo akêx. <sup>17</sup> NhyM akra dja Bẽnjadjwýr kukãm tẽ, kute memã bôx djã'ã ujarênh nhyM me kute kadjy amijo mexmã dja kukãm tẽ. NhyM Metĩndjwýnh Karô dja mrãmri o ba nhyM uma ne, kute mrãmri ne Metĩndjwýnh Karô kute Erijo ba nhyM umaja pyrãk. Dja akra memã arê nhyM me nãmê me bãm akubyn kum kra jabê. NhyM ate ajte memã arê nhyM me amakkre kêtja dja me akubyn katãt mrãn arým ajte kabên mexkumrêx. Dja akra ã memã ane nhyM me arým Metĩndjwýnh kadjy amijo mex. Nãm ã kadjy mrãn djwýnh

Djakarijmã kabên jarênh o ane.

<sup>18</sup> NhyM kam kum,

—Gêt kon ne. Mýjkôt dja ba akabên ma? Arým iprômê ar ibêngêtte. Djãm ar ijabatãnh ny godja bar ikra mý?

<sup>19</sup> NhyM kam kum,

—Ba ibê Gabrijeu ne ba Metĩndjwýnh kabem dja. Ije amã kabên jarênhmã ne ijano ba awýr tẽ. Mýjja mextire ije amã arênhmã ne ijano ga ate “Kon ne” ane. <sup>20</sup> Aje amim ikabên mar kêtikumrêx pãnh gêdja ga akabên kêt nhyM akra ruw. Dja akra nhô akati 'yr bôx nhyM ruw ga kam ijukri akabên, ane. Nãm ã Gabrijeu kum ane.

<sup>21</sup> NhyM me kam kapôtã te Djakarij kam ama:, te bôx nhyM me kute kukràdjã 'ô marmãn kam abenmã kum,

—Ije tô mýj got ar o ba? ane.

<sup>22</sup> NhyM kam arým katon te kute memã kabênmã. NhyM me,

—Arým ne Metĩndjwýnh nhô kikretikam mýjja 'ô pumũ, ane.

NhyM tu ikrao memã ujakreo djan kabên kêt mex ne.

<sup>23</sup> Ne kam ar àpênh ba:n arým inomã kumên kam katon akubyn ũrkwãmã tẽnh bôx. <sup>24-25</sup> Bôx nhyM kãjbê 'ãtũm nhyM kam prôbê Ixabeu tujarôn kam pijãm ne kam kikre bu'ãbit mrã. Kute amirĩt kêt'ã mytyrwý amãnhkrut ne amãnhkrut ne ikjêkêt, pijãm djãje, tujarôkam. Nãm,

—Ota Bẽnjadjwýr ipumũn kum ikaprĩn arým ijo mex. Jakam dja me ijã kabên kêt ne, ane.

*Marij kurũm Jeju rwýkmã kum arê.*

<sup>26-27</sup> NhyM kam arým tujarô'ã mytyrwý amãnhkrut ne amãnhkrut ne amãnhkrut nhyM Metĩndjwýnh ajte kadjy mrãn djwýnhbê Gabrijeu jano, Marij'yr ano. Marij kurererkam ne kra kêtikumrêx,

\* **1:15** Mýjja me kute o kôm ne kôt bibãnh kunĩja, kadjwati kangômê uba kangômê, mýjja kangô kunĩ ne me kum kadjwati kangô jarê.

me'õ 'yr mōr kêt kam. Nhy m bep me'õbê Jōdje ne kum kabēn kajgo, kraxje 'yr mōr kêt. Nhy m bep Jōdje nhyngēt ne Dawi. Apŷnh ne me õ pyka nhy m bep tu pyka abenã tŷm nhidjibê ne Garrêja. Nhy m bep kam krī 'õ nhidjibê ne Nadjare. Krī jakam ne Metīndjwŷnh Marij'yr Gabrijeu jano. <sup>28</sup>Nhy m arŷm 'yr tēn bōx ne kum,

—Marij, djām ga? Metīndjwŷnh ne arŷm akam ukaprīn ajo ba, ane.

<sup>29</sup>Nhy m Marij Gabrijeu kabēn man axwe amikam umar ne õkre kadjwŷnhbê amim,

—Mŷj kabēn got ja? ane.

<sup>30</sup>Nhy m kam kum,

—Kwārīk wānh, Marij, atīn prām kêt. Mrāmri ne Metīndjwŷnh akam kīnhkumrēx. <sup>31</sup>Ota, dja ga on atu-jarōn kam akra my mŷn kam kum Jeju jarē. <sup>32</sup>Godja akra bēnjadjwŷr rax ne ar meo ba nhy m kam me 'ã abenmã kum, “Metīndjwŷnh py-mati kra”, ar o ba. Gēdja Bēnjadjwŷr Metīndjwŷnh Jeju'ã bēnjadjwŷr rax mē nhy m kam ar meo ba. Ingēt bē Dawi bēnjadjwŷr rax djō'ã dja rax ne ar meo ba. <sup>33</sup>Tām godja tūmrām mekbê idjaer kadjy bēnjadjwŷr ne ar meo ba. Dja bēnjadjwŷr rã'ã rã'ān ar meo ban o ino rer kêt kumrēx, ane. Nām ã kadjy mrānh djwŷnh kum ane. <sup>34</sup>Nhy m kam kum,

—Godjām me'õ iwŷr mōr kêtjakam ba ije ikra mŷnhmã. Mŷj godja imã ikra dji? ane.

<sup>35</sup>Nhy m kam kum,

—Metīndjwŷnh Karō dja awŷr ruw. Metīndjwŷnh pymati Karō dja awŷr ruw. Djām tãwãbê mŷjja tŷx? Ta gēdja tu amã akra jadja nhy m akurūm kato. Ne kam prīrerūm mrāmri mexo tuknīn mexkumrēx. Kam axwe 'õ kêt kumrēx. Nhy m me kam kum Metīndjwŷnh Kra jarē.

<sup>36</sup>Ota anhōbikwa Ixabeu te kubēngētte ne arŷm tujarō. Me kute Ixabeumã kra kêt jarēnh ar o baja ne arŷm tujarō. Adjwŷnhdjwŷ ne

kra my wajēt nhy m arŷm jēt'ã my-tyrwŷ amānhkrut ne amānhkrut ne amānhkrut. <sup>37</sup>Djām Metīndjwŷnhbê mŷjja 'õ bipdjur got? ane. Nām ã kadjy mrānh djwŷnh kum ane. <sup>38</sup>Nhy m kam kum,

—Ã, mrāmri. Ibê Metīndjwŷnh nhō ãpēnh tūm. Gora gē akabēnkôt ã ijo ane, ane. Marij ã kum ane nhy m arŷm mã kurūm tē.

*Marij Ixabeu'yr bōx.*

<sup>39-40</sup>Nhy m kam Marij no kator mex ne mã Ixabeu'yr tē, kute omūnhmã 'yr tē. Pykabê Djudējakam krī 'õ'yr tē. Kam ne krānh kumex. Nhy m tēn bōx ne Djakarijmē Ixabeu ar ŷrkwãmã wadjàn kam Ixabeumã kabēn. <sup>41</sup>Kum kabēn nhy m Ixabeu kute kabēn marmē ro'ã kraja Marij kabēn man kam kīnh ne kãjmã amijã te. Nã tikkrekam kãjmã amijã te.

Nhy m kam Metīndjwŷnh Karō raxo Ixabeu kadjwŷnhbê nhŷn ar o ba <sup>42</sup>nhy m kãj bē kabēn ne kum,

—Metīndjwŷnh ne arŷm ajo kīnh, me nire kunī kurām ajo kīnh ne. Ne atikkrekam akra jētjadjwŷ o kīnhkumrēx ne. <sup>43</sup>Xō kum djām ibēnjadjwŷr rax ne Metīndjwŷnh kute ijo kīnhmã iwŷr inhō Bēnjadjwŷr nã jano? ane. Arŷm ne inhō Bēnjadjwŷr nã iwŷr bōx ba arŷm ikīnhkumrēx ne. <sup>44</sup>Ē, ga imã akabēn, ba akabēn ma nhy m kam ikra kīnhkumrēx. Itikkrekam jētja kīnhkumrēx ne kam kãjmã amijã te, ba kam amã ikabēn jarē. <sup>45</sup>Ō kwep akīnhkumrēx. Bēnjadjwŷr ne arŷm amã kabēn ga tu amijã akra kamnhīxkumrēx ne amim, “Mrāmri, Metīndjwŷnh kabēnkôt dja ikra rwŷkkumrēx”, ane. Kam ne ga akīnhkumrēx ne. Nām ã Ixabeu Marijmã ane.

*Marij kute Metīndjwŷnhmã mex jarēnh.*

46-47 Nhyam kam Marij kutã kum kabên ne kãjmã Metĩndjwýnhmã rax jarênho dja, ne,

—Dja ba mã Bẽnjadjwýrbê Metĩndjwýnhmã rax jarên kôt kum amikĩnh jarê.

Metĩndjwýnhbê ipytãr djwýnhkam ne ba ikĩnh raxkumrêx, ikad-jwýnhbê ikĩnh ne kam kum amijarê.

48 Metĩndjwýnh ta ne kum ikaprĩn ijo amiptãn kam imã kĩnh jadjã.

Djãm adjãkam irax tũm? Xô kum kati, ingrire. ãm ibê ô ãpênh kajgokumrêx. Ingridre nhyam kam tu Bẽnjadjwýr ijo amiptãn kam imã ikĩnh rax jadjã.

Jakam dja kamingrãny amũ aben nhijuk'ã abenmã ikĩnh jarênho tẽ, ikĩnh rax jarênho tẽ.

49 Ga prĩne kute ijo kĩnhja pumũ. Djãm Metĩndjwýnh rerek got? Axwe tỳx. Ga kute mỳjja pumũnh kêt imã o amirĩtja pumũ.

O ne imã ikĩnh jadjã. Mrãmri ne tãwã mexkumrêx. Nãm mexo uma.

50 Ne mekam ukaprĩkumrêx. Me kute Metĩndjwýnh kabên mar ne kôt kute ar amijo baja mekam ne ukaprĩ.

Nhyam kamingrãny amũ me banhijuk'ã amũ maro tẽ nhyam Metĩndjwýnh me kamdjwý ukaprĩ, me banhijuk'ã me kamdjwý ukaprĩ tẽ.

51 Bep me kute amijo àmraja, me kute ôkre kadjwýnhbê,

“Ba ne ba ibẽnjadjwýr rax, ba ne ba irax”, anhyrja, memã ne arým amimao pôx ne kãjbê me kumê.

52 Ne me bẽnjadjwýr rũnh memã ýrja me tãm ne tu arým meo kãtãm ne, ne kam pãnh me kute amijo kãtãmja, me kute

amijo àmra kêtjao bẽnjadjwýr rũnh ne.

53 Ne kam ajte me ô mỳjja kêt, me kum prãmja ne mỳjja mex-tireo memã ajne ne o me kĩnh ba.

Ne kam pãnh me ô pi'ôk kaprĩ rũnh, me ô djwý krãptĩja arým meo ajkên aminêje me ano nhyam me ýkam ar ba.

54 Metĩndjwýnh kute amrêbê me bakukãmãremã katãt arênhkôt ne arým me baman kum me bakaprĩ.

Ne me babê idjaer, me babê ô ãpênhja ne kum me bakaprĩn me bawýr ruw ne amikôt me bajo môn me bajo djuw mex ne ar me bajo ba.

55 Amrêbê ne me banhingêt Abraõomã kabên ne kum kaprĩ, me bakajmã'ã kum kaprĩ ne kam kôpdji'ã me baman kum me bakaprĩ. Dja kum me bakaprĩ rã'ã rã'ã ne.

Nãm ã Marij kum kabêno ane. 56 Ne kam Ixabeu kuri dja: nhyam kam 'ã mytyrwý amãnhkrut ne ikjekêt nhyam arým mã tẽ, mã ô pykamã tẽn bôx.

*Djuão rwýk'ã ujarênh.*

57 Nhyam kam Ixabeu kra rwýk djã nhô akati arým ýr bôx nhyam kam kra my ruw. 58 Nhyam kam ôbikwa kuman arým kĩnhkumrêx. Nhyam atãri ar ýrkwãkam me jadjwý kuman kam kôt kĩnhkumrêx. Metĩndjwýnh kam ukaprĩ raxkôt kuman kam kudjwa kĩnhkumrêx ne. 59-60 Nhyam kam arým kra rwýk'ã pi'ôk kamrêk pydji nhyam me kute my nhinhu kã krã'ymã bit kute kum Djakarij jarênhmã, bit kute kum bãm nhidji jarênhmã nhyam nã memã kum,

—Xô kum kati, idjibê ne Djuão, ane.

61-62 Nhyam me kam kum, —Je tô mýkam? Nhýnh ne anhôbikwa 'ô ã idji ane? anen kam bãm'ýr akêx ne kum ikrao

ajakre. Idji jabej kukjêr kadjy ne me bãmã ikrao ajakre.

—Mã ne aje kum idji jarênhja kute? ane.

<sup>63</sup> Nhyam kam bãmja kute memã idji no'òk kadjy mÿjja'ã me ku'uw nhyam kam me kum o tẽ nhyam kam memã idji no'òk ne,

—Idjibê ne Djuão.

Nhyam me omũn kam ari aben pumũn abenmã kum,

—Je tô mÿkam? Mÿj got ja? ane.

<sup>64</sup> Nhyam Djakarij kute idji no'òkmẽ ro'ã arÿm ajte kabên ne kam Metĩndjwÿnhmã mextire jarêho dja. <sup>65</sup> Nhyam kam ar õ kròkam me ja tĩn prãm ne kam abenmã arêho ipòk ne. Pykabê Djudêjakam apÿnh krãnhrekam me õ krĩkam ne me abenmã arêho ipòk ne. <sup>66</sup> Nhyam me kam kuma:n ar o ba, Metĩndjwÿnh kute ar krao bakam ne me mar ar o ban kam abenmã kum,

—Mã gêdja abatànħ ne kute? ane.

*Djakarij kute Metĩndjwÿnhmã mex jarêh.*

<sup>67</sup> Nhyam kam Metĩndjwÿnh Karõ raxo bãmbê Djakarij kadjwÿnhbê nhÿn ar o ba nhyam amũ Metĩndjwÿnh djò'ã kabên jarêho dja ne Jeju kumrêx'ã ajarê. Jejubê bẽnjadjwÿr rax ne kubê mekbê idjaer pytâr djwÿnh'ã ajarê. Ne kam ijukri Djuão jarê. Nhyam bep Jeju kumrêx ne 'ã ajarê ne memã kum,

<sup>68</sup> —E kum me babê idjaer nhõ Bẽnjadjwÿr mexkumrêx. Ba gop me amã me banhõ Bẽnjadjwÿr, me banhõ Metĩndjwÿnh mextire jarê.

Mÿkam? Bir, nãm ta õ me ba djwÿnh'ÿr ruw, kute me bapytãrmã ne me bawÿr ruw.

<sup>69</sup> Kute umao ar me bapytâr ne me bajo ba kadjy ne arÿm me bamã me bapytâr djwÿnh jano. Ingêt kukãmãre ne Dawi, õ àpênh tũmja.

Ingêt kukãmãrebê Dawi jabatànħ djakam ne me bakadjy nõ.

Abatànħ ne kute umao me bapytâr ne ar me bajo ba kadjy arÿm ingêt jabatànħ djakam nõ.

<sup>70</sup> Me kute Metĩndjwÿnh kabên jarêh djwÿnh kabên kòtò.

Amrêbê ne Metĩndjwÿnh kute kabên jarêh djwÿnh mexkumrêx jamã kabên jarêh kòt ne arÿm me bamã ano.

<sup>71</sup> Kute me bakurê djwÿnhbê me bapytãrmã, me kum me bakurê ne kute me bajo bajabê me bapytãrmã ne Metĩndjwÿnh me bawÿr ano.

<sup>72</sup> Nãm me bakukãmãremã kabên pydjĩn arêh memã kum,

“Dja ba imã me akapri”, ane.

Dja ba amikabên mexja mã kuman o ibiknor kêt, ane ne kam kòt me bawÿr ano.

<sup>73</sup> Nãm ã me bakukãmãrebê Abraõomã kabên pydjĩn arêho anen kam katãt kòt kuma.

<sup>74</sup> Kute me bakurê djwÿnhbê me bapytâr, gu me badjumar meÿ ne arek ar baban kum badjãpênhmã.

<sup>75</sup> Me bamextire ne katãt bamrãnh ne kum badjãpênhmã. Me batĩnri Metĩndjwÿnh kabem kribêm ar me babao rãm ne mũ jamã ne kum arê.

Nãm ã Abraõomã kabên jarêho anen kam katãt kòt kuman me bawÿr me bapytâr djwÿnh jano, Bẽnjadjwÿr jano, ane.

Nãm ã Djakarij memã Jeju jarêho anen kam ajte kramã kabên jarê, krabê Djuãoomã 'ã karõ, Djuão Jeju kukãm tẽmmã 'ã kum karõ ne kum,

<sup>76</sup> —Bep ga, akmere, ga dja ga Bẽnjadjwÿr kukãm tẽn kutêp me akre gê me kuman Bẽnjadjwÿr kam amakbê katãt amijo ba.



Kute mrāmri ne me kute me bēnjadjwŷrmā katāt pry djirja pyrāk. Gēdja me ajā,

“Metīndjwŷnh Pymati kabēn jarēnh djwŷnh ne ja”, ane.

77 Nā, ga dja ga kukām tēn memā arē. Ta kute ō me ja pytar ne ar meo bamā memā arē. Mā ne me bapytār o?

Apŷnh me bajaxwe djāri kute tu o bingrānh ne me bakam ngryk kētmā. Kute ā ukaprikōt me bapytāro anhŷrmā.

78 Mrāmri ne me Batīn djwŷnh kum me bakapri rax ne. Ne kam kājkwā kurūm me bapytār djwŷnh me bawŷr ano.

Kute me bamā irā djā pyrāk. Kute mrāmri ne myt kute me bamā irān kute me bakurwŷja pyrāk ne me bawŷr ano.

79 Me kum tyk pyma, me tīn prāmja ne me kute mrāmri ne me akamāt kō tykkam me krīja pyrāk.

Nhym bep me bapytār djwŷnh dja me jamā tīn prāmo ajngrā. Ga akati kute akamāt kō nhipōnhja pumū.

Dja ā me bamā me batīn prām, me bamā batyk pyma ā o bingrānho ane gu me kam badjumar mexkumrēx ne ar baba. Tām ne ja.

Nām ā Djakarij kramā 'ā karōo ane, Jeju kukām tēm ne kute kutēp me akremā.

80 Nhym kam kra arŷm kājkmā krā tēn kam Metīndjwŷnh kabēnkōt amijo ba. Kute kōt amijo ba rā'ān abatānh. Ne kam kapōt kukritkam ar ba. Ō akati kutēp ne kapōt kukritkam ar ba. Kute mekbē idjaermā amijo amirīt nhō akati amiwŷr kam amakbē kapōt kukritkam ar ba.

## 2

*Jeju rwŷk'ā ujarēnh.*

*Mat 1.18*

<sup>1</sup> Nhym kam bēnjadjwŷr raxbē Xedja Agujtu memā kabēn jarē. Xedja Agujtu ne me kunīmā nhŷ. Nām memā kabēn jarēn memā kum,

—Me akunī, pyka kunikōt dja ga me anhingēt nhō pyka'ŷr aba gē me me anhidji'ā pi'ōk no'ōk, ba ije me ajā akre kadjy, ane. <sup>2</sup> Me kute me idji'ā pi'ōk no'ōko kutewa kadjy ne ja. Nhym Xirēnhu, bēnjadjwŷr bajtem, pykabē Xirijkam memā nhŷ. Kam ne me kute bēnjadjwŷr raxbē Xedja Agujtu kabēnkōt me idji'ā no'ōkmā.

<sup>3</sup> Nhym kam me kunī apŷnh krī djāri'ŷr ajmā. Apŷnh me ingēt nhō pykakam abatānh djāri'ŷr ajmān kam bōx. Bōx nhym me kam me idji'ā pi'ōk no'ōko tē.

<sup>4-5</sup> Nhym kam Jōdjemē Marij ar adjwŷnhdjwŷ me kudjwa ingēt nhō pyka'ŷr tē, ingētbē Dawi rwŷk djā'ŷr ne ar tē. Arŷm ne kum kabēn ne. Kraxje 'ŷr mōr kēt rā'ā. Nām kum kabēn kajgo. Tu pyka abenā mēnh nhidjibē ne Garrēja ne kam apŷnh ne krī djāri idji. Garrējakam krī nhidjibē ne Nadjare. Kurūm ne ar tē. Marij arŷm tujarō tŷx nhym ar tē. Atemā ajte pyka 'ō tu abenā tŷm nhidjibē ne Djudēja. 'ŷr ne ar wabi ne kam tē:n kam krībē Berē'ŷr bōx. Ingētbē Dawi rwŷk djāmā tēn bōx, ō pyka nhidjibē Berēmā tēn bōx, me kute ar idji'ā pi'ōk no'ōkmā. <sup>6-7</sup> Nhym kam me kumex ne prīne Ar kubē kikre kre jaē. Nhym kam kra rwŷk djā nhō akati arŷm 'ŷr bōx nhym kra my ruw. Kra kutewa ne ruw. Nhym Marij kubēkào kupun o tēn mryti djākur djākam kudji, me kute prīne Ar kubē kikre kre jaērkam.

*Mry pumūnh djwŷnh Jeju'ŷr bōx.*

<sup>8</sup> Nhym krī nokā'ā ne mry nhō kapōt. Nhym arŷm akamāt.

Nhym kam mry nhõ kapôtkam ar kute mry pumũnh djwýnhja õ krit pumũho dja. <sup>9</sup> Nhym kam Metĩndjwýnh kadjy mrãnh djwýnh ar nokrekam kato nhym Metĩndjwýnh jadjênh prĩne ar kurwý ne arkum ipõk ne. Nhym arkum uma ne kam madjã tertet ne.

<sup>10</sup> Nhym kam kadjy mrãnh djwýnh arkum,

—Kwãrik wãnh, ar amã uma kêt. Ota ba ije ar amã mýjja mex jarênhmã tê. Ê, me akĩnh djã ne arým me akadjy kato. Me akunĩ akĩnh kadjy, akĩnh raxmã. <sup>11</sup> Ê, akamãt ja tãmkam ne me apytãr djwýnh arým me akadjy ruw. Dawi nhõ pykakam ne ruw. Kubê ne Kritu, kubê ne Bẽnjadjwýr djwýnh. <sup>12</sup> Tãm ne ajbir rwýk nhym nã kute kubêkão kupun mryti djãkur djãkam irwã. Kute kubêkão kupun mryti djãkur djãkam irkõt dja gar kum akaton kam omũ, ane. Nãm ã Metĩndjwýnh kadjy mrãnh djwýnh arkum ane.

<sup>13</sup> Nhym kam ar aêrbê kãjkwa kurũm Metĩndjwýnh me ano, amikadjy mrãnh djwýnh jano nhym katon kumex, kumrêx kator jakõt ne me katon kumex ne kam Metĩndjwýnhmã mextire jarênho kumex ne mry pumũnh djwýnhmã o amra,

<sup>14</sup> —Kãjkwakam ne Metĩndjwýnh me:xkumrêx, tý:xkumrêx, uma:kumrêx.

Gora gê me kunĩ kãjmã kum mex jarênho tê. Arým ne pykakam me wãmã umar mex jarê.

Gora gê õ me wãkam kĩnhwã umar mex ne ar ba, ane.

<sup>15</sup> Nãm ã Metĩndjwýnh kadjy mrãnh djwýnh anen kam mã ar kurũm kãjkwamã wabi. Nhym kam ate mry pumũnh djwýnh abenmã kum,

—Gêto gwaj gop Berêmã mõn goja karãkõt omũ. Bẽnjadjwýr djwýnh kute gwaj bamã arênhja

pumũ, anen kam 'ýr prõt ne. <sup>16</sup> Prõt ne Marijmê Jõdje ar'ýr kato nhym mryti djãkur djãkam nõ, ngrire ne nõ nhym ar omũ. <sup>17</sup> Nõrkõt omũn kam memã arênhõ ajkate. Kadjy mrãnh djwýnh kute mry pumũnh djwýnhmã arênhja, kute Marij kra jarênhja ne me memã arênhõ ajkate.

<sup>18</sup> Nhym me kuman kam abenkam no tyn kumex ne abenmã kum,

—Mýj gotja? Mýkam got Metĩndjwýnh kadjy mrãnh djwýnhja katon kumex? anen ari aben pumũho akêx. <sup>19</sup> Nhym bep ãm Marij ta kute kraxkõt mar ne amikam mýjja kunĩ ma:ro tẽn 'õo biknor kêt ne.

<sup>20</sup> Be, nhym kam mry pumũnh djwýnh kapõtmã akêx. Kadjy mrãnh djwýnh kute arkum arênhkõt ne ar karã nõrkõt omũ. Kõnh ne arkum kudji nhym ar mýjja kunĩ pumũn kuman kam Metĩndjwýnhmã mex jarênhõ mõ. Ne kãjmã kum rax jarênhõ mõn kum,

—Metĩndjwýnh, gajbit ne ga apy-djin adjukaprĩ, amex, arax, atýx, anhýro mõ.

*Ar kute Metĩndjwýnhmã Jeju djar.*

<sup>21</sup> Nhym kam arým 'ã akati amãnhkrut ne amãnhkrut ne amãnhkrut nhym ar my nhinhu kã krãtan kam ajte kum idji Jeju jarê. Tikkrekam jêt kêttri Metĩndjwýnh kadjy mrãnh djwýnh kute kum idji jarênhja ne kum arê. <sup>22-24</sup> Nhym kam akati krãptĩ nhym ar krĩraxbê Djeruxarê'ýr o tê. Ar kute Bẽnjadjwýr djwýnhbê Metĩndjwýnhmã armã ne ar o tê. Metĩndjwýnh kabên'ã pi'õk nõ'õkkam ne memã,

“Me akra my kutewa gêdja axidjuw ga me Bẽnjadjwýr djwýnhmã me umjuw, kute o am-inhõmã”, ane.

Kõt ne ar kute Djeruxarêmã Jejuo tẽn ne kum armã. Ar

adjw̄ȳnhdjw̄ȳ kute Met̄indjw̄ȳnhm̄ā mry bōrm̄ā. Ar̄ym ne Marij kamrō ngr̄an kam kute Mōjdjē kukr̄adjākōt Met̄indjw̄ȳnhm̄ā mry dj̄ar ne kum ōrm̄ā. Amr̄ēbē ne Mōjdjē Met̄indjw̄ȳnh kabēn'ā pi'ōk no'ōk ne mem̄ā kum, “Ē, dja ga me akamrō ngr̄an kam Bēnjadjw̄ȳr djw̄ȳnhm̄ā tutte amē agan kum angā, nār tutti no t̄yr nyre amē ab̄in kum aga”, ane.

Jakōt ne ar kute kum ar̄ ne ōr nhȳm nāja akubyn Met̄indjw̄ȳnhm̄ā mex ne ō kikretim̄ā arm̄ā Djeruxarēm̄ā o tē.

<sup>25</sup> Nhȳm bep Djeruxarēkam me'ō mybē Ximiāo. Mr̄ānh katāt ne Met̄indjw̄ȳnh kabēnkōt ar amijo ba. Nām arek mekbē idjaer pytār djw̄ȳnh, mem̄ā kapr̄ī rēnh djw̄ȳnh, Kritukam ama. Nhȳm Met̄indjw̄ȳnh Karō ar o ba. <sup>26</sup> Ar o ban kam ar̄ym kum,

—Ē, at̄in rā'ā dja ga Met̄indjw̄ȳnh kute anorja'ȳr bōx ne om̄ū. Kute me apytarm̄ā ne ano, kubē ne Kritu, tām dja ga om̄ū, anh̄ytā 'ȳr bōx ne ano om̄ū, ane. Nām ā Met̄indjw̄ȳnh Karō Ximiāom̄ā ane nhȳm kuman ar o ba.

<sup>27</sup> Ne kam Met̄indjw̄ȳnh nhō kikreti'ȳr tē. Met̄indjw̄ȳnh Karō ne ano nhȳm tē. Kumr̄ēx ne ar kukām tēn bōx. Nhȳm Jeju nāmē bām arkōt 'ȳr o bōx. Ar kute me amikukr̄adjā tūmkōt Met̄indjw̄ȳnhm̄ā arm̄ā ne ar 'ȳr o tēn o wadjā. <sup>28</sup> Nhȳm Ximiāo om̄ūn kum̄ȳn kam Met̄indjw̄ȳnhm̄ā mextire jarēn kum amik̄inh jarēn kum,

<sup>29</sup> —Bēnjadjw̄ȳr djw̄ȳnh, jakam dja ga on im̄ā ityk nhō akati jarē, ba ibē anhō àpēnh dja ba wām aw̄ȳr tē, aje im̄ā arēnhkōt.

Ar̄ym ne ba om̄ūn ar̄ym ik̄inhkumr̄ēx ne ar̄ym idju-mar mexkumr̄ēx ne. Jakam dja ba idjumar mexbē ty, aje im̄ā arēnhkōt.

<sup>30</sup> Ga ga ar̄ym me utār djw̄ȳnh jano ba inoo om̄ū.

<sup>31</sup> Anh̄ȳr djw̄ȳnhrām aje arēnhja ne ga ar̄ym mem̄ā o akato nhȳm me kunī pyka kunīkōt om̄ū.

<sup>32</sup> Me utār djw̄ȳnhja ne kute a'u pyrāk. Dja ap̄ȳnh me ba-jtemja no bō nhȳm me katāt mr̄ā.

Nhȳm kam ajte me ibē id-jaerm̄adjw̄ȳ k̄inh jadjā. Kōt dja me me im̄ā me ik̄inh jarē, me irax jarē, ane.

Nām ā Ximiāo Jeju'ā ujarēnh ane.

<sup>33</sup> Nhȳm kam bām̄mē nā ar kuman kam abenkam no tyn aben pum̄ūnho dja.

<sup>34</sup> Nhȳm kam Ximiāo jām aro akēx ne Met̄indjw̄ȳnhm̄ā aro a'uw ne kum,

—Dja ga aro k̄inh ne ad-jukap̄r̄ikōt aro djuw mex ne arkum umar mex jarē gē ar umar mex ne ar ba, ane. Ne kam ajte jām nājao akēx ne kum,

—Ota ar̄ym akra kute meo bikjērm̄ā bōx. Me babē idjaer kw̄ȳ dja me kum kurēn kam kōt amijo ajkē. Dja te kute mem̄ā Met̄indjw̄ȳnho amir̄itm̄ā nhȳm me mā ap̄ȳ. Nhȳm bep me bakw̄ȳ dja gu me mā bam̄ā abēn kam amipt̄an kōt ar amijo baba. <sup>35</sup> Nhȳm akra ta dja ar mekm̄ā apōx ba. Godja me ōkre kadjw̄ȳnhbē amim m̄ȳjja'ā karō nhȳm akra ta tu ar mem̄ā apōx ba. Ga gadjw̄ȳ akra djō'ā akap̄r̄ī rax ne akra ma: ne. Kute mr̄āmri ne nānhre kute gadjw̄ȳ anhōpōkkam akap̄r̄ī pyrāk, ane. Nām ā Ximiāo anh̄ȳr djw̄ȳnhrām kum arēnho ane.

<sup>36-37</sup> Nhȳm kam me'ō nibē Ana adjw̄ȳnhdjw̄ȳ ar'ȳr bōx. Kubē Met̄indjw̄ȳnh kabēn jarēnh djw̄ȳnh 'ō, Panuwe kra, mekbē Axer 'ō. Nām 'uw̄tī. Amr̄ēbē ne mjēn 'ȳr mō nhȳm 'ā amex amānhkrut ne amānhkrut ne amānhkrut ne ik̄jēkēt nhȳm ar̄ym kubē ty. Nhȳm kam 'uw̄tīn ar̄ym kubēngē:xte. Ar̄ym 'ā

amexbê 84. Nãm Metĩndjwỳnh nhõ kikretikam ku'ên kator kêt-kumrêx ne tu Metĩndjwỳnhmã ãpênho dja. Akamãtmẽ akati kunĩkõt ne kum kabêno ku'ên kadjy amijajbu. <sup>38</sup> Ne kam kum ajmã ar'ỳr bõx ne Jeju pumũn kam Metĩndjwỳnhmã amikĩnh jarên kum ukapĩ jarê ne kam ajte me kute kam amakjamã Jeju jarê. Me utãr djwỳnh bõx ne kute me kurê djwỳnhbê akubyn me õ krĩraxbê Djeruxarê pytãrmã ne me kam ama. Memã ne Ana,

—Arỳm ne bõx. Arỳm ne me bapytãr djwỳnh bõx, ane. Nãm ã Ana me kute kam amakjamã arênho anen kam ajte mã wadjã.

<sup>39</sup> Nhyam kam Marijmẽ Jõdje ar Bẽnjadjwỳr djwỳnh kukràdjã kunĩkõt arỳm mỳjjao tẽn inomã kumẽn kam akubyn pykabê Garrêja'ỳr tẽn kam ar õ krĩbê Nadjarekam bõx. <sup>40</sup> Nhyam kam kra kãjmã krã tẽn kam ì tỳx tẽn. Tẽn tẽn ì arỳm abatãnh ne kam no mexkumrêx nhyam kam Metĩndjwỳnh kam kĩnhkumrêx ne mã o djuw mex.

*Jeju Bãm nhõ kikretikam ỳr.*

<sup>41</sup> Nhyam na mẽ gaga mrãnh kunĩkõt Jeju nãmẽ bãm ar Djeruxarẽmã mrã. Me kute aben pydjĩn kute Metĩndjwỳnh me irõbê mrãnh nhõ akati mar ne õ kwỳ krẽn rax kadjy ne ar 'ỳr mrã. <sup>42-43</sup> Nhyam ajbir Jeju nõrny. Arỳm 'ã amexbê 12. Nhyam ar kunĩ mekõt ajte me kute aben pydji'ỳr wabin me'ỳr bõx ne mekõt ar õ kwỳ krẽn ba, Jejumẽ. Nhyam me kam o ino re nhyam nãmẽ bãm ar akubyn õ krĩmã tẽn. Tẽn kam pry konenh te abej aprã. Nhyam be nãm nõrnyja, arek Djeruxarẽkam ar ba nhyam nãmẽ bãm ar kute mar kêt. <sup>44</sup> Nãm kute atemã me'õ arkõt mã tẽn pyrãk. Nhyam 'ã akati pydji nhyam ar te õbikwakam abej aprã. <sup>45</sup> Ne kam kute Djeruxarẽkam ajte

abejmã akubyn tẽn. Tẽn bõx ne kam te: ajte abej nhyam 'ã akamãt. <sup>46</sup> Nhyam akati kêt nhyam ar te ajte abej.

Nhyam kam akati nhyam kam ar Metĩndjwỳnh nhõ kikretikam kum kato. Nhyam me ipõkri nhỹ, Mõdjê kukràdjã jarênh djwỳnh nhĩpõkri nhỹ, me kabên maro nhỹn kam me kukjêro nhỹ. <sup>47</sup> Nhyam me Jejukam no tyn nhỹ. Nãm tu me aêrbê prĩne mỳjja ma. Nhyam me jadjwỳ mỳjja jabej kukjêro nhỹ nhyam no mexkõt katãt memã mỳjja jarênho nhỹ. Kam ne me kam no tyn nhỹ. <sup>48</sup> Nhyam nãmẽ bãm ar mekõt omũn kam mekõt kam no tyn dja. Nhyam nã kum,

—Akmere, mỳkam ne ga ar ibê ã anhỹr aba? Nã bãm abãmmẽ ar te ajabej aprãn axwe akam idjumar ne kam ajabej ar mrã, ane.

<sup>49</sup> Nhyam kam kum,

—Mỳkam ne gar ijabej ar mrã? Djãm ar aje imarja kêt? Arỳm ne ba Ibãm nhũrkwão inhũrkwãn kam idjãpênhmã, ane. <sup>50</sup> Nhyam ar kute kabênja mar kêt-kumrêx. Ne te kute marmãn kam õkre kadjwỳnhbê,

—Mỳj kabên got ja? ane.

<sup>51</sup> Nhyam kam arkõt tẽn, arkõt Nadjarekam tẽn bõx ne kam ar kabênkõt ar amijo ba. Nhyam bep nãja ne mỳjja kunĩ man kum kĩnh ne. <sup>52</sup> Nhyam bep Jeju ta adjãkamã no mex tũm ne amũ no mexo amikamênho tẽn kam ì abatãnh mex ne. Nhyam Metĩndjwỳnh kam kĩnhkumrêx. Nhyam mebêngõkredjwỳ\* kam kĩnhkumrêx ne.

### 3

*Ngõmã me angjênh djwỳnhbê Djuão.*

*Mat 3.1; Mak 1.1; Dju r 1.19*

<sup>1-2</sup> Nhyam bep Djuão kapõt kukritkam ar ba. Djuão, Djakarij

\* 2:52 Jeju nhõ pykakam me kunĩ bêngõkre kute mrãmri ne apỳnh me õ pyka djãri kunĩkõt me kunĩ bêngõkre pyrãk. Kubê kã jakamẽ me kakrãtykmẽ me babêngõkremẽ ne me kunĩ bêngõkre.

kraja ne kapôt kukritkam ar ba. Nhyam kam Metĩndjwýnh kum kabĕn ne.

Be, nhyam bep bĕnjadjwýr raxbĕ Xiberu Xedja. Me bĕnjadjwýr kunĩ kuràm rax ne me kunĩmã nhỹ. Ne kam amidjô'ã me kwý'ã bĕnjadjwýr rĕ. Nãm pykabĕ Djudĕjakam me ja kadjy Põxu Piratu'ã bĕnjadjwýr mĕ, kubajtem. Ne kam ajte pykabĕ Garrĕjakam me ja kadjy Erodji'ã bĕnjadjwýr mĕ. Ne kam ajte pykabĕ Iturejmĕ Tarakõnikam me ja kadjy Piripi'ã bĕnjadjwýr mĕ. Erodji kamybĕ Piripi'ã bĕnjadjwýr mĕ. Ne kam ajte pykabĕ Abirĕnkam me ja kadjy Rixanij'ã bĕnjadjwýr mĕ. Nhyam ar kute me kadjy Metĩndjwýnh mar djwýnh nhõ bĕnjadjwýr raxbĕ Ananhmĕ Kajbajmĕ ar ar meo ba. Nhyam arým Xiberu Xedja memã ýr'ã amexbĕ 15 nhyam ô'ã ar bĕnjadjwýr nyreja arým memã krĩ.

Nhyam kam Metĩndjwýnh Djuãomã kabĕn ne. Djuão kapôt kukritkam ar bajamã kabĕn ne. <sup>3</sup> Nhyam kam kabĕnhkõt ngõbĕ Djodãokam ar mrã. Ne kam ar me akreo ba. Me akreo ban memã kum,

—On me amim akaton wãnh ajaxwemã anhiren Metĩndjwýnh'ýr amijo akĕx gĕ me ajaxweo aknon me akam ngryk kĕt. Ba kam on ngõnhmã me ajangjĕ, me aje ajaxwemã anhirerkõt me kute me amar kadjy, ane.

<sup>4</sup> Amrĕbĕ ne anhỹr djwýnhram Metĩndjwýnh kabĕn jarĕnh djwýnhbĕ Idjaij ne 'ã pi'ók no'ók ne memã kum,

“Me'õ dja kapôt kukritkam memã kabĕn ne. Kãj bĕ dja me akren memã kum,

‘Me apa. Ĕ, me on Bĕnjadjwýr djwýnh kutĕp wãnh ajaxwemã anhiren katãt amijo aba. Kute mrãmri ne me kute me bĕnjadjwýr rũnh kutĕp pryo mex ne kute

memã katãt pry jadjwýrja pyrãk.

<sup>5</sup> Nãm me inuw kunĩo amrã ne kam krãnhre rũnhmĕ kryremĕ, kunĩ abenãnh imõk rĕ nhyam pyka aben pyrãk ne ikwã.

Nhyam pry nhirõ nhyam me katãt adjuw. Ne pyka karõtdjwý prĩne katen o aben pyrãk nhyam mĕkumrĕx ne ikwãja pyrãk.

Dja me ã Bĕnjadjwýr djwýnhram axwemã irer ne katãt amijo bao ane.

<sup>6</sup> Nhyam me kunĩ dja me Metĩndjwýnh kute me utãrkõt me omũ', ane.”

Nãm ã anhỹr djwýnhram Idjaij memã arĕnhõ ane. Kõt ne Djuão Bĕnjadjwýr kukãm katon me akre ar o ba, nhyam me kwý rax ne me mrãmri axwemã iren katãt amijo ba.

<sup>7</sup> Nãm Djuão me akre ar o ba nhyam me itepato 'ýr bao ku'ĕ. Kute ngõnhmã me angjĕnhmã ne me 'ýr bao ku'ĕ. Nhyam kam memã kum,

—Me akamingrãny ne ga me abĕ iry. Me ajaxwekam abĕ kangã. Mýj me'õ ne me amã Metĩndjwýnh ngryk nhõ akati jarĕ ga me umaje iwýr aprõt kajgo? <sup>8</sup> Gop on me katãt Metĩndjwýnhkõt amijo aba gĕ me mrãmri me amex jabej me amã kato. Mrãmri me amim akator ne aje wãnh ajaxwemã anhirer ne aje Metĩndjwýnh'ýr amijo akĕx jabej gĕ me on me amã kato. Gĕ me me amexmã katon me akam kĩnhõ kute mrãmri ne me kute pidjõ djõ mexmã apõx ne kam kĩnhja pyrãk. Kwãrik wãnh me anhõkre kadjwýnhbĕ anhingĕt kukãmãre Abraãoo adjãmra kĕt ne amim, “Me ba ne ba me ibĕ Abraão tãmdjwý. Dja Metĩndjwýnh me ikam ngryk kĕt. Dja ba me te ijaxwe nhyam kam me inhingĕt kukãmãre Abraãokõt Metĩndjwýnh kum me ijabĕ ne me ijaxwekam me ijo bikĕnh kĕtkumrĕx”, anhỹr

kêt. Kwārīk wānh ga me ā anhyr ar aba kêt. Kati. Ē, ba me amā arē. Dja ga me te abē Abraão tãmdjwý nhym Metĩndjwýnh tu me ajo ajkē, me ajaxwe pānh tu me ajo ajkē. Ne ren kum ajte Abraão tãmdjwý prām jabej ren tu kēnjao itun o amim Abraão tãmdjwý nhipēx nhym me ren tu katon kumex.

<sup>9</sup> Ē, mrāmri arým 'yr. Metĩndjwýnh kute me axwe pānh memā akati jarēnh arým 'yr. Kute mrāmri ne pidjō apýnh abenkam ô kêt nhym me kute kār ne o mrānh ne kute kuwykam rēnhja pyrāk. Arým ne Metĩndjwýnh me ajā pidjō djō kêt jakren arým me ajaxwe pānh kute me ajo bikēnh 'yr. Dja me ajo mōn kuwykam me amē. Arým 'yr. Kute mrāmri ne me'ō kute pidjōmā 'yr kadjy kute parbē kākkrākō mýnh ne o ām pyrāk, ane. Nām ā Djuāo me krāptĩmā arēnh o ane.

<sup>10</sup> Nhym me kam kum,

—Ije tō mā dja ba me nē? ane. Metĩndjwýnh kute me ijo bikēnh kêt kadjy, mā dja ba me nē?

<sup>11</sup> Nhym memā kum,

—Dja ga me ajō nhō kubēkà amānhkrut ne kam me'ō nhō kubēkà kêt mā ikjē ngā. Nhym me'ōdjwý ō kwý krēn djā krāptĩn kam me'ō nhō djwý kêt mā amikutā kwý ngā, ane.

<sup>12</sup> Nhym me kute bēnjadjwýr ba-jtemmā pi'ók kaprīo atom djwýnh me kudjwa Djuāo'yr bōx, kute ngōnhmā me angjēnhmā. 'Yr bōx ne kum,

—Bēnjadjwýr, mā gēdja ba me nē? ane.

<sup>13</sup> Nhym kam memā kum,

—Ē, me anhō bēnjadjwýr kute me amā pi'ók kaprī jarēnhja 'ānhbit dja ga me kum o atom. Kwārīk wānh ga me ga amū amim pi'ók kaprī kamēnh ne amýnh kêt. Dja ga me tu 'ānh jamý, ane.

<sup>14</sup> Nhym me krākamngōnhredjwý kum,

—Ne me badjwý, mā dja ba me nē? ane.

Nhym kam memā kum,

—Ē, kwārīk wānh ga me me pa 'amýnh ne mekbē mýjjao aprōt kêt. Ne kwārīk wānh ga me me kātām'ā axwe rēnh ne me axweo me utār ne mekbē ijēn me ō mýjjao aprōt kêt. Nhym bep ga adjāpēnh pānh dja ga pi'ók kaprī byn tu akīnh ne. Kwārīk wānh ga me adjākrē kêt, ane. Nām ā Djuāo memā kabēn jarēnh o ane. <sup>15</sup> Nhym me kunī Bēnjadjwýrbē kumkati jabej ajkam aman kam ōkre kadjwýnhbē amim,

—Bep birām tām ne ja. Birām Djuāo got Metĩndjwýnh me bawýr ano, me bakadjy Bēnjadjwýrbē kumkatimā me bawýr ano, ane. Birām Kritu ne ja, ane.

<sup>16</sup> Nhym kam Djuāo me kunīmā kum,

—Mrāmri ba ne ba ngōnhmābit me ajangij. Nhym bep itotokbē me'ō bōxja. Me'ō tām ne raxo kute ijakrenh, kute ijakrenh mexi. Bām te irax ne 'ā inhibōn ije kum parkà 'āpre bōnh ne o itēm prāme. Bep ām ren irax ne ba ren arým kum apē. Nhym bep kati, ām ingrire. Nām raxo ijakrenh mex ne. Tām ne arým bōx 'yr. Djām ngōnhmā kute me ajangjēnhmā? Kati. Tām dja bōx ne kam me awýr Metĩndjwýnh Karō jano, me katāt amrānhbit'yr dja ano, kute ar me ajo bamā. Ne kam me ajaxweja kute kuwymā me arēnhmā. <sup>17</sup> Gēdja bōx ne kam kute mrāmri ne me kute kōtyk byr ne o kute bāygogore ka'uk ne kute kam mūm 'y mexjao atom ne kam kute 'ykājao tēm ne kute kuwykam ýr nhym xētja pyrāk. Dja me'ōja bōx ne ā me axweo anen kuwykam me kurē. Nhym kuwyja dja pōk rā'ā: rā'ān apēx kêt kumrēx. Nhym bep bāygogo 'y mex'ā ne me mexja jakren mūm meo atom ne. Ne kākkwakam ō pykamā meo mō gē me kam kam kīnhkumrēx ne ar ba. Arým kute ā meo anhyr 'yr.

<sup>18</sup> Nãm ã Djuão memã ane. Ne kam arek memã kabên jarênho tẽ. Nãm atemã kukràdjã krãptĩo me akre. Ne mã kabên nyo, kabên mexo ar me akreo ba.

<sup>19-20</sup> Nhyr bep bẽnjadjwýrbê Erodji ne axwekumrêx. Nãm axwe aben nhiby kumexo mõi, aben nhiby adjwýro mõn kam ajte Djuão mekbê ijê djakam iby kumẽ. Nãm kamybê upãnh'ýr mõi, upãnhbê Erodjij'ýr mõi. Nhyr kam Djuão arým kum kabên jarên kum,

—Kati, kwãrĩk wãnh, ane.

Nhyr kam Erodji tu amakkre kêt ne Djuãobê ijê.

*Kute ngômã Jeju jadjãr.*

*Mat 3.13; Mak 1.9; Dju r 1.32*

<sup>21-22</sup> Anh'ýr djwýnhrãm me kute kubê ijê kêtiri ne Djuão ngõnhmã me kunĩ jangij ne kam ajte Jeju ngõnhmã adjã. Ngõnhmã adjã nhyr kam Bãmã kabêno dja. Kum kabêno ãm rã'ã nhyr kãjkwa abenbê ajkij. Abenbê ajkij nhyr Metũndjwýnh Karõ 'ýr ruw ne 'ã tým. Amijo tut ne 'ýr ruw ne 'ã tým. Nhyr kãjkwa kurũm kabên ne kum,

—Mrãmri abê ikrakumrêx. Imã ajabê. Ba akam ikũnhkumrêx, ane.

<sup>23-38</sup> Nhyr kam Jeju arým ta àpênhmã o krax ne. Arým 'ã amexbê 30 ne kum o krax ne.

*Jeju nhingêt nhidji.*

*Mat 1.1*

Nhyr me we Jódjeo Jeju bãm.

Nhyr Jódje bãm ne Eri.

Nhyr Eri bãm ne Matat.

Nhyr Matat bãm ne Rewi.

Nhyr Rewi bãm ne Marki.

Nhyr Marki bãm ne Djananh.

Nhyr Djananh bãm ne Jódje.

Nhyr Jódje bãm ne Mataxij.

Nhyr Mataxij bãm ne Amox.

Nhyr Amox bãm ne Naũ.

Nhyr Naũ bãm ne Exi.

Nhyr Exi bãm ne Naganh.

Nhyr Naganh bãm ne Ma'at.

Nhyr Ma'at bãm ne Mataxij.

Nhyr Mataxij bãm ne Xemê.

Nhyr Xemê bãm ne Jódje.

Nhyr Jódje bãm ne Djoda.

Nhyr Djoda bãm ne Djõwanã.

Nhyr Djõwanã bãm ne Rexa.

Nhyr Rexa bãm ne Djoba.

Nhyr Djoba bãm ne Xarati.

Nhyr Xarati bãm ne Neri.

Nhyr Neri bãm ne Marki.

Nhyr Marki bãm ne Adji.

Nhyr Adji bãm ne Kodjã.

Nhyr Kodjã bãm ne Erma.

Nhyr Erma bãm ne Êr.

Nhyr Êr bãm ne Djodjuwe.

Nhyr Djodjuwe bãm ne Eridjê.

Nhyr Eridjê bãm ne Djobi.

Nhyr Djobi bãm ne Matat.

Nhyr Matat bãm ne Rewi.

Nhyr Rewi bãm ne Ximião.

Nhyr Ximião bãm ne Djuda.

Nhyr Djuda bãm ne Jódje.

Nhyr Jódje bãm ne Djõnã.

Nhyr Djõnã bãm ne Eriki.

Nhyr Eriki bãm ne Merja.

Nhyr Merja bãm ne Mena.

Nhyr Mena bãm ne Matata.

Nhyr Matata bãm ne Natã.

Nhyr Natã bãm ne Dawi.

Nhyr Dawi bãm ne Djexe.

Nhyr Djexe bãm ne Ôbet.

Nhyr Ôbet bãm ne Bõadj.

Nhyr Bõadj bãm ne Xara.

Nhyr Xara bãm ne Naxõ.

Nhyr Naxõ bãm ne Amĩnadabi.

Nhyr Amĩnadabi bãm ne Adjimĩ.

Nhyr Adjimĩ bãm ne Ani.

Nhyr Ani bãm ne Êrõ.

Nhyr Êrõ bãm ne Perê.

Nhyr Perê bãm ne Djuda.

Nhyr Djuda bãm ne Djako.

Nhyr Djako bãm ne Idjak.

Nhyr Idjak bãm ne Abraõ.

Nhyr Abraõ bãm ne Tera.

Nhyr Tera bãm ne Nakõ.

Nhyr Nakõ bãm ne Xeruk.

Nhyr Xeruk bãm ne Ragau.

Nhyr Ragau bãm ne Parek.

Nhyr Parek bãm ne Ebe.

Nhyr Ebe bãm ne Xara.

Nhyr Xara bãm ne Kajnã.

Nhym Kajná bām ne Arpaxa.  
 Nhym Arpaxa bām ne Xē.  
 Nhym Xē bām ne Nōwe.  
 Nhym Nōwe bām ne Ramek.  
 Nhym Ramek bām ne Mexare.  
 Nhym Mexare bām ne Enoki.  
 Nhym Enoki bām ne Djarexi.  
 Nhym Djarexi bām ne Mareju.  
 Nhym Mareju bām ne Kajná.  
 Nhym Kajná bām ne Inox.  
 Nhym Inox bām ne Xexi.  
 Nhym Xexi bām ne Adão.  
 Nhym Adão bām ne Metīndjwýnh.

#### 4

*Xatanaj te Jejumã axwe'ã àpnênh.*  
*Mat 4.1; Mak 1.12; Idja 2.18, 4.15*

<sup>1-2</sup> Arým Djuão kute ngônhmã Jeju jadjār nhym Metīndjwýnh Karõ kute amijo tut ne rwýk ne 'ã tým nhym Bām kute kum kabēnja kurūm Jeju tē. Ngôbê Djodão kurūm ne arým Jeju tē. Nhym Metīndjwýnh Karõ raxo kadjwýnhbê nhýn ar o ban kam kapôt kukrit'ýr o bôx nhym kam kam ar ba. Nhym kam Xatanaj 'ýr bôx ne te kum mýjja'ã apné. Kute kabēnkôt amijo ba jabej kum mýjja'ã àpnênh tē. Te kum mýjja'ã àpnênh'ã akatibê 40. Akati kräptī. Kute ã kum anhýrkam kute mýjja krēn kêtumrêx. Nhym kam akati apêx nhym prām prīne kubī.

<sup>3</sup> Nhym kam Xatanaj kum,

—Ē, goja abê Metīndjwýnh krakumrêx jabej goja kēnjamã akabēn gê goja kubê djwý ga krê.

<sup>4</sup> Nhym kam kum,

—Kati, Metīndjwýnh kabēn'ã pi'ók no'ókkam ne,

“Djām djwýobit ne me kute amityx ne ar tīn ne ba? Kati, Metīndjwýnh kabēno djwý dja me amityx ne tīn ne ba”, ane.

<sup>5</sup> Nhym kam Xatanaj krānh nhimök'ýr Jejuo tēn o bôx ne kum pyka kunīkôt me akreo dja. Apýnh bēnjadjwýr kute meo ba djari kum

me kunī jakreo dja. Nām tebê kum krī jakre, kukrà kêt mex ne tebê kum akre. Ne ajte kum bāmē kapôtmê krī rünhmê mýjja kunī jakre nhym omū nhym kum,

<sup>6</sup>—Ē, ba inhõ. Amã dja ba ja kunī kanga. Pyka kunīkôt apýnh me ba djari dja ba amã me kunī ngã ga me ja kunī kadjy abēnjadjwýr rax. Djām mýjja kakrit, djām mýjja punu got. Mýjja mexjakam. Mýjja kräptī, mýjja pyma. Ba inhõ. Djām me'õ nhõ? Ba inhõ dja ba imã me'õ kīnhkôt amidjõ'ã kum kungã nar amã kungã. <sup>7</sup> Dja ga amijo angrin ikuka kōnh akōnkrão nhýn imã irax jarê ba arým amã kunī kanga ga arým amū idjõ'ã o aminhōn ar o aba, ane.

<sup>8</sup> Nhym kam Jeju kum,

—Kati, Metīndjwýnh kute pi'ók no'ókkam ne,

“Bēnjadjwýr djwýnh, Atīndjwýnhmãbit dja ga amijo angrin kum rax jarēn ajbitmã apê. Kwārīk wānh atemã me'õmã rax jarēnh kêt”, ane.

<sup>9</sup> Nhym kam Djeruxarēmã Jejuo tēn Metīndjwýnh nhõ kikreti nhimök'ýr o wabin anhã'ã kudjan kum,

—Ē, goja abê Metīndjwýnh krakumrêx jabej goja rüm tēn ato.

<sup>10</sup> Nām we Metīndjwýnh kute pi'ók no'ókkam amã,

“Dja ba ikadjy mrānh djwýnhmã ajarê gé anêje mýjja punu kaja”, ane.

<sup>11</sup> Ne ajte we Metīndjwýnh kute pi'ók no'ókkam we,

“Dja ba ajã ikadjy mrānh djwýnhmã karõ. Dja me atēmkôt amã ikra dja gé kēn 'õ apar ngānh kêtumrêx”, ane.

<sup>12</sup> Nhym kam Jeju amipānh kum,

—Kati, Metīndjwýnh kabēn'ã pi'ók no'ókkam ne,

“Kwārīk wānh, Bēnjadjwýr Atīndjwýnh kabi kêt, kute ajāno ãm jabej kabi kêt”, ane.



13 Nhyam kam Xatanaj arým mýjja'ã kum àpnênh pa. Nãm te kute Metíndjwýnh kabên kangan Xatanaj kabênkôt kute ar amijo bamã 'ã kum àpnênh dja. Apýnh mýjja djari kunĩ'ã te kum àpnênh djan 'ã kum àpnênh pan kam mã kurüm tẽ. Ajte akati 'õ kadjy mã kurüm tẽ.

*Krĩraxbê Nadjarekam me kute Jeju kanga.*

*Mat 4.12; Mak 1.14*

14 Nhyam kam Jeju akubyn pykabê Garrêja'ýr tẽ. Metíndjwýnh Karõ arým kum týx jadjà, Metíndjwýnh mã àpnênh mex kadjy kum týx jadjà nhyam týxkumrêx ne kam akubyn tẽn bõx.

Nhyam kam me abenmã Jeju jarênh ajkate, pyka kunĩkôt ne me abenmã arênh ajkate. 15 Nhyam Jeju apýnh mekbê idjaer bikprõnh djâkam ar memã Metíndjwýnh kukràdjà'ã ujarênh ba. Memã 'ã ujarênh ba nhyam me kunĩ abenmã Jeju mex jarênh ipõk ne.

16 Nhyam bep krĩraxbê Nadjarekam ne me atemã kabên. Nhyam kam Jeju Nadjarekam bõx, abatãnh djà'ýr tẽn bõx nhyam arým pi'òk ràràr. Pi'òk ràràr kunĩkôt ne Jeju mekôt mekbê idjaer bikprõnh djà'ýr mrãn wangijn krĩ. Ne kam arým kãjmã dja. Kute Metíndjwýnh kabên'ã pi'òk no'òk jarênh mã kãjmã dja. 17 Nhyam me kum kungã nhyam kubyn o ajkij. Metíndjwýnh kabên jarênh djwýnhbê Idjaij kute pi'òk no'òkjaõ ajkijn kam kadjy amijã no'òkjamã kato. Kum katon kam memã arênh djan memã kum,

18-19 "Metíndjwýnh Karõ ne mã ijo ba. Arým ne amijo ipytã, ije me õ mýjja kêt mã kabên mex, kabên ny kàj bê arênh nhyam me kĩnh mã. Kadjy ne ar ijo ba.

Ne kam ajte mekbê ijê kadjy ijano. Ije kàj bê memã kum, 'On me akato. Me kute me abê

ijêja on me akato', anhýrmã ne ijano ba tẽ.

Ne ajte ije kàj bê me no rãmã kum, 'On me arít mex', anhýrmã. Kadjy ne ijano ba tẽ.

Ne ajte ije kàj bê me 'uwtímẽ me kute meo bikênh nhyam me kaprĩn mrãnh mã kum, 'On me akĩnh ne adjumar mex ne ar aba. Jakam dja me me ajo bikênh kêt', anhýrmã ne ijano ba tẽ.

Ne ajte ije kàj bê memã kum, 'Ë, amex jakam dja on Bênjadjwýr mekam ukapri kato', anhýrmã ne ijano ba tẽ", ane.

20 Nãm ã Jeju memã pi'òk no'òkkôt amijarênh õmo anen pi'òk abenã kudjin akubyn kute pi'òko atom djwýnh mã kungãn kam nhý. Nhyam kam me kunĩ Jejukam no tyn kumex, me bikprõnh djâkam ne me Jejukam no tyn kumex. 21 Nhyam kam ajte ujarênhmo krax ne memã kum,

—Amrêbê Metíndjwýnh kute kabên'ã pi'òk no'òk ja ne arým kato. Mrãmri ne kõnh kum kudji nhyam ajbir jakam kato. Me aje maro anhýrjakam ne arým kato, ane.

22 Nhyam me kam abenmã Jeju mex jarênh kumex kajgo ne abenmã,

—Je kum bep mexkumrêx. Ga kabên mexja pumũ, Jõdje kra ne ajmãn me bajaêrbê kabên mexkumrêx jarê. Jõdje kra, me baje Jõdje pumũnh tũmja tãm ne kra dji nhyam kabên mexkumrêx jarênh tẽ, ane. Nãm me ã kabên jarênh ane.

23 Nhyam kam Jeju memã kum, —Birãm me aje imã me banhingêxê kabên tũm jarênh mã ne ga me anhõkre kadjwýnhbê imã arênh nhý, ba arým kuma. Birãm me aje imã, "Goja abê me kane djwýnh jabej on amikanen amex", anhýrmã. Goja aje mýjja 'õ pumũnh jabej nar aje mýjja 'õ mar jabej

goja on ipêx, ba me ikunĩ omũ, me inokam ipêx ba me ikunĩ omũ. Rĩnakambit, krĩbê Kapanakambit ne ga ar mýjja nhípêxo aba. Nhym 'ã ujarênh me iwýr bôx ba me kuma. Goja on jakam, anhô pyka djwýnhkam mýjja pumũnh kêt 'ô nhípêx ba me omũ. Birãm me aje ã imã anhýrmã ne ga me anhôkre kadjwýnhbê amim ijã karô.

<sup>24</sup> Ě, ba me amã mýjja jarē. Mrãmri ikabēn. Ě, got ren Metĩndjwýnh kabēn jarēnh djwýnh atemã pyka 'ôkam tē nhym me ren arým kabēn ma. Nhym bep kati, ô pyka djwýnhkam me kute kukrãdjãkôt omũnh ne kute kabēn mar kêt. Ām me kute kukrãdjãkôt mar kêt ne me tu ate krã. Me ga, me banhô krôkam me ga ne ga me ã ijo anen tu ãm imar kêtukumrêx ne.

<sup>25-26</sup> Ě, gora me ikabēn ma. Mrãmri ikabēn. Me Metĩndjwýnh kabēn jarēnh djwýnhbê Erij ja ma. Amrêbê ne me'ã na kêtukumrêx. Arým na kêt'ã amex amãnhkrut ne ikjêkêt apêx nhym na rwýk kêtukumrêx ne. Nhym ajte na tým kam ajte na kêt ne. Nhym me prãm kam ar ba. Pyka kunĩkôt djwý kêtukumrêx. Nhym prãm me imex ne. Nhym mekbê idjaer nhô pykakam axwe me nire 'uwtĩ krãptĩ. Djãm me'ýr ne Metĩndjwýnh Erij jano, me kute o djuw mexmã? Arkati, me bajtem, mekbê idjaer kêt'ýr ne ano. Mekbê idjaer kêt nire 'uwtĩ'ô'ýr ne ano. Pyka typydji nhidjibê ne Xidô. Nhym bep krĩ nhidjibê ne Xarepta. 'Ýr ne ano. Nhym me'ô ni bajtemja o djuw mex ar o ba. <sup>27</sup> Ajte Metĩndjwýnh kabēn jarēnh djwýnh 'ôbê Eridjêu ja ma. Mekbê idjaer nhô pykakam axwe me krãptĩ ĩ kajêkam tē. Nhym bep Eridjêu kute me jao mex kêtukumrêx. Kubajtem, kubê idjaer kêt pydji ne

o mex. Pykabê Xirij kurũm me'ôbê Namãbit ne o mex ne, ane.

Nãm ã Jeju memã arênh o ane. Djãm ta ô pykakambit ne mekbê idjaerkam kute me ajbitmã mýjja pumũnh kêt 'ô nhípêxmã? Kati, ta dja ukabikôt amũ pyka mýjakam mýjja kwý 'yro mō. Nār kon ta kute amimarkôt ô pyka djwýnhkam mýjja pumũnh kêt 'ô nhípêx. Ne ta ukapřikôt amũ me mũ jakamdjwý mýjja kwý nhípêx.

<sup>28</sup> Nhym me kuman kam kam ngryk ne. Me bikprõnh djãkam me ja kunĩ ne me Jejukam ngry:k ne. <sup>29-30</sup> Ne kam pa 'amýn bõm kumê. Nãm meo mõn krãnhre nhimõk'ýr o wabi. Krãnhre konenh ne krĩbê Nadjare. Kam ne me Jeju pa 'amýn krãnh nhimõk'ýr o mõn o bõx. Ne bit kute amũ aparmã mēnh nhym tým ne tykmã o mō nhym kam mekbê amikaban kam me ôêxo tēn katon mã tē.

*Kute me'ô nêje me karô punu janor:*

#### *Mak 1.21*

<sup>31</sup> Mã tēn kam krĩraxbê Kapanakam bõx. Pykabê Garrêjakam krĩraxbê Kapanakam bõx. Bõx ne memã Metĩndjwýnh kukrãdjã'ã ujarênh o dja. Pi'ôk rãrãrkam ne memã 'ã ujarênh o dja. <sup>32</sup> Nhym me kabēn man kam ari ar aben pumũn kam abenmã kum,

—Tô mýj kabēn ny got ja? Kabēn mexukumrêx. Nãm ã me bēnjadjwýr rũnh kwý kabēn mex anen ar přine kabēno meo atomo ba, ane. Nãm Jeju přine kute amimar kôt katã:t memã amikukrãdjã jarēnhkumrêx.

<sup>33</sup> Ne me bikprõnh djãkam memã 'ã ujarênh o ãm rã'ã nhym kam me'ô my kum akij. Me karô punu'ô ne ar o ba nhym kum akij. <sup>34</sup> Me karô punu'ô kute me'ô my ar o baja tãm ne akij. Djãm me'ô bēngôkre\* ne kum akij? Kati, e kum me'ô

\* **4:34** Jeju nhô pykakam me kunĩ bēngôkre kute mrãmri ne apýnh me ô pyka djãri kunĩkôt me kunĩ bēngôkre pyrãk. Kubê kã jakamê me kakrãtykmê me babēngôkremê ne me kunĩ bēngôkre.

kadjwýnhbê, me'õ bêngôkre kad-jwýnhbê, me karõ punu'õ ne Je-jumã akij. Kubêngôkre ja ta àkjêr kêt. Âm me karõ'õ ne kum akij ne kam kute kubêngôkre mân kute kum àkjêr pyrãk. Ne kum,

—Ã, tô mã ne ga aje me ijomã? Ë, Jeju, Nadjare kra'õ, djãm aje me iparmã ne ga bõx. Arým ne ba me prïne apumũ, ga ne Metĩndjwýnh arým amim adja, ga kam amexo apýma, ane.

<sup>35</sup> Nhyam kam kum bẽn tỳx ne kum,

—On anhikrẽn akato, ane.

Nhyam me karõ punu ikõta. Me ipõkri ikõtã kurũm kato. Kute kubêngôkre ajmã o kêtumrẽx. Me karõ punu kute me'õo baja kator kutã ajmã o kêtumrẽx. Nãm ikõ'yr kajgon kam mã kurũm katon tẽ.

<sup>36</sup> Nhyam me kunĩ ari aben pumũn abenmã kum,

—Mỳj kabẽn gotja? Mã got on? Nãm tu kabẽno, umao bõm me karõ punu mẽ nhyam mã tẽ. Djãm rerek got. Me bakatãm'õ baje ã mỳjja ja'õo anhỳr kêtumrẽx. Pydji ne tu kabẽno bõm me karõ punu mẽ nhyam mã tẽ, ane. <sup>37</sup> Ne kam abenmã Jeju jarẽnho kumex. Bu'ã pykakam me ja ne me abenmã arẽnho kumex.

*Kute me punu krãptĩo mex.*

*Mat 8.14; Mak 1.29*

<sup>38</sup> Nhyam kam Jeju me bikprõnh djã kurũm tẽn kam Ximão nhũrkwãmã wadjã. Nhyam Ximão djupãnhdjwýjã kanẽn nõ. Kanê kubĩ nhyam nõ. Nhyam me kum arẽ, kute o mexmã. <sup>39</sup> Nhyam 'ỳr tẽn irãn kanẽmã bẽn tỳx nhyam arým kum ire. Nhyam arým à kêt ne kãjmã dja. Kãjmã djan kam aro djuw mex ar o ba.

<sup>40</sup> Nhyam arým para. Nhyam me Jeju'ỳr bao dja. Me kunĩ ne me 'ỳr õbikwa kanẽo bao dja. Apýnh me õbikwa kanẽ djãri ne me Jeju'ỳr meo ban meo bõx. Nhyam me pýnhkõt

me'ã ikra jadjuw nhyam me kunĩ arým mex ne. <sup>41</sup> Nhyam me karõ punudjwý me krãptĩ kurũm apõx ne Jejumã kum,

—Abê Metĩndjwýnh kra, anhỳro ba.

Nhyam kam tu memã bẽn tỳx ne memã kum,

—On me anhikrẽn mã amũ mõ, ane.

Nhyam me karõ punu tu anhikrẽn mã mõ. Me karõ punu kute Jeju pumũnh. Kute Metĩndjwýnh kute amim Jeju Bẽnjadjwýrbê kumkati kadjy ar ne anorkõt omũnh. Kute Jejubê Kritu kõt omũnh. Kam ne me karõ punu bit kute irãri memã Jeju jarẽnhmã nhyam kubê aptãn ano.

<sup>42</sup> Nhyam akati kêt nhyam krĩ kurũm arwãmã tẽn kam ar ba. Nhyam me abej mõ. Abej mõn 'ỳr kato. 'Ỳr katon bit kute kubê àptãrmã, arek mekam ãmmã ne me bit kute kubê àptãrmã <sup>43</sup> nhyam memã kum,

—Ë, djãm me amãbit ne ba Metĩndjwýnh'ã idjujarẽnh tẽ? Kati, ije krĩ kunĩkõt kãj bê memã arẽnhmã ne ba me'ỳr tẽ. Kadjy ne Metĩndjwýnh ijano ba tẽ. Ije memã amijã idjujarẽnh ny jarẽnhmã. Metĩndjwýnh me kadjy Bẽnjadjwýr ne kute ar meo bamã ja ne ba ije krĩ kunĩkõt memã arẽnhmã. Kadjy ne ijano ba me'ỳr tẽ, ane. <sup>44</sup> Anen kam mã memã Metĩndjwýnh'ã ujarẽnh mõ. Apýnh krĩ djãri ne kãj bê memã 'ã ujarẽnh mõ. Ne kam ajte amũ tẽn krĩ 'õkam bõx ne me bikprõnh djãkam ajte memã Metĩndjwýnh kukrãdjã'ã ujarẽnho dja. Nãm ã pykabê Djudêjakam memã 'ã ujarẽnho ane.

## 5

*Ximão ar mã Jejukõt bikamẽnh.*

*Mat 4.18; Mak 1.16*

<sup>1</sup> Ne akati 'õkam memã arẽnho dja, memã Metĩndjwýnh kabẽn jarẽnho dja. Imõti nhidjibê

Gênexare mÿrri ne memã arênho dja. Nhyam kam me 'ã akuprôn maro kumex. Nhyam me kwÿ nÿnh mrân te kute marmãn kam jãm 'ã me kamẽ. Me kamên te kute marmãn kam 'ã aben nhingãnho kumex ne Jejudjwÿ nhingãnho mō. <sup>2</sup> Nhyam kam me umaje kãmã wadjã. Nãm ar kute tep pynênh djwÿnhja kã dji. Kã djin kam katon kam kryre pônho dja. Nhyam amẽ kã nõ. <sup>3</sup> Nhyam kam ikjêjamã wadjãn kam õ kã djwÿnhjamã kum, Ximãomã kum,

—Amũ kamẽ, amũ kamênh ngrire, ane.

Nhyam kam amũ kamẽ. Kamênh ngrire nhyam kam kam nhÿn memã Metĩndjwÿnh'ã ujarênho nhÿ.

<sup>4</sup> Ne memã 'ã ujarênh pan kam Ximãomã kum,

—Ë, gop amũ ubÿmwã'ÿr kã kamên kam mân kryre mên kam tep kwÿ pynê, ane.

<sup>5</sup> Nhyam Ximão kum,

—Je kum bënjadjwÿr, nã bãm ar te ari ar kryre rênho iba ri nhyam akati. ãm tep kêt. Ba gop tu akabênkôt kumẽ, ane.

<sup>6</sup> Nhyam kam ar kumên kam tu kam tep kwÿ pynê:nhkumrêx. Nhyam arÿm tep kute kryre rênh 'ÿr. <sup>7</sup> Nhyam kam ar te o no katon kã nhikjêjamã ikra bẽno dja, ar kute 'ÿr kào tẽmmã. Nhyam ar 'ÿr kào tẽ nhyam kam ar aprakamã kãkam tepo ipu. Nhyam kam arÿm amẽ ar 'ÿr.

<sup>8-10</sup> Nhyam kam Ximão Pedrumẽ ar ja ari aben pumũ. Ar kute amijaêrbê tep kwÿ pynê:nhkam ne ar abenkam no tyn ku'ê. Nhyam Ximãomẽ ar ro'ã kute tep pynênh ar o baja kubê Xijagumê Djuão, Djebedêu kute ar irja, ar jadjwÿ ne ar abenkam no tyn ku'ê.

Nhyam Ximão Pedru mÿjja kunĩ pumũn kam umaje Jeju kabem kônkrão nhÿn kum,

—Bënjadjwÿr, on mã ikurũm tẽ. Ga ne ga mrãmri amexkumrêx. Nhyam bep ãm ba, ba ne ba ijaxwe, ane.

Nhyam kam kum,

—Kwãrĩk wãnh amã ipyma kêt ne atĩn prãm kêt. Jakam gêdja ga on mebêngôkrebito atom ne memã ijarê gê me amim iman amim ikamnhĩx. Jakam dja ga tep pynênh kêt ne kam mebêngôkrebito akprõ, ane. <sup>11</sup> Nhyam ar kam kã djin wabin kam mÿjja kunĩmã iren kam mrãmri Jeju'ãbit ngrã: ne. 'Ã ngrã tÿx ne mã kôt ajkamẽ.

*Kute me'õ nhĩ kajêkam tẽo mex.*

<sup>12</sup> Nhyam kam akati 'õkam Jeju tẽn krĩ 'õkam bõx. Nhyam me'õ ï kajêkam tẽja prĩne kào ajkê, prĩne o tuknĩ. Nhyam Jeju'ÿr bõx ne omũn kam pijãm djaje tẽn tu mÿrbê tÿm. Ne kam nõrkam kum amijarênho nõn kum,

—Bënjadjwÿr, aje inhĩ kajêkam itê markôt, aje ijo mex prãm jabej, ijo mex, ane.

<sup>13</sup> Nhyam kam 'ÿr ikra mõn kupên kam kum,

—Ije, ije ajo mex prãmã. On akã mex, ane. Nhyam gêt ajmã kã nẽn kã mex ne. Kute o ãm tãm kam tebê kã mex ne.

<sup>14</sup> Nhyam kum,

—Kwãrĩk wãnh ga memã amijarênh kêt. Dja ga tu katãt mã me kadjy Metĩndjwÿnh mar djwÿnh'ÿr tẽn kum amibê, kum amikã bẽ. Ne kam kum mry ngã gê akadjy Mõjdjê kukràdjãkôt Metĩndjwÿnhmã mry gan kungã. Arÿm akã mexkam dja ga kum mrywã ngã gê me kunĩ apumũ, arÿm akã mexkôt apumũ, ane.

<sup>15</sup> Aje, jakam ne me arÿm abenmã Jeju jarênho ajkate:n apÿnh abenmã arênho ba.

Nhyam kam me itepato 'ÿr mõn 'ã akuprõ. Me kute kabên mar nhyam kute me kanêo mexmã ne me 'ã akuprõ. <sup>16</sup> Nhyam bep ta ne mã

arwāmā tēn kam Metīndjwýnhmā kabēno dja, kum amijarēno dja.

*Kute me'ō jakryo mex.*

*Mat 9.1; Mak 2.1*

<sup>17</sup> Nhyam kam ajte akati 'ōkam Jeju memā Metīndjwýnh'ā ujarēno dja. Nhyam me arek maro nhý. Mekbē pardjēumē me kute Mōjdjē kukrādja jarēnh djwýnhmē ne me arek maro nhý. Mýj pyka kurūm? Pykabē Garrējamē pykabē Djudēja kunīkam apýnh krī djari ne me kurūm kwý bōx. Nhyam Djeruxarē kurūmdjwý me kwý bōx. Nhyam Metīndjwýnh prīne Jejuo týx, kute týxo meo mexmā.

<sup>18-19</sup> Me'ō jakryja arek nōr djākam nōr rā'ā nhyam ōbikwa 'ýr o mōn o bōx ne te kute kikremā o armā. Te kute Jeju'ýr o bikamēnh ne kute parbē ir nhyam kute o mexmā. Nhyam me kikre jajkwa krekre pytār mex ne. Nhyam kam ar tu ibej o wabi. O wabin kikre nhimōkkōt 'ā ngy týx katen jām ngybōr jadjuwn kam me'ō jakry nōr djākam nōr rā'ā o ruw nhyam me ipōkri Jeju parbē nō.

<sup>20</sup> Nhyam Jeju amim ar omū. Ar kute tu amim kamnhīxkumrēxja pumū ne kam ōbikwa jakryjamā kum,

—Akmere jakam ne ba ajaxweo kunīo aknon arým akam ingyk kêt ne, ane. Jeju ta ne axweo akno. <sup>21</sup> Nhyam wānh Mōjdjē kukrādja mar djwýnhmē mekbē pardjēu ōkre kadjwýnhbē arým amim,

—E kum bep me'ōja ne ajmān Metīndjwýnh japryō djan amijo Metīndjwýnh pydji ne kute me axweo biknorn mekam ngryk kêt, ane. <sup>22</sup> Nām me ā ōkre kadjwýnhbē anhýro kumex nhyam arým tu kuman memā kum,

—Mýkam ne ga me anhōkre kadjwýnhbē ijo ikajgon ijapryō akumex? ane. <sup>23</sup> Ē, ba me amā mýjja amānhkrut jarē. Mýj ne amirīt ne? Ba ren me'ō jakryjamā

kum, “Ba arým ajaxweo aknon akam ingyk kêt”, ane, nār kon, “On kāj mā djan tē”. Mýj ne ren amirīt, nēn? Nā bām ren kum, “Arým ne ba ajaxweo aknon akam ingyk kêt”, ane nhyam amirīt kêt kumrēx ne. Tāmbit ne amirīt kêt. Nhyam bep kāj mā me ku'ē, ije ren me'ōmā kum, “Kāj mā djan tē” nhyam ren amirīt ne. Tāmbit ne amirīt kumrēx. <sup>24</sup> Dja ba kum, “Kāj mā djan anhi kwā djā mýn o tē”, anen arým o mex ga me arým omūn arým abenmā, “Be, ga Jeju kute me'ō jakryo mexja pumū. Be, djām kute me axweo biknor kêt got. Mrāmri ne Metīndjwýnh arým amijo ī ne pyka jakam amikabēnkōt ar me axweo biknoro ba”, ane. Me aje abenmā ja jarēnh kadjy dja ba me'ō jakryjao mex, ane.

Nām ā Mōjdjē kukrādja mar djwýnhmā anen arým tu me'ō jakryja'ýr akēx ne kum,

—Amā ne ba ikabēn ne. On kāj mā djan anhi kwā djā mýn anhi rkwāmā o tē, ane. <sup>25</sup> Nhyam me ipōkri ekru x ne kāj mā djan nōr djā mýn mā ūrkwāmā o tē, Metīndjwýnhmā mexmē ōdjānhmē rax jarēno tē. <sup>26</sup> Nhyam me kunī omūn kam ari aben pumūno kumex ne kōt Metīndjwýnhmā mexmē rax jarēno kumex ne kam arým kum Metīndjwýnh pyman abenmā kum,

—Atemā mýjja mexkumrēx ne gu me arým jakam omū, ane.

*Rewi mā Jejukōt bikamēnh.*

*Mat 9.9; Mak 2.13*

<sup>27</sup> Nhyam kam Jeju me kurūm tē. Tēn kute pi'ōk kaprīo atom djwýnh'ýr bōx ne omū. Idjibē Rewi. Pi'ōk kaprī nhūrkwākam ne bēnjadjwýr bajtemmā pi'ōk kaprīo atomo nhý. Nhyam Jeju 'ýr bōx ne omūn kum,

—Gop amrē ikōt ajkamēn gop ikōt ar aba, ane. <sup>28</sup> Nhyam tu ekru x ne kāj mā djan mýjja kunī

kangan mā kôt ajkamē. <sup>29</sup> Ne kam me krāptimē ro'ā ō kwỳ krēn rax kadjy memā djwýmē mry gan kadjy memā arē. Nhy me kute bēnjadjwỳr bajtemmā pi'ók kaprīo atom djwýnh krāptīn bôx nhy ajte atemā me jadjwỳ kwỳ bôx, Rewi nhūrkwākam bôx ne ō kwỳ krēno kumex, ar kutā ō kwỳ krēno kumex.

<sup>30</sup> Nhy kam mekbê pardjēumē me kute Mōjdjē kukrādja mar djwýnh omūn bēn prīkam kabēno krī, Jejukôt ba djwýnh'ā kabēn ne kum,

—Mýkam ne gar me kute pi'ók kaprīo atom djwýnhmē me axwemē akàn aro'ā anhō kwỳ krēno akumex ne kôt akōmo akumex? ane. <sup>31</sup> Nhy kam Jeju memā kum,

—Djām me mex'ỳr ne me kane djwýnh mrā? Kati, me kanē'ỳrbit ne me kane djwýnh mrā. <sup>32</sup> Badjwỳ ne ba me axwe'ỳr tē. Djām we me katāt mrānh'ỳr ne ba tē? Kati, me axwe'ỳr ne ba tē, ije amiwỳr me 'wỳrmā. Me kute ikabēn mar ne amim kator ne wānh axwemā irer ne kute iwỳr amijo akēxmā ne ba me'ỳr tē, ane.

*Me kute amijajbur jabej Jeju kukjê:*

*Mat 9.14; Mak 2.18*

<sup>33</sup> Nhy me ajte kum,

—Ota Djuāokôt ba djwýnh kute Metīndjwýnhmā amijarēnh kadjy amijajbur ba. Nhy mekbê pardjēu nhō me ja me kudjwa ā ane nhy bep akôt ba djwýnhbit ne mā akun kôt kōm ar ba, ane. Ar kute Metīndjwýnhmā amijajbur kêt, ane.

<sup>34</sup> Nhy kam Jeju memā kum,

—Nà, ikôt ba djwýnh dja mā aku. Ga me kute abenā me rēnhkam me àkur rūnhja pumū. Djām me kute abenā me rēnhkam me àkur ngy got? Me kute abenā me rēnhkam ne me mrāmri àkur rūnhkumrēx. Abenkam kīnh ne ō kwỳ krēno kumex. Djām me kute mýjja

jakam amijajbur got? Djām me mjēnmē abentā ku'eri àkur punu got? <sup>35</sup> Nhy bep amū akati 'ōkam, dja me me aerbē mekbê mjēno tým ne pa 'amýn mā o tē. Nhy me arým kam kaprīre ne kam amijajbur ajbit ma, kôtbīt amak bē:no nhýn ō kwỳ krēnja kêt kumrēx ne. Nām ā Jeju amijā me mjēn jakreo ane.

<sup>36</sup> Ne kam ajte memā amikukrādja ny'ā memā mýjja jakren arē.

—Nhýnh got me'ō inōkà ny 'ō byn kadjō, mex katikôt kadjōn kute tūmja'ā ir ne kute o mexmā? Kati, nām ren o anen ren amibē nyo ajkē nhy nymē tūmja ren aben pyrāk kêt ne. <sup>37</sup> Ne ajte nhýnh got me'ō mrykà tūm, mekbê idjaer kukāmāre ne me mrykào ngōnh nhinhujabjēti, nhýnh got me'ō mrykà tūm, mrykà kadjakam pidjō kangō ny ru, pidjōbē uba kangō ru. Nām ren ane nhy ren ajkatōr ne ajkapī. Kangō nymē tūm kute abenkam o bikār ne runhkam ne ren ajkatōr ne ajkapī, nhy mrykādjwỳ arým punu. <sup>38</sup> Kati, mrykà nykam dja pidjō kangō nyja ru. <sup>39</sup> Nhy ajte nhýnh got me'ō kute pidjō kangō tūmbito kōmo ban ny kakin kum ny djānh? Kati, arým tūmbito amiprāk ne kam, “Ije bep kangō tūmbit ne ành”, ane. Nām ā Jeju kute memā kukrādja tūm'ā pidjō kangō tūm jakren kute kukrādja ny'ā pidjō kangō ny jakreo anen kam memā arēnh pa.

## 6

*Memā pi'ók rārār'ā ujarēnh.*

*Mat 12.1; Mak 2.23*

<sup>1</sup> Ne kam pi'ók rārārkam Jeju pur katikôt tē. Nhy kôt ba djwýnh kôt mō. Kôt mōn arým kum prām ne mōrmā bāygogo 'y nhikēn mōrkôt ngānh ne amijajkwamā rēnhō mō. <sup>2</sup> Nhy kam mekbê pardjēu ar omūn arkum,

—Ije tô mã ne gar arým nê? Pi'ók rârârkam ne me tyk djâ kêt djâ. Me kute pi'ók rârârkam mýjjao anhÿr kêt. Me tûmre ne me ta kukràdjâkôt mã me babê uma. Me kute pi'ók rârârkam mýjja kupênh kêt. Kambit ne me tyk djâ kêt djâ. Mýkam ne gar ã ar o anhÿro aba?

<sup>3</sup> Nhyam kam Jeju memã kum,

—Kê, djãm me aje Metîndjwýnh kabên'ã pi'ók no'ókjadjwý pumûnh kêt? Djãm me aje me bakukãmãrebê Dawi'ã ujarênhja pumûnh kêt, Metîndjwýnh kabênkam me aje Dawi'ã ujarênhja pumûnh kêt?

Ë, Dawi arkum prã:mã. <sup>4</sup> Nhyam Dawi Metîndjwýnh nhûrkwãmã wadjàn djwý byn kukrên kam kôt ar têm jamãdjwý kungã, nhyam ar kukrê. Djwý me kute Metîndjwýnhmã ôrja tãm ne kubyn kukrên arkum kungã. Metîndjwýnh nhô djwý ne me kâtãm kute kur kêtumrêx. Me kadjy Metîndjwýnh mar djwýnhbit ne kute kur. Nhyam bep Dawi ta ne tu kubê kukrê. Nhyam kam me kute kum axwe jarênh kêt. Djãm me aje ja mar kêt? Ga me aje Dawimã axwe jarênh kêtja pumû ne kam ikôt ba djwýnhmêbit ar imã ar ijaxwe jarê.

<sup>5</sup> Bep kati, ba ije amijo inhÿ ne me awÿr irwýk ne ba inhô pi'ók rârâr djwýnh. Kam gêdja ba memã, “Kwãrîk wãnh ga me kam mýjja kupênh kêt, nâr kon, dja ga me jakam apên, nâr kam mýjja kupênh kêt ne arek akrÿ”, ane. Tãm ne ja, ane.

<sup>6</sup> Nhyam kam ajte pi'ók rârâr 'ókamdjwý me bikprôn timer djãmã wadjàn kam kam memã Metîndjwýnh'ã ujarênh dja. Nhyam me'ô nhikra jarôxja nhÿ. Ubôk ne arôx ne. <sup>7</sup> Nhyam mekbê pardjêumê me kute Môjdjê kukràdjâ mar djwýnh arek Jejukam no tyn krÿ. Nhyam pi'ók rârârkam kute ikrao mex nhyam me kute kôt kum kator ne kute kum,

—Arým ne ga Môjdjê kukràdjâkôt amijo aba kêt, anhÿrmã ne me arek kam no tyn omûnho krÿ. Mekbê pardjêumê me kute Môjdjê kukràdjâ mar djwýnh ne me ã Jejukam no tyn ar krÿ ba ane. <sup>8</sup> Nhyam bep ta, Jeju ta ne arým me kute ôkre kadjwýnhbê amim 'ã karôja arým kuma ne kam me'ô nhikra jarôxjamã,

—Amrê tén me ipôkri dja, ane.

Nhyam kãmã djan 'ÿr tẽ. <sup>9</sup> Nhyam kam memã kum,

—Ë, ba me bakukràdjâ jabej me akukja. Nhÿnhja ne me bakukãmãre me bamã arê? Djãm pi'ók rârârkam me baje mýjja mex nhipêxmã nâr kon kam me baje mýjja punu nhipêxmã? Djãm kam me baje me utâr nâr kon kam me baje me parmã, nên? ane. <sup>10</sup> Ne kam ari ar me omûn kam ate ikra jarôxjamã,

—On anhikra katât, ane.

Nhyam kam ikra katât ne. Arým ne ikra mexkumrêx. Arým ajte ikra katât ne ikrakumrêx. <sup>11</sup> Nhyam kam ajte mekbê pardjêu ngry:k ne. Ngryk tÿ:x ne. Ne kam Jeju'ã abenmã karôo kumex.

*Kute Ar kubê 12 janor.*

*Mak 3.13*

<sup>12</sup> Nhyam kam akati 'ókam krãnhre'ÿr tén 'ã wabin nhÿ, kute Bãmmã kabênmã, Metîndjwýnhmã kabênmã. Kum kabêno ÿr ri nhyam akati. <sup>13-16</sup> Akati nhyam kam amiwÿr kôt ba djwýnh 'uwn amijo ar kwý pytàn amim ar umjuwn arkum,

—Ba dja ba ar ajano, gar memã ijã adjujarênhho ajmã. Ar abê inhô ãpênh, ane. Nãm kute ar anor kadjy ar o 12 ne amijo ar utàn kam tûmrãm ar ano. Ximão. Jeju kute kum Pedru jarênhja.

Ãngre. Ximãomê Ãngre ar aben djâkam ikwã.

Xijagu.

Djuão.

Piripi.

Batormê.

Matêu.

Tôme.

Xijagu 'ödjawý. Kubê ne Aupêu kra.

Ximão 'ödjawý. Ximão tãm ne kum me bajtemja kurêkumrêx, me bajtem kute meo baja kum me kurêkumrêx.

Djuda. Xijagu kraja.

Djuda Ikadji. Kute Jeju kurê djwýnhmã kanga djwýnhja.

Be, Jeju kute tũmrãm ar anor ne ja. <sup>17</sup> Ne kam kôt ba djwýnhbê 12jamê ro'ã ruw ne pyka kênh'ýr bôx ne kam kam meo dja. Nhy m me kôt ba kajgo ne me 'ã kumex. Nhy m me kâtãmjadjwý Jeju'ýr môn bôx ne 'ã kumex. Pykabê Djudêja kurũm me krãptĩmê krĩraxbê Djeruxarê kurũm me krãptĩmê ngô rax nokã'ã pykabê Xirumê Xidômê kurũm me krãptĩmê. Me tãm ne me akãn Jeju'ã kumex. Me ja ne me 'ýr akuprô. 'Ýr bikprõnh ne kute kabên mar nhy m kute apýnh me kanê djari meo mexmã ne me 'ã akuprô.

<sup>18</sup> Nhy m me karô punu kute meo bajadjwý mekôt 'ýr môn bôx nhy m kam mekam me karô punuja jano nhy m me arým mex ne. <sup>19</sup> Nhy m me itepato kute Jeju kupênh prãm. Nãm Jeju tu týxkumrêx nhy m kurũm uma apôx ne me kunĩ mex. Kam ne me kunĩ kute Jeju kupênh prãmã.

*Kute arkum kĩnh jarênh ne ajte kute arkum kaprĩ jarênh.*

*Mat 5.1*

<sup>20</sup> Nhy m kam meo mex pan kam kôt ba djwýnh pumũn arkum,

—Ë ar anhõ nêkrêx kêtãwã, ar ga ne gar akĩnhkumrêx. Mýkam? Bir, ar ga ne Metũndjwýnh ar akadjy bẽnjadjwýr ne ar ar ajo ba.

<sup>21</sup> Ë, ar jakam amã prãmãwã, ar ga ne gar akĩnhkumrêx.

Mýkam? Bir, ar ga dja gar ajajnekumrêx ne.

Ë, ar jakam amýrwã, ar ga ne gar akĩnhkumrêx. Mýkam? Bir, ar ga dja gar akeket ne.

<sup>22</sup> Ë, jakam me kum ar akurêja, ar ga dja gar akĩnhkumrêx ne. Ba ne ba amijo inhĩ ne me awýr ruw ne kam ar me ajo iba. Ga me akwý amã ikĩnh ne iwýr akuprô ba kam ar ar ajo iba. Nhy m me kam kum ikurên kam ikôt kum ar akurê ne. Gar mã ikôt abikamênhkamdjwý me kum ar akurê. Gêdja me te wãnh kum ar akurên bõm ar arên ar ajapryñ ar ajaxweo ar apytã,

<sup>23</sup> gar tu akĩnhkumrêx ne ate akĩnh katin amijara tatak ne.

Mýkam? Bir, dja Metũndjwýnh ar amã o pãnh rax ne. Kãjkwakam gêdja ar amã o pãnh mex ne. Kãjkwakam kute ar amã o pãnh mex ja dja gar amikukãm aman ate akĩnh kati. Nãm me tũmre ã axwe anen me kamingrãny kajmã'ã ã Metũndjwýnh kabên jarênh djwýnho bikênho bao ane. Gar arým kam kãjkwakam me kĩnhkumrêx ne ar baja pumũ, ane.

Nãm ã Jeju arkum ane. Ne kam ajte me õ nêkrêx kumexjamã kabên ne memã kum,

<sup>24</sup> —Nhy m bep me anhõ nêkrêx krãptĩwã me ga dja ga me akaprĩ rax ne. Bir, mýkam? Jakambit akĩnh djã kajgokam. Gêdja ã apêx ne ajte amũ kêtumrêx.

<sup>25</sup> Ne me jakam ajajnewã, me ga dja ga me akaprĩ rax ne. Mýkam? Bir, me ga dja ga me amã prãm ne.

Ne me jakam akeketwã, me ga dja ga me akaprĩ rax ne. Mýkam? Bir, me ga dja ga



me abixangrin kam amýro akumex.

26 Ne me kunī kute abenmā me amex jarēnho kumexja me ga dja ga me akaprī rax ne. Mýkam? Ga me axwe pumū. Ga me kum me axwebit kīnh ne kute abenmā me mex jarēnho kumexja pumū. Nām me tūmre ā axwe o anen me kamingrāny kajmā'ā kum me 'ēxnhībit kīnh. Me 'ēx ne kute amijo Metīndjwýnh kabēn jarēnho bajabit ne me kum me kīnh ne abenmā ā me mex jarēnho kumexo ane. Kam ne me kamingrāny me tūmre kōpdji'ā kum me axwe, me 'ēxnhībit kīnh ne kute abenmā me mex jarēnho kumexja.

Nām ā Jeju memā anen kam kōt ba djwýnhmā kum,

*Jeju kute arkum, "Amā akurē djwýnh jabē" jarēnh.*

*Mat 5.38; Ruk 23.34; Kar 7.60; Rô 12.14*

27 —Ē, ba ajte ar amā ikabēn 'ō jarē, gora ar ikabēn ma. Gora gar tu amā akurē djwýnh jabē. Gora me kum ar akurēja dja me te ar ajo ajkē gar akrānmā amā me abēn ar meo aba. 28 Gora ar me kute ar adjūnwāmā tu akabēn mex jarē. Gora ar me kute ar ajo bikēnhja tu Metīndjwýnhmā me arē gē meo djuw mex. 29 Gédja me'ō ar ajō nhinebē kurwa ga 'yr akēx gē aktā anhinebē kurwa. Gédja me'ō ar ajōbē inōkà by ga tu kum kanga. Nym ajte akā 'ō'ā ajwý ga ajte akā 'ōdjwý byn kōt kum angā. 30 Gédja me'ō mýjja 'ā ajwý ga tu kum kanga. Gédja me'ō abē anhō mýjja 'ō by ga tu kum kangakumrēx. Kwārīk wānh ga akubyn 'ā 'wýr kēt. 31 Djā nām me ar ajōo ajkē ga akīnh ne? Kati, nā gām akaprīre. Bir be, kam dja gar ā me jao anhýr kētkumrēx gē me adjwýnhdjwý kaprī kēt. Nār kon, djā nām me ar ajōkam mex ga

akaprī? Kati, nām me ar akam mex gar akīnhkumrēx ne. Bir be, kam dja gar ā me jakam amexo ane gē me adjwýnhdjwý kīnhkumrēx.

32 Ē, ba ar amā arē. Me kum ar ajabē gar amipānh amā me abēkumrēxja bārām kam dja ba ar amex jarēnh jabej? Kati, ē, me axwe ne me kum ōbikwabit jabē, kum aktā aben jabē ne kam kum me kātāmja kīnh kētkumrēx. Be, dja gar gadjwý amā anhōbikwabit jabē, djori kam mex? Kati, ar ikōt aba djwýnhkam gédja gar tu amā me abēo tuknī. Ar amā anhōbikwa jabēn kam kōt amā akurē djwýnhdjwý jabē. 33 Nym ajte me ar akam ukaprī gar amipānh mekam adjukaprī, bārām kam dja ba ar amex jarēnh jabej? Kati, ē, me axwe ne me ōbikwakambit ukaprī, aktā abenkam ukaprī ne kam me kātāmjakam ukaprī kētkumrēx. Be, dja gar gadjwý anhōbikwakambit adjukaprī, djori kam mex? Kati, ar ikōt aba djwýnhkam gédja gar tu me kunīkam adjukaprīo tuknī, anhōbikwakam adjukaprīn kam kōt akurē djwýnhdjwý kam adjukaprī. 34 Nym ajte me ar amā mýjja ngā gar kam amipānh memā mýjja ngā, bārām kam dja ba ar amex jarēnh jabej? Kati, ē, me axwe ne me aktā aben pānh abenmā mýjja nhōro ba. Nām me akubyn abenmā 'ānh ōro ba. Be, dja gar gadjwý me kute akubyn ar amā mýjja nhōrmābit mýjja ngā, djori kam mex? Kati, ar ga, ar ikōt aba djwýnhja dja gar tu memā mýjja nhōrkumrēx ne kam pānhkam amak kēt.

35 Bir be, ar ga dja gar amā akurē djwýnh jabēkumrēx ne kam adjukaprī ne tu kum mýjja kajgo ngā. Kute akubyn amā pānh mýjja 'ō nhōrmā pānh kam amak kēt. Metīndjwýnh pymati tām gédja ar amā o pānh ra:x ne. Gar kam arým abē Metīndjwýnh krakumrēx.

Mýkam dja gar ã meo ane? Bir, Metĩndjwýnh ne tu me òdjý, me axwekam ukapřĩ. <sup>36</sup> Kam dja gar kãjkwakam Abãm'ã amijakren mekam adjukapřĩ.

*Mete me'ã axwe rēnh nēje memã kabēn.*

*Mat 7.1; Rô 2.1; Xij 4.11*

<sup>37</sup> Kwãřĩk wãnh gar me'ã axwe rēnh kêt. Dja gar me'ã axwe rē nhy m me amipãnh ar ajã axwe rē, nãr Metĩndjwýnh ar amã axwe jarē. Kwãřĩk wãnh gar me axwemã akator kêt ne memã pãnh jarēnh kêt. Dja gar me axwemã akato ne memã pãnh jarē nhy m me amipãnh ar ajaxwemã katon ar amã pãnh jarē, nãr Metĩndjwýnh ar amã pãnh jarē. Nhy m bep kati, gēdja me kute ar akam amikrãja gar tu o abiknorkumrēx gē me amipãnh ar gadjwý tu ar ajaxweo biknorkumrēx ne. <sup>38</sup> Gora ar memã anhòdjãnh ne tu memã angã. Gē me kam amipãnh ar amã òdjãnhkumrēx ne ar amã mýjja ngã. Dja Metĩndjwýnh ar amã o pãnh rax ne. Kute mrãmri ne me kute akubyn abenmã djwý ngrã nhõr kadjy kute ngõnhkam ngiēnh ne ajte kute à'ãk ne kum o'uk ne iby ngiēnh nhy m akà'ã bikapĩnja pyrãk. Dja ã Metĩndjwýnh ar amã õr raxo ane. Bir be, kam dja gar Metĩndjwýnh kudjwa memã õr rũnh nhy m kam me akubyn ar aje memã õr 'ãnh ar amã kungã, ane. Nãm Jeju ã kõt ba djwýnhmã arēnh o ane.

<sup>39</sup> Ne kam ajte apýnh mýjja djãri arkum 'ã ujarēnh jakreo tē. Ne kam arkum,

—Djãm me'õ no rãja kute me'õ no rãjamã kum, “Amrē, ba amã kò 'amýn katãt ajo tē”, anhýrmã? Kati, gorēn kum kò 'amýn o mõn ren ar ro'ã krekam tým, ane.

Be, me axwe rã'ãkam dja me amũ me jamã axwe jarēnh kêt. Me axwekam ne me kute me no rã

pyrãk. <sup>40</sup> Djãm me'õ kute mýjja mar kêtja kute me'õ kute mýjja mar raxja jakrenh got? Kati, nhy m bep djãm me'õ kute marja přĩne kum arēn kum akre nhy m kam arým ar aben pyrãk ne.

Bir be, ar aje Metĩndjwýnh kukrãdjã mar tũmja amijãno dja. Dja me nyre ar ajã amijakren kam kute ar apyrãk.

<sup>41</sup> Mýkam ne ga akamy nokam pyka jaũmjabit pumũn kam ga anokam pĩponhtija pumũnh kêt ne? <sup>42</sup> Djãm aje akamymã kum, “Ak-mere, amrē ba amã anokam pyka jaũmwã kaba”, anhýrmã? Ne kam ga anokam pĩponhtiwã pumũnh kêt kumrēx ne. Aje aminokam pĩponh pumũnh kêt kam we ã kum ane. Kē. Mrãmri ne ga apunu rax ne kam ajãkwakambit ajte amimexo amra. Akumrēx gēdja ga aminokam pĩponhtiwã kaban kam arĩt mex ne arým amikõt akamy nokam pyka jaũm ngrire wã kaba.

<sup>43</sup> Ne ajte jadjwý, ē, djãm pidjõ mex, pidjõ djãnhjakam pidjõ punu apõx got? Nãr kon, djãm pidjõ punukam pidjõ djãnh apõx got? Kati, apýnh pidjõ bãri djãri ne kam ô apõx. <sup>44</sup> Ô ne parbē rõrõk ne ikwãn kam o bãrio amirĩt nhy m me kõt kum apõx. Pidjõ punukam ô punu apõx, nhy m ate pidjõ mexkam ô mex apõx. Ga rojkãkrekam tyrti apõx kêtja pumũ. Ga ajte přėxkamdjwý katēbãri apõx kêtja pumũ. <sup>45</sup> Bir be, nãm ã mebēngõkredjwý\* ane. Nãm me õkre kadjwýnhbē kabēn mex man arým kabēn mexo memã amijo amirĩt. Nhy m me ajte õkre kadjwýnhbē kabēn punu man arým kabēn punuo memã amijo amirĩt. Nãm me õkre kadjwýnhbē mýjja kumex ma nhy m kam amrē bõm ajkwa krekemē õto'ýr apõx nhy m me kam arēnh o ba. Arēnh o ban

\* 6:45 Jeju nhõ pykakam me kunĩ bēngõkre kute mrãmri ne apýnh me õ pyka djãri kunĩkõt me kunĩ bēngõkre pyrãk.

kam arým memã amijo amirît. Mex nâr axwe ja o memã amijo amirît. Kute mýjja ô kute bario amirît ja pyrâk.

*Me'ô ar kute kikre'ã amijakremã memã arênh.*

*Mat 7.24*

<sup>46</sup>Ê, ba ajte ar amã ja jarê. Mýkam ne gar imã “Bênjadwýr, Bênjadwýr” anhýro aban ajte ikabênkôt ar amijo aba kêt ne. <sup>47-48</sup>Ê, ba ar amã arênh kikre'ã me ajakre. Me'ô iwýr akêx ne kute ikabên markumrêx ne ikabênkôt kute ar amijo baja ne kute mrãmri ne me kute kikremã kre jabjê:n kam kam par pymjýr ne kam iby kênme pyka rênh ne kute kum o'uk ne 'ã kute kikre nhym te ngô tám ne kute kangôn nhym mrãmri ku'ê týxja pyrâk. Kum kre jabjekam ne mrãmri âm týx ne. Nãm â me kute amim ikabên mar týx â ane.

<sup>49</sup>Nhym bep me'ô kute ikabên mar kajgo, kute ikabênkôt amijo ba kêtja ne kute mrãmri ne me kute tu pyka krākà'ã par pymjýr. Kre krãnne kam kute par pymjýr ne kute 'ã kikre pyrâk. Nhym 'ã ngô tám ne kute kãjbê me'ã rênh nhym rôrôkja pyrâk. Djã nãm kãjbê kukê nhym ban rôrôk got? Kati, nãm tu ator nhym ban gru: ane. Dja me'ô kute ikabên mar kêt'ô â ane, ane. Nãm â Jeju arkum ujarênho âmo anen memã ujarênh pa.

## 7

*Krākamngôn nhõ bēnjadwýr kute tu amim Jeju kamnhĩxkumrêx.*

*Mat 8.5*

<sup>1</sup>Ne kam ate krîbê Kapana'ýr tē. Mã 'ýr tēnh bôx. <sup>2-3</sup>Bôx nhym krākamngôn nhõ bēnjadwýr arým kuma, kubê ne krākamngôn hre krãptîbê 100 nhõ bēnjadwýr arým kuma, bôxkôt kuma. Kubajtem. Arým kuman kam 'ýr mebêngêtte kwý jano. 'Ýr mebêngêttebê idjaer kwý jano. Ô àpênh ne kanê týx ne nô. Arým tyk'ýr. Arým arkatin

nô. Kum ô àpênh jabêkumrêx ja ne kubê kanênh nô nhym kam kadjy Jeju'ýr ar ano. Ar kute kum arênh nhym 'ýr tēm ne kute kum ô àpênho mexmã ne 'ýr ar ano.

<sup>4-5</sup>Nhym ar môn Jeju'ýr bôx ne kam kum o no katon kum,

—E kum bep támja ne mexkumrêx. Mrãmri dja ga 'ýr tēnh kum ô àpênh pytà. Nãm kum me bakĩnhkumrêx ne arým me bamã me babikprôn dhã nhípêx ne. Dja ga on 'ýr tē, anhýro ku'ê.

<sup>6-7</sup>Nhym kam 'ýr tē. Bit 'ýr tēnh 'ýr kikre tēpo tē nhym krākamngôn nhõ bēnjadwýrja ajte kutã ôbikwa kwý jano. Nhym ar kutã tēnh kajpan kum,

—Bēnjadwýr, on dja ga akêx ne. Krākamngôn nhõ bēnjadwýr ne ar imã, “Ar tēnh kum arê gê on amũ akêx”, ane. Bar kam akutã tē. Nãm amã, “Ibēnjadwýr kaak, ibēnjadwýr ngrirekam ne ga inhũrkwãmã adjãr ba ipijãm karô amã ane. Ingrire, ikãtãmkam ne ba ba akutã itēm kêt ne, amikam ipijãmkam. Dja ga tu akabēnobit inhõ àpênho mex nhym arým mexkumrêx ne. <sup>8</sup>Inhõ bēnjadwýr ne imã kabên, kute raxo ijakrenhja ne imã kabên ba kabên man kôt amijo iba. Ne kam ajte ba ibê me krākamngôn hre nhõ bēnjadwýrkam ba memã ikabên nhym me ikabênkôt amijo ba. Ba me'ômã kum, “Ýr tē”, ane nhym arým 'ýr tē. Ba kam ajte me'ômãdjwý, ‘Amrê tē’, ane nhym arým amrê tē. Ba inhõ àpênhmã, ‘On mýjja kupê’, ane nhym arým mýjja kupê. Kam ne ba amã, ‘Abēnjadwýr djwýnhkam dja ga akabēnobit o mex ne’, ane.” Nãm â krākamngôn nhõ bēnjadwýr amã ane, ane.

<sup>9</sup>Nhym Jeju ar kabên man kam arkam no tyn djan ôkre kadjwýnhbê amim,

—E kum be nãm tu amim ikamnhĩxkumrêx ne, ane. Ne kam

me itepato kôt mōrja'yr akēx ne memā kum,

—Ē, ba me amā arē. Nhÿnh ne me babē idjaer 'ō ā kute tu amim imaro anhÿr? Kati, kētkumrēx. Nhy m be nām tāwā, tāwā kubajtem ne gēt tu amim ikamnhĭxkumrēx ne, ane. <sup>10</sup> Nhy m kam krākamngōnh nhō bēnjadjwÿr nhōbikwaja akubyn kikremā tē. Kikremā tēn bōx ne kanēn nōrja pumū. Nhy m mexkumrēx ne, arÿm à kēt ne nhÿ. Tām ne ja.

*Kute me'ō tyk akubyn o tĭn.*

<sup>11</sup> Nhy m kam akati ngrēre nhy m Jeju krĭ'ōmā tē. Krĭ nhidjibē Naĭmā tē. Nhy m kôt ba djwÿnhmē me kātām krāptĭ kôt mō. <sup>12</sup> Nhy m kam Jeju meo mō. Meo mōn ĭ krĭ tēpo mō. Nām bit krĭo rām ne jao mō nhy m Ar kubē kra tyk-jao mōn o kajpa. Kikre bu'ā kēno kō kayr jajkwa krekremā o aben kajpa. Amrēbē me'ōbē mjēn tyk nhy m kam kraja adjwÿnhdjwÿ kôt kubē ty. Kute amikamā kra py-djin irja ne kubē ty. Nhy m me kam kēnkre'ÿr o mōn o kajpa. Me krāptĭ ne me kēnkre'ÿr bit o mō, bit kute mekbē idjaer kukrādjakôt kēnkrekam adjārmā. <sup>13</sup> Nhy m Jeju me'ō nija pumūn kam kum kaprĭ: ne kum,

—Kwārĭk wānh ga amÿr kēt, ane.

<sup>14</sup> Ne kam 'ÿr tē. 'ÿr tēn kam 'ā nōr djābit kupē. Nhy m ar kute o mōrja, tyko mōrja, o mōr tÿx katikôt kum o dja. Nhy m kum kabēn ne kum,

—Akmere, ba amā arē. Ē, on kāj mā nhÿ, ane. <sup>15</sup> Nhy m ekru x ne kāj mā nhÿn kam kabēno nhÿ. Nhy m Jeju nāmā kungā. <sup>16</sup> Nhy m me kunĭ madjā kreti ne kum uman kam Metĭndjwÿnhmā raxmē mex jarēnho kumex ne abenmā kum,

—Ota Metĭndjwÿnh kabēn jarēnh djwÿnh rax 'ō me bakam kato, ane. Ne ajte,

—Metĭndjwÿnh ne arÿm ō me baja 'ÿr bōx, ane. <sup>17</sup> Nhy m me

kam abenmā Jeju jarēnho kumex ne amū abenmā arēnho prōt ne. Nhy m pykabē Djudējakam me ja kuma. Nhy m amū bu'ā pyka ja kunĭkôt me abenmā arēn kuma.

*Djuāo'ā ujarēnh.*

*Mat 11.2*

<sup>18-19</sup> Nhy m Djuāo kôt ba djwÿnhdjwÿ arÿm kuman Djuāomā arē. Nhy m adjwÿnhdjwÿ kuma. Mekbē ijē djākam nōr rā'ākam ne ar kum mÿjja ja kunĭ jarē nhy m kuma. Kuman kam amiwÿr ar ku'uw, amiwÿr kôt ba djwÿnh 'uw, ar amānhkrut ne ar ku'uw ne arkum, —Ē, ar Jeju'ÿr tēn kum, “Djām ga ne Metĭndjwÿnh amrēbē me imā ajarē ga arÿm bōx. Nār kon, dja ba me atemā 'ōdjwÿ jabej ajkam ama”? ane. Djuāo ne ā arkum anen kam ar ano. Bēnjadjwÿr djwÿnh'ÿr ar ano. Ar kute omūnh ne tēm ne kute Djuāomā arēnhmā ne 'ÿr ar ano.

Nhy m ar 'ÿr tēn bōx. <sup>20</sup> Bōx ne kum,

—Djuāo kute ngōnhmā me angjēnh djwÿnh ne awÿr ar ijano ne ar imā, “Ar tēn kum, ‘Djām ga ne Metĭndjwÿnh amrēbē me imā ajarē ga arÿm bōx? Nār kon, dja ba me atemā 'ōdjwÿ jabej ajkam ama”? ane.” Nām ā arkum ane.

<sup>21</sup> Nhy m kam Jeju arek me utāro dja. Me apÿnh kanē djārimē, apÿnh me tokry djārimē, me karō punu kute meo bamē, me no rāmē, me ja ne meo mexo dja. Me krāptĭ ne meo mexo dja. Djuāo kôt ba djwÿnh kute omūnh ne akubyn 'ÿr tēm ne kute kôt kum arēnh nhy m kute marmā ne arek me utāro dja. <sup>22</sup> Ne kam arkum,

—Ar'ÿr tēn Djuāomā arē. Ba ne ba arÿm me'ÿr bōx ne me utāro dja nhy m me no rā arÿm rĭt, me te jakry arÿm m rā, me ĭ kajēkam tē arÿm kà mex, me amakkre kēt arÿm amakkre mex ne ajkam ama, nhy m me tykjadjwÿ arÿm akubyn tĭn ne, nhy m me me ō mÿjja kēt

jamădjwÿ kabên mex, kabên ny kàj bē arē. Bir be, ar aje ije meo mexkôt ipumũnhja dja gar tèn kôt Djuãomă arē, ane.

Ne ajte kum,

<sup>23</sup> —Me'õ kute tu amim imar ne kute ôkre kadjwÿnhbê ijă amim, “Djăm tăm, năr kon atemă”, anhÿr kêt, tăm dja kĩnhkumrêx, ane. Năm ă Jeju Djuão kôt ba djwÿnhjamă ane. Nhym ar kuman kam mă 'ÿr akubyn tē.

<sup>24</sup> Ar tēm tekrekam memă Djuão jarēho dja. Me krăptĩjamă arēho djan memă kum,

—Nă găm me aje Djuão pumũnhmă mō, kapôt kukritkam mō. Mă ne kute? Me bōreja pumũ. Bōre ne kōk o wabên ari ar adjuw. Mũm wabên adjuw. Nhym pãnh wabên mũm adjuw. Ne ari ar adjuw. Djăm ă Djuão kute anhÿr? Djă nãm ă memă kabên jarēho ane? Djă nãm me jamă kabên 'õ jarē ne kam ajte me umaje amũ me jamă atemă kabên 'õ jarē? Kati, nãm tu katàt memă kabên jarēnhkumrêx ne, tu kum me uma kêt ne kabên pydji memă arēho tē, kabên tăm jarēho tē. <sup>25</sup> Djă nă găm me aje Djuão pumũnhmă 'ÿr aba nhym kubêkă mex jangij ne o ba? Kê, me kute kubêkă mexbit jangjênh ne kute 'ă amibêno baja ne me bēnjadjwÿr rax nhō kikretikambit ar ba, ikra kêt, ăpênh kêt mex ne ar ba.

<sup>26</sup> Bir be, nhym mÿj ne ga me aje omũnhmă mō? Djăm Metĩndjwÿnh kabên jarēnh djwÿnh 'õ ne ga me aje omũnhmă mō? Nă, tăm. Tăm. Ba me amă arē. Djuão ne Metĩndjwÿnh kabên jarēnh djwÿnh kunĩ kuràm raxi. <sup>27</sup> 'Ă ne amrêbê Metĩndjwÿnh pi'ók no'ókkam me amă,

“Ota ba akukăm ajă ujarēnh djwÿnh 'õ jano, kute akukăm me akre nhym me kute mar ne akutêp kute axwemă irern katàt amijo bamă.

Kute mrãmri ne me kute me bēnjadjwÿr rũnh kutêp katàt pry jadjwÿrja pyrək”, ane.

<sup>28</sup> Ba me amă arē. Djuão ne me kunĩ kuràm raxi. Nhÿnh ne me'õ nă tikkre kurùm kator'õ raxo kute Djuão jakrenh? Kati, bep Metĩndjwÿnh me kadjy bēnjadjwÿr ne kute ar me utăr ne meo baja, me ja'õ ne te kătăm mex ne kute raxo Djuão jakrenh mexi.

<sup>29</sup> Nă, Djuão ne rax nhym me kunĩ Djuão kabên ma. Nhym me axweja, me kute bēnjadjwÿr bajtemmă pi'ók kaprĩo atom djwÿnhdjwÿ me kudjwa kabên ma. Nãm me Djuão kabên man ôkre kadjwÿnhbê amim, “Mrãmri ne Metĩndjwÿnh katàt meo ba”, ane. Nhym Djuão arÿm ngõnhmă me angij.

<sup>30</sup> Nhym bep mekbê pardjêumē me kute Mōjdjê kukràdjă mar djwÿnhmē, me ja ne me Metĩndjwÿnhbê amikati. Metĩndjwÿnh kute amim me'ă karō ne me mar kêt ne ar kubê amikatio ba. Nhym Djuão kute ngõnhmă me angjênhmă nhym me ate ar kubê amikatio ba.

<sup>31</sup> Ije tō mÿj'ă got ba me akam-ingrăny jakre? Mÿj ne ga me aje urək? <sup>32</sup> Nă găm me aje me prĩre mÿjja kam kĩnh kêt pyrək. Ga me me prĩre kikre kabem krĩn kute abeno bixaêr baja pumũ. Ar ja ne ar ar jamă kabên ne arkum, “Gwaj bakĩnh katio dja, gwaj babixaêro dja ne ngõtăx ă'ăk”, ane.

Nhym ar kum, “Waj, ar ibixaêr prăm kêtê. Ar itor prăm kêtê. Ar imă wă kĩnh kêtê.”

Nhym ajte arkum, “Gwaj bamÿr kati măn o nhÿ.”

Nhym ar, “Kê, wajre. Ar imă kĩnh kêtê. Ar imÿr prăm kêtê.” <sup>33</sup> Djuão kute ngõnhmă me angjênh djwÿnh ne me awÿr bōx. Nãm amijajbu:n kute uba kangôo kôm kêt ne ar ba, ga me amă kĩnh kêt ne kam we,

“Nām ajbā. Me karō punun ar o ba nhym ajbā”, ane.

Be, nā gām me aje me prīre pyrāk ne amā ja kīnh kêt ne ajte amā jadjwỳ kīnh kêt ne. <sup>34</sup> Nhym bep ba ne ba mrāmri gêt amijo inhī ne me awỳr bōx ne me akam idjàkur iban kôt ikōm iba ga me kam amā ikīnh kêt ne we ijā, “Kê, tāwā ne kum prām̄ti, kum uba kangō djānh̄ti.” Ne we ajte ijā, “Me kute bēnjadjwỳr bajtemmā pi'ōk kaprīo atom djwỳnhmē me axweobit ne òbikwa”, anhỳr ar o aba.

<sup>35</sup> Djām Metīndjwỳnh jamak punu got? Axwe amak mex ne prīne kute amikukām mỳjja kunī mar ne Djuō kute amijajbur ne ar bamā ano. Ne ajte amikukām umarkam badjwỳ ijano. Ije amijajbur kêt m̄a ijano. Nhym kôt me amak mex, me amikukām umar, ar ipumūn kam òkre kadjwỳnhbê amim, “Mrāmri ne Metīndjwỳnh mexkumrēx ne amē ar ano”, ane. Nām ā Jeju memā ane. Tām ne ja.

*Me'ō ni jaxwe kute me kudjỳ djào Jeju par kudjỳ.*

<sup>36</sup> Nhym kam mekbê pardjêu'ō nhidjibê Ximāo ne Jejumā kum,

—Amrē tēn ikutā anhō kwỳ krē, ane.

Nhym kam kutā ò kwỳ krēnmā tēn bōx ne nhỹ. Nhym me abenmā arē. <sup>37</sup> Nhym me'ō nire arỳm kuma. Me'ō nija ne axwe ne krī tām̄kam arīk ar ban kam Jeju tēm ne mekbê pardjêu'ō nhūrkwākam ò kwỳ krēno ỳrkôt arỳm kuma. Arỳm kuman kam 'ỳr tē. Nām ngōnh mexte, kēn jakareo ngōnhkam me kudjỳ djào ipun kubyn 'ỳr o tēn o bōx. <sup>38</sup> O bōx ne burūm ibôn mỳro nhỹ. Parbē mỳro nhỹ nhym no kangō prīne Jeju par kumrā. Par kumrā nhym kam ta amikīo par ngrā. Kum Jeju kīnhkam 'ỳr tēn bōx ne omūn kam amikam pijām ne kam muw ne prīne no kangōo par kumrān kam amikīo par ngrā. Ne kam par

kaō. Kum abêkam par kaôn kam me kudjỳ djào par kudjỳ. <sup>39</sup> Nhym mekbê pardjêu'ō kutā Jeju ò kwỳ krēno ỳrja arỳm omū. Arỳm omūn kam òkre kadjwỳnhbê amim,

—Be, Jeju kute mar kêt. Bep Metīndjwỳnh kabēn jarēnh djwỳnhkumrēx ne ren arỳm kuma. Mỳj me'ō niwā ma, arīk ar baja ren arỳm kôt kuma, me'ō axwe kute kupēnhkôt ren arỳm kuma. Ren kuman ren aminēje ano. Bep kati kute mar kêt. Kute Metīndjwỳnh kabēn jarēnh mar kêt, kātām.

Nām ā òkre kadjwỳnhbê amim ane. <sup>40</sup> Nām ā ane nhym Jeju arỳm kuman kam kum,

—Ximāo ba amā ikabēn jarē, ane.

Nhym,

—Ā, bēnjadjwỳr, aj rā'ā, ane.

<sup>41</sup> Nhym kum,

—Ē, me'ō ne ar amānhkrutjamā pi'ōk kaprīre ngā. Nām jamā pi'ōk kaprī ngrireo 50 ne kungā. Ne ajte jamādjwỳ pi'ōk kaprī raxo 500 ne kungā. <sup>42</sup> Nhym ar ja amē te akubyn kute kum o pānhmā. Te o ane nhym kam kute arkum pi'ōk kaprī nhōr djwỳnhja arkum, “Kwārīk wānh imā o pānh kêt. Dja ba tu o akno”, ane.

Bir be, nhym gēdja kum abê rax ne? ane. <sup>43</sup> Nhym kam Ximāo Jejumā kum,

—Kon, birām tāwā, kute kum rax ne òr ne kute pānh tu o biknorwā gēdja kum kīnh rax ne, ane.

Nhym kum,

—Nā, kôt ne ga aje arēnhwā, ane. Nija ne axwe rax. Ba arỳm axwe kunīo aknon kum pānh jarēnh kêt ne. Kam ne kum ikīnh rax ne, ane. <sup>44</sup> Ne kam nija'ỳr akēx ne Ximāomā kum,

—Ē, djā nā gām nija pumū? Be, nā bām anhūrkwāmā wadjā ga aje imā ngō nhōr kêt, ije amipar ku'ōnh kadjỳ aje imā òr kêt. Nhym bep tāmja ne no kangōo ipar kumrān kam amikīo ipar ngrā. <sup>45</sup> Ga ne ga

amã ikĩnh kêtka ajehine kaôr kêt nhym bep tãmja ne ibôx totokbê arek ipar kaôro nhÿ. <sup>46</sup> Ga ne ga aje ikrà ngrànkh kêt nhym bep tãmja ne me kudjÿ djào ipar kun-grà. Tãmja ne kum ijabêkumrêx ne prĩne ijo djuw mex ne. <sup>47</sup> Kam ne ba amã, “Tãmja ne axwe krãptĩ ba arÿm tu kunĩo ibiknorkumrêx ne. Ga kum ijabê raxja pumũ. Nhym bep ije me’ô jaxwe ngrireo ibiknor ne amipãnh kum ikĩnh ngrire”, ane.

<sup>48</sup> Ne kam nijamã kum,

—Arÿm ne ba ajaxwe djari arÿm kunĩo akno, ane.

<sup>49</sup> Nhym kam me Jejumê ro’ã ò kwÿ krêno kumexja abenmã kum,

—Djijak tô mÿj me’ô ne gêt me axweo biknoro ba? ane.

<sup>50</sup> Nhym bep Jeju ne nijamã kum,

—Ga ne ga mrãmri aje tu amim ikamnhĩxkumrêx nhym kam Metĩndjwÿnh arÿm apytã, on adjumar mex ne tẽ, ane. Tãm ne ja.

## 8

*Ar nire kute Jejuo djuw mexo ba.*

<sup>1</sup> Nhym kam tũmbê Jeju ajte pyka kunĩkôt ipôko mō. Krĩ rũnhmê krĩ kryre kunĩkôt memã Metĩndjwÿnh kukràdjã’ã ujarênho ipôko mō. Ne kãj bê memã kabên ny, kabên mex’ã ujarênh mō. Mÿj kabên mex’ã? Bir, Metĩndjwÿnh kute me utãr ne me kadjy bẽnjadjwÿr ne kute ar meo bamã tãm. Tãm ne memã arênho ipôko mō. Nhym kôt ba djwÿnhbê 12 kôt mō.

<sup>2</sup> Nhym me niredjwÿ kôt mō. Mÿj me nire nã? Bir, me karō punumê apÿnh me kanê djari kute kubê me utãrjadjwÿ ne me kôt mō.

Marij me kute kum Madarena anhÿrja, kurũm ne Jeju kute me karō punuo 7 ne apôx ne anorja.

<sup>3</sup> ‘Ôbê ne Djôwanã, Kudja prō. Kudja ne kubê bẽnjadjwÿr raxbê Erodji nhō nêkrêx pumũnh djwÿnh.

‘Ôbê ne Xudjana. Nhym ajte me kwÿ rax ne me kôt mō. Be, me nire

tãm ne me kôt mōn ò pi’ôk kaprĩreo aro djuw mexo mō, o arkum mÿjja jamÿnho mō.

*Kute bãyogore ‘y’ã Metĩndjwÿnh kabên jakre.*

*Mat 13.1; Mak 4.1*

<sup>4</sup> Nhym me apÿnh pyka kunĩkôt Jeju’ÿr mōn bôx ne ‘ã kumex. Me krãptĩ ne me ‘ã akuprō nhym kam Jeju Metĩndjwÿnh kukràdjã’ã memã mÿjja jakre. <sup>5</sup> Nãm mekmã kum,

—Ë, ò pur djwÿnh ne kute ò purkam bãyogore kremã ‘ÿr o tẽ. ‘ÿr o tẽn o bôx ne kam ar ‘yo ukabêr mrã, ane. Nãm mekbê idjaer kute mÿjja kre kadjy tu mÿjja ‘yo akabê, bãyemê bãyogore ‘ymê, ja ne me kute purkam kremã o mrãn kam purkam o ukabêr mrã. Kute mrãmri ne me kute katêbãri ‘yo ukabêr mrãnhja pyrãk.

—Be, me’ô ne ar bãyogore ‘yo ukabêr mrã. Nhym ‘y kwÿ prykam rôrôk ne. Nhym me paro pykamã angij nhym te ingrôtã nhym me prĩne paro pykamã angij. Nhym kwênhdjwÿ mã prĩne kuku.

<sup>6</sup> Nhym ‘y kwÿ kênpo’ã rôrôk ne ingrôt totokbê tu ingrôt mjô. Mrãmri ne kên’ã pyka prorrekam ‘y rôrôk ne ‘êx ne ingrã mex ne te kênã arêo ingã arÿm ty.

<sup>7</sup> Nhym ‘y kwÿ mrÿnhĩkam rôrôk ne kam mrÿnhĩmê ro’ã ingrôt ne. Nhym kam prĩne o akno.

<sup>8</sup> Nhym bep ‘y kwÿ ne pyka mekkam rôrôk ne kam ingrôt ne abatãnh ne ijj rũnh ne ‘y krãptĩkumrêx. Ijy kam ‘yja amũ o amijakren kam ‘y pÿnhkôt kubê 100 ne. Tãm ne ja, ane. Nãm ã Jeju memã anen kam ajte kãj bê memã kum,

—Godja ga me ajô ajamakre mex jabej, on ama, ane.

<sup>9</sup> Nhym kam kôt ba djwÿnh abej kukij ne kum,

—Mÿj’ã ne ga bãyogore kre jakre? ane.

<sup>10</sup> Nhym arkum,

—Bep ar amābit dja ba mýjja bipdjuro amirīt ne. Metīndjwýnh kute ar apytār ne ar akadyj bēnjadywýr ne kute ar ar ajo baja, ar amābit dja ba kukrādjào amirīt ne. Nhy m bep me jamā dja ba kukrādjà'ā mýjja jakren memā arē, “gē me te kute mýjja pumūnhmā ari ar abej rīt ne te kute mýjja marmā te ari ar amako akēx ne mar kētkumrēx ne.”

11 Nā, ar amā dja ba kukrādjà jarē. Ije kukrādjà'ā mýjja jakreja jarē.

'Yja, me'ō kute 'yo ukabērbabē ne Metīndjwýnh kabēn. 12 'Y prykam rōrōkja ne me kute Metīndjwýnh kabēn mar kajgoja'ā akre. Bit me kute amim Metīndjwýnh kabēn markumrēx ne 'ā ngrā tỳxmā nhy m ate Xatanaj jām meo amijakren mekbē Metīndjwýnh kabēno akno. Me kute tu amim markumrēx nhy m Metīndjwýnh kute kubē me utār karō ne jām meo amijakren mekbē Metīndjwýnh kabēno akno.

13 Kēnkam 'y rōrōkja ne me kute amim Metīndjwýnh kabēn mar 'iry kēt ne kangaja'ā akre. Nām me Metīndjwýnh kabēn man bit kum kīnhkumrēx o tēm kajgo. Kute mrāmri tu amim markumrēx kētē. Ajkwaobit ne kute mar. Kute 'y nhingrōt ne arē kētkam tebē tykja pyrāk. Kute amim mar 'iry kēt nhy m ate apýnh me kaprī djari kute ikō'ymā 'ýr bōx nhy m arým kanga.

14 Mrýnhīkam 'y rōrōkja ne me kute Metīndjwýnh kabēn mar ne kam ate ajte kute jām mýjja marja'ā akre. Nām me arým amim Metīndjwýnh kabēn man kam 'āno ām kēt ne. Djā nām me Metīndjwýnhbit man ar o ba? Kati, nām me jām umar punu djā 'ōmē nēkrēxmē mýjja me kute o amikīnhjamē mýjja jakōtbit amak bēn ne ne kam amū amim Metīndjwýnh kabēn maro ārwy kētkumrēx ne. Kute mrýnhī kute prīne bāygogo nhingrōto bikēnh nhy m kam iij kēt mexja pyrāk.

15 Nhy m bep pyka mexkam 'y rōrōk ja ne me kute tu amim markumrēx ja'ā akre. Nām me tu amim Metīndjwýnh kabēn markumrēx ne tu 'ā ngrā tỳx ne kam mūm ate ibej mýjja 'ō mar kēt ne tu mrāmri 'āno djan mā kōt ajkamē. Kute 'y nhingrōt ne abatānh ne iij mexkumrēx ne kumex ja pyrāk. Tām ne ja.

*Kute ngōnhpōk'ā memā Metīndjwýnh kabēn jarēnh djwýnh jakre.*

*Mak 4.21*

16 Ba ajte ar amā 'ōdjwý jarē. Djām me kute ngōnhpōkmā angjēnh ne kute ngōnho 'ā pro got? Ne kute ikwā djā krakri umjýr got? Kati, ngōnhpōk ne me kum angij ne tu kēnhkam umjuw nhy m memā kikre kre kurwýo ku'ē. Nhy m me mrān wangij nhy m prīne memā irā. Dja gar ā abē ngōnhpōk mān prābē ā memā Metīndjwýnh jarēnh o ane gē me kuma.

17 Ē, amū akati 'ōkam dja mýjja bipdjur kunī amirīt ne. Nhy m mýjja pudjurdjwý amirīt nhy m me kunī kuma. 18 Kam gēdja gar mýjja kunī kute amirīt kētri prīne ikabēn ma. Gora ar amim aprīn ikabēn ma. Me kute tu amim imarkumrēxmā dja Ibām ijo amirīto tē gē me amim imar rax. Nhy m bep me ajkwaobit kute amim imarjabē dja Ibām ijo apdju. Dja prīne inēje me no'ā pron mekbē ijo apdju. Tām ne ja, ane. Nām ā Jeju arkum amijarēnh o ane.

*Jeju kamymē nā te 'ýr àrmā.*

*Mat 12.46; Mak 3.31*

19 Nhy m kam Jeju nāmē kamy ar 'ýr tē. Ar kute omūnhmā ne ar 'ýr tē. Nhy m me 'ā kumex. Nhy m ar te 'ýr bikamēnhmā te 'ā meo ane. Nhy m me 'ā iptī: ane. Prīne Ar kubē utā.

20 Nhy m kam me'ō Jejumā kum,

—Ota anāmē akamy ar amrēbē awýr bōx ne akuri ku'ē, te kute apumūnhmā kikre kabem ku'ē, ane.



21 Nhyam kam kum,

—Me kute Metĩndjwŷnh kabĕn mar ne kute kabĕnkŏt amijo baja, o ne ba inā, o ne ba ikamy, o ne ba inhŏbikwakumrĕx, ane.

*Kute kŏkmā bĕn tŷx.*

*Mat 8.23; Mak 4.35*

22 Ne kam amũ akati jakam kŏt ba djwŷnhmĕ ro'ā kākam wadjān nhŷ. Nhyam kam arkum,

—Gwaj gop imŏti nhikjĕmā rĕ, ane.

Nhyam kam ar kum,

—Gĕtŏ, ane.

Nhyam kam ar mŏ. 23 Kŏknhŏkākam ne ar mŏ. Mŏ: nhyam kam Jeju ŏto nŏ. Nhyam kam arŷm kŏk wabĕ. Ābĕr tŷx nhyam arŷm kam ngŏ aben mok ne. Nhyam kam ngŏ kute aben mokkam arŷm kākam ngŏ ipu ne. Ne arŷm ar 'ŷr. 24 Nhyam Jeju arek ŏto nŏ. Arek ŏto nŏ nhyam kam kŏt ba djwŷnh 'ŷr prŏt ne tok ne kum,

—Meo ba djwŷnh, meo ba djwŷnh, gop ano tŷx, ota gwaj arŷm badjār 'ŷr, ane.

Nhyam kam ekru ne kāj mā dja. Ne kam kŏkmā bĕn tŷx ne ngŏ kute aben moktijamā bĕn tŷx nhyam arŷm ngŏ anhikrĕ nhyam arŷm kŏk djābĕr anhikrĕ. Nhyam arŷm ngŏ anhikrĕn nŏ. 25 Nhyam kam Jeju arkum,

—Mŷkam ne gar imar kĕt ne tu amim ikamnhĭxkumrĕx kĕt ne? ane.

Nhyam kam ar madjākam e tuk anen kam ari aben pumũnho kumex ne kam abenmā kum,

—Ije tŏ mŷ me'ŏ got ja? Nām tu gĕt kŏkmā kabĕn ne ngŏmā kabĕn nhyam tu kabĕnkŏt anhikrĕ, ane. Arŷm ne Jeju kŏkmĕ ngŏmā kabĕn nhyam anhikrĕn nŏ.

*Me karŏ punu krāptĩ kute me'ŏo ba.*

*Mat 8.28; Mak 5.1*

26 Nhyam kam ar mŏ. Mŏ: nhyam arŷm ikjĕmā rĕ. Mekbĕ Djeradja nhŏ pyka'ŷr rĕ. Aben kŏnh ne pykabĕ Garrĕjamĕ mekbĕ Djeradja nhŏ

pyka. Aben kŏnh ne aktā akāx nhikjĕ'ā krĭ. Nhyam kam arŷm ar ikjĕ'ā mekbĕ Djeradja nhŏ pyka'ŷr rĕ. 27 Nhyam kam Jeju wabi. Krĭbĕ Djeradjakam me kra 'ŏ ne me karŏ punu ar o ba nhyam kam Jeju bŏx nhyam omũn kam 'ŷr prŏt ne. Amrĕbĕ me karŏ punu kute ar o ba tũmkam ne ar kubĕkā jangjĕnh kĕt ne ba. Kĕnkrekambit ba. Kikremā bŏx kĕt. Kĕnkrekambit ne ar ba, me kute kĕnkrekam me angjĕnh jakambit ne ar ba. 28-29 Me karŏ punu kute ar o baja ne me te kute uwpren kubĕ ijĕmā te o ane. Nhyam me karŏ punu kute ar o bakam mrāmri 'itŷxkumrĕx ne. Nām me te pa djuwpren te te djuwpre nhyam tu amijā kàxirāx kukĕ. Nhyam me karŏ punu mā arwā'ŷr kujaĕko ba, mā 'ŷr kangŏ. Nām ā me karŏ punu ar o anhŷro ba. Be, tām ne Jeju pumũn kam 'ŷr prŏt ne. 'ŷr prŏt ne parbĕ tu mŷrbĕ tŷm ne amra. Nhyam Jeju arŷm me karŏjamā kum,

—Me karŏ punu on akato, ane.

Nhyam kam arŷm amra ne. Ne kam kāj bĕ kum kabĕn ne kum,

—Jeju, Metĩndjwŷnh pymao kubĕ kumkati kra, mŷj ne ga aje ijomā? Kwārĭk wānh ijo abikĕnh kĕt, ane.

30 Nhyam kam Jeju kukij ne kum,

—Mā ne anhidji kute? ane.

Nhyam kum,

—Ibĕ ne Krāptĩtire, ane. Me karŏ krāptĩ: kute ar o ba'ā ne,

—Ibĕ ne Krāptĩtire, ane. 31 Kwārĭk wānh ga mũm me ijanor kĕt, ane. Ne kāj bĕ kum kabĕn ne, aminĕje kum kabĕn ne, ne kum,

—Kwārĭk wānh ga kre ry typydjija'ŷr me ijanor kĕt. Kwārĭk wānh kam me ijo abikĕnh kĕt ba me itokry kĕt, anhŷro nhŷ.

32-33 Nhyam kum ajmā angrŏ jamyre krānhrekam kumex. Kute pi'ŏ pyrāk ne ākuro kumex. Nhyam kam me karŏ punu Jejumā kum,

—Dja ga angrô jamyre'yr me ijano. Dja ga angrô jamyre'yr me ijano ba me kum wangjê, ane.

Nhym kam memã,

—Rã'ã, ane. Nhym kam me karô punu arým kum iren mã kurũm katon angrô jamy'yr mõn kum wangij. Nhym angrô jamyre umaje bõm tým ne pyka krã'yrkam mõn ngô to do: ane, akãx prêk'ã ne mõn nox nhym kam ngô kunĩ nhimex ne. <sup>34</sup> Nhym kam me kute õ krito djuw mex djwýnhja omũnhõ dja. Omũnhõ djan prõt ne kam bõx ne memã arê. Me õ krĩkam me jamã arên bu'ã krĩkam me jamãdjwý arê.

<sup>35</sup> Nhym kam me Jeju'yr prõt ne. Kute omũnhmã 'yr prõt ne. Nhym kam me karô punu kute ar me'õo baja arým mexkumrêx ne Jeju parbê nhỹ. Kubêkã jangij ne nhỹ. Arým umar mexkumrêx ne nhỹ. Nhym me omũn kam tĩn prãm ne. <sup>36</sup> Nhym kam me kute Jeju pumũnh djwýnhja mekõt prõt ne ajte katon kam memã arênho dja, Jeju kute me'õkam me karô punu janorja memã arênho dja. <sup>37</sup> Kam pykabê Djeradjakam me jamê bu'ã krĩ krykam me ja ne me Jejumã kabên ne kum,

—On me ikurũm tẽ, on mã me ikurũm tẽ, ane.

Me kum uma tỳxkam ne me ã aminêje anoro ane. Nhym kam Jeju kãmã wadjã. <sup>38</sup> Nhym kam Jeju kute me karô punubê me'õ pytãrja te kõt krã ne kum,

—Ba akõt tẽ. Ba akõt tẽ, ane.

Nãm te ane nhym aminêje nên kum,

<sup>39</sup> —Kati, arek dja. Mã akubyn tẽn anhũrkwãkam memã amijarê, Metĩndjwýnh kum akaprĩn kute apytãrkõt memã amijarê, ane.

Nhym kam ã anen kam mã akubyn tẽn kam arým kikre kunĩkõt kikrepdjitã memã ar amijarênho ba, Jeju kum kaprĩn kute utãrkõt ar memã amijarênho ba.

*Kute me'õ kurerer akubyn o tĩn.*

*Mat 9.18; Mak 5.21*

<sup>40</sup> Nhym kam Jeju kãmã wadjàn ajte akubyn ikjêmã mõn rê. Nhym me kam amako krĩ nhym arým bõx nhym me kam kĩnhkumrêx ne. <sup>41-42</sup> Nhym kam me'õbê Djajru Jeju'yr tẽn bõx. Djajrubê bẽnjadjwýr'õ, me bikprõnh djãkam bẽnjadjwýr'õ. Ne kam Jeju'yr tẽn bõx ne kabem tu mýrbê tým ne kam kum,

—Dja ga inhũrkwãmã tẽ, ane. Ne kam kum krao no katoro dja. Kra pydji, kra prĩti ne kanên nõ. Arým tyk 'yr: ne nõ nhym kam kum o no kato. Nhym kam Jeju kõt tẽ. Me krãptĩ Jeju'ã aõ ne kunoro mõ.

<sup>43-44</sup> Nhym kam tẽmkõt me'õ nija kõt bõx ne 'ã kubêkã nhidja kupê. Nãm ar kamrõ apõx ba. Amrêbê ne ar kamrõ apõx ba. Arým 'ã amexbê 12. Nãm prĩne amijã amibê pi'õk kaprĩ kunĩ krên kajgon mex kêt rã'ã ne. Nãm te me kane djwýnh o ane. Nhym bep Jeju tẽmkõt ne 'ã kubêkã nhidjabit kupên, tãmkam arým kamrõ ngrã, arým mex ne. <sup>45</sup> Nhym kam Jeju memã kum,

—Mýj me'õ ne ikupê? ane.

Nhym me kunĩ aminêje kum,

—Kati, kon, me'õ, me'õ, anhýro kumex.

Nhym kam Pedru kum,

—Bẽnjadjwýr, djãm me krãre: got ga “Mýj me'õ ne ijã kubêkã kupê”, ane. Me kute gwaj bamã ipõk mex ne kute gwaj bakunoro mõrjakam ga, ane.

<sup>46</sup> Nhym kum,

—Nã, arým ne me'õwã ikupê. Ipymao ne ba arým me'õwãõ mex ne arým kuma, ane.

<sup>47</sup> Nhym nija te kute kubê amipdjurmãn kam ta amim,

—Kati, arým ne kuma, anen kam 'yr tẽ. 'Yr tertet tẽ. Umaje tertet tẽn tu mýrbê tým ne kum amijarê. Me ipõkri tu kum amijarênho nõ. Kute 'ã kubêkã kupênh ne tãm

kam mexkôt kum amijarênho nô.  
 48 Nhyim kum,

—Àpnhîre nã gãm tu amim ikamnhîxkumrêx ne. Aje amim ikamnhîxkumrêx kôt ne ba arÿm apytã. On adjumar mex ne mã akubyn tẽ, ane. 49 Kum kabêno ãm rã'ã nhyim bẽnjadjwÿr nhûrkwã kurûm me'ôja tẽn kajpan kum,

—Onÿj arÿm akra ty. Kwãrîk wãnh ga memã ujarênh djwÿnhmã akrao ano kator kêt, ane.

50 Nhyim Jeju arÿm kuman kum,

—Kwãrîk wãnh ga akaprî kêt ne akrakam adjumar punu kêt. Dja ga tu akra'ã ikamnhîxkumrêx nhyim arÿm akubyn mex ne, ane.

51-53 Nãm ã anen kam mã 'ÿr tẽ. Tẽn kam ûrkwãmã bõx. Nhyim me arekabej ãmrao kumex. Nhyim kam mekmã kum,

—Kwãrîk wãnh ga me amÿr kêt. Kati, tyk kêtê, nãm ôto nô, ane.

Nhyim me arÿm tyk mexkôt omûn kam Jeju'ã keketo kumex ne aprÿo kumex, ne we,

—Be nãm we, “Nãm ôto nô”, ane.

Nhyim kam aminêje me ja nê, mekôt môrjamê me kute tyk jabej ãmrao kumexjamê aminêje me nê. Nhyim bep Pedrumê Djuãomê Xi-jagumê tyk ne nôrja nãmê bãmmê ar ajbit ne ar kôt wadjã. 54 Nhyim kam Jeju ikra 'amÿn kum,

—Àpnhîre, kãjmã nhÿ, ane.

55 Nhyim kam karõ akubyn kum wadjã nhyim akubyn tÿn ne ekrux ne kãjmã nhÿ. Nhyim kam Jeju nãmê bãm arkum,

—Ar kum mÿjja 'õ ngã gẽ kukrê, ane.

56 Nhyim nãmê bãm ar abenkam no tyn dja. Nhyim kam arkum,

—Kwãrîk wãnh gar memã arênh kêt. Dja gar tu mekbê udju, ane.

## 9

*Kute Ar kubê 12 janor.  
 Mat 10.5; Mak 6.7*

1 Nhyim kam akati 'õkam Jeju amikôt ba djwÿnho akprõ. Kôt ba djwÿnhbê 12ja ne aro akprõ. Apÿnh me õ pyka djari kute 'ÿr ar anormã ne aro akprõn arkum,

—Ë, ikabênkôt dja gar me nêje me karõ punu jano. Ne apÿnh me kanê djari me utãro mõ. Ba dja ba ar amã ipyma jadjã gar kam ipymao apÿnh me kanê djari meo mexo mõn me karõ punu kute meo ba djari kubê me utãro mõ.

2-5 Ar apa, ã, ba ar amã arê. Kwãrîk wãnh gar anhõ mÿjja'õ byr ne o amõr kêt, akajpar djã'õ byr ne o amõr kêt, ajênh tur ne o amõr kêt, anhõ kwÿ krên djã, anhõ pi'õk kaprî, anhõ kubêkã'õ kwãrîk wãnh gar o atêm kêt. Dja gar tu anhÿkam mõ. Mõn kam apÿnh me õ pyka djari me 'ÿr ajmã. Dja gar me'õ nhûrkwãkam bõx ne nhÿ, kwãrîk wãnh ajte amũ amã me'õ nhûrkwã 'õ kÿnh ne 'ÿr amõr kêt. Dja gar tu bõx ne kikrekam abõxwã tãmkam tu arek kam anhikwão dja. Dja gar memã arênh pan kam arÿm ajte amũ pyka 'õ'ÿr tẽn ajte kikre 'õkam tãm ne. Ne ajte amũ tẽn 'õkam tãm ne. Ne ajte 'õkam tãm ne.

Dja gar krî 'õkam bõx nhyim me kum ar akÿnh kêt ne kute ar akabên mar prãm kêt jabej, gar kam arÿm tu amõrkumrêx ne. Tu amõrkumrêx kadjy amiparkã'ã pykawã tatak ne. Aje me kute akabên mar prãm kêtjao amirît nhyim Metÿndjwÿnh kute omûnh ne amũ 'õkam kute memã pãnh jarênh kadjy dja gar amiparkã'ã pykawã tatak ne. Dja gar kãj bê memã kum, “Onÿj Metÿndjwÿnh kute ar me bapytãr ne me bakadjy bẽnjadjwÿr ne kute ar me bajo bamã”, anhÿro mõ. Ne kam kôt meo mexo mõ, ane. Nãm ã Jeju kôt ba djwÿnhmã me'ã karõo anen kam mã me'ÿr ar ano.

6 Ar ano nhyim kam ar arÿm krî kunîkôt ajmã ne kãj bê memã Jeju'ã ujarênh ny jarênh mõn kôt meo

mexo mō, apŷnh krī kunīkōt ne ar ajmān ba.

7-8 Nhyam kam bēnjadjwŷr raxbē Erodji arŷm Jeju'ā ujarēnh man kōt ba djwŷnh kute meo mexo mōrja arŷm adjwŷnhdjwŷ ma, ne kam te kute marmā. Nām me apŷnh kabēno noo biknor mex ne. Nhyam te kute mŷjja marmā. Jeju'ā ne me ari kabēn kwŷ jarē: ne abenmā kum,

—Bep Djuāo kute ngōnhmā me angjēnhja ne we ajte tŷn ne kato, ane.

Nhyam ajte me kwŷ we,

—Me bakukāmārebē Erij ne ajte kato, ane.

Nhyam ajte we me kwŷ,

—Bep Metīndjwŷnh kabēn jarēnh djwŷnh amrēbē tyk ne ajte we tŷn ne kato, ane.

Nhyam kam Erodji te kute apŷnh me kabēn ja marmā. <sup>9</sup> Ne kam ta amim,

—Ije bep Djuāo ne ba arŷm mut krāta. Nhyam mŷj me'ō got ja ba arŷm 'ā ujarēnh ma, ane. Ne kam te kute Jeju pumūnh prāme.

*Kute tepmē djwŷno meo djuw mex.  
Mat 14.13; Mak 6.30; Dju r 6.1*

<sup>10</sup> Nhyam kam arŷm Jeju kute ar anor nhyam ar mōrja ajte akubyn 'ŷr mōn bōx ne kum amijarē. Nhyam kam krīmā me umaje ar ajbit aro tē. Krī nhidjibē Bexadamā ne aro tē. <sup>11</sup> Ar ajbit kute o mōrmā nhyam ate ajte me kātāmja kōt krāptī:n bōx. Nām me abenmā Jeju mōrkōt arēn kam ajte kōt mō. Djā nām Jeju me krāptī pumūn memā àkrē? Kati, nām me krāptī pumūn kam tu memā kabēn mex jarē. Nām Metīndjwŷnh me kadji bēnjadjwŷr ne kute me utār ne ar meo bamā memā arē ne kam ajte kōt me kanē pytāro dja.

<sup>12</sup> Nhyam kam arŷm me'ā amykry tē. Nhyam kam kōt ba djwŷnhbē 12ja 'ŷr tē. Jeju'ŷr tēn kum,

—Ije gop on me ano. Gop on me krāptīja me ano gē me apŷnh

krīmā ajmān bu'ā krī kryremādjwŷ mōn wānh kam ō kwŷ krēn wānh kam nōn ta amikadji mŷjja by. Nhyam nhŷnh ne mŷjja 'ō ne me kute krēnmā ne me jakam ar ba. Arwākam ne gwaj ar baba, ane. <sup>13</sup> Nhyam kam Jeju kōt ba djwŷnhmā kum,

—Ar ga dja gar mekmā mŷjja ngā gē me kukrē, ane.

Nhyam ar kam kum,

—Ije kati, ar inhō djwŷbē 5 ne tepdjwŷ amānhkrut. Jabit. Be, djām mŷjja rax? Nār djām ar imōr ne ije gwaj banhō pi'ōk kapriō me krāptīja kadji ije djwŷ byrmā? ane.

<sup>14</sup> E kum bep me krāptīkumrēx. Me my'ā akrebē 5.000. Nhyam kam ar kum,

—Ē, dja gar meo 50'ā kabēn ne me krīō tē.

<sup>15</sup> Nhyam kam kōt ba djwŷnh meo 50'ā kabēn ne me krīō tēn me krī pa.

<sup>16</sup> Nhyam kam Jeju djwŷbē 5ja byn tep amē kubyn kāj mā krān kāj kwa pumūn Metīndjwŷnhmā ōdjānh jarē. Ne kam djwŷmē tep kokij ne kam kōt ba djwŷnhmā kungā. Nhyam kam amū memā kungā, me krāptījamā kungā. <sup>17</sup> Nhyam me kam kukrē. Nhyam kam me kunī ō kwŷ krēn kam ajnekumrēx. Nhyam kam djwŷmē tepja'ā kātām. Nhyam kam kōt ba djwŷnh anhyjao atom ne. Djwŷmē tep janhyjao atom nhyam kam 'ā kabē 12. Djām djwŷmē tep ngri got.

*Pedru kute Jejubē Krituo amirīt.*

*Mat 16.13; Mak 8.27*

<sup>18</sup> Nhyam kam 'ōkam Jeju ate mekbē tēn kam Metīndjwŷnhmā amijarēho nhŷ. Nhyam kōt ba djwŷnhbit kuri krī. Nhyam kam Jeju kute amijā ujarēnh marmā abej ar kukij.

—Ē, ar imā ijā me ujarēnh jarē ba kuma, ane.

<sup>19</sup> Nhyam ar kam kum,

—Ije kum be nām we me ajo Djuāo kute ngōnhmā me angjēnh

djwýnhja, nhym me kwý ajo me bakukãmãrebê Erij, nhym me kwý ajo Metĩndjwýnh kabên jarênh djwýnh tũm ajte akubyn tĩn ja'õ, ane.

<sup>20</sup> Nhym kam arkum,

—Ne ar gadjwý mã ne gar imar on? Mýj'ã ne gar ijakre? ane.

Nhym kam Pedru kum,

—Kati, abê ne Kritu. Abê me inhõ Bẽnjadjwýrbê kumkati. Metĩndjwýnh amrêbê kute me bakukãmãremã ajarênh ga aje me ipytãr ne aje ar me ijo abamã amrêbê kute me imã ajarênh ba me ije ar akam amako iba, ne arým Metĩndjwýnh ajano ga arým bõx, ane.

<sup>21</sup> Nhym kam arkum,

—Nã, kõtõ. Kwãrĩk wãnh gar memã ja jarênh kêt. Dja gar tu mekbê ipudjurkumrêx ne, ane. Ar kute udjurmã ã arkum arênh tÿxo ane. <sup>22</sup> Ne ajte arkum,

—Ë, dja me prĩne ijo ajkê, ba itokry rax ne. Ba ije amijo inhĩ ne me awýr irwýk ba dja ba itokry rax ne. Dja me bêngëttemê me kadjy Metĩndjwýnh mar djwýnh nhõ bẽnjadjwýrmê Mõjdjê kukrãdjã mar djwýnhmê kum ikĩnh kêt ne ikanga ne kam tu ibĩ nhym ijã akati amãnhkrut ne ikjêkêt ba kam akubyn itĩn ne, ane.

<sup>23</sup> Ne kam ajte me kunĩmã kum,

—Gêdja ga me ajõ mã ikõt abikamênh prãm jabej kwãrĩk wãnh amidjwýnhbit mar ne amijo kĩnh kêt. Dja ba ityk kadjy inhõ pĩte'y mýn itokry: ne. Dja ga me ajõ ijã amijakren aje pĩte'y mýnh mãn prãbê amã atokry puma kêt ne amã ijabê rã'ãn kam myt kunĩkõt ikadjy amiman mã ikõt ajkamê. <sup>24</sup> Me kute amidjwýnhbit mar ne me kum tokry puma, me tãm gêdja me tyn kam me biknor tokry djãkam tẽ. Nhym bep me kum ijabêkumrêx ne kute amidjwýnhbit mar kêt nhym me kute me par jabej me tãm gêdja me amiptãn ar tĩn ne ba rã'ã: rã'ã.

<sup>25</sup> Ne ren me'õ pykabê mýjja mexja kunĩ, nêkrêx kunĩ ren ari o atom ne o ban kam ren ty, je mã dja kam nê? Kati, nãm ren ty nhym ren õ nêkrêxja ren wãnh kumex.

<sup>26</sup> Godja me'õ ikam pijãm ne ikabênkam pijãm jabej ba badjwý amipãnh kam ipijãm ne. Ba ije amijo inhĩ ne me awýr irwýk gêdja ba amipãnh tãwãkam ipijãm ne. Dja ba ajte iraxo me awýr bõx. Ibãmmê kadjy mrãnh djwýnh jadjênhmê umao ipyma:n me awýr bõx. Ibê kumkatio bõx nhym tãmja ikam pijãmja ba badjwý arým amipãnh kam ipijãm ne.

<sup>27</sup> Ba me amã arê. Ibãm dja ijã bẽnjadjwýr rax mê ba ipymao me apytãn ar me ajo iba. Dja gar adjãmja akwý atĩnri iraxkõt ipumũ, me akadjy ibẽnjadjwýr rax ne ipymakõt ipumũ. Mrãmri ne ba ikabênja, ane. Nãm ã Jeju memã kabên jarênhõ ane.

*Jeju adjênhõ kute amijo amirĩt.*

*Mat 17.1; Mak 9.2*

<sup>28</sup> Nhym 'ã pi'õk kamrêk pydji nhym aro tẽ, Pedrumê, Xijagumê, Djuão aro tẽ, krãnh'ýr aro tẽn imõkmã aro bõx. Kute Bãmmã amijarênhmã ne 'ýr aro bõx. Ne kam Bãmmã amijarê. <sup>29</sup> Bãmmã amijarênhõ dja nhym ajmã nokre o nhym atemã nokre nhym 'ã kubêkãdjwý aka: ne. Akakam adjênh ne.

<sup>30-31</sup> Nhym ar my amãnhkrut ne kum kabêno dja. Mõjdjê Erij ar amrêbê tyk, ar tãm ne ar katon kum kabêno dja. Nãm ar adjênh ne uma:kumrêx ne kum kabêno dja. Jejumê ne ar abenmã kabêno dja. Jeju tyk'ã ne ar abenmã ujarênhõ dja. Krĩraxbê Djeruxarêkam me kute bĩnmã ne ar abenmã arênhõ dja. Metĩndjwýnh kute tykmã kum 'ã karõkõt ne ajte ar 'ýr bõx ne kõt abenmã arênhõ dja.

<sup>32</sup> Nhym Pedru ar õtdjwakumrêx ne arek õto ikwã. Ne kam no tÿx

ne kam Jeju pyma, adjênhkôt omũ nhyam amê ar kuri ãmjadjwý tãm ne. Kam kubêkà jadjênh ne kam mexkumrêx ne ku'ê. <sup>33</sup> Nhyam arým ar amê tẽm 'yr dja nhyam Pedru Jejumã kum,

—Bẽnjadjwýr, mrãmri ne bar jakam bõx ne akuri nhý nhyam mexkumrêx ne. Bar apýnh ar amã kikre'ã irõx nhípêx, ga anhõmê, Mõjdjê nhõmê, Erij nhõmê. Amãnhkrut ne ikjêkêt dja bar ar amã ipêx, ane.

Kute amikabên'õ mar kêt. Pedru ta ne amikabên'õ mar kêt kam ãm tu arík kabên ja jarê. <sup>34</sup> Kum kabêno ãm rã'ã nhyam kam kakrã arým prĩne aro akno. Nãm kakrã kute prĩne aro biknorkam arým ar tĩn prãm ne.

<sup>35</sup> Nhyam kam kakrã kurũm Metĩndjwýnh arkum kabên ne arkum,

—Be, ikra ne wã. Ar omũ. Ikra ja ne ba ãpênh kadjy amijo utãn amim kudja. Tãwã dja gar kabên man kabênkôt mrã, ane.

*Jeju me karõ punumã bẽn týx.*

*Mat 17.14; Mak 9.14*

<sup>36-37</sup> Nãm ã arkum kabên anen anhikrê nhyam kam Jejumê kôt ba djwýnh ar ate ku'ê. Amê ar myja arým mã nhĩ'ãm tẽ.

Nhyam akati nhyam kam Jeju akubyn krãnhre kurũm aro ruw. Aro ruw ne kam mã aro mõ. Aro mõ nhyam me krãptĩ ar kutã mõn ar kajpa. Djãm kam got ar kute Jeju jadjênhkôt omũnhja memã arê? Kati, Jeju ar pykabê bari ne ar mekbê udju ne.

<sup>38</sup> Nhyam me ar kajpa nhyam me ipõkri me'õ myja kãj bê kum akij,

—Bẽnjadjwýr, gop ikraja pumũ. Ikra myja ne pydjii. <sup>39</sup> Ota me karõ punu'õ ar ibê ikra paro ba. Nãm 'yr ban bõx nhyam ar ijaêrbê tu amra: ne. Nãm amran rõrõk ne ãmnhirêno ikwã, ajmrõ prõto ikwã. Ne kam kute amijo pyka titik kurêje prĩne amingã. Kute kum irer

prãm kêt kumrêx. <sup>40</sup> Nã bãm te akôt ba djwýnhjamã ikrao a'uw nhyam kute imã ikra pytãr kêt kumrêx, te kute imã utãmã te o ane, ane. Nãm ã Jejumã kra jarêno ane. <sup>41</sup> Nhyam kam Jeju me 'yr akêx ne memã kum,

—Ije me akamingrãny aje amin ikamnhĩx kêt kumrêx. Me ajaxwe. Mã dja ijã akati, akamãt kô kute ba me akam arek ar iba. Nã bãm me awýr bõx ga me ajamakre kêt kumrêx ne prĩne akabêno ikaty. Nã bãm te amiwýr me akam ama ga me arík ar aba, ane. Ne ajte bãmjãmã kabên ne kum,

—Amrê akrao tẽ, ane.

<sup>42</sup> Nhyam kam 'yr tẽn pa 'amýn Jeju 'yr o tẽ. 'Yr o tẽmrãm nhyam ajte me karõ punuja o pyka kôpênãt ne. Krajao pyka kôpênãt nhyam ãmnhirêno nõ. Nhyam Jeju me karõ punujãmã bẽn týx nhyam umaje bõm tým. Nhyam kam Jeju kum krao mex ne akubyn bãmmã kungã. <sup>43</sup> Nhyam me kôt omũ, Jeju kute Metĩndjwýnh pymao o mexja me kôt omũ ne ari aben pumũno kumex. Djãm Metĩndjwýnh pyma ngri got. Nhyam me Jejukam no tyn kumex rã'ã nhyam Jeju kôt ba djwýnhmã kum,

<sup>44</sup> —Gora ar amijamakrekam ikabên janhõ. Ê, ba ije amijo inhĩ ne me awýr irwýk gêdja me memã ikanga, ikurê djwýnhmã ikanga, ane. <sup>45</sup> Nhyam ar kute kabênja mar kêt kumrêx. Nãm ar ajmã amakkre nẽ, te kute marmã. Ne kam te kute kukjêrmãn kam pijãm ne.

*Jejukôt ba djwýnh kute abenbê bẽnjadjwýr pytãr tẽ.*

*Mat 18.1; Mak 9.33; Pir 2.3*

<sup>46</sup> Ne kam kabêno aben japanho mõ, kôt ba djwýnhja kabêno aben japanho mõ. Mýj mýr jabej? Bir, nhýnh kôt ba djwýnhja 'õ gêdja bẽnjadjwýr raxo aben jakre. Ja mýr jabej ne me kabêno aben japanho mõ. <sup>47</sup> Nhyam Jeju kôt ba djwýnh kute kabêno aben japanho

mörja kute ar tãri amako mar kêt. Nãm tu mũm kuma ne kam me'õ prĩre pa 'amÿn amijakÿxkõt kudja. <sup>48</sup> Kudjan arkum,

—Ë, gar me'õ prĩreja pumũ, kãtãm mexja pumũ. Dja me'õ ikõpdji'ã kum me'õ prĩreja, me'õ kãtãmja kĩnh ne kam arÿm badjwÿ kum ikĩnh ne. Dja me'õ kum ikĩnh ne kam kum Ibãmdjwÿ kĩnh ne, Ibãm kute ijanorjadjwÿ kum kĩnh ne. Ë, me'õ kãtãm mex gédja ja pãnh bẽnjadjwÿ rax ne, ane. Nãm ã Jeju kõt ba djwÿnh kute amijo rax prãmjamã kabẽn jarẽnho ane.

<sup>49</sup> Nhyam kam Djuão kum,

—Bẽnjadjwÿr, ba amã arẽ. Me'õ gwaj bakõt ba kêt'õ ne tu me karõ punu kute me'õo bamã anhidji jarẽ. Kum anhidji jarẽn me karõmã kum, “Ba Jeju kukwakam amã ik-abẽn. On kum anhire”, ane. Nãm ã kum anhÿro dja, bar arÿm omũ. Ne kam gwaj bakõt ba kêt kam bar kum, “Kwãrik wãnh”, ane. Nãm ã Djuão kum ane.

<sup>50</sup> Nhyam kam kum,

—Kati, kwãrik wãnh 'ã kum ak-abẽn kêt. Ba ar amã arẽ. Me'õ kute ar ajo kurê djwÿnh kêt ne arÿm tu mrãmri ar ajo õbikwa, ane. Nãm ã Jeju kum ane.

*Pykabê Xamarijka me ja kute Jeju kanga.*

<sup>51</sup> Nhyam arÿm Bãm kute kãjkwamã o àbirmã arÿm õ akati 'ÿr bõx 'ÿr. Nhyam kam krĩraxbê Djeruxarãmã krã. Nãm te kam mÿjja pyrna, mÿjja tokry nhyam tu 'ÿr tẽmmã krãn kam 'ÿr tẽ. <sup>52</sup> Ne kam 'ÿr tẽmkõt amikukãm kõt ba djwÿnh kwÿ jano. Ar mrãnh ne me bajtem, Xamarijka me jakam bõx ne kam kute Jeju kutêp ikwã djã jabej ne kum õ kwÿ krẽn djã jabej nhyam bõx ne kam kam õ kwÿ krẽn ne kam nõr kadyj nãrãm amikukãm 'ÿr ar ano. 'ÿr ar ano nhyam ar mrãn bõx. <sup>53</sup> Bõx nhyam kam Xamarijka me ja aminêje

ar ano. Jejumẽ kõt ba djwÿnh Ar kubê idjaerkam. Ne mekbê idjaer nhõ pykabê Djeruxarẽ'ÿr mörkam. Kam ne Xamarijka me ja kum ar kurêkumrẽx, me kute abeno kurê djwÿnh tũmkam. Kam ne me kum ar kurẽn kum ar kĩnh kêt ne tu aminêje ar ano. <sup>54</sup> Nhyam kam kõt ba djwÿnhbê Xijagumẽ Djuão ar me omũn kam Jejumã kum,

—Bẽnjadjwÿr, dja bar kuwy'ã Abãm 'wÿ gé kãjkwa kurũm kuwy tÿm ne prĩne me kuga gé me xer, nẽn, ane.

<sup>55</sup> Nhyam ar'ÿr akẽx ne ar omũn arkum bẽn tÿx ne,

—Kati, kwãrik wãnh, ane.

<sup>56</sup> Nhyam ar kunĩ ajte tu atemã krĩ 'õ'ÿr mõ.

*Me kute tu Metĩndjwÿnh maro mörkumrẽxmã.*

*Mat 8.18*

<sup>57</sup> 'ÿr mõ nhyam me'õ kum,

—Ë, ba arek akõt tẽ. Dja ga nhĩãm amrãnh katã ba akõt mrã, ane.

<sup>58</sup> Nhyam kam kum,

—Ë, ga djoti pykakam kreja pumũ. Ne kwẽn kÿjrũm aêja pumũ. Mrymẽ kwẽnhit ne õt djã, kute amim pyka kre pumũnhkõt kam õt djã, nhyam bep kati, ba ne ba inhõ kikre kêt, inhikwã djã kêt. Ije amijo inhĩ ne me awÿr irwÿk nhÿnh ne inhõ kikre ja? Nhÿnh ne inhikwã djã ja? Kati. Kon, gop ga amiman kam ikõt atem jabej nãr kon arek dja, ane.

<sup>59</sup> Ne kam ajte ta me'õmã,

—Ikõt tẽ. Ikõt tẽn mã ikõt ajkamẽ, ane.

Nhyam kam kum,

—Adjÿm, Bẽnjadjwÿr, ibãm kumrẽx gédja ba akubyn tẽn adjã. Ibãm ne ajbir ibê ty, ane.

<sup>60</sup> Nhyam Jeju kum,

—Gé me kute Metĩndjwÿnh mar kêt wãnh me tykjadjã. Me kute mar kêt ne me kute mrãmri ne me tyk jamakkre kêt pyrãk. Gé me wãnh õbikwa tykjadjã, ane. Nhyam bep

ga dja ga ikôt Metîndjwýnh'ã adjujarênh tē, Metîndjwýnh me akadjy bēnjadjwýr ne kute ar me ajo bamã gēdja ga 'ã adjujarênh tē, ane. Nãm ã Jeju kum ane.

<sup>61</sup> Nhy m me'ôjadjwý Jejumã kum, —Bēnjadjwýr, ba dja ba akôt tē. Inhürkwã kumrēxkam dja ba inhöbikwamã amijarēn kam akôt tē, ane.

<sup>62</sup> Nhy m kum, —Djãm me purkam àpēnh katēri kute kum irer got? Kati, mýjja wákam ne me apēn àpēnh mrān tu àpēnh inomã rēnhkumrēx ne. Djãm me kute Metîndjwýnhdjwý maro ban konenh krākār got? Kati, dja ga tu amim maro tēn tu maro atēm kumrēx ne. Dja ga maro mōn mar konenh krātan kam Metîndjwýnh nhö pyka'ýr abōx kētkumrēx ne. Metîndjwýnh kute me utār ne me kadjy bēnjadjwýr ne kute ar meo baja dja ga 'ýr abōx kēt ne, ane. Nãm ã Bēnjadjwýr Jeju arkum ane.

## 10

*Kute Ar kubê 70 janor.*

<sup>1</sup> Nhy m kam Jeju kute arkum arēnh nhijukri ajte amim ar kwý rax ne ar umjuw. Me kwýo 70 ne amim ar umjuw. Nãm amim aro aben nhikjê'ã kabēn ne amim ar umjuw, kute ar anor kadjy. Kute ar anor nhy m ar kukām mōr ne kumrēx pyka kunīkôt, krī kunīkôt mōrmã. Dja i Jeju ar kudjwa ã ane, ar kudjwa krī kunīkôt bōx mō.

<sup>2</sup> Ne kam kute ar anor nhy m ar mōr kutã prīne me'ã arkum karō ne arkum,

—Me kute Metîndjwýnh mar prāmja ne me kumex. Nãm me kute mrāmri ne bãy arým abōr tyk ne kumexja pyrāk. Nhy m bep Metîndjwýnh'ã ujarēnh djwýnh ne ngrēre kute bãykam me àpēnh djwýnh ngrēre ja pyrāk. Kam dja ga me kadjy Metîndjwýnh 'uw gē me'ýr 'ã ujarēnh djwýnh

jano gē me kuman kam tu amim kamnhīxkumrēx. Kute mrāmri ne me mrānh ne kute me ô purkam bãy pumūnh ne mrānh ne bōx ne kute kadjy me ô pur djwýnhmã arēnh nhy m me kute amū kadjy me kwýmã arēnh nhy m me ban kute memã ê ja pyrāk. Dja gar ã me kadjy Metîndjwýnh 'wýro ane.

<sup>3</sup> Ê, on dja gar mō. Arým ne ba ije me'ýr ar ajanormã. Ar aje memã ijarēnhmã ne ba ar ajano. Dja gar me kam bōx nhy m me ikôpdji'ã ar ajo kurê djwýnh ne kum ar apar prām kumrēx ne. Kute mrāmri ne rop kute mrykī'ätomti kra par prām kumrēx ja pyrāk. <sup>4</sup> Ê, dja gar tu anhykam mō. Kwārīk wānh gar anhō katōk'y djã jamānh kēt ne ajēnh tur ne o amōr kēt. Ne aparkã 'ô byr kēt. Dja gar ajamānhkrut'ã kabēn ne pyka kunīkôt aben ngrã. Kwārīk wānh gar apýnh krī djãri kôt ajmã gē me'ô ar ajō kajpan amã kabēno akukrào ãm kēt. Dja gar tu amrānhkôt me'ômã akabēn jarēnho tēn tu mã tē.

<sup>5</sup> Dja gar mrān bōx ne me'ô nhürkwãmã wadjān kam kum, “Gora adjumar mex ne ar aba”, ã ane. <sup>6</sup> Dja umar mex prām jabej arým mrāmri akabēnkôt umar mexkumrēx ne. Nhy m bep djãm kum umar mex prām kēt ne kam ürkwākam me jamē ro'ã umar punu mex ne ar ba. Me jabit dja me umar punu. Gar kam gajbit adjumar mex ne ar aba. <sup>7</sup> Dja gar kikrekam abōxwã tām kam tu arek kam anhikwão dja. Kwārīk wānh gar bōx ne kikrekôt ar aba kēt. Dja gar kikrekam abōxwã tām kam gē me ar ajo djuw mex ne ar amã mýjja ngã gar krē, tu kam apijām kētkumrēx ne krēn kôt ikōn adjumar mexkumrēx. Ar aje memã Metîndjwýnh'ã adjujarēnh pānh, ar aje memã 'ã adjujarēnho aku'ēn atyk djã pānh dja gar tu anhō kwý krē.



<sup>8</sup> Dja gar krī 'ōkam bōx gē me kum ar akīnh ne ar akam ukapřī jabej ar amā mỳjja ngā gar tu krē. <sup>9</sup> Krīwākam ar abōxwā, kam me kute ar amā kabēn mex jarēnh tām kam gēdja gar me kanē pytān memā kum, “Arỳm ne Metīndjwýnh me akadja bēnjadjwýr ne kute me apytār ne kute ar me ajo ba 'ỳr. Arỳm ne me ajo rām ne ja”, ane. Dja gar ā memā ane. <sup>10</sup> Nhy m bep djā gām ar krī 'ōkam bōx nhy m me kum ar akīnh kēt ne aminēje ar ajano gar kam tu me ipōkri memā akabēn jarēnho tē. Ne memā kum,

<sup>11</sup> “Ě, dja bar me abē me anhō pyka ja amiparkā'ā tatak ne. Ar ije me ajaxweo amirīt ga me aje omūnh kadja. Gora me ar ikabēnja ma. Ě, arỳm ne Metīndjwýnh me akadja bēnjadjwýr ne kute me apytār ne kute ar me ajo bamā ga me ate amā kīnh kēt ne ar imā, 'Kati, me ije akabēnwā mar prām kētkumrēx', ane. Me aje ā ar imā anhýrkam ne bar me abē me anhō pykaja amiparkā'ā tatak ne.” <sup>12</sup> Dja gar ā memā akabēn jarēnho ane. Ě, ba ar amā arē. Krī wākam me wā ar aje mebē amiparkā'ā me ō pyka tatakja me tām gēdja me tokry rax ne. Metīndjwýnh kute memā axwe pānh jarēnh nhō akatikam godja krīwākam me wā meo bikēnh raxo Xōtōmakam me ja jakrenh mex ne.

<sup>13</sup> Watī:re Koradjikam me wā. Watī:re Bexadakam me wā. Dja ga me atokry rax ne. Ba ren me bajtem nhō pykabē Xirumē Xidōkam ren mỳjja rūnhja, mỳjja pumūnh kēt ja kwý 'y nhy m ren me omūn ren arỳm amrēbē amim katon ren wānh amijaxwemā ire. Ne ren kute kum irero amirīt kadja kubēkàbē exopa jangijn ren amijā mro prā tatak ne. Ne ren kam iwýr amijo akēx. Nhy m bep kati, inhō me wýnhkam me ga, Koradjikam me gamē Bexadakam me gamē me akam ne ba te mỳjja pumūnh kēt

kwý rax ne ipēx ga me omūnh kajgon kam ajaxwemā anhírer kēt ne iwýr amijo akēx kētkumrēx ne. <sup>14</sup> Metīndjwýnh kute memā axwe pānh jarēnh nhō akatikam godja me ajo bikēnh raxo me bajtem nhō pykabē Xirumē Xidōkam me ja jakrenh mex ne.

<sup>15</sup> Krīraxbē Kapanakam me gadjwý djām me aje amijo adjāmran aje amijo raxmā? Djām me aje amijo rax ne aje araxo aje kàjkwa tēpmā? Kati, dja Metīndjwýnh aparmā me biknor tokry djāmā me amē ga kam me atokrybit ma.

<sup>16</sup> Nā, dja gar aben nhikjē'ā kabēn ne pyka kunīkōt ajmān memā ijarē. Godja me'ō ar akabēn man badjwý ikabēn ma. Nhy m ate me'ō kum ar akurēn ar akabēn mar kēt ne badjwý kum ikurēn ikabēn mar kēt ne. Dja me'ō badjwý kum ikurēn ikabēn mar kēt ne ne Ibām kute ijanor djwýnhjadjwý kum kurēn kabēn mar prām kēt ne, ane.

Nām ā Jeju aro 70 ne kute ar anor kutā arkum kabēn jarēnho anen kam aro aben nhikjē'ā kabēn ne ar ano, pyka kunīkōt ar bimānhmā ar ano.

<sup>17</sup> Nhy m ar mōn memā Metīndjwýnh'ā ujarēnh mōn me kanēbē me utāro mō:n kam akubyn mō, kīnhkumrēx ne akubyn mō. Mōn bōx ne kam Jejumā kum,

—Bēnjadjwýr, nā bām ar akabēnkōt me karō punu jano nhy m me karō punu anhidji jarēnh kajgokambít apymaje prōt ne, ane.

<sup>18</sup> Nhy m kam arkum,

—Ā, me karō punu ne gar ano. Nhy m bep arỳm ne me karō nhō bēnjadjwýrbē Xatanaj kàjkwa kurūm tēn tỳm ba arỳm omū. Nām amikrā kēt mex ne tỳm kute na jadjēnh tamikrā kēt mex ne rōrōk ja pyrāk. Gar aje Xatanaj nhō àpēnh kujaēko amōro aje arỳm pa nhikjē 'yr rax mexja pumū. <sup>19</sup> Be, arỳm ne ba ar amā ipyma jadjā gar te kangāmē

makmē mry kakrit djàkrêja kunĩ 'ã aku'ê nhy mÿjja ipymaje ajmã ar ajo kêtumrêx ne. Nhy me me bakurê djwÿnh pyma gar ipy-mao tu kujate nhy ajmã ar ajo kêtumrêx ne. <sup>20</sup> Be, ja ne kajgo. Me karõ punu ar akabên pymaje prõt ja ne kajgo. Tãm ne ngrire. Nhy bep kàjkwakam Metĩndjwÿnh kute ar anhidji'ã pi'òk no'òk ja ne mrãmri rax. Tãm ne kubê kumkatikumrêx. Kam dja gar tu akĩnhkumrêx.

<sup>21</sup> Nãm ã Jeju kôt ba djwÿnhmã anen kam arÿm kĩnhkumrêx ne. Metĩndjwÿnh Karõ ne kum kĩnh jadjã nhy kam kĩnh rax kato. Ne kam Bãmmã amikĩnh jarên kum,

—Djũnwã, ota ga anhõ kàjkwan anhõ pyka djwÿnh. Amã ne ba amikĩnh jarê. Nã gãm me amikukãm umarmē me kute mÿjja mar rũnhjabê mÿjja ja pudju ne kam me kute amijo prĩre prãbê amijo rũnh kêtjamã mÿjjao amirĩt ne. Mrãmri Djũnwã, nã gãm ã aje anhÿrkam mrãmri mexkumrêx. Adjukaprĩkam ne ga amim me'ã karõ ne arÿm ã meo ane. Ba kam badjwÿ ikĩnhkumrêx ne wãm amã amikĩnh jarê. Nãm ã Bãmmã amijarênho ane.

<sup>22</sup> Ne kam ajte kôt ba djwÿnhmã kum,

—Ibãm ne imã kukràdjã kunĩ jarê ba kam ar o iba. Nhÿnh ne jakam me'õ prĩne idjãtari? Kati, Ibãmbit ne prĩne kute imar ne kute arÿm prĩne idjãtari. Nhy Ibãmdjwÿ. Nhÿnh ne me'õ kute ikudjwa noo Ibãm pumũnh ne kute kukràdjãkôt mar? Kati, bajbit. Bajbit ne ba prĩne inoo Ibãm pumũn kam idjukabikôt me kwÿmã kukràdjã'ã idjujarênh tē. O me kwÿmã o amirĩt nhy me arÿm prĩne ikôt kuma, ane.

<sup>23</sup> Ne kam kôt ba djwÿnh'ÿrbit akêx ne me kãxã ar amakri arkum arên arkum,

—Ar ga ne gar akĩnhkumrêx. Ar ga ne gar anoo mÿjja pumũ.

<sup>24</sup> Ba gop ar amã arê. Me kute Metĩndjwÿnh kabên jarênh djwÿnh tũmmē me bēnjadjwÿr tũmdjwÿ krãptĩ te kute omũnh prãme, ar anoo aje mÿjja pumũnhja te kute omũnh prãme, ne ar ajamako aje mÿjja marja te kute marmã. Nhy bep kati, ar gajbit ne gar anoo mÿjja pumũnh kêt kwÿ pumũn mÿjja ma. Ar ga ne gar akĩnhkumrêx ne, ane.

*Me'õ kum kurê djwÿnh kaprĩn o djuw mex.*

<sup>25</sup> Nhy kam akati 'òkam Mòjdjê kukràdjã mar djwÿnh'õ Jeju kabên maro nhÿ. Kabên maro nhÿn kãjmã dja. Mòjdjê kukràdjã mar djwÿnhja kãjmã dja. Kute Jeju no mex jabej kabimã kãjmã dja. Kute Mòjdjê kukràdjã jabej Jeju kukjêrmã, Jeju kute kukràdjã kupa'ã arênh kadjy nãrãm ne amikadjy kãjmã 'ÿr djan kum kabên ne kum,

—Bēnjadjwÿr, mã gēdja ba amijo nhy kam Metĩndjwÿnh pãnh imã itĩn rã'ã rã'ão itĩnmã imã arê? ane.

Nhy kam kum,

<sup>26</sup> —Mã ne Mòjdjê kukràdjã'ã pi'òk no'òk kute? Mÿj ne ga kam omũn arÿm ama? ane.

<sup>27</sup> Nhy kam Mòjdjê kukràdjã mar djwÿnh Jejumã kum,

—Nãm,

“Me anhõ Bēnjadjwÿr djwÿnh, me Atĩndjwÿnh dja ga amã kĩnh, amã abêo katat me kunĩ, mÿjja kunĩ jakre.

Djãm ajajkwaobit amã Metĩndjwÿnh jabêmã? Kati, ajamak, akadjwÿnhbê, akukràdjã kunĩo dja ga me amã abê.

Ne ajte amã amibu'ã me ja jabê.

Kute ga amã amijabêja pyrãk dja ga ã amã amibu'ã me ja jabêo ane”, ane.

Nãm ã Mòjdjê kukràdjã'ã me bamã pi'òk no'òko ane.

<sup>28</sup> Nhy Jeju kum,

—Nã, kôt ne ga arê. Dja ga ã ar o anhÿro aban kam arÿm tu atĩnkumrêx ne, ane.

<sup>29</sup> Nhyam kam Mòjdjê kukràdjà mar djwýnh òkre kadjwýnhbê amim,

—E kum kati, imã Metíndjwýnh jabê rax kêtê, ne imã ibu'ã me ja jabê rax kêtê, ane. Ne kam pijàm ne amijã maje,

—Nhyam ne ibu'ã dja ba imã abê? ane. <sup>30</sup> Nãm Jeju kukij nhyam kam kum,

—Ë, me'ò ne Djeruxarê kurüm kríraxbê Djeriko'ýr ruw. Ne kam tẽ. Tẽ nhyam kam arým me àkínhí wýnhràam kum nòn tẽmràm o arín kubê kubêkãmẽ kubê mýjja kunõ prõt ne kam titik ne mã prõt ne. Nhyam kam wãnh wakrekam tyko nõ. <sup>31</sup> Tyko nõ nhyam kam me kadjy Metíndjwýnh mar djwýnh'ò pry'ã tẽ. Tẽn omün kam iròbê apan mã tẽ. <sup>32</sup> Nhyam mekbê Rewi'ò, adjwýnhdjwý Metíndjwýnhmã àpênh'ò kôt tẽn adjwýnhdjwý tãm ne. Nãm 'ýr tẽn irãn omün tẽn iròbê apan mã tẽ.

<sup>33</sup> Nhyam bep me'ò, Xamarikam me ja 'ò ne arkôt tẽ. Xamarikam me ja kute me bajo kurê djwýnh ja 'ò ne arkôt tẽ. Arkôt tẽn 'ýr bõx ne omün kam kum kaprî ne. Omün kam rerek ne kum kaprî. <sup>34</sup> Ne kam me kute o tým ne kute titik kurêje kute apýnh kà rênha kum oy. Kadjwati kangôo kum oyn kam ajte mýjja kute rõny kangô pyrako kum oy. Ne kam kubêkào kupu. Príne kupun kam ta ò mryja'ã kudjin o tẽ. O tẽn atemã me'ò nhürkwã'ýr o bõx ne kam príne o djuw mexo dja.

<sup>35</sup> Nhyam akati nhyam kam pi'òk kaprî raxja amẽ kaba. Ò kikre djwýnhjamã kaban kum kungãan kum, “Ë, dja ga príne imã tãmjao djuw mexo dja, príne ikutêp imã o djuw mexo dja. Dja ga 'ã aje pi'òk kaprî krên jabej ba kam bõx ne arým ajte amã o pãnh, ajte akubyn ibõxkam”, ane.

Be, tãm ne ja. Nãm ã Xamarikam me ja'ò kum kurê djwýnh

kaprîn o djuw mexo ane. <sup>36</sup> Gop imã arê. Nhýnh ar 'òja ne kute o kamy? Djãm tẽn ne kute omünh ne iròbê àpanha? Nàr kon, djãm kôt tẽnja? Nàr kon djãm Xamarikam me ja'ò?

<sup>37</sup> Nhyam kam kum,

—Nà, me'ò kum kaprîja. Me'ò kum kaprîja ne o kamy, ane.

Nhyam kam kum,

—Nà, kôtò. Nà, ga kam gadjwý tẽn ã kudjwa akurê djwýnhho anhýro aba, ane. Nãm ã Jeju Xamarikam me ja'ò ukaprîkôt kute kurê djwýnhho kamyja'ã ujarênho ane.

*Matamẽ Marij'ã ujarênh.*

<sup>38</sup> Nhyam kam Jeju ar mã mõn kam atemã krî 'òkam bõx. Kam ne me'ò nire nhidjibê Mata. Mata ne ukaprîkumrêx ne kam Jejumã kum,

—Amrê inhürkwãmã tẽn kam anhõ kwý krên kam nòn akòkam kôt, ane.

Nhyam kam kum,

—Ã, aj mã, ba kam wãm akôt tẽn, anen kam ürkwãmã tẽn. Ürkwãmã tẽn kam 'ýr wadjàn nhý. <sup>39</sup> Nhyam Mata kanikwýnhbê Marijja nhý. Arek Bẽnjadjwýr'ýr tẽn parbê nhýn kam kãmã kôt òkren kabên maro nhý. <sup>40</sup> Nhyam Mata àpênh rax ne. Jeju ò kwý krên mex kadjy ne àpênh raxo djan kam Marijmã kabên ne. Marij kute kôt kum mýjja 'ò kupênhmã. Ne kam Jeju'ýr tẽn kum,

—Bẽnjadjwýr, djãm aje imar kêt? Ikanikwýnh ne ikôt àpênhmãn ate ari akurî ba. Ba kam bajbit ar mýjja kupênho iba. On amrê ano gê tẽn gop ikôt apê, ane.

<sup>41</sup> Nhyam kam Bẽnjadjwýr kum,

—Àpnhíre, àpnhíre Mata. Nã gãam ari mýjja man kam akabên wã jarê. Nã gãam mýjja krãptí kupê ne kôt mar ar o aban kam adjumar punu. <sup>42</sup> Nhyam bep mrãmri mýjja pydji ne mexkumrêx. Tãm ne arým Marij o nhý. Nãm ikabên maro nhý. Ja

ne mexkumrêx. Kwārīk wānh arek ikabēn maro nhỹ. Wām ije awȳr anor prām kêtê. Gêdja arek ikabēn maro nhỹn prĩne ikabēn man kam o biknor kêtukumrêx, ane. Nām ā Jeju ane. Tām ne ja.

## 11

*Ar kute Metĩndjwỹnhmā kabēn'ā arkum karō.*

*Mat 6.9*

<sup>1</sup> Nhȳm kam Jeju akati 'ōkam Metĩndjwỹnhmā amijarēnho dja. Kum amijarēnho djan kum amijarēnh pa nhȳm kam kōt ba djwỹnh'ō kum,

—Bēnjadjwỹr, gop ar imā arē. Ar ije Abāmmā amijarēnh kadjy gop ar imā arē. Mā dja bar kum ikabēn ja o? Djuāobit ne kōt ba djwỹnhmā kabēn'ā karō. Gadjwỹ dja ga ar imā 'ā karō bar akudjwa Abāmmā amijarēnho iba, ane.

<sup>2</sup> Nhȳm kam arkum,

—Ē, dja ga goja ar aje Metĩndjwỹnhmā amijarēnh kadjy kum,

“Djũnwā, gē me ame:xo amex man amim ajarēn abenmā ajarē. On me kadjy abēnjadjwỹr ne ar meo aba.

<sup>3</sup> Myt kunīkōt ar ijajkwa mānhkutā mā ar imā inhō kwỹ krēn djā ngā.

<sup>4</sup> Dja bar akam ijaxwe ga tu ar ijaxweo akno. Ar badjwỹ dja me'ō ar ikam amikrā bar akōt tu o akno. Kam dja ga ar ijaxweo akno.

Godja me kute ar imā axwe'ā àpnēnh katā ga ga ar ijo tỹx bar mebē idjām tỹx ne ijaxwe kêt. Tām ne ja.”

Dja gar ā kum anhỹr ar aba, ane.

<sup>5-6</sup> Ne kam ajte ar kute Metĩndjwỹnhmā amijarēnh 'āno ām kadjy arkum kabēn jarēn arkum,

—Ga ren ar ajō anhōbikwa'ō ajbir bōx, akamāt kō ipōkri bōx ga ren aje kadjy mỳjja'ō byrmā tēn ren anhōbikwa 'ōmā kum, “Nār, imā

angā, anhō djwỹ 'āmro amānhkrut ne ikjêkêt imā 'ō ngā gē inhōbikwa kukrē. Nām iwỹr y:n kam ajbir bōx. Ba kam kadjy mỳjja jabej tē. Kadjy inhō mỳjja kêtukumrêx ba kam kadjy ije akutā djwỹ kwỹ byrmā tē. Gop on imā angā.”

<sup>7</sup> Nhȳm ren anhōbikwaja arek ōto nōr prāme ren amā,

—Kati, inhōtdjwaa. Ije amā ōr prām kêt. Arỹm ne ba kikre'ā ijē ne arek ikrao inhikwā. Kājma idjām prām kêtê. Amũ dja ga tē gē me'ō amā 'ō ngā, ane.

<sup>8</sup> Bir be, ba ar amā arē. Ga kam ren arek 'ā adjā'wỹro dja, mā 'ā 'uw nhȳm kam ren arỹm kājma djan ren, “Ba on kum kungā gē wām o tē ba gop ikujrēnh kêt ne gēt arek inhōto nō”, ane.

Djām ar aje abeno anhōbikwakam ne amā kungā? E kum kati, ē, aje mā 'ā 'wỹrkam ne amā kungā. Apijām kêt ne aje 'ā 'wỹr 'āno adjām kam ne amā kungā, ar atu mānhkutā amā kungā.

<sup>9</sup> Bir be, kam ne ba ar amā, “Dja gar tu mỳjja 'ā 'uw, mā mỳjja'ā 'wỹro tē nhȳm Metĩndjwỹnh arỹm ar amā kungā. Gar aje mā mỳjja jabej ne kam arỹm kum akatorja pumũ. Ne kam ajte mā kikre kabem ō kikre djwỹnhmā akabēno aku'ē nhȳm arỹm kute ar amā kikre 'ā 'yrja pumũ.” Dja gar ā Metĩndjwỹnh 'wỹro ane. <sup>10</sup> Be, me kute mỳjja'ā 'wỹr 'āno āmja dja arỹm Metĩndjwỹnh memā kungā. Gar me kute mỳjja jabej ne kum apōxja pumũ. Ne kam ajte me kute kikre jajkwa krekremā kabēno ku'ē nhȳm arỹm me kute memā kikre'ā rēnhja pumũ. Dja gar gadjwỹ ā mỳjja'ā Metĩndjwỹnh 'wỹro ane nhȳm arỹm ar amā kungā.

<sup>11</sup> Nhỹnh ne ar akra'ō tēn tep'ā ar ajuw gar kum kangā ngā? <sup>12</sup> Ne ōkrēnē'ānh ngrē'ā ajuw gar kum makre ngā? Arkati. <sup>13</sup> Be, gar ajaxwekam aje akramā mỳjja mex

nhõrja pumũ. Nnym bep kãjkwakam ar Abãm mextire ta gêdja ar amã amũ mÿjja mex nhõro ar ajakren ar amã Amikarõ ngã. Gêdja gar Metĩndjwÿnh Karõ'ã 'uw nnym tu ar amã kungã, ta mextire ne ar baja gêdja ar amã Amikarõ ngã, ar amã Amikarõ jano, ane. Nãm ã Jeju me kute mÿjja'ã Bãm 'wÿr nnym õdjãnhkõt kute memã Amikarõ nhõrmã ã memã 'ã ujarêho ane.

*Me kute Jejuo Xatanaj nhõ àpênh.  
Mat 12.22; Mak 3.20*

<sup>14</sup> Nnym kam me karõ punu ar me'õo ba nnym kabên kêt kumrêx ne. Me karõ ajmã ajkwa o nnym kabên kêt kumrêx ne. Nnym kam Jeju bõm kumê. Bõm kumê nnym arÿm mã tê nnym arÿm kabên ne. Nnym me kam ari aben pumũn Jujukam no tyn kumex. <sup>15</sup> Nnym bep me kwÿ ne me abenmã kum,

—Kê, djãm Metĩndjwÿnh kabênkõt? Kati, Bedjêbu. Me karõ punu nhõ bënjadjwÿrbê Bedjêbu kabênkõt uma proo ne ar bõm me karõ rênho ba, ane. Xatanaj nhidji 'õbê ne Bedjêbu.

<sup>16</sup> Nnym ate me kwÿ kum,

—Goja on mÿjja'õ nhipêx ba me omũ, Metĩndjwÿnh puma proo mÿjja pumũnh kêt goja 'õ nhipêx ba me omũ, ane. Jeju kute Metĩndjwÿnh puma proo kute mÿjja pumũnh kêt'õ nhipêx mar jabej ne me kute kabimã kum ane. <sup>17</sup> Nnym Jeju ta prĩne me õkre kadjwÿnhbê me kabên ma, me kute Bedjêbu puma proo ne ar bõm me karõ rênho ba anhÿrja me kadjwÿnhbê prĩne kuman kam memã kum,

—Godja me õ pyka tãmkam abeno kurê djwÿnh mã ne ren me kam nê? Nãm ren ã me anen kam ren arÿm amijo ajkê. Nnym ren me ta ùrkwã tãmkam abeno kurê djwÿnh mã ne ren me kam nê? Nãm ren ã me anen kam ren arÿm abeno apêx.

<sup>18</sup> Bir be, Xatanajdjwÿ ta õ àpênhmê ne ren abeno ajkij ne ren abeno kurê djwÿnh, mã ne ren me kam nê? Mã ne ren Xatanaj nê? Nãm ren anen kam ren arÿm abeno apêx. Nã gãm me we ijã, “Bep Bedjêbu puma proo ne ar bõm me karõ punu rênho ba”, ane. Ije gêdjãm Xatanaj ta ajte jãm õ àpêho akêx ne ar bõm rênho ba. <sup>19</sup> Ba ren Bedjêbu kabênkõt ren bõm ar me karõ punu rênho iba nnym ren mÿj me'õ kabênkõt ne me anhõ àpênh bõm ar me karõ rênho ba? Ar jadjwÿ ne ar bõm me karõ rênho ar o ba. Djãm ar adjwÿnhdjwÿ ne ar we Xatanaj kabênkõt ar bõm me karõ rênho ba. Ga ren me arkum ja jarê nnym ren ar me amã, “Ije tã djãm Xatanaj ta kute õ àpêho bikêho ba got.”

<sup>20</sup> Nnym bep kati, Metĩndjwÿnh puma proobit ne ba ar bõm me karõ punu rênho iba. Ga kõt arÿm Metĩndjwÿnh me awÿr bõxja pumũ. Metĩndjwÿnh kute me apytãr ne me akadji bënjadjwÿr ne kute me ajo bamã me awÿr bõxja pumũ. <sup>21</sup> Ba ajte atemã me'õ'ã amijakre ga me ama.

Me'õ ne õ kikrekam kruwmê rop'io nhÿ ne o õ nèkrêx pytãn o nhÿ. Umao amim õ nèkrêx pytãn o nhÿ. Nnym me'õ ajmã kute õ nèkrêx o kêt kumrêx. <sup>22</sup> Nnym bep atemã me'õ kute umao akrenh mex ne tu bõx ne kruw tã o tÿm ne kubê kunĩo põx ne kam kubê nèkrêxo prõt ne, kubê mÿjja kunĩo prõt ne. Kute umao õ nèkrêx pytãr ne o ÿrja tu kubê o prõt ne memã kungrà. Ba ne ba ipymao Xatanaj jakrenh mex ne kam amijo aptãn kubê õ krito iprõt ne.

<sup>23</sup> Me'õ kum ikĩnh kêt ne arÿm mrãmri ijo kurê djwÿnh ne. Ne ikõt àpênh prãm kêt ne arÿm Xatanajkõt apê. Dja me'õ kum ikĩnh kêt ne kam ajte kum Xatanaj kĩnh kêt ne kam amijã, “Ba dja ba ate ikrãn ar mrã, amidjwÿnhbit man ar o mrã”, anen

arým Xatanajkôt apê, ane. Nãm ã Jeju memã ane.

<sup>24</sup> Ne kam ajte me karõ punu'ã ajarên memã kum,

—Me karõ punu pydjın kute ar me'õo baja ne arým kurüm katon tẽ. Ne kam te ar mrã, ngõ kêt kam ar mrã, te ajte kute me'õmã àr ne tyk djã kêt mã ar mrãn kam akubyn kute ar me'õo ba tùmja'yr tẽ. Ne kam amim, “Ba gop inhürkwã kurüm ikatorja ajte 'yr tẽ”, ane. Kute ar me'õo ba tùm'ã ne ürkwã jarê. <sup>25</sup> Ne kam amim ba djã tùmja'yr tẽn bõx ne omũ nhym arým mexkumrêx. Me karõ 'õ kute o ba kêt nhym prıne kadjwýnhbê mex ne arým kam mýjja katãt. <sup>26</sup> Nhym kam kadjy mã me karõ punu'yr tẽ. Ne kam mekam me kwý japrõn 'yr meo mõn meo bõx. Nãm me karõo 7 ne o bõx ne me'õ jamã meo wangij nhym kam me kam ar ba. Kute me karõ punuo 7 ne o bõx tãm ne axweo kute õbê pydji kute ar o ba tùmja jakrenh mex ne kam arým o punu rax ne. Kãjbê punuri ne kãjbê punu nhym bep kute o 7 ne o bõxja ne arým o punu rax ne. Nãm ã Jeju me karõ punu'ã ujarênho ane.

<sup>27</sup> Nãm memã kabẽno ãm rã'ã nhym me ipõkri me'õ nire kãj bê kum kabẽn ne kum,

—Ô kum anãbit ne kĩnhkumrêx. Abê bẽnjadjwýr raxkam ne ga anã tikkremã wadjàn ruw ne anã kã kaõ nhym anã kĩnhkumrêx ne, ane.

<sup>28</sup> Nhym kum,

—Bep me kute Metĩndjwýnh kabẽn mar ne 'ãno ãm ne kute kôt amijo baja, me tãm gẽdja me mrãmri kĩnhkumrêx ne, ane.

*Me kute Jeju kute mýjja pumũnh kêt'õ nhípêx jabej.*

*Mat 12.38*

<sup>29-30</sup> Nhym kam me Jeju'yr ban bõxo dja. 'Yr ban bõxo djan 'ã aben pydji mõn o mõn o mõn í 'ã uti: ane. Me kute õbê kum,

—Goja on mýjja pumũnh kêt'õ nhípêx ba me omũ, anhýr jamã ne Jeju,

—Me akamingrãny ne ga me ajaxwekumrêx. Nã gãm me abentã ijuw ne imã, “Mýjja pumũnh kêt'õ nhípêx. Ba me goja omũn kam tu amim amarkumrêx”, ane. Bep kati, djã bãm me amã ipêx kêt kumrêx ne. Ê, mýjja pydji dja ga me omũ. Gẽdja ba ty. Nhym ijã akati amãnhkrut ne ikjêkêt ba akubyn itĩn ne ikato ne kam me amã Metĩndjwýnh raxo amirĩt ne. Ga me me bakukãmãrebê Djõnaj tep tikkrekam nõrja pumũ. Tep tikkrekam nõr nhym 'ã akati amãnhkrut ne ikjêkêt nhym ajte tep tikkre kurüm kator ne kam pykabê Niniwekam me ja'yr tẽm ne kute memã Metĩndjwýnh raxo amirĩtja pumũ.

Badjwý ije amijo inhĩ ne me awýr ibõx gẽdja ba ty ne akubyn itĩn ne ikato ga kam me akamingrãny amim Metĩndjwýnh raxkôt ama.

<sup>31</sup> Godja Metĩndjwýnh kute memã axwe pãnh jarên nhõ akati kato nhym kãjkwã nhirê kurüm bẽnjadjwýr ni ajte katon kam me akamingrãny, me amymã axwe jarê. Mýkam? Bir, amrêbê ne me bakukãmãrebê Xaromão no mexkumrêx ne kute prıne mýjja mar. Bẽnjadjwýr rax. Nhym arým bẽnjadjwýr nija arým 'ã ujarên ma. Arým Xaromão'ã ujarên man kam kute omũnh prãm ne. Ne kam nĩnh kãjkwã nhirê kurüm 'yr tẽn bõx. 'Yr bõx ne kam prıne kabẽn ma. Ê, ba ne ba Xaromão kurãm irax. Nã bãm iraxo bõx, jakam, me akam bõx ga me imar kêt ne, ikanga mex ne. Kam dja bẽnjadjwýr nija me amã axwe jarê.

<sup>32</sup> Nhym Niniwekam me jad-jwý me amã axwe jarê. Godja Metĩndjwýnh kute memã axwe pãnh jarên nhõ akati kato nhym Niniwekam me ja ajte apõx ne

kam me akamingrānymā axwe jarē. Mýkam? Bir, Djônaj ne kàj bê memā Metīndjwýnh'ā ajarē nhym Niniwekam me ja kuman amim katon wānh axwemā iren Metīndjwýnh'ýr amijo akēx ne. Ē, ba ne ba iraxo Djônaj jakrenh mex ne. Ga me tu ate akrān ikanga mex ne. Kam ne ba me amā, “Me ja dja me akubyn apôx ne arým me amā axwe jarē”, ane. Nām ā Jeju memā ane.

*Me kute Metīndjwýnh kabēn kôt amijo ba'ā ne a'u jakre.*

*Mat 5.15, 6.22*

<sup>33</sup> Ne kam ajte memā irā jarē ne memā,

—Djām me kute ngōnhpōkmā angjēnh ne kute mýjja 'ōkôt o bipdjur got? Ne kute kào 'ā pro got? Kati, ngōnhpōk ne me kum angij ne tu kēnhkam umjuw nhym memā kikre kre kurwyo ku'ē. Nhym me mrān wangij nhym memā irākumrēx.

<sup>34</sup> Nhym me nodjwý. Me noo ne me kute mýjja pumūnh. Dja ga me ajō ano mex, ajmā ano kute kēt jabej arým mrāmri arīt týxkumrēx ne aje mýjja pumūnh. Aje mrāmri ne me a'uri mrānh mex pyrāk. Nhym bep dja ga ano rā, ano punukumrēx jabej arým arīt kēt ne aje mýjja pumūnh kēt. Aje mrāmri ne me akamāt kô tykkam mrānh punu, mrānho bikār mrānh ja pyrāk.

<sup>35</sup> Gora me amijāno djan Metīndjwýnh kute me amā amikukrādja jarēnhkôt amijo aba. Gédja ga me kôt amijo aba kēt jabej, kute me amā amikukrādja jarēnhja kôt amijo aba kēt jabej arým aje me'ō akamātkam ba pyrāk, me aje me'ō akamāt kô tyk týxkam mrānho bikār mrānh ja pyrāk.

<sup>36</sup> Nhym bep dja ga me mrāmri Metīndjwýnh kabēn kunīkôt amijo abakumrēx ne kam me aje me'ō mrāmri ngōnhpōkti nhirākambit

mrānh ne kam akamāt kô tykkam mrānh kētkumrēx ja pyrāk.

*Jeju mekbē pardjēumā bēn týx.*

*Mat 23.1; Mak 12.38*

<sup>37</sup> Nām memā arēnh pa nhym kam mekbē pardjēu'ō kum, —Amrē ikôt tēn ikutā anhō kwý krē, ane.

Nhym Jeju kum “Ā” anen kam kôt tēn ūrkwāmā wadjān nhý. <sup>38</sup> Kute aminhikra ku'ōnh kēt ne nhý nhym omūn kam ōkre kadjwýnhbē amim,

—Ije tō mýj nā? Ije kum bep kute me bakukrādjakôt aminhikra ku'ōnh kēt. Ō kwý krēn kadjy kute aminhikra ku'ōnh kēt, ane.

<sup>39</sup> Nhym kam Bēnjadjwýr kum, —Kē, me abē pardjēu ne ga me ijā akabēn ne anhōkre kadjwýnhbē amim, “Kute me bakukrādjakôt aminhikra ku'ōnh kēt”, ane. Bep me ga ne ga me ajēx ne we amijo akabēn mex. Nā gām me aje mrāmri ne me kute ngōnh krāmē ngōnh puror nhībūmbit pōnh ne kute kre pōnh kēt nhym krekam mýjja kakrātyk pyrāk. Be, nā gām me ā we katāt amijo abao ane. Nhym kam me me akrākābit pumū nhym kam kute me amex pyrāk. Nhym bep kati, me akadjwýnhbē ne ga me apunu rā'ā. Me akadjwýnhbē ne me amā me ō nēkrēx prām ne 'ā angryk ne ajaxwe'ābit aje amim karō rā'ā. Kam ne ga me akadjwýnhbē apunu rā'āja. <sup>40</sup> Me ano kētkumrēx. Djā nām me anhipēx djwýnh me akrākābit 'y? E kum kati, nām me akadjwýnhdjwý 'y. Kam ne kute prīne me akadjwýnhbē me apumūnh ne kum me akadjwýnhbē me amex prāmikumrēxja. <sup>41</sup> Nā gām me we amijo akabēn mex ne, ne amijo katāt amrānh, bep kati, me akadjwýnhbē apunu. Dja ga me me 'uwtīmadjwý anhōdjānh ne me 'uwtīkam adjukaprīn memā mýjja ngān kam arým akadjwýnhbēdjwý

amexkumrêx ne, akrākāmē akad-jwýnh kunī mexkumrêx ne, me 'uwfīkam me adjukapřīkam.

<sup>42</sup> Me abē pardjêu dja ga me ĭ me biknor tokry djākam mō. Watī:re. Mýkam? Me aje Metīndjwýnhmā mýjja kakritbit nhōr ne kam aje mýjjabē kumkatija aje kum ōr kêt kam. Nā gām me mýjja kakrit, ōmrō djānh djā, pi'ōmē djwý kakrit kunī ne ga me Metīndjwýnhmā ikjē rēn kum kryre ne angā. Ne kam ga abēngōkreja amā abē kêt ne katāt meo aba kêt kumrêx ne. Me aje kum kryre ne ōrja ne mrāmri tu mexkumrêx. Mýkam ne ga me mýjja raxjadjwý kum ōr kêt ne? Mýkam ne ga me amā Metīndjwýnh jabēn katāt meo abaja kêt ne. Ja ne ga me aje marmān ate mýjja kakritbit ma.

<sup>43</sup> Me abē pardjêu dja ga me ĭ me biknor tokry djākam mō. Watī:re. Mýkam? Me aje amijo rūnhbit mar přām kam. Me kute aben pydji djākam me amā me bēnjadjwýr rūnh krī djābit kīnhkam. Nhy m me me ipōkri me kute me amā kabēn ne me amā rūnh jarēnho kumex jabit ne ga me amā kīnh.

<sup>44</sup> Me ga dja ga me ĭ me biknor tokry djākam mō. Watī:re. Mýkam? Me aje pyka krā pyrākkam. Nā gām me aje pyka krā arým biknor ne pyka mē bimrāk ne kute pykakumrêx pyrāk. Nhy m me kute mar kêt ne tu ibly mrānhja pyrāk. Ne kam kadjwýnhbē ne punu, kad-jwýnhbē ne mýjja kro. Nā gām me ā akad-jwýnhbē apunu ane nhy m me kute me amar kêt. Nām mýjja 'êx ne krākābit mex ne kam kadjwýnhbē ā punu ane. Nām ā Jeju mekbē pardjêu jaxweo amirīto ane.

<sup>45</sup> Nhy m kam me kute Mōjdjê kukrādja mar djwýnh'ō Jejumā kum,

—Ě, bēnjadjwýr, nā gām me bad-jwý me ijapřý. Nā gām akabēn jao me badjwý ā me ijo ane, ane.

<sup>46</sup> Nhy m kam Jeju kum,

—Ije nā, me aje Mōjdjê kukrādja mar djwýnhdjwý dja ga me ĭ me biknor tokry djākam mō. Watī:re. Nā gām me akabēn kajgoobit ar memā Metīndjwýnh kabēn jarēnho aba. Djām Metīndjwýnh kabēn? Kati, me ga akabēno ne ga me ar me anoro aba. Ga kam me ga kôt ar aba kêt ne. Nhy m me te amijo anen kam, “Ije mā dja ba me nē”? ane. Me aje ā meo anhýrkam ne kute mrāmri ne me kute me kad-jybit jēnh rūnho atom ne kam kute kāmā memā arī kêt kumrêx ne kute memā tur kêt kumrêx ne kute me ibūm nēje kum katy kêt kumrêx ja pyrāk.

<sup>47-48</sup> Me ga dja ga me ĭ me biknor tokry djākam mō. Watī:re. Mýkam? Me amā Metīndjwýnh kabēn jarēnh djwýnh par přām kam. Me akukāmāre ne Metīndjwýnh kabēn jarēnh djwýnh kwý pa:, ga me kam anhingēt nhy mry krā přīne kum o djuw mex ne. Me anhingēt bē Metīndjwýnh kabēn jarēnh djwýnh par djwýnhmē me aje aben pyrāk. Me akukāmāre kute me parja ne ga me omūn kam kôt amijo mōn kam we imry krā přīne kum o djuw mex ne.

<sup>49</sup> Kwārīk rā'ā. Metīndjwýnh ta ne no mexkôt, ta kute amim 'ā karōkôt arým me amā, “Ě, dja ba me amā ikabēn jarēnh djwýnh janon inhō āpēnh jano ga me kwý pan kwýo ajkē”, ane. Djā nām kupa'ā arē? Kati, kōnh ne kum kudji. Ga me aje me paro amōrja pumū. Kam ne Metīndjwýnh arým pānh jarē.  
<sup>50</sup> Me akukāmāremē ne ga me me kraxrūm Metīndjwýnh kabēn jarēnh djwýnh paro tē. Paro tēn paro tēn arek me kamrō kapīn o tē. Nhy m Metīndjwýnh arým meo ngryk ne kam gormā me ajabatānhmā pānh jarē.  
<sup>51</sup> Nā gām me akukāmāre Abeu bīno kurētuw ne kam ijukri me ja paro tēm tāmtā: jakam arek o tē ne kam Djakarij'ýr bōx ne



kam Metĩndjwýnh nhõ kikretimẽ õ ngõnho ki kaẽxkam kubĩ.

Nà, ã, ba me amã arẽ. Metĩndjwýnh ne arým meo ngryk ne. Ne kam me akamingrãnymã arým pãnh jarẽ. Me ga dja Metĩndjwýnh me akukãmãre kute me imex tũmja pãnh me ajo ajkẽ.

<sup>52</sup> Me aje Mõjdjẽ kukràdjã mar djwýnh dja ga me ĩ me biknor tokry djãkam mõ. Watĩ:re. Ga me aje memã Metĩndjwýnh kabẽno amirĩto atẽmmãn ate ajte mekbẽ udju. Nym me te kute amim Metĩndjwýnh marmã. Nã gãm me aje mrãmri ne me kute mekbẽ kĩkre'ã ijẽn nhĩ'ãm kam o kajkep djã rẽn nhym me te kute kĩkre'ã rẽn ne ngjẽn prãme kapõtã ku'ẽja pyrãk. Ga me kam ga Metĩndjwýnh mar kêt ne ajte me jadjwýbẽ aptã, ane. Nãm ã Jeju memã bẽn tỹxo anen kam katon mã tẽ.

<sup>53-54</sup> Nym kam mekbẽ pardjẽumẽ me kute Mõjdjẽ kukràdjã mar djwýnhmẽ Jeju jabej rĩt mõ. Jeju kute Mõjdjẽ kukràdjã'õ kupa'ã arẽn jabej ne me umaro dja. Ne kam mã kukijn mã kukijn mã kabẽn'ã kum apnẽn ajte kum,

—Goja rã'ã ajte arẽ, ba me kuma, ane.

Jeju kute kupa'ã arẽn nhym me kute o tỹm ne bĩnmã ne me ã ane. Nãm me te kute Jeju'ã kabẽn punu nhõrmã. Kute kabẽn punu 'õ jarẽn nhym me kute 'ã kabẽn punu nhõrmã te abej umaro dja.

## 12

*Kute memã kum, “Amã me uma kêt” jarẽn.*

*Mat 10.26*

<sup>1</sup> Nym me Jeju'ã bikprõnho dja. 'Ã bikprõnho djan o djan o djan ĩ 'ã utĩ: ane. Kute pi'õ pyrãk. Ne ĩ ãm ta aben par'ã ku'ẽn ĩ ta ikjẽo aben rẽ, me krãptĩkam. Nym kam Jeju amikõt ba djwýnh kumrẽxmã kum,

—Gora ar aminẽje me wã pumũ, aminẽje mekbẽ pardjẽu jaxwe 'ãno

dja. Nãm me 'ẽx ne kute mex pyrãk. Nym bep kati, me kadjwýnhbẽ ne me punukumrẽx. Me õkre kadjwýnhbẽ ne me axwebit kute mar ne 'ã amim karõ. Me axwe kute djwý nhigot djã pyrãk. Gẽdja amũ me'õ'ýr bõx ne amũ me'õ'ýr bõx ne amũ me'õ'ýr bõx ne ĩ mekmẽ amrã ne ĩ me kunõ tuknĩ. Kam ne ba ar amã, “Gora ar aminẽje me wã pumũ”, ane.

<sup>2</sup> Djã nãm me kadjwýnhbẽ axweja bipdjur rã'ãmã? Kati, dja ĩ amirĩt ne. Nhýnh ne mýjja bipdjur'õ me kute omũnh kêtã? Ne me kute mýjja pudjur'õ mar kêtã? Adjým, dja ĩ kunĩ amirĩt ne. Dja mýjja pudjur, mýjja o bipdjurja ĩ kunĩ amirĩt ne. <sup>3</sup> Dja gar te akamãt kõ tykkam abẽn prĩkam abenmã mýjja jarẽ nhym me ĩ tu irãri arẽnho kumex. Dja gar te amijã ijẽ, kĩkre kadjwýnhbẽ amijã ijẽn ajte aben jamakri ajajkwa momokkam abenmã mýjja jarẽ nhym me tu kãj bẽ abenmã arẽ. Dja amirĩt ne. Dja me kuman kam kãj bẽ abenmã arẽ, kĩkrekõt arẽnho ipõk ne, ne ngãbẽ abenmã arẽ.

<sup>4</sup> Ë, ar apa, inhõbikwa ar, ba ar amã arẽ. Kwãrĩk wãnh ga ar amã me kute ar aparja puma kêt. Me ja gẽdja me ar akrãkãbit par kajgon kam ijukri kute ar akadjwýnhbẽ ajmã ar ajo kêt. <sup>5</sup> Kati, ba ar amã arẽ. Me'õ pydji dja ga ar amã uma. Kute me bĩn ne kute ijukri me biknor tokry djãkam me rẽn, jabit dja ga ar amã uma. Be, ba ar amã arẽ, Metĩndjwýnhbit dja ga ar amã uma.

<sup>6</sup> Ë, mã ne kwẽnhnẽ pãnh kute? Kwẽnhnẽ ne pãnh ngri:re. Kwẽnhnẽ ne amãnhkrut ne amãnhkrut ne ikjẽkêt kam pãnh birãm ngõnho pi'õk kaprĩ amãnhkrut. Nã, tãm. Nhýnh ne Metĩndjwýnh kwẽnhnẽ jao akno? Djã nãm o akno? Kati, nãm me mýjja kakrit, te kubẽ kwẽnhnẽ nhym prĩne o djuw mex ne. <sup>7</sup> Be, ar ja man atĩn prãm kêt. Ar ga ne gar

kwênhne kuràm abê kumkati. Ar ga ne gar abêngôkre ne anhi pÿnhkôt kwênhne krãptĩ kuràm arax. Be, kute kwênhneo djuw mexja pumũ. Nhy m bep ar ga. Ar ga dja prĩne ar ajo djuw mex ne. Ga prĩne kute me bamar ne kute me bajãno ãmja pumũ. Mÿjja'õ kubê biknor kêt. Nhÿnh ne mÿjja'õ kubê akuno? Ga kute me bakĩ'ã akreja pumũ. Kam ne ba ar amã, “Kwãrik wãnh ga ar adjumar punu kêt ne amã mÿjja puma kêt”, ane.

<sup>8</sup> Ba ar amã mÿjja 'õdjwÿ jarê. Me kute amijo ipytàr ne kute me krãptĩ nhipôkri kute, “Nà, ba ne ba arÿm amijo Jeju pytà”, anhÿrja gêdja ba badjwÿ ije amijo inhĩ ne me awÿr irwÿk badjwÿ Metĩndjwÿnh kadjy mrãnh djwÿnh nhipôkri, “Nà, ba inhôbikwa ne wã”, ane. Dja ba ã ane. <sup>9</sup> Nhy m bep me kute imar kêt ne kum ikĩnh kêt, me kute, “Ije bep ije tãwã mar kêt”, anhÿr, me tãm gêdja ba badjwÿ amipãnh Metĩndjwÿnh kadjy mrãnh djwÿnh nhipôkri, “Ije tãwã mar kêt”, ane.

<sup>10</sup> Ë, gêdja me'õ ijã kabên ba ije amijo inhĩ ne me awÿr irwÿk, dja me'õ ijã kabên nhy m Metĩndjwÿnh tu o aknon mar kêt ne. Nhy m bep me'õ kute Metĩndjwÿnh Karõ japrÿ, tãm gêdja Metĩndjwÿnh mar rã'ã rã'ã ne, mã kam ngryk ne.

<sup>11</sup> Dja me ĩ ar ajo ajkê. Gêdja me ar apa 'amÿn mekbê idjaer bikprõnh djã'ÿr ar ajo bõx. Ne kam ajte me bënjadjwÿr krĩ djã'ÿr ar ajo mõ. Dja me ar apa 'amÿn ar ajo mõn amikabem ar apumjuw ne ar ajaxwe jabej ar akukjêro nhÿ. Kwãrik wãnh gar ajõ, “Ije, mÿj dja ba ikabên nê? Mÿj dja ba arê? Mã gêdja ba gêt ikabên on arê”, anhÿr kêt. Dja gar tu ate akrãn amikam atĩn prãm kêt. <sup>12</sup> Metĩndjwÿnh Karõ ta dja ar amã kabên jarê. Me kabem adjãmkam dja amã kabên jarê gar kam kabêno akabên ne memã akabên jarê. Nãm

ã Jeju kôt ba djwÿnhmã kabên jarêno ane. Me kute kôt ba djwÿnho bikên nhy m ar kute memã kabên jarênhmã ã arkum anhÿr djwÿnhrà m kabên jarêno ane.

*Me'õ nhõ mÿjja raxmã Jeju kute kabên jarênh.*

<sup>13</sup> Nhy m kam me krãptĩ nhipôkri ne me'õ kãj bê kum,

—Bënjadjwÿr, gop ikamymã arê gê imã nèkrêx kwÿ ngã. Ibãm tyk kutã ne ar imã nèkrêx'ã karõ bar ije ar o ibamã nhy m ikamy bõx ne tu jãm o amijakren utàn mã o mõ. Kute imã kwÿ nhõr kêt kumrêx, ane.

<sup>14</sup> Nhy m kam Jeju kum,

—Ije mÿj me'õ kabênkôt gêdja ba aben nêje ar akukrà. Ne mÿj me'õ kabênkôt gêdja ba akamy kutã nèkrêx kwÿ byn amã kungã? Djãm kadjy ne ba me awÿr tẽ? Kati, ane.

<sup>15</sup> Ne kam me kunimã kum,

—Gora me amijãno djan amã nèkrêx prãm kêt. Kwãrik wãnh ga me anhõ nèkrêx rũnh ne anhõ nèkrêxo adjãptàr ne ar o aba kêt. Djãm me kute amim nèkrêxo ãptàr ne o bakam umar mex got, kôt me kĩnh got? ane.

<sup>16</sup> Ne kam memã me'õ'ã ujarênh jakreo tèn memã,

—Me'õ ne õ nèkrêx krãptĩ ne õ purkamdjwÿ djwÿ krãptĩ. Bãygogoremê bãy mẽ djwÿ kunĩ ingrõt ne kumex. <sup>17</sup> Nhy m kam, “Ije, mã dja ba on? Nhÿnh gêdja ba inhõ bãygogomê bãy kumexjao atom ne 'ã man ar o iba”? ane. <sup>18</sup> Ne kam amim, “Goja, nã, gêdja ba bãygogo nhõ kikre kryreja ngràn kam ajte akãjbê rũnh nhipêx ne kam kam o atom ne kumex ne. <sup>19</sup> Ije nã, dja ba o ane nhy m arÿm mrãmri inhõ nèkrêx kumex. Mrãmri ne ba arÿm amimex ne. Gêdja 'ã amex krãptĩn kumex rã'ã ne. Jakam gêdja ba idjãpênh krãtan ikõkam kôt ne inhõ kwÿ krên kôt ikõn kam ikĩnh katibit ma”, ane.

<sup>20</sup> NhyM Metĩndjwŷnh kum, “Nã gãM ajbã. Akamãt ja tãmkam gẽdja ga aty. Nã bãM te amexmã akabi ga ademã. NhyM nãr anhõ nõkrẽxwã? Mŷj kadjy ne ga anhõ nõkrẽx ar o aba? NhyM gẽdja amŷrbẽ ar o ba”? ane.

<sup>21</sup> Bir be, nãM ã me kute amim Metĩndjwŷnh mar kêt ne kam kute õ nõkrẽxbit mar ne kute amim o atommã o atom kajgo ane. NãM amimex ne kam Metĩndjwŷnhmã mex kêtumrẽx ne, ane.

*Amikam umar punu nõje arkum karõ.*

*Mat 6.25*

<sup>22</sup> Ne kam ajte kõt ba djwŷnhmã kum,

—Bir, kam ne ba ar amã, “Kwãrĩk wãnh gar amikam adjumar punu kêt ne anhõ kre kadjwŷnhbẽ amim, ‘Mŷj dja ba kukrẽ’?”

Nãr kubẽkã’ã, ‘Mŷj kubẽkã dja ba angij’? anhŷr kêt.” <sup>23</sup> Metĩndjwŷnh ta ne gwaj bajo tĩn ne, ga gwaj batĩn ne ar babaja pumũ. Ja ne gwaj bamã mex, ja ne mrãmri wŷnhĩ. NhyM bep me õ ne kajgo, djwŷy ne kãjbẽ. NhyM bep Metĩndjwŷnh ne gwaj banhipẽx. Ja ne gwaj bamã mex, ja ne mrãmri wŷnhĩ. NhyM bep kubẽkã ne kajgo. Kubẽkã ne kãjbẽ. Kwãrĩk wãnh ar amikam adjumar punu kêt.

<sup>24</sup> Ë, gop ar bãrire ja pumũ. Kute amim pur jadjwŷr kêt. Kute amim djwŷy kre kêt. Kute amim mŷjjaõ atom kêt. Nhŷnh got õ bãy nhõ kĩkre, nãr o atom djã? Kati, kwẽnhne ne ta ar ba, nhyM kam Metĩndjwŷnh prĩne o djuw mex ne. Kwẽnh kute amim djwŷo atom kêtja pumũ. Ar ga ne gar kwẽnhne kurãm amexkumrẽx. Ne ar araxo kwẽnhne jakrenh mex ne. Dja Metĩndjwŷnh kwẽnhne kurãm prĩne ar ajo djuw mex ne.

<sup>25</sup> Nhŷnh ne me’õ ta ajkwao, mŷjja kam umar punuo, amũ tyk kêtã aminhõ akati kamẽ? Kati.

<sup>26</sup> Gar aje mŷjja ngrĩre te o anhŷrja

pumũ. Gar aje mŷjja ngrĩre ja mar kêtja pumũ. Metĩndjwŷnhbit ne kute mar. Ajbit kute me tĩn nhĩjukri kute amidjar mar, kumãbit ne amirĩtkumrẽx. Ne kute me bajo djuw mexjadjwŷy mar, prĩne kute mar, kumã ne mrãmri amirĩtkumrẽx. Kam gẽdja me bajo djuw mexkumrẽx. Bir be, mŷkam ne gar amikam atĩn prãm ne amikam adjumar punu? Kwãrĩk wãnh gar amikam adjumar punu kêt.

<sup>27</sup> Ë, ar kapõtkaM pidjõrãja pumũ. Pidjõrã ne ta ingrõt ne kumex. Apẽnĩh kêtumrẽx. Ne kute amim kubẽkã kayr kêt. Ë, ba ar amã arẽ, bẽnjadjwŷr raxbẽ Xaromãõ ne kute kubẽkã mextire jangjẽnhkam kĩ:nhkumrẽx. NhyM bep pidjõrãja ne mex, kĩnho Xaromãõ jakrenh mex ne. <sup>28</sup> Metĩndjwŷnh ta ne pidjõrã nhĩpẽx nhyM kam mexkumrẽx ne. Rã abenon kumex ne kam kĩnhkumrẽx. NhyM akati nhyM me arŷm kadjy bõremã adjã nhyM xẽr. Te mŷjja kakrit tebẽ apẽx ba nhyM Metĩndjwŷnh prĩne o djuw mex ne. Ar ga ne gar pidjõrã kurãm abẽngõkre ne amexkumrẽx. Dja Metĩndjwŷnh pidjõrã kurãm prĩne ar ajo djuw mex ne ar amã ar akãdjwŷy ngã. Be, kam gẽdja gar tu amim Metĩndjwŷnh kamnhĩxkumrẽx. NhyM mŷkam ne gar amim kamnhĩx kêt ne kãjbẽ amim kamnhĩx ne.

<sup>29</sup> Kwãrĩk wãnh gar amikam adjumar punu kêt ne anhõ kwŷy krẽn ne kõt akõmkõtbit ajamak bẽn kêt. <sup>30</sup> Apŷnh pyka djãri me kute amim Metĩndjwŷnh mar kêt ne me ar mŷjja ja jabej ba. NhyM bep kati, ar Abãm kute prĩne ar amar ne ar anhõ mŷjja kêtãkõt kute ar amar. Kam gẽdja prĩne ar ajo djuw mex ne. <sup>31</sup> Metĩndjwŷnh kumrẽx dja gar mar ar o aba, Metĩndjwŷnh kukrãdjãmẽ dja gar kumrẽx ma. NhyM kam ijukri dja arŷm ar amã mŷjja ja ngã.

32 Ë, inhõ kritte, inhõ àpênh ngrêreja, kwârîk wânh gar atîn prâm kêt. Ar Abâm ne arým amim ar ajâ karõ. Kute meo atom ne me kadjy bënjadwÿr ne kute ar meo bakam kute ar ajâ bënjadwÿr mênh gar aje ro'ã meo abamã arým ar ajâ amim karõ.

33 Ë, kwârîk wânh pykabê anhõ nêkrêxa'ã ano tÿx ne 'ã angrân ar o aba kêt. Dja gar anhõ nêkrêx me'õmã angã gê pãnh ar amã pi'ók kaprîre ngã gar abyn kam me õ mÿjja kêtjamã angã. Bep kati, kâjkwakam dja Metîndjwÿnh ar amã anhõ mÿjjao atom, nhyt tûmrâm ar amã mexkumrêx gar o aba. Tûmrâm rerek ne punu kêtumrêx. Ar aje amim kâjkwakam mÿjja mextireo atomja gêdja kâpo, mÿjja'õ ar abê o bikênh kêtumrêx nhyt me àkînh'õ 'ÿr bõx kêtumrêx, gar ar o aba. Kwârîk wânh gar pykabê mÿjja ja mar ne o atom ne ar o aba kêt. 34 Be, nok ga ren ar pykabê amim mÿjjao atom ne kam ren kôt pykabê ar anhõ mÿjjabit man ar o aba. Nhyt bep dja kâjkwakam Metîndjwÿnh ar amã mÿjjao atom gar kam kôt arým kâjkwakam anhõ mÿjja man ar o aba.

*Jeju me aêrbê akubyn bõx.*

*Mat 24.42; Mak 13.35; Ruk 21.34; Tex k 5.4*

35-36 Dja ba tyn akubyn itîn ne kâjkwa kumrêxmã wabi. Ne kam arým ajte akubyn bõx. Ar ga dja gar ikam ama. Ne ikutêp amijãno dja. Ikutêp amijãno djan ar amijo aba. Kute mrâmri ne me õ bënjadwÿr me kute abenã me rênh'ÿr mrân nhyt õ àpênh kutêp kikrekam krîn kute kubêkã jangjênh rã'ân õt kêt ne kute ngõnhpõkmã angjênh rã'ân kutêp no tÿx ne kam amako krî. Nhyt kam me õ bënjadwÿr akubyn mrân bõx ne kam õ àpênhmã kabên ne. Ne arkum, "Kikre'ã ta", ane.

Nhyt ar tebê kum kikre'ã kuta nhyt arým wadjã. Ar õ

bënjadwÿrja arým bõx. 37 Ar no tÿx ne kute kam amak rã'ã nhyt bõx nhyt kam ar kînhkumrêx ja pyrâk. Nhyt kam ar õ bënjadwÿrdjwÿ arkam kînhkumrêx ne. Õ àpênhkam kînhkumrêxkam gêdja kute arkum õmrõmã kadjy amidjê. Mrâmri ne ba ar amã katât arê. Dja amidjên kam ar'ÿr tên kam arkum, "Ar nhÿ. Ar nhÿ ba ar amã ar anhõ kwÿ krên djã nhîpêx gar krê", ane. 38 Dja te akamât kô ipôkri nâr te akati maktã bõx nhyt õ àpênhja no tÿx ne kam amako krî rã'ã ne. Kam gêdja ar õ bënjadwÿr arkam kînhkumrêx ne, nhyt ar jadjwÿ kînhkumrêx ne. Dja gar ã bënjadwÿr nhõ àpênh'ã amijakren arek ikam amako akrîo ane. Gêdja gar ikam amak rã'ã jabej ba ar akam ikînhkumrêx ne.

39 Gop ar ikabên ma. Ba ajte ar amã 'õdjwÿ jarê gar ama. Ne ren õ kikre djwÿnhja ren me àkînh'õ bõx djã man kam ren arek kam amako nhÿ. Nhyt ren bõx ne kikre'ã 'ÿr ne kum ar kêtumrêx ne. Badjwÿ dja ba ije me àkînh'õ pyrâk ne me ajaêrbê bõx. 40 Kam gêdja gar gadjwÿ mã ikam amako akrî. Ba ije amijo inh'õ ne me awÿr ibõx ba gêdja ba ajte akubyn bõx. Ar aje nhÿnh myt nhÿr 'õkam aje ibõx djã mar kêt. Kam gêdja ba tu ar ajaêrbê bõx, ane. Nãm ã Jeju arkum amibõx djã jarênhõ anen kam arkum kabên jarênh pa.

41 Nhyt Pedru kum,

—Djãm ar imãbit ne ga arê, ar ije akam amakmã, djãm ar imãbit ne ga arê, nâr kon, djãm me kunîmã ne ga arê? ane.

42 Nhyt kam kum,

—Be, me kute amikajmã'ã imar kunî dja me arîk ikam ama ne kam kute mrâmri ne me àpênh djwÿnh kute õ bënjadwÿr kam amakja pyrâk. Me õ bënjadwÿr ne õ àpênhmã kabên ne ne kum, "Ga dja ga me àpênh'ã me omû, ane, ne prîne 'ã meo djwÿ mex. Dja ga

myt kunīkôt memā ò kwý krĕn dja ngān akrānmā memā òro aba. Ne me'ā akren memā angā." Nām ā ò àpĕnhmā me'ā karōo ane. Kute akrānmā me àpĕnh'ā me omūnh ne kute 'ā meo djuw mex katātmā ā kum me'ā karōo ane.

Nhym ò àpĕnh kum, "Nà, gĕdja ba mrāmri ā anen kam me 'āno dja", ane.

Nhym kam ò bĕnjadjwýr mā nhī'ām tĕ. Nhym kam ò àpĕnhja kabĕnkumrĕx. Nām no mexkumrĕx ne katāt ar memā mýjja nhōro ba, me kanga kĕtkumrĕx ne ar meo ba.

<sup>43</sup> Nhym kam bĕnjadjwýr akubyn bōx ne kam ò àpĕnhjamā kato. Kute amrĕbĕ kum kabĕn jarĕnhja kôt mrāmri meo djuw mex nhym kam arým kum kato. Kam dja ò àpĕnhjadjwý tu amikam kīnhkumrĕx ne.

<sup>44</sup> Ē, ba ar amā kôt arĕ. Bĕnjadjwýrja dja ò àpĕnh ja'ā bĕnjadjwýr mĕ. Kute nĕkrĕxmĕ mýjja kunī pumūnhmā dja 'ā bĕnjadjwýr mĕ. Nhym kam ò àpĕnhja kīnhkumrĕx ne. <sup>45</sup> Nām ren ò àpĕnhja òkre kadjwýnhbĕ, ò bĕnjadjwýrja'ā ren, "Be, nām nhī'ām bĕnjadjwýr tĕn arým amikrà. Jakam dja ba on tu arĭk ar iba, inomā arwāri", ane. Ne kam ren ar ò àpĕnhja titiko ba, ò àpĕnh mymĕ ò àpĕnh nimĕ ren ar titiko ba. Ren ò kwý krĕnbit ban kôt kadjwati kangōo\* ikōn kam ren kam ajbān ar ba. <sup>46</sup> Nhym kam ò bĕnjadjwýrja aĕrbĕ bōx. Ò àpĕnhja kute amim ò bĕnjadjwýrja bōx djākôt mar kĕt. Nhýnh akatī 'òkam bōx djāmā kute mar kĕt ne nhýnh myt nhýr 'òkam bōx djāmā kute mar kĕtkam ne aĕrbĕ bōx. Nām bōx ne kam ò àpĕnh arĭk ar bajakam ngryk ne. Ngryk ne kam o ajkapōn bōm kumĕ. Me amakkre kĕtjamĕ ro'ā bōm kumĕ.

<sup>47</sup> Bir be, dja ā me bĕnjadjwýr ane. Me kute ò àpĕnhmā prĭne mýjja'ā

karō nhym me ren ām mar kajgo ne kam ren ate krān ar ba ne ren kabĕnkôt amijo ba kĕtkumrĕx ne. Nhym ren me ò bĕnjadjwýrja bōx ne prĭne ren meo ajkĕ, me kaprĕprĕ:k ne. Kute arým memā 'ā karō kajgo nhym me kute kabĕn mar kĕtkam.

<sup>48</sup> Nhym bep ò àpĕnhja kute ò bĕnjadjwýrja kabĕn mar kĕt, me'ò kute memā kabĕn jarĕnh kĕtkam, ne ren arĭk ar ba, kam ne ren ò bĕnjadjwýrja bōx ne kam ren me kaprĕprĕk ngrire, meo bikĕnh ngri mex ne. Nām me ren te mar mex ne tu ate krān ar ba nhym ren prĭne meo ajkĕ. Nhym bep kati, me kute mar kĕt, kam ne bōx ne ām meo bikĕnh ngri mex ne.

Metĭndjwýnh ne apýnh ar amā mýjja ngā, ne ar amā ar adjĕ mex, ar ano mex, ar ajamak mex ar amā kungā, o ar kum adjàpĕnh kadjy. Dja abej ar akukij ne ar amā, "Nār, ije ar amā ar ano mex, ar adjĕ mex nhōrja, mā ne gar kam nĕ? Djā ne gar o adjàpĕnh mex ne?"

Kute me'omā mýjja kajbĕ rax nhōrja gĕdja o kum kajbĕ àpĕnh rax jabej kukij. Nhym bep kute me'omā mýjja ra:x nhōrja gĕdja o kum àpĕnh ra:x jabej kukij.

*Jeju kute meo bikjĕr jarĕnh kadjy.*

*Mat 10.34*

<sup>49</sup> Ē, mýj kadjy ne ba jakam tĕn bōx. Ije me axweo apĕxmā ne ba pyka jakam bōx. Ga kuwy kute mýjja kakrit kunīo apĕxja pumū. Dja ba ĭ ibĕ kuwy mān prābĕ ā o anen me axwemā ikaton memā pānh jarĕn kam me imex ne. Gora gĕ on ò akatī 'ýr bōx. <sup>50</sup> Nhym bep dja ba itokry rax kumrĕxi. Dja ba itokry rax ne kute mrāmri ne me wýrkam ngoo tuknī ja pyrāk. Dja ĭ itokry ā prĭne ijo tuknīo ane. Dja ba itokry ra:x nhym me ibī. Kadjy ne ba tĕ. Gora gĕ on inhō akatī iwýr bōx ba gop itokry rax gĕ gop

\* **12:45** Mýjja me kute o kōm ne kôt bibānh kunīja, kadjwati kangōmĕ uba kangōmĕ, mýjja kangō kunī ne me kum kadjwati kangō jarĕ.

on apêx. Ba kam arÿm ije amimarja arÿm apêx.

<sup>51</sup> Djãm ije pykabê me jamã umar mexmê me typydjin ar ba jarênhmã ne ba me'ÿr tẽ. Arkati, ê, ba ar amã arê. Me kute imÿr jabej abeno bikjêrmã ne ba me'ÿr tẽ. <sup>52</sup> Jakam dja me kikre tãmkam imÿr jabej abeno kurê djwÿnh ne. Me ta ôbikwamê dja me ï abeno kurê djwÿnh ne abeno ajkij. Dja ar amãnhkrut ne ikjêkêjtja amê ar jao kurê djwÿnh nhym amê ar ja amipãnh ar amãnhkrut ne ikjêkêjt jao kurê djwÿnh ne. Arÿm ne ar abeno ajkij. <sup>53</sup> Bãmja dja imÿr jabej kra myo kurê djwÿnh ne. Nhym kra my amipãnh bãmno kurê djwÿnh ne. Nhym ate nãja dja kra nio kurê djwÿnh nhym kra nijadjwÿ amipãnh nãno kurê djwÿnh ne. Nhym ate umrengêxja dja wÿnh nio kurê djwÿnh nhym wÿnh nija amipãnh umrengêxo kurê djwÿnh ne. Dja me ã imÿr jabej abeno kurê djwÿnh ne abeno bikjêro ane. Tãm ne ja. Nãm ã Jeju kôt ba djwÿnhmã kabên jarênhno anen arkum kabên jarênh pa.

<sup>54</sup> Ne kam ajte me krãptitjamã kum,

—Nã gãm me kãjkwa nhôt kurÿm kakrã amrê bikamênh baja pumÿn kam abenmã kum, “Gêdja na ruw”, ane. Ga me mrãmri tu kônh kum irkumrêx, nhym arÿm ruw. <sup>55</sup> Nã gãm me kôk djâbêr tÿxja pumÿ, kãjkwa nhirê kurÿm kôk djâbêr pumÿn kam abenmã kum, “Gêdja on amex nhym kam arÿm arngro tÿ:x ne”, ane. Ga me tu mrãmri kônh kum irkumrêx nhym ã ane.

<sup>56</sup> Kê, nã gãm me ajêx ne mÿjja mar kajgo ar o aba. Kãjkwamê kôk djâbêrbit ne ga me aje mar ne omÿnh. Mÿkam ne ba me akam ar ibari mÿjja pumÿnh kêt kwÿ 'yn me amã mÿjjao amirÿto iba ga me ja mar kêt ne omÿnh kajgon amim, “Ije tô mÿj'ã”? anhÿr kajgon mar

kêtkumrêx ne. <sup>57</sup> Nhym mÿkam ne ga me amimar ne amijaxwemã akator ne Metÿndjwÿnhmã amijarênh kêt ne? Ja ne katât. Mÿkam ne ga me ã anhÿr kêt ne? <sup>58</sup> Gêdja ga me Metÿndjwÿnh nhô akati bôx kêtri kum amijo a'wÿ gê me ajo mex. Ba me amã arên me'ô'ã me ajakre. Birãm me'ô amã, “Ga ne ga ibê mÿjjao ajkên ar ikam amikrão aba. Aje imã o pãnh kêtkam gêdja ba bënjadjwÿr kute me axwemã apôx'ÿr ajo tẽ gê amã pãnh jarê”, ane. Gêdja ga amibêx ne kute 'ÿr ajo bôx kêtri kum amijarên kum o pãnh. Kute memã axwe pãnh jarênh djwÿnhmã apa 'amÿnh ne abjêro têm nhym kute krãkamngônã akanga nhym me kute abê ijê kêtri. Kute ã ajo anhÿr kêtri gêdja ga atêmbê kum o pãnh. Dja ga ã o anen kum o pãnh kêt nhym arÿm mekbê ijê djãkam amê ga kam kum o pãnh ra:xo dja. <sup>59</sup> Gêdja ga kum pãnhno dja:n kum pãnhno ino rer jabej arÿm akato. Nhym be djã gãm kum pãnhno ino rer kêt ne mrãmri arek aku'ê. Gêdja ga me ã anen Metÿndjwÿnh kute memã axwe pãnh jarênh nhô akati kator kêtri Metÿndjwÿnh'ÿr amijo akêx ne kum amijo a'wÿ gê me ajo mex, ane. Nãm ã Jeju memã arênhno ane.

## 13

*Kute me kute abenmã axwe kukrã kêt mex ne arênh nêje me kukrã.*

<sup>1</sup> Ne kam memã kabên ja jarênh pa nhym me kam kum pykabê Garrêjakam me ja jarê. Nãm me Metÿndjwÿnhmã mry pan kubô. Kum bôro ku'ê rã'ã nhym Piratu ô ãpênh krãkamngônãhre me'ÿr ano nhym me prÿne me imex ne, me kute mry bôro ku'ê ja ne me me imex ne, ne mry kamrômê me kamrôo akã. Nhym me omÿn kam Jejumã arê. <sup>2</sup> Nhym kam memã kum,

—Birām gām me we, “Be nām me ō pykakam me ja axweo me tīnja jakrenh mex ne kam ty.”

<sup>3</sup> Arkati. Ba me amā arē. Me gadjwý dja ga me amim akator ne wānh ajaxwemā anhirer ne Metīndjwýnh'ýr amijo akēx kētkam me kudjwa tu abiknorkumrēx ne, me akunī, ane. Nām ā Jeju ane. <sup>4</sup> Nhy m krīraxbē Djeruxarēkamdjwý kikre prēktibē Xirōwe me imex ne. Nām me'ā tým ne meo 18 ne me imex ne. Nhy m me adjwýnhdjwý pumūn kam Jejumā arē. Nhy m kam ajte memā kum,

—Birām gām me we, “Be nām Djeruxarēkam me ja kute Metīndjwýnhkam amikrào me tīnja jakrenh mex ne kam ty.”

<sup>5</sup> Arkati. Ba me amā arē. Me gadjwý dja ga me amim akator ne wānh ajaxwemā anhirer ne Metīndjwýnh'ýr amijo akēx kētkam me kudjwa tu abiknorkumrēx ne, me akunī, ane. Tām ne ja, ane. Nām ā Jeju memā ane. Nām me abenmā axwe kukrà kēt mex ne arē nhy m kam ā memā ane.

<sup>6-7</sup> Ne kam ajte memā atemā mýjja 'ā ujarēnh jakreo tē. Me kute abenmā axwe kukrà kēt mex ne arēnhbē ne memā kum,

—Atemā pidjōbē pigēre ne ō àpēnh kute ō bēnjadjwýrjamā kremā o tē. O tēn kum kre. Pidjōkō nhīpōkri kum kre. Nhy m arým ingrōt ne abatānh ne. Nhy m ō pidjō djwýnhja kute ō jabejmā 'ýr tē. Ne te ō jabej nhy m amex nhy m te ō jabej nhy m ajte amū amex nhy m te ō jabej, ō jabej te aprān kam ō àpēnhmā kum, “Ota ajte pidjō kreja ō kēt ne. Arým 'ā amex amānhkrut ne ikjēkēt ba te ō jabej. On tēn kum ta. Mýj kadjy ne mōn inhō purkam ām kajgoo dja?” ane.

<sup>8</sup> Nhy m ō àpēnhja kum, “Adjým bēnjadjwýr. Gē arek djan 'ā amex pydji ba kam bu'ā kakuwn kum mry nhīno ipōk ne o kane. Mry nhīno dja ba kanen kam gop ō

jabej. <sup>9</sup> Dja ō mex ne kam arek dja. Gédja ō kēt ba tu kum kuta”, ane. Tām ne ja.

Metīndjwýnh on kute memā pānh jarēnh kēt. Tūmrām dja ī memā pānh jarē. Me kute axwemā irer ne kute tūmrām 'ýr amijo akēx kadjy ne tūmrām memā pānh jarēn meo ajkē. 'Ā ne kute memā ujarēnh jakreja.

*Kute me'ō nire punuo mex.*

<sup>10</sup> Ne kam pi'ók rārār 'ōkam me kute abeno bikprōnh djākam memā Metīndjwýnh'ā ujarēho dja. <sup>11</sup> Nhy m kam me'ō nija wadjā. Me karō punu'ō ne mā o ba nhy m kam ibōn mrā. Ibōn mrānh'ā amex krāptī. Arým 'ā 18. Nām te katāt kajmā āmmān katāt kēt mex ne. <sup>12</sup> Nhy m kam Jeju omūn kam amiwýr ku'uw ne kam kum,

—Àpnhīre, me karō'ō kute ajo baja ne arým amā ire, ane.

<sup>13</sup> Ne kam 'ā ikra dji. 'Ā ikra dji nhy m tebē kajmā dja, arým katāt ne dja. Ne kam Metīndjwýnhmā mex-tire jarēho dja. <sup>14</sup> Nhy m bep me bikprōnh djākam bēnjadjwýrja ne 'ā ngyrk ne. Pi'ók rārārkam Jeju kute meo mexo āmkam ne 'ā ngyrk ne. Ne kam memā,

—Pi'ók rārār ne ja. Pi'ók tykkambit ne me àpēnh djā. Pi'ók tyk amānhkrut ne amānhkrut ne amānhkrutkambit ne me àpēnh djā. Kam dja ga me amrē mō gē me ajo mex. Kwārīk wānh ga me pi'ók rārārkam amrē 'ýr abao adjām kēt, ane.

<sup>15</sup> Nhy m kam Bēnjadjwýr djwýnh kum,

—Kē, nā gām me ajēx ne ajajkwakambit amimex jarē, ar amimex jarēho aba kajgo. Nhýnh ne ga me ajō pi'ók rārārkam anhō krit'ō kōm kēt ne, anhō mryti nār mry'ā krīja krādē djā 'āpre bōn ūrkwā kurūm o akaton o tē nhy m kōm kēt ne? Katī, nā gām me pi'ók rārārkam anhō krito aba nhy m kōm

ba. <sup>16</sup> Ije nhyam mỳkam gêdja ba me'õ ni, Abraão tãmdjwýja 'ãpre bõnh kêt ne? Me ga ne ga me pi'ók råràrkam anhõ kritt 'ãpre bõ. Nhyam mỳkam gêdja ba kubêngòkreja 'ãpre bõnh kêt ne, Xatanaj kute uwpre'ã amex krãptĩ, arým 'ã amexbé 18ja 'ãpre bõnh kêt ne? Kati, dja ba 'ãpre bõ gê kãjmã dja, ane.

<sup>17</sup> Æ kum ane nhyam kam kurê djwýnhja amikam pijãm ne. Nhyam bep me ja, me kunĩ ne me tu kam kĩnhkumrêx ne. Nãm Jeju memã mýjja krãptĩo pòx nhyam mexkumrêx nhyam me kam kam kĩnhkumrêx ne.

*Metĩndjwýnh kute me utàr ne meo ba.*

<sup>18</sup> Nhyam kam ajte Jeju memã kum,

—Ë, Metĩndjwýnh kute me utàr ne me kadjy bẽnjadjwýr ne kute ar meo baja, mýj ne kute uràk? Mýj'ã ne ba ije akremã? <sup>19</sup> E kum nãm kute pidjõ 'y kryre ja pyràk. Pidjõ 'y kryrebê motadu. Me'õ ne amim 'y kryreja by ne kam o tẽn õ purkam kre nhyam tebé abatành ne. Abatành mexkumrêx nhyam kam kwênhne apýnh pa'ã aê, ane.

Me kute amim Jeju marmã nhyam arým ja pydji kadjy amima, nhyam arým ja kadjy amiman 'ã tým, nhyam ja kõt 'ã tým, nhyam ja 'ã tým, nhyam ja 'ã tým nhyam arým 'ã krãptĩ ne. 'Æ ne 'y kryre ja jakre.

<sup>20</sup> Ne kam ajte memã kum,

—Metĩndjwýnh kute me utàr ne me kadjy bẽnjadjwýr ne kute ar meo baja mýj ne ba ije 'ã akremã?

<sup>21</sup> E kum nãm kute djwý nhigot djã pyràk. Me'õ nire ne djwý djõm byn ngõnhkam kumẽn kam ajte iby o amãnhkrut ne kumê ne kam kadjy djwý nhigot djã ngri:re ja by. Ne kam o akàn kudji nhyam nõn kam arým igot mõ. Igot mõ:n arým rax ne kam prĩne djwýo tuknĩ, ane. Nãm ã me kute Metĩndjwýnh mar amũ

abendjõ'ã abenmã Metĩndjwýnh jarêho ane nhyam arým me pyka kunĩkõt arêho ajmã nhyam arým pyka kunĩkõt me kute Metĩndjwýnh mar krãptĩ ne. 'Æ ne memã djwý nhigot djã jakren arê.

*Kikre jajkwa krekre ngrire'ã ujarênh.*

*Mat 7.13*

<sup>22</sup> Ne kam tu Djeruxarê'ýr kràkumrêx ne. Ne kam apýnh krĩ rũnhmê krĩ kryre kõt mõ. Kam memã Metĩndjwýnh'ã ujarênh mõ. <sup>23</sup> Djeruxarê'ýr me mõrkõt ne memã 'ã ujarênh mõ nhyam kam me'õ kum,

—Bẽnjadjwýr, djãm Metĩndjwýnh kute me utàrja djãm me ngrêrebit? ane.

<sup>24</sup> Nhyam kam memã,

—Ë, kwãrĩk wãnh ga amũ me ja mar kêt. Nhyam bep Metĩndjwýnh dja ga amikajmã'ã ama. Ga me kikre jajkwa krekre ngrire kõnh mrãnh, kõnh ngjênhmã mrãnh týt ne kute ikjêo aben rênh ne mrãnh ne ngjêxja pumũ. Gadjwý dja ga ã amikam atýxo anen Metĩndjwýnh nhõ pyka'ýr bõx. Ba me amã arê. Nãm me krãptĩ te 'ýr àrmã. Dja me te o anen te o anen 'ýr àr kêt ne. Kute mrãmri ne me te kikremã àr prãmre ja pyràk. <sup>25</sup> Dja õ kikre djwýnh 'ýr tẽn kikre'ã ijê, me abê kikre'ã ijê. Ga me kam wãnh kapõtã akumex. Ne kam 'ã ijê djã mõro akumex. Te 'ã ijê djã mõro akumex ne kam kum, “Bẽnjadjwýr, amrê me imã kikre'ã ta ba me wãm wadjã”, anhýro akumex. Te kum ane. Nhyam kam me amã, “Kê waj, ije me amar kêt. Ije mýjwã kurũm me ajapõx djãkõt me amar kêt”, ane.

<sup>26</sup> Dja ga me te kum, “Tõ gêt anihikõ'ã ne ba me inhõ kwý krên kõt ikõ ga me inhũrkwã kabe'ã me akreo mõ”, anhýro akumex.

<sup>27</sup> Nhyam kam me amã, “Ba me amã arê ga me ikabẽn ma. Ije mýjwã kurũm me ajapõx djãkõt me



amar kêt. Rûm măn me mō, me aje ajaxwebit markam dja ga me rûm mō”, ane. Dja ā ō kikre djwŷnh me kapôtā akumexjamā ane. <sup>28</sup> Ā me amā ane ga me kam amran amim angyrk ne wānh amijanên amijo pyka titik ar o aba. Abraāomē Idjakmē Djakomē Metīndjwŷnh kabēn jarēnh djwŷnh kunīmē dja me Metīndjwŷnh nhō pykakam ar ba, ga me te me omū. Metīndjwŷnh arŷm kute me utār ne me kadjy bēnjadjwŷr ne kute ar meo ba, ō pykakam kute ar meo baja dja ga me te me omū, amybŷm me omū ne kam ajte jām amipumūn kam amikam angyrk ne. Metīndjwŷnh kute bōm me arēnhkam gēdja ga me ā amim angyrk o anen amran amijanên ar amijo pyka titik o aba.

<sup>29</sup> Bir be, dja me apŷnh pyka kunīkōt Metīndjwŷnh'ŷr akuprōn kam kutā ō kwŷ krēno kumex. Kājkwā kraxrûm me jamē, kājkwā nhôt kurûm me jamē, aktā kājkwā nhirē'ānh me jamē, me tām dja me 'ŷr bōx ne kutā ō kwŷ krēno kumex. Nhyam bep Metīndjwŷnh dja me ja kadjy bēnjadjwŷr ne meo ba.

<sup>30</sup> Nhyam kam pykabē me 'uwtī, me kâtām ar baja gēdja me kumrēx Metīndjwŷnh nhō pyka'ŷr bōx. Nhyam bep jakam me kute amirūnhbit mar ne kute amirūnh mar kanārrām baja gēdja me pānh me katēn mrā, ane. Nām ā Jeju memā Bām nhō pyka jarēnh o ane.

*Jeju Djeruxarēkam me jakam kaprī.*

*Mat 23.37*

<sup>31</sup> Nām memā kabēn jarēnh pa nhyam kam mebē pardjēu kwŷ 'ŷr bōx ne kam kum,

—On ja kurûm tē, ane. On ja kurûm tē. Arŷm ne Erodji kute abīnmā akangrō, ane.

<sup>32</sup> Nhyam kam memā kum,

—Ām me mōn kukōnhwāmā arē, axwere wāmā arē, “Ota ba akati jakam arek me karō punubē me

utāro djan me kanēo mexo dja. Gēdja akati ba ajte tām ne. Nhyam ijā akati amānhkrut ne ikjēkēt ba arŷm inom kumē.” Dja ga me ā kum ane.

<sup>33</sup> Nā, mrāmri ne ba arŷm Djeruxarē'ŷr itēm kumrēxmā. Dja ba akati jakam meo mexo tēn nō nhyam akati kêt ba ajte amū tēn 'ŷr nō nhyam akati ba arŷm 'ŷr bōx, Djeruxarēkam bōx. Nhyŷnh ne me kute atemā krīrax 'ōkam Metīndjwŷnh kabēn jarēnh djwŷnh par dja 'ō got ba 'ŷr tē? Kati, Djeruxarē pydjii. Pydji ne ba arŷm 'ŷr itēm mā. Kam gēdja me ibī, ane. Nām ā Jeju mekbē pardjēumā ane. Ne kam ajte Djeruxarēkam me ja ā,

<sup>34</sup> —Ŷ, Djeruxarē, Djeruxarē, mŷkam ne akra Metīndjwŷnh kabēn jarēnh djwŷnh par prām ne? Mŷkam ne kēno me titik ne me kupa, Metīndjwŷnh kute me awŷr me anorja pa? Ije nā bām te ije me ajo ibikprōnh ne ije me ajo atommā. Kute mrāmri ne ōkrēnē'ānh kute arao krao bikprōnhja pyrāk. Ba ren ā me ajo ane. Nā bām te ije ā me ajo anhyrmā ga me. <sup>35</sup> Ē, jakam me amōr dja ja gēdja kukrit mex ne kaprŷn nō. Ē, ba me amā arē, jakam dja ga me ipumūnh kêt kumrēx ne. Ipumūnh kêt rā'ā: nhyam inhō akati ijo rām ne jao tē ga me abenmā kum,

“Ē, ota arŷm Metīndjwŷnh kabēnkōt tāmja bōxmā. Gē Metīndjwŷnh o kīnh.”

Ga me ā abenmā ane ba kam arŷm me awŷr bōx, ane.

## 14

*Jeju kute me'ōbē pardjēu nhūrkwākam ō kwŷ krēn.*

<sup>1</sup> Nām memā kabēn jarēnh pan kam ajte tē. Nhyam ajte pi'ōk rārār nhyam mekbē pardjēu nhō bēnjadjwŷr ngri'ō kum,

—Amrē ikōt tēn inhūrkwākam ikutā anhō kwŷ krē, ane.

Nhym kum “Ā” anen kôt tēn kutā ò kwý krē nhym me arek kam no tyn omũho nhỹ. <sup>2</sup> Nhym Jeju kutā me'ò my nhỹ. Nām prĩne igoto tuknĩ. <sup>3</sup> Nhym mekbê pardjēumē me kute Mòjdjē kukràdjā mar djwýnh arek Jeju pumũho nhỹ. Kute o mex jabej ne me ikò'ā nhỹn omũho nhỹ. Nhym kam memā,

—Djām ori me kute pi'òk rārarkam meo mexkam punu? Djori kam punu? ane.

<sup>4</sup> Nhym me pijām djāje anhikrē:n nhỹ. Nhym kam pa'ā byn kàjmā kudjan o mex ne kam ano. <sup>5</sup> Ne kam memā kum,

—Gédja me ajō kra'ò, me ajō nhō krit'ò pi'òk rārarkam tēn kreti, ngòmkwatikam tỹm, mā gédja ga on? Djām aje arek pi'òk rārarkam omũnh kajgoo adjāmmā? Omũnh kajgoo adjām nhym tykmā? Kati, gédja ga pi'òk rārarkam o wabi, ngò kute bĩn kētri, ane.

<sup>6</sup> Nhym me ajte anhikrē:n nhỹ, ne te kute amipānh kum kabēn'ò jarēnhmān mrāmri nhỹ. <sup>7</sup> Nhym me ò kwý krēno ýrja, bēnjadjwýr kute memā arēnh nhym me ò kwý krēnmā ýrja ne me kwý amijo rũnh prām ne mekbē amijo me rũnh krĩ djā pytā. Nhym Jeju me omũn kam nēje memā kabēn kadjy memā mýjja'ā ajarē ne memā kum,

<sup>8-9</sup> —Me kute abenā me rēnhkam ne me ákur rũnhĩ. Nhym kute abenā me rēnh djwýnhja amā kabēn jabej ne amā, “Amrē tēn me kutā anhō kwý krē”, ane. Ga kam tēn ũrkwāmā wadjān kam kwārĩk wānh ga amijo me rũnh krĩ djā pytār ne kam anhýr kēt. Dja me bēnjadjwýr'ò akòt bōx, kute raxo ajakrenh'ò akòt bōx nhym kam abenā me rēnhdjwýnh amā, “On kàjmā dja. On kàjmā dja gé tāwā nhỹ. Tāwā ne kute raxo ajakrenh. Ga dja ga tēn me burũm nhỹ, me wā nhikò'ā nhỹ”, ane ga kam apijām

ne. Kute me ipòkri amā anhýrkam dja ga apijām rax ne.

<sup>10</sup> Bep kati, dja ga anhō kwý krēn kadjy wadjān tu me burũm nhỹ, me kàtām ja nhikò'ā nhỹ nhym kam ta, abenā me rēnhdjwýnh ta gédja amā, “Kati, Bēpbāmre, amrē tēn me rũnh krĩ djākam nhỹn anhō kwý krēn mex”, ane. Ga kam arým 'ýr tē. Ta gédja arým me ipòkri ajo rax. Nhym me kunĩ arým araxkòt apumũ. Me aro'ā anhō kwý krēno anhýrja dja me araxkòt apumũ.

<sup>11</sup> E kum ē, me kute amijo rũnh prāmja gédja me ĩ pijām ne. Nhym bep me amikam pijām ne akrānmā ar kute amijo baja gédja arým Metĩndjwýnh pānh meo rũnh ne, ane.

<sup>12</sup> Nām ā Jeju me ro'ā ò kwý krēno ýrjamā anen kam ajte bēnjadjwýrjamā kabēn ne. Ne kum,

—Gédja anhō djwý kumex, anhō mry kumex jabej ga arým anhō kwý krēn rax ne. Kàjkwa nhipòkri myt nhýrkam nār kon amykrykam anhō kwý krēn rax ne. Kwārĩk wānh anhōbikwamē akamymē anhōbikwa 'òmē me kute amimexjamē me jamā arēnh kēt, anhō kwý krēn djāja jarēnh kēt. Me kute akubyn amā o pānh karō me jamā arēnh kēt. Mýkam? Bir, ga ren anhōbikwamā mýjja ngā nhym ren arým amipānh amā mýjja ngā.

<sup>13</sup> Nhym bep kati, dja ga anhō kwý krēn rax kutā, kadjy me ò mýjja kēt, me kute amijo bikēnh, me akry, me no rā, me jamā akabēn gē me akutā ò kwý krē. <sup>14</sup> Metĩndjwýnh dja pānh ajo kĩnh ne. Me 'uwťjja dja me te kute amā o pānhmā. Nhym bep Metĩndjwýnh dja amā o pānh ne, me katāt mrānh ne tyk ne akubyn tĩn nhō akatikam gédja arým amā o pānh ne, ane. Nām ā Jeju kum kabēn jarēho ane.

*Metĩndjwýnh kute amiwýr me 'wýr'ā me ò kwý krēn jakre.*

*Mat 22.1*

<sup>15</sup> Nhyam kam Jejumē ro'ā me ō kwỳ krēno ỳr ja'ō kuman kum,

—Be, godja me'ō Metīndjwỳnh nhō kàjkwa'ỳr bōx ne kutā ō kwỳ krēn jabej, dja mrāmri kīnhkumrēx ne, ane.

<sup>16</sup> Nhyam kam kum,

—Me'ō ne arỳm kute memā djwỳ nhije djarmā djwỳmē mry nhijeo nhỹ. Ne arỳm kadjy me krāptīmā arē ne arỳm memā djwỳmē mry ga nhyam arỳm xēr. <sup>17</sup> Arỳm xēr nhyam kam kadjy ō àpēnhmā arēn kum, “Mā tēn ar wāmā arē. Ar wāmā arē gē amrē ar mō. Dja ga arkum, ‘Arỳm ne xēr gwaj on ỳr banhō kwỳ krē’, ane.”

Amrēbē ne kadjy memā arē ne kam ajte kadjy me'ỳr ō àpēnh jano. Nhyam kam ō àpēnhja tēn bōx ne te kadjy memā arē. <sup>18</sup> Nhyam kam ar kunī apỳnh kukrādjàkōt kubē amikati ne. Ja kumrēx ne kum, “Kati, ajbir ne ba amim pur byn kam ije omūnhmā ỳr tē. ỳr tēn kum ijarē. Dja ba wām itēm kēt ne. Kwārīk wānh gē ikam ngryk kēt”, ane. “Nēn”, ane.

<sup>19</sup> Nhyam atāri ja kum, “Ota ba ajbir mryti krāptībē 10o bōx ne kam ije gop àpēnh mex jabej, tỳx jabej ije kabimā ỳr tē. ỳr tēn kum ijarē. Dja ba wām itēm kēt ne. Kwārīk wānh gē ikam ngryk kēt”, ane. “Nēn”, ane.

<sup>20</sup> Nhyam kam kute o ino rerja kum, “Ajbir ne ba iprō ne kam te ije kum inhīrer ne wām itēmā”, ane. Nām ar ā kubē amikatio ane.

<sup>21</sup> Nhyam kam ō àpēnhja tēn bōx ne kum arē, ō bēnjadjwỳrjamā arē. Nhyam kam ngryk ne, ō bēnjadjwỳrja ngry:k ne. Ne kam kum, “Amibēx ne amū aprōt ne ajte me abej. Ngōo pry kamūn kikre bu kamū. Ne amrē me ō mỳjja kēt, me kute amijo bikēnh, me no rā, me akrywā kunīo mō”, ane.

<sup>22</sup> Nhyam kam ō àpēnh meo bōx ne kam, “Be, ota ga aje imā me arēnhja

ba arỳm meo bōx nhyam me kute kikre jaēr kēt rā'āā”, ane.

<sup>23</sup> Nhyam kam ō bēnjadjwỳrja kum, “Ajte akubyn me'ỳr tēn prykōt me abej ne purkamdjy ajte me abej, ane. Memā arēn me pa 'amỳn amrē meo mō. Amrē meo mōn meo bōx gē me prīne inhūrkwā kre jaē”, ane. <sup>24</sup> Ba me amā arē, ije kumrēx 'wỳrja gēdja mrāmri ikutā ō kwỳ krēn kētkumrēx ne. Tām ne ja, ane. Nām ā Jeju mekbē pardjēumā anen kàjkwamā ỳr me bōx kētmā ā arēnho ane.

*Kute mā me Jejukōt bikamēnhmā memā arēnh.*

*Mat 10.37; Mak 8.34; Ruk 9.23; Dju r 12.26*

<sup>25</sup> Ne kam ajte Djeruxarē'ỳr krā. Nhyam kam me itepato kōt mō. Kōt mō: nhyam kam me'ỳr akēx ne memā kum,

<sup>26</sup> —Dja ga me ajō mā ikōt abikamēnh prām jabej gora amā ijabē tỳxo, amā ikīnh tỳxo amā anhōbikwa kīnhja jakrenh mex ne. Dja ga amā abāmmē anāmē aprōmē akramē akamymē akanikwỳnhmē kīnh kēt ne kam ga amā aminhīdjwỳ kīnh kēt ne kam bajbit amā ijabē tỳx ne kam arỳm abē inhō àpēnhkumrēx. <sup>27</sup> Ne kam ajte dja ga me ajō amā atokry pyma jabej kam arỳm ikōt aba djwỳnh kētkumrēx. Nhyam bep kati, dja ga ijā amijakren ikudjwa aje anhō pīte'y mỳnh mān prābē atokry rax ne amā ijabē rā'ā nhyam me kute abīn jabej ga ikanga kēt ne tu mā ikōt ajkamēn kam arỳm mrāmri ikōt aba djwỳnhkumrēx, ane. Nām ā Jeju memā anen kam ajte memā kum,

<sup>28</sup> —Nà, dja ga me ajō aje kikreti nhīpēx jabej gēdja ga kadjy amikadjwỳnhbē amim 'ā karō ne amim 'ā pi'ōk kaprī jakre kumrēx ne. <sup>29</sup> Got ga ren 'ā pi'ōk kaprī jakre kēt ne ren ipēxo mō nhyam ren kam abē ỳr pi'ōk kaprī atāk ne. Ga ren kam kum parbit pumjuw. Kum

parbit pumjuw ne kam te aje inomã mênhmãn kam ren tu katëri krãta. Nhyw kam ren me kãtãmjã ajã keket ne ren kam ajapry,

<sup>30</sup> “Tãwã ne kute kikre nhipexo tẽm ne inomã mênhmã ar o ban kam katëri krãta”, ane. Ga ren kam apijãm ne. Bir be, ã me kute ajã anhÿr kêtbe gẽdja ga pi'ok kaprĩ kumrẽx 'ã akre.

Bir be, gẽdja me'õ mã ikõt bikamẽnh prãm jabej, amim ijã karõ kumrẽx ne kam amim, “Ije ba on mã Jejukõt ajkamẽ ne kõt ar iba, o ino rer kêt, katëri krã'yr kêt. Dja ba tu kõt ar ibakumrẽx ne”, ane. Dja ga ã me ajõ ijã amim karõ anen kam mã ikõt ajkamẽ, ane.

<sup>31-32</sup> Ba me amã ajte 'õdjwÿ jarẽ. Bẽnjadjwÿr ja ne arÿm kurẽ djwÿnh'ÿr õ àpẽn hja o mõ. Nhyw õ àpẽn hja krãptĩ ne. Õ àpẽn ne kubẽ 20.000. Nhyw kum ÿrja nhõ àpẽn ngrẽre. Kubẽ 10.000. Nhyw bẽnjadjwÿr ja kute nĩnh 'ÿr õ àpẽn ho mõr ja ne kum ÿr nhõ àpẽn hja jakrenh mex ne. Nhyw kam kum ÿrja bit kurẽ djwÿnh kutã õ àpẽn ho mõn kam ajte amikam ajkam aman te kurẽ djwÿnh'ã õ àpẽn jakren kam amim, “Ije, mÿj dja ba nẽ? Ije ba me'ÿr inhõ àpẽn jano, nĩjar me mõr rã'ãri gẽ ikãxã mekmã ijã aprã. Bar arek apÿnh nhÿn idjumar mex”, ane. Nãm me ja bit kute me ja'ÿr prõtman kam te amikabin amikam ajkam aman tu akubyn akẽx ne.

<sup>33</sup> Be, dja ga ã amim ijã karõ kumrẽxo ane. Aje arek o atẽm ne aje inomã mênh kadjy, katëri krã'yr kêt kadjy. Dja ga amikabi kumrẽx ne kam anhõ nèkrẽx, anhõ mÿjja kunĩ'ã ano tÿx kêt ne tu amibẽ kanga ne kam mrãmri ikõt aba djwÿnhkumrẽx. Nhyw bep kati, dja ga anhõ nèkrẽx 'amÿnh tÿx ne kam arÿm ikõt aba djwÿnh kêt kumrẽx.

<sup>34</sup> Ë, kadjwanhĩ. Kadjwanhĩ ne mexri ànhkumrẽx, akrykumrẽx. Nhyw bep arÿm tũmkam ành kêt,

akry kêt nhyw me kute ajte o mex kêt kumrẽx. Me te o ane. Mrãmri tu akry kêt. Mÿj kadjy ne ga ar o aba kajgo? Kajgo mexi. <sup>35</sup> O me kute djwÿ kane kêt ne kute mry nhĩnmẽ o bikar ne kute o pidjõjadjwÿ kane kêt. Nãm me tu o ban mũm kurẽ. Arÿm mrãmri akry kêt. Kajgo mexi. Gop me ajamakkre jabej, gop on ama, ane. Nãm ã me'õ kute amijo Jeju pytar ne kõt tẽm ne katëri kubẽ akẽxkam ã kajgo ane, kum õ nèkrẽx kĩnhkam kute kubẽ akẽxkam ã kajgo ane. Djã nãm mrãmri mã Jejukõt ajkamẽ got? Kati, nãm 'ẽx ne kõt ar ba kajgo.

## 15

*Mrykĩ'ãtomti pydji biknor.*  
*Mat 18.12*

<sup>1</sup> Nhyw kam me kute bẽnjadjwÿr bajtemmã pi'ok kaprĩo atom djwÿnhmẽ me axwe ajte Jeju'ã akuprõn kuri kumex, me kute kabẽn marmã ne me 'ã akuprõn kuri kumex. <sup>2</sup> Nhyw kam mekbẽ pardjẽumẽ me kute Mõdjẽ kukràdjã mar djwÿnhmẽ ne me kãxã kabẽn ne, bẽn prĩkam kabẽn ne abenmã,

—Djidjãk, tãwã ne kum me axwebit kĩnh ne ajte ro'ã mõn õ kwÿ krẽno nhÿ, ane.

<sup>3</sup> Nhyw kam atemã memã mÿjja'ã ujarẽn jakreo tẽn memã,

<sup>4</sup> —Birãm me ajõ nhõ krit, mrykĩ'ãtomti krãptĩbẽ 100. Dja abẽ pydji akuno ga kam mã dja ga on? Dja ga tu anhõ mrykĩ'ãtomti krãptĩbẽ 99jamã anhire gẽ wãnh akutẽp kumex, kapõt kukritkam kumex ga kam pydji biknorja jabej tẽ. Abej tẽn arÿm kum akaton aprõn o tẽn o bõx. <sup>5</sup> Aprõn o tẽn o bõx ne kam akĩnh ra:x ne. <sup>6</sup> Akĩnh rax ne kam anhõbikwamẽ anhũrkwã nhitepã me jao akuprõn kam memã kum, “Ota ba arÿm inhõ krit ibẽ biknorja japrõn o tẽn o bõx. Dja ga me idjõ'ã akĩnh ne akĩnh rax”, ane.

7 Bir be, gêdja ã kàjkwakam me kînho ane. Me'õ pydji gêdja amim katon wânĥ axwemã iren Metîndjwýnh'ÿr amijo akêx nhym kam me kînĥkumrêx. Me'õ pydjikam dja kàjkwakam me kînĥ rax ne. Kam kînĥ raxo me mex, me krãptikam kînĥja jakrenĥ mex ne. Me kute, “Bep ba ne ba katãt mrãn imexkumrêx”, anĥÿr ne ajkwaobit kute amimex jarênhja ne Metîndjwýnh kute meo mex kêtê. Nhym kam kàjkwakam me jadjwý mekam kînĥ kêt ne.

*Ngônĥponho pi'òk kaprî pydji biknor:*

8 Ba ajte me amã 'òdjwý jarê. Me'õ nire nhõ kryt jakao ngônĥponho pi'òk kaprîbê 10 ne pydjîn kubê akuno, pãnh ra:xkam. Mã dja on? Dja ngônĥpòktimã adjàn kam prî:ne ar abej kapõnho ban kam kum kato. 9 Kum katon kam òbikwamê itepã kikrejakam me jao akprõn memã kum, “Me ikôt akînĥ. Ota ba arým ije pi'òk kaprîo ibiknorjamã ikato”, ane.

10 Bir be, ba me amã arê. Dja Metîndjwýnh kadjy mrãnĥ djwýnh ã kînĥ ane. Me'õ pydjîn amim kator ne kute wânĥ axwemã irern kam kute Metîndjwýnh'ÿr amijo akêx nhym kam ã kadjy mrãnĥ djwýnh kam kînĥ ane. Nãm ã Jeju memã ujarênh ane.

*Me'õ kra biknor ne akubyn bãm'ÿr akêx.*

11-12 Ne kam ajte memã 'òdjwý jarênh memã,

—Me'õ my kra amãnhkrut nhym kam kutapureja bãmmã kum, “Djünwã, gop on ar imã anhõ nêkrêx kwýo ajkjê. Aje ar imã atyk kutã nêkrêxo abikjêrmã arênhja on atînri ar imã o ajkjê, ar ije kam amak kêt kadjy”, ane.

Nhym kam kum “Ã” anen kam arkum o ajkijñ kutapure jamã kungãn kutewajamã kungã.

13 Nhym kam bãm kute kum òrja arým amim kuby, kutapureja amim kuby. Nhym kam 'ã akati ngrêre nhym kam arým mã o mõ, ò mýjja kunîo atom ne o mõn ajjubê o tým, pyka 'òkam o mõn o bõx ne kam arî:k ar o ba. Tu arîk ar ba'ã pi'òk kaprî krêno tê:n kam krên pa. 14 Prî:ne 'ã pi'òk kaprî krên mex ne, ne kam arým arîk ar ba. Nhym kam pykawãkam arým djwý kêtumrêx, nhym me prãmĥkam ar ba. Nhym kam pi'òk kaprî krên pan kam tu arîk ar ba, prãmĥkam ba.

15 Ne kam bënjadjwýr 'ò'ÿr tèn kam kum, “Ba amã apê”, ane. Kum ãpênh nhym kute kum pi'òk kaprî nhõr nhym kute o mýjja byr ne krênmã. Nhym kam bënjadjwýrja “Ã” anen kam ò mry nhõ kapõtmã ano, kute angrô jamyre pumũnh ne kute kum o djuw mexmã. Nhym kam kum omũnho dja.

16 Nhym kam angrô jamyre bày kakô kuro ba nhym kubêngòkreja\* arým prãm bîn mex nhym te kute angrô jamyre kutã bày kakô kwý krênmã. Nhýnh ne me'õ got kute kum mýjja 'ò nhõr nhym kute krênmã? Arkati. 17 Nãm ar ban kam amim katon kam amim, “Ije, djã nãm ã ibãm nhõ ãpênhja anen ar prãmĥkam ba? Djünwã ne prî:ne ò ãpênhho djuw mex nhym kam djwý kumex. Djwý kumex ne kam 'ã katãm ne kumex. Mýkam ne ba bajbit ar prãmĥkam iba. 18 Ba gêt on akubyn ibãm'ÿr tèn kum, ‘Djünwã, ota ba Metîndjwýnhkam ar amikrào iba, ne gadjwý akam ar amikrào iba. 19 Djãm imex ne ga aje ijo akra rã'ãmã. Dja ga tu ijo anhõ ãpênh, ijo ajtem ne. Ba kam amã apê.’ Gêdja ba ã Djünwã'ÿr tèn kum ane.”

20 Ne kam ekruX ne kãjmã djan kam bãm'ÿr tê. Bãm'ÿr tê: nhym kam bãmjã amybým omũ, kraja pumũ. Ne kam rerek ne, tik ngyo

\* 15:16 Jeju nhõ pykakam me kunî bêngòkre kute mrãmri ne apýnh me ò pyka djãri kunîkõt me kunî bêngòkre pyrãk.

nhÿn kum kaprÿ ne. Ne kam prôt ne kajpan o tÿm ne kam abej muw.

21-22 Nhyam kam bãmã kum, “Djũnwã, ota ba Metĩndjwÿnhmẽ ar akam ar amikràò iba. Djãm imex got ga aje ijo akra rà'ãmã”, anhÿr konenh nhyam bãmja ò àpênhmã kum, “Amũ ar ajò aprôt ne kubèkà mexwãmẽ ikrakam ràxwãmẽ parkàwãmẽ amrẽ amÿn o aprôt ne kum angjê, ane. <sup>23</sup> Ne ãm ar ajò aprôt ne ije kutèp mryti jabatàn nyre nhĩptĩ'ã ma nhyam ãmwã japròn amrẽ o tèn abĩ. Gwaj banhò kwÿ krèn rax ne bakĩnh kadjy. <sup>24</sup> Ota ikra. Be, ikra djwÿnh ja ne ibè tyn ajte akubyn tĩn ne. Nãm akunon arÿm akubyn imã kato”, ane.

Nhyam kam me kĩnh rax kato. Kĩnhkumrẽx ne ò kwÿ krèno kumex.

25-26 Nhyam kam kutewaja purkam àpênho dja. Àpênho dja:n àpênho ino ren kam kurũm tẽ. Tèn kam kikre tẽpo tèn me kanga ma. Me toro dja nhyam me ngrer man kam amikutã bãm nhò àpênh 'uw. Nhyam kutã tèn kajpa nhyam kum, “Mÿj nã”? ane.

<sup>27</sup> Nhyam kam kum, “Ije atõnhre ne arÿm bõx. Nhyam kam abãm kadjy mryti jabatàn nyreja bĩ, twÿmtija bĩ. Nhyam abãm kĩnhkumrẽx ne. Amrèbè: atõnhre tèm ne arÿm bõxkam ne abãm kĩnhkumrẽx ne. Mÿjja kute ajmã o kêt, umar mex ne ar ban arÿm bõx, kam ne abãm kĩnhkumrẽx ne”, ane.

<sup>28</sup> Nhyam kam tu ngry:k ne kikremã àr kêtumrẽx ne. Ne kam kapõtã arek ngryk ne dja. Dja nhyam bãm 'ÿr katon te kum kabèn ne, te kum me tor'ã apnèn kum, “Amrẽ tèn anhò kwÿ krèn me kudjwa akĩnh”, ane. <sup>29</sup> Nãm te kum ane nhyam kam kum, “Kê wajre. Nã bãm amã idjàpè:nh ar iba. Arÿm idjàpênh'ã amex krãptĩ. Djã nã bãm abè amikati? Ga mÿjja 'ÿr ijano ba 'Kê wajre' ane? Kati, nã gãm mÿjja 'ÿr ijano ba akrànãm amã 'ÿr

mrã. Djã ne ga kam mãn imã anhò mokaak'õnh bĩ bar inhòbikwamẽ ro'ã kwÿ krèno nhÿn ikĩnhkumrẽx ne? <sup>30</sup> Nhyam bep akamrerre ne anhò nèkrèxo mõn me kuprÿ'ã kukrèn mõn ajbir bõx ga kum gu banhò mryti twÿmtija bĩ”, ane.

<sup>31</sup> Nhyam kam bãmja kum, “Ak-mere ga ne ga arek ikuri dja. Ne inhò mÿjja kunõ anhò”, ane. <sup>32</sup> Mrãmri ne bar ikĩnhkumrẽx ne. Mrãmri ne bar ikĩnh ne itor inhÿrja. E kum mrãmri ne atõnhre gu babè tyn ajte akubyn tĩn ne. Nãm akunon arÿm akubyn kato, ane. Nãm ã bãm kutewajamã ane. Tãm ne ja.

Be, nãm ã Jeju mekbè pardjèumã ujarènh ane. Metĩndjwÿnh kum me axwedjwÿ jabèn kute me abej ne kute me utàr nhyam me ô'ã kĩnh'ã ujarènh ne ja.

## 16

*Ò àpênh kute ò bẽnjadjwÿr noo bi-knor.*

<sup>1</sup> Nhyam kam Jeju ajte kute kòt ba djwÿnhmã mÿjja 'ò'ã kabèn jakremã arkum,

—Me'ò bẽnjadjwÿr ne ò pi'òk kaprÿ kumex. Nhyam kam ò àpênh ne kum kam àpênho dja. Pi'òk kaprĩmẽ nèkrèxja kunĩkam kum àpênh ar ba. Nhyam kam me kàtàm ne me kum ò àpênhja jarèn kum, “È, ota anhò àpênh arÿm abè amijã anhò pi'òk kaprÿ krèno mõ, ane. Arÿm abè o apèx mexo mõ”, ane.

<sup>2</sup> Nhyam kam arÿm ò bẽnjadjwÿrja amiwÿr ku'uw ne kum, “Mÿj nã? Mÿj ne ga ajmã o nhyam me imã ajarè? On amrẽ inhò nèkrèx'ã pi'òk no'òkwão akato ba omũ. Jakam dja ga imã adjàpênh kêtumrẽx ne”, ane.

<sup>3</sup> Nhyam kam kabèn ja man kam òkre kadjwÿnhbè amim, “Ije tó mã dja ba nè? Arÿm ne inhò bẽnjadjwÿr bõm imè. Mã dja ba nè? ãm arngro tÿxkam purkam idjàpênhbè irerekre ne kikre kabe'ã idjà'wÿr

imrānhbê ipijāmà”, ane. <sup>4</sup> Nām ja jarēn nhÿn kam ajkam aman kam,

—E kum ā ane. Arÿm ne ba kuma. Jakam dja ba ar jamā ikabēn jarē nhyṃ arÿm inhō bēnjadjwÿr kute bōm imēnhkam ar ja arÿm ijo ōbikwan amiwÿr ijo wadjā, ane. <sup>5</sup> Ne kam ar kute bēnjadjwÿrmā pānh kētja amiwÿr ar ku'uw. Amiwÿr ar ku'awn arkum, “Mā ne ga aje mÿjjao pānh kētja kute?”

<sup>6</sup> Nhyṃ kam kum, “Ngōnh krōkrōktibē 100. Rōny kangō'ā ngōnh krōkrōktibē 100 ne ba kum o pānh kēt ne”, ane.

Nhyṃ kam kum, “Mī. Aje pi'ōk no'ōk tūmjā byn on o nhÿn 100ja ngrān pānh 50 nhō”, ane. Ajēx ne kum ngrēre jarēn kum 50 nhō, ane.

Nhyṃ kam ā anen kam kīnhkumrēx ne kunhōn mā tē. <sup>7</sup> Nhyṃ kam ajte abej ja kukij ne kum, “Mā ne ga aje mÿjjao pānh kētja kute”? ane.

Nhyṃ kam kum, “Bàygogore'ā xakubē 100”, ane.

Nhyṃ kam kum, “Mī. Anhō pi'ōk no'ōk tūmjā by gē arīk wānh 100 nō, ga pānh kum 80 nhō, ane. Ajēx ne 'ā kum kājibē krāptibē 80 nhō”, ane.

Nhyṃ kam ā anen kunhōn kam kīnhkumrēx ne mā tē. Nām ā arkum o anhyō tē. Ō āpēnhja arkum ō bēnjadjwÿrja noo biknoro anhyō tē. We arkum kīnh ne kute amipānh o ōbikwamā ne ā arkum o anhyō tē.

<sup>8</sup> Nhyṃ ō nēkrēx djwÿnh ne ō āpēnhja no mex jarē. Ākīnhīkam ne kum no mex jarē. Nā, mrāmri ne amikadjy no mexkumrēx. Nā, mrāmri ne pykabē me ar baja ne me mrāmri amikadjy no mexkumrēx ne o Metīndjwÿnh nhō me ja jakrenh mex ne. Nhyṃ bep Metīndjwÿnh nhō me ja ne Metīndjwÿnh kadjy amak mex ne kam kute a'uri me mrānhja pyrāk.

<sup>9</sup> Djām ā ar aje ō āpēnh kudjwa me noo abiknoro anhyōrmā ne ba ije ar amā arēnhja? Djām ar adjākīnhī,

ar ajēxnhīkōt aje meo anhōbikwamā got. Djām ar aje pi'ōk kaprīkōt meo anhōbikwa nhyṃ atykkam kute amikōt kājkwamā ajo ābir mā got. Djām me ja kute kājkwamā ajo ābir gar atīn rā'ā rā'āmā got. <sup>10</sup> Arkati. Gēdja me'ō mÿjja kakritte kumrēx, mÿjja ngrire kam āpēnhō djan prīne o djuw mex ne o ākīnh kēt, me'ō tām gēdja arÿm ajte amū ijukri mÿjja rūnhdjwÿo djuw mex. Nhyṃ bep kati, gēdja me'ō mÿjja kakrittekam āpēnhō djan arÿm o akī ne kam ajte mÿjja raxkamdjwÿ āpēnhō djan adjwÿnhdjwÿo akī.

<sup>11</sup> Bir be, tām. Dja gar pykabē mÿjja kakrit, pi'ōk kaprījao akī djām Metīndjwÿnh kute kājkwakam ō mÿjja rūnh, ō mÿjja mestire kute ar amā ōrmā got? Kati, arÿm ne ar akabi. <sup>12</sup> Dja gar ari me ō nēkrēx prokam amikrān o adjākīnhō aban ar mekbē o abikēnhō aba, djām Metīndjwÿnh kute ar amā anhō mÿjja nhōrmā, anhō nēkrēx djwÿnh kute ar amā ōrmā? Arkati.

<sup>13</sup> Ē, nhÿnh ne me'ō ō bēnjadjwÿr amānhkrut'ō amē arkum āpēnh ar ba? Kati, gēdja o anen kam te o ane. Gēdja kum ja kurēn kam kum ja jabē. Nār kon, gēdja kum ja kīnh ne kumābit apē ne kam kum ja kurēn kum āpēnh kēt ne. Dja ga amā Metīndjwÿnh kīnh ne ajte amā nēkrēx kīnh ne kam kute bēnjadjwÿr amānhkrutmā adjāpēnh pyrāk. Gēdja ga te o ane, ane.

<sup>14</sup> Nhyṃ bep mekbē pardjēu ne me Jeju kabēn maro nhÿn aprÿo kumex. Me kum pi'ōk kaprī kīnhkam, kam ne arē nhyṃ kam me aprÿo kumex. <sup>15</sup> Nhyṃ kam Jeju memā kum,

—Me ga ne ga we me amijo katāt amrānh ne. Me kunī kute we me amex pumūnh ne kute me amā me amex jarēnhmā ne ga we me amijo katāt amrānh ne. Nhyṃ bep kati, Metīndjwÿnh ne kute prīne me akadjwÿnhbē me apumūnh. Me

aje amim mýjja'ã karōjakôt ne me akadjwýnhbê prīne me apumū. Be, mebēngōkre ne me me akrākàbit pumū, ga me kam kute amex pyrāk nhym me me amex jarē. Bep kati, Metīndjwýnh kute prīne me akadjwýnhbê me apumūnh nhym mýjja punubit me akadjwýnhbê ikwākam kum me amex kêt. Mrāmri me apunukumrēx.

<sup>16</sup> Amrēbê ne me Mōjdjê kukràdjākôt ar amijo ba. Metīndjwýnh kabēn jarēnh djwýnh kabēnkôtme ar amijo ba. Ar kôt me kute amijo ba rã'ã nhym arým Djuão ajte adjwýnhdjwý bôx. Djuão kute ngōnhmã me angjēnhja adjwýnhdjwý bôx. Ajbir ne Djuão tūmrãm bôx ne ar memã 'ã ujarēnh ny jarēho ba. Me kute axwemã irern kute Metīndjwýnh'ýr amijo akēx nhym Metīndjwýnh kute me utār ne me kadjy bēnjadjwýr ne ar kute meo ba'ã ne memã ujarēnh tē. Nhyr me krāptī arým kute 'ýr amijo akēx prāmkmrēx, kute mrāmri ne me krāptī kikre ngriremã ngjēnh prām ne kam 'ã kute aben nhingānhja pyrāk. Me kute ari 'ã ikjēo aben rēnh ne 'ã kute aben nhingānho kumexja pyrāk. Nām me ã kute Metīndjwýnh'ýr amijo akēx prāmkmã ã ane.

<sup>17</sup> Nhyr Metīndjwýnh kukràdjã tūmja, kute me mrānh mex'ã memã karōja, djām arým tūm ne apēxmã? Kati, gēdja rã'ã ne. Pykamē kãjkwabit dja apēx nhym bep Metīndjwýnh kabēn dja tūmrãm rã'ã rã'ã ne. Nhýnh ne mýjja ngrire, mýrbê itãja 'õ biknormã? ane.

<sup>18</sup> Ne kam ajte Metīndjwýnh kukràdjã 'õ jarē. Me kute tu prō'ýr bakumrēx ne kute kanga kētmã memã arē ne memã kum,

—Gēdja me'õ prō'ýr mōn ar o ban kanga ne kam pānh atemã me'õ'ýr mōn kam kute krō'ã prō pyrāk. Mjēnja ne axwe. Nhyr kam ajte me'õ ne prō kanga nhym kam me'õja ne me'õ kute prō kangaja'ýr

mōn kam arým kute me'õbê prō ãkīnh pyrāk, ane.

*Radjaru mōn me'õ bēnjadjwýr 'wýro nhý.*

<sup>19</sup> Nām ã Jeju memã anen kam ajte memã mýjja 'õ'ã karō ne memã,

—Me'õ ne õ nēkrēx kumex ne kute amidjwýnhbit mar. Nām kubēkã mex, kubēkã pānh raxbit jangij ne õ kwý krēn djã mexbit kute mar. Myt kunīkôt ne ã o anen õ kwý krēn rax ne. <sup>20-21</sup> Nhyr kikre jajkwa krekremã me'õ bikēnhja ikwã. Myt kunīkôt kikre jajkwa krekremã ikwã. Ne te kute õ anhy krēn prāme. Me'õ kute myt kunīkôt kubēkã mex, kubēkã pānh rax jangjēnh ne 'ã mrānhja tām ne te kute õ anhy krēmã kuri ikwã ne te 'ã 'wýro ikwã. Idjibē ne Radjaru. Tām ne prīne karýr týx ne, tēmē prīne týx ne. Karýrmē tē týx nhym ta ikwã. Nhyr bep roprebit ne 'ýr māt ne karýr kunuw, tē kunuw.

<sup>22</sup> Nhyr õ mýjja kētja, Radjaru, arým ty nhym kam kadjy mrānh djwýnh kumýn kãjkwamã Abraão'ýr o tēn o bôx. Nhyr kam ar ingēt kukāmāre Abraão'õ ro'ã ar ba. Nhyr me'õ nhõ nēkrēx kumexjadjwý ty nhym me kam o mōn adjã.

<sup>23</sup> O mōn adjã nhyr kam me tyk nhõ pykakam bôx ne kam tokry rax ne. Tokry: ne, ne kam tokry py-maje kãjmã rīt ne amybým Abraão pumū. Nhyr ar Radjarumē ro'ã ar ba. Ar umar mexkumrēx ne kīnhkumrēx ne ar ba.

<sup>24</sup> Nhyr kam Abraão pumūn kam kum amijo akijn kum, “Ngētwa, ngētwa Abraão, gop amrē amã ikaprīn iwýr Radjaru jano gē amrē iwýr tēn ngōmã ikra nhōttebit jadjàn o inhōto ngo, ane. Ota ba kuwyjakam itokry bit itokry”, ane.

<sup>25</sup> Nhyr Abraão kum, “Bir be, krāny, omū. Atīnri ne ga mýjja mexbito amikīnh ne. Nhyr bep Radjaru ne kaprī, tīnri kaprīn ar ba.



Ne kam arým jakam kīnhkumrēx ne. Ga ne ga arým pānh atokryn akaprīre. <sup>26</sup> Ē, mýjja 'ōdjwý. Djām jānh ne wām awýr tēm ne kute ajmā ajomā? Nām me banēje inuwti: nō, ne kam abenmā kre raxi. Ne kam jakam me ijō'ō me awýr itēm prām kêtê. Ga me ajō nīnh pānh me ikam abōx prām kêtê. Aprakamā ne gwaj banēje inuwti: nō”, ane.

<sup>27-28</sup> Nhyam kam kum, “E kum ā ne. Ē, ngētwa, gora ibām nhūrkwā'yr Radjaru jano. Kam ne ikamy amānhkrut ne amānhkrut ne ikjêkêt. Ar'yr dja Radjaru tēn arkum arēn arkum tīn jadjā gē ar jakam, me tokry rax djājamā ikôt bōx kêt”, ane.

<sup>29</sup> Nhyam Abraão kum, “Kati. Arkati, amrēbê ne Mōjdjēmē Metīndjwýnh kabēn jarēnh djwýnh ar'ā pi'ók no'ók ne te memā arē. Gē ar Mōjdjē ar kabēn ma”, ane.

<sup>30</sup> Nhyam kam kum, “Kati, ngētwa Abraão, got ren me'ō me tyk kurūm me'yr katon bōx ne memā arē nhyam ren me arým kôt amim katon kam ren wānh axwemā iren Metīndjwýnh'yr amijo akēx ne jakam bōx kêt ne”, ane.

<sup>31</sup> Nhyam Abraão kum, “Kati, dja me Mōjdjēmē Metīndjwýnh kabēn jarēnh djwýnh kabēn mar prām kêt, nhyam ajte me'ō me tyk kurūm katon te memā amijo amirīt ne te memā arē nhyam ren ajte tām ne. Te ren omūn tu ate krā”, ane. Nām ā Abraão me'ō nhō nêkrēx kumex-jamā ane. Tām ne ja, ane.

Be, nām ā Jeju memā ujarēnh ane.

## 17

*Me'ō me'ōkam axwe nhyam tu axweo biknormā.*

<sup>1-2</sup> Ne kam ajte kôt ba djwýnhmā, —Wānh ne me axwe pro ar akukām rax ne nō. Nhyam bep me kute memā axwe'ā āpnēnhja gēdja me tokry ra:x ne. Watī:re. Dja prīne Metīndjwýnh meo ajkē nhyam

me tokry ra:x ne. Me'ō kute me prīre pyrāk ne ajbir kute amim imar nyja nhyam ren me'ō axwe'ā kum apnē nhyam ren arým kôt axwe nhyam kam ren me kute kum axwe'ā āpnēnh djwýnhja nhōkre'ā kēnpoti nhō ne ren ngōnhmā kumē, ngō raxbē pyka kêt mā kumē nhyam ren kubī, ja ne kāj bē tokry. Tokry ngri. Nhyam bep kati, dja prīne Metīndjwýnh o ajkē nhyam tokry ra:x ne.

<sup>3</sup> Gora ar amijā ano tỳx ne amijāno dja. Dja ar akamy'ō axwe jabej gar ajō kum akabēn'ō jarē. Kum akabēn'ō jarē gē axwekam amim ngryk ne amim kato ga kam tu o akno. <sup>4</sup> Gēdja mā akam axwe jabej ga kam tu o abiknorkumrēx. Dja myt pydjikam akam axwe amānhkrut ne amānhkrut ne amānhkrut ne ikjêkêt ne kam awýr tēm ne kute amā, “Arým ne ba ijaxwekam amim ingryk ne”, anhyr amānhkrut ne amānhkrut ne amānhkrut ne ikjêkêt jabej ga kam tu o akno, ane. Nām ā Jeju arkum ane.

*Tu amim kamnhīxkumrēx.*

*Mat 17.20; Mak 11.23*

<sup>5</sup> Nhyam kute ar anor nhyam ar mōrja Bēnjadjwýrmā kum,

—Ar ba ne bar ije amim amar ngrire. Gop on ar ikadjwýnhbē ar ijo tỳx ne ar ikadjwýnhbē akabēn wadjā bar amim amar rax.

<sup>6</sup> Nhyam kam Bēnjadjwýr arkum, —Ga ren ar amim ikamnhīx ngrireo kute motadu 'y kryre ja pyrāk ne ren arým pyjamā akabēn ne ren kum, “On amikaban ngō raxbē pyka kêt mū jakam mān ajte dja”, ane.

Nhyam ren tēn ngō rax nījkam dja. Ar aje tu amim ikamnhīxkumrēxkam ren tēn nījar ngō raxkam dja. Nhyam bep kati, ām ar aje amim ikamnhīxkumrēx kêtê, ane. 'Ybē motadu ne kryre kute karnhō nhijy pyrāk. Nhyam Jeju ajte arkum,

*Me tu akrànmã Metĩndjwỳnhmã àpênhmã.*

<sup>7</sup> Ga we ar ajõ abẽnjadwỳr rax ne nhỹ. Nhyam kam anhõ àpênh purkam àpênhmã tẽ, nàr kon kute mrykĩ'átomtio djuw mexmã 'ỳr tẽ. Ne kam wãnh purkam àpênho dja. Àpênho dja:n arỳm àpênho ino ren bõx. Djãm aje kum, "Amibêx ne nhỹn atyk djã kêt ne kam anhõ kwỳ krẽ", anhỹrmã got.

<sup>8</sup> Bep kati, dja ga ajte tu ano ne kum, "On imã òmrõn kam kadjy tẽn kubêkà mex jadjàn amrẽ imã òmrõo tẽ ba kukrẽ. Ne ngõdjwỳ imã kwỳ jadjã. Dja ba inhõ kwỳ krẽn kõt ikõ, ane. Ba ikumrẽx inhõ kwỳ krẽn pa ga kam ikudjwa anhõ kwỳ krẽn kõt ikõ", ane.

<sup>9</sup> Djã nãm bẽnjadwỳrja õ àpênh djàpênho amra got. Djã nãm õ àpênh djàpênh pumũn kum mex jarênho ba got. Kute kabẽn mar ne kute kõt amijo bakam, djã nãm kum mex jarên kam kum amikĩnh jarên ar o ba? Kati, mrãmri ne õ àpênh. Ò àpênh kute õ bẽnjadwỳr kabẽn mar ne kute kõt kum mỳjja kupênh.

<sup>10</sup> Bir be, ar gadjwỳ dja gar Metĩndjwỳnh kute ar amã mỳjja jarênhja kunĩ kupên amidjapênh pumũn kam, "Ije, djã nã bãm ar Bẽnjadwỳrmã idjapênh mex ar iba got ar ijo amra? Kati, dji Bẽnjadwỳr kute me anor nhyam õ àpênh kute kum àpênhmākêt. Kõt ne Bẽnjadwỳr ar ijano bar kum idjapênh iban ikĩnhkumrẽx ne, ane. Djãm kute ar idjapênho àmra kadjy ne bar kum apê? Kati, nã bãm ar tu akrànmã kum idjapênh iban kam ikĩnhkumrẽx ne", ane. Dja gar ã ane. Be, nãm ã Jeju kõt ba djwỳnhmã arênho ane.

*Me ì kajêkam tẽ kubê 10.*

<sup>11</sup> Ne kam ajte Djeruxarẽ'ỳr kràn tẽn pry pnã, aben nêje a'yr. Nãm mũm pykabê Xamarij ne amrẽ pykabê Garrêja nhyam pyka 'yr nhõkre

djakõt pry ja'ã tẽ, 'ã Djeruxarẽ'ỳr tẽ. <sup>12-13</sup> Nãm pry'ã tẽn kam ì krĩ 'õmã àr tẽ. Krĩ 'õmã àr tẽn nhyam me ì kajêkam tẽ kutã mõ. Me ì kajêkam tẽbê 10 ne kutã mõn kajpan kam nĩjar ku'ê, tãri ku'ê kêtê, nĩjar ku'ên kam kãj bê kum kabẽn ne kum,

—Jeju, Bẽnjadwỳr, gop amã me ikapri, ane.

<sup>14</sup> Nhyam Jeju me omũn kam memã,

—On me mõn me kadjy Metĩndjwỳnh mar djwỳnhmã amibê, ane.

Nhyam me mõi pro akêx ne mã Metĩndjwỳnh mar djwỳnh'ỳr mõn mõi rãm arỳm kà mex ne.

<sup>15</sup> Nhyam kam pydjın amimex pumũn kam akubyn Jeju'ỳr tẽ. Metĩndjwỳnhmã ukapri, mex jarênho tẽ. Kãj bê kum arênho tẽn kam Jeju'ỳr bõx. <sup>16</sup> Jeju'ỳr bõx ne kam tu mỳrbê tỹm ne kum amikĩnh jarênho nõn kum mex jarênho nõ. Me bajtem'õ, Xamarij kam me ja'õ. Tãm ne akubyn tẽn Jejumã mex jarê. <sup>17-18</sup> Nhyam kam Jeju memã,

—Ije, nhãr me? Nã bãm mebê 10o mex nhyam me 'õ akubyn iwỳr tẽn kêt ne. Mỳkam ne kubajtem-jabit akubyn iwỳr tẽ? Mỳkam ne me wã akubyn kudjwa mõi ne Metĩndjwỳnhmã mex jarênh kêt ne?

<sup>19</sup> Ne kam kum,

—Aj, on kãmã djan tẽ. Nã gãm tu amim ikamnhĩxkumrẽx ne. Nhyam kam arỳm Metĩndjwỳnh apytã, ane. Nãm ã Jeju kum ane nhyam kam mã tẽ.

*Akubyn bõx djã kutã dja me ate krãn ar ba jarênh kadjy.*

*Mat 24.23; Mak 13.21*

<sup>20</sup> Nhyam kam mebê pardjêu Jejumã,

—Mỳj akatikam dja Metĩndjwỳnh me bawỳr Bẽnjadwỳrbê kumkati jano nhyam kute me bakurê djwỳnhbê me bapytãr ne kute ar me bajo bamã?

Nhyam kam memã,

—Kute me apytâr ne ar me ajo ba kadjy, djâm Bĕnjadjwÿrbĕ kumkati mÿjja 'ômĕ ro'ã bôx ga me aje kôt omũnh ne aje abenmã bôx jarĕnho akumexmã? Kati, me kute mÿjja 'ôkôt omũnh kĕt. <sup>21</sup> Me kute jakam mÿjja pumũnh ne kute abenmã, “Ota, Bĕnjadjwÿr arÿm bôx”, anhÿr kĕt.

Nâr kon, me kute nÿjar omũnh ne kute abenmã, “Orĭnã, arÿm Bĕnjadjwÿr amrĕ tĕ”, anhÿr kĕt.

Mÿkam? Bir, anhô Bĕnjadjwÿrbĕ kumkati kute ar me apytâr ne me akadjy bĕnjadjwÿr ne kute ar me ajo bamã ne arÿm me awÿr bôx, arÿm me anhipôkri bôx, me anhipôkri ar ba, ga me omũnh kĕtkumrĕx, ane.

<sup>22</sup> Ne kam ate kôt ba djwÿnhmã,

—Adjÿm, dja ĩ ar akaprĭ djã ar awÿr bôx. Ar akaprĭ djã nhijukri dja gar te ikuka kre jabej rĭt. Ne kam abenmã, “Gora gĕ on ajte akubyn bôx gwaj omũ. Amrĕbĕ kute gwaj bakadjy amijo ĩ ne gwaj bawÿr rwÿkja gora gĕ akati pydjikam ajte rwÿk jabej gwaj gop ajte omũ”, ane. Dja gar te aje ĩpumũnh prãme. <sup>23</sup> Nhy m me ar amã,

—Ota arÿm bôx, ota arÿm jakam bôx, anhÿr jabej, nâr me ar amã, “Ĕ, onĭj arÿm bôx”, anhÿr jabej ga kam ar tu ate akrãn 'ÿr amôr kĕt ne mekôt 'ÿr aprôt kĕt.

<sup>24</sup> Nhy m bep kati, ibôx djã gĕdja amirĭtkumrĕx ne. Amirĭtkumrĕx nhy m me kunĭ omũ. Ba ije amijo inhĭ dja ba akubyn bôx nhy m me kunĭ ĩpumũ. Ga na jadjĕnh ne kute prĭne kãjkwa kurwÿo tuknĭja pumũ. Dja ã akubyn ibôx djã nhô akatikam ije amijo amirĭto kãjkwa kunĭ kurwÿo ane.

<sup>25</sup> Nhy m bep itokry rax kumrĕxi. Me kamingrãny ja dja me prĭne ijo ajkĕ ba kam itokry rax ne. <sup>26</sup> Nhy m bep akubyn ibôx 'ÿr dja me ate krãn ar ba. Ba ije amijo inhĭ dja ba akubyn ibôx 'ÿr nhy m me ate ar krãn ba. Me kute amrĕbĕ me bakukãmã Nôwekam me ja pyrãk ne

ate ar krãn ba. <sup>27</sup> Nãm me ô kwÿ krĕn kôt ikôn abenwÿr babit ar o ba rã'ã nhy m arÿm Nôwe kã raxmã wadjã nhy m me aĕrbĕ ngô me iby ajkapĭn me imex ne.

<sup>28</sup> Ne kam ajte kute amrĕbĕ me bakukãmãre Rokam me ja pyrãk ne ate krãn ar ba ne ô kwÿ krĕn kôt ikôn abenmã mÿjja ngãn abenmã mÿjja o pãnh ne purkam mÿjja kren amim kikren jabit ar kuman o ba. <sup>29</sup> Ar ã anhÿr ba rã'ã nhy m arÿm Ro krĭbĕ Xôtôma kurũm tĕ. Aje. Nhy m arÿm wakrekam kuwy me aĕrbĕ mekam ajka'u ne me imex ne. Kĕn ngrãngrã pôkmĕ me'ã akãn kam me imex ne.

<sup>30</sup> Dja ba ã akubyn ibôx djão ane. Gĕdja me ate ar krãn ba. Ba kam ba ije amijo inhĭja dja akubyn ibôx djã me aĕrbĕ ã amirĭto ane. <sup>31</sup> Kam, ibôx djãjakam, gĕdja me'ô kre tã nhÿ ne akubyn ô nĕkrĕx'ÿr àr kĕt. Kwãrĭk wãnh akubyn ũrkwãkam nĕkrĕx'ÿr àr ne byr ne o tĕm kĕt. Nhy m me'ôdjwÿ ar purkam ba. Ba bôx gĕ arĭk wãnh ô kikremã ô nĕkrĕx'ÿr kwÿr kĕt. <sup>32</sup> Gar Ro prôja ma. Ro prô ne ô nĕkrĕxo amak djãje amipãnh krã tĕn ty.

<sup>33</sup> Me kute amidjwÿnhbit mar ne pykakam mÿjja jakôtbit amak bĕnja gĕdja me tyn kam ijukri tĭn kĕtkumrĕx. Nhy m bep me kute amidjwÿnh mar kĕt ne amibĕ ô mÿjja kanga, me tãm gĕdja me amiptãn ar tĭn ne ba, jakam ar tĭn ne ban kam tyk nhijukri tĭn rã'ã rã'ã. Tãm ne ja.

<sup>34</sup> Nhy m bep kati. Ĕ, ba ar amã arĕ, dja ba akamãtkam ibôx jabej nhy m me'ô my ar amãnhkrut aben nhikô'ã nō. Ba ikjĕbito tĕ nhy m ikjĕ arek wakrekam nō. <sup>35</sup> Nhy m me'ô nire ar amĕ à'uko nhÿ. Ba ikjĕbit pa 'amÿn o tĕ nhy m ikjĕja arek wakrekam nhÿ. <sup>36</sup> Nhy m me'ô my ar amĕ kapôtka tĕ ba ikjĕ pa 'amÿ nhy m ikjĕ arek wakrekam dja, ane.

Nām ā Jeju ane. <sup>37</sup> Nhyṁ kôt ba djwýnh bôx djà jabej kukij ne kum, —Bēnjadjwýr, nhýnh jakam dja ga bôx?

Nhyṁ arkum,

—Gar nhônhne mry tyk'ā bikprônh ne kumex ne kute o amirítja pumū, ane. Dja ā Jeju akubyn bôx kutā mýjja apôx ne bôx djào amirító ane.

## 18

*Me'ô nire kute kabēno bēnjadjwýr katyk.*

<sup>1</sup> Nhyṁ kam ajte kôt ba djwýnhmā atemā mýjja'ā ujarēnh jakreo tē. Mete Metīndjwýnhmā kabēn 'āno ām ne kute kanga kêt'ā ne arkum arēn arkum,

<sup>2</sup> —Atemā pyka 'ôkam ne memā axwe pānh jarēnh djwýnh kum Metīndjwýnh pyma kêtumrēx ne mebēngôkredjwý mar kêtumrēx.

<sup>3</sup> Nhyṁ pyka tām kam me'ô ni 'uwtīre kubé mjēn tyk nhyṁ me'ô ar o bikēnho ba, 'uwtīkam ar o bikēnho ba. Nhyṁ kam akati kunīkôt mā 'ýr mrān kum arēn kum, “On ijo angyrk”, ane. “On ikurē djwýnhmā arē gē on imā o pānh”, ane.

<sup>4-5</sup> Ne mā kum 'ā apnē. Te kum 'ā apnē nhyṁ ate krān ar ba. Nhyṁ mā kum arē nhyṁ kam, “Ije. Ije ba gop on 'uwtīwāo ingyryk ne kute kum o pānh kadjy kurē djwýnhmā ikabēn 'ô jarē gē gop on arek wānh nhý ba ityk djà kêt. Djā nā bām imā Metīndjwýnh pymā imā mebēngôkre pyma got ba o ingyryk? Kati, nām mā ikujrē ba gop on o ingyryk gē gop on anhikrēn kabēno ikatkyk ngri”, ane.

<sup>6</sup> Jeju ne arek arkum ujarēnho dja ne arkum,

—Memā axwe pānh jarēnh djwýnh ja ne axwekam me'ô 'uwtīo ngyryk ne. Amijā maje ne o ngyryk ne. <sup>7</sup> Djām ā Metīndjwýnh kute anhýr got? Kati, Metīndjwýnh ta

ne amijo me bapytān kam ô me jabē ate krān ar ba kêtumrēx. Nām ô me ja mar 'āno dja. Nhyṁ me kum amijarēnh ry typydji. Akamātkammē a'urimē ne me kum amijarēnh ry typydji.

Nhyṁ arým me kuma. Djā nām amikrà:n gormā ô me jao ngyryk got. <sup>8</sup> Kati, ē, ba ar amā arē. Dja ô me jao ngyryk kukrà kêt ne. Ba ije amijo inhī gēdja ba akubyn pyka jamā bôx, ije meo ingyryk kadjy akubyn bôx, djā nām me ja akubyn ibôxmā ikamnhīx got? Kati, dja me ate krān ar pyka jabē ba rā'ā ba akubyn bôx, ane. Nām ā Jeju kôt ba djwýnhmā ane.

*Me'ô ar amānhkrut kute Metīndjwýnhmā amijarēnhmā.*

<sup>9</sup> Ne kam ajte memā atemā mýjja'ā ujarēnh jakreo tē. Me ām ta axwekam we katāt mrānh ne ajkwaobit kute ar amimex jarēnho ban kam mūm me ja'ābit ar axwe rēnho baja, me ja'ā ne memā mýjja jarēn memā,

<sup>10</sup> —Me'ô ar amānhkrut ne ar kute Metīndjwýnh nhô kikretikam kum amijarēnhmā tē. Nhyṁ jabē pardjēu'ô nhyṁ jabē bēnjadjwýr bajtemmā pi'ók kapriō atom djwýnh, àkīnhīre.

<sup>11</sup> Nhyṁ kam pardjēuja tēn wadjān djan kam Metīndjwýnhmā amijarēnhkam amijo àmrao djan kum, “Metīndjwýnh, ba amā amikīnh jarē, ane. Ije me urāk kêt kam ne ba ikīnhkumrēx. Me ne me àkīnhī, axwe, abenbē prōo akī. Nhyṁ bep kati, ba ne ba ajmā ikute kêtē. Ije tāwā pyrāk kêtē. Ije àkīnhīwā, kute pi'ók kapriō atom djwýnhwā pyrāk kêtē, kam ne ba ikīnhkumrēx. <sup>12</sup> Nhyṁ bep ba ne ba amā ikabēn kadjy amijajburo amānhkrut ne, pi'ók tyk nhôkre djākôtmē pi'ók rārarmēkam. Ne ajte amā apýnh inhô mýjja djāri kwý rax ne kungā. Nā bām apýnh inhô mýjja djāri kunī aben kadjy kryre

ne amÿn o aptàn rax ne amã kungã. Tãm ne ja”, ane.

<sup>13</sup> Nhyr bep ate ne pi'òk kaprïo atom djwÿnh. Nÿjar ne dja, pijàm djaje ibôn djan kãjmã kãjkwa'ÿr krã kêt ne amititiko dja. Amijaxwekam kaprÿn pijà:m ne. Ne kam Metÿndjwÿnhmã kum, “Dja ga adjukaprÿkôt ikam adjukaprÿ, ane. Nã, mrãmri ne ba ijaxwe ga kam tu amã ikaprÿ”, ane. Nãm ã pi'òk kaprïo atom djwÿnh Metÿndjwÿnhmã ane.

<sup>14</sup> Be, ba me amã arẽ. Mrãmri ne arÿm Metÿndjwÿnh tãmja jaxwekam ngryk kêt ne arÿm kum axwe kêt jarẽ. Nãm tu axweo aknon kum kabèn mex jarẽ nhyr arÿm umar mexkumrẽx ne mã ùrkwãmã tẽ.

Nhyr bep me'òbẽ pardjẽuja ne kute kum axwe kêt jarẽnh kêt. Mÿkam? Bir, me kute amijo rax kadjy kute ar amimex jarẽho baja gẽdja me ì kàtãm ne. Nhyr bep me kàtãm, me akrànãmã kute amijo ban pijàm ne ar baja gẽdja ì Metÿndjwÿnh meo rax ne. Nãm ã Jeju memã arẽho ane.

*Kute me prÿreo kÿnh.*

*Mat 19.13; Mak 10.13*

<sup>15</sup> Nhyr me Jeju'ÿr me prÿredjwÿo mō, me prÿredjwÿ jamÿn 'ÿr meo mō, kute me'ã ikra jadjwÿr ne kute meo kÿnhmã. Nhyr kôt ba djwÿnh me omũn kam nẽje me kajpan memã bẽn tÿx ne. <sup>16</sup> Nhyr bep Jeju ne amiwÿr me prÿre 'uw ne kam kôt ba djwÿnhmã kum,

—Kwãrÿk wãnh arek amrẽ me prÿre iwÿr mō, ane. Kwãrÿk wãnh gar mebẽ adjaptàr kêt gẽ me arek amrẽ mō. ã me kute amijo anhÿrbit gẽdja Metÿndjwÿnh me utàn me kadjy bẽnjadjwÿr ne ar meo ba. <sup>17</sup> È, mrãmri ne ba ar amã katàt arẽ. Me kute me prÿre pyrãk ne amijo kàtãmjabit gẽdja Metÿndjwÿnh me utàn me kadjy bẽnjadjwÿr ne ar meo ba. Be, me prÿre kute ta amim imarja pumũ. ã me kute amijo

anhÿr gẽdja Metÿndjwÿnh me utàn me kadjy bẽnjadjwÿr ne ar meo ba, ane. Nãm ã Jeju arkum ane.

*Jeju me'ò bẽnjadjwÿr ngrirebẽ nèkrẽx pyrna.*

*Mat 19.16; Mak 10.17; Xim k 6.6; Xij 5.1*

<sup>18</sup> Nhyr kam me'ò, bẽnjadjwÿr ngri'ò Jejumã,

—Bẽnjadjwÿr, ga ne ga amexkumrẽx. Mã gẽdja ba amijo? Itÿn rà'ã rà'amã, mã gẽdja ba kadjy amijon? ane.

<sup>19</sup> Nhyr kam kum,

—Mÿkam ne ga imã imex jarẽ? Djãm mrãmri aje amim imex marmã got ga imã imex jarẽ. Me ne me mex kêt, nhyr bep Metÿndjwÿnh pydji ne mex. <sup>20</sup> Arÿm aje Metÿndjwÿnh kukràdjã marjakam ajte ikukij. Kute me mrãnh katàt'ã memã karòkôt kukràdjã ne ga arÿm ama. Aje mebẽ prõo adjãkÿnh kêt ne aje me par kêt ne adjãkÿnh kêt ne ajẽ ne aje me kãmex jarẽnh kêt. Ne ajte aje abãmmẽ anã ar kabèn mar ne ar kabènkôt amijo abaja ne ga arÿm ama. Ja kunÿ ne ga arÿm ama, ane.

<sup>21</sup> Nhyr bẽnjadjwÿr ngrija kum,

—Nã, arÿm ne ba ibòktikam ja kunÿ ma. Ne kam kôt ar amijo iba rà'ã:n arÿm ijabatãnh ne, ane.

<sup>22</sup> Nhyr Jeju kabèn ja man kum,

—Mÿjja pydji ne kute akukrà rà'ãã. On tẽn memã anhõ mÿjja wã ngràn pãnh pi'òk kaprÿ byn me 'uwÿ, me ò mÿjja kêtjamã angãn o me kÿnh ne kam amrẽ iwÿr tẽn mã ikôt ajkamẽ. Dja ga ã anen kam arÿm kãjkwakam anhõ mÿjja mex kumex, ane.

<sup>23</sup> Nhyr kam kuman kam kaprÿ:re. Ò nèkrẽx kume:xkôt amak bẽn ne kam kaprÿre ne dja. <sup>24</sup> Nhyr kam Jeju kaprÿ pumũn kam memã,

—Nèkrẽx ne kute me kukrà prãmã. Me ò nèkrẽx kumex gẽdja me te Metÿndjwÿnh nhõ pyka'ÿr bõxmã, te Metÿndjwÿnh kute meo baja'ÿr bõxmã. <sup>25</sup> Be, ga mry

jabatànhbê kameru te: kute aguja tekrax kremã ngjênhmãja pumũ. Me ò nèkrêx rûnhdjwý kute urak. Nãm te Metîndjwýnh nhò pyka'ýr bôxmã, te Metîndjwýnh kute meo baja'ýr bôxmã nhym nèkrêx utà: ne, ane.

<sup>26</sup> Nhym me kabênja man kam kum,

—Ije nhym mýj me'ò gêdja Metîndjwýnh amim utà? ane.

<sup>27</sup> Nhym memã,

—Mebêngôkre te kute mýjjao anhýrja ne Metîndjwýnhmãbit amirît ne. Metîndjwýnh kute me ò nèkrêx kumexja kute me utàrkôt mar, ane.

<sup>28</sup> Nhym kam Pedru kum,

—Ë, arým ne bar inhôbikwa kunĩmã inhiren kam mã akôt ajkamê, ane.

<sup>29-30</sup> Nhym kam arkum,

—Nà. Mrãmri ne ba katàt ar amã arê. Godja me'ò arým ò mýjjamã irer jabej, nâr ôbikwamã irer jabej, ô kikre, nâr prò, nâr kamy nâr nãmê bãm, nâr kramã irer jabej. Godja arým ò mýjja ja 'ômã irer, ne kute memã Metîndjwýnh'ã ujarênh nhym kute me utâr ne kute meo ba kadjy kum irer jabej, ba dja ba kum o pãnh ra:x ne. Dja ba pãnh on pyka jakam kum mýjjao akrenh mex ne kum kungã. Nhym ije pykao nykam gêdja tîn rã'ã rã'ã ne, ane. Nãm ã Jeju arkum ane.

*Jeju ajte kôt ba djwýnhmã amityk jarê.*

*Mat 20.17; Mak 10.32*

<sup>31</sup> Ne kam kôt ba djwýnhbê 12o aben pydjín kam aro môn arkum,

—Ë, ota gwaj arým Djeruxarê'ýr badjábir ne kam babôxmã. Kam gêdja me ajmã ijo. Ba ije amijo inhĩ ne me awýr ibôxja dja me ajmã ijo. Metîndjwýnh kabên jarênh djwýnh kute ijã pi'ók no'ók tùmja kôt dja me ã ijo anhýro tẽn kam inomã kumê. <sup>32-33</sup> Dja gwaj bôx nhym kam me me bajtemmã ikanga nhym kam me ijã bẽno ajkên ijo axên

ijaprýn ikutôn ikaprêprê:k ne kam ibĩ. Nhym kam ijã akati amãnhkrut ne ikjêkêt ba kam ajte akubyn itîn ne ikato, pi'ók no'ók tùmja kôt, ane.

<sup>34</sup> Nãm ã Jeju kôt ba djwýnhmã amijã karôn arkum amijarênhò ane. Nhym ar kute kabên ja mar kêtukumrêx. Kabên ja ne Ar kubê bipdjur nhym ar kam te kute marmã.

*Me'ò no rã akubyn rît.*

*Mak 10.46*

<sup>35</sup> Nhym kam Jeju kôt ba djwýnhò mō ne kam krĩraxbê Djeriko tẽpo mō. Nhym me'ò no rãja pry jakakam nhý ne à'wýro nhý.

<sup>36</sup> Nhym me itepato 'ãnh mō nhym kam me kanga man memã,

—Mýkam ne ga me akanga mō? ane.

<sup>37</sup> Nhym kam me kum,

—Jeju, ane. Nadjarekam Jeju ne me ijo mō, ane.

<sup>38</sup> Nhym kam kum amijo akij ne kum,

—Ë, Jeju, Dawi tàmdjwý 'ò, gop amã ikaprĩ, ane.

<sup>39</sup> Nhym me wamã mörja kum bẽn týt ne kum,

—E kum anhikrê, ane.

Nhym kam tu kum àkjêro bẽn kum,

—Dawi tàmdjwý'ò, gop amã ikaprĩ, ane.

<sup>40</sup> Nhym kam Jeju tẽm týt katikôt djan kam amiwýr ku'uw. Nhym kam me'ò 'ýr tẽn kum,

—Aje, onj arým amiwýr ajuw, anen kam pa 'amýn o tẽn 'ýr o bôx.

<sup>41</sup> Nhym kam kum,

—Nâr, mýj nã? Mã ne ba ije ajomã?

Nhym kam kum,

—Bênjadjwýr, aje inoo mex ba irĩtmã.

<sup>42</sup> Nhym kam kum,

—Nà, on rît. Tu aje amim ikamnhĩxkumrêx kam ne ga arým amex, ane.

<sup>43</sup> Nhym kam tebê rît. Ne kam Jejukôt tẽ, mekôt tẽ, ne

Metĩndjwýnhmã ukapřĩmẽ amikĩnh jarẽho tẽ. Nhyam kam me kunĩ omũn kõt Metĩndjwýnhmã mex jarẽ.

## 19

### *Djakij Jejuo aminhõ.*

1-2 Nhyam kam Jeju krĩbẽ Djeriko'yr meo mõn meo bõx ne kam bit kajõnhkõt katomã. Nhyam me Jeju'ã kumex ne přĩne angrĩn o mõ. Nhyam kam me'õbẽ Djakij. Djakij ne bẽnjadjwýr bajtemmã pi'õk kapřĩo atom djwýnh nhõ bẽnjadjwýr. Kam ne õ nẽkrẽx ra:x ne. <sup>3</sup> Nhyam me přĩne Jeju jangrĩn o mõ, kunoro mõ. Nhyam kam te Djakij kute omũnhmã 'ã aminhinõ ryo tẽ. Mýj me'õbẽ Jejuja kute omũnhmã te 'ã aminhinõ ryo tẽ. Djakij krõ krĩkam ne te kute omũnhmã nhyam me přĩne kubẽ utã.

<sup>4</sup> Nhyam kam kukãm prõt ne. Kukãm prõt ne kutẽp wabi. Pidjõ'ã wabi. Amrẽ tẽm nhyam kute omũnhmã kutẽp pidjõ'ã wabi. <sup>5</sup> Nhyam kam Jeju 'yr tẽn bõx ne parbẽ djan kajmã krãn kam kum,

—Djakij, amrẽ aparmã aprõt. Jakam dja ba akõt tẽn anhũrkwãkam nõ, ane.

<sup>6</sup> Nhyam kam tebẽ aparmã prõt ne ruw ne kam kĩ:nhkumrẽx ne ũrkwãmã Jejuo tẽn o wadjã. <sup>7</sup> ũrkwãmã o tẽn o wadjã nhyam me omũn kam kangãngãn abenmã ajkwa momoko kumex, ne,

—Djijãk, me axwe'yr ne mõn wadjã, ane. Djãm tãwã mex, ane.

<sup>8</sup> Nhyam Djakij Bẽnjadjwýr kuka kõnh djan kam kum,

—Bẽnjadjwýr, ba inhõ mýjja kõnho ajkjẽn me bikẽnhmã kungã, ane. Ne ije me'õbẽ pi'õk kapřĩo idjakĩnh jabej akubyn me'õmã inhõ jao amãnhkrut ne o amãnhkrut ne kungã.

<sup>9</sup> Nhyam kam Jeju kum,

—Akati jakam ne arým Metĩndjwýnh apytã, anhũrkwãkam ar wãmẽ ro'ã. Mrãmri gadjwý ne

ga abẽ Abraão tãmdjwý'õ nhyam Metĩndjwýnh arým apytã, ane. <sup>10</sup> Be, ja kadjy ne ba tẽ. Ije me axwe jabej ne ije me utãrmã ne ba tẽ. Kadjy ne ba amijo inhĩ ne me awýr ruw, ije me axwekam biknorja jabej ne ije me utãrmã, ane. Nãm ã Jeju kum ane.

*Me'õ bẽnjadjwýr kute õ àpẽnhmã pi'õk kapřĩnhõr.*

*Mat 25.14*

<sup>11</sup> Nhyam me kute maro ãm rã'ã nhyam ajte memã mýjja 'õ'ã ujarẽnh jakreo tẽ.

Nãm Jeju arým Djeruxarẽkam bõx 'yr nhyam kam me amim,

—Jakam dja Jeju Djeruxarẽkam bõx ne on me bakadjy Bẽnjadjwýrbẽ kumkatin me bakuré djwýnhbẽ me bapytãn ar me bajo ba, ane. Me ta ne me kute amim àtari kẽtkam týtõx amim kamnhĩx. Nhyam bep Jeju ne kute katãt memã arẽnhmã. <sup>12</sup> Kadjy ne memã mýjja 'õ'ã ujarẽnh jakreo tẽn memã,

—Ë, bẽnjadjwýr kra'õ ne me kute nĩjar atemã pyka 'õkam 'ã bẽnjadjwýr mẽnhmã tẽ. 'Ã bẽnjadjwýr mẽnh nhyam ajte akubyn õ pykamã me'yr tẽmmã. <sup>13</sup> Ne kam tẽn kutã amiwýr õ àpẽnh 'uw. Õ àpẽnhbẽ 10 ne amiwýr ar ku'uw ne kam arkum ngõnho pi'õk kapřĩre ngã. Pãnh raxkam. Õ àpẽnh kunĩmã pi'õk kapřĩ pýnh'ã kabẽn ar kum kungãn kam arkum, “Dja gar ikutẽp imã jao aptã. Dja ba amrẽ akubyn 'yr tẽ”, ane.

<sup>14</sup> Nhyam bep õ pyka djwýnhkam me ja ne me kum kĩnh kêt ne, kum kurẽ ne kam kõt me kwý jano nhyam me nĩjar kõt bõx ne kam memã, “Kwãrik wãnh tãmja'ã bẽnjadjwýr mẽnh kêt. Me ba ne ba me imã tãwã kĩnh kêtẽ. Kwãrik wãnh gẽ tãmja me ijo ba kêt”, ane.

<sup>15</sup> Nhyam me tu ate krãn 'ã bẽnjadjwýr mẽ. 'Ã bẽnjadjwýr mẽ nhyam akubyn õ pykamã bõx ne kam amiwýr õ àpẽnh 'uw ne

arkum, “Nār, djām arým ne ba ije ar amã pi'ók kaprĩ nhõrwã gar ikutêp imã o aptã”? ane.

<sup>16</sup> Nhyam kam ja kumrêx 'ÿr o bõx ne kam kum, “Bênjadjwÿr, ota ba anhõ pi'ók kaprĩ pydjija ar o iban arým amã o aptã. Amã o aptàn abenã kumê nhyam arým kubê 10”, ane.

<sup>17</sup> Nhyam kam kum, “Mexkumrêx. Ga ne ga adjâpênh mexkumrêx. Nã bãm amã mÿjja ngrire ngã ga prĩne imã o djuw mex ne, ikutêp imã o djuw mex ne aje kanga kêt. Pãnh gêdja ba amã krĩ krãptĩ jarê, krĩbê 10 jarê. Ga kam abênjadjwÿr rax ne amũ idjõ'ã ar kam meo aba”, ane.

<sup>18</sup> Nhyam atãri ja 'ÿr o bõx ne kum, “Bênjadjwÿr, ota ga aje imã pi'ók kaprĩ nhõrja ba ar o iban arým amã o aptã nhyam kubê 5”, ane.

<sup>19</sup> Nhyam kam kum, “Gadjwÿ ne ga amexkumrêx. Jakam dja ba amãdjwÿ krĩ krãptĩ jarê, krĩbê 5 jarê, ga kam abênjadjwÿr rax ne amũ idjõ'ã ar kam meo aba”, ane.

<sup>20-21</sup> Nhyam kam atãri ja 'ÿr o bõx ne kam kum, “Bênjadjwÿr, mĩ, anhõ pi'ók kaprĩ. Nã bãm ije amã kupênh prãm kêt kam prĩne amã kubêkào kupun kudji. Imã apymakam. Nã gãm apyma ne. Nã gãm aje amim mÿjja kunĩ jadjwÿr kêt kam ar mebê jãm o amijakren o atomo aba. Ne ga adjãkre kêt kam ar mebê djwÿo atomo aba”, ane.

<sup>22-23</sup> Nhyam kam kum, “Ga ne ga ajaxwekumrêx ne imã adjâpênh prãm kêt ne. Akabên jakõt gêdja ba ã ajo ane. Djã nã bãm ipyma? Ne ije amim mÿjja kunĩ jadjwÿr kêt kam ar jãm mebê o amijakren o atomo iba ne idjãkre kêt kam ar mebê djwÿo atomo iba? Bir be, ga kam we ga aje amim ipumũnhkõt ren inhõ pi'ók kaprĩ jao tẽn me kute pi'ók kaprĩ marmã angã nhyam ren abenã rôrõk tẽn rax ba ren arým 'ÿr bõx ne kuby”, ane.

<sup>24</sup> Ne kam me kute arek omũnho ku'êjamã, “Aj, amũ me ajõ kubê

pi'ók kaprĩwã byn o tẽn kute imã pi'ók kaprĩo àptãr nhyam kubê 10wãmã angã”, ane.

<sup>25</sup> Nhyam me kam kum, “Kati, bênjadjwÿr, arým tãwã nhõ pi'ók kaprĩre raxi. Arým õ 10”, ane.

<sup>26</sup> Nhyam kam memã, “Bir be, ba me amã arê. Arým me õ mÿjja gêdja ajte Metĩndjwÿnh iby memã kungã. Nhyam bep me õ mÿjja kêt, kute memã õr nhyam me kute kum o djuw mex kêtjabê gêdja Metĩndjwÿnh mÿjja ngrireja kunĩ by”, ane.

<sup>27</sup> —Ë, ikurê djwÿnh kute ijã “Kwãrĩk wãnh gê tãmja me ijo ba kêt”, anhÿrja gêdja ga me amrê meo mõn ikuka kõnh me imex, ane. Be, tãm ne ja. Nãm ã Jeju kãjkwamã tẽn ne akubyn pykamã bõx ne kute ar meo bamã ã amijarênhõ ane.

*Jeju Djeruxarêãmã bõx.*

*Mat 21.1; Mak 11.1; Dju r 12.12*

<sup>28</sup> Memã arênh pan kam ate meo mõ, Djeruxarê'ÿr kãjmã meo mõn <sup>29</sup> kam arým amê krĩ ngrireja tẽpo mõ. Krãnh nhidjibê Oriwêre parbê amê krĩja tẽpo mõ. Krĩ nhidjibê Bepadjê mẽ Betanha tẽpo mõn kam amikukãm kõt ba djwÿnh amãnhkrut janon arkum,

<sup>30</sup> —Pry ja'ã dja gar arek katãt krĩwãmã tẽ. Nhyam ar akutã pry kator kraxkam me kute mry jabatãnh nyre pĩ maktã kum õkre djê nhyam ãmwã. Me 'ã krĩ kêt wã. Tãm gêdja gar amrê 'ãpre bõn o tẽ. <sup>31</sup> Gêdja gar 'ãpre bõnho dja nhyam me'õ ar amã, “Mÿkam ne gar 'ãpre bõnho dja”? ane.

Gar kam kum, “Bênjadjwÿr 'ã tẽn kadjy”, ane.

<sup>32</sup> Nhyam kam Jeju kute ar anorja mã ar tẽn 'ÿr bõx ne kam kum kato. Kute arkum arênh kõt kum kato. <sup>33</sup> Kum katon 'ãpre bõnho dja nhyam kam õ mry djwÿnhja arkum,

—Mÿkam ne gar mry 'ãpre bõnho dja? ane.

<sup>34</sup> Nhyam kam ar kum,



—Bēnjadjwyr 'ā tēm kadjy, ane. 35-36 Ne kam Jeju kutā o tēn o bōx ne kam kum 'ā kubēkà rē, 'ā yr kadjy. Ne kam kum ikra dja nhym ar ikrakam par djan kàjmā 'ā arīn arým ate 'ā tē. Nhym kam me arým prykôt kum kubēkà rēnho mō. Nām mebê idjaer ā me bēnjadjwyr raxmā mýjja rēnh nhym 'ā tēmmā ā kum prykôt kubēkà rēnho mōro ane. 37 Nhym kam arým Jeju Djeruxarē tēpo mō. Krānhrebê Oriwēre ja'ā rwýkbê arým Djeruxarē tēpo mō. Nhym arým kôt ba djwýnhjamē, mekôt mōr, me itepato kôt mōrja arým kīnhkumrēx, kīnh ra:x ne arým àkjēr mō. Jeju ne mýjja pumūnh kēt kwý rax ne ipēx ne, nhym me kute ipēxkôt omūn kam kīnhkumrēx ne Metīndjwýnhmā mex jarēnho mō, àkjēr mō. 38 Ne kam abenmā,

—Gē Metīndjwýnh bēnjadjwyr jao kīnh rax. Bēnjadjwyr djwýnh kukwakam ne arým me bakadjy bōx. Gora gē me kàjkwakamdjwý umar mex ne kīnh rax. Gora gē me kàjkwakamdjwý Metīndjwýnhmā mextire jarēnho kumex, ane.

39 Nām me ā anhýro kumex nhym kam mebê pardjéumē me krāptī akān Jejukôt mō. Nhym kam mebê pardjéu Jejumā,

—Bēnjadjwyr gop akôt ba djwýnhmā akabēn gē anhikrē, ane.

40 Nhym kam memā,

—Ba me amā arē. Nām ren me anhikrē nhym ren kēnja ijo àkjéro nhý, ikam kīnh ne ren ijo àkjéro nhý, ane. 41 Anen kam arým Djeruxarē'yr mō. 'Yr mōn arým irā. Irān omūn kam ate me abej muw. Me kute amibê Jeju kangan amibê kurēn kute bīn nhym Metīndjwýnh kute pānh prīne meo bikēnhmā ne kôt amak bēn ne me abej muw, ne,

42 —Ga ren me ga aje amidjumar mex djā mar ren akati ja tāmkan ren adjumar mex ne ar aba. Nhym bep kati, mýjwā ne adjumar djā'ā, mýjwā ne me ajān kam me abē

o akno. 43 Adjým, dja ī me ajo bikēnh djā nhō akati me awýr bōx. Dja ī me akurē djwýnh me awýr bōx ne me amā ipōk ne prīne pykao me abē ka'ēn prīne me abē ijēn me amā ipōk me:x ne me ajo dja. 44 Dja me aminhikra kraxkam me akrā jadjuw ne prīne me anhimex ne kam me anhō kikre prīne kungrān ikō rēnho mō, ne me abēngōkredjwýo pyka tako mō, akramē. Dja me prīne me ajo mōr djā kaprā. Nhýnh gēdja par'ō dja? Nhýnh dja mýjja'ō nō? Mýkam? Bir, me aje amim Metīndjwýnh mar prām kētkam. Nām arým Metīndjwýnh me awýr bōx kute me amā me adjumar mex jarēnh ga me adjumar mex ne ar abamān amā Metīndjwýnh mar prām kēt ne, ane. Nām ā Jeju ane, anhýr djwýnhram Djeruxarē kurē djwýnh kute o bikēnhmā ā memā arēnho ane.

*Kute kikreti nēje me anor.*

*Mat 21.12; Mak 11.15*

45 Ne kam Djeruxarēkam bōx. Kam bōx ne kam Metīndjwýnh nhō kikretimā tēn wadjā, Bām nhūrkwāmā tēn wadjā. Nhym arým me kam pi'ók kaprī pānh memā mry nhōro ku'ē. Nhym kam arým bōm nēje me rēnho tē, Bām nhō kikre nēje bōm me rēnho tē. 46 Ne memā,

—Metīndjwýnh ne ō pi'ók no'ókkan memā,

“Me kute imā kabēn kadjybit ne inhō kikretiwā.

Nhym bep me ga ne ga me kam aje me àkīnhīo aben pydji djā”, ane.

Nām ā Jeju memā anen bōm me kurē.

47 Ne kam kam akati kunīkôt memā Metīndjwýnh kukrādja'ā ujarēnho ku'ē. Nhym kam me kadjy Metīndjwýnh mar djwýnh nhō bēnjadjwýrmē Mōjdjē kukrādja mar djwýnhmē ar kute meo ba djwýnhmē te kute bīn prāme. 48 Te kute ajmā ne kute bīnmā nhym me

kunī kum kabēn kī:nhkumrēx ne maro kumex. Kabēn 'āno djan kam no tyn maro nh̄y.

## 20

*Jeju Djuão jabej me kukij.*

*Mat 21.23; Mak 11.27*

<sup>1</sup> Nhyam kam akati 'ōkam Jeju Metīndjw̄ynh nh̄o kikretikam memā 'ā ujarēho dja. Ne kam Metīndjw̄ynh'ā ujarēnh ny memā arēho dja. Nhyam kam me kadjy Metīndjw̄ynh mar djw̄ynh nh̄o bēnjadjw̄yrmē Mōjdjē kukrādja mar djw̄ynhmē mebēngēttemē ne me ro'ā Jeju'yr bōx ne kam kum,

<sup>2</sup>—Goja on me imā arē. M̄yj me'ō kabēnkōt ne ga ar ā meo anhȳro aba? M̄yj me'ō ne amā me'ā karō ga kam amū ô'ā bōm ar me rēho aba? Goja on me imā arē, ane.

<sup>3</sup> Nhyam kam amipānh memā,

—Badjw̄y dja ba m̄yja jabej me akukij. Me akumrēx dja ga me imā arē ba kam ar̄ym badjw̄y me amā arē, ane. <sup>4</sup> Djuão kute ngōnhmā me angjēnhja, djām mebēngōkre kabēnkōt ne arīk ar ngōnhmā me angjēho ba? Nār djām Metīndjw̄ynh kabēnkōt? Gop me imā arē, ane.

<sup>5</sup> Nhyam kam me abenkam kan-gan abenmā,

—Ije mā dja gwaj kum nē? Dja gwaj kum, “Metīndjw̄ynh kabēnkōt”, ane nhyam kam gwaj bamā kabēn'ō jarē, gwaj bamā,

—Bir be, m̄ykam ne ga me Djuão kabēnja mar kêt ne? ane.

<sup>6</sup> Nār dja gwaj kum,

—Me kabēnkōt ne tu arīk ar ngōnhmā me angjēho ba, ane nhyam me kunī ar̄ym kēno gwaj batitik ne gwaj bapa. Me kātām ja ne me ar̄ym Djuão kabēn man kum kīnh ne, ne o Metīndjw̄ynh kabēn jarēnh djw̄ynh ne. Dja gwaj ane nhyam me o ngryk ne gwaj bapa, ane.

<sup>7</sup> Nām me ā abenmā anen kam Jejumā kum,

—Kon ne. Ar ije mar kêt. M̄yj me'ō kabēnkōt Djuão kute ngōnhmā me angjēnhja ar ije kōt mar kêtē, ane.

<sup>8</sup> Nhyam kam memā,

—Bir be, dja ba badjw̄y me amā arēnh kêt ne. M̄yj me'ō kabēnkōt ije ar meo ibaja dja ba me amā arēnh kêt ne, ane.

*Pidjōo djuw mex djw̄ynh jaxwe.*

*Mat 21.33; Mak 12.1*

<sup>9</sup> Anen kam memā atemā m̄yja'ā ujarēnh jakreo tēn memā,

—Me'ō ne pur rax djin kam kam amim pidjō kumex ne. Ne kam me kw̄ymā kum, “Gora me imā o djuw mex. Gora gē djan abatānh ne ô ga amim kw̄yo atom ne imā mūm kw̄yo atom”, ane. Nām ā memā anen kam atemā pyka 'ōmā tē. Ne kam kam wānh ar ba. Ar ban kam kà'ā ngrā: ne. <sup>10</sup> Nhyam ar̄ym pidjōja tuk ne kumex. Nhyam kam ô pidjō djw̄ynhja ar̄ym 'ā mytyrw̄y jakren kam 'yr ô àpēnh jano. Kute memā arēnh nhyam me kute kum pidjō kw̄yo atom ne kute kōt anor kadjy ne 'yr ano. Nhyam kam 'yr tēn bōx nhyam kam me kute pidjōo djuw mexja ate kaprêprê:k ne. Nhyam mā akubyn 'yr ŷkam tēn bōx.

<sup>11</sup> Nhyam ajte ô pidjō djw̄ynhja pānh 'yr me'ōjadjw̄y jano nhyam 'yr tēn bōx nhyam me ajte tām ne, kaprêprêk ne prīne o ajkēn kum pijām jadjār mex ne ano nhyam akubyn 'yr ŷkam tēn bōx.

<sup>12</sup> Nhyam ajte ô pidjō djw̄ynh 'yr ajte ô àpēnh 'ō jano nhyam 'yr tēn bōx. Adjw̄ynhdjw̄y ne me prīne o ajkēn bīn punun bōm kumē nhyam 'yr tēn bōx.

<sup>13</sup> Nhyam kam ô pidjō djw̄ynhja amim, “Ije, mā gēdja ba nē? M̄yj gēdja ba on? Jakam dja ba 'yr ikra jano, ikra djw̄ynh imā abēja dja ba 'yr ano gē gop me mar jabej.” Nām ā amim anen kam me'yr kra djw̄ynhja jano nhyam me'yr tēn bōx.

<sup>14</sup> Nhyam kam me kute puro djuw mex djwýnhja kra pumün kam abenmä 'ã karõ ne abenmä, "Be, kra ne wã. Ajrã, gu me on kubĩ. Tãwã dja bãm kum mýjja kunĩ ngã, õ nèkrêx kunĩ kanga ane. Gu me on tãwã bĩn kam amim õ nèkrêx, õ mýjja, õ pidjõja kunĩo aminhõ", ane. <sup>15</sup> Ne kam pidjõkõ kurũm bõm kumẽn kubĩ. Bir be, mã gêdja õ pidjõ djwýnhja kute me ja omã? <sup>16</sup> Bir be, dja õ pidjõ djwýnhja me'ýr tẽn bõx ne me imex ne kam õ pidjõkõja atemã me ja'õmã kungã, ane.

Nhyam me kute maro ku'êja kuman kam kum,

—Kati, gora gê ã o anhýr kêt, ane.

<sup>17</sup> Nhyam kam Jeju arek mekam no tyn djan kam memã,

—Mrãmri, ane. Mýj'ã ne Metĩndjwýnh pi'õk no'õkkam memã ja jakre?

"E kum kẽn ja ne me kute kikreo ãm djwýnhja kute kikremã armã te omün kam bõm kumẽ.

Kẽn ja ne kute kikremã o kajpar, kum o kajpar týxi", ane.

Mýj'ã ne Metĩndjwýnh kabẽn ja, nẽn? ane. <sup>18</sup> Ë, kẽn ja gêdja ga me ajõ 'ã tým ne prĩne 'ã amikrakra ne. Nhyam bep ta gêdja me ajõ nhiby tým ne prĩne angãn prĩne pyka mẽ ajo amrã, ane. Nãm ã Jeju kute prĩne kurê djwýnh nhimexmã ã amijã kẽn jakreo ane.

<sup>19</sup> Nhyam kam Môjdjê kukràdjã mar djwýnhmẽ me kadjy Metĩndjwýnh mar djwýnh nhõ bẽnjadjwýr te kute memã 'ã ujarẽnho ãmri kute o tým nhyam me kute bĩnmã te 'ã amijakre. Jeju kute puro djuw mex djwýnh'ã me akrekam. Nhyam me kuman kam kam ngryk ne. Ne te kute o tým nhyam me kute bĩnmã, ne kum me uma ne, kum me krãptĩtija puma ne.

*Me kute Xedjamã pi'õk kaprĩ nhõrmã.*

*Mat 22.15; Mak 12.13; Rõ 12.1*

<sup>20</sup> Nãm te me kute Jeju bĩnmã o anen kam amim amã, kute kabẽn 'õ kupa'ã arẽn nhyam me kute on o tým ne bĩnmã ne me amim amã.

Kam ne me Jeju'ýr ar kwý jano. Ar kute amijo kabẽn mex ne kute amijo Jeju kabẽn mar prãm ne kute mýjja jabej kukjêr kadjy ne me Jeju'ýr ar ano. Ar kute pa 'amýnh ne kute o tẽn ne me bajtem nhõ bẽnjadjwýrjamã arẽn nhyam kute bĩnmã ne ar ã o ane.

<sup>21</sup> Ar ja, ar 'êx ne kute amijo Jeju kabẽn mar prãmja ne ar kum,

—Bẽnjadjwýr, nã gãm katãt me imã mýjja jarẽn mexkumrêx ne, ne katãt adjujarẽnho dja. Djã nã gãm te me mýja pymaje ne me mýjamã akabẽn mex jarê? Kati, nã gãm katãt me imã arẽnho aben pyrãk ne, me imã Metĩndjwýnh kukràdjã'ã adjujarẽn mexkumrêxo dja. Bar arým kuma. <sup>22</sup> Ë, djãm Metĩndjwýnh kukràdjãkõt ne gu me baje bẽnjadjwýr Xedjamã pi'õk kaprĩ nhõrmã? Nãr kon. Goja on ar imã arẽ, ane.

<sup>23</sup> Bẽnjadjwýrbê Xedja ne me kunĩmã nhý ne mebê idjaero aminhõ ne pi'õk kaprĩ'ã ar me 'wýro ba. Me kute kum õr nhyam kute we me utãrmã. Ja jabej ne we ar amijo kabẽn mex ne Jeju kukij. Kute "Kati, kwãrik wãnh kubajtemmã pi'õk kaprĩ nhõr kêt," anhýr nhyam Xedja nhõ krãkamngõnhre kute o týmã, nãr kon kute, "Nã, kum angã," anhýr nhyam me ja kute o týmã, ne ar kukij ne kum,

—Djãm mrãmri ne gu me baje bẽnjadjwýr Xedjamã pi'õk kaprĩ nhõrmã, nãr kon? ane.

Nhyam bep kati, Jeju ne tu ar omũ, ar kadjwýnhbê tu ar omün kam arkum,

<sup>24</sup> —Goja amrẽ ngõnhponho pi'õk kaprĩwão tẽ ba omũ, ane.

Nhym kam ar kum o tĕn kungā.  
 Nhym kam arkum kubĕ ne arkum,  
 —Mỳj me'ō ne 'ā karōja? Ne mỳj  
 me'ō ne 'ā idji jĕtja?

Nhym ar kum,

—E kum bep Xedja karō, ane.

<sup>25</sup> Nhym kam arkum,

—Bir be, ō pi'ōk kaprī. Dja  
 gar kum angā nhym bep  
 Metĭndjwỳnh nhō mỳjjabit dja gar  
 Metĭndjwỳnhmā angā, ane.

<sup>26</sup> Nām prĭne arkum arĕnh  
 mexkumrĕx nhym kam ar  
 abenmā,

—Ije tō mā ne gwaj baje omā?  
 Djām nopnu: got kute mỳjja'ō  
 kupa'ā arĕnh gwaj baje ajmā omā,  
 ane. Nām ar te me ipōkri Jejumā nō,  
 kute kabĕn'ō jarĕnh nhym ar kute  
 o tỳmmā te me ipōkri kum nō nhym  
 mrāmri kabĕn kōt arĕ. Nhym kam  
 ar tu anhikrĕ, pijām djaje anhikrĕ.

*Me tyk ne akubyn tĭn jabej me  
 Jeju kukij.*

*Mat 22.23; Mak 12.18; Tex k 4.16*

<sup>27</sup> Nhym pānh me ja 'yr bōx.  
 Mekbĕ xadjudjĕu ne me kwỳ 'yr  
 bōx. Nām we me,

—Kati, me tyk ne akubyn tĭn kĕt,  
 ane. Nām tu me tykkumrĕx ne, ane.  
 Me ja kwỳ ne me 'yr bōx ne kute  
 mỳjja jabej kukjĕrmā 'ĕx ne kum,

<sup>28</sup> —Bĕnjadjwỳr, we Mōjdjĕ ne me  
 bamā me badjupānh'ā karō ne 'ā  
 pi'ōk no'ōk ne. Me'ō prō'yr mōr ne  
 kra kĕt ne tyk nhym atāri kamy'ō  
 pānh 'yr mōr ne kute kum kra  
 djirmā arĕ, ane. Kamy kumrĕx 'yr  
 mōrja tyk nhym kam kamy pānh  
 'yr mōrja kute kum kra djir nhym  
 kam kra kutewaja we kute bām  
 kamy kumrĕx tykja nhō mỳjjao am-  
 inhōmā. Nhym bep atāri ja ne  
 kute we bām tĭn nhō mỳjja jao am-  
 inhōmā. Nām ā we Mōjdjĕ 'ā me  
 bamā karōo ane.

<sup>29</sup> Be, kamybĕ 7 ne axikōt apōx.  
 Nhym kutewaja prō'yr mō. Prō'yr  
 mōn kra kĕt ne ty. <sup>30</sup> Nhym atārija  
 pānh 'yr mōn kam ajte ty. <sup>31</sup> Nhym

pānh atārija 'yr mōn kam kra kĕt  
 rā'ā ajte ty. Be, nām ar ā o anhỳro  
 tĕm tāmā: nhym arỳm kutapureja  
 aro ino ren 'yr mōn adjwỳnhdjwỳ ty,  
 kra kĕt ne ty. <sup>32</sup> Nhym arỳm ar prōja  
 arkōt ty, kra kĕt rā'ā ty.

<sup>33</sup> Be, nija, mā gĕdja me akubyn  
 tĭnkam ar on? Nhym ne kute o  
 kubajtem ne kute o prō kĕt dja 'yr  
 mō? Ar kunĭ ne ar axikōt 'yr ban ty,  
 ane. Nām ā me bĕ xadjudjĕu Jejumā  
 anhỳro dja.

<sup>34</sup> Nhym kam memā,

—Ē, pyka jabĕ me ar bari ne  
 me prō'yr ba nhym me nire mjĕn.

<sup>35</sup> Nhym bep me akubyn tĭnkam  
 gĕdja me abenwỳr ba kĕtkumrĕx  
 ne. Metĭndjwỳnh kute me'ā mex  
 nhōr nhym me tyk nhijukri akubyn  
 tĭn me tām gĕdja me abenwỳr ba  
 kĕtkumrĕx ne. Me my prō'yr ba kĕt  
 nhym me nire mjĕn kĕt. <sup>36</sup> Nām  
 me akubyn tyk prām kĕtkumrĕx ne  
 abenwỳr ba kĕt ne. Kam ne me  
 kute kadjy mrānh djwỳnh pyrāk.  
 Ne arỳm akubyn tĭnkam dja me  
 kubĕ Metĭndjwỳnh krakumrĕx ne tu  
 tĭn ne ajte tyk kĕt.

<sup>37</sup> Mōjdjĕdjwỳ ne me tyk ne  
 akubyn tĭnja memā o amirĭt ne. Ga  
 me akaōk pōk ne tu mex ne ām'ā  
 ujarĕnhkam kute,

“Ibĕ Abraōmĕ Idjakmĕ Djako  
 ar ō Metĭndjwỳnh”, anhỳrja  
 pumū.

Bĕnjadjwỳr'ā, Metĭndjwỳnh'ā ne  
 ā ane. <sup>38</sup> Bir be, ar tyk tūmja  
 Metĭndjwỳnhmā tĭn ne ar ba nĭj  
 pumū. Djām Metĭndjwỳnhbĕ me  
 tyk nhō Metĭndjwỳnh? Kati,  
 Metĭndjwỳnh ne me tĭn nhō  
 Metĭndjwỳnh. Me tyk kunĭ ne  
 me kum tĭn. Me tykkumrĕx kĕt.  
 Metĭndjwỳnh ne akubyn meo tĭn.  
 Kam ne ba me amā, “Metĭndjwỳnh  
 ne kubĕ me tĭn nhō Metĭndjwỳnh”,  
 ane.

<sup>39</sup> Nhym kam Mōjdjĕ kukrādja  
 mar djwỳnh kwỳ ne kum,

—Be, bēnjadjwÿr, nã gãm me wãmã arēnh mexkumrēx ne, ane.

Môjdjê kukràdjã mar djwÿnh ne me kum mebê xadjudjêu kÿnh kêt nhyh Jeju kabēno me jao apa nhyh me arÿm anhikrê. Nhyh kam Môjdjê kukràdjã mar djwÿnh arÿm kôt omÿn kÿnhkumrēx.<sup>40</sup> Nhyh kam me kunÿ arÿm kum Jeju pyman mÿjja'ô jabej kukjêr kêt ne arÿm tu anhikrê.

*Kritubê mÿj me'ô tãmdjwÿ jabej me kukij.*

*Mat 22.41; Mak 12.35*

<sup>41-42</sup> Nhyh kam Jeju amipãnh me kukij. Kute memã amijã ujarēnh nhyh me kute mar ne kute kôt kum kator kadjy. Amrēbê ne Metÿndjwÿnh memã Bēnjadjwÿrbê kumkati jarē, kute memã anormã. Ne kam memã Bēnjadjwÿrbê kumkati jarēn arēn arēn arÿm memã ano. Metÿndjwÿnh ta ne memã Jeju jano, nhyh kute memã amijarēnho ãm nhyh me kute kum katormã, me kute kubê Bēnjadjwÿrbê kumkati kôt kum kator kadjy ne memã,

—Nãm we me Bēnjadjwÿrbê kumkati dja kubê Dawi tãmdjwÿ'ô, ane. Metÿndjwÿnh kute me bamã anorja dja kubê Dawi tãmdjwÿ. Mÿkam ne me kum Dawi tãmdjwÿ ane? Be, djãm Kritubê ne Dawi tãmdjwÿbit? Kati, kubê ne Dawi nhõ Bēnjadjwÿrdjwÿ, ane. Dawi ta ne o ô Bēnjadjwÿr ne me ngrer'ã pi'ók no'ókkam ajte ta, Dawi ta ne, “Inhõ Bēnjadjwÿrmã ne Bēnjadjwÿr djwÿnh kabēn ne kum, ‘Amrē idjubók'ãnh nhÿ, Abēnjadjwÿr raxkam idjubók'ãnh nhÿ.

<sup>43</sup> Ikutêp nhÿ ba 'ÿr amrē awÿr akurê djwÿnho mō ga kwÿo apardjan kwÿ nhimex', ane. Nãm ã Metÿndjwÿnh inhõ Bēnjadjwÿrmã arēnho ane”, ane.

<sup>44</sup> Bir be, ga Dawi kute kum “Abēnjadjwÿr rax” anhÿrja pumÿ.

Mÿkam ne me Dawi tãmdjwÿ kajgo jarē? Djã nãm o tãmdjwÿ kajgo? Kati, Dawi ta ne kute o ô Bēnjadjwÿr rax, ane. Nãm ã Jeju memã amijarēnho anen o me unê nhyh me kute ajte kukjêr kêtumrēx.

<sup>45</sup> Nhyh me itepato Jeju kabēn maro kumex. Nhyh kam Jeju me ipôkri kôt ba djwÿnhmã,

<sup>46</sup> —Gora ar aminêje me omÿ, ane. Aminêje Môjdjê kukràdjã mar djwÿnhwã pumÿ, ane. Me wã ne me kute amibēn kadjy kute kubêkã jabjêti jangjēnh ne 'ã ba prãmkumrēx. Nhyh me ajte me krãptÿ nhipôkri kute me mexo ãmran kute memã rÿnh jarēnh ne kute memã, “Bēnjadjwÿr, djãm ga, djãm ga”, anhÿr jabit ne me kum kÿnh. Ne mebê idjaer bikprõnh djãkam kute abeno krÿ djãkam kute amijo rÿnh ne kute mebê me rÿnh krÿ djã pytar prãmkumrēx. Ne kam ajte me krãptÿ kute abeno bikprõnh ne àkuro krÿ katã kute mebê me rÿnh krÿ djã pytar prãmkumrēx, ne kute mÿjja rÿnh, mÿjja mexbit kur prãmkumrēx.

<sup>47</sup> Nãm ã me amijo rÿnho bao anen kam ate ajte me 'uwtÿ krão apan mebê mÿjja kunÿo akÿ ne kam ajte ajkwaobit Metÿndjwÿnhmã kabēn rÿnh ne, ne kum kabēn jabjêo ku'ê. Nãm me 'êx ne amijo mex ne kum kabēn ne. Bep kati, me axwekumrēx. Kam gêdja Metÿndjwÿnh me kurãm memã pãnh rax jarēn prÿne me kurãm meo ajkê. Kam ne ba ar amã, “Gora ar aminêje me wã pumÿ”, ane. Nãm ã Jeju kôt ba djwÿnhmã me kute amijo mex, amijo rÿnh ne kute amijaxweo bipdjurja'ã ã arkum karõo ane.

## 21

*Me'ô 'uwtÿ kute ô pi'ók kaprÿ nhõr.*

*Mak 12.41*

<sup>1</sup> Metÿndjwÿnh nhõ kikretikam ÿr rã'ãkam ne ã arkum anhÿro nhÿ,

arkum 'ã ujarênho nhÿn 'ã ujarên pan kam ibôn nhÿn kãjmã krãn arÿm ari ar me omÿ. Nnym me ò nèkrêx krãptĩ, ò pi'òk kaprĩ krãptĩja Metĩndjwÿnhmã me kute pi'òk kaprĩ nhõr djãkam kum pi'òk kaprĩ rênho kumex, aben nhipã kum kam rênho kumex. <sup>2</sup> Nnym kam me'ò nija, me'ò ni 'uwtĩ kubê mjên tyk nnym ò mÿjja kêtja ngõnhponhreo pi'òk kaprĩ byn o tẽn kam kum kumê. Amãnhkrutkam pãnh ngrire ne amê kubyn o tẽn kam kumê. <sup>3</sup> Nnym Jeju arek omÿnho nhÿn kam arkum,

—Ba ar amã arê, me'ò 'uwtĩ ja ne ò mÿjja kêt, ne tu me kurãm ò pi'òk kaprĩ raxo tẽn Metĩndjwÿnhmã kungã. Me kunĩ kurãm pi'òk kaprĩ raxo tẽn kum kungã. <sup>4</sup> Me ja ne me ò pi'òk kaprĩ kumex ne kam 'ã kãtãm ne kumex. Ne kam 'ã kãtãmja Metĩndjwÿnhmã kungã. Nnym bep me'ò nija ne ò pi'òk kaprĩ kêtê, pi'òk kaprĩ ngrire ne tu kum kunĩ ngã. O kute amikadjy mÿjja byr ne krên ne tĩn kadjy Metĩndjwÿnhmã kunĩ ngã. Kum 'ò nõr kêtê. Kam ne ba ar amã, “Nãm me kurãm pi'òk kaprĩ rax ne kum kungã. Mrãmri ne ba ar amã arê”, ane.

*Akubyn bõx djã kukãm mÿjja apõx tẽ.*

*Mat 24.1; Mak 13.1; Xim k 4.1; A Xim 3.1*

<sup>5</sup> Nnym ar kwÿ abenmã Metĩndjwÿnh nhõ kikretija jarênho mõ. Ne abenmã,

—Kên ja ne mexkumrêx. Nnym me o kikre nnym kĩnhkumrêx. Ja ne kikre jao kĩnh ne. Ê, nnym me kwÿ kute Metĩndjwÿnh nhõ kikretio kĩnh kadjy kute apÿnh mÿjja aben kadjy òrkam kute o kikre ja kĩnhkumrêxja pumÿ, ane.

<sup>6</sup> Nnym kam arkum,

—Bir be, ar omÿ. Ar aje omÿnhwã gêdja ò akati, o bikênh djã nhõ akati 'ÿr bõx nnym me kurê djwÿnh prĩne kikreti ngrã. Dja me

kên aben nhiby ikwã kunĩ nhikõ rê. Nnym kam kên'ò aben nhiby nõr kêtumrêx, ane.

<sup>7</sup> Nnym ar kum,

—Bênjadjwÿr, nhÿnh amex 'òkam dja me kurê djwÿnh o ane? Mÿj gêdja kukãm apõx bar omÿn kam kõt ò akatimã ikaton ò akati ma? ane.

<sup>8</sup> Nnym kam arkum,

—Ar amijã ano tÿx, gê me'ò ar amã 'êx ne ar aõoo biknor ne Metĩndjwÿnhbê ar ajo akêx kêt. Be, me krãptĩ dja ĩ aben totokmã me'ÿr bõx ne arÿm amijo 'êx. Amijo 'êx ne arÿm amijã imê. Amijã imên arÿm memã, “Me anhõ Bênjadjwÿrbê kumkati kadjy ne Metĩndjwÿnh ijano ba tẽn bõx. Ba ibê Kritu”, ane.

Ne kam ajte,

—Ota arÿm akubyn bõx djã nhõ akati kato, ane. Kwãrik wãnh gar me wã kabên mar ne mã mekõt abikamênh ne ar mekõt aba kêt. Dja gar tu ate akrã.

<sup>9</sup> Gêdja me abeno kurê djwÿnh ne abenwÿr prõt ne aben nhimexo ba gar omÿn kõt ama. Nnym ajte me kwÿ ta ò pykakam ò bênjadjwÿro kurê djwÿnh ne ta ajte jãm abeno kukan aben paro ba. Dja gar mÿjja ja man atĩn prãm kêt ne amã uma kêt. Ja kumrêx gêdja me ã o anhÿro tẽ. Kraxje kute inomã mênh kêt, kute 'ÿr o tẽn rã'ã, ane.

<sup>10</sup> Nãm ã Jeju arkum 'ã karõo anen kam ajte arkum,

—Nà, apÿnh me ba djãri gêdja me abenwÿr prõt ne aben nhimexo ba. Nnym apÿnh pyka abenã rõrõk djãri dja me abeno kurê djwÿnh ne aben nhimexo ba. <sup>11</sup> Apÿnh pyka djãri gêdja kam pyka tertet: ne, tertet rax ne. Nnym prãmdjwÿ me kwÿ nhimex. Nnym apÿnh me kanê djãri me kwÿ nhimex ne. Nnym mÿjja rÿnh, mÿjja pymadjwÿ kãkwa kurÿm apõx ne kumex.

<sup>12</sup> Nnym bep mÿjja ja apõx kêttri gêdja me ar ajo rõrõk ne prĩne ar ajo ajkê. Ne me bikprõnh djã'ÿr ar apa

'amÿn ar ajo mōn me bēnjadjwÿrmā ar ajo 'ēx ne ar ajaxweo ar apytàn me bē ijē djàkam ar arē. Ar amā ijabē ne amā ikīnhkōt gēdja me me bēnjadjwÿr'ÿr ar apa 'amÿn ar ajo mrā. Me bēnjadjwÿr krymē me bēnjadjwÿr rūnh'ÿr ar ajo mrā.  
 13 Kam, kamā gēdja gar memā ikukràdjā ny'ā ajarē gē me kuma.  
 14 Kam gēdja gar adjumar punu kēt ne amim, “Mÿj ikabēn gēdja me amiwÿr ijo tē ba arē”? anhÿr kēt. Ne, “Mā dja ba gēt memā amijā idjāprārmā ikabēn ja on”? anhÿr kēt. Kwārīk wānh gar ā amim anhÿr kēt, anhÿr djwÿnhhrām ā amim anhÿr kēt.

15 Bep kati, ba gēdja ba ar ajamākmā ikabēn wadjā. Ba gēdja ba ar amā ikabēn jarē gar kam ikabēn ja tām memā arē nhym kam ar akurē djwÿnh te ar amā ām tÿx ne kute kabēn'ō mar ne kute bēno ar ajapanhmān tu anhikrē. 16 E kum ā, ar abāmmē, ar anā, ar akamy, ar anhōbikwaja tām gēdja me ar akurē djwÿnh'ÿr ar apa 'amÿn ar ajo mrā nhym me ar akwÿ pa. 17 Ikōt ar abikamēnhkam dja me kunī kum ar akurē ne.

18 Nhym bep Metīndjwÿnh ta gēdja prīne ar ajo djuw mex ne ar apumūnh 'āno dja. Djām kum ar apumūnh kangamā got? Kati, gēdjām prīne ar apumūnh 'āno dja.  
 19 Gora ar memā adjām tÿx. Dja gar adjām tÿx ne 'āno djan arÿm tu atīnkumrēx.

20 Gēdja krākamngōnh Djeruxarēmā ipōk mō ne 'ā aben krākā proo mō gar kam omūn arÿm kōt ama. Mrāmri ne arÿm ō akati tēpo tē, Djeruxarēo bikēnh djā nhō akati tēpo tē, me kute me amōr djā ngrānh ne kute prīne kapōnhmā ne arÿm tēpo mō. 21 Kam gēdja Djeruxarē bu'ā pyka ja nhidjibē Djudējakam me ja amijā maje krānh'ÿr prōt ne. Nhym bep krībē me ja gēdja me amikrā kēt mex ne amijā maje kurūm kato. Nhym

purkam me jamē, bākam me jamē gēdja me ajte akubyn ūrkwāmā mōr kēt. Dja me tu ām kamā ajmā, apÿnh krānh'ÿr ba. Akubyn krīmā mōr ne bōx ne ajte akubyn prōt kēt. Tu ām kamā amū prōt ne.

22 Be, akati kaprī ne ja. Akati kīnh kē:tkumrēx ne ja. Mrāmri gēdja Metīndjwÿnh me axwekam ngryk ne me axwe pānh prī:ne meo ajkē. Anhÿr djwÿnhhrām ne Metīndjwÿnh pi'ōk no'ōkkam ja kunī'ā ajarē. Dja ō akati 'ÿr bōx, anhÿr djwÿnhhrām Metīndjwÿnh kute pi'ōk no'ōkkam arēnh jakōt dja 'ÿr bōx ne kam kōt ā o anhÿro tē.

23-24 Be, akati ja dja kaprī ra:x ne. Watīre me nire tujarō, watīre me nire kute kra karāre jamÿnhja. Mā gēdja me ja krākamngōnh pymaje prōtja on? Metīndjwÿnh gēdja pyka jakam me jakam ngry:k ne. Ne prīne kam meo ajkē, me axwekam. Metīndjwÿnh ta gēdja pyka ja'ÿr me kurē djwÿnh jano nhym me me'ÿr bōx ne Djeruxarēmā ipōk ne kam prīne me imexo mō. Kāxdjwa kaj-goo me kwÿ nhimex ne kam amipardja'ā me kwÿ pa 'amÿn kam apÿnh me bajtem nhō pykakōt me kungrā. Krākamngōnhre bajtem ja gēdja prīne Djeruxarēo ajkē, prīne o ajkēn kungrān jām o mrān kurēn kam arÿm mÿrbē kam ajkarē. Kam bikarēr rā'ā: nhym arÿm me kute meo bikēnh djā nhō akati apēx. Arÿm me bajtem nhō akatija apēx nhym arÿm me mā mō.

25 Nhym kākjakam mÿjja pumūnh kēt kwÿ rax dja apōx. Mytmē mytyrwÿmē kanhētirekam gēdja mÿjja apōx ne kumex. Nhym pykabēdjwÿ ngō rax dja tām ne aben pumjuw ne mÿja bē abenā ajkapī ne kam rārā:ko nō. Dja me apÿnh ō pyka djāri omūn kam abenmā,

—Mÿj got ja? Mÿkam? anen kam umar punure. Te kute mÿjja'ō marmān mÿjja'ō mar kētkumrēx ne

kam axwe umarre. <sup>26</sup> Ne kam terteto kumex. Mýjja pyma kator ne kute pr̄ne pykao bikamýr ne kute pr̄ne meo bikēnh pymaje ne me terteto kumex. Nām me amijā ja kamnh̄x ne kam t̄n prā:m ne. Te t̄n prāme ne kam terteto kumex. Djām mýjja pyma ngri: ne apôxmā got me umaje tertet kêt ne. Kâjkwakam apýnh mýjja t̄y:x dja amingrêk ne.

<sup>27</sup> Kam gêdja ba me'ýr bôx nhym kam me kunī ipumū. Ije amijo inhī dja ba imextire ne itýxkumrêx ne ipyma:kumrêx ne. Kam dja ba kâjkwakam kakrā kôt bôx nhym me kunī: arým ibôxkôt ipumū. <sup>28</sup> Kukām ne mýjja apôxja. Bir be, gêdja mýjja ja arým apôxmō krax ga kam ar amikam atýx. Amikam atýx ne akīnh ne. Arým ije ar apytārmā me awýr ibôx 'ýr, ane.

<sup>29</sup> Ne kam ajte arkum atemā mýjja 'ô'ā ujarēnh jakreo tēn arkum,

—Gop ar pidjôbê pigêremē rāmtāxtemē pī kunī ma. <sup>30</sup> Amex kutā gêdja 'ô ingrā gar kam arým amexmā kamnh̄x nhym kam arým amex ne.

<sup>31</sup> Bir be, gêdja ba ije ar amā mýjja jarēnhja ā apôx mōr ane gar kam arým ijabej rīt ne ijabej ajkam ama. Akubyn ibôx ne me kadjy ibēnjadjwýr rax ne ipymao ije me utār ne ar meo ibamā arým 'ýr. 'Ýr dja mýjja apôx tē. Amex kutā gêdja pi'ô ingrā, nhym bep ibôx kutā gêdja mýjja pymatija apôx mō.

<sup>32</sup> Nā, mrāmri ne ba ar amā kôt arē. Ar anhō krôkam me kam-ingrāny ja gêdja me tyk par kētri mýjja ja kunī apôx. Mrāmri ne ba ar amā arē. <sup>33</sup> Ikabēn kajgo kêtumrêx. Gêdja pykamē kâjkwa ī apêx nhym bep ba ikabēn gêdja 'ô biknor kêtumrêx. Mrāmri gêdja ba ije mýjja jarēnh ja kunī apôx nhym me omū.

<sup>34</sup> Gora ar ikam amakbê amijā ano t̄yx ne amijāno dja. Gar mrāmri akukrādja mexbito atēm rā'ā. Kwārīk wānh gar kadjwati kangôkôtbit\* ar aban o akôm nhym kute bôm ar ano rēnh ne pr̄ne kute ar ano kamrêkwā wām nō. Ne kôt arīk ar abawā gêdja wām nō. Kwārīk wānh gar pyka jabêbit adjumar punukôtbit ajamak bēn ne o aba kêt. Dja gar ā ar anhýr aba ba kam ar ajaêrbê bôx gar kam ajmā imā amijarēnh on? <sup>35</sup> Kute mrāmri ne me mrymā krīn kute aêrbê parja pyrāk. Be, dja ba ā anen ar ajaêrbê bôx, pyka kunīkôt dja ba ā ar ajaêrbê ibôxo ane, ar akunī jaêrbê ibôxo ane.

<sup>36</sup> Kukām dja ī mýjja kunī apôx tē. Kadjy ne ba ar amā, “Gop ar arek ijabej ajkam aman amijāno dja. Mā amijāno djan arek Metīndjwýnhmā amijo adjā'wýr rā'ā gē ar ajo t̄yx. Gar atýx ne mýjja punu apôxkam ijāno djan ikanga kêt. Ne akubyn ibôxkam amikam apijām kêt ne ikabem aku'ê. Ba ije amijo inhī ne me awýr ibôxja ikabem amikam apijām kêt ne aku'ê.” Nām ā Jeju arkum bôx djā nhō akatimē kukām mýjja apôx djā nhō akatimē arkum arēnhō ane.

<sup>37-38</sup> Ne kam akati kunīkôt memā Metīndjwýnh kukrādja'ā ujarēnh tē. Metīndjwýnh nhō kikretikam memā 'ā ujarēnh tē. Nhym amykry nhym kam krānhbê Oriwêre'ýr tēn kam ikwā. Nhym akati nhym ajte akubyn Metīndjwýnh nhō kikreti'ýr tēn kam ajte memā 'ā ujarēnhō dja. Nhym me kryrām 'ýr ban bôx ne ujarēnh ma nhym amykry nhym me mā ba. Nām ā akati kunīkôt ā o anhýro tē.

## 22

*Me kute Jeju bñn kadjy o aben maro ýr.*

*Mat 26.14; Mak 14.10*

\* **21:34** Mýjja me kute o kôm ne kôt bibānh kunīja, kadjwati kangômē uba kangômē, mýjja kangô kunī ne me kum kadjwati kangô jarē.



<sup>1</sup> Arým ne Metíndjwýnh nhõ akati, amrêbê Metíndjwýnh me irôbê mrânh nhyim me mã kôt kute mar nhõ akati arým o râm ne ja o mô. Kam ne me djwýponhredit ku.

<sup>2</sup> Nhyim kam me kadjy Metíndjwýnh mar djwýnh nhõ bēnjadjwýrmē Mōjdjē kukrādja mar djwýnhmē ne me abenmā Jeju'ã karõo mô. Mete bīnmā ne me abenmā 'ã karõo mô. Ne kam me kum me kâtāmja pyima ne. Me kâtām ja ne me kunī kum Jeju kīnhī. Nhyim bep me ja, me kadjy Metíndjwýnh mar djwýnh nhõ bēnjadjwýrmē Mōjdjē kukrādja mar djwýnhmē ne me kum kurê ne kam kute bīnmā abenmā 'ã karõo môn kam kum me kâtāmja pyima ne.

<sup>3</sup> Nhyim kam Xatanaj Djudamā wadjà. Jeju kôt ba djwýnhbê 12'õ ne Djuda. Idji 'õ ne Ikadjī. Kumā ne Xatanaj wadjà. <sup>4</sup> Arým Djudamā wadjà nhyim kam arým mã me'ýr tē. Me kadjy Metíndjwýnh mar djwýnh nhõ bēnjadjwýrmē Metíndjwýnh nhõ kikretikam krākamngõnh nhõ bēnjadjwýrmē me'ýr tē. Me'ýr tēnh bõx nhyim me abenmā 'ã ãpnēnhõ nhý. Nhyim kam me kum,

—Ije ba gop on me amā Jeju kanga ga me abīn amā kurê kêt, ane.

<sup>5</sup> Nhyim kam arým me kīnhkumrēx. Kīnhkumrēx ne kam kum,

—Mexkumrēx. Gêdja bar kam pānh amā pi'òk kaprīre ngā, ane.

<sup>6</sup> Nhyim kam “Á” ane. Nhyim kam me arým kum pi'òk kaprīre ngā nhyim kam amim kubyn kam ate kato. Katon kam arým Jeju'ã amin karõo tē. Me 'ã bikprõnh kētri, me no prāri ne kute me kum kangamā amā.

*Me kute Jeju bīn kētri kôt ba djwýnhmē ro'ã õ kwý krēn mex.*

*Mat 26.17; Mak 14.12*

<sup>7</sup> Nhyim kam mebê idjaer kukrādjakôt mete djwýponhbit kur

nhõ akati arým kato. Kam ne me apýnh ũrkwākam Metíndjwýnhmā mrykī'átomti pan kubõn kuku. Amrêbê Metíndjwýnh me irôbê mrânh nhõ akati me kute kôt mar kadjy ne me ã o ane. <sup>8</sup> Kam ne Jeju kôt ba djwýnh jano. Nām Pedrumē Djuão ar anon arkum,

—Ar tēn ar ikutēp mrykī'átomti jabatānh nyrewā bīn aga. Bar wām bõx gwaj kukrē. Gwaj baje Metíndjwýnh me irôbê mrânh nhõ akati mar kadjy mrykī'átomti krē, ane.

<sup>9</sup> Nhyim ar kum,

—Nhýnh gêdja bar ar akutēp mryga? ane.

<sup>10-11</sup> Nhyim kam arkum,

—Ē, ba ar amā arē. Gêdja gar tēn krī'ýr bõx nhyim me'õ my ngõo tēn ar akajpa. Ga kam ar kôt tē nhyim ũrkwāmā wadjà. Gar kôt wadjàn kam õ kikre djwýnhjamā kum, “Bēnjadjwýr ne amā, ‘Nhýnh kumoka'è ja ne me bõx ny kadjy, dja ba ikôt ba djwýnhmē ro'ã bõx ne kam inhõ kwý krē? Ar ije Metíndjwýnh me irôbê mrânh nhõ akati mar kadjy mrykī'átomti krē? ane.” <sup>12</sup> Dja gar ã kum ane nhyim kam ar amā kumoka'è rax jakre, kýjrũm imõkkam kumoka'è raxwā jakre, kapõnh pro, arým o mex pro, kam gêdja gar ar ikutēp agan adjī, ane.

<sup>13</sup> Nhyim kam ar tēn kam kajpa. Kute arkum arēnh kôtõ. Kute arkum arēnh kôt ne ar tēn me'õja pumũn kam kôt tēn ũrkwāmā wadjàn kam ar kutēp mryga.

<sup>14</sup> Nhyim Jeju kute kôt ba djwýnhõ mōrja'ã arým apajrũm myt tē. Nhyim ar bõx ne kam ro'ã õ kwý krēnmā arým nhý. <sup>15</sup> Nhý nhyim Jeju arkum, kôt ba djwýnhbê 12mā,

—Ba ne ba imā gwaj baro'ã banhõ kwý krēn prām̄kumrēx. Itokry kētri gwaj baro'ã baje Metíndjwýnh me irôbê mrânh nhõ akati mar kadjy mrykī'átomti krēn prāmā. <sup>16</sup> Ē, ba ar amā arē. Ja dja ba

krën o ino re. Ne kam ajte krën kêt 'iry:n kam Metîndjwÿnh me kadjy bënjadjwÿr ne kute me utâr ne kute ar meo bakambit gêdja ba ajte inhô kwÿ krën djâ djwÿnhja krê, ane.

17 Ne ngônhrâkam uba kangôadjwÿ byn 'â Metîndjwÿnhmâ ôdjânh jarên kam arkum,

—Mî, ar jao ikô, aben nhitepâ o akômo mô. 18 Ba ar amâ arê, gar ama. Ije pidjô kangôo ikômo krâ'yr ne ja. Metîndjwÿnh kute amim ô me ja kunî pytâr ne kute meo bakambit dja ba ajte pidjô kangô nyo ikô.

19 Ne kam ajte djwÿ ja byn 'â Metîndjwÿnhmâ ôdjânh jarên kam kokijn apÿnh arkum kungân arkum,

—Ë, inhî ne ja. Inhî'â ne ba djwÿ jakren ar amâ kokij. Ar akadjy dja ba ty. Dja me pîte'y'â inhôn ibî. Dja gar akuprôn inhî ja'â djwÿ jakren krê. Dja gar krën â imaro anen imar râ'â ne, ane.

20 Nhyr ar ô kwÿ krën pa nhyr kam ajte uba kangô byn kam arkum,

—Ikamrô'â ne ba pidjôbê uba kangô jakre. Dja me ibî nhyr kam ityk jakôt dja ikamrô â me akadjy prôt ne bixabjêr ane. Ikamrô jakôt gêdja Metîndjwÿnh me amâ kukràdjâ ny, kabên ny jarênh mâmджи.

21-22 Ë, ikuri ÿr ne ô kwÿ krêno ÿr ja gêdja ikurê djwÿnhmâ ikanga. Mrâmri dja me ibî. Amrêbê ne Metîndjwÿnh me kute ibîn kadjy amim ijâ karô. Kute amim ijâ karôjakôt gêdja me ibî. Ba ije amijo inhî ne me awÿr ibôxja gêdja me ibî. Watîre kute ikurê djwÿnhmâ ikanga djwÿnhwâ. Ta gêdja tokry ra:x ne, ane.

23 Nâm â Jeju arkum ane nhyr kam kôt ba djwÿnhja abenmâ,

—Ije, mÿj gwaj bajô dja gwaj kurê djwÿnhmâ kanga? ane. 24 Ne abenkam kangao kumex ne kam

adjwÿnhdjwÿ abenbê bënjadjwÿr pytâro kumex. Ne abenmâ,

—Ba gêdja ba gop ibënjadjwÿr raxo ar ajakre, anhÿro kumex.

25 Nhyr kam Jeju arkum,

—Me bajtemkam ne me bënjadjwÿr rûnh kabêno meo atom ne ar meo ba. Nâm me memâ, “Idjukaprikôt ne ba amim me ajo atom ne amim ar me ajo iba. Me akadjy ne ba ibënjadjwÿr rax”, ane. Nâm we â me bajtemkam me bënjadjwÿr we â ane.

26 Bep kati, ar ga dja gar â anhÿr kêtukumrêx ne. Dja gar ajô abenkam arax jabej, djâ gâm aje me kutapure pyrâk ne me katên tê. Ne ar ajô amikam aben kadjy abënjadjwÿr jabej gêdja ga tu ar memâ adjâpênh aba. 27 Nhyr ne bënjadjwÿr raxo kute aben jakrenh? Djâm kum ÿr nhyr kute 'ÿr ômrôo têmja? Nâr kon djâm kum âpênh ne kute kum ômrô ne o têmja? Kum ÿrja. Bep kati, ba ne ba te ibënjadjwÿr raxo me bënjadjwÿr kunî jakren tu amijo ikâtâm ne ar ar amâ idjâpênh iba. Dja gar â ikudjwa ane.

28 Ë, ar ga ne gar amexkumrêx. Nâm me te kum ikurên ijo ajkê gar mâ ijâ angrâ tÿx ne. 29-30 Kam gêdja ba akati 'ôkam arÿm ar ajâ bënjadjwÿr rê. Ibâm ne ijâ bënjadjwÿr mê ba kam badjwÿ amidjô'â ar ajâ bënjadjwÿr rê. Kam dja gar inhô pyka djwÿnhkam ar akadjy ibënjadjwÿr ne ije ar ajo ibakam ikôt anhô kwÿ krên kôt ikô. Kam dja gar me bënjadjwÿr rûnh krî djâkam memâ akrîn ar meo aba, apÿnh me kute mekbê idjaermâ idji jarênh djâri kubê 12jamâ akrîn ar meo aba, ane.

31 ÿ, Ximão, Ximão, ota arÿm Xatanaj ar ajâ Ibâm ma, kute ar akabimâ, mrâmri ar amâ ikînh ne ijâ angrâ tÿx ne ar ikôt aba jabej. Kute mrâmri ne me kute bây 'ykaç katêk ne kute djwÿ kapîn djâkam

krīn kute kapīn ja pyrāk. Dja ā Xatanaj kute ar akabimā ā ar ajo ane. <sup>32</sup> Ē, Ximāo, ba ne ba arým Ibāmmā ajo a'uw. Ijā angrā tỳx ne mā ikôt abikamēnh ne ar ikôt aba kadjy. Dja ga mekôt ikangan kam akubyn aje iwýr amijo akēxkam gora akamydjwýo tỳx, ane.

<sup>33</sup> Nhyam kam Pedru kum,

—Kati, Bēnjadjwýr, ba dja ba apy-maje iprôt kētkumrēx ne. Gēdja me kute abē ijē jabej akôt ibē ijē. Ne kute abīn o mōr jabej akôt ibī, ane.

<sup>34</sup> Nhyam kam Jeju kum,

—Kati, ba amā arē, Pedru. Akamāt ja tāmkaŋ ōkrēnē'ānh kār kētri dja ga amijā maje memā ajēxo dja. Memā aminēje ajēxo adjāmo amānhkrut ne ikjēkēt ne memā, “Kati, ije tāwā pumūnh kēt”, ane. Be, dja ga ā memā ijā ane. Ba arým amā arē, ane.

<sup>35</sup> Nām Jeju ā Pedrumā anen kam ajte arkum,

—Ije ōbē ar ajanor gar anhykam amōr ne aje anhō katōk'y djā, aparkā 'ō byr ne o amōr kēt ne ajēnh 'ō aje tur ne o amōr kētia, djori kam ar anhō mýjja kēt? Ne kam ar anhō kwý krēn djā kēt? ane.

Nhyam ar kum,

—Kati, kam ar inhō mýjja, kam ar inhō kwý krēn djā. Me ne me ar imā kungā, ane.

<sup>36</sup> Nhyam kam arkum,

—Nhyam bep jakam ne atemā. Jakam dja gar anhō katōk'y djāwā jamā ne ajēnhdjwý'ō tun o mō. Ne anhō kàxdjwa kajgo kēt jabej on kadjy aminhinōkatiwā ngān pānh pi'ók kaprī byn amim o 'ō byn ar o mrā. <sup>37</sup> Ba ar amā arē. Arým ne me kute ibīnmā arým ijo rā:m ne jao tē. Amrēbē me kute Metīndjwýnh kabēnkam ijā pi'ók no'òkkam kute, “Nām me o axwen me axwemē ro'ā kubī”

anhýr ja arým kator 'ý:r. Amrēbē me kute ijā pi'ók no'ók ja gēdja mrāmri on kato nhyam me omū, ane.

<sup>38</sup> Nhyam ar kam kum,

—Bēnjadjwýr, omū, ota ar inhō kàxdjwa kajgo amānhkrut, ane.

Nhyam kam arkum,

—Ā, aj, anū, ane.

*Pidjòkòkam Bāmmā amijarēho ýr.*  
*Mat 26.36; Mak 14.32*

<sup>39</sup> Nām arkum “Anū” anen ate kikre kurūm katon krānhbē Oriwēre'ýr kôt ba djwýnh o mō. Kute 'ýr aro mōr tūmjja 'ýr ne ajte aro mō. <sup>40</sup> Ýr aro mōn aro bōx ne kam arkum,

—Ar Metīndjwýnhmā amijo a'wý. Gēdja me te ar ajaxwe'ā ar amā apné, gar mekôt ajaxwe kēt. Ja kadjy dja gar kum amijo a'wý, ane.

<sup>41</sup> Arkum anen ate tēn ýro rām ne nīj. Nām kôt ba djwýnhmā iren tēn ýro rām ne nīj ne kōnkrāo nhý. Ne kam arek Bāmmā kabēno nhý. <sup>42</sup> Ne kum,

—Djūnwā, aje ibē ikaprija kadjār jabej on ibē kaba. Aje ibē ikapri kadjār nhyam me kute ibīn kētmā ne ba amā amijarē. Nār kon, dja ga mrāmri ibē kadjār kēt jabej ba tu mrāmri itokryo itēm rā'ā. Djām ba ne ba amimar kôt ar amijo iba? Kati, akabēnkôt ne ba amijo iba, ane.

<sup>43</sup> Nhyam kam kàjkwa kurūm kadjy mrānh djwýnh 'ýr ruw ne kam o tỳx ne. <sup>44</sup> Nhyam kam akubyn Bāmmā amijarēho nhý. Kaprī ra:xkam ajte akubyn prīne kum amikôt amijarēho nhý. Kaprī raxkam ne ō djākam tokry. Tokry raxkam ne arým 'ā ngō pepeko dja. Djām 'ā ngō? Kati, kamrō ne prōto dja, pykakam totoko dja. <sup>45</sup> Ne Bāmmā amijarēho nhýn kam kum amijarēnh pan kāmā djan kam akubyn kôt ba djwýnh'ýr tē. Nhyam kôt ba djwýnh arek ōto kumex. Kaprī raxkam arek ōto kumex.

<sup>46</sup> Nhyam kam arkum,

—Mýkam ne gar arek anhōto akumex? On ar kāmā djan Metīndjwýnhmā amijo a'wý. Gēdja me te ar ajaxwe'ā ar amā apné, gar

mekôt ajaxwe kêt. Ja kadjy dja gar kum amijo a'wÿ, ane.

*Me kute Jejuo tÿm.*

*Mat 26.47; Mak 14.43; Dju r 18.3*

<sup>47</sup> Arkum kabêno ãm rã'ã nhym arÿm me kute pa 'amÿnh ne o mORMã arÿm 'ÿr bôx. Me krãpti ne me arÿm 'ÿr bôx. Djuda, Jeju kôt ba djwÿnhbê 12ja'ô ne 'ÿr meo mō. Ne kam kute o tÿm ne kute ine kaôrmã 'ÿr tē. <sup>48</sup> Nhym kam kum,

—Djuda, djãm aje inhine kaôro atēm pro aje memã ijo atÿmmã ne ga iwÿr tē? Nã gãm ajêx ne ije amijo inhĩ ne me awÿr ibôxja ijo anhôbikwan inhine kaô, ane.

<sup>49</sup> Nhym kam Jeju nhô àpênh bu'ã ku'êja arÿm kuma, tu amikam kuman kum,

—Bênjadwÿr, djãm ar ije kãxdjwa kajgoo me ja parmã? ane. <sup>50</sup> Nhym ate ar'ô me'ôjamã akabê, me kadjy Metĩndjwÿnh mar djwÿnh nhô bênjadwÿr rax nhô àpênh ja'ômã akabên toxy anen arÿm amak nhikjê ta, amak djubôk ne kuta. Nãm tu amak toprik ane nhym wãnh amak tÿm.

<sup>51</sup> Nhym kam Jeju,

—Aje, anũ, arek ar dja, ane. Ne kam amak djãm djã kupê nhym arÿm ajte amak mex ne.

<sup>52</sup> Nhym kam me kute pa 'amÿnhmã 'ÿr môrjamã, me kadjy Metĩndjwÿnh mar djwÿnh nhô bênjadwÿrmê Metĩndjwÿnh nhô kikretikam krãkamngónhmê mebêngêtemã,

—Ije djãm idjàkĩnhĩ ne ga me aje ibĩnmã iwÿr anhô kômê anhô kãxdjwa kajgomê o mō? ane. <sup>53</sup> Myt kunikôt ne ba me akam ar Metĩndjwÿnh nhô kikretikam iba ga me kam kam ijo atÿm kêt ne. Nã, mrãmri me anhô akati ne ja. Me ajaxwe rax ne kute akamãt kô tyk pyrãk. Nãm prĩne me bajo ajkamuw. Kam ne ga me aje ipa 'amÿnhmã iwÿr mō, ane.

*Pedru aminêje 'êx.*

*Mat 26.69; Mak 14.66; Dju r 18.15*

<sup>54</sup> Nãm ã memã ane nhym kam me pa 'amÿn kam me kadjy Metĩndjwÿnh mar djwÿnh nhô bênjadwÿr rax nhô kikre'ÿr o mō. 'ÿr o mō nhym kam Pedru mekôt tē, nĩjar memã kre rax ne tē. <sup>55</sup> Nhym me arÿm Jejuo mōn o bôx, me kute pa 'amÿnhja ne me arÿm o mōn o bôx ne kam kikre nhipôkri kênh ngrire jakam amim kuton kam 'ã ànhũho kumex. Nhym kam Pedru mekôt tēn 'ÿr wadjàn kam me ikô'ã nhÿ. <sup>56</sup> Nhym bênjadwÿr nhô àpênh kurererja kuwy pôkmã omũ ne kam 'ÿr tēn kam no tyn djan kam memã,

—Tãwãdjwÿ ne arkôt ba, ane.

<sup>57</sup> Nhym kam Pedru aminêje 'êx ne kum,

—Kati, arkati. Ije tãwã pumũnh kêt, ane.

<sup>58</sup> Nhym adjynkêt ne me'ô mydjwÿ 'ÿr bôx ne omũn kam kum,

—Gadjwÿ ne ga abê ô àpênh'ô, ane.

Nhym kam kum,

—Kati, arkati. Ibê ô àpênh kêtê, ane.

<sup>59</sup> Nhym 'âtũm nhym ajte me'ô myjadwÿ 'ÿr bôx ne 'ã no tÿx mex ne 'ãno djan memã arên memã,

—Mrãmri ne tãwãdjwÿ arkôt ba. Kubê pykabê Garrêja kra'ô, ane.

<sup>60</sup> Nhym kam kum,

—Kati, ije akabênwã mar kêt. Ije akabênwã mar prãm kêtumrêx, ane. Ne kam kabêno ÿr rã'ã nhym 'ã ôkrênê'ãnh kã. <sup>61</sup> Nhym kam Bênjadwÿr 'ÿr akêx ne omũ. Nãm ar aktã aben pumũ. Nhym kam arÿm Pedru Bênjadwÿr kabên ma. Kute anhÿr djwÿnhràam kum kabên jarênh ja ne arÿm kuma. Kute kum,

—Akamãt ja tãmkam ôkrênê'ãnh kãr kêtiri dja ga aminêje ajêxo amãnhkrut ne ikjê kêt ne memã, “Kati, ije tãwã pumũnh kêt”, anhÿr ja ne arÿm kuma. <sup>62</sup> Ne kam katon

mu:w. Kaprī raxkam ne mỳr rax ne.

*Krākamngônh kute Jeju'ã bēno bikēho ãm.*

*Mat 26.67; Mak 14.65*

<sup>63</sup> Nhyṁ me kute Jeju pumũnho ku'ēja kam bēno ajkēn tak ne. <sup>64</sup> Nãm me no'ã pron kam apỹnh tak ne kam kum,

—Aj, goja me'õ kute akurwanh-jakõt omũ. Goja tu aman me imã arē, ane. <sup>65</sup> Nãm me prĩ:ne o ajkē. Nãm me apry:o kumex.

*Me rũnh kute Jeju axwe jabej kukjēr.*

*Mat 26.57; Mak 14.55; Dju r 18.12*

<sup>66</sup> Nhyṁ arỳm akati nhyṁ kam mebē idjaer bēngētmē me kadjy Metĩndjwỹnh mar djwỹnh nhõ bēnjadjwỹrmē me kute Mõdjē kukràdjã mar djwỹnhmē, me ta ne me aben pydjĩn amiwỳr Jeju 'uw. Nhyṁ kam me'ỳr Jejuo mõn o bõx ne me kabem kudja. <sup>67</sup> Me kabem kudja nhyṁ me kum,

—Goja on me imã amijarē. Djãm abē me babē idjaer nhõ Bēnjadjwỹrbē kumkati, nēn? Goja on me imã amijarē, ane.

Nhyṁ kam memã,

—Got ba ren me amã amijarē ga ren me amim imar kētkumrēx ne. <sup>68</sup> Ba ren badjwỳ me akukij ga ren me imã arēnh kēt ne. <sup>69</sup> Nhyṁ bep jakam gēdja ba on Metĩndjwỹnh py-mati djubõk'ãnh nhỹ. Ba ije amijo inhĩ ne ibēnjadjwỹr raxkam gēdja ba ubõk'ãnh nhỹ, ane.

<sup>70</sup> Nhyṁ kam me kunĩ kukij ne kum,

—Djãm abē Metĩndjwỹnh kra? ane.

Nhyṁ kam memã,

—Ãã, kõt ne ga me aje arēnhwã, ane.

<sup>71</sup> Nhyṁ kam me abenmã,

—Bir be, arỳm ta kute amijo Metĩndjwỹnhja ma. Mỳj kadjy dja gu me ajte me'õdjwỳ kukij? Kati, ta

ne arỳm amijarē gu me arỳm kuma, ane.

## 23

*Piratu kute Jeju axwe jabej kukjēr.*

*Mat 27.1; Mak 15.1; Dju r 18.28*

<sup>1</sup> Nhyṁ kam me rũnhja eku:n kãjmã djan mũjar Piratu'ỳr o mõn o bõx. <sup>2</sup> O bõx ne kam Piratumã Jeju kãmex jarēn kum,

—Ē, tãmja ne axwere. Tãwã ne ar me ibē idjaer noo biknoro ba. Ba meo tỹm ne awỳr o mõ. Nãm we me imã, “Kwãrĩk wãnh ga me bēnjadjwỹr raxbē Xedja me kunĩmã ỳr djwỹnhmã pi'õk kaprĩ nhõr kēt”, ane. Ibē me anhõ Bēnjadjwỹrbē kumkatikam gēdja ba ipymao ar me apytàn me ajo iba, ane. Nãm we ã me inoo biknoro ane, ane. Nãm ã me Jejuo 'exo ane.

<sup>3</sup> Nhyṁ kam Piratu Jejumã,

—Djãm abē mebē idjaer nhõ bēnjadjwỹr rax? ane.

Nhyṁ kam kum,

—Ãã, kõt ne ga aje arēnhwã, ane.

<sup>4</sup> Nhyṁ kam Piratu me kadjy Metĩndjwỹnh mar djwỹnh nhõ bēnjadjwỹrmē me krãptĩmã,

—Nã bãm te kukij. Ajmã kute kēt. Axwe kētkumrēx, ane.

<sup>5</sup> Nhyṁ kam me mã kum 'ã apnē. Kum 'ã apnē:n kum,

—Kati, nãm prĩne aben kadjy memã 'ex mõ. Nãm Garrēja kurũm tēn Djudējakam bõx ne aben kadjy memã 'ex. Nãm krĩ 'õkam bõx ne aben kadjy memã 'ex. Ne ajte amũ krĩ 'õkam bõx ne aben kadjy memã 'ex. Ne ajte amũ 'õkam bõx ne aben kadjy memã 'ex ne ajte amũ 'õkam bõx ne aben kadjy memã 'ex. Ne jakam arỳm bõx, ane.

*Erodji kute Jeju axwe jabej kukjēr.*

<sup>6</sup> Nhyṁ Piratu me kabēn ja man kam abej me kukij ne memã,

—Djãm Garrējakam me kra'õ? ane.

7 Nhyam me kum “Ăă” ane. Garrêjakam me ja nhô bĕnjadjwÿr nhidjibê ne Erodji. Ajbir Djeruxarêkam bôx. Kam ne Piratu Erodji'ÿr Jeju jano, Erodji kute Piratu kudjwa Jeju kukjêrmă. Jejubê Garrêja krakam ne kum ano. Nhyam me arÿm 'ÿr o bôx. 8 Nhyam Erodji Jeju pumÿn kam kĭnhkumrêx ne. Amrêbê ne Jeju'ă ujarênh man kam te kute târi omÿnh prăme. Nhyam kam me arÿm 'ÿr Jejuo môn o bôx nhyam kam kĭnhkumrêx ne. Kute kum mÿjja pumÿnh kêt'ô nhipêx nhyam kute omÿnhmă ne bit 'ă kamnhĭx ne. 9 Ne kam te Jeju kukjêr krăptĭ ne. Nhyam mrămri bĕn kêt mex ne dja.

10 Nhyam bep me kadjy Metĭndjwÿnh mar djwÿnh nhô bĕnjadjwÿrmĕ Môjdjĕ kukrădjă mar djwÿnhmĕ ne me Jeju kuri ku'ĕn kam mă kum arĕ. Kum kătăm jarĕnho ku'ĕ. Djă năm me akrănmă kum arĕ? Kati, năm me tu Erodjimă Jeju jarĕnho bĕ: ne. 11 Nhyam kam Erodji ô krăkamngônhrēmĕ ro'ă Jeju japrÿ ne 'ă keket ne kam kum me bĕnjadjwÿr kă jadjăn kam akubyn ajte Piratu'ÿr ano nhyam me ajte akubyn 'ÿr o môn o bôx.

12 Nhyam Erodjimĕ Piratu ar myt tămkam abeno ôbikwa. Jejukôt ne ar abeno ôbikwa. Amrêbê ne arkum aben kurĕ ne kam ajbir arÿm Jejukôt abeno ôbikwa. Piratu kute Erodji'ÿr Jeju janorkam ne ar arÿm abeno ôbikwa.

*Piratu kute Jeju bĭn kadjy memă kanga.*

*Mat 27.15; Mak 15.6; Dju r 18.39*

13 Nhyam me akubyn Piratu'ÿr Jejuo môn o bôx. O bôx nhyam kam Piratu me kadjy Metĭndjwÿnh mar djwÿnh nhô bĕnjadjwÿrmĕ me kute meo ba djwÿnhmĕ me kătămmĕ meo akprôn kam memă,

14 —Ĕ, tăm ne ga me iwÿr o môn o bôx ne kam imă, “Tămja ne ar me inoo biknoro ba”, ane. Ba kam te kukij, te me anhipôkri kukij, nhyam

ajmă kute kĕtkumrêx. Mexkumrêx. Nă găm me ajĕx ne arĭk kămex jarĕ. 15 Nhyam Erodjidjwÿr te ikudjwa kukij nhyam mexkumrêx. Ga kute ajte akubyn me bawÿr anorja pumÿ. Be, mÿj kadjy dja ba kubĭ? Ije bĭn prăm kêtĕ. 16 Kam dja ba tu kaprêprĕk kajgon ano, ane.

17-19 Nhyam kam me kunĭ axikôt kum 'ă àpnĕnho kumex. Ne kum,

—Kati, on o tĕn abĭn me imă Baraba bôm amĕ, ane.

Năm Piratu me kute Metĭndjwÿnh me irôbê mrănh nhô akati mar kunĭkôt me pÿnh ne bôm me rĕnho tĕ. Me axwe nhyam kute mebê ijĕja ne bôm me rĕnho tĕ. Baraba ne axwekumrêx. Năm me bĕnjadjwÿr kadjy memă 'ĕx nhyam me me bĕnjadjwÿr'ÿr prôt ne, nhyam ta adjwÿnhdjwÿ me kwÿ pa. Tăm ne Piratu kubê ijĕ. 'Ă ne me ku'uw ne kum,

—On rÿm tăwă o tĕn abĭn pănh me imă Baraba kaba, ane.

20 Nhyam Piratu te kute Jejumă irer prăme. Ne kadjy ajte memă kabĕn ne memă,

—Ba kum inhiren ano, ane.

21 Nhyam me kăj bĕ: 'ă kum apnĕn kum,

—On pĭte'y'ă anhô. On pĭte'y'ă anhô, anhÿro kumex.

22 Nhyam kam ajte memă,

—Tô mÿkam? Mă ne kute dja ba kubĭ? Djăm axwe? Nă băm te kukij nhyam axwe kĕtkumrêx. Kam ne ba ije bĭn prăm kêtĕ. Dja ba tu kaprêprĕk kajgon kam akubyn ano, ane. Năm te memă anen te memă anen kam arÿm ajte te memă ane.

23 Nhyam me mă 'ă kum apnĕ. Năm me kăj bĕ kum 'ă àpnĕnho kumex ne kum,

—On pĭte'y'ă anhô, on pĭte'y'ă anhô, ane. Năm me tÿxo Piratu jakrenh mex ne prĭne kabĕno katy.

24 Nhyam kam me umaje “Ă” anen tu memă kanga. 25 Nhyam me'ô kute bĕnjadjwÿr kadjy memă 'ĕx ne ta kute me kwÿ parja Piratu kaba.

Me kute Piratumã “Me imã Baraba bôm amê”, anhÿr ja ne kaban anon kam pãnh memã Jeju kanga, krãkamngônhre kute Jeju bïnmã memã kanga. Me kum kurêkam ne me 'ã Piratumã apnê, kute bïnmã. Nãm me kum 'ã àpnêho katyk mex ne. Nhyr kam arÿm me kute bïnmã memã kanga.

*Me kute pïte'y'ã Jeju nhôr.*

*Mat 27.32; Mak 15.21; Dju r 19.17*

<sup>26</sup> Nhyr kam krãkamngônhre arÿm o mô. O mô nhyr kam me'ôja tẽn me kajpa. Me'ô nhidjibê Ximão, pykabê Xireni kra'ô. Arwã kurÿm ne tẽn me kajpa nhyr me pa 'amÿn ikreikam pïte'y djin kam kum,

—Kum amÿ, ane.

Nhyr kam kum kumÿn o Jeju katẽn o mô. <sup>27</sup> Nhyr me itepato kôt mô. Nhyr me niredjwÿ kôt mô. Mörkôt abej mÿr mô, kàj bê abej àmra mô. <sup>28</sup> Nhyr Jeju me'ÿr akêx ne memã,

—Ë, àpnhïre ar, Djeruxarêkam me kra, kwãrïk wãnh ga me ijabej amÿr kêt. Bep me akra jabejbit dja ga me muw, ne ga amijabej muw. <sup>29</sup> Dja ï meo bikênh djã nhô akati me awÿr bôx. Dja me awÿr bôx nhyr me abenmã, “ÿ, me nire kra kêtja ne me mrãmri kïnhkumrêx. Ne me kute kra jamÿnh kêt djwÿ kïnhkumrêx. Ne me kute krao kaôr kêt djwÿ kïnhkumrêx”, ane. Me jabit dja me mã prôt ne kato.

<sup>30</sup> “Ne ajte kamã tokry pymaje krãnhmã,

‘On amrê me inhïby arôrök ne me inhïmex’, ane.

Ne kam ajte krãnh kryre jamã,

‘On amrê me inhïby arôrök ne me ijo apdju’, ane.”

<sup>31</sup> Ga me kute ã pï ngoo anhÿrja pumÿ. Godja arÿm pï ngrã nhyr mã dja me ajte on? Ba ne ba ajmã ikute kêt kumrêx ne itokry rax ne. Nhyr bep mrãmri me axweja, mã dja Metïndjwÿnh me

on, Djeruxarêkam me ajaxweja on? ane. Nãm ã Jeju mÿjja kute meo bikênh djã nhô akati djwÿnhram ã memã arêho anen ta amijaxwe kêt'ã pï ngo jakren me axwe'ã pï ngrã jakre.

<sup>32</sup> Nhyr me amê ar kâtãmja Jejukôt aro tẽn, me kute pï'ã Jejukôt ar nhôr kadjy. Ar kute mekam ar amikrão baja ne me kute Jejumê ro'ã ar parmã aro mô. <sup>33</sup> Aro môn aro bôx. Krãnhbê me krã'i'ÿr ne me Jeju aro bôx. Aro bôx ne kam apÿnh pïte'y'ã ar adjuw. Ne kam ar ikramã kàxirãxo iten ar parjamo iten kam kàjmã krekam ar umjuw. Nhyr arÿm ar arij. Jeju ôkredjãkôt wajêt nhyr aktã ar axweja ijên o wajêt. <sup>34</sup> Nhyr kam Jeju me nêje Bãmmã kabên ne,

—Djünwã, dja ga tu imar krãtan mekam angyrk kêt. Me kute ibïnja dja ga tu mar krãta. Me kute ibïnja ne me kute gu bakukràdjã mar kêt kumrêx, ane.

Nhyr kam me abenmã kàja ngrã. Nãm me apÿnh kute kà jamÿnh kadjy kên kryre rê. Me kute ari kên kryre rênhkôt ne me amijo kubêkã pytãn amÿ.

<sup>35</sup> Nhyr me kunï no ma môn Jeju pumÿnhô dja. Nhyr me bënjadjwÿrdjwÿ aprÿo dja. Nãm me abenmã,

—Amübit ne me utã. Goja gê ta amiptã. Goja gê Metïndjwÿnh kute anor nhyr kubê me banhô Bënjadjwÿrbê kumkatikumrêx jabej goja on amiptã, Metïndjwÿnh kute amijo utãr jabej goja on amiptã, anhÿro kumex.

<sup>36-37</sup> Nhyr me krãkamngônhredjwÿ 'ã keket ne aprÿo kumex. Nãm me 'ÿr bôx ne kum pidjô kangô kadjã bën kum,

—Ajrã, goja on amiptã. Goja abê mebê idjaer nhô bënjadjwÿr rax jabej goja on amiptã, anhÿro dja. <sup>38</sup> Ne kam ajte Jeju nhimökri pi'ök

no'ók nhípêx ne kunhō. Me kute omũnh ne kam kute,

—Mebê idjaer nhō bēnjadjwýr rax ne ja, anhýr kadjy ne me imókri kunhō. <sup>39</sup> Nhyam kam me kute Jeju nhikô'ã amê ar axwe nhōrja ikjêja Jeju japryō wajêt. Ne kum,

—Goja abê mebê idjaer nhō Bēnjadjwýrbê kumkatikumrêx ne goja on amiptàn ar badjwý ar ipytà, ane.

<sup>40</sup> Nhyam kam ikjêja kum bēn tỳx ne kum,

—Kwãrĩk wãnh. Birãm amã Metĩndjwýnh puma kêtikumrêx. Me kute gwaj bajanhôr ga arým gadjwý atyk 'ýrja pumũ ne kam ajmãn amã Metĩndjwýnh puma kêt mex ne. <sup>41</sup> Mrãmri ne me kute arým gu babĩnmã arým ã gu bajo ane. Gu ba ne gu ar mekam amikrào baba nhyam arým me kute pãnh gu babĩnmã. Nhyam bep tãmja ne kute ajmã mýjja 'õo kêtikumrêx, ane. <sup>42</sup> Ne kam ajte Jejumã,

—Jeju, gora anhō me ja kunĩ kadjy abēnjadjwýr ne aje ar meo abakam gora badjwý ima, ibiknor kêt kadjy ima, ane.

<sup>43</sup> Nhyam kam Jeju kum,

—Myt ja tãmkam dja gu baro'ã kàjkwakam Ibãm nhō pyka'ýr bôx. Mrãmri ne ba arým amã ikabēn pydjĩn arê, ane.

<sup>44-45</sup> Nhyam arým kàjkwa nhípôkri myt nhỹ. Nhyam kam tu akamãt kô tyk ne. Pyka kunĩkôt me'ã akamãt kô tyk ne, arngro kêtikumrêx ne. Nãm me'ã akamãt kô tykkam myt kyn kyn kyn ky: nhyam 3 orakam, amykrykambit arým ajte kàjkwa no pôt ne. Arým ajte myt kato. Nhyam arým Metĩndjwýnh nhō kikreti kadjwýnhbê kubêkãtija ta amikadjô. Nãm kônh e ty:k ane. <sup>46</sup> Nhyam kam Jeju Bãmmã amijarê. Kàj bê kum amijo akij ne kum,

—Djũnwã, ba wãm awýr ikarõ jano, ane.

Nãm ã kum anen kum amikarõ janon ate ty. <sup>47</sup> Nhyam

krãkamngõnhre krãptĩbê 100 nhō bēnjadjwýr Jeju tykkôt omũn kam Metĩndjwýnhmã rax jarê, ne,

—Mrãmri ne djãm tãmja axwe kêtê. Mexkumrêx, ane.

<sup>48</sup> Nhyam me itepato kute Jeju tykkôt omũnhmã mōrja arým mýjja kunĩ pumũn kam akubyn mōn kaprĩkam aminhōkôt titiko mō, ũrkwã'ýr binhirênh mō. <sup>49</sup> Nhyam bep õbikwa kunĩmê, Garrêja kurũm me nire kôt mōrjamê, me tãm ne me arek omũnho dja, kum kre rax ne omũnho dja.

*Me kute Jeju jadjãr.*

*Mat 27.57; Mak 15.42; Dju r 19.38*

<sup>50-52</sup> Nhyam kam me'õ nhidjibê Jôdje ne Piratu'ýr tẽ. Mebê idjaer nhō krĩ'õ nhidjibê Armatêkam kra'õ. Nãm me rũnh bikprõnh djakam mekôt mrã. Kabēn mexkumrêx, katãt ne mrã. Nhyam me kute Jeju bĩnmã amim 'ã karõo nhỹ nhyam kam te nêje me kukrà. Atemã ne kabēn. Me ja kabēnkôt kabēn kêtê. Nãm amim Metĩndjwýnh kamnhĩx ne. Metĩndjwýnh bôx ne me kadjy bēnjadjwýr ne kute ar meo bamã ja ne amim kamnhĩx ne. Tãm ne Piratu'ýr tẽn bôx ne Jeju'ã kuma. Kute Jejuo rwýk ne adjãrmã ne 'ýr tẽn bôx ne 'ã kuma.

<sup>53</sup> Nhyam kam kum "Ã" anen kam kum kanga. Nhyam kam pĩte'y'ýr tẽn kam Jejuo ruw, kute adjãrmã. Ne kam kadjy kubêkã mexja byn kam prĩne o kupun kam kēnkrekam adjã. Me kutê kēnkre kakrwýnh nyjakam adjã. Kraxje me kute kam me'õ jadjãr kêtikumrêx. Kam ne adjã. <sup>54</sup> Pi'ók rãrãr nêje akati jakam ne adjã. Akati jakam ne me no katon õ mýjja kupênhõ kumex. Pi'ók rãrãr kētri õ mýjja kupênhõ kumex. Akati jakam ne adjã.

<sup>55-56</sup> Nhyam me nire Garrêja kurũm Jeju kôt mōrja mekôt mōn omũ. Nãm me kute kēnkrekam



adjärkôt omün kam akubyn ürkwāmā mōn bōx. Bōx ne kam me kudjy djāmē pidjy nhūnmē kubyn abenkam o akān kam kadjy kudji. Nhy m pi'ōk rārār nhy m arým me nire tyk djā kēto kumex, Mōjdjē kukrādjakôt ne me pi'ōk rārār kam tyk djā kēto kumex.

## 24

*Jeju akubyn tīn.*

*Mat 28.1; Mak 16.1; Dju r 20.1*

<sup>1</sup> Nhy m arým pi'ōk kamrēk. Nhy m ar nire kry:rām kō rā'ā kute me kudjy djā abenkam o birēnh ne irja byn 'yr o mō, kēnkre'yr o mō. Ar kute kēnkrekam adjārja'yr o mō. <sup>2</sup> Nām ar bit Jeju'yr o mō, ar kute o kudjymā ne ar bit 'yr o mōr kajgo. Nhy m arým me kute kēnpotio 'ā ijēja arým amijā kutan kre jakā'ā amidjan dja. Me'ō ne o mōn kudja nhy m dja. <sup>3</sup> Nhy m ar nireja 'yr mōn kēnkremā wangij ne kam te Jeju nōr djā kamū nhy m nōr kēt ne.

<sup>4</sup> Nhy m ar te kute mýjja'ō marmā o dja nhy m adjynkēt ne ar my amānhkrutja ar aerbē kato. Tu ar nokam kato. Ō kubēkà jadjē:nh ne ar kuri dja. <sup>5</sup> Nhy m ar te tīn prāme ne rōrōk ne ponh ne ikwā. Nhy m kam arkum,

—Mýkam ne gar me tykkam me'ō akubyn tīnja jabej mō? <sup>6-7</sup> Ē, ar nōr kētja pumū. Arým ne akubyn tīn ne kato. Djā ne gar kabēnja ma. Amrēbē ne ar amā, Garrējakam ar ba rā'ākam ar amā, “Gédja me me axwemā ikanga. Ba ije amijo inhī dja me me axwemā ikanga nhy m me pīte'y'ā inhō ba ty ne ijā akati amānhkrut ne ikjēkēt ne akubyn itīn ne”, ane, ā ar amā ane. Ā ar amā ane gar ajte abej mō, ane. Nām ā kadjy mrānh djwýnh arkum ane.

<sup>8-10</sup> Nhy m kam ar nire arým Jeju kabēn ja ma. Kabēn ja man kam akubyn kēnkre kurūm mō. Mōn bōx ne kam Jeju kōt ba djwýnhmā mýjja kunī jarē. Kōt ba djwýnhbē

11mē ōbikwaja kunīmā mýjja jarē. Marij Madarenamē Djōwanāmē Xijagu nābē Marijmē ar ro'ā mōrjamē. Ar ja ne Jeju'yr mōn te nōr djā kaprān bōx ne memā arē, Jeju kute tūmrām ar anorjamā arē. <sup>11</sup> Nhy m bep nām me ate krā. Nām me o kabēn kajgon kam tu ate krān amim kamnhīx kēt ne. <sup>12</sup> Nhy m bep Pedrubit ne ekru x ne kāj mā djan kam kēnkre'yr prōt ne 'yr bōx ne kam te 'ā ibōn ýmkjēro nō. Te abej rīto nō. Nhy m kupu djābit ate nō. Nhy m omün kam akubyn tē, te kute amikam mýjja'ō marmā umar tē. Tēn ürkwākam bōx.

*Imau'yr Jejukôt ba djwýnh tē nhy m ar nokam amirīt.*

*Mak 16.12*

<sup>13</sup> Nhy m myt tām kam kōt ba djwýnh amānhkrut ne krī ngrire 'ō'yr tē. Krī ngrirebē Imau'yr ne ar tē. Djām mūjar got. Tām ne ja. Djeruxarē kurūm pry'ā akrebē 11 kirometu 'yr ne ar tē. <sup>14</sup> Ne kam abenmā kabēn tē, abenmā Jeju bīnmē mýjja ja kunī jarēho tē. <sup>15</sup> Abenmā arēho tēm rā'ā nhy m Jeju arkōt bōx. Arkōt bōx ne arým ro'ā mō. <sup>16</sup> Nām ar omūnh kajgo. Bārām mýjja ne ar no'ā nhy m ar te kute omūnhmā. Jeju ta ne aminēje ar no nhity ne kam arkum,

<sup>17</sup> —Ije tō mýj ne gar abenmā arēho tē? ane.

Nām arkum kabēn nhy m ar tēm týt katikōt djan kam kaprīre, nokre kaprīre ne dja. <sup>18</sup> Nhy m kam ikjēja idjībē Kreōpa kum,

—Ije birām apydji ne ga aje mýjja mar kēt, mýjja ajbir katorja mar kēt ne. Djeruxarēkam me kunī ne me kuma, ane.

<sup>19</sup> Nhy m kam kum,

—Ije nhy m mýj nā? Nhy m mýj ne gar abenmā arēho tē?

Nhy m amē ar ja kum,

—Ije tō gēt Nadjarekam me kra'ō nhidjībē Jeju. Metīndjwýnh kabēn jarēnh djwýnh'ō. Kabēn

mexkumrêx. Nãm katàt memã Metĩndjwýnh kukràdjã'ã ujarênh mexkumrêx ne. Ne ar memã mýjja pumũnh kêt kwý 'yro ba. Mýjja kwý nhípêx mexkumrêxo ba. Kam ne Metĩndjwýnh kam kĩnhkumrêx nhym me kãtãmdjwý kam kĩnhkumrêx.

<sup>20</sup> Nhym bep me kadjy Metĩndjwýnh mar djwýnh nhõ bẽnjadjwýrmẽ me banhõ bẽnjadjwýrmẽ arým tẽpo mõ. Nhym kam bit Jeju mã tẽmmã. Nhym ar kabẽno nẽ ne kum, kanga nhym me pĩte'ykam kubĩ.

<sup>21</sup> Ý, kute me bakurê djwýnhbẽ me bapytãrmã, me babẽ idjaer pytãrmã ne bar bajbit amim kamnhĩx ne, nhym arým ty. Nãm me arým kubĩ nhym kam arým 'ã akati amãnhkrut ne ikjêkêt.

<sup>22-23</sup> Nhym ar nire ar ikõt Jejumã àpênh ja ar ijaê. Kry:rãm ne ar kẽnkre'ýr mõn te abej ne kam akubyn bõx ne kam we ar imã, "Arým ne bar mýj me'õja pumũ. Birãm kadjy mrãnh djwýnh got bar omũ. Nhym ar imã, 'Jeju ne arým akubyn tĩn ne', ane."

Nã, nãm ã ar nire ar ijaêro ane.

<sup>24</sup> Nhym kam ar ijõ kẽnkre'ýr tẽn te kam abej. Nhym kẽnkre kaprý ne. Mrãmri ne ar nire kõt arẽ. Nhym bep Jeju ta ne amirĩt kêtumrêx, ane. ã kum ane. Nãm ã Jeju kõt ba djwýnh Jejuo atemã me'õn ã kum kabẽn ane.

<sup>25</sup> Nhym kam Jeju ta arkum,

—E kum ar ano kêt. Mýkam ne amrêbẽ Metĩndjwýnh kabẽn jarênh djwýnh me amã mýjja ja jarẽ ga me tu amim mar ne amijamakkrekam kunĩ nhõr ne ar o aba kêt ne.

<sup>26</sup> Mrãmri ne arým Bẽnjadjwýrbẽ kumkati tokryn arým kãjkwamã tẽmmã. Amrêbẽ Metĩndjwýnh kabẽn jarênh djwýnh kute arênh kõtõ. Dja tokry kumrêx ne kam arým bẽnjadjwýr rax kadjy kãjkwamã tẽ, ane.

<sup>27</sup> Ne kam prĩne arkum Metĩndjwýnh kabẽn'ã ujarênh tẽ, Metĩndjwýnh kabẽnkam ta amijã

ujarênhja ne kunĩ arkum 'ã ujarênh tẽ. Nãm Mõj djê kumrêx memã 'ã pi'õk no'õkmo krax nhym kam atãri Metĩndjwýnh kabẽn jarênh djwýnh memã 'ã pi'õk no'õk ne. Nhym kam ta amijã ujarênh tẽm tãmtã ĩ amũ 'ã ujarênh tẽ.

<sup>28-29</sup> Nhym kam ar ro'ã mõ. Ar krĩ'ýr tẽmja'ýr ne ar ro'ã mõn kam arým tẽpo mõ. Nhym kam bit Jeju mã tẽmmã. Nhym ar kabẽno nẽ ne kum,

—Jãnh ar inhũrkwãkam ar inhikõ'ã nõ. Arým ne apajrũm myt nhý. Arým akamãt 'ýr, ane.

Nhym kam tu arkõt wadjã. <sup>30</sup> Ne kam bit õ kwý krẽnmã nhý. Õ kwý krẽnmã nhýn kam djwý byn Metĩndjwýnhmã amikĩnh jarẽn kam ipõn arkum kungã. <sup>31</sup> Nhym kam ar amak e tyk anen arým Jeju ma nhym kam tu ar nokam akuno. <sup>32</sup> Tu ar nokam akuno nhym kam ar abenmã,

—E kum tãm. Ga pry'ã kute gu bamã Metĩndjwýnh kabẽn'ã pi'õk no'õk jarẽho tẽm gu bakĩnh ne bakrãkã 'õ nhýnhja pumũ, ane.

<sup>33-34</sup> Ne ekruux ne kãjmã djan kam ajte akubyn Djeruxarẽmã tẽ, Jeju kõt ba djwýnh'ýr tẽ. Jeju kõt ba djwýnhbẽ 11mẽ õbikwamẽ ne ar ro'ã aben pydjĩn nhý. Nhym kam ar ar ja'ýr bõx. Bõx nhym ar aben pydjĩn ýr ja ar kutã arkum arẽ,

—Mrãmri ne arým Bẽnjadjwýr akubyn tĩn ne katon Ximãomã amijo amirĩt ne, ane. Ar kutã ne ar arkum arẽ.

<sup>35</sup> Nhym kam ar nĩnh tẽmjadjwý amipãnh arkum arẽ. Pry'ã ar tẽm nhym Bẽnjadjwýr Jeju arkõt bõx ne ro'ã mõr ne kikrekam ýr nhym kute djwý nhípõnh ne 'ã Metĩndjwýnh 'wýr ne arkum õr nhym ar kute kõt kum kator ja ar amipãnh arkum arẽ.

*Kute kôt ba djwýnhmã aminhĩ kamjýr rã bën.*

*Mat 28.16; Mak 16.14; Dju r 20.19*

<sup>36</sup> Nãm ar arkum arënho ãm rã'ã nhyM Bënjadjwýr ta ajte tu ar nokam katon ar ipôkri dja. Ar ipôkri djan arkum,

—On ar adjumar mex ne ar aba, ane.

<sup>37</sup> NhyM kam ar tĩn prãm ne kum uma: ne. Nãm ar Jejuo me karõn kam kum uma: ne. <sup>38</sup> NhyM kam arkum,

—Mýkam ne gar amikam atĩn prãm ne anhökre kadjwýnhbê amim, “Mýj ne ja? Birãm me karõ ne ja”, anhýro akumex? <sup>39</sup> Ë, ar inhikramẽ iparkam kãxirãx djwakreja pumũ. Ba. Atemã me'õ kêt. Gop ar ikupên ipumũ. Djãm ã me karõ kute anhýr? Me karõ ã kute anhýr kêt. Gop ar inhĩmẽ ijija pumũ. Djãm me karõ ã 'imẽ i kute anhýr got, ane.

<sup>40</sup> Æ arkum anen kam arkum aminhikramẽ amipar bën kam ari arkum o apa. <sup>41</sup> NhyM ar omũn kam kĩnhkumrẽx ne. Ne kam kĩnhkam amim,

—Ije, djãm tãm? Kati, atemã me'õ. Nãr kon tãmý, anhýro kumex. Nãm ar kĩnh rax ne kam te kute marmã o dja. NhyM kam Jeju arkum,

—Djori mýjja ba kukrẽ, ane.

<sup>42-43</sup> NhyM kam ar kum tep djãr kwý tan kungã nhyM kubyn kukrẽ. NhyM ar arek 'ã omũnho nhý.

<sup>44</sup> NhyM kam arkum,

—Ë, ar ikabën ja ma. Ar akam ar ibari ikabën ja gop ar ama. Nã bãm anhýr djwýnhãm ar amã,

“Me kute ijã pi'ók no'ókja kunĩ dja apõx gar omũ. Mõjdjemẽ me Metĩndjwýnh kabën jarënh djwýnh kute ijã pi'ók no'ók nhyM me ijã ngrerdjwý 'ã pi'ók no'ókja kunĩ dja apõx gar omũ”, ane. Nã bãm ã ar amã ane nhyM arým apõx gar arým omũ, ane.

<sup>45</sup> Nãm ã arkum anen kam arkum Metĩndjwýnh kabën'ã pi'ók no'ókja kunĩ jarënh tën kadjy ar amak bõ nhyM ar kam kuma.

<sup>46</sup> Nãm arkum,

—Metĩndjwýnh kabën'ã pi'ók no'ókkam ne, “Bënjadjwýrbê kumkati dja tokryn tyn 'ã akati amãnhkrut ne ikjê kêt ne akubyn tĩn ne kato”, ane. <sup>47</sup> Kam dja me pyka kunĩkôt kãj bê 'ã ujarënh mõ gê me amim katon wãnh axwemã iren Metĩndjwýnh'ýr amijo akẽx gê Metĩndjwýnh me axweo aknon mekam ngryk kêt. Djeruxarẽkam dja me memã arënhmo krax ne. Ne kam apýnh pyka kunĩkôt memã arënh ajmã. Nãm ã me anhýr djwýnhãm Metĩndjwýnh kabënkam 'ã pi'ók no'oko ane. <sup>48</sup> NhyM arým apõx gar ga anoo prĩne omũ. <sup>49</sup> Jakam dja ba ar amã Ibãm Karõ jano. Ibãm kute ar amã kabën pydjĩn arënhja tãm, kute ar amã Amikarõ jarënh tãm dja ba amrẽ ar amã ano. Gora ar arek krĩraxbê Djeruxarẽwãkam arek djan kam ama. Adjãm rã'ã gê arým ar awýr bõx. Dja kãjkwa kurũm ar awýr ruw ne kam ar ajo ban kam ar ajo týx gar kam atýxkumrẽx ne kam pyka kunĩkôt 'ã adjujarënh mõ, ane. Nãm ã arkum ane.

*Jeju kãjkwamã àbir.*

*Mak 16.19; Kar 1.9*

<sup>50</sup> Ne kam krĩbê Betanhamã aro mõn aro bõx. Djeruxarẽ kurũm aro mõn aro bõx ne kam aro kĩnh ne. Kute aro kĩnh kadjy ne arkum ikra bën arkum kabën ne. <sup>51</sup> Arkum kabëno ãm rã'ã, tu kabën konenh mebê kãjkwamã wabin kam arým kãjkwakam õ pykamã bõx.

<sup>52</sup> NhyM kam kôt ba djwýnhja kum mex, rax jarënh kumex. Ne kam akubyn Djeruxarẽmã arým mõn bõx. Kĩnhkumrẽx ne mõn bõx. <sup>53</sup> Ne kam Metĩndjwýnh nhõ kikretikam ar mã Metĩndjwýnhmã mex, rax jarënh ba. Mrãmri. Tãm ne ja.

## Djuão memã Jeju'ã ujarēnh rax ne ja.

Djuão ne Jeju'ã ajarē. Jeju kute amijo ĩ ne rwýk kētri Bämmē ro'ã kàjkwakam ar bari kumrēx memã arē. Ne kam atāri Jeju kute amijo amirīt ne kute meo mex ne kute memã amikabēn jarēnh ja'ã ujarēnh tēn àbir djāmā kumē. Nām prīne gwaj bamā Jeju kabēn jarē. Jeju kute kukràdjà'ã mýjja jakre kunĩ ne arē. Me kute tu amim Jeju kamnhĩxkumrēx ne kam tĩn rá'ã rá'ãmā ne gwaj bamā arē.

Djuãomē kamybē Xijagu ne Ar kubē tep pynēnh djwýnh nhym Jeju arkum kabēn nhym ar tu mýjja kunĩmā iren Jeju kót mōn kót bikamēnh rá'a'ã nhym Jeju wabi. Nhym memã Jeju jarē nhym me kót kum kurēn pa 'ābyn apēxtimā kumē. Kamā ne ajte memã *Mýjja Apōx Kētri Kukām 'ã Ujarēnh* jadjwý'ã pi'òk no'òk ne.

*Me'õ nhidjibē kabēn'ã ujarēnh kadjy ne ja.*

*Kar 10.36; Pir 2.6; Kor 2.9; Idja 1.2*

<sup>1</sup> Mýjja kunĩ kētri ne arým me'õ nhidjibē Kabēn. Me'õ nhidjibē Kabēn kàjkwakam Metĩndjwýnhmē ro'ã nhýn adjwýnhdjwý kubē Metĩndjwýnh. <sup>2</sup> Ta ne mýjja kunĩ kētri Metĩndjwýnhmē ro'ã nhý.

<sup>3</sup> Kubē ne mýjja kunĩ nhipēx djwýnh. Ne ren kēt nhym ren mýjja katorjadjwý kunĩ ren kētkumrēx.

<sup>4</sup> Me'õ nhidjibē Kabēnjabē ne mýjja kunĩ tĩn djwýnhkumrēx. Ne kam kót kute mrāmri ne me kurwý djā pyrāk. Ga, ngōnhpòk kute akamāt kō tyk kurwý nhym me kute akamātkam mýjja kunĩ pumũnh ne katāt mrānhja pumũ. Me jadjwý ne me axwen kam mrānh punu. Nhym kam me memã me'õ nhidjibē Kabēnja'ã ajarē nhym me

kwý arým amim tu markumrēx. Kubē mýjja kunĩ tĩn djwýnhkam ne me kwý amim tu markumrēx ne kam arým axwe kēt ne katāt amijo ba. <sup>5</sup> Ga, akamāt kō tykkam me kute mýjja pumũnh kēt ne ba punuja pumũ. Me kwý jadjwý ne me axwen ba punu. Nhym kam me memã me'õ nhidjibē Kabēnja'ã ajarē. Memã 'ã ajarē nhym me axweja kute akamāt kō tykkam baja pyrāk ne me amim mar kēt.

<sup>6</sup> Be, atemã me'õbē ne Djuão. Ngômā me angjēnh djwýnhja. Metĩndjwýnh ne Djuão jano nhym arým kukwakam ujarēnh tē.

<sup>7</sup> Me'õ nhidjibē Kabēnja kute mrāmri ne me kurwý djā pyrāk nhym Djuão arým 'ã ujarēnh tē. Kót me kunĩ kute tu amim me'õbē Kabēnja markumrēx kadjy ne 'ã ujarēnh tē. <sup>8</sup> Be, djām Djuão ta kute me kurwý djāja pyrāk? Kati. Kukām kute 'ã ujarēnh kadjy ne tē. <sup>9</sup> Me'õ nhidjibē Kabēnja ne mrāmri kute amijo ba mexkumrēx ne katāt kute memã kabēn jarēnhkumrēx. Nām me kunĩmā arēnhkumrēx. Kute mrāmri ne me kurwý djā kute memã pry kurwý pyrāk.

<sup>10</sup> Me'õ nhidjibē Kabēnja ne amikadjy me kunĩ nhipēx ne tūmrām me'yr bōx ne me ro'ã ar ba. Ta ne amikadjy me kunĩ nhipēx. Nām te me ipēx ne te me ro'ã ar ba nhym me kute amim mar kēt. <sup>11</sup> Ō me wýnh'ýr ne bōx nhym ō me wýnh kute o aminhō bēnjadjwýr kēt. <sup>12</sup> Nhym be, me kwý ne me apýnh ĩ djāri arým o aminhō bēnjadjwýrkumrēx. Me ja ne me me'õ nhidjibē Kabēnja'ã amim,

—Mrāmri ne kubē Metĩndjwýnh Krakumrēx, ane. Nām me amim anen arým o aminhōkumrēx. Nhym kam arým apýnh me ĩ djāri memã kum,

—Mrāmri ne arým abē Metĩndjwýnh krakumrēx, ane. <sup>13</sup> Mebē Metĩndjwýnh krakam arým

umar djà ny. Umar djà nyo kute mrāmri ne me prīre bixadjwÿr nykam umar djà ny pyrāk. Djām me my kute me niremā kra jadjwÿrkôt me umar djà ny? Kati. Nār, djām me my kute me nireo ikwā prām kôt ne me umar djà ny? Kati. Nār, djām me kute kra'ā amim karōkôt me umar djà ny? Kati. Metīndjwÿnh kute memā amak bōnhkôt me umar djà ny.

<sup>14</sup> Be, me'ō nhidjibê Kabēnja ne arÿm amijo ī ne me baro'ā ar ba. Nām mexo uman ar ba. Ar ba ne bar prīne mexo umakôt omūnho iba. Bām pyma o ne uma. Kubê Metīndjwÿnh Kra djwÿnh. Pydji. Kam ne prīne mexo uma. Ta ne tu kum me kaprī:kumrēx\* ne kabēn pÿnh ne arēn me baro'ā ar ba.

<sup>15</sup> Be, ngômā me angjēnh djwÿnhbê Djuão ne kàj bê 'ā ajarēn memā kum,

—Arÿm ne ba ar amā me'ō ja'ā ajarēn 'ā ar amā, “Me'ō dja ikôt bōx. Nām raxo katāt ijakre. Be, mÿkam? Bir, amrēbê: ikētri ne ar ba tūm. Kam ne raxo katāt ijakre”, ane. Arÿm ne ba ā ar amā ane. Nām ā Djuão memā ane. <sup>16</sup> Be, mÿjja kunī ne ō. Ta ne ukaprīo ukaprīn ō mÿjja kunīmē me bakunīo djuw mexo nhÿ. <sup>17</sup> Mōjdjê ne Metīndjwÿnh kukwakam me kute katāt amijo ba'ā memā karō. Me axwe kêt kadjy memā karō. Nhy m be, Jeju Kritu ta ne tu kum me kaprīn kabēn pÿnh ne arē. <sup>18</sup> Be, djām me'ō ne kute Metīndjwÿnh pumūnh got? Arkati. Kra djwÿnh pydjibit ne kute omūnh. Bāmmē ro'ā ne nhÿ. Kra-bit kute omūnh ne arÿm memā 'ā ajarē.

*Djuão kute memā amijarēnh kadjy ne ja.*

*Mat 3.1; Mak 1.1; Ruk 3.1*

<sup>19</sup> Be, Djeruxarēkam me bē idjaer rūnhja ne me Djuāomā me kwÿ

jano. Ne me kadjy Metīndjwÿnh mar djwÿnh kwÿ jano. Ne me bē Rewidjwÿr kwÿ jano. Me kute abej Djuão kukjêr kadjy ne me me kwÿja jano nhy m me arÿm 'ÿr mō. 'ÿr mō:n kam arÿm 'ÿr bōx ne kum,

—Mÿj me ajō ga nā? Djām abê me inhō Bēnjadjwÿrbê kumkat-ibê Kritu? ane. <sup>20</sup> Nhy m Djuão memā 'ēx kêt ne mrāmri tu memā arēnhkumrēx ne memā kum,

—Ba ibê Kritu kêt. Metīndjwÿnh kute ijā me ō Bēnjadjwÿrbê kumkati mēnh kêt, ane.

<sup>21</sup> Nhy m me kum,

—Be, abê Kritu kêt kam mÿj me ajō ga nā? Djām abê Metīndjwÿnh kukwakam kabēn jarēnh djwÿnh? Djām abê Erij? ane.

Nhy m memā kum, “Kati”, ane.

Nhy m me kum,

—Metīndjwÿnh kute me imā kukwakam kabēn jarēnh djwÿnh'ō janormā. Djām ga? ane.

Nhy m memā kum, “Kati”, ane.

<sup>22</sup> Nhy m me kum,

—Bir, dja ga me imā amijarē. Me ije memā akabēn jarēnh kadjy. Me kute awÿr me ijanor ba me ije memā akabēn jarēnh nhy m me kute amar kadjy on me imā amijarē, ane.

<sup>23</sup> Nhy m memā kum,

—Be, amrēbê: ne Metīndjwÿnh kukwakam kabēn jarēnh djwÿnhbê Idjaij ijā kabēn jarēn me bakukāmāremā kum,

“Kapôt kukritkam dja me'ō kàj bê me akren memā kum,

'Bēnjadjwÿr djwÿnh kutēp wānh ajaxwemā anhiren kum amex. Kute mrāmri ne me kute me bēnjadjwÿr rūnhmā katāt pry jadjwÿr nhy m mexja pyrāk. Dja gar ā kutēp amexo ane', ane.”

Ba ijā ne Idjaij memā ane, ane. Djuão ā memā ane.

\* **1:14** Djām me ta ne me axwe kêt nhy m pānh kum me kaprī Kati. Me ta te axwe kêt mā nhy m ta arÿm tu kum me kaprī.

24 Be, mebê idjaer rũnh kute Djuão'yr me kwý janorja, kute kukjêrabê ne mebê pardjêu. 25 Djuão amijã memã ane nhym me kum,

—Be, abê Bēnjadjwýrbê kumkat-ibê Kritu kêt ne abê Erij kêt ne abê Metĩndjwýnh kukwakam kabēn jarēnh djwýnh'õ kêt ne kam Metĩndjwýnhmã ngômã me angjēho aba. Mýkam? ane.

26 Nhym memã kum,

—Bir, ba ikajgo me:xi. Ije Metĩndjwýnhmã me arēnh kadjy ba ngômãbit me angjēho iba. Ikajgo nhym be, me'õ ra:x arým bõx. Ne kam ar me banhipõkri ba ga me aje mar kêt. 27 Tãmwã 'ã ne ba me amã, “Me'õ gēdja ikõt bõx. Nãm raxo katat ijakre”, ane. Bãm te irax ne 'ã inhíbõn ije kum parkã 'ãpre bõhn ne o itēm prãmje. Be, ãm irax ba ren arým kum apê. Nhym be, kati. ãm ingrire. Nãm raxo ijakrenh mex ne. Nãm ã Djuão memã ane.

28 Ngõ raxbê Djodão nhikjê'ã krĩbê Betanhakam ne ã memã ane. Ngômã kute me angjēnh djakam ne ã memã ane. Djeruxarē kurũm me bõxjamã ã ane.

*Djuão kute arkum Metĩndjwýnh Kra jakre kadjy ne ja.*

*Mat 3.11; Mak 1.10; Ruk 3.22*

29 Nhym kam arým akamãt ne akati. Nhym Djuão ar jãnh dja nhym nĩnh Jeju Djuão kutã tē. Nhym omũn 'ã memã kum,

—Ota, Metĩndjwýnh nhõ Mrykĩ'ãtomti jabatãnh ny tē. Tãm ne Metĩndjwýnh me bawýr ano nhym me kute bĩn nhym kute me kunĩ jaxweo pãnhmã. 30 Tãmwã 'ã ne ba ar amã, “Me'õ dja ikõt bõx. Nãm raxo katat ijakre. Be, mýkam? Bir, amrêbê: ikêtri ar ba tũm. Kam ne raxo katat ijakre”, ane.

31 Be, djãm ba ne ba amrêbê nokre pumũ? Kati. Ije amrêbê omũnh kêt. Metĩndjwýnh kabēnkõt ije me abê idjaermã Kritu'ã idjujarēnh ga me

aje marmã. Jabit ne ba kuma. Me aje Kritu marmã ne ba ngômã me ajangjēho iba, ane.

32-33 Ne kam Djuão ajte memã kum,

—Djãm amrêbê ije nokre pumũnh got? Kati. Metĩndjwýnh amrêbê ngômã me angjēnh'ã imã karõ. Ne kam ije Kritu nokre pumũnh kadjy ta ajte imã, “Be, me'õ'ã dja Ikarõ ruw ne arek kam nhý ga omũ. Tãmja ta gēdja memã Ikarõ jano nhym arým meo ba”, ane. Kute imã anhýr kõt ne ba kam arým nokre pumũ. Metĩndjwýnh Karõ kute tut pyrãk arým Jeju'ã ruw ne arek kam nhý ba arým omũn kam nokre pumũ. 34 Ije nokre pumũnhkam ba arým memã arēnhkumrēx ne memã kum, “Be, mrãmri tãmwãbê Metĩndjwýnh Krakumrēx”, ane. Jeju kutã tēmkam Djuão ã memã ane.

*Ar kumrēx kute Jeju kõt amijo bikamēnh'ã ujarēnh.*

35-36 Nhym kam ajte akati nhym Djuãomē kõt ba djwýnh amãnhkrut ar Jeju tēmkõt omũho dja nhym arým arkum,

—Ota, Metĩndjwýnh nhõ Mrykĩ'ãtomti jabatãnh ny tē, ane.

37 Nhym Djuãokõt ba djwýnh ar kuman mã Jeju kõt ajkamē.

38 Nhym Jeju ar'ýr akēx nhym ar kõt tē nhym ar omũn arkum,

—Mýj nã? Mýj ne gar amã kĩnh ne ikõt tē? ane.

Nhym ar kum,

—Rabi, nhýnh ne ga anhũrkwãja? ane. Ujarēnh djwýnh'ã ne ar kum, “Rabi”, ane.

39 Nãm ar ũrkwã jabej kukij nhym arkum,

—Amrê ar ikõt tēn omũ, ane.

Nhym ar arým kõt tē. Kõt tē:n arým ũrkwã'ýr bõx ne arým omũ. Ne kam arek kam nhý. Arým ar'ã amykrykam ar arek kam nhý. Nhý: nhym ar'ã akati.

<sup>40</sup> Be, ar amãnhkrut kute Djuão kabên mar ne mã Jeju kôt bikamênhja nhikjê nhidjibê ne Ângre. Ângremê Ximão Pedru ar axikôt apôx. <sup>41</sup> Nãm ar 'ÿr'ã akati nhym Ângre kamy Ximão kumrêx jabej tẽn arým kum katon kum,

—Arým ne bar Mexijmã ikato, ane. Me ò Bënjadjwÿrbê kumkatibê Kritu'ã ne me kum Mexij jarê.

<sup>42</sup> Nãm Ximãomã anen arým Jeju'ÿr o tẽn 'ÿr o bôx ne kum akre. Nhym kam Jeju arek omũnho djan kum,

—Ga abê Ximão. Djônaj ne adji. Dja ba jakam amã Xepa jarê, ane. Be, kên'ã ne kum Xepa jarê. Me bakabênkam ne kum Pedru jarê.

<sup>43</sup> Nhym ajte ar'ã akati nhym Jeju pykabê Garrêja'ÿr tẽmmã. Ne 'ÿr tẽn kêtri Piripi kumrêxmã katon kum,

—Amrê mã ikôt ajkamê, ane.

<sup>44</sup> Krĩraxbê Bexadakam ne Piripi nhũrkwã. Kamdjwÿ ne Ângremê Pedru ar ũrkwã. <sup>45</sup> Nãm Jeju Piripimã kabên nhym kam arým tẽn Natana-jeumã kum,

—Arým ne bar kum ikato. Me bakukãmãre Mójdjê kute me bakukràdjã'ã pi'òk no'òkkam kute tãmwã'ã pi'òk no'òk. Metĩndjwÿnh kukwakam kabên jarênh djwÿnh 'òdjwÿ ar kute tãmwã'ã pi'òk no'òk. Bar pi'òk kôt kum ikato. Kubê ne Nadjarekam Jeju, ane.

<sup>46</sup> Nhym Natanajeu kum,

—Tô nhÿnh, djãm Nadjare kurũm mÿjja mex'ò kator prãm got? ane.

Nhym kum, “Amrê ikôt tẽn omũ”, ane.

<sup>47</sup> Ne kam arým 'ÿr o tẽn. 'ÿr o tẽn:ÿr o bôx. Nhym Jeju arým Natana-jeu tẽmkôt omũn kum,

—Be, ga abê idjaerkumrêx. Ajêxnhĩ kêtukumrêx, ane.

<sup>48</sup> Nhym Natanajeu kum,

—Je, nhÿnh ne ga arým ima? ane. Nhym kum,

—Be, Piripi kute iwÿr ajwÿr kêtri ne ba arým apumũ. Pibê pigêre parbê anhÿrri ne ba arým apumũ, ane.

<sup>49</sup> Nhym kum,

—Ujarênh djwÿnh, mrãmri ne abê Metĩndjwÿnh Krakumrêx. Abê mebê idjaer nhõ bënjadjwÿr rax, ane.

<sup>50</sup> Nhym Jeju kum,

—Ba ije amã, “Pigêre parbê anhÿrri ba arým apumũ”, anhÿrbit. Ga kam arým tu amim imarkumrêx. Adjÿm, dja ba ajte mÿjja pumũnh kêt kwÿ nhipê:x ga omũ. Mÿjja raxo kute ajbir ije amã arênhja jakrenh mex dja ga omũ, ane. <sup>51</sup> Ne kam ajte kum,

—Ba ije amijo inhĩ dja ïjã kàjkwa abenbê ajkij nhym Metĩndjwÿnh kadjy mrãnh djwÿnh arým ikurũm wabin ijã axidjuw gar arým omũ. Mrãmri ne ba ar amã ja jarênhkumrêx, ane.

## 2

### *Kute ngôo pidjô kangô.*

<sup>1</sup> Nhym akatin akatin akati nhym onÿj Garrêjakam krĩraxbê Kanakam me'ò myja me'ò nire'ÿr mõrmã. Nhym me me kukràdjã kôt arým ar'ã akuprõn kute abenã ar mênhmã o dja. Nhym Jeju nã me kôt kam ar ba. <sup>2</sup> Nhym me Jejumê kôt ba djwÿnh arkum krã nhym ar arým me'ÿr bôx. <sup>3</sup> Me'ÿr bôx nhym uba kangô arým mebê apêx. Nhym nãja Jejumã kum,

—Uba kangô ne arým mebê apêx, ane. <sup>4</sup> Nhym kum,

—Adjÿm me'ò nire. Djãm arým idjãpênh'ã myt bôx got ga imã arê? ane.

<sup>5</sup> Nhym kam nã kikrekam me ò àpênhmã kum,

—Gêdja ar amã arê gar kabên kôt apê. Nãm ã nã arkum ane.

<sup>6</sup> Nhym kam kêno ngõnhbê 6 ne ku'ê. Me kute amiku'õnh djã kadjy ne ngõnhja. Mebê idjaer kute Metĩndjwÿnhmã amiku'õnh djã

kadjy. Ngônh kre rûnh kute ngônhti pyràk. Kêno ngôn pydji kre'ã akrekam ne kute ngônhrôkrôkti ipuo amânhkrut ne amânhkrut pyràk.

<sup>7</sup> Nã me àpênh djwýnhmã kabên nhym kam Jeju arkum, “Ar ngôo ipu”, ane. Nhym kam ar ngô runho tèn o ipu mex ne.

<sup>8</sup> Nhym arkum,  
—Ar kwý run memã ýr djwýnhmã o tẽ, ane.

<sup>9</sup> Nhym arým ar kwý run memã ýr djwýnhmã o tẽ nhym arým kakin amim,

—Je tô, nhýnh ne uba kangôja? ane. Ne kam amiwýr me'õ my kute ni'ýr môrja 'uw nhym 'ýr bôx nhym kum,

<sup>10</sup> —E kum, uba kangô mexkumrêx ne ga o apdjun ajbir o akato. Djãm me kute ã o anhýr got? Kati. Me kute abenã me rênhkam ne me kute memã kangô djãnhkumrêxja kumrêxo apôx. Ne me kute o kôm kumexkambit kute memã kãjbê kangô djãnh apôx. Be, ga ne ga atemã ne ajbir kangô djãnhkumrêx jao akato, ane.

<sup>11</sup> Be, me kute raxmã kator kadjy mýjja pumûnh kêt nhípêx krax ne ja. Garrêjakam krîraxbê Kanakam ne ngô kajgoo uba kangô nhípêx ne o memã amiraxo amirít. Nhym kam kôt ba djwýnh ar kute omûnhkam tu amim markumrêx.

<sup>12</sup> Nhym kam Jeju krîraxbê Kapanã'ýr rwýk tẽ. Nãmê kamymê kôt ba djwýnhmẽ ne ar kôt mō. Ar 'ýr rwýk mō:n arým 'ýr bôx. Ne Kapanakam ar ba: nhym ar'ã akati ngrêrebit apêx. Nhym kam ar ajte mō.

*Kute Metîndjwýnh nhõ kikreti nêje me anor.*

*Mat 21.12; Mak 11.15; Ruk 19.45*

<sup>13</sup> Djeruxarêkam mebê idjaer kute aben pydji 'ýr. Me kute aben kajmã'ã Metîndjwýnh me bê idjaer kukãmãre nhirôbê mrãnhja mar kadjy ne me aben pydji 'ýr. Nhym

Jeju arým mekôt 'ýr tẽ. 'Ýr tẽ:n kam arým 'ýr bôx. <sup>14</sup> Ne kam Metîndjwýnh nhõ kikretimã wadjã. Nhym me kumex. Me kute pi'ók kaprî pãnh memã mry nhõr djwýnh kumex. Mry bàri, mrykî'ãtomti, tut nhõr djwýnh kumex. Nhym me kute me õ pi'ók kaprî pãnh memã kikreti nhõ pi'ók kaprîja nhõr kadjy me kumex. Nhym arým me omû. <sup>15</sup> Ne kam me kadjy arým djudjêdjêo me kaprêprêk djã nhípêx ne arým me aêro tèn bõm me kurê. Nãm me kunimê me õ mrykî'ãtomtimê me õ mry bàri jano. Nãm me kute me õ pi'ók kaprî pãnh memã kikreti nhõ pi'ók kaprî nhõr djwýnhjabê pi'ók kaprî ngràn mebê pîponh ikjêo rênho tẽ. <sup>16</sup> Ne tut nhõr djwýnhmã kum,

—Mûm me mýjja akato. Djãm Ibãm nhõ kikreo bikênh got ga me kikre kreo àpnu? Kwãrîk wãnh Ibãm nhõ kikrekam mýjja pãnh abenmã pi'ók kaprî nhõr kêt, ane.

<sup>17</sup> Nhym kôt ba djwýnh omûn arým pi'ókkam Metîndjwýnh kabên ma. Amrêbê: Kra kute Bãmmã kum,

“Dja ba anhõ kikre'ã ino týt nhym me arým ibî”,

anhýr ja ne ar arým kuma.

<sup>18</sup> Nhym kam mebê idjaer rûnh Jejumã kum,

—Goja on mýjja pumûnh kêt'õ nhípêx bar omû. Ne kam arým abênjadjwýr rax ma. Aje mýj me'õ kabênkôt kikretikam me anoro abaja ma, ane.

<sup>19</sup> Nhym memã kum,

—Ã. Dja ba ï me amã mýjja pumûnh kêt'õ nhípêx. Dja me Metîndjwýnh nhõ kikretija ngrã ba kam akubyn ipêx. Ije ipêxo idjãm'ã gêdja akati amânhkrut ne ikjêkêt apêx ba arým ipêx pa, ane.

<sup>20</sup> Nhym me kum,

—Tõ nhýnh? Djãm kikre ja nhípêx'ã akati amânhkrut ne ikjêkêt apêx got? Kati. Be, me kute kikreti ja nhípêxo ku'ê'ã



amex kräpti:bê 46 apêx nhym me arým ipêx pa, ane. <sup>21</sup> Be, djâm Metîndjwýnh nhô kíkreti wã'ã ne memã kabên jarê? Kati. Aminhî'ã ne Metîndjwýnh nhô kíkreti jakren memã arê. Be, Jeju nhî kute mrãmri ne Metîndjwýnh nhô kíkreti pyrãk. Dja ty nhym me adjã. <sup>22</sup> Nhym kam arým akubyn tîn. Nhym kôt ba djwýnh akubyn tînkôt omûn akubyn amijo tên arým Jeju kabên ja ma. Kute aminhî'ã kíkreti jakreja man amim,

—Be, mrãmri ne Metîndjwýnh amrêbê: pi'ôkkam Jeju kôn timer kabên dji. Mrãmri ne Jeju kabênkumrêx, ane. Dja kôt ba djwýnh ar kíkreti'ã kabên man ã amim ane.

<sup>23</sup> Me kräpti kute aben py-dji djã nhô akatikam ne Jeju Djeruxarêkam ar ba. Me kute aben kajmã'ã Metîndjwýnh me bê idjaer kukãmãre nhirôbê mrãnhja mar kadjy ne me aben pydji. Nhym Jeju mekam ar ban arým mýjja pumûnh kêt kwý nhipê:x. Nãm me punu kräpti:o mex nhym me arým omû. Me kräpti ne me omûn arým amim,

—Be, mrãmri ne Jejubê Metîndjwýnh Krakumrêx. Mrãmri kubê me banhô Bênjadjwýrbê kumkatibê Kritukumrêx, ane. <sup>24</sup> Nhym Jeju arým me kabên man amim,

—Be, djâm mrãmri me kräptija kute tu amim imarkumrêx got, ba on meo iba? Kati. Me kräpti kabên kajgo, ane. Be, djâm Jeju kute me mar kêt got? Nãm kute me kunî mar. <sup>25</sup> Djâm kute me'ômã, “Mýj ne me kuma”? anhyr prãm got? Kati. Kute prîne me ôkre kadjwýnhbê me kabên mar. Kute me kwý kabên kajgo mar.

### 3

*Nikodemumã umar djã ny'ã ujarênh.*

<sup>1</sup> Be, me'ô, idjibê Nikodemu. Kubê pardjêu'ô. Me rûnhmê

ro'ã ne mebê idjaer kunîmã nhý. <sup>2</sup> Akamãtkam ne Jeju'ýr tên 'ýr bôx ne kum,

—Ujarênh djwýnh, mrãmri ne Metîndjwýnh ajano. Aje memã kukràdjã'ã adjujarênh kadjy ajano ga bôx. Arým ba me ije amar. Ga ne ga aje mýjja pumûnh kêt kwý nhipê:x, me punu kräpti:o mex. Kam ne ba me arým kôt ije amar. Djâm me'ô kajgo kute ã meo anhyrmã got? Kati. Be, Metîndjwýnh amê amijo kajkep. Kam ne ga ã meo ane. Nãm ã Nikodemu Jejumã ane.

<sup>3</sup> Nhym kum,

—Ë, djâm aje Metîndjwýnh rax ne kute meo bajamã akator ne aje marmã ne ga tê? Be, ga ne ga te aje kum akatormã. Adjumar djã nykambit. Adjumar djã ny kute me prîre bixadjwýr nykam umar djã ny pyrãk. Kambit dja ga kum akaton ama. Mrãmri ne ba amã ja jarênhkumrêx, ane.

<sup>4</sup> Nhym kum,

—Je, mýj dja ba idjumar djã ny kadjy on? Djâm arým ijabatãnhkam ije inã tikkremã idjãr ne ajte ikator got ba idjumar djã nymã? ane.

<sup>5</sup> Nhym kum,

—Djâm ja ne ba amã arê? Kati. Dja me amim Metîndjwýnh kabên ma. Metîndjwýnh kabên ne kute ngô pyrãk. Dja me amim kabên ma nhym Karô arým memã amak bô nhym me arým umar djã ny kute me prîre bixadjwýr nykam umar djã ny pyrãk. Nhym kam Metîndjwýnh arým amim me utàn ar meo ba. Mrãmri ne ba amã ja jarênhkumrêx.

<sup>6</sup> Djâm me my kute memã kra jadjwýr nhym me bixadjwýrkam Metîndjwýnh kôt umar? Kati. Me kôt umar kêtumrêx. Nhym be, Metîndjwýnh Karô kute meo ny kôt ne me mrãmri umar djã nykumrêx ne arým kôt umar. <sup>7</sup> Ba amã, “Dja ga adjumar djã ny kute mrãmri

ne me prĩre bixadjwȳr nykam umar djà ny pyràk”, ane. Ije amã anhȳrkam kwārĩk wānh te aje marmã ikam ano tyk ne anhȳr kêt. <sup>8</sup> Be, ga, kôkreja pumũ. Djãm ga aje àbêrja kraxkôt omũnh ne nhĩãm prôtkôt aje omũnh? Kati. Metĩndjwȳnh Karôdjwȳ djãm aje omũnh? Kati. Kute memã umar djà ny jangjêhdjwȳ djãm aje kôt omũnh? Kati. Aje kôt omũnh ne mar kêtumrêx, ane.

<sup>9</sup> Nhyh Nikodemu kum,

—Kon. Bir, mȳj dja kute memã umar djà ny jangjêh on? ane.

<sup>10</sup> Nhyh kum,

—Be, ga ne ga mebê idjaerkam me kukràdjã'ã adjujarênh djwȳnh ne ren aje ikabên mar. Nhyh be, kati. Aje imar kêt, ane. <sup>11</sup> Mrãmri amrêbê ar ije mȳjja mar ne omũnhkumrêx. Ne kam arȳm me amã arê ga me kam aje amim ar imar kêt rã'ã. <sup>12</sup> Pykakam me kukràdjã kôt ba arȳm amã ikabên jarê ga aje amim imar kêt. Ne ba ren kàjkwakam ikukràdjã kôt amã ikabên jarê. Djãm kam ga ren tu amim imarkumrêx? Kati. Ga ren kamdjwȳ aje amim imar kêtumrêx.

<sup>13</sup> Be, nhȳnh ne me'õ kute kàjkwakam kukràdjã marmã 'ȳr wabin 'ȳr bôx? Ne kuman akubyn ruwn arȳm memã arê. Kati. Pykakam me'õ kute kadjy àbir kêtumrêx. Ba ije amijo inhĩbit ne ba arȳm kàjkwa kurũm ruw. Ba ne ba kam inhȳr tũm. Ne kam arȳm me amã arê.

<sup>14</sup> Be, me bakukãmãre Môjdjê kapôt kukritkam kryto kangã karô nhĩpêx. Ipêx ne pĩ'ã kunhôn arȳm kãjmã kudja. Kudja nhyh kangã karô kȳjrũm pĩ'ã wajêt. Badjwȳ, ije amijo inhĩdjwȳ, dja me pĩ'ã inhô ba arȳm kȳjrũm ã ijêto ane. <sup>15</sup> Mȳj kadjy dja ba kȳjrũm wajêt? Bir, dja me kwȳ ĩ pȳnhkôt tu amim imarkumrêx ne arȳm Metĩndjwȳnh kôt tĩn ne ar ba rã'ã: rã'ã ne. Ja

kadjy dja ba kȳjrũm wajêt. Nãm ã Jeju Nikodemumã ane.

<sup>16</sup> Metĩndjwȳnh ne kum pykakam me kunĩ jabê:. Mȳj ne kum me abê on? Bir, nãm me kadjy Kra djwȳnh jano. Kra pydji jano nhyh arȳm pykamã bôx ne me kadjy ty. Mȳj kadjy ne ty? Bir, dja me kwȳ ĩ pȳnhkôt tu amim Kra markumrêx nhyh arȳm me utã. Dja me biknor tokry djãkam me biknorbê me utã nhyh kam me Metĩndjwȳnhkôt tĩn ne ar ba rã'ã: rã'ã ne. Ja kadjy ne ty. Nãm ã Metĩndjwȳnh kum me kunĩ jabêo ane.

<sup>17</sup> Mȳj kadjy ne Metĩndjwȳnh pykamã Kra jano? Djãm kute memã axwe pãnh jarênh nhyh me me biknor tokry djãkam biknor kadjy? Kati. Kute kubê me kunĩ pytãrmã ne ano. <sup>18</sup> Be, me kute arȳm tu amim Kra markumrêxja Metĩndjwȳnh kute memã axwe pãnh jarênh kêtumrêx nhyh me biknor kadjy kêtumrêx. Nhyh be, me kute amim mar prãm kêtjamã ne arȳm kute memã axwe pãnh jarênhkumrêx. Arȳm kute me'ã amim,

—Tãmwã dja axwe pãnh me biknor tokry djãkam akuno, anhȳrkumrêx. Mȳkam? Bir, Metĩndjwȳnh Kra djwȳnh me kute amim mar prãm kêtam dja me arȳm akuno.

<sup>19</sup> Mȳj ne Metĩndjwȳnh amim arêh kam arȳm memã me biknor tokry djãkam biknor jarê? Bir, nãm amim,

—Ba arȳm pykakam memã Jeju jano nhyh bôx. Jeju ne kute memã pry kurwȳ djã pyrãk. Jejukôt me katãt amijo ban tĩnkumrêx. Nã bãm memã ano nhyh me kum kĩnh kêt. Ga, akamãt kô tykkam me kute mȳjja pumũnh kêt ne ba punuja pumũ. Me jadjwȳ ne me kum arĩk ar baja kĩnh. Mȳkam? Bir, me axwe'ã maje kum katãt amijo ba kĩnh kêt. Nãm ã me'ã amim ane.

<sup>20</sup> Ga, me kunĩ arĩk ar baja kum Jeju kurê ja pumũ. Jeju kute memã pry kurwý djã pyrãk me kum kurê. Djãm me kute amim Jeju mar ne kôt kute amijo ba prãm? Kati. Ren me amim Jeju ma nhym ren arým memã apýnh axwe jarê. Axwe pãnh kute memã bën týt pymaje ne me kute amim mar prãm kêt. <sup>21</sup> Nhym be, me katãt kute amijo baja ne me kute Jeju kôt amijo ba prãm. Jeju kute memã pry kurwý djã pyrãk ja ne me kute kôt amijo ba prãm. Mýj kadjy? Bir, dja me kôt ar amijo ba nhym me arým omũ. Kôt me ukapřja pumũ. Metĩndjwýnh djukapřĩ kôt me ukapřĩ dja memã amirĩtkumrêx nhym me arým omũ. Ja kadjy ne me kute Jeju kôt amijo ba prãm.

*Djuão Jeju'ã ujarênh.*

<sup>22</sup> Jeju Nikodemumã kabên pan kam kôt ba djwýnhmê arým ar tẽ. Tẽ:n kam arým pykabê Djudêjakam bõx. Bõx ne arek ar kam ba. Metĩndjwýnhmã ngômã me angjêno ba. <sup>23</sup> Nhym Djuãodjwý amũ ngômã me angjêno ba. Amũ krĩraxbê Xarĩ kuri pykabê Inõkam ne ngômã me angjêno ba. Kam ngõ kumexkam ne meo ba. Nhym me 'ýr bõxo ku'ê nhym ngômã me angjêno ku'ê. <sup>24</sup> Me kute Djuãobê ijê kêttri ne meo ku'ê.

<sup>25</sup> Nhym kam Djuãokôt ba djwýnhmê mebê idjaermê ar arým aktã kabêno aben japanho dja. Nãm ar abenmã kum,

—Mýj godja me ngõo me on nhym Metĩndjwýnh memã mex jarê? anen <sup>26</sup> arým Djuão'ýr tẽn 'ýr bõx ne Jeju'ã kum,

—Ë, ujarênh djwýnh, aje ngõbê Djodão nhijukri me'õmê ro'ã aban aje 'ã adjujarênh ar aba. Be, adjwýnhdjwý arým ngômã me angjêno ba nhym me kunĩ arým mũm abê tẽn 'ã kume:x, ane.

<sup>27</sup> Nhym Djuão memã kum,

—Kwãrĩk wãnh rã'ã. Metĩndjwýnh kute me'ã kum karõja ne me arým mũm 'ýr bõx. <sup>28</sup> Ba arým me amã amijarê ga me ikabên ma. Ba me amã, “Djãm ibê me banhõ Bẽnjadjwýrbê kumkati got? Djãm ibê Kritu got? Kati. Kukãm ne Metĩndjwýnh ijano ba tẽ”, ane. Ba arým me amã ja jarê ga me arým ama.

<sup>29</sup> Djãm me wã ne inhõ me? Kati. Me wã ne Jeju nhõ me. Ga, me mjênbit kute prõo baja pumũ. Jeju kute prõo ba mãn prãbê me wão ba. Jejubit ne me wão aminhõn meo ba. Ba ne inhõ me kêt. Be, ba ne ba amybým kam ikĩnhkumrêx. Ga, me mjên prõ'ýr baja pumũ. Nhym amybým mjên nhõbikwa kajgo arým mjên kabên ma. Kabên man kam arým kĩnhkumrêx ne. Jeju'ã me krãptĩkam ne ba arým ã ikĩno ane. <sup>30</sup> Mrãmri dja raxo amũ ijakrenho tẽ. Nãm ã Djuão memã ane.

<sup>31</sup> Kãjkwa kurým rwýkja ne raxo kute me kunĩ jakrenh. Nhym be, pykabê me bixadjwýrja ne me pykabê ar ba. Pykabê ar ban pykabê mýjjabit jarê. Nhym be, kãjkwa kurým rwýkja raxo kute me kunĩ jakrenh. <sup>32</sup> Kute kãjkwakam mýjja pumũnh ne mar ne memã 'ã amijarêno ba. Nhym me krãptĩ: kute amim kabên mar kêt. <sup>33</sup> Nhym be, me kwý kute amim,

—Mrãmri ne Jeju kabên katãtkumrêx, anhýrkam djãm Jejubit ne me amim kuma? Kati. Kãjkwakam Metĩndjwýnhdjwý ne me amim kuma. Nãm me amim,

—Mrãmri ne Metĩndjwýnh kabên katãtkumrêx, ane.

<sup>34</sup> Metĩndjwýnh kute anorkam ne Kra arým Metĩndjwýnh kukwakam kabên jarêno ba. Kute kubê Karõ nê kêtumrêx nhym kute 'amýnh týt ne o ba. <sup>35</sup> Kãjkwakam Bãm kum Kra jabê. Ne kam arým Kramã õ mýjja'ã kum karõn kam kum kunĩ kanga nhym ar o ba. <sup>36</sup> Kra Bãm nhõ mýjja kunĩo ba nhym kam me

kute tu amim Kra markumrēxja arým Metīndjwýnhkôt tīn ne ar ba rá'ã: rá'ã ne. Nhy m be, me kute amim Kra mar kêtja dja me tīnkumrēx'ýr bôx kêt kumrēx. Metīndjwýnh dja mekam ngryk rá'ã ne.

#### 4

*Xamarij kam me'õ nire ja'ã ujarēnh.*

<sup>1-3</sup> Nhy m kam Bēnjadjwýr djwýnh Jeju arým pykabê Djudêja kurūm tē. Mýkam ne tē? Bir, arým kute õ me jao Djuão jakrenhkam. Jeju amikôt me kamēn ngômã me angij nhy m me arým kume:x. Nhy m mebê pardjêu arým me kumex jarēnh ma. Nhy m kam arým amim,

—Be, me arým kute ijã me kumex jarēnh mar. Ba on, ane. Ne kam arým mebê tē. Djãm Jeju ta ne ngômã me angjēnh ba? Kati. Kôt ba djwýnh ne ar ngômã me angjēnh ba. Nãm Jeju Djudêja kurūm tēn kam ajte pykabê Garrêja'ýr tēmmã.

<sup>4</sup> Ne kam arým tu Garrêja'ýr pykabê Xamarijkôt tēm prãm. <sup>5</sup> Nãm Xamarijkôt tē:n kam arým krīrax'õ'ýr bôx. Idjibê ne Xika. Kuri ne Jódje nhõ pyka. Amrêbê: me bakukãmãre Djako kra Jódjemã pyka kwý tan kum kungã. <sup>6</sup> Õ pykakam ne Djako nhõ ngômkwati. Nãm Jeju krīrax'ýr bôx ne arým pykakôt tēm kurêje katy. Ne kam tēn arým ngômkwati jak'à nhỹ. Arým kàjkwa nhípókri myt nhỹrkam ne 'ã nhỹ.

<sup>7</sup> Nhỹ: nhy m nīnh Xamarij kam me'õ nire arým 'ýr tē. Kute kam ngó kwý jadjarmã ne 'ýr tēn 'ýr bôx. Nhy m kam kum, “Ba ikõ”, ane. <sup>8</sup> Be, arým kôt ba djwýnh mã krīraxmã mórkam. Kute ar õ kwý krēn djã byrmã ne ar tē.

<sup>9</sup> Nãm kum, “Ba ikõ”, ane.

Nhy m kum,

—E 'õ. Mýkam ne ga me ajõbê id-jaerkam ngó'ã ijuw? Ba ibê pykabê Xamarij kam me'õ nire ne ga ngó'ã ijuw, ane. Be, mebê idjaer ne me kum mebê Xamarij kīnh kêt.

<sup>10</sup> Nãm nireja ã kum ane nhy m Jeju kum,

—Ga aje Metīndjwýnh kute meo kīnh djã mar kêt ne ba ije ngó'ã ajwýr djwýnh aje imar kêt. Ne ga ren iman ren ba ngó'ã ijuw ba ren amã me tīnkumrēx kadjy ngó ren amã kungã, ane.

<sup>11</sup> Nhy m kum,

—Õ kum bēnjadjwýr, anhõ ngóo àbir djã kêt nhy m ngômkwati kre ry:. Nhỹnh ne me tīnkumrēx kadjy anhõ ngója? <sup>12</sup> Me banhingêt kukãmãre Djako kukwakam ne ngômkwatija. Ta ne kute kam o kómo ku'ê nhy m kramē õ mry mē kute kam o kómo ku'ê. Djãm araxo aje me banhingêt Djako jakrenh? ane.

<sup>13</sup> Nhy m kum,

—Gêdja me ngó kajgo jao ikõn akubyn kum kôr. <sup>14</sup> Nhy m be, ba ije amã ngó jarēnhja gêdja me kwý í pýnhkôt o ikõn akubyn kum kôr kêt kumrēx. Ije amã ngó jarēnh ja gêdja me o ikõ nhy m mã mekam apóx kute mrãmri ne ngômkwatikam ngó mã apóx pyræk. Nhy m kam me arým Metīndjwýnhkôt tīn ne ar ba rá'ã: rá'ã ne, ane.

<sup>15</sup> Nhy m kam kum,

—Bēnjadjwýr goja amrê imã aje ngó jarēnhwã ngã ba o ikõn goja imã kôr kêt ne amrê ngóo imrãnh kêt, ane. Djãm ngókumrēx'ã ne kute kum me tīnkumrēx kadjy ngó 'ã ajarē? Kati. Metīndjwýnh Karõ'ã ne ngó jakren kum 'ã ajarē. Nãm ã nire ngó'ã Jeju 'wýro ane. <sup>16</sup> Nhy m kum,

—Tēn amjēnmã arē gê amrê tē, ane.

<sup>17</sup> Nhy m kum, “Imjēn kêt”, ane.

Nhy m kum,

—Nã. Mrãmri amjēnkumrēx kêt.

<sup>18</sup> Amrêbê ne aben totokmã amjēn

amãnhkrut ne amãnhkrut ne ikjêkêt ga kanga. Ne kam ajbir awÿr bao ku'êja ne kubê amjên kêt. 'Á ne aje mrãmri imã, "Imjên kêt", anhÿrja.

<sup>19</sup> Nhyum kum,

—Bênjadwÿr, ga abê Metĩndjwÿnh kukwakam kabên jarênh djwÿnh'ô ba arÿm ama. <sup>20</sup> Krãnh wã'ã ne me ikukãmãre kute Metĩndjwÿnhmã rax jarênh djã. Nhyum me abê idjaer ne ga me atemã ne aje memã kum,

—Krĩraxbê Djeruxarêkambit ne me kute Metĩndjwÿnhmã amijarênh djã, anhÿro aba, ane.

<sup>21</sup> Nhyum Jeju kum,

—Djãm me aje krãnh wã'ã me Bãm djwÿnhmã rax jarênh rã'ãmã? Nãr djãm me aje Djeruxarêkam kum amijarênh rã'ãmã? Kati. Gêdja ga me ï kam kum amijarênh kêt. Kam kum amijarênh kêt'ã ne amrê akati mör rã'ã. Mrãmri ne ba ije amã arênhkumrêx. Dja ga tu amim ikabênja markumrêx. <sup>22</sup> Me abê pykabê Xamarijka me kra ne ga me aje we apytãr djwÿnhja, aje kum rax jarênhja aje mar kêt. Nhyum be, me ibê idjaerka ne ba me ije Metĩndjwÿnhmã amijarênhja arÿm ije mar. Ije me utãr djwÿnhkumrêx mar. Me ibê idjaerka ne me utãr djwÿnh kato. Kam ne ba me ije mar.

<sup>23</sup> Me kute markumrêx dja me ï me Bãm djwÿnhmã rax jarênhkumrêx ne 'êx kêtumrêx. Me kadjwÿnhbê Metĩndjwÿnh Karô kôt dja me mrãmri amijo ngriren raxmã katorkumrêx ne kum rax jarênhkumrêx. 'Á akati amrê mör rã'ãn arÿm bôx 'ÿr. Me Bãm djwÿnh kum me ja kĩnh. <sup>24</sup> Djãm kãjkwakam Metĩndjwÿnh kute me bapyràk? Djãm ïmê 'imê kute me bapyràk? Kati. Karôbit. Nhyum me kute omũnh kêtumrêx. Me kute omũnh kêtka dja me tu amikadjwÿnhbê karô kôt mrãmri amijo ngriren raxmã katorkumrêx. Kum katorkumrêx

ne kum rax jarênhkumrêx. Nãm Jeju ã me'ô niremã ane.

<sup>25</sup> Jejubê ne Bênjadwÿrbê kumkatibê Kritu nhyum kute mar kêt. Kritu nhidji 'ôdjwÿybê ne Mexij. Me'ô nire kute mar kêt ne kum,

—Tukwa, gêdja Mexij bôx ne me imã mÿjja kunĩ jarê ba me kuma. Ja ne ba arÿm ije mar, ane.

<sup>26</sup> Nhyum kum,

—E kum, ba ne ba arÿm amã ik-abêno nhÿ. Ibê ne Mexij, ane.

<sup>27</sup> Nãm nirejamã ja jarênh nhÿ nhyum kôt ba djwÿnh arÿm 'ÿr bôx ne ar omũ. Jeju kute kum kabêno ÿrkôt arÿm ar omũ. Ne te kute ar marmã arka me tyn dja. Ne bit kute nija'ã kukjêr ne kute kum,

—Mÿj ne ga kum arênh nhÿ? Mÿkam ne ga kum akabêno nhÿ? anhÿrmã ne arkum uman arek ku'ê.

<sup>28</sup> Nãm kôt ba djwÿnh Jeju 'ÿr bôx nhyum nire arÿm ô ngyo ngônhmã iren mã: krĩraxbê Xikamã tẽn wadjã. Ne kam memã kum,

<sup>29</sup> —Ô kum onÿ me'ô. Ije amijo ibaja kunĩkôt ipumũn imã arê. Bãrãm mrãmri kubê me banhô Bênjadwÿrbê kumkatibê Kritukumrêx. Gwaj 'ÿr gar omũ, ane. <sup>30</sup> Nhyum me arÿm krĩrax kurũm katon 'ÿr tẽn arÿm 'ÿr bôx.

<sup>31</sup> Me 'ÿr bôx kêttri ne kôt ba djwÿnh arÿm kum,

—Ujarênh djwÿnh, gop anhô kwÿ krê, ane.

<sup>32</sup> Nhyum arkum,

—Be, atemã inhô kwÿ krên djã ar aje mar kêt, ane. Be, djãm mrãmri ô kwÿ krên'ã ne arkum ane? Kati. Nãm Metĩndjwÿnhmã ãpênho ô kwÿ krên djã. Metĩndjwÿnhmã ãpên ar ba'ã ne arkum ane. <sup>33</sup> Nãm arkum ane nhyum ar arÿm abenmã kum,

—Djã ne me'ô arÿm kum mÿjja'ô ngã nhyum kukrê? ane.

<sup>34</sup> Nhyum arkum,

—Be, kãjkwakam Metĩndjwÿnh kute amrê pykamã ijanor arÿm ijã

amim karõ. Kute idjâpênh djà'ã amim karõ kôt dja ba amijo iban arým inomã kumê. Be, idjâpênh jakam ikĩnh inhõ kwý krênkam ikĩnh jakrenh mex ne. 'Ã ne ba ije ar amã, "Atemã inhõ kwý krên djà", anhÿrja. Nãm ã Jeju arkum ane.

<sup>35</sup> Ne kam ajte arkum,

—Kwãrĩk wãnh gar amim, "Dja bàygogo'ã mytyrwý amãnhkrut ne amãnhkrut apêx bar kam êo mõi", anhÿr kêt. Be, ba ne ba ar amã, "Ar kãjmã akrãn me kute ikabên mar prãmja pumũ. Me krãptĩ kute bàygogo pyrãk wã pumũ. Dja gar memã ijã ajarê nhym me arým tu amim imarkumrêx. Ja kadjy ne me mexkumrêx. Me mexkumrêx kute mrãmri ne bàygogo pry ngrãn akakam ê kadjy mexja pyrãk.

<sup>36</sup> Dja gar on jakam memã arê nhym me amim ima ba arým ar amã o pãnh. Nhym kam me ikôt tĩn ne ar ba rã'ã: rã'ã ne. Ba ar amã o pãnh gar arým akĩnh rã'ã: rã'ã ne. Djãm ar gajbit dja gar akĩnh? Kati. Me kute amrêbê memã arênhdjwý dja me ar aro'ã kĩnh. Ga, me kumrêx kute bàygogo kre nhym ate me ja kute tũmrãm bàygogo djêja pumũ. Me kute ê parkam me ro'ã kĩnhkumrêx. Inhõ ãpênh tũmmê dja gar aro'ã akĩnhkumrêx.

<sup>37</sup> Be, me memã kum, 'Gêdja me'õ 'y kre nhym me'õ arým ê', anhÿro ba. Be, ikabênja kõnh ne me kabên ja dji. <sup>38</sup> Ar aje o atom ne êmã ne ba 'ÿr ar ajano. Amrêbê ne gar bàyogokam adjâpênh kêt. Me'õ kumrêx ne arým kam apên kam 'y krebite ba. Gar inhõ me ãpênh tũm kôt ajbir adjâpênh 'amý", ane. Ar kute memã 'ã ujarênhmã nhym me kute tu amim markumrêxmã ne Jeju ã kôt ba djwýnhmã ane.

<sup>39</sup> Nãm me'õ nire krĩraxbê Xikakam Xamarij kramã kum,

—Nãm prĩne ije amijo iba kunĩkôt imã arênh mex, anhÿro tẽ. Nhym me krãptĩ kuman arým tu amim

Jeju markumrêx. <sup>40</sup> Ne kam Jeju'ÿr tẽn 'ÿr bõx ne kum,

—Gop arek me iro'ã ar aba, ane. Nhym arým arek mekam ar ba. Ar ba nhym arým 'ã akati amãnhkrut apêx. <sup>41</sup> Nhym kam me kute Jeju ta kabên markam ne krãptĩ tu amim markumrêx.

<sup>42</sup> Ne kam nijamã kum,

—Jakam bar tu amim Jeju markumrêx. Djã ne bar akabênbit man amim tu markumrêx? Kati. Arým ne bar Jeju ta kabên kôt amim kuman amim, "Be, mrãmri ne Jejubê Bênjadjwýrbê kumkatibê Kritukumrêx. Mrãmri kubê pykakam me axwe kunĩ pytãr djwýnhkumrêx." Nã bãm ar ã amim ane. Nãm me ã nire jamã ane.

*Kute me'õ bẽnjadjwýr krao mex.*

<sup>43</sup> Be, Jeju'ã akati amãnhkrut apêx nhym arým amũ ajte tẽ. Tẽn arým abatãnh djã, õ pykabê Garrêjakam bõx. <sup>44</sup> Jeju ta ne amrêbê memã kum,

—Djãm Metĩndjwýnh kukwakam kabên jarênh djwýnh'õ ne abatãnh djãkam bõx nhym me kum rax jarênh got? Kati. Nãm me aprý, ane. <sup>45</sup> Jeju abatãnh djãbê Garrêja jakam bõx.

Nhym kam me kum kabên mex jarê. Me kute amrêbê amũ Djeruxarêkam Jeju pumũnhkam ne me kum kabên mex jarê. Me krãptĩ kute amikukràdjã tũm mar kadjy aben pydji djã nhõ akatikam ne me Djeruxarê'ÿr tẽn 'ÿr bõx. 'ÿr bõx ne arým kam mekôt Jeju pumũ. Nhym mýjja pumũnh kêt krãptĩ nhípêx nhym me arým omũ. Omũn kam akubyn Garrêjakam bõx. Nhym Jejudjwý kam bõx ne me'ÿr bõx. Nhym me kam kum kabên mex jarê.

<sup>46</sup> Jeju Garrêjakam bõx ne ajte krĩraxbê Kanakam bõx. Kam ne amrêbê kute ngõ kajgoo uba kangõ nhípêx. Jeju bõx nhym onĩj Kapanakam me'õ bẽnjadjwýr kra

arým kanê. <sup>47</sup> Nhyim me arým bēnjadjwǝrmã arēn kum,

—Onǝj, Jeju arým Djudêja kurũm katon Garrêjakam bõx, ane.

Nhyim kuman arým Kana'yr tēn kam Jeju'yr bõx. 'Yr bõx ne kum,

—Ê, gu 'yr ga imã ikrao mex gê kanê kum ire, ane. Nãm mã 'yr kum krà. Arým kra tyk 'yrkam ne mã 'yr kum krà.

<sup>48</sup> Nhyim Jeju kum,

—Ga me aje amim imar kêt kumrēx. Ije mǝjja pumũnh kêt nhípēx ga me aje omũnhkambit ne amim ima. Mǝkam? ane. <sup>49</sup> Nhyim bēnjadjwǝr Jejumã kum,

—Bēnjadjwǝr, amibēx, tyk kētri gu 'yr tē, ane.

<sup>50</sup> Nhyim kum,

—Aj mã. Arým ne akra tĩn ne, ane. Nhyim arým tu amim kabēn markumrēx ne arým 'yr tē. Amim kamnhĩxo tē. <sup>51</sup> Tē: nhyim kam arým 'ã akamãt. Nhyim akati nhyim ajte tē: nhyim õ àpēnh ar arým kutã tēn kajpa. Ne kum, “Arým ne akra tĩn ne”, ane.

<sup>52</sup> Nhyim arkum,

—Nhǝnh ne myt nhǝ nhyim mexmo krax ne? ane.

Nhyim kum,

—Amũja'ã myt akēxkam ne arým kanê kum ire, ane.

<sup>53</sup> Nhyim amim,

—Be, Jeju kute imã, “Arým ne akra tĩn”, anhǝr majmã ne arým kanê kum ire, ane. Ne arým tu amim Jeju markumrēx. Õ kikrekam ar kunǝdjwǝ tu amim markumrēx.

<sup>54</sup> Jeju Djudêja kurũm tēn Garrêjakam bõxkam ne ajte mǝjja pumũnh kêt ja nhípēx. Me kute raxmã kator kadjy ne arým bēnjadjwǝr krao mex.

## 5

*Ngõ mǝrri me'õ punu nõr.*

<sup>1</sup> Jeju bēnjadjwǝr krao mex. Nhyim kam onǝj krĩraxbê Djeruxarēkam

arým mebê idjaer kute aben pydji djã nhõ akati 'yr. Nhyim Jeju arým 'yr tē. 'Yr tēn kam arým 'yr bõx.

<sup>2</sup> Be, Djeruxarēkam ne ngõ'õ nõ. Me kute krĩraxmã mrykĩ'ãtomtio ngjēx djã kuri ne ngõ'õ nõ. Mebê idjaer kabēnkam ne me ngõmã Bexeda jarē. Ngõ bu'ã ne kikre kre kēnh amãnhkrut ne amãnhkrut ne ikjêkêt. <sup>3</sup> Kikrekam ne me punu krãptĩ ikwã. Me no rãmē me mrãnh punumē me akrymē ikwã. Ngõ kute amingrēk ne me kam amako ikwã. <sup>4</sup> Mǝjkõt ne ngõ amingrēk? Bir, Metũndjwǝnh kadjy mrãnh djwǝnh ne ngõ'yr ban me aerbê ngõmã wangij, ngõmã ngjēx pǝnh. Nhyim arým kõt ngõ amingrēk ne. Amingrēk nhyim me'õ punu kumrēx kute memã wan noxja ne arým mex ne. Pydjibit mex.

<sup>5</sup> Be, Jeju Djeruxarē'yr bõx ne ngõ ja'yr bõx. Nhyim me'õja me punu kõt nõ. Punu'ã ne amex krãptĩ:bê 38 apēx. <sup>6</sup> Nhyim arým omũn amim,

—Be, amrēbê ne me'õwã punu, ane. Ne kam kum, “Djãm amã amex prãm”? ane.

<sup>7</sup> Nhyim punuja kum,

—Be, ngõ kute amingrēkkam djãm inhõbikwa'õ got ijo tēn ngõmã imē ba on imex ne? Kati. Nã bãm te ngõ'yr amibēx ne nhyim arým me'õ imã wan nox ne. Ba kam imex prãm kêt ne, ane.

<sup>8</sup> Nhyim kum,

—Be, kãjmã djan anhikwã djã krãnh amǝn o tē, ane. <sup>9</sup> Nhyim arým kabēnmē ro'ã mex ne ikwã djã krãnh kumǝn o tē. Pi'ók rãrãrkam, me tyk djã kêt djã nhõ akatikam ne mex ne.

<sup>10</sup> Nhyim mebê idjaer rũnh omũn kum kabēn ne kum,

—E kum pi'ók rãrãr ne ja. Djãm aje kam kukràdjã mar kêt ne ate anhikwã djã mǝn o tē? ane.

<sup>11</sup> Nhyim aminêje memã kum,

—Me'õ kute ijo mex ne imã, “Anhyim kam onǝj krĩraxbê Djeruxarēkam hĩkwã djã krãnh amǝn o tē”, anhǝr

kôt ne ba arým inhikwã djà mỳn o tẽ, ane.

<sup>12</sup> Nhyr me kum,

—Mỳj me'õ ne amã, “Anhikwã djà krãn amỳn o tẽ”, ane ga kam o tẽ? ane. <sup>13</sup> Nhyr, “Kon, ije mar kêt”, ane. Be, ar bu'ã ne me krãptĩ: ajkarê. Nhyr Jeju arým me katikôt mã tẽ nhyr arým omũnh kêt ne.

<sup>14</sup> Nhyr kam Jeju Metĩndjwỳnh nhõ kikretikam kum katon kum,

—Ë, arým amexkam on ajaxwe krãta. Dja ga ajte ajaxwe nhyr mỳjja'õ ajte ajo ajkẽ. Mỳjja punu kute apunu tũm jakrenh mex dja ajte ajo ajkẽ, ane. <sup>15</sup> Nhyr arým mebẽ idjaer rũnh'ỳr tẽn memã arẽn memã kum,

—Be, Jeju ne ijo mex, ane.

*Kute me rũnhmã amikôt ami-jarẽn.*

*Dju r 10.30*

<sup>16</sup> Jeju kute pi'òk rãrãrkam meo mexo bakam ne mebẽ idjaer rũnh kum kurêo ba. Ne kam arým abenmã kum, “Gwaj on kubĩ”, anhỹro ba. <sup>17</sup> Nhyr Jeju arým memã kum,

—Be, Ibãm ne pi'òk rãrãrkam àpẽn ar ba. Ba kudjwa kam idjãpẽn ar iba, ane. <sup>18</sup> Nhyr me arým abenmã kum,

—Be, Jeju gwaj bapãnh pi'òk rãrãrkam àpẽn ba. Djãm jabit? Kati. Tãmwã ta ne amijo 'êx ne Metĩndjwỳnh bãm ne raxo amiptãro ba, ane. Me abenmã anen arým we Metĩndjwỳnh ngryk ne kute Jeju bĩnmã kangrõnh tỳx ne.

<sup>19</sup> Nhyr kam Jeju amipãnh memã kum,

—E kum, mrãmri ne ba ibê Metĩndjwỳnh Krakumrêx. Djãm ba ipydji ne ba idjãpẽn got? Kati. Ibãmmẽ ne bar idjãpẽn'ã ajkrut. Ne ba ren ipydjin ren ije meo mex kêt. Ibãm djãpẽn ne ba omũn arým àpẽn o idjãpẽn. Ibãm djãpẽn kunĩkôt ne ba kudjwa ã idjãpẽnho ane. <sup>20</sup> Be, mỳkam? Bir, Ibãm

kum ijabêkam. Ne kam arým imã amidjãpẽn kunĩ jakre ba kôt ipêx. Dja ã imã mỳjja pumũnh kêt ra:x kwỳ jakre ba arým ipêx ne. Dja mỳjja raxo ajbir ije ipêxja jakrenh mex ne. Dja ba ipêx ga me te aje marmã kam ano tyn aku'ê. <sup>21</sup> Ba Ibãm kôt akubyn me tyko tĩn. Kute Ibãm ta kute akubyn me tyko tĩn pyrãk ne ba ã meo ane. Dja ba imã me tyk akubyn o tĩn kũnh ne arým ã meo ane nhyr me arým akubyn tĩn. <sup>22</sup> Dja ba me axwe kukjan memã ikaton kam memã axwe pãnh jarẽnhdjwỳ. Ibãm kute me'õmã axwe pãnh jarẽn kêt. Ta ne imã,

“Ga dja ga me kunĩmã axwe pãnh jarẽn”, ane.

<sup>23</sup> Be, mỳj kadjy ne ijã memã axwe pãnh jarẽn djwỳnh mẽ? Bir, dja ba memã axwe pãnh jarẽn nhyr me arým ijo bẽnjadjwỳr ra:x ne. Dja me ijo bẽnjadjwỳr ra:x mrãmri me kute Ibãm bẽnjadjwỳr rax pyrãk. Ja kadjy ne ijã memã axwe pãnh jarẽn djwỳnh mẽ. Be, djãm me kute imã ikajgo jarẽnhkam kute Ibãmmã rax jarẽn got? Kati. Dja me imã irax jarẽn kêt ne arým Ibãmdjwỳmã rax jarẽn kêt. Ta ne ijano ba tẽ.

<sup>24</sup> Dja me tu amim ikabẽn markumrêx ne tu amim kute ijanor djwỳnh markumrêx ne arým kunĩ Metĩndjwỳnhkôt tĩn ne ar ba rã'ã: rã'ã ne. Dja ba me jamã axwe jarẽn kêtumrêx. Amrêbê ne me ja Metĩndjwỳnhbê amakkre kêt kute mrãmri ne me tyk amakkre kêt pyrãk. Ne kam arým jakam Metĩndjwỳnhkôt tĩn ne ar ba rã'ã: rã'ã ne. Mrãmri ne ba me amã ja jarẽnhkumrêx. <sup>25</sup> Dja me tyk ã ikabẽn ma. Ibê Metĩndjwỳnh Kraja ikabẽn ma. Ne kam me kute ikabẽn mar kunĩ dja me akubyn tĩn. 'A akati arým me bajo rãm ne ja. Arým ije kum o kraxmã. Mrãmri ne ba me amã ja jarẽnhkumrêx.



<sup>26</sup> Be, mỳj ne ikam kute ba memã ikabên nhyr me akubyn tìn? Bir Ibãmmê ije aben pyrãk. Kam ne ba memã ikabên nhyr me akubyn tìn. Ibãm ta ne tìn ne ta kute mỳjja kunĩmã tìn jangjênho ba. Ibãm kabên kôt ne ba kudjwa itìn ne ije mỳjja kunĩmã tìn jangjênho iba. <sup>27</sup> Ne Ibãm kabênkôt dja ba memã axwe pãnh jarênhdjwỳ. Arỳm ije amijo inhĩkam dja ba ã meo ane.

<sup>28</sup> Be, ije me amã, “Dja me tyk ikabên man akubyn tìn”, anhỹrkam kwãrĩk wãnh te aje marmã ikam ano tyk kêt. Mrãmri dja pyka krãkam me tyk kunĩ ikabên man akubyn kato. <sup>29</sup> Me mex ne ukapri dja me akubyn tìn. Dja me Metĩndjwỳnhkôt tìn ne ar ba rã'ã: rã'ã ne. Nhyr me axwedjwỳ dja me akubyn tìn. Ije memã axwe pãnh jarênh kadjy dja me akubyn tìn.

<sup>30</sup> Be, djãm ipydji ne ba ar iba? Kati. Ba ipydji, idjãpênh ne ikabên kêt. Ibãm kabên o ne ba ikabên. Ibãm ne imã me axwe jakre ba kôt me axwemã ikaton kam memã pãnh jarê. Djãm ije amidjwỳnhbito kĩnhmã? Kati. Ibãm kute ijanor ne ba ije o kĩnhmã. Kabênkôt ije katãt me axwemã ikatorn kam pãnh jarênhkumrêx.

<sup>31</sup> Be, djãm ipydji ne ba me amã amijarê? Kati. Ba ren ipydjin me amã amijarê ga me ren mrãmri ijã, “Kati. Kabên kajgo”, ane. <sup>32</sup> Nhyr be, kati. Me'odjwỳ ne ikukãm ijã me amã ujarênhkumrêx. Katãt me amã ijã ujarênhkumrêx. Ja ne ba arỳm ije mar.

<sup>33</sup> Be, me ga ne ga me amrêbê Djuão'yr me akwỳ jano. Nhyr me Djuão'yr bõx ne kukij. Nhyr arỳm katãt me amã ijã ujarênhkumrêx ga me arỳm ama. <sup>34</sup> Be, djãm kute kabêno Ibãm jakrenh got ba me amã Djuão jarê? Kati. Pykakam me'õ kute kabêno Ibãm jakrenh kêt. Be, mỳj kadjy ne ba me amã Djuão jarê? Bir, me aje amijã Djuão kabên

markumrêx nhyr Metĩndjwỳnh kute me ajaxwebê me apytãrmã ne ba me amã arê. <sup>35</sup> Djuão ne kute mrãmri ne ngõnhpõk nhirã pyrãk ne ar ba. Nãm me amã kabên mex jarênho ba. Ga me ren tu amim kabên markumrêx ne ren amijo aba mex rã'ã. Nhyr be, kati. Djuão kute me amã arênho bakam ga me aje mar 'ikrãn ne akĩnh 'ikrãn ne.

<sup>36</sup> Be, Ibãmdjwỳ ne kute imã, “Ije amã adjãpênh djã jarênhja dja ga inomã amê”, anhỹr ne kute prĩne imã 'ã karõ ba arỳm kôt idjãpênh iba. Ba mỳjja pumũnh kêt nhipêxo iba ga me arỳm omũ. Idjãpênh ja kute iraxo amirĩto Djuão jakrenh mex. Ga me ren aje idjãpênh pumũnhkam ren arỳm mrãmri iraxmã akatorcumrêx. Ibãm kute ijanorkôt ne ga me ren imã akatorcumrêx.

<sup>37</sup> Ibãm ta kute ijanor ne arỳm ijã ajarê. Djãm me aje õkre mar ne ã pumũnh got? Arkati. <sup>38</sup> Ga me ren aje amim Ibãm kabên mar prãm ne ren tu amim imarkumrêx. Nhyr be, kati. Ibãm kute ijanor djwỳnh ta ne arỳm mã amã ijã ajarê ga me aje amim kabên 'amỳnh kêt ne mar prãm kêt. <sup>39</sup> Goja prĩne Metĩndjwỳnh kabên'ã pi'õk no'õk pumũ. Me ga ne ga me 'ã amim, “Dja ba arênho iban Metĩndjwỳnhkôt itìn ne ar iba rã'ã: rã'ã ne”, anhỹro aba. Me aje amim anhỹrkam goja prĩne amim omũn ama. Pi'õk tãmkam ne Metĩndjwỳnh ba ijã ajarê. <sup>40</sup> Nãm te pi'õkkam ijã ajarê ga me ikõt abikamênh kêt. Ga me ren Metĩndjwỳnhkôt atìn kadjy ren ikõt ajkamê. Nhyr be, kati. Me aje ikõt abikamênh prãm kêtumrêx.

<sup>41</sup> Djãm me aje imã, “Araxcumrêx”, anhỹrmã? Djãm irax ja ne ba abej? Kati. <sup>42</sup> Be, mỳkam? Bir, me amã kãjkwakam Metĩndjwỳnh jabê kêt kam ije irax ja jabej kêt. Arỳm ije me amar. <sup>43</sup> Ibãm kukwakam ba tẽn me awỳr bõx ga me aje amim imar kêt. Me'õ kãtãm ta dja tẽn me

awÿr bôx ne ta amiraxo àmra ar ba ga me arÿm tu amim markumrêx.

<sup>44</sup> Be, me ga ne ga me amirax jabej mã amim, “Ba gêt ba amibên gê me imã irax jarê”, anhÿro aba. Ne kam aje amim, “Ba Metîndjwÿnhmãbit amijarê gê ta ijo rax”, anhÿr kêtukumrêx. Aje amim, “Ba gêt irax. Ba gêt irax”, anhÿro abakam aje amim Metîndjwÿnh mar prãm kêtukumrêx.

<sup>45</sup> Djãm ba dja ba Ibãmmã me ajaxwe jarê? Kati. Ga me akukãmãre Mòjdjê kanàrràm ar amijo aba. Ta ne arÿm Metîndjwÿnhmã me ajaxwe jarênho dja. <sup>46</sup> Djãm mrãmri ne ga me aje tu amim akukãmãre Mòjdjê kabên markumrêx? Kati. Ga me ren tu amim Mòjdjê kabên markumrêx ne ren badjwÿ tu amim imarkumrêx. Ta ne ikukãm ijã ajarên ijã pi'ók no'ók. Kam ga me ren amim kabên jarên ren tu amim imarkumrêx.

<sup>47</sup> Nhyr be, kati. Me aje amim Mòjdjê kabên mar kêt ne aje kôt amim badjwÿ ikabên mar kêt. Nãm ã Jeju pi'ók ràràrkam kute me'ò punuo mexkam mebê idjaer rÿnhmã ane.

## 6

*Kute djwÿo mebê 5.000o djuw mex.*

*Mat 14.13; Mak 6.30; Ruk 9.10*

<sup>1</sup> Nãm memã anen kam arÿm amũ tẽ. Tẽ:n kam arÿm imòtibê Garrêja nhikjêmã rê. Imòti nhidji 'òdjwÿbê Xiberij. <sup>2</sup> Nhyr kam me krãpti kôt mō. Ôbê Jeju kute mÿjja pumũnh kêt kwÿ nhipêx nhyr me kute omũnhkam ne me kôt mō. Nãm me punu krãptio mex nhyr me omũn arÿm kôt mō. <sup>3</sup> Kôt mō nhyr Jejumê kôt ba djwÿnh ar me kukãm mō. Mō:n krãnh'ã wabi. Àbir tẽ:n arÿm kam nhÿ. <sup>4</sup> Be, arÿm ne Djeruxarêkam mebê idjaer kute aben pydji djã nhō akatija bôx 'ÿr. Me kute Metîndjwÿnh

me kukãmãre nhirôbê mrãnhja mar kady ne arÿm ò akati 'ÿr.

<sup>5</sup> Ar krãnh'ã nhÿ nhyr kam Jeju amipãnh rît. Nhyr nÿnh me krãpti: kôt mō nhyr me omũ. Ne kam Piripimã kum,

—Jãm dja gwaj tẽn me kady djwÿ kwÿ by? ane. <sup>6</sup> Be, djãm kute amikukãm amimar kêt ne Piripi kukij? Kati. Kute prÿne amikukãm amimar. Be, mÿkam ne kukij? Bir, Piripi kute mrãmri amim tu markumrêx jabej ne kukij. <sup>7</sup> Nãm kukij nhyr Piripi kum,

—Tô gêt kon. Gwaj banhō pi'ók kapri'ã akrekam kubê denarjuo 200bit. Ne gwaj ren pi'ók kapri jao ren me kady djwÿ by nhyr ren me krãpti abenmã kokjêr kryre nhyr ren me krãpti: 'ã djwÿ kêt, ane.

<sup>8</sup> Nhyr Jejukôt ba djwÿnh 'òdjwÿja nhidjibê Ængre. Ximão Pedrumê ar axikôt apôx. Ængreja kum,

<sup>9</sup> —Ota jakam me'ò bôktire nhō djwÿmê tepprãremê. Xe-wadao djwÿ nhipêx amãnhkrut ne amãnhkrut ne ikjêkêt. Ne tepprãre amãnhkrut. Nhyr be, me krãpti: Mÿj dja gwaj djwÿ ngrirejao me on? ane.

<sup>10</sup> Nhyr Jeju arkum,

—Ar memã arê gê me nhÿ, ane. Be, bõre ne pyka wãkam kumex ne. Jeju arkum ane nhyr ar arÿm memã arê. Nhyr me arÿm bõrekam nhÿ. Me krãpti: kubê 5.000 ne me nhÿ. <sup>11</sup> Nhyr kam Jeju arÿm djwÿ jamÿ. Ne kam arÿm o Metîndjwÿnhmã amikÿnh jarê. O kum amikÿnh jarên arÿm kôt ba djwÿnhmã kungã. Nhyr ar me krãptimã kungã. Nãm ã tepprãredjwÿo ane.

<sup>12</sup> Nhyr me ò kwÿ krê:n arÿm ajne. Nhyr Jeju kôt ba djwÿnhmã kum,

—Dja gar djwÿ janhy karwà. O bikênh kêt kady, ane. <sup>13</sup> Nhyr kam ar karwàn kaxnokai pÿnh

djari kam kungij. Nhyam kam kaxnokaibê 12 ipu. Be, xewadao djwý amãnhkrut ne amãnhkrut ne ikjêkêť janhy 'ã kãtãm ne ja.

<sup>14</sup> Nhyam me arým kute mýjja pumũnh kêtja pumũnhkam abenmã kum,

—Be, Metĩndjwýnh kukwakam kabẽn jarẽn djwýnh ja ne me amrêbê arê. Me memã kum, “Dja pykamã bõx”, anhýro ba. Be, kôt ne Jeju arým jakam bõxkumrêx, ane.

<sup>15</sup> Nhyam Jeju arým me kuman amim,

—Got ba ren arek dja nhyam ren me tu ijo tým ne ijã bẽnjadjwýr rax mẽ. Djãm on pykakam memã inhýr prãm got? ane. Ne kam arým mebé tẽn amũ krãnh'ã wabin ate ar ba.

<sup>16</sup> Nhyam kam arým para. Nhyam kôt ba djwýnh tẽn arým imõti'ýr ruw. <sup>17</sup> Ne kam arým kã'õkam wadjãn nox ne. Amũ akãx nhikjêmã krĩraxbê Kapana'ýr mõrmã ar arým nox ne. 'Ýr mõ: nhyam ar'ã arým akamãt ne. Nhyam kraxje Jeju ar'ýr bõx kêt rã'ã.

<sup>18</sup> Ar mõ: nhyam arým kõk 'itýx wabê nhyam kam ngõ amijapĩn týx ne. <sup>19</sup> Nhyam ar ngõ rẽnho mõn arým ajbubê tým ne. Ar mõr'ã arým kirometubê 5 apêx. Nhyam Jeju nũnh arkõt tu ngõ'ã tẽn nhyam ar omũ. Nhyam arým aro rãm ne ja nhyam ar arým tĩn prãm ne. <sup>20</sup> Nhyam arkum,

—Ar atĩn prãm kêt. Ba ne ba ar akõt tẽn, ane. <sup>21</sup> Nhyam ar kabẽn man arým kĩnh ne. Ne kum,

—Amrê ar ikõt kãmã wadjã, ane. Nhyam arým wadjãn nhý. Nhyam ýrmê ro'ã ar arým akãx nhikjê'ýr bõx. Kapanakam ar bõx.

<sup>22</sup> Jeju ar akãx nhikjêkam bõx nhyam arým ar'ã akati. Nhyam kam amũ akãx nhikjêbê me te ar õ kã jabej. Me krãptĩ kute amũja'ã djwý krẽnja ne te ar õ kã jabej ne abenmã kum,

—Be, amũja'ã kã pydjibit nõ nhyam ar o mõ. Kôt ba djwýnhbit

mã o mõ nhyam Jeju arkõt kãkam ýr kêt. Nãm me krãptĩ te ar õ kã jabejn kam ã abenmã ane.

<sup>23-24</sup> Ne kam me kute Jeju ar omũnh kêtkaam arým ar'ýr mõ. Me kã kwýkam wadjãn akãx nhikjêmã Kapana'ýr nox ne mõ. Be, nhýnh kã ja'õkam ne me mõ? Bir, krĩraxbê Xiberijkam kã 'õkam ne me mõ. Xiberijkam kã kwý arým me ku'ê djã'ãnh mõ. Bẽnjadjwýr djwýnh kute Metĩndjwýnhmã amikĩnh jarẽn nhyam me kute djwý krẽn djã'ãnh ne arým kã mõ. Kã kwý jamã ne me wadjãn amũ kôt mõ. Me kute Jeju jabej kadjy ne me Kapana'ýr mõ.

*Kute amijã djwý jakren 'ã ujarẽn.*

<sup>25</sup> 'Ýr mõ:n kam imõti nhikjêmã bõx. Bõx ne abej ne arým kum kato. Jejumã katon arým kum,

—Ujarẽn djwýnh, tõ nhýnh ne myt nhý ga jakam bõx? ane.

<sup>26</sup> Nhyam memã kum,

—Be, mýkam ne ga me ijabej mõ? Djãm amũja'ã ije mýjja pumũnh kêt kwý nhipêx ga me aje omũnhkam? Djãm arým me aje kôt iraxmã akatorkam? Djãm me aje ajte irax marmã ne ga me ijabej mõ? Arkati. Be, me ajajnekam. Me aje djwý krẽn ne me ajajnekam ne ga me ijabej mõ. Mrãmri ne ba me amã ja jarẽnhkumrêx.

<sup>27</sup> Kwãrĩk wãnh djwýkõtbit ajamak bẽn kêt. Tãm dja akuno. Nhyam be, atemã mýjja kute djwý pyrãk. Jakõt dja ga me ajamak bẽn. Tãm ne mex rã'ã nhyam õ'ã me Metĩndjwýnhkõt tĩn ne ar ba rã'ã: rã'ã ne. Ba ije amijo inhĩ dja ba me amã kungã ga me atĩn ne ar aba rã'ã: rã'ã ne. Bir, Ibãm kute imã 'ã karõ. Kabẽnkõt dja ba me amã kungã. Kãjkwakam Ibãm, Metĩndjwýnh ta ne mrãmri kute 'ã imã karõ mãmdji, ane.

<sup>28</sup> Nhyam me kum,

—Be, mỳj dja ba me Metĩndjwỳnhmã me aje tu amim imarkumrẽx got? idjapẽnh o nhy m arỳm kum me ikĩnh? ane.

<sup>29</sup> Nhy m,

—Metĩndjwỳnh ne ijano ba tẽ. Kõt dja ga tu amim imarkumrẽx. Kum adjapẽnh ne ja. Dja ga me ã ane nhy m arỳm kum me akĩnh, ane.

<sup>30</sup> Nhy m me kum,

—Goja mỳjja pumũnh kêt'õ nhípẽx ba me omũ. Ba me ije araxmã ikator kadjy omũn kam goja tu amim amarkumrẽx. <sup>31</sup> Be, me bakukãmãre ne me kapõt kukritkam djwỳbẽ mỳj ne ja krẽ. Me bakukãmãre ne me 'ã pi'òk no'òk ne kamã memã kum, “Me kute krẽn kadjy ne memã kàjkwa kurũm djwỳ ngã”, ane.

Goja kudjwa ã me imã o ane ba me omũ, ane.

<sup>32-33</sup> Nhy m amijã djwỳkumrẽx jakren memã kum,

—Be, Mõjdjẽ kute me akukãmãremã kàjkwa kurũm djwỳ nhõr kêt. Nhy m be, Ibãm kute me amã kàjkwa kurũm atemã djwỳkumrẽx nhõr. Me'õ ne arỳm kàjkwa kurũm ruw ne kute me kunĩmã tĩn jangjẽnh. Kute memã tĩn jangjẽnh nhy m me tĩn ne ar ba rã'ã: rã'ã ne. 'Ã ne ije me amã,

—Metĩndjwỳnh kute me amã atemã djwỳkumrẽx nhõr, anhỹr. Mrãmri ne ba me amã ja jarẽnhkumrẽx. Nãm Jeju ã memã ane.

<sup>34</sup> Nhy m me kum,

—Bẽnjadjwỳr djwỳnh, goja mã me imã djwỳ ja nhõro nhỹ, ane.

<sup>35</sup> Nhy m Jeju memã kum,

—E kum, ba. Ba ne ba ije atemã djwỳ pyrãk. Ba ne ba ije memã tĩn jangjẽnh nhy m me tĩn ne ar ba rã'ã: rã'ã ne. Dja me mã ikõt ajkamẽn arỳm kĩnhkumrẽx rã'ã kute mrãmri ne me arỳm kum prãm kêtam kĩnh pyrãk. Dja me tu amim imarkumrẽx ne arỳm kĩnhkumrẽx rã'ã kute mrãmri ne me arỳm kum kôr kêtam kĩnh pyrãk. <sup>36</sup> Be, djãm

Kati. Ba ne ba arỳm me amã, “Nã gãm me te ipumũn amim imar kêt”, ane.

<sup>37</sup> Be, Ibãm kute ikadjy memã amak bõnhja kunĩ dja me tu amim imarkumrẽx ne arỳm mã ikõt ajkamẽ. Ba kam me'õ kanga kêtumrẽx. <sup>38</sup> Mỳkam dja ba me'õ kanga kêtumrẽx? Bir, Ibãm kute me'ã imã karõ kõt dja ba me'õ kanga kêt. Be, djãm ba ije amijã amim karõ kõt ne ba kàjkwa kurũm ruw ne ar iba? Kati. Ibãm kute ijanor djwỳnh kabẽn kõt ne ba ruw ne ar iba.

<sup>39</sup> Ibãm kute ijanor djwỳnh ta ne ijã amim karõn amim, “Be, ije kadjy memã amak bõnhja dja ikra mã meo ban 'õo biknor kêt nhy m me akubyn tĩn ne. Pykakam me kunĩ kute aminhinomã amimẽn djã nhõ akatikam dja ikra akubyn õ me jao tĩn”, ane. <sup>40</sup> Ibãm kute ijanor djwỳnh ajte ijã amim karõn amim, “Me kute ikra pumũnh ne tu amim markumrẽxja dja me kunĩ ikõt tĩn ne ar ba rã'ã: rã'ã ne”, ane. Ibãm kute ijã amim karõ ne ja. Pykakam me kunĩ kute aminhinomã amimẽn djã nhõ akatikam dja ba akubyn inhõ me jao tĩn, ane.

<sup>41</sup> Nhy m kam mebẽ idjaer rũnh arỳm kãxã kabẽn kumex ne arẽ. Kute memã, “Ba ibẽ kàjkwa kurũm djwỳ”, anhỹrkam ne me kabẽn kumex jarẽ. <sup>42</sup> Ne abenmã kum,

—Be, djãm kubẽ Metĩndjwỳnh Kra got? Kati. Jõdje ne kudji. Idjibẽ ne Jeju. Ba me ije nãmẽ bãm pumũnh tũm. Nhy m amijo 'ẽx ne gwaj bamã,

—Kàjkwa kurũm ne ba ruw, anhỹro ba. Kati:. Nãm 'ẽx. Nãm me ã abenmã ane.

<sup>43</sup> Nhy m Jeju me kabẽn man memã kum,

—Kwãrĩk wãnh ikãxã akabẽn kumex ne arẽn kêt. <sup>44</sup> Be, djãm me ga dja ga me ikõt ajkamẽ? Kati. Ibãm kute ijanor djwỳnh kute memã amak bõnhkambit ne me mã

ikôt ajkamê. Mã ikôt ajkamê ba arým akubyn meo tîn. Pykakam me kunĩ kute aminhinomã amimênh djã nhõ akatikam dja ba akubyn meo tîn.

<sup>45</sup> Amrêbê: ne me bakukãmãre Metĩndjwýnh kukwakam kabên jarên memã kum,

“Metĩndjwýnh ta dja memã amik-abên jarê nhyr me arým kabên markumrêx”, ane.

Be, me bakukãmãre kute memã anhÿr ne 'ã pi'ók no'ók kôt mÿj xê dja mã ikôt ajkamê? Bir, Ibãm kute memã kabên jarênh nhyr me arým kute kabên markumrêx. Me kute mÿjja'ã kute kabên jarênhja markumrêx. Me ja dja me mã ikôt amijo bikamênhkumrêx. Nãm ã Jeju memã ane.

<sup>46</sup> Ne kam ajte memã kum,

—Be, djãm me'õ ne arým Ibãm pumũ got? Kati. Bajbit ne ba arým kãjkwakam Metĩndjwýnh pumũn arým kurũm tên bõx. Bajbit ne ba arým Ibãm pumũ. <sup>47</sup> Me kute tu amim imarkumrêx arým Metĩndjwýnhkôt tîn ne ar ba rã'ã rã'ã ne. Mrãmri ne ba me amã ja jarênhkumrêx. <sup>48</sup> Ba ne ba ije atemã djwý pyrãk. Ba ne ba memã tîn jangij nhyr me Metĩndjwýnhkôt tîn ne ar ba rã'ã rã'ã ne.

<sup>49</sup> Be, me bakukãmãre ne me kapôt kukritkam djwýbê mÿj ne ja ku nhyr mebêngêt tũmrãm me kupa. <sup>50</sup> Ije me amã atemã djwý jarênhja ne kubê kãjka kurũm djwý. Dja me kukun tyk kêt. <sup>51</sup> Ba ne ba ije atemã djwý pyrãk. Ba ne ba memã tîn jangij. Dja me djwý ja krên Metĩndjwýnhkôt tîn ne ar ba rã'ã: rã'ã ne. Djwý ije memã õrja ne kubê inhĩ. Me kunĩ tîn kadjy dja ba memã kungã, ane.

<sup>52</sup> Nhyr kam mebê idjaer rũnh arým kabêno aben japan abenmã kum,

—Je tô, mÿj dja memã aminhĩ nhõr on nhyr me ajmã krênja on? ane.

<sup>53</sup> Be, djãm mrãmri ne me kute ikumrêx krênmã? Kati. Atemã. Be, mrãmri me kute tu amim Jeju markumrêxo bamã. 'Ã ne Jeju me kute ĩ krên jakren 'ã me kute kamrõo kôm jakre. 'Ã ne memã kum,

—Be, ba ije amijo inhĩ dja ga me inhĩ krên kêt ne ikamrõo akôm kêt ne kam atĩnkumrêx prãm kêt. Mrãmri ne ba me amã ja jarênhkumrêx. <sup>54</sup> Me kute inhĩ krên ne ikamrõo kôm ne me mrãmri Metĩndjwýnhkôt tîn ne ar ba rã'ã: rã'ã ne. Pykakam me kunĩ kute aminhinomã amimênh djã nhõ akatikam dja ba akubyn meo tîn. <sup>55</sup> Mrãmri ne inhĩbê djwý ne ikamrõbê me kôm djã. <sup>56</sup> Me kute inhĩ kur ne ikamrõo kômja, me jamê ne ba me ije aben mar tÿx ne ije aben jamÿnh tÿx ne abenã idjukanga kêt ne ar abeno iba. <sup>57</sup> Mrãmri Ibãm tĩnkumrêx ne ijano ba tẽ. Kam ne ba Ibãm tîn o itĩnkumrêx. Nhyr me kute inhĩ kurdjwý dja me ba itĩn jao tĩnkumrêx.

<sup>58</sup> Ije amã atemã djwý jarênh ja ne kãjka kurũm ruw. Djãm kute djwýbê mÿj ne ja pyrãk? Kati. Nãm me te mÿj ne ja ku nhyr mebêngêt arým me kupa. Nhyr be, ate dja me atemã djwý ja kun arým Metĩndjwýnhkôt tîn ne ar ba rã'ã: rã'ã ne. Nãm ã Jeju memã ane.

<sup>59</sup> Mebê idjaer bikprõnh djãkam ne Jeju memã ja jarê. Kapanakam me bikprõnh djãkam. <sup>60</sup> Kute memã aminhĩ'ã djwý jarênh ne memã 'ã ujarênhkam ne me kôt baja krãptĩ arým amim,

—Je, djãm me ije kabên wã mar got? ane.

*Me krãptĩ kute Jeju kanga.*

<sup>61</sup> Nhyr Jeju ta arým me kuman memã kum,

—Ba arým me amã atemã djwý jarê ga me aje amim imar kêt ne arým apijãm ne. <sup>62</sup> Dja ba ĩ ikrĩ djã tũmmã wabi ga me idjãbirkôt

ipumũ. Mỳj dja ga me arỳm kam nē? <sup>63</sup> Be, atemã kàjkwakam ikabēn kukràdjà ne ba me amã arē. Metĩndjwỳnh Karõ kute meo bakambit ne me kute ikabēn mar. Me ga ne ga me aje amidjwỳnho kĩnh prãm. Kam me aje imar kêt-kumrēx. Nã bãm me amã ikabēn jarē, me amã Metĩndjwỳnh Karõ jarē. Tãm ne kute meo ban memã tĩn jangij nhyem me Metĩndjwỳnhkõt tĩn ne ar ba rã'ã: rã'ã ne.

<sup>64</sup> Be, djãm me akunĩ ne ga me aje tu amim imarkumrēx? Kati. Me akwỳ ne ga me aje amim imar kêt, ane. Nãm Jeju ã memã ane. Be, mỳj ne me mar on kam ã memã ane? Bir, amrēbē mỳjja kunĩ kētri ne Jeju kute amikukãm me mar. Apỳnh me ĩ djari kute amim mar kēlja arỳm kute me mar. Djudadjwỳ dja ĩ kurē djwỳnhmã Jeju kanga. Nhyem arỳm kute adjwỳnhdjwỳ mar. Kukãm kute mar. <sup>65</sup> Ne kam memã kum,

—Me akwỳ ne ga me aje amim imar kêt. Ba kam arỳm me amã, “Djãm me ga dja ga me ikõt ajkamē? Kati. Ibãm kute memã amak bõnhkambit dja me mã ikõt ajkamē.” Nãm ã Jeju memã ane.

<sup>66</sup> Nhyem kam me kõt baja krãptĩ arỳm kubē amijo akēx ne ajte kõt ba kêt.

<sup>67</sup> Nhyem kam Jeju kute ar anorjabē 12mã kum,

—Djãm ar gadjwỳ dja gar ikanga? ane. <sup>68</sup> Nhyem ar 'õbē Ximão Pedru kum,

—Kati. Bēnjadjwỳr djwỳnh, mỳj me'õkõt dja bar ar iba? Arkati. Gajbit ne ga akabēno meo tĩn ne 'ã ar imã adjujarēnh ar aba. Metĩndjwỳnhkõt me tĩn ne ar ba rã'ã: rã'ãja'ã ar imã adjujarēnh ar aba. <sup>69</sup> Ar ba ne bar tu amim amarkumrēx. Mrãmri abē me inhõ Bēnjadjwỳrbē kumkatibē Kritu. Mrãmri abē Metĩndjwỳnh Kra. Metĩndjwỳnh tĩnkumrēx Kra. Ar ba ne bar tu amim amarkumrēx.

<sup>70</sup> Nhyem Jeju arkum,

—Be, mrãmri ne ba amijo ar apytarkumrēx. Ije ar ajanorbē 12 ne ba amijo ar apytarkumrēx. Be, djãm ar akunĩ ne gar amex? Kati. Ar ajõ apydji ne abē Xatanaj nhõ àpēnh, ane. <sup>71</sup> Djuda'ã ne kabēn. Djuda Ikadji. Ximão 'õdjwỳ kute irja. Dja ĩ kurē djwỳnhmã Jeju kanga. Kute ar anorjabē 12'õ ja dja kanga.

## 7

*Djeruxarēkam me krãptĩmã 'ã ujarēnh.*

<sup>1</sup> Jeju memã anen kam arek Garrējakambit ar ba. Be, mỳkam ne Djudējakam arek ar ba kêt? Bir, mebē idjaer kute kam bĩnmã ar abej bakam. <sup>2</sup> Nhyem kam arỳm Djeruxarēkam mebē idjaer krãptĩ kute aben pydji djã nhõ akati 'ỳr. Me kute aben kajmã'ã me bakukãmãre kukràdjà mar kadjy bõ mjỳrkam krĩ djã nhõ akati 'ỳr.

<sup>3</sup> Nhyem kam Jeju kamy ar axikõt apõxja kum,

—E kum, goja amũ pykabē Djudēja'ỳr tē. Dja wãkam akõt me ba djwỳnh adjapēnh kõt apumũ.

<sup>4</sup> Djãm me'õ kute me kunĩmã amiraxo amirĩt prãm kam kute mebē amijo bipdjur prãm got? Aje mrãmri mỳjja pumũnh kêt nhípēx jabej goja pyka kunĩkõt me kunĩmã amijo amirĩt, ane. <sup>5</sup> Be, nãm ar te Jejumē axikõt apõx ne amim mar kêt. Kam ne ar ã kum ane.

<sup>6</sup> Nhyem Jeju arỳm arkum,

—Je djãm kraxje me kute ijo tỳm djã nhõ akati iwỳr bõx kêtjakam gar kam imã arē? Kati. Ar gajbit akati kunĩkõt ar adjumar mex rã'ã.

<sup>7</sup> Nhỳnh ne pykakam me axwe 'õ kum akurēmã? Arkati. Nhyem be, ba, me kum ikurēkumrēx. Ije me axwe'ã memã idjujarēnh ar ibakam me kum ikurēkumrēx. <sup>8</sup> Ar gajbit dja gar Djeruxarēkam me krãptĩ kute aben pydji djã'ỳr mō. Inhõ akati iwỳr bõx kêt rã'ãkam 'ỳr

itëm prãm kêt. <sup>9</sup> Nãm arkum anen arek Garrêjakam ar ba.

<sup>10</sup> Nhyam kam kamy ar arým tẽ. Nhyam ar ba:n kam amipdjun arým me kute aben pydji djà'ÿr tẽ. 'ÿr tẽ:n arým 'ÿr bôx. <sup>11</sup> Nhyam arým 'ã me kute aben pydji djà nhõ akati bôx nhyam mebê idjaer rûnh arým abej ne memã kum, “Nhÿnh ne Jeju dja”? ane. Nhyam me “Kon”, ane.

<sup>12</sup> Nhyam me me kàxã abenmã Jeju jarênhõ kumex. Me kwÿ ne me abenmã kum, “Kati. Jeju mexkumrêx”, ane.

Nhyam me kwÿ arík abenmã kum,

—Kati. Nãm Jeju amijo 'êx ne me noo biknoro ba, ane. <sup>13</sup> Nhyam be, nãm me me ipôkri memã Jeju'ã ujarênhõ amirît kêt ne. Mebê idjaer rûnh pymaje ne me me ipôkri 'ã ujarênhõ amirît kêt ne.

<sup>14</sup> Nhyam kam arým me kute aben pydji djà nhõ akati nhõkre djà kôt Jeju arým Metîndjwÿnh nhõ kikreti'ÿr tẽn wadjàn kam arým memã kukràdjà jarênhõ dja. <sup>15</sup> Nhyam kam mebê idjaer rûnh te kute Jeju marmã kam no tyn kumex ne abenmã kum,

—Je tô djãm tãmwã kute mekôt pi'òk jarênh tùm got ã me kukràdjà jarênh mexo ane?

<sup>16</sup> Nhyam Jeju memã kum,

—Djãm ba ikukràdjà ne ba me amã arênhõ iba? Kati. Kute ijanor djwÿnh kukràdjà ne ba me amã arênhõ iba. <sup>17</sup> Gêdja ga me ajõ ga aje kukràdjà kôt amijo aba prãm jabej arým ama. Me'õ kute ikukràdjà jarênhmo krax djwÿnhja dja ga me ama. Djãm ba ne ba ije me amã ikukràdjà jarênhmo krax djwÿnh? Kati. Kàjkwakam Metîndjwÿnh ne kute arênhmo krax ba kam kôt me amã arê. Ja dja ga me ama. Me aje kukràdjà kôt amijo aba prãm jabej ama. <sup>18</sup> Ne ga ren me ajõ ga amirax jabej ne ren 'ã memã amijarên memã amijo adjãmra ar aba. Nhyam be, kati. Kute ijanor djwÿnh ne ba

ije rax jarênh. Ije ajbit rax jarênh ne kam katát ije ikabên jarênhkumrêx ne ijêxnhí kêtumrêx.

<sup>19</sup> Me bakukãmãre Mõjdjê kute me amã Metîndjwÿnh kukràdjà jarênhja djà ne ga me kôt ar amijo aba? Kati. Ga me ajõ aje kukràdjà kôt ar amijo aba kêt. Ne kam aje ibînmã ijabej ar aba. Mÿkam? ane.

<sup>20</sup> Nhyam me kum,

—Je tô nhÿnh me'õja ne kute abînmã ajabej ar ba? Be, me karõ punu'õ ne ajo ba, ane.

<sup>21</sup> Nhyam Jeju arým memã kum,

—Be, ba amrêbê me'õ punu pydjio mex ga me te aje mÿjja marmã ikam ano tyn akumex. <sup>22-23</sup> Nã bãm pi'òk ràràrkam me'õo mex ga me arík ijã abenmã kum,

—Pi'òk ràràrkam ne apê. Axwekumrêx, anhÿro aban arým ikam angryk ne. Djãm bajbit ne ba kam idjapênh iba ga me bajbit imã ijaxwe jarê? Kati. Me gadjwÿ ne ga me pi'òk ràràrkam adjapênh aba. Mõjdjê ne me amã me my nhinhu kã rênho jarê. Djãm ta ne kumrêx arê? Kati. Me bakukãmãre Abraão ar kumrêx ne ar arê. Ga me kam aje katát Mõjdjê kukràdjà kôt amijo aba kadjy pi'òk ràràrkam adjapênh ne me my kã rênho aba. Mÿkam ne ga me bajbit imã ijaxwe jarê? Ije kam prîne me'õ punuo mexkam imã ijaxwe jarê. Ga me ren imã ijaxwe jarênh kêt. <sup>24</sup> Kwârík wãnh ga me arík me axwe kêt'ã axwe janhôr kêt. Dja ga me mrãmri me axwekumrêxkôt memã ajapôxkumrêx ne kam arým katát memã axwe jarênhkumrêx. Nãm ã Jeju memã ane.

*Mebê idjaer kum kurê.*

<sup>25</sup> Nhyam kam Djeruxarêkam me ar ba tùm kwÿ Jeju jabej aben kukij ne abenmã kum,

—Je, djãm mrãmri me kute tãmwã bînmã ar abej ba? <sup>26</sup> Nhyam kam kum me uma kêt ne memã kabên ne. Nhyam me arým kutã kute kum mÿjja'õ jarênh prãm

kêtkumrêx. Bārām me rūnh arým kute tām wā'ā amim, “Jejubê ne me banhō Bēnjadjwýrbê kumkatibê Kritu”, anhýrkam ne me anihkrên kabên maro dja. <sup>27</sup> Tô nhýnh? Be, kati. Djām me kute kraxkôt Bēnjadjwýrbê kumkatibê Kritu mar got? Kati. Me kute kraxkôt mar kêtkumrêx. Nhy m be, bām kute Jeju djir ne gu me baje arým omũnh. Kôt ne gu me arým Jeju 'êxnhĩmā bakato. Nām me kwý ā Jeju'ā abenmā ane.

<sup>28</sup> Nhy m kam Jeju kute Metĩndjwýnh nhō kikretikam memā kukràdjā jarēnhō āmkam kāj bē memā kum,

—Be, mrāmri ne ga me aje imar. Nhýnhja kurũm ne ba itēm ne ibōx ja ne ga me arým aje mar. Djām ba ne ba amikabên kôt amrē tē? Kati. Me'ō kute ijanor djwýnh ne mrāmri. Tām wā ne ga me aje mar kêt. <sup>29</sup> Nhy m be, ba ne ba ije omũnh tũm. Tām ne ijano ba amrē kurũm tēn bōx, ane.

<sup>30</sup> Nhy m kam me bit kute o tỹm ne pa 'amýnhmā. Ne te: o ane. Me kute o tỹm'ā myt bōx kêt rā'ākam ne me te: o ane. <sup>31</sup> Nhy m me kwý krāptĩ arým tu amim markumrêx ne abenmā kum,

—Me baje raxmā bakator kadjy ne Jeju arým mýjja pumũnh kêt krāptĩ nhípêx ne. Me puno krāptĩo mex. Djām me'ōdjwý bōx ne kute àpēnh mexo kute akrenh got? Kati. Be, mrāmri tām wābê ne me banhō Bēnjadjwýrbê kumkatibê Kritukumrêx, ane.

<sup>32</sup> Me rūnh kàxā ne me ā abenmā anhýro ku'ê nhy m mebê pardjêumê me kadjy Metĩndjwýnh mar djwýnh nhō bēnjadjwýr arým me kuma. Me kuman arým Jeju'ýr me krākamngōnh kwý jano. Me kute pa 'amýnhmā ne me me ano.

<sup>33</sup> Nhy m kam Jeju arým memā kum,

—Be, me aro'ā ar iba ne arým 'ā akati ngrêre. Dja ba kam arým kute

ijanor djwýnh'ýr tē. <sup>34</sup> Ga me kam arým te ijabej. Te ijabej ne imā akator kêt. Ne kam ikrĩ djā'ýr te abōx prāmje, ane.

<sup>35</sup> Nhy m mebê idjaer rūnh abenmā kum,

—Je tô, jām dja tē gu me kum bakator kêt. Djām apýnh me bajtem ba djākam me bimàn h tũm'ýr ne tēmmā? Djām kam kute me bajtemmā kukràdjā jarēnhmā? <sup>36</sup> Kute me bamā, “Dja ba tē ga me arým te ijabej. Te ijabej ne imā akator kêt. Ne kam ikrĩ djā'ýr te abōx prāmje”, anhýr. Mýj gēdja kam nē? ane.

<sup>37</sup> Nhy m kam me kute amikukràdjā kôt amijo mōr ne kute 'ā aminhinomā amimēnh nhō akati arým bōx. Akati raxja bōx. Me kukāmāre kukràdjā kôt me kute bō mýrkam krĩ'ā aminhinomā amimēnh kadjy akati ne arým bōx. Nhy m Jeju arým kāj mā djan memā kum,

—Me ajō ar amā kōr jabej amrē iwýr tēn ikō. <sup>38</sup> Me kute tu amim imarkumrêxja gēdja ĩ me kadjwýnhbê ngō kute meo tĩnja mā mekam apōx. Me bakukāmāre kute pi'ōkkam memā arēnh kôt ne ba ar amā arē.

<sup>39</sup> Nām Jeju Metĩndjwýnh Karō'ā ā memā ane. Dja me tu amim Jeju markumrêx nhy m Metĩndjwýnh Karō arým me'ýr bōx ne meo ba. Djām arým ne meo ba? Kati. Metĩndjwýnh kute memā Karō janor djwýnh rām ne Jeju memā ane. Dja Metĩndjwýnh amiwýr Jejuo wabin akubyn o rax. Ne kambit arým memā Karō jano nhy m bōx ne meo ba.

<sup>40</sup> Jeju memā ane nhy m me krāptĩ kute kabēnja markam 'ā abenmā kum,

—Be, mrāmri ne tām wābê Metĩndjwýnh kukwakam kabēn jarēnh djwýnh. Me bakukāmāre ne me amrêbê: arē, ane.



41 Nhyr me kwý Jeju'ã abenmã kum,

—Be, tãmwã ne mrãmri kubê Kritukumrêx. Mrãmri kubê me banhô Bënjadjwýrbê kumkatibê Kritukumrêx, ane.

Nhyr me kwý arík 'ã abenmã kum,

—Be kati. Jejubê ne Bënjadjwýrbê kumkatibê Kritu kêt. Abatãnh djã ne pykabê Garrêja. 42 Nhyr be, me banhô Bënjadjwýrbê kumkatibê Kritukumrêx krîbê Berêkam abatãnh. Kubê ne me bakukãmãre Dawi tãmdjwý. Bënjadjwýr rax Dawi jabatãnh djãkam ne Kritu abatãnh djã. Amrêbê: ne me bakukãmãre pi'òkkam arê. Nhyr be, kati. Djãm Jejubê Bënjadjwýrbê kumkatibê Kritu got? Jeju ate Garrêjakam abatãnh, ane. 43 Me kute 'ã abenmã anhýrkam me Jeju'ã axikôt kabên jadjwýr kêt. 44 Nhyr me ja kwý bit kute o tým ne pa 'amýnhmã. Ne kam te: kute o anhýrmã.

45 Nhyr kam me krãkamngôn timeri nêje ku'êja me rûnh'ýr akêx ne me'ýr bôx. Metîndjwýnh mar djwýnh nhô bënjadjwýrmê mebê pardjêu'ýr bôx. Nhyr kam me rûnh me krãkamngôn timeri kum,

—Je tô mykam ne ga me Jejuo abôx kêt? ane.

46 Nhyr me krãkamngôn timeri memã kum,

—Djãm me'ô pykakam kabên mexo kute tãmwã pyrãk? Kati. Nãm prîne kabên mexo kute katãt me kunî jakrenh. Ba me kam te ije o itým ne pa 'amýnhmã, ane.

47 Nhyr mebê pardjêu memã kum,

—Je tô djãm arým ne me gadjwý me anoo akno? 48 Ê, ba me amã arê. Djãm me irax'ô, nãr me ibê pardjêu'ô ije amim tãmwã mar got? Kati. 49 Be, djãm me kãtãmwã kute Môjdjê kukrãdjã mar got? Me kute me bakukãmãre kukrãdjã mar kêt kam dja Metîndjwýnh arým me kanga, ane.

50 Nhyr Nikodemu. Tãm ne akamãtkam Jeju'ýr tẽ. Kubê ne mebê pardjêu'ô. Nãm arým memã kum,

51 —Je gêdja gwãm kraxje me baje axwe jabej me kujjêr kêt kam memã axwe jarê? Kati. Be, Jeju kute kraxje me bamã amijarênh kêt kam gu me arým 'ã axwe nhôro nhý, me bakukrãdjã kupa'ã ne gu me 'ã nhôro nhý, ane.

52 Nhyr me arík kum,

—Djãm gadjwý pykabê Garrêjakam ajabatãnh djã ne ga nêje akabêno dja? Be, pi'òkkam ne Metîndjwýnh kukwakam kabên jarênh djwýnh'ô Garrêjakam abatãnh kêt kumrêx. Dja ga amim pi'ok jarên arým kôt ikabên kumrêxmã akato. Jejubê Bënjadjwýrbê kumkati kêt. Tãm dja ga pi'ok jarên ama, ane.

53 Nhyr kam me kunî ajmãn aminhûrkãmã apêx.

## 8

*Me'ô nire kute me'ôbê mjêno akînh.*

<sup>1</sup> Jeju arým krãnhbê Oriwêre 'ýr tẽ. Tẽ:n arým 'ýr bôx nhyr 'ã akamãt nhyr nô. Nô: nhyr arým ôkrên'ãnh kã. <sup>2</sup> Nhyr kam Metîndjwýnh nhô timeri 'ýr tãn kam bôx. Nhyr kam me kunî ajte 'ýr bôx nhyr arým nhý. Nhýn arým memã kukrãdjã jarênho nhý.

<sup>3</sup> Nhyr kam me arým Jeju'ýr me 'ô nireo bôx ne me ipôkri kudja. Arým ne mjên ne kam ajte me'ôbê mjêno akînh ar ro'ã nô. Nhyr me arým omûn o tým ne pa 'amýn Jeju'ýr o bôx. <sup>4</sup> Ne kum,

—Ê, ujarênh djwýnh. Be, me'ô nire ja arým mjên ne arým me'ô myo akînh ar ro'ã nô. Ba me ar nôrkôt ar omûn aro tým ne arým awýr o bôx. <sup>5</sup> Be, me ja jaxwe pãnh ne Môjdjê arým memã arê. Kute me bakukrãdjã jarênh kam Môjdjê arým 'ã memã kum,

—Ga me axwe pãnh këno titik ne abĩ gê ty, ane. Be, gadjwý ar imã axwe pãnh'õ jarê bar kuma. Mýj gêdja bar on? Nãm me ã Jejumã ane.

<sup>6</sup> Mýj kadjy ne me kum ane? Bir, godja kukràdjã kupa'ã mýjja jarênh jabej nhym me arým kôt kum axwe jarê. Ja kadjy ne me kum ane.

Nhym Jeju ate idjao nhÿn arek ikrao pyka no'òko nhÿ. <sup>7</sup> Nhym me mã kum tãmja jarê nhym arek pyka no'òko nhÿ. Nhym kam kãjmã djan memã kum,

—Goja me ajõ apydji ajaxwe kêt kumrêx jabej ga akumrêx kën'õ byn o titik ne abĩ, ane. <sup>8</sup> Nãm anen ajte nhÿ, pyka no'òko nhÿ.

<sup>9</sup> Nhym me arým amima:ro djan amijaxwedjwý ma. Ne kam arým pijãm ne mã apõxo dja. Me abatãnhja kumrêx ne me kato. Nhym mekôt me abatãnh nydjwý apõxo dja. Nhym ajbir abatãnh nyre meo ino ren kato. Arým ne me kunĩ apêx. Nhym kam Jeju arým ate nhÿ nhym niredjwý arým ate dja. <sup>10</sup> Nhym kãjmã djan nire ate ãmkôt omũn kum,

—Me'õ nire, nhÿnh ne me kute amã ajaxwe jarênhja ku'ê? Djãm me'õ kute ajaxwe pãnh këno atitik prãm kêt kumrêx? ane. <sup>11</sup> Nhym kum,

—Ã bënjadjwýr. Me'õ kute pãnh ititik prãm kêt, ane.

Nhym kum,

—Badjwý. Ajaxwe pãnh ije këno atitik prãm kêt. Aj mã. Kwãrĩk wãnh ga ajte ajaxwe kêt, ane.

*Kute katàt memã amijarênh.*

*Dju r 1.4; Rô 13.12; Ep 5.8; Tex k 5.5*

<sup>12</sup> Nhym kam Jeju ajte memã kum,

—Be, apÿnh me ba djã kunĩkôt me axwe kunĩ katàt kute amijo ba kadjy ne ije mrãmri ne memã pry kurwý djã pyrãk. Ga, me kurwý djã kute akamãtkam memã pry kurwý nhym me kute akamãtkam

mýjja kunĩ pumũnh ne katàt baja pumũ. Badjwý dja me tu amim imarkumrêx ne arým katàt amijo ba. Ga, akamãt kô tykkam me kute mýjja pumũnh kêt ne ba punuja pumũ. Me axwedjwý ne me kute mýjja mar kêt ne amijo ba punu. Djãm me kute tu amim imarkam axwe ne amijo ba punu? Kati. Ba ije mrãmri ne memã pry kurwý djã pyrãk. Dja me tu amim imarkumrêx ne arým katàt amijo ban kam arým ikôt tĩn ne ar ba rã'ã: rã'ã ne, ane.

<sup>13</sup> Nhym me bẽ pardjêu kum,

—Je, djã nãm me'õ akôt kabên dji? Kati. Ga apydji aje memã amijarênhõ aba nhym me'õ kute akôt kabên djir kêt. Ba me kam arým amã akabên kajgo jarê. Akabên kajgo nhym me kute amar kêt, ane.

<sup>14</sup> Nhym memã kum,

—Kati. Ipydji ije memã amijarênhkam ije memã amijarênh kajgo kêt. Kãkwakam Metĩndjwýnh ne ijano ba amrê kabên kôt tẽ. Be, 'ÿr dja ba akubyn tẽ. Ja ne ije markumrêx. Kam ikabên kajgo kêt. Nhym be, me ga ne ga me aje imar kêt. Nhÿnhja kurũm ne ba itẽmja ne ga me aje mar kêt. Nhĩ'ãm itẽmdjwý ga me aje mar kêt.

<sup>15</sup> Me ga ne ga me aje amidjwýnhõ kĩnh prãm ne aje memã axwe jarênhõ aba. Djãm ba ne ba ije amidjwýnhõ kĩnh prãm ne memã axwe jarênh got? Kati. <sup>16</sup> Godja ba memã axwe jarênh jabej arým katàt memã arênhkumrêx. Djãm ipydji dja ba arê? Kati. Ibãm kute ijanor djwýnhmẽ dja bar axikôt ikabên ne memã axwe jarê. Kam ne ije katàt memã axwe jarênhkumrêx. <sup>17</sup> Nhym be, amrêbê: me bakukãmãre kute me akukràdjã'ã pi'òk no'òkdjwý. Me akukràdjã kôt ba ije Ibãmmẽ axikôt memã amijarênhõ iba. Me akukràdjã jakam me'õ ar amãnhkrut ne kute me omũnhkôt kute axikôt me arênh nhym me

kunĩ kute mar ne kute memã kum, “Mrãmri katåt ar kute me arẽnhkumrẽx”, anhỹrmã. Ja ne ga me arỹm aje mar.

<sup>18</sup> Be, ja kõt ne ba Ibãmmẽ ã me amã amijarẽho ane. Ba ije me amã amijarẽnh. Nhyim Ibãm kute ijanor djwỹnh ikõt kute me amã ijarẽnh. Ba Ibãmmẽ ar ije axikõt me amã amijarẽnhkam ne ga me ren me akukràdjã kõt ijã, “Mrãmri ne katåt kute memã amijarẽnhkumrẽx”, ane. Ba Ibãmmẽ ar ije axikõt me amã amijarẽnhkam dja ga me ar ikabẽn katåtjamã akaton ama. Me akukràdjã'ã pi'òk no'òk kõt dja ga me ima, ane.

<sup>19</sup> Nãm ã Jeju memã ane nhyim me arỹm kum,

—Tò nhỹnh ne abãmja? ane.

Nhyim memã kum,

—Me aje imar kêt ne aje Ibãmdjwỹ mar kêt. Ne ga me ren iman ren Ibãmdjwỹ ma. Nhyim be, kati. Aje mar kêt, ane. <sup>20</sup> Be, Metĩndjwỹnh nhõ kikretikam me kute Metĩndjwỹnhmã pi'òk kaprĩo atom djakam ne Jeju ã memã ane. Nhyim me'õ kute o tỹm ne pa 'amỹnh kêtumrẽx. Pa 'amỹnh'ã myt bõx kêt rã'akam.

<sup>21</sup> Nhyim kam ajte memã kum,

—Dja ba ã mã tẽ ga me arỹm te ijabej. Te ijabej ne kam arỹm ty. Nhyim kam Metĩndjwỹnh me amã ajaxwe jarẽnh rã'ã. Mũm itẽmmã 'yr ikrãja dja ga me te ikõt 'yr atẽm ne 'yr abõx prãmje, ane.

<sup>22</sup> Nhyim mebê idjaer rũnh abenmã kum,

—Je tò mỳj dja nẽ? Birãm, dja amibĩ. Nãm me ã abenmã ane. Kute memã kum,

—Dja ba ã mã tẽ ga me arỹm te ijabej, anhỹrkam ne me ã abenmã ane.

<sup>23</sup> Nhyim memã kum,

—Be, me ga ne ga me pykakam ajapõx ne ar aba. Nhyim be, ba ne ba kỹjrũm kàjkwakam ar iba tũm. Me ga ne ga me aje pykakam mỳjjabit mar. Ba ne ba

ije kàjkwakam mỳjja mar. <sup>24</sup> Me aje pykakam mỳjjabit markam ne ba me amã, “Dja ga me ty nhyim Metĩndjwỹnh amã ajaxwe jarẽnh rã'ã”, ane. Ne me amã, “E kum ba. Ba ne ba arỹm bõx”, ane. Dja ga me kam amim imar kêt rã'ã jabej arỹm ty nhyim Metĩndjwỹnh me amã ajaxwe jarẽnh rã'ã, ane.

<sup>25</sup> Nhyim me kum,

—Bir, mỳj me ajõ ga nã? Gop me imã amijarẽnhkumrẽx, ba me ama, ane.

Nhyim Jeju memã kum,

—Be, amrêbê ne ba me amã amijarẽho iba. Nã bãm me amã, <sup>26</sup> “Be, ije me ajaxwe kumex markam ba ren memã me ajaxwe jarẽnh ajte me amã pãnh jarẽ. Be, ijanor djwỹnh kute katåt kabẽn jarẽnhkõt ne ba me kunĩmã arẽho iba.” Nãm bãm ã me amã ane, ane.

<sup>27</sup> Kute memã kum, “Kute ijanor djwỹnh”, anhỹrkam me kute mar kêt. Kute memã Bãm jarẽnhja me kute mar kêt.

<sup>28</sup> Nhyim kam Jeju memã kum,

—Ba ije amijo inhĩ ne ibõxja dja ga me kỹjrũm inhõ. Kam dja ga me arỹm ima. Ba ije amik-abẽnkõt amijo iba kêtumrẽx. Ibãm kute imã kabẽn jarẽnh kõt ne ba memã arẽho iba. Ja dja ga me aje kỹjrũm inhõrkam ama. <sup>29</sup> Kute ijanor djwỹnh ne imẽ amijo kajkep. Djã nãm imã kàx ba ate ar iba? Kati. Be, mỳkam ne imã kàx kêt? Bir, ije o kĩnh kadjy ne ba kum idjãpẽn mex rã'ã. Kam imã kàx kêt. Nãm ã Jeju memã ane. <sup>30</sup> Kute memã ja jarẽnhkam ne me kumex arỹm tu amim markumrẽx.

*Abraão tamdjwỹ'ã ujarẽnh.*

<sup>31</sup> Nhyim kam mebê idjaer kute tu amim markumrẽxja Jeju memã kum,

—Dja ga me mã ikabẽn kõt ar amijo aban 'ã adjukanga kêt ne arỹm me abẽ ikõt aba djwỹnhkumrẽx. <sup>32</sup> Ne kam arỹm mrãmri ikabẽnkumrẽxmã akaton

ijã amim, “Be, mrãmri ne kabên katàtkumrêx”, anhÿro aba. Ne kam ikabên katàtkumrêxmã akato ba kam arÿm me apytã. Me’õja kute me apa ‘amÿnh ga me kum adjapênh kajgoo abaja ba kubê me apytã. Ga me kam ikôt adjumar mexkumrêx ne ar aba. Nãm ã Jeju me axwe nhõ bënjadwÿr’ã memã ane.

<sup>33</sup> Nhy m ajte me kwÿ kum,

—Tô nhÿnh ne kam me’õ kute me ipa ‘amÿnh ba me kum idjapênh kajgoo ibaja? Kati. Me ba ne ba me ibê me bakukãmãre Abraão tãmdjwÿ. Nhy m kam me’õ kute me ipa ‘amÿnh kêtumrêx. Mÿkam ne ga,

—Ba me’õbê me apytã? ane.

<sup>34</sup> Nhy m Jeju memã kum,

—Mrãmri me ajaxwe prãmkam ne me ajo ba djwÿnhja arÿm kute me apa ‘amÿnh ga me arÿm kum adjapênh kajgokumrêx. <sup>35</sup> Ba me amã arê ga me ama. Djãm me’õ nhõ kikrekam õ àpênh djwÿnh djãm kubê õ àpênhkam kum àpênh rã’ãmã? Kati. Gêdja ï atemã me’õmã apê. Nhy m be, kam me’õ krakumrêxja dja kam kra rã’ã ne. <sup>36</sup> Ba ibê Metÿndjwÿnh Kra rã’ãkam ibê me apytãr djwÿnh. Me apa ‘amÿnh djwÿnhbê me apytãr djwÿnh. Dja ba me apa ‘amÿnh djwÿnhbê me apytã ga me kam mrãmri adjumar mexkumrêx ne ar aba.

<sup>37</sup> We me abê Abraão tãmdjwÿ, ba ije kôt me amar. Ga we me te abê Abraão tãmdjwÿ ne me aje ibĩnmã. Me amã ikabên kĩnh kêtumrêxkam ne ga me aje ibĩnmã. <sup>38</sup> Be, Ibãmmê ro’ã ar ibari ije mÿjja pumÿnh ne mar. Tãm ne ba me amã arê. Me ga ne ga me anhingêt kute amã arênh kôt ar amijo aba.

<sup>39</sup> Nhy m me kum,

—Be, mrãmri me inhingêtbê Abraão kumrêx, ane.

Nhy m memã kum,

—Ga ren me abê Abraão tãmdjwÿkumrêx ne ren Abraão

djapênh kôt adjapênh ar aba. <sup>40</sup> Nhy m be, kati. Ga me jakam aje ibĩnmã. Kàjkwakam Metÿndjwÿnh kute imã kabên katàt jarênh kôt ije katàt me amã arênhkumrêxkam ne ga me aje ibĩnmã. Djãm ã Abraão meo ane? Kati. <sup>41</sup> Ne ren Abraão bô me anhingêt kumrêx ga ren me adjapênh mex. Nhy m be, kati. Atemã me anhingêt djapênh kôt ne ga me atemã adjapênh ar aba.

Nhy m me kum,

—Djãm krõ’ã me’õ kute akudjwa me ijadjwÿr? Kati. Be, me Ibãm djwÿnh pydji. Kàjkwakam Metÿndjwÿnh, ane.

*Kute memã Xatanaj tãmdjwÿ jarênh.*

<sup>42</sup> Nhy m Jeju memã kum,

—Ne ga me ren mrãmri kàjkwakam Metÿndjwÿnhõ Abãm ne ren amã ijabê. Be, mÿkam? Bir, kàjkwakam Metÿndjwÿnh kurÿm ne ba tẽn bõx. Be, djãm ba ne ba tẽn? Kati. Tãm ne ijano ba amrê tẽn. Kam ga me ren amã ijabê. <sup>43</sup> Be, mÿkam ne ga me aje ikabên mar kêt? Bir, me ajamakkre kêt prãmkam. <sup>44</sup> Be, me anhingêtbê Xatanaj ne ar me ajo ba. Me anhingêt kum axwe prãm kôt ne ga me amã ajaxwe prãm. Kute amikrax totokbê kubê me par djwÿnh. Ta kabên katàt kêt kam kute Metÿndjwÿnh kabên katàt ‘amÿnh tÿx kêt ne kôt kute amijo ba kêt. Ta ‘êxnhĩ kôt memã ‘êx ba. Mrãmri ‘êxnhĩkumrêxkam kubê me ‘êxnhĩ nhingêt. <sup>45</sup> Kubê me ‘êxnhĩ nhingêtkam ba te me amã katàt ikabên jarênhkumrêx ga me aje amim imar kêt. <sup>46</sup> Be, mÿj me ajõ ga ne ga me aje mrãmri ijaxwe’õmã akator kumrêx? Kati. Ga me te: aje ijaxwe’õmã akator prãmje. Ijaxwe’õ kêt kam mÿkam ne ga me aje imar kêt? Ba te ije me amã katàt Metÿndjwÿnh kabên jarênhkumrêx ga me aje imar kêt. Be, mÿkam? <sup>47</sup> Bir, ne ga ren me abê Metÿndjwÿnh kra ne ren amim

kabên markumrêx. Nhyr be, kati. Me abê Metîndjwýnh kra kêt kam ne ga me aje amim kabên mar kêt. Nãm ã mebê idjaer rûnhmã ane.

*Kute mebê idjaer rûnhmã ami-jarênh.*

<sup>48</sup> Nhyr mebê idjaer rûnh arîk kum,

—Be, abê pykabê Xamarij kam me kra'ô ba me arým ama. Me karô punu ne ari ajo ba, ane.

<sup>49</sup> Nhyr Jeju memã kum,

—Kati. Me karô punu kute ijo ba kêt. Ba ne ba Ibãm rax jarênh o iba. Ga me kam imã ikajgo jarênh o aba. <sup>50</sup> Be, djãm ba ne ba amirax jabej? Kati. Atemã 'ô kute irax jabej ne kute me ajaxwe mar. <sup>51</sup> Mrãmri dja me ikabên man kôt ar amijo ban arým tykkumrêx'yr bôx prãm kêt. Mrãmri ne ba me amã ja jarênhkumrêx. Nãm ã Jeju memã ane.

<sup>52</sup> Nhyr mebê idjaer rûnh kum,

—Tô nhýnh? Be, me bakukãmãre Abraão arým ty. Metîndjwýnh kukwakam kabên jarênh djwýnhdjwý ne me arým aben kukãm ty. Tô nhýnh dja me akabên man kôt ar amijo ban tyk kêt? Akabên jakôt ba me arým amã ikaton amarkumrêx. Mrãmri ne me karô punu ajo ba. <sup>53</sup> Djãm aje araxo me bakukãmãre Abraão jakrenh ne ga aje, “Dja me ikabên man kôt ar amijo ban tyk kêt”, anhýr? Abraão arým ty. Metîndjwýnh kukwakam kabên jarênh djwýnh ar arým ty. Mýj me'ô rax ne ga arîk o amiptárn 'ã amimênho dja? ane.

<sup>54</sup> Nhyr Jeju memã kum,

—Ne ba ren arîk amijã me'ô rax mên ren mrãmri ikajgo. Nhyr be, kati. Ibãm ne kute ijã irax mênhkumrêx. 'Ã ne ga me aje abenmã, “Me Batîndjwýnh”, anhýr kajgoo aban <sup>55</sup> aje mar kêt kumrêx. Nhyr be, bajbit ije markumrêx. Ne ren ijêxnhí ne ren me amã, “Ije mar kêt”, ane. Ne kam ren me

akudjwa memã ijêx iba. Nhyr be, kati. Mrãmri ije markumrêx ne kabên kôt ar amijo iban ijêxnhí kêt. <sup>56</sup> Be, me anhingêt Abraão arým amikukãm iman arým ikam kînhkumrêx, ane.

<sup>57</sup> Nhyr mebê idjaer rûnh kum,

—Je tô, djãm kraxje ajã amex krãptîbê 50 apêx kêtjakam djãm ga ne ga arým me bakukãmãre Abraão pumû got? ane.

<sup>58</sup> Nhyr Jeju memã kum,

—Be, me akukãmãre Abraão amirît kêtri ne ba ar iba tûm, ane. <sup>59</sup> Nhyr me arým kên kwý jamý, kute o titik ne bîn kadjy. Nhyr Jeju arým amijo apdjun mã tẽ. Metîndjwýnh nhô kikreti kurûm katon mã tẽ.

## 9

*Kute me'ô adjakamã no rãjao mex.*

<sup>1</sup> Tẽ: nhyr arým me'ô no rã nhý. Adjakamã ne me'ô no rã. Nãm nhý nhyr arým omû. <sup>2</sup> Nhyr kôt ba djwýnhdjwý omûn Jeju kukij ne kum,

—Ujarênh djwýnh, mýkam ne me'ôja adjakamã no rã? Djãm ta axwe pãnh ne adjakamã no rã? Nãr nãmê bãm ar axwe djô'ã ne no rã? Mýj ne kam kute? ane.

<sup>3</sup> Nhyr arkum,

—Kati. Ta axwe pãnh no rã kêt. Ne nãmê bãm ar axwe djô'ã no rã kêt. Be, Metîndjwýnh kute no rãkam àpênh nhyr me kute kôt raxmã kator kadjy ne no rã.

<sup>4</sup> Be, jakim imexri idjãpênh prãm kumrêx kute mrãmri ne a'uri me àpênh prãm pyrãk. Kute ijanor djwýnh kute idjãpênh'ã imã karô kôt idjãpênh prãm kumrêx. Adjým, dja me í ijo bikênho tên ibí ba te idjãpênh prãmje. Kute mrãmri ne me akamãt kô tykkam te àpênh prãm pyrãk. <sup>5</sup> Pykakam me axwemê ro'ã ar ibari ba ije mrãmri memã pry kurwý djã pyrãk. Ga, me kute akamãtkam memã pry

kurwý nhy me katàt baja pumũ. Badjwý ne ba memã Metĩndjwýnh kabẽn jarẽ nhy me arým kõt katàt ar amijo ba. Ne tu amim kabẽn markumrẽx ne arým katàt ar amijo ba.

<sup>6</sup> Nãm anen arým pykakam aptõn kam o ajrẽn arým o me'õ no rãja no djy. Ne kam kum,

<sup>7</sup> —'Yr tẽn ngõ nhidjibẽ Xirõwekam amino ku'õ, ane. Me bakabẽnkam ne me ren ngõmã, kute anor jarẽ. Nãm kum ane nhy arým 'yr tẽn kam amino ku'õ. Ku'õn arým no mex ne. No mex ne kam ùrkwã 'yr tẽn arým 'yr bõx.

<sup>8</sup> Nhy ùrkwã bu'ã me krĩ kute me'õ no rã pumũnh tũm abenmã kum,

—Djãm tãmwã ne amijo à'wýro krĩ? ane.

<sup>9</sup> Nhy me kwý memã kum, “Nà, tãm”, ane. Nhy me kwý memã kum,

—Kon, kute tãmwã pyrãk, ane.

Nhy ta memã kum, “Nà, ba”, ane.

<sup>10</sup> Nhy me kum,

—Tõ mýj me'õ ne amã ano mex jadjã? ane.

<sup>11</sup> Nhy memã kum,

—Be, me'õbẽ Jeju ne pykakam aptõn kam o ajrẽn arým o ino djy. Ino djyn arým imã, “'Yr tẽn ngõbẽ Xirõwekam amino ku'õ”, ane. Ba kam 'yr tẽn amino ku'õn arým ino mex ne irĩt mexkumrẽx, ane.

<sup>12</sup> Nhy me kum, “Nhyñh ne dja”? ane.

Nhy memã kum, “Kon”, ane.

<sup>13</sup> Nhy kam me arým mebẽ pardjẽu'yr o bõx. Me'yr me'õ no rãn arým no mexjao bõx. <sup>14</sup> Be, me tyk djã kêt djã nhõ akatikam, pi'õk rãrãrkam ne Jeju pykakam aptõn o ajrẽn o me'õ no djyn o noo mex.

<sup>15</sup> Nãm me mebẽ pardjẽu'yr o bõx nhy me ajte kukij ne kum,

—Mýj ne ga arĩt mex kadjy nẽ? ane.

Nhy memã kum,

—Nãm pykakam aptõn o ajrẽn o ino djy ba ku'õn arým ino mex ne irĩt mexkumrẽx, ane.

<sup>16</sup> Nhy mebẽ pardjẽu kwý abenmã kum,

—Djãm Metĩndjwýnh ne tãmwã jano got? Be, me bakukràdjã pãnh ne pi'õk rãrãrkam ari àpẽn ba. Axwekumrẽx, ane.

Nhy me kwý 'ã abenmã kum,

—Nhy me bẽ ne me'õ jaxwe kute ã mýjja pumũnh kêt nhípẽxo anhýr. Kute ã me'õ no rão mexo anhýr. Nãm me ã Jeju'ã kabẽno aben japanho ane. <sup>17</sup> Ne kam me'õ no rãn arým no mexjamã kum,

—Kute amã anoo mexkam 'ã akabẽn'õ jarẽ ba me ama, ane.

Nhy memã kum,

—Be, kubẽ Metĩndjwýnh kukwakam kabẽn jarẽnh djwýnh'õ, ane.

<sup>18</sup> Nhy mebẽ idjaer rũnh amim mar kêt ne. Nãm me amim,

—Je tõ djãm mrãmri ne me'õja adjakamã no rã? Be, kati, ane. Ne kam arým bãmmẽ nã ar'yr me ano. Nhy me ar'yr tẽn arým aro bõx.

<sup>19</sup> Nhy me arkum,

—Be, gar memã kum, “Ikra adjakamã no rã”, anhýro aba. Djãm tãm ne ja? Mýj ne rĩt mex kadjy nẽ? ane.

<sup>20</sup> Nhy ar memã kum,

—Be, mrãmri ar ikrakumrẽx ne ja. Mrãmri ne adjakamã no rãkumrẽx. <sup>21</sup> Ne kam mýj ne arým no mex on, ar ije mar kêt. Mýj me'õ ne kum noo mex nhy rĩt mex, ar ije mar kêt. Be, ta ne arým abatãnh ne. Dja ga me kukja nhy arým me amã amijarẽ, ane. <sup>22</sup> Be, mýkam ne ar kute memã kum,

—Jeju ne ar ikra noo mex, anhýr kêt? Bir, arkum mebẽ idjaer rũnh pymakam. Nãm me arým abenmã Jeju'ã kabẽn djyn abenmã kum,

—Dja me'õ memã kum, “Be, mrãmri ne Jejubẽ me banhõ Bẽnjadjwýrbẽ kumkatibẽ Kritukumrẽx”, ane gwaj kõt me nẽje kanga gẽ ajte me bikprõnh

djakam me baro'ã krī kêt, ane.  
<sup>23</sup> Kam ne me kute ar kanga pymaje ar memã,

—Be, ta ne arým abatành. Dja ga me tãmwã kukja, ane.

<sup>24</sup> Nhyam kam me ajte amiwÿr me'õ no rãn arým no mexja 'uw nhyam arým 'ÿr bôx. 'ÿr bôx nhyam kum,

—Be, me ba ne ba me ije Jeju jaxwekôt mar. Kwârîk wãnh ga mex jarênh kêt. Kàjkwakam Metîndjwÿnh ta ne anoo mex. Tãm dja ga kum mex jarê, ane.

<sup>25</sup> Nhyam memã kum,

—Be, mÿj Jeju axwe nã? Ije mar kêt. Mrãmri ne arým ino räkumrêx. Ne arým jakim ba mrãmri irît mexkumrêx. Jabit ne ba mrãmri ije markumrêx, ane.

<sup>26</sup> Nhyam kam me ajte kum,

—Mÿj ne ajo, ga arým ano mex ne arît mex ne? ane.

<sup>27</sup> Nhyam memã kum,

—Je, arým ne ba me amã arê. Djãm me aje imar kêt got ga me ajte: ikukij? Be, mÿj kadjy dja ba ajte me amã arê ga me ajte ama. Djãm me aje me kudjwa mã kôt abikamênhmã got ga me ikukjêro dja? ane.

<sup>28</sup> Nhyam me arým kum kurên kum,

—Be, kati. Ga ne ga arým kôt aba djwÿnh. Me ba ne ba me atemã. Me bakukãmãre Môjdjêkôt ne ba me amijo iba. <sup>29</sup> Be, Metîndjwÿnh mrãmri me bakukãmãre Môjdjêmã kabênkumrêx. Ja ne ba me ije markumrêx. Nhyam be, tãmwã. Djãm me kute kator djã mar got? ane.

<sup>30</sup> Nhyam amipãnh memã kum,

—Be:, Jeju ne imã irît mex jadjà ga me aje kator djã mar kêtja pumũ. Djãm me ano mex got? <sup>31</sup> Ba me amã arê ga me ama. Djãm me axwe ne Metîndjwÿnh kute me mar ne kôt àpênh? Kati. Ja ne gu me arým baje mar. Nhyam be, me kute mrãmri Metîndjwÿnhmã

rax jarênh ne kute kabên mar ne kôt kute amijo bakumrêxa Metîndjwÿnh arým kute me mar ne me kôt àpênhkumrêx. <sup>32</sup> Be, djãm Metîndjwÿnh Jeju kôt àpênh ngri got ga me 'ã akabên ne? Mÿj me'õ ne adjakamã no rã nhyam me arým kute kum rît mex jadjãr ga me amrêbê aje mar? Kati. Me bakukãmãre kute arênh kêt. Me kunî kute arênh kêtikumrêx. Jejubit ne ajbir bajbit ijo mex ga me arým aje ipumũnh. <sup>33</sup> Metîndjwÿnh ren kute anor kêt nhyam ren kabênkôt àpênh kêt ba ren ino mex kêt ne. Nhyam be, kati. Mrãmri Metîndjwÿnh kute anorkumrêx.

<sup>34</sup> Nhyam me kum,

—Be, djãm akudjwa adjakamã me ijaxwe? Djãm ajaxwekam aje me ijakre got? ane. Nãm me kum anen kangan arým me nêje bõm kumê.

<sup>35</sup> Nhyam kam Jeju me kute bõm mênhkôt arým kuman 'ÿr tèn kum katon kum,

—Djãm arým ga tu amim Metîndjwÿnh Kra markumrêx? ane.

<sup>36</sup> Nhyam kum,

—Bênjadjwÿr, dja ga imã Metîndjwÿnh Kra jakre ba tu amim markumrêx, ane.

<sup>37</sup> Nhyam kum,

—Arým ga ipumũ. Ba. Ba ne ba amã ikabêno dja, ane.

<sup>38</sup> Nhyam kum,

—Nã, Bênjadjwÿr djwÿnh, arým ne ba tu amim amarkumrêx, ane. Ne arým kute Metîndjwÿnh Kramã katorkam amikajgo man parbê ibôn nhÿ.

<sup>39</sup> Nhyam Jeju memã kum,

—Be, mÿj kadjy ne ba pykakam bôx ne ar iba? Bir, dja ba me kukijn me axwemã ikaton arým memã pãnh jarê. Be, me kwÿ kute amijo àmran arîk amim, “Djãm ije Metîndjwÿnh kabên mar ngri got?” anhÿrja dja ba te memã kukràdjã jarê nhyam me arým mar kêt ne arým amakkre kêt mex ne ar ba.

Me kute mrãmri ne me rît mex arým no rân ba pyræk. Nhye be, me kwý kute kukràdjà mar kêt ne mar prãm dja ba memã arê nhye me arým tu amim markumrêx. Tu amim markumrêx ne arým kôt kute amijo ba mexkumrêx. Me kute mrãmri ne me no rã arým rît mex ne katàt ba pyræk. Ja kadjy ne ba pykakam bôx ne ar iba, ane.

<sup>40</sup> Nhye mebê pardjêu bu'ã ku'êja arým kabên man kum,

—Je, djãm me badjwý ne ba me ije me no rã pyræk? Kati. Djãm me ije Metîndjwýnh kukràdjà mar ngri got? ane.

<sup>41</sup> Nhye memã kum,

—Ne ga ren me aje Metîndjwýnh kukràdjà mar prãm ne ren aje mrãmri ne me no rã rît mex prãm pyræk. Ne kam ren ajaxwe kêt ne. Nhye be, kati. Me aje, “Me badjwý djãm me ije Metîndjwýnh kukràdjà mar ngri got”? anhyrkam me ajaxwe rã'ã. Nãm ã Jeju memã ane.

## 10

*Mrykĩ'átomtio ba djwýnh'ã ujarênh.*

*Idja 13.20; Ped k 5.4*

<sup>1</sup> Ne kam mrykĩ'átomtĩ'ã memã ajarên õ me ja'ã mrykĩ'átomtĩ jakren memã kum,

—Be, õ kôkayrkam mrykĩ'átomtĩ ar bakam nhye me ngjêx prãm kam me kwý ajkwa krekrekôt ngjêx kêt ne ate kôkayr nhĩbũm kôt wangij. Be, me ja ne me mryo àkĩnh prãm nhye me me'ã memã kum, “Me àkĩnh”, ane nãr, “Mebê mýjjao prôt djwýnh”, ane. Mrãmri ne ba me amã ja jarênhkumrêx.

<sup>2</sup> Nhye be, me kute katàt ajkwa krekrekôt ngjêxabê ne õ mryo ba djwýnhkumrêx.

<sup>3</sup> Nhye 'ã ijê djã nêje ku'ê djwýnh arým o ba djwýnhmã 'ã ijê djã'ã kurê nhye arým wangij. Ne kam mrymã kabên nhye arým amim kabên ma. Kute apýnh mrymã idji

jarênh djãri aben totokmã mrymã arê nhye arým kute apýnh aminhidji jarênh mar kôt bôm rôrôk. Bôm rôrôk nhye o ba djwýnh arým kapôt mã mryo apôx. <sup>4</sup> Mryo apôx ne arým mry kukãm mrã nhye mry arým kôt ba. Kute amim o ba djwýnh kabên markam kôt ba. Nãm mry ã o ba djwýnh kôt ane. <sup>5</sup> Nhye be, atemã me bajtem mry'ýr bôx ne te mrymã kabên nhye kôt ba kêt ne tu mã kubê prôt ne. Kute amim me bajtem kabên mar kêt kam amijã no týx ne tu mã kubê prôt ne. Mrãmri ne ba me amã ja jarênhkumrêx, ane.

<sup>6</sup> Be, mrykĩ'átomtĩ'ã ujarênhja ne Jeju kute amikabên kukràdjã'ã akre nhye me mrybit man kukràdjà mar kêt. Nãm me te: kute mýj'ã ujarênh kute amijakre marmãn te: kute kukràdjà marmã.

<sup>7-9</sup> Nhye ajte memã kum,

—Mrãmri ije mrykĩ'átomtĩ nhõ kôkayrkôt ajkwa krekre pydji pyræk. Ga, mryo ba djwýnh kute ajkwa krekrekôt mryo ngjêxja pumũ. Nhye kôkayr týx arým kute mýjja djãkrêbê mry pytãr nhye umar mexja pumũ. Badjwý ije ajkwa krekre pydjimãn prãbê dja me tu amim imarkumrêx ba arým axwebê me utã. Nhye kam me arým ikôt tĩn ne ar ba rã'ã: rã'ã ne. Atemã me'ókôt ne me tĩn kêt kumrêx. Dja me tu amim bajbit imarkumrêx ba arým me utã.

Ga, mryo ba djwýnh kute kôkayr kurũm mryo apôxja pumũ. Nhye mry àkur ban ajte akubyn ngjêxja pumũ. Badjwý dja ba me utãro iba nhye me ikôt umar mex ne ar ba.

Nhye be, amrêbê ibôx kêtĩ ne me kwý Metîndjwýnh'ã 'êx ne memã kum, “Metîndjwýnh ne imã arê ba kukwakam amã kabên jarênh o iba”, ane. Me Metîndjwýnh'ã 'êxja kunĩ ne me àkĩnhĩ. Me kute amiwýr inhõ me jao akêxmãn te meo ane nhye me



kute me kabên mar kêt. <sup>10</sup> Be, me àkínhĩ ne me kute mryo àkính ne par kadjy bôx. Nhy m be, kati. Ba ne ba atemã. Me tĩnkumrêx ne umar mexkumrêx kadjy ne ba bôx.

<sup>11</sup> Ije me kute mrykĩ'ãtomtio ba djwýnh mex pyrãk. Dja ba me kadjy ty. Ije me utãr kadjy ty. <sup>12</sup> Nhy m be, me mrykam àpênh djwýnh ne me atemã. Gêdja rop'õ mry'ýr bôx nhy m arým tĩn prãmje tu mry kangan prõt ne. Kubê õ mry djwýnh kêt kam ne tu mry kangan mã prõt ne. Nhy m rop arým mryo rôrõk nhy m mry abenbê ajmã. <sup>13</sup> Me mrykam àpênh djwýnh kute pi'ók kaprĩbit markam ne me kum mry jabê kêt. Nhy m kam rop bôx nhy m kum mry jabê kêt kam arým mry kangan prõt ne.

<sup>14-15</sup> Ba ije me kute mryo ba djwýnh mex pyrãk. Ibãm kute imarkumrêx. Badjwý ije Ibãm markumrêx. Inhõ me jadjwý ije ã me maro ane. Nhy m inhõ me jadjwý kute imar. Ba dja ba me kadjy ty. Ije me utãr kadjy ty. <sup>16</sup> Djãm kôkayr jakambit inhõ krit? Kati. Onĩj inhõ krit rã'ã. Me wãdjwý dja me amim ikabên ma. Dja ba inhõ me jamê me wãdjwý aben pydji. Kam arým inhõ me kunĩo iba. <sup>17</sup> Be, mýkam ne Ibãm kum ijabê? Bir, ije kabên kôt amijo ibakam. Kam ne kum ijabê. Ba dja ba ty. Akubyn itĩn kadjy dja ba ty. <sup>18</sup> Djãm me ta dja me ibĩ? Kati. Ba dja ba amikabênkôt tyn kam amikabênkôt akubyn itĩn ne. Ibãm ta ne ityk ne akubyn itĩn'ã imã karõ, ane.

<sup>19</sup> Nãm Jeju memã ane nhy m kam mebê idjaer rũnh ajte kabêno aben japanho dja. <sup>20</sup> Me krãptĩ ja ne me arĩk memã kum,

—Be, me karõ punu ne o ba. Ga, kute kukwakam kabên kajgo krãptĩ jarênhja pumũ. Mýkam ne ga me kabên maro dja? ane.

<sup>21</sup> Nhy m me kwý ja ne memã kum,

—Nhy m bê ne me karõ punu kute o ba nhy m ã kabên kute anhýr. Be, kati. Kabên mexkumrêx. Djãm me karõ punu kute me no rã noo mex mar got? ane.

*Mebê idjaer rũnh kum kurê'ã ujarênh.*

*Dju r 5.18, 8.59, 12.32*

<sup>22</sup> Be, krĩraxbê Djeruxarêkam, me krãptĩ kute aben pydji djã nhõ akatikam, arým na nhõ mytyrwýkam, Jeju me'ýr tẽn bôx ne arým Metĩndjwýnh nhõ kikretikam ar mrã. Me kute aben kajmã'ã me bakukãmãre kute amrêbê: Metĩndjwýnhmã kikreti ny nhípêx mar kadjy ne me krãptĩ akati jakam aben pydji.

<sup>23</sup> Jeju kikreti bu'ã kikre kre kênhkam ar mrã. Kikre kre kênhamã ne me kum, “Xaromão nhõ”, ane. <sup>24</sup> Nãm kam ar mrã nhy m mebê idjaer rũnh arým omũn kam kum ipók ne kum,

—Aje. Ga mrãmri abê me inhõ Bẽnjadjwýrbê kumkatibê Kritukumrêx jabej tu me imã amijarêno amirĩtkumrêx. Mýkam ne ga me ibê amipdju? ane.

<sup>25</sup> Nhy m Jeju memã kum,

—E kum arým ne ba me amã amijo amirĩt ga me aje amim imar kêt. Ibãm kukwakam ije apýnh mýjja pumũnh kêt nhípêx djãri. Tãm ne kute me amã ijo amirĩt mexkumrêx ga me aje amim imar kêt. <sup>26</sup> Be, me abê inhõ krit kêt kam ne ga me aje amim imar kêt. Arým ba me amã ja jarê ga me arým ama. <sup>27</sup> Inhõ krit ar kute amim ikabên mar. Badjwý ije inhõ krit ar mar nhy m ar mã ikôt ar amijo ba. <sup>28</sup> Dja ba memã tĩn jadjã nhy m me Metĩndjwýnhkôt tĩn ne ar ba rã'ã: rã'ã ne. Ne me biknor tokry djãkam biknor kêt kumrêx. Ba mã meo iba nhy m me'õ kute ibê me pa'amýnh ne ibê me ikô rênh prãm kêt.

29 Ibām kute ikôt me kamēnhja ne tỳxo kute me kunī jakrenh. Tām ne mǎ meo ba nhyem me'ô kute kubê me pa 'amýnh ne kubê me ikô rênh prām kêt. 30 Ibāmmē ro'ã ne bar itipdjín ar iba. Nām ã memã ane.

31 Nhyem me bē idjaer rúnh ajte kadjy kēn jamý. Kute o titik ne bīnmã kēn jamý. 32 Nhyem memã kum,

—Ibām kukwakam ne ba mýjja mex krǎptī nhípêx ne me amã o amirīt ga me omũ. Nhýnh idjápênh mexja pānh dja ga me kēno ititik ne ibī? ane.

33 Nhyem me kum,

—Djām adjápênh mex pānh ne ba me ije kēno atitik ne abīnmã? Kati. Metīndjwýnh ne ga arým aprý. Abê pykakam me'ôkam ne ga ga amijo ajêx ne amijo Metīndjwýnh Kra ne amijo Metīndjwýnh pyrāk. Aje Metīndjwýnh raxo amiptarkam ne ba me arým Metīndjwýnho ingyk ne ije abīnmã, ane. 34 Nhyem amipānh memã kum,

—Tô nhýnh ne ba aprý? Be, kukwakam kabēn jarēnh djwýnh ne me bakukāmãremã Metīndjwýnh kabēn jarēn memã kum,

“Nã bām memã kum, ‘Me abê metīndjwýnh’, ane.”

Nām ã me bakukāmãremã anen arým 'ã pi'ók no'ók ne. 35 Metīndjwýnh kabēn ne ga me te akabēno aje o adjāpanhmã. Ga, Metīndjwýnh ta kute memã kum, “Me abê metīndjwýnh”, anhýrja pumũ. 36 Metīndjwýnh ta ne imã idjápênh djā jarēn pykamã ijano ba kabēn kôt amrē tēn bōx. Djori kam ibê Metīndjwýnh Kra kêt? Kati, ibê Metīndjwýnh Krakumrêx. Djori kam ba aprý. Arkati.

37 Ne ba ren Ibām djápênh o idjápênh kêt ga ren me aje katāt imã ikajgo jarēnhkumrêx. 38 Nhyem be, kati. Mrāmri Ibām djápênh o idjápênhkumrêx. Kam ga me ren amim idjápênhbit ma. Aje amim ba imar kêt kam ga ren idjápênhbit man

ren Ibām djápênh o idjápênhja man ren arým kam ima. Ibāmmē ne bar itipdjín ar iba ga me ren kam arým ama, ane. 39 Nām memã ane nhyem me arým kute pa 'amýnhmã te o ane nhyem mǎ me bē katon tē.

40 Ne kam arým mǎ ngô raxbê Djodão nhijukri tē. Tē:n arým Djuão kute ngômã me angjênhmo krax djākam bōx ne arek kam ar ba. 41 Ar ba nhyem me krǎptī 'ýr bōx ne abenmã kum,

—Be, Djuão ne me kute raxmã kator kadjy kute mýjja pumúnh kêt'ô nhípêx kêt. Kute me punuo mex kêt. Ne kam mrāmri katāt me'ôja kukām 'ã ujarēnhkumrêx. Nhyem kam arým kute kukām 'ã ujarēnh kôt prīne kôt amijo bakumrêx, ane. 42 Nhyem kam me krǎptī pyka jakam tu amim Jeju markumrêx.

## 11

*Kute akubyn Radjaruo tīn.*

1 Be, me'ô nhidjibê Radjaru ne arým kanê bīno mō. Kanikwýnh ne ar amānhkrut. Ar idjibê ne Marijmē Mata ar. Ne ar kunī krībê Betanhakam ūrkwã. 2 Marij ja kute Bēnjadjwýr djwýnh par'ã me kudjý djā kangô kapī. 'Á me tyk kadjy kudjý djā kangô kapīn kam kute amikio 'ã kangô ngrã tām. 3 Nām kamy Radjaru arým kanê bīno mō: nhyem kanikwýnh ar arým Bēnjadjwýr djwýnh'ýr me'ô jano. Onīj. Nhyem arým 'ýr tē:n 'ýr bōx ne arým kum arēn kum,

—Bēnjadjwýr djwýnh, onīj amã anhōbikwa jabêja arým kanê: nhyem kanikwýnh ar amã arē, ane.

4 Nhyem Jeju arým kuman kum,

—Djām tu tyk rã'ã kadjy ne kanêja? Kati. Dja me kǎkwakam Metīndjwýnh raxmã katon ba ibê Metīndjwýnh Kra iraxmã kato. Ja kadjy ne kanê raxja, ane. 5 Be, Matamê kanikwýnhmē Radjarumē ne Jeju kum ar abê. 6 Nām Jeju

kabên man kam tu arek ÿr djâkam nhÿ nhyim 'ã akati amãnhkrut apêx.

<sup>7</sup> Nhyim kam kôt ba djwÿnhmã kum,

—Gwaj on pykabê Djudêjamã tê, ane.

<sup>8</sup> Nhyim ar kum,

—E kum, ujarênh djwÿnh, wãkam ajbir mebê idjaer rûnh kute kênô atitik ne abînmã ga ajte 'ÿr atêmmã, ane.

<sup>9</sup> Nhyim Jeju arkum,

—Djãm arngro pydjikam kãxdjakênh pa ipôkbê 12bit. Nã tãm. Djãm ori me arngrokam mrã nhyim mÿjja'ô me par tok? Kati. Arngrokam ne mÿjja amirît nhyim me omûn aã'ã mrã. <sup>10</sup> Nhyim be, akamãtkambit ne me ba punu, arîk rôrôk ba, me nokrekam irã kêtka, ane. Me kute o tÿm ne bîn kêttri tẽmbê kute àpênh inomã mênhmã ne amijã arngro jakreo tẽn me kute o tÿm ne bîn'ã akamãt jakre.

<sup>11</sup> Nãm arkum anen kam arkum,

—Be, gwaj banhôbikwa Radjaru arÿm ôto nô. Arÿm ba ije tokmã ne ba 'ÿr tê, ane.

<sup>12</sup> Nhyim ar kum,

—Dja ôto nôrkam akubyn mex, ane. <sup>13</sup> Be, djãm mrãmri ôtkumrêx'ã ne arkum ane? Be, kati. Arÿm tyk'ã ne arkum ane. Nhyim ar arîk amim,

—Be, ôtkam tyk djã kêt'ã ne ã ar imã ane, ane.

<sup>14</sup> Nhyim kam arkum arênhô amirîtkumrêx ne arkum,

—Be, Radjaru ne arÿm ty. <sup>15</sup> Wãkam idjãm kêt nhyim arÿm ty. Kam idjãm kêtka ar akadÿj ikînh. Jakam dja gwaj wãkam tẽn bôx gar arÿm mÿjja pumûn arÿm tu amim imarkumrêx. Ar akadÿj ne ikînh. Aj gwaj on 'ÿr, ane.

<sup>16</sup> Nhyim kam Jejukôt ba djwÿnh 'ô nhidjibê Tôme Djidjimuja kôt ba djwÿnh 'ôdjwÿmã kum,

—Gwaj on badjwÿ kôt ty, ane.

<sup>17</sup> Nhyim kam Jeju ar arÿm 'ÿr tê. 'ÿr tê:n arÿm 'ÿr bôx.

Nhyim me arÿm kum arên kum,

—Be, arÿm ne ty ba me adjã.

Nhyim arÿm 'ã akati amãnhkrut ne amãnhkrut apêx ga bôx, ane.

<sup>18</sup> Be, krîbê Betanhamê krîraxbê Djeruxarême ne aben jatãri.

Abenwÿr pry'ã akrebê kirometu amãnhkrut ne ikjêkêtbit. <sup>19</sup> Kam

ne mebê idjaer krãpti Matamê Marij ar'ÿr bôx. Ar kamy arÿm

tykkam me kute ar kapri, ar mÿr, ar amakbê arkum kabênmã ar'ÿr bôx.

<sup>20</sup> Nhyim Jeju ar bôx 'ÿr nhyim me'ô arÿm Matamã arê. Nhyim kãjmã

djan ate kutã tê. Nhyim be, Marij arek nhÿ.

<sup>21</sup> Mata Jeju kutã tẽn arÿm kajpan kum,

—Bênjadwÿr djwÿnh, ga ren pyka jakam arek ar aba nhyim ren ikamy

tyk kêtkaumrêx. <sup>22</sup> Gêdja ga mÿjja'ôo Metîndjwÿnhmã a'uw nhyim arÿm

akabên man prîne akabên kôt ipêx ne. Tãm ne arÿm ije mar, ane.

Nhyim kum,

<sup>23</sup> —Dja atô akubyn tîn, ane.

Nhyim kum,

<sup>24</sup> —Nã, me kunî kute aminhi-nomã amimênh djã nhô akatikam

dja me tyk akubyn tîn. Nhyim mekôt dja ikamy akubyn tîn. Tãm

ne arÿm ije mar, ane.

Nhyim kum,

<sup>25</sup> —E kum, ba ne ba ibê akubyn me tyko tîn djwÿnh ne ije memã tîn

jangjênh djwÿnh. Me kute tu amim ikamnhîxkumrêx dja me tîn ne. Dja

te tyn Metîndjwÿnhkôt tîn ne ar ba rã'ã: rã'ã ne. <sup>26</sup> Nhyim me tîn ne ar

ba kute tu amim ikamnhîxkumrêx dja me Metîndjwÿnhkôt tîn ne tyk

kêtkaumrêx. Djã ne ga tu amim ik-abênja markumrêx? ane.

Nhyim kum,

<sup>27</sup> —Nã, Bênjadwÿr djwÿnh, abê Kritukumrêx. Mrãmri

ne Metîndjwÿnh ajã me inhô Bênjadwÿrbê kumkati mênhkumrêx.

Me bakukãmãre kute amrêbê: memã kum, “Gêdja i Metîndjwÿnh

Kra pykamã bôx”, anhÿr kôt ga arÿm bôx ne kam abê Metîndjwÿnh

Krakumrêx. Tãm ne ba tu amim markumrêx.

<sup>28</sup> Nãm ã kum anen kam akubyn kanikwÿnh'ÿr tẽ. 'ÿr tẽ:n arÿm 'ÿr bôx ne me kãxã kum,

—Arÿm ne memã ujarênh djwÿnh bôx ne amã kabên. <sup>29</sup> Nãm kum ane nhym kãjmã djan amibêx ne 'ÿr tẽ. <sup>30</sup> Be, kraxje Jeju krĩmã àr kêt. Nãm arek Mata kute kajpar djakam arek dja. <sup>31</sup> Nhym Marij kãjmã djan amibêx ne tẽ nhym kikrekam mebê idjaer kute ar kapribê arkum kabêno ãmja arÿm abenmã kum,

—Be, ar mÿrmã ne ar kênkre'ÿr tẽ, ane. Nãm me anen arÿm kôt tẽ.

<sup>32</sup> Nhym be, Marij Jeju'ÿr tẽ nhym arek kam dja nhym arÿm 'ÿr bôx. Ne omÿn arÿm kônkrão nhÿn kum,

—Bênjadwÿr djwÿnh, ga ren pyka jakam ar aba nhym ren ikamy tyk kêtumrêx, ane.

<sup>33</sup> Nãm mÿro nhÿ nhym kôt mebê idjaer môrja kôt mÿro dja. Nhym Jeju me omÿn arÿm rerekren tik ngyo dja. <sup>34</sup> Ne kam memã kum,

—Nhÿnh ne ga me adjã? ane.

Nhym me kum,

—Bênjadwÿr djwÿnh, amrê ar ikôt tẽn omÿ, ane.

<sup>35</sup> Nhym Jeju arÿm muw.

<sup>36</sup> Nhym mebê idjaer abenmã kum,

—Be, kum abêkumrêx. Ga, arÿm mÿrja pumÿ, ane.

<sup>37</sup> Nhym me kwÿ abenmã kum,

—E kum, me no rãmã ne rĩt mex jangij. Nok ren Radjarudjwÿo mex nhym ren tyk kêt ne, ane.

<sup>38</sup> Nhym kam Jeju 'ÿr tik ngy tẽn arÿm kênkre'ÿr bôx. Kênpotio ne me arÿm kênkre'ã ijê. <sup>39</sup> Nãm kênkre'ÿr bôx ne memã kum, “Me 'ã kênpoti kaba”, ane.

Nhym tyk kanikwÿnh Mataja kum,

—Ô kum arÿm kro:. Tyk'ã arÿm akati amãnhkrut ne amãnhkrut apêx, ane.

<sup>40</sup> Nhym Jeju kum,

—Ë, arÿm ne ba amã, “Dja ga tu amim ikamnhĩxkumrêx ne arÿm Metĩndjwÿnh raxmã akato”, ane.

<sup>41</sup> Nhym me arÿm kênkre'ã jãm kênpoti dja. Nhym Jeju kãjmã krãn kãjkwa jabên Bãmmã kum,

—Djũnwã. Ga ne ga arÿm aje ikabên mar. Kam ikĩnhkumrêx. <sup>42</sup> Amã ikabên kunĩkôt ne ga arÿm aje ikabên mar. Be, me ibu'ã ku'ê ja amã ikabênkôt kute imar kadjy ne ba amã ikabên. Dja me tu amim imarkumrêx ne ijã amim, “Be, mrãmri ne Metĩndjwÿnh kute anorkumrêx”, anhyro ba. Ja kadjy ne ba amã ikabên, ane.

<sup>43</sup> Nãm anen arÿm kãj bê kabên ne kum, “Radjaru, amrê akato”, ane. <sup>44</sup> Nhym arÿm me aêrbê akubyn tĩn ne kato. Arÿm tu tykkumrêx ne jakam arÿm akubyn tĩn ne kato. Prĩne kubêkào ikramê par'ã kupu rã'ãn kato. Kubêkào nokre kupu rã'ãn kato.

Nhym Jeju memã kum,

—Me 'ã kubêkã bô gê tẽ, ane.

*Me kute bĩn kadjy kute o aben mar:*

*Mat 12.14; Ruk 6.11*

<sup>45</sup> Jeju akubyn Radjaruo tĩn nhym mebê idjaer omÿ nhym arÿm kwÿ krãptĩ tu amim Jeju markumrêx. Marijkôt me môrja tu amim markumrêx. <sup>46</sup> Nhym me kwÿ ja arÿm amÿ mebê pardjêu'ÿr mÿn memã Jeju jarê.

<sup>47</sup> Nhym kam me kadjy Metĩndjwÿnh mar djwÿnh nhô bênjadwÿrmê mebê pardjêu arÿm me rũho akuprô. Nhym kam me abenmã kum,

—Be, mÿjja pumÿnh kêt kwÿ rax ne ipêx. Me kute raxmã kator kadjy ne ipêx. Nãm me punu krãptĩo mex ne akubyn me tyko tĩn. Mÿj dja gu me nê? <sup>48</sup> Dja gu me amitô nhym me kunĩ arÿm tu amim markumrêx ne kôt ar amijo ba. Dja me ane nhym krĩrãxbê Rômakam me ô me ja arÿm me bawÿr prôt ne pyka mê Metĩndjwÿnh nhô kikretio amrãn

aben bê me babê idjaer kunĩ ngrà, ane.

<sup>49</sup> Nhyr me kadjy Metĩndjwýnh mar djwýnh nhõ bēnjadjwýr raxbē Kajbajja ne amexja tāmka memā nhỹ. Kajbaj memā kum,

—E kum, me aje mýjja mar kêt.  
<sup>50</sup> Me'õ pydji dja me babê idjaer kunĩ pānh ty. Kam dja me abenbê me bangrānh kêt gu me arým bad-jumar mex. Me aje ja mar kêt, ane.

<sup>51</sup> Be, djām Kajbaj ta ne amik-abēn jarē? Kati. Metĩndjwýnh kukwakam ne kabēn jarē. Amexja tāmka ne kubē me kadjy Metĩndjwýnh mar djwýnh nhõ bēnjadjwýr rax. Bēnjadjwýr rax ne Metĩndjwýnh mar djwýnh kunĩmā nhỹ. Kunĩmā ýrkam ne arým memā Metĩndjwýnh kabēn jarē. Kute memā Jeju mebē idjaer kunĩ pānh tyk jarēnhkam ne memā Metĩndjwýnh kabēn jarē. <sup>52</sup> Be, djām mebē idjaerbit pānh dja ty? Kati. Metĩndjwýnh kraja amrēbē abenbê me bimānh. Apýnh me bajtem ba djākam me bimānh. Jeju kute amikôt me jao aben pydjimā. Me jadjwý pānh dja ty. 'Ā ne Kajbaj kute Metĩndjwýnh kukwakam kabēn jarēnhja.

<sup>53</sup> Be, krax ne ja. Me kute Jeju bĩn kadjy kute aben kabēn marmo krax djā ne ja. Jeju kute akubyn Radjaruo tĩn nhõ akati jakam.

<sup>54</sup> Nhyr kam Jeju kute ja nhi-jukri mebē idjaer rũnhmā amijo amirĩto ba kêt. Kapôt kukrit nokà'ā ar bamā ne arým tē. Kam ne arým krĩbē Epraĩmā tēn bõx ne kôt ba djwýnhmē ro'ā kam ar ba.

<sup>55</sup> Nhyr kam mebē idjaer kute aben pydji djā 'ýr. Me kute me kukāmāre nhirõbē mrānhja mar kadjy arým õ akati 'ýr. Kam ne me krāptĩ: kadjy krĩraxbē Djeruxarē'ýr àbir mō. Me kute Mōjdjē kukrādja kôt Metĩndjwýnhmā amijaxwe jarēnhmā ne me mō. <sup>56</sup> Ne kam arým bõxo dja nhyr me rũnh arým

Jeju jabej. Ne Metĩndjwýnh nhõ kikretikam abenmā kum,

—Djām me krāptĩ kute aben pydji djā nhõ akati kadjy mekôt bõxmā? Djā ne ga me ajõ ama? ane.  
<sup>57</sup> Be, arým me kute Jeju'ā memā karõ. Me kadjy Metĩndjwýnh mar djwýnh nhõ bēnjadjwýrmē mebē pardjēumē ne me arým 'ā memā karõn memā kum,

—Dja ga me ajõ Jeju pumũn me imā arē ba me pa 'amý, ane.

## 12

*Marij kute par'ā kangõ pānh rax kapĩn.*

*Mat 26.6; Mak 14.3*

<sup>1</sup> Me Djeruxarēkam Jeju jabej nhyr arým ajte krĩbē Betanhakam bõx. Betanhakam ne Radjaru ar ba. Amrēbē ne ty nhyr Jeju 'ýr bõx ne akubyn o tĩn. Ne jakam Jeju ajte Betanhakam bõx. Nhyr amũ Djeruxarēkam Metĩndjwýnh me irõbē mrānh nhõ akati bõx 'ýr. Dja akati amānhkrut ne amānhkrut ne amānhkrut apēx nhyr arým akati bõx.

<sup>2</sup> Nām Jeju Betanhakam bõx nhyr arým amykry. Nhyr Mata ar arým kum õ kwý krēn djā nhipēx. Ipēx nhyr Jeju ar krēno nhỹ. Mata ne arkum õ kwý krēn djā nhõro dja. Radjarumē ro'ā ne ar àkuro nhỹ. <sup>3</sup> Àkuro nhỹ nhyr Marij arým me kudjý djā kangõ ipuja by. Me tyk kadjy ne kudjý djā. Kangõ nhidjibē ne nadu. Utĩ'ā akrekam ne kubē kiru kute o katē 'ýr ne kam pānh raxkumrēx. Nām ar àkuro nhỹ nhyr Marij arým kangõja byn Jeju par'ā kapĩ. 'Ā kapĩ ne amikĩo arým par'ā kangõ kwý ngrà. Nhyr kam arým amũ kikre krekôt kudjý prõt ne.

<sup>4</sup> Nhyr Djuda Ikadji. Ximāo kute ir ja. Jejukôt ba djwýnhja. Tāmja dja kurē djwýnhmā Jeju kanga. <sup>5</sup> Marij Jeju par'ā kangõ kapĩ nhyr Djuda arkum,

—Je tô, mỳkam ne arỳm kangô mexjao akno? Ne ga ren ar memã kangô ngân ren pân̄h pi'ók kaprĩ kumex ne aby. Ne ren pân̄h'ã akrekam denarju kubê 300 ne ren abyn kam ren me õ mỳjja kêt mã angrà, ane. <sup>6</sup> Be, djãm Djuda kum me bikên̄h kaprĩkam ne ã arkum ane? Kati. Ìkĩnhĩkam, Kubê ar õ pi'ók kaprĩo ba djwýnhkam. Ne kam ta amim kwýo àkĩnho ba. Kam ne ã arkum ane.

<sup>7</sup> Nhy m Jeju arkum,

—Kwãrik wân̄h rã'ã. Mỳj kadjy ne amim kangô dji? Bir, dja ba ty nhy m me arỳm ijadjà. Kute ijã kangô kapĩnkam dja ba ikudjy nhy m me ijadjà. Ja kadjy ne amim kangô dji. <sup>8</sup> Ar aje memã mỳjja nhõrmã wân̄h ne me õ mỳjja kêt ar abu'ã ar ba rã'ã. Dja gar anen arỳm memã mỳjja ngã. Badjwý. Djãm arek gwaj baro'ã ar baba rã'ãmã? Kati. Nãm ã Jeju arkum ane.

<sup>9</sup> Jeju Betanhakam ar ba: nhy m kam mebê idjaer krãptĩ arỳm kuman 'yr bõx. Djãm me kute Jejubit pumũnhmã ne me 'yr bõx? Kati. Radjarudjwý. Jeju kute Radjaru tyk akubyn o tĩnkam ne me kute adjwýnhdjwý pumũnhmã 'yr bõx. <sup>10</sup> Nhy m be, me kadjy Metĩndjwýnh mar djwýnh nhõ bẽnjadjwýr ne ar atemã. Nãm ar bit kute Radjaru bĩnmã 'ã aben maro nhỹ. <sup>11</sup> Be, mỳkam? Bir, Jeju kute akubyn Radjaruo tĩnkõt mebê idjaer krãptĩ arỳm omũn tu amim Jeju markumrêx. Nhy m kam me kute omũnh kêt kadjy ar kute Radjarudjwý bĩnmã. Nhy m Jeju Betanhakam ar ba nhy m kam 'ã akati. 'Ã akati nhy m Jeju amũ Djeruxarê'yr tẽ.

*Jeju rax ne Djeruxarêmã àr.*

*Mat 21.1; Mak 11.1; Ruk 19.28*

<sup>12</sup> Nhy m kam me Djeruxarêkam kukãm abenmã kum,

—Arỳm Jeju bõx 'yr. Arỳm Jeju bõx 'yr, ane. Me krãptĩ kute aben

pydji djã nhõ akati kadjy bõxja ne me ã abenmã ane. <sup>13</sup> Ne kam mõn bõ kwý nhikê. Me kute o Jeju kajpar kadjy ne me arỳm kutã mõ. Ne kãj bê abenmã Jeju mexo àkjêr mõn mã memã kum,

—Jejubê ne me banhõ bẽnjadjwýr rax. Ìm mexkumrêx. Kam me bakĩ:nhkumrêx. Gê on me bapytã. Gê Bẽnjadjwýr djwýnh o kĩnh rax. Kukwakam ne arỳm me bakadjy bõx. Ìm mexkumrêx. Me babê idjaer nhõ bẽnjadjwýr rax ne arỳm bõx, ane.

<sup>14</sup> Me kute o anhỹr kêt ri ne Jeju mry'ã nhỹ. Nãm mry'ã krĩ jabatàn̄h nyremã katon 'ã nhỹ. Amrêbê: ne me Metĩndjwýnh kukwakam me bakukãmãremã ja jarên memã kum,

<sup>15</sup> “È krĩraxbê Xijãokam me ja, kwãrik wân̄h me atĩn prãm kêt.

Ota, me anhõ bẽnjadjwýr rax bõxmã. Dja mry'ã krĩ jabatàn̄h nyre'ã nhỹn me awýr bõx.”

Nãm me ã me bakukãmãremã anen arỳm 'ã pi'ók no'ók ne. Nhy m me aben djõ'ã arênho mõ:n arênho mõr tãmtã tũ:mrãm me bakamingrãnyrekam arỳm 'yr o bõx. Jeju mry'ã nhỹn arỳm Djeruxarê'yr bõxmã tẽmkumrêx. Djeruxarê nhidji nhikjêbê ne Xijão.

<sup>16</sup> Nãm 'yr tẽ nhy m me o àkjêr mõ. Nhy m kõt ba djwýnh ar kute omũnh totokbê amim,

—Je tô, mỳj'ã ne me kute Jejuo àkjêrja? anen mar kêt ne. Arỳm Jeju àbir ne ra:xkambit dja ar akubyn pi'ók kõt amijo tẽn arỳm kuma. Be, pi'ökkam me kute Jejuo anhỹrmã kõt ne me arỳm jakam ã Jejuo ane. Ja dja ar kuma.

<sup>17</sup> Be, Jeju kutã me mõrja ne me amrêbê Jeju kute akubyn Radjaruo tĩnkõt omũ. Kute kum kabên nhy m kênkre kurũm katorkõt ne me omũ. Ne kam amũ memã 'ã ajarê. <sup>18</sup> Nhy m me krãptĩ arỳm

kute akubyn o tĩnja man kam arým adjwýnhdjwý mekôt Jeju kutã mõn kajpa. <sup>19</sup> Me krãptĩ: Jeju kutã mõn kajpa. Nhyam kam mebé pardjêu arým abenmã kum,

—Be ga, pyka kunĩkôt me kunĩ arým kute 'yr amijo akẽxja pumũ. Me baje te: mebé Jeju pyma nhyam me mã kum kĩnhja pumũ, ane.

*Amikukãm amityk'ã ujarẽnh.*

*Mak 8.34*

<sup>20</sup> Nhyam kam me bajtembé kreguja kwý ne me me krãptĩ kôt ar ba. Me kute mekôt me kute aben pydji djã nhõ akatikam Metĩndjwýnhmã rax jarẽnh kadjy ne me bõx ne mekôt ar ba. <sup>21</sup> Ne kam arým Piripi 'yr bõx ne kum, “Ba me Jeju pumũ”, ane. Piripi ne pykabê Garrêjakam krĩraxbê Bexadakam abatãnh djã. <sup>22</sup> Me kum ane nhyam amũ Ångre 'yr bõx ne kum arẽ. Nhyam kam ar ro'ã Jeju 'yr tẽn kum arẽ.

<sup>23</sup> Nhyam Jeju arkum,

—Be, arým ityk'ã akati bõx 'yr. Dja ba me kadjy tyn akubyn itĩn. Ne kam arým ira:xkumrẽx ne ipyma:. <sup>24</sup> Ga, me kute bãygogo 'y krekam arým tyk pyrãk. Djãm mrãmri ne arým ty? Kati. Ga, 'y ingrõt ne abatãnh nhyam arým 'ã ô kumexja pumũ. Ne ren me 'y kre kêt nhyam ren 'y kajgo rã'ãn ãptãr kêtukumrẽx. Ba ije bãygogo 'y pyrãk. Badjwý dja ba ty nhyam me arým ijadjã. Nhyam kam ityk djõ'ã arým me krãptĩ tĩn. Mrãmri ne ba ar amã ja jarẽnhkumrẽx.

<sup>25</sup> Be, me arek pykabêbit ar ba kadjy kute amimarja dja me arým tyn akuno. Nãr me kadjy kute amimar kêtja, arek pykabêbit ar ba kadjy kute amimar kêtja dja Metĩndjwýnh me utã nhyam me arým kôt tĩn ne ar ba rã'ã: rã'ã ne. <sup>26</sup> Be, me imã ãpẽnha gẽ me mã ikôt amijo bakumrẽx. Kam dja ba nhĩ'ãm ar iba nhyam inhõ ãpẽnha arek ikôt ar ba. Dja imã apê nhyam

Ibãm arým kãjmã kum rax kamẽ, ane.

<sup>27</sup> Ne ajte arkum,

—Be, arým idjumar punu iwýr bõx. Be, mýj dja ba nẽ? Djãm ije kum, “Djũnwã, arým itokry'ã myt bõx 'yr. Itokrybê ipytã”, anhýrmã? Kati. Ije itokry ja markumrẽx kadjy ne ba arým tẽn bõx. Nãm ã arkum ane. <sup>28</sup> Ne ajte Bãmmã kum,

—Djũnwã, jakam dja ga memã amiraxo amirĩt gẽ me araxmã kato, ane.

Nhyam ar arým kãjkwa kurũm Bãm kabẽn ma nhyam kum,

—Arým ne ba memã iraxo amirĩt. Dja ba ajte memã iraxo amirĩt, ane.

<sup>29</sup> Nhyam ar bu'ã me ku'ê kwý arĩk abenmã kum,

—E kum, na ne krikrit, ane.

Nhyam me kwý arĩk abenmã kum, —Metĩndjwýnh kadjy mrãnh djwýnh'õ ne kum kabẽn, ane.

<sup>30</sup> Nhyam Jeju memã kum,

—Djãm ba ije kabẽn mar kadjy ne kabẽn kato? Kati. Me ga aje kabẽn mar kadjy. <sup>31</sup> Be, jakam dja Metĩndjwýnh me kunĩ axwemã kato. Me ĩ pýnhkôt me axwe djãri kum kato. Jakam dja ba pykakam me axwe nhõ bẽnjadjwýro apan kujaten kumẽ. <sup>32</sup> Dja me kýjrũm inhõ ba arým amiwýr me kunĩo akẽx, ane. <sup>33</sup> Pĩte'y'ã jêt'ã ne ã memã ane.

<sup>34</sup> Nhyam me kum,

—Nhyam bê ne me kute me inhõ Bẽnjadjwýrbê kumkatibê Kritukumrẽx bĩnmã. Kritu ne tyk kêtukumrẽxmã nhyam me me imã arẽ, Mõjdjê kukràdjã'ã pi'òk no'òk kôt ne me imã arẽ ba me kuma. Be, ga ne ga atemã. Aje me imã, “Ba ije amijo inhĩja dja me kýjrũm inhõ”, anhýr kôt ba me arým akajgo ma. Be, we aje amijo anhĩjakam mýj me ajõ ga nã? ane.

<sup>35</sup> Nhyam Jeju memã kum,

—Ga, akamãt kô tykkam me ba punuja pumũ. Me kute amikukãm mýjja pumũnh kêtka

ne me ba punure. Ba ije memã pry kurwý djà pyræk ne memã Metĩndjwýnh kabēn jarēnh nhym me arým tu amim markumrēx ne ba mexkumrēx. Arek me aro'ã ar ibari dja ga me tu amim imarkumrēx ne ikabēn kôt ar amijo aba. Nok ga ren kôt amijo aba kêt ne ren me axwe kôt ajaxwen arým aje ajte me akamât kô tykkam ba punu pyræk. <sup>36</sup> Arek me aro'ã ar ibari dja ga me tu amim imarkumrēx. Ne kam arým aje mrāmri ne pry kurwý djækôt me ba mex pyræk, ane. Nãm Jeju memã anen arým mã tēn mebê amijo apdju.

*Me kute amim Jeju mar kêt.*

<sup>37</sup> Kute amijo bipdjur kētri ne me nokrekam mýjja krãptĩ nhípêx. Nãm te me punu krãptĩ mex nhym me kute amim mar kêtumrēx. <sup>38</sup> Be, amrêbê: Metĩndjwýnh kukwakam kabēn jarēnh djwýnhbê Idjaij kute me bakukãmãremã arēnh kôt ne me kute amim mar kêt. Nãm memã kum,

“Bēnjadjwýr djwýnh, mýj me'õ ne kute amim ar ikabēn mar got?

Mýj me'õ ne kute Bēnjadjwýr djwýnh djàpēnh pumũnhkam amim mar got?”

Nãm ã me bakukãmãremã ane. Nhym me arým aben djõ'ã arēnh mō:n arēnh mōr tãmtã arým tũ:mrãm me bakamingrãnyrekam arým 'ýr o bôx. Jeju te me punu krãptĩ mex nhym me me omũn amim Jeju mar kêtumrēx.

<sup>39</sup> Idjaij kute me bakukãmãremã arēnh kôt ne me me omũn amim Jeju mar kêt. Be, djãm me ta ne me kute tu amim markumrēxmã? Kati. Me ta ne me te: kute amim marmã. Be, mýkam? Bir, Metĩndjwýnh ta kute me nomê me amako bimrãkkam. Kôt ne Idjaij ajte me bakukãmãremã kum,

<sup>40</sup> “Metĩndjwýnh ne mebê nomê amako amrã.

Nhym kam me te memã mýjja jakre nhym me kukràdjã pumũnh kajgon mã omũnhkumrēx kêt.

Nhym me te memã mýjja jarē nhym me mar kumrēx kêt ne. Mã kukràdjã'ã mýjja kute amijakreja mar kêt. Ne kam iwýr amijo akēx kêt ba kam memã axwe jarēnh rã'ã ne kam ije meo mex kêt.

Me amakre kêt prãm kam ne ã meo ane”, ane.

<sup>41</sup> Idjaij ne Jeju mexo umakôt omũ ne 'ã me bakukãmãremã ujarēnh ba. Ne kam ã memã ane. Kam me ta te kute amim Jeju marmã.

<sup>42-43</sup> Be, djãm me rũnh kunĩ ne me amakre kêt prãm? Kati. Me kwý kute tu amim markumrēx. Djãm me kwý ja kute memã amijo amirĩt? Djãm me kute memã kum,

—Arým ne ba tu amim Jeju markumrēx, anhýro amijo amirĩt? Kati. Mebê pardjêu kabēn pymaje ne me kute memã amijarēnh kêt. Be, mýkam? Bir, me amim,

—Dja ba amijarēnh kêt nhym me imã imex jarēnh rã'ã. Ba ren Jeju'ã memã amijarē nhym ren me arým imã ijaxwe jarēn me nêje bôm imê. Ne ren kam ajte me bikprõnh djækam me ro'ã ikrĩ kêt, anhýro ba. Me kute amim anhýrkam ne me kute memã amijarēnh kêt ne. Djã ne Metĩndjwýnhbit kute memã mex jarēnhja me kum kĩnh? Kati. Pykakam me axwe kute memã mex jarēnhja ne me kum kĩnh. Jabit ne me kum kĩnh.

<sup>44</sup> Nhym kam Jeju kãj bê memã kum,

—Djãm me aje tu amim imarkumrēxkam ne ga me aje bajbit imar? Kati. Me aje amim imar o ne ga me aje amim ijanor djwýnh mar. <sup>45</sup> Me aje ipumũnh o ne ga me aje ijanor djwýnhdjwý pumũnh. <sup>46</sup> Ga, me kute akamât kô tykkam pry kurwý nhym pry arým amirĩtkumrēxja pumũ. Nhym



me arým ba mexkumrêx. Badjwý ne ba memã Metîndjwýnh kabên jarê. Nhyim me kwý î pýnhkôt kute tu amim kabên markumrêx ne kôt kute amijo baja ne me arým axwe kêt ne kute amijo ba mexkumrêx. Ne ajte kute akamãt kô tykkam me ba punuja pyrãk prãm kêtumrêx.

<sup>47</sup> Me ajô aje ikabên mar kajgon amim imar kêtumrêx djãm on ije amã ajaxwe pãnh jarênhmã? Me anhî pýnhkôt ajaxwe djãri pãnh jarênhmã? Djãm on pãnh atokrymã? Kati. Djãm ije memã axwe pãnh jarênh nhyim me pãnh tokrymã ne ba bôx? Kati. Ije pykakam me kunî axwebê me utãrmã ne ba bôx. <sup>48</sup> Be, me ajô aje ikangan amim ikabên mar kêtumrêx me'ô dja amã ajaxwe pãnh jarê. Me kunî kute aminhinomã amimênh djã nhô akatikam dja kajkwakam Metîndjwýnh amã, "Aje amim Ikra mar kêtumrêx", ane. Dja amã ane ga arým ajaxwe pãnh atokry.

<sup>49</sup> Mýkam dja ã amã ane? Bir, djãm ba ikabên ne ba me amã arê? Kati. Ibãm ne ikabên'ã imã karô ba arým me amã arê. Kam dja Ibãm ta amikabêno ngyrk ne me ajômã ajaxwe pãnh jarê. <sup>50</sup> Ibãm ne imã, "Dja me tu amim amarkumrêx ne arým ikôt tîn ne ar ba rã'ã: rã'ã ne", ane. Tãm ne ba ije markumrêx. Kam Ibãm kute imã kabên jarênh kôt ne ba memã arê. Nãm ã Jeju memã ane.

## 13

*Kute ar par ku'õnh.*

<sup>1</sup> Be, arým Metîndjwýnh me bakukãmãre nhirôbê mrãnh nhô akati 'ýr. Mebê idjaer kunî kute aben kajmã'ã me irôbê mrãnh djã mar kadjy aben pydji djã nhô akati 'ýr. Jeju arým kute pykakam mebê àbir 'ýr. Bãm'ýr àbir 'ýr. Ja ne arým kute mar. Arým ne kum pykakam ô me ja jabê:. Nhyim te me amakkre

kêt arým kute bîn 'ýr nhyim kum ô me abê rã'ã.

<sup>2</sup> Arým ar kute ô kwý krên parkam nhyim Djuda kute Jeju kanga 'ýr. Ximão ne Djuda dji. Djuda ja nhidji nhikjêbê ne Ikadji. Nãm kute kuré djwýnhmã kanga 'ýr. Xatanaj ne 'ã kum apnê nhyim kute memã kanga 'ýr. <sup>3</sup> Bãm arým kute Jejumã ô mýjja kunî kanga nhyim arým Bãmbê Metîndjwýnh kurûm rwýk ne kam akubyn 'ýr àbir 'ýr. Ja ne Jeju arým kute mar. <sup>4</sup> Nãm kuman kam kãjmã dja. Ar ô kwý krên parkam kãjmã djan ô kubêkã krãkão pôx ne adjuw. Ne me'ã ngô ngrã djã byn arým o amikrãx kupu. <sup>5</sup> Ne kam arým ngônh purortikam ngô run kam arým kôt ba djwýnh par ku'õnhmo krax. Ar par ku'õnh tẽ:n mã me'ã ngô ngrã djão ar par'ã ngô ngrã. O amikrãx kupu rã'ãn o ar par'ã ngô ngrã.

<sup>6</sup> Nãm ar par ku'õnh tẽ:n kam arým Ximão Pedru'ýr bôx. Nhyim kum,

—Je, djãm ba dja ga ipar ku'ô? ane.

<sup>7</sup> Nhyim Jeju kum,

—Jakam aje idjãpênh mar kêt. Dja ba î amã arê ga ama, ane.

<sup>8</sup> Nhyim kum,

—Be kati. Aje ipar ku'õnh prãm kêtumrêx, ane.

Nhyim kum,

—Dja ba apar ku'õnh kêt ga arým ikôt aba kêt, ane.

<sup>9</sup> Nhyim kum,

—Bênjadjwýr djwýnh. Djãm iparbit? Inhikramé ikrãdjwý dja ga ku'ô, ane.

<sup>10</sup> Nhyim kum,

—Be, gar arým adjwýrkam arým ar anhî mex ba kam ije ar aparbit ku'õnhmã, ane. Ne kam ar axwe kêt'ã arkum,

—Be, arým ar amex. Djãm ar akunî ne gar amex? Kati. Ar ajô apydji ne ga amex kêt, ane. <sup>11</sup> Arým kute amikukãm kuré djwýnhmã kanga djwýnh markam ne arkum,

—Djãm ar akunĩ ne gar amex? Kati, ane.

<sup>12</sup> Ne kam arým ar par ku'õnh pan kam kà jangijn kam nhÿn arkum,

—Be, mýkam ne ba ar apar ku'õ? Djã ne gar ama? <sup>13</sup> Bir, gar imã, “Ujarënh djwÿnh, Bënjadjwÿr djwÿnh”, anhÿro aba. Be, mrãmri ne gar imã arë. Ibê tãm. <sup>14</sup> Ibê ar anhõ Bënjadjwÿr djwÿnh ne ibê ar anhõ ujarënh djwÿnhkam ne ba arým amijo ingrin amijo ikâtãm ne arým ar amã apê. Ar akajgo mex, ar akâtãmmã ne ba apên arým ar apar ku'õ. Djãm ar ajõ aje, “Be, ba ne ba irax. Ije me kajgomã idjãpênh prãm kêt”, anhÿrmã? Kati. Ar gadjwÿ aben par ku'õ.

<sup>15</sup> Be, mýj kadjy ne ba ar apar ku'õ? Bir, dja gar ipumün ikudjwa arým amijo angriren akâtãm ne abenmã apê. Ja kadjy ne ba ar apar ku'õ. <sup>16</sup> Imã adjãpênhkam djãm aje araxo ijakrenh got? Ije ajanorkam djãm aje araxo ijakrenh got? <sup>17</sup> Ar aje araxo ijakrenh kêt kam dja gar amijã ije ar apar ku'õnhja man ikudjwa amijo angriren amijo akâtãm ne abenmã apê. Dja gar amijo anen arým akĩnhkumrëx.

*Djuda kute memã Jeju kanga kukãm arkum 'ã ujarënh.*

*Mat 26.21; Mak 14.18; Ruk 22.21*

<sup>18</sup> Be, djã ne ba ar akunĩmã ikabën jarë? Kati. Djãm ar akunĩ amex? Kati. Ije ar anhĩ pÿnhkõt amijo ar apytãr ba arým ije ar amar. Nhy m be, ar ajõ dja ga amã ikurê. Amrêbê: ije amikukãm arënh kõt dja ga amã ikurê. Nã bã m me bakukãmãremã kum, “Gwaj baro'ã badjãkur'õ dja kum ikurê”, ane.

Nã bã m ã memã ane nhy m me arým 'ã pi'õk no'õk ne. Nhy m me aben djõ'ã arënhõ mõ:. Arënhõ mõr tãmtã tũ:mrãm arým iwÿr o bõx. Gwaj baro'ã badjãkur'õ dja kum ikurê. <sup>19</sup> Ar ajõ amã ikurê kët ri ba arým pi'õkkam ar amã ikabën jarë.

Be, mýj kadjy? Bir, dja gar ajõ amã ikurê kõt arým omün kam arým akubyn amijo tën pi'õkkam ikabënja ma. Anhÿr djwÿnhrà m ikabën ja ma. Ne kam arým amim, “Mrãmri kõt ne amikukãm arënhkumrëx. Jëjubê ne Bënjadjwÿrbê kumkatibê Kritukumrëx”, ane. Dja gar ã anen tu amim imarkumrëx.

<sup>20</sup> Be, godja ba amũ me ano nhy m me me'ÿr bõx nhy m me arým amim me kabën man kam arým kõt badjwÿ amim ima. Ne kam arým kõt amim kute ijanor djwÿnhdjwÿ ma. Mrãmri ne ba ar amã ja jarënhkumrëx, ane.

<sup>21</sup> Jeju arkum anen arým umar punure ne. Ne kam arkum arënhõ amirĩtkumrëx ne arkum,

—Be, mrãmri dja gar ajõ ikurê djwÿnhmã ikanga. Mrãmri ne ba ar amã ja jarënhkumrëx, ane.

<sup>22</sup> Nhy m kõt ba djwÿnh te kute marmã abenkam no tyn nhÿn amim,

—Je tô, mýj me'õ'ã ne ane? ane.

<sup>23</sup> Be, kõt ba djwÿnh'õ ne Jeju tãri nhÿ. Jeju kum abêja. <sup>24</sup> Nhy m Ximão Pedru jãnh nhÿn amũ Jeju tãri ÿrja'ÿr akëx ne ar aktã aben pumũ. Ne kam kute ar 'õ jabej Jeju kukjêrmã Pedru kum inhuo Jeju jakre.

<sup>25</sup> Nhy m arým Jeju'ÿr ajkamën kum,

—Bënjadjwÿr djwÿnh, nhy m nã? Ar imã arë bar kuma, ane.

<sup>26</sup> Nhy m kum,

—Dja ba õmrõmã djwÿ jadjàn amũ kum kungã ga arým ar 'õ pumũ, ane. Ne kam arým kum adjàn amũ Djudamã kungã. Djuda nhidji 'õdjwÿbê ne Ikadj. Ximão 'õdjwÿ ne Djuda dji. <sup>27</sup> Nãm kum kungã nhy m Xatanaj arým Djudamã wadjàn 'amÿnh tÿx ne. Nhy m kam Jeju arým kum, “Ajrã, amibêx”, ane.

<sup>28</sup> Nhy m kõt ba djwÿnh kute kabën mar kajgon mÿjja'ã Jeju kute

kum kabên jarênhja ar kute mar kêt. <sup>29</sup> Djudabê ne ar ô pi'ôk kaprîo ba djwýnh. Ne kam ar kwý arík amim,

—Bârâm kute gwaj banhõ kwý krên djà'õ byrmã ne ano. Me krãptî kute aben pydji djà nhõ akati kadjy kute mýjja byrmã ne ano. Nâr, kute me ô mýjja kêt mã mýjja kwý nhõrmã ne ano, ane. <sup>30</sup> Nãm Jeju kum djwý ngã nhym arým kubyn mã kadjy katon tẽ. Arým akamãtkam ne tẽ.

*Pedru 'êxnhî kukãm kute kum arênh.*

*Mat 26.31; Mak 14.26; Ruk 22.31*

<sup>31</sup> Djuda kato nhym Jeju arým kôt ba djwýnhmã kum,

—Ije amijo inhî ne ar ibaja dja me jakam arým iraxmã kato ba memã irax. Nhym kam me arým ikôt kâjkwakam Metîndjwýnh raxmã kato. <sup>32</sup> Nhym kam arým memã ra:x ne uma:n kam arým amiraxo badjwý ijo rax. On dja ijo ra:x ba ipyma:.

<sup>33</sup> Akmere ar, gwaj baro'ã ar babaja arým kêt 'ýr. Dja gar ijabej ar aban te idjãm djà'ýr abõx prãmje. Nã bãm ã mebê idjaer rûnhmãdjwý ane. Ar gadjwý ba arým ã ar amã ane.

<sup>34</sup> Be, ba ar amã 'ã karõ. Ikabên ny ne ba ije ar amã arênhmã. Dja gar aman mã kôt amijo aba mex ne amã aben jabê. Kute imã ar ajabê pyrãk ã ar amã aben jabêo ane. <sup>35</sup> Nhym kam me kâtãm kunî arým ar ajã abenmã kum, “Be, Jejukôt ba djwýnhkumrêx ne wã. Ga, arkum aben jabêwã pumũ.” Dja me ã ar ajã abenmã ane. Nãm ã Jeju arkum ane.

<sup>36</sup> Nhym Ximão Pedru kum,

—Bênjadjwýr djwýnh, jãm ne ga atêmmã? ane.

Nhym kum,

—Bir, dja ba tẽ ga arým te on idjãm djà'ýr ikôt atêm prãmje. Kam dja ga tûmrãm arým ikôt tẽ, ane.

<sup>37</sup> Nhym Pedru arík kum,

—Bênjadjwýr djwýnh, mýkam dja ba te on adjãm djà'ýr akôt itêm prãmje? Dja me kum abîn prãm ne ikumrêx ibîn kam abî, ane.

<sup>38</sup> Nhym kum,

—Djãm me kute akumrêx abîn ne kam ibînmã got? Be, dja me ijo mõ, ga ôkrên'ãnh kâr kêttri amijã maje ajêxo amãnhkrut ne ikjêkêt ne ijã memã kum, “Kati. Ije me'õwã pumũnh kêtikumrêx”, ane. Nhym arým ajã ôkrên'ãnh kã. Mrãmri ne ba amã ja jarênhkumrêx. Nãm ã kum ane.

## 14

*Kute kôt ba djwýnhmã tỳx jadjãr.*

<sup>1</sup> Ne kam ajte arkum,

—Kwãrik wãnh ba ar akadjy tẽ gar axwe amikam adjumar kêt. Dja gar tu amim Metîndjwýnh markumrêx. Badjwý dja gar tu amim imarkumrêx. <sup>2</sup> Onj Ibãm nhõ kikretikam me ûrkwã krãptî. Djã ne ren kêt ba ren arým ar amã, “Kati, kêt”, ane. Nhym be, kati. Mrãmri ne Ibãm nhõ kikretikam me ûrkwã krãptîkumrêx. Ba arým 'ýr itêmmã. Dja ba 'ýr tẽn 'ýr bõx ne arým ar akutêp ar amã anhûrkwão mex. <sup>3</sup> Dja ba ar anhûrkwão mex kadjy tẽ:n kam akubyn ajte ar awýr bõx. Ne kam arým mã amikôt ar adjan ar ajo tẽ. Be, mýj kadjy? Bir gwaj arek baro'ã ar baba kadjy. <sup>4</sup> Be, idjãm djã gar arým ama. 'Ýr ipry gar arým ama. Kwãrik wãnh axwe amikam adjumar kêt, ane.

*Memã pry'ã ujarênh.*

*Kar 4.12*

<sup>5</sup> Nhym Tôme arým kum,

—Jãm atêmmã ja ar ije mar kêt ne ar ije apry kraxdjwý omũnh kêt. Mýj dja bar nẽn kum ikato? ane.

<sup>6</sup> Nhym Jeju kum,

—Bir, ba mrãmri ije 'ýr me pry pyrãk. Dja me tu amim imarkumrêx ba arým Ibãm'ýr meo bõx. Bajbit ije memã katãt ikabên jarênhkumrêx ne ije memã tîn

jangjênh nhym me Ibâmkôt tîn ne ar ba râ'â: râ'â ne. Djâm Ibâm'ÿr me o bôx kadjy me'ôdjwÿ? Kati. Bajbit ne ba 'ÿr meo bôx. <sup>7</sup>Ne ga ren ar aje imarkumrêx ne ren arÿm Ibâmdjwÿ ma. Be, arÿm ba ar amã arê gar arÿm aman omũ, ane.

<sup>8</sup> Nhym Piripi kum,

—Bênjadjwÿr djwÿnh, ar imã Abâm jakre bar omũ. Ne kam arÿm ikînh ne, ane.

<sup>9</sup> Nhym Jeju kum,

—E kum Piripi, djâm gormã ne ga ikôt ar aban aje imarn ipumÿnhja kêt? Be, me kute ipumÿnh o ne me arÿm Ibâmdjwÿ pumũ. Mÿkam ne ga imã, “Ar imã Abâm jakre bar omũ?” ane. <sup>10</sup> Be, Ibâmmê ne bar itipdjîn ar iba. Djâm aje amim imar kêt? Ije ar amã ikabên jarênhja ba ba ije arênh kêt. Djâm ba ne ba idjâpênh ar iba? Kati. Ibâm ne ar ijo ban âpênh ar ba. <sup>11</sup> Be, Ibâmmê ne bar abenã itipdjîn ar iba. Ja dja gar aman tu amim imarkumrêx. Nâr idjâpênhkôt imã akaton tu amim imarkumrêx.

<sup>12</sup> Me kute tu amim ikamnhîxkumrêx gêdja me idjâpênh o apê. Gêdja me âpênh o ijakre. Be, mÿkam? Bir, arÿm Ibâm'ÿr itêmkam dja me âpênh o ijakrenh mex ne. Mrâmri ne ba ar amã ja jarênhkumrêx. <sup>13</sup> Dja gar amijo Metîndjwÿnhmã a'wÿ. Tu amim imarkumrêx ne kum amijo a'wÿ ba kam ar aje kum arênh kôt ã ar amã o ane. Be, mÿj kadjy? Bir, dja ba kôt memã Ibâm ra: xo amirît. Ja kadjy dja ba ar aje kum arênh kôt ã ar amã o ane. <sup>14</sup> Ikukwakam dja gar kum mÿjja kunîo a'wÿ ba kam ar aje kum arênh kôt ã ar amã o ane.

*Arkum Metîndjwÿnh Karô'ã ujarênh.*

### *Kar 2.2*

<sup>15</sup> Gar mrâmri amã ijabê jabej mã ikabên man kôt ar amijo aba. Ije amrânh mex'ã ar amã karô kôt dja gar amijo aba. <sup>16</sup> Dja ba kam arÿm ar ajo Ibâmmã a'uw nhym

arÿm ar amã ajo kînh djwÿnh 'ôdjwÿ jano. Nhym kam arÿm arek ar aro'ã ar ba râ'â: râ'â ne. <sup>17</sup> Karô dja ar amã ano. Karô kute katât memã ikabên jarênhkumrêx. Me kum Metîndjwÿnh kînh kêtjamã dja Karô janor kêt. Be, mÿkam? Bir, mebê Karô bipdjur nhym me kute mar kêt kam dja memã anor kêt. Ar ga ne gar atemã. Arÿm aje mar. Karô arek ar aro'ã ar bakam aje mar. Dja arek ar aro'ã ar ba râ'ã.

<sup>18</sup> Djâm ije ar amã inhirer gar aje me 'uwti pyrâk ne akaprîn ar abamã? Kati. Ba dja ba mrâmri ar awÿr ibôxkumrêx.

<sup>19</sup> Dja ijã akati ngrêre ba arÿm me kum ikînh kêtjabê amijo apdju. Ar gajbit dja ba ar abê amijo ibipdjur kêt. Itînkôt dja gar gadjwÿ atînkumrêx. <sup>20</sup> Kam dja gar amim, “Be, mrâmri ne Jeju Bâmmê tipdjîn ar ba. Badjwÿ ne ba Jejumê itipdjîn ar iba. Jejudjwÿ ne imê tipdjîn ar ba.” Djã gãm ar ã amim ane. <sup>21</sup> Mÿj me'ô ne mrâmri kum ijabêkumrêx? Bir, ba ne ba me kute katât amijo ba'ã memã karô. Dja me kam amim ikabên man kôt ar amijo ba. Me ja ne me mrâmri kum ijabêkumrêx. Dja me mrâmri kum ijabêkumrêx nhym Ibâmdjwÿ arÿm kum me abê. Badjwÿ dja ba imã me abên arÿm ikabêno memã amijo amirît nhym me arÿm mrâmri imarkumrêx, ane.

<sup>22</sup> Nhym Djuda 'ôdjwÿ. Djâm Djuda Ikadjji? Kati. Djuda 'ôdjwÿ Jejumã kum,

—Be, mÿkam dja ga ar bajbit ar imã amijo amirît? Mÿkam dja ga me kunimã amijo amirît kêt? ane.

<sup>23</sup> Nhym Jeju kum,

—Bir, me kum ijabê dja me ikabên man kôt ar amijo ba. Nhym kam Ibâm arÿm kum me abê bar kam arÿm me'ÿr bôx ne ar meo iba. <sup>24</sup> Nhym be, me kum ijabê kêtja dja me ikabên mar kêt ne kôt amijo ba kêt ne tu ate krân amidjwÿnhbit ma.

Be, ije ar amã ikabên jarênh gar aje marja djâm ba ikabên? Kati. Ibâm kute ijanor djwýnh kabên ne ja.

<sup>25</sup> Gwaj baro'ã ar babari ne ba ar amã ikabên ja jarê. <sup>26</sup> Dja ba mã tẽ nhym ar ajo kînh djwýnh arým ar amã ikabên jarê. Metîndjwýnh Karôja tãm dja arým ar amã arê. Ije amrêbê ar amã ikabên jarênh ja kunîkôt dja ar amã arê. Kàjkwakam Ibâm dja ar amã Karô jano nhym arým bôx ne ar amã ikabên jarê. <sup>27</sup> Itêm tekrekam dja gar ikabênkôt adjumar mex. Idjumar mex kôt adjumar mex. Djâm me kum ikînh kêtja kabênkôt adjumar mexmã? Kati. Tãm ne kajgo. Ba ikabên kôt dja gar adjumar mex ne mrâmri adjumar mexkumrêx. Kwârîk wãnh amikukãm axwe adjumar ne atîn prãm kêt.

<sup>28</sup> Ôbê ne ba arým ar amã, “Dja ba mã tẽn kam akubyn ajte ar awýr tẽn bôx”, ane. Ga ren ar mrâmri amã ijabêkumrêx ne ren akînhkumrêx. Ije ar amã Ibâm'ýr idjâbir jarênh ar aje markam ne gar ren akînhkumrêx. Be, mýkam? Bir, kàjkwakam Ibâm kute raxo ijakrenhkam. <sup>29</sup> Be, jakam ba arým ar amã arê. Idjâbir kêttri ba ar amã arê. Dja ba wabi gar kam ikabênja man arým tu amim imarkumrêx.

<sup>30</sup> Jakam dja ba arým ar amã ikabên jarênh kwý ngri. Be, mýkam? Bir, arým Xatanaj bôx 'ýr. Me kum ikînh kêtja nhô bënjadjwýr iwýr bôx 'ýr. Djâm iwýr bôxkam kute ijo bamã? Arkati. <sup>31</sup> Dja ba Ibâm kabên kôt ar amijo iba. Ibâm kute imã 'ã karô kôt ar amijo iba nhym kam me kum ikînh kêtja arým ima. Dja me amim, “Mrâmri kum Bãm jabêkumrêx”, ane. Tãm dja me kuma. Kàjmã ar dja. Gwaj on 'ýr. Nãm Jeju ã kôt ba djwýnhmã ane.

## 15

*Kute amikukràdjã'ã akrô jakren 'ã ujarênh.*

<sup>1</sup> Ne kam apýnh akrô kukràdjã'ã ajarênh arkum,

—Be ga, atemã akrô djôja pumû. Ba ne ba ije akrô bàri pyræk. Ibâm ne kute akrôo djuw mex djwýnh pyræk. Ar ga ne gar aje akrô bàrikam apýnh pa pyræk.

<sup>2</sup> Ga, akrôo djuw mex djwýnh kute akrô pa kajgo rênhja pumû. Pakam ô kêt kam ne kurê. Ibãmdjwý kum me kute imar kajgo kînh kêt ne wãnh me kanga. Mýkam? Bir, me kute imar kajgo ne ukaprî kêt ne axwe ar ba. Kute mrâmri ne akrô pakam ô kêt pyræk. Kam ne wãnh me kanga. Ga, akrô pa kwýkam ôja pumû. Nhym o djuw mex djwýnh kute 'ã ingrà kajgodjwý rênh. Akrô pakam ôbit krãptî kadjy ne kurê. Ibãmdjwý kum me kute tu amim imarkumrêxja kînh. Ne kam arým mebê mýjja kajgo kunî kurê. Mýj kadjy? Bir, dja me amim imar 'ãno djan mýjja kajgo mar kêt. Ne kam arým ukaprî:n katât ar amijo ba. Ne kam mexkumrêx kute akrô pakam ô kumexkam mexkumrêx pyræk. Ja kadjy ne mebê mýjja kajgo kunî kurê.

<sup>3</sup> Be, ar aje akrô bàrikam apýnh pa pyræk. Arým ar amex. Ije ar amã ikabên jarênhkôt arým ar amex.

<sup>4</sup> Dja gar arek ijamýnh týxkumrêx ne tu amim imar týxkumrêx ne ijã adjukanga kêt kumrêx. Badjwý dja ba arek ar ajamýnh týxkumrêx. Djâm akrô pa arek akrô bàri 'amýnh kêt kam ô got? Arkati. Ar gadjwý dja gar ijamýnh kêt ne ijã adjukanga djâm kam amex? Kati. Te amex prãmje kute akrô pakam ô kêt kam mex kêt pyræk.

<sup>5</sup> Ba ije akrô bàri pyræk. Ar ga ne gar aje bàrikam apýnh pa pyræk. Dja gar arek ijamýnh týx ne tu amim imar týxkumrêx ne ijã adjukanga kêt kumrêx. Ba badjwý dja ba arek ar ajamýnh týx. Kam dja gar katât ar amijo aban adjukaprî:n amexkumrêx kute akrô

pakam ô mexkumrêx ne kumexja pyrâk. Djâm aje amim imar kêt kam amex prâm got? Dja ga ijâ adjukan-gan arým te amex prâmje. <sup>6</sup> Dja me amim imar rerekren ijâ ukanga nhym Metîndjwýnh arým wânh me kanga. Ga, akrô pa ate bàri'ã arij nhym o djuw mex djwýnh kute rênh ne wânh rênh nhym arým ngrâja pumû. Nhym kam me kute o atom ne kuwykam rênh nhym xêtja pumû.

<sup>7</sup> Gêdja gar arek ijamýnh tÿx ne tu amim imarkumrêx ne ijâ adjukanga kêt ne tu amim ikabên mar tÿxkumrêx nhym kam Ibâm arým akabênkôt ã amã o ane. Dja gar amã mÿjja kînh ne kum o a'uw nhym arým akabênkôt ã amã o ane. <sup>8</sup> Dja gar amexkumrêx ne katât ar amijo aban adjukapri kute akrô pakam ô mexkumrêx ne kumexja pyrâk. Nhym me amex ja pumûn arým Ibâm raxmã kato. Dja gar ã amijo anen arým abê ikôt aba djwýnhkumrêx.

<sup>9</sup> Imã ar ajabê kute mrâmri ne Ibâm kum ijabê pyrâk. Dja gar tu imã ar ajabêja markumrêx ne ar amã ijabê'ã adjukanga kêt. <sup>10</sup> Gêdja gar mã ikabênja man kôt ar amijo aba. Ije ar amã katât aje amijo aba'ã karôkam ikabênja man kôt ar amijo aba. Ne kam arým ar amã ijabê'ã adjukanga kêt. Ga, ije Ibâm kabên kôt amijo ibaja pumû. Ba kam imã Ibâm jabê'ã idjukanga kêt.

<sup>11</sup> Be, mÿj kadjy ne ba ar amã ikabên ja jarê? Bir, dja gar ikabên man arým ikînh akînh. Akînh ne akînh rã'ân akînh tire. <sup>12</sup> Be, ar amã aben jabêmã ne ba abenã ar amã karô. Amã aben jabê kute mrâmri ne imã ar ajabê pyrâk. <sup>13</sup> Djâm ije inhôbikwa kadjy itykkam imã inhôbikwa jabê ngri got? Imã abêo katât me kunî jakre. <sup>14</sup> Dja ba ar amã katât aje amijo aba'ã karô gar ikabên man kunîkôt ar amijo aba

ba arým ar ajo inhôbikwakumrêx.

<sup>15</sup> Djâm jakam ije ar amã, “Inhô ãpênh”, anhÿrmã? Kati. Ne ga ren ar abê inhô ãpênhbit ba ren ar amã adjápênh djâbit jarê gar ren jabit man ren kam aje ikabên kunî mar kêt. Nhym be, kati. Ibâm kute imã kabên jarênh ja ba arým ar amã kunî jarê. Ije ar amã Ibâm kabên kunî jarênhkam arým ije jakam ar amã, “Inhôbikwa”, anhÿrmã.

<sup>16</sup> Djâm ar ga ne gar amijo ipytã? Kati. Ba ne ba amijo ar apytàn arým ar adjápênh djâ'ã ar amã karô. Be, mÿj kadjy? Bir, dja gar katât ar amijo aban adjukaprikumrêx ne memã ijâ adjujarênh mô. Ne kam arým Metîndjwýnhmã amexkumrêx rã'ã. Kum amexkumrêx rã'ã ne arým aje mrâmri ne akrô pakam ô mexkumrêx ne kumexja pyrâk. Ja kadjy ne ba adjápênh djâ'ã ar amã karô. Mÿj kadjy dja gar ã amexo ane? Bir, dja gar ikuk-wakam mÿjja'ã Ibãmmã a'uw nhym arým ã ar amã o ane. Ar aje kum arênh kôt ã ar amã o ane. Ja kadjy dja gar ã kum amexo ane. <sup>17</sup> Ar amã aben jabêmã ne ba abenã ar amã karô.

*Me kum Metîndjwýnh kînh kêtja'ã ujarênh.*

*Mat 10.16,22; Dju r 7.7; Pir 1.29; A Xim 3.12; Dju k 3.13*

<sup>18</sup> Be, dja me kum Metîndjwýnh kînh kêtja kum ar akurê jabej. Ikumrêx ne me ã kum ikurêo ane. Ja dja gar ama. <sup>19</sup> Ne ga ren ar me kum ikînh kêtja jaxwe kôt ajaxwe nhym ren me kum ar ajabê ne. Nhym be, kati. Me axwe kôt ajaxwe kêt. Ba ne ba amijo ar apytàn mebê amikôt ar apumjuw. Kam ne me kum ikînh kêtja kum ar akurê.

<sup>20</sup> Ba arým ar amã, “Ar abê inhô ãpênhkam djâm aje araxo ijakrenh got”? ane. Djâm ar aje araxo ijakrenh got gar amim, “Kati. Dja me ijo bikênh kêt”, anhÿro aba? Kati. Ikôt dja me ar ajo

bikēnhkumrēx. Nhyim be, me kwỳ kute amim ikabēn mar kôt dja me amim ar akabēndjwỳ ma. <sup>21</sup> Be, mỳkam dja me ar ajo ajkē? Bir, ikôt ar abakam. Me kute ijanor djwỳnh mar kêt kam dja me ar ajo ajkē. <sup>22</sup> Ne ba ren me'yr ibôx kêt ne ren memã ikabēn jarēnh kêt nhyim Metĩndjwỳnh ren memã axwe jarēnh kêt. Nhyim be, kati. Arỳm ne ba me'yr bôx ne memã ikabēn jarē nhyim me kute amim imar kêt. Kam dja mrãmri memã axwe jarēnhkumrēx. Jakam dja me te Metĩndjwỳnhmã kum, “Kati. Ijaxwe kêt”, anhỳrmã.

<sup>23</sup> Be, me kum ikurêja kum Ibãmdjwỳ kurê. <sup>24</sup> Ne ba ren ije me nokrekam mỳjja pumũnh kêt kwỳ nhipêx kêt nhyim ren me omũnh kêt nhyim Metĩndjwỳnh ren memã axwe jarēnh kêt. Nhyim be, kati. Arỳm me kute omũnhkam ne me kum ikurên kum Ibãmdjwỳ kurê.

<sup>25</sup> Me kum ikurêja'ã ne me bakukãmãre amrêbê: pi'ók no'ók ne. Ba ne ba kam amikukãm memã kum,

“Ajmã ije meo kêt kam ne me kum ikurê.”

Nã bãm ã memã ane nhyim me arỳm kukràdjakam 'ã pi'ók no'ók ne. Nhyim kam me aben djô'ã arēnh mō:n arēnh mōr tãmtã arỳm iwỳr o bôx. Tũ:mrãm iwỳr o bôx. Nhyim me kamingrãnyre arỳm kum ikurê. Ajmã ije meo kêt kam me kum ikurê.

<sup>26</sup> Be, dja ba Ibãm 'yr wabin 'yr bôx ne arỳm ar amã ar ajo kĩnh djwỳnh jano, ar amã Metĩndjwỳnh Karô jano. Ta dja katãt memã kabēn jarēnhkumrēx. Ibãm kurũm dja tẽ. Dja ba ar amã ano nhyim bôx. Ne kam kute ipumũnh kôt arỳm ar amã ijã ajarê. <sup>27</sup> Ar gadjwỳ gédja gar ijã memã adjujarēnh aba. Idjãpēnh kraxkôt iro'ã ar abakam aje ipumũnh kôt memã ijã adjujarēnh aba.

## 16

<sup>1</sup> Ar aje ibê amijo akêx kêt kadjy ne ba ar amã ikabēn jarê. <sup>2</sup> Me bikprônh djakam dja me ar akan-gan me nêje bôm ar amê. Ne arĩk ar ajã amim, “Dja ba ar kupa nhyim kôt Metĩndjwỳnh arỳm kum ikĩnhkumrēx”, anen arỳm ar abĩ. <sup>3</sup> Me kute Ibãmmê ar imar kêt kam dja me ã ar ajo ane.

<sup>4</sup> Djãm amrêbê ne ba ar amã ikabēn ja jarēnh tẽ? Kati. Gwaj baro'ã ar babari ne ije ar amã arēnh kêt. Ajbir ne ba ar abê idjãbir kutã ar amã arê. Dja ba wabi nhyim me arỳm ar ajo bikēho ba. Kam dja gar akubyn ije ar amã ikabēn jarēnh ja'yr amijo bôx ne arỳm aman amim, “Be, mrãmri kute imã arēnh kôt ne me arỳm jakam ã ijo bikēho bao ane”, ane.

*Metĩndjwỳnh Karô kute ô me jao bamã.*

<sup>5</sup> Jakam ba arỳm kute ijanor djwỳnh'yr idjãbirmã. Kam ne gar aje imã, “Jãm dja ga tẽ”? anhỳr kêt. <sup>6</sup> Be, mỳkam? Bir, ba ije ar amã idjãbir jarēnh gar akaprĩ raxkam ne gar aje ikukjêr kêt. <sup>7</sup> Kwãrĩk wãnh ar akaprĩ kêt. Dja ba wabin arỳm ar amã ajo kĩnh djwỳnh 'ôdjwỳ jano. Metĩndjwỳnh Karô jano nhyim ar awỳr bôx gar adjumar mexkumrēx. Ba ren idjãbir kêt nhyim ren Karô ar awỳr bôx kêt. Nhyim be, kati. Dja ba idjãbirkumrēx ne ar awỳr anorkumrēx. Mrãmri ne ba ar amã ja jarēnhkumrēx.

<sup>8-11</sup> Mrãmri dja Metĩndjwỳnh Karô pykakam bôxkumrēx. Ne kam ta arỳm mã pykakam me axwemã kum, “Mrãmri ajaxwekumrēx”, anhỳro ba. Nhyim kam me arỳm kôt amijaxwe maro ba. Be, mỳkam? Bir, me kute amim imar kêt kam ne me axwe. Dja Metĩndjwỳnh Karô ta arỳm mã memã kum, “Jeju katãt kute amijo bakumrēx”, anhỳro ba. Nhyim kam me arỳm kôt ikatãtkumrēx maro ba.

Be, mỳkam? Bir, Ibām'yr idjābir gar aje ipumūnh kêt kam dja me mrāmri ikatāt kumrêx maro ba. Dja Metīndjwýnh Karō ta arým mã memã kum, “Dja ga ajaxwe pānh atokry”, ane. Nhy kam me arým kôt amimaro ba. Be, mỳkam? Bir, dja me kum ikīnh kêtja nhō bēnjadjwýrbê Xatanaj tokry. Axwe pānh tokry. Dja me ja man arým amimaro ba, amijaxwekam pānh tokry mã maro ba.

<sup>12</sup> Be, ba te ije ar amã ikukràdjã kumex jarēnh prāmje. Ar aje ikukràdjã kumex mar kadjy ne gar ajamak mex kêt rã'ã. <sup>13</sup> Kwārīk wānh rã'ã. Dja ī Metīndjwýnh Karō bōx. Kute memã katāt kabēn jarēnhkumrêxja bōx. Ne kam arým ar ajo ba gar ikabēn katāt kunī ma. Djām ta ne kute amikabēn jarēnhmã? Kati. Ba dja ba kum arē nhy arým ar amã kute ikabēn marja jarē gar arým ama. Dja ar akukām apýnh mýjja apōx djwýnh rām ar amã arē gar arým ama. <sup>14</sup> Ba dja ba kum ikabēn jarē nhy kuman arým ar amã arē. Kute ar amã ikabēn jarēnhkam dja ijo rax gar arým ira:xmã akaton ama. <sup>15</sup> Be, ba Ibām kabēn o ikabēnkam ne ba ar amã, “Ba dja ba Karōmã ikabēn jarē nhy kuman arým ar amã arē”, ane.

<sup>16</sup> Arým itēm 'yr. Dja ba tē gar arým ipumūnh kêt. Nhy kam ijã akati ngrêre gar ajte ipumū. Ibām'yr idjābir 'yr. Kam dja gar ajte ipumū. Nām ã Jeju kôt ba djwýnhmã ane.

*Ar'yr ar kīnh djã bōx kadjy kute arkum arēnh.*

<sup>17</sup> Nhy kôt ba djwýnh kwý ar abenmã kum,

—Nām gwaj bamã, “Arým itēm 'yr. Dja ba tē gar arým ipumūnh kêt. Nhy kam ijã akati ngrêre gar arým ajte ipumū”, ane. Ne, “Ibām'yr idjābir 'yr. Kam dja gar

ajte ipumū”, ane. Be, mýj'ã ne gwaj bamã ja jarē? ane. <sup>18</sup> Ne kam,

—Kute gwaj bamã, “Akati ngrêre”, anhýrkam mýj'ã ne kute gwaj bamã ja jarē? Gwaj te baje mar prāmje, ane.

<sup>19</sup> Be, ar kute kukjêr prām kôt ne Jeju arým ar kuma. Ne kam arkum,

—Djã ne gar bit aje ikukjêrmã? Ije ar amã, “Arým itēm 'yr. Dja ba tē gar arým ipumūnh kêt. Kam dja ijã akati ngrêre gar arým ajte ipumū”, anhýr. Ije ar amã anhýrkam djã ne gar aje bit abej ikukjêrmã?

<sup>20</sup> Ba ar amã arē gar ama. Dja gar muw ne akaprī rax. Nhy be, me kum ikīnh kêtja dja me kīnh. Dja gar akaprī tēn kam ī arým akīnhkumrêx. Mrāmri ne ba ar amã ja jarēnhkumrêx.

<sup>21</sup> Be, me nire kra àkam kaprīre. Me kra bixadjwýr 'yr nhy me kaprīre. Ne kam me kra bixadjwýrkam arým kaprīo aknon mar kêt ne. Me kīnhkam ne me arým kaprīo akno. <sup>22</sup> Dja gar ã akaprīn ajte akīnho ane. Jakam gar akaprī. Kwārīk wānh rã'ã. Dja gwaj ajte aben pumū gar akīnhkumrêx. Nhy kam me arým te kute ar amã akaprī jadjãr prāmje.

<sup>23</sup> Gwaj baje ajte aben pumūnhkam dja gar imã adjã'wýr prām kêt. Ne kam ikukwakam Ibām tamã mýjjao a'uw nhy arým ã ar amã o ane. Mýjja kunīo ikukwakam kum adjã'wýrja dja ã ar amã o ane. Mrāmri ne ba ar amã ja jarēnhkumrêx. <sup>24</sup> Kraxje ar aje ikukwakam Ibāmmã adjã'wýr kêt rã'ã. Ikukwakam kum a'wý nhy arým ã ar amã o ane. Ar akīnhtire kadjy dja ã ar amã o ane.

<sup>25</sup> Be, Ibām kukràdjã'ã ne ba pykakam apýnh mýjja jakren ar amã arē nhy kukràdjã kwý ar abē bipdjur. Adjým, dja ba ī ar amã ã arēnho anhýr kêt. Dja ba ar amã Ibām kukràdjã jarē nhy ar amã amirītkumrêx ne ar abē bipdjur kêt. <sup>26</sup> Amrē akati mōrjakam ije ar



ajo Ibämmã idjà'wỳr prãm kêt. Ar ga dja gar ikukwakam kum a'uw nhym arỳm ar ama.

<sup>27</sup> Be, mỳkam? Bir, ta kum ar ajabêkam. Ar amã ijabêkam ne ta kum ar ajabê. Ije ar amã, “Ta ne ijano ba tẽ”, anhỳr gar aje tu amim ikabên markumrêxkam ne ta kum ar ajabê. Dja gar kum a'uw nhym ta arỳm ar ama. <sup>28</sup> Ibãm kurũm ne ba amrê tẽn pykamã bôx. Dja ba jakam pyka kurũm Ibãm'ỳr tẽn arỳm 'ỳr bôx, ane.

<sup>29</sup> Nhym kôt ba djwỳnh kum,

—Be, jakam ne ga arỳm imã akabên jarênho amirĩtkumrêx. Aje akukràdjã'ã pykakam mỳjja'ã adjujarênhja jakre kêt. Ga tu akukràdjã jarênho amirĩtkumrêx. <sup>30</sup> Jakam bar arỳm amim ama. Mrãmri ne aje mỳjja kunĩ markumrêx. Jakam ar ije ajte akabên jabej akukjêr prãm kêtumrêx. Be, mrãmri ne ga kàjkwakam Metĩndjwỳnh kurũm tẽn abôxkumrêx, ane.

<sup>31</sup> Nhym Jeju arkum,

—Djãm jakam ne gar mrãmri tu amim imar tỳxkumrêx? Kati. <sup>32</sup> Adjỳm, dja gar amidjwỳnhbit man ĩ ibê ajmã. Me umaje ibê ajmã ba arỳm ate dja. Be, djãm mrãmri ba ate idjãmmã? Kati. Ibãm kute imê amijo kajkepkam dja ba ate idjãm kêt.

<sup>33</sup> Be, mỳj kadjy ne ba ã ar amã ane? Bir, dja gar ĩ ije ar amã ikabên jarênhja man arỳm tu amim markumrêx. Ne kam arỳm ikanàrrãm adjumar mex ne ar aba. Be, me kum ikĩnh kêtja kôt dja gar arek ar aba nhym me ar ajo bikênho ba. Kwãrĩk wãnh kam ar akapřĩ kêt. Ba ne ba itỳxo ije me kum ikĩnh kêtja jakrenh mex ne. Nãm ã Jeju kôt ba djwỳnhmã ane.

## 17

*Jeju Metĩndjwỳnhmã amijo à'wỳr.*

<sup>1</sup> Nãm arkum anen kam kàjmã ôkren kàjkwa jabên Bämmã kum,

—Djũnwã, arỳm itokry'ã myt bôx. Dja ga memã iraxo amirĩt gê me iraxmã kato. Dja me iraxmã kato ba arỳm memã araxo amirĩt nhym me gadjwỳ araxmã kato. <sup>2</sup> Be, mỳjkôt dja me gu baraxmã kato. Bir, aje me kadjy ijã Bẽnjadjwỳr djwỳnh mênhkôt. Apỳnh pyka djãri kunĩkôt dja ba me kunĩmã nhỹ. Ne kam arỳm me kwỳmã tĩn jadjã. Aje mã ikôt me kamênhja kunĩmã tĩn jadjã nhym me arỳm gu bakôt tĩn ne ar ba rã'ã: rã'ã ne. Ja kadjy ne ga ijã Bẽnjadjwỳr djwỳnh mē. Kôt dja me kum gu bakĩnhkumrêx.

<sup>3</sup> Be, mỳj ne me kute marmãn arỳm gu bakôt tĩn ne ar ba rã'ã: rã'ã ne? Bir, dja me amim, “Kàjkwakam Metĩndjwỳnh pydji. Mrãmri ne kubê Metĩndjwỳnhkumrêx. Mrãmri ne kute pykamã Jeju janorkumrêx”, anhỹro ba. Ja ne me kute marmã. Me kute mar ne tu amim gu bamarkumrêxmã. Dja me tu amim gu bamarkumrêx ne arỳm gu bakôt tĩn ne ar ba rã'ã: rã'ã ne.

<sup>4</sup> Pykakam ar ibari ba arỳm memã araxo amirĩt nhym me kwỳ arỳm kum akĩnhkumrêx. Aje adjãpênh djã'ã imã karõ kôt ba apên arỳm 'ã aminhinomã amimê. <sup>5</sup> Jakam badjwỳ dja ga memã iraxo amirĩt gê me ira:xmã kato. Adjakam mỳjja kunĩ kator kêttri gu ar baba. Kam gu bara:x. Amrêbê: gu baraxja kôt dja ga jakam ijo rax.

*Kute Bämmã kôt ba djwỳnhho à'wỳr.*

<sup>6</sup> Ga ne ga arỳm me bê anhõ me kwỳo akêx. Me kum akĩnh kêtja bê anhõ me kwỳo akêx ne mã ikôt me kamê. Ba kam arỳm memã ajo amirĩtkumrêx ne. Nhym kam me arỳm akabên man kôt ar amijo ba. <sup>7</sup> Arỳm me kute imarn arỳm ijã amim, “Jeju ne Metĩndjwỳnh kukwakambit ãpênh ne kabên jarênho ba”, anhỹro ba. Ja ne me kute mar. <sup>8</sup> Aje akabên'ã imã karõ kôt ba memã arê nhym me arỳm tu amim markumrêx ne mã kôt

ar amijo ba. Ne mã ijã amim, “Mrãmri kàjkwakam Metĩndjwýnh kurũm ne tẽn bõx. Mrãmri ta ne kute anorkumrẽx nhym arým tẽn bõx”, ane.

<sup>9</sup> Djãm pykakam me kum akĩnh kêtjao ne ba amã a'uw? Kati. Aje ikõt me kamẽnhjao ne ba amã a'uw. <sup>10</sup> Ga ne ga arým inhõ me kunõ anhõ. Badjwý ne ba arým anhõ me kunõ inhõ. Gu baro'ã arým meo banhõ. Nhym me arým memã iraxo amirít. <sup>11</sup> Djũnwã, amexti:ren akatátkumrẽx. Jakam dja ba arým awýr tẽn arým pykakam me kum akĩnh kêtjamẽ ro'ã ar iba kêt. Nhym be, gu banhõ me ne me pykakam me kum akĩnh kêtjamẽ ro'ã ar ba rã'ã.

Djũnwã, prĩne amexkam dja ga amim gu banhõ me utàn meo aba. Ga ne ga ikõt me kamẽ. Me kum aben jabẽn axikõt kabẽn kadjy dja ga me utàn meo aba. Gu bamã aben jabẽn baje axikõt bakabẽn pyrãk gẽ me ã kum aben jabẽn ã axikõt kabẽno ane. <sup>12</sup> Pykakam me kum akĩnh kêtjamẽ ro'ã ar ibari ne ba akukwakam me utàn ar meo iba. Aje ikõt me kamẽnhja ne ba me utàn ar meo iba nhym 'õ bi-knor kêtumrẽx. Ikõt ba djwýnhbê Djuda pydji ne axwekumrẽx. Pydjibit dja arým akuno. Amrẽbê me ikukãmãre kute 'ã pi'òk no'òk kõt dja akuno.

<sup>13</sup> Be, jakam ne ba arým awýr idjãbir 'ýr. Pykakam ar ibari ba amã ikabẽn ja jarẽ. Me kute amã ikabẽnja mar kadjy ba amã arẽ. Dja me kuman arým mrãmri ikĩnh kĩnhkumrẽx. <sup>14</sup> Arým me kum akĩnh kêtja kum gu banhõ me kurẽ. Be, mýkam? Bir, nã bãm memã akabẽn jarẽ nhym me arým tu amim markumrẽx. Ne kam arým ate mebê amijo ba. Me kum akĩnh kêtjabê amijo ba. Ije ate mebê amijo iba kõt ne me ate mebê amijo ba. Kam ne me kum akĩnh kêtja kum gu banhõ me kurẽ.

<sup>15</sup> Djãm ije amã, “Me kum akĩnh kêtja bê dja ga amim gu banhõ meo wabi”, anhyrmã? Kati. Dja me arek me ro'ã ar ba. Dja ga mã me utàn ar meo aba gẽ gu banhõ me ja me axwe kõt axwe kêt. <sup>16</sup> Me arým mebê amijo ba. Me kum akĩnh kêtja bê amijo ba. Ate ije mebê amijo iba kõt ne me ate mebê amijo ba.

<sup>17</sup> Mrãmri akabẽn katátkumrẽx. Aje memã akabẽn katát jarẽnhkõt dja ga amimexo meo mex gẽ me katát ar amijo ba. <sup>18</sup> Ga ne ga arým idjãpẽn djã'ã imã karõn arým pykakam me kum akĩnh kêtja'ýr ijano ba tẽ. Badjwý ne ba akudjwa arým me ãpẽn djã'ã gu banhõ me jamã karõn arým me kum akĩnh kêtja'ýr me ano. <sup>19</sup> Imã me abêkam ne ba itykmã. Dja ba akabẽnkõt me kadjy ty nhym me arým amexo mex. Dja me tu amim ikabẽn katát markumrẽx ne arým amexo mex.

*Kute Bãmmã me kute mar kunõ a'wýr.*

<sup>20</sup> Djãm me jabit ne ba amã meo a'uw? Kati. Dja me ã amũ memã ikabẽn jarẽ nhym me kwý ikabẽn man tu amim imarkumrẽx. Amũ me jaodjwý ba amã a'uw.

<sup>21</sup> Be, mýj kadjy ne ba amã meo a'uw? Bir, dja ga ikabẽn man arým memã amak bõ nhym me arým akabẽnkõt kum aben jabẽn axikõt kabẽn. Dja me axikõt kabẽn kute gu bamã aben jabẽn axikõt bakabẽn pyrãk. Be, mýj kadjy dja me kum aben jabẽn axikõt kabẽn? Bir, gẽdja amũ me kum akĩnh kêtja me omũn arým kum gu bakĩnh ne arým tu amim imarkumrẽx. Ne kam ijã amim, “Be, mrãmri ne Metĩndjwýnh Jeju jano nhym arým pykakam bõx ne ar ba”, ane. Ja kadjy dja me kum aben jabê.

<sup>22</sup> Ga ne ga ijo rax ba arým gu banhõ meo rax. Nã bãm memã gu bakukràdjã jarẽ nhym me arým tu amim markumrẽx ar o ba. Ar o ba:n arým rax ne. Be, mýj kadjy ne

ba meo rax? Bir, dja me kum aben jabên axikôt kabên kute gu bamã aben jabên axikôt bakabên pyræk. Ja kadjy ne ba meo rax. <sup>23</sup> Bamê gu banhô me jamê ne me itipdjïn ar iba. Gu badjwÿ batipdjïn ar baba. Gora gê me prïne kum aben jabên axikôt kabên. Nhyam kam me kum akĩnh kêtja me omũn arÿm amim, “Mrãmri ne Metĩndjwÿnh Jeju jano nhyam arÿm pykakam bôx ne ar ba. Ga, Metĩndjwÿnh kum me abêja pumũ. Kum me abê kute kum Jeju jabê pyræk”, ane. Dja me kum akĩnh kêtja me omũn ã amim ane.

<sup>24</sup> Djũnwã, mÿjja kunĩ kator kêttri ne ga amã ijabê. Kam dja ba wabi ga arÿm ijo ra:x ne. Aje mã ikôt me kamẽnhdjwÿ dja ga o wabi gê me iro'ã ar ba. Dja me iro'ã ar ba:n irax pumũnh ar o ba. Ja ne ba imã kĩnh.

<sup>25</sup> Djũnwã, ga ne ga akatàt ne ajaxwe kêtukumrêx nhyam me kum akĩnh kêtja kute amar kêt. Bajbit ije amar nhyam me jadjwÿ arÿm kute amim, “Mrãmri ne Metĩndjwÿnh Jeju jano nhyam arÿm pykakam bôx ne ar ba”, anhyro ba. Tãm ne me kute amim tu markumrêx. <sup>26</sup> Ba kam arÿm memã ajã ajarê. Dja ba memã ajã idjujarênh rã'ã ne. Be, mÿj kadjy dja ba memã ajã idjujarênh rã'ã? Bir, amã me abê kute amã ijabê pyræk. Amã me abêja'ã dja ba memã idjujarênh rã'ã nhyam me arÿm mar rã'an kam arÿm kum ajabê. Ba kam arÿm meo iba. Ja kadjy dja ba memã ajã idjujarênh rã'ã. Nãm ã Jeju Bãmmã kabêno ane.

## 18

*Me kute Jeju pa 'amÿnh ne o mõi.  
Mat 26.47; Mak 14.43; Ruk 22.47*

<sup>1</sup> Jeju Bãmmã kabên pan kam arÿm kôt ba djwÿnhmê ro'ã katon mõi. Mõi:n kam arÿm pakretibê Kedõ'ÿr bôx ne 'ã rê. Ne kam mõi:n pidjôkõ'ÿr bôx ne arÿm 'ÿr wadjàn kam nhÿ.

<sup>2</sup> Nhyam onÿ Djuda dja. Kute Jeju kurê djwÿnhmã kangaja dja. Djuda ne arÿm kute ar 'ÿr djã pumũnh. Amrêbê ne Jejumê kôt ba djwÿnh ar pidjôkõ'ÿr mrãnhõ ku'ê nhyam kam Djuda arÿm kute ar 'ÿr djã pumũnh. <sup>3</sup> Kam ne arÿm me rũnh'ÿr bôx ne memã arê. Nhyam me arÿm aminhõ krãkamngõnhmê aminhõ ãpênhmã kum,

—Me Djudakôt mõi:n Jeju pa 'amÿn amrê o mõi:n o bôx. Nãm ã me kadjy Metĩndjwÿnh mar djwÿnh nhõ bẽnjadjwÿrmê mebê pardjêumê memã ane. Nhyam Djuda arÿm kute omũnhkôt katãt Jeju'ÿr meo mõi. Nãm me Jeju kadjy ngõnhpõkmê kuwymê àbêr djãmẽo mõi. Me 'ÿr o mõi:n arÿm pidjôkõ'ÿr o bôx.

<sup>4</sup> Nhyam Jeju ta kãjmã djan me'ÿr kato. Ta ne kute amikukãm mÿjja kunĩ markam amikukãm me krãkamngõnh ma. Ta me'ÿr katon memã kum,

—Mÿj me'õ jabej ne ga me mõi? ane.

<sup>5</sup> Nhyam kam me kum,

—Be, Nadjarekam Jeju jabej ne ba me mõi, ane.

Nhyam Jeju memã kum, “E kum, ba”, ane. Be, Djuda ne krãkamngõnhmê ro'ã dja. <sup>6</sup> Nãm Jeju, “E kum, ba”, ane. Nhyam me tu umaje ajkran akubyn ajkamên arÿm tÿm ne nõ.

<sup>7</sup> Nhyam kam ajte me kukij ne memã kum,

—Mÿj me'õ jabej ne ga me mõi? ane.

Nhyam me kum,

—Be, Nadjarekam Jeju jabej ne ba me mõi, ane.

<sup>8</sup> Nhyam memã kum,

—E kum, arÿm ne ba me amã, “Ba”, ane. Kwãrik wãnh ga me bajbit ijabej gê ar ja mã tẽ, ane. Be, mÿkam ne Jeju ã krãkamngõnhmã ane? <sup>9</sup> Bir, kute ajbir Bãmmã kabênkam ar'ã ujarênh kôt. Kute kum,

—Aje ikôt me kamẽnhja ne ba ije 'õo ibiknor kêt, anhyr kôtõ.

Kôt ne Jeju jakam ar nêje me krâkamngônhamã kabên ne arým o mebê ar utã.

<sup>10</sup> Nhyam kam Ximão Pedru, Jujukôt ba djwýnhja arým õ kãxdjwa kajgo. Ne kam arým kaban o akabên arým o bënjadwýr nhõ àpênh jamak ta. Me kadjy Metíndjwýnh mar djwýnh nhõ bënjadwýr rax nhõ àpênhja jamak ta. Bënjadwýr rax nhõ àpênh nhidjibê ne Maku.

<sup>11</sup> Nãm bënjadwýr rax nhõ àpênh jamak ta nhyam Jeju arým Pedrumã kum,

—Kwãrĩk wãnh. Akubyn àkam anhõ kãx jadjã. Djãm itokry kêtãmã ne ga inêje me tak ne? Ibãm kute itokry'ã imã karõ kôt dja ba itokry, ane.

<sup>12</sup> Nhyam kam me arým Jeju pa 'amýn uwpre. Me krâkamngônhamẽ me õ bënjadwýr ar pa 'amý. Mebê idjaer rúnh nhõ àpênhdjwý pa 'amý.

*Me kute bënjadwýr Ananh'ýr o bõx.*

<sup>13</sup> Nãm me uwpre kam arým bënjadwýr rax Ananh kumrêx'ýr o mõ. Bënjadwýr rax Kajbaj ne Ananho umrengét. Kajbaj ne amex tãmkam kubê me kadjy Metíndjwýnh mar djwýnh nhõ bënjadwýr rax. <sup>14</sup> Amrêbê ne Jeju'ã memã kabên jarên memã kum,

—Me'õ pydji dja me babê idjaer kunĩ pãnh ty. Kam dja gu me arým badjumar mex, ane. Be, me krâkamngônham bënjadwýr rax Ananh kumrêx'ýr Jejuo mõ. O mõn arým õ kikreti'ýr o wadjã.

*Pedru kute aminêje memã 'êx.*

*Mat 26.69; Mak 14.66; Ruk 22.55*

<sup>15</sup> Nhyam Ximão Pedru kôt tẽ. Jujukôt ba djwýnh 'õdjwýmẽ ro'ã ne ar Jeju kôt tẽ. Kôt tẽ:n arým kre tã dja. Nhyam Pedru nhikjêja memã kum,

—Ba wadjã. Bënjadwýr kute ipumũnh tũmũ, ane. Ne kam arým Jeju kôt wadjã. Bënjadwýr nhõ kikreti nhipókri ne kênh ngrire. Kam ne wadjãn dja. <sup>16</sup> Nhyam Pedru

bõm kre tã arek dja. Nhyam Pedru nhikjêja akubyn 'ýr akêx ne. Ne kam bënjadwýr nhõ àpênh nire kre tã ku'ê djwýnhjamã Pedru jarê. Ne kam amikôt Pedruo wadjã.

<sup>17</sup> Nhyam kam bënjadwýr nhõ àpênh nija tẽn Pedrumã kabên ne kum,

—Djãm ga ne ga abê Jujukôt aba djwýnh 'õ? ane.

Nhyam kum, “Kati”, ane.

<sup>18</sup> Nhyam wãnh me ànhũho kumex. Bënjadwýr nhõ àpênhmẽ õ me krâkamngônham ànhũho kumex. Me arek kryje pĩ prão amim kuton ànhũho kumex. Nhyam Pedru me'ýr tẽn mekôt ànhũho dja.

*Bënjadwýr rax kute axwe'õ jabej kukjêr.*

*Mat 26.59; Mak 14.55; Ruk 22.66*

<sup>19</sup> Nhyam kam me arým bënjadwýr rax'ýr Jejuo bõx. Me kadjy Metíndjwýnh mar djwýnh nhõ bënjadwýr rax'ýr ne o bõx nhyam arým kabem dja. Nhyam kam arým kukij ne kum,

—Imã akôt me ba djwýnh'ã ajarê. Mýj akukràdjã ne ga memã arênho aba? ane.

<sup>20</sup> Nhyam kum,

—Djãm me kãxã ne ba memã ikukràdjã jarê? Kati. Arým ne ba me kunĩmã ikukràdjã jarênho amirĩt ne. Ne apýnh me bikprõnh djãmẽ Metíndjwýnh nhõ kikretikam arê. Kikretikam ne mebê idjaer kunĩ bikprõnh djã. Ba arým kunĩkôt memã ikukràdjã jarênho amirĩt ne. <sup>21</sup> Mýj kadjy ne ga ba ikukij? Me wã dja ga me kukja nhyam me arým kute ikabên mar kôt arým amã arê, ane.

<sup>22</sup> Jeju bënjadwýrmã ane nhyam krâkamngônham'õ, kuri ãmja ikra poo Jeju kurwan kum,

—Djãm me ã bënjadwýr raxmã kabên kute anhýr? Me kadjy Metíndjwýnh mar djwýnh nhõ bënjadwýr raxmã ne ga akabên ne, ane.

23 Nhyam Jeju kum,

—Ikabên punu kêt ne ga ikurwa. Ne ba ren ikabên punu ga ren aje mÿj ikabên punu'ô markôt ren memã ijarênho amirît ne kôt ren arÿm ikurwa. Nhyam be, kati. Ikabên katàt ne ba arê ga ikurwa, ane. 24 Nãm ane nhyam Ananh amũ Metĩndjwÿnh mar djwÿnh nhõ bēnjadjwÿr raxbê Kajbajja'ÿr Jeju jano. Úwpre rã'ã ne ano. Nhyam me arÿm Kajbaj'ÿr o mōn o bōx.

*Pedru ajte aminêje 'êx ne ajte aminêje 'êx.*

*Mat 26.71; Mak 14.69; Ruk 22.58*

25 Nhyam Ximão Pedru wãnh me krākamngōnh kôt ànhũnho dja. Ànhũnho dja: nhyam me arÿm kukij ne kum,

—Djãm gadjwÿ abê Jeju kôt ba djwÿnh'ô? ane.

Nhyam memã kum, “Kati”, ane.

26 Nhyam kam bēnjadjwÿr nhõ àpēnh'ô ajte kum kabēn ne kum,

—E kum, amũ pidjôkôkam Jekukôt me'ôja anokre o nokre ba arÿm omũ. Djãm ga? ane. Pedru kute me'ôbê ôbikwa jamak 'yrja ã Pedrumã ane. Nãm, “Djãm ga”? ane. 27 Nhyam Pedru ajte kum, “Kati”, ane. Nãm kum anhÿr to-tokbê nhyam ôkrēn'ãnh arÿm kã.

*Me kute Piratu'ÿr o bōx.*

*Mat 27.1; Mak 15.1; Ruk 23.1*

28 Nãm ôkrēn'ãnh kã nhyam me arÿm Kajbaj kurũm Jejuo mō. O mō:n kam kikreti 'ôdjwÿ'ÿr o bōx. Piratu nhõ kikreti'ÿr o bōx. Me bajtemkam bēnjadjwÿr nhidjibê Piratu. Kikreti jakam ne Piratu kute memã axwe pãnh jarēnh djã. Nãm me Piratu nhõ kikreti'ÿr Jejuo bōx ne amijã maje bōm arek kumex. Nãm me abenmã kum,

—Kwãrĩk wãnh gu me Piratu nhõ kikretimã badjãr kêt. Dja gu me me bajtem nhõ kikremã wadjãn arÿm bapunuren te baje mry krēmã. Me kute Metĩndjwÿnhmã mrykĩ'átomtĩ bĩnja te baje krēmã,

ane. Me kute aben bê me bajtem nhõ kikre pymakam ne me ã abenmã anen bōm arek kumex. 29 Me bōm kumex nhyam kam bēnjadjwÿr Piratu arÿm me'ÿr katon dja. Ne kam Jeju'ã memã kum,

—Be, mÿj ne me'ôja axwe kute? Mÿj ne o ajkê? ane.

30 Nhyam me kum,

—Je, ne ren axwe kêt ba me ren amã arēnh kêtukumrêx. Nhyam be, kati. Mrãmri axwekumrêx, ane.

31 Nhyam Piratu memã kum,

—Me ga dja ga me amũ o mōn me akukràdjã kôt mÿj axwe'ômã akaton kam arÿm pãnh ajmã on, ane.

Nhyam mebê idjaer rũnh kum,

—Be, kati. Me akukràdjã kôt me ije me axwe pãnh me'ô par kêt. Ga ne ga aje me axwe pãnh me par djwÿnh, ane. 32 Be, amrēbê Jeju kute amikukãm memã, “Dja me pĩte'y'ã inhô ba kÿjrũm wajêt”, anhÿr kôt ne me arÿm jakam ã Jeju'ã Piratumã àpnēnh ane. Kute pĩte'y'ã nhôr ne bĩn'ã ne me kum apnê.

33 Nhyam kam Piratu arÿm ô kikretimã wadjã. Ne kam amiwÿr Jeju 'uw nhyam 'ÿr bōx. Nhyam arÿm kukij ne kum,

—Djãm abê mebê idjaer nhõ bēnjadjwÿr rax? ane.

34 Nhyam kum,

—Djãm ga ne ga ima? Nãr kon. Djãm me'ô ne amã ijarê ga ikukij? ane.

35 Nhyam ajte kukij ne kum,

—Djãm ibê me abê idjaer'ô got? Anhõ me wÿnhmê me kadjy Metĩndjwÿnh mar djwÿnh nhõ bēnjadjwÿrmê ne me imã akanga, ane.

36 Nhyam kum,

—Be, djãm ibēnjadjwÿr rax kute pykakam me bēnjadjwÿr rax pyrãk? Kati. Ne ba ren amijo ane nhyam ren inhô àpēnh arÿm inêje me'ÿr prôt ne. Kam ren mebê idjaerkam me rũnhbê aptã. Nhyam be, kati.

Ibēnjadjwÿr rax kute pykakam me bēnjadjwÿr rax pyrāk kêt, ane.

<sup>37</sup> Ā kute kum anhÿrkam Piratu kum,

—Djām kam mrāmri abê bēnjadjwÿr rax'ō? ane.

Nhym kum,

—Ga ne ga arÿm imã ibēnjadjwÿr rax jarê. Be, mrāmri. Kadjÿ ne ba pykakam me'ÿr bōx ne inã kurũm ruw. Ije mrāmri katāt memã ik-abēn jarēnh kadjÿ ne ba bōx. Nhym me kum ikabēn kīnhja ne me ikabēn man kôt ar amijo ba.

<sup>38</sup> Nhym kum,

—Tô nhÿnh ne me kabēn katāt'ō? ane. Nãm kum anen arÿm ajte mebê idjaer'ÿr katon Jeju'ã memã kum,

—Be, axwe kêtumrēx ba arÿm kuma. <sup>39</sup> Ba we me abê idjaer nhō bēnjadjwÿr raxjamã inhiren ano gê ta arek ar me aro'ã ba. Me irôbê mrānh nhō akati jakam me akukrādjà kôt dja ba kum inhiren ano. Amex pÿnhkôt ne ba me pÿnh ne me'ã kurēn bōm me kurê. Metīndjwÿnh me irôbê mrānh nhō akatikam me akukrādjà kôt ne ba bōm me kurê, ane.

<sup>40</sup> Nhym me ajte kàj bê kum kabēn ne kum,

—Kati. Kwārīk wānh. Be, atemã Baraba dja ga kum anhiren ano, ane. Be, Baraba ne àkīnhī, axwe, nēkrēxmē pi'òk kaprī prāmje kute me paro ba.

## 19

*Me kute pīte'y'ã nhôr'ã Piratumã apnēnh.*

*Mat 27.27; Mak 15.16*

<sup>1</sup> Nãm me Piratumã ane nhym kam arÿm krākamngônhmã Jeju jarê. Me kute kaprēprêk kadjÿ memã arê. Nhym me o tēn arÿm mrykã punuo kaprēprêk kumex ne. <sup>2</sup> Ne kam mrÿnhō kajkep ne ikānh ne o kute bēnjadjwÿr rax krādjà pyrāk ne kum kutu. Ne

kam inôkã ryti kamrêk kute me bēnjadjwÿr rax kã pyrāk kum adjã.

<sup>3</sup> Ne kam arīk kum kabēno kute me me rūnhmã kabēn pyrāk ne kum,

—Be, ga we abê mebê idjaer nhō bēnjadjwÿr rax. Goja kribēm atīn 'iry, ane. Ne ikrao titik ne. Nãm me ã 'ã bēno bikēnhō ane.

<sup>4</sup> Nhym kam Piratu ajte me'ÿr katon memã kum,

—Be, ije kam axwe'ō mar kêt. Axwe kêt. Kam ba ije ajte me amã o ikatormã. Dja ba o ikato ga me kam arÿm ama. Axwe kêtja ma, ane.

<sup>5</sup> Nhym Jeju arÿm kato. Mrÿnhō krādjàmē inôkã ryti kamrêk rã'ã ne 'ã kato. Nhym Piratu memã kum,

—Ota, tãm ne ja, ane.

<sup>6</sup> Nhym me kadjÿ Metīndjwÿnh mar djwÿnh nhō bēnjadjwÿrmē mebê idjaerkam me krākamngônhmē omūn arÿm kàj bê Piratumã kum,

—Pīte'y'ã anhō, ane.

Nhym memã kum,

—Kati. Djã ne ba kam axwe'ômã ikato got ba pīte'y'ã kunhō? Kati. Me ga dja ga me o tēn pīte'y'ã anhō, ane.

<sup>7</sup> Nhym mebê idjaer rūnh kum,

—Be, axwekumrēx. Kute amijo 'êx ne memã kum, “Ibê Metīndjwÿnh Kra”, anhÿro bakam axwekumrēx. Nãm Metīndjwÿnhbê raxo amiptaro ba. Me ikukrādjà kôt me axwe ja pānh ne me kute me par, ane.

<sup>8</sup> Nãm Piratu me kabēn ja man arÿm tīn prã:m. <sup>9</sup> Ne kam akubyn ò kikretimã wadjàn Jeju kukij ne kum,

—Nhÿnh ne akator djã kraxja? ane.

Nhym Jeju tu anhikrê.

<sup>10</sup> Nhym kum,

—Je tô, djām ikajgo ne ga imã amijarēnh kêt? Djām ajte imar kêt? Be, ba ikabēnkôt nhym me kute pīte'y'ã anhôr jabej nãr ba ik-abēnkôt nhym me amã irer jabej. Djām ajte imar kêt? ane.

<sup>11</sup> Nhym Jeju kum,

—Be, Metíndjwýnh amybým ren kute ajã bñjadjwýr mēnh kēt ga ren akajon ren akabēn kēt mex ne. Kam me'õ kute amã ikanga djwýnh axweo ajakrenh mex ne, ane.

<sup>12</sup> Nãm kum ane nhym Piratu arým kam kum irer jabej. Ne ajte me'ýr katon te memã kabēn nhym mebê idjaer kum,

—E kum be, Jeju ne arík Xedjabê bñjadjwýr raxo amiptã. Djãm Xedja akam ngyrk kētmã ne ga aje Jejumã anhirermã? ane. Xedjabê ne me bñjadjwýr rñnh kunĩ nhõ bñjadjwýr.

<sup>13</sup> Nãm me ã Piratumã ane nhym arým amijã kuman kam ajte memã Jejuo kato. Ne kam arým me axwe pãnh jarēnh djakam nhý. Me krĩ djã jamã ne me Kēnpoti jarē. Mebê idjaer kabēnkam ne me me krĩ djã jamã Gabata jarē. <sup>14</sup> Arým me irõbê mrãnh nhõ akati nēje akatikam ne me Jejuo kato. Me kute amim mýjja kupēho kumex djã nhõ akatikam. Kýjrũm myt nhýrkam. Nãm me axwe pãnh jarēnh djakam nhýn kam mebê idjaermã kum,

—Be, ota me anhõ bñjadjwýr rax, ane.

<sup>15</sup> Nhym me kàj bê kum,

—Rũm o tē. Rũm o tēn píte'y'ã anhõ, ane.

Nhym memã kum,

—Djãm me anhõ bñjadjwýr rax ije píte'y'ã nhõrmã? ane.

Nhym me kadjy Metíndjwýnh mar djwýnh nhõ bñjadjwýr ar kum,

—Djãm me inhõ bñjadjwýr rax ne wã? Arkati. Atemã. Me inhõ bñjadjwýr raxbê ne Xedja. Pydji. Ajte 'õdjwý kētkumrēx, ane.

<sup>16</sup> Nhym kam me kute píte'y'ã nhõrmã arým kadjy õ me jamã arē.

*Me kute píte'y'ã nhõ.*

*Mat 27.32; Mak 15.21; Ruk 23.26*

Nhym kam me Jeju pa 'amýn mã o mõ. <sup>17</sup> Ne kam me kum ikrei'ã píte'y'ã dji nhym arým ta amikadjy kumýn o mõ, krãnhre'ýr

o mõ. Krãnhrebê me krã'i'ýr ne o mõ. Mebê idjaer kabēnkam ne me me krã'imã Gogota jarē. <sup>18</sup> Nãm me o mōn arým kam o bõx ne arým píte'y'ã Jejumã o iten kàjmã kudja nhym wajēt. Nhym kam me píte'y'ã ar ja amãnhkrutmo ite nhym ar aktã Jeju nhijēn wajēt.

<sup>19</sup> Nhym Piratu mýj Jeju axweja'ã pi'ók no'ók ne. Nãm pi'ókkam memã kum,

—Mebê idjaer nhõ bñjadjwýr rax ne ja. Krĩraxbê Nadjarekam Jeju. Nãm ã pi'ókkam no'õko ane. Nhym me kunĩ kute omũnh kadjy me Jeju nhimõkri kunhõ. <sup>20</sup> Nhym kam mebê idjaer krãptĩ pi'ók pumũn arē. Krĩrax kuri ne me kute píte'y'ã Jeju nhõr djã. Nhym kam me krãptĩ 'ýr ban bõx ne pi'ók jarē. Apýnh me kabēnkam ne no'ók. Mebê idjaer kabēnkam no'ók ne mebê kregu kabēnkam no'ók ne me kabēnbê Raxinakam no'ók. <sup>21</sup> Nhym kam mebê idjaer kadjy Metíndjwýnh mar djwýnh nhõ bñjadjwýr Piratumã kum,

—Kwãrĩk wãnh pi'ókkam memã kum, “Mebê idjaer nhõ Bñjadjwýr rax”, anhýr kēt. Ate gédja ga pi'ókkam memã kum, “Nãm amijo 'éx ne memã kum, 'Ibê mebê idjaer nhõ bñjadjwýr rax', anhýro ba.” Dja ga ã pi'ók no'ókkam memã anen 'ã anhõ gê me omũ, ane.

<sup>22</sup> Nhym Piratu arkum,

—Kati. Arým ne ba mrãmri 'ã pi'ók no'ók ne. Kwãrĩk wãnh rã'ã, ane.

<sup>23</sup> Nãm me krãkamngõnh ar píte'y'kam Jeju nhõ. Ne kam ar kute abenmã õ kubêkã ngrãnhmã. Nhym ar 'õ amijo õ kubêkã ja pytã. Nhym ar 'õ amijo ja pytã. Nhym ar 'õ amijo ja pytã. Ne kam ar inõkati ja'ýr bõx. Ne ar kunĩ kum kĩnh. Nhym inõkati pydji. <sup>24</sup> Nhym ar abenmã kum,

—Kwãrĩk wãnh gwaj abenmã kokjêr kēt. Gwaj pykakam kēn

kryre rên kôt kuman bajô amim inôkâti by, ane.

Amrêbê: ne me bakukâmâre ja jarê. Me Metîndjwýnh Kra kabên jarên memâ kum,

“Dja me abenmâ ikâ ngrân ikâ ja’â kên kryre rên kôt ’ô amim kuby.”

Nâm me bakukâmâre ã memâ anen arým ’â pi’ók no’ók ne. Nhyim me aben djô’â arênho mō:. Arênho mōr tâmtâ arým ’yr o bôx. Tû:mrâm me bakamingrânyrekam ne arým ’yr o bôx nhyim me arým ã Jeju nhô kubêkào anhÿrkumrêx.

<sup>25</sup> Nhyim nâ kanikwýnh, nâmê ar axikôt apôxjadjwý dja. Nhyim Marij ’ôdjwý, mjên nhidjibê Krôpa adjwýnhdjwý dja. Nhyim Marij Madarenadjwý dja. <sup>26</sup> Nhyim Jeju arým nâ, kurûm katorja pumû. Nhyim kôt ba djwýnh, kum abêja nâ kuri dja nhyim omû. Nhyim arým kôt ba djwýnh ja’â nâmâ kum,

—Ë, me’ô nire. Be, tâmwâbê ne arým akra, ane. <sup>27</sup> Ne kam kôt ba djwýnhmâ kum,

—Ë, tâmwâbê ne arým anâ, ane. Nhyim kam arým ô kikremâ o mōn arým o djuw mex ar o ba.

*Tyk’ã ujarênh.*

*Mat 27.45; Mak 15.33; Ruk 23.44*

<sup>28</sup> Nhyim kam arým kute inomâ apênh djâ mênhkam memâ kum, “Arým imâ kôr”, ane. Amrêbê: ne me bakukâmâre Jeju kabên ja jarên memâ kum, “Arým imâ kôr.”

Nâm me ã anen arým ’â pi’ók no’ók ne. Nhyim me aben djô’â arênho mō:. Arênho mōr tâmtâ arým ’yr o bôx. Tû:mrâm me bakamingrânyrekam ne Jeju arým kum kôrkumrêx ne arým memâ kum, “Arým imâ kôr”, ane. <sup>29</sup> Nhyim wânh pidjô kangô kadja ngôn’ôkam ipun dja. Nhyim me ngôn puror pôn h djâ jakritaja kangômâ adjâ nhyim kam ipu. Nhyim me pîbê ixôpu idjamâ adjân

kam kâjmâ kum kungân ajkwamâ adjâ. <sup>30</sup> Nhyim arým kaôn pidjô kangô kadjâo ikô. Ne kam memâ kum,

—Arým ne ba idjâpênho tên inomâ kumê, ane. Ne kam ta aparmâ krân tu amitînmâ iren ta arým ty.

<sup>31</sup> Be, pi’ók rârâr nêje arým akamât ’yr nhyim mebê idjaer arým êje ô mýjja kupênho kumex. Nhyim kam mekam me kwý Piratu’yr mōn kum,

—Ë, dja me pîte’y’ã ar ariija ’i kukê gê ar on ty. Dja ar on ty nhyim me on ar adjâ. Ne kam pi’ók rârâro bikênh kêt, ane. <sup>32</sup> Nhyim arým ’yr me krâkamngôn h jano nhyim me ’yr mōn ’yr bôx. ’Yr bôx ne kumrêx ja te’i kukê ne ajte ja te’i kukê.

<sup>33</sup> Nhyim ar ipôkri Jeju wajêt nhyim me ’yr bôx. Nhyim amrêbê tyn wajêt nhyim me arým omû. Ne kam kute te’i kukênh kêt. <sup>34</sup> Nhyim arým krâkamngôn h’ô ô kâxo nân h jarîn arým o pênât’ân h kanhuw. Kanhuw nhyim kamrômê ngômê akân arým prôt ne.

<sup>35</sup> Ba ne ba omûn me amâ kôt ’â ajarê. Mrâmri katât me amâ ’ã idjujarênhkumrêx. Mrâmri ije omûnhkumrêx ne kôt me amâ ’ã ajarê. Me ajte tu amin markumrêxmâ ne ba me amâ arê. <sup>36</sup> Amrêbê: ne me bakukâmâre tâmjâ jarên memâ kum,

“Be, ’i’ô dja me kwýnh kêt kumrêx”, ane.

<sup>37</sup> Ne kam ajte arên memâ kum,

“Dja me kanhuw ne arým omûnho dja”, ane.

Metîndjwýnh kukwakam ne me memâ anen arým ’â pi’ók no’ók ne. Nhyim me aben djô’â arênho mō:. Arênho mōr tâmtâ arým ’yr o bôx. Tû:mrâm me bakamingrânyrekam ne ’yr o bôx. Nâm me te’i kukênh kêt ne arým kanhuw. Me bakukâmâre kute ’ã pi’ók no’ók kôtô.

*Me kute adjâ:*

*Mat 27.57; Mak 15.42; Ruk 23.50*



38-39 Nhyam kam Jôdje Armatê, kubê ne Jeju kôt ba djwýnh'ô. Mebê idjaer rûnh pymaje kute memã amijarênh kêt ne. Kubê Jejukôt ba djwýnh'ã kute memã amijarênh kêt ne. Ne kam arým Piratu'ýr tén kum,

—Ba Jeju kaban o rwýn o tén adjã, ane. Nhyam Piratu kum, “Ajrã”, ane. Nhyam kam arým amũ tẽ. Amũ Nikodemu'ýr tén 'ýr bôx. Nikodemu ne amrêbê akamãtkam Jeju'ýr bôx nhyam ar abenmã kabêno nhÿ. Nikodemu ja'ýr ne Jôdje bôx nhyam ar ro'ã Jeju'ýr tẽ. 'Ýr tẽm kêtri ne Nikodemu arým Jeju kadjy kudjý djão atomkumrêx. Utĩ'ã akrekam utĩ: kute 50 kiru pyrãk. Miramê arômê ne abenkam o akã. Nãm kudjý djã tun arým Jôdjemê ro'ã Jeju'ýr o tén 'ýr o bôx.

<sup>40</sup>Ne kam arým píte'y kurũm Jeju kaban o ruwn arým kudji. Ne kam rinhuo kubêkào prĩne o kupu. Ar kupu djãkôt me kudjý djã jadjuw ne o kupu. Mebê idjaer kukrãdjã kôt ne me ã me tyko ane. <sup>41</sup>Nhyam wãnh me kute píte'y'ã nhôr djã kuri pidjôkô'ô. Ne kam kênkre'ô. Kênkre ny. Kraxje me kute kam me'ô jadjãr kêt rã'ã. <sup>42</sup>Nãm ar Jeju kupun kumýn o tẽ. O tén arým kênkrekam adjã. Arým pi'ók rãrãr bôx 'ýr nhyam kam ar amibêx ne me kute nhôr djã kuri kênkrekam adjã. Kênkrekam adjã nhyam ar'ã akamãt ne. Nhyam kam ajte akati. Nhyam kam ajte akamãt ne.

## 20

*Akubyn tĩn ne kator.*

*Mat 28.1; Mak 16.1; Ruk 24.1*

<sup>1</sup> Nhyam ajte akati 'ýr, pi'ók kamrêk 'ýr nhyam Marij Madarena arým kênkre'ýr tén 'ýr bôx. 'Ýr bôx nhyam me kute kênpoô kênkre'ã ijêja arým amijã kutan kre jakãja'ã dja nhyam Marij arým omũ. <sup>2</sup> Ne kam akubyn prôt ne arým Ximão Pedru'ýr bôx ne kôt ba djwýnh'ô kadjwý 'ýr bôx. Jeju kum abêja 'ýr bôx ne arkum,

—Arým ne me kênkre kurũm Bênjadjwýr djwýnhô kato. Nãm me nhýnh o môn kudji, ane.

<sup>3-4</sup> Nãm kum ane nhyam kam Pedrumê kôt ba djwýnh 'ôdjwý ar arým tu kênkre'ýr prôt ne. Nhyam kam kôt ba djwýnh 'ôja arým Pedru ren kumrêx kênkre'ýr bôx. <sup>5</sup> 'Ýr bôx ne kênkre'ã ibôn te kre kamũnhô dja. Nhyam rinhuo kubêkãbit nõ nhyam omũ. Ne kam kênkremã ãr kêt.

<sup>6</sup> Nhyam kam Pedru arým kôt bôx ne tu kênkremã 'ýr wadjã. Ne kam rinhuo kubêkã pumũn krã kupu djãja pumũ. <sup>7</sup> Nhyam krã kupu djãja rinhuo kubêkãmê ro'ã nõr kêt. Jeju ne prĩne krã kupu djã krã mex ne kudji nhyam ate nõ.

<sup>8-9</sup> Nhyam kam kôt ba djwýnh kumrêx bôxja kênkremã wadjãn arým omũ. Omũn arým amim,

—E kum, mrãmri ne akubyn tĩn ne, ane. Ne tu amim Jeju markumrêx. Bir, ar kute omũnh kêtri ne ar amim,

—Mrãmri ne arým tyn akubyn tĩn kêt, anhýro ba. Ne ren mrãmri Metĩndjwýnh kabên'ã pi'ók no'ók markumrêx ne ren amim,

—Be, mrãmri dja akubyn tĩn, anhýro ba. Nhyam be, kati. Ar kute pi'ók mar kêt. Kam ne ar kute kupu djã nõrkôt omũnh kêtri amim, “Akubyn tĩn kêt”, anhýro ba. Ne kam kênkremã 'ýr wadjãn arým omũn amim,

—E kum, mrãmri ne akubyn tĩn ne, ane. Ne tu amim Jeju markumrêx.

*Kute Marijmã amijo amirít.*

*Mat 28.9; Mak 16.9*

<sup>10</sup> Nãm ar kênkre kamũn kam akubyn ar ô kikremã tẽ. <sup>11-12</sup> Nhyam Marij ar pãnh kênkre'ýr bôx ne bõm arek mýro dja. Nãm mýro djan arým kênkre'ã ibô. Nhyam kênkre kadjwýnhbê Metĩndjwýnh kadjy mrãnh djwýnh amãnhkrut nhÿ. Ar ô kubêkã jaka. Jeju nõr djã'ã ar nhÿ. Nhyam ja krã nõr djã'ã nhÿ nhyam

ja te nör djä'ã nhÿ. NhyM Marij kënkre'ã ibôn arÿm ar omÿ.

<sup>13</sup> NhyM ar kum,

—Me'õ nire, mÿkam ne ga amÿro dja? ane.

NhyM arkum,

—Inhõ Bënjadjwÿr djwÿnh ne me'õ kënkre kurÿm o katon o mõn nhÿnh kudji. Ije ir djäkõt omÿnh kêt kam ne ba imÿro dja, ane. <sup>14</sup> Nãm arkum anen arÿm mÿm akëx. Mÿm akëx ne arÿm Jeju pumÿ. Djä ne tu omÿ? Kati. Kute omÿnh kêt.

<sup>15</sup> NhyM kum,

—Mÿkam ne ga amÿro dja? Mÿj me'õ ne ga abej? ane.

NhyM Jejuo kute pidjökô pumÿnh djwÿnh pyræk ne kum,

—Ô kum, ga aje nhÿnh o amõr ne ir jabej imã akre. Dja ba 'ÿr tën arÿm amrë o tẽ, ane.

<sup>16</sup> NhyM kum, “Marij”, ane.

NhyM kam 'ÿr akëx ne kum, “Rabi”, ane. Be, me bakabënkam ne gu me ren kum, “Ujarënh djwÿnh”, ane. Nãm kum, “Rabi”, anen arÿm o tÿm.

<sup>17</sup> NhyM kum,

—Kwãrik wãnh ijo atÿm kêt. Imã anhire. Kraxje Ibãm'ÿr idjãbir kêt ne ga ijo tÿm. Tën ikamyre arkum ikabën jarën arkum, “Jeju ne ar amã, 'Arÿm Ibãm'ÿr idjãbirmã. Ibãmbê ne ar Abãm. Arÿm Itëndjwÿnh'ÿr idjãbir ne itëmmã. Itëndjwÿnhbê ne ar Atëndjwÿnh', ane. Dja ga tën ã ikamy arkum ane.” Nãm ã Jeju Marij Madarenamã ane.

<sup>18</sup> NhyM arÿm kôt ba djwÿnh'ÿr tën ar'ÿr bõx. Ne arkum,

—Arÿm ne ba Bënjadjwÿr djwÿnh pumÿ, ane. Ne kam Jeju ajbir kute kum kabën jarënhja kôt arÿm arkum arë.

*Kôt ba djwÿnhmã kute amijo amirÿt.*

*Mat 28.16; Mak 16.14; Ruk 24.36*

<sup>19</sup> NhyM kam arÿm pi'ök kamrëkkam akamãt. NhyM kam kôt ba djwÿnh ar arÿm prÿne amijã ijën nhÿ. Mebê idjaer rÿnh pymaje

ne ar ar bikprõnh djäkam amijã ijën nhÿ. NhyM kam Jeju bõx ne tu ar aërbê ar'ÿr wadjàn ar ipökri dja. Djan arÿm arkum, “On ar adjumar mex”, ane. <sup>20</sup> Nãm arkum anen arÿm arkum ikrakam kãxirãx djwa kre jakren ajte pënãt'ãnh kãxdjwa kre jakre. NhyM ar kute mrãmri ar õ Bënjadjwÿr djwÿnh pumÿnhkumrëxkam kÿnhkumrëx ne.

<sup>21</sup> NhyM kam ajte arkum,

—On ar adjumar mex. Amrëbê ne Ibãm me'ã imã karõ. Pykakam me kum kÿnh këtja'ÿr itëm'ã ne imã karõ ba amrë tẽ. Dja badjwÿ Ibãm kudjwa jakam me'ã ar amã karõ. Ar aje ikudjwa me'ÿr atëmmã ne ba ar amã me'ã karõ, ane. <sup>22</sup> Nãm arkum anen arÿm ar akõn arkum,

—Gê on Metëndjwÿnh Karõ ar ajo ba. <sup>23</sup> Dja ar ajo ba gar kôt me kwÿ axwe maro akno. NhyM kam Metëndjwÿnh ar akõt me axwe maro akno. Nãr gar me kwÿ axwe maro abiknor kêt nhyM kam Metëndjwÿnh me axwe maro biknor kêt. Nãm Jeju ã arkum anen arÿm mã tẽ.

*Tõmemã kute amijo amirÿt.*

<sup>24</sup> NhyM Tõme Djidjimu. Jejukõt ba djwÿnhbê 12'õ. Tõme ne kute ar bikprõnh djäkam arkõt ÿr kêt ne kute Jeju pumÿnh kêt. Jeju mã tẽ nhyM kam ar Tõmemã kum,

<sup>25</sup> —Arÿm ne bar Bënjadjwÿr djwÿnh pumÿ, ane.

NhyM arkum,

—Tõ nhÿnh? Ne ba ren ikrakam kãxirãx djwa kre pumÿn ren kôt inhikra'i jadjàn ren pënãt'ãnh krekõt inhikra jadjã. Be, kambit ne ba ren tu amim markumrëx ne amim, “Mrãmri ne akubyn tÿnkumrëx”, ane. NhyM be, kati. Akubyn tÿn kêt. Nãm ã Tõme arkum ane. <sup>26</sup> NhyM kam arÿm ar'ã akatibê 8 apëx nhyM kôt ba djwÿnh ar ajte bikprõnh djäkam nhÿ. NhyM Tõmedjwÿ arÿm ar ikõ'ã nhÿ. NhyM ar ajte prÿne mebê kikre'ã ijë. Ar

nhỹ nhym kam Jeju ajte tu wadjàn arým ar ipôkri djan arkum, “On ar adjumar mex”, ane. <sup>27</sup> Ne arým Tômemã kum,

—Ajrã. Amrẽ anhkra 'io goja inhikra kupên omũ. Ne amrẽ ipênàtkam krekôt goja anhkra jadjã. Kwârík wãnh ijã amim, “Kati. Nãm 'êx”, anhỹr kêt. On tu amim imarkumrêx, ane.

<sup>28</sup> Nhym Tôme kum,

—Inhõ Bẽnjadjwýr djwýnh, Itĩndjwýnh, ane.

<sup>29</sup> Nhym kum,

—Tôme, ga aje ipumũnhkôt ne ga arým tu amim imarkumrêx. Nhym be, me kute ipumũnh kêt djwý. Djãm me kute ipumũnh kêt ne tu amim imarkumrêxkam kaprĩmã? Kati. Dja me te ipumũnh kêt ne tu amim imarkumrêx ne arým kĩnhkumrêx. Ne kĩnho katát ajakre. Nãm ã Jeju kum ane.

<sup>30</sup> Be, kôt ba djwýnh kute omũnh ne kute raxmã kator kadjy ne Jeju kute mýjja pumũnh kêt krãptĩ nhípêx. Ne me punu krãptio mex. Ije ar amã mýjja kwý'ã idjujarênh ne ije 'ã pi'ók no'ók ne ja. Djãm kunĩ'ã ne ba pi'ók no'ók? Kati. Pi'ók jakam ne ba kwýbit'ã pi'ók no'ók ne. <sup>31</sup> Be, mýj kadjy ne ba ar amã pi'ók no'ók ne? Bir, dja gar pi'ók jarênh aman arým tu amim Jeju markumrêx ne amim,

—Mrãmri ne Jejubê gwaj banhõ Bẽnjadjwýrbê kumkatikumrêx. Mrãmri kubê Kritukumrêx. Mrãmri kubê Metĩndjwýnh Krakumrêx, ane. Ja dja gar pi'ókkam arênh aman tu amim markumrêx. Tu amim markumrêx ne arým Jejukôt atĩn ne ar aba rã'ã: rã'ã ne. Ja kadjy ne ba ar amã 'ã pi'ók no'ók ne. Tãm ne ja.

## 21

*Kôt ba djwýnh kute kabênkôt tep kumex pynênh.*

<sup>1</sup> Nãm Jeju ã kôt ba djwýnhmã amijo amirĩto ane. Tyk ne akubyn

tĩnkam ã arkum amijo amirĩto ane. Ne kam ajte kute imôtibê Xiberij'ãnh kute arkum amijo amirĩt kadjy. <sup>2</sup> Nhym kôt ba djwýnh kwý imô nokà'ã ar ba. Ximão Pedrumê Tôme Djidjimumê Natanajeumê Djebedêu kute ar adjwýrmê kôt ba djwýnh amãnhkrut 'ôdjwý ar ba. Natanajeu ne pykabê Garrêjakam krĩbê Kanakam abatãnh djã. <sup>3</sup> Ar ngô nokà'ã ar ba: nhym Ximão Pedru arkum,

—Ba on tep kwý pynê, ane.

Nhym ar kum,

—Bar akôt tẽ, ane. Ne kam tẽn kãkam nhỹn kam nox ne. Ne kam ar kryreti rênho ba. Ne ar rênho ba: nhym ar'ã akamãt. Nhym ar ar o ba: nhym arým ar'ã akati tẽ nhym tep kêt mex ne.

<sup>4</sup> Ar'ã akati tẽ nhym Jeju arým bôx ne akàx'ã dja. Nhym ar kute nokre pumũnh kêt ne.

<sup>5</sup> Jeju akàx'ã dja:n kam amũ arkum kabên ne arkum,

—Akmere ar, djã ne gar tep'ô pynê? ane.

Nhym ar kum, “Kati”, ane.

<sup>6</sup> Nhym arkum,

—Ar kã djubôk'ãnh ajte kryreti mẽn arým kwý pynê, ane. Nhym kam ar arým kã djubôk'ãnh kryreti mẽ. Nhym arým tep kumex ne. Nãm ar arým tep kumex pynê ne arým te: kute o àbirmã nhym utĩ: ne.

<sup>7</sup> Nhym kôt ba djwýnhja, Jeju kum abêja, Pedrumã kum,

—E kum be, Bẽnjadjwýr djwýnh ne dja, ane. Nhym Pedru kuman amikajgo pumũn arým ô inôkãti jadjàn kam tu Jeju'ýr nox ne 'ýr bôx. <sup>8</sup> Nhym kôt ba djwýnh 'ôdjwý ar kã ngrire 'ókam arým akàx'ýr mō. Akàx'ýr tep kamênho mō. Amybým ne akãx nhym ar ar tepo ba. Akàx'ýr 'ã akrebê 90 metu. <sup>9</sup> Nãm ar tep kamênho mō:n arým akàx'ýr o bôx. 'Ýr o bôx ne arým o wabi. Nhym arým kute tep prã'ã

bôr ikwã nhym ar omũ. Nhym djwýdjwý kuri ikwã nhym ar omũ.

<sup>10</sup> Nhym kam Jeju arkum,

—Amrê ar aje tep pynênh kwýo tẽ, ane.

<sup>11</sup> Nhym Pedru arým 'ýr tẽ. Kryretikam tep rûnh krãptĩ. 'Ýr ne tẽ nhym kryretikam tep rã'ã nhym bjêro mō:n akàx'ã arým kumê. Nhym tep'ã akrekam kubê 153. Nãm te tep rûnh krãptĩn kute kryreti rênh kêt ne. <sup>12</sup> Nhym kam Jeju arkum,

—Amrê ar mōn anhõ kwý krê, ane. Nhym ar 'ýr mōn arek dja. Ar arým kute amim õ Bênjadjwýr djwýnhkõt kute markam ar 'õ kute kum, “Bênjadjwýr djwýnh, djãm ga”? anhýr prãm kêtukumrêx. Nãm ar arek umaje dja. <sup>13</sup> Nhym kam Jeju arým ar'ýr tẽn arkum djwýmẽ tep ngã. Nãm ã Jeju arkum amijo amirĩto ane. <sup>14</sup> Be, Jeju akubyn tĩn nhijukri ne amũja'ã arkum amijo amirĩt. Ne ajte arkum amijo amirĩt. Ne akati jakam ajte kute arkum amijo amirĩt ne ja.

*Kute Pedrumã akubyn kum ãpênh kadjy kabên jarênh.*

<sup>15</sup> Jeju arkum kungã nhym ar arým o nhý, õ kwý krêno nhý. Ne kam õ kwý krêno pa nhym Jeju arým Ximão Pedru kukij. Djõnaj kute Ximão djirja. Nãm kukij ne kum,

—Ê Ximão. Djãm amã ijabê? Djãm amã ijabêo aje ar ja kunĩ jakrenh? ane.

Nhym kum,

—Nã Bênjadjwýr djwýnh, imã ajabê. Ga arým ama, ane.

Nhym kum,

—Inhõ me ne me kute mrykĩ'átomtĩ krare pyrãk. Dja ga memã ikabên jarêno aba. Dja ga memã ikabên jarêno kute mrãmri ne mrykĩ'átomtĩ ba djwýnh kute õ krito djuw mexo ba pyrãk. ã memã ikabên jarêno ane, ane.

<sup>16</sup> Ne kam ajte kum,

—Ê Ximão, djãm amã ijabê? ane.

Nhym kum,

—Nã Bênjadjwýr djwýnh, imã ajabê ga arým ama, ane.

Nhym kum,

—Inhõ me kute mrykĩ'átomtĩ pyrãk dja ga ar meo aba, ane.

<sup>17</sup> Ne kam ajte: kum,

—Ê Ximão, Djõnaj kra, djãm amã ijabê? ane.

Nhym arým kaprĩre. Kute kum, “Djãm amã ijabê”? anhýro amãnhkrut ne ikjêkêtkam ne arým kaprĩre ne.

Nãm Jeju kum ane nhym kum,

—Bênjadjwýr djwýnh, ga ne ga aje mýjja kunĩ mar. Imã ajabê ga arým ama, ane.

Nhym Jeju kum,

—Inhõ me kute mrykĩ'átomtĩ pyrãkja dja ga memã ikabên jarêno aba. <sup>18</sup> Be, ajabatãnh nykam ne ga amipre djão amipren kam ga aje amim pry'ã karõ kõt mrã. Nhym be, abêngêttekam dja ga me'õmã apa bẽ nhym apren apa 'amýn 'ýr ajo tẽ. Te atêm prãm kêt nhym 'ýr ajo tẽ, ane. <sup>19</sup> Be, me kute Ximão Pedru bĩn kukãm ne Jeju ã kum ane. Pedru dja me kubĩ nhym arým ty. Dja ã tyko ane nhym me arým kõt Metũndjwýnh raxmã kato. Nãm kum anen ajte kum,

—Be, dja ga mã ikõt ajkamê, ane.

<sup>20</sup> Nãm Ximão Pedrumã ane nhym arým akêx ne kõt ba djwýnh 'õdjwý pumũ. Jeju kum abêja pumũ. Tãm ne amrêbê ar ãkuro ýrkam Jeju 'ýr ajkamên kum,

—Bênjadjwýr djwýnh, mýj me'õ ne kute akurê djwýnhmã akangamã? ane. <sup>21</sup> Nãm Pedru kõt ba djwýnh ja pumũn kam 'ã Jejumã kum,

—Bênjadjwýr djwýnh, mýj dja tãmwãdjwý kam nê? ane.

<sup>22</sup> Nhym Jeju Pedrumã kum,

—Be, dja ba akubyn bõx nhym tĩn rã'ã jabej. Kwãrik wãnh rã'ã. Nhym be, ije adjãpênh djã'ã amã karõja dja ga kõtbit ajamak bẽn ne o aba. Ba dja ga mã ikõt ajkamê, ane.

<sup>23</sup> Nhym kam Jeju kukwakam me kute abeno kamyja kute Jeju kabën mar kêt ne arík 'ã abenmã kum,

—Be, dja kôt ba djwýnh wã tyk kêt-kumrëx, ane. Nhym be, kati. Djã ne kum, “Dja tyk kêt”, ane? Kati. Nãm Pedrumã kum,

—Be, dja ba akubyn bôx nhym tïn rã'ã jabej. Kwãrík wãnh rã'ã. Nhym be, ije adjàpênh djà'ã amã karõ dja ga kôtbit ajamak bën ne mã ikôt ajkamë, ane. Jabit Jeju Pedrumã arë. Tãm ne ja.

<sup>24</sup> Ba Jeju kôt iba djwýnh ne ba me amã Jeju djàpênh'ã ajarë. Ije àpênh pumũnhkôt ne ba katàt me amã 'ã idjujarënhkumrëx ne arým 'ã pi'ók no'ók ne. Tãm ne bar ije markumrëx.

<sup>25</sup> Djãm ije apýnh àpênh djà'ã pi'ók no'ókja djãm jabit ne Jeju ipêx? Kati. Ije pi'ók no'ók këttri ne ba amim,

—Ne ba ren àpênh kunĩ'ã pi'ók no'ók nhym ren arým pi'ók kume:x. Ne ren apýnh pyka djàri kunĩkôt ren pi'ók me akrenh mex ne. Nhym be, kati. Jeju djàpênh jabit ne ba 'ã pi'ók no'ók ne. Tãm ne ja.

## Metĩndjwỳnh Karō kute meo ba'ã ujarēnh ne ja.

Ruka ne ajte me bakunĩ kadjy Teopiremã pi'òk no'òk ne. Òbê ja ne kum Jeju'ã ujarēnh tēn àbir djãmã kumê. Ne kam jakam ajte Jeju àbirkôt arē ne kam Metĩndjwỳnh kute Amikarō janor nhym kute me 'amỳnh tỳx'ã ajarē. Jeju pykabê ar bari kute ò me jao atom ne kam arỳm kàjkwamã àbirkam kute ar meo ba rã'ã ne kute memã Amikarō janor ne o meo tỳx ar o ba nhym me kute Jeju pyma proobit mỳjja pumũnh kêt kwỳ nhípêx ar o baja'ã ujarēnh tē. Jejukôt ba djwỳnh ne uma proo arkum me uma kêt mex ne memã 'ã ujarēnh ba nhym me tu amim markumrêx ne 'ã bikprõnhõ dja. Be, nhym Ruka ja kunĩ'ã ajarē ne kam ajte Pedru'ã ajarē ne kam atãri Paur'ã ajarē. Djãm Jeju kute amim mebê idjaerbit pytār ne ar meo bamã? Kati, kute pyka kunĩkôt me ja kunĩ pytarmã. Pedru ne memo krax nhym kam Paur mrãmri apỳnh me ò pyka djãri kunĩkôt me'yr mrãn prĩne memã 'ã ujarēnh ba. Amrêbê ne Paur kum Jeju nhõ me ja kurêkumrêx ne prĩne meo bikēnh ar o ba nhym kam Jeju kum amijo amirĩt nhym arỳm tu amim Jeju markumrêx ne kum abēn kam kabēnkôt pyka kunĩkôt me'yr mrãn memã Jeju'ã ajarē nhym kam me tu amim markumrêx ne kam 'ã akuprõ.

*Jeju djãbir'ã ujarēnh kadjy ne ja.*

*Mat 28.16; Mak 16.14; Ruk 24.46*

<sup>1</sup> Be, ga Teopire, amã ne ba amrêbê pi'òk no'òk ne. Pi'òk wãkam ne ba Jeju djãpēnh kraxkurũm, kabēn kraxkurũm prĩne amã 'ã idjujarēnh tēn 'ã amã pi'òk no'òk ne. <sup>2</sup> Pi'òk no'òko tē:n kam arỳm

àbir'ãnh amã 'ã ajarēn arỳm 'ãnh pi'òk no'òk krãta. Be, Jeju kumrêx ne amijo me kwỳ pytã. Amijo me kwỳ pytàn arỳm àpēnh djã'ã arkum karõ. Metĩndjwỳnh Karõ kukwakam 'ã arkum karõn ar anon arỳm kàjkwa djwỳnhmã wabi. <sup>3</sup> Be, àbir kētri ne tokryn tyn akubyn tĩn ne arỳm arkum amijo amirĩt ar o ba. Mỳj kadjy ne arkum amijo amirĩt ar o ba? Bir, dja ar tĩnkôt omũn arỳm mã memã kum,

—Mrãmri ne akubyn tĩn. Ar ba ne bar akubyn tĩnkôt omũnh krãptĩ, anhỹro ba. Ar kute ã memã anhỹro ba kadjy ne arkum amijo amirĩt ar o ba. Nãm arkum amijo amirĩt ne mã arkum ujarēnh ba. Metĩndjwỳnh kute amim me utarn ar meo ba'ã arkum ujarēnh ba. Akubyn tĩn'ã arkum amijarēnh ar o ba: nhym arỳm 'ã arngrobê 40 apêx. <sup>4</sup> 'ã arngro apêx kētri ne ar ajte Jejumê ro'ã abeno akuprõ nhym arkum 'ã karõn arkum,

—Kwãrik wãnh Djeruxarê kurũm ar akator kêt ne ije amrêbê ar amã gwaj Babãm kabēn jarēnh kôt Metĩndjwỳnh Karõ jabej ajkam ama. <sup>5</sup> Be, Djuão Metĩndjwỳnhmã ngômãbit me angij. Nhym be, dja ar ajã arngro krãptĩ apêx kêt nhym Metĩndjwỳnh arỳm ar amã Karõ jano nhym raxo ar akadjwỳnhbê nhỹn ar ajo ba. Nãm ã Jeju arkum ane.

<sup>6</sup> Nhym kôt ba djwỳnh Jeju àbir kutã 'ã akuprõ. Be, me bajtemmã ne mebê idjaer àpēnh tũm. Ar 'ã akuprõn kukij ne kum,

—È, Bēnjadjwỳr djwỳnh, djãm jakam dja ga me bajtembê me babê idjaero amiptàn ar me ijo aba? ane.

<sup>7</sup> Nhym arkum,

—Bir, gwaj Babãm djwỳnh ta ne kute mar. Kabēnkôt dja aje arēnhwã'ã akati nãr 'ã mytyrwỳ bõx. Kute ar amã 'ã akati jarēnh ar aje mar prãm kêtumrêx. <sup>8</sup> Nhym be, dja Metĩndjwỳnh Karõ ar akam ruw ne ar amã tỳx jadjã gar

arým kukwakam atýx ne. Ne kam ijã memã adjujarênh ar aba. Krîraxbê Djeruxarêkam ijã memã adjujarênh ar aba. Ne amibu'ã pykabê Djudêjakam apýnh me krî djãri kunîkôt ijã memã adjujarênh ar aba. Ne amũ pykabê Xamarijkam apýnh me krî djãri kunîkôt ijã memã adjujarênh ar aba. Ne amũ: pyka kunî kôt aba:n apýnh me ba djã kunîkôt me'yr aban bõx ne memã ijã adjujarênh ar aba.

<sup>9</sup> Nãm ã Jeju arkum anen arým kãjmã tẽ. Kãjmã tẽ nhym ar omũnho ku'ê. Nhym kakrã arým o akno nhym ar arým omũnh kêt ne.

<sup>10</sup> Abej rîto ku'ê rã'ã nhym arým Metündjwýnh kadjy mrãnh djwýnh amãnhkrut tu ar kuri dja. Ar õ kubêkã jaka. <sup>11</sup> Ar kuri djan arým arkum,

—Ë, pykabê Garrêjakam ar ajabatãnh, mýkam ne gar kãjkwa jabêno aku'ê? Arým ne Jeju ar abê kãjkwa djwýnhmã wabi gar omũ. Dja gar akubyn rwýkkôt djwý ã omũnho ane. Nãm ã Metündjwýnh kadjy mrãnh djwýnh arkum ane.

*Maxij kute Djuda tykkam pãnh ãpênh djã 'amýnh ne ja.*

<sup>12</sup> Nhym kam ar ar ku'ê djã kurũm, krãnhbê Oriwêre kurũm akubyn Djeruxarê'yr tẽ. Mebê idjaer ne me amikurãdjã kôt me tyk djã kêt djãkam pi'ók rãrãrkam nîjar mrãnh kêt. Me mrãnh'ã akreo kirometu pydjibit. Me kukràdjã kôt ar akubyn Djeruxarê'yr tẽmo kute kirometu pydji pyrãk. <sup>13</sup> Ne kam bõx. Bõx ne kýjrũm kumoka'ê'yr wabi. Ar bikprõnh djãmã wabin nhý. Pedrumẽ Djuãomẽ Xijagumẽ Ængremẽ Piripimẽ Tômemẽ Batormêmẽ Matêumẽ Xijagumẽ Ximãomẽ Djuda ar nhý. Aupêu ne Xijagu ja dji. Ximão ja ne idji kakritbê Xerodji. Djuda ja ne Xijagumẽ ar axikôt apõx. <sup>14</sup> Ar ja kunî axikôt amim Jeju maro

nhýn mã Metündjwýnhmã kabêno nhý. Mã kum meo à'wýro nhý. Nhym me niredjwý kwý nhý. Jeju nãbê Marijdjwý nhý. Jeju kamy ar axikôt ar apõxja ar adjwýnhdjwý nhý.

<sup>15</sup> Nhý: nhym ar'ã akati kwý apêx nhym Pedru arým kãjmã Jejukôt ba djwýnh nhipõkri dja. Arým ne me krãptîbê 120. Kãjmã djan memã kum,

<sup>16</sup> —Akmeremẽ ãpnhîre ar, dja gar ikabênja ma. Be, Djuda ne Jeju'yr meo mõ nhym kam me pa 'amý. Amrêbê: ne me bakukãmãre Djuda'ã ajarê. Metündjwýnh Karõ kukwakam Djuda'ã ajarê. 'Ã ajarê nhym me arým 'ã pi'ók no'ók ne. Nhym me aben djõ'ã arênh mõ:. Arênh mõr tãmtã arým 'yr o bõx. Me bakamingrãnyrekam Djuda arým Jeju'yr meo mõrkumrêx nhym me arým pa 'amý. Me bakukãmãre Dawi kute 'ã ujarênh kôtõ arým 'yr meo mõrkumrêx. <sup>17</sup> Be, Djuda kute 'yr meo mõr kêtri ne Jeju arým amijo utã. Ar iro'ã amijo ar ipytãn arým ano bar kumê ro'ã apê.

<sup>18</sup> Jeju te amijo utã nhym kam kurê djwýnhmã kanga nhym me arým pãnh kum ngõnhponho pi'ók kaprî ngã. Nhym kam pi'ók kaprîja pãnh amim pyka'õ by. Nãm pyka byn arým kam tým ne ajkatõr nhym krêx kunî ajkapî. <sup>19</sup> Nhym kam Djeruxarêkam me ja kunî abenmã arênh ipõk ne. Ne kam amikabên djwýnhkam õ pykamã Axêdjama jarê. Nãm ã Pedru memã ane. Me bakabênkam ne gwaj ren Djuda nhõ pykamã pyka kamrõre jarê.

<sup>20</sup> Nãm memã anen kam itepã ajte memã kum,

—Be, Djuda tyk ja'ã ne me bakukãmãre amrêbê: mebê idjaer nhõ me ngrer tũm'ã pi'ók no'ók ne memã kum,

“Kwãrik wãnh krî djã ja kaprý. Gê me'õ kam krî kêtumrêx”, ane.

Ne kamã ajte 'ã memã kum,

“Àpênh djâkam dja me'õ pãnh apê”,  
ane.

Nãm me bakukãmãre ã Metĩndjwýnh kukwakam pi'õkkam ane. <sup>21</sup> Ije ar amã Metĩndjwýnh kabên jarênhja kôt gê me'õ Djuda djâpênh djâ 'amý. Ê, bar Jejumê ro'ã ar iba. Ar gadjwý ar akwý ne gar Jeju kôt ar aba. Be, Jejumê ro'ã ar baba 'õ, dja àpênh djâkam apê. <sup>22</sup> Gwaj baro'ã babamo kraxkam ne Djuão Metĩndjwýnhmã ngômã me angjêho ba. Gwaj arým kam Jeju pumũ. Gwaj baro'ã ar baba: nhym kam Jeju arým wabi gwaj kam omũno ino re. Gê Metĩndjwýnh kabên kôt ar ajõ gwaj baro'ã apê. Gwaj baro'ã baje Jeju pumũnhkam dja ar ajõ gwaj baro'ã apê gwaj kam Jeju akubyn tĩnkôt memã badjujarênh ar baba. Nãm ã Pedru arkum ane.

<sup>23</sup> Nhym me arkum,

—Be, ar wã, Jõdje Baxabamê Maxijmê ne ar aro'ã Jeju pumũ, ane. Jõdje Baxaba nhidji 'õdjwýbê ne Juxu.

<sup>24-25</sup> Nhym ar arým Metĩndjwýnhmã ar arên kum,

—Ga abê Bênjadjwýr djwýnh. Me kunĩ nhõkre kadjwýnhbê ne ga aje me kabên mar. Ne arým ar amãnhkrutja pumũ. Jeju ne amrêbê ar ijano bar 'ã memã idjujarênh ar iba. Gê ar ja'õ Djuda pãnh ar iro'ã 'ã ujarênh ar ba. Ga aje amijo ar ja'õ pytãrkôt ar imã o amirĩt. Djuda ne axwekôt Jeju kute ar ijanorjabê amijo kuka. Kwãrĩk wãnh me biknor tokry djâkam wãnh akuno. Nãm ar ã Metĩndjwýnhmã ane. <sup>26</sup> Ne kam ar idji'ã kên kryre no'õk. Ne kam kumê. Ne kam 'ã idji kute amirĩtkôt ar arým amijo Maxij pytà. Nhym kam me Maxijmã Jeju kute anor'õ jarê. Jeju kute Ar kubê 11 janor kôt ne me arkum arê.

## 2

*Karõ raxo me kadjwýnhbê ým meo ba kadjy ne ja.*

*Kar 4.31, 8.15, 10.44, 19.2*

<sup>1</sup> Arým ne mebê idjaer bikprõnh djâ nhõ akati nhidjibê Pëxiko. Kam arým Jejukôt ba djwýnh kunĩ axikôt amim Jeju man ro'ã nhý.

<sup>2</sup> Ro'ã nhý: nhym ar aêrbê arým kãjkwa kurũm mýjja rãrãk ne arým kikremã wadjã. Mýjja rãrãk kute kôk 'ityx rãrãk pyrãk nhym arým me kunĩ kuma. <sup>3</sup> Nhym arým mýjja kute kuwy pyrãk amirĩt. Amirĩto kute me õto bikjêr pyrãk. Ne kam mýj kuwyja arým ar'ã arij. Ar ĩ pýnhkôt ar'ã arij nhym ar arým abenã omũ.

<sup>4</sup> Kam ne Metĩndjwýnh Karõ arým ar ĩ pýnhkôt raxo ar kadjwýnhbê nhýn ar ar o ba. Nhym ar arým apýnh me bajtem ba djâkam me kabêno kabên ne arým arênhõ dja. Metĩndjwýnh Karõ ta arkum me kabên jangij nhym kam ar arênhõ dja.

<sup>5</sup> Metĩndjwýnh Karõ kute ar ar o ba kêttri ne me ja apýnh me bajtem ba djâ kunĩkôt aben kurũm ban bõx. Ne arým myt tãmkam krĩraxbê Djeruxarêkam ar ba. Me bõx ny ja ne me mebê idjaer kukrãdjão kukrãdjãn kute ar o ba tũm. <sup>6</sup> Nãm me Djeruxarêkam ar ba: nhym arým mýjja rãrãk kato. Nhym me amybým mýjja man itepato ar'ã aben pydji. Me krãptĩ: bõx. Bõx nhym Jeju kôt ba djwýnh ar arým apýnh me bajtem kabênkam kabên jarênh mexkumrêxo ku'ê. Ar kute me bõx ny kabên bajtem jarênh mexkumrêx. Apýnh me bõx ny jãbatãnh djâkam me kabênjakam ar kabên jarênh mexkumrêx nhym me kunĩ arým amikabên djwýnh ma. <sup>7</sup> Amikabên djwýnh man kam te kute kraxkôt ar marmã arkam no tyn kumex ne abenmã kum,

—Je, me kabênja ma. Me ja kunĩ ne me pykabê Garrêjakam abatãnh. Me kute me bakabên mar kêtikumrêx ne arým kam kabên jarênh mexkumrêx. <sup>8</sup> Amrêbê me baprĩri apýnh me bakabên djwýnh gu me arým jakam maro dja. Mýj



ne me ja me bakabēnkam kabēn  
kadjy amijon? <sup>9-10</sup> Be, apýnh me  
bajabatānh djābē ne pykabē

Paxijmē

Medjijmē

Erāomē

Mexomimē

Djudējamē

Kapadōmē

Pōtumē

Adjijmē

Bridjamē

Papirijmē

Edjitumē.

Apýnh me bajabatānh djā ne ja.

Ribijkam pykabē Xireni kuridjwý  
me bajabatānh djā'ō.

Krīraxbē Rōma kurūm me  
babōxdjwý bakwý babē  
idjaerkumrēx.

Nhym me bakwý amrēbē baje  
mebē idjaer kukràdjāo  
kukràdjā.

<sup>11</sup> Kretamē Arabijmē ne me baja-  
batānh djā 'ōdjwý.

Be, apýnh me bajabatānh djā ne  
ja. Nhym me tu me bajaêrbē apýnh  
me bakabēn djwýnh kunīkôt kabēn  
jarēnh mex. Me bakabēn jarēnh  
mex ne arým kam Metündjwýnh  
rax'ā ujarēnh kumex gu me arým  
ar kuma. Nām me bōx ny ā Jejukôt  
ba djwýnh ar'ā abenmā ane. <sup>12</sup> Ne  
arým te kute kraxkôt ar marmā  
arkam no tyn kumex ne ar umaje  
umar punuren abenmā kum,

—E kum, mýj'ā ne gu me baje me  
kabēn marja amijakre? ane.

<sup>13</sup> Nhym me kwý arkam bēno  
ajkēn abenmā kum,

—Kadjwati kangō\* kumexkam  
ne me ajbā, ane.

*Pedru kute kàj bê me krāptī:mā  
Metündjwýnh kabēn jarēnh.*

<sup>14</sup> Nhym kam Pedru arým kàjmā  
dja. Jeju kute ar anorbē 11mē ar  
ro'ā kàjmā djan arým kàj bê memā  
kabēn ne memā kum,

—Me abē idjaer, krīraxbē  
Djeruxarēkam me ar aba kunī,  
dja ga me ikabēn 'āno djan ama.

<sup>15</sup> Be, me amābit ne bar ije kadjwati  
kangōkam ibibānh pyrāk. Nhym  
be, kati. Ota, kýjrūm myt nhý.  
Nhýnh got kýjrūm myt nhýrkam  
kadjwati kangōkam me bibānh'ō  
amirīt ne? Arkati. Ar ba ne bar  
ibibānh prām kêtikumrēx. <sup>16</sup> Bar me  
amā arē ga me ama. Bar apýnh  
me aba djāri me akabēnkam ikabēn  
jarēnh mex ga me ama. Be, amrēbē:  
Metündjwýnh kukwakam kabēn  
jarēnh djwýnhbē Djōwe kute ar ijā  
ujarēnh kôt ne bar ā ikabēno ane.

<sup>17</sup> Nām me bakukāmāremā kum,  
“Metündjwýnh me bamā, ‘Dja mýjja  
kunī pykakôt amingrānh 'ýr  
nhym me kunī aminhinomā  
amimēnh 'ýr ba arým me  
kunīmā Ikarō jano nhym  
arým meo tuknīn meo ba.

Me ĩ pýnhkôt me kunīo tuknīn meo  
ba. Meo tuknī kute mrāmri  
ne me kute me iby ngō kapī  
nhym kute meo tuknī pyrāk.

Dja ba Ikarō jano nhym akamrer  
ar, akadjwýx ar ikukwakam  
kabēn jarē.

Nhym me abatānh ny nokam mýjja  
pumūnh kêt kwý amirīt  
nhym me omū.

Nhym mebēngēt mýjja kwý pyti.

<sup>18</sup> Apýnh akati djāri wākam dja  
ba inhō àpēnh mymē inhō  
àpēnh nimā Ikarō jano nhym  
arým meo tuknī. Nhym me  
arým ikukwakam ikabēn  
jarē.

<sup>19</sup> Nhym me te kute mýjja marmā  
kam no tyn kumex kadjy  
dja ba kàjkwakam mýjja  
pumūnh kêt kwý nhípēx.  
Ne me kute iraxmā kator  
kadjy pykakamdjwý mýjja  
pumūnh kêt kwý nhípēx.  
Dja ba kam me kamrōmē  
kuwymē kum tyk nhípēx.

\* **2:13** Mýjja me kute o kōm ne kôt bibānh kunīja, kadjwati kangōmē uba kangōmē, mýjja kangō  
kunī ne me kum kadjwati kangō jarē.

20 Ne myt nokam akamàt kô tyk ne mytyrwýo me kamrô. Bēnjadjwýr djwýnh kute me axwemā pānh jarēnh nhō akati bōx 'ýr. Kam dja memā ra:xi ne memā umati:re. Dja bōx 'ýr ba kam arým ā mýjjao ane.

21 Kam dja me kwý ĩ pýnhkôt Bēnjadjwýr djwýnhmā amijo a'uw nhym arým me utā. Me ĩ pýnhkôt me kunī pytà.' Nām Metĩndjwýnh ā me bamā ane."

Nām ā Djōwe Metĩndjwýnh kukwakam ar ijā ane. Be, djām ar ibibānh got? Kati. Ga, me bakukāmāre Djōwe kute ar ijā ujarēnhja pumū. Djōwe kute ar ijā ujarēnh kôt bar arým apýnh me akabēnkam ikabēn jarēnh mex. Nām ā Pedru memā ane.

22 Ne ajte itepā memā kum,

—Me abē idjaer, dja ga me ikabēnja ma. Metĩndjwýnh ne krĩraxbē Nadjarekam Jejujao ba nhym kukwakam arým mýjja pumūnh kêt nhipēxo ba. Me punuo mexo ba. Te me aje marmā kam ano tyk ne aku'ê kady ne kôt aje raxmā akator kady ipēxo ba. Metĩndjwýnh ta ne o ba nhym arým kabēnkôt me akam mýjjao ba. Me ga ne ga me amrēbē kôt omūn ama. 23 Tām ne Metĩndjwýnh kum ire. Me abē idjaermā kum ire. Mýjja kunī kētri kute amikukām mýjja kunī mar kôt ne kum ire. Me kētri ne arým amim 'ā karō māmđji. Kute amim 'ā karōkôt ne arým me amā Jejumā ire. Nhym me axwe me akabēn kôt pīte'ykam kunhōn kubī ga me mekôt ajaxwe.

24 Ga, me arým tu tykkumrēxja pumū. Mýj me'ō ta dja akubyn meo tĩn nhym me ajte mekôt ar ba? Arkati. Me arým tu tykkumrēx. Kam me kute mrāmri ne me kute me uwpre týxkam me te: kator prāmje kute amikjēnho bakam tokryja pyrāk. Jejudjwý ne mrāmri

tu tykkumrēx. Nhym be, djām tyk rā'ā? Kati. Tyk rā'ā prām kêtumrēx. Metĩndjwýnh ne arým akubyn o tĩn ne. Metĩndjwýnh ne o kute mrāmri ne me kute me uwpre týxkam arým 'āpre bōnh pyrāk nhym akubyn me ta ajte mekôt ar ba pyrāk. 25 Amrēbē: Kritu ta Metĩndjwýnhmā amijarē. Tyk rā'ā kêt'ā kum amijarē. Nhym me bakukāmāre Dawi arým kôt arē gu me pi'ōkkam omū. Nām Metĩndjwýnhmā kum,

"Bēnjadjwýr djwýnh, inokrekam ga amirīt rā'ā. Ga imē amijo akajkepkam dja me te: idjumar punumā ingrēkmā.

26 Ba kam arým inhōkre kadjwýnhbē ikĩnhkumrēx ne ikĩnh'ā memā amijarē. Dja ba inhīkumrēx ne akubyn itĩn ne ar iba. Ja kady dja ba tu amim akamnhīxkumrēx ne ate ikrā.

27 Dja ba tyn me tyk ba djākam ar iba. Djām kam dja ga ikanga? Kati. Djām inhī rerekmā? Kati. Ba ne ba amexo imex. Kam dja ga ikanga kêtumrēx. Kam ne ba ikĩnhkumrēx.

28 Mýj dja ba itykkam nē? Bir, ga ne ga arým imā arē. Dja ba akubyn itĩn ne akôt ar iba rā'ā: rā'ā ne. Dja ga ikuri dja. Kam dja ba ikĩnhkumrēx ne."

Nām ā Dawi ane nhym Pedru arým kôt memā arē. Kritu tyk rā'ā kêt'ā memā arē.

29 Ne kam itepā Kritu tĩn'ā memā kum,

—Akmere, ba prīne me amā me bakukāmāre Dawi kabēn'ā ajarē ga me prīne ama. Djām amijā ne kabēnja jarē got? Kati. Dawi ne amrēbē: ty nhym me arým me tyk nhō kikrekam adjā gu me baje kikre pumūnh rā'ā. 30-31 Be, Kritu akubyn tĩn'ā ne kabēn jarē. Dawibē Metĩndjwýnh kukwakam kabēn jarēnh djwýnh'ō. Nhym kam

Metĩndjwýnh kum kabēn jarēnh māmđjin kum,

“Dja atāmdjwý ar aben djõ'ã apõx. Aben djõ'ã apõx tāmõtā nhym tũmrām dja atāmdjwýja kato. Tāmja dja kubē Kritu. Apānh dja memā nhýn arým kubē Bēnjadjwýrbē kumkati. Ikabēn pyđji ne ba arē.” Nām Metĩndjwýnh ã Dawimā ane nhym arým kuma. Kute amidjõ'ã Kritu kator markam ne Dawi Metĩndjwýnhmā Kritu kabēn jarēn kum,

“Dja ba tyn me tyk ba djākam ar iba. Djām kam dja ga ikanga? Kati. Djām inhĩ rerekmā? Kati. Dja ga ikanga kētkumrēx”, ane. Djām amijā ne Dawi kabēn ja jarē? Kati. Kritu'ã ne arē. Bēnjadjwýrbē kumkati'ã ne arē. Kritu dja ĩ rerek kēt ne akubyn tĩn.

<sup>32</sup> Be, Jeju ne Metĩndjwýnh akubyn o tĩn. Ar ikunĩ ne bar omũ. Jejubē ne Bēnjadjwýrbē kumkati. Kubē ne Kritu. <sup>33</sup> Nām akubyn o tĩn nhym kam wabin arým ra:x ne Metĩndjwýnh djubõk'ānh me kunĩmā nhý. Nhý nhym Bām arým kum Karõ ngā. Amrēbē kute kum arēnhkõt ne kum kungā nhym kam ajbir ar imā ano. Nhym kam ar ikam ruw ne arým ar ijo ba bar arým kukwakam me bajtem kabēn jarēnh mexkumrēx ga me arým ar ima.

<sup>34</sup> Be, mrāmri ne Jeju arým wabi. Nhym be, Dawi ne kākwa djwýnhmā ābir kēt. Nām amrēbē: me bakukāmāremā kum,

“Inhõ Bēnjadjwýrmā ne Bēnjadjwýr djwýnh kabēn ne kum, 'Amrē idjubõk'ānh nhý, Abēnjadjwýr raxkam idjubõk'ānh nhý.

<sup>35</sup> Ikam ama ba amrē awýr akurē djwýnhõ mõ ga me kwýo apardjan me kwý nhimex.' Nām Metĩndjwýnh ã Kritumā ane.”

Nām ã Dawi me bakukāmāremā ane. <sup>36</sup> Me abē idjaer kunĩ dja

ga me Dawi kabēnja man 'ã ikabēn mar pyđji. Mrāmri ne Metĩndjwýnh Jeju'ã Bēnjadjwýrbē kumkati mēnhkumrēx. Kubē ne Kritukumrēx, me aje pĩte'y'ã nhõrja tām. Ja dja ga me amim mar pyđji. Nām ã Pedru memā ane.

<sup>37</sup> Nhym me kute ja markam arým amim ngryk ne kaprĩre ne. Ne kam arým Pedrumē Jeju kute ar anorja kunĩmā kum,

—Akmere ar, mýj dja ba me kam amijon? ane.

<sup>38</sup> Nhym Pedru memā kum,

—Me on amikam akaprĩren wānh ajaxwemā anhiren Jeju Kritu'ýr amijo akēx. Bar kam arým kukwakam kum ngõmā me ajangij. Nhym Metĩndjwýnh arým me ajaxwe maro aknon me akam ngryk kēt ne arým me amā Karõ jano nhym ar me ajo ba. <sup>39</sup> Be, Metĩndjwýnh ne amrēbē me amā Karõ jarē. Ne ajte me akramē atāmdjwýmā arē. Ne ajte anhyr bē me mõr wāmā arē. Kute amiwýr me 'wýr kunĩ ne Metĩndjwýnh arým memā Karõ jarē. Nām ã Pedru memā ane.

<sup>40</sup> Ne kam ajte memā Metĩndjwýnh kabēn kumex jarēn axwe nēje me akre:n ajte memā karõ.. Nām memā kum,

—Me kamingrāny ja ne me axwekumrēx. Dja me ĩ me biknor tokry djākam akuno. Me gop mekõt abiknor kēt kadjy amipytā, ane. <sup>41</sup> Nhym kam me kum kabēn kĩnh ne tu amim markumrēx. Nhym kam me arým Metĩndjwýnhmā ngõmā me krāptĩ jangij. Mebē 3.000 ne me angij nhym me arým mekõt tu amim Jeju markumrēxo ba.

*Me kute Jeju mar kute abeno õbikwa.*

*Kar 4.32*

<sup>42</sup> Nhym me mā Jeju kute ar anorja kukrādja man kõt ar amijo ba. Ne aben tã akuprõ. Ne Jeju kute aminhĩ'ã djwý jakren kokjērja

tãm ne ajte kute 'ã akren kokjêro krĩ, aben tã, me kute tyk mar rã'ã kadjy. Ne aben tã Metĩndjwýnhmã kabêno krĩ. <sup>43</sup> Nhyim me te kute mýjja marmã kam no tyk ne kute Metĩndjwýnh raxmã kator kadjy Jeju kute ar anorja me aêrbê mýjja pumũnh kêt krãptĩ nhípêxo ba nhyim me kunĩ arým madjà kreti.

<sup>44</sup> Nhyim me kute amim Jeju mar kunĩ ro'ã ar ban kute abenbê mýjja'õ nê kêt ne abenmã abennhõ mýjjao ba. <sup>45</sup> Ne amũ memã apýnh aminhõ pykamê aminhõ mýjja ngãn pãnh pi'ók kaprĩ jamý. Ne kam apýnh me õ mýjja kêtã pi'ók kaprĩ ngã. <sup>46</sup> Ne kam akati kunĩkõt Metĩndjwýnh nhõ kikretikam axikõt Jeju maro krĩ. Ne kam apýnh me ũrkwã kõt Jeju kute aminhĩ'ã djwý jakren kokjêrja tãm ne ajte kute 'ã akren kokjêro krĩ. Ne kĩhtiren tu aben markumrêx ne ro'ã õ kwý krêno kumex. <sup>47</sup> Ne mã Metĩndjwýnhmã kum,

—Imã akĩnhkumrêx. Amexiti:re, anhýro kumex. Nhyim bu'ã me kunĩ kum me kĩnh. Nhyim Bẽnjadwýr djwýnh akati kunĩkõt amiwýr me kwýo akêx. Aben totokmã amiwýr meo akêx ne me axwebê me utã. Ne arým me kute amim Jeju mar kõt me umjuw nhyim me arým mekõt ar aben pydjio ba.

### 3

*Pedru kute me'õ mrãnh kêtõ mex.*

<sup>1</sup> Ne kam akati 'ókam arým myt ibõ, arým 3 ora nhyim Pedrumê Djuão ar Metĩndjwýnh nhõ kikreti'ýr tẽ. Akati kunĩkõt, myt ibõkam ne mebê idjaer kikretikam Metĩndjwýnhmã kabêno krĩ. Nãm ar 'ýr tẽn 'ýr bõx nhyim me me'õ mýn o tẽ. <sup>2</sup> Adjãkam ne mrãnh kêt nhyim me mýn o ba. Akati kunĩkõt ne meo ban kikreti jajkwa krekre kuri krĩ. Ajkwa krekre ja nhidjibê ne Kĩhtire. Nãm me o ban krĩ nhyim kam me ngjêx kunĩkõt pi'ók kaprĩ'ã me 'wýro krĩ.

<sup>3</sup> Be, nãm me kumýn o tẽn kam ýr. Nhyim Pedrumê Djuãomê mekõt ãrmã tẽ nhyim ar omũn arým pi'ók kaprĩ'ã ar ku'uw. <sup>4</sup> Nhyim Pedrumê Djuãomê 'ýr akêx ne omũ, omũnh týx ne kum, “Amrê ar ipumũ”, ane. <sup>5</sup> Nhyim arým ar kuman mýjja jabej ar'ýr akêx ne ar omũho nhý.

<sup>6</sup> Nhyim Pedru kum,

—Inhõ kryt jakao pi'ók kaprĩ kêt ne inhõ kẽn karýro pi'ók kaprĩ kêt. Nhyim be, atemã inhõ mýjja ba amã arê. Be, Nadjarekam Jeju Kritu kukwakam on kãjmã djan on mrã, ane. <sup>7</sup> Nãm anen tu ubõk'ãnh ikra 'amýn kãjmã aro tẽ. Nhyim on parmê parkõn mex <sup>8</sup> ne ekrux ne kãjmã dja. Ne arým tẽ. Ne kam arkõt Metĩndjwýnh nhõ kikretimã wadjã. Nãm arkõt arĩ tẽ, Kĩnhkumrêxkam arkõt ãtor tẽn Metĩndjwýnhmã mextire jarêno tẽ. <sup>9</sup> Nãm kum mextire jarêno tẽ nhyim me kunĩ arým omũ. <sup>10</sup> Omũn kam amim nokre pumũn arým abenmã kum,

—E kum, tãmwã ne kikreti jajkwa krekrebê Kĩhtire kuri amijo à'wýro krĩ. Je tõ mýj ne arým kam nẽ? anen te aben kukijn kam no tyn kumex.

*Me krãptĩmã Jeju'ã ujarênh.*

<sup>11</sup> Nhyim mrãnh kêt ne arým mexja arým Pedrumê Djuão aro tým ne aro dja. Metĩndjwýnh nhõ kikreti janhãkam kire kre kênhkam ne ar dja. Me kute kum Xaromão nhõ kire kre kênh jarênhja. Nãm aro dja nhyim me kunĩ arým kam ar'ã akuprõn te kute marmã arkam no tyn kumex. <sup>12</sup> Nhyim Pedru arým memã kum,

—Ga me abê idjaer, mýkam ne ga me te aje marmã me'õjakam ano tyn akumex ne ar ijã ano mao akumex? Djãm ar ba ne bar me'õjamã mrãnh mex jadjã? Kati. Ar ba ne bar ije o mex mar kêt. Djãm ar amimexo ne bar kum

mrãnh mex jadjà? Arkati. Jeju ne paro mex ne kum mrãnh mex jadjà.

<sup>13</sup> Ba me amã arẽ ga me ama. Metĩndjwýnh kute Abraõomẽ Id-jakmẽ Djakomẽ me bakukãmãre kunõ ba djwýnh arým jakam amirax kõt Kra Jejuo ra:xi. Tãmwã ne ga me amrẽbẽ Piratumã kanga. Nhyam kam bit kute kum irermã. Ta kute arek me aro'ã ar ban umar mex kadjy bit kute kum irermã ga me kum, “Kati, Kati”, ane. <sup>14</sup> Be, Jeju ne Metĩndjwýnh mexo mex ne katàt ar amijo ban axwe kêtumrẽx ga me kanga. Ne kam me'õ jaxwe kute me parja'ã Piratumã kum, “Tãmwã dja ga kum anhiren ano gẽ ta me ikõt arek ar ban umar mex”, ane. <sup>15</sup> Ne kam kute mýjja kunĩmã tĩn jangjẽnh djwýnhja bĩ. Nã gãm me bĩn'ã memã apnẽ nhyam me kubĩ.

Nhyam be, Metĩndjwýnh ne arým akubyn o tĩn. Ar ba ne bar omũn me amã kõt 'ã idjujarẽnh ar iba. <sup>16</sup> Be, Metĩndjwýnh ne amikõt Jejuo rax bar kam arým tu amim Jejuo kamnhĩxkumrẽx. Tu amim kamnhĩxkumrẽx nhyam arým me'õjamã tỳx jadjàn o mex ne. Jeju ta ne ar imã ijamak bõ bar arým tu amim kamnhĩxkumrẽx nhyam arým prĩne me'õjao mex ne. O mex nhyam arým me anhipõkri dja ga me akunĩ arým omũ.

<sup>17</sup> Be, akmere ar, ba me amã arẽ ga me ama. Anhõ bẽnjadjwýrmẽ ne ga me ajamakkre kêtam Jeju bĩ ba arým kuma. <sup>18</sup> Nhyam be, amrẽbẽ: ne Metĩndjwýnh kukwakam kabẽnh jarẽnh djwýnh kunĩ me bakukãmãremã kum, “Dja Kritu tokry. Metĩndjwýnh kute Kra'ã Bẽnjadjwýrbẽ kumkati mẽnhja dja tokry.” Nãm me ã me bakukãmãremã ane. Nhyam me aben djõ'ã arẽnhõ mõ:n arẽnhõ mõr tãmtã: arým 'ýr o bõx. Tũ:mrãm me akamingrãnyre amã kurẽ nhyam arým Kritu tokry. Me bakukãmãre kute arẽnh kõt Kritu tokry. Nãm ã Pedru memã ane.

<sup>19</sup> Ne kam itepã memã kum,

—Kam me on amikam akaprĩren wãnh ajaxwemã anhiren Bẽnjadjwýr djwýnh'ýr amijo akẽx ne katàt kabẽnh man kõt ar amijo aba. Dja ga me ã amijo ane nhyam arým me ajo kĩnh ne. Ga, me kum kõrkam kaprĩja pumũ. Ne ajte kute ngõo kõmkam kĩnhja pumũ. Dja ã me ajaxwekam akaprĩkam me ajo kĩnhõ ane.

<sup>20</sup> Dja ga me ã amijo ane nhyam arým akubyn me amã Kritu jano. Amrẽbẽ: me kute kãj bẽ me amã 'ã ujarẽnhja dja me amã ano. Bẽnjadjwýrbẽ kumkatibẽ ne Jeju. Kritubẽ ne Jeju. <sup>21</sup> Dja arek kãjkwa djwýnhkam ar ba:n kam akubyn ruw. Kute akubyn mýjja kunõ ny kadjy akubyn ruw. Metĩndjwýnh kukwakam kabẽnh jarẽnh djwýnhja kunĩ ne me amrẽbẽ: me bakukãmãremã ja jarẽnhkumrẽx. <sup>22</sup> Mrãmri ne Mõj djẽ me bakukãmãremã kum,

“Ba ne ba Metĩndjwýnh kukwakam me amã ikabẽnh jarẽnhõ iba. Dja Metĩndjwýnh ã me akadjy amijo me anhõbikwa'õ pytã nhyam arým ã ikudjwa ã me amã kabẽnh jarẽnhõ ane.

Dja me amã kabẽnh jarẽ ga me prĩne aman kõt ar amijo aba.

<sup>23</sup> Nhyam me'õ kute kabẽnh mar kêtja dja me o ajkẽ nhyam ajte õ me wýnhkõt amirĩt kêtumrẽx ne.”

Nãm ã Mõj djẽ ane nhyam Pedru kõt memã arẽ.

<sup>24</sup> Ne kam itepã memã kum,

—Mrãmri ne amrẽbẽ Metĩndjwýnh kukwakam kabẽnh jarẽnh djwýnh kunĩ apýnh mýjja apõxmã 'ã ajarẽ. Me ajte Kritu katormã 'ã ajarẽ. Nhyam jakam mýjja arým amirĩt nhyam Kritu arým kato. Dja ga pi'õk kõt akubyn arẽnhõ tẽnh Xamuwe'ýr o bõx. Metĩndjwýnh kukwakam kabẽnh jarẽnh djwýnh ne aben nhitẽpã apõx tẽ. Kunĩ'ã dja ga pi'õkkam ujarẽnh jarẽnhõ tẽ:n arým

kõt ama. Kukwakam kabēn jarēnh djwýnh kunĩ ne me Kritu'ã memã ajarē. Ja dja ga me kõt ama. <sup>25</sup> Ga me Metĩndjwýnh kukwakam kabēn jarēnh djwýnh kabēnjao aba rã'ã ne. Metĩndjwýnhmē me bakukãmāremē arým abenmã kabēn jarēnh mãmdji ga me kabēno aba rã'ã. Nãm Metĩndjwýnh Abraãomã kum, “Dja akrakam kra aben djõ'ã apõx.

Aben djõ'ã apõx krãptĩ:.

Atãmdjwý ja'õ dja meo kĩnh. Dja apýnh pyka kunĩkõt meo kĩnh nhym me arým kĩ:nhkumrēx.”

Nãm ã Abraãomã kabēn pydjín arēnho ane. <sup>26</sup> Be, ba me amã arē ga me ama. Kute meo kĩnh kadjy ne Metĩndjwýnh amijo Kra pytãn me akumrēxmã ano. Dja me anhĩ pýnhkõt me ajaxwebē me ajo akēx ne arým me ajo kĩnh. Ja kadjy ne me amã ano. Nãm ã Pedru memã ane.

#### 4

*Pedru me rũnh krãptĩmã Jeju'ã ujarēnh.*

<sup>1</sup> Nãm ar memã kabēno dja nhym me rũnh arým ar'ýr bõx. Me kadjy Metĩndjwýnh mar djwýnh ar'ýr bõx. Metĩndjwýnh nhõ kikreti nēje ku'ē djwýnho ba djwýnhjadjwý mekõt ar'ýr bõx. Mebē xadjudjēumē mekõt ar'ýr bõx. <sup>2</sup> Pedru ar kãj bē memã Jeju tyk ne akubyn tĩn'ã ujarēnho dja. Ne kam ajte kãj bē me kute amim Jeju mar tykja kunĩ akubyn tĩn'ã ujarēnho dja. Jeju akubyn tĩn kõt me tĩn'ã ujarēnho dja. Kam ne me rũnhja ngry:k ne arým ar'ýr bõx. <sup>3</sup> Nãm me ar'ýr bõx ne arým aro tým ne ar pa 'amýn aro tēn Ar kubē ijē. Arým me'ã akamãt 'ýr. Nhym kam me akati kadjy Ar kubē ijē. <sup>4</sup> Nhym be, me kute Ar kubē ijē kētri ne me kute ar kabēn marja krãptĩ: arým tu amim Jeju markumrēx. Òbē me kute tu amim markumrēxjamē ajbir me krãptĩjamē ne me abenã mēnhkam

krãptĩ:kumrēx. Me my ne mebē 5.000.

<sup>5-6</sup> Nãm me akati kadjy Ar kubē ijē nhym kam me'ã akati nhym me rũnh ar'ã akuprõ. Mebēngētmē Mõjdjē kukràdjã mar djwýnhmē ar'ã akuprõ. Nhym me kadjy Metĩndjwýnh mar djwýnh nhõ bēnjadjwýr raxbē Ananh mekõt nhý. Nhym Kajbajmē Djuãomē Arexãrimē Ananh nhõbikwa kunĩ ar'ã akuprõ. Me rũnh ja ne me krĩraxbē Djeruxarēkam ar'ã akuprõ. <sup>7</sup> Nhym me arým aro katon me ipõkri ar kudja. Nhym kam me ar kukij ne arkum,

—Mýj me'õ kukwakam ne gar mrãnh kētjao mex? Mýj ne idji kute? ane.

<sup>8</sup> Nhym kam Metĩndjwýnh Karõ arým raxo Pedru kadjwýnhbē nhýn ar o ba. Nhym kam memã kum,

—Mebē idjaerkam me abēnjadjwýrmē ar abēngēt ar, <sup>9</sup> mýjkõt ne bar imã me'õ punuja kaprĩn o mex ga me abej ar ikukij. <sup>10</sup> Dja bar me amã arē ga me ama. Me gamē mebē idjaer kunĩ dja ga me ikabēn ma. Nadjarekam Jeju Kritu, me aje pĩte'y'ã nhõr ne bĩn nhym Metĩndjwýnh akubyn o tĩnja. Jeju ja kukwakam ne me'õ mrãnh kētja arým mex. Mex ne me anhipõkri dja ga me arým omũ. <sup>11</sup> Amrēbē: ne me bakukãmāre Jeju'ã ajarēn memã kum,

“E kum kēn ja ne me kute kikreo ãm djwýnhja kute kikremã armã te omũn bõm kumē.

Kēn ja ne arým kute kikremã o kajpar, kum o kajpar tỳxi.”

Nãm ã me bakukãmāre memã anen arým 'ã pi'õk no'õk ne. Me aje kikreo ãm djwýnhwã pyrãk. Amã Jeju kurē nhym arým kute kēnwã pyrãk ne arým kãjkwa djwýnhkam me bakunĩmã nhý. <sup>12</sup> Djãm ikrebē me'õ kute me bajaxwebē me bapytãr? Arkati. Me'õ kute me bapytãr kētkumrēx. Mrãmri ne kute me bapytãr kadjy Metĩndjwýnh

memã Jeju pydji jarē. Nhyŷ pyka kunĩkōt me bakadjy me'ōdjwŷ kētkumrēx. Nãm ā Pedru memã ane.

<sup>13</sup> Be, Pedrumē Djuão ar memã kabēnkam me rŷnh abenmã kum,

—E kum, arkum gwaj bapyma kētkumrēx. Be, ar kute me bakukràdjã mar kēt, ar kajgo mexi. Mŷj got ar nēn ā kabēn mexo ane, ane. Ne kam arŷm ar kuman abenmã kum,

—Be, ar Jejukōt ba tŷmkam ne ar ā kabēn mexo ane, ane. <sup>14</sup> Nhyŷ ar kute me'ōo mexjadjwŷ ar ro'ã dja nhyŷ me omũ. Ne te kute abenmã, “Nãm ar 'êx”, anhŷr prãmje.

<sup>15</sup> Ne kam me rŷnh me bikprōnh djã nēje ar ano nhyŷ ar tē. Nhyŷ me ar kãxã aro aben maro nhŷ.

<sup>16</sup> Ne abenmã kum,

—Mŷj dja gwaj ar on? Me kute Metĩndjwŷnh raxmã kator kadjy ar mrãmri mŷjja pumũnh kēt raxja nhipēx. Me'ō punu mex nhyŷ ar arŷm o mex. Nhyŷ Djeruxarēkam me ja kunĩ arŷm omũ. Kam gwaj baje te memã, “Nãm ar 'êx”, anhŷr prãmje. <sup>17</sup> Be, gwaj ar kangrōnh tŷx gē ar ajte Jeju'ã ujarēnh kēt. Gēdja amũ me bu'ã me wã mar kēt. Nãm me ā abenmã ane.

<sup>18</sup> Ne kam amiwŷr ar ku'uw nhyŷ ar bōx nhyŷ me arkum,

—Kwãrĩk wãnh ajte Jeju kukwakam memã kabēn jarēnh kēt. Ne kwãrĩk wãnh 'ã memã adjujarēnh kēt, ane. <sup>19</sup> Nhyŷ Pedrumē Djuão ar memã kum,

—Be, mŷj dja bar nē? Metĩndjwŷnh kute ar imã ar imex jarēnh kadjy mŷj dja bar nē? Djãm me akabēnkōt ar ije Jeju'ã idjujarēnh kētmã? Nãr kon, djãm Metĩndjwŷnh kabēnkōt ar ije Jeju 'ã idjujarēnhmã? Me gadjwŷ amikadjy ama. <sup>20</sup> Be, ar ije Jeju akubyn tŷnkōt omũnh ne ar ije kabēn mar. 'Ã dja bar bir idjujarēnhkumrēx ar iba. Te 'ã idjujarēnh kētmã, ane.

<sup>21</sup> Nhyŷ kam me ajte ar kangrōn arkum ire nhyŷ ar arŷm mã tē. Me rŷnh ne me te: kute aro aben mar nhyŷ me kute mŷj ar axwe'ō pãnh kute aro bikēnhmã. Ar kute me'ōo mexkam ne me kãtãm kunĩ Metĩndjwŷnhmã ra:x jarēn kum ar kŷnh. Me rŷnh ren aro ajkē nhyŷ ren bu'ã me kãtãm ren kum me kurē. Kam ne me rŷnh te: kute aro bikēnhmã. <sup>22</sup> Be, te me'ō jakryja abatãnh mex nhyŷ ar arŷm o mex. 'Ã amexbē 40 nhjukri ne ajte amex rã'ã arŷm 'ã apēx nhyŷ ar o mex. Djã ne me mŷjja ja'ō pumũ? Arkati.

*Me kute Jeju mar kute Metĩndjwŷnhmã rax jarēnh.*

<sup>23</sup> Nãm me rŷnh Pedrumē Djuão arkum ire nhyŷ ar mã tēn kam arŷm aminhō me ja'ŷr bōx. Ne kam me rŷnh kute arkum kabēn kōt memã arē. Me kadjy Metĩndjwŷnh mar djwŷnh nhō bēnjadjwŷrmē mebēngētmē kabēn kōt arē nhyŷ me arŷm kuma. <sup>24</sup> Ne kam axikōt Metĩndjwŷnhmã kabēn ne kum,

—Bēnjadjwŷr djwŷnh, abē Metĩndjwŷnh. Ga ne ga kãjkwa nhipēx ne pyka nhipēx ne ngō raxbē pyka kēt nhipēx ne kam mŷjja ar baja kunĩ nhipēx. <sup>25</sup> Be, anhō àpēnh Dawi ne akukwakam memã kum,

“E kum, mŷkam ne apŷnh me ba djãkam me bajtem àkrēo kumex? Mŷkam ne me amim mŷjja'a karō kajgoo kumex?”

<sup>26</sup> Pykakam me bēnjadjwŷr rŷnh ar arŷm kãjmã dja. Kute Bēnjadjwŷr djwŷnhbē àptãrmã arŷm kãjmã djan itepato abeno akuprō.

Õ Kritudjwŷ me arŷm kute kubē àptãrmã kãjmã dja. Me õ Bēnjadjwŷrbē kumkatibē àptãrmã kãjmã dja.”

Nãm ā me bakukãmãre Dawi ane. <sup>27</sup> Be, Bēnjadjwŷr djwŷnh, mrãmri ne Dawi kabēnkumrēx. Arŷm ne me kute Jejubē àptãrmã akuprō. Akra Jeju ne amexo mex. Ga ne ga arŷm

'ã Bẽnjadjwýrbê kumkati mẽ. NhyM Erodjĩmẽ Põxu Piratumẽ apýnh me ba djãkam me bajtemmẽ mebê id-jaermẽ me kunĩ kute kubê àptãrmã arým abeno akuprõ. <sup>28</sup> Ga ne ga amrêbê me kêtĩ arým amim mẽã karõn amybým meo aba. Meo aba: nhyM kam me arým ã Jejuo ane. <sup>29</sup> Me kute Jejubê àptãrmã akuprõ. Bẽnjadjwýr djwýnh, jakam dja ga me kute ar ikangrõnhja ma. Ne kam ar imã itýx jadjã bar imã me uma kêt ne me kunĩmã akabẽn jarẽ. Ar ibê anhõ àpẽn. <sup>30</sup> Dja ga ar imã týx jadjã bar me punuo mex ne akra kukwakam me aêrbê mýjja pumũnh kêt nhípêx. Me te kute mýjja marmã kam no tyk ne ku'ên araxmã kator kadjy bar mýjja pumũnh kêt nhípêx. Akra ne mexti:ren axwe kêtumrêx, ane.

<sup>31</sup> Nãm me Metĩndjwýnhmã kabẽn pa nhyM me bikprõnh djã arým amingrêk ne. NhyM Metĩndjwýnh Karõ arým me ĩ pýnhkõt raxo me kadjwýnhbê nhýn ar meo ba. NhyM me arým kum me uma kêt ne memã Metĩndjwýnh kabẽn jarẽ.

*Me kute abenmã õ mýjja nhõr.*

*Kar 2.42*

<sup>32</sup> NhyM kam me kute amim Jeju mar krãptĩ: kum aben jabê. Me ĩ pýnhkõt kum aben jabẽn kum Jejuo kĩnh prãm. Ne aminhõ mýjja kunĩ aminhõ kêt ne amikutã abenmã kwý ngã. <sup>33</sup> NhyM Jeju kute ar anorja mã memã kum,

—Bẽnjadjwýr djwýnh Jeju akubyn tĩn. Ar ba ne bar tĩnkõt omũ, anen mã memã 'ã ujarẽn ar ba. Metĩndjwýnh ne arkum týx jadjã nhyM ar tý:x ne memã 'ã ujarẽn ar ba. NhyM Metĩndjwýnh arým tu me kunĩmã ukaprĩ jadjã nhyM me arým ukaprĩ:kumrêx. <sup>34</sup> NhyM kam mẽõ kum mýjja'õ prãm kêtumrêx. Mýkam? Bir, apýnh me ĩ djãri ne me õ pyka nãr õ kikre. Ne kam aben totokmã amũ memã kungã. Ne kam pãnh amim pi'ók kaprĩ byn o tẽn <sup>35</sup> mã Jeju kute ar anorjamã

kungã. NhyM kam ar mã me õ mýjja kêt mã pi'ók kaprĩ ngã. Me õ mýjja kêt kõt memã kungã nhyM me kam o mã amim mýjja jamý. Ne kam mẽõ kum prãm kêt.

<sup>36</sup> Kamã ne mẽõ nhidjibê Jõdje. Jeju kute ar anorja ne kum idji ny jarẽ. Kum Banabe jarẽ. Me kaprĩreo kĩnh djwýnh'ã ne ar kum idji jakren kum arẽ. Kubê ne mebê Rewi'õ. Apêxtibê Xiprekam ne abatãnh djã. <sup>37</sup> Banabe ne arým õ pyka. Ne kam pãnh kadjy arým amũ memã kungã. Ne kam amim pi'ók kaprĩ byn o tẽn arým Jeju kute ar anorjamã kungã. Nãm arkum 'êx kêt ne arkum kungã.

## 5

*Ananijmẽ Xapire ar 'êx.*

<sup>1</sup> NhyM be, Ananijmẽ prõ Xapire ne ar õ pyka. Ne kam amũ memã kungãn kam pãnh amim pi'ók kaprĩ by. Ne kam 'êx. <sup>2</sup> NhyM my prõmã kum,

—Gu amim kwýo apdju, ane. NhyM, "Ã", ane. NhyM kwýbito tẽn Jeju kute ar anorjamã o tẽn o bõx ne 'êx ne arkum,

—Mĩ, bar inhõ pyka pãnh pi'ók kaprĩ jabit by, ane. Ne kam arým arkum kungã.

<sup>3</sup> NhyM Pedru kum,

—Ananij, mýkam ne Xatanaj arým ajo ba ga arým Metĩndjwýnh Karõmã ajêx? Arým ne ga amim pi'ók kaprĩ kwýo apdju. <sup>4</sup> Ga ren anhõ pyka nhõr kêt nhyM ren anhõ pyka rã'ã ga ren amexkumrêx. Nãr, aje memã õrkam ga ren pi'ók kaprĩõ aba rã'ãn ren amexkumrêx. Mýkam ne ga amim ajêxja'ã karõ? Djãm ar imãbit ne ga ajêx got? Katĩ. Metĩndjwýnhmãdjwý ne ga ajêx. Nãm ã Pedru kum ane.

<sup>5</sup> NhyM Ananij kabẽn man arým tým ne ty. NhyM kam me kute arẽn mar kunĩ arým umaje madjã kreti ne. <sup>6</sup> NhyM kam me abatãnh



ny kwý kàjmã djan Ananijo kupun o mõn arým adjã.

<sup>7</sup> Nhyim 'ã myt kwýr kàjbê 'iry. 'Ã 3 ora apêx. Nhyim prõja kute mjên tyk mar kêt rã'ã. Ne kam arým me'ýr wadjã. <sup>8</sup> Nhyim kam Pedru kum,

—Aje, on imã arê. Mýj ne gar pyka pãnh pi'ók kaprĩ on aby? Djãm jabit? ane.

Nhyim mjên kõt kum 'êx ne kum,

—Ô nã. Bar amim ã pi'ók kaprĩ byro ane, ane.

<sup>9</sup> Nhyim Pedru kum,

—Mýkam ne ga aje Bẽnjadjwýr djwýnh Karõmã amikurê'uk kadjy amjênme aben kõt akabên dji? Ota, amjên jadjãr djwýnh ar arým akubyn kikre jajkwa krekre'ýr mõ. Dja ar rùm gadjwý ajo mõ, ane.

<sup>10</sup> Nhyim on parbê tým ne arým ty. Nhyim ar abatãnh nyre arým wadjã. Nhyim arým ty nhyim ar omũ. Ne kam o mõn mjên kuri adjã. <sup>11</sup> Nhyim me kute amim Jeju mar ne kõt ar aben pydjio baja kunĩ arým umaje madjã kreti. Me kute ar tyk jarênh mar kunĩ arým umaje madjã kreti.

*Pedru ar kute me krãptĩ mex.*

<sup>12</sup> Nhyim Pedrumê Jeju kute ar anorja kunĩ mýjja pumũnh kêt krãptĩ nhípêxo ba. Me te kute mýjja marmã kam no tyk ne ku'ên kute Metĩndjwýnh raxmã kator kadjy ne ar mýjja nhípêxo ba. Xaromão nhõ kikre kre kênhkam ne me kunĩ axikõt Jeju maro krĩ. <sup>13</sup> Nhyim me kãtãm te me umaje ne te me ikõ'ã krĩ prãmje ne amybým abenmã me mexkumrêx jarênh kumex. <sup>14</sup> Nhyim kam me krãptĩ kum Bẽnjadjwýr djwýnh kĩnh ne arým tu amim markumrêxo kumex. Amim maro kumex ne arým mekõt akuprõ. Nhyim kam me kute amim marja arým krãptĩ: tẽ. Me mymê me niremê arým krãptĩ: ne.

<sup>15</sup> Nhyim Jeju kute ar anorja mýjja pumũnh kêt nhípêxo ba. Nhyim me me punuo apõx ne Pedru kukãm

pry jakà'ã me adjwýro mõ. Me ikwã djãkam nãr aty djãkam me adjwýro mõ. Dja Pedru tẽmkõt karõbit me kwý'ã rõrõk nhyim me arým mex. Ja kadjy ne me kukãm me adjwýro mõ. <sup>16</sup> Nhyim Djeruxarê bu'ã me krĩ djãri me jadjwý me krãptĩ: 'ã akuprõ. Me aben totokmã 'ýr me punu jamýn o ban o bõx. Me karõ punu kute meo badjwý nhyim me aben totokmã 'ýr meo ban meo bõx. Nhyim Metĩndjwýnh arým me kunõ mex ne.

*Me kum ar kurê.*

<sup>17</sup> Nhyim kam me rũnh kwý arým Pedru arkam ngryk ne. Me kadjy Metĩndjwýnh mar djwýnh nhõ bẽnjadjwýr raxmê ro'ã mebê xadjudjêu krĩ kunĩ arkam ngry:k ne. <sup>18</sup> Jeju kute ar anorjakam ngryk ne ar'ýr mõn ar'ýr bõx ne arým aro tým. Ne kam Ar kubê ijê nhyim kam me kunĩ ar omũ. <sup>19</sup> Nhyim Bẽnjadjwýr djwýnh kadjy mrãnh djwýnh 'õ akamãtkam ar'ýr bõx ne arým arkum kikre'ã ijê djã'ã kuta. 'Ã kutan arým aro katon arkum,

<sup>20</sup> —Dja gar Metĩndjwýnh nhõ kikretikam tẽn adjujarênhõ dja. Dja me tu amim Jeju markumrêx ne arým kõt tũn ne ar ba rã'ã: rã'ã ne. Tãm dja gar memã 'ã adjujarênhõ dja, ane.

<sup>21</sup> Nhyim ar kadjy mrãnh djwýnh kabên man kam myt katorkam arým Metĩndjwýnh nhõ kikretimã wadjã. Wadjãn arým 'ã memã ujarênhõ dja. Memã ujarênhõ dja nhyim wãnh me kadjy Metĩndjwýnh mar djwýnh nhõ bẽnjadjwýr rax ar arým me rũnh bikprõnh djãkam bõx. Bõx ne arým amiwýr õ me rũnhõ akuprõ. Mebê idjaerkam me rũnh kunõ akuprõ. Me rũnhõ akuprõ nhyim arým mebê ijê djãmã ar'ýr me krãkamngõnh jano nhyim me 'ýr mõ. <sup>22</sup> 'Ýr mõn arým mebê ijê djã'ýr bõx ne te ar abej. Te: ar abej ne arým ar abej aprã. Ne kam akêx

ne me rũnh'ýr mõn 'ýr bõx ne memã kum,

<sup>23</sup> —Mebê ijê djà'ã ijê tỳx mex nhym kre'ã ku'ê djwýnh ar bõm 'ã ijê djà kabem dja ba me ar omũ. Ne kam 'ã ijê djà'ã kurên te kadjwýnhbê ar abej aprã, ane. <sup>24</sup> Nhym me rũnh arým me kabên ma. Metĩndjwýnh nhõ kikreti nêje ku'ê djwýnhõ ba djwýnh me kabên ma. Me kadjy Metĩndjwýnh mar djwýnh nhõ bẽnjadjwýr me kabên ma. Ne te aben kukij ne abenmã kum,

—Je, mỳj dja ar ijukri nê? ane.

<sup>25</sup> Nhym kam me'õ me'ýr bõx ne memã kum,

—E kum, onj me aje Ar kubê ijêja Metĩndjwýnh nhõ kikretikam memã ujarênho dja, ane. <sup>26</sup> Nhym kam kikreti nêje ku'ê djwýnhõ ba djwýnhja ar'ýr õ me jao mõn ar'ýr bõx. Ne arým arkum prĩre ne akubyn me rũnh'ýr aro bõx. Kum me kãtãm krãptĩ pymakam. Ar'ýr tẽm kãtri ne me abenmã kum,

—Gu me ren aro ajkẽ nhym me ren pãnh kẽno me batitik ne me bapa, ane.

<sup>27</sup> Kam ne me arkum prĩre ne arým me rũnh'ýr aro bõx. Aro bõx nhym ar arým me kabem dja. Nhym kam me kadjy Metĩndjwýnh mar djwýnh nhõ bẽnjadjwýr rax kukij ne arkum,

<sup>28</sup> —Bar arým ar amã ikabên ne. Jeju kukwakam memã 'ã adjujarênh kêt kadjy ar amã ikabên gar ajte 'ã adjujarênh ar aba nhym arým krĩraxjabê Djeruxarê kunĩkõt me abenmã ar akukràdjã jarênho ipõk ne. Gar kam aje bit ar ijã ar ijaxwe nhõrmã memã ar ije Jeju bĩn djwýnh jarênho aba, ane.

<sup>29</sup> Nhym Pedrumê Jeju kute ar anorja kunĩ memã kum,

—Bar me amã arê ga me ama. Be, dja Metĩndjwýnh ar imã 'ã karõ bar mrãmri ajbit kabên markumrẽx ne kõt ar amijo iba.

Nhym be, dja me te ar imã atemã kabên jarê bar mar kêt ne. <sup>30</sup> Be, Metĩndjwýnh kute me bakukãmãreo ba ja ne arým akubyn Jejuo tĩn ne. Me ga ne ga me pi'ã anhõn arým abĩ. Nhym Metĩndjwýnh arým akubyn o tĩn ne.

<sup>31</sup> Be, tãm ne Metĩndjwýnh arým o wabi nhym arým ubõk'ãnh bẽnjadjwýr rax ne memã nhỹ. Kute me utar kadjy memã nhỹ. Dja mebê idjaermã amak bõ nhym me arým amikam kaprĩren wãnh axwemã iren Metĩndjwýnh'ýr amijo akẽx. Nhym kam Metĩndjwýnh arým me axwe maro aknon mekam ngryk kêt. Ja kadjy ne Metĩndjwýnh arým Jejuo wabi nhym memã nhỹ. <sup>32</sup> Ar ba ne bar omũn memã 'ã idjujarênh ar iba. Metĩndjwýnh Karõdjwý ne omũ. Me kute kabên mar ne kõt ar amijo baja ne Metĩndjwýnh arým memã Karõ jano nhym arým meo ba. Nãm ã Pedru ar memã ane.

<sup>33</sup> Nhym me arým ar kabên man arkam ngryk ne àkrẽo kumex. Ne bit kute ar parmã. <sup>34</sup> Nhym Gamarij raxja arým me rũnh nhipõkri kãjmã dja. Kubê ne mebê pardjẽu'õ ne kubê mebê idjaer kukràdjã mar djwýnh'õ. Nhym me kunĩ kum kĩnh. Gamarij kãjmã djan Pedru ar'ã memã kum,

—Ar o akator ngrire, ane. Nhym me arým aro kato. <sup>35</sup> Nhym Gamarij arým ar kãxã memã kum,

—Ba ar amã arẽ. Kwãrĩk wãnh ajmã aro kêt. Dja gar ar par jabej mỳj dja gar ijukri nê?

<sup>36</sup> Ba ar amã arẽ gar ama. Amrêbê me'õbê Teuda ari memã amiraxo àmra ar ba. Nhym me krãptĩ kute 400 pyrãk mã kõt ajkamẽ. Nhym kam me arým kubĩ nhym me kunĩ kõt baja arým ajmã nhym arým kêt ne.

<sup>37</sup> Nhym kam me'õbê Djuda memã amijo amirĩt ne. Bẽnjadjwýr bajtem amrêbê kute me idji'ã pi'õk no'õko àmri ne Djuda memã amijo

amirĩt ne. Pykabê Garrêjakam ne abatãnh djã. Djuda amijo amirĩt ne amikõt me krãptĩ kamê. Ne kam adjwýnhdjwý arým ty nhym me kunĩ kõt bajadjwý arým ajmã.

<sup>38</sup> Be, Teudamê Djudakõt me krãptĩ ba. Ne kam me ta arým bimãnhja dja gar ama. Pedru arkum anhkra karo gê ar ta mekõt ar ba. Godja ar ta amikabênkõt meo ba jabej nhym me ta ĩ ajmã. Amrêbê me ja kõt dja me ta ã bimãnho ane. <sup>39</sup> Nãr, godja ar mrãmri Metĩndjwýnh kabênkõt meo bakumrêx jabej gwaj te aro àpanh ne aben bê me ngrãnh prãmje. Gwaj ren aro ajkên arým ren Metĩndjwýnhmã amikurêtuw.

<sup>40</sup> Nãm ã memã ane nhym me arým kõt amikabên dji. Ne kam amiwýr Jeju kute ar anorja 'uw nhym ar arým bõx. Nhym kam me ar titik ne arkum,

—Kwãrĩk wãnh Jeju kukwakam memã adjujarênh kêt, ane. Ne kam arým arkum ire nhym ar tẽ.

<sup>41</sup> Djãm ar kaprĩre ne ar tẽ? Kati. Ar kĩnhkumrêx ne me rũnhbê tẽ. Mýkam ne ar kĩnh? Bir, ar amim,

—Be, Metĩndjwýnh ta ne amim ar ijã karõn amim, “Be, me kum Jeju kurê. Dja kõt me kum ar adjwýnhdjwý kurê.” Nãm ã amim ar ijã karõo ane. Nãm ar ã amim anen arým kĩnhkumrêx. Metĩndjwýnh ta kute amim ar'ã karõkõt ar tokrykam ar kĩnhkumrêx ne me rũnhbê tẽ. <sup>42</sup> Ne kam akati kunĩkõt kãj bê memã Jeju kukradjã'ã ujarênh ar ba. Metĩndjwýnh nhõ kikretikam o ba. Me õ kikre kunĩ kõt o ban memã kum,

—Mrãmri ne Jejubê Kritukumrêx. Mrãmri ne Metĩndjwýnh Jeju'ã me banhõ Bênjadjwýrbê kumkati mênhkumrêx, anhyro ba.

## 6

*Me kute amijo Ar kubê 7 pytãr.*

<sup>1</sup> Nhym kam Jejukõt me ba djwýnh arým krãptĩ:. Ne kam me

kwý me bajtembê kregu kabênkam kabên nhym me kwý mebê idjaer kabênkam kabên. Nhym kregukam me kwý kabênja idjaerkam me kwý kabênjakam kaprĩre ne. Nãm me Jeju kute ar anorjabê 12'ã abenmã kum,

—Be, Pedru ar akati kunĩkõt me 'uwtĩo djuw mex nhym kam me bakam me 'uwtĩ kwý 'ã kãtãm, ane. <sup>2</sup>Nhym Pedru ar arým kuman arým amiwýr Jeju kõt me ba djwýnh krãptĩ:ja 'uw. Nhym me ar'ã akuprõ nhym ar arým memã kum,

—Godja bar memã mýjja nhõrbito iban arým te ije Metĩndjwýnh kabên'ã memã idjujarênh prãmje. Nhym kam arým ar akaprĩre ne.

<sup>3</sup> Be, mýj dja gwaj nê? Bir, akmere, àpnhĩre ar, dja gar me kwýo aben man me'ã aben kukij ne abenmã kum, “Djãm me kunĩ kute ar mex jarê? Djãm Metĩndjwýnh Karõ raxo ar kadjwýnhbê nhýn aro ba? Djãm ar krã mex”? ane. Dja gar ã me kabio ane. Nhym kam me kwý ã mexo ane, gar mekam amijo Ar kubê 7 pytãn ar imã ar arê. Ar imã ar arê bar arým ar'ã meo djuw mex djwýnh rê. <sup>4</sup>Ne kam meo djuw mex kêt ne ate ikrã. Ate ikrãn arým Metĩndjwýnhmã ikabên 'ãno djan memã kabên jarênh 'ãno djan ar o iba, ane.

<sup>5</sup> Nãm ar ane nhym me kunĩ arým kum ar kabên kĩnh ne. Ne kam arým amijo Exewão pytã. Nãm mrãmri tu amim Metĩndjwýnh markumrêx. Nhym Metĩndjwýnh Karõ raxo kadjwýnhbê nhýn ar o ba. Nhym kam me amijo me kwý pytã. Piripimê Prokorumê Nikanômê Ximômê Pamenajmê Nikoraumê ne me amijo ar utã. Nikorau ja ne amrêbê kubê me bajtem. Krĩraxbê Áxikikam ne abatãnh djã. Ne kam arým mebê idjaer kukradjã man kõt ar amijo ba. Ne kam arým tu amim

Jeju markumrêx. Mebê kregu kabênkam ne kabên. <sup>6</sup> Nãm me amijo ar utàn arỳm Jeju kute ar anorja kabem aro akuprõ. Nhy m ar arỳm aro Metĩndjwỳnhmã a'uw ne ar'ã ikra jadjuw.

<sup>7</sup> Nhy m kam me kute Jeju mar arỳm amũ memã Metĩndjwỳnh kabên jarênho kumex. Nhy m me kâtãm krãptĩ arỳm tu amim Jeju markumrêx. Nhy m kam Jejukõt me ba djwỳnh arỳm Djeruxarêkam àptâr mex ne. Nhy m me kadjy Metĩndjwỳnh mar djwỳnhdjwỳ krãptĩ: tu amim Jeju markumrêx ne kabên man kõt ar amijo ba.

*Me kute Exewão pa 'amỳnh.*

<sup>8</sup> Exewão ne tu amim Metĩndjwỳnh mar tỳ:xkumrêx nhy m Metĩndjwỳnh arỳm kum tỳ:x jadjã. Kum tỳx jadjã nhy m arỳm me ipõkri mỳjja pumũnh kêt rũnh nhipêxo ba. Me punu mex nhy m meo mexo ba. Me te kute mỳjja marmã kam no tyk ne ku'ên kute Metĩndjwỳnh raxmã kator kadjy ne ipêxo ba. <sup>9</sup> Nhy m ate me kwỳ kam kabên punun arỳm Exewãomẽ aktã kabêno aben japanho dja. Mebê idjaer bikprõnh djã 'õ kurũm ne me mõ. Me bikprõnh djã jamã ne me kum,

—Me ta ar ban ta amim àpênh ar ba ne ja, ane. Krĩraxbê Xirenimê Arexã kurũm ne me ja mõ. Nhy m pykabê Xirxijmê Adjij kurũm me jadjwỳ mõ. Ne kam Exewãomẽ aktã kabêno aben japanho dja: <sup>10</sup> nhy m Metĩndjwỳnh Karõ kukwakam memã kabên ne kabên katãto me akrenh mex ne. Nhy m kam me te: kute kabêno itymã o ku'ê.

<sup>11</sup> Te: kute kabêno itymã o ku'ên kam tẽn arỳm me kãxã me kwỳmã pi'ók kaprĩ jarê. Nhy m me arỳm me'yr bõx ne memã 'êx. Pi'ók kaprĩ pãnh arỳm memã Exewão'ã 'êx ne me kunĩmã kum,

—Be, Exewão ne arỳm me bakukãmãkjê Mõdjê mẽ

Metĩndjwỳnh japrỳ bar arỳm kuma. Nãm me ã anen mebê Exewão kurêo dja.

<sup>12</sup> Mebê kurêo djan arỳm memã kurêtuw. Mebêngêtmẽ Mõdjê kukràdjã mar djwỳnhmã kurêtuw. Nhy m me arỳm kam àkrêo kumex ne 'yr prõt ne o tỳm ne pa 'amỳ. Nhy m me rũnh krãptĩ arỳm kutêp akuprõ nhy m me arỳm me'yr o bõx.

<sup>13</sup> Ne kam me rũnh kabem me 'êxnhĩ kwỳ dja. Nhy m me arỳm me rũnhmã Exewão'ã 'êx ne memã kum,

—Me'õ ja ne mã Metĩndjwỳnh nhõ kikreti japrỳo ban mã Mõdjê kukràdjã japrỳo ba. <sup>14</sup> Nãm mã memã kum, “Nadjarekam Jeju dja ã Metĩndjwỳnh nhõ kikretio ajkên pyka mẽ o amrà. Mõdjê kute me bakukãmãremã kukràdjã jarênhja dja pãnh me bamã kukràdjã 'õdjwỳ jarê gwaj baje we mar ne kõt amijo babamã.” Nãm ã memã anhỹro ba bar arỳm kuma. Nãm me 'êx ne ã me rũnhmã arênho ane.

<sup>15</sup> Nhy m kam me rũnh kunĩ Exewãokam no ty. Kam no ty nhy m nokre arỳm amijo Metĩndjwỳnh kadjy mrãnh djwỳnh nokre pyrãk nhy m me arỳm nokre pumũ.

## 7

*Exewão me rũnh krãptĩmã me kukãmãkjê'ã ujarênh.*

<sup>1</sup> Nhy m kam me kadjy Metĩndjwỳnh mar djwỳnh nhõ bẽnjadjwỳr rax kum kabên ne kum,

—Djãm kõt ne me arê? ane.

<sup>2</sup> Nhy m tu me kukãmãre'ã ajarên memã kum,

—Akmere, mebêngê ar, dja ga me ikabênja ma. Metĩndjwỳnh ne me bakukãmãre Abraõomã amijo amirĩt. Prĩne me:xkumrêx ne uma: ne arỳm kum amijo amirĩt ne. Pykabê Arãkam ar ba kêttri Mexomikam ar bari ne Metĩndjwỳnh arỳm Abraõomã amijo amirĩt ne.

<sup>3</sup> Ne kam kum,

“Anhõ pyka kurũm akato. Kam anhõbikwa ar baja Ar kubẽ akato.

Dja ga tẽ: ba kam ĩ amã pyka 'õdjwý jakre ga kam 'yr tẽn 'yr bõx”, ane.

<sup>4</sup> Nhyam kam kabẽn kõt pykabẽ Kaudjẽkam me ja nhõ pyka kurũm katon tẽ. Tẽ:n kam arým pykabẽ Arã'yr bõx ne kam ar ba. Nhyam kam bãm kute irja arým kam kubẽ ty. Nhyam kam Metĩndjwýnh arým pykaja tãmmã ano nhyam 'yr tẽn arým 'yr bõx. Kam ne ga me ar aba.

<sup>5</sup> Djã ne Metĩndjwýnh pyka jakam kum pyka 'õ ta nhyam arým o aminhõ? Kati. Kute kam kum pyka'õ 'yr kêtikumrẽx. Kum 'yr kêt ne arým kukãm kum arẽnhbit ne kum, “Dja ba ĩ anhõ kady amã pyka ja kanga. Dja akrakam kra aben djõ'ã apõx ne arým atãmdjwý krãptĩ: Me jamẽ me amã dja ba kanga ga me arým o aminhõ.” Nãm ã kraxe kra'õ kêt rã'ãkam ã kum ane.

<sup>6</sup> Ne kam Metĩndjwýnh ajte Abraãomã kum, “Atãmdjwý krãptĩ dja me me bajtem nhõ pykakam ar ba. Ne kam arým memã àpẽn kajo ar ba. Ar ba nhyam me arým àpẽn pytĩo me kamjẽro ba. Meo ba: nhyam pyka wãkam arým me'ã amex krãptĩ: kubẽ 400 apẽx.

<sup>7</sup> Dja ba kam me tokry pãnh meo ajkẽ. Me bajtem kute me àpẽn'ã memã àpnẽn djwýnhõ ajkẽ. Kam dja atãmdjwý ar katon arým pyka jakam bõx ne imã àpẽn ar ba.”

Nãm ã Metĩndjwýnh Abraãomã ane. Nhyam Exewão kõt memã arẽ. <sup>8</sup> Ne kam itepã memã kum,

—Ne kam Metĩndjwýnhmẽ Abraão ar abenmã kabẽn jarẽn mãm dji nhyam kamã Metĩndjwýnh kum, “Dja ga me aben djõ'ã me my nhinhu kã rẽ”, ane. Nhyam kam arým Idjak dji nhyam ruw. Nhyam 'ã akatibẽ 8 nhyam arým kra

my nhinhu kã krãta. Nhyam kam abatãnh ne arým Djako dji nhyam ruw. Ne kam abatãnh ne kam me bakukãmãre kubẽ 12 jadjuw. Nãm ar aben jatãri apõx tẽ ne arým abatãnh ne.

<sup>9</sup> Ne kam te kute Jõdje pyrãk prãmje arým kam ngryk ne. Kam ngryk ne pi'õk kaprĩ kady arým me bajtemmã kanga. Nhyam kam me pykabẽ Edjitukam kum ire nhyam kam memã àpẽn kajo ar ba. Nhyam be, Metĩndjwýnh ne mã Jõdje mẽ amijo kajkep <sup>10</sup> ne kaprĩ djã kunĩbẽ utã. Nãm kum krã mex jadjã nhyam bẽnjadjwýr arým kum kĩnh. Edjitukam me õ bẽnjadjwýr rax nhidjibẽ Parao kum kĩnh ne arým 'ã bẽnjadjwýr mẽ. Nhyam kam pykabẽ Edjitukam Parao nhõ me kunĩmã nhýn kum õ mýjja kunĩ pumũnhõ ba.

<sup>11</sup> Nhyam kam Edjitukam me jamẽ pykabẽ Kanaãkam me ja kunĩbẽ djwý kêt. Nhyam prãm arým me pa:ro dja nhyam me arým kaprĩ:ren kumex. Nhyam me bakukãmãre ar te amitýx djã jabej aprã. <sup>12</sup> Ne kam abenmã kum, “Edjitukam ne me djwýo atom nhyam kumex”, ane. Nhyam Djako me kabẽn man arým djwý'yr me bakukãmãre ar ano. <sup>13</sup> Nhyam ar Edjitu'yr tẽn arým 'yr bõx. Ne kam akẽx ne arým akubyn aminhõ pyka'yr bõx. Ne kam ajte 'yr tẽn 'yr bõx. Nhyam kam kamy arkum amjarẽnho amirĩtkumrẽx ne arkum, “Ba. Axikõt gwaj bajapõx”, ane. Nhyam kam me Paraomã Jõdje nhõbikwa jarẽ nhyam kuma.

<sup>14</sup> Nhyam kam Jõdje arým bãm Djakomẽ ar'yr kamy ar ano. Õbikwa kunĩ'yr ano. Me abenã ar mẽnhkam ne ar krãptikumrẽxbẽ 75. <sup>15</sup> Nhyam kam Djako ar Edjitu'yr tẽ:n kam 'yr bõx ne kam arek kam ar ba. Nhyam kam Djako kubẽngẽtte kubĩ. Nhyam kam me bakukãmãre arkubẽngẽtte ar kupa. Aben nhipẽ ar pa:ro tẽ.

16 Nhyġ me amŭ krĭrāxbē Xikĭkam aro ban arŷm kēnkrekam ar angij. Amrēbē: ne ar kukāmāre Abraão kute me tyk jangjēnh kadjy mebē kēnkre by. Xikĭkam Imō tāmđjwĭmā ne ngōnhponho pi'ōk kaprĭ ngān pānh kēnkre ja by. Kēnkre jakam ne me ar angij.

17 Nhyġ tŭmrām Metĭndjwĭnh arŷm kute memā pyka kanga kadjy amikabēn tŭm ma. Kute amrēbē: Abraão mā pyka jarēnhja arŷm kute memā kanga kadjy amikabēn tŭm ma. Nhyġ Edjĭtukam arŷm me àptār mex mō. 18 Me àptār mō nhyġ atemā bēnjadjwĭr rax me kadjy kato. Bēnjadjwĭr ja ne kute me kukāmāre Jōdje'ā ujarēnh mar kēt. 19 Nām me kadjy katon arŷm me banhō me wŷnhmā 'ēx ban ar meo bikēnh ba. Nām me bakukāmāremā me prĭre'ā karōn memā kum, “Dja me prĭre axidjuw ga me bōm arē gē ty”, ane.

20 Nhyġ kam Mōjdjē ruw. Nhyġ Metĭndjwĭnh kum kĭnh. Nhyġ kam nā ta ūrkwākam o kaōro krĭ nhyġ arŷm 'ā mytyrwŷ amānhkrut ne ikjékēt apēx. 21 Nhyġ kam me bōm kudji. Nhyġ Parao kra ni arŷm amim kumŷn kra'ā amim o djuw mex. 22 Nhyġ kam me kum pykabē Edjĭtu nhō me ja kukrādja kunĭ jarē nhyġ arŷm kuma. Ne kute me kabēn jarēnh kadjy kabēn mexkumrēx ne àpēnh mex kadjy tŷxkumrēx.

23 Ne arŷm abatānh mex ne. Rwŷk'ā amexbē 40 apēx nhyġ amim, “Ba 'ŷr inhō me wŷnhbē idjaer pumŭ”, ane. 24 Ne me'ŷr tē:n kam me'ŷr bōx. Nhyġ Edjĭtukam me kra'ō mebē idjaer'ōo bikēnh ba dja nhyġ omŭn arŷm o ngryk ne kubĭ. 25 Be, kute bĭn kētri ne amim, “Be, Metĭndjwĭnh kukwakam dja ba me utā. Godja me kōt ima”, ane. Nhyġ kam me kute mar kēt. 26 Nām Edjĭtukam me kra'ōnh bĭ nhyġ 'ā akati nhyġ ō me wŷnh ar aben tako dja. Nhyġ bit kute aro

mexmā aben nēje arkum kabēn ne arkum, “Ē, ar ikabēn ma. Ar aje abeno anhōbikwajakam aben tako dja”, ane.

27 Nhyġ kute ikjēo bikēnh ōmja arŷm amŭ Mōjdjē kujaten kum, “Nhyġh ne me'ō me ikadjy ajā bēnjadjwĭr mē, ga aben nēje ar imā akabēn ne? 28 Ga ne ga amŭja'ā Edjĭtukam me kra'ōnh bĭ. Djām aje ā ijo anhŷrēmā”? ane. 29 Nhyġ arŷm kuman amijā maje atemā pykabē Midjĭjāmā prōt ne. Prōt ne kam 'ŷr bōx ne arŷm me bajtemwākam ar ba. Ar ba:n kam arŷm kra ja dji nhyġ ruw. Nhyġ ajte ja dji nhyġ ruw.

30 Nhyġ kam ar ba: nhyġ 'ā amex krāptĭbē 40 apēx. Nhyġ akati 'ōkam arŷm kapōt kukritkam ar ba. Krānhbē Xinaj bu'ā kapōtkam ar ba: nhyġ akaōk tu pōko dja. Nhyġ kuwykam Bēnjadjwĭr djwĭnh kadjy mrānh djwĭnh kum amijo amirĭt ne. 31 Nhyġ te kute marmā kam no tyn djan amim, “Je tō, mŷj ne wā”? ane. Ne kute omŭnh mexmā 'ŷr bikamēnh tē nhyġ Bēnjadjwĭr djwĭnh kum,

32 “Ba ne ba ibē me akukāmāre nhō Metĭndjwĭnh.

Ibē Abraão mē Idjakmē Djako ar ō Metĭndjwĭnh.”

Nām ā Bēnjadjwĭr djwĭnh kum ane. Nhyġ Mōjdjē umaje tertet ne ibōn djan te kāj mē 'ŷr krān kute omŭnhmā.

33 Nhyġ Bēnjadjwĭr djwĭnh kum, “Ē, aparkā kaba. Inhō pykakam ne ga adjām wā. Kwārĭk wānh o abikēnh kēt.

34 Ē, pykabē Edjĭtukam me kra ne inhō me jao bikēnh ba ba arŷm mrāmri me tokrykōt omŭn me kangāngā ma.

Ije me utār kadjy ne ba ruw. Amrē tē ba Edjĭtumā ajano.”

Nām ā Mōjdjēmā ane.

35 Be, Mōjdjē ja ne me amrēbē kangan kum,

—Nhýnh ne me'õ ajã bẽnjadjwýr mẽ ne ga aben nẽje ar imã akabẽn ne? ane. Be, me te kanga nhym Metĩndjwýnh ta arým me kadjy ano. Memã bẽnjadjwýr kadjy ne ano. Kute me utãr kadjy ne ano. Bẽnjadjwýr djwýnh kadjy mrãnh djwýnh ne akaók tu pókam kum amijo amirít nhym arým me kadjy ano. <sup>36</sup> Nhym kam Mõjdjẽ Edjitu kurũm meo mõ. Kamã ne me aerbẽ mýjja pumũnh kêt kwý nhipêx. Me te kute mýjja marmã kam no tyk ne ku'ẽn Metĩndjwýnh raxmã kator kadjy mýjja kwý nhipêx. Edjitungam ipêx ne ajte ngõ ra:x nhidjibê Kamrêkrekam ipêx. Ne kam kapõt kukritkam meo ba: nhym amex krãptĩbê 40 me'ã apêx. Nãm ã Exewão memã ane.

<sup>37</sup> Ne itepã ajte memã kum,

—Mõjdjẽ ja ne mebê idjaermã kum,  
 “Ba ne ba Metĩndjwýnh kukwakam me amã kabẽn jarẽnho iba. Dja Metĩndjwýnh ì me akadjy amijo me anhõbikwa 'õ pytà. Amijo utã nhym arým ikudjwa ã me amã kabẽn jarẽnho ane.”

Nãm ã Mõjdjẽ memã ane.

<sup>38</sup> Be, Mõjdjẽ ja ne kapõt kukritkam ar meo aben pydjĩn meo ba. Nhym kam krãnhbê Xinajkam Bẽnjadjwýr djwýnh kadjy mrãnh djwýnh kum kukràdjã jarẽ. Me kute katãt amijo ba'ã Metĩndjwýnh kute memã karõkam kukràdjã ja ne kum arẽ. Me kute mar ne tĩn ne ar bamã ne kum arẽ. Nhym arým me bakukãmãremã arẽ. Nhym me aben djõ'ã abenmã arẽ gu me bakamingrãnyre arým baje mar ne o baba.

<sup>39</sup> Nhym be, me bakukãmãre ne me kum kabẽn mar prãm kêt. Me aminhirõ bê kabẽn rẽn arým te akubyn Edjitungã mõrmã bikraro nhý. <sup>40</sup> Mõjdjẽ krãnh nhimõk'ã kute amikràkam ne me arým Arãomã kum,

“Mõjdjẽwã, kute Edjitu kurũm me bajo kator ne kute me bajo mõr djwýnhwã birãm mýjwã ne arým ajmã on. Nhym got omũ. 'Yr aprõt ne me batĩndjwýnh karõ kwý nhipêx gẽ me bakukãm ba.”

Nãm me ã Arãomã ane. <sup>41</sup> Ne kam arým mrybãri krare karõ nhipêx ne o we Metĩndjwýnh. Ne kam arým we mry karõ kĩnh djã'ã mryo bõx. O bõx ne parbê kudjin arým kum kubĩ. Ne arým kute ikrao mýjja nhipêxjakam kĩnh katio dja. <sup>42</sup> Nhym Metĩndjwýnh arým mebê amijo akêx ne wãnh memã ire. Me ta wãnh kute kanhêti krãptĩmã rax jarẽnho ba kadjy memã ire. Ije amã arẽn kõt ne Metĩndjwýnh kukwakam kabẽn jarẽn djwýnh kabẽn'ã pi'ók no'ók. Kamã ne Metĩndjwýnh memã kum,

“Ga me abê idjaer, djãm imã ne ga me mry paro aba? Me aje mýjjamã mry paro aba nhym 'ã amex krãptĩbê 40 apêjã djãm imã ne ga me mry pa got? Arkati.

<sup>43</sup> Ate ne ga me mýjjaõ metĩndjwýnh karõ nhipêx ne kum rax jarẽnho aba. Ne mã me karõbê Morkimã kikreo aba. Ne me anhõ metĩndjwýnhbê Rẽnpanh nhõ kanhêti karõo aba. Aje ikupa'ã amijo aba prãm kam dja ba arým me anhõ pyka djwýnh bê me akujate. Dja ba me bajtem nhõ krãraxbê Babirõnij nhijukri me akujate.”

Nãm ã Metĩndjwýnh memã ane. Nhym Exewão arým kõt me rũnhmã arẽ.

<sup>44</sup> Ne itepã ajte memã kum,

—Mrykão kikre ne me bakukãmãre kapõt kukritkam ar o ba. Metĩndjwýnh kute memã amijo amirít nhym me kute mar kadjy ar o ba. Ta ne Mõjdjẽmã 'ã karõn kum, “Ije kikre'ã amã karõ kõt dja ga ipêx.” Nãm ã Mõjdjẽmã 'ã

karõo ane. Nhyṁ arým kõt ipèx nhyṁ me ar o ba. <sup>45</sup> Nhyṁ kam ô'ã me bakukãmãremê Djodjuwemê ar kikreo ba:n arým apýnh me bajtem nhõ pyka djãri'ýr o bõx. Nhyṁ Metĩndjwýnh arým apýnh me bajtem ba djãrio apan me kujate. Me kujate nhyṁ me arým me pãnh pykakam ar ba. Nhyṁ mebêngêt aben kukãm me paro mõi. Me paro mõi nhyṁ me tàmdjwý arým aben djõ'ã mrykào kikreo krĩ. O krĩ: nhyṁ kam tũ:mrãm Dawi arým me kadjy katon kam me kadjy bẽnjadjwýr. <sup>46</sup> Nhyṁ kam Metĩndjwýnh kam kĩnh. Nhyṁ kum, "Metĩndjwýnh, abê Djakoo aba djwýnh. Ba amã anhũrkwã nhipèx", ane. <sup>47</sup> Nhyṁ be, Dawi ne kute kum kikre nhipèx kêt. Nhyṁ be, krabê Xaromão ne arým kum kikre nhipèx.

<sup>48</sup> Nhyṁ be, djãm me kute ikrao kum kikretikam Metĩndjwýnhbê kumkati krĩ prãm got? Arkati. Me bakukãmãre kabẽn kõt ne ba ikabẽn jarê. Amrêbê: ne me Metĩndjwýnh kukwakam memã kum,

"Bẽnjadjwýr djwýnh ne me amã,

<sup>49</sup> 'Be, kute me bẽnjadjwýr rũnh krĩ djã pyrãk ne ã kýjrũm kãjkwakam ikrĩ djã ã imã nõr ane. Kãjkwabê ne ikrĩ djã.

Kute me par ku'ê djã pyrãk ne pyka ã iparbê imã nõr ane.

Be, djãm me kute imã kikreti'õ nhipèx nhyṁ imãnhkutãmã? Arkati.

Djãm me kute imã ikrĩ djã'õ nhipèx ba kam inhýr ne ityk djã kêtãmã? Arkati.

<sup>50</sup> Ba ne ba inhikrao kãjkwamẽ pyka nhipèx. Djã ne ga me ja ma?"

Nãm ã Bẽnjadjwýr djwýnh me amã ane."

Nãm kukwakam kabẽn jarẽnh djwýnh ã memã ane. Ga, me kute ikrao kum kikreti nhipèxjakam Metĩndjwýnhbê kumkati kam krĩ

kêtja pumũ. Nãm ã Exewão memã ane.

<sup>51</sup> Ne kam itepã ajte memã kum, —Ba me amã arê ga me ama. Be, me akukãmãre kwý kute arĩk amijo ba'ã ne ga me amijakren arĩk ar amijo aban mã amin-hirõbê Metĩndjwýnh kabẽn rẽn anhõkre kadjwýnhbê ajaxwe ar aba. Ne kam ajamakre kêtukumrêx ne mã aminêje Metĩndjwýnh Karõbê adjãptãr aba. <sup>52</sup> Nhýnh got Metĩndjwýnh kukwakam kabẽn jarẽnh djwýnh'õ nhyṁ me akukãmãre kute o bikẽnh kêt? Nãm me mã aben kukãm me kupa. Metĩndjwýnh kukwakam kabẽn jarẽnh djwýnh mã me bakukãmãremã kum, "Kritu ne katãt ne axwe kêtukumrêx. Mrãmri dja bõxkumrêx." Nãm me mã ã memã ane nhyṁ kam me mã me kupa. Tãm ne ajbir jakam bõx ga me arým kangan abĩ. <sup>53</sup> Be, kadjy mrãnh djwýnh ne me kadjy Mõjdjẽmã Metĩndjwýnh kabẽn jarê. Me kute katãt amijo ba'ã kabẽn jarê ga me aben djõ'ã o aba kajgon mar kêt ne kõt amijo aba kêtukumrêx. Nãm ã Exewão memã ane.

*Me kute Exewão bĩn.*

<sup>54</sup> Nhyṁ me kute amijã kabẽn markam arým ngyrk týx mex ne.

<sup>55</sup> Nhyṁ be, Metĩndjwýnh Karõ arým raxo Exewão kadjwýnhbê nhýn ar o ba. Ar o ba nhyṁ arým kãjmã krãn kãjkwa pumũn kam Metĩndjwýnh pumũ. Prĩne me:xkumrêx ne uma: nhyṁ omũ. Nhyṁ Jeju Metĩndjwýnh djubõk'ãnh dja nhyṁ omũ. <sup>56</sup> Nãm Exewão ar omũn arým memã kum,

—Ë ota, arým ne kãjkwa abenbê ajkij. Kute amijo ã ne bõxja ne arým ra:x ne Metĩndjwýnh djubõk'ãnh dja, ba arým omũ, ane.

<sup>57</sup> Nhyṁ kam me tu kãj bẽ amran amijamak'ã pron itepato 'ýr prõt ne. 'Ýr prõt ne o tým ne <sup>58</sup> arým krĩrax kurũm o kato, atykmã o katon kumê. Kumẽn kam kẽnõ titik



ar o ba. Anhÿr djwýnhrà m ne me'õ abatàn n ybê Xaur dja. Nhy m me aminhõ kubêkào põx ne parbê adjuw.

<sup>59</sup> Nãm me Exewão titik ar o ba nhy m arÿm amijo Metĩndjwýnhmã a'uw ne kum,

—Bênjadwÿr djwýnh Jeju, amim ikarõo wabi, ane. <sup>60</sup> Ne kam kõnkrão nhÿn kàj bê àmrao kum kabên ne kum,

—Bênjadwÿr djwýnh, dja ga me kute ibĩn pãn h jarên h kêt. Nãm ã ane nhy m me arÿm kubĩ nhy m arÿm ty.

## 8

*Me kute Jeju nhõ me jao bikênho mõr nhy m me bimàn h.*

<sup>1</sup> Be, me kute Exewão bĩn kêt ri ne Xaur memã kum, “Rã'ã me abĩ”, ane.

Nhy m me kubĩn kam arÿm me krãptĩo bikên hmo krax ne. Me kute amim Jeju mar ne kõt ar aben pydjio bajao bikên hmo krax ne. Nãm me Djeruxarêkam meo bikên ho mõ:n me krãptĩo ajkê. Nhy m me me umaje arÿm ajmã. Pykabê Djudêjakam pyka kunĩkõt ajmã. Ne pykabê Xamarijkam pyka kunĩkõt ajmã. Jeju kute ar anorjabit ne ar arek Djeruxarêkam ar ba. <sup>2</sup> Nhy m me kwÿ kum Metĩndjwýnh jabêja ne Exewão mÿn o mõn arÿm adjã. Ne kam abej mu:w. <sup>3</sup> Nhy m be, Xaur arÿm àkrên ari me kute amim Jeju maro bikên ho ba. Me kute Jejukõt ar aben pydjio bajao bikên ho ba:n kikkre kunĩkõt mrãn wangij ne me bjêro mrãn meo apõx. Nãm me mymê me nireo mõn arÿm me bẽ ijê.

*Piripi Xamarijkam bõx ne Jeju'ã memã ujarên h.*

<sup>4</sup> Nhy m me amũ bimàn hja ne me arÿm memã Metĩndjwýnh kabên jarên ho mõ. Apÿnh me ba djari memã arên ho mõ. <sup>5</sup> Kamã ne Piripi

krĩraxbê Xamarijmã tẽn bõx. Ne kam arÿm kàj bê Kritu'ã memã ujarên h tẽ. <sup>6</sup> Nhy m me itepato arÿm kabên ma, me krãptĩ: kabên ma. Nãm mÿjja pumũnh kêt kwÿ nhípêx nhy m me arÿm omũn kam kunĩ kabên mar 'ãno dja. <sup>7</sup> Be, me karõ punu me krãptĩo ba nhy m arÿm ano nhy m me karõ amran memã iren arÿm mã mõ. Nhy m ajte me akrymê me mrãn h kêt krãptĩo mex. <sup>8</sup> Nhy m kam me arÿm krĩrax wãkam kĩnhti:re ne.

*Ximãobê wajangare'ã ujarên h.*

<sup>9</sup> Nhy m krĩrax tãm kam ne me'õ. Me kum Ximão jarê. Ta ne kute amijo mÿjja mar pytãr, amijo apÿnh mÿjja mar pytãr ne ari amijo wãjangao ba. Nãm me noo biknor ar o ba nhy m me kam no tyn kumex. Nhy m mã amijo rax ne memã kum,

—Ê, ba ne ba iraxkumrêx, anhÿro ba. <sup>10</sup> Nhy m me kâtãmmê me rũnh kunĩ ma:r ar o ban aben mã kum,

—Tãm wã ne Metĩndjwýnh pymao uman tÿ:x ne, ane. <sup>11</sup> Be, amrêbê ne amijo apÿnh mÿjja mar ne me kupên h ne me noo biknor ar o ba nhy m me arÿm maro ba. <sup>12</sup> Mar ar o ba: nhy m kam Piripi arÿm memã kabên jarê. Memã Metĩndjwýnh kute amim me utãr ne ar meo bakam kabên jarê. Ne Jeju Kritu'ã memã ajarê nhy m me arÿm kuman tu amim Jeju markumrêx. Nhy m arÿm Metĩndjwýnhmã ngõmã me angij. Me mymê me nire jangij.

<sup>13</sup> Nhy m kam Ximãodjwÿ arÿm mekõt amim kuma. Amim kuma nhy m me arÿm Metĩndjwýnhmã ngõmã adjã. Nhy m kam arÿm mã Piripi kõt ajkamê. Nhy m Piripi me aêrbê mÿjja pumũnh kêt rũnh nhípêxo ba. Me te kute mÿjja marmã kam no tyk ne kute Metĩndjwýnh raxmã kator kadjy ne ipêxo ba. Nhy m Ximão amim omũnh o ban te kute marmã kam no tyn ku'ê.

14 Nhyam kam me amũ Djeruxarẽkam memã kum,

—Be, pykabẽ Xamarĩjkam ne me arým amim Metĩndjwýnh kabẽn markumrẽx, ane. Nhyam Jeju kute ar anorja arým kuma. Kuman arým me'yr Pedrumẽ Djuãõ ar ano. 15 Nhyam ar me'yr tẽn me'yr bõx. Ne kam Metĩndjwýnhmã meo a'uw ne kum,

—Dja ga memã Akarõ jano gẽ me 'amýn meo ba, ane. 16 Be, kraxje Metĩndjwýnh Karõ mekam rwýk kêt rã'ã. Nãm me Bẽnjadjwýr djwýnh Jeju kukwakam Metĩndjwýnhmã ngõmãbit me angij.

17 Nhyam Pedru ar Metĩndjwýnhmã meo a'uw ne me'ã ikra jadjuw nhyam Metĩndjwýnh Karõ arým me 'amýn meo ba. 18-19 Pedru ar kute me'ã ikra jadjwýrkõt Metĩndjwýnh Karõ me 'amý nhyam Ximãõ arým amim omũn arkum,

—Ota pi'õk kaprĩ. Dja gar amikudjwa imã akre. Ba badjwý ar akudjwa maro iba ne me'ã aminhikra jadjwýro iba gẽ Metĩndjwýnh Karõ me 'amýn meo ba, ane.

20 Nhyam Pedru kum,

—Metĩndjwýnh kute tu memã kajgo Amikarõ janorjakam ga arĩk amim, “Dja ba pi'õk kaprĩ pãnh Metĩndjwýnh Karõ man ar o iba”, ane. Kam gẽ Metĩndjwýnh me biknor tokry djãmã ajano ga anhõ pi'õk kaprĩmẽ ro'ã akuno. 21 Be, Metĩndjwýnhmã akadjwýnhbẽ ajaxwe rã'ãn kum amex kêt rã'ã. Kam ne ga aje Karõ mar prãm kêt kumrẽx.

22 On amikam akaprĩn wãnh ajaxwejamã anhiren Metĩndjwýnhmã tẽ, ane. Gẽ kute ajaxweo biknor ne akam ngryk kêt jabej. Aje Metĩndjwýnh Karõ'ã amim karõ punujao biknor ne akam ngryk kêt jabej kum amijo a'wý. 23 Be, arým ne ba apumũ. Ajaxwe kute ajamýnh týx ne kute ajo ba rã'ã. Nãm ã Pedru Ximãõmã ane.

24 Nhyam Ximãõ kum,

—Inẽje Bẽnjadjwýr djwýnhmã akabẽn gẽ aje imã akabẽn jarẽnhja kõt ijo anhýr kêt, ane.

25 Nhyam kam Pedrumẽ Djuãõ ar Bẽnjadjwýr djwýnh'ã memã amijarẽho djan kabẽn'ã kãj bẽ memã ujarẽho djan kam arým o ino re. Ne kam arým Djeruxarẽmã akẽx ne. Ýr mõ:n mõr kõt memã Kritu'ã ujarẽnh ny jarẽho mõ. Pykabẽ Xamarĩjkam me ja apýnh me ba djari krãptĩ memã arẽho mõ.

*Exopijkam me'õjamã Piripi Jeju'ã ujarẽnh.*

26 Nhyam kam Piripi arek Xamarĩjkam ar ba. Kam ar ba nhyam Bẽnjadjwýr djwýnh kadjy mrãnh djwýnh'õ arým ýr bõx ne kum,

—Kãjmã djan amũ aparmã tẽ. Ga, Djeruxarẽmẽ, krĩraxbẽ Gadjamẽ abenmã pry mẽnhja pumũ. Pry 'ãnh ne kapõt kukrit. Dja ga ýr tẽn ýr bõx, ane. 27 Nhyam arým kãjmã djan ýr tẽn arým ýr bõx. Nhyam me'õ pry'ã tẽ nhyam omũ. Õ pyka djwýnhbẽ ne Exopij. Kubẽ eunuku'õ. Exopijkam bẽnjadjwýr rax nibẽ Kãdjidji. Nhyam kukwakam ra:xĩ. Kubẽ õ nèkrẽx kunĩ pumũnh djwýnh. Djeruxarẽ kurũm ne tẽ. Arým ne Metĩndjwýnhmã rax jarẽn kam tẽ. 28 Ne kam kurũm akubyn õ pyka ýr tẽ. Õ kãmranhtýx, mry kute bjẽrjakam tẽ. Ne kam pi'õk jarẽho nhỹ. Metĩndjwýnh kukwakam kabẽn jarẽnh djwýnhbẽ Idjaij nhõ pi'õk ne arẽho nhỹ.

29 Piripi me'õ ja pumũ nhyam Metĩndjwýnh Karõ kum,

—Ýr aprõt ne kãmranhtýxmẽ ro'ã tẽ, ane. 30 Nhyam arým ýr prõt ne ro'ã tẽ. Nhyam Idjaij nhõ pi'õk jarẽho nhỹ nhyam arým kuma. Ne kam kum,

—Ë, djã ne ga arým me kabẽnwã ma? Mýj'ã ne kabẽn amijakre? ane.

31 Nhyam kum,

—Djãm ije mýjja mar godja ba mýjja'ã kute amijakreja ma. Kon,

me'õ dja imã kraxkõt arẽ ba arým kõt kuma. Iwýr wabin inhikõ'ã nhỹ, ane.

<sup>32</sup> Me bakukãmãre Idjaij kabẽn ne eunuku arẽnho nhỹ. Nãm amim, “Me kute bĩnmã o tẽ nhym uwbõre kute mrãmri ne mrykĩ'ãtomti djuwbõre pyrãk. Ne kute mrãmri ne me arým kĩ jakãro ãmkam mrykĩ'ãtomti jabatãnh nyre bẽn kêt pyrãk. Nãm ã aminẽje kabẽn kêtõ ane.

<sup>33</sup> Nãm me 'êx ne o kãtãm ne 'ã, ‘Tãmwã ne axwekumrẽx. Tãmwã ne axwekumrẽx’, ane. Axwe kêtumrẽx nhym me arým tu kum mýj axwe pãnh jarẽ. Nhym arým tyn wabi nhym kute õ'ã me'õ kêt pyrãk”, ane.

Tãm ne eunuku pi'õkkam arẽnho nhỹ.

<sup>34</sup> Nhym Piripi 'ýr wabin ikõ'ã nhỹ nhym kum,

—Imã arẽ. Mýj me'õ'ã ne Metĩndjwýnh kukwakam kabẽn jarẽn djwýnh ja jarẽ? Djãm amijã nãr me'õ'ã? ane. <sup>35</sup> Nhym kam Piripi eunuku kute pi'õk jarẽn kõt arým kum Jeju'ã ujarẽnho krax ne arek 'ã ujarẽnho tẽ.

<sup>36</sup> O tẽ:n kam arým ngõ'ýr bõx nhym eunukuja kum,

—Ota ngõ. Mýj dja ba nẽ ga Metĩndjwýnhmã ngõmã ijadjã? ane.

<sup>37</sup> Nhym Piripi kum,

—Mrãmri aje tu amim Jeju markumrẽx jabej ba kam arým ngõmã ajadjã, ane. Nhym kum,

—Nã. Ba mrãmri tu amim Jeju Kritu markumrẽx. Mrãmri kubẽ Metĩndjwýnh Krakumrẽx, ane.

<sup>38</sup> Nhym eunuku mry kute kã bjẽrmã kabẽn nhym arým dja. Nhym kam ar ngõ'ýr ruw ne arým nox ne. Nhym kam Piripi arým Metĩndjwýnhmã ngõmã adjã. <sup>39</sup> Ne kam ar wabin dja. Nhym kam Bẽnjadjwýr djwýnh Karõ tu Piripi byn mã o tẽ. Nhym eunuku arým

ijukri omũnh kêtumrẽx. Ne kam õ pykamã tẽ. Arým kĩntiren tẽ. <sup>40</sup> Nhym kam krĩraxbẽ Oxotokam ajte Piripi amirĩt ne. Ne kam bu'ã krĩ kunĩkõt memã 'ã ujarẽn tẽ. Tẽ:n kam krĩraxbẽ Xedjare'ýr bõx.

## 9

*Xaur Jeju'ýr amijo akẽx.*

*Kar 22.3, 26.9*

<sup>1</sup> Nhym kam Xaurja kute ari meo bikẽnho baja kute me kangrõnh rã'ã. Kute Bẽnjadjwýr djwýnhkõt me ba djwýnh kangrõnh rã'ã. Nãm mã me'ã memã kum,

—Gẽ me tu me kupa. Gẽ me tu me kupa, ane. Nãm memã anhýr rã'ãn arým me kadyj Metĩndjwýnh mar djwýnh nhõ bẽnjadjwýr rax'ýr tẽn arým 'ýr bõx ne kum,

<sup>2</sup> —Ba krĩraxbẽ Tamagukam me rũnh'ýr tẽ. Dja ga me kute amim Jeju mar'ã pi'õk no'õk ne imã angã ba memã o tẽ. Ba apýnh mebẽ idjaer bikprõnh djãkam me rũnh kunĩkõt memã akreo tẽ. Dja me akabẽnkõt me kute amim Jeju mar jabej ne memã katon arým imã me kanga. Ba me uwpren amrẽ Djeruxarẽ'ýr meo tẽn awýr meo bõx, ane. Nhym kam arým me'ã memã pi'õk no'õk nhym arým kubyn me'ýr o tẽ. <sup>3</sup> Me 'ýr o tẽ:n kam arým krĩraxbẽ Tamagu tẽpo tẽ. Tẽpo tẽ nhym tu aerbẽ kãjkwa kurũm mýjja adjẽnhja prĩne kurwý. <sup>4</sup> Nhym arým tu pykabẽ tým ne arým me'õ kabẽn ma. Nhym kum,

—Xaur, Xaur, mýkam ne ga me kute amim imaro abikẽnho aba? Aje ba mãn ijo abikẽnho pyrãk ane.

<sup>5</sup> Nhym Xaur kum,

—Bẽnjadjwýr, mýj me ajõ ga ne ga imã akabẽn? ane.

Nhym kum,

—Ba, ibẽ Jeju. Nã gãm me kute amim imaro abikẽnho aba ne aje ba mãn ijo abikẽnho aba pyrãk. Ne kam te adjumar mex prãmje. Ga, mry kute jẽn bjerja pumũ. Me kute mýjja djwa mexo

mry kamjýr nhym arým umaje prõt tỳxja pumũ. Nhym kwý amakkre kêt kam tu amikamjýr djã kanã ne arým tokry ne. Gadjwý dja ga ari ijo abikẽnho aban arým atokry:. Nãm Jeju ã kum ane.

<sup>6</sup> Nhym kam kum,

—Bẽnjadjwýr djwýnh, mýj ne ga amã kĩnh? Dja ba ã amã o ane, ane.

Nhym kum,

—On kãmã djan amũ krĩraxmã wadjã. Kam dja me amã 'ã karõ. Dja ga mrãmri katãt me kabẽn man kõt amijo abakumrẽx, ane.

<sup>7</sup> Nhym Xaurkõt ar mõrja me'õ kabẽn man kam ar kute ĩ pumũnh kêt kumrẽx. Ne kam te: umaje te kabẽn mã. <sup>8</sup> Nhym kam Xaur kãmã djan no põt kajgon arým rĩt kêt ne. Nhym kam ar pa 'amýn o tẽn arým krĩraxbê Tamagumã wadjã. <sup>9</sup> Nhym rĩt kêt kumrẽx ne. Ne kam kute mýjja krẽn kêt ne kõm kêt'ã akati amãnhkrut ne ikjêkêt apêx.

<sup>10</sup> Nhym kam krĩraxbê Tamagukam ne me'õbê Ananij. Bẽnjadjwýr djwýnh ne Ananij nokrekam amirĩt nhym arým omũ. Nhym kum, “Ananij”, ane.

Nhym kum, “Bẽnjadjwýr djwýnh, mýj nã”? ane.

<sup>11</sup> Nhym kum,

—Kãmã djan tẽn pry nhidjibê Katãt'ãnh tẽn Djuda nhũrkwã'ýr bõx. Kam Xaur jabej me kukja. Krĩraxbê Taxukam ne abatãnh djã. Dja ga abej me kukja. Wãkam ne Xaur Metĩndjwýnh mã amijo à'wýro nhỹ. <sup>12</sup> Be, ga ne ga arým amikukãm nokrekam amirĩt nhym akarõ pumũ. Ga ne ga arým 'ýr wadjãnh 'ã anhkra dji nhym arým akubyn rĩt mex ne. Nãm ã apumũnhho ane. Nãm ã Bẽnjadjwýr djwýnh Ananij mã ane.

<sup>13</sup> Nhym kum,

—Je, Bẽnjadjwýr djwýnh, mýkam? Xaur wã ne umakumrẽx. Nãm arým Djeruxarêkam anhõ me ja krãptĩo ajkẽ nhym me krãptĩ arým

imã arẽ. <sup>14</sup> Ne jakam arým me kadjy Metĩndjwýnh mar djwýnh nhõ bẽnjadjwýr ar me ijã pi'õk no'õk nhym amrẽ o tẽ. Me ije amã amijarẽnha kunĩ kadjy arým amrẽ pi'õko tẽ. Kute me idjuwpre kadjy ne o tẽ, ane.

<sup>15</sup> Nhym Bẽnjadjwýr djwýnh kum,

—'Ýr tẽ. Ba ne ba inhõ àpẽn kadjy amijo utã. Dja me bajtemmã ijã ajarẽn me bẽnjadjwýr rũnh mã ijã ajarẽn mebê idjaermã ijã ajarẽ. Ja kadjy ne ba amijo utã. <sup>16</sup> Dja ba ĩ kum, “Dja ga ĩ ijã adjujarẽn djõ'ã atokry kumex.” Nãm ã Xaur'ã Ananij mã ane.

<sup>17</sup> Nhym kam arým 'ýr tẽ. 'Ýr tẽ:n kam arým Djuda nhũrkwãmã wadjãnh Xaur'ýr bõx. Ne kam arým 'ã kute ikra djirkam kum,

—Xaur, akmere, gu banhõ Bẽnjadjwýr djwýnh Jeju ne ijano ba arým awýr bõx. Pry'ã atẽm nhym kute amã amijo amirĩtja tãm ne ijano ba awýr tẽ. Dja ga akubyn arĩt mex nhym Metĩndjwýnh Karõ arým raxo akadjwýnhbê nhýn ar ajo ba. Ja kadjy ne ijano ba tẽ. Nãm Ananij ã kum ane. <sup>18</sup> Nhym aêrbê no kurũm mýjja kute tepkã pyrãk rôrõk ne. Nhym akubyn rĩt mex ne. Ne kam kãmã dja nhym kam arým Metĩndjwýnh mã ngõmã adjã. <sup>19</sup> Nhym kam ajte õ kwý krẽn arým akubyn tỳx ne.

*Xaur memã Jeju'ã ujarẽn nhym me kum kurẽ.*

*A Kõ 11.32*

Ne kam arek Tamagukam Jejukõt me ba djwýnhmẽ ro'ã ar ba nhym 'ã akati kwý apêx. <sup>20</sup> Tamagukam ar bari ne apýnh mebê idjaer bikprõnh djãkam kãj bẽ memã ujarẽn tẽ. Nãm memã kum,

—Mrãmri ne Jejubê Bẽnjadjwýrbê kumkatikumrẽx. Kubê Kritikumrẽx. Kubê Metĩndjwýnh Krakumrẽx, anhýr tẽ. <sup>21</sup> Nhym me kunĩ kute kabẽn markam te kute kraxkõt

marn kam no tyn kumex ne aben kukij ne abenmã kum,

—Bãrãm tãmja ne Djeruxarẽkam ari meo bikẽnho ba. Me kute Jeju Kritumã amijarẽnho bikẽnho ba. Bãrãm tãmja ne kute ajte me uwpre kadjy amrẽ tẽ. Kute me kadjy Metĩndjwýnh mar djwýnh nhõ bẽnjadjwýr ar'ýr meo bõx kadjy amrẽ tẽ, ane. <sup>22</sup> Nhyam kam Xaur kabẽn mexo amũ amikamẽnho tẽn arým kute memã Jeju jarẽn mar me:xkumrẽx. Nãm Tamagukam mebẽ idjaermẽ aktã kabẽno aben japa nhyam me arým kabẽn kõt Jejubẽ Kritu ma. Mrãmri Jejubẽ Bẽnjadjwýrbẽ kumkatikumrẽx man arým te kute kum kabẽn'õ jarẽn prãmje. Te o anen õkre kadjwýnhbẽ arik amikabẽn kwý jarẽnho kumex.

<sup>23</sup> Nãm ã memã anhýr tẽ nhyam 'ã akati krãptĩ apẽx. Nhyam kam mebẽ idjaer kwý arým o aben maro nhýn abenmã kum,

—Mýj dja gwaj Xaur on arým kubĩ? ane. Nhyam kam me arým amũ Xaurmã arẽ nhyam arým kuma. <sup>24</sup> Me õ krĩrax nẽje ne bu'ã pyka týt nhipẽx jabatãnhja nhyam kam apýnh ajkwa krekre djari. Nhyam me kute Xaur katorkõt bĩnmã ajkwa krekre kunĩ'ã ku'ẽn omũnh'ã rĩtkumrẽx ne. Nhyam Xaur arým me kuma. <sup>25</sup> Nhyam kam akamãt nhyam Jejukõt me ba djwýnh krĩrax nẽje pyka týt'ã Xauro wabin djan kadjy djudjẽdjẽo kaxnokai akã 'ãpren kam Xaur nhýr. Ne kam djudjẽdjẽ 'amýn pyka týt burũm aparmã kumẽn o rwýko tẽn arým pykabẽ kudja. Nhyam kam kãjmã djan mã mebẽ katon tẽ.

<sup>26</sup> Tẽ:n kam arým akubyn Djeruxarẽkam bõx. Ne kam bit Jejukõt me ba djwýnhmẽ ro'ã ýrmã. Nhyam me kum uman 'ã abenmã kum,

—E kum nhýnh ne tãmwã Jeju ma ne kõt ba? Godja ajte me bakwýo ajkẽ, ane. <sup>27</sup> Nhyam kam Banabe o

tẽn Jeju kute ar anorja'ýr o bõx. Ne 'ã arkum,

—Be, nãm prykõt tẽn arým Bẽnjadjwýr djwýnh pumũ nhyam kum kabẽn jarẽ. Nhyam kam arým krĩraxbẽ Tamagukam Jeju'ã memã ujarẽn ba. Nãm kum me uma kêt ne kãj bẽ 'ã memã ujarẽn ba, ane.

<sup>28</sup> Nãm arkum ane nhyam kam me arým kum uma kêt ne. Nhyam kam Djeruxarẽkam Jejukõt me ba djwýnhmẽ ro'ã ar ba. <sup>29</sup> Ar ba:n kum me uma kêt ne Bẽnjadjwýr djwýnh kukwakam memã ujarẽn ar ba. Nhyam mebẽ idjaer kwý ne me me bajtembẽ kregu kabẽnkam kabẽn. Nhyam Xaur arým me jamẽ aktã kabẽno aben japanho dja. Aben japanho dja nhyam kam me bit kute Xaur bĩnmã.

<sup>30</sup> Nhyam Jeju kukwakam me kute abeno kamy arým me kuma. Ne kam Xauro tẽn krĩraxbẽ Xedjaremã o tẽn o bõx. Ne kam krĩraxbẽ Taxumã ano nhyam arým 'ýr tẽ.

<sup>31</sup> Nhyam kam me arým me kute amim Jeju marjao bikẽnho ino re. Apýnh me ja kute Jejukõt ar aben pydjio ba djari meo bikẽnho ino re. Pykabẽ Djudjẽjakam o ino re. Ne pykabẽ Garrẽjakam o ino re. Ne pykabẽ Xamarijakam o ino re. Kunĩkõt ne me meo bikẽnho ino re. Nhyam me arým akubyn umar mex ne. Ne kam Metĩndjwýnh maro amũ amikamẽnho tẽn arým mar ra:x ne. Ne me kum Metĩndjwýnh pymakam katãt kabẽn kõt ar amijo ba. Nhyam Metĩndjwýnh Karõ memã kĩnh jadjã nhyam me arým kĩnhkumrẽx. Nhyam me kãtãm krãptĩ arým tu amim Jeju markumrẽx ne arým mekõt ajkamẽ. Nhyam kam me arým krãptĩ: tẽ.

*Pedru kute Anẽjao mex nhyam Dokre tyk nhyam akubyn o tĩn.*

<sup>32</sup> Nhyam kam Pedru pyka kunĩkõt kute me omũnh kadjy tẽ. Me omũnhõ tẽ:n kam krĩbẽ Ridjakam me jadjwý'ýr bõx. Jeju nhõ me ja'ýr bõx. <sup>33</sup> Nhyam kamã

me'õbê Anêja amrêbê akryn arek ikwã. Akry'ã arým amexbê 8 apêx. Nhyr Pedru arým omũ. <sup>34</sup> Ne kam kum,

—Ë, Anêja, Jeju Kritu arým ajo mex ne. On kãjmã djan anhi kwã djãwão mex, ane. Nhyr me aêrbê arým kãjmã dja. <sup>35</sup> Nhyr krĩbê Ridjamê krĩbê Xaronakam me ja kunĩ arým omũ. Ne kam arým Bẽnjadjwýr djwýnh'ýr amijo akêxo kumex.

<sup>36</sup> Pedru krĩbê Ridjakam arek ar ba. Nhyr kam krĩbê Djopekam Jejukõt ba djwýnh ni'õ ar ba. Idjibê ne Tabita. Mebê kregu kabênkam ne me kum Dokre jarê. Ukaprikumrêx ne mã me õ mýjja kêtõ djuw mexõ ba. <sup>37</sup> Ne kam kanên arým ty. Nhyr me amikukràdjãkõt ku'õn kikkre tãmkam kýjrũm kumoka'êkam kudji nhyr nõ. <sup>38</sup> Krĩbê Ridja ne krĩbê Djopeo rãm ne ja. Dokre ty nhyr kam me kum,

—Pedru ne Ridjakam ar ba, ane. Nhyr Jejukõt me ba djwýnh arým kuman Pedru'ýr ar amãnhkrut jano. Nhyr ar 'ýr tẽn kam 'ýr bõx ne kum,

—Ë, amikrà kêt ne Ridja'ýr tẽn, ane.

<sup>39</sup> Nhyr amibêx ne 'ýr arkõt tẽn. Tẽn kam arým 'ýr bõx. Nhyr ar Pedruo tẽn kýjrũm kumoka'ê'ýr o wabi. Nhyr kam me 'uwti kunĩ 'ýr bõx ne muw. Ne Dokre tĩnri kute apýnh me inõkãti, apýnh kubêkã nhípêx djãri mã: kum akreo ku'ê.

<sup>40</sup> Nhyr Pedru arým bõm me kunĩ jano. Ne kam kõnkrãõ nhýn arým Metĩndjwýnhmã o a'uw. Ne kam tykja'ýr akêx ne kum,

—Ë Tabita, kãjmã nhý, ane. Nhyr arým no põt ne Pedru pumũn arým kãjmã nhý. <sup>41</sup> Nhyr 'ýr ikran arým ikra 'amýn kãjmã kudja. Ne kam memã kabên nhyr me arým 'ýr bõx. Jeju nhõ me jamê me 'uwtimê ne me bõx nhyr arým memã kum,

—Ota, arým akubyn tĩn ne, ane. <sup>42</sup> Nhyr me arým krĩbê Djopekam kikkrepdjãtã abenmã arênho ipõk ne. Nhyr me krãptĩ arým tu amim Jeju markumrêx ne. <sup>43</sup> Nhyr kam Pedru arek krĩbê Djopekam ar ba. Me'õbê Ximãõ nhũrkwãkam ne nhý. Ximãõbê ne mry kãõ mex djwýnh'õ. Pedru krĩ wãkam ar ba nhyr arým 'ã akati krãptĩ apêx.

## 10

*Me'õ bajtembê Koneru'ã ujarênh.*

<sup>1</sup> Pedru Djopekam ar ba nhyr krĩraxbê Xedjarekam me'õbê Koneru ar ba. Kubê ne krãkamngõnhre krãptĩ: kubê 100 nhõ bẽnjadjwýr. Me kute krãkamngõnh ja'ã memã kum,

—Pykabê Itarij kurũm me ja, anhýro ba. <sup>2</sup> Koneru katãt Metĩndjwýnh kabên man kõt ar amijo ba. Konerumê ũrkwãkam ar krĩja kunĩ ne arkum Metĩndjwýnh rax puma. Nãm me õ mýjja kêtãkam õdjãnhkumrêx ne mã Metĩndjwýnhmã kabên ar ba.

<sup>3</sup> Nhyr kam arým myt akêxkam, 3 orakam, Metĩndjwýnh kadjy mrãnh djwýnh'õ nokrekam amirĩt nhyr arým omũnhõ nhý. Nhyr kum, “Ë, Koneru”, ane. <sup>4</sup> Nhyr kute omũnhkam madjã kretin kum, “Bẽnjadjwýr djwýnh mýj nã”? ane. Nhyr kum,

—Ga Metĩndjwýnhmã akabên nhyr arým ama. Ga me õ mýjja kêtãkam anhõdjãnh nhyr arým apumũ. <sup>5</sup> Jakam dja ga krĩbê Djopemã anhõ me ja kwý jano. Kam ne me'õbê Ximãõ Pedru. Gê ar tẽn kum arên awýr o bõx. <sup>6</sup> Imõti mýrri ne nhý. Mrykãõ mex djwýnhbê Ximãõmê ro'ã ne ar nhý. Dja ar tẽn kum arên amrê awýr o tẽn o bõx nhyr arým amã arê ga kabên kõt ã amijo ane.

Nãm ã Metĩndjwýnh kadjy mrãnh djwýnh Konerumã ane. <sup>7</sup> Ne kam mã tẽn. Nhyr arým amiwýr ar

amãnhkrut ne ikjêkêt 'uw. Me kute ar amãnhkrut pa 'amýnhja ne kum àpênh kajgo ar ba. Nhyh pydji ja ne kubê õ krâkamngõnh. Adjwýnhdjwý ne katàt Metĩndjwýnh kabên man kôt ar amijo ba. Ne kam Koneru târi kum àpênh ar ba. Nãm amiwýr ar ja 'uw nhyh ar arým bõx. <sup>8</sup> Nhyh kam prĩne arkum kadjy mrãnh djwýnh'ã ajarên arým krĩbê Djopemã ar ano.

*Mýjja kute Pedru nokrekam amirít nhyh kute omũnh.*

*Kar 11.5*

<sup>9</sup> Nhyh ar'ã akati nhyh ar arým 'ýr tẽ. 'Ýr tẽ:n arým krĩ tẽpo tẽ. Nhyh arkum ajmã Pedru krĩraxkam kikre'ã wabin imõk'ã nhỹ, imõk ngrengrer'ã nhỹ. Mebê idjaer ne me tu õ kikre nhimõk po. 'Ýr ne wabin nhỹ. Ne kam Metĩndjwýnhmã kabêno nhỹ. Kàjkwa nhipõkri myt nhýrkam. <sup>10</sup> Ne kam kum prãm ne bit kute õ kwý krênãm. Nhyh ar arým kum õmrõo dja. O dja nhyh Pedru jaêrbê mýjja amirít nhyh omũ. <sup>11</sup> Kàjkwa ne abenbê ajkij nhyh omũ. Nhyh mýjja kute kubêkãti pyrãk rwýk mõ. Idja amãnhkrut ne amãnhkrut. Nhyh mýjja idja kunĩ 'amýn o rwýko mõ. <sup>12</sup> Kadjwýnhbê ne apýnh pykakam mry kunĩ. Apýnh rop, apýnh mry ngãngão mrãnh, apýnh àk, mry kunĩ kubêkãti kadjwýnhbê ikwã nhyh omũ. <sup>13</sup> Nhyh kam arým me'õ kum kabên nhyh kuma. Nhyh kum,

—Ë, Pedru kãmã djan 'õnh bĩn krẽ, ane.

<sup>14</sup> Nhyh Pedru kum,

—Kati, Bẽnjadjwýr djwýnh. Mõdjê kute me ibê mýjja kakrit pyma ja ne ije kur kêtumrẽx, ane.

<sup>15</sup> Nhyh ajte kum,

—Be, Metĩndjwýnh kute mýjjao mex kwãrik wãnh kum kakrit jarênh kêt, ane.

<sup>16</sup> Be, me'õ kum kabên ne ajte kum kabên ne ajte kum

kabên nhyh aêrbê mýjja akubyn kàjkwamã wabi.

<sup>17</sup> Nhyh Pedru amim,

—Je, mýj'ã ne ije mýjja pumũnhja amijakre? ane. Nãm amim anhýro dja nhyh Koneru kute ar anorja kikre jabej me kukij nhyh me arým arkum arẽ. Nhyh ar 'ýr tẽn arým ajkwa krekre târi bõx ne dja. Ne arým abej me kukij <sup>18</sup> ne kãj bê memã kum,

—Ximão Pedru, djori kikre wãkam nhỹ? ane.

<sup>19</sup> Nhyh wãnh Pedru kute mýjja pumũnh'ã arek amikabên maro nhỹ nhyh Metĩndjwýnh Karõ arým kum,

—Ë, ar amãnhkrut ne ikjêkêt ne ar ajabej akukij. <sup>20</sup> Kãmã djan ar'ýr rwýn arkôt tẽ. Kwãrik wãnh ar kubajtemkam axwe amikam adju-mar kêt. Ba ne ba ar ano nhyh ar tẽ, ane.

<sup>21</sup> Nhyh Pedru arým ar'ýr ruw ne ar'ýr bõx ne arkum,

—Ë, ba, ba ne gar ijabej. Mýj ne gar amã kĩnh ne iwýr tẽ? ane.

<sup>22</sup> Nhyh ar kum,

—Krâkamngõnh krãptĩ: kubê 100 nhõ bẽnjadjwýr'õ ne ar ijano bar awýr tẽ. Idjibê ne Koneru. Nãm katàt amijo ban kum Metĩndjwýnh rax pyma. Nhyh mebê idjaer kunĩ kum mex jarẽ. Metĩndjwýnh kadjy mrãnh djwýnhja ne kum karõn kum, "Pedru'ýr ar 'õ jano gê amrẽ awýr tẽn amã kabên jarẽ. Dja ga prĩne kabên ma", ane. <sup>23</sup> Nãm ar Pedrumã ane nhyh arým arkum, "Amrẽ ar ikôt wadjã", ane. Ne kam arkum aminhũrkwã jarẽ nhyh ar arým kam nhỹ.

*Pedru Koneru nhũrkwãkam bõx.*

Nhyh ar'ã akati nhyh Pedru arkôt arým 'ýr tẽ. Djopekam Jeju kukwakam me kamy kwý ne arkôt tẽ. <sup>24</sup> Amũ Xedjare'ýr tẽn 'ýr bõx. Nhyh Koneru arým arkam amako nhỹ. Nãm arým amijã õbikwamê kute meo õbikwao akuprõ. <sup>25</sup> Nhyh

ar me'yr bôx nhym Pedru kikremã àr tē nhym Koneru arým kajpa. Ne umaje amijo ngriren parbê tým ne ibô. <sup>26</sup> Nhym Pedru pa 'amýn kâjmã kudjan kum,

—E kum, kâjmã dja badjwý ibê pykabê me'õ, ane.

<sup>27</sup> Ne kam kum kabên tēn wadjã. Nhym me krãptĩ akuprô nhym arým me omũ. <sup>28</sup> Ne kam memã kum,

—Be, me ba ne ba me me bajtemmê ibikprônh kêtumrêx. Me ibê idjaerkam ikukràdjã kôt ba me me bajtem nhürkwãmã idjár kêtumrêx. Arým ga me ama. Nhym kam Metîndjwýnh imã ikukràdjã ny jarê. Imã me kunĩ kînhmã ne imã arê. Ne ije me'õmã kakrit jarênh kêtã ne imã arê. Ije me'õo me bajtem kêtã ne imã arê. <sup>29</sup> Kam aje imã ar anorja iwýr bôx ne ar kute imã akabên jarênhkam ba aminêje ikabên kêt ne tu arkôt awýr tēn bôx. Bôx ne arým me anhürkwãmã wadjãn me anhkô'ã nhý. Kam ba me amã arê. Mýj kadjy ne ga me ijo bôx? Mýj ne ga me amã kînh? Nãm ã Pedru memã ane.

<sup>30</sup> Nhym Koneru kum,

—Amũja'ã, arým 'ã arngrobê 4 apêx ba amijajburo nhý. Nhym ã myt ibô ane, 3 orakam ba inhürkwãkam Metîndjwýnhmã ikabêno nhý. Nhym ijaêrbê me'õ ikuka kônh dja nhym õ kubêkã jadjênh ne. <sup>31</sup> Nhym imã, “Ë Koneru, ga Metîndjwýnhmã akabên nhym arým ama. Ga me õ mýjja kêtumrêx anhôdjãnh nhym arým apumũ. <sup>32</sup> Jakam dja ga krîraxbê Djopemã anhô me ja kwý jano. Kam ne me'õbê Ximão Pedru. Gê ar tēn kum arên awýr o bôx. Imôti mýrri ne me'õ mrykão mex djwýnhbê Ximão nhürkwã. Kam ne ro'ã nhý. Pedru dja awýr bôx ne amã arê.” Nãm ã me'õ imã ane. <sup>33</sup> Ba kam amikrà kêt ne awýr ar ano. Be, arým ga bôx ba

me ikînhkumrêx ne. Ne jakam ba me ikunĩ Metîndjwýnh parbê nhý. Metîndjwýnh kute kabên'ã amã karô kunĩ me ije mar kadjy ne ba me nhý. Nãm ã Koneru Pedrumã ane.

<sup>34</sup> Nhym kam Pedru kum,

—Mrãmri ne Metîndjwýnh kum me kunĩ kînh aben pyrãk. Ja arým imã amirîtkumrêx ne. <sup>35</sup> Be, me bê idjaer nãr me bajtem. Apýnh me ba djã kunĩkôt me kunĩ. Me apýnh kum Metîndjwýnh rax pyman katãt kute amijo baja, Metîndjwýnh kum me ja kunĩ kînh. <sup>36</sup> Ba me amã kabên jarê ga me ama. Be, Metîndjwýnh ne me bê idjaermã me umar mex jarê. Dja me tu amim Jeju Kritu markumrêx ne arým umar mex. Kubê ne me kunĩ nhô Bênjadjwýr djwýnh. Metîndjwýnh ne me bê idjaermã ujarênh ny ja jano. <sup>37</sup> Me ga ne ga me arým 'ã ujarênh ma. Djuão kute 'ã memã ujarênhkam ngômã me angjênhkam ne me Garrêjakam Jeju'ã ujarênhmo krax. Ne kam Djudêja kunĩkôt me 'ã ujarênh ar ba ga me arým ama.

<sup>38</sup> Be, Metîndjwýnh ne Nadjarekam Jejumã ta Karô jano nhym arým raxo kadjwýnhbê nhýn ar o ba nhym arým kukwakam týt ne. Ne kam apênh mex ar ba. Nhym Xatanaj meo ba nhym me umar punu:re nhym Jeju arým me kunõo mex. Metîndjwýnh kute kumê amijo kajkepkam ne mã meo mex ar o ba.

<sup>39</sup> Kute mýjja kunĩ nhípêxkôt ne bar omũ. Me bê idjaer nhô pykakam bar omũn krîraxbê Djeruxarêkam omũn arým 'ã memã idjujarênh ar iba. Nãm me píte'y'ã kunhôn kubĩ. <sup>40</sup> Nhym kam 'ã akatin akatin akati nhym Metîndjwýnh akubyn o tîn. Ne irãri o amirîr bar omũ. <sup>41</sup> Me kunimã ne o amirîr kêt. Metîndjwýnh ta kute amrêbê amijo me utãr jamã ne o amirîr ne. Me kute omũnhkôt memã 'ã ujarênh kadjy ne memã



o amirĩt. Ar imã ne arŷm o amirĩt ne. Ar ba ne bar akubyn tĩnkam ro'ã inhõ kwŷ krẽn kõt ikõ.

<sup>42</sup> Nhyŷ ta ar imã karõn ar imã, “Mrãmri ne Metĩndjwŷnh arŷm amijo ipytã. Dja ba memã axwe pãnh jarẽ. Me tĩn ne ar bajamã axwe pãnh jarẽ. Me tykjamã axwe pãnh jarẽ. Ja kadjy ne amijo ipytã. Tãm dja gar kãj bê memã arẽnho aba. Arŷm ar aje ipumũnhkõt memã 'ã adjujarẽn ar aba.” Nãm ã ar imã ane. <sup>43</sup> Be, Metĩndjwŷnh kukwakam kabẽn jarẽn djwŷnh kunĩ ne me amrẽbẽ: me bakukãmãremã kum, “Jeju arŷm tyk ne akubyn tĩnkam dja me kwŷ ĩ pŷnhkõt tu amim markumrẽx nhyŷ Metĩndjwŷnh arŷm me axwe maro aknon mekam ngryk kêt.” Nãm me ã me bakukãmãremã ane, ane.

<sup>44</sup> Pedru memã ja jarẽnho dja nhyŷ Metĩndjwŷnh Karõ arŷm me kunĩkam ruw ne ar meo ba. Me kute kabẽn maro ŷrja kunĩkam ruw ne ar meo ba <sup>45-46</sup> nhyŷ me arŷm apŷnh me ba djakam me kabẽnkam kabẽno kumex. Me kute me kabẽn mar kêtjakam ne me kabẽno kumex. Ne apŷnh me kabẽnkam Metĩndjwŷnh rax jarẽnho kumex. Nhyŷ Pedrukõt ar bõxja arŷm kuma. Kõt ar bõx jamã ne me kum me my kã rẽnne jarẽ. Ar ja ne ar amrẽbẽ tu amim Jeju markumrẽx. Nãm ar me kabẽn man arŷm mekam no tyn djan abenmã kum,

—Je, amrẽbẽ me babẽ idjaermãbit ne Metĩndjwŷnh kute Karõ janor. Ne kam arŷm jakam tu me bajtemmã Karõ jano, ane.

Nhyŷ Pedru arkum,

<sup>47</sup> —Be, amrẽbẽ Metĩndjwŷnh kute me bamã Karõ janorkõt ne arŷm jakam ã me bajtemmã anoro ane. Me babẽ idjaer ren amrẽbẽ abenmã, “Kwãrĩk wãnh ngõmã me bajtemja jangjẽn kêt”, ane. Nhyŷ be, jakam Metĩndjwŷnh kute memã

Karõ janorkam me baje ngõmã me angjẽn kadjy amimar, ane. <sup>48</sup> Ne kam arkum,

—Arŷm ne me tu amim Bẽnjadjwŷr djwŷnh markumrẽx. Ar Metĩndjwŷnhmã ngõmã me angij, ane. Nhyŷ ar arŷm ã meo ane. Nhyŷ kam me amijã Pedru nẽn kum,

—Dja ga arek me ikam ar aba gẽ ajã akatĩ kwŷ apẽx ga kam ajte tẽ, ane.

## 11

*Pedru kute Djeruxarẽkam me jamã amikõt amijarẽn.*

*Kar 10.9*

<sup>1</sup> Nhyŷ kam me bajtemdjwŷ arŷm tu amim Metĩndjwŷnh kabẽn markumrẽx nhyŷ me kwŷ arŷm amũ memã arẽnho ipõk ne. Nhyŷ pykabẽ Djudẽjakam Jeju kute ar anorja arŷm me arẽn ma. Nhyŷ Jeju kukwakam me kute abeno kamydjwŷ me arẽn ma. <sup>2</sup> Nhyŷ kam Pedru arŷm akubyn krĩraxbẽ Djeruxarẽmã tẽn bõx. Nhyŷ me kute amim Jeju mar kwŷ mebẽ idjaer kukradjã tũm'ã no tŷxi. 'Ã ne me memã me my kã rẽnne jarẽ. Pedru bõx nhyŷ me my kã rẽnne arŷm Pedrumẽ aktã kabẽno aben japanho dja. <sup>3</sup> Ne kum,

—Ga ne ga me bajtem nhũrkwãmã wangij ne me ro'ã adjãkuro akrĩ, ane.

<sup>4</sup> Nhyŷ Pedru akubyn amijo tẽn krax kurũm prĩne 'ã memã ajarẽn memã kum,

<sup>5</sup> —Be, krĩraxbẽ Djopekam ne ba Metĩndjwŷnhmã ikabẽno nhŷ. Nhyŷ mŷjja ijaerbẽ inokrekam amirĩt ba omũnho nhŷ. Mŷjja kute kubẽkãti pyrãk. Nhyŷ mŷjja idja kunĩ 'ãnh 'amŷn iwŷr o rwŷko mõ. Ne arŷm iwŷr o bõx. <sup>6</sup> Ba kam arŷm omũnho dja nhyŷ apŷnh pykakam mry kunĩ, ropmẽ mry ngãngão mrãnhmẽ ãkmẽ kadjwŷnhbẽ nõ ba omũ. <sup>7</sup> Nhyŷ kam kãjkwa kurũm me'õ kabẽn ba kuma. Nhyŷ imã,

“È Pedru kàjmã djan 'õnh bĩn krẽ”, ane.

<sup>8</sup> Ba kuman arým kum, “Bẽnjadwýr djwýnh, kati. Mõjdjẽ kute mýjja kakrit, mýjja punu wã nõje me imã kabẽn kõt ije kur kêtikumrẽx”, ane.

<sup>9</sup> Nhyr kàjkwa kurũm me'õ ajte imã, “Be, Metĩndjwýnh kute mýjjao mex kwãrik wãnh ga kum kakrit jarẽnh kêt”, ane. <sup>10</sup> Be, me'õ imã kabẽn ne ajte imã kabẽn ne ajte imã kabẽn nhyr arým mýjja kunĩ akubyn kàjkwamã wabi.

<sup>11</sup> Nhyr ijaerbẽ ar amãnhkrut ne ikjẽkêt kikrekam inhýrja'ýr bõx. Krĩraxbẽ Xedjare kurũm me'õ imã ar ano nhyr ar tẽn bõx. <sup>12</sup> Nhyr Metĩndjwýnh Karõ imã, “Dja ga arkõt tẽ. Kwãrik wãnh ga Ar kubẽ me bajtemkam axwe adjumar kêt”, ane. Ba kam arkõt tẽ. Nhyr Jeju kukwakam gwaj bakamy Ar kubẽ 6ja arým ikõt tẽ. Bar 'ýr tẽn kam Koneru nhũrkwãkam bõx ne arým 'ýr wadjã.

<sup>13-14</sup> Nhyr kam ar imã 'ã ajarẽ. Nãm ar imã, “Metĩndjwýnh kadjy mrãnh djwýnh'õ inhũrkwãkam dja ba omũ. Nhyr imã, ‘Dja ga anhõ me ja kwý krĩraxbẽ Djopemã ano. Me'õbẽ Ximão Pedru ne kam ar ba. Gẽ ar kum arẽn amrẽ awýr o bõx. Ta dja amã kabẽn jarẽ. Gamẽ anhõbikwa kunimẽ dja gar kabẽn ma nhyr Metĩndjwýnh arým ar ajaxwebẽ ar apytã.’ Nãm ã kadjy mrãnh djwýnh imã ane.” Nãm Koneru ã ar imã ane. Nãm ã Pedru me kukradjã tũm'ã me no týxjamã ane.

Ne kam ajte memã kum,

<sup>15</sup> —Ba kam memã ikabẽn kraxbit jarẽnhõ dja. Nhyr Metĩndjwýnh Karõ arým mekam ruw ne meo ba. Amrẽbẽ kute me bajo ba kõt ne ã wãkamdjwý arým meo bao ane. <sup>16</sup> Ba kam akubyn amijo tẽn arým amijã Bẽnjadwýr djwýnh kabẽn ma. Nãm me bamã, “Be, Djuão Metĩndjwýnhmã ngõmãbit me angio. Nhyr be, dja

ba ar amã Metĩndjwýnh Karõ jano nhyr arým ar ajo ba”, ane. Nã bãm Bẽnjadwýr djwýnh kabẽn ja man kõt ar amã arẽ. <sup>17</sup> Be, gu me baje tu amim Bẽnjadwýr djwýnhbẽ Jeju Kritu markumrẽxkam ne amrẽbẽ me bamã Karõ jano. Jakam ne me bajtemdjwý me bakõt tu amim markumrẽx nhyr arým ã memãdjwý Karõ janoro ane. Kam ba ar amã arẽ gar ama. Djã ne ba iraxo Metĩndjwýnh jakre got ba kubẽ aptã? Kati. Nãm ã Pedru memã ane.

<sup>18</sup> Nhyr me arým amijã kabẽn man Pedrumã kabẽn krãta. Ne arým abenmã Metĩndjwýnh rax jarẽn abenmã kum,

—Be, me bajtemdjwý ne Metĩndjwýnh arým kum me kĩnh ne arým memã amak bõ. Memã amak bõ nhyr me arým amikam kaprĩre wãnh axwemã iren Jeju'ýr amijo akẽx. Jakam dja me kõt tĩn ne ar ba rã'ã: rã'ã ne, ane.

*Ãxikikam me kute Jeju mar'ã ujarẽnh.*

<sup>19</sup> Be, amrẽbẽ me kute Exewão bĩnkam ne me me kute amim Jeju marjao bikẽnho mõ. Nhyr kam me arým ajmã. Ajmã:n kam me kwý amũ pykabẽ Penixijmã bõx. Nhyr me kwý amũ apẽxtibẽ Xipremã bõx. Nhyr me kwý krĩraxbẽ Ãxikimã bõx. Me ja ne me kãj bẽ mebẽ idjaermãbit 'ã ujarẽnh tẽ.

<sup>20</sup> Nhyr be, me kwý ja ne me apẽxtibẽ Xiprekam abatãnh djã nhyr me kwý pykabẽ Xirenikam abatãnh djã. Me kwý ja ne me Ãxiki'ýr bõx ne arým me bajtembẽ kregumã arẽ. Memã Bẽnjadwýr djwýnh Jeju'ã ujarẽnh ny jarẽ.

<sup>21</sup> Nãm me me bajtemmã arẽ nhyr Bẽnjadwýr djwýnh mekmẽ amijo kajkep. Me kute memã Jeju jarẽnh jamẽ amijo kajkep nhyr me arým kabẽn mexkumrẽx ne. Nhyr me bajtem krãptĩ: tu amim Bẽnjadwýr

djwýnh markumrêx ne arým 'ýr amijo akêx.

<sup>22</sup> Nhyr me arým amũ me arê. Nhyr onĩ krĩraxbê Djeruxarêkam me kute amim Jeju mar ne kõt ar aben pydjio baja arým me arênh ma. Ne kam Æxikimã Banabe jano. Nhyr 'ýr tẽ:n kam <sup>23</sup> 'ýr bõx ne arým me omũn amim,

—Be, mrãmri ne Metündjwýnh tu kum me kaprĩ:kumrêx\* ane. Ne kam arým mekam kĩnhkumrêx ne memã 'ã karõn memã kum,

—Dja gar amã Bẽnjadjwýr djwýnh jabê:n kabên man arek kõt amijo abakumrêx. Kwãrĩk wãnh 'ã adjukanga kêt. Nãm ã memã anhýro bao ane. <sup>24</sup> Be, Banabe ne mexkumrêx nhyr Metündjwýnh Karõ arým raxo kadjwýnhbê nhýn ar o ba nhyr mrãmri tu amim Metündjwýnh mar tÿ:xkumrêx. Nhyr ô'ã arým me krãptĩ Bẽnjadjwýr djwýnh'ýr amijo akêx ne tu amim markumrêx.

<sup>25</sup> Nhyr kam Banabe amũ krĩraxbê Taxumã tẽ. Kute kam Xaur jabej kadjy ne tẽ. Nãm 'ýr tẽ:n arým 'ýr bõx. <sup>26</sup> 'Ýr bõx ne kam abej ne arým kum kato. Ne kam akubyn Æxiki'ýr o bõx. Nhyr kam ar arým me kute amim Jeju mar ne kõt ar aben pydjio bajamê ro'ã akuprõ. Aben tã me ro'ã akuprõ. Me krãptĩ:mã Metündjwýnh kabên jarênh ku'ê: nhyr ar'ã amexmê na apêx. Be, krĩraxbê Æxikikam ne me Jejukõt me ba djwýnhja kumrêxmã me kute amim Kritu mar jarê.

<sup>27</sup> Nhyr kam Metündjwýnh kukwakam kabên jarênh djwýnh kwý bõx. Krĩraxbê Djeruxarê kurũm Æxiki'ýr bõx. <sup>28</sup> Nhyr kam ar 'õ kãjmã me ipõkri dja. Idjibê ne Agabu. Agabu kãjmã djan Metündjwýnh Karõ kukwakam memã kum,

—Dja apýnh me ba djãri pyka kunĩkõt mebê djwý kêt. Nhyr me kunĩ kum prã:m, ane. Nhyr tũmrãm arým kato. Bẽnjadjwýr raxbê Kraõdjõ memã ýrri ne arým kato nhyr me arým kum prã:m. <sup>29</sup> Nhyr memã prãm kêttri Æxikikam Jejukõt me ba djwýnh kunĩ arým abenmã kabên djin abenmã kum,

—Gwaj amikutã memã banhõ mýjja kwý jano. Jeju kukwakam me bakamy pykabê Djudêjakam ar bajamã ano, ane.

Nhyr me abenmã kum,

—Dja gwaj ã memã o ane. Dja gwaj ã memã o ane, ane. <sup>30</sup> Nhyr kam Banabemê Xaur ar kute memã o tẽmmã nhyr me arým arkum aminhõ mýjja ngã. Ne arkum,

—Dja gar me kute Jeju nhõ me jao ba djwýnhmã angã nhyr me arým memã kungrã, ane.

## 12

*Pedru mebê ijê djã kurũm kator.*

<sup>1</sup> Æxikikam me kute memã mýjja nhõrmã o dja: nhyr onĩ pykabê Djudêjakam bẽnjadjwýr raxbê Erodji arým àkrê:. Àkrên arým õ me ja jano nhyr me me kute amim Jeju mar kwýo rõrõk ne. Me kute Jejukõt ar aben pydjio baja kwýo rõrõk ne. Kute meo bikênh kadjy meo rõrõk ne. <sup>2</sup> Ne kam arým kãxdjwa kajgoo Xijagu bĩ. Xijagumê Djuãõ ar axikõt apõx. <sup>3</sup> Nãm me Xijagu bĩ nhyr mebê idjaer arým kam kĩnhkumrêx. Nhyr Erodji arým mekam kĩnhkõt omũn kam kute Pedruo tÿm kadjy memã arê. Me kute djwýponhbit kur djã nhõ akatikam ne memã arê.

<sup>4</sup> Nhyr kam me arým o tÿm ne kubê ijê. Nhyr kam Erodji 'ýr õ krãkamngõnhbê 16 jano. Nhyr me kute Pedru pumũnh kadjy me arým meo aben nhikjê'ã kabên. Me

\* **11:23** Djãm me ta ne me axwe kêt nhyr pãnh kum me kaprĩ Kati. Me ta te axwe kêtãm nhyr ta arým tu kum me kaprĩ.

kunîbê 4'ã kabên. Nhyam kam me 'ã aben japanho dja. Metîndjwýnh me irôbê mrânh djâ nhô akati apêx totokbê Erodji bit kute memã o katormã. Kute memã kukjêr nhyam me kute bînmã bit kute memã o katormã. <sup>5</sup> Kam ne me arek mebê ijê djâkam Pedruo dja. Nhyam me kute amim Jeju mar ne kôt ar aben pydjio baja ne me Pedruo Metîndjwýnhmã à'wýr'ã rîtkumrêx.

<sup>6</sup> Nhyam nêje akamâtkam Erodji amim,

—Gê kryrà, ba memã Pedruo ikato, ane. Nhyam Pedru arek ôto nô. Nhyam krâkamngôn amânhkrut ne aktã ijên o nhÿ. Kàxirãxo ne krâkamngôn Pedrumê aktã amijãpre. Nhyam kre'ã ku'ê djwýnh ar 'ã ijê djâ kuri dja. Arek kre nêje dja. <sup>7</sup> Nhyam Pedru ôto nô: nhyam Bênjadjwýr djwýnh kadjy mrânh djwýnh'ô arým 'ýr wadjã. Nhyam arým mebê ijê djâ kadjwýnhbê irã. Nhyam arým Pedru nhikre'i nhikjêbê kurwan kãjmã kangôn kum,

—Amikrà kêt ne kãjmã dja, ane. Nhyam kãjmã dja nhyam kàxirãxo inÿx 'ãpre djâ arým tu rôrok ne.

<sup>8</sup> Nhyam kadjy mrânh djwýnh kum,

—On amipren aparkã ponh jadjã, ane nhyam arým ã amijo ane. Nhyam ajte kum,

—Anhõ kubêkã krãkão amikupun ikôt tê, ane nhyam arým amikupu. <sup>9</sup> Nhyam mã kator tê nhyam arým kôt tê. Ne kute amimar kêt kam amim we,

—Be, nãm mÿjja kute ijo anhÿr kajgo. Nã bãm amiptir kajgo nô, ane. <sup>10</sup> Nhyam ar arým amipãnh 'ã ijê djâ ja mē. Kam ne kre'ã ku'ê djwýnh ar ja dja. Nhyam ar ajte amipãnh 'ã ijê djâ ja mē. Kam ne kre'ã ku'ê djwýnh ar jadjwý dja. Nhyam kam ar arým krîrax 'ýr kàxirãxtio 'ã ijê djâ ja tēpo tê nhyam ta arkum amijã kuta. Nhyam arým ar kato. Ne pry ja kumrêx'ã tēn

amipãnh kumē nhyam kadjy mrânh djwýnh arým mã kubê tê.

<sup>11</sup> Nhyam Pedru arým kute amip-tir kêtja man amim,

—Je, mrãmri ne Bênjadjwýr djwýnh Jeju imã kadjy mrânh djwýnh jano nhyam Erodjibê arým ipytã. Mebê idjaer kute ibînmã kam amak kajgo nhyam arým mebê ipytã, ane.

<sup>12</sup> Ne arek amimaro tē:m kam arým Marij nhûrkwã'ýr bôx. Djuão Makô ne Marij kurûm kato. Kikre jakam ne me krãptî Metîndjwýnhmã kabêno nhÿ. <sup>13</sup> Nhyam Pedru bôx ne arým kikre'ã ijê djâ mô. Nhyam me ô âpênh nija âmôr man arým kute me'ô pumûnhmã 'ýr tê. Idjibê ne Rodji. <sup>14</sup> 'Ýr tēn arým 'ã ijê djâ'ýr bôx. Nhyam Pedru kabên nhyam arým mrãmri Pedrukumrêx kabên ma. Ne arým kînhkam tu kikre'ã ijê djâ'ã 'ýr kêt ne akubyn me'ýr wadjãn memã kum,

—Ô kum, Pedru kikre'ã ijê djâ târi dja, ane.

<sup>15</sup> Nhyam me tu kum, “Ajbã”, ane. Nhyam, “Kati, mrãmri”, ane. Nhyam me arik kum,

—Be, kadjy mrânh djwýnh kute mã Pedruo baja ne dja, ane.

<sup>16</sup> Nhyam wãnh Pedru arek 'ã ijê djâ môro dja nhyam kam me kum 'ã kutan arým omû. Omûn kam arým te kute mÿjja marmã kam no tyn kumex. <sup>17</sup> Nhyam memã aminhikra bêno dja nhyam me arým anhikrê. Nhyam kam arým Bênjadjwýr djwýnh Jeju kute mebê ijê djâ kurûm o kator'ã memã ajarê. Ne kam memã kum,

—Aje, dja gar tēn Xijagumê Jeju kukwakam me kute abeno kamy arkum ijã ajarê. Ba on, ane. Ne kam arým amû kikre'ô'ýr tê.

<sup>18</sup> Nhyam kam akati. Nhyam arým krâkamngôn abenkam kangao kumex. Bênjadjwýr mekam ngryk karô abenkam kangao kumex. Ne abenmã kum, “Nãr Pedru? Nãr

Pedru”? ane. <sup>19</sup> Nhyam kam Erodji Pedru'yr me ano. Nhyam me abej ne te abej aprã. Nhyam arým prĩne kre'ã ku'ê djwýnh ar kukij. Nhyam me te: aminéje kum kabên ne. Nhyam arým memã arên memã kum,

—Pedru kator pãnh me kupa, ane. Nhyam me arým me kupa.

Nhyam kam Erodji arým pykabê Djudêja kurũm amũ tẽn arým krĩraxbê Xedjare'yr bõx. Ne kam arek kam ar ba.

<sup>20</sup> Arým krĩraxbê Xirukam me jamê krĩraxbê Xidõkam me jakam ngryk mex ne. Nhyam me arým axikõt 'yr bõx. Me bõx djwýnhram ne me Erodji nhõ àpênh rax'õmã amijarê. Idjibê ne Bradju. Kubê ne Erodji nhõ kumoka'ê, kam õt djã, nêje omũnh djwýnh. Kute me nêje Erodjimã kabên kadjy ne me Bradjumã amijarê. Amrêbê ne me kute Erodji nhõ pykakam õ djwý jamýnho ku'ê. Ne kam mebê djwý kêt karõ Bradjumã amijarê nhyam arým me nêje bẽnjadjwýr Erodjimã kabên jarê.

<sup>21</sup> Nhyam kam Erodji kute memã kabên kadjy akati'õ jarê. Nhyam arým 'ã akati bõx. Nhyam Erodji arým õ kubêkã rũnho prĩne amijo mex ne õ krĩ djã rax'yr bõx ne kam nhý. Nhýn arým memã kabêno nhý.

<sup>22</sup> Nhyam kam me arým abenmã õ akij ne abenmã kum,

—Djãm pykakam me'õ kabên got? Be, kubê ne kãjkwakam metĩndjwýnh'õ, ane. <sup>23</sup> Nhyam

totokbê arým Bẽnjadjwýr djwýnh kadjy mrãnh djwýnh mýj kanêjao kubĩ. Nhyam kõp arým kakuw nhyam arým ty. Be, mýkam? Bir, me kute kum metĩndjwýnh jarênh nhyam kute aminéje memã kum, “Kati”, anhýr kêtka. Kute memã kum, “Kati, atemã kãjkwakam Metĩndjwýnh pydji”, anhýr kêtka ne kadjy mrãnh djwýnh mýj kanê punure jao kubĩ nhyam arým ty.

<sup>24</sup> Nhyam kam me amũ memã Metĩndjwýnh kabên jarêno kumex nhyam me krãptĩ arým kum kĩnh. Nhyam me kute tu amim Jeju markumrêxia arým krãptĩ: mõ.

<sup>25</sup> Be, amrêbê ne Āxikikam me kute memã me õ mýjja kwý janormã. Djeruxarêkam me õ mýjja kêtjamã me kute anormã. Nhyam Banabemê Xaur ar arým amũ me kadjy o mõn memã o bõx ne arým memã kungã. Memã kungãn arým akubyn kurũm akêx ne tẽ. Ar Djuão Makõ japrõn o tẽ. Tẽ:n arým akubyn Āxikikam bõx.

## 13

*Me kute Jeju mar kute amũ Banabemê Xaur ar anor:*

<sup>1</sup> Be, Āxikikam me kute amim Jeju mar ne kõt ar aben pydjio bajakam ne me kwýbê Metĩndjwýnh kukwakam kabên jarênh djwýnh. Nhyam me kwýbê memã kukràdjã'ã ujarênh djwýnh. Ar idjibê ne Banabemê Ximião Nidjême Ruxumê Manaũmmê. Krĩraxbê Xirenikam ne Ruxu abatãnh. Manaũm ne bẽnjadjwýr raxbê Erodjimê ro'ã abatãnh ne kute o kamy.

<sup>2</sup> Ar Metĩndjwýnhmã rax jarê ne kum amijajburo nhý. Nhyam Metĩndjwýnh Karõ arkum,

—Dja gar imã Banabemê Xaur aro aben nhikjê. Ba arým ar àpênh djã ny kadjy aro amiptã, ane.

<sup>3</sup> Nhyam kam ar amijajburo nhýn Metĩndjwýnhmã aro à'wýro nhý. Ne kam ar krã'ã aminhikra djĩn amũ ar ano.

<sup>4</sup> Metĩndjwýnh Karõ ã kute ar anoro anhýrkam ne ar arým krĩraxbê Xerxij'yr tẽ:n kam 'yr bõx. Ne kam kãraxkam ngõ raxbê pyka kêtka tẽ. Apêxtibê Xipre'yr tẽ:n kam arým 'yr bõx. <sup>5</sup> Krĩraxbê Xarami'yr ne ar bõx. Ne kam wabin tẽ. Apýnh mebê idjaer bikprõnh djakam kãj bê memã Metĩndjwýnh kabên jarêno tẽ. Djuão Makõdjwý

ne ar aprõn o tẽ. Arkum àpênhmã ne ar o tẽ.

<sup>6</sup> Ne kam pykakõt krĩraxbê Papu'yr tẽn 'yr bõx. Ne kam arým me'õbê Bajegu kajpa. Kubê ne mebê idjaer'õ. Ta ne amijo apýnh mýjja mar mexo ban me kupênho ban amijo wajangao ba. Ne kam ta amijo Metĩndjwýnh mar mex ne amijo 'êx ne we kukwakam memã kabên jarênho ba.

<sup>7</sup> Nãm pyka tãmkam bẽnjadjwýrmã àpênh ar ba. Bẽnjadjwýr nhidjibê ne Xedju Paur. Bẽnjadjwýr krã mexkumrêx. Banabemê Xaur ar Papu'yr bõx nhym bẽnjadjwýr amiwýr ar ku'uw ne arkum,

—Imã Metĩndjwýnh kabên jarê. Ije mar prãm, ane.

<sup>8</sup> Nhym kam Erimanh, kubê ne Bajējuja. Me bakabênkam ne gu me ren kum wajanga jarê. Nhym be, me bajtem kabênkam ne me kum Erimanh jarê. Nãm bit kute Paur Ar kubê àptãrmã. Erimanh bit kute õ bẽnjadjwýr nêje Metĩndjwýnh kabên pytãrmã ne arým kabêno Xaur ar apanho dja.

<sup>9</sup> Nhym Xaur, idji nhikjêbê ne Paur. Metĩndjwýnh Karõ raxo Paur kadjwýnhbê nhýn ar o ba nhym arým wajanga'yr akêx ne kam no tyn omũnh djan <sup>10</sup>kum,

—'Êxnhĩti, axweti, Xatanaj tãmdjwý. Nãm me axwe kêt prãm, ga mã amã me kurê. Bẽnjadjwýr djwýnh memã 'ã karõ katãtkumrêx ga kam ga kupa'ã ar memã arênho aba nhym me arým aman Metĩndjwýnh kupa'ã amijo ba. Je tõi mýkam ne ga akabên punu jao krã'yr kêtumrêx? <sup>11</sup> Jakam arým Bẽnjadjwýr djwýnh kute ajaxwe pãnh ajo bikênhmã. Dja ga arým ano rãn arngro pumũnh kêt nhym ajã akati krãptĩ apêx, ane.

Nhym totokbê arým no rãn kam nokrekam akamãt kõi tyk pytĩ. Nhym arým me'õ jabej àpênh mõi. Me'õ kute pa 'amýnh

ne o tẽmmã ne mekõt me'õ jabej àpênh mõi. <sup>12</sup> Nhym bẽnjadjwýr Xedju Paur kute wajanga no rã pumũnhkam arým tu amim Bẽnjadjwýr djwýnh markumrêx. Nãm anhýr djwýnhràam amim,

—E kum, Bẽnjadjwýr djwýnh'ã ar kabên kukràdjã mexkumrêx, anen kam tu amim markumrêx.

*Paur Æiki 'õdjwýkam memã Jeju'ã ujarênh ne ja.*

<sup>13</sup> Nhym kam Paurmê ro'ã ar tẽmja ar kãraxmã wadjàn nox ne arým amipãnh krĩraxbê Papu mẽ. Ne tẽn kam arým pykabê Papirijkam krĩraxbê Pedji'yr bõx. Nhym kam Djuão Makõ arým ar kangan Djeruxarê'yr akêx ne.

<sup>14</sup> Nhym kam ar amipãnh krĩraxbê Pedji mẽ. Ne tẽn kam pykabê Pidjikkam krĩraxbê Æiki 'õdjwý'yr bõx. Nhym kam arým ar'ã pi'ók ràràr nhym ar arým mebê idjaer bikprõnh djãmã wadjàn nhý. <sup>15</sup> Nhym me'õ pi'ók jarênho dja. Mõj djê kukràdjãmê Metĩndjwýnh kukwakam kabên jarênh djwýnh 'õdjwýmẽ kabên jarênho dja. Ne kam arým arênh pa. Nhym me bikprõnh djãkam bẽnjadjwýr ar Paurmã kabên kadjy memã arê. Nhym me amũ abenmã arên arým kum arên kum,

—Bẽnjadjwýr ar ar amã kabên ne ar amã, “Be, akmere ar, ar ajõ aje memã akabên jarênh prãm jabej arê”, ane.

<sup>16</sup> Nhym kam Paur arým kãjmã dja. Ne memã aminhikra bẽ nhym me arým anhikrê. Nhym memã kum,

—Gar abê idjaer ar, ar akunĩ amã Metĩndjwýnh pyma ar, dja gar ikabên ma. <sup>17</sup> Me babê idjaero ba djwýnhbê ne Metĩndjwýnh. Nãm arým amijo me bakukãmãre pytà. Nhym kam me pykabê Edjítukam ar ba nhym Edjítukam me ja ar meo kubajtemo ba. Nhym kam Metĩndjwýnh me bakukãmãreo

krãptĩ:n o ra:x. Ne kam týx me:xkõt arým meo kato. <sup>18</sup> Meo kato nhy m me kapõt kukritkam ar ba. Nhy m me mã kam amikràõ ba nhy m mã kum me kaprĩn meo ba. Nhy m kam me'ã amexbê 40 apêx. <sup>19</sup> Nhy m kam Metĩndjwýnh pykabê Kanaãkam me ar ba tũmjao apêx. Apýnh me bajtem ba djãribê 7 nhy m arým memã meo apêx. Ne kam memã me õ pyka nhirê ne memã kungã.

<sup>20</sup> Ne kam aben totokmã memã me kute memã axwe pãnh jarênh djwýnh jarê nhy m me aben kukãm ar meo ba. Nhy m kam me'ã amex krãptĩ:o kute 450 pyrãk apêx nhy m Metĩndjwýnh kukwakam kabên jarênh djwýnhbê Xamuwe me kadjy kato. <sup>21</sup> Nhy m kam me amikadjy Metĩndjwýnhmã bēnjadjwýr raxo a'uw. Nhy m arým memã Xau, Ki kute irja jarê. Nhy m memã bēnjadjwýr'ã amexbê 40 apêx. Xaubê ne Bēnjamĩn djõ'ã me'õ.

<sup>22</sup> Nhy m kam Metĩndjwýnh bõm Xau mēn pãnh arým me kadjy Dawi jarê nhy m arým ar meo ba. Nhy m Metĩndjwýnh arým 'ã memã kum,

“Dawi ne ba arým kum ikato. Dja ba 'ã kum karõ nhy m arým katãt ikabên kunĩ man kõt ar amijo ba. Djexe ne Dawi dji.” Nãm ã Metĩndjwýnh memã ane.

<sup>23</sup> Ne kam amrêbê kute me bakukãmãremã arênh kõt arým tũmrãm me babê idjaer kamin-grãny kadjy Jeju jano. Dawija tãm djõ'ã ne kato. Jejubê ne õ kãjkwa kadjy me utãr djwýnh. <sup>24</sup> Jeju kute apēnhmo krax kētri ne Djuãõ me babê idjaer kunĩ jakren me bamã, “Me amikam akaprĩren wãnh ajaxwemã anhiren Metĩndjwýnh'ýr amijo akêx. Ba kam kum ngõmã me ajangij”, ane.

<sup>25</sup> Ne kam kute àpēnh'ã aminhi-nomã amimēnh 'ýr ne me bamã, “Ga me Kritu bõxmã kam amako aba. Djãm ibê tãmwã got? Katĩ,

ibê atemã. Nhy m be, itotokbê me'õ bõxja ne raxo kute ijakrenh, kute ijakrenh mexi. Nã bãm te irax ne 'ã inhi bõn ije kum parkã 'ãpre bõnh prãmje. Be, ãm irax ba ren arým kum apê. Nhy m be, kati, ãm ingrire. Nãm raxo ijakrenh mex ne.” Nãm ã Djuãõ memã ane. Nãm ã Paur memã ane.

<sup>26</sup> Ne itepã ajte memã kum,

—Be, akmere ar, gar abê Abraão tãmdjwý ar, ar akunĩ ar amã Metĩndjwýnh rax pyma ar. Be, Metĩndjwýnh arým me bamã kabên jano. Jeju kute me utãr'ã kabên jano. Ba arým ar amã kabên jarēho dja.

<sup>27</sup> Djeruxarêkam me jamê kam me bēnjadjwýrmê ne me kute Jeju raxkõt mar kêt. Amrêbê: ne Metĩndjwýnh kukwakam kabên jarênh djwýnh me bakukãmãremã arê. Me kute Kritu'ã axwe nhõr ne bĩnmã arê. Nhy m me aben djõ'ã kabên jarênh djwýnh kabên jarê. Pi'õk rãrãr kunĩkõt kabên jarēho mõr tãmtã. Nãm me te arēn mýjja'ã kabên kute amijakreja mar kêt. Jeju'ã kabên kute amijakreja mar kêt. Ne kabên jarēho mõr tãmtã arým 'ýr o bõx. Tũmrãm me kamingrãnyre kute mar kêt rã'ãn arým Jeju'ã axwe nhõn bĩnmã arê. Amrêbê: Jeju rwýk kētri kukwakam kabên jarênh djwýnh kute arēnh kõt arým tu bĩnmã arê.

<sup>28</sup> Ne te: kute axwe'õ jabej ne kum kator ne pãnh kute bĩnmã te me kukij nhy m axwe kētkumrêx. Te Jeju axwe kêt nhy m me tu mrãmri kute bĩnkumrêxmã Piratumã o a'uw. <sup>29</sup> Ne kam amrêbê: me bakukãmãre kute pi'õkkam Kritu'ã kabên jarênh kõt ã Jejuo ane. Kabên kunĩkõt me kute o anhýrmã kõt ne me kamingrãnyre arým ã Jejuo ane. ã Jejuo ane nhy m arým ty. Ty nhy m kam me arým pĩte'y kurũm kaban o ruw ne me tyk nhõ kēnkrekam adjã nhy m nõ. <sup>30</sup> Nhy m be, Metĩndjwýnh akubyn o tĩn.

<sup>31</sup> Nhyam kam kõt ba djwýnhmã amijo amirĩt ar o ba nhyam arým 'ã akati krãptĩ apêx. Jeju tyk kêtiri ne ar pykabê Garrêja kurũm ro'ã tẽ, Djeruxarẽ'yr tẽ. Nãm arukum amijo amirĩto ba nhyam kam jakam ar Jeju'ã ujarẽnh ar ba. Ar kute Jeju akubyn tĩn pumũnhkõt memã 'ã ujarẽnh ar ba. Nãm ã Paur memã ane.

<sup>32-33</sup> Ne kam itepã memã kum,

—Metĩndjwýnh ne amrêbê: me bakukãmãremã kum, “Dja ba akubyn Krituo tĩn”, ane nhyam me aben djõ'ã arẽnhõ mõ:. Arẽnhõ mõr tãmtã arým 'yr o bõx. Me bakamingrãnyrekam Jeju ty nhyam Metĩndjwýnh arým akubyn o tĩn. Tãm ne bar ar amã arẽnhõ dja. 'Ã ne me bakukãmãre amrêbê: mebê idjaer nhõ me ngrer tũmbê 2'ã pi'õk no'õk. Kamã Metĩndjwýnh arým kramã kum,

“Mrãmri abê ikrakumrêx. Jakam ga arým ijo Abãmkumrêx”, ane. Kute Kramã anhýrkõt ne arým akubyn o tĩn ne. <sup>34</sup> Nhyam amrêbê: me pi'õk 'õdjwý no'õk. Kamã Metĩndjwýnh kute akubyn o tĩn nhyam ĩ rerek prãm kêt'ã ajte kum, “Ije angêt Dawimã ajarẽnh kõt dja ba ã ajo djuw mexo ane”, ane.

<sup>35</sup> Nhyam me mebê idjaer nhõ me ngrer tũm 'õdjwý'ã pi'õk no'õk. Kamã ne Dawi Metĩndjwýnhmã kum,

“Djãm inhĩ rerekmã? Kati. Ba ne ba amexo imex. Kam dja ga ikanga kêtikumrêx”, ane.

Amrêbê: me kute pi'õk no'õk kõt ne Jeju tyn ĩ rerek kêt ne akubyn tĩn ne. Nãm ã Paur memã ane.

<sup>36</sup> Ne kam itepã ajte memã kum,

—Nhyam be, djãm Dawi nhĩ rerek kêt? Kati. Dawi tyn arým ĩ rerek ne. Metĩndjwýnh kabẽnkõt ne Dawi kum apê: nhyam kam kubẽngêt arým kubĩ nhyam ty nhyam me arým

adjã. Dawi akubyn tĩn kêt nhyam arým ĩ rerek ne. <sup>37</sup> Nhyam be, djãm Jeju nhĩ rerek? Kati. ĩ rerek kêt. Metĩndjwýnh kute akubyn o tĩnkam ne ĩ rerek kêt. Nãm ã Paur memã ane.

<sup>38</sup> Ne kam ajte memã kum,

—Be, akmere ar, ba ar amã arẽ gar ama. Jeju tyk ne akubyn tĩnkam Metĩndjwýnh arým me axweo aknon mekam ngryk kêt. Ja'ã ne bar kãj bê ar amã idjujarẽnhõ dja. <sup>39</sup> Mõjdjê kute me kute katãt amijo ba'ã memã karõkam kukràdjã gu me te baje mar ne katãt kõt amijo baba prãmje ne kam bajaxwe rã'ã. Nhyam be, dja me tu amim Jeju markumrêx nhyam Metĩndjwýnh arým me axwe kunĩ maro akno. O aknon tu memã axwe kêt jarẽ nhyam me arým kum mexkumrêx ne. <sup>40-41</sup> Amrêbê: ne Metĩndjwýnh kukwakam kabẽn jarẽnh djwýnh me bakukãmãremã kum,

“Ë, me atĩn ne ar abari dja ba mýjja pumũnh kêt nhípêx.

Nhyam me te me amã 'ã ajarẽ ga me mar prãm kêtikumrêx.

Ë, me aje ijapry prãm wã dja ga me te aje mýjja marmã kam ano tyn aku'ẽn arým me biknor tokry djãkam akuno”, ane.

Ga, me kute mar prãm kêt kam me biknor tokry djãkam biknorja pumũ. Kwãrĩk wãnh mekõt ã amijo anhýr kêt. Ar ga dja gar tu amim Jeju markumrêx. Nãm ã Paur memã ane.

<sup>42</sup> Nhyam kam me bikprõnh djã kurũm me kator mõrkam ne me Paur arkum,

—Dja gar amrê pi'õk rãrãr mõrkam ajte ar imã me kabẽn ja jarẽ, ane. <sup>43</sup> Nhyam arým me bimãnhkam me krãptĩ Paurmẽ Banabe arkõt tẽ. Mebê idjaermẽ me bajtem kute mebê idjaer kukràdjã mar ne kõt kute amijo

\* **13:43** Djãm me ta ne me axwe kêt nhyam pãnh kum me kaprĩ Kati. Me ta te axwe kêtã nhyam ta arým tu kum me kaprĩ.



bajamê ne me arkõt tẽ. Nhyr ar memã kabên ne memã kum,

—Metĩndjwýnh ta kum ar akaprikumrêx\* Dja gar tu amim markumrêx ne 'ã adjukanga kêt, ane.

<sup>44</sup> Nhyr kam ajte pi'ók rãrãr nhyr me ajte ar'ã akuprõ. Me kute Metĩndjwýnh kabên marmã ne krĩrax wãkam me kunĩ ar'ã akuprõ.

<sup>45</sup> Nhyr mebê idjaer kwý arým ar'ã me krãptĩja pumũn arým me'ã ngry:k ne. Ta te kute urãk prãmje arým Paur japryõ kumex.

<sup>46</sup> Nhyr kam Paurmê Banabe arkum me uma kêt ne memã kabên ne memã kum,

—Me abê idjaerkam bar ije me akumrêxmã Metĩndjwýnh kabên jarênh prãmikumrêx. Be, jakam ne ga me aminhirõbê kabên mên kam amim, “Djãm Metĩndjwýnhkõt itĩn rã'ãmã? Kati. Ja ne imã kĩnh kêt”, ane. Kam dja bar arým memã idjujarênh kadjy me bajtem'ýr amijo akêx ne. <sup>47</sup> Metĩndjwýnh kute pi'ók kõt ar imã me bajtem'ã karõ kõt dja bar ã amijo ane. Kamã ne Kritumã kum,

“Ga, akamãt kô tykkam me kute mýjja pumũnh kêt ne mrãnh punuja pumũ. Nhyr me kute memã pry kurwý nhyr me arým irãkam katãt mrã. Me bajtemdjwý ne me mrãnh punun axwe. Ga dja ga memã ikabên jarê.

Ja kadjy ne ba arým ajano. Dja me amim ikabên man arým gadjwý ama. Aje me axwebê me utãr djwýnh dja me ama. Aje pyka kunĩkõt me axwebê me utãr kadjy ne ba ajano.”

Nãm ã Kritumã ane. Ar badjwý ne bar arým kabênkõt me bajtemmã akêx ne. Nãm ã Paur memã ane. <sup>48</sup> Nhyr me bajtem kute ar markam arým kĩnhkumrêx ne abenmã kum,

—Metĩndjwýnh kabên mexkumrêx. Metĩndjwýnh kabên mexkumrêx,

ane. Ne kam Metĩndjwýnh kute me kêtĩ amijo me utãrja, kute kõt tĩn ne ar ba rã'ã kadjy amijo me utãrja arým tu amim Jeju markumrêx ne.

<sup>49</sup> Nhyr kam me pykaja kunĩkõt arým memã Bẽnjadjwýr djwýnh kabên jarênhõ ba. <sup>50</sup> Nhyr mebê idjaer arým Paurmê Banabe ar'ã memã apnê. Me nire kwý rũnh kute mebê idjaer kukrãdjã mar ne kõt amijo bajamã ne me ar'ã apnê. Ne me my bẽnjadjwýrdjwýmã ar'ã apnê. Krĩraxbê Æxikikam me jamã apnê. Nhyr kam me ari memã ar kurêtuw. Ne arým amibê ar kujate. <sup>51</sup> Nhyr ar kute me kangao amirĩt kadjy mebê amiparkã'ã me õ pyka ka'u. Ne kam amũ krĩraxbê Ikõni'ýr tẽ. 'Ýr tẽ:n arým 'ýr bõx. <sup>52</sup> Nhyr Jejukõt me ba djwýnh arým kĩnhkumrêx ne. Nhyr Metĩndjwýnh Karõ arým raxõ me kadjwýnhbê nhýn ar meo ba.

## 14

*Ikõnikam Paur ar memã Jeju'ã ujarênh.*

<sup>1</sup> Nhyr kam Ikõnikam Paurmê Banabe ar arým mebê idjaer bikprõnh djã'ýr tẽn wadjãn kam memã ujarênhõ dja. Ne memã kabên mexkumrêxo dja. Nhyr kam me krãptĩ: kum kĩnh ne arým tu amim Jeju markumrêx. Mebê idjaermê me bajtembê kregu krãptĩ: tu amim markumrêx. <sup>2</sup> Nhyr kam mebê idjaer kwý amakkre kêt ne kute Jeju mar prãm kêtja arým me bajtemmã me kurêtuw. Memã Jeju kukwakam me kute abeno kamy kurêtuw nhyr me kum me kurêõ ba.

<sup>3</sup> Nhyr kam Paurmê Banabe ar arek mekam ar ba. Arkum me uma kêt ne Bẽnjadjwýr djwýnh'ã memã 'ã ujarênh ar ba nhyr ar'ã arým arngro krãptĩ: apêx. Metĩndjwýnh ta kute tu kum me

kaprĩ'ã memã ujarẽnh ar ban\* Bẽnjadjwýr djwýnh kukwakam me aerbẽ mýjja pumũnh kêt kwý nhipêx. Me te kute mýjja marmã kam no tyk ne kute Metĩndjwýnh raxmã kator kadjy mýjja pumũnh kêt kwý nhipêx. Nãm ar me punu kwýo mex. Me kute abenmã kum,

—Mrãmri ne Metĩndjwýnh kõt ar kabẽnkumrêx, anhýr kadjy ar ipêx.

<sup>4</sup> Nhyr kam krĩraxkam me apýnh kabẽn. Me kwý mebẽ idjaer kõt kabẽn. Nhyr me kwý Jeju kute ar anorja kõt kabẽn. <sup>5</sup> Nhyr kam me bajtemmẽ mebẽ idjaermẽ mekam me bẽnjadjwýrmẽ arým abenmã ar'ã karõn abenmã kum,

—Gwaj arkum akjan kẽno ar titik gẽ ar ty, ane. <sup>6-7</sup> Nhyr kam ar arým me kuman arým mã mebê tẽ. Mebê tẽ:n kam arým pykabê Rikaõkam bõx. Ne kam krĩraxbê Rixakam bõx ne memã arẽ. Ne kam krĩraxbê Tebikam bõx ne memã arẽ. Ne bu'ã pyka kunikõt memã arẽho ba. Kritu'ã ujarẽnh nyja ne memã arẽho ba.

*Rixakam Paur ar memã 'ã ujarẽnh.*

<sup>8</sup> Nhyr krĩraxbê Rixakam me'õ mrãnh kêt. Adjakam ne par punuren mrãnh kêt rã'ã ne arým abatãnh ne. <sup>9</sup> Nhyr kam Paur memã ujarẽho dja nhyr par punuja kabẽn maro nhý. Ne mex kadjy arým tu amim Metĩndjwýnh kamnhĩxkumrêx. Nhyr Paur kam no djar týx ne arým kute amim kamnhĩxkõt omũ. <sup>10</sup> Nãm omũn kãj bẽ kum, “Kãjmã dja”, ane. Nhyr arým ekruy ne kãjmã djan arým mrãnh mex.

<sup>11</sup> Nhyr me krãptĩ arým Paur kute o mexkõt omũn kãj bẽ abenmã o akij. Nhyr be, Paur ar kute me kabẽn mar kêt. Me õ pykabê Rikaõkam me kabẽn kõt ne me kabẽn. Nãm me abenmã o akij ne abenmã kum,

—Apýnh me batĩndjwýnh ar amijo me bapyrãk ne arým pykamã ruw ne ar ba, ane nhyr ar kute me kabẽn mar kêt.

<sup>12</sup> Nhyr me Banabemã Djupite jarẽ. Ne Paur kute kabẽno Banabe jakrenhkam kum Mekuju jarẽ. Me õ metĩndjwýnh kajgo kõt ne me arkum idji jarẽ. <sup>13</sup> Krĩrax jakwa krekre ýr ne me kute me õ metĩndjwýnh kajgomã amijarẽnh djã. Me õ metĩndjwýnh jamã ne we kum Djupite jarẽ. Ýr ne kute mar djwýnh arým mrybãri kwýo bõx. Nãm me pidjõrã nhipêxo ipõk nhyr mry arým upij. Be, me krãptĩmẽ Djupite mar djwýnhmẽ ne me Paur aro õ metĩndjwýnh kajgon bit kute arkum mry bĩnmã. Bit kute arkum amijarẽnh kadjy arkum mry bĩnmã.

<sup>14</sup> Nhyr Jeju kute ar anorjabê Banabemẽ Paur ar arým me omũn arým kuma. Ne kute amikaprĩõ amirĩt kadjy amikã kadjõn me'ýr prõt ne. Ne me krãptĩ katikõt aminêje kãj bẽ: memã kabẽn tẽ. Me kute arkum mry bĩn nêje kãj bẽ: memã kabẽn tẽn memã kum,

<sup>15</sup> —Ë, mýkam ne ga me aje ar imã amijarẽnhmã? Djãm ar ibê Metĩndjwýnh? Kati. Ar ije me apyrãk. Me aje wãnh mýjja kajgo jamã anhirermã ne bar kãj bẽ me ajakreo iba. Metĩndjwýnh ne tĩn ne ar ba. Ta ne arým kãjkwa nhipêx ne ajte pyka nhipêx ne ajte ngõ raxbê pyka kêt nhipêx ne ajte kam mýjja kunĩ nhipêx. Tãm dja ga me amim maro aba. <sup>16</sup> Amrêbê: apýnh me ba djakam ne me ta kute amidjwýnhbit marn amikõt amijo ba kajgo nhyr Metĩndjwýnh ate krã.

<sup>17</sup> Djãm ate krãkam kute me bamã amijo amirĩt kêt? Kati. Kute me bamã amijo amirĩt rã'ã. Ga, kute me bakunõ djuw mex rã'ãja pumũ. Nãm mã djwý nhõ mytyrwý kõt

\* **14:3** Djãm me ta ne me axwe kêt nhyr pãnh kum me kaprĩ Kati. Me ne me te: axwe kêt mã nhyr Metĩndjwýnh ta arým tu kum me kaprĩ.

apýnh djwý djàri pykakam o apõx rã'ã. Ne kam djwýo mã me bajo djuw mexkumrêx ne o me bajo kĩnhkumrêx. Ne kute me bajo anhýr rã'ã ne. Ga, Metĩndjwýnhkumrêx ne kute me bakunõo djuw mex rã'ãja pumũ. Nãm Paur ar ã aminêje memã ane. <sup>18</sup> Nãm ar te memã ane nhym me krãptĩja ar'ã ajkê. Ne me kute arkum amijarênh kadjy kute mry bĩn prãm rã'ãn kam arým kanga.

<sup>19</sup> Nhym kam mebê idjaer kwý bõx. Æxiki kurũm me kwý bõx. Ajte Ikõni kurũm me kwý bõx. Ne kam memã ar kurêtuw nhym me arým kêno Paur titiko djan arým 'ã abenmã, “Arým ne ty”, ane. Ne kam arým krĩrax nêje bjêro mõn o katon atykmã kumê. <sup>20</sup> Nhym kam Jejukõt me ba djwýnh bõx ne kum ipõk ne. Nhym kam kãjmã djan arým akubyn krĩraxmã wadjã. Nhym kam me'ã akati nhym Banabemê Paur ar arým krĩraxbê Tebi'ýr tẽ.

*Ar arým amipry krax'ýr akêx.*

<sup>21</sup> 'Ýr tẽ:n kam 'ýr bõx. Ne kam krĩrax tãm kam kãj bê memã ujarênh ny jarênhõ ba nhym me krãptĩ arým tu amim Jeju markumrêx. Nhym kam ar akubyn krĩraxbê Rixa'ýr tẽn 'ýr bõx ne kam Ikõni'ýr tẽn 'ýr bõx ne kam Æxiki'ýr tẽn 'ýr bõx. <sup>22</sup> Ne krĩ kunĩkõt Jeju kõt me ba djwýnhmã 'ã karõo tẽn memã kum,

—Dja gar tu amim Jeju markumrêx rã'ãn 'ã adjukanga kêt. Dja me kãtãm gwaj bajo bikênh ar o ba gwaj batokry kumex ma. Nhym kam Metĩndjwýnh ýtã amikõt gwaj bapymjýrkumrêx. Arým õ me ja kunĩmã bẽnjadjwýrkam dja ã gwaj bajo ane. Nãm Paur ar ã memã anhýro tẽmo ane.

<sup>23</sup> Ne kam apýnh me kute amim Jeju mar djàri kunĩkõt tẽ. Me kute Jejukõt ar aben pydjio ba djàri kunĩkõt tẽn me kwý'ã meo ba djwýnh rẽ. Ne kam Metĩndjwýnhmã

meo a'uw ne kum amijajbun arým memã kum,

—Gar arým tu amim Bẽnjadjwýr djwýnh markumrêx. Bar kum ar ajo a'uw gê mã ar ajo djuw mex ne ar ajo ba, ane. <sup>24</sup> Ne kam arým tẽ. Pykabê Pidjikkõt tẽ:n kam arým pykabê Papirij'ýr bõx. <sup>25</sup> Ne tẽ:n kam krĩraxbê Pedji'ýr bõx. Ne kam kãj bê memã Metĩndjwýnh kabên jarê. Memã arên kam ajte tẽ. Tẽ:n kam krĩraxbê Atarij'ýr bõx.

<sup>26</sup> Ne kam ajte ngõ raxbê pyka kêt kõt akubyn krĩraxbê Æxiki 'õdjwý'ýr tẽmmã. Krĩrax jakam ne me amrêbê Metĩndjwýnhmã aro a'uw ne kum,

—Amã ar àpênh kadjy dja ga tu amã ar kaprĩkumrêx ne aro djuw mexo aba, ane. Nãm me kum aro a'uw ne kam amũ ar ano. Nhym ar arým amũ krĩrax krãptĩkõt ujarênh ba. Ne kam arým inomã amidjãpênh djã mẽn ajte akubyn Æxiki ja'ýr tẽmmã. <sup>27</sup> 'Ýr tẽ:n kam arým 'ýr bõx. Bõx ne me kute amim Jeju marjao aben pydjio arým memã amijã ajarê. Metĩndjwýnh kukwakam ar àpênh kunĩkõt memã 'ã ajarên memã kum,

—Be, Metĩndjwýnh ne arým apýnh me bajtem ba djakam memã amak bõ nhym me krãptĩ: arým tu amim Jeju markumrêx, ane. <sup>28</sup> Ne kam arek Jejukõt me ba djwýnhja kõt ar ba 'ã tũm.

## 15

*Djeruxarêkam me kute kukràdjão aben mar.*

<sup>1</sup> Nãm ar arek Æxikikam ar ba: nhym kam me kwý arým pykabê Djudêja kurũm bõx. Ne kam 'êx ne Jeju kukwakam me kamymã kabên. Me bajtemmã kabên ne memã kum,

—Gê me Môjdjê kukràdjã kõt me amy nhinhu kã rê. Dja me me amy nhinhu kã rênh kêt nhym Metĩndjwýnh kute õ kãjkwa kadjy

me apytàr prãm kêt. Nãm me 'êx ne ã memã ane.

<sup>2</sup> Nhyam kam Paurmẽ Banabe ar arým Djudêja kurũm me bõxjamẽ aktã kabẽno aben japa:nho dja. Nhyam kam me abenmã kum,

—Gê Paurmẽ Banabemẽ me bakwýdjwý Djeruxarẽmã tẽ. Gê ar Jeju kute ar anorjamẽ me kute Jeju nhõ me jao ba djwýnh'ýr bõx ne me my kã rênh jabej me kukja, ane. <sup>3</sup> Ne kam me kute amim Jeju mar ne kõt ar aben pydjio baja arým amũ ar ano nhyam ar tẽ. Tẽ:n pykabê Penixijkõt tẽ. Ne tẽ:n pykabê Xamarijkõt tẽ. Ne tẽmkõt Jeju kukwakam me kute abeno kamymã ujarẽnh tẽn memã kum,

—Apýnh me bajtem ba djakam ne me arým Bẽnjadjwýr djwýnh'ýr amijo akêx ne tu amim markumrêx. Nãm ar ã memã anhýr tẽ. Nhyam kam me kunĩ arým kĩntirekumrêx.

<sup>4</sup> Nhyam ar tẽ:n kam arým Djeruxarẽ'ýr bõx. Nhyam kam me kute amim Jeju mar ne kõt ar aben pydjio baja ar pa krij ne arkum kabẽn mextire jarẽ. Mekam Jeju kute ar anor jadjwý, meo ba djwýnhdjwý ne ar ã aro ane. Nhyam kam ar memã amijã ajarẽ. Metĩndjwýnh kukwakam ar ãpẽnh kunĩkõt ar memã 'ã ajarẽ.

<sup>5</sup> Nhyam kam mebê pardjêu kwý kãjmã dja. Adjwýnhdjwý ne ar tu amim Jeju markumrêx. Ar kãjmã djan memã kum,

—Gê me me my kã rê. Me bajtem kute amim Jeju marja my kã rê. Dja me me bakukràdjã'ã memã karõn memã kum, “Djã gãm me katàt Mõjdjê kukràdjã man kõt ar amijo aba”, ane. Dja me ã me bajtemmã ane. Nãm ã mebê pardjêu memã ane.

<sup>6</sup> Nhyam kam me kute 'ã aben marmã Jeju kute ar anorjamẽ me kute Jeju nhõ me jao ba djwýnhmẽ

akuprõ. <sup>7</sup> Ne kam aktã kabẽno aben japanho kumex. Nhyam kam Pedru kãjmã djan memã kum,

—Be, akmere ar, ba ar amã arẽ. Metĩndjwýnh ne amrêbê ar akurãm amijo ipytã. Ije me bajtemmã idjujarẽnh kadjy amijo ipytã. Ije memã Kritu'ã ujarẽnh ny jarẽnh nhyam me kute tu amim markumrêx kadjy. Ja kadjy ne amijo ipytã. Ja ne gar arým aje mar.

<sup>8</sup> Metĩndjwýnh ne kute me õkre kadjwýnhbê me kabẽn kunĩ mar. Nãm kum me bajtem kĩnh ne arým memã ta Karõ jano. O ne arým gwaj bamã kum me kĩnho amirĩt ne. Amrêbê ne gwaj bamã anon kam arým jakam ã memã anoro ane. <sup>9</sup> Djãm kum me babê idjaerbit kĩnh ne kum me bajtem kĩnh kêt? Kati. Me tu amim markumrêx nhyam arým me õkre kadjwýnhbê memã axweo ajngrã. Kam arým kum me bajtemdjwý kĩnh. Nãm kum me kunĩ kĩnho aben pyrãk.

<sup>10</sup> Ar akwý ne gar aje, “Dja me bajtem Mõjdjê kukràdjã kõt amijo ba mex”, anhýro aba. Je tõi, mykam ne gar akabẽn jao Metĩndjwýnhmã amikurê'uko aba? Djãm Mõjdjê kukràdjã kõt ne me bakukãmãre kute amijo ba mex got? Gwaj badjwý djãm kõt ne gwaj amijo baba mex got? Kati. Gwaj bajaxwekam ne gwaj te: baje Mõjdjê kukràdjãkõt amijo baba mexmã. Kam kwãrĩk wãnh me bajtemmã ja jarẽnh kêt. Me kute Mõjdjê kukràdjã kõt amijo ba mexmã kwãrĩk wãnh memã arẽnh kêt.

<sup>11</sup> Be, mrãmri Bẽnjadjwýr djwýnhbê Jeju Kritu ta ne tu kum gwaj bakaprĩkumrêx.\* Kam ta ne õ kãkwa kadjy gwaj bapytã. Gwaj amrêbê tu amim ja markumrêx. Ta ne tu kum me bajtemdjwý kaprĩn ã me utãro ane. Nãm ã Pedru memã ane.

\* 15:11 Djãm gwaj ba ne gwaj bajaxwe kêt nhyam pãnh kum gwaj bakaprĩ Kati. Gwaj ba ne gwaj te: bajaxwe kêtã. Nhyam be, Jeju Kritu ta ne tu kum gwaj bakaprĩkumrêx.

<sup>12</sup> Nhyṁ me krãptĩja arým kabẽn krãta. Nhyṁ kam Banabemẽ Paur ar arým memã kum,

—Be, me kute Metĩndjwýnh raxmã kator kadjy bar kukwakam mýjja pumũnh kêt kwý nhípêx. Nã bãṁ ar me punu kwýo mex nhyṁ me te kute marmã kam no tyn kumex, ane. Nãm ar memã anen 'ã memã ujarẽho dja.

<sup>13</sup> Nhyṁ me arek ar maro nhỹ: nhyṁ kam ar arým anhiokrẽ. Nhyṁ kam Xijagudjwý memã kabẽn. Memã kabẽnkam ne Pedrumã Ximão jarẽ. Nãm memã kum,

—Akmerer ar, dja gar ikabẽn ja ma. <sup>14</sup> Be, Ximão arým ar amã arẽ. Metĩndjwýnh arým kum me bajtem kaprĩn kute amim me kwý pytãr kraxkõt ne ar amã arẽ.

<sup>15</sup> Me bakukãmãredjwý tãm jarẽ. Metĩndjwýnh kute amim me bajtem kwý pytãr jarẽ. Amrẽbẽ: Metĩndjwýnh kukwakam kabẽn jarẽnh djwýnh tãm jarẽn arým 'ã pi'òk no'òk ne. Dawimẽ kramẽ tãmdjwý ar kute aben djõ'ã mebẽ idjaermã krĩn meo ba. Metĩndjwýnh me'ã Dawi nhõ kikre jakren memã kum,

<sup>16</sup> “Kam dja ba bõx ne akubyn Dawi tãmdjwý'ã bẽnjadjwýr mẽ. Mrãmri ne me kute akubyn kum õ kikre nhípêx pyrãk. Kikre kukràdjã tũmja ne amrẽbẽ amingrà. Dja ba kãjmã kudjan ipêx ne.

<sup>17</sup> Dja ba ã tãmdjwýo ane gẽ me anhy ijabej. Gẽ mebẽ idjaer bu'ã me bajtemdjwý ijabej. Me bajtem kute tu amim imarkumrẽxja kunĩ ijabej. Ba Ibẽnjadjwýr djwýnh dja ba ã meo ane.”

Nãm ã Metĩndjwýnh memã ane. Dawi tãmdjwýmẽ me bajtem'ã memã ane. Ga, kute amim me bajtem kwý pytãr jarẽnhja pumũ.

<sup>18</sup> Adjãkam kute amikukãm mýjja kunĩ markõt ne ã memã ane. Nãm ã Xijagu memã ane.

<sup>19</sup> Ne ajte itepã memã kum,

—Ga, me bajtem kute Bẽnjadjwýr djwýnho aminhõ Bẽnjadjwýrja pumũ nhyṁ kute me bajtemo aminhõ meja pumũ. Ba ar amã arẽ. Me bajtem kwý ne ajbir arým Metĩndjwýnh'ýr amijo akẽx ne tu amim markumrẽx. Kwãrĩk wãnh Mõjdjẽ kukràdjã kunĩo me kunor kêt. <sup>20</sup> Gwaj memã Mõjdjẽ kabẽn ngrẽrebit'ã pi'òk no'òk ne memã arẽ. Gwaj memã kum, “Me kute mýjjao metĩndjwýnh karõ nhípêxjamã mry parja kwãrĩk wãnh krẽn kêt. Kwãrĩk wãnh aprõ djwýnh kupa'ã nãr amjẽn djwýnh kupa'ã akurẽ aba kêt. Mry me kute mut djẽo parja kwãrĩk wãnh ãr ne krẽn kêt. Kwãrĩk wãnh kamrõ krẽn kêt”, ane. Gwaj ã memã ane.

<sup>21</sup> Gwaj me bajtemmã Mõjdjẽ kukràdjã jabit jarẽ. Gwaj ren memã arẽnh kêt nhyṁ ren me kute mar kêt nhyṁ ren kam mebẽ idjaer kum me kurẽ. Me Mõjdjẽ kabẽn'ã no tỳxkam kum me kurẽ. Be, me õ krĩ kunĩkõt ne me Mõjdjẽ kabẽn'ã no tỳx ne kãj bẽ memã arẽho ku'ẽ. Pi'òk rãrãr kunĩkõt ne me kute me bikprõnh djãkam mýjja ja'ã pi'òk no'òk jarẽho ku'ẽ. Amrẽbẽ: ne me me bakukãmãremã arẽn ajbir me kute arẽnh rã'ã. Kam dja gwaj me bajtemmã Mõjdjẽ kukràdjã ngrẽre jabit jarẽ gẽ me kuman kõt ar amijo ba nhyṁ kam mebẽ idjaer arým kum me kurẽ kêt. Nãm Xijagu ã memã ane.

*Me kute me bajtemmã pi'òk no'òk.*

<sup>22</sup> Nhyṁ kam me abenmã kum, —Gwaj Paurmẽ Banabe arkõt krĩraxbẽ Áxikimã gwaj banhõ me ja kwý jano, ane. Nhyṁ Jeju kute ar anorjamẽ me kute Jeju nhõ me jao ba djwýnhmẽ me kute kõt ar aben pydjio baja kunĩmẽ ne me abenmã kum,

—Be, mextire. Dja gwaj arkõt ar'õ jano, ane. Ne kute arkõt ar anor kadjy amijo Djuda Baxabamẽ

Xira ar utà. Ar amē ne ar Jeju kukwakam me kamy kuràm rax. Ar ja arkõt mõrmã. <sup>23</sup> Nhyr kam me arým pi'òk no'òk ne. Ar kute o mõr kadjy ne me pi'òk no'òk ne. Ne kamã me bajtemmã kum,

“Me ba Jeju kute me ijanor tũm ja ne ba me me amã ikabēn jarē. Me ije Jeju nhõ me jao iba djwýnhdjwý ne ba me me amã ikabēn jarē. Me ibē Jeju kukwakam me kamydjwý ne ba me me amã ikabēn jarē. Ga me apýnh me bajtem ba djakam ar aba, krĩraxbē Āxikimē pykabē Xirijmē pykabē Xirxijkam ar aba. Ba me Jeju kukwakam me ajo ikamy. Wãm ne ba me ikabēn mex'ã me amã pi'òk no'òk ne. Dja ga me me ikabēn jarēn ama.

<sup>24</sup> Be, wãm me kwý kumrēx mõrwã ne me arým me amã 'êx. Me ikurũm mõn me awýr bõx ne me amã 'êx. Ne me ikukràdjã tũmo me akunoro ban arĩk me amã, ‘Gē me Mõj djē kukràdjã kõt me amy nhinhu kà rē. Dja me me amy nhinhu kà rēnh kēt nhyr Metĩndjwýnh arým kute õ kãjkwã kadjy me apytãr prãm kēt', ane. Be, me kute me amã anhýr djõ'ã ne ga me te: aje katãt Metĩndjwýnh kabēn marmã. Arým ne Paur ar amrē tēn me imã ja jarē ba me kuman arým wãm me amã ikabēn jarē. Djãm me ba ne ba me wãm me 'êxnhĩwã jano got? Katĩ. <sup>25</sup> Be, ba me ije me ajarēnh markam arým axikõt ikabēn ne me akadjy amijo me ijõ ar utà. Amijo ar utàn Banabemē Paur arkõt me awýr ar ano. Gu me bamã bakamy Banabemē Paur ar kĩnhja kõt ar ano.

<sup>26</sup> Be, me kum Metĩndjwýnh kĩnh kēt ja ne me te ar kangrõnho ba nhyr ar mã memã Jeju'ã ujarēnh ar ba. Kum me uma kēt ne tu memã banhõ

Bēnjadjwýr djwýnhbē Jeju Kritu'ã memã ujarēnh ar ba.

<sup>27</sup> Me ije arkõt me amã ar anorjabē ne Djudamē Xira ar. Dja ga me pi'òk jakam me ikabēn jarēn ama. Nhyr ar wã dja ar ajkwakumrēxkõt ajte me amã tãm jarē ga me mrãmri ajte kõt aman mar pydji.

<sup>28-29</sup> Mõj djē kukràdjã ngrērebit dja ba me me amã arē ga me aman katãt kõt ar amijo aba. Ba me me amã, ‘Me kute mýjjao metĩndjwýnh karõ nhipēxjamã mry parja kwãrĩk wãnh krēn kēt. Kwãrĩk wãnh mry kamrõ krēn kēt. Mry me kute mut djēo parja kwãrĩk wãnh àr ne krēn kēt. Kwãrĩk wãnh aprõ djwýnh kupa'ã nãr amjēn djwýnh kupa'ã akurē aba kēt', ane. Jabit ne ba me me amã arē. Dja ga me katãt Mõj djē kukràdjã ngrēre jabit man kõt ar amijo aban arým amrãnh mex. Ba me ren me amã itepã kukràdjã 'õdjwý jarē ga me ren te: aje mar ne katãt kõt amijo aba prãmje. Be, Metĩndjwýnh Karõ ne me ikõt amikabēn dji ba me me amã ikabēn jarē. Tãm ne ja.”

Nãm me ã me bajtemmã pi'òk no'òkkam kabēn jarēnho ane.

<sup>30</sup> Nãm me memã pi'òk no'òk ne kam arým Paur arkum kungãn arkum, “Aj mã”, ane. Nhyr ar arým Āxiki'yõr o tē:n kam 'yõr o bõx. Ne kam me krãptĩ:o akuprõn arým memã pi'òk no'òk ngã. <sup>31</sup> Nhyr me memã pi'òk jarē nhyr me arým kuma. Kabēn mextire man arým kĩnhkumrēx ne.

<sup>32</sup> Nhyr Djudamē Xira Ar kubē Metĩndjwýnh kukwakam kabēn jarēnh djwýnh ne arým memã 'ã karõ kumex ne memã kum,

—Dja ga me tu amim Jeju mar tỳxkumrēx rã'ãn 'ã adjukanga kētkumrēx. Nãm ar ã memã 'ã karõo ane. <sup>33</sup> Ne arek kam ar ba nhyr ar'ã arým akati kwý apēx. Nhyr kam ar memã kum,

—Bar akubyn Jeju kute ar anorja'ýr tẽ, ane. NhyM Jeju kukwakam ar kute abeno kamy arkum,

—Aj mã. Ar adjumar mex ne tẽ, ane. <sup>34</sup>NhyM kam Xira memã kum,

—Ba arek me akam ar iba, ane. <sup>35</sup>Paurmẽ Banabe ar adjwýnhdjwý arek ãxikikam ar ba. Arek me krãptĩ ro'ã kãj bê memã Bẽnjadjwýr djwýnh kabẽn jarẽn 'ã memã ajarẽ.

*Paurmẽ Banabe kute abeno bikjẽr.*

<sup>36</sup>NhyM kam ar'ã akati kwý apẽx nhyM Paur Banabemã kum,

—Gu baje õbẽ apýnh krĩraxkõt Bẽnjadjwýr djwýnh'ã memã badjujarẽnhja gu akubyn kunĩkõt tẽ. Gu baje Jeju kukwakam meo bakamy pumũho tẽ. Me katãt kute amijo ba jabej me omũho tẽ, ane.

<sup>37</sup>NhyM arkõt tẽm kadjy Banabe kum Djuão Makõ Kĩnh.

<sup>38</sup>NhyM be, Paur ne kum o tẽm Kĩnh kêt. Õbẽ kute pykabẽ Papirijkam kute ar kangan arkõt apẽnh'ýr tẽm kêt kam ne kum o tẽm Kĩnh kêt. <sup>39</sup>NhyM kam ar kabẽno aben japan arým abenkam kaprĩre ne. Ne kam arým abenbẽ ajkij. NhyM kam Banabe arým Makõo tẽn ngõkõt apẽxtibẽ Xipre'ýr o tẽ.

<sup>40</sup>NhyM Paur amijo Xira pyta. NhyM kam Jeju kukwakam ar kute abeno kamy ar'ã Metĩndjwýnhmã kum,

—Ga ne ga adjukapri:kumrẽx. Kam tu amã ar kapri:kumrẽx ne ar o aba, ane. NhyM kam ar mã tẽ. <sup>41</sup>Ne pykabẽ Xirijmẽ pykabẽ Xirxijkam tẽ. Apýnh me kute amim Jeju mar djãri kõt ba. Me kute Jejukõt ar aben pydjio ba djãri kõt ba. Ne memã týt x jangjẽho tẽ. Nãm ar memã kum,

—Dja gar tu amim Jeju mar týt x kumrẽx rã'an 'ã adjukanga kêt kumrẽx, anhýro tẽ.

## 16

*Paur kute mã amikõt Ximoxi ba.*

<sup>1</sup>Ne kam tẽ:n kam arým krĩraxbẽ Tebi'ýr bõx ne ajte tẽ:n kam krĩraxbẽ Rixa'ýr bõx. NhyM Jejukõt me ba djwýnh'õ nhidjibẽ Ximoxi kam ar ba. Nã kurũm katorja ne kubẽ mebẽ idjaer'õ. Nãm nãja kumrẽx tu amim Jeju markumrẽx. NhyM bãm kute irjabẽ me bajtembẽ kregu'õ.

<sup>2</sup>Krĩraxbẽ Rixakammẽ krĩraxbẽ Ikõnikamdjwý Jeju kukwakam me kamy mã: memã Ximoxi mexkumrẽx jarẽho ba.

<sup>3</sup>NhyM Paur Ximoxi'ýr bõx ne omũn kam kum ar ro'ã ba prãm ne. Kum ar ro'ã ba prãm nhyM be ar kukãm pyka kunĩkõt mebẽ idjaer krãptĩ ar ba. Me kute Ximoxi mar tũm. Ximoxi bãmbẽ me bajtembẽ kreguja me kute mar tũm. Ximoxi my kã krã'yr kêt me kute ajte mar. NhyM kam mebẽ idjaer kum Ximoxi kurẽ kêt mã Paur arým kum my nhinhu kã krãta.

<sup>4</sup>NhyM kam ar tẽ. Apýnh krĩraxkõt tẽn kunĩkõt me kute amim Jeju marmã kabẽn jarẽho tẽ. Djeruxarẽkam Jeju kute ar anorjamẽ me kute Jeju nhõ me jao ba djwýnhmẽ ar kabẽn ne memã arẽho tẽ. Me kute mar ne katãt kõt kute amijo bamã ar memã arẽho tẽ. <sup>5</sup>NhyM kam ar ô'ã apýnh me kute amim Jeju mar kute ar Jejukõt aben pydjio ba djãri tu amim Jeju mar týt x kumrẽx. NhyM akati kunĩkõt me kwý kute Jeju mar kêtja me kõt arým tu amim markumrẽx. NhyM kam arým me krãptĩ.

<sup>6</sup>NhyM ar pykabẽ Bridjakõt tẽn pykabẽ Garaxakõt tẽ. NhyM Metĩndjwýnh Karõ arkum,

—Kwãrĩk wãnh pykabẽ Adjijkam memã Metĩndjwýnh kabẽn jarẽnh kêt, ane. <sup>7</sup>NhyM kam ar tẽ:n arým pykabẽ Midjij tẽpo tẽ. Ne bit kute pykabẽ Bixinij katikõt tẽmmã.

Nhym Metĩndjwýnh Karõ akubyn ar nê.

<sup>8</sup> Nhym kam ar arek tē:n kam amipānh pykabê Midjij mē. Ne tē:n kam krĩraxbê Krõwadji'ýr bõx. <sup>9</sup> Nhym ar'ã akamāt ne. Nhym Metĩndjwýnh Paurmã me'õ karõ bê nhym omũ. Pykabê Matenikam me'õ amiwýr Paur 'uw nhym omũ. Nhym kum,

—Amrē pykabê Matenikam tēn me ikõt apê, ane. <sup>10</sup> Be, Paur kute me'õ pumũnhkam bar\* on pykabê Mateni'ýr itēm kadjy amiman abenmã,

—Be, mrãmri ne Bēnjadjwýr djwýnh gwaj bajuw. Gwaj baje kãj bê memã Kritu'ã ujarēnh ny jarēnh kadjy gwaj bajuw, ane.

*Ridjij kute tu amim Jeju markumrēx.*

<sup>11</sup> Ne kam Krõwadji kurũm ikaton arým inox ne. Ne ngõkõt Xamokra'ýr tē. 'Ýr tē:n arým 'ýr bõx. Ne ajte tē: nhym kam ar ijã akati. Bar kam ajte tē:n kam arým krĩraxbê Nējapõr'ýr bõx ne 'ã kã nhõ. <sup>12</sup> Ne wabin kam ajte Nējapõr kurũm pykakõt tē. Tē:n kam arým krĩraxbê Pirpu'ýr bõx, pykabê Matenikam ne krĩraxbê Piripuja. Krĩrax ja ne kute raxo krĩrax kwý jakrenh. Myt apõx djã kutã pykabê Mateni nhikjê'ã kute krĩrax kunĩ jakrenh. Krĩraxbê Rõma nhõ me ja ne me krĩrax jao djuw mex. Bar arek kam ar iba: nhym kam ar ijã akati kwý apêx.

<sup>13</sup> Nhym kam ar ijã pi'õk rãrãr. Bar kam krĩraxbê tēn ngõ rax'ýr bõx. Kam ne mebê idjaer kute Metĩndjwýnhmã kabēn djã. Me nire kwý arým kam akuprõ. Bar me'ýr tēn arým me ikõ'ã nhýn kam memã idjujarēnhõ dja. <sup>14</sup> Nhym mekõt me'õ nire, idjibê ne Ridjij. Krĩraxbê Xijxira kra 'õ. Kubê ne kubêkã nhõr djwýnh. Ta ne kubêkã 'õk nhym

kamrêk. Nhym kam pi'õk kaprĩ kadjy memã õro ku'ê. Nãm Mõjdjê kukràdjã kõt mã Metĩndjwýnhmã rax jarēnhõ ba. Bar memã idjujarēnhõ dja nhym Ridjij ar ikabēn maro nhý. Nhym kam Metĩndjwýnh arým kum amak bõ nhym arým tu amim Jeju markumrēx. <sup>15</sup> Bar kam Ridjijmē õ kikrekam õbikwa kunĩdjwý Metĩndjwýnhmã ngõmã ar angij. Nhym kam ar imã krã ne ar imã,

—Ar aje ijã amim, “Mrãmri kute tu amim Bēnjadjwýr djwýnh markumrēx”, anhýr jabej dja gar on ikõt tēn inhũrkwãkam anhikwã, ane. Ne kam ar imã krãõ dja. Bar kam kõt tēn ũrkwãkam inhikwã.

*Me kute Paurmē Xira Ar kubê ijê.*

<sup>16</sup> Arek ũrkwãkam inhikwã:n kam Metĩndjwýnhmã kabēn djã'ýr tē. Nhym me prĩti'õ ar ikajpa. Me karõ punu ne ar o ba. Nhym me mã amikukãm mýjja kute apõx'ã prĩtija kukij nhym me karõ punu mã kum arē. Kum arē nhym õ'ã prĩtija mã memã mýjja'ã ajarē. Nhym kam me arým pãnh kum pi'õk kaprĩ ngã. Nhym kam prĩtija nhõ bēnjadjwýr ar arým kubê pi'õk kaprĩ kumex jamý. Ta ne arkum kungã nhym ar arým kubê amý.

<sup>17</sup> Nãm Paurmē ar ikajpan ar ikõt arým ar ijo memã àkjêr tē. Nãm àkjêrkam memã kum,

—Ota, ar ja ne ar Metĩndjwýnhbê kumkatimã àpēnh ar ba. Ne me amã Jeju kute me apytãr'ã ujarēnh ba, ane. <sup>18</sup> Nãm akati kunĩkõt memã anhýro tē nhym kam arým ar ijã akati krãptĩ apêx. Nhym kam Paur me karõ punumã àkrēn arým 'ýr akēx ne kum,

—Ë, Jeju Kritu kukwakam ba amã ikabēn ne. On prĩtijamã anhiren kurũm akato, ane. Nhym kum kabēn majmã nhym arým kum iren mã tē.

\* **16:10** Pi'õk ja no'õk djwýnh nhidjibê ne Ruka. Jakam ne Ruka arkõt tēmno krax. 'Ã ne kute, “Bar” jarēnhja. Paurmē amijã arê.



<sup>19</sup> Nhyim o ba djwýnh ar arým omün abenmä kum,

—Je, jakam prítija arým kute gwaj bamä pi'ók kapri jamýnh präm kêt, anen kam ar arým Paurmê Xira aro tým ne ar pa 'amý. Ne kam me rünh'ýr ar bjêro môn aro bôx. Me kräpti kute djwý jamýnh djakam ne me bikprönh djä.

<sup>20</sup> Ýr ne ar aro bôx ne arým me rünh kabem ar kudjan memä 'êx ne memä kum,

—Ar kubê idjaer ja ne ar me banhô krîraxkam me kunimä umar punu jangjêno ba nhyim me arým kangao kumex. <sup>21</sup> Näm ar me bamä atemä kukradjä jarêno ba. Krîraxbê Rômakam me ja kute me bajo aminhō. Ne gu me ren ar kukradjä wä man kôt ar amijo baba nhyim ren me bakam me bēnjadjwýr rünh ren me bakam ngyrk ne. Näm ar ä memä ane.

<sup>22</sup> Ne kam me bu'ä me kräpti: amim ar kurêtuw. Nhyim me rünh arým ar'ä memä apnê. Me kute Ar kubê kubêkà o pôx ne kôo ar titik kady ne ar'ä memä apnê. <sup>23</sup> Nhyim me arîk ar titik ne. Ne kam arým me bē ijê djämä aro tēn kam aro bôx. Ne kam me bē ijê djwýnhmä kum,

—Dja ga omünh 'ãno dja gê ar kator kêt, ane. <sup>24</sup> Näm me kum ane nhyim arým me bē ijê djä nhípökri kumoka'êkam ar ýr. Ne kam pïponh amänhkrut aktä me temä nätjao ar te janê nhyim ar wänh nhý.

<sup>25</sup> Wänh nhý: nhyim arým ar'ä akamät kô ipökri. Nhyim ar Metindjwýnhmä kabēn ne kum ngrero nhý. Nhyim bu'ä me bē ijê kräpti ar maro ikwä. <sup>26</sup> Nhyim me aêrbê arým pyka amingrêk tỳ:x nhyim ô'ä arým me bē ijê djä par krax amingrêk ne. Amingrêk nhyim on 'ä ijê djä kunî jām amijä kurê. Nhyim me kunî'ä apýnh me unênh djäja arým amijä kurê. <sup>27</sup> Nhyim me bē ijê djwýnh arým no tỳx ne. Ne kam me bē ijê djä'ä ijê

djä jām kute amijä rēnhkôt omü. Ne kam amim,

—Je, arým ne me bē ijê kunî kato, ane. Ne kam ô kàxdjwa kajgo kaban bit kute o amibînmä amijo dja.

<sup>28</sup> Nhyim Paur kàj bē kum,

—Kwārîk wänh amibîn kêt. Ota, ba me ikunî inhýr rä'ä, ane.

<sup>29</sup> Nhyim kam ngônhpök'ä me ku'uw ne me bē ijê djämä prôt ne wadjä. Wadjän umaje tertet ne arým Paurmê Xira ar parbê tým.

<sup>30</sup> Ne kam aro katon arkum,

—Ë, bēnjadjwýr ar, mýj dja ba amijon arým ijaxwebê amipytä? ane.

<sup>31</sup> Nhyim ar kum,

—Dja ga tu amim Bēnjadjwýr djwýnhbê Jeju Kritu markumrêx nhyim arým ajaxwebê apytä. Anhô kikrekam anhôbikwadjwý gê ar tu amim markumrêx, ane. <sup>32</sup> Ne kam arým arkum Metindjwýnh kabēn jarê, ô kikrekam ar ýr kunîdjwýmä arê. <sup>33</sup> Nhyim kam akamät tām kam Paurmê Xira arkum igot ku'ô.

Nhyim kam urokam ar arým Metindjwýnhmä ngômä ar angij. Me bē ijê djwýnhmê ôbikwa ar angij. <sup>34</sup> Nhyim kam aminhürkwämä aro tē. Ne kam arkum ômrô jarê nhyim ar ô kwý krêno nhý. Nhyim ar kunî arým kînhkumrêx ne. Ar kute amim Metindjwýnh markam ne ar kînhkumrêx ne.

<sup>35</sup> Nhyim kam ar'ä akati. Nhyim me rünh arým Paur ar'ýr krākamngôn ar ano. Nhyim ar ar'ýr môn me bē ijê djwýnh kumrêx'ýr bôx ne kum,

—Me rünh ne me arým amä, “Arkum anhire gê ar tē.” Näm me ä amä ane, ane. <sup>36</sup> Nhyim kam me bē ijê djwýnh Paur'ýr tēn kum arēn kum,

—Me rünh ne me arým ar ajä imä, “Arkum anhire gê ar tē”, ane. Kam dja gar akaton tēn adjumar mex, ane.

<sup>37</sup> Nhyim kam Paur krākamngôn arkum,

—Krĩraxbē Rōmakam me ja ne me ar ijo aminhō. Nhyṁ me kute ar ijaxwe jabej ar ikukjēr kētkam tu me ipōkri ar ititik ne. Ne kam tu ar ibē ijē. Ne kam bit kute me kàxā bōm ar imēnhmā. Djām me kute ā krĩraxbē Rōma nhō me jao anhyr got? Be, kati. Me kute ā Rōma nhō me jao anhyr kēt. Gē me ta amrē tēn ar ijo kato, ane.

<sup>38</sup> Nhyṁ kam krākamngōnh ar akubyn tēn me rūnhmā ar kabēn jarē. Nhyṁ me kute Rōmakam me ja kute aro aminhō markam arým ar umaje tĩn prām. <sup>39</sup> Ne kam arým ar'yr tēn aminēje arkum kabēn ne arkum,

—Gop ar ijarēnh kēt, ane. Ne kam arým aro katon ajte arkum,

—Gop krĩrax jabē mā tē, ane. <sup>40</sup> Nhyṁ kam ar mebé ijē djā kurūm katon Ridjij nhūrkwāmā tēn bōx. Ne kam Jeju kukwakam me kamy pumūn arým memā 'ā karōn meo kĩnh. Ne kam mā ajte tē.

## 17

*Texarōnikakam memā Jeju'ā ujarēnh.*

<sup>1</sup> Tē:n kam krĩraxbē Āporij'yr bōx ne amipānh kumē. Ne tē:n kam krĩraxbē Apōnij'yr bōx ne amipānh kumē. Ne tē:n kam krĩraxbē Texarōnika'yr bōx. Kam ne mebé idjaer bikprōnh djā'ō. <sup>2</sup> Nhyṁ kam Paur ajte tām ne pi'ōk rārārkam me bikprōnh djākam tēn arým pi'ōkkōt memā 'ā ajarēn me kukij ne 'ā memā karō. Nhyṁ ajte pi'ōk rārār nhyṁ ajte kam tēn pi'ōkkōt memā 'ā ajarē. Nhyṁ ajte pi'ōk rārār nhyṁ ajte kam tēn pi'ōkkōt memā 'ā ajarē.

<sup>3</sup> Nām memā kum,

—Be, amrēbē me bakukāmāre kute pi'ōk no'ōk ne. Pi'ōkkam ne mrāmri Kritu tokryn tyk ne akubyn tĩnmā. Be, pi'ōkkam Kritu kute amijo anhyrmā kōt arým Jeju ā amijo ane. Mrāmri ne Metĩndjwýnh

Jeju'ā me banhō Bēnjadjwýrbē kumkati mēnhkumrēx. Ja dja ga me pi'ōk kōt ama. Ga, mrāmri kubē Kritukumrēxja pumū. Jejuja tām ne ba kāj bē memā arēnho iba. Nām ā memā anhyro ku'ē.

<sup>4</sup> Nhyṁ kam me kwý 'ā amim,

—Be mrāmri. Kōt ne arē, anen arým mā Paurmē Xira arkōt ajkamē. Me bajtembē kregu kute Metĩndjwýnhmā amijarēnho baja krāptĩ: arkōt ajkamē. Me nire rūnhdjwý krāptĩ arkōt ajkamē.

<sup>5</sup> Nhyṁ mebé idjaer kwý kute amim Jeju mar kētja arým 'ā ngyrk ne. Me te kute ar urāk prāmje arkam ngyrk ne. Ar'ā me krāptĩkam arkam ngyrk ne. Nhyṁ me kwý axwekam ate ar ba. Nhyṁ mebé idjaer me jamā kum,

—Paur ar axwekumrēx. Gwaj me kunībē ar kurē, ane. Nhyṁ kam me kwýja krĩraxkam me krāptĩmā ar kurētuw nhyṁ me arým arkam kangao kumex. Ne kam Djaxō nhūrkwā'yr prōt ne. Me kute kam Paur ar abej ne arkum kator ne me krāptĩmā aro katormā ne me ūrkwā'yr prōt ne.

<sup>6</sup> Ne te: ar abej. Ne kam ar pānh Djaxōmē Jeju kukwakam ar kute abeno kamy kwý pa 'amýn aro katon krĩraxkam me rūnh'yr aro mōn me'yr aro bōx. Ne ar'ā 'ēx ne kāj bē memā kum,

—Paurmē Xira ar pyka kunĩkōt abenmā me kurē'uko ba nhyṁ me kangao kumex. Nhyṁ kam ar arým jakamdjwý bōx. <sup>7</sup> Nhyṁ kam Djaxō arkum aminhūrkwā jarēn aro djuw mex. Ar ja kunĩ ne arkum bēnjadjwýr raxbē Xedja kabēn kurē. Xedjabē ne me bēnjadjwýr rūnh kunĩ nhō bēnjadjwýr. Arkum kabēn kurē. Ne mā memā kum, “Bēnjadjwýr rax 'ōdjwý kute kabēno Xedja jakrenh ne kubē Jeju.” Nām ar ā memā anhyr ba, ane. Be, nām me ā ar'ā me rūnhmā ane.

<sup>8</sup> Nhyṁ kam me krāptĩmē krĩraxkam me rūnh kute ja markam

arým arkam ngryk ne àkrêo kumex. <sup>9</sup> Ne kam Djaxõ Ar kubé pi'ók kaprĩ kumex byn arkum,

—Paur ar ano gé ar mã tê. Ar mã têm nhjukribit dja bar akubyn ar amã anhõ pi'ók kaprĩ ngã, ane. Ne kam arkum ire nhym ar akubyn ũrkwãmã tê.

*Berêjakam memã Jeju'ã ujarênh.*

<sup>10</sup> Nhym kam Jeju kukwakam me kamy akamãt tãmkam amũ Paurmê Xira ar ano. Krĩraxbê Berêjamã ar ano. Nhym ar'ýr tê:n kam 'ýr bõx. Ne kam mebê idjaer bikprõnh djã'ýr tê. <sup>11</sup> Berêjakam me ja ne me kute amak mexo krĩraxbê Texarõnikakam me ja jakrenh. Paur ar ajkwao memã Metĩndjwýnh kabên jarê nhym me arým kum kabên kĩnh. Kum kabên kĩnh ne kam akati kunĩkõt amim pi'ók jarê. Metĩndjwýnh kabên'ã pi'ók no'ók jarên amim,

—Djãm Paur ar katãt amik-abên jarênhkumrêx? Djãm ar Metĩndjwýnh kabên'ã pi'ók no'ók kõt amikabên jarênhkumrêx? ane. Me kute Paur ar mrãmri Metĩndjwýnh kabên kõt kabên jabej ã amim pi'ók jarênh ne maro ane. <sup>12</sup> Me kum kabên kĩnhkam ne me krãptĩ tu amim Jeju markumrêx. Me ni bajtem rũnhbê kregujamê me ny bajtemdjwý krãptĩ tu amim markumrêx.

<sup>13</sup> Krĩraxbê Berêjakam Paur kãj bê memã Metĩndjwýnh kabên jarênho ba: nhym amybým krĩraxbê Texarõnikakam mebê idjaer arým arênh ma. Ne kam 'ýr tê:n arým kõt bõx. Ne wãkamdjwý me krãptĩmã ar kurêtuw nhym me arým kangao kumex.

<sup>14</sup> Nhym kam Jeju kukwakam me kute abeno kamy ngõ raxbê pyka kêt'ýr Paur jano. Nhym Xiramê Ximoxi ar arek Berêjakam ar ba. <sup>15</sup> Nhym me kamy kwý Pauro tê. O tê:n kam arým krĩraxbê Atêna'ýr o bõx. Nhym kam Paur arkum,

—Dja gar Xiramê Ximoxi ar'ýr tẽn ar'ýr bõx ne arkum ikabên jarê gé ar amrê tê, ane. Nhym ar arým akubyn Berêja'ýr akêx ne.

*Atênakam memã Jeju'ã ujarênh.*

<sup>16</sup> Nhym kam Paur arek krĩraxbê Atênakam arkam amako nhý. Arkam amako nhýn kam arým mekam kaprĩ:re ne. Be, me kute kum amijarênh kadjy ne me apýnh metĩndjwýnh karõ krãptĩ nhípêx ne krĩrax tãmkam kikre kunĩkõt umjuw. Nhym arým omũn mekam kaprĩre ne. <sup>17</sup> Ne kam mebê idjaer bikprõnh djãkam memã kabêno ku'ê. Me kukjêro ku'ê. Memã 'ã karõo ku'ê. Me bajtem kute Mõjdjê kabênkõt amim Metĩndjwýnh mar jadjwýmã 'ã ujarêno ku'ê. Ne akati kunĩkõt me krãptĩ kute djwý jamýnh djãkam memã 'ã ujarêno ku'ê.

<sup>18</sup> Nhym kam apýnh me kukrãdjã tũm'ã ujarênh djwýnh arým Paur'ýr bõx ne kabên ma. Me ja ne me mebê epikurêju kukrãdjã'ã ujarênh ar ba. Nhym ate me jadjwý ne mebê exoko kukrãdjã'ã ujarênh ar ba. Amê me ja ne me Paur'ýr bõx ne kabên man kam arým abenmã kum,

—Je tô, mýj ne kabên krãptĩja bit kute me bamã arênhmã? ane. Nhym me kwý 'ã abenmã kum,

—Bãrãm metĩndjwýnh bajtem'ã memã ujarênh ar ba, ane. Mýkam ne me ã abenmã ane? Bir, Paur kute kãj bê memã Jeju'ã ujarênh ny jarênho bakam. Ne kute kãj bê me tyk akubyn tĩn'ã ujarênh ar bakam. Kam ne me ã abenmã ane.

<sup>19</sup> Me ja ne me Paur kabên man kam kum krãn arým o tẽn krãnhbê Apaku nhimõk'ýr o bõx. Kam ne me kute aben pydji djã. <sup>20-21</sup> Nãm me me aben pydji djãkam Pauro bõx ne arým kum,

—Dja ga prĩne me imã arê. Aje memã me kukrãdjã ny jarênhja mýj ne kraxkam kute? Be, ga bõx ne atemã me kukrãdjã jarê. Mýj'ã ne

ga arẽ? ane. Be, krĩraxbẽ Atẽnakam me krĩ tũm kunĩmẽ me bõx ny kunĩmẽ ne me mã akati kunĩkõt abenmã ujarẽnhbit. Me abenmã apýnh me ujarẽnh ny jarẽho babit nãr me me maro krĩbit. Ne atemã mýjja kupẽnh kêt.

<sup>22</sup> Nãm me Paur kukij nhym arým me aben pydji djãbẽ Apaku nhĩpõkri kãjmã djan memã kum,

—Krĩraxbẽ Atẽnakam me akrĩ ga me aje apýnh me anhõ we metĩndjwýnh krãptĩ mar prãmkumrẽx. Arým ne ba omũ.

<sup>23</sup> Be, nã bãm me anhõ kikre kabe'ã tẽn apýnh me õ mýjjamã kute amijarẽnh djã kumexja pumũnhõ tẽn kam kẽn ja'yr ikato. Me anhõ we metĩndjwýnh mar djã'ã kẽn jamã ikato. Ga me akabẽn'ã kẽn no'õk ne. Kamã ne ga me, “Gu me baje metĩndjwýnh mar kêtjamã rax jarẽnh djã kadjy ne gu me kẽn ja dji”, ane. Be, me ga ne ga me kum kẽn djir kajgo. Aje Metĩndjwýnhkumrẽx mar kêtgam ne ga me aje kẽnja djir kajgon kum amijarẽnh kajgo. Be, ba ne ba arým ije tãmja mar. Ije Metĩndjwýnhkumrẽx mar. Dja ba Metĩndjwýnhkumrẽx'ã me amã ajarẽ ga me ama.

<sup>24</sup> Be, ta ne pykamẽ kam mýjja kunĩ nhĩpẽx. Pykakam mýjjamẽ kãjkwakam mýjjamẽ kunĩmã Bẽnjadjwýr djwýnh ne kute o ýr. Kunĩmã Bẽnjadjwýr djwýnhkam djãm me kute kum kikre nhym Metĩndjwýnh kam ýrmã got? <sup>25</sup> Nãr djãm mýjja 'õ Metĩndjwýnh nhõ kêt ga me kam aje kum õrmã? Kati. Be, ta ne kute memã tĩn jangjẽnh ne memã àkõr jangjẽnh nhym me ar ba. Ta ne memã mýjja kunĩ nhõro nhỹ.

<sup>26</sup> Apýnh me ba djã kunĩkõt me bakunĩ me banhingõt djwýnh pydji nhym Metĩndjwýnh adjãkamã ipẽx. Nhym kam õ'ã pyka kunĩkõt me ajmãn kam ar ba. Metĩndjwýnh

amim me kukãm apýnh me bixadjwýr djã'ã karõ. Amim apýnh akati'ã karõ nhym kõt me aben kukãm apõx. Nhym me kukãm amim apýnh me ba djã'ã karõ nhym me kam aben kukãm apõx ne arým kam ar ba.

<sup>27</sup> Mýj kadjy ne me ipẽx? Bir, me kute Bẽnjadjwýr djwýnh jabejmã ne me ipẽx. Me gop kute amim mar ne kum katormã ne me ipẽx. Djãm kute me bajõmã kre rax got? Kati. <sup>28</sup> Metĩndjwýnh me bamẽ amijo kajkep. Kute me bamẽ amijo kajkepkam ne gu me batĩn ne amingrẽk ne amirĩto baba. Ikabẽnja kõt me akukràdjã jarẽnh djwýnh kwý amrẽbẽ: ã memã ane. Ne memã kum, “Gu me babẽ Metĩndjwýnh kra”, ane.

<sup>29</sup> Be, ta ne kute me banhipẽx gu me babẽ ta krakam kwãrĩk wãnh ga me amim, “Be, me ê mex ne umarkõt ne me kute Metĩndjwýnh karõ nhĩpẽx. Kẽn karýro nãr kryt jakao nãr kẽno me kute ipẽx mex”, kwãrĩk wãnh ga me ã amim anhýr kêt. Metĩndjwýnh ta kute me banhipẽxkam kwãrĩk wãnh ga me amim anhýr kêt. <sup>30</sup> Be, amrẽbẽ me kute mar kêtgam ne me ã amim anhýro ba nhym Metĩndjwýnh ate krã. Ne kam ajbir jakam pyka kunĩkõt me kunĩmã kum, “Me on amikam akaprĩren wãnh ajaxwemã anhiren iwýr amijo akẽx”, ane.

<sup>31</sup> Be, dja ĩ pyka kunĩkõt me kunĩmã axwe pãnh jarẽn katãt memã o pãnhkumrẽx. Kute kukwakam memã axwe pãnh jarẽnh kadjy ne arým amijo Jeju pytã. Arým kadjy kukãm 'ã akati jarẽnh mãmdji. Me kunĩ kute kum kator ne mar kadjy ne Metĩndjwýnh arým akubyn o tĩn. Me kute tãmwã kute memã axwe pãnh jarẽnh djwýnhkõt mar kadjy ne arým akubyn o tĩn.

<sup>32</sup> Nãm ã Paur memã ane nhym me arým aprý. Me kute me tyk akubyn tĩn jarẽnh markam ne me

kwý arým aprýo dja. Nhyṃ me kwý kum,

—Dja ba me ĩ ajte 'ã ama, ane. <sup>33</sup> Nhyṃ kam Paur mā mebe tē.

<sup>34</sup> Be, tēm kētri nhyṃ me kwý mā kōt ajkamēn tu amim Jeju markumrēx. Me'ōja nhidjibē ne Dijoni. Nām Apakukam me rūnh bikprōnh djākam me ro'ã rax. Me'ō nire jadjwý idjibē Tamari. Nhyṃ me kwýdjwý ar jakōt tu amim Jeju markumrēx.

## 18

*Kōritukam memã Jeju'ã ujarēnh kadjy ne ja.*

<sup>1</sup> Nhyṃ kam Paur amipānh krīraxbē Atēna mēn arým krīraxbē Kōritu'ýr tē. 'Ýr tē:n 'ýr bōx. <sup>2</sup> Ne kam me'ōbē idjaer, idjibē Akwire'ýr bōx. Pykabē Pōtukam ne rwýk djā. Amrēbē ne krīraxbē Rōmakam prōmē ro'ã ar ba. Pykabē Itarijkam ne krīraxbē Rōma. Prōbē Prixira. Ar kam ar ba: nhyṃ kam bēnjadjwýr raxbē Kraōdjō mebe idjaer kunī jano. Krīraxbē Rōma kurūm me ano nhyṃ Akwiremē prō ar arým mekōt katon tē. Tē:n arým Kōritukam bōx. Ne kam ar ba. Ar ba: nhyṃ kam Paur arým Akwire ar'ýr bōx. Ne kam ar ũrkwākam tē.

<sup>3</sup> Paurmē Akwire ar àpēnh djā kute aben pyrāk. Ar kubē kubēkatio kikre nhipēx djwýnh. Kam Paur arým ar ũrkwākam tēn arek kam krīn ar ro'ã kikre nhipēxo ba. <sup>4</sup> Ipēxo ban kam pi'ók rārār kunīkōt mebe idjaer bikprōnh djā'ýr ban memã 'ã ujarēnh ku'ē. Nām mebe idjaermē me bajtembē kregudjwýmã 'ã ujarēnh ku'ē. Me kujjēro ku'ē, memã 'ã karōo ku'ē. Me kute tu amim Jeju markumrēxmã memã 'ã karōo ku'ē.

<sup>5</sup> Nhyṃ kam Xiramē Ximoxi ar pykabē Mateni kurūm kōt bōx. Nhyṃ Paur no kato:n memã arēnh

prā:mkumrēx ne mā mebe idjaermã kum,

—Mrāmri Jejubē me banhō Bēnjadjwýrbē kumkatibē Kritukumrēx anhýro ba. <sup>6</sup> Nām memã arēnh prā:m nhyṃ mebe idjaer arým kabēno apanh ne aprýo ku'ē. Nhyṃ kam Paur kute me kangao amirīt kadjy amijã kubēkã karngrōn memã kum,

—Ba te me abē idjaermã Metĩndjwýnh kabēn jarē ga me mā akabēno ijapanho aku'ē. Jakam dja ga me te aje Metĩndjwýnhmã kum, “Be, Paur kute me imã arēnh kētkam ne ba me biknor tokry djākam itokry”, anhýrmã. Jakam dja ba me bajtemmã tēn memã arē.

<sup>7</sup> Nām ã memã anen kam arým mebe tēn me'ōbē Juxu nhŭrkwāmã wadjān kam nhý. Juxu ne amrēbē Metĩndjwýnhmã rax jarēnh ba. Mebe idjaer bikprōnh djā kuri ne ũrkwã. <sup>8</sup> Me bikprōnh djā jakam me ō bēnjadjwýrbē Kripu. Paur Juxu nhŭrkwākam ikwã: nhyṃ kam Kripu arým tu amim Bēnjadjwýr djwýnh markumrēx. Ō kikrekam ōbikwa kunīdjwý tu amim markumrēx. Nhyṃ bu'ã krīraxbē Kōritukam me krāptī Paur kabēn man kam tu amim Jeju markumrēx. Nhyṃ me arým Metĩndjwýnhmã ngōmã me angij.

<sup>9</sup> Nhyṃ kam akamãtkam Bēnjadjwýr djwýnh Paur nokam amirīt nhyṃ omũ. Nhyṃ kum,

—Kwãrĩk wãnh me umaje abin-hikrēnh kēt. Dja ga memã akabēn jarēnh rã'ã. <sup>10</sup> Ba ne ba amē amijo ikajkep. Me'ō kute awýr prōt ne ajo bikēnh prām kētkumrēx. Be, krīrax jakam inhō me ja krāptīkam ne me'ō kute ajo bikēnh prām kētkumrēx. Nām ã Bēnjadjwýr djwýnh kum ane. <sup>11</sup> Nhyṃ kam arek Kōritukam memã Metĩndjwýnh kabēn jarēnh ba nhyṃ arým 'ã amex ne 'ã nan ajte 'ã amex apēx.

<sup>12</sup> Nhyŷ akati 'ōkam mebe idjaer arŷŷm akuprō. Gariju pykabē Akajakam memā bēnjadjwŷrkam ne me akuprōn kam abenmā Paur kurētuw. Abenmā kurētuw ne arŷŷm 'ŷr prōt. 'ŷr prōt ne o tŷm ne pa 'amŷn arŷŷm me kute memā axwe pānh jarēnh djākam o bōx. <sup>13</sup> Ne kam me rūnhmā kum,

—Me'ō ja ne me ibē ikukrādja kurēo ban me imā, “Be, ikukrādja jakōt dja ga Metĩndjwŷnhmā rax jarēnh aba”, ane.

<sup>14-16</sup> Nhyŷ Paur kum amijarēnh 'ŷr nhyŷ Gariju kumrēx ne memā kum,

—Je, me'ōja ren axwekumrēx. Ren me'ōnh bī, nār ren mŷjjao akī ba ren arŷŷm 'ā me akabēn ma. Nhyŷ be, ate ga me abē idjaer me akabēnbito angryk ne me anhidjibito angryk ne me akukrādja tūmbito angryk ne arŷŷm o ikunoro aba. Djām ba ije mŷjja kajgo jakōt memā axwe pānh jarēnh got? Rūm me mōn wānh me akukrādjaō aba. Nām ā Gariju mebe idjaermā anen arŷŷm me anon bōm me kurē. <sup>17</sup> Nhyŷ kam me bajtembē kregu kunī Xoxinio tŷm. Xoxinibē ne mebe idjaer bikprōnh djākam memā bēnjadjwŷr rax. Nām me o tŷm ne arŷŷm me kute memā axwe pānh jarēnh djāja kabem titik ne. Nhyŷ Gariju ate krā nhŷ.

*Prixiramē Akwiremē Apōr ar'ā ujarēnh.*

<sup>18</sup> Nhyŷ kam Paur krīraxbē Kōritu tām kam arek ar ba 'ātūm ne. Ne kam arŷŷm Jeju kukwakam me kute abeno kamy arkum, “Ba on”, ane. Ne kam arŷŷm Prixiramē Akwire ar aprōn aro tē. Ar pykabē Xirij'ŷr tēmmā. Ne krīraxbē Xekrere kumrēx'ŷr tēn 'ŷr bōx. Bōx kētri ne Paur Metĩndjwŷnhmā amikabēn pydjın arē. Ne kam amikabēn kōt amijo tēn arŷŷm aminhinomā amimē nhyŷ me arŷŷm kum krānh

kē, mebe idjaer kukrādja kōt. Nhyŷ kam ar nox ne.

<sup>19</sup> Ne tē:n kam arŷŷm krīraxbē Epexu'ŷr bōx. Nhyŷ kam Prixiramē Akwire ar arek Epexukam ar ba kadjy Paur arkum ire. Arkum iren kam tu arŷŷm mebe idjaer bikprōnh djākam tēn memā Jeju'ā ujarēnh dja. Me kukjēro dja, memā 'ā karōo dja. <sup>20-21</sup> Nhyŷ me kum,

—Dja ga arek jakam ar aba. Gē kajbē ajātūm ga kam amū tē, ane.

Nhyŷ memā kum,

—Kati. Djeruxarēkam mebe idjaer krāptī kute aben kajmā'ā amikukrādja tūm mar kadjy arŷŷm aben pydjī 'ŷr. Ije me aben pydjī djā nhō akati majmā ibōxmā. Ba on me'ŷr. Nhyŷ kam Metĩndjwŷnh kum akubyn itēm kīnh jabej ba kam ajte akubyn me awŷr tē. Aj, ba on, ane. Ne kam arŷŷm krīraxbē Epexu kurūm tē. Ngōkōt tē.

<sup>22</sup> Tē nhyŷ kam me arŷŷm krīraxbē Xedjarekam kà nhō nhyŷ kam wabi, krīraxbē Djeruxarē'ŷr wabin kam 'ŷr bōx. Ne kam me kute amim Jeju mar pa krij. Me kute amim Jeju mar ne kōt ar aben pydjio baja pa krij ne memā kabēn mex jarē. Ne kam krīraxbē Āxiki'ŷr tē. 'ŷr tē:n arŷŷm 'ŷr bōx.

<sup>23</sup> Ne kam kam ar ba kajbē 'ātūm ne ajte tē. Tē:n kam pykabē Garaxakōt tē. Ne kam pykabē Bridjakōt tēn apŷnh Jejukōt me ba djwŷnh djāri kunīkōt memā tŷx jangjēnh tēn mā memā kum,

—Gora tu amim Jeju mar tŷxkumrēx. Kwārīk wānh 'ā adjukanga kēt, anhyro tē.

<sup>24</sup> Nhyŷ kam mebe idjaer'ō nhidjibē Apōr arŷŷm krīraxbē Epexukam bōx. Krīraxbē Arexākam ne rwŷk djā. Nām kabēn mexkumrēx ne kute Metĩndjwŷnh kabēn'ā pi'ōk no'ōk mar mexkumrēx. Kute memā arēnh mexkumrēx nhyŷ me kātām te kute kabēno itymān

kam kutā amikabēno biknoro nhý. <sup>25</sup> Apôr Bēnjadjwýr djwýnh Jeju'ā prīne me bakukāmāre kabēn kukrādjà mar mexkumrēx. Ne kam no kator mex ne prīne katāt memā kabēn jarēnh mexkumrēx. Ne kam Djuāo kute Metündjwýnhmā ngômā me angjēnhkam me kabēnbit ne kute mar. Kute ja nhijukri Jeju'ā ujarēnh kunī mar kêt.

<sup>26</sup> Apôr ja ne Epexukam bôx ne kam mebê idjaer bikprōnh djā'ýr tēn 'ýr wadjān arým memā 'ā ujarēho dja. Nām kum me uma kêt ne memā 'ā ujarēho dja. Nhyam kam Akwiremē Prixira ar arým 'ā ujarēnh man arým o tēn kum arēnh mex. Apôr kute Jeju'ā ujarēnh mar kêtja kum arēnh mex.

<sup>27</sup> Nhyam kam kute pykabê Akajamā tēmmā nhyam Jeju kukwakam me kute abeno kamy arým memā pi'ók no'ók ne. Kute Akajakam Jujukôt me ba djwýnhmā ôr kadjy ne memā pi'ók no'ók ne arým Apôrmā kungā. Pi'ókkam ne me memā 'ā karōn memā kum,

—Dja ga me tu Apôro anhōbikwakumrēx ane. Nhyam kam Apôr me'ýr tēn me'ýr bôx. Ne kam arým me kute amim Jeju marjamā Metündjwýnh kabēn jarē. Nhyam kam me arým tu Apôro ôbikwakumrēx. Amrēbê ne Metündjwýnh tu kum me kaprīkumrēx ne memā amak bô nhyam kam me arým tu amim Jeju markumrēx. Nām me Apôro ôbikwakumrēx nhyam kam memā Metündjwýnh kabēn jarē: nhyam kam me arým amū amim mar kamēn kabēn mar rax ne.

<sup>28</sup> Nām mā mebê idjaermā me kukāmāre kute Kritu'ā pi'ók no'ók jarēn mā memā kum,

—Be, pi'ókkam Bēnjadjwýrbê kumkatibê Kritu kute amijo anhýrmā kôt ne Jeju arým ā amijo ane. Be ga, mrāmri pi'ók kôt Jejubê me banhō Bēnjadjwýrbê kumkatikumrēxja pumū. Mrāmri kubê Kritikumrēxja pumū, ane.

Nām me krāptī nhipōkri ā memā kabēn mex jarēho ane nhyam mebê idjaer te: kute kabēno itymā te o anen amikabēno biknoro nhý.

## 19

*Paur Epexukam Jeju'ā ujarēnh.*

<sup>1</sup> Nhyam Apôr arek krīraxbê Kôritukam ar ba nhyam Paur arým atýx kôt tē. Tē:n kam krīraxbê Epexu'ýr bôx. Ne kam Kritu nhō me ja kwý'ýr bôx. Ar ja ne ar kute Metündjwýnhmā ngômā me angjēnh djwýnhbê Djuāo kabēnbit mar. <sup>2</sup> Nām ar'ýr bôx ne arkum,

—Ar aje tu amim Kritu markumrēxkam djā ne Metündjwýnh Karō ar ajamýn ar ajo ba? ane.

Nhyam ar kum,

—Kraxje me'ō kute ar imā Metündjwýnh Karō'ā ujarēnh kêt kam ne bar ije mar kêt kumrēx, ane.

Nhyam Paur arkum,

<sup>3</sup> —Be, me kute Metündjwýnhmā ngômā ar ajangjēnhkam mýj ne me kute o amirīt kadjy ngômā ar ajangij? ane.

Nhyam ar kum,

—Be, nā bām ar arým amikam ikaprīren wānh ijaxwemā inhiren Metündjwýnh'ýr amijo akēx. Kute jao amirīt kadjy me ngômā ar ijangij. Nām ā Djuāo ngômā me angjēho ane, ane.

<sup>4</sup> Nhyam kam Paur arkum,

—Mrāmri ne me amikam kaprīren wānh axwemā iren Metündjwýnh'ýr amijo akēx. Jao amirīt kadjy Djuāo ngômā me angij. Kamā ne memā kum, “Be, itotokbê ne me'ō bôxmā. Tām wā dja ga me tu amim markumrēx”, ane. Kritubê Jeju'ā ne ā memā ane. Nām ā Paur arkum ane <sup>5</sup> nhyam ar arým kuma. Ne kam ar tu amim Bēnjadjwýr djwýnh Jeju markumrēx nhyam arým kum ngômā ar angij.

<sup>6</sup> Ne kam ar krā'ā aminhikra jadjuw nhyam Metündjwýnh Karō arým ar 'amý. Nhyam ar arým apýnh

ar kute me kabên mar kêt kam kabên jarênho dja, Metindjwýnh kukwakam kabên jarênho dja.  
 7 Kute ngômã ar angjênh ja ne Ar kubê 12 pyràk.

8 Nhyam kam Paur aben tã mebê idjaer bikprônh djâkam tén kum me uma kêt ne memã 'ã ujarênho ku'ê. Nãm aben tã Metindjwýnh kute amim me utâr ne ar meo ba'ã memã ujarênho ku'ê, memã 'ã karôo ku'ê. Nhyam me kwý amim, "Mrãmri kabênkumrêx", anhýro krî. Nhyam arým 'ã mytyrwýbê 3 apêx. 9 Nhyam ate, me kwý ta arým amakkre kêt ne arým kabên mar kêt ne me krãptî nhipôkri kabên punuo dja. Ne memã kum,

—Djãm Jejukôt me kute amijo bakam mex got? Arkati, anhýro ku'ê. Nhyam kam Paur mebê Jeju nhô me jao tén arým me kãxã meo krî. Me'ôbê Xiranu kute memã me kukràdjã jarênh djâkam meo krî. Akati kunîkôt memã ujarênho krî. 10 Nãm aben tã meo krî nhyam me'ã amex ne ajte 'ã na ne ajte 'ã amex ne ajte 'ã na apêx. Apêx nhyam kam pykabê Adjijkam me ô krî kunîkôt ne me arým Paur kabên ma. Mebê idjaermê me bajtembê kregudjwý ne me Bênjadjwýr djwýnh Jeju'ã ujarênh ma.

11 Nhyam Paur Metindjwýnh kukwakam arým apýnh mýjja pumûnh kêt djâri ipêxo ba. Nãm me punuo mexo ba. 12 Nãm ipêxo ba nhyam me me ïjarop kukônň djã, nâr me ô kubêkã Paurmã o môn o kupê. Ne kam apýnh me punuo djâri memã o mō nhyam me punuo kunî arým mex ne. Nhyam me karôo puno kunî arým memã ire.

13-14 Nhyam mebê idjaer kwýja ne ar Epexukam ate ar babit ne arek krî kêt. Me kadjy Metindjwýnh mar djwýnh nhô bēnjadjwýr'ô nhidjibê Xewa ne ar kunî jadjuw. Ar kubê 7. Xewabê ne mebê idjaer'ô. Kra ar ta ne amijo me karôo mar mexo ba. Ar me karôo puno kute meo ba'ã

Bēnjadjwýr djwýnh Jeju nhidji jarên kum,

—Bar Jeju kukwakam amã ik-abên. Paur kute kãj bê Jeju'ã memã ujarênhja ba kukwakam amã ik-abên. On kum anhire. Nãm ar ã memã anhýro ba.

15 Ne kam ar bit kute me'ô jakam me karôo puno janormã kum Jeju nhidji jarênh kajgo. Nhyam me karôo puno arým ar aêrbê arkum,

—Jeju ije kabên mar ne Paur ije kabên mar. Nhyam be, ar ga djãm ije ar akabên mar got? ane. 16 Nhyam me'ôja me karôo puno kute o baja arým tu aro arî ne ar titiko tē. Nãm aro tén prîne ar ôm ne. Ne arým Ar kubê ar ô kubêkã kadjôn o pôx. Ne ar par puno nhyam ar kajgo mã kikre kurûm prôt ne.

17 Nhyam kam me ar arênho ipôk ne. Nhyam me kunî arým kuma. Mebê idjaermê me bajtembê kregumê krîraxbê Epexukam me ja kunî arým kuma. Me kunî arým umaje madjã kretin Bēnjadjwýr djwýnh Jeju ra:xkumrêxmã kato. 18 Nhyam kam me krãptî kute tu amim Jeju markumrêxja bôx ne tu amijaxwe djâri arênho amirîtkumrêx.

19 Nhyam kam mebê wajanga krãptî aben totokmã amidjudjy'ã pi'ôk no'ôk jao bôx. Ne kam me kute amidjudjy kangao amirîtkadji me ipôkri kum kuton kam kurê nhyam kumex ne. Mýj ne pi'ôk pãnh kute nhyam me kum kuto? Bir, pãnh ra:x. Kryt jakao ngônňponho pi'ôk kaprî krãptî:, aben 'ã akre kubê 50.000. Nhyam me tu kum pi'ôk kurên arým kuwykam kunî rē nhyam xêr. 20 Nhyam kam me arým týx ne amũ memã Metindjwýnh kabên jarênho kumex nhyam me krãptî kum kînh nhyam me kute tu amim Jeju markumrêxja arým krãptî: ne.

21 Nãm me ã o ane nhyam Paur ôkre kadjwýnhbê arým amim pry karôo djã djirkumrêx ne amim,



—Ba pykabê Matenimē Akajamē 'yr tēn kam me omū. Dja ba anen kam arým Djeruxarēmā tē. Ne kam krīraxbê Rômamādjwý itēm prāmkumrēx, ane. <sup>22</sup> Ne kam amikukām Matenimā ò àpēnh amānhkrut jano. Nām Ximoximē Eraxu ar ano. Ne kam arek pykabê Adjikkam ar ba rā'ā.

*Temexu kute me krāptīmā Paur kur'uk.*

<sup>23</sup> Paur ar ba: nhym kam krīraxbê Epexukam me krāptī arým ngryk ne kangao kumex. Be, Temexu kute me krāptībē me kute amim Jeju mar kurēkam me arým ngryk ne. <sup>24</sup> Temexubē kryt jakao kikre kryre nhipēx djwýnh tūm. Kute kikreti pyrāk ne kikre kryre nhipēxo ba. Kikretikam ne me amrēbē Djijanamā amijarēnh djā. Djijanabē ne me ò metindjwýnh kajgo'ò. Nām kryt jakao kikre kryre nhipēxo ba. Ne kam kute memā òr pānh pi'òk kaprī jamýn ò àpēnhmā kungā. Pi'òk kaprī rū:nh ne amýn memā kungā.

<sup>25</sup> Nhym me krāptī jadjwý kute ar mýjjao metindjwýnh karō nhipēxo ba. Nhym Temexu ò àpēnh jao akuprōn metindjwýnh karō nhipēx djwýnh krāptī jadjwýo akuprōn memā kum,

—Ē, ar ikabēn ma. Gwaj badjāpēnh djā ja djō'ā ne gwaj mā banhō pi'òk kaprī kumex jamý. Tām ne gar arým ama. <sup>26</sup> Ē, arým ne gar Paur kute ar amijo ba kōt omūn arým kabēn kōt ama. Djām krīrax jabē Epexukambit ne ar kabēn ba? Kati, pykabē Adjijja kunīkōt ne me krāptī:bē metindjwýnh karō nhipēxja kurēo ban kubē ar meo akēxo ba. Nām arīk memā kum, “Djām metindjwýnh karō nhipēxjabē Metindjwýnhkumrēx? Arkatī. Kubē Metindjwýnh kētkumrēx”, anhýr o ba.

<sup>27</sup> Be, dja Paur memā ja jarēno ba rā'ā nhym me krāptī arým me baje metindjwýnh karō nhipēxja kanga. Djijana nhō kikretidjwý dja me kum kīnh kēt. Be, Djijanabē me banhō metindjwýnh raxkumrēx. Pykabē Adjij kunī, kam me kunī kum rax jarēno ba. Pyka kunīkōt apýnh me ba djākam me kunī: kum amijarēno ba. Dja me Paur kabēn man kōt ar amijo ban arým Djijanamā amijarēnh krāta. Nām ā Temexu memā ane.

<sup>28</sup> Nhym me kute amijā kabēn ja markam arým ngry:k ne kāj bē abenmā kum,

—Epexukam me batindjwýnhbē ne Djijana. Djijana raxkumrēx. Epexukam me banhō metindjwýnhbē ne Djijana. Djijana raxkumrēx anhýro kumex. <sup>29</sup> Nhym me kam me ja djō'ā kikrepdjitā abenkam kanga:o kumex. Ne kam arým Gajumē Arxaku ar pa 'amý. Pykabē Matenikam ne ar abatānh djā. Paurmē ro'ā ar Epexukam bōx. Nhym me ar pa 'amýn aro tēn me bikprōnh djātimā aro wadjā.

<sup>30</sup> Nhym Paur kute aben nēje me akre kadjy bit me kanga katikōt àrmā. Nhym Jujukōt me ba djwýnh arým akubyn Paur nē. <sup>31</sup> Be, pykabē Adjikkam me bēnjadjwýr kwý Pauro òbikwa tūm. Ar jadjwý Paur nēn kum,

—Kwārīk wānh me bikprōnh djātimā adjār kēt, ane. Me kute o bikēnh karō ne ar nē.

<sup>32</sup> Nhym me bikprōnhja ar kanga prōt ne ba. Djām me krāptī kute me kanga kraxkōt mar got? Kati. Nām me apýnh kabēn ne. Me kwý 'ā me kabēn ja jarēno amra. Nhym me kwý 'ā atemā me kabēn ja jarēno amra. <sup>33</sup> Nhym mebē idjaer arým Arexārimā 'ā karō. Kute me nēje me kunī kukrāmā ne me kum 'ā karō. Nhym me binhikrēnh kadjy te: memā ikra bēno dja. Nām bit kute mebē idjaer nēje me bajtemmā kabēnmā. <sup>34</sup> Nhym me

arým Arexāribē mebē idjaer'õ kõt omũ. Omũn arým kāj bē kabēno tuknĩn mā abenmā kum,

—Epeukam me banhõ metĩndjwýnhbē Djijana raxkumrēx. Nām me ã anhỹro kumex nhym arým me'ã myt ky:n me'ã ora amānhkrut apēx.

<sup>35</sup> Nhym kam krĩraxkam me'ã pi'õk no'õk djwýnh raxja arým bõx ne memā kabēn nhym me arým anhikrē. Nhym kam memā kum,

—Krĩraxbē Epeukam me ar abaja, gu me ba ne gu me babē metĩndjwýnh raxbē Djijana nhõ kikretio djuw mex djwýnh. Djijana karõ ne mrāmri kājkwā kurũm ruw. <sup>36</sup> Gu me babē o djuw mex djwýnh nhym pyka kunĩkõt me kute me bamar. Me kute me bamarkam ga me ren tu anhikrēn adjākrē kētkumrēx.

<sup>37</sup> Be, ga me jakam aro abõxja djā ne ar me banhõ metĩndjwýnh nhõ kikretikam mýjja'õo akĩnh got? Nār djām ar kute me banhõ metĩndjwýnh'ã kabēn punu'õ jarēnh got ga me ar'ã ajatom ne? Kati. Nā gām me jakam ar jao abõx kajgo.

<sup>38</sup> Be, dja Temexumē metĩndjwýnh karõ nhipēx djwýnh ar kute ar arēnh prām, wānh ne memā axwe pānh jarēnh djā dja. Myt ja tām kam ne memā pānh jarēnh djwýnh kam memā nhỹ. Gé Temexu ar 'yr aro bõx ne kum ar arē. Kam ne me kunĩ kute abenmā axwe jarēnh djā.

<sup>39</sup> Nār me aje mýjja 'õdjwýo aben mar prām jabej dja ga me tu me bakukràdjā kõtbit akuprõn o aben ma. <sup>40</sup> Be, jakam me banhõ bēnjadjwýr rax arým me bamā uma. Me bakangatikam kute me bamā pānh jarēnh arým me bamā umakumrēx. Godja bēnjadjwýr rax abej me bakukjēr jabej gu me bakangati ja'ã te: baje kum amijarēnhmā, te: aminēje kum bakabēnmā. <sup>41</sup> Nām ã me'ã pi'õk no'õk djwýnh rax memā ane. Ne kam memā kum,

—Aje, me on ajmā, ane. Nhym me arým ajmā.

## 20

*Paur Matenikam tēm ne kam Krexakam bõx 'ã ujarēnh.*

<sup>1</sup> Me kangati apēxkam Paur arým amiwýr Jejukõt ba djwýnh 'uw nhym me arým bõx. Nhym kam meo rōrōk ne memā kum,

—Ba on pykabē Mateni 'yr. Gora ar amim Jeju mar tỳx ne 'ã adjukanga kēt, ane. Ne kam me kurũm pykabē Mateni 'yr tē. <sup>2</sup> Nām 'yr tē:n kam apýnh Jejukõt me ba djāri me omũnho tēn me tỳxmā memā 'ã karõn memā kum,

—Dja gar tu amim Jeju mar tỳxkumrēx, anhỹro tē. Nām ã memā anhỹr kumexo tē. Ne tē:n kam arým pykabē Krexax'yr bõx. <sup>3</sup> Ne kam arek kam ar ba nhym 'ã mytyrwý amānhkrut ne ikjēkēt apēx. Nhym kam bit kute ngókõt pykabē Xirij'yr tēmmā. Nhym mebē idjaer bit kute kam o arĩmā. Nhym kam ate pykabē Matenikõt amipry karõ djā dji.

<sup>4</sup> Nhym kam me kwý Paur kõt tēmmā. Pykabē Mateni katikõt tēmmā. Pykabē Xirij'yr ne kõt tēmmā. Xopatu Paur kõt tēmmā. Piju ne Xopatu dji. Krĩraxbē Berējakam ne abatānh djā. Nhym Arxakumē Xekunu arkõt tēmmā. Krĩraxbē Texarōnikakam ne ar abatānh djā. Nhym ajte Gajudjwý kõt tēmmā. Krĩraxbē Tebikam ne abatānh djā. Nhym ajte Ximoxidjwý kõt tēmmā. Nhym ajte Xikikumē Krōpimu ar adjwýnhdjwý kõt tēmmā. Pykabē Adjijkam ne ar abatānh djā. Paurkõt ar mōr ne ja. <sup>5</sup> Xopatu ar ar ikukām tēn krĩraxbē Krōwadjikam ar ikam ama. Badjwý Paur kõt tē. Ba ibē Ruka.

<sup>6</sup> Apýnh akati wākam ne mebē idjaer amikukràdjā kõt djwýponhbit kuro ba. Nhym ar ijā akati wā apēx bar krĩraxbē Pirpu kurũm, pykabē Matenikam krĩraxbē Pirpu kurũm

inox ne tē. Tē: nhyam kam ar ijā akatibē 5 apēx. Bar kam krīraxbē Krôwadjikam Xopatu ar'yr bôx. Ne kam ar iba: nhyam kam ar ijā akatibē 7 apēx.

*Juxiku tŷm ne tyk nhyam kute akubyn o tŷn.*

<sup>7</sup> Nhyam arŷm ar ijā pi'ôk kamrêk ne. Nhyam Jejukôt me ba djwýnh arŷm akuprô, djwý kokjêr kadjy. Jeju kute aminhî'ã djwý jakren kokjêrja tãm ne ajte kute 'ã akren kokjêr ne krên kadjy akuprô. Nhyam Paur arŷm kâj bê memã 'ã ujarêho dja. Akati nhyam tēm kadjy ne 'ã ujarênh 'iryô dja. 'Ã ujarêho dja: nhyam kam me'ã akamât kô ipôkri.

<sup>8</sup> Atemã kikrekam ne me bikprônh dja. Kikre amãnhkrut ne ikjêkêt ne me aben nhiby ipēx. Kŷjrŷm kumoka'êkam ne me nhŷ nhyam me ô ngônhpôk krãpti. <sup>9</sup> Nhyam me'ã akamât kô 'iry: nhyam me'ô nôrny nhidjibê Juxiku kre krã'yr'ã nhŷ. Paur memã ujarênh 'iry: nhyam Juxiku arŷm ôtdjwa bŷn mex ne. Nhyam arŷm ôt mex ne e u:n môn tu:k ane. Pykabê môn tŷm nhyam me 'yr ruw ne kumŷ nhyam arŷm ty.

<sup>10</sup> Nhyam Paur arŷm 'yr ruw. Ne tu tykja nhiby tŷm ne 'amŷnh tŷx ne. Ne memã,

—Kwãrik wãnh ga me kam atŷn prãm kêt. Arŷm ajte tŷn ne, ane. <sup>11</sup> Ne kam akubyn wabin arŷm djwý kokijn ô kwŷ krêno nhŷ. Ô kwŷ krên pan ajte memã ujarênhmo krax. Ne o nhŷ: nhyam arŷm me'ã ôkrên'ãnh kâr mex ne. Nhyam kam arŷm tē. <sup>12</sup> Nhyam me ŷrkwãmã nôrny akubyn tŷnjao tē nhyam arŷm mexkumrêx ne. Nhyam kam me arŷm kŷ:nhkumrêx ne.

*Paur kute Epexukam meo ba djwýnhmã amijarênh.*

<sup>13</sup> Nhyam kam Paur kute bamē Xopatumē ar ijo mōrmã ar imã 'ã karô. Ba ibê Ruka. Nãm ar imã,

—Ba dja ba pykakôt krīraxbē Axô'yr tē. Dja ba 'yr bôx ne arŷm ar akôt kãraxkam amũ tē, ane. Ne kam pykakôt tē. Ar ba ne bar kãraxkam tē. <sup>14</sup> Tē:n kam arŷm krīraxbē Axô'yr bôx nhyam arŷm ar ikôt bôx. Ne kam ar ikôt kãraxmã wadjã. Bar kam krīraxbē Mixini'yr tē:n kam 'yr bôx.

<sup>15</sup> Ne kam ajte ngôkôt tē. Tē: nhyam ar ijã akati. Bar ajte tē:n arŷm apêxtibê Kuju'ãnh tē. Ne ajte tē: nhyam ajte ar ijã akati. Bar tē:n arŷm apêxtibê Xamu'ãnh tē. Tē:n kam arŷm krīraxbē Krodjirkam bôx. Ne kam amikrà:n kam ajte ngôkôt inox ne mō. Nhyam ajte ar ijã akati. Bar kam tē:n arŷm krīraxbē Miretukam bôx. <sup>16</sup> Ar ibôx kêtri Paur ar imã,

—Gwaj krīraxbē Epexu jaà'ã tē. Ba ren kam tēn pykabê Adjijkam amikrà:, ane. Adjijkam ne krīraxbē Epexu. Nãm mebé idjaer bikprônh dja nhô akatibê Pêxiko majmã Djeruxarê'yr bôxmã. Kam ne amikrà kêt ne tē.

<sup>17</sup> Bar krīraxbē Miretukam bôx nhyam Paur arŷm amũ krīraxbē Epexukam memã amikabên jano. Nãm memã kum,

—Gê amrê me kute Jeju nhô me jao ba djwýnh mō. Me kute amim Jeju mar ne kôt ar aben pydjio bajao ba djwýnh amrê môn ipumũ, ane. <sup>18</sup> Nhyam me arŷm wãm kabêno tēn o bôx ne memã arê nhyam me arŷm kuma. Ne kam arŷm Paur'yr tēn 'yr bôx. Nhyam memã kum,

—Be, akmere ar, jakam dja ba tē. Ne kam arŷm ar amã ikabên jarê. Be, nã bãm katât ar amijo iba rã'ã gar arŷm ipumũn ima. Me anhô pykabê Adjijkam ibôx totokbê gar katât ije amijo ibakôt ipumũnhmo krax ne jakam aje ikatât kôt ipumũnh rã'ã.

<sup>19</sup> Djã nã bãm Bēnjadjwŷr djwýnhmã idjãpênh kêt? Nã

bām amijo ingrin akrānmā kum idjāpēnh rā'ā ne. Ba kum idjāpēnh ar iba nhyim me axwekam irerek iwýr bōx ba mekam imýr iba. Nhyim mebē idjaer mā: amim ijā karōn ar ijo bikēnho ba, ba kam itokry kumex.

<sup>20</sup> Djā ne ba ar abē Metīndjwýnh kabēn'ō nēn ar amā arēnh kēt got? Kati. Ar aje mar mexo amū amikamēnhmā ne ba ar amā Metīndjwýnh kabēn kunī jarē. Nā bām ar akrāptī nhipōkri ar amā arē. Ne aje ar anhūrkwākōt ar amā arēnho iba.

<sup>21</sup> Nā bām me abē idjaermā arēn aje me abajtembē kregumā arē. Ne mā: ar amā, “Ar amikam akaprīren wānh ajaxwemā anhiren Metīndjwýnh'ýr amijo akēx ne tu amim Bēnjadjwýr djwýnhbē Jeju Kritu markumrēx.” Nā bām ā ar amā ane.

<sup>22</sup> Nhyim arým jakam Metīndjwýnh Karō mā: Djeruxarē'ýr itēm'ā imā karōo dja ba te imātmā. Mýj dja wākam ikam nē? Kon. Ije mar kēt. <sup>23</sup> Be, krīrax kunīkōt ne me Metīndjwýnh Karō kukwakam imā kabēn jarēn imā, “Dja me mrāmri abē ijē ga mrāmri amitokry kumex ma”, ane. Jabit ne ba amikadjy kuma.

<sup>24</sup> Be, me kute imā ja jarēnhkam ne ba ate ikrā. Djām ba ne ba imā pykakam itīn kīnh got? Amrēbē ne Bēnjadjwýr djwýnh Jeju imā idjāpēnh djā'ā karō. Nām imā, “Metīndjwýnh tu kum me kaprī. Djām me ta ne me axwe kēt nhyim pānh kum me kaprī? Kati. Me te axwe kētmā nhyim ta arým tu kum me kaprīn memā ijano ba me axwebē me utāro iba. Tām dja ga memā arēnho aba gē me kuma.” Nām Jeju ā imā idjāpēnh'ā karōo ane ba kam ije idjāpēnh djā inomā mēnh prā:m. Jabit imā kīnh. Dja ba inomā kumēn arým ikīnhkumrēx. Djām imā pykakam itīn kīnh got? Kati. Jabit imā kīnh.

<sup>25</sup> Amrēbē ne ba ar amā, “Arým ne Metīndjwýnh kute amim me utār ne ar meo ba 'ýr”, anhýr ne 'ā kāj bē ar amā idjujarēnh ar iba. Be, jakam dja gar akunī aje ipumūnh kēt. Ja ne ba kuman 'ā ar amā amijarē.

<sup>26-27</sup> Be, djā ne ba ar amā Metīndjwýnh kabēn kwýbit jarē? Kati. Ba ne ba ar amā kabēn kunī jarē. Be, mýj me ajō ga dja gar ī ijā Metīndjwýnhmā kum, “Be, Paur kute imā arēnh kētkam ne ba me biknor tokry djākam akuno”? ane. Be, kati. Ar aje te Metīndjwýnhmā ja jarēnhmā. Ba ne ba ar akunīmā kabēn kunī jarē. Ja dja gar akati jakam aman o abiknor kēt.

<sup>28</sup> Ije ar amā ja jarēnhkam dja gar ajaxwe kēt kadjy amijāno djan me axwe kēt kadjy me omūnh 'āno dja. Metīndjwýnh Karō ne arým ar ajā meo ba djwýnh rē. Ar ajā me kute Jeju maro ba djwýnh rē. Ga, mrykī'ātomti pumūnh djwýnh mā mryo djuw mexo baja pumū. Ar abē me kute Jeju maro aba djwýnhkam dja gar omūnh djwýnh kudjwa mā memā kabēn jarēnho aba. Kamrō prōtkam ne Metīndjwýnh arým me axweo pānh. Ta kute o pānhkam dja gar ikabēn kōt me omūnh 'āno dja.

<sup>29</sup> Be, dja ba tē nhyim itekrekam dja me axwe ar awýr bōx gar abenkam akā. Ga, rop djākrē mrykī'ātomti katikōt ngjēxja pumū. Nām kwý pa nhyim umaje kunī ajmā. Me axwedjwý dja me wangij ne Jeju bē ar akwýo akēx gar akwý mekōt ajaxwe. <sup>30</sup> Djām me kātāmbit kute ā ar ajo anhýrmā? Kati. Ar akwý dja gar Jeju bē amijo akēx ne arým ajaxwen Metīndjwýnh kupa'ā memā 'ā ajarē. Nhyim kam me kwý arým ar amaro ban arým ar akōt axwe.

<sup>31</sup> Kam, me kute amiwýr ar ajōo akēx kēt kadjy dja gar me 'āno dja. Kwārīk wānh ikabēno ajamak kēt kati kēt. Nā bām akatikam ar abē me uma. Ne aje akamātkam ar abē

me uma. Ne ajte imýrkam ar abé me uma. Ne ar akunibé me umao iku'è: nhym arým amexbê 3 apêx. Kwârĩk wãnh ikabêno ajamak kêt kati kêt.

<sup>32</sup> Be, akmere ar arým itēm 'ýr. Jakam ba arým Metĩndjwýnhmã ar ajo a'uw. Gédja ar ajo bakumrêx. Dja gar kabên ma nhym arým ar amã ajamak mex jangij gar mar mexo amũ amikamên arým mar rax ne. Metĩndjwýnh tu kum gwaj bakapri.\* Ukapri'ã dja gar kabên man arým ajamak mexo amũ amikamên mar rax ne. Be, dja ĩ Metĩndjwýnh õ me jamã mýjja ngã. Dja gar kabên ma nhym kute memã mýjja nhõrmã kõt arým ar amã kungã. Ja kadjy ne ba kum ar ajo a'uw.

<sup>33</sup> Be, djãm ba ne ba imã me'õ nhõ mýjja puro prãm? Kati. Me'õ nhõ kryt jaka nãr kên karýr nãr me'õ nhõ kubêkã ne imã prãm kêtumrêx. <sup>34</sup> Be, ba ne ba in-hikrao idjãpênho iku'è. Bamê iro'ã ar ar bamê ne bar imã mýjja prãm jabej ba ba inhõ pi'ok kapriõ ar amim kuby. <sup>35</sup> Mýj kadjy ne ba ã idjãpênho ane? Bir, dja gar iman arým ikudjwa ã adjãpênho anen kam amikutã me õ mýjja kêt mã mýjja nhõro aba. Dja gar kam Bẽnjadjwýr djwýnh kabên ma. Nãm memã kum, “Ga amikutã memã mýjja ngãn kam arým akĩnh ne. Kam akĩnh me kute mebê mýjja jamýnhkam kĩnhja jakrenh mex”, ane. Be, ije me amã ikabên jarênh ne ja. Tãm ne ja.

<sup>36</sup> Nãm ã Paur memã anen kam arým kõnkrão nhýn Metĩndjwýnhmã kabên. Nhym me kunĩdjwý Metĩndjwýnhmã kabêno nhý. <sup>37</sup> Nhym kam me Paurkam mýro kumex ne aben nHITEPã o rôrõk ne ine kaõ. <sup>38</sup> Paur kute memã kum,

—Jakam dja gar akunĩ ajte ipumũnh kêt, anhýrkam ne me

kapri:re. Ne kam kã nhikwã djã'ýr kõt mõ.

## 21

*Paur akubyn Djeruxarê'ýr tēm.*

<sup>1</sup> Bar kam mebê tēm kàraxmã wadjãn amũ mebê inox ne. Ne kam apêxtibê Kux kõnh tē. Ne tē:n arým 'ýr bõx. Nhym kam ar ijã akati. Bar ajte tē:n kam apêxtibê Rodji'ýr bõx. Ne ajte tē:n kam krĩraxbê Patara'ýr bõx. <sup>2</sup> Ne kam wabin kàrax 'õdjwý jabej ne arým kum ikato. Pykabê Penixij'ýr ne kàrax mõrmã. Bar kum wadjãn ajte inox ne. <sup>3</sup> Ne tē:n kam amybyñm apêxtibê Xipre pumũ. Ne kam tē:n ar idjuge'ãnh amipãnh Xipre mên tē:n arým pykabê Xirij tēpo tē. Ne tē:n arým krĩraxbê Xiru'ýr bõx. Kam ne kàraxkam me kute kãkam jênh kadjãrmã.

<sup>4</sup> Bar kam wabin Jejukõt me ba djwýnh jabej mõn arým me kwýmã ikato. Ne kam mekam ar iba: nhym kam ar ijã akatibê 7 apêx. Ar ijã akati apêx kētri ne me Metĩndjwýnh Karõ kukwakam Paurmã kum,

—Kwârĩk wãnh Djeruxarēmã àbir kêt, ane.

<sup>5</sup> Nhym arým ar ijã akati apêx bar tē. Nhym me kunĩ ar ikõt kàrax'ýr tē. Me mymê me niremê me prĩremê ne me ar ikõt mõ. Ba me mõn arým krĩrax kurũm ikato. Ne kam ngõ mýrri ikõnkrão nhýn Metĩndjwýnhmã ikabên. <sup>6</sup> Bar kam memã kum, “Bar on”, anen kam arým kàraxmã wadjãn nhý. Nhym me akubyn ũrkwãmã akêx ne.

<sup>7</sup> Bar kam amipãnh krĩraxbê Xiru mē. Ne tē:n kam arým krĩraxbê Tomedja'ýr bõx. Ne kam ar ije Jeju kukwakam me kute abeno kamy pumũnh kadjy arým wabi. Nhym ar ijã akati pydji apêx. <sup>8</sup> Nhym akati bar arým mebê tē. Ne tē:n

\* **20:32** Djãm gwaj ba ne gwaj bajaxwe kêt nhym pãnh kum gwaj bakapri Kati. Gwaj ba ne gwaj te bajaxwe kêt mã. Nhym be, ta ne tu kum gwaj bakapri.

arým krĩraxbê Xedjare'ýr bõx. Ne kam wabin arým Piripi nhũrkwãmã wadjã. Amrêbê ne Piripibê me kute amim Jeju mar o djuw mex djwýnh'õ. Ar kubê 7 kõt kubê meo djuw mex djwýnh'õ. Piripi ajte me kute mar kêtjamã Jeju'ã ujarênh ar ba. <sup>9</sup> Kra ni ne amãnhkrut ne amãnhkrut. Kraxje ar mjên kêt rá'ã. Ar kubê Metĩndjwýnh kukwakam kabên jarênh djwýnh.

<sup>10</sup> Bar Piripi nhũrkwãmã nhỹ: nhym ar ijã akati krãptĩ apêx. Nhym arým pykabê Djudêja kurũm me'õbê Agabu bõx. Kubê ne Metĩndjwýnh kukwakam kabên jarênh djwýnh'õ. <sup>11</sup> Agabu ar iwýr bõx ne arým Paur pre djã bõn kuby. Ne kam o aminhinỹxmê amite djuwpre. Ne kam ar imã,

—Be, Metĩndjwýnh Karõ ar amã, “Djeruxarêkam mebê idjaer dja me ã pre djã djwýnhja djuwpreo ane. Ne kam arým me bajtemmã kanga.” Nãm ã ar amã ane. Nãm ã Agabu ar imã ane.

<sup>12</sup> Bar kuman arým tu Paurmã kum,

—Kwãrĩk wãnh Djeruxarêmã atêm kêt, ane. Nhym Jejukõt me ba djwýnh, Xedjarekam ar ba tümjadjwý ar ikõt ã kum ane.

<sup>13</sup> Nhym Paur ar imã,

—Mýkam ne gar amýro imã ikaprĩ jadjãro dja? Kwãrĩk wãnh me idjuwpre. Godja me wãkam ibĩn jabej. Bẽnjadjwýr djwýnh Jejumã idjãpênhkam ibĩn jabej. Kwãrĩk wãnh rá'ã, ane.

<sup>14</sup> Nã bãm ar te: nên kam kum,

—Aj, Bẽnjadjwýr djwýnh kute amim ajã karõ kõt gé ã ajo tẽmo ane, anen arým anhikrê.

<sup>15</sup> Nhym ar ijã akati ja kwý apêx bar arým amijo atom ne arým Djeruxarê'ýr tẽ. <sup>16</sup> Nhym Xedjarekam Jejukõt me ba djwýnh kwý ne ar ikõt tẽ. Ar me'õbê Maxõ japrõn ar ikõt o tẽ. Apêxtibê Xiprekam ne abatãnh djã. Jejukõt ba tüm. Djeruxarêkam ne õ kikre.

Õ kikrekam ar inhýr kadjy ne ar aprõn aro mõ.

*Djeruxarêkam bõx ne kute Metĩndjwýnhmã amijo mex.*

<sup>17</sup> Bar Djeruxarê'ýr tẽ:n kam arým 'ýr bõx. Nhym Jeju kukwakam ar ikamy ar ipumũn kam kĩnhkumrêx ne ar imã kabên mex jarê. <sup>18</sup> Nhym ar ijã akati. Bar kam ije Xijagu pumũnh kadjy Paurkõt 'ýr tẽn 'ýr bõx. Nhym me kute Jeju nhõ me jao ba djwýnh kunĩ kam nhỹ. <sup>19</sup> Nhym Paur arým arkum kabên mextire jarê. Ne kam arkum apýnh me bajtemkam ãpênh'ã ajarê. Kute apýnh mýjja nhípêx'ã prĩne ajarê.

<sup>20</sup> Nhym ar kute ja markam arým Metĩndjwýnhmã rax jarê. Ne kam arým Paurmã kum,

—Be, akmere, ga, mebê idjaer kute tu amim Jeju markumrêxja arým krãptĩ:ja pumũ. Me me'ã akrekam ne mebê 1.000'ã akre krãptĩkumrêx. Ne kam me kunĩ Mõj djê kukràdjã'ã notý:x. <sup>21</sup> 'Ã no týt nhym me kwý arým ajã 'êx ne memã ajarê. Ne memã kum, “Paur arĩk apýnh me bajtemkõt ban mebê idjaerbê Mõj djê kukràdjã kurêo ba. Ne mã memã kum, ‘Kwãrĩk wãnh me akra my nhĩnhu kã rênh kêt ne kwãrĩk wãnh me bakukãmãre kukràdjã mar ne kõt amijo aba kêt’, anhýro ba.” Nãm me kwý ã memã ajã 'êxo ane.

<sup>22</sup> Be, me kwý kute ajã 'êxo anhýrkam dja me mrãmri abõx jarênh man arým akadjy akuprõ.

<sup>23</sup> Be, djãm aje mebê idjaerbê Mõj djê kukràdjã kurêo aba? Kati. Gadjwý ne aje katãt mar ne kõt ar amijo aba. Me kute katãt aje amijo abakõt amã kator kadjy dja ga ar ikabên man kõt amijo tẽ. Be, me babê idjaer ar amãnhkrut ne amãnhkrut arým Metĩndjwýnhmã amijarên kum, “Bar Mõj djê kabên kõt amã amijo mex.” Nãm ar ã kum anen kam arým amijo mex.

<sup>24</sup> Dja ga ar kudjwa Metindjwŷnhmā amijo mex ne Mōjdjê kukràdjà kôt ar aro'ā akrānh kēnh ne. Dja ga anen kam memā ar akrānh kēnh kunĩo pānh. Dja mebê idjaer kute amim Jeju mar arŷm kôt apumŷn ajā abenmā kum, “Be kati. Nām me Paur'ā 'êx. Ga, me bakôt kute katāt Mōjdjê kabēn mar ne kôt amijo tēmja pumŷ”, ane. Dja me ā ajā anen arŷm akubyn akam kŷnh ne.

<sup>25</sup> Be, mrāmri dja gu me babê idjaerbit katāt Mōjdjê kabēn man kôt ar amijo baba. Nhyem be, me bajtem kute amim Jeju mar dja me me babê idjaer kôt ar amijo ba kêt. Gwaj amrêbê arŷm me kadjy Mōjdjê kabēn ngrêrebit'ā pi'ôk no'ôk ne memā kum, “Me kute mŷjjao metindjwŷnh karō nhipêxjamā mry bŷn kwārĭk wānh krēn kêt. Kwārĭk wānh mry kamrô krēn kêt. Mry me kute mut djêo bŷn kwārĭk wānh àr ne krēn kêt. Kwārĭk wānh aprō djwŷnh kupa'ā akurê aba kêt. Nār, kwārĭk wānh amjēn djwŷnh kupa'ā akurê aba kêt”, ane. Gwaj ā memā ane. Kam dja me Mōjdjê kabēn ngrêre jakôtbit amijo ba. Nām Xi-jagu ar ā Paurmā ane.

<sup>26</sup> Nhyem me'ā akati nhyem Paur arŷm me kabēn man kôt amijo tē. Nām ar amānhkrut ne amānhkruto tēn ar ro'ā Metindjwŷnhmā amijo mexmo krax ne. Ne kam ar Metindjwŷnh nhō kikretimā wadjàn me kadjy Metindjwŷnh mar djwŷnhmā kum,

—Ar ijā akatibê 7 apêxkam dja bar arŷm amijo mexo ino re. Kam dja bar me kute Metindjwŷnhmā mry bŷn kadjy mryo bôx, ane.

*Me kute Paur pa 'amŷnh ne uw-pre.*

<sup>27</sup> Nhyem kam ar'ā akatibê 7 apêx 'ŷr nhyem mebê idjaer pykabê Ad-jij kurŷm bôxja arŷm Paur pumŷ. Metindjwŷnh nhō kikretikam ar ba nhyem me omŷ. Ne kam me me kunĩmā kurêtuw ne arŷm pa 'amŷ.

<sup>28</sup> Pa 'amŷn o djan 'ā 'êx ne kaj bē memā kum,

—Ē me abê idjaer, amibêx ne ar ikôt o kangō. Ota, me'ō ja ne bar arŷm ar amā arē. Nām mebê ar inhō me wŷnh kurêo ba. Nām ajte mebê Mōjdjê kukràdjà kurêo ba. Nām ajte mebê kikreti ja kurêo ba. Nām apŷnh me ba djari kunĭkôt me kunĭbê kurêo ba. Ne kam arŷm Metindjwŷnh nhō kikreti kreo àpnu. Nām arŷm amikôt me bajtembê kreguo wadjà nhyem Metindjwŷnhbê arŷm kikreti kre punure ne. Nām me ā Paur'ā 'êxo ane.

<sup>29</sup> Be, amŷ jakam ne Paur krĭraxbê Djeruxarēja tām kam me'ō bajtemmê ro'ā tē. Idjibê ne Krôpimu. Me bajtem nhō krĭraxbê Epexukam ne Krôpimu abatānh djā. Amŷ jakam ne kubajtemjamē ar ro'ā tē nhyem me arŷm ar omŷ. Ne jakam Paur kikretikam ar ba nhyem me arŷm omŷn arĭk 'ā abenmā kum,

—Be, arŷm ne Paur Metindjwŷnh nhō kikretimā me bajtemo wadjà. Nhyem Metindjwŷnhbê arŷm kikreti kre punure ne, ane.

<sup>30</sup> Nām me anen kam arŷm krĭraxkam me kunĩmā Paur kurêtuw. Nhyem me arŷm prôt ne 'ā akuprô. Ne arŷm Paur pa 'amŷn Metindjwŷnh nhō kikreti kurŷm bjêro mōn o katon kam pānh 'ā ijê.

<sup>31</sup> Ne kam bit kute Paur bŷnmā o dja. Nhyem me'ō arŷm krākamngōnh nhō bēnjadjwŷr'ŷr tē. Bēnjadjwŷr ja ne me krāptĭ: kubê 1.000mā nhŷ. Nhyem me'ō arŷm bēnjadjwŷrja'ŷr tēn kum,

—Ē, bēnjadjwŷr, krĭraxbê Djeruxarē jakam me kunĩ arŷm kangao kumex, ane.

<sup>32</sup> Nhyem bēnjadjwŷr amikrà kêt ne ō krākamngōnh o mōn meo ba djwŷnhmē ro'ā meo mō. Meo ba djwŷnh ne krākamngōnh krāptĭ: kubê 100o ba. Nhyem bēnjadjwŷr meo mōn me'ŷr prôt ne. Nhyem me

krãptĩ arým krãkamngõnh pumũn umaje Paur titik krãta.

<sup>33</sup> NhyM krãkamngõnh nhõ bẽnjadjwýr Paur'ýr bõx ne pa 'amýn õ krãkamngõnhmã 'ã karõn kum, "Kàxirãx amãnhkruto uwpre", ane. NhyM me arým uwpre. NhyM arým bu'ã me ku'ê kukij ne memã kum,

—Mýj me'õ ne ja? Mýj ne o ajkẽ? ane. <sup>34</sup> NhyM me kãj bê 'ã kum apýnh kabẽn kwý jarẽ. NhyM me kangao kumexkam te: kute me mar mexmã. Ne kam õ krãkamngõnhmã 'ã karõn kum,

—Me banhõ kikretimã o wadjã, ane. <sup>35</sup> NhyM me o mõn arým kikreti'ã me àbir djã'ýr bõx. Ne arým 'amýn kãjmã mebê arĩn o mõ. Me àkrê kumexkam ne me kãjmã mebê Paur jarĩn o mõn o wabi. <sup>36</sup> Me krãptĩ: ne me kõt mõn kãj bê memã kum, "Me tu abĩ. Me tu abĩ", anhýro mõ.

*Kute me krãptĩ:mã amijarẽnh.*

<sup>37</sup> NhyM kam me bit kute aminhõ kikretimã Pauo àr 'ýr nhyM mebê kregu kabẽnkam arým krãkamngõnh nhõ bẽnjadjwýrmã kum, "Ba amã ikabẽn jarẽ", ane.

NhyM kum,

—Je, djãm mebê kregu kabẽnkam ne ga akabẽn mex? <sup>38</sup> Djãm abê Edjitukam me'õwã kêt? Òbê ne me krãptĩmã bẽnjadjwýr kurêtuw nhyM me arým kangao kume:x ne. NhyM kam kapõt kukritmã me àprãr krãptĩ: kubê 4.000o kato. Djãm abê tãmwã kêt? ane.

<sup>39</sup> NhyM Paur kum,

—Kati. Ibê mebê idjaer'õ. Krĩraxbê Taxukam ne irwýk djã. Taxu raxo kute pykabê Xirxijkam apýnh krĩrax djãri krãptĩ jakrenh mex. Me ja ne ijo õ me wýnh. Ba me krãptĩ ren kute ibĩnjãmã ikabẽn jarẽ, ane.

<sup>40</sup> NhyM kum, "Ajrã", ane. NhyM àbir djã'ã djan me binhikrẽnh kadjy arým memã aminhikra bê. NhyM

kam me arým binhikrẽnhkumrẽx. NhyM arým mebê idjaer kabẽnkam memã kabẽn jarẽ.

## 22

*Paur me krãptĩmã kabẽn.*

*Kar 9.3, 26.13*

<sup>1</sup> Memã kabẽn ne memã kum, —Akmere ar, ba aminêje me amã ikabẽn jarẽ. Dja ga me ikabẽn ma, ane.

<sup>2</sup> Paur ne mebê idjaer kabẽn djwýnhkam memã kabẽn jarẽ nhyM me arým tu binhikrẽnhkumrẽx ne.

<sup>3</sup> NhyM kam ajte memã kum,

—Ibê ne mebê idjaerkumrẽx. Ba pykabê Xirxijkam krĩraxbê Taxukam ruw. Ne kam krĩraxbê Djeruxarêja tãmkam ijabatãnh djã. Gamarij ne prĩne imã me bakukãmãkjê kukràdjã jarẽ ba prĩne mar mexkumrẽx ne. Nã bãM Metĩndjwýnh kabẽn'ã ino týt ne. Mytja tãmkam ne gar akunĩdjwý ã kabẽn'ã ano týtõ ane. <sup>4</sup> Ba 'ã ino týt ne kam me kute amim Jeju maro ibikẽnhõ iba. Me kute me par kadjy ne ba meo ibikẽnhõ iba. Ne mã me mymẽ me nire djuwpren mã mebê ijê djãmã meo mrã.

<sup>5</sup> Be, me rũnh dja ar amã, "Be, kõt ne Paur arẽ", ane. Me kadjy Metĩndjwýnh mar djwýnh nhõ bẽnjadjwýr raxmẽ apýnh me rũnhmẽ dja me ã me amã ane. Me ta ne me me'ã pi'òk no'òk ne imã kungã. Ba kam krĩraxbê Tamagumã o tẽ. Nã bãM bit ije kam mebê idjaer rũnhmã o itẽmmã. Ne bit kam me kute amim Jeju mar djuwpren ije Djeruxarẽmã meo imõrmã nhyM me kute kam me axwe pãnh jarẽnhmã. Ja kadjy ne ba bit ije memã pi'òko itẽmmã.

<sup>6</sup> Nã bãM me'ýr o tẽn arým krĩraxbê Tamagu tẽpo tẽ. NhyM arým kãjkwa nhipõkri myt nhý nhyM ijaerbê arým kãjkwa kurũm mýjja adjẽnhõ prĩne ikurwý. <sup>7</sup> Ba kam arým tu pykabê tým ne me'õ



kabẽn ma. Nhyim imã, “Xaur, Xaur mykam ne ga me kute amim imaro abikẽnho aba? Nã gãm aje ba mãn ijo abikẽnho aba pyrãk”, ane.

<sup>8</sup> Ba kam kum, “Bẽnjadjwýr, myj me ajõ ga ne ga imã akabẽn”? ane.

Nhyim imã, “Ba ibê Jeju. Krĩraxbê Nadjarekam ijabatàn djà. Nã gãm me kute amim imaro abikẽnho aba ne aje ba mãn ijo abikẽnho aba pyrãk”, ane. <sup>9</sup> Nhyim ar ikõt mõrja ne ar mrãmri adjẽn pumũn arým kam tĩn prãm ne. Nhyim be, kabẽnja ne ar kute mar kêt. <sup>10</sup> Jeju imã ane ba kam kum, “Bẽnjadjwýr djwýnh, myj dja ba nẽ”? ane.

Nhyim Bẽnjadjwýr djwýnh imã, “On kãjmã djan amũ krĩraxbê Tamagumã wadjã. Kam dja me'õ awýr bõx. Ba ne ba arým amim ajã karõn arým kum arẽ. Tãm dja ikukwakam amã ikabẽn jarẽn amã 'ã karõ. Dja ga ikabẽn man kõt ar amijo aba.” Nãm ã Bẽnjadjwýr djwýnh imã ane.

<sup>11</sup> Be, myjja inokam adjẽn tỳx ba kam arým ino rã. Nhyim ar ikõt mõrja arým inihkra 'amýn ijo mõ ba arým Tamagu'ýr bõx.

<sup>12</sup> Nhyim kam me'õbê Ananij arým iwýr bõx. Ananij ne katãt Mõjdjê kukràdjã man kõt ar amijo ba nhyim Tamagakum mebê idjaerja kunĩ mex jarẽ. <sup>13</sup> Ananij iwýr bõx ne djan imã, “Akmere Xaur, on akubyn arĩt mex”, ane. Ba kam arým myt tãm kam akubyn irĩt mex ne kãjmã ikrãn omũ.

<sup>14</sup> Nhyim imã, “Metĩndjwýnh kute me bakukãmãkjẽo ba djwýnh ne arým amijo apytã. Arým ne amim ajã karõ. Tãm dja ga ama. Arým ne ga me'õ katãt kute amijo ban axwe kêtumrẽxja pumũ. Arým ne ga Jeju pumũn kabẽn ma. Ja kadjy ne arým amijo apytã. <sup>15</sup> Ga dja ga aje myjja pumũnh ne mar kõt me kunĩmã 'ã ajarẽ. <sup>16</sup> Be, myj kadjy ne ga nhỹ? Aje, kãjmã dja. Ba Metĩndjwýnhmã ngõmã ajadjã. Ga, me ngrã tykkam

me kute amipõnh ne arým mexja pumũ. Gadjwý dja ga Bẽnjadjwýr djwýnhmã amijo a'uw gẽ amã axwe kêt jarẽ ga kum amex.” Nãm ã Ananij imã ane. Nãm ã Paur me krãptĩmã 'ã ujarẽnho ane.

<sup>17-18</sup> Ne kam itepã ajte memã kum,

—Ba kam akubyn Djeruxarẽkam bõx. Ne kam Metĩndjwýnh nhõ kikretimã wadjãn arým Metĩndjwýnhmã ikabẽno nhỹ. Kum ikabẽno nhỹ nhyim arým Bẽnjadjwýr djwýnh inokrekam amirĩt ba omũ. Nhyim imã, “Aje, amikrà kêt ne on Djeruxarẽ kurũm akato. Dja ga te memã ijã adjujarẽn ar aba nhyim me amim amar kêtumrẽx”, ane.

<sup>19</sup> Ba kam kum, “Kati Bẽnjadjwýr djwýnh, dja me ima. Ba ne ba apýnh mebê idjaer bikprõnh djakam mrãn me kute amim amar jabej mõ. Ne me titik ne mebê ijẽo iba. <sup>20</sup> Nhyim me kute ajã ujarẽn djwýnh Exewão bĩno mõ ba arek me kuri dja. Ne memã kum, ‘Ajrã me on abĩ, anhỹro djan kam memã kubẽkã jamýn o dja. Nã bãm ã imã me kurẽo ane nhyim me kunĩ kute imar”, ane.

<sup>21</sup> Nhyim imã, “Kati, on akato. Dja ba amũ: apýnh me bajtem ba djari me'ýr ajano ga me'ýr mrã.” Nãm ã Bẽnjadjwýr djwýnh imã ane. Nãm ã Paur memã ane.

*Me krãptĩja ajte Paurkam ngryk.*

<sup>22</sup> Nãm me arek maro dja nhyim kam me bajtemmã amitẽmja jarẽ. Nhyim kam me arým tu ngryk ne. Ngryk ne on kãj bê kabẽno kumex ne krãkamngõnhmã kum,

—On me abĩ. Axwekumrẽx. Tĩn ne ar bakam ne punukumrẽx, ane.

<sup>23</sup> Nãm me kãj bê kabẽno djan arým aminhõ kubẽkã krãkão põx ne kurẽn kãjmã pyka rẽnho dja. Me ngryk tỳ:xkam ne me ã amijo ane. <sup>24</sup> Nhyim kam krãkamngõnh nhõ bẽnjadjwýr me omũn arým õ me jamã 'ã karõn kum,

—Me kikretimā Pauro wadjà. Mrykà punuo kaprêprêk gê tokry pymaje axwe'ō kôt amijarê. Ba gop me 'ã kabêno kumex kraxkôt kuma, ane. <sup>25</sup> Nhyim me arým kadjy djudjêdjêo uwpreo dja. O dja nhyim Paur arým mebê 100o ba djwýnhjamā kum,

—Ê, dja ga me ikukjan ima. Krĩraxbê Rômakam me ja ne me ijo aminhō. Me bakukràdjà kôt ne me kute me axwekumrêx jabej me kukjêr kumrêx. Me kute me axwe markambit ne me kute me kaprêprêk. Kraxje me aje imar kêt kam ne ga me tu ikaprêprêko mō, ane.

<sup>26</sup> Nhyim meo ba djwýnh kuman arým uwpreo kangan krākamngōnh nhō bēnjadjwýr rax'ýr tēn kum,

—Ê, aminêje Paur kukja. Gwaj ren bakukràdjà kupa'ã o ajkê. Be, krĩraxbê Rômakam me ja ne me Pauro aminhō, ane.

<sup>27</sup> Nhyim krākamngōnh nhō bēnjadjwýr rax arým 'ýr tēn 'ýr bōx ne kum,

—Djām mrāmri ne krĩraxbê Rômakam me ja ajo aminhōkumrêx? ane.

Nhyim kum, “Nà”, ane.

<sup>28</sup> Nhyim bēnjadjwýr kum,

—Be, Rômakam me ja kute ijo aminhō kadjy ne ba arým pānh pi'òk kaprĩ kumex ne memā kungā. Mýj ne ga gadjwý memā nê? ane.

Nhyim Paur kum,

—Rômakam me ja ne me ibām kute idjiro aminhō. Ibām kôt ne me ijo aminhō, ane.

<sup>29</sup> Nhyim me bit kute kaprêprêk 'ýrja arým umaje kum kre rax ne dja. Nhyim krākamngōnh nhō bēnjadjwýr raxdjwý kute Rômakam me ja kute Pauro aminhōja markam arým umaje tĩn prām. Kabēnkôt me kute uwprekam ne umaje tĩn prām.

*Paur kute me rũnh krāptĩmā amijarēnh.*

<sup>30</sup> Nhyim kam me'ã akati nhyim bēnjadjwýr bit kute kraxkôt marmā. Bit kute mebê idjaer kute Paurmā axwe jarēnh kraxkôt marmā. Nām arým 'ã kàxirāx bōn kum ire. Ne kam me kadjy Metĩndjwýnh mar djwýnh nhō bēnjadjwýrmē me rũnh kunĩmā amikabēn jano. Me Paur'ã bikprōnhmā ano. Nhyim me arým 'ã akuprō. Nhyim kam me Pauro tēn me ipōkri kudja.

## 23

<sup>1</sup> Nhyim kam Paur me rũnhkam no djar tỳxkumrêx ne memā kum,

—Akmere ar, ije amimarkam ne ba akubyn amimaro tēn kam amiwýr amijo bōx ne arým amim, “Djā ne ba amikam mýjja'ō ma nhyim me ibê ijê? Kati. Ije amikam mýjja'ō mar kêt ne katāt Metĩndjwýnhmā idjapēnh ar iba. Akati jakam ne ba katāt kum idjapēnh rã'ã ne. Metĩndjwýnh ne prĩne ipumũn ima.” Nā bām ã amimaro ane.

<sup>2</sup> Nhyim kam me kadjy Metĩndjwýnh mar djwýnh nhō bēnjadjwýr rax Ananij Paur bu'ã me ku'ēmā 'ã karōn kum,

—Me on ajkwabê kurwa, ane. Nhyim me arým kurwa.

<sup>3</sup> Nhyim Paur kum,

—Ga ne ga ajêx ne amijo Metĩndjwýnh maro aba. Metĩndjwýnh dja ĩ gadjwý akurwa. Dja ĩ amā ajaxwe pānh jarê. Nā gām me bakukràdjà kôt aje ikukjêr ne imā mýj ijaxwe pānh jarēnhmān ate me bakukràdjà kupa'ã ijā memā apnê nhyim me ikurwa, ane.

<sup>4</sup> Nhyim kam bu'ã me ku'ê kum,

—Me kadjy Metĩndjwýnh mar djwýnh nhō bēnjadjwýr raxmā ne ga adjākjêro dja. Djām ã me kute kum anhýr got? ane.

<sup>5</sup> Nhyim Paur memā kum,

—Akmere ar, kubê me kadjy Metĩndjwýnh mar djwýnh nhō bēnjadjwýr raxkôt ije mar kêt. Ba ren ja man ren ã kum anhýr kêt.

Be, Metindjwýnh ne memā kum, “Kwārīk wānh me bēnjadjwýrmā adjākjêr kêt”, ane nhym me arým 'ā pi'ók no'ók ne. Kam ba ren kum idjākjêr kêt. Nām ā Paur memā ane.

<sup>6-8</sup> Ne kam ōkre kadjwýnhbê amim,

—Be, ibu'ā me ku'ê jabê ne mebê xadjudjêu nhym jabê mebê pardjêu, ane. Be, mebê xadjudjêu ne me amikukrādjà kôt mā memā kum,

—Me tyk akubyn tīn kêt ne Metindjwýnh kadjy mrānh djwýnh kêt ne me karō kêt, anhÿro ba. Nhym be, mebê pardjêu ne me mā memā kum,

—Kati. Mrāmri me tyk akubyn tīnkumrêx. Mrāmri Metindjwýnh kadjy mrānh djwýnhkumrêx. Mrāmri me karōkumrêx, anhÿro ba. Paur apÿnh me ja kukrādjà ja man arým mebê pardjêu kôt amikabēn djin kàj bê me rūnhmā kum,

—Be, akmere ar, ibê mebê pardjêu'ō. Ibām kute idjirbê mebê pardjêu'ō. Be, mrāmri dja Metindjwýnh akubyn me tyko tīnkumrêx. Ja ne ba tu amim markumrêx. Ije mrāmri me tyk akubyn tīnja jarēho ibakôt ne gar imā ijaxwe jarēn we ijaxwe jabej ikukjêro nhÿ. Nām ā memā ane nhym mebê pardjêumē mebê xadjudjêumē aben kukrādjà mÿr jabej arým abenkam ngryk ne aktā kabēno aben japanho kumex. Nhym kôt me krāptī: apÿnh kabēno kumex.

<sup>9</sup> Ne kam kangao kumex. Nhym mebê idjaer kukrādjà mar djwýnh kwÿ kàjmā dja. Ar kute mebê pardjêu kukrādjàkôt amijo baja kàjmā djan arým Paur nêje memā bēn tÿx ne memā kum,

—Djām me karō mex kukwakam nār Metindjwýnh kadjy mrānh djwýnh kukwakam me akubyn tīn jarēnhkam axwe got? Kati, axwe kêt. Gwaj ren 'ā axwe nhōn ren kam Metindjwýnh bakurê djwýnh.

Nām ar ā memā ane <sup>10</sup> nhym me arým kabēn mÿr jabej kangao kumex. Nhym kam krākamngōnh nhō bēnjadjwýr rax amim,

—Je, me kute arým abenmā Paur nhirēnh 'ÿr pyrāk, anen arým krākamngōnhmā kum,

—On me 'ÿr rwÿn pa 'amÿn o katon me banhō kikretimā o wadjā, ane. Nhym me arým o wadjā.

<sup>11</sup> Nhym arým me'ā akamāt nhym Bēnjadjwýr djwýnh arým tēn kuri djan kum,

—On atÿx ne akīnh. Ga arým mrāmri Djeruxarē jakam ijā memā adjujarēnhkumrêx. Dja ga ī krīraxbē Rōmakamdjwÿ ā adjujarēho ane, ane.

*Me kute Paur bīn kadjy kute o aben mar.*

<sup>12</sup> Nhym arým 'ā akati nhym mebê idjaer kwÿ me kàxā aben kôt kabēn djin abenmā kum,

—Dja gwaj baje mrāmri Paur bīnkumrêx kadjy amijajbu. Dja gwaj bajō Paur bīn kētri mÿjja'ō krē nār ikō gora gē Metindjwýnh gwaj bajōnh bī. Gwaj bakabēn kajgo pānh gwaj bajōnh bī, ane. <sup>13</sup> Me krāptībē 40 ne ijukri ajmā kute ne me ā abenmā Paur'ā karōo ane. <sup>14</sup> Ne kam me rūnhÿr bōx. Me kadjy Metindjwýnh mar djwýnh nhō bēnjadjwýrmē mebēngēt'ÿr bōx. Ne kam memā kum,

—Ba me ije Paur bīnkumrêx kadjy arým aben kôt ikabēn djirkumrêx ne abenmā kum, “Kwārīk wānh gwaj mÿjja'ō krēn ne kôt bakōm kêt. Gwaj baje Paur bīnkambit dja gwaj banhō kwÿ krēn kôt ikō. Dja gwaj bajō bajêx ne mÿjja 'ō krēn kôt ikō nhym arým Metindjwýnh gwaj bajōnh bī. Gwaj bakabēn kajgo pānh gwaj bajōnh bī.” Nā bām me ā abenmā ane. <sup>15</sup> Kam ne ba me me amā arē. Me ije bīnkumrêx kadjy dja ga me krākamngōnh nhō bēnjadjwýr'ÿr tē. Gamē me rūnh 'ōdjwÿmē 'ÿr tēn kum Paur'ā a'uw ne kum, “Ajte akatikam me imā

Pauro rwŷ ba me prŷne kukjêr mex", ane. Dja ga me ā kum ane. Nhyŷ arŷm o kato ba me arŷm kubŷ. Me awŷr bōx kētri ba me tu bŷnkumrēx. Nām me ā me rūnhmā ane.

<sup>16</sup> Nhyŷ kam Paur tām djwŷ arŷm me kute ingēt kangrōnh jarēnh ma. Ne kam me krākamngōnh nhō kikretimā wadjān arŷm Paurmā me arē.

<sup>17</sup> Nhyŷ kam Paur amiwŷr me krākamngōnh krāptŷ: kubē 100o ba djwŷnh'ōja 'uw nhyŷ bōx. Nhyŷ kum,

—Ē, anhō bēnjadjwŷr'ŷr bōktijao tē. Nām kute kum mŷjja'ō jarēnhmā, ane.

<sup>18</sup> Nhyŷ arŷm 'ŷr o tēn ō bēnjadjwŷr'ŷr o bōx. Bēnjadjwŷr nhidjibē ne Kraōdjō Rixijanŷ. Nām 'ŷr o bōx ne kum,

—Aje me'ōbē ijē nhidjibē Paur ne amiwŷr ijuw ne imā, “Ē, anhō bēnjadjwŷrmā bōktijao tē. Nām kute kum mŷjja'ō jarēnhmā.” Nām ā Paur imā ane, ane.

<sup>19</sup> Nām meo ba djwŷnh kum ane nhyŷ arŷm bōkti pa 'ābyn amū o tēn me kākā kum,

—Mŷj ne ga aje imā arēnhmā? ane.

<sup>20</sup> Nhyŷ kum,

—Mebē idjaer arŷm aben kōt kabēn dji. Me kute amā arēnh ga aje me rūnhmā ajte ngētwa Pauro akator nhyŷ me we kute prŷne kukjêr mexmā. <sup>21</sup> Kwārŷk wānh ga memā o akator kēt. Me kubē 40 ne ijukri ajmā kute ne me ngēt wakam amako nhŷ. Me kute tu bŷnkumrēx kadjy arŷm abenmā kum, “Kwārŷk wānh gwaj mŷjja'ō krēn ne kōt bakōm kēt. Gwaj baje Paur bŷnkambit dja gwaj banhō kwŷ krēn kōt ikō. Dja gwaj bajō 'ēx ne mŷjja 'ō krēn kōt ikō nhyŷ arŷm Metindjwŷnh gwaj bajōnh bŷ. Gwaj bakabēn kajgo pānh gwaj bajōnh bŷ” Nām me ā abenmā ane. Ne

kam jakam me kute bŷn kadjy akabēnkam amako nhŷ. Nām ā bōkti bēnjadjwŷrmā ane.

<sup>22</sup> Nhyŷ krākamngōnh nhō bēnjadjwŷr rax arŷm kum,

—Aj, aje imā arēnhja kwārŷk wānh me'ōmā arēnh kētkumrēx. Aj mā, ane.

*Me kute Xedjare'ŷr Pauro mōr.*

<sup>23</sup> Ne kam amiwŷr krākamngōnh kubē 100o ba djwŷnh amānhkrut 'uw ne arkum,

—Gar krākamngōnh kubē 200mā arē gē me amijo atom. Me ajā kāj bē kō 'irykam, 21 orakam dja ga me krŷrāxbē Xedjare'ŷr mō. Me bē 70djwŷ dja me kawaru'ā 'ŷr mō. Me bē 200djwŷ dja me kākō nānh jamŷn 'ŷr o mō. <sup>24</sup> Paur djwŷ kadjy dja gar kawaru kwŷo mō. Gar me krāptŷo mōn me bē idjaerbē Paur pytār mex ne bēnjadjwŷrbē Perimā o bōx. Nām bēnjadjwŷr ā meo ba djwŷnh arkum ane.

<sup>25</sup> Ne kam amū bēnjadjwŷr raxbē Perimā amikabēn'ā pi'ōk no'ōk ne kum,

<sup>26</sup> “Ba ibē Kraōdjō Rixijanŷ. Bēnjadjwŷr Peri, araxkumrēx. Ba ne ba amā pi'ōk no'ōkkōt wām amā ikabēn mex jarē.

<sup>27</sup> Pi'ōk jakōt ba amā me'ōbē Paur jano. Ajbir ne me bē idjaer o tŷm ne pa 'amŷn bit kute bŷn 'ŷr. Ba kam arŷm krŷrāxbē Rōmakam me ja kute Pauro aminhōja man 'ŷr inhō krākamngōnho mōn me bē utā. <sup>28</sup> Ne kam me kute axwe jarēnh kraxkōt bit ije marmā. Ne kam kadjy me bē idjaer nhō me rūnh'ŷr o bōx. <sup>29</sup> Ne kam arŷm kuman amim, 'Be, me bē idjaer ta kukrādja kōt ne me kum axwe jarē', ane. Nhyŷ kute me babē Rōma kukrādja'ōo bikēnh kēt. Kam pānh me baje bŷn nār pānh baje kubē ijē kadjy kēt.

<sup>30</sup> Nhyŷ me bē idjaer bit kute bŷn kadjy aben kōt kabēn djin arŷm prykōt kum nōn kam

amako nõ. Nhyim me imã arê ba on wãm ano. Ne me kute kum axwe jarênh djwýnhmãdjwý arým memã 'ã karõn memã kum, 'Bênjadjwýr rax kuka kõnh dja gar kum axwe'õ jarê', ane. Be, tãm ne ja."

Nãm ã krãkamngõnh nhõ bênjadjwýr pi'òkkam Perimã ane. Ne me kute 'yr o mõi kadjy arým memã pi'òk ngã.

<sup>31</sup> Nhyim kam me'ã akamãt. Nhyim me krãkamngõnh arým bênjadjwýr kabênkõt Djeruxarê kurũm Pauro katon o mõi. Akamãt kõkam mõi:n kam arým krĩraxbê Pakrir'yr o bõx. <sup>32</sup> O bõx nhyim kam arým me'ã akati. Nhyim me krãkamngõnh pykabê mrãnhja akubyn aminhõ kikretimã akêx ne.

Nhyim me kawaru'ã mõi:ja amũ Pauro mõi. <sup>33</sup> Ne o mõi:n kam arým krĩraxbê Xedjare'yr o bõx. Ne kam bênjadjwýr Perimã pi'òk ngãn kam kum, "Ota, Paur ne ja", ane. <sup>34</sup> Nhyim arým amim pi'òk jarênh kabên ma. Ne kam kukij ne kum,

—Nhýnh pykajakam ne arwýk djã? Mýj ne idji kute? ane. Nhyim kum, "Xirxijkam ne ba irwýk djã", ane. <sup>35</sup> Nhyim kum,

—Gê me kute amã axwe jarênh djwýnh bõxmã ba kam arým akabên ma, ane. Ne kam õ krãkamngõnhmã kum,

—Bênjadjwýr rax Erodji nhõ kikrekam dja gar Pauro nhý, ane.

## 24

*Kute bênjadjwýr Perimã amijarênh.*

<sup>1</sup> Nhyim me'ã akatibê 5 apêx nhyim mebê idjaer rũnh arým Xedjare'yr bõx. Me kadjy Metindjwýnh mar djwýnh nhõ bênjadjwýr rax Ananijmê mebêngêtmê me kadjy me kabên jarênh djwýnhbê Teturmê ne me arým Xedjare'yr bõx. Ne kam arým bênjadjwýr Peri'yr tẽn 'yr bõx. 'Yr bõx ne arým

Paur kãxã 'ã axwe janhõ nhyim bênjadjwýr Peri kuma. <sup>2</sup> Kuman arým Paur'yr õ àpênh jano nhyim me o bõx.

Nhyim Tetur arým 'ã axwe nhõrmo krax ne bênjadjwýr rax Perimã kum,

—Be, ga me imã abênjadjwýr raxkam ne ba me idjumar mexkumrêx. Ga me imã mýjja kumexo mex. <sup>3</sup> Be, me imã akĩnh ne pyka kunĩkõt amã amikĩnh jarênh rã'ã. <sup>4</sup> Dja ba akunor ngri ne amã ikabên 'ikrãnebit jarê ga ikabên ma.

<sup>5</sup> Ba me me'õja axwekumrêxmã ikato. Nãm apýnh me ba djã kunĩkõt mebê idjaer kunĩmã me banhõ bênjadjwýr kurê'uko ba nhyim me arým kangao kumex. Kubê meo ba djwýnh'õ. Krĩraxbê Nadjarekam Jejuwã kukràdjã kõt ne õ me jao ba. <sup>6</sup> Ne kam kute Metindjwýnh nhõ kikretio àpnumã ba meo tým ne pa 'amý. Ne bit ije kum pãnh jarênhmã o mõi. Me ikukràdjã kõt ne ije kum axwe pãnh jarênhmã o mõi.

<sup>7</sup> Nhyim kam krãkamngõnh nhõ bênjadjwýrbê Rixijanh bõx ne me imã àkrê:. Ne arým me ibê Paur pytãn mã o mõi. <sup>8</sup> Ne kam me kute kum axwe jarênh djwýnhmã 'ã karõn memã kum, "Bênjadjwýr rax'yr dja gar tẽn kum arê", ane. Be, ga dja ga abej kukjan arým ama. Me ije me'õjamã axwe jarênh kõt dja ga ama. Nãm ã Tetur Perimã ane.

<sup>9</sup> Nhyim mebê idjaer kunĩ 'êx ne kum,

—Be, mrãmri ne kõt arê. Mrãmri ne kõt arê, ane.

<sup>10</sup> Nhyim bênjadjwýr Peri arým Paur'yr akêx ne inhuo akre. Paur kute kum amijarênhmã akre nhyim kam kum,

—Ga ne ga pyka jakam aje memã axwe pãnh jarênhõ aba nhyim arým jakam ajã amex krãptĩ apêx. Ba

arÿm kôt aman akam ikînh ne arÿm aminêje amâ ikabên jarê.

<sup>11</sup> Be, ba ne ba ajbir Djeruxarêmâ wabin 'ÿr bôx. Ije Metîndjwÿnhmâ rax jarênh kadjy ne ba wabi nhym arÿm jakam akatibê 12bit apêx. Ga dja ga me kukja gê me arÿm kute ipumÿnh kôt amâ, "Be, mrâmri ne akati kôt arê", ane. <sup>12</sup> Ajbir ne ba bôx ne ije Metîndjwÿnh nhô kikretikam me'ômê aktâ ikabêno aben japanh kêtumrêx ne ije amijâ me krâptîo ibikprônh kêtumrêx. Apÿnh me bikprônh djâkam ije meo anhÿr kêt ne krîraxkam ije meo anhÿr kêtumrêx. Nhym mebê idjaer rÿnh akabem ÿrja kôt kute imâ kator ne ipumÿnh kêtumrêx. Ije mebê bënjadjwÿr kurêkôt me kute imâ kator ne ipumÿnh kêtumrêx.

<sup>13</sup> Kam me kute ijarênhja kôt ga te aje mÿj ijaxwe'ômâ akator ne marmâ. <sup>14</sup> Dja ba amâ amijarê ga imarkumrêx. Be, Jeju kôt ne ba amijo iba. Kôt ne ba me ikukâmâreo ba djwÿnhmâ rax jarêno iba, Metîndjwÿnhmâ rax jarêno iba. Nhym mebê idjaer kwÿ 'êx ne ijâ abenmâ kum, "Metîndjwÿnh kupa'â ne amijo ba", ane. Nhym be, kati. Ba ne ba mrâmri tu amim Môjdjê kukràdjâ markumrêx ne tu amim Metîndjwÿnh kukwakam kabên jarênh djwÿnh kunî kabên markumrêx ne kôt ar amijo iba. Me kabên'â pi'ók no'ók kôt ne ba amijo iba.

<sup>15</sup> Be, mrâmri dja Metîndjwÿnh akubyn me tyko tîn. Me axwe kêtjao tîn. Me axwejao tîn. Ja ne ba tu amim markumrêx. Be, me rÿnh nhÿr jadjwÿ ne me amim â maro ane. <sup>16</sup> Mrâmri ne me tyk kunî akubyn tînmâ. Ba kam ijaxwe kêt kadjy amijâno dja. Metîndjwÿnh kute imâ ijaxwe jarênh karôn ibu'â me kunîdjwÿ kute imâ ijaxwe jarênh karô amijâno idjâm râ'â: ne.

<sup>17</sup> Be, amrêbê ne ba apÿnh me ba djâkam ar iba nhym ijâ amex

krâptî apêx. Ba kam akubyn inhô me wÿnh'ÿr bôx. Mebé idjaer'ÿr bôx. Ibôx kêttri ne me bajtem me ô mÿjja kêt kadjy imâ pi'ók kaprî ngâ ba arÿm o bôx ne memâ kungâ. Ne me kute ikadjy Metîndjwÿnhmâ mry bîn kadjy me 'ÿr bôx. <sup>18</sup> Ne kam arÿm me ikukràdjâ kôt Metîndjwÿnhmâ amijo mex ne arÿm Metîndjwÿnh nhô kikretimâ wadjâ. Nhym mebê idjaer kwÿ arÿm pykabê Adij kurÿm bôx. Kikretikam bôx ne arÿm ipumÿ. Ipumÿ ba amijâ me krâptîo ibikprônh kêt ne ije memâ me bënjadjwÿr'ô kurê'uk kêt nhym me kam kangati kêtumrêx.

<sup>19</sup> Adij kurÿm me bôxwâ kute Metîndjwÿnh nhô kikretikam ipumÿnhkôt ren awÿr bôx. Ne ren me kute mÿj ijaxwe'ô markôt ren amâ ijarê. <sup>20</sup> Nâr gê akuka kônhe me ÿrwâ'ô kute Djeruxarêkam ipumÿnhkôt amâ ijarê. Mebé idjaer rÿnh kute Djeruxarêkam ijaxwe jabej ikukjêrkôt gê me'ô kute ipumÿnh jabej amâ ijarê. Me kute mÿj ijaxwe'ômâ katorkôt amâ ijarê.

<sup>21</sup> Ba amâ amijarê ga ama. Ba Djeruxarêkam me ipôkri idjâmkam kaj bê memâ kum, "Ije mrâmri me tyk akubyn tîn jarêno ibakôt ne gar akati jakam mÿj ijaxwe'ô jabej ikukjêro nhÿ", ane. Djâm ori ije ja jarênhkam ijaxwe'ô? Kati. Tâm ne ja. Nâm â Paur Perimâ ane.

<sup>22</sup> Nhym Peri kute Paur kabên markam arÿm kadjy akati 'ôdjwÿ jarê. Amrêbê ne Peri Jeju'â ujarênh ma. Nâm kadjy akati 'ô jarênh memâ kum,

—Dja krâkamngôn nhô bënjadjwÿr Rixijan nhô amrê tē. Ba kam arÿm prîne ajâ ujarênh ma, ane. <sup>23</sup> Ne kam krâkamngôn krâptî: kubê 100 nhô bënjadjwÿrjamâ Paur'â karôn kum,

—Dja ga omÿ gê ta ar mrâ. Gê ôbikwa ta 'ÿr wangij ne o djuw mex.

Nãm ã Peri anen kam mã tê.

<sup>24-25</sup> Nhyr arým 'ã akati kwý apêx nhyr Peri akubyn bõx. Prõ nhidjibê Kruxire ne o bõx. Kubê mebê idjaer'õ. Nhyr kam Paur'ýr õ me ja jano nhyr me kum o bõx. Nhyr kam arkum ujarêno djan arkum,

—Metĩndjwýnh ne arým mrãmri Jeju'ã me banhõ Bẽnjadjwýrbê kumkati mẽ. Kubê ne Kritu. Djã gãr ar tu amim Jeju markumrêx nhyr Metĩndjwýnh arým ar amã ajaxwe kêt jarê gar arým kum amexkumrêx. Djã gãr ar ajaxwe kêt kadjy amijãno dja. Dja Metĩndjwýnh ï me kunĩmã axwe pãnh jarê. Kadjy amrê akati mõr rã'ã, ane.

Nãm prĩne ã kum 'ã ujarêno ane nhyr kabên pymaje Peri arým madjã kretin kum,

—Aj mã. Gê idjãpênh'õ kêtka ba ajte amã arê. Ga ajte imã arê ba kuma, ane. <sup>26</sup> Nãm anen õkre kadjwýnhbê amim,

—Dja Paur imã pi'õk kaprĩ nhõr jabej ba arým kum inhire gê tê, ane. Ne kam pi'õk kaprĩ jabej aben tã amiwýr Paur 'uw ne kum kabêno krĩ.

<sup>27</sup> Paur mebê ijê djãkam nhý nhyr arým 'ã amex amãnhkrut apêx. Nhyr arým Peri kato nhyr Poxu Pexu arým pãnh memã bẽnjadjwýr rax. Peri kator kêttri ne kute mebê idjaero kĩnh kadjy tu wãnh mebê ijê djãkam Paurmã irerkumrêx nhyr wãnh krĩ rã'ã.

## 25

*Kute bẽnjadjwýr Pexumã amijarênh.*

<sup>1</sup> Pexu pykabê Djudêja'ýr bõx ne kam krĩraxbê Xedjarekam bõx. Nhyr kam 'ã akatin akatin akati nhyr krĩraxbê Xedjare kurým katon Djeruxarê'ýr tê. Tê:n kam 'ýr bõx. <sup>2</sup> Nhyr kam me rũnh Pexumã Paur jarê. Me kam djy Metĩndjwýnh mar djwýnh nhõ bẽnjadjwýr raxmê

mebê idjaer nhõ me rũnh 'õdjwýmê ne me kum arê <sup>3</sup> ne kum,

—Ë, amã me ikĩnh jabej gop amrê DjeruxarêMã Pauro bõx, ane. Me kute kum arênh kêttri ne me abenmã kum,

—Gêdja me amrê pry'ã Pauro mõ gwaj kubĩ, ane. <sup>4-5</sup> Nãm me rũnh ã Pexumã Paur jarêno ane nhyr kam memã kum,

—Kati, gê wãnh Xedjarekam me arek o nhý. Badjwý arým 'ýr itêm 'ýr. Gê ar anhõ me rũnh'õ ar ikõt 'ýr tẽn axwe'õ jabej kukja gê kum amijarê gê kam kum axwe jarênhkumrêx, ane.

<sup>6</sup> Nhyr me'ã akatibê 10 ne ajmã kute apêx nhyr kam arým Xedjare'ýr tê:n 'ýr bõx. Nhyr akati nhyr arým tẽn memã axwe pãnh jarênh djãkam memã nhý. Ne arým Paur'ýr õ me ja jano nhyr me o mõn 'ýr o bõx. <sup>7</sup> O bõx nhyr arým Djeruxarê kurým mebê idjaer kwý 'ýr bõx ne Paurmã ipõk ne. Ne kam Pexumã Paur jarêno dja. Nãm me kum axwe krãptĩ: jarêno dja. Djãm axwe kryre ne arê? Kati, Axwe rũ:nh ne arê. Me kute axwekõt omũnh kêt ne tu arĩk kum axwe jarêno dja. Nhyr Pexu me kabên ma:n kam mrãmri Paur jaxwe'õmã kator ne mar kêtumrêx.

<sup>8</sup> Nhyr Paur aminêje Pexumã kum,

—Be, ba ne ba ije mebê idjaer kukràdjã 'õo ibikênh kêt ne Metĩndjwýnh nhõ kikretio ibikênh kêt ne mebê bẽnjadjwýr raxbê Xedja kurê kêt, ane. Xedja ne me bẽnjadjwýr rũnh kunĩ kurãm rax.

<sup>9</sup> Nhyr be, Pexu bit kute mebê idjaerjao kĩnhmã ne arým Paurmã kum,

—Djãm Djeruxarêkam atêm prãm? Dja ba kam mrãmri ajã me ja kabênkumrêx jabej, ane.

<sup>10</sup> Nhyr Paur kum,

—Kati. Bẽnjadjwýr raxbê Xedja kabênkõt aje me axwe jabej me kukjêr djã ne ja. Jakam dja ga ima.

Mýj kadjy dja ga Djeruxarēmã ijo tẽ nhyr me ikukij? Ba ne ba mebê idjaer 'õo ibikẽnh kêtumrẽx ga arým ama. <sup>11</sup> Be, me ren ijaxwe'õmã kato ne ren pãnh tu ibĩ, ba ren aminẽje ikabẽn 'õ jarẽnh kêt ne. Nhyr be, me 'ẽx ne kute imã ijaxwe jarẽnh kajgokam ne ga te aje memã ikangamã. Ba bẽnjadjwýr raxbê Xedja'ýr tẽn aminẽje kum ikabẽn jarẽ. Nãm ã Paur kum ane.

<sup>12</sup> Nhyr kam Pexu amibu'ã me rũnhmã kabẽn nhyr me Pauro aben ma. Nhyr kam kum,

—Nã gãm imã, “Ba bẽnjadjwýr raxbê Xedja'ýr tẽn aminẽje kum ikabẽn jarẽ”, ane. Be, jakam dja ga mrãmri amũ Xedja'ýr atẽmkumrẽx, ane.

*Pexu kute Paur'ã Angripa kabẽn mar:*

<sup>13</sup> Nhyr 'ã akati kwý apêx nhyr bẽnjadjwýr raxbê Angripamẽ prõbê Berni ar krĩraxbê Xedjare'ýr bõx. Ar kute Pexumã kabẽn mex jarẽnh kadjy ne ar bõx. <sup>14</sup> Ne kam arek kam ar ba nhyr ar'ã akati kwý apêxmã. Nhyr Pexu arým bẽnjadjwýr raxmã Paur'ã ajarẽn kum,

—Peri mebê ijê djakam me'õmã iren arým mã tẽ. <sup>15</sup> Ba krĩraxbê Djeruxarẽkam ar ibari nhyr mebê idjaer nhõ me rũnh arým imã Paur jarẽ. Me õ mebẽngẽtmẽ me kadjy Metĩndjwýnh mar djwýnh nhõ bẽnjadjwýrmẽ imã arẽ ba arým kuma. Me imã, “Dja ga kum axwe pãnh jarẽn abĩ”, ane.

<sup>16</sup> Ba memã kum, “Be, djãm Rõmakam me ja kukrãdjã kõt ne ba me ije me axwe jabej me kukjêr kêtum tu me par? Kati. Ba me me axwe jabej me kukjêr kumrẽx. Nhyr me me kuka kõnh axwe jarẽnh kumrẽx ba me me kuma. Nhyr kam me me imã amijã aprã ba me arým kuma. Me ije me axwemã ijapõxkambit ne ba me arým pãnh me kupa.” Nã bãm ã memã ane.

<sup>17</sup> Ne kam mebê idjaer arým amrẽ Xedjare jakam bõx. Nhyr me'ã akati ba amikrã kêt ne ije memã axwe pãnh jarẽnh djakam bõx ne memã nhỹ. Ba kam Paur'ýr inhõ me ja jano nhyr me o bõx. <sup>18</sup> O bõx ba arĩk 'ã amim, “Be, mrãmri axwekumrẽx”, ane. Nhyr me kwý kãjmã ku'ẽn kam 'ã imã kabẽn kajgobit jarẽnhõ ku'ẽ.

<sup>19</sup> Nãm me 'ã imã, “Paur kum me ikukrãdjã kurẽ”, ane. Ne me'õ nhidjibê Jeju jarẽ. Nãm me Jeju tyk jarẽnh nhyr be, Paur ne Jeju tũn jarẽ. Nãm me ã Paur'ã kabẽn kajgo jarẽnhõ ane. <sup>20</sup> Ba amim, “Je, djãm ije me kukrãdjã mar got”? ane. Ne kam kum, “Djãm Djeruxarẽkam atẽm prãm? Dja ba kam ajã me ja mrãmri kabẽnkumrẽx jabej”, ane.

<sup>21</sup> Nhyr kam Paur imã, “Ba gop tẽn aminẽje bẽnjadjwýr raxbê Xedjamã ikabẽn jarẽ”, ane. Ba krãkamngõnhmã kum, “Dja gar o nhỹ ba kam ĩ arým Xedjamã ano.” Nã bãm ã memã ane. Nãm ã Pexu Angripamã ane.

<sup>22</sup> Nhyr kum,

—Badjwý me'õja kabẽn ma, ane.

Nhyr kum,

—Gẽ akatimã ga kam arým kabẽn ma, ane.

*Paur Angripa kabem ãm ne kute kum amijarẽnh.*

<sup>23</sup> Nhyr arým ar'ã akati nhyr Angripamẽ Berni ar õ nèkrẽxo prĩne amikunhêr ne me axwemã pãnh jarẽnh djãmã wadjã. Krãkamngõnh nhõ bẽnjadjwýrmẽ krĩraxkam me rũnh ja arkõt wadjã. Nhyr Pexu arým Paur'ýr õ me ja jano nhyr me o bõx. <sup>24</sup> Nhyr Pexu Angripamã kum,

—Bẽnjadjwýr raxbê Angripamẽ me akatãmjamẽ, djã ne ga me me'õja pumũ? Krĩraxbê Djeruxarẽkam mebê idjaer kunĩmẽ krĩrax jakamdjwý mebê idjaer kunĩmẽ ne me imã me'õja jarẽnhõ



ku'én kam kaj bê imã, “On abĩ. On abĩ”, anhÿro kumex.

<sup>25</sup> Ba kam te ije axwe'omã ikator nhyem me kute pãnh bĩnmã te kukij nhyem axwe kêtê. Nhyem ta imã, “Ba gop tẽn aminêje bẽnjadjwýr raxbê Xedjamã ikabẽn jarê. Ta ne kute raxo me kunĩ jakrenh”, ane. Kam dja ba 'yr anorkumrêx. <sup>26</sup> Dja ba anen kam te ije me banhõ bẽnjadjwýr raxmã Paur jaxwe'ã pi'ók no'ók mã. Ba kam amã o ikato. Ga, bẽnjadjwýr rax Angripa, akumrêx ne ba aman amã o ikato. Ga dja ga axwe'õ jabej kukjan ama ba arým 'ã pi'ók no'ók ne. <sup>27</sup> Ba ren me'õ bê ijêja jano ne ren ije kôt axwe'ã pi'ók no'ók janor kêt ne ren Xedjamã kute ibẽno ibikẽn pyrãk. Nãm ã Pexu Angripamã ane.

## 26

<sup>1</sup> Nhyem kam Angripa arým Pau-rmã kum,  
—Ajrã. Aminêje akabẽn jarê, ane.

Nhyem memã aminhikra bẽn arým aminêje kum,

<sup>2</sup> —Bẽnjadjwýr rax Angripa, arým mebê idjaer ijã axwe krãptĩ janhõ ba kam aminêje amã ikabẽn jarê. Myt ja tãmkam aje ikabẽn mar prãmkam ne ba ikĩnhkumrêx. <sup>3</sup> Ga ne ga aje prĩne mebê idjaer kukrãdjã mar. Me kute kukrãdjã jabej aben kukjêrdjwý aje prĩne mar. Aje markam ne ba ikĩnhkumrêx. Dja ba amã amijã ajarê. Gop amijamãr 'iryen ikabẽnja kunĩ ma.

<sup>4</sup> Be, inhõ pyka djwýnhkam, krĩraxbê Djeruxarêkam ne me kute ipumũnh. Iprĩrũm ne mebê idjaer kunĩ ipumũ. <sup>5</sup> Me kute ipumũnhkôt ren ijã amã ajarê. Ba mebê pardjêu kukrãdjã man kôt ar amijo iba. Mebê pardjêu ne me prĩne kute me ikukãmãkjê kukrãdjã marn kôt amijo ba mex. Prĩne kute kôt amijo ba mexo kute mebê idjaer kunĩ jakrenh. Me ja kôt ne ba amijo iba. <sup>6</sup> Ne kam jakam arým akabem

dja ga ijaxwe jabej ikukjêro nhÿ. Be, Metĩndjwýnh me ikukãmãkjê mã kum, “Dja ba mrãmri akubyn me tyko tĩn”, ane. Kute akubyn me tyko tĩnja ne me tu amiwýr kamnhĩxkumrêx.

<sup>7</sup> Me ikukãmãkjê Djako ne krabê 12 jadjuw. Krabê 12 ja ne ar aben djõ'ã apýnh tãmdjwý ba djari kubê 12, apýnh me krãptĩ: ba djari kubê 12. Apýnh me ikukãmãkjê ba ja ne me akatikammê akamãtkammê mã Metĩndjwýnhmã amijarẽnho kumex. Ne mã kum ãpẽnho kumex ne mã amim, “Mrãmri dja Metĩndjwýnh akubyn me tyko tĩn”, ane. Ne mã me akubyn tĩn nhõ akati bõx jabej ajkam ama.

Ba ne ba mekôt tu amim kamnhĩxkumrêx ne mã me kunĩmã kum, “Mrãmri dja Metĩndjwýnh akubyn me tyko tĩn”, ane. Nhyem kôt mebê idjaer kamingrãnyre imã ijaxwe jarê ga kam ijaxwe'õ jabej ikukjêro nhÿ. <sup>8</sup> Be, djãm aje mekôt amim, “Metĩndjwýnh te kute akubyn me tyko tĩnmã”? ane. Djãm aje amim anhÿr got? Kati. Ga ne ga aje ã amim anhÿr prãm kêt. Nãm ã Paur Angripamã ane.

<sup>9</sup> Ne kam ajte kum,

—Be, badjwý amrêbê ne ba mekôt amim, “Kê, Nadjarekam Jeju wã. Ba 'ã me kabẽnbe idjãptãrkumrêx gê me ĩ maro ba”, ane. <sup>10</sup> Ne kam kôt mrãmri Djeruxarêkam ã mebê idjãptãro ane. Ne me kadjy Metĩndjwýnh mar djwýnh nhõ bẽnjadjwýr ar kabẽnkôt me krãptĩbê ijê. Jeju nhõ me jabê ijê. Nhyem me kute me parmã ba mekôt memã kum, “Ajrã. Me abĩ”, ane. <sup>11</sup> Ne mã me bikprõnh djã kunĩkôt meo ibikẽnho iba. Me tokry pymaje kute Jeju japrýn kanga jabej ne ba mã meo ibikẽnho iba. Meo ibikẽnho iba:n kam amũ apýnh krĩrax bajtem djãridjwý me'yr mrãn bõx.

<sup>12</sup> Kamã ne ba krĩraxbê Tam-agu'yr tẽ. 'Yr itẽm kêtĩri ne me

kadjy Metindjwŷnh mar djwŷnh nhô bĕnjadjwŷr ar me kadjy imā pi'ôk no'ôk ne. <sup>13</sup> Bĕnjadjwŷr rax Angripa, nā bām me'ŷr pi'ôk no'ôko tĕ: nhyŷ arŷm ijā kākwa nhipôkri myt nhŷ. Nhyŷ kākwa kurŷm mŷjja jadjĕnh prĕne ikurwŷ ba arŷm omŷ. Adjĕnh tŷxo kute arngro jakrenh. Nhyŷ ikôt me mōrdjwŷ mŷjja jadjĕnh me kurwŷ.

<sup>14</sup> Bar ikunĭ pykabĕ irôrôk ne. Ba kam me'ô kabĕn ma. Nhyŷ mebĕ idjaerkam ikabĕn djwŷnhkôt imā kabĕn ne imā, “Xaur, Xaur, mŷkam ne ga me kute amim imaro abikĕnh ar o aba? Nā gām aje ba mǎn ijo abikĕnho aba pyrāk. Ga ari aje ijo abikĕnho abakam te ad-jumar mex prāmje. Ga, mry kute jĕnh bjĕra pumŷ. Me kute mŷjja djwa mexo mry kamjŷr nhyŷ arŷm umaje prôt tŷxja pumŷ. Nhyŷ kwŷ amakkre kĕtkam tu amikamjŷr djā kanān arŷm tokry ne. Gadjwŷ dja ga ari ijo abikĕnho aban arŷm atokry: ne”, ane.

<sup>15</sup> Ba kum, “Bĕnjadjwŷr mŷj me ajô ga ne ga imā akabĕn ne”? ane.

Nhyŷ imā, “Ba ibĕ Jeju. Nā gām me kute amim imarjao abikĕnho aban aje ba mǎn ijo abikĕnh pyrāk. <sup>16</sup> Be, amibĕx ne kǎjmā dja. Ije ajā inhô àpĕnh djwŷnh mĕnh kadjy ne ba amā amijo amirĭt. Aje ajbir ipumŷnh'ā dja ga memā ajarĕ. Dja ba ĭ mŷjja kwŷ nhipĕx ne kôt amā amijo amirĭt ga ipumŷ. Jadjwŷ dja ga 'ā memā ajarĕ. <sup>17</sup> Jakam dja ba me bajtemmā ajanon mǎ me bajtembĕ apytā nhyŷ me kute abĭn kĕt. Ne mebĕ idjaerdjwŷbĕ apytā nhyŷ me kute abĭn kĕt.

<sup>18</sup> Ga, me no mjôtkam kute mŷjja pumŷnh kĕt ne arĭk ba punuja pumŷ. Nhyŷ be, me no pôt ne me mŷjja kunĭ pumŷn kam katāt ba. Ga ajte, akamāt kô tykkam me kute mŷjja pumŷnh kĕt ne ba punuja pumŷ. Nhyŷ me memā

mŷjja kurwŷ nhyŷ me arŷm mŷjja kunĭ pumŷn katāt ba.

Me bajtemdjwŷ ne me arĭk ar ban axwe. Dja ba memā ajano ga memā ikabĕn jarĕ. Memā arĕ nhyŷ me arŷm tu amim imarkumrĕx ne arŷm katāt amijo ban axwe kĕt ne ar ba. Xatanaj ne kute meo ba tŷm. Kubĕ dja ga Metindjwŷnh'ŷr meo akĕx nhyŷ me arŷm tu amim imarkumrĕx. Nhyŷ Metindjwŷnh arŷm me axwe maro aknon mekam ngryk kĕt. Mekam ngryk kĕt ne arŷm mekôt me umjuw. Ta kute amimexo meo mexja kôt me umjuw. Dja me tu amim imarkumrĕx nhyŷ Metindjwŷnh arŷm me axwebĕ me utā. Ja kadjy dja ba me bajtemmā ajano.” Nām ā Jeju imā ane. Nām ā Paur Angripamā ane.

Ne kam ajte kum,

<sup>19</sup> —Kam, Bĕnjadjwŷr raxbĕ Angripa, Jeju kute kākwa kurŷm imā amijo amirĭtkam ne ije omŷnhkam djām ijamakkre kĕt ne ije mar kĕt? Kati. Arŷm ne ba tu amim markumrĕx ne katāt kabĕn man kôt ar amijo iba. <sup>20</sup> Kam ne ba krĭrxbĕ Tamagu kumrĕxkam memā 'ā ajarĕ. Ne kam Djeruxarĕmĕ pykabĕ Djudĕja kunĭkôt memā 'ā ajarĕ. Ne kam apŷnh me bajtem ba djākam memā 'ā ajarĕ. Ne memā kum, “Dja gar amikam akaprĭren wānh ajaxwemā anhiren Metindjwŷnh'ŷr amijo akĕx. Ne kabĕn man kôt ar amijo aba gĕ me ar apumŷn arŷm amim, 'Be, mrāmri ne ar kute Metindjwŷnh'ŷr amijo akĕxkumrĕx', ane. Gĕ me ar apumŷn ā amim ane”, ane.

<sup>21</sup> Amrĕbĕ ije memā ja jarĕnho ibakam ne me arŷm ijo tŷm, mebĕ idjaer ne me Metindjwŷnh nhô kikretikam ijo tŷm ne ipa 'amŷn bit kute ibĭnmā. <sup>22-23</sup> Nhyŷ Metindjwŷnh mǎ: mebĕ ipytā ba memā idjujarĕnho itĕm rā'ān arŷm

myt ja'ýr bõx. Nã bãm me kàtãmmẽ me rũnhmã 'ã idjujarẽnh itẽm rã'ã ne. Mõjdjẽmẽ Metĩndjwýnh kukwakam kabẽn jarẽnh djwýnh ar amrẽbẽ me bakukãmãremã kum, "Dja me banhõ Bẽnjadjwýrbẽ kumkatibẽ Kritu tokryn tyn akubyn tĩn ne. Akubyn tĩno me bamã wa. Ne kam kàj bẽ mebẽ idjaermã amijarẽ. Ne ajte me bajtemmã amijarẽ. Ne memã kum, 'Ga, ityk ne akubyn itĩnja pumũ. Dja ga me tu amim imarkumrẽx ne arým ikõt atyk nhjukri akubyn atĩn', ane. Nãm ã memã anhýro ba. Kabẽn ja ne kute memã pry kurwý djã pyrãk. Kõt ne me katãt amijo ban tĩnkumrẽx." Nãm ã Mõjdjẽ ar me bakukãmãremã ane. Me kabẽn jabit ne ba memã arẽnho iba.

Nãm ã Paur Angripamã ane.  
<sup>24</sup> Nãm kum ja jarẽnho dja nhym Pexu tu o kapẽr tan kàj bẽ kum,

—Paur, nã gãm ajbã. Aje pi'õk nhidji jarẽnh krãptĩkam ne ga ajbã, ane.

<sup>25</sup> Nhyk kum,

—Bẽnjadjwýr Pexu, kati. Ibibãnh kêt. Mrãmri ne ba katãt ikabẽn jarẽnhkumrẽx ne ibẽno ibikẽnh kêt.

<sup>26</sup> Bẽnjadjwýr raxbẽ Angripa kute imarkumrẽx. Kam ne ije amipudjur kêt ne tu aminẽje kum ikabẽn jarẽnhkumrẽx. Djãm me kute mýjjao bipdjur ne o ba? Kati. <sup>27</sup> Nãm me tu irãri o ba nhym me kunĩ kute omũnh ne mar. Kam Angripadjwý arým prĩne kute mar. Ba ne ba ja mã, ane.

Nãm anen arým Angripa'ýr akẽx ne kum,

—Bẽnjadjwýr rax Angripa, djãm ga ne ga arým Metĩndjwýnh kukwakam kabẽn jarẽnh djwýnh'ã amim, "Mrãmri Metĩndjwýnh kõt me kabẽnkumrẽx"? ane. Arým ba ama. Mrãmri ne ga ã amim ane. Nãm ã Paur kum ane.

<sup>28</sup> Nhyk Angripa kum,

—Aje Kritu'ýr ijo akẽx'ýr, ane.

<sup>29</sup> Nhyk Paur kum,

—Ga ren 'ýr amijo akẽx 'ýr nãr ga ren ikudjwa tu amim Kritu markumrẽx ba ren kam ikĩnhkumrẽx. Me kunĩ kute jakam imaro ýrdjwý ren ikudjwa tu amim markumrẽx ba ren mekam ikĩnhkumrẽx. Jao ne ba Metĩndjwýnhmã a'uw. Nhyk ren me kute ikudjwa adjuwprekambit ne ba ren ikĩnh kêt.

<sup>30</sup> Nãm Paur ã Angripamã ane. Nhyk kam bẽnjadjwýr rax Angripamẽ bẽnjadjwýr Pexumẽ Bernimẽ ar ja nhikõ'ã me ýrjamẽ arým kãjmã dja. <sup>31</sup> Kãjmã djan kubẽ akẽx ne mõn kãxã o aben maro djan abenmã kum,

—Ne ren axwe gwaj ren kubĩ nãr kubẽ ijẽ. Nhyk be, kati. Axwe kêtumrẽx, ane.

<sup>32</sup> Nhyk kam Angripa Pexumã kum,

—Ren kute amã arẽnh kêt ne ren kute amã, "Ba gop bẽnjadjwýr raxbẽ Xedjamã aminẽje ikabẽn jarẽ", anhýr kêt, gwaj ren arým kum banhire nhym ren ta mekõt ar ba, ane.

## 27

*Me kute krĩraxbẽ Rõmamã Pauro mõr.*

<sup>1</sup> Nhyk kam bẽnjadjwýr ar memã kum,

—Me on ngõkõt pykabẽ Itarij'ýr mebẽ ijẽjao mõ, ane. Ne kam arým krãkamngõnho ba djwýnh nhidjibẽ Jurmã Paur ar arẽ. Paurmẽ mebẽ ijẽ kwýmẽ ne meo ba djwýnhmã arẽ. Kum arẽ nhym arým kute pykabẽ Itarij'ýr meo mõrmã. Jurbẽ ne bẽnjadjwýr raxbẽ Xedja nhõ krãkamngõnh krãptĩ: kubẽ 100 nhõ bẽnjadjwýr 'õ. Ba ibẽ Ruka ne ba ajte mekõt tẽ.

<sup>2</sup> Ba me kam pykabẽ Itarij'ýr imõrmãnh kam krĩraxbẽ Amitukam me ja nhõ kãraxmã wadjãnh arým inox ne. Pykabẽ Adjij'ãnh ne me kute kãraxo mõrmã. Me'õ nhidjibẽ Arxaku ne me ikõt

tē. Pykabê Matenikam krīraxbê Texarōnikakam ne abatānh djà.

<sup>3</sup> Ba me kàraxkam mō: nhyṃ me ijā akati. Ba me kam krīraxbê Xidō'ā kàrax nhō. Nhyṃ Jur kum Paur kaprīn kum,

—Ajrā. Anhōbikwa'yr wabi gē ar ajo djuw mex, ane. Nhyṃ ar'yr wabin ar ikō'ā nhŷ:n kam ajte akubyn kàraxmā wadjà. <sup>4</sup> Ba me kam inox ne. Ne apēxtibê Xipre tekre'ānh mō, kōk me ikutā àbêrkam. <sup>5</sup> Ne kam pykabê Xirxij'ānh mō:n kam amipānh kumē. Ne pykabê Papirij'ānh mō:n kam amipānh kumē. Ne kam arŷm pykabê Rixijkam krīraxbê Mire'yr bōx ne kam kàrax nhō.

<sup>6</sup> Nhyṃ kam krākamngōnh kubē 100 nhō bēnjadjwŷr arŷm kàrax 'ōdjwŷmā kato. Nām krīraxbê Arexākam me ja nhō kàraxmā kato. Kà wākam ne me kute pykabê Itarij'yr mōrmā. Nhyṃ kam me ijo tē ba me kà wāmā wadjà. <sup>7</sup> Ne kam inox ne mō. Ne iprī'ā mō: nhyṃ arŷm me ijā akati kwŷ apēx. Ba me kam krīraxbê Nidju tépo mō. Nhyṃ kōk djàbêr tŷ:x me ibê aptà ba me kam aparmā apēxtibê Kreta'yr mō. Mō:n kam Kretakam krānh krā'yrbê Xamona'ānh mō. <sup>8</sup> Ne kam iprī'ā mō:n kam arŷm amipānh Xamona mē. Ne kam kàrax nhikwā djà nhidjibê Kà jarij djà mexte'yr bōx ne 'ā kàrax nhō. Krīraxbê Raxêr kuri ne nō.

<sup>9</sup> Nhyṃ kam me ijā akati krāptī apēx. Nhyṃ Paur amim,

—E kum, arŷm ne ba me amikrà nhyṃ arŷm na 'itŷx 'yr. Na 'itŷx'ā mytyrwŷ bōx 'yr. Be, arŷm me kute amijajbur'ā akati apēx. Me ibê idjaer kute Met'indjwŷnhmā amijajbur djà nhō akatija apēxkam na 'itŷx kumex. Arŷm na 'itŷx kumexkam ne ba me imā imōr pyma:, ngō raxbê pyka kētkam me imōrja pyma:, ane. Ne kam memā kum,

<sup>10</sup> —Ikabēn dja gar ama. Dja gwaj ngō raxbê pyka kētkam mō nhyṃ na arŷm gwaj bajo ajkē. Ne arŷm kākam me jēnhmē kàraxo bikēnh mex ne. Ja ne ba gwaj bakukām kuma. Nām ā Paur memā ane. <sup>11</sup> Nhyṃ krākamngōnh nhō bēnjadjwŷrja Paur kōt kabēn djir kēt. Nām kào akēx djwŷnhmē ō kàrax djwŷnh kōt kabēn dji. <sup>12</sup> Ne kam me kute na 'itŷx apēx jamārbê kàrax nhikwā djà punure. Nhyṃ me bēn 'ātom ne abenmā kum,

—Gwaj on banox ne amū krīraxbê Penixij'yr babōxmā. Ne kam kam na 'itŷx apēx kam ama, ane. Be, apēxtibê Kreta tām kam ne krīraxbê Penixij. Penixijkam kà nhikwā djākam dja aparmā kōk 'itŷx wabê nār kāj mā wabê nhyṃ bu'ā akàx kōkbê aptà nhyṃ kàrax nōr mex ne.

*Kōk tŷ:x kute tu kàrax rēnhō mōr.*

<sup>13</sup> Nām me bēn 'ātom nhyṃ kōkdjwŷ arŷm aparmā kāj bē wabē. Nhyṃ me arŷm abenmā kum,

—Aje. Jakam arŷm 'yr me banox kadjy mexkumrēx, ane. Ne kam arŷm djudjêdjêti'ā kēn 'āprejao wabin kàraxkam kudji. Ba me kam mō. Apēxtibê Kreta 'ānh mō. <sup>14</sup> Nhyṃ kāj bē 'ātūm nhyṃ kōk arŷm àbêr tŷx ne. Kōk djàbêr tŷx jamā ne me kum Juraku jarē. <sup>15</sup> Nhyṃ arŷm kōk djàbêr tŷ:x ne tu kàrax rēnhō mō. Rēnhō mō: ba me kam arŷm tu kum inhire nhyṃ kōk arek o mō.

<sup>16-17</sup> Nhyṃ kam kà arŷm kōk djàbêr kōt apēxti nhidjibê Kraōdja tekre'ānh mō. Amrēbē ne ba me kàrax katē'ā kà ngrire nhōn o mō. Ne kam arŷm jakam idjapēnh rax ne kà ngrireo wabin kàraxkam kudji. Nhyṃ kam me djudjêdjêtio ibūmkōt kàrax'ā kajngāro tē. Ngō tŷ:x kute kàrax ka'ék kēt kadjy ne me 'ā kajngār. Kōknhōkà raxkam ne ba me mō. Kōknhōkà raxkam ne me par kwŷ pumjuw nhyṃ ku'ē tūm. Nhyṃ me apŷnh pīo krābē

o kapan ajte kraxbê o kapa. Ne pĩ'ã apýnh kubêkãti janhõ. Kõk kute o mõr tỳx kadjy ne me 'ã anhõ. Ba me mõ: nhym kõk me ijo mõr tỳ:x ne. Nhym kute arerek'õ'ã kàrax mēnh karõ ne me arým par'ã wabin kubêkãtimē kukràdjã kunĩ bõn arým o ruwn kudjin kam nhỹ. Nhym kõk arek kàraxo mõ. Nhym arým kã kajgon prĩ'ã mõ. Arerek wã nhidjibê ne Xixi.

<sup>18</sup> Nhym kõk djãbêr tỳ:x ne me ijo àbêr tỳ:x. Nhym kàrax amijadjwýr tỳxo mõrri: nhym 'ã akati. Nhym me kàrax kajkritmã arým ngõnhmã kãkam me jēnh kwý rē. <sup>19</sup> Nhym kam arým me inox'ã akatibê 3 apêx ba me arým ngõnhmã kàraxkam apýnh kukràdjã kwý rē. <sup>20</sup> Ne kam mõ: nhym arngromē kanhēti amirĩt kêt'ã arým akati krãptĩ apêx. Nhym kõk 'itỳ:x me ijo mõr tỳx rã'ã ne. Ba me te: amipytãr djã'õ jabej ar irĩt ne arým idjumar punure ne.

<sup>21</sup> Ne mõn arým inhõ kwý krēn kêt 'ãtũm ne. Nhym kam Paur kãkam me àpēnh'ýr tēn arým me ipõkri djan memã kum,

—Ë, ba ar amã arē gar ama. Nã gãm ren ar amũja'ã ikõt akabēn dji gwaj ren apēxtibē Kreta'ãnh arek wajēt. Ne ren kam badjumar mex nhym ren mýjja'õ biknor kêt. <sup>22</sup> Jakam dja gar akubyn adjumar mex ne atỳx. Dja te kàrax wadjã nhym ngõ kute gwaj bajõnh bĩn prãm kêtukumrēx.

<sup>23</sup> Be, akamãtkam Metĩndjwýnh kadjy mrãnh djwýnh'õ iwýr bõx ne ikuri dja. Metĩndjwýnh ta ne mã ijo ba, ba kum idjãpēnh ar iba. <sup>24</sup> Kadjy mrãnh djwýnhja ne imã, “Paur, on atĩn prãm kêt. Dja ga bēnjadjwýr raxbê Xedja kabem adjãmukumrēx. Nhym aro'ã me mõrwã ne Metĩndjwýnh arým akõt me kunĩ dja. Akõt dja me tyk kêtukumrēx”, ane.

<sup>25</sup> Be, ã kute imã anhýrkam dja gar adjumar mex. Mrãmri

dja amikabēn kõt ngõbê gwaj bapytãrkumrēx. Metĩndjwýnh kute gwaj bapytãrja ne ba tu amim kamnhĩxkumrēx. <sup>26</sup> Nhym kam mrãmri kõk 'itỳx dja apēxti'õ'ã gwaj bamēnhkumrēx. Kàraxmē ro'ã gwaj bamēnhkumrēx, ane.

*Kàrax bika'èk'ã ujarēnh.*

<sup>27</sup> Nhym kam arým me inox'ã akatibê 14 apêx nhym akamãtkam ngõ raxbê pyka kêt nhidjibê Angrikukam kõk 'itỳx ari: kàraxo ba. Nhym akamãt kõ ipõkri kãkam me àpēnh abenmã kum,

—Ë, kute akãx'ýr kã arým mõr pyrãk, ane. <sup>28</sup> Ne kam koror jabej ngõ'ã kadjãt'ã tu jakre nhym 'ã djudjēdjēbē 30 metu apêx. Nhym me kam amak ngriren ajte 'ã kadjãt jakre. Nhym arým kãjbē krãn 'ã 27 metu apêx.

<sup>29</sup> Nhym kàrax kēn'ã bika'èk karõ me arým ngõnhmã djudjēdjēti mē. Djudjēdjēti'ã kēn 'ãpreja mēn ajte ja mēn ajte ja mēn ajte ja mē. Nhym kēn arým akubyn kàrax pynē. Nhym me'ã akatio wajēt ne arým axwe umar. <sup>30</sup> Nhym kam kàraxkam me àpēnh bit kute mebē amipdjur ne amijã maje kàrax kurũm katomã. Nãm me 'èx ne memã kum,

—Ba me kã ngrirekam djudjēdjēti'ã kēn 'ãpreja'õ nhýr ne o ikaton kã krwýt'ãnh kumē gé akubyn kã krwýt pynē, ane. Ne kam djudjēdjēti'ã kã ngrireo ruwn bit ngõnhmã mēnhmã. <sup>31</sup> Nhym Paur arým me krãkamngõnhmē mebē 100 nhõ bēnjadjwýr'ýr tēn memã kum,

—Dja me wã mõn arým utãr djã kêt ne me gadjwý apytãr djã kêt, ane. <sup>32</sup> Nhym me krãkamngõnh arým 'ýr mõn 'ã djudjēdjēti kunĩ jakã. Nhym arým kã ngrire mebē ngõnhmã nox ne akuno.

<sup>33</sup> Nhym arým akati tē nhym Paur arým memã arēn memã kum,

—Nã gãm ar kôk apêxkam amakbê amijajbu nhyr arým ar ajã pi'ók kamrêk amãnhkrut apêx.  
<sup>34</sup> Ar atýx kadjy gop on ar anhõ kwý krê. Ngõ kute ar apar prãm kêtumrêx.

<sup>35</sup> Nãm ã memã anen arým djwý'õ by. Ne me kunĩ nhípókri Metĩndjwýnhmã amikĩnh jarên kokij ne arým krênmo krax ne.  
<sup>36</sup> Nhyr kam me kunĩ akubyn kĩnh ne adjwýnhdjwý õ kwý krêno kumex.  
<sup>37</sup> Kàraxkam me ikunĩ ne me ikràptĩ. Me kute me ijã akrebê 276.  
<sup>38</sup> Nhyr me õ kwý krên arým ajne. Ne kam kàrax kajkritmã ngõnhmã jênh rê. Atemã bàygogo 'yo jênh rê.

<sup>39</sup> Nhyr arým akati. Nhyr me arým pyka pumũ. Nhyr me'õ kute amrêbê pyka pumũnh kêtumrêx. Nhyr wãnh pyka kute aktã ngõ nhijêkam ngõ binhikrênhja. Nhyr me arým amybým kàrax kadjy omũ. Ne kam abenmã kum,

—E kum, gwaj 'ýr kam mãn kàraxo wadjã gê umar mex, ane.

<sup>40</sup> Ne kam arým kên kunĩ'ã djudjêdjêti 'ãpre bôn tu kum ire. Ne kã katê pynênh djã'ã djudjêdjê 'ãpre bô. Ne kam kã krwýt'ãnh par'ã kubêkãtio wabin 'ã kunhõ, kôk kute kàraxo mör týx kadjy. Ne arým akãx'ýr kàrax krão akêx ne.  
<sup>41</sup> Nhyr kam kàrax arým ngõ kute aben mok djã'ýr bõx. Kam ne kororre. Ne mõn 'ã nõn arým 'ã nõr týx mex ne. Nhyr ngõ djãkã 'ity:x arým kàrax katê titik ne ka'êko mõ.

<sup>42</sup> Nhyr krãkamngõnh ar abenmã kum,

—Mebê ijê tũm nox ne akãxmã rêr ne atýxã àbir ne mã prõt kêtiri gwaj me kupa, ane.  
<sup>43</sup> Nhyr krãkamngõnh nhõ bẽnjadjwýr Paur'ã maje akubyn me unên memã kum,

—Kwãrik wãnh. Gê me rêrja kumrêx tu nox ne rên akãx'ã wabi.  
<sup>44</sup> Gê me rêr kêt pĩponh jamý nãr ngõ kute kã ka'êk jamýn 'ã mekõt

rê, ane. Ba me kam ikunĩ arým inox ne. Ne kam ikunĩ arým akãx'ã wabi.

## 28

*Apêxtibê Matãkam ar ba.*

<sup>1</sup> Ba me arým wabi nhyr me bajtem apêxtikam ar baja me imã,

—Apêxti ja nhidjibê ne Matã, ane. Ba me kam kuma.  
<sup>2</sup> Nhyr kam namê krykam apêxtikam me bajtemja kum me ikaprĩkumrêx. Ne kam arým me imã kuton me imã kabên mextire.

<sup>3</sup> Nhyr Paur arým pĩ ngrã kwý karwãn kuwykam adjuw. Nhyr kangã djãkrê kuwy pymaje pĩ ngrã kurũm katon arým Paur nhikra nhãn 'ã wajêt.  
<sup>4</sup> Nhyr me arým ikra'ã kangã jêtkõt omũn abenmã kum,

—Be, tãmwãbê ne me par djwýnh'õ. Jakam dja ty. Ngõ ne kute bĩn kêt nhyr be, kangã dja kubĩ. Axwe pãnh dja ty, ane.

<sup>5</sup> Nhyr kangã ikra'ã wajêt nhyr tu kum ikra wabê nhyr arým kuwykam tým. Nhyr kam tokry kêt ne.  
<sup>6</sup> Nhyr me te Paur nhigot jabej. Nãr, me aêrbê tyk ne tým karõ te 'ã ajkam ama. Te kam ama:n omũnhõ kumex. Omũnh 'ãtũm nhyr ajmã kute kêtumrêx. Nhyr kam me atemã kabên djin abenmã kum,

—Be, kubê ne metĩndjwýnh'õ, ane.

<sup>7</sup> Apêxti tãmkam bẽnjadjwýr nhidjibê Pubriju. Õ pyka kuri ne ba me dja. Pubriju me imã,

—Inhõ kikrekam dja gar nhý, ane. Bar kam 'ýr mõn kam nhý nhyr arým me ijo djuw mex mexkumrêx. Ba me kam kam inhýr'ã akati amãnhkrut ne ikjêkêt apêx.

<sup>8</sup> Nhyr kam Pubriju bãm kute ir djwýnhja kã kangron iku:w. Nhyr Paur arým 'ýr wadjãn Metĩndjwýnhmã o a'uw ne krã'ã ikra djin arým o mex ne.  
<sup>9</sup> Nãm

Paur ã o ane nhyr kam apêxtikam me punu kunĩ 'yr bõx nhyr arým me o mex ne. <sup>10</sup> Nhyr kam me me imã mýjja kumex ngã. Ba me kam arým inoxmã. Nhyr me arým apýnh me imã mýjja kĩnh djàri kàraxkam kumex ne.

*Krĩraxbê Rõma'yr mõrn bõx.*

<sup>11</sup> Me inox kêtiri ne apêxtikam me ijã mytyrwýbê amãnhkrut ne ikjêkêt apêx. Ba me arým inox ne. Krĩraxbê Arexãkam me õ kàraxkam inox ne. Nãm me amrêbê amex jamãrbê apêxti'ãnh kàraxja nhõ. Kàrax krwýt'a ne me karõ amãnhkrut wajêt. Ja nhidjibê ne Kaxu. Nhyr ja nhidjibê Põr.

<sup>12</sup> Ba me inox ne mõ:n kam krĩraxbê Xiraku'ãnh kàrax nhõ. Nhyr me ijã akati amãnhkrut ne ikjêkêt apêx.

<sup>13</sup> Ne kam ajte inox ne pyka 'ãnh mõ:n kam krĩraxbê Reguju'yr bõx. Ne kam me aã'ã mõ: nhyr me ijã akati. Nhyr kam kãjmã kõk wabê ba me ajte akatikam krĩraxbê Poteroj'yr bõx ne 'ãnh kã nhõ.

<sup>14</sup> Bar kam wabin Jeju kukwakam me kute abeno kamy kwý jabej ne memã ikato. Nhyr me ar imã,

—Dja gar inhũrkwãkam nhỹ, ane. Bar kam nhỹ. Nhyr ar ijã akatibê 7 apêx. Bar kam itekõt krĩraxbê Rõma'yr mõ.

<sup>15</sup> Nhyr kam me amũ krĩraxbê Rõmakam Jeju kukwakam me kute abeno kamymã ar ijarê. Nhyr me arým ar ikutã mõ, kute ar ikajpar kadjy. Ne kam Apiju'ãnh djwý jamýnh djãmê me õt djãbê 3mê kam bõx. Bar kam me'yr bõx. Nhyr kam Paur me omũn arým Metĩndjwýnhmã amikĩnh jarẽn akubyn týx ne.

<sup>16</sup> Ba me kam mõ:n arým krĩraxbê Rõma'yr bõx. Nhyr kam krãkamngõnh krãpti: kubê 100 nhõ bẽnjadjwýrja mebê ijê tũmo bõx. Me nêje ku'ê djwýnh nhõ bẽnjadjwýrmã mebê ijê tũm kunõ bõx. Nhyr

arým mebê ijê djãkam mebê ijê. Nhyr be, me Paurmã kum,

—Ga dja ga anhõ kikrekam nhỹ. Krãkamngõnh pydjibit dja anêje nhỹ, ane. Nhyr kam me'õ nhũrkwã purokam nhỹ.

*Kute Rõmakam mebê idjaermã amijarẽnh.*

<sup>17</sup> Nhyr kam arým Paur'ã akatin akatin akati nhyr arým amiwýr mebê idjaer rũnh 'uw nhyr me 'yr bõx ne arým 'ã akuprõ. Nhyr kam memã kum,

—Akmere ar, djãm me babê idjaerkam ne ijaxwe'õ? Nãr djã ne ba me bakukãmãkjê kukràdjã'õo ajkê? Arkati. Ijaxwe kêt nhyr Djeruzarêkam me arým ibê ijên krĩraxbê Rõmakam me jamã ikanga. <sup>18</sup> Nhyr me prĩne ijaxwe jabej ikukij ne ima. Nhyr bẽnjadjwýr ar ijã abenmã kum, “Ren bĩn kadjy axwekumrêx gwaj ren arým kubĩ. Nhyr be, kati. Axwe kêtumrêx”, ane. Ne bit kute imã ikra karo ba itẽmmã.

<sup>19-20</sup> Nhyr mebê idjaer mã kabẽno bẽnjadjwýr ar apa. Ba kam aminêje arkum, “Ba gop bẽnjadjwýr raxbê Xedjamã aminêje ikabẽn jarê”, ane. Nhyr ar arým amrê 'yr ijano ba tẽn bõx. Dja ba aminêje Xedjamã ikabẽn jarê. Djãm ije kum inhõ me wýnhbê idjaer jaxwe'õ jarẽnhmã? Arkati. Imã inhõ me wýnh jabekam ne ba amiwýr ar ajuw. Ije ar apumũnh ne ar amã ikabẽnãmã ne ba amiwýr ar ajuw. Ê, ba ar amã arê gar ama. Dja Metĩndjwýnh akubyn me tyko tĩn. Mebê idjaer ne me tu amiwýr me akubyn tĩn kamnhĩxkumrêx. Badjwý ne ba tu amiwýr kamnhĩxkumrêx. Ije amiwýr kamnhĩxkam ne me arým kãxirãx jao idjuwpre. Nãm ã Paur memã ane.

<sup>21</sup> Nhyr kam me kum,

—Pykabê Djudêjakam ne me nĩnh ar imã ajã pi'õk no'õk kêt. Nhyr

mebê idjaer'õ nĩnh bõx ne kute ajã mŷjja'õ jarēnh kêt. <sup>22</sup> Be, pyka kunĩkõt me kute me kukràdjaja japryõ ba. Jabit ne bar kuma. Nhyh be, ar ba ne bar ije 'ã adju-jarēnh mar prãm, ane.

<sup>23</sup> Ne kam kute mar kadjy kum akati'õ jarē. Nhyh kam me kute kum akati jarēnh bõx nhyh me krãptĩ Paur nhũrkwãmã wadjã. Nhyh kam kryrãm memã ujarēnhmo krax ne akamãtkam o ino re. Metĩndjwŷnh kute amim me utàr ne ar meo ba'ã memã ajarē. Nãm memã Mõdjê kukràdjã jarēn Metĩndjwŷnh kukwakam kabēn jarēnh djwŷnh kunĩ kabēn jarē. Ne me kabēn kõt memã kum,

—Ga, pi'òk kõt Jejubê me banhõ Bēnjadjwŷrbê kumkatija pumũ. Kubê Krituja pumũ. Dja gar tu amim Jeju markumrēx. Nãm ã memã anhŷro nhŷ.

<sup>24</sup> Nhyh me kwŷ tu amim kabēn markumrēx. Nhyh me kwŷ amim kabēn mar kêt. <sup>25</sup> Ne arŷm kabēno aben japanho kumex ne arŷm ajmã. Nhyh me bimãnh kêtri Paur memã kum,

—Idjaij ne amrēbê: Metĩndjwŷnh Karõ kukwakam me akwŷ'ã kabēn jarē. Mrãmri ne arēnhkumrēx. Nãm me bakukãmãmãremã kum,

<sup>26</sup> “Me'ŷr tēn memã ikabēn jarēn memã kum,

‘Dja ga me maro aku'ê kajgon mar kêt ne, kukràdjã'ã mŷjja kute amijakreja mar kêt ne. Ne omũnh kajgon amim omũnhkumrēx kêt.’ Mŷkam?

<sup>27</sup> Bir, arŷm ne ga me adjumar djãkam ajamakkre kêt ne ajamakkre jaduj ne tu ano ngõr. Nã gãm me arĩk ã ibê amijo abao ane. Mŷkam?

Bir, aje anoo omũnh kêtãmã ne aje ajamako mar kêtãmã ne aje ikukràdjã'ã mŷjja kute amijakreja adjumar djãkam mar kêtãmã ne aje iwŷr amijo akēx

ba ije me ajo mex kêtãmã. Nã gãm me ibê ã ajamakkre kêtãmē ano kêtõ ane.”

Nãm ã me bakukãmãmãre Idjaij ane. Nhyh me bakukãmãmãre aben djõ'ã arēnho mõ:. Arēnho mõr tãmtã arŷm me awŷr o bõx. Tũ:mrãm ga me akamingrãnyre ã ikabēn mar kajgoo ane.

<sup>28</sup> Me aje ikabēn mar kajgokam dja Metĩndjwŷnh arŷm me bajtemã ijano. Dja ba memã Metĩndjwŷnh kute me utàr'ã ajarē nhyh me arŷm tu amim markumrēx nhyh kam arŷm me axwebê me utã. Nãm ã memã ane.

<sup>29</sup> Paur mebê idjaermã arēnh pa nhyh me arŷm mã kubê mõ. Ne aktã kabēno aben japanho mõ.

<sup>30</sup> Nhyh kam Paur ta am-inhũrkwãkam arek krĩ nhyh 'ã amex ne ajte 'ã amex. Paur ta õ pi'òk kaprĩõ õ kikre djwŷnhmã ŷrkwãõ pãnh. Nãm ŷrkwãkam nhŷ nhyh me mã 'ŷr ban bõx nhyh mã kam me kunĩõ djuw mex. <sup>31</sup> Ne kãj bê Metĩndjwŷnh kute amim me utàr ne ar meo baja'ã memã ujarēnho krĩ. Ne mã memã Bēnjadjwŷr djwŷnhbê Jeju Kritu'ã kukràdjã jarēnho krĩ. Nãm kum me uma kêt ne ã memã arēnho ane. Nhyh me'õ kubê àptàr kêtumrēx. Tãm ne ja.



## **Paur kute Rômakam me jamã pi'òk no'òk ne ja.**

Paur ne krĩraxbê Rômakam me jamã pi'òk no'òk ne. Nãm krĩraxbê Rôma 'yr tẽm kutã memã pi'òk no'òk ne. Nãm 'yr tẽm kêt rã'ã, kute Rôma pumũnh kêt rã'ã ne kam 'yr tẽmmã krã ne kam amikukãm memã pi'òk no'òk jano. Me kute Jeju mar kute omũnh ne kam òkre kadjwýnhbê kute amim,

—Nã mrãmri ne Metĩndjwýnh kute Paur janor. Nãm prĩne kute Metĩndjwýnh kukrãdjã marja pumũ, anhýr kadjy. Kam ne Paur memã Metĩndjwýnh kukrãdjã'ã ajarẽn memã kum,

—Me kunĩ ne me axwe, ane. Mebê idjaer nãr, pyka kunĩkõt me kunĩ axwekam mexo kute Metĩndjwýnh tẽp kêtumrẽx. Nhy m be Metĩndjwýnh ukaprĩkõt arým me bamã me bapytãr djwýnh jano. Me bamã kurê rã'ãkam, bamã bajaxwe kĩnh rã'ãkam me bawýr me utãr djwýnh jano. Nhy m kam me kunĩ, mebê idjaer, nãr kon pyka kunĩkõt me kunĩ dja me tu amim Jeju markumrẽx nhy m Metĩndjwýnh arým meo kra ne meo týt, axwebê meo týt nhy m me arým katãt ar amijo ba. Nhy m Metĩndjwýnh dja kum me abê rã'ã rã'ã rã'ã. Ne kam ajte amũ akati 'ò kam dja ajte mebê idjaero týt nhy m me arým 'yr amijo akẽx. Nãm ã Paur memã ane. Tãm ne ja.

<sup>1</sup> Ba ibê Paur. Ibê Jeju Kritu nhõ àpẽnh. Ta ne amiwýr ijuw ne arým mebê amim ipytãn ar ijo ba. Ijo ban arým ijano ba arým Kritu'ã ujarẽnh ny jarẽnhõ iba. <sup>2</sup> Amrêbê: ne kukwakam memã kabẽn jarẽnh djwýnh ar me

bakukãmãremã ujarẽnh ny jarẽnh mã memã kum, “Dja Metĩndjwýnh ĩ memã ujarẽnh ny jarẽ.”

Nãm me ã Metĩndjwýnh nhõ pi'òkkam memã ane. <sup>3</sup> Kra'ã ne ujarẽnh nyja. Krabê Jeju Kritu'ã ne ujarẽnh nyja. Me banhõ Bẽnjadjwýrbê kumkati'ã ne ujarẽnh nyja. Nãm Kra amijo ĩ ne nã kurũm kato. Nã kurũm katon arým kõt kubê me bakukãmãre Dawi tãmdjwý. <sup>4</sup> Ne kam tyn akubyn tĩn nhy m kam Metĩndjwýnh Karõ arým memã týt jadjã nhy m me arým týt. Týt ne arým memã Jeju'ã ujarẽnh ar ba. Ne memã kum,

—Mrãmri, Jejubê Metĩndjwýnh Krakumrẽx. Ga, tyk ne akubyn tĩnja pumũ, anhýro ba. <sup>5</sup> Ta ne tu kum ikaprĩn ijano ba arým memã 'ã idjujarẽnh ar iba. Gêdja apýnh me ba djã kunĩkõt me idjujarẽnh man arým tu amim Jeju markumrẽx ne arým katãt kabẽn man kõt ar amijo ba. Ja kadjy ne ijano ba Jeju'ã idjujarẽnh ar iba. <sup>6</sup> Ga, ar gadjwý Jeju Kritu kute amiwýr ar ajwýr ne ar ajo baja pumũ.

<sup>7</sup> Krĩraxbê Rômakam Metĩndjwýnh kum ar ajabê. Kute ar ajo aminhõ kadjy arým amiwýr ar ajuw ne ar ajo ba. Ar akunĩmã ne ba pi'òk no'òkjakam ikabẽn jarẽ.

Gê Metĩndjwýnh tu kum ar akaprĩ. Kubê ne me Babãm. Ne kam Bẽnjadjwýr djwýnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

*Paur kute Rômakam me omũnh prãm'ã amijarẽnh ne ja.*

<sup>8</sup> Ba mã ijo ba djwýnh, Metĩndjwýnh kumrẽxmã ar ajarẽn mã kum ar akunĩkam amikĩnh jarẽ. Apýnh me ba djã kunĩkõt ne me ar ajã abenmã kum,

—Onĩj, Krĩraxbê Rômakam me arým tu amim Jeju markumrẽx,

\* 1:7 Djãm gwaj ba ne gwaj bajaxwe kêt nhy m pãnh kum gwaj bakaprĩ Kati. Gwaj ba ne gwaj te bajaxwe kêtãm. Nhy m be, ta ne tu kum gwaj bakaprĩ.

anhÿro ba. Ba kam ar akam ikĩnhkumrëx.

<sup>9-10</sup> Ne Metĩndjwÿnhmã ar ajarënh rã'ã ne. Kum idjã'wÿr kunĩkôt ne ba mã kum ar ajarë. Ba ar awÿr itëm kadjy mã kum amijo a'uw ne kum,

—Djünwã, ba jakam krĩraxbê Rômakam ar'ÿr tën ar'ÿr bôx, idjumar mex ne ar'ÿr bôx. Ga mrãmri aje ar'ÿr ibôx'ã amim karô jabej ba jakam ar'ÿr ibôxkumrëx. Nã bãm ã kum amijo idjã'wÿro ane. Mrãmri ne ba ar awÿr ikrã ne. Djã nã bãm ar amã ijëx? Metĩndjwÿnh ta ne kute ar amã ijëx kêt kôt kute imar. Djãm kum idjãpënh kêt got? Mrãmri Kra'ã ujarënh ny ne ba kãj bê memã arënho ibakumrëx. Kam ne ba mrãmri ar amã arënhkumrëx.

<sup>11</sup> Mÿkam ne ba ã kum idjã'wÿro ane? Bir, ije ar apumũnh prã:mkam. Dja ba ar akam bôx ne Metĩndjwÿnh kadjy arÿm ar amã adjãpënh djã'õ'ã karô. Metĩndjwÿnh Karô kukwakam ar amã 'ã karô gar arÿm maro aban arÿm Jejukôt ar amijo aba. Kôt ar amijo aban arÿm 'ã angrã tÿx ne 'ã adjukanga kêt kumrëx. <sup>12</sup> Gwaj kam baje tu amim Jeju markumrëx'ã aben pumũn arÿm aben man kam tu amim Jeju mar tÿ:xkumrëx ne bakĩnhkumrëx.

<sup>13</sup> Bir, ar awÿr itëmmã ne ba mã amim 'ã karô krãptĩ nhym apÿnh mÿjja mã ibë aptã. Ar aje imar kêt karô ne ba ar amã ja jarë. Imã ar awÿr ibôx prãm. Ga, me kute bãygogo djëo baja pumũ. Arÿm me kute é parkam kĩnhkumrëx. Badjwÿ dja ba ar akam bôx ne Jeju'ÿr me kwÿo akëx nhym me arÿm tu amim markumrëx. Tu amim markumrëx ba kam arÿm ikĩnhkumrëx. Ije me akam Jeju'ÿr meo akëx prãm kute mrãmri ne ba ije pyka 'õkamdjwÿ arÿm 'ÿr meo akëxja pyrãk. Kute arÿm ije amũ me bajtem 'õdjwÿkam 'ÿr meo akëx pyrãk. Me ibë idjaer ne ba me mebê idjaer këto me bajtemo iba. Ba ne ba ije

Metĩndjwÿnh'ÿr me bajtemo akëx prãm kumrëx.

<sup>14</sup> Jeju imã me kunĩ'ã karôkôt ne ba ije me kunĩmã 'ã ujarënh ny jarënh prãm. Me krôr tũmbê kregujamë me krôr nyjamã ije arënh prãm. Ne me krã mexmë me krã mex kët mã ije arënh prãm. Ije Jeju'ÿr meo akëx kadjy ne ba ije memã arënh prãm. <sup>15</sup> Kam krĩraxbê Rômakam me gadjwÿmã ije Kritu'ã ujarënh ny jarënh prã:mkam ne ba dja.

<sup>16</sup> Bir, djãm ije Kritu'ã ujarënh ny jarënhbê ipijãm? Kati. Ba arënhkumrëx nhym me arÿm kwÿ ï pÿnhkôt tu amim markumrëx nhym kam Metĩndjwÿnh arÿm me utã. Tÿxkôt me utã. Mebê idjaer kumrëx ne me utã. Ne kam me bajtembê kregujadjwÿ me utã. Kam ne ba ije arënhbê ipijãm kêt kumrëx. <sup>17</sup> Ujarënh nykam ne Metĩndjwÿnh kute memã axwe kêt jarënhjao amirĩt gwaj arÿm kam kuma. Dja me tu amim markumrëx nhym arÿm memã axwe kêt jarë nhym me arÿm kum mex. Dja me tu amim markumrëx ne amim marbê ar ba rã'ã: ne. Me bakukãmãre kabën kôt ne ba ar amã arë. Amrëbê: me bakukãmãre memã kum,

“Metĩndjwÿnh kute memã axwe kêt jarënh nhym me arÿm kum mexja dja me tu amikajmã'ã markumrëx ne arÿm tĩn ne ar ba”, ane.

Amrëbê: ne me bakukãmãre memã ja jarë nhym me arÿm 'ã pi'ók no'ók ne. Kam mrãmri dja me tu amim Kritu markumrëx nhym Metĩndjwÿnh arÿm memã axwe kêt jarënhkumrëx nhym me arÿm kum mexkumrëx ne. Nãm ã meo ane ba kam krĩraxbê Rômakam ar aje amim Jeju marjamã arë.

*Paur kute memã Metĩndjwÿnh mekam ngryk jarënh ne ja.*

<sup>18</sup> Nhym be, atemã mÿjja ne Metĩndjwÿnh kute me axwemã

o amirît. Amingryk ne memã o amirît. Me kute Metîndjwÿnh mar prãm kêt ne axweja kunîkam ne ngryk ne. Me axwekam kute amim,

—Kati. Ije kabên katâtã mar prãm kêt, anhÿro bajamã ne mekam ngryko amirît ne. 19-20 Godja me kwÿ amim,

—Mÿkam ne Metîndjwÿnh ikam ngryk ne? Djãm arÿm imã amijo amirît ba kuma? Kati. Ta kute imã amijo amirît kêt kam ne tu ikam ngryk ne, ane. Djãm mrãmri ne me kwÿ kabênja? Kati. Nãm me 'êx. Arÿm ne me Metîndjwÿnh man mar kajgo. Me te kute noo omÿnh kêt nhyM Metîndjwÿnh arÿm prîne memã amijã mÿjja kwÿo amirît ne nhyM me arÿm kuma. Tÿ:xi ne tÿx rã'ã: rã'ã ne. Kubê me kunîmê mÿjja kunî tîn djwÿnhkumrêx. Ja ne o amirît nhyM me arÿm kuma. Adjâkamã ne mÿjja kunî: nhîpêx nhyM me arÿm omÿ. Jakamdjwÿ mÿjja rã'ã nhyM me arÿm omÿ. Mÿjja rÿnh, mÿjja puma, mÿjja tîn nhyM me arÿm prîne omÿn arÿm apôkmã amim,

—Be, Metîndjwÿnh tÿ:xi ne tÿx rã'ã: rã'ã ne. Kubê ne mÿjja kunî, me kunî tîn djwÿnhkumrêx. Nãm me ã amim anen arÿm Metîndjwÿnh man kam mar kajgo.

<sup>21</sup> Djãm me kute markam kum,

—Metîndjwÿnh ara:x ne apuma:kumrêx. Me imã akî:nhkumrêx? ane. Arkati. Nãm me te Metîndjwÿnh man kum rax jarênh kêt ne ate kubê krã. Ate kubê krãkam ne me arÿm arîk amim mÿjja'ã karô punuo ba. Bën katikumrêxkam ne me arÿm no kêt ne kam arÿm umar djâkam kute akamât kô tyk pyrâk. <sup>22</sup> Me ta ne me amijo krã mex ne amijo àmra ar ba. Ne kam mrãmri arÿm no kêt kumrêx. <sup>23</sup> Ne kam arÿm Metîndjwÿnh raxo kubê kumkatija

mar kangan kum amijarênh kanga, Metîndjwÿnh tîno kubê kumkatija kanga. Ne ate kam pãnh apÿnh mebêngôkre,† ãk, mry, mry ngãngão mrãnh, apÿnh mÿjja tîn 'ikrãn maro ba. Maro ban arÿm karô nhîpêx ne o Metîndjwÿnh ne kum amijarênh ba.

<sup>24</sup> NhyM kam Metîndjwÿnh arÿm wãnh memã ire. Me kum mÿjja punu prãmja ta kute wãnh ar o ba kadjy wãnh memã ire. Me ta kute wãnh ari prô, mjên kupa'ã kurê ba kadjy. Me ta kute aben nhîo àpnu kadjy. Ja kadjy ne wãnh memã ire. <sup>25</sup> Mrãmri Metîndjwÿnh katât amikabên jarênhkumrêx nhyM me arÿm aminhirôbê kabên rê. Aminhirôbê kabên rên arÿm pãnh me 'êxnhî kabên'ÿr amijo akêx ne kôt ar amijo ba. Me ren mÿjja kunî nhîpêx djwÿnh maro ban ren kum rax jarênh ba ban ren kum àpênh ar ba rã'ã ne. NhyM be, kati. Nãm me kangan arÿm mÿjja nhîpêxmãbit rax jarênh ba ban kum àpênh ar ba. NhyM be, mrãmri ne mÿjja kunî nhîpêx djwÿnh ra:xi. Me kute amim marja kute kum rax jarênh rã'ã: rã'ã ne. Mrãmri ne ba ar amã arênhkumrêx.

<sup>26</sup> NhyM be, me axwe ne me Metîndjwÿnh kanga. NhyM kam Metîndjwÿnh arÿm wãnh memã ire. Me kum mÿjja punu prãm ta kute wãnh ar o ba kadjy ne wãnh memã ire. NhyM me arÿm pijàm kêt ne axwe amijo ban kam abenbê me kupênh ba prã:m. Me nire axwe amijo ban me my kangan arÿm amikupa'ã me nire kupênh ba. <sup>27</sup> NhyM me mydjwÿ axwe amijo ban me ni kangan aktã kurê prã:mkam pijàm kêt kam amikupa'ã me my kupênh ba. Kam Metîndjwÿnh arÿm memã axwe pãnh jarênh katât. Me ta ne me amijo bikênh mex ne.

<sup>28</sup> Metîndjwÿnh ne kute ô mÿjjakôt

† 1:23 Apÿnh me ô pyka djãri kunîkôt ne me kunî bêngôkre.

arým memã amijo amirît nhy me arým kuma. Ne kute mar râ'ãmã ne ate kam ajte amim,

—Kati. Ije mar prãm kêtkumrêx, anhÿro ba. Mã me kute ã amim anhÿro bakam ne Metîndjwÿnh arým wãnh memã ire. Nhy me kam me arým mÿjja punubit man arým axwe amijo ba.

<sup>29</sup> Ne kam apÿnh axwe kunïo ba tÿ:x ne.

Ne ajte ari prô, mjên kupa'ã kurê ba prã:mkumrêx ne.

Ne ajte meo bikênh kume:x.

Ne ajte kute amim mÿjja rÿnho atom prã:m.

Ne ajte amim meo bikênh'ã karô prã:m.

Ne ajte me ô mÿjja'a ngryk prã:m.

Me axwe amijo bakam ne me ajte aben par prã:m.

Ne ajte kute kabêno aben japanh prã:m.

Ne ajte memã 'êx ne me noo biknor prã:m.

Ne ajte kum me kurê:.

Ne ajte kute me kãxã me arênh prã:m ne.

<sup>30</sup> Me axwe amijo bakam ne me ajte memã me kurê'uk prã:m ne.

Ne ajte kum Metîndjwÿnh kurê:o ba.

Ne ajte tu memã àkjêr prã:m ne.

Ne amijo àmra prã:m ne.

Ne ajte amibên prã:m ne.

Ne ajte apÿnh axwe kumex'ã amim karôo ba prã:m ne.

Nhy me bãmmê me nã ar te ar me akre: nhy me ajte amakkre kêt prã:m ne.

<sup>31</sup> Me axwe kute amijo bakam ne me ajte no kê:t ne.

Ne ajte 'êx ne we memã kabên pydjîn arênh nhy me me mar pydji. Mar pydji nhy me atekam ajte,

—Kati. Dja ba ipêx kêt ne, anen ajte kabên 'ôdjwÿo ikjên kabên pydji mar kêtkumrêx ne.

Ne ajte kum me abê kêtkumrêx ne.

Ne ajte ukapri kêtkumrêx.

<sup>32</sup> Me kute ã amijo anhÿro bajamã ne Metîndjwÿnh arým memã axwe pãnh jarê. Me axwejakam me biknormã. Tãm ne arým memã arê nhy me arým pri ne kuma. Nãm me te kuman axwe amijo ba râ'ã ne. Djãm me axwe amijo babit? Kati. Nãm me ajte apÿnh axwe ja'ã amÿ memã kum,

—Ã amijo ane. Kam ne me kum me akÿnhkumrêx, anhÿro ba. Nãm me ã axweo ane ba kam arým wãm Rômakam me amã arê. Tãm ne ja.

## 2

*Metîndjwÿnh kute memã axwe pãnh jarênh.*

*Mat 13.41; Ruk 13.3; Idja 9.27*

<sup>1</sup> Me akwÿ ne ga me amÿ memãbit axwe jarênhô aba. Djãm me gadjwÿ ajaxwe kêt got ga me amÿ me wã'ã amim,

—Me axwekumrêx. Dja Metîndjwÿnh me axwe pãnh me kanga, ane? Me aje me'ã amim, “Dja me axwe pãnh me kanga”, anhÿr kôt dja Metîndjwÿnh me gadjwÿ arým me akanga. Mÿkam? Bir, me gadjwÿ me ajaxwekam. Me ajaxwe kute mrãmri ne amÿ me wã axwe pyrãk. Me axwe kôt me ajaxwekam dja me gadjwÿ pãnh me akanga. Djãm me aje Metîndjwÿnhmã kum,

—Ijaxwe kêt. Ga ren ikanga kêt, anhÿrmã? Kati. Me gadjwÿ me axwe kôt ajaxwekam ne ga me aje te kum anhÿrmã.

<sup>2</sup> Nhy me, me kute ã axweo bao anhÿrja'ã ne Metîndjwÿnh katã:t memã kum,

—Pãnh dja me biknor tokry djãkam akuno, ane. Tãm ne gwaj baje markumrêx. <sup>3</sup> Me abê pykakam me i kajgo. Akajgokam aje amÿ me wãbit'ã amim, “Dja Metîndjwÿnh pãnh kanga”, anhÿro aba. Ne kam ajte mekôt ã ajaxweo ane. Mekôt ã ajaxweo anhÿrkam djãm apydji Metîndjwÿnh kute

akanga kêtâmâ? Kati. Gadjwÿ. Dja katât amâ ajaxwe jarê ne kam arÿm pânĥ akangakumrêx.

<sup>4</sup> Nâr, ga me te â ajaxweo ane nhym Metîndjwÿnh ukapri ra:x ne ngryk tô:n kute amijâ ngryk nê 'âtû:m. Djâ ne ga me ukapri'â amim, "Kê, djâm mÿjja mex"? ane? Kati. Kwârîk wânĥ â amim anhÿr kêt. Metîndjwÿnh kute me ajaxwebê amiwÿr ajo akêxmâ ne kum me akapri:. Me aje 'ÿr amijo akêxmâ kum me akapri. Djâm me aje amijâ ja mar kêt?

<sup>5</sup> Ga me atekam ajte kubê ajamakkre kêt ne 'ÿr amijo akêx prâm kêt. Be ga, me mǎ kute amim mÿjjao atomja pumû. Me mǎ amim adjuw nhym arÿm mǎ kǎjmǎ ajkamên arÿm kum ra:xja pumû. Ga me aje me urâk ne mǎ ajaxwe nhym mǎ me akam ngryk ne mǎ kǎjmǎ me akam ngryk ajkamê. Nhym kam dja ô akati arÿm me awÿr bôx. Kute katât memǎ axwe pânĥ jarênĥ djâ nhô akati me awÿr bôx nhym arÿm me akam ngry:k ne. Me ajamakkre kêt kam me akam ngry:k ne.

<sup>6</sup> Dja Metîndjwÿnh katât memǎ o pânĥ. Dja katât apÿnh me kute mÿjjao ba kôt memǎ o pânĥ. Me î pÿnhkôt katât memǎ o pânĥ. <sup>7</sup> Me kute arek katât amijo bajamǎ dja katât memǎ o pânĥ. Metîndjwÿnh kute ta amimexo meo mex kadjy, ne kute memǎ, "Amexkumrêx", anhÿr kadjy, ne kute memǎ î ny, î punu prâm kêtja nhôr kadjy ne me arek katât amijo ba. Nhym kam Metîndjwÿnh katât memǎ o pânĥ nhym me arÿm Metîndjwÿnh kôt tîn ne ar ba râ'â: râ'â ne.

<sup>8</sup> Nhym be, me kute amidjwÿnhbit mar ne kute kabên katât kangan me axwe kôt axwe. Dja katât me jadjwÿmǎ o pânĥ ne arÿm mekam ngry:k ne. Nhym kam arÿm mÿjja pyma: mekam apôx. <sup>9</sup> Me me axwe kôt axweja dja me arÿm î pÿnhkôt umar punure ne tîn prâ:m. Mebê idjaer kumrêx dja â

ane. Nhym kam me bajtemdjwÿ â ane.

<sup>10</sup> Nhym be, me mex kôt me mexja dja me arÿm me:xkumrêx nhym Metîndjwÿnh arÿm kum me kî:nhkumrêx. Nhym kam me arÿm umar me:xkumrêx. Mebê idjaer kumrêx dja â umar mexo ane. Nhym kam me bajtemdjwÿ â ane. <sup>11</sup> Mÿkam dja me â ane? Bir, djâm Metîndjwÿnhmǎ me'ô pyman kute kum 'â mamǎ? Arkati. Nâm me kunô kute aben pyrâk ne katât kute memǎ o pânĥkumrêxmǎ.

<sup>12</sup> Metîndjwÿnh ne me bakukâmǎre Môjdjê mǎ kukrâdjâ jarê. Me kute katât amijo ba kadjy kukrâdjâ jarê nhym amû mebê idjaermǎ arê. Nhym kam me aben djô'â kukrâdjâ'â, "Môjdjê kukrâdjâ, Môjdjê kukrâdjâ", anhÿro ba. Dja Metîndjwÿnh katât memǎ axwe pânĥ jarênĥo nhÿ.

Nhym me bajtem, memǎ me kute Môjdjê kukrâdjâ jarênĥ kêtja. Godja me bajtemja kwÿ kam axwe jabej arÿm axwe pânĥ akuno. Djâm kam Metîndjwÿnh kute memǎ kum,

—Aje Môjdjê kukrâdjâ kôt amijo aba kêt kam dja ga akuno, anhÿrmǎ? Kati. Mÿkam? Bir, me kute memǎ Môjdjê kukrâdjâ jarênĥ kêt nhym me kam kute mar kêt. Kam dja â memǎ anhÿr kêt. Nhym kam me arÿm axwe pânĥ akuno. Me biknor tokry djâkam akuno.

Nhym mebê idjaerdjwÿ, memǎ me kute Môjdjê kukrâdjâ jarênĥ tûmja. Godja me kwÿ kam axwe jabej Metîndjwÿnh dja arÿm memǎ kum,

—Aje Môjdjê kukrâdjâ kôt amijo aba kêt kam dja ga akuno, ane. Me kute kukrâdjâ mar ne kôt amijo ba kêt kam dja â memǎ ane. Nhym kam me arÿm axwe pânĥ akuno. Me biknor tokry djâkam akuno. <sup>13</sup> Djâm me kute memǎ kukrâdjâ jarênĥ nhym me kute mar kajgoja djâm Metîndjwÿnh kute memǎ axwe kêt jarênĥ? Kati. Me kute amim

kukràdjà markumrêx ne kôt amijo ba jabit dja memã axwe kêt jarê nhym me arým kum mex ne.

<sup>14</sup> Me bajtemmã me kute Môjdjê kukràdjà jarênh kêtja. Me kwý ta ne me tu kute amikadjwýnhbê kukràdjà mar ne tu kôt ar amijo ba. Kam me kwý ta tu kute mar mexkumrêx ne tu kôt amijo ba mexkumrêx. Te me kute memã Môjdjê kukràdjà jarênh kêt nhym me ta tu kute mar ne kôt ar amijo ba mexkumrêx. <sup>15</sup> Me tu kadjwýnhbê kabên mexkumrêx ne kute mrãmri ne umar djâkam arým Metîndjwýnh kukràdjà no'ók pyrâk. Me ta kute amikadjwýnhbê markam ta tu kute axwe nêje amikukrà. Ne kam axwekam kute amim, “Mrãmri ijaxwe”, nâr axwe kêtka kute amim, “Kati, imexkumrêx”, anhÿr.

<sup>16</sup> Me kwý tu kute kukràdjà kôt amijo ba ja dja Metîndjwýnh ï memã axwe kêt jarê nhym me arým kum mex ne. Amrê ô akati môrn bôxkam dja ã me kwýmã ane. Nhym be me kwý kute mex pyrâk ne te amikadjwýnhbê axwe pudju nhym tu me kuman arým memã pânj jarênhkumrêx. Jeju Krituo dja memã axwe pânj jarênhkumrêx. Ja ne ba ujarênh nykam memã arênhô iba.

*Paur kute memã me kute mex o me akrenh kêt jarênh.*

<sup>17</sup> Be, me ga ne ga me memã kum, “Ba ibê idjaer”, anhÿro aba. Ga me ajte memã kum,

—Ba ne ba Môjdjê kukràdjà kôt ar amijo iba nhym kam Metîndjwýnh kum ikînhkumrêx, anhÿro aba. Ne ajêx ne amijo amran memã kum,

—Me jabit ne ba me ije Metîndjwýnh mar mexkumrêx, anhÿro aba. <sup>18</sup> Nhym me me amã Môjdjê kukràdjà jarê ga me we aje prîne markam we aje Metîndjwýnh kute amim me'ã karô kôt mar ne mÿjja kabin we amijo mÿjja mexbit

pytân memã arê. <sup>19</sup> Ne kam ajte we aje amimarkôt amim,

—Me no rã katât pry'ã mrânj kadjy ne me kute me pa 'amýnh ne kute meo mrânj katât. Ba ije me urâk ne mrãmri ibê katât me no kêtô iba djwýnhkumrêx, anhÿro aba. Ne ajte amim,

—Me axwe ne me kute mrãmri ne akamât kô tykkôt me ar ba pyrâk. Ije mrãmri ne memã pry kurwý djwýnh pyrâk. Ba ne ba ibê me axwe kêt kadjy me akre djwýnh, anhÿro aba. <sup>20</sup> Ne me'ã amim,

—Ba ne ba ibê me no rerekremã kukràdjà jarênh djwýnh. Me kute me kra karâre pyrâk ne me no rerekre. Ba ne ba me no tÿx kadjy memã kukràdjà'ã idjujarênh djwýnhkumrêx, anhÿro aba. We aje Metîndjwýnh kukràdjà katâtkumrêjja kunÿ maro abakam ne ga ã 'ã amijo adjâmrao ane.

<sup>21</sup> Ba me amã arê. Me aje amÿ me akren ã amim anhÿrkam mÿkam ga: ne ga amijakre kêt? Aje amÿ me âkînhÿ kêt kadjy me akrekam mÿkam ga: ne ga adjâkînhÿ? <sup>22</sup> Aje memã kum,

—Kwârîk wânj mebê prôo adjâkînh kêt, anhÿro abakam mÿkam ga: ne ga mebê prôo adjâkînhô aba? Ga we amã mÿjjao metîndjwýnh karô nhîpêx kurê:o aba. Mÿkam ga: ne ga mÿjjao metîndjwýnh karô nhîpêx nhô kikrekam ar aba? Mÿkam ga: ne ga mebê adjâkînh kadjy kam ar aba? <sup>23</sup> Aje Môjdjê kukràdjà'ã memã kum, “Kukràdjaja ne mexkumrêx”, anhÿro abakam mÿkam ga ne ga ajte ari kukràdjâkam amikrào aba? Ga kukràdjâkam amikrào aba nhym me arým adjô'ã abenmã kum, “Metîndjwýnh kajgo”, anhÿro ba.

<sup>24</sup> Amrêbê: ne me bakukãmâre Metîndjwýnh kukwakam me ajã kabên jarênh kum,

“Apÿnh me bajtem ba djari ne me me ajaxwekôt Metîndjwÿnh japrÿ:.”

Nãm me ã me ajã me bakukãmãremã anen arÿm 'ã pi'òk no'òk ne. Ga me kukràdjào abikênho aba nhym me arÿm ã me ajaxwe djô'ã Metîndjwÿnh japrÿo ane.

<sup>25</sup> Me abê idjaer, mÿj kadjy ne me me amy kà nhinhu rê. Bir, me aje amy kà rênh mar ne aje 'ã amim, “Arÿm ne Metîndjwÿnh ijo aminhõ”, anhÿr kadjy. Djãm me bamy kà rênhkambit nhym arÿm me bajo aminhõ? Kati. Gu me baje ajte Metîndjwÿnh kukràdjã marn kôt ar amijo babakam ne arÿm me bajo aminhõ. Nhym be, godja ga me kukràdjãkam ajaxwe jabej arÿm me amy kà rênh kajgo. <sup>26</sup> Kam me my kà tãja, me bajtemja, godja me ta kute amikam katât kukràdjã marn kôt amijo ba jabej nhym Metîndjwÿnh arÿm meo aminhõ. Te me my kà tã nhym arÿm meo aminhõ.

<sup>27</sup> Kam, dja me my kà tãja, kubê me bajtemja arÿm me abê idjaermã ajaxwe jarê. Ta te kute Môjdjê kukràdjã'ã pi'òk no'òk mar kêtka dja arÿm me amã ajaxwe jarê. Ta tu kute katât kôt amijo bakam dja me amã arê. Me aje Metîndjwÿnh kukràdjã'ã pi'òk no'òk mar kajgon amy kà rênh kajgon kukràdjãkam amikrà ar o aba. Nhym kam me ta arÿm me apumÿn me amã ajaxwe jarê.

<sup>28</sup> Mÿj xêjabê ne Metîndjwÿnh nhõ me jakumrêx? Djãm me kute amibên ne ajkwa kajgokam memã kum, “Ibê idjaer, ibê idjaer”, anhÿrbit? Djã ne me kute amijo anhÿrbit ne kam mrãmri mebé Metîndjwÿnh nhõ me jakumrêx? Kati. Djã ne me me my kà nhinhubit rê nhym kam arÿm me mrãmri kubê Metîndjwÿnh nhõ me jakumrêx? Kati. <sup>29</sup> Me kute mrãmri kadjwÿnhbê Metîndjwÿnh kabên

mar ne kôt amijo babit. Me jabit ne mebé ò me jakumrêx. Me kute amikadjwÿnhbê amim mÿjja'ã karô djãkam kute Metîndjwÿnh Karô mar ne kum amijã maja me jabê ne ò me jakumrêx.

Nhym be, me kute kukràdjã 'ã no'òk mar kajgon me my kàbit rênhja me jabê ne ò me ja kêt. Me kute Metîndjwÿnh Karô mar ne kum amijã maja djãm pykakam me ar baja gêdja memã mex jarê? Kati. Metîndjwÿnh dja memã mex jarê nhym arÿm mebé ò me jakumrêx.

### 3

*Kute memã Metîndjwÿnh 'êxnhÿ kêt ne kabên kajgo kêt jarênh.*

<sup>1</sup> Nhym kam mÿj kadjy dja mebé idjaer? Kam ajte mÿj kadjy dja me me my kà nhinhu rê? Djãm mebé idjaer kute mÿjja maro kute me bajtem jakrenh? <sup>2</sup> Nã. Me kute mÿjja maro kute me akrenh me:xi. Bir, me kute Metîndjwÿnh kabên mar. Metîndjwÿnh kute me kute katât amijo ba'ã memã karôkôt amikabên'ã pi'òk no'òkja ne me kute mar ne o ba.

<sup>3</sup> Me kwÿ kute amim Metîndjwÿnh kabên mar kêtka mÿj gêdja kam kute? Djãm me kute kabên mar kêtka ne Metîndjwÿnh arÿm kabên kajgo? <sup>4</sup> Arkati. Dja te me kunÿ 'êxnhÿn kabên kajgo. Nhym be, Metîndjwÿnh ne kabên kajgo kêtkaumrêx. Amrêbê: ne me bakukãmãre Metîndjwÿnhmã kabên kajgo kêtkaumrêx jarên kum, “Dja me te ajã amim, ‘Kabên kajgo’, anen kam mrãmri akabênkaumrêxmã katorkaumrêx.”

Nãm me bakukãmãre ã Metîndjwÿnhmã ane nhym me arÿm 'ã pi'òk no'òk ne. Nhym me arÿm aben djô'ã arênho mō:m arênho mōr tãmtã gu me bakamingrãnyredjwÿ baje arênh rã'ã. Mrãmri ne me arênhkaumrêx. Metîndjwÿnh kabên kajgo kêtkaumrêx.

*Metîndjwÿnh me axwekam ngrykkam ne katât.*

<sup>5</sup> Nhyim be, pykakam me kajgo ta ren kabên kajgokam ren abenmâ kum,

—Metîndjwÿnh ren gwaj bajaxwekam ngryk kêt. Ga, gwaj bajaxwekôt me kum Metîndjwÿnh kÿnhja pumû. Me kute gwaj bajã, “Tãmwã ne axwe:. Ba ne ba imã me axwe kÿnh kêtukumrêx. Ba dja ba atemã ne imã Metîndjwÿnhbit kÿnh”, ane. Be ga, gwaj bajaxwe nhyim me kum gwaj bakÿnh kêtja pumû. Ne kam kôt kum Metîndjwÿnh kÿnh. Gwaj bajaxwekôt me kum kÿnhkam Metîndjwÿnh ren gwaj bakam kÿnh, ane. Me ta ren ã kabên kajgo jarêhno ane.

<sup>6</sup> Djãm mrãmri me kabên? Kati. Ne ren Metîndjwÿnh gwaj bajaxwekam kÿnh ne ren kam gwaj bamã bajaxwe pãnh jarênh kêt. Ne ren apÿnh me ba djã kunîkôtdjwÿ ren memã axwe pãnh jarênh kêt. <sup>7</sup> Nhyim ren ajte me ta ajte kabên kajgokam memã kum,

—Metîndjwÿnh ren ijêxnhÿkam ngryk kêt ne. Ga, ijêxnhÿkôt me kum Metîndjwÿnh kÿnhja pumû. Me kute ijã, “Tãmwã ne 'êxnhÿ. Djãm ba dja ba kôt ijêxnhÿ? Kati. Ba dja ba imã kôt ijêxnhÿ kÿnh kêtukumrêx. Metîndjwÿnhbit dja ba imã kÿnhkumrêx”, ane. Be ga, ijêxnhÿ nhyim me kum ikÿnh kêt ne kam kôt me kum Metîndjwÿnh kÿnhja pumû. Ijêxnhÿkôt me kum kÿnhkam ne ren ikam kÿnh ne ren imã ijaxwe jarênh kêt ne ijêxnhÿ pãnh ikanga kêt ne. Ne ren me kabên kajgokam ã ren memã ane.

<sup>8</sup> Me'ô ar ta ne arÿk ijã,

—Paur memã kum, “Gwaj bajaxwe baba nhyim gwaj bajaxwekôt arÿm mÿjja mex apôx”. Nãm ã memã anhÿro bao ane, ane. Kati. Nãm me arÿk ikabên kêt jarê. Ne ren mrãmri Metîndjwÿnh me axwekam kÿnh bar ren ã memã ane. Nhyim be, kati. Mrãmri

me axwekam ngryk ne kute me kangakumrêx. Me kute ar ikabên kêt jarênh ja dja Metîndjwÿnh pãnh me kanga. Kute me kangaja katât, punu kêt, nhyim Metîndjwÿnhdjwÿ katât.

*Kute memã me kunÿ kupãnhã axwe jarênh.*

*Kar 17.30; Kô k 6.9; Gar 3.22; Xit 3.3*

<sup>9</sup> Mÿj dja gu me babê idjaer abenmã né? Djãm gu me baje,

—Gu me ba ne gu me bamexo me bajtem jakre, anhÿrmã? Kati. Ba ibê Paur ne ba arÿm me kunÿã,

—Mebê idjaermê me bajtemmê ne me kute aben pyrãk. Me kupãnhã axwe:n ta te: axwe kêt prãmje, ane. <sup>10</sup> Me bakukãmãre kabên kôt ne ba me amã arê. Amrêbê: me bakukãmãre memã kum,

“Djãm me'ô axwe kêt? Arkati. Me'ô axwe kêtja kêtukumrêx.

<sup>11</sup> Me'ô kute mar kêtukumrêx. Me'ô kute Metîndjwÿnh jabej kêtukumrêx.

<sup>12</sup> Me ta amiprykôt binhirên ban kunÿ kupãnhã Metîndjwÿnhbê punu:re. Djãm me'ô pydji ne apênh mex? Arkati. Me'ô mex kêtukumrêx.”

Nãm me bakukãmãre ã amrêbê: memã ane. <sup>13</sup> Ne kam ajte memã kum,

“Me ajkwakam me kabên apôx ne kute mrãmri ne me kute arÿm pyka krãã kuprãr nhyim kurûm mÿjja punu prôt pyrãk. Nãm me ã kabên punuô ane.

Me kute memã 'êxkôt ne me me noo biknoro ba.

Me kabên ne kute kangã djwakam tokry djãja pyrãk.

<sup>14</sup> Me kute me ùn kume:x ne me kabên djã kume:x.”

Nãm me bakukãmãre ã amrêbê: memã ane. <sup>15</sup> Ne kam ajte memã kum,

“Nãm me amikrà kêt ne tu me paro ba.



16 Ne ari meo bikênho ba: nhyim me me ô'ã tokry kume:x ne umar mex kêtukmrẽx.

17 Mÿj dja me umar mex kadjy nê? Ja ne me kute mar kêtukmrẽx.

18 Me kum Metîndjwÿnh puma kêtukmrẽx."

Nãm me bakukãmãre ã amrêbê: memã ane nhyim me arÿm 'ã pi'ók no'ók ne. Nhyim me aben djô'ã arênho mō:n arênho mōr tãmtã gu me bakamingrãnyredjwÿ baje arênh rã'ã. Mrãmri ne me arênhkumrêx. Me kupãnhã axwen ta te axwe kêt prãmje.

19 Be, mebê idjaermã ne Metîndjwÿnh kukràdjã kunĩ jarê. Me kute kukràdjã maro baja, me jamã ne arê. Mÿj kadjy ne memã arê? Bir, me kute kukràdjã maro ban ta te kute kôt amijo anhÿrmã.\* Ne kam kôt kute amijaxwemã katormã. Ja kadjy ne memã kukràdjã jarê. Kam dja me kunĩ ajte Metîndjwÿnh me axwekam ngryk ma. Dja me amim,

—Metîndjwÿnh ne ijaxwekam ngryk, ane. Tãm dja me arÿm kam kuma. Apÿnh me ba djã kunĩ dja me ngryk markumrêx. Ja kadjy ne memã kukràdjã jarê. Tãm ne gu me baje arÿm mar.

20 Kam djãm me kute kukràdjã mar ne kute kôt amijo anhÿro ba nhyim Metîndjwÿnh arÿm kute memã kum, "Be, ajaxwe kêt", anhÿrmã? Kati. Nhyim be, mÿj kadjy ne memã kukràdjã jarê? Bir, me kute amijaxwemã kator kadjy ne memã kukràdjã jarê.

*Metîndjwÿnh ta kute memã axwe kêt jarênhja'ã ujarênh.*

*Gar 2.16; Xit 3.5*

21 Nhyim be, jakam atemã me'õ kôt Metîndjwÿnh kute memã axwe kêt jarênh nhyim me arÿm kum mex

ne. Djãm me kute Metîndjwÿnh kukràdjã mar ne ta kute kôt amijo anhÿro ba nhyim kôt kute memã axwe kêt jarênhmã? Kati. Atemã me'õ kôt ne kute memã axwe kêt jarênh. Amrêbê: kute Mòjdjêmã kukràdjã jarênhkam Metîndjwÿnh arÿm memã Kritu'ã ajarê. Kukwakam kabên jarênh djwÿnhdjwÿ ne me arÿm memã 'ã ajarê. <sup>22</sup> Me kute tu amim Jeju Kritu markumrêx kôt ne Metîndjwÿnh kute memã axwe kêt jarênh nhyim me arÿm kum mex ne. Me ï pÿnhkôt kwÿ kute tu amim Kritu markumrêxja nhyim kute tu memã axwe kêt jarênh. Mÿkam?

Bir, me kunĩ ne me axweo kute aben pyrãk. <sup>23</sup> Djãm me'õ ta mexo Metîndjwÿnh mãnkhutã? Arkati. Me kunĩ kupãnhã axwe. <sup>24</sup> Nhyim kam tu memã axwe kêt jarê nhyim me arÿm kum mex ne. Djã ne me kukràdjã maro ban kôt amijo anhÿro ba nhyim pãnh arÿm memã axwe kêt jarê? Kati. Ta ne tu kum me kaprÿn ta memã arê. Kritu Jeju ta ne arÿm me axweo pãnh mex nhyim kam kôt ta memã axwe kêt jarê nhyim me arÿm kum mex ne.

<sup>25</sup> Metîndjwÿnh ne amim Jeju dja nhyim kam arÿm me axwe pãnh pÿte'y'ã wajêt nhyim kamrô prôt nhyim arÿm ty. Nhyim kam me kute tu amim markumrêxja Metîndjwÿnh arÿm me ja jaxwekam ngryk kêt. Be, ja kadjy ne pÿte'y'ã wajêt. Ne mÿjja 'õdjwÿ kadjy ne Jeju pÿte'y'ã wajêt. Me kute Metîndjwÿnh kute katãt meo baja mar kadjy. Kute katãt memã axweo pãnhkumrêx ja mar kadjy. Amrêbê: pÿte'y'ã jêt kêtri ne me axwe: nhyim Metîndjwÿnh ren mekam ngry:k ne ren me biknor tokry djãkam me kumên kam ren arÿm katãt memã axweo pãnh

\* 3:19 Djãm pi'ók jarênh'ã ne me kute kukràdjã mar ne kôt kute amijo anhÿr ja jarênh Kati. Kute memã kum, "Kwãrik wãnh ajaxwe kêt", anhÿr nhyim me kôt kute ã amijo anhÿr ne axwe kêtã. Ja'ã ne kute me kute mar ne kôt amijo anhÿr ja jarênh.

kumrêx. Nhyim be, kati. Nãm amijã ngyrk nê:n tu me axwe maro akno. Djãm ã kute memã anhÿrkam katåt kute meo bakumrêx? Nã, mrãmri katåt.

<sup>26</sup> Mÿj ne me kam kuman kam Metĩndjwÿnh katåtja ma? Bir, jakam ne Metĩndjwÿnh Jejumã me axwe pãnh jarẽ nhyim kam Jeju me pãnh tyn arÿm Metĩndjwÿnhmã me axweo pãnh. Nhyim kam me arÿm Metĩndjwÿnh kute katåt memã o pãnhja man arÿm kum kato. Jeju kute me axweo pãnhjamã kato. Nhyim kam me tu kute amim Jeju markumrêxja ne Metĩndjwÿnh arÿm katåt kute memã axwe kêt jarẽnhkumrêx.

<sup>27</sup> Djãm kam gwaj ba ne gwaj baje,

—Metĩndjwÿnh kukràdjã kôt ne ba amijo anhÿro iba. Imexkumrêxja pumũ, anhÿrmã? Kati. Djãm gwaj bajõ bamex? Arkati. Nhyim be, dja gwaj tu amim Jejubit markumrêx nhyim Metĩndjwÿnh tu gwaj bamã axwe kêt jarẽ gwaj arÿm kum bamexkumrêx ne.

<sup>28</sup> Kam, djãm me kute Metĩndjwÿnh kukràdjã mar ne kute kôt amijo anhÿro ba nhyim kam kute kôt memã axwe kêt jarẽnh? Kati. Atemã ne wã. Nhyim be, me kute tu amim Jeju markumrêxbit. Kôtbit ne kute memã axwe kêt jarẽnh nhyim me arÿm kum mexkumrêx.

<sup>29</sup> Djãm Metĩndjwÿnh kute mebê idjaerbito ba? Djãm kute me bajtemo ba kêt? Kati. Kute me bajtemdjwÿo ba. <sup>30</sup> Mÿkam? Bir, Metĩndjwÿnh pydji:. Kam dja mebê idjaerbê me my nhinhu kã rênhja tu amim Jeju markumrêx nhyim kôt arÿm memã axwe kêt jarẽ. Nhyim me bajtembê me my kã tãjadjwÿ dja me ajte tãm. Dja me tu amim Jeju markumrêx nhyim kôt arÿm me adjwÿnhdjwÿmã axwe kêt jarẽ. <sup>31</sup> Djãm gwaj baje tu

amim Jeju markumrêxkam ne gwaj baje Metĩndjwÿnh kukràdjã kôt amijo anhÿrja kangamã? Kati. Nhyim bê ne gwaj baje kukràdjã kanga prãm. Gwaj ba baje tu amim Jeju markumrêxkam ne gwaj baje kukràdjã kôt amijo anhÿr prãm kumrêx.

## 4

*Kute Abraãomã axwe kêt jarẽnh'ã ujarẽnh.*

*Gar 3.6; Xij 2.23*

<sup>1</sup> Kam gwaj akubyn amijo tẽn me bakukãmãre Abraão'ã ujarẽnh ma. Mÿj ne ta amikam kuma? Djãm ta ne mex? Kati. <sup>2</sup> Djãm Abraão kute amijo ba mex pãnh Metĩndjwÿnh kum axwe kêt jarẽ? Kati. Kute amijo ba mex pãnh kute kum axwe kêt jarẽnh kêt. Ren kute amijo ba mex pãnh ren kum axwe kêt jarẽ nhyim ren amimexo àmra ar ba. Nhyim be, kati. Metĩndjwÿnhmã ne amimexo àmra kêt. <sup>3</sup> Mÿkam? Bir, djãm Abraão ta axwe kêt? Kati. Metĩndjwÿnh ne tu kum axwe kêt jarẽ nhyim me arÿm 'ã ajarẽ. Me bakukãmãre amrêbê: memã kum, “Abraão ne tu amim Metĩndjwÿnh kamnhÿxkumrêx nhyim 'ã amim,

'Be, nãm tu amim ikamnhÿxkumrêx ba kam ba tu kum axwe kêt jarẽ nhyim arÿm imã mex.' Nãm Metĩndjwÿnh ã Abraão'ã amim ane.”

Nãm me bakukãmãre ã Abraão'ã memã ane. Nãm tu amim Metĩndjwÿnh kamnhÿxkumrêx nhyim ta tu kum axwe kêt jarẽ. <sup>4</sup> Be ga, me'õ me bẽnjadjwÿr'õmã àpênhja pumũ. Kute amim pi'òk kaprĩ kwÿ byr kadjy bẽnjadjwÿrmã apê. Nãm kadjy kum apê:n arÿm o ino re. Nhyim kam bẽnjadjwÿr arÿm kum pi'òk kaprĩ ngã. Àpênh pãnh ne kum pi'òk kaprĩ ngã. Djãm kajgo got? Kati. Àpênh pãnh ne kum kungã.

<sup>5</sup> Nhyam be, djâm me kute amijo ba mex pân̄h Metîndjwýnh kute memã axwe kêt jarênh? Kati. Me kute amijo ba mex pân̄h kute memã axwe kêt jarênh kêt. Me tu kute amim Metîndjwýnhbit markumrêx nhyam kôtbít arým kute memã axwe kêt jarênh. Metîndjwýnh kute me axwemã axwe kêt jarênh djwýnh ta kute ã memã anhÿr nhyam me arým kum mexkumrêx. <sup>6</sup> Me bakukãmãre Dawidjwý ne amrêbê: ja tãm jarê. Metîndjwýnh kute tu memã axwe kêt jarênh nhyam me arým kum mexkumrêx. Me ja ne me kînhkumrêx. Me kute kukràdjã kôt amijo ba mex pân̄h ne Metîndjwýnh kute memã axwe kêt jarênh kêt. Tãm ne me bakukãmãre Dawi 'ã ajarê. <sup>7</sup> Nãm memã kum,

“Metîndjwýnh kute wãnh me axweo biknor ne me kam ngyrk kêt ne kute me axweo bipdjur ja ne me kî:nhkumrêx.

<sup>8</sup> Bênjadjwýr djwýnh kute tu memã axwe kêt jarênh ja ne me kînh:re ne.”

Nãm me bakukãmãre Dawi ã memã ane nhyam me aben djô'ã arênhõ mō:n arênhõ mōr tãmtã gu me bakamingrãnyre baje arênh rã'ã. Mrãmri ne arênhkumrêx. Mrãmri Metîndjwýnh kute tu memã axwe kêt jarênhkam ne me kînhkumrêx.

<sup>9</sup> Djâm kute mebê idjaermãbit arênh? Djâm kute mebê idjaerbê me my kã rênh jamãbit arênh? Kati. Me bajtembê me my kã tãjadjwý.

Ga, Abraãodjwý ja ma. Abraão ne tu amim Metîndjwýnh kamnhîxkumrêx nhyam 'ã amim,

—Abraão ne tu amim ikamnhîxkumrêx ba kam arým tu kum axwe kêt jarê, ane. Tãm ne gwaj arým kuma. <sup>10</sup> Mýj ne kute kum axwe kêt jarênhkam kute? Djã ne kumrêx kum amimy nhinhu kã krãta nhyam kam arým kum axwe kêt jarê? Kati. Kute amimy kã krã'yr kêttri ne kum

axwe kêt jarê nhyam arým kum mexkumrêx.

<sup>11</sup> Nhyam kam Metîndjwýnh arým kum my kã krã'yr'ã kum karõ. Nhyam kabênkôt arým amijo tẽn arým amimy kã krãtan kam arým amijã maro ba. Nãm mar kunikôt amim,

—Be, amrêbê ne ba tu amim Metîndjwýnh kamnhîxkumrêx nhyam arým tu imã ijaxwe kêt jarênhkumrêx. Ga, imy kã krã'yrja pumũ, anhÿro ba. Amrêbê kute my kã krã'yr kêttri ne Abraão tu amim Metîndjwýnh kamnhîxkumrêx nhyam arým tu kum axwe kêt jarênhkumrêx.

Nhyam kam tũmrãm amimy kã krãtan arým ã amim anhÿro ba. ã amimy kã krã'yr'ã amim anhÿro ba. Mýj kadjy ne kute my kã krã'yr kêttri kum axwe kêt jarê? Bir, me bajtem my kã tãja kunĩ kajmã'ã ne kum axwe kêt jarê. Abraãobê me kute amikajmã'ã Metîndjwýnh marja kunĩ nhingêt kadjy. Dja me tu amim markumrêx nhyam arým tu memã axwe kêt jarênhkumrêx. <sup>12</sup> Abraãobê ne me my kã rênhja nhingêt. Djâm Abraãobê ne me my kã rênhbit nhingêt? Kati. Abraão kute amimy kã krã'yr kêttri kute tu amim Metîndjwýnh kamnhîxkumrêx. Nhyam me kute Abraão kudjwa tu amim Metîndjwýnh kamnhîxkumrêxja me ajbit Abraãobê me ingêt.

<sup>13</sup> Nhyam ajtekam Metîndjwýnh arým tu Abraãomê ô'ã tãmdjwý arkum ar kute meo aminhõn meo bamã arênhkumrêx ne arkum,

—Gamê adjô'ã atãmdjwýmê dja gar apýnh me ba djã kunikôt meo aminhõn meo aba. Meo aminhõn meo aba kute mrãmri ne me tãmdjwý ingêt nhõ nèkrêxo aminhõn o ba pyrãk. Nãm ã tu Abraãomê ô'ã tãmdjwýmã kabên pydjín arênhõ ane. Djâm ar kute Môjdjê kukràdjã mar ne kôt kute amijo anhÿro ba pân̄h kute arkum

ar kute meo bamã arênh got? Kati. Nãm ar tu amim Metîndjwýnh kamnhĩxkumrêx nhym arým tu arkum axwe kêt jarêh kam arým kôt arkum kute meo bamã arê. Kabên pydjín arê.

<sup>14</sup> Ne ren memã me kute Mõjdjê kukràdjã maro ba pãnh ren memã kute meo bamã arê nhym kam me ren kute Mõjdjê kukràdjã maro ba nhibej ren amim Metîndjwýnh kamnhĩx kêt. Nhym kam ren kabênja jarênh kajgo. Nhym be, kati. Djãm me kute kukràdjã mar ne kôt kute amijo anhÿro ba pãnh memã me kute meo bamã arê? Kati. Ja pãnh kute memã me kute meo aminhõ jarênh kêt. <sup>15</sup> Me kute Mõjdjê kukràdjãbit maro baja ne Metîndjwýnh mekam ngrykbit. Mýkam ne mekam ngrykbit? Bir, me kute kukràdjãkam amikràò ba prãm kam ne mekam ngrykbit. Nhym be, memã me kute Mõjdjê kukràdjã jarênh kêt nhym me kute mar kêt jabit ne me kute kukràdjãkam amikrà kêt. Ren me arým memã arê nhym ren me arým kuma, kambit me kute kam amikrà. Nhym be, me kute mar kêt kam ne me kute kukràdjãkam amikrà kêt.

<sup>16</sup> Kam, me kute tu amim markumrêxja ne Metîndjwýnh memã me kute meo bamã arê. Mýkam? Bir, dja Abraão djõ'ã tàmdjwý kunĩ tu amim markumrêx nhym Metîndjwýnh ta arým tu kum me kaprĩ. Tu kum me kaprĩkam gêdja arým mrãmri tàmdjwý kunĩmã apÿnh me ba djãkam me ja nhõrkumrêx nhym me arým ar meo ba. Djãm mebé idjaer kute Mõjdjê kukràdjã mar jabit dja meo ba? Kati. Me kute Abraão kudjwa tu amim Metîndjwýnh markumrêxja kunĩ dja me meo ba. Mrãmri ne kute me ja kunĩmã kute meo bamã arênhkumrêx. Abraãobê ne me bakunĩ ngingêt.

<sup>17</sup> Metîndjwýnh ne amrêbê: me

bakukãmãre Abraãomã ja jarê. Kum me bakunĩ ngingêt jarê. Metîndjwýnh kum,

“Apÿnh me ba djã krãptĩ:kam me jamã ne ba arým ajo me ingêt.”

Nãm ã Abraãomã ane. Nhym me arým 'ã pi'òk no'òk ne. Nhym me aben djõ'ã arênhõ mõ:m arênhõ mõr tãmtã gu me bakamin-grãnyredjwý baje arênh rã'ã ne. Ga, mrãmri Abraão kubê me banhingêtkumrêxja pumũ. Abraão kute tu amim kamnhĩxkumrêxja ne arým Metîndjwýnh nokrekam kubê me banhingêtkumrêx. Metîndjwýnh ta ne kute akubyn me tyko tin ne mýjja kukãm 'ã ajarê. Mýjja kator kêt rã'ã nhym memãbit kute kator prãm kêt pyrãk. Nhym be, Metîndjwýnhmãbit arým mýjja amirĩt nhym arým kukãm 'ã ajarê. Ga, mrãmri Abraão kubê me banhingêtkumrêxja pumũ.

<sup>18</sup> Ne ren atemã me'õ ne ren te amiwÿr kute meo aminhõja katorkam ama ne ren 'ã ukanga. Nhym be, kati. Nãm Abraão kute meo aminhõmã tu amiwÿr kam amako tẽmkumrêx ne me kadjy tu amim Metîndjwýnh kamnhĩxkumrêx. Ne kam arým meo aminhõkumrêx, arým kubê me ingêt. Kubê apÿnh me ba djã krãptĩkam me ja ngingêt. Metîndjwýnh kute kum anhÿr kôt. Kute kum, “Dja ã atãmdjwý krãptĩo ane”, anhÿr kôt ne Abraão arým tu amiwÿr me kamnhĩxkumrêx.

<sup>19</sup> Nãm te amim,

—Arým Xaramê ar ibêngê:tte. Nã bãm te ar ikra'õ prã:mje. Mrãmri ar ije me tykkam kra prãm kêtja pyrãk, ane. Nãm te amim anen tu amim kamnhĩxo tẽmkumrêx. Arým ne Abraão'ã amex krãptĩ: kubê 100 pyrãk. <sup>20</sup> Djã ne Metîndjwýnh kum kabên jarê nhym we amim,

—Dja ijo anhÿr jabej. Nã kon. Dja ijo anhÿr kêt jabej? ane. Kati. Nãm tu amim kamnhĩx tÿxkumrêxo

tê. Ne kam o Metîndjwýnhmã ra:x jarê. <sup>21</sup> Nãm amim,

—Djãm Metîndjwýnh 'irere:k got? Mrãmri kute imã ikra jarênh kôt dja imã ikra nhôrkumrêx, ane. <sup>22</sup> Kute ã amim anhÿrkam ne Metîndjwýnh arým 'ã amim,

—Ba tu kum axwe kêt jarê nhy m arým imã mex ne, ane. <sup>23</sup> Djã ne Abraãobit man amim, “Ba tu kum axwe kêt jarê”, ane nhy m me'ã pi'ók no'ók ne? Kati. <sup>24</sup> Gwaj badjwý ne arým gwaj bama. Dja gwaj tu amim Metîndjwýnh kamnhÿxkumrêx nhy m arým gwaj bamãdjwý axwe kêt jarê. Metîndjwýnh kute akubyn gwaj banhô Bënjadjwýr djwýnh Jejuo tîn djwýnh dja gwaj tu amim kamnhÿxkumrêx, tu amim markumrêx nhy m arým gwaj bamãdjwý axwe kêt jarê gwaj kam arým kum bamex ne. <sup>25</sup> Nãm me memã Jeju kanga nhy m me arým kubî. Mýj kadjy? Bir, kute gwaj bajaxweo pãnh kadjy ne me Jeju kanga nhy m me arým kubî. Kubî nhy m arým akubyn o tîn. Kute gwaj bamã axwe kêt jarênh kadjy ne akubyn o tîn.

## 5

*Kritu tykkôt me umar mex ne kînh.*

*Mat 5.12; A Kô 4.8; Pir 1.28; Ped k 4.13*

<sup>1</sup> Gwaj baje tu amim Jeju markumrêxkam ne Metîndjwýnh arým gwaj bamã axwe kêt jarê. Kute gwaj bamã axwe kêt jarênhkam arým gwaj bakam ngryk kêt ne. Bënjadjwýr djwýnhbê Jeju Kritu gwaj bajaxwe pãnh tokrykam ne gwaj bakam ngryk kêt. Gwaj bakam ngryk kêt kam ne gwaj arým badjumar me:xkumrêx ne ar baba. <sup>2</sup> Jejukôt ne Metîndjwýnh arým kute gwaj ba mar. Gwaj tu

amim Jeju markumrêx nhy m arým kute gwaj bamarkumrêx. Gwaj kum amijarê nhy m arým tu kum gwaj bakaprîkumrêx.\* Tu kum gwaj bakaprîkumrêx gwaj arým kôt badjãm tÿx. Dja gwaj ï Metîndjwýnh mexkumrêx pumû. Baje Metîndjwýnh me:xkumrêx pumûnhkam amakbê gwaj bakînhkumrêx.

<sup>3</sup> Ne kam te apÿnh gwaj badjumar punu, batokry djari gwaj bawÿr bôx gwaj bakînhkumrêx. Gwaj badjumar punu, batokry japôkmã bakînhkumrêx. Mýkam? Bir, gwaj kam amim,

—Dja ba te itokryn mã Jeju kôt ar amijo iban 'ã idjukanga kêt. <sup>4</sup> Mã kôt ar amijo iba:n kam arým kum imexkumrêx. Kum imexkumrêx ne kam arým tu amiwÿr kamnhÿxkumrêx. Nã gwãm ã amim anen kuman arým bakînhkumrêx.

<sup>5</sup> Baje omûnhkumrêxkam amakbê mýj dja gwaj amikam kuman kôt batÿx. Bir, kum gwaj bajabê:. Nãm gwaj bamã Karô jano nhy m arým gwaj bamã arênhho ba. Gwaj bamã,

—Ga, Metîndjwýnh kum ajabê:ja pumû, anhÿro ba. Ne kum gwaj bajabêja pÿne gwaj bamã o amirît mex gwaj arým amikam kuma. Ja ne gwaj kuman arým baje kam amakjakam batÿx. Baje Metîndjwýnh pumûnhkumrêxkam amakjakam batÿx.

<sup>6</sup> Amrêbê ne gwaj te: kum bamex prãmje ne mã: bajaxwe rãã ne nhy m arým ô akati bôx nhy m arým Kritu gwaj bapãnh ty. Metîndjwýnh kute amrêbê tyk nhô akati'ã kum karô kôt ne akati wajêt nhy m Kritu arým gwaj bapãnh ty. Gwaj ba ne gwaj bamã Metîndjwýnh kînh kêt ne ar baba nhy m arým gwaj bapãnh ty.

\* 5:2 Djãm gwaj ba ne gwaj bajaxwe kêt nhy m pãnh kum gwaj bakaprî Kati. Gwaj ba ne gwaj te bajaxwe kêt mã. Nhy m be, ta ne tu kum gwaj bakaprî.

<sup>7</sup> Djâm gwaj bajô ne gwaj ren baje me'ô jaxwe pytâr kadjy ty? Kati. Djâ ne gwaj ren bajô baje me'ô kute katât amijo baja pytâr kadjy ren batyk prâm? Kon. Gwaj baje me'ô djukaprî pytâr kadjy mrâmri ren batyk prâm jabej.

<sup>8</sup> Nhyr be, djâm gwaj ba ne gwaj katât amijo baba nâr badjukaprî? Kati. Gwaj ba ne gwaj bajaxwe: nhyr Kritu arým kute gwaj bapytâr kadjy ty. Nâm Metîndjwýnh ã kum gwaj bajabêo amirîto ane.

<sup>9</sup> Kamrô prôt ne tykja kam ne Metîndjwýnh arým gwaj bamã axwe kêt jarê gwaj arým kum bamex ne. Gwaj baje ja markam ne gwaj amim,

—Mrâmri ne Kritu kute Metîndjwýnh ngrykbê ipytâr mexkumrêx, ane.

<sup>10</sup> Amrêbê ne gwaj Metîndjwýnho bakurê djwýnh nhyr Kra arým ty. Ty nhyr Metîndjwýnh arým gwaj bajo ôbikwa. Kute gwaj bajo ôbikwakam ne gwaj arým amim,

—Mrâmri dja amim ipytâr me: xkumrêx. Arým tyn akubyn tîn ne. Kam dja ipytâr mexkumrêx, ane. <sup>11</sup> Djâm jabit? Kati. Ajte. Gwaj Metîndjwýnhkam bakî:nhkumrêx. Bênjadjwýr djwýnhbê Jeju Kritu djâpênhkôt kam bakînhkumrêx. Kute gwaj bajaxweo pânkhôt bakî:nhkumrêx.

*Me kute tu amim Kritu markumrêxja tîn.*

*Kô k 15.21*

<sup>12</sup> Nhyr be, Adão pydji me kukâm axwe nhyr kam me kunî kudjwa arým axwen arým ty. Me kunî Adão kudjwa axwekam arým kunî ty. <sup>13</sup> Mýj ne me axwekam kute? Bir, Metîndjwýnh kute Môjdjêmä kukrâdjâ jarênh nhyr amũ amidjô'ã kute memã arênh kêttri ne me arým pykakam axwe ar ba. Nhyr be, djâm kute memã kukrâdjâ jarênh kêttri Metîndjwýnh

kute memã kum, “Ajaxwe”, anhyr? Kati. Kute memã kukrâdjâ jarênh kêttri nhyr me kute mar kêttri ne kute memã axwe jarênh kêt. <sup>14</sup> Nhyr be, kute pidjô krên kêt kadjy kabên ja ne Adão arým kam axwe. Djâ ne me kunî Adão kôt ã axweo ane? Djâ ne me ã Metîndjwýnh kabênkam amikrào ane? Kati. Me te Metîndjwýnh kabênkam amikrà kêt ne arým axwe. Ne kam arým ty. Axwekam aben djô'ã ty: nhyr kam arým Metîndjwýnh Môjdjêmä kukrâdjâ jarê. Adão kumrêx axwe nhyr me kunî kudjwa axwe. Nhyr be, me'ôdjwý amrê môrmã ne atemã ne ukaprî. Jeju ne ukaprî.

<sup>15</sup> Gwaj Adãomê Jeju Kritumê abenã ar maro nhý. Adão axwe nhyr Jeju Kritu ukaprî. Adão pydji axwekam ne me krâptî: ty. Aben djô'ã ty. Nhyr be, Jeju Kritu pydji tu kum me kaprî: kumrêxkam† ne arým amim me krâptî: pytâ. Metîndjwýnh tu kum me kaprî nhyr Jeju Kritudjwý ukaprî ne arým me axwe krâptî: pytâ. <sup>16</sup> Adão pydji axwekôt mýjja kator nhyr be, Jeju djukaprîkôt mýjja kator. Apýnh mýjja kator. Adão pydji axwe kôt Metîndjwýnh arým kam ngryk ne pânkhôt memã biknor jarê nhyr me arým me biknor tokry djâkam akuno. Nhyr be, te apýnh me axwe djâri krâptî nhyr Metîndjwýnh kute memã Jeju nhôr kôt memã axwe kêt jarê nhyr me arým kum mex ne. <sup>17</sup> Adão pydji axwekôt me kunî aben djô'ã ty. Nhyr be, Metîndjwýnh tu kum me kaprî: kumrêx nhyr me tîn. Adãokôt ne me ty. Nhyr be, Jeju Kritu

† 5:15 Djâm me ta ne me axwe kêt nhyr arým pânkhôt me kaprî Kati. Me ta ne me te: axwe kêtme nhyr ta arým tu kum me kaprî.

pydjikôt ne me tîn ne ar ba rã'ã: rã'ã ne.

<sup>18</sup> Adão kute pidjô krênkôt axwe. Axweja pydji kôt ne Metîndjwýnh arým me kunĩmã biknor jarẽ nhym me arým me biknor tokry djãkam akuno. Nhym be, Jeju Kritu me axwe pãnh ty. Ja pydjikôt ne Metîndjwýnh arým memã axwe kêt jarẽ nhym me arým kum mex ne. Me kum axwe kêt kam me kunĩ arým Metîndjwýnh kôt tîn ne ar ba rã'ã: rã'ã ne. <sup>19</sup> Bir, me'ô pydji kute Metîndjwýnh kabên kangakam Metîndjwýnh arým me krãptĩmã axwe jarẽ. Nhym be, me'ô pydji kute Metîndjwýnh kabên markumrêxkam dja Metîndjwýnh arým me krãptĩmã axwe kêt jarẽ nhym me arým kum mex ne.

<sup>20</sup> Nhym ajtekam Metîndjwýnh arým memã Mõjdjê kukrãdjã jarẽ. Apýnh me axwe djãrio krãptĩ: kadjy ne memã kukrãdjã jarẽ. Nhym be, te apýnh me axwe djãri krãptĩ: nhym ukaprĩ:. Me te mã axwe nhym mã ukaprĩ:. Ukaprĩo amũ amikamên arým ukaprĩ ra:x ne. <sup>21</sup> Mýj kadjy? Bir, me mã axwe:n te axwe kêt prãmje. Ne kam arým me biknor tokry djãkam akuno. Nhym be, Metîndjwýnh tu kum me kaprĩ:kumrêx ne memã axwe kêt jarẽ ne kam arým meo ba. Meo ban memã tîn jangij nhym me kôt tîn ne ar ba rã'ã: rã'ã ne. Nãm me tu amim me banhõ Bẽnjadjwýr djwýnhbê Jeju Kritu markumrêx ne kam arým Metîndjwýnhkôt tîn ne ar ba rã'ã: rã'ã ne.

## 6

*Me Kritumẽ ro'ã tyk ne akubyn tîn.*

*A Kô 5.17; Gar 2.20; Kor 2.13*

<sup>1</sup> Te gwaj bajaxwe nhym Metîndjwýnh tu kum gwaj bakaprĩ. Djãm tu kum gwaj bakaprĩkam dja gwaj we abenmã kum,

—Gwaj mã bajaxwe ar baba rã'ã. Gêdja kam Metîndjwýnh tu kum

gwaj bakaprĩ:kumrêx, ane? Djãm gwaj baje ã abenmã anhÿrmã?

<sup>2</sup> Arkati. Arým gwaj tu bajaxwe kangakumrêx. Baje mrãmri ne me tyk kute tu axwe kangakumrêx pyrãk. Djãm kam gwaj bajaxwe rã'ãmã? Arkati. <sup>3</sup> Me kute ngômã gwaj bajangjênhja kunĩ gwaj amim,

—Ba Kritu Jejumẽ itypdji. Ne kam arým kute mrãmri ne Kritumẽ ro'ã ityk ne ijadjãr pyrãk. Nã gwãm ã amim ane. Djãm ar aje ja mar kêt?

<sup>4</sup> Kam, me kute ngômã gwaj bajangjênhkam ne kute gwaj Kritumẽ ro'ã batyk ne bajadjãr pyrãk. Ga, Bãm mexo uma:n arým akubyn Krituo tînja pumũ. Gwaj badjwý baje mrãmri ne Kritumẽ ro'ã akubyn batîn pyrãk. Gwaj ã amimaro ane. Kam dja gwaj atemã amijo baba nyo amijo baban katãt amijo baba.

<sup>5</sup> Godja gwaj kumẽ batipdjikam baje ro'ã batyk pyrãk jabej dja gwaj kam kumẽ baje mrãmri ne ro'ã akubyn batîn pyrãk. <sup>6</sup> Bir, amrêbê ne gwaj ar bajaxwe: baba. Ne kam Jejumẽ batipdjĩn arým kute ro'ã pite'y'ã arým bajarij pyrãk. Ne kute bajaxwe wãnh arij pyrãk. Gwaj ã amimaro ane. Gwaj kam arým bamã bajaxwe prãm kêt. Arým gwaj Jejumẽ batypdji. Ne kam baje bajaxweo krã'yr mar mexkumrêx. <sup>7</sup> Ga, arým me tykkam me ajte axwe kêtja pumũ. Gwaj badjwý arým baje Jejumẽ ro'ã batyk pyrãk ne bamã bajaxwe prãm kêt.

<sup>8</sup> Godja gwaj baje ro'ã batyk pyrãk mar jabej ne kam arým baje ro'ã akubyn batîn pyrãk jadjwý mar ar o baba. Tãm ne gwaj baje tu amim markumrêx. <sup>9</sup> Mýkam? Bir, Kritu arým mrãmri akubyn tĩnkam ajte tyk'ýr bõx prãm kêt kumrêx. Dja ajte tyk prãm kêt kumrêx. Tãm ne gwaj baje ajte markumrêx. <sup>10</sup> Mýkam? Bir, tykkam ne arým gwaj bajaxwe pãnh tyk mãmdji. Nhym be, jakim ne akubyn tîn ne

ar ba. Metîndjwÿnh kabên kôt ar amijo ba kadjy tîn ne ar ba.

*Me kute wân̄h axwemã ir-  
erkumrêxmã.*

*Rô 8.4; Ep 4.17; Kor 3.5; Ped k 4.1*

<sup>11</sup> Tãm dja gar amijã aman amim,

—Badjwÿ ne ba ije me'õ tyk pyrãk ne tu wân̄h ijaxwemã inhir-  
erkumrêx. Nhym be, jakam ije  
Metîndjwÿnhkôt katãt ar amijo iba  
kadjy ne ba ije me'õ tyk ne akubyn  
tîn pyrãk ne ar iba, ane. Dja gar ã  
amim ane. Gwaj banhõ Bênjadjwÿr  
djwÿnhbê Jeju Kritumê batipdji kôt  
dja gar ã amim ane.

<sup>12</sup> Ba ar amã me'õ'ã ajarê gar  
ama. Me'õja ne õ bēnjadjwÿrmã  
àpēnh ar ba ne kubê utî:n amim,

—Ba te ije bēnjadjwÿr kangan  
ikator ne ate ikrãn ityk djã kêt  
prãmje. Nhym ijã no tÿx ne mã  
ijãno djan idjãpēnh'ã inê ne, ane.  
Ar gadjwÿ ar aje me'õja pyrãk ne  
te ajaxwe kêt prãmje ne ajaxwe  
rã'ã. Kwãrik wân̄h ajte amã ajaxwe  
prãm kêt. Jakam akubyn kubê  
aminê gê ar anhõ ba kêt, ar anhÿ  
tyk prãmjao ba kêt. <sup>13</sup> Kwãrik  
wân̄h kum adjãpēnhmã me axwe  
nhõ bēnjadjwÿrmã amijarēnh kêt.  
Kwãrik wân̄h kum aminhikra,  
amipar, amino, amidjumar djã  
jarēnh kêt. Dja gar kôt ajaxwe.  
Kubê aminê. Nhym be, aje  
me'õ tyk ne akubyn tîn pyrãk  
dja gar Metîndjwÿnhmã amijarê,  
kum aminhikra, amipar, amino,  
amidjumar djã jarê. Ne kam arÿm  
kôt katãt amijo aba.

<sup>14</sup> Amrêbê ne gar amim,

—Ba dja ba Môjdjê kukrãdjã man  
kôt amijo anhÿro iban arÿm kôt  
Metîndjwÿnhmã ijaxwe kêt, anhÿro  
aban te kôt amijo anhÿr prãmje ne  
ajaxwe rã'ã. Nhym be, jakam ne  
gar amim,

—Metîndjwÿnh djukaprÿtire ta ne  
tu ijo mex, anhÿro aban arÿm tu  
amim markumrêxo aba. Kam ar

aje wân̄h ajaxwemã anhirer kadjy  
atÿx.

*Me kute Metîndjwÿnhõ bēnjadjwÿrn  
kum àpēnhmã.*

*Kô k 7.22; Gar 5.1*

<sup>15</sup> Gwaj baje Môjdjê kukrãdjã  
marn kôt amijo anhÿro babakôt  
Metîndjwÿnh kute gwaj bajo mex  
kêt. Nhym be, tu kum gwaj  
bakaprÿkôt ta kute gwaj bajo mex.  
Djãm kam gwaj baje we amim,

—Ba gêt ijaxwe rã'ã. Tu kum  
ikaprÿkam ba gêt ijaxwe rã'ã. Dja  
imã ijaxwe pãnh jarēnh kêt, anhÿr  
ne kam kôt bajaxwe rã'ãmã? Kati.

<sup>16</sup> Godja gar me axwe nhõ  
bēnjadjwÿrmã kum,

—Ã. Ba amã apê ga arÿm ijo  
aba, anhÿr jabej gar arÿm kum  
adjãpēnhkumrêx. Ne kam arÿm  
ajaxwen kam ô'ã arÿm akuno, me  
biknor tokry djãkam akuno. Nhym  
be godja gar Metîndjwÿnhmã kum,

—Ba akabên kôt amã idjãpēnhkumrêx,  
anhÿr jabej ne arÿm Metîndjwÿnhõ  
ar anhõ bēnjadjwÿrkumrêx jabej  
arÿm aje kabên marn kôt amijo  
anhÿro aba. Ne kam arÿm ô'ã  
ajaxwe kêt ne akatãt. Djãm ar aje  
ja mar kêt?

<sup>17</sup> Nhym be, ba Metîndjwÿnhmã  
ar akam amikÿnh jarê. Gar amrêbê  
me axwe nhõ bēnjadjwÿrmã apê.  
Kum adjãpēnhri te katãt aje amijo  
abamãn arerekre. Ne arÿm jakam  
mrãmri aje Metîndjwÿnh kabên  
markumrêx. Me kute ar amã  
Metîndjwÿnh kabên jarēnhja amã  
kÿnh. Ne kam mrãmri aje mar ne  
kôt amijo anhÿro abakumrêx. <sup>18</sup> Ne  
kam arÿm ajaxwe kêt mã atÿx ne  
arÿm akatãt. Abê Metîndjwÿnh nhõ  
àpēnh ne arÿm kôt katãt ar amijo  
aba.

<sup>19</sup> Ar ano rerekren ar ajamak  
mex kêt kam ne ba tu pykakam  
me kukrãdjã kôt ar amã ikabên  
jarê. Amrêbê ne gar aje me axwe  
nhõ bēnjadjwÿrmã adjãpēnh kadjy  
kum amijarê, kum aminhikra,



amipar, amino, amidjumar djâ jarê. Aje amû ajaxweo amikamênh kadjy kum amijarê nhyam ar ajo ba. Gar kum apên te katât amijo abamân arÿm arerekre. Nhyam be, jakam dja gar Metîndjwÿnh ar anhô bÿnjadjwÿr ne kum adjâpênhkumrêx. Ne kam aje katât amijo abamâ arÿm atÿx ne. Dja gar kum atÿx ne arÿm katât amijo aban amû kum amexo amikamênh mō.  
<sup>20</sup> Me axwe nhô bÿnjadjwÿrmâ adjâpênhri Metîndjwÿnh kute ar ajo ba kêtikumrêx gar te katât kôt amrânhe mex prâmje. <sup>21</sup> Jakam dja gar akubyn amijo tÿn amima. Kam amikam apijâm ne. Amrêbê ate ar abakam mÿj got gar me axwe nhô bÿnjadjwÿrkam amim aby. Arkati. Ar ga ne gar ar mekôt aba kajgo. Me ate ar ba djô'â ne me me biknor tokry djâkam akuno. <sup>22</sup> Nhyam be, jakam ne Metîndjwÿnh arÿm me axwe nhô bÿnjadjwÿrbê ar apytâ gar kum adjâpênh ar aban arÿm ô'â amexkumrêx. Ne amû amexo amikamênh mōn kam ô'â arÿm Metîndjwÿnhkôt atÿn ne ar aba rā'â: rā'â ne.

<sup>23</sup> Tām ne ja. Me axwe pānh ne me arÿm me biknor tokry djâkam akuno. Nhyam be, Metîndjwÿnh ne kute memâ tÿn jangjênh nhyam me arÿm kôt tÿn ar ba rā'â: rā'â ne. Djām me kute kum o pānhkam kute memâ angjênh? Kati. Me kute kum o pānh kêt kam tu kute memâ angjênh. Me kute tu amim gwaj banhô Bÿnjadjwÿr djwÿnhbê Jeju Kritu markumrêx nhyam arÿm ta kum me kaprÿn kute memâ kôt tÿn jangjênh.

## 7

*Me kute Kritubit marn kôt amijo bamâ kute arênh.*

*Rô 8.2; Gar 4.1; Ep 2.2; Kor 3.7*

<sup>1</sup> Akmere, àpnhÿre ar, Metîndjwÿnh kute Môjdjê mâ kukràdjâ jarênh gar aje mar mexja, ar amâ ne ba ikabÿn. Me tÿnri ne me kute

kukràdjâ mar ne kôt kute amijo anhÿro bamâ. Nhyam be, djâm me arÿm tykkam kute kôt amijo bamâ? Kati. Arÿm me tykkam me kute kôt amijo ba kêt. Djâm ar aje ja mar kêt got?

<sup>2</sup> Ba ar amâ arê. Me'ō nire arÿm mjênkam dja arek mjên'â ngrâ. Metîndjwÿnh kukràdjâkôt arek mjên'â ngrâ. Mjên tÿnri 'â ngrâ. Godja mjên'â ngrâ kêt jabej arÿm Metîndjwÿnh kukràdjâkam amikrân arÿm axwe. Nà, dja mjên tÿnri 'â ngrâ. Nhyam be, arÿm kubê mjên tykkambit dja arÿm 'â ngrâ kêt.

<sup>3</sup> Godja mjên tÿnri me'ōdjwÿ'ÿr mōr jabej nhyam me arÿm kum mjênkam axwe jarê. Arÿm ne me'ōjao akî. Nhyam be, godja mjên arÿm kubê ty nhyam my 'ōmê arkum aben kÿnh kwârîk wānh ar abenwÿr mō. Djâ ne kam ar Metîndjwÿnh kukràdjâkam amikrà? Kati. Arÿm mjên kubê tykkam nhyam ar kute abenwÿr mōrkam kute kukràdjâkam amikrà kêt. Me kute kum mjênkam axwe jarênh prām kêtikumrêx. Tām dja gar ama.

<sup>4</sup> Mjên tykkam kukràdjâja mÿj'â ne ba ar amâ arê? Mÿj ne gar aje kam marmâ? Bi; amrêbê ne gwaj Metîndjwÿnhmâ bamex kadjy Môjdjê kukràdjâ man kôt amijo anhÿro baba. Tām ne kute mrāmri ne gwaj bamjên arÿm tyk pyrâk. Jakam ne gwaj baje kukràdjâ kôt amijo baba prām kêt. Jakam arÿm Kritu tyn akubyn tÿn ne. Kritumê batipdjikam ne gwaj baje Môjdjê kukràdjâ marn kôt amijo anhÿro baba prām kêt. Kam Metîndjwÿnhmâ bamex kadjy gwaj Kritubit man kôt ar amijo baba. Ja'â ne ba ar amâ mjên tykkam kukràdjâ jarê. Kritu tyk ne akubyn tÿnjamê batipdji kadjy ne gwaj Kritu man kôt ar amijo baba. Metîndjwÿnhmâ bamexkumrêx kadjy gwaj Kritu man kôt ar amijo baba.

<sup>5</sup> Amrêbê gwaj ba baje amid-jwÿnhbit o kÿnh prãm kam ne gwaj tu bajaxwe:. Me te Môjdjê kukràdjào gwaj bajaxwe nêje gwaj bajakre gwaj bajamakkre kêt ne kam bajaxwe: ne. Metÿndjwÿnhkam bajaxwe: ne. Nhy m bit kute me biknor tokry djàkam gwaj bamênhmã. <sup>6</sup> Amrêbê ne gwaj baje te Môjdjê kukràdjà marn te kôt amijo anhÿro baba. Ne amim,

—Dja ba Môjdjê kukràdjà man kôt amijo anhÿro iban arÿm Metÿndjwÿnhmã ijaxwe kêt, anhÿro baba. Ne kam kôt te bajaxwe kêt prãmje.

Nhy m be, jakam arÿm gwaj Kri-tumê batipdjikam baje ro'ã batyk pyrãk ne arÿm baje ajte Môjdjê kukràdjà tÿm'ã pi'ók no'ókja mar prãm kêt. Djãm gwaj baje ajte amim,

—Dja ba Môjdjê kukràdjà man kôt amijo anhÿro iban arÿm Metÿndjwÿnhmã ijaxwe kêt, anhÿrmã? Kati. Gwaj baje amim anhÿr kêt kumrêx. Jakam ne gwaj mÿjja ny man amim,

—Arÿm ne Metÿndjwÿnh Karô iwÿr bôx ne ijo ba. Ta ne kute Metÿndjwÿnhmã ijo mexo ba, anhÿro baba.

*Dja me Môjdjê kukràdjà man kôt amijaxwe ma.*

*Rô 3.20, 5.20*

<sup>7</sup> Metÿndjwÿnhmã gwaj bajaxwe kêt kadjy ne gwaj ajte Môjdjê kukràdjà kôt amijo anhÿro baba kêt. Kam, djãm gwaj we baje amim,

—Môjdjê kukràdjà punu, anhÿr jabej? Arkati. Ne ba ren Môjdjê kukràdjà mar kêt ne ren amijaxwemã ikator kêt ne ren ajte amijaxwe mar kêt. Ê, ren me Môjdjê kukràdjào nêje ikukrà kêt, imã me'õ nhô mÿjja pro kÿnh ne amim 'ã karô kêt kadjy ren ikukrà kêt ba ren tu imã me õ mÿjja pro kÿnh ne 'ã amim karôo iban kam ren kam amijaxwe ja mar kêt. Me

kute nêje ikukrà kêt kam ne ba ren kam amijaxwe mar kêt.

<sup>8</sup> Nhy m be, kati. Arÿm ne me Môjdjê kukràdjào nêje ikukrà. Ba kam arÿm amijaxwe ma. Ba kãjbê imã me'õ nhô mÿjja puro kÿnh nhy m me Môjdjê kukràdjào mã imã,

—Kwãrÿk wãnh amã me õ mÿjja puro prãmje ar aba kêt, ane. Ba kam ba arÿm imã me õ mÿjja pro kÿnh. Ne kam arÿm me õ mÿjja puro prãmje ar iba. Ne arÿm imã apÿnh me õ mÿjja puro kÿnh ne arÿm ijaxweo imôr me:x ne. Ne ren Môjdjê kukràdjà kêt nhy m ren me mar kêt nhy m ren me axwe ren kute kajgo pyrãk. Kam ne ba ren badjwÿ ren amijaxwe mar kêt ne. Nhy m be, kati. Arÿm ne ba kukràdjà man ajte kôt ijaxwe ma.

<sup>9</sup> Amrêbê ije Môjdjê kukràdjà mar kêt ri ne ba ate ikrãn amim,

—Dja ba Metÿndjwÿnhkôt itÿn ne ar iba rã'ã: rã'ã ne, anhÿro iba. Ne kam kute itÿn pyrãk ne ar iba. Ne kam arÿm Môjdjê kukràdjà man amim,

—Je, arÿm ijaxwe:. Ijaxwe pãnh dja Metÿndjwÿnh arÿm ikangan me biknor tokry djàkam imê, ane. Ba kam arÿm ityk pyrãk. <sup>10</sup> Ba arÿk amim,

—Dja ba Môjdjê kukràdjà mex-tire man kôt amijo anhÿro iban arÿm Metÿndjwÿnh kôt itÿn ne ar iba rã'ã: rã'ã ne, ane. Ne kam te ije kôt amijo anhÿrmãn kam arÿm amim,

—Ijaxwe:. Dja Metÿndjwÿnh ikangan me biknor tokry djàkam imê. Nã bãm ã amim ane. Ne kam ije Môjdjê kukràdjà mex-tire markam amityk ma.

<sup>11</sup> Mÿkam? Bir, ba ne ba amim ijêx ne aminoo aknon amim,

—Dja ba Môjdjê kukràdjà man kôt amijo anhÿro iban Metÿndjwÿnh kôt itÿn ne ar iba rã'ã: rã'ã ne, ane. Nhy m be, kati. Me kunÿ te kute kukràdjà marn kôt amijo

anhÿr prāmje, ne kam kam amikràò ba. Badjwÿ ne ba kam amikràò iba. Ne kam aminoo aknon arìk amim,

—Dja ba Mòjdjê kukràdjà man kòt amijo anhÿro iban arÿm Metìndjwÿnh kòt itìn ne ar iba rà'á: rà'á ne, ane. Nhym be, kati. Ije kukràdjàkam amikràkam dja Metìndjwÿnh me biknor tokry djàkam imē. <sup>12</sup> Djām kam Mòjdjê kukràdjà punu? Kati. Mexkumrēx. Metìndjwÿnh kukwakam ne Mòjdjê kute memā kukràdjà jarēnh. Mòjdjê kute kam me axwe kêt kadjy me akre katàtkumrēx. Kukràdjà mexkumrēx.

<sup>13</sup> Djām Mòjdjê kukràdjà mex kòt ije amijo anhÿr djò'á ne ijaxwen me biknor tokry djàkam itēmmā? Arkati. Ba kukràdjà maro iban kam arÿm amijaxwemā ikaton amima. Ne kam te kukràdjà kòt amijo anen mā ijaxwen kam arÿm mā amim,

—Dja Metìndjwÿnh ijaxwe pānh me biknor tokry djàkam imē. Be, ijaxwe ne punu:re, anhÿro iba.

*Ta te: axwe kêt prāmje mā axwe'ā kute amijarēnh.*

#### *Gar 5.17*

<sup>14</sup> Metìndjwÿnh Karō ne Mòjdjê kukràdjà jarē. Nhym be, jakam djē ne ba mā Metìndjwÿnh Karō ma? Kati. Imā ijaxwe prām ne te ijaxwe kêt prāmje. <sup>15</sup> Djām imā mÿjja kīnhja ne ba o iba? Kati. Imā mÿjja kīnh kêtja ne ba o iba. Mÿkam ne ba o iba? Kon. Ije mar kêt. <sup>16</sup> Imā mÿjja kīnh kêtò ibakam ba arÿm amim,

—Mrāmri, Mòjdjê kukràdjà mexkumrēx, ane. <sup>17</sup> Djām kam ba ne ba o iba, imā mÿjja kīnh kêtjao iba? Kati. Ikadjwÿnhbé ijaxwe ja ne 'ā imā apnēn ijo ba. <sup>18</sup> Djām imex got? Ije amidjwÿnhbito kīnh prām kam djām imex got? Ije mÿjja mexo iba kadjy te imā mÿjja mexbit kīnh. Kam, ije mÿjja mexbito iba kadjy mÿj dja ba amijon? Kon. Ije amikam mar kêt kumrēx. <sup>19</sup> Imā

mÿjja mex kīnhja djām tām ne ba o iba? Kati. Imā ijaxwe kīnh kêtja ijaxwe ja ne ba o iba. Te imā ijaxwe kīnh kêt mā o iba. <sup>20</sup> Kam, imā ijaxwe kīnh kêtjao ibakam djām ba ne ba o iba? Kati. Ikadjwÿnhbé ijaxwe ja ne ijaxwe'ā imā apnēn ijo ba.

<sup>21</sup> Kam, djā ne ba mrāmri mÿjja mexo ibakumrēx? Kati. Bit ije mÿjja mexo iba kunìkòt ne ba mā mÿjja punu o iba. <sup>22</sup> Ba ne ba imā Metìndjwÿnh kukràdjà kīnh. <sup>23</sup> Nhym be, ikadjwÿnhbé ijaxwe ja ne ijaxwe'ā imā apnē. Ba amim, “Ba on imexbit”, ane. Ne kam mā ijaxwen te ijaxwe kêt prāmje. Ije mÿjja mexo iba prām kunìkòt mā ijaxwe. <sup>24</sup> Ba amim,

—ÿ, watīre. Ikadjwÿnhbé ijaxwe ja ne ijaxwemā ingrēk prām ba arÿm me biknor tokry djàkam itēmmā. Mÿj me'ò dja ikadjwÿnhbé ijaxwe jabē ipytà? Nā bām ā amim ane. <sup>25</sup> Bir, gwaj banhō Bēnjadjwÿr djwÿnhbé Jeju Kritu dja ikadjwÿnhbé ijaxwebē ipytà. Ba kam mā Metìndjwÿnhmā amikīnh jarē. Tām ne ja.

Ba kam mā amim,

—Ba on Metìndjwÿnh kabēn kòtbit amijo iba, ane. Nhym be, ikadjwÿnhbé ijaxwe mā kute ijo ba prām kumrēx. Tām ne ja.

## 8

*Me kute Metìndjwÿnh Karō marja tìn.*

<sup>1</sup> Kritu Jejumē gwaj batipdji nhym arÿm kute gwaj bakadjwÿnhbé bajaxweo apēxmā. Kam, Metìndjwÿnh kute gwaj bamā bajaxwe pānh jarēnh kêt gwaj me biknor tokry djàkam babiknor kêt kumrēx. Baje amidjwÿnhbito kīnh kadjy bajaxweo baba kêtja, baje Metìndjwÿnh Karō kòt amijo babaja, gwaj ba dja gwaj me biknor tokry djàkam babiknor kêt kumrēx.

<sup>2</sup> Mÿkam? Bir, gwaj mā bajaxwekam arÿm me biknor tokry djâkam batëmmā. Nhy m be, gwaj arÿm tu amim Kritu Jeju markumrëx nhy m Metÿndjwÿnh Karō gwaj babē bajaxwe kurën kubê gwaj bamā tÿx jadjà gwaj kam arÿm katàt amijo baba kadjy batÿx. Ne kam babiknor kêt kumrëx ne Metÿndjwÿnhkôt batÿn ne ar baba rā'ā: rā'ā ne. <sup>3</sup> Bir, gwaj baje amidjwÿnhbito kÿnh kadjy bajaxweo babakam ne gwaj te: katàt baje amijo baba prāmje ne te baje Mōjdjê kukràdjà mar ne te kôt baje amijo baba mexmā. Nhy m kam Metÿndjwÿnh pykamā ta Kra pydji jano nhy m ta amijo kute me axwe nhÿ pyrāk ne ar ba. Nām aminhÿ tā pÿte'y'ā wajêt nhy m Metÿndjwÿnh arÿm gwaj bamā tÿx jadjà. Katàt baje amijo baba kadjy arÿm gwaj bamā tÿx jadjà nhy m gwaj bajaxweja arÿm gwaj bamā rerekren ajte kute gwaj bajo ba kêt.

<sup>4</sup> Dja gwaj amidjwÿnhbito kÿnh kêt ne bajaxweo baba kêt ne Metÿndjwÿnh Karō man kôt ar amijo baba. Nhy m kam arÿm gwaj bamā tÿx jadjà. Gwaj bajaxwe kêt kadjy bamā tÿx jadjà. Gwaj kam arÿm kum bajaxwe kêt ne katàt ar amijo baba. Ne kam arÿm tu Mōjdjê kukràdjà kôt katàt ar amijo baba.

*Me ta kute amidjwÿnhbito kÿnh.*

*Gar 5.16*

<sup>5</sup> Bir, me ta kute amidjwÿnhbito kÿnhja ne me kum axwe mar prām. Nhy m be, me kute Metÿndjwÿnh Karō kôt amijo baja ne me kum Karō mar prām. <sup>6</sup> Nhy m me mā kum axwe mar prām ja dja me me biknor tokry djâkam akuno. Nhy m be, me kum Karō mar prām dja me Metÿndjwÿnhkôt tÿn ne ar ba rā'ā: rā'ā ne umar mexkumrëx.

<sup>7</sup> Mÿkam ne me mā: kum axwe mar prām akuno? Bir, me kum Metÿndjwÿnh kurëkam. Me ja ne me kute Metÿndjwÿnh kukràdjà

kôt amijo ba prām kêt. Nām me te: kôt amijo ane. <sup>8</sup> Me ja, me kute amidjwÿnhbito kÿnh kadjy axweo ba prāmja ne me te kute Metÿndjwÿnh kÿnhmā.

*Me kum Metÿndjwÿnh Karō mar prām'ā ujarënh.*

*Dju r 7.38*

<sup>9</sup> Nhy m be, djām ar ga ne gar amā ajaxwe maro aba prām? Kati. Ar ga ne gar amā Karō mar prām. Mrāmri ar akam Metÿndjwÿnh Karō ÿrkumrëx jabej ar amā Karō mar prām. Nhy m be, me'ōkam Kritu Karō ÿr kêtja Metÿndjwÿnh kute o aminhō kêt kumrëx.

<sup>10</sup> Nhy m be, mrāmri Kritu ar akam ÿrkumrëx jabej ar anhÿbit dja ty. Me axwe djô'ā me baty kjakam dja ar anhÿbit ty. Nhy m be, Metÿndjwÿnh kute ar amā axwe kêt jarënh nhy m Karō kute ar ajo bakam dja gar kôt atÿn ne ar aba rā'ā: rā'ā ne. <sup>11</sup> Nhy m kam Metÿndjwÿnh arÿm Karōo akubyn Jejuo tÿn. Karō ja ar akam ÿr jabej dja ar gadjwÿ ar ajo tÿn. Krituo tÿn djwÿnh ar ajo tÿn. Dja gar te arÿm ty nhy m akubyn ar gadjwÿ ar ajo tÿn. Ar akam Karō ÿr jao akubyn ar ajo tÿn.

<sup>12</sup> Kam, djām gwaj baje amidjwÿnhbito kÿnh kadjy mā bajaxweo babamā? Kati. <sup>13</sup> Dja gar arek ajaxweo aban arÿm akuno. Me biknor tokry djâkam akuno. Nhy m be, dja gar apÿnh ajaxwe krāta. Aparo ajaxwe'ÿr amrānh, anhÿkrao aje ajaxwe nhÿpëx, anoo aje ajaxwe pumÿnh, adjumar djâkam aje ajaxwe mar, ajajkwao aje mÿjja punu jarënh ajaxweja kunÿ krāta kute mrāmri ne me kute mÿjja bÿnkam arÿm apënh krā'yr pyrāk. Dja gar Metÿndjwÿnh Karō maro ajaxwe krātan arÿm Metÿndjwÿnhkôt atÿn ne ar aba rā'ā: rā'ā ne.

<sup>14</sup> Mÿkam? Bir, me kute Metÿndjwÿnh Karō maro ba nhy m

kute meo baja ne me mrãmri kubê Metĩndjwýnh krakumrêx. <sup>15</sup> Karô kute ar ajo bakam djãm Metĩndjwýnh ar ajo ô âpênh kajgon kum ar akurên ar ajo ajkê gar amã uma: ar aba? Kati. Karô kute ar ajo bakam Metĩndjwýnh arým ar ajo krakumrêx gar amã kĩ:nhkumrêx. Ne kam kum, “Djũnwã”, ane. Mebê idjaer kabênkôt ne me kum, “Aba”, ane. Nhym be, me bakabênkôt ne gwaj kum, “Djũnwã”, ane.

<sup>16</sup> Metĩndjwýnh Karô ta ne gwaj bakadjwýnhbê gwaj bamã,

—Be, omũ. Mrãmri abê Metĩndjwýnh krakumrêxja pumũ, anhÿro ba. Kam, gwaj babê Metĩndjwýnh krakumrêx. Tãm ne gwaj baje markumrêx. <sup>17</sup> Arým gwaj babê krakam dja gwaj arým Metĩndjwýnh nhô mÿjjao aminhõ. Kritumê ro'ã dja gwaj ô mÿjjao aminhõn ar o baba. Kôt batokry jabej o aminhõ. Kritukôt mrãmri batokry jabej dja gwaj ô mÿjjao aminhõn arým ro'ã bame:xkumrêx.

*Me kute amimexkumrêx kam amak.*

*Dju r 17.22; A Kô 4.17; Kor 3.4*

<sup>18</sup> Bir, mÿj dja gwaj batokry jakam kuma? Bir, 'ã dja gwaj amim,

—Jakam ba itokry ne kute itokry rax pyrãk. Nhym be, dja ba ï Kritumê ro'ã ime:xkumrêx nhym me kunĩ arým ipumũ. Dja ba kam ikĩnh. Ne ikĩnhkam ajbir itokry ja mar kêt, ane. Gwaj ã batokry'ã amim ane. <sup>19</sup> Dja gwaj babê Metĩndjwýnh krakôt bakato. Dja amrê ô akati bõx gwaj kam arým bakato. Djãm kam dja gwaj bapunu: got? Kati. Dja gwaj kam bame:xkumrêx. Mÿjja kunĩ Metĩndjwýnh kute ipêx ja ne amiwÿr gwaj bakatorkam ama:. Mrymê bãmê pykamê mÿjja kunĩ amiwÿr gwaj bakatorkam ama:.

<sup>20</sup> Mÿkam ne amiwÿr gwaj bakam ama:?. Bir, Metĩndjwýnh kute mÿjja

kunĩ nhipêx ja ne amrêbê amijo ajkên arým punu. Pykakam 'ê kumex ne mÿjja djãkrê kumex kato. Djãm mÿjja ta ne amijo ajkê? Kati. Metĩndjwýnh kabênkôt ne ã mÿjja amijo bikênhõ ane. Nhym be, ajmãkam dja mÿjja kunĩ mexkumrêx. Mÿjja kunĩ amiwÿr amimexkam ama:.

<sup>21</sup> Mÿkam? Bir, jakam ne mÿjja punu prãm, kã rerek prãm, kro prãm, apök prãm. Nhym be, mÿjja kute amijo mexkam dja punu prãm kêt, kã rerek prãm kêt, kro prãm kêt, apök prãm kêtumrêx. Gwaj babê Metĩndjwýnh kramê ro'ã dja mÿjja me:xkumrêx ne kĩ:nhkumrêx. Dja ï gwaj babê Metĩndjwýnh kra amirĩt. Ne kam bamexkumrêx ne bakĩnhkumrêx. Nhym kam me baro'ã mÿjja kunĩdjwÿ mexkumrêx. Kam ne mÿjja kunĩ amiwÿr amimexkam amã:.

<sup>22</sup> Jakam ne mÿjja kunĩ: tokry pymaje kangãngã. Kute mrãmri ne me nire kra àn tokry pymaje kangãngã pyrãk ne kute kra bixadjwÿrkam ama:k pyrãk. Amrêbê: ne mÿjja kangãngãn jakam kangãngã rã'ã ne.

<sup>23</sup> Gwaj badjwÿ ne gwaj banhĩ nykam ama:. Gwaj badjwÿ baje arým amijã Metĩndjwýnh Karô kakinhja ne gwaj banhĩ nykam ama:. Dja gwaj babê Metĩndjwýnh krakumrêx amirĩt. Nhym akubyn bõxkam dja gwaj bamã banhĩ ny ngã. Dja gwaj banhĩ nyja rerek prãm kêt ne apêx prãm kêt ne ny rã'ã. Banhĩ nykam amakbê bakangãngã. Banhĩja punu prãmkam batokry pymaje bakangãngã.

<sup>24</sup> Gwaj amiwÿr banhĩ ny kam ama: nhym arým Metĩndjwýnh amim gwaj bapytã. Nhym be, djãm arým ne gwaj banhĩ nyja pumũ? Kati. Gwaj ren arým banhĩ ny pumũn ren amiwÿr kam amak kêtumrêx ne ren ate bakrãn ar

baba. <sup>25</sup> Nhyr be, kati. Kute gwaj bamã banhĩ ny jadjãr kêtiri ne gwaj amiwÿr kam ama:n kam akrãnmã amiwÿr amãr 'iry.

<sup>26</sup> Gwaj banhĩ nykam amakbê Metĩndjwÿnh Karõ kum gwaj bakaprĩ. Gwaj bakaprĩn barerekrekam ne Karõ kum gwaj bakaprĩ. Ne Metĩndjwÿnhmã gwaj bajo a'u:w. Gwaj bakaprĩn barerekrekam dja gwaj amim,

—Mÿj dja ba ikaprĩkam Metĩndjwÿnhmã ikabên jarênh on? anen te baje Metĩndjwÿnhmã amijarênhmã. Nhyr kam Karõ kute pykakam gwaj bajo ba arÿm gwaj bama. Gwaj baman arÿm kum gwaj bakaprĩ. Kum gwaj bakaprĩn arÿm amũ kãjkwakam Metĩndjwÿnhmã gwaj bajo a'u:w. Djãm gwaj bakabênkam ne gwaj bajo a'uw? Kati. Ta kabên mar kêt kam. Kum gwaj bakaprĩ:kam ne kabêno kangãngã gwaj bajo a'u:w. Nãm ã Karõ amybÿm amũ kãjkwakam Metĩndjwÿnhmã gwaj bajo à'wÿro ane.

<sup>27</sup> Metĩndjwÿnh ne kute me kunĩ djumar djãkam me kabên mar mexkumrêx ne kam arÿm kute prĩne Karõ kabên mar mex. Karõ ta ne arÿm kute gwaj bajã Metĩndjwÿnh kabên mar. Kute gwaj bajã amim karõkam kabên ja kute mar ne kabên kôt kute kum gwaj bajo à'wÿr. Jeju kute arÿm gwaj bajo õ me ja, Karõ kute Metĩndjwÿnhmã gwaj bajo à'wÿr. Metĩndjwÿnh kabên kôt kute kum gwaj bajo à'wÿr. Nhyr kam Metĩndjwÿnh arÿm kute prĩne kabên mar mex.

*Kra mex kôt me mex.  
Rô 8.37; Pir 1.12; Ped k 5.10*

<sup>28</sup> Be, nhyr apÿnh mÿjja kute gwaj bajo baja. Mÿjja kunĩkôt. Apÿnh gwaj bakaprĩ djãri nãr apÿnh gwaj bakĩnh djãri kute gwaj bajo baja. O ne Metĩndjwÿnh amim gwaj bajo bajo mexo tẽ. Gwaj

bamã abêja ne gwaj bajo mexo tẽ. Metĩndjwÿnh ne amrêbê: gwaj bakukãm amim gwaj bajã karõn arÿm kôt amiwÿr gwaj bajuw ne ar gwaj bajo ba. Ne kam arÿm apÿnh mÿjja gwaj bajo mexo tẽ. Ja ne gwaj arÿm baje mar.

<sup>29</sup> Mÿj kadjy ne gwaj bajo mexo tẽ? Bir, Kra mex kôt gwaj bamex kadjy. Mÿjja kunĩ kêtiri ne kute me kukãm õ me ja kunĩ mar ne arÿm amijo me utã. Kra mex kôt kute meo mex kadjy ne amijo me utã. Krakôt kute õ me ja kunĩ mexo tẽkam ne kute mrãmri ne me kra kutewa apõx nhyr kôt aben nhytepã kamykunĩ apõx pyrãk. Kra kute kamy krãptĩ:mã wa kadjy ne Kra mex kôt gwaj bajo mexo tẽ.

<sup>30</sup> Kute amijo me utãr ja ne amiwÿr me ku'uw ne meo ba. Kute amiwÿr me 'wÿr ja ne memã axwe kêt jarê nhyr me arÿm kum mex ne. Kute memã axwe kêt jarênh ja dja meo me:xkumrêx. Nhyr me arÿm kãjkwakam Kra mex kôt mrãmri me:xkumrêx. Dja gwaj kãjkwakam kôt arÿm bame:xkumrêx.

*Metĩndjwÿnh kum me abê ne me'ã ukanga kêt.*

<sup>31</sup> Metĩndjwÿnh arÿm gwaj bamã axwe kêt jarê. Ne kam dja i Kra kôt prĩne gwaj bajo mex. Kam, djãm me'õ kute Metĩndjwÿnh bê gwaj bajo akêx gwaj kôt bajaxwemã? Kati. Metĩndjwÿnh ã kum gwaj bajabêo anhyr kam dja me'õ kubê gwaj bajo akêx kêt kumrêx. <sup>32</sup> Nãm amijã Kra djwÿnh pydji nê kêt ne gwaj bakunĩ kadjy kanga nhyr arÿm gwaj bapãnh ty. Djãm kute gwaj bakadjy Kra kangakam kute gwaj babê mÿjja mex'õ nê mã? Arkati. Kute gwaj bamã mÿjja mex kunĩ nhõrmã.

<sup>33</sup> Mÿj me'õ dja gwaj bamã axwe jarê? Kati. Metĩndjwÿnh kute amijo gwaj bapytãrja dja gwaj bamã axwe jarênh kêt. Ta ne arÿm gwaj bamã axwe kêt jarê gwaj arÿm kum

bamex ne. Kam dja te me'õ kute gwaj bamã axwe jarënhmã.

<sup>34</sup> Mÿj me'õ dja gwaj bamã me biknor tokry djâkam babiknormã arê? Kati. Kritu Jeju ne tyn akubyn tïn ne ajte Metïndjwÿnh djubôk'ãnh nhÿ. Metïndjwÿnh djubôk'ãnh nhÿn ajte gwaj banêje kum kabëno nhÿ. Kam dja te me'õ kute gwaj bamã babiknormã arënhmã. <sup>35</sup> Kritu kum gwaj bajabê:.

Dja te me'õ gwaj bajo ajkë nhym Kritu kum gwaj bajabê rä'ã:n gwaj bajo ba rä'ã: ne.

Dja te apÿnh gwaj bakaprï djari ajte gwaj bajo ba nhym Kritu kum gwaj bajabê rä'ã.

Dja te apÿnh mÿjja tÿx ajte gwaj bajo ba.

Dja te me ajte kum gwaj bakurê. Kritumã badjâpënhkam te kum gwaj bakurê.

Dja te ajte gwaj bamã prä:m.

Dja te ajte gwaj bakà kêt kam bamã kry:.

Dja te apÿnh mÿjja puma ajte gwaj bajã apôx.

Dja me ajte te kàxo gwaj bapa. Nhym Kritu mã: kum gwaj bajabê rä'ã:n gwaj bajo ba rä'ã: ne.

<sup>36</sup> Apÿnh gwaj bakaprï djari kute gwaj bajo ba kôt ne me bakukãmãre amrêbê: Metïndjwÿnhmã amijarën kum,

“Be, amã ar idjâpënhkam ne me kute ar ibïn pyrâk. Myt kunïkôt ne me kute ar ibïn pyrâk. Nãm me ar ijo mrykï'ãtomti pyrâk ne kum ar ibïn prä:m.”

Nãm ã me bakukãmãre Metïndjwÿnhmã anen arÿm 'ã pi'òk no'òk ne. Kam gwaj badjwÿ bakamingrãnyre dja gwaj mrãmri mekôt ã apÿnh bakaprï djari maro ane. Jejumã badjâpënhkam ã apÿnh bakaprï djari maro ane.

<sup>37</sup> Jeju ne gwaj bajã ukanga kêt ne kum gwaj bajabê rä'ã:. Kam te apÿnh mÿjja pumaja gwaj bajo ba

gwaj amim Jeju mar tÿx ne arÿm kubê amijo akêx kêt kumrêx.

<sup>38</sup> Djãm gwaj batykkam kum gwaj bajabê kêt ne gwaj bajã ukangamã? Kati.

Nàr, djãm gwaj batïn ne ar babakam kum gwaj bajabê kêt ne gwaj bajã ukangamã? Kati.

Nàr, djãm kadjy mrãnh djwÿnh 'õ kute gwaj bajo bikënh nhym kum gwaj bajabê kêt ne gwaj bajã ukangamã? Kati.

Nàr, djãm me karô punu,

nàr djãm jakam apÿnh mÿjja apôx, nàr djãm amrê apÿnh mÿjja apôx mör,

nàr djãm apÿnh mÿjja 'itÿx gwaj bajo bikënh nhym kum gwaj bajabê kêt ne gwaj bajã ukangamã? Kati.

<sup>39</sup> Nàr, djãm kâjkwa kurüm mÿjja apôx,

nàr djãm pyka krakri mÿjja apôx, nàr djãm Metïndjwÿnh kute amü apÿnh mÿjja kunï nhipêx'õ kute gwaj bajo bikënh nhym kum gwaj bajabê kêt ne gwaj bajã ukangamã? Arkati.

Apÿnh mÿjja puma te gwaj bajo ajkë nhym Metïndjwÿnh kum gwaj bajabê:n gwaj bajo ba rä'ã:.

Nãm ã kum gwaj bajabêo ane. Gwaj baje Kritu Jejuo banhö Bënjadjwÿr djwÿnhkôt ã kum gwaj bajabêo ane. Tãm ne ba tu amim markumrêx.

## 9

*Metïndjwÿnh ta kute amijo me*

*utâr:*

<sup>1-2</sup> Djãm gwaj baje Môjdjê kukràdjã mar ne kôt baje amijo babakam ne Metïndjwÿnh kute gwaj bamã axwe kêt jarënh gwaj arÿm kum bamex ne? Kati. Nã gwãm tu amim Jeju markumrêx nhym arÿm gwaj bamã axwe kêt jarê gwaj arÿm kum bamex ne. Nhym be, inhö me wÿnh,

inhöbikwabê mebê idjaer djâm me kute tu amim Jeju markumrêx? Kati. Me kute amim Jeju mar kêt. Nâm me amim,

—Ba Môjdjê kukràdjà man kôt ar amijo iba nhym Metîndjwýnh arým imã ijaxwe kêt jarê ba arým kum imex, ane. Me kute amim Jeju mar kêt kam dja Metîndjwýnh arým pãnh me kanga. Kam ne ba ikadjwýnhbê ikaprîn iban imýr rã'ã: ne. Kritu kôt ne ba katât ikaprî'ã ar amã amijarênhkumrêx. Metîndjwýnh Karô ta ne ajte idjumar djà kadjwýnhbê imã,

—Mrãmri 'ã ajêx kêtumrêx, ane. Mrãmri ikaprîkumrêx. <sup>3</sup> Inhö me wýnh, inhöbikwabê mebê idjaer ne me kute amim Jeju mar kêt. Ba ren me kadjy Metîndjwýnhmã kum,

—Kwãrik wãnh mebê idjaer kanga kêt. Ba dja ga me pãnh ikanga, ane. Nhym ren me kam arým tu amim Jeju Kritu markumrêx ba ren arým ã Metîndjwýnhmã ane. Nhym be, kati. Me kute amim Jeju mar kêt. Kam ne ba mekam ikaprîre. <sup>4</sup> Mebê idjaerkumrêx. Metîndjwýnh ne amrêbê meo kra nhym Metîndjwýnh rax djô'ã me ra:x. Ne kam ajmã kuten amim Jeju mar kêt ba arým mekam ikaprîre ne. Metîndjwýnhmê ne me kute aktã abenmã amijarênh mãmddji nhym arým memã kum,

—Ba dja ba me ajo djuw mex rã'ã: rã'ã ne, ane. Ne arým memã Môjdjê kukràdjà jarê nhym me o ba. Ne kukràdjà kôt kum apê ne kum amijarênh ba. Nhym kute memã mýjja jarênh mãmddji. Me kukãm apýnh mýjja mex apôxmã kute memã arênh mãmddji. Nhym me ajmã ne Jeju mar kêt ne ar ba. Ba kam mekam ikaprîre ne.

<sup>5</sup> Me bakukãmãre ne me me babê idjaer kukãmãrekumrêx nhym Jeju Kritu arým mekam amijo ï ne kato. Kubê ne apýnh me ba djà kunîkôt

me kunî, mýjja kunî Tîndjwýnh. Pydji ne me:xkumrêx ne ra:x. Mex ne rax rã'ã: rã'ã ne. Mrãmri ne ba ar amã arênhkumrêx. Jeju Kritu me ibê idjaer kurüm kato nhym kam me ajmã ne Jeju mar kêt ne ba. Ba kam mekam ikaprî:re ne imã me kaprî:kumrêx.

<sup>6</sup> Metîndjwýnh kute mebê idjaero kran kute memã, “Me abê ikra”, anhýrkam ne me kwý arým kanga. Me kwý kute kangakam djâm arým kam Metîndjwýnh kabên kajgo? Kati. Metîndjwýnh kabênkôt me kwýbê Metîndjwýnh krakumrêx. Djâm mebê idjaer kunî ne Metîndjwýnh kute meo kra? Kati. Me kwýbit. <sup>7</sup> Nâr, djâm Abraão djô'ã me ar ba kunî ne Metîndjwýnh kute memã,

—Me abê Abraão tàmdjwýkumrêx, anhýro ba? Kati. Me kwýmãbit. Nâm Abraãomã kum,

—Idjak kurüm dja atãmdjwý apôx, ane.

<sup>8</sup> Mýj'ã ne gwaj kabên ja ma? Bir, amrêbê: me bakukãmãre Abraão ta ne amikabênkôt ô apênh kajgomã Imaêr dji nhym kato. Djâm kra Imaêrmê ô'ã tàmdjwý apôxmê djã ne Metîndjwýnh me jao krakumrêx? Kati. Metîndjwýnh kute kabên pydjín arênh kôt ne prökumrêxmã Idjak dji nhym arým kato. Nhym kam Metîndjwýnh arým o krakumrêx. Kra Idjakmê kam tàmdjwý apôxmê ne Metîndjwýnh meo krakumrêx. <sup>9</sup> Arým ne Abraãomã kum,

—Dja ba ï bôx nhym Xara arým kra, ane. Metîndjwýnh kute kabên pydjín arênh ne ja. Nhym kam arým kra kato nhym Metîndjwýnh amikabênkôt arým o kra.

<sup>10</sup> Nhym ajtekam me banhingêt Idjak Rebekamã kra ar kudji nhym tujarô rã'ãkam Metîndjwýnh arým kra ar'ã amim karô. <sup>11-13</sup> Ar rwýk kêttri. Ar mex nâr ar axwe kêttri ne arým ar'ã amim karôn Rebekamã kum, “Kutewa dja kutapumã apê”, ane.



Pi'ôkkam kute me bakukâmâremã ar arênh kôt ne ã Rebekamã ane. Ne memã kum,  
 “Imã Djako kînh. Nhyim be, imã Ixau kînh kêt”, ane.

Djãm mexkam ne kum Djako kînh? Kati. Djãm axwekam ne kum Ixau kînh kêt? Kati. Kute ar'ã amim karõ kôt kum Djako kînh ne kum Ixau kînh kêt. Idjujarênhja ne me kunĩ'ã amijakre. Mÿj dja gwaj me kunĩ'ã amim arênh kuma? Bir, dja gwaj amim,

—Be, Metĩndjwÿnh ne amikabênh kôt arÿm amijo me utã. Kute me kêtri me'ã amim karõ kôt ne arÿm amijo me utã. Djãm me ta mexkôt ne amijo me utã? Kati. Amikabênh kôt. Kute amiwÿr me 'wÿr djwÿnh ta amikabênh kôt ne kute amijo me utã, ane. Tãm dja gwaj idjujarênh ja markam amim arênh maro baba.

<sup>14</sup> Metĩndjwÿnh ta kute amijo me utã. Me kator kêtri kute amijo me utã. Kute amim me'ã karõ kôt kute amijo me utã. Djãm kam gwaj ba baje amim,

—Be ga, Metĩndjwÿnh kute katãt amijo ba kêtja pumũ, anhÿrmã? Arkati. Metĩndjwÿnh katãt ry tipdji.

<sup>15</sup> Ga, Metĩndjwÿnh amrêbê: me bakukâmãre Mõjdjê'mã kum,  
 “Ba dja ba amim me'õ'ã karõn tu imã kaprĩ. Ba dja ba amim me'õ'ã karõn tu imã kînh.”  
 Nãm ã Metĩndjwÿnh me bakukâmãremã ane.

<sup>16</sup> Mÿj ne gwaj kabênh ja burũm kuma? Bir, djãm me'õ ta kum kînh nhyim kum kaprĩ? Kati. Nãr, djãm me'õ ta kum apê nhyim kum kaprĩ? Kati. Metĩndjwÿnh ta ne tu kum me kaprĩ. Tãm ne gwaj Metĩndjwÿnh kabênja burũm kuma.

<sup>17</sup> Amrêbê: me bakukâmãre ar bari ne Metĩndjwÿnh Parao'ã amakkre kêt mên ajte o bikênh dja. 'Ã amakkre kêt mênho ãmri ne kum,  
 “Mÿj kadjy ne ga anã kurũm ruw ba ajo ikato? Bir, ije ajã ajamakkre kêt mênho ne ajo ibikênh kadjy. Ije me

kunĩmã akam itÿxo amirĩt kadjy ne ba ajo ikato.

Apÿnh pyka kunĩkôt dja me iraxmã katon abenmã irax ne ipyma jarê. Ja kadjy ne ba ajo ikato. Me kute ipyma: mar kadjy. Kadjy ne ba ajo ikato.”

Nãm ã Paraomã ane nhyim me arÿm 'ã pi'ók no'ók ne. <sup>18</sup> Arÿm ne ba Rebekã'ã ajarênh ajte Mõjdjê'ã ajarênh ajte Parao'ã ajarê.

Mÿj dja gwaj Metĩndjwÿnh kute kam arkam kabênh jarênh burũm kuma? Mÿj'ã ne amijakre? Bir, Metĩndjwÿnh ta ne amim me'ã karõ. Ne kam amikabênkôt arÿm tu kum me kwÿ kaprĩ. Tãm ne gwaj kute Rebekamã kabênh jarênh ne ajte Mõjdjê'mã kute kabênh jarênh burũm kuma. Ba kam ajte Parao'ã ajarê. Mÿj dja gwaj Metĩndjwÿnh kute kum kabênh jarênhja burũm kuma? Bir, Metĩndjwÿnh ta ne amim me'ã karõ. Ne kam ta amikabênkôt ajte tu me kwÿ'ã amakkre kêt rê. Tãm dja gwaj Paraomã kabênh burũm kuma.

<sup>19</sup> Djãm ar ajõ imã,

—Metĩndjwÿnh kute ã amim me'ã karõ anhÿrkam mÿj me'õ ne kubê ãptãrmã? Arkati. Metĩndjwÿnh ta kute me'ã amakkre kêt mênhkam ne ren memã axwe jarênh kêt. Mÿkam ne memã axwe jarê? ane. Djãm aje ã imã anhÿrmã?

<sup>20</sup> Kati. Kwãrĩk wãnh mÿjwã wã jarênh kêt. Pykabê ne ga ar aban angri:re ga we ajte akabêno aje Metĩndjwÿnh japanhmã. Nã bãm me bakukâmãre kabênh kôt amã ane. Amrêbê ne me memã kum,  
 “Djãm arÿm mÿjja nhipêx kute ipêx djwÿnhmã kum,

‘Mÿkam ne ga ga inhipêx prãm ne kam ã ijo ane?’ anhÿrmã? Kati.”

Nãm ã me bakukâmãre memã ane. Mrãmri ne me bakukâmãre memã arênhkumrêx. <sup>21</sup> Ga, ngyo ngõnh nhipêx djwÿnh ta kute amim 'ã karõ kôt kute ngy kajgo jamÿnh

ne o ngôn nhípêxa pumũ. Ta mýjja mex kadjy ngôn nhípêx. Nâr, ajte ta mýjja punu kadjy ngôn nhípêx. Metĩndjwýnhdjwý, kute me ipêx djwýnh ta amikabênkôt tu ã meo ane. Djãm kam gwaj baje bak-abêno apanhmã? Kati.

<sup>22</sup> Ta amikabênkôt tu ã meo ane. Mekam ngyrk ne tu kute meo bi-knorkumrêx kadjy ne me ipêx. Me kwý ja'ã ne ta amim karõn amim,

—Dja ba ĩ me kwýkam ingyko amirĩt ne. Nhym me kunĩ ipumũn arým 'itýx ma, ane. Ne kam ajte amijã ngyrk nêñ amiwýr me amãr 'iry.

<sup>23</sup> Ne kam mekam ukaprĩ kadjy me kwý nhípêx. Amrêbê: ne ta me'ã amim karõn amim,

—Me ja dja ba amimexo meo me: xkumrêx. Ne me kunĩmã mekam idjukaprĩo amirĩt. Me kunĩ dja me 'ã ipumũn ime: xkumrêx ma. Ja kadjy dja ba amimexo meo me: xkumrêx, ane. Djãm ta kute amim me'ã karõn ajte ã me ipêxo anhýrkam djãm katãt kute amijo ba kêt? Kati. Katãt ne amijo ba.

<sup>24</sup> Ta ne tu ã gwaj badjwý gwaj bajo mexo ane. Ta ne amiwýr gwaj bajuw ne gwaj bajo ba. Djãm me ibê idjaerbĩto ba? Kati. Me abajtemdjwýo ba.

<sup>25</sup> Metĩndjwýnh ta ne amim me'ã karõ. Ne kam ta amikabênkôt arým amijo me utãn ar meo ba. Me bakukãmãre Ôdjêja amrêbê: ja jarê. Metĩndjwýnh ta amikabênkôt kute amijo me kwý pytãrja jarê. Metĩndjwýnh ne Ôdjêjamã kabên jarê nhym me bakukãmãremã kum, “Metĩndjwýnh ne me amã,

‘Amrêbê ije me kwýo inhõ kêt.

Nhym be, jakam dja ba memã inhõ me ja jarê.

Me kwý amrêbê imã me kĩnh kêt.

Nhym be, jakam dja ba imã me kĩnh.’

Nãm ã Metĩndjwýnh me amã ane.”

Nãm ã me bakukãmãre Ôdjêja memã ane nhym me arým kabên'ã

pi'ók no'ók ne. Ga, Metĩndjwýnh ta kute amijo me bajtem kwý pytãrja pumũ. <sup>26</sup> Nhym kam ta ajte memã kum,

“Metĩndjwýnh ne me amã,

‘Pyka 'õkam me'ã ne ba memã kum, Ije meo ikra kêt ne ja, ane. Pyka tãm kam dja me ĩ memã kum, Me abê Metĩndjwýnh tĩn ne ar baja kra ar, ane. Dja me ĩ ã memã ane’, ane.

Metĩndjwýnh ã me amã ane.”

Nãm ã me bakukãmãre Ôdjêja memã ane nhym me arým 'ã pi'ók no'ók ne. Ga, ajte Metĩndjwýnh ta kute amijo me bajtem kwý pytãrja pumũ.

<sup>27</sup> Nhym kam me bakukãmãre Idjaj ajte amrêbê: tãm jarê. Metĩndjwýnh ta amikabênkôt kute amijo me kwý pytãrja jarê. Idjaj me bê idjaer'ã kãj bê memã kum,

“Dja me bê idjaer krãptĩ: kute mrãmri ne ngõ raxbê pyka kêt kam pykati 'ykã krãptĩ pyrãk.

Dja te me krãptĩ nhym arým amim me ngrêrebit pytã. Me anhybit me utã. Me kute amim mar me utã.

<sup>28</sup> Nhym me kute Metĩndjwýnh mar kêt djwý. Mýj dja me on?

Bir, Bêñjadjwýr djwýnhbê Metĩndjwýnh kute pykabê me axwemã pãnh jarênhmã. Dja meo kukrà kêt kumrêx ne katãt memã pãnh jarênhkumrêx ne on inomã kumê.”

Nãm ã me bakukãmãre Idjaj memã ane nhym me arým 'ã pi'ók no'ók ne. Ga, ajte Metĩndjwýnh ta kute amijo me kwý pytãrja pumũ.

<sup>29</sup> Nhym kam Idjaj ajte tãm'ã ajarên memã kum,

“Bêñjadjwýr djwýnh 'itýxo kubê kumkati amrêbê: me axwe raxkam arým krĩrãxbê Xõtãmãmê krĩrãxbê Gomora gan pyka mẽ o amrã.

Ne ren kum me bajã ma kêt gu ren me badjwý arým mekôt

bakêt. Nhyim be, kati. Nãm kum me bajã ma nhyim kam me badjô'ã me anhy rä'ã, me kwý rä'ã ne."

Nãm ã me bakukãmãre Idjajj memã ane. Ga, me bakukãmãre kabênja kunĩ kôt Metĩndjwýnh ta amikabênkôt kute amijo me kwý pytär ne meo baja pumũ.

*Mebê idjaer kute Kritu mar kêt.*

<sup>30</sup> Mýj dja gwaj jakam abenmã arê? Bir, me bajtem ne me amrêbê kute Metĩndjwýnhmã amijo mex jabej kêt. Nãm me te kum amijo mex jabej kêt nhyim Metĩndjwýnh ta arým kum me kaprĩn memã axwe kêt jarê. Me tu amim Jeju Kritu markumrêx nhyim Metĩndjwýnh arým tu memã axwe kêt jarê nhyim me arým kum mex ne.

<sup>31</sup> Nhyim be, mebê idjaer kute Metĩndjwýnh kukrãdjã marn kôt amijo bakam djãm me arým kum axwe kêt? Kati. <sup>32</sup> Mýkam? Bir, me kute amim Kritu mar kêt kam. Me kute amim,

—Djãm ba dja ba amim Jeju ma got? Ba Mójdjê kukrãdjã man kôt ar amijo iban arým Metĩndjwýnhmã ijaxwe kêt, ane. Me kute amim anhýro bakam ne me axwe rä'ã ne. Kam ne me kute kên me par tok nhyim me rôrôk pyrãk. Me kute amim Jeju mar kêt. <sup>33</sup> Metĩndjwýnh ne amrêbê me bakukãmãremã kum,

“Ota, ba Xijãokam kên'õ nhýr. Kên wã kute me par tokkam me rôrôk prãm kumrêx. Kam dja me kum kên wã kurê.

Nhyim be, dja me kwý ĩ pýnhkôt tu amim markumrêx ne arým pijãm kadjy kêt kumrêx.”

Nãm Metĩndjwýnh ã memã ane nhyim me arým 'ã pi'ók no'ók ne. Kritu'ã ne kên jakren arê nhyim me kum kurê mã. Nhyim kôt mebê idjaer ã kum kurên mar kêt o ane.

## 10

<sup>1</sup> Akmere, àpnhĩre ar, imã mebê idjaer kĩ:nh. Mebê inhôbikwakam imã me kĩnh. Metĩndjwýnh ren amim mebê idjaer kunĩ pytã ba ren mekam ikĩnh kumrêx. Nã bãm mã Metĩndjwýnhmã kum,

—Gop amim me utã. Gop amim me utã, anhýro iba.

<sup>2</sup> Ba ne ba amrêbê mekam ar iban prĩne me omũ. Kam djãm me Metĩndjwýnhmã àpênh prãm ngri got? Me kum àpênh prãm. Me te kum àpênh prãm ne kute Metĩndjwýnh mar kêt. Me arĩk ar kupa'ã ba. <sup>3</sup> Metĩndjwýnh ta ne memã kum,

—Me kute amim Kritu markam dja ba memã axwe kêt jarê nhyim me arým imã mex ne, ane. Nhyim me atekam ajte mar kêt ne amim,

—Djãm ba ije amim Jeju marmã got? Kati. Ba dja ba ijaxwe kêt. Ba dja ba Mójdjê kukrãdjã man kôt ar amijo iban arým ijaxwe kêt ne Metĩndjwýnhmã imex ne, anhýro ba.

<sup>4</sup> Djãm gwaj ba baje amim,

—Djãm ba ije amim Jeju marmã got? Kati. Ba dja ba Mójdjê kukrãdjã man kôt ar amijo iban arým Metĩndjwýnhmã ijaxwe kêt, anhýrmã? Djãm gwaj baje ã amim anhýrmã? Kati. Kritu ta ne gwaj bakadjy prĩne kukrãdjã man kôt amijo ba me:xkumrêx. Gwaj baje Kritubit mar ne tu amim markumrêx nhyim Metĩndjwýnh arým tu gwaj bamã axwe kêt jarê gwaj arým kum bamex ne.

*Mýj dja me nên arým axwe kêt?*

<sup>5</sup> Me bakukãmãrebê Mójdjê ne amrêbê: memã kum,

“Dja me katãt kukrãdjã man kôt amijo ban kam arým tĩn ne ar ba rä'ã: rä'ã ne”, ane.

Kute memã ja jarênham mýj dja me nên arým axwe kêt? Bir, dja me katãt kukrãdjã man kôt ar amijo ban arým axwe kêt. Ja ne Mójdjê amrêbê memã arê. <sup>6</sup> Nhyim be,

ajbir jakam me kute tu amim Jeju markumrêx, nhym Metîndjwýnh arým tu memã axwe kêt jarê nhym me arým kum mex ne. Gar akwý ne gar arík amim,

—Mýj me'õ godja kàjkwa djwýnhmã wabi? Ne ren me'õ kàjkwamã wabin ren iwýr Krituo ruw ba ren kôt omün tu amim markumrêx, ane. Kwãrîk wãnh ja jarênh kêt. <sup>7</sup> Gar akwý ajte arík amim,

—Mýj me'õ godja me tyk ba djakam ruw? Ne ren me'õ me tyk ba djakam Kritu'ýr ruw ne ren iwýr o wabin iwýr o bõx ba ren tu amim markumrêx, ane. Kwãrîk wãnh ja jarênh kêt. Mýkam dja gar ja jarênh kêt? Bir, arým ne me ar amã Kritu'ã ajarê gar arým ama. Ne kam ajte tu amim markumrêx kêt. <sup>8</sup> Metîndjwýnh ne me bakukãmãremã kum,

“Djãm onîj ikabên nõ? Kati, arým ne akadjwýnhbê nõ. Aja-jkwa kôt ne ga memã arê nhym ajajkwakam nõn adjumar djã kadjwýnhbê nõ”, ane.

Kabên ja ne bar kàj bê memã arê. Dja me kwý tu amim kabênja mar ne anim Kritu markumrêx. Ja kadjy ne bar memã kabên ja jarê. <sup>9</sup> Nã bãm ar memã kum,

—Dja gar amibu'ã memã amijarên memã kum, “Mrãmri Jejubê inhõ Bênjadjwýr djwýnhkumrêx”, anen ajte ar adjumar djã kadjwýnhbê amim, “Mrãmri ne Metîndjwýnh akubyn Jejuo tînkumrêx”, ane nhym arým amim ar apytã, ane. Ar ikabên ja ne bar memã arê. <sup>10</sup> Mýkam? Bir, me umar djã kadjwýnhbê ne me tu amim markumrêx nhym arým tu memã axwe kêt jarê nhym me arým kum mex ne. Ne kam amibu'ã memã amijarên memã kum,

—Arým ba tu amim Jeju markumrêx, ane nhym arým amim me utã. <sup>11</sup> Me bakukãmãre kabên

kôt ne ba ar amã ikabên ja jarê. Amrêbê: ne me bakukãmãre memã kum,

“Djãm me kute tu amim markumrêx nhym Metîndjwýnh kute amim me utãr kêt nhym me arým pijãm? Kati.

Djãm me kute amim, ‘Ba arým tu amim Metîndjwýnh markumrêx nhym arým ibê kajgo’, anhýrmã? Kati. Me kwý ï pýnhkôt kute tu amim markumrêxja dja Metîndjwýnh arým me utãrkumrêx.”

Nãm ã me bakukãmãre memã ane nhym me arým ‘ã pi'ók no'ók ne. Ga, me kute tu amim markumrêx nhym kute amim me utãrja pumü. Mrãmri me kabênkumrêx. Ba kôt ar amã ikabên jarê.

<sup>12</sup> Djãm kam kute mebê idjaerbit pytãr ne kute amü me bajtembê kreguja pytãr kêt? Kati. Kute me bajtemdjwý pytãr. Mýkam? Bir, Bênjadjwýr djwýnh ne pydji:n me kunîmã bēnjadjwýr rax. Mebê idjaermã Bēnjadjwýr ra:xi. Me bajtemmã Bēnjadjwýr ra:xi. Me ï pýnh kôt me kute kum amijo a'wýrja ne Bēnjadjwýr djwýnh kute apýnh meo djuw mex. <sup>13</sup> Me bakukãmãre ne me amrêbê: ã memã ane. Nãm me memã kum,

“Me kwý ï pýnhkôt dja me Bēnjadjwýr djwýnhmã amijo a'uw ne kum, ‘Ipytã’, ane nhym arým me utã.”

Nãm ã me bakukãmãre memã ane. Ga, me bajtemdjwý kute tu amim Jeju markumrêxja pumü. Metîndjwýnh kute amim me adjwýnhdjwý pytãrja pumü. Mrãmri ne me kabênkumrêx ba me amã arēnhkumrêx.

<sup>14</sup> Nhym be, me kute amim Jeju kamnhîx kêtkaam djãm me kute kum, “Jeju ipytã”, anhýrmã? Kati. Ne ajtekaam me kute Jeju'ã ujarēnhja mar kêtkaam djãm me kute amim kamnhîxmã? Kati. Ne

ajtekam kraxje me kute memã Jeju'ã ujarënh kêt kam djãm me kute marmã? Kati. <sup>15</sup> Ne ajtekam me kute me'yr me anor kêt kam djãm me kute memã Jeju'ã ujarënhmã? Kati. Nhy m be, Metïndjwýnh arým me'yr me kwý jano nhy m me arým kàj bê memã 'ã ajarë nhy m me kum kî:nhkumrëx. Me bakukãmãre kabën kôt ne ba ar amã ja jarë. Amrëbê: me bakukãmãre memã kum,

“Kritu'ã ujarënh ny, kôt me umar mexja. Apýnh mýjja mex'ã me ujarënh nyja. Ujarënhkam me kî:nhkumrëxja. Djãm kute memã 'ã ujarënh ny jao mrãnh djwýnh mex ngri got? Me'yr bôxkam me kum kî:nhkumrëx.”

Nãm ã me bakukãmãre memã ane. Ga, me kwý kum kînhkumrëxja pumû. Mrãmri me kabënkumrëx.

<sup>16</sup> Nhy m be, djãm mebê idjaer kunĩ ne me arým Kritu'ã ujarënh ny ma? Djãm me kunĩ arým Krituo aminhõ? Kati. Mebê idjaer kunĩ kute Krituo aminhõ kêt. Me bakukãmãre Idjaij ne amrëbê: me arë. Me kute amim mar këtja jarë. Nãm memã kum, “Nhýnh got me'õ kute tu amim ar ikabën markumrëx?”

Nãm me bakukãmãre ã mebê idjaer jarëho ane. Ga, me kute amim mar këtja pumû. <sup>17</sup> Bir be, kam me kute memã Metïndjwýnh kabën jarënhkambit ne me arým kuman tu amim markumrëx. <sup>18</sup> Djãm arým ne me mebê idjaermã 'ã ujarënh ny jarë nhy m me arým kuma? Nà, arým. Amrëbê: ne me bakukãmãre memã arë nhy m me arým kuma. Nãm me memã kum, “Apýnh me ba djã kunĩkôt ne me me kabën ma. Djãm jakambit ne me kuma? Kati. Orĩ:nãdjwý ne me arým kuma.

Apýnh me ba djã kunĩkôt ne me arým me'yr kabëno bôx ne

arým memã arë nhy m me arým kuma.”

Nãm me bakukãmãre ã memã ane. Ga, mebê idjaer arým kute Kritu'ã ujarënh ny marja pumû. <sup>19</sup> Ba ajte me amã arë. Mýj'ã ujarënh ny kute amijakreja djãm me kute mar? Nà. Me kute mar. Ne kam me kute mar kajgo. Metïndjwýnh ne amrëbê mebê idjaermã amikabën jarë. Me bajtem'ã memã amikabën jarë. Nhy m Mõjdjê arým kabën man amû Metïndjwýnh kukwakam me bakukãmãremã arën memã kum,

“Metïndjwýnh ne me amã,

‘Me aje me'ã, Me kakrit, anhýrja.

Me ja dja ba amim me utã. Dja ga me kam te ga aje me urãk prãmje angyrk ne. Ne aje me'ã, Me no kêt, anhýr ja. Me ja dja ba amim me utã. Dja ga me kam te ga aje me urãk prãmje amim angyr:k ne.’

Nãm ã Metïndjwýnh me amã ane.”

Nãm ã me bakukãmãre Mõjdjê mebê idjaermã ane. <sup>20</sup> Ne kam me bakukãmãre Idjaijdjwý kum mebê idjaer puma kêt ne ajte me bajtem'ã memã ajarë. Metïndjwýnh ne kum amikabën jarë nhy m kukwakam arým me bakukãmãremã kum,

“Metïndjwýnh ne me amã,

‘Me kute ijabej kêt ja ne me arým imã kato. Ba ne ba memã amijo amirít nhy m me arým imã kato. Me kute ijabej me kujjêr këtjamã ne ba amijo amirít.’

Nãm ã Metïndjwýnh me amã ane.”

Nãm ã Idjaij me bajtem'ã mebê idjaermã ane. <sup>21</sup> Nhy m Metïndjwýnh ajte mebê idjaer'ã memã kum,

“Me kute aminhirôbê ikabën rënh ne amakkre kêt. Me jamã ne ba kryrãm te ipa koror ne amiwýr me kam amakom iku'ê: nhy m ijã akamãt nhy m me kute imar kêt kumrëx.”

Nãm ã Metĩndjwýnh me bê idjaermã ane. Be ga, me bê idjaer arým kute Kritu'ã ujarênh ny mar ne mar kaj-joja pumũ.

## 11

*Metĩndjwýnh kute amijo me anhy-bit pytãr.*

<sup>1</sup> Kam djãm arým ne Metĩndjwýnh ò me bê idjaer kunĩ kanga? Arkati. Ga, badjwý ibê me bê idjaer 'õja pumũ. Nhy m bê ne badjwý kute ikanga. Ibê Abraão tãmdjwý'õ. Tãmdjwý Bẽnjamĩn djõ'ã ne ba ikato. Ba ibê idjaerkumrêx nhy m kute ikanga kêt. <sup>2</sup> Metĩndjwýnh ne me kunĩ kêttri amijo me kwý pytã. Kute amijo me bê idjaer kwý pytãr ja ne kute me kanga kêt. Me bakukãmãre Erij ne amrêbê Metĩndjwýnhmã me bê idjaer'ã kabên ne 'ã ajarê. Nhy m me arým kabên'ã pi'òk no'òk. Erij kabên dja gar ama. Nãm arĩk amim,

—Arým ne me kunĩ Metĩndjwýnh kanga, ane. <sup>3</sup> Ne kam Metĩndjwýnhmã kum,

“Bẽnjadjwýr djwýnh, arým ne me akukwakam kabên jarênh djwýnh kunĩ pa. Ne arým apýnh anhõ ki djari kungrã. Ba kam ipydjin ar iba nhy m me kute badjwý ibĩnmã ijabej ar ba.”

Nãm ã Erij kum ane nhy m me arým 'ã pi'òk no'òk ne. <sup>4</sup> Nhy m mýj ne Metĩndjwýnh me bakukãmãre Erijmã arê? Bir, nãm kum,

“Ba ne ba amim me krãptĩ: pytã. Me'ã akre kubê 7.000 kute bajbit amim imarkam ne me Baaumã kõnkrão krĩ kêt ne kute kum amijarênh kêtumrêx ba arým amim me utã.”

Nãm ã Metĩndjwýnh me bakukãmãre Erijmã ane nhy m me arým 'ã pi'òk no'òk ne. Be ga, amrêbê: me bê idjaer kwý kute amim Metĩndjwýnh mar týxja pumũ. Me anhy kute amim mar týx. <sup>5</sup> Ajbir jakamdjwý

me bê idjaer janhy kute amim Jeju Kritu mar týx. Ta ne me kêttri tu kum me anhy kaprĩn amijo me utã nhy m kam me kute amim mar týx. <sup>6</sup> Djãm me ta kute katãt kabên mar ne kôt kute amijo ba pãnh ne Metĩndjwýnh amijo me utã? Kati. Ta ne me kêttri tu kum me kaprĩn arým amijo me utã. Nãm ren me kute arým kum o pãnhkam ren amijo me utã djã ne ren kam tu kum me kaprĩ? Kati. Kam ren tu kum me kaprĩ kêt. Nhy m be, kati. Tu kum me kaprĩkumrêxkam ne me kute kum o pãnh kêt.

*Me bê idjaer krãptĩ jamakkre kêt.*

<sup>7</sup> Kam, djãm gwaj baje amim,

—Metĩndjwýnh ne arým ò me bê idjaer kanga, anhýrmã? Kati. Me bê idjaer ta te kute Metĩndjwýnhmã amijo mex jabej ar ban axwe rã'ã ne. Ne kam Metĩndjwýnhmã mex kêt ne. Nhy m be, Metĩndjwýnh kute me kêttri amijo me bê idjaer kwý pytãr ja ne me arým Metĩndjwýnhmã mex ne. Nhy m kam me bê idjaer 'ã kãtãmja Metĩndjwýnh arým me'ã amakkre kêt mẽ. <sup>8</sup> Me bakukãmãre kute amrêbê: me'ã pi'òk no'òk kôt Metĩndjwýnh ã meo ane. Kamã ne me bakukãmãre memã kum,

“Metĩndjwýnh ne me'ã kãptĩ mẽ.

Nãm me te non no kêt. Te me amak kreken kute mar kêt.”

Nãm ã me bakukãmãre memã ane nhy m me jakam amakkre kêt rã'ã.

<sup>9</sup> Nhy m me bakukãmãre Dawi ajte memã tãm jarê. Me amakkre kêt nhy m 'ã memã kum,

“Me kute ate krãn àkur raxbit markam gê Metĩndjwýnh me aêrbê memã axweo pãnh.

Gê me te: aminêje amijo ane. Kute mrãmri ne mrybê ka'ê aêrbê kute unênh pyrãk, nhy m kute kên me aêrbê kute me tok nhy m me rôròk pyrãk.

10 Gê me amakkre kêt ne no kêt gê  
me kaprî pymaje ibôn mrân  
râ'â: râ'â ne."  
Nâm ã me bakukãmãre Dawi me  
amakkre kêt'ã memã ane.

*Kute me'ã pidjô jakren 'ã memã  
ujarênh.*

11 Ba kam ar amã arê. Mebê  
idjaer ne me kum Jeju kînh kêt  
ne arým axwe. Kute mrâmri ne  
kute kên me par tok nhyim me  
rôrök pyrâk. Me kum kînh kêt  
kam djâm Metîndjwýnh tu kute  
me kangakumrêxmã? Arkati.

Nhyim be, arým me kum Jeju  
kînh kêt kam ne Metîndjwýnh  
arým me bajtem'ýr akêx ne  
arým amim me utáro dja. Mebê  
idjaer ne me kêt jamã me  
bajtem jarênh ba nhyim  
Metîndjwýnh arým me'ýr  
akêx ne me utáro dja. Dja  
amim me bajtem pytáro dja  
nhyim me kêt idjaer arým  
omû. Kute me bajtem  
pytârkôt omû:n arým amim  
ngryk ne. Me te ta kute me  
urâk prãmje amim gryk ne.  
Ne amim,

—Je tô mýkam ne ba me imã  
Jeju kînh kêt? Ga, Metîndjwýnh  
kute me bajtembit pytârja  
pumû, ane. 12 Nâm me kum  
Jeju kînh kêt nhyim me kute  
Jeju mar arým amû me  
bajtemjamã Jeju'ã ajarê.  
Apýnh me ba djâ kunîkôt ne  
me memã arê nhyim me  
arým tu amim markumrêx.  
Nhyim kam Metîndjwýnh  
arým amim me utâ. Nhyim  
kam me arým kî:nhkumrêx.  
Nhyim be, me kêt idjaer  
kum Jeju kînh kêt kam ne  
me kînh kêt kam rêx.

Nhyim be, me kêt idjaer  
kute meo me bajtembit, me  
bajtembit ne Metîndjwýnh  
amim me utâ. Kute amim  
me utârkam ne me kî:nh  
kumrêx. Kam godja me kêt  
idjaer amim gryk ne ï  
akubyn Metîndjwýnh'ýr  
amijo akêx jabej ne tu  
amim Jeju markumrêx  
jabej. Me kute tu amim  
Jeju markumrêxkam dja  
me kî:nhkumrêx. Dja me  
kînh me bajtem jakrenh  
me:x ne.

13 Me abajtemmã ne ba  
ikabên. Kritu ne me abajtemmã  
ijano. Ije me amã Kritu'ã  
idjujarênh kadjy ijano. Ije  
me amã Kritu'ã idjujarênh  
kam ikînh ne me kêt idjaer  
mã me akam ikînh jarênh  
kume:x. 14 Nã bãm inhô me  
wýnhmã me ajarênh memã  
kum,

—Ba me bajtemmã Kritu  
jarênh iba nhyim me krãptî:  
arým tu amim markumrêx  
nhyim Metîndjwýnh arým  
me krãptî: pytâ, anhýro  
iba. Ba ã memã anhýro  
ibao ane. Nhyim godja  
me te: ta kute me urâk  
prãmje amim,

—Ga, Metîndjwýnh kute  
arým ikangaja pumû. Nâm  
me bajtembit me utáro ba.  
Jakam dja ba tu amim  
Jeju markumrêx gê  
Metîndjwýnh arým amim  
ipytâ, anhýr jabej. Godja  
me amim gryk ne arým  
tu amim Jeju markumrêx  
jabej nhyim Metîndjwýnh  
arým me utâ.

15 Nhyim be, jakam me kêt  
idjaer kute amim Jeju mar  
kêt. Kam Metîndjwýnh  
arým me kanga. Nâm me  
bajtem'ýr amijo akêx ne  
arým amim me utáro ba.  
Me kute tu amim Jeju  
markumrêxkam ne amim  
me utáro ba. Nhyim be,  
godja me kêt idjaer amim  
gryk jabej ne tu amim  
Jeju markumrêx jabej  
nhyim Metîndjwýnh arým  
amim me utâ. Kam,  
arým kute me utârkam  
mýj dja me kam nê? Bir,  
dja me kute mrâmri ne  
arým me tyk ne akubyn  
tîn pyrâk. Kam dja me  
kunî kînhkumrêx.

16 Amrêbê: ne me abenmã  
kum, —Be, me kukãmãkjê  
kukrãdjâ kôt ne me kute  
Metîndjwýnh kumrêxmã  
djwý kwý rênh ne kum  
ôr. Godja djwý kumrêx  
me kute kum rênhja  
kum mex jabej nhyim  
kôt djwý kunîdjwý  
kum mex. Nâr, godja  
pidjô jarê kum mex  
jabej nhyim apýnh  
padjwý kum mex,  
ane. Mrâmri ne me  
kute abenmã arênh  
kumrêx. Me bakukãmãre  
Abraão ne kute urâk.  
Abraão arým Metîndjwýnh  
mã mex. Kam, dja ò'ã

mebê idjaerdjwÿ Metîndjwÿnhmã mex.

<sup>17</sup> Ba me amã arê ga me ama. Mebê idjaer ne kute pidjô djujabê pa pyrâk. Me abajtem ne ga me aje pidjô djujabê kêt pa pyrâk. Mebê idjaer kute Jeju mar kêt kam ne Metîndjwÿnh arÿm me kangan kam arÿm me abajtem pytàn me ajo aminhõ. Kute mrãmri ne me'õ kute pidjô b̄arikam pa djujabê mok ne kute pãnh pa djujabê kêt jadjar pyrâk. Me ga ne ga me arÿm jakam tu amim Jeju markumrêx nhym Metîndjwÿnh arÿm me apytàn me ajo aminhõn me ajo djuw mex. Me aje mrãmri ne pidjô djujabê kêt pa kute pidjô djujabê jarêkam kangô mex kaõro arija pyrâk. Mebê idjaer djwÿnh kwÿ kute amim Jeju marmê ro'ã ne Metîndjwÿnh arÿm me ajo djuw mex. <sup>18</sup> Djãm me amã mebê idjaer kurêmã? Djãm me aje amijo adjãmran amim,

—Be, ga, Metîndjwÿnh arÿm mebê idjaer kangan kum me bajbit ikĩnhja pumũ, anhÿrmã? Kwãrik wãnh amijo adjãmra kêt. Ga me abajtem dja ga me mrãmri amijã ikabên ma. Djãm ga ne ga Metîndjwÿnhmã tÿx jangij got? Arkati. Ta ne amã tÿx jangij kute mrãmri ne pidjô jarê b̄arimê pamã tÿx jangjênh pyrâk.

<sup>19</sup> Ga me ren amim,

—Be, Metîndjwÿnh ne mebê idjaer kangan arÿm me ibajtembit ipytã. Nãm me kanga kute mrãmri ne me'õ kute pidjô djujabê pa mok ne kanga pyrâk. Ne kam arÿm pãnh pidjô djujabê kêt pao tẽn pidjô djujabê b̄arikam adjã. Nãm Metîndjwÿnh ã me ijo ane, ane.

<sup>20-21</sup> Mrãmri ne Metîndjwÿnh arÿm amim me apytãro ba. Nhym be, kwãrik wãnh amijo adjãmra kêt ne amim,

—Te me ibajtem nhym Metîndjwÿnh arÿm me ijo kra. Me bajbit kum me imexkumrêx, anhÿr kêt. Kwãrik wãnh ã amijo adjãmrao

anhÿr kêt. Dja ga amã Metîndjwÿnh puma. Mebê idjaer kute Jeju mar kêt kam ne Metîndjwÿnh arÿm me kanga. Nãm me kanga kute mrãmri ne me kute pidjô pa djwÿnh mok ne kanga pyrâk. Me ren Jeju kanga kêt nhym ren arÿm amim me utã. Me ga ne ga me tu amim Jeju markumrêx nhym arÿm amim me apytã. Kam, dja ga me akubyn amijo tẽn amiman amidjwÿnho adjãmra kêt. Metîndjwÿnh ta kum me akaprĩkam ne arÿm me apytã. Dja ga me amidjwÿnho amra nhym arÿm me gadjwÿ akanga.

<sup>22</sup> Dja ga me Metîndjwÿnh kum me kaprĩja ma:ro aba. Ne uma:djwÿ ma:ro aba. Mebê idjaer ne me kute amim Jeju mar kêt ne arÿm Metîndjwÿnhbê amijo akêx. Kam ne arÿm mekam ngryk. Nhym be, me ga ne arÿm tu kum me akaprĩ. Dja ga me ukaprĩ ma:ro aba. Godja ga me ukaprĩja mar kêt jabej nhym arÿm me akanga. Dja me akanga kute mrãmri ne me kute pidjô pa mok ne wãnh kanga pyrâk.

<sup>23</sup> Mebê idjaer arÿm kute Jeju mar kêt djwÿ godja me kwÿ arÿm Jeju'yr amijo akêx jabej ne tu amim markumrêx jabej. Metîndjwÿnh dja ajte meo kran me utã mrãmri ne kute amim me abajtem pytãrja pyrâk. Kute akubyn me utãr mar mexkumrêx.

<sup>24</sup> Ga, me abajtem Metîndjwÿnh kute me apytãr ne ajo kraja pumũ. Nãm amim me apytã kute mrãmri ne me kute pidjô djujabê kêt paja pidjô djujabêkam adjãr pyrâk. Kute ã kum me akaprĩo anhÿrkam djãm kum mebê idjaer kaprĩ prãm kêt? Kati. Mebê idjaer ne me kute mrãmri ne pidjô djujabê pa pyrâk. Kum me kaprĩ prãm kumrêx. Kum ajte meo kra prãm kumrêx ne kum amim me utãr prãm kumrêx. Kam dja me ajte kubê Metîndjwÿnh krakumrêx kute mrãmri ne amrêbê me kukãmãrebê Metîndjwÿnh krakumrêxja pyrâk.



*Metîndjwÿnh kute tûmràm mebê idjaer kunî pytàr.*

<sup>25</sup> Akmere ar, mebê idjaer kwÿ rax ne me amakkre kêt ba arÿm me amâ me arê. Me aje mar kadjy ne ba me amâ arê. Dja ga me aman arÿm amijo adjàmra kêt. Dja mebê idjaer djwÿnh amakkre kêt ar ba:. Nhyim kam me bajtem Metîndjwÿnh 'ÿr amijo akêx ne kôt ar amijo ba. Metîndjwÿnh ne me kêtri arÿm amijo me bajtem kwÿ pytà. Kute amijo me utàrja kunî dja 'ÿr amijo akêx ne tu amim Jeju markumrêx nhyim arÿm me utà.

<sup>26</sup> Dja me utà nhyim kam mebê idjaerdjwÿ arÿm tu amim Jeju markumrêx, kunî: tu amim markumrêx nhyim Metîndjwÿnh arÿm amim me kunî pytà. Ije me amâ ja jarênh ne me kute mar kêtumrêx. Mar kêtumrêx ba arÿm me amâ arê. Dja ga me aman arÿm amijo adjàmra kêt. Me bakukâmâre kute amrêbê: 'â pi'ôk no'ôk kôt dja ã me adjwÿnhdjwÿ pytàro ane. Kamã ne Metîndjwÿnh memã kum, "Dja me utàr djwÿnh krîraxbê Xijão kurûm katon amim mebê idjaer pytà. Djako djô'ã ne mebê idjaer apôx. Dja amim me utà nhyim me arÿm Metîndjwÿnhmã axwe kêt.

<sup>27</sup> Bamê mebê idjaer kukâmâremê ne bar aktâ abenmã ikabên jarênh mândji. Nã bãm memã kum, 'Ije memã ikabên jarênh kôt dja ba arÿm me axwe maro aknon arÿm me kam ingyk kêt ne.'

Nã bãm ã memã ane." Nãm ã Metîndjwÿnh me bakukâmâremã ane. Ga, kute mebê idjaerdjwÿ pytàrmãja pumû.

<sup>28</sup> Nãm me mebê idjaermã Kritu'ã ujarênh ny jarê nhyim me kum kÿnh kêt. Me kum kÿnh kêt kam ne me arÿm Metîndjwÿnhho kurê djwÿnh. O kurê djwÿnh nhyim arÿm mebê amijo akêx ne arÿm amim me utàr kêt. Nãm mebê amijo akêx ne

arÿm amim me bajtem pytà. Nhyim be, kum me ikukâmâre kÿnh. Kum me kÿnh kôt ne kum me ibê idjaer kwÿ kÿnh rã'ã ne. Kute me kêtri amijo me ipytàrja kum me ikÿnh rã'ã.

<sup>29</sup> Amrêbê ne me bakukâmâremã apÿnh mÿjja jarê. Ne ajte kute meo ba kadjy amiwÿr me ku'uw. Djãm kute kabên jarênh ne ajte atemã kabên 'ô jarênhmã? Kati. Djãm kute kabên tûm japanh ne o bi-knormã? Kati. Mrãmri ne tu kabên jarênhkumrêx. Kam ne kum mebê idjaer kwÿ kÿnh rã'ã.

<sup>30</sup> Ga me abajtem ne ga me amim Metîndjwÿnh mar kêt. Amim mar kêt nhyim kam arÿm tu kum me akaprÿn amim me apytà. Mebê idjaer ne me amim mar kêt nhyim kam arÿm mebê amijo akêx ne arÿm tu kum me akaprÿn amim me apytà. <sup>31</sup> Nã, mebê idjaerdjwÿ ne me kute jakam amim mar kêt. Dja me amim mar kêt nhyim Metîndjwÿnh kum me akaprÿ kôt ajte kum me kaprÿ. <sup>32</sup> Nãm mebê idjaermê me bajtemmê arÿm axikôt amakkre kêt. Amrêbê: ne me Metîndjwÿnh kabênkôt amakkre kêt ne ta te amak mexmã. Mÿj kadjy ne me amakkre kêt? Bir, Metîndjwÿnh kum me kunî kaprÿ kadjy ne me amakkre kêt.

*Metîndjwÿnh rax'ã ujarênh.*

*Ep 3.20; Kor 1.16*

<sup>33</sup> E kum, Metîndjwÿnh ne kute mÿjja mar me:xkumrêx. Kute amim me'ã karô mar me:xkumrêx. Kute me mar mexo me barer me:x ne. Mÿj me'ô ne kute kum kator ne kute mar? Djãm me'ô amak mexo 'ÿr bôx? Ari:kati. Umario memã kre ra:x ne me'ô umario 'ÿr bôx kêtumrêx. Kute me kunîo ba me:xkumrêx. Mÿj me'ô ne kute uràk? Ari:kati. <sup>34</sup> Me bakukâmâre ne me amrêbê: Metîndjwÿnh djumar'ã ajarênh memã kum, "Bênjadjwÿr djwÿnh kute apÿnh mÿjja marja djãm arÿm ne me'ô kute mar? Djãm arÿm

ne me'ô kumrêx kum mýjja'ã karô nhym arým kôt kute mar? Ari:kati."

35 "Nàr djâm Metîndjwýnh we me'ômã kum,

'Ga ne ga akumrêx imã angã. Dja ba kam amã o pãnh ne', ane? Ari:kati."

Nãm ã me bakukãmãre Metîndjwýnh djumar'ã ujarênho ane. <sup>36</sup> Ta ne kumrêx amim mýjja kuní'ã karô nhym kôt mýjja kuní apôx. Ta ne mýjja kuní nhípêx nhym apôx. Amikadjy ne ipêx ne. Gê me kuní 'ã kum rax jarênh rã'ã: rã'ã ne. Mrãmri ne ba ar amã arênhkumrêx.

## 12

*Me kute Metîndjwýnhmã aminhõr'ã memã karô.*

*Kor 1.10; Tex k 4.1; Ped k 2.11*

<sup>1</sup> Akmere, àphñire ar, Metîndjwýnh kum gwaj bakaprî:kumrêx. Kum ar akaprî:kam dja gar kum amingã. Ga, Jeju kute Metîndjwýnhmã aminhõrja pumũ. Nãm kum amingãn pîte'y'ã wajêt ne arým ty. Ar gadjwý dja gar kudjwa kum amingã. Djâm me kute abñn ne kute kum anhõrmã? Kati. Ar ga dja gar atin ne prine kum amijã ma gê ar akam kñnh ne ar ajo aminhõn ar ajo ba. ã kum aminhõro anen kam arým katát Metîndjwýnh kabên markumrêx ne kôt amijo abakumrêx. Ja ne mexkumrêx.

<sup>2</sup> Djâm me kum Metîndjwýnh kñnh kêtja kute ar ajo amipyràk ne amikukràdjã punu kôt kute ar ajo bamã? Kati. Kwãrik wãnh mekôt amijo aba kêt. Dja gar mebe adjumar djã nyn atemã akabên nybit ma. Mýj kadjy? Bir, Metîndjwýnh ne arým ar ajã kabên mex jarê. Nãm amim ar ajã karõn kabên mex jarê. Dja gar atemã akabên nybit man arým amijã Metîndjwýnh kabên mexja ma. Ne kam kabên mex kôt ar amijo aban prine kum amex. Kum amex nhym

arým akam kñnhkumrêx. Ja kadjy dja gar mebe atemã adjumar djã nyn atemã akabên nybit ma.

<sup>3</sup> Ba ar akunimã ikabên jarê. Djâm amikukwakam ne ba ar amã arê? Kati. Metîndjwýnh ta ne tu kum ikaprñn arým imã ikabên'ã karô. Kôt ne ba ar amã ikabên jarê. Ar anhñ pýnhkôt ar amã arê. Ar gadjwý ne Metîndjwýnh arým ar amã adjápênh djã'ã karô. Ar aje adjápênh djã markam dja gar mã amim Metîndjwýnh rax ma. Kwãrik wãnh arík amim, "Be, iraxkumrêx", anhýr kêt. Dja gar katát amim,

—Be, nã bãm tu amim Metîndjwýnh markumrêx nhym arým imã idjápênh djã ja'ã karô ba kabênkôt maro iba, ane. Djã gãm me ã amimaro ane.

<sup>4</sup> Ga, gwaj banhñ pýnhja pumũ. Gwaj banhñ pýnhkôt badjápênh djã krãptí. Gwaj baparkam bamrãnh djã. Gwaj banhikrao baje mýjja kupênh djã. Ne gwaj bakrãkam banhõ mýjja mar djã. Ne gwaj banokam baje mýjja pumũnh djã. Ne gwaj bajamakkrekam baje mýjja mar ne kupênh djã. Gwaj banhikam badjápênh djã krãptí.

<sup>5</sup> Ga, Kritudjwý. Te gwaj bakrãptí gwaj baje amim Kritu markam baje kumê banhñ pydjã pyràk. Djâm gwaj bamã aben jabé kêtã? Djâm gwaj apýnh ar babamã? Kati. Gwaj banhñ pýnhkôt abeno banhõbikwa.

<sup>6</sup> Metîndjwýnh tu kum gwaj bakaprîkam gwaj abeno banhõbikwan banhñ pýnhkôt apýnh badjápênh djã. Metîndjwýnh ta ne gwaj bamã badjápênh djã'ã karô gwaj maro baba. Gwaj banhñ pýnhkôt apýnh Metîndjwýnhmã badjápênh djãn kum badjápênh ar baba.

Godja me'ô Metîndjwýnh kukwakam kabên jarênhja mar jabej gê kute amim Metîndjwýnh mar kô:t memã arê. <sup>7</sup> Nàr, godja me'ô me kadjy mýjja 'õ kupênh mar jabej gê me kadjy kupê. Nàr, godja me'ô memã Metîndjwýnh kukràdjã

jarēnh mar jabej gē arē. <sup>8</sup>Nār, godja me'ō kute 'ã memã karō mar jabej. Me kute amim Jeju mar rerekre jamã 'ã karō mar jabej. Me kute amim mar tỳx'ã memã karō mar jabej. Gē memã 'ã karōo ba gē me amim mar tỳx. Nār, godja me'ō memã mỳjja nhōr jabej gē ōdjānh ne memã kungã. Nār, godja me'ō kute meo ba mar jabej gē meo ba 'āno djan 'ã ukanga kêt. Nār, godja me'ō kum me kaprī mar jabej. Djām nokre kaprīn kum me kaprīmã? Kati. Dja nokre kīnh ne kum me kaprī.

*Me kum me abê'ã memã karō.*

*Dju r 13.34; Xim k 1.5; Idja 13.1*

<sup>9</sup> Dja gar amã me abê. Kwārīk wānh amijo ajēx kêt. Dja gar mrāmri amã me abê katāt kumrēx.

Godja me abenkam axwe nār amijo axweo ba, ar ga dja gar amã axwe kīnh kêt:kumrēx. Nār, godja me abenkam mex nār amijo ba mex ar ga dja gar amã mex kīnh ne 'ã angrã: ne.

<sup>10</sup> Kute ar amã akamy jabê pyrāk ne abenmã aprī:ren amã aben jabê.

Kwārīk wānh gar me'ã amim,  
—Gē me kumrēx imã imex jarē. Ba kam amipānh ã memã mex jarēho ane, anhÿr kêt. Ar ga akumrēx dja gar memã wan tu memã mex jarēho aba. Memã mex jarēho aban kãjmã memã rax kamēho aba.

<sup>11</sup> Metīndjwýnh kadjy mỳjja'ōo aba'ã ar adjukanga kêt ne atỳx. Dja gar Karō man kôt amã Metīndjwýnh jabê:n arek kadjy mỳjjao aba.

<sup>12</sup> Dja gar amiwÿr Metīndjwýnh nhō mỳjja mexja kamnhīxkumrēx. Aje amiwÿr kamnhīxkôt akīnhkumrēx.

Dja te apÿnh ar akaprī djari ar ajo ba arek amim Jeju

mar tỳx rã'ān 'ã adjukanga kêt. 'Ã adjukanga kêt ne Metīndjwýnhmã amijo adjã'wÿr rã'ã ne.

<sup>13</sup> Godja Jeju nhō me ja ō mỳjja kêt jabej ar amã me kaprīn amikutã memã mỳjja kwÿ ngã.

Gē me ar awÿr wangjê gar meo djuw mex. Ja dja gar amã kīnh.

<sup>14</sup> Godja me'ō ar ajo bikēnh jabej gar Metīndjwýnhmã o a'uw ne kum,

—Dja ga o djuw mex, ane. ã kadjy kum ane. Kwārīk wānh kum,

—Dja ga ijo angryk ne o ajkê, anhÿr kêt.

<sup>15</sup> Godja me'ō kīnh jabej ar gadjwÿ kôt akīnh.

Godja me'ō muw ar gadjwÿ kôt akaprīn muw.

<sup>16</sup> Dja gar axikôt akabēn man axikôt arē.

Kwārīk wānh amijo araxmã amijo adjāmra kêt. Ar amã me ka-jgo kīnh ne ro'ã ar aba.

Kwārīk wānh amim,  
—Ba ne ba ijamak mex'ã ipydji, anhÿr kêt.

<sup>17</sup> Godja me'ō ar ajo ajkê kwārīk wānh amipānh o abikēnh kêt.

Dja gar akabēn katāt ne katāt amijo aba gē me amim ajã,

—Be, mrāmri, tãmwã ne katāt kute amijo bakumrēx, ane.

<sup>18</sup> Ar ga dja gar me kunīmē abenmã akabēn mexkumrēx jarē ne 'ã adjukanga kêt. Nār gar te me'ōmã akabēn mex jarē nhym tu ar ajapa. Kwārīk wānh rã'ã.

<sup>19</sup> Akmere, àpnhīre ar, imã ar akīnhkam ne ba ar amã ikabēn jarē. Kwārīk wānh amipānh kêt. Dja gar Bēnjadjwÿr djwýnhkam ama gē ta ar ajo ngryk.

Metīndjwýnh ne amrêbê: me bakukãmãremã kum,

“Ba ne ba ibê memã o pãnh djwýnh.  
Ba dja ba ajo ingryk ne o

pãnh. Kwãrîk wãnh amipãnh kêt.”

Nãm ã Bënjadwÿr djwÿnh memã ane. Kam dja gar kam ama.

<sup>20</sup> Nhyam kam ajte memã kum,

“Kam godja akurê djwÿnh kum prãm jabej ga kum mÿjja ngã gê kukrê. Godja kum kôr jabej ga kum ngô ru gê o ikô.

Dja ga ane nhyam ta arÿm amiman amim ngryk jabej ne ajo ôbikwa jabej.”

Nãm Bënjadwÿr djwÿnh ã me bakukãmãmãmã ane. Kam kwãrîk wãnh amipãnh kêt.

<sup>21</sup> Me kute ar ajo bikênhkam djãm mekôt ajaxwemã? Kwãrîk wãnh mekôt ajaxwe kêt. Ar ga dja gar adjukaprîo meo djuw mex.

### 13

*Me kute me bënjadwÿr kabên kôt amijo ba'ã memã karô.*

*Xit 3.1; Ped k 2.13*

<sup>1</sup> Pykakam me bënjadwÿr rÿnh me kute katàt amijo ba'ã kute memã karôkam dja gar me kabên mar tÿx ne kôt ar amijo aba. Nhÿnh ne bënjadwÿr'ô Metÿndjwÿnh kute ar kêt. Nãm me bënjadwÿr kunÿ pumjuw. <sup>2</sup> Gêdja me'ô kum ô bënjadwÿr kurê jabej. Djãm ô bënjadwÿr kajgo ne kum kurê? Kati. Kajgo kêt. Metÿndjwÿnh ne 'ã bënjadwÿr mē. Me kum kurê dja Metÿndjwÿnh arÿm memã axwe pãnh jarê.

<sup>3</sup> Djãm me mexkam kum krâkamngôn nhô bënjadwÿr pyma? Kati. Me axwekambit kum uma. Ar amã uma kêt kadjy mÿj dja gar nê? Bir, dja gar amextiren ar aba nhyam arÿm ar amã mextire jarê. <sup>4</sup> Mÿj kadjy dja gar kabên ma? Bir, ar amextiren ar aba kadjy ne me ar amã krî. Metÿndjwÿnh ne ar akadjy me'ã ô âpênh rê nhyam me ar amã krî. Nhyam be, godja gar ajaxwe jabej on atÿn prãm. Djãm kute amijã

kàxdjwa kajgo nhôn kute o ba kajgo? Kati. Metÿndjwÿnh ne me âpênh'ã me kurê kute kukwakam âpênhmã, me badjumar mex kadjy âpênhmã. Kam dja me'ô axwe nhyam arÿm kam ngryk nhyam arÿm tokry. Kadjy ne me bënjadwÿr nhô kàxdjwa kajgo.

<sup>5</sup> Kam dja gar tu me kabên ma. Djãm ar amã umakambit? Djãm kambit dja gar kabên ma? Kati. Ar ga ne gar aje anhôkre kadjwÿnhbé 'ã amim,

—Pykakam anhô bënjadwÿr kabên ma, anhÿro aba. Ar akabênja kôt dja gar me bënjadwÿr kabên ma.

<sup>6</sup> Kam dja gar ajte amikutã me bënjadwÿrmã ar anhô pi'ôk kaprî kwÿ ngã. Me kute ar amã îpôxu'ã karô kôt memã kwÿ ngã. Mÿkam? Bir, me mã ar akadjy bënjadwÿrkam âpênhkam. Metÿndjwÿnh ne me'ã ô âpênh djwÿnh rê. Gora ar memã angã.

<sup>7</sup> Me kute 'ã ar amã karô kôt ar anhô bënjadwÿrmã angã. Ar aje adjâpênh pãnh pi'ôk kaprî jamÿnhja ar aje kum kwÿ nhôrmã. Aje me kabênkôt amikutã kwÿ ngriren 'yr ne aje kum ôrmã. Kwãrîk wãnh kubê nê kêt. Ar kum angã. Nâr, gar pi'ôk kaprî pãnh me'ôbê nêkrêx jamÿ. Nhyam me ar amã,

—Ar aje nêkrêx jamÿnh pãnh'ã akreja kôt dja gar pi'ôk kaprî kwÿ ngã. Amikutã me bënjadwÿrmã kwÿ ngã, ane. Kwãrîk wãnh kubê nê kêt. Ar kum angã. Nâr, dja me ar amã,

—Dja gar amã me bënjadwÿr pyma, ane. Tu ar amã uma. Nâr, dja me ar amã,

—Dja gar kãjmã me bënjadwÿrmã rax kamê, ane. Tu kãjmã kum rax kamê.

*Akubyn bôxkam amakbê me kum aben jabê'ã memã karô.*

*Mat 22.39; Dju r 15.12; Ped k 1.22*

<sup>8</sup> Ar aje amikutã memã anhô mÿjja'ô nhôrmã kwãrîk wãnh mebé

nê kêt. Ar amã me abêmãdjwý kwãrĩk wãnh mebé aminê kêt. Dja gar mrãmri amã me abêkumrêx ne arým aje Metĩndjwýnh kukràdjà marn kôt amijo aba mexkumrêx. Me kute katàt amijo ba'ã kute memã karökôt kukràdjà kôt gar arým amijo aba mexkumrêx.

<sup>9</sup> Me bakukãmãre ne Metĩndjwýnh kukwakam memã kabên kukràdjà jarên memã kum,

“Kwãrĩk wãnh mebé prô nàr mjêno adjãkĩnh kêt.

Kwãrĩk wãnh me'õnh bĩn kêt.  
Kwãrĩk wãnh adjãkĩnhĩ kêt.

Kwãrĩk wãnh me'ã ajêx kêt.

Kwãrĩk wãnh me amã me'õ nhõ mýjja puro kĩnh ne 'ã amim karõ kêt.”

Nãm ã memã anen kam ajte memã kum,

“Me amã amibu'ã me ja jabê. Kute mrãmri ne ga me amã amijabêja pyrãk dja ga me ã amã amibu'ã me ja jabêo ane.”

Nãm ã memã ane. Ja dja gar aman ar amã me abê. Ar amã me abêkam ne gar tu Metĩndjwýnh kukràdjà kôt amijo aba mex. Me kute katàt amijo ba'ã kute memã karökôt kukràdjà kunikôt gar tu amijo aba mex. Kukràdjà 'õ ne 'ã kãtãm kêt. Ar amã me abêkam gar aje kukràdjà kunĩ marn kôt amijo aba mexkumrêx.

<sup>10</sup> Nhyim bê ne me kum me abêkam kute meo bikênh. Kati. Dja gar mã amã me abêjabit man arým urokam Metĩndjwýnh kabên kukràdjà kunikôt amijo aba mexkumrêx.

<sup>11</sup> Kam, ba ajte ar amã arê. Arým 'ýr. Mýkam ne gar ate akrã? Ar aje mrãmri ne me õto nõr pyrãk. On ar ano tỳx. Gwaj baje tu amim Kritu kamnhĩxkumrêxmo kraxkam akubyn bõxja kute onj pyrãk. Nhyim be, kati. Gwaj bawýr bõx ne kute amim gwaj bapytãr nhõ akatija arým 'ýr.

\* **13:13** Mýjja me kute o kõm ne kôt bibãnh kunjja, kadjwati kangõmê uba kangõmê, mýjja kangõ kunĩ ne me kum kadjwati kangõ jarê.

<sup>12</sup> Arým akamãt kêt 'ýr. Me axwe kumexkam kute pykakam akamãt pyrãk. A'u ne gwaj bajo rãm ne ja. Dja Kritu bõx nhyim arým me mexkumrêx. Me mexkumrêxkam dja kute pykakam a'u pyrãk. Kam gwaj on wãnh badjãpênh punu kute akamãt kô tyk pyrãk ja kanga. Kute mrãmri ne me krãkamngõnh kute amipytãr kadjy õ kãxo kubêkã jangjênh pyrãk. Gwaj Kritu kukwakam batỳx ne katàt ar amijo baba. Kritu kute gwaj bajaxwebê bamã tỳx jadjãr. Dja gwaj bamã tỳx jadjã gwaj arým katàt ar amijo baba. Kukwakam katàt ar amijo baba ne arým baje mrãmri ne me kute a'ukam mrãnh pyrãk.

<sup>13</sup> Gwaj memã katàt ar amijo baba kute a'uri me katàt ba pyrãk. Djãm mekôt ar abixaêr punumã? Djãm kadjwati kangõkam\* ar abibãnhmã? Djãm mekôt aprõ kupa'ã, amjên kupa'ã akurê abamã? Djãm mekôt ar abixaêr tỳ:x ne tu apunu raxmã? Djãm ar aje abenmã akabên punu abamã? Djãm ar aje aben nhõ mýjja puro'ã angrykmã? Kati. Kwãrĩk wãnh. <sup>14</sup> Bênjadjwýr djwýnhbê Jeju Kritu nextire kôt dja gar amextiren ar aba. Ar amex ja dja gar ama. Kwãrĩk wãnh ar aje amidjwýnhbito kĩnh kadjy ar ajaxwe aba kêt.

## 14

*Me kute Jeju mar rerekreja'ã memã ujarênh.*

*Mat 7.1; Rô 2.1; Xij 4.11*

<sup>1</sup> Me kwý kute amim Jeju mar rerekreja dja gar o anhõbikwa. Kwãrĩk wãnh mýjja'õ mýr jabej ar amã kurê kêt ne 'ã amim, “Axwe”, anhýr kêt. <sup>2</sup> Me kute ar amã,

—Dja gar ãm mry pumũ, anhýro ba. Ga kam aje amim Jeju mar tỳxkam amim,

—Kati. Ba dja ba mýjja kunĩ kuro iban kam Metĩndjwýnhmã imex rá'ã, anhýro aba. Nhyem me kwý kute amim Jeju mar rerekren kum mry pyman djwýbit kuro ba.

<sup>3</sup> Kwãrĩk wãnh ar amã kurê kêt. Ar aje mýjja kunĩ kuro abakam kwãrĩk wãnh ar amã me'õ kute djwýbit kurja kurê kêt. Nãr ar akwý aje djwýbit kurja kwãrĩk wãnh me kute mýjja kunĩ kur'ã akabên kêt ne amim, “Me axwe”, anhýr kêt. Mýkam? Bir, Metĩndjwýnh ta kute arým o krakam. Kwãrĩk wãnh mýjja kur mýr jabej ar amã aben kurê kêt. <sup>4</sup> Me axwekam djãm ar ga dja gar memã axwe pãnh jarê? Kati. Metĩndjwýnh dja memã axwe pãnh jarê. Nãr, me mexkam djãm ar ga dja gar memã kĩnh djã ngã? Kati. Metĩndjwýnh dja memã kĩnh djã ngã. Djãm ar ga ne gar meo aba? Kati. Metĩndjwýnh ne meo ban me axwebê memã týtjangjêho ba. Kam kwãrĩk wãnh ar amã kurê kêt.

<sup>5</sup> Amrêbê me bakukãmãre ne me kute apýnh akati maro ba. Nhyem ajbir jakam dja me kute amim Jeju mar kwý amim, “Akati punu ne ja”, anhýro ba. Nhyem ajtekam me kwý kute amim Jeju mar kute akati mar kêt ne amim,

—Kati. Akati kunĩ ne mex ne 'õ kute aben japanh kêt, anhýro ba. Gê kam me kunĩ ta ĩ pýnhkôt prĩne akatio amiman ta akati ma nãr ta mar kêt. Kwãrĩk wãnh akati'õ mýr jabej ar amã aben kurê kêt.

<sup>6</sup> Me'õ kute akati marja ta kute Bẽnjadjwýr djwýnh markam kute akati mar. Nãr, me'õ kute akati mar kêtja ta kute Bẽnjadjwýr djwýnh markam kute akati mar kêt. Ajte me'õ kute mýjja kunĩ kurja ta kute Bẽnjadjwýr djwýnh markam kute kur. Ga, ta kute 'ã Metĩndjwýnhmã amikĩnh jarênhkam kute kurja pumũ. Nãr, me'õ kute djwýbit kurja ta kute Bẽnjadjwýr djwýnh markam kute djwýbit kurja pumũ. Ga, kute djwýbit kurkam kute 'ã

Metĩndjwýnhmã amikĩnh jarênh ne kute kurja pumũ.

<sup>7</sup> Gwaj baje amim Jeju mar kunĩ djãm gwaj baje amidjwýnhbit maro babamã? Kati. Dja gwaj Metĩndjwýnh maro baban ajte gwaj babu'ã me ar baja maro baba. Gwaj batĩnri dja gwaj Metĩndjwýnh maro baba nãr gwaj tyn Metĩndjwýnh ma. <sup>8</sup> Bẽnjadjwýr djwýnh ne gwaj baje markumrêx. Dja gwaj batĩn ne ar babari Bẽnjadjwýr djwýnh maro baba. Ne tyn Bẽnjadjwýr djwýnh ma. Kam dja gwaj batĩn ne ar baba jabej nãr batyk jabej. Kwãrĩk wãnh rá'ã. Bẽnjadjwýr djwýnh ne gwaj baje mar nhyem arým gwaj bajo kra.

<sup>9</sup> Mýj kadjy ne Kritu tyn akubyn tĩn ne? Bir, kute me tynkmê me tĩn kunĩmã Bẽnjadjwýr djwýnh ne meo ba kadjy. Ja kadjy ne tyn akubyn tĩn ne.

<sup>10</sup> Ga kam ar aje Jeju kukwakam me'õo ar akamyja mýkam dja gar mýjja'õ mýr jabej ar akamymã axwe jarênh ar amã kurêo aba? Djãm ar abê memã axwe pãnh jarênh djwýnh got? Kati. Dja gwaj bakunĩ Kritu kabem dja nhyem ta arým gwaj bamã bajaxwe pãnh jarêho nhý. Kwãrĩk wãnh ga akamymã axwe jarênh kêt. <sup>11</sup> Amrêbê me bakukãmãre kute 'ã pi'õk no'õk kôt dja gwaj kabem djan amikôt kum amijarê. Nãm memã kum,

“Bẽnjadjwýr djwýnh ne memã arênh memã kum,

'Itĩn ne ar iba. Djãm itĩn ne ar iba kêt ne ba ikabên kajgo? Itĩn ne ar ibakumrêx ne ba me amã ikabên ne. Me kunĩ dja me ikabem kônkrão nhýn kunĩ amikôt imã amijarê.’

Nãm ã Bẽnjadjwýr djwýnh ane.”

Nãm me bakukãmãre ã memã anen arým 'ã pi'õk no'õk ne. <sup>12</sup> Ga, pi'õk no'õkja kôt gwaj banhĩ pýnh kôt gwaj baje Metĩndjwýnhmã amikôt amijarênhmãja pumũ.

<sup>13</sup> Dja gar aje meo akamy kwýja ma. Me kwý kute amim Jeju mar rerekreja ma. Kwārīk wānh mýjja'ō mýr jabej ar amā kurē kêt. Dja gar atemā amijo tēn ar akamy'ā amim,

—Ba on Metīndjwýnhmā amijan-gri týx. Ikamy ne ipumūnho ba. Nok ba ren tu ikamy nokrekam mýjjao iban ren Metīndjwýnhbē ikamyo akēx. Ba on amijangri týx. Ba ren kubē o akēx ne ren kam ije mrāmri ne mýjja kute me par tok nhym me rôrōk pyrāk, ane. Dja gar ā amim anen ā ar akamy maro ane.

<sup>14</sup> Nhym me kute mýjja kurdjwý. Djām me kute mýjja'ō krēn arým Metīndjwýnhmā axwe? Arkati. Ja ne ba ije Bēnjadjwýr djwýnh Jeju kabēnkōt markumrēx. Nhym be, dja ar akamy kwý mýjja 'ō'ā amim,

—Dja ba kukrēn Metīndjwýnhmā ijaxwe, anhýro ba. Be, akamy jamā ne mrāmri mýjja punu. <sup>15</sup> Ga kam tu akamy nokrekam mýjja ja krē nhym kōt arým akam kaprīre ne. Godja ajā amim,

—Nām mýjja punure krēn arým Metīndjwýnhbē amijo ajkē, ane. Godja ā akamy anen arým kaprī:re ne. Djām amā akamy kīnhkam ne ga tu nokrekam mýjja krē? Kati. Aje amidjwýnhbit mar. Kritu kum akamy kīnh ne kam kadjy ty. Gadjwý ga ren amā kīnh ne ren nokrekam mýjja krēn kêt. Nhym be, kati. Ga amidjwýnhbit man amā akamy kīnh kêt ne tu nokrekam mýjja krēn arým akamyo ajkē. Kwārīk wānh o anhýr kêt. <sup>16</sup> Dja ga te mýjja 'ō'ā amim,

—Kati. Imā ne mexkumrēx, ane. Nhym me kute ajā, “Axwe”, anhýr prām kwārīk wānh nō. Dja ga ām mýjja pumū gē me ajā anhýr kêt.

<sup>17</sup> Metīndjwýnh kute gwaj bajo bakam djā ne gwaj baje mýjja kuro babaja mar týx? Nār, djām gwaj baje mýjjao bakōm mar týx? Kati. Gwaj baje mar kajgo. Nhym be, kute gwaj bajo bakam gwaj baje

bajaxwe kêt kadjy amimar. Gwaj badjumar mex kadjy baje amimar. Gwaj bakīnh kadjy baje amimar. Gwaj baje Metīndjwýnh Karō maro babakam ne gwaj bakīnh kadjy baje amimar. Metīndjwýnh kute gwaj bajo bakam mýjja mex ja kadjy gwaj baje amimar týxkumrēx. <sup>18</sup> Mýkam? Bir, me mýjja mex jao ba ne me Kritumā āpēnho ba ne arým kākjakam Metīndjwýnho kīnh nhym pykakam me ar badjwý kum me kīnh.

<sup>19</sup> Gwaj abenmā bakabēn mex ne badjumar mex kadjy amima. Gwaj abenmā Jeju'ā ajarēn arým mar mexo amū aben kamē. Ja kadjy dja gwaj amima. <sup>20</sup> Djām ar aje me'ōo akamyja mar kêt ne ar aje adjākurbīt mar ne o ar aje Metīndjwýnh bē o akēxmā? Akamybē Metīndjwýnh nhō āpēnh. Kwārīk wānh kubē o akēx kêt. Mrāmri ne me kute mýjja kunī kurkam Metīndjwýnhmā mex.

Nhym be, godja gar akamy mar kêt ne amidjwýnhbit man arým tu nokrekam mýjja'ō krē ne kam arým o Metīndjwýnh bē o akēx. Aje kubē o akēxkam arým ajaxwe. <sup>21</sup> Djām aje tu mýjjao aba ne aje tu mry'ō kuro abamā? Nār djām ar aje tu uba kangōo akōmo abamā? Nār djām ar aje apýnh mýjja 'ōdjwýo abamā? Nār djām ar aje mýjjao abakōt ar amā Metīndjwýnh bē akamyo akēx pma kêt? Aje o abakōt aje o kubē o akēx pymakam kwārīk wānh o aba kêt. Dja gar akamy man kwārīk wānh o aba kêt. Nār djām ar aje mýjja 'ōo abakōt ar aje akamymā kaprī jadjār jabej nār ar aje akamymā Metīndjwýnh mar rerekre jadjār jabej? Kwārīk wānh o aba kêt. Dja gar akamy ma. Kwārīk wānh o aba kêt.

<sup>22</sup> Apýnh mýjja'ā ne gar amim, —Ije amim Metīndjwýnh markam ne mýjja ja ajmā kute kêt. Ba ren o iba ne ren ijaxwe kêt, anhýr jabej. Amimābit dja gar arē

gê Metîndjwÿnhbit ama. Nok gar ren ar akamy mar kêt ne ren tu mÿjjao abao anen ren amim angyrk ne ren amim,

—Mÿkam ne ba o iban Metîndjwÿnh bê ikamy akêx? ane. Nhym be ar aje amikam ajaxwe'ô mar kêt kam dja gar adjumar mextire. <sup>23</sup> Godja me'ô kute mÿjjao'ô krên mā amim,

—Kon. Dja ba kukrên arÿm ijaxwe jabej, anen atekam tu krên jabej. Djori kam mex? Kati. Arÿm axwe. Mÿkam? Bir, kute Metîndjwÿnh mar kêt ne tu krên kam. Me kute mÿjjao ba kunîkôt dja ne kumrêx o Metîndjwÿnh ma. Ne kam arÿm o ba. Godja me Metîndjwÿnh mar kêt ne tu mÿjjao ba jabej arÿm axwe.

## 15

*Me kute Jeju mar rerekreja'ă memă ujarênh ră'ă.*

*Mak 10.45; Kô k 10.24; Pir 2.4*

<sup>1</sup> Kam, gwaj baje amim Jeju mar tÿx jabej ne gwaj ren me kute amim mar rerekre jamă baprîre. Djâm gwaj baje amidjwÿnhbito bakînh babamă? Kati. Gwaj meo kînh. <sup>2</sup> Gwaj bakunî banhî pÿnhkôt amibu'ă meo kînh. Mÿj kadjy? Bir, me mexmă. Me kute Jeju mar mexo kute amû amikamênh ne mar raxmă.

<sup>3</sup> Ga, Kritudjwÿ kute amidjwÿnh kînh kêtja pumû. Kute amidjwÿnh kînh kêt kôt ne me bakukâmăre Kritu kabên jarê. Nām Kritu Bămmă kum, “Me kum akurê kôt ne me kum ikurê.”

Nām ă Kritu Bămmă ane nhym me bakukâmăre memă arê nhym me arÿm 'ă pi'ôk no'ôk ne. Nhym kam tû:mrâm me bakamingrănyrekam Kritu katon ar ba nhym me arÿm kum kurê. Kum kurê nhym arÿm amidjwÿnh kînh kêt. Gwaj badjwÿ kwărik wănh amidjwÿnhbito kînh kêt.

<sup>4</sup> Metîndjwÿnh ne mā me bakukâmăreo djuw mexo ba nhym me mā me'ă ajarên mā me'ă pi'ôk no'ôko ba. Mÿj kadjy? Bir, dja gwaj pi'ôk jarên mā amijă kabên kunî maro baba. Ja kadjy ne me 'ă pi'ôk no'ôk ne. Dja gwaj amijă kabên kunî man arÿm tu amim Jeju mar tÿx ne. Nhym kam te apÿnh gwaj bakaprî djari gwaj bajo ba gwaj tu amim Jeju mar tÿx ră'ăn 'ă badjukanga kêt. Ne kam mā amijă kabên kunî man te bakaprî akubyn bakînh ne. Bakînh ne arÿm amiwÿr kamnhîx tÿx. Ja kadjy ne me me bakukâmăre'ă ajarên me'ă pi'ôk no'ôk ne.

<sup>5</sup> Metîndjwÿnh ne kute amijamăr 'iry ne kute memă tÿx jangjênh nhym me kute amim mar tÿx ne kînh. Nă bām mā kum ar ajo a'uw gê ar amă akabên mextire jadjă. Ar aje Jeju Kritu kôt ar amijo abakam gê ar amă akabên mextire jadjă gar axikôt abenmă akabên mextire jarê. <sup>6</sup> Ne kam axikôt anhökre kadjwÿnhbê Metîndjwÿnh ra:x ne uma:ja man arÿm me kunîmă arêno amirît ne. Ja kadjy ne ba ă Metîndjwÿnhmă ar ajo idjă'wÿro ane. Metîndjwÿnhbê ne Bênjadjwÿr djwÿnhbê Jeju Kritu Băm.

*Metîndjwÿnh kum me bajtemdjwÿ kînh.*

*Kar 10.34; Rô 9.24; Gar 3.28; Ep 2.16*

<sup>7</sup> Kam dja gar abeno anhöbikwa kute Kritu gwaj bajo öbikwa pyrăk. Ar aje memă Metîndjwÿnh raxo amirît kadjy ar abeno anhöbikwa.

<sup>8</sup> Ba kam ajte ar amă arê gar ama. Kăjkwakam Metîndjwÿnh ne amrêbê mebê idjaer kukâmăremă mÿjja jarê. Me my kă rênhamă arê. Nām memă apÿnh mÿjja jarênh mămđji. Nhym kam kôt Jeju Kritu nă kurûm katon ar ba. Me bakamingrănyrekam ar ba. Ar ba:n arÿm mebê idjaermă âpênh ar ba. Metîndjwÿnh kute me



bakukâmâremâ apÿnh mÿjja jarênh kôt ne memâ àpênh ar ban mÿjja nhipêxo ba. Nhyim me arÿm omÿn amim,

—Mrâmri ne Metîndjwÿnh kabênkumrêx. Ga, Jeju arÿm kôt memâ àpênh ar baja pumÿ. Metîndjwÿnh kute me bakukâmâremâ arênh kôt àpênh ar baja pumÿ. Nâm me Jeju pumÿn arÿm ã amim ane.

<sup>9</sup> Jeju memâ mÿjja pumÿnh kêt nhipêxo ba; me punuo mexo ba: nhyim me bajtemdjwÿ arÿm omÿ. Me kute Metîndjwÿnh raxmâ kator ne abenmâ kum,

—Djâm Metîndjwÿnh ukapri ngri got? Mrâmri ne ukapri:kumrêx, anhÿr kadjy. Ja kadjy ne me bajtemdjwÿ arÿm mÿjja pumÿnh kêt kwÿ pumÿ. Djâm mebê idjaerbit ne me kute Metîndjwÿnh raxmâ katorn kum rax jarênhmâ? Kati. Me bajtemdjwÿ ne me kute raxmâ katorn kum rax jarênhmâ. Me bakukâmâre ne amrêbê: ja jarê. Me bajtem kute Metîndjwÿnhmâ rax jarênhja jarê. Kritu kâjkwakam Bâmmâ amijarênh kum, “Me bajtem nhipôkri dja ba memâ ajâ idjujarênho amirÿt ne apyma'ã ngre.”

Nâm ã Kritu Bâmmâ me bajtem jarênho ane nhyim me arÿm 'ã pi'ôk no'ôk ne. <sup>10</sup> Nhyim kam me bakukâmâre 'ôdjwÿ me bajtemmâ kum,

“Me abajtem, me on ô me wÿnh kôt akînhkumrêx.”

Nâm ã memâ ane nhyim me arÿm 'ã pi'ôk no'ôk ne. <sup>11</sup> Nhyim kam me bakukâmâre 'ôdjwÿ me bajtemmâ kum,

“Me abajtem kunÿ dja ga me Bênjadjwÿr djwÿnhmâ mex-tire jarê.

Apÿnh me aba djâ kunÿkôt ar abaja kum mex-tire jarê.”

Nâm ã me bajtemmâ ane nhyim me ajte 'ã pi'ôk no'ôk ne. <sup>12</sup> Nhyim kam Idjaiidjwÿ me bakukâmâremâ me

ajarê. Nâm Kritu'ã arê nhingrôt jakren memâ kum,

“Dja me bakukâmâre Djexe tâmdjwÿ'ô kato. Tÿ:mrâm me kamingrânyrekam kato. Me kute mrâmri ne pi 'yr nhyim tÿmrâm ajte arêkam ingrân abatânh pyrâk.

Dja ã tâmdjwÿ'ô katorn ar bao anen arÿm kubê Bênjadjwÿrbê kumkati. Ne kam arÿm apÿnh me ba djâri meo ba. Nhyim kam me bajtem arÿm tu amim kamnhÿxkumrêx.”

Nâm ã Idjaij me bakukâmâremâ ane. Me bakukâmâreja kunÿ ne me me bajtem jarê. Metîndjwÿnh kum me kapri nhyim me kute kum rax jarênhmâja jarê.

<sup>13</sup> Metîndjwÿnh ne kute memâ amak bôn timer nhyim me kute amiwÿr ô mÿjja mex kamnhÿxo ba. Gê ar amâ ajamak bô gar tu amim Kritu markumrêx. Ne kam arÿm kôt ar akînh-ti:ren ar adjumar mex-ti:re. Nhyim kam Metîndjwÿnh Karô ar amâ atÿx jadjâ gar amiwÿr kamnhÿx tÿx ne. Ja kadjy ne ba ã kum ar ajo idjâ'wÿro ane.

*Paur kute me bajtem kadjy àpênh'ã amijarênh.*

<sup>14</sup> Akmere, àpnhÿre ar, djâm ar amex kêt ne ba ar amâ ikabênh? Kati. Ar ga ne gar arÿm amex-tire ne ar aje Metîndjwÿnh mar mexkumrêx. Ne kam aje abenmâ 'ã karô mar mexkumrêx. Tâm ne ba arÿm ije markumrêx. <sup>15</sup> Ije ar amâ pi'ôk no'ôkkam ne ba itÿx ne ar amâ 'ã karô. Te ar aje arÿm ikabênh mar jabej ba akubyn ar amâ arê gar ajte ama. Metîndjwÿnh ne tu kum ikapriin tu imâ idjâpênh djâ'ã karô ba arÿm kabênh kôt ar amâ ikabênh jarê.

<sup>16</sup> Ije me bajtemmâ Metîndjwÿnh'ã ujarênh ny jarênho iba kadjy ne imâ Kritu Jejumâ idjâpênh'ã karô. Mÿj kadjy? Bir, ije Metîndjwÿnho kînh kadjy. Ije 'yr me bajtemo akêx

nhym me kum mexmã. Dja me tu amim Jeju markumrêx nhym Metîndjwýnh Karô arým meo mex. Tãm dja Metîndjwýnho Kînhkumrêx.

17 Kritu Jeju kute imã tÿx jadjárkam ne ba me bajtemmã Metîndjwýnh kabên jarênho iba. Idjâpênh djã jakam ne ba ikînhkumrêx ne ar amã 'ã ami-jarênho amirîtkumrêx. 18 Kum idjâpênhkam ne ba Kritu kuk-wakam mÿjja pumûnh kêt kumex nhipêx. Kritu kukwakam ije mÿjja nhipêxbit dja ba 'ã amijarê. Me bajtem kute kabên mar ne kôt amijo ba kadjy ne ba memã kabên jarê. Nã bãm memã kabên jarên kôt mÿjja kwÿ nhipêx nhym me arým omû. Omûn arým kabên man kôt ar amijo ba.

19 Metîndjwýnh Karô 'itÿxkôt ne ba mÿjja pumûnh kêt kwÿ nhipêx. Ne me punuo mex. Nhym me karô punu meo ba ba me nêje me ano nhym me arým memã ire. Nã bãm mÿjja pumûnh kêt kwÿ nhipêx nhym me te kute marmã kam no tyn kume:x ne arým Metîndjwýnh raxmã kato. Ba kam kãj bê memã Kritu'ã ujarênh ny jarênho iba:. Djeruxarêkam arênho iba:n amû apÿnh pykakam me ba djãri kunî kôt o iba:n o inhipôk ne. Ne arênho iba:n arým pykabê Irrij'ÿr arênho bôx.

20 Ba ne ba me kute Kritu mar kêtjamã arê. Me kute memã Kritu'ã ujarênh ny jarênh kêtjamã ne ba ije kãj bê memã arênh prãmkmumrêx. Me'ô kumrêx kute memã 'ã ujarênh ny jarênh nhym me arým kute mar. Me jamã ne ije arênh prãm ngrire. Me ujarênh nhiby ije ajte memã arênh prãm ngrire. Amû me kute mar kêt jamãbit ije kãj bê memã arênh prãmkmumrêx. Ga, me'ô arým kute kikre nhipêxmô kraxja pumû. Nhym kam me'ôdjwÿ arým 'ÿr bôx ne omû. Omûn ajte iby ipêx prãm kêt. Badjwÿ ije me arým kute mar jamã ajte arênh prãm ngrire.

Me kute mar kêt jamãbit ne ije arênh prãmkmumrêx. 21 Ije me amã ja jarênh kôt ne me amrêbê: me bakukãmãremã arên memã kum, "Me kute memã 'ã ujarênh kêt jamã dja me memã 'ã ajarê nhym me arým kuma.

Me kute mar kêt ja dja me arým kraxkôt prîne amijã kuma."

Nãm me ã me bakukãmãremã ane nhym me arým 'ã pi'ôk no'ôk ne. Ba 'ã pi'ôk no'ôk pumûn arým ije me kute mar kêt jamã arênh prãmkmumrêx. 22 Me kute memã arênh kêt jamã ije arênh prãmkam ne ba pyka jakam amikrà ar o iban te ar awÿr ikrã krãptî ne.

*Me ô krîraxbê Rôma'ÿr têm kadjy kute memã amijarênh.*

23 Nhym be, jakam arým ne ba pyka ja kunîkôt memã Kritu'ã ajarênh arým inomã kumê nhym me arým kuma. Amrêbê ne ba ar awÿr ikrã nhym ijã amex krãptî apêx. Jakam dja ba wãm ar awÿr tên bôx ne 24 ar akam dja. Dja gwaj kam abeno bakînhô bakrî:n bakrî kãjbê 'iry.

Ba kam arým amû pykabê Êpanha'ÿr tẽ. Êpanha'ÿr itêm kadjy dja gar ikôt o kangôn 'ÿr ijano. Ba kam arým 'ÿr tẽ. Ja kadjy ne ba amima. 25 Nhym be, ajbir jakam dja ba Djeruxarê'ÿr itêm ne ibôx kumrêx ne Jeju nhô me jamã pi'ôk kaprî ngã.

26 Matenimê Akajakam Jeju nhô me ja ne me kute amû memã ô pi'ôk kaprî kwÿ janormã. Djeruxarêkam me kute amim Jeju mar kwÿ ne me ô mÿjja kêt ne ar ba nhym me kute memã anormã. 27 Me ta ne me kute memã anormã. Mrãmri me kute memã ôr prãmkam mexkumrêx. Djeruxarêkam me kute amim Jeju mar ja ne me kumrêx Kritu'ã ujarênh nyo ban amû me bajtemmã arê. Mebê idjaer ne me amû me bajtemmã Kritu jarê nhym me arým tu amim

markumrêx ne kînhkumrêx. Ne kam me kute amikutâ memâ ô pi'ôk kaprî janor prâmkumrêx.

<sup>28</sup> Dja ba me'ÿr pi'ôk kaprîo bôx ne memâ kungâ. Me kînh djâ ja memâ kungân arÿm akubyn tē. Akubyn pykabê Êpanha'ÿr tē. 'ÿr tē:n krîraxbê Rôma kumrêxkam ar akam bôx. Ne kam amû pykabê Êpanha'ÿr tē. <sup>29</sup> Ije Kritu mar raxkôt ikî:nhkumrêx. Ar akam ibôx ne ije prîne ar amâ Kritu'â ujarênh ny jarênhkam dja gar ikudjwa akînhkumrêx. Tām ne ba arÿm kuma.

<sup>30</sup> Akmere, àpnhîre ar, Bēnjadjwÿr djwÿnhbê Jeju Kritu kabênkôt, Metîndjwÿnh Karô kum gwaj bajabêja kabênkôt ne ba ar amâ arê. Dja gar Metîndjwÿnhmâ ijo adjâ'wÿr 'âno dja. Ba ne ba idjâpênh tÿx ar iba. Kum ijo adjâ'wÿr 'âno djan o iro'â apên ikôt o kangô.

<sup>31-32</sup> Dja gar kum,

—Djûnwâ, arÿm Paur pykabê Djudêjakam tēmmâ. Kam me kwÿ kute amar kêt ne ar ba. Dja ga mebê utâ. Gêdja krîraxbê Djeruxarêkam tēn Jeju nhô me jamâ me ô pi'ôk kaprî ngâ. Dja ga memâ kînh jadjâ gê me kum me kînh ne amim me ô pi'ôk kaprî by. Djûnwâ, aje mrâmri Paur ar ikam bôx'â amim karô jabej amrê ar iwÿr ano gê kînh ne ar ikam bôxkumrêx. Dja bar kam Paur kôt abenmâ tÿx jangijn Jeju kôt ar amijo iban 'â idjukanga kêt, ane. Dja ga ã kum ijo adjâ'wÿro ane. <sup>33</sup> Metîndjwÿnh ne kute memâ umar mex jangjênh djwÿnh. Jakam ba kum ar ajo a'uw gê ar akunî mē amijo kajkep rā'â ne. Tām ne ja.

## 16

*Kute apÿnh ôbikwamâ kute amik-abên mex janor.*

<sup>1</sup> Gwaj bakanikwÿnh Bebi ije ar amâ arênhmâ. Bebi ne mexkumrêx ne krîraxbê Xekrerekam me kute amim Jeju mar kadjy àpênh ba.

Me kute Jejukôt ar aben pydjio baja kadjy àpênh ba. <sup>2</sup> Dja gar amâ kînh ne kum akabên mex jarê. Bēnjadjwÿr djwÿnh Jeju nhô me ja ne me kum aben jabê. Dja gar me kudjwa amâ Bebi jabê. Godja gar àpênh'ô'â omû nhym Bebi kum ar aje kôt o kangôn prâm jabej tu kôt o kangô. Ta ne me krâptî:kôt o kangô. Badjwÿ ikôt o kangô. Dja gar pânh kôt o kangô.

<sup>3</sup> Ne ajte amû Prixiramê Akwire arkum ikabên mex jarê. Nām ar iro'â Kritu Jejumâ àpênh ba. <sup>4</sup> Ar ta ne ar inêje memâ kabên. Nām me te umati tâ nhym arkum amijâ ma kêt ne tu me'ÿr tēn inêje memâ kabên. 'Ā ne ba arkum ukaprî: jarê. Me bajtem kute amim Jeju mar kunî, apÿnh me kute Jejukôt ar aben pydjio ba djâri ne me ajte arkum ukaprî jarê.

<sup>5</sup> Ar ô kikrekam me kute amim Jeju mar ne ar aben pydjio bawâdjwÿ. Me wâmâdjwÿ dja gar ikabên mex jarê. Wākam imâ inhôbikwa kînh. Kubê Epenexu. Dja gar kum ikabên mex jarê. Pykabê Adjijkam ne Epenexu kumrêx Kritu'ÿr amijo akêx.

<sup>6</sup> Dja gar ajte Marijmâ ikabên mex jarê. Marij ne gwaj bakadjiy àpênh rax.

<sup>7</sup> Dja gar ajte wākam inhôbikwa Tônikumê Djunijmê arkum ikabên mex jarê. Ar wā ne me ar iro'â ar ibê ijê. Jeju kute ar anorja ne ar abenmâ Tônikumê Djunij ar arê:n kute ar mar tÿx. Ar kumrêx Kritu'ÿr amijo akêx. Ba kam badjwÿ 'ÿr amijo akêx.

<sup>8</sup> Āpritumê ne bar imâ Bēnjadjwÿr djwÿnh jabê. Kam imâ Āpritu jabê. Ar kum ikabên mex jarê.

<sup>9</sup> Ne ajte Ubanumâ ikabên mex jarê. Ubanu Kritu kadjy gwaj bakôt àpênh ar ba. Etakidjwÿ imâ kînh. Dja gar ajte kum ikabên mex jarê.

<sup>10</sup> Ne ajte Aperimâdjwÿ ikabên mex jarê. Aperi ne Kritumâ àpênh

mexkumrêx nhy me arÿm kôt kuma. Dja gar ajte Artobur nhô kikrekam ar wâdjwÿmâ ikabên mex jarê.

<sup>11</sup> Ne ajte inhôbikwa Erodjiãomã ikabên mex jarê. Ne Naxixu nhô kikrekam ar kute Bênjadjwÿr djwÿnh marjamã ajte ikabên mex jarê.

<sup>12</sup> Gwaj bakanikwÿnh Kripenamê bakanikwÿnh Kripodjamã dja gar ajte arkum ikabên mex jarê. Nãm ar Bênjadjwÿr djwÿnhmã àpênh ar ba. Dja gar ajte Pexirmã kum ikabên mex jarê. Me kum me bakanikwÿnh kÿnh. Pexir ne Bênjadjwÿr djwÿnhmã àpênh ra:x.

<sup>13</sup> Nhy Rupumê nã ar. Badjwÿ ne ba o inã. Dja gar ajte arkum ikabên mex jarê. Bênjadjwÿr djwÿnh ne amijo Rupu pytàn ar o ba.

<sup>14</sup> Dja gar ajte Axikritumê Prekôtimê Erimanhmê Patubamê Erimijmê ar ro'ã gwaj baje aro bakamyja arkum ikabên mex jarê.

<sup>15</sup> Ne Pirogumê Djurijmê Nerumê Neru kanikwÿnhmê Orîpamê ar ro'ã Jeju nhô me ja kunimê dja gar arkum ikabên mex jarê.

<sup>16</sup> Ne abenwÿr bôx ne abeno arôrök ne aben pa krij. Apÿnh me kute amim Kritu mar ne kôt ar aben pydjio ba djari ne me ar amã kabên mex jarê.

*Me kute aminêje me 'ãno ãm'ã memã karô.*

<sup>17</sup> Akmere, àpnhîre ar, gora ikabên ma. Arÿm ne gar ajte Metÿndjwÿnh kabên kukràdjã mar katàt. Dja me'ô ar bôx ne kupa'ã ajte ar amã atemã mÿjja'ô jarê. Ne abenbê ar ajo bikjêr prãm ne Metÿndjwÿnhbê ar ajo akêx prãm. Gora ar aminêje me 'ãno djan memã akax. <sup>18</sup> Mÿkam? Bir, djãm me wã ne me gwaj banhô Bênjadjwÿr djwÿnhbê Kritumã apê? Kati. Nãm me amidjwÿnhbit man mã axwe. Ne kute me noo

biknor kadjy prîne memã me kabêno irô mex. Ne memã 'êx ne kabên mexkumrêx. Nhy me no rerekreja kum me kabên kÿnhkumrêx.

<sup>19</sup> Nhy be ar ga ne gar ajte Metÿndjwÿnh mar mex nhy me kunî kute abenmã ar ajarêno ipök ba ar ama. Ne kam ar akam ikÿnhkumrêx. Kam, dja gar mÿjja mexbit ma. Kwãrik wãnh mÿjja punu mar kêt.

<sup>20</sup> Metÿndjwÿnhkôt me umar mexkumrêx. Ta dja ar amã tÿx jadjã nhy Xatanaj te ar amã apnê. Kôt ar ajaxwemã te ar amã apnê gar amijãno dja. Arÿm ajte Xatanajmã rerek jadjãrmã. Aje nrãmri ne aparo Xatanaj krã kajyr pyrãk. Arÿm ajte Xatanajmã rerek jadjãr 'ÿr.

Gê Bênjadjwÿrbê Jeju tu kum ar akaprÿn ar ajo ba. Tãm ne ja.

<sup>21</sup> Ximoxi ikôt àpênhja ne ar amã kabên mex jarê. Inhôbikwa Juxumê Djaxômê Xopatudjwÿ ar amã kabên mex jarê.

<sup>22</sup> Ba ibê Texu ne ba Paur kukwakam pi'ök ja no'ök. Nã bãm tu amim Bênjadjwÿr djwÿnh markumrêx. Ne amÿ ar amã ikabên mex jarê.

<sup>23</sup> Gajudjwÿ ne ar amã kabên mex jarê. Jakam ar ije amim Jeju mar ne kôt ar aben pydjio ibaja kunî ne bar mã Gaju nhô kikrekam bôx nhy mã ar ikunîo djuw mex.

Eraxumê gwaj bakamy Kwatu ar amã kabên mex jarê. Eraxu ne kute krîrax jakam bēnjadjwÿrmã pi'ök kaprî pumÿnh djwÿnh. <sup>24</sup> Gê Bēnjadjwÿr djwÿnhbê Jeju Kritu tu kum ar akunî kaprî:kumrêx ne ar ajo ba.

<sup>25</sup> Dja ar amã tÿx jadjã. Amrêbê ne ba kãj bê memã Jeju Kritu'ã ajarê nhy 'ã ujarênh arÿm ar awÿr bôx gar tu amim markumrêx. Ar ajte tu amim markumrêxkam dja ar amã tÿx jadjã gar kôt ar amijo aban 'ã

adjukanga kêt. Amrêbê ne Kritu'ã ujarênh nyja me bakukâmârebê bipdjur tûm. Nhym kam me kute arênh kêtukumrêx. <sup>26</sup> Nhym kam ajbir jakam Metîndjwýnh arým gwaj bamã Kritu'ã ujarênho amirîtkumrêx. Amrêbê: ne Metîndjwýnh kukwakam kabên jarênh djwýnh Kritu'ã pi'ók no'ók gwaj jakam, 'âtũ:mkam amim arên arým kuma. Metîndjwýnh tîn ne ar ba rã'ã: rã'ã ne. Kabên kôt ne gwaj apýnh pyka djâri kunîkôt memã Kritu'ã ajarê nhym kunîkôt me arým 'ã ujarênh ma. Dja me kwý tu amim Kritu markumrêx ne kabên markumrêx ne kôt ar amijo ba. Ja kadjy ne gwaj memã 'ã ajarê.

<sup>27</sup> Metîndjwýnh pydji ne amak me:xkumrêx ne no me:xkumrêx. Ba kum meo a'uw gê memã amak bô. Me kute tu amim Jeju Kritu markumrêxkôt gê memã amak bô. Dja memã amak bô nhym me kunî arým kum rax jarênh rã'ã: rã'ã ne. Tãm ne ja.

## Paur kute Kôritukam me jamâ pi'ôk kumrêx no'ôk ne ja.

Paur ne krîrâxbê Kôritukam me jamâ pi'ôk no'ôk ne. Nâm arým pyka kunî'yîr mrânkhôt me'yîr bôx ne memâ Jeju jarê nhym me kwÿ arým tu amim markumrêx ne 'â abeno akprô. Nhym kam Paur arým mã me jadjwÿ'yîr tê nhym tekrekam me amijo ajkê. Nâm me abenmâ kum,

—Djã nâm mrâmri Jeju Paur jano nâr kon, ane ne kam ajte abenbê bikjêro kumex. Ne kam ajte kute Jeju tyk marmân kam ajte bibân ar mrân abenbê djwÿ pytâro ba. Ne kam ajte me kâtâm nhipôkri aben japyr ar o ba. Nhym kam ajte me'ô bâmbê prôo akî nhym me tu ate krân ar ban kute nêje kukrà kêt. Ne kam ajte abenmâ kum,

—Kati, me akubyn tîn kêt. Nâm me tu tykkumrêx, anhÿr ar o ba. Ne kam ajte,

—Mã dja gwaj nê? Djãm gwaj baje mry me kute mÿjjao Metîndjwÿnh karô nhipêxmâ bôrja kurmâ nâr kon? ane. Ne kam ajte,

—Me kuprÿ ne ar babit ne mex, nâr kon me abenwÿr môrbit mex, ane. Be, nhym Paur mÿjja ja kunî man kam prîne pi'ôk no'ôkkôt memâ 'â karô.

<sup>1</sup> Ba ne ba ibê Paur. Kritu Jeju ne amiwÿr ijuw. Metîndjwÿnh kute amim ijã karô kôt Jeju amiwÿr ijuw ne ar ijo ban ijano. Ba kam arým 'â memâ idjujarênh ar iba. Me bakamy Xoxinîdjwÿ ne ikôt dja.

<sup>2</sup> Krîrâxbê Kôritukam ar aje Metîndjwÿnh mar ne kôt aje ar aben pydjio abaja ba ar amâ ikabên jarê. Kritu Jeju ne arým amimexo ar ajo mex. Arým amiwÿr ar ajuw

gar tu amim markumrêx. Kute ar ajo ô me ja kadjy ne amiwÿr ar ajuw. Nâm amiwÿr gwaj bakunî 'uw. Apÿnh gwaj baba djari bakunî 'uw. Gwaj baje banhô Bênjadjwÿr djwÿnhbê Jeju Kritumâ amijo badjà'wÿrja kunî 'uw. Kute gwaj bajo ô me ja kadjy ne gwaj bakunî 'uw. Amÿ me wâmê gwaj bamê ne Jeju arým amiwÿr gwaj bakunî 'uw. Ar amâ ne ba ikabên jarê.

<sup>3</sup> Metîndjwÿnhbê ne me Babâm. Ne Bênjadjwÿr djwÿnhbê ne Jeju Kritu. Gê ar tu kum ar akaprî\* ar ajo ba gar adjumar mex râ'â ne.

*Kute Metîndjwÿnhmâ mekam amikînh jarênh ne ja.*

<sup>4</sup> Ba mã ijo ba djwÿnh, Metîndjwÿnhmâ ar akam amikînh jarê. Metîndjwÿnh tu kum ar akaprî. Gar tu amim Jeju Kritu markumrêx nhym arým kum ar akaprî. Kam ne ba mã kum ar akam amikînh jarê. <sup>5</sup> Nâm kum ar akaprî prîne ar ajo djuw mex. Mÿj ne ar ajo djuw mex on? Bir, nâm ar amâ apÿnh akînh djã, adjâpênh djã'â karô gar maro aban kam arým kôt aje memâ kukràdjã jarênh me: xkumrêx ne aje mÿjja mar me: xkumrêx. <sup>6</sup> Ar ba ne bar ar amâ Kritu jarê. Ar ije omÿnh kôt bar ar amâ arê: gar arým amim,

—Mrâmri Paur ar kabên katâtkumrêx, ane. Nã gãm ar amim anen kam arým tu amim Kritu markumrêx.

<sup>7</sup> Ne kam aje âpênh djã kunî mar ne o aba. Metîndjwÿnh Karô ne ar amâ âpênh djã kunî'â karô gar aje mar ne akubyn bôxkam amako aba. Bênjadjwÿr djwÿnhbê Jeju Kritu bôxkam amako aba. Kam ne ba mã Metîndjwÿnhmâ ar akam amikînh jarê.

<sup>8</sup> Ta dja mã ar amâ tÿx jadjã gar mã amim mar tÿx râ'â: nhym Bênjadjwÿr djwÿnhbê Jeju Kritu

\* 1:3 Djãm ar ga ne gar ajaxwe kêt nhym pân kum ar akaprî Kati. Ar ga ne gar te ajaxwe kêtâm. Nhym be, ta ne tu kum ar akaprî.

arým bôx. Ne kam ar amã ajaxwe jarênh kêtukumrêx gar arým kum ajaxwe kêt ne amextire ne dja. <sup>9</sup> Metîndjwýnh ne mrãmri kabênkumrêx. Kabên kôt dja gwaj bajo djuw mexkumrêx. Ta ne arým kra'ÿr ar ajuw. Bênjadjwÿr djwýnhbê Jeju Kritu'ÿr ar ajuw ne ar ajo ba. Gar kam arým o anhôbikwakumrêx. Mrãmri kabênkumrêx.

*Me kabêno aben japanho ku'ê nhy m nêje memã kabên.*

*Rô 15.5; A Kô 13.11; Pir 2.2; Ped k 3.8*

<sup>10</sup> Akmere, àpnhîre ar, ba ar amã arê gar ama. On abenmã akabên pydjîn arê. Bênjadjwÿr djwýnhbê Jeju Kritu kukwakam ne ba ar amã amex'ã karô. Kwârîk wãnh apÿnh mÿj xêjakôt adjãm ne abenã akabên kêt. Ate dja gar axikôt akabênjabit man axikôt akabên jarên kôt prîne amex. <sup>11</sup> Akmere, àpnhîre ar, Krôre nhô kikre wãkam ar kwÿ arým nînh iwÿr bôx ne ar arým ar ajã imã,

—Onj, me kabêno aben japanho kumex, ane. Ba arým ar kabên man arým wãm ar amã arê. <sup>12</sup> Gar we akwÿ amã me kînh kêt ne memã kum,

—Ba ne ba Paur kôt ar iba, anhÿro aba. Nhy m ar akwÿ ajte amã me kînh kêt ne memã kum,

—Be, ba ne ba Apôr kôt ar iba, anhÿro aba. Nhy m ar akwÿ ajte amã me kînh kêt ne memã kum,

—Be, ba ne ba Xepa kôt ar iba, anhÿro aba. Nhy m ar akwÿ ajte amã me kînh kêt ne memã kum,

—Be, ba ne ba Kritu kôt ar iba, anhÿro aba. Nã gã m ar ã ari aben bê abikjêrn amã aben kînh kêt o ane nhy m me arým imã arê ba arým kuma.

<sup>13</sup> Nã gã m ar arým apÿnh mÿj xêja kôt aku'ên arým abenã akabên ne. Nã gã m ar arým aje abenmã Kritu nhirênh pyrãk. Djãm ba ne me arým pîte'y'ã inhô gar we ikôt ar aba?

Djãm imã ne me arým ngômã ajadjã gar we ikôt ar aba? Kati:.

<sup>14-16</sup> Djãm ba ne ba ngômã ar ajangij? Kati. Ije ngômã ar ajangjênh kêt. Kam ne ba ikînh ne Metîndjwýnhmã amikînh jarê. Mÿkam ne ba kam ikînh? Bir, ba ren ngômã ar ajangij nhy m ren ar ajô arîk ijã amim,

—Ba ne ba tu amim Paur markumrêx. Nãm arým amim ngômã ijadjã, ane ba ren kam ikaprîre ne. Nhy m be, kati. Kripumê Gajubit ne ba ngômã ar adjã. Exepa nhô kikrekam ar jadjwÿ ba ngômã ar angij. Nhy m me'ôdjwÿ ije mar kêt. Ar ngrêre jabit ne ba ngômã ar angij.

<sup>17</sup> Djãm ije ngômã me angijênh kadjy ne Kritu ijano ba tê? Kati. Kãj bê ije memã Kritu'ã ujarênh ny jarênh kadjy ne ijano ba tê. Me kum Metîndjwýnh kînh kêtja me ta krã mexja djãm me ta krã mexo ikrã mex ne ikabên mex ne ba ar amã arê? Kati. Me kum Metîndjwýnh kînh kêtja krã mexo ikrã mex kêt. Ba ren me krã mexo ikrã mex ne ren ar amã ikabên mex jarên ren arým o amibê Kritu'ã ikabênja kuno. Kritu pîte'ykam tyk'ã ikabên ja ne ba ren o kuno. Nhy m kam ren me arým Kritu mar kêt ne.

*Me ta krã mex'ã ujarênh.*

*Kô k 3.19*

<sup>18</sup> Nhy m be, kati. Kritu pîte'ykam tykbit ne ba kãj bê ar amã 'ã ajarê nhy m arým ar amã amirîtkumrêx. Nhy m kam me biknor tokry djãkam me biknor prãmja ikabên man amim,

—Kê. Djãm katât kute amikabên jadjwÿr got? Nãm krã punu, ane. Nhy m be, gwaj ba, Jeju kute gwaj bajo bakumrêxja gwaj amim,

—Mrãmri, Paur kute Kritu pîte'ykam tyk'ã ujarênhkumrêx. Nãm 'ã ajarê nhy m me tu amim Kritu markumrêx. Nhy m kam Metîndjwýnh arým 'ityxo me utàn ar meo bakumrêx, ane.

19 Amrêbê: Metîndjwýnh kute me bakukãmãremã arênh ne ja. Nãm memã kum,

“Me ta krã mex ne kute memã kabên mexja dja ba mebê kabêno akno. Nhyam kam me arým kabên kajgo me:xi.

Nhyam me ta amak mex ne kute prîne memã mýjja'ã karô mex ne kute mar ja dja ba mebê amak mexo akno nhyam me arým kabên kajgokumrêx.”

Nãm Metîndjwýnhã me bakukãmãremã ane nhyam me arým 'ã pi'ók no'ók ne. Nhyam kam me arým aben djô'ã arêno mō:n arêno mōr tãmtã arým 'yr o bôx. Tũ:mrãm me bakamingrãnyrekam Jeju Kritu arým pîte'y'ã wajêt ne kam ty. Ty nhyam Metîndjwýnh arým o gwaj bapytàn kam arým mebê amak mexo akno. Nhyam kam me arým kabên kajgo me:x ne.

20 Nhýnh ne me'ô ta krã mex? Nhýnh ne me kum Metîndjwýnh kînh kêtja ta krã mex? Kati. Nhýnh ne me'ô ta kute prîne me kukradjã mar? Kati. Nhýnh ne me'ô ta krã mex ne kute kabên mexo kute me apanh mar? Kati. Me kum Metîndjwýnh kînh kêtja ne me krã mex kêt. Me kabên kajgo me:xi.

21 Mýkam ne me kabên kajgo mexi? Bir, Metîndjwýnh ta kute katãt me'ã amikabên djirkumrêx ne amim,

—Djãm me kum ikînh kêtja ta kute imarmã? Djãm me ta krã mex ne kute imarmã? Arkati. Me kute kãj bê memã Kritu pîte'ykam tykja'ã ujarênh nhyam me kute me'ã, “Me krã punu”, anhýrja. Me kute anhýrkam gê inhô ãpênh ar kãj bê memã Kritu pîte'ykam tyk'ã ujarênhkumrêx. Nhyam kam me kwý kute tu amim Kritu markumrêx ba arým me utàn ar meo iba. Ja ne imã kînhkumrêx. Nãm ã Metîndjwýnh me'ã amim ane. Kute amim anhýrkam ne

me kabên kajgo me:xi. Me kum Metîndjwýnh kînh kêt ta krã mexja ne me kabên kajgo me:xi.

22 Be, mebê idjaer ne me ar imã, —Goja mýjja pumûnh kêt'ô nhípêx ba me omûn kam arým amim Kritu'ã akabên markumrêx, anhýro ba. Nhyam be, me bajtembê kregu ne me kute ar imã,

—Goja me krã mex o akrã mex ne akabên mex ne arým imã Kritu 'ã ajarê. Dja ba me aman kam arým amim Kritu'ã akabên markumrêx, anhýro ba. 23 Bar kãj bê memã kum,

—Metîndjwýnh ne Jeju'ã Bênjadjwýrbê kumkatibê Krituja mẽ nhyam arým pîte'y'ã wajêt ne ty, ane. Nhyam mebê idjaer arým kôt kum Jeju kurê kute mrãmri ne kên me par tok nhyam me rôrôk ne arým kum kurêja pyrãk. Nhyam be, me bajtem kwý ne me abenmã,

—Nãm ar ari kabên kwý jadju:w. Nãm ar krã punu, anhýro ba.

24 Nhyam be, bar katãt me kwýmã 'ã ajarê. Metîndjwýnh kute arým amiwýr me kwý 'wýr ne ar meo bajamã 'ã ajarê. Mebê idjaerja nãr me bajtemja bar katãt me jamã 'ã ajarê. Katãt Kritu pîte'ykam tyk'ã memã ajarê. Nhyam me abenmã kum,

—Djãm Metîndjwýnh 'irere:k got? 'Itýxo kute me kunĩ rer me:xi. Djãm Metîndjwýnh kute ari kabên jad-jwýr got? Metîndjwýnh kute no mexo, kabên mexo me kunĩ rer me:xi, anhýro ba.

25 Mýkam me ã abenmã anhýro ba? Bir, Metîndjwýnh kute krã mexo, 'itýxo kute me kunĩ rer mexkam. Nãm me kute Metîndjwýnh'ã amim, “Krã punure”, anhýr, me ta ne me krã punure. Nhyam be, Metîndjwýnhbit ne krã me:xkumrêx. Nãr, nãm me kute, “Irerekre”, anhýr, me ta ne me 'irerekre. Nhyam be, Metîndjwýnh 'itýxo kute me rer me:xi.



26 Aj, mÿj gêdja ga me kam amikadjy ama? Bir, mÿj ne ga me kam akute nhym Metîndjwÿnh arÿm amiwÿr me ajuw ne me ajo ba? Bir, djâm me akrâptî akrâ mexkam ne amiwÿr me ajuw ne me ajo ba? Kati. Djâm me akrâptî ajitÿx nhym kam arÿm amiwÿr me ajuw ne me ajo ba? Kati. Djâm me akrâptî arÿnh nhym kam arÿm amiwÿr me ajuw ne me ajo ba? Kati.

27 Nhym be, me kum Metîndjwÿnh kÿnh kêt kute me'ã, "Me krã punure", anhÿr Metîndjwÿnh arÿm amijo me we krã punure ja pytàn meo ba. Mÿj kadjy? Bir, dja meo ban arÿm meo me we krã mexjao apa. Me ta kute amijo krã mexjao apa nhym me arÿm pijàm ne. Me kum Metîndjwÿnh kÿnh kêtja kute me'ã, "Me rerekre", anhÿrja Metîndjwÿnh arÿm amijo me we rerekre ja pytàn meo ba. Mÿj kadjy? Bir, dja meo ban arÿm meo me we 'itÿxjao apa. Me ta kute amijo 'itÿxjao apa nhym me arÿm pijàm ne. 28 Me kum Metîndjwÿnh kÿnh kêtja kute me'ã,

—Me kajgo. Me kum me kÿnh kêtumrêx, anhÿro ba. Me kajgo ja Metîndjwÿnh arÿm amijo me utàn meo ba.

Mÿj kadjy? Bir, dja meo ban arÿm meo me rÿnho apa nhym me arÿm pijàm ne kajgo ne. 29 Dja meo ba nhym me kunî arÿm Metîndjwÿnhmã amijo ãmra kêt. 30 Nhym be, ar ga ne Metîndjwÿnh arÿm amijo ar apytàn Kritu Jeju kôt ar ajo ba. Ne arÿm gwaj bamã Kritu jano nhym bôx ne arÿm gwaj bamã katàt kabên jarênhkumrêx. Gwaj kam arÿm markumrêx ne kôt arÿm bakrã mexkumrêx. Nhym Metîndjwÿnh ajte Kritu kôt arÿm gwaj bamã axwe kêt jarê gwaj arÿm ta mexo bamex ne. Nhym ajte Krituo gwaj bajaxweo pân mex.

31 Amrêbê: me kute me bakukãmãremã arênh kôt ne ba ar amã arê. Nãm memã kum, "Djâm amijo adjãmra prãm? Kwârîk wânh amijo adjãmra kêt.

Dja ga Bênjadjwÿr djwÿnho amra." Nãm ã memã ane nhym me arÿm 'ã pi'òk no'òk ne. Kam, dja gwaj Jeju Kritubito amra. Tãm ne ja.

## 2

1 Akmere, àpnhîre ar, amrêbê ne ba ar awÿr bôx ne Metîndjwÿnh kukwakam ar amã kabên jarê. Djã nã bãm me kum Metîndjwÿnh kÿnh kêtja krã mexo ikrã mex ne arÿm mekôt prîne ikabên jarênh mex, prîne mekôt ar amã ikabên jarênh mex gar arÿm amã ikabên kÿnhkumrêx? Kati. Mÿkam? 2 Bir, ba ar awÿr ibôx kêttri amim,

—Dja ba arkam bôx ne Jeju Kritubit man arkum 'ã ajarê. Kritu pîte'y'ã jêt ne tyk'ã dja ba ajarê. Kwârîk wânh ba arkum atemã mÿjja'ò jarênh kêt. Nã bãm ã amim ane.

3 Ne kam ar awÿr bôx ne amikam irerekre ma. Ba irerekre man arÿm ar apymaje itertet kumex. 4 Djã nã bãm amim,

—Ba me krã mex o ikrã mex ne prîne arkum ikabên jarênh mex gê ar arÿm ikabên mex man kôt ar amijo ba, ane? Djã nã bãm amim anen arÿm ã ar amã arênhho ane? Kati. Metîndjwÿnh Karô ne ijo ba gar arÿm ipumû. Ba kam arÿm ar amã ikabên jarê gar arÿm ama. 5 Mÿj kadjy ne ba ã ar amã ikabên jarênhho ane? Bir, ar aje me ta krã mex mar kêt kadjy. Nhym be, Metîndjwÿnh ne 'itÿ:x. Ar aje tu amim Metîndjwÿnh markumrêx kadjy ne ba ã ar amã ikabên jarênhho ane.

*Me kute Metîndjwÿnh Karô mar-bit ne me krã mex.*

*Mat 7.6; Dju r 14.22*

6 Be, djã nã bãm ar ikrã punun kôt ikabêndjwÿ punu? Kati, nã bãm ar ikrã mex ne kôt ikabên mex.

Me amak mexjamã ne bar prïne memã arê. Nhyr be, me kum Metĩndjwýnh kĩnh kêtja kabên kôt ne bar ije ikabên jadjwýr kêt. Nãr, me rũnh kwý kum Metĩndjwýnh kĩnh kêtja kabênkôt ne bar ije ikabên jadjwýr kêt. Me ja dja me ĩ kêt kumrêx.

<sup>7</sup> Nhyr be, Metĩndjwýnh kute katãt kabên jadjwýrkumrêx. Kabên ja ne bar ije memã arênh. Mýjja kunĩ kêttri ne Metĩndjwýnh kute tu amim kabên'ã karôkumrêx. Kute prïne amimexo gwaj bajo mex kadjy amim kabên'ã karô. Ne kam kute me bakukãmãremã arênh kêt. Ne kam ajbir ar imã kabên jarê bar arým jakam memã arênh o iba.

<sup>8</sup> Djãm pykakam me rũnh'ô kute kabênja mar? Kati. Ne ren me rũnh kuman ren pĩte'y'ã Jeju nhôr kêt. Bênjadjwýr djwýnh Jeju ne prïne mex ne umakumrêx. Ren me kute pĩte'y'ã nhôr kêt kumrêx. <sup>9</sup> Mrãmri me'ô ta kute kabênja mar kêt kumrêx. Ije ar amã arênh kôt ne me amrêbê: me bakukãmãremã arê. Me memã kum,

“Metĩndjwýnh ne arým me kadjy amim mýjja mex'ã karô.

Djãm me'ô ta kute omũnh? Kati. Me'ô ta kute omũnh kêt.

Djãm me'ô ta kute mar? Kati. Me'ô ta kute mar kêt.

Djãm pykakam me'ô ta kute amim 'ã karô? Kati. Me'ô ta kute amim 'ã karô kêt.

Me kum abêja kadjy ne Metĩndjwýnh amim mýjja mex'ã karôn memã kudji. Nhyr kam me'ô ta kute mar kêt kumrêx.” Nãm me ã me bakukãmãremã ane nhyr arým 'ã pi'ôk no'ôk ne.

<sup>10</sup> Ga, me ta te kute marmãja pumũ. Nhyr be, Metĩndjwýnh ta ne arým gwaj bamã o amirĩtkumrêx. Karôo kute gwaj bamã kabêno amirĩtkumrêx. Karô kute prïne mýjja mar. Metĩndjwýnh kute ôkre kadjwýnhbê amim mýjja'ã karôja kunĩ ne Karô kute prïne mar mex. <sup>11</sup> Djãm gwaj babu'ã

me'ô kute gwaj bakadjwýnhbê bakabên mar? Kati. Gwaj bajbit ne gwaj baje banhôkre kadjwýnhbê bakabên mar. Metĩndjwýnhdjwý ôkre kadjwýnhbê kabênja me'ô kute mar kêt kumrêx. Metĩndjwýnh Karôbit arým kute mar.

<sup>12</sup> Djãm me kum kĩnh kêtja karô ne Metĩndjwýnh gwaj bamã ano nhyr gwaj bajo ba? Kati. Ta Karô ne gwaj bamã ano. Gwaj baje bakĩnh djã mar kadjy ne gwaj bamã ano. Metĩndjwýnh ta gwaj bamã apýnh bakĩnh djã ngã, kajgo gwaj bamã kungã. Gwaj ba ne baje bakĩnh djãjo pãnh kêt. <sup>13</sup> Bar memã gwaj bakĩnh djã'ã idjujarênh ar iba. Djãm me kum Metĩndjwýnh kĩnh kêt ja ne ar imã 'ã ajarê, ta krã mexkôt ar imã 'ã ajarê? Kati. Metĩndjwýnh Karô ne ar imã 'ã ajarê. 'ã ajarê bar ije mar ne arým memã 'ã idjujarênh ar iba. Karô kute katãt kabên jadjwýrkumrêx ar ije mar ne Karô kabên kôt memã 'ã ajarê.

<sup>14</sup> Nhyr be, me ja, Metĩndjwýnh Karô kute meo ba kêtja djãm me kute amim Metĩndjwýnh Karô kabên mar prãm? Kati. Mýkam? Bir, nãm me aprýn amim,

—Djãm kute amikabên jadjwýr mex got? Nãm krã punu, ane. Ne kam amim,

—Ba gêt mekôt kabên ma, ane. Ne kam 'ýr tẽn gwaj bakôt maro krĩn mar kajgo. Mar kajgon arým amim,

—Je, mýj'ã ne kabên jarê? ane. Ne te 'ã amijakren te kute marmã.

<sup>15</sup> Nhyr be, gwaj ba ne gwaj baje Metĩndjwýnh kabên kunĩ mar kadjy bamex. Gwaj baje Metĩndjwýnh Karô markôt kadjy bamex. Nhyr be, me kute Karô mar kêtja ne me te kute Metĩndjwýnh kabên marmã. Ne kute gwaj badjwý gwaj bamar kêt.

<sup>16</sup> Ikabênja kôt ne me amrêbê: me bakukãmãremã kum,

“Bênjadjwÿr djwÿnh kute mÿjja'ã amim karô djâm me'ô kute mar? Kati.

Kam, djâm me'ô kute Metîndjwÿnhmã mÿjja'ã karômã ne kum, 'Gêdja ga ã ane'? ane. Arkati. Metîndjwÿnh ajbit ne kute mÿjja kunî mar.”

Nãm me ã me bakukãmãremã ane. Nhyim be, gwaj bajbit ne gwaj Karô kôt Kritu djumaro badjumar ne arÿm baje mar. Kute amikabên'ã amim karôja gwaj arÿm baje mar. Tãm ne ja.

### 3

*Me kute me prÿre pyrãk nhyim kute memã arênh.*

*Kô k 14.20; Ep 4.14; Idja 5.11*

<sup>1</sup> Akmere, àpnhÿre ar, djâm ije ar amã ikabên kunî jarênhmã? Djâm arÿm ar ajamak mex got ije ar amã ikabên kunî jarênhmã? Kati. Ar aje Metîndjwÿnh Karô mar kêt rã'ã. Me kum Metîndjwÿnh kÿnh kêt kukràdjaja ne ar aje mar tÿx rã'ã. Ar aje me prÿre bixadjwÿr nyre pyrãk.

<sup>2</sup> Ga, me prÿre bixadjwÿr nyrekam kute mÿjja tÿx kur kêtja pumû. Ar gadjwÿ Metîndjwÿnh kabên kwÿbit ne ba ar amã arê. Amirÿtbit ne ba ar amã arê. Ije ar amã kunî jarênh kêt. Metîndjwÿnh kabên kwÿ ne mebê bipdjur ne mebê tÿx. Me kute Metîndjwÿnh Karô marjabit ne kute kabên bipdjur mar. Djâm ije ar amã kabên bipdjur jarênh prãm? Kati. Amrêbê ne ar aje Karô mar mex kêt. Gar kam ajte jakam aje Karô mar mex kêt rã'ã. Ba kam te ije ar amã Metîndjwÿnh kabên kunî jarênh prãmje.

<sup>3</sup> Ar aje amidjwÿnhbito kÿnh kadjy amimar tÿx rã'ã ne. Ne kam te aje me urãk prãmje angyrÿk ne ari akabêno aben japanho aku'ê. Ne kam arÿm apÿnh mÿj xê jakôt aku'ê ne arÿm abenã akabê:ne. Djâm kam ar aje me kum Metîndjwÿnh kÿnh

kêtja kukràdjaja mar kêt got? Djâm mekôt ar aje amijo aba kêt got? Mrãmri me kum Metîndjwÿnh kÿnh kêt kôtbit ar aje amijo abakumrêx. <sup>4</sup> Ar akwÿ ar amã me kwÿ kÿnh kêt ne memã kum,

—Ba ne ba Paur kôt ar amijo iba, anhÿro aba. Nhyim ar akwÿ ajte tãm ne memã kum,

—Ba ne ba Apôr kôt ar amijo iba, anhÿro aba. Gar kam aktã ar amã aben kÿnh kêt aban mÿj xêja kôt aku'ên ã aben bê akêxo ane. Djâm me kum Metîndjwÿnh kÿnh kêtja kôt adjumar kêt got? Ar aje me kum Metîndjwÿnh kÿnh kêtja kôt adjumarkumrêx.

<sup>5</sup> Djâm Apôrmê ar irax got gar ar ikôt aben bê abikjêr prãm? Kati. Ar irax kêt ne ingriire ne ibê Metîndjwÿnh nhô àpênhbit. Ar ikabên kôt ne gar tu amim Jeju markumrêx. Kute ar imã apÿnh ar idjapênh djã'ã karô kôt ne bar kum idjapênho iba.

<sup>6</sup> Bar ije puro djuw mex djwÿnh pyrãk. Ba ne ba ije pur kre djwÿnh pyrãk. Nhyim Apôr kute ngo djwÿnh pyrãk. Nhyim be, Metîndjwÿnhbê djwÿ kunimã rÿnh jangjênh djwÿnh. Ba ikumrêx ne ba ar amã Jeju'ã ajarê gar arÿm 'ÿr amijo akêx ne kôt ar amijo aba. Nhyim kam Apôr bôx ne ar amã Metîndjwÿnh kabên ra:x ne arê gar ama. Nhyim be, Metîndjwÿnhbit ne ar amã ajamak bô gar arÿm amû maro amikamê. <sup>7</sup> Kam ne ba ikajgokumrêx. Nhyim Apôrdjwÿ kajgokumrêx. Nhyim be, Metîndjwÿnhbit ne raxkumrêx. Kute memã amak bônkhkam ne raxkumrêx.

<sup>8</sup> Djwÿ abatãnhmã ne kre djwÿnh pur kre nhyim ajte ngo djwÿnh pur ngo. Ar badjwÿ ne ar aje Jeju mar raxmã bar ar amã arê. Ar ije ar amã arênh mex kôt dja Metîndjwÿnh ar inhÿ pÿnhkôt ar imã o pãnh ne. <sup>9</sup> Ar iro'ã ne bar Metîndjwÿnhmã idjapênh ar iba. Ar

ga ne gar aje Metîndjwýnh nhõ pur pyrâk. Ar aje Metîndjwýnh mar ne kôt amijo aba kadjy ne bar ar akam apê kute mrâmri ne me kute purkam âpênh pyrâk. Ne ar aje mrâmri ne kute Metîndjwýnh nhõ kikre pyrâk. Kute kên krâptîo kikre pyrâk. Ar akrâptî nhym Metîndjwýnh arým amijo ar apytân ar ajo kra.

*Kikre'ã memã ujarênh.*

*A Kô 6.16; Ep 2.20; Ped k 2.5*

<sup>10</sup> Metîndjwýnh tu kum ikaprikam ne ba prîne ar amã Metîndjwýnh kukrâdjâ jarênh mex. Kute mrâmri ne me kute prîne kikre nhîpêx mexja pyrâk ne ba ar amã kukrâdjâ jarênh mex. Ba ne ba ikumrêx ar amã kukrâdjâ jarê gar ama. Kute mrâmri ne me kute kikremã pyka nhîpônho tēm, katât pyka nhîpônho tēm ne kam kam kên kapîn ne kam iby pyka tÿx kapînja pyrâk ne ba ikumrêx ar amã arênh mex. Me'õ ne arým ar awÿr bõx ne ajte ar amã kukrâdjâ 'õdjwÿ jarê. Kute mrâmri ne me'õdjwÿ kute pyka kadjwýnhbê kên ja nhîby kikre pyrâk ne me'õ ar amã kukrâdjâ 'õdjwÿ jarê. Ije ar amã kukrâdjâ jarênh nhîjukri ar amã arê. Gora gê ikõt bõxja ikudjwa ajte Metîndjwýnh kukrâdjâ jarênh 'ãno djan prîne katât ar amã arênh mex. Kute mrâmri ne me kute kikre 'ãno ãm ne prîne katât ipêx mexja pyrâk gora gê me katât ar amã arênh mex.

<sup>11</sup> Djãm me kute pyka kadjwýnhbê kên ngrânh ne kupa'ã kute ajte 'õdjwÿ nhîpêxkam mex got? Kati. Kritudjwÿ. Djãm me'õ kute katât memã Kritis'ã ujarênh nhym ajte me'õdjwÿ bõx ne kute memã kupa'ã 'ã ujarênhkam mex got?

<sup>12</sup> Ë, gop ajte kikre ma. Djãm me kute mÿjja tÿxo, mÿjja pãnh raxo kikrekam punu got? Me kute kên karÿro ipêx nâr kute kryt jakao ipêx nâr kute kên pãnh rax 'õdjwÿo ipêx. Tãm dja punu kadjy kêt

ne tûmràm mex rã'ã ne. Me'õ kute ar amã Metîndjwýnh kabên jarênhjadjwÿ godja ar amã katât Metîndjwýnh kabênkumrêx jarê gar ama. Nhym kam kute mÿjja pãnh raxo kikre pyrâk. Gar kam arým Metîndjwýnhmã amex rã'ã ne tu amim Jeju markumrêx rã'ã ne.

Ë, gop ajte kikre ma. Djãm me kute mÿjja rerekre, mÿjja pãnh kryo kikrekam mex got? Me kute pîo ipêx nâr kute bõo ipêx nâr kute bõo ipêx. Tãm dja tēmbê punu. Me'õ kute ar amã Metîndjwýnh kabên jarênhjadjwÿ godja bõx ne Metîndjwýnh kabên kupa'ã ar amã arê, Metîndjwýnh kabên kêt jarê, ta kabên ar amã arê gar ama. Nhym kam kute mÿjja rerekreo kikre nhîpêx pyrâk. Dja ar amã arê gar ama. Ne kam arým Metîndjwýnhmã amex kêt ne tēmbê apunu ne tu amim Jeju markumrêx kêt.

<sup>13</sup> Dja Jeju arým bõx 'ÿr nhym arým apÿnh me umar punu djâri ban bõx. Kute mrâmri ne kuwy kikre'ÿr bõx pyrâk. Nhym kam me arým me omü. Me'õ kute memã kabên jarênh mex kôt dja me arým omü. Nâr me'õ kute memã kabên jarênh punu kôt dja me arým omü. Godja me'õ arým katât memã kabên jarênhkumrêx jabej nhym te me umar punu djâ me'ÿr bõx nhym me mex rã'ã ne. Dja me kute mrâmri ne kuwy kikre'ÿr bõx ne xêt kêt ne umar mex mex ne ku'ê pyrâk. Nâr, godja me'õ kupa'ã memã ta kabên jarênh jabej. Nhym kam me umar punu djâ me'ÿr bõx. Nhym kam me arým mex kêt ne Jeju bê amijo akêx. Dja me kute mrâmri ne kuwy kikre'ÿr bõx nhym pök ne xêt pyrâk.

<sup>14</sup> Godja me'õ katât memã Metîndjwýnh kabên jarênhkumrêx jabej nhym me arým Jeju mar tÿx rã'ã. Nhym kam Metîndjwýnh arým me'õjamã pãnh nextire ngã.

<sup>15</sup> Nâr godja me'õ memã arênh

punu jabej nhym me arÿm Jeju bê amijo akêx. Nhym kam me'ôja arÿm umar punure. Kute pân'h'ô byr kêt kam dja umar punure. Nhym be, dja Metîndjwÿnh arÿm me'ôja pytà. Kute mrâmri ne me kute kikre pôk katikôt kute me pa 'amÿnh ne meo kator pyrâk.

<sup>16</sup> Metîndjwÿnh Karô ar akam ÿr kam ar aje mrâmri ne Metîndjwÿnh nhô kikreti pyrâk. Djâm ar aje ja mar kêt? <sup>17</sup> Metîndjwÿnh nhô kikreti ne ta mexo mex ne uma:. Gêdja me'ô ô kikretio bikênh jabej nhym kam pân'h o bikênh rax ne. Ar gadjwÿ ar aje Jeju markam aje mrâmri ne ô kikreti pyrâk ne ta mexo amex. Gêdja me'ô ar abê Metîndjwÿnh kurên kubê ar ajo akêx jabej nhym kam pân'h o bikênh rax ne.

<sup>18</sup> Gar ajô we aje prîne me kukràdjâ mar. We aje me kum Metîndjwÿnh kÿnh kêt kukràdjâja mar ne mekôt ar amijo aba. Ba amã arê ga ama. Kwârîk wân'h amim ajêx ne aminoo abiknor kêt ne amim,

—Ba ne ba mekôt ikrã mexkumrêx, anhÿr kêt. Djâm mrâmri akrã mexkumrêx? Kati. Ate dja ga amim, “Ikrã punu”, ane. Mÿj kadjy dja ga ã amim ane? Bir, dja ga amim anen kôt amim Metîndjwÿnh man arÿm kôt akrã mexkumrêx.

<sup>19</sup> Me kum Metîndjwÿnh kÿnh kêtja kute amikukràdjâ punu kôt amijo ban kute amim, “Ba ikrã mexkumrêx”, anhÿrja, me jamã ne Metîndjwÿnh memã krã punu jarê. Ije ar amã arênh ja ne me amrêbê: me bakukâmâremã arên memã kum,

“Ga, me kute mry kukràdjâ mar kute kum ka'ên kam kute kum ô mry janhôrja pumû. Nhym mry ta amikukràdjâ kôt amijo ba tâmtã ô mry'ÿr bôx ne ta arÿm amipynê.

Nhym me kum Metîndjwÿnh kÿnh kêt djwÿ we ta krã mexkam dja me amikukràdjâ punu kôt amijo môr tâmtã arÿm ta amijo bikênh mex ne.”

Nãm me ã me bakukâmâremã ane nhym me arÿm 'ã pi'ôk no'ôk ne.

<sup>20</sup> Nhym me ajte kam memã kum, “We me krã mex. Me kum Metîndjwÿnh kÿnh kêtja we me krã mexja. Me ta umar kôt ne me amim 'ã karô.

Nhym Bênjadjwÿr djwÿnh arÿm me kabên man kam arÿm amim, ‘Me kabên mrâmri kajgokumrêx.’ Nãm ã amim ane.”

Nãm me ã me bakukâmâremã ane nhym me arÿm 'ã pi'ôk no'ôk ne.

<sup>21</sup> Kam, djâm ar aje mekôt we me krã mexjao adjâmramã? Kati. Kwârîk wân'h mekôt we me krã mexjao adjâmra kêt. Mÿkam? Bir, mÿjja kunî ne ar anhô mÿjjakam. <sup>22-23</sup> Metîndjwÿnh ne Krituo Kra nhym arÿm ar ajo kamy. Ar aje tu amim markumrêx kam arÿm ar ajo kamy. Nhym kam Metîndjwÿnh djwÿ arÿm ar ajo kran kam arÿm ar amã mÿjja kunî ngã. Ne kam ba arÿm ibê ar anhô àpênh. Nâr, kam Apôr arÿm kubê ar anhô àpênh. Nâr, kam Pedru arÿm kubê ar anhô àpênh. Kritu kute ar ajo krakam pykakam mÿjja kunî ne ar anhô mÿjja. Gar arek mekôt atÿn ne ar aba nâr ty. Te tyn arÿm Metîndjwÿnh kôt atÿn ne ar aba rã'ã: rã'ã. Kam mÿjja kunî ne ar anhô mÿjja. Ajbir jakam mÿjja ne ar anhô mÿjja. Nâr amrê gwaj bawÿr mÿjja apôxdjwÿ ne ar anhô mÿjja. Kritu kute ar amã mÿjja kunîo bakam mÿjja kunî ne ar anhô mÿjja.

## 4

*Paur kute Kritumã àpênh'ã memã amijarênh.*

*Rô 14.4*

<sup>1</sup> Kam gê me ar ijã abenmã kum, —Ar wãbê ne Kritu nhô àpênh ne ar gwaj bamã Metîndjwÿnh kabên

jarênho ba. Amrêbê memã kabên jarênh kêtja ne ar arým jakam gwaj bamã arênho ba, ane. <sup>2</sup> Bir, mýj dja memã kabên jarênh djwýnh memã arênh on? Bir, dja memã arênh katàt. Metíndjwýnh kute kum arênh kôt dja memã arênh katàt.

<sup>3</sup> Nhy m be, ba. Ar ga ar aje te idjápênh jaxwemã akator prãmkam djãm kam itín prãmmã? Kati. Djãm ije idjápênh jaxwe'omã ikatorn mar? Kati. Ije amikam ijaxwe'õ mar kêt. <sup>4</sup> Ne kam djãm ije amikam ijaxwe'õ mar kêt kam ije amim, "Ijaxwe kêt kumrêx", anhÿrmã? Kati. Bënjadjwýr djwýnh ne kute imar. Ta ne kute idjápênh jaxwe'õ pumũnh jabej ne kute imar.

<sup>5</sup> Kam, kwãrîk wãnh me'õmã axwe jarênh kêt. Nâr, kum axwe kêt jarênh kêt. Gwaj Bënjadjwýr djwýnh nhõ akatikam ama. Ta dja bõx ne me mex nâr me axweo amirît ne mýjja kunõ amirît. Ga, me kute akamãt kô tykkam mýjjao bipdjurja pumũ. Nhy m a'ukam amirît nhy m me kunĩ arým omũ. Bënjadjwýr djwýnhdjwý dja mýjja kunõ amirît, me kute mýjja pudjurja kunõ amirît gê me kunĩ kuma. Me kute umar djã kadjwýnhbê amim mýjja'ã karõjao amirît gê me kunĩ kuma. Kam gédja me ï pÿnhkôt me mex jabej memã mex jarê. Nâr, me axwe jabej memã axwe jarê.

<sup>6</sup> Akmere, aþnhîre ar, ba ar amã, —Kwãrîk wãnh me'õ'ã, "Axwe" nâr "Mexkumrêx", anhÿro aba kêt. Ja ne ba aje Apõrmê ar amijã arê. Ar akadjy ne bar amijã arê. Dja gar kam ar iman arým ar ijõo adjãmra kêt. Ne kam arým Metíndjwýnh kabênbit mar rax. Kute me'ã kabên jarênh jabit mar rax. Ne kam arým me'õo adjãmran ate amũ amã me'õo kurê kadjy kêt.

<sup>7</sup> Mýj me'õ ne ar amã arê gar amim,

—Ba ne ba imexkumrêx, anhÿro aba? Nhÿnh ne ar amex'õja?

Nhÿnh ne ar anhõ mýjja'õja? Kati. Metíndjwýnh ta ne ar amã kungã gar kam amijo amran amim,

—Djãm me'õ ne imã kungã? Kati. Ba ne ba imex. Ba ne ba inhõ mýjja, anhÿro aba.

<sup>8</sup> Nã gã m ar aje mrãmri ne kute me ajne pyrãk. Nã gã m ar amim,

—Arým jakam imexkumrêx. Ije imexo amũ amikamênh prãm kêt. Arým jakam iraxkumrêx ne ije mrãmri ne ibënjadjwýr rax pyrãk. Arým ne ba amipãnh Paur ar kumê. Nã gã m ar ã amim anhÿro aba. Djãm mrãmri ne akabênwã? Kati. Ga ren ar mrãmri araxkumrêx ba ren ikĩnhkumrêx. Gar ren kam amipãnh ar ijõ mênh kêt kumrêx. Ar ba ne bar ren ar aro'ã ren irax.

<sup>9</sup> Nhy m be, kati. Kritu kute ar ijanorja djãm ar ba ne bar irax? Kati. Ga, me kute me par kadjy kute me ipõkri me umjýr nhy m me kunĩ kute me omũnhja pumũ. Ar badjwý. Bar memã Metíndjwýnh kabên jarênho iban kam memãbit ar ije mýjja pyrãk. Nhy m kam me kunĩ 'ã ar ipumũ. Nhy m me kute ar ibin prãm. Pykakam me ja 'ã ar ipumũ. Nhy m Metíndjwýnh kadjy mrãnh djwýnhdjwý 'ã ar ipumũ.

<sup>10</sup> Bar Kritumã apê nhy m me arým ar ijã, "Nãm ar krã punu", ane. Nhy m be, ar ga ne gar amim,

—Ba tu amim Kritu markumrêx ne ikrã mexkumrêx, anhÿro aba. Ar ijã ne me, "Ar rerekre", ane. Nhy m be, ar ga ne gar amim,

—Ba ne ba itý:xkumrêx, anhÿro aba. Nhy m be, ar ijã ne me, "Ar ngrire", ane.

<sup>11</sup> Apÿnh myt djãri ne bar prãm kam, kôrkam ar iba. Ne ajte inhõ kubêkã punuren iba. Nhy m me ajte ar ikam àkrê kumex ne ar ititik ne. Bar ajte arek ar inhÿr djã kêt ne ar ibaobit iba. <sup>12</sup> Bar ajte inhikrao idjápênh tÿx. Me te ar imã,

—Gora gê Metíndjwýnh ajo ajkê, ane bar mã memã kum,

—Gê Metîndjwÿnh ajo djuw mex, ane. Me te ar ijo ajkê bar arek memâ dja. <sup>13</sup> Me te mâ memâ ar ijâ kabên punu bar mâ memâ iprîren nêje me kukrà. Me kubê ar ikînh no kati. Kute mrâmri ne mÿjja arÿm punurekam me kubê kînh no kati pyrâk. Ga, me kute mÿjja kro janhînh ne mÿm rênhja pumû. Nâm me â ar ijo ane. Akati jakam me kubê ar ikînh no kati râ'â. Be, djâm kam ar irax?

<sup>14</sup> Djâm ije ar amâ apijâm jadjâr kadjy ne ba â ar amâ amijarênho ane? Kati. Nâ bâm ar abê akabên kajgo pymao dja. Me kum kra jabêja pyrâk ne ba imâ ar ajabê. Imâ ar ajabêkam ne ba ar abê akabên kajgo pymao dja.

<sup>15</sup> Ga, me bâm kute kra jadjwÿr nhym apôxja pumû. Badjwÿ ne ba ar amâ Kritu Jeju jarê gar ikabênkôt tu amim markumrêx ne kôt ar amijo aba. Ba kam ba ije ar abâm pyrâk. Gar Kritu man kôt ar amijo aba nhym kam me krâptî aben totokmâ ar awÿr bôx. Ar awÿr bôx ne ar amâ arê gar arÿm me krâptî kabên ma. Nhym be, djâm me kute ipyrâk? Kati. Djâm me kumrêx ar amâ arê? Kati. Ba ikumrêx ne ba ar amâ arê. Kam me kute ar abâm pyrâk kêt. Ba ikumrêx ne ba ar amâ Kritu'â ujarênh ny jarê gar ikôt arÿm tu amim markumrêx. <sup>16</sup> Kam ne ba arÿm ar amâ 'â karô. Dja gar ijâ amijakren ikôt ar amijo aba.

<sup>17</sup> Ar aje ijâ amijakren mâ ikôt amijo abamâ ne ba arÿm ar amâ Ximoxi jano nhym ar awÿr tê. Imâ ikra Ximoxi jabê:. Ba ikumrêx ne ba kum Bênjadjwÿr djwÿnh'â ajarê nhym arÿm tu amim markumrêx ne arÿm katât kabên man kôt ar amijo ba. Ba kam arÿm o ikra. Nâ bâm katât Kritu markumrêx ne kabên kôt ar amijo iba. Me kute katât Kritu mar ne kabên kôt amijo bamâ ne ba memâ arênho iba. Me kute amim Jeju mar ne kôt ar aben pydjio baja kunîmâ ne ba memâ

arênho iba. Tâm dja Ximoxi ar amâ arê gar ajte ama. Dja gar kam ikudjwa katât Kritu markumrêx ne kabên kôt ar amijo aba.

<sup>18</sup> Be, kute ar awÿr ibôx kêt pyrâk gar akwÿ amijo adjâmra ar aba. <sup>19</sup> Bênjadjwÿr djwÿnh mrâmri ar awÿr itêm'â kute amim karô jabej dja ba amikrà kêt ne ar awÿr tê. Ar awÿr tèn ar awÿr bôx ne me kute amibên prâmja kabên kôt me kuma. Djâm me kabênjabit dja ba kuma? Kati. Dja ba mrâmri me âpênh tÿxkumrêx jabej memâ ikato. Djâm mrâmri ne we Metîndjwÿnh me wâmâ tÿx jadjâ? Kon. Dja ba bôx ne goja me omû.

<sup>20</sup> Metîndjwÿnh kute meo bakam djâm me kabênbit? Kati. Mrâmri kute meo bakumrêxkam kute memâ tÿx jadjardjwÿ. <sup>21</sup> Mÿj dja ba ar awÿr ibôxkam gar amâ kînh? Ga, me kute me âbêr djâo me kaprêprêk nhym me tokryja pumû. Me kute memâ bèn tÿxkamdjwÿ me tokry. Djâm ba ar awÿr ibôx ne ar amâ ibên tÿxmâ gar atokrymâ? Nâr ar awÿr ibôx ne imâ ar ajabêkam ije ibên prîo ar amâ ikabên. Djâm tâm ne gar amâ kînh?

## 5

*Me kute bôm me'ô jaxwe mênh'â memâ karô.*

<sup>1</sup> Me ar akurûm iwÿr tèn bôx ne imâ ar akam me'ô jarê. Ne imâ,

—Me'ô ne bâmbe prô pytàn o ikwâ. Nâm me â imâ ar akam me'ô jarênho ane ba kuman arÿm ar amâ arên ajte ar amâ me'ôja axwe jarê. Me kute Jeju mar kêt'ô kute bâmbe prô pytâr kêt. Wâkambit we me'ô kute Jeju mar arÿm bâmbe prô pytâ.

<sup>2</sup> Gar kam apijâm kêt. Me'ôja bâmbe prô pytâ gar mÿjja 'ô jarênh kêt ne ate ar akrân arÿm amijo adjâmrabit. Ne ga ren ar amikam akapri:ren ren aminêje bôm me'ôja mē gê ar akôt krî kêt.

<sup>3</sup> Mrâmri ne ba jakam idjâmkam ar amar 'âno djan arÿm mrâmri

me'ô jaxwe wã'ã ikabên djirkumrêx. <sup>4</sup> Dja gar Bênjadjwÿr djwÿnhbê Jeju Kritu kute gwaj bamã arênh kôt me'ô'ã akuprô. Kute bãmbê prô pytarja'ã akuprôn amim kukjan kam kum axwe pãnh jarê. Dja ba ar akàxã ar amaro nhÿn arÿm ar akôt ikabên dji. Bênjadjwÿr djwÿnhbê Jeju Kritu ne gwaj bajo ban arÿm àpênh tÿx. Kam dja gar katàt me'ôja'ã ar akabên djirkumrêx ba arÿm ar akôt ikabên dji. <sup>5</sup> Axwekam 'ã ar akabên djirkumrêx ne on Xatanajmã kanga gê ar o ban arÿm o ajkê. Dja o ajkê nhym arÿm ty. Nhym kam Jeju arÿm amikôt karô dja. Ô akatikam dja Bênjadjwÿr djwÿnhbê Jeju Kritu bôx ne arÿm amikôt karô dja nhym arÿm biknor kêt.

<sup>6</sup> Gar ate akrân amijo adjàmrakam mex kêtumrêx. Ga, me kute djwÿ nhigot djà ngrire djwÿkam rênhkam arÿm djwÿ kunÿ'ÿr bôx nhym igotja pumû. Me'ô jaxwejadwÿ. Dja gar ate akrã nhym me'ô amijo têm tãmtã gar akrãptÿ arÿm amã axwe kÿnh ne kôt ajaxwe.

<sup>7</sup> Ga, mebê idjaer kukràdjã kôt ne me kute djwÿ nhigot djà tûm kunÿ kapÿnja pumû. Nhym kam arÿm djwÿ nykam igot djà kêt. Dja gar aminêje me'ô jaxwe jano gê mã tê gar kam arÿm ajaxwe kêt. Ga, me kute me irôbê mrãnh nhô akatikam me axwe pãnh mrykÿ'átomtÿ parja pumû. Kritu ne ã anen arÿm ta gwaj bajaxwe pãnh ty. Nhym kam Metÿndjwÿnh arÿm gwaj bamã axwe kêt jarê gwaj arÿm kum bamex.

<sup>8</sup> Ga, Metÿndjwÿnh me irôbê mrãnh nhô akatikam me kute katàt Metÿndjwÿnh mar kadjy kute djwÿponhbit kurja pumû. Kritu gwaj bajaxwe pãnh tykkam gwaj badjwÿ dja gwaj katàt Metÿndjwÿnh maro baba. Ga, me kute djwÿ nhigot djà tûm kur kêtja pumû.

Gwaj badjwÿ dja gwaj bajaxwe tûm kunÿkangan bamã aben kurêja kangan arÿm katàt Metÿndjwÿnh maro baba. Me kute djwÿkam djwÿ nhigot djà kêtjabit kur, kute djwÿponhbit kur. Gwaj badjwÿ dja gwaj bajêx kêtumrêx ne bak-abênkumrêx ne katàt Metÿndjwÿnh maro baba.

*Djãm me axwemê ro'ã me ar bamã?*

*A Tex 3.6*

<sup>9</sup> Amrêbê ne ba ar amã pi'ók no'ók ne ar amã,

—Me mjên djwÿnh kupa'ã nàr prô djwÿnh kupa'ã kurê ba kwãrik wãnh ro'ã ar aba kêt, ane. <sup>10</sup> Djãm me kum Metÿndjwÿnh kÿnh kêtja'ã ne ba ar amã ane? Djãm ar aje me kum Metÿndjwÿnh kÿnh kêtme ro'ã aba kêtme? Kati. Pyka kunÿkôt me kum Metÿndjwÿnh kÿnh kêtja krãptÿ gwaj te memã bakãxmã. Me mjên djwÿnh kupa'ã nàr prô djwÿnh kupa'ã kurê baja, me kute amim mÿjjao atom rÿnh prã:mja, me kute me noo biknor ne kute mebê mÿjjao àkÿnh prãmja, me kute mÿjjao metÿndjwÿnh karô nhipêxmã amÿjarênh prãmja. Pyka kunÿkôt me axweja krãptÿ gwaj te memã bakãxmã.

<sup>11</sup> Nhym be, me'ô ta kute amijo Jeju mar, ta kute amijo gwaj bakamy'ô. Dja kum axwe kÿnh rã'ã djãm ro'ã ar abamã? Kati. Me ja'ã ne ba ar amã,

—Kwãrik wãnh me ro'ã ar aba kêt, ane. Godja me'ô mjên djwÿnh kupa'ã nàr prô djwÿnh kupa'ã kurê ba prãm nàr amim mÿjja rÿnho atom prãm nàr mÿjjao metÿndjwÿnh karô nhipêxmã amÿjarênh prãm nàr kute mebê me kurê prãm nàr kad-jwati kangôkam\* bibãnh prãm nàr kute me noo biknorn mebê mÿjjao àkÿnh prãm godja me'ô ta kute amijo Jeju mar ne ã axwe prãm rã'ao ane kwãrik wãnh ro'ã aba

\* 5:11 Mÿjja me kute o kôm ne kôt bibãnh kunÿja, kadjwati kangômê uba kangômê, mÿjja kangô kunÿ ne me kum kadjwati kangô jarê.



kêt. Kwârîk wānh ro'ā anhō kwÿ krëndjwÿ kêt.

<sup>12-13</sup> Me kum Metîndjwÿnh Kînh kêtja djâm on gwaj baje memã axwe pānh jarēho babamã? Kati. Metîndjwÿnh ta dja me kum Kînh kêtjamã axwe pānh jarē. Nhyim be, gwaj ba baje amim Jeju mar bajaxwe jabej baje abenmã axwe pānh jarēho babamã. Kam, ba ar amã arê. Ar akam me'ô jaxwe ja dja gar kum axwe pānh jarēnhkumrêx ne arÿm aminêje bôm amê gê ar aro'ā bikprōnh kêt. Tām ne ja.

## 6

*Me kute memã axwe pānh jarēnh.*

<sup>1</sup> Be, jakam ije ar amã mÿjja 'ôdjwÿ jarēnhmã. Be, ar akam me kute Jeju mar'ô ajmã ajon axwe. Axwe gar arÿm pa 'amÿn tu apijâm kêt ne me kute Jeju mar kêt'ÿr o mrã. Kute kukjêr ne kum axwe pānh jarēnhmã ÿr o mrã. Mÿkam ne gar kute amim Jeju mar'ô'ÿr o amrãnh kêt?

<sup>2</sup> Be, dja gu me baje amim Jeju mar ï pykakam me kunÿ kukij ne memã axwe pānh jarē. Jeju akubyn bôxkam gu me babê Metîndjwÿnh nhô me ja dja gu me me kunÿmã axwe pānh jarē. Kam ar ga ne gar ren jakamdjwÿ me kute amim Jeju mar jaxwe ja'ã akuprô ne kum axwe pānh jarē. Djâm ar aje amim Jeju markam ajô akrã mex kêtgam ne gar amikupa'ã me kute Jeju mar kêtâm meo mrã?

<sup>3</sup> Be, Metîndjwÿnh kadjy mrãnh djwÿnh kwÿ axwe. Dja gwaj ï memã axwe pānh jarē. Kam ar ga ne gar ren jakamdjwÿ ren me kute amim Jeju mar'ÿr meo mrã. Nhyim be, kati. Amikupa'ã ne gar me kute Jeju mar kêtâm meo mrã nhyim me kute Jeju mar kêtgam arÿm memã axwe pānh jarē. <sup>4</sup> Dja me kute amim Jeju mar'ô ajmã ne axwe jabej, kadjy dja gar me'ô kute amim Jeju marjao amiptã. Ar

akam rax kêt'ôo amiptã gê ar amã kukjan kum axwe pānh jarē.

<sup>5</sup> Ga ren ar amikam apijâm ne. Ar aje me kute Jeju mar kêtjamã me kute amim Jeju maro amrãnh prãm kam ga ren ar amikam apijâm ne. Nhyim be, kati. Amikam ar apijâm kêtgam ne ba ar amã ik-abên ne. Ar ga ne gar aje amim Jeju markam ar akrã mex ne ate me kute Jeju mar kêt'ÿr meo mrã. Kwârîk wānh. Ar ga ne gar ren me kute amim Jeju mar'ô jaxwe'ã akuprô ne ren arÿm amim kukij ne ren arÿm kum axwe pānh jarē.

<sup>6</sup> Nhyim be, kati. Ar aje amim Jeju mar ne gar me kute Jeju mar kêt'ÿr meo mrã. Ar aje Jeju kukwakam meo akamyja me'ÿr meo mrã nhyim me arÿm memã axwe pānh jarēho krÿ. Nhyim kam me kute Jeju mar kêtja me'ã ar apumÿnho kumex. Kam ne ba ipijã:m ne.

<sup>7</sup> Ar aje amikupa'ã me kute Jeju mar kêt'ÿr meo amrãnhkam ne gar arÿm axwe amijo mrã. Axwe amijo amrãnhkam ga ren ar arÿm ate akrã. Me kute amim Jeju mar ren te ar anoo akno ga ren ar ate akrã. Me ren te ar abê mÿjjao akno ga ren ar ate akrã ren me kute Jeju mar kêt'ÿr meo amrãnh kêt. <sup>8</sup> Nhyim be, kati. Ar ga ne gar me noo abiknor ne mebê mÿjjao abiknoro aba. Ar akamy ne gar ã aro ane.

<sup>9</sup> Kwârîk wānh gar amim,

—Dja ba te ijaxwe rã'ã nhyim Metîndjwÿnh arÿm amiwÿr ijo wabin ijo ba, anhÿr kêt. Kwârîk wānh ã amim ajêx ne aminoo abiknoro anhÿr kêt. Mÿj xê dja Metîndjwÿnh meo ba kêt?

Bir, me kute mjên djwÿnh kupa'ã nâr prô djwÿnh kupa'ã kurê ba prãmja.

Nâr me kute mÿjjao metîndjwÿnh kar'ô nhipêxmã amijarēnh prãmja.

Nâr me kute mebê prôo àkînh nâr mjêno àkînhja. Metîndjwýnh kute me jao ba prâm kêt.

Nâr me kute me kupênho ikwâ kadjy me my kute amijo me nire pyrâkja.

Nâr me my kute me my kupênho ikwâja nâr me nire kute me nire kupênho ikwâja. Metîndjwýnh kute me jao ba prâm kêt.

<sup>10</sup> Nâr me àkînhîja.

Nâr me kute amim mýjjao atom rûnh prâmja.

Nâr me kute kadjwati kangôkam\* bibânh prâmja. Metîndjwýnh kute me jao ba prâm kêt.

Nâr me kute mebê me kurê kadjy me'ã kabên punu prâmja.

Nâr me kute me noo biknor ne mebê mýjjao prôt prâmja.

Metîndjwýnh kute ô kâjkwakam me ja'ôo ba prâm kêtumrêx. Kwârîk wânh amim ajêx ne aminoo abiknor kêt ne amim,

—Dja ba te imã ijaxwe prâm rã'ã nhym Metîndjwýnh arým amiwýr ijo wabin ijo ba, anhýr kêt.

<sup>11</sup> Amrêbê gar akwý mekôt ã amijo ane. Nhym kam Metîndjwýnh arým ar ajo kute mrâmri ne me kute me pôn nhym me arým mestire pyrâk. Nâm arým amimexo ar ajo mex ne arým ar amã axwe kêt jarê gar arým kum amexkumrêx. Ar aje tu amim Bênjadjwýr djwýnhbê Jeju Kritu markam ne arým ã ar ajo ane. Metîndjwýnh Karôo arým ã ar ajo ane.

*Me ari prô, mjên kupa'ã kurê ba nêje kute me akre.*

*Mat 5.27; Ep 5.3; Kor 3.5*

<sup>12</sup> Nã gãm ar abenmã,

—Apýnh imã mýjja kînh djâri dja ba kunîo iba nhym Metîndjwýnh ajmã ijo kêtumrêx, anhýr ar o aba. Djâm ba ne ba amim anhýr ar o iba? Kati. Djâm apýnh imã mýjja kînh

djâri dja ba kunîo iban arým amijo mex? Kati. Gar amim,

—Apýnh imã mýjja kînh djâri dja ba kunîo iba nhym Metîndjwýnh ajmã ijo kêtumrêx, anhýr ar o aba. Djâm ba ne ba amim anhýr ar o iba? Kati. Dja ba imã mýjja kînh ne arým ije o ibamã ne kam arým amiman amim,

—Kati. Dja ba mýjja wão iban kam arým te ije kangamã, ane. Dja ba ã amimaro anen kam arým o iba kêt ne. Te imã kînh ba o iba kêt ne.

<sup>13</sup> Nã gãm ar abenmã,

—Me tik kadjy ne djwý. Djwýo me ajne kadjy ne me tik, anhýr ar o aba. Nhym be, djwýmê me tik kajgo. Metîndjwýnh dja pyka mẽ o amrà nhym kêt ne. Nhym be, gwaj ba, djâm gwaj bakajgo? Kati. Mýj kadjy ne gwaj ar baba? Bir, gwaj baje Bênjadjwýr djwýnh mar nhym kute ar gwaj bajo ba kadjy ne gwaj ar baba. Mýj kadjy ne gwaj banhipêx? Djâm ga aje amjên djwýnh kupa'ã ar akurê aba, nâr gwaj baje baprô djwýnh kupa'ã ar bakurê babamã? Djâm ja kadjy ne Metîndjwýnh gwaj banhipêx? Kati. Ta amikadjy ne gwaj banhipêx.

<sup>14</sup> Metîndjwýnh týxo arým akubyn Bênjadjwýr djwýnhho tîn ne. Ne kam gédja gwaj badjwý kôt akubyn gwaj bajo tîn.

<sup>15</sup> Be, Kritu ne arým gwaj bajo kute apýnh amikukràdjâ pyrâk. Kute arým ijo amikukràdjâ pyrâkkam djâm ije me kuprý mjên prâmjao inôrmã? Kati. Djâm me ni kuprýja mex? Kati. Kam ije me kuprýo inôr prâm kêtumrêx. Kritu kute arým ijo amikukràdjâ pyrâkkam ije me kuprýo inôr prâm kêtumrêx. <sup>16</sup> Amrêbê ne me bakukâmãre memã kum, “Ar ï abenã tým ne kam kute ï pydjâ pyrâk.”

Nâm ã me bakukâmãre memã ane. Ga, me kute me kuprý mjên

\* **6:10** Mýjja me kute o kôm ne kôt bibânh kunîja, kadjwati kangômê uba kangômê, mýjja kangô kunî ne me kum kadjwati kangô jarê.

prâmjao ikwâkam abenâ tÿm ne kam kute mrâmri ne î typdji pyrâk ja pumû. Ja ne Kretimâ mex kêt. <sup>17</sup> Nhy m be, me Bënjadjwÿr djwÿnhmê typdjija ne me arÿm ta Karôkôt typdji.

<sup>18</sup> Ar aje me'ô kuprÿo anôrmâ on kum akâx ne kubê aprôt ne. Dja ga me kuprÿo anhikwân arÿm aminhîo abikênh rax ne. Nhy m be, aje mÿjjao adjâkînhkam ne ga amibu'â meo ajkê. Nâr aje me'ônh bînkam nâr aje memâ ajêxkam ne ga amibu'â meo ajkê. Nâr, apÿnh me âpênh jaxwe 'ôdjwÿkam me kute amibu'â meo bikênh. Nhy m be, me kute me kuprÿo ikwâkambit ne me kute aminhîo bikênh rax ne.

<sup>19</sup> Djâm ar aje amimar kêt? Ga, Metîndjwÿnh ô kikretikam ÿrja pumû. Metîndjwÿnh Karô ne ar akamdjwÿ nhÿ. Mexti:re ne axwe kêtumrêx ne ar akam nhÿ. Kâjkwakam Metîndjwÿnh ne ar amâ ano nhy m nhÿ. Djâm ar aje ja mar kêt? Djâm ar ga dja gar amijo aba? Kati. <sup>20</sup> Metîndjwÿnh arÿm pânh raxo ar ajo pânh ne ar ajo ba. Ga, kute Kra janor nhy m pîte'ykam tyk ne kute o ar ajaxweo pânhja pumû. Kute pânh ra:xo ar ajo pânh ne ar ajo ba. Kam, dja gar katât ar amijo aban adjukapri nhy m kam me arÿm ar apumûn amim,

—Be ga, me kute katât Metîndjwÿnh mar ne kôt kute amijo baja pumû. Me ukaprikumrêx. Kam, ne me mrâmri Metîndjwÿnh'â ujarênhkumrêx ne. Arÿm imâ kînhkumrêx, ane. Dja me â ar akatât pumûnhkam ane.

## 7

*Me abenwÿr môr'â ujarênh.  
Ep 5.22; Kor 3.18; Idja 13.4*

<sup>1</sup> Ar aje amrêbê nînh imâ pi'ôk no'ôkkam ne gar mÿjja kwÿ jabej ikukij. Me kute abenwÿr môr jabej ikukij. Jakam dja ba arÿm kôt ar amâ arê gar ama. Be, me

abenwÿr môr kêt kam ne me kwÿ mexkumrêx.

<sup>2</sup> Nhy m be, ar amy kunîkôt ren aprô nhy m ar anire kunîkôt ren amjên. Mÿkam? Bir, me krâptî kute mjên djwÿnh kupa'â nâr prô djwÿnh kupa'â kurê ba prâmkam. <sup>3</sup> Ne kam ar amy, kwârîk wân h ate anhikwân aprôbê aminê kêt. Ar aniredjwÿ, kwârîk wân h amjênbê ate anhikwân kubê aminê kêt. <sup>4</sup> Mÿkam? Bir, djâm me abenwÿr bakam akubyn kuprÿkam kute amijo baja kôt kute amijo ba râ'an kute amidjwÿnhbit mar ne kute o bamâ? Arÿm prô'ÿr bakam gêdja prôdjwÿ maro ba. Nhy m prôdjwÿ amipân h mjên maro ba.

<sup>5</sup> Kam kwârîk wân h aben bê ate ar anhikwân aben bê aminê kêt. Ar aje abenmâ akabên mex jarênhkambit dja gar apÿnh anhikwâ. Nâm me kwÿ kute Metîndjwÿnhmâ amijajbur ne kum kabên'â rît kadjy apÿnh ikwâ kryre. Ne kam ajte ro'â ikwâ. Me kute aben bê aminê'â akati krâptîkam tÿx kêt. Tÿx kêt kam Xatanaj ren axwe'â memâ apnê nhy m me ren arÿm rerekren ren arÿm prô djwÿnh kupa'â amijo tê. Nâr mjên djwÿnh kupa'â amijo tê. Nhy m be, kati. Dja gar apÿnh anhikwâ: nhy m ajâ akati ngrêrebit apêx gar kam ajte aro'â anhikwâ.

<sup>6</sup> Djâm ar akunî abenwÿr amôrmâ ne ba ar amâ 'â karô? Kati. Ar akwÿ amâ amijo anhÿr prâm kêt jabej amâ amijâ ma. <sup>7</sup> Ba iprô kêtja pumû. Ba amim,

—Me kunî ren kute ipyrâk ne ren me mexkumrêx, ane. Metîndjwÿnh ne me kwÿmâ tÿx jangij nhy m me kum amijâ ma râ'â. Nhy m me kwÿ tÿx kêt ne kum amijâ ma kêt. Gêdja me ta kute amimar kôt abenwÿr ba nâr abenwÿr ba kêt jabej.

<sup>8</sup> Ne kam ar aprô kêt. Nâr, ar amjên kêt. Nâr ar anhikjê arÿm ty. Ba ar amâ arê. Ga ren ar arâ'â ne ren aje ipyrâk ne ren kam

amexkumrêx. <sup>9</sup> Nhyr be, te amã amijã mamã ne abenwÿr amôr prãm. Abenwÿr ar amôr prãm kam dja gar tu abenwÿr mō. Abenwÿr ar amôr kam amexkumrêx. Ar amã aben prãm kajgo ne mex kêt.

<sup>10</sup> Nhyr be, ar ajō arÿm abenwÿr amôr kam ba arÿm 'ã ar amã karōkumrêx. Bēnjadjwÿr djwÿnh kumrêx ne imã arē ba kôt ar amã arē. Ar anire, kwārîk wānh amjên kanga kêt. <sup>11</sup> Nār kon, godja ar ajō aje arÿm amjên kanga jabej ne ajte amã amjên prãm jabej. Dja ga amã akubyn amjên tũm kĭnh gē akubyn awÿr mō. Nār dja ga te o ane nhyr kum akĭnh kêt kwārîk wānh atemã amjên 'ōdjwÿ jabej kêt. Me amydjwÿ, kwārîk wānh aprō kanga kêt.

<sup>12</sup> Ne kam ar ajō anhi kêt kute Jeju mar kêt dja ba ar amã arē. Djām Bēnjadjwÿr djwÿnh ne imã arē ba arÿm ije ar amã arēnhmã? Kati. Ba ije markam dja ba ar amã arē. Ga abē Jeju kukwakam ikamy'ō arÿm aprō nhyr kute Jeju mar kêt. Ne kam ar aro'ã ar aba kadjy kum akĭnh. Kwārîk wānh kanga kêt. <sup>13</sup> Ar anidjwÿ arÿm amjên nhyr kute Jeju mar kêt. Ne kam ar aro'ã ar aba kadjy kum akĭnh. Kwārîk wānh kanga kêt. <sup>14</sup> Mÿkam? Bir, amjên kute Jeju mar kêtja ne Metĭndjwÿnh arÿm amiwÿr o tē. Nhyr ar ajō aprō kute Jeju mar kêtja ne Metĭndjwÿnh arÿm amiwÿr o tē. Akôt ne amiwÿr o tē. Ne ren amiwÿr o tēm kêt nhyr ren akradjwÿ Metĭndjwÿnh nokrekam mex kêt. Nhyr be, kati. Akôt akradjwÿ Metĭndjwÿnhmã mex.

<sup>15</sup> Nār, gēdja kute Jeju mar kêtja akanga jabej. Kwārîk wānh wãm tē. Akmere, àpnhĭre ar, djām aje arek 'ã angràn akaprĭ rã'ãmã? Kati. Arÿm kute akangakam on ate akrã. Gwaj badjumar mexmã ne Metĭndjwÿnh amiwÿr gwaj bajuw ne gwaj bajo ba. <sup>16</sup> Me nire ar, djām mrãmri ar

aje Jeju'ÿr ar amjêno akēxmã? Djām arÿm aje mar? Kati. Aje mar kêt. Nār, me my ar, djām mrãmri ar aje Jeju kôt ar aprō akēxmã? Djām arÿm aje mar? Kati. Aje mar kêt.

<sup>17</sup> Metĭndjwÿnh kute amiwÿr ar ajwÿr ne ar ajo bakam djām aje aba djã kangamã? Kati. Djām aje aprō, amjên kangamã? Kati. Akuprÿkam djām aje me'ō'ÿr amōrmã? Kati. Djām aje adjãpēnh djã kangamã? Kati. Ba ar amã arē gar ama. Dja gar arek apÿnh aba djã, adjãpēnh djãjakam amrãnh katãt rã'ã. Ja'ã ne ba me kute amim Jeju mar kunimã karōn memã arē. Apÿnh me kute Jejukôt ar aben pydjio ba djãrija kunikôt memã arē.

<sup>18</sup> Djām arÿm ar amy nhinhu kã rēnh nhyr Metĭndjwÿnh arÿm amiwÿr ar ajuw ne ar ajo ba? Kwārîk wānh ar amy kã rēnho bimirã kêt. Kwārîk wānh memã,

—Imy nhinhu kã akuprōn 'ã kay gē kam arÿm kute adjãkamã imy kã djwÿnh pyrãk, anhÿr kêt. Tu ar amy kã rēnh rã'ã ne ar abē idjaer rã'ã. Djām ar amy nhinhu kã tã nhyr Metĭndjwÿnh arÿm amiwÿr ar ajuw ne ar ajo ba? Kwārîk wānh ar amy kã rēnh kêt. <sup>19</sup> Djām me kute amimy kã nhinhu rēnh nhyr Metĭndjwÿnh arÿm me kam kĭnh? Kati. Djām me amimy kã tã nhyr arÿm me kam kĭnh? Kati. Nhyr be, dja gar kabēn man kôt ar amijo aba. Kute me kute katãt amijo ba'ã memã karōkôt, kabēnja kôt dja gar amijo aba nhyr kambit arÿm ar akam kĭnhkumrêx.

<sup>20</sup> Apÿnh ar adjãpēnh djã tũm, ar aba djã tũm nhyr Metĭndjwÿnh kute kam amiwÿr ar ajwÿr ne ar ajo ba. Kam ar ajo bakam kwārîk wānh ar aba djã tũm kanga kêt. Dja gar mã Metĭndjwÿnh man arek ar aba djã tũm, ar adjãpēnh djã tũmkam ar aba rã'ã ne.

<sup>21</sup> Djām me kute apa 'amÿnh ga tu memã adjãpēnh kajgo ar aba nhyr Metĭndjwÿnh arÿm amiwÿr ajuw ne

ar ajo ba? Kwârîk wānh adjâpênh pānh kêt kam adjumar punu kêt. Adjumar mex ne arek kam adjâpênh rā'ā. Nhyam kam me amā,

—Arÿm me kute amā ikra karomā, ane.

Dja ga kum,

—Ā. Bon ba arek mekôt ar iba, ane. Nhyam me arÿm amā ikra karo ga arÿm ga arek mekôt ar aban amim apê. <sup>22</sup> Kam, ar akwÿ ne me arÿm ar apa 'amÿ gar tu memā adjâpênh kajgo ar abaja. Kwârîk wānh kam ar akaprî kêt. Kritu ne arÿm amiwÿr ar ajuw ne ar ajo ba. Gar kam ga kôt ar amijo aban akînhkumrêx. Nâr, ar akwÿ me'ô kute ar apa 'amÿnh kêt gar amim adjâpênh ar abaja. Kritu ne arÿm amiwÿr ar ajuw ne ar ajo ba kute mrâmri ne me'ô bēnjadjwÿr kute me pa 'amÿnh nhyam me kute katât kabēn kôt ar amijo ba pyrâk. Kritu ne arÿm ar ajo ba gar katât kabēn kôt ar amijo aba.

<sup>23</sup> Ga, me kute arÿm me'ô pa 'amÿnhja pumû. Nhyam me'ôja arÿm 'ÿr bôx ne arÿm o pānh ne o katon o aminhō. Nhyam kam arÿm kum âpênh ar ba. Metîndjwÿnhdjwÿ ne kute pānh raxo ar ajo pānh ne ar ajo katon arÿm amim ar ajo ba. Ga, kute Kra janor nhyam kute pîte'ykam tyk ne kute o ar ajaxweo pānhja pumû. Pānh ra:xja pumû. Kam me kum Metîndjwÿnh kînh kêt kukrâdjâja kwârîk wānh ar amā kînh kêt gê me amikôt ar ajo ba kêt. Ga ren ar amā kînh nhyam ren me amikôt ar ajo ba ga ren ar arÿm aje mrâmri ne me'ô pa 'amÿnh ne mekôt ba pyrâk.

<sup>24</sup> Akmere ar, apÿnh ar adjâpênh djâ tûm, aba djâ tûm nhyam Metîndjwÿnh kute kam amiwÿr ar ajo akêx. Kam kute amiwÿr ar ajo akêxkam kwârîk wānh ar aba djâ tûm kanga kêt. Dja gar tu amim Metîndjwÿnh mar tÿxkumrêx ne

arek ar aba djâ tûmkam ar aba rā'ā ne.

<sup>25</sup> Me nire kraxje me'ô kute 'ÿr mōr kêt rā'ā. Me'ā ne ije ar amā karōmā. Ba ije markam dja ba me'ā ar amā karō. Djām Bēnjadjwÿr djwÿnh ne imā arê ba arÿm ije ar amā arēnhmā? Kati. Ba ije markam dja ba ar amā 'ā ikabēn jarê. Bēnjadjwÿr djwÿnh kum ikaprîkam ne arÿm ije ikabēn jarēnh katât kadjy ijo mex. Ba kam ba katât ar amā arēnhkumrêx.

<sup>26-27</sup> Me kute gwaj baje amim Jeju marjao bikēnh kumex gwaj batokry kumex. Kam, djām arÿm amjên nâr arÿm aprō? Dja ga arā'ā. Kwârîk wānh kanga kêt. Nâr, djām amjên kêt rā'ā nâr djām aprō kêt rā'ā? Dja ga arā'ā. Kwârîk wānh amjên nâr aprō jabej kêt.

<sup>28</sup> Nâr, ga kam arÿm me'ô nire'ÿr mō. Djām kam ga arÿm amijo ajkēn ajaxwe? Kati. Nhyam me my'ô 'ÿr mōrkam djām nire axwe? Kati. Djām arÿm amijo ajkēn axwe? Kati. Ba ar amā arê gar ama. Dja gar abenwÿr mōn arÿm amikam ar adjumar punu, ar atokry kumex ma. Ar ajamānhkrutkam ne aje ar akrakam dja gar amikam adjumar punu kumex ma. Nâr, dja gar abenwÿr amōr kêt ne arÿm ar adjumar punu kumex mar kêt. Apydjikam adjumar punun aje atokry kumex mar kêt. Ar adjumar punun ar atokry karō ne ba kukām ijamak bēn bit abenwÿr ar amōr nêje ar akukrâ.

<sup>29-31</sup> Akmere âpnhîre ar, ba ar amā arê gar ama. Pykakam mÿjja kunî dja î kêt ne. Gwaj mÿjjao baba 'ikrân ne. Kam, dja gwaj pykakam gwaj banhō mÿjja kunîkôt bajamak bēn tÿx kêt. Godja arÿm aprō. Djām aje o aba rā'āmā? Kati. Dja ga o aba 'ikrân ne. Kam kwârîk wānh kôt ajamak bēn tÿx kêt. Nâr, godja arÿm amÿr jabej. Djām amÿr rā'āmā? Kati. Dja ga amÿr 'ikrân

ne. Kam, kwârîk wânh kôt ajamak bën tÿx kêt. Nâr, godja arÿm akînh jabej. Djâm akînh râ'âmâ? Kati. Dja ga akînh 'ikrân ne. Kam kwârîk wânh kôt ajamak bën tÿx kêt. Nâr godja ga arÿm pi'ôk kaprî pân̄h mÿjja mex'ô byr jabej. Djâm o aba râ'âmâ? Kati. Dja ga o aba 'ikrân ne. Kam, kwârîk wânh kôt ajamak bën tÿx kêt. Gwaj pykakam gwaj banhõ mÿjja kunîkôt bajamak bën tÿx kêt. Djâm gwaj baje o baba râ'âmâ? Kati. Dja gwaj o baba 'ikrân ne.

<sup>32</sup> Mÿkam ne ba ar amâ ikabên ja jarê? Bir, dja gar ikabên ja man arÿm pykakam mÿjja kôt ajamak bën tÿx kêt ne adjumar punu kêt.

Me prõ kêt ne me kute kâjkwakam Bënjadwÿr djwÿnhmâ âpên̄h kadjy amimar. O kînh kadjy kute amimar. <sup>33</sup> Me arÿm prõ ne me kute pykakam mÿjja kadjy âpên̄h kadjy amimar. Kute prõo kînh kadjy kute amimar.

<sup>34</sup> Me nire arÿm mjênja ne atemâ umar nhym me nire me'ô kute 'ÿr mör kêtja ne atemâ umar. Me apÿnh umar. Mjên kêtja Bënjadwÿr djwÿnhmâ âpên̄h kadjy kute amimar. Nâm prîne kum amijâ man Bënjadwÿr djwÿnh mar 'âno dja. Nhym be, arÿm mjênja pykakam mÿjja kadjy âpên̄h kadjy kute amimar. Nâm kute mjêno kînh kadjy kute amimar.

<sup>35</sup> Djâm ar akunî akuprÿmâ ne ba ar amâ ja jarê? Nâr, gar arÿm aprõkam nâr gar arÿm amjênkam, djâm kam ar akaprîmâ ne ba ar amâ ja jarê? Kati. Bënjadwÿr djwÿnhmâ prîne ar amexmâ ne ba ar amâ arê. Dja gar ikabênja man arÿm kum adjâpên̄h 'âno dja. 'Âno dja nhym mÿjja'ô arÿm ar akunor kêt. Ja kadjy ne ba ar amâ arê.

<sup>36</sup> Nâr, akra nhym mjên kêt râ'â jabej ga arÿm kam adjumar mex kêt ne ar o aba. Arÿm abatân̄h mex tèn kum mjên prâm. Arÿm aje mjênmâ arênh ne ör prâm jabej

kum angâ. Ga kam amex. Kwârîk wânh ar abenwÿr mō. <sup>37</sup> Nâr kon, akra kum me my prâm kêt ne aje me'ômâ ör prâm kêt. Aje amim akra'â karõn amim,

—Kati. Ba arek ikrao iba, ane. Jadjwÿ ne mex. <sup>38</sup> Kam ne me kute mebê kra nê mexo me kute memâ ör jakrenh.

<sup>39</sup> Metîndjwÿnh kukràdjâ kôt dja prõ mjên'â ngrâ. Mjên tînri 'â ngrâ. Nhym kam godja arÿm mÿjja'ô kubê kubînhym tyk jabej. Dja kum me my 'ôdjwÿ 'ÿr mör prâm jabej arÿm 'ÿr mō. Dja me'ô kute amim Jeju marbit 'ÿr mō. <sup>40</sup> Ba kam bajbit 'â amim,

—Nâm ren mjên kêt râ'â nhym ren umar mex. Arÿm ajte mjênkam umar mex ngrire, ane. Nâ bâm â amim ane. Metîndjwÿnh Karõ kute ijo bakam ba badjwÿ 'â katât ikabên jarê. Ja ne ba kuma. Tâm ne ja.

## 8

*Me kute mÿjjao metîndjwÿnh karõ nhipêxmâ mry bôrja'â ujarênh.*

*Kô k 13.2; Gar 5.13; Ped k 4.8; Dju k 3.18*

<sup>1</sup> Me kute mÿjjao metîndjwÿnh karõ nhipêxmâ mry bôrja krêndjwÿ. Jadjwÿ ne gar abej ikukij. Gar imâ,

—Djâm ar ije amim Jeju mar mÿjja karômâ mry bôrja kurmâ? Nâr djâm ar ije kur kêtâmâ? ane. Jakam ije 'â ar amâ ikabên jarênhmâ. Ar ga ne gar we,

—Djâm ar ino kêt? Djâm ar ijamakkre kêt? Arÿm ar ije mÿjja mar, ane. Nâ, gwaj bakunî baje mÿjja kwÿ mar. Badjwÿ dja ba ar amâ arê. Gwaj baje mÿjja kumex markam ne gwaj baje amibên prâm. Nhym be, gwaj bamâ aben jabêkam baje abenmâ tÿx jangjênho tèn kam baje amim Jeju mar mexo amû aben kamên arÿm mar rax ne.

<sup>2</sup> Be, me kute mÿjja maro amibên prâmkam djâm mrâmri kute mÿjja markumrêx? Kati. Kraxje kute

mýjja mar mex kêt rá'ã. <sup>3</sup> Nhy m be, me'õ kum Metîndjwýnh jabé jabej, támja dja Metîndjwýnh amipân h kuma.

<sup>4</sup> Kam, me kute mýjjao metîndjwýnh karõ nhípêxmã mry bõr kurja mýj dja gwaj mar on? Mýjjao metîndjwýnh karõ nhípêx kunĩ ne kajgokumrêx. Nhy m be, Metîndjwýnh pydji. 'Õdjwý kêtumrêx. Ja ne gwaj kam kuma. <sup>5</sup> Mrãmri me kute arík apýnh mýjiamã metîndjwýnh jarênh. Kàjkwakam nãr pykakam mýjja krãptíkumrêx nhy m kute arík kum metîndjwýnh, bẽnjadjwýr djwýnh jarênhõ ba.

<sup>6</sup> Nãm me te mýjja kumexmã metîndjwýnh jarê gwaj bamã ne Metîndjwýnh pydjibit. Me Babãm djwýnh. Tãm ne kute mýjja kunĩ nhípêx. Kute amikadjy gwaj banhipêx. Bẽnjadjwýr djwýnhbê Jeju Kritu pydji. Kõt ne mýjja kunĩ kato. Gwaj badjwý kõt bakato. Ja ne ar aje mar. Badjwý ije mar.

<sup>7</sup> Metîndjwýnh pydjibit. Nhy m kam mýjjao metîndjwýnh karõ nhípêx ja ne kajgo. Ne kam djãm me kunĩ kute amim, "Mýjjao metîndjwýnh karõ nhípêx ne kajgo", anhýro ba? Kati. Me kwý ja ne me arík amim,

—Be, mýjjao metîndjwýnh karõ nhípêxbê metîndjwýnh'õ. Nãm me kwý ã amim ane, kute Metîndjwýnhkumrêx mar rerekre rá'ãkam. Ne kam arým mry bõrja krê. Ne kam arým amim,

—Be, mýjjao metîndjwýnh karõ nhípêxmã ne me kute mry bõrja. Kubê ne metîndjwýnh'õ. Ba arým mekõt mryja krê. Arým ne ba Metîndjwýnhkumrêxkam ijaxwe ne, ane. Me kute Metîndjwýnhkumrêx mar rerekre rá'ãkam me ã amim ane.

<sup>8</sup> Nhy m be, djãm gwaj baje Metîndjwýnh mar týxkam ã amim ane? Kati. Gwaj ã amim anhýr kêt. Gwaj baje mýjja kunĩ krên

kajgokumrêx nhy m ajmã kute kêt. Djãm gwaj baje mýjja'õ krêno Metîndjwýnh kõt ajkamê? Kati. Nãr, djãm gwaj baje krênkam ne Metîndjwýnh gwaj bamã punu jarê? Kati. Nãr, djãm gwaj baje krên kêt kam ne gwaj bamã mex jarê? Kati. Mýjja kunĩ ne me kute krên kajgo. Kam ajmã kute kêt.

<sup>9</sup> Nhy m be, gora amijãno dja. Dja gar amidjwýnhbit marõ aban arým tu mýjja karõ nhõ mry krêno aba. Nok ga ren tu õ mry krêno abao ren me'õo akêx jabej. Nok ga ren me'õ kute amim Jeju mar rerekreja Metîndjwýnhbê o akêx jabej nhy m ren ate ar ba jabej. Kam gora amijãno dja. Nok ga ren o me'õo akêx ne ren kam aje mýjja kute me par tok nhy m me rôrõk pyràk.

<sup>10</sup> Ga amim,

—Djãm ije mýjjao metîndjwýnh karõ nhípêx nhõ mry krênkam Metîndjwýnhbê ajmã ikuten ijaxwe? Kati. Ije krênkam ajmã ikute kêt. Mýjjao metîndjwýnh karõ nhípêx ne kajgo. Õ mrydjwý ne kajgo, anhýro aba. Aje amim anhýro abakam ne ga tu mýjjao metîndjwýnh karõ nhípêx nhõ kikretikam tẽn me ikõ'ã nhý. Nhý:n arým õ mry krê. Nhy m arým me'õ kute amim Jeju mar rerekre awýr bõx ne arým amim omũ. Djãm kute 'ã amim karõ kêt mã got? Kati. Dja amim,

—Je, ba badjwý krêno iba, ane. Kute Metîndjwýnh mar rerekreja dja amim anen arým krêno ba.

<sup>11</sup> Ga amim,

—Djãm ije mýjjao metîndjwýnh karõ nhípêx nhõ mry krênkam Metîndjwýnhkumrêxbê ajmã ikuten ijaxwe? Kati. Ije mry krênkam ajmã ikute kêt. Mýjjao metîndjwýnh karõ nhípêx ne kajgo. Õ mry ne kajgo, anhýro aba. Ne kam tu mýjja karõ nhõ mry krê. Nhy m kam aje me'õo akamyja kute Metîndjwýnh

mar rerekreja arÿm apumũ. Ta kute anhÿr djwÿnhrà m arÿk amim,

—Mÿjjao metÿndjwÿnh karõ nhipêxbê metÿndjwÿnh'õ. Dja ba õ mry krên arÿm Metÿndjwÿnhkumrêxbê ajmã ikuten arÿm ijaxwe, anhÿro ba. Ta kute arÿk amim anhÿro ba ja ga arÿm tu nokrekam mÿjja karõ nhõ mry krê. Nhy m arÿm apumũn amim,

—Ga, me'õ kute Metÿndjwÿnh mar tÿx kute mÿjja karõ nhõ mry krênja pumũ. Je, ba badjwÿ kuro iba, ane. Ne kam arÿm tu mÿjja karõ nhõ mry krê. Kritu kute utâr kadjy arÿm axwe pân h ty. Akamy kute amim Jeju mar rerekreja jaxwe pân h ty. Ga krê nhy m arÿm akudjwa kukrê. Kukrên arÿm arÿk amim, "Ijaxwe", anhÿro ba.

<sup>12</sup> Akamy kute amim Jeju mar rerekreja ta kute arÿk amim,

—Dja ba mÿjja karõ nhõ mry'õ krên kam ajmã ikuten ijaxwe, anhÿro ba. Ga mÿjja karõ nhõ mry krê nhy m arÿm akudjwa kwÿ krên arÿm arÿk amim, "Ijaxwe", anhÿro ba. Nhy m kam Kritu arÿm ga amã, "Ajaxwe", ane. Ga ren krên kêt nhy m Kritu ren amã ajaxwe jarênh kêt. Nhy m be, kati. Ga krê nhy m Kritu arÿm amã, "Ajaxwe", ane. <sup>13</sup> Kam mÿj ne ba ren ba nê. Bir, ba ren mÿjja karõ nhõ mry krê nhy m me'õ kute amim Jeju mar rerekreja ren ikudjwa kukrên ren amim, "Ijaxwe", ane ba ren kam ajte krên kêt kumrêx. Me kute ipumũnh ne ikudjwan kute amim, "Ijaxwe", anhÿr karõ dja ba ajte krên kêt kumrêx.

## 9

*Jeju kute Paur janor'ã kute memã amijarênh.*

<sup>1</sup> Djãm mrãmri ne ba we imã mÿjja kÿnh ne ije o ibamã nhy m me we ipa 'amÿ ba we te ije o ibamã? Kati. Ba ne ba ije o iba kêt. Djãm mrãmri ne we Jeju ta

kute ijanor kêt? Kati. Mrãmri ne ta kute ijanorkumrêx. Djãm mrãmri ne ba we ije gwaj banhõ Bênjadjwÿr djwÿnh pumũnh kêt? Kati. Mrãmri ije omũnhkumrêx. Kum idjâpênhkam djãm 'ÿr ije ar ajo akêx kêt got? Ba ne ba Jeju'ÿr ar ajo akêxkumrêx.

<sup>2</sup> Wãnh ar abu'ã me wã ijã,

—Kati. Jeju kute Paur janor kêt, ane. Ije Kritu'ÿr me wão akêx kêt kam ne me ã ijã ane. Djãm ar ga ne gar ijã ane? Kati. Ar ga ne gar aje ijã anhÿr kêt. Mÿkam? Bir, ba ne ba Kritu'ÿr ar ajo akêx. Dja gar akubyn amikõt amijo tèn ba ije Kritu'ÿr ar ajo akêxja ma. Ne arÿm amim,

—Mrãmri ne Kritu kute Paur janorkumrêx. Ga, Paur kute Kritu'ÿr ijo akêxja pumũ, ane. Dja gar ã amim ijã ane.

*Me kute ren Paurdjwÿo djuw mex'ã kute memã amijarênh.*

<sup>3</sup> Ar akwÿ ne gar we abenmã,

—Djãm gwaj baje Paur aro djuw mexmã? Ar kute gwaj bamã kukràdjã jarênh pân h aro djuw mexmã? Kati. Kwãrik wãnh gwaj o pân h kêt. Djãm Jeju ne Paur jano got? Kwãrik wãnh gwaj Paurmã o pân h kêt, ane. Ar akwÿ ã ijã ane. Me kwÿ jamã ije jakam amijarênhmã.

<sup>4</sup> Jeju kute ar 'õdjwÿ janorja ar awÿr bõx ne ar amã kukràdjã jarê. Gar kam pân h arkum mÿjja ngã nhy m ar kukrên o ikõ. Nhy m be, ar ba, djãm ar bajbit ne gar ren ar imã o pân h kêt got? Ar ije amã kukràdjã jarênhja gar ren ar imã o pân h kumrêx.

<sup>5</sup> Ar kute ni kute amim Jeju mar'ÿr mõi ne mã amikõt o ba. Djãm kam bajbit ren iprõ'ÿr imõi kêt got? Ba ren iprõ'ÿr imõrkumrêx. Wãnh ne Jeju kute ar anor 'õdjwÿ ar memã arênhõ ban mã prõ japrõn o ba. Jeju kêt axikõt ar apõxdjwÿ.



Pedrudjwÿ. Idji 'ôdjwÿbê ne Xepa. Wãnh ne ar mã prô japrôn o ba.

<sup>6</sup> Jeju kute ar 'ôdjwÿ janorja ar ar awÿr bôx ne ar amã arê gar arÿm memã kabêno pãnh. Nhy m be, bamê Banabemê ne bar ije ar amã pãnh'ã idjã'wÿr kêt. Ar idjã'yr pãnh ne bar amim inhô pi'ôk kaprÿ jamÿ. Djã ne ba ren ar amã ikabên pãnh'ã idjã'wÿr kêt? Kati. Ba ren ar amã ikabên pãnh'ã idjã'wÿrkumrêx.

<sup>7</sup> Ga, me krâkamngônha pumû. Nhy nh got krâkamngôn'hô me 'yr prôt ba ne ta ô pi'ôk kaprÿo kute amim djwÿ, mÿjja jamÿnh? Kati, kute anor djwÿnh nhô pi'ôk kaprÿo ne amim mÿjja jamÿ. Kute me aêro ba nhy m kute pãnh memã pi'ôk kaprÿ nhôro ne me amim mÿjja jamÿ. Ga, ajte me kute pidjô kre nhy m nep nhy m me kute kurja pumû. Djãm pidjô nep nhy m me kute kur kêt got? Ga, nep nhy m me kute kre pãnh kute krênja pumû. Ga, ajte me kute mrykÿ'âtomtio djuw mexo baja pumû. Djãm kute kã kangô kwÿo kôm kêt got? Kute kwÿo kôm kumrêx. Kute o djuw mex pãnh kute kwÿo kôm kumrêx.

<sup>8</sup> Ba ibê pykabê me'ô kajgo ne ba ar amã ja jarê. Nhy m kôt Metÿndjwÿnhdjwÿ ar amã arê.

<sup>9</sup> Kamã ne amrêbê; me bakukãmãre Môjdjê memã 'ã karô. Nãm Metÿndjwÿnh kukwakam memã 'ã karôn memã kum,

“Mryti kute ituo me amã bãygogo ngãnhô têm kam kwãrÿk wãnh ajkwabê ijê djã inhumã adjãr kêt.

Kwãrÿk wãnh ta àpênh pãnh ô kwÿ krê.”

Nãm ã memã ane. Djãm Metÿndjwÿnh kute mrybit mar?

<sup>10</sup> Djãm kute gwaj bamar kêt? Kati. Kute gwaj badjwÿ gwaj bamar. Gwaj bajã ne kabên jarê. Kam, gê pur kre djwÿnh àpênh ar bakam tu amim djwÿ kwÿ kamnhÿxkumrêx ne djwÿ tÿxkam amim kwÿ byrkumrêx. Kute kre

pãnh kwÿ byrkumrêx. Gê djwÿ ngãnh djwÿnhdjwÿ àpênh ar bakam tu amim djwÿ kamnhÿxkumrêx. Ne àpênh pãnh amim kwÿ byrkumrêx.

<sup>11</sup> Ar badjwÿ ne bar arÿm ar amã Metÿndjwÿnh kabên jarê. Bar ren ar abê pãnh byrkumrêx. Ar ije mrãmri ne me kute purkam 'y kre pyrãk. 'Y ingrôt ne abatãnh ne arÿm ngrã. Nhy m kam me êo môn arÿm amim kwÿ by. Ar badjwÿ ne bar ar amã Metÿndjwÿnh kabên jarê. Djãm ba ren ar ije pãnh ar akutã mÿjja'ô byr kêt got? Ba ren ar ije ar abê pãnh byrkumrêx. <sup>12</sup> Me'ôdjwÿ ne me ar awÿr bôx ne ar amã Metÿndjwÿnh kabên jarê. Ne kam ajte ar amã pãnh'ã a'uw gar tu memã mÿjja ngã. Me kute ar amã arênh pãnh tu memã mÿjja ngã. Ar badjwÿ ar ibê ar anhôbikwakumrêx ne bar ar amã Metÿndjwÿnh kabên jarê. Mÿkam ne gar ren ar ibê pãnh nê? Djã ne bar ren ar amã 'ã a'uw gar ren ar ibê pãnh nê? Kati. Gar ren ar ibê nê kêt. Gar ren ar ikabên pãnh ar imã mÿjja ngã bar ren ar abê byrkumrêx.

Nhy m be, kati. Ar ba ne bar ije ar abê pãnh byr kêt. Te mÿjja prãm ar ikangô. Te ar idjã'wÿr ar ikangô. Bar amim,

—Kati. Ba ren ar memã Kritu'ã ujarênh ny jarên iby ren memã pãnh jarê nhy m ren me abenmã, “Je, mÿkam ne Paur gwaj bamã Kritu'ã ujarênh ny jarên ajte gwaj bamã pãnh jarê”, ane. Ne ren abenmã ja jarên ren arÿm Kritu mar rerekre. Nã bãm ar ã amim anen kam ar ikabên pãnh jarên kêt ne.

<sup>13</sup> Be ga, Metÿndjwÿnh nhô kikretikam me àpênho ku'êja pumû. Me kute kikretikam mÿjjao memã àpênho pãnh. Me kute kikretikam Metÿndjwÿnhmã mry par ne kute bôro ku'êja kute àpênh pãnh amim mry kwÿ 'yr. Ja ne gar arÿm aje mar. <sup>14</sup> Kôt ne Bënjadjwÿr

djwÿnh arÿm memã 'ã karõn memã kum,

—Gê me kute memã ujarênh ny jarênhja pãnh amim me kutã mÿjja kwÿ byn õ kwÿ krên mex, ane.

<sup>15</sup> Nhy m be, ba ne ba ije ar amã 'ã idjã'wÿr kêt. Nâr djãm arÿm jakam ije ar amã idjã'wÿr kadjy ne ba ã ar amã ikabêno anen ã ar amã pi'òk no'òko ane? Kati. Ba ne ba memã Kritu'ã ujarênh ny jarênh pãnh jarênh kêt. Ne kam ikÿnhkumrêx. Gar ren imã o pãnh ba ren arÿm ikÿnh kêt ne ren kam ikaprÿre.

*Metÿndjwÿnhmã àpênh'ã kute memã amijarênh.*

<sup>16</sup> Nhy m be, kàj bê ije ar amã ujarênh ny jarênh ibakam djãm ba ne ba amim 'ã karõn amim,

—Ba dja ba memã arê, ane? Kati. Mÿkam? Bir, Metÿndjwÿnh ta ne imã idjãpênh djã'ã karõ ba te akubyn ije aminêã. Ba ren aminênh amim,

—Kati, ba memã ujarênh ny jarênh kêt, ane nhy m ren pãnh arÿm imã kaprÿ jadjã ba ren kam ikaprÿkumrêx. <sup>17</sup> Godja ba imã memã arênh kÿnhkõt memã arê nhy m pãnh arÿm imã ikÿnh djã ngã. Nhy m be, dja ba imã memã arênh kÿnh kêt kam tu memã arênh iba. Mÿkam? Bir, Metÿndjwÿnh ta kute tu imã 'ã karõkumrêxkam. Kam ne ba tu memã arênhkumrêx.

<sup>18</sup> Ije ikabênh pãnh jabej kêt kam mÿj dja ijo kÿnh? Bir, ije memã Kritu'ã ujarênh ny jarênh ne memã pãnh jarênh kêt kam ne ba ikÿnhkumrêx. Me kute amã amijo à'wÿrja ne me amijo a'uw nhy m be, bajbit ne ba ije amijo idjã'wÿr kêt. Kam ne ba ikÿnh.

<sup>19</sup> Djãm pykakam me'õ ne ipa 'amÿ ba kum apênh arÿm memã Jeju jarênh iba? Kati. Me'õ ne kute ipa 'amÿnh kêt. Ba ne ba memã arênh iba. Te me'õ kute ipa 'amÿnh kêt ba imã me kÿnh. Imã me kunÿ kÿnh ne ije memã arênh iba. Ije mrãmri ne me'õ kute amijo me kunÿ nhõ

àpênh djwÿnh pyrãk. Imã me kunÿ kÿnh ne me kunÿmã arênh iba. Dja ba me kunÿmã arênh arÿm Jeju'ÿr me krãptio akêx.

<sup>20</sup> Dja mebê idjaer jabej ba ba amijo mebê idjaer pyrãk. Ije Jeju'ÿr mebê idjaer kwÿo akêx kadjy ba ã amijo ane. Me kute Môjdjê kukràdjã mar tÿx jabej ba ba amijo ije Môjdjê kukràdjã mar tÿx. Ije me kwÿo akêx kadjy ba ã amijo ane.

<sup>21</sup> Nâr me kute mebê idjaer kukràdjã mar kêt jabej ba ba amijo ije mebê idjaer kukràdjã mar kêt. Ije me kwÿo akêx kadjy ba ã amijo ane. Djãm kam ije Metÿndjwÿnh kukràdjã 'amÿnh rerekre? Kati. Ije Metÿndjwÿnh kukràdjã 'amÿnh tÿx ne Kritu kukràdjã 'amÿnh tÿxkumrêx.

<sup>22</sup> Me rerekremã ba ba amijo irerekre pyrãk. Ije me rerekre kwÿo akêx kadjy ba ã memã amijo ane. Me kunÿmã ije amijo me urãk. Ije amijo me urãk kunÿkõt dja ba Jeju'ÿr me kwÿo akêx jabej. <sup>23</sup> Dja ba amijo me urãk ne memã ujarênh ny jarê nhy m me arÿm amim kuma. Ba kam arÿm amim ikÿnh djã by, Metÿndjwÿnh kute memã me kÿnh djã nhõrja amim kuby, me ro'ã kuby.

<sup>24</sup> Be ga, me kute aben rer djãja pumũ. Kam me kute aben rer kadjy me kunÿ prõt. Nhy m be, me'õ pydjibit me kunÿ ren arÿm amim kÿnh djã by. Krãdjêja by. Djãm ar aje ja mar kêt? Ar gadjwÿ dja gar Jeju man kõt ar amijo aba. Atÿx ne kõt amijo aba ne amã djukanga kêt. Dja ga anen arÿm akÿnh djã byrkumrêx. Metÿndjwÿnh kute memã kÿnh djã nhõrja byrkumrêx.

<sup>25</sup> Nhy m kam me kute me rer prãmja kunÿ ne me kadjy amijangri tÿx. Kute kÿnh djã punu byrmã. Kute pi'õo krãdjê byrmã amijangri tÿx. Nhy m be, gwaj ba ne gwaj baje bakÿnh djã punu prãm kêtja byrmã. Kadjy gwaj Metÿndjwÿnhmã

amijangri tÿx ne katàt ar amijo baba. Nok gwaj ren kum amijangri kêt ne ren Metîndjwÿnhmã bamex kêt nhym ren gwaj bamã kÿnh djã nhõr kêt.

<sup>26</sup> Djãm ije mrãmri ne me arÿk prõt pyrãk ne amikukãm ikÿnh djã mar kêt got? Ba amikukãm ikÿnh djã mar 'ãno djan Metîndjwÿnhmã apê. Djãm me ajbit ije me akre? Djãm ije amijakre kêt got? Ne ba ren amijakre kêt ne ren ije mrãmri ne me bit kute ikra krão me titikmãn kòkremã ukabêr kajgo pyrãk ne ren ikajgo mexi. <sup>27</sup> Nhym be, kati. Nã bãm mã amijakren mã amikukràn amim,

—Je, djãm ije amidjwÿnhbïto kÿnh ne ijaxwemã? Kati. Kwãrÿk wãnh ijaxwe kêt, anen mã akubyn aminê. Ne kam ije mrãmri ne me ta kute amititik pyrãk. Ne mã amijakren arÿm amiman katàt amikabên kôt ar amijo iba. Ije mrãmri ne me kute me pa 'amÿnh nhym me kute katàt me kabên mar ne mekôt amijo ba pyrãk. Ne ba ren me ajbit jakren ren amijakre kêt ne ren arÿm ate amijo iba. Nhym kam Metîndjwÿnh ren arÿm imã,

—Djãm amã dja ba kÿnh djã ngã? Kati. Ije amã òr prãm kêt kumrêx, ane.

## 10

*Memã mebê idjaer tÿm'ã ujarênh. Idja 3.8; Djuda 5*

<sup>1</sup> Be, akmere, àpnhÿre ar, ar aje mar kêt karõ ne ba ije ar amã me bakukãmãre'ã idjujarênhmã. Amrêbê: ne me bakukãmãre kapôt kukritkam mõi. Metîndjwÿnh ne me kadjy kakrã nhípêx nhym me kunÿ kakrã parbê mõi. Nhym kam ngõ raxbê pyka kêt aprakamã memã ajkij nhym me kam ngõ bikjêrkôt mõi rê. <sup>2</sup> Me kunÿ Môjdjê kôt ar amijo ba. Ga, me kute ngõmã gwaj bajangjênhja pumũ. Nhym me gwaj bajã amim,

—Ga, me arÿm kute Jeju mar ne kôt amijo baja pumũ, ane. Me bakukãmãredjwÿ kunÿ Môjdjê kôt ar amijo ba ne kakrã parbê mõi aje ngõ parbê mõi rê. <sup>3</sup> Metîndjwÿnh memã djwÿ jano nhym axidjuw nhym me kunÿ djwÿ jabit kuro ba. Nhym ta aje memã ngõo kato nhym me kunÿ ngõ jabito kôm ar o ba. <sup>4</sup> Metîndjwÿnh nhõ kên ne mekôt ar ba nhym me kôt ngõo kôm ar o ba. Kên ja ne Kritu'ã amijakre.

<sup>5</sup> Nãm Metîndjwÿnh te meo djuw mexo ban me kunÿkam kÿnh kêt. Nãm me kwÿ ngrêrebitkam kÿnh. Ne me krãptÿkam kÿnh kêt nhym kam me arÿm ty. Nhym wãnh me kapôt kukrit kunÿkôt me tyk jangij nhym me krã wãnh kumex. Me tykkôt ne gwaj Metîndjwÿnh mekam kÿnh kêtja ma.

<sup>6</sup> Mÿj kadjy ne gwaj baje me bakukãmãre marmã? Bir, dja gwaj me kuman arÿm me kudjwa ã anhÿr kêt ne bamã mÿjja punu prãm kêt.

<sup>7</sup> Kam kwãrÿk wãnh me kwÿ kudjwa kêt ne mÿjja metîndjwÿnh karõ nhípêxmã amijarênhõ aba kêt. Amrêbê: ne me me bakukãmãre'ã ajarên memã kum, “Me mry karõmã mry bôn kukrên kam kôt kômõ nhÿ. O nhÿ:n kam kãjmã dja. Kãjmã djan aje mry karõmã tor ne kam kÿnh katio nhÿ”, ane.

Ga, me kute amrêbê: memã 'ã ujarênh nhym me bakukãmãre kute 'ã pi'òk no'òkja pumũ.

<sup>8</sup> Nãm me mjên djwÿnh kupa'ã nãr prõ djwÿnh kupa'ã kurê ba. Kwãrÿk wãnh gwaj me kudjwa kêt. Me bakukãmãre kwÿ ã anen kam akati pydjikam arÿm ty. Krãptÿ: kubê 23.000 arÿm ty.

<sup>9</sup> Nãm me kwÿ aje amim, —Ba ijaxwe mex gê goja ijo ajkê. Goja Metîndjwÿnh mrãmri kute ipumÿnh jabej goja ijo ajkê, anhÿro ba. Nãm me amim anhÿro ba: nhym kangã krãptÿ arÿm bõx

ne me imex ne. Kwârîk wānh gwaj me kudjwa ā bakabēno anhÿr kêt.

<sup>10</sup> Me kwÿ Bēnjadjwÿr djwÿnhmē ò àpēnh ar'ā kabēn ar ba. Bēn prîkam 'ā kabēn ar ba. Kwârîk wānh me kudjwa kêt. Nām me'ā kabēn ar ba: nhym Metîndjwÿnh arÿm me'ÿr kadjy mrānh djwÿnh jano nhym me arÿm me'ÿr bôx ne arÿm me imex ne.

<sup>11</sup> Mÿkam ne mÿjja ā me bakukāmāreo anhÿro ba? Bir, gwaj baje amijā mÿjja mar kadjy. Nām me me'ā pi'ók no'ók gwaj arēnh maro baba. Arÿm pykakam me kute aminhinomā amimēnh djā nhō akati bôx 'ÿr gwaj mÿjja'ā pi'ók no'ók jarēnhja maro baba. Dja gwaj amikajmātā mÿjja man arÿm bamā bajaxwe pyma. Me kute gwaj babē bajaxwe pyma kadjy ne me arÿm me'ā pi'ók no'ók ne. <sup>12</sup> Dja gar amijā ano tÿx. Nok ga ren ar ajō amim,

—Ba ne ba itÿxkumrêx. Ije me kudjwa ā ijaxweo anhÿr prām kêt, anhÿro aba. Nok ga ren ar te amitÿx jarēn ren arÿm me kudjwa ren ajaxwe ar aba.

<sup>13</sup> Nhym be, jakam ne me ar ajaxwe'ā ar amā àpnēnh ba. Djām ar gajbit ar ajaxwe'ā ar amā àpnēnh ba? Kati. Nām ar ajaxwe'ā ar amā àpnēnh ban tām'ā me kunīmā àpnēnh ba. Nhym be, Metîndjwÿnh ne kute gwaj bamar ne kabēnkumrêx. Amikabēn kôt dja mrāmri gwaj bajo djuw mexkumrêx ne gwaj bajā ukanga kêt. Dja me te axwe'ā ar amā àpnēnh ba nhym arÿm ar amā tÿx jadjā nhym kam me tÿxo kute ajakrenh prām kêt. Gar kam arÿm memā akāx ne ajmā akute kêt.

*Me kute mÿjja karōmā amijarēnh nêje kute me akre.*

*Ap 9:20*

<sup>14</sup> Kam akmere ar, imā ar ajabēkam ne ba ar amā ikabēn jarē. Godja me mÿjjao metîndjwÿnh karō nhipêxmā amijarēnh prām kwârîk

wānh mekôt amijo anhÿr kêt ne on memā akāx. <sup>15</sup> Ar akrā mexkam ne ba ar amā ikabēn jarē. Goja ije kôt arēnh jabej dja ga ikabēn mexmā akato.

<sup>16</sup> Gwaj baje ngōnhkrākam pidjō kangô'ā Metîndjwÿnhmā amikînh jarēnho bakrî nhym kôt gwaj bajo djuw mex gwaj bakînhkumrêx. Gwaj baje o bakōmkam arÿm Kritu kamrô'ā kangô jakre. Ne kam arÿm Kritu kamrō prôt ne tyk baje mar pydji. Ne baje djwÿ kokjêr ne krēnkam arÿm Kritu nhî'ā djwÿ jakre. Ne kam arÿm me kute Kritu pîte'y'ā nhôr nhym tykja baje mar pydji. Mrāmri ikabēnkumrêx.

<sup>17</sup> Gwaj Kritu pydji'ā djwÿ jakren pydjîn kubyn bakunî kukrê. Te bakrāptîn kute gwaj banhî pydji pyrāk. Ne kam baje djwÿ pydjija kwÿ krēnkôt baro'ā Kritu mar pydji.

<sup>18</sup> Ga, me bakukāmārebê idjaerjadjwÿ pumû. Me kunî Metîndjwÿnhmā mry bôrja krê. Me kute krēnkam arÿm ro'ā mar pydji. <sup>19</sup> Mÿj ne ba ije me kute mÿjjao metîndjwÿnh karō nhipêx'ā ar amā arēnhmā? Bir, mÿjjao metîndjwÿnh karō nhipêx tîn ne ar ba kêt ne kajgo. Me kute kum mry bôrdjwÿ me kute kur kajgo.

<sup>20</sup> Nhym be, me kute Metîndjwÿnh mar kêtja ne me mÿjjao metîndjwÿnh karō nhipêxmā mry bôr ne kum amijarēnho ba. Djām Metîndjwÿnhmā ne me amijarēnho ba? Kati. Me karō punu ar bajamā ne me amijarēnho ba, Xatanaj nhō àpēnhjamā amijarēnho ba. Me mÿjjao metîndjwÿnh karō nhipêxmā amijarēnho ban kam me karō punu ar bajamā amijarēnho ban kam arÿm mar pydji. Ne kam 'ā tpydji. Djām kam ar aje me kudjwa me karō punu mar pydjîn 'ā atpydji prām? Kati. Ja ne ba ar abē uma. <sup>21</sup> Djām ar aje Bēnjadjwÿr djwÿnh nhō ngōnhkrākam pidjō kangôo akōm prām ne ajte me

karô punu nhô ngônhrâkam pidjô kangôo akôm prâm? Kati. Djâm aje Bênjadjwÿr djwÿnh nhô djwÿmâ akrî prâm ne aje me karô punu nhô mrymâ akrî prâm? Kati. Kwârîk wânh. <sup>22</sup> Dja gwaj ari amijo akêxo ane nhym Bênjadjwÿr djwÿnh arÿm gwaj bakam ngryk ne. Te ta gwaj bajâ pydji prâmje arÿm ngryk ne. Djâm gwaj batÿxo baje akrenh got?

*Me katàt ar amijo ban ukapriã kute memã karô.*

*Mat 20.28; Rô 15.1; Pir 2.4*

<sup>23</sup> Nã gãm ar abenmã,

—Ba apÿnh imã mÿjja kÿnh djâri kunïo iba nhym Metîndjwÿnh ajmã ijo kêtumrêx, anhÿro aba. Djâm ba ne ba ije amim anhÿr? Kati. Djâm apÿnh imã mÿjja kÿnh djâri dja ba kunïo iban arÿm amijo mex? Kati. Gwaj bamã mÿjja kÿnh kunïo babakam djâm kunîkôt baje amim Jeju mar mex? Djâm kôt gwaj baje mar mexo amÿ amikamênh? Kati. Kunîkôt gwaj baje amÿ amikamênh kêt. <sup>24</sup> Kwârîk wânh amidjwÿnhbit mar kêt. Ne aje mÿjjao abamã ar amibu'ã me ama. Me aman kam mÿjja man amim,

—Ba ren o iba nhym ren me arÿm 'ã ipumÿ ne ren arÿm Jeju mar prâm kêt. Kam, dja ba o iba kêtumrêx, ane. Dja ga ã me maro anen arÿm o aba kêtumrêx. Nâr, ga amim,

—Dja ba o iba nhym me arÿm 'ã ipumÿn arÿm kum Jeju mar prâmkumrêx. Kam, tãm dja ba o ibakumrêx, ane. Dja ga ã me maro anen kam arÿm o abakumrêx.

<sup>25</sup> Ga, me kute memã mry nhôr djâja pumÿ. Kam ne me mÿjjao metîndjwÿnh karô nhîpêx nhô mry memã kungã ne mry kajgo tu o akàn kungã. Ga kam mry nhôr djâkam bôx. Aje mry'ô byrmã bôx. Tu mry byn krê. Kwârîk wânh amim me kukjêr ne memã kum,

—Djâm mÿjjao metîndjwÿnh karô nhîpêx nhô mry? anhÿr kêt. <sup>26</sup> Amrêbê: ne me bakukâmãre memã kum, “Pykamê pykakam mÿjja kunîdjwÿ, mÿjja kunî ne Metîndjwÿnh nhô mÿjja”, ane.

Ja dja ga aman me kukjêr kêt. Tu abyn krê. Kwârîk wânh amã uma kêt.

<sup>27</sup> Nâr, ajtekam godja me'ô kute amim Jeju mar kêtja amã kràn amã,

—Dja ga ikutã anhô kwÿ krê, ane ga kum, “Ã”, ane. Tu kute amã mÿjja jarênh kunî krê. Kwârîk wânh kum,

—Djâm me karô nhô? anhÿr kêt. Dja ga amim,

—Mÿjja kunî ne Metîndjwÿnh nhô, ane. Dja ga amim anen tu krê.

<sup>28</sup> Nhym be, godja amÿ me'ôdjwÿ nÿnh bôx ne amã,

—Be, ja ne me mÿjjao metîndjwÿnh karô nhîpêxmã kubô ga krê, ane. Kwârîk wânh kam krên kêt. Me'ôja ne arîk amim,

—Dja ba me karô nhô mry krên arÿm ajmã ikuten ijaxwe, anhÿro ba. Ga ren omÿnh nhiràm arek mÿjja karô nhô mry krê nhym ren arÿm akudjwa kwÿ krê. Ren kwÿ krên ren arÿm amim, “Ijaxwe”, anhÿro ba. Mrâmri ne pykamê kam mÿjja kunîdjwÿ, mÿjja kunî ne Metîndjwÿnh nhô mÿjja. <sup>29-30</sup> Nhym be, djâm aje amidjwÿnhbit marmã? Kati. Me'ôjadjwÿ dja ga aman omÿnh nhiràm krên kêt. Nok ren akudjwa kwÿ krên ren arÿm amim, “Ijaxwe”, anhÿro ba. Ga ren amidjwÿnhbit ma nhym ren me'ô bôx ne amã kabên ga ren amim,

—Je tô mÿkam ne me'ô imã kabên ne ikunoro dja? Arÿm ba mry ja'ã Metîndjwÿnhmã amikÿnh jarê. Ba tu omÿnh nhiràm kukrê, ane. Kwârîk wânh amidjwÿnhbit mar ne omÿnh nhiràm krên kêt.

<sup>31</sup> Ga dja ga katàt ar amijo aban adjukapri. Aje anhô kwÿ krên ne akôm kôt nâr aje anhô mÿjja

kunîo abakôt katàt ar amijo aban adjukapří. Nhy m kam me arým apumûn amim,

—Be ga, me kute katàt Metîndjwýnh mar ne kôt amijo baja pumû. Me ukapříkumrêx. Kam, mrâmri ne me Metîndjwýnh'ã ujarênhkumrêx. Arým imã kînhkumrêx, ane. Kam, dja me kum Metîndjwýnh kînhkumrêx.

<sup>32</sup> Kwârîk wãnh amidjwýnhbit maro aba kêt. Dja ga amidjwýnhbit maro aban arým Metîndjwýnh bê me'õo akêx. Mebê idjaer nâr me bajtem nâr me kute amim Jeju mar ne kôt ar aben pydjio baja. Kwârîk wãnh aje amidjwýnhbit maro Metîndjwýnh bê me'õjao akêx kêt. Nok ga ren me'õo akêx ne ren kam aje mrâmri ne mýjja kute me par tok nhy m me rôrôk pyrâk. <sup>33</sup> Ba ije me kunîo kînh kadjy ije amimar ne katàt ar amijo iba. Ije mýjjae iba kunîkôt katàt ar amijo iba. Djâm ije amidjwýnhbit mar? Kati. Ije me krãptî mex kadjy amimar. Ije Metîndjwýnh'ýr meo akêx nhy m kute me utâr nhy m me mex kadjy amimar.

## 11

*Mjên dja prõo ba nhy m kãjmã kum rax kamê.*

*Ep 5.22; Xim k 2.9; Ped k 3.1*

<sup>1</sup> Nã bã m Kritu'ã amijakren kôt ar amijo iba. Ar gadjwý dja gar ijã amijakren ikôt ar amijo aba.

<sup>2</sup> Be, ije amrêbê ar amã ikabên jarênh gar aje mar rã'ã ne ikabên kunîkôt ar amijo aba. Kam ne ba mrâmri ar amã amex jarê.

<sup>3</sup> Me kute me bikprõnh djâkam amikrã'ã prodjwý. Jadjwý ne gar abej ikukij. Gar imã,

—Dja bar me bikprõnh djâkam ikrã'ã pro jabej. Nâr, dja bar 'ã pro kêt. Mýj dja bar nê? Nã gã m ar ã imã ane. Jakam ije ar amã ikabên jarênhmã. Ga, me krãja pumû. Me krâkam ne me umar ne kam kukwakam amû ikrao apê nâr parkam

mrã. Me krã ne amû me kukràdjã kunî ngrêk ne meo ba. Kritudjwý ne gwaj bakunîo ba kute mrâmri ne me krã kute meo ba pyrâk. Gwaj bamydjwý ne gwaj baprõo baba kute mrâmri ne me krã kute meo ba pyrâk. Metîndjwýnhdjwý ne Krituo ba kute mrâmri ne me krã kute meo ba pyrâk.

<sup>4</sup> Godja me my mekôt akuprõn Metîndjwýnhmã kabên nâr kukwakam memã kabên jarê djâm kute amikrãdjê tur ne o amikrã'ã pro? Kati. Kam kute amikrã'ã prokam mex kêt. <sup>5</sup> Nhy m be, godja me nire Metîndjwýnhmã kabên nâr kukwakam memã kabên jarê djâm amikrã'ã pro? Nã. Me nire kute amikrã'ã prokam mex. Ren kam amikrã'ã pro kêt nhy m ren me arým kam pijâm ne. Ren me kam pijâm kute mrâmri ne me nire prîne krã kênham ren me arým kam pijâm pyrâk. <sup>6</sup> Dja me nire amikrã'ã pro prãm kêt nhy m ren me kum krãnh kê. Mýj kadjy ren me kum krãnh kê? Bir, pijâm kadjy. Nhy m be, kati. Me nire krãnh kênham nâr kî jakârkam mex kêt. Mex kêt kam gê me nire amikrã'ã pro.

<sup>7</sup> Adjâkamã ne Metîndjwýnh amimekôt, amipymakôt me my nhipêx nhy m arým mexkumrêx ne uma. Kute amikôt ipêxkam me my kute amikrã'ã pro kêt. Nhy m be, djâm Metîndjwýnh amimexo me nire nhipêx? Kati. Kute amimexo me nire nhipêx kêt. Nãm me my mexo me nire nhipêx. Kam dja me nire amikrã'ã pro. <sup>8</sup> Djâm me'õ nireo ne Metîndjwýnh my nhipêx? Kati. My nhõkwao ne ni nhipêx. <sup>9</sup> Djâm me my me nirekôt ba kadjy ne my nhipêx? Kati. Mykôt ba kadjy ne ni nhipêx.

<sup>10</sup> Kam dja me nire me my kabên man kôt ar amijo ba. Kamdjwý dja me nire arým amikrã'ã pro. Amikrã'ã pron arým memã amijo amirît. Mrâmri kute mjên kabên mar ne kôt amijo

bakumrêxja dja memã o amirît nhyim me arým omũ. Dja amikrã'ã pron Metîndjwýnh kadjy mrãnh djwýnhmãdjwý amijo amirît nhyim me arým omũ.

<sup>11</sup> Nhyim arým me kute Bênjadjwýr djwýnh markam djãm me nire ta ar ban kum me my mar prãm kêt ne ar ba? Kati. Nãr, djãm me my ta ar ban kum me nire mar prãm kêt ne ar ba? Kati. Ar ta ne ar ar ba kêt. Arkum aben mar prãm. <sup>12</sup> My nhõkwao ne ni nhípêx nhyim me nire kurũmdjwý arým me my apõx. Nhyim be, Metîndjwýnh rax ne mýjja kunĩ nhípêx. <sup>13</sup> Be, godja me nire amikrã'ã pro kêt ne Metîndjwýnhmã kabên jabej djãm kam mex? Ar ga dja gar amim mex jabej kabi.

<sup>14-15</sup> Me my kĩ jabjêkam mex kêt. Nhyim be, me nire kĩ jabjêkam me kum me kĩnhkumrêx. Me krã'ã pro kadjy ne mexkumrêx. <sup>16</sup> Nhyim dja ar ajõ aje me nire krã kajgo mýr jabej akabêno ijapanh prãm. Kwãrĩk wãnh rã'ã. Djãm ar ikam me nire kute amikrã'ã pro kêt? Nãr djãm amũ me kute amim Jeju mar ne kôt ar aben pydjio baja apýnh ba djakam me nire kute amikrã'ã pro kêt? Arkati. Me nire amikrã'ã pro. Tãm dja gar ama. Tãm ne ja.

*Me kute Jeju'ã djwý jakren kute kur;*

<sup>17</sup> Gar abikprõnh ne aje amim Jeju mar kadjy djwý krê. Be, djã ne gar akuprõn arým Jeju man aje mar mexo amũ aben kamê? Kati. Ar aje Jeju'ã djwý krên ne aje Jeju marmã akuprõn ate aben kam amex kêt ne. Djãm kam we ije ar amã mex jarênhmã? Kati. Kam ar amex kêtumrêx.

<sup>18</sup> Ar aje amim Jeju mar ar aje aben pydjio abakam gar we arým apýnh mýj xêjakôt akrĩ ne arým abenã akabê:n ne. Ja ne me nĩnh imã arê ba arým kuma. Birãm mrãmri ne me kabênkumrêx. <sup>19</sup> Mrãmri gêdja ar akam me kwý

abenã kabê:n ne. Nhyim be, mýj xêja dja mrãmri Metîndjwýnhmã mex? Djãm me ajkwa kajgokambit memã kum,

—Ba ne ba ije amim Jeju mar, anhýro ba ne kute katãt kôt amijo ba kêt? Djãm kam me arým Metîndjwýnhmã mex? Kati. Me kum mex kêtumrêx. Nhyim be, me kute tu amim Jeju markumrêx ne katãt Jeju kôt ar amijo ba. Be, me ja ne me mrãmri Metîndjwýnhmã mexkumrêx.

<sup>20</sup> Ar abikprõnhkam djãm ar aje Bênjadjwýr djwýnh mar kadjy ne gar anhõ kwý krê? Kati. Ar aje amidjwýnhbit mar kadjy ar anhõ kwý krê. <sup>21</sup> Nã gãm ar apýnh aben bê anhõ djwý jamýn o aprõt ne o akrĩ. Nhyim me kwý kum prãm ne te 'ã ar apumũ. Gar akwý atekam anhõ kwý krên raxkam ajbã. <sup>22</sup> Djãm ar aje anhõ kwý krên ne akõm kadjy ar anhũrkwã kêtumrêx ne gar aben bê djwýo aprõt? Djãm ar amã me kute amim Metîndjwýnh mar ne kôt ar aben pydjio baja kurên me õ mýjja kêtja kanga nhyim me arým pijãm ne? Mýj dja ba kam ar amã arê? Djãm kam ije ar amã amex jarênhmã? Kati. Kam ar amex kêtumrêx.

<sup>23</sup> Nhyim be, gwaj babikprõnh ne baje djwý krên ne baje Jeju tyk marmã. Bênjadjwýr djwýnh ta ne imã tãm'ã karõ ba kuman arým amrêbê ar amã arê. Ne jakam ije ajte kôt ar amã tãm jarênhmã. Bênjadjwýr djwýnh Jeju arým djwý by. Djuda ate tẽm ne kute kurê djwýnhmã kangao ãmri nhyim akamãt tãmkam arým djwý byn <sup>24</sup> 'ã Metîndjwýnhmã amikĩnh jarê. Ne kam arým kôt ba djwýnh arkum djwý kokij ne 'ã aminhĩ jakre. Ne arkum,

—Ar abyn krê. Inhĩ ne ja. Dja me pĩte'y'ã inhõn ibĩ. Dja gar akuprõn inhĩ'ã djwý jakren krê. Dja gar ã imaro anen imar rã'ã ne. Nãm ã Jeju arkum anen arkum kungã

nhym ar arým kukrê. <sup>25</sup> Kukrên arým krên pa.

Nhym kam arým ngônhrâdjwý by. Ngônhrâkam pidjô kangô byn arým arkum,

—Pidjô kangô ja ne ikamrô prôt ne ityk'ã amijakre. Arým ikamrô prôt ne itykkôt gêdja Metîndjwýnh arým memã kabên ny jarênh mãmджи. Gêdja memã kum, “Dja gar tu amim ikra markumrêx ba arým ajaxwe maro aknon akam ingyryk kêt”, ane. Kabên ny ne ja. Dja gar akuprôn ikamrô'ã pidjô kangô jakren o ikôn ã imaro anen imar râ'ã ne. Nãm ã Jeju arkum ane. <sup>26</sup> Kam dja gar akuprôn 'ã djwý krên 'ã pidjô kangôo ikôn ã maro ane. Ar aje ã maro anhÿr kunîkôt gar arým memã Bênjadjwýr djwýnh tyko amirît. Dja gar memã o amirîto akrî tãmtã nhym î akubyn bôx.

<sup>27</sup> Kam me kute Bênjadjwýr djwýnh nhô djwýo mýjja kajgon kute krênja ne me arým axwe. Me kute Bênjadjwýr djwýnh nhô pidjô kangôo mýjja kajgon kute o kômja ne me arým axwe. Kute Bênjadjwýr djwýnh tyk mar kêt kam ne axwe. Axwe kute mrãmri ne me kute Jejuo bikênh ne kamrômã ôpôkkam me axwe ja pyrâk.

<sup>28</sup> Kam dja gar amijaxwe jabej adjumaro nhÿn arým amima. Amiman amijaxwe kôt Metîndjwýnhmã amijarê. Ne kam arým Jeju'ã djwý krên 'ã pidjô kangôo ikô. <sup>29</sup> Dja gar ajô Bênjadjwýr djwýnh tyk mar kêt ne tu djwý krê ne tu pidjô kangôo ikô nhym kam Metîndjwýnh arým ajo ajkê.

<sup>30</sup> Ga, ar akrãptî aje Bênjadjwýr djwýnh mar kêt kam tu ar aje krên ne o akômja pumû. Kam arým ar akrãptî arerekren akanê nhym me kwý arým ty. <sup>31</sup> Gwaj ren bakumrêx bajaxwe jabej badjumaro nhÿn ren arým amijaxwe ma. Ne kam ren arým amijaxwe

kôt Metîndjwýnhmã amijarê. Nhym kam ren Metîndjwýnh arým gwaj bajaxwe pãnh gwaj bajo bikênh kêt. <sup>32</sup> Bênjadjwýr djwýnh kute gwaj babê bajaxwe kurê. Kute gwaj babê kurê kadjy ne gwaj bajo ajkê. Ne ren gwaj babê bajaxwe kurê kêt gwaj ren arým akuno. Nhym be, kati. Me axwe kôt me biknor tokry djâkam babiknor kêt kadjy ne gwaj babê bajaxwe kurê.

<sup>33</sup> Kam akmere ar, dja gar Bênjadjwýr djwýnh tyk mar kadjy akuprôn abenkam amako nhÿ. Kwârîk wãnh aben bê anhô djwý 'amýnh ne tu o aprôt kêt. Dja gar abenkam amako nhÿ. <sup>34</sup> Nhym me'ô kum prãm gê ûrkwâkam ô kwý krên mex. Ô kwý krên mexkam gê ar awÿr bôx ne ar aro'ã nhÿ. Ne kam arým Bênjadjwýr djwýnh tyk mar katât ne arým djwý krên kangôo ikô. Mýkam? Bir, kute pãnh meo bikênh kêt kadjy. Me kute Bênjadjwýr djwýnh tyk mar kêt ne tu kute krên ne o kôm kam ne Metîndjwýnh kute pãnh meo bikênh pyma.

Be, ije ar amã mýjja kwý'ã idju-jarênh prãm râ'ã. Ba wãm itêm ne ar akam ibôxkambit dja ba ar amã arê.

## 12

*Karôkôt me apýnh Metîndjwýnhmã àpênh djâ.*

*Dju k 4.1*

<sup>1</sup> Ar ga ne gar Metîndjwýnh Karôkôt adjâpênh jabej ikukij, ba arým kuma. Ba ar amã 'ã ajarê gar ama. <sup>2</sup> Amrêbê ar aje amim Jeju mar kêt ri ne me amã,

—Dja gar mýjjao metîndjwýnh karô nhîpêxmã amijarêho aba. Nãm me ã ar amã ane gar arým ari mekôt apýnh mýjjao metîndjwýnh karô nhîpêx jamakkre kêtjamã amijarêho aba nhym kute ar amar kêt kumrêx. Kam ne gar Metîndjwýnh Karô djâpênhja mar kêt. Ja ne gar aje mar. <sup>3</sup> Kam, ar aje



Metîndjwýnh Karô djâpênhja mar kadjy ba jakam ar amã arê. Me'ô kute Metîndjwýnh Karô kukwakam kabên'ô jarênhkam djâm kute memã kum,

—Djâm Jeju mex? Kati, punure, anhÿro ba? Arkati. Metîndjwýnh Karô kukwakam ne me kute Jeju'ã kabên mexbit jarênh ba. Ne kam ajte me'ô kute memã kum,

—Mrãmri Jejubê Bênjadjwÿr djwýnhkumrêx, anhÿro ba, Metîndjwýnh Karôbit kukwakam kute arênh ba.

<sup>4</sup> Kam, mÿj ne Metîndjwýnh Karô djâpênh kute? Bir, nãm apÿnh mÿjja'a memã karô nhym me arÿm kôt kute mar ne arÿm kam kum âpênh ar ba. Djâm kam apÿnh karô kute apÿnh mÿjja'ã memã karô? Kati. Metîndjwýnh Karô ta pydji. Pydji kute 'ã memã karô. <sup>5</sup> Bênjadjwÿr djwýnh kadjy gwaj apÿnh badjâpênh djâri maro baba. Djâm kam apÿnh Bênjadjwÿr djwýnh? Kati. Bênjadjwÿr djwýnh ta pydji. <sup>6</sup> Metîndjwýnh apÿnh gwaj bajo ô âpênh ne kam kum badjâpênh kadjy apÿnh gwaj bamã bano mex, bajamak mex, badjê mex jarê. Djâm kam apÿnh Metîndjwýnh? Kati. Metîndjwýnh ta pydji.

<sup>7</sup> Metîndjwýnh Karô kute gwaj bakôt amijo amirît kadjy arÿm gwaj bakunĩmã 'ã karô. Gwaj badjâpênh djâ'ã gwaj bamã karô. Dja gwaj bakunĩ apÿnh badjâpênh djâ kôt kum apên arÿm abenmã Metîndjwýnh raxo amirît ne kam bakunĩ arÿm ra:x ma. Rax man arÿm katà:t kôt ar amijo baba nhym arÿm gwaj bakam kĩnhkumrêx.

<sup>8</sup> Kute gwaj bakunĩmã âpênh djâ'ã karô kôt ne Karô gwaj bakam me kwÿmã amak mex jadjã. Nhym kam arÿm kute memã kabên katât jarênh mar mexkumrêx.

Metîndjwýnh Karô ta ajte gwaj bakam me kwÿmã apÿnh mÿjja mar

kêt jarê nhym me arÿm kôt kute mar ne kute gwaj bamã arênh mar mex.

<sup>9</sup> Metîndjwýnh Karô ta ajte gwaj bakam me kwÿmã Metîndjwýnh raxo amirît nhym me arÿm kôt tu amim Metîndjwýnh markumrêx.

Metîndjwýnh Karô ta ajte gwaj bakam me kwÿmã me punuo mex'ã kum karô nhym me arÿm kôt kute me punuo mex mar mex.

<sup>10</sup> Nhym ajte gwaj bakam me kwÿmã mÿjja pumũnh kêt nhipêx'ã kum karô nhym me arÿm kôt kute mÿjja pumũnh kêt nhipêxja mar mex.

Nhym ajte gwaj bakam me kwÿmã kabên jarênh ba nhym kam me arÿm kôt kute Metîndjwýnh kukwakam kabên jarênh mar mex. Nãm ã gwaj bamã ane gwaj kam baje apÿnh mÿjja mar mex ne arÿm o kum badjâpênh ar baba.

Nhym be, me'ô Metîndjwýnhmã âpênh gêdja gwaj bawÿr bôx. Nâr kon, me'ô me karô punumã âpênh gêdja gwaj bawÿr bôx. Kute mex pyrâk gêdja gwaj bawÿr bôx. Mÿj dja gwaj me'omã bakator on? Bir, Metîndjwýnh Karô ajte gwaj bakam me kwÿmã me'ô jarênh nhym me arÿm kôt kute kum kator mar mex. Me'ô Metîndjwýnhmã âpênhkumrêx gwaj bawÿr bôx nhym me arÿm kuman gwaj bamã,

—Metîndjwýnhmã âpênhkumrêx ne wã, ane. Nâr, me'ô me karô punumã âpênhja gwaj bawÿr bôx nhym me arÿm kuman gwaj bamã,

—Me karô punumã âpênh ne wã, ane. Gwaj bakwÿ Metîndjwýnh Karôkôt badjâpênh djâ 'ôdjwÿ ne ja.

Nhym kam ajte Metîndjwýnh Karô gwaj bakam me kwÿmã me kabên'ã karô nhym me arÿm kôt kute me bajtem kabên mar kêtja jarênh mar mex.

Nhym kam ajte Metîndjwýnh Karô gwaj bakwÿmã me kabên'ã karô nhym kôt me kute gwaj bakabên djwýnhkôt amũ gwaj

bamã me bajtem kabên mar kêtja jarênh mar mex. Metîndjwýnh Karôkôt gwaj bakwý badjâpênh djâ 'ôdjwý ne ja.

<sup>11</sup> Metîndjwýnh Karô ta ne kute gwaj bamã apýnh badjâpênh djâri arênh ne ja. Gwaj banhî pýnhkôt kute gwaj bamã arênh. Ta kute gwaj bajã amim karôn arým kôt gwaj bamã badjâpênh djâ jarênh ne ja.

*Gwaj baje Kritumê banhîo typdji pyrâk.*

*Rô 12.4; Ep 4.16; Kor 3.15*

<sup>12</sup> Ga, gwaj banhîja pumû. Gwaj banhîkam apýnh badjâpênh djâ krâptî. Gwaj baparkam bamrân djâ. Ne banhîkrao baje mýjja kupênh djâ. Ne bakrâkam banhîo mýjja mar djâ. Ne banokam baje mýjja pumûnh djâ. Ne bajamakkrekam baje mýjja mar ne kupênh djâ. Be, gwaj banhîkam apýnh badjâpênh djâ krâptîja pumû. Kritudjwý gwaj baje amim mar nhym kute gwaj bajo ôbikwakam gwaj baje kumê banhî pydji pyrâk. Ne kam gwaj banhî pýnhkôt apýnh badjâpênh djâ krâptî, badjumar djâ krâptî.

<sup>13</sup> Metîndjwýnh Karô ne pydji. Ne kam gwaj bakunîo ban Kritu pydji'ã gwaj bamê. 'Ã ne me ngômã gwaj bajangjênh jakre. Gwaj te babê idjaer nâr te gwaj babajtem nhym arým Metîndjwýnh Karô Kritu pydji'ã gwaj bamê. Nâr, me arým gwaj bakam ar kwý pa 'amý nhym ar memã àpênh kajgo ar ba. Metîndjwýnh Karô arým ar o ban Kritu pydji'ã ar kumê. Nâr, gwaj bakam ar kwý me kute ar pa 'amýnh kêtja nhym ar arek mekôt ar ban umar mex. Kwârîk wân h râ'ã. Metîndjwýnh Karô pydji arým gwaj bakunîo ban Kritu pydji'ã gwaj bamê. Metîndjwýnh Karô kute ngô pyrâk gwaj bakunî baje pydjio bakôm pyrâk.

<sup>14</sup> Ga, gwaj banhîja pumû. Djâm gwaj badjâpênh djâ pydjibit? Kati. Gwaj banhîkam apýnh badjâpênh djâ krâptî, badjumar djâ krâptî. Kritudjwý gwaj baje amim mar nhym kute gwaj bajo ôbikwakam kumê banhî pydji pyrâk. Ba ar amã arê gar ama. Kritu mē gwaj baje banhî pydji pyrâk.

<sup>15</sup> Birâm Kritukam gwaj bajô djâpênh djâ kute gwaj bapar djâpênh djâ pyrâk ne kajgo. Ne kam kum àpênh djâ kînh kêt. Kum me'ô djâpênh djâ kînh, àpênh djâ mexkumrêx kute me ikra djâpênh djâja pyrâk kum kînh. Ne kam ren amim,

—Tâmwã ne àpênh djâ mexkumrêx. Me kum kînhkumrêx. Nhym be, me kum ba idjâpênh djâ kînh ngrire. Mýkam ne Metîndjwýnh Karô imã idjâpênh djâ ja'ã karô? Kute Kritu ijo ôbikwa kêt pyrâk. Kute kadji idjâpênh kêt pyrâk, ane. Djâm kute amim anhýrkam djâm mrâmri Kritu kute o ôbikwa kêt? Kati. Mrâmri kute o ôbikwakumrêx.

<sup>16</sup> Ne birâm atekam Kritukam gwaj bajôdjwý djâpênh djâ kute me amak djâpênh djâ pyrâk. Ne kam kum àpênh djâ kînh kêt. Kum me'ô djâpênh djâ kînh, àpênh djâ mexkumrêx kute me no djâpênh djâja pyrâk kum kînh. Ne kam ren amim,

—Tâmwã ne àpênh djâ mexkumrêx. Me kum kînhkumrêx. Nhym be, me kum ba idjâpênh djâ kînh ngrire. Mýkam ne Metîndjwýnh Karô imã idjâpênh djâ ja'ã karô? Kute Kritu ijo ôbikwa kêt pyrâk. Kute kadji idjâpênh kêt pyrâk, ane. Djâm kute amim anhýrkam djâm mrâmri Kritu kute o ôbikwa kêt? Kati. Mrâmri, kute o ôbikwakumrêx. <sup>17</sup> Ne ren gwaj banobit ne ren gwaj bajamakmê bajamakkre kêt mýjo ne gwaj ren badjumar? Ne ren gwaj bajamakbit ne ren banhîjakre kre kêt mýjo ne gwaj ren badjubâr?

18 Nhyim be, kati. Metîndjwýnh ta gwaj bakadjy apýnh gwaj bakukràdjà, gwaj badjâpênh djà nhípêx. Ta ne kute amim gwaj badjâpênh djà'ã karõ kôt arým apýnh gwaj badjâpênh djà nhípêx. Kritudjwý. Gwaj baje amim mar nhyim kute gwaj bajo ôbikwakam ne gwaj apýnh kôt badjâpênh djàrio baba.

19 Nhyim be, Metîndjwýnh ren gwaj banhiãkrebit nhípêx gwaj ren badjâkur kêt, badjâpênh kêt, bamrânh kêt. Ren gwaj bakukràdjà'ò pydjibit nhípêx mýj ne gwaj ren nê? Ne ren gwaj banhiãkrebit nhípêx ne ren gwaj bajajkwa nhípêx kêt gwaj ren badjâkur kêt. Ne ren gwaj banhikra nhípêx kêt gwaj ren badjâpênh kêt. Ne ren gwaj bapar nhípêx kêt gwaj ren bamrânh kêt. Mýj ne gwaj ren kam nê? Gwaj ren kam ajmã nê.

20 Nhyim be, kati. Gwaj bakukràdjà kunĩ. Gwaj badjâpênh djà krãptĩ. Nhyim be, gwaj banhi pýnhbit. Kritudjwý gwaj baje amim mar nhyim kute gwaj bajo ôbikwakam kute kumê gwaj baje banhi pydji pyrãk. Nhyim be, apýnh gwaj badjâpênh djà krãptĩ. Kam kwãrik wãnh ar amã adjâpênh djà kurê kêt.

*Me kute abeno ôbikwan kum aben jabê'ã memã karõ.*

*Rô 12.10; Pir 2.3; Ped k 2.17*

21 Ba ar amã mýjja jarê gar ama. Djãm gwaj bamã bano kĩnh ne ate bamã banhikra kurê? Kati. Gwaj bamã bano kĩnh ne bamã banhikra kĩnh ne bamã bakukràdjà kunĩ kĩnh. Metîndjwýnh Karõ ne kute gwaj bamã apýnh badjâpênh djà'ã karõ gwaj o baba ne kam bamã badjâpênh djãdjwý kunĩ kĩnhmã. Djãm gwaj baje me kabên mar kêtja jarênh djãm jabit ne gwaj bamã kĩnhmã? Djãm me punuo mex ne gwaj bamã kĩnh kêtã? Kati. Dja gwaj bamã badjâpênh djà kunĩ kĩnh aben pyrãk.

22 Gwaj bakukràdjãdjwý kwý rerekre. Gwaj bakĩ, gwaj bajamak, gwaj bajai, gwaj bakukràdjã kwý rerekre. Te kwý rerekre gwaj bamã kĩ:nhkumrêx ne. Ne ren kêt gwaj ren ajmã nê? 23 Nhyim gwaj bakukràdjã kwý me kum kĩnh kêt jabej gwaj amim o mex. Gwaj o mex ne kãjmã kamê nhyim me arým kum kĩnh. 24 Gwaj bakukràdjã me kum kĩnhja gwaj o mex kêt ne kãjmã kamênh kêt.

Metîndjwýnhdjwý ne Kritu nhõ àpênh aro aben pyrãk ne kum ar kunĩ kĩnh aben pyrãk. Nãm mã me kum õ àpênh kĩnh kêtjao mex ne kãjmã kum mex kamê. Nhyim kam me arým kum õ àpênh kunĩ kĩnh aben pyrãk. 25 Mýkam ne õ àpênh aben pyrãk? Bir, ne ren meo aben pyrãk kêt nhyim ren me amirax mýr jabej abenmã kabên ne. Nhyim be, kati. Me kute abenmã anhýr kêt kadjy ne arým õ àpênh aben pyrãk nhyim kam me arým abeno djuw mex'ã kabên.

26 Nhyim kam godja gwaj bajõ tokry jabej gwaj bakunĩ arým ô'ã batokry. Nãr godja me kãjmã kum rax kamê nhyim arým kĩnh. Kĩnhkam gwaj arým ô'ã bakĩnh ne. 27 Ar aje tu amim Kritu markam nhyim kute ar ajo ôbikwakam ar aje mrãmri ne kumê anhĩ kute pydji pyrãk. Nhyim arým ar ajo õ àpênh.

28 Me baje amim Jeju mar kunĩ ne kôt ar aben pydjio babaja ne Metîndjwýnh kute aben nhitepã me bajã àpênh rênh. Nãm me bakwý'ã memã wa djwýnh mē. Jeju ne amrêbê ar ijano bar 'ã idjujarênh ar iba. Ar ikumrêx. Nhyim me bakwý'ã ajte kukwakam kabên jarênh djwýnh mē nhyim me ar ijatãri. Nhyim me bakwý'ã memã kukràdjã'ã ujarênh djwýnh mē nhyim me me atãri. Nhyim kam ajte me bakwý'ã mýjja pumũnh kêt nhípêx djwýnh mē. Ne kam ajte me bakwýmã me punuo mex'ã karõ gu me baje mar. Nhyim kam ajte me

bakwýmã me àpênhkôt o kangõnh'ã karõ gu me baje mar. Nhyam kam me kwýmã meo ba djwýnh'ã kum karõ nhyam me kute mar. Nhyam kam me bakwýmã me kabên'ã karõ gu me kôt baje me bajtem kabên mar kêtja jarênh mar.

<sup>29</sup> Djãm kam me bakunîbé Jeju kute ar anorja? Kati. Me bakwýbit. Djãm kam me bakunîbé Metîndjwýnh kukwakam kabên jarênh djwýnh? Kati. Me bakwýbit. Djãm me bakunîbé memã kukràdjã'ã ujarênh djwýnh? Kati. Me bakwýbit. Djãm me bakunî baje mýjja pumûnh kêt nhípêx mar, baje me punuo mex mar? Kati. Me bakwýbit. <sup>30</sup> Djãm me bakunî baje me bajtem kabên mar kêtja jarênh mar? Kati. Me bakwýbit. Djãm me bakunî baje me kabên djwýnhkôt amũ memã me kabên mar kêtja jarênh mar? Kati. Me bakwýbit. <sup>31</sup> Kam ar adjápênh djãja'õ mexo kute kunî jakrenh dja gar amã kînh. Mex ja dja gar abej týx.

Ne kam mýj dja gar nênh kam apê? Bir, dja gar amã me abên kam apê. Gwaj bamã me abê kêtka badjápênh kajgo. Gwaj bamã me abêkambit mrãmri badjápênh mexkumrêx.

### 13

*Me kum me abê'ã ujarênh.*

<sup>1</sup> Gwaj bamã me abêkambit ne mrãmri gwaj badjápênh mexkumrêx. Ne ren gwaj bakam me'õ ren pykakam apýnh me bajtem kabên mar kêtja jarê nar ren kãkwakam Metîndjwýnh kadjy mrãnh djwýnh kabên mar kêtja jarê. Ne ren kum me abê kêt. Djãm kam mex? Kati. Kum me abê kêtka kabên kajgokumrêx. Kum me abê kêtka kabên jarênh kajgo kute mrãmri ne me ngõnh krõkrõkti titikkam kanga kajgo pyrãk.

<sup>2</sup> Nhyam ren gwaj bakam me'õ kute Metîndjwýnh kukwakam kabên jarênh mar. Ne ren kute mýjja bipdjur tüm kunîo amirît mar. Ne ren me kute mýjja marja kunî ren mar. Ne kam ren kum me abê kêt. Djãm me'õja rax? Kati. Kum me abê kêtka ne kajgo me:xi.

Nhyam ren gwaj bakam me'õ ren mrãmri kute Metîndjwýnh rax markumrêx. Ne ren mýjja nhípêx kadjy amim kamnhîx mexkumrêx. Ne ren kum,

—Djünwã, dja ga imã krãnhwã kaba, ane. Nhyam ren arým kum kadjãrkumrêx. Nhyam kam ren me'õja kum me abê kêt. Djãm me'õja rax? Kati. Kum me abê kêtka ne kajgokumrêx.

<sup>3</sup> Nhyam ren gwaj bakam me'õ ren õ mýjja kunî me bikênhmã kungrà. Ne ren kum me abê kêt, mã ne kute? Kati, Kute memã mýjja nhõrja kajgo mexi, kum me abê kêtka.

Nhyam ren kam me'õ kute me'õ pytãr kadjy memã kum,

—Kwãrik wãnh kuwyo tãmwã bînh kêt. Ba dja ga pãnh kuwyo ibî, ane. Nhyam ren me arým kabênkôt pãnh kubî. Kubî nhyam tykjao ren arým me'õ pytã. Nhyam be, ren tykja anhýr djwýnhhrãm kum me abê kêt, mã ne kute? Kati, tykja kajgo mexi, kum me abê kêtka.

<sup>4</sup> Gwaj bamã me abêkam dja gwaj memã bano kator kêt ne amijamãr 'iry.

Ne bamã me kaprî.

Ne me õ mýjja'ã bangryk kêt.

Ne bamã me abêkam babên kati kêt. Ne amijo badjãmra kêt.

<sup>5</sup> Ne memã baprire ne memã bak-abên jarê.

Ne bamã me abêkam amidjwýnhbit mar kêt.

Ne amijã bangryk nê.

Nhyam me'õ gwaj bajo ajkê gwaj amipãnh kadjy mar kêtumrêx.

<sup>6</sup> Ne bamã me abêkam me axwekam bakînh kêtumrêx.

Ne me kute katât amijo bakam bakînhkumrêx.

<sup>7</sup> Ne memã me arênh prãm kêt.

Ne bamã me abêkam tu amim me markumrêx ne amim, “Mrãmri kabênkumrêx”, anen amiwÿr mÿjja kamnhîxkumrêx.

Ne mekôt badjãm tÿxkumrêx ne 'ã badjukanga kêt.

<sup>8</sup> Ne bamã me abêkam arÿm Metîndjwÿnh kadjy badjâpênhkumrêx ne bakajgo kêtumrêx. Nhyim be, Metîndjwÿnh Karô kute apÿnh memã âpênh djâ jarênhja dja î kêt. Dja kukwakam kabênh jarênh djwÿnh î memã arênh kêt. Nhyim me î me bajtem kabênh mar kêtja jarênh kêt. Nhyim me kute apÿnh mÿjja mar djwÿnh î mar kêt. Nhyim be, djãm me kum me abênh kam kum me abê kêt mã? Arkati. Dja me kum me abê rã'ã. Ne kam kajgo kêt rã'ã ne. <sup>9</sup> Jakam gwaj mÿjja kwÿbit man Metîndjwÿnh kukwakam kabênh kwÿbit jarê. Gwaj baje kabênh kunî mar kêt. <sup>10</sup> Nhyim be, dja î mÿjja kunî kute amirît djâ nhô akati bôx gwaj arÿm prîne mÿjja kunî ma nhyim me:xkumrêx. Nhyim mÿjja kajbê mexja arÿm kêt ne.

<sup>11</sup> Amrêbê iprîri ikabênh kute me prîne kabênh pyrâk. Iprîri ije mÿjja mar kute me prîne kute mÿjja mar pyrâk. Ne ije amim mÿjja'ã karô kute me prîne amim mÿjja'ã karô pyrâk. Ba kam arÿm ijabatânh ne arÿm iprîne prãm kêt. Ba arÿm iprîne kam amijo ibaja kanga.

<sup>12</sup> Jakam gwaj baje Metîndjwÿnh nhô mÿjja pumûnh mex kêt kute mrãmri ne ixe punukam me kute mÿjja pumûnh mex kêt pyrâk. Dja gwaj ã omûnh ane:n kam î arÿm kuka kônh omûnh mexkumrêx. Jakam gwaj baje mÿjja kwÿbit mar. Dja gwaj ã maro ane:n kam î arÿm prîne mar mexkumrêx. Dja gwaj maro kute mrãmri ne ta kute prîne gwaj bamar pyrâk.

<sup>13</sup> Jakam gwaj tu amim Metîndjwÿnh markumrêx rã'ã. Ne amiwÿr kamnhîxkumrêx rã'ã. Ne bamã me abê rã'ã. Ne kam gwaj baje tu amim markumrêxja ne kajbê mex. Gwaj amiwÿr kamnhîxjadjwÿ ne kajbê mex. Nhyim be, gwaj bamã me abêja ne mexo kute kunî jakrenh.

## 14

*Aben kabênh djwÿnhkôt me kute abenmã arênh'ã memã karô.*

<sup>1</sup> Dja gar mã amã me abê. Ne kam ajte ar amã apÿnh adjâpênh djâdjwÿ kînhkumrêx. Metîndjwÿnh Karô kute 'ã ar amã karôja dja gar amã kînh. Ne kam ar adjâpênh djâ'ã abê Metîndjwÿnh kukwakam kabênh jarênh djwÿnhja dja gar amã kînhkumrêx. Abê kukwakam kabênh jarênh djwÿnhkam ajte me aben djwÿnh kabênkôt memã arênh. Tãm dja ga amã kînhkumrêx.

<sup>2</sup> Nhyim be, me'ô kute me bajtem kabênh mar kêt jarênhkam djãm gwaj bajômã ne arê? Kati. Gwaj bajô baje mar kêt. Metîndjwÿnhmã ne arê. Me'ô ta ne mÿjja mar kêt jarê. <sup>3</sup> Nhyim be, me'ô kute gwaj bakabênkôt Metîndjwÿnh kukwakam kabênh jarênhja ne mex. Gwaj baje markam ne mex. Nãm gwaj bamã arê gwaj kam bajamak mexo amû amikamênh tênh arÿm Metîndjwÿnh mar rax ne. Nãm gwaj bamã 'ã karônh gwaj bajo kînh. <sup>4</sup> Nhyim be, me'ô kute me bajtem kabênh mar kêtja jarênh ne amidjwÿnhmãbit arênh kam ajbit arÿm amak mexo amû amikamê. Me'ôdjwÿ kute mar kêt. Nhyim be, me'ô kute me aben djwÿnh kabênkôt Metîndjwÿnh kukwakam kabênh jarênhja. Ja ne me kute amim Jeju marja kunîmã arê nhyim me arÿm kuma. Ne kam arÿm amak mexo amû amikamênh arÿm Metîndjwÿnh mar rax ne.

<sup>5</sup> Ar akunî ren me bajtem kabênh mar kêtja jarê ba ren kam ikînh

ngrire. Nhyim be, ren ar akunî me bakabênkôt Metîndjwýnh kukwakam kabên jarê ba ren kam ikînhkumrêx ne. Mýkam? Bir, ar aje kukwakam kabên jarênhkam ne gar amexkumrêx. Nhyim me'ô kute me bajtem kabên mar kêt jarênhja kâjbê mex. Nâr, godja me'ô ar amâ me kabên mar kêtja jarênh jabej. Nhyim me'ôdjwý me bakabênkam amû ar amâ me'ô kabên jarê gar arým kabên mar jabej. Kambit dja mexkumrêx. Ar aje kabên markam mexkumrêx. Ne kam arým ajamak mexo amû amikamên arým mar rax ne. Ar aje amim Jeju mar ne kôt ar aben pydjio baja kunî arým mar rax ne.

<sup>6</sup> Akmere, àpnhîre ar, ba ren ar awýr bôx ne ren ar amâ me bajtem kabên mar kêtja jarê djâ ne ga ren ar amim aman akînh? Kati. Dja ba ar awýr bôx ne me bakabênkôt ar amâ arê gar arým amim aman arým akînh ne. Metîndjwýnh kute imâ mýjja ny jarênh dja ba me bakabên kôt ar amâ arê gar arým amim aman arým akînh. Nâr ije mýjja'ô bipdjur tûm mar dja ba me bakabênkôt ar amâ arê gar arým amim aman arým akînh ne. Nâr, dja ba me bakabênkôt Metîndjwýnh kukwakam ar amâ kabên jarê gar arým amim aman arým akînh ne. Nâr, dja ba me bakabênkôt ar amâ Metîndjwýnh kukràdjâ jarê gar kam arým amim aman arým akînh ne.

<sup>7</sup> Nhyim be, aje memâ me bajtem kabên mar kêtja jarênhkam aje mrâmri ne me kute me ô'i kakôr punu pyrâk. Nhyim kam me abenmâ kum,

—Je tô mýj ne kute kakôr punuja? ane. Ar aje me bajtem kabên mar kêtja jarênhkam aje mrâmri ne me kute pîjâbârekam ngrer punu pyrâk. Nhyim kam me abenmâ kum,

—Je tô mýj ngrer punu ja? ane.

<sup>8</sup> Me krâkamngônâ apýnh prôt djâri ô me ngrer. Ô'ikam me ngrer.

Ne ren me me ngrer kupa'â ô'i kakô djâ ne ren krâkamngônâ me ngrer man kurê djwýnhmê aben kutâ prôt kadjy akuprô? Kati.

<sup>9</sup> Kam ar gadjwý ga ren ar memâ akabên djwýnh jarênh kêt djâ ne me ren akabên ma? Kati. Ne ga ren ar aje kôkmâ akabên nhyim kute akabên mar kêt pyrâk. <sup>10</sup> Apýnh me ba djâkam apýnh me kabên krâptî. Ne kam me kute aben djwýnh kabênkôt kute aben kabên kunî mar. <sup>11</sup> Gwaj ren me kabên mar kêtjakam abenmâ bakabên ne ren abeno me bajtem.

<sup>12</sup> Ar gadjwý ne gar â aje aben kabên mar kêtkaam â abeno me bajtemo ane. Kam, me bakabênkôt dja gar memâ akabên jarê. Metîndjwýnh Karô kute ar amâ apýnh ar adjâpênh djâ jarênh dja gar me bakabênkôt memâ akabên jarênh kôt apê nhyim me arým ar akabên markumrêx. Ne kam arým amak mexo amû amikamên arým mar rax ne. Me kute amim Jeju mar ne ar aben pydjio baja kunî arým mar rax ne. Ar adjâpênh djâ ja'ô dja gar amâ kînhkumrêx.

<sup>13</sup> Kam, ar ajô aje me bajtem kabên mar kêtja jarênh markam dja ga Metîndjwýnhmâ amijo a'uw ne kum,

—Me ikabênkam dja ga ajte imâ arê, ane. Dja ga â kum ane gê me bakabênkam ajte amâ arê. Ga kam arým amû me bakabênkam memâ arê nhyim me arým ama. Tãm ne ja. <sup>14</sup> Metîndjwýnhmâ gwaj bakabênkamdjwý. Godja gwaj kum me bajtem kabên mar kêtja jarênh arým baje mýj kabên jarênhja mar kêt. Gwaj bajajkwakambit ne gwaj arê ne kam bajamakjao baje mar kêt ne.

<sup>15</sup> Mýj godja gwaj kam nê? Bir, dja gwaj me bajtem kabên mar kêtjao kum bakabên jarênh mâ bakabên djwýnhkôt kum bakabên jarênh arým amikabên ma. Dja gwaj mâ me kabên mar kêtjao

kum ngren mã bakabên djwýnhkôt kum ngren arým amikabên ma. <sup>16</sup> Godja gar me bajtem kabên mar kêt kôtbit kum mex jarê mýj godja ar abu'ã me ja kute akôt kum, "Mrãmri", anhÿr on? Me kute akabên mar kêtja mýj godja me akôt nê? Me kute akabên mar kêt kumrêx. <sup>17</sup> Mrãmri ga me bajtem kabênkôt kum mex jarê. Nhyim be, abu'ã me ja dja me amim amar kêt ne amak mexo amũ amikamên kêt.

<sup>18</sup> Ba ne ba ije apÿnh me bajtem kabên mar kêtja jarên kumex. Ije me bajtem kabên mar kêtja jarênho ar akunĩ jakrenh mex ne. Kam ne ba Metĩndjwýnh mã amikĩnh jarê. <sup>19</sup> Ne kam me kute amim Jeju mar kute aben pydjikam djãm mekam ije me bajtem kabên mar kêtja jarênh prãm? Kati. Nhyim be, me kabên djwýnh ije arênh prãm kumrêx. Ije memã Metĩndjwýnh kukràdjã jarênh nhyim me kute mar kadjy ije me kabên djwýnh jarênh prãm kumrêx. Ne ba ren me bakabên djwýnhkôt ikabên ngrêrebê 5bit jarên ren imã ikabênja kĩnh kumrêx. Nhyim be, ne ba ren me bajtem kabên mar kêtja kabên krãptĩ: kubê 10.000 jarên ren kam imã ikabên ja kĩnh ngri:re ne.

<sup>20</sup> Akmere, àpnhĩre ar, kwãrĩk wãnh ar aprĩre kêt ne arĩk amim akabên kajgo jarênh kêt. Dja gar ajabatàn h ne amim akabên kumrêx jarê. Dja gar me prĩre ma. Prĩ:rekam me axwe kêt dja gar aman me kudjwa ajaxwe kêt ne katàt ar amijo aba. <sup>21</sup> Be, amrêbê: ne Bẽnjadjwýr djwýnh me bakukãmãre Mõjdjêmã 'ã karõ nhyim kukwakam memã 'ã karõ. Nãm te memã 'ã karõ nhyim me kute mar kêt ne amakkre kêt rã'ã ne. Nhyim kam arým memã kabên ne memã kum,

"Me kabên mar kêt kôt, me bajtem kabênkôt dja ba jakam memã ikabên jarê.

Dja ba te memã arê nhyim me amim ikabên mar kêt rã'ã ne."

Nãm me amakkre kêt kam Bẽnjadjwýr djwýnh ã me bakukãmãre'ã ane nhyim me arým 'ã pi'ók no'ók ne.

<sup>22</sup> Kam, ba ar amã arê. Mýj xê kadjy ne me kute me bajtem kabên mar kêt jarênh? Djãm me kute tu amim Metĩndjwýnh markumrêxja kadjy ne me kute arênh? Kati. Me kute amim Jeju mar kêtja kadjy ne me kute arênh. Nhyim be, mýj xê kadjy ne me kute Metĩndjwýnh kukwakam kabên jarênh, kute me bakabên djwýnhkôt kabên jarênh? Djãm me kute amim Jeju mar kêtja kadjy ne me kute kabên jarênh? Kati. Me kute amim Jeju marja kadjy ne me kute kabên jarênh. <sup>23</sup> Kam, godja gar akunĩ aben pydjĩn akunĩ arým me bajtem kabên mar kêtjakam akabên jarênh jabej. Nhyim me kute Metĩndjwýnh kabên mar prãmja ar akôt wadjã. Nãr me kute amim Jeju mar kêtja ar akôt wadjàn ar akabên ma. Gar me bajtem kabên mar kêt jarênho akumexkam mýj dja me ar ajã abenmã arê? Bir, dja me abenmã abibãnh jarê.

<sup>24</sup> Nhyim be, dja gar akunĩ abikprõnh djãkam akabên djwýnhkôt Metĩndjwýnh kabên jarê. Aben totokmã arê. Nhyim kam me'õ kute amim Jeju mar kêtja ar akôt wadjã. Nãr me'õ kute Metĩndjwýnh kabên mar prãmja ar akôt wadjã. Ne kam arým amijã akabên ma:ro nhÿ. Maro nhÿn arým amiman arým amim,

—Mrãmri ne ba mekôt ajmã ikuten ijaxwe, anhÿro nhÿ. Amimaro nhÿ:n arým amim kator mex ne. <sup>25</sup> Dja gar akunĩ akabên djwýnhkôt ã arênho ane nhyim arým prĩne amima. Kute apÿnh mýjja punu nhĩpêx ne kute amikam o bipdjur djãri amikam kuma. Ne kam Metĩndjwýnh pymaje arým tu

mýrbê tÿm ne kum rax jarê. Ne kam arÿm ar ajã me kunĩmã kum,

—Be, mrãmri Metũndjwÿnh mekmê amijo kajpekumrêx, ane.

*Me kabên'ã atom ne kute arênh nêje me akre.*

*Kar 2.42; Idja 10.25*

<sup>26</sup> Akmere ar, ba apÿnh ar adjãpênh djã'ã ar amã karõ gar ama. Me kute amim Jeju mar rax kadjy dja gar memã akabên jarê. Me kute amim mar mexo amũ amikamênhmã dja gar memã arê. Kwãrik wãnh ar akabên kajgo jarênh kêt. Arÿm ar abikprõnhkam ar aje memã apÿnh anhõ me ngrer jarênhmã nãr memã kukràdjã'õ jarênhmã me kute amim Jeju mar rax kadjy dja gar memã arê. Nãr ar aje me bajtem kabên mar kêtka akabên jarênhmã nãr Metũndjwÿnh kute ar amã mÿjja 'õo amirõtja ar aje memã arênhmã me kute amim Jeju mar rax kadjy dja gar memã arê. Nãr, ar aje me bajtem kabên mar kêtja akabên djwÿnhkõt memã arênhmã me kute amim Jeju mar rax kadjy dja gar memã arê. Kwãrik wãnh ar akabên kajgo jarênh kêt.

<sup>27</sup> Nhy kam ar akam me'õ ar me bajtem kabên mar kêtja jarênh jabej. Djãm ar krãptĩ kute arênhmã? Kati. Gê ar amãnhkrut nãr ar amãnhkrut ne ikjêkêt arê. Ar jabit. Djãm me kute kabên jarênh'ã atom\* ne aben mar kêtã? Kati. Kwãrik wãnh. Gê ar aben nहितepã pÿnh ne memã arênhõ tẽ. Nhy kam gêdja me'õ me bakabên kõt amũ memã arênhkumrêx. <sup>28</sup> Nãr kon, dja me me bajtem kabên mar kêtja jarê nhy me'õ kute me bakabênkõt amũ ar amã arênh mar kêt. Kute mar kêtka kwãrik wãnh me me bajtem kabên jarênh kêt. Me'õ kute me ijuk'ã ar amã arênh mar kêtka gê me ja anhikrê. Ar aje aben pydjikam anhikrê. Gê me bixamarkam amimãbit me kabên

mar kêt jarênh Metũndjwÿnhmã bit arê.

<sup>29</sup> Nhy kam me'õ ar kute Metũndjwÿnh kabên jarênhmã. Djãm tu ar krãptĩ kute arênhmã? Kati. Gê ar amãnhkrut nãr kon ar amãnhkrut ne ikjêkêt ne arê. Aben nहितepã pÿnh ne arênhõ tẽ gê kam ar bu'ã me ja ar maro krĩ. Mrãmri Metũndjwÿnh kabên kõt ar kabên katãtkumrêx jabej ar maro krĩ.

<sup>30</sup> Gê ar aben nहितepã memã kabên jarênhõ tẽ. Nhy kam wãnh me'õdjwÿ nhÿ nhy Metũndjwÿnh arÿm kum mÿjja 'õo amirõt nhy kuma. Gê kumrêx kabên jarênhõ ãmja kum anhikrê. Nhy kam me'õ ÿrja kajmã djan pãnh memã kabên jarê. <sup>31</sup> Gêdja gar akunĩ aben nहितepã apÿnh ne Metũndjwÿnh kabên jarênhõ tẽ gê me kunĩ arÿm amim ar akabên ma. Ar akabên man arÿm amim Jeju mar mexo amũ amikamên arÿm kõt kÿnh.

<sup>32</sup> Metũndjwÿnh kabên jarênh djwÿnh ne me kute amimexkumrêx. Dja gar aminên ar apÿnh ne aben nहितepã memã akabên jarê. <sup>33</sup> Djãm ar aje akabên'ã atom ne aje aben kabên mar kêtã? Djãm Metũndjwÿnh kute ar amã ar akangaja jadjãrmã? Kati. Nãm kute memã me umar mexbit jadjãrmã. Nãm ã apÿnh me kute amim Jeju mar ne kõt ar aben pydjio ba djãri umar mexo ane.

<sup>34</sup> Nhy kam me niredjwÿ. Mÿj dja ga me abikprõnh djãkam nê? Djãm me nire kute memã arênhmã? Kati. Dja me anhikrên me my kabên ma. Djãm apÿnh me kute amim Jeju mar ne ar aben pydjio ba djãri me nire kute kam memã kabên 'õ jarênh? Kati. Kunĩkõt me anhikrê. Ar akam me niredjwÿ, gê me me kudjwa anhikrên me my kabên ma. Me bakukãmãre kute Metũndjwÿnh kukràdjã'ã pi'õk no'õkkõt ne me nire kute me abikprõnh djãkam

\* 14:27 'ã krãptĩ



me my kabên mar ne kute kôt amijo bamã. <sup>35</sup> Ne me kute mÿjja'ô marmã, djãm me aben pydji djãkam kute me kukjêrmã? Kati. Gê me akrànãmã aminhûrkwãkam mjên kukja. Me kute amim Jeju mar aben pydjikam me nire kute kabên'ô jarênhkam ne mex kêt ne.

<sup>36</sup> Djãm ar ajô aje akabêno ijapanhmã? Djãm ar akumrêx ne gar aje Metîndjwÿnh kabên jarênhmo krax djwÿnh? Djãm ar gajbit ne Metîndjwÿnh kabên ar awÿr bôx? Kati. <sup>37</sup> Godja me'ô we,

—Ibê Metîndjwÿnh kukwakam kabên jarênh djwÿnh, ane. Nâr,

—Ije Metîndjwÿnh Karô mar, ane. Gê tãmwã ikumrêx iman ijã ar amã,

—Paur kabênkumrêx. Kute gwaj bamã kabên'ã pi'ôk no'ôk ja ne mrãmri Bênjadjwÿr djwÿnh kute kum arênhkumrêx, ane. Dja ã ar amã ane gwaj kam arÿm me'ôja markumrêx. <sup>38</sup> Nâr, dja me'ô amakkre kêt prãm kwãrik wãnh me'ô kabênja mar kêt.

<sup>39</sup> Kam, akmere ar, ar akabên djwÿnhkôt aje Metîndjwÿnh kabên jarênhja amã kÿnh. Nhyim be, dja ar akam me'ô kute me bajtem kabên mar kêtjakam kabên'ô jarênh prãm jabej. Kwãrik wãnh kubê adjãptâr kêt. <sup>40</sup> Ne kam ar akabên jarênh'ã atom kêt gê mex. Nhyim be, apÿnh dja gar aben nwhitepã akabêno aku'ê. Ije Metîndjwÿnh Karôkôt ar adjãpênh'ã idjujarênho ino rer ne ja. Tãm ne ja.

## 15

*Jeju tyk ne akubyn tÿn'ã ujarênh.  
Kar 2.23, 10.39, 13.29*

<sup>1</sup> Jakam ba ajte ar amã Kritu'ã ujarênh ny jarê. Ije amrêbê ar amã 'ã ujarênh ny jarênh gar arÿm tu amim markumrêx ne 'ã adjukanga kêt. Ba ajte ar amã tãm jarê. <sup>2</sup> Ar aje amim 'ã ujarênh nyja markôt

Metîndjwÿnh arÿm ar apytã. Tãm dja ba ajte kãj bê ar amã arê. Ar aje kam tu amim mar tÿx rã'ã jabej arÿm ar apytã. Nâr ar aje mar kajgo jabej.

<sup>3</sup> Metîndjwÿnh ne kute imã kabên mex jarênhja ba arÿm ar amã arê. Kritu ne arÿm gwaj bajaxwe pãnh ty. Amrêbê: Metîndjwÿnh kute me bakukãmãremã 'ã ujarênh nhym me kute 'ã pi'ôk no'ôk kôt Kritu arÿm gwaj bajaxwe pãnh ty. <sup>4</sup> Ty nhym me arÿm adjã. Nhyim me kute ajte 'ã pi'ôk no'ôk kôt 'ã akatin akatin akati nhym arÿm akubyn tÿn ne. <sup>5</sup> Nãm akubyn tÿn nhym kam Pedru arÿm omÿ. Pedru nhidji 'ôdjwÿbê ne Xepa. Nhyim kam Jeju kute ar anorbê 12djwÿ arÿm omÿ.

<sup>6</sup> Nhyim kam ajte anrgo pydjikam gwaj baje meo bakamy krãptÿ kubê 500 ne kam ajmã ijukri 'ã akre kuteja adjwÿnhdjwÿ arÿm omÿ. Me kute omÿnhja krãptÿ ne akati jakam tÿn ne ar ba rã'ã ne. Nhyim me kwÿbit arÿm ty. <sup>7</sup> Nãm me omÿ nhym kam ajte Xijagu omÿ. Nhyim kam Jeju kute ar anorja kunÿ omÿ. <sup>8</sup> Kam ne ba ba me tekren arÿm omÿ. Ije mrãmri ne me prÿre nhô akati nhôkre djã kôt me aêrbê bixadjwÿr pyrãk. Imã Jeju kurê:ô iba. Nhyim kam memã amijo amirÿto ba nhym me omÿnho ba. Omÿnho ba ba kam badjwÿ arÿm omÿ. Nãm ijaêrbê imã amijo amirÿt ba me totokbê arÿm omÿ.

<sup>9</sup> Jeju kute ar anorja djwÿ ar rÿnho kute ijakrenh mex. Bajbit mekam ikajgo pyrãk. Mrãmri ne me ren kute ijã memã kum, “Jeju ne Paur jano”, anhÿr kêt. Ije me kute amim Jeju marjao ibikênho ibakam ne me ren ijã anhÿr ar ba kêt.

<sup>10</sup> Nhyim be, kati. Metîndjwÿnh tu kum ikaprÿ kôt\* Jeju arÿm ijano ba arÿm 'ã idjujarênh ar iba.

\* **15:10** Djãm ba ne ba ijaxwe kêt nhym pãnh kum ikaprÿ Kati. Ba ne ba te ijaxwe kêtãm. Nhyim be, ta ne tu kum ikaprÿ.

Djâm kum ikaprî kajgo? Kati. Ba ne ba kum idjâpênho ar kunî jakrenh mex. Djâm ba ne ba apê? Kati. Metîndjwýnh ta ne tu kum ikaprîn ikadjwýnhbê djan ijo ba. Ijo ban ikam apê ba arým kum apê. <sup>11</sup> Nhyim ar wâdjwý kâj bê memã 'ã ujarênh ar ba. Badjwý ba kâj bê memã 'ã idjujarênh ar iba. Bar aktã Kritu'ã memã ajarê gar kam arým tu amim markumrêx.

*Medjwý tyk ne akubyn tîn.*

*Ruk 20.37*

<sup>12</sup> Me arým kâj bê Kritu akubyn tîn'ã ar amã ajarê gar arým aje mar. Mýkam ne ga ate ar akwý ajte memã kum,

—Kati. Me tyk akubyn tîn prãm kêtumrêx, anhýro aba? <sup>13</sup> Ne ren mrãmri me tyk akubyn tîn kêt nhyim Krittudjwý ren akubyn tîn kêt ne. <sup>14</sup> Ne ren mrãmri akubyn tîn kêt ba ren ar kâj bê 'ã ar amã idjujarênh ar iba kajgo. Ga ren ar gadjwý ren amim maro aba nhyim ren arým kajgo:kumrêx. <sup>15-16</sup> Ne ren mrãmri me tyk akubyn tîn kêt nhyim Krittudjwý ren akubyn tîn kêt ne. Ba ren ar kam me kunîmã Metîndjwýnh jarênh'ã ijêxnhõ iban memã,

—Metîndjwýnh arým akubyn Krittuo tîn, anhýro iba. <sup>17</sup> Ne ren mrãmri Krittuo akubyn tîn kêt ga ren ar amim maro aba nhyim ren arým kajgo:kumrêx. Gar kam ren ajaxwe tûm râ'ã ne.

<sup>18</sup> Nhyim me kute Krittuo mar arým tykdjwý ren akubyn tîn kêt ne ren mrãmri tu biknorkumrêx. <sup>19</sup> Gwaj ren batînri amim Krittuo kamnhix ne ren kam arým ty. Ne ren kam akubyn gwaj batîn kêt djã ne gwaj ren kam bakînh? Kati. Gwaj ren kam bakaprîkumrêx. Ne ren bakaprîo katât me kunî jakrenh mex ne.

<sup>20</sup> Nhyim be, kati. Mrãmri ne Metîndjwýnh akubyn Krittuo tînkumrêx. Kam me kute amim Krittuo mar tyk kunîdjwý dja

me Krittuo kôt akubyn tîn ne. <sup>21</sup> Pykakam me'õ djô'ã ne me arým ty. Ne kam akubyn tîndjwý pykakam me'õdjwý djô'ã akubyn tîn. <sup>22</sup> Adão kôt me ja kunî Adão djô'ã ty. Nhyim Krittuo kôt me ja kunî ajte Krittuo djô'ã akubyn tîn.

<sup>23</sup> Djâm me kumrêx akubyn tîn? Kati. Krittuo arým tyn kam kumrêx akubyn tîn ne wabi. Dja ï akubyn bôx. Akubyn bôx kambit dja akubyn õ me jao tîn.

<sup>24</sup> Nhyim kam arým pykakam mýjja kunî aminhinomã amimê. Kam dja Krittuo arým Bãmmã me kanga. Kute meo baja kunî arým Bãmmã me kanga. Kute kum me kanga djwýnhràim dja pykakam me bënjadjwýr kunîo kajgo. Me 'ityx kunîo kajgo. Nhyim kam me arým meo ba kêt ne arým rerekre. Kam dja Krittuo arým Bãmmã õ me ja kunî kanga nhyim arým me kunîo ba. <sup>25</sup> Bir, ajbir jakam ne Krittuo Metîndjwýnh kabênkôt arek meo ba. Dja meo ba:n arým kurê djwýnh kunîmã rerek jadjã. Ga, me kum bënjadjwýr rûnh pymakam rerekren parbê rôrôkja pumû. Kurê djwýnh kunîdjwý dja Krittuo pymaje rere:kre.

<sup>26</sup> Gwaj badjwý. Mýj dja gwaj bajon? Bir, dja gwaj bajo ban arým akubyn gwaj bajo tîn. Gwaj kam batyk kêtumrêx. Gwaj bakurê djwýnhbê batykjadjwý dja kêtumrêx. Gwaj bakurê djwýnhõ ino rer ne ja. <sup>27</sup> Nã, dja Krittuo kurê djwýnh kunîmã rerek jadjã. Amrêbê ne me me bakukãmãremã 'ã ajarênh memã kum,

“Arým ne me kunîmã rerek jadjã nhyim me kunî arým umaje parbê kum rôrôk ne”,

ane. Amrêbê me ã Krittuo'ã ane. Me bakukãmãremã ane. Kam dja Krittuo arým me kunîmã rerek jadjã. Djâm kam Metîndjwýnh ta Krittumã rerekre? Kati. Mýjja kunî, me kunî Metîndjwýnhmã rerekren kam

arým Kritumã rerekre. <sup>28</sup> Kute me kunimã rerek jadjãr nhyem me kute o bënjadwÿr raxkam dja Kra ta arým Bãmmã bënjadwÿr rax jarê. Nhyem kam Bãm arým me kunimã rax'ã pydji. Ta ne Kra kadjy mÿjja kunimã rerek jadjã.

<sup>29</sup> Ê, jadjwÿ. Me kute me tînri ngômã me angjênh kêt nhyem me arým tyk. Nhyem me kute me tykja mar kadjy ne me ãm djãkam ngômã me tînja jangjênh ba. Ne ren mrãmri me tyk we akubyn tîn kêt nhyem ren me ngômã me angjênh kajgo. Nhyem be, kati. Mrãmri me tyk akubyn tînkumrêx.

<sup>30</sup> Badjwÿ myt kunikôt imã me kute ibîn puma. <sup>31</sup> Akati kunikôt imã me kute ibîn pyman mã kum idjãpênh ar iba. Ne ren me tyk akubyn tîn kêt ba ren ã idjãpênh anhÿr kêt nhyem ren me kute ibîn prãm kêt. Ba ren kam imã ibîn puma kêt. Ba ne ba Bënjadwÿr djwÿnhbê Kritu Jeju'ã ajarê gar 'ÿr amijo akêx. Kam ikînhkumrêx ne mã ar ajo amra. Ne ren me tyk akubyn tîn kêt ba ren ar amã Kritu'ã idjujarênh kêt gar ren kam amim mar kêt. Ba ren kam ã ar akam ikînh anhÿr kêt. Nhyem be, kati. Me tyk akubyn tînkumrêx.

<sup>32</sup> Krîraxbê Epexu jakam me kute ibîn prãm. Ga, me kute rop djãkrêo kê nhyem kute me par prãmja pumû. Nã bãm memã Kritu'ã ajarê nhyem me arým imã àkrê:n ibîn prãm. Ne ren me tyk akubyn tîn kêt ba ren ba akubyn itîn kêt ne ren ajmã nê. Ren me Epexukam ibi ba ren akubyn itîn kêt ne ren ajmã nê. Nhyem be, kati. Dja me ibîn ba akubyn itînkumrêx. Nhyem be, amrêbê ne me arîk abenmã kum,

“Dja akatibê gwaj batyk ne babi-knor jabej.

Gwaj kam on batînri amijo kînhbit.

Gwaj banhõ kwÿ krên bakõm rax ne bakînh kati”, anhÿro ba.

Ne ren gwaj batyk ne akubyn batîn kêt ba ren mekôt ã ikabêno ane. Nhyem be, kati. Me tyk akubyn tînkumrêx. <sup>33</sup> Kwãrîk wãnh gê me ar amã 'êx ne ar anoo biknor kêt. Amrêbê me memã kum,

—Dja me mexja me axweo òbikwan kôt ar ban ì arým me axweo axwe, ane. Kôt ne me kute arênhja. Kam kwãrîk wãnh gê me ar anoo biknor kêt. Ga ren ar amim me kabên man ren arým me kôt ajaxwe. <sup>34</sup> Wãkam me kwÿ kute Metîndjwÿnh mar kêt. Gora ar amiman amijãno djan ajaxwe kêt. Ar apijãmmã ne ba ar amã ja jarê.

*Akubyn me tînkam mÿj dja me ikam kute?*

*A Kô 5.1; Pir 3.21*

<sup>35</sup> Godja ar ajõ ikukij ne imã,  
—Arým gwaj batykkam mÿj dja gwaj akubyn batîn on? Mÿj godja gwaj banhikam kute? ane.

<sup>36</sup> Ajbã. Purkam aje mÿjja 'y kreo amõrkam ne gar aje mÿjja 'y jangjênh kute me tyk jangjênh pyrãk. Gar ren aje 'y jadjãr kêt nhyem ren ingrõt ne abatãnh kêt. Gwaj badjwÿ ren batyk kêt gwaj ren akubyn batîn kêt. <sup>37</sup> Gar bãygogo 'y nãr atemã 'y 'õdjwÿ kre nhyem kam ingrõt ne kam bàri abatãnh ne. Djãm bàri jabatãnh pro ne ga kre? Kati. 'Ybit. Djãm bàri jabatãnh kute 'y pyrãk? Kati. Atemã. <sup>38</sup> Apÿnh mÿjja djãri ne Metîndjwÿnh kute 'y kadjy bàri nhipêx. Kute amim 'ã karõ kôt kute ipêx. Pi'y kadjy ne kute pi'y bàri nhipêx. Katêbãri 'y kadjy ne kute katêbãri bàri nhipêx. Apÿnh mÿjja djãri ne kute 'y kadjy bàri nhipêx.

<sup>39</sup> Djãm axikôt ne mÿjja nhî? Kati. Apÿnh me banhîmê mry nhîmê àk nhîmê tep nhîmê. Apÿnh mÿjja nhî. <sup>40</sup> Me apÿnh kãkwakam mÿjja pumûn kam kum kînh. Myt pumû, mytyrwÿ pumû, kanhêtire pumûn kam kum kînh. Apÿnh me kum mÿjja kînh djãri ne me omûn kum kînh. Ne apÿnh pykakam

mýjja pumûn kam kum kînh. Mry pumûn, tep pumûn, bà pumûn kam kum kînh. Apýnh me kum mýjja kînh djari ne me omûn kum kînh. Kàjkwakam mýjjamê pykakam mýjja ne me apýnh kum mýjja kînh djari. <sup>41</sup> Me kute myt pumûnhkam kum kînhkumrêx. Ne kute mytyrwý pumûnhkam kum kînhkumrêx. Ne kute kanhêtire pumûnhkam kum kînhkumrêx. Apýnh kanhêtire djari ne me omûn kum kînhkumrêx.

<sup>42</sup> Me tyk akubyn tînkamdjwý. Me tyk jangjênhja myt tãmkam punu. Nhy m be, akubyn me tînkam arým punu prãm kêtumrêx. <sup>43</sup> Me kute me angjênhkam me kum me kînh kêt. Nhy m be, akubyn me tînkam me arým kum me kînhkumrêx. Me kute me angjênhkam týt kêt. Nhy m be, akubyn tînkam me arým 'itýxkumrêx. <sup>44</sup> Pykakam me ï. Kàjkwakam atemã me ï. Pykakam me ne me ï jangij. Nhy m be, akubyn me tînkam ne me atemã ï. Me kàjkwakam me ïjao ï.

Pykakam me ïnhy m kàjkwakamdjwý atemã me ï. <sup>45</sup> Ika bènja kôt ne me amrêbê: memã kum, “Me banhingêt Adão kumrêx ne Metîndjwýnh ipêx ne akôn o tîn nhy m arým tîn ne.”

Nãm me amrêbê ã me bakukãmãremã ane. Nhy m be, Adão kôt Adão 'ôdjwý ne kubê Jeju. Ne kute mýjja kunio tîno ba. <sup>46</sup> Metîndjwýnh kute pykakam me ipêxkam djãm kàjkwakam me ïo ne me ï? Kati. Pykakam me ïjao ne me ï. <sup>47</sup> Adãoja kumrêx ne Metîndjwýnh pykao kum ï. Nhy m be, Jeju, Adão 'ôdjwýja ne kàjkwakam me ïo ï. <sup>48</sup> Adão nhîja kumrêxo pykabê me bakunî nhî. Kàjkwakam Adão 'ôdjwý nhîo ne kàjkwakam me ja kunî nhî. <sup>49</sup> Nhy m be, arým gwaj batyk ne akubyn batîn ne badjãbirkam mýj dja gwaj banhîkam kute? Djãm Adão nhîo gwaj banhîmã? Kati. Dja gwaj atemã banhî kute kàjkwakam Jeju

nhî pyràk.

*Dja meo kukrà kêt ne meo ny.*

*Tex k 4.16*

<sup>50</sup> Djãm me banhî, me bakamrô jao dja Metîndjwýnh kàjkwakam me bajo ba? Kati. Me banhî ja rà'ã, Metîndjwýnh kute me bajo ba prãm kêt. Me banhî punu prãm kam. Nhy m be, kàjkwakam mýjja punu prãm kêt.

<sup>51</sup> Ba ar amã mýjja bipdjur tûm jarê gar ama. Djãm gwaj bakunî dja gwaj ty? Kati. Gwaj bakwý dja gwaj batyk kêt. Nhy m be, gwaj bakunîmã dja Metîndjwýnh atemã gwaj banhî nhipêx. <sup>52</sup> Dja gwaj banhipêxo kukrà kêt o kute gwaj bano bikraro kukrà kêtja pyràk. Dja me kunî, mýjja kunî aminhi-nomã amimê nhy m kadjy mrãnh djwýnh arým ô'i kakô. Nhy m kam Metîndjwýnh akubyn me tyko tîn ne. Dja me ï punu prãm kêt o akubyn meo tîn ne. Ne kam arým gwaj badjwý atemã gwaj banhî nhipêx.

<sup>53</sup> Gwaj banhî tûmja ne punu prãm nhy m be me ï punu prãm kêt o dja gwaj banhî ny. Jakam gwaj batyk prãm nhy m be dja gwaj ï batyk prãm kêt ne batîn rà'ã: rà'ã ne. <sup>54</sup> Dja gwaj banhî punu prãm kêt ne batyk prãm kêt ne Metîndjwýnh kôt batîn ne ar baba rà'ã: rà'ã ne. Nhy m kam me kute amrêbê: mýjja jarênhja dja ka-torkumrêx. Amrêbê: ne me memã kum,

“Arým me tyk kêt. Arým akubyn meo tîn nhy m me arým tyk kêtumrêx. Ne tu tîn rà'ã: rà'ã ne.”

Nãm me amrêbê ã me bakukãmãremã ane nhy m me arým 'ã pi'ók no'ók ne. <sup>55</sup> Nhy m kam me ajte memã kum,

“Ga, mýjja kakrit kute me kamjýr nhy m me arým tykja pumû. Dja Bênjadjwýr djwýnh me batyk-jao apêx kute mrãmri ne me kute mýjja kakrit perey jakãr

nhyam kute arÿm me kamjÿr  
kêt pyrâk.

Bênjadwÿr djwÿnh dja akubyn  
me tyko tÿn. Nhyam kam  
nhÿnhjakam me ajte tykmã?  
Kati. Arÿm me tyk kadjy  
kêtkumrêx.

Ga, me tÿx kute me pa 'amÿnh ne  
kute meo baja pumÿ. Nhyam  
me te kator ne te ta ar ba  
prãmje.

Me kunÿdjwÿ ne me aben djô'ã tyn  
te tÿn ne ar ba rã'ã prãmje.

Nhyam be, Bênjadwÿr djwÿnh dja  
akubyn me tyko tÿn. Nhyam  
kam nhÿnhjakam me ajte  
tykmã? Arkati. Arÿm me tyk  
kêtkumrêx."

Nãm me amrêbê ã me bakukãmãremã  
ane nhyam me arÿm 'ã pi'ók no'ók  
ne. Nhyam kam me aben djô'ã  
arê:n arê:ho môr tãmtã:. Me  
bakamingrãnyre dja gu me ajte  
arê:ho bamôr tãmtã: arÿm 'ÿr o  
bôx. Mrãmri me batyk kêtkumrêx'ÿr  
o babôxkumrêx.

<sup>56</sup> Mÿjja kakrit kute me  
kamjÿrkôt ne me ty. Me  
axwekôtdjwÿ ne me tyn arÿm me  
biknor tokry djâkam akuno. Ne  
kam mÿj ne me kute amijaxwe mar  
on? Bir, me memã Môjdê kukràdjã  
jarê nhyam me arÿm amijã kuman  
amijaxwe ma. Ne kam arÿm te  
axwe kêt prãmje. Te: axwe kêt  
prãmje ar ba:n arÿm axwe pãnh  
tyn kam me biknor tokry djâkam  
akuno.

<sup>57</sup> Nhyam be, Metÿndjwÿnh ne  
ukaprikumrêx ne arÿm Bênjadwÿr  
djwÿnhbê Jeju Kritu jano. Nhyam  
kam arÿm gwaj bajaxwe pãnh tyn  
akubyn tÿn. Dja gwaj kôt te tyn  
akubyn batÿn. Akubyn batÿn ne ajte  
batyk kadjy kêtkumrêx, bajaxwe  
kadjy kêtkumrêx. <sup>58</sup> Kam, akmere,  
àpnhÿre, dja gar arek Bênjadwÿr  
djwÿnhkôt adjãm tÿx ne tu amim  
mar tÿxkumrêx. Kwãrÿk wãnh  
'ã adjukanga kêt. Mÿjja 'ókôt 'ã  
adjukanga kêt. Kum adjãpênh

kumex rã'ã. Bênjadwÿr djwÿnhkôt  
adjãpênhja kajgo kêtkumrêx.

## 16

*Metÿndjwÿnh nhô me ja kadjy  
pi'ók kaprÿ'ã kute memã karô ne ja.*

*Kar 11.29; Rô 15.25; A Kô 8.1;  
Xim k 6.18*

<sup>1</sup> Jakam Metÿndjwÿnh nhô me  
ja kadjy pi'ók kaprÿ'ã ije ar amã  
karômã. Dja gar Jeju nhô me  
jamã pi'ók kaprÿ jano. Ije krÿrãxbê  
Garaxakam me kute amim Jeju  
marjamã arê:nh kôt dja gar memã  
pi'ók kaprÿ jano.

<sup>2</sup> Pi'ók kamrêk kunÿkôt dja gar  
akunÿ me kadjy anhô pi'ók kaprÿ  
kwÿ jadjuw. Apÿnh ar anhô pi'ók  
kaprÿja nhidji kôt dja gar me kadjy  
kwÿ jadjuw. Ar anhô pi'ók kaprÿ  
rax jabej ar anhô rax kwÿ tan me  
kadjy adjuw. Nãr ar anhô ngrire  
jabej ngrire kwÿ tan me kadjy ad-  
juw. Adjuw ne o atom. Dja ba bôx  
nhyam arÿm o atom pro. O atom pro  
ba kubyn kam 'ã idjã'wÿr ar iba kêt.

<sup>3</sup> Dja ba bôx gar amim amikam  
me'ô aro amiptãn imã ar arê. Ba  
kam ar'ã pi'ók no'ók ne arkum  
kungãn arÿm krÿrãxbê Djeruxarê'ÿr  
ar ano. Gê ar pi'óko tÿn anhô pi'ók  
kaprÿo tÿ. Ne Djeruxarê'ÿr o tÿn o  
bôx ne memã kungã gê me omÿ. Ne  
kam arÿm ar mar katãt. <sup>4</sup> Nãr kon,  
gar me'ÿr ijanor prãm jabej ba dja  
ba me'ÿr aro tÿn aro bôx. Dja gar ã  
pi'ók kaprÿo ane. Tãm ne ja.

<sup>5</sup> Jakam dja ba ar awÿr itêm'ã  
ajarê. Wãm ar awÿr gêdja ba ï  
tÿn ar apumÿ. Gêdja ba pykabê  
Mateni kumrêxkam tÿ:n kam ajte  
amÿ ar awÿr tÿn bôx. <sup>6</sup> Ne kam ar  
akam arek idjãm jabej ar akam ijã  
na apêx jabej. Gar kam amÿ itêm  
kadjy ikôt o kangôn ijano. Ba kam o  
ajte amÿ itêm kadjy 'itÿx ne. <sup>7</sup> Djãm  
jakam dja ba ar awÿr tÿn bôx? Kati.  
Ne ba ren jakam ar awÿr tÿn ren ar  
akam idjãm 'iry kêt ne ren ajte amÿ  
tÿ. Arek ar akam idjãm 'iry kadjy ne

ba amima. Metîndjwýnh kute amim ijã karô kôt ikabênkumrêx jabej dja ba arým ã ar akam ane.

8-9 Nhyim be, krîraxbê Epexujakam ne ba idjâpênh mexkumrêx. Me kum idjujarênh kînh. Nãm me kute mrãmri ne me kute memã 'ã ijê djã'a 'yr ne memã, "Ajrã amrê wadjã", anhÿr pyrãk ne me kum idjujarênh kî:nh. Ba memã Kritu'ã ajarê nhym me ma:ro kumex. Nhyim me kwÿ krãptîdjwÿ kute ikapêrkãr ne ibê àptãr prãm kumrêx. Gêdja ba kam arek jakam ar iba. Ar iba: nhym me bikprônh djã nhô akatibê Pêxiko ijã apêx ba kam arým wãm itêmmã.

10 Nhyim godja Ximoxi ar akam bôx jabej dja gar kam kum akabên mexbit jarê. Abenmã ikabên ja jarê gê ar akam bôx gar amã abê. Ne kam kum akabên mexo akabên gê umar mex. Mÿkam dja gar ã kum ane? Bir, nãm ikudjwa mã Bênjadjwÿr djwýnhmã àpênh ba. Kam dja gar ã kum ane. 11 Kwãrîk wãnh ar ajô amã kurê kêt. Ne amrê ajte têm kadjy dja gar kôt o kangô gê tÿx ne umar mex ne amrê tẽ. Nã bãm amiwÿr kam amak ar o iba. Gwaj baje aro bakamy Ximoxikôt môrjadjwÿ ne ba amiwÿr arkam amak ar o iba.

12 Apôrdjwÿ ne ba o ikamy. Nã bãm te ar awÿr tẽmmã kum ikabên mex jarê nhym mã imã,

—Kati. Jakam me'ÿr itêm prãm kêt, ane. Ta dja 'ôkam arým ar awÿr tẽ.

13 Ar ajaxwebê amijã ano tÿx. Kritukôt adjãm tÿx ne tu amim mar tÿxo aba. Me kum Metîndjwýnh kînh kêtja dja gar amã me uma kêt ne atÿx. 14 Amã me abêbit. Amrãnh kunîkôt amã me kunî jabê.

15 Nhyim kam Exepa nhô kikrekam ar ja ne ar amrêbê Metîndjwýnh'ÿr amijo akêx. Pykabê Akajakam ar kumrêx 'ÿr amijo

akêx. Ja ne gar arým aje mar. Nãm ar mã Jeju nhô me ja kôt o kangônh ar o ba. Arkum me kôt o kangônh kînhkumrêx. 16 Dja gar ar kabên ma. Ne me kute ar kudjwa Metîndjwýnhmã àpênh tÿx ar o bajadjwÿ kabên ma. 17 Exepamê Potunamê Akaku ar arým amrê iwÿr bôx ba arým ikînhkumrêx. Gar amrê iwÿr abôx kêt ne ikôt o kangônh kêt. Nhyim kam ar arým iwÿr bôx ne ikôt o kangô. 18 Ba kam arým ikînhkumrêx ne. Wãkam ar gadjwÿ amybÿm dja gar arým aman idjô'ã akînhkumrêx. Dja ar wãm tèn bôx gar ar aman abenmã ar mex jarê.

*Kute apÿnh ôbikwa djãri kum amikabên mexjanor.*

19 Pykabê Adjijjakam apÿnh me kute amim Jeju mar ne ar aben pydjio ba djãri ne me ar amã kabên mex jarê. Ba me kuman arým pi'ók jakam wãm ar amã arê. Akwiremê Prixira ar amã kabên mex jarê. Arkum ar ajabê ne ar amã amijarê. Ar ûrkwãkam me kute amim Jeju mar ne ar aben pydjio bajadjwÿ ne me ar amã kabên mex jarê. Ba me kuman arým pi'ók jakam wãm ar amã arê. 20 Jakam gwaj bakamy kunî ar amã kabên mex jarê ba kuman arým wãm ar amã arê. Dja gar abenwÿr abôxkam abeno arôrök ne aben pa krij.

21 Ba ibê Paur ne ba inhikrao ar amã ikabên mex ja'ã pi'ók no'ók ne.

22 Godja ar akam me'ô kum Bênjadjwÿr djwýnh jabê kêt jabej Metîndjwýnh dja o ajkê nhym arým me biknor tokry djãkam akuno. Gêdja Bênjadjwÿr djwýnh bôxkumrêx. 23 Gê Bênjadjwÿrbê Jeju tu kum ar akapri.\*

24 Ota, jakam ba imã ar ajabêkumrêx. Kritu Jeju kum ar ajabê. Ba kôt imã ar akunî jabêkumrêx. Tãm ne ja.

\* 16:23 Djãm ar ga ne gar adjukapri nhym pãnh arým kum ar akapri Kati. Ta ne tu kum ar akaprikumrêx.

## **Paur kute Kôritukam me jamã atãri pi'ók no'ók ne ja.**

Paur ajte krĩraxbê Kôritukam me jamã pi'ók no'ók ne. Paur kum me abê nhym be me ja ne me Paur japryn 'ã abenmã kum,

—Kati, Metĩndjwýnh kute Paur janor kêt. Ta ne arĩk ar ba, ane. Kam ne Paur kaprĩ rax ne ajte memã pi'ók no'ók ne memã kum,

—E kum be mrãmri ne Metĩndjwýnh tu amim idjarkumrêx ne apýnh pyka kunĩkôt me ja'yr ijano, ane. Ne kam prĩne memã amijã ajarê. Amitokry djã kunĩkôt memã arê. Be, Metĩndjwýnh ne tokry japôkmã, umar punu japôkmã tu o týx ne nêje mýjja punuo ajngrã. Xatanaj ne memã mýjja punu ngã nhym be Metĩndjwýnh ne raxo Xatanaj jakre ne tu me nêje mýjja punuo bingrãno ba. Nãm ã Metĩndjwýnh umao kute nêje mýjja punuo bingrãno bao ane nhym Paur memã amijarên kam ajte memã apýnh mýjja'ã karô.

<sup>1</sup> Ba ibê Paur. Kritu Jeju ne ijano ba memã 'ã idjujarênh ar iba. Metĩndjwýnh kabênkôt ne ijano ba 'ã idjujarênh ar iba. Ximoxidjwý ne ikôt dja. Gwaj baje Ximoxio bakamy. Ba ne ba pi'ók no'ókkam ar amã ikabên jarê. Krĩraxbê Kôritukam ar aje amim Jeju mar ne kôt ar aben pydjio abaja ne ba ar amã ikabên. Bu'ã pykabê Akaja kunĩkôtdjwý Metĩndjwýnh kute ar ajo õ me ja ba ar amã ikabên. <sup>2</sup> Metĩndjwýnhbê ne me Babãm. Ne Bênjadjwýr djwýnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

\* 1:2 Djãm ar ga ne gar adjukaprĩ nhym ar pãnh arým kum ar akaprĩ Kati. Ar ta ne ar tu kum ar akaprĩkumrêx.

*Apýnh me kaprĩ djãri nhym  
Metĩndjwýnh akubyn meo kĩnh.*

*Kor 1.11; A Tex 2.16*

<sup>3</sup> Metĩndjwýnhbê Jeju Kritu Bãm. Kubê gwaj banhõ Bênjadjwýr djwýnhbê Jeju Kritu Bãm. Ba kum nextire jarê. Mýkam ne ba kum nextire jarê? Bir, me Babãm djwýnh ne ukaprĩkumrêx. Ga, me kaprĩ nhym Metĩndjwýnh kute me kunĩmã kĩnh jangjênhja pumũ. <sup>4</sup> Ar ba ne bar apýnh ar ikaprĩ djãri kuma. Bar amikanê man me Jeju'ã kum ar ikurê man apýnh ikaprĩ ja ma nhym Metĩndjwýnh arým kunĩkôt akubyn ar ijo kĩnh. Mýj kadjy ne ã ar ijo kĩnh ane? Bir, dja me'odjwý kaprĩ jabej bar amikudjwa akubyn o kĩnh nhym arým ar ikudjwa kĩnh. Metĩndjwýnh ta kute ar ijo kĩnh o dja bar ajte me'õo kĩnh. Ja kadjy ne ã ar ijo kĩnh ane.

<sup>5</sup> Amrêbê Kritu tokry: bar kôt arým itokry kumex ma. Memã 'ã idjujarênhkôt itokry ma nhym Kritu arým mã ar ijo kĩnh bar ikĩnhkumrêx. <sup>6</sup> Mýj kadjy ne bar itokry? Bir, dja bar itokry gar arým amim Metĩndjwýnh ma nhym arým ar apytã. Gar kam akubyn akĩnh. Te atokryn akubyn akĩnh ne. Nãr, godja bar akubyn ikĩnh jabej. Mýj kadjy dja bar akubyn ikĩnh? Bir, ar gadjwý dja gar kam akubyn akĩnh ne arým atokrykam atýx. Ne kam aje amim Jeju mar'ã adjukanga kêt. Godja gar atokry kute ar itokry pyrãk jabej ne kam arým ar ima. Ne kam ar ikudjwa atokrykam atýx ne aje amim Jeju mar'ã adjukanga kêt. Ja kadjy dja bar akubyn ikĩnh. <sup>7</sup> Itokryn mã: ikĩnh. Ne kam ar ajã amim,

—Godja ar ikudjwa tokry jabej ne kam ikudjwa ã kĩnh ane. Bar amim anen kam tu amim ar akĩnh kamnhĩxkumrêx.

<sup>8</sup> Akmere, àpnhĩre ar, bar ar amā pykabē Adjijkam itokry jarē gar ama. Ar itokry kume:x. Bar te: ikatomā te: amijo anen kam arým amikukām itykbitkam ama. <sup>9</sup> Mrāmri ne bar mǎ amim,

—Dja me ibĩ. Dja me ibĩ, anhȳr ar ibakumrēx. Mȳj ne bar kam kuma? Bir, dja me ar ikangrōnho ba, bar arým amikanàrrām ar iba kēt ne arým tu amim Metĩndjwȳnhbit kamnhĩxkumrēx. Ta kute akubyn me tyko tĩn djwȳnh dja bar tu amim kamnhĩx tȳxkumrēx. <sup>10</sup> Ta ne kute ar ityk jabē ar ipytār. Ar ityk pymatijabē ar ipytār ne kute kubē ar ipytār rǎ'ǎ. Ba tu amim kamnhĩxkumrēx ne amim,

—Mrāmri dja kubē ar ipytār rǎ'ǎ ne, ane. <sup>11</sup> Ar gadjwȳ dja gar ar ikōt o kangōn Metĩndjwȳnhmǎ ar ijo a'wȳ. O dja gar ar ikōt o kangō. Ar ikadjy Metĩndjwȳnh 'wȳr ar o aban o ar ikōt o kangō. Nhym kam arým ar akabēn man ar akabēnkōt kum ar ikaprĩn ar ipytā. Gar kam akĩnho akumex ne ar ikōt Metĩndjwȳnhmǎ amikĩnh jarē.

*Paur kute memǎ 'ēx kēt'ǎ amijarēnh.*

<sup>12</sup> Wākam me kwȳ ar ijǎ memǎ kum, “Paur ar 'ēxnhĩkumrēx”, ane. Djām mrāmri me kabēnkumrēx? Kati. Bar akubyn amijo tēn amrēbē ar akam ar ibaja'ȳr amijo bōx ne amiman amim,

—Kati. Nām me ijǎ 'ēx. Nhym bē ne ba mekam ijēxnhĩ ar iba. Kati. Ba ne ba Metĩndjwȳnh mexo imex ne mekam ar iba. Metĩndjwȳnh kōt ijēxnhĩ kētkumrēx ne mekam ar iba. Ibu'ǎ me kum Metĩndjwȳnh kĩnh kētja ba memǎ ijēx kēt. Nār, me kute amim Jeju marmǎ ijēx kētkumrēx ne mekam ar iba. Nǎ bām ǎ amimaro anen arým amikōt ar amǎ amijarē. Djām me kute amidjwȳnhbito kĩnhja we krǎ mex kōt ne bar ikrǎ mex ne ar akam ar iba? Kati. Ba ne ba ikrǎ mex kēt. Nhym be, Metĩndjwȳnh ta ne

tu kum ikaprĩ ba arým ikrǎ mex ne ar akam ar iba. Ba ar amǎ amikōt amijarēn amikam ikĩnhkumrēx. Amikam ikaprĩre kēt.

<sup>13</sup> Ije ar amǎ pi'ōk no'ōkkam ikabēn jarēnhdjwȳ. Djām ikabēn krǎptĩ? Kati. Ba ikabēn pȳnh ne arēn 'ǎ pi'ōk no'ōk gar arým omũn ama. Ba kam ar ajǎ amim,

—Dja me ĩ imar pydji. Ne imar pydji rǎ'ǎ ne. <sup>14</sup> Be, kraxje me kute prĩne imar mex kēt rǎ'ǎ. Godja me ĩ imar pydji. Nǎ bām ǎ ar ajǎ amim ane. Dja gar ĩ iman ikam akĩnhkumrēx kute mrāmri ne ije ar akam ikĩnh pyrǎk. Dja Bēnjadjwȳr djwȳnh akubyn bōx ba ar akam ikĩnhkumrēx. Nǎ bām ǎ ar amaro ane.

<sup>15</sup> Ar ije ǎ ar amaro anhȳrkam ne ba bit tēmbē ar awȳr itēm ne ibōx ne ije ar amǎ arēnh gar aje amim Jeju mar mexo amũ amikamēnhmǎ. Kam ne ba bit ajte akubyn ar akam ibōx ne ije ajte ar amǎ arēnh gar ajte o amũ amikamēnhmǎ. <sup>16</sup> Ba ar ajǎ amim,

—Dja ba me kumrēx 'ȳr bōx. Krĩraxbē Kōritukam me'ȳr bōx ne mekam ar iban amũ pykabē Mateni'ȳr tē. Ne kam Mateni kurũm akubyn tēn ajte mekam bōx. Nhym kam ajte amũ pykabē Djudēja'ȳr itēm kadjy godja me ikōt o kangō ba arým 'itȳx ne tē. Nǎ bām ǎ ar ajǎ amim ane. Nhym be, kati. Ar akam ibōx kēt. <sup>17</sup> Djǎ nǎ bām bit ar akam ibōxmǎ ne arĩk ikabēn dji? Kati. Djǎ nǎ bām me kum Metĩndjwȳnh kĩnh kētja kudjwa ikabēn amānhkrut ne ar amǎ,

—Nǎ. Dja ba ar awȳr bōx, anen atekam ajte amim,

—Kati. Dja ba ar'ȳr ibōx kēt, ane? Kati. Ikabēn amānhkrut kēt.

<sup>18</sup> Metĩndjwȳnh kute kabēn pȳnh ne arēnh ba ije kudjwa ikabēn pȳnh ne arēnh. <sup>19</sup> Bamē Xibanumē Ximoximē ne bar kaj bē ar amǎ,

—Metĩndjwȳnh Krabē Jeju Kritu dja gar tu amim markumrēx nhym



arým ar apytà, ane. Djā ne bar atekam ajte ar amā, “Kati. Dja ar apytār kêt”, ane? Kati. Dja gar tu amim markumrêx nhym nrāmri arým ar apytār kumrêx. <sup>20</sup> Metīndjwýnh ne gwaj bamā,

—Dja ba ĩ ar amā apýnh mýjja mex ngā. Ar aje tu amim Kritu markam dja ba ĩ ar amā kungā. Dja gar ikôt atīn ne ar aba rā'ā: rā'ā ne. Mýjja kumex dja ba ar amā kungā. Nām ā gwaj bamā anen kam kabēn pýnh ne arē. Kabēn pýnh ne arē gwaj arým mar pýnh ne abenmā kum,

—Mrāmri ne arēnhkumrêx, ane. Gwaj ā abenmā ane nhym Metīndjwýnh arým gwaj bakam kīnhkumrêx.

<sup>21</sup> Kritu ne kute gwaj bamā týx jangjēnh. Ar bamē ar gamē kute gwaj bamā týx jangjēnh gwaj tu amim mar týxkumrêx ne 'ā badjukanga kêt kumrêx. Nām gwaj bamā Karō jano nhym arým ar gwaj bajo ba. <sup>22</sup> Ga, me kute mýjja 'ā aminhidji nhôr nhym arým amirít kumrêxja pumū. Gwaj badjwý arým ne gwaj bamā Karō jano nhym arým gwaj bakam nhýn gwaj bajo ba. Gwaj kam arým amikam Karō man amim,

—Mrāmri ne Metīndjwýnh arým ijo krakumrêx. Ga, arým kute imā Karō janor nhym kute ijo bakumrêxja pumū, ane.

Gwaj amim anen arým kuma. Arým Metīndjwýnh gwaj bajo kra. Ja ne gwaj kuma. Karō kute gwaj bajo bakôt ne gwaj kuma. Ga, me kute memā mýjja rūnh nhōrmān kute kukām memā kryre nhōrja pumū. Nhym me amim kryre jamýn arým amiwýr rūnh kamnhīxkumrêx. Gwaj badjwý Metīndjwýnh arým gwaj bamā Karō jano nhym arým gwaj bajo ba. Gwaj kam arým amim,

—Ga, Metīndjwýnh arým kute imā Karō janorja pumū. Ga, kute ijo baja pumū. Mrāmri dja ba

kājkwakam kôt itīn ne ar iba rā'ā: rā'ā ne, ane. Karō gwaj bajo ba gwaj kam amim anen kam arým baje mrāmri ja markumrêx. Mrāmri kājkwakam Metīndjwýnhkôt batīn rā'ā: rā'āja markumrêx ne amiwýr kamnhīxkumrêx.

<sup>23</sup> Amrêbê ne ba pi'ôkkam ar amā me'ô jaxwe jarē. Me'ô jaxwe: ar akam ar ba gar ate akrā nhym arek ar akam axweo ba rā'ā. Ba ren on ar awýr bôx ne ren arým 'ā ar amā ikabēn ne ren ar amā kaprī jadjā. Ije ar amā akaprī jadjār karō ne ba on ajte Kōritukam ar awýr ibôx kêt. Mrāmri ne ba ar amā amijarēnhkumrêx. Metīndjwýnh ne kute imar. Nok ba ren ar amā ijêx nhym ren ajmā ijon. Mrāmri ne ba ar amā amikôt amijarēnhkumrêx.

<sup>24</sup> Ar aje amim Bēnjadjwýr djwýnh Jēju marmā ne bar ar awýr ibôxmā. Djām ar ije ar akam amijo ibēnjadjwýr ne ibamā? Kati. Ar ba ne bar ije ar amā kāj mā akīnh kamēnhmā. Kritu pydjibit ar aje tu amim markumrêxmā. Tām dja ar ajaxwebê ar amā týx jadjā gar mā kôt ar amijo aban 'ā adjukanga kêt.

## 2

<sup>1</sup> Ar akaprī karō ne ba amim,

—On me'ýr itēm prām kêt. Nok ba ren me'ýr bôx ne ren memā kaprī jadjār mex ne, ane. <sup>2</sup> Nā bām ren ar amā kaprī jadjār mex nhym mýj me'ôja ren ijo kīnh? Gar ren akaprīkam te aje ijo kīnhmā.

<sup>3</sup> Kam ne ba amrêbê amikukām ar amā pi'ôk no'ôkkam ikabēn jarē. Ar aje ikutêp abeno mexmā ne ba ar amā arē. Ba ar awýr itēm ne ibôx ne ije ar apumūnh ne idjumar punu kêt kadjy ne ba ar amā arē. Ar aje ijo kīnhmā ne ba bit tēmbê ar awýr itēm ne ar awýr ibôxmā nhym ren ate ar akwý imā idjumar punu jadjā. Ar akwýkam idjumar punu karō ne ba amrêbê amikukām ar amā pi'ôk no'ôk ne. Nā bām ar amexkam amakbê amim ar akunī

kamnhīx ne. Ba ar awȳr bōx gar iro'ā akīnh kadjy ba tu amim ar amex kamnhīxkumrēx ne. <sup>4</sup>Nā bām ar akam idjumar punu rax ne ikadjwŷnhbê itokry kumex man mu:w. Djām ije ar amā ar akaprī jadjār kadjy ne ba ar amā pi'ōk no'ōk? Kati. Ar aje imar kadjy. Imā ar ajabê:ê. Ar aje imar kadjy ne ba ā amrēbê amikukām ar amā pi'ōkkam ane.

*Me kute me'ō axwe maro biknor'ā kute memā karō.*

*Ruk 17.3; Gar 6.1; Ep 4.32*

<sup>5</sup>Ije amrēbê pi'ōkkam ar amā me'ō jaxwe: jarēnhja djām bajbit ne imā ikaprī jadjā? Kati. Ar gadjwŷ ne ar akunīmā kaprī jadjā. Ba ar amā iprīren ar amā me'ō jaxwe jarē. <sup>6</sup>Aje, kwārīk wānh ajte ijukri me'ōjamā kaprī jadjār kêt. Mrāmri amrēbê me'ōja axwen kam arŷm kaprīre. Ar akrāptī arŷm axwe pānh kum kaprī jadjā. Jao dja gar krāta. Kwārīk wānh ajte kum kaprī jadjār kêt.

<sup>7</sup>Jakam dja gar on me'ōja jaxweo aknon ajte mar kêt. Ne kam tu o kīnh gē akubyn tŷx ne. Gar ren kum kaprī jadjār rā'ā nhym ren kaprībê te amijo anen arŷm rerek mex ne. <sup>8</sup>Dja gar ajte kum,

—Mrāmri ar imā ajabêkumrēx, ane. Dja gar kum ane gē on kaprī kêt.

<sup>9</sup>Be, ije amrēbê ar amā ikabēn'ā pi'ōk no'ōkja ije ar amar kadjy ne ba 'ā pi'ōk no'ōk. Ije 'ā pi'ōk no'ōk kadjy ba amikabēn man amim,

—Ba arkum ikabēn mex jarē gē ar iman goja ikabēn kôt amijo ba jabej, ane. Ar aje ikabēn kunī mar ne kôt amijo aba jabej ne ba ar amā pi'ōk no'ōk. <sup>10</sup>Godja gar me'ō axwe'ōo abiknor jabej ba badjwŷ arŷm axweo aknon mar kêt ne. Mrāmri me'ōja axwekumrēx jabej ba arŷm axweo akno, ar adjumar mex kadjy arŷm o akno. Kritu kukwakam ba arŷm axweo aknon arŷm mar kêt ne. <sup>11</sup>Djām ije

axwe mar rā'ā? Kati. Arŷm ba o aknon mar kêt. Ba ren axwe mar rā'ā nhym ren Xatanaj arŷm gwaj banoo akno. Nām me noo biknoro ba. Ja ne gwaj baje prīne mar.

<sup>12</sup>Be, ba amrēbê krīraxbê Krōwadjī'ȳr tēn 'ȳr bōx. Ije kaj bē memā Kritu'ā ujarēnh ny jarēnh kadjy ba Krōwadjī'ȳr tēn 'ȳr bōx. Ne kam memā Kritu jarē nhym kam me kum kīnh ne ma:ro kumex. Nām me kute mrāmri ne me kute memā kikre'ā ije djā'ā rēnh ne memā, “Ajrā amrē wadjā”, anhŷr pyrāk. <sup>13</sup>Nām me ā kum Kritu'ā ujarēnh ny kīnh ane. Me te kum kīnh ba idjumar punu rā'ā ne. Nā bām kam bōx ne te ikamy Xitu jabej ne kum ikator kêt. Xituo ne ba ikamy. Kum ikator kêt kam idjumar punu. Ne kam memā, “Ba on”, anen arŷm amū pykabê Mateni'ȳr Xitu jabej tē.

*Me kudjŷ djào me kurwŷk mōrja Paur kute amijā akre.*

*Ep 5.2; Pir 4.18*

<sup>14</sup>Bar te idjumar punun mā Metūndjwŷnhmā ar amikīnh jarē. Mŷkam? Bir, ta ne ar ijo djuw mex bar mā Kritu kôt ar amijo iban mā ikīnh. Ikīnh kute mrāmri ne me kute me kurē djwŷnh'ȳr meo ban kute 'ā aprār̄n akubyn ōbikwa tēpo ban kurwŷko pōx ne kīnhja pyrāk. Nām ā Kritu kôt amijo ibakam ikīnh ane.

Ga, me krākamngōnh krāptī: akubyn kurē djwŷnh kurūm ban kurwŷko pōx nhym me kute kukām prykôt pidjōrā rēnh ne kute kudjŷ djā kudjŷ tŷx bōr nhym kudjŷ:ja pumū. Nhym kam ardjānh me kunīkôt prōt ne kute me kunīo bikamŷr ja pumū. Ar badjwŷ ne bar pyka kunīkôt Kritu'ā memā idjujarēnh iba nhym me arŷm pyka kunīkôt 'ā idjujarēnh ma. Kritu ta kute kudjŷ djā mestire pyrāk bar me kunīmā 'ā ajarē.

<sup>15</sup>Nā bām ar ā anen kam arŷm Metūndjwŷnh kīnh. Kute mrāmri ne

me kute kum kudjy djā mextire bōr nhyr ardjānh 'yr ābir nhyr kute bārñ kīnhja pyrāk. Nā bām ar ā kum anen kam arym me jamādjwý ā ane. Metīndjwýnh kute amim me utārjamē kute me kangajamē amē me jamā ne bar ije mýjja kudjy mextire pyrāk ne memā Kritu'ā idjujarēnh iba.

<sup>16</sup> Nhyr be, me ja ne me kum Kritu 'ā ar idjujarēnhja kīnh kēt. Ar ije mýjja kudjy mextire ja pyrāk me kum kīnh kēt. Metīndjwýnh kute me kanga nhyr me me biknor tokry djākam biknor ja kadjy ne me kum kīnh kēt. Nhyr be, ate me ja ne me kum Kritu'ā ar idjujarēnhja kīnh. Ar ije mýjja kudjy mextire ja pyrāk me kum kīnh. Metīndjwýnh kōt me tīn ne ar ba kadjy ne me kum kīnh. Be, mýj me'ō ta ne āpēnh djā ja kadjy týx? Kritu'ā ujarēnh kadjy týx. Djām ar ba? Arkati. Nhyr be, Metīndjwýnh ne ar ijo ban ar imā týx jangij bar me kunīmā 'ā idjujarēnh ar iba. <sup>17</sup> Nhyr kam me krāptī kute arīk Metīndjwýnh kupa'ā kabēn jarēnh punu. Djā ne bar me kudjwa ā arēho ane? Kati. Ar ba ne bar amijāno djan Metīndjwýnh kukwakam katāt arēnhkumrēx. Metīndjwýnh ta ne ar ipumūnhō nhý. Ar ije kupa'ā arēnh nhyr kute ar imā o pānh karō ne bar ā katāt arēnhō ane. Kritu ar imē amijo kajkep bar katāt arēnhkumrēx ne.

### 3

*Paur ta kute amimex'ā amijarēnh kēt.*

<sup>1</sup> Djām mrāmri ne ba ije ajte ar amā amimex jarēnhmo kraxja? Kati. Ar ba ne bar ije amimex jarēnh kēt. Djā ne bar me kwý kudjwa memā, nār kon ar amā,

—Memā ar imex'ā pi'ōk no'ōk ne ar imā angā bar memā o tēn o bōx. O bōx gē me arēn arym ar imex man kum ar ikīnh, ane? Ne kam ar amā pi'ōko tēn o bōx gar arēn kōt

arym ar imex man ar amā ar ikīnh? Kati. Ar ba ne bar imā imex'ā pi'ōk no'ōk prām kēt. Me kwý ne me mrāmri kum amimex'ā pi'ōk no'ōk prām kumrēx. Nhyr be, ar ba ne bar imā prām kēt.

<sup>2</sup> Mýkam ne ar bajbit ar imā amimex'ā pi'ōk no'ōk prām kēt? Bir, ar ga ne gar aje ar imex'ā pi'ōk no'ōk pyrāk. Ar ba ne bar ar amā Kritu jarē gar ar idjō'ā 'yr amijo akēx. 'Yr amijo akēx nhyr arym ar ajo mex ne. Ar idjō'ā ne gar amex. Nhyr kam me kunī kute ar idjō'ā ar amex pumūnh ne kute ar amar. Ne kam jām kute ar badjwý ar imex mar. Me kute ar apumūnh kute mrāmri ne me kute ar imex'ā pi'ōk no'ōk pumūnh pyrāk. Tām ne bar kuman ar amā,

—Ar ga ne gar aje ar imex'ā pi'ōk no'ōk pyrāk, ane. Ar badjwý ar ije ar amex pumūnh ne ije ar amar ne arym imā ar ajabē.ē. Me kunī ne me kute ar amar.

<sup>3</sup> Kritu ta ne ar amā ajamak bō gar adjumar djā ny. Nām ar ajo kute mrāmri ne me kute pi'ōk no'ōk pyrāk. Ar ba ne bar amā Kritu'ā ajarē gar arym tu amim markumrēx. Nhyr kam arym ar amā ajamak bō gar adjumar djā ny. Ga, Metīndjwýnh Karō tīn ne ar baja ne kute ar amā ajamak bōnh gar adjumar djā nyja pumū. Kritu ne Karō ar amā ajamak bō. Ga, me bakukāmāre kute mýjja týxo kēnpō'ā no'ōkja pumū. Djām ā Kritu ar ajo ane? Kati. Bar ar amā Kritu'ā ajarē gar arym tu amim markumrēx ne arym adjumar djā ny.

<sup>4</sup> Ar ba ne bar ar amā arē nhyr Kritu arym ar ajo mex. Tām ne bar ije markumrēx nhyr mrāmri Metīndjwýnhdjwý kute ar imar. <sup>5</sup> Djām kam ar ba ne bar ije amim,

—Ba ne ba ije aro mex, anhýro iba? Kati. Metīndjwýnh ta ne ar imā 'ā karō bar arym ar amā Kritu'ā

ajarê nhyam kam ta arým ar amã  
ajamak bô.

*Metîndjwýnh kute Kritu'ã kabên  
ny jarênh mãmđji.*

<sup>6</sup> Ta ne me kadjy ar imã ija-  
mak mex jadjà bar memã arênh  
iba. Metîndjwýnh ne kute Kritu'ã  
kabên ny jarênh mãmđji bar arým  
kuman memã arênh iba. Djã nã  
bãm Môjdjê kudjwa memã kabên'ã  
kênpoti no'ók tùmja jarênh iba?  
Kati. Metîndjwýnh Karô ne bar  
memã arênh iba. Mýkam ne bar  
memã kabên tùm jarênh kêt? Bir,  
ba ren ar memã tùm jarê nhyam  
ren me te: kute katàt kôt amijo  
ba prãmje ne ren ta amikôt axwe  
rà'ã ne. Ne kam ren arým pãnh me  
biknor tokry djakam akuno. Nhyam  
be, kati. Bar memã Metîndjwýnh  
Karô jarê nhyam me arým maro ba  
nhyam ta arým katàt meo ba. Nhyam  
kam me arým Karôkôt tïn ne ar ba  
rà'ã: rà'ã ne.

<sup>7</sup> Me memã kênpotikam kabên  
jarênh ba nhyam me arým mar kaj-  
gon ta amikôt axwe rà'ã. Ne kam  
pãnh arým akuno. Metîndjwýnh  
mýjja týxo kênpoti týx no'ók ne.  
Nhyam kam Metîndjwýnh mexo  
umakôt Môjdjê nokre jadjênh  
ne arým kênpoti mýn memã o  
bôx. Ne kam memã Metîndjwýnh  
kabên jarênh dja nhyam kabên  
me:xkumrêx nhyam me maro dja.  
Maro djan te kute nokre 'ãno ãm  
ne omũnhmã. Metîndjwýnh mexo  
uma djô'ã ne Môjdjê nokre jadjênh  
nhyam me te kute omũnhmã. Nhyam  
kam adjênh apêx tẽ:n arým tu  
apêxkumrêx. Nhyam Metîndjwýnh  
kute Môjdjêmã kabên jarênh  
tùmjadjwý. Djãm me kute kabên  
tùm kôt katàt amijo bamã? Kati.  
Me ta te: katãtmãn axwe rà'ã ne.

<sup>8</sup> Nhyam be, Metîndjwýnh Karô ne  
gwaj bamã kabên ny jarê. Kute  
gwaj bamã arênh ja ne mexo kute  
Môjdjê kabên tùm jakrenh mex ne.  
<sup>9</sup> Djãm Metîndjwýnh kute Môjdjêmã

kabên jarênh tùm punu? Kati.  
Mexkumrêx. Nhyam be, nãm me  
te memã Môjdjê kabên tùm jarê  
nhyam me axwe rà'ã ne. Me ta  
amikôt axwe rà'ã ne. Axwe rà'ãn  
kam pãnh arým me biknor tokry  
djakam akuno. Nhyam be, gwaj Karô  
kabên ma nhyam arým gwaj bamã  
týx jadjà gwaj arým katàt kôt ar  
amijo baba. Kam ne Metîndjwýnh  
Karô kabên nyja arým mexo Môjdjê  
kabên tùm jakrenh mex ne.

<sup>10</sup> Kabên nyja kute tùmja jakrenh  
mex nhyam tùmja me arým kute  
kum kïnh kêt pyrãk. <sup>11</sup> Tùmja me  
kute 'ã ukangan mar kêtãmã. Nhyam  
be, pãnh kabên nyja dja me mar  
rà'ã ne kôt amijo ba rà'ã ne. Kam  
nyja ne mexo kute tùmja jakrenh  
me:xi.

<sup>12-13</sup> Bar Karô kabên ny mar  
rà'ãn tu amiwýr kute mýjja jarênhja  
kamnhïxkumrêx ne irãri memã  
kabên ny jarênh amirïtkumrêx.  
Nhyam be, Môjdjê ta ne kubêkào  
aminokre'ã pro. Metîndjwýnh  
mexo uma djô'ã nokre jadjênh  
ne kam mebê idjaer kute omũnh  
kêt kadjy aminokre'ã pro. Nhyam  
kam adjênh arým apêx. <sup>14-16</sup> Me  
abendjô'ã Metîndjwýnh kabên tùm  
jarê. Ne akati jakam kute arênh  
rà'ã ne.

Nhyam be, me kam amakkre kêt  
tẽ:n amakkre kêt rà'ã. Akati jakam  
me amakkre kêt rà'ã. Ga, gwaj baje  
kubêkào banokre'ã prokam baje  
mýjja ngrirebit pumũnhja pumũ.  
Mebê idjaerdjwý ne me kute  
Metîndjwýnh mar ngrire. Nhyam be,  
me kwý arým Bênjadjwýr djwýnh'ýr  
amijo akêx ne kôt ar amijo ba. Kôt  
ar amijo ban arým mar rax ne.

Ga, gwaj baje kubêkào banokre'ã  
pro kêt kam baje mýjja pumũnh  
rũnhja pumũ. Mebê idjaer kwýdjwý  
ne me Metîndjwýnh mar rũnh. Nãm  
me Bênjadjwýr djwýnh'ýr amijo  
akêx ne kôt ar amijo ba. Ne kam  
arým Metîndjwýnh mar rũnh ne.  
Nhyam be, me kute Bênjadjwýr

djwŷnhkōt amijo ba kêtja ne me kute Metŷndjwŷnh mar kryre. Me amakkre kêtka.

<sup>17</sup> Be, Bēnjadjwŷr djwŷnhjabê ne Metŷndjwŷnh Karō. Bēnjadjwŷr djwŷnh Karō arŷm gwaj bamê amijo kajkep. Djā ne gwaj kam arek amim,

—Ba katāt Mōjdjê kabēn man kōt ar amijo iban arŷm Metŷndjwŷnhmā ijaxwe kêt, anhŷro baba? Kati. Gwaj baje amim anhŷr kêt. Metŷndjwŷnh ta ne gwaj bamā axwe kêt jarê gwaj arŷm kum bamex ne.

<sup>18</sup> Ga, me kute kubêkào aminokre'ā pro kêtka kute mŷjja pumŷnh rŷnhja pumŷ. Gwaj badjwŷ baje Bēnjadjwŷr djwŷnh mex mar rax. Ga, me kute ixekam mŷjja kumex pumŷnh mexja pumŷ. Gwaj badjwŷ ā Metŷndjwŷnh mar mexo ane. Ne maro baba:n arŷm kōt ar amijo baba. Ta kute amijo ba pyrāk kōt ar amijo baba. Kōt ar amijo baba: nhym arŷm amikōt gwaj bajo mexo tē. Gwaj kam arŷm bamexo amŷ amikamēn arŷm ta mexo bamex ne. Mŷj me'ō ne kute gwaj bajo mex? Bir, Bēnjadjwŷr djwŷnh Karō ne kute gwaj bajo mex.

## 4

*Paur kute memā Kritu'ā ujarēnh'ā amijarēnh.*

*A Kō 1.12; Tex k 2.1*

<sup>1</sup> Metŷndjwŷnh kum ar ikaprŷkam ne ar imā me'ā karōn ar imā,

—Dja ga memā Bēnjadjwŷr djwŷnhbê Kritu'ā ujarēnh nyja jarēho aba, ane. Kam ne bar arŷm memā arēho iba. Djā ne bar memā arēnh'ā idjukanga? Kati. Bar memā arēnh'ā idjukanga kêtka kumrēx ne memā arēnh ar o iba.

<sup>2</sup> Djā ne bar memā arēn ate mebê amipdjun mebê mŷjja kupēnh o iba? Kati. Amrêbê: ne ba mebê amipdjun mebê mŷjja kupēnhja kanga. Djā ne bar ari memā ijêx ne me noo ibiknoro iba? Nār ijêxnhŷn ari me noo ibiknor ne Metŷndjwŷnh

kabēn kupa'ā memā mŷjja kwŷ jarēho iba? Arkati. Ar ba ne bar katāt memā arēho iba. Ar ije memā Kritu kabēn jarēnhkam djā ne bar ajmā ikuten kupa'ā amijo iba? Kati. Kritu kōt ne bar katāt ar amijo iba. Metŷndjwŷnh ta ne kute ar ipumŷnh. Bar katāt ar amijo iban kam katāt memā arē nhym me arŷm amim,

—Nā. Nām ar katāt me bamā arēnhkumrēx. Ga, katāt ar kute amijo baja pumŷ. Ar mexkumrēx. Dja ba amim ar kabēn ma, ane. Dja me kunŷ ar ipumŷnh kwŷ arŷm ā amim ane.

<sup>3</sup> Bar memā Kritu'ā ujarēnh ny jarēho iba. Djām kam mrāmri we Kritu'ā ar idjujarēnhja bipdjurkumrēx? Kon. Mrāmri, me kwŷ biknor prāmjabê bipdjurkumrēx. Ga, me kute kubêkào aminokre'ā pron mŷjja pumŷnh kêtja pumŷ. Mŷjja mebê bipdjur. Me biknor prāmdjwŷ mebê ikabēn bipdjurkumrēx.

<sup>4</sup> Kritumē Metŷndjwŷnh ar. Djām ja ne uma rax nhym ikjê uma ngrire? Kati. Ar umao kute aben pyrāk. Me kum amē ar uma:. Bar memā Kritu'ā ujarēnh ny jarē. Ujarēnh ny kute mrāmri ne memā irā djā pyrāk. Gwaj baje amim Kritu markam gwaj baje mrāmri ne me kute irākam mŷjja kunŷ pumŷnh mex pyrāk. Nhym be, nā bām ar me biknor prāmmā ujarēnh ny jarē nhym mebê bipdjur nhym me kute amim mar kêtê. Me kute mrāmri ne me no rā kute mŷjja pumŷnh kêt pyrāk, ne te: kute marmā. Me kum Metŷndjwŷnhkumrēx kŷnh kêtja nhō metŷndjwŷnh, Xatanaj ne arŷm memā amakkre kêt jadjā nhym me arŷm ajbit maro ba. Nhym kam arŷm mebê Kritu'ā ujarēnh nyja pytāro ba. Kam ne Kritu'ā ujarēnh nyja mebê bipdjurkumrēx.

<sup>5</sup> Djā nā bām ar memā,

—Ar ba dja gar tu amim ar imarkumrēx bar kam arŷm ar

apytà, anhỹro iba? Kati. Bar kàj bē memā kum,

—Jeju Kribubē ne me kunĩ nhō Bēnjadjwỹr djwỹnh. Tām dja gar tu amim markumrēx nhym arỹm ar apytà, anhỹro iba. Ā Jejumā ar idjāpēnh kute anhỹrkam ne bar ar amā idjāpēnh ar iba.

<sup>6</sup> Be, adjākamā Metĩndjwỹnh ta kabēn ne, “Akamāt kō tykbit. Gē on a'u. Gē a'u akamāt kurwỹ”, ane.

Ga, a'u kute mỹjja kunĩ kurwỹkam mỹjja kunĩ arỹm memā amirĩt mexja pumũ. Metĩndjwỹnhdjwỹ ne arỹm gwaj bamā bajamak bō gwaj arỹm Kritu mar mex ne. Metĩndjwỹnh ne kute mexo, umao me kunĩ jakrenh. Tām ne gwaj arỹm kuma. Kritu ne kute amijo ba mexkumrēx gwaj arỹm 'ā ujarēnh ma. Gwaj baje Kritu mar o ne gwaj baje arỹm Metĩndjwỹnh mar. Metĩndjwỹnh ne kute mexo, umao me kunĩ jakrenh. Tām ne gwaj baje Kritu mar o kuma.

*Me kute ngyo ngōnh pyrāk nhym Metĩndjwỹnh mekam ỹr.*

*A Kō 11.23; Kor 1.11*

<sup>7</sup> Nhym be, gwaj ba ne gwaj baje mrāmri ne ngyo ngōnh pānh ngrire pyrāk. Gwaj bapānh ngrire. Te gwaj bapānh ngrire nhym gwaj bakam Metĩndjwỹnh nhỹ. Metĩndjwỹnhbē kumkati nhỹ. Mỹj kadjy ne gwaj bakam nhỹ? Bir, Metĩndjwỹnh ta dja gwaj bakam amityxo amirĩt nhym me arỹm ajbit rax ma. Dja me gwaj bamar kēt ne arỹm Metĩndjwỹnh ajbit ma. Ja kadjy ne gwaj bakam nhỹ.

<sup>8</sup> Ar ije ngyo ngōnh pānh ngrire pyrāk. Me arĩk ar ibu'ā ar ijā kabēn punu krāptĩ. Me ā kabēn pytĩ: ane. Djā ne kam bar Jejumā idjāpēnh'ā idjukanga? Kati. Bar 'ā idjukanga kēt ne kum idjāpēnh rā'ā. Ne mā amim,

—Mỹj godja bar amijon? Mỹj godja bar amijon? ane. Djā nā

bām ar kam amim Metĩndjwỹnh kamnhĩx kēt got? Bar tu amim kamnhĩxkumrēx.

<sup>9</sup> Me ar ijo bikēnho ba. Djām kam Metĩndjwỹnh kute ar ikanga got? Kute ar ikanga kētkumrēx. Nhym me arỹm pyka'ā ar imē bar nō. Djām kam bar arỹm ty? Kati. Ar itĩn ne ar iba.

<sup>10</sup> Akati kunĩkōt me kute ar ibĩn pyma. Kute mrāmri ne amrēbē Jeju akati kunĩkōt me kute bĩn pyma pyrāk. Nā bām ā ar ije amikam me kute ar ibĩn pyma maro ane. Dja te me kute ar ibĩn pyma nhym Jeju mā ar ikam tĩn ne ar ijo ba. Bar kam itĩn ne nhym me arỹm ar ijā abenmā kum,

—Ga, ar tĩn rā'āja pumũ. Mrāmri Jeju tĩn ne ar ba. Tām ne ar utār ar o ba, ane.

<sup>11</sup> Bar Jejumā idjāpēnh ar iba nhym akati kunĩkōt me ar ibĩn pyma. Bar kam itĩn rā'ā ne. Nhym kam me arỹm ar ijā abenmā kum,

—Ga, ar tĩn rā'āja pumũ. Mrāmri Jeju tĩn ne ar ba. Ta ne ar utāro ba, ane. <sup>12</sup> Me kute ar ibĩn pyma bar itĩn rā'ā. Gar kam arỹm ar ipumũn arỹm tu amim Jeju markumrēx ne arỹm kōt atĩn ne ar aba rā'ā: rā'ā ne.

<sup>13</sup> Kam ne me amrēbē: memā kum,

“Ba ne ba tu amim Metĩndjwỹnh markumrēx. Ne kam arỹm memā arēnho iba.”

Nām me ā me bakukāmāremā ane nhym me arỹm 'ā pi'ók no'ók ne. Ar badjwỹ ne bar tu amim Metĩndjwỹnh markumrēx ne kam memā arēnho iba. Dja te me kute ar ibĩn pyma bar tu amim Metĩndjwỹnh markumrēx ne mā memā arēnh ar o iba.

<sup>14</sup> Nhym be, godja me mrāmri ar ibĩn jabej mỹj dja bar kam ikute? Metĩndjwỹnh ne arỹm akubyn Bēnjadjwỹr djwỹnh Jejuo tĩn ne. Ta dja Jejukōt akubyn ar badjwỹ ar ijo tĩn ne ar ijo mōn arỹm amikabem ar ipumjuw. Ar gamē dja gwaj baro'ā kabem baku'ē. Tām ne bar tu amim

markumrēx. <sup>15</sup> Akati kunīkôt me kute ar ibīn pyma. Bar itokry ne ikaprīre maro iba. Mỳj kadjy? Bir, ar akadjy. Bar te itokry kumex nhym Metīndjwýnh mã kum ar ikaprī bar mã memã Kritu jarēnho iba. Gar kam arým ar ipumūn arým Metīndjwýnh djukaprī: man kam arým akī:nhkumrēx. Akī:nhkumrēx ne kum,

—Djūnwã, adjukaprī:kumrēx. Imã akī:nhkumrēx, anhýro aba. Nhym gwaj babu'ã me krãptī: gwaj bapumūn arým kum Metīndjwýnh kīnh. Ne kam tu amim markumrēx ne adjwýnhdjwý kī:nhkumrēx. Kī:nhkumrēx ne arým kum,

—Djūnwã, adjukaprī:kumrēx. Imã akī:nhkumrēx, anhýro ba. Dja me krãptī: kum amikīnh jarē nhym Metīndjwýnhdjwý arým kīnhkumrēx. Ja kadjy bar itokry o iba.

<sup>16</sup> Dja me krãptī: kum amikīnh jarē. Bar amikukãm ja man mã kam ikīnh nhym kam arým irerek iwýr bõx kêt. Memã ar idjujarēnhkôt bar itokrymē ikaprī maro iba. Maro iba: nhym arým ar ibē ar inhī kator mex ne. Nhym be, djãm kam ar irerekre? Kati. Te ar ibē ar inhī kator mex bar mã ikīnh ne mã 'ityx ne. Akati kunīkôt mã 'ityx ne.

<sup>17</sup> Mỳj ne bar kuman mã ikīnh ne mã 'ityx ne? Bir, djãm me kute ar ijo bikēnh rã'ã rã'ãmã? Kati. Me kute ar ijo bikēnh 'ikrãn ne. Kam dja bar Metīndjwýnh'ýr tēn bõx ne ikīnhkumrēx. Djãm kam ar ikīnh 'ikrãn ne? Kati. Dja bar kam ikīnh rã'ã: rã'ã ne. Jakam ar ikaprīre. Metīndjwýnhkôt dja bar ikīnhiti:re. Tãm ne bar kuman mã ikīnh ne mã 'ityx ne.

<sup>18</sup> Djãm gwaj baje mỳjja pumūnhja ne bar kôt ijamak bēn? Me kute ar ijo bikēnh ja nār ar itokry ja nār ar ikaprī ja djãm kôt ne bar ijamak bēn? Kati. Mỳjja pumūnh kêt kôt ne bar ijamak bēn 'ãno dja. Gwaj baje mỳjja pumūnh

ja dja ī kêt ne. Nhym be, gwaj baje mỳjja pumūnh kêt ne rã'ã: rã'ã ne. Metīndjwýnhkôt ar baban bakīnhiti ja ne baje omūnh kêt rã'ã. Kàjkwakam õ mỳjja baje omūnh kêt rã'ã. Mỳjja ja ne rã'ã: rã'ã ne. Ar ije mỳjja pumūnh kêt jakôt bar ijamak bēn 'ãno dja. Ne kam mã ikīnh ne mã 'ityx.

## 5

*Atemã me ī ny'ã ujarēnh.*

*Pir 3.21*

<sup>1</sup> Be, gwaj banhī ja kute mrãmri ne kubêkatio kikre pyrãk. Pykakam ar babari gwaj kam nhý, banhī kute kubêkatio kikre pyrãk ja kam nhý. Ga, me kute tēmbê kubêkatio kikre ngrãnhja pumū. Gwaj badjwý gwaj on ty. Nhym be, arým gwaj batykkam gwaj arým Metīndjwýnh'ýr tēn arým atemã banhī ny. Metīndjwýnh dja gwaj banhī ny nhípêx gwaj kôt ar baba rã'ã: rã'ã ne. Tãm ne bar ije markumrēx. Gwaj banhī ny ne kute gwaj banhūrkwã ny pyrãk.

<sup>2</sup> Dja gwaj kàjkwamã tēn arým banhī ny. Kute mrãmri ne me kute kubêkã tūmo pôx ne ny jangjēnh pyrãk dja gwaj banhī ny. On jakam gwaj bamã banhī ny prãm. Gwaj banhī ny prãmje kam ama:n kam amakbê bakangãngã. On gwaj banhī ja katyk ne tokry djaje bakangãngã. <sup>3</sup> Gêdja gwaj arým kàjkwakam banhī nyn bakajgo kêt. Ne bakadjwýnhbit ar baba kêt. Gwaj banhī.ī.

<sup>4</sup> Jakam gwaj banhī ja, kute kubêkatio kikre pyrãk ja, gwaj kam ar babari bakangãngã. Batokry djaje bakangãngã. Djãm on gwaj bamã banhī kangan bakajgo prãm, kàjkwakam bakajgo ar baba prãm? Kati. Gwaj bamã on kàjkwakam banhī ny prãm. Ne kam arým batyk kêt ne banhī nyn batīn ne ar baba rã'ã: rã'ã ne.

<sup>5</sup> Ja kadjy ne Metĩndjwỳnh gwaj banhipêx. Gwaj batĩn ne ar baba rã'ã rã'ã kadjy ne gwaj banhipêx. Ga, me kute memã mỳjja rũnh nhõrmãn kukãm kute mỳjja kryre nhõrja pumũ. Me amim kryre jamỳn arỳm amiwỳr mỳjja rũnh kamnhĩxkumrêx. Gwaj badjwỳ. Metĩndjwỳnh arỳm gwaj bamã Karõ jano nhym arỳm gwaj bajo ba gwaj arỳm amim,

—Ga, Metĩndjwỳnh arỳm kute imã karõ janorja pumũ. Ga, arỳm kute ijo baja pumũ. Mrãmri dja ba kãjkwakam kõt itĩn ne ar iba rã'ã: rã'ã ne, ane. Karõ kute gwaj bajo bakam dja gwaj ã amim ane. Ne kam arỳm baje mrãmri ja markumrêx. Dja gwaj mrãmri kãjkwakam Metĩndjwỳnhkõt batĩn ne ar baba rã'ã: rã'ã ne. Tãm ne gwaj baje mrãmri markumrêx ne amiwỳr kamnhĩxkumrêx.

<sup>6</sup> Ar ije itĩn markam 'itỳx rã'ã ne. Kum idjãpênhkam 'itỳx rã'ã. Jakam ne bar arek inhĩ jakam ar iba. Arek kam ar ibari djãm Bẽnjadjwỳr djwỳnh'ỳr ar ibõx? Kati. 'Ỳr ar ibõx kêt rã'ã. Ja ne bar ije mar. <sup>7</sup> Djãm jakam ne bar Bẽnjadjwỳr djwỳnh pumũnhbê ar iba? Kati. Te ar ije omũnh kêt bar tu amim Bẽnjadjwỳr djwỳnh markumrêx ne ar iba. <sup>8</sup> Ar ije markam 'itỳx rã'ã. Nhym be, ba ren ar on Bẽnjadjwỳr djwỳnh'ỳr tẽn bõx ne kõt ar iban ren ikĩ:nhkumrêx. Ba ren ar on tyn inhĩja kangan ren arek Bẽnjadjwỳr djwỳnhkõt ar iba. Ne kam ren ikĩ:nhkumrêx ne.

<sup>9</sup> Kam ne bar arek kum idjãpênh iba. Arek pykakam inhĩ ja'ã ar iba jabej bar Bẽnjadjwỳr djwỳnhmã idjãpênh ne ije o kĩnh kadjy amima. Nãr bar ityk ne kãjkwamã itêm jabej bar Bẽnjadjwỳr djwỳnhmã idjãpênh ne ije o kĩnh kadjy amima. Ar ije o kĩnhmã ne bar kum idjãpênh ar iba.

<sup>10</sup> Mỳkam ne bar ije o kĩnhmã? Bir, dja Kritu kãjkwakam krĩ djãkam gwaj bamã nhỹ. Gwaj kam arỳm 'ỳr bõx ne kabem dja nhym arỳm gwaj

bakukij. Pykakam gwaj ar babari gwaj baba mex jabej bakukij. Nãr, gwaj baba punu jabej bakukij. Gwaj kam arỳm prĩne amikõt kum amijarê nhym kam arỳm gwaj bakunĩmã o pãnh. Apỳnh gwaj banhĩ djãri gwaj bamã o pãnh. Gwaj baje amijo baba kõt gwaj bamã o pãnh. Katõt gwaj baba mex jabej arỳm gwaj bamã o pãnh mex. Nãr ate gwaj amijo baba punu jabej arỳm gwaj bamã o pãnh punu.

*Metĩndjwỳnh kute me kunõ õbikwao ãm.*

*A Kõ 4.2*

<sup>11</sup> Dja gwaj baje amijo baba kõt gwaj bakunĩmã o pãnh. Kam ne bar Kritu'ỳr me 'wỳro iba. Me kute Kritu'ỳr amijo akêxmã me 'wỳro iba ne me axwe nêje ar me kukrão iba. Bẽnjadjwỳr djwỳnh pyma: bar arỳm kuman arỳm nêje ar me kukrão iba. Ne katõt ar amijo iba nhym Metĩndjwỳnh prĩne kute ar imar. Ar gadjwỳ ar aje ar imar jabej ne aje amim,

—Mrãmri ne Paur ar katõt kute amijo bakumrêx, anhỹr jabej.

<sup>12</sup> Wãkam ne me we ar ijã,

—Ar wã ne ar ajte ar amã amimex jarênhõ ba, ane. Djãm mrãmri me kabên? Kati. Wãkam me kwỳ ta amimexo amran ar amã,

—Ba ne ba Kritu'ã idjujarênh mexkumrêx. Me kum ikĩnhkumrêx, anhỹro ba. Djãm mrãmri ne me kabên mex? Kati. Nãm me amijo 'êx. Djãm Kritu kabên kõt me kum me abê? Kati. Me jamã dja gar ar ijã ajarên memã kum,

—Paur ar kute katõt ar imã arênhkumrêx. Paur ar kute katõt Metĩndjwỳnh kabên marn kõt amijo bakumrêx, ane. Dja gar ã memã ane nhym me arỳm pijãm ne.

<sup>13</sup> Djãm mrãmri ne bar we ajbãn ar amã amijarê? Nã. Kwãrĩk wãnh rã'ã. Bar we ajbã. Metĩndjwỳnh kadjy ne bar we ajbã. Nãr, djãm mrãmri ar ikrã mex ne katõt ar amã amijarênhkumrêx? Metĩndjwỳnh



ta ne kute ar imar. Ar aje Metĩndjwýnh mar kadjy ne bar katàt ar amã amijarẽnhkumrẽx.

<sup>14</sup> Kritu kum gwaj bajabê:ê. Kum gwaj bajabêkam ne gwaj bakunĩ pãnh ty. Gwaj badjwý bamã Kritu jabê:m arým 'ã memã badjujarẽnh prã:m. Dja me te Kritu'ã gwaj bakangrõnho ba. Kwãrik wãnh rã'ã. Gwaj ty. Gwaj bamã batyk pyma kêt. Kritu gwaj bakunĩ pãnh tykkam gwaj badjwý gwaj bamã batyk pyma kêt. <sup>15</sup> Gwaj bakunĩ pãnh tykkam mýj dja gwaj nẽ? Bir, dja gwaj amidjwýnhbit maro babaja krãta. Ne kam Kritu maro baban kôt ar amijo baba. Nãm gwaj bapãnh tyn akubyn tĩn ne. Kam dja gwaj maro baban kôt ar amijo baba.

<sup>16</sup> Arým gwaj bapãnh tykkam djãm kam ar ije me mar punu? Kati. Me kum Metĩndjwýnh kĩnh kêt ja ne me kute me mar punu. Djã ne bar ã me mar punuo ane? Kati. Bar aminhijukri amidjan kam arým ar ije me mar punu kêt. Mrãmri amrêbê ar ije Kritu mar punu. Djãm jakam ar ije mar punu rã'ã? Kati. Bar arým aminhijukri amidjan kam arým ije mar punu kêt.

<sup>17</sup> Bir, mýj ne ar ije me mar on? Bir, dja Kritu meo kra nhym me arým umar djã ny. Amrêbê ne me mýjja tũm kôt ar amijo ba. Ne jakam arým kute mýjja tũmkôt amijo baja arým krãtan arým mýjja nykôt ar amijo ba. Be ga, me arým mrãmri prĩne umar djã nykumrẽxja pumũ. Bar aminhijukri amidjan arým kute meo ny ja ma.

<sup>18</sup> Metĩndjwýnh ta ne arým prĩne meo ny. Gwaj badjwý ne gwaj amrêbê Metĩndjwýnho bakurê djwýnh nhym ta arým gwaj bajo nyn gwaj bajo õbikwa. Jeju Kritu arým tyn akubyn tĩn gwaj kam tu amim markumrẽx. Nhym kam Metĩndjwýnh arým gwaj bajo õbikwa. Gwaj bajo õbikwan arým

me'ã gwaj bamã karõ. Gwaj baje memã 'ã badjujarẽnhmã gwaj bamã karõ. Gwaj kam arým memã kum,

—Ga me aje Metĩndjwýnho akurê djwýnh. Nhym be, dja ga me tu amim Jeju markumrẽx nhym arým me ajo nyn me ajo õbikwa. Nã gwãm ã memã anhõro baba. <sup>19</sup> Metĩndjwýnh ta ne me kunõ õbikwao dja. Kritu arým tyn akubyn tĩn ne nhym me arým tu amim markumrẽx nhym kam arým meo õbikwa. Meo õbikwan arým memã axwe kêt jarẽ nhym me arým kum mex ne. Nhym arým ar imã Kritu'ã ujarẽnhja jarẽ. Bar memã 'ã ajarẽn memã kum,

—Dja ga me tu amim Kritu markumrẽx nhym Metĩndjwýnh arým me ajo nyn me ajo õbikwakumrẽx, ane. Tãm ne bar memã arẽnho iba.

<sup>20</sup> Kam ne bar Kritu kabẽnkôt memã idjujarẽnh ar iba ne Kritu kukwakam 'ýr ar ajwýro iba. Ar aje Metĩndjwýnh'ýr amijo akẽxmã ar ajwýro iban ar amã,

—Dja gar tu amim Kritu markumrẽx nhym Metĩndjwýnh arým ar ajo õbikwa, anhõro iba. Bar 'ýr ar ajwýro iba kute mrãmri ne Kritu ta mãn kute amiwýr me 'wýro ba pyrãk.

<sup>21</sup> Kritu amikam axwe 'õ mar kêt ne axwe kêt me:x ne. Nhym be, Metĩndjwýnh arým kum axwe jarẽ. Nhym mýj axwe'õja? Bir, gwaj ba bajaxwe pro. Nãm kum gwaj bajaxwe pro jarẽ nhym arým kute ta mãn axwe djwýnh pyrãk. Nhym kam Metĩndjwýnh arým pãnh gwaj bamã axwe kêt jarẽ. Gwaj tu amim Kritu markumrẽx nhym Metĩndjwýnh arým gwaj bamã axwe kêt jarẽ gwaj arým Metĩndjwýnh jaxwe kêtõ bajaxwe kêt. Kam dja gar tu amim Kritu markumrẽx nhym Metĩndjwýnh arým ar ajo õbikwakumrẽx.

## 6

<sup>1</sup>Metĩndjwýnh kõt ne bar idjãpênh ar iba. Kam ne bar arým ar amã arẽ. Metĩndjwýnh ne tu kum ar akaprĩ:kumrêx\* ne ar amã ar ajamak bõ gar arým amim ama. Ar aje amim markam tu amim markumrêx ne kwãrĩk wãnh 'ã adjukanga kêt. <sup>2</sup>Mýkam dja gar 'ã adjukanga kêt? Bir, Metĩndjwýnh ne arým gwaj bakukãmãremã kabên ne memã kum,

“On jakam ije me amar. Ga me imã amijarẽ ba arým me ama. Imã me akaprĩkam ne ba me ama.

Ë, on akati jakam ije me apytãr. Ba me apytãn arým me ajo djuw mex.”

Nãm ã Metĩndjwýnh gwaj bakukãmãremã ane. Badjwý kõt ar amã arẽ. Mytja tãmkam Metĩndjwýnh kum ar akaprĩ. Akati jakam kute ar apytãr. On 'ýr amijo akêx. Kwãrĩk wãnh 'ã adjukanga kêt.

*Paur kute apýnh kaprĩ djãri'ã amijarênh.*

*Kor 1.10*

<sup>3</sup>Ar ba ne bar amijaxwe nêje amijãno dja. Mýkam ne bar amijãno dja? Bir, ba ren amijãno idjãm kêt ne ren arým ajmã ikute. Nhyam kam ren me'õ arým ijã,

—Djãm Metĩndjwýnhmã ar àpênh wãkam ar mex? Kati, ar axwe ar ba, ane. Me'õ ren ar ijã anen ren arým Metĩndjwýnh bê amijo akêx. Me'õ kute Metĩndjwýnh bê amijo akêx karõ ne bar amijaxwe nêje amijãno dja. <sup>4</sup>Ne ar imrãnh kunĩkõt katãt Metĩndjwýnhmã idjãpênhkumrêx nhyam me kunĩ kute kõt ar imar.

Katãt kum ar idjãpênhkam te apýnh ar ikaprĩ djãri ar ijo ba bar kum idjãpênh'ã idjukanga kêt.

Ne aje apýnh itokry ma.

Ne aje imã mýjja prãm ne inhõ mýjja kêt.

Ne aje apýnh mýjjakam itĩn prãm.

<sup>5</sup>Katãt kum ar idjãpênhkam me aje mry kã punuo ar ikaprêprêk.

Nhyam me ar ibê ijê

nhyam me krãptĩ: ar ikam àkrên ar ikam kangao kumex.

Bar apýnh idjãpênh týxo prĩne amidjõm ne.

Ne aje apýnh idjãpênh'ã ino týx ne inhõt kryre nhyam arým akati.

Bar aje Metĩndjwýnhmã amijajburo iba. Katãt kum ar idjãpênhkam bar ã ane.

<sup>6</sup>Ne aje kam prĩne amijaxwe nêje amijãno dja.

Ne aje prĩne mýjja mar mexkumrêx.

Nhyam me aje ar ijo ajkê bar bit ingykmãn aje akubyn amijã ingyk nê.

Ne kum ar idjãpênhkam aje imã me kaprĩ.

Nhyam Metĩndjwýnh Karõ aje ar ijo ba bar mrãmri imã me abêkumrêx.

<sup>7</sup>Ne aje katãt memã ikabên jarênhkumrêx

nhyam Metĩndjwýnh aje ar ikõt àpênh týx.

Kum ar idjãpênhkam bar amijãno djan katãt ar amijo iba. Ga, krãkamngõnh kute kãxo kubêkã jangjênh ne kute kurê djwýnhbê amipytãrja pumũ. Ar badjwý ne bar inhõ kãxo kubêkã jadjar mãn prãbê amijãno djan katãt ar amijo iba. Me kute ar imã ar ijaxwe jarênh karõ ne bar amijãno dja.

<sup>8</sup>Nhyam me aje kum ar ikĩ:nhkumrêx. Djãm kam ar ije amidjwýnhbit mar ne Metĩndjwýnhmã idjãpênhmã kanga? Kati. Bar mã kum apê.

\* **6:1** Djãm ar ga ne gar ajaxwe kêt nhyam pãnh kum ar akaprĩ Kati. Ar ga ne gar te ajaxwe kêt mã nhyam arým ta kum ar akaprĩ.

Nhym me ajte te mebê ar ikurê bar mā kum apê.

Nhym me ajte te ar ikàxã abenmã kum,

—Djãm ar wã mex got? ane bar mā Metĩndjwýnhmã apê.

Nhym kam me ajte te ar ikàxã abenmã kum,

—Me kum ar kĩ:nhkumrêx, ane bar mā kum apê.

Nhym me ajte te ar ijã,

—Nãm ar ta amijo Metĩndjwýnh maro ba. Nãm ar memã 'êx ne me noo biknoro ba, ane. Nãm me te ar ijã ane bar katãt kum idjãpênhkumrêx rã'ã.

<sup>9</sup> Nhym me ajte te ar ibê ate krãn ba nhym Metĩndjwýnh kute ar imarkumrêx. Nhym õ me jadjwý kute ar imarkumrêx.

Nhym me ajte kute ar ibĩn puma. Te ar ibĩn puma. Ota, ar itĩn rã'ã.

Nhym me ajte mā ar ikaprêprêk. Ne te ar ikaprêprêk bar ityk kêt.

<sup>10</sup> Ne ajte ikaprĩ:ren ikaprĩ japôkmã mā ikĩnh.

Ne ajte ar inhõ mýjja kêt. Te ar inhõ mýjja kêt bar memã Kritu'ã idjujarênh ar iba nhym me arým tu amim markumrêx. Me krãptĩ ne me tu amim markumrêx ne arým kôt Kritu nhõ mýjja kume:xo õ mýjja.

Te ar inhõ mýjja kêt bar tu amim Kritu markumrêx ne arým Kritukôt ar inhõ mýjja kunĩ.

<sup>11</sup> Krĩraxbê Kõritukam ar ga ne bar imã ar ajabê:. Kam ne bar prĩne amikôt ar amã amijarênho amirĩtkumrêx. <sup>12</sup> Djã nã bãm ar ar abê amiptàn imã ar ajabê kêt got? Ar ga ne gar amã ar ijabê kêt. <sup>13</sup> Ar ije ar ajo ikramãn prãbê bar ar amã ikabên. Ar gadjwý dja gar amipãnh ar imã akabên mex jarên ar amã ar ijabê.

*Me kute Jeju marbito aben nhikjê'ã kute memã karõ.*

*Ep 5.7; A Xim 2.4; Xij 4.4; Ped k 2.11*

<sup>14</sup> Ga, mry kute jênh bjêr kadjy me kute o aben nhikjêja pumũ. Mry kute aben pyrãk kambit ro'ã àpênh mex. Ar gadjwý ar aje me'õo anhikjênmã me kute amim Jeju marbito anhikjê. Kwãrĩk wãnh me'õ kute Jeju mar kêtõ anhikjê kêt ne ro'ã adjãpênh kêt.

Djãm me axwemê me axwe kêt kute aben pyrãk ne ro'ã àpênh mex? Kati. Ga, a'umê akamatmê ro'ã ba kêtja pumũ. Apýnh ne ba. Ar gadjwý ne gar aje amim Jeju mar. Kam ar amã ajaxwe kĩnh kêt. Me kute Jeju mar kêtja ne me kum axwe kĩnh. Djãm ro'ã ar adjãpênhkam mex? Kati. Kam mex kêt.

<sup>15</sup> Djãm Kritumê Berij axikôt kabên? Kati. Ar apýnh kabên. Berij nhidji 'õdjwýbê ne Xatanaj. Me kute amim Jeju mardjwý djãm me kute amijo ba kute me kute Jeju mar kêtja amijo ba pyrãk? Kati. Me kute amim Jeju mar katãt ar amijo ba. Nhym be, me kute mar kêtja ate amijo ba. Me apýnh ba.

<sup>16</sup> Djãm Metĩndjwýnh nhõ kikretikam me kute kum amijarênh kadjy apýnh mýjjao metĩndjwýnh karõ nhipêxja krĩ? Djãm Metĩndjwýnhmã ja mex? Arkati. Me kute kam Metĩndjwýnhmãbit amijarênhmã. Gwaj badjwý. Djãm gwaj baje Metĩndjwýnhmã amijarênh ne jãm mýjjao metĩndjwýnh karõ nhipêxmã amijarênhmã? Me kute Jeju mar kêtja kudjwa mýjjao metĩndjwýnh karõ nhipêxmã amijarênhmã? Kati. Gwaj baje me kute Jeju mar kêtja kudjwa kêt ne mýjjao metĩndjwýnh karõ nhipêxmã amijarênh kêtãmã. Ga, Metĩndjwýnh õ kikretikam ýrja pumũ. Gwaj badjwý. Metĩndjwýnh ne gwaj bakam nhý. Metĩndjwýnh tĩn ne ar

bakumrêx. Tyk kêtumrêx. Tãm ne gwaj bakam nhÿ. Metÿndjwÿnh ta ne amrêbê: memã kum,

“Ba dja ba mekõt ar iban mekmê ar mrã. Dja me imã, ‘Me inhõ Metÿndjwÿnh’, ane ba meo iba rä’ã ne.”

Nãm ã amrêbê: me bakukãmãremã ane. <sup>17-18</sup> Ne kam ajte,

“Kam, on me me kute imar kêtjamã akàx. Djãm me aje meo an-hikjên me ro’ã adjãpênhmã? Kati. Kwãrÿk wãnh. On me memã akàx ne ate ar aba.”

Nãm ã Bênjadjwÿr djwÿnh me bakukãmãremã ane. Ne kam ajte memã kum,

“Kwãrÿk wãnh me axwe kõt ajaxwe kêt. Me axwe kõt ajaxwe kêt kam ba dja ba ibê abãmumrêx. Ne kam arÿm ajo ikrakumrêx. Ajo ikra mykumrêx. Ajo ikra nikumrêx.”

Nãm ã Bênjadjwÿr djwÿnh me bakukãmãremã ane. Bênjadjwÿr djwÿnh ‘ityxo kubê kumkati ta ne memã ja jarê.

## 7

<sup>1</sup> Ga, kute gwaj bamã mÿjja mex jarênhja pumũ. Mrãmri ne gwaj bamã kabên pydjïn arê. Kam dja gwaj on wãnh bajaxwe kunÿ kanga. Baje amidjwÿnhbito kÿnh kadjy bajaxwe kunÿ gwaj on wãnh kanga. Bakabên punu kunÿkõt, badjãpênh jaxwe kunÿkõt ne gwaj tu Metÿndjwÿnhbê amijo ajkê. Gwaj wãnh kunÿ kangan katàt Metÿndjwÿnh kõt ar amijo baba. Gwaj kum bamexo amũ amikamên prÿne ta mexo bamex. Gwaj bamã umakõt ã kum bamexo batêmo ane.

*Paur kute memã amikÿnh jarênh.*

<sup>2</sup> Dja gar amã ar ijabê. Djã nã bãm ar ar ajõo ajkê? Djã nã bãm ar ar ajõo ãpnu? Djã nã bãm ar ar ajõbê mÿjja ‘õo iprõt? Arkati. <sup>3</sup> Djãm ar ije ar amã ajaxwe jarênhmã ne bar ar amã ja jarê? Kati. Arÿm bar ar amã,

—Gwaj baro’ã dja gwaj batÿn ne ar baba. Nàr kon ar atyk jabej gwaj baro’ã ty, ane. Nãm bãm ar ã imã ar ajabêo ane. <sup>4</sup> Nã bãm tu amim ar amex markumrêx ne prÿne ar amã amikõt amijarê. Nã bãm ar akam ikÿnh ne memã ar akam ikÿnh jarênh kumex ne. Nãm te apÿnh ikaprÿ djari iwÿr ban bõx ba ar amex djõ’ã akubyn ikÿnh ne amikÿnh ra:x ma.

<sup>5</sup> Nã bãm ar amrêbê pykabê Mateni’ÿr tèn ‘ÿr bõx. Nhym kam apÿnh ar ikaprÿ djari mã ar iwÿr ban bõx bar te ityk djà kêt prãmje. Me kum ar ikurê:n ari ar ijo ba bar arÿm itÿn prãm.

<sup>6</sup> Nhym be, me Batÿndjwÿnh kute me kaprÿo kÿnh ba tãm ne arÿm akubyn ar ijo kÿnh ne. Arÿm Xitu ar akurũm bõxkam ne bar akubyn ikÿnh ne. <sup>7</sup> Djãm bõxkambit ar ikÿnh? Kati. Kute ar imã ar ajarênh djõ’ã ne bar ajte ikÿnh. Nãm ar imã ar akam amikÿnh jarê. Nãm ar imã,

—Nãm me ar ajo ama: ne kaprÿre ne muwn mã memã kum, “Paur ne ba ar imã kÿnhkumrêx”, anhyro ba. Nãm ã Xitu ar imã ar ajarênh ane. Ba kam arÿm Xitu kÿnh djõ’ã badjwÿ ar akam ikÿnhkumrêx.

<sup>8</sup> Amrêbê ar ije ar amã pi’òk no’òkkam ne ba amim ingyk ne amiman ar ajã amim,

—ÿ, watÿre. Mÿkam ne ba arkum pi’òk no’òk ne arÿm arkum kaprÿ jadjã? ane. Djãm jakam ije amim anhyr rä’ã? Kati. Ije inhõ pi’òko ije ar amã kaprÿ jadjãr ngrirebit. <sup>9</sup> Jakam ne ba ikÿnh ne. Mÿkam? Djãm ar akaprÿkam? Kati. Gar akaprÿkam arÿm akubyn amima. Ba kam arÿm ikÿnh ne. Ar aje Metÿndjwÿnh kabên markõt gar arÿm akaprÿ. Akaprÿn arÿm akubyn amima. Ga, ar aje akubyn amimarkam ije ar ajo ibikênh kêtja pumũ. Ije pi’òkkam ar amã ikabên’ã no’òko ije ar ajo ibikênh kêtê.

<sup>10</sup> Me kute arÿm amikam Metÿndjwÿnh kabên mar ne kõt

kaprĩkam ne me arým amiman wãnh axwemã iren Metĩndjwýnh'ÿr amijo akêx. 'ÿr amijo akêx nhym arým me utã. Djãm kute me utãrkam me amim ngryk ne kaprĩ? Arkati. Nhym be, me kum Metĩndjwýnh kĩnh kêtjamã ne me kabên jarê nhym me arým amim ngryk ne amikam kaprĩ. Amikam kaprĩ kajgon wãnh axwemã irern kute Metĩndjwýnh'ÿr amijo akêx kêt ne arým akuno. Me biknor tokry djãkam akuno.

<sup>11</sup> Nhym be, amrêbê inhõ pi'ók ar awÿr bõx ja ne gar amim arên aman arým amima. Amiman arým amijo mex prãm ne amijo mex ngry'ã ar ano kator me:x ne arým abenbê ar ajaxwe kurê. Abenbê ar ajaxwe kurên arým ar amã ajaxwe pyma:. Ne kam ijo ama:n arým inêje mã memã akabên. Ne kam me'õ jaxwe jabe:j ne axwemã akatorkumrêx. Ar Metĩndjwýnh kabên kôt akaprĩkumrêxja pumũ. Ne kam arým ar amexo amirĩtkumrêx. Ôbê ne ba ar amã apÿnh mÿjja kwÿ jarê. Gar arým jakam mÿjja kunĩkôt imã amimexo amirĩtkumrêx ba arým ar ama.

<sup>12</sup> Ba amrêbê ar amã pi'ók no'ók ne. Me'õ jaxwe ne ba kuman pi'ókkam arým ar amã arê. Nãm ar ajo ajkê ba kuman pi'ókkam arým ar amã arê gar arým ama. Djãm ar aje jabit marmã ne ba ar amã arê? Kati. Ar aje badjwÿ imarmã. Ba ar ajã ino tý:x. Tãm ne ar aje marmã ne ba ar amã arê. Mrãmri ne ba ar ajã ino týxkumrêx. Metĩndjwýnh ta ne kute imar. <sup>13</sup> Ar aje ar imar ne akubyn ar akĩnhkam bar badjwÿ ar adjõ'ã akubyn ikĩnh.

Nhym Xitudjwÿ ar awÿr bõx ne bit umar punure. Gar kam akunĩ arým aêrbê o kĩnh nhym arým ar akam kĩnhkumrêx. Ne kam arým amrê tèn iwÿr bõx ne imã ar ajã ajarê bar badjwÿ arým ô'ã ikĩnhire. <sup>14</sup> Nãm bãm Xitumã ar amextire jarê.

Djãm kam ikabên kajgon arým kam ipijãm ne? Kati. Ije amrêbê ar amã ikabên kunĩ jarênhja ba ar akõnh kudji. Ije Xitumã ar amex jarênhdjwÿ ba ar amex kõnh kum arê. Nhym kam ta ar awÿr bõx ne arým ta ar amex pumũnhkumrêx.

<sup>15</sup> Ne kam ta ajte akubyn jakam bõx ne akubyn amijo tèn ar ama:ro nhÿ. Nãm ar awÿr bõx gar akunĩ aje kabên maro akumex. Nã gãm ar atertet ne kum akabên mexbit jarê. Nãm akubyn amijo tèn ar amaro nhÿn arým amybÿm kum ar ajabê:ê. <sup>16</sup> Kam ne ba arým ate ikrãn amim ar amexbit man arým ar akam ikĩnhkumrêx.

## 8

*Kute me ôdjãnh'ã memã karõ.*

*Kar 11.29; Rõ 15.25; Kõ k 16.1; Xim k 6.18*

<sup>1</sup> Kam, akmere, àpnhĩre ar, ba ar amã pykabê Matenikam me arê. Ga, Matenikam apÿnh me kute amim Jeju mar ne kôt ar aben pydjio ba djãri ne me ukaprĩkumrêxja pumũ. Djãm me ta ne me ukaprĩ? Kati. Metĩndjwýnh ta ne kum me kaprĩ ra:xi nhym me arým kuman arým ô'ã kum me kaprĩkumrêx. <sup>2</sup> Nãm me te amikam tokry ne kaprĩ kumex man arým apõkmã amikam kĩnh kati ma. Nãm me te ô mÿjja ngrire ne memã mÿjja nhõr prã:m. Nãm me tu ôdjãnhiti:re ne memã mÿjja kumex ngã.

<sup>3</sup> Be, apÿnh me àpênh djã kôt ne me kute apÿnh pi'ók kaprĩ jamÿnh. Me kwÿ ô pi'ók kaprĩ rax nhym me kwÿ ô ngrire. Djãm Matenikam me ô pi'ók kaprĩ rax? Kati, me ô ngrire. Nãm te me ô pi'ók kaprĩ ngriren memã kumex ngã. Ba ne ba omũ. Me ta ne me memã kungã.

<sup>4</sup> Nãm bãm bit akubyn memã nèn memã kum,

—Kati. Ar anhõ pi'ók kaprĩ ngrire. Kôt dja gar memã ngrirebit ngã, ane. Nhym ar imã,

—Kati. Djeruxarēkam Jeju nhō me ja ne me ō mỳjja kēt ne kum prām. Bar kam imā me kaprī. Ar ba dja bar memā kumex ngā, ane.

<sup>5</sup> Bar kam me kute memā pi'ōk kaprī nhōrkam ama. Nhyim kam me ta kumrēx ar ijaērbē Metīndjwýnhmā amingān amim,

—Ba katāt Bēnjadjwýr djwýnh kabēn man kōt amijo iba mex, ane. Ne kam amim,

—Ba Paur kabēn man kōt amijo iba mex, ane. Metīndjwýnh kabēnkōt ne me ā ane. Ne kam me kadjy ar imā pi'ōk kaprī ngā.

<sup>6</sup> Matenikam me ā ane bar kam Kōrituwākam ar abaja'ā Xitumā karō. Ta ne amrēbē ar awýr bōx ne ar amā arē. Gar kam arým memā pi'ōk kaprīo atommo krax. Nhyim kam jakam ar iwýr bōx. Kam ne bar ar ajā Xitumā karōn kum,

—Dja ga Kōritukam memā arē gē me mrāmri ukaprīkumrēx ne pi'ōk kaprīo atommo tēn inomā mēnhkumrēx, ane.

<sup>7</sup> Akmere āpnhīre ar, gar arým amex ne arým tu amim Metīndjwýnh markumrēxo aba. Ne aje kabēn jarēnh me:xkumrēx. Ne aje kōt mỳjja kume:x mar. Ne mrāmri akabēnkumrēx ne amā ar ijabē:kumrēx. Ā amexo ane. Nhyim be, dja gar mekam adjukaprīdjwý ne me kadjy pi'ōk kaprīo atomkumrēx.

<sup>8</sup> Djām ar ba ne bar amirax pumūnh nhirām ar amā,

—Ar iraxja man ar ikabēn kōt memā o atomkumrēx, anhýro iba. Kati. Nā bām ā ar amā anhýr kēt. Matenikam me ja kumrēx ne me memā o atommo tēn inomā kumē. Ar gadjwý ar aje ar ikabēn mar ne aje memā o atommo atēm ne inomā mēnhmā. Djām mrāmri ne gar amā ar ijabēkumrēx? Ar amā ar ijabēkam dja gar o atomkumrēx.

<sup>9</sup> Bēnjadjwýr djwýnhbē Jeju Kritu ta ne tu ukaprīkumrēx. Tām ne gar arým aje mar. Nām ō mỳjja kumex. Mỳjja kunī ne ō mỳjja. Nām te ō

mỳjja kunīn arým ar akadjy ō mỳjja kēt. Gar kam arým mỳjja kumexo anhō.

<sup>10</sup> Ba kam arým ja man ar amā arē. Be, amū amex ja'ā ne gar akumrēx aje memā pi'ōk kaprī nhōr prām ne arým o atommo krax ne. <sup>11</sup> Jakam dja gar o atommo tēn inomā mēnhkumrēx. Djām ar aje memā ōr prām ne o atommo krax ne katēri krā'yrcam mex got. Kati. Gar amā memā ōr prām ne ajte o atommo tēn inomā mēnhkumrēx. Kambit arým mex. Ar aje apýnh adjápēnh pānh pi'ōk kaprī jamýnh kōt dja gar memā ikjē rēn memā o atom.

<sup>12</sup> Be, me kute memā ōr prām kumrēxja ne Metīndjwýnh kute me mar ne arým mekam kīnh. Djām me'ō nhō mỳjja kētkam dja Metīndjwýnh memā kum, “Memā angā”, ane? Kati. Me ō mỳjja rax gēdja 'ā akren pi'ōk kaprī rax ngā. Nhyim be, me ō mỳjja ngrire dja 'ā akren pi'ōk kaprī ngriren kum kungā.

<sup>13</sup> Djām ar aje memā ōr nhyim me kum prām kēt gar ajte me pānh anhō mỳjja kētmā ne ar amā prāmmā? Djām ja kadjy ne ba ar amā arē? Kati. Gēdja ar anhō mỳjja nhyim amū me ō mỳjja nhyim kam ar ajō'ā kātām kēt. Gamē amū me wāmē gēdja ar anhō mỳjjao aben pyrāk. Ja kadjy ne ba ar amā ikabēn. <sup>14</sup> Jakam arým ar anhō mỳjja kumexkam ar aje memā kwý nhōr nhyim memā prām kētmā. Nhyim kam ajmākam gar me pānh amā prām jabej nhyim me ō mỳjja kumex jabej. Ne kam arým amipānh ar amā mỳjja ngā. Gar kam anhō mỳjjao aben pyrāk.

<sup>15</sup> Me bakukāmāre kute djwýbē mỳj ne jao atommo bakam ne me ā ane. Amrēbē: ne me'ā memā kum, “Nām me djwýo atom kumex nhyim me mānhkutā ne. Ne djwý'ā kātām kētne.

Nhym me jadjwý djwý ngireo  
atom nhym me mánhkutã  
ne. Ne me'ã 'ã kãtãm kêt ne."  
Nãm me ã me bakukãmãremã ane  
nhym me arým 'ã pi'ók no'ók ne.  
Ga, me kunĩ õ djwý nhym me'õ'ã  
djwý'ã kãtãm kêtja pumũ.

*Kute me'yr Xitu ar anor kadjy.*

<sup>16</sup> Be, Metĩndjwýnh ne Xi-  
tumã amak bõ nhym kute ar  
amarkumrêx. Kute ba ije ar amar  
pyràk ne ã ar amaro ane. Ba  
kam Metĩndjwýnhmã amikĩnh jarê.

<sup>17</sup> Bar Xitumã ar ajã karõn kum,

—Dja ga memã arê gê me  
pi'ók kaprĩo atomo tẽn inomã  
mẽnkhkumrêx, ane.

Nhym ar imã,

—Be, mrãmri. Dja ba ã memã  
ane, ane. Ne kam ta kadjy ar awýr  
têm prãmkumrêx. Ne kam arým  
kute ar awýr pi'oko tẽn ne kute o  
bõxmã gar aje omũnhmã.

<sup>18</sup> Bar ar ajã Xitumã karõn  
kam kôt ije gwaj bakamyja 'õdjwý  
janormã. Gwaj bakamy jamê  
Xitu ar ar awýr tẽmmã. Ar ikamy  
ja ne àpênh mexkumrêx. Kute  
Kritu'ã ujarênh ny jarênhkam àpênh  
mexkumrêx. Me kute amim Jeju  
mar kunĩ apýnh kôt ar aben pydjio  
ba djãri kunĩ ne me abenmã mex  
jarê. <sup>19</sup> Me kute Jeju mar ta ne me  
amijo utãn ar imã,

—Gwaj bakamy ja dja ar ikabên  
kôt ar akôt pi'ók kaprĩo tẽn memã  
kungã, ane. Gwaj bakamy ja ne bar  
kuman kumrêx Xitu kôt ar awýr  
ano. Dja ar bõx gar me kadjy pi'ók  
kaprĩo atom inomã mẽnkhkumrêx.  
Ar badjwý dja bar ã ar awýr tẽn  
bõx gar ar imã pi'ók kaprĩ ngã bar  
Xitumê ro'ã arým Djeruxarê'yr o tẽn.  
'Yr o tẽn o bõx ne iro'ã memã kungã.  
Me ar ikôt Metĩndjwýnh raxmã ka-  
tor kadjy dja bar ã o ane. Ar aje  
memã õr prãm nhym me kute jad-  
jwý mar kadjy dja bar ã o ane.

<sup>20</sup> Godja bar memã pi'ók kaprĩ  
kumexo tẽn memã kungã. Nhym

kam me ar ikôt gwaj bakamy tẽmja  
pumũn ar ijã ar idjãkĩnhĩ nhõr kêt.

<sup>21</sup> Dja bar iro'ã katãt memã o tẽn  
o bõx. Metĩndjwýnh dja katãt ar  
ije amijo ibakôt ar ipumũ. Nhym  
pykakam me ar badjwý dja me  
katãt ar ije amijo ibakôt ar ipumũ.

<sup>22</sup> Kam gwaj bakamy ja Xitu  
kôt ar awýr tẽmmã. Dja bar kam  
gwaj bakamy 'õdjwý jano nhym  
arkôt tẽn. Gwaj bakamy jadjwý  
ne mexkumrêx. Metĩndjwýnhmã  
àpênh kunikôt gwaj bakamy ja  
mrãmri kum ukanga kêtumrêx  
ne kum àpênhkumrêx bar arým  
amim omũ. Nhym tu amim ar  
amarkumrêx. Kam ne ar akadjy  
àpênh prãmkumrêx. Gwaj bakamy  
jadjwý dja arkôt ar awýr tẽn.

<sup>23</sup> Nhym Xitudjwý. Be, tãmjamê  
ne bar iro'ã apê. Ne kam arým ar  
iro'ã ar akam idjãpênhmã. Nhym  
gwaj bakamy ar jadjwý, apýnh me  
kute amim Jeju mar ne kôt ar aben  
pydjio ba djãri ne me ar ano. Nhym  
kam ar arým me kabên kôt ar awýr  
tẽmmã. Kute memã Kritu raxo  
amirĩt kadjy ar awýr tẽmmã.

<sup>24</sup> Kam dja gar pi'ók kaprĩo atomo  
tẽn inomã mẽnkhkumrêx. Nhym  
ar arým o ar amarkumrêx. Ar  
amã ar abêja markumrêx. Nã  
bãm ar mã memã ar ajarêho  
iba. Ar akam ar ikĩnh jarêho  
iba. Dja gar pi'ók kaprĩo atomo  
tẽn inomã mẽnkhkumrêx gê ar pi'ók  
kaprĩ pumũnhkumrêx. Kam dja ar  
abenmã kum,

—Mrãmri Paur kabênkumrêx,  
ane. Kam gẽdja ar akubyn õ  
pykakam bõx. Bõx ne apýnh me  
kute amim Jeju mar ne kôt ar aben  
pydjio ba djãri memã ar ajarêho  
ba. Ne memã kum,

—Mrãmri ne me õdjãnhkumrêx.  
Nãm me arým pi'ók kaprĩo atom.  
Djeruxarêkam me kute Jeju marja  
kadjy ne me arým pi'ók kaprĩo  
atomkumrêx, ane. Dja ar ã ar  
ajarêho ane.

## 9

1-2 Djãm ar aje amijã pi'ók kaprĩ nêmã ne ba aje ar amã arẽ? Kati. Ar aje pi'ók kaprĩo atomã ne ba ar amã arẽ. Ar ga ne gar aje Jeju nhõ me jamã o atom prãmkuvrẽx. Arým ba ar apumũn Matenikam me jamã ar ajarẽho iba. Nã bãm memã kum,

—Onj, pykabê Akajakam krĩraxbê Kôritukam me ja ne me arým kute memã õr prãmkuvrẽx. Amũ amex jaã me kute memã õr prãmkuvrẽx. Nã bãm ã ar ajã memã anhÿro iba nhym kam me ar akudjwa kute memã õ pi'ók kaprĩ nhõr prãmkuvrẽx.

<sup>3</sup> Kam, ar aje pi'ók kaprĩo atomo atẽm ne inomã mẽn h kadjy ije ar awÿr gwaj bakamy ar anormã. Ar ga ne gar imã,

—Dja bar o atomo tẽn inomã mẽn hkuvrẽx, ane. Kam dja gar o atomo tẽn inomã mẽn hkuvrẽx nhym kam ikabẽn dja kajgo kêt, Matenikam me jamã ikabẽn ja dja kajgo kêt. Nok ba ren ikabẽn kajgo. Ije memã kum,

—Kôritukam me ja kute õr prãm, anhÿrkam gar ren katẽri pi'ók kaprĩo atom krãta ba ren arým ikabẽn kajgo.

<sup>4</sup> Dja ba ar awÿr tẽn nhym Matenikam ar ja'õ ikõt ar awÿr tẽn ne ar awÿr bõx jabej. Kam bar ren ar awÿr bõx ga ren ar arým pi'ók kaprĩ katẽri o atom krãta nhym ren Matenikam ar jamẽ ba ren ar ar apumũn ren arým ar akam ren ar ipijãm ne. Ga ren ar gadjwÿ kam apijãm ne. Ba ren ar amim,

—Nã bãm ar bit tÿx'ã me kamnhÿxkuvrẽx nhym meo mõn tu krãta. Bar kam arým ipijãm, ane.

<sup>5</sup> Gwaj bapijãm karõ ne bar abenmã kum,

—Gwaj amikukãm bakamy ar ano, ane. Ne kam arkum,

—Dja gar me'ÿr atẽmkuvrẽx ne me'ÿr bõx nhym kam me arým ar

ikukãm pi'ók kaprĩo atomo tẽn inomã mẽn hkuvrẽx. Nã bãm ar ã arkum ane. Dja ar ikabẽn ja man ar awÿr bõx ne ar amã arẽ. Arým ne ba amrêbê ar amã arẽ. Ar aje o atomo atẽm ne inomã mẽn h mã ba ar amã arẽ. Djãm me kute pi'ók kaprĩ'ã ngrÿk ne amim,

—Je tõi, mÿkam ne me ibê pi'ók kaprĩ jamÿnho ba, anhÿrkam mex? Kati. Kam mex kêtkuvrẽx. Dja gar o atomo tẽn inomã mẽn hkuvrẽx bar arým ar awÿr bõx gar arým anhõdjãnh ne akĩnhkuvrẽx. Ne kam arým me kadjy ar imã angã. Kam dja bar arým Djeruxarẽmã o tẽn o bõx ne arým memã kungã.

*Me kĩnh ne kute memã mÿjja nhõr raxmã.*

*Kõ k 16.2; Xim k 6.18; Idja 13.16*

<sup>6</sup> Ba ar amã arẽ gar ama. Godja me 'y ngrêre ne kren kam djwÿ ngrêre ne o atom. Nãr, godja me 'y kumex ne kren kam djwÿ kumex ne o atom. Tãm dja gar anhõ pi'ók kaprĩ'ã ama. <sup>7</sup> Djã gãm ar abenã ar anhõ pi'ók kaprĩ jakre kumrẽx ne amim,

—Be, kõt dja ba memã amikutã kwÿ ngã, anen kam memã angã. Kwãrĩk wãnh 'ã maje amim,

—Dja ba memã kwÿ ngã nhym ibê kêt ba ajmã nẽ, anhÿr kêt. Nãr, kwãrĩk wãnh 'ã maje amim,

—Gê me imã 'ã àpnẽn tÿxmã ba kam memã kwÿ ngã, anhÿr kêt. Mÿkam? Bir, dja me õdjãnh ne kĩnh ne memã mÿjja ngã nhym Metĩndjwÿnh arým kum me kĩnhkuvrẽx. Tãm dja gar ama.

<sup>8</sup> Djãm Metĩndjwÿnh õdjÿ got ar abê mÿjja 'õ nêmã? Kati. Dja ar amã mÿjja kunĩ ngã. Djãm kute ar amã mÿjja ngrêre nhõrmã? Kati. Mÿjja kumex dja tu ar amã kungã gar arým akĩnhkuvrẽx. Ar gadjwÿ dja gar akati kunĩkõt mekam adjukaprĩkuvrẽx. <sup>9</sup> Ikabẽnja kõt ne me amrêbê: memã arẽn memã kum,



“Arým ne amikutã me õ mýjja kêt mã õ mýjja ngrã. Nãm katãt amijo bakumrêx rã'ã: rã'ã ne.”

Nãm me amrêbê ã me bakukãmãremã ane nhym me arým 'ã pi'ók no'ók ne.

<sup>10</sup> Ga, me kute pur kreõ mõrja pumũ. Metĩndjwýnh ne me kute kre kadjy kute memã 'y nhõr. Ne kam kute memã djwý nhõr. Me õ kwý krên djã'ã kute memã õr. Mýj'ã ne ba ar amã ja jarê. Bir, ar aje memã mýjja nhõr'ã ne ba ar amã ja jarê. Metĩndjwýnh ta dja ar apumũ. Dja gar me õ mýjja kêt mã amikutã anhõ mýjja kwý ngã nhym arým ar apumũn ar amã mýjja kumex ngã. Ar aje memã mýjja nhõr jakrenh mex ne ar amã kungã. Ga, me kute mýjja 'y kumex ne kren arým õ djwý kumex ne kute o atomja pumũ. Ar gadjwý dja gar memã mýjja kumex ngã. Nhym Metĩndjwýnh arým pãnh ar amã mýjja kumex ngã gar arým katãt ar amijo aban kum amexkumrêx ne.

<sup>11</sup> Ar anhõdjãnhkam mýj dja Metĩndjwýnh ar amã nê? Bir, dja mã ar amã mýjja kumex ngã gar mã amikutã memã anhõ mýjja kwý ngã. Anhõdjãnh ne mã memã angã. Dja gar ar imã amikutã ar anhõ pi'ók kaprĩ kwý ngã bar kubyn arým memã ar anhõ pi'ók kaprĩõ tẽn memã kungã. Dja me ar anhõ pi'ók kaprĩ byn arým Metĩndjwýnhmã amikĩnh jarê. Gwaj badjõ'ã kum amikĩnh jarê.

<sup>12</sup> Dja gar Jeju nhõ me jamã angã nhym me arým o amikĩnh. Djãm me o amikĩnhbit? Kati. Dja me kĩnh ne ar adjõ'ã Metĩndjwýnhmã amikĩnh jarêho kumex. <sup>13</sup> Ne kam ar amarkumrêx ne arým Metĩndjwýnhmã kum,

—Mrãmri ne me kute Kritu'ã ujarênh ny markumrêx ne arým akabên kõt õdjãnhtire. Õdjãnhtire ne arým amikutã ar imã õ mýjja kwý ngãn arým amũ me kum prãm

kunĩmã kwý ngã. Bar kam arým amã amextire jarê, ane. Ar aje memã pi'ók kaprĩ nhõrkam dja me ã Metĩndjwýnhmã ane.

<sup>14</sup> Ar aje memã pi'ók kaprĩ nhõrkam dja me kum ar ajabên arým ar akadjy Metĩndjwýnhmã kabên ne kum,

—E kum, Djũnwã, me kĩnh djã rax ne ga memã angã nhym me arým adjõ'ã ar imã pi'ók kaprĩ jano. Bar kam amã amextire jarê, ane. Dja me ã Metĩndjwýnhmã ajã ane. <sup>15</sup> Mýj kĩnh djãja ne Metĩndjwýnh memã kungã? Bir, Kraja ne arým memã kungã. Nãm gwaj bakunĩmã kungã. Kra ra:xi. Mýj me'õ ne kute prĩne 'ã ujarênh mex kadjy 'yr bõx. Arkati. Kra ra:x ne gwaj bamã kungã gwaj kam kum amikĩnh jarê.

## 10

*Mrãmri ne Kritu kute Paur janorkumrêx.*

<sup>1</sup> Ga, Kritu kabõt kati ne kute memã prĩ mex ne ar meo baja pumũ. Ja ne ba kuman arým ar amã ikabên mex jarê. Ar gadjwý dja gar Kritu man badjwý ikabên ma. Ba ibê Paur ikabên ma. Wãkam me'õ ar memã kum,

—Paur ne amybym kute týt pyràk ne me ýtãri 'yr bõxkam kum me uma:, ane. Djãm mrãmri me kabên? Kati. <sup>2</sup> Dja gar on ikabên ma. Got ba ren ar awýr bõx ne tu ar amã ibên týt:x ne. Nã bãm anhýr djwýnhràam amim,

—Dja ba wãkam bõx ne ar kwýmã ibên týt jabej, ane. Ar akwý aje amim,

—Paur ne amidjwýnhbitõ kĩnh ne axwe ar ba, anhýro abakam ba ibõx ne ije ar akwýmã ibên týt karõ ne ba ar amã,

—Dja gar on ikabên ma, ane.

<sup>3-5</sup> Ga, me kurê djwýnh me'ýr bõxja pumũ. Me'ýr bõx nhym me arým ãbêr djã jamýn o me'ýr prõt ne arým aminêje me aê. Pykakam ne me ã aminêje meo ane. Djã ne bãm ar ã

me kudjwa ane. Kati. Nā bām ar ije pykakam me àbêr djā jamÿnh kêt. Metĩndjwÿnh ne tÿ:x. Bar tÿxo itÿx ne me nêje ikabêno me ity nhym me arÿm anhikrê.

Ga, me kurê djwÿnh kwÿ kute aminêje kikre tÿ:x nhipêxja pumÿ. Nhym be, me tÿxo me ja jakre ne me arÿm me'ā kikre kate. Ne kam arÿm pardja'ā me pa 'amÿn meo ban meo bôx nhym kam me arÿm memā àpênh ar ba.

Me kwÿ jadjwÿ ne me kute me bakurê djwÿnh pyrāk. Me 'êxnhĩ. Metĩndjwÿnh ne kute gwaj bamā amijā ujarênh pydji baje mar pydjimā nhym me arÿm 'êx ne ta amijo Metĩndjwÿnh mar mex ne arík kupa'ā memā 'ā ujarênh punu. Nhym kam me arÿm me ma:ro ba. Nhym me Metĩndjwÿnh kupa'ā apÿnh mÿjja rÿnh jarênh mebê Metĩndjwÿnh kabênkumrêx kurênh arÿm me noo akno. Nām me memā 'êx ba. Me kabênh 'êxnhĩ ne kute mrāmri ne me ô kikre tÿx pyrāk. Bar kam ikabêno me ity nhym me arÿm ar imā rerekre. Ar imā rerekre nhym me arÿm katāt Kritu'ā ujarênh man katāt kabênh kôt ar amijo ba. Kam ar ije mrāmri ne me kute me pardja'ā me pa 'amÿnh ne me meo ban meo bôx pyrāk nhym me arÿm Kritu kôt amijo ba.

<sup>6</sup> Ar gadjwÿ dja gar prĩne Kritu kabênh kôt amijo aba mex ba arÿm bôx. Bôx nhym ar ajō ate aje ar amijo aba prām rā'ā ba arÿm ar amā ibênh tÿx gar arÿm pānh atokry.

<sup>7</sup> Ar akwÿ ne gar abenmā,

—Djā ne Kritu Paur jano? Kati, anhÿro aba. Ba ar amā arê gar ama. Djām gwaj baje me krākābit pumÿnh ne kam arÿm amim, “Tāmwā ne mex”, ane nār, “Tāmwā ne mex kêt”, ane. Djām gwaj baje me krākābit pumÿnho ne arÿm prĩne me mar mex? Kati. Djām mrāmri Kritu ar ajo bakumrêx gar

arÿm ama. Aje mrāmri markumrêx jabej ar badjwÿ ar ima. Djām Kritu kute ar ijo ba kêt got? Ar badjwÿ mrāmri Kritu kute ar ijo bakumrêx. Gwaj ba ne Kritu kute gwaj bajo bakumrêx. Gwaj baje aben pyrāk. Tām dja gar ama.

<sup>8</sup> Ba ren ar amā ar irax jarênh kume:x. Djā ne ba ren kam amikam ipijām? Kati. Mrāmri ne Bēnjadjwÿr djwÿnh ar ba ar ijā irax mēnhkumrêx. Ar akadja ar ijā ar irax mēnhkumrêx. Djām ar ije ar amā ibênh tÿx kadja ne ar ijā rax mē? Kati. Bar Kritu'ā ar amā ajarê gar mar mexo amÿ amikamēnh mar rax. Ja kadja ne Bēnjadjwÿr djwÿnh ar ijā rax mē.

<sup>9</sup> Ba ren ajte ar amā amirax jarênh kumex. Nhym be, kati. Me kute ar amā,

—Paur ne ar amā pi'òk no'òko kute ar ajaêr prām, anhÿr. Djām mrāmri? Kati. Ije ar ajaêr prām kêt. <sup>10</sup> Me kwÿ ta ne me arík ijā kabênh ne ar amā,

—Paur ne pi'òkkāmbit we kabênkumrêx ne tÿ:x. Djām mrāmri ne tÿxkumrêx? Kati. Dja ta anhÿtāri ar awÿr bôx ne arÿm rerekren kabênh punure gar amā kabênh kÿnh kêt, ane. Nām me kwÿ ā ijā ar amā ane.

<sup>11</sup> Gora gê wākam me'ō ar ajte ikabênh ma. Amybÿm ar ikabênh kajgo kêt. Pi'òkkam ar amā ar ikabênkumrêx. Dja ba wākam ar awÿr bôx ne wākamdjwÿ itÿxkumrêx. Ar ije pi'òk no'òkkam 'itÿx kôt itÿxkumrêx.

<sup>12</sup> Me kwÿ ta ne me amiraxo àmra ba. Me kum me kÿnhmā ne me ta amijo àmra ba. Djām ar ije amijo me urāk? Kati. Djām ar ije me'ā amijakreo iba? Kati. Nhym be, me ta ne me amirax jabej abenā amijakreo ban amim,

—Irax kute tām wā rax pyrāk, anhÿro ba. Nār,

—Ba ne ba iraxo tãmwã jakre, anhÿro ba. Djãm kam me krã mex? Kati. Me krã punu.

<sup>13</sup> Nhy m be, kati. Metĩndjwÿnh ne ar imã idjãpênh djã'ã karõ bar Kritu'ã memã idjujarênh ar iba. Djã ne bar kam amijo me'õ nhõ ãpênh djã pytãn 'ã ar amijo amra? Kati. Metĩndjwÿnh ta ne ar imã ar idjãpênh djã'ã karõ. Kabên kôt ne bar memã Kritu jarên 'ÿr meo akêxo iba. Kute ar imã ar idjãpênh djã jakre kôt ne bar idjãpênh tẽ:n kam arÿm ar gadjwÿ ar awÿr bõx ne arÿm ar amã arê. Ar ba ne bar ar amã Kritu jarên arÿm ar gadjwÿ 'ÿr ar ajo akêx ne. Ar ije Kritu 'ÿr ar ajo akêxkam ne bar iraxja.

<sup>14</sup> Bar ren ar awÿr ibõx kêt ne ren arĩk ar amã amijarênh kajgo. Nhy m be, kati. Arÿm ne bar ar gadjwÿ ar awÿr bõx ne ije kãj bê ar amã Kritu'ã ujarênh ny jarênhkumrêx. Kam ne bar ar akadjy irax.

<sup>15</sup> Pyka 'õdjwÿkam dja me'õ Metĩndjwÿnhmã apên arÿm Kritu 'ÿr meo akêx. Djã ne bar kam me kwÿ kudjwa õ pykakam õ me ja'ÿr bõx ne õ ãpênh djã'ã amimên arĩk memã kum,

—Ba ne ba Kritu 'ÿr ar ajo akêx ne. Kam ne ba ar akadjy irax, anhÿro iba? Kati. Ar ije ã memã anhÿr prãm kêt. Adjÿm. Dja ba ajte akubyn ar awÿr bõx ne ajte ar amã Kritu kabên jarê. Gar kam arÿm amim Kritu mar mexo amũ amikamênh tẽ:n arÿm mar mexkumrêx. Nhy m kam ar abu'ã me krãptĩ arÿm ar adjõ'ã ajte 'ÿr amijo akêx ne.

<sup>16</sup> Dja gar ajte ar ikôt o kangõ bar ajte amũ ar anhijukri me jamã arênh tẽ. Amũ memã Kritu'ã ujarênh ny jarênh tẽ. Ja ne bar kam ama. Djãm ar ije me kwÿ kudjwa me'õ djãpênh djã'ã amimên ne arĩk me ãpênh proo idjãmra prãm? Kati.

<sup>17</sup> Amrêbê: me kute me bakukãmãremã arênh kôt bar amijo iba. Nãm me memã kum, “Djãm amijo adjãmra prãm? Kwãrĩk wãnh amijo adjãmra kêt.

Dja ga Bẽnjadjwÿr djwÿnh amra.” Nãm me ã memã ane bar kabên man kôt ar amijo iban amijo idjãmra kêt ne Bẽnjadjwÿr djwÿnh amra. <sup>18</sup> Djãm me'õ ta kute amijo rax ne kute memã amijarênhkam Metĩndjwÿnh kute 'ã memã kum, “Ã. Mrãmri ne raxkumrêx”, anhÿr? Kati. Metĩndjwÿnh ta kute me'õ'ã rax mênhkambit kute 'ã memã kum, “Mrãmri ne raxkumrêx”, anhÿr.

## 11

*Me 'êx ne ta kute amijo Jeju kute anor pyrãk.*

*Mat 7.15; Rõ 16.17; Kor 2.8; A Ped 2.1*

<sup>1</sup> Ba ije ar amã amijarênhkam kute ibên kati pyrãk. Ar arek nhÿn ikabên ma. Nã, dja gar arek ikabên maro nhÿ. <sup>2</sup> Nã bãm ar ajã ino tÿ:x kute Metĩndjwÿnh õ me ja'ã no tÿ:xja pyrãk. Dja gar katãt Kritu kôtbit amijo aban ajaxwe kêt. Kwãrĩk wãnh me kum Metĩndjwÿnh kĩnh kêt kukrãdjãjakôt amijo aba kêt. Mekôt ar aje amijo aba kêt kadjy ne ba ar ajã ino tÿ:x ne.

Ga, me bãm, me nã kra ni'ã no tÿ:xja pumũ. Me my kute Ar kubê kupênh kêt kadjy kra'ã no tÿ:xja pumũ. Nhy m kam arÿm abatãnh nhy m mjên pydji 'ÿr mörkumrêx nhy m krõ'ã mjên kêtumrêx.

Badjwÿ. Ba arÿm Kritumã ar ajarên kum,

—Kôritukam ar ja dja ar katãt akôtbit amijo ban me kum akĩnh kêt kukrãdjãja kôt amijo ba kêt. Nã bãm ã kum ar ajarênh anen arÿm ar ajã ino tÿ:x ne. Dja gar katãt Kritu kôtbit amijo aban ajaxwe kêt. Kwãrĩk wãnh me kum Metĩndjwÿnh kĩnh kêtja kôt amijo aba kêt. Mekôt amijo aba kêt kadjy ba ar ajã ino tÿ:x ne.

<sup>3</sup> Me kute ar anoo biknor karô ne ba ar akam axwe idjumar. Ar aje katât Kritu pydji kôt amijo aban ajaxwe kêtâmã. Godja me arîk kupa'ã ar amã mÿjja kwÿ jarê gar aman arÿm Kritu kupa'ã amijo aban ajaxwe. Nãm ã kangã no tÿ:xkam kute me bakwatynh Ewamã 'êx ne noo biknoro ane. Me kute ar gadjwÿ ar anoo biknor karô ne ba ar akam axwe idjumar.

<sup>4</sup> Godja me ar awÿr bôx ne ije ar amã Jeju'ã ujarênh ny jarênh kupa'ã ar amã atemã Jeju 'ôdjwÿ'ã ujarênh jabej. Djã nã gãm ar me kanga? Kati. Nã gãm ar tu amã me kînh ne arek me kabên maro akrî. Djã nã gãm ar me kôt Metîndjwÿnh Karô maro aba? Kati. Atemã me karô punu ne gar me kôt maro aba. Djãm Kritu'ã ujarênh ny ne gar amim maro aba? Kati. Atemã mÿjja punu'ã ujarênh ny ne gar maro aba. Nãm me ar amã kupa'ã arê gar amã me kînh ne arek me kabên maro akrî.

<sup>5</sup> Me kwÿ ta amijo 'êx ne ar amã, —Kritu ne ijano ba ar amã arêho iba, ane. Ta ne ar amijo raxo ba. Djãm mrãmri ne we ar ja ikurãm rax? Kati. <sup>6</sup> Nãm me ijã,

—Paur ne kabên tô, anhÿro ba. Kwãrîk wãnh rã'ã. Ikabên tô. Djã ne ba Kritu'ã ajarên ikabên tô? Kati. Ar ga ne gar prîne katât 'ã idju-jarênhja ma, ikabên amirîtkumrêxja ma.

<sup>7</sup> Nã bãm ar amã ujarênh ny jarên pãnh ije amim ar abê pi'ók kaprî jamÿnh kêt. Djãm kam ne gar arÿm ijo kajgo? Ije amim ar abê pi'ók kaprî jamÿnh kêt kam ne ije amijo me kajgo pyrãk. Mÿkam ne ba ã amijo ane? Bir, ije ar ajo raxmã ne ba ije amijo me kajgo pyrãk. Djãm kam ne gar amim,

—Paur kajgon axwe, ane. Kwãrîk wãnh gar amim anhÿr kêt.

<sup>8</sup> Djãm ba ne ba ar amã amijo a'uw? Kati. Amÿ me ja ne ba me ku'uw, ne apÿnh me ô pykakam mrãn bôx ne me kute amim Jeju

mar ne kôt ar aben pydjio ba djãri me ku'uw memã kum,

—Ar ikôt o kangô ba Kôritukam memã arê. Nã bãm ã memã ane nhym me arÿm imã pi'ók kaprî ngã ba amÿ. Ne kam ar akam bôx ne ar amã Kritu kabên jarê. Ne kam ba inhô mÿjjao pãnh ne. Amÿ me'ô nhô pi'ók kaprîo inhô mÿjjao pãnh. Ije ar amã idjã'wÿr kêt kadjy ne ba inhô mÿjjao pãnh ne ar akam idjãpênh ar iba. Ar amã arêho iba.

<sup>9</sup> Ne kam ar akam ar iba nhym kam prãm iwÿr bôx. Djã nã bãm ar ajô 'uw? Kati. Mateni kurÿm gwaj bakamy ar bôx. Ne kam ar ta arÿm ijo djuw mex. Inhô mÿjja ibê kêt nhym ar arÿm imã kunî ngã. Ar akam idjãpênh kunîkôt ije pãnh ar abê pi'ók kaprî jamÿnh kêt. Dja ba rã'ãn ar abê amÿnh kêt kumrêx ne.

<sup>10</sup> Mrãmri ne Kritu kabên katãtkumrêx. Badjwÿ kôt katât ar amã ikabên jarênhkumrêx. Pykabê Akajakam ar abê Kôritu ar, ije idjãpênh pãnh ar abê pi'ók kaprî jamÿnh kêt. Ije amÿnh kêt'ã dja ba ar amã amijarêho iba rã'ã. Dja gar ajô ije amijarênh jabê adjãptãr kêt kumrêx. <sup>11</sup> Ije idjãpênh pãnh ar abê pi'ók kaprî jamÿnh prãm kêt. Ja'ã ne ba ije ar amã amijarênh prãm ne arÿm ar amã amijarê. Mÿkam? Djãm imã ar ajabê kêt kam? Kati. Imã ar ajabê kam ne ba arÿm ar amã amijã ajarê. Metîndjwÿnh kute imar.

<sup>12</sup> Ne ba ren ar abê pi'ók kaprî jamÿ nhym ren me'ô ikãxã ar amã,

—Be, djãm ar bajbit ne bar ar abê pi'ók kaprî jamÿ? Ga, Paurdjwÿ kute ar abê pi'ók kaprî jamÿnh ar o bawã pumÿ. Ar ije aben pyrãkja pumÿ, ane. Ar kute ijã, “Ar ije aben pyrãk”, anhÿr karô dja ba irã'ãn idjãpênh pãnh ar abê pi'ók kaprî jamÿnh kêt rã'ã ne.

<sup>13</sup> Djãm mrãmri ne bar ije aben pyrãk? Djãm mrãmri ne Kritu ar ano kute mrãmri kute ijanorja pyrãk nhym ar 'ã ujarênh ar ba?

Arkati. Nām ar ar anoo biknoro ba. Nām ar ta memā 'êx ne memā,

—Kritu ne ijano ba 'ā idjujarēnh ar iba, ane. <sup>14</sup> Djā ne ba amim,

—E kum, mỳkam ne ar me noo biknoro ba, ane? Kati.

Ga, me axwe nhō bēnjadjwýrbē Xatanajdjwý kute me noo biknorja pumū. Nām amijo Metīndjwýnh kadjy mrānh djwýnh pyrāk ne me noo biknoro ba. <sup>15</sup> Kam ō àpēnhdjwý ar ō bēnjadjwýrbē Xatanaj kudjwa memā 'êx ne amijo Metīndjwýnh nhō àpēnh pyrāk. Ar ta arīk ar amā,

—Dja gar ikabēnh man kam mrāmri katāt ar amijo abakumrēx, anhýro ba. Kam ar kute am-inhinomā amimēnhkam dja Metīndjwýnh ar 'êxnhī kōt arkum o pānh katāt nhym ar arým me biknor tokry djākam akuno.

*Apýnh amikaprī djāri Paur kute 'ā amijarēnh.*

<sup>16</sup> Ba ajte ar amā arē gar ama. Kwārīk wānh amim,

—Paur ne amimex jarēnh ba. Ga, bēh katikumrēxja pumū, anhýr kēt. Nār gar aje ijā amim anhýr jabej arek nhýn ikabēnh ma. Ba ajte ar amā amimex jarē gar ama.

<sup>17</sup> Ije ar amā amimex jarēnh ja ne kute Bēnjadjwýr djwýnh kabēnh pyrāk kēt. Ne kute ar amā ibēnh kati pyrāk ne ar amā amijarē. <sup>18</sup> Me krāptī ne ar amā amijo àmra prā:m. Me kute amidjwýnhbito kīnh kadjy amijo àmra prā:m. Ba ne ba bir amimex kōt ar amā amijarēnh amirītkumrēx gar badjwý ima.

<sup>19</sup> Me kwý ne me mrāmri bēnh katikumrēx. Nām me ar awýr bōx ne ar amā amijarē gar arek me kabēnh maro akrī. We ar akrā mex ne kam arek me bēnh kati maro akrī. <sup>20</sup> Dja me'ō bēnh kati ar akwý apa 'amýn amiwýr ar ajo akēx gar arým kōt ar amijo aba. Ne kam ate akrān arek me'ōja kabēnh maro akrī. Dja me'ō bēnh katikōt ar akwý anoo aknon ar abē mýjjao prōt, gar kam

ate akrān arek me'ōja kabēnh maro akrī. Me'ō ta dja ar akam amijo ra:x nār ar akwý nobē tak ne. Gar kam ate akrān arek kabēnh maro akrī.

<sup>21</sup> Ba ren badjwý ar amā ibēnh týx gar ren ikabēnh ma. Nhym be, kati. Ba ne ba ar amā ibēnh týx kēt. Ba akrānmā ar akam ar iba gar kam arým amim, “Paur rerekre ne ka-jgo”, anhýro aba. Nhym be, kati. Irerekre ne ikajgo kēt.

Me ta ne me amijā, “Jeju ne ijano ba bōx”, anhýro ba. Me amijo amra:n arīk ar amā, “Ba ne ba iraxkumrēx.” Nām me ā ar amā anhýr ar o ba. Ba badjwý jakam ar amā amimex jarē gar ama. Nā bām ije ibēnh kati pyrāk ne ar amā amirax jarē gar ama.

<sup>22</sup> Djām ar wābēbit ne ebraga. Badjwý. Djām ar wābēbit ne id-jaer. Badjwý ibē idjaer. Djām ar wābēbit ne Abraão tām djwý. Badjwý ibē Abraão tām djwý. <sup>23</sup> Djām ar wābēbit ne Kritu nhō àpēnh. Badjwý ibē Kritu nhō àpēnhkumrēx ne o ar akrenh mex. Nā bām ije ar amā ibēnh kati pyrāk ne ar amā amirax jarē. Nā bām kum idjāpēnh týxo ar akrenh mex ne.

Me kute mry kà punuo ikaprēprēk kume:xi. Ba te ije itak'ā akremā.

Ne kute ajte ibē ijē krāptīo ar akrenh mex ne.

Ne ajte bit kute ibīnmā ijo baja krāptī: ba ityk pyma ar iba. Ga, ibē Kritu nhō àpēnhkumrēxja pumū.

<sup>24</sup> Kamā ne apýnh mebē idjaer djāri ajte mry kà punuo ikaprēprēk kumex. Nām me ikaprēprēk nhym kam me ajte ikaprēprēk nhym kam me ajte ikaprēprēk nhym kam me ajte ikaprēprēk nhym kam me ajte ikaprēprēk. Ne kute ikaprēprēk kunīkōt me me kute mrykà punuo itak'ā akre krāptī: kute 39 pyrāk.

25 Nhyam kam me ajte kōo ititik ne.  
Nhyam kam me ajte kōo ititik  
ne. Nhyam kam me ajte kōo  
ititik ne.

Nhyam kam me ajte kute ibīnmā  
kēno ititi:k ne. Ga, ibē Kritu  
nhō àpēnhkumrēxja pumū.

Ba kākamdjwý, kà rūnhkam ngō  
raxbē pyka kētkam iba nhyam  
ijā kà ja wadjà. Ne ajte ijā ja  
wadjà. Ne ajte ijā ja wadjà.

Ba ajte ngō raxkam wadjà ne pī'ā  
wajēt: ne ar iba:. Nhyam ijā  
akamāt ne akati ba wabi.

26 Nā bām ar imrānh kume:x ne.  
Nhyam kam ajte apýnh ngō rūnh  
djārikam idjār pyma: ne.

Nhyam apýnh me àkīnhī kute ijaērbē  
ijo tým ne ijo bikēnh pyma:.

Nhyam apýnh mebē idjaerdjwý kute  
ijo bikēnh pyma:.

Nhyam me bajtemdjwý kute ijo  
bikēnh pyma:.

Apýnh krīrax djārikam ar iba ne  
apýnh kapôt kukrit djārikam  
ar iba ne ngō raxbē pyka  
kētkam ar iba. Ja kunīkôt ne  
mýjja kute ijo bikēnh pyma:  
ne.

Nhyam me 'ēx ne kute amijo Jeju  
mardjwý kute ijo bikēnh  
pyma:. Ga, ibē Kritu nhō  
àpēnhkumrēxja pumū.

27 Nā bām idjāpēnh pytīdjwýo iku'én  
o amidjōm me:x ne.

Ne ajte inhôt kēt krāptī.

Prāmmē kōrkam ne ba ajte ar iba.

Ije ajte amijajbur kumex.

Ajte imā kryn ikā kēt ne ar iba.

28 Ikā krākà'ā mýjja ne ja.

Ba kam me kute amim Jeju marja  
ma:ro ikrī. Apýnh me kute  
amim Jeju mar ne kôt ar  
aben pydjio ba djāri ne ba  
kunīkôt me ma:ro ikrī. Ne  
me kwý'ā àpnhix ne, ne akati  
kunīkôt mekam idjumar  
punu:re.

29 Dja mekam me'ō rerekre. Djām  
kôt irerekre kēt got? Kôt bad-  
djwý irerekre.

Dja me Metīndjwýnhbē me'ōo akēx.  
Djām o ingyryk kēt got? O  
ingrykkumrēx. Nā bām me  
ma:ro ikrī. Ga, Kritumā  
idjāpēnhkumrēxja pumū.

30 Me kwý ta kute amijā,

—Kritu ne ijano ba bōx,  
anhýro baja djām mrāmri ar kum  
àpēnhkumrēx. Kon. Ga, Kritumā  
idjāpēnhō ije me akrenh mexja  
pumū. Dja ba ar amā amimex'ā  
idjujarēnh prām jabej arým ar amā  
apýnh itokry djāri, apýnh ikaprī  
djāri'ā ar amā ajarē. Kunī kôt  
irerekre. Ba ar amā irerekredjwý  
'ā ajarē gar ama.

31 Bēnjadjwýr djwýnhbē Jeju  
Tīndjwýnh kute imar. Jeju Bām,  
mexti:re rā'ā: rā'ā ne. Tāmja ne  
kute imar. Ije amimex jarēnh ne  
ijēxnhī kētkôt kute imar.

32 Ba ajte ar amā irerekre jarē  
gar ama. Krīraxbē Tamagu nhō  
bēnjadjwýrja bit kute ipa 'amýnhmā.  
Bēnjadjwýr rax Areta ne Tamagu  
nhō bēnjadjwýr jamā nhý. Tamagu  
nhō bēnjadjwýr ō krākamngōnhmā  
ijarē. Nhyam krīrax bu'ā pyka týt  
nhipēx apýnh ajkwa krekre djāri.  
'Ā ikator nhyam me kute ipa 'amýnh  
kadjy nārām ne me ibē kre kunī  
pytā. 33 Nhyam me kute amim  
Jeju mar arým djudjédjêo kaxnokai  
jakà 'āpren kam inhýr. Ne kam  
kýjrūm krīrax nēje pyka týtja burūm  
imē. Kre krā'yrkôt burūm imēn  
arým ijo ruw. Ba arým pykabē  
djan mā mebē ikaton iprôt ne.  
Be, djām kam 'itýt got? Kati.  
Ba ne ba irere:kre. Nhyam be,  
Metīndjwýnhbit týt:x ne arým ipytā.

## 12

*Kute kàjkwa pumūnh'ā amijarēnh.*

<sup>1</sup> Djām ije amikôt ar amā ami-  
jarēnhō iban kôt iraxmā? Kati.  
Kwārīk wānh rā'ā. Ba ar amā  
mýjja'ā ajarē. Me kute mýjja  
pumūnh kētja ba arým omū. Dja ba  
ar amā 'ā ajarē. Bēnjadjwýr djwýnh

kute amrēbē memā mỳjja jarēnh kēt. Arỳm ne imā arē. Nām imā arē ba arỳm kuma. Dja ba ar amā 'ā ajarē gar ama.

<sup>2</sup> Ba amipumū. Ije amim Kritu markam amipumū. Nhyam kam Metīndjwýnh arỳm amiwýr ijo àbiro tē ba amipumūnho tē. Nām kàjkwa jan iby jan amū ja. 'Yr ne ijo wabi, amiwýr ijo wabi ba arỳm amipumū. Bārām inhītā got ijo wabi nār kon ikadjwýnhbit got o wabi. Kon, ije mar kēt. Metīndjwýnh ta ne kute mar. Ba ije amipumūnhja'ā arỳm amex krāptī apēx. Amexbē 14 ne ijukri ajmā 'ā akre kute ne ijā apēx. <sup>3</sup> Bārām inhītā got ijo wabi nār kon ikadjwýnhbit got o wabi. Kon. Ije mar kēt.

<sup>4</sup> Nā bām amipumūnho tē nhyam Metīndjwýnh amiwýr ō kàjkwa djwýnhmā ijo wabi. Kàjkwa djwýnh ne me:xkumrēx. Kam mỳjja punu kētkumrēx. Metīndjwýnh ō kàjkwa djwýnhmā ijo wabi ba amipumū. Ne kam arỳm kam me kabēn ma. Me kabēn mexkumrēx. Punu kētkumrēx. Ba kam te ije me kabēn jarēnhmā. Mexti:rekam te ije arēnhmā. Pykakam me babēngōkre kabēn'yr bōx kēt. Nhyam ta ibē uma, ije arēnh kēt mā.

<sup>5</sup> Be, tām ne ja. Ije amipumūnhja'ā dja ba ar amā amikōt amijarē. Djām ba ije ar amā amimex jarēnhmā? Kati. Ba irerek mexi. Kam ne ba ar amā amikōt amijarē. <sup>6</sup> Nār, ba ren ar amā amimex jarē djā ne ba ren ibēn kati? Kati. Ba ren ibēn kati kētkumrēx ne kam mrāmri ar amā amimex jarē. Ne ren katāt amimex kōt ar amā amijarēnhkumrēx nhyam ren me'ō arỳm ren ijo amra: ne. Nhyam be, kati. Irerekre'ā dja ba ar amā amijarē gar kam arỳm aje ipumūnh kōt ne aje ikabēn mar kōt imar katāt.

<sup>7</sup> Ga, kute imā apýnh mỳjja pumūnh kētjao amirītja pumū. Nām

imā mỳjja rūnho amirīt. Ba ren kam 'ā amijo amra. Nhyam be, kati. Kam amijo idjāmra kēt kadjy itokry djā ja iwýr bōx. Mrāmri itokry djā ja ne kute mrýnhī arek me ikam ku'ē nhyam me tokry pyrāk. Xatanaj imā itokry djā ja jano nhyam iwýr bōx ba arỳm itokry. <sup>8</sup> Kam, kute kubē ipytār kadjy ba te Metīndjwýnhmā amijo a'uw. Ne ajte te kum amijo a'uw. Ne ajte te kum amijo a'uw.

<sup>9</sup> Nhyam arỳm imā,

—Kati. Dja ga atokryja mar rā'ā ne. Be ga, me tokry ne kaprīrekam rerekreja pumū. Me te rerekre ba idjukaprīn itýx puroo memā týx jangij. Gadjwý dja ba ajo djuw mex. Dja ga te atokry ne arerekre ba dja ba ajo djuw mex ga arỳm atýx.

Nām ā Metīndjwýnh imā ane. Kam ba itokry ne irerekre rā'ā. Tām ne ba ije ar amā arēnh prām. Irerekre dja ba ar amā arē, me kunīmā irerekre jarē. Kritu týxo itýx kadjy ije memā irerekre kōt amijarēnh prām.

<sup>10</sup> Kam Kritumā idjāpēnhkam mā ne ikute? Bir, apýnh irerek djāri ne iwýr ban bōx. Nhyam apýnh me kwý imā akij. Nhyam apýnh itokry djāri iwýr ban bōx. Nhyam apýnh me kwý ijo ajkē. Nhyam apýnh mỳjja pyma djāri ikam apōx. Te apýnh mỳjja ikam apōx ne te irerekre ba kunīkōt ikīnh. Mýkam? Bir, dja ba ba irerekre nhyam Kritu arỳm imā týx jadja ba arỳm itýx ne.

*Me kute kupa'ā Paur mar:*

<sup>11</sup> Ije amimex kōt ar amā amijarēnhkam kute ibēn kati pyrāk. Mýkam ne ba amimex jarē? Bir, ar aje ikupa'ā ijarēnhkam. Ar ga ne gar ikupa'ā abenmā kum,

—Djām Kritu ne Paur jano nhyam 'ā ujarēnh tē? Kati. Kute anor kēt, ane. Ba kam amā amimex kōt amijarē. Ba amimex kōt amijarēn kute ibēn kati pyrāk. Ar ga ne ga ren ar abenmā kum,

—Mrãmri ne Kritu kute Paur janorkumrêx nhym gwaj bamã 'ã ujarênh ar ba, ane. Ga ren ar anen ba ren amimex kôt ar amã amijarênh kêt. Ar akam me'õ ar ta arík amijo 'êx ne kute ar amã,

—Kritu ne ijano ba ar amã idjujarênh ar iba, anhÿr ne ta amijo raxo ba. Djãm mrãmri ne ba we ar wã katêri irax? Kati. Ba ne ba ar wãmê ije aben pyrãk ne ar katêri itêm kêtumrêx. Ne kam djãm ba ne ba irax? Kati. Ba ne ba ikajgo. Nhym be, mrãmri ne Kritu ijano ba 'ã idjujarênh ar iba.

<sup>12</sup> Amrêbê ne ba arek akrãnmã ar akam mÿjja pumũnh kêt nhipêxo iba. Ne apÿnh me punu djãri meo mex gar omũn arÿm Kritu raxmã akato. Ba ar akam mÿjja rũnh nhipêxo iba gar amim,

—Mrãmri ne Kritu kute Paur janorkumrêx. Ga, Kritu kute anor kôt kute mÿjja nhipêxja pumũ. Nã gãm ar amrêbê ã amim ane. Mÿkam ne gar jakam arÿm amim,

—Kati. Kritu kute Paur janor kêt, ane?

<sup>13</sup> Mÿkam ne gar jakam arÿm amã ikĩnh kêt ne? Nã gãm ar amim,

—Be, Paur kum me ikĩnh kêt. Nãm kum me wãbit kĩnh. Kum apÿnh me kute amim Jeju mar wãbit kĩnh. Kum apÿnh kôt me ar aben pydjio ba djãri wãbit kĩnh ne arÿm ãpênh pãnh mebê pi'ók kaprĩ jamÿ. Nhym be, gwaj bajbit ne kute gwaj babê pi'ók kaprĩ jamÿnh kêt. Nã gãm ar ã amim ane. Djãm mrãmri imã me wãbit kĩnh? Kati. Imã ar gadjwÿ kĩnh. Imã ar akĩnho aben pyrãk. Kwãrĩk wãnh gar ikam angyk kêt.

<sup>14</sup> Ota, jakam ba arÿm ar awÿr itêmmã. Arÿm ne ba ar akam tẽn ajte ar akam tẽ. Ne jakam ajte ar akam itêmmã. Dja ba ar akam tẽn bõx ne ajte idjãpênh pãnh ar abê pi'ók kaprĩ byr kêt. Djãm ar anhõ mÿjja ne ba abej ne ar akam itêmmã? Kati. Imã ar anhõ mÿjja prãm kêt. Ar aje amim Jeju mar

raxmã ne ba ar akam itêmmã. Ja ne ba imã kĩnh. Djãm me kra ne kute bãm kadjy mÿjjao atom ne adjwÿr? Kati. Bãm ne kute kra kadjy mÿjjao atom.

<sup>15</sup> Ba ije ar abãm pyrãk dja ba ar akadjy apê:n prĩne ibê inhĩ kato. Ne kam ikaprĩ kêt. Ikĩnhbit. Ar ga dja gar te amã ikĩnh ngrire. Ba dja ba kãjmã imã ar akĩnh kamênh tẽn mã ar akadjy apê. <sup>16</sup> Be, ar ga ne gar ima. Idjãpênh pãnh ije ar abê pi'ók kaprĩ jamÿnh kêtja ma. Nhym be, ar akam me'õ arík ar amã,

—Djãm me kum prãmja kadjy ne Paur kute ar abê pi'ók kaprĩ jamÿnh? Kati. Paur no tÿxtikam ne arík ar amã 'êx ne ar anoo akno. Nãm arÿm ar anhõ pi'ók kaprĩo aminhõ, anhÿro ba.

<sup>17</sup> Be, amrêbê ba ar awÿr ar ja jano nhym ar awÿr bõx. Ne kam arÿm ar abê pi'ók kaprĩ byn arÿm imã o bõx. Djãm kam ne ba arÿm o aminhõ? Kati. <sup>18</sup> Nã bãm ar ajã Xitumã karõ. Gwaj bakamy jadjwÿ ba arkôt ano nhym ikabên kôt ar arÿm ar awÿr tẽn bõx. Djãm Xitu kute ar anhõ pi'ók kaprĩo aminhõ? Djã ne atemã ibê kabên djin atemã ibê amijo tẽ? Kati. Ar ije imrãnh katãto aben pyrãk gar arÿm ama.

<sup>19</sup> Ar akwÿ ne gar aje abenmã kum,

—Be, Paur ar mrãmri gwaj bajo ajkê. Ga, ar kute aminêje gwaj bamã amijã àprãrja ma, ane. Djã ne bar ar ajõo ajkê got bar ar amã amijã aprã? Arkati. Bar tu amim Kritu markumrêx ne ar amã amijarê nhym Metĩndjwÿnh ta kute ar imar. Akmere àpnhĩre ar, djãm ar ije amijo djuw mex kadjy ne bar ar akam apê? Kati. Ar gajbit bar ije ar ajo djuw mex kadjy ar akam apê. Ar ije ar amã arênh gar aje Kritu mar raxmã. Ja kadjy bar ar akam apê.

<sup>20</sup> Imã ar ajaxwe kêt prãm. Nok ren ar ajaxwe ba ren ar awÿr bõx.



Ar amã ne ba ikabên mexobit ikabên prãm. Ikabên ja ne gar amã kñh. Ne ba ren ar awÿr bõx ne ren ar amã ibên tÿx ne. Ar amã ibên tÿx karõ ba amikukãm pi'õkkam ar amã ikabên. Ga ren ar aje akabêno aben japanh prãm ba ren ar awÿr bõx ne ren ar amã ibên tÿx ne. Ga ren ar aje aben nhõ mÿjja'ã angyrk prãm nãr ren ar aje abenkam adjãkrê prãm ba ren ar amã ibên tÿx ne. Nãr ga ren ar abenmã adjãkjêr prãm nãr ren abenã akabên punu ba ren ar amã ibên tÿx ne. Nãr ren ar aje aben kãxã abenbê aben kurê prãm nãr ren abên kati prãm nãr ren abenmã adjãkjêro abikarêr prãm ba ren ar amã ibên tÿx ne. Ar awÿr ibõx gar akrãpti ajaxwe ja'õ karõ ne ba pi'õkkam amikukãm ar amã ikabên ne.

<sup>21</sup> Ga ren ar akwÿ ajaxwe prãm rã'ã. Nãr ren akwÿ ar aprõ djwÿnh kupa'ã akurê aba prãm rã'ã. Nãr akwÿ amjên djwÿnh kupa'ã akurê aba prãm rã'ã. Nãr ren akwÿ aje apijãm kèttikam adjãpên punu prãm rã'ã. Amrêbê ar akwÿ ã ajaxweo ane ba ar amã pi'õk no'õk ne. Ar amikam akaprïren wãnh ajaxwemã anhirer ne aje akubyn Metïndjwÿnh'ÿr amijo akêx kêt karõ ne ba amikukãm pi'õkkam ar amã ikabên ne. Ba ren ar akam bõx nhym ren Metïndjwÿnh ar akam imã irerek jadjã ba ren ar akrãptikam imÿr rax. Ar akam imÿr rax karõ ne ba amikukãm ar amã ikabên ne.

## 13

*Kute me kwÿbê axwe pyma.*

<sup>1</sup> Jakam ba arÿm ar awÿr itëmmã. Arÿm ba ar akam tèn ajte ar akam tẽ. Ne jakam ajte ar akam itëmmã. Be, amrêbê: Metïndjwÿnh me bakukãmãremã kum, "Dja me'õ amijarênh jabej. Gê ar amãnhkrut nãr ar amãnhkrut ne ikjêkêt kabên kôt memã

arê. Ar kute kabên mar kôt arê nhym me arÿm kuma.

Ar axikôt kabênkam dja me ar kabên man arÿm abenmã kum,

'Mrãmri me'õja kute amijarênh nhym ar kute kabên kôt arênhkumrêx', ane.

Dja me ã abenmã ane."

Nãm ã Metïndjwÿnh me bakukãmãremã ane. Ja dja gar amijã ama. <sup>2</sup> Be, õbê ne ba ar awÿr bõx. Ne kam ajte ar awÿr bõx ne ar abê ajaxwe pyma. Jakam ba ajte ar akãxã pi'õkkam ar abê uma. Ja dja gar amijã aman ikabên mar pydji. Amrêbê ar akwÿ ajaxwe jabej nãr ajbir ar akwÿdjwÿ axwe jabej djãm ije ar amã iprïmã? Kati. Dja ba bõx ne ar amã iprï kêt ne tu itÿx.

<sup>3</sup> Gar akwÿ ijã,

—Goja mrãmri Paur Kritu kabêno kabênkumrêx jabej bar goja kabênkumrêxmã ikato, anhÿro aba. Ar aje ijã anhÿrkam dja ba bõx ne itÿx. Djãm Kritu ar akam ãpênhkam rerekre? Kati. Ar akam tÿ:xi. <sup>4</sup> Mrãmri me kute pite'y'ã nhôrkam memã amijo rerekre. Nãm te memã amijo rerekren jakam Metïndjwÿnh 'itÿxkôt tïn ne ar ba. Ar badjwÿ ne bar kôt amijo irerekre. Ne te amijo irerekre dja bar bõx ne Kritu kôt itïn ne ar iban Metïndjwÿnh 'itÿxo ar akam itïn ne ar iba.

<sup>5</sup> Djãm bajbit ne gar aje imexkôt imã akatormã? Ar gadjwÿ dja gar amima:ro tèn amim akatorkumrêx ne amim,

—Djãm mrãmri ije tu amim Kritu markumrêx? ane. Dja ga ã amikukjêro anen kam mrãmri ar aje tu amim markumrêx jabej amim,

—Nã ije mrãmri tu amim Kritu markumrêx, anen kam arÿm ja markumrêx. Aje tu amim markumrêxja markumrêx. Ja dja gar amim akatorkam ama. Kritu ne mrãmri ar akam ÿrkumrêx. Djãm

ar aje amikam ja mar kêt? Nār kon, ar ajō ga mrāmri amijo ajêx ne amijo Jeju mar jabej nhym kam mrāmri ar akam yr kêt.

<sup>6</sup> Dja gar amiman arým ar badjwý ar iman amim,

—Mrāmri ne Paur ar kute Kritu markumrêx, ane. Ar aje amim ja jarênh ne ba kam ama.

<sup>7</sup> Jakam ne bar Metĩndjwýnhmā ar ajo a'uw ne kum,

—Dja ga meo djuw mex gê me axwe'ō kêt, ane. Mýj kadjy dja gar ajaxwe kêt? Djām me kute ar akôt ar imar ne kute ar imā mex jarênh kadjy? Kati. Godja me te ar ijā, “Paur ar ta ne amijo 'êx ne amijo Jeju maro ba”, anhýr rā'ā jabej. Kwārīk wānh rā'ā. Ar ba dja bar we amijo ijêx ne. Ar ga dja gar katāt ar amijo aban ajaxwe kêt. Ar ajaxwe kêt mā ne bar ar ajo Metĩndjwýnhmā a'uw.

<sup>8</sup> Djām bar Metĩndjwýnh kabên katāt kupa'ā amijo iba nhym kam arým kabên katāt kêt? Kati. Metĩndjwýnh ta kabên katāt rā'ā: rā'ā ne. Nhym be, kati. Bar katāt kabên kôtbit amijo iba prām kumrêx. Nhym kam me arým ar ikôt Metĩndjwýnh kabên katāt kumrêxmā kato.

<sup>9</sup> Dja bar te memābit ireekre. Kwārīk wānh rā'ā. Ar ga dja gar Metĩndjwýnh kabên kôt katāt ar amijo aban arým atýx. Kôt atýxkam ar ikĩnh kumrêx. Pĩne ar amex ja ne ar imā kĩnh kumrêx.

<sup>10</sup> Mýj kadjy ne ba ar akāxā pi'ōkkam ā amikukām ar amā ikabêno ane? Bir, ba ren ar awýr bōx ne ren ar amā ibên týx. Bēnjadjwýr djwýnh kute ijā rax mēnh kôt ba ren ar amā ibên týx. Ar amā ibên týx karō ne ba ar akāxā ā amikukām ar amā ikabêno ane. Djām ije ar ajo ibikēnh kadjy ne ijā rax mē? Kati. Dja ba ar amā arē gar amim Jeju

mar mexo amū amikamēn arým mar rax ne. Ja kadjy ne ijā rax mē.

*Kute memā amikabēn mex jarēnh ino rer:*

<sup>11</sup> Akmere āpnhĩre ar, ikabêno ino rer ne ja. Dja gar adjumar mex ne pĩne Metĩndjwýnhmā amex. Ne pĩne amijā ikabēnja ma. Ne axikôt ar akabēn ne abenmā akabēn mexo akabēn. Dja gar amijo ane nhym Metĩndjwýnh arým ar amē amijo kajkep. Kubê ne me kum aben jabê djā krō krax. Kubê ne me umar mex djā krō krax. Tām gēdja ar amē amijo kajkep.

<sup>12</sup> Dja gar amā aben jabêo amirĩt kadjy aben pa krij ne aben tatak.

<sup>13</sup> Amrē jakam Jeju nhō me ja kunĩ ne me amū ar amā kabēn mex jarē.

<sup>14</sup> Gē Bēnjadjwýr djwýnhbē Jeju Kritu tu kum ar akunĩ kaprĩn\* ar ajo ba. Gē Metĩndjwýnh kum ar akunĩ jabēn ar ajo ba. Gē Metĩndjwýnh Karō ar akunĩ mē amijo kajkep ne ar ajo ba. Tām ne ja.

\* **13:14** Djām ar ga ne gar adjukaprĩ nhym pānh arým kum ar akaprĩ Kati. Ta ne tu kum ar akaprĩ kumrêx.

## Paur kute Garaxakam me jamã pi'ôk no'ôk ne ja.

Paur ne pykabê Garaxakam me jamã pi'ôk no'ôk ne. Nãm arÿm pyka kunî'ÿr mrãnhkôt me'ÿr bôx ne memã Jeju jarê nhym me kwÿ arÿm tu amim markumrêx ne 'ã abeno akprô. Nhym kam Paur arÿm mã me jadjwÿ'ÿr tẽ nhym tekrekam mebê idjaer kwÿ me'ÿr bôx ne memã kum,

—Djãm ar aje tu amim Jeju markambit Metîndjwÿnh kute ar apytâr? Kati, dja gar prîne Môjdjê kukràdjâdjwÿ kôt ar amijo aban kam arÿm Metîndjwÿnhmã amex, ane.

Nhym kam Paur memã kum,

—Arkati. Mrãmri ne me tu amim Jeju markumrêx nhym Metîndjwÿnh arÿm memã axwe kêt jarê nhym me arÿm kum mex. Me ta ne me mÿjja kukràdjâkôt amijo bakôt Metîndjwÿnhmã mex kêt. Mrãmri ne me tu amim markumrêx nhym Metîndjwÿnh ukaprîkôt arÿm memã axwe kêt jarê, ane.

Djã nãm ã Abraão Môjdjê kukràdjâkôt amijo bao ane nhym Metîndjwÿnh arÿm kum axwe kêt jarê? Kati, nãm tu Metîndjwÿnh markumrêx ne arÿm Metîndjwÿnhmã mex. Nhym amũ tũmrãm Môjdjê katon memã kukràdjâ jarê. Bir be, gwaj badjwÿ tu amim Jeju markumrêx ne arÿm kênhkam ar baba. Gwaj bajaxwe kute gwaj bate djê pyrâk ne gwaj babê Metîndjwÿnh kurê. Nhym Metîndjwÿnh arÿm bajaxwebê bapytâ. Arÿm ne gwaj bate djê apêx. Mÿkam dja gwaj akubyn Môjdjê kukràdjâ tũmo amite djê ar o baba? Kati, Jeju kute gwaj bajãpre bônhkam gwaj kênhkam ar

babakam gwaj Jeju kukràdjâ ny kôt amijo baba rã'ã. Nãm ã Paur memã anen ajte memã Jeju kute anor kôt memã amijarê. Tãm ne ja.

<sup>1</sup> Ba ne ba ibê Paur. Djãm pykakam me'ô kajgo ne ijano? Nâr, djãm Metîndjwÿnh ne me'ô kajgomã ijã karô nhym ijano? Kati. Jeju Kritumê Bãmbê Metîndjwÿnh ijano ba arkum idjãpênh iba. Jeju Kritu arÿm ty nhym Bãm akubyn o tîn ne. <sup>2</sup> Jeju kukwakam bakamydjwÿ ikôt dja bar wãm ar amã ikabên mex jarê. Pi'ôk no'ôkkam ar amã arê. Pykabê Garaxakam apÿnh ar aje amim Jeju mar ne kôt ar aben pydjio aba djari ne ba ar amã ikabên mex jarê.

<sup>3</sup> Metîndjwÿnhbê ne me Babãm. Ne Bênjadjwÿr djwÿnhbê ne Jeju Kritu. Gé ar tu kum ar akaprîn\* ar ajo ba gar adjumar mex rã'ã ne. <sup>4</sup> Jeju Kritu ne gwaj bakadjy amingã. Nãm gwaj bajaxwe pãnh ty. Me kum Metîndjwÿnh kînh kêtja ne me axwe:. Mekôt bajaxwe kêt kadjy gwaj bapãnh ty. Kute kubê gwaj bapytâr kadjy gwaj bapãnh ty. Me Babãmbê Metîndjwÿnh kute kum 'ã karô kôt ne gwaj bapãnh ty. <sup>5</sup> Metîndjwÿnh ne ra:x ne uma:. Gé me aben djô'ã memã Metîndjwÿnh rax jarênh rã'ã: rã'ã ne. Mrãmri, tãm ne ja.

*Me memã Kritu kupa'ã ujarênh nhym mebê uma.*

*Mat 7.15; Ep 4.14; Kor 2.8; A Ped 2.1*

<sup>6</sup> E kum, djãm ar ga ne gar ajaxwe kêt nhym Metîndjwÿnh pãnh kum ar akaprîn amiwÿr ar ajuw ne ar ajo ba? Kati. Ar ga ne gar ajaxwe: nhym ta kum ar akaprî. Kritu ar ajaxwe pãnh ty nhym kam Metîndjwÿnh ta kum ar akaprîn amiwÿr ar ajuw ne ar ajo ba. Nhym kam wãnh me kwÿ ar awÿr bôx

\* 1:3 Djãm ar ga ne gar adjukaprî nhym ar pãnh arÿm kum ar akaprî Kati. Ar ta ne ar tu kum ar akaprîkumrêx.

ne arým 'êx ne ar amã we Kritu'ã ujarênh ny 'ôdjwý jarê. Me wãnh ar amã arê gar arým ijaêrbê me'ýr amijo akêx ne mekôt amijo abao dja. <sup>7</sup> I:je. Djãm mrãmri ne me ar amã Kritu'ã ujarênh ny jarê? Kati. Nãm me arík ar anoo biknoro ba. Kritu kupa'ã ne me ar amã arênh ba.

<sup>8</sup> Arým ne bar kàj bê ar amã arê, katát Kritu'ã ujarênh nykumrêx jarê gar arým amim ama. Nhy m be, godja ar ijô akubyn ar awýr bôx ne ar amã Kritu kupa'ã ajte ujarênh ny 'ôdjwý jarênh jabej gé Metíndjwýnh on pãnh o akno gé biknor rá'ã rá'ã ne. Nãr, godja kàjkwakam kadjy mrãnh djwýnh 'ô ar awýr bôx ne ar amã kupa'ã ujarênh ny 'ôdjwý jarênh jabej gé Metíndjwýnh on pãnh o akno gé biknor rá'ã: rá'ã ne. <sup>9</sup> Bar ajte jakam ar amã arê gar ama. Arým ne bar katát ar amã Kritu'ã ujarênh nykumrêx jarê gar amim ama. Nhy m be, godja me'ô ar awýr bôx ne ar amã Kritu kupa'ã ajte ujarênh ny 'ôdjwý jarênh jabej gé Metíndjwýnh on pãnh o akno gé biknor rá'ã: rá'ã ne.

<sup>10</sup> Djãm me kum ikĩnhmã ne ba abej ar iba? Kati. Metíndjwýnh kum ikĩnh ne ba abej. Djãm ije meo kính prãm got? Kati. Ne ba ren meo kính prãm ba ren ibê Metíndjwýnh nhô ãpênhkumrêx kêt.

*Jeju ta ne Paurmã amijarê.*

*A Kô 1.12; Tex k 2.4*

<sup>11</sup> Akmere, ãpnhĩre ar, ba ar amã arê. Ije kàj bê ar amã Kritu'ã ujarênh ny jarênhja djãm me'ô ta ne amim ujarênh'ã karõn imã arê? Kati. <sup>12</sup> Djãm me kute aben djô'ã ujarênh ar baja ne me'ô imã arê ba o iba? Kati. Nãr, djãm me'ô kute prĩne ujarênh marja ne imã arê ba kuma? Kati. Jeju Kritu ta ne imã ujarênh ny jarê ba maro iba. Tãm ne ba jakam pi'ôkkam wãm pykabê Garaxakam ar amã arê.

<sup>13</sup> Arým ne me ar amã ijã ajarê gar ama. Amrêbê ne ba mebê

idjaer kukràdjã kôt ar amijo iban Metíndjwýnh nhô me ja kute amim Jeju maro ibikênh kumex. Ne kam me kute amim Jeju mar kêt kadjy mebê Jeju kurên abenbê me ngrãnh o iba. <sup>14</sup> Ne mebê idjaermê ro'ã ijabatãnhja ije me kukràdjã maro me akrenh mexo tẽ. Ne me ikukãmãre kukràdjã tũm'ã ino tý:x ne o iba.

<sup>15</sup> Nhy m kam Metíndjwýnh ta arým kum ikĩnh ne kum ikaprĩ. Djãm ba ne ba imã kính nhy m kum ikaprĩ? Kati. Ta ne tu kum ikaprĩn arým amiwýr ijuw ne ijo ba. Adjãkamã inã tikkrekam ijêtri ne Metíndjwýnh amijo ipytã.

<sup>16</sup> Ije kàj bê me bajtemmã 'ã idju-jarênh kadjy arým imã Krao amirĩt. Kute imã Krao amirĩtkam djã nã bãm o me'ô kumrêx ma nhy m arým imã arê ba ô'ã memã arênh o iba? Kati. Kritu ta ne imã arê. <sup>17</sup> Nãr, djã ne ba krĩraxbê Djeruxarê kumrêxmã tẽn bôx? Nãm Jeju ar ja kumrêx janon kam badjwý ijano ba kum idjãpênh ar iba. Djã nã bãm Jeju kute ar anor ja kumrêx'ýr Djeruxarêmã tẽn bôx nhy m ar imã kabên'ô jarê ba memã arênh o iba? Kati. Ar'ýr Djeruxarêkam itêm kêt. Ate ne ba pykabê Arabijkam tẽ. Ba kam ajte akubyn krĩraxbê Tam-agumã akêx. Kritu ta ne imã kabên jarê ba memã arênh o iba. Tãm ne ba jakam pi'ôkkam wãm pykabê Garaxakam ar amã arê.

<sup>18</sup> Nhy m kam ijã amex amãnhkrut ne ikjêkêt apêx. Kambit ne ba arým Djeruxarê'ýr tẽ. Ije Pedru pumũnhmã 'ýr tẽ. Ne kam Pedru'ýr bôx ne ar iro'ã nhỹ. Ar iro'ã nhỹ: nhy m ar ijã akatibê 15bit apêx ne. Djã ne ba kam idjãm 'iry got Pedru imã me kabên 'ô jarê ba memã arênh o iba? Kati. <sup>19</sup> Djã ne ba kam Jeju kute ar anorja 'ôdjwý pumũ? Kati. Ije ar 'ô pumũnh kêt. Bênjadjwýr djwýnh kamy axikôt katorja ne kubê Xijagu. Xijagubit ne ba omũ.

<sup>20</sup> Djã nã bãm ar amã ijêx? Kati. Metîndjwýnh kute imarkam ne ba mrãmri ar amã ikabênkumrêx.

<sup>21</sup> Ne kam Djeruxarê kurûm ikaton tẽ. Tẽ:n kajônkhôt pykabê Xiri-jmê Xirxij'ÿr tẽ. Tẽ:n kam arým kam bôx.

<sup>22</sup> NhyM Djeruxarê bu'ã pykabê Djudêjakam apýnh me kute amim Jeju mar ne kôt ar aben pydjio ba djãri me kute ipumûnh kêt rã'ã.

<sup>23</sup> NhyM be, me kwý ne me amũ memã ijarêh memã kum,

—Paur kute me bajo bikêho ba ja ne arým jakam kãj bê Kritu'ã memã ujarêh ar ba. Me kute Kritu kôt amijo bamã memã 'ã ujarêh ar ba. Me kute Kritu mar kêt kadjy ne Paur amrêbê mebê Kritu kurêo ba. Ne jakam arým 'ã memã ujarêh ar ba. Nãm me ã ijarêho ane. <sup>24</sup> NhyM me arým jabit man ikam Metîndjwýnhmã mextire jarêho kumex. Be, djãm kam ne me'õ ikabên'ã imã karô ba memã arêho iba? Kati. Kritubit ne imã arê ba arým pi'ókam wãm pykabê Garaxakam ar amã arê.

## 2

*Pedru ar kute Paur kabên'ã aben mar.*

*Kar 15.4*

<sup>1</sup> Nã bãm ar iba: nhyM kam ijã amexbê 14 apêx. Ba kam Ban-abekôt Djeruxarêmã tẽ. Xitudjwý ne ba o tẽ. <sup>2</sup> Metîndjwýnh ta ne imã 'ã karô ba kabên kôt 'ÿr tẽ. 'ÿr tẽ:n kam arým 'ÿr bôx. Ne kam me krãpti kãxã me rûnh kumrêxmê ro'ã akuprô. Me kute amim Jeju mar rûnhmê ro'ã akuprô. Memãbit ar rûnh pyrãkjamê ro'ã akuprô. Ne kam memã arê. Ije me bajtemmã Kritu'ã idjujarêh ny jarêho ibaja ne ba memã arê. Ne ba ren Djeruxarêkam me krãpti kumrêxmã arêh ren kam te memã arê nhyM ren me kute imar kêt ne. NhyM be, kati. Me krãpti kãxã ne ba me rûnh kumrêxmã arê.

<sup>3-4</sup> NhyM Xitubê me bajtembê kreguja ikôt dja. Me ja ne me kute Mõj djê kukràdjã kôt amijo ba kêt ne my nhinhu kã tã. Nãm Xitu ikôt dja. NhyM me ta kute amijo 'êx ne kute amijo Jeju mar mexja ne me arým apdjun mekôt wadjã. Bar Kritu Jeju kabên kôt idjumar mex ne ar ibamã nhyM me amim,

—Paur ar kute Mõj djê kukràdjã kôt amijo ba katãt jabej ba ar omũ. Gêdja ar kôt amijo ba kêt ba me kukràdjã'ã arkum apnê, ane. Ga, me ta te: kute Mõj djê kukràdjã kôt amijo ba mexja pumũ. Ne te: Metîndjwýnhmã amijo mexo ban umar punu. Ar idjumar punu ja kadjy ne me ã amim ar ijã ane. Ne kam te: kute Xitu my kã krã'ÿrmã memã 'ã apnê. Djã ne me kute amim Jeju markam me rûnh ja ne mekôt kabên dji? Kati. Me mekôt kabên djir kêt ne kute,

—Gê ar Mõj djê kukràdjã kôt amijo tẽn on Xitumã my kã ta, anhÿr kêtumrêx.

<sup>5</sup> Djãm ar ba ne bar me ta kute amijo Jeju mar mexja kabên kôt Xitu my kã krãta? Kati. Bar me kabên kôt Mõj djê kukràdjã kôt amijo itêm kêtumrêx. Mÿkam? Bir, ne ba ren ar mekôt amijo tẽn my kã krãta gar ren ikôt Mõj djê kukràdjã maro aban kôt ar amijo aba. Ne kam ren arým Kritu kabên katãt mar kêt ne kôt amijo aba kêt. Amrêbê ne bar ar amã katãt Kritu'ã ujarêh ny jarê gar kôt ar amijo aba. Kôt amijo aba rã'ã kadjy ne bar me ja kôt amijo iba kêtumrêx.

<sup>6</sup> NhyM be, memãbit ar kute rûnh pyrãk ja, me kute ar'ã abenmã kum,

—Amrêbê ne ar gwaj bamã wan gwaj bajo ba. Gwaj bamã ne ar raxkumrêx, anhÿrja. Djãm me kute ar rûnh'ã abenmã anhÿrkam djãm imã ar uma? Kati. Memãbit ne ar kute rûnh pyrãk. NhyM be, Metîndjwýnhmã ne ar ngri:ren kãjgo. Bir be, Kritu ne imã kabên jarê.

Djām ijukri ne ar rūnh imā mỳjja 'ōdjwỳ jarē ba kam memā arēnho iba? Kati. Ar kute ijukri imā mỳjja'ō jarēnh kêtukumrēx. <sup>7</sup> Ne kam ar ipa krij ne ar itatakbit. Arỳm ne ar kute imar ne ar abenmā kum,

—Be, mrāmri ne Metīndjwỳnh Paurmā kum, “Ga dja ga me bajtemmā Kritu'ā ujarēnh ny jarē”, anhỳrkumrēx. Nām ar ā abenmā ane.

<sup>8</sup> Metīndjwỳnh ne mebê idjaermā Pedru jano nhym arỳm memā Kritu'ā ajarē. Ga, me krāpti: arỳm kute tu amim markumrēxja pumũ. Metīndjwỳnh ajte badjwỳ ijano ba me bajtemmā 'ā ajarē. Ga, me jadjwỳ krāpti tu kute amim markumrēxja pumũ. <sup>9</sup> Xijagumē Pedrubê Xepamē Djuāomē ne ar kumrēx tũm. Ar memābit rūnh. Ar ja ne ar amim,

—Mrāmri ne Metīndjwỳnh ta kum Paur kapri:kumrēx nhym mrāmri arỳm kôt kum àpēnhkumrēx, ane. Nām ar anen arỳm Banabemē bamē ar ipa krij ne ar itatak ne ar imā,

—Mrāmri ar ga dja gar me bajtem'yr mrān memā 'ā ajarē. Nhym be, ar ba dja bar mebê idjaer'yr mrān memā 'ā ajarē, ane. <sup>10</sup> Ne kam ar imā,

—Dja gar ar ikam me ō mỳjja kêt mar rā'ā, ane. Jabit ne ar ar imā arē. Ba kam arỳm ar kuman amũ memā me arēnho iba nhym me arỳm memā mỳjjao atomo ba. Nā bām ā Djeruxarēkam me maro anen arỳm pi'òkkam wām pykabē Garaxakam ar amā arē.

*Paur Pedrumā kabēn ne.*

<sup>11</sup> Bar kam krīraxbē Āxikimā tēn bōx ne kam dja. Nhym kam Pedru nīnh tēn kam Āxikikam ar iwỳr bōx. Ba kam arỳm kuka kōnh kum ikabēn ne. Arỳm Metīndjwỳnh kabēn kupa'ā kute amijo tēmkam ne ba kum ikabēn ne.

<sup>12</sup> Mỳkam? Bir, amrēbē ne Pedru tu me bajtemmē ro'ā àkuro krī.

Ar ba ne bar me bajtemmē ro'ā idjàkuro nhỳ nhym Pedru mekmē ro'ā àkuro nhỳ. Nhym kam me kwỳ Mōjdjē kukràdjā'ā no tỳxja arỳm bōx. Xijagu kurũm ne me bōx. Me ja ne me memā kum,

—Dja me me bajtemmē ro'ā àkuro krīn arỳm Mōjdjē kukràdjā kupa'ā amijo tē. Nām me ā memā anhỳro ba. Me ja bōx nhym Pedru arỳm me omũ. Ne kam arỳm me bajtemmē ro'ā ō kwỳ krēn krātan arỳm ate nhỳ. Me Mōjdjē kukràdjā'ā no tỳxja, me my kà rēnhneja, kute 'ā kum kabēn karō ne Pedru ate nhỳ. Me ja kute kum,

—Kwārīk wānh me bajtemmē ro'ā adjàkur kêt. Abē mebê idjaer. Mōjdjē ne me bamā, “Kwārīk wānh me bajtemmē ro'ā adjàkur kêt”, ane ga kam me ro'ā adjàkuro akrī, anhỳr karō ne Pedru ate nhỳ.

<sup>13</sup> Nhym kam ar ikam mebê idjaer kunī Pedru kôt amijo mōn ate ar ibē nhỳ. Nhym kam Banabedjwỳ arỳm rerekre ne me umaje kôt amijo tēn ate me bajtembē amijo tēn ate ar ibē nhỳ.

<sup>14</sup> Ba kam me omũ. Kritu'ā ujarēnh ny ne katàtkumrēx nhym me arỳm kupa'ā amijo mō ba arỳm me omũn arỳm Pedrumā ikabēn ne. Me kunī nhipòkri ne ba 'ā kum ikabēn ne kum,

—E kum, ga ne ga arỳm me bajtem kôt ar amijo aban ajte. Ga arỳm mebê idjaer kukràdjābē amijo akēx ne arỳm me bajtem kôt ar amijo aba. Mỳkam ne ga arỳm jakam ajte mebê idjaer kukràdjā kôt me kute amijo ba'ā me bajtemmā karōo dja? Nā bām ā Pedrumā ikabēno ane.

<sup>15</sup> Ne kam ajte Pedru arkum,

—Mrāmri me bakukāmākjē kôt ne gu me babē idjaerkumrēx. Me baje me bajtem'ā abenmā kum, “Me axwe”, anhỳro baba. Djām me baje me wā kôt amijo baba got? Arkati. Me ba ne gu me babē idjaerkumrēx. <sup>16</sup> Djām kam me kute

Môjdjê kukràdjà kôt amijo bakam ne me mrāmri axwe kêt? Kati. Me kute kukràdjà kôt amijo baja ne me te axwe kêt prāmje. Nhyim be, me tu kute amim Jeju Kritu markumrêx. Nhyim kambit arým memã axwe kêt jarê nhyim me kum axwe kêt. Tãm ne gwaj amrêbê kuma. Me bajtemja ne me tu amim Kritu markumrêx. Gwaj badjwý ne gwaj bajaxwe kêt kadjy tu amim Kritu Jeju markumrêx. Djãm gwaj bajaxwe kêt kadjy ne gwaj baje Môjdjê kukràdjà marn kôt ar amijo baba? Kati. Kadjy ne gwaj tu amim Kritu markumrêx. Djãm pykakam me'õ ta axwe kêt prãm? Arkati. Me'õ ta kute Môjdjê kukràdjà marn kute kôt amijo bakam te: axwe kêt prãmje. Nã bãm ã Pedru arkum ane.

<sup>17</sup> Ne kam ajte arkum,

—Me'õ ta ne te axwe kêt prãmje. Nhyim be, dja gwaj tu amim Kritu markumrêx ne arým bajaxwe kêt. Ne kam amim Kritu maro tẽ nhyim arým gwaj bamã bajaxweo amirĩto tẽ gwaj arým amima. Gwaj baje amimarkam djãm gwaj baje me kwý kudjwa amim, “Ije amim Kritu kabên markôt ne ba ijaxwe”, anhÿr mã? Arkati. Kritu kute me axwe'ã memã ãpnênh kêt. Kabênkôt me'õ axwe prãm kêtumrêx. <sup>18</sup> Be, amrêbê ne gwaj te: Môjdjê kukràdjà kôt bajaxwe kêt prãmje bajaxwe rã'ã ne. Nhyim be, jakam ba arým kubê amijo akêx. Kubê ije amijo akêxkam ba ren ar akudjwa ren akubyn Môjdjê kukràdjà'ÿr amijo akêx ne ren amim,

—Ba Môjdjê kukràdjà man kôt ar amijo iban arým ijaxwe kêt, anhÿro iba. Djãm kam ba ren mrāmri ijaxwe kêt? Arkati. Akubyn ije 'ÿr amijo akêxkam ba ren arým Metĩndjwýnh kabên mar kêt ne kam ren kam amikrà ar o iba.

<sup>19</sup> Amrêbê ne ba amim,

—Ba Môjdjê kukràdjà man kôt ar amijo iban arým ijaxwe kêt, anhÿro

iba. Djãm kam mrāmri ijaxwe kêt? Kati. Ijaxwe rã'ã. Ne kam arým Môjdjê kukràdjà ma. Amrêbê ne Môjdjê memã kum, “Dja me axwe arým pãnh ty”, ane. Tãm ne ba kuman kam ijaxwe man kam arým amim,

—Kati. Dja ba Môjdjê kukràdjà man kôt ar amijo iban te ijaxwe kêt prãmje, ane. Kam ne ba arým Môjdjê kukràdjà kôt ar amijo iba kêt. Ga, me arým tykkam kute kôt amijo ba kêtja pumũ. Badjwý ije me tyk pyrãk. Ne kam arým Metĩndjwýnh kadjy itĩn ne ar iba.

<sup>20</sup> Ba ne ba Kritumê ro'ã pĩte'ykam ty. Ne kam ba itĩn ne ar iba kêt. Kritu ta ne ikam tĩn ne ar ba. Nã bãm ã amimaro ane. Ne kam inhĩ jakam itĩn ne ar iba jakam ne ba tu amim Metĩndjwýnh kra markumrêx ar o iba. Ta ne kum ijabên ijaxwe pãnh ty. <sup>21</sup> Nãm Kritu ã kum ikaprĩ o ane. Djã nã bãm kubê ate ikrãn Môjdjê kukràdjãbit mar 'ãno dja? Djã nã bãm ijaxwe kêt mã kukràdjãbit man o Kritubê aptã? Kati. Ne ren me Môjdjê kukràdjà kôt ren axwe kêt nhyim ren kam Kritu me axwe pãnh tykja ren kajgokumrêx. Nhyim be, kati. Kritu kôtbit ne me axwe kêt. Nã bãm ã Pedru arkum anen ajte pi'õkkam wãm pykabê Garaxakam ar amã arê.

### 3

*Me ta kute amijo mex kêt.*

*Ep 2.8; Pir 3.9; A Xim 1.9; Xit 3.5*

<sup>1</sup> Ar abê Garaxa ar, ar ano rere:kre. Mÿj me'õ ne ar amã 'êx ne ar ano akno? Ê, Metĩndjwýnh kabên katãtkumrêx. Kabên kôt ar aje amijo aba kêt kadjy ne me ar ano akno. Arým ne ba prĩne ar amã Kritu pĩte'y'ã jêt'ã ajarê gar prĩne ama. Nhyim kam me ar ano akno. Ar ano rere:kre.

<sup>2</sup> Dja gar ar imã arê ba kuma. Djã nã gãm ar Môjdjê kukràdjà man kôt ar amijo aban kôt we ajaxwe kêt? Djã nã gãm we ar ajaxwe kêt nhyim

Metĩndjwýnh Karõ arým ar awýr bõx ne ar ajo ba? Dja gar imã arẽ ba kuma. Kati. Nã gãm ar Kritu'ã idjujarẽnh man tu amim Kritu markumrẽx nhym Karõ arým ar awýr bõx. <sup>3</sup>Nã gãm ar Metĩndjwýnh Karõkõt amijo abamo krax. Djã nã gãm jakam Mõjdjê kukràdjã man kõt ar amijo aban aje kõt ga: we amijo amexmã.

<sup>4</sup> Amrẽbê ar aje Kritu mar'ã ne me ar ajo bikẽnhõ ba gar arým kadjy atokry kumex ma. Godja gar jakam kubê amijo akẽx ne 'ã adjukanga jabej nhym arým kadjy ar atokry ja arým kajgo. Nhym be, kati. Ar aje mrãmri tu amim Kritu markumrẽx rã'ã jabej arým atokryja kajgo kêt. <sup>5</sup>Djã nã gãm ar Mõjdjê kukràdjã man kõt ar amijo aban kõt we ajaxwe kêt nhym kam Metĩndjwýnh arým ar amã Karõ jano nhym kam ar akam mýjja pumũnh kêt nhipẽx, ar akam apýnh me punuo mex? Kati. Nã gãm ar Kritu'ã idjujarẽnh man tu amim markumrẽx nhym arým kõt ar amã Karõ jano nhym kam arým ar akam apýnh mýjja pumũnh kêt nhipẽx.

<sup>6</sup> Me bakukãmãre Abraãodjwý ne “tu amim Metĩndjwýnh markumrẽx nhym arým tu kum axwe kêt jarẽ.”

<sup>7</sup> Kam, me kute tu amim Kritu markumrẽx, me ja kunĩ kute mrãmri ne Abraãõ tãmdjwý pyrãk. Tãm dja gar ama. <sup>8</sup> Amrẽbê: ne Metĩndjwýnh amim,

“Dja me bajtem tu amim Kritu markumrẽx ba kam tu memã axwe kêt jarẽ nhym me arým axwe kêt.”

Nãm ã amim anen kam kãj bê Abraãomã tãm jarẽ. Nhym me arým 'ã pi'õk no'õk ne. Mrãmri ne me kute tu amim Kritu markumrẽx nhym kute tu memã axwe kêt jarẽnh. Ja 'ã ne Abraãomã kum,

“Ga tu amim ikamnhĩxkumrẽx. Ba kam arým imã akapri. Dja atãmdjwý akõt tu amim

imarkumrẽx. Ba kam arým imã me kapri. Dja apýnh me ba djãkam me bajtemdjwý akõt tu amim imarkumrẽx. Ba kam arým imã me adjwýnhdjwý kapri”, ane.

<sup>9</sup> Ga, me kute tu amim Kritu markumrẽxja Metĩndjwýnh arým kum me kaprija pumũ. Abraãõ tu amim kamnhĩxkumrẽx nhym me kute kõt tu amim markumrẽxja Metĩndjwýnh arým kum me kapri.

<sup>10</sup> Be, me kute amim,

—Dja ba Mõjdjê kukràdjã man kõt ar amijo iban arým ijaxwe kêt, anhýro baja. Me ja kunĩ'ã ne Metĩndjwýnh arým amim,

—Me wã dja ba me kanga nhym me arým me biknor tokry djãkam akuno, ane. Mýkam dja me kanga? Bir, amrẽbê Metĩndjwýnh me bakukãmãremã kum,

“Ga, Mõjdjê kukràdjã'ã pi'õk no'õkja pumũ. Godja me mar kêt ne katãt kunĩ:kõt amijo ba kêt jabej ba dja ba pãnh me kanga nhym me arým me biknor tokry djãkam akuno.”

Nãm Metĩndjwýnh ã me bakukãmãremã ane. Me bit kute kukràdjã kunĩkõt amijo baja, djãm kõt me axwe kêt mã? Kati. Nãm me te kute kukràdjã kunĩkõt amijo ba ne kam axwe rã'ã. Kam Metĩndjwýnh ta kabẽnkõt dja me ja kunĩ akuno. <sup>11</sup> Nhym kam me ajte me bakukãmãremã kum,

“Metĩndjwýnh kute memã axwe kêt jarẽnh nhym me arým kum mexja dja me tu amikajmã'ã markumrẽx ne arým tĩn ne ar ba”, ane.

Ga, Metĩndjwýnh kute memã axwe kêt jarẽnhja pumũ. Me kute tu amim markumrẽx kambit ne kute memã axwe kêt jarẽnh. Kam me kute Mõjdjê kukràdjã marn kõt amijo baja te: axwe kêt prãmje. <sup>12</sup> Nhym kam ajte pi'õkkam memã kum,



“Me kute Mòjdjê kukràdjà marn kòt amijo baja gè me p̄r̄ne kunìkòt amijo ba mex”, ane. Djām pi'òkkam kabèn jakam ne memā, me kute tu amim Metĩndjw̄ynh markumr̄ex jarē? Kati. Kute arēnh kêtumr̄ex. Nām memā, kòt me kute amijo babit jarē.

<sup>13</sup> Nhy m be, Metĩndjw̄ynh ne memā Kritu jarē. Kritu ar̄ym p̄ite'y'ā gwaj bajaxweo pānh. Amrēbē ne Metĩndjw̄ynh memā kum,

—Godja me Mòjdjê kukràdjà mar kêt ne katàt kukràdjà kunì: kòt amijo ba kêt, ba dja ba pānh me kanga nhy m me ar̄ym me biknor tokry djàkam akuno, ane. Tām ne Metĩndjw̄ynh amrēbē arē. Kam gwaj ba ne gwaj kòt amijo baba kêt ne bajaxwe:. Ga, gwaj bajaxwe pānh Metĩndjw̄ynh bit kute gwaj bakangaja pumū.

Nhy m be, kati. Jakam Kritu ar̄ym gwaj bajaxweo pānh. Gwaj bakadjy ne Kritu ta mǎn axwe djw̄ynh pyrāk ne p̄ite'y'kam wajēt. Nhy m kam Metĩndjw̄ynh ar̄ym kute kanga pyrāk nhy m me biknor tokry djàkam biknor pyrāk. Nām ā anen p̄ite'y'kam wajēt ne ar̄ym gwaj bajaxweo pānh. Amrēbē: ne Mòjdjê me bakukāmāremā kum,

“Me p̄i'ā me anhō nhy m me arij. Nhy m kam Metĩndjw̄ynh ar̄ym me kanga nhy m me ar̄ym me biknor tokry djàkam akuno”, ane.

Ga, Kritu p̄ite'y'kam jêtkam Metĩndjw̄ynh kute kanga pyrākja pumū.

<sup>14</sup> Kam, Jeju Kritu ar̄ym gwaj bajaxweo pānh. Nhy m kam Metĩndjw̄ynh ar̄ym me bajtemo djuw mex ne ar̄ym memā axwe kêt jarē. Tām ne Abraōmā arē. Gwaj tu amim Kritu markumr̄ex, nhy m Metĩndjw̄ynh Karō ar̄ym gwaj baw̄yr bōx. Amrēbē kute gwaj bamā Karō jarēnhja ar̄ym gwaj

baw̄yr bōx. Ja kadjy ne Kritu gwaj bajaxweo pānh.

*Metĩndjw̄ynh ne Abraōmā kabèn p̄ynh ne arē.*

*Idja 6.13*

<sup>15</sup> Akmere, àpnh̄ire ar, ba ar amā pykakam me kukràdjà'ō jarē gar ama. Godja me'ō ar tu abenmā m̄ȳjja'ō jarēnhkumr̄ex. Nhy m me r̄unh ar̄ym 'ā pi'òk no'òkkumr̄ex. Djām kam ajte me'ō kute ijukri kabèn 'ō jarēnhmā? Nār, djām kam kute kabèn 'ōo bingrānhmā? Arkati. Ar̄ym ne me tu 'ā pi'òk no'òk mām̄dji. <sup>16</sup> Abraōmā ne Metĩndjw̄ynh ap̄ynh m̄ȳjja jarēnh kam kum kabèn p̄ynh ne arēnh kum,

—Dja ba ajo djuw mex ne atām̄djw̄yo djuw mex, ane. Djām kute kabèn jao bingrānhmā? Kati. Djām tām̄djw̄y krāpt'ā ne kum, “Dja ba atām̄djw̄yo djuw mex”, ane? Kati. Tām̄djw̄y pydji'ā ne kum arē. Tām̄djw̄y ja ne kubé Kritu.

<sup>17</sup> Metĩndjw̄ynh ne amrēbē: tu Abraōmā tām̄djw̄ybē Krituja jarēnhkumr̄ex. Nhy m kam tū:mrām, ar̄ym kute kum arēnh'ā amexbē 430 ap̄èxkam Mòjdjēmā kukràdjà jarē. Djā ne kute Mòjdjēmā me kukràdjà jarēnh kabèn tūm japa? Djā ne kute amrēbē: Abraōmā tām̄djw̄ybē Kritu jarēnhja ar̄ym arēnh kajgo? Arkati. Kute amrēbē: Abraōmā arēnh kute mar t̄yx rā'ā ne.

<sup>18</sup> Djā ne me kute Mòjdjê kukràdjà marn kòt amijo bakam axwe kêt ne ajte kute amim Kritu markam axwe kêt? Kati. Nhy m be, ar̄ym ne Metĩndjw̄ynh mrāmri tu Abraōmā tām̄djw̄y Kritu jarēnhkumr̄ex nhy m amim tu markumr̄ex nhy m ar̄ym kum axwe kêt jarē.

<sup>19-20</sup> Nhy m be, m̄ȳj kadjy ne Metĩndjw̄ynh Mòjdjēmā kukràdjà jarē? B̄ir, me kute amijaxwe mar ne kute kòt amim ator kadjy. Ja kadjy ne Mòjdjēmā kukràdjà jarē.

Me aben djô'ã abenmã arênho mō. Abenmã arênho mōr tãmtã arým tũmrãm Abraão tãmdjwýr Kritu'ýr o bôx. Me bakamingrãnyrekam Kritu arým katon ar ba. Nhyr kam me tu amim markumrêx nhyr Metĩndjwýnh arým memã axwe kêt jarê. Metĩndjwýnh ne Mōjdjê mã kukràdjã jarê. Kadjy mrãnh djwýnh kumrêxmã ne arê nhyr arým amũ Mōjdjê mã arê nhyr amũ memã arê. Nhyr kam me krãptĩ amipãnh Mōjdjê mã amijarê nhyr amũ Metĩndjwýnh mã me arê. Nhyr be, djã nãm Metĩndjwýnh me'ômã Kritu jarê nhyr arým amũ Abraômã arê? Kati. Metĩndjwýnh pydji ne tu Abraão kuka kônh djan kum tãmdjwýbê Kritu jarê.

<sup>21</sup> Metĩndjwýnh ne Abraômã apýnh mýjja mex jarên kum tãmdjwýbê Kritukôt axwe kêt jarê. Djã ne kam amikabên jao aknon kam memã kum,

—Dja ga me Mōjdjê kukràdjã man kôt ar amijo aba. Ba kam arým me amã axwe kêt jarê, ane? Kati. Dja me Mōjdjê kukràdjã man kôt ar amijo ban arým te axwe kêt prãmje ne Metĩndjwýnh kôt tĩn ne ar ba kêt. Ne ren me Mōjdjê kukràdjã'õ man kôt ar amijo ban ren kam axwe kêt ne ren kam Metĩndjwýnh kôt tĩn ne ar ba nhyr Metĩndjwýnh ren kam memã kum,

—Dja ga me Mōjdjê kukràdjã man kôt ar amijo aban kam ajaxwe kêt, ane.

<sup>22</sup> Nhyr be, kati. Me'õ ta te axwe kêt prãmje. Metĩndjwýnh ne pi'ókkam me kunĩ kupãnh tã memã axwe jarê. Mýj kadjy ne me kunĩ mã axwe jarê? Bir, me kute tu amim Jeju Kritu markumrêx kadjy. Dja me tu amim markumrêx nhyr Metĩndjwýnh arým memã axwe kêt jarê. Tãm ne amrêbê: me bakukãmãremã arênho pydji.

<sup>23</sup> Nhyr be, amrêbê me bakukãmãre kute tu amim Kritu markumrêx kêtiri ne me Mōjdjê

kukràdjãkôt ar amijo ba. Me ta te: katormã ar amijo ba. Me kute mrãmri ne mebê ijêkam me ta te: katormã amijo ba pyrãk. Gwaj badjwý te bakatormã ari amijo baba. Nhyr kam tũmrãm me arým gwaj bamã Kritu'ã ajarê, gwaj arým tu amim markumrêx ne arým bakato. Bakaton arým gwaj ba ar baban bakĩnhkumrêx.

<sup>24</sup> Kam, Mōjdjê kukràdjã ne kute me kra prĩre pumũnh djwýnh pyrãk. Me bakukãmãre ne me kute me kra prĩre pyrãk. Ne kam me omũnh djwýnh kôt ar amijo ba, Mōjdjê kukràdjã kôt ar amijo ba nhyr mebê tý:xi. Me kute aben djô'ã kôt amijo ba tãmtã nhyr kam tũmrãm arým Kritu me'ýr bôx. Gwaj bawýr bôx gwaj arým tu amim markumrêx nhyr arým tu gwaj bamã axwe kêt jarê. <sup>25</sup> Gwaj arým tu amim Kritu markumrêx. Djãm kam gwaj baje akubyn Mōjdjê kukràdjã'ýr amijo akêx prãm? Kati. Arým me abatãnhkam djãm akubyn kute amipumũnh djwýnh prãm? Kati. Gwaj badjwý ne gwaj akubyn baje Mōjdjê kukràdjã mar prãm kêt. Kritu ne gwaj tu amim markumrêx.

*Mebê Metĩndjwýnh kra'ã ujarênh.  
Dju r 1.12; Rô 8.14; Ep 1.5*

<sup>26</sup> Ar akunĩ ne gar arým abê Metĩndjwýnh kra. Gar arým tu amim Kritu markumrêx ne arým abê Metĩndjwýnh kra. <sup>27</sup> Me kute ngômã ar ajadjãr kunĩja, mýj'ã ne ngômã ar ajadjãrja amijakre? Bir, Kritumê ne gar atypdji. 'Ã ne amijakre. Gar kam arým aje Kritu pyrãk. Kritubê Metĩndjwýnh Kra. Ar gadjwý ne gar Kritu kôt abê Metĩndjwýnh kra.

<sup>28</sup> Djãm kam dja gar ajô aben mýr jabej memã kum, “Ibê idjaer”, ane? Nãr, “Ibê me bajtembê kregu”, ane? Nãr, gar ajô aben mýr jabej memã kum,

—Nãm me ipa 'amỳ ba me kabênkôt kajgo ari idjâpênh tỳxo iban idjumar punu, ane? Nâr,

—Me kute ipa 'amỳnh kêt ba arek mekôt ar iban idjumar mex, ane? Nâr gar ajõ aben mỳr jabej memã kum, “Imy”, ane, nâr, “Ini”, ane? Djãm aje amim Kritu markam aje aben mỳr jabej ã abenmã anhỹro abamã? Kati. Ar aje amim Kritu markam ne ar akunĩ abeno anhõbikwan apydji:i. <sup>29</sup> Ne, ar abê Kritu nhõbikwakam Metĩndjwỳnh arỳm ar ajo Abraão tamdjwỳ. Kute ar anhingêt Abraõmã kabên pỳnh ne arênhja kunĩ ne ajte ar amãdjwỳ arê. Dja gar arỳm Abãm nhõ mỳjjao aminhõ. Metĩndjwỳnh nhõ mỳjjao aminhõ.

## 4

*Metĩndjwỳnh gwaj bajo kra.*

<sup>1</sup> Jakam ne ba ar amã arê, me abê Garaxakam me jamã arê, gar ama. Me kra prĩre ne me kute bãm nhõ nêkrêx kunĩo bamã te o ane. Prĩrekam kute o ba kêt rã'ã. Nãm me kute bãm nhõ ãpênh kajgo pyrãk ne kajgo: ne. <sup>2</sup> Nhyam kam me omũnh djwỳnh me prĩre jamã mrãnh mex'ã karõn me omũnho ba nhyam me kam kôt amijo ba. Nãm me prĩre pumũnh djwỳnh meo ba: nhyam me arỳm abatàn ne. Nhyam me bãm kute õ akati jarênhja arỳm bõx nhyam kam me arỳm bãm nhõ nêkrêxo aminhõn o ba.

<sup>3</sup> Gwaj badjwỳ Kritu bõx kêttri ne gwaj baje me prĩre pyrãk. Gwaj baje me ãpênh kajgo pyrãk ne gwaj bakajgo: ar baba. Nhyam me kute gwaj bamã pykakam me kukràdjã jarênh gwaj ajbit maro baba. Kute mrãmri ne me prĩre pumũnh djwỳnh me prĩremã mrãnh mex'ã karõo ba nhyam me kute kôt amijo baja pyrãk. Gwaj badjwỳ gwaj pykakam me kukràdjãkõtbit amijo baba.

<sup>4</sup> Nhyam be, kam arỳm õ akati bõx nhyam Metĩndjwỳnh arỳm pykamã

Kra jano nhyam me'õ nire kurũm kato. Katon arỳm Mõjdjê kukràdjã man kôt ar amijo ba. <sup>5</sup> Mỳj kadjy ne Mõjdjê kukràdjã man kôt ar amijo ba? Bir, kute gwaj bajaxweo pãnh kadjy. Gwaj te Mõjdjê kukràdjãkõtbit amijo baban mã bajaxwe:. Nhyam Kra arỳm gwaj bajaxweo pãnh nhyam kam Metĩndjwỳnh arỳm gwaj bajo kra. Ja kadjy ne Kra arỳm ruw ne Mõjdjê kukràdjã man kôt ar amijo ba.

<sup>6</sup> Kute gwaj bajo krakam ne arỳm gwaj bamã Kra Karõ jano nhyam arỳm gwaj bakam nhỹn gwaj bajo ba. Gwaj kam amikam Karõ ma nhyam arỳm gwaj bakadjwỳnhbê Metĩndjwỳnhmã kum, “Aba, Aba”, anhỹro nhỹ. Me kabên djwỳnhkam kum, “Aba, Aba”, anhỹro nhỹ. Me bakabênkam ne Karõ ren arên ren kum, “Djũnwã, Djũnwã”, anhỹro nhỹ. <sup>7</sup> Ga, me kute me pa 'amỳnh nhyam me memã ãpênh kajgo ar baja pumũ. Amrêbê ar gadjwỳ ne gar Mõjdjê kukràdjã man kôt amijo aba kajgo. Ne jakam arỳm Mõjdjê kukràdjã kôt amijo aba kêt. Kritu ar akadjy ty nhyam Metĩndjwỳnh kute ar ajo krakam. Dja ar amã õ mỳjjã ngã gar o aba.

*Me kute akubyn me kukràdjão ba prãm.*

*A Kõ 11.3; Kor 2.16; Ped k 1.14*

<sup>8</sup> Be, ar abê me bajtem ne gar amrêbê ar aje Metĩndjwỳnhkumrêx mar kêt ne kôt amijo aba kêt. Apỳnh mỳjjao metĩndjwỳnh karõ nhípêxjamã ne gar adjâpênh tỳx kajgo aba. Djãm mrãmri ne kubê Metĩndjwỳnhkumrêx? Arkati. Gar o aban aje mrãmri ne me pa 'amỳnh nhyam me memã ãpênh tỳx kajgo ba ne te apõx prãmje ja pyrãk.

<sup>9</sup> Nhyam be, jakam ne gar arỳm aje Metĩndjwỳnhkumrêx mar. Djãm ar ga ne gar amim mar? Kati. Ta kumrêx ne kute ar amarn arỳm ar amã amijo amirĩt gar kam kôt arỳm amim maro aba. Arỳm ar

aje Metĩndjwýnhkumrêx mar jakam mýkam ne aje akubyn me kum Metĩndjwýnh kĩnh kêtja kukràdjà marn kôt amijo aba prãm? Gar me kukràdjà kôt ar amijo aban te ajaxwe kêt prãmje. Kam ar ar-erekre. Me kukràdjà kajgo. Dja gar kôt ar amijo aban arým aje mrãmri ne me pa 'amýnh nhy m me memã àpênh kajgo ba pyrãk.

<sup>10</sup> Ar aje mýjja kajgo kadjy adjàpênh týx prãmkam ne gar apýnh akati krãptĩkam me kukràdjà man arým abenmã kum,

—Akati ja dja gwaj 'ã bano týx ne Mõj djê kukràdjà kôt bamex, anen ajte apýnh mytyrwý'ã abenmã kum,

—Mytyrwý ja dja gwaj 'ã bano týx ne me kukràdjà kôt bamex, anen ajte abenmã kum,

—Dja gwaj bàygogo djê pan ajte Mõj djê kôt akati ja ma, anen ajte abenmã kum,

—Dja gwaj amex ja'ã bano týx ne Mõj djê kukràdjà kôt bamex, ane. Dji:jãk. Djãm me kukràdjà kajgoja krãre got? Djãm ar aje ã amijo anhýrkam Metĩndjwýnh kute ar amã ajaxwe kêt jarênh gar kum amex got? <sup>11</sup> Amrêbê ba me abê Garaxakam Kritu jarênh o iban idjãpênh kume:x. Ar akam idjãpênh kajgo gar aje Kritu mar kajgo karõ ne ba ar ajã idjãpnhĩx ne axwe idjumar ne.

<sup>12</sup> Akmere, àpnhĩre ar, on ar ikudjwa. Ba ne ba ije ar apyrãk. Djãm ba ne gar ijo ajkê, ba ar amã ikabên? Kati. <sup>13</sup> Nhy m be, amrêbê ije ar amã Kritu'ã ujarênh ny jarênh kutewa. Kamã ne ba ikanên ar amã Kritu'ã ajarê gar ama. <sup>14</sup> Nãm itokry te ijo ba djãm kam ne gar amã ikurên ikanga? Kati. Nã gãm ar prĩne imar mex. Nã gãm ar ijo Metĩndjwýnh kadjy mrãnh djwýnh pyrãk nãr ijo Kritu Jeju pyrãk ne ar amã ikĩnh ne. <sup>15</sup> Ba ino kanê: gar te aje ikadjy ano kadjár ne pãnh imã ano jadjãr ba ikanê kêt mã. Ba ne ba

'ã ar apumũn arým ar amã arê. Ar amã ikĩnh. Mýj ne gar arým jakam amijon? <sup>16</sup> Djãm ije katãt ar amã Metĩndjwýnh kabên jarênhkam gar arým ijo akurê djwýnh?

<sup>17</sup> Be, wãkam me'õ ar kute amiwýr ar ajo akêxmã àpênh kume:xo ba. Djãm me kute ar ajo mex kadjy? Kati. Me kute ar abê ikurê mã. Dja me ar abê ikurê gar kam arým mekôt ar amijo aban arým me kukràdjà'ã ano týx ne ar o aba. Ja kadjy ne me ar abê ar ikurêo ba.

<sup>18</sup> Ne ren me kute ar ajo mexmã àpênh kumex ne ren kam mrãmri mexkumrêx. Ar akam idjãm kam ne me ren ar ajo mexmã àpênh kumex ne ren ajbubê itým kam djwý ren ar ajo mexmã àpênh kumex ne kam ren mrãmri mexkumrêx. Nhy m be, kati. Me kute ar abê ikurê kadjy ne me àpênh kumex.

<sup>19</sup> Ba ne ba imã ar ajabê:ê kute mrãmri ne me kum kra prĩre jabêja pyrãk. Ije me'õ nire kra àkam umar punure pyrãk ne ar akam idjumar punu:re. Me'õja amijo 'êx ne Kritu kupa'ã ar amã arê ba ar ama:ro iba. Nok gar ren kabên man Kritu kupa'ã amijo tẽ. Ga, me prĩre kute nã tikkrekam aminhipêxo baja pumũ. Nãm aminhipêxo ba:n arým prĩne aminhipêx nhinomã kumê. Ar gadjwý. Dja gar prĩne Kritu kôt amexo amũ amikamênh tẽ. Amikamênh tẽ:n kam arým prĩne Kritu mexo amex. Tãm ne ba imã kĩnh. Nã bãm ar ama:ro iba. <sup>20</sup> Ar awýr ibõx prãm kam ne ba dja. Ne ba ren inhýtã ar awýr bõx. Djã ne ba ren kam ar amã ibên týx? Kati. Kam ne ba ren ar amã ibên rerekbito ikabên. Nhy m be, kati. Amybým ne ba axwe ar akam idjumar ne.

*Agaremê Xara'ã ujarênh.*

<sup>21</sup> Dja gar jakam imã arê. Ar aje Mõj djê kukràdjà marn kôt amijo aba prãmja mýkam ne gar amikadjy kukràdjà kunĩ mar kêt? <sup>22</sup> Ba ar

amã kukràdjà jarē gar ama. Mòjdjê ne kute 'ã pi'ók no'ókkam memã Abraão kra amãnhkrut'ã ajarē. Kra ja ne Abraão ò àpēnh kajgobê Agaremã kudji. Agare ne kubê me pardja. Nãm Abraãomã àpēnh kajgobit ar ban umar punure. Ò àpēnh kajgo jamã ne kra ja dji. Nhyim be, prô djwýnhbê Xaramã ne kra djwýnhja dji. Prô ja ne kubê me pardja kêt ne ta arek mekôt ar ban umar mex.

<sup>23</sup> Nhyim kam Abraão ta ne Xara kute kum arēnhkôt me pardjajamã kra ja dji nhyim kumrêx ruw. Nhyim be prô djwýnhmã kute kra djwýnh djirja ne Metĩndjwýnh kabēnkôt. Metĩndjwýnh ta kute kum kra jarēnh kôt ne Abraão arým prôbê Xaramã kudji. Kute kum, “Dja akra'õ amirĩt”, anhÿr kôt arým kum kudji. Xara kubê me pardja kêt ne ta arek mekôt ar ban umar mexkumrêxjamã ne kudji nhyim kam ruw.

<sup>24</sup> Mÿkam ne ba ar amã ar nire abenkôt kra rwýkja'ã ajarē? Mÿj'ã ne ar nireja amijakre? Bir, ar amãnhkrut Metĩndjwýnh kabēn amãnhkrut'ã amijakre.

Ba ar amã kabēn jarē gar ama. Metĩndjwýnh kute Abraãomã kabēn jarēnhkam ne kum Kritu jarē. Kritu'ã ne Xara amijakre. Nhyim be, Mòjdjê kukràdjà'ã ne Agare amijakre. Be, kabēn amãnhkrut ne ja. 'Ã ne ar nire amãnhkrut amijakre. Metĩndjwýnh ne krãnhbê Xinajkam Mòjdjêamã me kukràdjaja jarē. Me kukràdjaja kôt ne me àpēnh tÿx kajgobit ar ban te axwe kêt prãmje. Krãnhbê Xinaj'ã ne Agare amijakre. Agare ne kubê me pardja ne Abraãomã àpēnh tÿx kajgobit ar ba. <sup>25</sup> Agare'ã ne krãnhbê Xinaj amijakre. Pykabê Arabijkam ne krãnhbê Xinaj. Nhyim kam Xinaj'ã ne pykakam krĩraxbê Djeruxarēja amijakre. Djeruxarē jakam me ar ba ne me kute Mòjdjê kukràdjabit mar. Me

kute Mòjdjê kukràdjabit mar ne me àpēnh tÿx kajgobit ar ban te axwe kêt prãmje.

<sup>26</sup> Nhyim be, me kute amim Kritu mar ne me kàjkwakam Djeruxarēkam ar ba. Me ja ne me kute Mòjdjê kukràdjà marn kute kôt amijo baja kangan Kritubit kôt ar amijo ba. Kôt ar amijo ban kubê me pardja kêt ne ta arým arek mekôt ar ban umar mex ne. Kàjkwakam Djeruxarē ne kute me banã pyræk.

<sup>27</sup> Ga, Metĩndjwýnh amrêbê: kute me bakukãmãmẽ kabēn jarēnh nhyim me arým kute 'ã pi'ók no'ókja pumũ. Nãm Metĩndjwýnh tu krĩraxbê Djeruxarēmã kabēn jarē. Nãm tu kum,

“Ga te akra prãmje ne akra kêtumrêxja on akĩnh. Aje akra à mar kêtja on tu adjãmra tÿx kaba.

Djãm mrãmri akra kêt ne ar abamã, amjēn kute akangakam akra kêt ne ar abamã? Kati. Dja me arým mjēnja te akurãm kra krãptĩ ga dja ga akra krãptĩo me akrenh mex ne.”

Nãm ã kàjkwakam krĩraxbê Djeruxarējama ane. Ga, kàjkwakam krĩraxbê Djeruxarē kute mrãmri ne gwaj bakunĩ nã pyrækja pumũ. Arým gwaj bakrãptĩn tu amim Kritu markumrêx nhyim Metĩndjwýnh arým tu gwaj bamã axwe kêt jarē.

<sup>28</sup> Ga, Metĩndjwýnh kute Abraãomã kum, “Dja akra amirĩt”, anhÿrja pumũ. Nhyim kam kute kum arēnh kôt arým Idjak kato. Ar gadjwý ne gar aje Idjak pyræk. Mÿkam? Bir, Metĩndjwýnh ne ar amã,

—Dja gar tu amim Kritu markumrêx. Ba kam arým ar amã axwe kêt jarēn arým ar ajo ikra, ane. Gar kam arým tu amim markumrêx nhyim kute ar amã arēnh kôt arým ar ajo kra. Kute Abraãomã arēnh kôt ne arým kra

Idjak kato. Ar gadjwý kute ar amã arênh kôt ne arým ar amã axwe kêt jarên arým ar ajo kra.

<sup>29</sup> Nhyr be, amrêbê: Imaêr kum Idjak kurêo ba. Metîndjwýnh Karô kabên kôt ne Abraão arým kra Idjak dji nhyr katon ar ba nhyr Imaêr kum kurêo ba. Abraão ta ne Imaêr dji nhyr arým kum kamybê Idjak kurêo ba. Nãm ã akati jakam me kum gwaj bakurêo ane. Me kute amim,

—Dja ba Môjdjê kukràdjà man kôt ar amijo iban arým ijaxwe kêt, anhÿro baja. Me ja ne me kum gwaj bakurê. Kum gwaj baje amim Kritu marja kurêo ba. Gwaj baje amim Kritu mar ne gwaj amim,

—Dja ba tu amim Kritu markumrêx nhyr Metîndjwýnh arým imã ijaxwe kêt jarê, anhÿro baba. Gwaj anhÿro baba nhyr me arým kum gwaj bakurêo ba.

<sup>30</sup> Nhyr kam mÿj ne amrêbê: me bakukãmãre arê nhyr me'ã pi'ók no'ók ne? Bir, Xarabê me pardja kêtja ne Agare'ã Abraõomã kabên ne kum,

“Djãm gu banhõ àpênh kajgo kraja kute ikra kôt anhõ mÿjjao aminhõmã? Amÿrbê kute o aminhõmã?

Kati. Ikrabit dja anhõ mÿjjao aminhõ. On ikra nêje bõm Agaremê kra ar amê.”

Nãm ã Xara Abraõomã ane. <sup>31</sup> Ar tãm 'ã dja gwaj amijakren amima. Me kute amim,

—Ba Môjdjê kukràdjà man kôt ar amijo iban ijaxwe kêt, anhÿrja ne me te axwe kêt prãmje. Nãm me me pardja kra'ã amijakre ne àpênh kajgo ar ba. Dja me Metîndjwýnh nhõ mÿjjao aminhõ kêt ne axwe rã'ã. Nhyr be, gwaj ba ne gwaj tu amim Kritu markumrêx nhyr Metîndjwýnh arým tu gwaj bamã axwe kêt jarê gwaj arým kum bajaxwe kêt. Gwaj ba ne gwaj me pardja kêt kra'ã amijakre ne kam Metîndjwýnh nhõ mÿjjao aminhõ.

## 5

*Pykakam me kute kukràdjà kajgo kôt amijo ba nêje me akre.*

*Rô 3.21; Kor 2.20*

<sup>1</sup> Gwaj ba: arek mekôt ar baban badjumar mex kadjy ne Kritu arým gwaj bapytà. Ga, mryti kute jênh pyti tur ne kute o baja pumũ. Gwaj badjwý amrêbê: gwaj pykakam me kukràdjà kôt badjapênh tÿx kajgobit ar baba. Kam ne gwaj badjumar punu:re. Nhyr Kritu arým gwaj bapytà gwaj arým me kukràdjà kôt badjapênh kêt. Gwaj ba ne gwaj Kritukôt arek ar baban badjumar mex. Arým Kritu kôt badjumar mexkam kwãrik wãnh Môjdjê kukràdjà'ÿr amijo akêx kêt ne kôt amijo aba kêt. Dja ga kôt ar amijo aban arým akapri:re kute mrãmri ne mry jênh pytikam kapri pyrãk. Gê me te: kukràdjà'ã ar amã karô gar arek mebê dja. Kritu kôt dja gar adjãm tÿx.

<sup>2</sup> Ba ibê Paur ne ba me abê Garaxamã arê. Godja gar aje memã kum,

—Ajrà. Môjdjê kukràdjà kôt imy nhinhu kã krãta. Dja ba kôt ijaxwe kêt, anhÿr jabej nhyr me amy kã nhinhu krãta gar kam arým aje Kritu mar kajgo. <sup>3</sup> Ba ajte mrãmri me kunimã arênhkumrêx. Metîndjwýnh ne arým me my kã rênhamã kute pri:ne Môjdjê kukràdjà kunĩ kôt amijo bamã memã arê.

<sup>4</sup> Ar ajô ar aje amim,

—Ba Môjdjê kukràdjà man kôt ar amijo iban arým ijaxwe kêt, anhÿr. Ar aje amim anhÿrkam aje Kritu mar kajgo. Nhyr kam Metîndjwýnh kum ar akapri kêt ne arým ar amã axwe jarê. Ar ga ne gar Kritu bê amijo akêx.

<sup>5</sup> Nhyr be, gwaj ba ne gwaj arým tu amim Kritu markumrêx. Nhyr kam Metîndjwýnh arým Karô kôt gwaj bajo mex. Dja Karô gwaj bajo ban arým gwaj bajo mex gwaj kam bakunĩ bajaxwe kêt. Tãm ne gwaj tu amiwÿr kamnhÿkumrêx.

<sup>6</sup> Be, Kritu kôt gwaj baje amijo babakam djâm Metîndjwýnh kute gwaj bamy kà rênh mar? Nâr djâm kute gwaj bamy kà tâ mar? Kati. Ja ne kum kajgokumrêx. Nhyr be, gwaj baje tu amim Kritu markumrêxkam. Kambit ne gwaj mrâmri kum bakajgo kêtumrêx ne kum bajaxwe kêt. Ne baje tu amim markumrêxkam arým bamâ me abêkumrêx.

<sup>7</sup> Amrêbê ne gar aje mrâmri ne me rer djwýnh prôt mex pyrâk. Ne katât Kritu kôt ar amijo aban 'ã adjukanga kêtumrêx. Mýj me'õ ne ar abê aptâ? Gar kabên katât man kôt ar amijo aba nhyr ar abê aptâ? <sup>8</sup> Djâm Metîndjwýnh kute amiwýr ar ajwýr djwýnh ta ne ar abê aptâ? Djâm ta ne Môjdjê kukràdjâ'ã ar amâ karôn o ar abê aptâ? Kati. Atemâ me'õ.

<sup>9</sup> Ga, me kute djwýkam igot djâ kryre rênhja pumû. Nhyr kam arým djwý djôm mē amrà. Ar gadjwý ne me ngrêre ar amâ 'ã karôo dja. Dja me arek ar amâ 'ã karôo dja: nhyr me kabên ar anhî kunî mē amrán arým me'ýr ar ajo akêx gar arým mekôt ar amijo aba. <sup>10</sup> Nhyr be, arým ne gar aje ikabên ja markam ba tu amim ar akamnhîxkumrêx ne amim,

—Kati. Jakam dja ar ikabên man Kritu kôtbit amijo ba, ane. Nhyr be, me'õ ja kute Môjdjê kukràdjâ'ã ar amâ karôn ar amâ kaprî jadjârja gêdja Metîndjwýnh arým kum axwe pânharê.

<sup>11</sup> Nhyr me we ar amâ,

—Paurdjwý ne me my kà rênh'ã memâ àpnêho ba, anhýro ba. Djâm mrâmri me kabên? Kati. Ba ne ba kâj bê memâ kum,

—Kritu ne pîte'ykam ty. Dja ga me tu amim markumrêx, nhyr Metîndjwýnh arým tu me amâ axwe kêt jarê ga me kum ajaxwe kêt, anhýro iba. Ne ba ren iby aje memâ kum,

—Gê me me amy kà rênh gê kam arým Metîndjwýnh me amâ axwe kêt jarê, anhýro iba nhyr ren me kum ikurê kêt. Nhyr be, kati. Nâ bâm memâ kum,

—Kritu ne pîte'ykam ty. Dja ga me tu amim markumrêx nhyr Metîndjwýnh arým tu me amâ axwe kêt jarê, anhýro iba. Jabit ne ba memâ arê. Ne kam ije me my kà rênh'ã memâ karô kêt. Kam ne me arým ijo bikêho ba. <sup>12</sup> Be, me kute ar amy kà rênh'ã ar amâ karôn ar amâ kaprî jadjârja ren ta ã amijo bikêho ane.

*Me kute Metîndjwýnh Karô mar'ã memâ karô.*

*Idja 13.3; Ped k 1.22; Dju k 3.11*

<sup>13</sup> Kam, akmere àpnêre ar, djâm ar aje Môjdjê kukràdjâ marn kôt amijo aban ar akaprîmâ ne Metîndjwýnh amiwýr ar ajuw ne ar ajo ba? Kati. Ar adjumar mex ne arek mekôt ar abamâ. Ja kadjy ne Metîndjwýnh amiwýr ar ajo akêx. Ar aje Môjdjê kukràdjâ kôt amijo aba kêt ne arek mekôt ar abakam djâm kam arým tu ajaxwemâ? Djâm aje amidjwýnhbito kînh kadjy tu ajaxwemâ? Kati. Kwârîk wânharê ajaxwe kêt. Arým aje Môjdjê kukràdjâ mar kêt ne arek mekôt ar abakam dja gar amâ aben jabên abenmâ apê.

<sup>14</sup> Mýkam? Bir, Metîndjwýnh ne memâ kum,

“Me amâ amibu'ã me ja jabê. Kute mrâmri ne ga me amâ amijabêja pyrâk dja ga me ã amâ amibu'ã me ja jabêo ane”, ane.

Dja gar Metîndjwýnh kabênja pydjibit man kôt ar amijo aban arým Môjdjê kukràdjâ kunî man kôt amijo aba. Mrâmri ar amâ me abêkam ne gar tu Metîndjwýnhmâ amexkumrêx.

<sup>15</sup> Nâr kon dja gar amâ aben kurêo aba mýj dja kam akute? Ga, ropre kute aben kamjânharê ne kute abeno apêxo baja pumû. Ar gadjwý

dja gar amā aben kurê tām̄tã ĩ arým aben bê akunĩ ajmã.

<sup>16</sup> Gwaj ba, bamã amidjwýnhbito kĩnh prãm ne kôt arým bajaxwe prãm. Nhyim be, dja gar amim Metĩndjwýnh Karõ man mã kôt ar amijo aban kam arým kôt ajmã akute kêt ne katàt amijo aba.

<sup>17</sup> Djãm ar ga ne gar Metĩndjwýnhmã ajaxwe kêt? Kati. Gwaj ba ne gwaj bajaxwe prãm ne amim, “Ba amidjwýnhbito kĩnh”, anhÿro baba. Nhyim kam Metĩndjwýnh Karõ mã gwaj bamã,

—Kati. Kwãrĩk wãnh, anen ã akubyn gwaj banêo ane. Karõ mã akubyn gwaj banê gwaj ba bajaxwemã mã amim, “Ba amidjwýnhbito kĩnh”, anhÿro baba. Gwaj mã bakabêno Metĩndjwýnh Karõ japanho baba. Nhyim ta mã akubyn gwaj banêo ba. Kam ar ga ne gar te ga: ajaxwe kêt prãmje.

<sup>18</sup> Nhyim be, ar ga dja gar amim Metĩndjwýnh Karõ man mã kôt ar amijo aba nhyim kam ta arým katàt ar ajo ba. Dja gar amim Karõ maro aba:n arým amã Mõjdjê kukràdjã maro aba prãm kêt kumrêx.

*Me kute amidjwýnhbito kĩnh prãm kam apýnh axwe djãri 'ã ujarênh ne ja.*

<sup>19</sup> Me kute amidjwýnhbito kĩnh prãm kam ne me apýnh mýjjao ban kôt axwe. Me kute apýnh mýjjao baja ne me kunĩ kute mar.

Nãm me mebê prõo akĩ, mjêno akĩ. Ne ajte ari prõ, mjên kupa'ã kurê ba.

Ne ajte kute abenbê me kupênhõ amijo ãpnuo ba.

Ne ajte amijo ãpnu me:x ne. Me kute amidjwýnhõ kĩnh prãm kam kute mýjjao ba ne ja.

<sup>20</sup> Ne ajte mýjjao metĩndjwýnh karõ nhípêxmã amijarênhõ ba.

Ne ajte ta apýnh mýjja maro amiptàn arým amijo wajangao ba.

Ne ajte kum me kurêo ba.

Ne ajte axikôt kabên kêt ne abenã kabên ba.

Ne ajte me õ mýjja pro'ã ngryk ba.

Ne ajte kute amijã ngryk nê kêt ne tu ngryk ba.

Ne ajte kute amidjwýnhbit markam amijo rax pytãro ba.

Ne ajte kute amiwýr meo akêx prãmje aben bê me kurêo ba.

Ne ajte apýnh mýj kukràdjã'ã no tÿx ne kam mýr jabej apýnh me kwý djãri kôt bikprõnh ba.

Me kute amidjwýnhbito kĩnh prãm kam kute mýjjao ba ne ja.

<sup>21</sup> Ne ajte te kute me uràk prãmje ngryk ba.

Ne ajte aben paro ba.

Ne ajte kadjwati kangõkam\* bibãnh ba.

Ne ajte apýnh mýjja punukam aben tÿx jabejo ba.

Be, apýnh mýjja kute ja pyrãk rã'ã. Me kute amidjwýnhbito kĩnh prãm kam kute mýjjao ba ne ja. Dja Metĩndjwýnh ĩ õ me ja kunĩõ ba. Djãm kam kute me jao bamã? Me kute mýjja jao ba, djãm kute meo bamã? Kati. Dja me ja wãnh me biknor tokry djãkam akuno. Tãm ne ba amrêbê ar amã arên ajte jakam ar amã arê.

*Metĩndjwýnh Karõ kute meo bakam me kute amijo ba mex.*

<sup>22</sup> Nhyim be, dja Metĩndjwýnh Karõ ta ar ajo ba.

Gar arým õ'ã amã me abê.

Ne ajte akĩnhhtire.

Ne ajte adjumar mex.

Ne ajte memã ano kator kêt ne ami-jamãr 'iry.

Dja Karõ ta ar ajo ba gar ajte õ'ã memã aprĩ.

Ne ajte anhõdjãnh.

\* 5:21 Mýjja me kute o kõm ne kôt bibãnh kunĩja, kadjwati kangõmê uba kangõmê, mýjja kangõ kunĩ ne me kum kadjwati kangõ jarê.



Ne ajte katàt Metĩndjwýnh kabēn man kòt ar amijo aban 'ã adjukanga kêt.

<sup>23</sup> Ne ajte akabòt katin ar aba.

Ne ajte amijaxwe kêt kadjy amijãno dja.

Dja Karò ta ar ajo ba gar arým ã amijo anen kam Metĩndjwýnh kòt amijo aba mexkumrêx nhym arým ar akam kĩnhkumrêx ne ar amã ar akatàtkumrêx jarê.

<sup>24</sup> Kritu kute gwaj bajo aminhòkam gwaj arým bamã bajaxwe prãm kêt. Bajē amidjwýnhbito kĩnh kadjy bajaxwe prãm kêt. Bajē mebê me kupēnh prãm kêt ne bamã mýjja punu prãm kêt. Bajē mrãmri ne Kritumē ro'ã aktã banhikra, baparmo i'ék pyræk. Gwaj ã amimaro ane.

<sup>25</sup> Mrãmri Karò kute gwaj bajo ba jabej gwaj mã Karò man prĩne kòt amijo baba mex. <sup>26</sup> Kwãrik wãnh gwaj bakajgokam arĩk amijo badjãmra ar baba kêt. Dja gwaj amijo badjãmra ar baba:n arým abenmã aben kurê'uko baba. Ne aben rax mýr jabej aben kam ban-gryko baba.

## 6

*Me kum me kunĩ kaprĩã kute memã karò.*

<sup>1</sup> Akmere àpnhĩre ar, godja me'ò arým axwe nhym me arým kute kòt omũnh jabej. Ar ga aje amim Metĩndjwýnh Karò maro abaja dja gar me'òmã aprĩren akubyn Metĩndjwýnh'ýr o akêx. Ne amiman amim,

—Û, watĩre. Nok ba ren akati 'òkam Metĩndjwýnh maro aknon ren ã kudjwa ijaxweo anhýr jabej, ane. Dja gar ã amimaro anen ajaxwe nêje amijãno djan arým me'òjamã aprĩren akubyn 'ýr o akêx jabej.

<sup>2</sup> Ga, me kute jēnh pytĩo baja pumũ. Nhym me arým 'ýr bõx ne arým kum kaprĩn kòt o kangõ. Ar gadjwý dja gar aben maro aba nhym me'ò amikam kaprĩre.

Ar amã kaprĩn kum kaprĩ kwý ngri. Dja gar ã anen arým aje Kritu kukràdjã marn kòt amijo aba mexkumrêx.

<sup>3</sup> Nhym be, godja ajò katàt aje amijo aba kêtka mã amim,

—Djãm ba ijaxwe? Kati. Ijaxwe'ò kêtka mãmri, 'itýx, anhýro aba jabej. Djãm mrãmri ne akabēn? Kati. Ga ne ga amim ajêx ne aminoo abiknoro aba.

<sup>4</sup> Ar akunĩ apýnh anhĩ djari gar mrãmri katàt aje amijo aba jabej ga: amikabi. Ne kam mrãmri katàt aje amijo abakam ga amikam akĩnh. Nhym be, djã ne aje amim,

—Ba ne ba ije katàt amijo ibao tãm wã jakrenh, anhýro abakam djãm mrãmri akatàt? Kati. Ar aje ã amim anhýro abakam akatàt kêtka mãmri. <sup>5</sup> Nhym be, ar akunĩ apýnh anhĩ djari dja gar goja mrãmri akatàtkumrêx jabej katàt amijo aba.

<sup>6</sup> Be, dja Metĩndjwýnh kabēn jarēnh djwýnh ar amã kabēn jarēho ku'è, ar amikutã kum ar anhõ mýjja mex kwý ngã. Kum angã gē ar akòt o amikĩnh.

<sup>7</sup> Djãm me kute Metĩndjwýnh'ã abenmã kum,

—Djãm mrãmri dja Metĩndjwýnh memã axwe pãnh jarê? Kati. Kabēn kajgo. Me àkĩnhĩkam pãnh kêt. Me 'èxnhĩkam pãnh kêt. Me axwe kunĩkam pãnh kêt, anhýr? Djãm me kute anhýrkam mrãmri me kabēnkumrêx? Kati. Kwãrik wãnh amim ajêx ne aminoo abiknor kêt. Ga, mrýnhĩ 'y, akrò 'y, akaòk 'y, 'è 'òdjwý 'yja pumũ. Djã ne ren me 'y ja kren ren kòt djwý mex jamý? Kati. Me kute 'y mexbit kreka m kute kòt djwý mex jamýnh.

<sup>8</sup> Gwaj badjwý. Godja gwaj amidjwýnhbito kĩnh kadjy bajaxwe jabej, badjãkĩnhõ baba jabej, bakabēn punuo baba jabej. Metĩndjwýnh dja pãnh gwaj bamã mýjja punu ngã gwaj arým bakaprĩre. Dja gwaj bajē me kute

mrÿnhĩ 'y kren arÿm kaprĩ pyràk. Nàr, godja gwaj amim Metĩndjwÿnh Karõ man katàt kõt ar amijo baba, Metĩndjwÿnh Karõ dja arÿm gwaj bamã o pãnh. Pãnh dja gwaj arÿm kõt batĩn ne ar baba rã'ã: rã'ã ne.

<sup>9</sup> Kam dja gar adjukaprĩn katàt aje amijo aba'ã adjukanga kêt. Dja gar ã anen ĩ arÿm amim akĩnh djà byn akĩnhkumrêx. Kute mrãmri ne me kute bàygogo djê parkam me kĩnh pyràk. <sup>10</sup> Pykakam mekõt ar abari dja gar amã me kunĩ kaprĩ. Dja gar me kute amim Jeju marja kumrêx aman amã me kaprĩn kam amã me kunĩ kaprĩ.

*Metĩndjwÿnh kute meo nykambit kĩnh.*

<sup>11</sup> Ga, ba inhikrakam ije ar amã pi'òk no'òkkam ije no'òk rũnhja pumũ.

<sup>12</sup> Me ar amy kà rênh'ã ar amã àpnêho ba. Dja gar me kabên kõt ar amy kà rê nhym amũ me ja arÿm me'ã abenmã kum,

—Be, me Mòjdjê kukràdjà'ã no tÿxkumrêx. Me mexkumrêx, ane. Ja kadjy ne me ar amy kà rênh'ã ar amã apnê. Ne ren 'ã ar amã àpnênh kêt nhym ren me 'ã kum me kurêo ba. Nhym ren me Kritu pĩte'ykam jêbit'ã ar amã ajarê nhym ren me 'ã kum me kurêo ba. Nhym be, kati. Nãm me ar amy kà rênh'ã ar amã àpnêho ba nhym me arÿm kum me kĩnh. <sup>13</sup> Djãm me arÿm my kà rênhkam kute mrãmri Mòjdjê kukràdjà marn kõt amijo bakumrêx? Kati. Ne kam mÿj kadjy ne me ar amy kà rênh'ã ar amã apnê? Bir, dja me amiwÿr ar ajo akêx ne 'ã amidjwÿnhbito amran memã kum,

—Be, arÿm ar me bakukràdjà kõt ba mexkumrêx. Ba ne ba 'ÿr aro akêx, ane. Ja kadjy ne me ar amy kà rênh'ã ar amã àpnêho ba.

<sup>14</sup> Nhym be, djã ne ba ba: amijo idjãmra prãm? Kati. Bẽnjadjwÿr

djwÿnhbê Jeju Kritu ne ba o idjãmra prãm. Kute gwaj bajaxweo pãnh kadjy ne arÿm pĩte'ykam ty. Tãm ne ba o amra. Pĩte'ykam tykkam Metĩndjwÿnh arÿm imã ijaxwe kêt jarê. Kam, me kum Metĩndjwÿnh kĩnh kêt kukràdjà ba arÿm kanga. Ga, me arÿm tykkam kum mÿjja kĩnh kêtja pumũ. Badjwÿ imã me kukràdjà kĩnh kêt. Me kum Metĩndjwÿnh kĩnh kêt kukràdjà imã kĩnh kêt. Ba Kritumê ro'ã pĩte'ykam arÿm ityk pyràk ne imã me kukràdjà kĩnh kêt.

<sup>15</sup> Be, arÿm gwaj baje tu amim Jeju Kritu markam djãm Metĩndjwÿnh kute gwaj bamy kà rênh mar nàr djãm kute gwaj bamy kà tã mar? Kati. Mÿjja ja ne arÿm kum kajgokumrêx. Nhym be, gwaj arÿm tu amim markumrêx nhym arÿm gwaj bajo ny ne. Tãm ne Metĩndjwÿnh kute markumrêx. <sup>16</sup> Me kute ikukràdjà jakõt amijo baja gê Metĩndjwÿnh kum me kaprĩ gê me umar mexkumrêx. Metĩndjwÿnh nhõ mebê idjaerkumrêxja gê kum me kaprĩ gê me umar mexkumrêx.

<sup>17</sup> Jakam dja gar aminhijukri amidjan ajò ajte imã ikaprĩ jadjàr kêt. Kute mrãmri ne me kute Bẽnjadjwÿr djwÿnh Jejuo bikênhkam apÿnh kà rã kumex pyràk ne ikà rã kumex. Jejukõt ne ba ikà rã kumex. Kam kwãrĩk wãnh ajte imã ikaprĩ jadjàr kêt.

<sup>18</sup> Gê Bẽnjadjwÿr djwÿnhbê Jeju tu kum ar akaprĩ.\* Tãm ne ja.

\* **6:18** Djãm ar ga ne gar adjukaprĩ nhym pãnh arÿm kum ar akaprĩ Kati. Ta ne tu kum ar akaprĩkumrêx.

## Paur kute Epexukam me jamã pi'ôk no'ôk ne ja.

Paur ne krĩraxbê Epexukam me jamã pi'ôk no'ôk ne. Nãm me Paurbê ijê nhym mebê ijê djâkam âmkan ne memã pi'ôk no'ôk ne. Kute meo tỳx ne meo kĩnhmã ne memã pi'ôk no'ôk ne. Ne memã Metĩndjwỳnh kute mỳjja kunĩ'ã karõ amirĩt ne. Metĩndjwỳnh kute pyka nhĩpêx kêtĩri ne gwaj bajã amim karõ ne kam jakam arỳm Jejukôt gwaj bapytãro tẽn kam amũ 'ôkam dja bajaxwe kunĩo apêx. Be, pykabê ar babari dja Xatanajmê õ me karõ punumê gwaj bawỳr prõt. Be, gwaj baje Jeju mar kunĩ dja gwaj tu Xatanajmã baku'ê tỳx ne amijo aptàn o apa. Kam ne Paur apỳnh memã 'ã karõ, me kute katãt amijo ba'ã memã karõ.

Metĩndjwỳnh ne Kritukôt mỳjja kunĩ o ba. Ne Kritukôt mỳjja kunĩ 'y ne o ban kam ajte kôt gwaj bapytã. Ne kôt gwaj bajo kĩnh. Be, Kritu ne gwaj baje Jeju mar kunĩmã bẽnjadjwỳr. Kute gwaj bajo djuw mexo baja pumũ. Nãm ã Paur memã o amirĩto ane.

<sup>1</sup> Ba ne ba ibê Paur. Metĩndjwỳnh ne Jeju Kritumã ijã karõ nhym arỳm ijano ba memã 'ã idjujarênh ar iba.

Krĩraxbê Epexukam Jeju kute ar ajo õ me ja ne ba pi'ôk kôt ar amã ikabên. Gar aje arek Kritu Jeju kôt ar amijo aban 'ã adjukanga kêtja ba pi'ôk no'ôkkan ar amã ikabên.

<sup>2</sup> Metĩndjwỳnhbê ne me Babãm. Ne Bẽnjadjwỳr djwỳnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne.

\* 1:2 Djãm ar ga ne gar adjukaprĩ nhym ar pãnh arỳm kum ar akaprĩ Kati. Ar ta ne ar tu kum ar akaprĩkumrêx.

*Mỳjja kunĩ kêtĩri Metĩndjwỳnh kute amijo me utãr.*

*Rõ 8.29; Tex k 1.4; A Tex 2.13; Ped k 1.2*

<sup>3</sup> Be, Metĩndjwỳnh ne ukaprĩ:kumrêx. Kute Bẽnjadjwỳr djwỳnhbê Jeju Kritu ba nhym kute o Bãm. Metĩndjwỳnh ta ne gwaj bajo djuw mex. Gwaj tu amim Kritu markumrêx nhym prĩne kãjkwakam õ mỳjja kunĩo gwaj bajo djuw mex. <sup>4</sup> Ga, kute amijo gwaj bapytãrja pumũ. Mỳjja kunĩmê me kunĩ kator kêtĩri ne amijo gwaj bapytãn amim,

—Be, me wã dja me tu amim Kritu markumrêx ba arỳm meo inhõkumrêx nhym me arỳm imã axwe kêtikumrêx. Nãm ã kum gwaj bajabêkam gwaj bajã amim ane. <sup>5</sup> Amrêbê me kunĩ kêtĩri, mỳjja kunĩ kêtĩri ne ta kum gwaj bakĩnhkumrêx ne amijo gwaj bapytã. Ne kam tu amim gwaj bajã karõkumrêx ne amim,

—Me wã dja me tu amim Jeju Kritu markumrêx ba arỳm meo ikrakumrêx, ane. <sup>6</sup> Metĩndjwỳnh tu kum gwaj bakaprĩ:kumrêx. Nãm kum Kra jabêkumrêx, ne Krakôt kum gwaj badjwỳ kaprĩ:kumrêx. Dja gwaj kam bakunĩ: kum,

—E kum, djãm adjukaprĩ ngri: got? Adjukaprĩ ra:xi. Amexti:re. Me imã akĩnhkumrêx, anhỹro baba. Gwaj baje ã kum anhỹro baba kadjy ne arỳm amijo gwaj bapytã.

<sup>7</sup> Nãm Krakôt kum gwaj bakaprĩ:kumrêx. Kra ne amikamrõo gwaj bajaxweo pãnh. Nhym kam arỳm gwaj bajaxwe maro aknon bakam ngyrk kêt ne. Nãm ukaprĩ:kumrêxkôt ã gwaj bajaxweo ane. <sup>8</sup> Kute prĩne mỳjja kunĩ mar. Kute amikukãm mỳjja kunĩmê me kunĩ'ã amim karõ. Ne kam gwaj badjwỳ, kute amim gwaj bajã karõ kôt arỳm kum gwaj bakaprĩ:kumrêx.

<sup>9</sup> Ta ne amrêbê: kute mýjja kunĩ markôt arým amim kabên'ã karô. Ta ne kum kabên kĩnh ne arým amim kabên'ã karô ne kam memã arênh kêt 'âtũm. Ne kam ajte ta arým jakam gwaj bamã kabênja jarê. <sup>10</sup> Nãm jakam gwaj bamã,

—Dja ĩ me kunĩ kute aminhi-nomã amimênh djã nhô akati bôx ba kam Kritu'ã me kunimê mýjja kunõ akuprô. Kãjkwakam mýjja nãr pykakam mýjja dja ba Kritu'ã kunõ akuprô nhyr arým kunõ ba, ane. Amrêbê kute kabên jarênh kêt ja ne jakam arým gwaj bamã arê.

<sup>11</sup> Amrêbê mýjja kunĩ kêttri, me kêttri ne amijo me ibê idjaer pytã. Nãm tu me ijã amim karôkumrêx ne amim,

—Be, me wã dja ba memã amak bô nhyr me arým tu amim Kritu markumrêx ba kam arým meo aminhô. Nãm ã me ijã amim ane. Ta ne kute amim mýjja kunimê me kunĩ'ã karô. Kute amim 'ã karô kôt ne mrãmri kute o apôxkumrêx ne kute o bakumrêx. Djãm me ibê idjaerbit ne amijo me ipytã? Kati. Mýjja kunĩ:. Kute amim mýjja kunĩ'ã karô kôt arým mrãmri kute o apôx ne o bakumrêx.

<sup>12</sup> Mýj kadja ne amijo me ibê idjaer pytã? Bir, ba me ikumrêx ne ba me tu amim Kritu markumrêx ne kôt ar amijo iba. Me kunĩ dja me me ijã abenmã kum,

—Ga, me kute Kritukôt katãt ar amijo baja pumũ. Kritu nexti:rekumrêx. Me bamã kĩnhkumrêx, anhÿro ba. Ja kadja ne amijo me ipytã. <sup>13</sup> Me ibê idjaer kumrêx ne ba me tu amim markumrêx. Nhyr kam me arým me abajtemmã Kritu'ã ujarênh ny katãtkumrêxja jarê ga me aman tu amim markumrêx. Nhyr kam Metĩndjwýnh arým me ajaxwebê me apytãn kam me amã Karô jano.

Amrêbê Kritu kute me bamã Karô jarênhja ne me amã ano nhyr arým me ajo ba. Ga, me kute

mýjja'ã aminhidji janhôr nhyr arým amirĩtkumrêxja pumũ. Me badjwý Metĩndjwýnh arým me bamã Karô jano nhyr arým me bajo ba. Me bajo ba gu me arým amim,

—Mrãmri ne Metĩndjwýnh arým ijo krakumrêx. Ga, arým kute imã Karô janor nhyr kute ijo bakumrêxja pumũ, ane. Karô ne me bajo ba gu me ã amim ane. Kam, gu me baje mrãmri ja markumrêx. Arým Metĩndjwýnh kute me bajo kraja ne gu me baje mrãmri markumrêx.

<sup>14</sup> Ga, me kute memã mýjja rũnh nhôrmãn kam kukãm kute memã mýjja kryre nhôrja pumũ. Me amim kryre jamýn arým amiwýr rũnhja kamnhĩxkumrêx.

Me badjwý Metĩndjwýnh arým me bamã Karô jano nhyr arým me bajo ba gu me arým amim,

—Ga, Metĩndjwýnh arým kute imã Karô janorja pumũ. Ga, kute ijo baja pumũ. Mrãmri dja ba kãjkwakam kôt itĩn ne ar iba rã'ã: rã'ã ne, ane. Karô ne me bajo ba gu me ã amim anen kam arým baje mrãmri ja markumrêx. Mrãmri kãjkwakam Metĩndjwýnhkôt batĩn ne ar baba rã'ã: rã'ãja baje mrãmri markumrêx ne amiwýr kamnhĩxkumrêx. Dja gu me Metĩndjwýnh kôt batĩnmãja maro baba: nhyr Kritu arým bôx ne amikôt me bajo mō. Metĩndjwýnh kute amijo me bapytãrjao mō. Dja amikôt me bajo mō nhyr me kunĩ arým abenmã kum,

—Metĩndjwýnh me:xkumrêx. Me bamã kĩnhkumrêx, ane.

*Kute Metĩndjwýnhmã meo à wýr.*

*Kor 1.9; Pir 1.9; Tex k 5.23; Idja 13.20*

<sup>15-16</sup> Kam ne ba mã Metĩndjwýnhmã ar akam amikĩnh jarênhô iba. Ar ga ne gar arým tu amim Bẽnjadjwýr djwýnh Jeju markumrêx ne kam amã Jeju nhô me ja kunĩ jabê:. Nhyr kam me arým imã ar ajarê

ba ar aman mā Metīndjwýnhmā ar akam amikīnh jarēho iban kam mā kum ar ajo a'awn kum,

17 —Metīndjwýnh, ga ne ga Bēnjadjwýr djwýnhbê Jeju Krituo aba. Djūnwā, amexti:re. Dja ga Akarōo aro aba gē ar arým ô'ā katāt akabēn markumrēx nhy m arým arkum Akrao amirītkumrēx gē ar mar mexkumrēx. 18 Anhō me ja dja me arým kàjkwakam anhō mýjja mexti:rekumrēxo aminhō. Mýjja ja kadjy ne ga amiwýr ar 'wýr ne aro aba. Dja ga arkum anhō mýjja amirīt gē ar prīne mexti:rekōt kuman amiwýr kamnhīxkumrēx. 19 Me kute tu amim amarkumrēxja dja ga memā týx jadjà. Aje memā týx jadjàr kadjy ajitý:xi. Me kadjy ajitýxo abē kumkati. Mýj ne ga aje meo týx kadjy ajitýxkam kute? Tām dja ga arkum o amirīt, gē ar prīne kuma. Anhō mýjja ja dja ga arkum o amirīt gē ar kuma. Nā bām ā ar akadjy Metīndjwýnh 'wýro ane.

Metīndjwýnh ne 'itý:xi. 20 Ga, Kritu arým tykkam Metīndjwýnh 'itýxo kam àpēnhja pumū. 'Itýxo kam àpēho kute akubyn o tīnja pumū. Nām ajte kàjkwa djwýnhkam o wabin aminhikō'ā ýr. Raxo kute me rūnh jakrenh mex kadjy amidjubōk'ānh ýr.

21 Kýjrūm, me rūnh kunī nhiby ýr. Nhy m arým rax ne týxo me akrenh me:x ne. Nhy m pa:rbē memā ýr djwýnh kunīmē me rūnh kunīmē me 'itýx kunīmē me bēnjadjwýr kunīmē ne me kum ngri:re. Jakam me bakam me rūnh kunī ne me kum ngri:re, nār amrē pyka ny mōrkam me rūnh kunī ne me kum ngri:re. Me kunī ne me kum ngri:ren kajgo:.

22 Pa:rbē me kunī kum kajgo me:xi. Metīndjwýnh arým me rūnh kunī kadjy Jeju'ā ra:x mē. Ne ō me kute amim Jeju marja kunī kadjy 'ā rax mē nhy m arým meo ba.

Kute meo bakam arým kute me krā pyrāk.

23 Ga, me bakrāja pumū. Me bakrākam ne gu me badjumar nhy m kam kukwakam amū me banhī amingrēk ne ar me bajo ba. Me bakrākam gu me badjumar ne arým me banhikrao badjapēnh nār me baparkam bamrānh. Me bakrā amū me bakukràdjā kunī ngrēk ne me bajo ba. Kritudjwý kute me bakrā pyrāk ne me bakunīo ba, me babē ō me ja kute ta ī pyrākja ba, me bangrēk ne me bajo ba, me baje amim mar kunījao tuknīn ar bajo ba. Ta ne kute amiraxo pykamē kàjkwamē mýjja kunīo tuknīn ar o ba kute me badjwý me bajo ba.

## 2

*Metīndjwýnh kute akubyn Krituo tīnkōt ō me jadjwýo tīn.*

*Kō k 6.11; Xit 3.3*

1 Nhy m be, ar ga ne gar amrēbē ajamakkre kēt kute me tyk amakkre kēt pyrāk ne ar aba. Gar Metīndjwýnh kabēnkam amikrào aban mekōt ajaxwe. 2 Me kum Metīndjwýnh kīnh kētja kukràdjā kōt ne gar amijo aba. Gwaj banhiby me karō punu nhō bēnjadjwýr kukràdjā kōtdjwý ne gar amijo aba. Me karō nhō bēnjadjwýrja tām ne jakam me amakkre kēt prāmja ba. 3 Amrēbē gwaj bakunīdjwý ne gwaj mekōt amidjwýnhbito kīnho baban arým bajaxwe:. Djām me'ō ne gwaj bajo axwe gwaj bajaxwe? Kati. Gwaj ba ne gwaj bamā bajaxwe prām ne amim 'ā karōn arým kōt bajaxwe. Amrēbē gwaj bajaxwekam ne Metīndjwýnh gwaj bakam ngryk ne. Me axwe kunīmē gwaj bakam ngry:k ne.

4 Djām gwaj bakam ngryk rā'āmā? Kati. Metīndjwýnh kum gwaj bakapri:kumrēx ne kum gwaj bajabē:. 5 Gwaj bajaxwekam ne gwaj bajamakkre kēt kute mrāmri ne me tyk amakkre kēt pyrāk. Gwaj

kam tu amim Kritu markumrêx ne kam mrâmri ne baje me tyk ne akubyn tîn pyrâk. Metîndjwÿnh ne jakam Kritumê ro'ã akubyn gwaj badjwÿ gwaj bajo tîn ne. Ta ne tu kum ar akaprîn arÿm ar apytà.

<sup>6</sup> Metîndjwÿnh ne jakam Kritumê ro'ã akubyn gwaj badjwÿ gwaj bajo tîn. Gwaj kam arÿm bajamak mex ne ar baba nyo ar baba. Kritumê ro'ã ar baban ar baba rã'ã: rã'ã ne kute mrâmri ne jakam on kàjkwakam Kritumê ro'ã ar baba pyrâk. <sup>7</sup> Mÿj kadjy ne gwaj Kritumê ro'ã ar baba? Bir, Metîndjwÿnh gwaj bakam ukaprîkumrêx. Kute me kunîmã gwaj bakam ukaprîo amirît kadjy ne gwaj Kritumê ro'ã ar baba. Gwaj tu amim Kritu Jeju markumrêx nhym kam gwaj bakam ôdjânhkumrêx. Ukaprî:kumrêx kôt ne gwaj bakam ôdjânhkumrêx. Amrê amex mör jakam ne amû nî:jkamdjwÿ dja memã gwaj bakam ukaprîjao amirît rã'ã: rã'ã rã'ã.

<sup>8</sup> Be, Metîndjwÿnh ta ne kum ar akaprî. Ar ga ne gar amex kêtikumrêx, nhym ta kum ar akaprîn ar amã Kritu jano nhym ty. Gar kam tu amim markumrêx, nhym arÿm kôt amim apytà. Djâm ar amex ne ar adjukaprî gar ga: amipyta? Kati. Metîndjwÿnh ta ne kum ar akaprîn ar amã Kritu janon kam ta amim ar apytà. <sup>9</sup> Djâm we kute ar amã,

—Be, ga ne ga amex ne adjukaprîkumrêx, anhÿr, ne kam we kôt kute amim ar apytâr? Arkati. Nãm ren ã ar ajômã ane, gar ren arîk ga amimexo adjâmra ar aba.

<sup>10</sup> Nhym be, kati. Metîndjwÿnh ta ne gwaj bajo mex gwaj kam arÿm badjukaprî. Kritu Jeju tyn arÿm akubyn tîn nhym kôt arÿm gwaj bajo ny. Metîndjwÿnh ta ne gwaj bajo ny gwaj aminhjukri amidjan kam arÿm bamã ne kaprîo baba. Ar adjukaprî ja ne Metîndjwÿnh amim 'ã karô. Gwaj bakêtri amim

'ã karô. Ne kam tûmrâm arÿm gwaj bajo ny gwaj arÿm kôt bamã me kaprîo baba.

*Mebê idjaermê me bajtem arÿm Kritu kôt abeno ôbikwa.*

<sup>11</sup> Be, amrêbê ne ba me imã me akurêo iba. Ga me abajtemkam ne ba me ibê idjaerkam imã me akurêo iba. Ba me me ajã memã kum,

—Me wã ne me my nhinhu kà rênh kêt. Metîndjwÿnh kum me kînh kêt. Me ba ne ba me imy kà rênh. Nhym Metîndjwÿnh kum me ikînhkumrêx, ane. Djâm mrâmri me kute me imy kà rênhkam arÿm me imex? Kati. Me imy kãbit rênh.

<sup>12</sup> Me abajtemkam ne ga me amrêbê aje Kritu mar kêtikumrêx ne ate amijo aba. Ba me ibê idjaer ne ba me ari me ajo kubajtemo iba. Metîndjwÿnh ne amrêbê: kute me ipytâr'ã me imã,

—Me kute tu amim ikra markumrêx dja ba amim me utã, ane. Ne kam 'ã me imã apÿnh mÿjja jarênh mãmджи ba me maro iba. Djâm me abajtemmã ne Metîndjwÿnh mÿjja ja jarê? Kati. Kute me amã arênh kêt ga me aje mar kêt. Kam ne ga me Metîndjwÿnhkôt atîn kadjy kêt ne aje amiwÿr atîn kamnhîx kêt ne aje mekôt Metîndjwÿnh mar kêt. Ne kam ate kubê amijo aba. Tãm dja ga me nhÿn ama ne mar rã'ã ne.

<sup>13</sup> Metîndjwÿnh bê ne ga me amrêbê ate ar amijo aba. Nhym be, jakam ne arÿm Kritu Jeju kamrô me bakadjy prôt ne nhym me bapãnh ty. Ga me kam kôt ar amijo aba nhym arÿm ar me ajo ba.

<sup>14</sup> Ta ne me bamã,

—Me abeno anhôbikwa, ane. Nãm ã me bamã ane, gu me arÿm abeno banhôbikwa. Me abajtemmê me ibê idjaermê ne gu me bamã aben kurê. Me bamã aben kurêja ne kute mrâmri ne gu me baje aben nêje ka'ê pyrâk. Gu me kam Jeju

kabĕnkôt arÿm abeno banhōbikwa nhym kute mrāmri ne aben nĕje ka'ĕ ngrānh pyrāk.

<sup>15</sup> Mōjdĕ kute Metĭndjwÿnh kukwakam mebĕ idjaermā 'ā karōkam kukràdjaja ne Kritu arÿm o kajgo. Pĭte'y'ā tyko arÿm o kajgon arÿm ajte mar kĕt. Mÿj kadjy ne o kajgo? Bir, nām o kajgon arÿm amiwÿr me bajo akĕx. Amiwÿr me bajo akĕx gu me arÿm abeno banhōbikwa. Ga, kute me bajo nja pumũ. Gu me arÿm baje mrāmri banhĭ tipdji pyrāk. Ja kadjy ne Mōjdĕ kukràdjao kajgo. <sup>16</sup> Kritu pĭte'y'ā tyko ne me bajo aben pydjĭn kam Metĭndjwÿnh'ÿr me bajo akĕx ne. Gu me kam arÿm o banhōbikwan kam bamā aben kurĕ kĕt.

<sup>17</sup> Kritu arÿm me abajtem'ÿr bōx. Metĭndjwÿnh bĕ amijo akre raxkam arÿm me awÿr bōx. Me awÿr bōx ne arÿm kàj bĕ me amā kabĕn jarĕ. Me aje Metĭndjwÿnho anhōbikwa kadjy ne me amā kabĕn jarĕ. Ajte me aje me ijo anhōbikwa kadjy ne me amā kabĕn jarĕ. Ne, me ibĕ idjaer ije Metĭndjwÿnh kôt amijo ibakam Kritu arÿm me iwÿr bōx ne kàj bĕ me imā kabĕn jarĕ. Me ije Metĭndjwÿnho inhōbikwa kadjy ne me imā kabĕn jarĕ. Ne me ije ajte me ajo inhōbikwa kadjy me imā kabĕn jarĕ.

<sup>18</sup> Djām apÿnh me Babām'ÿr me bapry? Kati. Arÿm ne me Babām'ÿr me bapry pydji. Metĭndjwÿnh Karō pydji. Me ibĕ idjaermĕ me abajtemmĕ ne gu me Karō pydji kôt me Babām'ÿr bōx.

<sup>19</sup> Kam ne ga me arÿm abajtem kĕt ne me akātām kĕt. Metĭndjwÿnh ne arÿm me ajo ō me ja ne me ajo ōbikwa. Me ibĕ ō me tũmmĕ ro'ā me ajo ōbikwa.

<sup>20</sup> Gu me kam arÿm baro'ā babĕ Metĭndjwÿnh nhō kĕno kikreti pyrāk. Kritu ne ar ijanō bar me awÿr bōx ne me amā arĕ. Ar ba ne bar Metĭndjwÿnh kukwakam me

amā arĕ, ga me kabĕn ma. Ar ba ne bar ije mrāmri ne kikreti kadjy pyka mā: par krax ku'ĕ pyrāk. Jeju Kritu kute mrāmri ne kikre par krax kadjy kum kajpar djā djwÿnh pyrāk.

<sup>21</sup> Kum kajpar djā djwÿnh kōnh ne me prĭne kĕn jadjwÿr mexo mō:. Kōnh ne me aben nhĭtepā adjwÿr mexo mō. Ne kam aben nhĭby kĕn jadjwÿr mexo mō: nhym Metĭndjwÿnh nhō kikreti arÿm abatānh mō. Metĭndjwÿnh Karōdjwÿ ā me bajo anen Bĕnjadjwÿr djwÿnhbĕ Jeju Kritu kôt me bapymjÿr mexo mō. Metĭndjwÿnh me ibĕ idjaero ōbikwan kam me abajtemo ōbikwa gu me arÿm Jeju kôt djan arÿm batypdjĭn dja. Batypdjĭn djan arÿm Metĭndjwÿnhmā bamexkumrĕx ne.

<sup>22</sup> Djām me ibĕ idjaerbit ne me ijo ōbikwa? Kati. Me abajtemdjwÿ. Gu me kam arÿm baro'ā babĕ Metĭndjwÿnh nhō kĕno kikreti pyrāk. Metĭndjwÿnh ne me bamā Karō jano. Kute me bamĕ amijo kajkep kadjy ne me bamā ano.

### 3

*Metĭndjwÿnh kute me bajtem'ÿr Paur janor.*

<sup>1</sup> Metĭndjwÿnh kute me amā Karō janorkam ne ba arÿm kum me ajo a'uw. Me abajtemo ne ba kum a'uw ne me amā ne ba Jeju Kritu'ā idjujarĕnh ar iba nhym me arÿm 'ā kum ikurĕn idjuwpre. Ba ibĕ Paur ne me arÿm idjuwpre.

<sup>2</sup> Me ga ne ga me arÿm ama. Metĭndjwÿnh ta ne kute imā me ajā karō ga me arÿm ama. Nām imā,

—Arÿm imā me bajtemdjwÿ kaprĭ. Ga dja ga memā 'ā adjujarĕnh djwÿnh, ane. Tām ne ga me aje mar jabej ba ajte akubyn me amā arĕ. <sup>3</sup> Kum me abajtem kaprĭmā ne kute amrĕbĕ arĕnh kĕt. Ne kam jakam ba imā arÿm arĕ ba

arým me amã 'ã pi'òk no'òk ngrire ga me arým omũn aman <sup>4</sup> badjwý ima. Metĩndjwýnh kute Kritu'ã mýjja jarēnh kēt ba ije p̄rĩne marja dja ga me ama.

<sup>5</sup> Nãm amrēbē kute memã arēnh kēt nhym pykakam me kra'ò kute mar kēt. Me kute aben djô'ã mar kēt. Nhym kam Metĩndjwýnh Karõ arým jakam ar imã arē bar arým jakam kuma. Kritu ne ar ijano bar ibē õ àpēnhkumrēx ne kukwakam idjujarēnh ar iba. Nãm ar imã arē bar jakam arým kuma.

<sup>6</sup> Kute mýjja jarēnh kētja arým ar imã arēn ar imã,

—Djãm me bajtemmē me abē idjaermē arek apýnh ar abamã got? Arkati. Dja ga me akunĩ tu amim Kritu'ã ujarēnh ny markumrēx ne arým aro'ã kôt ar aba. Ne kam arým aro'ã Metĩndjwýnh nhõ mýjjao aminhõn aro'ã kôt ar aban kam aje anhĩ tipdji pyrãk. Ne kam Metĩndjwýnh kute amrēbē: memã mýjja jarēnh mãmdjja me aro'ã amim aby. Me abē idjaermē me abajtemmē dja ga me tu amim Kritu markumrēx ne arým me aro'ã amim aby, ane. Tãm ne ar imã arē ba arým kuma.

<sup>7</sup> Metĩndjwýnh ta ne 'ityxkôt ijo ban tu kum ikapri.\* Ne kam arým imã me'ã karõ ba memã Kritu'ã kabēn nyja'ã idjujarēnh ar iba.

<sup>8</sup> Metĩndjwýnh nhõ me ja kunĩ ne me kute rũnho ijakrenh mex. Ba kam bajbit ikajgo me:x ne. Nã bãm te ikajgo: nhym Metĩndjwýnh ta arým tu kum ikapri:n kam arým imã idjapēnh djã'ã karõ. Ta ne imã,

—Ga dja ga me bajtemmã kãj bē Kritu'ã adjujarēnh ar aba, ane. Kritu ne memã kĩnh djã rũ:nh ngã, krãptĩ: ngã. Me te: kute kĩnh djã'ã ujarēnh inomã mēnhmã. Kritu kôt me kĩnh djã ja'ã ne ba idjujarēnh ar iba.

<sup>9</sup> Kum ikapri:kam ne imã,

—Ije memã ikabēn jarēnh kētja dja ba amã arē ga arým p̄rĩne ama. Ije amim me bajtem pytãrmã. Tãm dja ga aman me kunimã arēnho amirĩto aba. Nãm ã imã ane. Metĩndjwýnh ta ne Krituo mýjja kunĩ nhipēx. Adjãkamã kute Jeju Krituo mýjja kunĩ nhipēx ne kute me abajtem pytar'ã amim karõn kute me bakukãmãremã arēnh kēt tãm ne imã arē.

<sup>10-11</sup> Mýkam ne kute amrēbē me bakukãmãremã me apytãr jarēnh kēt? Bir ga, Kritu kute ajbir pykakam abenã me bamēnhja pumũ. Kam ne me kãjkwakam aparmã abenã me bapumũnho nhỹ. Kãjkwakam me bēnjadjwýrmē me rũnhmē ne me jakam me bapumũnho nhỹ. Me baje amim Jeju mar kunĩja pumũnho nhỹn arým me bakõt Metĩndjwýnh raxmã kato. Me kute me bakõt Metĩndjwýnh raxmã kator kadjy ne Metĩndjwýnh kute amrēbē me bakukãmãremã arēnh kēt. Memã kute me abajtem pytar ne kute abenã me bamēnhja kute arēnh kēt.

Nãm me me bapumũnho nhỹn me bajã abenmã kum,

—Be, djãm mrãmri ne djãm Metĩndjwýnh kute p̄rĩne abenã me mēnh mar mexkumrēx. Nãm mýjja kunĩ kētri amim me'ã karõkumrēx. Djãm kabēno kute amikapēr kãr? Kati. Nãm Bēnjadjwýr djwýnhbē Jeju Kritu'yr meo akēx nhym tu kute ar meo bakumrēx. Djãm Metĩndjwýnh no kēt got? Ga, p̄rĩne kute aben ã me mēnh mar mexkumrēxja pumũ. Ga, me kute abeno õbikwa mexkumrēxja pumũ, ane. Nãm me me bapumũnho nhỹn ã abenmã ane. Me kute kãjkwakam ã abenmã anhỹr kadjy ne Metĩndjwýnh kute amrēbē me bakukãmãremã arēnh kēt. Kute memã me abajtem pytar ne kute aben ã me bamēnhja jarēnh kēt.

\* **3:7** Djãm Paur ta axwe kēt nhym pãnh kum kapri Kati. Paur te axwe kētmã nhym ta arým tu kum kapri.



<sup>12</sup> Metĩndjwýnh ne uma:. Kam dja me kute Kritu mar kėtja kum uma:. Me badjwý gu me ren baje Kritu mar kėt ne ren bamā Metĩndjwýnh pyma: ne. NhyM be, kati. Arým ne gu me tu amim me banhō Bēnjadjwýr djwýnhbē Jeju Kritu markumrēx ne arým batĩn prām kėt. Ne kam arým Metĩndjwýnh pymatio banhōbikwakumrēx ne kum amijarēho baba.

<sup>13</sup> Kam kwārĩk wānh amim mar rerekre kėt. Me amextire kadjy ne ba Metĩndjwýnhmā apē. NhyM kam me arým 'ā kum ikurēn ijo bikēho ba. Gē me te ijo bikēho ba kwārĩk wānh kam amim mar rerekre kėt. Dja ga me tu amim Jeju mar tỳxkumrēx.

*Kute meo Metĩndjwýnhmā à'wýr.*

<sup>14</sup> Me akĩnh kadjy ne ba arým ikōnrkro nhýn Bēnjadjwýr djwýnhbē Jeju Kritu Bāmā me ajarē. <sup>15</sup> Ta ne me kute amim Jeju mar kunĩ kra. Kàjkwakam me kute amim Jeju marmē pykakam me kute amim Jeju marmē ne me kunĩ kra. Ba arým kum me ajo a'uw. Nā bām kum,

<sup>16-17</sup> —Djūnwā, ara:x ne adjukapriti:rekōt dja ga memā tỳx jadjā. Gē Akarō me umar djākam memā tỳx jadjā gē me kōt tỳ:x ne mrāmri tu amim Kritu markumrēx. NhyM kam Kritu arým mrāmri tu me kadjwýnhbē ýrkumrēx. NhyM kam me arým ô'ā kute mrāmri ne pidjō pykakam arē jabjēkam ku'ē tỳx pyrāk. Kam dja me mar tỳxkumrēx. Mýj dja me kuma? Bir, Kritu mrāmri kum me abē:kumrēx. Tām dja me mar tỳxkumrēx. Ne kam ô'ā mrāmri me kum me abē:kumrēx ne.

<sup>18</sup> Dja me kum me abēkumrēx ne kam arým prĩne kuma. Mýj dja me kuma? Bir, Kritu ta kum me abē:kumrēx. Ja dja me prĩne kuma. Kritu nhō me ja kunĩ dja me prĩne kuma. Mýj ne Kritu kum me abēkam kute? Kum me abē ja ne

kute mýjja jabatā:nh pyrāk. Mýjja jabatānh ne kum me abē ja'ā amijakre. Me te kute kàjkwa nār kon, pyka'ā akremāja pumū. Ā abatā:nh ane nhyM me te aktā irē'ýr bōx ne 'ā akremā. Nār kon, me te 'ēnhōt nār krax'ýr bōx ne 'ā akremā. Nār kon, me te 'ā àbir nār aparmā rwýk ne 'ā akremā.

<sup>19</sup> Nām ā Kritu kum me abē ra:xo ane. 'Ā akre'ýr me bōx kē:tkumrēx. Me kute mar mex kē:tkumrēx. Kritu kum me abē:ē. Kum me abēo me rer me:x ne. Dja kum me abē rā'ā: rā'ā ne. NhyM be, Djūnwā, dja ga memā akren memā arē gē me kuma. Dja me prĩne Kritu kum me abēja ma ga kam arým araxo me kadjwýnhbē nhý. Ne kam me ĩ pýnhkōt meo tuknĩn prĩne meo aba mex. NhyM kam me prĩne araxmā katon arým prĩne amikam ara. Nā bām ā me Babāmmā ajarēho ane.

<sup>20</sup> Metĩndjwýnh ne ra:xi. Me'ō ne kute raxo tēp kētkumrēx. Kute mýjja kunĩ nhipēx mar. Mýjja 'ō kubē tỳx kētkumrēx. Djām me baje kum mýjja ra:xo badjā'wýr nhyM te kute me bakadjy ipēxmā nhyM kubē tỳxmā? Kati. Kubē tỳx kėt. Nār, djām me baje amim mýjja ra:x'ō'ā karō nhyM te kute me bamā ipēx mā? Arkati. Me bamābit ne kute mýjja rũnh pyrāk. NhyM be, kumā ne mýjja kunĩ kry:re. Kute mýjja kunĩ nhipēx kadjy umaro, tỳxo kute me bajakrenh me:xi. Djām gu me baje kum mýjja rax'ō jarēnh nhyM te kute umaje ne ipēx kētmā. Kati. Tỳxo me bakadjwýnhbē ýrkam dja arým mýjja rũnh nhipēx ne.

<sup>21</sup> Gu me kam kum,

—Me ije amim Jeju mar kunĩ ne ba me amā, “Ara:x ne apyma:kumrēx”, anhýro iba. Dja ba me aben djō'ā amā arax jarēnh rā'ā: rā'ā ne, ane. Gu me ā kum ane.

## 4

*Me kum aben jabē'ā kute memā*

karõ.

*Rõ 15.5; Pir 2.1; Ped k 3.8*

<sup>1</sup> Ë, Bēnjadjwyr djwýnhmã ne ba apê nhym me 'ã kum ikurên idjuwpre. Ba kam arým ar amã 'ã karõ. Katåt ar aje amijo aba kadjy ne Metĩndjwýnh arým amiwýr ar ajuw ne ar ajo ba. Kam dja gar katåt ar amijo aba nhym Metĩndjwýnh arým ar akam kĩnhkumrēx.

<sup>2</sup> Dja gar kum amijo angri. Kwãrik wãnh amijo adjãmra kêt ne akrãnmã ar amijo aba. Kwãrik wãnh memã bêx kêt ne memã aprĩren memã akabēn. Gê me'õ ar ajõo bikēnh jabej akubyn amijã angryk nê. Ar amã aben jabêkõt amijã angryk nê ne. <sup>3</sup> Metĩndjwýnh Karõ kute abenã ar amēnh gar aje abeno anhõbikwakam aje mrãmri ne me ĩ pydji pyrãk. Kam amã aben jabēn abenmã akabēn mex jarē. Abenmã akabēn mex ry typydji 'ãno djan aben nêje aben pumũ.

<sup>4</sup> Gwaj baje mrãmri ne me ĩ pydji pyrãk ne ren kam axikõt bakabēn. Metĩndjwýnh Karõ pydji kute gwaj bajo ba gwaj ren axikõt bakabēn. Kute amiwýr gwaj bajwýr ne gwaj bajo bakam gwaj bakunĩ amiwýr me'õ pydji kamnhĩxkumrēxo baba. <sup>5</sup> Bēnjadjwyr djwýnh pydji:. Gwaj bakunĩ baje tu amim Jeju pydji: markumrēx ne pydji kõt ar amijo baba nhym me arým ngõmã gwaj bajangij. <sup>6</sup> Nhym me Batĩndjwýnh pydji kubê ne gwaj bakunĩ Bãm djwýnh ne gwaj bakunĩmã Bēnjadjwýr djwýnh. Nãm gwaj bakunĩõ ban bakunĩ mẽ amijo kajkep. Ga, gwaj baje mrãmri ne me ĩ pydji pyrãkja pumũ.

<sup>7</sup> Nhym be, ajtekam gwaj banhĩ pýnhkõt apýnh gwaj badjãpēnh djã. Kritu ta kum gwaj bakaprĩn gwaj banhĩ pýnhkõt arým amim gwaj bajã karõ. Amim gwaj bajã karõn arým gwaj bakunĩmã gwaj badjãpēnh djã'ã karõ. Gwaj kam banhĩ pýnhkõt arým apýnh badjãpēnh djã maro baba. Gwaj

badjãpēnh djã'ã ne Metĩndjwýnh gwaj bakĩnh djã jarē.

<sup>8</sup> Amrēbē: gwaj bakētri ne Metĩndjwýnh me bakukãmãremã kum,

“Nãm kãjkwamã wabin amim me uwpre tũm krãptjja pytãn meo mõ.

Ne kam pykakam me jamã me kĩnh djã ngã”, ane.

Ga, Metĩndjwýnh kute Kritu kãjkwamã ãbir jarēnhja pumũn kam kute memã kĩnh djã nhõrja pumũ.

<sup>9</sup> Mýj ne kãjkwamã ãbir kētri nē? Bir, nãm ruw. Nãm apa:rmã pykamã ruw ne pyka mã: nõ.

<sup>10</sup> Nõ:n kam ta ajte wabi. Kãjkwã kunĩ mýrbê kãjkwã djwýnhmã wabin kam nhý. Kute mýjja kunĩ mẽ amijo kajkep kadjy kam nhý. Kute kãjkwamē pykamē amijo kajkep ne o ba kadjy kam nhý.

<sup>11</sup> Ga, Kritu ãbirkam kute memã me kĩnh djã nhõrja pumũ. Tãm ne Metĩndjwýnh me bakukãmãremã arē. Mýj'ã ne kute memã kĩnh djã nhõrja amijakre? Bir, kute memã apýnh ãpēnh djã nhõr'ã ne amijakre. Kritu ne arým gwaj bamã apýnh badjãpēnh djãri'ã ajarē gwaj maro baba. Ar ije 'ã idjujarēnhmã ne ar ikwýmã 'ã karõn ar ijano. Bar kam ije omũnhkõt memã 'ã idjujarēnh ar iba. Nhym kam ajte gwaj bakwýmã apýnh kabēn jarē gwaj maro baba ne arým kukwakam amũ memã kabēn jarēho baba. Nhym kam ajte gwaj bakwýmã bakabēn mex'ã karõ gwaj me kute Jeju mar kêtjamã arēho baba. Nhym kam me arým amim Jeju maro ba. Nhym kam ajte gwaj bakwýmã me kute Jeju marjao djuw mexo ba'ã karõ. Gwaj meo djuw mexo baba nhym kam me tu amim Jeju mar týxkumrēx ne 'ã ukanga kêt ne ar ba. Nhym kam ajte gwaj bakwýmã memã kukràdjã'ã badjujarēnh'ã karõ gwaj memã 'ã badjujarēho baba. Kritu kute gwaj bakĩnh djã'ã

gwaj bamã apÿnh badjãpênh djã nhôr ne ja.

<sup>12</sup> Dja gwaj apÿnh badjãpênh djãkam apê:, Jeju nhô me ja pÿne kum mex kadjy apê: nhyk kam me adjwÿnhdjwÿ Metÿndjwÿnhmã àpênh ar ba. Gwaj me kadjy badjãpênh ar baba nhyk me kunÿ arÿm Kritu mar mexo amÿ amikamêh arÿm amim mar ra:x ne. Me kute Kritu mē ĩ pydjy pyrãk ja arÿm amim mar ra:x ne. <sup>13</sup> Djãm kam dja gwaj Metÿndjwÿnh Kra mar punun kam bakabêh kajgo'ô mÿr jabej abenmã bakabêh ar baba? Kati. Dja gwaj Kra'ã bakabêh pydjibit man axikôt arêh tu amim markumrêx. Ne kam baje me pÿre pyrãk kêt ne Kritu mar rerekre kêt ne bajabatãnhkumrêx. Ne kam pÿne amim kuman arÿm amim mar ra:xkumrêx.

<sup>14</sup> Djãm gwaj bano rerekre kute me pÿre no rerekre pyrãk rã'ãmã? Nhyk apÿnh me 'êxnhÿ mrãh bôx ne no tÿxtikam ari gwaj banoo biknoro bamã? Me kute ari apÿnh me kukràdjã jarêhno kute kôk, kute ngô djãkã ari mÿjja japÿn pyrãk. Djãm gwaj baje jãm Kritukôt bakabêh djir ne ajte jãm me kukràdjã punukôt bakabêh djir ne ari: bakabêh jadjwÿro babamã? Kati.

<sup>15</sup> Gwaj ba dja gwaj bamã aben jabêh bakabêh katãtbit jarêh arÿm kãjmã Kritumã aben kamêhno tē. Baje mar mexo, kum bamexo kãjmã aben kamêhno tē. Ga, gwaj bakràja pumũ. Gwaj bakràkam badjumar ne kam amũ banhikrao apê nãr baparkam mrã. Gwaj bakrà ne amũ gwaj bakukràdjã kunÿ ngrêk ne gwaj bajo ba. Gwaj bakrà kumrêx umar nhyk kam ô'ã amũ gwaj bakukràdjã kunÿ apê. Kritudjwÿ ne kute gwaj bakrà pyrãk ne gwaj bakunio ba gwaj kukwakam apÿnh kum badjãpênh djãri kum badjãpênh ar baba.

<sup>16</sup> Ga, gwaj bapar, bate, bapa,

banhikra, bano, banhijãkre, bakukràdjã kunÿ:, kunÿ apÿnh gwaj bakudjêkkôt kute aben jamÿnh tÿx, kute abenmã tÿx jangjêh mex. Ne ren gwaj bakudjêk kêt gwaj ren bakukràdjã kunÿ ren aben bê ajka'u gwaj ren kam kãjmã baku'ê kêt. Kritudjwÿ ne ã ane. Nãm gwaj bakràptio ôbikwa gwaj banhÿ pÿnhkôt apÿnh kum badjãpênh djãri. Gwaj kam baje aben jamÿnh tÿx mãn prãbê abeno banhôbikwan baro'ã Kritumã apê. Te apÿnh kum badjãpênh djãri gwaj baro'ã kum badjãpênh ar baban o abenmã tÿx jangjêhno baba. Kute gwaj bamã badjãpênh djã'ã ujarêh kôt gwaj kum badjãpênh ar baba. Gwaj bamã aben jabêo ro'ã aben kamêhno mō. Gwaj baje mar mexo, kum bamexo aben kamêhno mō.

*Me kute me kukràdjã punu kôt amijo ba kêtã.*

*Kor 3.5; Ped k 4.7*

<sup>17</sup> Ije ar amã ja jarêhnkam djãm ar aje arek amijo aba tũm kôt amijo aba rã'ãmã? Amrêbê ne gar ate Metÿndjwÿnh bê ar amijo aban me bajtem kukràdjã punu kôt ar amijo aba. Djãm aje arek me kukràdjã punu kôt amijo aba rã'ãmã? Kati. Tãm ne ba ar abê uma:. Me wã ne me amim mÿjja kajgobit'ã karô ba.

<sup>18</sup> Nãm me tu amakkre kêtumrêx. Nhyk me te kute memã mÿjja mex'ã karô nhyk me kute mar kêtumrêx. Mÿjja'ã me kabêh kute amijakreja ne me kute mar kêtumrêx. Kam ne me arÿm umar djãkam mÿjja punubit man arÿk ar ba. Arÿk ar ba kute mrãmri ne akamãt kô tykkam me arÿk ar baja pyrãk. Nãm me Metÿndjwÿnhbê: amijo ban kam kôt tÿn ne ar baja mar kêtumrêx. <sup>19</sup> Nhyk ren me me akre ren me amimaro tēh ren arÿm amim ngryk ne. Nhyk be, kati. Me ja ne me kute amimar kêtumrêx ne kam kute kurêbit mar ne aben bê me kupêh ra:x ne mÿjja punu

kunĩ nhipêxo ban ajbit mar prã:m ne.

<sup>20</sup> NhyM be, Kritu. Djã ne gwaj bamã,

—Ajrã mekôt ã amijo ane, ane? Arkati. <sup>21</sup> Arÿm ne gar mrãmri Jeju kabên katàt kôt ama. Nãm amã, “Kwãrĩk wãnh”, ane. Nãr ar akwÿ aje mar kajgo jabej ba ajte ar amã tãm jarê. <sup>22</sup> Amrêbê ne gar me kum Metĩndjwÿnh kĩnh kêtja kukràdjã kôt ar amijo aba. Aje kangamã. Me kukràdjãja kôt ne me kum mÿjja punu prãm ne amim 'êx ne amim, “Ajrã, kam amexkumrêx”, anhÿro ba. Aje me kukràdjã ja kangamã. <sup>23</sup> Adjumar djã ny kadjy aje amimarmã. <sup>24</sup> Ne amrãnh nymã ne mrãmri Metĩndjwÿnh katàtkôt katàt aje amijo abamã ne mexo amexmã.

<sup>25</sup> Kam memã ajêxo abaja tu wãnh kangakumrêx ne abu'ã me kunimã akabên katàtbit jarê. Mÿkam? Bir, Kritu amikôt gwaj bakunio ba gwaj baje kumê banhĩ pydjy pyrãk. Kam dja gwaj memã bakabên katàt jarê.

<sup>26</sup> Godja ga angryk jabej kwãrĩk wãnh kam ajaxwe kêt. Kwãrĩk wãnh angryk'ã akamàt kêt ne angryk 'iry kêt. <sup>27</sup> Ajaxwe kêt gê Xatanaj akam ãm kêt.

<sup>28</sup> Kwãrĩk wãnh ar ajõ adjãkĩnhĩ ajte mÿjja 'õo adjãkĩnh kêtumrêx. Ga dja ga adjãpênh tÿx ne anhkrao katàt mÿjja kupênh mex. Ne kam adjãpênh pãnh arÿm amim anhõ mÿjja jamÿ. Ne kam arÿm amikutã me õ mÿjja kêtjamã kwÿ ngã.

*Me kabên mex'ã kute memã karõ.*

<sup>29</sup> Kwãrĩk wãnh akabên punu'õ jarênh kêt. Memã akabên mexbit jarê gê me kuman mex. Gê me mexo amũ amikamên arÿm mexkumrêx.

<sup>30</sup> Kwãrĩk wãnh Metĩndjwÿnh Karõmã kaprĩjadjàr kêt. Metĩndjwÿnh ne arÿm ar amã ano nhyM amim ar ajo ba. NhyM o kute mrãmri ne arÿm ar ajã kute aminhidji nhôr pyrãk.\* Dja Karõ arek amim ar ajo ba: nhyM kam Jeju arÿm bõx. Bõx ne amikôt ar ajo mõ.

<sup>31</sup> Dja gar wãnh angryk, kam amadjãkam atokryja wãnh kanga. Ne wãnh mekam adjãkrêmê angrykmê akabên punumê wãnh kangakumrêx. Ar aje meo abikênh'ã amim karõja kunĩ dja ga wãnh kangakumrêx.

<sup>32</sup> Ar ga dja gar amã aben kaprĩn abenmã abên rerek ne aben jaxwe maro aknon abenkam angryk kêt. Mÿkam? Bir ga, Metĩndjwÿnh arÿm Kritu tykkôt kute ar ajaxwe maro biknor ne ar akam ngyrk kêtja pumũ. Kam dja gar aben jaxwe maro aknon abenkam angryk kêt.

## 5

<sup>1</sup> Ga, me bãM kum kra jabê nhyM kute bãM kôt amijo baja pumũ. Nãm kute amim,

—Ba djũnwã kudjwa, ba djũnwã kudjwa, anhÿro ba. Metĩndjwÿnh kum ar ajabêkam dja gar kôt ar amijo aban kudjwa amã me abêo aba. <sup>2</sup> Ga, Kritu kum gwaj bajabêja pumũ. Ne kam arÿm gwaj bajaxwe pãnh Metĩndjwÿnhmã amingã nhyM me kam kubĩ nhyM arÿm gwaj bajaxwe pãnh ty. Kritu kute mrãmri ne mry bĩn pyrãk, me kute amrêbê me axwe pãnh kute Metĩndjwÿnhmã mry par pyrãk. Me kum mry pan kubõ nhyM arÿm ardjành bãn kĩnh ne. Dja gar Kritu kudjwa ã amã me abêo ane nhyM arÿm akam kĩnhkumrêx ne.

*Apÿnh me axwe djãri nêje kute me kukrà.*

*A Xim 2.4; Xij 4.4; Dju k 1.6, 2.15*

\* **4:30** Ga, me kute mÿjja'ã aminhidji janhôr nhyM arÿm amirĩtkumrêxja pumũ. Ar gadjwÿ Metĩndjwÿnh arÿm ar amã Karõ jano nhyM ar ajo ba gar arÿm amim, “Mrãmri ne arÿm ijo krakumrêx. Ga, arÿm kute imã Karõ janor nhyM kute ijo baja pumũ”, ane.

<sup>3</sup> Nhym be, me mjên djwýnh nâr prô djwýnh kupa'ã kurê ba. Nâr me âpênh punu:re kunĩ nhym me arým mekam pijâm ne. Nâr me kute mýjjao atom rûnh prã:m. Kwârĩk wãnh ar ajô amijo anhÿr kêtumrêx gê me ajarênh kêtumrêx. Djâm Jeju nhô me ja kute ã amijo anhÿrkam mex got? <sup>4</sup> Nâr, me kabênkamdjwÿ. Ar amy aje me nire kukràdjã'ã me aprÿ nhym me ar akam pijâm. Nhym ar anire aje me my kukràdjã'ã me aprÿ nhym me ar akam pijâm. Nâr, ar abixaêrkôt ar akabên kajgo. Nâr me keket kadjy ar amy me ni'ã abêno ajkê nhym ar ani amipãnh me my'ã abêno ajkê. Ar akabên ja ne mex kêt. Kwârĩk wãnh memã arênh kêt. Atemã dja gar memã Metĩndjwýnhkam amikĩnh jarê.

<sup>5</sup> Nhym be, me mjên djwýnh nâr prô djwýnh kupa'ã kurê ba. Nâr, me âpênh punu:re nhym me mekam pijâm ne. Nâr, me kute mýjjao atom rûnh prã:m. Me ja ne me mrãmri ne me kute mýjjao metĩndjwýnh karô nhípêxmã amijarêno ba pyrãk. Djâm me ja Metĩndjwýnh kute meo bamã? Djâm Kritumê Metĩndjwýnh ar me kunĩmã Bênjadjwÿrkam djâm ar kute meo bamã? Nâr, djâm ar kute me jamã ar ô mýjja nhôrmã? Arkati. Ja ne gar aje amrêbê mar. <sup>6</sup> Ar aje markam kwârĩk wãnh me'ô ajte kabên kajgoo arĩk ar amã,

—Ajrã. Æ ajaxweo ane. Dja Metĩndjwýnh ajmã ajo kêtumrêx, anhÿr kêt. Kwârĩk wãnh o anoo biknor kêt. Me amakkre kêt prãm kute ã axweo anhÿr prãm kam ne Metĩndjwýnh arým mekam ngry:k ne. <sup>7</sup> Kam kwârĩk wãnh mekôt ã ar ajaxweo anhÿr kêt.

<sup>8</sup> Mýkam? Bir, amrêbê ne gar ajaxwe:n aje akamãt kô tykkam me ar baja pyrãk. Nhym be, jakam ne gar arým Bênjadjwÿr djwýnh kôt ar amijo aban arým aje a'uri me

ar baja pyrãk. Bênjadjwÿr djwýnh kute ar ajo krakam dja gar ajmã akute kêt ne katãt ar amijo aba. Dja gar aje mrãmri ne me a'uri ar baja pyrãk. <sup>9</sup> Metĩndjwýnh Karô dja meo ba nhym kam me ô'ã ukaprikumrêx ne katãt kute kabên jarênhkamrêx ne 'êxnhĩ kêtumrêx.

<sup>10</sup> Dja gar Bênjadjwÿr djwýnho kĩnh, mýj akabênkôt, aje mýjo abakôt aje Bênjadjwÿro kĩnh jabej amikabi. <sup>11</sup> Ne kwârĩk wãnh me axwe kôt ajaxwe kêt. Me axwe ne me kute akamãt kô tykkam me âpênh punu pyrãk. Djâm me âpênh punu djô'ã mýjja mex got? Arkati. Kwârĩk wãnh me axwe kôt ar ajaxwe kêt. Ar ga dja gar me axwe nêje me kukrà.

<sup>12</sup> Mýkam dja gar me axwe kôt ajaxwe kêt? Bir, me me kãxã apdjun ba punukumrêx. Gwaj ren abenmã me arênh ren bapijã:m ne. <sup>13</sup> Me axwe ne me apdjun âpênh punuo ba: nhym me arým memã Metĩndjwýnh kabên jarê. Nhym kam me arým amijaxwe ma. Me kute memã arênh nhym me kute amimar kute mrãmri ne me kute memã mýjja kurwýkam mýjja kunĩ kum amirĩt pyrãk. <sup>14</sup> Me kute memã Metĩndjwýnh kabên jarênhkambit ne me arým kute amijaxwe kunĩ mar. Amrêbê: ne me me bakukãmãremã me kute amijaxwe mar'ã ajarê. Me memã kum,

“Kute mrãmri ne me ôto nôrkam kute me kabên mar kêt pyrãk ne ga aje Metĩndjwýnh mar kêt.

On ano tÿx ne amim kabên ma kute mrãmri ne me krã apôx ne no tÿxkam amak mex pyrãk.

Aje kabên mar kêt kute mrãmri ne me tyk kute me kabên mar kêt pyrãk. On kabên man kôt ar amijo aba kute mrãmri ne me tyk ne akubyn tĩn ne ar ba pyrãk.

Dja ga kabĕn ma nhym Kritu arĕm prĕne amā arĕ ga prĕne amima.

Kute mrāmri ne me kute memā pōk ne o kute pry kurwĕ nhym kam me kute prĕne rĭt mex pyrāk”, ane.

Mrāmri ne me kute me bakukāmāremā arĕnhkumrĕx. Mrāmri ne Metĭndjwĕnh kute memā arĕnh ne kute me axwe kunĭo amirĭtmā.

<sup>15</sup> Kam dja gar amijā ano tĕx ne katāt ar amijo aban ajmā akute kĕt. Djām ano kĕtmā? Kati. Dja gar akrā mex ne amijā ano tĕ:x ne katāt ar amijo aba. <sup>16</sup> Ar abu’ā me axwe kunĭja dja gar me’ā ano tĕ:x. Nhym kam ar aje memā Metĭndjwĕnh kabĕn jarĕnh djā ar awĕr bōx gar arĕm memā arĕ. Akati jakam me axwe krāptĭkam dja gar ā memā ane.

<sup>17</sup> Kam kwārĭk wānh ar akrā punu kĕt. Dja gar amijo Bĕnjadjwĕr djwĕnh man kum,

—Mĕj dja ba nĕ ga kam arĕm ikam akĭnhkumrĕx jabej? ane. Dja gar ā kum anen arĕm prĕne amijo Bĕnjadjwĕr djwĕnh markumrĕx.

<sup>18</sup> Kwārĭk wānh kadjwati kangōkam\* ar abibānh kĕt. Kam ne me arĕm amijo ajkĕn punu mex ne. Ar ga dja gar Metĭndjwĕnh Karō mar tĕx ne ’ā adjukanga kĕt gĕ ar anhĭ pĕnhkōt raxo ar akadjwĕnhbĕ nhĕn ar ajo ba mex.

<sup>19</sup> Dja gar mar tĕx ne abenmā mebĕ idjaer nhō me ngrer tĕm jarĕ, me ngrerkōt Bĕnjadjwĕr djwĕnhmā mextire jarĕ. Metĭndjwĕnh’ā me ngrerja kunĭ jarĕ. Djām ate akrān ajajkwa kajgokambit aje Bĕnjadjwĕr djwĕnhmā me ngrer jarĕnhmā? Kati. Dja gar amikam me ngrerkam kabĕnja markumrĕx ne angrerkōt kum arĕnhkumrĕx.

<sup>20</sup> Dja gar Karō mar tĕx ne mā Metĭndjwĕnhmā, me Babāmmā amikĭnh jarĕ. Mĕjja kunĭkōt kum

amikĭnh jarĕ. Djām ar adjumar mexkambit dja gar kum amikĭnh jarĕ? Kati. Ar adjumar punukamdjwĕ dja gar kum,

—Djĕnwā, te idjumar punu ga mā ijo djuw mex ne mā ijo kĭnh. Bĕnjadjwĕr djwĕnhbĕ Jeju Kritu ba tu amim markumrĕx ne arĕm amā amikĭnh jarĕ, ane. Dja gar akati kunĭkōt ā kum amikĭnh jarĕnhho ane.

<sup>21</sup> Dja gar akrānmā aben kabĕn man kōt ar amijo aba. Ar aje Metĭndjwĕnh pyma markam dja gar ā amijo abao ane.

*Prōmĕ mjĕnmĕ abenā memā karō.*

*Kō k 11.3; Kor 3.18; Ped k 3.1*

<sup>22</sup> Me aniremā ne ba ikabĕn jarĕ. Dja gar amjĕn kabĕn man akrānmā kōt ar amijo aba. Aje mrāmri ne Bĕnjadjwĕr djwĕnh kōt ar amijo aba pyrāk dja gar ā amjĕn kōt amijo abao ane. <sup>23</sup> Mĕkam? Bir, ar amjĕn ne ar ajo ba kute mrāmri ne me krākam umar ne o kute amingrĕk ne ba pyrāk. Me krākam ne me umar ne kam amĕ ikrao apĕ nār parkam mrā. Me krā ne amĕ me kukrādja kunĭ ngrĕk ne meo ba. Nām Kritudjwĕ ā me kute amim marja kunĭo ane. Ta ne kute me krā pyrāk ne meo ba. Ne kam arĕm me utān meo ba. Ō me kunĭ ne me kute ta ĭ pyrāk nhym me utān meo ba. <sup>24</sup> Nhym kam Kritu nhō me kute amim mar kunĭja akrānmā kabĕn man kōt amijo ba. Dja me aniredjwĕ ā amjĕn kabĕn kunĭ mar ne kōt amijo abao ane.

<sup>25</sup> Me amymādjwĕ ne ba ikabĕn jarĕ. Dja gar amā aprō jabĕ: kute Kritu kum ō me kute amim marja kunĭ jabĕ pyrāk. Ga, Kritu arĕm me kadjy tykja pumĕ.

<sup>26</sup> Mĕj kadjy ne me kadjy ty? Bir, prĕne kute meo mex kadjy. Kute mrāmri ne me kute ngōo

\* 5:18 Mĕjja me kute o kōm ne kōt bibānh kunĭja, kadjwati kangōmĕ uba kangōmĕ, mĕjja kangō kunĭ ne me kum kadjwati kangō jarĕ.

kubêkà pōnh nhym prīne mex pyrāk. Mrāmri ne kabēn kute ngō pyrāk ne prīne meo mex. Kritu memā kabēn jarē nhym me amim kuman arým Metīndjwýnh mexo mex. Ja kadjy ne Kritu me kadjy ty. <sup>27</sup> Ō me kute amim marja kunī prīne kum me:xkumrēx nhym me arým kum me kī:nhkumrēx nhym kam kute amikabem me umjýr ne kute ar meo ba kadjy. Ja kadjy ne Kritu me kadjy ty. Dja ō me ja kute ta ī pyrākja prīne mexkumrēx ne axwe kêtikumrēx kute mrāmri ne me kà mjô kêtikumrēx ne ngrā kêtikumrēx nhym mýjja 'ō kute meo bikēnh kêtikumrēx pyrāk. Dja me Metīndjwýnh mexo mex ne kum punu kêtikumrēx nhym arým meo ba. Ja kadjy ne Kritu me kadjy ty. Be, djām kum ō me ja jabē ngri: got?

<sup>28</sup> Bir be, me mydjwý dja me ā kum prō jabêo ane. Kum prō jabêo kute mrāmri ne me kum aminhī jabêja pyrāk. Me kum prō jabêja ne me kum aminhī jabê. <sup>29</sup> Djā nām me'ō kum aminhī kurê? Kati. Me kum aminhī jabê ne ō kwý krēmē kubêkāmē mýjja kunīo aminhīo djuw mex.

Nām ā Bēnjadjwýr djwýnh me baje Kritu mar djwýnho djuw mexo ane. <sup>30</sup> Me banhī pýnhkôt ne gu me baje Kritumē banhī typydji pyrāk. Baje Kritu pa pyrāk, no pyrāk, par pyrāk. Baje ta kukrādja kunī pyrākkan ne Kritu amim me bajo djuw mex.

Dja ā me amim prōdjwýo djuw mexo ane. <sup>31</sup> Amrêbê: ne me bakukāmāre 'ā memā kum, “Kamā dja me my prō kadjy arým bāmmē nā arkum iren kam arým prōbit'ā ngrā ne.

Nhym kam ar ī abenā tým ne kam kute ī typydji pyrāk.”

Nām me bakukāmāre ā memā ane. <sup>32</sup> Be, ije ar amā kukrādja jarēnhja ne me kute prīne mar mex kêtikumrēx, mebê týx. Kritumē

me bamē ō me kute amim marja kunī'ā ne ba ikabēn ja jarē.

<sup>33</sup> Kam ne ba ar amā aprō jabêikumrēxmā ar amā 'ā karō. Kute mrāmri ne ar amā amijabê pyrāk ne ar amā aprō jabēn aje o djuw mexmā. Nhym ar anireja, ar amjēn ne ar ajo ba. Kam ar aje amijā mar mā ne ba ar amā 'ā karō. Tām ne ja.

## 6

*Bāmmē kramē abenā memā karō.  
Kor 3.20*

<sup>1</sup> Jakam ne ba me aprīremā 'ā karō. Bēnjadjwýr djwýnh kabēnkôt dja gar abāmmē anā kabēn man ar kabēn kôt ar amijo aba. Ja ne mex. <sup>2-3</sup> Mýkam? Bir, amrêbê: Metīndjwýnh me bakukāmāremā kum,

“Me amā abāmmē anā jabēn ar kabēn ma.”

Nām ā memā anen kam kôt memā mýjja mex jarēn memā kum,

“Kam arým adjumar mex ne kribēm pykakam ar aba”, ane.

Metīndjwýnh kute memā 'ā karōkôt kukrādja ne ja. Kukrādja kumrēx kute kôt memā mýjja mex jarēnh ne ja. Kam dja gar mar týx ne.

<sup>4</sup> Ne ar amy, ar ajabatānhwādjwý, ar amā ne ba 'ā karō. Kwārīk wānh akra arkum amikurê'uk kêt. Ari arkum adjākrêo kum amikurê'uk kêt. Ar ga dja gar akumrēx amijā Bēnjadjwýr djwýnh kabēn man arým katāt kôt ar amijo aba. Ne kam kôt axwe nêje ar akren kam mrānh mex'ā arkum karō. Dja gar ā akra aro ane gē ar akôt Metīndjwýnh kôt ar amijo ba.

*Bēnjadjwýrmē ō àpēnhmē abenā memā karō.*

*Kor 3.22; Xim k 6.1; Xit 2.9; Ped k 2.18*

<sup>5</sup> Ar akwý ne me arým amim ar apa 'amý gar memā adjāpēnh týx kajgo ar aba. Ar amā ne ba ikabēn. Dja gar pykakam ar anhō bēnjadjwýr kabēn ma. Ar anhō

bĕnjadjwÿr raxmĕ uma dja gar aman kum adjapĕnh katāt. Kute mrāmri ne Kritumā ar adjapĕnh pyrāk dja gar ā kum adjapĕnho ane. <sup>6</sup>Djām ar aje anhō bĕnjadjwÿr ŷtābit kum adjapĕnh katāt mā? Kati. Ar amā kākamdjwÿ dja gar amim,

—Kati, Kritumā ne ba apĕ. Kam dja ba Metĭndjwÿnh kabĕn kōt mrāmri pykakam inhō Bĕnjadjwÿrmā idjapĕnh katāt kumrĕx. <sup>7</sup>Dja ba kabĕn man kum idjapĕnhkam ikĭnh. Nā bām kute pykakam memā idjapĕnh pyrāk. Nym be, kati. Kājkwakam Bĕnjadjwÿr djwÿnhmā ne ba apĕ, ane. Dja gar ā amim anen kam kum adjapĕnhkam akĭnh.

<sup>8</sup>Mÿkam? Bir, ar akwÿ apa 'amÿnh aje me kabĕn kōt adjapĕnh tÿx kajgo ar aba. Bĕnjadjwÿr djwÿnh Jeju kute aparmā ar adjapĕnh pumÿnh. Ar adjapĕnh mex kōt dja ar amā o pānh mex. Nār ar akwÿ apa 'amÿnh kĕtwā ne ar ga gar adjapĕnh ar aba. Me kute ar amā o pānh kadj gar adjapĕnh ar aba. Bĕnjadjwÿr djwÿnh kute ar adjapĕnh pumÿnh. Ar adjapĕnh mex kōt dja ĩ ar amā o pānh mex. Me akunĭ adjapĕnh mex kōt dja ta amā o pānh mex. Tām ne gar amrĕbĕ ama.

<sup>9</sup>Ne bĕnjadjwÿr ar, ar aje amim me pa 'amÿnh nym me ar amā apĕnh kajgo ar bawā ar amā ne ba ikabĕn. Dja gar ije ajbir ar anhō apĕnhmā ikabĕn jarĕnhja ma. Ikabĕn kōt ar gadjwÿ ar anhō apĕnhmā amex. Kwārĭk wānh aje meo abikĕnhmā me kangrōnho aba kĕt. Djām bĕnjadjwÿr'ā apydji? Kati. Ar gadjwÿ ne kājkwakam ar anhō Bĕnjadjwÿr djwÿnh. Tām ne ba ar amā arĕ gar amrĕbĕ aje mar. Ta ne kum me'ō pyma kĕtkumrĕx.

*Metĭndjwÿnh nhō kàxo kubĕkà'ā ujarĕnh.*

*Rō 16.20; Tex k 5.8; Xij 4.7; Ped k 5.8*

<sup>10</sup>Akmere àpnhĭre ar, ije ar amā arĕnho ino rer kadj ne ja. Bĕnjadjwÿr djwÿnh tÿ:xi. Atÿx kadj gora amim maro aba nym arÿm ar amā atÿx jadjā. <sup>11</sup>Me karō punu nhō bĕnjadjwÿr kute gwaj bamā 'ĕx ne gwaj banoo biknor prām kumrĕx. Dja gar amijā ano tÿx ne arek kubĕ dja nym arÿm ar anoo biknor kĕt. Arek kubĕ ar adjām ne aje kangōnh kadj dja gar aminĕje Metĭndjwÿnh nhō kàxo kubĕkà jangjĕ, kute gwaj bamā kàxo kubĕkà nhōr kunĭja aminĕje angjĕ.

<sup>12</sup>Mÿkam dja gar angjĕ? Bir, djām me ĩ, gwaj baje me omÿnhja ne gwaj baje aminĕje me kangōnhmā? Kati. Me karō punu pumÿnh kĕtja. Apÿnh me axwe nhō bĕnjadjwÿr ja ne gwaj baje aminĕje me kangōnhmā. Apÿnh me karō punu, me rĭnh 'itÿx ja ne gwaj baje aminĕje me kangōnhmā. Pykakam me axwe prāmja ne me kute mrāmri ne akamāt kō tykkam me mrānh punuja pyrāk. Me ja nhō bĕnjadjwÿr ne gwaj baje aminĕje kangōnhmā. Kājkwakam me karō jaxwe ar baja. Me karō punu ja ne gwaj baje aminĕje me kangōnhmā. <sup>13</sup>Kam, dja gar aminĕje Metĭndjwÿnh nhō kàxo kubĕkà kunĭ jangjĕ. Dja aje me kangōnh nhō akati awÿr bōx ga mebĕ atÿx ne me kangōnho dja. Ne kam arÿm meo apan me kujate. Kam dja ga arek mebĕ adjām tÿx rā'ā.

<sup>14</sup>Be, mÿj dja mebĕ ar anhō kàxo kubĕkāja kute gar aminĕje angij? Bir, ajĕxnĭ kĕt ne ak-abĕnkumrĕx. Ajĕxnĭ kĕt kadj ne ar anhō kàxo apre djā. Ga, krākamngōnh kàxo pre djào kute kà janĕnh tÿxja pumÿ. Kute o kàxo kubĕkāja kunĭ janĕnh tÿx nym arÿm 'ā rorok kĕt. Ar gadjwÿ ar aje apre djào amikrax pre mān prabĕ ajĕxnĭ kĕt ne akabĕnkumrĕx. Ak-abĕn kajgo kĕt ne arek me karō punu kangōnho dja. Nym kam



me te kute Metĩndjwýnhbê ar ajo akêxmã.

Metĩndjwýnh kabênkôt dja gar katát ar amijo aban ajaxwe kêt. Akatát jabê ne anhô kàxo anhinôkà. Ga, krākamngônh kute kurê djwýnhbê amipytâr kadjy kute kàxo inôkà jangjênhja pumũ. Ar gadjwý ar aje kàxo ar anhinôkà jadjâr mân pràbê ajaxwe kêt ne Metĩndjwýnhmã akatát. Ne arým me karô punubê amipytàn aminêje kangôhno dja.

<sup>15</sup> Ar prĩne 'ã ujarênh nyja ma. Aje 'ã ujarênh ny mar jabê ne ar aparkà tỳx. Ga, krākamngônh kute parkà tỳx jangjênhja pumũ. Kurê djwýnh'yr prôt ne kute amiparo bikênh kêt kadjy ne kute parkà tỳx jangjênh. Ar gadjwý ar aje ar aparkà tỳx jadjâr mân pràbê dja gar Kritu'ã ujarênh ny kôt adju-mar mexja prĩne aman arým me'yr mrãn memã arê. Dja gar memã arên arým o aminêje me karô punu kangôhno dja nhym me te: kute Metĩndjwýnhbê ar ajo akêxmã.

<sup>16</sup> Dja gar kam tu amim Metĩndjwýnh markumrêx. Aje tu amim markumrêx jabê ne ar anhô kàxo kruwbê àptâr djà. Ga, krākamngônh kute kruwbê àptâr kadjy kute amýnhja pumũ. Ar gadjwý ar aje anhô kruwbê àptâr djà byr mân pràbê tu amim Metĩndjwýnh markumrêx. Tu amim markumrêx ne arým arek me karô jaxwe nhô kruwbê adjàptáro dja. Aje tu amim markumrêx jao dja ga ô kuwyo kruw kunĩbê aptàn mã pa. Me kabên punu, apýnh me kaprĩ djàri, apýnh me tokry djàri ne kubê me karô jaxwe nhô kuwyo kruwja. Ar aje tu amim markumrêxjao dja gar mã pa. Nhym me te: kute Metĩndjwýnhbê ar ajo akêxmã.

<sup>17</sup> Mrãmri ne Metĩndjwýnh arým kute amim ar apytârkumrêx. Ja dja gar tu amim markumrêx.

Jabê ne ngôhno ar akrãdjê. Ga, krākamngônh kute amikrã pytâr kadjy kute ngôhno krãdjê turja pumũ. Ar gadjwý ar aje ngôhno akrãdjê tur mân pràbê tu amim ja markumrêx. Mrãmri Metĩndjwýnh arým kute amim ar apytârkumrêxja markumrêx. Ne kam arek me karô punu kangôhno dja nhym me arým te kute Metĩndjwýnhbê ar ajo akêxmã.

Dja gar aje prĩne Metĩndjwýnh Karô kabên man memã arê. Aje kabên mar jabê ne ar anhô kàxdjwa kajgo. Ga, krākamngônh kute kurê djwýnhno àpanh kadjy kute ô kàxdjwa kajgo jamýnhja pumũ. Ar gadjwý ar aje ar anhô kàxdjwa kajgo byr mân pràbê prĩne Metĩndjwýnh Karô kabên man memã arê. Ne arým me karô punu kangôhno dja nhym me arým te kute Metĩndjwýnhbê ar ajo akêxmã.

<sup>18</sup> Dja gar kam Metĩndjwýnhmã akabêno aba. Kum mýjja kunĩo a'wý. Akati kunĩkôt kum ar akabên jarê. Aje Metĩndjwýnh Karô mar'ã ar amã djukanga kêt gê prĩne ar ajo ba mex. Prĩne kute ar ajo ba mexkam mã Metĩndjwýnhmã akabên jarê. Kum Jeju nhô me ja kunĩo a'wý. Ar ano tỳx ne amã djukanga kêt ne meo a'wý.

<sup>19</sup> Badjwý kum ijo a'wý gê ija-mak'yr kabêno bôx ba gop imã me uma kêt ne memã kabên jarê. Me krãptĩ kute Kritu'ã ujarênh ny mar kêt rã'ã. Ba gop me kunĩmã arênho amirĩtkumrêx gê 'ã ujarênh ny memã amirĩtkumrêx. <sup>20</sup> Ba ne ba Bênjadjwýr djwýnh kabênkôt memã 'ã ujarênh ny jarênho iba nhym me arým kàxirãx jao idjuwpre. Dja gar kum ijo a'wý gê me te arým idjuwpre ba gop imã me uma kêt ne memã arênhkumrêx ne gop mrãmri kabênkôt ibê 'ã idjujarênh djwýnhkumrêx ne memã arênhkumrêx.

<sup>21-22</sup> Xikiku ne ba arým ar amã ano. Imã gwaj bakamy Xikiku

jabêkumrêx nhym Bênjadjwÿr  
djwÿnhmã àpênh katàtkumrêx ne 'ã  
ukanga kêtikumrêx. Ba arÿm ar amã  
ano. Gêdja ar awÿr bôx ne arÿm ijã  
ar amã ajarê. Mÿjja kunĩ'ã ar amã  
ajarê gar arÿm iman arÿm ikam  
adjumar punu kêt ne akĩnh.

<sup>23</sup> Metĩndjwÿnhbê ne me Babãm.  
Ne Bênjadjwÿr djwÿnhbê ne Jeju  
Kritu. Gê ar ar aje abeno  
akamywão djuw mex gar adjumar  
mex ne amã aben jabêkumrêx ne tu  
amim ar markumrêx. <sup>24</sup> Ar amã  
Bênjadjwÿr djwÿnhbê Jeju Kritu  
jabêkumrêx ne 'ã adjukanga kêtja gê  
ar tu kum ar akaprĩkumrêx.\* Tãm  
ne ja.

---

\* **6:24** Djãm ar ga ne gar adjukaprĩ nhym ar pãnh arÿm kum ar akaprĩ Kati. Ar ta ne ar tu kum ar akaprĩkumrêx.

## Paur kute Pirpukam me jamã pi'ôk no'ôk ne ja.

Krîraxbê Pirpukam ne Paur memã Jeju jarê nhyam kam me kwý arým tu amim markumrêx. Paur kum ar kînhkumrêx nhyam ar jadjwý amipãnh kum Paur kînhkumrêx nhyam kam Paur ar kurûm tèn atemã krîrax 'ôkam bôx. Bôx nhyam me ja kum Metîndjwýnh kabên mar prãm kêt ne kam Paur pa 'amýn o tèn mekbê ijê djâkam kumê. Nhyam arîk kaprîre ne mekbê ijê djâkam dja, prãmkam dja. Nhyam kam krîraxbê Pirpukam Paur nhôbikwaja kum kînh djâ jano, kôt kum ô kwý krên djâ jano, nâr kon kum pi'ôk kaprî jano nhyam kubyn kînhkumrêx. Paur kute amikajmâtã arkum Jeju jarênhja ta ne kôt kum mýjja jano, Epaprodjikôt ne kum kînh djâ jano. Nhyam 'ýr o bôx. 'Ýr o bôx nhyam kubyn kam kînhkumrêx ne akubyn arkum,

—Ota ba arým kubyn arým ikînhkumrêx ne, ane. Nhyam kute kôt kum kînh djâo bôxja, Epaprodjija ate kanê ne kam arým mexkumrêx ne kam ô pykamã tēmã, nhyam Paur kute kôt arkum pi'ôk no'ôk janormã. Kute arkum pi'ôk no'ôk ne kôt anor ne ja.

Ë, Paur kute arkum pi'ôk no'ôk ne ja.

*Paur kute Metîndjwýnhmã ar arênh.*

### *Ep 1.15*

<sup>1</sup> Ba ibê Paurmê Ximoximê ne bar ar amã pi'ôk no'ôk ne. Ar ibê Jeju Kritu nhô àpênh ne bar ar amã pi'ôk no'ôk ne. Ë, krîraxbê Pirpukam Kritu Jeju nhô me ja, ô me mextire jamã ne bar pi'ôk no'ôk ne. Ar aje Jeju nhô me jao aba

djwýnhwãmê atãri àpênhwãmê, ar akunimã ne bar pi'ôk no'ôk ne.

<sup>2</sup> Gé Metîndjwýnh ar ajo djuw mex, Metîndjwýnhbê gwaj Babãmmê krabê Bênjadjwýr Jeju Kritu ar ukaprîkôt ar ajo djuw mex ne ar ar ajo ba ne ar amã umar mex jarê gar adjumar mex ne ar aba.

<sup>3</sup> Ota ba inhô Metîndjwýnhmã amikînh jarê. Nã bãm mã ar aman ar amar rã'ã. Nã bãm ar akam ikînh ne ije ar amar kunîkôt kum amikînh jarê. <sup>4</sup> Djã nã bãm ar akam ikaprî? Kati, nã bãm ikînhkumrêx ne ije kum ar akunîo idjã'wýr katã kum amikînh jarê. <sup>5</sup> Mýkam ne ba ikînhkumrêx ne ar ajo a'uw? Bir, ar ikôt adjápênhkam. Kra:x kurûm ne gar ikôt apê ne memã Jeju kukràdjã ny'ã adjujarênh atēm rã'ã ne kam kôt ijo djuw mex ba kam itýxkumrêx ne memã Jeju'ã idjujarênh tē.

<sup>6</sup> Kam ne ba ar akam ikînh ne. Arým ba kuma. Metîndjwýnh ta ne arým ar ajo mexmo krax ne. Dja ar ajo mexo tèn o tèn o tēm rã'ãn arým inomã kumê gar akunî amextire. ã kute ar ajo anhýrmã ne ba amikajmã'ã kuma. Mýj akatikam dja inomã kumê? Bir, akubyn Jeju Kritu bôx nhô akatikam.

<sup>7</sup> Be, kôt ne ba ije ar akunîo ijamakja. Bir, mrãmri. Mýkam? Bir, imã ar akînhkumrêxkam. Ar akunî ne gar ikôt ar adjápênh aba. Metîndjwýnh kute imã idjápênh jarênhja ne gar ikôt kum adjápênh ar aba. Djãm mekbê ijê djâkam idjãm kambit ne gar adjápênh ar aba? Kati, irãri ar ibaridjwý ne gar ikôt adjápênh ar aba. Irãri ar ibari ije Jeju kukràdjã ny'ã idjujarênh nhyam me kute aprýo ba, ba prîne kôt memã 'ã idjujarênh ne ije memã kum,

—Mrãmri ne ba ije me amã kôt Jeju'ã idjujarênh ar o ibaja, anhýrja, be, nã gãm ar ã ikôt Jeju'ã adjujarênh ane. Kam ne ba imã ar akînhkumrêx ne. <sup>8</sup> Imã ar

akĩnhkôt ne ijamak inhô djâkam tokry ne. Mrãmri ne ba kôt ar amã arê. Metĩndjwýnh kute prĩne me kadjwýnhbê me omũnhkôt arým ikadjwýnhbê ipumũ, ije ar ajo ijamakkôt ipumũ. Imã ar akĩnh raxi. Kute Jeju Kritu kute kum ar akĩnh pyrâk. Aben kôt ne bar ã ar amaro ane.

<sup>9</sup> Nã bãm Metĩndjwýnhmã ar ajo a'uw. Ar amã aben jabêo amõr rã'ã o amõr rã'ãn arým ar amã aben jabê rax kadjy. Kadjy ne ba Metĩndjwýnhmã ar ajo a'uw. Be, dja gar amã aben jabêo atêm rã'ãn kam arým kôt prĩne mýjja pumũnh mex ne kôt akrã kre mex. <sup>10</sup> Gar kam amim mýjja kabin mýjja mexbito amiptã. Nhy mũm mýjja punu nõ gar katãt mýjja mexbito amiptãn kam amextire ne ajmã akute kêt ne ar aba rã'ã nhy arým akubyn Kritu bõx. <sup>11</sup> Nã, gar kam amextire. Jeju Kritu kute katãt me krã pymjýr djwýnh tãm gêdja katãt ar amã ar akrã pumjuw gar katãt mrã. Nhy me kam ar apumũn kam kôt Metĩndjwýnhmã rax jarên kum mex jarê. Tãm ne ja.

*Paur tyko nãr tĩno kute Jeju raxo amirĩtmã.*

*Kor 1.24; A Xim 2.9*

<sup>12</sup> Akmere ar, ãpnĩre ar, ê, ba ar amã arê. Djã nãm me ibê ijên kam Jeju'ã me ujarênh nyja mekbê krãta? Kati, nãm me mã Jeju jarê, arênh ry typydji nhy me kunĩ kuma, me kute arênh bãptãr kêt. <sup>13</sup> Nhy kam bẽnjadjwýrbê Xedja nhô krãkamngõnhre kunĩ kuma, mete mekbê ijê djâkam imẽnhkôt kuma. Nã bãm Kritu'ã idjujarênh tẽ nhy me mekbê ijê djâkam imẽ nhy me kunĩ kôt kuma. <sup>14</sup> Nhy gwaj baje abeno bakamy kwý rax ne mekbê ijê djâkam idjãmkôt ipumũn kam Bẽnjadjwýr kanãrrãm kum me uma kêtumrêx ne irãri ar tu memã Metĩndjwýnh kabên jarênh ar o ba.

<sup>15-17</sup> Nhy bep apýnh ne me kwý kute amijo rũnh prãm kam Jeju'ã pydjĩ 'ã ujarênh mõr prãme memã Jeju jarênh ba. Kum ikĩnh kêt ne 'ã pydji prãme ne arĩk ajkwakambit we memã Kritu jarênh ar o ba. Ikaprĩ rax kadjy, mekbê ijê djâkam idjãmkam ikaprĩ rax kadjy ne me arĩk Jeju'ã ujarênh ny jarênh kajgo ar ba.

Nhy bep ate ne me kute mrãmri ukaprĩkôt ar memã Jeju jarênh ba. Me ja ne me kum ijabên arým prĩne ipumũ. Metĩndjwýnh kute imã idjãpênh jarênh ba ije tu katãt arênhkumrêx nhy kôt me kute ibê ijê kôt ipumũn kum ijabên kam ikudjwa memã Jeju jarênh ba. Nhy bep ate ne me kwý arĩk Kritu'ã ujarênh kajgo ba.

<sup>18</sup> Kwãrĩk rã'ã gê me tu ar amẽ arek 'ã ujarênh ba. Dja me kum Jeju jabên 'ã ujarênh mexja mrãmri rã'ã. Nhy me kute 'ã pydji prãme Jeju jarênh kajgoadjwý mrãmri rã'ã. Mrãmri gêdja me amẽ ar 'ã ujarênh ba. Gê kam me kunĩ Kritu'ã ujarênhja ma. Ba kam arým ikĩnhkumrêx. Gêdja ba mã ikĩnh rã'ã ne. <sup>19</sup> Jeju Kritu Karõ gêdja ijo ba rã'ãn ikadjy me ngrêk nhy me kam ikaba. Nhy adjwýnhdjwý mrãmri ar aje Metĩndjwýnhmã ijo adjã'wýro gêdja me arým bõm imẽ. Ja ne ba arým prĩne kuma. Kam dja ba ikĩnh rã'ã ne.

<sup>20</sup> Gora ba imã me uma kêt ne idjãm týx ne Kritu'ã ajarê. Gora ba ã anhýr jabej kam memã Kritu raxo amirĩt ne amikam ipijãm kêt. Ije Kritu raxo amirĩt prãmã. Itĩn rã'ã nãr kon mete ibĩn jabej o ne ba ije Krituo rax prãm, o ne ba ije memã o amirĩt nhy me arým kôt kute kum katormã. Amrêbê ne ba memã Kritu raxo amirĩt rã'ã. Gora ba jakam djwý ã o ane. Tãm ne ba amim kamnhĩx ne aminhõkre kadjwýnhbê maro nõ.

<sup>21</sup> Ikĩnh djãbê ne Kritu. Ajbit dja ba kuman o amikĩnh. Djãm ityk

nhijukri ikapri? Kati, ityk nhijukri dja ba ikinho itinja jakrenh mex ne. Ityk nhijukri dja ba arym Kritubê ikinh dja pumun kam ikinhkumrêx ne.

<sup>22</sup> Nhyr bep dja ba arek itin jabej kam Kritumã apê ne memã 'ã ajarê nhyr me krãpti arym amikajmã'ã Jeju ma. Jadjwý ne mexkumrêx. Ije, nã bãr te ari mýjja ma. <sup>23-24</sup> Nãm te mýjja 'õ imã pydji prãme. Nã bãr ityk ne Kritumê ro'ã iban inhýtã ije aben pumũnhmã kuman jãm itinkam ije Kritumã idjãpênhja ma. Ije, nã bãr te ari mýjja ma. Dja ba tyn arym mrãmri imexo, ikinho itinja jakrenh mex ne. Tãm ne ba imã kinhkumrêx ne. Nhyr bep dja ba itin ne kam ar amãdjwý kinh jadjãr ar amã arênh nhinom kumê.

<sup>25</sup> Nã, dja ba itin ne kam ar amã Metĩndjwýnh kabên jarênhõ tẽn inom kumê. Tãm ne ba arym prĩne kuma. Itin ne arek ar ar akam iba rã'ã, ar aje amim Jeju mar rax ne o atêm ne kôt akinh kadjy. Ja ne ba arym kuma. <sup>26</sup> Bir be, dja ba arym ar awýr ibõxjakam gar arym ipumũn kam arym ikôt Kritu Jejumã mex jarê. Kute ipytãrkôt ipumũn kam akinh rax ne kam arym akunĩ kikrepdjitã Kritu Jejumã rax jarê.

*Ar te tokry Jeju'ã ukanga kêtã.*

*Ruk 6.22; Xij 1.12*

<sup>27</sup> Ê, ar ikabên ma. Gar arym Kritu'ã ujarênh nyja ma. Gora kôt ar amijo aba. Dja ba ar awýr itêm ne ibõx ne ije inhýtã ar apumũnh jabej arym ikinhkumrêx. Ar aje kôt amijo abakam ikinhkumrêx. Nãr kon, mekbê ijê djãkam idjãm rã'ã jabej nhyr arym iwýr ar ajã ujarênh bõx jabej dja ba kuman ikinhkumrêx. Gar atypydjĩn adjãm týx ne axikôt akabên ne ar memã Jeju kukrãdjã ny'ã adjujarênh aban aro'ã aje o angryk ne aje akabêno me unênhkam. Me kute Metĩndjwýnh Kabên japryja dja gar

akabêno me unê. Ja dja ba kôt kuman arym ikinhkumrêx ne.

<sup>28</sup> Kwãrik wãnh me kute ar ajaprywã ne mũm kute Metĩndjwýnhõ akêx ne kute aprýwã kwãrik wãnh gar amã me uma kêt. Ate gêdja me wãnh ar axwe ba. Gwaj mrãmri tu katãt Metĩndjwýnhmã badjãpênh mex ne. Nhyr kam kôt me ar amã katon kam amijã,

—Bep djãm mrãmri ne Metĩndjwýnh ar wã pytã. Nhyr bep ba ne ba ije mar kêtãkam kute ipytãr kêtãkumrêx. Dja ba tu ibiknorkumrêx. Bep djãm mrãmri ne ar ja arym mrãmri Metĩndjwýnhõ aminhõ. Kam ne kute ar utãrja, ane. Dja me ar apumũn kam ã ane.

<sup>29</sup> Arym ne Metĩndjwýnh Kritu kadjy amim ar ajã karõ. Ga kam ar arym amikajmãtã Kritu ma. Djãm ja'ãbit ne amim karõ? Kati, mýjja 'õdjwý. Ê, aje Kritukôt amijo abakam ar atokrymãdjwý. <sup>30</sup> Dja gar ikudjwa Kritukôt djan o angryk nhyr me arym jãm ar ajo akêx ne ar amã tokry jadjã ga kam ar ikudjwa aje Kritukôt amijo abakam te atokryn te akaprĩn mã kôt ajkamê. Wãkam idjãmkam ne ba ã ane gar kôt ipumũ. Jakam idjãmkamdjwý ne ba Krituo ingryk ne memã ikabên gar ijã ujarênh ma. Tãm ne gar gadjwý arym kôt adjãm ne aje o angryk ne atokryõ aben pyrãk kadjy ne Metĩndjwýnh ar ajã amim karõ. Tãm ne ja.

## 2

*Ar kute Kritu kudjwa amijo kãtãmmã.*

*Ep 4.1; A Kõ 8.9*

<sup>1</sup> Akmere ar, ãpnhĩre ar, gora axikôt akabên ne akabêno ikinh. Be, ga arym Kritu kute ar amã týx jangjênhwã pumũ. Ne aje kum ar ajabên kam ar akaprĩkam kute ar amã kinh jadjãrwã pumũ. Metĩndjwýnh Karõdjwý kute ar ajo

öbikwan kute ar ar ajo bawã pumũ. Gar kôt aje abeno anhöbikwan kam amã aben kaprĩ. <sup>2</sup> Be, ã kute ar ajo anhÿrwãkam dja gar kôt axikôt akabên ne akabêno ikĩnh. Kam dja ba arÿm kãjmã amũ ikĩnh ajkamẽ. Dja gar akabên'ã kabên ne ar amã aben jabêo aben pyrãk ne axikôt akabên ne abenmã kum,

—Gwaj atemã bakabên kêt ne kam gwaj badjãpênho aben pyrãk ne gwaj bakabêno aben pyrãk, ane. O dja gar amũ kãjmã ikĩnh kamênho mō.

<sup>3</sup> Kwãrĩk wãnh gar amikad-jwÿnhbê amijo abênjadwÿr ne ar meo aba kêt. Kwãrĩk wãnh gar amijo arax prãm kêt. Dja gar tu amikam apijãm ne amijo angrire ne amijo akåtãm. Kwãrĩk wãnh gar amikad-jwÿnhbê amijo abênjadwÿr kêt. Nhym bep amũ me ja'ãbit dja gar aminêje me'ã bënjadwÿr rên kãjmã me kamênho tẽ. <sup>4</sup> Kwãrĩk wãnh gar gajbit amimar ne ar amijo aba kêt. Kwãrĩk wãnh gar amijo adjãptãr ne ar mebê mÿjja jao anhÿro aba kêt. Dja gar amũ me jadjwÿ ma.

<sup>5</sup> Be, Kritu Jeju kute amijo ngrija pumũ. Kute mrãmri amijo ngri mex ne kute amijo kåtãmja pumũ. Kudjwa dja gar ã amijo ane.

<sup>6</sup> Nã, Kritu raxmẽ Metĩndjwÿnh raxo aben pyrãk. Kute aben pyrãk. Dji Kritu kubê Metĩndjwÿnhkêt. Nãm ren Kritu ren amirax pumũnh japkrem ren arek ar ba.

<sup>7</sup> Nhym bep kati, nãm te rax ne, te kãjkwakam ò mÿjja mex ne tu me bakadjy amikangan ruw. Tu amikunĩ kangan amijo ngrin me bawÿr ruw. Ne kam ar memã àpênh ba. Nãm tu amijo kubêngökre.\*

<sup>8</sup> Ne kam ï kute me babêngökre nhÿja pyrãk. Axikôtô. Nãm amijo ngrire ne amak mex ne akrànãmã Bãm kabênkôt mrã. Akrànãmã Bãm kabênkôt mrãnh rã'ã nhym me kubĩ. Djã nãm me bĩn kajgo? E kum kati, pĩte'y tokry tÿxkam ne me kubĩ.

<sup>9</sup> Kam ne Metĩndjwÿnh raxo kãjmã kamên kam kum idji mex jarẽ, idjibê kumkati ne kum arẽ, idji rax ne kum arẽ. Kãjmã kute raxo amũ mÿjja kunĩ jakrenh, o kute mÿjja jakrenh mexi.

<sup>10</sup> Dja me Jeju nhidji man kam arÿm umaje ibô, pijãm djaje ibô. Mÿjja kunĩ dja idji raxkôt kuman kam arÿm umaje ibôn anhikrên 'ò kabên kêt kumrêx. Kãjkwakam kadjy mrãnh djwÿnhmẽ pykakam me kunĩmẽ, pyka kadjwÿnhbê me karômẽ mÿjja kunĩ.

<sup>11</sup> Be, me kunĩ dja me abenmã, —Nã, Jeju Kritu, ajbit ne Bënjadwÿr djwÿnh, ane. Dja me ane nhym kam Metĩndjwÿnhbê Bãmdjwÿ dja ò'ã memã rax nhym me Bãmmãdjwÿ kãjmã rax jarênho tẽ.

Be, dja gar ã Jeju Kritu'ã amijakreo ane.

<sup>12</sup> Jeju ne amak mex ne Bãm kabênkôt ar amijo ba. Kam dja gar gadjwÿ, akmere ar, àpnhĩre ar, ajamak mex ne kabênkôt ar amijo aba. Be, gora ar ikamã ajamak mexwã kwãrĩk wãnh rã'ã. Gar itekre kamã mÿjja punu wã 'ò nhipêx kêt. Nã gãm ar ikam ajamak mex ne prĩne Metĩndjwÿnh kabênkôt ar amijo aba. Gora ar aje Metĩndjwÿnh kabênkôt amijo abawã rã'ã. Gora Metĩndjwÿnh kute ar apytãr ne kute ar ar ajo bakam

\* 2:7 Kritu ne amijo kubêngökre kute mrãmri ne apÿnh me ò pyka djari kunikôt me kunĩ: bêngökreja pyrãk. Kubê kã jakamẽ me kakrãtykmẽ me babêngökremẽ ne me kunĩ: bêngökre. Me kamrômẽ me kukrãdjã kunĩ kubêngökreo aben pyrãk. Jakam dja ga Karô 17.26 jarên ama.

gora ar mã ajamak mex ne kôt amijo aba rã'ã. Ne kum adjâpênh rã'ã ne. Dja gar amã Metîndjwýnh pyman kam apijãm ne kam kum adjâpênh rã'ãn kôt ar amijo aba rã'ã ne.

<sup>13</sup> Nhy mýj me'õ ne ar angrêk gar kabênkôt ar amijo aban kum adjâpênh prãm ne kum adjâpênh ar aba? Bir, Metîndjwýnh. Metîndjwýnh ta ne ar amã arê gar kabênkôt ar amijo aban kum adjâpênh prãm ne kum adjâpênh ar aba.

<sup>14</sup> Kwãrik wãnh gar aben prikam mýjja japyrý kêt ne akabêno aben japanh kêt. Dja gar tu abenkam akabên mex. <sup>15</sup> Mýkam? Bir, ar ajaxwe kêt ne ajmã akute kêt ne arek ar abamã. Ar abê Metîndjwýnh krakumrêxkam memã katât amrãnhmã. Gora memã katât mrã gê me axweja, me arík ar baja ar apumũ. Katât ar amrãnhkam ne gar aje ngônhpôkti nhirã pyrãk, aje akamãt kô tykkam ngônhpôkti kute memã irãja pyrãk. Nhy bep me axweja, me arík ar baja ne me kute akamãt kô tyk pyrãk.

<sup>16</sup> Dja gar aje ngônhpôkti pyrãk ne aje mã memã Metîndjwýnh kabên jarênh nhy me kute amim mar ne tîn rã'ã rã'ã rã'ãmã. Dja gar ã amijo anhýr ar o aba ba kam ar akam ikînh. Kritu akubyn bôx ne kute me bakabin kam kute ar amexmã apôxkam dja ba ar akam ikînh ne ar ajo idjãmra iba ne kam aminhökrekadwjýnhbê,

—Be, djã nã bãm te arkam idjâpênh rax? Djã nã bãm te arkum Jeju jarênh iba? Djã nã bãm arkum arênh kajgo? Kati, nãm ar amikajmãtã Jeju markumrêx. Ba kam idjâpênh kajgo kêt, ane.

<sup>17</sup> Birãm djãm me ibĩ. Kon ne. Dja me te ibĩ ba mã ikînh. Nhy Metîndjwýnhdjwý mã ikam kînh. Mýkam? Bir, dja mete ibĩn jabej ibĩ nhy Metîndjwýnh mrãmri ikam kînhkumrêx. Kute mrãmri ne me

kute amrêbê Metîndjwýnhmã mry par ne kute kum bôr nhy kam mekam kînhja pyrãk. Dja ã ikam kîho ane. Ar gadjwý, dja gar amim Metîndjwýnh kamnhix. Kam gêdja Metîndjwýnh ar akamdjwý kînhkumrêx. Kute mrãmri ne me kute Metîndjwýnhmã mry nhiby uba kangô runh nhy kam mekam kînhja pyrãk. Kute tãm pyrãk. Dja ã itykkam gwaj bakam kîho ane. Bir, mrãmri, kwãrik wãnh ibĩn rã'ã ba tu ikînh ne. Gwaj bakunĩ baro'ã bakînh ne. <sup>18</sup> Gar gadjwý ã ikôt akînh ane gwaj baro'ã bakînh.

### *Ximoxi'ã ujarênh.*

<sup>19</sup> Adjým, dja ba ã wãm ar awýr Ximoxi jano. Ije ar awýr anormã tu amijã Bênjadjwýr Jeju kamnhixkumrêx. Dja ar akam bôx ne akubyn iwýr tèn bôx ne kam imã ar ajarê. Kute imã ar ajarênh mexo dja imã ikînh jadjã, ba kam ajte ikînh ne. <sup>20</sup> Ximoxi ne mexkumrêx. Nhýnh ne atemã me'õ ne ba ije wãm ar awýr anormã? Kati, Ximoxi pydjii. Ajbit ne ikôt mrãmri ar ajo djuw mex ne. <sup>21</sup> Me kunĩ ne me amidjwýnhbit ma, ne kam Jeju Kritu mar kêt ne.

<sup>22</sup> Nhy bep ate ne Ximoxi. Gar arým mexmã akato. Nãm ikôt âpênh mexkumrêx. Kute me kra bãmkôt âpênh mexja pyrãk. Nãm ã ikôt memã Jeju'ã ujarênh ny jarênh tẽmo ane. <sup>23</sup> Be, tãm ne ba ije ar awýr anormã tu kamnhixkumrêx. Dja ba amima, itîn jabej nãr kon ityk jabej, dja ba amiman kam on ar awýr ano nhy wãm tẽ.

<sup>24</sup> Adjým, dja ba badjwý ã wãm ar awýr tèn bôx. Nã bãm itẽmmã tu amijã Bênjadjwýr djwýnh kamnhixkumrêx.

<sup>25</sup> Mrãmri dja ba akubyn ar awýr ikamy Epaprodji jano. Nã gãm ar iwýr ano nhy iwýr bôx ne ikôt âpênh ar ba. Bar kam iro'ã ar ije Jejuo ingyryk ne memã ikabên iba.

Tām ne gar iwÿr ano nhym iwÿr bôx ne kam ar akàxã ijo djuw mex ar o ba, ba kam ije arÿm akubyn ar awÿr anormã.

<sup>26-27</sup> Nãm ar ajo ama: ne. Ba kam ije akubyn ar awÿr anormã. Mrãmri ne arÿm kanê tÿx ne tyk 'ÿr. Tyk 'ÿr nhym Metĩndjwÿnh kum kaprĩn arÿm o mex ne. Kum tãmja kaprĩn kum badjwÿ ikaprĩ. Ikaprĩ nhĩby ajte ikaprĩ karô ne kanêbê utà, Epaprodji pytà, nhym arÿm mexkumrêx ne ar ajo aman kam,

—Û, arÿm ne ar ikanêkôt iman arÿm ikam umar punu, anen kam ar akôt umar punu.

<sup>28</sup> Kam ne ba ije akubyn ar awÿr anor prãm kumrêx, gê ar awÿr tẽn bôx gar omũn kam ajte akĩnhkumrêx. Ar akĩnhkumrêx ba badjwÿ arÿm ikaprĩ apêx. <sup>29</sup> Bir be, kam dja ar awÿr bôx gar amiwÿr o wadjã, ne akĩnhkumrêx ne Bẽnjadjwÿr kôpdji'ã kum akabên mex jarê. Dja gar ã o ane, me'ô kute Epaprodji pyrãk dja gar ã o ane, kãjmã kamênho tẽ. <sup>30</sup> Be, tu amiwÿr o wadjãn kum akabên mex jarê. Djã nã gãm ar omũ, Kritumã àpênh ar bakam ren tykja pumũ? Nãm ikôt ar àpênh ba. Gar te ikôt adjãpênh prãm nhym kam ta ar akàxã ikôt àpênh ar ba. Kute amikam tyk mar kêt ne tu ikôt ar àpênh ba.

### 3

*Paur kute amikukràdjã tũm kunĩ kanga.*

<sup>1</sup> Ê, akmere ar, àpnhĩre ar, gora ar ajte ikabên ma. Gora ar akĩnh. Gora ar gwaj banhô Bẽnjadjwÿrwã kôt akĩnh.

Ê, ba ajte ar amã mÿjja 'ôdjwÿ jarê, ôbê ije ar amã 'ã pi'ôk no'ôkja dja ba ajte ar amã arê. Djã nã bãm ije ajte akubyn ar amã arênhbê imã idjukanga? Kati, me kute ar anoo biknorbê dja ba ajte akubyn ar amã arê. <sup>2</sup> Ê, gora ar aminêje me

omũ. Me axwe, me arĩk ar bawã ar aminêje me omũ. Me wã ne me mÿjja punubit nhipêx ne memã me kute me mykã jakãrmãbit arênh ar o ba. Nãm me 'êx ne we ar memã,

—Djãm me aje amim Jeju mar ne kam tu aje mar kajgomã. Bep kati, dja ga me amim ama nhym me me amy nhinhu kãdjwÿ rê. Metĩndjwÿnh ne kum me my nhinhu kã rênhbit kĩnh ne meo kra, bep me mykã tã ne kute meo kra kêt, anhÿr ar o ba. Nãm me 'êx. Me 'êxnhĩ ne me ar 'êx ba. Bir, nhÿnh me jabê ne Metĩndjwÿnh krakumrêx? Gwaj ba.

<sup>3</sup> Gwaj ba ne gwaj mrãmri babê Metĩndjwÿnh krakumrêx. Gwaj baje Metĩndjwÿnh mar ne kum rax jarênh nhym Metĩndjwÿnh Karô kute gwaj bajo ba nhym Kritu Jeju kute gwaj bapytãr gwaj baje kam kamnhĩxbê ar baba. Kam ne gwaj babê Metĩndjwÿnh krakumrêx. Djãm gwaj ba ne gwaj ajmã amijon amiptãn ar amijo badjãmra baba? Kati, Kritu Jeju ne gwaj bapytã gwaj kam Kritukam bakĩnhkumrêx ne o ar badjãmra baba.

<sup>4</sup> Djori me'ôwã amikukãmãreo amran we,

—Ba inhingêt kôpdji'ã Metĩndjwÿnhmã imex, anhÿr ar o ba? Nãr kon ajmã amijon amijo àmra ba? Bir be, ba ren amijo idjãmra prãm ne ren badjwÿ ren amikukãmãreo amran ren amimexo idjãmra iba. Djãm ikàtãm, djãm iprÿ kãtã got ba? Arkati, inhingêt kute imã mÿjja rero kute me ja kunĩ rer. Gora ima.

<sup>5</sup> Ê, ijã pi'ôk kamrêk pydji nhym me imykã krãta. Ibê idjaerkumrêx nhym inhingêt bê Bẽnjamĩn. Djãm ibajtem got? Kati, inãmê ibãm amê Ar kubê idjaer djwÿnhĩ. Ibê mekbê pardjêu 'ô ne ba prĩne Mòjdjê kukràdjãkôt amijo iba mextire. <sup>6</sup> Nã bãm imã Mòjdjê kukràdjã kĩnhkumrêx ne o ingyk ne meo ajkê, me kute amim Jeju marjao ibikênh mex ne. Nã bãm prĩne



Môjdjê kukràdjàkôt amijo iba. Nhÿnh ne me'ô ijã,

—Kati, nãm Môjdjê kukràdjã 'ôo akno, ane? Kati, nã bãm prÿne kôt amijo iba. <sup>7</sup> Bir be, amrêbê mÿjja ja kunÿ imã mex ba kanàrrãm amijo iba.

Nhym bep kati, jakam arÿm imã punun imã kajgo. Ba arÿm kanga. Kritubit ne ikadjy mex, ba kam kanàrrãm ar amijo iba. <sup>8</sup> Djãm Môjdjê kukràdjãmê me ikukãmãre jabit imã kajgo? Kati, mÿjja kunÿ ne imã kajgo mexi. Nhym ije inhô Bënjadjwÿrbê Kritu Jeju marmã, ajbit pydji ne imã mex, imã kÿnh, ba kôtbít ijamak bën. Bir be, Kritu kadjy ne ba mÿjja kunÿ kanga. Nã bãm ikukràdjã tÿm kunÿo mÿn ne tu bôm kumê, ije ajbito aminhô kadjy.

<sup>9</sup> Ije Krituo aminhôn kam kôt idjãm ne kôt ibamã ne ba mÿjja kunÿ kanga. Ta ne imã ijaxwe kêt jarê ba kam kum imexkumrêx. Djãm Môjdjê kukràdjàkôt ije ar amijo ibakam imexkumrêx? Kati, Kritukôt ne ba imex. Nã bãm amikajmã'ã Kritu ma nhym Metÿndjwÿnh imã ijaxwe kêt jarê ba kam kum imex ne. Nãm me ã amikajmãtã Kritu maro ane nhym arÿm Metÿndjwÿnh memã axwe kêt jarêno ane.

<sup>10-11</sup> Bir be, ije Kritu mar ne kôt ar amijo ibamã ne ba mÿjja kunÿ kanga. Mÿkam ne ba mÿjja kunÿ kanga? Bir, ije prÿne Kritu mar nhym kute ta tÿxo ijo tÿx, tÿxja tãm kute akubyn amitÿn jao itÿxmã ba kudjwa tokryo itokryn 'ã ingrà tÿx rã'ã nhym me kute Jeju kudjwa ibÿn jabej ba kanga kêt ne kam ije ityk nhÿjukri akubyn itÿn ne ikator kadjy amim kamnhÿx bê ar amijo iba.

<sup>12</sup> Djãm arÿm imexo imexkumrêx? Djãm arÿm imex ne ijaxwe 'ô kêtumrêx? Kati, ãm ije amijo itêm rã'ã. Tÿmràãm gêdja Metÿndjwÿnh ijã mex mẽ ba kam mrãmri

imexkumrêx. Kadjy ne Kritu Jeju ipytàn ijã amim karô.

<sup>13-14</sup> Ê, akmere ar, àpnhÿre ar, kraxje ijaxwe apêx kêt rã'ã. ãm ije amijo itêm rã'ãã. Ne kam mÿjja pydji'ã ino tÿx. Mÿjja tÿm, ije amijo iba tÿmja ne ba tu wãnh kum inhÿre. Tu wãnh kum inhÿren mar kêt ne amikukãm bít maro têt.

Kute me kute aben rerkam prôt tÿx ne kam amim kÿnh djã jamÿnhja pyrãk. Nãm me amikukãm 'ÿr prôt ne prôt tÿx ne tyk djã kêt ne arÿm 'ÿ:r têt. Me kute me tÿxmê me tyk djã kêt nhô nèkrêx jamÿnhmã. Me kute amim amÿnhmã ne me katàt 'ÿr prôt ne. Me prôt kôt ari ar rÿt kêt ne ate krãn mÿm rÿt ne mÿm rÿt kêt. Ajbit ne me kuman tu 'ÿr prôt ne.

Bir be, nã bãm ã ane. Nã bãm ã amijo anen 'ÿr amijo itêm rã'ãn 'ã inopdji ne. Metÿndjwÿnh kute ijã amim karôkôt ne ba amijo têt. Metÿndjwÿnh ikam kÿnh ne kute imã ikÿnh djã nhôr ba ije amim amÿnhmã ne ba kôt amijo têt. Bir be, nã bãm ajbit ma. Ije kôt amijo iba nhym ikam kÿnh ne kute imã ikÿnh djã nhôrmã ne ba kadjy amijo itêm rã'ãn 'ã inopdji ne.

Mÿj nèkrêx nã, mÿj ikÿnh djã ne ba ije amim byrmã? Bir, Metÿndjwÿnh kute kàjkwamã me bajwÿr gu me 'ÿr bamôr ne ô kàjkwakam mÿjja mextikam ar babamã, tãm. Kritu Jejukôt dja gu me kàjkwamã wadjã. Mÿj me'ôkôt? Bir, Kritu Jeju pydjikôt dja ba kàjkwamã wadjã. Kadjy ne ba amijo itêm rã'ãn 'ã inopdji ne. Metÿndjwÿnh ikam kÿnh ne kute imã ikÿnh djã nhôr kadjy.

<sup>15</sup> Gwaj baje amim Jeju mar tÿm ne kôt arÿm bamexja, dja gwaj arek kôt amijo bamôr rã'ã. Metÿndjwÿnhmã bajaxwe kêt kadjy arek amijo batêm rã'ã. Nã, gwaj o ane, ã axikôt maro ane. Dja gar akwÿ ate anhô kre kadjwÿnhbê,

—Kê, waj. Ije Metÿndjwÿnhkôt ar ije amijo iba prãm kêtumrêx.

Mýj kadjy gédja bar mýjja wākôt ar amikangõnho iba? anhÿr jabej, nhym Metĩndjwýnh arým ar amã kabên 'õ jarê gar arým aman kam kôt amim akato.

<sup>16</sup> Ê, ja dja gar ama. Arým ne gwaj kôt amijo batêmo ane. Gwaj arek bamõr rã'ã. Metĩndjwýnh kute gwaj bajo mõr gwaj arek kôt bamõr ne atemã mùm bajõ bamàt kêt ne tu arek katàt kôt amijo batêm nhym tũmrãm Metĩndjwýnh kute gwaj bajã mex mênh gwaj bamex-tire ne bajaxwe kêt-kumrêxmã.

<sup>17</sup> Akmere ar, àpnhĩre ar, ar aro'ã ijã amijakren ikôt amijo tẽ. Ê, ar ipumũ. Ar akajmãtã katãt imrãnhja pumũ. Dja gar ipumũn kam katãt ã ikudjwa ar amijo anhÿr ar o aba. Arým ar kwý kute ikõpdji'ã ikôt ar amijo ba. Dja gar ar kudjwa ama.

<sup>18</sup> Nhym bep ate ne me kwý kum Kritu kurê. Nãm me arĩk ar ba ne kute Kritu me bakunĩ kadjy pite'ykam tykja mar prãm kêt-kumrêx ne kum kurê. Arým ne ba ar amã me ja jarênh krãptĩ ne kam ajbir ajte akubyn ar amã arẽ, imýrkam ne ba ar amã arẽ. <sup>19</sup> Me ja dja me tu biknorkumrêx. Djã nãm me kum Metĩndjwýnh kĩnh got? Kati, nãm me arĩk ar ban kam kum axwebit kĩnh ne. Djã nãm me pijãm ne? Nãm me ren axwekam pijãm ne ar ba. Bep kati, nãm me pijãm kêt ne ar ban ajte ta amijo àmra ba. Djã nãm me kãjkwakam mýjja ma? Kati, nãm me pyka jakam mýjjabit mar ar o ba.

<sup>20</sup> Bep ate ne gwaj ba. Gwaj banhõ pykakumrêxbê ne kãjkwa, Metĩndjwýnh nhõ kãjkwa. Kurũm dja Bẽnjadwýr Jeju Kritu kubê me bapytãr djwýnhja bõx. Tãm ne gwaj kõtbit bajamak bẽn ne amãr ar o baba. <sup>21</sup> Dja bõx ne kam me bajo ny, me banhĩ punuja, tyk prãmja dja o ny gu me kam banhĩ kute ta ã mex-tire, ã kadjwýnh ajmã kute kêt, ã mex-tire pyrãk. Mýjo dja me banhõ ny? Djãm Jeju Kritu rerek got. Tỳxi.

Ta tỳxo. Dja amityxo amijo aptãn kam amikôt mýjja kunĩ mên kam mýjja kunĩ nhõ Bẽnjadwýr. Ta tỳx tãmõ dja me banhõ ny.

## 4

*Kute arkum amijo ba mexmã 'ã karõ.*

*Ep 4.3; Pir 2.2; Kor 3.15; Xij 3.17*

<sup>1</sup> Be, akmere ar, àpnhĩre ar, kam dja gar ã Bẽnjadwýrkôt amijo aban 'ã angrã tỳxo ane. Djãm imã ar akĩnh ngri. Axwe imã ar akĩnh, ije ar ajo ijamak tỳxkam ne ba ar amã ikabên jarên ar amã pi'ók no'ók ne. Ar ajo dja ba amikĩnh ar o iba. Ar ga dja ba ar ajo idjãmra mõ, imã ar akĩnh raxkam, akmere ar, àpnhĩre ar. Ar Jeju 'ã angrã tỳx ne kôt aje amijo abamã ne ba ã ar amã pi'ók no'óko ane.

<sup>2</sup> Ê, àpnhĩre ar, Ebodjijmẽ Xixiki, ba ar amã ikabên jarê. Kwãrik wãnh akabêno aben japanh kêt. Ar abê Bẽnjadwýr djwýnh krakam on ar aje aben pyrãk ne aro'ã axikôt akabên. <sup>3</sup> Gadjwý, akmere, ikôt adjãpênh djwýnhkumrêx, dja ga arkum akabên jarê gẽ on ar kute aben pyrãk ne kabêno aben japanh kêt. Nãm ar ikôt àpênh ar ban memã Jeju'ã ujarênh ny jarênh ar o ba. Ne kam Kremëxidjwýkôt àpênh ar ba. Kremëximẽ me ikôt àpênh kunĩmẽ, me tãm ne me arým Metĩndjwýnh me tĩn rã'ã rã'ãmã arým pi'ók no'ókkam amim me idji janhõ. Nhym bep ar nire kute ar ikôt àpênhja ne ajmãn ar arým ajbir kabêno aben japa. Mýkam? Arkumã dja ga akabên jarê.

<sup>4</sup> Be, on tu ar akĩnh ry typydji, ar abê Bẽnjadwýr djwýnh krakam on tu ar akĩnh ry typydji. Ba ajte ar amã arẽ,

—Ar akĩnhkumrêx. <sup>5</sup> Gora me kunĩmã ar adjukaprĩ. Bẽnjadwýr arým akubyn bõx 'ýrkam dja gar me kunĩmã adjukaprĩ gẽ me kunĩ ar adjukaprĩkôt ar ama.

<sup>6</sup> Kwārīk wānh gar mỳjjakam adju-mar punu kêt. Tu Metūndjwýnhmā akabēn ne prīne kum amijārēn mỳjjao a'wý. Ne mỳjjao adjà'wýr katā kum amikīnh jarē. Kute ar amā mỳjja kunī nhōrkam kum amikīnh jarēn kum ōdjānh jarē. Ā kum amijārēnho ane. <sup>7</sup> Dja gar ane nhym kam Metūndjwýnh ar amā umar mex djā jarē gar kam adju-mar mexkumrēx ne ar aba. Djām tāwā nhō me umar mex djā punu got. Tāmwā ne ō me umar mex djā ra:xi. Nām me te kute mar ne kute kraxkôt omūnhmā. Kritu Jejukôt dja gar adjumar mexkumrēx. Ō me umar mex djājao dja prīne ar anēje aptà. Nhym me umar punu 'ō ar amā àr prām kêtumrēx, amadjāmā àr kêtumrēx ne ar anhōkre kadjwýnhbē àr kêtumrēx.

<sup>8</sup> Be, akmere ar, àpnhīre ar, ba ajte ar amā mỳjja jarē. Godja mỳjja mextire, nār mỳjja ajmā kute kêt ne kīnhkumrēx jabej gora ar ajbit ma. Kwārīk wānh gar mỳjja punu 'ō mar kêt.

Bep mỳjja me kute arēnh ne 'ēxnhī kêt 'ō,  
me kute katāt kabēn jadjwýr 'ō,  
mỳjja mex me kute kôt amijo ba 'ō,  
me kabēn mex me kute o aben nhikjē kêt 'ō,  
mỳjja mex me kute omūnh ne kīnhkumrēx 'ō,  
mỳjja mextire me kute kikre kunīkôt mar ne kute o ýrja 'ō,  
mỳjja ja dja gar mar o aba.

<sup>9</sup> Ije ar amā ikabēn jarēnh gar aje ikabēn mar ne ikabēnkôt aje amijo aba ne ije amijo iba gar aje ije amijo ibakôt ipumūnh gora ar ā ikudjwa amijo ane nhym kam Metūndjwýnh ar amā umar mex jarēn prīne ar ar ajo ba. Tām ne ja.

<sup>10</sup> Be, nā bām ikīnh ra:x ne. Ne Bēnjadjwýrmā amikīnh jarē. Nā gām ar ajte ijo djuw mex ba kam ikīnhkumrēx ne. Ar aje ijo djuw mex kêt ne kam ajbir ajte ijo djuw

mex. Ar atāri ar iba ga ren ar ijo djuw mex rā'ā. Nhym bep amybým ne ba ar iba gar ijo djuw mex kêt. Djā nā gām ar ijo aknon ijo djuw mex kêt. Arkati, nā gām ar aje imar rā'ā ne te jānh gar aje ijo djuw mex prāme.

*Kute arkum arkam amikīnh jarēnh.*

<sup>11-12</sup> Djām imā prām nār inhō mỳjja kêtumrēx ne ba ije ar amā amijārēnhja? Kati, ikīnhkumrēx. Ba arým amikam ajkam aman arým tu ate ikrā. Ē, godja inhō mỳjja kêtumrēx nār kon inhō mỳjja krāptīkam ba tu kam ikīnhkumrēx ne ar iba. Godja mỳjja punu arým iwýr bōx ba tu ikīnhkumrēx. Nhym mỳjja mexdjwý arým iwýr bōx ba arým ikīnhkumrēx. Mỳjja punu nār mỳjja mex iwýr ban bōx katā ba tu ikīnhkumrēx ne ar iba. Imā prām nār ijajne jabej, inhō nēkrēx krāptī nār inhō nēkrēx kêt jabej ba tu ikīnhkumrēx ne ar iba. Ja ne ba arým ije mar tỳx. <sup>13</sup> Kritu ta ne ijo tỳx nhym mỳjja kunī iwýr ban bōx katā ba tu ate ikrān ikīnhkumrēx ne ar iba.

<sup>14</sup> Bep mrāmri ne gar adjukaprīkumrēx. Nā gām ar itokry pumūn kam anhōdjānhkôt imā mỳjja jano. Mrāmri ne gar amexkumrēx.

<sup>15</sup> Amrēbē ije pykabē Matenikam memā Jeju'ā idjujarēnh ny jarēnhmo krax ne kam kurūm itēmcam ne gar gajbit ikôt apē ne imā mỳjja kwý jano. Atemā me kute Jejukôt aben pydji 'ō kute imā mỳjja janor kêt. Ar gajbit ne gar imā mỳjja jano. Be, gar aje imar rā'āja pumū. Krībē Pirpukam ar aje amim Jeju mar ne kôt ar aben pydjio baja, ar gajbit ne gar imā pi'ók kaprīre jano ba amim kuby. <sup>16</sup> Ne ajte krībē Texarōnikakam idjām rā'ākam inhō pi'ók kaprīre kêt. Gar imā kwý jano, ne ajte ano.

<sup>17</sup> Djām ar aje ajte imā pi'ók kaprîre nhõrmā ne ba ajte ar amā ane? Kati, Metîndjwýnh ar akam kînh ne kute ar adjukaprîo pānh gar akînh raxmā.

<sup>18</sup> Nā, mrāmri ar aje imā anorja kunī arým iwýr bõx ne imānhkutān kwý ijakre. Gar aje Epaprod-jikõt imā anor nhym kute imā o bõxja imā kungā nhym arým inhõ mýjja krāptī ne. Ar aje imā õrja kute Metîndjwýnh nhõ mry pyrāk, kute õ mry kudjýre pyrāk. Me kute Metîndjwýnhmā mry par ne kute kum bõr nhym kum kînh ne mekam kînhja. Kute tām pyrāk. Nā gām ar imā mýjja ngā nhym kam Metîndjwýnh ar akam kînhkumrēx.

<sup>19</sup> Kam dja ar amā mýjja ngā nhym ar amānhkutā ne.

Djām inhõ Metîndjwýnh õ nêkrēx kêt got. Arkati, kàjkwakam õ mýjja krāptīti: kute kanhêtire pyrāk. Dja ar amā kwý ngā, Kritu Jeju djõ'ā ar amā kwý ngā nhym kam ar anhõ mýjja ar amānhkutā. Nhýnh ne Metîndjwýnh ar amā mýjja 'õ nhõr kêt? Kati, dja ar amānhkutā kungā nhym rā'ān kumex.

<sup>20</sup> Gê me kunī me banhõ Metîndjwýnhmā rax jarē, Metîndjwýnhbê me Babāmmā rax jarē. Kum rax jarēnh rā'ā rā'ā. Gê me ā ane. Tām ne ja.

<sup>21</sup> Nā bām ar ajo ama, wānh, Kritu Jejukõt ar abê Metîndjwýnh nhõ ar amexja ne ba ar akunõo ama ne. Wānh ar abenmā ijarē. Nhym jakamdjwý ar kute Jejukõt abeno kamy ar ajo amak rā'ān ar amā amijarē. <sup>22</sup> Jakam, Metîndjwýnh nhõ me mex kunī ne ar ar ajo amak rā'ān ar amā amijarē. Nhym bēnjadjwýr Xedja nhûrkwākam me jadjwý ar ajo amak tỳ:x ne.

<sup>23</sup> Gê gwaj banhõ Bēnjadjwýr Jeju Kritu ukaprîkõt prîne ar akunõo djuw mex. Tām ne ja.

## **Paur kute Korxikam me jamã pi'òk no'òk ne ja.**

Me'ò nhidjibê Epapraj ne arým Paurkôt Jejuo aminhõ. Ne kam akubyn ò pykabê Korximã tèn kam memã ar Jeju'ã ujarènh ba. Nhyim mekam kwý arým tu amim Jeju markumrêx ne kôt aben pydji. Nhyim kam Epapraj Paur'ýr tèn bõx. Mekbê ijê djákam Paur ãm rá'ã nhyim Epapraj 'ýr bõx ne kam ò pykabê Korxikam ar ja Paurmã ar arènhõ nhý. Nhyim kam tu Paur kute ar omũnh kêt kam tu kum ar kĩnhkumrêx. Kute ar omũnhmã prãbê tu kum ar kĩnhkumrêx ne kam arkum pi'òk no'òk ne. Nhyim bep Korxikam me kwý ne me Metĩndjwýnh kabèn kupa'ã ar memã arènhõ ba. Nãm me 'èx ne we,

—Me mykã rènhbit ne Metĩndjwýnh kum me kĩnh ne meo kra. Ne ajte memã 'èx ne we,

—Metĩndjwýnh kadjy mrãnh djwýnhmã akabèn. Djãm abènjadjwýr got ga katàt Metĩndjwýnhmã amijarê? Dja ga kadjy mrãnh djwýnh kumrêxmã amijarê gè amũ kum ajarê, ane. Kati, nãm me memã 'èx. Nhyim me kute mýjja krènmã nhyim me mebê mýjja pyman memã kum,

—Ë, kwãrĩk wãnh ja krèn kêt, ane.

Kam ne Paur arkum,

—Kwãrĩk wãnh atemã me kabènwã mar kêt. Nhyim bep Kritu ne kabèn mexkumrêx. Tãm gèdja gar 'ãno djan kabèn ma. Kritu ajbit kute me utàr. Kwãrĩk wãnh kadjy mrãnh djwýnhmã akabènwã wãm nõ. Kritu pydji ne kute me utàr. Kwãrĩk wãnh atemã 'ò jabej kêt. Ajbit ne Metĩndjwýnh djwýnhĩ ne mýjja kunĩ 'y ne kute me utàr. Nã, nhyim Jeju Bãmbê Metĩndjwýnh tãm ne amiwýr me bajo bõx. Kra

kukwakam amiwýr me bajo bõx ne me bajo òbikwakumrêx. Nãm ã Paur arkum pi'òk no'òko anen kam arkum ano. Tãm ne ja.

1-2 Ba ibê Paurmê gwaj bakamy Ximoximê ne bar ar amã pi'òk no'òk ne. Ibê Paur, Metĩndjwýnh kute ijã amim karõ nhyim Jeju Kritu kute ijanor ba itèm, ba, ba ne ba ar amã pi'òk no'òk ne. Krĩrãxbê Korxikam Kritu nhõ me ja, ò me mextire ja, ar aje amim Kritu markumrêx ne 'ã angrã tỳx ne Kritukôt aje abeno akamyja, ar amã ne ba pi'òk no'òk ne.

Gè Metĩndjwýnh ar ajo djuw mex, Metĩndjwýnhbê me Babãmmê krabê Bènjadjwýr Jeju Kritu ar ukaprikôt ar ajo djuw mex ne ar ar ajo ba, ne ar amã umar mex jarê gar adjumar mex ne ar aba.

*Paur kute Metĩndjwýnhmã arkam amikĩnh jarènh.*

<sup>3</sup> Bar ije Metĩndjwýnhmã ar ajo idjà'wýrkôt mã kum ar akam amikĩnh jarê. Bãmbê Metĩndjwýnh, gwaj banhõ Bènjadjwýr Jeju Kritu Bãmbê Metĩndjwýnh kumã ne bar amikĩnh jarê. <sup>4</sup> Mýkam ne bar kum ar akam ikĩnh jarê? Bir, nã gãm ar tu amim Kritu Jeju markumrêx ne kam kôt amã me jadjwý jabèkumrêx, amã ò me ja, ò me mextire ja jabèkumrêx bar arým kuman kam ikĩnhkumrêx.

<sup>5</sup> Be, kute ar amã mýjja mex djir ne gar kam ama. Metĩndjwýnh kute kãjkwakam ar amã mýjja mex djir ne katàt ar amã arènh, mýjja mex tãm ne gar aman tu amim kamnhĩxkumrêx ne kam kam ama. Ar aje mýjja mexkam amakkam ne gar tu amim Jeju markumrêx ne kam kôt amã ò me ja jabèkumrêx. Bir be, nã gãm ar Jeju'ã ujarènh nyja man tu amim kamnhĩxkumrêx. Jeju'ã ujarènhja ne katàt nõ. Kabèn punu kêt. Kabèn 'èxnhĩ kêt. Kam ne katàt nõ.

6-7 Be, Jeju'ã ujarënh ny arÿm wākam ar awÿr bōxwā pumū. Nām me pyka kunīkōt Jeju'ã ujarënh ajmā. Arÿm ne me o ajmā nhym me ar akudjwa arÿm kuman arÿm kum mÿjja mexbit kīnh ne ar o ba. Nām me mÿjja mexbit ma. Be, nām ã wākamdjwÿ ar amā arënh ane. Gar arÿm ã mÿjja mexbit maro ane. Krax kurūm ar aje mar totokbē ne gar ã amijo ane.

Epapraj ne ar amā Metīndjwÿnh jarënh o tē gar arÿm kōt maro tē. Nā, Epapraj ne ar amā Metīndjwÿnh djukaprī jarē. Metīndjwÿnh ne ukaprīkōt ar ajo djuw mex. Nhym Epapraj ar amā ukaprī jarē gar kam arÿm tu amim markumrēx. Nā gām ar anhōkre kadjwÿnhbē,

—Nā, mrāmri ne arÿm Metīndjwÿnh djukaprīkumrēx ne ja, ane. Nā, Epapraj ne ar amā arē gar maro tē. Ar imā Epapraj kī:nhkumrēx. Nām ar ikōt ãpēnh ar ba. Mrāmri Kritu nhō ãpēnhkumrēx ne kum ãpēnh ar ba ne kute kanga kētkumrēx. Nām wām ar akam bōx ne ar ikōpdjī'ã ar ãpēnh ba.

<sup>8</sup> Be, Epapraj, ta ne ar imā ar amex jarēn ar imā,

—Ota arkum aben jabēkumrēx. Metīndjwÿnh Karō ne abenā arkum karō nhym ar arÿm kum aben jabēkumrēx, ane. Nām ã ar imā ar ajarënh ane.

<sup>9</sup> Bir be, kam ne bar mā kum ar ajo a'uw. Epapraj kute ar ajarënh bar ije mar totokbē ne bar Metīndjwÿnhmā ar ajo idjā'wÿr ry typydjī. Nā bām ar kum ar ajā,

—Dja ga prīne arkum 'ã karō gē ar kuman akabēnkōt ar amijo ba. Dja ga Akarōo prīne ar no bō, Akarōo ar no bō gē ar prīne akukrādjà ma. Nā bām ar ã kum ar ajo idjā'wÿro ane.

<sup>10</sup> Bir be, dja Metīndjwÿnh prīne ar amā ar adjāpēnh'ã karōn ar ano bōn ar amā amikukrādjà jarē gar kam arÿm mā kōt amijo aba

mextire gē Bēnjadjwÿr ar akam kīnhkumrēx. Ga kam ar amā mÿjja mexbit kīnh ne ar o aban ajte Metīndjwÿnh maro tē:n amū maro ajkamēn mar rax ne.

<sup>11</sup> Gēdja Metīndjwÿnh prīne ar ajo tÿx. Djām uma ngri got. Uma raxo kute mÿjja kunī jakrenh. Ta tÿxo godja prīne ar ajo tÿx ne, ta mexo prīne ar ajo mex ne. Ga kam ar akrānmā amijo aba. Kwārīk wānh gē te mÿjja punu ar akam apōx nār kon ar akaprī ar akam apōx gar mā Jejukōt ajkamēn tu akrānmā amijo aban angryk kēt ne tu akīnhkumrēx. <sup>12</sup> Ne tu Jeju Bāmbē Metīndjwÿnhmā amikīnh jarē.

Bir, mÿkam? Bir, arÿm ne gwaj bajo mex. Gwaj bamex nhym kute o me mextire jamē ro'ã gwaj bamā mÿjja nhōrmā. Kute o me jamā mÿjja mextire djir ja tām gēdja gwaj baro'ã gwaj bamā kungrà. Ō pykakam a'ubit, Ō pykakam me axwe 'ō kēt, mÿjja punu 'ō kēt tām'ÿr dja gwaj bōx nhym kute gwaj bamā mÿjja ngrānh ne kam ar kute gwaj bajo bamā. Kadjy ne gwaj bajo mex ne.

<sup>13</sup> Be, arÿm ne mrāmri tu gwaj bapytārkumrēx. Amrēbē ne Xatanaj ar gwaj bajo ba gwaj kam bamā bajaxwebit kīnh ne ar o baba nhym kam kute mrāmri akamāt kō tykkam kute ar gwaj bajo ba pyrāk. Nhym arÿm Metīndjwÿnh kubē gwaj bapytā nhym arÿm wānh ar ba. Arÿm tu Xatanajbē gwaj bapytārkumrēx. Xatanaj kute ātykri ar gwaj bajo bajabē ne arÿm gwaj bapytā nhym Kra arÿm ar gwaj bajo ba. Bām kum Kra kīnhkumrēx ja ta ne arÿm ar gwaj bajo ba.

<sup>14</sup> Nā, Bām ta Xatanajbē gwaj bapa 'amÿ. Amrēbē Xatanaj ajbit ar gwaj bajo ba nhym kam Bām kubē gwaj bapa 'amÿn gwaj bajo katon gwaj bajaxwe tu o aknon gwaj bajo ba. Kra tyk ne kamrō bikapīnkōt ne

Bām gwaj bapytàn gwaj bajaxweo aknon tu mar kêt ne.

*Kritu kute raxo katàt me kunĩ jakrenh.*

*Djur 1.1; Kar 10.36; Kor 2.9; Idja 1.2*

<sup>15</sup> Nà, kra ta ne memã Bāmo amirīt ne. Djām me kute noo Metĩndjwỳnh pumũnh got. Me kute noo omũnh kêt. Nhyam kam kra ta memã Bāmbê Metĩndjwỳnh amirīt ne. Amê ar kute aben pyrāk. Ar amê tāmỹ. Nhyam kam kra ta memã Bāmo amirīt ne. Ne kam ajte kubê Metĩndjwỳnh Krakam ta ne õ mỳjja kunĩ djwỳnh, mỳjja kunĩ nhõ bẽnjadjwỳr.

<sup>16</sup> Ta ne kute mỳjja kunĩ 'yr djwỳnh. Bām kabẽnkõt ne mỳjja kunĩ 'y. Kàjkwamê pykakam mỳjja ja kunĩ 'y. Mỳjja me kute noo omũnhjamê mỳjja me kute noo omũnh kêtjamê, tām ne kunĩ 'y. Me karõ nhõ bẽnjadjwỳrmê kadjy mrãnh djwỳnh nhõ bẽnjadjwỳrmê mebhẽngõkre\* nhõ bẽnjadjwỳr rũnhmê bẽnjadjwỳr krymê mỳjja kunĩ ne amim ipêx ne. Bām kabẽnkõt amim ku'y. Nām prĩne amim mỳjja kunĩ 'y, prĩne o atom, kam ne õ mỳjja kunĩ djwỳnh, ta õ mỳjja djwỳnh.

<sup>17</sup> Adjākam, mỳjja kator kêtiri ne Jeju ar tĩn ne ba. Djām pykabê mỳjja ta ar ba? Kati, ta ne kute mỳjjao ba djwỳnh ne kam kute mỳjja 'õ kanga kêtumrêx. Kute mỳjja kunĩ 'yrkam ne kute mỳjja 'õ kanga kêt. Kra ta ne ar mỳjjao ba. Nhyam mrãmri mỳjja tu kunĩ rã'ã: rã'ã.

<sup>18</sup> Nhyam ajte Krabê Jeju ta ne õ me ja kadjy bẽnjadjwỳr. Me kute amim Jeju mar ne kõt amijo baja me tām ne me kute Jeju nhĩ pyrāk. Nhyam bep Jeju ne kute krã pyrāk. Jeju ne kam õ me ja kadjy bẽnjadjwỳr. Ta ne kutewa ne kam amikõt mỳjja kunĩ apõxo tẽ. Ne

kubê Metĩndjwỳnh krakam kumrêx me tyk kurũm tĩn ne kato. Kam ne ajbit pydji raxo kute mỳjja kunĩ jakrenh, raxo mỳjja kunĩmã wa.

<sup>19</sup> Kubê Metĩndjwỳnh djwỳnhĩ. Apỳnh Ar kubê Metĩndjwỳnh djwỳnhĩ. Kra kubê Metĩndjwỳnh djwỳnhkumrêx. Metĩndjwỳnh ne Kramê kute aben pyrāk'ã amim karõ nhyam kam Kradjwỳ kubê Metĩndjwỳnh djwỳnhĩ. Ar amê kubê Metĩndjwỳnh djwỳnhĩ.

<sup>20</sup> Bir be, Metĩndjwỳnh ta ne amim Kra'ã karõ, krakõt kute amim mỳjja kunĩ õbikwamã, pykakam mỳjja nar kàjkwamam mỳjja, kunĩ kute o õbikwamã. Mỳjkõt? Krakõt, kra ne me kadjy pĩte'ykam tyn kamrõ ajkapĩ nhyam kam kõt Bām memã kabẽn mex jarẽ nhyam me arỳm umar mexbit ma.

*Metĩndjwỳnh kute meo õbikwa.*

<sup>21</sup> Amrêbê ne gar Metĩndjwỳnh akurê djwỳnh. Ar aje ajaxwekõtbit ajamak bẽn ne aje mỳjja jaxwebit ar o abakam ne gar o akurê djwỳnh. <sup>22</sup> Nhyam bep ajbir ne Metĩndjwỳnh ar ajo õbikwa. Nã gãm ar te amã kurê nhyam Metĩndjwỳnh tu ar ajo õbikwakumrêx. Kra ne me kadjy amijo kubẽngõkren ruwn kam ty. Nhyam kam kõt Metĩndjwỳnh ar ajo õbikwakumrêx. Mỳj kadjy ne ar ajo õbikwa? Bir, kute amiwỳr ar ajo bõx, gar kabem aku'êmã. Ar mrãmri Metĩndjwỳnh mexo amextire ne ajmã akute kêt ne ar aba ne ar akam mỳjja punu 'õ kêtumrêx ne kabem aku'êmã. Kadjy ne Metĩndjwỳnh ar ajo õbikwa, godja gar arek o tẽn kanga kêt jabej. <sup>23</sup> Godja gar arek aje Jeju 'ã angràn mrãmri adjām tỳx ne aje kanga kêt jabej ne kam ajte amijã kamnhĩxbê kam amak ar o aban kanga kêt jabej. Nã gãm ar arỳm Jeju'ã ujarẽnh nyja man kam amim kamnhĩx ne kam kam

\* **1:16** Apỳnh me õ pyka djari kunikõt ne me kunĩ bẽngõkre. Kubekã jakamê me kakrãtykmê ne babẽngõkremê ne me kunĩ: bẽngõkre.

ama. Godja gar mrāmri arek kôt amijo atēm rā'ā ne aje kanga kêt jabej ne kam mrāmri arým 'ýr bôx. Djām ar gajbit ne gar Jeju'ā ujarēnh ma? Kati, pyka kunîkôt ne Jeju'ā ujarēnh mekôt ajmā. Ba ibê Paur ne ba memā Jeju kukràdjà ny'ā idjujarēnh mō. Idjâpēnh ne ja. Kam ne ba kâjbê memā 'ā idjujarēnh mō.

*Paur me kadjy àpēnh.*

<sup>24</sup> Ā idjujarēnh mō nhyh me arým kôt ijo ajkê ba itokry ne. Djām kôt ikapri? Arkati, ikînhkumrêx. Me akadjy ne ba itokry ne kam ikînh ne. Mete Krituo bikēnh nhyh tokryja 'ā ne me ijakre. Ba kam ba itokrykôt mete inhîo bikēnh ba, ba itokryjakôt ne ba Kritu tokry nhinomā rēnh tē. Jeju nhî kadjy, mete amim Jeju mar ne kute Jeju nhî pyrâkja, me kadjy ne ba itokryja. <sup>25</sup> Ne me akadjy idjâpēnhja. Metîndjwýnh ne me akadjy idjan imā idjâpēnh jarē. Ba kam me amā idjâpēnh ar iba. Mýj idjâpēnh nā? Bir, ije me kunîmā prîne Metîndjwýnh kabēn'ā idjujarēnh itēm nhyh me kunî kute marmā.

<sup>26</sup> Amrêbê ne me kunîbê Kritu apdju ne. Nām me bakukāmāre amikam kra jadjwýro tēm tâmtā: nhyh bipdjur rā'ā. Nhyh kam ajbir Metîndjwýnh arým memā o amirît, ta ò me mextire jamābit o amirît ne. Kute amim me ja'ā karôkôt ne memābit o amirît ne. <sup>27</sup> Amrêbê ne amim 'ā karô ne kam mebê udju: ne. Ne arým jakam memā o kato, ò me mextire jamābit ne o amirît ne. Mýj ne mekbê udju ne ajbir memā o amirît ne? Bir, Kritu me bakadjwýnhbê ýrja. Tām ne gu me ò mýjja mex'ā amím kamnhîx ne. Kritu me bakadjwýnhbê ýrkam ne myt kunîkôt mā me bamā mýjja mex ngā ba me ikînhkumrêx. Mā ne mýjja mexja kute? Bir, mýjja mex ja ne apêx prām kêtumrêx. Mýjja mex ja ne mexo kute mýjja kunî jakrenh, kute

me kute ò nèkrêxo amimexja kunî jakrenh mex ne. Dja mā amirît rā'ā ne. Djām me kwýmā ne o amirît ne? Kati, pyka kunîkôt ne ò me jamā o amirît ne.

<sup>28</sup> Bir be, kam ne bar mā me kunîmā Kritu'ā ajarē. Ar ikrā mekkôt, ar ikabēn mexo ne bar me kunîmā tîn jangijn me kunîmā Metîndjwýnh kabēn jarē. Ar ije Metîndjwýnhmā meo imôr ne kum me òrmā. Me kunî arým kute Kritu mar mex ne kute inomā mēnh, me tām ne bar ije Metîndjwýnhmā meo imôr ne kum me òrmā. <sup>29</sup> Kadjy ne ba idjâpēnhkam ityk djā kêt ne. Djām Kritu rerek got. Axwe týx ne ta týxo ijo tý:x ba kam me kadjy idjâpēnh ra:x ne.

## 2

*Kritu ajbit rax nhyh me kute ja mar kadjy ne Paur djâpēnh raxja.*

<sup>1</sup> Ê, ba ar amā arē, gar ama. Gora ar amā idjâpēnh raxjakôt ima. Krîraxbê Raodjikam ar jamē apýnh krî rûnh djari me jamē me aje te ipumûnh kêt ba akrân mā ar me akunîmā idjâpēnh ibaja pumû.

<sup>2</sup> Mýj kadjy ne idjâpēnh raxja? Ije ar amā týx jangjēnh gar ajte atýxmā. Ne ajte ar amā aben jabēn axikôt akabēn ne ar abamā. Ga kam ar aje mrāmri Kritu markumrêxmā, Metîndjwýnh kute prîne mekbê o bipdjurja ar aje mar ne aje katāt kôt mar ar o abamā. Mýj ne mekbê o apdju? Kritu. Kritu mekbê bipdjur ne gar aje marmā. Me kute Kritu mar rax ne kute mrāmri me ò nèkrêx rûnh pyrâk. Dja gar ā Kritu mar rûnh ano. Kadjy ne idjâpēnh raxja.

<sup>3</sup> Nà, Kritu pydji ne kute amikadjy memā no mex jangjēnh djwýnh. Ajbit kute memā Bämmē ar kukràdjào amirît, kukràdjà bipdjurjao amirît nhyh kôt me arým ò mýjja mex maro tē, ò mýjja mex maro tēn kam kôt no mex. Nhyh kam apýnh me kute



Metĩndjwýnh nhõ mýjja mar djari mrãmri kute õ nèkrêx mextire ja pyræk. Be, ga Kritu pydji kute amikadjj memã ne mex jangjênh nhyh me no mex ne kute õ mýjja marja pumũ. <sup>4</sup> Atemã 'õ kêt. Ta pydji ne kute Bãmo amirĩt. Ê, me'õ kute ar anoo biknor karõ ne ba ar amã katåt 'ã ajarê. Me 'êx ne kute kabên punuo amikabên mex ne o kute ar anoo biknor karõ ne ba ar amã ane.

<sup>5</sup> Nãm te jãnh prãme ba amybymbit imã ar akĩnh ne ar amar rã'ã. Arým ne ba ar aman kam ikĩnhkumrêx ne. Nã gãm ar amim Kritu markumrêx ne 'ã angrã týx ne amã me uma kêt ne kanga kêtumrêx ne 'ãno dja, ne akrãnmã aben mẽ ar aba. Ba kuman kam ikĩnhkumrêx ne.

*Ar kute Kritubit mar kadjj.*

<sup>6</sup> Bir be, ar aje Kritu Jejuo anhõ Bẽnjadjwýrkam ã kôt amijo abao ane, anhõ Bẽnjadjwýr Jejukôt ã amijo abao ane. <sup>7</sup> Dja gar ã amũ Kritu maro abikamênhõ atêm kute mrãmri ne pĩ abatãnh kadjj kute pykamã arê ngjênh ne kute pyka 'amýnh týxja pyræk. Dja gar ã amũ Kritu maro abikamênhõ atêmo ane, ne ã Kritu 'amýnh týx ne 'ãno adjãmo ane. Ne amrêbê ar aje amim Kritu marja arek o tẽ. Me kute ar amã arênhkôt dja gar arek o anhýro tẽ. Dja gar ã o anhýro atêm rã'ãn prĩne mar týx ne. Ne kam Metĩndjwýnhmã amikĩnh jarê, ne kum amikĩnh jarênh 'ãno dja.

<sup>8</sup> Dja gar aminêje me kabên punuwã pumũ. Dja me kabên punu 'êx ne amijo kabên mex ne mõn ar anoo akno. Djãm me kabên punuja kabên katåt got, kabên mex got? Kati, me kabên kajgo mexi. Me ta ne me ar abenmã 'êx ban amũ abenmã arênhõ mör tãmtã nhyh ĩ kamingrãny amũ abenmã arênhõ mō. Djãm Metĩndjwýnh kabênkôt ne wã? Kati, me ta kukràdjãkôt ne me kabên kajgowã.

Nhyh bep atemã ne Kritu kabên katåtã. Mrãmri katåt arê.

<sup>9</sup> Kubê Metĩndjwýnh djwýnhkumrêx. Amijo kubêngökren me bawýr pykamã ruw. Kubêngökrekam ne kubê Metĩndjwýnhkumrêx. Æm Metĩndjwýnh djwýnhĩ. Ta ne kubê Kritu. <sup>10</sup> Ne ta gwaj bakadjwýnhbê nhýn gwaj bamã umar mexti:re jarê. Gwaj bamã umar mextire jarê gwaj kam bakĩnhkumrêx. Mã ne gwaj bakĩnh kute? Bir, mrãmri me kute õ nèkrêx rũ:nhkam kĩnhja pyræk. Dja gwaj Jejukam bakĩnhõ bamã nèkrêx kĩnhja jakrenh mex ne. Ê, mrãmri ne Kritu raxo kute me bẽnjadjwýr rũnhmê me bẽnjadjwýr kry kute meo baja kunĩ jakrenh. Ta ne umar mexo ar gwaj bajo ban gwaj bajo kĩnhõ ba, gwaj bamã kĩnh jangjênhõ ba.

<sup>11</sup> Arým gwaj baje Krituo aminhökam ne gwaj atemã bakukràdjã. Gwaj bakukràdjã tũm, gwaj bajaxweja ne gwaj arým tu wãnh kangan kum banhire. Ne kam gwaj bamex kute mrãmri ne mekbê idjaer kute me my nhinhu kã rênh nhyh me kam mex ne kĩnhja pyræk. Me bajtem kute Metĩndjwýnh nhõ me ja mar kadjj ne me me my nhinhu kã rê. Nãm me me my nhinhu kã rên mũm kurên kam kĩnh nhyh Kritudjwý arým gwaj bamã gwaj bakukràdjã tũmja mũm ã rênho ane gwaj kam ã badjwý ã bamexo ane nhyh Metĩndjwýnh arým gwaj bakam kĩnh ne.

<sup>12</sup> Jeju akubyn tĩn ne me tyk krã kurũm kator'ã ne ngõnhmã gwaj bajangjênhja amijakre. Ngõnhmã gwaj bajangjênh ne kute Jeju tyk ne pykakam ir pyræk. Nãm me ã ngõnhmã gwaj bajangjênhõ ane. Ngõnhmã gwaj bakrã jangjênh, gwaj kam akubyn bakrã apõx ne kute Jeju kênkre kurũm akubyn tĩn ne kator pyræk. Metĩndjwýnh ta ne týxo akubyn Krituo tĩn, me

tyk kurũm Krituo kato. Gwaj kam arũm tu amim kamnhĩxkumrẽx nhym kam ngõ kurũm me bakator kute gwaj badjwý akubyn batĩn pyræk, kute ta tũxo Kritumẽ ro'ã gwaj bajo tĩn pyræk. Kam dja gwaj bakukràdjã nykõtbit amijo baba.

<sup>13</sup> Bir be, amrẽbẽ ne gwaj baje batyk pyræk ne ar baba. Nã gwaj bajaxwekumrẽx ne mũm amikukràdjã tũm rẽnh kẽtkam kute me batyk pyræk. Nhym bep ajbir ne Metĩndjwýnh gwaj bajaxwe kunõ biknorkumrẽx. Nhym kam kute Kritumẽ ro'ã gwaj bajo tĩn pyræk.

<sup>14</sup> Arũm ne Metĩndjwýnh Mõjdjẽ kukràdjão apẽx. Mõjdjẽ kute memã “Kwãrĩk wãnh” anhýr ne 'ã pi'òk no'òkja arũm o apẽx. Nã gwaj te kukràdjãkõt amijo babamãn ãm mã bajamakkre kêt. Nhym kam Metĩndjwýnh òkre kadjwýnhbẽ,

—Ikra tykkõt, mete pĩte'ykam kum o i'èk nhym tykkõt dja me tu amim ikamnhĩxkumrẽx ba kam me'ã mex rẽ. Nãm me te Mõjdjẽ kukràdjãkõt te o anen mar kêtumrẽx ne, ane. Nãm ã Metĩndjwýnh o anen ã Mõjdjẽ kukràdjão apẽxo ane.

<sup>15</sup> Be, Kritu tykkõt ne Metĩndjwýnh me karõ punu rũnhjadjwýo ajkẽ, me karõ punu nhõ bẽnjadjwýrmẽ, me tãm ne Metĩndjwýnh meo ajkẽ. Nãm me amipardja'ã me pa 'amýn kam meo kurwýko ban meo bõx. Me ipõkri ne me meo kurwýko ban meo bõx ne kam prĩne mekbẽ àbẽr djã kunõ apdjun kam memã me uma ngrãnh mex ne. Nhym me kunĩ kõt omũn arũm kõt kuma. Nãm ã Kritu tykkõt ã Metĩndjwýnh me karõ punu rũnhõ bikẽnhõ ane.

<sup>16</sup> Metĩndjwýnh kute me karõ punu rũnhõ bikẽnhkam kwãrĩk wãnh õ kukràdjãja mar kêt. Nãm me Mõjdjẽ kukràdjã kupa'ã mekbẽ mýjja pyma ar o ba ne memã amiangri'ã apnẽ. Bir be, kukràdjã kakritja dja gar mar kêt. Metĩndjwýnh arũm kute mýjja

tũmjao apẽxkam dja gar mar kêt. Kwãrĩk wãnh ga arĩk ar adjãkur abakam gẽ me'õ adjãkur mýr jabej ar amã kabẽn 'õ jarẽnh kêt, nãr kon, mýjja akõm mýr jabej gẽ me'õ ar amã kabẽn 'õ jarẽnh kêt. Nãr kon, me rer mex 'òkam, mytyrwý 'òkam, akati 'òkam, me rer mexo mõrkam, mekõt ar aje amijo anhýr kẽtkam, kwãrĩk wãnh gẽ me kam ar amã kabẽn 'õ jarẽnh kêt. Kwãrĩk wãnh mýjja kukràdjã ja mýr jabej gẽ me'õ ar amã àkrẽ kêt.

<sup>17</sup> Kritu bõx kेत्रi ne me kukràdjã ja arĩk kam ar ba. Nãm me Kritu kutẽp ar kukràdjã jabito ba. Kajmã'ã ari o ba nhym kam bõx ne arũm o ajngrã, kukràdjã tũmja tu mũm kumẽ.

<sup>18</sup> Kwãrĩk wãnh me 'èx ne kute amijo pijãm ne arĩk Metĩndjwýnh kadjy mrãnh djwýnhmã kabẽnja wãnh nõ. Nãm me kum mýjja ja kĩnh ne 'ã ar amã apnẽ, ar aje me kudjwamã. Nãm we me,

—Dja gar me ikudjwa kadjy mrãnh djwýnhmã amijarẽn kum rax jarẽ nhym arũm Metĩndjwýnh kum ar akĩnh. Dja ga ar o anhýr kêt nhym arũm kum ar akĩnh kêt. Djãm abẽnjadjwýr got ga tu Metĩndjwýnhmã akabẽn, ane. Kati, nãm me 'èx. Kwãrĩk wãnh wãm nõ gẽ me ja ar anoo biknor kêt.

Nãm we me biptirkam mýjja pytiro ikwãn we ar amã kõt 'ã ujarẽnh ba. Kati, nãm me 'èx. Me ja ne me kajgo mex ne kam we ar amã mýjja jarẽnhõ ban we amijo àmra ba. Kati, nãm arĩk ar ta amijo 'èx ne amijaxwekõt amiman kam we amijo àmra ba. Kati, nãm me 'èx.

<sup>19</sup> Ne arũm Kritumã iren 'amýnh kêt.

Kritubẽ Metĩndjwýnh djwýnhkumrẽx. Ta ne wýnhĩ. Kute ta krã pyræk. Me baje Kritu mar ne gu me baje ĩ pyræk. Nhym bep Kritu ta ne kute krã pyræk nhym me kam iren 'amýnh kêt. Nã gu me bakukràdjãri ajkanhõk ne kam tu batypydjĩ.

Apÿnh kêtê. Me bakukràdjâmê me bakudjêk kunïo aben pydjìn me bakràmä kumê.

Nãm ä Kritu ta kubê kräkam ta ïo djuw mexo têt, me bajo djuw mexo têtmo ane. Kritu ne ta ò me jamã bënjadjwÿr ne kam amim meo atom ne meo djuw mex. Te apÿnh me ba djäri baba nhym tu amim me bajo atom, me bajo aben pydji gu me batypydjìn aben mêt ar baban kam kôt bamã aben jabên kam baro'ã Kritu maro têt. Metïndjwÿnh ne amim me bajã karô gu me kam kãjmã kôt ä maro batêtmo ane.

<sup>20</sup> Arÿm ne gar Kritumê ro'ã ty nhym arÿm ar amã mÿjja kukràdjã kakritja mÿm kumê. Kritu kute ar amã mÿjjao apêx gar kam mã ajte amã akukràdjã kakrit kÿnh. Mÿkam ne gar akubyn mã amã pyka jakam me kukràdjã jabit kÿnh ne kôt ar amijo aba? Nãm we me,

<sup>21</sup>—Kwãrik wãnh byr kêt,

—Kwãrik wãnh kakin kêt,

—Kwãrik wãnh kupên kêt, ä we anhÿr ar ba gar kôt amijo aba.

<sup>22</sup> Djãm Metïndjwÿnh kukràdjã ne ja ne me we ar “Kwãrik wãnh” ar o ban mekbê mÿjja puma ar o ba? Kati, me ne me ane. Kukràdjã tÿm, kukràdjã kakritja arÿm kêt. Metïndjwÿnh arÿm kukràdjã tÿmjao apêx gu me arÿm kôt amijo baba kêt. Mrãmri kute me badjäkur djã pyrãk. Tebê dja me batikkekam apêx ne me banhÿ'ã apêx ne me bakràkã'ã mrã. Nãm ä kukràdjã kakrit, kukràdjã tÿmja apêxo ane.

<sup>23</sup> Me kute mebê mÿjja pymaja ne me 'êx ne kabên mex ne. Bep kati, nãm me tu ar mÿjjamã amijarênho ba, mÿjjao Metïndjwÿnh ne ar kum amijarênho ban 'ã memã apnê nhym me kudjwa. Nãm we me 'êx ne we ar amijo pijãmo ban ar ta aminhÿ djwÿnho bikênho ba. Me ta kute we amibê axwe rênhmã prïne amijo bikênho ba.

Metïndjwÿnh kute memã ja jarênho kêt. Me ta ne me arÿk ta kute amijaxwe bïnmã apÿnh amijo ba djäri amijo ba. Nãm me amititik ne kam amijo bikênho mexo ba. Kati, äm kajgo mexi. Nãm me te aminhÿ djwÿnhja te o ane nhym äm mã axwe. Djã nãm me amibê axwe kurê? Kati, nãm me te o anen mã axwe.

### 3

*Ar kute katät amijo bamã arkum 'ã karô.*

<sup>1</sup> Gora ar Kritumê ro'ã arÿm akubyn atïnkam, ngô kurÿm ar ajapôx kute akubyn atïn pyrãk, kam dja gar kãjkwakambit mÿjja jabej ajkam ama. Kam ne Kritu nhÿ, Metïndjwÿnh djubôk'ãnh nhÿ. <sup>2</sup> Dja gar kãjkwakam mÿjjakôtbit ajamak bën. Kwãrik wãnh pykakam mÿjja mar kêt.

<sup>3</sup> Kute Kritumê ro'ã arÿm atyk pyrãk. Djãm me tykkam kute pyka jakam mÿjja mar got. Bir be, arÿm Kritumê ro'ã ar atyk ne ro'ã akubyn atïnkam, dja gar jakam, pyka jakam, Kritumê atypydjìn ari ar aba. Nhym kam Kritu kadjwÿnhbê, Metïndjwÿnh ar ajo bipdjur mex ne, kute apytär mex kadjy. Kam dja gar kãjkwakam mÿjjabit ma. <sup>4</sup> Be, Kritumê ne gar atypydjìn ar aban kam tu atïnkumrêx ne. Gêdja Kritu akubyn raxo amirÿt ne kam abêngôkredjwÿ\* arÿm araxo amirÿt.

<sup>5</sup> Bir be, kam dja gar arÿk abawã tu krã'yrkumrêx gê on wãnh nô. Kwãrik wãnh gar krô'ã aprô kêt, nhym me nijadjwÿ krô'ã mjên kêt. Ar aprô prãm, nhym me ni mjên prãmja kwãrik wãnh nô. Gê me my prô prãm ne kurê ar ba, nhym me ni ar mjên prãm ne kurê ba kwãrik wãnh nô. Me kum mÿjja punubit prãmja kwãrik wãnh nô. Ne me kum nëkrêxbit prãmja

\* 3:4 Apÿnh me ò pyka djäri kunïkôt ne me kunï bêngôkre. Kubêkã jakamê me kakràtykmê me babêngôkremê ne me kunï: bêngôkre.

kwārīk wānh nō. Nām me kum nēkrēxbit kīnh ne kam kōtbit amak bēn ne kam kum Metīndjwýnhja mar prām kētkumrēx. Me kute mýjjao Metīndjwýnh karō nhípēx ne kute we kum ar amijarēnho baja tām ne Metīndjwýnh kum kīnh kētkumrēx. Nhym me kum nēkrēxbit prāmjadwý kum kīnh kētkumrēx. Amē punu nhym kam kum kīnh kēto aben pyrāk ne. Kam ne ba ar amā,

—Tām gēdja on wānh nō, ane.

<sup>6</sup> Mýjja ja kunīkōt ne Metīndjwýnh mekam ngry:k ne. Godja me kute mýjja jao ban kam kute Metīndjwýnhkōt amijo ba kētkumrēxja, me tām gēdja Metīndjwýnh mekam ngryk ne ī memā o pānh. <sup>7</sup> Nhym bep amrēbē ne gar gadjwý ā amijo aba punuo anen ajbit ma.

<sup>8</sup> Bep jakam dja gar on mýjja ja kunī kanga. Kwārīk wānh gar angyrk kēt ne memā adjākjēr kēt ne aje amipānhmā mar kēt ne me kāmex jarēnh kēt ne ajajkwakam akabēn punu 'ō jarēnh kēt. Me my kute me nire kukrādja'ā me aprýja dja kēt. Nhym me niredjwý kute me my kukrādja'ā me aprýjadwý dja kētkumrēx.

<sup>9-10</sup> Kwārīk wānh gar akukrādja tūm jakōt abenmā ajēxnhī kēt. Arým ne gar akukrādja tūmja mūm kunī mē. Ar aje akukrādja tūmkōt aje abenmā ajēx aba ja ne gar arým nhī'ām kunī mē. Pānh ne gar akukrādja nykōt mýjja mexbit ma. Metīndjwýnh kute ar ajo ny nhípēx djwýnh ne ar ajo nyo tē, ar aje Metīndjwýnh mex pyrāk kadjy ne ar ajo nyo tē, prīne ar aje Metīndjwýnh markumrēxmā ne ar ajo nyo tē.

<sup>11</sup> Metīndjwýnh kute meo nykam ne me arým abenmā kre rax kēt ne tu arým abenā tým ne typydji. Arým Kritukōt me apýnh ba djāri kute abeno kurē djwýnh kētē ne kam arým tu abeno kamyn abeno ōbikwa. Me bajtemmē mebé

idjaermē, me tām ne Metīndjwýnh arým meo aben pydji. Ne ajte me my nhinhu kà rēnhmē me mykā tāmē, me tām ne Metīndjwýnh ajte meo aben pydji. Me kute arým me krōrmē me krōr kēt apýnh ō pykakam ba djāri bajamē, me tām ne Metīndjwýnh arým meo aben pydji. Me kute me pa 'amýnh nhym me memā āpēnh kajgo ar bajamē me kute memā o pānh kadjy āpēnhjamē, me tām ne arým Metīndjwýnh meo aben pydji. Nā, ne arým memā me kute abeno kurē djwýnhja arým o ajngrā. Kritukōt ne me aben pydji ne kam kute Kritubit mar, arým ajbit kute amikajmātā mar. Djā nām kum me'ō kīnh kēt ne? Kati, nām kum me kunī kīnh ne me 'āno dja. Nām me 'āno āmo aben pyrāk ne.

<sup>12</sup> Ga Metīndjwýnh kute amijo ar apytār ne arým kute amim ar ajo bikjēr ne kam kute ar ajo mex ne kum ar ajabēkumrēxja pumū. Kam gēdja gar tu amim akukrādja ny man kōt amijo aba. Gora ar amā me kaprī ne adjukaprī ne ar meo aba. Kwārīk wānh ar ajō apydji arax prāme ari aba kēt. Dja gar memā aprī mex ne ar meo aba. Tu akabōt katin akrānmā ar meo aba. Be, mýjja mex ja dja gar ā maro anen kam tu kōt amijo aba.

<sup>13</sup> Gēdja me'ō ari kute anoknoro ba jabej kwārīk wānh ga kum adjākrē kēt ne mā kum akabēn mex jarē. Dja gar ā anen ar abeno aba. Dja gar abenkam amikrā rax jabej nār kon amikrā ngri jabej tu o aknon abenkam angyrk kēt. Gar Bēnjadwýr djwýnh arým ar aje kam amikrāja tu o biknorkumrēx ne ar akam ngryk kētja pumū. Dja gar ā anen ar aje abenkam amikrāja tu o abiknorkumrēx ne abenkam angyrk kēt.

<sup>14</sup> Gora ar mýjja ja kunīkōt amijo aban kam ajte iby amā aben jabē. Gora ikabēn ja ma. Ar amā aben jabēn ar abeno aba. Ar atypydji

djà ne ja. Ar amã aben jabên kam atypydjin kam amexkumrêx. <sup>15</sup> Djãm ar aje abeno ajtemmã ne Metîndjwýnh amiwýr ar ajuw? Kati, gar atypydjin aben kam adjumar mex kadjy ne amiwýr ar ajuw. Bir be, kam dja gar adjumar mexbit ma. Kritu ta umar mextire jao dja ar amã umar mextire jadjã ne o aben nêje me akukrà. Dja ta õ me umar mex djão prîne ar ajaên kam o aben nêje ar ajakre. Ê, gora ar Metîndjwýnhmã amikînh jarê.

<sup>16</sup> Gora ar prîne ajamakrekam Kritu kabên kunî nhôn kôt ar amijo aba. Ne akabên mexo abenmã Metîndjwýnh kukràdjã jarên o abenmã tîn jadjã. Ne Metîndjwýnh'ã angrer aba. Mebé idjaer nhõ me ngrer tûm jarên kam ajte Metîndjwýnh Karõ kute ar amã me ngrer ny jarênhjadwý jarê. Ne Metîndjwýnhmã ar amikînh jarê, angrerkôt kum akadjwýnhbê akînh jarê.

<sup>17</sup> Dja gar Bênjadjwýr Jekukôt amijo aban Jeju Bãmbê Metîndjwýnhmã amikînh jarê. Djãm ar akàtãm, djãm ar anhõ bênjadjwýr kêt dja gar adjàpênh punun akabên punu? Kati, ar abê Bênjadjwýr Jeju nhõ àpênhkam dja gar adjàpênh mexkumrêx ne akabên mex ne. Ar abê Bênjadjwýr Jeju nhõ àpênhkam dja gar anhõ bênjadjwýrkôt amiman kôt akabên mexkumrêx ne kôt adjàpênh mexkumrêx ne mýjja kunîkôt Jeju Bãmbê Metîndjwýnhmã amikînh jarê. Kritukôt kum amikînh jarê.

<sup>18</sup> Ê, ar apa, ar anire, arým ar amjênja dja gar amjên kabên man kôt amijo aba. Bênjadjwýr djwýnh kute ar amã ã anhýrkam dja gar ã amjên kabên mar ne kôt amijo abao ane nhym kam mexkumrêx ne.

<sup>19</sup> Ê, ar apa, ar amy, ar amã aprõ jabên kum akabên djã jarênh kêt ne kum akabên mexbit jarê.

<sup>20</sup> Ar apa, ar aprîre, gora ar ar anãmê ar abãm ar kabên man ar kabênkôt amijo aba. Ar kute ar amã kabên jarênhjakôt amijo aba ne o abiknor kêt. Nhym kam Bênjadjwýr djwýnh ar akam kînhkumrêx ne.

<sup>21</sup> Ê, ar apa, ar ajabatànhja, kwârîk wãnh gar akra arkum akabên kêt ne arkum ngryk jadjãr kêt. Arkum akabên mexbit jarê. Dja gar arkum adjàkrê nhym ar arým kaprî ne katàt mrãnhja kanga.

<sup>22</sup> Ê, ar apa, memã ar adjàpênh kajgo ar abawã, me kute ar ajo pãnh ne amim ar apa 'amýnh gar memã adjàpênh kajgo ar abawã gora ar pyka jakam ar apa 'amýnh djwýnhja kabên ma. Kute mýjja ar amã arênh kunîkôt dja gar kabên man kôt amijo aba. Djãm me kute ar apumünho ku'êkambit got gar memã adjàpênh mex ne, nhym we me ar akam kînhmã? Kati, me kãxãdjwý dja gar tu adjàpênh katàt ne. Ar amã Bênjadjwýr Jeju kînh ne amã umakam dja gar tu kum adjàpênh katàt ne.

<sup>23</sup> Gora tu ar adjàpênhkumrêx. Kwârîk wãnh gar adjàpênh punu kêt. Dja gar tu adjàpênh kunî amã kînh ne kupênhõ tẽ. Ne tu adjàpênh mexkumrêx ne katàt adjàpênh tẽ. Djãm pykabê mebêngôkre 'õbitmã ne gar apê? Kati, kàjkwa kam ar anhõ Bênjadjwýrmã ne gar apê. Kam ne ba ar amã katàt ar adjàpênh'ã karõ, ar aje katàt adjàpênhwão atëmmã ne ba ar amã adjàpênh'ã karõ.

<sup>24</sup> Gora ar ama. Bênjadjwýr djwýnh ta dja ar amã o pãnh. Kute õ me jamã mýjja mextire djirja dja ar amã kungã gar amim aby. Bir be, Bênjadjwýr Kritumã ar adjàpênhja man kam kôt kute ar apa 'amýnh djwýnhmã adjàpênh ar aba.

<sup>25</sup> Bep apýnh me axwe djãri gêdja Metîndjwýnh memã axwe pãnh jarênho tẽ. Amrêbê tñri axweri

gédja Metíndjwýnh kôt kum o pânĥ ne, tînri axwekam dja memã o pânĥo aben pyrãk ne. Djã nãm we,

—Ije bep tãmja ne ôbikwa krãptĩ ne kam bĕnjadjwýr rax. Kwãrik wãnh kum pânĥ jarĕnh kĕt. Ba 'uwtĩjamã pânĥ jarĕ, anhýr got? Kati, nãm tu memã pânĥ jarĕnh aben pyrãk ne. Ne me axwekam katãt memã o pânĥ.

## 4

*Me bĕnjadjwýr kute ô àpĕňho ba katãtmã.*

<sup>1</sup> Ē, ar apa, ar aje meo pânĥ ne amim me pa 'amýnh nhym me ar amã àpĕnh kajgo ar bawã, ar amã ne ba ikabĕn. Gora ar anhõ àpĕnhmã akabĕn mex jarĕn meo aba katãt. Ē, ar gadjwý ne gar kãjkwakam anhõ Bĕnjadjwýr. Gora ar ama. Tãm ne ja.

<sup>2</sup> Ē, ar apa, gora ar akupãnhãtã Metíndjwýnhmã akabĕn 'ãno dja. Gora ar Metíndjwýnhmã amijarĕnhkam amã adjukanga kĕt ne aje kum amijarĕnh ar o abakôt aje mýjja'ã 'wýrja tãm dja gar kam ama. Ne kum ar akabĕnkôt kum amikĩnhdjwý jarĕnh 'ãno dja.

<sup>3</sup> Kum ar akabĕnkôt ar badjwý kum ar ijo a'wý gĕ Metíndjwýnh mýjja kute ar ibĕ àptãrjao ajngrã bar tu memã Metíndjwýnh kabĕn jarĕ, memã Kritu jarĕ. Nãm mekbĕ apdju bar kam ije memã o amirĩtmã. Kam ne ba mekbĕ ijĕ djãkam idjãmja. Nã bãm ije memã Kritu jarĕnhõ itĕm katikôt nhym me mekbĕ ijĕ djãkam imĕ. <sup>4</sup> Bir be, kam gĕdja gar kum ijo a'wý, ije memã arĕnh ne ije katãt memã o amirĩtmã. Ije Jeju mekbĕ bipdjurja memã arĕnh ne ije memã mã o amirĩt nhym me kute katãt marmã. Nã, kadjy ne Metíndjwýnh amim idja, ije prĩne memã o amirĩtmã. Tãm ne ja.

<sup>5</sup> Be, me kãtãm kadjy, me kute Jeju mar kĕtja, kadjy dja gar

akrãnmã amijo aba mextire ne memã akabĕn mexbit jarĕ. Gĕdja aje Jeju'ã adjujarĕnh djã awýr bõx ga kam mekmã Jeju jarĕ.

<sup>6</sup> Gora akrãnmã memã adjujarĕnhõ akrĩ gĕ me ar amã,

—E kum goja ajte adjujarĕnhõ nhý. Ga nã gãm akabĕn mar prãmre, ane. Gĕdja me kute mýjja 'õ mar prãm jabej akukij ga kam memã katãt 'ã adjujarĕnhõ nhý. Be, tãm ne ja.

*Apýnh ôbikwamã kute kabĕn janor.*

<sup>7</sup> Ota me bakamy Xikiku dja ar amã prĩne ijarĕ. Gwaj bamã Xikiku jabĕkumrĕx tãm dja ar amã ijarĕ. Nã, nãm ikôt àpĕnh mexkumrĕx ne àpĕnh kanga kĕtkumrĕx. Bĕnjadjwýr nhõ àpĕnhkumrĕx ne ja. Nãm ar ikôt kum àpĕnh ar ba. Ta dja prĩne ar amã ijarĕ. <sup>8</sup> Kadjy dja ba ar awýr ano, kute ar amã ar ijarĕnh gar aje ar imar nhym kute ar amã kĩnh jadjãr gar ajte atýx ne akĩnhmã. Kadjy dja ba ar awýr ano. <sup>9</sup> Gwaj bakamy Ônemudjwý dja ba ano, wãm ar ro'ã ar ano. Gwaj bamã Ônemu jabĕkumrĕx, tãm dja ba ano. Nãm amim Kritu markumrĕx ne kanga kĕt. Ar ajõ 'õ. Be, ar ta dja ar ar amã jakam mýjja kunĩ jarĕ.

<sup>10</sup> Gwaj bakamy Arxakumĕ ar iro'ã mekbĕ ijĕ djãkam dja. Ne ar ajo aman wãm ar amã amijarĕ. Nhym Makudjwý kubĕ Banabe tãmdjwýja adjwýnhdjwý ar ajo aman wãm ar amã amijarĕ. Ē, arým ne ba ar amã 'ã karõ. Dja ar awýr tĕn bõx gar amiwýr o wadjãn kum akabĕn mex jarĕ. <sup>11</sup> Jejuw, mete kum Juxu jarĕnhja adjwýnhdjwý ar ajo aman wãm ar amã amijarĕ. Be, Arxakumĕ Makumĕ Jejuw ar ajbit ne Ar kubĕ idjaer ne kute amim Jeju mar ne ar ikôt àpĕnh ar ba. Ar kute mekmã Jeju jarĕnh nhym me kute amikajmãtã Jeju mar nhym Metíndjwýnh kute ar meo bamã ne

ar ikôt àpênh ba. Nãm ar ikôt àpênh mehkumrêxo ikĩnh ne.

<sup>12</sup> Epapraj, ar ajô 'õ ne kubê Kritu Jeju nhô àpênh ne ar ajo aman wãm ar amã amijarê. Nãm Metĩndjwýnhmã ar ajo à'wýr 'ãno dja. Tyk djà kêt ne ar ajo à'wýro ban kum,

—Ga dja ga aro tỳx gê ar ajã ngrà tỳx ne akanga kêt ne amar mex nhinomã kurê. Ga dja ga arkum 'ã karô gê ar kôt mrã, aje amin ar'ã karôkôt mrã. Nãm ã kum ar ajo à'wýro ane. <sup>13</sup> Be, ba ne ba inoo Epapraj pumũn kôt ar amã 'ã pi'ók no'ók ne. Mrãmri ne ar ajã àpnhĩx ne. Krĩraxbê Raodjikam ar jamê krĩraxbê Ijeporikam ar jamê me akun'ã ne àpnhĩx ne. Ba ne ba arým omũn ar amã 'ã pi'ók no'ók ne.

<sup>14</sup> Rukabê me kane djwýnh gwaj bamã kĩnhkumrêxjamê Temanhmê ar ar ajo aman wãm ar amã amijarê.

<sup>15</sup> Nã bãm Raodjikam gwaj baje abeno bakamyo ama ne. Gora arkum ijarê. Nĩpa nhũrkwãkam ar kute Jejukôt aben pydjiwãmê Nĩpa bêngôkremê ne ba o ama ne. Ar wãmãdjwý ijarê.

<sup>16</sup> Ê, ije ar amã pi'ók no'ók nhõrwã gar omũ:n omũnh pan kam amũ krĩraxbê Raodjikam ar kute Jejukôt aben pydjiwãmã angã gê kam ar amipãnh ar amã wã ngã. Dja ba ije wãm ar amã pi'ók no'ók nhõrwã gar ga wã pumũn amũ ar wãmã angã gê Raodjikam ar wã amrê amipãnh ar amã wã ngã. Gar aprakamã omũ.

<sup>17</sup> Ê, Akipumã kum,

—Gora Bēnjadjwýr kute amã adjàpênh jarēnhja on o tēn inomã amē, ane.

<sup>18</sup> Ba ibê Paur ne ba wãm ar amã ikabēn ne. Nhym bep ngrire ja ne ba ba inhikrao ipēx ne. Nã bãm ar ajo aman kam wãm ar amã amijarê. Gora mekbê ijê djakam idjãmja man o abiknor kêt. Gê Metĩndjwýnh

ukaprĩkôt ar ajo djuw mex. Tãm ne ja.

## **Paur Kute Texarônikakam me jamâ pi'ôk kumrêx no'ôk ne ja.**

Paurmê ikjêbê Xira krî nhidjibê Pirpukam bôx ne mekmâ Jeju jarê. Nhyim me kwý kum Jeju'ã ujarênh mar prâm kêt ne prîne aro ajkên kam Ar kubê ijê. Nhyim akati nhyim me ajte bôm ar kumê nhyim ar mã me kurûm tê. Mã me kurûm tên kam krîbê Texarônikakam bôx ne ajte mekmâ Jeju jarê. Nhyim me kwý rax ne tu Jejuo aminhõ. Nhyim kam mekbê idjaer ajte mekmâ ar kurêtuw. Nhyim kam Paur krîbê Texarônika kurûm tê. Tên atemâ krî 'ôkam bôx. Nhyim Texarônikakam ar kute Jejuo aminhõja arek abeno bikprônho dja. Nhyim Paur ar kurûm tên aro aman te akubyn ar'ýr têm prâme ne kam Ximoxi ar'ýr ano. Texarônikakam ar kute Jejuo aminhõja kute arek Jeju kabênkôt ar amijo ba rã'ã jabej kute ar omûnhmã ar'ýr ano.

Nhyim Ximoxi ar'ýr tên bôx ne ar omûn kam akubyn Paur'ýr tê. Akubyn tê:m bôx ne Paurmã ar arê,  
—Ăm arkum Jeju kînhkumrêx. Onîj ar arek Jeju kabênkôt ar amijo ba, ane. Nhyim kam Paur kuman kam kînhkumrêx ne arkum pi'ôk no'ôk. Mýj'ã ne Paur pi'ôk no'ôk? Bir, Paur kurê djwýnh ne Paur'ã kabên ne. Nãm me,

—Paur ne me amã 'êx. Nãm me amã akubyn têmmã amijarê. Nãm 'êx. Nãm arîk ar ba. Me bôx kêtja pumû, ane. Nãm ã Paur kurê djwýnh 'ã kabên ane. Nhyim Texarônikakam ar ja arým me tyk jabej Paur kukij. Ne kam ajte Jeju akubyn bôx jabej kukij nhyim Paur ja kunî'ã pi'ôk no'ôk ne. Tãm ne ja.

<sup>1</sup> Ba ibê Paur ne ba ar amã pi'ôk no'ôk ne. Xiramê Ximoximê ne bar ar amã pi'ôk no'ôk ne. Krîraxbê

Texarônikakam ar aje amim Jeju mar ne kôt aben pydjiwãmã ne bar pi'ôk no'ôk ne. Metîndjwýnhbê ar Babãm ne kam krabê Bênjadjwýr Jeju Kritu arkôt ne gar aben pydji, ar amã ne bar pi'ôk no'ôk ne.

Gê Metîndjwýnh ar ajo djuw mex, Metîndjwýnhbê gwaj Babãmmê Bênjadjwýr Jeju Kritu ar ukaprîkôt ar ajo djuw mex ne ar ar ajo ba ne ar amã umar mex jarê gar adjumar mex ne ar aba.

*Paur kute Metîndjwýnhmã arkam amikînh jarênh.*

<sup>2</sup> Nã bãm ar Metîndjwýnhmã ar akam ikînhkumrêx jarê ne kum ar ajarênh 'ãno dja. <sup>3</sup> Mýkam ne bar ar akam ikînh? Bir, ar aje tu amim Jeju markumrêx ne arým kôt aje amijo abakam ne bar ikînhkumrêx. Ne ajte ar amã Metîndjwýnh jabêkôt arým kum adjapênh raxkamdjwý ne bar ikînhkumrêx. Ne ajte ar aje arým Jeju Kritu jabej mã adju-markamdjwý ne bar ikînhkumrêx. Gwaj banhõ Bênjadjwýr Jeju Kritu akubyn bôxmã ar aje mã abej ajkam amakkamdjwý ne bar ikînhkumrêx. Kam ne bar ar akam ikînhkumrêx ne gwaj Babãmmã ar ajarê, gwaj banhõ Metîndjwýnhbê gwaj Babãmmã ar ajarê.

<sup>4</sup> Akmere ar, àpnhîre ar, mrãmri ne arým Metîndjwýnh kum ar ajabêkôt arým amijo ar apytã. Kute ar ajo kra kadjy amijo ar apytã bar arým kuma.

<sup>5</sup> Djãm Jeju'ã ar amã idjujarênh nyja kabên kajgo got? Kati. Mrãmri ne ba ar amã Jeju'ã idjujarênhkumrêx ne. Ăm Metîndjwýnh pyma kôt ne bar mã ar amã Jeju kabên jarê. Djãm ar ba ne bar ar amã ikabên jarê? Kati, ãm Metîndjwýnh Karõ kabênkôt ne bar ar amã ikabên jarê. Ăm Metîndjwýnh kabênja ne kajgo kêt. Ăm 'êxnhî kêt. Tãm ne bar mã kuman ar amã arê.



Nã bãm ar ar akam imexkumrêx ne akrânãmã ar ar ajo iba. Gar arým prïne ar ipumün tu amim ar ikabên markumrêx. <sup>6</sup> Ar ikabên man ar ijã amijakren Bênjadjwýr Jeju'adjwý arým amijakre. Ar ijã amijakren mã ar ikôt amijo aba. Nnym kam me ar ajo ajkê. Ar aje Jeju markam ne me ar ajo ajkê. Nãm me te ar ajo ajkê gar mã ajamako ar ikabên mar týx mex ne. Ne tu ate akrân tu akínhkumrêx ne. Nã gãm ar Metíndjwýnh Karô kabênkôt tu akínhkumrêx ne mã ar ikabên ma.

<sup>7</sup> Nnym arým Akajakam ar kute amim Jeju marjamê Matenikam ar kute amim Jeju marja me kuní arým ar apumü, ar aje Jejukôt ar amijo aba pumün arým ar ajã amijakren kute ar apyrak ne ar ba. <sup>8</sup> Ê, ar ga ne gar memã Jeju'ã ajarê nnym Akajakam ar jamê Matenikam ar jamê ne me arým kuní Bênjadjwýr Jeju'ã adjujarênh ma. Djãm me ajbit ne me kuma? Kati, nã gãm ar me kunímã arê nnym me arým kuman kam arým amü abenmã arê. Nnym me arým prïne kuma. Nã gãm ar aje amim Metíndjwýnh marja memã amijarê nnym me arým prïne kuma ne kam amü aben djô'ã abenmã ar ajarê. Nnym kam pyka kuníkôt me arým ar ajarênhbit ma. Kam ne bar ije arým memã ar ajarênh kêt.

<sup>9</sup> Me ja ta ne me ar imã ar ajarê. Me ja ta ne me ar imã,

—Be, onj Texarônikakam ar ja ne arkum ar akínhkumrêx. Be, ga ar abôxkam ar kute ar amã kabên mexbit jarênhja ma, ane. Ne ajte ar imã,

—Be, Texarônikakam ar ja ne ar arým mýjjao we Metíndjwýnh karô nhípêxja kangan arým Metíndjwýnhkumrêx, Metíndjwýnh tñjao aminhõ. Ar kute amikadjy kum àpênhmã ne ar o aminhõ, <sup>10</sup> ne arým krakam amako dja.

Metíndjwýnh kra ne ar arým amiwýr kam amako dja, ane.

Nãm me ã ar ajarênhõ ane. Mrãmri ne gar Metíndjwýnh krabê Jejukam ama. Tãm ne tykkam Bãm ajte akubyn o tñn ne. Tãm dja ajte kàjkwa kurüm bôx. Tãm ne gar kam ama. Tãm ne kubê gwaj bapytâr djwýnh ne Metíndjwýnh ngrykbê gwaj bapytã. Godja Metíndjwýnh me axwekam ngryk ne. Bãm ngrykbê godja Jeju arým gwaj bapytã. Tãm ne bôxmã gwaj kam amã.

## 2

*Paur arkam àpênh mex.*

*A KÔ 1.12*

<sup>1</sup> Akmere ar, àpnhîre ar, wãnh ar ar akam idjãm ne kajgo kêtikumrêx. Gar arým ama. <sup>2</sup> Ar awýr ar imôr kêtiri ne me Pirpukam prïne ar ijo ajkên ar imã kabên punu jarê. Gar arým ama. Nãm me ja te ar ijo ajkê bar ar amã Metíndjwýnh'ã idjujarênh ny jarênh rá'ã ne. Metíndjwýnh ne ar imã týx jadjã bar itñn prãm kêt ne tu ar amã arê. Nãm me te Metíndjwýnh'ã ar amã ar idjujarênhkôt kum ar ikurê bar mã ar amã arê.

<sup>3</sup> Nã bãm ar ar amã,

—On ar tu amim Jeju markumrêx, ane.

Djãm kupa'ã ne bar ar amã arê?

Nâr djãm mýjja 'õ prãme ne bar ar amã arê?

Nâr djã nã bãm ar ar amã ijêx? <sup>4</sup> Arkati, Metíndjwýnh ta ne ar ijano bar tẽ. Nãm ar imã,

—Gora ar memã Jeju kukradjã ny'ã ajarê, ane. Nãm ã Metíndjwýnh ar imã ane bar kabênkôt me akunímã 'ã idjujarênh mõ.

Djãm me abêngôkre\* amã ikñnh kadjy ne ba me amã Metíndjwýnh'ã idjujarênh mõ? Kati, Metíndjwýnh ta ar ikam kñnh kadjy ne bar me amã 'ã idjujarênh mõ ne kum ar

\* 2:4 Apýnh me õ pyka djãri kuníkôt ne me kuní bêngôkre. Kubêkã jakamê me kakrãtykmê ne babêngôkremê ne me kuní: bêngôkre.

idjâpênh iba. Tãm ne kute prïne ar ikabi. Kum ar idjâpênhkôt ne arÿm ar ipumû.

<sup>5</sup> Djâ nã bãm ar ar amã ijêx ne ar atãri ar amã,

—Bep ar amexkumrêx, anen kam ar akàxã ar ajã ikabên ne? Arkati. Arÿm ne gar imex pumû.

Når djâ nã bãm ar arÿk ar amã ijêx ne pi'ók kaprïre prãme ar amã ikabên jarê? Kati, Metîndjwÿnh ta ne prïne ar ikadjwÿnhbê ar ipumû.

<sup>6</sup> Når djãm wãkam ar aje ar imã ar imex jarênhmã ne bar tê? Kati, Kritu kute ar ijanorkôt ne bar tê.

Når djãm atemã me ja'õ kute ar imã ar imex jarênhmã ne bar tê? Kati, Metîndjwÿnh ta ne kute prïne ar ipumûnh. <sup>7</sup> Kritu kute ar ijanor pumûnh nhirãm ne bar ren ar amã,

—Amrê ar ar imã mÿjja ngã,

—Gop ar ar imã apé, ane ne ren arÿm ikabêno ar akaty.

Nhym bep kati, ã ar ije anhÿr kêtê. Nã bãm ar akrãnmã ar ajo iba. Mrãmri ne me nire kute amim kra karãkam o djuw mex pyrãk. Nã bãm ã ar ar ajo ibao ane.

<sup>8</sup> Ar imã ar akÿnh raxi. Kam ne bar prïne arÿm ar amã Metîndjwÿnh kukràdjã ny'ã ajarê ne ar itÿn prãm kêtumrêx ne. Djê ne ren me'õ kute ar ibÿn prãm bar kam ren tu ate ikrãn mã ar amã Metîndjwÿnh'ã ajarê nhym kam me ren ar ibÿ. Nã bãm ã imã ar akÿnh rax ane.

<sup>9</sup> Akmere ar, àpnhÿre ar, ar akam ar idjãmkam ar idjâpênh raxja gar omû. Arngrö'ãmê akamãtkammê ar idjâpênhja pumû. Bir mÿkam? Ar ije pi'ók kaprïre'ã ar ajwÿr kêt kadjy. Ar ije kãj bê ar amã Metîndjwÿnh kukràdjã ny'ã idjujarêno iku'êkam ije pi'ók kaprïre'ã ar ajwÿr kêt kadjy.

<sup>10</sup> Nã bãm ar akrãnmã: ar ar ajo iba. Nã bãm ar ar ajo iba mexkumrêx ne ar ar ajo iba. Ar aje Jeju marja, ar ga ne bar akrãnmã ar ar ajo iban ijaxwe kêtumrêx ne. Ar imrãnh mexkumrêx. Nã bãm

ar katàt amijo iba. Gar arÿm ar ipumû. Metîndjwÿnhdjwÿ ne arÿm prïne ar ipumû.

<sup>11-12</sup> Nã bãm ar ar akunÿo ikrakumrêx ne ar ar ajo iba, ne ar akunimã ikabên jarên ar amã,

—Kwãrÿk wãnh Metîndjwÿnh kanga kêt. Gora ar 'ã angrã tÿx, ane.

Ne kam ajte me kaprÿmã kum, —Kwãrÿk wãnh akapri kêt. Metîndjwÿnh dja ajo kÿnh, ane.

Ne kam ajte ar amã, —Gora ar mã Metîndjwÿnh kabênkôt ar amijo aba rã'ã ne, ane.

Ar aje ã anhÿrkam godja Metîndjwÿnh ar akam kÿnhkumrêx. Metîndjwÿnh ne ar kute gwaj bajo ba djwÿnh. Tãm ne amiwÿr gwaj bajuw. Tãm ne kute ar gwaj bapytãr ne ar kute gwaj bajo bamã amiwÿr gwaj bajuw. Gwaj bamextire ne õ pyka mexti:re, õ pyka ra:xkam ar babamã ne amiwÿr gwaj bajuw. Kadjy dja gar katàt amijo aba, Metîndjwÿnh ar akam kÿnh kadjy.

*Akubyn kute arkam amikÿnh jarênh.*

<sup>13</sup> Arÿm ne bar ar amã Metîndjwÿnh kabên jarê gar arÿm ama. Kam ne bar mã ar akam ikÿnhkumrêx ne Metîndjwÿnhmã amikÿnh jarê. Djâ nã gãm ar mar kajgo got? Kati, nã gãm ar tu markumrêx. Nã gãm ar anhõkre kadjwÿnhbê,

—Djãm mebêngõkre kabên got? Kati, Metîndjwÿnh kabên ne ja, ane. Kôt ne gar arê. Metîndjwÿnh kabênkumrêx ne ja. Metîndjwÿnh ne arÿm ta kabêno katàt ar akrã dja, kam ne gar arÿm amrãnh mexkumrêx mõ.

<sup>14</sup> Ê, akmere ar, àpnhÿre ar, djãm wãnh Texarônika kam, ar anhõ krõkambit ne me ar ar ajo bikêno ba? Kati, mekbê idjaerkamdjwÿ ne me õ krõkam me ar ar o bikêno ba, pykabê Djudêjakam. Mekbê idjaer kwÿ ne ar arÿm Kritu Jejukôt aben

pydji. Nhyem me kute Jeju mar kêt ar aro bikênho ba. Gar ar anhô krôkam me kute ar ajo bikênhja pumû. Aprakamã ar aje amim Metîndjwýnh marja ne me arîk ar me ajo bikênho ba.

<sup>15</sup> Amrêbê ne mekbê idjaer ta ar Metîndjwýnh kabên jarênh djwýnh paro ban kam arým Bēnjadjwýr Jeju bîn kam arým ar badjwý ar ijo kurê djwýnh ne. Arým o Metîndjwýnhmã ngryk jadjân me kunîkam amikrà ar o ba.

<sup>16</sup> Mã ne mekbê idjaer mekam amikrà on? Bir, nã bãm ar ije me bajtem, me jamã Metîndjwýnh kabên jarênh itēm nhyem kute me utãrmã nhyem mekbê idjaer mã: ar ikukrà ar o ba. Godja me ã anen arek Metîndjwýnhmã ngryk jadjãro tē:n kam arým Metîndjwýnhmã ngryk jadjãr mex ne. Nhyem kam arým Metîndjwýnh prîne me axwe pãnh meo ajkê.

*Kute aro amak'ã kute arkum amijarênh.*

<sup>17</sup> Akmere ar, àpnhîre ar, nã bãm ar ar akurûm itēm ngrîre ne ar ajo ama: ne. Ne kam ar ije me 'uwfî tûm pyrãk. Nã bãm ar ar ajo aman iba. Ne te ije inhýtã ar apumûnh prãme. <sup>18</sup> Ne te akubyn ar awýr imôr prãme. Ibê Paur ne ba te akubyn ar awýr itēm mã ikràn ikràn ikrã nhyem Xatanaj mã: ar ikukrà.

<sup>19-20</sup> Ê, Bēnjadjwýr Jeju akubyn bôxkam, kuka kônh gwaj badjãm kam, nhyem dja bar mex jarê? Ar ga. Ar ga dja bar ar amex jarê ne kum,

—Be, ar ja ne ar mexkumrêx ne ar ba. Arým amar tÿx ne, ane. Be, ar ga dja bar ar ajo idjãmra mō. Ar ije kum ar ajarênhmã ne bar kam ama ne. Mýjbê ne ar ikînh djã? Ar ga. Texarônîk kam ar ga ne gar abê ar ikînh djã. Nhyem Metîndjwýnhdjwý dja ar imã ar amex jarê bar kam ikînhkumrêx ne.

### 3

<sup>1-2</sup> Nã bãm axwe ar akam idjumar ne kam inhôkre kadjwýnhbê amim,

—Birãm ijamak dja ibî, ane. Kam ne ba ar awýr Ximoxi janon kam ate: krîbê Atēnakam dja. Gwaj bakamy Ximoxi ar ikôt Metîndjwýnhmã àpênh ba. Tãm ne bar ar awýr ano. Kute memã Kritu'ã ujarênh ny jarênho baja tãm ne bar ar awýr ano. Kute ar amã tÿx jadjãr ne kute ar amã kabên jarênhmã ne kute ar amã,

—Arým ne gar tu Jeju markumrêx ne. Gora ar 'ã angrã tÿx, anhÿrmã ne bar ar awýr ano nhyem tē. <sup>3</sup> Birãm me kute ar ajo bikênh gar arým aje Jeju kanga karō ne bar ar awýr Ximoxi jano nhyem tē, kute ar amã tÿx jadjãrmã ar awýr ano nhyem tē.

Be, mrãmri godja me arîk ar ba gwaj bajo ajkê. Arým ne Metîndjwýnh gwaj bajã amim karō. Me arîk ar ba kute me baje Jeju maro bikênhmã ne amim me bajã karō, me kute me bajo bikênh gu me Jeju'ã bangrà rã'ã jabej amim me bajã karō. Gar arým ama.

<sup>4</sup> Ar akam ar idjãm kam ne bar arým ar amã arê. Anhÿr djwýnh rãm ne bar ar amã arên ar amã,

—Gora ar ar ikabên ma. Godja me ar ar ajo bikênho ba, ane. Be, kôtō. Nã bãm tu kônh kum irkumrêx gar arým ama.

<sup>5</sup> Kam ne ba ar awýr Ximoxi jano. Ije ar amar prãm kute ibîn kajgo ne ba ar awýr ano, ije marmã. Ar aje Jeju kanga kêt jabej ne ba ar awýr ano. Ar 'ã angrã rã'ã jabej ne ba ar awýr ano. Nã bãm inhôkre kadjwýnhbê amim,

—Birãm arým godja Xatanaj arkum ar kute Jeju kangamã arkum 'ã apnê nhyem arým ar kanga. Nhyem arým ar idjãpênh, ar ije arkum arênhja arým kajgo, ane. Nã bãm ã amim ikabên jarênho ane.

*Ximoxi kute ar mex jarênh.*

<sup>6</sup> Nhyr bep kati. Nã bãr ar ar awÿr Ximoxi jano nhyr ar awÿr tãn ar akurũm tãn bõx ne arÿm ar imã ar ajarênh nextire ne. Bar kam ikĩnhkumrêx ne. Nã gãr ar tu aje Jeju markumrêx ne 'ã angrã tÿx nhyr omũn bõx ne ar imã arẽ bar ikĩnhkumrêx. Nhyr ajte ar amã me abẽ jarẽ. Nãm ar imã,

—Onÿj ar ar ajo ama ne. Ar kute ar apumũnh prãmã. Ar kute ar apumũnh prãm gar gadjwÿ aje ar omũnh prãm kute aben pyrãk, ane. Be, nãm Ximoxi ã ar ajã ar imã anen ã ar ajarênh ane.

<sup>7</sup> Be, akmere ar, ãpnhĩre ar, ar aje Jeju mar tÿx ne mã 'ã angrã rã'ãja ne omũn akubyn bõx ne ar imã arẽ. O ar imã ar ikĩnh jadjã. Nãm me ja ar ijo ajkẽ. Ar ijo ajkẽ bar idjumar punure ne kam irerekre. Nhyr bep ar ga ne gar ar imã kĩnh jadjã. <sup>8</sup> Jakam ne bar arÿm ajte itÿxkumrêx ne. Ar aje Bẽnjadjwÿr mar ne 'ã angrã tÿx rã'ãkõt ne bar arÿm ajte 'itÿx ne.

<sup>9</sup> Jakam dja bar Metĩndjwÿnhmã ar akam ikĩnh jarẽ. Mÿjkõt ne bar ikĩnh? Bir, ar akam. Ar aje mar ne 'ã angrã tÿxkam ne bar ikĩnhkumrêx ne kam gwaj Batĩndjwÿnhmã amikĩnh jarẽ. <sup>10</sup> Akamãt kunĩkõt arngro kunĩkõt ne bar amikadjy Metĩndjwÿnh ma:ro iku'ẽ. Ar awÿr ar itẽm, gwaj baje aben nhÿtã aben pumũnh bar ije õbẽ ar amã Metĩndjwÿnh kabẽ jarênh ino rer kêtja jarênh gar aje prĩne amim marmã. Kam ne bar amikadjy Metĩndjwÿnh ma:rbito kuma.

<sup>11</sup> Gora gẽ gwaj Babãmbẽ Metĩndjwÿnhmẽ gwaj banhõ Bẽnjadjwÿrbẽ Jeju, gora gẽ ar ar ijano bar kam wãm ar awÿr tẽ.

<sup>12</sup> Mrãmri ne gar arÿm amã aben jabẽ ar aba. Gẽ Bẽnjadjwÿr abenã ar amã karõ gar amã aben jabẽ rax. Amã aben jabẽ rax ne ar abeno aba. Ne ar amã me kunĩ

jabẽ, ar amã me kunĩ jabẽ rax ne ar aba, ar amã me abẽ raxo kute ar imã ar ajabẽ ja pyrãk. <sup>13</sup> Kam dja Metĩndjwÿnh arÿm ar ajo tÿx ne, gar arÿm 'ã angrã tÿx ne. Nhyr kam Jeju akubyn bõxkam gar ajaxwe kêtka amextire ne ar aba. Gwaj banhõ Bẽnjadjwÿr Jeju dja õ me ja kunĩõ bõx. Õ me ja kunĩõ bõx gu me bajaxwe kêtka me Babãmbẽ Metĩndjwÿnh kabem bakumex. Gu me baje Jeju mar bakunĩ ajmã bakute kêt ne Metĩndjwÿnh mexo bamexkumrêx ne dja, me Babãm kuka kõnh dja.

## 4

*Me kute katãt amijo bao Metĩndjwÿnh kĩnhmã.*

*Rõ 12.9, 13.13; Kor 3.5*

<sup>1</sup> Be, akmere ar, ãpnhĩre ar, bar prĩne arÿm ar amã arẽ gar arÿm ama. Ar aje Metĩndjwÿnh kabẽnkõt ar amijo aba nhyr ar akam kĩnh kadjy ne gar arÿm ama. Mrãmri ne gar arÿm ã anhÿr ar aba. Ba kam ar ije ajte ar amã arẽnhmã. Bẽnjadjwÿr Jeju djõ'ã ajte ije ar amã arẽnhmã.

—Arek ar Metĩndjwÿnh kabẽnkõt ar amijo aba rã'ã ne. <sup>2</sup> Amrẽbẽ ne bar ar amã ikabẽ jarẽ ga arÿm ar ama. Bẽnjadjwÿr Jeju kabẽnkõt ar amã ikabẽ jarẽ gar arÿm prĩne ama.

<sup>3</sup> Metĩndjwÿnh ne arÿm ar ajã amim karõ. Ar Metĩndjwÿnh mexo amextire ne ar aba ne ajaxwe kêt ne ar abamã ne ar ajã amim karõ. Kam dja gar aprõ prãm kêt ne abenbẽ prõo adjãkĩnh kêt ne amextire ne ar aba. Nhyr me nidjwÿ mjẽn prãm kêt gar arek ar aba.

<sup>4-5</sup> Kam dja gar aprõ djwÿnh'ÿrbit tu abakumrêx ne ar o aba ne amexkumrêx. Nhyr bep me katãm, me kute Metĩndjwÿnh mar kêt me tãm ne me prõ prãmka, kurẽkam tu arĩk prõ'ÿr ba. Nhyr bep kati, kwãrĩk wãnh mekmã nõ. Nhyr bep ar ga dja gar aprõ djwÿnh'ÿrbit aban 'ã apÿnh ne.

Kwârîk wānh gar krô'ā meo aprô kêt. Kwârîk wānh gar krô'ā meo amjên kêt. Ne kam arîk ar aba kêt. <sup>6</sup> Kwârîk wānh akamykam amikrà ar o aba kêt ne kubê prôo adjâkînh kêt. Mÿkam? Bir, Bênjadjwÿr Jeju godja mÿjja ja kunõ pānh ne. Ê, kute o pānh kêtri ne bar anhÿr djwÿnhram arÿm prîne ar amā arê gar ama.

<sup>7</sup> Be, djām gwaj arîk ar baba kadjy ne Metîndjwÿnh amiwÿr gwaj bajuw? Kati. Arkati, gwaj bamextire ne katât bamrānh kadjy. Katât me bamrānh ne baje abenbê prôo badjâkînh kêt kadjy ne Metîndjwÿnh amiwÿr gwaj bajuw.

<sup>8</sup> Dja me'ô kabên ja mar prām kêt djām mebêngôkre kabên dja me'ô mar prām kêt ne? Kati, Metîndjwÿnh kabên dja mar prām kêt. Metîndjwÿnh ta kute ar amā ta Karô mex janor tām dja me'ô mar prām kêt.

<sup>9</sup> Nā gām ar amā aben jabê. Ar aje Jeju marja ne gar amā aben jabê. Metîndjwÿnh ne ar amā arê gar kam amā aben jabê. Kam dja ba ar amā 'ā pi'ôk no'ôk kêt ne. <sup>10</sup> Nā gām ar amā aben jabê, Matenikam ar kute Jejukôt abeno kamy kunîmê ne gar amā aben jabê. Kam dja ba ar amā, —Akmere ar, àpnhîre ar, gora arek ar ā anhÿr ar aba rā'ā ne, ane.

<sup>11</sup> Ba ajte ar amā arê,

—Gora ar abenkam akabôt katin ar aba. Adjâkrê kêt ne ar aba. Kwârîk wānh kikrekôt môr ne mÿjja pumÿnh ne mÿjja mar ne arênho aba kêt. Gora anhikrao adjâpênh aba. Tām ne ba arÿm amrêbê ar amā arê. <sup>12</sup> Bir, mÿj kadjy dja gar ar adjâpênh aba? Bir, me kâtām kum ar akînh kadjy. Kadjy dja gar ā ane. Mÿkam ne gar akwÿ ar adjâpênh kêt ne aba? Ar apê ne ate amim mÿjja by ne me 'wÿr kêt.

*Jeju akubyn bôxmā.  
Kô k 15.51*

<sup>13</sup> Ê, akmere ar, àpnhîre ar, ba ajte ar amā arê, ar aje prîne mar kadjy. Me arÿm tyk tÿmja dja ba ar amā arê gar ama, ar akaprî kêt kadjy. Nhyr bep me kute Jejukam amak kêtja dja me mrāmri kaprî. Me ja'ô dja ty nhyr me ja tu kaprîkumrêx, tyk nhijukri Jeju'ÿr bôx kêtka. Nhyr bep gu me ba dja gu me ā bakaprî anhÿr kêtumrêx ne.

<sup>14</sup> Jeju tyk ne akubyn tîn. Tām ne gu me arÿm tu amim kamnhîxkumrêx ne. Dja me tyk ā Jejukôt akubyn tîn ane. Tām dja gu me kuman tu amim kamnhîxkumrêx ne. Mrāmri godja Metîndjwÿnh me tyk tÿmja Jejumê ro'ā meo mō, me kute amim Jeju mar tyk tÿmja dja Jejumê ro'ā meo mō. Me kute tu amim Jeju markumrêxja, me tyk tÿmja, me tām godja Metîndjwÿnh Jejumê ro'ā meo mō.

<sup>15</sup> Ê, Bênjadjwÿr ne ar imā arê bar ô'ā prîne ar amā arê, katât ar amā arê. Gu me batînja dja gu me me tykmā wa kêt. Bênjadjwÿr akubyn bôxkam dja gu me batîr rā'āja me tykmā wa kêt.

<sup>16</sup> Bênjadjwÿr ta dja kâjka kurÿm ruw ne kâj bê me bamā akij ne amiwÿr me bajuw. Kadjy mrānh djwÿnh nhô bênjadjwÿrmê dja ar me bamā akij ne Metîndjwÿnh nhô mÿjja kute poti nhôkre pyrâk kakô. Nhyr kam me kute amim Kritu mar tyk tÿmja, me kumrêx tyk ne pykakam nôrja dja me kumrêx pyka kurÿm katon wabi. Dja me akubyn tîn ne katon wabi.

<sup>17</sup> Gu me batîr rā'ājamê dja gu me baro'ā wabi. Me batîr ne ar babaja dja gu me batîr ne wabi. Nhyr bep me kumrêx tyk ne pykakam nôrja dja me kumrêx akubyn tîn ne kam me batîr rā'ājamê abenā bôx. Gu me arÿm baro'ā Bênjadjwÿr'ÿr wabi. Metîndjwÿnh godja me baro'ā me babyn Bênjadjwÿr'ÿr me bajo wabi. Kakrâkam dja me babyn

Bênjadwÿr'ÿr me bajo wabi. Gu me kam Bênjadwÿr Jeju kajpa, kôk djâbêrkam dja gu me kajpa nhym kam kâjkwamâ me bajo mō. Gu me kam kôt ar baba. Ar baba râ'â: ne. Dja gu me Bênjadwÿrkôt ar babao ino rer kêt mex ne ar baba. Ar baba râ'â ar baba.

<sup>18</sup> Kam dja gar abenmâ ikabên ja jarêngo aban o ar akapribê abenmâ kînħ jadjà.

## 5

*Meo bikênhdjâ nhô akati'â ujarênh.*

*Mat 24.29; Mak 13.26; Ruk 21.25, A Ped 3.10*

<sup>1</sup> Ê, akmere ar, àpnħire ar, mÿj kadjy dja ba ar amâ 'â pi'òk no'òk ne? Mÿj mytyrwÿ 'òkam nâr mÿj akati 'òkam dja meo bikênh djâ nhô akati me'ÿr bôxmâ ne ba ije 'â ar amâ pi'òk no'òkmâ? <sup>2</sup> Godja me aêrbê Bênjadwÿr Jeju kute meo bikênh djâ nhô akati me'ÿr bôx. Arÿm ne gar prïne ama. Me aêrbê. Akamâtkam me àkînħi me aêrbê me ûrkwâmâ ngjêx ne kute mekbê mÿjjao àkînħo ba. Dja meo bikênh djâ nhô akati â me aêrbê me'ÿr bôx ane.

<sup>3</sup> Kute me nire kra àn tokrykam kute kubê amijo bipdjur kêt ne kubê prôt kêtja pyrâk. Mrâmri godja meo bikênh djâ arÿm â me'ÿr bôxkumrêx o ane, nhym me kubê amijo bipdjur kêtumrêx. Dja me abenmâ,

—Be, arÿm ne gu me badjumar mexkumrêx ne ar baba. Godja mÿjja'ô ajmâ me bajo kêtumrêx ne, ane. Me kute abenmâ arênh râ'â nhym me aêrbê meo bikênh djâ nhô akati me'ÿr bôx, Bênjadwÿr kute meo bikênh djâ nhô akati me'ÿr bôx. Godja me'ÿr bôx nhym me kubê amijo bipdjur kêtumrêx ne 'ô kubê kator kêtumrêx.

<sup>4</sup> Nhym bep kati, akmere ar, àpnħire ar, djâm âtykri ar amrânħ got meo bikênh djâ nhô akati ar ajaêrbê ar awÿr bôxmâ. Kute

me àkînħi me aêrbê me ûrkwâ'ÿr mrânħ ne ngjêx pyrâk. Nhym bep kati, djâm ar ajaêrbê ar awÿr bôx kêtumrêx ne. Me mû ja'ÿrbit dja bôx. Me arĭk ar ba'ÿr dja bôx.

<sup>5</sup> Nhym bep kati, ar ga ne gar a'ukam mrâ, ne arngro'â mrâ. Nâ gãm ar Metĩndjwÿnh kabênkôt ar amijo aban kam kute a'uri ar amrânħ pyrâk. Gwaj ba ne gwaj akamâtkam baba kêtumrêx, âtykri baba kêtumrêx. Nhym bep me arĭk ba ne me kute âtykri me ba pyrâk.

<sup>6</sup> Kam dja gwaj a'ukam bamrânħja, arngro'â bamrânħja 'â bano tÿx râ'â ne babibânħ kêt ne ar baba. Nhym bep me arĭk ar baja, âtykri ar baja dja me wânħ arĭk ar ba. Nhym bep gwaj ba dja gwaj â anhÿr kêtumrêx ne ar baba. <sup>7</sup> Nhym bep me Jejubê jâm krâja ne kute arĭk akamâtkam me ba pyrâk. Nhym me arĭk ar badjwÿ ne me kute me bibânħkam arĭk akamâtkô tykkam ba pyrâk.

<sup>8</sup> Nhym bep kati, a'uri gwaj bamrânħja dja gwaj bajaxwe kêtumrêx ne ar baba. Ê, dja gwaj amijâ bano tÿx. Xatanaj ne kute gwaj bajaxwe'â gwaj bamâ àpnênh prâmumrêx. Kam dja gwaj amim Jeju mar 'âno djan arek bamâ me abê. Kute mrâmri ne me kute ngônho kubêkâ jangiênh nhym me te kute me'â kamjÿrja pyrâk. Dja gwaj â baje amim Jeju mar 'âno badjâm ne bamâ me abêo ane. Nhym kam Xatanaj te gwaj bajaxwe'â gwaj bamâ apnê. Gwaj Jeju 'âno djan amiwÿr kam ama. Kute mrâmri ne me kute ngônho krâdjê tur nhym me te kute kôo me ikwÿr kajgo ja pyrâk. Dja gwaj â baje Jeju 'âno badjâm ne amiwÿr kam amako ane nhym kam Xatanaj te gwaj bajaxwe'â gwaj bamâ apnê.

<sup>9</sup> Djâm Metĩndjwÿnh me bakam ngryk ne kute me bajo bikênh kadjy ne amijo me bapytàn amim

me bajã karõ? Kati, kute me bapytãrmã ne me bajo amiptã. Me banhõ Bênjadjwÿr Jeju Kritu ta ne me bapytãn ar me bajo ba.

<sup>10</sup> Ta ne me bapãnh tyn ajte me bakadjy tïn ne. Gu me kõt bakunĩ batïn ne. Dja gu me arÿm batyk jabej nãr kon batïn rã'ã jabej mrãmri dja gu me bakunĩ ajte Jejukõt batĩnkumrêx ne. <sup>11</sup> Me akubyn tïn dja gar mã abenmã arê. Ne mã o abenmã kĩnh jangij ne o abenmã tÿx jangij. Arÿm ne gar ã ane. Jakam dja gar mã ã anhÿr atêm rã'ã.

*Akubyn ajte arkum 'ã karõ.*

*Gar 6.6; Xim k 5.17*

<sup>12</sup> Ê, akmere ar, àpnhĩre ar, dja gar prĩne ar kute Jeju nhõ me jao ba djwÿnh kabên ma. Ar ja ne ar prĩne ar ar ajo djuw mexo ba, Bênjadjwÿr Jeju kabênkõt ar ar ajo djuw mexo ban ar amã àpênh ar ba, ne ar ar akreo ba. Kam dja gar prĩne ar kabên ma. <sup>13</sup> Gora ar prĩne ar kabênja man amã ar abên amã ar kĩnh. Ar akrãnmã ar amã àpênhkam dja gar amã ar kĩnhkumrêx ne ar aba. Gora ar akunĩ abenmã adjãkrê kêt ne amã aben jabên ar aba.

<sup>14</sup> Ê, akmere ar, àpnhĩre ar, ba ajte ar ar amã ikabên jarê. Godja me kum ukanga gar mekmã kum,

—On adjãpênh ar aba. On mÿjja kupê, ane.

Godja me kaprĩ gar memã kĩnh jangjê. Godja me kute amim Jeju mar rerek gar mekmã kum,

—On amim Jeju mar mex ne 'ã angrã tÿx, ane.

Gora ar akunĩ abenmã akabên mexbit jarên abenmã adjãkrê kêt ne ar abeno aba.

<sup>15</sup> Godja me'õ ar ar ajõkam ar amikrão ba ga amipãnh o abikênh kêt ne. Tu ate akrãn ar aba. Godja gar abenkam adjukaprĩn ar aban me kunĩkam adjukaprĩn ar aba.

<sup>16</sup> Gora ar akĩnh rã'ã rã'ã.

<sup>17</sup> Gora ar Metĩndjwÿnhmã akabên 'ãno dja.

<sup>18</sup> Gora ar myt kunĩkõt Metĩndjwÿnhmã kum,

—Aje imã mÿjja janorja ne mexkumrêx. Ba akam ikĩnhkumrêx, ane. Adjumar mexkam nãr apunukam nãr abikênhkam nãr mÿjja kute ajo bikênhkam dja gar kum ã amijarênho ane ne 'ãno dja. Ar aje mÿjja kunĩkam akĩnh ne aje kum amijarênhmã ne Metĩndjwÿnh ar ajã amim karõ. Nãm ã ar aje Kritu Jeju mar'ã amim karõo ane.

<sup>19-20</sup> Dja me'õ Metĩndjwÿnh Karõkõt ar amã mÿjja'õ jarê gar aprÿ kêt. Kwãrik wãnh Metĩndjwÿnh Karõ ar amã kabên'õ jarê gar ate akrã kêt. Dja gar ate akrã nhym arÿm Metĩndjwÿnh Karõ ar amã kabên kêt ne. <sup>21</sup> Dja gar prĩne me kunĩ kabên kabi. Dja me'õ kabên mex jabej gar tu kabên markumrêx ne kabênkõt ar amijo aba. Dja me'õ kabên punu gar tu ate akrã.

<sup>22</sup> Be, gora ar rÿm apÿnh mÿjja punu djãri kunĩmã akre rax.

<sup>23</sup> Gê Metĩndjwÿnh ta kute me bamã umar mex jarênh djwÿnh prĩne amim ar amã mex jadjã gar kam ta mexo amexkumrêx ne ar aba. Me akunĩ dja gar anhĩ pÿnhkõt amexo tuknÿn ar aba. Dja me banhõ Bênjadjwÿr Jeju Kritu akubyn tê gu me bamextire ne ar baba. Gu me bajaxwe kêt ne ar baba. Ajmã bakute kêt ne ar baba. Badjumar djãmê banhĩmê bakarõmê ajmã bakute kêt ne ar baba. <sup>24</sup> Metĩndjwÿnh ta ne amiwÿr ar ajuw, ta godja ar amã mex jadjã. Mrãmri godja ar amã mex jadjã. Metĩndjwÿnh ne kabênkumrêx. Mrãmri dja ar amã mex jadjã gar amexkumrêx ne ar aba.

<sup>25</sup> Ê, akmere ar, àpnhĩre ar, ar badjwÿ dja gar Metĩndjwÿnhmã ar ijarê.

<sup>26</sup> Ar aje Jejukôt abeno akamy dja gar idjô'ã aben pa krij.

<sup>27</sup> Ba ar amã arẽ, Bẽnjadjwÿr kabẽnkôt ar amã arẽ. Ije ar amã pi'ôk no'ôkja dja gar akamy kunĩmã arẽ.

<sup>28</sup> Gê gwaj banhõ Bẽnjadjwÿr Jeju Kritu ukaprikôt prĩne ar ajo djuw mex. Tãm ne ja.



## **Paur kute Texarônikakam me jamã atãri pi'ók no'ók ne ja.**

Arÿm ne Paur Texarônikakam ar jamã pi'ók no'ók ne. Nhyim arÿm mã me'õ ar'ÿr o tẽ nhyim ar arÿm omũn kam amipãnh Paurmã pi'ók no'ók ne kum amijarẽ. Texarônikakam ar kwÿ kum ukanga rã'ã. Nhyim ar kwÿ meo bikẽnh djã nhõ akati kupa'ã arẽn memã kum,

—Arÿm ne me bawÿr bõx. Mã dja gu me nẽ? Paur ne arÿm arẽ, anhÿro kumex. Nhyim kam ar abej Paur kuki:j.

Nhyim ar kwÿ ajte amikam umar punu ne Paurmã kum,

—Birãm dja ba Metĩndjwÿnh'ÿr ibõx kêt jabej, ane. Nãm ar ã Paurmã amijarẽho ane nhyim kam Paur omũn ajte arkum pi'ók no'ók ne. Ar kute Texarônikakam Jeju marjamã ajte pi'ók no'ók ne arkum tÿx jadjã. Nãm ar axwe amikam umarjamã kum,

—Kwãrik wãnh gar amikam ad-jumar punu kêt. Metĩndjwÿnh ta ne ar amã tÿx jadjã gar 'ã angrã tÿx ne. Nhyim me te ar ajo ajkẽ. Adjÿm, dja Metĩndjwÿnh ar ajo ngryk ne meo ajkẽ. Metĩndjwÿnh kute meo bikẽnh djã nhõ akati kraxje bõx kêt rã'ã. Dja ï bõx. Nhyim bep ar ga ne Metĩndjwÿnh amijo ar apytã, kute ar apytãrmã ne amijo ar apytã. Kam dja gar mã 'ã angrã tÿx ne, ane.

Ne kam ajte arkum ukangajamã àpẽnh'ã apnê. Nãm ã Paur arkum pi'ók no'óko anen arkum ano. Gwaj 'ÿr Paur kabẽn ma.

<sup>1</sup> Ba ibê Paur ne ba ar amã pi'ók no'ók ne. Xiramẽ Ximoximẽ ne bar ar amã pi'ók no'ók ne. Ar aje krĩbê Texarônikakam amim Jeju mar ne kôt aben pydjijamã ne

bar pi'ók no'ók ne. Metĩndjwÿnhbê gwaj Babãmmê krabê Bẽnjadjwÿr Jeju Kritu arkôt ne gar aben pydji. Ar amã ne bar pi'ók no'ók ne.

<sup>2</sup> Gê Metĩndjwÿnh ar ajo djuw mex, Bẽnjadjwÿr Jeju Kretimẽ Bãmbê Metĩndjwÿnh ar ukaprĩkôt ar ajo djuw mex ne ar ar ajo ba ne ar amã umar mex jarẽ, gar adjumar mex ne ar aba.

*Paur kute Metĩndjwÿnhmã arkam amikĩnh jarẽnh.*

<sup>3</sup> Mrãmri ne bar mã Metĩndjwÿnhmã ar akam ikĩnh jarẽ, akmere ar, àpnhĩre ar. Nã gãm ar arÿm Jeju mar tÿxo tẽn kam arÿm akunĩ amã aben jabê rax tẽ. Kam ne bar mrãmri Metĩndjwÿnhmã ar akam ikĩnh jarẽ. <sup>4</sup> Kam ne bar ar ajo amra. Apÿnh pyka djãri ne bar mekmã ar ajo amra. Me kute Metĩndjwÿnhkôt aben pydjijamã ne bar ar ajo amra. Me te kute ar ar ajo bikẽnh ban ar ajaprÿo ba gar aje mã tu Jeju mar tÿxkumrẽx ne mã 'ã angrã tÿx. Tãm ne bar mã memã arẽ.

<sup>5</sup> Be, arÿm ne me kute Jeju mar kêtja ar ajo ajkẽ. Arÿm ar amã Metĩndjwÿnh jabêkam ar ajo ajkẽ. Bir, mÿj kadjy? Mÿjja kute gwaj bajo bikẽnh gwaj bakaprĩkôt godja Metĩndjwÿnh amim gwaj bakabi ne amim gwaj bajo mex ne. Gwaj bamex ne Metĩndjwÿnh kute õ me ja ar o ba'ÿr babõx ne kam kam ar baba kadjy. Be, ga Metĩndjwÿnh kute katãt memã o pãnhja pumũ.

<sup>6</sup> Djã nãm Metĩndjwÿnh kupa'ã memã o pãnh? Arkati. Nãm katãt kute memã o pãnhmã amim 'ã karõ. Godja Metĩndjwÿnh me kute ar ajo bikẽnhjao ajkẽ <sup>7-8</sup> gar kam arÿm ajo bikẽnhja arÿm adju-mar mexkumrẽx ne atyk djã kêt ne. Ar badjwÿ dja bar idjumar mexkumrẽx ne ityk djã kêt.

Mÿj akatikam? Bir, Jeju kãjkwa kurũm kute amijo amirĩtkam. Kuwy pòk jabatãnhmê kadjy mrãnh

djwÿnh pymamë, tãm dja Jeju amikôt o mö. Kute ar apãnh meo bikënhmä dja bôx. Me kute Metïndjwÿnh mar këto bikënhmä dja bôx. Me kute Jeju kabën mar prãm këtja, gwaj banhõ Bënjadjwÿr Jeju'ã ujarënh ny mar prãm këtja kute meo bikënhmä dja bôx.

<sup>9</sup> Dja prïne ar apãnh meo ajkë nhym me biknor rä'ã: ne. Tu biknorkumrëx. Godja Bënjadjwÿr tu abenbë me bajo bikjêrkumrëx nhym me wãnh ba djakam tu wãnh bakumrëx ne Metïndjwÿnh'ÿr bôx kêtumrëx. Ne kam Bënjadjwÿr pumÿnh kêtumrëx ne mex pumÿnh kêtumrëx ne uma pumÿnh kêtumrëx ne tÿx pumÿnh kêtumrëx.

<sup>10</sup> Be, dja Jeju ï bôx. Akubyn me'ÿr bôx nhym ta õ me ja kunï dja me kum mextire jarën kum uma jarën kum tÿx jarë. Me kute amim Jeju mar kunï dja me uma pumÿn ari aben pumÿn kam kïnhkumrëx ne Jejumã mextire jarën kum uma jarë. Ar gadjwÿ dja gar me kudjwa Jejumã mextire jarë. Jeju'ã ar idju-jarënhja ne gar tu markumrëx ne. Kam dja gar me kudjwa kum mex jarë.

<sup>11</sup> Kadjy ne bar mã gwaj banhõ Metïndjwÿnhmä ar ajarën ar akadjy Metïndjwÿnh 'uw ne kum ikabën. Metïndjwÿnh ne arÿm amiwÿr ar ajuw. Kam ne bar kum,

—Ga aje amiwÿr ar 'wÿr djwÿnh dja ga amikadjy katät ar krã dja. Ota ar ja katät mrãnh prãmumrëx. Ota ar arÿm tu amim Jeju markumrëx ne kam kum mÿjja mexbit kïnh ne ar o ba. Abë mÿjja 'õ bipdjur kêtôt dja ga katät ar krã dja. Atÿxkôt dja ga ã aro ane. Nã bãm ar ã Metïndjwÿnhmä ar ajarëho ane.

<sup>12</sup> Ar aje Jeju marja godja Metïndjwÿnh katät ar akrã pumjuw nhym kam me ja ar apumÿn arÿm Jejumã mextire jarë. Ar

amex pumÿnh nhiràm mã Jeju jarëho ba. Nhym gwaj banhõ Bënjadjwÿr Jeju Kritudjwÿ dja ar amexkôt ar apumÿn arÿm ar akam kïnh ne ta dja ar amã ar amex jarë. Gwaj banhõ Metïndjwÿnh djukaprikumrëx, nhym Bënjadjwÿr Jeju Kritudjwÿ ukaprikumrëx. Ar ukaprikôt dja ar katät ar akrã dja.

## 2

*Kute me'õ ar axwe baja katormã arënh.*

<sup>1-2</sup> Akmere ar, àpnhïre ar, Bënjadjwÿr Jeju Kritu akubyn bôx gwaj baje 'ã aben pydjimã, kam dja gar axwe amikam adjumar kët ne ar aba. Kwärïk wãnh gar arïk abenmä ajëx ne,

—Arÿm ne gwaj bajo bikënh djã nhõ akati gwaj bawÿr bôx, anhÿr kët ne kam adjumar punu kët. Godja me'õ arïk 'ëx ne,

—Arÿm ne gwaj bajo bikënh djã nhõ akati gwaj bawÿr bôx, ane. Nàr kon arïk 'ëx ne,

—Arÿm ne gwaj bawÿr bôx. Metïndjwÿnh Karökôt ne ba kuman kam ar amã ikabën jarë. Nàr kon ijã,

—Arÿm ne Paur gwaj bamã pi'ók no'ók ne. Arÿm ne gwaj bajo bikënh djã nhõ akati gwaj bawÿr bôx, ane. Kati, dja gar tu ate akrã ar aba. Nãm me 'ëx ar ba.

<sup>3</sup> Kwärïk wãnh me'õ arïk ar amã 'ëx ne ar amã kabën jarë gar kôtbit ajamak bën kët. Dja gar tu ate akrã ar aba.

Ë, meo bikënh djã nhõ akati bôx djwÿnhràr godja me kato, ne amibë Metïndjwÿnh kurën axwebit ma. Nhym kam gormã me'õ katon kam me kadjy bënjadjwÿr ne kam ar axwe ban ï axweo amijo amirït mex ne. Godja axweo amijo amirït kumrëx nhym kam atäri arÿm meo bikënh djã me'ÿr bôx. Kam godja me'õ ar axweo baja tu biknorkumrëx ne. Arÿm

ne Metīndjwýnh me'ò jaxweja tu biknorkumrēmā amim 'ā karō.

<sup>4</sup> Be, dja me'ò ar axwe baja arīk 'èx ne amijo Metīndjwýnh. Godja me kute mýjja metīndjwýnhja kunī kum kurēn mekbē o akabē, ne me kute mýjja karō nhipèx ne kum, “Me Itīndjwýnh”, anhýr kajgoja kunīo akabē. Ne kam ta amijā bēnjadjwýr rax mē. Ne kam Metīndjwýnh nhō kikremā wadjàn nhýn kam mekmā kum,

—Ibē ne Metīndjwýnh, ane. Nām arīk 'èx ne amijo Metīndjwýnh. Axwekam arīk 'èx ne mekmā amijo Metīndjwýnhho nhý.

<sup>5</sup> Djām arým ne gar ikabēno akno? Ar akam idjāmkam ne ba arým bēnjadjwýr ar axwe baja ar amā arē gar arým ama.

<sup>6</sup> Ē, kraxje bēnjadjwýr ar axwe baja nhō akati 'ýr bōx kêt. Gédja ō akati 'ýr bōx nhym arým axweo amijo amirīt ne. Nhym bep mýjja ne mā me banēje bēnjadjwýr ar axwe baja kukrà, me baje Jeju mar nēje kukrà. Arým ne gar mýjja ja mā.

<sup>7</sup> Mrāmri ne me arým bēnjadjwýr ar axwe bajakôt axwebit ma. Axweo kute amijo amirīt kêt rā'ākam ne me kukām axwemābit amima. Nhym bep kute me banēje kukrà djwýnhja dja me banēje kukrào dja:n kam mā tē.

<sup>8</sup> Mā tē nhym kam arým axweo memā amijo amirīt. Nhym kam Bēnjadjwýr Jeju bōx. Bōx ne kam axwe pānh akōro pyka mē o amrā. Umao dja bōx ne o kubī, pñe o akno.

<sup>9</sup> Ē, godja bēnjadjwýr ar axwe baja Xatanaj kabēnkôt bōx ne kam ar ro'ā ar ba. Xatanajmē dja ar ar ba nhym kam bēnjadjwýr ar axwe baja ar mekmā amimao ba, ar mekmā amimao pôxo ba. Ne kam mekmā mýjja pumūnh kêt nhipèx ar o ba. Kute o me noo biknormā ar mýjja pumūnh kêt nhipèxo ba. Nām ar mekmā 'èx ba.

<sup>10</sup> Dja pñe mýjja punu kuniō me noo akno nhym me kuma. Dja me jamā 'èx nhym kute mrāmri pyrāk, nhym me kôtbit amak bēn ne, ajbit ma. Metīndjwýnh kute me jao biknor'ā amim karōja, me tām. Metīndjwýnh kute katāt memā amikabēn jarēnh nhym me kute mar prām kêtja, me tām. Me tām ne me kum Metīndjwýnh kabēn mar prām kêtukumrēx ne kum kīnh kêtukumrēx nhym te Metīndjwýnh kute me utārmā. Kam dja me tu biknorkumrēx ne.

<sup>11</sup> Nām Metīndjwýnh katāt mekmā amikabēn jarē nhym me mar prām kêt ne kum 'èxnhībit kīnh ne. 'Èxnhībit mar prām nhym kam me kute 'èxnhībit mar kadjy me kanga. Me kute 'èxnhībit marmā me kanga.

<sup>12</sup> Mýkam? Bir, nām te Metīndjwýnh mekmā amikabēn katāt arē, nhym me kum axwebit kīnh ne. Kam dja Metīndjwýnh me jamā axwe pānh jarēn me biknor djā'ýr me ano.

*Me kute Metīndjwýnh kukràdjā'ā ngrā tỳxmā kute arēnh.*

<sup>13</sup> Akmere ar, àpnhīre ar, nhym bep ar ga ne gar atemā. Ar ga ne Bēnjadjwýr Jeju kum ar ajabē:kumrēx. Metīndjwýnh ne amijo ar apytā, kute ar apytārmā ne amijo ar apytā. Amrēbé mýjja kētri ne amijo ar apytā, ar aje tu Metīndjwýnh kute katāt amikabēn jarēnh markumrēx nhym Metīndjwýnh Karō kute katāt ar akrā djar kadjy ne amijo ar apytā. Kam ne bar mā Metīndjwýnhmā ar akam ikīnh jarē.

<sup>14</sup> Kadjy ne amiwýr ar ajuw. Ar amā idjujarēnh kôt, Jeju'ā idjujarēnh nykôt ne amiwýr ar ajuw. Gwaj banhō Bēnjadjwýr Jeju Kritu ne kute umao, mexo, raxo mýjja kunī jakrenh gwaj kôt badjwý ā baje anhýrmā ne amiwýr gwaj bajuw.

15 Ē, akmere ar, àpnhīre ar, kam dja gar 'ā angrā tỳx ne. Ar ije ar amā prīne Metīndjwýnh kukràdjà jarēnhja dja gar ajamako mar tỳx mex ne. Ar ije pi'ók no'ókkam ar amā arēnh ne ije ijajkwakam ar amā arēnhja tām dja gar ajamako mar tỳx mex ne mā ama.

16-17 Be, gwaj banhō Bēnjadjwýr Jeju Kritu ne kum gwaj ba-jabêkumrēx. Nhym Metīndjwýnhbê gwaj Babāmdjwý kum gwaj ba-jabêkumrēx. Nām tu kum gwaj bakaprīn gwaj bamā tỳx jadjàr rā'ā: rā'ā ne. Gwaj kam batỳxo ino rer kêt rā'ā ne. Nhym kam arým gwaj bamā mýjja mex jarē gwaj kam amim kamnhīxbê ar kadjy baba.

Gê Metīndjwýnhmē krabê Jeju Kritu ar prīne ar amā kīnh jadjàn ar amā tỳx jadjà. Gar kam arým akabēn mexkumrēx ne ar aban apýnh mýjja mex djāribit kupê.

### 3

*Ar kute Metīndjwýnhmā Pauro à'wýrmā kute arēnh.*

1 Ē, akmere ar, àpnhīre ar, Metīndjwýnhmā ar ijarē gê Bēnjadjwýr djwýnh'ā ar idjujarēnhja pyka kunīkôt ajmā gê me kuman tu amim Jeju kamnhīxkumrēx gê me kum mextire jarē. Gora gê me kute me apyrāk ne ar ba. Ar ga ne gar Metīndjwýnh'ā ar idjujarēnhja man tu amim Metīndjwýnh markumrēx ne. Nhym kam ar akam me ja ar apumūnh nhirām ar akôt Metīndjwýnhmā mextire jarē. Gora gê Bēnjadjwýr'ā ar idjujarēnhja ā pyka kunīkôt bimānh ane.

2 Gora ar ajte Metīndjwýnhmā ar ijarē gê on me axwemē me kabēn punubê ar ipytà gê me ar ibīn kêt. Djā nām me kunī Jeju ma got me ar imā kabēn mex ne? Kati, kam dja gar ajte Metīndjwýnhmā ar ijarē.

3 Nhym bep ar ga. Ar ga dja Bēnjadjwýr ar amā tỳx jadjàn ar anēje axwe djwýnhbê Xatanaj

kukrà. Mrāmri dja ā ane. Arým ne ar amā arē. Djām Metīndjwýnh kabēn krāptī got? Kati, Metīndjwýnh ne kabēnkumrēx. Mrāmri ne arým ar amā arē, mrāmri dja ar amā tỳx jadjàn ar anēje axwe djwýnh kukrà.

4 Arým ne bar ar akam ikīnhkumrēx. Ar aje Bēnjadjwýr djwýnh kabēn mar ne kôt ar amijo abakam ne bar arým ikīnhkumrēx. Amrēbê ne gar amikam ar ikabēn man arým kôt ar amijo aba. Mrāmri dja gar arek ā anhýr rā'ān tu ar ikabēn man kôt ar amijo aba. Arým ne bar prīne ar amā ikato. Kam ne bar ar akam ikīnhkumrēx.

5 Gê Bēnjadjwýr ta ar amā Metīndjwýnh jabê kadjy ar amā arē. Gar kam amā Metīndjwýnh jabêkumrēx. Gê ta ajte ar amā arē, gar aje 'āno adjām ne aje kanga kêt kadjy ar amā arē. Gar kam aje Kritu pyrāk gê me te ar ajo ajkê gar kanga kêtumrēx.

*Arkum ukanga nēje kute ar akre. Ep 4.28; Tex k 4.11*

6 Ē, akmere ar, àpnhīre ar, Bēnjadjwýr Jeju Kritu kabēnkôt dja bar ar amā ikabēn 'ō jarē. Dja ar aje Jejukôt abeno akamy kwý kum ukangan àpēnh prām kêt jabej gar rüm arkum akre rax. Ar kute ar ikabēn mar kêtam dja gar rüm arkum akre rax.

7 Arým ar aje mar. Ar aje ar ijā amijakre ne ar idjāpēnhō adjāpēnhmā, arým ne gar ama. Djām ar akam ar idjām kam ar idjāpēnh kêt ne ar iba. Arkati.

8 Ar ar idjāpēnh ra:xja pumū. Nā bām ar prīne mýjja kupê. Arngro'ā akamātkam ar idjāpēnh iba. Nā bām ar amim apê. Ar ije pi'ók kaprīre'ā ar ajwýr kêt kadjy. Nhýnh ne me'ō kute ar ijo djuw mex'ō bar ije kum o pānh kêt? Arkati.

9 Nā bām ar ā ane. Ar aje ar ijā amijakren ar ikôt amijo abamā. Jeju Kritu kute ar ijanor pumūnh

nhirām ren ate ikrān arek ikrī  
nhym me ren ijo djuw mex kajgo  
nhym ren mrāmri kôt. Nhym bep  
kati, ar ba ne bar idjâpênhbit iba,  
ar aje ar idjâpênhkôt ar ipumūnh ne  
aje ar ijā amijakremā. <sup>10</sup> Ar akam  
ar idjām kam ne bar arým ar amā,

—Godja me'ō àpênh prām kêt  
kwārīk wānh gar kum ō kwý krēn  
djā nhōr kêt, ane.

<sup>11</sup> Ar akam ar akwý ne ar àpênh  
prām kêt kumrēx ne ar ba bar arým  
kuma. Nām ar mýjja kupênh kêt  
ne kam kikre kabe'ā kabēn prām  
kadjybit ar ba. <sup>12</sup> Ē, ar prīne ikabēn  
ma. Bēnjadjwýr Jeju Kritu kabēnkôt  
ne bar arkum ukangajamā ikabēn  
jarē ne àpênh'ā arkum apné ne  
arkum,

—Dja gar akrānmā adjâpênh ar  
aba. Ar anhō kwý krēn kadjy  
adjâpênh ar aba, ane.

<sup>13</sup> Be, akmere ar, àpnhīre ar, ar  
akunī dja gar amrānh mexja kanga  
kêt. Ar akunī dja gar amrānh  
mexkumrēx ne.

<sup>14</sup> Godja me'ō ar ikabēnja mar  
prām kêt, ar ije ar amā 'ā pi'ók  
no'ókja mar prām kêt gar 'āno djan  
omūn kum akre rax. Kute on amim  
kator ne pijām kadjy. Kadjy dja gar  
'ā ano týx ne 'āno djan omū. <sup>15</sup> Djām  
ar aje o akurē djwýnhmā? Kati, ar  
aje o akamykam dja gar abēn djānh  
no katio bit kum akabēn ne kum,

—On tu Metīndjwýnh kabēn  
markumrēx ne kôt ar amijo aba,  
ane. Dja gar ā kum ane.

### *Kabēn jarēho ino rer.*

<sup>16</sup> Gê Bēnjadjwýr kute memā  
umar mex jarēnh djwýnh ta ar amā  
umar mex jarē gar mā adjumar  
mexbit man o aba gê te mýjja ar  
ajo ajkē gar mā adjumar mex ne ar  
aba. Gê Bēnjadjwýr amimē ar ar ajo  
ba.

<sup>17</sup> Aje, ibê Paur ne ba ar amā pi'ók  
no'ók ne. Ē, ba ne ba inhikrao pi'ók  
no'ók ja ngrire no'ók ne o ino re. Ije

memā pi'ók no'ók kunīkôt ne ba ā  
pi'ók no'ók kryre o ane.

<sup>18</sup> Gê gwaj banhō Bēnjadjwýr Jeju  
Kritu prīne ukaprīkôt ar ajo djuw  
mex. Tām ne ja.

## **Paur kute Ximoximã pi'ók kumrêx no'ók ne ja.**

Paur ne krabê Ximoximã pi'ók no'ók ne. Mýjkôt ne o kra? Jujukôt. Kute kum arênh nhym kute tu amim markumrêxkôt ne o kra. Nhym kam arkum aben kînhkumrêx ne.

Nhym kam Paur kumrêx ne krîraxbê Epexukam bôx ne kam ar memã Metîndjwýnh'ã ujarênh ba ne kam tê. Nhym kam Ximoxidjwý arým kam bôx. Kam tên bôx ne kam ar kam memã 'ã ujarênh ba, memã Jeju jarênh ba. Nhym me kwý arým prîne amikajmãtã Jeju ma. Nhym bep ar kwý ne ar arîk 'êx ne kute amijo Jeju mar. Ar kute mar kêtumrêx ne arîk 'êx ne memã mýjja jarê. Nãm we ar,

—Kwãrîk wãnh abenwýr mör kêt, ane. Ne,

—Mrywã kur kêt, ane. Nãm ar ã kupa'ã me akre ar o bao ane. Ar ja 'ã ne Paur Ximoximã kum,

—Dja ga akabêno ar ity gê ar an-hikrê, ane. Ne kam ajte me kute amim Jeju mar'ã kum karô ne kum,

—Ë, Jeju nhõ me jao ba djwýnhmê me atãri àpênhjamê gédja ar katãt mrãn memã Metîndjwýnh'ã ajarê, ane. Ne kam Ximoximãdjwý kum,

—Ë, gadjwý, gadjwý dja ga katãt mrãn Metîndjwýnh kabênkôt prîne memã arê, ane.

Ne kam ajte me'ã kum karô, me Metîndjwýnh kabênkôt katãt mrãnhmã, me mymê me niremê me ari memã àpênh kajgo ar bajamê me 'uwttimê, me kunî. Me kunî ne me Metîndjwýnh kabênkôt katãt mrãnhmã ajte Ximoximã me'ã karô. Ne kam me'ã kum pi'ók no'ók ne kum ano. Tãm ne ja.

<sup>1-2</sup> Akmere Ximoxi, ba ibê Paur ne ba amã pi'ók no'ók ne. Ximoxi,

ikra djwýnh, amã ne ba pi'ók no'ók ne. Ije amã Jeju jarênh ga tu aje amim markumrêx kôt ne ba arým ajo ikrakumrêx ne. Ba ibê Paur, ne ba amã pi'ók no'ók ne. Djãm ba ne ba Jejumã idjãpênh? Kati, Metîndjwýnhmê Kritu Jeju ar ta ne ar imã idjãpênh jarênh ijano, ije memã 'ã idjujarênhmã ijano. Metîndjwýnh, kute gu bapytãr djwýnhjamê Kritu Jeju gu baje amiwýr kam amakjamê, ar ta ne ar imã kabênh jarê ba kam arkum idjãpênh iba.

Be, gê Metîndjwýnh ajo djuw mex. Kritu Jeju gu banhõ Bênjadjwýrmê Bãmbê Metîndjwýnh ar ukaprikôt ajo djuw mex ne ar ajo ba. Gê arkum akapri ne amã umar mex jarê, ga kam adjumar mex ne ar aba.

*Kute Metîndjwýnh kabênh jarênh djwýnh 'êxnhî bôxmã arênh.*

*Rô 16.17; Xim k 6.3; Xit 1.10*

<sup>3</sup> Ë, dja ga arek Epexukam djan nêje ar kukrà. Wãnh ne ar kwý arîk kupa'ã ar memã arênh ba, Metîndjwýnh kabênh kupa'ã ar memã arênh ba. Dja ga nêje akabêno ar ity. Nã bãm itêm kutã, pykabê Matenimã itêm kutã amã ikabênh jarênh kam arým ajbir ajte ar'ã amã pi'ók no'ók ne ano.

<sup>4</sup> Dja ga arkum,

—Kwãrîk wãnh ar me tûmre'ã ujarênh kajgomê me akukãmãre nhidji me kute tûmrãm abenmã arênhja kwãrîk on wãnh nõ. Kôt ne me abenmã kabênh ar ban kam me kute amim Metîndjwýnh mar ne 'ãno ãm kêt. Tãm dja on wãnh nõ, ane.

<sup>5</sup> Akmere Ximoxi, mýj kadjy ne ba amã ikabênh ja jarê? Bir, me kum aben jabê kadjy. Godja me ôkre kadjwýnhbê axwe 'õ nör kêt ne kute amikam axwe 'õ mar kêt kam arým kôt kum aben jabê. Ne kam ajte me kute mrãmri amim Jeju markumrêx kôt ne me kum aben

jabê. Kadjy ne ba amã ikabên ja jarê.

<sup>6</sup> Bir be, me kwÿ arÿm kute ja mar prãm kêtkam arÿm kabên kajgo kumex, ne abenkam kangao kumex. Jabit ne me kuma.

<sup>7</sup> Djãm me ja kute mÿjja mar got. Kute Môjdjê kukràdjà mar kêtjakam kukràdjà kupa'ã ar memã arênho ba. Ar ta ne ar amijo memã mÿjja'ã ujarênh djwÿnh ne. Ne kute memã,

—Mrãmri ne ba ije me amã arênhja. Kôt ne ba me amã arê, anhÿr ar o ba. Bep kati, ar kute ta amikabên mar kêt ne Môjdjê kukràdjà mar kêt.

<sup>8</sup> Be, Môjdjê kukràdjaja ne mexkumrêx. Gu arÿm kuma. Ne ren ar kuman kôt ar amijo ba nhym arÿm rãn mexkumrêx. Nhym bep kati, ar ja kute mar kêt ne ar kupa'ã memã arênh ar o ba.

<sup>9</sup> Be, nhÿnh me jamã ne Môjdjê kukràdjaja? Djãm me kute katât amijo bajamã? Kati, me kute axweo amiptârjamê, me amakkre kêtjamê, me kute Metîndjwÿnh mar prãm kêtjamê, me axwejamê, me kute mÿjja punubit mar prãmjamê, me kute Metîndjwÿnh japrÿjamê, me kute nãmê bãm ar parjamê, me kute me parjamê <sup>10</sup> me prô nâr mjên prãmjamê, me my ta kute aben nÿho bajamê, me kute mekbê krao àkÿnhjamê, me 'êxnhÿjamê, me kute me kà mex jarênhjamê, nâr me kute mÿjjao amiptâr, Metîndjwÿnh kute katât memã amikukràdjà jarênh ne mekbê mÿjja puma nhym me kute o amiptârjamê. Me ja kunÿ kadjy ne Môjdjê kukràdjaja. Gu arÿm kuma.

<sup>11</sup> Nà, Metîndjwÿnh amikabên nykôt katât memã amikukràdjà jarê. Djãm kabên ny punu got. Axwe mextire. Metîndjwÿnh ne mexo, umao me rer mex ne. Nhym kabên nydjwÿ à mexo, umao ane. Nhym kam ta, Metîndjwÿnh kÿnh tire ta ne imã amijã ujarênh ny jarên

ijano ba kam ô'ã memã arênho tê, memã 'ã idjujarênh tê.

*Kritu kum Paur kaprÿ ne kute àpênh 'ã mênh.*

<sup>12</sup> Ê, akmere, mrãmri ne Kritu Jeju gu banhô Bênjadjwÿr amim idja. Kum idjâpênhmã ne amim idja. Nãm amikajmã'ã ima, ije 'ã ingrà tÿx ne kanga kêtmã kôt tu iman amim idjan imã idjâpênh jarê.

—Dja ga imã apê, ane. Ne kam kadjy imã tÿx jadjà ba kam kum idjâpênh mex ar iban kôt kum amikÿnh jarê. Mrãmri ne Kritu Jeju imã mexkumrêx ba kam kum amikÿnh jarê.

<sup>13</sup> Amrêbê ne ba Jeju japrÿ ar o iban arÿk ùno iban Jeju nhô me jao ibikênho iba. Nã bãm te Jejukam ijaxwe nhym tu kum ikaprÿn kam amim idja. Nà, mrãmri ne tu kum ikaprÿ. Kraxje ije amikajmã'ã Jeju mar kêtkam ije amimar kêt nhym bi kum ikaprÿ. <sup>14</sup> Nãm gu banhô Bênjadjwÿr tu ukaprÿkôt kum ikaprÿ raxkumrêx ne prÿne ijo djuw mex. Djãm ukaprÿ kêt got. Kum ikaprÿ rax ba arÿm jakam ije amikajmã'ã amim markumrêx. Ije amikajmã'ã Kritu Jeju markumrêx ne imã abê:kumrêx.

<sup>15</sup> Ê, mrãmri ne me abenmã kum, —Kritu Jeju arÿm pykamã ruw, kute me axwe pytarmã ne ruw, ane. Mrãmri ne me abenmã arê. Kabên ja dja me tu markumrêx ne amijamakkrekam kunhò. Be, kute me axwe pytarmã ne pykamã ruw.

Ba ne ba ijaxweo me axwe kunÿ jakre. <sup>16</sup> Te ijaxwe rax nhym bi kum ikaprÿ rax ne. Jeju Kritu kute akrânãmã meo tēm nhym me kute mar kadjy. Te ijaxwe raxo ije me kunÿ jakrenh nhym mã Jeju kute akrânãmã prÿ'ã ijo tēmja pumÿ. Mÿkam? Godja me'ô kute ijaxwe pyræk ne kute Jeju japrÿ jabej dja ikôpdji'ã ã ikudjwa anen tu amim Jeju kamnhÿkkumrêx ne kam ikudjwa tyk nhijukri tÿn rã'ã rã'ã kadjy.

Kadju ne Jeju kum ikaprîn akrânâmã prî'ã ijo tẽ. Kam ne ba amã,

—Jeju kute me axwe pytãrmã ne pykamã ruw, ane.

<sup>17</sup> Be, Metîndjwýnh djukaprîja pumû. Kumã dja me rax jarẽ. Djãm bẽnjadjwýr ngri got. Dja memã Bẽnjadjwýr rax rã'ã: rã'ã Bẽnjadjwýr rax. Dja tyk kêtumrëx ne. Me kute noo omũnh kêtumrëx ne. Kubê Metîndjwýnh pydji. Atemã 'õ kêtumrëx. Kumã dja me rax jarẽn kum uma jarẽn mex jarẽ. Dja me kum arẽnh rã'ã: rã'ã ne. Mrãmri. Tãm ne ja.

<sup>18</sup> Ê, ikra Ximoxi, akmere, ba arým amã ikabẽn jarẽ. Gora ikabẽn ja ma. Amrêbê ne me Metîndjwýnh kabẽn jarẽnh djwýnh adjãpênhmã akabin prîne adjãpênh'ã amã karõ. Kõt ne ba amã ikabẽn ja jarẽ. Ê, dja ga ar ikabẽn ja man kõt atýx ne. Ê, ba me abenwýr prõt'ã atýx jakre. Ê, gora atýx. Gora atýx ne amã me uma kêt ne kãj bê memã Metîndjwýnh kabẽn jarẽ gẽ me amikajmãtã kuma. Kute me týx kum me uma kêt ne tu kute abenwýr prõtja pyrãk.

<sup>19</sup> Nã, dja ga ã anen Jeju'ã angrã týx ne amim mýjja mexbit man kõt amijo aban kam amikam ajaxwe 'õ mar kêtumrëx ne ar aba.

Nhym bep me kwý ne me arým Jeju'ã ngrã týx kêt ne kõt amijo ba kêt ne kam arým kangan amijo ajkê. <sup>20</sup> Be, Imenemê Arexãrimê ne ar arým Jeju kangan amijo ajkê. Arým ne ar amijo ajkê. Kam ne ba arým Xatanajmã ar kanga, ar kute Jeju japrý kêt kadju ne ba arým kum ar kanga.

## 2

<sup>1</sup> Be, akmere, ba amã arẽ ga aman amû idjõ'ã memã arẽ. Dja me Metîndjwýnhmã mã kabẽn ne

kum me kunî jarẽ. Mã ne mete Metîndjwýnhmã kabẽn kute? Dja me kum aben jarẽn kum abeno a'uw. Ne kam jãm meo akẽx ne me jadjwý kum meo a'uw. Ne kõt kum õdjãnh jarẽn kum amikĩnh jarẽ. <sup>2</sup> Nã, dja gu me kum pykakam me bẽnjadjwýr rũnhjao a'uw ne kam ajte me bẽnjadjwýr kry kute meo ba jadjwýo a'uw.

Mýkam? Bir, me kute akrânãmã me bajo ba gu me badjumar mex ne ar baba kadju. Kam dja gu me Metîndjwýnh kabẽnkõt ar baba ne kõt ar amijo baba katãt ne. <sup>3</sup> Be, me ã kute Metîndjwýnhmã kabẽno anhýrkam mexkumrëx. Kam dja Metîndjwýnh mekam kĩnhkumrëx. Metîndjwýnh kubê me bapytãr djwýnh dja mekam kĩnhkumrëx.

<sup>4</sup> Nã, kute me kunî pytãr prãmumrëx. Nãm arým memã katãt kabẽn nhym me kute tu markumrëxmã. <sup>5</sup> Nã, Metîndjwýnh pydjii ne kam ajte kute Bãm'ã me bamẽnh djwýnh pydjii, kubêngõkre,\* kubê ne Kritu Jeju. Me bajaxwekam ne gu me Metîndjwýnh'ýr babõx kêt ne. Nhym kam kra ta amijo kubêngõkren me bawýr bõx ne kam Bãm'ýr me bajo bõx. Gu me kam arkõt baba. Kute Bãm'ýr me bajo bõx djwýnh pydjii. Atemã 'õ kêt, kubêngõkre, kubê ne Kritu Jeju.

<sup>6</sup> Jeju ta, kute memã amikangan me kunî pãnh tyk, tãm ne amrêbê Metîndjwýnh 'ã akati jakre nhym arým 'ýr bõx nhym kam arým amijo aptãn memã amikangan me kunî pãnh ty, me kunî kute mar kadju. Me kunî kute,

—Mrãmri Metîndjwýnh kum me bajabẽn kute me bapytãrmã, anhýr kadju. Kadju ne ty.

<sup>7</sup> Kam ne Metîndjwýnh ijano ba tẽ. Ba ikumrëx itẽm ne ije

\* 2:5 Kritu ne amijo kubêngõkre kute mrãmri ne apýnh me õ pyka djãri kuníkõt me kunî: bêngõkreja pyrãk. Kubê kã jakamê me kakrãtykmê me babêngõkremê ne me kunî: bêngõkre. Me kamrõmê me kukrãdjã kunî kubêngõkreo aben pyrãk. Jakam dja ga Karõ 17.26 jarẽn ama.



memã Metĩndjwýnh kute me utãr jarënhmã. Jeju kute ijanorkôt ne ba me bajtemdjwý'ýr tën bôx ne memã kaj bê Metĩndjwýnh'ã ajarë. Nã bãm memã Metĩndjwýnh kabën katãtja, 'ëxnhĩ kêtja jarë nhym me amikajmã'ã kuma. Kadjy ne ijano ba tẽ. Mrãmri ne ikabënja. Ijëxnhĩ kêtikumrëx.

<sup>8</sup> Ije, ije ar amã Metĩndjwýnh jarënh gar aje kum akabënmã ba ate o akno. Ba akubyn ar amã arë gar ama.

Dja pyka kunĩkôt mete abeno bikprõnhkam me my Metĩndjwýnhmã kabën. Dja me prĩne Metĩndjwýnhmã amijarë. Me mexo mexkumrëx, me kute mýjja punu 'õ mar prãm kêt, me ja dja me kum kabën. Nhym bep me ngryknhĩ, me kute kabëno aben japanh, me tãm dja me kum kabën kêt ne.

*Me nire kute akrãnmã amijo bamã.*

*Kô k 14.34; Xit 2.3; Ped k 3.1*

<sup>9-10</sup> Nhym me niredjwý. Dja me nire kute Jeju marja akrãnmã amijo ba mexkumrëx, kwãrik wãnh amimex ne me my nokam mrãnh kêt. Dja ga me apijãm ne ar aba. Mýkam dja gã me akrãkãbit mex? Nã gãm me amikakrwýnhmẽ akunhêrmẽ angãmẽ kubëkã mexmẽ o amimex ne ar aba. Me akrãkãbit ne mex. Me my nomã amrãnh kadjybit aje amikrã ngrãnh, amikakrwýnh, ne amimex, ja ne punu. Bep kati, me nire kute,

—Ba ije Jeju mar, anhýrja dja apýnh kabën mexo amiptàn o amimex.

<sup>11</sup> Me kute Metĩndjwýnhkôt abeno bikprõnhkam dja me nire anhikrën nhýn Metĩndjwýnh kabën maro nhý. Akrãnmã dja me Jeju nhõ me jao ba djwýnh kabën maro nhýn amijamakkrekam kunhõ.

<sup>12</sup> Kwãrik wãnh me nire dja me me my jakre kêt ne me mymã kabën jarënh kêt ne. Nhym bep me my gëdja me me niremë me mymë me akre nhym me nire anhikrën me kabën maro nhý.

<sup>13</sup> Mýkam? Bir, Metĩndjwýnh ne mybê Adão kumrëx nhipëx ne kam atãri nibê Ewa nhipëx ne. <sup>14</sup> Be djãm Xatanaj ne Adão noo akno? Kati, nija ne noo akno. Nhym kam nija arým Metĩndjwýnhkam amikrã. Be, kam ne ba amã,

—Kwãrik wãnh me nire dja me me my jakre kêt, ane.

<sup>15</sup> Nija ne te Metĩndjwýnhkam amikrã nhym mã Metĩndjwýnh kum me nire jabëkumrëx ne me kra bixadjwýr kutã me utã. Me nire kute Jeju marja gëdja me Jeju 'ãno dja ne mã kum me abëkumrëx ne kute mýjja punu 'õ mar prãm kêtka gëdja mexo mexkumrëx ne mã me my nomã mrãnh kêt. Godja me ã kute anhýr jabej nhym Metĩndjwýnh me kra bixadjwýr kutã me utã nhym me kra me bĩn kêt ne.

### 3

*Kute ar kute Jeju nhõ me jao ba djwýnhmã 'ã karõ.*

*Xit 1.6*

<sup>1</sup> Be mrãmri ne me abenmã kum, —Gëdja me'õ kute meo ba prãm jabej, kute Jeju nhõ me jao ba prãm jabej, mrãmri mexkumrëx. Nã, mrãmri mexkumrëx. Nã, kôt ne me kute arënhja.

<sup>2</sup> Be, mã gëdja Jeju nhõ me jao ba djwýnh kute? Me axwe kêt ne kute amijo ba mextire nhym kam me me'ã kabën kêtja, me prõ pýnh, me bixaêr punu kêt, me kute amipnënh ne ar ba, me kabôt kati, me kute meo djuw mex prãm, me kute memã Metĩndjwýnh'ã ujarënh prãm, me ja gëdja me Jeju nhõ me jao ba.

\* 3:3 Mýjja me kute o kôm ne kôt bibãnh kunĩja, kadjwati kangômẽ uba kangômẽ, mýjja kangõ kunĩ ne me kum kadjwati kangõ jarë.

<sup>3</sup> Kwārîk wānh me kum kadjwati kangô\* djānh, me àkrê, me kute kabēno me apanh prāmja, me kute pi'ók kaprîbit mar ne kute amim o àptārja, kwārîk wānh me ja gédja me meo ba kêt ne. Bep kati, me ukaprîmê, me kute umar mex marja dja me Jeju nhô me jao ba.

<sup>4</sup> Dja me'ô meo ba prām jabej dja kumrêx amim prômê kra jakre, ne arkum mrānh mextire gê ar omûn kam adjwýnhdjwý kôt mrānh mexkumrêx. Dja amim ar jao ba mex nhym kra amakkre mex ne kabēnkôt ar amijo ba nhym kam arým kôt Jeju nhô me jao ba. <sup>5</sup> Nok ren me'ôja ar meo ban kam prômê kra jakre kêt kumrêx ne kam Metîndjwýnh nhô me jabit me akre, mā gédja on? Mā gédja kam nê? Ije, mýkam ne prômê kraja ar o ba mex kêt nhym kra jaxwe rā'á? Ije kum bep nām ren amim prômê krawā kumrêx jakren kam ren kôt Metîndjwýnh nhô me ja jakre. Mýkam ne prômê krawā ar o ba kêt ne kam Metîndjwýnh nhô me jabit ar o ba?

<sup>6</sup> Kwārîk wānh me'ô ajbir kute Jejuo aminhō ny'ô'á Jeju nhô me jao ba djwýnh mēnh kêt. Mýkam? Bir, kute amiraxo àmra nhym kam ren Metîndjwýnh kute o bikēnh karō dja me kute Jejuo aminhō ny'ô'á meo ba djwýnh mēnh kêt. Ne ren amiraxo amra nhym ren Metîndjwýnh o ajkê. Mrāmri kute Xatanajo bikēnhja pyrāk. Xatanaj kute amiraxo àmra nhym kam Metîndjwýnh kute prîne o bikēnhja pyrāk. Ne ren me'ô ajbir kute Jejuo aminhō ne ren meo ban ren amijo amra, Xatanajkôt amijo amra nhym ren Metîndjwýnh adjwýnhdjwý o ajkê.

<sup>7</sup> Nhym bep kati, Jeju nhô me jao ba djwýnh dja amijo ba mextire nhym kam me kâtāmdjwý kum kînh ne kum mex jarê. Nām ren

arîk ar ba nhym kam me kâtām rān 'á kabēn ne. 'Á kabēn nhym kam rān Xatanaj ikôta, Xatanaj meo ba djwýnhja nhikôta.

<sup>8</sup> Nhym Jeju nhô me jao ba djwýnh jatāri me àpēnhjadjwý dja me kâtāt mrā gê me me'á kabēn kêt. Dja me kabēn mexmê me kabēn punuo aben nhikjê kêt. Dja me kum kadjwati kangô† djānh kêt. Kwārîk wānh gê me pi'ók kaprî prāmebit me noo biknor prām kêt. <sup>9</sup> Dja me amim Metîndjwýnh kukràdjā markumrêx ne 'á ngrā tỳx ne. Metîndjwýnh kute me bamābit amikukràdjāo amirîtja, kukràdjā tāmbit dja me 'á ngrā tỳx ne maro ba ne mýjja mexbit mar ar o ba. Mýjja mexbit mar ar o ban kam amikam axwe 'ô mar kêt. Kadjy dja me Metîndjwýnh kukràdjā'á ngrā tỳx ne ar o ba. <sup>10</sup> Dja me Jeju nhô me jao ba djwýnh jatāri me àpēnhja kumrêx kabi nhym me kabēn mex ne kam ar kôt àpēnh ba. Godja me mrāmri mexkumrêx jabej ne kam arým àpēnh ar ba.

<sup>11</sup> Nhym Jeju nhô me jao ba djwýnh jatāri me àpēnh prōjadjwý. Me adjwýnhdjwý dja me kâtāt mrā gê me me'á kabēn kêt. Dja me me kà mex jarēnh prām kêt. Dja me bixaêr punu kêt ne ar ba. Dja me prîne mrānh mextiren kabēn pýnh ne arê. Dja á Jeju nhô me jao ba djwýnh jatāri me àpēnh prōja á ane.

<sup>12</sup> Be, Jeju nhô me jao ba djwýnh jatāri me àpēnh gédja me prō pýnh ne. Dja me ô kikre kumrêxkam amim ar ja jakren arkum mrānh mexkumrêx gê ar omûn kam adjwýnhdjwý kôt mrānh mexkumrêx. Dja me amim krao ba mexkumrêx gê ar kabēn mexkumrêx ne ar ba. <sup>13</sup> Godja me atāri me àpēnhja mrāmri àpēnh mex ne kam arým memā amimexo amirît nhym me kâtāmja arým me mex pumûn

† 3:8 Mýjja me kute o kôm ne kôt bibānh kunĵa, kadjwati kangômê uba kangômê, mýjja kangô kunĵi ne me kum kadjwati kangô jarê.

kam kum me kînh. Gêdja mekam amikam pijâm kêt ne kâjmã djan tu memã Jeju'ã ajarê. Me kute amim Kritu Jeju mar tûmkam tu memã 'ã ajarê. Bir be, dja ã Jeju nhõ me jao ba djwýnhmê atãri me àpênhmê ã ane.

<sup>14</sup> Be, nã bãm amã ikabên'ã pi'òk no'òk ne amikukãm ano. Dja ba ã wãm kôt tẽ. Nã bãm amim itêm djã ma. <sup>15</sup> Nãr kon birãm dja ba amikrà ga prîne omûn kam kôt memã arê, me kute mar kadjy. Metîndjwýnh kra kunĩ kute kôt ar amijo ba mar kadjy. Kadjy ne ba amã pi'òk no'òk jano. Apýnh pyka kunĩkôt ne me bakwý arým amijo Jeju pytà nhym Metîndjwýnh arým kôt me bajo kra. Gu me kôt arým apýnh banhõ pyka djãri kam aprakamã kôt aben pydji, Metîndjwýnh tînjakôt mã pyka kunĩkôt aben pydji. Ne me kâtãmmã Metîndjwýnh kabên jarênh ar o baba, Metîndjwýnh 'êxnhĩ kêt ne kute katãt kabên jarênhja memã arênh ar o baba.

<sup>16</sup> Bir be, djãm mýjja kakrit, djãm mýjja prîre, djãm mýjjao bikênh ne gu me arým amim kuman kam amim kamnhixbê ar baba? Djãm mýjja ngri: got me tebê kute mar ne ate krãmã? Mrãmri ne Jeju ra:xi.

Nãm amijo kubêngòkren† kato.

Nhym Metîndjwýnh Karõ kabin axwe kêtã katon kôt memã arê.

Nhym kadjy mrãnh djwýnhdjwý arek omûnh ar o ba.

Nhym me apýnh me õ pyka djãri kãj bê memã 'ã ujarêho ajmã.

Nhym me kam pyka kunĩkôt tu amim markumrêx ne.

Nhym kam Metîndjwýnh kãjkwamã o wabi, õ kãjkwa mextiremã o wabi. Õ kãjkwa mexo kute pykabê mýjja kunĩ jakrenhjamã o wabi.

Nãm ã Jeju raxo ane.

## 4

*Kubê me kabên 'êxnhĩ pyma.*

<sup>1</sup> Be, akmere. Anhýr djwýnhnrãm ne Metîndjwýnh Karõ arým prîne me bamã arê, ne,

—Pyka kute o ino rer 'ýrkam dja me kwý amibê Jeju kangan ate amijo ba. Arým kum kînh kêt ne kam ate me karõ 'êxnhĩja kabên ma, me karõ djujarênh punubit man kôt amijo ba, ane.

<sup>2</sup> Nã, mrãmri me kwý dja me me karõ djõ'ã me akre. Me ajkwao bit kute Jeju mar ne 'êxja, me tãm ne me òkre kadjwýnhbê kute mýjja punubit markam pijâm kêt mex ne arík 'êx ba ne me karõ 'êxnhĩ djõ'ã me akre ne memã kum,

<sup>3</sup> —Kwãrik wãnh abenwýr mõr kêt. Dja ga me tu akuprýkumrêx ne ar aba, ane. Ne ajte mry'õ nãr me àkur djã'õ mekbê uman memã,

—Kwãrik wãnh krên kêt, ãm omû, ane. Nhym bep kati, Metîndjwýnh ta ne me bamã mry, me badjakur djã nhípêx, me baje 'ã kum amikînh jarênh ne krên kadjy ne me bamã ipêx. Me baje amim Jeju markumrêx ne kam kôt baje mýjja marja, me bamã ne Metîndjwýnh me banhõ kwý krên djã'ã apýnh mýjja nhípêx.

<sup>4</sup> Be, mýjja kunĩ Metîndjwýnh kute ipêxja ne mexkumrêx. Djãm mete mry nãr djwý'õ kanga kadjy ne Metîndjwýnh ipêx? Arkati, me kute Metîndjwýnhmã 'ã amikînh jarênh ne tu kute amim byr ne krênmã ne ipêx. <sup>5</sup> Metîndjwýnh kabênkôt arým mrymê apýnh me badjakur djã mexkumrêx. Mýjja kunĩ ne arým mexkumrêx. Gu me arým 'ã kum amikînh jarê nhym arým mexkumrêx.

<sup>6</sup> Akmere, dja ga memã arê, me kute Jejukôt abeno kamymã ikabên ja jarê. Godja ga memã

† 3:16 Kritu ne amijo kubêngòkre kute mrãmri ne apýnh me õ pyka djãri kunĩkôt me kunĩ: bêngòkreja pyrãk. Kubê kã jakamê me kakrãtykmê me babêngòkremê ne me kunĩ: bêngòkre. Me kamrômê me kukràdjã kunĩ kubêngòkreo aben pyrãk. Jakam dja ga Karõ 17.26 jarênh ama.

ikabên ja jarên arým mrâmri abê Kritu Jeju nhô àpênhkumrêx. Nâ, Metîndjwýnh kabên ne gu baje tu amim markumrêxja, kôt dja ga arek amijo tèn amijo tèn kam atýxkumrêx. Jeju kukràdjâ mexkumrêx, tãm ne ga arým kôt amijo tẽ. Dja ga arek kôt amijo tèn amijo tèn arým atýxkumrêx. Atýx ne arým Kritu Jejumâ adjâpênh mex ne.

<sup>7</sup> Nhyr bep me tũmre'ã ujarênh kajgoja dja wãnh nõ. Tãm ne punu. Kati, dja ga prĩne Metîndjwýnh kukràdjâkôt amijo tẽ. Katât amrãnh kadjy dja ga arek amijo tèn arek amijo tèn kam amityxmã amijakre. Djãm akrãkà'ã ne ba amã ane? Kati, akadjwýnhbê atýx'ã ne ba amã ane.

<sup>8</sup> Mrãmri ne me ĩ krãkà týx kad-  
jybit amijo djuw mex. Ja ne kãjbê mex. Nhyr bep me kadjwýnhbê me týxja mete Metîndjwýnh kukràdjâkôt amijo tẽmkam týx, ja ne mrãmri mexkumrêx, tũmrãm mexkumrêx. Pyka jakam gu bad-  
jumar mex ne ar baba kadjy mex. Ne kam ajte batyk nhijukri akubyn batĩnkam kadjy mexkumrêx. Kadjy ne ba amã,

—Metîndjwýnh kukràdjâkôt amijo tèn kam kôt atýx, kôt amex, ane.

<sup>9</sup> Mrãmri ne kabênja nhyr me abenmã arẽ. Kabên ja dja me tu markumrêx ne amijamakkrekam nhõrkumrêx.

<sup>10</sup> Metîndjwýnh kute me kunĩ pytâr djwýnh, bep me baje amikajmãtã marja ne mrãmri kubê me bapytâr djwý:nhkumrêx. Mrãmri ne gu me amim Metîndjwýnh kamnhĩxbê ar baba, Metîndjwýnh tĩnja kamnhĩxbê ar baba. Kam ne gu amikukãm kuman kam badjâpênh rax ne memã arênho tẽ, batyk djâ kêt ne memã arênho tẽ.

*Metîndjwýnhmã àpênhkumrêxmã kum 'ã karõ.*

<sup>11</sup> Be, akmere, dja ga apijãm kêt ne tu memã ikabên ja jarên memã Metîndjwýnh kukràdjâ jarẽ.  
<sup>12</sup> Kwãrik wãnh gẽ me amã,

—Ûgê, e kum djãm ajabatãnh ne ga ar me akreo aba, anhýr kêt. Bep kati, dja ga te ajbir ajabatãnh ne mã katât mrã gẽ me ajã amijakre, me kute amim Jeju marja ajã amijakre. Kadjy dja ga akabên mexbit jarênh ar o aban amrãnh mex ne amã me abên amim Jeju markumrêx ne 'ã angrã týx ne aprõ prãm kêt ne ar aba. Dja ga ã ane nhyr me ajã amijakren ã akudjwa amijo anhýro bao ane.

<sup>13</sup> Dja ga kãj bê memã Metîndjwýnh kabên jarên memã Metîndjwýnh kabẽno amirĩt ne memã kukràdjâ jarẽ. Ja dja ga 'ãno adjãm rã'ã ba awýr bõx. Ba ibê Paur dja ba awýr bõx.

<sup>14</sup> Amrêbê ne me kute Metîndjwýnh kabên jarênh djwýnh arým Metîndjwýnhmã adjan amã,

—Ë, Metîndjwýnh ne arým amijo apytã ga kum adjâpênhmã. Ta dja amã týx jadjã ga kam atýx ne ar kum adjâpênh aba, ane. Nhyr kutã Jeju nhõ me jao ba djwýnh akrã'ã ikra jadjuw, ga kam Metîndjwýnhmã adjâpênh ar aba. Kwãrik wãnh Metîndjwýnh kute amim adjarwão abiknor kêt. Memã Metîndjwýnh kukràdjâ jarênh 'ãno dja ne mã memã 'ã adjujarênh aba.

<sup>15</sup> Be, dja ga ikabênja tu markumrêx ne amijamakkrekam anhõn kôt amijo mõ. Dja ga ã amijo atẽmo anen arým amrãnh mexkumrêxo tèn o tẽ nhyr me kunĩ arým amrãnh mexkôt apumũn kôt amã kato. <sup>16</sup> Ë, ajaxwebê amipnên amrãnh katât kadjybit amima. Gora memã Metîndjwýnh kabên jarẽ. Gora memã arênh 'ãno dja. Godja ga anen arým amiptãn kam o me

jadjwý pytà, me kute akabên maro  
ÿrjadjwý pytà. Tãm ne ja.

## 5

*Mebêngêtemê me 'uwtĩ'ã kum  
karô.*

*A Xim 2.24*

<sup>1</sup> Ê, godja me kute amim Jeju marwã 'õ, mebêngêtte 'õ, me'õkam amikrà, kwãrik wãnh ga kum abên týx kêt ne akrãnmã kum akabên ne kum,

—Kwãrik wãnh ga ã anhÿr kêt, ane. Mrãmri ne me kra djwýnh kute bãmmã kabênja pyrãk, akrãnmã kum akabên. Dja ga me kraremê me nôr nyreo akamyn me adjwýnhdjwýmã akabên mex jarê. <sup>2</sup> Dja ga mebêngêxteo anãn me adjwýnhdjwýmã akrãnmã akabên. Dja ga me kra pÿnhmê me kurerero akanikwýnhkumrêx ne memãdjwý katãt akabên jarên mekam apijãm ne meo akanikwýnhkumrêx. Dja ga ã me kute amim Jeju mar kunĩmã akabên jarênho ane.

<sup>3</sup> Ê, akmere, ba amã me 'uwtĩ'ã karô, ga amũ idjô'ã memã arê. Me kute amim Jeju marwã kute akrãnmã mebê mjên tykjao djuw mexmã. Me kute amim Jeju marwã dja me me 'uwtĩbito djuw mex. <sup>4</sup> Nhyr bep djãm me'õbê mjên ty nhyr arÿm kra nãr kon tãmdjwý 'õ arÿm ta amim o djuw mex ne. Me'õ kra 'õ nã kute amim o djuw mex nhyr abatãnh ne arÿm amipãnh amim não djuw mex ne. Ne me'õ tãmdjwý 'õ kwatynh 'õ amim tãmdjwýo djuw mex ne. O djuw mex nhyr abatãnh ne kam amipãnh kwatynho djuw mex ne. Me kute mrãmri Metĩndjwýnh mar jabej dja ã õ kikre kumrêxkam amim me 'uwtĩo djuw mexo anen kam atãri amũ me jadjwý o djuw mex ne. Kam ne Metĩndjwýnh arÿm mekam kĩnhkumrêx ne.

<sup>5-6</sup> Ate gêdja me'õbê mjên ty nhyr arik ar ba. Nãm amidjwýnhbit amiman ar amijo ba. Ne kam

kute me'õ tyk pyrãk. Tĩnri kute me'õ tyk pyrãk, kute Metĩndjwýnh mar kêtka, arik ar bakam. 'Uwtĩ kajgo ne wã. Kwãrik wãnh me wã. Me tãm dja gar aje Jeju marwã o djuw mex kêt. Nhyr bep atemã me'õ mjên kubê tyk nhyr kam ate: ar ba ne kam amijã Metĩndjwýnh kamnhĩxkumrêx ne kam kum kabên ne kum amijo a'awn kam ajte jãm me jao akêx ne ajte kum meo a'uw. Akamãtkammê a'urimê kum kabên 'ãno dja. Me'õ tãm ne mrãmri 'uwtĩkumrêx. Tãmbit dja gar aje Jeju marwã o djuw mex ne.

<sup>7</sup> Dja ga memã ikabên ja jarê gê me'õ kra nãr kon me'õ tãmdjwý õbikwa 'uwtĩo djuw mex. Dja o djuw mex gê me 'ã kabên kêt. <sup>8</sup> Godja me kute amim Jeju mar 'õ ta ÿrkwã djwýnhkam amim me jao djuw mex kêt ne kam arÿm mrãmri axwen arÿm Jeju kabên kanga, ne kute axweo me kãtãmja, me kute Jeju mar kêtja jakrenh mex ne.

<sup>9</sup> Ê, ba amã me 'uwtĩ nhõ pi'õk'ã karô. Dja ga me 'uwtĩ nhidji pi'õk no'õkkam anhõ, me kute amim Jeju marwã kute kôt meo djuw mex kadjy. Ê, kwãrik wãnh me abatãnh nybê mjên tykwã kwãrik wãnh me 'uwtĩkôt pi'õk no'õkkam idji nhõr kêt. Kubê mjên tyk bêngêxtebit dja ga idji nhõ gê me kute amim Jeju mar meo djuw mex.

Djãm ori arÿm 'ã amex 60 apêx jabej? Djãm ori mjên tĩnri krõ'ã mjên kêt nhyr kam kubê mjên tyk nhijukri me kute krõ'ã o prõ kêt jabej? <sup>10</sup> Djori kum mÿjja mexbit kĩnh ne ar o ba nhyr me kunĩ arÿm kôt omũn abenmã arênh jabej? Djori amikõpdji'ã kra jakreo tẽ nhyr kudjwa mexkumrêx jabej? Djori õbikwa kêtka meo djuw mex jabej? Djori prĩne Metĩndjwýnh nhõ me wão djuw mex ne memã õdjãnh jabej? Djori kum me umar punu kapri jabej? Djori kute mÿjja mexo amiptãrkôt kute mÿjja mexbit mar

jabej? Djâm ori ã kute anhÿr jabej mrãmri mexkumrêx, me 'uwtîkôt pi'òk no'òkkam idji nhô, me kute amim Jeju marja kunî kute me 'uwtî jao djuw mex kadjy.

<sup>11-12</sup> Nhyr bep kwãrîk wãnh ar abatãnh nybê mjên tykja kwãrîk wãnh pi'òk no'òkkam me 'uwtî ro'ã idji nhôr kêt. Mÿkam? Bir, ar 'uwtîja kute ôbê,

—Ba ikuprÿ gê me'ô iwÿr môr kêtumrêx. Ba tu Kritumã idjãpênhit, anhÿrja tu o aknon ajte kum me my kînh nhyr me'ô 'ÿr môr prãme kum Kritu kînh kêt ne kubê amijo akêx nhyr me arÿm 'ã kabên ne.

<sup>13</sup> Nhyr ar kam kum ukangabit ma ne kam kikremã ipôko tê. Djâm arkum ukangabit? Kati, nãm ar kabên prãmdjwÿ, ne me'ã kabên tê, me pijãm djãbit, mÿjja punubit jarêno tê.

<sup>14</sup> Kam ne ba memã kum,

—Dja ar abatãnh nybê mjên tyk ajte mjên ne kam amim kra mÿ ne kramê mjêno djuw mex ne akrãnmã àpênh ar ba. Be, nã bãm ã ar abatãnh nybê mjên tykjamã ane. Mÿkam? Bir, me bakurê djwÿnh kute me bajã kabên kêt kadjy. <sup>15</sup> Bir be, Ar kubê mjên tyk kwÿ arÿm Jeju kangan Xatanajkôt amijo ba. Kam ne ba amã arê.

<sup>16</sup> Nhyr bep me kute amim Jeju mar ni 'ô nãr my 'ô ôbikwabê mjên tyk jabej ta dja amim ôbikwa 'uwtîo djuw mex. Nhyr ate me kute Jejukôt aben pydjija gêdja me'ô 'uwtîkumrêx ne ate: ar bajao djuw mex ne.

*Me kute kãjmã meo ba djwÿnh kamênhmã.*

<sup>17</sup> Ê, me jadjwÿ. Jeju nhô me jao ba djwÿnh kute prîne meo baja, ar tãm dja me kãjmã me kamê. Jeju nhô me jao ba djwÿnh kute memã Metîndjwÿnh kabên jarênh ne kute memã o amirîtkam àpênh rax. Me tãm dja me mrãmri kãjmã me kamên memã o pãnh mex ne.

Ar kute memã Metîndjwÿnh kabên jarênh pãnh.

<sup>18</sup> Kam ne Metîndjwÿnh kabên'ã pi'òk no'òkkam memã,

—Mryti kute amã àpênh ar ba ne kute amã bàygogo 'ÿka ka'uko ipôko ãmja kwãrîk wãnh inhu djuwpre kêt gê ta àpênh pãnh àkur tê. Nãm mryti'ã Metîndjwÿnh nhô me jao ba djwÿnh jakren àkur'ã kum pãnh jakre. Jeju nhô me jao ba djwÿnhmã me kute o pãnhmã. Ne ajte Metîndjwÿnh kabênkam ne,

—Me àpênh ne pãnh, ane. Me àpênh me mãmnhkutã tãm gêdja memã o pãnh, ane. Kam ne ba amã,

—Dja me Jeju nhô me jao ba djwÿnhmã o pãnh mex, ane.

<sup>19</sup> Ê, mÿjja 'ôdjwÿ dja ba amã arê. Gêdja me Jeju nhô me jao ba djwÿnh'ã kabên ne arîk me kâtãm jarê ga tu ate akrã. Djâm me 'êxnhî kêt got. Nhyr bep me'ô ar amãmnhkrut nãr kon amãmnhkrut ne ikjê kêt ne mrãmri kute noo axwekôt omÿnh ne axikôt arênh ga kam arÿm tu 'ÿr tãn kum akabên jarê gê amim kato. <sup>20</sup> Godja mrãmri Jeju nhô me jao ba djwÿnh kute mekam axwe jabej dja ga tu me kute amim Jeju mar nhipôkri kum abên tÿx, me kute maro 'ÿrja tîn prãm ne axwe kêt kadjy.

<sup>21</sup> Ê, ba amã mÿjja 'ôdjwÿ jarê. Dja ga tu memã akabêno aben pyrãk. Dja ga tu me kunîmã axikôt akabên.

Ê, Metîndjwÿnhmê Kritu Jejumê Metîndjwÿnh kute amijo kadjy mrãnh djwÿnh pytãr ja, ar kute ikabên mar ne ikôt kabênkam ne ba mrãmri tu amã ikabên jarê.

Ê, gora ikabên ja ma. Ikabên kunî ma, prîne ikabên ja ma. Ê, dja ga me kunîmã akabêno aben pyrãk. Kwãrîk wãnh me umaje anhôkre kadjwÿnhbê amim,

—Be, inhôbikwa ne ja. Ba kum ikabên kêt, anhÿr kêt. Dja te anhôbikwa, ga tu kum akabên jarê, apijãm kêt ne tu kum akabên jarê.

Nâr kon, kwârîk wânh anhökre kadjwýnhbé amim,

—Be, tâwâ ne ôbikwa krâptî. Ba kum ikabên kêt, anhÿr kêt. Dja te ôbikwa krâptî ga tu kum akabên jarê, amâ me uma kêt ne tu kum akabên jarê. Dja ga tu me kunĩmâ akabêno aben pyrâk.

<sup>22</sup> Ê, kwârîk wânh ga arîk aje me kabi kêt kam Metîndjwýnhmâ me umjÿr kêt, kum âpênh kadjy kum me umjÿr ne 'ã anhikra jadjwÿr kêt. Dja ga anen ano katon tu mar kêt ne Metîndjwýnhmâ me'ô dja nhym arÿm mekam amikrào ba jabej ga kam ga mân kute ajaxwe pyrâk. Kwârîk wânh ã anhÿr kêt ne mekôt ajaxwe kêt. Ga dja ga tu katât mrâ.

<sup>23</sup> Ê, atikkrekam akanê prâmkam ne ga akanê prâm ne. Kadjy dja ga uba kangô kwÿ ikô. Uba kangômê ngômê apÿnh dja ga o akômo tē.

<sup>24</sup> Ê, me kwÿ ne me axwekam amirîtkumrêx. Nhym me kunĩ kôt omũn arênhô kumex. Nhym kam me memâ axwe pân̄h jarê. Nhym bep me kwÿ ne me axwekam amirît kêt ne. Metîndjwýnh gédja tũmrâm memâ o amirît ne memâ kum katon memâ pân̄h jarê nhym me kam kôt omũ. <sup>25</sup> Nhym me mexdjwÿ ne me amirît ne. Nhym me abenmâ me arê. Nhym me kwÿ apdju ne. Djâm mrâmri tu bipdjurkumrêx? Kati, Metîndjwýnh gédja tũmrâm memâ me mexo amirît ne, nhym me arÿm kôt omũ.

## 6

*Me ô âpênh kajgoja'ã kum karô.*

*Ep 6.5; Kor 3.22; Xit 2.9; Ped k 2.18*

<sup>1</sup> Ê, akmere, dja ga me memâ âpênh kajgo ar bawã, me kute meo pân̄h ne amim me pa 'amÿnh nhym me memâ âpênh kajgo ar ba ne kute amim Jeju mar wâdjwÿmâ arê gê me ô bēnjadjwÿr kabên kôt amijo ban prîne kabên ma. Mÿkam? Bir, me kâtâm kute Metîndjwýnh japyrÿ

kêt kadjy, ne kute Metîndjwýnh kukrâdjâdjwÿ japyrÿ kêt kadjy. <sup>2</sup> Dja ga aje me memâ âpênh kajgo ar bawãmâ kum,

—Ê, djori ar anhô bēnjadjwÿrwã ar akudjwa kute Jeju mar jabej kwârîk wânh gar amâ kurê kêt. Djâm ar aje Jejukôt abeno akamykam amâ kurêmâ got. Arkati. Dja gar tu kum adjâpênh mextire ne ar aba. Mÿkam? Bir, ar akamymâ ne gar apê. Kute Jeju mar 'ô, Metîndjwýnh kum abé 'ô, kumâ ne gar apê. Kam dja gar kum adjâpênh mextire ne ar aba, ane. ã me pardjamâ ane.

Ê, gora prîne memâ ikabên ja jarên ikabên jao amirîto aba.

*Nêkrêxkôtbit me umarja ne me umar mex kêt kumrêx.*

<sup>3-4</sup> Godja me'ô atemâ kabên 'ô jarênhô ku'ê prâm jabej arÿm amijo ajkên kam Bēnjadjwÿr Jeju Kritu kabên mexja kubê kính no kati ne kam kôt kabên kêt ne. Ne aje Metîndjwýnh kute katât gu bakrã pymjÿr'ã ujarênhja kubê kính no kati ne kam kôt kabên kêt ne. Mrâmri ne 'êx ne amiraxbito amran kam kute mÿjja mar kêt mexi. Nãm ajbân ajmân me kukrâdjâ kajgo mex mÿr jabej memâ akij. Ne kam kabêno me apanhbit mar prâm. ã me kute anhÿr ne punu. Nãm me ã anhÿr ban kam mÿjja kukrâdjâ'ã ngryk ne abenbê meo bikjêro ban aben japyrÿ ne aben kamnhix ar o ban <sup>5</sup> mã kabêno aben japanh ar o ba. Mÿjwã ne arÿm me ja djumar djâ ajmã o nhym me arÿm katât kabênkumrêxja mar kêt. Nãm me nêkrêx prâme 'êx ne we,

—Be, ba amijo Jeju mar gê inhô nêkrêx kumex ba kam amimexkumrêx ne, ane. Nãm me ã nêkrêx prâme amim 'ã karôo ane. Kam ne me abenkam axwe ar baja.

<sup>6</sup> Mÿjkôt ne me umar mex ne amimex ar o ba? Bir, me kute Metîndjwýnh kukrâdjâkôt amijo ba

ne nêkrêx jabej umar kêt kam ne me umar mex ne ba. Ne amidjumar mexwão amimex ar o ba. <sup>7</sup> Mýj ne gu me banã tikkre kurũm amýn o axidjuw? Kati, nã gu me banhýkam axidjuw. Me batykkamdjwý, mýj ne gu me amýn o banhikwãn ty? Kati, nãm gu me banhýkam banhikwãn ty.

<sup>8</sup> Bir be, dja me banhõ kwý krên djãmê me banhõ kubêkã jabej, mrãmri, me bamãnhkutã. Kam dja gu me badjumar mex ne atemã mýjja 'õ jabej kêt. Metĩndjwýnh dja me bajo djuw mex ne. <sup>9</sup> Nhy m bep me kute amim nêkrêx nãr pi'ók kaprĩo ãptãr ne kute o amimexja dja me amijo ajkê. Nãm me nêkrêx prãm ar axwe ba ne kam te kum nêkrêx prãm kêt mã ne mã nêkrêx bit ma. Ne kum mýjja kakritmê mýjja punubit kĩnh ne kôt arým amijo ajkê ne kam arým tu biknorkumrêx ne.

<sup>10</sup> Bir be, nãm me ã kum nêkrêx nãr pi'ók kaprĩbit kĩnh ne ã amijo ane. Ne arým amijo bikênh mex ne. Mýkam? Bir, nãm me kum nêkrêx bit kĩnh ne kam ajbit man kam kôt apýnh axwe djãri kunĩkôt amijo ba. Memã nêkrêx prãm kwý ne me arým Jeju mar kangan kam arým amijo ajkê, kaprĩo prĩne amijo ajkê.

*Akubyn Ximoximã kute katãt amijo bamã 'ã karõ.*

<sup>11</sup> Nhy m bep ga, akmere, ga abê Metĩndjwýnh nhõ ãpênhkam dja ga mýjja ja kunĩmã akre rax ne. Katãt amrãnh kadjy mýjja jamã akre rax. Katãt amrãnh ne aje Metĩndjwýnh kukràdjãkôt amijo aban aje amim Jeju kamnhĩxbê ar aban amã me abên aje akrãnmã amijo atêm, kam dja me ajo ajkê ga mã aje akrãnmã amijo atêm ne anhĩ djuwbõn ar abamã, tãm dja ga ama.

<sup>12</sup> Me kute amim Jeju mar ne kôt amijo têm ne kute me kute aben rer pyrãk. Me kute aben rer kam ne me

týx ne prõtobit prõt ne mebê apõx. Kam dja ga 'ã amijakren ã atýxo anen mã Jejukôt amijo tẽ, kute me prõtja pyrãk. Gora ga ã anen kam atyk nhjukri atĩn rã'ã rã'ã rã'ã 'ýr tu abõxkumrêxmã. Kadjy ne Metĩndjwýnh amiwýr ajuw. Kadjy ne ga me ipõkri memã katãt amijarênh mex ne. Nã gãm memã kum,

—Be, arým ne ba tu amikajmã'ã Jeju markumrêx, ane. Nã gãm ane, nhy m me apumũ. Kam ne ba amã,

—Arek amijo tên kam atyk nhjukri atĩn rã'ã rã'ã rã'ã 'ýr tu abõxkumrêx, ane.

<sup>13</sup> Ê, Metĩndjwýnhmê Jeju Kritu ar kute ikabên mar ne ikôt kabênkam ne ba amã ikabên jarê. Metĩndjwýnh ne mýjja kunĩo tĩn djwýnh. Ta ne kute ikabên mar ne ikôt kabên. Kam ne ba amã ikabên jarê. Nhy m Kritu Jejudjwý kute katãt amijarênh mexja, kute bẽnjadjwýrbê Põxu Piratu kabem katãt amijarênh mexja. Ar kute ikabên mar ne ikôt kabênkam ne ba amã ikabên jarê ne amã,

<sup>14</sup>—Ê, gora prĩne ikabên man kôt amijo aban kudjar kêt ne amrãnh mextire gê me ajã kabên kêt. Dja ga mã ã anhýro aba rã'ã nhy m arým Jeju Kritu gu banhõ Bẽnjadjwýr kato. <sup>15</sup> Dja õ akati arým 'ýr bõx nhy m Metĩndjwýnh dja kum arê nhy m arým bõx. Nã, Metĩndjwýnh ta pydji ne memã Bẽnjadjwýr rax ne meo ba. Atemã 'õ kêt. Metĩndjwýnh umar mex ne kĩnhkumrêx tãm ne Bẽnjadjwýr raxbê kumkatiti:. Kute bẽnjadjwýr raxo pykabê me bẽnjadjwýrja kunĩ jakrenh mexi. Kam ne kubê Bẽnjadjwýr raxbê kumkatiti: ne meo ba. <sup>16</sup> Ajbit pydji ne tyk prãm kêt kumrêx, tĩn rã'ã: tĩn djwýnh. Ne irãkam ar ba, arngrokam ar ba. Nãm kam axwe 'õ kêt. Kam gêdja me tẽp kêt kumrêx. Nhýnh got me'õ arým noo omũ? Arkati. Me'õ kute noo omũnh kêt kumrêx. Dja tũmrãm omũnh kêt rã'ã. Kumã dja me uma jarênh rã'ã:



rã'ã. Tãm dja me kàjmã kamênh  
rã'ã rã'ã. Gêdja memã Bênjadjwÿr  
ne meo ba rã'ã rã'ã. Mrãmri.

<sup>17</sup> Ê, me pykakam ô nêkrêx  
kumexmã dja ga,

—Amijo arax kêt. Djãm nêkrêx  
kute me apytãrmã ne ga me nêkrêx  
kanàrrãm ar aba? Kati, kwãrik  
wãnh. Nêkrêx ne kajgo ne me  
abê biknor prãm. Kati, dja ga  
me Metĩndjwÿnh kanàrrãm ar aba.  
Metĩndjwÿnh ta ne kute ôdjãnhkôt  
me bamã mÿjja kunĩ nhôr, o kute  
me bakĩnh kadjy, ta kanàrrãm dja  
ga me ar aba, ane. <sup>18</sup> Gora me  
akabên mexbit jarê ne mekam ad-  
jukaprĩn ar meo aba, ne memã  
anhôdjãnh ne memã anhô mÿjja  
ngrà, ane.

<sup>19</sup> Dja ga ã me ô nêkrêx krãptĩjamã  
arênhô ane gê me ã anen kam  
arÿm amityk nhijukri kadjy atemã  
kàjkwakam nêkrêxo aptã. Nêkrêx  
tãm ne mekbê biknor prãm kêt ne  
memã nôr rã'ã. Dja me kam arÿm  
'ÿr bôx, mrãmri tu amitĩnkumrêx  
ja'ÿr bôx.

<sup>20</sup> Ê, Ximoxi, Metĩndjwÿnh kute  
amã kukràdjã rerja gora prĩne omũ.  
Gora 'ãno djan omũnh tÿx. Me  
kabên kajgo, me kabên tũm dja  
wãnh nõ. Rũm kum akre rax.  
Nhym me 'êxri amijo kute mÿjja  
mar ne kam mÿr jabej abenkam  
kangati dja adjwÿnhdjwÿ wãnh nõ.

<sup>21</sup> Mrãmri ne me kwÿ kupa'ã,

—Ije mÿjja mar, anen kam ajbit  
mar ar o ba ne kam amibê arÿm  
Jeju mar kanga ne. Gê Metĩndjwÿnh  
ukaprĩkôt prĩne ajo djuw mex. Tãm  
ne ja.

## **Paur kute Ximoximã atãri pi'òk no'òk ne ja.**

Paur ne ajte Ximoximã pi'òk no'òk ne. Krĩraxbê Rômakam ne me Paurbê ijê nhym mekbê ijê djakam dja. Nãm amijamãro dja. Me kute bĩnmã amijamãro dja. Ne kam krabê Ximoximã pi'òk no'òk ne. Jejukôt ne Paur Ximoxio kra. Nhym Ximoxi krĩraxbê Epexukam djan memã Metĩndjwýnh kabên'ã ujarênho dja. Nhym Paur mete bĩn kutã kum pi'òk no'òk ne kum,

—Arým ityk 'yr. Arým ne ba amijo rãm ne ja. Gop arek memã Metĩndjwýnh kabêno amirĩto aku'ê. Ba ije amã arênhja dja ga amũ idjô'ã memã arê. Gora atýx ne, ane. Ne ajte kum,

—Amrê Rôma'yr tẽn ipumũ, ane. Nãm ã Paur Ximoximã ane. Paur kute kum týx jadjãr nhym Ximoxi týx ne katãt kute memã Metĩndjwýnh'ã ujarênh ne kute memã Metĩndjwýnh kabên jarênhmã. Nhym me 'êx ne kute amijo Jeju nhõ me jao ba djwýnhja ne me Metĩndjwýnh kabên kupa'ã ar memã arênho ba. Nhym bep Ximoxi gédja katãt memã arê. Kadjy ne Paur kum pi'òk no'òk ne ano.

1-2 Akmere Ximoxi, ba ibê Paur ne ba amã pi'òk no'òk ne. Imã akĩ:nhkumrêx, akmere, ba kam ajo ikra. Ba ibê Paur, ibê Jeju Kritu nhõ ãpênh ne ba amã pi'òk no'òk ne. Metĩndjwýnh ta ne imã arên ijano, ije memã arênhmã ijano. Metĩndjwýnh ne arým me bamã kabên pydjín arê, me baje arým amim Kritu Jeju markumrêxkam ne kute me bajo tĩnmã me bamã kabên pydjín arê, gu me batĩn rã'ã rã'ãmã. Ba kam ó'ã memã arênho tẽ.

Gê Metĩndjwýnh ajo djuw mex. Kritu Jeju gu banhõ Bẽnjadjwýrmẽ

Bãmbê Metĩndjwýnh ar ukaprĩkôt ajo djuw mex ne ar ajo ba. Gê arkum akaprĩ ne amã umar mex jarê, ga kam adjumar mex ne ar aba.

<sup>3</sup> Ê, nã bãm aman kam mã Metĩndjwýnhmã amikĩnh jarê. Metĩndjwýnh ta, kumã ne ba amikĩnh jarên kum ajarê. Kumã ne ba idjãpênh. Ije amikam ijaxwe 'õ mar kêt ne kum idjãpênh iba. Me bakukãmãre ne ã Metĩndjwýnhmã ãpênh ar bao ane ba kam badjwý ã kum idjãpênh ar ibao ane.

<sup>4</sup> Abenbê gu babikjêr kutã amýrkam ije amar rã'ã. Akamãtkammẽ a'urimẽ ba aman kam te ije apumũnh prãme. Dja ba apumũn kam arým ikĩnhkumrêx ne. <sup>5</sup> Ba ije prĩne amar. Ga ne ga ajte akabêno aben nhikjê kêt ne tu amim Jeju markumrêx ba arým ama. Akwatynh Roxdjimẽ anã Juniximẽ ne ar ã akajmãtã amim Jeju kamnhĩxo ane. Ga kam gadjwý ar kôpdji'ã tu amikajmã'ã Jeju markumrêx. Ba kam arým amã ikator mex ne.

*Tu kum me uma kêt mã 'ã karõ.*

<sup>6</sup> Kam ne ba ije amã ikabên jarênhmã. Aje amimar kadjy ne ba akubyn amã arê. Ê, ije ajã aminhikra djirkam Metĩndjwýnh kute amã mýjja rerja dja ga tu markumrêx ne ar o aban on ajte atýx ne kum adjãpênh týx ne. Tu amã me uma kêt ne memã Jeju jarê. <sup>7</sup> Djãm me batĩn prãm ne ar babamã got Metĩndjwýnh me bawýr ta Karõ jano. Arkati, me batýx ne ar baban bamã aben jabên baje amipnênh ne ar babamã. Nãm ã Metĩndjwýnh Karõ me bajo ane.

<sup>8</sup> Kam dja ga apijãm kêt ne tu memã Jeju'ã ajarên ajte badjwý ikam apijãm kêt ne. Nã bãm Kritu'ã idjujarênh ny jarênho tẽ nhym me mekbê ijê djakam imê. Kam dja ga ikam apijãm kêt ne. Nhym bep kati, dja ga tu atýx ne memã Jeju'ã

ajarê nhyem me kum Jeju kurêkam kôt kum akurên akam ngyrk ne ajo ajkê ga kam ikudjwa atokry. Kwârîk wânîh râ'ã Metîndjwýnh dja on amã týx jadjà, atokry katikôt amã týx jadjà ga kam atýx ne ar aba.

<sup>9</sup> Nã, Metîndjwýnh ta, kute me bapytâr djwýnh dja amã týx jadjà. Nãm me bapytân amiwýr me bajuw, me bamextire ne ar baba kadjy ne amiwýr me bajuw. Mã ne gu me nê nhyem Metîndjwýnh kôt me bapytà? Djãm me bamex ne ar babakôt ne me bapytà? Arkati, ta ne tu me bajã amim karô, ukaprîkôt ne tu me bajã amim karôn kam amiwýr me bajuwn me bapytà. Me baje tu amim Kritu Jeju markumrêxkam me bapytà. Amrêbê:, kute pyka nhîpêx kêtri ne Metîndjwýnh ukaprîkôt me bajã amim karô, Jeju Kritu kute me bapytârmã ne amim me bajã karô. <sup>10</sup> Amrêbê ne me bajã amim karôn kam ajbir me bamã o amirît. Kritu Jeju, me bapytâr djwýnh arým me bawýr tèn bôx ne me bamã Metîndjwýnh djukaprîo amirît. Arým ne bôx ne me bamã me batyko apêx gu me tu batînkumrêx, me batyk nhîjukri batîn râ'ã:n amũ ijukri batyk kêtkumrêx ne. Be, Metîndjwýnh ukaprîja pumũ. Nhyem me Jeju'ã gwaj badjujarênh nykôt arým kuma.

<sup>11</sup> Kam ne Metîndjwýnh ijano. Kum idjâpênh ne me kunĩmã kàj bê Jeju'ã idjujarênhmã ijano ba tẽ. Ije me kunĩmã kukràdjã ny jarênh nhyem me kute marmã. Kadjy ne ijano ba tẽ. <sup>12</sup> Nã bãm tèn memã arê nhyem me kam ijo ajkê. Jeju'ã idjujarênhkôt ijo ajkê ba itokry. Djã nã bãm kam ipijãm? Arkati, arým ne ba tu amim Jeju kamnhîxkumrêx ne kam arým prîne amim atãri. Gêdja prîne ije Jejumã amikangakam prîne ijo djuw mex ne ijãno dja. Ne ijãno ãm râ'ã: nhyem

õ akati arým 'ýr bôx nhyem akubyn me bawýr bôx. Tãm ne ba mar týx ne amijã kamnhîx ne.

<sup>13</sup> Gora ije amã katãt ikabên jarênhja amijamakkrekam anhôn 'ãno djan ikôpdjî'ã kôt ar amijo aba. Ne aje arým amikajmã'ã Kritu Jeju marja 'ãno djan kôt tu amã me kunĩ jabê ne. <sup>14</sup> Ê, Metîndjwýnh kute katãt memã kabên jarênhja ga aje kôt ar amijo abaja gora mã kôt ar amijo aba râ'ã. Nhyem Metîndjwýnh Karô kute me bakam krîja dja ajo týx ga kam kôt ar amijo aba.

<sup>15</sup> Pykabê Adjîjkam me kunĩ ne me ikangan mõ, me umaje mõ ga arým ama. Nhyem Pijerumê Emodjedjwý mekôt ikanga.

<sup>16</sup> Nhyem bep ate ne Nexipôr. Tãm ne imã kînh jadjâr mexkumrêx. Ne ajte imã kînh jadjã. Nãm imã kînh jangjênh krãptî ne. Me kute ibê ijêkam pijãm kêt ne. Kum me uma kêt ne. Gê pãnh Bênjadjwýr Jeju kum kaprî. Kum Nexipôrmê ôbikwa kunĩ ar kaprî. <sup>17</sup> Nãm krîraxbê Rômakam ajbir bôx ne prî:ne ijabej. Ijabej tèn ijabej tèn ijabej tèn kam imã kato. <sup>18</sup> Amrêbê krîraxbê Epexukamdjwý ikôt àpênhja ga arým aje mar mex. Nãm apýnh mýjja kupên o ikôt kangô. Gê Bênjadjwýr Jeju kum kaprî, Bênjadjwýr akubyn bôxkam kum kaprî. Tãm ne ja.

## 2

*Ãm týx ne rerek kêtmã kute arênh.*

<sup>1</sup> Be, akmere Ximoxi, gora atýx. Kritu Jeju ta ukaprîkôt dja ajo djuw mex ne ajo týx ga kam atýx ne ar aba. <sup>2</sup> Ê, gop ikabên ma. Ba ije me ipôkri memã ikabên jarênh nhyem me krãptî kute mar ga gadjwý aje marja tãm dja ga amidjô'ã me kwýmã arê. Me mrãmri kabênkumrêxmã dja ga arê. Me kute amim Jeju mar 'ãno ãmmãbit dja ga arê nhyem kam me

akôpdji'ã amũ aben nhujuk'ã memã arênho tẽ.

<sup>3</sup> Ë, me krâkamngônhreja pumũn me'ã amijakre. Dja ga abê krâkamngônñ prabê te atokryn mã Kritu Jejukôt ajkamẽ. <sup>4</sup> Ë, me krâkamngônñre ba kutã kute amijangri tỳx ne kute tu mỳjja mar kêt ne mũm mrãnhbit kute marja pumũ. Jabit ne me kute mar ne ba. Me kute atemã mỳjja kajgo mar kêt ne tu ba, me ô bẽnjadjwỳr kute memã kabẽn mex jarẽnh ne mekam kĩnh kadjy. Gadjwỳ dja ga ã amijo anhỳr ar o aban anhõ Bẽnjadjwỳr Jeju Kritu kabẽnkôt amrãnhbit aje mar nhym kôt kute apumũnh ne akam kĩnh kadjy.

<sup>5</sup> Ë, dja ga me kute aben rerdjwỳ pumũn me'ã amijakre. Gadjwỳ dja ga ã anen Kritu Jeju kukràdjãkôtbit ar amijo aba. Me kute aben rerkam dja me mrãnh tỳx'õ pydjìn me bakukràdjã tũmkôt me kure. Nhym kam me kumãbit kĩnh djã ngã. Be, gadjwỳ dja ga ã anen Kritu Jeju kukràdjãkôtbit ar amijo aban kam kãjkwamã 'ỳr bõx.

<sup>6</sup> Ë, dja ga ajte me ô pur djwỳnh kam àpẽn rax pumũn me'ã amijakre. Nãm me ô pur djwỳnh amim pur jadjuwn arỳm kam djwỳ kre nhym arỳm abatãnh ne. Nhym me ô pur djwỳnh kumrẽx kam djwỳ krẽn arỳm kĩnh ne. Dja ga 'ã amijakren adjãpẽn rax ne. Nhym kam Metĩndjwỳnh amã o pãnh ne. <sup>7</sup> Ë, dja ga ikabẽnja mar ar o aba. Nhym kam tũmrãm dja Bẽnjadjwỳr djwỳnh arỳm ano bõ ga kam arỳm mỳjja kunĩ ma.

<sup>8</sup> Ë, Jeju Kritu dja ga omũ. Bẽnjadjwỳr raxbê Dawi tãm djwỳ 'õ. Ga tyk ne akubyn tĩn ne katorja pumũ. Kukràdjã ny'ã ne ba ar idjujarẽnh ibaja, <sup>9</sup> Jeju kukràdjã ny'ã ar idjujarẽnh ibakôt ne me kum ikurẽn ijo ajkẽ ba itokry ga me kute idjuwpreja pumũ. Nãm me ijo ijaxwen idjuwpre ba nõ. Ë, djã nãm

me idjuwpren o mebê Metĩndjwỳnh kabẽn bẽ aptã? Kati, dja me 'ã ujarẽnh tẽm rã'ã ne amũ abendjõ'ã pyka kunĩkôt abenmã arẽ. <sup>10</sup> Kam ne ba te itokryn Metĩndjwỳnh 'ãno djan tu ate ikrã. Mỳj kadjy? Bir, Metĩndjwỳnh nhõ me ja kadjy, Metĩndjwỳnh kute amijo me utãrja kadjy. Me jadjwỳ Kritu Jeju kute me utãr nhym me kôt ô kãjkwa mextirekam ar ba rã'ã: rã'ãmã. Ô kãjkwa mextire, kam mỳjja punu kêt, prĩne mexo kute pykabê mỳjja ja jakrenh, ô kãjkwa mextire jakam me ar ba rã'ã rã'ãmã. Kam ne ba te itokryja. Me jadjwỳ kute amim Jeju mar nhym kute me utãrmã.

<sup>11</sup> Mrãmri ne me abenmã,

—Dja gu me Jejukôt batyk jabej kôt ajte batĩn.

<sup>12</sup> —Dja me te me bajo ajkẽ gu me te batokryn mã Jeju 'ãno djan kam pãnh batyk nhujukri akubyn batĩn ne babẽnjadjwỳr ne ar meo baba.

—Dja gu me amikatin jãm Jejubê bakrã nhym adjwỳnhdjwỳ me babê amikatin jãm me babê krã.

<sup>13</sup> —Dja gu me amrẽbê baje amijo Jeju pytãrkam me krãptĩjakôt bajaxwe nhym kam Jeju dja me bamar rã'ã ne. Me ba dja gu me amibê kanga nhym bep ta gẽdja me bamar rã'ã ne, me bakanga kêt ne. Mỳkam? Bir, ta ne kabẽnkumrẽx. Kabẽn pydji ne me bakadjy arẽ. Gẽdja atemã ajte amibê kabẽn 'õ jarẽnh kêt ne. Kam dja amibê me bakanga kêt ne.

Ë, mrãmri ne me ã abenmã kabẽnwã jarẽnho ane.

*Kute memã Metĩndjwỳnh kabẽn jarẽnhmã.*

<sup>14</sup> Wãnh dja ga ajte akubyn memã tãm jarẽ gẽ me ajte kuma. Ne ajte memã kum,

—Ë, kwãrĩk wãnh me akabẽn kukràdjã mÿr jabej abenmã adjãkrê kêt ne akabẽno aben japanh kêt, ane. Dja ga memã wã jarẽ, kãj bê memã akabẽn jarẽ. Metĩndjwÿnh kute akabẽn mar ne akôt kabẽnkam memã akabẽn jarẽ gê me kuma. Djã nãm me ari abenã atom bakam mex got? Kati, nãm me mÿjja man nhÿnh kabẽn ja'õ mÿr jabej ajmãn ar abeno bikẽnh o ba.

<sup>15</sup> Ë, gora Metĩndjwÿnhmã adjãpênhkam atÿx. Pĩne katãt Metĩndjwÿnh kabẽn'ã memã adjujarênh ar aban memã arẽ. Metĩndjwÿnh kabẽn ne katãt. Kam dja ga katãt memã 'ã ajarẽ. Metĩndjwÿnh akam kĩnh ne kute amã,

—Amexkumrêx. Ba akam ikĩnhkumrêx, anhÿr kadjy. Kadjy dja ga adjãpênhkam atÿx ne kam amikam apijãm kêt ne.

<sup>16</sup> Kwãrĩk wãnh me kabẽn kajgo kwãrĩk wãnh nõ. Me kabẽno kute aben japanh kwãrĩk wãnh nõ. Rũm kum akãx. Wã, me kabẽn wão dja me Metĩndjwÿnhbê amiptãr mex ne. Kubê o amiptãro mõn o mõn o mõn ï kubê o amiptãr mex ne arÿm o amipunu mex ne. <sup>17</sup> Me kabẽn punu wã kute wajre pyrãk. Ga wajre kute amũ me ï kuro baja pumũ. Nhy m me ujarênh punuja ã pĩne meo bikẽnho ane. Me ja 'õ nhidjibê ne Imene. 'Õdjwÿ ne Pireto.

<sup>18</sup> Nãm ar amibê Metĩndjwÿnh kabẽn kanga, Metĩndjwÿnh kute katãt memã kabẽn jarênh ja kangan kabẽn punuo amũ Jeju nêje meo akêxo tẽn memã kum,

—Arÿm apêx. Arÿm Metĩndjwÿnh kute akubyn meo tĩn djã arÿm apêx, ane. Nãm ã ar memã 'êxo anen me kwÿo ajkê, me kute amim Jeju mar kwÿo ajkê.

<sup>19</sup> Nhy m bep ate ne Metĩndjwÿnh kabẽn. Metĩndjwÿnh kabẽn ne mrãmri kabẽnkumrêx. Kute kẽn pyrãk, kẽn nhÿr tÿxa pyrãk. Nãm

me te kute kẽn nhikõ 'yrmã. Nãm ã Metĩndjwÿnh kabëndjwÿ ane nhy m me te kute kabẽn nhikõ'yrmã. Nhy m Metĩndjwÿnh kabẽn ne memã kum,

—Bẽnjadjwÿr djwÿnh ne ta õ me ja pĩne arÿm me àtãri ne pĩne arÿm mekam ama, ane. Ne ajte,

—Gora gê me kute “Tje Bẽnjadjwÿr Jeju mar” anhÿrja me on mÿjja punu kanga, ane. Nãm ã Metĩndjwÿnh kabẽn'ã pi'õk no'õk ane. Nhÿnh ne me'õ ne kute kabẽn nhikõ'yrmã.

<sup>20</sup> Ë, me'õ bẽnjadjwÿr nhũrkwãkam ne ngõnh apÿnh kute abeno djãri kumex. Kwÿ ne adjênh nhy m bep kwÿ ne kajgo. Mexja ne kẽn karÿro ipêx ne kwÿ kryt jakao ipêx. Nhy m bep kajgoja ne ngõkraxmê ngyo ipêx. Tãm ne mÿjja kajgo kadjy. Nhy m bep mexja ne mÿjja mex kadjybit.

<sup>21</sup> Nhy m me pĩne ngõnh ku'õ nhy m kam akan kam mexkumrêx, mÿjja mexkumrêx kadjybit ku'ê. Be, gu me badjwÿ ngõnh'ã amijakren pĩne amijaxwe, mÿjja punu kangan kam bamexkumrêx, mÿjja mex kadjybit bamextire. Nhy m kam me banhõ Bẽnjadjwÿr dja arÿm amim me bapumjuw, kum me badjãpênh kadjybit amim me bapumjuw. Gu me kam apÿnh badjãpênh djãri badjãpênhõ baku'ê.

<sup>22</sup> Nãm me abatãnh nyre kum mÿjja punu prãm kumrêx. Rũm kum akãx ne kubê amiptã. Gê arĩk wãnh me kute mÿjja punuo bawã arĩk wãnh memã nõ. Nhy m bep kati, ga dja ga katãt amrãnh'ã anopdji. Katãt amrãnh ne aje amim Jeju kamnhĩxbê ar aban amã me abên mekam angyk kêt ne adjumar mex ne ar aba, be, mÿjja ja dja ga 'ãno djan 'ã anopdji ne. Kam gêdja ga ã amijo anhÿro tẽ. Me jamẽ ro'ã ã amijo anhÿro tẽ. Me õkre kadjwÿnhbê axwe'õ nõr kêt ne kute Metĩndjwÿnhmã amijo à'wÿrjamẽ

ro'ã dja ga ã amijo anhÿr o tẽ. Nhyim arĩk wãnh mÿjja punuwã wãm nõ.

<sup>23</sup> Kwãrĩk wãnh me kute abenã atomwã kwãrĩk wãm nõ. Tãm ne kajgokumrẽx. Tãm gẽdja wãm nõ. Djãm kõt mete mÿjja mar got. Kõt ne me kum aben kurẽn kam aben japrÿn abenmã àkrẽ.

<sup>24</sup> Bep kati, ga abẽ Bẽnjadjwÿr djwÿnh nhõ àpẽnhkam kwãrĩk wãnh akabẽno me apanh kêt. Bẽnjadjwÿr nhõ àpẽnh ne me me kunĩkam ukapri ne prĩne memã Metĩndjwÿnh kabẽn'ã ujarẽnh mex ne, ngrÿk kêt ne memã 'ã ajarẽ. Nãm ã Bẽnjadjwÿr nhõ àpẽnh ã meo ane.

<sup>25</sup> Abẽ Bẽnjadjwÿr nhõ àpẽnhkam dja ga ã o anen kam akrànãmã akurẽ djwÿnhmã akabẽn ne tu kum akabẽn mex jarẽ. Birãm Metĩndjwÿnh dja amikadjy me ja ngrẽk nhyim me arÿm amikam ajkam aman wãnh axwemã iren 'ÿr amijo akẽx ne arÿm Metĩndjwÿnh kute katãt memã kabẽn ja arÿm kum kato.

<sup>26</sup> Arÿm Metĩndjwÿnh kute katãt memã kabẽn jarẽnh ja man arÿm amim kato. Xatanaj ne me ja pa 'amÿn amiwÿr meo mõn ar meo ba nhyim me kam ar kum àpẽnh ba. Birãm Metĩndjwÿnh dja amikadjy akabẽno me ngrẽk nhyim me arÿm amim katon Xatanaj kangan kubẽ amiptàn arÿm jãm Jejuo amijakre. Kadjy ne ba amã,

—Akrànãmã memã akabẽn jarẽ, ane.

### 3

*Pyka kute o ino rer 'ÿr me axwe raxmã kute arẽnh.*

*Xim k 4.1; Djuda 18*

<sup>1</sup> Ë, prĩne ikabẽn ma. Adjÿm, dja ã me umar punu djã kato. Pyka kute o ino rer 'ÿrkam dja ã me umar punu djã kato. Mÿkam dja me umar punu? Bir, me axwe raxkam. Ije, mã ne me kukràdjã kute?

Je kum dja ã me apÿnh amijo ba. <sup>2</sup> Dja me òdjÿn kam amidjwÿnhbit man memã mÿjja nhõr kêtumrẽx. Dja me kum nèkrẽxmẽ pi'òk kapribit prãmikumrẽx. Dja me amiraxbito amra. Dja me òkre kadjwÿnhbẽ amim,

—Ba ne ba imexmẽ iraxo me akrenh mex ne, ane. Dja me ar me ũno ba. Dja me nãmẽ bãm kabẽn mar kêtumrẽx. Dja Metĩndjwÿnh kute memã mÿjja nhõrja kunĩ kubẽ kĩnh no kati. Dja me Metĩndjwÿnhbẽ amiptar mex ne.

<sup>3</sup> Dja me kum aben kĩnh kêtumrẽx. Dja me ukapri kêtumrẽx ne kum aben kurẽkumrẽx. Dja me aben kã mex jarẽ. Dja me amipnẽn ar ba kêt ne tu arĩk ar ba. Dja me àkrẽkumrẽx. Dja me kum mÿjja punubit kĩnh ne kam kum mÿjja mex kurẽkumrẽx.

<sup>4</sup> Dja me kurẽ djwÿnhmã õbikwa kanga. Dja me amakkre kêt. Dja me arĩk ta amijã bẽnjadjwÿr rẽnh ar o ba. Dja me amidjwÿnhbit o kĩnh ne kum Metĩndjwÿnh kĩnh kêtumrẽx. <sup>5</sup> Dja me 'ẽx ne mekõt Metĩndjwÿnhmã ngrero krĩ. Ajk-wakambit ne kute Jeju mar. Nhyim bep kati, amikadjwÿnhbẽ kute amikam Jeju mar kêt ne kute uma mar kêtumrẽx. Ë, kwãrĩk wãnh me ja kõt amrãnh kêt ne rùm memã akre rax.

<sup>6-7</sup> Ë, me arĩk baja ne me kwÿ me nire'ÿr wangij ne atemã memã kabẽn jarẽ. Me nire ja ne me no kêt ne axwebit ma ne kum mÿjja punubit prãmikumrẽx ne arĩk mÿjja punu jabej mrã. Te kute mÿjja marmã ne Metĩndjwÿnh katãt kabẽnja mar kêtumrẽx. Be, me nire punu jamã ne me atemã kabẽn jarẽ nhyim me prĩne me kabẽn man kõt ar amijo ba.

<sup>8</sup> Me ja, me kute Metĩndjwÿnh kupa'ã memã 'ã ujarẽnhja ne me kute mÿjja punubit mar. Djãm me kute amim Jeju mar got. Arkati, nãm me kum Metĩndjwÿnh katãt

kabënja kurêkumrêx ne kam me kute Môjdjê kurê djwýnh pyrâk. Me kute me bakukâmãrebê Môjdjê kurê djwýnh ja pyrâk. Ar idjibê ne Djanimê Djãmbri ar. Ar tãm ne ar kabêno Môjdjê japanho ba. Nhyim me kute Metîndjwýnh kupa'ã memã 'ã ujarênhjadjwý ã kabêno Metîndjwýnh kabên katâtja japanho ane, ne Metîndjwýnh kabêno mýjja kajgo ar o ba.

<sup>9</sup> Bep kati, dja me punuja amijo mrãnh 'ijabjê kêt nhyim me memã apôx, me axwemê me bibãnhmê me arîk bajamã apôx. Me kute Djanimê Djãmbri arkum katorja pyrâk. Dja ã me memã apôxo ane nhyim me kunî me axwe kôt me omû.

*Metîndjwýnh kabên jarênh'ã ukanga kêtã kute arênh.*

<sup>10</sup> Nhyim bep ga ne ga arým iman ikôt ar amijo aba. Ije memã Metîndjwýnh kabêno amirît ne ije kôt ar amijo iba ne ije Metîndjwýnh amiptâr kadjy idjãpênh o ije amirît ga arým kôt prîne ipumûn arým prîne idjâtari. Ije amikajmãtã Jeju mar ne 'ã ingrà týx ne akrãnmã ije meo iba ne imã me abê ne ije Jeju 'ãno idjãm ne ije kanga kêt ga arým kôt ipumû. <sup>11</sup> Me kute ijo bikênh ga ga arým itokrykôt ipumû. Krîraxbé Æxikimê krîrax 'ôbê Ikônimê krîrax 'ôbê Rixamê kam me kute ijo bikênhkôt ga arým ga ipumû. Nãm me prîne ijo ajkê ba itokry: ne. Nhyim bep Bênjadjwýr Jeju ne mýjja kunîbê ipytã.

<sup>12</sup> Bir be, mrãmri ne me kute Kritu Jejukôt amijo ban katât mrãnh prãmja mrãmri dja me kãtãm arým me jao ajkê.

<sup>13</sup> Ê, me axwemê me 'êxnhîmê gêdja me î punu raxo môr purokam î punu rax mex ne. Dja me memã 'êx ne me noo akno nhyim me kam amipãnh me jamã 'êx ne me noo biknor mex ne.

<sup>14</sup> Nhyim bep ga. Ga dja ga mã kôt amijo aba. Ar ije amã Metîndjwýnh kabên jarênh ga arým ga prîne aje amim mar dja ga arek 'ãno djan kôt ar amijo aba. Ar ba ar ije amã arênhja ga arým ar ipumû. <sup>15</sup> Aprîrekam ga arým Metîndjwýnh kabên maro tẽ. Maro tẽn o atêm rã'ãn arým ajabatãnh ne arým prîne ama. Metîndjwýnh kabên mexkumrêx kute ano bõnh ga arým aje tu amikajmãtã Kritu Jeju markumrêx nhyim arým kute apytãrja tãm ne ga arým prîne o tẽn arým prîne ama.

<sup>16</sup> Be, Metîndjwýnh ne me bakukâmãremã arê nhyim me kabên'ã pi'ók no'ók ne, kôt pi'ók no'ók ne. Pi'ók no'ókja kunî ne kubê me banhõ Metîndjwýnh kabênja. Mýj kadjy ne Metîndjwýnh kabênja? Bir, kute katât memã Metîndjwýnh kukrãdjã jarênh kadjy, kute me axwe nêje me akre kadjy, kôt me kute amû aminhujuk'ã amidjar kadjy, kute katât me krã pymjýr nhyim me kute katât mrãnh o amû amikamênh o môr kadjy. Be, kadjy ne Metîndjwýnh kabênja. <sup>17</sup> Nã, Metîndjwýnh ta kabêno dja prîne ô ãpênh o týx ne, prîne o mex gê me kum apýnh mýjja mex djãribit kînh ne ar o ba. Be, dja ã Metîndjwýnh Kabêno meo ane.

## 4

<sup>1</sup> Ê, Kritu Jeju dja akubyn me bawýr bõx ne ar me bajo ba, umao ar me bajo ba. Dja bõx ne me kunî jaxwekam memã pãnh jarê, me tînmê me tykmê me axwekam memã pãnh jarê. Kam ne ba Jeju Kritu kabênkôt, Metîndjwýnh kabênkôt amã ikabên jarê. Ne amã,

—Ê, gora memã Metîndjwýnh kabên jarê. <sup>2</sup> Gora prîne memã Metîndjwýnh kabên kôt kãj bê memã arê gê me kuma. Gora 'ãno dja. Dja me kute mar prãm jabej ga memã arê. Nhyim bep djãm me

kute mar prãm kêt jabej ga kam ga mã akubyn mekmã arê.

Gora Metĩndjwýnh kabẽno me ngrêk. Dja me'õ kute Metĩndjwýnh mar kêt jabej ga kum Metĩndjwýnh kabẽn jarê gẽ Metĩndjwýnh kute katàt kabẽn jadjwýrkõt amim kuman 'ýr amijo akêx.

Gora me axwe nêje me akre. Dja me axwe jabej ga memã akabẽn 'õ jarê gẽ me axwe kêt.

Gora memã týx jadjã. Dja me'õ kute Jeju mar rerek jabej ga kum týx jadjã gẽ 'ã ngrã týx.

Dja ga ã me 'ãno adjãmo anen kanga kêt mex ne akrãnmã memã Metĩndjwýnh kabẽn'ã ajarê.

<sup>3</sup> Dja ì me kute memã mýjja kupa'ã arênh djwýnh bõx ne kam Metĩndjwýnh kupa'ã ar memã arênhõ ba. Nhym mã me mýjja punu mar prãm ne. Nhym te Jeju nhõ me jao ba djwýnh te katàt memã arê nhym me mar prãm kêt kumrêx ne. Ne kam me kute kupa'ã memã arênhõ bajabit ma ne amim me punubito atom nhym me kumex ne kam atemã memã kabẽn punu jarê. Me kute me kabẽn punu mar prãm kam ne me me kabẽn punubit ma. <sup>4</sup> Nãm me Metĩndjwýnh kute katàt kabẽn jarênhja mar prãm kêt kumrêx ne jãm kubê krã. Ne kam me tũmre'ã ujarênh kajgobit mar prãm ne.

<sup>5</sup> Nhym bep ga. Ga dja ga mýjja kunĩkam ano týx ne katàt o tẽ. Djãm me te ajo ajkê ga tu ate akrãn ar amijo aba rã'ãn mã kam amirĩt ne. Gora adjãpênh 'ãno dja. Mýj adjãpênh gêdja ga 'ãno dja? Ije kum me kute Jeju mar kêtjamã kukràdjã ny'ã adjujarênh gêdja ga 'ãno dja. Dja ga mã kam apê, prĩne memã Metĩndjwýnh kabẽno amirĩt ne katàt memã mýjja jarênh mekumrêx.

<sup>6</sup> Ê, arým me kute ibĩn 'ýr. Arým itẽm 'ýr. Arým ne itẽm djã ijo rãm ne jao tẽ. Ityk'ã, me kute ijo Metĩndjwýnh nhõ mry ne ibĩn

ba ityk'ã ne ba arým itẽm 'ýr jarê. Arým ne ba amikam kò krãn mexo tẽn kam amã itẽm djã jarê. Arým ne ityk djã ijo rãm ne jao tẽ.

<sup>7</sup> Nã bãm Jejumã idjãpênhõ mrãmri ne me kute me prõt týxmã mýjja janhõr nhym me kumrêx 'ýr mrãnh ne bõx ne kute amýnhja pyrãk. Nã bãm ã amikam itýxo anen Jejumã idjãpênhkõt ajbit ma. Nã bãm ã Jejumã idjãpênh anen kam arým o ino rer djã'ýr arým ibõx tẽ. Nã bãm ã 'itýx anen amijo tẽn aminhinomã amimẽn arým itẽmmã. Nã bãm ije Jeju kanga kêt ne katàt memã mýjja jarênh arým itẽmmã.

<sup>8</sup> Nhym kam Bẽnjadjwýr Jeju kute katàt memã o pãnh djwýnhja tãm dja imã o pãnh. Dja katàt imã o pãnh mektire. Arým ne ikutêp kudji. Dja imã,

—Akmere, amrê tẽn amim aby. Ba arým amã ajaxwe kêt jarê ga arým imã amexkumrêx. Ne kam on amim aby, ane. Kute memã o pãnh nhõ akatikam dja imã kungã. Djãm bajbit dja imã kungã? Kati, me kute kam amakja, me kum kĩnhja kunĩmã gêdja kungã, me kunĩmã o pãnh ne.

*Kurê djwýnh amiwýr o bõx nhym ate kuka kõnh dja.*

<sup>9</sup> Akmere, gora amrê amibêx ne on iwýr bõx. <sup>10</sup> Nhym Demaj. Demaj ne kum me kàtãm kukràdjã punujabit kĩnh, me kute Metĩndjwýnhõ kurê djwýnh kukràdjã punu jabit ne kum kĩnh ne ar o ban arým ikangan imã iren mã tẽ, pykabê Texarõnika'ýr tẽ. Nhym Krexêxi arým pykabê Garaxa'ýr tẽ. Nhym Xitu pykabê Damaxa'ýr tẽ. <sup>11</sup> Rukabit ne ikuri dja. Maku dja ga aprõn amrê iwýr o tẽ. Nãm ikõt apênh mekumrêx. Tãm gêdja ga amrê o tẽ. <sup>12</sup> Xikiku ne ba pykabê Epexu'ýr ano.

<sup>13</sup> Ê, iwýr atẽmkam dja ga amrê imã inhinòkã rytiwãõ tẽ. Wãnh



ne ba gu bakamybê Kapukam kum inhire, krīraxbê Krōwadjikam ne ba kum inhire. Gora amrê imā o tē. Pi'ók no'ók ngriwāmē no'ók raxwāmē amrê imā o tē. Pi'ók no'óktiawā ne ba imā kīnhī. Gora aman amrê imā abyn o tē.

<sup>14</sup> Ē, Arexāri kute ngōnh nhipêx djwýnhja ne prīne ijo ajkē. Metīndjwýnh ta dja kum axweo pānh. <sup>15</sup> Gadjwý dja ga aminêje tawā pumū. Nām kabēno ar ijapa ne. Nām kabēno ar ijapa: ba te kum ikabēn mex jarē ne te akre nhym mā kabēno ar ijapan kam prīne kabēno ijo ajkē. Kam ne ba amā,

—Gora aminêje tawā pumū, ane. Kam ne ba amā ane.

<sup>16</sup> Me kute amiwýr ijo bōx kutewakam nhýnh ne inhōbikwa 'ō ikuri dja? Me kute amiwýr ijo bōx ne we ijaxwe jabej ikukjêro ýr kutewakam? Ba we ijaxweo ije amiptār kadjy nārām me kute bit ibīnmā amiwýr ijo bōx ne we ijaxwe jabej ikukjêro nhý. Nhym nhýnh ne inhōbikwa 'ō ikuri dja? Kati, nām ar kunī ikangan mā prōt ne, mā ipymaje prōt ne. Gora gē inhōbikwa ipymaje prōtwā gora gē Metīndjwýnh arkum o pānh kêt ne arkam ujakrānh no kati, arkam ukapri.

<sup>17</sup> Nā, me ne me ipymaje prōt ne. Nhym bep kati, Bēnjadjwýr ne ikōt djan imā týx jadja ba tu kanàrrām kàj bê memā Metīndjwýnh jarē, prīne kunī'ā ajarē nhym me bajtem kunī arým kuma. Djām me kute ikukjêrkam uma ngri got. Nām me kubê rop prābê uma:kumrêx. Nhym bep Metīndjwýnhbit ne mebē ipytā.

<sup>18</sup> Nhýnh ne mýjja punu 'ō ne kute ijo bikēnhmā? Kati, Metīndjwýnh ta gédja inêje jām mýjja punu dji. Metīndjwýnh ta ne kute ipytār ta gédja ipytān ijo tēn ō pykakam ijo bōx, mōr djāmā ijo bōx ba kam kōt imexkumrêx ne ar iba. Gora gē

me kunī Metīndjwýnhmā kàjmā rax jarē. Me kunī dja me kàjmā kum rax jarēno tē. O tēm rā'ā rā'ā rā'ā ne. Gora gē me mrāmri o anhýro tē.

<sup>19</sup> Dja ga Prixiramē Akwire arkum ijarē, ne ajte Nexipōrmē prōmē kramē arkum ijarē, ar kupānhntā arkum ijarē. <sup>20</sup> Ē, Eraxu ne krīraxbê Kōritukam arek dja. Nhym Krōpimu kanē, pykabē Miretukam kanē ba kam kum inhiren amrê tē.

Amrê amibêx ne na tým djwýnhrà m iwýr bōx.

<sup>21</sup> Juburmē Prudêximē Rinumē Kraōdjamē me kute Jejukōt abeno kamy kunī ne me wām amā amijarē. <sup>22</sup> Gē Bēnjadjwýr Jeju prīne ajo ba nhym Metīndjwýnhdjwý ukaprikōt prīne me akunio djuw mex. Tā ne ja.

## Paur kute Xitumã pi'ók no'ók ne ja.

Paur ne Xitu kàxã djan kum pi'ók no'ók ne. Arým ne Xituo kra ne kum pi'ók no'ók ne. Arým ne pykabê Kretakam Xitumã ire nhym kam kam dja. Nhym kam Paur kum pi'ók no'ók ne Artemanhkôt ano. Mýj'ã ne Paur pi'ók no'ók ne?

Bir, Xitu kute prĩne memã Metĩndjwýnh kabẽno amirĩt ne kute memã kabẽn jarẽnhmã. Kute me kabẽn punu kabẽno me itymã, ne kute Jeju nhõ me jao ba djwýnh kum àpẽnh kadjy me umjýrmã. Kadjy ne Paur Xitumã pi'ók no'ók ne. Ne kam ajte amiwýr Xitu 'uw. Tãm ne ja.

<sup>1-4</sup> Akmere Xitu, ba, ibê Paur ne ba amã pi'ók no'ók ne. Xitu, abê ikra djwýnh, amã ne ba pi'ók no'ók ne. Ga ne ga ikôt tu amim Jeju kamnhĩxkumrẽx, kam ne ba ajo ikra.

Ba ibê Paur, ibê Metĩndjwýnh nhõ àpẽnh. Jeju Kritu ta ne ijano ba tẽ. Nã, Metĩndjwýnh kubê me bapytãr djwýnh ne ijano, ije memã Jeju jarẽnh kadjy ijano ne imã,

—On kãj bê ijã adjujarẽnh tẽ, ane. Ije memã Jeju jarẽnh nhym me kute mar ne kam kute tu amim kamnhĩxkumrẽxmã. Arým ne Metĩndjwýnh amijo me kwý pytã. Me ja kute tu amim Jeju markumrẽxmã, ne kam arým kôt katãt mrãnhmã. Metĩndjwýnh kabẽn katãtja, 'ẽxnhĩ kêtja tãm ne me kute mar ne kam arým kôt katãt mrãnhmã. Nã, kadjy ne Jeju ijano, ije memã Jeju jarẽnh nhym me kute amim kamnhĩxkumrẽxmã. Mýj ne me kute tu amim kamnhĩxkumrẽxmã? Bir, me batyk nhijukri amũ me batĩn rã'ã rã'ã rã'ãn batyk kêtumrẽxmã. Metĩndjwýnh 'ẽxnhĩ kêtumrẽxja tãm ne me bamã arẽ.

Amrêbê ne kute pyka nhipêx kêtĩri arým kabẽn pydji jarẽn me bajã amim karõ. Me batyk nhijukri batĩn rã'ãmã ne me bajã amim karõ. Ne kam ajbir ne arým me bamã me batĩnjao amirĩt ne. Ar idjujarẽnhkôt o amirĩt ne. Arým kute aminhõ akati jarẽnh djãkam me bamã o amirĩt ne. Ba ne ba memã 'ã ajarẽ nhym arým amirĩt ne.

Be, akmere, gê Metĩndjwýnh ajo djuw mex, Jeju Kritu kubê me bapytãr djwýnhmẽ Bãmbê Metĩndjwýnh ar ukaprĩkôt ajo djuw mex ne ar ajo ba, ne amã adjumar mex jarẽ ga kam adjumar mex ne ar aba.

*Xitu kute Jeju nhõ me jao ba djwýnh pymjýrmã.*

*Xim k 3.1*

<sup>5</sup> Mýj kadjy ne ba pykabê Kretakam amã inhire? Bir, aje mýjja inomã mẽnhmã, ije kum o krax ne ije inomã mẽnh kêtja aje ikudjwa inomã mẽnhmã ne ba kadjy amã inhire. Ne kam ajte aje Jeju nhõ me jao ba djwýnh kum àpẽnh kadjy me umjýrmã ne ba kadjy amã inhire. Krĩ kunĩkôt aje me'ã Jeju nhõ me jao ba djwýnh rẽnhmã, ije amã 'ã karõkôt.

<sup>6</sup> Bir, mýj me'õ Ar kubê dja Jeju nhõ me jao ba djwýnh? Bir, me axwe kêtme, me prõ pýnhmẽ, me ja gẽdja me Jeju nhõ me jao ba. Nhym me kradjwý tu kute amim Jeju markumrẽx ne me bãm kabẽnkôt mrãnhmã. Nhym me ja bep bãmbit ne kabẽn mexkumrẽx nhym kam kraja arĩk ar ba, amakkre kêt, kute bãm kabẽn mar kêt nhym me kam kum kĩnh kêt ne ar'ã kabẽn ba. Kwãrĩk wãnh ga me bãm ja'ã Jeju nhõ me jao ba djwýnh rẽnh kêt. Djãm me kraja kabẽn mex got ga aje me bãm'ã meo ba djwýnh rẽnhmã.

<sup>7</sup> Nã, me axwe kêtbit dja me kubê Jeju nhõ me jao ba djwýnh. Mýkam dja ga me ja'ãbit meo ba djwýnh rẽ? Bir, me kabẽn mexbit dja

me Metīndjwýnhmā apê. Djām me kabēn punu Metīndjwýnhmā àpēnh got. Kwārīk wānh me amakkre kêt, me ngrýkhñ, me kum kadjwati kangôbit\* djānh, me àkrê, me kute pi'ók kaprībit prāme me noo biknoro baja, kwārīk wānh me ja'ā Jeju nhō me jao ba djwýnh rēnh kêt.

<sup>8</sup> Nhy m bep me kute meo djuw mex prām, me kum mýjja mexbit kính, me kute amipnēnh ne ar ba, me katāt mrānh, me mrāmri mexo mexkumrēx, me axwe nēje kute amijāno ām, me ajbit dja ga me'ā Jeju nhō me jao ba djwýnh rē. <sup>9</sup> Dja Jeju nhō me jao ba djwýnh kum Metīndjwýnh kabēn kính ne kôt ar amijo ba. Metīndjwýnh kabēn 'ēxnhñ kêtja, ar ije prīne memā arēnhja, tām dja me kôt ar amijo ba. Me kute prīne memā Metīndjwýnh kabēn jarēnh mextire ne o kute memā tỳx jangjēnh ne o kute me kínhmā. Nà, dja Jeju nhō me jao ba djwýnh prīne mekmā Metīndjwýnh kabēn jarēn kam me kabēn punu nēje me akre. Me kum Metīndjwýnh kabēn mar prām kêt ne kute kabēno me bajapanhja dja Jeju nhō me jao ba djwýnh me kabēn punu nēje me akre gē me kuma.

<sup>10-11</sup> Bir, me amakkre kêt ne me kumex ne kabēn kajgo ar me noo biknoro ba. Nām we me,

—Djām me aje amim Jeju mar ne kam tu aje mar kajgomā? Kati, dja ga me amim ama nhy m me kam me amy nhinhu kàdjwý rê, ane.

Nām ā me noo biknoro ane. Nà, me ja dja Jeju nhō me jao ba djwýnh kabēno me unê gē me anhikrê. Nām me apýnh kikrekam me kunī noo aknoñ meo ajkê. Mýjo ne me meo ajkê? Me kute Metīndjwýnh kupa'ā mekmā arēnhkam ne me meo ajkê. Mýj kadjy ne me Metīndjwýnh kupa'ā mekmā arēnh ar o ba? Bir, me kute me noo

biknor ne me ò pi'ók kaprīreo prôt kadjy ne me Metīndjwýnh kupa'ā mekmā arēnh ar o ba. Kam dja Jeju nhō me jao ba djwýnh akubyn kabēno me ity nhy m me arým anhikrê.

<sup>12</sup> Bep Kretakam me'ò kute memā kabēn jarēnh djwýnh'ò ne ta ò me wýnh'ā kabēn ne,

—Kretakam me kra ne mrāmri 'ēxnhñkumrēx, axwekumrēx, kum ukangakumrēx, àkurbit kute mar. Nām ā me'ā kabēn ane.

<sup>13</sup> Nà, mrāmri me ā ane. Kam dja ga memā akabēn jarē, tu memā abēn tỳx, me kute mrāmri amim Jeju mar ne 'ā ngrā tỳx kadjy. <sup>14</sup> Dja ga memā abēn tỳx nhy m me arým wānh kabēn kakrit marmā ire, mekbê idjaer kukāmāre'ā ujarēnh kajgojamā ire. Me kabēn punuja ne me kum Metīndjwýnh kabēnkumrēxja kurēn kam ta amimarkôt kabēno mekbê mýjja pyma ar o ba nhy m me kabēn man kôt amijo ba. Dja ga memā abēn tỳx gē me on kôt amijo baja krāta.

<sup>15</sup> Me axwe kētmā ne mýjja kunī mexkumrēx. Nhy m bep me axweo kute amiptārja, me kute Jeju mar kêtja, me tām ne me bē mýjja kunī punu. Be, djām me ja mex got. Nām me òkre kadjwýnhbē mýjja punubit man mýjja punu'ābit amim karò. <sup>16</sup> Nām we me ajkwakambit,

—Ije Metīndjwýnh mar, anhýr ar o ban kam arīk ar ba. Nām me axwe, me amakkre kêt, ne te kute mýjja mex marmān mýjja punubit ma. Djām ā me kute amim Metīndjwýnh mar kute anhýr.

## 2

*Xitu kute mebêngêttēmē me kunīmā Metīndjwýnh kabēn jarēnhmā.*

<sup>1</sup> Nhy m bep ga, akmerē, dja ga me kupānhñtā me kute amim Jeju

\* **1:7** Mýjja me kute o kōm ne kôt bibānh kunīja, kadjwati kangômē uba kangômē, mýjja kangò kunī ne me kum kadjwati kangò jarē.

marwāmā Metīndjwýnh kukràdjà'ã prīne adjujarēnh ar aba.

<sup>2</sup> Dja ga me bēngēttemā,

—Gora ar abixaēr punu kēt ne ar aba. Ne akabôt katin ar aba, ne amipnēn ar aba. Gora ar tu amim Jeju markumrēx ne amibê kanga kēt ne mā kôt ajkamē. Ne kam mā amā aben jabê, ane. Dja ga ã me bēngēttemā ane.

<sup>3</sup> Ne kam ajte me bēngēxtemā kum,

—Gora ar amrānh mexkumrēx ne ar aba. Metīndjwýnh mex'ã amijakren kôt ar amijo aba, ane. Kwārīk wānh aben japrý kēt ne amā kadjwati kangô\* djānh kēt, ane. Dja gar mekmā mýjja mexbit jarēnh ar o aba, ane. <sup>4-5</sup> Nā, akmere, dja ga me bēngēxtemā kum,

—Ē, tynhwa ar, dja gar amū idj'ó'ã me kra pýnh jakre gē me ar ajã amijakren me akudjwa kum mjēn jabēn kum kra jabēn amipnēn ar ban mjēn prām kēt ne ar ban ōbikwao djuw mex ne ukaprīkumrēx ne mjēn kabēn ma, ane. Mýkam? Bir, dja me kātām te kute me amrānh punu 'ō pumūnh ne kute ar akôt Metīndjwýnh kabēn japrýmā te me ajabej ajkam aman kam tu ate krā, ane.

Dja ã me bēngēxte me kra pýnh jakreo ane.

<sup>6</sup> Akmere, dja ga me kraremādjwý akabēn jarē gē me amipnēn ar ba.

<sup>7</sup> Ga dja ga katāt mrā gē me krare apumūn kam akôt ar amijo ba. Dja ga katāt memā Metīndjwýnh kabēn jarēnh mextire ne abixaēr kēt. <sup>8</sup> Dja ga memā arēn mā memā akabēn mextire jarē gē me te kabēno kute ajapanhmā, me kum akurê ar o baja te akabēn punu jabej umar ar ban arým pijām ne ate krān ar ba.

<sup>9</sup> Dja ga me memā àpēnh kajgo ar ba jamādjwý akabēn jarē. Me kute meo pānh ne amim me pa 'amýnh

nhym me memā àpēnh kajgo ar bamā akabēn jarē. Dja ga memā kum,

—Gora me anhō bēnjadjwýr kabēn ma. Dja gar prīne me kabēn man me kabēnkôt ar amijo aba ne memā adjapēnh mex ar aba gē me ar akam kīnh, ane. Kwārīk wānh me anhō bēnjadjwýr pānh akabēn kēt ne akabēno apanh kēt, ane.

<sup>10</sup> Kwārīk wānh mekbê adjākīnh kēt, ane. Dja gar katāt memā apē gē me kātām ar adjapēnh mexkumrēxkôt ar apumūn kam arým kum Metīndjwýnh kīnh, Metīndjwýnh kubê me bapytār djwýnhja kum kīnh, ne kum Metīndjwýnh kabēndjwý kīnh ne. Dja ga ã me memā àpēnh kajgo ar bajamā akabēn jarēnho ane.

<sup>11</sup> Mýkam dja gu me katāt mrā? Bir, Metīndjwýnh ne arým me kunī kadjy ukaprīo kato. Kute me bakunī pytār kadjy ne ukaprīo kato. <sup>12</sup> Nā gu me prīne ukaprīja man kam arým pānh arīk ar babaja kanga. Ne mýjja punu, me kute Jeju mar kēt kute mýjja punuo amikīnhja tu arým kangakumrēx nhym wānh nō. Gu me kam on pyka jakam amipnēn ar ban katāt mrā ne Metīndjwýnh kabēnkôt akrānmā ar amijo baba. Dja gu me prīne amim Metīndjwýnh djukaprī man kam ã kôt amijo ane.

<sup>13</sup> Ne akrānmā ar amijo bababê amiwýr Jeju kamnhix, akubyn rwýk djā amiwýrkam amako tē. Me banhō Metīndjwýnh, me bapytār djwýnhbê Jeju Kritu tām dja me bajaērbê kato, ta raxo kubê kumkatio me bawýr kato. Djām ngri got. Raxo, mexo kubê kumkatiti:. Nhýnh ne me'ō mexo, raxo, umao kumānhkutā? Dja me bawýr kato gu me arým bakīnhkumrēx. Me bakīnh djā ne ja. Tām ne gu me amiwýrkam amak ar o baba.

\* **2:3** Mýjja me kute o kōm ne kôt bibānh kunīja, kadjwati kangōmē uba kangōmē, mýjja kangō kunī ne me kum kadjwati kangō jarē.

<sup>14</sup>Be, Jeju Kritu ta ne me bajaxwe pānh tyk kadjy memā amikanga, kute me bajaxwe kunībē me bapytār ne kute amim me bajo mexmā ne mekmā amikanga. Kute amim me bajo mex ne kute me bajo ō me wýnhkumrēx ne kute ar me bajo bamā ne mekmā amikanga. Kute me bajo ō me wýnh gu me kam bamā mýjja mexbit kính ne arek ar o babamā.

<sup>15</sup>Bir be, ikabēn ja dja ga prīne me kupānhtā me kute amim Jeju marwāmā arē, memā kōt arē. Me kaprījamā kính jangjē gē me kaprī kēt. Gora atýx ne me axwe nēje me akren memā abēn týx gē me arek ar ba. Kwārīk wānh gē me ajā kabēn kēt.

### 3

*Kute Metīndjwýnh djukaprī marn kute katāt amijo bamā.*

*Ep 4.2; Pir 2.3; Kor 3.12*

<sup>1</sup>Gora me kute amim Jeju marwāmā akabēn jarē gē me on akabēn ma. Dja ga memā kum,

—Gora me me bēnjadjwýrmē meo ba djwýnh kabēn man me kabēnkōt ar amijo aba. Dja me me amā me adjāpēnhkumrēx jarē ga me kam kubē amikati kētkumrēx ne tu 'ýr tē. Nhyr bep djām me me amā mýjja punu'ā apnē ga me ate akrā. <sup>2</sup>Kwārīk wānh ga me abenā akabēn kēt, ane. Gora me akabōt katin amā aben kaprīn akrānmā abenmā akabēn jarē, ane. Dja ga ā ajte memā akabēn jarēho ane gē meo biknor kēt.

<sup>3</sup>Amrēbē ne gu me badjwý bano kētkumrēx ne bajamakkre kētkumrēx nhyr me arīk me banoo biknoro ba. Nā, amrēbē ne gu me arīk ar babari bamā mýjja punu kunī kính ne. Ne te baje bajaxwemā banhirer ne arek ar babamān mā bamā bajaxwe kính ne. Me bajaxwen abenā bakabēn ne aben nhō mýjja'ā bangryk ar baba. Nhyr me kum me bakurē:

gu me badjwý amipānh bamā me kurē.

<sup>4-5</sup>Nhyr bep ajbir ne Metīndjwýnhbē me bapytār djwýnh ukaprīo kato ne kum me bajabēkumrēx. Nā gu me te bamā bajaxwebit kính nhyr Metīndjwýnh tu ukaprīkōt me bapytā. Kum me bajabēn kam me bapytā. Djām me bamrānh mexkōt ne gu me amiptā? Arkati, ta ne ukaprīkōt me bapytā. Nām me ngōo amingrā ku'ōn kam arým akubyn mexkumrēx. Nhyr Metīndjwýnh Karōdjwý ā me bajo nyo ane, ā me bajo mexo ane. Nām me bajo ny ne me babē me bajaxwe krāta gu me kam baje babixadjwýr ny pyrāk ne bakabēn punu mar kēt ne bakabēn mexbit ma. Nhyr kam Metīndjwýnh Karō mā me bajo mexo tēm rā'ā ne. <sup>6</sup>Ukaprīkōt ne me bawýr Karō jano, kute me bajo djuw mexmā. Jeju Kritu kubē me bapytār djwýnh djō'ā ne me bawýr ano. Djām ōdjý got me babē Karō nē? Kati, mrāmri ne ōdjānhkumrēx ne me bamā ta Karō jano ne prīne o me banhipēx ne ar me bajo ba.

<sup>7</sup>Be, djām Metīndjwýnh djukaprī ngri got. Nām ukaprīkōt me bamā me bajaxwe kēt jarē. Gu me bamex ne batyk nhijukri batīn rā'ā: rā'ān ar baba kadjy ne me bamā me bajaxwe kēt jarē. Nām amū me batīn rā'ā: rā'ā rā'āmā arē gu me amiwýr kamnhīxbē ar baba. Adjým, dja me bamā kungā.

<sup>8</sup>Mrāmri ne ikabēnja. Ikabēnkumrēx. Dja ga memā prīne idjō'ā ikabēnja kōt arē gē me kute amim Metīndjwýnh marja kum mýjja mexbit kính ne ar o ba. Kam ne mexkumrēx, me kunīmā mexkumrēx.

<sup>9</sup>Kwārīk wānh me abenkam kangatija wānh nō. Tām ne kajgo mexi. Kwārīk wām nō. Kwārīk wānh me bakukāmā nhidjikōt me àkrēja wānh nō. Nhyr me kute kabēno aben japanh ne me kute abenmā àkrējadjwý kunī dja wānh

nõ. Môjdjê kukràdjà tũm'ã ne me ã abenmã ane. Tãm ne kajgo mexi. Punure. Tãm dja wãnh nõ.

<sup>10</sup> Dja me'õ kabẽno kute abenbẽ meo bikjẽr jabej ga nẽje kukrà. Dja ate krã ga ajte kum akabẽn jarẽ. Godja mã ate krã jabej ga kam arým tu kangakumrẽx. Arým ne ga te kabẽn punu nẽje te o ane nhym mã kum kabẽn punu kĩnh. <sup>11</sup> Arým ne ga kõt kum akato. Mrãmri ne me'õ ja punukumrẽx. Atemã kabẽn. Kum axwe kĩnhkam ne ga arým kum akato. Nãm kabẽno amijo amirĩt. Mrãmri dja ga tu kangakumrẽx. Tãm ne ja.

*Kabẽn o ino rer.*

<sup>12-13</sup> Be, dja ba awýr Artemanh nãr kon Xikiku jano gẽ awýr tẽn bõx ga kam tebẽ mã amrẽ iwýr tẽ. Krĩraxbẽ Nikoporikam dja gu abenwýr bõx. Kam dja ba na tỹmkam arek akam amako dja. Nĩnh iwýr atẽm kẽtri dja ga Djenajmẽ Apõr aro tẽn amũ ar kujate. Djenajbẽ ne me kadjy kabẽn jarẽnh djwýnh, ar ja. Dja ga prĩne aro djuw mex ne aro tẽn amũ ar kujate gẽ ar tẽm mex ne ýkam tẽm kêt. Ga kam amrẽ iwýr tẽ.

<sup>14</sup> Be, gora gẽ gu banhõbikwa kute Jeju marwã, mýjja mexbit ma ne kum ajbit kĩnh. Mýkam? Bir, gu banhõbikwa kute me 'uwttö djuw mex ne mekam kum ukanga kêt ne kute akrãnmã ar meo djuw mexo bamã.

<sup>15</sup> Ar ja, arkam idjãm ja kunĩ ne ar kute ajo amak rã'ãn kam wãm amã amijarẽ. Badjwý ne ba ar wão ama ne. Ar wã kute Jeju mar ne kum gu bakĩnhkam ne ba aro ama ne. Arkum ijarẽ.

Gẽ Metĩndjwýnh ukaprĩkõt ar akunõo djuw mex. Tãm ne ja.

## **Paur kute Piremômã pi'ók no'ók ne ja.**

Paur ne kamybê Piremômã pi'ók no'ók ne. Jejukôt ne ar abeno kamy. Nhyr Piremô nhô kubê kra 'ô, me pardja 'ô kum âpênh kajgo ar baja arým mã kubê tê. Birâm kubê pi'ók kapríreo akîn mã kubê o tê. Ne kam pyka 'ókam bôx. Pyka 'ókam Paur memã Metîndjwýnh'ã ujarênh ar bakam bôx nhyr kam Paur Jeju'ã ujarênh ku'ê. Mekbê ijê djâkam âm rá'âkam ne 'ã ujarênh ku'ê. Nhyr kubê kraja kuman kam tu amim Jeju markumrêx, tu amim kamnhîxkumrêx ne. Nhyr kam Paur arým o kra. Kum abêkumrêx ne, ne kam te kute nêman ajte Piremômã ano. 'Ã pi'ók no'ók ne Piremômã ano nhyr Xikiku ô pi'ók no'óko tê. Nhyr kam kum,

—Kwârîk wânh, ga kam angyr kêt. Tu amã abê. Jejukôt dja gar tu abeno akamy ne amã aben jabê, ane. Nãm ã Paur Piremômã pi'ók no'óko ane. Tãm ne ja.

1-2 Piremô, amã ne ba pi'ók no'ók ne. Ba, ibê Paur ne ba amã pi'ók no'ók ne. Gu bakamy Ximoximê ne bar amã pi'ók no'ók ne. Piremô, ga ne ga ar ikôt Metîndjwýnhmã adjâpênh ar aba bar imã akînhkumrêx ne amã pi'ók no'ók ne. Gamê gwaj bakanikwýnh Apijmê Akipu gwaj bakôt âpênhjamê ar aje amim Jeju mar ne kôt anhûrkwâkam aben pydjijamê, ar amã ne bar pi'ók no'ók ne. Ba, ibê Paur, Jeju Kritu'ã idjujarênh ibakam me kute ibê ijêja, ba ne ba ar amã pi'ók no'ók ne.

<sup>3</sup> Gê Metîndjwýnh ajo djuw mex, Metîndjwýnhbê me Babâmmê krabê Bênjadjwýr Jeju Kritu ar ukapríkôt ajo djuw mex ne ar ajo ba ne amã umar mex jarê ga adjumar mex ne ar aba.

*Paur kute Metîndjwýnhmã amikînh jarênh.*

<sup>4</sup> Mrâmri ne ba akam ikînhkumrêx ne kam ije inhô Metîndjwýnhmã amijarênh katã kum ajarênh rá'ã. Nã bãm kum,

—Ota ba Piremôkam ikînhkumrêx, ane. Nã bãm ã kum akam ikînh jarênh anen kôt kum mextire jarê.

<sup>5</sup> Mýkam ne ba akam ikînh ne? Bir, amã me abêkam, amã Metîndjwýnh nhô me ja kunî jabêkam ne ba akam ikînhkumrêx ne. Ne ajte aje tu amim Jeju kamnhîxkumrêx, tãm ne me iwýr arênh bôx. Kam ne ba akam ikînhkumrêx ne. <sup>6</sup> Be, nã bãm Metîndjwýnhmã ajarê ne kum,

—Arým ne Piremô amikajmã'ã Jeju ma. Kam dja ga kum ôdjânhmê kum me abê jarê gê memã ôdjânh ne kum me abê, ane. Nã bãm ã Metîndjwýnhmã ajarênh ane.

Nã, akmere, dja me akabên mex man anhôdjânh pumûn arým akôt Kritu ma, Kritu nhôdjânhmê ukaprí ma. Nãm ukapríkôt apýnh mýjja mex djario me bakînh ne arým gad-jwý ajo kînh ne, gê me gop apumûn kam arým akôt Kritumã kato.

<sup>7</sup> Nã, nãm me imã ajarê ba kam ikînhkumrêx ne kam ajte itý:xkumrêx ne. Amã me abêkam, amã me kute Jejukôt abeno kamy jabêkam ne ba ikînhkumrêx ne kam itý:xkumrêx. Ga, akmere, nã gãm Metîndjwýnh nhô me mexja pêne meo djuw mex ne meo kînh ne. Ba kuman kam ikînhkumrêx ne.

*Ônemu nêje kum kabên.*

<sup>8-10</sup> Amã me abêkam ne ba mýjja'ã ama. Ba ikrabê Ônemu'ã ama. Me kute ibê ijê rá'âkam ne Ônemu iwýr bôx ba kam o ikra. Nã bãm kum Jeju jarê nhyr tu amim markumrêx ba kam o ikra.

Ibê Kritu nhô âpênhkam ren amã ibên týx ne. Ne ren amã,

—Kwârîk wânh arek ikuri dja, ane. Nhyr ren arým tu mrâmri dja.

Nhyr bep kati, imã ajabêkam ne ba tu 'ã ama. Ba ibê Paur,

ibêngêttekam amā ikaprī jabej, nhyem me kute Kritu Jeju'ā idju-jarēnh ibakam ibê ijê ga amā ikaprī jabej ne ba tu 'ā ama.

<sup>11</sup> Nām amrêbê akam punu ne kam ajbir amā mexkumrêx, ne badjwý imā mexkumrêx ne.

<sup>12</sup> Ba arým ije akubyn awýr anormā. Imā abékumrêx tām ne ba ije amā anormā. Godja ba akubyn amā anon kam o ama: ne. <sup>13</sup> Nā bām te ije o aminhō prāme nhyem arek ikuri ām ne kute akāxā ijo djuw mexmā. Ije Jeju kukrādja ny'ā idjujarēnh ibakam ne me ibê ijê ba mebê ijê djakam dja nhyem Ônemu kute akāxā imā àpénhmā ba te ije o aminhō prāme.

<sup>14</sup> Nhyem bep kati, nā bām inhōkre kadjwýnhbê amim,

—Kati, ba dja ba ā anhýr kêt ne. Ga dja ga amā ikaprī jabej arým imā nê gê arek ikurī dja. Aje amimarkôt dja ga amā ikaprī jabej arým imā nê gê kam ikurī dja, ane.

<sup>15</sup> Amrêbê ne mā abê tēm ngrire ne kam arým akubyn awýr tēmmā. Kon ne, birām arým akubyn tu awýr bôxkumrêx ne arek wānh akurī ām rā'ā: rā'āmā arým wām tēmmā. <sup>16</sup> Djām aje o me bajtem'ō pyrāk nhyem amā àpénh kajgo ar bamā ne akubyn awýr tēmmā? Kati, arým ar aje Kritukôt abeno akamymā. Arým kubê akamy. Akamy, gu arým bamā kīnhkumrêxja tām ne awýr tēmmā. Mrāmri imā kīnh raxi. Nhyem bep ga dja ga amā kīnh raxo ijakre. Amā àpénhkan ne gar arým ajbir Bēnjadjwýr Jejukôt abeno akamykam dja ga amā kīnh raxo ijakre.

<sup>17</sup> Be, kam dja akubyn awýr bôx ga amiwýr o wadjàn kum akabēn mex jarē. Gu baro'ā badjápénh ne abeno banhōbikwakam baje aben pyrāk jabej dja ikāxā awýr bôx ga o ipyrāk ne kutā aprôt ne pa 'amýn amiwýr o wadjàn kam kum akabēn mex jarē.

<sup>18</sup> Djori ajo ajkê? Nār kon, djori abê mýjjao akī? Kute ajo bikēnh jabej amrê imā 'ā pi'ók no'ók ba kam amā o pānh. <sup>19</sup> Ê, gop ije in-hikrao pi'ók no'ókja pumū, ba ibê Paur dja ba amā o pānh. Kwārīk wānh, ga dja ga àkīnhī pānh kum arēnh kêt.

Gora ijā mān amijakren ikudjwa pānh jarēnh kêt, àkīnhī pānh kum arēnh kêt, tu ate akrā. Ga ije amā Jeju jarēnh ne ije amā pānh jarēnh kêtja pumū. Nā ba ren amā Jeju jarēnh kêt ga ren amim mar kêt ne tu abiknorkumrêx ne. Bep kati, nā bām amā arê ga ama ba kam ije amā pānh jarēnh kêt. Gora aje ipyrāk ne tu àkīnhī pānhja mar kêtumrêx. Ônemu kute ajo bikēnh tūmja tu o pānh mar kêt.

<sup>20</sup> Nā, akmere, gora ā anen kum akabēn mex jarē gu banhō Bēnjadjwýr kabēnkôt tu kum akabēn mex jarē. Kum akabēn mex jarēn o ikīnh, akmere. Gu baje Kritukôt abeno bakamykam gop ijo kīnh, akmere. <sup>21</sup> Be, nā bām inhōkre kadjwýnhbê amim,

—Dja tu ikabēn man kôt amijo ba. Dja ikabēn man kam o djuw mexo ikabēn jakre, ane. Nā bām ā amim anen kam amā pi'ók no'ók ne.

<sup>22</sup> Ê, ajte mýjja 'ōdjwý. Ba wām awýr itēm ne ibôx jabej on ikutêp imā kikre kre kapō ne kikre kadjwýnhbê inhiqwā djawā kapī. Godja Metīndjwýnh wām awýr ijano ba kam awýr tēn bôx. Kadja dja ga Metīndjwýnhmā ijo a'uw nhyem kam arým awýr ijano. Me kute ikadjār ba kam wām awýr itēmmā. Kam ne ba amijā Metīndjwýnh kamnhīxbê nō.

<sup>23</sup> Epapraj ne kute ajo amak ne kute ajarēnh rā'ā. Adjwýnhdjwý ne me kubê ijê. Nām Kritu Jeju'ā ujarēnh ar ba nhyem kam me kubê ijê nhyem iro'ā mebê ijê djakam dja. <sup>24</sup> Makumē Arxakumē Temanhmē Rukamē ar adjwýnhdjwý kute ajo



amak ne kute ajarēnh rã'ã. Ar ja ne  
ar ikôt àpēnh ar ba.

<sup>25</sup> Gê Bēnjadjwÿr Jeju Kritu  
ukaprikôt prīne ajo djuw mex. Tãm  
ne ja.

## Mekbê idjaer kute amikajmã'ã Jeju mar nhõ pi'ôk no'ôk ne ja.

Me'õ ne Jeju'ã pi'ôk no'ôk ne kam mekbê idjaer kute amikajmã'ã Jeju markumrêx jamã ano, ar kute mrãmri Jeju'ã ngrækumrêxmã. Mekbê idjaer kwý ne ar amikajmã'ã Jeju man kam arým kute ari mýjjakôt akêxmã. Nãm ar abenmã,

—Gwaj akubyn Môjdjê kukràdjã tímjakôt amijo baba.

Ne ajte,

—Gwaj akubyn Metíndjwýnhmã mry bôn kamró kapí. Birãm Jeju kamró me bajaxweo bingrãnh mãnkhutã kêt, gwaj akubyn mry kamródjwý me bajaxwe pãnh ajte Metíndjwýnhmã kungã ane. Kam ne me'õ arkum pi'ôk no'ôk ne arkum,

—Kati, Jeju pydji kute me bajaxweo bingrãnh djwýnh. Kwãrîk wãnh atemã ibej mýjja 'õ jabej kêt. Jeju kamró pydji ne me bajaxwe mãnkhutã. Kwãrîk wãnh Jeju kamró nhibej mry kamró nhõr kêt, ane. Nãm ã anen kam arkum Jeju mex jarê. Jejubê ne Metíndjwýnh kra. Jeju ne mýjja kuní kurãm mexkumrêx. Ne kadji mrãnh djwýnh kurãm raxi. Ne Môjdjê kurãm raxi. Ne me kute me kadji Metíndjwýnh mar djwýnhja kurãm raxi. Jeju kamró ne mry kamró kurãm mexkumrêx ne kam kute o me axweo bingrãnh kadji mexkumrêx. Nhym Jeju kukràdjã nyja ne Môjdjê kukràdjã tím jakãjbê bõx ne kurãm mexkumrêx. Kam gédja me mrãmri Jeju'ã ngrækumrêx ne mã 'amýn kanga kêtumrêx ne mã kôt ajkamên õ pykakam bõx, kãjkwakam õ pykakam bõx.

*Metíndjwýnh kra kute raxo kadji mrãnh djwýnh jakrenh.*

*Kor 1.15*

<sup>1</sup> Amrêbê ne Metíndjwýnh me bakukãmãremã kabên. Me kute kabên jarênh djwýnhkôt ne memã kabên, ne apýnh mýjja djãri kôt memã amijo amirîto tẽ. Nãm memã kabên tẽm tãmtã ã amũ kamingrãnymã kabên ba. <sup>2</sup> Nhym bep ajbir ne Krakôtbit me bamã kabên ne. Ajbir ne akati kute o ino rerkambit Krakôt me bamã kabên ne me bamã amijo amirît ne.

Bir be, arým kute Kramã mýjja kuní kangaja pumũ. Nhym kam Kra arým pykamê kãjkwamê mýjja kuní 'y. Metíndjwýnh djõ'ã ne mýjja kuní 'y. <sup>3</sup> Nãm Metíndjwýnh jadjêho adjênh ne. Kubê Metíndjwýnh tãm. Ar kute aben pyrãk. Nãm 'itýxkumrêx ne kam ta amikabênkôt mýjja pumũnh 'ãno dja. Kute mýjja kuní nhípêxja pumũnh 'ãno dja. Djãm kabên ngri got. Nãm ta amikabên pymao mýjja kuní pytãn 'ãno djan ar o ba.

Bir be, tãwã ne me babê me bajaxweo põx ne me bajo mex ne kam arým mã tẽ, mã kãjkwamã tẽn kam nhý, Metíndjwýnh djubõk'ãnh nhý. Metíndjwýnh kubê kumkati djubõk'ãnh nhý. Djãm me kãtãm ne me me bẽnjadjwýr rũnh djubõk'ãnh krî? Kati, ãm me bẽnjadjwýr rũnhbit. Me bẽnjadjwýr rũnh ne me me ubõk'ãnh krî.

<sup>4</sup> Nã, kra ne ra:xi. Raxo kute kadji mrãnh djwýnh jakrenh mexi. Ne umaodjwý kute kadji mrãnh djwýnh jakrenh. Bãm ne 'ã bẽnjadjwýr mẽ nhym uma: ne. <sup>5</sup> Nhýnh ne Metíndjwýnh kadji mrãnh djwýnh 'õmã kum,

“Mrãmri abê ikrakumrêx. Jakam ne ba arým ajo ikrakumrêx ga amipãnh ijo Abãmumrêx”, ane got.

Kati, kramãbit ne ã kabên ane. Nãr kon, nhýnh ne Metíndjwýnh kadji mrãnh djwýnh 'õ'ã memã kum,

“Dja ba o ikra nhyim ijo Bãm”, ane got.

Kati, Kra'äbit ne ã kabên ane.  
 6 Ne kam ajte, kute pykamã kra janorkam memã kum,

“Gora gë ikadji mrãnh djwýnh kunĩ ikramã rax jarë”, ane.

Be, kubê Metĩndjwýnh krakam arým kum mýjja kunĩ re nhyim rax ne.

7 Nhyim bep kadji mrãnh djwýnh'äbit ne,

“Nã bãm amikadji mrãnh djwýnh nhipêx nhyim kute kôkmë kuwy pyrãk.

Akrãnmã imã mrãnh ne ikadji àpênhmã”, ane.

8-9 Nhyim bep Kramãbit ne kum,

“Be, Metĩndjwýnh, mrãmri dja ga meo aba rã'ã rã'ã ne.

Nã gãm katãt meo aban amã mýjja mexbit kĩnh ne katãt amijo aba ne amã mýjja punu kurê.

Kam ne ba ibê anhõ Metĩndjwýnh ne amijo apytãn arax kadji adja. Ga kam akĩnhkumrêx ne. Nã gãm araxmë akĩnho anhõbikwa kunĩ jakrenh mex ne”, ane.

Nãm ã Kramã ane ne kam ajte kum,

10 “Ga, Bënjadjwýr, ga ne ga krax kurũm pyka nhipêx ne an-hikrao kãjkwa nhipêx.

11-12 Dja ã apêx. Nhyim bep kati, gajbit dja ga arã'ã: rã'ã rã'ã.

Nhyim bep kati, dja ã kute kubêkã pyrãk ne tũm ne.

Mrãmri ne me kute kubêkã, mýjja tũm, inõkã tũm nhyim me kute krãn o mrãnh ne 'ê'ã rênha pyrãk. Dja ga ã kãjkwamë pyka tũm krãn o atêm ne mênho ane. Ne kam arým pãnh ny nhõ.

Nhyim bep ga dja ga tũmrãm arã'ã rã'ã ne. Ga adjwýnh tãmo dja ga amũ arã'ã: rã'ã ne. Dja ga atemã kêtumrêx”, ane.

Bir be, nãm ã Kramã ane.

13 Nhýnh got kadji mrãnh djwýnh 'õmã kum,

“Amrê idjubõk'ãnh nhý, abënjadjwýr raxkam idjubõk'ãnh nhý.

Ikutêp nhý ba 'yr amrê awýr akurê djwýnhõ mõ ga kwý o apard-jan kwý nhimex”, ane.

Djãm kute kadji mrãnh djwýnhmã ã anhýr got? Arkati, Kramãbit ne ã kabên ane. 14 Nhyim bep kadji mrãnh djwýnh ne Metĩndjwýnh nhõ àpênh kajgo. Djãm mebêngõkre got\* amirít ne? Kati, me kute noo omũnh kêt nhyim Metĩndjwýnh me bakadji ano. Me ba ba, Metĩndjwýnh kute me bapytãn ne kute ar me bajo bamã, me bawýr ne anoro dja, kute me bapumũnh ne kute me bajãno ämmã ne me bawýr ano.

## 2

*Me kute Metĩndjwýnh kabên mar 'ãno ämmã.*

1 Bir be, kam, Metĩndjwýnh kute me bamã krabê kumkati janorkam dja gwaj tu amijamakkrekam nhõrkumrêx. Me kute gwaj bamã katãt arênh gwaj baje marja tãm dja gwaj tu amijamakkrekam nhõrkumrêx ne 'amýnh týx, gwaj baje o babiknor karõ. Dja gwaj ate ar bakrãn baban kam ã o babiknor mex ne, o babiknor mexo tẽ.

2 Amrêbê ne kadji mrãnh djwýnh memã Mõjdjê kukràdjã jarë, me kute kôt amijo bamã. Nhyim me'õ kôt kute amijo ba kêt nãr kon kubê binhirênh katã nhyim kam arým kum o pãnh ne. Katãt kum o pãnh ne. 3 Bir be, dja gwaj badjwý ate bakrãn ar baba djãm kute gwaj bamã o pãnh kêtã? E kum kati, gêdja gwaj bamãdjwý o pãnh ne. Amrêbê ne Metĩndjwýnh memã kukràdjãbit jarë. Nhyim me ate krãn ar ba nhyim arým memã o pãnh ne. Nhyim bep ajbir, ajbir ne me bamã

\* 1:14 Apýnh me õ pyka djãri kunĩkõt ne me kunĩ bêngõkre. Kubêkã jakamë me kakrãtykmë me babêngõkremë ne me kunĩ: bêngõkre.

kra ngā, krabê me bapytâr djwýnh me bamā kungā. Djām ate gwaj bakrājamā kute o pānh kêt mā? E kum kati ne. Dja gwaj bamādjwý o pānh ne. Bēnjadjwýr ta ne kumrēx memā amijarē, kute me utārmā amijarē. Nhy m kam kute ar meo baja, me kôt baja ne me kuman kam ô'ā gwaj bamā kôt arē, kabēno kabēn ne gwaj bamā arē.

<sup>4</sup> Nhy m Metīndjwýnhdjwý kôt mýjja kwýo amirīt, me kute kôt kum kator kadjy ne umao apôx ne o mýjja 'yro ba, apýnh mýjja pumūnh kêt 'yro ba, me kôt baja ne me uma proo mýjja 'yro ba. Nām me me akrymē me kanêo mex, me tyk kwýo tīn, bōm me nēje me karō rē, ā ar meo anhýro ba. Nhy m kam Metīndjwýnh ajte kôt memā ta Karō jano, apýnh apēnh djāri ne kadjy tu ukabikôt memā kungrà. Nām ā Metīndjwýnh kute meo bao ane, me kute Jejumā kator kadjy.

*Jeju amijo kubēngôkren kute me bapyrāk.*

<sup>5</sup> Djām kadjy mrānh djwýnh Metīndjwýnh kute amim umjýr got? Kute ar pykao ba kadjy, kute amim umjýr got? Ije ar amā pyka ny jarēnhja tām, djām kute ar o bamā? Kati, Jejubit ne kute ar pykao ba kadjy Metīndjwýnh amim kudja. Kute mýjja kunīo ba kadjy ne amim kudja. <sup>6</sup> 'Ā ne me'ō Metīndjwýnh kabēnkam,

“Ē, Metīndjwýnh, djām me ibēngôkre imex got ga aje me imar rā'āmā? Mýkam ne ga me ikakritjao djuw mex ne?

<sup>7</sup> Nā gām o kātām, akadjy mrānh djwýnh kôpdji'ā o kātām. O kātām 'iry kêt ga ajte umamē raxo utā <sup>8</sup> nhy m ajte mrāmri bēnjadjwýr rax ne mýjja kunīo ba”, ane.

Nām ā Metīndjwýnh kabēnkam ane. Ga kute mýjja kunīo baja pumū. Nhýnh ne mýjja'ō kubē 'ā kātām ne? Kati. Djām me babēngôkre'ā

ne kabēnja? E kum kati, Jeju'ā ne ā ane. Mebēngôkre kute mýjja kunīo ba kêtja pumū.

<sup>9</sup> Nhy m bep Jeju'ā ne ā ane. Mrāmri ne kadjy mrānh djwýnh kurām kātām 'ikrān mex ne, nhy m Metīndjwýnh ajte 'ā raxmē umamē kumē. Nām me bapānh ty nhy m kam pānh Metīndjwýnh 'ā kute raxmē umamē mēnh o ane. Metīndjwýnh me bakam ukapri kôt ne amim kra'ā karō nhy m kam me bapānh ty, me bakunī pānh ty. Djā nām tyk kadjy tokry kêt ne ty? Kati, nām tyk kadjy tokry: ne. Nhy m kam pānh Bāmja 'ā umamē ra:xmē kumē.

<sup>10</sup> Djām Metīndjwýnh kute kra tokry'ā amim karōja punu got? Kati, mrāmri katāt. Metīndjwýnh kute mýjja kunī 'yr ne kute ar o baja tām ne krabê Jeju'ā amim karō, kute tokry maro tēm ne inomā mēnh ne kam mrāmri kubē me bapytâr djwýnhkumrēxmā. Tokrykôtbit ne me bapytā. O ne Metīndjwýnh me bakrāptī pytān me bajo kra, kute ō kàjkwa mextiremā me bajo tēm gu me kramē baro'ā arkam babamā. Jeju ne me bamā wan me bamā pry o mōn kàjkwamā wadjā. Dja gu me ī kôt pry'ā mōn wadjā.

<sup>11</sup> Bir be, ta Bām ne kubē me Babām pydji. Ta, kute me bajo mex ar o bajamē gu me bamē ne gu meo Babām pydji. Kam ne me bajo kamy. Me bakam pijām kêt ne tu me bajo kamy. <sup>12</sup> Nām Bāmmā kum, “Dja ba ikamyremē ikanikwýnhremā ajo amirīt.

Me kute aben pydji nhipôkri dja ba memā amex jarē”, ane.

<sup>13</sup> Ne kam ajte,

“Metīndjwýnh kanārrām dja ba ar amijo iba”, ane.

Ne kam ajte,

“Ota ba dja. Metīndjwýnh kute imā ikra nhōrjamē ro'ā ne bar dja”, ane.

Nâm ã Jeju gwaj bajo ðbikwao ane. <sup>14</sup> Bir be, Metîndjwýnh krabê ne gu me babaja. Ga me banhîja pumû. Me barerek, me bakatyk, me bakanê, me batokryja pumû. Kam ne Jeju amijo kubêngôkren\* kute me bapyràkà. Ne kam amitykkôt Xatanajo ajkê. Xatanaj kute memã tyk jarênh nhym me kabênkôt tykja tãm ne prîne o ajkê. Kadjy ne amijo kubêngôkren ty.

<sup>15</sup> Ta amitykkôt Xatanajo ajkên kubê me bakaba. Nã gu me bamã batyk puma: ne. Me batînrî bamã batyk puma: ne. Nhym kam Jeju ne me bakadjy tyn kam o me bamã me batyk pymajao ajngrà, gu me arým bamã uma kêt ne.

<sup>16</sup> Djã nãm amijo kadjy mrãnh djwýnh ne ruw ne me utà? Kati, nãm amijo kubêngôkren ruw. Nãm amijo Abraão tàmdjwý 'ôn ruwn me utà.

<sup>17</sup> Kam ne me bajo kamykumrêx ne kam kamymê kute aben pyrâk. Nãm me banhîo î, ne kam me bakôt tokry, me bakôt mýjja maro ba, me bakôt muw, me bakôt kînh. Bir be, nãm prîne kute kamy bêngôkre pyrâk, kute me bapyràk ne kam arým kubê Metîndjwýnh mar djwýnh nhõ bënjadjwýr rax djukaprîkumrêx ne Metîndjwýnhmã âpênhkumrêx ar ban kute kanga kêt. Nãm me bakadjy Metîndjwýnhmã amijarê, me bajaxwe pãnh tyk jarê, nhym arým me bajaxweo ajngràn me bajaxweo akno.

<sup>18</sup> Djãm me banhõ Metîndjwýnh mar djwýnh nhõ bënjadjwýr kute gwaj bamar kêt, kute gwaj batokry mar kêt? Kati, kute gwaj bamar. Xatanaj kute gwaj bajo baja mar. Djãm kute adjwýnhdjwýmã mýjja jarênh kêt, axwe'ã âpnênh kêt. Pykabê ar baridjwý ne kum axwe'ã

apnê nhym adjwýnhdjwý tokry: ne. Kute tokrydjwý mar. Kute mýjja kunî mar. Kam dja gwaj bakam ukaprî: ne gwaj bawýr prôt ne kubê gwaj bapytà. Xatanaj kute gwaj bamã axwe'ã âpnênhkam dja gwaj bawýr prôt ne kubê gwaj bapytà.

### 3

#### *Jeju kute raxo Mòjdjê jakrenh.*

<sup>1</sup> Nà, akmere ar, âpnhîre ar, ar abê Metîndjwýnh nhõ me mex-tireja, Metîndjwýnh kute kâjkwa kadjy gwaj baro'ã amijo gwaj bapytàr, on ar Jejukôt ajamak bën. Ê, dja ba ar amã Jeju rax jarê. Arým ne Metîndjwýnh me bawýr Krabê Jeju jano, me bakadjy ano nhym bôx. Ne kam mrãmri ne kubê me banhõ Metîndjwýnh mar djwýnh nhõ bënjadjwýr rax. Tãm ne gwaj tu amim kamnhîxkumrêx ne kam memã arênh ar o baba. <sup>2</sup> Nhym kam Jeju bôx ne kum âpênhkumrêx ar ba. Metîndjwýnh kute anorjamã âpênh ar ba ne kanga kêtumrêx. Kute Mòjdjê pyrâk. Mòjdjêdjwý ne prîne kute anor djwýnhjamã âpênh ar ba ne Metîndjwýnh nhõ me jao ban meo djuw mexkumrêx ne kute me kanga kêtumrêx.

<sup>3</sup> Nhym bep Jeju ne Mòjdjê kuràm rax ne. Kam dja me mã abenmã Jeju pymamê rax jarênh ar o ba. Ga me kute amim kikreja pumû. Kikre nhîpêx djwýnh ne raxo, tỳxo kikre jakre. Nãm ã Jeju kute kikre nhîpêx ar o ba pràbê Mòjdjê nhîpêxo ane ne kam raxo Mòjdjê jakrenh mex ne. <sup>4</sup> Nhýnh ne kikre 'õ ta kute amin-hipêx got? Kati, kikre 'yr djwýnh ta ne ikrao kikre 'y. Bir be, nãm ã Metîndjwýnh mýjja kunî 'yro ane. Nà, mýjja kunî nhîpêx djwýnhbê ne Metîndjwýnh. Ta ne Mòjdjêdjwý nhîpêx ne.

\* 2:14 Kritu ne amijo kubêngôkre kute mrãmri ne apýnh me õ pyka djãri kunîkôt me kunî: bêngôkreja pyrâk. Kubê kã jakamê me kakrãtykmê me babêngôkremê ne me kunî: bêngôkre. Me kamrômê me kukràdjã kunî kubêngôkreo aben pyrâk. Jakam dja ga Karõ 17.26 jarênh ama.

<sup>5</sup> Mrāmri ne Mōjdjê prīne Metīndjwýnh nhõ me ja kunõ ban meo djuw mexkumrêx ne kute me kanga kêt ne memã Metīndjwýnh kute amũ tũmrãm amikukràdjào amirĩtja kajmã'ã memã arênho ba. Kubê Metīndjwýnh nhõ àpênh. Õ àpênh kajgo.

<sup>6</sup> Nhym bep Kritu kubê Metīndjwýnh kra. Kubê Metīndjwýnh kra ne ta õ me jao ban prīne meo djuw mexo ban kute me kanga kêtumrêx. Ê, gwaj ba ne gwaj babê ta õ me ja. Nhym Metīndjwýnh arým gwaj bamã mýjja mex dji. Gwaj batĩn prãm kêt ne baje amim kamnhĩxbê mýjja mexja kam amak ne kam bakĩnh rã'ã jabejmã. Dja gwaj o anhỹro bamõr ne inomã mênh jabej babê ta õ me ja.

*Me amakkre kêt ne ar ba nêje memã kabên.*

*Kõ k 10.1; Djuda 5*

<sup>7-8</sup> Kam ne Metīndjwýnh Karõ memã kum,

“On me akati jakam on aje Metīndjwýnh kabên mar jabej gê on wãm ajamakkre kêt on wãm nõ.

Amrêbê ne me akukãmãre amakkre kêtumrêx ne kapõt kukritkam jãm Metīndjwýnh akêx ne 'ã kabên ne. Me kute ngryk jabejmã ne me,

‘Kati, Metīndjwýnh dja me bajo bikênh kêt. Dja gu me te kam amikrà ar o baba nhym me bajo bikênh kêt. Kute me bajo krakam dja tu ate krã’, ã ar anhỹr ba.

Nãm me ã me kute Metīndjwýnh ngryk jabejmã ã ane.”

Nãm ã Metīndjwýnh ane ne kam ajte memã kum,

<sup>9</sup> “Nà, wãnh ne me akukãmãre kute amim ikakinhmã, kute ingryk jabejmã ar ikam amikrà:õ ba. Nã bãm te me nokam memã mýjja kwýo amirĩt ar o iba nhym

me ãm ate kute we ingryk jabejmã ar we ã anhỹr ba. Me kute we ingryk jabejmã 'ã amexbê 40.

<sup>10</sup> Kam ne ba me jakam ingry:ky ne memã kum,

‘Mrāmri ne me ja ajte ikam amikràn ibê binhirênh mõ. Ne ikabên mar prãm kêtumrêx’, ane.

<sup>11</sup> Kam ne ba ingry:ky ne mrāmri ikabên pydjĩn arê. Nã bãm memã kum,

‘Aj, me ja dja me inhõ pyka'yr bõx kêtumrêx ne ikõt me tyk dja kêt djakam tyk dja kêt kêtumrêx’, ane.”

Nãm ã Metīndjwýnh kabên ane.

<sup>12</sup> Ê, akmere ar, àpnhĩre ar, kam ne ba ar amã, gora ar amijãno dja. Ar akadjwýnhbê ajaxwe 'õ, apunu 'õ ar akam kator ga kam arým ar aje amim Jeju kamnhĩx kêt ne aje Metīndjwýnh tĩnja kanga karõ dja gar mrāmri amijãno dja. <sup>13</sup> Kwãrik wãnh gar amikam ajamak kêt kati kêt. Dja gar akati kunĩkõt abenmã akabên ne o abenmã tỳx jadjã. On akati jakam, Metīndjwýnh kute ar amã,

—On jakam, anhỹr ja ma. Metīndjwýnh kute me amakkre kêtõ tỳm kêtĩ. Gêdja mýjja punu 'êxri kute mex pyrãk ne arým ar anoo akno. Kute ar anoo biknor gar ajamakkre kêt karõ dja gar on abenmã tỳx jadjã.

<sup>14</sup> Gwaj bakunĩ baro'ã babê Kritu nhõ me ja dja gwaj 'ã bangrà tỳx. Amrêbê gwaj baje amim kamnhĩx nyrekam batỳxja dja gwaj o batêm rã'ã o tẽn o tẽn o tẽn inomã kumê. Gwaj gop mrãmri ã o anhỹr jabej kam arým babê Metīndjwýnh nhõ me jakumrêx.

<sup>15</sup> Bir be, on dja gar ã amijo ane. Ga Metīndjwýnh Kabên kute,

“On me akati jakam on aje Metīndjwýnh kabên mar jabej gê on wãm ajamakkre kêt on wãm nõ.

Amrêbê ne me akukâmâre amakkre kêt-kumrêx ne kapôt kukritkam jâm Metîndjwýnho akêx ne 'ã kabên ne", anhÿrja pumû.

<sup>16</sup> Nhÿnh me ja ne me Metîndjwýnh kabên mar kajgon kam jâm o akêx ne? Je kum Môjdjê kute pykabê Edjitu kurûm meo kator ne kute meo baja kunî, me tãm.

<sup>17</sup> Nhym nhÿnh me ja ne Metîndjwýnh mekam ngryk ne? Mekam ngryko tèm râ'ã'ã amex krãptîbê 40? Je kum, me tãm, me kute Metîndjwýnhkam amikrão ba ne kam wãnh kapôt kukritkam apÿnh rôrôk ban wãnh tyko ikwã, me tãm.

<sup>18</sup> Nhym nhÿnh me ja'ã ne Metîndjwýnh memã kabên pydjîn arê ne memã kum,

"Aj, me ja dja me inhô pyka'ÿr bôx kêt-kumrêx ne ikôt me tyk djã kêt djãkam tyk djã kêt kêt-kumrêx", ane.

E kum me tãm, me kute Metîndjwýnh kabên mar kêt ne ar baja, me'ã ne ane. <sup>19</sup> Bir be, ga me kute amim Metîndjwýnh mar prãm kêt-kam 'ÿr bôx kêtja pumû.

## 4

*Metîndjwýnh memã me tyk djã kêt djã jarê.*

<sup>1</sup> Ê, gwaj amijãno dja. Gwaj bajô 'ÿr babôx kêt karô dja gwaj amijãno dja. Metîndjwýnh kute ô pyka'ÿr memã krãn kute memã tyk djã kêt djã jarênhja tãm ne gwaj bamã nôr râ'ãã. Kam dja gwaj amijãno dja, gwaj bajô 'ÿr babôx kêt karô. <sup>2</sup> Ê, 'ã ujarênhja, 'ã ujarênh mexkumrêxja ne arÿm gwaj bawÿrdjwÿ bôx, gwaj arÿm me kudjwa kuma. Me bakukâmâre kumrêx 'ÿr bôx nhym me kuma. Nãm me mar kajgokumrêx ne. Djã nãm me kuman amikajmã'ã tu kamnhÿxkumrêx? Kati, nãm me ãm mar kajgon ate krã. <sup>3</sup> Nhym bep gwaj ba ne gwaj baje tu

amim markumrêx ne baje amijã kamnhÿxkumrêxja, gwaj ba dja gwaj 'ÿr babôxkumrêx ne kam kam batyk djã kêt ne. Nhym bep me amakkre kêt'ã ne Metîndjwýnh memã kum,

"Nã bãm ingy:k ne mrãmri ikabên pydjîn arên memã kum,

'Aj, me kute ikabên mar kêtja dja me inhô pyka'ÿr bôx kêt-kumrêx ne ikôt me tyk djã kêt djãkam tyk djã kêt kêt-kumrêx", ane."

Djãm kam me tyk djã kêt djã kêt got me 'ÿr bôx kêt-mã. Je kum amrêbê ne Metîndjwýnh pyka nhípêxo tèn inomã kumên kam me kukãm tyk djã kêtmo krax ne te memã tyk djã kêt djã jarên te mekam ama. <sup>4</sup> Be, Metîndjwýnh kabênkam ne pi'ók rãrãr'ã memã,

"Nãm pi'ók tyk to ino rerkam ãpênho ino ren kam pi'ók rãrãrkam tyk djã kêtmo nô", ane.

<sup>5</sup> Ne kam ajte me tyk djã kêt djã jarê, ne,

"Aj, me ja dja me inhô pyka'ÿr bôx kêt-kumrêx ne ikôt me tyk djã kêt djãkam tyk djã kêt kêt-kumrêx", ane.

<sup>6</sup> Me bakukâmâre kumrêx kute 'ã ujarênh mar kajgoja me tãm ne me 'ÿr bôx kêt-kumrêx, me kute amim Metîndjwýnh mar kêt-kam. Tãm, me tyk djã kêt djã, ne arek me ja kadjy nôr râ'ã, atemã me ja kadjy nôr râ'ã. <sup>7</sup> Kam ne Metîndjwýnh ajte akati 'ô jarê ne memã,

"Akati jakam on ajamakkre kêt-wã on wãm nô ga me ikabên man kam ikôt atyk djã kêt djã'ÿr bôx."

Nãm amû tûmrãm Dawimã kabên nhym ô'ã memã arê, ajbir ije me amã arênhja tãm, ne memã,

"On me akati jakam on aje Metîndjwýnh kabên mar jabej gê on wãm me ajamakkre kêt on wãm nô", ane.

<sup>8</sup> Bir be, nãm ren Djodjuwe ren me tyk djã kêt djã'ÿr meo bôx nhym

ren Metîndjwýnh ren ajte tûmràm akati 'ò jarènh kêtumrêx, me tyk djà kêt djà kadjy akati 'ò jarènh kêtumrêx.

<sup>9</sup> Nhyr bep kati, 'ýr kute meo bôx kêtumrêx memã nõr rã'ã. Metîndjwýnh nhõ me ja kadjy, kadjy ne nõr rã'ãã, gwaj bamã nõr rã'ãã. Kute pi'òk rãrãrkam Metîndjwýnh kôkam kôto nõr ja pyrãk. Dja gwaj ã kudjwao ane. <sup>10</sup> Kôt dja gwaj badjãpènh jakàn kam Metîndjwýnh kudjwa bakôkam kôto banhikwã. <sup>11</sup> Ajrã, gora gwaj batýx ne kudjwa 'ýr bôx ne kudjwa bakôkam kôto nõ. Gwaj bajõ baje me bakukãmãre'ã amijakren bajamakkre kêt ne arík ar baban 'ýr babôx kêt karõ ne ba ar amã,

—Gora gwaj batýx ne kudjwa 'ýr bôx, ane.

<sup>12</sup> Djãm Metîndjwýnh kabèn kajgo got. Kabèn kute mýjja tîn ne ãdjõnh pyrãk. Dji tînkêt. Dji kute mýjja kyxkêt. Ga mrãmri me kute kãx aktã irêkôt prîne wa ngrãnh nhyr kute mýjja kyx týxja pumũ.

Nãm ã Metîndjwýnh kabèn kute kãx pyrãk ne wa mexo kãx jakrenh mexo ane. Mrãmri me kute kãx djwa mexo mrymã ukabêr ne kute o mry toprik ne kute amũ katãt o 'i jakãr nhyr kre kamrêk ne ikwã nhyr 'i kanhînja amirît mex ne ikwãja pyrãk.

Nãm ã Metîndjwýnh kãx'ã amik-abèn jakreo ane ne kabèno ã gwaj bajo ane. Nãm ta kabèno gwaj bakadjwýnhbê prõt ne gwaj badjumar djã'ã kurèn gwaj bakamũnho ane. Ne kam gwaj banhõkre kadjwýnhbê baje amim mýjja'ã karõja, baje mýjja mar ar o babajao amirît ne mýjja kabi. Gwaj Metîndjwýnh kabèn mar ar o baba nhyr Metîndjwýnh gwaj badjumar djãkam gwaj bamã kabèn ne,

—Mexkumrêx, ikabènkôt ne ga amijo aba, ane.

Nãr kon,

—Ë, nã gãm aje ikabènkôt amijo aba kêt, ane.

Nãm ã Metîndjwýnh Kabèn kute kãx pyrãk ne gwaj bakadjwýnhbê: prõt ane. <sup>13</sup> Bir be, nhýnh ne mýjja 'ò Metîndjwýnhbê apdju? Arkati, kute mýjja nhípèx kunĩ ne amirîtumrêx ne nõ. Irãri kum nõ. Noo kute mýjja kunĩ pytãr. Kumã dja gu me amijarê, kubê mýjja 'ò biknor kêtumrêx.

*Metîndjwýnh mar djwýnh nhõ bñjadjwýr rax'ã ujarènh.*

<sup>14</sup> Ije ar amã arènh ja ma. Ije õbê ar amã Jeju rax'ã idjujarènhja dja ba akubyn ar amã arê. Gora gwaj baje amim Jeju mar ne 'ã ar memã badjujarènh babaja gora gwaj 'ã bangrà týx. Ga gwaj banhõ Metîndjwýnh mar djwýnh nhõ bñjadjwýr ra:xja pumũ. Nãm kãjkwamã wadjãn amũ kajõnhkôt katon kam ýtã Metîndjwýnh'ýr bôx. Kubê ne Jeju. Kubê ne Metîndjwýnh kra.

<sup>15</sup> Gwaj banhõ Metîndjwýnh mar djwýnh nhõ bñjadjwýr rax djukaprikumrêx. Djãm kute gwaj barerek mar kêt got? Kati, nãm te Xatanaj axwe'ã kum apnê nhyr ãm tu ate krã. Gwaj apýnh bajaxwe djãri kute 'ã gwaj bamã ãpnènh, 'ã ne kum apnê nhyr ãm tu ate krãn axwe kêtumrêx ne.

<sup>16</sup> Bir be, gora gwaj amikam bapijãm kêt ne tu Metîndjwýnhmã amijarê. Õdjãnhkumrêx gwaj kam tu kum amijarê. Dja gwaj bakam ukaprikumrêx. Gédja mýjja kute ar gwaj bajo baja, gwaj bajaxwe, gwaj barerek, gwaj bakapri, gwaj batîn prãm kute ar gwaj bajo baja, kam dja gwaj tu bapijãm kêt ne Metîndjwýnhmã amijã ajarê nhyr kam ta ukaprikôt prîne gwaj bajo djuw mexkumrêx ne.

## 5

<sup>1</sup> Ë, Metîndjwýnh kute amim me kadjy Metîndjwýnh mar djwýnh nhõ bñjadjwýr rax, bñjadjwýr



bêngôkre 'ô\* djarmâja pumũ. Kute amim 'ô djar kadjy ne amijo me bajô, me babêngôkre 'ô pytân amim kudja, nhym kam ta, me kadjy Metîndjwýnh mar djwýnh ta ne me ô'ã Metîndjwýnh ma. Nhym me kâtâmja amijaxwe pânih me kadjy Metîndjwýnh mar djwýnhjamã mryo mrân kungã nhym me axwe pânih Metîndjwýnhmã kubô, me ô'ã kubô. Nhym kam Metîndjwýnh me ja jaxweo ajngrân tu o akno. Nãm ã me kadjy Metîndjwýnh mar djwýnh memã Metîndjwýnh maro ane.

<sup>2</sup> Djã nãm me no kêtja, me kute Metîndjwýnhbê ikô màtjamã àkrêmã got? Kati, adjwýnhdjwý axwe prãmkam mekam ukaprîn memã àkrê kêt ne tu memã kabên rerek jarê. <sup>3</sup> Ne ta me kudjwa axwe prãmkam adjwýnhdjwý ta amijaxwe pânih kum mry bô. Djã nãm me ajbit axwe pânih kum mry bô? Kati, ta, adjwýnhdjwý amijaxwe pânih kum mry bô.

<sup>4</sup> Djã nãm me kadjy Metîndjwýnh mar djwýnh nhô bënjadjwýr ta amijã bënjadjwýr rê got, ta o amiptân amijã me kadjy Metîndjwýnh mar djwýnh nhô bënjadjwýr rê got? Kati, Metîndjwýnhbit ne amijo utân amim 'ã bënjadjwýr rê ne amim umjuw. Ga Metîndjwýnh ajbit kute Arão'ã me kadjy Metîndjwýnh mar djwýnh nhô bënjadjwýr mênhja pumũ. Metîndjwýnhbit ne me'ã bënjadjwýr rê.

<sup>5</sup> Bir be, nãm ã Kritudjwý o ane. Ta kute amijo rax ne kute o amiptâr ne amijã me kadjy Metîndjwýnh mar djwýnh nhô bënjadjwýr rax mênh kêtumrêx. Nhym bep kati, Metîndjwýnh ta ne amim kudjan kum, "Mrãmri abê ikrakumrêx. Jakam ne ba arým ajo

ikrakumrêx ga amipânih jio Abãmkumrêx", ane.

Nãm ã Metîndjwýnh nhô pi'ók no'ôkkam ã kum ane. <sup>6</sup> Ne kam ajte kum,

"Abê me kadjy Metîndjwýnh mar djwýnh rã'ã rã'ã rã'ã ne. Merkixatek ne akajmã'ã Metîndjwýnh mar djwýnh.

Ga kam Merkixatek nhijuk'ã gadjwý abê me kadjy Metîndjwýnh mar djwýnh", ane.

<sup>7</sup> Mrãmri ne Jeju me kurãm me kadjy Metîndjwýnh mar djwýnh mexkumrêx. Kute amijo kubêngôkren† pykakam ar bari Metîndjwýnhmã kabên ne amijo a'uw. Kãj bê kum kabên ne amra. Metîndjwýnh pydji kute tykbê utâr kadjy nãrãm kum kabênkam muw. Nhym Metîndjwýnh arým kabên ma, Jeju jaxwe kêt ne kute Metîndjwýnh kabên mar ne kôt ar amijo bakam Metîndjwýnh arým kabên ma.

<sup>8</sup> Be, djã nãm kubê Metîndjwýnh Krakam kute tokrymê kaprî mar kêt got? Kati, nãm te kubê Metîndjwýnh kra, te axwe kêt ne mã tokry man kaprî ma. Nãm tokry katikôt Bãm kabên man kôt ar amijo ba. Te tokryn mã Bãm kabên mar 'ãno dja. Kam ne kute kabênkôt ar amijo baja mar mexkumrêx. <sup>9</sup> Ne kam arým mrãmri tokryo ino re. Tokryo ino ren kam arým kubê me utâr djwýnhkumrêx ne. Me kute Jeju kabên mar ne kute kôt ar amijo ba, me ja ne me utân kam kute ar meo ba rã'ã rã'ã rã'ãmã.

<sup>10</sup> Be, kute me utarkumrêx ne kute meo ba rã'ã rã'ã nhym kam kôt Metîndjwýnh kum,

"Abê me kadjy Metîndjwýnh mar djwýnh nhô bënjadjwýr rax.

\* 5:1 Apýnh me ô pyka djãri kunikôt ne me kunî bêngôkre. † 5:7 Kritu ne amijo kubêngôkre kute mrãmri ne apýnh me ô pyka djãri kunikôt me kunî: bêngôkreja pyrãk. Kubê kã jakamê me kakrãtykmê me babêngôkremê ne me kunî: bêngôkre. Me kamrômê me kukràdjã kunî kubêngôkreoben pyrãk. Jakam dja ga Karô 17.26 jarên ama.

Merkixatek nhijuk'ã gadjwý abê me kadjy Metîndjwýnh mar djwýnh nhô bënjadjwýr rax", ane.

Nãm ã Metîndjwýnh kute amim arkam ã kum ane.

*Me abatành kute me prîre pyràk.  
Kô k 3.1; Ep 4.14*

<sup>11</sup> Nã bãm bit ar ije ar amã Merkixatek jarênhmãn kam ajte akubyn ar amã arênh kêt. Nã bãm ren ar ar amã kunî jarê ga ren ar mar kêtumrêx ne, ar ajamakre kêt kam, ar ajamak'ã tomkam. Dja gar on amijamak'ã tom tan gop mýjja ma. <sup>12</sup> Nã gãm ar amrêbê memã Metîndjwýnh kabên'ã adjujarênhmãn ajte mar kêt ne.

Nhym bep kati, me'õ gêdja akubyn ar amã Metîndjwýnh kukràdjã kraxkôt arê. Nã gãm ar aje me bixadjwýr ny pyràk. Me bixadjwýr ny ne me kute kã kaôrbit mar ne kute me ôkumrêx kur kêt. Gar gadjwý aje mýjja mar kêt rã'ãkam aje me bixadjwýr ny pyràk. <sup>13</sup> Ar aje mýjja mar kêt kam aje me prîre pyràk. Ar aje kã kaôr rã'ã. Nhym bê ne ga gop ar ajabatànhkam aje gop mýjja mar. Ar aje Metîndjwýnh kabên katàtja o amiprãk kêt rã'ã.

<sup>14</sup> Bep ate ne me abatành. Me abatành ne me kute me ôkumrêx kur. Nã gãm ar ren Metîndjwýnh kabên maro tèn ren o amiprãk ne ren arek maro tèn o tèn o tèn ren marja amũ o abikamênho tèn kam ren aje me abatành pyrãk ne kam ren prîne ren mýjja kabi, prîne mýjja punumê mýjja mexmê prîne ren kabin mýjja man kam ren aje me abatành pyrãk.

## 6

<sup>1-3</sup> Gwaj Kritukôt babikamênhmo kraxkam arým Kritu kukràdjã kwý ma. Nãm me Kritu kukràdjã kraxbit gwaj bamã arê gwaj kuma. Mýj kukràdjã krax ne gwaj arým kuma?

Me batyk kadjy bamã bajaxwe kînhja wãnh kum banhîrer ne kam baje amikajmãtã Metîndjwýnh mar ja. Nhym ajte me kute ngômã me bajangjênh'ã ujarênhjadjwý. Ne kam ajte me kute Metîndjwýnhmã me bapymjýr gu me kum badjãpênh kadjy me kute me bajã ikra jadjwýr ja. Ne kam ajte me batyk ne akubyn batîn ne bakator nhym Metîndjwýnh kute me bamã bajaxwe pãnh jarênhmã ne kute me jamã me tîn rã'ã rã'ãmã arênh ne ate me jamã me biknor rã'ã rã'ã jarênh ja. Ja ne mar tùm, kukràdjã krax.

Djãm ajbit ne gwaj baje marmã? Kati, kwý rax ne gwaj baje mar kêt rã'ã. Gwaj on ajte amũ ijukri on mýjja 'ôdjwý man gop amũ maro babikamênho mō. Nã gãm ar te o anen te aje kãjmã mar kamênhmãn kam mã akubyn ama, akubyn kraxbit maro mō.

Nhym bep kati, dja gwaj on amũ ijukri on mýjja 'ôdjwý ma. Gwaj baje mýjja marmã ne Metîndjwýnh amim gwaj bajã karō, gwaj on kuma, kute gwaj bamã no mex jadjãr jabej dja gwaj on ã o ane.

*Me kute Metîndjwýnhbê amijo akêx karō memã kabên.*

*Idja 10.26*

<sup>4</sup> Nhym bep ate ne me kute Jeju kangaja. Tō mã dja me me on akubyn Metîndjwýnh'yr meo akêxmã? Kati, gêdja me te meo ane. Arým ne Metîndjwýnh me ja no bônh pydji nhym me arým amim kuma. Jeju kute me utãrmã kãjkwa kurũm bôxja ne me arým amim kuma. Nhym Metîndjwýnh ta memã Karōja ngrã nhym meo ba. <sup>5</sup> Nhym me kam arým mrãmri Metîndjwýnh Kabên mexkumrêxmã kato. Ne arým amim mýjja puma kwý pumũ. Jeju akati 'ôkam akubyn bôx ne kute meo ba kajmã'ã mýjja pumaja kwý

pumû. Omûnh kajgon kam ate amibê kanga, amibê kurê ar o ba.

<sup>6</sup> Be, me ja, me kute bit amim Jeju marmân ajte jam kute kubê amijo akêx ne kangaja, djâm me kute akubyn Metîndjwýnh'ÿr meo akêxmâ? Arkati, gêdja me te meo ane, dja me te akubyn 'ÿr kute meo akêxmâ te meo ane. Mÿkam? Bir, me kute Jeju kangaja ne me o ajkê. Nâm kute mrâmri ne me kute Metîndjwýnh krao bikênh ne kute akubyn pîte'y'â nhôrkam o bikênhja pyrâk. Nhyam kam me kâtâm Jeju japyô kumex.

<sup>7</sup> Ê, gop ar pyka mexja pumû. Na ne pyka jakam bixadjwÿr krâptî ne kam amû pyka ja mâ prôt ne. Nhyam me kam kam mÿjja kren prîne 'â karên o djuw mex nhyam kam ingrôt ne abatânh. Ô wýnh kute krên ne tÿxmâ ne ingrôt ne ôn kumex. Pyka mex ne ja. Pyka mex ja ne Metîndjwýnh arÿm kum kînh ne ôkre kadjwýnhbê amim,

—Pyka ja ne mexkumrêx. Ba kum kînh jadjâ ne kum djwÿ jarê gê mâ arek kam djwÿ nhingrôt ne ôn kumex, ane.

<sup>8</sup> Nhyam bep ate ne pyka punu. Nâm te na axidjuw nhyam me te karê nhyam mâ mrÿnhîmê mjêxêtte nhîbit apôx ne kumex. Pyka kajgo mexi. Me te kam mÿjja nhingrôt jabej, djwÿ nhingrôt jabej ne kam ôkre kadjwýnhbê amim,

—Axuk wânh nôre. Ba tu kanga gê wânh nôre. Mÿj kadjy dja ba prîne karên 'âno dja? Gê me'ô tu kum adjâ gê prîne xêt. Kê, ane.

Dja â Metîndjwýnh me kute akubyn kubê akêxjamâ anen kuwyo imôkam me kurê.

<sup>9</sup> E kum ar ga, akmere ar, àpnhîre ar, ar imâ ar akînhja, djâm ar amâ ne bar ikabên ja jarêno iba? Kati, arÿm ne bar ar amexkôt ar ama. Ar ga ne gar tu amim Jeju markumrêx nhyam arÿm ar apytâ. Ga kam ar aje pyka mexja pyrâk.

<sup>10</sup> Djâm Metîndjwýnh punu got. Djâm kute ar amar kêt got. Kati, dja katât ar adjâpênh man o biknor kêt ne. Nâ gâm ar amâ Metîndjwýnh kînhkumrêx ne kam ô'â ô me mex jadjwÿo djuw mex ar o aba. Ne arek ar o aba râ'â ne. Kam dja Metîndjwýnhdjwÿ ar amar râ'â ne.

<sup>11</sup> Bir be, gora ar 'âno dja. Nâ bâm ar inhôkre kadjwýnhbê,

—Gora gê ar î pÿnhkôt kum Jejuwâ kînh ne kam kînh râ'â râ'ân kôt ar amijo ban inomâ kumê, ane.

Nâ, dja gar â anen inomâ amên kam arÿm 'ÿr bôx. Ar aje amim kam amakja ne aje amim kamnhîxja arÿm 'ÿr bôx.

<sup>12</sup> Nâ, gora ar amâ adjukanga kêt ne 'âno djan inomâ amên kam 'ÿr bôx. Kwârîk wânh ar amâ adjukanga kêt. Ê, me kute amim Jeju mar ne kute akrânâmâ arek amiwÿr kam amakja, me tâmbit dja me 'ÿr bôx. Mÿjja mex, Metîndjwýnh kute 'â memâ katât kabên pydjîn arênhja'ÿr dja me bôx. Bir be, gora on ar ja'â amijakren me kudjwa mÿjja ja kunî 'ÿr bôx.

*Metîndjwýnh kute Abraômâ tâmdjwÿ jarênh mâmdji.*

<sup>13-16</sup> Ar me bakukâmârebê Abraôja pumû. Amrêbê Metîndjwýnh Abraômâ kabên pydjîn arê. Nâm kum,

“Ê, mrâmri dja ba ajo kînh ne amâ atâmdjwÿ krâptî ngâ nhyam aptân kumex.

Ba ibê Metîndjwýnh ne ba amâ ikabên. Mrâmri ne ikabênja”, ane.

Be, Metîndjwýnh kute Abraômâ kabên pydjîn arênh ne ja. Nâm Abraô akrânâmâ arek amiwÿr kam aman kam 'ÿr bôx. Metîndjwýnh kute kum kabên pydjîn arênhja'ÿr bôx ne arÿm kran arÿm tâmdjwÿ.

Me babêngôkre baje memâ bakabên pÿnh ne arênh kadjy ne atemâ me'ô'ÿr mrâ. Me'ô kute raxo me bajakrenh ne kute me bakabên

marmã 'ÿr tēn kum arē, kute ad-  
jw̄nyndjw̄y me bakabēn mar ne  
kute ar o bamã. Gu me kum  
bajêx karô, kum bajêx nhym kute o  
ngrykmã ajte atemã me'ô'ÿr mrân  
kum me bakabēn ja jarē.

Nhym bep Metîndjw̄nyh  
kute Abraômã kabēn pydjîn  
arēnhkam nh̄nyh ne atemã me'ô  
Metîndjw̄nyh kurãm rax got kute  
adjw̄nyndjw̄y kabēn marmã? Kati,  
Metîndjw̄nyhbê kumkati pydjii.  
Kam ne ta tu aminhidji jarēn  
Abraômã kabēn pydjîn arēn kum,  
“Ē, mrāmri dja ba ajo kīnh ne  
amã atãmdjw̄y krãptī ngã  
nhym aptãn kumex. Ba  
ibê Metîndjw̄nyh ne ba amã  
ikabēn. Mrāmri ne ikabēnja”,  
ane.

<sup>17</sup> Nãm kabēn pydjîn arēn kam  
ta aminhidji jarē. Nãm ar̄ym 'ã  
amim karôn kôt kabēn pydjîn arē.  
Nãm akubyn atemã kabēn 'ô jarēnh  
kêtkumrêx. Nãm ta ar̄ym amim pry  
pydji jarē. Ne kam me kute pr̄ine  
amim mar t̄yxmã, Metîndjw̄nyh  
kute memã kabēn pydji jarēnh  
nhym me kute amim mar t̄yxjamã  
ne kabēn pydjîn arēn kam ta memã  
aminhidji jarē.

<sup>18</sup> Bir be, kumrêx ne kabēn pyd-  
jin arēn kam adjw̄nyndjw̄y ta amin-  
hidji jarēn memã,

—Ba ibê Metîndjw̄nyh dja ba ajo  
kīnh, ane.

Dja akubyn atemã kabēn 'ô  
jarēnh kêtkumrêx ne. Dja 'êxnhī  
kêtkumrêx. Djãm Metîndjw̄nyh  
kabēnkam 'êxnhīn kute akubyn  
memã kabēn 'ô jarēnhmã got.  
Arkati. Kam dja gar ja man kam  
ajte at̄yxkumrêx, ajte akīnhkumrêx.  
At̄yx ne tu amim kamnh̄ixkumrêx  
ne mã kam ama. Metîndjw̄nyh ar̄ym  
gwaj bakukãm gwaj bamã m̄yja  
mex jarē gwaj mã kam ama. Kute  
gwaj bapytãrmã ne gwaj ar̄ym 'ÿr  
baprôt nhym ar̄ym gwaj bapytãn  
gwaj bamã m̄yja mex jarē, kãjkwa  
jarē.

<sup>19</sup> Gora gwaj kam bat̄yx ne tu  
amim kamnh̄ixkumrêx ne mã kam  
ama. Mrāmri dja gwaj 'ÿr bôx. Kam  
ne gwaj bakadjw̄nyhbê badjumar  
mex ne baku'ê t̄yx ne. Mrāmri ne  
me kute ngômã kēn rēnh nhym kã  
arek arij t̄yx nhym ngô kute o ba  
kêt ja pyrãk. Dja gwaj ã bakad-  
jw̄nyhbê badjumar mex ne bat̄yx  
ane. Gwaj baje amim Metîndjw̄nyh  
kabēn kamnh̄ix ar o babakam dja  
gwaj ã bakadjw̄nyhbê badjumar  
mex ne bat̄yx ane.

Metîndjw̄nyh nhô kikreti ja ma.  
Kadjw̄nyhbê Metîndjw̄nyh nhô  
m̄yja nêje kubêkati wajêt. Nhym  
me kady Metîndjw̄nyh mar djw̄nyh  
nhô bēnjadjw̄yr raxbit 'ÿr ngjēnh.

<sup>20</sup> Nhym bep Jeju ne ta kãjkwakam  
ûrkwãti djw̄nyhjamã wadjã. Me  
bakukãm ne 'ÿr wabin kum  
wadjã. Kute me banhirãr ne me  
bajo djuw mex ne me bakadjy  
Metîndjw̄nyhmã kabēnmã. Dji  
kubê Metîndjw̄nyh mar djw̄nyh  
djw̄nyhkêt. Kubê Metîndjw̄nyh  
mar djw̄nyh nhô bēnjadjw̄yr rax  
dja rã'ã rã'ã ne. Merkixatek  
ne kajmã'ã Metîndjw̄nyh mar  
djw̄nyh nhym kam Jeju ijuk'ã kubê  
Metîndjw̄nyh mar djw̄nyh ne me  
bakadjy Metîndjw̄nyhmã kabēn ne.

## 7

*Jeju kute raxo Merkixatek  
jakrenh.*

<sup>1-3</sup> Be, m̄yj me'ôbê ne Merkix-  
atekja? Nãm kr̄ibê Xarêkam me  
ja nhô bēnjadjw̄yr ne adjw̄nyndjw̄y  
kubê Metîndjw̄nyh pymao kubê  
kumkati mar djw̄nyh. Idji kutewa  
ne katãt me mrãnh nhô bēnjadjw̄yr,  
Merkixatek. Idji jatãri jadjw̄y ne  
me umar mex nhô bēnjadjw̄yr. Kr̄i  
nhidjibê ne Xarê. Me umar mex ne  
ar bakam ne me tu 'ã kum idji. Me ô  
bēnjadjw̄yrjamã, Merkixatekmã ne  
me me umar mex nhô bēnjadjw̄yr  
ane.

Ije nhym mã ne bãmme nã ar  
kute? Kati, e kum bep me kute

bāmmē nā noo ar omūnh kêtukmrêx ne me kute ar arênh kêtê. Kon ne. Ingêtmê kwatynhmê me kute omūnh kêt mexi. Me kute rwýkkôt mar kêt, nā 'ô kurūm rwýkkôt mar kêt ne ajte kute tyk djā kôt mar kêtukmrêx. Nām tu nhī'anh tē. Kute Metīndjwýnh Kra pyrāk ne me kadjy Metīndjwýnh mar djwýnh rā'ā rā'ā ne.

Be, ta ne Abraão kutā tēn kajpan kum kabēn jarēnho kīnhkumrêx ne. Abraão arým mýj bēnjadjwýrja ar'ýr prôt ne ar kubīn kam akubyn tē nhym Merkixatek kutā tēn kajpan o kīnh ne.

Nhym kam kum mýjja kwýo ajkij. Kute mýjja kwýo mōrjao ajkij nhym mā o mō. Abraão ô mýjja kunī kryre ne kurēn aben kadjy kum kungā. Merkixatekmā apýnh aben kadjy o pōxo tēn kum kungā nhym abenā rēnhkam arým rax nhym kam mā o mō.

<sup>4</sup> Bir be, me Merkixatek raxja pumū. Te Abraão bēnjadjwýr rax ne kute nēkrêx pytārja tu kute kum kwý o bikjêrja pumū. Djām Merkixatek ngri got.

<sup>5</sup> Atūmā ne mekbê Rewi me ô mýjja jamýnho ba. Mōj djê ne kukrādjakôt mekbê idjaermā kum,

—Gora me amū anhō mýjja wā kwýo ajkjên amū mekbê Rewibê me kadjy Metīndjwýnh mar djwýnhmā angā, amū amikutā memā kwý ngā gē me ta ô nēkrêxkôt amim amý, ane. Nhym me kam ā anen ô mýjja kwýo ajkijn kam amū amikutā mekbê Rewimā ôro tē, me ta ô krôkam me jamā kungā nhym me amim amý. Amē kubê Abraão tām djwý nhym mekbê Rewi kute amim amýnhja tām ne kubê ô nēkrêx.

<sup>6</sup> Nhym bep atemā ne Merkixatek. Mekbê Rewi 'ô kêtê. Nām te kubê mekbê Rewi kêt ne kam tu Abraãobê nēkrêx kwýo ajkijn kum kīnh jadjā. Metīndjwýnh arým Abraãomā kabēn pydjīn arēn kum mýjja mex jarē nhym Merkixatek

arým kuman kam kôt Abraãoo kīnh ne. <sup>7</sup> Be, mrāmri ne me'ô kute meo kīnhja ne raxo tāmja jakre. Me rūnh ne me meo kīnh.

Kam ne ba ar amā,

—Me Merkixatek raxja pumū.

<sup>8</sup> Mekbê Rewibê Metīndjwýnh mar djwýnh ne me ô nēkrêxo ba. O ban kêt nhym me pānh kamingrāny amū ijuk'ā ajte Metīndjwýnhmā àpēnh ba nhym me ajte memā ôro ba. Nhym bep Merkixatek pydji ne tīn rā'ā rā'ā ne kubê ô mýjja mō. Ga me Metīndjwýnh nhō pi'ôk no'ôkkam Merkixatek'ā kute tīn rā'ā: rā'ā, anhýrja pumū. Be, Merkixatek raxja pumū.

<sup>9-10</sup> Nhym kam Merkixatek Abraão kutā tēn kajpa nhym kum ô mýjja kwýo ajkij nhym mā o mō. Nhym kam Rewidjwý kute kum ôr pyrāk. Rewibê ne Abraão tām djwý. Rewi ne ingêt kukāmārebê Abraão ngrekam nōr rā'ā, kraxje kadjy kute Rewi bām djir kêt, ngrekam nōr rā'ākam ne Abraão Merkixatekmā ô mýjja kwýo ajkij. Nhym kam Rewidjwý kute kum ôr pyrāk. Nhym kam amū atūmā Rewi wajēt ne ruw ne kam amū abatānh nhym kam tām djwý amim mýjja jamýnho ba, ô nēkrêxkôt me ô mýjja jamýnho ba. Nhym bep Merkixatek mekbê Rewi kajmā'ā nēkrêxo mō, Abraão nhō mýjjao mō.

<sup>11</sup> Arão kôpdji'ā mekbê Rewibê me kadjy Metīndjwýnh mar djwýnhja ne memā Mōj djê kukrādja jarēnho tē. Arão ne kubê me kadjy Metīndjwýnh mar djwýnho kutewa nhym kam tām djwý mekbê Rewija amū aben nhijuk'ā kubê Metīndjwýnh mar djwýnh ne Arão kôpdji'ā memā Mōj djê kukrādja jarēn me kadjy Metīndjwýnh ma. Nhym me te: kôt kute amijo ba mexmā. Nhym kam atemā me kadjy Metīndjwýnh mar djwýnh 'ô ne kato. Atemā. Arão kôt kêtê. Merkixatekkôt ne kato. Nām ren

me mekbê Rewikôt mex nhyr ren atemã ny 'ô kator kêtumrêx ne. Nãm me te: amimex ne te: axwe kêt nhyr kam kadjy nyja kato.

<sup>12</sup> Bir be, atemã ne me kadjy Metîndjwýnh mar djwýnh ny 'ô kato nhyr kukràdjâdjwý ne kôt atemã. <sup>13</sup> Gwaj banhô Bênjadjwýr'ã ne id-jujarênhja. Â mûm me ja kurûm ne kato. Âm atemã. Djãm me ja 'ô kubê me kadjy Metîndjwýnh mar djwýnh got? Ne kute Metîndjwýnh nhô ngônho ki'ã kum mry bôr got. Arkati.

<sup>14</sup> Mekbê Djuda kurûm ne kato. Me ja, mekbê Djuda ne me Metîndjwýnhmã âpênh kêtumrêx. Nhyr me kunî arým kôt omû. Djã nãm Môjdjê me jamã kum,

—Me ga dja ga me abê me kadjy Metîndjwýnh mar djwýnh, ane got? Kati, mekbê Rewimãbit ne arê.

<sup>15</sup> Be, arým kute amirît têmja pumû. Atemã me kadjy Metîndjwýnh mar djwýnh 'ô ne kato. Mekbê Rewi kurûm kator kêtê. Ne kam kute Merkixatek pyràk. <sup>16</sup> Mýjkôt ne kubê me kadjy Metîndjwýnh mar djwýnh? Djã nãm mebêngôkre ta Môjdjê kukràdjâkôt kute amû aben nhijuk'ã abenmã rero tèn kam Jeju'ýr bôx ne kum kure nhyr kam arým kubê me kadjy Metîndjwýnh mar djwýnh? Djãm mekbê Rewi 'ô? Kati. Bir, mýjkôt? Mýjja týxkumrêx kôt. Ta tu tîn rá'ã:n kute tîn o ino rer kêtumrêx. Kam ne Metîndjwýnh 'ã me kadjy Metîndjwýnh mar djwýnh nhô bênjadjwýr mê. <sup>17</sup> Metîndjwýnh nhô pi'ók no'ókam kute,

“Abê me kadjy Metîndjwýnh mar djwýnh rá'ã rá'ã rá'ã ne. Merkixatek ne akajmã'ã Metîndjwýnh mar djwýnh.

Ga kam Merkixatek nhijuk'ã gadjwý abê me kadjy Metîndjwýnh mar djwýnh”, anhýrja pumû.

<sup>18</sup> Be, Môjdjê kukràdjâ tûmkôt mekbê Rewi kute aben nhijuk'ã

abenmã Metîndjwýnh mar djwýnh rerja ne arým tûm ne wãnh nõ. Arým kajgo mexi. Kute me utâr kêt. Kam ne Metîndjwýnh wãnh kudji nhyr nõ.

<sup>19</sup> Môjdjê kukràdjâ kute mýjja mex kêt. Nãm me te: kute kôt amijo ba ne te: kôt kute amijo mexmã. Nhyr bep ajbir ne Metîndjwýnh me bawýr mýjja mex jano, Jeju jano. Tãm ne gwaj kamnhîxbê ar baban kôt Metîndjwýnh'ýr bôx. Nhyr prîne raxo, mexo Môjdjê kukràdjâ tûm jakre. Kôtbit ne gwaj Metîndjwýnh'ýr bôx.

<sup>20-21</sup> Be, gwaj banhô Metîndjwýnh mar djwýnh ny, mextireja pumû. Kumã ne Metîndjwýnh kabên pydjîn arê. Bep me ja, me kadjy Metîndjwýnh mar djwýnh tûmja ne Metîndjwýnh amim me umjýr kajgon kute memã kabên pýnh jarênh kêt. Nhyr bep ate ne Jeju. Metîndjwýnh kute amim arkam kum kabên pydjîn arên kum,

“Ba ibê Bênjadjwýr ne ba arým amã ikabên pydjîn arê. Dja ba atemã ikabên 'ô jarênh kêt.

Ga dja ga abê me kadjy Metîndjwýnh mar djwýnh rá'ã: rá'ã ne”, ane.

<sup>22</sup> Be, Jeju kukràdjâ nyja mexo kute tûm jakrenh mexi. Nhyr Metîndjwýnh kute kukràdjâ nykôt me bamã mýjja mex jarênhja dja mrãmri me bawýr bôx. Jeju ta dja Metîndjwýnh kabênkôt mýjja mex nêje omûnh 'ãno djan me bamã kungã.

<sup>23</sup> Nã, Jeju mexo kute me kadjy Metîndjwýnh mar djwýnh tûm jakrenhja pumû.

Ë, mýjja 'ôdjwý. Me ja ne me krãptî. Nãm me aben nhijuk'ã tyk tẽ. Te kute âpênh 'ãno ãm rá'ãmãn mã aben nhijuk'ã kubêngêtte ne tyk tẽ.

<sup>24</sup> Nhyr bep Jeju pydji ne mã: tîn rá'ã rá'ãn kam mã kubê me kadjy Metîndjwýnh mar djwýnh

râ'â râ'ân atemâ amidjô'â me'ômâ rer kêtumrêx. <sup>25</sup> Ajbit ne tîn râ'â râ'âkam arek Metîndjwýnhmâ me banêje kabên ne me bajo à'wýr ar ba 'ano dja. Nâm me bapytàn ar me bajo ba. Nhýnh me baja? Bir me baje tu amim Jeju kamnhîxkôt baje Metîndjwýnh'ýr amijo akêxja, me batâm ne ar me bapytàn me bajo ba. Gêdjâm ar me bajo ba râ'â ne. Gêdja me bapytâr râ'â: ne, râ'â râ'â.

<sup>26</sup> Bir be, me kadjy Metîndjwýnh mar djwýnh nhõ bēnjadjwýr rax ã kute anhýr ne gwaj bamānhkutā. Nām mexo uma. Kute axwe 'õ mar kêtumrêx. Punu 'õ kam nōr kêtumrêx. Nām mūm mexo amiptā nhym ate me axwe wānh ar ba nhym Metîndjwýnh o rax ne kàjkwamā amiwýr o wabin kàjkwā nhiby ýr nhym kam ar ro'ā ar ba.

<sup>27</sup> Nà, atemā. Kute me kadjy Metîndjwýnh mar djwýnh nhõ bēnjadjwýr tūmjā pyrāk kêt. Djām kute Metîndjwýnh mar djwýnh nhõ bēnjadjwýr tūm kudjwa myt kunīkôt ta amijaxwe pānh Metîndjwýnhmā mry par ne bōr ne ōr got. Me tām ne me kumrêx amijaxwe pānh kum mry pan kubôn kungān kam atāri me kunī jaxwe pānh kum mry pan kubôn kungā. Djā nām ã Jeju me kudjwa ane got? Arkati, nām ta Metîndjwýnhmā me axwe pānh tyk pydji. Nām me axwe pānh Metîndjwýnhmā amikanga pydji nhym tūmrām dja ajte memā tyk kêt ne.

<sup>28</sup> Mōjdjê kukrādjakôt ne me axwe prām nhym me amim me umjuw. Nhym bep tūmrām, Mōjdjê kukrādja arým tūmkam ne Metîndjwýnh amim krao katon amim kudja. Nhym kam prīne Metîndjwýnh kabēnkôt amijo ba. Axwe prām kêtumrêx. Dja amū tūmrām axwe 'õ kêtumrêx râ'â râ'â, tām ne amim kudjan kam kum kabēn pydjin arê. Ne kam adjwýnhdjwý aminhidji jarēn kum,

—Ba ne ba amijo apytàn amim adja. Ga abê imar djwýnh nhõ bēnjadjwýr rax, ane. Be, nām ã anen kam amim Kra dja.

## 8

*Me kadjy Metîndjwýnh mar djwýnh nhõ bēnjadjwýr ny ne Jeju.*

<sup>1</sup> Bir be, ije ar amā arēnh ja ma. Arým gwaj banhõ Metîndjwýnh mar djwýnh nhõ bēnjadjwýr rax ã kute anhýrja pumū. Nām kàjkwakam Metîndjwýnhbē kumkati krī djàtikam ubòk'ānh ikò'ā nhý, kubê bēnjadjwýr raxkam ubòk'ānh nhý. <sup>2</sup> Kubê Metîndjwýnh mar djwýnh nhõ bēnjadjwýr ne kam Metîndjwýnh nhūrkwāti kadjwýnhbē kumoka'êkam àpēnh ar ba. Ūrkwāti djwýnhkam àpēnh ar ba. Djām me ikrao ne me kum kikre got? Kati, Bēnjadjwýr djwýnh ta ne amim kikre nhym kàjkwakam dja. Ūrkwā djwýnh ne ja. Nhym kadjwýnhbē kumoka'êkam Metîndjwýnh nhõ mýjja nēje kubèkāti wajêt. Ýr ne arým wadjàn kam kam àpēnh ar ba.

<sup>3</sup> Me kadjy Metîndjwýnh mar djwýnh nhõ bēnjadjwýr rax kunī ne Metîndjwýnhmā mry bōn kum kungān kôt kum kīnh djā ngā. Kadjy ne amim me umjuw. Nhym gwaj banhõ Metîndjwýnh mar djwýnhdjwý mýj ne kum kungā? Kati, ãm ta ne kum amingā.

<sup>4</sup> Nām ren jakam, pyka jakam ar ban ren kubê me kadjy Metîndjwýnh mar djwýnh kêtumrêx ne. Ga me kadjy Metîndjwýnh mar djwýnh kumex ne kute Mōjdjê kukrādjakôt Metîndjwýnhmā kīnh djā nhōr râ'āja pumū. Kam ne ren jakam ar ban ren arým kubê me kadjy Metîndjwýnh mar djwýnh kêt.

<sup>5</sup> Pyka jakam Metîndjwýnh nhõ kikreja ne kàjkwakam ūrkwāti djwýnhja'ā amijakre nhym me kam

kam àpênh ar ba. Ô'ã ne pykabê ò kíkreja. Nãm Môjdjê kute kíkrene nhipêxmã nhyam kam Metîndjwýnh prîne kôt kum 'ã karô, kute kum 'ã karô nhyam kute kôt kum ipêxmã. Kute kâjkwakam ûrkwãti ja'ã akren kute kôt kum ipêxmã ne kum 'ã karôn kum,

“Gora prîne inhûrkwãti djwýnh'ã akren imã ipêx, ane.

Krãnhre'ã ije amã akrejakôt dja ga ipêx”, ane.

Be, mýjja kâjbê mex ne ja. Kâjkwakam ûrkwã djwýnh ne mexkumrêx, nhyam bep ja, pykabê ja ne ô'ã. Ô'ã ne kam kâjbê mex.

Nhyam bep ûrkwã djwýnh ne mrãmri wýnh, mextire. <sup>6</sup> Nhyam àpênhdjwý mextire. Metîndjwýnh ne kum àpênh ny jarê nhyam àpênhja prîne mexo kute me kadjy Metîndjwýnh mar djwýnh tùm djàpênh tùm jakrenh. Nhyam kukràdjã nydjwý prîne mexo kute tùm jakrenh. O ne Jeju Metîndjwýnh'ýr mebêngòkreo bôx. Nhyam Metîndjwýnh me bamã kabên pydjín arên kam me bamã mýjja mex jarê. Mýjja mexja ne mexo tùmja jakrenh mex ne. Kôt kukràdjã nydjwý mexo tùmja jakrenh mex ne.

<sup>7</sup> Nãm ren Môjdjê kukràdjã ajmã kute kêt nhyam ren ajte kukràdjã ny kator kêt kumrêx ne. Nãm ren kutewaja mex nhyam ren ijukri ny 'ò kator kêt kumrêx ne.

<sup>8</sup> Nhyam bep kati, nãm kukràdjã tùmja kute me utâr kêt nhyam kam pãnh Metîndjwýnh kukràdjã ny kute me utârja pãnh o kato. Nãm mekam kính kêt ne memã kum,

“Adjým, amũ akati 'òkam dja ba mekbê idjaer kunimã atemã ikabên ny 'ò jarênh mãmdji, atemã kukràdjã ny 'ò.

Nã, Djuda aben nhjuk'ã tãmdjwýjamã gédja ba atemã kukràdjã ny 'ò jarê. Ba ibê

Bênjadjwýr ne ba me amã ikabên ne.

<sup>9</sup> Ate ne nyja. Ate ne tùm, ije me akukãmãremã arênhja, tãm ne tùm.

Amrêbê ne ba me akukãmãre pa 'ãbyn pykabê Edjitu kurùm meo ikaton kam ar meo iban memã ikukràdjã ja jarê.

Nhyam be nãm me ikabên mar prãm kêt ne arík ar ba. Ba kam amipãnh tu me kanga.

Ibê Bênjadjwýr ne ba me amã ikabên ne.

<sup>10</sup> Bep jakam dja ba mekbê idjaermã ikukràdjã ny jarê. Amũ akati 'òkam dja ba memã ny 'ò jarê.

Ba ibê Bênjadjwýr ne ba me amã ikabên ne.

Me òkre kadjwýnhbê dja ba ikukràdjã jao adjàn me ajamak krekre'ãdjwý pi'òk no'òk ne.

Ne kam meo inhô me jakumrêx nhyam me amipãnh Metîndjwýnh<sup>ho</sup> ipytàn kam amim ijo Metîndjwýnhkumrêx.

<sup>11</sup> Djãm me òbikwamê kute abenmã kum, nâr me kamy kute abenmã kum,

'On amim Bênjadjwýr djwýnh ma', anhýrmã.

Kati, me kunĩ dja arým amim ima. Me kâtãmmê me rûnhmê me kunĩ dja me amim ima.

<sup>12</sup> Ba kam me kute ikam amikràjakam idjukapri ne kam me ikam axweja tu o akno”, ane.

Nãm ã Metîndjwýnh kukràdjã ny'ã ujarênh ane. <sup>13</sup> Kute kukràdjã ny jarênhkam arým òbê jao tùm ne. Be, ga mýjja arým tùm tēm ne arým biknor 'ýrja pumũ.

## 9

*Kute pykakam Metîndjwýnh nhô kíkreti jarênh.*

<sup>1</sup> Amrêbê ne Metîndjwýnh prîne kukràdjã tùmja, kukràdjã kute-waja'ã memã karô, kôt me kute



ar amijo ba ne kum kabên ne kum àpênh kadjy. Nãm me pykabê kum kikren kam kam kum kabêno ku'ê.

<sup>2</sup> Nãm me kubêkâmê mrykâmê pïponho kikren ajkwa krekre'ã kubêkà nhô. Kikrebê kumkati ne ja. Kam ne ngônhpôktimê pïponh ku'ê. Nhyim djwý me kute Metïndjwýnhmã òr ne pïponhkam adjwýrjadjwý ikwã. Apýnh mýjja ku'ê djari ne ja.

<sup>3</sup> Kadjwýnhbê ne kumoka'ê. Nhyim kam nêje kubêkà wajêt. <sup>4</sup> Kam ne kên karýro kikre kudjý djà bôr djâmê kên karýro pïo rara krãkà djyjamê ku'ê. Nhyim kên karýrreo pïo rara krãkà djy kam ne ngôn dja. Kên karýro ngônkhkam djwý nhidjibê “Mýj ne ja” nýt ne dja. Nhyim kam kam Arão nhô kô me aêrbê ingrôt ne ôja nõ. Nhyim kam kamdjwý Metïndjwýnh kute amikabên'ã kên no'òkja amê nõ.

<sup>5</sup> Nhyim kên karýro pïo rara krãkà djyja'ã Metïndjwýnh kadjy mrãnh djwýnh amê ar karô kãjbê prêkja aben kutã dja. Metïndjwýnhbê kumkatiti.; Metïndjwýnh pymati, Metïndjwýnh mexo tukni kadjy mrãnh djwýnh karô nhípêx ja dja. Pïo rara 'ã ijê djà'ã dja. 'Ã ijê djà ja ne me kadjy Metïndjwýnh mar djwýnh nhô bënjadjwýr mry kamrôo kaprêprêk nhyim Metïndjwýnh apýnh me axwe djari tu o akno. Aj, djâm on ije ar amã prïne ja jarênhmã got. Ba ar amã mýjja 'òdjwý jarê.

<sup>6</sup> Be, nãm ã Metïndjwýnh nhô kikrekam apýnh mýjja ku'ê djari ku'ê ane. Nhyim me kadjy Metïndjwýnh mar djwýnh kâtãm myt kunîkôt kikrebê kumkatikam wangij ne kam kam àpênh ar ba.

<sup>7</sup> Nhyim bep me kadjy Metïndjwýnh mar djwýnh nhô bënjadjwýr rax pydji ne kadjwýnhbê kumoka'êjamã wangij. Djãm myt kunîkôt? Arkati, kum ngorekam-bit. Ýr ngjênh nhô akati apôxkambit

ne 'ýr ngjênh pýnh ne. Nhyim ajte kum ngore nhyim ajte 'ýr wadjã. Akati pýnhkambit. Djã nãm ýkam 'ýr wangij? Kati, mry kamrô ne 'ýr o wangijn Metïndjwýnhmã kungã. Ta amijaxwemê me kâtãmja jaxwe pãnh ne kum kungã. Me kute mar kêt ne kute Metïndjwýnhkam amikrão ba pãnh ne me ô'ã o mrãn o wangijn kum kungã.

<sup>8</sup> Jakôt ne Metïndjwýnh Karô memã o amirít, me kute me kâtãm Metïndjwýnh'ýr ngjênh kêt kôt mar kadjy. Metïndjwýnh nhô kikrebê kumkati ãm rá'ã nhyim me kute kukràdjã tùmjao ba rá'ari ne me kâtãmja Metïndjwýnh'ýr ngjênh kêtumrêx, kumoka'êjamã ngjênh kêtumrêx. Me kâtãmja kraxje 'ýr ngjênh kêt.

<sup>9</sup> Be, pykabê Metïndjwýnh nhô kikremê kôt kukràdjã tùmja ne Kritu kukràdjã djwýnh'ã amijakre nhyim me Kritu kajmã'ã ar o ba. Kukràdjã tùmja ne me ì krãkãbito mex. Nãm me kukràdjã tùm kôt te Metïndjwýnhmã mry bôn kum kungãn te kum kïnh djã ngãn mã amikam kute axwe mar rá'ã. Me kute kum mry nhôr djwýnhja te kum mry bôn kum kungãn kadjwýnhbê mex kêt rá'ã ne. <sup>10</sup> Kukràdjã tùm kôt ne me me ò kwý krên djâmê mýjjao kôm djà'ã memã karôn mekbê uma. Ne kam ajte me kute apýnh amiku'õnh djari memã 'ã karô, me kute kôt amijo bamã. Apýnh kukràdjã ja ne me ì krãkãbito mex. Metïndjwýnh kute mýjja kunîo ny kajmã'ã ne memã kukràdjã tùmja'ã karô nhyim me ar o ba.

*Kritu kamrô'ã ujarênh.*

*Xim k 2.5; Idja 8.6, 12.24*

<sup>11</sup> Nhyim arým Kritu bôx ne arým kukràdjã ny, kukràdjã mexo kato. Ne kute kukràdjã nyo kator kadjy kubê me kadjy Metïndjwýnh mar djwýnh nhô bënjadjwýr rax ne arým Metïndjwýnh nhürkwã

djwýnhmã wadjã. Metîndjwýnh nhûrkwãti prîne kute raxo, mexo pykabê ja jakrenh mexjamã wadjã. Mebêngôkre kute ipêx kêt. Me banhô pykabê mýjja, pî, bô, bànhôr jao kikre nhípêx kêt.

<sup>12</sup> Be, tãm, Metîndjwýnh nhûrkwã djwýnhbê kumkatimã wadjãn kam amû kadjwýnhbê kumoka'ê'ýr àr pydji. Djã nãm 'ýr wangij ne akubyn apôx ne 'ýr ngiênh krãpti got? Kati, nãm 'ýr àr pydji. Djãm mokaak kamrô nâr mryti jabatãnh nyre kamrô ne o wadjã, kute Metîndjwýnhmã ôrmã? Arkati, nãm ta amikamrôo wadjã. Ne o me bapytã. Me bapytãrkumrêx. Gu me batîn rã'ã rã'ã ne baje o ino rer kêt kadjy.

<sup>13</sup> Amrêbê kukràdjã tûmkôt ne me mry kamrôo me kamî, me akubyn mex kadjy. Nãm me Metîndjwýnhkam amikrãn kam punu. Nym kam Metîndjwýnh mar djwýnh mryti djûmre kamrômê mokaak kamrôo me kamî. Ne mryti jabatãnh nyre, kaãnhre bîn kum adjãn kam prã byn o me punu kaprêprêk. Nym me kam akubyn mex.

<sup>14</sup> Be, ga mry kamrô kute kãjbê meo mexja pumû. Bep Kritu kamrô ne mrãmri meo mexkumrêx. Metîndjwýnh Karô tîn o ino rer kêtja tãm ne Krituo ban o tÿx nym kam kôt Metîndjwýnhmã amingã. Djãm punu ne me kubî? Kati, nãm mexo mextire, ajmã kute kêt ne ta Metîndjwýnhmã amingãn kam kamrô ajkapî. Ta kamrô ne prîne me bajo mex. Me batyk ne baje Metîndjwýnhmã bakre rax ne nîjar baba kadjy ne gu me bamã bajaxwe kînh ne o baba. Nym kam ta kamrôo prîne me bakadjwýnhbê me bajo mex gu me kam arým bakadjwýnhbê bapijãm kêt ne amikam bajaxwe'ô mar kêt ne Metîndjwýnhmã badjãpênh ar baba, Metîndjwýnh tînjãmã apê.

<sup>15</sup> Kadjy, Kritu kamrô prîne kute me bajo mex gu me Metîndjwýnhmã badjãpênh kadjy ne Kritu kukràdjã nyo kato. Metîndjwýnh kute amiwýr me bajwýr ne kute me bamã kabên pydjín arênh ne kute me bamã mýjja mex jarênh gu me 'ýr babôxmã. Nym me banhô mýjja mexja dja rã'ã rã'ãn o ino rer kêtumrêx. Mrãmri dja Kritu ã memã o ane. Kadjy ne arým me axwe pãnh ty. Me kute kukràdjã tûmja ar o bari ne me Metîndjwýnhkam axwe nym kam arým Jeju amityko o pãnh ne.

<sup>16-17</sup> Bir be, nãm tykkôtbit o pãnh. Nym kam ajte mýjja tykkôtbit ne mýjja amirît. Ga me ôbikwa tyk kutã kute abenmã ô mýjja'ã karôja pumû. Ôbikwaja tyk kutã ôbikwamã ô mýjja'ã karô ne,

—Godja ba ty ga kam inhô mýjja jao mð.

Ne kam kum ô mýjja nhidji jarênh kum,

—Tãm dja ga o tẽ, ane.

Gêdja kute kum 'ã karôja ty nym kam ôbikwaja amû ajte kudjwa ô'ã ar o ba. Me tykkambit ne me ajmãn aben nhô mýjja jamýn mã amû abendjô'ã o ba. Me tîn rã'ãkam ne me kute aben nhô mýjja jamýnh kêt. Me tykkambit ne me kute me ô mýjja kajgo jamýnh. Bir be, me tykkôtbit ne mýjja amirît. Nym kukràdjã tûmjadjwý ajte tãm ne.

<sup>18</sup> Nãm me kute kukràdjã tûm kutewaja o bao kurê'ukmã ne Môjdjê mry kamrôo me kamî. Mýjja tyk ne kamrô bikapînkôtbit ne mýjjao mex djã.

<sup>19</sup> Nãm Môjdjê memã Metîndjwýnh kabên kukràdjã kunî'ã ujarênh kumrêx arê. Metîndjwýnh kute mekbê mýjja pymaja memã arênh o djan memã kunî jarênh pan kam mry kamrô by, mryti jabatãnh nyremê mokaak kamrô run kam iby ngô run kam pi'ô nhikwýr ne kadjãt kamrêk jakritare jao krax

'äpren kam pi'ôja mry kamrômã adjän kam o me kaprêprêk. Metîndjwýnh kabên kukràdjà'ã pi'ök no'ôkja kumrêx ne kamîn kam mebêngôkrejadjwý kamî. <sup>20</sup> Me kamîn kam mekmã kum,

“Be, Metîndjwýnh kute me amã amikukràdjà jarênh mãmджи ga me aje kôt amijo aba kadjy kamrô ne ja. Gora me 'ãno dja”, ane.

<sup>21</sup> Ne kam ajte Metîndjwýnh nhô kikre kamî. Nãm kapôtã kukràdjàja kumrêx kamîn kam kikre kad-jwýnhbêja'ÿr o wadjän kam ad-jwýnhdjwý o kamî, kukràdjàja kunî kamî. <sup>22</sup> Bir be, Môjdjê kukràdjàkôt ne me mry kamrôobit mýjjao mexo ba. Kamrô kapînkôtbit ne apýnh me axweo djari Metîndjwýnh tu me axweo aknon mar kêt-kumrêx ne.

<sup>23</sup> Bir be, pykabê Metîndjwýnh nhô kikremê õ kikrekam kukràdjàja ne kàjkwakam mýjja djwýnh'ã amijakre. Kam ne Môjdjê mry kamrôobit ã mýjjao mexo ane. Nhyr bep kàjkwakam mýjja djwý:nh kadjy ne me mýjja mexbit kum kubîn kungã. Kàjkwakam mýjja djwýnhja kadjy ne me mýjja mexbit kum kubîn kungã. Mýjja mexo kute pykabê mýjja ja jakrenh. Mýj ne mex nhyr me Metîndjwýnhmã kubîn kungã? Je kum Jeju. Jejubit ne mexkumrêx ne kam Metîndjwýnhmã amingã nhyr me kubî.

<sup>24</sup> Djã nãm me Metîndjwýnhmã kikre nhyr kam Kritu kadjwýnhbê kumoka'êja'ÿr wadjà? Kàjkwakam õ kikre djwýnhja'ã kute amijakre djãm kumã ne wadjà? Kati, nãm tu kàjkwamã wadjà. Kum wadjän arým Metîndjwýnh kabem djan kum me bajarêno djan me banêje kukrào dja.

<sup>25</sup> Djã nãm Metîndjwýnhmã aminhôr krãptî? Kute pykabê Metîndjwýnh mar djwýnh nhô bënjadjwýr rax kikremã ngjêx krãptîja pyrãk? Kum ngore

kunîkôt kute mry kamrôbito mrãnh ne Metîndjwýnh nhô kikre kad-jwýnhbê kumoka'êmã o ngjêxja pyrãk? <sup>26</sup> Arkati, nãm ren kum aminhôr krãptî ren arým tokry krãptî. Ren pyka nhipêx totokbê ren arým apýnh tokry krãptî. Bep kati, arým pyka kute o ino rerkam arým kator ne kute mekbê axweo apêxmã kute Metîndjwýnhmã aminhôr mãmджи.

<sup>27</sup> Ga Metîndjwýnh kute me kunî'ã amim karôja pumû. Me kunî dja me tyk pydji nhyr ijukri dja Metîndjwýnh memã axwe pãnh jarê.

<sup>28</sup> Bir be, nãm ã Kritudjwý tyk pydjio ane. Kute Metîndjwýnhmã aminhôr nhyr me kute bîn mãmджи. Nãm amijã me krãptî jaxwe mên kam me pãnh Metîndjwýnhmã amingã nhyr me kubî. Dja ajte me bawýr kato. Djãm kute axweo pãnhmã? Kati, kute õ me ja pytãr ne kute meo mörmã. Pykabê me kute abej ajkam amakja pytãr ne ar meo bamã dja ajte kato.

## 10

*Kritu pîte'ykam tyk pydji.*

<sup>1</sup> Bir be, Môjdjê kukràdjà ne mýjja nextireja kukãm bôx. Kubê wýnh kêt. Mýjja nextire bôx kêttri ne Metîndjwýnh Môjdjê kukràdjajao kato. Nãm mýjja mex djwýnh'ã amijakre kajgo. Kam kute meo mex kêt. Metîndjwýnh kute me axweo bingrãnh kadjy ne me kum mry pan kubôn kungã. O anhÿro ba tãmtã: ÿ arek amû namê amex kunîkôt o anhÿro tẽ. Nãm me te mry pan kamrô kapîn te kute o amikam axweo apêx ne mexmã te o amijo ane. Me kute Metîndjwýnh'ÿr bikamênh prãmja ne me te amijaxwe kêtã amijo ane. <sup>2</sup> Nãm ren me kute Metîndjwýnhkôt amijo ba prãmja mry kamrôo ren amikam axweo apêx ne ren mrãmri amikam

axwe'õ mar kêt-kumrêx ne ren tu mry par krâta.

<sup>3-4</sup> Nhyim bep kati, nãm me te o amijaxweo ane. Mryti djũmre kamrômê moakaak kamrôo mrãmri me kute amijaxweo apêx kêt. Nãm me te o amijo anen mã axwe. Mry kamrô kute memã axweo apêx kêt. Nãm tu amex kunikôt memã axweo amirito tẽ.

<sup>5-6</sup> Kam ne Kritu pykamã rwỳk kutã Bãmmã kum, “Nã gãm arỳm amã mry kamrô kapĩnmê me kute amã djwỳ nhõrja kĩnh kêt.

Nhyim me kute amijaxweo apêx kadjy nãrãm kute mry par ne rã'ã ngõnho kikam rênh ne kute kum angjênh ne kute amã õrja tãm ne ga arỳm abê kĩnh no kati.

Ne kam aje ijo inhĩmã ijã amim karõ.

<sup>7</sup> Ba kam amã, ‘Metĩndjwỳnh, ota ba dja. Aje amim ijã karõkôt ne ba jãnh dja. Amrêbê anhõ pi'õk no'õkkam aje ijarênhkôt ne ba jãnh dja’, ane.”

Nãm ã Kritu Bãmmã ane. <sup>8</sup> Nãm kum,

“Mry kamrô kapĩnmê me kute amã djwỳ nhõrjamê me kute amim axweo apêx kadjy nãrãm mry par ne kute ngõnho kikam rã'ã rênh ne kute kum angjênh ne kute amã õrja tãm ne ga amã kĩnh kêt ne abê kĩnh no kati”, ane.

Djã nãm me kupa'ã ar o ba? Kati, mrãmri ne Mõjdjê memã kôt 'ã karõ nhyim me kute kôt ar o ban kute Metĩndjwỳnhmã mry par ne kute õro ba. Nhyim Kritu Bãmmã kum, “Ga abê kĩnh no kati”, ane.

<sup>9</sup> Nãm kum kabên ja kumrêx jarên kam atãri kum,

“Metĩndjwỳnh, ota ba dja. Aje amim ijã karõkôt ne ba jãnh dja”, ane.

Bir be, nãm me kute mry par ne kum õrja arỳm o apêx. Kute pãnh nyjao katormã ne arỳm tũmjao

apêx. <sup>10</sup> Metĩndjwỳnh kute 'ã amim karõkôt ne Jeju Kritu tẽn ruwn ta Metĩndjwỳnhmã amidjwỳnh ngã nhyim me kubĩ. Nãm kute kum aminhõrkam me bĩn mãmdji. O ne prĩne me bajo mex, prĩne me bajo mexo mexkumrêx ne.

<sup>11</sup> Me ì pỳnhkôt me kadjy Metĩndjwỳnh mar djwỳnh aben nhijuk'ã myt kunikôt ngõnho ki kabem ku'ên mry kupê. Nãm me kute Metĩndjwỳnhmã mry par ne bõr ne kum õrmã bõro ku'ê. Nhyim akati nhyim tãm ne. Nhyim akati nhyim ajte tãm ne. Nãm memã axweo apêx kêt-kumrêx ne.

<sup>12</sup> Nhyim bep ate ne Kritu Metĩndjwỳnhmã mỳjja pydji ngã. Nãm kum amingã nhyim me bĩn pydji. Nãm amijã me axwe mẽ nhyim me kam bĩn pydji. Nãm me kubĩ nhyim kam tu amijã me axweo apêxkumrêx. Jakôt ne Metĩndjwỳnh djubõk'ãnh nhỹ, kubê bẽnjadjwỳr raxkam ubõk'ãnh nhỹ. <sup>13</sup> Ne kam arek kam amako nhỹ. Metĩndjwỳnh kute kurê djwỳnho bikênh mex nhyim me kam umaje kuka kõnh terteto ku'ên kam tu mỳrbê rõrõk nhyim kute kwỳ o pardjan kwỳ nhimex, ja ne kam amako nhỹ.

<sup>14</sup> Bir be, kute Metĩndjwỳnhmã aminhõr pydjijakôt arỳm mrãmri tu me'ã mex mênhkumrêx nhyim me mrãmri mex rã'ã rã'ã rã'ã. Kute me bajo mex ne kute me bajaxwe kêtõ tẽmja, me bajã ne tu mex mênhkumrêx. <sup>15-16</sup> Nhyim Metĩndjwỳnh Karõdjwỳ kôt arê,

“Bep jakam dja ba memã ikukràdjã ny jarê. Amũ akati 'õkam dja ba memã ny'õ jarênh mãmdji.

Ba ibê Bẽnjadjwỳr ne ba me amã ikabên ne.

Me õkre kadjwỳnhbê dja ba ikukràdjãjao adjãnh kunhõ. Ne me amak krekrekamdjwỳ kunhõ”, ane.

Nãm kabên ja kumrêx jarên kam atãri memã kum,

17 “Apÿnh me ikam ajaxwe djari, me aje ikam amikrà ar o abajad-jwÿ gêdja ba tu mar kràtan o akno.”

18 Bir be, mrāmri ne Metĩndjwÿnh arÿm o akno. Kam ne me kute amijaxwe pānh Metĩndjwÿnhmā mry par ne kum ōrja arÿm apêx. Arÿm kêt. Arÿm Metĩndjwÿnh kute kam me axweja kuñō biknorjakam ajte we amijaxwe pānh mry par ne ar Metĩndjwÿnhmā ōro ba. Kati, arÿm kêt.

*Me kute Kritu mar'ā ukanga kêt mā.*

*Ep 3.11*

19 Ē, akmere ar, àpnhĩre ar, mrāmri dja gwaj tu bapijām kêt ne Metĩndjwÿnh nhō kikre kadjwÿnhbê kumoka'ēmā wangij ne Metĩndjwÿnh 'ÿr bōx ne tu kum amijarē. Mÿjkôt dja gwaj bapijām kêt ne tu 'ÿr wangij? Jejukôt. Gwaj bakadjy tyk ne kamrō bikapĩnkôt dja gwaj bapijām kêt ne Metĩndjwÿnh'ÿr bōx ne tu kum amijarē ne kum bakabēn.

20 Pykabê Metĩndjwÿnh nhō kikre kadjwÿnhbê kumoka'ē nêje, Metĩndjwÿnh krĩ djā nêje ne kubêkāti wajêt nhym me 'ÿr ngjênh kêt kumrêx. Nhym bep ajbir Jeju ne me bakadjy Metĩndjwÿnh'ā kutan 'ÿr pry ny dji. Pry kubê Jeju. Kute Metĩndjwÿnhmā ta aminhōr nhym me kute bĩn nhym ajte tĩnkôt ne gwaj tu Metĩndjwÿnh'ÿr mrān bōx ne wangij ne tu kum bakabēn.

21 Be, gwaj banhō Metĩndjwÿnh mar djwÿnh nhō bēnjadjwÿr raxkumrêx. Nām prĩne Metĩndjwÿnh nhō me jao ban meo djuw mex ar o ba.

22 Gora gwaj kam tu Metĩndjwÿnh'ÿr mrān bōx ne tu kum bakabēn, on batĩnri 'ÿr mrān bōx ne kum bakabēn. Amrêbê ne Mōjdjê Metĩndjwÿnh kukràdjākôt kute meo mex kadjy mry kamrōo me kamĩ nhym me kam akubyn mex ne. Ne

kam ajte me kute amijo mex kadjy ngō mexkambit djuwn o jām amijā ngrā rē. Gwaj baje tu amim Jeju kamnhĩxkam dja gwaj Metĩndjwÿnh kadjy bamex. Jeju ne gwaj bajo mex. Ā gwaj bamex tanhÿrkam dja gwaj Metĩndjwÿnh'ÿr mrān bōx ne tu kum bakabēn, on batĩnri 'ÿr mrān bōx ne kum bakabēn. Kwārĩk wānh gar ajō anhōkre kadjwÿnhbê amim,

—Djām Metĩndjwÿnh imā mex? anhÿr kêt. Dja gwaj tu amim kamnhĩxkumrêx ne katāt bakabēnkam tu 'ÿr mrān kum bakabēn. Pykabê gwaj ar babari dja gwaj ā o ane.

23 Gora gwaj mā 'āno dja. Metĩndjwÿnh kute gwaj bamā mÿjja mex jarēnh gwaj baje tu amiwÿr kamnhĩxbê ar babaja ne gwaj arÿm memā arē nhym me kuma. Gwaj gop mā 'āno djan gop arek amiwÿr kamnhĩxbê ar baba. Kwārĩk wānh gwaj 'ā badjukanga kêt. Metĩndjwÿnh ne arÿm gwaj bamā kabēn pydjın arē. Mrāmri ne kabēnkumrêx. 'Ēxnhĩ kêt kumrêx ne kute gwaj bakanga kêt kumrêx. Kam dja gwaj amiwÿr kamnhĩx tÿxbê ar baba.

24 Gora gwaj aben ma ne amidjwÿnhbit mar kêt. Dja gwaj bamā aben jabēmābit abenmā karō ne ajte bamā mÿjja mexbit kĩnh ne baje o baba'ā abenmā karō.

25 Gora gwaj abeno babikprōnh rā'ā. Nhym bep me kwÿ ne me arÿm kum abeno bikprōnh kanga. Nhym bep kati, gwaj ba dja gwaj o anhÿr kêt kumrêx. Gwaj ba dja gwaj abenmā tÿx jangij, mā Jejukôt gwaj babikamēnh rā'ā kadjy. Metĩndjwÿnh nhō akati arÿm o rām ne ja. Kam gêdja gwaj mā abenmā tÿx jangjênh ar o baba.

26 Me kute me bamā Metĩndjwÿnh kabēn 'ēxnhĩ kêt jarēnhja ne gu me baje amim marmān ate mā bamā bajaxwebit kĩnh ne, nhÿnh ne mÿjja 'ō ajte me bajaxwe pānh tykmā gop

gu me bamã bajaxwebit kînh ne. Arkati, Jeju pydji ne me bajaxwe pân̄h ty. Atemã mỳjja 'õ kêt-kumrêx. Mỳjja 'õ kute me bajaxwe pân̄h tyk ne kute me bamã me bajaxweo bingrân̄h kêt. <sup>27</sup> Nhȳm bep ãm mỳjja ti, mỳjja punuti, mỳjja py-mati: wã pydji ne me jamã nõ. Me kum Metîndjwýnh kurêjamã ne nõ. Memã gêdja axwe pân̄h jarê ne kam kuwy pôktijamã me kurê. Kumã dja me kurê nhȳm me prîne xêr. Me kajmã'ã ne nõ. Kumã dja me kurê. Djãm uma ngri? Gora ar amikam ajkam ama.

<sup>28</sup> Ê, amrêbê me'õ kute Môjdjê kukràdjâkôt amijo ba kêtja nhȳm me'õ axwekôt omũ. Birãm me'õ amãnhkrut nãr kon amãnhkrut ne ikjêkêt me'õ jaxwekôt arým noo omũn arê nhȳm me arým pân̄h kubĩ, kum kaprĩ kêt ne tu kubĩ, axwe pân̄h.

<sup>29</sup> Bir be, kam dja me'õ kute Metîndjwýnh kra japrykam mrãmri arým o bikênh rax ne. Me kute Môjdjê kukràdjâo bikênhkam ne me kute tu bĩn kajgomã. Bep me kute Metîndjwýnh krao bikênhkam dja pân̄h rax. Pân̄h raxo prîne kute Môjdjê kukràdjâkôt me kute me bĩn kajgoja jakrenh mex ne.

Nãm me Metîndjwýnh kra japry ne kam ajte Metîndjwýnh kukràdjâ ny kadji kamrôjao mỳjja punu, Metîndjwýnh kute memã kukràdjâ ny jarênh mãmdji kadji kamrô jao mỳjja punu. Kra ne tyn amikamrô kapĩ gu me kam arým Metîndjwýnh kukràdjâ nykôt amijo baba. Kamrô jao ne me mỳjja punu, o mỳjja kakrit ne kubê kanga. Jeju kute kamrô kapĩnkôt ne Metîndjwýnh memã me axweo ajngrã ne meo mex nhȳm be nãm me tu kamrô jao mỳjja kakrit ne kanga.

Ne kam ajte Metîndjwýnh Karõ japryñ kum ngryk jadjâ. Metîndjwýnh Karõ me bakam ukaprija, gu me baje te kam amikrà

ar o baba nhȳm mã me bakam ukapri, ja tãm ne me apry. Djãm ja pân̄h kêt got? Mrãmri gêdja prîne Metîndjwýnh me jao bikênh mex ne.

<sup>30</sup> Nhȳnh me'õja kute memã kum, "Bajbit dja ba memã amijo pân̄h ne. Ba dja ba me axwe pân̄h meo ajkê",

anhÿrja ne gwaj arým mar mexkumrêx. Nhȳm ta ajte memã kum,

"Bênjadjwÿr djwýnh ta dja õ me jamã pân̄h jarê", ane.

<sup>31</sup> Metîndjwýnh tĩn ne ar ba tãm dja pao meo bikênh mex ne. Kute pao meo pân̄h ja tãm ne uma:kumrêx. Djãm mỳjja wã puma ngri got.

<sup>32</sup> Ê, amrêbê Metîndjwýnh kute ar ano bõnh totokbê ja gora ar ama. Nãm me te ar ajo bikênh ba gar mã 'ã angrã tÿx ne, ne te atokryn mã 'ã angrã tÿx ne. <sup>33</sup> Nãm me me ipõkri ar ajapryñ ar akamjêro ba. Nãm ã me ar akwÿo ane gar an-hitepato ar kuri aku'ên ar omũnho aku'ên kam ar ô'ã akã djãn akapriñ ar omũnho aku'ê. <sup>34</sup> Nhȳm me ajte ar akwÿbê ijê gar ar ô'ã arerek ne akapriñ ar omũnho aku'ê. Nhȳm me te ar anhõ nèkrêxo prõt gar kam mã akĩnh. Mrãmri arým kajkwakam anhõ mỳjja mextirekôt ajamak bẽn kam tu ate akrã. Kajkwakam anhõ mỳjja me:xkumrêx. Mexo kute pykabê ja jakrenh mexi. Tãm gêdja rã'ã rã'ã rã'ã. Nhȳm me te pykabê mỳjja jao ar ajo ajkê, gar kam kajmã mỳjja ja man mã akĩnh.

<sup>35</sup> Bir be, gora ar amã me uma kêt ne atÿx ne kôt amijo aba rã'ã. Kwãrĩk wãnh gar amã kanga kêt. Mrãmri dja Metîndjwýnh pân̄h ar amã mỳjja mextire ngã. <sup>36</sup> Dja gar arek akrãnmã amijo aba 'ãno dja. Metîndjwýnh kute ar ajã amim karõ ne kute ar amã mỳjja jarênhja kôt dja gar amijo mõ. Dja gar 'ãno djan akrãnmã o amõr rã'ãn arým kôt 'ÿr bõx. Kute me bamã kabẽn pydji jarênh ne kute me bamã mỳjja mex

jarênhja 'ÿr bôx. 'ÿr bôx ne amim aby. <sup>37</sup> Metîndjwÿnh kabênkam ne krabê Jeju akubyn me bawÿr bôx'a, "Adjÿm ngrire, dja ï me awÿr tèn bôx. Amrêbê ne tēm̄mā krā ne kam arÿm amrê tēm 'ÿr. Dja tebê amikrā kêt ne.

<sup>38</sup> Me kute amikajmā'ā imar ba arÿm ije memā axwe kêt jarênh nhym me katāt mrānhja dja me mā imar rā'ān ar ikôt ba.

Gêdja me'ô me umaje akubyn ibê akêx ba kam arÿm ibê kÿnh no kati", ane.

Nām ā Metîndjwÿnh ane. <sup>39</sup> Nhym bep gwaj ba ne gwaj baje ā anhÿr kêtukumrêx. Djām gwaj bamā me uman baje kubê amijo akêx ne kam tu babiknorkumrêxmā? Arkati, gwaj ba ne gwaj tu amikajmā'ā markumrêx nhym arÿm Metîndjwÿnh gwaj bapytān ar gwaj bajo ba.

## 11

*Me tūmre kute amikajmātā Metîndjwÿnh mar.*

<sup>1</sup> Ije, mÿjbê ne me kute amikajmā'ā mÿjja mar? Mā ne kute? Bir, me baje amikajmā'ā mÿjja markam ne gu me tu amim kamnhÿkumrêx ne amiwÿr kam amakbê ar baba. Ne tu amim markumrêx ne banhōkre kadjwÿnhbê amim,

—Nā, mrāmri dja iwÿr bôxukumrêx, ane. Ne kam ajte me baje banoo mÿjja pumÿnh kêt kam tu amim markumrêx ne banhōkre kadjwÿnhbê amim,

—Nā, mrāmri dja ba ï amū akati 'ôkam omū, ane. Nā gu me ā amikadjwÿnhbê amikajmā'ā mÿjja maro ane. <sup>2</sup> Nām ā amrêbê me bakukāmāre tu amikajmā'ā Metîndjwÿnh maro ane nhym arÿm mekam kÿnh ne.

<sup>3</sup> Nā gu me badjwÿ ā amikajmā'ā Metîndjwÿnh kute pyka nhipêxkôt maro ane. Nām kabêno pyka nhipêx nhym kato. Me kute

noo mÿjja pumÿnh kêtō ne pyka nhipêx. Nhym arÿm apôx ne amirīt gu me arÿm kôt omū. Ne kam amikajmā'ā kute pyka nhipêxkôt kuma, amikajmātā arênh ma.

<sup>4</sup> Nām ā Abeu amikajmā'ā Metîndjwÿnh maro anen kam ô krit bÿn kugan kum kungā. Nām kum mÿjja mex ngā. Mexo kute kamybê Kaï nhō mÿjja ja jakrenh. Nhym kam kam kÿnh ne. Ne kum,

—Ga ne ga ajaxwe kêtukumrêx. Aje imā ôrja ne ba imā kÿnhkumrêx, ane.

Be, nām tu amikajmā'ā Metîndjwÿnh ma. Amrêbê ne ty. Nām te tyn mā me bamā mÿjja jarê. Tin mām prābê mā me bamā arê ne, —Dja ga me ā ikudjwa amim Metîndjwÿnh maro ane.

<sup>5</sup> Nām ā Enokidjwÿ amikajmā'ā Metîndjwÿnh maro anen kam tyk kêt. Nām Metîndjwÿnh tu tÿn rā'āo wabi. Nhym me te noo abej aprā. Nhym kêtukumrêx, Metîndjwÿnh kute tu tÿno àbir kam. Kute o àbir kêt ri ne 'ā memā kum,

—Tāmjakam ne ba ikÿnhkumrêx, ane.

Nām ā Metîndjwÿnh ane. <sup>6</sup> Bir be, nhÿnh ne me'ô amikajmā'ā Metîndjwÿnh mar kêt nhym we kam kÿnh? Kati, me kute amikajmā'ā Metîndjwÿnh marbit ne mekam kÿnh ne kum me kÿnh. Godja me'ô Metîndjwÿnh'ÿr bôx prām jabej gora amikajmā'ā Metîndjwÿnh ma. Metîndjwÿnh ne tÿn ne ar ban kam mekam ukaprikumrêx ar ba, me kute Metîndjwÿnh mar prām ne kute abejja mekam ne ukapri. Ja dja me amikajmā'ā kuman kam kôt Metîndjwÿnh'ÿr bôx.

<sup>7</sup> Nām ā Nōwedjwÿ amikajmā'ā Metîndjwÿnh maro ane. Metîndjwÿnh ne kum tÿn jadjā. Anhÿr djwÿnhhrām kute amirīt kêt ri ne kum ngō tām jarê. Nhym kam Nōwe umaje kâ rax nhipêx ne kam kum prômê kramê upānhmê aro wadjān ar utān ar aro ba. Nhym

ate me kum mā axwe kīnhja ne me tu ate krān ar ban kam tu biknorkumrēx ne. Nhy m bep Nōwe pydji ne amikajmā'ā kuma nhy m Metīndjwýnh arým kum axwe kêt jarê.

<sup>8</sup> Nām ā Abraōodjwý amikajmā'ā Metīndjwýnh maro ane. Nām Metīndjwýnh atemā kum pyka ny jarēn 'yr ano nhy m tē. Nām kum kabēn pydjīn arēn kum,

—Dja ba amā kungā ga tu o anhō pykakumrēx ne kam kam ar aba, ane.

Nhy m kabēn man kam tu 'yr tē, kute amikajmā'ā pyka pumūnh kêt 'yr ne tu tē. <sup>9</sup> Nām tu amikajmā'ā Metīndjwýnh ma. Amikajmā'ā kuman pyka nyja kam ar ba. Metīndjwýnh kute kum pyka jarēnh ja kam ar ba. Me bajtem nhō pykakam ar ba. Nām mrykào kikrekam ar ba. Krabê Idjakmē tām djwýbê Djakomē ro'ā mrykào kikrekam ar ba. Metīndjwýnh kute Idjakmē Djako ar adjwýnhdjwýmā kute pyka jarēnhjamē ro'ā mrykào kikrekam ar ba. <sup>10</sup> Mýkam ne Abraōo mrykào kikrekambit ar ba? Bir, kýrūm Metīndjwýnh kute amim krī mex'ā karōn kute prīne ipēxja kamnhīxbē ne pykabē mrykào kikre jakam ar ba. Krī mex rā'ā rā'ā, krī mōr ne tūm ne rōrōk kêt, tām ne amim kamnhīxbē ar ban mar ar o ba.

<sup>11-12</sup> Nām ā Xaramē mjēnbē Abraōodjwý amikajmā'ā Metīndjwýnh Metīndjwýnhmā kum, maro ane. Nām ar te kra prāme ar ba nhy m arým Xara bēngēxte. Te kubēngēxte nhy m kam kra wajēt ne ruw nhy m amim kumý. Metīndjwýnh arým kum kabēn pydjīn arēn kum kra jarē nhy m kam Xara amikajmā'ā kuman kam, —Metīndjwýnh ne kabēnkumrēx, ane.

Nhy m kam kute kum kra jarēnhja wajēt ne ruw nhy m kumý. Te kubēngēxte ne amim kra mý. Kam ne Abraōo pydji kurūm me kamingrāny apōx ne kumex. Arým

kubēngētte kute amikam kō krān mexo tēmkam ne kra dji. Nhy m amū aben nhjuk'ā kam tām djwý aptān kumex. Tāwā pydji kurūm ne me krāptī apōx ne kam kam aptān kumex ne kute mrāmri kàjkwakam kanhētire pyrāk. Ne kute ngō rax mýrri pykati ngrā ja pyrāk. Pykati ngrā tām ne me o itun te kute abenā akremā nhy m krāptī: anen amū ajkamē nhy m me te o ane. Nām ā kam tām djwý amū aptār ne kumex o ane.

<sup>13</sup> Ije ar amā ar tūmre jarēnhja ne ar kunī amikajmā'ā Metīndjwýnh mar rā'ān ty. Metīndjwýnh kute kabēn pýnho memā mýjja jarēnhja, kabēn ja jarēnh ja ne ar kraxje kute amim byr kêt ne ty. Nām ar kute amybým noo omūnhmān prābē amikukām kuman tu amikam kīnhkumrēx. Ne memā kum,

—Me bajtemkam ne bar iba. Me ō pyka prokam ne bar iba. Pyka ja ne inhō pyka djwýnh kêt kumrēx, ane.

<sup>14</sup> Me ja ne me kute ō pyka jabej rā'ā, kute kàjkwakam ō pyka djwýnhja jabej rā'ā kam ā kabēn ane. <sup>15</sup> Nām ren ar ō pyka kurūm kator ja tēn o aman arým ren mā ajte akubyn 'yr tē. <sup>16</sup> Nhy m bep kati, kàjkwakam ar ō pyka mex-tire ja ne ar o aman kam 'yr tēm prāmā ne kam ā kabēn jarēnho ane. Kam ne Metīndjwýnh kum ar kīnhkumrēx. Nhy m ar kute

Metīndjwýnhmā kum,

—Ar imā akīnhkumrēx. Apydji ne ga abē ar itīn djwýnh, anhyrkam djām kam Metīndjwýnh jām Ar kubē krāmā got, arkam pijāmā got. E kum kati, kum ar kīnh raxkam ne ar kutēp krī mex nhipēx ne.

<sup>17-18</sup> Nām ā Abraōo amikajmā'ā Metīndjwýnh maro ane. Nām Metīndjwýnh Abraōo kute Metīndjwýnhkōt ar amijo ba jabej kabin kra'ā ku'uw. Nhy m bit kute krabē Idjak bīnmā, kute bīn ne kum ōrmā bit kute bīnmā. Amrēbē Metīndjwýnh kute kum kra



pydji jarênh ja ne bit kute kum bînmâ. Kra ja'ã, kra pydji ja'ã ne Metîndjwýnh kute kum,

“Akrabê Idjak ja gêdja amû aben nhijuk'ã kam tãmdjwý krãptikumrêx”, anhÿrja.

Kra ja ne Metîndjwýnh kum arê nhym kam bit kute bîn ne kum òrmã. <sup>19</sup> Nãm òkre kadjwýnhbê amim,

—Metîndjwýnh dja akubyn imã o tîn, ane. Ne kam bit kute bînmã nhym kam Metîndjwýnh nêje kukrãn akubyn kum nê ne kam mrãmri kute akubyn o tîn pyrãk.

<sup>20</sup> Nãm ã Idjakdjwý amikajmã'ã Metîndjwýnh maro ane. Ne kam krabê Djakomê Ixau arkum kînh djã jarê, ar kukãm ne arkum kînh djã jarê. Ar ò mÿjja kute amirît kêtri ne ar kukãm amû arkum kînh djã jarê.

<sup>21</sup> Nãm ã Djakodjwý amikajmã'ã Metîndjwýnh maro ane. Nãm amû krabê Jôdjekam kra amê aro kînh. Arÿm kubêngêtte, arÿm bikati mex ne kam môn amikakêkôt kajpar djã djan kam Metîndjwýnhmã rax jarênh kam tãmdjwýjamã kum,

—Gêdja Metîndjwýnh ar ajo kînh, ane. Nãm ã arkum ane.

<sup>22</sup> Nãm ã Jôdjedjwý amikajmã'ã Metîndjwýnh maro ane. Tyk kutã ne amû anhÿr djwýnhram mekbê idjaer pykabê Edjitukurûm katormã arê. Ne prîne memã ta amiji'ã karô, me kute 'io môrãm ne memã 'ã karô, me kute 'io môr ne kute ò pyka djwýnhkam adjãrmã, Metîndjwýnh kute kum pyka jarênhjakam kute adjãrmã.

<sup>23</sup> Nãm ã Môjdjê nãmê bãmdjwý amikajmã'ã Metîndjwýnh maro ane. Nãm ar rwýk totokbê o apdju. Bênjadjwýr raxbê Parao ne me kra my apôx nhym me kute me parmã arê. Nhym arkum bênjadjwýr rax kabênh puma kêt mex ne tu o apdju, ar kute bîn kêt ne tu o apdju. Nãm ar kra mextire pumûn kam Metîndjwýnh kanàrrãm tu o

apdju. Nhym o bipdjur'ã mytyrwý amãnhkrut ne ikjêkêt nhym kam ar têtêktikam kunhò.

<sup>24</sup> Nãm ã Môjdjêdjwý amikajmã'ã Metîndjwýnh maro anen kam arÿm abatãnh ne kam krô'ã nãja kanga. Parao kra kute amim prîrûm mÿnhja tãm ne nã kanga. <sup>25</sup> Nãm,

—Kwãrik wãnh ba ijaxwejao amikînh kêt. Kwãrik wãnh wãm memã nõ. Godja ba arîk ar ibaja kwý ngrire ne o amikînh? Kati, gêdjãm wãm kunî nõ. Ba gêdja ba Metîndjwýnh nhò me jakôt itokry, ane. <sup>26</sup> Môjdjê ne Kritu kajmã'ã tokry, Bênjadjwýrbê kumkati kajmã'ã tokry. Nhym amû tûmrãm Kritu bôx ne adjwýnhdjwý kôt kudjwa tokry. Nãm me kum kurênh aprÿn prîne o ajkê nhym tokry rax ne. Nhym Môjdjêdjwý Kritu kajmã'ã kajbê ã tokry ane.

Nãm,  
—Kwãrik wãnh me kum ikurênh wãnh ijapry kwãrik wãnh rã'ã. Ba gêdja ba Bênjadjwýrbê kumkati kajmã'ã itokry, nhym bep ate gêdja Edjitukam nêkrêx kumexja wãnh memã nõ. Nhym bep ba dja ba Bênjadjwýrbê kumkati kajmã'ã itokry. Tãmbit ne ba imã kînh, ajbit ne imã mex, ane. Nãm amû amikukãm Metîndjwýnh kute kum pãnh mÿjja mextire nhôrãm amikukãm kuman kamnhîxbê ar ban kam ã o ane.

<sup>27</sup> Nãm ã amikajmã'ã Metîndjwýnh maro anen kam kum bênjadjwýr rax puma kêt mex ne pykabê Edjitu kurûm kato. Bênjadjwýr rax te kam ngry:k. Nhym kam kum uma kêt mex ne tu kurûm tẽ. Kute noo amim Metîndjwýnh pumûnh pyrãk. Metîndjwýnh pumûnh kêtja ne kute noo omûnhmãn prãbê akrãnmã amijo ba rã'ã ne akubyn akêx kêtikumrêx ne.

<sup>28</sup> Nãm ã amikajmã'ã Metîndjwýnh maro anen kam Metîndjwýnh me irôbê mrãnh nhò akati man kam me kute kamrôo kikre'ã ijê djã kamînmã memã arê. Metîndjwýnh

kadjy mrânh djwýnh kute me imexmã me irôbê mör ne kute mekbê idjaer kutewa par kêt kadjy. Nãm tu amikajmã'ã kuman kam me kute kamrôo kikre 'ã ijê djã djymã memã arê nhy m me o amiptãro ba.

<sup>29</sup> Nãm ã mekbê idjaerdjwý amikajmã'ã Metĩndjwýnh maro anen ngô rax nhidjibê Kamrêk'ýr bôx nhy m tu memã ngô ngrã rê nhy m me kam 'ã môn rê. Mrãmri ne kute atýxkam pyka ngrã ja pyrãk, nhy m me kam môn 'ã rê. Nhy m mekbê Edjitu mekôt me kudjwa bit 'ã rêrmã mō nhy m tu ngô meo ajkamuw ne me imex ne.

<sup>30</sup> Nãm ã mekbê idjaer amikajmã'ã Metĩndjwýnh maro anen krĩrãxbê Djeriko nêje pyka týx nhipôkjamã ipôko dja. Nãm me Metĩndjwýnh kabên man kam kabênkôt krĩmã ipôko dja. Nhy m akati nhy m me ajte tãm ne. Nãm me ã kum ipôko anhýro dja nhy m me'ã akati amãnhkrut ne amãnhkrut ne ikjêkêt nhy m arým nêje pyka týxja te týx ne tu ajkaten rôrôk ne kumex. Nhy m kam 'ãnh mekbê idjaer kurê djwýnhja'ýr wadjãn me'ýr prôt ne.

<sup>31</sup> Nãm ã me kuprý 'ôbê Rabe amikajmã'ã Metĩndjwýnh maro anen kam amiwýr mekbê idjaer àpkãro mrânh djwýnh wadjãn arkum kabên mex jarên ar udju ne. Kam ne mekbê idjaer me kute Metĩndjwýnh kabên mar prãm kêtja kunĩ nhimex ne kam kute Rabe ar bĩn kêt nhy m ar ajbit me kurãm tĩn ne.

<sup>32</sup> Bir be, djãm arek ar amã me'ã idjujarênh itêmã? Nãr kon, birãm aje. Dja ba Djidjãomê Barakimê Xãxãomê Djetemê Dawimê Xamuwemê Metĩndjwýnh kabên jarênh djwýnhmê me ja kunĩ'ã idjujarênh tẽ nhy m arým ijã akamãt ne.

<sup>33</sup> Nãm me amikajmã'ã Metĩndjwýnh man kam kurê djwýnh'ýr prôt nhy m Metĩndjwýnh

memã me kurê djwýnh rerek mex ne, nhy m me mekbê pyka pytã. Nãm me katãt meo ba nhy m kam Metĩndjwýnh kabên pýnho memã mýjja mextire jarê. Nãm me Metĩndjwýnh kanãrrãm kum rop djãkrêbê rijão pyma kêt kumrêx ne. Rop kute krênãm ne me rop nhũrkwãkam kumê nhy m Metĩndjwýnh rop jajkwa ajmã o nhy m ajkwa pôt ne krên kêt kumrêx ne.

<sup>34</sup> Nãm me Metĩndjwýnh kanãrrãm kum kuwy pyma kêt mex ne. Me kute kuwymã ar rênh nhy m ar xêt kadjy nãrãm ne me kuwy pôk jabatãnhmã ar kurê nhy m Metĩndjwýnh ar'ã kuwy bĩn ar utã. Nãm me Metĩndjwýnh kanãrrãm ar ba nhy m me bit kute pao me imexmã nhy m Metĩndjwýnh me utã. Nãm me Metĩndjwýnh kanãrrãm ar ban katyk mex ne ar ba nhy m Metĩndjwýnh akubyn meo týx. Nãm me abenwýr prôt kam Metĩndjwýnh kanãrrãm ar ban kam amijo aptãn kãjbê kurê djwýnh rê nhy m me bajtemja me umaje prôt. <sup>35</sup> Nhy m me niredjwý amikajmã'ã Metĩndjwýnh ma nhy m akubyn memã ôbikwa kwýo tĩn.

Nhy m be nãm me kwý amikajmã'ã Metĩndjwýnh ma nhy m me me kupa. Nãm me te memã kum,

—On me Metĩndjwýnh kanga ba me me apar kêt. Dja ga me mã 'ã angrã ba kam me prĩne me ajo ajkê, ane. Te memã ane nhy m me amibê kanga kêt kumrêx ne 'ãno dja. Metĩndjwýnh kute akubyn meo tĩn nhy m me ô pyka mextirekam ar bamã ne me kanga kêt kumrêx nhy m me prĩne meo ajkên me par punu nhy m me tokry:n ty.

<sup>36</sup> Nãm me me kwý japrýn me'ã keket ne kam me kaprêprê:k ne prĩne mrykão me kã noxnox nhy m kam mrykãkôt me kamrô kukrykry ne. Nãm me me kwý djuwpren mekbê ijê djãkam me kurê. <sup>37</sup> Nãm me kẽno me kwý titik

ne me kupa. Nām me pī kokjêr djào, kàxkajêro me kwý jakàn me kupa. Ne kàxdjwa kajgoo me kwý pa. Nhyr me amim mrykí'átomti, mokaàk kào kubèkàn kayn angij. Me ò mýjja kètkam me ò nèkrèx kètkam ne me ar ba. Nhyr me prīne meo ajkê nhyr me tokryn kaprīre ne ba. <sup>38</sup> Nām me kapôt kukritkam ar ba, krānhrekam ar ba, kēnkrekam ar ba, pyka krekam ar ba. Ām me mexkumrèx. Pykabê me ja ne me mexo me ja tēp kètkumrèx ne.

<sup>39</sup> Bir be, me ja kunī ne me amikajmā'ā Metīndjwýnh ma. Nhyr kam Metīndjwýnh ne me jamā,

—Mrāmri me amexkumrèx. Nā bām me akam ikīnhkumrèx, ane.

Nhyr bep kraxje me tūmre ja kute byr kêt rā'ā. Metīndjwýnh kute kabēn pýnho memā mýjja jarēnhja ne me kute amim byr kêt rā'ā. <sup>40</sup> Adjým, Metīndjwýnh ne arým me bakadjy amim mýjja mex'ā karō. Me bakunī kadjy ne prīne amim mýjja'ā karō mextire. Djā nām kute me tūmrebit pytārmā? Kati, arým ne me bajādjwý amim karō. Nhyr kam mexkumrèx. Mexo kute me tūmre pytārja jakrenh mexi. Kute me tūmre jamē ro'ā kute me bajo mexmā. Gu me batipydjīn bamexo bamexkumrèxmā ne amim me bajā karō. Be, tām ne ja.

## 12

*Metīndjwýnh kra kunīmā uwēk māt.*

<sup>1-2</sup> Be, me kume:xja pumū. Me kute amikajmā'ā Metīndjwýnh marja me tām ne me krāptī. Me tām ne ne me bamā ipók ne me banhirān kumex. Kam dja gwaj me ja kudjwa Jeju 'āno djan kanga kêt. Ē, mrāmri ne me kute aben rerkam mýjja kute me kukrà nhyr me kute o pōx ne amikôt rēnh ne kajkrit ne prôt mex ja pyrāk. Dja gwaj ā mýjja kute gwaj bakukrāja

jām aminêje kunī rēnho ane. Gwaj bajaxwe kute gwaj bajamýnh týxja jām aminêje kurēn kurēn kam arým mrāmri bajaxwe kètkam katāt ar amijo baba mexkumrèx ne. Gora gwaj 'ā badjukanga kêt ne mrāmri katāt amijo tēn inomā kumē. Kute mrāmri ne me kute aben rerkam amikukām mýjja pumūnh ne kam kambit no pymjýr týx mex ne atemā mýjja 'ō pumūnh kêt ne 'ýr prôtja pyrāk.

Dja gwaj ā o anen amikukām Jējubit man kôtbīt bajamak bēn ne baje ibej atemā mýjja 'ō mar kêt ne Jeju 'ýrbit baprôt ane.

Jeju ta ne gwaj bajamak bō gwaj tu amim mar kumrèx. Nhyr ajte gwaj bajamak bōnho tē gwaj arým amim mar rax ne. Tām dja gwaj 'āno djan kanga kêt ne. Nām amū amikukām kīnh djā man kam mete pīte'ykam bīnja kum uma kètkumrèx. Djām me pīte'ykam ari-jkam pijām ngri got. Nām amikam pijām mar kêt ne tu ate krān arek amijo tē. Kam ne Metīndjwýnh arým 'ā bēnjadjwýr rax mē nhyr Metīndjwýnh krī djātikam ubôk'ānh ikô'ā nhý.

<sup>3</sup> Gora ar amikam Jeju man amikam arerek kêt. Me axwe ne me kum kurēn prīne o ajkê nhyr kam tu arek dja, tu ate krān dja. Gora ar aman kudjwa arek o tēn amikam arerek ne akaprī kêt ne arek kôt o tē. <sup>4</sup> Djā nā gām ar Jeju kudjwa akamrô ajkapīn ty got? Kati, ar ajaxwebê aku'è týxkam kraxje ajō akamrô bikapīn kêt. Kraxje me kute ar ajō bīn kêt rā'ā.

<sup>5</sup> Djām arým ne gar Metīndjwýnh kabēnja o akno? Arým kute ar ajo kran kam kute ar amā týx jadjārmā ja. Djā nā gām ar o akno? Nām ar amā,

“Ē, akmere, gēdja Bēnjadjwýr amā uwēk māt kwārik wānh ga aprý kêt ne kam amikati kêt. Gēdja amā bēn týx ga akaprī kêt. Mýkam?”

<sup>6</sup> Bir, kum me abêjamã ne uwêk màt. Ne kute meo krajad-jwý kunĩmã uwêk màt ne, me katàt mrãnh kadjy”, ane.

<sup>7</sup> Bir be, Metĩndjwýnh kute ar amã uwêk màtkam dja gar tu arek dja. Kòt ne Metĩndjwýnh kute ar ajo kra. Nhýnh ne me prĩre 'õ bãm kute kum uwêk màt kêt? <sup>8</sup> Bir be, Metĩndjwýnhdjwý kute kra kunĩmã uwêk màtja pumũ. Me katàt mrãnh kadjy ne kramã uwêk màt. Mýj me ne Metĩndjwýnh memã uwêk màt? Kute me bajo kra djwýnhja. Nãm ren kute gajbit amã uwêk màt kêt ga ren abê kra djwýnh kêt kumrêx ne ren kam abê krõ'ã me kute adjir pyràk.

<sup>9</sup> Ga me babãm bêngõkre kute me bamã uwêk màt gu me bapijãm djaje banhibõn bakrĩn amikam baje kabên maro bakrĩja pumũ. Bir be, gwaj pykabê gwaj babãmja kurãm kàjkwakam Babãmja kabên maro nhý, gwaj badjumar mex ne ar baba kadjy, amikam kabên maro nhý. <sup>10</sup> Pykabê gwaj babãm bêngõkre kute gwaj bapĩrerũm gwaj bamã uwêk màt. Me ta kute amimarkòt ne gwaj bamã uwêk màt ne. Nym bep Metĩndjwýnh ne gwaj bamex kadjybit gwaj bamã uwêk màt ne. Ta mexo mexkumrêx kòt gwaj bamex kadjy.

<sup>11</sup> Djãm me kute memã uwêk màtkam tokry ngri got. Kam ne me tokry:n kam kaprĩre ne. Nym bep amũ atũmã gêdja arým umar mex ne katàt mrã. Arým kute mar ne kòt amijo tẽmkam gêdja umar mex ne katàt mrã.

<sup>12</sup> Bir be, kam dja gar on ajte amikam atýx ne arek kòt amijo tẽ. Kute mrãmri ne me krĩ'ýr mrãnh ne katyk me:x ne mrãnh ne kõno birẽnh mrãnh ne kute krĩõ rãm ne jao mrãnh ne arým ajte ìmẽ ikra àdjõnh ne arým ajte mrãnh týx ne arým arek mrãnh ja pyràk. Dja gar ã amikam atýx ne arek kòt amijo atẽm o ane. <sup>13</sup> Nã, dja gar kòt amijo

tẽn katàt amiprywã djin arek 'ã mõ, katàt ar abenkòt amrãnh kadjy. Gar aje Jeju mar tũmwã arek me kute amim Jeju mar rerekwãmã mõn amõr mexo mõ gê me arek ar akòt mõ. Ar akòt mõn 'õ abenbê màt kêt. Me kute amim Jeju mar rerek ne me kute mrãmri ne me mex mã ba nym me par tãtãk mekòt 'ok ba pyràk. Gêdja kute mar rerekrewã ar akòt tẽm rerekre ne tẽ:n kam arým amũ tẽm týx ne arým amũ mrãnh mex, arým Jeju mar týx ne.

*Me kute axwebê amijãno ãmmã.*

<sup>14</sup> Gora ar amũ me wã kunĩmã akabên mexbit jarèn angyk kêt, gar kam adjumar mex ne ar aba. Gora ar Metĩndjwýnh mexo amexkumrêx. Kam dja gar Metĩndjwýnh pumũ. Dja gar Metĩndjwýnh mexo amex kêt ne Bẽnjadjwýr'ýr abõx ne omũnh kêt kumrêx ne.

<sup>15</sup> Ê, Metĩndjwýnh ne ukaprikòt me utã. Gora ar amijãno dja, ar ajõ Metĩndjwýnh djukaprijabê jãm akrãn 'ýr abõx kêt karõ. Gora ar amijãno dja. Dja gar ajõ ajaxwemo krax ne kam aje mýjja djý pyràk, aje akrõre djý pyràk. Kute mrãmri ne me kute akrõo tep ka'õnh nym kute prĩne ngõ jaer ne kute tep nhimexo ba ja pyràk. Gora ar amijãno dja. Dja me'õ axwemo krax ne kam amikòt me akrãptĩmã axwe jangij. Gora ar amijãno dja.

<sup>16-17</sup> Ne ajte ar ajõ aprõ prãm karõ nym me niredjwý 'õ mjên prãm karõ gora ar amijãno dja. Kwãrĩk wãnh ar ajõ abê Ixau kêt. Gora ar amijãno dja. Ixau ne pykabê mýjja kakritjabit kum kĩnh ne kam kýjrũm mýjja mextire ja kum kĩnh kêt kumrêx. Ixau ne kutewa nym kam kòt bãm kute Metĩndjwýnhmã kam,

—Dja ga o rax ne o kĩnh, anhýr kadjy nàràk kute kum õ nèkrêx kunĩ rer kadjy nàràk bit 'ã no týx.

Nhym Ixau kute àkurbit mar ne kam kamyjamã ò kwý krên djã pydji pãnh mýjja kunĩ kanga. Nhym kam tũmrãm kum kĩnh ne kam te 'ã o ane. Nhym bãmjã nê ne. Nhym amim ngryk ne te mýrkam 'ã bãmo ane. Nhym tu ate krã. Ja ne gar arým ama. Gora ar amijãno dja.

<sup>18</sup> Ê, ate ne Metĩndjwýnh amrêbê me bakukãmãremã kukrãdjã tũmjao kato nhym bep ate ne ajbir me aga akamingrãnydjwýmã kukrãdjã nyo kato.

Amrêbê ne me bakukãmãre krãnhbê Xinaj'ýr mõn bõx. Nhym pò:ko nhý nhym kũm kakrãtyk ne kum ipòk nhym kam kam akamat kò ty:k ne. Nhym nadjwý kam krar ne adjênho dja. <sup>19</sup> Nhym potidjwý kakòr tỳx ne, nhym Metĩndjwýnhdjwý òkreti:rekam kabên. Nhym me kuman kam umaje amra:n kum,

—Kwãrĩk wãnh ga ajte me imã akabên kêt, ane. <sup>20</sup> Nhym Metĩndjwýnh arým memã,

“Kwãrĩk wãnh me krãnh kupênh kêt. Dja ga me abêngòkre 'ò nàr mry 'ò krãnhreja kupê ga me arým kênò titik ne abi”, ane.

Nhym me kuman kam umaje àmrao kumex. Te ku'ê tỳxmã.

<sup>21</sup> Nhym Mòjdjêdjwý omũn kam,

“Ije kum bep imã uma. Nã bãm umaje itertet ne”, ane.

Djãm uma ngri: got. Nãm ã pykabê Metĩndjwýnh nhõ krãnh ane. 'Ýr ne me bakukãmãre bõx.

<sup>22</sup> Nhym bep ajbir ne Metĩndjwýnh me akamingrãnymã kukrãdjã nyo kato ga kam ar krãnhbê Xijão, Metĩndjwýnh nhõ pyka'ýr mõn bõx. Kàjkwakam ò pykabê Djeruxarê'ýr bõx. Kam ne Metĩndjwýnh tĩn ne ar ba, nhym kadjy mrãnh djwýnhdjwý kamã ar ba. Kadjy mrãnh djwýnh krãptĩ. Me'ã akre kubê 1.000.000 krãptĩ. Nãm me'ã akre kute pi'ò pyrãk ne kĩnh tire ne

kute Metĩndjwýnhmã rax jarênhmã ar aben pydjĩn ba.

<sup>23</sup> Kamãdjwý ne Metĩndjwýnh nhõ me ja kunĩ aben pydji. Metĩndjwýnh nhõ me ja kumrêx kute amikajmã'ã marja ne me aben pydji. Amrêbê kute kàjkwakam pi'òk no'òkkam me idji janhòrja tãm ne arým kamã 'ã aben pydji. 'Ýr ne gar bõx. Bẽnjadjwýr rax kute me kunĩmã pãnh jarênh djwýnh kubê ne Metĩndjwýnh, 'ýr ne ga me bõx. Ne ajte me karò, me pykakam ar bari katat mrãnh nhym Metĩndjwýnh kute me'ã mex rênh, me ja karò'ýr ne gar bõx.

<sup>24</sup> Be, Jeju'ýr ne gar bõx. Jeju kute me bamã kukrãdjã ny jarênh mãm dji ne kute o kator, ne kute ta kamrò bikapĩnkòt me bajo mex, 'ýr ne gar bõx. Jeju kamrò kute mexo Abeu kamrò jakrenh mexi. Amrêbê ne me bakukãmãrebê Abeu tyn kamrò ajkapĩ nhym me omũn kam pãnhbit jarê,

—Gora gê on o pãnh, ane.

Nhym bep me kute Jeju kamrò markam ne me,

—Metĩndjwýnh ne Jeju kamròkòt tu me bajaxweo akno, ane.

Be, Jeju mex tire'ýr ne gar bõx.

<sup>25</sup> Bir be, kam ne ba ar amã,

—Gora ar amijãno dja gê Metĩndjwýnh ar amã kabêno dja. Kwãrĩk wãnh ar ajò kabênbê jãm akrã kêt. Gora ar ama.

Ê, amrêbê Mòjdjê kute pykabê memã kabên jarênhkam me'ò kabênbê jãm krãnh ar ba djãm kute kum o pãnh kêt mã? Kati, Metĩndjwýnh ne prĩne memã o pãnh. Nhym bep ajbir ne Metĩndjwýnh kàjkwa kurũm me bamã kabên jarê. Nhym mexo amrêbê pykabê kabên ja jakrenh mex ne. Be djãm gwaj badjwý kabênbê jãm bakrã djãm kute gwaj bamãdjwý o pãnh kêt mã? Arkati, dja prĩne gwaj bamãdjwý o pãnh. Me kute Metĩndjwýnh kabên marbê

jām krāja gêdja meo bikênh mex ne, ne kam me kute Môjdjê kabên marbê jām krâ ja pânho akrenh mex ne.

<sup>26</sup> Amrêbê ne kabêno pykabit karngôr kajgo nhym tertet. Nhym bep ajbir ne kabên pydjîn arên memã,

“Djâm pykabit ne ba ije karn-grôrmã? Dja ba ï ajte kâjkwadjwý karngôr”, ane.

<sup>27</sup> Be, kute “Dja ba ajte” anhýrja ma. Metîndjwýnh kute mýjja kunĩ nhípêx ja gêdja ajte karngôr nhym tu apôx ne rôrôk ne kunĩ akuno. Nhym bep mýjja jarij týtjabit dja arek arij. Tãm ne rôrôk prãm kêt-kumrêx.

<sup>28</sup> Be, Metîndjwýnh nhõ mýjja dja rôrôk prãm kêt kumrêx. Metîndjwýnh kute õ pykakam ar me bajo baja gêdja tým prãm kêt-kumrêx ne arek gwaj bamã nôr rã'ã rã'ã ne. Tãm ne me bamã arê gwaj tu 'ýr babôxkumrêx. Kadjy, Metîndjwýnh kute õ pykakam ar me bajo baja tým prãm kêt tãm ne gwaj bamã nôr rã'ã, kadjy dja gwaj bakînhkumrêx ne ar baban kum amikînh jarê. Kum amikînh jarên kum rax jarên kam kum badjâpênh mextire gê gwaj bakam kînhkumrêx. Gora gwaj kam bapijâm ne bamã uma.

<sup>29</sup> Djâm uma ngri got. Dja prîne meo apêx. Kute mrâmri ne kuwy pôkti kute prîne mýjja bôr ne o apêx ja pyrâk. Dja ã Metîndjwýnh meo apêxo ane.

## 13

*Kute memã 'ã karõo ino rer.  
Kor 1.10; Tex k 4.1; Ped k 2.11*

<sup>1</sup> Gora ar abeno akamyn mã amã aben jabê rã'ã. <sup>2</sup> Gora ar me bajtemwã man anhûrkwãmã amiwýr meo wangjê ne mekam ad-jukapri. Nãm me kwý ã anen am-inhûrkwãmã kadjy mrânhdjwýnh kwýo wangjê ne o djuw mex. Kute kraxkôt mar kêt ne tu o djuw mex. <sup>3</sup> Ê, gora ar mekbê ijê djâkam ar

ku'êja ma. Dja gar gadjwý aje ar ro'ã mekbê ijê djâkam aku'ê mãn prabê ar ô'a atokryn akã djân akaprin ar aba. Kwârîk wãnh gar ate akrã kêt. Dja gar ã arkôt ane. Me kute prîne aro bikênh nhym ar tokryjadjwý gora ar ar ama. Dja gar ar ô'ã akã djân atokry ne. Be, tãm ne ja. Gêdja ba ajte ar amã mýjja 'ôdjwý jarê.

<sup>4</sup> Me abenwýr bakam ne mrâmri mýjja mexkumrêx. Dja gar aprõ'ýr aban kam aprõ djwý:nh'ýrbit mrã. Nhym me niredjwý mjên djwýnhbit ma. Me kwý ne me me prõ prokam no kêt ne. Nhym bep ar ga. Ar ga dja gar akunĩ me prõ prokam apijâm ne aprõ pýnh ne. Kwârîk wãnh ga ar krõ'ã aprõ kêt, gê me nija krõ'ã mjên kêt. Me prõ prãm, me mjên prãmja dja Metîndjwýnh memã pãnh jarê. Me kute me'ôbê prõ nâr mjêno àkînh jamãdjwý pãnh jarê.

<sup>5</sup> Kwârîk wãnh gar pi'ók kapri prãmebit ar aba kêt. Dja te ar anhõ mýjja ngrire gar tu o amikînh. Mýkam? Bir, Metîndjwýnh ta dja ar ajo djuw mex. Arým ne ar amã,

“Dja ba me akurüm itêm kêt-kumrêx. Dja ba me akanga kêt-kumrêx.

Dja ba me ajo iba rã'ã rã'ã ne”, ane. Ga Metîndjwýnh kute ar gwaj bajo ba rã'ãja pumü. <sup>6</sup> Bir be, kam dja gwaj batýx ne banhökre kad-jwýnhbê amim,

“Metîndjwýnh ta ne kute ijo ba djwýnh.

Kam dja ba itîn prãm kêt.

Mã ne me kute ijomã”? ane.

Dja gwaj ã amim ane.

<sup>7</sup> Ê, gora ar kute ar ajo ba djwýnh ma, ar kute ar amã Metîndjwýnh kabên jarênhja dja gar ama. Ar kute kôt amijo ba mex rã'ãn ar ty. Ga ar kute amikajmã'ã Jeju mar ne 'ã ngrã týt ja pumü. Ar ta ne ar arým ty. Ar ja dja gar

amikam ar aman kam ar'â amikakren ar aba. <sup>8</sup> Nâ, nâm ar amikajmâ'â Jeju ma. Jeju Kritu pydji. Atemâ kêt. Amrêbê tãmÿ ne ajbir ajte tãm ne. Tãm gêdja râ'â râ'â râ'â ne. <sup>9</sup> Kwârîk wânĥ me kute apÿnh mÿjja'â ujarênh nyo ar anoo biknor ar o baja kwârîk wânĥ o ar anoo biknor kêt. Metîndjwÿnh ta ne ukaprikôt gwaj bajo tÿx gwaj katât mrâ. Kam ne mexkumrêx. Bep ate ne me ta kukràdjâkôt mekbê me àkur djâ pyma. Kam ne punure. Nâm me te o anen arîk ar ba.

<sup>10</sup> Ate ne me bakukràdjâ ny. Kritu ta ne Bämmâ me bakadjy amingâ nĥym me kubî. Nĥym me bajaxwe pânĥ ty. Nĥym bep me kute kukràdjâ tÿm ar o ba râ'âja, me Metîndjwÿnh nhô kikrekam àpênh ja kute Jeju me bamâ tykja mar kêtumrêx, ne Jeju nhô kukràdjâ nyja mar kêtumrêx. Nĥym Metîndjwÿnh kute me ja jaxweo biknor kêt ne kute meo kra kêtumrêx.

<sup>11</sup> Kukràdjâ tÿmkôt ne me kadjy Metîndjwÿnh mar djwÿnh nhô bënjadjwÿr rax mry pan kamrôo atom ne o tē. Metîndjwÿnh nhô kikre kadjwÿnhbê kumoka'êmâ o tēn o wadjâ. Me axwe pânĥ ne kum kungâ. Metîndjwÿnh kute omÿnh ne me axwekam ngryk kêt kadjy. Nĥym bep mry nhÿja ne me atykmâ kum angij nĥym prÿne xêr. <sup>12</sup> Kôt ne Jeju atykmâ tokryn â tyk ane. Ta kamrôo kute prÿne me bajo mex kadjy. <sup>13</sup> Kam dja gwaj atykmâ jêt djâja'ÿr tē. Kôt gwaj batokry nĥym me kute kôt gwaj bajapry gwaj kudjwa bapijammâ.

<sup>14</sup> Djâm pyka jakam ne gwaj banhô pyka? Kati, nĥym bep amrê môr rÿnâ ne gwaj kam ama nĥym râ'â râ'â râ'âmâ. Kam dja me gwaj bajapry gwaj ate bakrâ. Kwârîk wânĥ râ'â. Mrâmri dja tu â ane. Kÿjrÿm ne gwaj banhô pykakumrêx, gwaj banhô krÿrax djwÿnh. <sup>15</sup> Bir be, gwaj banhô pyka

gwaj bamâ nôr nÿkam amakbê mâ Metîndjwÿnhmâ mex jarênh râ'â ne. Gwaj baje amikajmâ'â Jeju markam dja gwaj â Metîndjwÿnhmâ anhÿr ar baba râ'â ne. Gwaj baje Metîndjwÿnho aminhôn baje idji jarênh ar o babaja dja gwaj ô ane. Kam dja Metîndjwÿnh gwaj bakam kÿnhkumrêx nĥym kam mrâmri kute amrêbê mete Metîndjwÿnhmâ mry par ne kum ôr nĥym mekam kÿnhkumrêx ja pyrâk.

<sup>16</sup> Gora ar abenkam adjukaprin aben man ar abeno aban anhôdjânhkôt abenmâ mÿjja ngâ. Gora ar mâ aman 'âno dja. Gêdja gar ane nĥym arÿm ar akam kÿnh. Kute amrêbê mete mry par ne kum ôr nĥym mekam kÿnh ja pyrâk.

<sup>17</sup> Ar kute Metîndjwÿnhkôt ar ajo ba djwÿnhja gop ar kabênkôt amijo aba. Dja ar ar amâ mÿjja'ô jarê gar tu abên kêt ne akrânâmâ kôt aba. Nâm ar prÿne Metîndjwÿnh kabêno ar ajo djuw mex ne ar ajâ ukanga kêtumrêx. Mÿkam dja gar arkôt amijo aba? Bir, Metîndjwÿnh kute ar kukjêr nĥym ar kute kum amikôt amijarênhmâ. Kam dja gar arkôt amijo aba nĥym kam ar kÿnhkumrêx ne. Ar kÿnhkumrêx ne amikôt kum amijarê. Dja gar â aro anhÿr kêt nĥym kam ar kum amijarênhkam kaprÿre ne. Gar gadjwÿ axwe amikam adjumar. Be, tãm ne ja.

<sup>18</sup> Gop ar Metîndjwÿnhmâ ar ijarênh râ'â. Ar ije amikam ijaxwe 'ô mar kêt ne ije kôt amijo iba prâmâ, Jeju kute imâ kukràdjâ jarênh kunÿkôt ije amijo iba prâm kam gêdja gar kum ar ijarênh 'âno dja. <sup>19</sup> Gora ar on kum ar ijo a'wÿ. Dja gar kum ar ijo a'wÿ bar amikrâ kêt ne on arÿm wâm ar awÿr bôx.

<sup>20-21</sup> Gê Metîndjwÿnh ar amâ mex jangjê ga kam ar apÿnh mÿjja mex djâri kunÿo amiptân ar o aba. Metîndjwÿnh kute memâ umar mex jarênh djwÿnh ta gêdja ar amâ o

ane. Gar kam kabênkôt akabên ne kôt ar amijo aba. Kute ar ajâ amim karôkôt ar amijo aba. Metîndjwÿnh gêdja ar angrêk gar kôt amijo aba mextire. Nhym kam ar akam kînhkumrêx. Jeju Kritu ta gêdja ar ajo tÿx gar kôt amijo aba. Tãm ne kubê me bapumÿnh djwÿnhbê kumkati. Metîndjwÿnh ne me tyk kurÿm akubyn Bênjadjwÿr Jejuo tîn ne o kato. Nhym kam kubê me bapumÿnh djwÿnhbê kumkatikam prîne me bapumÿnh 'ãno dja. Mrãmri ne kute mrykî'ãtomti pumÿnh djwÿnh kute prîne amim o djuw mexkôt kute omÿnh ja pyrâk. Nãm ã me bajo mrykî'ãtomtin prîne me bajo djuw mexo ãmo ane. Mÿjkôt ne kubê me bapumÿnh djwÿnhbê kumkati ne raxo kute me omÿnh djwÿnh kunî jakrenh? Bir, kute Metîndjwÿnhmã aminhõr nhym me kute bîn nhym kamrô bikapînkôt. Be, kamrô bikapînkôt ne ajte me bamã kukràdjâ ny jarênh mãmджи ne o kato. Jeju nhõ kukràdjâ nyja dja rã'ã rã'ã rã'ã ne. Ê, gora gê me Kritumã kum kubê kumkatiti:, umati, mexo tuknî jarênh rã'ã rã'ã rã'ã ne. Tãm ne ja.

<sup>22</sup> Ê, akmere ar, àpnhîre ar, gora ar pi'òk no'òkam ikabên ja ma. Tu akrànMã maro tèn inomã amê. Ije pi'òk no'òko ar amã tÿx jangjênh kadjy ne ba ar amã pi'òk no'òk ne. Ije ar amã pi'òk no'òk krãnne.

<sup>23</sup> Ê, ba ar amã arê gar ama. Nãm me gwaj bakamy Ximoxi mekbê ijê djârÿm kaba nhym amrê tẽmmã. Gêdja on bõx jabej bar iro'ã wãm tèn bõx ne ar apumÿ.

<sup>24</sup> Nã bãm ar akunõ ama ne. Gora ar ar kute ar ajo ba djwÿnhwãmã ar ijarê. Ne Metîndjwÿnh nhõ me mextire wãmãdjwÿ ar ijarê. Nhym pykabê Itarijkam me kute Jejukôt abeno kamyja ne me ar ajo ama:n ar amã amijarê.

<sup>25</sup> Gê Metîndjwÿnh ukaprikôt ar akunõ djuw mex. Tãm ne ja.



## Xijagu kute memã pi'ôk no'ôk ne ja.

Jeju kamy'ôbê ne Xijagu. Nãm ar aben djâkam nõ nhym Jeju kumrêx kato nhym tûmrãm Xijagudjwÿ Marij kurûm kato. Kute amim Jeju mar kêt ne kam tûmrãm arÿm tu amim mar kumrêx. Birãm Jeju akubyn tînkôt ne tu amim kuma. Ne kam Jeju nhõ me jao ba. Ne kam mebê idjaer kute amim Jeju marjamã pi'ôk no'ôk ne. Nãm prîne memã 'ã karõ ne memã kum,

—Djã nã gãm ar amim Jeju man kam tu arîk ar abamã? Kati, dja gar amim Jeju man kam adjâpênh mexo memã amijo amirît ne. Pidjô ne rôrôk ne bàrio amirît ne. Pidjô mex ne bàri mexo amirît nhym be mÿjja punu ne bàri punuo amirît. Dja gar ja man adjâpênh mexo memã amijo amirît ne.

Kwãrîk wãnh me kute abenã kabên, me kute amimexo àmra, me prõ prãm, me kum nèkrêxbit kînh, kwãrîk wãnh memã wãm nõ. Dja gar mekam adjukaprîo aben pyrâk. Kwãrîk wãnh ar amã me ja kurên amã me ja jabê ne meo aba kêt. Ar ga ar aje Jeju markam dja gar apÿnh adjâpênh mexo memã amijo amirît. Ne Jejumã amingã nhym arÿm ar ajo tÿx gar kam apÿnh adjâpênh mex ar o aba. Nãm ã Xijagu memã ane.

<sup>1</sup> Ba ibê Xijagu. Ibê Metîndjwÿnh nhõ àpênh ne ibê Bënjadjwÿr djwÿnhbê Jeju Kritu nhõ àpênh. Apÿnh me aba djâri abenã akrekam me aba djâbê 12. Me abê idjaer aje amim Jeju mar. Apÿnh me õ pyka'ÿr me abimãnhwã, me amã ne ba ikabên mestire jarên 'ã pi'ôk no'ôk ne. Dja gar inhõ pi'ôkja jarên amijã ikabênja ma.

Apÿnh me kaprî djâri kute meo ba.

Ruk 6.22; Kor 1.11; Idja 12.3; Xij 5.7

<sup>2</sup> Akmere, àpnhîre ar, godja te apÿnh ar akaprî djâri ar ajo ba, ar akanê, nâr ar anhõ mÿjja kêt, nâr ar abê anhõbikwa'õ tyk, nâr me kute ar ajo bikênho ba, godja te apÿnh ar akaprî djâri ar ajo ba. Dja gar kam amim,

—Kati. Kwãrîk wãnh ba kam ikaprî kêt. Dja ba kam ikînhkumrêx, ane. <sup>3</sup> Mÿkam dja gar kam akînh? Bir, dja apÿnh ar akaprî djâri ar ajo ba gar arÿm amim Metîndjwÿnh mar tÿxo aban 'ã adjukanga kêt. <sup>4</sup> 'Ã adjukanga kêt ne arÿm amim mar tÿxo amÿ amikamên arÿm amim mar tÿ:x ne. Ne kam arÿm prîne kum amexkumrêx ne akajgo kêtumrêx. Ja ne gar arÿm aje mar. Kam dja gar akaprîkam akînh.

<sup>5</sup> Ne ar ajamak mexdjwÿ. Godja gar ajõ ajamak mex kêt jabej ajamak bõnho Metîndjwÿnhmã a'uw. Djãm kute 'ã ar amã àkjêrmã? Kati. Dja gar tu kum amijo a'uw. Metîndjwÿnh ne kute me kunîmã amak bõnho ba. Kum amijo a'uw nhym arÿm ar amã ajamak bõ. Dja õdjànne ne arÿm ar amã ajamak bõ gar arÿm kôt ajamak nextirekumrêx.

<sup>6</sup> Dja gar amijo a'uw ne arÿm tu amim kamnhîxkumrêx. Kute ar amã õr kadjy tu amim kamnhîxkumrêx nhym arÿm ar amã kungã. Kwãrîk wãnh amim,

—Kon, dja imã õr jabej. Nâr kon, dja imã õr kêt jabej, anhÿr kêt. Mÿkam? Bir, aje tu amim kamnhîxkumrêx kêtka. Me kute tu amim kamnhîxkumrêx kêtka ne me kute mrãmri ne ngõ pyrâk. Me kute kôk djâbêrkam ngõ djâkã ari: amijadjwÿr pyrâk, kute ari: amijapînh pyrâk. <sup>7</sup> Djãm me kute tu amim kamnhîxkumrêx kêtka Bënjadjwÿr djwÿnh kute memã mÿjja 'õ nhõrmã got? Arkati.

<sup>8</sup> Me kute jām Metīndjwýnh kôt amikabēn jadjwýr ne aje jām mýjja punu kôt amikabēn jadjwýr ari: amikabēn jadjuw. Ne kam arík ba rá'á. Kwārík wānh me kudjwa amim Metīndjwýnh kamnhīx rerekre kêt. Dja gar tu amim kamnhīx tỳxkumrēx.

<sup>9</sup> Be, Jeju kukwakam gwaj baje me'ōo bakamy'ōja dja kajgo jabej djām Metīndjwýnh nokrekam ne kajgo? Kati. Nokrekam rax. Gê amiraxja man arým kīnhkumrēx.

<sup>10</sup> Nhyem be, ar 'ō nhō nêkrēx rax jabej. Djām Metīndjwýnh nokrekam rax? Kati. Metīndjwýnh nokrekam kajgo mexi. Gê te kute amikajgo markam amikam kīnh. Me ō nêkrēx rūnh kute rūnh pyrāk. Dja me mrānhbê kêt ne. Ga, bō rá mex tām kam mjōn rōrōkja pumū. Dja ā me ō nêkrēx rūnh mrānhbê kêtō ane. <sup>11</sup> Bō'ā arngro tỳx apōx ne kōk kangro wabê nhyem totokbê bō arým ngrā nhyem rá arým rōrōk ne. Nhyem kam me arým kum kīnh kêt ne. Me ō nêkrēx rūnhdjwý dja me ō mýjja krāptī jabej katikôt arým ā amijaêrbê kêtō ane.

<sup>12</sup> Dja te apýnh ar akaprī djāri ar ajo ba, akané, nār anhō mýjja kêt, nār ar abē anhōbikwa'ō tyk, nār me ar ajo bikēho ba. Godja te apýnh ar akaprī djāri ar ajo ba gar amim Jeju mar tỳx rá'ā ne 'ā adjukanga kêt. Kam dja gar akīnhkumrēx. Ne kam inomā akaprī mē nhyem Metīndjwýnh arým ar amā akīnh djā ngā. Amrēbê ne me kum abêkumrēx jamā kum,

—Dja te ar akaprī djā kumex ar awýr bōx gar imar tỳx rá'an kam arým ikôt atīn ne ar aba rá'ā: rá'ā ne, ane. Ga, me kute memā me bēnjadjwýr krādjê nhōrkam me kīnhja pumū. Ar gadjwý dja gar amim Jeju mar tỳx rá'ā. Te ar akaprī djā ar ajo ba gar mar tỳx rá'ā nhyem kam arým ar amā akīnh djā ngā gar kôt atīn ne ar aba rá'ā: rá'ā ne.

<sup>13</sup> Ne kam godja me ar ajaxwe'ā ar amā àpnēnh jabej, kwārík wānh gar arík amim,

—Metīndjwýnh ne ijaxwe'ā imā àpnēho dja ba kam kôt ijaxwe, anhýr kêt. Djām me kute axwe'ā Metīndjwýnhmā àpnēnh prām? Kati. Me te kute o anhýr prāmje. Metīndjwýnhdjwý kute gwaj bajaxwe'ā bamā àpnēnh prām kêt kumrēx. <sup>14</sup> Gwaj ba ne gwaj bamā bajaxwe prām kam bajaxwe'ā amim apnēn amim, “Ba 'yr on kam ajmā ikute jabej”, ane. <sup>15</sup> Bamā bajaxwe prām tē:n arým ajmā bakuten arým bajaxwekumrēx. Bajaxwe tē:n kam arým bajaxwe rax ne. Bajaxwe rax ne kam arým ty.

<sup>16</sup> Akmere, àpnhīre ar, kwārík wānh me ar anoo biknor kêt. Imā ar ajabêkam ne ba ar amā ikabēn ja jarē. <sup>17</sup> Metīndjwýnh ne mex ry typdjīn kute axweo amikapêr kār kêt kumrēx. Ga, kute kàjkwakam mýjja nhirā kunī nhipēx nhyem mexkumrēxja pumū. Nhyem kam amrē kute gwaj bamā mýjja kunī nhōrjadjwý mexbit. Kute gwaj bamā bakīnh djā kunī nhōrja prīne mexbit. Metīndjwýnh mex ry typdjī.

<sup>18</sup> Ta kute amijo gwaj bapytār kôt ne arým gwaj bajo kra. Kute gwaj bamā kabēn katàtkumrēx jarēnh kôt arým kute gwaj bajo kra. Kute mrāmri ne me kute bāyogo ja kumrēx djē pyrāk Metīndjwýnh gwaj bakumrēx gwaj bajo kra, ō me ja kunī kukām gwaj bajo kra. Ne kam arým gwaj bamā amak bō gwaj arým badjumar djā ny.

*Me kute Metīndjwýnh kabēn mar kajgo nêje kute me akre.*

<sup>19</sup> Akmere, àpnhīre ar, imā ar ajabêkam ne ba ar amā ikabēn jarē. Dja gar ikabēn 'āno djan ama. Dja me amā amijarēnh prām ar ga dja gar aje me mar prām. Ne amijā akabēn nēn angyrk tō. <sup>20</sup> Mýkam? Bir,

djãm gwaj bangrykkam katàt ar amijo baba? Kati. Metĩndjwýnhmã katàt baje amijo baba kêt-kumrêx.

<sup>21</sup> Kam, dja gar wãnh aje mýjja punuo aba prãm kunĩja kanga. Ar ajaxwe kunĩja dja gar kanga. Godja me ar amã Metĩndjwýnh kabẽn jarẽ, kabẽn kute ar apytãrja jarẽ nhym ar amã wadjã gar akabôt katin tu amim markumrêxo aba. <sup>22</sup> Kute memã me mex'ã karõkam kabẽn djãm ar aje mar kajgomãbit? Kati. Dja gar tu amim markumrêx ne mrãmri katàt kôt amijo abakumrêx. Ar aje mar kajgoo abakam gar amim ajêx ne aminoo abiknoro aba.

<sup>23-24</sup> Be ga, me kute ixekam amikarõ pumũnh ne apõx ne mã mrãnhja pumũ. Ne kam mörbê amikarõo biknoria pumũ. Ar ajõ aje kabẽn mar kajgokam ar aje me urak. Ar aje kabênkôt amijo aba kêt-kam tẽmbê kabẽno akno. <sup>25</sup> Nhym be, me kwý arým kabẽn pumũ. Metĩndjwýnh ne pi'õkkam prĩne katàt me kute amijo ba'ã memã karõ mex nhym me kute kabẽn kôt amijo bakam me ta ne me ar ban umar mex. Me kwý kabẽn ja pumũnho ban 'ã ukanga kêt ne tu markumrêx ne o biknor kêt. Nhym kam Metĩndjwýnh arým memã týx jangijn o djuw mex nhym me umar mexkumrêx.

<sup>26</sup> Ga, me kute mry'ãkrĩo mrãnhmã kute krãdjê djão õto pynênhja pumũ. Me kute amijã kabẽn nê ne me kute mrãmri ne mry'ãkrĩ nhõto pynênh ne kute o mrãnh mex pyrãk. Nãm me mrãmri kute amim Jeju markumrêx. Nhym be, me kute amijã kabẽn'ã ma kêt ne tu kabẽn ba. Djãm me kute amim Jeju markumrêx? Kati. Me ta ne me amim 'êx ne ta aminoo akno.

<sup>27</sup> Gwaj baje mrãmri Metĩndjwýnh, me Babãm djwýnh markumrêxkam mýj ne gwaj kam bakute? Bir, gwaj kam me 'uwtĩmê me bixangrio djuw mexo baba. Me õ mýjja

kêt-kam meo djuw mexo baba. Gwaj ajte Metĩndjwýnhmã amijangri týx ne me kum kĩnh kêtja jaxwe kôt bajaxwe kêt.

## 2

*Me kum me õ mýjja kêtja kĩnh'ã kute memã karõ.*

<sup>1</sup> Akmere, àpnhĩre ar, Bẽnjadjwýr djwýnh Jeju Kritu mexo umati: ga me tu amim markumrêxo aba. Djãm kam ar amã me rũnhbit kĩnhmã? Nhym me õ mýjja kêtja djãm ar amã me kĩnh kêt-mã? Kati. Dja gar amã me kunĩ kĩnho aben pyrãk. Nhym be, djãm mrãmri arým ar amã me kunĩ kĩnho aben pyrãk? Kati. Nã gãm ar amã me rũnh, me umabit kĩnh. Ne kam amã me õ mýjja kêtja kĩnh kêt.

<sup>2</sup> Gar abikprõnh djãkam akuprõ nhym me'õ rax bõx. Kute õ kẽn karýro ikrakam rãx jangjênh, aben nhiby angjênh. Kute õ kubêkã mex jangjênh. Kute prĩne o amijo mex ne arým bõx gar omũ. Nhym kam me'õ nhõ mýjja kêtja bõx. O kubêkã apýnh bikadjõnhja bõx. <sup>3</sup> Ar amã me'õ nhõ kubêkã mex ja pyman kum,

—Ota, me krĩ djã mex. Jakam dja ga nhý, ane. Ne kam me'õ nhõ mýjja kêtjamã kum,

—Wãnh dja ga dja nãr iparbê dja ga pykakam nhý, ane. <sup>4</sup> Djã nã gãm ar amã me kĩnho aben pyrãk? Kati. Nã gãm arĩk amim me'ã karõ punun amijo me utãr punu.

<sup>5</sup> Akmere, àpnhĩre ar, imã ar ajabêkam ne ba ar amã ikabẽn jarẽ. Dja gar amim ikabẽn ja ma. Mýj xêja ne Metĩndjwýnh amijo me utã? Djãm me rũnhbit, me umabit? Kati. Pykakam me kute me'ã, “Me bikênh”, anhýrja, me õ mýjja kêt ja ne Metĩndjwýnh amijo me utã. Nhym kam me arým tu amim mar týxkumrêx nhym kam kute amikôt meo bamã memã arẽ. Me kum abêjamã ne arẽ. <sup>6</sup> Nãm te amijo me õ mýjja kêtja pytã gar amã me kĩnh

kêt nhyam kam me arým pijàm ne. Bir, mýj xêja ne ar ajo bikênho ban ar apa 'amýn me axwe pânharênh djà'ýr ar ajo mrâ? Djâm me ô mýjja kêtja ne me 'ýr ar ajo mrâ? Kati. Me rûnh ne me 'ýr ar ajo mrâ.

<sup>7</sup> Metîndjwýnh kute ar ajo ba ar, dja gar ikabênja ma. Mýj xêja ne Metîndjwýnh japryò ba? Djâm me ô mýjja kêt ja? Kati. Me rûnh ne me aprýò ba. Metîndjwýnh ne mexti:rekumrêx nhyam me aprýò ba.

<sup>8</sup> Metîndjwýnh ne arým me bakukâmâremâ 'ã karôn memâ kum,

“Me amâ amibu'ã me ja jabê. Kute mrâmri ne ga me amâ amijabêja pyrâk dja ga me ã amâ amibu'ã me ja jabêo ane.”

Nâm ã me bakukâmâremâ ane nhyam me arým 'ã pi'ók no'ók ne. Kabên kukràdjà ja ne mexo kute kukràdjà kuní jakrenh. Dja gar kabên ja mar týx ne amâ amibu'ã me kuní jabê. Ne kam arým amexkumrêx. <sup>9</sup> Godja gar amâ me ô mýjja kêtja kính kêt ne amâ me rûnhbit kính jabej. Djâm kam amâ abu'ã me kuní jabêkumrêx? Djâm Metîndjwýnh kukràdjàja kôt amâ me abêkumrêx? Kati. Gar kam amikrân arým ajaxwe.

<sup>10</sup> Be, Metîndjwýnh me kute katàt amijo ba'ã kute memâ karòkôt apýnh kukràdjà. Dja gar kam kukràdjà kuní mar týx ne kôt ar amijo aba. Ne kam kukràdjà pydjibit mar kêt ne kôt amijo aba kêt. Djâm kam ajaxwe ngri got? Kati. Aje ja pydjibit mar kêt kam ajaxwe rax kute mrâmri ne aje kukràdjà kuní mar kêt kam ajaxwe rax pyrâk.

<sup>11</sup> Ga, Metîndjwýnh kute me bakukâmâremâ kum,

“Kwârîk wânh abenbê prô, mjêno adjâkính kêt”, anhýrja ma.

Ne aje kute me bakukâmâremâ kum,

“Kwârîk wânh me par kêt”, anhýrja ma.

Godja ga kukràdjà kôt mebê prô'ýr amrân kêt ne kam me'ôn bîn arým o ajaxwe. Te mebê prô'ýr amrân kêt ne arým ajaxwe. Aje me'ôn bînkam ga kukràdjà mar kêt ne arým kam ajaxwe.

<sup>12</sup> Metîndjwýnh ne pi'òkkam prîne me kute katàt amijo ba'ã memâ karò mex. Nhyam kam me kwý arým kute markumrêx nhyam Metîndjwýnh arým memâ týx jangij. Nhyam kam arým katàt kabên kôt ar amijo ban umar mex ne ta arek mekôt ar ba. Dja gwaj kabên ja man kôt ar amijo baba. Gêdja í Metîndjwýnh gwaj bakukjêro nhýn gwaj bamâ,

—Djã ne ga ikabên ja markumrêx ne kôt ar amijo aba? ane gwaj amikôt kum amijarê. Godja gwaj kukràdjà kôt amijo baba kêt nhyam arým gwaj bamâ axwe jarê. Kute ren gwaj bamâ axwe jarênh karò dja gwaj kukràdjà kôt amijo baba mex.

<sup>13</sup> Nâr, dja gwaj bajò bamâ me kaprî kêt nhyam Metîndjwýnh arým amipân kum gwaj bakapri kêt ne tu katàt gwaj bamâ bajaxwe pânharênhkumrêx. Nâr, dja gwaj badjukapri kumrêx ne kam arým bamâ Metîndjwýnh pýma kêt ne arým bakínhkumrêx.

*Djâm me kum me kaprî kêtja Metîndjwýnh kute me utâr?*

<sup>14</sup> Akmere, àpnhîre ar, dja gwaj bamâ me kaprî kêt ne atekam ajte memâ kum,

—Ba ne ba tu amim Metîndjwýnh markumrêx, anhýro baba. Djâm kam Metîndjwýnh kute amim gwaj bapytâr ne kute ar gwaj bajo bamâ? Djâm gwaj bajajkwa kajgokam bakabênbit ne kam bamâ me kaprî kêt nhyam arým kute amim gwaj bapytâr ne kute ar gwaj bajo bamâ? Kati.

<sup>15</sup> Godja gwaj baje me'ôo bakamy nâr o bakanikwýnh, ô kubêkà kêt

ne kum prām. <sup>16</sup> Gwaj kam kum mỳjja'ō nhōr kêt ne kum,

—Gora gē Metīndjwỳnh ajo djuw mex ga adjumar mex ne amā kry kêt ne ajajne, ane. Djām ja ne mex? Kati. Gwaj baje kum mỳjja'ō nhōr kêt kam ne kajgo.

<sup>17</sup> Mỳj ne gwaj baje kam mar? Bir, dja gwaj bamā me kaprī kêt ne kam memā kum,

—Ba ne ba tu amim Metīndjwỳnh markumrēx, ane. Djām mrāmri bakabēn? Kati. Ga, me arỳm tykkam kute amingrēk kêt ne kajgoja pumū. Gwaj badjwỳ bamā me kaprī kêt kam bakajgo.

<sup>18</sup> Godja me'ō amā,

—Ē, ga ne ga we aje Metīndjwỳnh mar. Ba ne ba imā me kaprīn ije memā mỳjja nhōro iba. Goja gu baje tu amim Metīndjwỳnh markumrēx jabej aben kabī. Ga amā me kaprī kêt kam dja ba te apumūn amim, “Kon. Kute Metīndjwỳnh mar kêt pyrāk”, ane. Bajbit dja ba imā me kaprīn memā mỳjja nhōro iba ga arỳm ipumūn ijā amim, “Be, djām mrāmri tu kute amim Metīndjwỳnh markumrēx. Ga, ukaprīn kute memā mỳjja nhōrja pumū”, ane. Ga kam arỳm ipumū. Ba tu ije amim Metīndjwỳnh markumrēxa pumū. Dja ā me'ō amā ane.

<sup>19</sup> Be, ga ne ga we aje Metīndjwỳnh rax markam memā kum,

—Metīndjwỳnh pydjibit. 'Ōdjwỳ kêt kumrēx, anhỹro aba. Be, mrāmri. Djām gajbit aje Metīndjwỳnh rax mar? Kati. Xatanaj nhō me karō punudjwỳ kute Metīndjwỳnh rax mar ne kam ajte kum me kaprī kêt ba. Ne kute rax markam abenmā kum,

—Metīndjwỳnh pydjibit. 'Ōdjwỳ kêt kumrēx, anhỹro ba. Ne kam tu umaje terte:t.

<sup>20</sup> Kē, ano kêt, mỳkam ne ba te ar amā,

—Dja ga memā kum, “Ba ne ba tu amim Metīndjwỳnh markumrēx”, anhỹro aban amā me kaprī kêt ga mrāmri akajgokumrēx. Ga, me arỳm tykkam kute amingrēk kêt ne kajgo nōrja pumū. Gadjwỳ ne ga ā akajgoo ane. Mỳkam ne ba te ar amā ja jarē gar imar kêt?

<sup>21</sup> Dja gar me bakukāmāre Abraão man kêt ije ar amā arēnhja ma. Djām Abraão kute amim Metīndjwỳnh mar kajgo? Kati. Nām tu amim markumrēx ne kam kabēn kôt amijo tē. Nām kabēn kôt Metīndjwỳnh nhō kikam kra Idjak djin bit kute bīn 'ỳr. Nhym Metīndjwỳnh Abraão pumūn arỳm amim,

—Mrāmri ne Abraão imā axwe kêt ne mex, ane.

<sup>22</sup> Ga, Abraão kute tu amim markumrēx ne kam kute kabēn kôt amijo tēmja pumū. Nām kabēn kôt amijo tēn kam arỳm tu amim Metīndjwỳnh mar mexkumrēx ne. <sup>23</sup> Kam ne me aben djō'ā Abraão jarē:n arēnho mōr tāmtā nhym kam arỳm Mōjdjē katon arỳm abatānh ne. Ne kam arỳm me bakukāmāremā kum,

“Abraão ne tu amim Metīndjwỳnh markumrēx nhym arỳm kum axwe kêt jarē nhym arỳm kum mex”, ane.

Ne kam pi'ōkkam no'ōk ne. Be, mrāmri ne kôt arēnhkumrēx. Nām arē nhym me aben djō'ā abenmā kum,

—Mrāmri ne Metīndjwỳnh Abraão ōbikwakumrēx, ane.

<sup>24</sup> Ga, me kute tu amim markumrēx ne kam kute kabēnkôt amijo bakam Metīndjwỳnh arỳm kute memā axwe kêt jarēnhja pumū. Djām me kute mar kajgokam Metīndjwỳnh kute memā axwe kêt jarēnh? Kati.

<sup>25</sup> Me'ō nire kuprỳ Rabadjwỳ. Djām Rabe kute Metīndjwỳnh mar kajgo? Kati. Nām tu amim markumrēx ne kabēn kôt amijo tē. Nhym kam arỳm kum axwe kêt

jarê. NhyM Djodjuwe kute ar anor-jadjwÿ Rabe kum ar kaprîn arÿm arkum aminhûrkwâ jarê. Arkum arên arÿm ar kurê djwÿnhbê arkum atemã pry 'ô jarê. NhyM kam ar umar mex ne akubyn 'ã môn bôx. Nãm ã Rabe kum ar kaprîo ane nhyM Metîndjwÿnh arÿm kum axwe kêt jarê.

<sup>26</sup> Be, tãm ne ja. Me tyk arÿm karô biknorkam kute amingrêk kêtumrêx ne arÿm kajgo. Gwaj badjwÿ. Gwaj baje Metîndjwÿnh kabên mar kajgon kôt amijo baba kêtam ne kam baje memã kum,

—Ba ne ba tu amim Metîndjwÿnh markumrêx, anhÿrkam arÿm bakajgo. Bakajgo kute mrãmri ne me tyk kajgo pyrâk.

### 3

*Me ôto djujabê kêt'ã ujarênh.*

<sup>1</sup> Akmere, àpnhîre ar, ar akrâptî ne gar aje amijo memã kukràdjâ'ã adjujarênh djwÿnh prãm. Djãm kam mex? Kati.

Mÿkam ne mex kêt? Bir, gwaj bakunî bakabên kwÿ kajgo. Gwaj bakabên kajgokam bamex kêt. Ga ren ar abê memã ujarênh djwÿnh kêt ne ren akabên kajgo ren gajbit amex kêt. Me krâptîmã adjujarênh kêtam ga ren gajbit amex kêt. NhyM be, kati. Ar akabên kajgo'ã memã adjujarênhkam me krâptî arÿm ar akabên man arÿm ar adjô'ã mex kêt. NhyM kam Metîndjwÿnh arÿm pãnh ar amã ajaxwe rax jarê.

<sup>2</sup> Me bakunî bakupãnhã bakabên kajgo kumex. Godja ren me'ô kabên kajgo kêtumrêx jabej ren prîne kute katât amijo ba kadjy mex.

<sup>3</sup> Ga, me kute mry'âkrîo mrãnhja pumû. Nãm me kute krâ djên ajkwa katikôt kàxiràx jadjuw ne ari o krâ kukênhô mrã. Ga, te mry rûnh nhyM me kute ajkwakôt ar krâ kukênhô mrãnhja pumû.

<sup>4</sup> Ga, me kutê tekrekam no'i kryreo kà rûnhô baja pumû. Nãm

te kà rûnh nhyM te kôk djâbêr tÿx nhyM me tekrekam no'i kryreo unênh ne o krâ kukênh o baja pumû.

<sup>5</sup> Me banhôto kute kà tekrekam no'i pyrâk. Me banhôto te kryre gu me o mÿjja rûnhô amra. NhyM kuwy kryredjwÿ. Ga, te bà rûnh nhyM me kute kuwy kryreo kunîmã angjênhja pumû.

<sup>6</sup> Me banhôto ne kute kuwy pyrâk, kute bãmã angjênh pyrâk. Apÿnh me axwe djâri kunîkôt ne gu me banhôtoo arên arÿm ipêx. Me banhî katikôt ne me banhôto ikwã. Ne kam kute prîne me bajo punu prãm. Me banhôtoo bakabênja ne tu apÿnh mÿjja kunîo tuknîn o punu. Kute mrãmri ne kuwy kryre kute bãmã angjênh nhyM mÿjja kunî xêtja pyrâk. Me axwe nhô bēnjadjwÿr ja ne kute me banhôtoo krî djwÿnh.

<sup>7</sup> Me kute mÿjja krâptî djujabê. Mry, àk, kwênh, mry ngângão mrãnh, ngônham mÿjja, mÿjja krâptîja ne me kute ujabê. <sup>8</sup> NhyM be, me banhôtoo bakabênja pydjibit ne kute mrãmri ne mry djujabê prãm kêt pyrâk. Me banhôtoo bakabênkam bajamakkre kêt ne bajaxwekumrêx. Me banhôtoo bakabên kute me parkumrêx, kute mrãmri ne udjy rûnh kute me par pyrâk.

<sup>9</sup> Me banhôtoo ne gu me baje Metîndjwÿnh, me Babãm djwÿnhmã mextire jarênh ne atekam ajte o baje abenmã bakabên punu jarênh. Kute amipyrâk ne Metîndjwÿnh me banhipêx. Kute me bajo amipyrâk ne me banhipêxkam ne gu me baje abenmã bakabên punu jarênh. <sup>10</sup> Ne kam bajajkwakôt memã bakabên mexmê bakabên punuo aben nhikjên memã arê. Akmere, àpnhîre ar, gu me ren ã memã anhÿr kêtumrêx.

<sup>11</sup> Djãm inore 'ôkôt ngô djãnhmê ngô djÿ kute aben nhikjên apôx?

12 Nār, djām pidjôbê pigêre'ã oriwêre djô arij? Kati. Nār, djām akrô'ã pigêre djô arij? Kati. Ne ngô nhinore'ôkam kadjwanhî ne arým akryja djām kam ngô djānh apôx? Arkati. Axikôtbit mýjja apôx. Kwārîk wānh gu me memã bakabên mexmê bakabên punuo aben nhikjên memã arēnh kêt.

*Me krã mex'ã ujarēnh.*

*Gar 5.16*

13 Ar ajô we akrã mex ne we aje me kukrãdjã kunî mar. Goja mrãmri akabēnkumrêx jabej on katât amijo aban amijo adjāmra kêt. Ne kam arým akrã mex. Kam dja me arým apumû. Akrã mexkôt apumû. 14 Nhym be, ga ne ga anhökre kadjwýnhbê angryk. Me'ô nhô mýjja'ã angryk. Ne arax mýr jabej akadjwýnhbê adjãkrê. Ne kam 'ã amijo amra. Djām ja ne mex? Djã ne ga katât ar amijo aba? Kati. Ga ne ga ate amijo aba. Kam kwārîk wānh 'ã amijo adjāmra kêt ne arîk amim ajêx kêt.

15 Djām akrã mex ne ja? Djām kãjkwakam Metîndjwýnh we kute amã ja jarēnh? Kati, atemã. Pykakam me ar ba ne me kute amã wã jarēnh. Me kum Metîndjwýnh kînh kêtja kôt akabên ne ja. Xatanaj ne kute amã wã jarēnh. 16 Mýkam? Bir, me'ô nhô mýjja'ã angrykkam ne arax mýr jabej adjãkrêkam ne ga akangati. Akangatimê apýnh me axwe djãrimê akam apôx.

17 Nhym be, kãjkwakam Metîndjwýnh kute gwaj bamã bakrã mex jadjãr gwaj bakabên mexkam gwaj baje amikam bajaxwe'ô mar kêt.

Ne badjumar mex prãm.

Ne memã baprîn memã bakabên.

Ne bajamak mex.

Ne badjukaprikkumrêx ne baje mrãmri ne pidjô djô mex ne ô kumex pyrãk.

Ne bamã me ô mýjja kêtme me rûnh jabêo aben pyrãk.

Ne bajêxnhi kêt ne mrãmri tu amim Jeju markumrêx.

18 Me kute aben nêje me kukrã ne akrãnmã memã arēnh ba ja ne me memã arēnh ba nhym me arým ajmã kute kêt ne katât ar amijo ba. Me kute mrãmri ne pidjô djô mex ne ô kumex pyrãk.

## 4

*Me kute amidjwýnhbito kînhja ne Metîndjwýnhmã à'wýr punu.*

1 Mýj ne ga me aman arým abenwýr aprôt ne aben tako aba? Bir, me aje amim 'ã karô djãkam amã apýnh me'ô nhô mýjja pro prãm ne 'ã angryk aba. Ne kam ã abeno anhÿro aba. 2 Me amã mýjja kînh ne aje bit byrmã nhym me me abê aptã ga me byr kêt. Byr kêt ne arým me kupa. Aje 'ã angryk ne te aje byr prãmje. Ne kam aje 'ã aben tak ne abenwýr aprôt ne kam aje byr kêt rã'ã ne. Mýkam ne ga me aje byr kêt? Bir, me aje Metîndjwýnhmã o adjã'wýr kêt kam.

3 Nār, me aje Metîndjwýnhmã o adjã'wýr jabej nhym kute me amã ôr kêt. Mýkam? Bir, me aje o adjã'wýr punukam. Mýj ne aje o adjã'wýr punu on? Bir, me aje bit byrmã ne aje bit o amidjwýnhbito kînh prãm. Aje amidjwýnhbito kînh prãm kam aje mýjja Metîndjwýnhmã adjã'wýr punukumrêx.

4 Metîndjwýnh ne arým kute ar ajo ô me jakam ga ren ar amã Metîndjwýnh kînhkumrêx. Nhym be, kati. Me kum Metîndjwýnh kînh kêt kukrãdjã punuja ne gar amã kînh rã'ã. Aje mrãmri ne me kum prô djwýnh kînh ne kam jãm kum krô'ã prô kînh pyrãk. Nār, aje mrãmri ne me kum mjên djwýnh kînh ne kam jãm kum krô'ã mjên kînh pyrãk. Amã Metîndjwýnh kînh ne kam jãm amã me kum Metîndjwýnh kînh kêt

kukràdjà punuja kīnh. Nā gām ar kam ari akabēno aben nhikjê. Dja gar amā me kukràdjà punu kīnh rā'an arým amijo Metīndjwýnh kurê djwýnh.

<sup>5</sup> Amrêbê: ne me memā kum,

—Metīndjwýnh Karō kute me bakadjwýnhbê amijo kajkep ne te arek kum me bajo ba prāmje. Te arek kum me bajo ba prāmkam arým ngryk 'yr.

Nām me ā me bakukāmāremā ane nhyim me arým 'ā pi'ók no'ók ne. Djām me kabēn kajgo got?

<sup>6</sup> Ajmā gwaj bakuten bajaxwe prām. Nhyim be, Metīndjwýnh ne kum gwaj bakaprīn gwaj bajaxwe kêt kadjy gwaj bamā tỳx jangij gwaj ajmā bakute kêt. Amrêbê: ne ujarēnh djwýnh me bakukāmāremā kum,

“Me kute amijo àmra prāmja Metīndjwýnh arým mebé aptà.

Nhyim be, me kute amijo ngriren amijo kàtāmja Metīndjwýnh tu kum me kaprī.”

Nām ā me bakukāmāremā ane nhyim me arým 'ā pi'ók no'ók ne. Ga, kum me bakaprīja pumū.

<sup>7</sup> Kum gwaj bakaprīkam dja gar akrānmā Metīndjwýnh kabēn man kôt ar amijo aba. Ar Xatanajbê aptà nhyim arým ar abê prôt ne.

<sup>8</sup> Dja gar Metīndjwýnh man kôt amijo ajkamē nhyim arým amipānh ar aman ar awýr amijo ajkamē. Ar ajaxweja, on ajaxwe krātan amex kute mrāmri ne me aminhikra punu pōnh nhyim arým mex pyrāk. Ar aje amijo Metīndjwýnh mar ne jām ajaxwe prāmja, on aje amim ajaxwe'ā karōja krātan adjumar djà mex ne. <sup>9</sup> Ajaxwe prāmkam on adjumar punun on muwn kôt amra. On akeket krātan muwn on akīnh krātan adjumar punu:re ne. Ā ajaxwe prāmkam amijo ane.

<sup>10</sup> Dja gar Bēnjadjwýr djwýnh rax man arým amijo angrin amijo

akātām. Nhyim kam arým kāmā akamē.

<sup>11</sup> Akmere, àpnhīre ar, kwārīk wānh abenā akabēn punu kêt. Metīndjwýnh ne arým gwaj bamā kukràdjà jarēn gwaj bamā, “Djā gām me amā aben jabê”, ane. Kute gwaj bamā kabēn ja jarēnhkam gar atekam akamy'ā akabēn punu jarēn 'ā axwe nhō. Mýj ne gar arým aman ā akamy'ā akabēn punuo ane? Bir, gar amim,

—Metīndjwýnh kukràdjà ja ne mex kêt, anen arým akamy'ā ar akabēn punu. Ne kam arým o Metīndjwýnh kabēn'ā punu jarēn arým mar kêt ne kôt amijo aba kêt. Ne aje Metīndjwýnh kukràdjà'ā punu jarēnhbit.

<sup>12</sup> Djām we ar abê mýjja ne gar amibu'ā me'ā axwe janhōro aba? Metīndjwýnh pydji ne arým me kute katāt amijo ba'ā memā karō nhyim me arým kabēn ma. Ta dja me utār jabej nār meo biknor jabej nhyim me arým me biknor tokry djākam biknor jabej. Atemā me'ō kute meo anhýr kêtumrēx. Kam ar ga aka-jgon kam me'ā axwe janhōr ar o aba.

*Me amikukām amijo àmra ne kute amijarēnh nēje kute me akre.*

<sup>13</sup> Ar aje amijo adjāmratija, ikabēn 'āno djan ama. Aje Metīndjwýnh mar kêt ne amijo adjāmtrakam ga we memā kum,

—On ne nār kryrām dja ba krī wāmā tēn bōx ne ije amim pi'ók kaprī kumexo atommā. Be, dja ba kam pi'ók kaprī pānh mebé mýjja jamýn amū memā ōro ikrī. Ne o ikrī:n arým pānh inhō pi'ók kaprī kumexo atom. Ne o ikrī: nhyim arým ijā amexmē na apēx. Ba kam arým akubyn tē, ane. Gar aje memā ā amijo adjāmrao anhýrja gora ikabēn 'āno djan ama. <sup>14</sup> Dja ar ajā akati nhyim mýjja ajmā ar ajo gar aje mar kêtumrēx. Atīn tē:n atīn nhitep djà ne kute mrāmri ne



kakūm ba pyrāk. Kakūm ba:n kam arým me aêrbê kêt ne tu kâjkwa mē bimrâkkumrêx ne. Nâm ā atīn tē:n me aêrbê tu akêto ane.

<sup>15</sup> Kwârîk wānh ā memā amijo adjāmrao anhÿr kêt. Ga ren ar Metîndjwÿnh man ren memā kum,

—Metîndjwÿnh kute amim ijā karō kôt dja ba itīn ne ar iba rā'ā jabej. Ba kam arým krī 'ôkam itēm jabej. Nâr atemā idjâpênh jabej, ane. Ga ren ar ā memā anen arým ar amex.

<sup>16</sup> Nhym be, kati. Gar Metîndjwÿnh mar kêt ne amikam akīnh kadjy amijo amra. Aje ā amijo adjāmrao anhÿrkam ne ajaxwe. <sup>17</sup> Metîndjwÿnh ne arým ar amā amrānh mex'ā karō gar arým aje mar. Dja ga mar kajgon kôt amijo aba kêt ne arým ajaxwe.

## 5

*Me ò nêkrêx rûnh kute amid-jwÿnhbit mar.*

*Mat 13.22; Ruk 12.15; Xim k 6.6; Ap 18.15*

<sup>1</sup> Me rûnhmā ne ba memā kum, —Ê, me anhō nêkrêx rûnh, ba me amā arê. Dja apÿnh me akaprī djâri me awÿr bôxkumrêx. Me akaprī ra:x kukām dja ga me on muwn amra.

<sup>2</sup> Mÿkam? Bir, dja me anhō nêkrêx rax arým me abê rerekre ne. Te me anhō kubêkà mex nhym kâpotire arým prīne me abê apôk ne. <sup>3</sup> Dja prīne me abê anhō mÿjja 'ôk ne me abê amijo ajkê. Me anhō kên karÿmê anhō kryt jaka dja prīne me abê punure. Nhym me kunī arým me anhō mÿjja punu pumûn me ajā abenmā kum, “Be, omû. Djām tâmwā mex got?” ane. Nhym kam Metîndjwÿnh arým me amā ajaxwe pānh jarê ga me atokry:. Atokry kute mrāmri ne kuwy'ā me xêtkam me tokry pyrāk. Be, mÿj kadjy ne ga me amim anhō nêkrêx rûnho atom nhym kumex? Djām we me aje amijo rûnhmā? Kati. Me kute aminhinomā amimênh

djâ nhō akatikam dja Metîndjwÿnh me amā ajaxwe pānh jarê ga me atokry:.

<sup>4</sup> Ê, akubyn amijo tēn amima. Ga me ajêx ne anhō âpênhmā kum, “Dja gar inhō bâyogogo djê pa ba kam ar amā o pānh”, anhÿro aba. Nhym me ê pa, ga me ate kam arým memā o pānh kêt. Tām dja ga me akubyn amijo tēn ama. Djām Metîndjwÿnh kute me amar kêt got? Kati. Ê, me kute me amā ê kajgoja kum amijo akij ne kum, “Dja ga ijo angryk”, ane nhym arým me kuma. Metîndjwÿnh ne me krâpti:o ban memā Bēnjadjwÿr djwÿnh. Uma:kumrêx ne arým me kute kum amijo âkjêrja ma.

<sup>5</sup> Me ga ne ga me prīne amijo djuw mexo aban abixaêr tÿ:xo aba. Aje mrāmri ne mry nhÿpti kute ate krān âkurbit mar nhym me kute myt tâmkam par pyrāk. On dja Metîndjwÿnh me ajaxweo pānh ne. <sup>6</sup> Ga me arým aje me kute katât amijo bakumrêxmā axwe jarênh ne aje me par nhym me kute aminêje me abê âptâr kêtumrêx. Tām dja ga me akubyn amijo tēn ama. Nā bām ā me nêkrêx rûnh kute Metîndjwÿnh mar kêt kam memā ane.

*Me kute amiwÿr Bēnjadjwÿr djwÿnh jamâr 'iry-mā.*

<sup>7</sup> Nhym be, akmere, âpnhÿre ar, gwaj baje Metîndjwÿnh markam me kute gwaj bajo bikênhkam, mÿj dja gwaj amim arênh kuma? Bir, dja gwaj amim,

—Bēnjadjwÿr djwÿnh dja bôx ba kôt dja, ane. Bēnjadjwÿr djwÿnh bôx gwaj kôt baku'êja dja gwaj kuma. Ne kam akrānmā amiwÿr amâr 'iry:n 'ā badjukanga kêt. Ga, pur kre djwÿnh kute pur kreja pumû. Ne kam djwÿ mex jamâr 'iry:ja pumû. Nhym kam kum ngo nhym arým na bixadjwÿr mex ne. Nhym kam djwÿ arým apôx ne 'y tÿx ne. <sup>8</sup> Dja gar kudjwa akrānmā amiwÿr Bēnjadjwÿr djwÿnh jamâr 'iry:n 'ā

adjukanga kêt. Mÿkam? Bir, arÿm bôx 'ÿr gwaj kôt baku'é 'ÿr.

<sup>9</sup> Kwârîk wân̄h abên prîkam abenâ akabên kêt. Mÿkam? Bir, Metîndjwÿnh kute pân̄h ar amâ ajaxwe jarên̄h karô. Kwârîk wân̄h abenâ anhÿr kêt. Memâ axwe pân̄h jarên̄h djwÿnh arÿm bôx 'ÿr.

<sup>10</sup> Ga, me bakukâmâreja ma. Metîndjwÿnh kukwakam ujarên̄h djwÿnhja ma. Bênjadjwÿr djwÿnh kukwakam ne me memâ ujarên̄h ar ba nhym me 'ã ari meo bikên̄ho ba nhym me amitokry maro ba. Nâm me te meo anhÿro ba nhym me akrân̄mâ amiwÿr Metîndjwÿnh jamâr 'irdyn 'ã ukanga kêt. Dja gar me kudjwa ã amiwÿr amâr 'iryane.

<sup>11</sup> Nâm me te meo anhÿro ban te mebê Metîndjwÿnh kurêo ba nhym me Metîndjwÿnh'ã ukanga kêt kumrêx. Me ja ne me kînhkumrêx. Ja ne gar aje arÿm mar. Arÿm ne gar Djo'ã ujarên̄h ma. Me bakukâmâre Djo te amitokry kumex maro ban amim Bênjadjwÿr djwÿnh mar'ã ukanga kêt kumrêx. Ne kam arÿm tokry mar'ã aminhinomâ amimê nhym Bênjadjwÿr djwÿnh arÿm o djuw me:xkumrêx. Tãm dja gar ama. Ga, Bênjadjwÿr djwÿnh kum me kaprî:kumrêxja pumû.

<sup>12</sup> Akmere, àpnhîre ar, ar aje memâ akabên jarên̄h nhym me kute amar pydji kadji djâm aje kam kôt Metîndjwÿnh nâr ô mÿjja'ô jarên̄hmâ? Kati. Kwârîk wân̄h aje memâ akabên pydjîn arên̄hkôt memâ kâjkwa jarên̄h kêt. Kwârîk wân̄h aje memâ akabên pydjîn arên̄hkôt memâ pyka jarên̄h kêt. Memâ ar akabên pÿnhbit ne arê. Aje mrâmri mÿjjao anhÿrmâ. Kam-bit memâ kum, “Nâ. Dja ba ã o ane”, ane. Nâr, aje mÿjjao anhÿr kêt mâ. Kambit memâ kum, “Kati. Dja ba o anhÿr kêt”, ane. Jabit memâ arê. Memâ akabên pÿnhbit ne arê. Kwârîk wân̄h memâ akabên

jarê ne me kute ar amar pydji kadji kôt memâ apÿnh mÿjja jarê kêt. Metîndjwÿnh ren ar amâ ar ajaxwe jarê.

*Me kute aben mar ne Metîndjwÿnhmâ abeno à'wÿr.*

<sup>13</sup> Dja gar ajô akaprî jabej Metîndjwÿnhmâ amijo a'wÿ. Nâr, ar ajô akînhkumrêx jabej angrerkam kum amikînh jarê.

<sup>14</sup> Djâ ne ar akam me'ô kanê? Gê amiwÿr me kute Jeju nhô me jao ba djwÿnh 'wÿn amiwÿr aro bôx. Gê ar Metîndjwÿnhmâ o a'wÿn arÿm Bênjadjwÿr djwÿnh kukwakam kangôo kungrâ. Kangô kute rôn̄y kangô pyrâkjao kungrâ. <sup>15</sup> Ne Bênjadjwÿr djwÿnh kute me'ô kanêjao mexmâ tu amim kamnhîxkumrêx ne kum o a'wÿ nhym arÿm ar kabênkôt o mex ne kum tÿx jadjâ. Amrêbê kute àpên̄h jaxweo ba jabej dja arÿm axwe maro aknon kam ngryk kêt ne.

<sup>16</sup> Dja gar ajaxwe'ôkam akaprî'n 'ã abenmâ amikôt amijarê. Ne kam Metîndjwÿnhmâ abeno a'wÿ nhym arÿm ar ajo mex. Godja gwaj bajaxwe kêt jabej ne kum badjà'wÿr jabej. Ne badjà'wÿr'ã batÿx ne 'ã badjukanga kêt jabej nhym kam Metîndjwÿnh arÿm gwaj bakabên kôt àpên̄h rax.

<sup>17</sup> Be, djâm Erijbê wajanga? Kati. Erij umar kute mrâmri ne gwaj badjumar pyrâk. Ne kam Metîndjwÿnhmâ kâjkwa ngrâ'ã à'wÿr tÿxkumrêx. Nhym arÿm kôt namê amexkam kâjkwa ngrâbit. Ne ajte namê amexkam kâjkwa ngrâ ne. Ne ajte namê amexkam tãm ne. Ne ajte nakam kâjkwa ngrâ ne. <sup>18</sup> Ne kam ajte kum na'ã a'uw nhym kabên kôt ajte na axidjuw. Axidjuw nhym kam djwÿ ajte ingrôt. Dja gwaj ã Metîndjwÿnhmâ badjà'wÿro ane nhym ã gwaj bakabênkôt àpên̄h raxo ane.

<sup>19</sup> Akmere, àpnhîre ar, gêdja ar akam me'ô Metîndjwÿnh kabên

katàtja bê ate amijo ba jabej. Nhym me'õ akubyn Metĩndjwỳnh'ỳr o akẽx jabej. <sup>20</sup> Mỳj dja kute arỳm 'ỳr o akẽxkam kuma? Bir, me'õ kute akubyn 'ỳr o akẽxja ne axwebê utà nhym Metĩndjwỳnh arỳm me biknor tokry djàbê utàn kam kum apỳnh axwe djàri krãptĩ akno.

## Pedru kute memã pi'ôk kumrêx no'ôk ne ja.

Jejukôt ba djwÿnhbê Pedru ne mebê idjaer kute amim Jeju marjamã pi'ôk no'ôk ne. Ar ja ne ar apÿnh pykakôt ajmã nhym me Jejukôt aro ajkê ne. Nhym kam Pedru kute aro tÿx ne o kÿnhmã arkum pi'ôk no'ôk ne. Ne arkum,

—Mrãmri ne gwaj pykajabê babari Jejukôt batokry. Te batokry gwaj Jeju'ã bangrà tÿx. Arÿm gwaj bakutêp gwaj bakÿnh djã dji. Gwaj Jeju'ã amijakren kudjwa te batokryn tu amikajmãtã Jeju kamnhÿx ne bakÿnh. Nãm ã Pedru arkum ane.

<sup>1</sup> Ibê Pedru. Jeju Kritu ne ijano ba memã 'ã idjujarênh ar iba. Ba ne ba pi'ôk no'ôkkam ar amã ikabên jarê. Amrêbê gar apÿnh me ô pykakôt aben bê abingrãnhja nhym me kute ar ajo me bajtemo baja ba ar amã ikabên. Pykabê Pôtukam, Garaxakam Kapadôkam, Adjijkam, Bixinijkam, ar aben bê abingrãnhja, ba ar amã ikabên jarê.

<sup>2</sup> Metÿndjwÿnh, me Babãm djwÿnh arÿm amijo ar apytã. Amrêbê: mÿjja kunÿ kator kêtri amijo ar apytã. Kute prÿne amikukãm mÿjja kunÿ markam amijo ar apytã. Karô ne ar ajo mexo ba gar arÿm kôt amextiren ajmã akute kêt ne ar aba. Ne kam katãt Jeju Kritu kabên man kôt ar amijo aba. Amrêbê: ne me bakukãmãre mry kamrô me kaprêk nhym Metÿndjwÿnh arÿm me axwe maro aknon mekam ngryk kêt ne. Jakamdjwÿ arÿm Kritu pÿte'ykam ty nhym kamrô prôt. Kam ne Metÿndjwÿnh arÿm ar ajaxwe maro aknon ar akam ngryk kêt.

Gê tu kum ar akaprÿ:kumrêx\* gar adjumar mexo amÿ amikamên arÿm adjumar mexkumrêx ne.

*Mÿj ne me kute amiwÿr kamnhÿxmã?*

*Rô 8.29; Ep 1.4; A Xim 1.9; Ped k 2.9*

<sup>3</sup> Ba Metÿndjwÿnhmã mextire jarê. Metÿndjwÿnh ne ra:xkumrêx. Kubê Bênjadjwÿr djwÿnhbê Jeju Kritu Bãm. Ta ne ukaprÿ ra:xi. Ukaprÿ raxkôt ne arÿm gwaj bamã amak bô. Ga, me nã kurÿm apôxkam me umar djã nyja pumÿ. Metÿndjwÿnhdjwÿ ne gwaj bajamak bô gwaj arÿm badjumar djã nyn kam bamã katãt amijo baba prã:m ne bamã Metÿndjwÿnh kÿ:nhkumrêx. Jeju Kritu tyk ne akubyn tÿnkam ne arÿm gwaj bamã bajamak bô gwaj arÿm badjumar djã ny. Kute gwaj bamã bajamak bônham gwaj tu 'ÿr babôxmã kamnhÿxkumrêx. Dja gwaj 'ÿr bôx ne kôt ar baba rã'ã: rã'ã ne. <sup>4</sup> Nhym kam arÿm gwaj bamã mÿjja mexti:re ngã, gwaj bamã mÿjja kume:x ngã. Djãm mÿjja rerekãmã? Kati. Djãm punumã? Kati. Mÿjja mex rã'ã: rã'ã ne. Kãjwa djwÿnhkam ne arÿm ar amã kudji.

<sup>5</sup> 'Itÿxo Metÿndjwÿnh kute mã amim ar apytãr mex ne ar ajo ba. Gar tu amim markumrêx nhym kute mã 'itÿxo ar apytãr mex ne ar ajo ba. Dja mã amim ar ajo ba: nhym me kute aminhinomã amimênh djã nhô akati arÿm bôx. Bôx nhym arÿm prÿne amimex kôt ar ajo mexkumrêx.

<sup>6</sup> Jakam godja gar apÿnh mÿjjakam akaprÿ jabej. Me kum ar akurê nãr akanê nãr anhôbikwa'ô abê tyk nãr mÿjja 'ôdjwÿkam akaprÿ jabej. On dja akaprÿ kêt ne. Dja te akaprÿn akÿnhti:re. Mÿkam? Bir, dja gar Metÿndjwÿnhkôt amexti:rekumrêx. Ja ne gar amiwÿr kam ama. Kam

\* 1:2 Djãm ar ga ne gar adjukaprÿ nhym pãnh arÿm kum ar akaprÿ Kati. Ta ne tu kum ar akaprÿkumrêx.

ne gar akînhti:re. Akaprî japôkmã akînhti:re.

<sup>7</sup> Ga, kên karýrkam punu kunî kator kadjy me kute kuwykam adjwýrja pumû. Nhyam kam arým mexkumrêx. Ar gadjwý dja me kum ar akurê nâr akanê nâr anhôbikwa'ô abê tyk nâr mýjja 'ôdjwýkam akaprî jabej. Kam dja gar amim Metîndjwýnh man amim maro amû amikamên arým mar rax ne. Aje Metîndjwýnh mar raxkam akînhkumrêx. Kam akînho kên karýrkam me kînha jakrenh me:x ne. Kên karýr dja on akuno. Nhyam be, ar ga dja gar tu amim Jeju Kritu mar raxkumrêx nhyam akubyn bôx ne apumûn ar ajã amim,

—Be, inhô me wã mex djô'ã ne me mã imex jarên irax jarê ba kam arým ikînhkumrêx, ane. Dja ã ar amex djô'ã ane.

<sup>8</sup> Ar ga ne gar omûnh kêt. Te aje omûnh kêt ne amã abê:kumrêx. Te jakam aje omûnh kêt ne aje tu amim markumrêxkam arým akî:nhkumrêx ne te: aje akîn'hã memã amijarênh mex prãmje. <sup>9</sup> Metîndjwýnh kute ar apytãrmã gar tu amim Kritu markumrêx nhyam arým ar apytã gar kam arým akî:nhkumrêx.

<sup>10</sup> Djãm amrêbê: ne Metîndjwýnh kukwakam kabên jarênh djwýnh kute gwaj bapytãr mar? Mýjja Metîndjwýnh kute gwaj bapytãrmã djãm me kute mar? Kati. Nãm me memã kum,

—Metîndjwýnh ta dja ã tu kum me kaprîkumrêx, anhýro ba. Jabit ne me arê. Ne kam te: kute amikukãm gwaj bapytãr mar mex prãmje. Nãm me te: kute marmã prîne pi'ôkkôt abenã Metîndjwýnh kabên jarên abenmã kum,

<sup>11</sup> —Je tô, mýj xêja ne Metîndjwýnh ta tu mekam ukaprîkumrêx? Mýj dja me utãr on? Nhýnh amex jakam dja ã meo ane? Nãm me ã amim ane. Nhyam Kritu

Karô me kadjwýnhbê amijo kajkepe ne memã Kritu'ã ajarê. Nãm memã kum,

—Dja tokryn kam ã arým raxkumrêx. Nãm ã Karô memã ane nhyam me te: kute amikukãm gwaj bapytãr mar mex prãmje. Mýjja kute gwaj bapytãr ja te kute mar mex prãmje.

<sup>12</sup> Nhyam kam Metîndjwýnh arým memã kum,

—Djãm me ajã ne ba ikabên ja jarê ga me te: aje mar mexmã? Kati. Tû:mrãm me akamin-grãnyre'ã ne ba ikabên jarê, ane. Metîndjwýnh memã ane nhyam kam 'ätûmkam ujarênh djwýnh ar arým kaj bê ar amã Kritu'ã ujarênh ny jarê. Kute kãjkwã kurûm memã Metîndjwýnh Karô janorkôt me ar amã arê gar gajbit arým ama. Kadjy mrãnh djwýnhdjwý te kute mar prãmje gar gajbit arým ama.

*Me mexti:ren axwe kêt ne ar ba'ã kute memã karô.*

*Ep 4.1; Kor 1.10; Tex k 2.10; Xit 2.14*

<sup>13</sup> Ar aje markam dja gar ano týt ne ajamak mex ne ajaxwe kêt kadjy amijãno djan mrãmri akîn djãkam amakkumrêx. Kwãrîk wãnh kam amak katêri 'ã adjukanga kêt. Dja Jeju Kritu bôx ne arým memã amijo amirît ne arým ar amã akîn djã nhôrkumrêx. <sup>14</sup> Ga, me prîre kute nã kabên mar ne kôt kute amijo baja pumû. Ar gadjwý dja gar Metîndjwýnh kabên man kôt ar amijo aba. Amrêbê ne gar ajamakkre kêt ne amã mýjja punu kîn. Kwãrîk wãnh akubyn amã kîn kêt. <sup>15</sup> Metîndjwýnh ne mexti:ren axwe kêtumrêx. Ar ga dja gar Metîndjwýnhkôt amextiren ajaxwe kêt ne ar aba. Amrãnh kunîkôt ajmã akute kêt ne ar aba. Metîndjwýnh ta ne amiwýr ar ajuw ne ar ajo ba. <sup>16</sup> Amrêbê: ne me bakukãmãmã kum, “Ba ne ba imexti:ren ijaxwe kêtumrêx ne ar iba.

Dja gar ikudjwa amextiren ajaxwe kêt ne ar aba.”  
 Nãm â me bakukãmãremã ane nhyim me arÿm 'ã pi'òk no'òk. Kam dja gar amexti:ren ajaxwe kêt ne ar aba.

<sup>17</sup> Kàjkwakam me Babãm djwÿnhmã ne gar amijo a'uw. Ta ne kute me kunĩ axwe markam kute memã axwe pãnh jarênh. Me kute axwekôt amijo badjari 'ãnh dja memã pãnh jarênh tẽ. Dja katàt me kunĩmã pãnh jarẽ. Ar gadjwÿ kute ar amã ajaxwe pãnh jarênh karõ amijãno djan ar aba. Ga, me me bajtem nhõ pykakam ar bakam amijãno ãm ne katàt kute amijo baja pumũ. Ar gadjwÿ pykakam ar abari amã Metĩndjwÿnh pyman amijãno dja. Ajaxwe kêt kadjy amijãno djan katàt ar amijo aba.

<sup>18</sup> Amrêbê ne gar te ajaxwe kêt mã ar akukãmãkjê kukràdjã kôt amijo aba kajgo:n ajaxwe rà'ã. Nhyim kam Kritu arÿm ar ajaxweo pãnh nhyim kam Metĩndjwÿnh arÿm tu ar amã axwe kêt jarẽ gar kum ajaxwe kêt. Djãm kryt jakao nãr kên karÿro ne ar ajaxweo pãnh? Kati.

<sup>19</sup> Metĩndjwÿnh ne kum kra kĩ:nh. Nãm te kum kĩnh ne arÿm pykamã ano nhyim arÿm amikamrõo ar ajaxweo pãnh. Ga, me bakukãmãre kute mrykĩ'ãtomti par ne kute Metĩndjwÿnhmã bõrja pumũ. Mry punu kêt ne prĩne kã mex ne me kupa. Kritudjwÿ ajmã kute kêt ne axwe kêt kumrêx ne arÿm ar ajaxweo pãnh. Pĩte'ykam ne kamrõ prõt ne arÿm tyn kam arÿm o ar ajaxweo pãnh. Kam dja gar amijãno djan katàt ar amijo aba.

<sup>20</sup> Mrãmri ne Metĩndjwÿnh amim Kritu'ã karõkumrêx. Amim tyk'ã karõkumrêx. Pykamẽ kàjkwamẽ mÿjja kunĩ kêttri ne amim 'ã karõkumrêx. Ne kam 'ãtũmkam arÿm ar akadjy Krituo amirĩt ne. Mÿjja kunĩ kute aminhinomã amimênh djã nhõ akati jakam arÿm o amirĩt ne. <sup>21</sup> Nãm ar akadjy

o amirĩt gar aje kôt tu amim Metĩndjwÿnh markumrêx. Nãm o amirĩt nhyim ty nhyim akubyn o tĩn ne amiraxo o rax nhyim arÿm ra:x ne uma:kumrêx. Mÿj kadjy? Bir, gar aje tu amim Metĩndjwÿnh markumrêx ne aje amiwÿr kôt atĩn kamnhĩxmã. Ja kadjy ne akubyn Krituo tĩn nhyim arÿm ra:xkumrêx.

<sup>22</sup> Jakam ne gar arÿm kabên katàt man kôt ar amijo aban arÿm ajmã akute kêt ne ar aban arÿm mrãmri amã me abê katàtkumrêx. Jeju kukwakam me bakamyja amã me abê katàtkumrêx. Kam, dja gar ã anen amim ajaxwe'õ'ã karõ kêt kumrêx ne arÿm ar amã aben jabê.

<sup>23</sup> Ga, te bãygogo 'y mex ne punu prãmja pumũ. Nhyim me bãygogo 'y mex kre nhyim arÿm ingrõtja pumũ. Ar gadjwÿ ne me ar amã Metĩndjwÿnh kabên jarẽ, Metĩndjwÿnh kabên kute mÿjja 'y pyrãk ne me ar amã arẽ. Nhyim me kute ar amã arênhja ne kute me àkre pyrãk. Djãm Metĩndjwÿnh kabên punu prãm? Kati. Mex rà'ã: rà'ã. Tãm ne me ar amã arẽ gar aman arÿm tu amim Metĩndjwÿnh markumrêx. Nã gãm ar mÿjja nhingrõt mãn prãbê tu amim markumrêx. Nhyim kam arÿm ar amã ajamak bõ gar arÿm adjumar djã ny kute mrãmri ne me prĩre bixadjwÿr nykam umar djã ny pyrãk. Ne kam arÿm amã Metĩndjwÿnh kĩ:nh ne aje mar prã:m ne aje katàt amijo aba prã:m ne. Metĩndjwÿnh ne amikabên pÿnh ne arẽ. Djãm kute atemã kabên 'õ jarênhmã ne kute o kabên tũm japanh ne o biknormã? Arkati. Kute amikabêno biknor kêt kumrêx. <sup>24</sup> Ikabênja kôt ne me amrêbê: me bakukãmãremã kabên jarênh memã kum,

“Ga, bõja pumũ. Bõ tĩn 'ikrãne ne arÿm mjõ. Me badjwÿ ne gu me bakunĩ batĩn ne ar baba 'ikrãne.

Ga, pidjôrã mexkumrêxja pumû.  
Pidjôrã mex 'ikrãne ne  
arým rôrôk ne. Me badjwý  
ne gu me bamex 'ikrãne.

<sup>25</sup> Nhyr be, Metĩndjwýnh ne amik-  
abên pýnh ne arê. Djãm kute  
iby atemã kabên 'ô jarênh ne  
kute o kabên tũm japanh ne  
o biknormã? Arkati. Kute  
mar tÿx rã'ã: rã'ã ne."†

Nãm me ã me bakukãmãremã ane.  
Kam ne gwaj kabên mar pýnh.  
Amrêbê ne me kãj bê ar amã  
Kritu'ã ujarênh ny jarê. Kabên  
pydjĩn arê gar mar pydjĩ.

## 2

<sup>1</sup> Me kute ar amã Kritu'ã ujarênh  
ny jarênh ar aje mar pydjĩkam  
on wãnh me kãxã akabên punu  
kanga.

Aje memã ajêxkôt me noo abiknor  
on wãnh kanga.

On wãnh ajêx ne aje amijo Jeju mar  
mexja kanga.

Me'ô nhõ mÿjja'ã angyrk on wãnh  
kanga.

Akabên punu kunĩ on wãnh kanga.

<sup>2</sup> Metĩndjwýnh kabên kute me kã  
kangô pyrãk dja ga amã kĩnh. Aje  
me prĩre rwýk ny pyrãk kute kum  
kã djãnh pyrãk ã amã kabên kĩnh  
ane. Ne kabên maro tẽ:n maro amũ  
amikamên mar ra:x ne. <sup>3</sup> Aje arým  
amim Bẽnjadjwýr djwýnh mex kak-  
inhkam dja ga ã amã kabên kĩnh  
ane.

*Kute Kritu'ã kên jakre.*

<sup>4</sup> Kritu ne kute kên pyrãk. Nhyr  
be, kên ne tĩn ne ar ba kêt. Nhyr  
be, Kritubit ne tĩn ne ar ba. Kute  
kên pyrãk gar arým 'ÿr bôx. Nhyr  
me kwý arým kanga. Nhyr be,  
Metĩndjwýnh ta arým amijo utã.  
Kute o me utãr kadjy arým amijo  
utã. Kum kĩ:nhkumrêx kute mrãmri  
ne me kum kên pãnh rax kĩnh  
pyrãk.

† 1:25 Kute amikabên jarênh ne o biknor kêtumrêx. Kute apýnh mÿjja jarênh kôt dja mÿjja kunĩ apôx mexkumrêx.

<sup>5</sup> Ar gadjwý ne gar aje apýnh  
kên pyrãk. Nhyr be, kên ne  
tĩn ne ar ba kêt. Ar gajbit ne  
gar atĩn ne ar aba. Aje apýnh  
kên pyrãk. Ga, me bakukãmãre  
kute keno Metĩndjwýnh nhõ kikreti  
nhipêxja pumû. Ar gadjwý ne  
Metĩndjwýnh arým ar ajo kran ar  
amã Karô jano nhyr kam arým ar  
akam nhýn ar ajo ba. Gar kam  
arým abeno anhôbikwa mexo mō.  
Nãm ar ajo kute mrãmri ne keno  
kikreti nhipêxo mōr pyrãk. Ne  
kam aje amim ar apumjuw, kute  
ar ajo me kadjy Metĩndjwýnh mar  
djwýnhmã ne ar apumjuw. Ga,  
me kadjy Metĩndjwýnh mar djwýnh  
kute Metĩndjwýnh nhõ kikretikam  
kum mry bôr nhyr kum kĩnhja  
pumû.

Ar gadjwý Karô kute ar ajo  
bakam ne gar kum apýnh kĩnh djã  
nhôro aba nhyr kum kĩnh. Ar  
aje tu amim Jeju Kritu markam  
ne kum kĩnh. <sup>6</sup> Be, nhyr kam  
Metĩndjwýnh kên'ã Kritu jakre. Kên  
pãnh raxja, me kum kĩnhja'ã ne  
akren me bakukãmãremã kum,

"Ota ba krĩraxbê Xijãokam keno  
kikremo kajpa nhyr dja.  
Kên mexkumrêx, kên pãnh  
rax ne ba amijo utã kudja.

Me kute tu amim kênja markumrêx  
dja me pijãm kadjy  
kêtumrêx."

Nãm Metĩndjwýnh ã Kritu'ã me  
bakukãmãremã ane nhyr me arým  
'ã pi'ok no'ok ne. <sup>7</sup> Ar ga ne gar  
arým tu amim Kritu markumrêx  
ne arým amã kĩ:nh. Amã kĩnh kute  
mrãmri ne me kum kên pãnh rax  
kĩ:nh pyrãk.

Nhyr be, me amakkre kêtja ne  
me kute amim Kritu mar kêt ne  
kanga. Nhyr be, Metĩndjwýnh ta  
arým kãjmã kum rax kamê nhyr  
arým ra:x. Kritu'ã ne amrêbê me  
bakukãmãre memã ajarê. Nãm me  
memã kum,

“E kum kên ja ne me kute kikreo  
ãm djwýnhja kute kikremã  
armã te omün kam bôm  
kumê.

Kên ja ne arým kute kikremo kaj-  
par, kum kajpar týxi”, ane.

Be ga, me bakukãmäre kute  
amrêbê: memã anhÿr kôt me arým  
kute Kritu kangaja pumũ. Nhy  
kam Metíndjwýnh arým kãjmã kum  
rax kamê nhy arým ra:x ne.

<sup>8</sup>Nãm me memã kum,

“Kên ne kute me par tok nhy kam  
me rôrök prãmkumrêx”, ane.

Me amakkre kêt ne me kute me  
rôrökja pyrãk. Nãm me kute  
amim Kritu mar kêt ne kam arým  
me biknor tokry djãkam akuno.  
Metíndjwýnh kute amrêbê: me'ã  
amim karô kôt dja me arým akuno.

<sup>9</sup>Nhy me, ar ga ne Metíndjwýnh  
arým amijo ar apytã. Ar ga  
ne gar aje mrãmri ne me kadjy  
Metíndjwýnh mar djwýnh rüh  
pyrãk. Nhy Bënjadjwÿr djwýnh  
ne ar ajo ba. Ar abê Metíndjwýnh  
nhô me wýnhkumrêx nhy arým  
amim ar ajo ba. Ar gajbit ne amim  
ar ajo ba. Amrêbê ne gar ajaxwe:  
ne aje mrãmri ne me akamãt kô  
tykkam rôrök baja pyrãk. Gar ari  
ajaxweo aba nhy Metíndjwýnh  
arým amiwÿr ar ajuw ne ar ajo  
ba. Jakam ar aje mrãmri ne me  
irãkam katãt ba pyrãk ne katãt  
Metíndjwýnh kôt ar amijo aba. Ne  
kam arým memã ra:xmê mextire  
'ã adjujarênh ar aba. <sup>10</sup>Amrêbê  
ne gar ate me kajgo kôt ar aba.  
Nhy Metíndjwýnh arým jakam ar  
ajo kran amikôt ar ajo ba. Amrêbê  
ne kum ar akaprĩ kêt. Ne kam arým  
jakam kum ar akaprĩ.

<sup>11</sup>Ga, me me bajtem nhô  
pykakam ar baja pumũ. Djãm  
me kute amikukrãdjã kangan me  
bajtem kukrãdjã marn kôt amijo  
ba prãm? Kati. Ar gadjwÿ ne gar  
me kum Metíndjwýnh küh kêtja mē  
ro'ã ar aba. Me kum amidjwýnhbito  
küh prãmkam axwe:. Me axwe

kôt ar ajaxwe puma:. Djãm ar  
aje Metíndjwýnh kukrãdjã kangan  
me axwe kukrãdjã 'amýnh ne kôt  
ajaxwemã? Kati. Kwãrik wãnh. Dja  
gar Metíndjwýnhmã amijangri týx.

<sup>12</sup>Me kute Metíndjwýnh mar  
kêtjamē ro'ã ar abakam dja gar  
katãt ar amijo aba. Nhy kam me  
ar apumün arým ar ajã 'êx jabej ne  
arik ar ajã kute,

—Ga, me axweja pumũ, anhÿr  
jabej. Kwãrik wãnh rã'ã. Ar ga dja  
gar memã katãt ar amijo aban ad-  
jukaprĩ. Katãt ar amijo aba: nhy  
kam Kritu arým bôx. Bôx nhy  
me arým amiman Metíndjwýnhmã  
kum,

—Mrãmri amexkumrêx. Me kute  
amim amarja katãt ar amijo ban  
ukaprĩ. Ba kam gadjwÿ amex  
ma. Mrãmri amexkumrêx, ane.  
Dja me ar akatãt pumün arým ã  
Metíndjwýnhmã ane.

*Me kute me bënjadjwÿr kabën  
marmã.*

*Rô 13.1; Xit 3.1*

<sup>13</sup>Ba ar amã arê gar ama. Dja  
gar pykakam me bënjadjwÿr kabën  
kunĩ ma. Mÿkam? Bir, gar arým  
kãjkwakam anhô Bënjadjwÿr djwýnh  
kabën maro aba. Ta ne arým ar  
amã me'ã karôn ar amã,

—Pykakam ar anhô bënjadjwÿr  
kabën ma, ane. Kute ar amã  
anhÿrkam ar aje pykakam anhô  
bënjadjwÿrdjwÿ kabën marmã.  
Bënjadjwÿr raxo kute me bënjadjwÿr  
kunĩ jakrenhja dja gar kabën ma.  
<sup>14</sup>Nãr me bënjadjwÿr kute atãri ar  
amã ÿr ja dja gar kabën ma.

Metíndjwýnh ta ne ar amã me  
bënjadjwÿr jano. Ta ne ar amã aje  
me kabën marmã arê. Mÿj kadjy  
ne ar amã me arê? Bir, dja me  
bënjadjwÿr me axweo bikênho ba.  
Nãr, dja me katãt kute amijo ba-  
jamã mex jarênho ba. Me kute  
ã meo anhÿr kadjy ne ar amã  
me bënjadjwÿr jarê. Kam, dja gar  
me bënjadjwÿr kabën man katãt ar  
amijo aba. <sup>15</sup>Katãt ar amijo aba



nhyam kam me kwÿ ar ajã kabên kajgo kumex jarê. Me bën kati dja me ã ar ajã ane. Kwãrîk wãnh rã'ã. Ar ga dja gar arek katàt ar amijo aban 'ã adjukanga kêt. Nhyam kam amũ me krãpti arÿm ar amexkôt ar apumũn arÿm me kabên kajgoja mar kêt. Nhyam kam me arÿm anhikrên arek dja. Dja gar aje katàt amijo abao ã me kabên kajgoja nhityo ane. Metîndjwÿnh kute ar amã 'ã karô kôt dja gar ã ane.

<sup>16</sup> Amrêbê ne gar te ajaxwe kêt mã ne ajaxwe rã'ã. Jakam ne Kritu arÿm ar ajaxwebê ar apytàn arÿm ar amã tÿx jangij. Ar ajaxwebê ar atÿxkam ar ga ne gar arek mekôt ar aban adjumar mex. Arek mekôt ar abakam kwãrîk wãnh arîk ar aba kêt. Ga, me kwÿ kute,

—Ba ne ba arek mekôt ar iban idjumar mex, anhÿrja pumũ. Nãm me anen kam arîk ar ban axwe:. Ne kam me kute mrãmri ne me kute kubêkã mex jangjênh ne kadjwÿnhbê punu rã'ã pyrãk. Kwãrîk wãnh ã amijo anhÿr kêt. Ar ga dja gar abê Metîndjwÿnh nhô ãpênhkumrêx ne kum adjãpênh tÿx ne katàt kabên man kôt ar amijo aba.

<sup>17</sup> Me kunî ar aje kãjmã memã rax kamênh kadjy dja gar amima. Jeju kukwakam ar aje meo akamyja ar amã me abê. Amã Metîndjwÿnh rax pyman bënjadjwÿr raxja kãjmã kum rax kamê.

<sup>18</sup> Me kute ar ajô ar apa 'amÿnh gar memã adjãpênh kajgo ar aba ar, ar amã ne ba ikabên jarê. Dja gar akrãnmã pykakam ar ajo ba djwÿnhmã adjãpênh katàt ne rax ma. Djãm ar ajo ba djwÿnh mex ne kabôt katikambit dja gar kabên kôt kum adjãpênh katàt? Kati. Àkrê prãm kamdjwÿ kum adjãpênh katàt.

<sup>19</sup> Mÿj dja gar nênh kam arÿm Metîndjwÿnh kÿnh nhyam ar amã mex jarê? Bir, dja gar katàt

Metîndjwÿnh kabên man kôt ar amijo aba. Nhyam kôt me arÿm ar ajo ajkê gar kôt arÿm atokry ne akapri ma. Kam dja gar Metîndjwÿnh kÿnh nhyam arÿm ar amã mex jarê.

<sup>20</sup> Godja gar ajaxwe nhyam me pãnh ar ajo bikênh jabej gar kam akrãnmã amitokry mar jabej. Djãm kam gar arÿm Metîndjwÿnh kÿnh nhyam kute ar amã mex jarênhmã? Kati. Nhyam be, godja gar katàt ar amijo aba nhyam me arÿm kôt ar ajo bikênh jabej gar kam akrãnmã atokry mar jabej. Katàt ar aje amijo abakambit dja gar arÿm Metîndjwÿnh kÿnh nhyam ar amã amex jarê. <sup>21</sup> Katàt ar aje amijo abakôt me kute ar ajo bikênh gar kôt atokry. Ja kadjy ne Metîndjwÿnh amiwÿr ar ajuw ne ar ajo ba. Ga, Kritudjwÿ gwaj bakadjy tokryja pumũ. Gwaj baje kudjwa katàt amijo baban kôt batokry kadjy ne gwaj bakadjy tokry.

<sup>22</sup> “Djã nãm Kritu axwe? Kati. Djã nãm memã 'êx ne me noo akno? Kati.”\*

<sup>23</sup> Me kum ãkjêrkam djã nãm amipãnh memã akij? Kati. Tokrykam djã nãm me kangrô? Kati. Nãm Metîndjwÿnhmã amijarê. Kute katàt memã axwe pãnh jarênh djwÿnhkumrêx jamã ne amijarê. <sup>24</sup> Kritu ta ne pÿte'ykam gwaj bajaxweo pãnh. Mÿj kadjy ne gwaj bajaxweo pãnh? Bir, gwaj bamã bajaxweo prãm kêt kadjy.

Ga, me tyk kum axwe prãm kêtja pumũ. Gwaj badjwÿ arÿm batykmãn prãbê bamã bajaxweo prãm kêt ne ar baban baje kabên marn kôt baje amijo baba prãm. Ja kadjy ne arÿm gwaj bajaxweo pãnh. Mry kã punuo ne me prÿne ôm nhyam kam Metîndjwÿnh arÿm kôt gwaj bajo mex gwaj kam ã bamã bajaxweo prãm kêt ane. <sup>25</sup> Ga, mryo ba djwÿnh kêt kam

\* **2:22** Amrêbê ne Metîndjwÿnh kukwakam kabên jarênh djwÿnhbê Idjaij ja jarê nhyam kam Pedru kôt arê.

mrykĩ'átomtĩ arým no biknor ne ate ar baja pumũ. Ar gadjwý ne gar ate ar aba. Nhym be, jakam gar arým ajo ba djwýnh Jeju'ýr amijo akêx ne kôt ar amijo aba nhym arým ar apytàro ba.

### 3

*Kute prômê mjênãmã abenã karõ.  
Xit 2.2; Xim k 2.9, 3.11*

<sup>1</sup> Ê, ar apa, arým ar amjênwã, ar amã ne ba ikabên ne. Dja gar akrãnmã amjên kabên maro aba. Ar ajõ amjên kute amim Metĩndjwýnh kabên mar prãm kêt jabej ga dja ga katàt kabên kôt ar amijo aban ĩ arým 'ýr o akêx ne. <sup>2</sup> Godja te amim Metĩndjwýnh kabên mar kêt ne arým apumũ. Katàt aje amijo aban amã Metĩndjwýnh rax pymakôt arým apumũ. Ne kam amex kôt arým Metĩndjwýnh'ýr amijo akêx ne tu amim markumrêx.

<sup>3</sup> Be, mýj dja ga amexkam akute nhym me kum akĩnh ne? Djãm akunhêrkam nàr djãm akĩ prĩne mex nàr djãm apýnh anhõ kên karýrkam nàr djãm aje akà mex jangjênhkam? Djãm akunhêr jabit ne arým kôt amex? Kati.

<sup>4</sup> Bir, mýj dja ga ga amexkam akute nhym me kum akĩnh ne? Bir, dja ga anhõkre kadjwýnhbê akabên mexbit man memã aprĩren akrãnmã memã abên rereko aba nhym me arým kum akĩnhkumrêx. Nhym kam Metĩndjwýnhdjwý kum akĩnhkumrêx kute mrãmri ne me kum õ mýjja pãnh ra:x kĩnh pyrãk.

<sup>5</sup> Amrêbê ne me bakukãmãre nire kwý mextiren axwe kêt ne ar ba. Ne Metĩndjwýnh kanãrrãm ar ban arým kabên mexbit jarên akrãnmã mjên kabên maro ba. <sup>6</sup> Ga, Xara kute Abraão kabên marja pumũ. Nãm katàt kôt ar amijo ban kum rax jarên ar o ba. Ar aje Xara tãmdjwý pyrãk dja gar kudjwa amjên kabên man arým atĩn prãm kêt.

<sup>7</sup> Ê, ar apa, arým ar aprõwã, ar amãdjwý ne ba ikabên ne. Kwãrik wãnh amidjwýnhbit maro aba kêt ne prĩne amim aprõ maro aba. Ajityxo aje aprõ jakrenhkam kum aprĩ:ren amã abê. Djãm amã aprõ jabê kêt nhym Metĩndjwýnh kute amarmã? Aje kum amijo adjã'wýr nhym kute amarmã? Kati. Dja ga amã abê kêt nhym Metĩndjwýnh arým amar kêt. Nhym be dja ga amã aprõ jabê nhym arým akabên ma. Djãm apydji ne Metĩndjwýnhkôt atĩn ne ar abamã? Kati. Metĩndjwýnh djukaprĩkôt ne ga aprômê kôt ar atĩn ne ar abamã.

*Me kute katàt amijo bamã.*

*Ep 4.1; Kor 1.10; Tex k 4.1; Ped k 2.12*

<sup>8</sup> Jakam ne ba ar akunĩmã ikabên. Gora ar akunĩ axikôt abenmã akabên jarê. Kwãrik wãnh amidjwýnhbit maro aba kêt. Dja gar aben maro aba. Kute me kamy kum kamy jabê pyrãk dja gar ã amã aben jabêo ane. Ar amã aben kaprĩn amijo angrin akatãm ne ar abeno aba.

<sup>9</sup> Kwãrik wãnh me'õ ar ajo ajkê gar amipãnh o abikênh kêt. Nàr, kwãrik wãnh me'õ ar amã akij gar amipãnh kum adjãkjêr kêt. Ate dja gar kum akabên mex jarên o djuw mex. Ar aje ã abenmã anhýr kadjy ne Metĩndjwýnh amiwýr ar ajuw ne ar ajo ba. Ja dja gar aman ikabên kôt amijo ane nhym Metĩndjwýnh ĩ arým ar amã akĩnh djã ngãn ar ajo djuw mex. <sup>10</sup> Amrêbê: ne me bakukãmãre memã kum,

“Ar adjumar mex ne atĩn 'irynd ar abamã djãm ar amã ja kĩnh? Mýj dja gar kadjy amijon?”

Bir, kwãrik wãnh akabên punu'õ jarên kêt. Aje me noo abiknor kadjy, kwãrik wãnh memã ajêx kêt.

<sup>11</sup> Godja me arĩk ar ban axwe on memã akãx. Ar ga dja gar ajaxwe kêt ne amã me kaprĩ.

Ar akunî abenkam adjumar mex kadjy dja gar aben nêje aben jakren akabôt katin ar aba ne 'ã adjukanga kêt.

<sup>12</sup> Mÿkam dja gar abenkam adjumar mex? Bir, Bênjadjwÿr djwÿnh kute katàt me kute amijo baja pumÿnh.

Ne kam me kute kum amijo à'wÿrkam arÿm kute me kabên marn kam kute me kabên kôt memã ipêx.

Nhym be, me axweja ne Metîndjwÿnh arÿm mekam no kà nhàn ngyrk ne arÿm mebé aptã", ane.

Me kute amrêbê: me bakukãmãremã anhÿrkam dja gar ã amexo ane.

<sup>13</sup> Ar amex prãm kam djãm me kute ar ajo bikênh prãm? Kati.

<sup>14</sup> Nàr gar katàt ar amijo aba nhym me kôt ar ajo bikênh jabej gar arÿm atokry. Atokry japôkmã akînh. Akînh ja dja gar ama. Kwãrîk wãnh kam ar amã me uma kêt ne atîñ prãm kêt.

<sup>15</sup> Ne ate Bênjadjwÿr djwÿnh, Metîndjwÿnh ma. Ne mexo umatija ma. Ne ano tÿx. Amikôt aje memã amijarênh kadjy ano tÿx. Dja me abej akukij ne amã,

—Mÿj ne ga aman arÿm, "Dja ba Metîndjwÿnh kôt itîñ ne ar iba rã'ã: rã'ã ne", anhÿro aba? Mÿj ne ga ama? ane. Dja me ã abej akukjêro ane ga kam amikôt memã amijarên memã kum,

—Kritu ikadjy ty. Ba arÿm tu amim markumrêx. Kam dja ba Metîndjwÿnh kôt itîñ ne ar iba rã'ã: rã'ã ne, ane. Kwãrîk wãnh memã bêx kêt. Metîndjwÿnh mexo uma dja gar aman memã aprîren memã amijarê.

<sup>16</sup> Dja gar katàt ar amijo aban amikam ajaxwe'ô mar kêt nhym me arÿm ar ajã 'êx ne memã kum,

—Djãm tãmwã katàt kute amijo ba got? Kati, axwe, anhÿro ba. Kwãrîk wãnh rã'ã. Dja te me ar ajã anhÿro ba, ar ga dja gar katàt

amijo aba rã'ã. Ne katàt amijo aba tãmtã: nhym kam me arÿm ar akatàtkumrêx kôt ar apumÿn arÿm amikam pijàm ne. Me amikam pijàmmã dja gar katàt amijo ar aba rã'ã.

<sup>17</sup> Mÿkam ne me ar ajã kabên punu? Bir, godja Metîndjwÿnh ar atokry'ã amim karô jabej. Kute ar ajã amim karô kôt ne me ar ajã kabên punu gar arÿm atokry. Ajaxwe kêt ne atokry. Ne te atokry ne Metîndjwÿnhmãbit amexkumrêx. Nhym be, me kwÿ axwekumrêx nhym Metîndjwÿnh arÿm memã axwe jarê nhym me arÿm tokry:. Nhym be, ga te ajaxwe kêt ne atokry, ja ne mex.

<sup>18</sup> Be ga, Kritudjwÿ tokryja pumÿ. Gwaj bajaxwekôt tokry. Gwaj bajaxwekumrêx nhym ta axwe kêtumrêx ne arÿm gwaj bajaxwe pãnh tokry. Kute Metîndjwÿnh'ÿr gwaj bajo akêx kadjy tokry. Nãm me kubî. Kritu nhîkumrêx nhym me kubî. Nhym kam Metîndjwÿnh Karô akubyn o tîñ ne.

<sup>19</sup> Amrêbê: Nôwe me bakukãmãremê ro'ã ar bakam ne ngô me imex nhym me arÿm ty. Nhym kam Metîndjwÿnh arÿm me karôbê ijê. Me tîñ ne ar bari ne Metîndjwÿnh arÿm Nôwemã Karô jano nhym arÿm kum arê. Kum arê nhym kuman arÿm kàj bê me akren memã kum,

—Ar ajaxwe:. On wãnh ajaxwemã anhire. Nãm ã memã anhÿro ba. Kute kà raxo âmri ne ã memã anhÿro ba.

<sup>20</sup> Nôwe te memã ane nhym me axwe rã'ã ne. Nhym kam Metîndjwÿnh ngyrk tô:n te me kute amijaxwe krã'ÿrmã kam ama:. Nhym kam ngô arÿm me imex nhym me arÿm ty. Nhym kam Metîndjwÿnh arÿm me karôbê ijê. Nhym be, me ngrêrebit arÿm amim kabên ma. Ar kubê 8bit arÿm amim kabên man arÿm wãnh axwemã

ire. Ne kam arým kãmã wadjàn kam tyk kêt. Ga, ar kute amim Metîndjwýnh mar ne arým kàkam ýrja pumũ. Kam Metîndjwýnh arým ngòkam ar utàn ar aro ba.

<sup>21</sup> Gwaj badjwý ne gwaj tu amim Kritu markumrêx nhym me arým ngòmã gwaj bajangij. Mýj'ã ne ngò kurũm bajapòxja amijakre? Bir, Jejumẽ ro'ã akubyn batĩn'ã ne amijakre. Gwaj Jejumẽ ro'ã akubyn batĩnkam ne gwaj arým Jejukòt katàt ar amijo baba. Djãm mýjja punu'ò gwaj banhĩ'ã atom nhym me gwaj bajã ku'ò? Kati Gwaj katàt ar amijo baban arým amim,

—Metîndjwýnh ne katàt ije amijo ibakòt kute imar, anen arým bakĩnhkumrêx ne. Ja'ã ne ngò kurũm bajapòxja amijakre.

<sup>22</sup> Mrãmri ne Jeju akubyn tĩn kàjkwamã wabin arým Metîndjwýnh djubòk'ãnh nhỹ. Bẽnjadjwýr rax ne memã nhỹ ne kute raxo, umao mýjja kunĩ, me kunĩ jakrenh. Kute kadjy mrãnh djwýnhmẽ me bẽnjadjwýrmẽ me 'itýx kunĩ jakrenh mex ne kabẽno me anoro nhỹ.

## 4

*Me kute katàt Metîndjwýnh kabẽn kòt amijo ba'ã kute memã karò.*

*Ep 4.17; Kor 3.5*

<sup>1</sup> Kritu nhĩkumrêx ne arým gwaj bapãnh tokry. Ar aje ja markam dja gar amikukãm mã amim,

—Badjwý dja ba kudjwa itokry, ane. Dja gar ã amim ane. Mýkam? Bir, dja gwaj kudjwa batokryn arým amim Metîndjwýnh mar týx ne kam arým bajaxwe prãm kêtumrêx <sup>2</sup> ne bamã mýjja punu kĩnh kêt. Djãm me axwe kòt dja gwaj amidjwýnhbito kĩnh kadjy amima, bamã mýjja punu kĩnh kadjy amima? Kati:. Arým Kritu kudjwa batokrykam dja gwaj

Metîndjwýnh kabẽn man kòt amijo baba kadjy amima.

<sup>3</sup> Amrêbẽ me kute Metîndjwýnh mar kêtja kòt gar amijo aban aprò djwýnh kupa'ã nãr amjên djwýnh kupa'ã akurẽ aba. Ne amã mýjja punu kĩnh. Ne kadjwati kangòkam\* ajabã. Ne me torkam abixaer punu. Ne kadjwati kangòkam aben týx jabej. Ne mýjja metîndjwýnh karò nhípèxmã amijarẽho aba. Ja ne punu:re. Nhym Metîndjwýnh ar akam ngryk. Gar kam arým Metîndjwýnh'ýr amijo akẽx ne tu amim markumrêx.

<sup>4</sup> Nhym kam me amakke kêt arým ar ajã kabẽn. Me kute axweo ba týx rà'ãkam ar ajã kabẽn ne. Me abenmã kum,

—Je tô, mýkam ne me arým gwaj bakòt bixaer kêt? anen kam arĩk abenmã kum,

—Nãm gwaj ba kòt ar ba kêt. Axwe. Nãm me ã abenmã ar ajã ane.

<sup>5</sup> Me wã dja me ì prĩne amijaxwe kòt Metîndjwýnhmã amijarẽ nhym arým memã axwe pãnh jarẽ. Kute memã axwe pãnh jarẽnh kadjy arým memã dja. Me tĩnmẽ me tykmẽ arým memã dja. <sup>6</sup> Ë, me arým tykja me tĩnri ne me memã Kritu'ã ajarẽ. Mýj kadjy? Bir, me tĩnri, pykakam ar bari kute amijaxwe mar ne kam arým tykkam Metîndjwýnhkòt tĩn ne ar ba kadjy ne me memã arẽ.

<sup>7</sup> Me kunĩ kute aminhinomã amimènh djã nhõ akati bõx ýr. Kam dja gar akrã mex kadjy amiman ajaxwe kêt kadjy amijãno djan kum akabẽno aba.

<sup>8</sup> Ar aje Metîndjwýnhmã akabènkam amex. Nhym be, ar amã aben jabèkam gar arým ar amexo amũ amikamèn arým ar amexti:re. Kam ar amã aben jabê:. Dja gar amã aben jabèn arým aben jaxwe krãptiõ aknon mar kêt ne.

\* **4:3** Mýjja me kute o kòm ne kòt bibãnh kunĩja, kadjwati kangòmẽ uba kangòmẽ, mýjja kangò kunĩ ne me kum kadjwati kangò jarẽ.

<sup>9</sup>Dja gar abenmã anhürkwã jarêñ abenkam aku. Kwãrik wãnh aben kãxã ar anhõ mýjja'ã maje amim,

—Mýj kadjy dja ba kum inhõ mýjja jarê? anhýr kêt. <sup>10-11</sup>Metĩndjwýnh Karõ ne ar amã adjãpênh djã'ã karõ. Apýnh ar anhĩ djãri ar amã 'ã karõ gar apýnh adjãpênh djã maro aba.

Ar ajõ aje memã kabên jarêñh'ã kute ar amã karõja, Metĩndjwýnh kabênkumrêx dja gar memã arê. Kwãrik wãnh memã kabên kajgo'õ jarêñh kêt.

Ne ajte kute ar ajõmã aje meo djuw mex'ã karõja dja gar memã mýjja nhõro aba ne me kadjy adjãpênhkumrêx. Aje meo djuw mex kadjy Metĩndjwýnh arým ar amã týx jadjã. Dja gar arerek kêt ne meo djuw mexo aba. Metĩndjwýnh ne ukaprĩ:kumrêx. Ar gadjwý dja gar adjukaprĩkumrêx ne ar adjãpênh djã'ã adjukanga kêt ne memã adjãpênh ar aba. Memã adjãpênh kunĩkõt dja me arým Metĩndjwýnhmã mextire jarê. Ne kum,

—Ga ne ga adjukaprĩ:kumrêx. Akabênkõt ne Jeju Kritu bõx. Ba arým tu amim markumrêx, ane. Metĩndjwýnh ne ra:x ne kute me kunõ ba djwýnh. Rax rã'ã: rã'ã ne. Ne ren me kunĩ kum rax jarê. Mrãmri. Tãm ne ja.

*Me kum me kute amim Kritu marja kurê.*

*Mat 10.16; Dju r 16.1; Pir 1.29; Idja 12.3*

<sup>12</sup>Akmere, àpnhĩre ar, ba ar amã arê gar ama. Ga, me kute kuwykam kên karýr jadjwýrja pumũ. Me adjuw nhym ôr ne xêr nhym mýjja punu kunĩ apõx. Ar gadjwý dja ar akaprĩ djã ar ajo ba gar atokry: ne. Birãm ar amãbit ne kute me kute amim Jeju marja tokry prãm kêt pyrãk. Gar kam amim,

—Je tô ba ne ba ije amim Jeju maro iba nhym itokry ja ijo ba. Mýkam? ane. Kwãrik wãnh amim ja jarêñh kêt. <sup>13</sup>Be ga, Kritu tokryja pumũ. Me kute amim Kritu mar krãptĩdjwý kõt tokry. Ar gadjwý dja gar kõt atokry. Kwãrik wãnh kam akaprĩ kêt. Dja Kritu me: xkumrêx ne uma:n arým bõx. Godja jakam kõt atokry jabej dja gar bõxkam akĩnhiti:rekumrêx.

<sup>14</sup>Ar aje amim Kritu mar nhym me arým kam kum ar akurê. Djãm kam ar akaprĩ got? Ga, Metĩndjwýnh Karõ ar amê amijo kajkeja pumũ. Karõ ra: xkumrêx ar amê amijo kajkep. Kam te me kum ar akurê gar akĩnhkumrêx. Me ta ne me Kritu'ã kabên punu. Nhym be, ar ga ne gar kum mextire jarê.

<sup>15</sup>Nhym be, dja ar ajõ aje me par nhym me kõt ajo ajkê ga atokry. Nãr, adjãkĩnhĩ nhym me kõt ajo ajkê ga atokry. Nãr aje amim me kukjêr prãm nhym me kute amã amijarêñh ga aje amũ memã me arêñh prãm. Nhym me arým kõt ajo ajkê ga atokry. Nãr ajaxwe 'õ nhym me kõt ajo ajkê ga atokry. Djãm kam akĩnh? Kati. Ajaxwekam akaprĩkumrêx. Kwãrik wãnh ã amijo anhýr kêt.

<sup>16</sup>Nhym be, aje mrãmri amim Kritu markumrêx nhym me arým kõt ajo ajkê ga atokry. Kwãrik wãnh kam apijãm kêt. Dja ga kam Metĩndjwýnhmã rax jarêñ kum,

—Djũnwã, ije amim Kritu markam ne me ijo ajkê ba itokry. Ba kam ikĩnhkumrêx, ane.

<sup>17</sup>Apýnh gwaj baje marja Metĩndjwýnh kute gwaj bajaxwe jabej amim gwaj bakukjêrmã. Õ akati gwaj bawýr bõx 'ýr. Gwaj bajo dja amim me kukjêrmo krax. Gwaj bajo kute memo kraxkam mýj dja ã arým me amakkre kêt kam nê? Bir, dja me axwe jabej amim me kukij nhym me arým amijaxwe kõt kum

amijarê. Nhyam kam arÿm memã pãnh rax jarê. Me kute Kritu'ã ujarênh ny mar kêt pãnh tokry rax jarê. <sup>18</sup> Amrêbê: ne me bakukãmãre ije ar amã arênhja kôt memã kum, “Metîndjwÿnh kute me katàt kute amijo baja pytàr ne tô, kam àpênh rax.

Nhyam kam mã dja me axwemê me kute Metîndjwÿnhbê amijo akêxja mekam nê?

Bir, mrãmri dja memã pãnh jarê nhyam me axwe pãnh tokrykumrêx.”

Nãm me bakukãmãre ã memã ane.

<sup>19</sup> Tãm ne ja. Metîndjwÿnh kute ar ajã amim karô kôt dja gar katàt ar amijo aban ajmã akute kêt ne ar aba. Ne te katàt amijo aban arÿm atokry jabej. Kum amijarê gê ta ar atokrykam ar apytã. Metîndjwÿnh kute ar anhipêx djwÿnh kute ar amarkumrêx ne ar ajã ukanga kêtumrêx. Kum amijarê gê ta ar ajo ba.

## 5

*Kute meo ba djwÿnhmã àpênh'ã karô.*

<sup>1</sup> Ar akam ar abê Jeju nhô me jao aba djwÿnhwã ba ar amã ik-abên jarênh ar adjápênh djã'ã ar amã karô. Dja gar ikabên ma. Ota, badjwÿ ibê Jeju nhô me jao iba djwÿnh. Ba ne ba Kritu tokrykôt omÿ. Dja ba ajte omÿ. Djãm rerekren kajgo ba omÿ? Kati. Dja ra:x ne uma: ba arÿm omÿn kôt ar iba.

<sup>2</sup> Ga, me kute me ô krito djuw mex nhyam memã abatãnhja pumÿ. Ar gadjwÿ dja gar wãkam me kute amim Jeju marmã arênhho aba. Memã Metîndjwÿnh kabên jarênhho aba gê me mar mexo amÿ amikamên mar rax ne. Djãm me'ô ne kute ar amã ar aje meo aba'ã àpnênh tÿx gar amã uman kabên kôt ar aje me omÿnho abamã? Kati. Ar ga dja gar amã me omÿnh kÿnh ne meo aba. Djãm ar aje pi'ók kaprÿbit mar ne aje amim o

adjãptàr kadjy meo abamã? Kati. Ar amã me kÿnhkam dja gar me o aba. <sup>3</sup> Djãm ar aje amiraxo adjãmran Metîndjwÿnh nhô me ja janoro abamã? Kati.

Ga, mrykÿ'ãtomtio ba djwÿnh ô krit kukãm katàt baja pumÿ. Katàt ba nhyam ô krit arÿm kôt katàt amijo ba. Ar gadjwÿ dja gar Metîndjwÿnh nhô me ja kukãm katàt ar amijo aba gê me ajã amim, “Ba gêt kudjwa”, anen arÿm ar akudjwa katàt ar amijo ba.

<sup>4</sup> Ga, me kute aben rer djãja pumÿ. Kam me'ô kute me kunÿ rerja dja kÿnh djã'ã arÿm amim krãdjê byn kutu. Pi'ôo krãdjê tu. Nhyam kam pi'ôo krãdjê tẽmbê punu. Ar gadjwÿ dja gar katàt ô me ja kukãm amijo aba mex ne arÿm amim akÿnh djã by. Ô me jao ba djwÿnh djwÿnh dja bôx. Jeju dja bôx ne arÿm ar amã ar akÿnh djã mexti:re ngã gar arÿm amim aby. Djãm ar akÿnh djã rerekmã? Djãm punumã? Arkati. Kute ar amã ar akÿnh djã nhôr ja dja mex rã'ã: rã'ã ne.

<sup>5</sup> Ar ajabatãnh nyredjwÿ, ba ar amã ikabên jarê. Dja gar mebêngêt kabên ma. Arÿm me abatãnhkam dja gar me kabên man kôt ar amijo aban amim,

—Djãm ije iraxo me akrenh? Kati. Ikaigo, anen abenmã amijo angrin akajgo. Mÿkam? Bir, amrêbê: me bakukãmãre memã kum,

“Me amijo àmra prãmja Metîndjwÿnh arÿm mebê aptã.

Nhyam be, me kute amijo kajgo dja Metîndjwÿnh tu mekam ukaprikumrêx”, ane.

<sup>6</sup> Metîndjwÿnh 'itÿxo kubê kumkati dja gar rax man kam arÿm amijo akajgo. Amijo akajgo: nhyam ï akati 'ókam arÿm kãjmã ar akamên ar ajo rax ne. <sup>7</sup> Dja gar rax ma:n kum ar adjumar punu djã kunÿ jarênhho aba. Kute ar amã ne ar ajo djuw

mexo ýrkam ã kum anhyro abao ane.

<sup>8</sup> Ar ano mex ne amijã ano tÿx ne aminêje rît. Ga, rop jamrexe kâr ar baja pumÿ. Nãm kute mry'õ krênMã abej ar ba. Akurê djwÿnhbê Xatanajdjwÿ ne 'itÿ:x ne àkrê: ne kabên 'itÿ:x ne me abej ar ba. Kute me'õbê Jeju kurêMã nhym 'ã ukangamã ne abej ar ba. <sup>9</sup> Dja gar tu amim Metÿndjwÿnh mar tÿxkumrêx ne 'ã adjukanga kêt ne o arÿm Xatanajbê aptân arek kubê dja. Xatanaj ar abê Jeju kurê prãm ne ajte pyka kunîkôt me bakamydjwÿbê kurê prãm. Jeju kukwakam ar aje meo akamyjabê kurê prãm nhym me ar akudjwa arÿm tokry. Ja dja gar aman kubê aptâ.

<sup>10</sup> Metÿndjwÿnh ta ne tu kum me kaprî:kumrêx\* ne prîne kute me kunîo djuw me:xkumrêx. Ta ne Kritu djâpênhkôt amiwÿr ar ajuw ne ar ajo ba. Dja gar õ kâjkwakam kôt atÿn ne ar aba rã'ã: rã'ã ne. Ja kadjy ne amiwÿr ar ajuw. Be, ar atokry kâjbê 'irykam dja prîne ar ajo mex. Ta dja akubyn ar amã tÿx jadjã gar kôt adjãm tÿx ne 'ã ar adjukanga kêtumrêx. <sup>11</sup> Gê me kunî kum mex jarênh rã'ã: rã'ã ne. Gê me kunîmã rax rã'ã: rã'ã ne. Tãm ne ja.

<sup>12</sup> Ije ar amã ikabên jarênh ja ne ba Xibanumã arê nhym arÿm 'ã pi'ók no'ók gar arÿm amim arê. Me bakamybê Xibanu ne tu amim Jeju markumrêx ne 'ã ukanga kêtumrêx. Ba ar amã ikabên jarênh 'ikrãn nhym 'ã pi'ók no'ók ne. Ar akÿnhmã ne ba ar amã arê. Ba ar amã mrãmri Metÿndjwÿnh ta tu kum ar akaprîkumrêx jarê. Kam dja gar tu amim markumrêx ne 'ã adjukanga kêtumrêx.

<sup>13</sup> Krîraxbê Babirônijkam me kute amim Jeju mar ne ar aben pydjio baja ne me ar amã kabên mex jarê. Metÿndjwÿnh kute meo ba kadjy

arÿm amijo me utã. Ar gadjwÿ arÿm amijo ar apytã. Makôdjwÿ ar amã kabên mex jarê. Tãm ne mã ikôt ajkamên arÿm kute ikra pyrãk.

<sup>14</sup> Dja gar abenwÿr bôx ne abenmã akabên mex jarênh aben pa krij. Ar amã aben jabêkam aben pa krijn aben tatak ne.

Gê ar aje amim Kritu Jeju mar kunîwã umar mex. Tãm ne ja.

\* 5:10 Djãm me ba ne gu me badjukaprî nhym pãnh kum me bakaprî Kati. Me ba ne gu me badjukaprî kêt. Ta ne kum me bakaprîkumrêx.

## Pedru kute memã atāri pi'ôk no'ôk ne ja.

Jejukôt ba djwýnhbê Pedru ajte arkum pi'ôk no'ôk ne. Tyk kêtri ne arkum pi'ôk no'ôk ne. Tekrekam Metĩndjwýnh kabên jarênh djwýnh 'êxnhĩ bôxmã ne arkum arê ne kam arkum,

—Dja gar Jeju'ābit angràn amũ aje maro amikamênh kadjy katāt ar amijo aba. Akati 'ôkam dja Jeju akubyn bôx ne pyka jao apêx. Kam dja ar amã pyka jakam kukràdjā kĩnh rax kêt. Dja ĩ apêx gwaj Jeju akubyn bôx kamnhĩxbê ar baba. Nãm ā Pedru arkum ane.

<sup>1</sup> Ba ibê Ximão Pedru. Jeju Kritu ne ijano ba 'ā idjujarênh ar iba. Ba ne ba ar amã ikabên ne. Gwaj Batĩndjwýnhmê gwaj bapytār djwýnh ar ta ne ar arým gwaj bamã axwe kêt jarê. Jeju Kritubê ne gwaj bapytār djwýnh. Ar ta ne ar gwaj bamã axwe kêt jarê gwaj arým tu amim markumrêx ne bamã kĩnhkumrêx. Ar amã ne ba ikabên jarê.

<sup>2</sup> Gê Metĩndjwýnh tu kum ar akaprĩ:kumrêx\* gar adjumar mexo amũ amikamên arým adjumar mexkumrêx ne.

*Me ba mex'ā kute memã karō.  
Kô k 1.4*

<sup>3</sup> Metĩndjwýnh ne mexo uma:n prĩne mex ne axwe kêtumrêx. Arým amiwýr gwaj bajuw gwaj tu amim markumrêx nhyam 'itýxkôt arým gwaj bamã Karō jano. Ne gwaj bamã kabên jarê gwaj arým bamã kĩnh ne kôt ar amijo baban kam arým kôt batĩn ne ar baba rã'ā: rã'ā ne. Gwaj kam bajaxwe kangan bamex prām. <sup>4</sup> Kôt ne kute gwaj bamã mýjja jarênh mãmđji. Kute gwaj bamã mýjja mexti:rekumrêx jarênh. Dja gwaj amiwýr mýjjakam

amakbê ta mexo bamex. Ja kadjy ne gwaj bamã mýjja mexti:re jarê. Me kum Metĩndjwýnh kĩnh kêtja ne me mýjja punu kumexo ba. Me 'êxnhĩ. Me kum me kurê. Me ari prō, mjên kupa'ā kurê ba. Me mýjja punu kumex jao ba. Gwaj ba dja gwaj bamã mýjja punu kĩnh kêt ne tu kangakumrêx. Ja kadjy ne Metĩndjwýnh gwaj bamã mýjja mextire jarênh mãmđji.

<sup>5</sup> Kute gwaj bamã mýjja nhõrmã arênhkam

dja gar amikrà kêt ne amex. Arým ar aje tu amim Metĩndjwýnh markumrêxkam dja gar amex.

Amex ne ajte Metĩndjwýnh mar mexo amũ amikamên mar rax ne.

<sup>6</sup> Metĩndjwýnh mar rax ne ajte ajaxwe kêt kadjy amijāno dja.

Ajaxwe kêt kadjy amijāno djan ajte Metĩndjwýnh kôt ar amijo aba.

Kôt ar amijo aba'ā adjukanga kêt.

'Ā adjukanga kêt ne ajte mex kôt amex.

<sup>7</sup> Mex kôt amex ne ajte Jeju kukwakam akamy arkam adjukaprĩ. Arkam adjukaprĩ kute me axikôt apôx abenkam ukaprĩ pyrāk.

Arkam adjukaprĩn ajte amã me kunĩ jabê.

<sup>8</sup> Dja gar ā aba mexo anen aba mexo amũ amikamên aba me:xxumrêx. Ga, pidjô ô me:xxumrêxja pumũ. Nhyam me kum kĩ:nhkumrêx. Ne kam kam kaprĩ kêtumrêx. Ar gadjwý dja gar aba me:xxumrêx ne aka-jgo kêtumrêx nhyam Bēnjadjwýr djwýnhbê Jeju Kritu arým kum akĩnhkumrêx ne akam kaprĩ kêtumrêx.

<sup>9</sup> Nhyam be, godja gar ajō aba mex kêt ne aba punu jabej. Aje mrāmri ne me no rã kute amybym mýjja pumũnh kêt pyrāk ne aje

\* 1:2 Djām ar ga ne gar adjukaprĩ nhyam pānh arým kum ar akaprĩ Kati. Ta ne tu kum ar akaprĩkumrêx.



mar rerekre. Metīndjwýnh ne arým ar ajaxwe tūm maro aknon akam ngyrk kêt. Nhym be, ar ga ne gar arým jao ajamak kêt katin arým mar kêt ne.

<sup>10</sup> Kam, akmere, àpnhīre ar, amibêx ne markumrêx. Djām mrāmri ne Metīndjwýnh amijo ar apytān amiwýr ar ajuw ne ar ajo bakumrêx? Ja dja gar amibêx ne markumrêx. Ne kam arým amim,

—Nā. Mrāmri ne Metīndjwýnh arým amijo ipytān ijo bakumrêx, ane. Dja gar ije ar amā arēnhja kôt amijo aba mex ne kam Metīndjwýnhbê amijo akêx kêtumrêx.

<sup>11</sup> Dja gar aba mexo ane nhym kam arým Bēnjadjwýr djwýnhbê Jeju Kritu bôx. Kubê ne gwaj bapytār djwýnh. Dja bôx ne ô kàjkwamā ar ajo mōn ar ajo bôx ne arým ar amā,

—Aj. On amrê wadjā. Ota, ar anhō mýjja mexti:rekumrêx. Ba dja ba ar ajo iba. Jakam dja ba me kunī:ô iba rā'ā: rā'ā ne, ane. Dja gar pykakam aba mexo ane nhym arým ar ajo bôx ne ā ar amā ane.

*Metīndjwýnh kabēn pýnh ne kute memā arēnh.*

*Ep 4.1; Kor 1.10; Ped k 1.15; Ap 3.4*

<sup>12</sup> Kam dja ba ije ar amā ar aba mex ja'ā karō 'āno dja. Arým ne ba ar amā tām jarē gar arým aman arým kôt amijo aba mex. Kwārīk wānh rā'ā. Dja ba ajte ar amā tām jarēn ajte ar amā tām jarē gar arým mar týx ne. Ne kam aba mex'ā adjukanga kêt.

<sup>13</sup> Nā bām amim,

—Pykakam itīn ne ar ibari dja ba mā arkum arē gē ar mar týx. Tām ne mexkumrêx. Nā bām ā amim anen kam arým mā ar amā arē. <sup>14</sup> Mrāmri ityk arým ijo rām ne ja. Bēnjadjwýr djwýnhbê Jeju Kritu ne imā arē ba arým kuma. Ga, kubêkatio kikreja pumū. Nām me kungrān arým mā tē. Badjwý dja

ba ty nhym inhī wānh nō. <sup>15</sup> Itīnri dja ba ar amā karō 'āno dja. Ar aba mex'ā ar amā karō 'āno dja. Dja ba ty gar mā aba mex ne mar týx ne arým 'ā adjukanga kêtumrêx.

<sup>16</sup> Gwaj banhō Bēnjadjwýr djwýnhbê Jeju Kritu arým bôx ne 'itýxkôt mýjja pumūnh kêt nhīpêxo ba. Bar memā 'ā idjujarēnh ar iba. Djām me kabēn kajgokôt ne bar amijo iban arým ar amā me ujarēnh kajgo jarē? Kati. Djā ne me ta amim,

—Ba dja ba memā 'ā ajarēn prīne idjujarēnho irō mex gē me idjujarēnh ma? Dja me kuman aben djô'ā amū abenmā arēnho ba, ane. Djā ne me ā amim anen 'êx ne arým amū imā arē ba me ujarēnh kajgoja man arým me ô'ā amū ar amā arē? Kati. Ar ba ne bar Jeju pumūnhkumrêx ne kam kôt ar amā 'ā ajarē. Jejubê ne Bēnjadjwýrbê kumkatibê Kritu ne me kunī, mýjja kunīo ba. Bar omūn arým ar amā tāmja'ā ajarē.

<sup>17-18</sup> Amrêbê ne bar Jeju pumū. Metīndjwýnh nhō krānhkam ne bar djan arým kam Metīndjwýnh kabēn ma. Jejumē ro'ā ne bar djan arým kuma. Kakrā jadjēnh tý:x ne me:xkumrêx ne arým Jeju kuno bar omū. Nhym kam Metīndjwýnh arým kàjkwa kurūm Jeju'ā ar imā kabēn jarē. Kakrā jadjēnh tý:x kurūm ne ar imā 'ā kabēn jarēn kam,

—Ikra ne wā. Imā abê:kumrêx. Ba kam kam ikīnhkumrêx. Nām ā Jeju'ā ane bar arým kabēn ma. Ga, Metīndjwýnh, me Babām ta kute kum rax jarēnhja pumū. Kum kī:nh jarēnhja pumū bar arým kuma.

<sup>19</sup> Be, nā bām ar Jeju pumūn Metīndjwýnh kabēn ma. Nhym be, amrêbê ne me bakukāmāre Metīndjwýnh kukwakam kabēn jarē. Metīndjwýnh ne kabēn pýnh ne arē gwaj mar pýnh. Dja gwaj on Metīndjwýnh kabēn mar 'āno dja.

Ga, ngõnh pòk kryre kute akamàt kò tyk kurwýja pumũ. Me'õ ne o akamàt kurwý ne arým amim kam mýjja pumũho ba. Metũndjwýnh kabẽndjwý dja gwaj mar 'ãno djan arým mýjja mar kêt maro tẽ. Arým mýjja kute apõxmã maro tẽ. Dja gwaj mar 'ãno badjãmo tẽ:n arým mýjja'yr o bõx ne arým prĩne mýjja pumũnh mex ne.

Ga, umajýrti noti kãjmã mrãnhja pumũ. Kãjmã mrã nhym me arým abenmã kum, "Arým akati 'yr", ane. Nhym kam akati ban arým akati nhym kam me arým mýjja kunĩ pumũnh mex ne. Gwaj badjwý dja gwaj Metũndjwýnh kabẽn mar 'ãno badjãmo mõ:n arým Kritu'yr o babõxkumrẽx. Nhym kam arým akubyn bõx gwaj arým prĩne omũnh mex nhym arým me:xkumrẽx ne dja. Gwaj kam prĩne mýjja kunĩ pumũnh mexkumrẽx.

<sup>20-21</sup> Amrẽbẽ: me bakukãmãre Metũndjwýnh kukwakam kabẽn jarẽ nhym me 'ã pi'òk no'òk ne. Djãm kabẽn jarẽnh djwýnh ta ne amikabẽn man o Metũndjwýnh kabẽn ne arẽ? Kati. Metũndjwýnh Karõ ta ne ngrẽk nhym kam kabẽn man Metũndjwýnh kabẽn kò:t arẽ. Karõkõt kute arẽnhkam djãm gwaj baje pi'òkkam kabẽn jarẽnh kajgo ne tu kabẽn mar, tu mýjja'ã kute kabẽn jarẽnhja mar? Kati. Gwaj ba baje tu mar kêt. Dja gwaj Karõ kumrẽx ma nhym arým gwaj bajamak bõ gwaj kam pi'òkkam kabẽn jarẽ. Ne kam arým kõt kuma.

## 2

*Me ta kute amijo 'êx ne kute Metũndjwýnh kabẽn jarẽnh.*

### *Djuda 3*

<sup>1</sup> Nhym be, me bakukãmãre kwý ne me arým amijo 'êx ne memã kum,

—Metũndjwýnh kukwakam ne ba ar amã arẽ, anhýro ba ne arým Metũndjwýnh kupa'ã memã

mýjja kwý'ã ujarẽnh ar ba. Ar akamdjwý dja me kwý ta amijo Metũndjwýnh mar mex ne ate kupa'ã ar amã mýjja kwý'ã ujarẽnh ar ba. Dja me 'êx ne kraxkam ujarẽnh mexkumrẽx. Ne ujarẽnh tẽ:n kam arým 'ênhõtka kupa'ã ajarẽ:n kam arým me akwý noo akno. Ne arým Metũndjwýnh bê ar ajo akẽx. Dja me ajte Bẽnjadjwýr djwýnh'ã memã kum,

—Djãm mrãmri ne Jeju me axweo pãnhkumrẽx? Kati. Nãm me 'êx, anhýro ba. Anhýro ba:n arým me aerbẽ tyn arým me biknor tokry djãkam akuno.

<sup>2</sup> Me 'êxnhĩ ja ne me prõ prãm, mjên prãm ar ba. Dja me krãptĩ me 'êxnhĩ man me kõt prõ prãm, mjên prãm ar ba. Nhym me kãtãm me omũn arým abenmã kum,

—Be, djãm me kute amim Jeju mar wãkam me mex got? Me axwe, anhýro ba.

<sup>3</sup> Me kute Metũndjwýnh'ã 'êxja dja me amim mýjja rũho atom prãm ne Metũndjwýnh kupa'ã ar amã mýjja kwý jarẽn arým ar anoo akno. Ga, me kute memã nẽkrẽx nhõr ne pãnh pi'òk kaprĩ jamýnhja pumũ. Ar gadjwý dja me ar ajo õ nẽkrẽx pyrãk ne ar anoo aknon arým ar abẽ pi'òk kaprĩ jamý. Djãm Metũndjwýnh ate krãn ar ban kute me mar kêt? Djã nãm õtdjwan me omũnh kêt? Kati. Dja me aerbẽ mrãmri memã axwe pãnh jarẽnhkumrẽx nhym me arým me biknor tokry djãkam akuno.

<sup>4</sup> Djãm me axwe kajgo? Djãm pãnh kêt? Kati. Metũndjwýnh kute memã axweo pãnhkumrẽx. Nhym kadjy mrãnh djwýnhdjwý, djãm kute memã axweo pãnh kêt? Kati. Pãnh ne arým apa:rmã me biknor tokry djãkam me kumẽ. Ne kam akamàt kò tykkam mebẽ ijẽ, mrãmri me kute kãxirãxo me 'ãprekam me kute mebẽ ijẽ tỳx pyrãk. Dja 'ãtũm nhym memã axwe

pãnh jarënh nhõ akati arÿm bõx. Kute kam memã axwe pãnh jarënh kadjy Metĩndjwÿnh arÿm mebê ijê. Dja memã axwe pãnh jarê.

<sup>5</sup> Me bakukãmãre Nõwe bu'ã me jadjwÿ, djãm me axwe kajgo? Kati. Me axwe kajgo kêt. Pãnh. Nõwe te kàj bê me kute katàt amijo ba'ã memã karõo ba nhyim me axwe rà'ã ne. Memã 'ã karõo ba: nhyim arÿm me'ã ngõ tàim ne me kunĩ nhimex ne. Nhyim be, Nõwemê Ar kubê 7bit ne Metĩndjwÿnh ngõ tàmbê ar utã.

<sup>6</sup> Krĩraxbê Xõtõmamê Gomorakamdjwÿ djãm me axwe kajgo? Kati. Kajgo kêt. Pãnhkumrêx. Arÿm ne Metĩndjwÿnh memã axweo pãnh nhyim me kunĩ arÿm xêr nhyim arÿm mÿjja prãbit nõ. Mÿj kadjy? Bir, jakam me amakkre kêt kunĩ kute mar ne kum Metĩndjwÿnh pymamã. Ja kadjy ne ã memã axweo pãnhõ ane.

<sup>7</sup> Ne kam me'õbê Rodjwÿ. Ro axwe kêt nhyim Metĩndjwÿnh arÿm utã. Xõtõmakam ne me ari prõ, mjên kupa'ã kurê ban axweti ba. Nhyim Ro axwe kêt ne arÿm mekam pijãm ne kaprĩre ne. <sup>8</sup> Ne me axwe kêt me omũn ne me maro ba. Ne kam me ô'ã akati kunĩkõt kadjwÿnhbê tokry. Nhyim kam Metĩndjwÿnh arÿm Ro pytãn arÿm me axwe kunĩ ga.

<sup>9</sup> Ga, Metĩndjwÿnh kute Ro pytãn mar mekkumrêxja pumũ. Me kute Metĩndjwÿnh mar ne kõt kute amijo badjwÿ ne Metĩndjwÿnh kute me utãn mar mekkumrêx. Kute kapribê me utãn mar mekkumrêx. Me axwedjwÿ Metĩndjwÿnh kute mebê ijê mar. Mÿj kadjy dja mebê ijê? Bir, dja ã memã axwe pãnh jarê. Kute memã axwe pãnh jarënh kadjy dja mebê ijê.

<sup>10</sup> Me kute Metĩndjwÿnh'ã 'êxja ne me kum amidjwÿnhbito kĩnh prãm. Ne kam kum mÿjja punu kĩnh. Me ja ne ba ar amã arënh 'ãno dja. Metĩndjwÿnh dja mebê ijê.

Me kum me rũnh kunĩ kurên kum me uma kêt. Me amakkre kêt ne amijo ãmra prãm ne tĩn prãm kêt ne tu me rũnh'ã kabën punu. Me kwÿ ne me te uma nhyim me 'êxnhĩja tu me'ã kabën punu. <sup>11</sup> Nhyim be, Metĩndjwÿnh kadjy mrãnh djwÿnh umaro 'itÿxo kute me 'êxnhĩja jakrenh mex. Nãm me te 'itÿx djãm me kute Metĩndjwÿnhmã kum, "Me axwekumrêx", anhyr mã? Kati.

<sup>12</sup> Nhyim be, me 'êxnhĩja ne me kute mry pyrãk. Mÿj kadjy ne mry ar ba? Bir, me kute par ne kute kur kadjy. Me kute Metĩndjwÿnh'ã 'êxjadjwÿ. Mÿj kadjy ne me ar ba? Bir, dja Metĩndjwÿnh ã meo akno nhyim me arÿm me biknor tokry djãkam akuno. Me kute mry pyrãk ne kute me mar kêt kam tu me'ã kabën punu.

<sup>13</sup> Me 'êxnhĩja ne me Metĩndjwÿnh kabën kupa'ã memã arënhõ ba. Kam, dja Metĩndjwÿnh memã axweo pãnh nhyim me tokry:. Nãm me pijãm kêt ne a'uri axwe ban õ kwÿ krên kõt o ikõn kam ajbãn kurê ban kam we kĩnhkumrêx. Be, me ja ne me ar amã amibën amijo amran arÿm ar aro'ã krĩn aku. Ar aro'ã akun ar amã 'êx ne ar anoo biknoro ba. Ga, me kã mekkam mÿjja 'õk, me ngrã 'ã ariřkam punuja pumũ. Ar gadjwÿ ne me punuo ar apunu.

<sup>14</sup> Nãm me mebê prõ nãr mjêno àkĩnh kadjy ari no prõt ne kum axwe prãm. Nhyim me kwÿ kute amim Jeju mar rerekre nhyim me arĩk memã 'êx ne me noo aknon arÿm amiwÿr meo akêx nhyim me mekõt axwe. Nãm me kute amim mÿjja rũnhõ atom kadjy no nextire ne Xatanaj man kõt ar amijo ba. Me kute mrãmri ne me tàmdjwÿ kute ingêt kõt amijo ba pyrãk. Metĩndjwÿnh ne amrêbê: me'ã amim,

—Me wã dja ba me kanga nhyim me arÿm me biknor tokry djãkam akuno, ane.

15 Nãm me tu Metĩndjwỳnh nhõ pry kangakumrẽx ne arỳm me bakukãmãre Barãoja kõt ar amijo ba. Bedjo kute Barão djirja kõt ar amijo ba. Me'õ ne Barãomã kum,

—Dja ga Metĩndjwỳnhbẽ mebẽ id-jaer kurẽn kum, “Dja ga mebẽ id-jaero ajkẽ”, ane. Ota, pãnh nẽkrẽx kumex. Nãm me ã Barãomã ane nhym arỳm kum nẽkrẽx kĩnh ne me kabẽn kõt me'ỳr tẽ. 16 Me'ỳr tẽ: nhym Metĩndjwỳnh arỳm õ mrymã me kabẽn jadjã nhym mry arỳm Barãomã kabẽn ne. Bibãnh ne axwe ja nẽje kum kabẽn nhym arỳm Metĩndjwỳnhbẽ me kurẽ kêt ne.

17 Be, me kute Metĩndjwỳnh'ã 'ẽxja ne me kabẽn kajgo jarẽn kumex. Ga, ngõmkwatikam arỳm ngõ ngrãja pumũ. Me kum kõt ne 'ỳr bõx nhym kam ngõ kêt ne kre kajgo. Nhym me arỳm kam kaprĩ:re. Ar gadjwỳ dja me 'ẽxnhĩ Metĩndjwỳnh kupa'ã ar amã mỳjja kwỳ jarẽ: gar aman arỳm akaprĩ:re. Ga, kakũm kók djãbẽr tỳxkam arĩk baja pumũ. Djãm Metĩndjwỳnh ne me 'ẽxnhĩo ba? Kati. Mỳj kukrãdjã punu kõt ne me ta arĩk ba. Kute kakũm arĩk ba pyrãk. Kam ne me mekam kaprĩ:re. Metĩndjwỳnh dja tu akamãt kó tykkam me rẽnhkumrẽx nhym me arek kam ar ba rã'ã: rã'ã ne. Arỳm ne me kadjy akamãt kó tyk dji.

18 Nãm me amijo 'ẽx ne amijo amran mã memã kum,

—Ba ne ba ikabẽn katãtkumrẽx, anhỹro ba. Nhym me kute amidjwỳnh kĩnh prãm arỳm mekõt axwe prãm. Nhym me 'ẽxnhĩja me kute amidjwỳnh kĩnh'ã memã ãpnẽnho ba. Ne memã kum,

—Ajrã. Amidjwỳnh kĩnh aba. Dja ga ikõn kam ajbãn akurẽ aban abixaer tỳ:x ne arỳm akĩ:nhkumrẽx, ane. Me ã memã anhỹro ba. Metĩndjwỳnh ajbir amiwỳr meo akẽxo mõ nhym me 'ẽxnhĩja arỳm memã 'ẽx nhym me arỳm me maro ba. Ne kam arỳm Metĩndjwỳnh bẽ

amijo akẽx ne me 'ẽxnhĩ kõt amijo mõ.

19 Xatanaj kute me 'ẽxnhĩja pa 'amỳnh tỳx ne amipunu kõt ar meo ba. Nhym kam me 'ẽx ne memã kum,

—Ikabẽnkõt dja ga amidjwỳnh kĩnh aba. Djãm aje amidjwỳnh kĩnh nhym Metĩndjwỳnh akam ngyrkãm? Arkati. Dja ga amidjwỳnh kĩnh ne arỳm akĩnhbit, ane. Me kute Metĩndjwỳnh'ã 'ẽxja ne me ã memã anhỹro ba. Ba ar amã arẽ gar ama. Ga, me kute me pa 'amỳnh nhym me arỳm kum ãpẽn kajgo ne kaprĩ baja pumũ. Me kaprĩ ba:n te kute kubẽ amijo põxmã. Me axwedjwỳ ne me axwe rã'ãn te ta axwe kẽtmã. Me kute mrãmri ne me pa 'amỳnh tỳx nhym me te kute amijo põx prãmjeja pyrãk.

20 Bir, godja me'õ jaxweja arỳm kute amim Bẽnjadjwỳr djwỳnhbẽ Jeju Kritu marn 'ỳr akẽx, gwaj bapytãr djwỳnhja'ỳr akẽx ne me kum Metĩndjwỳnh kĩnh kêt djãpẽn punujabẽ amiptã. Ne kam akubyn me axwe'ỳr akẽx ne ajte mekõt axwe jabej, mrãmri akubyn mekõt axwekam arỳm axwe ra:x.

21 Be, katãt Metĩndjwỳnh kabẽn kõt kute amijo baja ne me'õja arỳm kute mar mex. Ne ren mar kêt ne ren kãjbẽ axwe. Nhym be, kati. Arỳm ne mar mex. Nãm te mar mex ne arỳm kubẽ amijo akẽx. Kam ne arỳm axwe ra:x ne. Metĩndjwỳnh me kute katãt amijo ba'ã kute memã karõkõt kabẽnja ne arỳm mar mex ne arỳm kubẽ amijo akẽx ne arỳm axwe ra:x ne.

22 Amrẽbẽ: me bakukãmãre kabẽn kõt ne me'õja arỳm ã amijo akẽxo ane. Me bakukãmãre memã kum,

“Ropre ne arỳm õ jaĩn. Ne kam akubyn kukrẽ. Nhym me te angrõ jamydjwỳ ku'õ nhym akubyn ngykam amirẽ.”

Nãm me bakukãmãre ã me kute Metĩndjwýnh markam kute kubẽ amijo akẽx'ã ã memã ane.

### 3

*Bẽnjadjwýr djwýnh bõx djã nhõ akati'ã ujarẽnh.*

<sup>1-2</sup> Akmere, ãpnhĩre ar, imã ar ajabẽ. Amrẽbẽ ne ba ar amã Bẽnjadjwýr djwýnh akubyn bõxmã arẽ. Pi'õkkam ba ar amã arẽ. Ne kam pi'õk jakam ba ajte ar amã arẽ. Ar aje mar tỳx rã'ã kadjy. Ije ar amã arẽnhkam ba akubyn ar ajo tẽn me bakukãmãre kabẽn'ýr ar ajo bõx. Me bakukãmãre kwý ne mebẽ Metĩndjwýnh kukwakam kabẽn jarẽnh djwýnhkumrẽx ne kukwakam memã kabẽn jarẽ. Bẽnjadjwýr djwýnh akubyn bõxmã arẽ ba ajte jakam ar amã arẽ. Bẽnjadjwýr djwýnh, gwaj bapytãr djwýnh ne ar ijano bar memã 'ã idjujarẽnh ar iba. Dja gar ajte ar badjwý ar ima. Ar ije amrẽbẽ Bẽnjadjwýr djwýnh kukwakam ar amã katãt aje amijo aba'ã karõja dja gar ajte ama. Ar aje Bẽnjadjwýr djwýnh akubyn bõxmã mar tỳx rã'ã kadjy ba 'ýr ar ajo bõx ne ajte ar amã arẽ. Ba ar amex man ã ar amã arẽnhõ ane.

<sup>3</sup> Dja Bẽnjadjwýr djwýnh akubyn bõx 'ýr nhym me arým gwaj bajprý:. Ja kumrẽx ba ar amã arẽ. Dja me mýjja punubit'ã amim karõn kum axwe prã:m ar ban arým gwaj bajapryõ ban <sup>4</sup> gwaj bamã,

—Je tó nhýnh? Djãm kute aminhõ akati jarẽnhja on bõxmã got? Adjãkamã mýjja kunĩ kute aminhipẽx kraxkõt kute amijo mõr tãmtã rã'ã. Me bakukãmãre kêt mýrbẽ mýjja tãm rã'ã. Djãm on õ akati bõxmã got? ane. Dja me ã gwaj bajapryõ ane.

<sup>5</sup> Djãm mrãmri ne we mýjja kunĩ rã'ã nhym we Jeju akubyn bõx kêt mã? Kati. Ga, adjãkamã Metĩndjwýnh kabẽn kõt kãjkwa katorja pumũ. Nhym kam ajte

kabẽn kõt pyka ngõ kurũm katon ngõ kõt aminhipẽx.

<sup>6</sup> Nhym kam kabẽnkõt ajte ngõ pykao ajkamuwñ o aknon prĩne o ajkẽ. Ja ne me kute mar prãm kêt kumrẽx. Ne kam we mýjja kunĩ rã'ã jarẽ. We Jeju akubyn bõx kêt jarẽ. Kati. Metĩndjwýnh kabẽnkõt dja Jeju akubyn bõxkumrẽx.

<sup>7</sup> Nhym be, jakam Metĩndjwýnh ta amikabẽnkõt amim kãjkwamẽ pyka'ã ma. Dja kabẽnkõt xẽr. Metĩndjwýnh dja ã memã axweo pãnh. Me kum Metĩndjwýnh kĩnh kêtjamã axweo pãnh. Nhym kam me arým me biknor tokry djãkam akuno. Kamã, dja kãjkwamẽ pyka xẽr.

<sup>8-9</sup> Me kwý ne me amim,

—Bẽnjadjwýr djwýnh akubyn bõxmã amijarẽn kam ate ari amikrão ba. Nãm me ã amim ane. Djãm mrãmri ne Bẽnjadjwýr djwýnh amikrão ba? Kati. Akmere, ãpnhĩre ar, ba ar amã mýjja jarẽ. Dja gar amim markumrẽx. Dja kãjkwakam Bẽnjadjwýr djwýnh'ã akati pydjibit apẽx. 'ã akati pydji apẽx ja ne kute gwaj bajã amex krãptĩ: arým apẽx pyrãk. Ba ajte ar amã arẽ. Dja gwaj bajã amex krãptĩ:õ kute 1.000 pyrãk apẽx. Gwaj bajã amex krãptĩ ja ne kute Bẽnjadjwýr djwýnh'ã akati pydjibit apẽx pyrãk. Bẽnjadjwýr djwýnh ne kute amikrão ba kêt. Kabẽn pydji ne arẽ. Amikabẽn kõt dja bõxkumrẽx. Mýkam ne amrẽbẽ bõx kêt? Bir, nãm ngryk tõn amiwýr me amãr 'iryñ amim,

—Djãm me'õ biknor ba kam ikĩnhmã? Kati. Me kunĩ amikam kaprĩren wãnh amijaxwemã irern kute iwýr amijo akẽxkambit dja ba ikĩnhkumrẽx. Nãm ã amim anen amiwýr me amãr 'iry. Kam ne amrẽbẽ bõx kêt. Nhym be, dja mrãmri akubyn bõxkumrẽx.

<sup>10</sup> Dja te amiwýr me amãr 'iryñ arým gwaj bajaerbẽ bõxkumrẽx. Bẽnjadjwýr djwýnh bõx djã nhõ akati dja me'ýr bõx kute mrãmri

ne akamãtkam me àkĩnhĩ me aêrbê bôx pyrãk. Dja me'yr bôx nhym kàjkwakam mÿjja arÿm kêt ne, kàjkwakam mÿjja kunĩ: kêt ne. Dja mÿjja rãrãk tÿ:x ne arÿm kàjkwa nhĩ'ãm tèn akuno. Pykadjwÿ dja arÿm xêr. Pykakam me kute mÿjja nhĩpêxdjwÿ dja xêr. Mÿjjao pyka kute aminhipêx djãdjwÿ dja kunĩ xêr. Dja kuwy kangro tÿ:x nhym arÿm mÿjja kunĩ: xêr nhym arÿm kêt ne.

<sup>11</sup> Ga, mÿjja kunĩ kêtãmãja ma. Ar aje ja markam mÿj dja gar on jakam amijon? Bir, dja gar on Metĩndjwÿnh kabên man kôt ar amijo aban amextiren ajaxwe kêt. Kwãrĩk wãnh me kum Metĩndjwÿnh kĩnh kêtja kukràdjã kôt amijo aba kêt. <sup>12</sup> Dja gar amiwÿr kam aman mã amim,

—Gê Metĩndjwÿnh nhõ akati on bôx, ane. Metĩndjwÿnh nhõ akatikam dja kàjkwa pòk tÿx ne arÿm xêr. Nhym mÿjjao kàjkwa nhĩpêxadjwÿ dja arÿm kunĩ ôr, kangro tÿ:x ne arÿm ôr.

<sup>13</sup> Nhym be, gwaj ba mÿj ne gwaj amiwÿr kam ama? Bir, gwaj amiwÿr kàjkwa nykam ama. Gwaj amiwÿr pyka nykam ama. Metĩndjwÿnh kute gwaj bamã kabên pydjĩn arênhja gwaj kam ama. Pyka arÿm nykam djãm kam me axwe'õ ar ba? Arkati. Me axwe kêtbit dja me kam ar ba.

<sup>14</sup> Mÿkam ne ba ar amã ja jarê? Bir, dja bôx gar ajaxwe kêt nhym arÿm ar apumũ. Ar ajaxwe kêt kôt ar apumũ gar arÿm adjumar mex. Nãr, dja bôx gar ajaxwe nhym arÿm ar apumũ. Ar ajaxwe kôt ar apumũ gar arÿm adjumar punu. Kam dja gar ajaxwe kêt kadjã amijãno dja. Nhym bôx gar prĩne kum amex kute mrãmri ne kubêkã'ã ngrã kêt kumrêx prĩne memã mex pyrãk.

<sup>15</sup> Kam, kwãrĩk wãnh mekôt amim,

—Bênjadjwÿr djwÿnh akubyn bôxmã amijarên ate amikràõ ba, anhÿr kêt. Dja gar amim,

—Bênjadjwÿr djwÿnh kute me utãr prã:m. Kam ne ngyrk tòn amiwÿr me amãr 'iry. Kam ne bôx kêt rã'ã, ane. Dja gar ã amim ane.

Nãm ã gwaj bakamy Paurdjwÿ ar amã ane. Metĩndjwÿnh kute kum amak bõnhkôt ar amã ane. Kute pi'òk no'òk kôt ã ar amã ane. <sup>16</sup> Õ pi'òk kunĩkôt ne mÿjja ja'ã memã pi'òk no'òk ne. Kam kabên kwÿ ne me kute marbê mebê tÿxi. Nhym kam me kwÿ amak mex kêtja kute amim Metĩndjwÿnh mar kêt kam memã kupa'ã arên prĩne o ajkê. Ne kam Paur kabên kupa'ã ta memã amikabên jarê. Nãm me ã Metĩndjwÿnh kabên'ã pi'òk no'òkja kunĩ jarênho ane. Nãm me kupa'ã arên arÿm prĩne o ajkên Metĩndjwÿnh kabên kupa'ã ta memã amikabên jarê. Dja me kupa'ã arênho ba:n arÿm me biknor tokry djãkam akuno.

<sup>17</sup> Kam, akmere, àpnhĩre ar, ar aje arÿm ikabên ja markam amijã ano tÿx. Nok ga ren ar me axwe kôt ar amijo aban ren mekôt ajaxwe. Metĩndjwÿnh kupa'ã ne me amijo ba. Ar ga ne gar tu amim Metĩndjwÿnh kabên markumrêx. Nok ga ren ar me kabên man ren kupa'ã amijo aba. <sup>18</sup> Dja gar Bênjadjwÿr djwÿnhbê Jeju Kritu mexo amex tẽ. Kubê ne gwaj bapytãr djwÿnh. Dja gar mexo amex tèn amũ o amikamên arÿm amexkumrêx. Ne mar mexo tẽ:n amũ o amikamên arÿm mar rax ne. Gê me jakam kum rax jarên kum rax jarên rã'ã: rã'ã ne. Tãm ne ja.

## Djuão kute memã pi'òk kumrëx no'òk ne ja.

Jejukôt ba djwýnhbê Djuão ne me kute Jeju marmã pi'òk no'òk ne. Arým kubêngê:tte ne arkum pi'òk no'òk ne kum ar abên kam kum,

—Ikra ar, akmere ar, àpnhîre ar, Metîndjwýnh ne amijo ï ne me bawýr ruw. Kubê ne Jeju. Arým gwaj baje Jeju markam Bãmdjwý ma. Metîndjwýnh kumrëx ne kum gwaj bajabê gwaj kam amipãnh bamã abê ne kam bamã kradjwý jabê, baje abeno bakamykam bamã aben jabê ne kam Metîndjwýnh kabên kôt ar amijo baba, bamã abêkam. Nhym Metîndjwýnh arým Jeju kôt gwaj bajaxwe kuní maro akno. Kam dja gwaj kum amijarê nhym arým gwaj bamar krãta. Nãm ã Djuão kute arkum 'ã karõo ane.

*Kabên kute mýjja kunĩmã tĩn jangjênhja'ã ujarênh.*

*Dju k 5.11; Ap 1.18*

<sup>1</sup> Be, amrêbê ne me'õ nhidjibê Kabên, kute mýjja kunĩmã tĩn jangjênhja, mýjja kunĩ kêtiri Kabênja. Kabênja ar imã kabên jarê bar kabênkôt kuman inoo omũ. Ne arým prĩne omũnh mex ne ar inhikrao kupê. Tãm ne bar memã 'ã idjujarênh ar iba. <sup>2</sup> Tãmja, kute mýjja kunĩmã tĩn jangjênhja ne pykakam bõx ne amijo amirít bar arým omũn kam 'ã ar amã amijarê. Metîndjwýnhkôt me tĩn rã'ã: rã'ã kadjy ne me'õja kute memã tĩn jangjênh. Ja ne bar ar amã arê. Ta ne me Babãm djwýnhmê ro'ã ar ban kam arým pykakam ar imã amijo amirít. <sup>3</sup> Bar ije omũnh ne mar kôt ar amã arê. Gwaj ba baje abeno banhõbikwa kadjy

ar amã arê. Gwaj baje abeno banhõbikwakam mrãmri ne baje me Babãm djwýnhmê Kra Jeju Kritu aro banhõbikwa. <sup>4</sup> Mýj kadjy ne ba ja'ã ar amã pi'òk no'òk ne? Bir, dja gar omũn aman arým mrãmri akĩnho akĩnhkumrëx. Ja kadjy ne ba 'ã ar amã pi'òk no'òk ne.

*Me kute katàt amijo ba.*

*Dju r 8.12; Ep 5.8; Tex k 5.5*

<sup>5</sup> Ga, akamàt kô tykkam me kute mýjja pumũnh kêt ne mrãnh punuja pumũ. Nhym me memã pry kurwý nhym me arým irãkam katàt ba. Me axwedjwý ne me mrãnh punu nhym me arým memã Metîndjwýnh kabên jarê. Nhym kam me arým amim kuman kabênkôt katàt amijo ba kute mrãmri ne me irãkam katàt baja pyrãk. Metîndjwýnhdjwý djãm mrãnh punun axwe? Arkati. Katàt amijo ban axwe kêtikumrëx. Tãm ne Metîndjwýnh ar imã arê bar arým kuman arým ar amã arê.

<sup>6</sup> Gwaj badjwý godja gwaj memã kum, “Metîndjwýnh ne ijo õbikwan ijo ba”, ane. Ne atekam akamàt kô tykkam bamrãnh punumãn prãbê amim Metîndjwýnh kabên mar kêt ne bamrãnh punun bajaxwe. Djãm kam mrãmri bakabênkumrëx? Kati. Nã gwãm amijo bajêx ne katàt bakabên kêtikumrëx. Metîndjwýnh kute gwaj bajo õbikwa kêt ne kute gwaj bajo ba kêt.

<sup>7</sup> Metîndjwýnh ne katàt ar amijo ban axwe kêtikumrëx. Nãm kute mrãmri ne me irãkam katàt ba pyrãk. Dja gwaj kudjwa kabên kôt katàt amijo baban bamã bajaxwe prãm kêt ne kam arým mrãmri bajêx kêt. Nhym kam Metîndjwýnh mrãmri gwaj bajo õbikwakumrëx ne kute gwaj bajo bakumrëx. Ne kam arým prĩne gwaj bajo mex. Kra Jeju Kritu kamrõkôt gwaj bajo mex.\* Kute mrãmri ne me kute mýjja punu põnh nhym arým prĩne

\* 1:7 Dja jãm gwaj bajaxwe man jãm bajaxwe pãnh kamrõ prõtja man kam prĩne gwaj bajo mex.

mex pyræk. Dja ã gwaj bajo mexo ane.

*Me kute amijaxwe kôt Metîndjwýnhmã amijarênh.*

<sup>8</sup> Godja gwaj baje amim,

—Djãm ijaxwe? Kati. Ijaxwe kêt kumrêx, anhÿr jabej, ne kam arÿk amim bajêx ne bakabêñ katât kêt kumrêx. <sup>9</sup> Nâr godja gwaj tu bajaxwe kôt kum amijarê nhym Metîndjwýnh arÿm gwaj bajaxwe maro aknon gwaj bakam ngryk kêt ne prÿne gwaj bajo mex. Mrãmri ne kabêñ kajgo kêt ne katât kute amijo bakumrêx. Kam dja prÿne gwaj bajo mex gwaj arÿm kum bajaxwe kêt. <sup>10</sup> Djãm gwaj ba ne gwaj bajaxwe kêt? Kati. Metîndjwýnh ne arÿm memã kum, “Me kunÿ kupânhtã axwe”, ane. Kam, godja gwaj baje memã kum, “Kati, ijaxwe’ô kêt”, anhÿr jabej ne arÿm Metîndjwýnho kute me’ô ’êxnhÿ pyræk. Ne arÿm baje amim, “Metîndjwýnh ’êxnhÿ”, anhÿr pyræk. Ne kam baje Metîndjwýnh kabêñ mar kêt kumrêx.

## 2

*Me nêje Metîndjwýnhmã kabêñ djwýnh’ã ujarênh.*

*Xim k 2.5; Idja 4.14, 9.11*

<sup>1</sup> Akmere, àpnhÿre ar, mÿkam ne ba ar amã ikabêñ ja’ã pi’ôk no’ôk ne? Bir, ar ajaxwe kêt kadjy. Godja gwaj bajô arÿm bajaxwe jabej. Mÿj dja gwaj amim arêñ kuma? Bir, dja gwaj amim,

—Kàjkwakam ne me’ô dja. Jeju Kritu ne dja. Axwe kêt kumrêx. Ta dja inêje Metîndjwýnhmã kabêno dja. Ta dja inêje kum kabêñ nhym arÿm ijaxwe maro aknon ikam ngryk kêt, ane. Dja gwaj ã bajô bajaxwe jabej amim ane. <sup>2</sup> Jejubê ne gwaj bakam ngryko apêx djwýnh. Metîndjwýnh ne gwaj bajaxwekam ngryk nhym Jeju kute gwaj bajaxweo pânñ kadjy arÿm ty. Ne kam tyk jakam arÿm gwaj

bajaxweo pânñ nhym kam arÿm gwaj bakam ngryk kêt. Djãm gwaj bajbit? Kati. Me kunÿ. Apÿnh pykakam me ba djari me kunÿ jaxwe nhym Jejubê mekam ngryko apêx djwýnh.

<sup>3</sup> Djãm mrãmri ne gwaj baje amim Jeju markumrêx? Mÿj dja gwaj ja mar on? Bir, dja gwaj me kute katât amijo ba’ã kute memã karôkôt kabêñja markumrêx ne kôt ar amijo baba. Ne kam arÿm amim,

—Be ga, ije kabêñ markumrêx ne kôt amijo ibaja pumû. Mrãmri ije amim Jeju markumrêx, ane. Gwaj kam arÿm ja ma. Gwaj baje amim Jeju markumrêxja ma. <sup>4</sup> Jeju ne me kute katât amijo ba’ã memã karôn memã arê. Godja gwaj kabêñ mar kêt ne kôt amijo baba kêt jabej ne memã kum, “Ba ije amim Jeju mar”, anhÿr jabej. Ne kam bajêx ne bakabêñ katât kêt.

<sup>5</sup> Nâr, godja gwaj kabêñ man kôt amijo baba jabej arÿm mrãmri bamã Metîndjwýnh jabêkumrêx. Ne bamã abêo amû amikamêñho môn kam arÿm amim,

—Mrãmri ne Metîndjwýnh kute amikôt ijo bakumrêx. Ga, imã abêkumrêxja pumû, ane. Gwaj kam arÿm ja markumrêx. Metîndjwýnh kute amikôt gwaj bajo baja markumrêx. <sup>6</sup> Me kute,

—Ba ne ba ije Jeju ’amÿnh tÿx ne ’ã idjukanga kêt, anhÿrja ren katât amijo ba kute ta katât amijo ba pyræk.

*Me kum kamy jabêmã.*

*Dju r 13.34, 15.12; Dju k 3.14*

<sup>7</sup> Akmere, àpnhÿre ar, imã ar ajabê. Ije ar amã katât aje amijo aba’ã karôkam djã ne ba me kabêñ ny’ô jarê? Kati. Me kabêñ tÿm ne ba arê. Ar aje Jeju kôt amijo abikamêñ krax djakam me kute ar amã kabêñ jarêñ ja ne ba ar amã arê. <sup>8</sup> Ne kam ajte pi’ôk jakam katât aje amijo aba’ã ar amã karô. Kute mrãmri ne ikabêñ ny pyræk ne



ba ar amã arê. Jeju kumrêx kute kabên ja mar tÿx ne kôt ar amijo ba. Gar arÿm kudjwa kôt ar amijo aba. Nhyam kam kabên ar amã kute mrãmri ne ny pyrâk. Gar kôt ar amijo aba nhyam kam me arÿm Jeju mex man ar gadjwÿ ar amex ma. Ne kam ar ajã amim, “Mrãmri ne ar kabênkumrêx”, ane. Mÿkam? Bir, gar arÿm me kukràdjã punu kanga. Me kukràdjã punu kute akamât kô tyk pyrâk arÿm kanga. Ne kam arÿm Metîndjwÿnh kukràdjã ny ma. Kukràdjã ny kôt gar katât ar amijo aba kute mrãmri ne irâkam me katât baja pyrâk. Nhyam kam me arÿm ar ama.

<sup>9</sup> Dja me'ô memã kum,

—Ba ne ba Metîndjwÿnh kabênkôt katât ar amijo iba kute mrãmri ne me irâkam katât baja pyrâk, ane. Ne atekam kum kamy kurê. Gwaj baje Jeju kabênkôt o bakamyja kurê. Djãm mrãmri ne katât kute amijo bakumrêx? Kati. Axwen kute amijo ba punu rã'ã kute mrãmri ne me akamât kô tykkam ba punu pyrâk.

<sup>10</sup> Nhyam be, me'ô kum kamy jabêja ne mrãmri Metîndjwÿnh kabênkôt katât kute amijo bakumrêx. Katât kute amijo ba kute mrãmri ne me irâkam katât ba nhyam mÿjja'ô kute me par tok kêt pyrâk.

<sup>11</sup> Nhyam be, me kum kamy kurêja ne arÿm amim 'êx ne aminoo aknon kute katât kute amijo baja mar kêtumrêx. Kute mrãmri ne me'ô akamât kô tykkam no biknor ne kute amipry mar kêt pyrâk. Mÿkam ne kute katât kute amijo baja mar kêt? Bir ga, me akamât kô tykkam baja te rîtmãja pumÿ. Nhyam nokam akamât kô tykbit. Me kum kamy kurêdjwÿ ne me amakkre kêt ne kam kute katât kute amijo baja mar kêt.

<sup>12</sup> Ar aprîre, akmere, ãpnhîre ar, mÿkam ne ba ã ar amã ikabên jarênho ane? Bir, gar

ajaxwe nhyam Jeju arÿm ar ajaxwe pãnh ty. Nhyam kam Metîndjwÿnh arÿm Jeju man arÿm ar ajaxwe maro aknon ar akam ngyk kêt ne. Kam ne ba pi'ôkkam ã ar amã arênho ane.

<sup>13</sup> Ar akra krãptî, ar amã ne ba pi'ôk no'ôkkam ikabên jarê. Mÿkam? Bir, Kritu ne mÿjja kunî kêttri ar ba. Ar aje Kritu markam ne ba ar amã ikabên jarê.

Ar ajabatãnh nymã ne ba pi'ôk no'ôkkam ikabên jarê. Mÿkam? Bir, Xatanaj ar ajaxwemã te kute amiwÿr ar ajo akêxmã gar arÿm mar kêt ne arÿm o apa. Kam ne ba ar amã arê.

Ar aprîre, ar amã ne ba pi'ôk no'ôkkam ikabên jarê. Mÿkam? Bir, ar aje me Babãm djwÿnh markam ne ba ar amã arê.

<sup>14</sup> Ar akra krãptî, ba ne ba pi'ôk no'ôkkam ar amã ikabên jarê. Mÿkam? Bir, Kritu mÿjja kunî kêttri ar baja ar aje markam ne ba ar amã arê.

Ar ajabatãnh ny, ba ne ba pi'ôk no'ôkkam ar amã ikabên jarê. Mÿkam? Bir, Xatanaj ar ajaxwemã te kute amiwÿr ar ajo akêxmã gar arÿm kubê atÿx ne Metîndjwÿnh kabên mar tÿx ne 'amÿnh tÿx. Ne kam 'ã adjukanga kêt ne arÿm Xatanajo apa. Kam ne ba ar amã ikabên jarê.

*Me kum Metîndjwÿnh kînh kêtja kukràdjã punu'ã ujarênho.*

<sup>15</sup> Me kum Metîndjwÿnh kînh kêtja kukràdjã punu, me ô mÿjja punudjwÿ, kwãrîk wãnh ar amã kînh kêt. Me kum me kukràdjã punu kînhja kum Metîndjwÿnh jabê kêtumrêx.

<sup>16</sup> Mÿkam ne me kum abê kêt? Bir, djãm me Babãm djwÿnh kute memã kukràdjã punu jarênho? Kati. Me kum Metîndjwÿnh kînh kêtja ne me

kute memã kukràdjà punu jarênh. Me axwe kadjy ne me kute memã arênh ne memã kum,

—Dja ga amidjwýnhbito kînh, anhÿro ba. Me axwe kadjy ne me ajte memã kum,

—Dja ga amim mÿjja pumũnh tÿx, anhÿro ba. Me axwe kadjy ne me ajte memã kum,

—Dja ga amibên amijo adjàmra, anhÿro ba. Me kukràdjà punu ja ne me kum Metîndjwýnh kînh kêtja memã arênh ba.

<sup>17</sup> Dja me kum Metîndjwýnh kînh kêt kukràdjà punuja ï apêx ne me kum mÿjja punu kînhdjwÿ ï apêx. Nhy m be, me kute Metîndjwýnh kabên mar ne kôt kute amijo ba rà'ája ne me Metîndjwýnh kôt tîn ne ar ba rà'á: rà'á ne. Kam kwârîk wânh ar amã me kukràdjà punu kînh kêt.

*Kritu kurê djwýnh'ã ujarênh.*

<sup>18</sup> Be, arÿm ijabatàn h mexkam ba ar amã ikabên jarê. Dja gar amim ikabênja ma. Arÿm akati bôx 'ÿr. Arÿm mÿjja kunî kute pykakôt amingràn h nhy m me kunî kute aminhinomã amimênh 'ÿr. Dja akati bôx nhy m Kritu kurê djwýnh rax arÿm amirît gwaj arÿm omũ. Kritu kurê djwýnh rax ja ne me arÿm ar amã 'ã ajarê. Nhy m kute amirît kukãm arÿm ajbir jakam kurê djwýnh kumex ne amirît ne. Kumex amirît nhy m me arÿm gwaj bamã me arê gwaj kam kôt amim,

—Mrãmri arÿm gwaj bawÿr ò akati bôx 'ÿr. Ga, kukãm kurê djwýnh kumex arÿm amirîtja pumũ, ane. Gwaj kam arÿm ja markumrêx. Ne amiwÿr akatija markumrêx. Ne amiwÿr me kunî kute aminhinomã amimênh nhõ akatija markumrêx.

<sup>19</sup> Amrêbê ne Kritu kurê djwýnhja gwaj baje amim Jeju marjamê ro'ã krî. Nhy m be, arÿm ne me Kritu bê amijo akêx ne ate ar ban gwaj baro'ã krîkanga. Gwaj

kam arÿm memã bakaton abenmã kum,

—Be, Kritu kurê djwýnh ne wã, ane. Gwaj baro'ã me krîkam djãm mrãmri me kute gwaj bakôt amim Jeju markumrêx? Kati. Me ren markumrêx ne ren Jeju bê amijo akêx kêt ne ren kator kêt. Nhy m be, kati. Me kute Jeju mar kêt'ã kute amijo amirît kadjy ne me arÿm kato.

<sup>20</sup> Be, Kritu kurê djwýnh dja ar amã 'êx ba. Dja me te ar amã 'êx gar me mar prãm kêtumrêx. Mÿkam ne ar aje me mar kêt? Bir, Kritu mex-tire ne axwe kêtumrêx ne arÿm ar amã Karõ jano nhy m arÿm ar ajo ba. Kute ar ajo bakam ar aje me kabên katât kunî mar ne aje Kritu kurê djwýnhja mar prãm kêt.

<sup>21</sup> Djãm ar aje me kabên katât mar kêt kam ne ba ar amã pi'òk ja no'òk ne? Kati. Ar aje me kabên katât markam ne ba ar amã no'òk ne. Be, me kute memã 'êx bakam ne me kute me kabên katât kôt arênh kêtumrêx. Ja ne gar arÿm aje mar.

<sup>22</sup> Nhy m mÿj me'ò ne 'êxnîkumrêx? Bir, me 'êxnî ne me memã kum,

—Djãm Jeju'ã ne Metîndjwýnh kute me banhõ Bênjadjwÿrbê kumkati mên h got? Djãm Jejubê Kritu got? Kati. Atemã. Nãm me ã memã anhÿro ba. Me ja ne me 'êxnîkumrêx. Me kute Bãm japrÿn Kra japrÿ. Me ja ne me kubê Kritu kurê djwýnhkumrêx. <sup>23</sup> Me kute Kra mar kêtja ne me kute Bãm mar kêtumrêx. Me kute tu amim Kra markumrêxja ne me kute tu amim Bãmdjwÿ markumrêx.

<sup>24</sup> Me kute amrêbê ar amã kukràdjà jarênh dja gar 'amÿnh tÿx ne tu amim markumrêx ne 'ã adjukanga kêt. Ar aje Jejukôt amijo abikamênh krax djàkam me kute ar amã kukràdjà jarênhja dja gar 'ã adjukanga kêt. Godja gar 'ã adjukanga kêt jabej ne kam Kramê Bãmdjwÿ 'ã adjukanga kêt. <sup>25</sup> Nhy m kam Bãm gwaj bamã,

—Dja gar ikôt atîn ne ar aba rã'ã: rã'ã ne, ane. Mrãmri ne gwaj bamã ja jarênhkumrêx. Kabên pydjîn arê.

<sup>26</sup> Be, Kritu kurê djwýnh kute Metîndjwýnhbê gwaj bajo akêx prãm. Mekôt bajaxwemã kubê gwaj bajo akêx prãm. Me'ã ne ba ije ar amã pi'ôk no'ôkja. <sup>27</sup> Dja me te: kute ar ajo akêxmã ar ajo ane. Mýkam? Bir, Metîndjwýnh kute ar amã Karô janor nhym kute ar ajamýnh týx ne ar ajo bakam. Karô kute ar ajo bakam djãm atemã me'ô kute ar amã, “Ota, me'ô 'êxnhĩ”, anhýrmã? Kati. Karôja ta dja ar amã me 'êxnhĩ jarê. Ta ne kute ar amã mýjja kunĩ, me kukràdjã kunĩ jarênh ne katàt kute ar amã arênhkumrêx. 'Êxnhĩ kêtumrêx. Amrêbê kute ar amã kukràdjã jarênh kôt dja gar mã Kritu 'amýnh týxkumrêx ne tu amim markumrêx ne 'ã adjukanga kêt. Nhym kam me te: ar amã 'êx ne kute ar ajo akêxmã.

*Metîndjwýnh kra ar'ã ujarênh.*

<sup>28</sup> Be, arým ijabatàn mexkam ne ba ar amã ikabên jarê. Dja gar amim ikabênja ma. Dja gar amim Kritu 'amýnh týx ne 'ã adjukanga kêt. Gwaj amim 'amýnh týx ne 'ã badjukanga kêt nhym arým gwaj bamã amijo amirît. Gwaj bamã amijo amirît gwaj kam arým bamã umã kêt ne bapijãm kêt ne dja.

<sup>29</sup> Gar arým aje Jeju katàt kute amijo baja mar. Me katàt kute amijo baja kunĩdjwý Metîndjwýnh arým meo kra nhym me umar djã ny. Jadjwý gar arým aje mar.

### 3

<sup>1</sup> Me Babãm djwýnh ta ne arým gwaj bamã, “Ikra ar”, ane. Djãm kam kum gwaj bajabê ngri? Kum gwaj bajabê:kumrêx. Nhym be, gwaj babê Metîndjwýnh krakam me kute gwaj bamar kêt. Me kum Metîndjwýnh kĩnh kêtja kute gwaj bamar kêt. Mýkam? Bir, me

kute Jeju mar kêt kam ne me kute gwaj bamar kêt. <sup>2</sup> Akmere, àpnhĩre ar, jakam gwaj babê Metîndjwýnh krakumrêx. Ne kam mýj dja gwaj ĩ bakute? Kon. Kraxje kute gwaj bamã o amirît kêt rã'ã gwaj baje mar kêt rã'ã. Nhym be, Jeju dja ĩ gwaj bamã amijo amirît gwaj arým prĩne mexkôt omũ. Nhym kam ta amikôt gwaj badjwý gwaj bajo mex gwaj arým baje Jeju pyrãk. Ja ne gwaj baje markumrêx ne amim,

—Nã. Dja ijo mex ba arým ije Jeju pyrãk, ane. <sup>3</sup> Gwaj bawýr Jeju bôxkam amakbê bamã bamex prã:m. Gwaj bamã bamex kute ta mex pyrãk prã:m. Ne kam kam amak djêje amijo mexo tẽ.

<sup>4</sup> Nhym be, me axwe ne me Metîndjwýnh kukràdjã mar kêt ne kam amikrà ar o ba. Metîndjwýnh te memã kum, “Kwãrik wãnh ajaxwe kêt”, ane nhym me arým kam amikrà ar o ban tu axwe. <sup>5</sup> Mýj kadjy ne Kritu ruw ne nã kurũm katon ar ba? Bir, kute gwaj bamã bajaxweo apêx kadjy ne katon ar ba. Ja ne gar arým aje markumrêx ne amim,

—Kute imã ijaxweo apêx kadjy ne Jeju katon ar ba, ane. Djãm ta axwe'ô? Arkati. <sup>6</sup> Me kute amim Jeju mar týxo ban 'ã ukanga kêtja ne me mã kum axwe prãm kêt. Nhym be, me mã kum axwe prãm kute amim Jeju mar kêt.

<sup>7</sup> Akmere, àpnhĩre ar, me kute me axwe'ã 'êx ne ar amã, “Me axwe kêt”, anhýrkam kwãrik wãnh gê me'ô o ar anoo biknor kêt. Djãm me axwe mex? Kati. Me katàt kute amijo babit ne me mex. Jeju kôt me mex.

<sup>8</sup> Nhym be, me kute arek axweo ba prãmja ne Xatanaj meo ba. Mýkam? Bir, Xatanaj adjãkamã axwe krax ne kute arek axweo ba prãm. Kam ne arým me kute arek axweo ba prãmja Xatanaj kute meo ba. Metîndjwýnh Kra kute Xatanajo àpanh kadjy ne kato. Dja o apa

nhym arým meo ba kêt nhym me arým axwe kêt. Ja kadjy ne nã kurüm katon ar ba. <sup>9</sup> Metîndjwýnh kute meo krakam ne me arým umar djà ny. Kam ne me arek kute axweo ba prãm kêt. Metîndjwýnh Karõ\* kute mýjja 'y pyræk ne memã wadjàn me kadjwýnhbê nhÿ, me axwebê àptàro nhÿ. Kam ne me te kute arek axweo bamã. Metîndjwýnh kute meo krakam ne me te arek axweo bamã.

<sup>10</sup> Mýj xêbê ne Metîndjwýnh kra ar? Bir, Metîndjwýnh kra ne me kum axwe prãm kêt ne kum kamy jabê. Kum gwaj baje Jeju kabênkôt o bakamyja jabê. Kum kamy jabê gwaj arým kôt memã bakaton me omũ. Me jabê ne Metîndjwýnh kra ar. Ja ne gwaj omũ. Mýj xêjabê ne Xatanaj kra ar? Bir, Xatanaj kra ne me kum axwe prãm ne kum gwaj bakamy jabê kêt gwaj kam arým kôt memã bakaton me omũ. Me jabê ne Xatanaj kra ar.

*Me kum aben jabêã kute memã karõ.*

<sup>11</sup> Ba ar amã arê gar ama. Metîndjwýnh ne memã kum,

—Dja ga me amã aben jabê, ane. Ja ne gar aje amim Jeju marmo kraxkam aje mar ne mar rã'ã.

<sup>12</sup> Be, me bakukãmãre Kaĩ ne arým kamy bĩ. Kwãrĩk wãnh gar Kaĩ kôt ã amijo anhÿr kêt. Xatanaj ne Kaĩo ba nhym arým kamy bĩ. Mýkam ne kamy bĩ? Bir, ta àpênh jaxwe prãm kam nhym kamy katát kute amijo ba prãm kam.

<sup>13</sup> Bir, akmere, àpnhĩre ar, godja me kum Metîndjwýnh kĩnh kêtja kum ar akurê jabej. Kwãrĩk wãnh ar amim,

—Je tó mýkam ne me ã ijo ane? anhÿr kêt.

<sup>14</sup> Amrêbê gwaj bajaxwekam ne gwaj me biknor tokry djàkam bamõrmã. Djãm jakam kam gwaj

bamõrmã? Kati. Jakam ne gwaj arým Metîndjwýnhkôt batĩn ne ar baba rã'ã: rã'ã ne. Mýjkôt dja gwaj ja markumrêx, ne amim,

—Mrãmri ne arým Metîndjwýnhkôt itĩn ne ar iba rã'ã: rã'ã ne, ane. Bir, gwaj arým mrãmri bamã bakamy jabêkumrêxkôt. Dja gwaj bamã bakamy jabêkumrêx ne arým amim,

—Mrãmri dja ba arým Metîndjwýnhkôt itĩn ne ar iba rã'ã: rã'ã ne. Ga, arým imã ikamy jabêkumrêxja pumũ, ane. Gwaj kam arým ja markumrêx. Ne kam kôt batĩn ne ar baba rã'ã: rã'ãja markumrêx. Nhym be, me kum kamy jabê kêtja ne me me biknor tokry djàkam mõrmã rã'ã. <sup>15</sup> Me kum kamy kurê kunĩ ne me kute me par djwýnh pyræk. Ne kam me par djwýnh dja Metîndjwýnhkôt tĩn ne ar ba kêt. Ja ne gar arým aje mar.

<sup>16</sup> Nhym be, Jeju mrãmri kum gwaj bajabêkumrêxkam arým gwaj bapãnh ty. Gwaj ren bamã aben jabê kute Jeju kum gwaj bajabê ne gwaj bapãnh tyk pyræk. Nhym me ren arým kute gwaj bakamyõnh bĩnmã. Gwaj ren bamã bakamy jabêkumrêxkam ren arým memã kum,

—Ba dja ga me ibĩ gê ikamy tĩn ne, ane. Gwaj ren bamã abêkumrêxkam gwaj ren ã memã ane. <sup>17</sup> Nhym be, me'õ nhõ mýjja nhym kamy nhõ mýjja kêt. Nhym arým omũ. Omũnho nhÿ:n kam arým amim,

—Je, djãm ije amikutã kum inhõ mýjja kwý nhõrmã? Kati. Dja ba kum õr kêt, ane. Djãm tãmwã ne Metîndjwýnh kôt kum kamy jabê got? Kati.

<sup>18</sup> Be, arým ijabatãnh mexkam ne ba ar amã ikabên jarê. Dja gar amim ikabên ma. Kwãrĩk wãnh gwaj bajajkwa kajgokambit

\* 3:9 Metîndjwýnh Karõ ne kabêno memã amak bõ nhym me umar djà nyn arým kum axwe prãm kêt. Dja ga 'ã Ped k 1.23, Xij 1.18, Mat 13.3-23, Dju r 1.13, 3.5 jarên ama.

memã, “Imã me abêkumrêx”, anhÿr kêt. Gwaj bakabên kwÿ kajgokumrêx. Ate dja gwaj bamã aben jabêkumrêx ne abenmã mÿjja ngãn abenmã apê. <sup>19</sup> Dja gwaj bamã me abêkumrêx ne kam arÿm markumrêx. Metîndjwÿnh arÿm kute gwaj bajo aminhökumrêx markumrêx. Ne kam arÿm amim,

—Mrãmri ne Metîndjwÿnh arÿm ijo aminhökumrêx, ane. Ne kam ja markumrêx ne ate bakrãn badjumar mex ne ar baba.

<sup>20</sup> Nhym be, godja gwaj banhökrekad-jwÿnhbê amiman amim,

—Djãm mrãmri Metîndjwÿnh kabên kôt imã me abêkumrêx? Kati. Imã me abê rerekre, ane. Gwaj amiman arÿm badjumar punu. Ne kam ajte amim,

—Metîndjwÿnh ne kute mÿjja kunÿ mar ne kute inhökrekad-jwÿnhbê ikabên mar mexkumrêx. Ta dja imã tÿx jadjà, ba arÿm imã me abêkumrêx, ane. Dja gwaj ã Metîndjwÿnh'ã amim anen arÿm amikam badjumar punu kêt ne.

<sup>21</sup> Nâr atekam baje banhökrekad-jwÿnhbê amim bakabên markam amim,

—Kati. Metîndjwÿnh kabênkôt imã me abêkumrêx, anhÿr jabej ne arÿm bamã Metîndjwÿnh puma kêt. <sup>22</sup> Ne kam tu kute gwaj bamã mÿjja nhipêxo kum a'uw nhym arÿm gwaj bamã ipêx. Mÿkam? Bir, gwaj baje kabên mar ne kôt amijo baba nhym gwaj bakam kÿnhkam dja arÿm gwaj bamã ipêx.

<sup>23</sup> Metîndjwÿnh ne gwaj bamã,

—Dja gar tu amim Ikra Jeju Kritu markumrêx ne ar amã aben jabê, ane. Gwaj kabên ja man kôt ar amijo baba. Tãm ne ja.

<sup>24</sup> Dja gwaj Metîndjwÿnh kute abenã gwaj bamã karôja man kam kabên kôt ar amijo baba. Ne kam arÿm Metîndjwÿnh kôt ar baba. Nhym kam arÿm gwaj bakad-jwÿnhbê amijo kajkep. Djãm mrãmri ne Metîndjwÿnh gwaj

bakad-jwÿnhbê mã amijo kajkep-kumrêx? Mÿjkôt ne gwaj ja ma? Bir, Metîndjwÿnh ne gwaj bamã Karô jano. Karô ta dja gwaj bamã,

—Arÿm ne Metîndjwÿnh akad-jwÿnhbê amê amijo kajkep, ane. Kam dja gwaj ja markumrêx, Metîndjwÿnh gwaj bakad-jwÿnhbê amijo kajkepja markumrêx.

## 4

*Me kute me mex jabej me kabimã.*

*A Dju 7*

<sup>1</sup> Akmere, àpnhÿre ar, imã ar ajabêkam ne ba ar amã ikabên. Dja gar amim ikabênja ma. Dja me ar awÿr bôx jabej ne ar amã,

—Metîndjwÿnh kukwakam ne ba ar amã 'ã ajarê, anhÿr jabej. Kumrêx dja gar amim me kabin me mrãmri Metîndjwÿnh kabên kôt kabên katàtmã akato. Mÿkam? Bir, me ta kute amijo Metîndjwÿnh kukwakam ujarênh djwÿnh ne amijo 'êx baja ne krãptÿ. Ne kam arÿm pyka kunÿkôt apôx ne ar ba. Kam dja gar amim me kabi.

<sup>2</sup> Mÿj dja gwaj amim me kabin memã bajapôx on? Bir, dja gwaj me kabên ma nhym me memã kum,

—Be, mrãmri ne Jeju Kritu kàjkwa kurÿm ruw ne nã kurÿm katon ar ba, ane. Godja me ã memã anhÿro ba jabej. Me wã dja gwaj me markumrêx. Nãm me amijo 'êx kêt ne mrãmri Metîndjwÿnh kabên kôt kabênkumrêx.

<sup>3</sup> Nhym be, me kute memã anhÿr kêt ne ate memã kum,

—Be, kati. Nhÿnh ne Jeju Kritu kàjkwa kurÿm ruw ne nã kurÿm katon ar ba? Kati, anhÿro ba. Me kute memã ja jarênh ba ne me amijo 'êx ne Metîndjwÿnh kabên kôt kabên kêt. Kritu kurê djwÿnh'ô ne ja. Ja ne me arÿm ar amã arê. Kritu kurê djwÿnh rax bôxmã arê. Bôx kukãm ne kurê djwÿnh kwÿ arÿm jakam katon mekôt ar ba.

<sup>4</sup>Akmere, àpnhîre ar, Metîndjwýnh kôt gar arým akabên aba. Gar arým kam kurê djwýnho apa. Mýjkôt ne gar o apa? Bir, Jeju ar akam ýrkôt. Jeju ne ar ajo ban týxo kute pykakam kurê djwýnh kunĩ jakrenh mexi.\* Gar kam kukwakam arým meo apa. <sup>5</sup>Me kum Metîndjwýnh kînh kêtja kôt ne Kritu kurê djwýnh amijo ba. Ne kam me kabên kôt kabên. Nhyim kam me kum Metîndjwýnh kînh kêtja arým kum Kritu kurê djwýnh kînh ne me kabên maro ba.

<sup>6</sup>Nhyim be, ar ba ne bar ije memã Metîndjwýnh kabên jarênhkam mrãmri memã kabên jarênhkumrêx. Me kute ar ikabên markumrêxja gwaj arým me'ã abenmã,

—Mrãmri kute Metîndjwýnh markumrêx. Ga, kute Metîndjwýnh kabên markumrêxja pumũ. Mrãmri kabênkumrêx, ane. Nhyim be, me kute ar ikabên mar kêtja gwaj arým me'ã abenmã kum,

—Kati. Kute Metîndjwýnh mar kêt. Ga, kute Metîndjwýnh kabên mar kêtja pumũ. 'Êxnhîkumrêx, ane. Gwaj ã amim me kabio anen arým memã bajapôx ne arým me kuma. Me kabênkumrêx jabej nâr me 'êxnhî jabej arým memã bajapôx ne me kuma.

*Me kum aben jabêmã.*

*Mat 22.39; Dju r 13.34; Gar 5.14; Ped k 1.22*

<sup>7</sup>Akmere, àpnhîre ar, imã ar ajabêkam ne ba ar amã ikabên. Me kute amim Metîndjwýnh markôt ne me kum aben jabê. Kam gwaj bamã aben jabê. Mýj xêbê ne Metîndjwýnh kra ar? Bir me kum me abêbit ne mebê Metîndjwýnh kra. Metîndjwýnh kra ne me umar djà ny. Me kum me abêbit ne me kute Metîndjwýnh mar. <sup>8</sup>Ta kum me abê nhyim kam me arým kôt

kum aben jabê. Kam, me kum me abê kêt kute Metîndjwýnh mar kêt.

<sup>9</sup>Metîndjwýnh kum gwaj bajabê. Mýjkôt ne gwaj baje ja mar. Bir, nãm arým gwaj bawýr Kra djwýnh jano. Kra pydji jano nhyim pykakam bôx. Gwaj kôt batîn ne ar baba rã'ã: rã'ã kadjy. Kam ne gwaj baje Metîndjwýnh kum gwaj bajabêja markumrêx ne amim,

—Nã. Metîndjwýnh kum ijabê:kumrêx, ane. <sup>10</sup>Mrãmri kum gwaj bajabêkumrêx. Djãm gwaj ba bamã Metîndjwýnh jabê? Kati. Ta ne kum gwaj bajabê. Kum gwaj bajabên kam arým Kra jano nhyim nã kurúm katon ar ba. Gwaj bajaxwe: nhyim Metîndjwýnh gwaj bajaxwekam ngryk. Nhyim Kra arým gwaj bajaxweo pãnh ne Metîndjwýnhmã gwaj bakam ngryko apêx, gwaj bakam Metîndjwýnh ngryko apêx.

<sup>11</sup>Metîndjwýnh kute ã kum gwaj bajabêo anhýrkam gwaj ren kudjwa bamã aben jabê. Akmere, àpnhîre ar, imã ar ajabêkam ne ba ar amã ikabên. Dja gar amim ikabênja ma. <sup>12</sup>Djãm me'õ ne arým kãjkwakam Metîndjwýnh pumũ? Kati. Me'õ ne kute omũnh kêtumrêx. Kwãrik wãnh gwaj omũnh kêt. Godja gwaj bamã aben jabê nhyim Metîndjwýnh arým gwaj bakadjwýnhbê mã amijo kajkep. Gwaj kam bamã Metîndjwýnh jabê týxo amũ amikamênho môn bamã abê tý:x ne.

<sup>13</sup>Metîndjwýnh ne arým gwaj bamã Karõ jano nhyim arým ar gwaj bajo ba. Gwaj kam baje Metîndjwýnh kute ar gwaj bajo ban gwaj bakadjwýnhbê amijo kajkepja markumrêx ne amim,

—Nã. Kute ar ijo ban ikadjwýnhbê amijo kajkepikumrêx, ane. <sup>14</sup>Ar ba ne bar arým Kra pumũnho iba. Mrãmri ne me Babãm djwýnh

\* 4:4 Djãm pykakambit kurê djwýnh nhyim týxo kute akrenh Kati, kãjkwakamdjwý. Jeju ne týxo kute kurê djwýnh kunĩ jakrenh mexi. Epedju 1.21-22 dja gar arên kôt ama.

arým Kra jano nhym bôx. Kute pykakam me axwe kunī pytārmā ne me'yr bôx. <sup>15</sup> Me kute memā kum,

—Mrāmri Jejubê Metīndjwýnh Krakumrêx, anhÿro baja. Me ja ne me kute amim maro ba. Nhym Metīndjwýnh mrāmri me kadjwýnhbê mā amijo kajkep ne amikôt ar meo ba.

<sup>16</sup> Metīndjwýnh kum gwaj bajabê gwaj arým tu amim markumrêx ne amim,

—Mrāmri, kum ijabêkumrêx, ane.

Me kum aben jabê japôx djábê ne Metīndjwýnh. Ta ne kum me abê nhym kam me kôt arým kum aben jabê. Metīndjwýnhkam me kum aben jabê japôx djâkam ne me mā kum aben jabê. Ne kam me mā kum aben jabêja Metīndjwýnh amikôt ar meo ban me kadjwýnhbê mā amijo kajkep.

<sup>17</sup> Dja Metīndjwýnh ã gwaj bajo ane gwaj kam kôt bamā abê tÿxo amū amikamēnho mō. Gwaj kam arým bamā abê tÿ:x ne. Nhym kam Metīndjwýnh nhō akati arým bôx. Kute memā axwe pānh jarēnh djā nhō akati bôx. Gwaj kam bajbit bamā uma kêt ne dja. Mÿkam? Bir, pykakam gwaj ar babari gwaj bamā abêkam. Gwaj bamā abê kute ta kum gwaj bajabê pyrāk. Kam dja gwaj bamā uma kêt ne dja. <sup>18</sup> Ga, me prīne kum me abêkumrêxkam arým kum me uma kêtumrêxja pumū. Mÿkam? Bir, me kute meo bikēnh karō ne me kum me uma. Me kum me umakam ne me prīne kum me abê mex kêt rā'ā.

<sup>19</sup> Mÿkam ne gwaj bamā Metīndjwýnh jabê? Bir, ta kumrêx ne kum gwaj bajabê gwaj kam arým bamā abê. <sup>20</sup> Nhym kam gwaj baje Jeju kabēnkôt me'ōo bakamyja, gwaj bajō jām bamā kurēn jām memā kum, “Imā Metīndjwýnh jabêkumrêx”, ane. Kati. Nā gwām bajêx. Gwaj baje bakamy pumūnhkam ne

gwaj bamā kurêkam te bamā Metīndjwýnh pumūnh kêtja jabêamā. <sup>21</sup> Metīndjwýnh arým gwaj bamā 'ā karōn gwaj bamā,

—Djām ar amā ijabê? Dja gar amā akamydjwý jabê, ane. Kam dja gwaj bamā bakamy jabêkumrêx.

## 5

*Me kute tu amim Metīndjwýnh Kra markumrêx'ā ujarēnh.*

<sup>1</sup> Mÿj xêbê ne Metīndjwýnh krakumrêx? Bir, me kwÿ ĩ pÿnhkôt kute mā amim,

—Mrāmri ne Jejubê Kritu. Mrāmri ne Metīndjwýnh Jeju'ā me banhō Bēnjadjwýrbê kumkati mēnhkumrêx, anhÿrja. Me kute mā amim anhÿr ne tu kute amim markumrêx ja ne mebê Metīndjwýnh krakumrêx ne umar djā ny. Ne kam mebê Metīndjwýnh krakam me kum Metīndjwýnh jabê. Djām Metīndjwýnhbit me kum abê? Kati. Amibu'ā mebê Metīndjwýnh kradjwý ne me arým kum me abê.

<sup>2</sup> Djām mrāmri ne gwaj bamā amibu'ā Metīndjwýnh kra ar abêkumrêx? Mÿj kôt dja gwaj arým ja markumrêx? Bir, dja gwaj bamā Metīndjwýnh jabēn kabēn man kôt ar amijo baba. Ne kam kôt arým bamā kra ar abêja markumrêx ne arým amim,

—Nā. Imā Metīndjwýnh kra ar abêkumrêx, ane.

<sup>3</sup> Dja gwaj kute me kute katāt amijo ba'ā memā karōkôt kabēnja man kôt ar amijo baban kam arým bamā Metīndjwýnh jabêkumrêx. Djām gwaj baje kabēn mar ne te kôt amijo babamā? Kati. Gwaj kôt amijo babaja babê tÿx kêt. <sup>4</sup> Mÿkam? Bir, me kum Metīndjwýnh kīnh kêtja te gwaj bamā amikukràdjā jarē gwaj bamā me kukràdjā kīnh kêt. Metīndjwýnh ne arým gwaj bajo kra gwaj arým badjumar djā ny. Kam gwaj bamā

me kukràdjà kīnh kêt ne kôt amijo baba kêt. Ne tu amim Metĩndjwýnh markumrêx ne arým me kukràdjà kôt amijo baba kêt.

<sup>5</sup> Mýj xêja ne me kute me kukràdjà mar kêt ne kôt amijo ba kêt? Bir, me kute tu amim Jeju markumrêxbit. Me kute mã amim,

—Mrãmri Jejubê Metĩndjwýnh Krakumrêx, anhÿro ba. Me jabit ne me kute me kukràdjà mar kêt ne kôt amijo ba kêt.

*Metĩndjwýnh kute memã Krao amirít.*

*Dju r 5.31*

<sup>6</sup> Ne kam mýj ne Metĩndjwýnh arým gwaj bamã Kra jarêno amirít on? Bir, Kra Jeju Kritu bôx ne nã kurũm kato. Ne kam arým abatãnh ne. NhyM Metĩndjwýnh kute arêno amirít kadjy Djuão arým ngômã adjã. Ngômã adjã nhyM kam tũmrãm arým kamrô prôt ne arým ty. Djãm ngômã adjãrkambit Metĩndjwýnh gwaj bamã Kra jarêno amirít? Kati. Kamrô prôt ne tykkamdjwý kute o amirít. NhyM kam Metĩndjwýnh Karôdjwý ajte Kra'ã amijarêno amirít. Karô mrãmri katát kute kabên jarênhkumrêx.

<sup>7</sup> Be, Metĩndjwýnh arým Kra jarêno amirító amãnhkrut ne ikjêkêt. <sup>8</sup> Karôkôt o amirít. Ngômã adjãrkam o amirít. Kamrô prôt nhyM tykkam o amirít. Kunĩkôt ne Metĩndjwýnh kabên pydji.

<sup>9</sup> Pykakam me kute mrãmri gwaj bamã mýjja'ã amijarêno amirítkam gwaj abenmã kum, “Mrãmri ne amijarênhkumrêx”, ane. NhyM be, Metĩndjwýnh kute Kra'ã amijarêno amirítjakam kabên katãto kute me kunĩ jakrenh. Kam me kunĩ ren abenmã kum,

—Mrãmri Jejubê Metĩndjwýnh Krakumrêx, ane. <sup>10</sup> Me kute tu amim Metĩndjwýnh Kra markumrêx ne me amim,

—Mrãmri ne Jejubê Metĩndjwýnh Krakumrêx, anen amikadjwýnhbê markumrêx. NhyM be, me kute amim Metĩndjwýnh mar kêt ne me Jejuo me'õ 'êxnhĩ pyrãk. Mýkam? Bir, mrãmri Metĩndjwýnh kute Kra'ã amijarêno amirítkumrêx nhyM me kute amim mar kêt kam ne me o me'õ 'êxnhĩ pyrãk. <sup>11</sup> NhyM Metĩndjwýnh arým amijarêno amirít ne memã kum,

—Me kute tu amim ikra markumrêx arým ikôt tĩn ne ar ba rã'ã: rã'ã ne, ane. <sup>12</sup> Me kute Krao aminhõja ne kôt tĩn ne ar ba rã'ã: rã'ã nhyM me kute Metĩndjwýnh Krao aminhõ kêtja kôt tĩn kêt kumrêx ne.

<sup>13</sup> Ar aje tu amim Metĩndjwýnh Kra markumrêx ar. Ar amã ne ba ikabên ja'ã pi'ók no'ók ne. Mýj kadjy? Bir, ar aje pi'ókkam ikabên jarênh ne mar kadjy. Dja gar aman tu amikukãm kôt atĩn markumrêx. Metĩndjwýnhkôt atĩn ne ar aba rã'ã: rã'ãja markumrêx ne amim,

—Nã. Dja ba kôt itĩn ne ar iba rã'ã: rã'ã ne, ane. Dja gar pi'ókkam ikabên jarênh aman kam arým tu amikukãm ja markumrêx. Metĩndjwýnhkôt atĩn ne ar aba rã'ã: rã'ãja markumrêx.

<sup>14</sup> Dja gwaj ja man arým Metĩndjwýnhmã mýjjao a'uw. Ta kute amim gwaj bajã karô kôt o a'uw ne kum,

—Aje ijã amim karô kôt dja ga ã imã mýjjao ane, ane. Dja gwaj ã kum ane nhyM arým gwaj bama. Ja ne gwaj baje markumrêx. <sup>15</sup> Kute gwaj bamarkumrêx dja gwaj kuman arým amim,

—Mrãmri dja kôt ã imã mýjjao ane, ane. Dja gwaj amim anen arým kute gwaj bamã mýjjao anhÿr kadjy baje amimarkumrêx ne amiwÿr baje mýjjao badjà'wÿrja markumrêx.

*Me axwe'ã ujarênh.*

<sup>16-17</sup> Apÿnh me axwe djãri kunĩkôt ne me axwe. Ne kam kwý



pãnh tyk kêt. Nhym be, atemã me axwe'õ pãnh dja arým ty. Godja me'õ me kute Jeju kôt abeno kama 'õ pumũ, axwe kôt omũ. Gêdja o Metĩndjwýnhmã a'uw ne kum,

—Djũnwã, amã ikamy kaprĩ. Kwãrĩk wãnh kum axweo pãnh kêt, ane. Dja ã kamyo Metĩndjwýnhmã à'wýro ane. Nhym arým kum axweo pãnh kêt nhym tyk kêt ne tĩn ne. Nàr me axwe 'õkôt. Kôt me tykkumrêxja. Djãm o kute Metĩndjwýnhmã à'wýrmã? Kati. Dja mrãmri kôt ty.

<sup>18</sup> Metĩndjwýnh kute memã amak bõnh nhym me umar djà nyja kunĩ kum axwe prãm kêt. Jadjwý ne gwaj markumrêx ne amim,

—Nà. Me umar djà ny kunĩ kum axwe prãm kêt, ane. Nãm me amijaxwe kêt kadjy amijãno djan kum axwe prãm kêt. Nhym kam Xatanaj te kute amiwýr meo akêx nhym me ro'ã axwemã.

<sup>19</sup> Metĩndjwýnh ne arým gwaj bajo kra. Nhym be, Xatanaj arým amikôt me kum Metĩndjwýnh kĩnh kêtja kunĩ ar o ba. Ja ne gwaj baje markumrêx ne amim,

—Nà. Metĩndjwýnh ne arým ijo kra. Nhym be, Xatanaj arým amikôt me kum Metĩndjwýnh kĩnh kêtja kunĩ ar o ba, ane.

<sup>20</sup> Metĩndjwýnh Kra ne arým bõx. Katàt kabèn ne katàt kute amijo bakumrêx. Ne kam gwaj baje Kra katàtkumrêxkôt mar kadjy arým gwaj bamã bajamak bõ. Ja ne gwaj baje markumrêx ne amim,

—Nà. Arým ne Kra bõx ne imã ijamak bõ. Ije ta katàtkumrêx mar kadjy arým imã ijamak bõ, ane. Nhym kam Kra Jeju Kritu arým amim gwaj bapytà. Katàtkumrêxja arým amim gwaj bapytà. Mrãmri kubê Metĩndjwýnhkumrêx. Gwaj kôt batĩn ne ar baba rã'ã: rã'ã ne. Jadjwý ne gwaj baje arým tu amim markumrêx.

<sup>21</sup> Akmere, àpnhĩre ar, mýjjao metĩndjwýnh karõ nhipêx me

kute kum amijarênhja ne kumex. Dja gar amijãno dja. Mýjjao metĩndjwýnh karõ nhipêx'ýr aje amijo akêx kêt kadjy amijãno dja. Tãm ne ja.

## Djuāo kute atāri pi'ôk no'ôk ne ja.

Jejukôt ba djwýnhbê Djuāo ne ôbikwa nimê kra arkum pi'ôk no'ôk ne. Jeju kôt ne o kanikwýnh ne arkum pi'ôk no'ôk ne. Kute o týx ne kute kum me 'êxnhî bôxmā arēnhmā ne pi'ôk no'ôk ne. Me 'êxnhî kute Metīndjwýnh kabēn kêt jarēnh ne kute me noo biknormā bôxmā.

Nām kum,

—Kwārik wānh me ja mar kêt ne mekôt amijo aba kêt. Dja ga amijā ano týx ne me jamā kre rax. Nām ā Djuāo ôbikwa nimê arkum ane.

<sup>1</sup> Ba ibê Djuāo. Ibê Jeju nhô me jao iba djwýnh'ô ne ba ar amā pi'ôk no'ôk ne. Nā àpnhîre, Metīndjwýnh ne amijo apytā. Ba kam akramē ar amā pi'ôk no'ôk ne. Mrāmri imā ar ajabêkumrēx. Djām bajbit? Kati. Me kunī kute Metīndjwýnh kabēn katātukumrēxja mar ja ne me adjwýnhdjwý kum ar ajabê. <sup>2</sup> Metīndjwýnh kabēn katātukumrēx. Gwaj baje bakadjwýnhbê mar týx rā'ā ne baje o bajamak kêt kati prām kêtukumrēx.

<sup>3</sup> Me Babāmbê ne Metīndjwýnh. Krabê ne Bēnjadjwýr djwýnhbê Jeju Kritu. Gê ar tu kum ar akaprīkumrēx\* gar adjumar mex rā'ā. Ar katāt kute kabēn jarēnhkumrēx ne kum ar ajabêkumrēx. Gê ar amē amijo kajkep.

*Me kum aben jabê'ā kute memā karō.*

<sup>4</sup> Nā àpnhîre, akra kwý ne kôt ar amijo ba ba omūn ikīnhkumrēx. Nām ar kute Metīndjwýnh kabēn katāt markumrēx ne kôt ar amijo ba ba kôt ar omū. Me Babām ta ne 'ā gwaj bamā karō. Kôt amijo baba'ā

gwaj bamā karō nhym ar arým kuma. Ne kam arým mrāmri kôt amijo bakumrēx ba kôt ar omūn arým ikīnhti:re.

<sup>5</sup> Ne kam àpnhîre ar, jakam ajte ar amā arē. Djām me kabēn ny ne ba ar amā arē? Kati. Gwaj baje amim Jeju mar kraxkam baje kabēn marja tām dja ba akubyn ar amā arē. Gwaj bamā aben jabēmā. Ja dja ba ajte ar amā arē.

<sup>6</sup> Mýj dja gwaj nēn bamā aben jabê? Bir, dja gwaj Metīndjwýnh kabēn man kôt ar amijo baban arým bamā aben jabê. Mýj ne kabēnkam kute? Bir, tām ne gar aje amim Jeju mar kraxkam arým ama. Ar amā aben jabê ryti pydjimā. Ja ne gar ama ba ajte ar amā arē.

*Me amijā no týxmā, me 'êxnhî kute me noo biknor kêt kadjy.*

*Dju k 4.1*

<sup>7</sup> Be, arým me 'êxnhî krāptī ar ba. Nām me memā kum,

—Djām mrāmri ne Metīndjwýnh Jeju Kritu jano nhym pykamā bôx ne nā kurūm katon ar ba? Kati, nām me 'êx, anhýro ba. Me kute ā memā anhýro bakam mrāmri 'êxnhîkumrēx. Mebê Kritu kurê djwýnh.

<sup>8</sup> Dja gar aminêje me 'āno dja. Me kute ar anoo biknor karō me 'āno dja. Ga wākam arým Kritumā adjāpēnh 'ātūm. Nhym Metīndjwýnh arým ar amā akīnh djā jarē. Dja ar amā kungā. Nār, godja gar aminêje me 'āno adjām kêt jabej, nhym me arým ar anoo biknor jabej. Nhym kam Metīndjwýnh arým ar amā ôr kêt.

<sup>9</sup> Me kute Metīndjwýnh kabēn mar kêt ne kam amikrā ar o ban ajte kute arek Kritu kabēn kôt amijo ba kêtja ne Metīndjwýnh kute meo ba kêtukumrēx. Nhym be, me kute arek Kritu kabēn kôt amijo baja me

\* **1:3** Djām ar ga ne gar adjukaprī nhym ar pānh arým kum ar akaprī Kati. Ar ta ne ar tu kum ar akaprīkumrēx.

Babãmbê Metĩndjwýnh kute meo ba nhyŋ aje Kradjwý kute meo ba.

<sup>10</sup> Godja me'õ bõx ne 'êx ne Kritu kupa'ã ar amã ajarê kwãrĩk wãnh kum aminhũrkwã jarẽnh kêt. Ne kwãrĩk wãnh pa kjênh kêt. 'Êx ne kupa'ã ar amã 'ã ujarẽnhkam dja gar pa kjênh kêt. <sup>11</sup> Dja gar pa krij nhyŋ me arým ar ajã,

—Arým ne ar amijã kumê. Ga, ar kôt bawã pumũ, ane. Gar kam arým kôt ar gadjwý Kritu'ã ajêx pyrãk.

<sup>12</sup> Nã bãm bit pi'õkjakam ar amã ikabẽn kumexjarẽnh prãm. Ba kam amim,

—Kati. Kwãrĩk wãnh ba pi'õkkam ikabẽn kunĩ jarẽnh kêt. Dja ba tẽn arkam bõx ne ijajkwao arkum arê, ane. Dja ba ar amã ane gwaj kam arým abenkam bakĩnhkumrêx. Ja kadjy ne ba amima.

<sup>13</sup> Akanikwýnhkam kradjwý amã amikabẽn mex jarê. Metĩndjwýnh kute amijo akanikwýnh pytãr tãm kra ne amã amybým amikabẽn mex jarê. Tãm ne ja.

## Djuão kute pi'ôko ino rer no'ôk ne ja.

Jejukôt ba djwýnhbê Djuão ne ôbikwa myjamã pi'ôk no'ôk ne. Ôbikwaja ne ar apýnh pyka djari memã Jeju'ã ujarênh tēmja amiwýr aro wadjà ne arkum kabên mex jarê ne arkum mýjja ngã ne ar kujate nhym ar tē. Kute arek o anhýr rã'ãmã ne kute kubê me'ô jaxwe pymamã ne kum pi'ôk no'ôk ne.

<sup>1</sup> Akmere, Gaju. Ba ibê Djuão ne ba amã pi'ôk no'ôk ne. Ibê Jeju nhô me jao iba djwýnh'ô ne ba amã pi'ôk no'ôkkam ikabên jarê. Metíndjwýnh kabên katátkôt imã ajabê.

<sup>2</sup> Akmere, Metíndjwýnhmã arým amexkumrêx ba arým ama. Ne kam Metíndjwýnhmã ajo a'uw ga amex kôt adjumar mex. Adjã kêt djwýo ane. Ga adjumar mex ne adjã kêtja ne ba imã kínhkumrêx. <sup>3</sup> Be, Jeju kukwakam gwaj bakamy ar arým nính iwýr bôx ne imã ajarê. Nãm ar imã,

—Be, Onj Gaju kute Metíndjwýnh kabên katát markumrêx ne kabên kôt kute amijo ba mexkumrêx, ane. Ba ar kute ajarênhja man ikínhkumrêx. <sup>4</sup> Nã bãm memã Jeju'ã idjujarênh nhym me kute ikabênkôt Jejuo aminhō. Ba kam mã itēm nhym me nính imã me'ã ujarênh ne kute imã,

—Onj ar kute akabên kôt Jejuo aminhōja Metíndjwýnh kabên man kôt kute katát amijo bakumrêx, anhýr. Me kute ã imã anhýrkam ikínhkumrêx.

*Gaju kute meo djuw mexkam Djuão kute amikính jarênh.*

<sup>5</sup> Akmere Gaju, Jeju kukwakam gu bakamy kwý ne awýr bôx, ga anhōdjãnh ne aro djuw mex. Nã gãm te ar nokre pumũnh kêt

ne tu aro djuw mex. Ne kam Metíndjwýnh kabên kôt amijo abakumrêx. Aje me bakamy djuw mex kuníkôt ne ga kabên man kôt amijo aba mexkumrêx. <sup>6</sup> Gwaj bakamyja kwý arým nính ar iwýr bôx ne ar imã ajã ajarênh ajte me kute Jeju mar kunjãmã ajã ajarênh memã kum,

—Onj Gaju kum ar ijabê:n ôdjãnh ne ar ijo djuw mex, ane, ba arým ar kuman ajte ama. Dja ar ajte awýr bôx ga amũ ajte ar mōr kadjy arkum mýjja'ô ngã. Arkum djwý, pi'ôk kaprí ngã. Metíndjwýnh kabênkôt arkum angã.

<sup>7</sup> Mýkam dja ga ã arkum ôro ane? Bir, ar Jeju'ã ujarênh kadjy mōrkam. Nhym be, jakam me kute Jeju mar kêt kwý bit kute gwaj bakamyjamã ô mýjja nhōrmã nhym ar kute amim byr kêt. Me kute Jeju mar kêt kam gwaj bakamy ar kute mebê byr kêt. Ne kam arým mã mō. <sup>8</sup> Mýj xêja dja gwaj bakamy arkum mýjja ngã? Djãm me kute Jeju mar kêt? Kati. Me kute amim Jeju mar dja gwaj bakamy arkum mýjja ngã nhym ar arým tē. Jeju kabên katát jarênh kadjy tē. Gwaj ba dja gwaj arkum mýjja ngã. Ne kam arým ar ro'ã apê.

*Djoti kute amijo bēnjadjwýr rax prãm.*

<sup>9</sup> Amrêbê ne ba wãm ar aje amim Jeju marjamã pi'ôk no'ôk ne. Gar arým inhō pi'ôk jarên ikabên ma. Nhym be, wãkam Djoti kute ikabên mar prãm kêt. Djoti ta ne amijo bēnjadjwýr rax prãm. Me kute amim Jeju markam ta amijo bēnjadjwýr rax prãm. Bēnjadjwýr rax prãmje ne kute ikabên mar prãm kêt kumrêx.

<sup>10</sup> Dja ba ar akam itēm ne ibôx jabej ne arým ar amã Djoti jarê. Nãm ikãxã kabên punure jarênh ba. Amrêbê jakam gwaj bakamy kwý wãm ar awýr tēn ar akam bôx. Ar kute ar amã Metíndjwýnh kabên jarênh kadjy ar akam bôx. Nhym

kam Djoti kute ar pa kjênh kêt ne arkum aminhürkwã jarênh kêt. Gar akwý ar aje arkum aminhürkwã jarênh prãm nhym Djoti arým ar abê aptàn ar amã,

—Aje, jakam dja gar ar ikôt abikprõnh kêt, ane. Ne ar aje amim Jeju mar bikprõnh djã nêje ar ajano.

<sup>11</sup> Akmere, kwãrĩk wãnh me axwe'ã amijakre kêt. Me mex'ã dja ga amijakre. Me mex ne me Metĩndjwýnh kôt ar amijo ba. Nhym me axwe kute Metĩndjwýnh mar kêt kumrêx. <sup>12</sup> Be, me kunĩ ne me me bakamy Temexu mex jarê. Nãm me 'ã abenmã kum,

—Metĩndjwýnh kabên katàt kôt ne Temexu amijo ba gwaj arým omũ, ane. Ar badjwý ne bar Temexu mex jarê ga ar ijêxnhĩ kêt kôt aje arým ar imar.

<sup>13</sup> Nã bãm bit ije amã ikabên kumex jarênh prãm. Ne kam ije pi'òkkam amã arênh prãm kêt. <sup>14</sup> Ije amikrà kêt ne awýr itẽmmã. Dja ba awýr bõx gu banhýtãri abenmã bakabên jarê. Ja kadjy ne ba amima.

<sup>15</sup> Gê Metĩndjwýnh ajo djuw mex ga adjumar mex rã'ã. Be, jakam gu banhõbikwa ar arým amã kabên mex jarê ba kuman arým pi'òk jakam wãm amã arê. Ga apýnh aje gu banhõbikwa nhidji mar kôt arkum ar idji jarên arkum ikabên mex jarê. Tãm ne ja.

## Djuda kute memã pi'ôk no'ôk ne ja.

Jeju kamy 'ôbê ne Djuda. Nãm ar aben djâkam nō. Jeju kumrêx kato nhym tũmrãm Xijagumê Djudadjwÿ Marij kurũm kato. Kute amim Jeju mar kêt ne kam tũmrãm tu amim markumrêx. Birãm Jeju akubyn tĩn kôt ne tu amim kuma. Ne kam Jeju nhô me jao ba. Ne kam arkum pi'ôk no'ôk ne. Nãm Ar kubê me 'êxnhĩ pyma. Me 'êxnhĩ amijo Metĩndjwÿnh kabên jarênh djwÿnh ne me kute Jeju marmê abenkam bikâr ne ate ajte memã 'êx ban arĩk ar ban memã mÿjja punu'ã àpnênh ba. Nhym kam Djuda arkum,

—Kati, Metĩndjwÿnh amrêbê kute me axwemã o pãnhja pumũ. Dja ĩ prĩne me jadjwÿo bikênh mex ne. Be, ar ga dja gar Jeju'ã angrã tÿx nhym Metĩndjwÿnh dja ar arôrôkbê ar akukrà gar aku'é tÿx. Nãm ã Djuda arkum ane.

<sup>1</sup> Ba ibê Djuda. Ibê Jeju Kritu nhô àpênh. Ibê Xijagu kamy. Ba ne ba pi'ôk no'ôkkam ar amã ikabên jarê. Metĩndjwÿnh, me Babãm arÿm amijo ar apytãn amimexo ar ajo mex nhym Jeju Kritu amim ar apytãr mex ne ar ajo ba.

<sup>2</sup> Gê Metĩndjwÿnh tu kum ar akaprĩ:kumrêx\* ne kum ar ajabê:kumrêx gar adjumar mexo amũ amikamên arÿm adjumar mexkumrêx ne.

*Me kute axwe'ã memã àpnênh.*

*A Ped 2.1*

<sup>3</sup> Akmere, àpnhĩre ar, Metĩndjwÿnh ne kute Krituo me bakunĩ pytãr. Nã bãm amibêx ne bit ije ar amã 'ã pi'ôk no'ôko inhÿrmã. Ba nhÿn arÿm me kute ar anoo biknor prãmja man amim,

—Kati. Dja ba arkum me kute ar noo biknor jarê. Ne arkum, “Wãnh ne me ar akwÿ anoo biknoro ba. Kritu ne gwaj bamã amijã ujarênh pydjın arê gwaj babê Kritu nhô me ja baje mar pydjimã nhym me arÿm 'êx. Ne kam ta amijo Kritu mar mex ne arĩk kupa'ã ar amã 'ã ujarênh punun ar anoo biknoro ba. Me kute ar anoo biknoro baja dja gar me 'ãno djan mã akabêno me ity gê me anhikrê.” Nã bãm ã amikabên maro anen arÿm ar amã arê.

<sup>4</sup> Me kute ar anoo biknorja ne me kum Metĩndjwÿnh kĩnh kêt ne amipdjur mex ne ar akôt wangijn ar amê akã. Nãm me amakkre kêt ne ar amã,

—Ar rã'ãn aben prô, aben mjên kupê. Gêdja Metĩndjwÿnh ate krã. Arÿm ne tu kum ar akaprĩn ar amã ajaxwe kêt jarênhkumrêx. Nãm me ã ar amã ane. Ne kam arÿm Bẽnjadjwÿr djwÿnh japrÿ. Kubê ne Metĩndjwÿnh. Nãm me Metĩndjwÿnh pydji japrÿ. Ne ajte Bẽnjadjwÿr djwÿnh bê Kritu japrÿn ar'ã memã kum,

—Djãm mrãmri ne Kritu ar ba? Kati. Nãm me 'êx, ane. Amrêbê me kêttri ne Metĩndjwÿnh arÿm me ja'ã amim karô. Me biknor tokry djãmã kute me anormã ne me'ã amim karô.

*Apÿnh me tũmre djãri jaxwe'ã ujarênh.*

*Mat 7.21; A Ped 2.3; Dju k 3.6*

<sup>5</sup> Ba ar amã me kwÿ biknor'ã ajarê gar ama. Gar te arÿm aje me'ã ujarênh mar ba ajte ar amã me'ã ajarê gar ama.

Be, Bẽnjadjwÿr djwÿnh arÿm pykabê Edjitu kurũm mebê idjaero katon me utã. Ne kam arÿm me amakkre kêtto akno. Me kute amim mar kêtjao akno.

<sup>6</sup> Nhym Metĩndjwÿnh kadjy mrãnh djwÿnh jaxwedjwÿ arÿm

\* **1:2** Djãm ar ga ne gar adjukaprĩ nhym pãnh arÿm kum ar akaprĩ Kati. Ar ga ne gar adjukaprĩ kêt. Ta ne tu kum ar akaprĩkumrêx.

àpênh djà kanga. Nām me amijo àmra ban àpênh djà kanga nhym pānh arým me biknor tokry djàkam me kumên arým akamàt kô tykkam me bē ijê. Nām me bē ijê tỳx kute mrāmri ne me kute kàxiràxo me uwprekam kute me bē ijê tỳxja pyrāk. Ô akati rax me'yr bôx kadjy me bē ijê. 'Ātūm nhym Metīndjwýnh kute memā axwe pānh jarēnh djà nhō akati me'yr bôx kadjy.

<sup>7</sup> Krīraxbê Xôtōmamē Gomoramē bu'ā krīdjwý, kam me axwe ne me prō djwýnh, mjên djwýnh kupa'ā ari abeno ngjêxo ba. Metīndjwýnh kute me ipêx kupa'ā ne me my ta kute abeno ngjêx prām kumrêx nhym me niredjwý ta kute aben kupênho ikwā prām kumrêx. Me baje amikajmāta me mar kadjy ne Metīndjwýnh arým memā axweo pānh. Kuwyo memā o pānh nhym kam kuwy meo ajkamuw nhym me mrāmri arým biknorkumrêx.

<sup>8</sup> Me kute me anoo biknor prāmja ne me me ja kôt axwe. Nām me biptiro ikwān arým amijo àpnun amibu'ā meo àpnu. Ne kum me bēnjadjwýr kurēn kàjkwakam me rūnh'ā kabēn punu.

<sup>9</sup> Be, Mīgeubê ne Metīndjwýnh kadjy mrānh djwýnh raxja. Djā ne Mīgeu Xatanajmā kabēn punu jarē? Kati. Amrêbê: ne me bakukāmāre Mōjdjê arým ty nhym kam Mīgeumē Xatanaj ar Mōjdjê nhī'ā aben maro dja. Djā ne kam Mīgeu tu kum kabēn punu jarē? Kati. Nām kum,

—Gê Metīndjwýnh ta amā akij, ane. Jabit ne arē.

<sup>10</sup> Nhym be, me kute ar anoo biknor prāmja ne me tu mýjja'ā kabēn punu ba. Me kute me mar kêt kam ne me tu me'ā kabēn punu ba. Nām me mry djumar djāo umar. Mry kute amidjwýnh bit mar ne tu ar ba. Nhym me mry kôt kute amidjwýnh bit mar ne tu ar ban arým kôt amijo àpnu.

<sup>11</sup> Ý watīre, Metīndjwýnh dja me biknor tokry djàkam me kurē. Amrêbê: ne me bakukāmāre Kaī axwe:. Nhym me kute ar anoo biknor prāmjadwý ne me Kaī kôt ar amijo ba. Amrêbê: ne me bakukāmāre Barāo kum nêkrêx prāmje tu me noo aknon meo ajkê. Me kute ar anoo biknor prāmjadwý ne me Barāo kôt kum nêkrêx prā:m ne ar anoo biknoro ba. Amrêbê: me bakukāmāre Kore ne kute amijo rax prā:m ne arým bēnjadjwýr'ā kabēn punu ba. 'Ā kabēn punu ba:n kam arým akuno. Me kute ar anoo biknor prāmjadwý ne me Metīndjwýnh'ā kabēn punu ba. Dja me 'ā kabēn punu ba:n ī arým Kore kôt me biknor tokry djàkam akuno. Metīndjwýnh'ā kabēn punukôt arým akuno.

*Me kute me noo biknorja me ro'ā bikàr.*

#### *A Ped 2.13*

<sup>12</sup> Ar amā aben jabêkam gar aro'ā ar anhō kwý krēno akrī. Nhym me kute ar anoo biknorjadwý ne me pijām kêt ne arým ar aro'ā aku. Ar akīnhkumrêxo akrī nhym me arým amipunuo ar ajo àpnu. Ga, me kà mexkam ngrā kute o punuja pumū. Me kute ar anoo biknordjwý ne me ā ar ajo àpnuo ane. Amipunuo ā me ajo àpnuo ane. Nhym me te: me kabēn mex jabej mekam ama:n arým kaprīre ne. Ga, kôk djâbêrkam kakrā kakrātyk ba kajgoja pumū. Nhym me te: na bixadjwýrkam aman kam arým kaprīre ne. Me kute ar anoo biknordjwý ne gar ā mekam akaprīo ane. Nām me kajgo kute mrāmri ne pidjō kunī ô kumexkam ja pydji ô kêt ne ām pyrāk. Pidjō tu tykkumrêx nhym me arým kraxmē arēmē ro'ā kaba. Nām me kute urāk ne tu kajgokumrêx. Dja me arým me biknor tokry djàkam akuno.

<sup>13</sup> Nām me ta ar ba kute mrāmri ne ngō djâkrêkam ngō djâkâ ari aben pymjýr pyrāk. Ga, ngō djâkrê

apêx nhyim arÿm akàxkam mÿjja punu kumexja pumÿ. Nãm me kabên punu jarênho ku'ên o ino re nhyim me arÿm pijàm ne, kabên punukam pijàm ne. Me kute ar anoo biknor prãmja ne me arÿk ba nhyim me te: kute mekôt katàt amijo bamã. Me kute mrãmri ne kanhêtire arÿk ba pyræk nhyim me te: kute omÿnh mex ne kute 'ã amimrãnh jakremã. Metÿndjwÿnh ne arÿm amim me axweja pãnh'ã karökumrêx. Akamàt kô tyk pyfikam dja me kurê. Dja kam akamàt kô tyk rã'ã nhyim me kator kêtikumrêx.

14-15 Adão ar amikam kra jadjuw nhyim arÿm abatãnh ne. Abatãnh ne arÿm amikam kra jadjuw. Kra jadjuw nhyim arÿm abatãnh ne. Abatãnh ne arÿm amikam kra jadjuw. Ne amÿ aben nhijuk'ã kra jadjwÿro tẽ. Adjwÿro tẽ:. Adjwÿro tẽm tãmtã kam arÿm 7'ÿr o bôx. Aben nhijuk'ã krakam kra'ã akren arÿm 7'ÿr o bôx. 7'ÿr o bôx nhyim me arÿm krajamã Enoki jarê. Enoki ajte me kute me noo biknorja'ã memã kum,

—Ë, Bënjadjwÿr djwÿnh dja Metÿndjwÿnh nhô me ja krãpti: kubê 10.000mê ro'ã bôx. Ne kam arÿm me kum Metÿndjwÿnh kÿnh kêtja kunimã axwe pãnh jarê. Apÿnh me àpênh jaxwe djari pãnh memã arê. Metÿndjwÿnh'ã kabên punuja kunÿ pãnh memã arê nhyim me arÿm amijaxwe ma. Nãm ã me bakukãmãre Enoki memã ane.

16 Me kute me anoo biknor prãmja ne me bën prÿkam kabên ban apÿnh mÿjja'ã kabên punu prã:m. Me kute amidjwÿnhbit markam ne me kum apÿnh mÿjja punu prãm ne kôt ar amijo ban amijo àmrati ba. Ne kam me ò nèkrêx kumex pumÿn amim,

—Ba gêt tãmwã kôt ar amijo iba. Ne kam arÿm inhô mÿjja kumex ne kôt irax. Nãm me ã amim anen kam kum me ò nèkrêx ngrireja kÿnh

kêtikumrêx. Me kum me ò nèkrêx kumexjabit kÿnh ba.

*Me kute Jeju markumrêx djãpênh'ã memã karô.*

17 Akmere, àpnhÿre ar, ar ga dja gar atemã amijo tẽ. Bënjadjwÿr djwÿnhbê Jeju Kritu kute ar anorja dja gar ar kabên mar tÿx. 18 Nãm ar arÿm me'ã ar amã ajarê. Me kute ar anoo biknor prãmja'ã ajarê. Nãm ar ar amã,

—Dja Jeju bôx 'ÿr nhyim me arÿm gwaj bajapry: o ba. Dja me amidjwÿnhbit man kum mÿjja punu prãm ne kôt ar amijo ba, ane.

Kritu kute ar anorja ne ar ã ar amã ane. Dja gar ar kabên mar tÿx. 19 Me kute ar anoo biknor prãm ja ne me abenbê me kurêo ba. Ne pykakam mÿjjakôtbit amijo ba. Nhyim Metÿndjwÿnh Karô kute meo ba kêtikumrêx.

20 Akmere, àpnhÿre ar, ar ga dja gar atemã amijo tẽ. Kritu kabên mexikumrêx. Tãm dja gar tu amim markumrêx ne amim kabên maro tẽ:n amÿ maro amikamên mar rax ne. Metÿndjwÿnh Karô dja gar aman Metÿndjwÿnhmã akabên aba nhyim Karô arÿm ar akôt o kangô.

21 Metÿndjwÿnh kum gwaj bajabê. Ar gadjwÿ dja gar amã abê rã'ã ne 'ã adjukanga kêt. Ne Bënjadjwÿr djwÿnhbê Jeju Kritu jabej ajkam ama. Ta dja bôx ne kum gwaj bakaprikumrêx gwaj kôt batÿn ne ar baba rã'ã: rã'ã ne.

22 Me kwÿ kute amim Jeju mar kêtja dja gar amã me kaprÿn 'ÿr me o akêxo tẽ gê me tu amim markumrêx. 23 Nãr, dja gar ano katon me axwebê me kwÿo akêx. Me kwÿ kute amijo punu mexja. Me ja on biknor karô dja gar memã ano katon me axwebê meo akêx. Kute mrãmri ne me'ò kuwykam ãm nhyim me kum kaprÿn kam no kator ne kute pa 'amÿnh ne bôm mênh pyræk. Dja gar me punu kôt ar apunu'ò pymaje amijã ano tÿx ne.



24 Metĩndjwỳnh ne kute amim ar apytàr mexkumrēx gar kam ajmā akute kêt ne katàt ar amijo aba rā'ā ne. Metĩndjwỳnh ra:x nhym me kum uma:. Dja amimexo ar ajo mex gar arỳm ajaxwe kêt. Nhym kam arỳm amikabem ar apumjuwn arỳm prĩne ar ajo kĩ:nhkumrēx. 25 Me Batĩndjwỳnhbê ne me bapytàr djwỳnh. Pydji kute mỳjja kunĩ mar ne krā me:xkumrēx. Ba kum,

—Mrāmri ame:xkumrēx ne apyma:kumrēx. Araxo abê kumkaticumrēx. Me kunĩ:mā Abēnjadjwỳr djwỳnhkumrēx. Ajitỳ:xkumrēx. Amexmē apymamē abēnjadjwỳrmē atỳxmē ne ga aje 'ā aminhinomā amimēnh kêtumrēx, ane. Gê me kunĩ ā Metĩndjwỳnhmā ane. Tām ne ja.

## Mýjja apôx kêttri kukãm 'ã ujarênh ne ja.

Bênjadwýr Jeju Kritu ne Djuãomã, õ àpênhbê Djuãomã mýjjao amirít. Me kute Jeju mar kêtja ne me me kute amim Jeju marjao bikênh ar o ba. Nhym kam Jeju kute õ me jao týx nhym me akubyn týx ne kute kanga kêt kadjy Djuãomã mýjjao amirít. Te me kute meo bikênhkam mã Jeju'ã ngràn kute kanga kêt mã kum o amirít. Anhýr djwýnhrà m kum o amirít, abentã kum o amirító tẽ, mýjja'ã akreo tẽ. Õ me jabit kute mýjja mar nhym me kãtãmbê bipdjurmã ne apýnh mýjja djãri'ã mýjja jakre. Bir, nhym mýj ne Djuão omũ?

Metíndjwýnh kute me axwemã o pãnh ne tu kute mýjja jaxwe kunĩ kuwyo imôkam rênh nhym apêxmã. Nhym kute Xatanajdjwý bĩn nhym kêt nhym kam pyka ajte nyn tu mexkumrêxmã ne kum o amirít. Ne kum kãjkwadjwý jakre. Metíndjwýnh kute õ me jao kĩnhmã, me 'ã ngrã týx ne kute kanga kêtja, me tãm ne kute meo kĩnh nhym me kãjkwakam õ pykakam kĩnhkumrêx ne ar ba rã'ã rã'ãmã. Kam ne me mexbit ar ban kam kanê kêt ne tyk kêt ne mýr kêt. Mýjja punu 'ýr àr kêt kam. Ja kunĩ ne kum o amirít, apôx djwýnhrà m kum o amirít. Nhym Djuão me kadjy omũ. Mýjja apôx kêttri ne anhýr djwýnhrà m omũn memã arê. Tãm ne ja.

*Me kute pi'ôkjakôt amijo baja dja me kĩnh.*

<sup>1</sup> Jeju Kritu kute mýjjao amirít ne ja. Metíndjwýnh ta ne Jejumã arê nhym kam amidjó'ã ajte kute õ àpênhamã o amirít mã, nhym kam me kute marmã. Apýnh mýjja

djãri dja í apôx, amikrà kêt ne apôx nhym anhýr djwýnhrà m arým kute memã o amirít mã. Imã ne arým o amirít ba kam ije me amã arênhmã. Ba ibê Djuão ne ba Metíndjwýnh mã idjãpênh, imã ne o amirít ba ije me amã arênhmã. Nãm iwýr kadjy mrãnh djwýnh jano nhym kam imã mýjja kunĩ jakre ba kam kôt omũ. <sup>2</sup> Ije arým kunĩ pumũnhkam dja ba prĩne me amã kunĩ jarê. Metíndjwýnh kabên ne ba arým ije me amã arênhmã. Jeju Kritu kute katãt kabên jarênh tãm dja ba me amã arê.

<sup>3</sup> Metíndjwýnh kute anhýr djwýnhrà m mýjja'ã memã ujarênh ja gêdja me'õ memã arê nhym kute arênh djwýnh tãm gêdja arým Metíndjwýnh kum kĩnh jadjã. Nhym me kute mar ne kôt amijo bajadjwý gêdja Metíndjwýnh memã kĩnh jadjã. Dja amẽ aro kĩnh, me kute 'ã ujarênh djwýnh o kĩnh ne kam ajte me kute maro ýr jadjwýo kĩnh. Bir, arým 'ýr. Arým Metíndjwýnh kute memã mýjja anhýr djwýnhrà m arênh ja arým apôx 'ýr.

*Djuão apýnh me kute Jeju'ã abeno bikprõnh djãri kubê 7mã kabên.*

<sup>4</sup> Ba ibê Djuão ne ba ar amã pi'ók no'ók ne. Ar aje amim Jeju mar ne apýnh aje kôt aben pydjija, ar amã ne ba pi'ók no'ók ne. Pykabê Adjijkam apýnh krĩ rũnhkôt ar aje 'ã abeno abikprõnh o 7ja me amã ne ba pi'ók no'ók ne.

Gê Metíndjwýnh ukaprikôt me ajo djuw mex ne ar me ajo ba ne me amã umar mex jarê ga me adjumar mex ne ar aba. Metíndjwýnh ta ne tĩn ne ar ba, amrêbê adjãkamã tĩn ne ar ba. Dja mrãmri tĩn rã'ã rã'ã. Tãm dja ukaprikôt me ajo djuw mex ne me amã umar mex jarê.

Nhym Metíndjwýnh Karõ kute amijo 7 ne Metíndjwýnh krĩ djã kõnh ku'ê tãm gêdja adjwýnhdjwý me ajo djuw mex ne me amã umar mex jarênh ar me ajo ba.

<sup>5</sup> NhyM Jeju Kritudjwý dja me ajo djuw mex ne me amã umar mex jarê. Jeju Kritu ta kute mrãmri katàt memã Metĩndjwýnh kabẽno amirĩt djwýnh ne kumrêx tyk ne akubyn tĩn ne kator gédja Metĩndjwýnhmẽ Metĩndjwýnh Karômẽ kudjwa me ajo djuw mex. Jeju ne bẽnjadjwýro kute me bẽnjadjwýr kunĩ jakrenh ne pyka kunĩkôt me ô bẽnjadjwýro ba. Tãm dja Metĩndjwýnhmẽ Metĩndjwýnh Karômẽ kudjwa me ajo djuw mex ne me amã umar mex jarê.

Jeju Kritu ta ne kum me bapumjuw gu me kam babê me kadjy Metĩndjwýnh mar djwýnh ne Bãmmã badjapênh ar baba. Kumã, Jeju Kritu tãmmã gora gẽ me kãjmã kum rax jarênh rã'ã rã'ã. Gédja umao ar me bajo ba rã'ã rã'ã. Mrãmri. Tãm ne ja.

<sup>7</sup> Ori, amrê tẽ. Kakrãkôt ne amrê tẽ. Me kunĩ dja me omũ. Me kute Jeju kanhwýr djwýnhjadjwý dja me omũ, pĩne Jeju pumũ.

NhyM apýnh pyka djari dja me kunĩ omũn amra, Jeju py-maje àmrao kumex. Mrãmri dja me kunĩ omũn amim ngryk ne àmrao kumex. Be, tãm ne ja.

<sup>8</sup> Bẽnjadjwýrbẽ Metĩndjwýnh ne memã kum,

—Ba ibê mýjja kunĩ krax ne ajte ibê mýjja kunĩ 'ẽnhôt, ane.

Nãm ã Metĩndjwýnh týxo kubê kumkati ane. Metĩndjwýnh, ta ne tĩn ne ar ba, amrêbê adjakamã tĩn ne ar ba. Dja mrãmri tĩn rã'ã rã'ã. Ajbit ne umao mýjja kunĩ pytã.

*Jeju Djuãomã amijo amirĩt.*

<sup>9</sup> Nã, ba ibê me akamy Djuão. Nãm ne Jejukôt me akudjwa ijo ajkê ba itokry. Mrãmri ne Jeju me baro'ã me bapytàn ar me bajo

ba. Ba kam me akudjwa mã Jeju'ã INGRÀ týx ne 'ãno djan ije kanga kêt. Ba ne ba apêxtibê Pax-imukam ar ba. Na bãm memã Metĩndjwýnh Kabẽn jarẽn memã Jeju'ã idjujarênh iba. NhyM kam me ja ngryk ne kam imã,

—Kwãrik wãnh mýjja wã jarênh kêt, ane. Ne kam ipa 'amýn kam ijo tẽn apêxti jakam imẽ ba kam kam ar iba.

<sup>10</sup> Be, pi'ók kamrêkkam, Bẽnjadjwýr nhô akatijakam ne ba arek maro nhý nhyM Metĩndjwýnh Karô ar ijo ba. Ba kam me'ô kabẽn ma. Me'ô kabẽn týx kute poti kakôr týx pyrãk. Ikôt ne imã kabẽn ne. Ne imã,

<sup>11</sup> —Ba ibê mýjja kunĩ krax ne ajte ibê mýjja kunĩ 'ẽnhôt. Ba ren ije kãkwamẽ pykamẽ omũnh 'ãno idjãm kêt nhyM ren amrêbê amijo ajkê nhyM ren mýjja kunĩ kêt ne. Ê, amrê tẽn mýjja pumũn 'ã pi'ók no'ók, ane. 'Ã pi'ók no'ók ne kam memã ano. Me kute amim Jeju mar ne apýnh kute kôt aben py-dji, me jamã dja ga ano. Me kute apýnh krĩ rũnhkôt 'ã aben pydjibê 7, ar kute Epexukam 'ã aben pydjijamẽ, ar kute Emĩnakam 'ã aben pydjijamẽ, ar kute Pega-mukam 'ã aben pydjijamẽ, ar kute Xixirakam 'ã aben pydjijamẽ, ar kute Xadjikam 'ã aben pydjijamẽ, ar kute Pirapijkam 'ã aben pydjijamẽ, ar kute Raodjikam 'ã aben pydjijamẽ, mekmã dja ga aje mýjja pumũnhja'ã pi'ók no'ók ne ano, ane. Nãm ã imã kabẽn ane.

<sup>12</sup> Ba kam 'ýr akêx. Ije mýj me'ô kute imã kabẽnja pumũnhmã 'ýr akêx nhyM ngõnhpôkti kubê 7 ne ku'ê ba omũ. Kẽn karýro ngõnhpôkti.

<sup>13</sup> NhyM kam ipôkri dja. Kute me'ô my pyrãk ne dja. Nãm kubêkã ryti jadjãn o dja. Kubêkã rytija ne parkõn 'ãnh itep nhyM 'ã dja. Ne kẽn karýro amirunh pren 'ã dja. <sup>14</sup> Ne kí jaka: kute àk

kaka jaka ja pyræk. Kute kadjät nhĩ jaka pyræk. NhyM no pókja kute kuwy pók pyræk. <sup>15</sup> Ne par jadjénh. Kute ngónh nhípêx djákam me kute 'ã ngrão póx nhyM adjénh pyræk. NhyM ôkrekam krikrit kute ngô rãrãkti: pyræk. <sup>16</sup> Ne ubókjao kanhêtireo 7 ne 'amýn o dja nhyM kam aktã kàx djwa mextire ajkwa krekre kurúm kato. Ne nokre jadjénh kute kàjkwa nhípókri myt mrãnhkam adjénh ja pyræk.

<sup>17</sup> Ba omün kam itu mýrbê tým kute ityk pyræk ne itu mýrbê tým ne nõ, itín prãme. NhyM kam ta ijã ikra dji, ubôko ijã ikra djin kam imã,

—Kwãrĩk wãnh atín prãm kêt. Ba ibê mýjja kunĩ krax ne kam ajte ibê mýjja kunĩ 'ênhôt. <sup>18</sup> Bajbit ne ba ije amitín mar. Arým ne ba ty ne kam arým ajte itín ne. Amrê ipumũ. Ba dja ba itín rã'ã rã'ã. Ba ne ba ikabêno me tyk kadjy me anor djwýnh ne kam ajte ikabêno me tyk nhõ pyka'ýr me anor djwýnh.

<sup>19</sup> Aj, dja ga on 'ã pi'ók no'ók, aje omünhja'ã pi'ók no'ók ne. Arým kator ga aje omünhjamê mýjja kraxje kator kêt rã'ãmê. Amê dja ga 'ã pi'ók no'ók ne. <sup>20</sup> Mýkam ne ba kanhêtireo 7 idjubôko 'amýn o dja ga omũ? Ne kên karýro ngónhpóktio 7jadjwý, mýj ne ja? Bir, ba amã arê ga ama. Ê, ngónhpóktio 7ja ne kubê apýnh krĩ djari me kute amim imar ne kute ikôt aben pydji 'ã akre kubê 7. Apýnh krĩkam me kute ikôt aben pydji'ã akre kubê 7 ne ja. NhyM kanhêtireo 7ja ne kubê apýnh krĩ djari me kute ijã abeno bikprõnhja kadjy mrãnh djwýnh ta ne 'ã akre, ane.

Nãm ã Jeju imã kabên ane ba kuma.

## 2

*Epexukam ar ja arým kum Metĩndjwýnh kñh ngrire.*

<sup>1</sup> NhyM kam ajte imã,

—Ê, ar kute krĩraxbê Epexukam amim imar ne kute ikôt aben pydji ja kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bênjadjwýr Jeju dja ga arkum ikabên jarên arkum, “Ê, ba ije idjubôko kanhêtireo 7 ne 'amýnhja, ne ba kên karýro ngónhpóktio 7kam imrãnhja, ba. Ba ne ba ar amã ikabên ne.

<sup>2</sup> Gar ikabênkôt ar amijo aba ba arým omũ. Ar adjápênh rax, ar aje ijãno adjãm ne aje ikanga kêt ba arým omün kam ikñhkumrêx. Nã gãM ar abê me axwe kñh no kati ba arým omũ. NhyM me wã we kute 'Jeju kute ar ijanor' anhýrja gar te kabên mex jabej kam aman kam arým prĩne mekmã akato. Me wã ne me 'êxnhikumrêx. Me tãm ne gar arým mekmã akaton abê me kñh no kati. <sup>3</sup> Nã gãM ar ijãno djan amibê ijo abiknor kêtumrêx ne. Nãm me ikôt ar ajo ajkê gar tu ate akrãn aje amibê ikanga kêt ba arým omün kam ikñhkumrêx ne.

<sup>4</sup> Bep mýjja pydji ne ba omün ikaprĩre. Amrêbê ar aje amim ijo amirĩt totokbê ne gar amã ijabê ne jakam arým amã ikñh ngrire. <sup>5</sup> Gop ar amim akaton wãnh ajaxwemã anhiren iwýr amijo akêx. Nã gãM ar ibê amiptar mex ne. On ar ajte akubyn amã ijabên kam ajte akubyn imã apê kute amrêbê imã ar adjápênh ja pyræk. Dja gar ã anhýr kêt ba wãm ar awýr tén kam ar abê ngónhpókti wã kaba nhyM arým ãM djã kaprý.

<sup>6</sup> NhyM bep me punubê Nikôrij, me tãm, me kabên punu ar baja. Me tãm ne gar me kabên punukam amã me kurêkumrêx. Mrãmri, kam ne mexkumrêx. Mrãmri ne gar amã me kabên punuja kurêkumrêx. Kam ne mexkumrêx. Badjwý ne ba imã mekbê Nikôrij me kabên punukam imã me kurêkumrêx.

<sup>7</sup> Gora ar ajamak mex jabej on ama. Metĩndjwýnh Karõ ne ar kute amim imar ne apýnh kute ikôt aben

pydjijamã kabên. Gora ar prïne kabên ja ma. Ê, ar me kuràm atÿx ne aje ijãno adjãm, ar gajbit dja ba ar amã pidjô kute meo tïnja jarê gar gajbit ku. Pidjô kute meo tïnja ne Metïndjwÿnh nhô pykakam dja, kàjkwakam Metïndjwÿnh nhô pyka mexkumrêxkam. Tãm dja gar ku”, ane. Nãm ã Jeju imã kabên ane. Ba ibê Djuão ne ba kuman ar amã arê.

*Emïnakam ar ja tokry.*

<sup>8</sup> Nhyam kam Jeju ta ajte imã,

—Ê, krïraxbê Emïnakam ar kute amim imar ne kute ikôt aben pydjijja kadjy mrãnh djwÿnhjamã dja ga pi'òk no'òk ne. Dja ga arkum ikabên jarê. Ba ibê Bënjadjwÿr Jeju dja ga arkum ikabên jarên arkum, “Ê, ba ibê mýjja kunï krax ne kam ajte ibê mýjja kunï 'ênhôt. Ba ne ba tyn kam ajte itïn ne. Ba ne ba ar amã ikabên ne.

<sup>9</sup> Me kute ar ajo bikênhja ne ba arÿm omü. Ar anhô mýjja kêt, anhô nêkrêx kêtja ne ba arÿm omü. Nhyam bep kati, nïjar anhô nêkrêx kumex. Mrãmri pykakam ar abakam arÿm anhô mýjja kêt nhyam bep kàjkwakam anhô mýjja kumex. Nhyam me kwÿ ta amijo Metïndjwÿnh kra, amijo mekbê idjaer ne ar ajaprÿ ar o ba, ba arÿm omü. Djãm mekbê Metïndjwÿnh kra? Kati, Xatanaj nhô àpênh ne wã ne kam mã kôt ar aben pydjio ba. <sup>10</sup> Kwãrïk wãnh gar amã me uma kêt. Gora ar atÿx. Dja me ï ar ajo ajkê ga ar atokry. Gora ar atïn prãm kêt. Ê, godja me ï Xatanajbê me axwe nhô bënjadjwÿr kabênkôt mekbê ijê djakam ar akwÿ rê, ar aje ikanga jabej. Be, akati kunïkôt dja me ar ajo ajkê gar atokry. Nhyam kam arÿm me kute ar ajo bikênh'ã akatibê 10 nhyam kam me arÿm ar ajo bikênh kêt ne. Gora ar ijã angrã tÿx ne ijãno dja. Godja me te ar apa gar ijãno dja ba kam pãnh ar ajo tïn gar atïn rã'ã rã'ã.

<sup>11</sup> Gora ar ajamak mex jabej, on ama. Metïndjwÿnh Karô ne ar kute amim imar ne apÿnh kute ikôt aben pydjijamã kabên. Gora ar prïne kabên ja ma. Ê, ar me kuràm atÿx ne aje ijãno adjãmja, ar gajbit dja gar atyk nhijukri ajte atyk kêtikumrêx. Arkati”, ane. Nãm ã Jeju imã kabên ane. Ba ibê Djuão ne ba kuman ar amã arê.

*Pegamukam ar ja kwÿ prô prãm.*

<sup>12</sup> Nhyam kam Jeju ta ajte imã,

—Ê, ar kute krïraxbê Pegamukam amim imar ne kute ikôt aben pydjijja kadjy mrãnh djwÿnhjamã dja ga pi'òk no'òk ne. Dja ga arkum ikabên jarê. Ba ibê Bënjadjwÿr Jeju dja ga arkum ikabên jarên arkum, “Ê, ba ne ba ar amã ikabên. Ba ijajkwa krekre kurüm aktã kàx djwa mextire kator djwÿnh, ba ne ba ar amã ikabên ne.

<sup>13</sup> Xatanaj kute meo ba djakam ne gar te ar aban amex rã'ã ba arÿm ar apumü. Be, nã gãm ar ijã angrã tÿx ne aje amibê ikanga kêt. Djã nã gãm ar me kudjwa aminêje memã kum, 'Jakam arÿm ije amim Jeju mar kêt. Arÿm imã kïnh kêt', ane? Kati, ar aje ã memã anhÿr kêtikumrêx. Nhyam me arÿm ar anhôbikwa Áxipanah bï gar mã amã ikïnh ne aje ikanga kêtikumrêx ne. Nã, Áxipanhdjwÿ kum me uma kêt ne tu memã ijarênh 'ãno dja nhyam me kubï, wãkam, Xatanaj mör djã wãkam. Nãm me te kubï gar mã amã ikïnh ne. Ba arÿm omün ar akam ikïnh ne.

<sup>14</sup> Bep me kute me kabên punukôt amijo ba ja tãm ne ba imã me kïnh kêt. Ar akwÿ ne gar me bakukãmãre 'òbê Barãokôt ar amijo aba. Djãm Barão mex got. Nãm mekbê idjaer kurê djwÿnhbê Barakimã mekbê idjaer'ã karô. Kute mekbê idjaer o bikênhmã ne mýjja punu'ã kum karô. Mekbê idjaer kute mry punu krênãm, me kute mýjjao Metïndjwÿnh karô

nhipêxjamã mry nhôr ja kute krên ne amijo bikênhmã. Ne ajte me kute abenbê prôo âkînh ne arîk prô prãmo kumexmã. Me kute ã amijo bikênhho anhÿrmã ne me'ã kum karô. Nhyim kam ô'ã Baraki mekbê idjaero bikênh o ba. <sup>15</sup> Nhyim ar akamdjwÿ mekbê Nikôrij ã kabên ane, ã memã 'ã karôo ane. Nhyim ar akwÿ kabên punu jakôt ar amijo ba.

<sup>16</sup> On ar amim akaton wãnh ajaxwemã anhiren iwÿr amijo akêx. Dja gar amim akator kêt ba ar awÿr bôx ne me kabên punuja'ÿr iprôt ne. Ijajkwa krekre kurûm aktã kãxdjwa mextire katorjao dja ba me'ÿr iprôt ne.

<sup>17</sup> Gora ar ajamak mex jabej on ama. Metîndjwÿnh Karô ne ar kute amim imar ne apÿnh kute ikôt aben pydjijamã kabên. Gora ar prîne kabên ja ma. Ê, ar me kurãm atÿx ne aje ijãno adjãmja, ar gajbit dja ba ar amã djwÿbê mÿj ne ja ngã, djwÿo bipdjurja ngã gar krê. Ba kam ajte ar atÿxmãbit apÿnh kên mêre, kên jaka ngã. Ne kam ajte ar amã kên ja no'ôk, apÿnh ar anhidji ny'ã kên no'ôk ne kungã gar kam omû. Atemã me ja kute ar anhidji nyja mar kêt. Ar gajbit, ar atÿxbit, ije apÿnh ar amã kên nhôrja, ar gajbit dja gar apÿnh aminhidji nyja ma", ane. Nãm ã Jeju imã kabên ane. Ba ibê Djuão ne ba kuman ar amã arê.

*Xixirakam Djedjabeu ar noo akno.*

<sup>18</sup> Nhyim kam Jeju ta ajte imã,

—Ê, ar kute krîraxbê Xixirakam amim imar ne kute ikôt aben pydjija kadjy mrãnh djwÿnhjamã dja ga pi'ôk no'ôk ne. Dja ga arkum ikabên jarê. Ba ibê Bênjadjwÿr Jeju dja ga arkum ikabên jarên arkum, "Ba ne ba ar amã ikabên ne. Ê, ba, ibê ne Metîndjwÿnh kra ne ino pôk kute kuwy pôk pyrãk, ne ipar jadjênh kute ngônh nhipêx djãkam

me kute 'ã ngrão pôx nhyim adjênh pyrãk, ba ne ba ar amã ikabên ne.

<sup>19</sup> Gar kôt amijo aba, ba arÿm omûn kam ikînhkumrêx. Gar amã aben jabên amã Metîndjwÿnh jabê ba arÿm omû. Gar tu amim imarkumrêx ne ijã angrã tÿx ba arÿm omû. Ar adjãpênh rax ba arÿm omû. Nã gãm ar ijãno djan amibê ikanga kêtumrêx ba arÿm omû. Nã gãm ar ikôt amijo aba. Amrêbê ne gar ikôt amijo aba ngrire ne kam amijo tên amijo tên arÿm ikôt amijo amôr mex ne.

<sup>20</sup> Nhyim bep mÿjja pydji ne ba omûn ikaprîre. Nã gãm ar amã me'ô nibê Djedjabeu kînh. Nãm we amijo Metîndjwÿnh kabên jarênh djwÿnh ne kam mÿjja punu'ã inhô âpênhmã karôn 'ã arkum apnê. Inhô âpênh kute abenbê prôo âkînh ne ar prô prãm ba ne kam kute amijo bikênhmã.

Ne kam ajte ar kute mry punu krênmã, me kute mÿjjao we Metîndjwÿnh karô nhipêxjamã kute mry nhôr nhyim ar kute krên ne o kute amijo bikênhmã. Nãm ã Djedjabeu inhô âpênhmã mÿjja punu'ã karôo ane, ne ã 'ã arkum âpnênhho ane. <sup>21</sup> Nã bãm te amiwÿr kam ama. Kute amim kator ne wãnh axwemã irern iwÿr amijo akêxmã te amiwÿr kam ama nhyim kute mjên prãm ja kanga kêt ne amim kator kêtumrêx. Kum axwe kînh rã'ã.

<sup>22</sup> Ê, dja ba nija'ÿr bôx ne kam nôr djãkam kumê, nôr djã tãmkam dja ba kumên kam prîne o ajkê. Me my kute nînhjamê ro'ã dja ba prîne meo ajkê. Dja me kum axwe kînh rã'ã ne nija kanga kêt ne iwÿr amijo akêx kêt, ba kam prîne meo ajkê nhyim me kam tokry. <sup>23</sup> Ne ni krajadjwÿ pyka mē o amrã. Apÿnh ar aje amim imar ne ikôt aben pydjija kunî aje imã akator kadjy. Ba ije ar ajamakke kadjwÿnhbêmê anhôkre kadjwÿnhbê aje mÿjja mex nâr mÿjja punu'ã amim karô jabej

ije ar akamũnh ne kôt ije ar anhĩ pýnhkôt ar amã o pãnh djwýnh. Gar kôt aje imã akator kadjy dja ba ni krajadjwý pyka mẽ o amrà.

<sup>24</sup> Bep ar aje me kabẽn punukôt amijo aba kêtjamã, wãkam, Xi-jxirakam ar aje me kabẽn punu kôt amijo aba kêtjamã dja ba aje ikabẽn 'õ jarẽnh kêt. Mrãmri ne ar aje ikôt amijo aba ne ar aje Xatanaj kukràdjã mar prãm kêtgam amexkumrẽx. Nhyam me ate we kute Xatanaj kukràdjã bipdjurja marmã we, 'Mexkumrẽx gu me kuma', anhýrja djãm me mex got. Axwe punu gar kôt amijo aba kêtgam amexkumrẽx. <sup>25</sup> Gora ar mã ikôt ar amijo aban ijã angrã tỳx rã'ã: ba akubyn bõx.

<sup>26-28</sup> Ë, ar me kurãm atỳx ne aje ijãno adjãmja, ar aje ikabẽn mar ne aje ikôt amijo aba rã'ãn aje o atẽm ne o atẽm ne arỳm aje inomã mẽnhja, ar ajã dja ba bẽnjadjwýr rẽ gar kam inhijuk'ã meo aba.

'Apýnh me ba djari dja gar meo aba, ar apymao meo aban meo aba tỳx ne. Meo aba tỳx ne, nhyam me'õ axwe gar kam prĩne o ajkẽ, me kute kãxo àbẽr djão kute ngyo ngõnh totyk ne prĩne ka'ẽkja pyrãk. Dja gar ã meo aba tỳxo ane.'

Be, Ibãmbẽ Metĩndjwýnh ne ijã bẽnjadjwýr mẽ. Dja ba kam amidjõ'ã ar ajã kurẽ gar kam ikabẽnkôt meo aba. Dja ba kam aje ar akĩnh djã kadjy ar amã umajýrtiredjwý ngã, akati maktã umajýrtire ja ngã.

<sup>29</sup> Gora ar ajamak mex jabej on ama. Metĩndjwýnh Karõ ne ar kute amim imar ne apýnh kute ikôt aben pydjijamã kabẽn ne. Gora ar prĩne kabẽn ja ma", ane. Nãm ã Jeju imã kabẽn ane. Ba ibẽ Djuão ne ba kuman ar amã arẽ.

### 3

*Xadjikam ar ja kute me tyk*

*pyrãk.*

<sup>1</sup> Nhyam kam Jeju ta aje imã, —Ë, ar kute krĩrãxbẽ Xadjikam amim imar ne kute ikôt aben pydjijja kadjy mrãnh djwýnhjamã dja ga pi'õk no'õk ne. Dja ga arkum ikabẽn jarẽ. Ba ibẽ Bẽnjadjwýr Jeju dja ga arkum ikabẽn jarẽn arkum, "Ë, ba ne ba ar amã ikabẽn. Ba ije Metĩndjwýnh Karõ kute amijo 7 ije amýnhja, ne ije kanhẽtireo 7 ne amýnhja, ba. Ba ne ba ar amã ikabẽn ne.

Nãm me we ar amex jarẽ. Bep kati, ar ajaxwekam kute ar atyk pyrãk. Ba arỳm ar apumũ. <sup>2</sup> On ar ano mex, atĩn rã'ari, ne akubyn amijo tỳx, amijo mex, ar atyk kẽtri. Nã gãm ar amijo aba punu ba te ar apumũ, te ar aje kôt amijo aba jabej te ar apumũ ne kam ar amã, 'Ë, Ibãmbẽ Metĩndjwýnhmã ar amex kêtikumrẽx', ane.

<sup>3</sup> Gop ar ajkam ama. Amrẽbẽ me kute ar amã arẽnh gar arỳm aje markumrẽx tãm dja gar tu markumrẽx ne kôt amijo aba. Kôt amijo aban on wãnh ajaxwemã anhiren iwýr amijo akẽx. Dja gar amim akator kêt ba kam ar ajaẽrbẽ ar awýr bõx. Kute me àkĩnhĩ me aẽrbẽ kute mýjjao àkĩnh ne kute mebẽ mýjja jamýnh ja pyrãk. Dja ba ã ar ajaẽrbẽ ar awýr ibõxo ane. Dja gar ibõx djãkôt imar kêtikumrẽx ba ar ajaẽrbẽ bõx.

<sup>4</sup> Bep krĩbẽ Xadjiwãkam ar angrẽre ne gar amrãnh mexkumrẽx rã'ã. Ne kam ar angrẽre amrãnh mexkumrẽx kute mrãmri ne me kute kubẽkã mex, 'ã ngrã kêt kute angjẽnh ne 'ã mrãnhja pyrãk. Nã gãm ar ã amexo ane. Ar ga dja gar ikôt mrãn ikudjwa kubẽkã jaka jangij ne 'ã mrã. Nã gãm ar amrãnh mexkumrẽx. Nhyam kam kubẽkã jaka kadjy ar amex. Tãm dja gar angij, amrãnh mex pãnh angijn 'ã mrã.

<sup>5</sup> Be, ar me kurãm atỳx ne aje ijãno adjãmjabit dja gar ã kubẽkã

jaka jangiênh ne 'â amrânho ane. Ba kam pi'ók no'ókkam anhidji jarijwã o ibingrânh kêt, me tîn râ'â râ'â'â pi'ók no'ókkam ar anhidjio ibingrânh kêt ne. Ne kam ajte dja ba Ibãmmã inhýtã ar ajarê, Ibãmmê Ibãm kadjy mrânh djwýnhmê arkum inhýtã tu kàj bê ar ajarê ne kum, 'Be, inhô me ja ne me ja.' Be, dja ba ã kum ane.

<sup>6</sup> Gora ar ajamak mex jabej on ama. Metîndjwýnh Karô ne ar kute amim imar ne apýnh kute ikôt aben pydjijamã kabên ne. Gora ar prîne kabên ja ma", ane. Nãm ã Jeju imã kabên ane. Ba ibê Djuão ne ba kuman ar amã arê.

*Pirapijkam ar Metîndjwýnh kabênkôt amijo ba.*

<sup>7</sup> Nhyh kam Jeju ta ajte imã,

—Ë, ar kute krîraxbê Pirapijkam amim imar ne kute ikôt aben pydjijã kadjy mrânh djwýnhjamã dja ga pi'ók no'ók ne. Dja ga arkum ikabên jarê. Ba ibê Bênjadjwýr Jeju dja ga arkum ikabên jarên arkum, "Ë, ba ne ba ar amã ikabên. Ba imexo ipyma ne mrãmri ikabênkumrêx ne ijéxnhî kêtumrêx ne kam ar amã, 'Ba ne ba ije inhingêt kukãmã Dawi nhûrkwãkam o kajkep djwýnh. Ba kikre'ã kuta nhyh mýj me'ô godja 'ã ijê? Ba 'ã ijê nhyh mýj me'ô godja 'ã kuta?'

<sup>8</sup> Bir be, gar ikôt amijo aba ba arým omû. Djã nã gãm ar atýx kumrêx? Katî, kàjbê ar atýx ba arým ar apumû. Nã gãm ar te atýx ngriren mã ikabênkôt ar amijo aban aje ikanga kêtumrêx ba kam ar amã, 'Ba gêdja ba ar amã kikre'ã kuta. Mýj me'ô gêdja ar abê 'ã ijê? Ba dja ba ar ajo iba. Mýj me'ô dja inê?' ane.

<sup>9</sup> Ë, Xatanaj nhô àpênh 'êxnhîja, kute kôt ar aben pydjio ba, ne me 'êx ne amijo Metîndjwýnh kra, kute amijo mekbê idjaer, djãm mekbê idjaer djwýnh got, me ja me tam gêdja ba ar awýr me pa 'amýn meo

môn ar akuka kôn h me umjuw nhyh me kam pijãm djãje ar akuka kôn h ibôn krîn ar amã arax jarên kam tu ar amarkumrêx. Imã ar ajabêkam kôt me kute mar ne kute ar ajã, 'Jeju kum ar abêja pumû', anhýr kadjy dja ba ã meo ane.

<sup>10</sup> Ije ar amã, 'Dja me te ar ajo ajkê gora gar mã ijã angrã týx ne ijãno djan ikanga kêt', anhýrkôt ne gar amijo aba. Nhyh me te ar ajo ajkê gar mrãmri ijãno djan ikanga kêt. Kam dja ba ar apytã. Ije me kunîo ibikênhkam dja ba arým ar apytã. Dja ba pyka kunîkôt ije me kabi kadjy meo ajkê. Dja ba apýnh pyka djãri me kunî kabi, me kute imã kator kadjy me kabin meo ajkê. Nhyh bep ar amexbit dja ba ar apytã.

<sup>11</sup> Arým ibôx 'ýr. Gora ar arek ikabênkôt ar amijo aba râ'ã: ba kam ar amã o pãnh, ar amã ar akînh djã ngã. Kwãrîk wãnh me'ô ar abê ikurê kêt. Dja me'ô ar anoo aknon ar abê ikurê gar kam akînh djã býr kêt ne. Dja gar arek amijo aban arým ikam amim akînh djã by.

<sup>12</sup> Ë, ar me kurãm atýx ne aje ijãno adjãm, ar gajbit dja ba amim ar apumjuw, Ibãmbê Metîndjwýnh nhûrkwãtikam ar apumjuw gar aku'ê râ'ã râ'ã, kute Metîndjwýnh nhûrkwãtikam par pyrãk ne aku'ê, Metîndjwýnh kuka kôn h aku'ê râ'ã râ'ãn akator kêt. Ba dja ba ar ajã Ibãmbê Metîndjwýnh nhidji no'ók, ne kam ajte ar ajã krî nhidji no'ók, Ibãmbê Metîndjwýnh nhô krî mex nhidji dja ba ar ajã no'ók ne. Krî mexja, Djeruxarê nyja, Ibãmbê Metîndjwýnh kurûm rwýkja, kàjkwa kurûm rwýk, ja tãm nhidji dja ba ar ajã no'ók ne. Ne kam ajte ba aminhidji ny ar ajã no'ók ne, ar atýx ne aje ijãno adjãmja'ã aminhidji no'ók ne.

<sup>13</sup> Gora ar ajamak mex jabej on ama. Metîndjwýnh Karô ne ar kute amim imar ne apýnh kute ikôt aben



pydjijamã kabên. Gora prîne kabên ja ma”, ane. Nãm ã Jeju imã kabên ane. Ba ibê Djuão ne ba kuman ar amã arê.

*Raodjikam ar kute ngô kàjbê kangro pyrãk.*

<sup>14</sup> Nhyim kam Jeju ta ajte imã,

—Ë, ar kute krîraxbê Raodjikam amim imar ne kute ikôt aben pydjija kadjy mrãnh djwýnhjamã dja ga pi'ók no'ók ne. Dja ga arkum ikabên jarê. Ba ibê Bênjadjwýr Jeju dja ga arkum ikabên jarên arkum, “Ë, ba ne ba ar amã ikabên. Ba, ibê ne Mrãmri. Ba ije mrãmri katãt memã Metîndjwýnh kabêno amirît djwýnh ne ba mrãmri ikabênkumrêx. Metîndjwýnh kabênkôt ne ba ibê mýjja kunî nhípêx djwýnh.

<sup>15</sup> Gar ar aba ba arým ar apumũ. Djãm we ar amã ikuré nãr kon djãm we ar amã ijabê. Arkati. Nã gãm ar amã ikuré kêt ne kam ajte amã ijabê kêt. Ar aje ngô kàjbê kangro pyrãk, ajakry kêt ne kam ajte akangro kêt. Gop on ar ajakry nãr kon on akangro rax. Ba gop kôt kuma, ar apunu ma nãr kon ar amex ma. <sup>16</sup> Nhyim bep kati, ar kàjbê akan-grokam ije ar amar mex kêt. Kam dja ba ar ajo aptô. Ar ajakry kêt ne ar akangro kêt ne aje ngô kangro kajgo pyrãkkam.

<sup>17</sup> Nã gãm we ar, ‘Arým ne inhô nêkrêx kumex. Nã bãm prîne inhô mýjjao aptã nhyim kam kumex. Arým inhô mýjja kunî bikàr ne ibê 'ô'ã kãtãm kêt.’

Kê, djãm ar aje amimar got. Nã gãm ar prîne amijo ajkê. Ne akaprî mex ne. Ne abikênh mex ne. Ar ano rã ne anhô kubêkã kêtgam tu irãri ar abajakam. Djãm ar aje amimar kêt? <sup>18</sup> Kam dja ba ar amã mýjja jarên ar amã, ‘Ë, on kên karýr mextireja, ngônh nhípêx djãkam me kute 'ã ngrão pôx nhyim mextire ja dja gar 'ã ijwý ba ar amã kungã gar abyn arým amímex, arým abikênh kêt. Ne kam ajte

ar kubêkã jaka'ã ijwý ba ar amã kungã gar kam arým angjê. Angjên irãri ar aba kêtgam apijãm kêt. Ne kam ajte ar anokam pidjý'ã ijwý ba ar amã kungã gar arým o aminô dji ne arým ano mex.’

<sup>19</sup> Me axwe nêje ne ba memã ibên týx ne imã me Kînhja ne ba memã uwêk mãt ne. Kam dja gar on amim akaton wãnh ajaxwemã anhiren akubyn iwýr amijo akêx.

<sup>20</sup> Ë, gop ar ikabên ma. Ota ba arým ar awýr bôx ne kikre kabem dja. Ar ajô imã kikre'ã ta. Ba wãm awýr wadjã gu baro'ã aben kuka kônh banhô kwý krêno nhý ga arým akî:nhkumrêx. Gop ar ajô aje ikabên mar jabej, on kikre'ã ta.” Nãm ã Jeju me kunimã kabên ane. Me kute Jejuo aminhômã ne ã kabên jarênho ane ne kam ajte memã kum,

<sup>21</sup> “Ë, me me kurãm atýx ne aje ijãno adjãmja, me gajbit dja ba me amã arê ga me ikrî djãkam inhikô'ã nhý. Me ga dja gu me ar meo baban bakabêno me ano. Me me bamã ãpênhmã dja gu me bakabêno me anor ar o baba. Ga ba itýx ne ije Ibãm 'ãno idjãm ne ije amijo imrãnh rã'an ije aminhinomã amimênhja pumũ. Ije kanga kêt ne ije aminhinomã amimênh ne kam Ibãm nhikô'ã inhýr ne ije ikabêno me anorja pumũ. Dja ga me ã ikudjwa atýx ne ijãno adjãmã ane.

<sup>22</sup> Gora me ajamak mex jabej on ama. Metîndjwýnh Karô ne mete amim imar ne apýnh kute ikôt aben pydjijamã kabên. Gora prîne kabên ja ma”, ane. Nãm ã Jeju imã kabên anen kam o ino re. Ba ibê Djuão ne ba kuman me amã arê.

## 4

*Metîndjwýnh krî djãtikam nhý.*

<sup>1</sup> Nhyim kam ijukri atemã mýjja kato ba omũ. Kãjkwakam kikre'ã 'yr ne dja ba omũ. Nhyim kam ajte me'ô imã kabên ne, ôbê kute imã

kabēnja, kabēn kute poti kakôr tỳx pyrāk, ta ajte imā kabēn ne imā,

—Amrē tē ba amā mýjja jakre, mýjja kraxje kator kēt dja ba anhýr djwýnhřam amā o amirít ga anoo anhýtā omŭ nhy m bep tŭmrām dja amirít ne, ane. Nām ā imā ane.

<sup>2</sup> Ā imā anhýrmē ro'ā Metīndjwýnh Karō iwýr ruw ne mā ijo tēn ijo wabi. Nhy m nĵar kāk kwakam bēnjadjwýr krī djā rax dja nhy m kam arým me'ō kam nhý. <sup>3</sup> Me'ō ýrja ne adjēnhō tuknī. Kute kēn ngrāngrāmē kēn kamrēk kakrātyk, o me ikrakam rax ne o ōkredjē karýr jadjēnh tỳx ja pyrāk. Nām ā me'ō ýrja jadjēnh kute kēn ja jadjēnhja pyrāk ne nhý. Nhy m kam djwýngwýnh tīre ne krī djāmā ipōk ne wajēt ne kam adjwýnhdjwý adjēnh. Kute atemā kēn ngrāngrā 'ōdjwý jadjēnh tỳx ja pyrāk. Nām ā djwýngwýnh tīre adjēnh ā anen krī djā raxmā ipōk ne.

<sup>4</sup> Nhy m krī djā raxjamā me krī djā kryre ipōk ne. Apýnh me krī djā kryre ku'ē djāri 'ā akrekam kubē 24. Nhy m mebēngētte kam krī. Kubēkā jaka jangij ne kam kam krī. Ne kēn karýro krādjē, bēnjadjwýr krādjē ne me kutu.

<sup>5</sup> Nhy m krī djā raxja kurŭm adjēnhō amikurwý ne kam krako dja. Kabēnmē adjēnhmē krakmē o akā. Nhy m krī djā rax kabem ne ngōnhpōktio 7 ne pōko ku'ē. Ngōnhpōktija kubē Metīndjwýnh Karō kute amijo 7ja. <sup>6</sup> Nhy m ajte krī djā rax kabem ne mýjja karýr kute imōti pyrāk ne nō. Kute ixeo imōti pyrāk ne nō. Karýr kute kryt karýr pyrāk ne nō.

Nhy m mýjja tīn amānhkrut ne amānhkrut ne krī djā raxmā ipōk ne, nhy m ipōkri krī djā rax dja. Nhy m mýjja tīnja kute krī djāmā ipōkja ikam no kumex, ibŭmkam non ōngākkam no. <sup>7</sup> Nhy m mýjja tīn

kutewaja kute rop djākrēbē rijāo pyrāk, atāri ja kute mryti kra pyrāk, atāri ja nokre kute mebēngōkre\* nokre pyrāk nhy m kute katēja kute ākkajkrītti tor pyrāk. <sup>8</sup> Nhy m apýnh mýjja tīn djāri ara kumex. Ar ī pýnhkōt ara kubē 6'ā kabēn. Nhy m arakam no kumex. Ara nhībŭmkam no. Ara nhōkrekam no.

Ne ar ngrer ba. Ngrer ba rā'ā rā'ā. Kute ngrero ino rer kētkumrēx. A'urimē akamātmē kam ar ngrer ba rā'ā rā'ā. Nām ar, —Mex, mex, mex. Metīndjwýnh ne mexo umakumrēx. Nām Bēnjadjwýr raxkumrēx. Týxo kubē kumkati. Nām tīn ne ar ba, amrēbē adjākamā tīn ne ar ba. Dja mrāmri tīn rā'ā rā'ā.

Nām ā ar ngrero ane, ā kute kum mex jarēnhō ane. <sup>9-10</sup> Mýjja tīn amānhkrut ne amānhkrutja ā kute krī djā raxkam ýrjamā mexmē umamē raxmē amikīnh jarēnhō ane. Metīndjwýnh tīn ne ar ba rā'ā rā'ājamā arē. Ar kute kum arēnh kunīkōt ne mebēngētte kubē 24ja tu mýrbē rōrōk ne. Krī djā raxkam ýrja kabem, pijām djāje tu mýrbē rōrōk ne. Mrāmri ne Metīndjwýnh tỳxkumrēx ne tīn rā'ā: rā'ā. Kam ne kuka kōnh mebēngētte kubē 24ja pijām djāje tu mýrbē rōrōk ne. Ne kam tu kabem krādjē mexjamā ire. Tu kabem krādjē mexjamā ire nhy m wānh ikwā. Nhy m me kam kum mex jarē. Kum mex jarē ne kum,

<sup>11</sup> —Me inhō Bēnjadjwýr, me Itīn djwýnh, gajbit ne ba me amā amextīre jarēn amā apymamē arax jarēn amā atỳx jarē.

Mýj me'ōmē ne gar aje aben pyrāk? Kati, apydji.

Gajbit ne ga mýjja kunī 'y.

Gajbit ne ga tu amim mýjja kunī'ā karō nhy m arým tīn ne apōx.

\* 4:7 Apýnh me ō pyka djāri kunīkōt ne me kunī bēngōkre. Kubēkā jakamē me kakrātykmē me babēngōkremē ne me kunī: bēngōkre.

Ga ne ga mýjja nhípêx nhym apôx, ane.

Nâm ã mebêngêtte kubê 24ja Metîndjwýnhmã mextire jarêho ane.

## 5

*Mrykĩ'átomti jibatànň nyre kute pi'ók byr:*

<sup>1</sup> Nhyam kam krĩ djã raxkam ýrja ubôko pi'ók no'ók byn o nhỹ ba omũ. Nãm prĩne pi'ók no'oko tuknĩ. Ôkremẽ ibũmmẽ prĩne no'ók. Ne kam krãkã'ã tom krĩo tẽ. Abenmã mênh'ã tom krĩo tẽ. 'Ã tom'ã akre kubê 7. Me'õ kute 'ãpre bõnh ne omũnh kêt kadjy. <sup>2</sup> Nhyam kam kadjy mrãnh djwýnh týxkumrêx ne katon kãj bê memã kabên ne memã kum,

—Mýj me'õ ne mexkumrêx ne kam kute pi'ók no'ókja'ã 'yrmã? Kute 'ã oy djã rênhmã? ane. <sup>3</sup> Nãm ã anen kam te me'õ mex jabej me kabi. Kute pi'ók no'ók'ã oy djã rênh ne omũnhmã. Nãm kãjkwakammẽ pykakammẽ pyka kadjwýnhbê me jamẽ te kadjy me kabi. Ne me'õmã kator kêtumrêx. <sup>4</sup> Kam ne ba arým muw. Me'õ mexkumrêx kute pi'ók no'ók'ã 'yr ne omũnh 'õ kêtumrêx ne ba arým imýro dja.

<sup>5</sup> Nhyam kam mebêngêtte 'õ imã,

—Amýr kêt. Ë, Djuda nhürkwãkam me'õ, Dawi tamdjwý 'õ dja pi'ók no'ók'ã kuta. Týxkumrêx, umakumrêx. Kute rop djãkrêbê rijão pyrãk. Tãm, ajbit, ne týxkumrêx ne meo apan kam kute pi'ók no'ók'ã oy djãbê 7 rênh ne kute pi'ók no'ók'ã 'yr ne kute omũnhmã.

Nãm ã imã ane ba kam kuma.

<sup>6</sup> Nhyam kam Metîndjwýnh krĩ djãti nhípõkri Mrykĩ'átomti jibatànň nyja dja ba omũ. Nhyam kam kute me kute Mrykĩ'átomti jibatànň nyja bĩn nhym ajte akubyn tĩn pyrãk. Nhyam mýjja tĩn amãnhkrut ne amãnhkrutjamẽ mebêngêttẽ Metîndjwýnh krĩ djãtikam Mrykĩ'átomti jibatànň

ny djãmjamã ipók ne dja. Nhyam Mrykĩ'átomti bãrio 7 ne kam noo 7. Noo 7ja kubê Metîndjwýnh Karõ kute amijo 7, tãm ne pyka kunĩkõt ar mrã. <sup>7</sup> Nhyam kam Mrykĩ'átomti jibatànň nyja tẽn kubê pi'ók no'ók by. Krĩ djãtikam ýrja ne ubôko kum kungã nhym kubê kuby.

<sup>8</sup> Nhyam byrmẽ ro'ã mýjja tĩn amãnhkrut ne amãnhkrutmẽ mebêngêtte kubê 24jamẽ kabem tu mýrbê rôrõk ne. Apýnh õ pĩjãbare. Atemã pĩjãbare djẽ krãptĩ. Ne apýnh õ ngõnh. Kẽn karýro ngõnh. Ngõnh ja ne ipun dja. Kikre kudjý djã ne kam ipu ne. Mýjbê ne kikre kudjý djã? Me kabên. Metîndjwýnh nhõ me ja kute kum kabên'ã ne kikre kudjý djã amijakre.

<sup>9-10</sup> Be, mebêngêtte nhõ pĩjãbaremẽ ngõnh ipujamẽ ne me amýn kam ngrer ba. Ngrer ny ne me arêho ba, ne,

—Gajbit apydji ne ga amex ne aje pi'ók no'ók byrmã. Ga dja ga pi'ók no'ók byn 'ã ta. Arým ne me abĩ ga kam arým akamrõo meo pãnh ne me pa 'amýn me utãn Metîndjwýnh'ýr meo tẽ. Nã gãm me kwý ra:x ne me utã.

Apýnh mebêngõkre ba djãri, apýnh amyngãri me ba djãri, apýnh me kabên djãri, apýnh me õ pyka djãri kunĩkõt ne ga me kwý pytãn Abãmmã me umjuw.

Nhyam me kam kubê me kadjy Metîndjwýnh mar djwýnh ne me banhõ Metîndjwýnhmã ãpênh ba. Dja me Metîndjwýnh djõ'ã prĩne pykabê me ja o ba, ane.

Nãm ã mebêngêtte ar ngrer ba ane.

<sup>11</sup> Ba kam ajte omũn kam me kanga ma, kadjy mrãnh djwýnh kanga ma. Me krãptĩ kute pi'õ pyrãk. Kubê 1.000.000 krãptĩ. Me'ã akre krãptĩ: ne ba omũn kuma. Djãm me krãre got. Nãm me krĩ

djátimē mýjja tīnmē mebēngēttemē kum ipók ne. Ne kàj bē kabēno kumex, ne,

<sup>12</sup>—Mrāmri ne ga gajbit amex. Mýj me'ō got kute apyràk?

Gajbit ne ga amexo me kunī jakre nhyim me abī. Abē mrykī'ātomti jabatànĥ ny pràbē abī.

Nhyim kam Metīndjwýnh arým ajā bēnjadjwýr rax mē. Nhyim kam apýnh me pyka djāri kute ō nékrēx amā kumex ga aje ar o abamā.

Ga gajbit ano mex ne atýx. Gédja me amim ajarēn ajo rax ne kàjmā akamēn abenmā araxo amirīt, ane.

Nām ā kadjy mrānh djwýnh kabēn ane.

<sup>13</sup> Nhyim kam mýjja kunī kabēn ne. Nhýnh ne mýjja 'ō kabēn kēt ne? Kati, kàjkwakam mýjjamē pykakam mýjjamē pyka kadjwýnhbē mýjjamē ngō raxbē pyka kētkam mýjjamē kunī ne ro'ā kabēn ne,

—Gora gē me abenmā krī djàtikam ýrjamē Mrykī'ātomti jabatànĥ nymē ar arē ne abenmā ar raxo amirīt ne kàjmā ar kamē. Ar ajbit ne ar týx.

Gora gē me abenmā ar arē. Arkum rax jarēnh rā'ā rā'ā ne.

Nām ā mýjja kunī kabēn ane ba kuma.

<sup>14</sup> Nhyim kam mýjja tīn amānhkrut ne amānhkrutja kót kabēn ne,

—Mrāmri godja ā ane.

Nhyim mebēngētte kót tu mýrbē rôrôk ne adjwýnhdjwý kum rax jarē.

## 6

*Kute pi'ók no'ók'ā o y djà rénh.*

<sup>1</sup> Ba ibē Djuāo ne ba arek omūnh o dja. Nhyim kam Mrykī'ātomti jabatànĥ nyja pi'ók no'ók'ā oy djà ta ba omū. Nhyim kam mýjja tīn amānhkrut ne amānhkrut kumrēxja

imā kabēn. Kabēn kute na krak pyràk ba kuma. Nhyim imā,

—Amrē tē, ane.

<sup>2</sup> Ba 'ýr tēn omū nhyim kawaru jakaja dja. Nhyim me'ō 'ā nhý. Ō djudjē jamýn o nhý. Nhyim me kum bēnjadjwýr kràdjē tu. Nhyim kutun o nhý ne kam 'ā kawaru'ā tē. Kute me kunī 'ā amijo àptàr ne me'ýr prôt ne kute me par ne kute mekbē pyka pytarmā ne tē.

<sup>3</sup> Nhyim kam Mrykī'ātomti abatànĥ nyja ajte pi'ók no'ók'ā oy djà nhitepā ja'ā kuta. Nhyim kam mýjja tīn ja jatārija imā kabēn ba kuma. Nhyim imā,

—Amrē tē, ane.

<sup>4</sup> Ba 'ýr tēn omū nhyim kawaru 'ō ajte dja. Kawaru kamrēk. Nhyim me'ō 'ā nhý. Pyka kunīkót me kute abenwýr prôt ne aben par kadjy. Kadjy ne me'ōja kawaru'ā nhý. Nhyim me arým kum kàxdjwa kajgo ngā, kàxdjwa kajgo jabatànĥ, rytire ne me kadjy kum kungā.

<sup>5</sup> Nhyim kam Mrykī'ātomti jabatànĥ nyja ajte pi'ók no'ók'ā oy djà nhitepā ja'ā kuta. Nhyim kam mýjja tīnja jatārijadjwý imā kabēn ba kuma. Nhyim imā,

—Amrē tē, ane.

Ba 'ýr tēn omū nhyim kawaru tykja ajte dja. Nhyim me'ōja 'ā nhý. Mýjja pytī'ā akre djà mýn o nhý. <sup>6</sup> Nhyim mýjja tīn amānhkrut ne amānhkrutja kurūm me'ō kabēn ba kuma. Nām,

—Ē, arým ne mekbē djwý kēt. Prāmkan ne me ar ba. Ota djwýbē trigu'ā akre pydji pānh raxi. Pānh me àpēnh rā'ā nhyim akamāt. Ne kam ajte djwý 'ōbē xebada'ā akre amānhkrut ne ikjékēt adjwýnhdjwý pānh rax. Pānh me àpēnh rā'ā nhyim akamāt. Djwý kētkam, djwý kairekam. Nhyim bep pidjôbē uba kangômē mýjja kute rōny kangô pyràk ja dja o bikēnh kēt. Tām dja kumex. O ne me ajne kēt. Kwārik wānh tām mān o bikēnh kēt, ane. Nām ā me'ō kabēn ane.

7 Nhyam kam Mrykí'átomti jabatành nyja ajte pi'òk no'òk'ã oy djà nHITEPã ja'ã kuta. Nhyam kam mýjja tîn amãnhkrut ne amãnhkrut kute o ino rerja imã kabên ba kuma. Nhyam imã,

—Amrê tẽ, ane.

8 Ba 'ÿr tẽn omũ nhyam kawaru rãrãrja ajte djã. Nhyam me'õja 'ã nhỹ. Me'õ nhidjibê ne Tykre. Me tyk'ã amijakre. Nhyam mýjja kute katên tẽmja. Me tyk nhõ pykamã me mrãnh kadjy ja ta ne kute katên tẽmja. Ar kute pyka kunikôt me kwý rax ne me parmã. Me kute abenwýr prôt ne aben par nhyam djwý kêt kam prãm kute me par nhyam me kanêdjwý kute me par nhyam pykakam mry djãkrêdjwý kute me par kadjy. Kadjy ne ar tẽ. Kam djã me kwý rax ne ty.

9 Nhyam kam Mrykí'átomti jabatành nyja ajte pi'òk no'òk'ã oy djà nHITEPã ja'ã kuta. Nhyam kam kikre kudjý djã bôr djã krakri me karõ kumex. Mýj me karõ? Bir, me kute memã Metĩndjwýnh kabên jarênho ba nhyam kam me kute me par, me tãm karõ ne kumex. Nãm me tîn prãm kêt mex ne tu mekmã Metĩndjwýnh kabên jarê nhyam kam me me kupa. Me tãm karõ ne kumex ba omũ. <sup>10</sup> Nhyam me kãj bê kabên ne kum,

—Bênjadjwýr Pymati, gajbit amexo apyma ne katãt aje mekmã kabên jarênh djwýnh, mã djã mytyrwý kute ga me ijo angyry ne pykakam me jao ajkê, me kute me ipar pãnh meo ajkê? ane. Nãm ã kikre kudjý djã bôr djã krakri me karõ ã kum kabên ane. <sup>11</sup> Nhyam kam me'õ mekmã kubêkã jaka ngã ne memã kum,

—Ë, me arek atyk djã kêtõ akrĩ ngrire. Atyk djã kêt ngrire gẽ me me anhõbikwa paro tẽn inomã kumẽ. Me akôt me Metĩndjwýnh mã àpênh, me akamy paro tẽn inomã kumẽ, ane. Nãm ã me'õ me karõmã ane.

<sup>12</sup> Nhyam kam Mrykí'átomti jabatành nyja ajte pi'òk no'òk'ã oy djã nHITEPã ja'ã kuta ba omũ. Nhyam kam pyka kunĩ amingrêk ne. Amingrêk tỳ:x ne. Nhyam kam mytjadjwý kakrãtyk ne wajêt. Nãm kute kubêkã pytĩ, kakrãtyk pyrãk. Nhyam mytyrwýjadjwý no tîn, no kamrêk tỳ:x ne. Kute kamrô pyrãk. <sup>13</sup> Nhyam kanhêtire jadjwý kãjkwa kurũm rôrôk ne. Pykakam rôrôk ne. Kute kôk djãbêr tỳ:x kute pidjô ngrãngrã ka'urja pyrãk. Nãm ã kanhêtire rôrôk ane. <sup>14</sup> Nhyam kam kãjkwa ajmã nẽn nhĩ'ãm tẽn akuno. Nãm tu amijarõx ne kute me kute kupip jarõx pyrãk, nhyam kam krãnh kunĩ amũ ajkamên krĩ. Nhyam apêxtidjwý kunĩ amũ ajkamên ikwã. Nãm krãnh amũ krĩ djãmã kre rũnh ne krĩ. Nhyam apêxtidjwý ikwã djãmã kre rũnh ne ikwã.

<sup>15</sup> Nhyam kam apýnh me ba djãri kam bênjadjwýr rũnhmẽ me kute meo ba djwýnhmẽ me krãkamngõnh nhõ bênjadjwýrmẽ me õ nêkrêx kumexjamẽ me àprãrmẽ me kunĩ, me kute me pa 'amýnh nhyam memã àpênh kajgo ar bajamẽ me kute memã o pãnh kadjy àpênhjamẽ me kunĩ ne me amijo apdju. Me tîn prãmẽ amijo apdju. Nãm me kênkrekam amijo apdjun krãnhkam kên krakri amijo apdju. <sup>16</sup> Ne kam krãnhremã kabên ne kênmã kabên ne kum,

—On me inhiby arôrôk ne me ijo apdju, me ipro. Krĩ djãtikam ÿrjabê me ijo apdju ba me nokre pumũnh kêt. Mrykí'átomti jabatành nyjamẽ ar ngyrykbê me ijo apdju. <sup>17</sup> Arým ne ar ngyryk nhõ akati me iwýr bõx. Mrãmri ne ar ngyrykkumrêx. Mýj me'õ ne arkum ãmmã? ane. Nãm ã me kabên ane.

## 7

*Ar kute mebê 144.000 kuka'ã idji janhôr.*

<sup>1</sup> Nhyam kam ijukri kadjy mrãnh djwýnh amãnhkrut ne amãnhkrut ne ku'ê ba omũ. Nãm ar apýnh ku'ê djãkam ku'ê. Nhyam ja kãjkwa krax 'ãnh dja nhyam ja kãjkwa nhôt 'ãnh dja nhyam ar ja aktã kãjkwa nhirê'ãnh dja ba omũ. Mýj kadjy ne ar ku'ê? Apýnh ar ku'ê djãri kute kôkbê àptãrmã. Pykakam àbêr kêt ne ngô raxbê pyka kêt kam àbêr kêt ne bákam àbêr kêt kadjy. Kadjy ne ar ku'ê.

<sup>2</sup> Nhyam kam kadjy mrãnh djwýnh 'õ tẽ ba omũ. Kãjkwa krax kurũm ne kato ba omũ. Nãm ikrakam ràxo pi'ók no'ók djã byn o tẽ. O kute Metĩndjwýnh nhõ àpênh'ã idji janhôr kadjy, Metĩndjwýnh tĩnja nhõ àpênh'ã idji janhôr kadjy. Nãm kubyn o tẽn kam kãj bê arkum kabẽn. Metĩndjwýnh kadjy mrãnh djwýnh amãnhkrut ne amãnhkrutjamã kabẽn. Ar ja kute Metĩndjwýnh kabẽnkôt pykamẽ ngô raxbê pyka kêt bikênhmã. Ar kumã ne kãj bê kabẽn ne arkum,

<sup>3</sup> —Adjým, bar Metĩndjwýnh nhõ àpênh'ã idji janhômã, bar me banhõ Metĩndjwýnh nhõ àpênh'ã idji janhô gar kam pykamẽ ngô raxmẽ bào ajkê. Me kuka'ã dja bar me idji janhô, Metĩndjwýnh nhõ àpênh tamirĩt gar aje meo abikênh kêt kadjy. Gar kam arým pykao ajkê, ane. Nãm ã kadjy mrãnh djwýnh arkum ane.

<sup>4</sup> Nhyam ar me kwý krãptĩ kuka'ã idji janhô ba omũ. Me krãptĩ kubê 144.000 ne ar kuka'ã idji janhô. Nãm mekbê idjaer apýnh idji djãri me kwý'ã idji janhô ba omũ.

<sup>5-8</sup> Mekbê Djudakam me kwý kubê 12.000.

Ne mekbê Rubẽnkam me kwý kubê 12.000.

Ne mekbê Gadjikam me kwý kubê 12.000.

Ne mekbê Axerkam me kwý kubê 12.000.

Ne mekbê Naptarkam me kwý kubê 12.000.

Ne mekbê Manaxekam me kwý kubê 12.000.

Ne mekbê Ximiãokam me kwý kubê 12.000.

Ne mekbê Rewikam me kwý kubê 12.000.

Ne mekbê Ixakakam me kwý kubê 12.000.

Ne mekbê Djeburókam me kwý kubê 12.000.

Ne mekbê Jôdjekam me kwý kubê 12.000.

Ne mekbê Bẽnjamĩnkam me kwý kubê 12.000.

Be, nãm me abenã rôrôkkam 'ã akre kubê 144.000.

*Me krãptĩ: kubêkã jaka jangij.*

<sup>9-10</sup> Nhyam kam ijukri, be, me krãptĩ: ne me kumex ba me omũ. Axwe me krãptĩ. Nãm me te kute me'ã akremã. Djãm me krãre got. Nãm me kute pi'õ pyrãk ne kumex. Mýj xê ne kumex? Bir, apýnh mebhẽngôkre ba djãri, apýnh amyngrãri me ba djãri, apýnh me õ pyka djãri, apýnh me kabẽn djãri kunĩkôt ne me kwý Metĩndjwýnh aminhõn krĩ djãti kabem abenã rôrôk ne kumex ne Mrykĩ'ãtomti jabatãnh ny kabem kumex. Nãm me kubêkã jaka jangij ne o kumex ne bõ byn o kumex ne kam kãj bê kabẽn ne,

—Be, mrãmri ne me banhõ Metĩndjwýnh, ajbit kubê me bapytãr djwýnh. Tãm, krĩ djãtikam krĩja, tãm.

Ne Mrykĩ'ãtomti jabatãnh nyja, tãm. Ar kubê ne me bapytãr djwýnh. Ar tãm ne ar ja, ane.

Nãm ã me krãptĩ kabẽn ane.

<sup>11</sup> Nhyam kadjy mrãnh djwýnh kunĩ krĩ djãtimã ipôk ne kumex. Krĩ djãtimẽ mebhẽngêttemẽ mýjja tĩn amãnhkrut ne amãnhkrutjamẽ ne kadjy mrãnh djwýnh arkum ipôk ne tu mýrbê rôrôk ne kumex. Ne kam Metĩndjwýnhmã rax jarẽ ne kum,

<sup>12</sup> —Mrãmri. Kôt ne me ane. Gajbit ne ga mekmã amexo amiptã ba me abenmã amex jarẽnhõ iba ne abenmã araxo

amirít ne ano mex jarên kam amã amikînh jarên abenmã araxmê apyma jarên abenmã abênjadjwýr rax jarên abenmã mýjja 'õ abê bipdjur kêtukumrêx jarê.

Gora gê me kunĩ amã ja jarênh rá'ã rá'ã. Mrãmri. Godja ã ane.

Nãm ã kadjy mrãnh djwýnh ane, pijàm djaje tu mýrbé rôrôk ne ã kabên ane. <sup>13</sup> Nhyam kam arkubêngê't'õ imã,

—Mýj xê ne kute kubêkà jaka jangjênh ne o kumexja? Mýj xê nã? Mýj kurũm ne me mõi? ane.

<sup>14</sup> Ba kam kum,

—Gê't kon, kubêngê't. Gajbit aje mar; ane.

Nhyam kam imã,

—Me ja ne me prĩne meo ajkê. Nãm me prĩne me jao ajkê, meo bikênh rax ne. Nhyam me ja katon kam nĩnh mõi nh bõx. Arým ne me õ kubêkà põi nhyam kam aka ne. Mýjo ne me kupõi nhyam aka? Bir, Mrykĩ'ãtomti jabatãnh ny kamrõo ne me kupõi nhyam aka, ane.

Metĩndjwýnh kute memã axweo bingrãnh'ã ne kubêkà põnh nhyam aka jakre.

<sup>15</sup> —Kam ne me Metĩndjwýnh krĩ djãti kabem kumex ne kam kum apê. Akatikam kum apê ne akamãtkam kum apê. Metĩndjwýnh nhũrkwãtikam ne me kum apê nhyam bep krĩ djãtikam ýrja dja umao me utàn ar meo ba. Ar me utãr mex ne meo ba.

<sup>16</sup> Kam dja me kum prãm kêtukumrêx ne kum kõi kêtukumrêx, nhyam arngrodjwý dja me bĩn kêtukumrêx, nãr kon atemã mýjja kangro 'õdjwý me bĩn kêtukumrêx. Mýkam?

<sup>17</sup> Bir, Mrykĩ'ãtomti jabatãnh ny krĩ djãti nhipõkri ýrja, tãm dja ar me utàn meo ba. Kute mrãmri ne mrykĩ'ãtomtio ba djwýnh kute õ mryo ba ja pyrãk.

Ne ngõi kute meo tĩn kator djã'ýr dja meo mõi.

Nhyam Metĩndjwýnh ta dja me kunĩ no kangõi ku'õn memã no kangõo apêx nhyam kam me mýr kêtukumrêx, ane.

Nãm ã arkubêngê'te 'õ imã kabên mex jarênho ane.

## 8

*Kute o y djã kute o ino rer'ã 'yr.*

<sup>1</sup> Nhyam kam Mrykĩ'ãtomti jabatãnh ny ajte pi'õk no'õk'ã oy djã kute o ino rer'ã kuta nhyam kam kãjkwakam mýjja kunĩ anhikrê ne, nhyam myt kwýr ngrire. <sup>2</sup> Nhyam kam kadjy mrãnh djwýnh kubê 7, Metĩndjwýnh kabem ku'ê djwýnh, ar ja ne ar ku'ê ba ar omũ. Nhyam kam Metĩndjwýnh arkum poti ngã. Poti kubê 7 ne apýnh arkum kungã nhyam ar amý.

<sup>3-4</sup> Nhyam kam kadjy mrãnh djwýnh 'õ kên karýro ngõnh ngrire byn o tẽn o dja, kikre kudjý djã bõr djã'ýr ne o tẽn o dja. Nhyam kam me'õ kikre kudjý djã kwý rax ne kum kungã. Kute me kabênmê kikre kudjý djão bikãrmã ne kum kungã. Metĩndjwýnh nhõi me mexja kunĩ kute kum amijarênhmê kikre kudjý djã bikãr ne xêt ne Metĩndjwýnh'ýr bõx kadjy. Krĩ djãti kabem ne kikre kudjý djã bõr djã dja. Kên karýro ne adjênh ne dja. Kam ne kadjy mrãnh djwýnh kikre kudjý djãmã adjã nhyam xêr nhyam kam kudjýmê me kabên ro'ã Metĩndjwýnh'ýr bõx. Kũmmê õ me ja kabênmê Metĩndjwýnh'ýr wabin 'ýr bõx.

<sup>5</sup> Nhyam kam kadjy mrãnh djwýnh kikre kudjý djã kadjy ngõnh byn kam kam kuwy mõi. Kikre kudjý djã bõr djãkam kuwy byn kam kikre kudjý djã kadjy ngõnhkam kumên kam pykakam kumê, o pyka kópênãt ne. O pyka kópênãt nhyam kam arým na krar ne rãrãk ne

adjênh nhyam pykadjwý amingrêk ne, tertet ne.

*Potibê 7'ã ujarênh.*

<sup>6</sup> Nhyam kam kadjy mrânh djwýnh kubê 7ja kute apýnh ò poti kubê 7 kakôrmã.

<sup>7</sup> Nhyam kam kadjy mrânh djwýnh kutewa poti kakô. Nhyam kam namê'ymê kuwy rôrôk ne. Kamrômê akân rôrôk ne. Tu tÿmkumrêx ne. Nhyam kam pyka kwý ra:x ne prîne xêr. Pykamê bà nokà 'ÿr 'ãnh ne xêt o ino re. Nhyam bep bô kunî ne prîne xêr. Nhÿnh ne bôre 'ò xêt kêt.

<sup>8</sup> Nhyam kam atãri kadjy mrânh djwýnhja ò poti kakô nhyam kam atãri mýjja kute krãnhre jabatãnh pyrãk ne pôr ne môn nox ne, ngô kôpênãt ne. <sup>9</sup> Ngô raxbê pyka kêtgam nox nhyam kam ngô kwý ra:x ne kamrô, ngô nhikjêbit ne kamrô nhyam ngôkam mýjja ar baja arÿm kwý rax ne ty, ngô ipôkri 'ÿr ne tyk o ino re. Nhyam kã rûnhjadjwý amijo ajkên wangij, kã kute katê 'ÿr ne ngjêxo ino re. Nhyam kam mebêngôkre\* ar kãkam bajadjwý arÿm kôt ty.

<sup>10</sup> Nhyam kam atãri kadjy mrânh djwýnhja poti kakô. Poti kakô nhyam kam kanhêtidjwý tÿm, kanhêtireti: ne tÿm. Pôkti: ne tÿm. Nãm kute me kute bô 'ò ngrãmã angjênh nhyam pôk rûnh ja pyrãk. Kãjka kurûm ne môn tÿm. Ngô binhirênh kwýkam rôrôk ne inore kwýkamdjwý rôrôk ne. Ngô nhino kunîkam ne tÿm. Nhyam ngô kwý rax ne mex rã'ã. <sup>11</sup> Kanhêtire nhidjibê ne ÿ. Nhyam kam idjikôt ngô nhikjê ne ÿkumrêx ne. Nhyam kam me kwý krãptÿn ty. Ngô djÿ ne me o ikôn arÿm tyko kumex.

<sup>12</sup> Nhyam kam atãri kadjy mrânh djwýnhja ò poti kakô nhyam kam mytdjwý kwý rax ne ajmã nêh kam akamãt kô tyk ne, no nhikjêkambit

ne akamãt kô tyk ne. Ne kam kãjbê pyka kurwý. Kurwý ngrire nhyam mytyrwýmê kanhêtiredjwý kôt ã ane. Akatikam myt kãjbê irã nhyam kam akamãt kô tyk ne. Nhyam akamãtkamdjwý mytyrwýmê kanhêtire kãjbê irã nhyam kam akamãt kô ty:k ne.

<sup>13</sup> Ba kam omûnho dja nhyam kam àkkajkritti kýjrûm ton mô. Kãjkawã tã mô ba omû. Nhyam kãj bê memã kabên, ne,

—Watîre, watîre, watîre.  
Pykakam me ar baja watîre. Arÿm ne kadjy mrânh djwýnh kute katê amãnhkrut ne ikjêkêt kute poti kakô 'ÿr, ane.

## 9

<sup>1</sup> Nhyam kam atãri kadjy mrânh djwýnh ò poti kakô nhyam kam kãjka kurûm kanhêtire tÿm. Pykamã tên tÿm nhyam me kum kam o kajkep djã ngã. Mýjkam o kajkep djã nã? Bir, kre ry typydjikam o kajkep djã. Kre krã'ÿr kêt, kre o ino rer kêt, kre ry typydjikam o kajkep djã ne me kum kungã.

<sup>2</sup> Nhyam kam kam o kajkep ne 'ã kuta nhyam kurûm kuwy kûm katon mô. Kre ryti kurûm ne kuwy kûm kato. Kute kikatire kûm pyrãk nhyam kam kûmja kãjkwamê mytmê prîne o akno nhyam akamãt kô tyk ne.

<sup>3</sup> Nhyam kam kûmja kurûm krytkanhê bixadjwýro kumex. Pykamã ne bixadjwýro kumex. Ne kam àkrê. Àkrê:kumrêx ne. Kute me kamjÿrmã ne bixadjwýro kumex. Kute mrãmri ne pykabê makre kute me kamjÿr nhyam tokryja pyrãk. <sup>4</sup> Nhyam kadjy mrânh djwýnh krytkanhêmã kum,

—Kwãrîk wãnh pykakam bôreo abikênh kêt, mýjja nhingrôto abikênh kêt, pïo abikênh kêt. Me ajbit dja ga meo ajkê. Me kuka'ã

\* **8:9** Apýnh me ò pyka djãri kunîkôt ne me kunî bêngôkre. Kubêkã jakamê me kakrãtykmê me babêngôkremê ne me kunî: bêngôkre.



idji kêtja, Metîndjwýnh kute me kuka'ã idji kêtja, me tâmbit dja ga meo ajkê, ane.

<sup>5</sup> Nã, mrãmri ne krytkanhêja kute me kamjýr ne kute me kamjêro ba kajgomã. Kute me par kêtê. Nãm me kamjuw nhym me tokry pymaje àmra ba'ã mytyrwý amãnhkrut ne amãnhkrut ne ikjêkêt. Nhym tokry: ne. Kute makre kute me kamjýr nhym tokryja pyrãk. <sup>6</sup> Nhym kam arým me te tyk prãme, krytkanhê kute me kamjýr ar o bakam te tyk prãme, te amitykkam ama ne, ne tyk kêtumrêx ne.

<sup>7</sup> Mã ne krytkanhê kute? Djãm axwe uma? Nã, axwe uma. Nãm kute mrãmri ne me kute kawaru'ã aben par kadjy kute ngônho kubêkã kawarumã angjênh nhym kam uma ja pyrãk. Nhym krytkanhê mýjja kute me bënjadjwýr krãdjê pyrãkja tu. Kên karýro krãdjê ne kutu. Nãm krytkanhê no kre kute mebêngôkre nokre pyrãk. <sup>8</sup> Nhym kîdjwý kute me nire kî pyrãk nhym wa kute rop djãkrêbê rijão djwa pyrãk. <sup>9</sup> Nhym ôkôt kã kute tepkã pyrãk, ngônho ne ôngãkkã. Ne ara rãrãk týx ne. Kute mrãmri ne me kute abeno bakam kawarumê kãmranhtýx rãrãkja pyrãk.

<sup>10</sup> Nhym tey kute makre tey pyrãk. O kute me kamjýr ar o ba. Dja kute me kamjýr ar o ba'ã mytyrwý amãnhkrut ne amãnhkrut ne ikjêkêt, nhym tokry: ne.

<sup>11</sup> Krytkanhê nhõ bënjadjwýrbê ne kadjy mrãnh djwýnh, kre ry typydjikam kadjy mrãnh djwýnh. Idjibê ne O bikênh djwýnh, mekbê idjaer ne me ta kabênkam kum Abadõ jarê, nhym mekbê kregu kabênkam kum Apõri jarê. Nhym bep me babêngôkre kabênkam ne O bikênh djwýnh.

<sup>12</sup> Be, watîre kutewa ne arým apêx. Àkkajkrittire kute memã “Watîre” jarênhja kutewa arým

apêx. Nhym bep watîre amãnhkrut ne me'ýr bõx kêt rã'ã.

<sup>13</sup> Nhym kam atãri kadjy mrãnh djwýnhja õ poti kakõ nhym kam me'õ kabên ba kuma. Kikre kudjý djã bõr djã kurüm ne kabên. Kên karýro kikre kudjý djã bõr djã Metîndjwýnh kabem ãmja, kurüm, anhã kurüm ne kabên kato ba kuma. <sup>14</sup> Nhym kum, kadjy mrãnh djwýnh kute poti kakõrmã kum,

—On arkum anhire, kadjy mrãnh djwýnhõ amãnhkrut ne o amãnhkrut djuwprewã on arkum 'ãpre bõ gê ar wãm tê. Ngõ raxbê Jupraxikam me kute ar uwpre nhym ar ikwãwã, on arkum 'ãpre bõ gê ar wãm tê, ane.

<sup>15</sup> Nhym kam arkum 'ãpre bõ nhym kam ar mã mõ. Ar kute me imexmã ne ar mõ. Ar kute me kwý rax ne me imexmã. Ar kute me imexo tẽm ne me kuto katê 'ýr me paro krã'ymã. Kadjy ne me ar uwpre nhym ar ikwã. Ar õ akati ar'ýr bõx nhym ar kute me imexmã katon mõ. Arým ne ar õ amexmê ar õ mytyrwýmê ar õ akatimê ar õ myt arým ar'ýr bõx. <sup>16</sup> Nhym ar õ krãkamngôn kumex. Krãkamngôn kawaru'ã krïja ne kume:x kute pi'õ pyrãk. Nãm 'ã akre kubê 200.000.000. Me'õ ne 'ã akren imã arê ba kuma.

<sup>17</sup> Be, Metîndjwýnh ne imã ar õ krãkamngôn jakre ba omũ. Ba kawarumê krãkamngôn pumũ. Kawaru kumex nhym 'ã krãkamngôn kumex. Tãm ne ba omũ. Nhym krãkamngôn aminhõkôt nêje ngônho inõkã jangij ne o kumex. Ngônho inõkã kamrêkmê ngrãngrã kakrãtykmê ngrãngrã kute mân tu pyrãk. Nhym krãkamngôn nhõ kawaru ja ne krã rũnh'ã kabên. Krã kute rop djãkrêbê rijão krã pyrãk. Ne ajkwa kurüm kuwymê kũmmê kên ngrãngrã pôkmê apõxo kumex. <sup>18</sup> Apõxo kumex ne kam me kupa. Be, kuwymê kũmmê kên ngrãngrã

pôko ne me kwý rax ne me kubĩ. Me kuto katê 'ÿr ne me tyko ino re. <sup>19</sup> Kawaruja ne àkrêkumrêx. Ajkwakôt ne àkrê, amymê kôt. Aktâ àkrê djâkôt ne me kupa. Amy kute kangã pyrâk. Amy kubê kangã krâdjwý o me kamjã.

<sup>20</sup> Nhyim me'ã kâtâmja, mýjja kute me imex kurãm me tñja, djã nãm me ja amim katon wãnh axwemã iren Metĩndjwýnh'ÿr amijo akêx got. Arkati, me ja ne me kute amim mýjja punu nhípêxjamã irer prãm kêtumrêx. Nãm me mã ar me karô punumê mýjjao metĩndjwýnh karô nhípêxmê arkum amijarênh ba, arkum rax jarênh ba. Be, nãm me kên karýro, kryt jakao, ngônh ngrãngrão, kêno, pïo metĩndjwýnh karô nhípêx ar o ba nhyim rít kêt ne umar kêt ne mrãnh kêt ne. Ja ne me kum amijarênh ar o ba, kum rax jarênh ar o ba. Me kute kum irer prãm kêtumrêx.

<sup>21</sup> Ne kam ajte me kute me parmê me udjymê me prô prãmmê me mjên prãmmê me àkĩnhĩmê, ja ne me kute kum irer prãm kêtumrêx. Me kute kum irer ne Metĩndjwýnh'ÿr amijo akêxmã kute mar kêtumrêx. Me axwebit ne me kum kĩnh. Nãm te Metĩndjwýnh kute mekmã uwêk mãtmã.

## 10

*Kadjy mrãnh djwýnh kute pi'ók byr ne ãm.*

<sup>1</sup> Nhyim kam kadjy mrãnh djwýnh 'õ, týxkumrêx ne ruw. Kàjkwa kurũm ne tẽn ruw ba omũ. Nãm kakrão prĩne amikunon kam djwýngwýnhtire tu. Nokre kute myt pyrâk, ne te kute kuwy pôko krikam kãjmã pôk ku'ên pôk jabjê ja pyrâk.

<sup>2</sup> Ne kam pi'ók no'ók ngrire byn o dja. Pi'ók no'ók arým koxen kubyn o dja. Ne kam te djubôk ngô raxbê pyka kêt'ã djan te djuge atýxã dja. <sup>3</sup> Nãm te ajkij ne djan kam kãj bê kabên. Kãj bê kabên kute rop djâkrêbê rijão kâr týxja

pyrâk. Kabên nhyim kutã na krikrit ne. Nãm amipãnh kum kabên. Krikrit 'ã akre kubê 7.

<sup>4</sup> Na krikrit 'ã akre kubê 7 ne kabên, ba kam bit ije 'ã pi'ók no'ók mã nhyim kãjkwa kurũm me'õ imã kabên ba kuma. Nãm imã,

—Kwãrĩk wãnh. Tu udju. Na krikritkam kabên'ã akre kubê 7 dja ga tu udju. Kwãrĩk wãnh 'ã pi'ók no'ók kêt, ane. Ba arým kuma.

<sup>5</sup> Nhyim kam kadjy mrãnh djwýnh ije omũnh tũmja, ngô raxmê pykamê kam te bikjêr ne ãmja, tãm ne kãjmã kãjkwamã ubôkja bẽn <sup>6-7</sup> mekmã kabên pydjĩn arên memã kum,

—Mrãmri godja mýjja amikrà kêtumrêx. Godja kadjy mrãnh djwýnh kute katê õ poti kakô nhyim tebê mýjja kato. Metĩndjwýnh kute amrêbê õ àpênhmã, kabên jarênh djwýnhmã arênhja dja on tebê kato, kute amitô kêtê. Poti kakôrmê ro'ã dja mýjja bipdjur arým kato. Amrêbê Metĩndjwýnh kute mekbê mýjjao bipdjurja ne on kute memã o katormã, ane. Nãm ã kadjy mrãnh djwýnh mekmã ane. Metĩndjwýnh ne kabênkumrêx. Kôt dja mýjjao kato. Kam ne kadjy mrãnh djwýnh ubôko kãjmã Metĩndjwýnh jakren 'ã mekmã ujarênh ku'ên mekmã kum,

—Metĩndjwýnh ne tĩn o ino rer kêtumrêx. Tĩn, tĩn rã'ã rã'ã. Ta ne kãjkwa nhípêx ne kãjkwakam mýjja ar baja nhípêx ne. Ne pykadjwý nhípêx ne pykakam mýjja ar bajadjwý nhípêx ne. Ne ngô raxbê pyka kêtjadjwý nhípêx ne ngôkam mýjja ar bajadjwý nhípêx ne. Tãm dja amitô kêt ne on memã o kato, ane.

<sup>8</sup> Nhyim kam kãjkwa kurũm kute imã kabên jarênh tũmja ajte imã kabên ne imã,

—Ajrã, on 'ÿr tẽn kute pi'ók koxen o ãmwã by. Kadjy mrãnh djwýnh ngô rax nhípôkri te nhikjê djãm ne atýxã te nhikjê djãmwã ne kubyn o dja. 'ÿr tẽn kubê aby, ane.

<sup>9</sup> Ba kam 'ÿr tēn 'ã ku'uw ne kum, —Imã pi'ók no'ók ngrire ngã, ane.

Nhym kam imã,

—Mĩ, amim abyn krē. Gora kunĩ krē. Atik kadjwýnhbē dja ý nhym bep ajajkwakam godja ànhkumrēx. Ành kute menh djành pyræk. Mĩ, ane.

<sup>10</sup> Ba kam ikra kurũm kubē kaba. Pi'ók no'ók ngrire ne ba kubyn kukrē. Nhym kam ijajkwakambit ànhkumrēx, ành kute menh djành pyræk. Nhym amũ itik kremã tũm ne arũm ý: ne. <sup>11</sup> Nhym kam imã,

—Be, dja ga ajte anhÿr djwýnhràmmemã Metĩndjwýnh kabēn jarē. Kute apýnh me õ pyka djari, apýnh me ba djari, apýnh me kabēn djari, apýnh me bēnjadjwýr djari krãptikõt kute meo bikēnhmã mekmã arē, ane. Nãm ã kadjy mrãnh djwýnh imã ane.

## 11

*Metĩndjwýnh nhõ àpēnh amãnhkrut ar ujarēnh ba.*

<sup>1</sup> Nhym kam me imã kō ngã, ije ũrkwãti'ã akre kadjy ne me imã kungã. Kute me àbēr djà pyræk. Nãm me imã kungã nhym kam Metĩndjwýnh imã,

—Apa, on 'ÿr tēn inhũrkwãti'ã akre, ane. Dja ga inhũrkwã'ã akren kam kikre kudjý djà bõr djà'ã akren kam me kute imã rax jarēho bajadjwý 'ã akre.

<sup>2</sup> Nhym bep inhũrkwãti kre kēnhbit dja wãnh 'ã akre kēt ne. Mýkam? Bir, arũm ne me me bajtemmã kanga. Nhym kam me kute mekbē idjaer nhõ krĩ mexbē Djeruxarēo bikēnhmã, õ krĩ mexo mexkumrēxbē Djeruxarē kute o bikēnhmã. Kikre kunikõt dja me bajtem mrãnh prĩne kikreo ajkēn kikre ngràn kam kõt inhũrkwãti kre kēnhjao ajkē. Dja me kute o bikēnh'ã na tũm amãnhkrut ne ikjēkēt ne kam ajte 'ã amex. Kam dja ba inhõ àpēnh jano.

<sup>3-4</sup> Ba ne ba inhõ pyka djwýnh ne kam inhõ àpēnh amãnhkrut kute pĩbē oriwēre amãnhkrut ikabem ku'ēja pyræk, ne kam ajte kute ngõnhpõkti amãnhkrut ikabem ku'ēja pyræk, ar tãm dja ba ar ano, ar kute memã ikabēno amirĩtmã. Dja ar kubēkã kaprĩre jadjàn kam ikabēn'ã ujarēnh ar ba. 'Ã ujarēnh ar ba'ã akati krãptĩ, kubē 1.260. 'Ã na tũm amãnhkrut ne ikjēkēt ne kam ajte 'ã amex. Godja ã ar ikabēn'ã ujarēnh ane, ane. Nãm ã Metĩndjwýnh imã ane.

<sup>5</sup> Godja me'õ kute aro bikēnhmã nhym kuwy põk ar ajkwa krekrekõt katon me'õnh bĩ, prĩne ar kurē djwýnhja 'õ ga. Be, godja me'õ aro kurē djwýnh prãm nhym ar arũm ã o bikēho ane, prĩne kuga. <sup>6</sup> Nhym ar ta kabēnkõt Metĩndjwýnh kãjkwa'ã ijē nhym na rwýk kētkumrēx. Ar Metĩndjwýnh kabēn'ã ujarēnh bari godja na rwýk kētkumrēx ne. Nhym kam ajte ar ta kabēnkõt nhym ajte ngõ kamrõ. Nhym ar kabēnkõt apýnh mýjja kute meo bikēnh djari apôx ne pykao ajkē. Apýnh kute pykao bikēnhmã mýjja apôx tē, aben nHITEPã mýjja apôx tē.

<sup>7</sup> Nhym kam ar Metĩndjwýnh kabēno amirĩto tē:n kam o amirĩt pa. O amirĩt pa nhym kam mrydjwaryre dja amim ar kurētuw. Mrydjwaryre kre ry tpydjdi kurũm katorja dja ar'ÿr prõt ne tũxo ar akrenh mex ne kam ar kubĩ.

<sup>8</sup> Nhym kam ar tyn nõ. Kikre nhipõkri dja ar tyn nõ. Krĩrax jabatãnhkam kikre nhipõkri nõ. Mýj krĩrax jabatãnh? Bir, kam ne me ar õ Bēnjadjwýr pĩte'ykam kunhõ tãm. Kumã ne me idjibē Xõtõmamē Edjitu jarē. Nãm me axwekumrēx ne Xõtõmakam me ja jaxwe'ã amijakren kam ajte Edjitungam me ja jamakkre kēt'ã amijakre nhym kam me krĩrax jamã idjibē Xõtõmamē Edjitu jarē. Kam ne ar

kute Metíndjwýnh kaběno amirít djwýnh tyn nõ.

<sup>9</sup> Kam dja me kunĩ omũ. Apýnh me õ pyka djari, apýnh mebêngôkre ba djari, apýnh amyngřari me ba djari, apýnh me kaběn djari kunĩkõt dja me ar omũho kumex. Ar tykja pumũho kumex'ã akati amãnhkrut ne ikjêkêt ne 'ã mēdjij. Nhyh me abenmã,

—Kwārĩk wãnh ar adjar kêt. Axuk wãnh ar nõre, ane. <sup>10</sup> Nhyh kam pykakam me ar baja kĩnhkumrêx. Ar tyk ne nõrkam ar omũn kĩnhkumrêx ne kam toro kumex ne kam abenmã nêkrêx ngã. Mýkam ne me ar tykkam kĩnhkumrêx? Bir, ar kute Metíndjwýnh kaběn jarěnh djwýnh ja ne ar pykakam me ar baja prĩne ar meo bikěho ba. Kam ne me ar tykkam kĩnhkumrêx.

<sup>11</sup> Nhyh ar tyk ne nõr'ã akati amãnhkrut ne ikjêkêt ne 'ã mēdjij nhyh kam Metíndjwýnh ar akõ, ar tĩn kadjy ne ar akõ nhyh Metíndjwýnh djákõr arkum wadjà nhyh arým ar aje tĩn ne ekrux ne kàjmã dja. Nhyh kam me ar omũn kam kum ar uma: ne. Kum ar uma týxkumrêx ne. <sup>12</sup> Nhyh kam kàjkwa kurũm me'õ kaběn. Kàj bê kaběn ne arkum,

—Apa, on ar amrě tē, ane.

Nãm ã arkum ane nhyh ar kuma. Kuman kam tu kàjmã tē. Mã tēn wabi. Kakrãkam ne ar tē. Nhyh ar kurê djwýnh arek ar omũho kumex.

<sup>13</sup> Ar omũho kumex katikõt nhyh pyka tertet ne. Tu tertet týx nhyh kam kikre kwý ajkaten rórók ne me kwý rax ne me imex ne. Me kwý rax'ã akre kubê 7.000 ne me imex ne. Nhyh me tyk kêtja, pyka tertet kute me par kêtja, me tãm ne me tĩn prãmkam Metíndjwýnhmã rax jarěn kum týx jarě. Metíndjwýnh nhõ kàjkwa djwýnhmã ne me kum rax jarě.

<sup>14</sup> Be, watĩre nwhitepã watĩre 'õ ne ja. Ota watĩre kute katē rã'ã. Arým me'ýr bõx 'ýr.

*Kadjy mrãnh djwýnh kute katē kute õ poti kakõr.*

<sup>15</sup> Nhyh kam kadjy mrãnh djwýnh kute katē õ poti kakõ nhyh kam kàjkwakam me kaběn. Kàj bê kaběn ne. Jejumē Bãm'ã ne me abenmã kum,

—Bãmbê me banhõ Bēnjadjwýr ne krabê Kritu kute me bawýr anor, ar tãm ne ar arým pyka kunĩkõt ar meo ba. Dja ar meo ba rã'ã rã'ã: ne, ane.

Nãm ã kàjkwakam me kaběn ane.

<sup>16</sup> Nhyh kam mebêngêt kubê 24 tu mýrbê rórók ne. Metíndjwýnh kabem bēnjadjwýr krĩ djákam krĩja me tãm ne me tu mýrbê rórók ne Metíndjwýnhmã rax jarěn kum,

<sup>17</sup> —Bēnjadjwýr, Metíndjwýnh, atýxo abê kumkati. Ga amrêbê: adjákamã atĩn ne ar aban mã atĩn rã'ã.

Amã ne ba me amikĩnh jarě. Arým ne ga apymao amijo amirít mex ne aje ar meo abamo kraxmã.

<sup>18</sup> Apýnh me ba djari ne me ngryk ar ba, ga gadjwý arým an-gryk kato. Arým me tyk ne pykakam ikwãja nhõ akati me'ýr bõx. Arým aje me tyk ne pykakam ikwãjao akator ne kam aje memã pãnh jarěnhmã.

Nhyh anhõ àpēnhdjwý arým õ akati me'ýr bõx. Anhõ àpēnhmē akaběn jarěnh djwýnhmē anhõ me mextire jamē me kum apymaja kunĩmē me kâtammē me rũnhmē. Arým me ja nhõ akatidjwý me'ýr bõx, ga aje memã o pãnh nhyh me kĩnhmã.

Nhyh bep me axwe kute pykao bikěnh djwýnhdjwý arým õ akati me'ýr bõx. Ga aje me jao abikěnhmã, ane.

<sup>19</sup> Nhyam kam kàjkwakam Metĩndjwýnh nhũrkwāti amijā kuta. Amijā kuta nhyam kam pīo rara kēn karýro krākā djyja, kam ne Metĩndjwýnh kabēn'ā kēn no'òk nō, pīo rara tām ne amirīt ne. Metĩndjwýnh nhũrkwātikam ne amirīt ne. Nhyam kam na adjēnh ne rārāk ne krak nhyam pykadjwý tertet ne. Nhyam namé'y rôrô:ko kumex.

## 12

*Me'ō niremē atemā mry kaāk'ā ujarēnh.*

<sup>1</sup> Nhyam kam mýjja pumũnh kēt 'ō kàjkwakam kato. Mýjja rax 'ō ne kato. Me'ō ni ne myt jadjān o dja. Ne mytyrwý'ā djan o dja. Ne kanhētireo krā djēn kutu. Kanhētire kubē 12 ne o krā djēn kutun o dja. <sup>2</sup> Arým tujarô tỳx. Arým kra rwýk 'ýr ne kam kra àn tokry nhyam amra.

<sup>3</sup> Nhyam kam ajte mýjja pumũnh kēt 'odjwý kàjkwakam ajte kato. Ē, atemā mry kaāk kamrēk ne kato. Ti:re ane. Krā kubē 7 ne kam kam bāri kubē 10. Ne krā kunīkam me bēnjadjwýr krā djē tu. <sup>4</sup> Ne amyó kanhētire kute katē 'ýr ja kanhēn bjéro mō. Kàjkwakam kanhētire bjéro mōn pykakam kumē. Ne kam ni kabem kra kadjy dja. Mýj kadjy? Bir, nija kra rwýk ne kam amako dja. Ni kra rwýk nhyam on kute krēmā ne kam amako dja. Te kam ama.

<sup>5</sup> Nhyam kam kra my ruw. Kute ar meo ban kabēno kute me anormā ne ruw. Apýnh me ba djāri kunī dja ar meo ban kabēno me anon ar me axwemā bēn tỳx ba. Djām kute akrānmā ar me axweo bamā? Kati, dja kaxo àbēr djāo ar meo ba. Tām. Tām ne arým ruw nhyam arým Metĩndjwýnh amim kumý. Tu amim mýnhkumrēx ne amiwýr o tē. Krī djāti'ýr o tē.

<sup>6</sup> Nhyam bep nāja ne katon prõt ne kapôt kukritmā kato. Nhyam Metĩndjwýnh arým kapôt

kukritkam kutēp kum kikre. Kute o djuw mexmā ne arým kum kikre. Ne kam kam o djuw mex aro ba. Kute o djuw mex'ā akati kubē 1.260. Amex amānhkrut ne ikjékēt nhyam ajte 'ā na tỳm nhyam kam arek aro djuw mexo ba.

<sup>7</sup> Nhyam kam kàjkwakam me abenwýr prõt. Mígeumē kadjy mrānh djwýnhmē mry kaākme kadjy mrānh djwýnhmē ar abenwýr prõt.

<sup>8</sup> Nhyam bep kati, Mígeu ne ar tỳxkumrēx nhyam te mry kaākja kute ar parmā. Nhyam bep Mígeu ne ar tỳxo mry kaākja jakre ne kàjbē me kumē. Nhyam kam kàjkwakam me ajte mrānh kētkumrēx. <sup>9</sup> Be, mry kaāk jabatānhitija ne me arým bōm kumē. Tām, kangā tũmja kute me kāmex jarēnh djwýnh, idjibē Xatanaj, kute me kunī noo biknor djwýnh, tām. Tām ne me bōm kumē, pykamā kumē, kadjy mrānh djwýnhmē ro'ā ne me bōm ar kumē.

<sup>10</sup> Nhyam kam kàjkwakam me'ō kabēn ba kuma. Kāj bē kabēn ne, —Ota arým me banhō Metĩndjwýnh me utā. Arým ne umao me utār mex ne. Djām me banhō Metĩndjwýnh rerek got. Dja prīne umao me utān ar meo ba. Nhyam Kritudjwý Metĩndjwýnh kute amikôt arja dja kabēnkôt ar meo ba.

Ga arým me kute bōm mēnhja pumū. Kute me bakamy kāmex jarēnh djwýnhja ne me arým bōm kumē. Nām mā me banhō Metĩndjwýnh jamakmā me'ā kabēn ne te me banhō Metĩndjwýnhbē me bakamy kurē. Nām te kubē me bakamy kurē rā'ā nhyam akamāt ne akati nhyam ajte kubē kurē rā'ā nhyam akamāt ne akati nhyam ajte tām rā'ā ne.

<sup>11</sup> Nhyam me bakamy tu kum ām tỳx ne 'ēxnhīmā katon bōm

kumê. Mýj kanàrràm ne me bakamy kum ãm tÿx ne? Jeju ne mrykí'átomti jabatànñ ny'ã amijakren ty ne kamrôo meo pãnh. Kanàrràm ne me tu kum ãm tÿx ne.

Xatanaj ne kute Jeju nhô me ja par nhym me kute umaje Jeju kangamã. Nãm te me kupa. Nhym me Metíndjwýnh kanàrràm tu ate krãn Jeju'ã ngrà rã'ãn kàj bê memã Jeju'ã ajarê. Me tïn prãm kêtumrêx. Nãm me ã anen kam prïne amim Xatanaj pyma ngrà ne kàjkwa kurũm bõm kumê.

12 Ê, kàjkwa, on akĩnhkumrêx. Gê mebêngôkre\* akam ar bajad-jwý akôt kĩnhkumrêx.

Nhym bep pykabê me ar bajamê ngó raxkam me ar bajamê ne arým me kaprĩ 'ÿr. Watĩre. Mýkam?

Bir, Xatanaj, kute me kàmex jarênh djwýnh, arým wãm me awýr ruw. Arým ngrý:k ne wãm me awýr ruw. Arým ne tyk nhô akatio rãm ne jan arým amima. Arým amiman kam ngrý:k ne, ane.

Nãm me ã kàjkwa kurũm kabên ane.

13 Nhym me arým bõm kumê nhym arým mry kaàkja pykakam bõx. Bõx ne kam ni'ÿr prôt ne. Kurũm kra my rwýkja'ÿr prôt ne.

14 Nhym kam àkkajkritti jara ne nija pakam apôx. Xatanaj nhidji amãnhkrut ne ikjêkêt. Idjibê kangã ne idji 'ôdjwýbê mry kaàkja. Nhym àkkajkritti jara nija pakam apôx, kangãbê tor ne kapôt kukritkam tēm ne bõx nhym Metíndjwýnh kute o djuw mexmã. Kute o djuw mex 'ã amex amãnhkrut ne ikjêkêt ne kam ajte 'ã na pydji. Kadjy ne pakam ara apôx.

15 Nhym mry kaàkbê kangãja kute nija bĩnmã aéro tēn aby'ã ngó

kapĩ. Ngó rax ne ajkwa krekre kurũm ajkapĩ. Kute 'ã ngó tãm nhym ngó kute mã o mör ne bĩnmã.

16 Nhym bep kati, pyka ne nio õbikwan ngómã ajkij nhym kam ngó wadjàn ngrà. Mry kaàk jajkwa krekre kurũm ngója wadjàn ngrà. 17-18 Nhym kam mry kaàk nijakam ngrý:k ne kam ãm ajbir tēn dja. Kute ni kra parmã ne dja. Mýj ni kra nã? Bir, me kute Metíndjwýnh kabên mar ne kôt amijo baja, ne kute mekbê amipdjur kêt ne Jejukam pijàm kêt ne tu kute memã arênhja, me tãm ne mry kaàk kute me'ÿr prôt ne me parmã ajbir tēn dja, ngó rax mýrri dja, mekam amako dja.

## 13

*Ngó rax kurũm mry'õ kator.*

1 Nhym kam ngó rax kurũm mry 'õ kato ba omũ. Nãm bàri kubê 10 ne krã kubê 7. Ne apýnh bàri djari bēnjadjwýr krãdjê tu. Nhym kam krã kunĩ'ã idji arij ne idjio Metíndjwýnh djün ne. 2 Nhym mryja kute rop krori pyræk nhym parja kute mrybê uxu par pyræk, parkop jabjêti. Nhym bep ajkwa krekreja ne kute rop djàkrêbê rijão jajkwa krekre pyræk. Nhym kam mry kaàk mryjamã kum,

—Ikabēnkôt dja ga meo aban ipy-mao apyman inhýr djàkam memã nhý, ane. Nãm ã kum ane. 3 Nhym mry krã 'õ ne tyn nõn kam ajte me aerbê tïn ne. Kute mrãmri ne me kute me par punukam me akubyn tinja pyræk.

Nhym kam me kunĩ, pyka kunikôt ari ar aben pumün kam mry kabēnkôt ar ban mã kôt ajkamê. 4 Mry kaàk kute mrymã kum,

—Ga dja ga ipymao apyman inhýr djàkam nhýn idjô'ã meo aba, anhýrja ne me mry kaàkmê arkum amijarēho ba. Nãm me

\* 12:12 Apýnh me õ pyka djari kunikôt ne me kunĩ bēngôkre.

mrymã amijarên kum rax jarên kam abenmã kum,

—Mýj me'ô ne mrymê ar kute raxo aben pyrãk ne ar abenwýr prôt nhyk kutã kum ãmmã? Arkati, ane. Nãm ã me abenmã ane.

<sup>5</sup> Nhyk kam mryja kabên punubit jarên ar o ba. Mry kaàk djô'ã ne mryja kabên punu ar ba. Nãm amijo rax ne ar Metündjwýnh japry o ba. Nãm ar meo ba, mry kaàk djô'ã meo ba'ã amex amãnhkrut ne ikjêkê ne naja kuto katê. Ne kam mytyrwý 'ã akrebê 42. <sup>6</sup> Nãm ar meo ban Metündjwýnh japry o ba. Nãm prîne Metündjwýnh djün ne idji japry ne kam úrkwãbê kãjkwa djün ne me kãjkwakam ar bajadjwý djün ne. Djãm mry kabên mex got.

<sup>7</sup> Nhyk kam mry kaàk mrymã kabên nhyk kam kabênkôt Metündjwýnh nhõ me ja'ýr prôt ne. Ýr prôt ne me kwý pan kãjbê me kumê. Ne kam kabênkôt, umakôt ar me kunõ ba ne kabêno me ano. Apýnh mebêngôkre ba djãri, apýnh amyngrãri me ba djãri, apýnh me ô pyka djãri, apýnh me kabên djãri kunîkôt ne ar meo ba. Mry ne amijo aptàn Metündjwýnh nhõ me jao ajkên kam me kunõ ba. <sup>8</sup> Nhyk kam pykabê me ja kunî dja me mrymã amijarênho ba ne kum rax jarê.

Nhyk bep me kwý, Jeju nhõ pi'ók no'ókkam me idji arija, me ajbit dja me kum mry kînh kêt ne kum rax jarên kêt ne. Jejubê Mrykî'ãtomti jabatãnh nyja ne ô pi'ók no'ók. Kute pyka nhípêx kêttri ne Metündjwýnh arým amim me kute Jeju bîn'ã karõ, me kute Jejuo mrykî'ãtomtin kute bînmã amim 'ã karõ ne arým anhýr djwýnhhrãm kuma. Be, Jeju kubê Mrykî'ãtomti jabatãnh ny ja ne ô pi'ók no'ók, me tîn rã'ã rã'ã'ã pi'ók no'ók. Nhyk me tîn rã'ã rã'ã kadjy pi'ók no'ókkam me idji arija me tãm dja me mrymã rax jarên kêt.

Nhyk bep me idji'ã no'ók kêtja, me kunî dja me kum mry kînh ne kum rax jarên kum amijarênho o ba.

<sup>9</sup> Gora me ajamak mex jabej on ama.

<sup>10</sup> Ê, dja me me kwýo rôrôk ne meo mrãn mekbê ijê.

Ne kam tu me kwý pa, kãxdjwa kajgoo tu me kupa.

Nhýnh me ja dja me meo rôrôk ne mekbê ijê ne kãxdjwa kajgoo me kwý pa?

Bir, Metündjwýnh kute amim me'ã karõja, me tãm dja me mekbê ijê ne me kwý pa.

Kam dja Metündjwýnh nhõ me ja kute tu amim Jeju markumrêx ne mã 'ã ngrã týx ne 'ãno ãm ne kute kanga kêt mã.

*Mry 'ôdjwý pyka kurüm kator.*

<sup>11</sup> Nhyk kam mry 'ô kato, mry kute katê pyka kurüm kato, ba omü. Nãm bãri amãnhkrut kute mrykî'ãtomti jabatãnh ny bãri pyrãk. Ne kabên kute mry kaàk kabên pyrãk. <sup>12</sup> Ne kam mry kaàk jatãri mryja djô'ã umakôt ar meo ba. Ne kam me kunîmã, pykabê me ja kunîmã kum,

—On me mry kaàk jatãri mryjamã amijarênho o aba ne kum rax jarê. Mry krã 'ô tyk ne nõr ne kam ajte akubyn tînja on kum akabên ne kum rax jarê, ane. Ajrã, ane. Nãm ã mry kute katê mry kaàk jatãri mry ja'ã mekmã karõo ane.

<sup>13</sup> Ne kam mýjja pumũnh kêt kwý nhípêx ne. Kwý rax ne ipêx ne. Nãm me ipôkri kuwyo ruw, kãjkwa kurüm pykamã kuwyo ruw.

<sup>14</sup> Be, mýjja pumũnh kêtto ne me noo akno. Nãm pykabê me kunî noo akno. Mry kaàk jatãri mryja kabênkôt ne mýjja pumũnh kêt kwý nhípêx ne, tãri ãmkambit ne mýjja pumũnh kêt kwý nhípêx ne. Ne kam mekmã kum, pyka kunîkôt mekmã kum,

—On me mry kaàk jatãri mry ja karõ nhípêx. Mry me kute te

kàxdjwa kajgoo krā jayr nhym mā tīn karō dja ga me ipêx, ane. Ajrā, ane. Nām ā mry kute katē mekmā ane.

<sup>15</sup> Nhym kam me ipêx ne. Nhym mry kute katēja mry karō jakō, mry kaāk jatāri mryja karō jakō nhym arým tīn ne arým akôn kabēn ne. Nām kabēn ne memā me kwý'ā apnēn mekmā kum,

—Tāmja kute imā amijarēnh kēt ne kute imā rax jarēnh prām kēt. On dja ga me abī, ane. Nām ā mry kaāk jatāri mryja karō mekmā ane nhym me kabēnkôt arým me kwý pa.

<sup>16</sup> Nhym kam mry kute katēja ne me kunī'ā idji janhō. Nām me ikra'ā idji janhōn me kuka'ā idji janhō, mry kaāk jatāri mryja nhō me ja kute amirīt kadjy. Nhym me kwý te kubē amikati, kute me'ā idji janhōr pymaje te kubē amikati nhym tu me'ā idji janhō. Nhýnh me ja'ā ne idji janhō? Bir, me kunī, me kâtammē me bēnjadjwýrmē me ō nêkrêx krāptīmē me ō nêkrêx kētmē me memā àpēnh kajgo ar bajamē me kute memā o pānh kadjy àpēnhjamē. Me ja kunī'ā ne idji janhō. Nhýnh ne me 'ō kukamē ikra'ā idji kēt ne. Me kunī.

<sup>17</sup> Dja me'ō'ā idji jēt prām kēt nhym me arým kum mýjja nhōr kētkumrêx, nhym ta kute mýjja byr kētkumrêx, te kute amim mýjja byrmā. Me'ā idjikôtbit ne me kute amim mýjja byr. Mýj idji nā? Bir, mry kaāk jatāri mryja ne me kwý'ā idjin kwý'ā numeru janhō.

<sup>18</sup> Be, me no mexbit godja me kuma. Ē, gora me ano mex jabej on mry'ā numeru pumū. Numeru ja kute me idji pyrāk. Nām 666. Be, mry'ā numeru ne ja.

## 14

*Bàygogomē uba kadjy kàx byr.*

<sup>1</sup> Nā bām arek omūnhō dja nhym kam Mrykī'ātomti jabatānh nyja

dja, ba omū. Krānhrebē Xijāokam ne dja. Nhym kam kôt me krāptī ku'ē. Me krāptī kubē 144.000. me tām ne me kumex. Nhym Mrykī'ātomti jabatānh ny nhidjija me kuka'ā arij ne Bām nhidjijadjwý me kuka'ā arij. Me tām ne me Mrykī'ātomti jabatānh ny kôt kumex.

<sup>2</sup> Ba kam kàjkwakam me ngrer ma. Kute ngō rārākti pyrāk, kute na krak pyrāk. Nā, nām me ngrer mexkumrêx. Nām me kute pījābārekam me ngrer pyrāk ba maro dja.

<sup>3</sup> Nhym me krāptīja ngrer ny jarē. Nām krī djātikam ýrjamē mýjja tīn amānhkrut ne amānhkrutjamē mebēngēttemē, me tām ne me kabem ku'ēn ngre. Ngrer ny ne me arē. Mýj me ngrer nā? Me ajbit ngrer. Atemā. Me'ō kute arēnh kēt. Amū me'ō kute mar ne arēnh kadjy kēt. Me ajbit ngrer, me krāptī kubē 144.000, Metīndjwýnh kute me utār ne meo mōrja, pyka kurūm meo mōrja, me ajbit ngrer, me ajbit ne me kute mar ne arēnh.

<sup>4</sup> Nām me mexo amiptān kabôt katin ar ba. Nām me kute axwe 'ō mar kētkam mexkumrêx kute mrāmri ne me kute krō'ā meo prō kētkam mex ja pyrāk. Nām me ā axwemā irero ane. Nām me mā Mrykī'ātomti jabatānh ny kôt ajkamēn mā kôt mō. Mrykī'ātomti jabatānh nyja abenbē meo ajkij ne meo mō. Kamrōo ne me utān meo mōn Metīndjwýnhmā me kungā. Me ja ne me kutewa nhym Bāmā meo mōn kum me kanga. Dja ī ajte me kwý rax ne kum me kungā. Bāmmē ar ro'ā kute meo aminhōn kute ar meo bamā. <sup>5</sup> Nhym me 'ēxnhī kētkumrêx. Nām me axwe kētkam mextire ne ar ba. Ajmā kute kēt.

<sup>6</sup> Nhym kam kadjy mrānh djwýnh 'ō kà:jmā ton tē. Kàjkwa tā: tē. Mýj kadjy ne ton tē? Bir, kute me kunīmā kabēn mex jarēnhmā. Kute me kunī pykabē ar bajamā arēnhmā, apýnh mebēngōkre ba



djari, apýnh amyngràri me ba djari, apýnh me kabên djari, apýnh me ô pyka djari kunîkôt ne kute mekmâ arênhmâ. Kabên mexja ne mex râ'ã râ'ã. Mekmâ tûmràm mex ne kam o ino rer kêtumrêx. <sup>7</sup> Nhyam kam kadjy mrânh djwýnhja ne kâj bê kabên ne memâ kum,

—On me amâ Metîndjwýnh pyman kum rax jarê, kute katât memâ axweo pân̄h ne kute meo bikênhkam. Arým ne ô akati bôx. Arým kute memâ axwe pân̄h jarênhmâ. Dja memâ axweo pân̄h. Djâm uma ngri got. On me kum rax jarê, kute kâjkwamê pykamê ngô raxbê pyka kêtme inoremê kute ipêx djwýnhmâ rax jarê, ane.

<sup>8</sup> Nhyam kam kadjy mrânh djwýnh 'ôdjwý kutewa kôt tên memâ kum,

—Metîndjwýnh dja krîraxbê Babirônijkam me jao ajkê. Arým kute meo môr djâ kaprârmâ. Arým 'ÿr. Krîraxbê Babirônij, krî jabatàn̄h tãm ne Metîndjwýnh arým kute o bikênhmâ. Kute pyka mē meo bimirâkmâ. Kam ne me axwekumrêx. Me axwebit ne me ar kam ba. Ne kam pyka kunîkôt me axwemâ me prêk ne. Nhyam kam me ô'ã pyka kunîkôt axwe. Ne kam kute me'ô kuprý, kurêti'ô kute amiwýr me 'wýr nhyam me kute 'ã aben japanh ne kam kôt axwe, kôt kurêti ar ba pyrâk. Nãm ã krîraxbê Babirônij ã pyka kunîkôt memâ ane. Kute mrâmri ne me kute kadjwati kangô\* kôm ne bibân̄h ne axwebit kute mar ja pyrâk. Kam ne Metîndjwýnh mekam ngryk ne kute prîne meo bikênhmâ.

<sup>9-10</sup> Nhyam kam kadjy mrânh djwýnh 'ôdjwý kadjy mrânh djwýnh ar kutewakôt tên kâj bê memâ arên memâ kum,

—Ë, me ikra'ã mry nhidjija ne me kuka'ã mry nhidjija kute mryo Metîndjwýnh ne mry karôo Metîndjwýnh ne arkum amijarênh

o ban kum rax jarênh o baja me tãm gêdja Metîndjwýnh mekam ngryk ne prîne meo ajkê. Djâm ngryk rerek got kâjbê meo ajkê. Dja prîne meo bikênh mex ne. Arým ne ngry:k ne. Mýj me'ô gêdja kubê amijo apdju? Be djâm me kunîo ajkê.

Be, dja Metîndjwýnh me ja, me kum mrymê mry karô kînhja kuwykam me kurê. Kuwymê kên ngrângrâ pôkkam me kurê nhyam me kam àmnhirênho kumex. Mrykí'átomti jabatàn̄h nymê kadjy mrânh djwýnh ar nokrekam dja me àmnhirênho kumex. <sup>11</sup> Nhyam kuwy kûmja mã wabi, kute o ino rer kêtumrêx. Kuwy kute me kamjêrja kûm râ'ã râ'ã. Nhyam me arek àmnhirênho kumex râ'ã: râ'ã. Djâm me tyk djâ kêtme? Arkati. Djâm akamâtkam nâr kon akatikam dja me tyk djâ kêt? Arkati. Dja me arek àmnhirênho kumex. Be, dja ã Metîndjwýnh meo bikênho ane. Me kute mrymê mry karômê o Metîndjwýnh ne arkum amijarênh o ba ne kute arkum rax jarênh ar o ba ne 'ã idjija, me ja dja Metîndjwýnh prîne ã meo bikênho ane. Nãm ã kadjy mrânh djwýnh kabên ane.

<sup>12</sup> Kam godja Metîndjwýnh nhô me ja, me kute Metîndjwýnh kabênkôt ar amijo baja, me kute tu amim Jeju markumrêxja, me ja dja me mã 'ã ngrâ tÿx ne 'ãno djan kanga kêtumrêx.

<sup>13</sup> Nhyam kam kâjkwa kurûm me'ô imã kabên ba kuma. Nãm imã,

—On 'ã pi'ôk no'ôk. Ë, me kute Bênjadjwýr 'ãno àm nhyam mete me par ja dja me kînhkumrêx. Bênjadjwýr kadjy me tykja dja me arým kâjkwakam Jeju'ÿr bôx ne kam kînhkumrêx. Metîndjwýnh kute memâ kînh jadjâr kadjy ne arým me ô akati me'ÿr bôx. Dja

\* **14:8** Mýjja me kute o kôm ne kôt bibân̄h kunîja, kadjwati kangômê uba kangômê, mýjja kangô kunî ne me kum kadjwati kangô jarê.

Metîndjwýnh mã memã kînh jadjâr rax ne, ane.

Nhym kam Metîndjwýnh Karô imã,

—Nà, mrãmri. Mrãmri ne arým me àpênh raxkam katyk. Me àbirkam dja me arým kàjkwakam tyk djã kêt ne. Nãm me Jeju'ã ngrà tỳx ne mã kum apê. Nhym Metîndjwýnh me omũn arým kute pãnh memã kînh jadjâr raxmã, ane. Nãm ã Metîndjwýnh Karô imã ane.

<sup>14</sup> Ja ne arým apêx ba kam ajte mýjja 'õ pumũ. Nhym kakrã jaka ajte kato. Kato nhym kam kam me'õ nhỹ. Kute me'õ my pyrãk ne bẽnjadjwýr krãdjê tun o nhỹ. Kên karýro krãdjê ne kutu. Ne kam kàx nhibôti ne kubyn o nhỹ. Wa mexkumrêx.

<sup>15</sup> Nhym kam kadjy mrãnh djwýnh 'õ Metîndjwýnh nhũrkwãti kurũm kato. Katon kum kàj bê kabên, kakrãkam ýrjamã kabên ne kum,

—On aparmã anhõ kàxwã o abên o bàygogo jakàn o atom. Arým ne õ akati 'ýr bôx. Arým ne ngrà tẽ. Arým ne pykabê me ja nhõ akati me'ýr bôx. Kute bàygogo ngrà nhym me kute o atom nhõ akati pyrãk, ane. <sup>16</sup> Nhym kam kabênkôt pykamã kàxo abên o akàro tẽn kam o atom. Nãm ã kakrãkam ýrja me'ã bàygogo jakreo ane.

<sup>17</sup> Nhym kam kadjy mrãnh djwýnh 'õdjwý Metîndjwýnh nhũrkwãti kurũm kato. Kàjkwakam Metîndjwýnh nhũrkwãti kurũm kato. Ne adjwýnhdjwý õ kàx nhibôti. Wa mexkumrêx.

<sup>18</sup> Nhym kam ajte kadjy mrãnh djwýnh 'õdjwý, õ kuwy djwýnh kikre kudjý djã bôr djã kurũm kato. Katon kam kàj bê kum kabên. Kadjy mrãnh djwýnh kute kàxdjwa mex byr ne o ãmjamã kabên ne kum,

—On aparmã anhõ kàxo abên pidjôbê uba djô jakàn o atom. Arým ne tuk ne kumex. Nà, ãrk pytýja

pumũ. Arým ne pykabê me ja nhõ akati me'ýr bôx. Kute pidjô tuk nhym me kute o atom nhõ akati pyrãk. Nãm ã kum ane. Nãm me axwe'ã pidjô tuk nhym me kute o atom nhõ akati jakre. Metîndjwýnh arým me axwekam ngryk ne prêne kute meo bikênhmã. 'Ã ne pidjô tuk jakre.

<sup>19-20</sup> Nhym kam kabênkôt tu pykamã kàxo abên o pidjô krô jakàro tẽn kam ôjao atom ne kam pidjô kangôo pôx djãkam kumex ne. Metîndjwýnh nhõ djwýmẽ pidjô kangôo pôx djã raxi. Kam ne kumex ne, kute kangôo pôxmã. Metîndjwýnh mekam ngryk ne prêne kute meo bikênh'ã ne djwý pynênh djãkam me kute pidjô kumex nhym prêne kute anênh jakre. Atykmã ne pidjô kangôo pôx djã dja.

Nhym me kam kumex ne, nhym kam prêne anê nhym kam me kamrô prô:t ne. Pidjô kangôo pôx djã kurũm me kamrô prôto nõ. Djãm me kamrô ngri got. Axwe me kamrô rax ne prô:to nõn kam tám ne. Kute ngô pyrãk ne kam ã ubým ane. Kawaru jajkwa krekrekam kàxirãx 'ãnh ne ubým itep ne. Me kamrô tám môr ry'ã akre kubê 300 kiometu. Nhỹnh me ja kamrô nã? Bir, me kum Metîndjwýnh kînh kêtja, me axweja. Dja ã Metîndjwýnh me axweo bikênhõ ane, me imexo ane.

## 15

*Me kute apýnh meo bikênh djãri amýnh ne o ku'ê.*

<sup>1</sup> Nhym kam mýjja pumũnh kêt 'õdjwý kàjkwakam kato ba omũ. Nãm ã tire ane ne ã uma ane. Kadjy mrãnh djwýnh kubê 7 ne apýnh mýjjao kute meo bikênh djãri amýn o ku'ê. Apýnh mýjjao kute meo bikênh djãri ja godja Metîndjwýnh aben whitepã meo bikênhõ tẽn kam 'õo ino re. Ne arým ngryko ino re.

<sup>2</sup> Ba arek omũnho dja nhym mýjja kute imôti pyræk, kute ixeo imôti pyræk kato ba omũ. Ixemê kuwymê akà. Nhym mýrri me ku'ê. Mýj me nã? Bir, me kum mrymê mry karõ kĩnh kêt ne kute arkum mex jarênh kêtumrêx nhym te mry kute meo aminhõn me'ã idji janhõrmã, te me'ã idjimê numeru janhõrmã. Me ja ne me ixeo imôti mýrri kumex. Metĩndjwýnh nhõ pĩjãbare ne me amýn o kumex. Me kam Metĩndjwýnhmã ngrer kadjy.

<sup>3</sup> Mõjdê kubê Metĩndjwýnh nhõ ãpênhjamê Mrykĩ'ãtomti jabatãnh nymê ar ngrer ne me arê.

—Bẽnjadjwýr, Metĩndjwýnh, atýxo abê kumkati.

Mrãmri ne ga araxo mýjja kunĩ nhípêx nhym akõt rax ne umã ne.

Ga ne ga abê pyka kunĩkõt me kunĩ nhõ Bẽnjadjwýr rax ne ar meo aba mextire ne ar meo aba.

Nã gãm memã akabẽn pýnh ne arê ne katãt memã akabẽn jadjuw.

<sup>4</sup> Nã, Bẽnjadjwýr, nhýnh ne me'õ kum apyma kêt got.

Nhýnh ne me'õ amã amextire jarênh kêt got. Me kunĩ dja me kum apyman abenmã arax jarê.

Gajbit ne ga amexo apyma.

Nhym kam pyka kunĩkõt me kunĩ dja me awýr ban bõx ne amã rax jarênhõ kumex.

Nã gãm prĩne memã o pãnh, katãt memã o pãnh.

Nhym me kunĩ arým omũn kam amã rax jarê, ane.

Nãm ã me ngrer ane. <sup>5</sup> Nhym kam ijukri Metĩndjwýnh nhũrkwãti amijã kutan dja. Kãjkwakam Metĩndjwýnh nhũrkwãti amijã kutan dja ba omũ. Nhym kadjwýnhbê Metĩndjwýnh nhõ kumoka'ê mextire jadjwý amijã kutan dja. <sup>6</sup> Nhym kam Metĩndjwýnh nhũrkwãti kurũm kadjy mrãnh

djwýnh kubê 7ja apôx. Nãm apýnh mýjjiao kute meo bikênh djari kubê 7ja me kadjy amýn o ku'ê. Kubêkã jaka, kubêkã jadjênh ne angij ne o ku'ê. Ne kên karýro amirunh pren 'ã ku'ê.

<sup>7</sup> Nhym kam mýjja tĩn amãnhkrut ne amãnhkrut 'õ ne arkum ngõnh ngã. Kadjy mrãnh djwýnh kubê 7jamã apýnh kungã. Kên karýro ngõnh kubê 7 ne arkum kungã. Ngõnhõ ipu ne arkum kungã. Mýj ne kam ipu? Bir, Metĩndjwýnh ngryk ne kam ipu. Metĩndjwýnh ta tĩn ne ar ba rã'ã rã'ã ne kute o ino rer kêt, tãm ngryk ne ngõnhkam ipu. Tãm ne arkum kungã.

<sup>8</sup> Nhym kam Metĩndjwýnh kũm prĩne ũrkwãti kre jaê. Mýj kũm nã? Bir, Metĩndjwýnh raxmê mexmê týxmê uma kam kũm. Tãm ne prĩne ũrkwãti kre jaê. Nhym me te Metĩndjwýnh nhũrkwãtimã ngjênhmã. Nhym arým Metĩndjwýnh kũm mebê aptã. Nhym kadjy mrãnh djwýnh kubê 7 ne apýnh mýjjiao kute meo bikênh djari kubê 7ja me'ã kapĩno ku'ê, aben nhitepã me'ã kapĩno ku'ê. Nhym me'ã kapĩn pa nhym me arým Metĩndjwýnh nhũrkwãtimã wangij.

## 16

*Me kute ngõnhbê 7kam Metĩndjwýnh ngryk me'ã kapĩn.*

<sup>1</sup> Nhym kam Metĩndjwýnh nhũrkwãti kurũm me'õ kabẽn. Kãj bê kabẽn ne kadjy mrãnh djwýnh kubê 7mã kum,

—On o tẽn pykakam kapĩ. Ngõnhbê 7kam Metĩndjwýnh ngryk ipuwã on kapĩ, ane.

<sup>2</sup> Nhym kam kadjy mrãnh djwýnh kutewa o tẽn pykakam kapĩ. Nhym kam kuwê me'ã apôx. Kuwê punure. Tokry:. Nhýnh me ja'ã ne apôx? Bir, mry kute me'ã idji janhõr nhym me kute mry karõmã

rax jarēnhja, me tām ne kuwê me'ã apóx.

<sup>3</sup> Nhyam kam atāri kadjy mrānh djwýnhja Metīndjwýnh ngryk 'odjwý kapī. Ngô raxbê pyka kêtka me kapī nhyam arým ngô ta tu kamrô, kute me'ô tyk kamrô pyrāk. Nhyam kam ngôkam mýjja ar baja kunī ty. Tu tykkumrêx.

<sup>4</sup> Nhyam kam atāri kadjy mrānh djwýnhja Metīndjwýnh ngryk 'odjwý kapī. Ngô bixabjêrmê inorekam ne kapī. Nhyam arým ngô ta tu kamrô.

<sup>5</sup> Nhyam kam kadjy mrānh djwýnh kute ngô pumūnh djwýnh kabēn, ba kuma. Nām Metīndjwýnhmā kum, —Be, mrāmri. Ga ne ga amexo apyma ne amrêbê: adjakamā atīn ne ar aban mā atīn rā'ã, mrāmri.

Nā gām katāt memā o pānh ne, ane.

<sup>6</sup> Nām me anhō me mexja nhimex ne, ne akabēn jarēnh djwýnhjadjwý nhimex ne, ne me ja kamrô kapī: no kumex.

Ga arým meo angryk ne kam pānh ngô kamrô memā angā, me kute o kōmmā.

Mrāmri ne pānh mexkumrêx, ane. Nām ã ngô pumūnh djwýnh Metīndjwýnhmā ane.

<sup>7</sup> Nhyam kam kikre kudjý djā bôr djādjwý kabēn ne, ne kum,

—Nā, mrāmri, Bēnjadjwýr, Metīndjwýnh atýxo abê kumkati.

Ga ne ga akabēn pydjīn arēn arým prīne katāt memā o pānh ne, ane.

Nām ã kikre kudjý djā bôr djā kabēn ane.

<sup>8</sup> Nhyam kam atāri kadjy mrānh djwýnhja Metīndjwýnh ngryk 'odjwý kapī. Myt'ã ne kapī nhyam kam myt pôr ne prīne me kuga. <sup>9</sup> Arngrō týxkumrêx ne prīne me kuga. Te me kuga nhyam me mā Metīndjwýnh japrý. Metīndjwýnh kute apýnh mýjja kute meo bikēnhmā me'ýr anorja tām ne me aprý. Mā aprý. Me kute amim kator kêt ne wānh

axwemā irer kêtikumrêx. Kute kum mex jarēnh kêtikumrêx.

<sup>10</sup> Nhyam kam atāri kadjy mrānh djwýnh ja Metīndjwýnh ngryk 'odjwý kapī. Mry krī djakam kapī nhyam arým ô me ja'ã akamāt kô tyk ne. Akamāt kô tyk prīne meo ajkamuw. Nhyam kam me tokry djāje tu āmnhirēnho kumex.

<sup>11</sup> Āmnhirēnhbê Metīndjwýnh japrýo kumex. Kājkwakam Metīndjwýnh ne me ūn ne. Me tokry djāje, kuwēmê mýjja tokry djāje ne me Metīndjwýnh djūno kumex ne amim kator ne kute wānh axwemā irer 'ýr amijo akêx kêtikumrêx.

<sup>12</sup> Nhyam kam atāri kadjy mrānh djwýnhja Metīndjwýnh ngryk 'odjwý kapī. Ngô raxbê Jupraxikam ne kapī nhyam kam tu ngô ngrā, me kam tēm kadjy. Kājkwa krax kurūm me bēnjadjwýr tēm ne ngô'ã rêr, kadjy ne ngrā. <sup>13</sup> Nhyam kam karō amānhkrut ne ikjêkêt ne apóx ba omū. Karō punu kute bri ponhti pyrāk ne apóx ba omū. Mry kaak jajkwa krekremê mry jajkwa krekremê ar kabēn jarēnh djwýnh 'êxnhija jajkwa krekremê ar ja jajkwa krekre kurūm ne bri apóx, ba omū.

<sup>14</sup> Ar karō punu kute amijo brija ne Ar kubê Xatanaj nhō àpēnh ne kam kute mýjja pumūnh kêt kwý nhipêxmā. Ne kam mā me bēnjadjwýr rūnh'ýr ba. Pyka kunīkôt me bēnjadjwýr rūnh kunī'ýr ban meo akprō. Me me'ýr prôt kadjy ne meo akprō. Metīndjwýnh týxo kubê kumkati ngryk nhō akatikam, ô akati pymakam dja me me'ýr prôt ar ba.

<sup>15</sup> Me abenwýr prôt kadjy ne me abenwýr mōn aben tēpo mō nhyam Jeju imā kabēn ne. Ne imā,

—Ê, on me ikabēn ma. Dja ba me aêrbê me'ýr bôx. Kute me ākīnhī me aêrbê me ūrkwāmā ngjêx ne mekbê ākīnh ba pyrāk. Dja ba ã me aêrbê me'ýr ibôx ane. Nhyam bep me ôt

kêt ne no týx ne kute ikam amako kríja dja me kínhkumrêx. Me tãm dja me kute me mrãnhmã kute kubêkà jangjênh ne mrãnh djákam amako kríja pyrãk. Nhy m bep me ate krãja dja me kute me ôt mýrri me ban bôx nhy m me kute kubêkà jangjênh kêt ne pijãmkam mrãnh pyrãk. Dja me ã kute ikam amak kêtja pijãm ane, ibôxkam ã pijãm ane. Nãm ã Jeju Kritu memã amibôx djã jarênh ane.

<sup>16</sup> Nhy m kam ar karô punu kute amijo brija me bënjadwýr rünho akprô. Me kute me'ýr prôt kadjy ne meo akprô. Me kute abeno bikprônh djã nhidjibê Amadô. Mekbê idjaer kabênkam ne Amadô. Kam ne me bënjadwýr rünh abeno akprô.

<sup>17</sup> Nhy m kam kadjy mrãnh djwýnh kute katê ne Metíndjwýnh ngryko ino rer kapí. Kôk djábêrkam ne kapí nhy m kam Metíndjwýnh krí djãti kurüm me'ô kabên. Metíndjwýnh nhürkwãtikam krí djãti kurüm ne kabên ne. Kàj bê kabên ne,

—Anũ, o ino rer ne arým ja, ane.

<sup>18</sup> Nhy m kam na adjênhmê krakmê rãrãkmê. Nhy m kam pykadjwý tertet tý:x ne. Nãm amingrêk tý:x ne. Me bakrax kurüm me bakukãmãre aben nwhitepã bixadjwýr tẽm ja'ô kute pyka kute amingrêk ja'ô pumũnh kêtikumrêx. Nãm tertet tý:x ne.\*

<sup>19</sup> Nhy m kam krírax jabatãnhbê Babirônijkam pyka ajkij nhy m kikre kuní rôrôk ne ajkaten amingrãn kumex. Babirônijkam pyka amikokij ne arým amãnhkrut ne ikjêkêt ne ikwã. Nhy m pyka kuníkôtdjwý krírax rôrôko kumex nhy m kikre príne amikaten kumex. Be, mrãmri ne Metíndjwýnh Babirônij jabatãnhja mar ar o ban kam arým o ajkê, príne kum axweo

pãnh ne. Nãm tu mekam ngryk týx ne. Mýj me'ô gêdjã kubê amijo apdju? Be, dja me kuní ajkê, príne meo ajkê. Djãm Metíndjwýnh me axwekam ngryk kêt got.

<sup>20</sup> Nhy m kam apêxti kuní nhí'ãm mrãn akuno. Nhy m krãnhdjwý kuní tu akuno.

<sup>21</sup> Nhy m kam namê'y me'ã rôrôko kumex. Kãjkwa kurüm ne me'ã rôrôk ne. Axwe abatãnh, axwe utí. Utíkam 'ã akre kute 40 kiru pyrãk. Djãm kam got me axwe kangãn kam Metíndjwýnhmã rax jarê? Arkati, nãm tu me Metíndjwýnh djũno kumex. Namê'y kute meo bikênhkam tu Metíndjwýnh djũno kumex. Djãm namê'y rôrôk kajgo got? Kati, nãm meo bikênh rax ne.

## 17

*Me'ô kuprý kurêti mry'ã ýr.*

<sup>1</sup> Nhy m kam kadjy mrãnh djwýnh kubê 7 kute ngônhbê 7 jamýnhja 'ô ne imã,

—Apa, amrê tẽ, ba amã mýjja jakre ga omũ. Me'ô kuprý ne ja. Tãmja ne ngô kuní'ã krí, ane. Tãmja ne me kuní abenmã arê. Me kuní arým abenmã kurê jarê. Nhy m Metíndjwýnh arým axwe man kute o bikênhmã. Kríraxbê Babirônij ne me'ô kuprý kurê'ã amijakre. Krírax jakam ne mýjja punu ne kam kute me'ô kuprý kurêti pyrãk.

<sup>2</sup> Nhy m apýnh pyka djãri me ô bënjadwýr rünh 'ýr bao ku'ê. 'Ã aben japa. Nhy m pyka kuníkôt me kuní 'ýr ban kam kumex. Me'ô nija ta ne memã kadjwati kangô\* ngã nhy m me o ikôn ajbãn kam kurêo kumex.

Nãm ã kadjy mrãnh djwýnh imã ane. <sup>3</sup> ã imã anen kam mã ikarôo tẽ. Kapôt kukritmã ne ikarôo tẽn o bôx. Ba kam me'ô kuprý kurêti ja pumũ. Nhy m mry kamrêk'ã nhý. Nhy m mryja'ã idjio tukní. 'Ã idjijao

\* **16:18** Djãm pyka kute amingrêk kêt Arkati. Pyka kute amingrêk. \* **17:2** Mýjja me kute o kôm ne kôt bibãnh kuníja, kadjwati kangômê uba kangômê, mýjja kangô kuní ne me kum kadjwati kangô jarê.

ne prîne Metĩndjwýnh japrýn ũn ne. NhyM mry krábê 7 ne b̄aribê 10.

<sup>4</sup> NhyM me'õ kuprý kurëtija kubêkà kamrêkmê tyk jadjàn o nhý. Kunhêr krãptĩ. Kên karýrmê kên mextemê angà krã kute ngãp jadjênh pyrãk. O ne amikunhêr. Ne ngõnhkrã byn o nhý. Kên karýro ngõnhkrãkam mýjja kroo ipu ne kubyn o nhý. Mjên prãmmê kurêmmê ja ne kam o ipun 'ã kubyn o nhý. <sup>5</sup> Ne kuka'ã idji. Mýj idji nã? Bir, mýjja bipdjur. Bir,

—Krĩrax jabatãnhbê Babirõnijkam ne me kuprý kurëti kator kutewa nhyM kam me ô'ã pyka kunikôt punu ar ba, arĩk ar ba.

Nãm ã kuka'ã idji ane.

<sup>6</sup> Me'õ kuprý kurëtija tu ajbã. Kamrô ne o ikõn kam ajbã. Nãm prîne Metĩndjwýnh nhõ me mexja kwý nhimex ne, prîne me kute tu amim Jeju markumrêx ne mã kôt bikamênh nhyM me te kute me par nhyM me mã kôt bikamênhja ne prîne me imex ne me kamrô kapĩn o ikõn kam ajbã. Be, nija ne ba omũn kam kam ino tyn djan te ije omũnhmã ne kam,

—Tõ mýj nã? ane.

<sup>7</sup> NhyM kam kadjy mrãnh djwýnh imã,

—Mýkam ne ga kam ano tyn dja? ane. Ê, ba mýjja bipdjurja amã arê ga ama. Ba amã nija jarê, krĩrax kute ni jaxweti'ã amijakreja amã arê ga ama, ne ajte mry kute turja jarê. Mry krábê 7 ne b̄aribê 10, tãm dja ba amã arê, ga ama.

<sup>8</sup> Mry aje omũnhja ne amrêbê tĩn ne ar ba. Ne kam tu akuno. Dja ajte kato. Kre ry typydjikurũm ajte katon ar mrã. Ar mrãn kam tu biknorkumrêx ne. NhyM pykabê me ja te omũn kam abenkam no tyn kumex. Me kute Jeju mar kêtja dja me te kute mry marmãn kam abenkam no tyn kumex ne abenmã,

—Mýj mry got ja? Nãm tĩn ne ar ban akunon kam ajte akubyn kato, anhýro kumex.

Djã nãm Metĩndjwýnh me ja tĩn rã'ã rã'ã'ã pi'ók no'ók got me kôt mry ma? Kati, pyka nhipêx kêtiri kute me ja tĩn rã'ã rã'ã'ã pi'ók no'ók kêt. Kam dja me mry mar kêtumrêx ne. Kam ne me mry tĩn ne biknor ne ajte akubyn katorja pumũn kam abenkam no tyn kumex.

<sup>9</sup> Ê, me no mexbit dja me kuma, me kute mýjja marbit dja me kuma. Ê, mry krábê 7 kubê mýjja amãnhkrut. Krã kubê krãnhre ne krĩ. 'Ã ne nija krĩ. Adjwýnhdjwý krábê bēnjadjwýr rũnhbê 7. <sup>10</sup> Bēnjadjwýrbê 5 ne arým kêt mexi. NhyM bep pydji ne tĩn ne ar ba rã'ã, nhyM bep ikjêja ne kator kêt rã'ã. Dja katon kam ar meo ba ngrire. <sup>11</sup> Be, mryja amrêbê tĩn ne ar ban arým biknorja, tãm ne kubê bēnjadjwýr rax'õ, bēnjadjwýr rũnhbê 7 ja'õ, ne arkôt akuno.

<sup>12</sup> NhyM bep b̄aribê 10, aje omũnhja kubêdjwý bēnjadjwýr rũnhbê 10. Kraxje mete ar'ã bēnjadjwýr mēnh nhyM ar kute ar meo ba kêt. Adjým, tũmrãm, dja me ar'ã bēnjadjwýr mē nhyM ar meo ba. Mrymê ar aprakamã ar ar meo ba. Dja ar ro'ã ar meo ba ngrire.

<sup>13</sup> Be, bēnjadjwýr rũnhja godja ar abenkôt kabēn ne tu mry kabēnkôt ar meo ba. NhyM mryja pydji ne bēnjadjwýr raxo ar akren ar meo ba. <sup>14</sup> NhyM kam bēnjadjwýr rũnhja dja Mrykĩ'ãtomti jabatãnh ny'yr prõt ne. Ar kunĩ dja ar'yr prõt ne.

NhyM bep Mrykĩ'ãtomti jabatãnh ny ta dja amijo aptàn pyka mē aro amrà. Djãm Mrykĩ'ãtomti jabatãnh ny bēnjadjwýr ngri got. Arkati. Bēnjadjwýr raxbê kumkatiti:. Kute bēnjadjwýr raxo pykabê me bēnjadjwýrja kunĩ jakrenh mexi. Kam ne kubê Bēnjadjwýr raxbê

kumkatiti:. Kam dja ò me jamē prīne pyka mē ar bēnjadjwýrbē 10jao amrà. Ò me ja, Metīndjwýnh kute amiwýr me 'wýr ne kute amijo me utàrja nhym me tu kute amim markumrēx ne mǎ kôt bikamēnh ne kute kanga kēt, me tām dja me Mrykī'ātomti jabatānh nykôt mōn kurē djwýnhjao ajkē.

Nām ā kadjy mrānh djwýnh imā ane. Ā imā 'ā ujarēnh ane. <sup>15</sup> Ne kam arek imā kabēno dja ne imā,

—Ē, apýnh ngò ikwǎja, 'ā me'ò kuprý kurēti krī ga aje omūnhwā, ngòja ne kute me urāk. Me'ā ne ngòja amijakre. Apýnh me ò pyka djari, apýnh me ba djari, apýnh me bēngōkre ba djari, apýnh amyngràri me ba djari, apýnh me kabēn djari kunīkôt me ja'ā ne ngòja amijakre.

<sup>16</sup> Ne aje bāribē 10 pumūnhwāmē mry'ā ýr ga aje omūnhwāmē ar tām dja Ar kubē ni kuprý kurētija kīnh no kati ne arkum kurēkumrēx ne kam o ajkē. O ajkēn prīne kunhēmē ò kubēkà mexja kubē kunī by nhym tu irāri nō. Nhym kam ar ī kwý krē, me'ò kuprý nhī kwý krēn kam 'ā kātām kuwykam kumē nhym prīne xēr.

<sup>17</sup> Mrāmri dja ar ā o ane. Mýkam? Bir, Metīndjwýnh ne kadjy ar ngrēk ne, bēnjadjwýrbē 10ja ar ngrēk ne. Metīndjwýnh ta ne arým amim 'ā karō ne kam ar kadjwýnhbē arkum arē. Nhym kam kôt ar bēnjadjwýrbē 10ja òkre kadjwýnhbē amim 'ā karōn o ajkē. Nām ar axikôt kabēn ne mrymā kum,

—Gajbit dja ga apydjin abēnjadjwýr rax ne ar meo aba. Nhym be nija gēdja wām nō, ane. Nām Metīndjwýnh anhýr djwýnhràn tu kōnh arkum irkumrēx nhym kam ar kôt o tēn o tēn inomā kumē. Ar kute amimar kēt ne ar Metīndjwýnh kabēnkôt tē.

<sup>18</sup> Nhym krīrax jabatānhbē Babirōnij ne me'ò kuprý kurēti ga aje omūnh wā'ā amijakre. Krīraxja ne pyka kunīkôt me kadjy bēnjadjwýr nhym bēnjadjwýr kunī 'ýr ba:o ku'ē, 'ýr ò nēkrēxo bao ku'ē, nhym kam krīraxbē Babirōnij raxo bēnjadjwýr ja jakre ne kam meo ba, ane. Tām ne me arým o ajkē, ane. Be, nām ā kadjy mrānh djwýnh imā 'ā ujarēnh anen imā arēnho tēn inomā kumē.

## 18

*Kute pyka mē Babirōnijo bimrāk.*

<sup>1</sup> Ba arek omūnho dja nhym kam kadjy mrānh djwýnh 'ò kàjkwa kurūm tēn ruw. Kute bēnjadjwýr rax pyrāk ne adjēnho prīne pyka kurwý. <sup>2</sup> Ne kam kǎj bē kabēn ne,

—Ē, arým ne kēt ne. Krīraxbē Babirōnij, krī jabatānhja ne Metīndjwýnh prīne o ajkēn pyka mē meo amrà nhym arým kēt ne.

Arým ne Xatanaj nhō àpēnh punu 'ýr bōx ne kam kam ar ba. Nhym kam apýnh me karō punu djari kam ar ba. Nhym apýnh àk punu djari kunīdjwý me kum kurēja kam ar ba.

<sup>3</sup> Mrāmri ne Metīndjwýnh arým prīne pyka mē meo amrà nhym kam kam ar ba. Mýkam?

Bir, axwe pānh. Babirōnijkam ne me axwebit ar ba. Kam ne me axwe'ā bit abenmā karō.

Kute me'ò kuprý kurēti 'ò kute amijā memā àpnēnh nhym me tu 'ýr ba ar ba nhym kute memā kadjwati kangō\* nhōr nhym me kute o kōm ne bibānh ne kurē ar ba pyrāk.

Nām me ā pyka kunīkôt kum krīraxbē Babirōnij kīnho ane. Pyka kunīkôt ne me

\* **18:3** Mýjja me kute o kōm ne kôt bibānh kunīja, kadjwati kangōmē uba kangōmē, mýjja kangō kunī ne me kum kadjwati kangō jarē.

bēnjadjwýr kunī kum kīnh  
ne 'ýr bao ku'ê kute me'õ  
kuprý kurēti'ã me kute aben  
japanh pyræk nhym pyka  
kunīkôt me kute nêkrêxo  
ba djwýnh Babirônij'ýr õ  
nêkrêxo bao ku'ê ne arým  
pānh õ pi'ók kaprī rax ne.

Babirônij axwe kum nêkrêx prām  
kute me'õ mjên prām pyræk  
nhym me kute nêkrêxo ba  
djwýnh kôt õ pi'ók kaprī  
rūnhkumrêx ne. Djām  
Babirônij mex got. Axwe  
punu, ane.

Nām ā kadjy mrānh djwýnh kabēn  
ane. <sup>4</sup> Nhym kam kākwa kurūm  
me'õdjwý kabēn ne memā kum,

—Apa, inhõ me ja, on me me  
kurūm akato. Mekôt me  
ajaxwe ba ije mekôt me ajo  
ibikēnh karõ on me akato,  
ane.

<sup>5</sup> Be, nām Babirônij aben nHITEPā  
axwe tēn arým kākwa 'ýr itep  
ne. Nhym Metīndjwýnh kute  
axweo biknor kêtumrêx.  
Nām kuman o nhý, ane.

<sup>6</sup> Gora me amipānh. Krīraxbê  
Babirônij kute me ajo bikēnh  
'ānh dja ga me amipānh o  
abikēnh itep ne, o aben  
pyræk ne.

Kati, me amipānh o abikēnh  
amānhkrut. Djām krīraxbê  
Babirônij kute me ajo bikēnh  
ngri got. Axwe kute me  
ajo bikēnh raxi, kam dja  
ga me amipānh o abikēnh  
amānhkrut ne.

Nām mýjja djýo me akõm ne. Kam  
dja ga me amipānh mýjja  
djýo kōmo amānhkrut ne,  
ane.

Nām mýjja djýo kōm'ã kute meo  
bikēnh jakre,

—Kam dja ga me amipānh mýjja  
djýo kōmo amānhkrut ne,  
ane.

<sup>7</sup> Krīraxbê Babirônij ajbit ne raxo  
amiptān õ nêkrêx kumex.  
Kam dja ga me me kaprīmē

me tokrymē o amipānh, kute  
õ nêkrêx kumexja 'ānh o itep  
ne.

Nām krīraxbê Babirônij õkre kad-  
jwýnhbê amim,

“Ota ba arek ibēnjadjwýrkumrêx ne  
nhý. Mýkam dja ba ikaprī?

Djām imjên ibê tyk got ba ikaprī?

Djām ibixangri dja ba ibēn kêt mex  
ne nhý?

Kati, ibixangri kêt. Kam dja ba  
ikaprī kêtumrêx”, ane.

Nām ā krīraxbê Babirônij ni'ã ami-  
jakreo ane.

<sup>8</sup> Nām ā amim ane ne kam nhý.  
Kam dja tēbê apýnh mýjjao  
kute meo bikēnh djāri 'ýr  
bõx.

Myt tām kam dja o bikēnh djāja kunī  
abenā rōrōk ne arým 'ýr bõx.

Gédja tyk 'ýr bõx ne bixangri 'ýr bõx  
ne kum prām 'ýr bõx.

Tēbê dja o bikēnh djāja kunī 'ýr bõx.  
Nhym kam me kuwykam  
kumē nhym xēr.

Bēnjadjwýrbê Metīndjwýnh ne  
týxkumrêx ne kum axwe  
pānh jarē nhym arým 'ýr bõx.  
Nām ā kabēn ane.

<sup>9</sup> Pyka kunīkôt dja me bēnjadjwýr  
àmrao kumex. Me bēnjadjwýrja kum  
nija kīnh ne 'ýr bao ku'êkam kute  
me me'õ kuprý kurēti'ýr me bao  
ku'ê ja pyræk. Kam dja me abej  
àmrao kumex. Me kute kukwakam  
amim nêkrêxo aptār o bakam. Dja  
krīrax pôr ne kūm ty:k ne. Nhym  
me bēnjadjwýr abej àmra:o kumex,  
<sup>10</sup> omūnh o kumex. Krīrax kaprīmē  
tokry pymaje ne me nījar djan  
omūnh o kumex ne kam abenmā  
kum,

—Watīre, Babirônij. Krīrax ja-  
batānh, krīrax puma, watīre.

Nām tebê Metīndjwýnh prīne ajo  
ajkē ga nõ, ane.

<sup>11</sup> Nhym me pyka kunīkôt kute  
nêkrêxo ba djwýnhjadjwý àmrao  
kumex ne kaprī:re. Nhym tu wānh  
nêkrêx nõ. Mýj me'õ godja me  
kute nêkrêxo ba djwýnhbê nêkrêx



byn pãnh pi'ók kaprĩ ngã? Arkati. Babirônij ne ipêxri me kute nêkrêxo ba djwýnh kute kum nêkrêx rero bajamã o pãnh ne.

Nhym arým xêr nhym kam<sup>12</sup> me'õ kute mekbê apýnh me kunhêr djari byr kêtukumrêx, me õ kên karýrmê kryt jakamê kên jadjênhmê angà krã kute ngàp jadjênh pyrãkmê kubêkà jakamê kubêkà tykmê atemã kubêkà mêrebê xêdamê kubêkà kamrêkmê apýnh pĩ kudjý djàrimê apýnh mrybê erpãxi djwao mýjja nhípêx djàrimê apýnh pĩ pãnh raxo mýjja nhípêx djàrimê atemã ngônhbê brôdjimê ngôn timer tykmê atemã kênbê mamoremê<sup>13</sup> mýjja djãnhbê kaneramê me krã ngrãnh djãmê kikre kudjý djãmê me kudjý djãbê miramê me kudjý djã 'õmê uba kangômê atemã röny kangô 'õmê atemã djwý djôm 'õmê djwýbê trigumê me õ kritbê mrytimê mrykĩ'ãtomtimê kawarumê pïo kãmranhtýxmê me memã àpênh kajgo ar ba, me kute meo pãnh ne amim me pa 'amýnh nhym me memã àpênh kajgo ar bajamê. Nã, mebhêngôkredjwý.

Ja kunĩ ne Babirônij tĩnri amim amýn pãnh memã pi'ók kaprĩ ngã nhym kam ajbir kêt ne. Mýj me'õ godja amim amýn kam pãnh mekmã pi'ók kaprĩre ngã. Arkati.

<sup>14</sup> Nhym me kute nêkrêxo ba djwýnh Babirônijmã kum,

—Be, apýnh me amã mýjja mex kĩnhja ne arým me abê kêtukumrêx. Me anhô nêkrêxmê me akunhêr kunĩ ne arým tu biknorkumrêx. Dja ga ajte omũnh kêtukumrêx, ane. Nãm ã me kute nêkrêxo ba djwýnh kum ane.

<sup>15</sup> Ne nĩjar djan omũnho kumex. Krĩrax kaprĩmê tokry pymaje nĩjar djan omũnho kumex. Kukwakam õ nêkrêx rax ne mekbê kêt nhym me kam o aman kam abej àmrao kumex ne kam kaprĩ:ren abenmã kum,

<sup>16</sup> —Watĩre, Babirônij, krĩrax jabatãnh, watĩre. Tãm ne arým kêtukumrêx.

Nãm ipêxri kubêkà mexbit jangij ne o mrã. Kubêkà jakamê kakrãtykmê kamrêkmê. Nãm kunhêr pãnh raxobit amikunhêr, kên karýrmê kên jadjênhmê angà krã kute ngàp jadjênh pyrãkmê. Ý, tãm ne arým kêt ne.

<sup>17</sup> Nêkrêxja ne arým pyka mē amrã. Amikrã kêt ne arým pyka mē amrã. Kãxdjãkênh ipók pydjìkam, ane.

Nãm ã me kute nêkrêxo ba djwýnh kaprĩkam abenmã ane.

Nhym kam me ngô raxkam kãkam ar bajadjwý kaprĩ. Me kute ngô raxbê pyka kêt kam kã raxo ba djwýnhmê me kãtãm kãkam ar bajamê me kute kão ba djwýnh nhô àpênhmê me kute ngôkôt nêkrêxo bajamê. Me ja kunĩ ne me kaprĩn nĩjar kumex ne àmrao kumex.

<sup>18</sup> Krĩrax pók ne kũm tyk pymaje ne me nĩjar omũnho kumex, abej àmrao kumex ne kãj bê abenmã kum,

—Krĩrax jabatãnhja pydjii. Nhýnh ne 'õmê kute aben pyrãk? ane. Nãm ã me kã raxkam ar baja abenmã ane. <sup>19</sup> Ne kam kaprĩkam pykao amikrã kaprêprêk ne krĩrax jabej amran kam kaprĩ:re ne kum,

—Watĩre, Babirônij, krĩrax jabatãnh, watĩre.

Akukwakam ne ba me ikunĩ inhô nêkrêx rũnh ne. Nã bãm me kãkam awýr mýjjao iban o bõx ga pãnh me imã mýjja ngã. Ba me ikunĩ akukwakam inhô nêkrêx rũnh ne. Ga tebê arým pyka mē amrã. Jakam dja ba me arĩk ar iba, ane.

Nãm ã me ngô raxbê pyka kêt kam kã raxkam ar baja krĩraxo aman ã kum ane. Nhym kam atemã me'õ kabên.

<sup>20</sup> —Be, kãjkwa, on akĩnh. Arým ne Metĩndjwýnh o ajkê.

Me gadjwý, Metíndjwýnh nhô me gamê Jeju kute me anorjamê Metíndjwýnh kabên jarênh djwýnhmê on me akînh. Metíndjwýnh arým me apânh Babirônijo ajkê. Kam dja ga me tu akînhkumrêx.

<sup>21</sup> Nhyam kam kadjy mrânh djwýnh týxkumrêx 'ô kên by. Kên rax, kên jabatânh. O ne mekbê idjaer bày ngân ôm ne. Tãm ne kumýn o ngô rax kôpênât ne. Ne mekmã kum,

—Dja ã Metíndjwýnh krîrax jabatânhbê Babirônijo bikênhho ane, kôpênâto bê o ane. Gêdja tu biknorkumrêx ne ajte kator kêtumrêx.

<sup>22</sup> Godja ajte me'ô me akam ngrer kêtumrêx. Atemã pîjãbàremê pomê ngônho potimê. Ja kunîkam ngrer dja ajte me akam kator kêtumrêx. Nhýnh ne me'ô môn ajte me akam ngrero dja? Arkati.

Nhyam me apýnh ê mex djâri 'ô ajte me akam kator kêtumrêx. Nhýnh ne me ê mex 'ô me akam dja? Arkati.

Nhyam me ni'ô me akam djwý ka'uko ýr kêtumrêx. Nhýnh ne me ni'ô djwý ka'uko nhý got ga me aje marmã?

<sup>23</sup> Nhyam ngônhpôkdjwý me akurwý kêtumrêx. Nhýnh ne me akam ngôn pôk 'ô godja me akurwý?

Ne me keketdjwý mar kêt ne. Nhýnh ne me'ô ajbir abenwýr môr ny got kînhkumrêx ne kute abenmã kabên ne keketmã? Arým kêtumrêx.

Me akam me kute nêkrêxo ba djwýnh ne pyka kunîkôt me kurãm ô nêkrêx rûnh ne.

Ga arým apýnh me ba djâri me kunî noo akuno. Nã gãm adjukane me noo akuno nhyam arým pânň Metíndjwýnh príne ajo ajkê, ane.

Nãm ã kadjy mrânh djwýnh ane.

<sup>24</sup> Be, Babirônij ne Metíndjwýnh kabên jarênh djwýnhmê Metíndjwýnh nhô me mexja par ar o ba. Babirônij kabênkôt ne me pyka kunîkôt me par ar o ba. Kam ne Metíndjwýnh meo ngryk ne me pânň príne Babirônijo ajkên pyka mê o amrà.

## 19

*Me kute Metíndjwýnhmã mex jarênh.*

<sup>1</sup> Nhyam kam mýjja kute me krãptî kanga pyrãk ba kuma. Kàjkwakam ne me krãptî kabên ne, ne,

—On me Metíndjwýnhmã mex jarê. Me banhô Metíndjwýnh, ajbit ne kubê me bapýtãr djwýnh, gu me kam abenmã mex jarênh abenmã bënjadjwýr rax jarê.

<sup>2</sup> Ta ne kabên pýnh ne katât memã axwe pânň jarê. Mrãmri ne arým kum pânň jarê. Me'ô kuprý kurêtijã, tãmja pydji ne rax ne pyka kunîkôt me'ã axwe rê nhyam me kôt axwen arîk ar ba, tãm. Kumã ne Metíndjwýnh pânň jarê.

Arým ne kam ngryk ne o ajkê. Nãm ô àpênhho ngryk ne kam me pânň o ajkê, kute ô àpênh par ne kamrô kapînkam ngryk ne kam me pânň me'ô kuprý kurêtijao ajkê. Mrãmri, ane.

Nãm ã kàjkwakam me krãptî ane.

<sup>3</sup> Ne kam ajte kãj bê kabên ne, —On me Metíndjwýnhmã mex jarê. Krîrax jabatânhbê Babirônij ne mã pôr ne kûm tyk rã'ã rã'ã. Átyk kêtumrêx, ane.

Nãm ã kàjkwakam me krãptî ane.

<sup>4</sup> Nhyam kam mebêngêtbê 24mê mýjja tîn amãnhkrut ne amãnhkrut ne tu mýrbê rôrôk ne Metíndjwýnhmã rax jarê. Metíndjwýnh krî djâtikam ýrjamã rax jarênh kum, —Mrãmri godja ga ã o ane, ane.

Ne kam ajte abenmã kum,

—Gu me on Metĩndjwýnhmã rax jarë, ane.

<sup>5</sup> Nhyam kam krĩ djãti kurũm me'õ kabën ne,

—Ë, me akunĩ, me abê Metĩndjwýnh nhõ ãpênh, me amã umaja, me abênjadjwýrmë me akatãmmë me akunĩ on me me banhõ Metĩndjwýnhmã mex jarë, ane.

<sup>6</sup> Nhyam kam mýjja kute me krãptĩ kangao kumex pyrãk ba kuma. Kute ngõ rãrãk pyrãk, kute na krikrit tỳx pyrãk. Nhyam me krãptĩja kabën ne,

—On me Metĩndjwýnhmã mex jarë. Bênjadjwýr djwýnh me banhõ Metĩndjwýnh tỳxo kubê kumkati, ta ne bênjadjwýr rax ne mrãmri ar meo bakumrëx, kumã dja ga me mex jarë, ane.

<sup>7</sup> Ë, gu me on bakĩnhkumrëx. Me kute abenã ar mênh kadjy bakĩnhkumrëx. Gu me abenmã raxmë mex jarë. Arým ne õ akati ýr bõx. Arým ne me kute Mrykĩ'ãtomti jabatãnh nymë prõmë abenã ar mênhmã, kam dja gu me bakĩnhkumrëx.

Arým ne nija amimex ne. <sup>8</sup> Arým ne kadjy kum kubëkã ngã nhyam arým adjã. Kubëkã mexkumrëx, kubëkã jadjênh, kubëkã ajmã kute kêtumrëx, ane.

Nãm ã me krãptĩ memã ane. Nãm Metĩndjwýnh kute õ me mexjamã axwe kêt jarênh nhyam me katãt mrãnh'ã kubëkã mex jakre ne ta õ me ja'ã prõ jakre.

<sup>9</sup> Nhyam kam kadjy mrãnh djwýnh imã,

—On 'ã pi'õk no'õk. Arým ne me kute Mrykĩ'ãtomti jabatãnh nymë prõmë abenã ar mênhmã, nhyam me arým kute kadjy djwý djãrmã. Arým kadjy mry kumex

ne. Nhyam arým memã kabën. Me Mrykĩ'ãtomti jabatãnh nymë ro'ã õ kwý krën rax kadjy memã kabën ne. Me ajbit dja me kĩnhkumrëx. Me Mrykĩ'ãtomti jabatãnh nykõt õ kwý krënja, me ajbit dja me kĩnhkumrëx. On 'ã pi'õk no'õk, ane. Nãm ã kadjy mrãnh djwýnh imã ane. Ne kam ajte imã,

—Ë, mrãmri ne Metĩndjwýnh arým kabën pydjın arë, ane.

<sup>10</sup> Ba kuman kam kabem itu mýrbê tým ne bit ije kum rax jarênhmã, bit ije kadjy mrãnh djwýnhmã rax jarênhmã nhyam imã,

—Kati, kwãrĩk wãnh. Badjwý ne ba Metĩndjwýnhmã idjãpênh, akamymë ar akõt Metĩndjwýnhmã idjãpênh. Akamymë ar atýxkumrëx me aje mekmã Jeju'ã adjujarênhjakõt ne ba kum idjãpênh. Badjwý ne ba ar akõt kum apë. Kam dja ga Metĩndjwýnhmãbit rax jarë, ane.

Be, me akajmãtã ne Metĩndjwýnh kabën jarênh djwýnh ô'ã memã Jekubit'ã ujarênh ar ba. Ga me kam gadjwý ijuk'ã Jekubit'ã adjujarênh ar aba. Kumãbit ne me kute rax jarênh ar õ bamã, ane. Nãm ã kadjy mrãnh djwýnh imã ane.

*Me'õ kawaru jaka'ã ýr.*

<sup>11</sup> Nhyam kam kãjkwa ajkij nhyam kawaru jakaja dja. Nhyam me'õ 'ã nhỹ. Me'õ nhidjibê Kabênkumrëx, ne ajte idji 'õbê Katãt kabën ne 'ã nhỹ. Nãm katãt memã axwe pãnh jarên kõt me'ýr prõt ne. <sup>12</sup> No põt kute kuwy põt pyrãk ne kam bênjadjwýr rax krãdjê tu. Krãdjê krãptĩ ne kutu. Ne ta idji 'ã wajêt.

Nhyam me kute idjija pumũnh kêt, ajbit ne kute aminhidji pumũnh. <sup>13</sup> Ne õ kubëkã kute kamrõkam irja jadjã. Nhyam me kum idji jarë. Idjibê Metĩndjwýnh Kabën. Tãm ne me kum arë.

<sup>14</sup> Nhyam kãjkwakam Metĩndjwýnh nhõ krãkamngõnh krãptĩ kõt mõ. Ne kam kubëkã mexkumrëx,

kubêkà jaka, kubêkà ajmã kute kêt jangij ne 'ã mō. Kawaru jaka'ã ne me krîn kôt mō. <sup>15-16</sup> Nhyim Bēnjadjwýr jajkwa krekre kurūm kàxdjwa kajgo kato. Kàxdjwa kajgo djwa mexkumrêx ne kato. Nhyim kubêkà'ã idjin kjê'ã idji. Idjibê Bēnjadjwýr raxbê kumkatiti:.

Kute bēnjadjwýr raxo pykabê me bēnjadjwýrja kunī jakrenh mexi.

Kam ne kubê Bēnjadjwýr raxbê kumkatiti:.

Ne kam kàxdjwa kajgo djwa mexjao dja apýnh me ba djari meo ajkê. Meo ajkên kam ar meo ba, me kum àpênhmã dja kabêno me anor ar o ba. Kabêno me anon me axwemã bēn týx ar ba. Djãm kute akrânãm ar me axweo bamã? Kati, dja kàxo àbêr djào ar mekam ngryk ban mekam ngryk mex ne. Godja Metĩndjwýnh ngryk janênh djakam me kurê ne prĩne me anê nhyim me kamrô prôt ne. Djãm Metĩndjwýnh týxo kubê kumkati ngryk ngri got? Nãm ar meo ban ĩ mekam ngryk mex ne.

<sup>17-18</sup> Nhyim kam kadjy mrãnh djwýnh pydjĩn dja, ba omũ. Arngro týxkam ne dja. Ne kam kàj bê àkmã kabên ne. Àk kàjkwa tã tor ne mrãnhja kunĩmã kabên ne, ne kum,

—Me apa. Amrê me aben pydji. Arým ne Metĩndjwýnh me amã me anhō kwý krên djà rax ne o atom ne, me aje krên ne ajajnemã. Ê, bēnjadjwýr nhĩmê krākamngôn nhō bēnjadjwýr nhĩmê me àprãr nhĩmê kawaru nhĩmê 'ã krākamngôn krĩja nhĩmê me kute me pa 'amýnh nhyim me memã àpênh kajgo ar baja nhĩmê me kute memã o pãnh kadjy àpênhja nhĩmê me bēnjadjwýr nhĩmê me kâtãm nhĩmê me kunī nhĩ dja ga me krên ajajne, ane. Nãm ã kadjy mrãnh djwýnh àkmã kabên ane.

<sup>19</sup> Nhyim kam mry kute meo bajamê õ krākamngôn hmê me bēnjadjwýr rũnhmê arým akuprô.

Me kute Jeju kawaru jaka'ã ýrja 'ýr prôt mã ne me akuprô. Nhyim arým kutã Jejudjwý õ krākamngôn hreo akprô.

<sup>20</sup> Ne kam amijo aptàn ar pa 'amýn kuwyo imôtikam ar kumê. Nãm mrymê kabên jarênh djwýnh 'êxnhĩja ro'ã ar pa 'amýn aro tēn kuwyo imôtikam ar kumê. Kabên jarênh djwýnh 'êxnhĩja ta kute mýjja pumũnh kêt kwý nhípêx, kute mry djô'ã kabênkôt mýjja pumũnh kêt kwý nhípêx ne o kute me noo biknor. Nhýnh me ja ne me noo akuno? Bír, me'ã mry nhidji jarij ne kute mry karômã amijarênh ne kute kum rax jarênhja, me tãm ne kabên jarênh djwýnh 'êxnhĩja me noo akno. Kam ne Bēnjadjwýr Jeju mrymê kabên jarênh djwýnh 'êxnhĩja ar ro'ã ar pa 'amýn aro tēn kam kuwyo imôtikam ar kumê. Ar tĩn ne ar pa 'amýn aro tēn kuwyo imôtikam ar kumê. Kuwymê kēn ngrãngrã pôkkam ar kumê.

<sup>21</sup> Ne kam me kôt mōrja nhimex ne. Jeju kawaru'ã ýrja tãm ne ajkwa krekre kurūm kàxdjwa kajgo katorjao me imex ne. O ne pyka kunĩkôt me bēnjadjwýrmê ar õ krākamngôn ro'ã me imex ne. Me imex nhyim àk kunī me kwý krê:n meo ajne.

## 20

*Xatanaj djuwpre'ã amex kubê 1.000.*

<sup>1</sup> Nhyim kam kadjy mrãnh djwýnh 'õ kàjkwa kurūm tēn ruw ba omũ. Ikrakam ne kam o kajkep djà byn o tēn o ruw. Mýjkam o kajkep djà nã? Bír, kre ry typydjikam o kajkep djà ne kubyn o tēn o ruw. Kàxiràxtimê ne kubyn o ruw.

<sup>2</sup> Ne kam mry kaàkjao tým, kubê ne Kangã tũm, kute me kãmex jarênh djwýnh. Xatanaj tãm ne o tým ne kàxiràxtio uwpre. Djãm uwpre'ã amex pydji got. 'Ã amex krãptĩ. 'Ã amexbê 1.000. <sup>3</sup> Nãm tu kre ry typydjikam kumēn 'ã ijēn

kam o kajkep ne přine 'ã ijê djào amrà, mýjja kute tom pyràk o přine oy.

Be, Xatanaj kute ajte pyka kunìkôt me noo biknorbé ne kreka kumên 'ã ijê. Godja 'ã amexbé 1.000 apêx nhym kam ajte kadjy mrãnh djwýnh 'ã kutan kaba nhym ar ba ngrire. Tãm ne ja. Be, ba kam ajte mýjja 'ôdjwý pumũ.

<sup>4-5</sup> Be, me krì djàtidjwý ne kumex ba omũ. Nhym me kam krì. Metìndjwýnh ne arým me jamã kum,

—Me ga dja ga me memã axwe pãnh jarê, ane.

Me karôdjwý ne ba omũ. Mýj me karô nã? Bir, me kute memã Jeju'ã ujarênh ar ban Metìndjwýnh kabên'ã ujarênh ar ba nhym me kute me mut krãkàr nhym me tyk karô ne ba omũ. Me kute mrymê mry karô arkum rax jarênh kêt, kute aro Metìndjwýnh ne arkum amijarênh kêt nhym mry te kute me'ã aminhidji janhôr prãmjã, te kute me kuka'ã nãr me ikra'ã aminhidji janhôr prãmjã, nhym me kubê bikênh nhym kam me kute me par karô ne ba omũ. Me tãm dja me akubyn tìn ne kam Kritumê ro'ã ar meo ba. Ar meo ba'ã amex krãptì ne. 'Ã amexbé 1.000. Me tyk ne akubyn tìn kutewa ne ja. Nhym bep me kâtãm tykja, me tãm dja me'ã amexbé 1.000 nhym me akubyn tìn ne.

<sup>6</sup> Nhym bep me tyk ne akubyn tìn kutewaja dja me kìnkhkumrêx. Arým mexo me akrenh me:x ne. Dja me ajte ty? Arkati. Dja me ajte tyk kêtikumrêx, ne kam Metìndjwýnhmê Kritu arkum apê, mebê me kadjy Metìndjwýnh mar djwýnh ne arkum àpênh ba. Ne kam ar ro'ã ar meo ba. Ar meo ba'ã amex krãptì. 'Ã amexbé 1.000.

*Kute kuwo imôtikam Xatanaj mênh.*

<sup>7</sup> Nhym kam amexbé 1.000 apêx nhym kam kadjy mrãnh djwýnh

Xatanaj'ã kuta. Kubê ijêja'ã kutan me kadjy kaba. <sup>8</sup> Nhym arým kato, pyka kunìkôt ajte kute me noo biknormã kato. Dja kàjkwa kraxkam me jamê kàjkwa nhôtka me jamê aktã kàjkwa nhirê'ãnh me jamê mekbê Kokmê mekbê Makokmê me kunì 'ýr bôx ne memã kabên jarên me noo aknon meo akprô. Kute Metìndjwýnh nhô me ja'ýr prôt ne kute me par kadjy nãrà meo akprô nhym me kumex. Nãm me kute ngô rax mýrri pykati ngrã ja pyràk. Pykati ngrã tãm ne me o itun te kute abenã akremã nhym krãptì: anen amũ ajkamê nhym me te o ane. Nãm ã krãkamngônhre kumex o ane.

<sup>9</sup> Ne kam přine me kadjy pyka jaên kam me'ýr môn Metìndjwýnh nhô me mexjamã ipôk ne, krì mexmã ipôk ne. Metìndjwýnh kum krìrax kìnkhkumrêxja tãm ne me kum ipôk ne. Nhym kam kàjkwa kurùm kuwo ruw ne přine me kuga nhym me přine xêr.

<sup>10</sup> Nhym kam Metìndjwýnh bôm 'êxnhija mē, kute me noo biknor djwýnhja kuwo imôtikam kumê. Kuwymê kên ngrãngrã pôkkam kumê. Kam ne ôbé mrymê kabên jarênh djwýnh 'êxnhija mē. Ne kam ajbir kam Xatanaj mē. Kam ne Metìndjwýnh přine aro bikênh rax ne. Nhym ar tokry: ne àmnhirênh ar ba. Àmnhirênh ar ba rã'ã rã'ã. Àmnhirênh ar ba: nhym 'ã akamàt ne tãmka 'ã akati. Dja o ino rer kêtikumrêx ne.

*Metìndjwýnh kute me tykmã pãnh jarênh.*

<sup>11</sup> Nhym kam krì djàti jaka dja nhym kam me'ô nhý ba omũ. Nhym kam umaje pykamê kàjkwa prôt ne nhì'ãm tèn akuno. <sup>12</sup> Nhym kam me tyk kabem kumex. Me tyk kunì, me bènjadjwýrmê me kâtãmmê krì djàti kabem kumex. Nhym kam pi'ók no'ók'ã kurê.

Ne kam ajte pi'ók no'ók 'ôdjwý'ã kuta. Metîndjwýnh kute me tîn rã'ã rã'ã no'ókja pi'ók tãm ne 'ã kuta.

Nhym bep ate ne kute pi'ók no'ók kumrêx'ã rênhja. Pi'ók jakôt ne Metîndjwýnh memã axwe pãnh jarê. Me tînri axwe'ã pi'ók no'ók ja ne Metîndjwýnh 'ã kurên kam mekmã axwe pãnh jarênho nhÿ, me tykmã pãnh jarênho nhÿ.

<sup>13</sup> Nhym kam ngô raxbê pyka kêtjadjwý Metîndjwýnhmã me tyk kanga. Ngô kute me imexja tãm ne kum me kanga. Nhym apýnh mýjja kute me par djari Metîndjwýnhmã ajte me kanga. Nhym me tyk nhô pyka Metîndjwýnhmã ajte me kanga. Kum me kanga nhym me tyk kunĩ krĩ djati kabem kumex. Nhym mekmã pãnh jarênho nhÿ. Me tînri kute amijo bakôt ne memã pãnh jarênho nhÿ.

<sup>14-15</sup> Mekmã pãnh jarên pan kam ate apýnh mýjja kute me par djari mekam o pôx ne kuwyo imôtikam kurê ne ajte me tyk nhô pykadjwý kuwyo imôtikam kumê nhym arým me tyk nhô pykaja kêt ne. Nhym bep mýjja kute me parja gêdja ajte akubyn me par kêt kumrêx ne. Arým me tyk kêt. Mýjja kute me parja arým kêt.

Nhym me idji'ã no'ók kêtja, Metîndjwýnh kute me tîn ne ar ba rã'ã rã'ã kadjy idji'ã no'ók kêtja, me tãm ne Metîndjwýnh kuwyo imôtikam me kurê. Me tyk nhijukri tyk ne ja.

## 21

*Metîndjwýnh nhô Djeruxarê ny.*

<sup>1</sup> Nhym kam kâjkwamê pyka arým ny ba omũ. Nhym bep kâjkwa tũmmê pyka tũm ne arým nhĩ'ãm tẽn akuno. Nhym ngô raxbê pyka kêtjadjwý arým kêt.

<sup>2</sup> Nhym kam krĩrax mextire ruw ba omũ. Krĩraxbê Djeruxarê arým ny ne ruw. Kâjkwa kurũm ruw. Metîndjwýnh kurũm ne ruw ba

omũ. Djeruxarê arým mexkumrêx. Kute me mjên 'ÿr ba kadjy kute amimex pyrãk, me kute mjên kadjy amimex ne kute kubêkã mex jangjênh ne mrãnh nhym me kute abenã me rênh pyrãk.

<sup>3</sup> Nhym kam krĩ djati kurũm me'ô kabên. Kãj bê kabên ne memã kum, —Ë, arým ne Metîndjwýnh pykakam me ja'ÿr bôx ne kam mekam ar bamã. Dja mekam ar ba ne kam meo aminhòkumrêx ne.

Nã, Metîndjwýnh ta dja mekam djan <sup>4</sup> kam me kunĩmã no kangô kukôn mekmã o apêx.

Nhym kam me arým tyk kêt kumrêx ne.

Ne kaprĩ kêt kumrêx ne.

Ne mÿr kêt kumrêx ne.

Ne tokry kêt kumrêx ne. Mÿkam?

Mýjja kunĩ tũmja arým nhĩ'ãm tẽn ne biknorkam ne arým kêt ne, ane.

Nãm ã krĩ djati kurũm kabên ane.

<sup>5</sup> Nhym kam krĩ djatikam ÿrja ne kabên ne,

—Ë, arým ne ba mýjja kunĩo ny, ane.

Ne kam ajte,

—On 'ã pi'ók no'ók. Mrãmri ne kabênja. Djãm kabên kajgo? Arkati, kabênkumrêx, ane.

<sup>6</sup> Ne kam imã,

—Anũ. Arým ne ba o ino re.

Ba ibê mýjja kunĩ krax ne ajte ibê mýjja kunĩ 'ênhôt.

Ba ne ba adjakamã itũm ne kam ije mýjja nhipêxo itẽm ne ije inomã mênh, ba.

Djori me'ô kum kôr ba kum ngô ngã gê o ikô. Ngô tîn dja ba tu kum kajgo ngã gê o ikô. Mÿj ngô tîn nã? Bir, ngô kute meo tĩnja dja ba kum kungã.

<sup>7</sup> Me me kurãm tÿx ne kute ijãno ãm jamãbit dja ba mýjja mex kunĩ ngã ne kam tu meo ikrakumrêx nhym me imã, “Me inhô Metîndjwýnh”, ane.

<sup>8</sup> Nhy**m** bep me kute bit ijo am-  
inhômân kute amikam me  
kabên pymaje ikangaja,  
ne kam ajte me kute amim imar  
kêtja,  
me kute axweo amiptàrja,  
me kute me par prāmja,  
me prō prāmja, me mjên prāmja,  
me udjy,\*  
me kute mýjjao Metīndjwýnh karō  
nhipêx ne kute we kum ar  
amijarêno baja,  
me 'êxnhī kunī,  
me arīk ar ba kunī dja me iwýr bōx  
kêtkumrêx ne.  
Me ja kunī dja ba kuwo imôtikam  
me kurê. Kuwymê kên  
ngrāngrā pôkkam me kurê.  
Me tyk nhijukri ajte tyk ne  
ja.

<sup>9</sup> Nhy**m** kam kadjy mrānh djwýnh  
'ō kato ba omū. Kadjy mrānh  
djwýnhbê 7 ne apýnh mýjjao kute  
meo bikênh djari Metīndjwýnh  
ngryko ino rero ngônho ipu kute  
amýnh ne o ku'ê ja 'ō ne iwýr tēn  
imā,

—Apa, amrê tē ba on amā akre  
ga omū. Mrykī'átomti jabatānh ny  
prō dja ba amā akre. Me arým kute  
abenā ar mēnhja dja ba amā akre,  
ane. <sup>10</sup> Ā imā anen kam ikarōo  
tē. Krānh jabatānh, krānh prēkti'ýr  
ikarōo tēn ijo bōx.

Nhy**m** kam krīrax mextire ruw  
ba omū. Prō ne rwýkja. Krīraxbê  
Djeruxarē arým ruw. Kàjkwa  
kurūm, Metīndjwýnh kurūm ruw ba  
omū. <sup>11</sup> Nhy**m** aparmā adjēnh tē.  
Metīndjwýnh jadjēnh ne adjēnh ne.  
Ne kam karýr kute kēn pānh rax,  
kēn ngrāngrā jadjēnh týxja pyrāk.  
Ne ajte karý:r kute krytyrānh  
karýrja pyrāk. Nām ā krīrax jadjēnh  
anen ruw.

<sup>12</sup> Nhy**m** kikre bu'ā apýnh kēn  
djari aben nhiby adjwýro tē nhy**m** ā  
prēktire anen ā utī ane. Nhy**m** kam

ajkwa krekrebê 12. Nhy**m** kam  
apýnh ajkwa krekre djari kadjy  
mrānh djwýnh 'ā ku'ê. Nhy**m** ajkwa  
krekre'ā idji arij. Apýnh mekbê id-  
jaer nhingêt kukāmāre nhidji djari  
ajkwa krekre 'ā idji arij. Idjibê 12  
ne apýnh kre'ā arij.

<sup>13</sup> Nām kàjkwa krax 'ānh ajkwa  
krekre amānhkrut ne ikjêkêt. Ne  
kàjkwa nhôt'ānh ajkwa krekre  
amānhkrut ne ikjêkêt. Ne kàjkwa  
nhirê'ānh aktā ajkwa krekre  
amānhkrut ne ikjêkêt.

<sup>14</sup> Nhy**m** kikre bu'ā apýnh kēn  
djari aben nhiby adjwýro tēmja  
krakri ne kēnpotibê 12 ikwā.  
Kēnpoti'ā ne Mrykī'átomti jabatānh  
ny kute ar anorbê 12ja idji arij.

<sup>15</sup> Nhy**m** kadjy mrānh djwýnh  
kute imā kabēnja àbêr djā byn o  
dja. Kēn karýro àbêr djā. O kute  
krīrax'ā akremā. Kute krīraxmē  
ajkwa krekremē bu'ā apýnh kēn  
djari aben nhiby adjwýro tēmjamē  
kute 'ā akremā.

<sup>16</sup> Nhy**m** krīrax pomē rymē kute  
aben pyrāk. Nhy**m** pokôt 'ā akren  
anhākôt 'ā akren prēkkôt 'ā akre.  
Nhy**m** kunī'ā akre kute aben pyrāk.  
Ne 'ō aben japanh kêtkumrêx. Àbêr  
djào ne 'ā akreo tē. 'Ā akrebê 2.200  
kirometu.

<sup>17</sup> Nām kikre'ā akren kam atāri  
kikre bu'ā kēnja'ā akre. Prék'ā  
akrebê 64 metu. Me baje mýjja  
'ā akrekôt ne kadjy mrānh djwýnh  
kikremē kikre bu'ā kēnjamē 'ā akre.

<sup>18</sup> Nhy**m** bu'ā kēnja ne ngrāngrā  
kute bōre ngrāngrā pyrāk o ne ipêx  
ne. Nhy**m** bep krīraxja ne kryt  
karýro ipêx ne. Kryt karýrobit,  
atemā mýjja 'ōmē o bikār kêt. Nhy**m**  
krytja karý:r kute ixē jadjēnh pyrāk.

<sup>19-20</sup> Nhy**m** kam kikre bu'ā kēnja  
krakri kēnpotikam apýnh kēn djari  
kumex. Kēn pānh raxbit. Kikre  
bu'ā kēnja kīnh kadjy.

\* **21:8** Me kute apýnh mýjja mar, namē mry kaàkmē me karōmē, me tām ne me amijo wajangao  
ba. Nhy**m** me karō punu ne me kute me jakôt me noo biknor prāmikumrêx. 'Ā dja gar, A Tex 2,9,  
Apôx 13.13, Karō 8.9-24, 13.6-12, 19.13-19 jarē.

Kën kutewa ne ngrãngrã kute  
bõre ngrãngrã ja pyrãk.  
Ne atãri ja ngrãngrã tÿx kute  
kwënh ngrãngrã ngwÿnh  
ja pyrãk.  
Ne atãri ja kãjbê rãrãr kamrêk  
kute kôkanê ngwÿnh rãrãr  
kamrêk ja pyrãk.  
Ne atãri ja ngrãngrã kute krwÿnh  
ngwÿnh ngrãngrã ja pyrãk.  
Ne atãri ja kajngãr kute ngãnh  
nhy kajngãr ja pyrãk.  
Ne atãri ja kamrêk kute tyrti tekã  
kamrêkti, tekã kamrêk ja  
pyrãk.  
Ne atãri ja kãjbê rãrãr kute  
mutêkre ngwÿnh rãrãr ja  
pyrãk.  
Ne atãri ja kãjbê ngrãngrã kute  
kôtkaak ngwÿnh kãjbê  
ngrãngrã ja pyrãk.  
Ne atãri ja ngrãngrã kute bãy'yre  
ngrãngrã ja pyrãk.  
Ne atãri ja kãjbê ngrãngrã kute  
krãkamkãxte ngwÿnh kãjbê  
ngrãngrã ja pyrãk.  
Ne atãri ja ngrãngrã tÿx kute  
atorti ngrekã ngrãngrã ja  
pyrãk.  
Nhyr bep kute katê ja ne rãrãr  
kute kënnetojre ngwÿnh  
rãrãr ja pyrãk.

Be, kikre bu'ã kën krakri apÿnh  
kënpoti djãri ne ja.

<sup>21</sup> Nhyr bep kikre bu'ã kënja  
ajkwa krekrebê 12ja ne angã krã.  
Angã krãti:, angã krãtio ne kikre  
bu'ã kënja ajkwa krekre kunïo 'ã  
ijê djã, tãm ne kute ngãp jadjënh  
pyrãk. Apÿnh ajkwa krekre djãri ne  
kadjy angã krã'ã akren o ipêx ne,  
angã krã pÿnho. Be, kikre bu'ã kën  
ajkwa krekre ne ja.

Nhyr bep krãkam pryjadjwÿ kryt  
karÿro pry. Kryt karÿrobit, atemã  
mÿjja 'õmê o bikãr kêt. Karÿ:r ka-  
jgon kam apôkmã rît, kute ngõnh  
karÿr apôkmã rît ja pyrãk.

<sup>22</sup> Djãm krãrãx jakam Metÿndjwÿnh  
nhõ kikreti? Kati, arÿm ne bõx

ne me bakam ar mrã. Bënjadjwÿr  
Metÿndjwÿnh tÿxo kubê kumkatimê  
krabê Mrykĩ'ãtomti jabatãnh nyja  
ar tãm ne arÿm ar bõx ne me bakam  
ar mrã. Arÿm ne ar ro'ã me bawÿr  
ruw ne me bakam ar mrã. Djãm  
me kute kum kabën kadjy ne mete  
kum kikremã? Kati, arÿm ne ar bõx  
ne me bakam ar mrã. Mÿj kadjy dja  
me kum kikre? Djãm kãjkwakam ar  
ba rã'ã ne mete kum kikren kam  
kum kabën mã?

<sup>23</sup> Djori kam mytmê my-  
tyrwÿ kute me kurwÿmã? Kati,  
Metÿndjwÿnh ta adjënh dja me  
kurwÿ. Krabê Mrykĩ'ãtomti ja-  
batãnh ny jadjwÿbê ne me kurwÿ  
djwÿnh. <sup>24</sup> Be, ar irã jakam godja  
apÿnh me ba djãri kunï kam  
mrã, mrãnh mextire. Nhyr pyka  
kunïkôt bënjadjwÿr krãrãxmã õ mÿjja  
mex kunïo wangijn o krãrãx kÿnh ne.

<sup>25</sup> Nhyr krã bu'ã kën jãkwa  
krekredjwÿ 'ã ijê kêt kumrêx  
ne. Djãm akamãt kadjy dja me  
ajkwa krekre'ã ijê? Kati, akamãt  
kêt kumrêx, a'u ry typydji. Kam  
godja ajkwa krekre'ã ijê kêt kumrêx  
ne. <sup>26</sup> Nhyr apÿnh me ba djãrikam  
me ja õ mÿjja mexo wangijn o krãrãx  
kÿnh ne. Nhyr me rÿnh krãrãxmã  
wangij nhyr krãrãx õ'ã kÿnh kumrêx  
ne.

<sup>27</sup> Nhyr bep mÿjja punu 'õ dja  
kum ãr kêt kumrêx ne. Me pijãm  
kêtmê me 'ëxnhimê me ja 'õ dja  
kum ãr kêt kumrêx ne. Nhyr bep  
Mrykĩ'ãtomti jabatãnh ny kute õ  
pi'õk no'õkkam me tÿn rã'ã rã'ã'ã idji  
jãnhõrjabit dja me kum wangij.

## 22

*Ngõ kute meo tÿn.*

<sup>1</sup> Nhyr kam kadjy mrãnh djwÿnh  
imã ngõ kute meo tÿn pakrãx jakre.  
Ngõ kute meo tÿn ne prõto nõ ba  
omü. Metÿndjwÿnhmê Mrykĩ'ãtomti  
jabatãnh nyre ar krã djãti kurÿm  
ne prõto nõ. Karÿ:r kumrêx. Karÿr  
kute krytyrãnh pyrãk. <sup>2</sup> Nãm pry  
nhõkre djãkôt prõto nõ. Krãrãxkam



pry nhôkre djâkôt prôto nô nhym aktâ nokâ'â pidjô kute meo tînja dja.

Pidjô bari amânhrut ne mytyrwý kunî kôt aben pânĥ ô kadjy aktâ ngô nhijên o dja. Aktâ ne ngô jakâ'â ngô nhijên o dja. Be, pidjô ja ne ar mytyrwý kunîkôt ôo kute aben japanho âm kadjy dja. Nâm apýnh mytyrwý djari'â pidjô jakren o 12. Mytyrwý kunî kôt ôn bikaprâr kêtumrêx kadjy 'â akre. Nhym bep pidjô 'ôja ne kubê me umar mex djâ, pyka kunî kôt kute meo mex nhym me umar mex ne kanê kêtma.

<sup>3</sup> Djâm krî jakam mýjja kute meo bikênhmâ? Kati, krî ja gédja tu kam me mex ryti pydji. Nhym mýjja kute meo bikênĥ dja 'ýr àr kêtumrêx. Metîndjwýnhmê Mrykî'âtomtî jabatânh ny dja kam ar meo ban meo djuw mex o ba. Nhym ô âpênhdjwý kum âpênĥ mexkumrêx ne. <sup>4</sup> Ne kam Metîndjwýnh nokre pumû nhym kam me kuka'â Metîndjwýnh aminhidji janĥo nhym me 'â ar ba.

<sup>5</sup> Nhym kam kam akamât kêtumrêx ne. Nhym kam ngônĥpôkti kêtumrêx ne. Nhym arngro kêtumrêx ne. Mýj kadjy dja ngônĥpôktimê arngromê? Bênjadjwýrbê Metîndjwýnh dja me kurwý. Nhym Metîndjwýnh nhô me ja dja ar meo ba râ'â: ar meo ba.

<sup>6</sup> Nhym kam kadjy mrânĥ djwýnh imâ,

—Ë, mrâmri ne kabênja. Djâm kabên kajgo? Arkati. Kabênkumrêx. Amrêbê Bênjadjwýrbê Metîndjwýnh ne me kute kabên jarênĥ djwýnhmâ ta Karô jano nhym me kam ô'â memâ kabêno amirît ne. Nhym kam ajbir jakam ta arým ajte kadjy mrânĥ djwýnh jano. Kute ô âpênhmâ mýjja kator 'ýr jao amirîtmâ ne ano. Kute mýjja kator kêtja anhýr djwýnhram mekmâ o amirît kadjy ne ano.

Arým kator 'ýr, ane. Nâm â kadjy mrânĥ djwýnh imâ ane.

*Jeju bôx 'ýr arê.*

<sup>7</sup> Nhym Jejudjwý arým me bamâ, —Ë, arým ne ba akubyn me awýr ibôx 'ýr, ane. Ë, me'ô kute prîne ikabênkôt amijo ba jabej dja kînhkumrêx. Metîndjwýnh kute anhýr djwýnhram memâ mýjjao kator'â ujarênĥ ga aje 'â pi'ók no'ók nhym me kute amim mar ne kôt amijo ba jabej, be, me tam dja me kînhkumrêx ne, ane.

Nâm â Jeju me bamâ ane.

<sup>8</sup> Ba, ba ibê Djuão ne ba arým prîne omû. Nâ bâm mýjja ja kunî pumûn kuma. Ne kam mýjja kunî pumûn mar pan kam kabem itu mýrbê tým. Kadjy mrânĥ djwýnh kute imâ mýjja 'â karô kabem itu mýrbê tým ne bit ije kum rax jarênhmâ. <sup>9</sup> Nhym kam imâ,

—Kati, kwârîk wânĥ. Badjwý ne ba Metîndjwýnhmâ idjâpênĥ, akamybê Metîndjwýnh kabên jarênĥ djwýnhmê ar akôt Metîndjwýnhmâ idjâpênĥ. Me akunî aje pi'ók no'ókkôt, ajbir aje Metîndjwýnh kabên'â pi'ók no'ók jakôt amijo abajamê ne gu me baro'â Metîndjwýnhmâ badjâpênĥ. Kam dja ga Metîndjwýnhmâbit rax jarê, ane. <sup>10</sup> Ne kam ajte imâ,

—Gora udjur kêt. Metîndjwýnh kute anhýr djwýnhram memâ mýjjao kator'â ujarênĥ ga aje 'â pi'ók no'ókja kwârîk wânĥ udjur kêt. Arým 'ýr. Mýjja ja kunî arým kator 'ýr. <sup>11</sup> Kwârîk wânĥ me axwe wânĥ axwe ar ba râ'â. Nhym me arîk ar badjwý tu wânĥ arîk ar ba râ'â. Kute amimarkôt arîk ar wânĥ ba. Gê me kute katât amijo badjwý katât amijo ba râ'â, katât amijo ba ry typydji. Nhym Metîndjwýnh nhô me mex jadjwý mex râ'â, mex ry typydji.

<sup>12</sup> Ë, arým ne Jeju me bamâ kabên jarê. Gora me kabên ma. Nâm,

—Ë, arým ne ba akubyn me awýr ibôx 'ýr. Dja ba bôx ne kam me amã pãnh jarê. Me aje amijo abakôt me amã pãnh jarê. Me ajaxwemê me amrãnh mexmê kôt me amã pãnh jarê. Ë, me ajaxwe dja ba me ajo ajkê nhym bep me mexmê gêdja ba me iro'ã ar iba. <sup>13</sup> Ba ibê mýjja kunĩ krax ne aje ibê mýjja kunĩ 'ênhôt. Ba ne ba adjakamã itũm ne kam ije mýjja nhipêxo itẽm ne ije inomã mẽn. Ba ren ije kãjkwamê pykamê omũnh 'ãno idjãm kêt nhym ren amrêbê amijo ajkê nhym ren mýjja kunĩ kêt ne, ane.

<sup>14</sup> Be, Metĩndjwýnh nhô me mexja, me axwe kêtja dja me kĩnhkumrêx ne. Me tãm dja me kute kubêkà'ã ngrã o pôxkam aka pyrãk. Dja me axwe kêt ã mextire ne ã kĩnh ane. Me jabit, Metĩndjwýnh nhô me mexja dja me pidjô kute meo tĩn ku ne krĩrax bu'ã kẽn jãkwa krekrekôt wangij ne kam Metĩndjwýnh nhô krĩraxkam ar ba.

<sup>15</sup> Nhym bep me kute ropre pyrãk ne arĩk ar bajamê me udjymê me prô prãmmê me mjẽn prãmmê me kute me par prãmmê me kute mýjjao Metĩndjwýnh karô nhipêx ne kute we kum amijarẽnho bajamê me 'êxnhĩmê me kabẽn krãptĩjamê, me tãm gêdja me kum ngjẽn kêtumrêx ne.

Nhym kam Jeju ajte me bamã,

<sup>16</sup> —Ba ibê Jeju ne ba me amã ikadjy mrãnh djwýnh jano. Kute apýnh me aje ikôt aben pydji djari me amã katãt mýjja ja jarẽnhmã. Ba ne ba ibê Dawi tãmdjwýkumrêx ne ãm djãkam dja. Ba ne ba Dawi nhipêx ne. Ba ne ba ije akati maktã umajýrtire pyrãk ne inhirãkumrêx, ane. Nãm ã Jeju me bamã ane.

<sup>17</sup> Nhym Metĩndjwýnh Karômê Mrykĩ'ãtomti jabatãnh ny prômê ar Jejumã kum,

—On amrê tê, ane. Jeju nhô me jabê Mrykĩ'ãtomti prô ne kum,

—On amrê tê, ane.

Godja ga me Jeju'ã idjujarẽnha man kam gadjwý kum,

—On amrê tê, ane.

Nhym Jeju memã kum,

—Gê kam me'ô kum kôr jabej on amrê iwýr tẽn ngô tĩno ikô. Tu kajgoo ikô, pãnh kêt. Amã ngô kute meo tĩnja kĩnh jabej tu kajgoo ikô, ane. Nãm ã Jeju kabẽn ane.

<sup>18</sup> Ë, ibê Djuão ne ba ije me amã ikabẽn jarẽnhmã.

—Me apa, me ikabẽn ma. Gora me aje ja mar jabej, Metĩndjwýnh kute anhýr djwýnhram memã mýjjao kator'ã ujarẽn ba ije 'ã pi'ók no'ókja aje mar jabej gora me ikabẽn ma. Dja ga me ajô ijukri adjan atemã akabẽn 'ô jarẽn arým Metĩndjwýnh kabẽno ajkê nhym arým pãnh me ajôo ajkê. Apýnh ije meo bikẽn djari'ã pi'ók no'ók jao dja me ajôo ajkê. <sup>19</sup> Ba ibê Djuão ne ba aje ije me amã ikabẽn jarẽnhmã,

—Godja ba ije anhýr djwýnhram Metĩndjwýnh kute me amã mýjjao kator'ã pi'ók no'ók ja ga me ajô kabẽn 'ôo ajngrã nhym arým Metĩndjwýnh abê mýjja nê. Abê pidjô kute meo tĩnja nẽn abê ô krĩrax mextireja nê ne ije me amã mýjja mex jarẽn ne ije 'ã pi'ók no'ók ja tãm dja me ajôbê nê, ane.

Be, me ikabẽn ja ma. Ë, gêdja Jejudjwý me amã kabẽn jarê,

<sup>20</sup> —Ba ibê Jeju, ije katãt me amã mýjja kunĩ jarẽn ne ba me amã, “Mrãmri ne ba arým me awýr ibôx 'ýr”, ane.

Dja gu me,

—Nã, Bẽnjadjwýr Jeju, mrãmri. On amrê tê, ane.

<sup>21</sup> Gê me banhô Bẽnjadjwýr Jeju ukaprikôt prĩne me bajo djuw mex. Mrãmri. Tãm ne ja.